

ЎЗБЕК ТИЛИНИНГ ИЗОҲЛИ ЛУҒАТИ

учинчи жилд

Н – Тартибли

“ЎЗБЕКИСТОН МИЛЛИЙ ЭНЦИКЛОПЕДИЯСИ”

ДАВЛАТ ИЛМИЙ НАШРИЁТИ

Директор — Н.Тўхлиев.

Директорнинг биринчи ўринбосари — Д.А.Шораҳмедов.

Директор ўринбосарлари — М.Н.Аминов, А. Ниёзов.

Тил ва адабиёт илмий тахририяти — А. Мадвалиев (мудир), Ҳ. Абдиев, Р. Қиличев (етакчи илмий муҳаррирлар).

Ишлаб чиқариш, харитаграфия ва безак бўлими — И.Р.Ҳодиев (бошлиқ), А. Бурхонов (бош раҳбар), М. Олимов (етакчи техник муҳаррир), А. Ёқубжонов (етакчи илмий программист), Д. Ҳасанова (саҳифаловчи-оператор).

Луғат ҳозирги ўзбек адабий тилида кенг истеъмолда бўлган 80 мингдан ортиқ сўз ва сўз бирикмаларини, фан, техника, санъат ва маданият соҳаларига оид терминларни, бир неча шевада қўлланадиган сўзларни, баъзи тарихий ва эскирган атамаларни ўз ичига олади. Луғатда берилган сўзларнинг амалда қўлланиши XX аср ўзбек адабиёти ва матбуотидан олинган мисоллар билан далилланган. Луғат ўзбек тилшунослиги ва туркийшунослик бўйича мутахассислар, таржимонлар, оммавий ахборот воситалари ходимлари, олий таълим муассасаларининг ўқитувчилари ва талабалари, шунингдек, кенг ўқувчилар оммаси учун мўлжалланган.

ББК 81.2Ўзб-4

Ў $\frac{70105-071}{358-2007}$

ISBN 978-9943-07-051-6

© “Ўзбекистон миллий энциклопедияси”
Давлат илмий нашриёти, 2007.



НА I Нима? сўроқ олмошининг қисқарган шакли. *Сенга бунинг на кераги бор? ■ -Бу на деб турибди? — ноиб қамчиси билан Авазга ишора қилди. С. Сиёев, Ёруғлик.*

На чора қ. начора. -*Совға қилиб келса суюнмас, чиқариб сотса куюнмас эдим. На чора, қиморбознинг куни шу! — деди Ҳожи хола. М. Исмоилий, Фарғона т. о.*

НА II [ф. نه — йўқ, эмас] айр. боғл. Уюшиқ бўлақлар ёки уюшиқ гаплар бошида такрорланиб, уларни боғлайди ва бўлишли феъл билан инкор маъносини билдиради. *Ундан на хат бор, на хабар. ■ Йўқ, на қамоқхонасидан, на сурғунидан кўрқади Акмал! Гулчехрасиз ҳаёт керак эмас унга! Гулчехрадан айриладиган бўлса.. отиб юборсалар ҳам пинагини бузмайди. О. Ёкубов, Эр бошига иш тушса.*

НАБЗ [а. نىض — томир уриши] Қон томири уриши. *Хўш, энди менинг ёнимга келинг-чи, набзингизни кўрай. М. Осим, Карвон йўлларида.*

НАБИ [а. نبى — пайғамбар, илоҳий хабар келтирувчи] **1** дин. Худонинг хоҳишини бандаларига етказувчи; пайғамбар. *Набилар, расуллар, доҳийлар унда, Қабрлар, қасрлар тургандир қатор. А. Орипов, Юртим шамоли.*

2 Наби (эркаклар исми).

НАБИРА [ф. نېيره — набира; эвара; авлод] Ўғил ёки қизнинг фарзанди (бобога, бувига нисбатан). *Толибжонбойнинг беш ўғли, уч қизи бор экан. Икки ўғли уйланган, бир қизи эрга теккан, набиралари ҳам бор. Ойбек, Танланган асарлар.*

НАБИРАЛИ Набирага эга бўлган, наби-раси бор.

НАБОР [р. набор — (ҳарф) териш, терилган ҳарфлар] полигр. **1** Матнга мувофиқ терилган ҳарф ва белгилар йиғиндиси. *Наборни сочиб юборманг. Набор қилмоқ.*

2 Матнга мувофиқ ҳарф ва белгиларни териш. *Кўлёмани наборга бермоқ. Набор цехи.*

НАБОРШЧИК Босмахонада ҳарф терувчи ишчи.

НАБОТ I айн. новвот. *Сен борсанки, кенг воҳада ҳаёт бор, Демак, юртнинг лабида бол, набот бор. Э. Воҳидов, Шарқий қирғоқ.*

НАБОТ II [а. نبات — ўсимлик] Ўсимлик, кўкат. *Бу ясси қирғоқларда боболар ётур, Туғмадир ҳар ялпиз, ҳар шох, ҳар набот. Миртемир, Асарлар.*

НАБОТОТ [а. نباتات — ўсимликлар] **1** Ўсимликлар дунёси, ўсимликлар. *Хужайранинг топиллиши шуни исбот қилдики, наботот, ҳашарот ва ҳайвонот — ҳамма тирик жисмлар ўсиб, кўпайиб борувчи органик кичик бўлақлар — хужайралардан иборатдир. «Умумий биология».*

2 айн. ботаника.

НАБОТОТШУНОС [а. + ф. نباتاتشناس — ўсимликларни ўрганувчи; текширувчи] айн. ботаник.

НАВ [а. نوع — хил, тур, кўриниш] **1** Нарсаларнинг умумий белгилари билан бирлашувчи гуруҳи; тур, хил. *Меваларнинг кечпишар навлари. ■ Мардон Йўлчиевич ҳар куни тонг билан тоққа чиқиб, ёнғоқ навларини ўрганарди. Ж. Абдуллахонов, Орият.*

2 Молнинг, буюмнинг сифат, қиймат жиҳатдан хили, тури; сорти. *Бирон буюмни*

сифатсиз ишлаб, аъло навга ҳақ олиш ноинсофлик, виждонсизлик, тўғрироғи, ўғриликнинг бошқа бир тури-ку! Н. Сафаров, Оловли излар.

Бир нав(и) 1) яхши ҳам эмас, ёмон ҳам эмас, ўртамиёна. *Ер бир нав ҳайдалди, экин бир нав экилди, лекин шундоқ бўлса ҳам, ҳосил экинни ёзда қандоқ парвариш қилинишига ҳам боғлиқ бўлгани учун одамларнинг кўнгли тўқ эди.* А. Қаҳҳор, Кўшчинор чироқлари. *Она бир нави яшаб турганини, қудаси Жўрвой ака уч-тўрт келиб хабар олганини айтди.* Ҳ. Фулом, Машғал; 2) дуруст, тузук, яхши. *Мастура она келадиган меҳмонлар билан таниш бўлганда ҳам бир нави эди.* Р. Файзий, Шоҳи дарпарда.

НАВАРА с. т. Набира.

НАВБАТ [а. نوبت — қатор, кетма-кетлик]

1 Бирин-кетин содир бўладиган воқеа-ҳодисалар, бажариладиган ишлар тартиби; гал. *Тегирмон навбати билан.* Мақол. ■ *ЎзР Олий Мажлисининг навбатдан ташқари сессиялари.*

2 Қаторда ишғол этилган ўрин; гал. *Навбат олмоқ. Навбат кутмоқ. Эрга навбат — шерга навбат.* Мақол. ■ *Тўлават мўйлов Нигора томонга кўз қирини ташлаб, Шербекнинг қулоғига шивирлайди: — Энди, укам, Сувоннинг тўйидан кейин навбат сеники.* С. Анорбоев, Оқсой. *Равшан тушиликда шўрвага навбат олди. Шериклари тандирдан янги узилган сомсани столга уйиб.. Равшанни кутиб туришиди. «Ёшлик».*

3 Алмашилиб бажариладиган иш; навбатчилик, смена. *Ласточкин батальон штабида постда турарди. Навбати тугагач, ким биландир гаплашиб қолди.* И. Раҳим, Чин муҳаббат.

4 Маълум босқич; бажарилган ишнинг маълум қисми, бўлаги. *Урганч бройлер фермасининг биринчи навбатини фойдаланишга топшириш тўғрисидаги ҳужжат имзоланди. «Ёшлик».*

5 (“бу”, “шу”, “ҳар”, “бир” каби с. билан) Марта, гал. *Бир навбат.*

Биринчи навбатда айн. биринчи галда қ. биринчи 5.

НАВБАТДАГИ 1 Навбатда турган, биринчи навбатда қилиниши лозим бўлган; галдаги. *Навбатдаги масалалар. Навбатдаги вазифалар.* ■ *Навбатдаги чопиққа одам кетишидан уч кун бурун, кечки пайт иккита*

ҳамира келиб, алланимага қарши ҳаммага укол қилди. А. Қаҳҳор, Кўшчинор чироқлари.

2 Қаторда турган, қаторда маълум ўрин олган. *Навбатдаги одамлар.* ■ *Навбатдаги сўз ўртоқ Раҳматовга. Ўртоқ Ҳакимова тайёрлансин.* А. Қаҳҳор, Мунофиқ.

НАВБАТЛАШМОҚ Бирор ишни бошқалар билан навбатма-навбат, галма-гал бажармоқ. *Навбатлашиб ишламоқ. Навбатлашиб ашула айтишмоқ.* ■ *Йигит югуриб бориб, ўтовларнинг биридан қимиз олиб келди. Очил бува, Азимжон, шофёр навбатлашиб икки косадан шимирдилар.* А. Мухтор, Чинор.

НАВБАТМА-НАВБАТ рвш. Навбати билан, гали билан, навбатлашиб, галма-гал. *Китобни навбатма-навбат ўқимоқ.* ■ *Тўрт киши навбатма-навбат арра тортиб, кўприкнинг кўндалангига тўсин қилиб қўйилган йўғон ва қаттиқ ёғочини арралаётганда, қора терга ботиб кетишиди.* П. Қодиров, Юлдузли тунлар.

НАВБАТЧИ 1 Бирор ишни бошқалар билан навбатлашиб бажарувчи; ўз навбати келганда, шундай ишни бажарётган шахс. *Синф навбатчиси.* ■ *Улар ишини навбатчига топшириб келган тракторчилар билан иссиқ саломлашгач, Погодиннинг кичик кабинетига кирдилар.* Ш. Рашидов, Бўрондан кучли.

2 Постда турган соқчи; қоровул. *Тунлари ҳар ҳовли эшигида ўша ерда яшовчилардан навбатчилар тайинланади — бегона кирмасин.* Шуҳрат, Шинелли йиллар. *Коридорга кирганимизда, навбатчи аёл диванда мудраб ўтирган экан, бизни кўриб ҳайрон бўлди.* Ҳ. Усмонов, Сирли соҳил.

3 Маълум бир вазифани бажариш учун навбатда турган (восита, транспорт). *Суриштираман, навбатчи автобуслар ҳам аллақачон кетиб бўлган экан.* Ҳ. Умарбеков, Ёшлик кўчалари.

НАВБАТЧИЛИК 1 Навбатлашиб бажариладиган иш, навбатлашиб бажариш; навбатчи вазифаси. *Навбатчиликка ўтмоқ. Навбатчилик қилмоқ.* ■ *Шу кечасиёқ отани касалхонага олиб бориб ётқизишиди, учовлари унинг бошида ўтириб, навбатчилик қилишиди.* С. Анорбоев, Оқсой. *Умуман, Шоира навбатчилик қилмаган кун кам бўларди.* Ҳ. Ҳошимов, Нур борки, соя бор.

НАВБАҲОР [ф. نوبهار — эрта, илк баҳор] Эрта баҳор, илк баҳор, баҳорнинг

боши. *Навбахор очилди гуллар, Сабза бўлди боғлар.* Муқимий. *Ҳар навбахор бу кўкаламзорга ҳиротликлар от-аравада чиқиб, бирикки кун сайр этиб, ҳордиқ чиқариб қайтишарди.* Мирмуҳсин, Меъмор.

2 Навбахор (хотин-қизлар исми).

НАВЖУВОН [ф. نوجوان — жуда, анча ёш] 1 Ёш йигит; ўспирин. *Кексалик келиб эрди, дилда кўп эди армон, Яшнатиб, яшартиб сен, навжувон этиб келдинг.* Ҳабибий. *Кўча-кўй ола-қуроқ кийинган ва безовта бир қиёфада зир югуриб юрган навжувонлар билан тўлди.* С. Сиёев, Куёвсалом.

2 кўчма Янги, ёш. *Кўмлар ўртасида бир шаҳар кўрдим, Навжувон, сулув, соз, ярқироқ шаҳар.* Миртемир.

НАВЗАМБИЛЛО, наузубиллоҳ [а. نعوذبالله — худодан паноҳ сўраймиз; худо, ўзинг сақлагин] Худо сақласин. *Бу манзарадан ҳанг-манг бўлган Зоҳир шайх: -Ҳой, осий банда! Нега кетдинг?! Навзамбилло! Қариганда мени бир балога гирифторм этмасанг гўрғайди, — дея қичқирди С. Сиёев, Ёруғлик. Саидхўжа ака ёқасини ушлади: -Навзамбилло! Танканинг ойнаси бўлишини энди эшитиб турибман. С. Сиёев, Ёруғлик.*

НАВИГАЦИЯ [лот. navigatio — кемада сузиш; кемалар қатнови < navigo — кемада сузаман] 1 Кемалар қатнови; учиш аппаратларида учиш.

2 Маълум сув йўлларида маҳаллий об-ҳаво шароитларига кўра кема қатновлари мумкин бўлган вақт, мавсум.

3 Кемаларни, ҳаводан оғир учиш аппаратларини, космик кемаларни белгиланган йўлдан тўғри ва хавф-хатарсиз юргизиш усуллари ҳақидаги фан.

НАВИСАНДА [ф. نویسنده — ёзувчи] эск. кт. Ёзувчи, адиб.

НАВКАР [мўғ. нўхўр — дўст, ўртоқ; эр] 1 тар. Ҳарбий хизматкор, аскар. *Ҳусайн Бойқаро «Боғи Шимол» дарвозаси яқинидаги.. чодир ичиди икки-уч навкари билан ўтирарди.* М. Осим, Сехрли сўз. *Машина гув этиб, автомат ушлаган навкарлар ёнидан ўтиб, шаҳарга чиқиб кетди.* Мирмуҳсин, Чодрали аёл.

2 кўчма Хизматкор, ходим. *Раис дала беги эмас, дала навкари.* Ойбек, О. в. шабадалар.

НАВЛИ 1 Нави, сифати жиҳатидан юқори, сара. *Навли уруғлар.* ■ *Навли уруғликни мамлакатимизнинг бошқа районларидан олишга тўғри келмоқда.* Газетадан.

2 Бирор навга мансуб бўлган. *Паст навли папирос.* ■ *Биз ҳам юқори навли чигитдан эхсак борми, ўттиз-ўттиз беш центнер пахта нақд экан.* Р. Азизхўжаев, Яшил чайла.

НАВНИҲОЛ [ф. نونهال — ёш, янги дарахт, кўчат] 1 Янги ўтқазилган ёки униб чиққан кўчат; ёш дарахт. *Салимхон эса, экиб парвариш қилган навниҳолининг биринчи мевасини егандай завқланар эди.* А. Қаҳҳор, Сароб.

2 кўчма Янги туғилган, пайдо бўлган, ёш. *Ҳафиза билан Умид навниҳол муҳаббатнинг сирли оғушида маст ва мамнун юрардилар.* Мирмуҳсин, Умид.

3 кўчма Ёш йигит ёки қиз. *Нозик, навниҳол бўлсанг, толеимдан ўргилай.* Т. Тўла.

НАВО I [ф. نوا — куй, оҳанг; кўшиқ] 1 Куй, оҳанг; хониш. *Кумрининг тўйи: Безалган уйи, Найнинг навоси Қайта-қайтадан Чалиниб тинмай.* Ф. Фулом. *Шундан сўнгра сен қадаҳ ушлаб, Хумор кўз-ла боққил самога, Тингла қушининг эзгу орзусин, Қулоқ бергин майин навога.* Ҳ. Олимжон.

2 кўчма Маълум бир нарсанинг завқи. *Аваз ўрнидан қушдай енгил турди. Оппоқ бўлиб ёришган янги тонг ҳавосидан, безовта кўнглида туғилган янгича бир туйғулар навосидан жон-жаҳони яйради.* С. Сиёев, Аваз.

3 (Н — катта) Шашмақом тизимидаги иккинчи мақом номи (қ. **шашмақом**). *Дуторни созлаш учун реза куйлардангина олиб турган машшоқ, Отабек кутмаган жойда, “Наво”дан бошлаб юборган эди.* А. Қодирий, Ўтган кунлар.

4 кам қўлл. *Ғам-алам ифода этувчи аянчли овоз; нола. Кўзларида нозик бир ўт чақнади. У фахр ўтимиди, ё қаҳр ўти — билиб бўлмади. Лекин мағрур кишининг овози билан эмас, дилгур кишининг навоси билан жавоб қилди.* М. Исмоилий, Фарғона т. о.

НАВО II снт. Ярим ёй шаклидаги безак тури; шифт билан девор оралиғидаги қайрилма эгик безак. *Уста Ширин Муродовнинг ганчли ажойиб наволари кўпгина биноларни беади.* Газетадан.

НАВОБ [а. نواب — «ноиб» с. кўпл.] Бобурийлар салтанатида ва кейинчалик ундан ажралиб чиққан ҳинд вилоятларида вилоят ҳоқими унвони (18-асрнинг иккинчи ярмида инглизлар навобларни ўзларига бўйсундирганлар).

НАВОЗАНДА [ф. نوازنده — музикачи] *кт.* Куй ижро этувчи, наво қилувчи; созанда. *Баъзи ерларда созанда ва навозандалар миллий ашуладаги оҳанг, наво ва ашборлардан чалган ва куйлаганлари эшитила бошлади.* Ҳамза, Танланган асарлар.

НАВОЗИШ [ф. نوازش — эркалаш; хушмуомалалик] *кт.* Меҳрибонлик билан ёки лутфан қилинган муомала, мулозамат, лутф, марҳамат; эркалаш. *Азизбек одатдаги қаршилаш ёнига бир навозиш ҳам илова қилиб, ҳожига юқоридан жойи кўрсатди.* А. Қодирий, Утган кунлар. *Олдинда бораётган ёш каниз тўрдаги эшикни очиб, тезгина ичкарига кириб чиқди-да, яна бояғидай билинар-билинмас кулумсираб, навозиш билан бош эгди.* О. Ёқубов, Кўҳна дунё.

Навозиш кўрсатмоқ айн. навозиш қилмоқ
1. Бекларига навозишлар кўрсатиб, сўнгга ўз ниятини ўртага ташлади. Ойбек, Навоий. **Навозиш қилмоқ** **1)** меҳрибонлик билан ёки лутфан муомала қилмоқ, марҳамат қилмоқ; эркаламоқ; **2)** чалмоқ, куйламоқ.

НАВОЙИШУНОС Навоий ижодини ўрганувчи олим. *Навоийшунос олим Ҳ. Сулаймонов ташаббуси билан Алишер Навоий достонларига ишланган расмлар альбом шаклида эълон қилинди.* Газетадан.

НАВОЙИШУНОСЛИК Адабиётшуносликнинг Навоий ижодини ўрганувчи соҳаси.

НАВРАСИДА [ф. نورسيده — янги етиб келган; янги етилган; янги туғилган] Ёш, янги етилган. *Кетди бойга қарз ҳисобидан Уй ҳам, ер ҳам, ҳатто ўзим ҳам, Бу етмасмиш, ўлжага кетди Наврасида, дўндиқ қизим ҳам.* М. Шайхзода, Чорак аср девони.

НАВРАСТА [ф. نورسته — янги ўт-ўлан; ёш йигит-қиз] Янги, ёш, навқирон. *Ассалом алайкум, нуроний тарих, Навраста бугуним, бахт таманноси.* Ж. Жабборов, Кўёш юрти.

НАВРЎЗ I [ф. نوروز — янги кун] **1** Шамсия йил ҳисобида янги йилнинг биринчи куни (март ойининг 21-кунига тўғри келади). **2** Баҳор чоғи, баҳор. *Наврўз ёмғири.*

Наврўз байрами Эски сана ҳисобидаги янги йил ва баҳорнинг бошланиши муносабати билан ўтказиладиган байрам. **Наврўзи ажам** Ўзбек мумтоз куйларидан бирининг номи.

3 Наврўз (эркаклар исми).

НАВРЎЗ II Кечпишар ўрик нави.

НАВРЎЗГУЛ *бот.* Наврўзгулдошлар оиласига мансуб кўп йиллик ўсимлик (халқ таботатида қайнатма ва дамлама дори сифатида қўлланади).

НАВРЎЗЛИК *тар.* Эски мактабда наврўз муносабати билан талабалардан тўпланадиган пул ва б. нарсалар.

НАВҚИРОН [ф. نو - янги + а. قران — бирикиш, қўшилиш; никоҳ] **1** Авжи кучқувватга тўлган, қирчиллама, ёш. *Наби ака мўйсафидни ичкарига таклиф қилди. Ҳовлининг бир чеккасида ўтирган икки навқирон йигит ҳам аста юриб келиб, мўйсафид билан сўрашди.* А. Раҳмат, Ҳаёт лавҳалари.

2 кўчма Ёш. *Сархуш бўлиб, мудрар бесадо Қирғоқдаги навқирон толлар.* Х. Даврон, Болаликнинг овози.

3 кўчма Тик қоматли, баланд. *Навқирон қоялар совуқ илжаярди. «Шарқ юлдузи».*

НАВҲА [а. نوحه — дод, фарёд; ўкириб йиғлаш] *эск. кт.* Йиғи; ўкириб, дод солиб йиғлаш. *Тулқининг тавбасидан қўрқ, муғамбирнинг навҳасидан.* Мақол.

НАҒАН [бельгиялик қуролсоз А. Наган (Nagant) номидан] Айланма барабани тўппонча. *Забардаст қомат, озгини зида қатъият, елкасидан қалин қайишни ошириб олган, ёнида наган, тиззасида узун сопли қилич.* Ш. Тошматов, Эрк қуши.

НАДИМ [а. نديم — бирга овқатланувчи, ҳамтовок; улфат] *кт.* **1** Яқин, сирдош дўст; ҳамсухбат.

2 *эск.* Шоҳ саройида: энг яқин хизматкор, маҳрам ва маслаҳатчи. *Маликул шаробнинг ўзи ҳам ёшлигида султоннинг суюкли надими бўлган.* О. Ёқубов, Кўҳна дунё.

3 Надим (эркаклар исми).

НАДИМА [а. نديمه] *кт.* **1** Яқин, сирдош дугона; ҳамсухбат аёл. *Демак.. унинг хотини маликани бутун канизаклари, надималари билан.. ўз уйига чорлайди.* Ойбек, Навоий.

2 Надима (хотин-қизлар исми).

НАДОМАТ [а. ندامت — афсус(ланиш), ўқиниш; армон] **1** Пушаймон, ўқинч; ўқиниш, афсусланиш, афсус. *Бермас кишига фойда сўнги надомат.* Ҳабибий. *Бу харобани кўриб, Қурбон отанинг кўз олдига Фармонқул ва ўшанга ўхшаган дунёга надомат билан келиб, заҳмат чекиб, ҳасрат билан ўтган кишилар келди.* А. Қаҳқор, Қўшчинон чироқлари.

2 с. т. Кимсани ёмонлаб айтилган, тарқатилган гап, маломат. Қизи туфайли эшитган надоматлари, онасининг муттасил мияга уриб турган тўқмоқдек гиди-бидилари жонини ҳалқумига келтириб қўйган эди. М. Исмоилий, Фарғона т. о.

Надомат тошини отмоқ Бировга маломат қилмоқ.

НАЖАС [а. نجس — ифлослик; нопоклик; ҳаром қилиш] 1 Ифлос, ҳаром нарса; ахлат. [Мулла Муҳсин:] Ҳовузни ифлос сувлардан, нажас нарсалардан эҳтиёт қилинса, ҳеч боки йўқ. А. Қодирий, Обид кетмон.

2 нафр. Разил, палид одам ҳақида.

НАЖДАК [туркий] Майда ва юпқа, донадор кристаллардан иборат тоғ жинси.

НАЖЖОР [а. نجار — дурадгор] эск. айн. дурадгор. Адибу хуш қалам, хаттоту рассом — Бари нозик табиат, соҳиб илҳом. Яна бир қанчаси нажжору наққош, Бўлолмас ҳеч ким ўз даврида тенгдош. Ҳабибий. Мен ўзим нажжорман, сантарошлик ҳам қиламан.. Айбга буюрмайсиз, ўғлим меъморликни ўргансин, отасидек сантарош бўлиб қолмасин, дедим. Мирмуҳсин, Меъмор.

НАЖЖОРБОШИ эск. Дурадгорлар бошлиғи, ишбоши. Энди Эгамберди нажжорбоши дурадгорларга бурунги нўписа ва эски тааддиси қилиб кўрсин-чи. «Муштум».

НАЖИБ [а. نجيب — асилзода, олижаноб; истеъдодли, оқил] эск. кт. 1 Ҳурматга сазовор, азиз, мўътабар, муҳтарам. Дунё гўзал, дунё нажибдир, қонимизда янграр бир наво. А. Шер, Роз.

2 Асилзодаларга, зодагонларга мансуб; зодагон, зоти тоза. Шунинг билан сизнинг нажиб оилангиз даҳшатли фожиа даврларини кечириб, энди масъуд кунлар арафасига етди. А. Қодирий, Ўтган кунлар.

3 Нажиб (эркаклар исми).

НАЖОСАТ [а. نجاست] айн. **нажас** 1. Сиз, нажосатга харис Исмоил хўжам, ғазабингиз авжига миниб, оллонинг беғуноҳ бандаларини ҳождатхонага ташлатдингиз. К. Яшин, Ҳамза.

НАЖОТ [а. نجات — қутулиш, халос бўлиш] 1 Халос бўлиш, қутулиш. *Нажот бермоқ. Нажот топмоқ. Нажотга чиқмоқ.* ■ Фарёд уриб йиғлади Шахло, Кўкни босиб кетди ноласи. Юм-юм йиғлаб, сочини юлди, Бўлмади ҳеч нажот чораси. Т. Тўла. Яратганнинг ўзи нажот берсин, оллоҳу акбар. Н. Сафаров, Шарқ тонги. Уста Фарфи давом

этиб деди: ..бир мактуб сабаби билан.. кутмаган жойда дор остида нажотга чиққанлар. А. Қодирий, Ўтган кунлар.

2 Қутулиш ёки қутқариш учун зарур ёрдам, кўмак. *Золимдан нажот куттиш беғойда, маҳол.* Файратий. Ўғлининг дарди билан чўккан Ойша хола нажот истаб, Ёқутбиканинг олдига борди. Ж. Шарипов, Хоразм.

НАЖОТКОР [а. + ф. نجاتكار — қутқарувчи, халос этувчи] Нажот берувчи, халос этувчи, қутулиш йўлини кўрсатувчи; қутқарувчи. *Уша гўзал қизча Бобурни ўз нажоткорини кутгандай кутади — буни ҳам Бобурга келиб айтувчилар бор.* П. Қодиров, Юлдузли тунлар. *Жасур нажоткорлар сафқаторида Ўзбек йигитининг номи ҳам кушод.* А. Орипов, Юртим шамоли.

НАЖОТСИЗ Қутулиш учун чораси, иложи бўлмаган, мушкул аҳволда қолган; ноилож. *Катер илгарилаб кетди. Бироқ Зумрад ўгирилиб, ҳамон бепоён денгиз қаврида қолиб кетаётган ёлғиз, нажотсиз қушчани анчагача кузатиб борди.* С. Сиёев, Отлиқ аёл. *Бошпанасиз, нажотсиз етим ўғил ва қизлар бировларнинг зулми ва исканжасига, хўрлашига ноилож чидар, яшамок учун бундан ўзга чоралари йўқ эди.* П. Турсун, Ўқитувчи.

НАЗАР [а. نظر — кўриш қобилияти, кўриш; нигоҳ] 1 Кўз қараши; нигоҳ. *Назар солмоқ. Назар ташламоқ.* ■ *Йигитнинг совуқ назари Мадаминхўжани шошириб қўйди.* М. Исмоилий, Фарғона т. о. *Йўловчи.. ёшларни бирма-бир назаридан ўтказаркан, атрофга аланглаб сўради: -Идораларингиз қаерда, йигитлар? П. Турсун, Ўқитувчи. Бизнинг ишимизга ҳам бир назар солсангиз-чи. П. Турсун, Ўқитувчи. Сидиқжон қипқизариб кетди ва Зуннунхўжага “гапирсангиз-чи!” деган мазмунда назар ташлади.* А. Қаҳҳор, Кўшчинор чироқлари. *Ўқитувчи лекциянинг ярмига келганда.. Йўлдошга эгилиб турган Ҳасанга назари тушди.* Ибохон, Улуғ кун.

Назар(и)га (ёки **назари**) илмайди Мен-симаиди, писанд қилмайди. *Мендай бир муштипар кампирни назарингизга илиб келибсиз, раҳмат.* С. Анорбоев, Оқсой. **Назарга олмоқ** ёки **назарда тутмоқ** Эътиборга олмоқ, ҳисобга олмоқ. *Уша вақтдаги турмуш, ўша шароитдаги болаликни назарга олганда, уни “кичик меҳнаткаш” дейиш*

мумкин эди. А. Қаҳҳор, Олтин юлдуз. **Назардан қолмоқ** Эътибори йўқолмоқ, хайрихоҳлик, яхши муносабатдан айрилмоқ.

2 (фақат эгаллик қўшимчаси билан) Воқеа, ҳодиса, кимса, нарса ва ш. к. ҳақидаги субъектив фикр, уларга бўлган қараш. *Назаримда, сиз янглишяпсиз.* ■ *Хўжайинлар назарида хизматкор — ярим одам.* Ойбек, Танланган асарлар. *Ишлар Элмуроднинг назарида кўнгилдагидек давом этаётганга ўхшар эди.* П. Турсун, Ўқитувчи.

Назари паст ёки паст назар қ. паст 10.
Нуқтаи назар 1) қарашлар системаси, воқеа ва ҳодисаларни англаш усули; концепция. *Масалага моддий манфаатдорлик нуқтаи назаридан ёндашмоқ;* 2) жиҳат, томон. *Иқлим нуқтаи назаридан Ўзбекистоннинг ўзига хос хусусиятлари бор.* =дан қатъи назар Бирор нарсага боғлиқ бўлмаган ҳолда.

3 Назар (эркаклар исми).

НАЗАРИЁТЧИ Илм-фаннинг бирор соҳасида назарий масалалар билан шуғулланувчи олим. *Дарвоқе, Навоий «Мезон ул-авзон» номли илмий асари билан аруз назариётчиси сифатида танилди.* «ЎТА».

НАЗАРИЙ [а. نظرى — кўришга оид; мушоҳадага асосланган, мавҳум; фикрий] **1** Назарияга оид, назария масалаларига боғлиқ бўлган, назарияга асосланган. *Назарий масала. Назарий хулоса. Назарий тадқиқотлар.* ■ -Бу назарий мулоҳазаларингизни майин жунли, зотли қўйлар урчитиб устидаги ишларимизга олиб келиб боғлаганингизда, ажабланмаган бўлардим, — деди Шербек. С. Анорбоев, Оқсой.

2 Бирор соҳанинг назарияси билан шуғулланадиган. *Назарий физика.*

НАЗАРИЯ [а. نظریه — таълимот; қоидалар мажмуи; умумлашма фикр] **1** Воқелик қонуниятлари ва ундаги муҳим алоқалар ҳақида бир бутун тасаввур берадиган билим шакли. *Назария ҳамма вақт амалиёт билан узвий боғлиқ бўлади ва шундагина у ҳаракат ва ривожланишнинг қуролига айланади.* «ЎЗМЭ».

2 Бирор фан соҳасини ёки унинг бирор қисмини ташкил этувчи асосий гоёлар, умумлашган қоидалар мажмуи. *Машина ва механизмлар назарияси. Ўрмончилик назарияси.*

3 Бирор соҳада ҳунар олиш, малака орттириш, маҳоратни ошириш йўлидаги

билим-қоидалар мажмуи. *Муסיқа назарияси. Шахмат назарияси. Самолётни бошқариш назарияси.*

4 Илм-фан, санъат ва б. соҳаларнинг мантиқий абстракт фикрлаш йўли билан ишлаб чиқилган асослари. *Назарияни амалий иш билан боғлаш.*

5 Воқеа, ҳодиса ва ш. к. ни тушуниш-тушунтиришнинг умумий принципларини асослаб берувчи илмий қонун-қоидалар мажмуи. *Дарвиннинг турларнинг келиб чиқиши ҳақидаги назарияси.*

6 Бирор нарсага, масалага бўлган умумий ва шахсий қараш, нуқтаи назар. *«Санъат санъат учун» деган беҳуда назария. Унинг ҳар бир масалада ўз назарияси бор.*

НАЗАРИЯЧИ айн. **назариётчи.** *Ҳаёт тақозо қилган ҳар бир ислоҳотни назариячилар билан бамаслаҳат амалга ошириш фойдадан холи эмас.* Ж. Абдуллахонов, Тўфон.

НАЗАРКАРДА [а. + ф. نظر کرده — сеҳр, афсун қилинган; худонинг паноҳидаги, худо сақлаган] Оллоҳнинг, улуғ кишиларнинг назари тушган, кўп илтифоту меҳрибонликларга сазовор бўлган. *Навоий биринчи бўлиб қаламга олган назаркарда шайхлар орасида Исҳоқ ота, Кўрқут ота, Бобо Хушкелди каби кўплаб мўътабар номлар бор.* П. Қодиров, Тил ва эл.

НАЗАРЛАНМОҚ Халқ ишонч-эътиқодига кўра, “кўз тегиб” оғримоқ ёки ёмон томонга ўзгармоқ. -*Сути камайиб кетганми, касалми, билмадим. Бувим “назарланган” дейдилар, — деди Мурод.* А. Мираҳмедов, Кулган чечаклар.

НАЗАР-НАФАС Халқ ишонч-эътиқодига кўра, “ёмон кўз”, назарлантирувчи кўз, қараш. *Бувим бўлса нуқул: -Хўш, хўш, жонивор, хўш, назар-нафас қурсин, кимнинг кўзи тега қолди сенга, — дер эдилар.* А. Мираҳмедов, Кулган чечаклар.

НАЗАР-НОГИРОН Кўзга ташланмайдиган, биров эътибор бермайдиган. *Етимча, назар-ногирон Муҳаммаджон оғизга тушиб, пешқадамлар қаторига кириб қолди.* Н. Сафаров, Танланган асарлар.

НАЗАР-ПИСАНД: **назар-писанд қилмаслик** Менсимаслик, назарга илмаслик, ўзини баланд тутиб, кимсага паст назар билан қараш. *Отасининг оstonасида юрган бир камбағал малай йигит уни назар-писанд*

қилмасин, унинг ялинишларини, ваъдаларини тингламасин! Ким у? Ойбек, Танланган асарлар. *Ўтганинда бир қайрилиб кулмайсан, Ёки бизни назар-писанд қилмайсан?* Т. Тўла.

НАЗД [ф. نزد — ёни, яқини, атрофи]: **наздида** кўм. (б. к. билан) эск. 1) олдида, қошида. Азизбекни қўлга тушириб бериш билан қипчоқлар наздида ҳам Юсуфбек ҳожининг қадр қиймати юқориланган эди. А. Қодирий, Ўтган кунлар; 2) назарида, хаёлида. *Ушанда бу қиз унинг наздида фариштадек бўлиб жонланган, хаёлида алланечук муқаддас бир из қолдирган эди.* Ў. Ҳошимов, Қалбингга қулоқ сол.

НАЗЗОРА [а. نظاره — қараш]: **наззора қилмоқ** (ёки **айламоқ**) эск. кт. Қарамоқ, назар, нигоҳ ташламоқ. *Кўз учида ул кун қилдинг наззора, Кўйингда мен йиллар кездим овора.* Ҳабибий. *Теваракка айлаб наззора, «Пиқ» этди-ю, кулди Ситора.* М. Али, Боқий дунё.

НАЗИРА [а. نظيره — ўхшаш нарса; ўхшатиш; нусха] **1** ад. Ўзидан олдин ўтган ёки замондош адиб асарига ўхшатиб ёки унга жавоб тариқасида ёзилган янги асар. *Шоир ғазалига ёзилган назира.* ■ *Одатда, у бир ғазал айтар, келаси анжуманда шоири замонлар мазкур ғазалга назира боғлар эдилар.* С. Сиёев, Ёруғлик.

2 Назира (хотин-қизлар исми).

НАЗЛА [а. نزهه — шамоллаш] **1** Кўз ёки бурун шиллиқ пардасининг ялиғланиши, тумов натижасида кўз ёки бурундан оқадиган шилимшиқ сариқ сув. *Ўрта Осиё халқлари назла ёхуд кўк сув деб ном берган кўз касаллиги бор.* Т. Қосимов, Кўзингизни эҳтиёт қилинг.

2 Кўз касаллигининг номи; глаукома. *Табиблар: «Сафро мияга урса — жинни, назла кўзга тушса — кўр қилади», дейишади.* Шукрулло, Жавоҳирлар сандиғи.

НАЗМ [а. نظم — тизиш, териш; шеър ёзиш; шеърлар] ад. Шеърый асар; шеърят, поэзия жанри. *[Абдишукур] Шоирлик истеъдодидан тамом маҳрум бўлишига қарамай, у “миллатни уйғотиш” учун вазни бузуқ, фикри саёз, рангсиз назмлар ёзди.* Ойбек, Танланган асарлар.

НАЗМБОЗЛИК Шеър ўйини, бўлар-бўлмас мавзуни назмга солиш. *Кейинги йилларда вужудга келаётган назмбозлик, айниқса, ижодкорларда улкан ўзгаришлар,*

кечаётган воқеаларга нисбатан лоқайдлик иллатлари пайдо бўлаётганлиги айтиб ўтилди. Газетадан.

НАЗМГҲҲЙ [а. + ф. نظمگوى — назм, шеър айтувчи] Шеър айтувчи. *Рўзибой Хивадаги созандаю хонанда, назмгҲҲй, котиб, қилқалам, халфаю талқинчиларнинг қаерда туришини, шу топда қаерда юрганини ипга тизиб ўтирадиган зийрак чойхоначи эди.* С. Сиёев, Ёруғлик.

НАЗМИЙ сфт. Шеърятга оид, назмда ёзилган. *Маълумки, халқ достончилигида насрий ҳамда назмий парчаларнинг аралаш келиши табиийдир.* «ЎТА».

НАЗОКАТ [а. نزاكت — хушмуомалалик, латифлик, нозиклик] **1** Кишининг юриш-туриши, ҳаракат ва қилиқларидаги нозиклик, латофат. *Қиз асилзодаларга хос бир назокат билан ўзини эркин тутиб кулимсираётган бўлса ҳам, кўзининг ҳаёдан ялтиллаб кетганини Мавлоно Фазлиддин пайқади.* П. Қодиров, Юлдузли тунлар. *Зебонинг ўзи салобати, кўркамлиги, назокати, латофати ва табассуми билан хаёлни чулғаб келарди.* Шухрат, Шинелли йиллар.

2 Муомаладаги нозиклик, одоб. *Мурод дарров туриб, ҳожи билан сўрашди ва назокат билан унга жой кўрсатди.* А. Қаҳҳор, Йиллар. *Майор қўзининг тирсагидан йигитлардек назокат билан ушлаб, Азамларнинг олдида олиб келди.* Шухрат, Жаннат қидирганлар.

3 Назокат (хотин-қизлар исми).

НАЗОКАТЛИ Юриш-туриши, ҳаракати ва муомаласи нозик, латиф ва ёқимли, назокати билан кишига ёқадиган; одобли. *Назокатли аёл. Назокатли бўлмоқ.* ■ *Уйда ёлғиз ўтирганида ҳам, ишда ҳам Гулхайрининг назокатли боқишлари, ҳароратли лаблари кўз олдидан нари кетмай, юрагига ўт туташади.* С. Нуоров, Нарвон. *Маҳалладаги қариялар ёшларни юксак маънавий покликка, назокатли бўлишга ўргатадилар.* Газетадан.

НАЗОРА айн. **назора.** *Жаноби домла кўчанинг у ён-бу ёнига назора айлаб, ичкарига суқулдилар.* Чустий, Пардаий асрор.

НАЗОРАТ [а. نظارت — бошқариш, идора қилиш; вазирлик; бошқарма] **1** Бирор ишнинг, нарсанинг аҳволи, бориши, кишининг юриш-туриши ва ш. к. устидан доимо кузатиш, текшириш. *Назоратдан четда қолган иш. Техника назорати. Назорат қилмоқ. Назорат остига олмоқ.* ■ *Куль-*

тивация қилиб жўяк оладиган универсаллар иши устидан алоҳида назорат ўрнатилди. Ш. Рашидов, Бўрондан кучли. Терговнинг боришини шахсан Халиловнинг ўзи назорат қилмоқчи. И. Раҳим, Ихлос. [Саид] Малоҳат билан судлашибди чоғи, ўзи ҳам милиция назоратида эмиш. А. Мухтор, Чинор.

2 эск. Шундай иш олиб борувчи муассаса, бўлим; инспекция. Сафаров авваллари Тафтиш назоратида нозир бўлиб ишлаганида ҳам, отпусқа олмас, ўз соғлиғини ўйламас эди. Ж. Шарипов, Хоразм.

3 эск. Комиссарлик, нозирлик, министрлик. [Обидийга] Маориф назоратидан каттагина бир вазифани беришди. А. Қаҳҳор, Кўшчинор чироқлари.

НАЗОРАТСИЗ Назорат остига олинмаган, назоратдан ташқари. Назоратсиз болалар. Назоратсиз қолмоқ.

НАЗОРАТЧИ Назорат идораларида ишловчи; назорат қилувчи; қараб, текшириб турувчи; нозир. Халқ назоратчилари. Темир йўл назоратчиси. ■ Назоратчиларимиз жамоатчилик топшириқлари билан бирга ўз иш-вазифаларини ҳам виждонан, ҳалол адо этиб, алоҳида ибрат кўрсатмоқдалар. Газетадан. Ичкаридаги ҳар бир парта рақамланган. Назоратчи қуръа ташлаш йўли билан абитуриентларни жойлаштиради. Газетадан.

НАЗР [а. نذر — тантанали ваъда; қасам-ёд; шу асосдаги қурбонлик, назр-ниёз] дин. 1 Савоб учун ёки бирор муддао билан худо йўлига аталган ёки берилган нарса. Бир мачит ҳовлисидаги қайрағоч тагида назрга қўй сўйилар эди. Улар шу ерда тўхташди. П. Турсун, Ўқитувчи. Толеим қурсин, деб ёндим, куйдим. Фолбинларга бордим, азиз-авлиёларга назр атадим. Ойбек, Танланган асарлар.

2 Азайимхон, домла ва ш.к. га ўқиб, дам солиб қўйганлиги ва б. амаллари учун бериладиган ҳақ, мол ёки пул. Сен ҳам.. ўша ҳиндини топасан ва назрини бериб, яхшилаб қайтариқ қилдирасан. А. Қодирий, Ўтган кунлар. -Назри нақдона бўлмаса, кўнглим ҳам жойига тушмайди, иш ҳам юришмайди, — деди Ҳожиги хола. М. Исмоилий, Фарғона т. о.

3 айн. хайр-садақа. Кўз оғриғи уни [де-вонани] чўчитмас учун наридан туриб, ёнчиғини кавлай берди: -Сизга.. назрим бор. А. Қодирий, Ўтган кунлар.

4 Савоб учун ёки маълум нарса эвазига ўзини-ўзи ёки фарзандини маълум шахсга, табаррук жойга бағишлаш. Ҳамма гап шундаки, Ёдгор ота Каромат, Адолат отлик икки қизини бирданига Нурматжоннинг отаси Тошхўжа эшонга назр қилган эди. А. Қаҳҳор, Асарлар. Кунги кеча мазорга бир маликаи зебо чехра назр этилди. Шу ожизани эртагаёқ ҳарамингизга ўзим келтириб топшираман. К. Яшин, Ҳамза. Қурбон отанинг йигитлик ҳаёти якуни шуки, «бу дунё бўлмади, энди охиратдан ҳам қуруқ қолмай», деб ўзини-ўзи Саидахмадхон деган эшонга назр қилган. А. Қаҳҳор, Асарлар.

НАЗР-НИЁЗ айн. хайр-садақа. «Ҳазрати султон» шайхларига назр-ниёзлари бекорга кетмаганига, қизининг бўйида бўлганига.. ишонди, кулумсиради. Ҳ. Фулом, Машғал. Зиёратга келганлар қовоқ солиб ўтирган авлиёга салом беришиб, унинг ёнига назр-ниёзларини қўйишди, эскигина сопол товоққа биттадан кумуш танга ташлашди.. Мирмуҳсин, Меъмор.

НАИНКИ [ф. نه اينکه — ..деб ҳам бўлмайди; аммо.. унчалик эмас] юкл. Шубҳа, ажабланиш, ишонмаслик каби маъноларни ифодалайди; наҳотки. Наинки фашист фақат душмангина бўлса, наинки унинг бутун қилиш-қилмишларини минг йиллардан бери одам боласига маълум бўлган “душман” калимаси ифода қила олса. А. Қаҳҳор, Олтин юлдуз.

2 Фақат саналган нарсаларгина эмас маъносига; бундан ташқари; нафақат. Умиданинг ўзига ором олиш қачон насиб бўларкин? У ўша франкуздан ҳам аянчроқ ҳис қилади ўзини. Наинки вужуди, бутун ҳаёти, руҳи қийноқда. А. Мухтор, Чинор. Жимжитлик, кимсасизлик, ярим ўлик табиат наинки инсон, жониворлар юрагига ҳам ваҳима соларди. Мирмуҳсин, Меъмор.

НАЙ [ф. ناي] 1 Узун, ичи тешик нарса, ингичка труба. Шиша най. Қамиш най.

2 Турли нарса, асбобларнинг шу шаклдаги қисми. Мулла чилимнинг найини лабига бир тегизгандан кейин уни Ҳайит амин томонига буриб.. бир жилмайди. С. Айний, Қуллар.

3 Олтита тешигини бармоқлар билан бекитиб-очиб, пуфлаб чалинадиган мусиқа асбоби; сибизга. Набигул келди. Унинг кетидан бири най, бири танбур, бири дутор

кўтарган уч йигит кирди. А. Қаҳҳор, Қанотсиз чигтақ. *Йўлчи чиндан ҳам най чалишни билар эди ва яхши чалар эди.* Ойбек, Танланган асарлар.

НАЙЗА I [ф. نيزه — санчқи, найза] 1 Қўл билан отиб ёки уриб санчиш учун мўлжалланган, учи ўткир қурол. *Мудофелар қўлларидаги милтиқ, шашвар, ойболта, қилич ва найзалари билан тизилишиб олдилар.* А. Қодирий, Ўтган кунлар. *От чопса, гумбурлар тоғнинг дараси, Ботирни ингратар найза яраси.* «Алпомиш».

2 Милтиқнинг учига ўрнатиладиган учи ўткир қисми; штик. *Нормат милтиқ найзасини ёвнинг кураклари ўртасига ботирарди.* И. Раҳим, Чин муҳаббат.

3 Газандалар чаққанда, уларнинг баданга санчиладиган аъзоси. *Ари найзаси.*

4 *сфт.* Санчиладиган, найзадек, найзага ўхшаш, санчилиб кирадиган даражада ўткир. *Учи найза қалам.*

5 *кўчма.* Сезиларли таъсир, куч. *Совуқ ўз найзасини келиб-келиб фақат тиззаю тирсакка ураётгандай бўларди.* Р. Файзий, Чўлга баҳор келди.

6 *кўчма* Тик, тўғри. — *Сўзга қулоқ сол, шаллақи!* — *Ёрмат кўзларини найзадай қадади.* — *Етмишда эмас, олтмиш бешда.* Ойбек, Танланган асарлар. *Улар қишлоқ марказига етганда, қуёш найза бўйи кўтарилган эди.* М. Жўра, Ноширнома.

Кун (ёки **офтоб**) **найзага келганда** Қуёш айна тепага келган, қизиган пайт, туш пайти. *Сал вақтдан кейин, офтоб найзага келганда, пайкалда ишлаш у ёқда турсин, нафас олиш маҳол бўлиб қолади.* Р. Раҳмон, Меҳр кўзда. *Айниқса, кун найзага келганда, бутун бодомзор жимжит, сукут ичида қолагандай бўларди.* Д. Нурий, Осмон устун.

НАЙЗА II Амалий санъатда нақш тури.

НАЙЗАБАРГ Гуллари оқ кўп йиллик илдизпояли ўт.

НАЙЗАБАРДОР [ф. نيزه بردار — найза кўтарувчи] Найза тугган, найза билан қуролланган аскар. *Найзабардор отлиқларнинг ҳамласи Шаҳарлардан эсиб ўтди ел каби, Пиёдалар тўлқинланиб босарди, Чопар эди ёвга қарши сел каби.* М. Шайхзода.

НАЙЗАБОЗ [ф. نيزه باز — найза ўйнаувчи] 1 Найза билан қуролланиб жанг қилувчи, найза билан жанг қилишга уста, моҳир одам.

2 *кўчма с. т.* Бўлар-бўлмасга танқид қилишни яхши кўрадиган одам; танқидбоз.

НАЙЗАБОЗЛИК Найза жанги, найза билан жанг қилиш (қўл жанги турларидан бири). *Душман солдатлари найзабозликка дош беролмай қоча бошлади.* ■ *Ребров ажойиб жангчи, айниқса, найзабозликда ҳеч ким унга бас келолмайди.* М. Муҳамедов, Қаҳрамон изидан. *Дарвозахонада найзабозлик ва қиличбозлик бошланди.* Фозил Тархон бўйнидан қилич еб, отдан йиқилиб тушди. П. Қодиров, Юлдузли тунлар.

НАЙЗАДАСТ [ф. نيزه دست — қўлида найза ушлаган, найзаси бор] *фольк.* Найза кўтарган, абжир. *Қорахон подшо салтанатли беклар билан.. неча найзадаст ботири билан, жиловдор шотири билан боғнинг устидан келиб қолди.* «Орзиғул».

НАЙКАМАЛАК [най + камалак] *айн. камалак 2, ёй I 1.* *Горнинг оғзига яқинлашганингизда, сиз аввало қуёш нури ва булоқ суви зарраларидан пайдо бўлган ажойиб найкамалакни кўрасиз.* А. Мухтор, Чинор. — *Найкамалак!* — *деди Анорхон осмонга кўзи тушиб. Севинганидан қарсак чалиб юборганини ўзи ҳам билмай қолди.* И. Раҳим, Ҳаёт булоқлари.

НАЙЛАЙИН *поэт.* Нима қилайин, қандай қилайин. *Ғайри, ғайри жойа келдим, найлайин, Кун тушмаган сойа келдим, найлайин.* «Равшан».

НАЙМАН Ўзбек халқининг этник таркибига кирган қабилалардан бирининг номи. *Булар орасида қипчоқ, найман, лақай, қорақалпоқ, қиёт, уйғур каби кўпгина уруғлар мавжуд.* «ЎТА».

НАЙНОВ [ф. نينان — 1 с. т. Бўйи баланд, новча. *Инглиз укки кўз, карнай бурун, кампир даҳан, қилтириқ бўйин, найнов эди.* Ойбек, Нур қидириб.

2 *кўчма с. т.* Ўта содда, бўшашган. *Найновнинг ақли — тўпигида.* Мақол.

НАЙРАНГ [ф. نيرنگ — ҳийла, найранг, макр; фокус; сеҳргарлик] 1 *эск.* Кўз илғамайдиган ҳаракат, чаққонлик ва ҳийла ишлатиб кўрсатиладиган томоша, кўз боғлаш; фокус.

2 *кўчма* Алдамчиликка, макр-ҳийлага асосланган хатти-ҳаракат; ҳийла, лўттибозлик. *Унинг [Элмуроднинг] назарида, Мадаминнинг бу ҳаракати соддадил одамларга ўзини ҳукуматга “берилган” қилиб кўрсатиш учун қилинган найрангга ўхшарди.* П. Турсун,

Ўқитувчи. *Ана, текширувда раиснинг ҳамма найранглари очлиб, шуда қолиш-қолмаслиги гумон бўлиб турганмиш-ку!* «Ёшлик».

НАЙРАНГБОЗ [ф. نىرنگ باز — ҳийлакор, алдамчи; фокусчи] **1** эск. Кўз боғловчи; фокусчи.

2 кўчма Алдов, макр-ҳийла билан иш тутадиган; ҳийлагар, лўттибоз. [Ғуломжон:] *Мени бу ерга келтирган найрангбоз қизингизни чақириб, эл олди-да, эр олдида сўроқ қилишингизни талаб этаман.* М. Исмоилий, Фарғона т. о.

НАЙРАНГБОЗЛИК 1 Найранг билан машғуллик, найрангбоз эканлик.

2 Кўз боғлаш; фокус. *Бозоршабда.. турлитуман найрангбозлик, қизиқчилик.. қилиб бериб, томошабинларни, хусусан, ёш болаларни ҳайрон қолдирар эдилар.* М. Муҳаммад-жонов, Турмуш уринишлари.

3 кўчма Найрангга асосланган иш, хатти-ҳаракат; найранг. *Найрангбозлик қилма.*

НАЙСИМОН Найга ўхшаган; най шаклида ўралган. *Амир қалтироқ кўллари билан найсимон мактубни ёзиб, ўқишга киришди.* О. Ёқубов, Кўҳна дунё.

НАЙСОН [ф. نىسان — сурёний тақвими бўйича апрель ойига тўғри келадиган 5-ой номи] **1** Ўрта баҳор; апрель ойи.

2 Эрта баҳорда, апрелда ёғадиган ёмғир. *Биз сайрга чиққанда, баҳор найсонлари бошланиб қолсаям майли, чунки у табиатни уйғотиб юборади.* «Гулистон».

Абри найсон қ. абр.

НАЙЧА 1 [ф. نيچه — кичик най, қамишча] **1** Кичик ёки ингичка най. *У ерда ҳам лабораториядагидай эгри-бугри шиша найчалар, шиша идишлар, ўлчағичлар, электрокамера, ҳар хил асбоблар.* С. Анорбоев, Оқсой.

2 махс. Ип ўраладиган найсимон асбоб ёки машина қисми. *Бу ернинг бола-чақаси тили чиқиб, аввал билган сўзи — арқоқ билан тароғу найча билан моки.* А. Мухтор, Опа-сингиллар.

3 бот. Полиэкинларида ҳосил бўлувчи тугунча, нишона. *Шу билан ошқовоқнинг тутган найчалари сарғайиб тўкилаверди.* С. Айний, Эсдалиқлар. *Шаҳарликлар жуда олифта, нозик келишади. Подвалда кўкартирилган картошка уруғининг найчасидан ҳам нимжон.* М. Ҳазратқулов, Журъат.

НАЙЧА 2 Юпқа металл япроқча ўрами (най шакли)дан иборат, чаккага тақиладиган аёллар тақинчоғи.

НАЙЧАЛАМОҚ Тугунча ҳосил қилмоқ, тутмоқ (қовун, бодринг, қовоқ каби полиэкинлари ва б. ҳақида). *Бодринг найчалади.* ■ *Хуллас, қаттиқ меҳнатлари зое кетмади, қўшниларники чопиққа етганда, Холбойнинг пахтаси иккинчи чопиқ сўраб гунчалади, гуллаб найчалади.* К. Яшин, Ҳамза.

НАЙЧИ Най чалувчи созанда. *Чалишни билмайман. Катта дадам: “Чалма, сен найчи бўласанми, ёмон кўраман”, дейди.* Ойбек, Танланган асарлар.

НАКАЗ [р. наказать — «буюрмоқ, топшириқ бермоқ» фл. дан ҳосил бўлган от: талаб ва топшириқ] Сайловчиларнинг ўзлари сайлаган депутат ёки органга берган топшириқлари, талаб ва истаклари. *Халқ депутатларига сайловчиларнинг нақазлари.* ■ *Ферма турган жойда, кичик бўлса-да, клуб очиш тўғрисидаги нақаз ҳам Ажарбой ака ташаббуси билан амалга оширилади.* Газетадан.

НАКИ с. т. Негаки, нима учун десанг. *Раҳмат, юзга кир, ували-жували бўл, ўғлим.. Шу сўзинг ўзи олтидан аъло. Наки, кўнглимни кўтарди.* Ойбек, Танланган асарлар.

НАМ [ф. نم — ҳўллик, зах, рутубат; сув, суюқлик; шудринг; кўз ёш] **1** от Бирор нарса таркибидаги ёки унга шимилган, сингиган сув. *Нам емоқ. Нам тортмоқ. Ернинг нами қочибди. Тупроқдаги намни сақлаш чоралари.*

2 Сув; суюқлик. *Нам кўрмайин, қақраб бу чўллар Асрларни кутиб олганлар.* Ҳ. Олимжон. *Бодринг — иссиқсевар, ёруғсевар ва намга талабчан ўсимлик.* «Фан ва турмуш».

3 сфт. Сув шимган; ҳўл. *Нам рўмол.* ■ *Оёқ остидаги нам тупроқдан инсон учун жуда яқин, қон-қариндошлик иси димоққа уриларди.* С. Анорбоев, Оқсой. *Раҳимберди нам кўзларини артиб: -Йиғлаганим йўқ, ўғлим, — деб жавоб берди.* Х. Тўхтабоев, Шонли авлод.

Нам юқтирмас Унча-мунча нарсага парво қилмайдиган, бетаъсир (одам).

НАМАК [ф. نمک — туз] шв. Туз.

НАМАКОБ [ф. نمک آب — тузли сув] Тузли сув, туз эритилган сув. *Намакобда тузланган бодринг. Намакоб бўлиб кетибди.* ■

Сигирингизнинг қаншарига темиртки чиқибди, намақоб сурқадим, нос сурқадим — бўлмади, пичоқ билан қириб, керосин сурқаш керакмиш. А. Қаҳҳор, Оғриқ тишлар.

НАМАКСИЗ Тузсиз. Намаксиз таом қанчалик бетаъм бўлса, мантиқсиз нутқ ҳам шунчалик бемаъни бўлади. Р. Усмонов, Одбонама.

НАМАТ [ф. نهد — кигиз] 1 Юнгдан босиб ишланган палос; кигиз. [Нигора] Чайланинг олдига солинган наMAT устига оёқларини узатиб ўтирди. С. Анорбоев, Оқсой.

2 сфт. Юнгдан босиб ишланган материалдан тайёрланган, тикилган (кийим). *НаMAT патак.* ■ Тўқ кулранг наMAT береткасини бошидан олиб, чангини қоқди. С. Кароматов, Олтин кум. Қиличев, «игна учидек тешиқдан туядек шамол киради», деб кечаси қалин пахталик нимчаси билан оёғидаги наMAT этигини емай ётарди. Мирмуҳсин, Занглаган қилич.

НАМГАРЧИЛИК 1 Ёгин-сочин вақти ва шу вақтдаги захкашлик, лойгарчилик. Қоровулхонадан янги молхонага бориш учун икки томони қинғир-қийшиқ, у ер-бу ери баҳорги намгарчиликда қулаб тушган эски девор билан тўсилган кўчадан ўтилади. С. Анорбоев, Оқсой.

2 Ёгингарчилик. *Намгарчилик кўп бўладиган ҳудудлар.* ■ Совуқ намгарчилик ҳали ёз хотираси билан мунғайиб турган кузги гулларнинг рангини ўчириб кетди. А. Муҳтор, Давр менинг тақдиримда.

НАМИҚМОҚ Нам тортмоқ, нам бўлиб қолмоқ; ҳўл бўлмоқ. *Заҳда сомон намиқиб қолибди.* ■ Унинг [Шербекнинг] елкасига ва туртиб чиққан белига тердан намиққан кўйлаги ёпишиб қолган. С. Анорбоев, Оқсой. *Сувчилар сувни эгатларга бир метёрда тараб, жилдиратиб, тагидан намиқтиришга алоҳида эътибор берадилар.* Газетадан.

НАМЛАМОҚ Нам қилмоқ, нам бермоқ, ҳўлламоқ. *Ўктамнинг боши қизиб ёнади, тер томчилари манглайдан юмалаб, киприқларини намлайди.* Ойбек, О. в. шабадалар. *Унинг [Гулсумнинг] кўз ёши билан намланган киприқлари капалак қанотидай силкинди.* П. Турсун, Ўқитувчи.

НАМЛИ Нами бор, намга эга; нам, ҳўл. *Намли ва булутли ҳавода ўргимчаклар, шиллиқлар туғилади, шудгордан бошқа озиқ тополмагандан сўнг янги ўсиб чиққан ғўза-*

ларни қирқишга бошлайди. А. Қодирий, Обид кетмон.

НАМЛИК 1 Ҳаводаги сув буғлари ва моддий жисмлар таркибидаги сув миқдори. *Бу намлик, асосан, куз, қиш ва баҳор фаслларида тушиб, ўсимликка зарур бўлган миқдорни асло қондиrolмайди.* «Фан ва турмуш».

2 Намга эгалик; нам бўлган ҳолат. *Кийимни намлигида дазмолламоқ.*

НАМОЁН [ф. نمايان — очиқ-ойдин кўриниб турган, ошқора; кўринарли, сезиларли] Яққол кўриниб турадиган, гавдаланадиган; очиқ-ошқор, равшан кўриниш, кўрсатиш. *Намоён бўлмоқ. Намоён қилмоқ.* ■ *Тонг ёришди. Бурқиган тутун ва чанг орқали шаҳарнинг хароб гавдаси аста-секин намоён бўлди.* Ойбек, Қуёш қораймас. *Сайрамов звенолар ишини, худди ойнада кўриб турагандай, яққол намоён қилди.* Ойбек, О. в. шабадалар. *Келди очилур чоғи — ўзлигинг намоён қил, Парчалаб кишанларни, ҳар томон паришон қил.* Ҳамза. *Ҳаёт бутун кўркамлиги билан улар кўзи олдига намоён. Шухрат, Шинелли йиллар. Айтсам, куч оламан «ўстлик» сўзидан, Бу сўзда ўтилган йиллар намоён.* Э. Раҳим.

НАМОЗ [ф. نماز — мусулмонларда олло-таолога ибодат, дуолар] 1 Мусулмонларнинг кунига беш маҳал қилинадиган ибодатлари мажмуи ва уларнинг ҳар бири. *Эрталабки намоз. Кечки намоз. Жума намози. Намоз ўқимоқ.* ■ *Меъмор ювиниб, таҳорат қилиб, намозни ўқиб олгач, ҳовлига чиқди. Нонуштага ҳозирлик қилишни шогирдларига топширди.* Мирмуҳсин, Меъмор.

2 Умуман, ибодат. ■ -Юсуфжон, мусулмонсан, намоз, руза ўрнига масҳарабозлик қилиб, аҳли имон, аҳли растани тоат-ибодатдан қўяр эмишсан. *Ташла бу касбни, гумроҳ бўлма, — деди эшон.* К. Яшин, Ҳамза.

Намоз куни Ҳайитнинг намоз ўқиладиган биринчи куни.

3 Намоз (эркаклар исми).

НАМОЗГАР [ф. نمازديگر — бошқа, бошқа пайтдаги намоз; аср намози] 1 Кун ботиш олдидан ўқиладиган намоз, беш вақт намознинг учинчиси.

2 эск. Кун ботиш олдиданги пайт. *Шу куни намозгаргача.. уруш бўлиб, Асқар понсад оғзидан ўқиб ёб ўлибди.* А. Қаҳҳор, Қўшчинор чироқлари.

НАМОЗГОҲ [ф. نمازگاه — намоз ўқила- диган жой; масжид] Кўп одам йиғиладиган, катта маросимларда намоз ўқиладиган жой.

НАМОЗЛИК 1 Тоза, намоз ўқишда ки- йиладиган кийим.

2 Намоз матни. *Кампир ҳар куни, шомдан кейин Гаффоржон икковимизни кўчага чи- қармай, намозлик ва ҳар хил дуолар ўргатар- ди.* А. Қаҳҳор, Ўтмишдан эртақлар.

НАМОЗХОН [ф. نمازخوان — намоз ўқув- чи] Намоз ўқувчи; намозни канда қилмай- диган диндор киши. *Ҳамза ҳожини минг-минг намозхонлар ичиди, баланд овоз билан дуо қилишиди. Катталари «Ҳамза ҳожиси», кичик қориваччалари «Ҳожиси ака» дейдиган бўлишиди.* К. Яшин, Ҳамза.

НАМОЗХОНА [намоз + хона] Намоз ўқиладиган бино, хона, жой. *Каттайўл бў- йидаги машиш-техник хизмат кўрсати- ладиган танҳо бир масканда.. намозхона ва ошхона мавжуд эди.* Газетадан.

НАМОЗШОМ [ф. نمازшام — шом намози ва у ўқиладиган пайт] **1** Кун ботиб, қорон- гилик туша бошлаган пайт, қош қорая бошлаган вақт; оқшом. [Тилабой] *Олдига қўйилган овқатларни хўп еб олгандан кейин, хуфтонни намозшомдаёқ чала-чулла ўқиб олиб, дарров ухлаб қолар эди.* П. Турсун, Ўқитувчи.

2 Кун ботгандан бир оз кейин ўқи- ладиган намоз, беш вақт намознинг тўр- тинчиси. *Сўзни келган ерида тўхтатиб, Ҳожибобо имом бўлган ҳолда, намозшом ўқишга қўзғалдилар.* Ф. Фулом, Шум бола.

Дили (ёки кўнгли) намозшом бўлмоқ Дили қоронғи бўлмоқ, қаттиқ хафа бўл- моқ, ранжимоқ. *-Хунук воқеадан дилим намозшом бўлиб, хаёл суриб келаётган эдим, Ўринбойнинг сўзларига унча эътибор бер- мабман, — деди Камол. Ҳ. Назир, Кўктерақ шабадаси.*

НАМОЗШОМАТЛАС Ипак газлама (атлас)нинг бир тури. *Машинистка Робия- хон турмушга чиққанда, битта жемпер билан намозшоматлас тўёна қилганмиз, ушанда сиз ун тўрт сўмга қўл қўйгансиз, тўғрими?* С. Аҳмад, Сайланма.

НАМОЗШОМГУЛ [ф. نمازшامگل — шом пайти очиладиган гул] Гули кечқурун очи- либ, эрталаб ёпиладиган кўп йиллик ва бир йиллик ўтсимон ўсимлик ва унинг оқ, сариқ ёки қизил гули. *Офтоб қайта бошлар, кў-*

ланка майдон, Яна бош кўтарар намозшом- гуллар. Секин мовийлашар қизарган осмон, Оқариб кўринар кумушранг йўллар. А. Орипов, Онажон.

НАМОЙИШ [ф. نمايش] **1** Бирор маро- сим ёки байрам муносабати билан ўтка- зиладиган, бирор мақсад билан уюштири- ладиган оммавий юриш, ҳаракат. *Элмурод, Эргаиш, Муса, Омон ўша куни бўлган на- мойишда саф олдида навбатма-навбат байроқни кўтариб бордилар.* П. Турсун, Ўқитувчи.

2 Тажрибада, амалда кўрсатиш, намоён қилиш. *Денгизга ўхшаиш теп-текис ерларда занжирли тракторлар ўз қудратини намо- йиш қилиб.. пароходдай сузиб юрарди.* Ш. Рашидов, Бўрондан кучли.

3 кўчма Бирор нарсани кўрсатувчи, намоён қилувчи далил, бирор нарсанинг мужассам ифодаси. *Ҳаваскор артистларнинг шаҳар ва қишлоқларда берган концертлари фольклор қўшиқ ва рақсларининг ёрқин намоийиши бўлди.* Газетадан.

НАМОЙИШГОҲ [ф. نمايشگاه — на- мойиш жойи] Намойиш ўтказиладиган жой. *Толлар соя солиб турган кенг майдон асфальт- ланиб, катта намоийишгоҳга айлантирилди.* Газетадан.

НАМОЙИШКОРОНА рвш. Атайин ҳаммага кўрсатиб, очиқдан-очиқ. [Умида].. *биринчи қаторга, Бергернинг шундоқ рўпа- расига келиб, курсини намоийишкорона тарақ- латиб ўтирди.* А. Мухтор, Чинор.

НАМОЙИШЧИ Намойиш қатнашчиси. *Шаҳар кўчаларида намоийишчиларнинг кети узилмайди.*

НАМОЯНДА [ф. نماينده — вакил, вако- латли] Бирор ижтимоий гуруҳга ёки соҳа- га мансуб бўлган шахс; вакил. *Ўзбек адабиё- ти намояндалари. Фан намояндалари. ■ Кон- гресс ишида фақат тиббиёт намояндалари- гина эмас, шу билан бирга, кимё, физика фан- ларининг намояндалари ҳам қатнашмоқда.* Газетадан.

НАМРЕЗА [ф. نمریزه — тўкилган нам] *айн. шабнам.* Эрталабки намреза туфайли бўлса керак, гуллар худди ҳозиргина узилгандек. Н. Аминов, Суварак.

НАМТОБ [ф. نمتاب] Намиққан, намни сингдирган, нам ҳолатли; салқин. *Гулноз отилиб, боғ кўчага қиқди ва Қичқириқ шало- ласининг намтоб салқин ҳавосидан кўкрагини*

тўлдириб нафас олди. Х. Гулом, Тошкентликлар. *Машина эрталабки намтоб тупроқда жимжимадор тасмадек иккита из қолдириб, район марказининг катта кўчасидан дала йўлига чиқиб кетди.* А. Мухтор, Чинор.

НАМУНА [ф. نمونه — андаза, нусха; ўрнак, ибрат] **1** Бир турдаги нарсаларнинг шу нарсалар ҳақида тасаввур бера оладиган бир нусхаси, бўлаги, донаси. *Газлама намунаси. Фалла намуналари кўрғазмаси.*

2 Тимсол, мисол. *Қутбиддинлар икки кун давомида ложувард конини ўрганишди, ўн килограммча намуна олишди.* С. Кароматов, Олтин қум. *Юсуфжон қизиқ Шакаржоновнинг ҳаётий ва ижодий йўли камтарлик, меҳнатсеварлик ва халққа сидқидилдан хизмат қилишининг ёрқин намунасидир.* Т. Обидов, Юсуфжон қизиқ.

3 Ўрнак бўла оладиган, ибрат олса, эргашса арзийдиган шахс ёки нарса; ибрат, ўрнак. *У меҳнатсеварликда ҳаммага намуна. Намуна кўрсатмоқ. Намуна олмоқ. Намуна мактаби.* ■ *-Биз мактабимиз билан фахрланамиз. Бу ерни битириб кетганлар бизга намуна ва ўрнак, — деди Авзам Расулов.* Э. Раймов, Ажаб қишлоқ.

НАМУНАВИЙ айн. **намунали.** Район бўйича эмас, Ўзбекистон бўйича энг обрўли, намунавий колхозлар қаторига кўчади. А. Қодирий, Обид кетмон. *Жамоатчилик ишларида фаол қатнашаётган, ўзининг намунавий хулқи, одоби билан тенгдошларига ўрнак бўлаётган Барно зиммасига масъулиятли вазифа юкланди.* Газетадан.

НАМУНАЛИ **1** Ўрнак бўла оладиган, ўрнак, ибрат олса бўладиган. *Намунали хўжалик. Кўкламги чигит экишни намунали ўтказиш.*

2 Ҳаммага ибрат бўлсин учун махсус ташкил этилган, уюштирилган, ўтказилган. *Намунали суд.*

НАМУНЧА айн. **бунча.** *-Намунча ўйланиб қолдингиз, сиз бу қизлар билан қаерда танишган эдингиз? — деб сўради Нигора Самардан.* М. Қориев, Ойдин кечалар. *Вой-бў, гапира қолинг, намунча нафасингиз ичингизга тушиб кетмаса, Ғойиб ака?* Ж. Абдуллахонов, Орият.

НАМХУШ [ф. نم خشк — ярим (чала) куруқ] шв. Нимхуш, бир оз намли. *Тўйчибой ака шу гапларни айтгунча терлаб кетди, белбоғига қистириқли намхуш рўмолчаси*

билан юзларини, пешонасини артди. С. Маҳкамов, Дала тонги. *Намхуш ҳавода киш уйқусини тарк этган тупроқнинг майин иси оҳиста қанот қоқади.* Ў. Ҳошимов, Нур борки, соя бор. *Намхуш шамол эсади Жўнариқ соҳилидан.* Х. Салоҳ.

НАМЧИЛ Нами бир оз сақланган. *Жумабой ака ер ҳиди келиб турган намчил пахтазор четига чўнқайиб, бир қисм майин тупроқни кафтида аста ёзаркан, гўё у билан гаплашарди.* Ў. Усмонов, Ўжар одамлар.

НАНАЙ қ. **нанайлар.** *Нанай тили. Нанай аёл.*

НАНАЙЛАР Россия Федерациясида Амур дарёси водийсида яшовчи кичик халқ.

НАННА бол. Нон; овқат.

НАПОРМОН қ. **нафармон.** *Ариқча бўйидаги атиреул, қизил гул, напормон гуллар очилиб ётибди. Қирлардан эсаётган майин шабада ана шу гулларнинг гунчаларини ёзмақда, япроқларини учуриб келиб, Адолатнинг бошига сочмоқда.* И. Раҳим, Чин муҳаббат. *Гуллар жилвасидан товланади бог, Гунафша, гулсафсар пушти, напормон.* Миртемир, Танланган асарлар.

НАР [ф. نر — эркак жинсидаги; эркак; жасур, мардона] Эркак жинсли ҳайвон ёки парранда. *Маълумки, канарейкаларнинг фақат нари сайрайди, холос.* «Фан ва турмуш».

НАРВОН [ф. نردبان — зина, зинапоя; шоти] Икки ёни узун ёғоч ёки металл ва унга кўндалангига маҳкамланган ёғоч ёки металл погоналардан иборат, юқорига чиқиш ва тушиш учун ишлатиладиган асбоб; шоти. *Томга нарвон қўйиб чиқмоқ. Нарвонга чиқсанг, шошмай чиқ, Ўз ҳаддиндан ошмай чиқ!* Мақол. ■ *Отхона олдидаги нарвонга кўзи тушиб, нарвонни кўтарганча болохонага қўйди-да, тепага кўтарила бошлади.* У. Исмоилов, Сайланма.

НАРГИС [ф. نرگس < юн. Narkisos — юнон мифологиясида: ўз ҳуснига ошиқ бўлиб, шу ишқдан ҳалок бўлган ва маъбудлар томонидан шу номдаги гулга айлантирилган ёш йигит] **1** Оқ ёки сариқ гулли кўп йиллик ўт ва унинг чиройли гули.

2 Наргис (хотин-қизлар исми).

НАРД(А) [ф. نرد — ўйин тури] Рақиб томонларнинг шашкаларни ўйин тахтасининг икки қарама-қарши томонига жойлаштириб, уларни ўртага отилаётган соққаларнинг кўрсаткичлари (холлари)га қараб

уяча (катак)лар бўйича суриб, уячаларни тезроқ тўлдиришидан иборат қадимги ўйин ва шу ўйин учун керак бўладиган нарсалар йиғмаси. *Нард ўйнамоқ. Нардани тезроқ олиб кел.*

НАРЁҚ 1 Нариги ёқ, нариги томон. - *Бувимлар келишимди? Ҳаёт калласи билан “ҳа” ишорасини қилди-ю, нарёққа ўгирилиб олди. М. Исмоилий, Фарғона т. о. Ариқ нарёғидан бошланган полизда қатор-қатор тизилишган қарамлар ой нурида кумушдек товланар эди. П. Турсун, Ўқитувчи.*

2 Давоми, кейини; бошқа жиҳати. *Бизнинг вазифамиз — маълум қилиш, нарёғини ўзлари текширишади.. Ё. Хаимов, М. Раҳмон, Ҳаёт-мамот.*

НАРЗАН [Кисловодск (Россия Федерацияси)даги булоқ номи] Карбонат ангидрид-сулфатли шифобахш минерал сув. *Билмадик, Ҳайдаров шундан буён Пискентнинг сувини ичаяптими, йўқми ёки ташналигини нарзан, пиво, қимиз дегандай бошқа ичимликлар билан қондириб юрибдими?* Газетадан.

НАРИ *рвш. 1* Сўзловчидан ёки сўз бораётган пайт ё ўриндан узоқ, олис. *Нари тур. Ҳечқиси йўқ, бир кун нари, бир кун бери. Вокзалдан нари. Тошкентдан нари. ■ Анварни ўзлари турган маҳалладан бир гузар нари бўлган Солиҳ махдумнинг мактабига берди. А. Қодирий, Меҳробдан чаён. [Қизлар] Энди “нари ёт, бери ёт” билан бир-бирларини итариб, суриб, кўрпани тўрт томонга тортишиб, жанжаллаша бошладилар. А. Қодирий, Меҳробдан чаён.*

2 (ч. к. билан) кўм. *взф. Кейин; ўтгач. Мактабдан наримиз, беримиз?*

Кўздан нари Одам ёки одамлар назаридан йироқ; холи, панала. *Кўздан нари — кўнгилдан нари. Мақол. Нариз борса ёки нарис билан* Ортиғи билан, кўпи билан, жуда бўлса. *Нариси билан, ўн кунлик иш. ■ У [хотин] истараси иссиққина, нари борса, йигирма беш ёшларда.. эди. А. Қаҳҳор, Кўшчинор чироқлари. Нариз олиб бориб, бери олиб келмоқ* Роса қийнамоқ, қийнаб ўласи қилмоқ. *Овқат ҳазм бўлмай, мени нари олиб бориб, бери олиб келди. Нариз турсин* У ёқда турсин, тугул. *Бизда милтиқ нари турсин, бир косов ҳам йўқлигини ўзингиз яхши биласиз. С. Айний, Куллар. Ундан нари(га)* Ажаб бўлибди; ҳечқиси йўқ. *Келса келар, келмаса ундан нари(га). Ҳаёлидан (ёки кўз олдидан)*

нари кетмаслик Унута олмаслик, кўз олдидан доим намоён бўлмоқ. *Остонада ўша қиз, шунча кундан буён унинг хаёлидан нари кетмай қолган ўша қизнинг ўзгинаси турарди. Ў. Ҳошимов, Қалбинга қулоқ сол. Ўйда ёлғиз ўтирганида ҳам, ишда ҳам Гулхайрининг назокатли боқишлари, ҳароратли лаблари кўз олдидан нари кетмай, юрагига ўт туташади. С. Нуров, Нарвон.*

НАРИ-БЕРИ *рвш. 1* У ёқ-бу ёққа, турли томонга. *Нарсаларни нари-бери сурмоқ. ■ Сафаров тугаган папироснинг чўғидан иккинчисини тутатиб олиб, нари-бери юрди. А. Қаҳҳор, Кўшчинор чироқлари.*

2 *айн. наридан-бери.* - *Уйга келгач, электр чойнакда чой қўйиб, нари-бери овқатланди-да, “Қани, жўра, ҳикоянгни бошла”, дедим, — деди Шокиржон. Ш. Ризо, Қор ёғди, излар босилди.*

Нари-бери бўлмоқ Айтишиб қолмоқ, орадан гап ўтиб, тескарилашиб қолмоқ. *Умарбек билан бир оз нари-бери бўлиб қолган эдик, ҳайтовур, тагин орани очиб юбордик. А. Қодирий, Ўтган кунлар.*

НАРИГИ Сўзловчидан ёки сўз бораётган пайт ё ўриндан наридаги; узоқта, олисдаги; бошқа. *Нариги уй. Нариги ҳафтада бораман. Ариқнинг нариги томонига ўтмоқ. ■ Кейин чуқурнинг нариги бетиди, эски қоп тагида ётган бир қанча темир понани олиб чиқиб кўрсатди Қудрат. М. Исмоилий, Фарғона т. о. Айвоннинг нариги ёнидаги дарича орқали уйга киришур эди. А. Қодирий, Ўтган кунлар.*

НАРИДАН-БЕРИ *рвш. 1* Шоша-пиша; энгил-елпи. *[Уста] Бир пиёла чойни наридан-бери ичди-да, ўрнидан турди. О. Ёқубов, Ларза. У [Сидиқжон] юраги ғаш бўлди-да, отхонадан отни олиб чиқди, наридан-бери эгарлади-да.. онасининг кетидан от қўйди. А. Қаҳҳор, Кўшчинор чироқлари.*

2 Чалакам-чатти, чала-чулпа, “мендан кетгунча, эгасига етгунча” зайлида. *Ҳар қандай масалани ўзбошимчалик билан наридан-бери ҳал қилишга тиришадиган Тожибой бу сафар бирор кимсанинг маслаҳатига, қўллаб-қўлтиқлашига муҳтож бўлди. П. Турсун, Ўқитувчи.*

НАРИЁҚ *айн. нарёқ. У [Аҳмаджон] ярим хароба уйнинг муюлишидан чиқиб, катта кучага қараган эди, нариеқдан югуриб келаятган ёшгина бир қизил аскарни кўриб қолди. А. Қаҳҳор, Олтин юлдуз.*

НАРИЛАМОҚ Нарӣ кетмоқ, узоқлашмоқ. *Ҳамма секин бош кўтариб, у ёқ-бу ёққа қаради. Дарҳақиқат, чанг-тўзон анча нарилаб, Карка томонга кетарди.* Мирмуҳсин, Меъмор.

НАРКО- [юн. *narkotikos* — донг қотирувчи, гангитувчи, мияни айнитувчи] Ўзлашма байналмилал сўзларнинг биринчи қисми бўлиб, «наркотиклар», «наркозга оид» маъноларини ифодалайди (мас., *наркология, наркомания*).

НАРКОБИЗНЕС [нарко.. + бизнес] Уюшган жиноятчи гуруҳ ва тўдаларнинг наркотиклар (гиёҳванд моддалар) ишлаб чиқариш ва тарқатиш билан боғлиқ фаолияти. *Мамлакатларимиз террорчилик, экстремизм, наркобизнес.. каби таҳдидларга қарши кураш борасида ҳам ҳамфикрдир.* Газетадан. *Афсуски, биз дунёга осойишталик истаймиз, дея ҳайқираётган жаноблар наркобизнес вабосига негадир жиддийроқ қарашмаяпти.* Газетадан.

НАРКОЗ [юн. *narkosis* — гапиролмай қотиб қолиш, донг қотиб, серрайиб қолиш] **1** Наркотик модда. *Даврон бир неча марта наркоз таъсирида бўлди, икки марта операция қилишди.* Т. Рустамов, Мангу жасорат.

2 Наркотик моддалар ёки электр токи таъсирида пайдо қилинадиган, тўлиқ ёки қисман беҳушлик, оғриқ сезгисининг йўқолиши билан кечадиган чуқур уйку ҳолати. [Наркотик моддаларни] *Венага юбориб пайдо қилинадиган наркозда, асосан, уйқу дорилари.. ишлатилади.* «ЎЗМЭ».

НАРКОЗЛАМОҚ Оғриқсизлантирмоқ; наркотик модда бериб беҳуш ёки оғриқ сезмайдиган қилмоқ.

НАРКОЛОГ Наркология мутахассиси; гиёҳвандларни даволовчи врач.

НАРКОЛОГИЯ [нарко.. + юн. *logos* — фан, таълимот] Психиатриянинг сурункали алкоголизм, наркомания ва ш.к. нинг пайдо бўлиши ва ривожланишини ўрганувчи ҳамда унинг олдини олиш, даволаш усулларини ишлаб чиқувчи бўлими. *Наркология диспансери.* ■ *Москвадаги наркология шифохонасида ярим тунда тўсатдан ёнғин чиқди.* Газетадан.

НАРКОМАН Гиёҳвандлик билан касалланган шахс. қ. **гиёҳванд**.

НАРКОМАНИЯ [нарко.. + юн. *mania* — жиннилик; қаттиқ берилганлик, қизиқиш,

интилиш] Наркотик моддаларга ўрганиб қолиб, уларни истеъмол қилмасдан туролмаслик; гиёҳвандлик, бангилик.

НАРКОТИК сфм. Беҳуш қиладиган, ухлатадиган ёки вақтинча оғриқни сездирмайдиган. *Наркотик моддалар.* ■ *Қорадори анча кучли наркотик модда бўлиб, организмга зарарли таъсир ўтказади.* Газетадан.

НАРКОТИКЛАР [юн. *narkotikos* — гангитувчи, мияни айнитувчи] **1** Гиёҳвандлик, наркоманияга сабаб бўлувчи табиий ва сунъий моддалар.

2 Беҳуш қиладиган ёки вақтинча оғриқни сездирмайдиган дори модда (мас., морфий, афюн ва б.). *Сабаби — бу ерда таркибида наркотик бўлган экинлар ўсиши учун иқлим шароити қулай.* Газетадан.

НАРРА [ф. *تره* — эркак; эркак жинсига мансуб] Эркак жинсидаги ҳайвон. *Тўйни қилур танти элим — нарра шер, Дашту дала топди сафо, яли-яли.* Миртемир, Танланган асарлар.

НАРРАКИ шв. Касалга йўлиқиб ўсган сабзавот ёки насли бузилган ўсимлик. *Нарраки сабзи. Нарраки новда (ҳосил бермайдиган новда).*

НАРСА 1 Ҳар қандай моддий мавжудот; предмет. *Йўлдошнинг кўзи комиссарнинг тўшидаги тангадек қора нарсага тушиди.* Шухрат, Шинелли йиллар. *Хотиннинг бериб кетган нарсаси уч-тўрт буқланган бир қоғоз эди.* А. Қодирӣ, Ўтган кунлар.

2 Ҳаёт, тирикчилик учун зарур ҳар қандай ашё, буюм, маҳсулот. *Ош — яхши нарса.* ■ *Мана сизда нарса бор экан, сотибсиз, бизда бир нарча ердан бошқа кўзга илинарли ҳеч нарса йўқ эди.* Ойбек, Танланган асарлар. *Чарос коридорда тескари қараб турар, қўлида газетага ўралган патнисга ўхшаш нарса бор эди.* Ў. Ҳошимов, Қалбингга қулоқ сол.

3 Умуман, ҳар қандай ҳодиса (гап, сўз, ўйин, кулги, иш, воқеа, ҳодиса ва ш. к.). *Барот полвон дунёда икки нарсани яхши кўрар эди. Биринчиси — кураш, иккинчиси — ашула.* М. Исмоилий, Фарғона т. о. *Бегимхон хатни қайта-қайта ўқиди. Гўё хатда ҳамма нарса ёзилган.* И. Раҳим, Чин муҳаббат.

4 с. т. Одам ва умуман жонли мавжудот ёки уларнинг сифатини билдирувчи сўзлар билан қўлланиб, уларнинг шу сўзлар ифодалаган тоифага мансублигини ифодалайди.

Сен ёш нарса, қолавер, мен кетай, эртага азон билан колхозга чиқиб кетаман. Ойдин, Фонарь тагида. Ўрис амалдорга тегажаклик қилишни унга ким қўйибди? Камбағал нарса чориғини судраб, тинч юрса бўлмасмиди?! Ойбек, Танланган асарлар.

Бир нарса Нимадир, аниқ бўлмаган. Кумушибиби хомуш эди. Бир нарса тўғрисида ўйлармиди ёки бош оғриғи кучлимиди, ҳар ҳолда, намозшомгул каби ёпиқ эди. А. Қодирий, Ўтган кунлар. **Бир нарса бўлди**ми? Нима қилди? нима бўлди? Сизга бир нарса бўлди? **Ҳеч нарса эмас** 1) арзирли нарса эмас. Унга қараганда бу ҳеч нарса эмас; 2) қийин эмас, осон. Бу менга ҳеч нарса эмас.

НАРХ [ф. نرخ — баҳо, қиймат] Нарса-нинг, буюмнинг пул билан ўлчанадиган қиймати; баҳо. *Ибодилла катта-кичик тароқларнинг нархларини бирма-бир айтди. Ҳ. Фулом, Машғал. [Махдум болага:] Йигирма дон нон керак экан. Нархи қанчадан? деб дарров сўраб кел!* А. Қодирий, Меҳробдан чаён.

Нарх қўймоқ (ёки қилмоқ) Нархини белгиламоқ, баҳо қўймоқ, баҳоламоқ. *Бу молга беш сўм нарх қўйилди. ■ «Холислар» ҳар бир ботмон жўхорини 10 танга нарх қилдилар. С. Айний, Эсдаликлар.*

НАРХ-НАВО [нарх + ф. نوا — яшаш воситалари; фаровонлик, бойлик; гаров] Нарх, баҳо; нархлар, баҳолар. *Бозорда нарх-наво кўтарилиб, харидору сотувчининг тортишувлари авжга минган эди. Ш. Холмирзаев, Қил кўприк. Савдо ходими — дунёнинг қай бурчида нималар бўляпти, нарх-наво қалай — ҳаммасидан хабардор, турли хил одамлар билан муомала қила оладиган илмли ва дипломат одам. Шукрулло, Жавоҳирлар сандиғи.*

НАРЯД [р. нарядить — «топшириқ бермоқ; махсус ишга юбормоқ; тайинламоқ» фл. дан қўшимчасиз ҳосил қилинган от] 1 Бирор ишни бажариш учун бериладиган ёзма ёки оғзаки фармойиш ёки буйруқ. *Наряд ёзиб бермоқ. Нарядга мувофиқ ҳақ тўламоқ.*

2 Бирор нарса олиш ёки топшириш учун ёзиб берилган ҳужжат. *Складдан наряд билан мол олмақ. ■ Полвон отам билан икковимиз колхоз дўконига наряди йўқ уч машина қовун оширган эмишимиз, тухмат. С. Аҳмад, Қадрдон далалар.*

3 ҳарб. Ҳарбий хизматчилар бажарадиган ёки бажараётган топшириқ, вазифа. *Нарядда турмоқ. ■ Интизомсиз жангчиға, интизомни бузгани учун, навбатдан ташқари икки наряд бериш керак бўлади. Н. Сафаров, Оловли излар. -Наряддагилардан бошқаларга дам берилсин, — деди Юрьев, тепалик гарнизонини айланиб чиққандан кейин. И. Раҳим, Чин муҳаббат.*

4 ҳарб. Махсус хизмат вазифаларини бажарувчи ёки бажараётган ҳарбий хизматчилар гуруҳи. *Соқчилар наряди. ■ Паровоз тумшугига иккита пулемёт ўрнатиб, саккиз кишилик наряд юборилди. И. Раҳим, Чин муҳаббат.*

НАС с. т. Наҳс.

НАСАБ [а. نسب — қон-қариндошлик; алоқа, муносабат] Келиб чиқиш, насл-насаб; бир ота-бободан тарқалган авлод. *-Бу насаби настага итотни қачон ўқитасиз? — ушқирди у. Ш. Тошматов, Эрк қуши. Иброҳим ота ҳикояни бошлашга мажбур бўлди: -Асл насабимиз — эронлик ўзбек.. Ж. Шарипов, Хоразм.*

НАСИБ [а. نصيب — улуш, қисм; тақдир, қисмат, толе] Кишига тақдирда буюрилган ҳисса, улуш; тақдир.

Насиб бўлмоқ (ёки қилмоқ, этмоқ) Тақдиран буюрилган ҳиссага муяссар бўлмоқ. *Бу ер — ари-овло. Унча-мунчага насиб бўлмайдиган жой. Ойбек, Танланган асарлар. Ҳай, мен нега уни бевақт уйғотаяпман, ким билсин, бу хил уйқу кенжамга яна қачон насиб қилади. И. Раҳим, Чин муҳаббат. Ҳожи Маккаю Мадина тўғрисида гапирганда, эшон: -Насиб бўлса, биз ҳам борамиз, — деб қўйди. П. Турсун, Ўқитувчи.*

НАСИБА [а. نصيبه — улуш, қисм; тақдир; омад, иқбол] 1 Кишининг тақдиран буюрилган ўз ҳиссаси, улуши. *Ишимдан хурсандман. Энди битта-яримта насибаси қўшилган хотин чиқиб қолса, уйлансам, деган ўйим ҳам йўқ эмас. А. Қаҳҳор, Қўшчинор чироқлари. Юртим, сенда экан насибам тугал, Сен ўзинг масканим, сен ўзинг шоним. А. Орипов, Йиллар армони.*

2 Умуман, ҳисса, улуш; ризқ. *Бу — сенинг насибанг. ■ Йўлчи бир сўмга ўзи нон-чай ичдида, оч қорнини бир қадар овутиди, қолганини “Унсиннинг насибаси”, деб белбоққа тугди. Ойбек, Танланган асарлар.*

3 Насиба (хотин-қизлар исми).

НАСИБАЛИ Насибаси улуғ, ризқи баланд; бахтли.

НАСИБАСИЗ Насибаси, толеи паст; бахтсиз. *Насибасиз қилмоқ. Насибасиз қолмоқ.*

НАСИМ [а. نسيم — майин шабада, сабо] *кт.* 1 Енгил, ёқимли шамол; шабада, сабо. *Ариқ бўйлари, толзорлар оралаб учган шабадалар, Самарқанд насимидай, қайноқ танларга қанот уриб, эркалаб, ором бериб ўтади.* Мирмуҳсин, Умид. *Колонналар тўлиб-тошади, байроқлар баҳор насими билан ўйнашади.* Миртемир. Танланган асарлар.

2 Насим (эркаклар исми).

НАСИЯ [а. نسيئه — муҳлатни чўзиш, кечиктириш; қарз, кредит] 1 Нақд пулсиз, пулини кейин тўлаш шартли билан бўлган ёки бўладиган савдо муомаласи; кредит. *Молни насияга олмоқ. Насияга сотмоқ.* ■ [Мирзакаримбой:] *..нақд пулга мол чаққон бўлган замонда сиз анча молни насияга сотибсиз.* Ойбек, Танланган асарлар. *Жаҳон ота аллакмининг боқиб қўйган қўзисини насияга олиб келди.* Р. Раҳмонов, Чангалзордаги шарпа.

2 Шундай савдо муомаласига мувофиқ тўланадиган пул, қарз. *Энди гап шу: оёқни қаттиқ тиранг. Қозоқлардан насияни тезроқ ундиринг, дурустми?* Ойбек, Танланган асарлар.

3 *кўча с. т.* Дарҳол бажарилмайдиган, қилинмайдиган, берилмайдиган. *Бу ваъдаларингиз ҳаммаси насия.* ■ *Кириб тарвузни қўлига бераман-у, салом-аликни насия қилиб, қуён бўламан.* С. Аҳмад, Сайланма.

Насия савдо Амалга ошмайдиган иш; пуч, хом гап. [Мирзакарим Мастурага:] *Кел, насия савдони қўй, нақддан гапиравер!* Ҳамза, Танланган асарлар. **Хайр-маъзурни насия қилмоқ қ. хайр-маъзур.**

НАСИХАТ [а. نصيحت — самимий маслаҳат, ўғит; хайрихоҳлик, самимийлик] Яхши йўлга солиш, таълим бериш мақсадида айтилган гап; маслаҳат, панд, ўғит. *Оталар насихати. Насихат қилмоқ. Насихат бермоқ.* ■ *Тузалар, деб насихатимизни аямдик, вақти келганда, дўстона танқид қилдик.* С. Анорбоев, Оқсой. *Ўзиндан бир кўйлак ортиқ йиртган кишининг сўзига қулоқ солсанг, унинг насихатларини тингласанг, албатта, одам бўласан.* С. Айний, Куллар.

НАСИХАТГҲЙ [насиҳат + ф. گوى — айтувчи] Насиҳат берувчи, насихат қилувчи.

Насиҳатгўй одам. ■ *Элмурод ҳамма вақт мулоийм ва насихатгўй бу аёлнинг бу қадар ҳаяжонга тушганини ҳеч қачон кўрмаган эди.* П. Турсун, Ўқитувчи.

НАСИХАТГҲЙЛИК 1 Насиҳат бериш хусусиятига эгалик.

2 Насиҳат бериш, панд, ўғит-насиҳат қилиш; ўғит-насиҳат. *Оқсоқол.. ора-сира чой хўплаб ўтириб, насихатгўйликка ўтди.* П. Турсун, Ўқитувчи. *Онам одатдагидай насихатгўйлигини бошламоччи эди, папкамни ола, кўчага чопдим.* А. Кўчимов, Ҳалқа.

НАСИХАТОМУЗ [насиҳат + ф. آمين — ўхшаш] Насиҳат йўсинидаги, насихат тарзидаги; панд-насиҳатга ўхшаган. *Насиҳатомуз гап.* ■ *Тоғжиев осойишта, насихатомуз сўзлай бошлади: -Хурматли раисимиз бизга ҳосилни йиғиб олиш ҳамда қурилишни сусайтирмаслик ҳақида тўғри ва батафсил гапириб бердилар.* Р. Файзий, Чўлга баҳор келди.

НАСИХАТЧИ айн. **насиҳатгўй.** *Иш битгач, насихатчи кўпаяр.* Мақол.

НАСЛ [а. نسل — авлод, уруғ; бола-чақа; туғилган бола (ҳайвонларда)] 1 Бир авлодаждога мансуб кишилар уруғи, уларнинг келиб чиқиши, зоти, насаби, таги-тахти. *Наслини суриштирмоқ. Наслдан наслга ўтмоқ. Қазисан-қаратасан, асли наслинга тортасан.* Мақол. ■ *Ал-Беруний, Ал-Хоразмий Ал-Фороб авлодидан, Асли насли балки ўзлуқ, Балки тархон, ўзбегим.* Э. Воҳидов, Муҳаббат.

2 Келажак авлод, зурриёт. *Нимани мерос қилиб қолдирайин наслимга.* С. Акбарий, Меҳригий. *Баҳодир насли ҳам бўлгай баҳодир. На мушкул бўлса, ҳал қилмоққа қодир.* Ҳабибий.

3 *биол.* Маълум белги-хусусиятларга эга, бир турга мансуб ўсимликлар, бир зотга мансуб ҳайвонлар гуруҳи; уруғ, зот. *Ҳайвонларни дурагайлаб, янги насл олиш.* ■ *Биз от наслини тузатишда ҳам ҳали бир иш қилмадик.* А. Қодирий, Обид кетмон.

НАСЛАН *рви.* Насл эътибори билан, насл жиҳатидан. *Бу йигит биздан наслан анча юқори туради.* А. Қодирий, Ўтган кунлар.

НАСЛДОР 1 Насли яхши; зотли, зотдор. *Наслдор моллар.*

2 Таг-тахтли, зодагон. *Тўғонбек шахзода хизматида бўлган наслдор, обрўли бекларни, мулозимларни четлатиб, тун-кун шахзодага чегарасиз ҳокимиятга интилган қув, муғам-*

бир руҳининг эҳтиросларини талқин этади. Ойбек, Навоий.

НАСЛДОШ Насли, зоти бир, бир уругдан тарқаган.

НАСЛИЙ Наслга оид, наслдан наслга ўтиб борадиган. *Наслий хусусиятлар. Наслий ўзгаришлар.*

НАСЛЛИ айн. **наслдор 1.** *Наслли сизирлар.*

НАСЛ-НАСАБ айн. **насл 1.** *Насл-насабини суриштирмоқ. ■ Мутавалли: -Баҳоваддинлик хўжалар насл-насабдан биз билан қандай барабар бўла оладилар.. - дебди. С. Айний, Эсдаликлар. Насл-насаби номаълум, ота-онасининг ҳам тайини йўқ Қораилонни бир кимса ҳам эсламади, унинг исзиз йўқолганидан фуқаро эмас, ҳукмдорларнинг ўзлари ҳам хурсанд бўдилар. Мирмуҳсин, Меъмор.*

НАСЛСИЗ Насл қолдирмайдиган, пушти йўқ. *Ҳачирлар наслсиз бўлади.*

НАСЛЧИЛИК қ. х. Ҳайвонлар ва паррандалар наслини, зотини яхшилаш, тақомиллаштиришга қаратилган ташкилий-зоотехник тадбирлар мажмуи. *Молларни яхши парвариш қилиш билан бир қаторда наслчилик ишларини тўғри уюштириш ҳам қорамоллар маҳсулдорлигини янада кўпайтиришнинг катта резервидир.* Газетадан.

НАСОРО [а. نصرانى — «насроний» с. кўпл.] Христиан динига мансуб киши, кишилар; христианлар, насронийлар.

НАСОС [р. насосать — «тортмоқ, сўрмоқ, тортиб (сўриб) олмоқ» фл. дан қўшимчасиз ҳосил қилинган от] Суюқлик ёки газни тортиб чиқариш ёки юбориш учун қўлланилган асбоб, машина. *Велосипед насоси. Ҳаво насоси. Насос билан сув чиқармоқ. ■ -Биламан, нефть насосларини биламан, — деди шошилиб Ҳусейн. И. Раҳим, Чин муҳаббат.*

Насос станцияси Суюқликни баландликка чиқариб бериш ёки уни бир жойдан иккинчи жойга олиб ўтказиш учун қурилган махсус иншоот.

НАСР I [а. نثر — сочиб, тўкиб ташлаш; проза] *ад.* Прозаик асар; вазн ва қофияга эга бўлмаган ёзма нутқ маҳсули; *зид. назм.* *Назмга сиғдирилмаганини насрда берибди. Қарни кўрсатган бўлсам, барини ёзибди. С. Анорбоев, Оқсой.*

НАСР II Шашмақом таркибидаги мақомларнинг ашула бўлими.

НАСРИЙ [а. نثرى — наср билан ёзилган] Проза жанрига мансуб, прозада ёзилган,

прозаик. *Сизнинг насрий асарларингиз, ҳикояларингизда фикр ёрқин, тил ўткир ва гўзал сатирик чизиқлар бордир. Ойбек, Нур қидириб.*

НАСРЛАШТИРМОҚ Назмий йўл билан ёзилган асарни наср (проза) йўли билан бермоқ. *«Фарҳод ва Ширин» достонини насрлаштираётганида, Фафур Фулом яхши қўлёзмаларга суюнган, шу асосда тўғри фикрлаб, тўғри хулосаларга келган. «ЎТА».*

НАСРОНИЙ [а. نصرانى — масиҳий, христиан; христианларга, христианликка оид] **1** *от* Христиан динига мансуб киши; насоро. *Ривоятларга кўра, Исо Масиҳ Носира номли шаҳарда туғилган бўлиб, уни Носирий деб атар эдилар. Унга эргашган кишини эса насроний деб юрита бошлаганлар. «ЎЗМЭ».*

2 сфт. Христианликка, насронийликка оид, алоқадор. *Руслар Византия орқали насроний динини қабул қилган ва насронийлар маданиятини ўзлаштирган қадимий халқ саналади. П. Қодиров, Тил ва эл.*

НАСРОНИЙЛИК Христианлик, христиан динига мансублик.

НАСТАРИН [ф. نسترن — оқ, қизил рангли, хушбўй гули бўлган ўсимлик] Бута ёки дарахт кўринишидаги, гуллари майда тўпгул, хушбўй, оқ, пушти, қизил рангли манзарали ўсимлик; сирень. ■ *Боғларда настарин гуллаб қолди-ю, Баҳор ҳурмати-чун мен узиб олдим, Кейин ўз чаккамга тақшидан кўра, Бекамга тақдимин уйлабон қолдим. Ф. Фулом, Қизларга. Ётоқхона ҳовлисидаги настариннинг хуш бўйлари димоғимга урилди. «Ёшлик».*

НАСТАЪЛИК [а. نستعليق — араб ёзуви турлари — نسخ (наسخ) ва تعليق — (таълиқ) номларидан] 14-асрда шаклланиган ва 15-асрда Ўрта Осиё ҳудудига ҳам тарқалган араб мумтоз хат турларидан бири (наسخ ва таълиқ хатлари асосида яратилган). *Ҳофиз Кўйкий бу нодир асарнинг нафис настаълиқ хат билан кўчирилган нусхасини кўриб, шоҳлик теккан гадодек қувониб кетди. Х. Султонов, Бир оқшом эртаги.*

НАСХ [а. نسخ — ёзишма; бекор қилиш; хат (ёзув) тури] Хаттотлик услуги, араб ёзувидаги мумтоз хат турларидан бири.

НАТИЖА [а. نتيجه — хулоса, яқун; оқибат, самара] **1** Иш-ҳаракат, воқеа-ҳодисадан пировардида келиб чиққан оқибат; иш-ҳаракат, воқеа-ҳодисадан келиб чиққан

кўрсаткич. *Элмурод*. “*Бўлар иш бўлди, энди тишини тишага қўйиб, натижани кутуш керак*”, деб ўзини овутиди. П. Турсун, Ўқитувчи.

2 с.т. Фойда, наф; самара. *Тўсатдан бошланган хужум яхши натижа бермади*. И. Раҳим, Чин муҳаббат. *Пулат отанинг тепасига келиб, уни ғазабга олишди, аврашди – натижа чиқмади*. К. Яшин, Ҳамза.

3 Фикр, муҳокаманинг манتيқий якуни; хулоса. *Натижа чиқармоқ. Натижага келмоқ.* ■ *Кўринишдан натижа чиқариб айтганда, бу қизиқ мажлис унинг [Кумуш] учун базм ўрнини эмас, аза жойини тутганди*. А. Қодирий, Ўтган кунлар.

НАТИЖАДА *рвш.* Охир-оқибатда, пировардида. *Об-ҳаво ёмон келиб, натижада олти-етти кунлик иш йигирма кунга чўзилди*.

НАТИЖАЛАМОҚ Натижа чиқармоқ, якун ясамоқ; натижага, хулосага келмоқ. *Гапни натижаласмоқ. Текиширувни натижаласмоқ. Имтиҳонлар анча қувончли якунлар билан натижаланди.* ■ *Отабекнинг бу синаши ўз фикрининг тўғри бўлиши билан натижаланди*. А. Қодирий, Ўтган кунлар.

НАТИЖАЛИ Яхши натижа берган ёки берадиган; самарали. *Натижали иш*.

НАТИЖАСИЗ Натижаси йўқ, самарасиз; бенатижа. *Натижасиз уриниш.* ■ *Отабекнинг ўша вақтдан сўнгги Марғилон қатнашлари фақат натижасиз, қуруққина бир қатнаш эди*. А. Қодирий, Ўтган кунлар.

НАТРИЙ [лот. *patrium* < юн. *nitron* – табиий сода] Менделеев даврий системасининг I гуруҳига мансуб кимёвий элемент, кумушсимон юмшоқ ишқорий металл. *Эркин натрий. Натрий бирикмалари*.

НАТУРА [лот. *natura* – хосса, хусусият; кишининг хулқ-атвори; табиий майл; табиат] **1** Расмга, кинога олиш, сурат чизиш ва ш. к. учун объект бўлган табиий манзара, нарса, одам ва ш. к. *Натурадан суратга олиш. Натура танлаш.* ■ *Бошдан-оёқ натурада суратга олинган жуда кўп фильмларни мисол қилиб кўрсатса бўлади*. С. Хўжаев, Ўзбек тарихий фильмлари.

2 иқт. Пул ўрнига тўланадиган мол, маҳсулот. *Натура билан ҳақ тўлаш.* ■ *Колхозчилар меҳнатига ҳақ тўлаш, улар меҳнатини натура ва пул билан рағбатлантириш системаси такомиллаштирилди*. Газетадан.

НАТУРАЛ [лот. *naturalis* – табиий, туғма; асл] **1** Натура (мол, маҳсулот) билан олинадиган, бериладиган, тўланадиган. *Натурал даромад. Натурал солиқ*.

2 Табиий ҳолатдаги; табиий, асл, ўз. *Жисмининг натурал катталиқдаги сурати*.

Натурал сонлар Оддий ҳисоблашда қўлланадиган бутун мусбат сонлар. **Натурал хўжалик** Бозорга чиқариб сотиш учун эмас, балки ўз аъзоларининг эҳтиёжлари учун маҳсулот ишлаб чиқарадиган хўжалик.

НАТУРАЛИЗАЦИЯ [фр. *naturalisation* < лот. *naturalis* – ҳақиқий, қонуний] Чет эллик шахснинг маълум давлат фуқаролигига қабул қилиниши; чет элликнинг шундай ҳуқуққа эга бўлиши.

НАТУРАЛИЗМ [фр. *naturalisme* < лот. *natura*] 19-асрнинг 60-йилларида Франция, 19-асрнинг сўнгги чорагида Европа ва АҚШ адабиёти ва санъатида пайдо бўлган ва реал борлиқни объектив (ўз ҳолича), аниқ ва ҳиссиз акс эттиришга интилган оқим ва ижодий метод. *Адабиётда натурализм инсон характериини илмий (экспериментал) ўрганишни мақсад қилиб қўйди*. «ЎзМЭ».

НАТУРАЛИСТ 1 Табиатни ўрганиш билан шуғулланувчи олим, табиатшунос.

2 Натурализм тарафдори.

НАТУРАЛИСТИК Натурализмга оид. *Натуралистик йўналиш*.

НАТЮРМОРТ [фр. *nature morte* – ўлик табиат] Тасвирий санъат жанри; портрет, пейзаж ва ш.к. мавзулардан фарқли равишда жонсиз предметларни тасвирлаш. *Аксарият рассомлар натюрмортни рангларни бойитиш учун яратишади*. Газетадан.

НАУШНИК [р. *наушник* – қулоқчин; қулоққа тутиладиган мослама] Рация ёки телефон орқали берилаётган хабарни қулоққа тақиб эшитадиган мослама; гўшаб. *Майор рация орқали ўзи команда бериб, самолётларни қўндиришга аҳд қилди-да, Русановдан наушникни олиб қулоқ солди*. Ҳ. Фулом, Тошкентликлар.

НАФ [а. *نفع* – фойда, манфаат; яхшилик; бойлик] Бирор иш ёки нарсадан олинган ижобий натижа, таъсир; фойда. *Янги машиналар пахтачиликда жуда катта наф келтирмоқда. Наф қилмоқ. Дори ҳеч наф қилмади.* ■ *-Сенинг бир ҳафта ортиқ ишлаганинг ёки ишламаганингдан менга нима*

нафу нима зарар? — деди бой аччиғи келган ҳолда. С. Айний, Куллар.

НАФАР [а. نافر — бир неча киши; бир киши] нумератив с. (фақат шахс-киши билдирувчи сўз билан) Адад. Ёнига тўрт нафар ясовул олиб, Султонали йўлга тушди. А. Қодирий, Меҳробдан чаён. Амалдор маҳрам Ёдгорни зиндондан чиқарди, зиндон-бон унга тўрт нафар қуролли сарбозни соқчи қилиб берди. С. Айний, Дохунда.

НАФАРМОН [ф. نافرمان] Оч бинафша, қизғиш бинафша рангли. Олма гули нафармон, Корхонага чопарман. «Кўшиқлар». Фил суягидан ясалган бежиримгина қутичанинг тагида кўк, қизил, нафармон ва яна аллақандай нозик рангларда жиловланган йирик бир жавоҳир ётарди. О. Ёқубов, Кўҳна дунё.

НАФАС [а. نفس — ўпкага олинадиган ва чиқариладиган ҳаво] 1 Узлуксиз биологик жараён, яъни ўпкага олинадиган ва ундан чиқариладиган ҳаво; дам, тин. Сўнги нафас. Оғир нафас олмоқ. ■ Яна юрак уйнаб, нафас бўғизга тиқилди. М. Исмоилий, Фарғона т. о. -Жуда жабр қилади, — деди Сиддиқжон чуқур олган нафасини гап билан бўшатиб. А. Қаҳҳор, Қўшчинор чироқлари. Совуқ шамолда шовуллаб турган қамшизор манзараси очилиши билан Ботирали муздек ҳаводан тўйиб-тўйиб нафас олди-да, тўқайга кириб кетди. Ҳ. Фулом, Машғал.

Нафас йўллари Одам ва ҳайвонларда ҳаво ўтказадиган аъзолар. **Нафас чиқармаслик** ёки **нафасини ўчирмоқ** Жим ўтирмоқ, гапирмай ўтириш. Шу ҳужрага қамалларинг. Кундузи нафас чиқармайсанлар. Ойбек, Танланган асарлар. -Нафасинени ўчир! ..Туф, туф! — деди Бувинисо кўксига туфлаб. П. Турсун, Ўқитувчи. **Нафаси ичига тушиб кетмоқ** айн. дами ичига тушиб кетмоқ қ. дам 1. Ораларингизда анчагина гап ўтган экан. Шунинг учун ҳам сиз у эрга кириб боришингиз билан нафаслари ичларига тушиб кетган экан. П. Турсун, Ўқитувчи. **Нафаси узилди** Ўлди. Эшон Шайхулло дуо ўқир, бемор кампирнинг нафаси узилмай, уйига етиб олишини худодан тиларди. Ш. Тошматов, Тонгдаги кўланка. **Нафасини ростламоқ** қ. **ростламоқ** 2.

2 кўчма с. т. Бўлажак иш ҳақида оғиздан чиққан гап, изҳор қилинган ният. Ёмон

нафас. ■ [Хадича Дадавойга:] Нафасингизни совуқ қилманг! Уйғун, Навбахор. Нафасингизни иссиқ қилинг. Н. Сафаров, Ҳаёт мактаби.

Нафасинг ўзинга урсин Ёмон ният қилган, совуқ хабар келтирган кишига нисбатан айтиладиган ибора.

3 Жуда қисқа вақт; лаҳза, он. Бир нафасда. Бир нафасга. Нафас ўтмай. ■ Булутли, хомуш оқшом зулмати нафас сайин қуюқлашиб, баҳайбат қоп-қора қанотларини уфқлар устига тез ёйиб келмоқда. П. Турсун, Ўқитувчи. Мана, Меҳринисо опа биладилар, онам мени бир нафас олдидан қўзғатгиси келмайди. З. Саид, Н. Сафаров, Тарих тилга кирди.

4 этн. Дуохон, азайимхон ва ш. к. солган дам кучи. Уйимизда бир бечора бемор бор, шайтонлаб ётибди, тақсир, бориб дам солиб келинг, шояд нафасингиздан шифо топса. Ойбек, Танланган асарлар.

Ўткир нафас(ли) Кучли дуохонга нисбатан айтилади. Бундан уч ой илгари, Нурини ўткир нафасли домлага олиб борган кун, ташқари ҳовлида қорда чўққайиб идиш ювган бу қизга унинг кўзи тасодифан тушган эди. Ойбек, Танланган асарлар.

5 Ҳил, ис. Киши билан тор уйларида диққинафас бўлган кишиларнинг димоғига адирлардан гиёҳларнинг хушбўй нафаси келиб урилади. С. Аҳмад, Ҳукм.

6 Ҳарорат, об-ҳаво. Яқинлашиб келаётган қишинг нафаси теварак-атрофда кезиб юрибди. Газетадан.

НАФАСДОШ кам қўлл. айн. ҳамнафас.

НАФАСЛИК: бир нафаслик Жуда оз вақт давом этадиган, бир лаҳзали. Бир нафаслик сукунат. ■ Бир нафаслик зилзиладан кечаги шаҳарлар бугун саҳрога айланади. Шукрулло, Жавоҳирлар сандиғи.

НАФАСҚИСМА айн. астма, зикнафас. Амманнинг нафасқисма касали бор эди. «Ёшлик».

НАФАҚА [а. نفقة — харажат; алимент] 1 Муҳтож одамларга ёрдам сифатида бериладиган пул; ёрдам пули.

2 Ўздан бўлак турадиган хотин ёки эрга (етим, балоғатга етмаган болалари учун) ёки меҳнатга яроқсиз ота-онага қонунчилик асосида тўлаб туриладиган таъминот пули; алимент. Нафақа бермоқ. Нафақа тўламоқ. ■ Мен шундоқ гумон қиламанки, ё

болани ташлаб кетгани келган, ё нафақа сўрагани. А. Қаҳҳор, Қўшчинонор чироқлари.

3 эск. айн. стипендия.

НАФАҚАТ юкл. Таъкид маъносини кучайтиради; ..дан ташқари, ..гина эмас каби маънони билдиради. *Бу ҳақда у нафақат мамлакат, жаҳон археологлари эътиборини жалб этган китоб яратди.* С. Кароматов, Сўнгги бархан. *Нон нафақат моддий бойлик, балки у маънавий бойлик ҳамдир.* Газетадан.

НАФАҚАХЎР [нафақа + ф. *خور* — еювчи] Нафақа олувчи, нафақа билан таъминланган шахс. *Жума куни маҳалла оқсоқоли ва маҳалладаги бир қанча нафақахўрлар узунқисқа бўлиб кириб келишди.* Газетадан.

НАФИС I [а. *نفيس* — қимматбахо] **1** Гўзал ва нозик, латиф. *Нафис газлама.* ■ *Шамол нафис япроқларни узади, ҳавода, эркинликда бирпасгина улар билан ўйнашиб, эркалаб, сўнг ерга ташлайди.* Ойбек, Куёш қораймас. *Унинг [Кумушининг] нафис қора сочлари орқа-ўнгига тўзғиб, ажиб бир манзара бердилар.* А. Қодирий, Ўтган кунлар.

2 Нозик ва ёқимли. *Икковининг кўзларида эҳтирос чақмоқ чақар, улардан гўё баҳор гулларининг нафис ҳиди анқирди.* С. Анорбоев, Оқсой.

3 Бадийий жиҳатдан жуда юксак, гўзал ва нозик. *Нафис иш.* ■ *Шоирнинг нафис шеърлари ҳозир унинг учун тузсиз сўзлар йиғиндисидан бошқа бир нарса ҳам эмас эди.* А. Қодирий, Ўтган кунлар.

4 эск. айн. бадийий. *Ўртоқ Бақоев ўйлаб туриб сўради: -Нафис адабиёт дарсини сизларга ким беради? А. Қаҳҳор, Адабиёт муаллими.*

НАФИС II Олманинг эрта ҳосилга кирадиган қишки нави.

НАФИСА [а. *نفيسه*] **1: санойи нафиса қ. санойи.** *Лекин кўкариб кела бошлагон ўзбек санойи нафисасининг тегига қайноқ сув тўкилди.* А. Қодирий, Кичик асарлар.

2 Нафиса (хотин-қизлар исми).

НАФИСЛАМОҚ Безамоқ, чиройли тус бермоқ. *Улар [безакчилар] тоннель йўли деворларини ҳар хил шаклдаги гуллар билан нафислайдилар.* Газетадан.

НАФИСЛИК I Нафис, нозик хусусиятга эгалик.

2 айн. нафосат.

НАФЛ [а. *نفل* — зарур бўлганидан ортиқ, қўшимча намоз] Намоз тури. *У кишининг кўп вақтлари тасбеҳ ўғириш, нафл намозларини ўқиш билан ўтар эди.* М. Муҳаммаджонов, Турмуш уринишлари.

НАФЛИЛИК иқт. Товарлар ва хизматларнинг ўз хусусиятларига кўра эҳтиёжларни қондириш хоссаси ёки уларни истеъмол қилишдан ҳар бир шахс оладиган муайян қониқиш. *Ҳар қандай неъматларнинг нафлилик даражаси унинг табиий хоссалари ва сифатига боғлиқ.* Газетадан.

НАФОСАТ [а. *نفاست* — аҳамият; қимматбахо нарса, бойлик] кт. Нарса ва ҳодисаларнинг ташқи кўринишидаги алоҳида мукамалликни, мутаносибликни ифодаловчи белгилар мажмуи; нафислик, гўзаллик, латофат. *Табиатнинг сеҳр ва нафосат тўла манзараси.* ■ *Замиранинг.. аччиқланганда ҳам нафосатини йўқотмайдиган юзи жазманига янада чиройли кўринди шекилли, йигит ширин илжайди.* П. Қодирий, Уч илди.

НАФРАТ [а. *نفرت* — жирканиш; ёқтирмаслик] Бирон-бир шахсга ёки шахсларга, амалий фаолиятга нисбатан қаттиқ ғазаб ва жирканиш туйғуси, ғазаб аралаш жирканиш. *Нафрат қилмоқ.* ■ *Полвонларнинг бирига муҳаббат, иккинчисига нафрат билан қараб турган халқ кўзида, унинг ҳаяжонли юзида икки дунё кураши акс этгандек эди.* М. Исмоилий, Фарғона т. о. *Унсин Мирзакаримбой уйдан нафрат қилгани учун, бир маҳаллада бўлишига қарамай.. сийрак қатнар эди.* Ойбек, Танланган асарлар.

НАФРАТЛАНМОҚ Бирон-бир шахсдан, унинг қилган ишларидан ғазаб аралаш жирканмоқ, нафрат қилмоқ. *Шербек йигитнинг юзсизлигидан нафратланди.* С. Анорбоев, Оқсой. *У ерда, одамлар орасида Ҳаётнинг отаси Мадаминхўжа ҳам бу бедодликдан нафратланиб, Фуломжонга жавдираб қараб турар эди.* М. Исмоилий, Фарғона т. о.

НАФРАТЛИ Нафрат билан тўлиб-тошган; жирканч. *Нафратли хатти-ҳаракат.* ■ *Маҳкамга қисқа ва нафратли назар ташлади-да, шошилмай энгашиди.* П. Қодириев, Уч илди.

НАФРАТОМУЗ [нафрат + ф. *آمیز* — ўхшаш] Нафрат ифодаловчи, нафратнамо. *Ниҳоят, ичкаридан Малика чиқди. Эсонга*

нафратомуз қараб олгач, Саломнинг кўлидан ушлади: -Кетса кетавермайдим, нима қиласиз ялиниб?! - деди у. Ҳ. Аҳмар, Ким ҳақ?

НАФС [а. نفس — қалб, кўнгил; инсон; мақсад, интилиш; гурур, мағрурлик] **1** Ейиш-ичишга, мол-дунёга бўлган эҳтирос. *Менинг нафсим балодур, ёнган ўтга соладир.* Мақол.

Нафс бандаси Нафсидан бошқани ўйламайдиган. -*Нафс бандаси.. Биров ишдан келса, сиз ошдан келасиз, - деди Мели полвон жаҳли чиқиб.* П. Турсун, Ўқитувчи. **Нафси бузуқ** (ёки **ёмон**) Овқатдан сира қайтмайдиган, нафсини тия олмайдиган; ҳирсли. *Нафси бузуқ ҳайитда ўлар.* Мақол. **Нафси ўлик** (ёки **тийиқ**) Нафсини тия оладиган, ҳар нарсага суқ билан қарайвермайдиган. **Нафсига ўт тушмоқ** Нафси ҳаддан ташқари авж олмақ; нафси ҳақалак отмоқ. **Нафсини тиймоқ** Нафсига эрк бермаслик, ўзини сақламоқ. *Кўзинг оғриса, кўлингни тий, ичинг оғриса, нафсингни тий.* Мақол.

2 Шаҳвоний ҳирс. [Фотима ўз-ўзига:] *Бундай ўз нафсларига берилган зотлар бировнинг ҳалол хотинига кўз тикиб, ҳаётда ҳеч бўлмаган ёлғон сўзларни қилиб, ширингина бир турмушни бузмоқчи бўладилар.* Ҳамза, Тухматчилар жазоси. *Бойваччанинг кўзида ҳар бир хотин унинг нафси, ҳирси учун яратилган чиройли мева эди.* Ойбек, Танланган асарлар.

Нафси олинмоқ (ёки **оғримоқ**) Нафсониятига тегмоқ, кўнгли оғримоқ. *Бундан нафси олинган Соли ота жаҳлига чидамай, олдида дўмбиллаб юрган набирасини уйдан кўвди.* А. Қаҳҳор, Олтин водийларни кезганда. У [Фуломжон] *нафси оғриган киши товуши билан қулфи дилини очди.* М. Исмоилий, Фарғона т. о.

НАФСАМБИР с. т. Нафсиламр. *Бошдан оёқ янгидан иш бошлаган колхоз ёшларининг бу ғайрати, нафсамбирга, ҳайратда қоларли эди.* М. Жўра, Қуёшдан нур эмганлар.

НАФСИЗ Фойдасиз, бефойда. *Дунё таниш-билиш, гумонлар юкин Кўтариб кексаяр бекор ва нафсиз.* В. Зоҳидов, Ҳаётбахш бадиият тароналари.

НАФСИЛАМР [а. فى نفس الامر — ҳақиқатда] **1** Ҳақиқатга мос; тўғри, рост. -*Бэ-э-э, гўрними, тақсир!* - деди Сафар бўзчи, - у гапни қўйинг, нафсиламр гап яхши. А.

Қодирий, Мехробдан чаён. -*Уни қаранг, нафсиламрини айтганда, ота-бобомизнинг замонида ҳам бунақанги пахтани ҳеч ким кўрмаган, - деди Шермат.* Ҳ. Нуъмон, Фасллар.

2 кри с. Ҳақиқатда, ҳақиқатан ҳам. *Нафсиламрга, насия жаннатдан кўра бир отим нос афзал!* Н. Мақсудий, Лайлатулқадр. -*Нафсиламр, гапингиз жуда тўғри..* - деди Йўлчи. Ойбек, Танланган асарлар.

НАФСОНИЯТ [а. نفسانيت — худбинлик; ёқтирмаслик, ёмон кўриш] Кишининг ўз назаридаги қадр-қиммати, обрў-эътибори; гурур; иззат-нафс. *Бўтабой ака, масалага кенгроқ, нафсониятга берилмай, холисроқ қараш керак бўлар.* А. Қаҳҳор, Қўшчинор чироклари. *Барот полвон мингбошига ҳайрон бўлиб қараб қолди.* Айниқса, иззатини билмаган, деб ўшқирини нафсониятига тегди. М. Исмоилий, Фарғона т. о.

НАФСПАРАСТ Нафсига берилган, нафсининг қули. *Одамлар орасида савдо ходимларига нисбатан, улар ўз манфаатларини ўйлайдиган, мол-давлат орттиришга ҳирс қўйган нафспараст кишилар, деган гаплар ҳам юради.* Шукрулло, Жавоҳирлар сандиги.

НАФТАЛИН [юн. naphtha — нефть < ф. نفت — нефть] Ўткир ҳидли, қаттиқ оқ кристалл модда (техникада ва куядорли сифатида қўлланади). *Билдим, амман сандиқ очяпти.. Кўп ўтмай, нафталин ҳиди анқиб турган кўйлакни ёзиб, ёнимга келди.* Р. Азизхўжаев, Яшил чайла.

НАФТАЛИНЛАМОҚ Нафталин сепмоқ, нафталин билан ишлов бермоқ. *Лобар учун энг азиз нарса битта: бисот, қўш сандиққа тиқиб нафталинлаб қўйилган моллари.* Ҳ. Фулом. Тошкентликлар.

НАХ с. т. Нақ. -*Бу бир ит!* - деди уста Фарфи. - *Томдаги луқмани ўзи ҳам елмайди, бошқага ҳам едирмайди, нах итнинг ўзи!* А. Қодирий, Ўтган кунлар. [Холмат Қодирқулга:] *Яхши ҳам келганим, йўқса, зиёфат деб нах жанозангизнинг тепасидан чиқар эканман!* Ҳамза, Бой ила хизматчи.

НАХТ Нақ, худди, айнан. *Кўзлари ёмон аблаҳнинг, нахт жодугарнинг кўзлари, Отин! Сиз, у келганда, ташқарига қарашдан эҳтиёт бўлинг!* П. Турсун, Ўқитувчи.

НАХЎТАК Бир йиллик сертук ўт. *Сансариқ қоқилар, кўк-қизғиш нахўтаклар орасида узоқдан қип-қизил гиламга ўхшаб кўзга ташланадиган — қийғос очилган лолақиз-*

галдоқлар бор эди. П. Қодиров, Юлдузли туңлар.

НАЦИОНАЛИЗАЦИЯ [ингл. nationalisation < лот. natio, nationis — миллат, халқ] Айрим шахс ёки бирлашмаларнинг хусусий мулки бўлган ер, ишлаб чиқариш корхоналари, транспорт, банк ва б. ларни давлат ёки жамият мулкига айлантириш, давлат ихтиёрига олиш. *Ерни национализация қилиш.*

НАЧОРА *кри. с. вэф.* Илож қанча, нима ҳам қила олардик; илож йўқ. *Начора, ҳаёт ниманики тақдим этган бўлса, ўшандан ортигини қайтиб олмайди. Ў. Ҳошимов, Қалбингга кулоқ сол. -Начора, бошга тушганни кўз кўрар экан-да, — деди Эргашев. Н. Сафаров, Оловли излар.*

НАША [а. نشئه — кайф, маст бўлиш; мастлик; лаззат, хузур қилиш] **1** Поясидан тола, уруғидан ёғ олинадиган баланд бўйли техника ўсимлиги. *Заҳарли гиёҳлардан наша ҳам киши организмга ёмон таъсир қилади. Газетадан.*

2 Шу ўсимликнинг барги ва поясидан, ширасидан тайёрланадиган, кайф берадиган наркотик модда. *Кийими исқирт бу девона нашани кўп чекиб, мияси айниганидан, оғзига келган гапни қайтармай алжирар эди. М. Муҳаммадҷонов, Турмуш уринишлари.*

Наша қилмоқ Қаттиқ таъсир этмоқ, таажжубга солмоқ; айил ботмоқ. *Аширнинг гапи Ҳўжабековга наша қилди. Хохолаб кулди. С. Анорбоев, Оқсой. Раис ёлғиз қолгач, парткомнинг сўзлари баттар наша қилди. А. Кўчимов, Ҳалқа.*

НАШАВАНД Наша чекишга ўрганиб қолган; банги. *-Шофёрни топдик, ҳозир келади! — деди Камол ака ва ҳазиломуз: -Ҳа, намунча нашасидан айрилган нашаванддай бошингиз осилиб қолди? — деб кулди. О. Ёқубов, Бир фельетон қиссаси.*

НАШАВАНДЛИК Наша чекишга берилганлик; бангилик; гиёҳвандликнинг бир тури. *Отам қилмаган шўхлик йўқ бўлса керак. Қимор ўйнаган, улоқ чопган, нашавандлик қилган.. дейишади. М. Исмоилий, Фарғона т. о.*

НАШАПОЯ 1 Нашанинг пояси.

2 Наша экилган жой, майдон. *Тоғ орасидаги кўз илғамас жойга экилган нашапоя йўқ қилинди. Газетадан.*

НАШАТИР [р. нашатырь < а. نشادر — аммиак] **1** ким. Аммоний хлорид, рангсиз

кристалл модда, новшадил (техника ва тиббиётда қўлланади).

Нашатир спирт Аммиакнинг сувдаги ўн фоизли эритмаси. *Малоҳат палаткага кириб келганда, врачлар довулдан қўрқиб, ҳушидан кетган онасиса нашатир спирт ҳидлатаётган эдилар. И. Раҳим, Тинимсиз шаҳар.*

2 с. т. Нашатир спирт.

НАШВАТИ Нокнинг сершира, сувли, оч сариқ, қизил ёки сарғиш кўк йирик нави. *Тўғайсари Муртоз узатган нашватини артмаёқ бир тишлади. Ш. Холмирзаев, Қил кўприк.*

НАШИДА [а. نشيده — кўшиқ, мадҳия] *поэт. Кўшиқ; тантанали шеър, мадҳия. Баҳорнинг кўнгилларни аллаловчи нашидаси. ■ Кеча ғазаб билан юмилган лаблар Бугун куйламоқда эрк нашидасин. Ф. Фулом.*

НАШР [а. نشر — тарқатиш, тарғибот; чоп этиш, босиб чиқариш] **1** Босма асар чоп қилиш, чиқариш. *Китобни нашрга бермоқ. Нашрга тайёрламоқ. Нашр этмоқ (қилмоқ).*

2 Босма асар. *Фанлар академияси нашри. ■ Демократия шароитида турфа хил нашрларнинг пайдо бўлишини, шубҳасиз, ҳаммамиз табиий ҳол деб биламиз. Газетадан.*

3 Босма асарнинг ҳар бир чиқарилиши ёки тури. *Китобнинг тузатиш ва тўлдирилган нашри. Илмий нашр. ■ Оммавий информацияларнинг калити бўлган телеграф агентликларининг қон томирлари матбуот нашрларининг ҳамма тармоқларига бориб туташади. Х. Ёдгоров, Ҳаёт тўлқинлари.*

НАШРИЁТ [а. نشریات — нашр ва тарғибот ишлари] **1** Босма асарлар тайёрлаш ва нашр этиш ишлари, ноширлик.

2 Шундай ишлар билан шуғулланувчи муассаса. *“Фан” нашриёти. Фафур Фулом номидаги Адабиёт ва санъат нашриёти.*

НАШРИЁТЧИ Нашриёт ходими, нашриётда ишловчи киши.

НАШРИЁТЧИЛИК *айн. ноширлик. Нашриётчилик кундан кунга қулоқ ёймоқда.*

НАШТАР [ф. نشتر] *айн. ништар.*

НАШЪА [а. نشئه — мастлик, кайф қилиш; лаззат, хузур (маза) қилиш] *поэт. Эстетик лаззат, хузур, гашт. Ҳар ишининг ўзига яраша нашъаси бор. ■ Далаларнинг нашъасин уй ичинг билан сурдинг, Ўз бойлигинг ўзингда, ишрат, сафолар қурдинг. Файратий.*

Нашъа қилмоқ **1)** лаззат олмоқ, хузур қилмоқ, гашт қилмоқ; **2)** *айн. наша қилмоқ*

қ. **наша**. Саломнинг гапи борган сари унга кўпроқ *нашъа* қилар эди. Х. Аҳмар. Ким ҳақ?

НАШЪАЛИ *позт*. Роҳат, лаззат, ҳузур бағишловчи, гаштли. *Узоқ вақт жанг оловларида уйқусиз, хатарли кунларни ўтказган бу йигит учун.. сой бўйлари янада нашъали ва оромбахш туюлар эди*. С. Аҳмад, Қадрдон далалар.

НАШЪУ НАМО [а. نشوونما — юсак ҳузур-ҳаловат] **1** Юқори даражадаги эстетик лаззат, ҳузур, гашт. *Ҳаётнинг нашъу намолари*. ■ *Хоҳласа — каклик ови қиларди*. Шундай *нашъу намо билан яшарди*. П. Турсун, Ўқитувчи.

2 *эск. кт*. Тараққиёт, ривож, гуллаш. *Ҳаётнинг нашъу намоси адолат нурига боғлиқ*. Ойбек, Навоий.

НАЪЛ [а. نعل — тагчарм; енгил оёқ кийими; тақа] *эск. кт. айн. нағал*.

НАЪЛАТ с. т. Лаънат.

НАЪМА [а. نعمة — куй, оҳанг, наво] *айн. нағма*. *Чигиртканинг чириллаши, кеча ҳашаротларининг наъмаси кучли шамол товуши билан кесилди*. А. Қодирий, Меҳробдан чаён.

НАЪМАСОЗ Созанда, мусиқачи. *Фафур Гулом чинакам устоз, оташин қалбли наъмасоздир*. М. Шайхзода, Шеърятимизнинг байроқдори.

НАЪМАТАК [ф. نعمتك] **1** Гули хушбўй ва ҳар хил рангли, меваси ширали, шакли ва ранги ҳар хил, ёввойи ҳолда ўсадиган ёки элма усулда ўстириладиган буталар туркуми (Баъзи турлари тиббиёт, парфюмерия ва фармацевтикада ишлатилади). *Йигитали қоронғида тимискаланиб, чапга бурилганда, наъматакнинг тиканли шохлари бехосдан юзига урилди*. Д. Нурий, Осмон устуну.

2 Шу ўсимликнинг қизил доривор меваси. *Наъматак, қорақанд, зирк, лимон, турп ва бошқа кўп сабзавотларда «С» витамини бўлади*. М. Тўйчиев, Витаминларни унутманг.

НАЪРА [а. نعره — пинғиллаб гапириш; бўкириш] Ларзали, ваҳимали қаттиқ овоз. *Бомбардимон кучайгандан кучайиб борди. Унга узоққа отар замбаракларнинг наъраси кўшилди*. Шухрат, Шинелли йиллар. *Кўкрагидан отилиб чиққан қудратли наъра узоқ-узоқларга таралади*. С. Анорбоев, Оқсой.

Наъра тортмоқ (ёки **урмоқ**) Ларзали, қаттиқ товуш чиқармоқ. *Сен кетган сўнг бир озроқ уруш қилдим, Наъра тортиб, мен ҳам майдонда турдим*. «Алпомиш».

НАЪТ [а. نعت — таъриф-тавсиф, васф; мақтов] Мумтоз адабиётда: катта ҳажмли шеърый асарлар бош қисмида келадиган, асосан пайғамбарлар шаънига айтилган мақтовдан иборат шеърый парча.

НАЯКИ [ф. نياكى] Най орқали чекиш; най билан тортиб чекиладиган. *Наяки қилмоқ*. ■ *Уч йил ичида у [Мамараим] кирмаган кўча қолмади*. *Наякини ўрганди, қора дори еди, тақяларга кириб, кўкнори ичди*. М. Исмоилий, Фарғона т. о. *Чапани йигитлар қиттак наяки қилиб олдилар-да, хуфтондан огдириб, Қазнига жўнадилар*. Ойбек, Улуғ йўл.

НАҚ [а. نقد — бор, мавжуд, қўлдаги пул] *рвш. 1* Айтилганнинг, кўзда тутилганнинг ўзгинаси; худди, айни. — *Отангизга раҳмат, Юсвали тоға!* — деди бошини қимирлатиб *Мели полвон*. — *Гапнинг нақ онасини айтдингиз-қўйдингиз!* П. Турсун, Ўқитувчи.

2 Қоқ, айни, худди. *Нақ ярим кечада. Нақ шу пайтда*.

3 Оз бўлмаса; деярли. *Нақ йиқила ёздим*.

4 Роса, обдан. *Баҳорда чунонам кўш тортдики, жонвор қорабайирни нақ.. терга тушириб юборди*. М. Исмоилий, Фарғона т. о.

5 Бўлмаса, акс ҳолда. [Самоварчи] *Товушини баланд қўйиб, ўзича валдирар эди: -Ҳой, аравакаш бола, отингни торт, нақ тезагини дўппингга солиб бераман!* Ойбек, Танланган асарлар.

НАҚАДАР *рвш.* Қандай, қанчалик. *Элмурод янги мактаб биноси қишлоқ тарихида нақадар улуғ иш эканлигини, бу улуғ ишга озми-кўпми ўз меҳнати синганини ўйлаб, ўзидан ўзи гуруланди*. П. Турсун, Ўқитувчи. *Тошкент тонготари нақадар гўзал*. Файратий.

НАҚАРОТ [а. نقارات — гоҳ-гоҳ, такрор-такрор тақиллатиш, чертиш] Кўшиқнинг ҳар бир бандидан кейин қайтарилувчи, такрорланувчи қисми. *Юрагимга ишқинг уругини Билсанг эдинг эканлигингни. Қалбимнинг шўҳ, соз қўшиғининг Нақароти эканлигингни*. Х. Салоҳ.

НАҚБ [а. نقب — тешик, тирқиш; ер ости йўли] Ер тагидан кавланган йўл. *Мўғуллар аксари ер остидан нақб қазиб, шаҳарга кириб олар, ўз аскарларида дарвозани очиб берар эдилар*. М. Осим, Ўтрор.

НАҚД [а. نقد — қўлда бор, мавжуд пул] **1** Пулини дарҳол тўлаш шarti билан бўлган ёки бўладиган савдо муомаласи. *Нақдга олмоқ. Нақдга сотмоқ*.

2 Қўлда, ихтиёрда бор, фойдаланиш ёки муомалага киритиш учун тайёр. *Нақд пул. Нақд қилмоқ.* ■ Сафохон тўра-чи? Бу зот унинг эзгу ниятини қувватлабгина қолмай, қўлига нақд маблағ ҳам тутқазди! К. Яшин, Ҳамза. -Бўлди, адаш, бўлди! — деди Колянинг олдига борган Қудрат дўпписини осмонга ташлаб. — Рухсат.. арава ҳам нақд! Ҳ. Назир, Сўнмас чақмоқлар. Сойма-сой жилиб, ерларни бир-бирига қўша-қўша, ҳозир элик гектарни нақд қилдик. Ҳ. Назир, Маёқ сари.

3 Аниқ, ҳал бўлган, тайёр. [Фотима:] Ҳўшиша кириши нақдга ўхшайди.. Пешонам қурсин.. сени катта қилиб берганим кам экан, энди боласини ҳам катта қилиб бераман, шекилли. А. Қаҳҳор. Асарлар.

НАҚДИНА [а. + ф. نقدینه — бор, мавжуд пул] эск. кт. Нақд пул. Ўғлим, энди бозор-ўчарнинг ҳам пайидан бўлинг.. Нақдина пул — ҳам енгил, ҳам қиммат, ҳам яширишга осон бўлади. Ф. Фулом, Шум бола.

НАҚДЛАМОҚ Нақд қилмоқ, тайёр қилмоқ. Кўмир келган бўлса-я? Эсингни едингми, Қодир, сенга кўмирни нақдлаб турибдими шу топда, — ўзини ўзи койирди [Қодирхўжа]. — Яна бирон корхона келаётгандир, кутиб олиш керак. Р. Файзий, Ҳазрати инсон.

НАҚДОНА айн. **нақдина**. -Назри нақдона бўлмаса, кўнгил ҳам жойига тушмайди, иш ҳам юришмайди, — деди Ҳожжи хола, М. Исмоилий, Фарғона т. о.

НАҚИБ [а. نقیب — бошлиқ, раис] Хива хонлигидаги ҳарбий мансабдор. Расмий қабул маросимларида нақиб хоннинг сўл томонида биринчи ўринда ўтирган.. хазинадан таъминланиб турилган. «ЎзМЭ».

НАҚЛ [а. نقل — узатиш, ўтказиш; таржима; кўчириб ёзиш; қайта ҳикоя қилиш] 1 Халқ томонидан тўқилган ва авлоддан авлодга ўтиб келаётган оғзаки ҳикоя; ривоят. Нақлларга, қўшиққа, ривоятларга, Мақолларга, эртакка, ҳикоятларга Мен умримда жуда кўп қулоқ осибман. М. Шайхзода.

2 Умуман, бирор кимса, нарса ёки унинг тарихи ҳақидаги гап, ҳикоя. -Тўхтанг, мен сизга бу телба аёлнинг нақлини айтиб берай, — деди ота.. Ҳ. Фулом, Машғал. Умарқул Тўлқин билан Учқунни икки ёнига ўтқазиб олиб, саёҳатини нақл эта бошлади. Ҳ. Фулом, Машғал.

3 Халқ томонидан яратилган ҳикматли гап. Халқимизда “Ҳисобини билмаган ҳамёнидан айрылади” деган нақл бор.

НАҚЛИЁТ [а. نقلیات — анъанавий фанлар; транспорт] эск. 1 Халқ хўжалигининг юк, одам ва ш. к. ташиш билан боғлиқ бўлган тармоғи; транспорт. *Нақлиёт ширкати. Нақлиёт воситалари.*

2 Юк, одам ташиш. У вақтларда ҳали темир йўл қурилмаган, шунинг учун нақлиёт фақат туя карвони билан Қизилқум чўли орқали амалга оширилди. С. Айний, Эсдаликлар.

НАҚШ [а. نقش — расм, безак; ўйма тасвир, гул] 1 Ўйиб, тикиб, тўқиб ёки бўёқ билан ишланган гул, безак. *Нафис нақш билан безатилган бино.* ■ Гавҳар ойна устига солинган катта бир ўйма нақш олдига Маҳкамни тўхтатди. П. Қодиров, Уч илдиз.

2 кўчма Кўрк, зийнат. Одам борки, одамларнинг нақшидир, Одам борки, ҳайвон ундан яхшидир. Мақол. ■ Меҳнат бизда шараф, мардлик ишидир, Меҳнат фазилатдир, инсоннинг нақши. Э. Раҳим, Янги қадам.

Нақш олма Олманинг рангдор ва қизғиш йўллари бўлган бир тури. Адолат бутунлай ўзгариб кетганга ўхшайди, юзи ойдек тўлиб, нақш олмадек қизариб турибди. И. Раҳим, Чин мухаббат.

НАҚШБАНД [а. + ф. نقش‌بند] айн. **нақшдор**. Осмонўпар биолар, нақшбанд маъмурий идоралар, ҳашиаматли маданият саройлари кўзни қамаштиради. Газетадан. Тўрда нақшбанд арк. М. Исмоилий, Фарғона т. о.

НАҚШБАНДИЙЛИК айн. **нақшбандия**. Алишер Навоий нақшбандийлик асосларини қаноат тариқи деб атаганлар. Газетадан.

НАҚШБАНДИЯ [а. + ф. نقش‌بندی] Тасаввуфнинг 14-асрда асос солинган тариқатларидан бири. Нақшбандияда одамнинг қадри унинг мансаби, бойлиги билан эмас, маънавий комиллиги билан ўлчанади. Газетадан.

НАҚШДОР [а. + ф. نقش‌دار — нақшга эга, нақши бор, нақшли] Нақш солинган, нақш билан безатилган, нақшланган; нақшли, нақшинкор. Шипи шарқча нақшдор уй, нақшлари эскириб, ранги хираланган, лекин ҳали диққатни тортарли ҳолда. Ойбек, Танланган асарлар. Бир гал Давлатёр билан Элмурод қишлоқ оралаб кетаётганларида, бир нақшдор дарвоза очилди-ю, озғин бир йигит от етаклаб чиқди. П. Турсун, Ўқитувчи.

НАҚШИЙ [а. + ф. نقشين — нақшли, нақш билан безатилган] айн. **нақшдор**. Шомга яқин шу нақшин дарвоза тагига “Форд” машинаси келиб тўхтади. Ҳ. Фулом, Машғал. Қаторасига биридан иккинчисига кирадиган тўртта катта-кичик нақшин уй олдида баҳаво бир шийпон. С. Аҳмад, Қадрон даладар. Нақшин нафас ичида булбул тарона қилмас. Э. Воҳидов.

НАҚШИЙКОР айн. **нақшдор**. Нақшиинкор уй. Нақшиинкор кўза. ■ Хонанинг тўрт томондаги нақшиинкор жавонлар китобга лиқ тўла эди. О. Ёқубов, Диёнат.

НАҚШКОР [а. + ф. نقش کار — нақш соловчи, нақш ишловчи] 1 айн. **нақшдор**. Олимхон эликбошининг кўнглидагидай зиёфат: жиҳозларга бой, гўзал, нақшкор меҳмонхонада ўтиради, яна.. донгдор бойвачча билан суҳбат! Ойбек, Танланган асарлар.

2 айн. **наққош**. Нақшкор уста.

НАҚШЛАМОҚ Нақш бермоқ, нақш билан безамоқ. Деворларни нақшламоқ. ■ Бу ерда серсаватл бир киши клуб деворини нақшлаётган усталарнинг ҳунарига маҳлиё бўлиб турарди. Газетадан.

НАҚШЛАНМОҚ кўчма Сақланиб қолмоқ, муҳрланмоқ. Буларнинг ҳаммаси гўдак хотиранда нақшланиб қолган бўлса ажаб эмас. К. Яшин, Ҳамза. Бир зум қараш билан юракка нақшланган унинг чеҳрасини яна кўз олдида жонлантиришига тиришди. Ойбек, Танланган асарлар.

НАҚШЛИ айн. **нақшдор**. Саҳни торроқ, лекин тўрт томони уй-айвонлар билан ўралган ташқари ҳовлидаги нақшли.. меҳмонхонанинг бирида қат-қат шоҳи кўрпачаларда, иссиқ танчага суқилиб Мирзакаримбой ўтирар эди. Ойбек, Танланган асарлар.

НАҚШЧИ айн. **наққош**.

НАҚҚОШ [а. نقاش — ўймакор; бўёқчи] Нақш ишловчи, безак, гул яратувчи уста. Кўзим жимирлаб кетди, Нақшларига қарасам. Дейдилар: Уста Ширин, Наққошини сўрасам. Қ. Муҳаммадий.

НАҚҚОШЛИК Нақш чизиш, ўйиш билан шуғулланувчи соҳа; наққош касби. Ҳозир шаҳарда кўлаб кулолчилик ва наққошлик устахоналари ишлаб турибди. Газетадан.

НАҒАЛ [а. نعل — тагчарм, пошна; тақа] Оёқ кийимининг пошнасига ёки тагчарми учига қоқиладиган тақача. Ботинка нағалининг кўча тошларига урилиб чақиллаши

эшитилди-ю, Маҳкамнинг хаёли бўлинди. П. Қодиров, Уч илди.

НАҒМА [а. نغمه — куй, оҳанг, наво] 1 эск. Куй, оҳанг, наво; мусиқа товуши. Тол шохларини тўлдирган паррандалар нағмаси ҳам ортиқчалик қилди. Ҳ. Фулом, Машғал. [Комил:] Бу хушнуд нағмалардан бенасиб бўлманг, деб атайин уйғотдим, бир эшитиб қолинг! О. Ёқубов, Айтсам, тилим куяди, айтмасам — дилим.

2 Лабда юргизиб пуфлаб чалинадиган мусиқа асбоби. Болалар тарқалишади. Қоровой нағмасини чалади.. Р. Файзий, Сен етим эмассан.

3 кўчма салб. Ортиқча қилиқ, харша. Э, бу одамнинг нағмаси кўпга ўхшаб қолди. Уйгун, Ҳуррият. У [Ибодилла] дорини ишлатдими, бас, турли-туман нағма чиқаради. Ж. Шарипов, Хоразм.

4 кўчма с. т. Ортиқча ташвиш, дахмаза, икир-чикир. Тўйнинг нағмаси кўп булар экан.

НАҒМАГАР [а. + ф. نغمه گر — нағма қилувчи, нағмачи] шв. Созанда, мусиқачи. Чавандозлар катта унум қилади. Қирқ кунгача узмай тўйни беради, Уйинчи, нағмагар — бари келади. «Алпомиш».

НАҒМАЧИ 1 Нағма চালувчи созанда.

2 эск. Умуман мусиқачи.

НАҲ: наҳ урмоқ Ёмонлаб қадрини пастга урмоқ, ерга урмоқ, камситмоқ. Камбағал, қашшоқни наҳ уриб келдинг, Бойликнинг домасин бизларга қилдинг. «Фольклор».

НАҲАЛ шв. Нағал. Аламига чидолмаган бири пошнасига наҳал қоқилган калта кўнжли этиги билан бошига тепди. В. Ғофуров, Вафодор.

НАҲАНГ [ф. نهنگ — кит; тимсоҳ] 1 айн. **акула**, **кит**. -Заминдорларга қарам бўлгандан кўра, наҳанг оғзига бош суққан яхши, — деди Абдулқодир уҳ тортиб. Ойбек, Нур қидириб. Дарахтлар қоплаган бу оролча бениҳоя дилбар, қирғоқнинг яқинида наҳанглар сузиб юрармиш. 3. Акрамов, Ҳиндистон лавҳалари.

2 кўчма Ўта юлғич; ўзлаштирувчи. У [Анорхон] наҳанг, сен лаққа.. Раислик муҳринг билан бирга ютиб юборади. И. Раҳим, Ихлос. Нафси наҳанг Ашууров ҳаш-паш дегунча колхознинг жуда кўп пулини камкўстига сарфлаб юборди. Газетадан.

3 айн. **балиқ йили** қ. **балиқ** I 3.

НАҲВ [а. نحو — томон; чекка, бурчак; синтаксис] эск. айн. **синтаксис**.

НАҲОР [а. نهار — туш пайти, кундуз вақти] **1** Кундуз, кундуз кун.

Лайлу наҳор Кеча-кундуз. *Сени соғинганда лайлу наҳорлар, Остона тубида бўлдим интизор.* Т. Тўла.

2 Тонг ёришган пайт; эрта тонг. *Колхоз хазиначисин қўли-қўлига тегмас, Танда каби уланур оқишмига наҳори.* Ф. Фулом. *Кўз тутуди далада баҳор.. Кутмакдадир эл туриб наҳор.* Ҳ. Олимжон. *Бўри ўғлини наҳорда уйқудан уйғотиб, тухум ютқизди.* Т. Мурод, Юлдузлар мангу ёнади.

3 кўчма Эрта нонуштадан олдин, нонушта қилмай, оч қоринга. *Наҳор юрмоқ. Наҳорга дори ичмоқ.*

НАҲОРИ айн. **наҳорлик**. [Гулжон:] *Жиндак наҳори қилайлик, шояд ҳордиқларингиз чиқса.* Ҳамза, Паранжи сирлари.

НАҲОРИЙ сфт. Наҳорга хос; наҳордаги. *Қай томон боқар бўлсам, Бу тириклик боғида Баҳорий илиқлигу Наҳорий тиниқлик бор.* Э. Воҳидов, Муҳаббатнома.

НАҲОРЛИК Эрталабки овқат; нонушта. *Эрталаб Аҳмад Ҳусайн бир пиёла чой ва бир бурда чапати билан наҳорлик қилиб, ўрнидан турди.* Ойбек, Нур қидириб.

НАҲОТ(КИ) юкл. Сўроқ ва таажжубшубҳа маъносини билдиради. *Наҳот ўғлимга ўшандоқ қаттиқликни раво кўрсам!* А. Қаҳҳор, Кўшчинор чироқлари. [Сифат буви:] *Айланай, қизим, наҳотки бошингга давлат қуши қўнса-ю, уни калтак олиб, ўзинг қувласанг!* Ҳамза, Бой ила хизматчи.

НАҲР [а. نهر — дарё] эск. кт. айн. **дарё**. *Ёвнинг умидлари соврилди кўкка, Сен кечиб ўтганда Одер наҳридан. Жаҳоннинг тақдири тўғри ҳал бўлди, Сен мағрур ўтганда душман шаҳридан.* Уйғун. *Қулоғимга номинг кирганда, Қумлик каби ташна боқурман. Сенинг жаннат водийларингдан Наҳрлардай тўлиб оқурман.* Ҳ. Олимжон.

НАҲРА Девор туйнуғи. *Пахса деворнинг наҳрасидан хотин кишининг боши кўринди.* С. Аҳмад, Қадрдон далалар. *Холдорхон жавоб кутмай, тешани олиб юзуриб кетди. Кейин тирмашиб чиқиб, теша билан девор тепасидан наҳра очди.* С. Зуннунова, Гулхан. *Эрталаб ҳовли супураётган келинойиси девор наҳрасига ҳайрон бўлиб қараб турганда,*

Моҳидил кўзини қисиб қўйди. С. Зуннунова, Гўдак ҳиди.

НАҲРУЛҲАЁТ [а. نهر الحيات — тириклик дарёси] эск. кт. Ҳаёт дарёси. *Мана, Туямўйин! Бунёд бўлади Улкан наҳрулҳаёт ва нур чаимаси Ф. Зоҳид, Туямўйин қўшиғи.*

НАҲС [а. نحس — бахтсизлик; мусибат; омадсизлик] **1** Фусл қилмаган, нопок.

Наҳс босган ёки наҳсда қолган Фусл қилмаган, ювуқсиз ҳолатли. *-Менинг ҳолимга раҳм қилинг, хўжайин! -Сен наҳсда қолгансан. Сенга ёрдам қилишнинг фойдаси йўқ.* С. Айний, Дохунда. *Чолнинг ғазоби тутатди. Ўғлини "шумқадам, наҳс босган", деб сўқди.* Ойбек, О. в. шабадалар.

2 сўк. Ифлос, нопок; разил, палид. *-Бўлиб қолдинг, наҳс! — дейди Мирвали банги, — етти отангинг ўраси ҳам бунчалик бугдойни кўрмаган.* А. Қодирий, Обид кетмон. *Йўқ бўл, наҳслар, шумғиялар!* Ҳамза.

3 кўчма с. т. Иши олдинга босмаган, юришмаган. [Мулладўст:] *Бу дунё ҳамма ёғидан бизни сафар қочди қилган, ўшанинг учун эллик тўртга кирибманки, иқболим наҳс, фалокатдан сира ажралолмайди.* Ҳамза, Майсаранинг иши.

НЕ сўр. олм. **1** Нарса-предмет ҳақида сўроқни ифодалайди; нима? *Сенга не бўлди? — Энди сенга нелар айтийин?* Ҳ. Олимжон. *Не дейди сенинг ўсган ерингни?* «Гўрўғли».

2 Белги ҳақида сўроқни билдиради; қандай? *Не айби бор?*

3 Маъно кучайтириш учун қўлланади. *Акам содда дехқон йигитга ўхшайди, содда бўлгани яхши. Негаки, шумларнинг қўлига тушиб, не балоларга гирифторм бўлдим.* Ойбек, Танланган асарлар. [Қодирқул:] *Мен учун не бахтли кундирки, тўрамиз қоронғи кулбамни ёритдилар!* Ҳамза, Бой ила хизматчи.

НЕАНДЕРТАЛЛАР [нем. ибтидоий одам қолдиқлари дастлаб (1856 йил) қазиб топилган Неандертал (Германия) водийси номидан] Инсоният тадрижий тараққиётида питекантроп билан ҳозирги одам ўртасида жой эгаллаган қадимги қазилма одам тури. *Осиё, Ўрта Осиё ва Африкада топилган неандерталларнинг буйи унча баланд бўлмаган.* Газетадан.

НЕВАРА айн. **набира**. *Келинлар далада, неваралар боғча ва ясида, ҳовли жимжит.* И. Раҳим, Чин муҳаббат.

НЕВАРА-ЧЕВАРА Набира(лар) ва чевара(лар). Бу файзли хонадонга йиғилган ўғил-қизлар, нева-чеваралар катта ҳовлини лиқ тўлатиб ўтиришибди. Газетадан.

НЕВР-, НЕВР(О)-, НЕЙРО- [юн. neuron — томир, нерв] Ўзлашма байналмилал қўшма сўзларнинг биринчи қисми бўлиб, шу сўзларнинг нервларга, нерв системасига алоқадорлигини билдиради (мас., *невроз, неврология*).

НЕВРАЛГИЯ [невр.. + юн. algos — оғриқ] тиб. Нерв ёки унинг бирор қисми бўйлаб тарқаладиган кучли оғриқ.

НЕВРАСТЕНИЯ [невр.. + юн. astheneia — заифлик, толиқиш] тиб. Нерв системасининг узоқ вақт ақлий ёки эмоционал зўриқиши, руҳий изтироб, физиологик етишмовчиликлар (мас., тўйиб ухламаслик ва овқатланмаслик каби) натижасида келиб чиқадиган касаллик.

НЕВРОЗ [қ. *невр(о)-*] тиб. Узоқ вақт давом этган оғир ички кечинмалар, руҳий изтироблар таъсирида пайдо бўладиган асабий-руҳий касалликларнинг умумий номи. *Умумий невроз. Юрак неврози.* ■ *Невроз эса барча асаб касалликлари орасида сабаби аниқ хасталик саналади.* «Фан ва турмуш».

НЕВРОЛОГ Неврология мутахассиси, нерв системасини ўрганувчи шифокор.

НЕВРОЛОГИК Неврологияга, нерв касалликларига оид. *Неврологик клиника.*

НЕВРОЛОГИЯ [невр(о).. + юн. logos — фан, таълимот] тиб. Нормал ва патологик ҳолатдаги нерв системасининг тузилиши ва фоллатини ўрганувчи фан.

НЕВРОПАТОЛОГ Невропатология мутахассиси, врач.

НЕВРОПАТОЛОГИЯ [невр(о).. + патология-] Тиббиётнинг нерв системаси касалликларини, уларни даволаш ва олдини олиш чора-тадбирларини ўрганувчи бўлими.

НЕГА сўр. олим. **1** Ҳаракат ёки ҳодисанинг сабаби ҳақида сўроқни ифодалайди; нима учун? *Қани, ростини айт-чи, нега қўнимсизсан?* А. Қаҳҳор, Қанотсиз чигтак.

2 Риторик сўроқ гапларда сўзловчининг айтилган, бўлиб ўтган ёки кўзда тутилган ҳаракат, ҳодиса ва ш. к. ларга салбий (афсусланиш, ачиниш) муносабатини билдиради. *Фам, қўрқув титроғи билан эзилган Гулнор кўрпага ўралиб ўйлади: Нега кеча қочмадим?* Ойбек, Танланган асарлар. *Мен*

айтаман, болам, қўлимдан шунча иш келар экан, даданг ҳаёт вақтида нега “берсанг — ейман, урсанг — ўламан”, деб ўтирган эканман! А. Қаҳҳор, Қўшчинор чироклари.

Нега денг (ёки десанг) Чунки, сабаби шуки, негаки. *Маслаҳатга ҳаммаси чаққон. Нега десанг, маслаҳатгўйлик осон нарса-де: тили қимирлайди, холос.* Ойбек, Танланган асарлар.

НЕГАДИР гум. олим. Ҳаракат ёки ҳодиса сабабининг ноаниқлигини билдиради; нима сабабдандир, нима учундир. *Негадир бу кишининг ўзи ҳам, совғаси ҳам Навоийга ёқмаган эди.* М. Осим, Сеҳрли сўз. *Отабек тасдиқ ишорасини бергач, негадир бир энтикиб қўйди.* А. Қодирий, Ўтган кунлар.

НЕГАКИ сабаб боғл. Сабаб шуки, чунки. *Негаки, ҳозирда менинг кўз ёшларимгина эмас, бутун борлигим сиёҳдир.* А. Қодирий, Ўтган кунлар. *Яхши ишласам, албатта, чакки бўлмайди. Негаки, булар қариндошларим, ҳаммадан юлсалар ҳам, мендан юлмаслар.* Ойбек, Танланган асарлар.

НЕГАТИВ I [лот. negativus — манфий, салбий] фото, кино **1** Оқ ўрнига қора, қора ўрнига оқ бўлиб тушган фототасвир ва шундай тасвир туширилган пластинка ёки плёнка; зид. **позитив.** *Негативдан позитивга сурат кўчирмоқ. Негативни сақлаб қўймоқ.*

2 сфм. Оқ ўрнига қора, қора ўрнига оқ туширилган; шундай фотосурат олиш учун ишлатиладиган. *Негатив сурат.*

НЕГАТИВ II сфм. Тескари, акс мазмундаги; нотўғри, яроқсиз (маълумот, хабар, гап-сўз). *Негатив маълумот.* ■ *..анжуманда ҳаётнинг негатив ҳодисалари очиб ташланди.* Газетадан.

НЕГИЗ I Бирор нарсанинг ҳамма устки қисмларини тутиб, кўтариб турадиган остки қисми; пойдевор, фундамент. *-Албатта, янги усулда, — дейди Берди татар, — негизи ўн қаторча пишиқ ғишт, юқориси хом ғишт.* А. Қодирий, Обид кетмон.

2 Бирор нарсанинг асосини ташкил этган омил; база, асос. *Ўзбекистонда чорвачиликни саноат негизида ташкил этиш борасида кўп ишлар қилинди.* Н. Мавлонов, Қорамолчилик. *Хужайра ҳар қандай организмнинг негизи ҳисобланади.* Газетадан.

3 тлш. Сўзнинг асосий маъносини билдирувчи, сўз ўзгартувчи қўшимчалар олманган қисми. *Негиз ва қўшимча.*

НЕГОВ Қовоқни ўйиб ясалган идиш. *Саидий неговда анҳордан сув олиб ичди.* А. Қаҳҳор, Сароб. *Ўзим ҳам озиб кета бошладим.* Бурним осилиб, негов қовоқдек бўлиб кетди. Х. Тўхтабоев, Ширин қовунлар мамлакатаи.

НЕГР [исп. negro < лот. niger — қора] қ. негрлар. *Негр халқи. Негр аёл.*

НЕГРЛАР Қора ирққа мансуб одамларнинг кўп тилларда қабул қилинган номи; Африканинг туб аҳолисини ташкил этувчи қора танли халқ; занжи; ҳабаш.

НЕДИР гум. олл. Нарса ёки ҳаракат ноаниқлигини билдиради, нимадир. *Кумуш меҳмонхонага киргандан сўнг ҳам, терсайиб, тоқчалардан недир ахтаргандек юрина бошлади.* А. Қодирий, Ўтган кунлар.

НЕЙЛОН [ингл. nylon] Табиий ипакдан ҳам пишиқ ва мустаҳкам сунъий тола ва шу толадан тўқилган газлама. *Товони қора нейлон пайпоқ чиқибди, ҳай қизлар, ким кўрди?* А. Мухтор, Туғилиш.

НЕЙРОАНАТОМИЯ [нейро.. + анатомия] Анатомиянинг нерв система шакли ва тузилишини ўрганадиган бўлими.

НЕЙРОДЕРМИТ [нейро.. + юн. derma — тери] тиб. Терининг руҳий-асабий изтиробларга боғлиқ ҳолда ривожланиб кучайиб борадиган, унинг қичишиши, юза қатламининг қалинлашиши билан намоён бўладиган касаллиги.

НЕЙРОЛИНГВИСТИКА [нейро.. + лингвистика] Марказий нерв системасида муайян нутқий ифодаларни шакллантириш, бошқаларидан фарқлай олиш ва ш.к. билан боғлиқ жараёнларни ўрганувчи илм соҳаси.

НЕЙРОХИРУРГИЯ [нейро.. + хирургия] Хирургия (жарроҳлик)да: нерв системасининг жарроҳлик йўли билан даволанадиган касалликларини ўрганувчи соҳа. *Мен анча вақт Тошкент вилоят бирлашган касалхонасининг нейрохирургия бўлимида даволандим.* Газетадан.

НЕЙТРАЛ [лот. neutralis — на унга, на бунга мансуб; бетараф] **1** Уруш қатнашчиларининг бирортасига ҳам қўшилмайдиган, бетараф. *Нейтрал давлатлар.*

2 Халқаро битимга асосан, ҳарбий тўқнашувлар ва ҳарбий куч тўплаш ман этилган. *Нейтрал зонадан ўтиб, сойга тушдим. Атрофда кўз ташласам, нарироқда шерикларим кўринди.* А. Убайдуллаев, Қонли издан.

3 ким. Кислотали реакция ҳам, ишқорли реакция ҳам бермайдиган. *Нейтрал эритма.*

НЕЙТРАЛИТЕТ [нем. Neutralität < лот. neutralis — бетараф, у ёки бунга тегишли бўлмаган] **1** Бошқалар тортишувига, жанжалига аралашмаслик.

2 ҳуқ. Давлатларнинг халқаро-ҳуқуқий ҳолати: уруш пайтида — урушда иштирок этмаслик, тинчлик пайтида — ҳарбий уюшма ва иттифоқларига қўшилмаслик. *Панама каналининг доимий нейтралитети ва ундан фойдаланиш ҳақидаги Америка-Панама шартномаларига кўра, АҚШ Панама билан биргаликда канал нейтралитетига кафолат беради.* Газетадан.

НЕЙТРАЛЛАМОҚ 1 Нейтрал, бетараф қилмоқ. *Армияни нейтралламоқ. Давлатни нейтралламоқ.*

2 ким. Ишқор таъсирида эритманинг кислоталик хусусиятини ёки кислота таъсирида ишқорлик хусусиятини йўқотмоқ.

НЕЙТРАЛЛАНМОҚ **Нейтралламоқ** фл. ўзл. н. *Нейтралланиш реакцияси (ким).*

НЕЙТРАЛЛИК айн. **нейтралитет.** *Австриянинг нейтралликни сақлаш ҳақидаги мажбурияти бугунги кунда ҳам ўз кучида.* Газетадан.

НЕЙТРОН [ингл. neutron < лот. neutrum — униси ҳам, буниси ҳам эмас] физ. Электр жиҳатдан нейтрал (электр заряди нолга тенг) элементар зарра; атом ядросининг таркибий қисми. *Илмий тадқиқот реакторларида у қадар кўп уран сарф қилмасдан юқори даражада нейтрон оқимини ҳосил қилиш мақсадга мувофиқдир.* «Фан ва турмуш».

НЕК [ф. نیک — яхши] сфт. кт. Яхши, хайрли. *Бу боланинг қадами нек бўлгани отидан маълум. Буни сотиб олсангиз, уйингизга унинг қадами билан бирга неклик киради.* С. Айний, Қуллар.

НЕКБАХТ [ф. نیکبخت — бахтли, омадли, бахти кулган] кт. Толеи баланд, бахтли. *Бир намхуш, ёлғизоёқ дала йўлини бошида Мен некбахт турар эдим бемисл ният билан.* Т. Қаҳҳор, Оқ ўрик.

НЕКБИН [ф. نیکبین — яхшилиқни кўрувчи] кт. Ҳар нарсани яхши томондан кўрувчи, келажакка ишонувчи; оптимист. *Унинг тақдири ҳақида энг некбин бўлган Ҳайдар ҳожиди, энди бадбинликка тушиб, хатлар ёзади.* А. Қаҳҳор, Сароб.

НЕКИ эск. айн. **нимаики**. [Навоий:] *Халойиқ нафидур ҳар неки билдик, Халойиқ билса бас, ҳар неки қилдик*. Уйғун ва И. Султон, Алишер Навоий. *Мен неки деган бўлсам, кўнглимдагини дедим, неки ёзган бўлсам, кўрган-билганимни ёздим*. С. Сиёев, Ёруғлик.

НЕКЛИК Яхши хусусиятга эгалик, яхшилиқ. *Кексалар бирон кишига неклик тиламоқчи бўлсалар: «Болаларинг орзусини кўр, топганини тўйга, яхшиликларга буюрсин!» — дейишади*. Н. Сафаров, Оловли излар.

НЕКРОЗ [юн. nekros — ўлик, ўлган] тиб. биол. Тирик организмдаги бирор аъзонинг, унинг тўқима ёки ҳужайраларининг ўлиши, жонсизланиши.

НЕКРОЛОГ [юн. nekros — ўлик, ўлган + logos — сўз, нутқ] Бирор шахснинг вафоти муносабати билан унинг ҳаёти ва фаолиятига бағишлаб ёзилган мақола, таъзиянома. *Некролог эълон қилмоқ*.

НЕКТАР [юн. nectar] 1 Юнон мифологиясида: худо (маъбуд)ларнинг абадий ҳаёт ва ёшлиқ ато этувчи илоҳий ичимлиги.

2 бот. Гулнинг шираси, гулшира. *Усимликлар доривор моддалар манбаидир. Шундай моддалардан бири гул нектаридир. «Фан ва турмуш» Асалари ўн минг гулга кўниб, бир грамдан нектар тўплайди*. Газетадан.

НЕКҚАДАМ [ф. + а. نيك قدم — қадами қутлуғ] кт. Бахт келтирувчи, шарофатли (одам ҳақида). *Ғулумжон ака некқадам инсон, у қаерга, қайси хўжаликка раҳбар бўлиб борса, ўша жой гуллаб-яшнайд*. Газетадан.

НЕМИС [қад. р. немец — гўлдираб, нонаиқ гапирувчи, соқов; ажнабий] қ. **немислар**. *Немис тили. Немис халқи. Немис аёл.* ■ Шу-шу бўлди-ю, немис тилини ўрганишга ҳаракат қилди. Бироқ бир неча ой меҳнат қилгандан кейин эшитсаки, Шекспир немис эмас, инглиз экан. А. Қаҳҳор, Олтин юлдуз.

НЕМИСЛАР Германиянинг туб аҳолисини ташкил қилувчи халқ.

НЕМИСЧА 1 Германияга, немис халқига, унинг алифбоси, тили, адабиёти ва маданиятига оид. *Немисча ёзув*.

2 Немис тили. *Сиз немисча(ни) биласизми? Немисча гапирмоқ.* ■ Бу ўртоғим немисча билар экан, ҳозир жуда мавриди келганга ўхшаб қолди. А. Қаҳҳор, Олтин юлдуз.

НЕ-НЕ Кўп ва хилма-хил; қанчадан-қанча. *Маллаҳондан бери яшайман, болам, не-*

не хонларнинг, не-не бекларнинг отларини кўрганман, не-не отлар ўз қўлимдан ҳам ўтган. Аммо, бу отжон экан. Ойбек, Танланган асарлар. Улар не-не хатарли жангда Бирга ўтга кирди ёнма-ён. З. Обидов.

НЕНЕЦ қ. **ненецлар**. *Ненец халқи. Ненец тили. Ненец аёл*.

НЕНЕЦЛАР Россия Федерациясининг Архангельск ва Тюмень вилоятлари ҳамда Красноярск ўлкасида яшовчи халқ.

НЕО- [юн. neos — янги] Ўзлашма байналмилал қўшма сўзларнинг биринчи қисми бўлиб, «янги, янгича» деган маънони билдиради.

НЕОДИМ [лот. neodymium < нео.. + юн. didymos — қўшалок, эгизак] Менделеев даврий системасининг III гуруҳига мансуб кимёвий элемент; оч кулранг металл.

НЕОКОЛОНИАЛИЗМ [нео.. + колониализм — мустамлакачилик сиёсати < лот. colonia — манзилгоҳ] Жаҳоннинг саноати ривожланган мамлакатлари томонидан Осиё, Африка ва Лотин Америкасидаги ривожланаётган мустақил мамлакатларга нисбатан қўлланаётган, ҳуқуқий жиҳатдан тенг бўлмаган иқтисодий ва сиёсий муносабатлар тизими; янгича мустамлакачилик сиёсати.

НЕОЛИТ [нео.. + юн. lithos — тош] археол. Тош асрининг энг кейинги даври. *Дастлабки сопол буюмлар неолит даврига мансуб бўлиб, бу давр археологик ёдгорликлари дастлаб Ўзбекистоннинг Хоразм, Қуйи Зарафшон воҳаларида топилган. «Фан ва турмуш». Яҳё Ғуломов экспедициясининг.. қидирувлари натижасида тадқиқ этилган неолит ва бронза даврига мансуб ёдгорликлар ҳайратомуз кашфиётлардан эди*. Газетадан.

НЕОЛИТИК Неолитга оид. *Сергей Павловичнинг кўп ишлари Ўрта Осиё, Қозоғистон ва ҳатто қўшни мамлакатларнинг неолитик ёдгорликларини текширишда туртки бўлиб ҳисобланди*. И. Жабборов, Кўҳна харобалар сири.

НЕОЛОГИЗМ [нео.. + юн. logos — сўз] тлш. Тилда турли эҳтиёжлар натижасида янгидан пайдо бўлган сўз ёки сўз бирикмаси. *Тил ривожланган сари неологизмлар билан бир қаторда окказионал неологизмлар ҳам вужудга келади. «ЎТА»*.

НЕОН [лот. neon < нео..] Менделеев даврий системасининг 0 (нолинчи) гуруҳига

мансуб кимёвий элемент; ҳаво таркибида бўладиган рангсиз ва ҳидсиз газ (электр лампочкалари, сигнал, реклама ва ш. к. ёритиш асбобларини тўлдириш учун ишлатилади). **Неон лампа.** ■ **Неон чироқлари нурида залда ғужғон ўйнаётган болалар худди аквариум ичида юрган балиқларга ўхшаб кўринади.** Ў. Усмонов, Сирли соҳил.

НЕОФАШИЗМ [нео.. + фашизм] Ўзининг аниқ шиорлари ва фаолият усулларини ҳозирги замонга мослаб ўзгартирган, лекин гоёвий-сиёсий асосини, қонун-қоидаларини сақлаб қолган фашизм.

НЕПТУН [лот. Neptunus – қадимги рим мифологиясида: денгизлар маъбуд, худоси] Кўёш системасининг Кўёшдан кейин саккинчи ўриндаги катта сайёраси.

НЕПТУНИЙ [лот. neptunium < Нептун сайёраси номидан] Менделеев даврий системасининг III гуруҳига мансуб, табиий ураннинг парчаланишидан ҳосил бўладиган кумушсимон радиоактив кимёвий элемент.

НЕРВ [юн. neuron – томир, тола] *анат., физиол.* Бош мия, орқа мия ва нерв тугунларини гавданнинг бошқа аъзо ва тўқималари билан боғлайдиган, асосан, нерв толалари тугунидан иборат мураккаб анатомик тузилма ва уларнинг ҳар бири; асаб. *Кўриш нерви. Ҳаракатлантирувчи нервлар. Нерв системаси. Нерв тўқималари.* ■ *Тепки касаллигида айрим ҳолларда нерв системасида ҳар хил ўзгариш бўлиб, енгил ўтадиган менингит ҳам бўлиши мумкин.* «Саодат».

НЕСТ-НОБУД [ф. نست – мавжуд эмас, йўқ + نابود – мавжуд эмас, йўқ қилинган]: **нест-нобуд бўлмоқ** Бекорга йўқ бўлиб кетмоқ; **нобуд бўлмоқ.** *Ҳосилнинг нест-нобуд бўлишига йўл қўйилмайди. Нест-нобуд қилмоқ* Бекорга йўқ қилмоқ; **нобуд қилмоқ.** *Олтиндан ҳам қиммат “оқ олтин” ўз вақтида ва нест-нобуд қилинмай йиғиб-териб олинди.*

НЕТАЙ *поэт.* Нима қилай, начора. Азиз дўстлар, нетай, бахти қаро бўлганга йиғлайман, Азизимдан тирик, ўлмай жудо бўлганга йиғлайман. Ҳамза, Паранжи сирлари.

Сўрамай-нетмай 1) сўрамай-суриштирмай; 2) сўроқсиз, бесўроқ.

НЕТОНГ *поэт.* Не ажаб. Муҳаббат дардидан бемор қалблармиз, Ўғай бўлсак, нетонг, соғлар орасида. А. Орипов, Руҳим.

НЕТТО [итал. netto – соф; ҳақиқий] Маҳсулотнинг ўров-идишсиз соф оғирлиги; *зид. брутто.* *Нетто – беш килограмм.*

НЕФРИТ I [юн. nephros – буйрак] *тиб.* Буйракнинг, энг аввало, буйрак тугунчаларининг яллиғланиши.

НЕФРИТ II *мин.* Яшил ёки оқ рангли тигиз кристалл минерал (Нефритнинг майда тошлари буйрак шаклида бўлганлигидан ушбу минерал шундай аталади).

НЕФРОЛОГ Буйрак касалликларини ўрганувчи мутахассис, шифокор.

НЕФРОЛОГИЯ [юн. nephros – буйрак + logos – фан, таълимот] Тиббиётнинг буйракнинг тузилиши ва фаолияти, касалликлари, уларнинг олдини олиш чора-тадбирлари каби масалаларни ўрганувчи бўлими.

НЕФТЧИ Нефть саноати ишчиси, мутахассиси.

НЕФТЬ [турк. petrol < ф. نفت] Ёнилғи сифатида ишлатиладиган ва турли маҳсулотлар (мас., керосин, бензин) олинадиган кўнғир ёки қора ёғсимон, энг муҳим қазилма; суёқ минерал модда. *Боку нефти. Нефть билан ишлайдиган двигател. Нефть саноати.* ■ *Нефть ва газ бизнинг асримизда энг зарурий энергетик хомашё бўлиб қолди.* «Фан ва турмуш».

НЕЧА *сўр. олм. 1* Сон-миқдор ҳақида сўроқни билдиради; қанча? *Костюм неча сўм туради? Соат неча бўлди? Заводда неча йил ишладингиз? Бир неча одам. Бир неча вақт. Фарғонага неча марта боргансиз? Мен буни сенга неча марта айтдим!* ■ *Хон жанобларидан сўрайдиган бир неча тилакларим бор.* А. Қодирий, Ўтган кунлар.

2 Ҳис-ҳаяжонни билдирувчи гапларда миқдорнинг сон-саноқсизлигини, кўплигини билдиради. [Холмат:] *Мен сизнинг ишқингизда неча йилдан бери куйиб юрибман-а. Энди бундан ортиқ чидашга ҳеч тоқатим йўқ.* Ҳамза, Танланган асарлар. *Поезд неча соат йўл юргандан кейин ана шу бекатчаларнинг бирига келиб тўхтади.* А. Қаҳҳор, Асарлар.

НЕЧА-НЕЧА Бир неча, анча-мунча, кўп. *Тўйга неча-неча эркак ва аёл келиб кетди.* ■ *Сиддикжонни.. колхозга тортишга неча-неча ҳаракат қилди: тушунтирди, ваъда берди, яхши гапириб ҳам кўрди, ёмон гапириб ҳам кўрди – фойдаси бўлмади.* А. Қаҳҳор, Қўшчинор чироқлари.

НЕЧАНЧИ сўр. олм. Предметнинг тартиб ўрни ҳақидаги сўроқни билдиради. *Нечанчи синфда ўқийсиз? Нечанчи қаватда турасиз?*

НЕЧИК 1 сўр. олм. Белги ҳақидаги сўроқни билдиради; қандай?, қанақа? *Сизни нечик шамол учирди? ■ Қулоқ солгин, нодон кўзим, сўзимга, Нечик энди айшу ишрат айлайин?* «Равшан».

2 гум. олм. Сабаб ҳақидаги сўроқни билдиради: нима учун? нима сабабдан? *Шу кечаси нечик унда бўш вақтларини бундан сўнг ёзиш-чизиш ишига сарф қилиш фикри кўзгалди.* А. Қаҳҳор, Сароб.

Ҳар нечик Ҳар қалай, ҳар ҳолда. *Ҳар нечик, иш дуруст бўлиб қолди.*

НЕЧИЛАМЧИ айн. нечанчи. *Раис бува, қалиш нечиламчи эди?* Т. Мурод, Юлдузлар мангу ёнади.

НЕЧОВ сўр. олм. Шахс, киши сони, миқдори ҳақидаги сўроқни билдиради. *Сизлар нечов? ■ От суриб бу майдон ичра турарман, Сендай нечовларнинг додин берарман.* «Шири билан Шакар».

НЕЧОҒЛИҚ рвш. **1** Нақадар, қанчалик, қандай. *Ишнинг нечоғлиқ қийинлигини билсанг эди. Кўрдингми, нечоғлиқ хушёр бўлиш керак. ■ Нечоғлиқ ўзини қаттиқ ушлаган Кумуш ҳам сирини яшира олмади.* А. Қодирӣ, Ўтган кунлар.

2 боғл. вэф. Миқдор, даража мазмунидаги гапни бош гапга боғлаш учун хизмат қилади, бунда эргаш гапнинг кесими шарт майли шаклида бўлади. *Ҳожининг бу сўзи Ўзбек ойимга нечоғлиқ ёққан бўлса, Отабекни шу қадар ерга қаратган эди.* А. Қодирӣ, Ўтган кунлар.

НЕЧТА сўр. олм. Дона, миқдор ҳақидаги сўроқни билдиради. *Нечта китобинг бор? ■ -Арава бордими? - деди Ўрмонжон каттакон рўмолчаси билан юзини, буйнини артиб. - Нечта арава борди?* А. Қаҳҳор, Қўшчинор чироқлари.

НЕЧУК с. т. Нечик? қандай, нима учун? *Аҳволингиз нечук? Нечук, шуни ҳам билмайсиз? ■ Ҳеч кимдан садо чиқмади. Ҳамма, нечукдир, ўнгайсизланар, қимтинар, ерга қарар эди.* А. Қаҳҳор, Асарлар.

НЕЧУККИМ эрг. боғл. эск. Негаки?, чунки, сабабли. *Хусусан, бундан сўнг дим сара бўлғай, нечукким, бугун кулбаи вайронамга Авазим ташириф буурди.* С. Сиёев, Ёруғлик.

НЕЧУН Нима учун?, нима сабабдан?, нега? *Мен нечун севаман Ўзбекистонни, Тупроғин кўзимга айлаб тўтиё.* А. Орипов, Юртим шамоли.

НЕЪМАТ [а. نعمت — бахтли, фаровон ҳаёт; инъом, ҳадя] **1** Табиат инъом этган егулик нарсалар; ноз-неъматлар. *Шири меваларга ўрганган оғизларига бу ернинг нордон неъматлари ёқмади.* Ойбек, Қуёш қораймас.

2 Эзгу иш, яхши нарса. *Бўлакка неъматини васлинг фаровон айладинг кетдинг.* Муқимий. *Мана, илм қандоқ азиз неъмат. Дунёда илмдан ортиқ ҳам лаззатли шири неъмат борми?* Ҳамза, Танланган асарлар.

3 Неъмат (эркаклар исми).

НЕҚАДАР айн. нақадар. *Лекин мени отмадинг ўтга, Неқадар яхшисан, ёшлигим!* Р. Парфи, Кўзлар.

НИВЕЛИР [фр. niveler — тўғриламоқ, бараварламоқ < niveau — ватерпас, шайтон] геод. Ернинг паст-баландлигини бирор нуқтага нисбатан ўлчайдиган геодезик асбоб.

НИВЕЛИРЛАШ Геодезик ўлчашнинг бир тури; ер сатҳи нуқталари баландликларини бирон-бир танланган нуқта ёки денгиз сатҳига нисбатан аниқлаш, белгилаш.

НИВЕЛИРОВКА қ. нивелирлаш.

НИВЕЛИРОВКАЧИ Нивелирлаш ишларини бажарувчи мутахассис.

НИГИЛИЗМ [лот. nihil — ҳеч нима, ҳеч нарса] 19-аср рус ижтимоий тафаккурида мавжуд ижтимоий ҳаёт шакли ва ахлоқий нормаларни, маданий мерос ҳамда идеалларни инкор этишдан иборат оқим.

НИГИЛИСТ Нигилизм тарафдори.

НИГИЛИСТИК Нигилизм ва нигилистга оид. *Нигилистик қарашлар. ■ Маданий меросга нигилистик муносабат санъат ва бадиий адабиётга юзакиларча ёндашишдан келиб чиққан эди.* Газетадан.

НИГИН [ф. نغین — узук; узукка қўйилган қимматбаҳо тош] фольк. айн. узук. *Энди Равшанбек кўзининг ёшини артиб, шундай нигинга қараса, нигиннинг юзида хати бор.* «Равшан».

НИГОР [ф. نگار — ёзувчи, ёзиб олувчи; севики, гўзал; тавсиф] **1** Севгили; гўзал. *Кўнглида гўё нигори келади, ҳаётбахш узори уни бахтиёр қилади.* М. Исмоилий, Фарғона т. о. *Ёнимда бўлсанг, нигор, жонни айлардим нисор.* Ё. Мирзо.

2 Нигор (хотин-қизлар исми).

НИГОРОН [ф. نگاران — севимли, гўзал ёр] Зориқиб-толиқиб, интизор бўлиб кутувчи. *Нигорон кўзлар. Нигорон бўлмоқ.* ■ *Ҳаёт шохлар орасида нигорон бўлиб ўтирган ёрини кўрди-ю, қалбида оғир чўккан дардлари тарқалгандай, шукроналик билан жилмайди.* М. Исмоилий, Фарғона т. о.

НИГОҲ [ф. نگاه — қараш, назар, кўз қараши] Кўз қараши; назар, боқиш, қараш. *Лавли қўлига зугурт олиб, газни ёқаркан, унга зимдан қараганди, ихтиёрсиз равишда нигоҳлар яна тўқнашди.* Д. Нурий, Осмон устунни. *Майна бу бошлиқларга рўмолини сал кўтариб, бир нигоҳ ташлади.* Ш. Тошматов, Эрк қуши.

НИГОҲБОН [ф. نگاهبان — қараб турувчи, қоровул] Қараб турувчи, бошқариб турувчи. *Бўлмас обод эл, адолатли нигоҳбон бўлмаса, Бир-бирига меҳру шафқатли қадрдон бўлмаса.* Ҳабибий.

НИГРОЛ [лот. niger — қора + ol(eum) — ёғ, мой] Ёғли гудрон; механизмларни ёғлаш учун ишлатиладиган, нефтдан олинадиган қовушқоқ суюқлик.

НИГУН [ф. نگون — ағдарилган, тўнтарилган] Тесқари. *Авлодим толеи нигун эмас, бас, Юрт деса, жонидан кечади ҳар дам.* Б. Бойқобилов.

НИДО [а. نداء — хитоб, мурожаат; даъват, чақириқ] *кт.* 1 Бирор кайфиятни, ҳис-туйғунни ифодаловчи овоз, товуш. — *Қаёқданам бу балога йўлиқдим, уф-ф, — Хўжабековнинг кўкрагидан тубсиз пушаймон нидоси узилиб чиқди.* С. Анорбоев, Оқсой.

2 Ҳайқирик, айтилган фикр. *Бухорий харсангош ётқизилган айланма кўчалардан борар экан, кўнглида бир нидо бор эди: «Менинг тинчгина ишлашимга имконият бермаётирлар!»* Мирмуҳсин, Меъмор.

3 эск. Чақириқ, даъват, ундов.

НИЁЗ [ф. نیاز — эҳтиёж; илтимос, ўтинч; ваъда; туҳфа, ҳадя] 1 эск. *кт.* Ёлвориш, ўтиниш. *Мен бандайи бечора дуо бирла ниёзин Оламнинг амири, шоҳи давронима айтинг.* Ҳ. Фулом, Машъал.

2 кам қўлл. Хайр-садақа.

3 Ниёз (эркаклар исми).

НИЗО [а. نزاع — баҳс, тортишув; жанжал, тўқнашув; кураш] Ўзаро келишмовчилик ёки қарама-қаршилик, душманлик, адоват орқасида туғилган ҳолат, муносабат;

ихтилоф, нифоқ. *Давлатлар ўртасидаги низолар. Миллий низолар. Низо уруғини сочмоқ.* ■ *Мусулмонқул ўз ғарази йўлида орада йўқ низоларни қўзғаб, куёви Шералихонни ўлдирди, гуноҳсиз Муродхонни шаҳид этди.* А. Қодирий, Ўтган кунлар.

Низо солмоқ ёки низо уруғини сочмоқ Қарама-қаршиликни, келишмовчиликни вужудга келтирмоқ. *Даҳо ўйлаб, улуғ шоир билан аёли орасига низо солишни топди.* Т. Мурод, Юлдузлар мангу ёнади. **Ордан низони кўтармоқ** Ўзаро келишмовчилик, қарама-қаршиликни йўқотиш. [*Абдурахмонбой Қудратга:*] — *Уй-жойингни қайтарай, давлатимдан баҳраманд қилай, орадаги низони кўтар!* Н. Сафаров, Танланган асарлар.

НИЗОЛАШМОҚ Адоват, ихтилоф, нифоқ туфайли ўзаро жанжаллашмоқ. *Ориф ака узоқ қишлоқларда қолиб кетади, кўплар билан низолашиб ҳам олди, кўп дўстлар орттирди.* А. Мухтор, Чинор.

НИЗОЛИ Низога сабаб бўладиган, ихтилоф туғдирадиган, нифоқ соладиган; жанжалли. *Низоли масалаларни тинч йўл билан ҳал қилмоқ.* ■ *Раҳмон тоға қишлоқ пешволари билан боғлиқ бўлган низоли масалаларни ҳал этишга маслаҳат сўраб келганларга очик бир нарса дея олмас, уларни инсофга чақиришдан бошқа йўл йўқдай туюларди назарида.* С. Кароматов, Бир томчи қон.

НИЗОМ [а. نظام — тартиб, тизим; тузум; устав, ички тартиб қоидалари] 1 Маълум иш, масала бўйича қонун-қоидалар, тартиблар мажмуи. *Сайлов тўғрисидаги низоми.* Қиличбозлик низоми. ■ *У уруш низомини билади.* С. Айний, Куллар.

2 эск. айн. **устав.** *Бухоро ҳукуматининг ҳарбий низомига кўра, бузилган қуролни сарбоз ўз пулига тузатиши лозим эди.* С. Айний, Дохунда.

3 эск. Саф, қатор. *Низом тортмоқ.*

4 Низом (эркаклар исми).

НИЗОМНОМА [а. + ф. نظامنامه — низоми, устав, қоидалар] айн. **низоми 1, 2.**

НИКЕЛЛАМОҚ Металл буюмлар сиртига никель югуртирмоқ, никель қопламоқ. *Кроватни никелламоқ.*

НИКЕЛЛАНМОҚ Никелламоқ фл. мажҳ. н. *Никелланган самовар.* ■ *Ёруғ ва кене хоналарда қулай жиҳозлар — никелланган*

кроватьлар, стол, стул, шкаф, буфетлар бор. Газетадан.

НИКЕЛЬ [нем. Kupfernickel минерали номидан < Kupfer – мис + Nickel – мис қазиб олувчиларга тўсқинлик қилувчи ёвуз рух] Менделеев даврий системасининг VIII гуруҳига мансуб кимёвий элемент, эриши қийин, ҳавода ўзгармайдиган, кумуш каби оқ ялтироқ қаттиқ металл.

НИКОТИН [фр. nicotine < тамакини дастлаб, 1560 йилда Францияга олиб келган француз дипломати J. Nicot (Ж. Нико) номидан] Тамаки ва б. баъзи ўсимликлар таркибида бўладиган алкалоид, кучли заҳар. Жуда кўп талант эгалари алкоголь ва никотин таъсиридан ҳалок бўлган. «Фан ва турмуш».

НИКОТИНЛИ Таркибида никотин мавжуд бўлган. Анабазин ва никотинли дорилар ўрнига кальций содасини ишлатиш мумкин. Газетадан.

НИКОҲ [а. نكاح – уйланиш, эрга тегиш; эр-хотинлик; эр-хотиннинг қовушиши] ҳуқ. 1 Эр-хотинликни шарият йўли билан расмийлаштириш маросими ва шу маросимда домумла томонидан ўқиладиган шартнома. Никоҳ қилмоқ. Никоҳ ўқимоқ. ■ -Ҳозир Зухур маҳсум чиқса, аянгизни чақириб, никоҳ ўқиймиз! – деди домла. «Муштум». Қиз никоҳ ва унинг эртаси бўладиган бутун можарони кўз олдига келтириб, аммасининг оёғига йиқилди. А. Қаҳҳор, Қўшчинор чироқлари.

2 Эр-хотиннинг ўзаро розилиги билан ҳуқуқий жиҳатдан расмийлаштирилган оилавий иттифок; эр-хотинлик. Никоҳ тўйи. Никоҳ тўғрисида гувоҳнома.

НИКОҲЛАМОҚ Оилавий иттифокни, эр-хотинликни шарият йўли билан расмийлаштирмоқ, никоҳ ўқимоқ. -Бўлар иш бўлган, мени қиморбоз никоҳлаб олган эди.. – деди Ҳожи хола. М. Исмоилий, Фарғона т. о. Робиянинг иддаси ўтгач, маҳалла имоми уни Тоҳирга никоҳлаб берди. П. Қодиров, Юлдузли тунлар.

НИКОҲЛИ Никоҳлаб олинган, никоҳ ўқиб расмийлаштирилган. Никоҳли хотин.

НИКОҲСИЗ Никоҳ қилинмаган, эр-хотинлиги никоҳ ўқиб расмийлаштирилмаган. Никоҳсиз хотин.

НИЛ [ф. -ҳинд. نيل – кўк бўёқ модда, индиго] 1 Баъзи ўсимликлардан кимёвий йўл билан ажратиб олинган кўк бўёқ, олтин

ранг билан товланадиган кўк кристалл модда.

2 Кўзга сурма, юзга ясама хол қўйиш учун қўлланадиган мис сурмачўп (яна қ. мил V). Чиройлироқ хотин-қизларни ва ёш ўғлонларни чўмилтирганда, жуда катта аҳамият берилар.. қошлари терилар, кўзларига сурма ва юзларига нил билан ясама холлар қўйилар эди. С. Айний, Қуллар.

3 Маълум бир нарсанинг учи (яна қ. мил I). Юсупов милтиқнинг нилини осмонга қаратди-да, тепкини босди. Ёруғ осмон гумбурлаб кетди. М. Ҳазратқулов, Журъат.

Бўёқчининг нилими? қ. буюқчи. -Дарахт ўстириш буюқчининг нили эмас, – деди Комилжон. Р. Файзий, Чўлга баҳор келди.

НИЛГУН [ф. نيلگون – кўк, осмоний ранг] эск. кт. Нилранг; мовий, кўк, нилий. Полвонлар қадамига осмон поя, Жаранлар бош устида нилгун фазо. Ф. Фулом.

НИЛИЙ [ф. نيلي – тўқ кўк, зангори] айн. нилгун. Бола ҳар кун келар оқшомда, Тут тагига бориб ўтирар Ва сарҳадсиз нилий осмонга – Кўк гумбазга боқиб ўй сурар. Х. Даврон.

НИЛУФАР [ф. نيلوفر] 1 Йирик баргли, чиройли катта-катта гулли, сувда ўсадиган кўп йиллик ўсимлик.

2 Нилуфар (хотин-қизлар исми).

НИМ [ф. نيم – ярим, яримта] Ярим, сал, тўла эмас. У, ним қоронғи уй ўртасида чалқанча ётгани ҳолда, бир нималар деб шивирлар.. эди. П. Турсун, Ўқитувчи. Унинг гапи оғзида қолди, кўзлари хиёл кенгайиб, ним очик лаби титради. П. Қодиров, Уч илди.

НИМА сўр. о.л. 1 Предмет, воқеа-ҳодиса ҳақида сўроқни ифодалайди. Бу нима? Нима янгилик бор? Сизга нима керак эди? Отингиз нима? ■ Тошкентдан нималар келтирдингиз, бек ака? А. Қодирий, Ўтган кунлар.

Нима бўлди? 1) айн. нима қилди? Унга нима бўлди?; 2) қандай натижа билан тугади. Иш нима бўлди? **Нима гап?** Воқеа нимадан иборат? **Нима учун?** қ. учун. **Нима қиламан (ёки қиласан, қилади)** Менга (сенга, унга) нима кераги бор, бошимга ураманми. Мен буни нима қиламан? Нима қиласан ёлғон гапириб? ■ Хўш, у [Йўлчи] тентакни қутқазиб нима қиласан, жиян? Ойбек, Танланган асарлар. **Нима қилди?** Не бўлди?, қандай ҳодисага йўлиқди? Сизга нима қилди?

2 Риторик сўроқ гапларда инкор маъносини билдиради. *Дунёни сув босса, ўрдакка нима қайғу?* Мақол. ■ *Юрт ишига ғам-хўрлик қиладиган одамлар бор. Санларга нима.* Ойбек, Танланган асарлар.

3 Белги ҳақида сўроқни билдиради; қандай? *Нима гуноҳ қилдим?* Ойбек, Танланган асарлар. *Марғилонга нима юмуш билан келган эдингиз?* А. Қодирий, Ўтган кунлар.

НИМА ҚИЛАЙ Қандай қилай, начора, илож қанча. *Гапга қўнмаса нима қилай.*

4 Қариндошлик муносабатлари маъносида “ким” ўрнида ишлатилади. *Уменинг нимама бўлади?* *Сиз Каримнинг нимаси бўласиз?*

5 Сўроқ гапларнинг бошида умумий сўроқни билдирувчи сўз-гап сифатида келиб, сўроқни кучайтиради, таъкидлайди. *Нима, мадрасани битиртириб, мачитга имом қиласизми?* М. Исмоилий, Фарғона т. о. *-Нима, бирон нарса тушиб қолдимиз?* — *бепарво сўради Салим.* Ойбек, Танланган асарлар.

Бир нима Ноаниқ нарса, предметни ифодалайди; нимадир. **Нимаси?** Сўзловчининг бирор нарса ёки хатти-ҳаракатдан таажжубланганлигини ёки норозилигини билдиради. *Канизак билан ўйнашганинг ўйнашган, Сидиқжоннинг хотинини чақиртириб, икковини уриштирганинг, Анзират хола бечорани урдирганинг нимаси?* А. Қаҳҳор, Қўшчинор чироқлари. **Нимасини айтасан** (ёки **айтасиз**)? *қри. с. Қани-я, қани энди.*

НИМАГА *сўр. олам.* Сабаб ҳақида сўроқни билдиради; нега?, нима учун?, нима сабабдан? *Ака, нимага жим бўлиб кетдингиз?* Ойбек, Танланган асарлар. [*Чол:*] *Нимага бунақа қилганини биласизми бунинг?* М. Исмоилий, Фарғона т. о.

НИМАГАКИ *эрг. боғл.* Нима учун десангиз, шунинг учунки, чунки. *Хурсанд бўлиш керак, нимагаки бугун қишлоғимизга уяз [уезд] ҳокими Фишман тўра келадилар.* М. Исмоилий, Фарғона т. о.

НИМАЙКИ *нисбий олам.* Қандай нарса бўлмасин, нима бўлмасин ҳаммаси. *Дўстлар нимаики топсалар, баҳам кўришади.* ■ *Нимаики қилсанг тилак, Бариға ўқиб керак.* Қ. Муҳаммадий.

НИМАРСА *эск. айн. нарса.* [*Абдишукур:*] *Ука, менингча, гафлатдасан, ўқимаганликдан бўлса керак, фикринг кўп нимарсалардан ҳали гофил.* Ойбек, Танланган асарлар.

НИМДОШ [*ф. نيمداشت* — тутилган, ишлатилган; эскирган, тўзган] Кийилиб, тутилиб, анчагина эскирган (асосан кийим ҳақида). *Бир куни кечга томон Умурзоқ аканинг эски қўрғончаси олида нимдошгина солдат шинели кийган одам пайдо бўлади.* Ҳ. Назир, Сўнмас чақмоқлар. *Куз кечаси.. Совуқ шамол баданни тиканли тили билан тирнар, нимдош кийимдан ўтиб санчар ва қалтиратар эди.* Н. Мақсудий, Лайлатулқадр.

НИМЖОН [*ф. نيمجان* — чалажон, чалаўлик, ярим жон] 1 *Куч-қуввати кам; заиф, нозик.* У [*Анзират хола*] *олтмишларга бориб қолган, нимжон, юзи жуда буришган бўлса ҳам, қизил, товуши майин ва ёқмли бир кампир эди.* А. Қаҳҳор, Қўшчинор чироқлари.

2 *Заиф, нозик, ҳали ўзини тутиб олмаган, яхши ривожланмаган. Қатор-қатор ўтқазилган ёш ва нимжон ниҳоллар эндигина япроқ чиқарган эдилар.* Ш. Рашидов, Бўрондан кучли.

НИМКОРЛИК [*ф. نيمكاره* — тугалланмаганлик; ярим бажарилганлик; ерни тенг шерикликка ишлаш] *Хусусий эгаликда бўлган ерни ижарага олиб, тенг шериклик асосида фойдаланиш шакли. 1921-29 йиллардаги Ўрта Осиё ва Қозоғистонда ўтказилган ер-сув ислохотлари натижасида нимкорлик барҳам топди.* Газетадан.

НИМКОСА [*ф. نيمكاسه* — кичикроқ коса] *Кичик коса; косача. У чиқариб кўкнор халтасин, Нимкосада эзди оғуни. Аввал “қулт-қулт” ютди анчасин, Сўнг ялади бори-ўғини.* Р. Файзий.

Коса тагида нимкоса *Бирор гап, иш-ҳаракат ва ш. к. заминиди яширинган гап ёки нарса ҳақида. Темир Акбарович коса тагидаги нимкосага энди тушунди.* П. Қодиров, Уч илди.

НИМПАЛЬТО [ним + пальто] *Этаги тиззадан юқори турадиган пальто тури; калта пальто. Жамшид секингина туриб, нимпальтосини энига ташлади-да, эшикка чиқди.* Ш. Холмирзаев, Тоғларга қор тушди.

НИМПУШТИ [*ф. نيمپشت*] *Оч пушти. Нимпушти гуллар.*

НИМРАНГ [*ф. نيمرنگ* — оч рангли, ёрқин эмас] 1 *Ранги оч, оч ранг. Ёз кунлари маҳдумнинг боғчаси оқ, нимранг, ола-зангор, малла-ложувард ва бошқа тус капалак-*

ларнинг ялт-юлт учишлари билан алоҳида бир кўринишга кирарди. А. Қодирий, Меҳробдан чаён.

2 Узумнинг ўртача кечпишар бир тури. Токнинг тоифи, нимранг, ҳусайни, қирмиска, шивирғони, доройи каби навларини ўстириш мақсадга мувофиқ. Газетадан.

НИМТА [ф. نيمتنه — тананинг ярми] Сўйилган мол ёки қўй танасининг бўйлама ярми. Қассоб дўконини очиб, қўй нимталарини осяпти. Х. Фулом, Замин юлдузлари. *Темиртош яқиндаги бир мўғулни мўлжалга олиб, ўнг томонидан от солди, етиб бориб, унинг чап елкасига қилич урди, мўғул икки нимта бўлиб, отининг оёғи остига тушди.* М. Осим, Ўтроп.

Нимта қилмоқ Ўлдирмоқ, иккига бўлиб ташламоқ (яна қ. **нимталамоқ 2**). *Ҳамма ёқ кўрбоши. Ҳозир билса, нимта қилади. Йўқол, кўрмайин ҳам, куймайин ҳам!* Ш. Тошматов, Эрк қуши.

НИМТАЛАМОҚ 1 Сўйилган мол ёки қўй танасини бўйламасига икки тенг қисмга ажратмоқ.

2 кўчма Парча-парча қилмоқ, парчалаб ташламоқ. *Майдон-майдон отин елсин фарзандим, Душманни нимталаб бўлсин фарзандим.* «Равшан». *Шерали ҳозир уни нимталаб ташлашга тайёр эди, бироқ индамай, кўча эшиги томон илдам юриб кетди.* С. Кароматов, Олтин қум.

НИМТА-НИМТА Бўлак-бўлак, парча-парча. *Ўзинг мардсан, Ғиротинени елгансан, Ғаним бўлса, нимта-нимта бўлгансан.* «Равшан».

НИМТАТИР 1 Унча куюқ эмас, аччиқ эмас, суюқ (дамланган чой ҳақида). *Зумрад нимтатир, суюққина чойни хўлаб кўярди.* Ойбек, Зумрад.

2 Сал товланувчан, ўхшаш. *Аваз кўксини тўлдириб нафас олди. Гоҳ тўхтаб, нимтатир кўкиш уфқларга разм солди, кечаги осойишта кунини, бу ерда ўтажак осуда дамларини ўйлади.* С. Сиёев, Аваз.

НИМХУШК [ф. نيم خشک — ярим қуруқ, чала қуриган] Бир оз нами бор, намроқ, ҳўлроқ. *Нимхушк тупроқ.*

НИМЧА [ф. نيمچه — яримта; калта кийим] **1** Кўйлак устидан, костюм, камзул ичидан кийиладиган енгсиз ва ёқасиз калта ва ихчам кийим (асосан хотинлар кияди). *Энида узун қизил шоҳи кўйлак, кимхоб*

нимча, бошида шафтолиранг ёрқин товланган ипак дуррача. Ойбек, Танланган асарлар.

2 эск. Тахминан 400 граммга яқин бўлган оғирлик ўлчови. *Нимча гўшт.* ■ *Бир қассобдан нимча қўй гўшти олиб келдим. Бу сабил ҳам эчки гўшти экан.* С. Айний. Эс-далиқлар.

НИМЧИЛИҚ Яхши ривожланмаган, ўсмаган; заиф, нимжон, мажмағил. *-Сизга нима бўлди ўзи, сап-сарик, нимчилик-ку.. Ё анави ўғил болани оламизми, кўҳликкина экан, — деди жувон эрига.* Р. Файзий, Сен етим эмассан. *Бу ерда экин ғовлаган, бўйга зўр берган эмас ва оч ерда ўсган ёки парваршсиз қолган ўсимликдек пакана, нимчилик эмас.* Ойбек, О. в. шабадалар.

НИМЧОРАК [ф. نيم چارپک — ярим чорак; чоракнинг ярми] эск. Саккиздан бир, чоракнинг ярми. *Нимчорак қадоқ чой.*

НИМҚОРОНҒИ Ярим қоронғи, унчалик ёруғ ҳам, қоронғи ҳам эмас. *Эркин нимқоронғи, зах хонага ҳам, сукунатга ҳам аста кўника бошлади.* Т. Малик, Иблис девори.

НИНА айн. игна. *Шакархоннинг ангишвонаси тешилиб, бармоғига нина кириб кетмаганда, қўшиқ тонг отгунча янграши турган гап эди.* И. Раҳим, Чин муҳаббат. *Чиндан колхознинг нинасига теккан бўлса, туя қилиб тўлатаман. Биласан-ку қаттиққўл-лигимни!* С. Анорбоев, Оқсой.

Нинадай гап Арзимаган, аҳамиятсиз гап. *Гапни кўп чўзма, қаердалигингни биласанми? Нинадай гап бу ерда туюдай бўлади-я! — деди Темир хотинига.* Б. Раҳмонов, Юрак сирлари.

НИНАЧИ Найчасимон тана тузилишига эга бўлган, қанотли ҳашарот тури. *Илонлардан ташқари турли хил ҳашаротлар: бешиктерватар, қора чигиртка, ниначи ва бошқалар ҳам ўз ривожланиши давомида қобиғини янгилайди.* «Фан ва турмуш». *Ўтуланлар устида оқ, сариқ капалаклар, қизил, бинафшаранг ниначилар учиб юрибди.* М. Маҳмудов, Мангу куй излаб.

НИННИ бол. Янги туғилган бола, чақалоқ.

НИОБИЙ [лот. niobium < юнон мифологиясидаги Танталнинг қизи — Фива маликаси Ниоба (Niobe) номидан] Менделеев даврий системасининг V гуруҳига мансуб кимёвий элемент; қийин эрийдиган, коррозияга чидамли қулранг металл.

НИППЕЛЬ [ингл. nipple] 1 Қувур ва шлангларни, радиатор бўлақларини герметик улашга хизмат қиладиган, ҳар икки томони резьбали деталь. *Радиатор ниппели.*

2 Камералардан ҳавони чиқармайдиган мослама. *Велосипед камерасининг ниппели.*

НИСБАТ [а. نسبت — муносабат, алоқа; қариндошлик; ўзаро боғланиш; миқдор] 1 Нарсаларнинг бир-бирига қараганда катта-кичиклиги, оз-кўплиги ва ш. к. *Кучлар нисбати.* ■ ..урушда қатнашаётган кучларнинг нисбати, мақсади кун сайин илмий асосда тушунтириб борилиши керак. И. Раҳим, Чин муҳаббат.

2 *мат.* Бир соннинг иккинчи сонга қараганда қиёсий катталиги, бир соннинг иккинчи сонга бўлинишидан ҳосил бўлган бўлинма. *Икки миқдор ўртасидаги нисбат.*

Нисбат бермоқ Бирор кимса ёки нарсага олиб бориб боғламоқ; ўхшатмоқ *Менинг жунунима Мажнунни бермангиз нисбат. Нодира. Ота-боболаримиз қадимда кўп жойларнинг номини дов-дарактларга нисбат бериб қўйганлар.* Газетадан.

Феъл нисбатлари тлш. Ҳаракатнинг субъект ва объектга бўлган муносабатини кўрсатадиган феъл шакллари. *Феълнинг ўзлик нисбати. Феълнинг орттирма нисбати.*

НИСБАТАН [а. نسبتاً] рвш. 1 Бошқаларига қиёсан; қиёсан олганда. *Деворсиз боғнинг шимол томони чакалакзор бўлгани учун уни нисбатан озроқ қум босган.* С. Айний, Эсдалиқлар.

2 кўм. *взф.* Айириб, таъкидлаб кўрсатишни ифодалайди; қараганда, кўра. *Маҳкамнинг босиқлиги эса уни Очилга нисбатан бир неча ёш катта кўрсатарди.* П. Қодиров, Уч илдиш. *Каспий денгизида пароходлар қатнови баҳорга нисбатан кўпайди.* Шухрат, Шинелли йиллар.

3 кўм. *взф.* Ҳаракат-ҳолатнинг нимага, кимга қаратилганлигини, муносабатини билдиради. *Элмуроднинг кўнглида, энди чолга нисбатан бўлган ҳалии нафрат ўчиб, унинг ўрнига аянчга ўхшаш бир сезги пайдо бўлди.* П. Турсун, Ўқитувчи.

НИСБИЙ [а. نسبى] 1 Бошқаларга қиёсан олинган ёки белгиланадиган; қиёсий, солиштирма. *Пахтанинг нисбий намлиги. Жойнинг нисбий баландлиги.*

2 Ташқи шароит, муҳит билан боғлиқ равишда ўзгарадиган; шартли. *Нисбий ташунча. Нисбий ҳақиқат (флс.).*

3 тлш. Нисбат, муносабат билдирувчи. *Нисбий сифат.*

НИСБИЙЛИК 1 Нисбий ҳолат, нисбий эканлик. *Тушунчаларнинг нисбийлиги.*

Нисбийлик назарияси Ҳозирги замон физикасида: фазо ва вақтнинг ҳар қандай физик жараён учун ўринли бўлган хусусиятлари ҳақидаги таълимот (20-асрнинг 1-чорагида америкалик физик А. Эйнштейн томонидан ишлаб чиқилган). *Нисбийлик назарияси — материя мавжуд бўладиган фазо ва вақт назариясидир.* «Фан ва турмуш».

2 *айн.* **нисбият.**

НИСБИЯТ [а. نسبیت — нисбийлик] Нисбий катталиқлар, муносабатлар мажмуи; нисбийлик. *Атомлар ичидя электрон, протон очилган, нисбият назарияси ёзилиб, нашр этилган бир вақтда.* Газетадан.

НИСОР [а. نثار — ширинликлар, ҳадялар улашиш, тарқатиш] *кт.* 1 *айн.* **қурбон.** *Ёринга, эй нигор, вафо қил, Жонингни эт нисор, вафо қил.* Ё. Мирзо.

2 *айн.* **чочиқ** П 2. [Навоий:] *Ташаккур билдириб наққошингизга, Нисор этсам бу зарни бошингизга.* Уйғун ва И. Султон, Алишер Навоий.

НИСФ [а. نصف — ярим, яримта; ўрта] *эск. кт. айн.* **ярим.** *Агар берсам мунга гавҳар тахтимни, Оққиз, бўлмас, билгин, нисфи баҳоси.* «Равшан». *Чамаси, нисфи шаб асноси, дўстим деб, ёнида қиз, Султоналининг уйига келган.* А. Қодирий, Мехроблан чаён.

НИСФКОРЛИК [а. + ф. نصفه‌كارى — ярим ҳосилга, тенг шерикликка ишлаш] *айн.* **нимкорлик.**

НИТРАТЛАР [қ. нитро..] *ким. қ. х.* Нитрат (азот) кислотасининг тузлари: ўғит сифатида ҳамда дори-дармон ва портловчи моддалар ишлаб чиқаришда қўлланади.

НИТРИДЛАР [нитро.. + юн. eidos — тур, хил; кўриниш] *ким.* Азотнинг бошқа элементлар, асосан металлар билан ҳосил қилган бирикмалари.

НИТРО- [юн. nitron — селитра, сода] Ўзлашма байналмилал қўшма сўзларнинг биринчи қисми: айна қўшма сўзнинг азотга, нитрат (азот) кислотасига алоқадорлигини кўрсатади, мас., *нитратлар, нитроглицерин.*

НИТРОГЛИЦЕРИН [нитро.. + глицерин] *тех. ким.* Нитрат (азот) кислотаси ва глицериннинг мураккаб эфири; рангсиз

ёпишқоқ суюқлик, кучли портловчи модда (харбий техникада ва тиббиётда қўлланади).

НИТРОН [қ. нитро-] Таркибида азот бўлган оқ қаттиқ синтетик полимер ва ундан ишлаб чиқарилган пишиқ сунъий тола. *Нитрон толасидан тўқилган гиламлар жуда енгил, пишиқ ва кўркам бўлиб, оддий гиламларга нисбатан анча арзондир.* Газетадан.

НИФОҚ [а. نفاق — иккиюзламалик; мунофиқлик, риёкорлик; муғамбирлик] Келишмовчилик, ихтилоф, низо, жанжал. *Амирлик рутбасини қабул қилсам, баъзи улўф зотларнинг кўнгли ранжур. Орада беҳуда сўз кўпаюр. Дўстлик ўрнига нифоқ вужудга келур. Ойбек, Навоий. Нигора билан Шербекнинг ораларига нифоқ солишда унинг ҳам қўли бордир.* С. Анорбоев, Оқсой.

НИФОҚЧИ Нифоқ туғдирувчи, нифоқ, низо солувчи; ғаламис. *Нифоқчи — одамлар ўртасига нифоқ ташлайди, коллективни бузади, таълим-тарбияни издан чиқаради.* Р. Усмонов, Одобнома.

НИШ [ф. نيش — ари, чаёнларнинг чақиш аъзоси; найза; бирор нарсанing ўткир учи; чақиш, нина, найза санчиш] **1** Ўткир нарсанing учи; найза. *Кўк стрелкаларнинг шаҳарга, тепаликлар ва катта йўлларга қаратилган найзалари.. ханжар нишидай армия мудофаасига санчилиб турарди.* И. Раҳим, Чин муҳаббат.

2 Газандаларнинг чаққанда санчадиган аъзоси; ништар. *Йўлда чаён тошбақадек дўстига, Урди бир-икки нишини пўстига.* Ҳамза.

3 Эндигина униб чиққан (ўсимлик ёки куртак). *Тупроқни кўтариб турган ниш гўза тагини аста кавлаб кўрсам, илдизи чирий бошлабди.* С. Маҳкамов, Шогирд.

Ниш урмоқ **1)** нина, найза каби ўткир учли нарсани санчмоқ. *Қайнаётган қазига ниш урмоқ;* **2)** ўсиб ер бағрини ёриб чиқмоқ (ўсимликлар ҳақида). *Аввал экинларнинг ниш уришидан хирмонгача бўлган жараённи тўрт кўз бўлиб кузатган бўлса, энди кишиларнинг қалбини, қарашини, руҳини ўргана бошлади.* Шухрат, Шинелли йиллар; **3)** кўчма энди-гина, янги пайдо бўлмоқ, туғилмоқ. *Мураббий — бола қалбида ниш ура бошлаган умид гунчаларининг меҳрибон соҳибидир.* Р. Усмонов, Одобнома.

4 Тухумнинг учигаги ўткир бўртиғи, холи.

НИШАБ [ф. نشيب — қиялик, ёнбағир; пастлик, паст жой] **1** Юзанинг бирор то-

монга қиялиги; қиялик даражаси. *Нишаб ер. ■ Янги қамиш босиб, лой билан сувалган томнинг нишаби ҳовли томонда.* А. Мухтор, Опа-сингиллар.

2 кўчма Бирор гап-сўз, иш-харакатнинг мазмуни, йўналиши. *—Ўзим ҳам гапнинг нишабидан масалани тушунгандим, — деди Ботирали Неъматжонга.* Газетадан.

Нишабини ўзига оғдирмоқ (ёки тўғриламоқ) Фойдани, тушумни ўз томонига қаратмоқ. *Гулнор.. Мирзакаримбой хонадонига бошлиқ бўлиб кеккайсин, ҳеч ким билан сўзлашмасин, тугсин, бойликнинг нишабини ўз томонига тўғриласин!.. У жуда шайтон хотин.* Ойбек, Танланган асарлар.

НИШАБЛИК Қия жой; қиялик, ёнбағир. *Баширжон Қирмизхонни эргаштириб, нишабликдан бир-бир босганча, пастга туша бошлади.* Н. Аминов, Суварак.

НИШОЛДА Тухумнинг оқини етмак билан кўпиртириб ва шакар қиёми кўшиб тайёрланадиган кўпиксимон қуюқ оқ ширинлик. *Ота.. нишолдага нон ботирар, самоварчи унга гулдор пиёлада иссиқ, хушбўй чой узатиб турар эди.* А. Мухтор, Опа-сингиллар.

НИШОЛДАЧИ Нишолда тайёрлаш билан шуғулланувчи шахс.

НИШОН [ф. نشان — белги, из; муҳр, тамға; аломат; мўлжал; орден, медаль] **1** Атайлаб қўйилган ёки табиий белги; аломат. *Боланинг ўнг бетиде нишони бор. ■ Техник.. домланинг дарвозасига қизил нишон қўйиб кетди.* А. Қаҳҳор, Сароб.

2 Бирор нарсанing изи, асари, *Кечаги ёмғирдан нишон ҳам қолмаган, хушбўй шабада, дилхуш манзара, оромижон табиат.* И. Раҳим, Ихлос. *Кубань бўйларидан изладим сени. Ўтди туну кунлар, топмадим нишон.* Т. Тўла.

3 Бирор нарсадан дарақ ёки далолат берувчи белги. *Ясовулар садоқат нишони кўрсатдилар.* А. Қодирий, Меҳробдан чаён. *Бу байроқ ҳар бир жангчи учун шон-шараф белгиси.. ғалаба нишони.* И. Раҳим, Чин муҳаббат.

4 Ўқ узиш учун мўлжалга олинган (қўйилган) нарса; қора. *Ўқни нишонга бехато урмоқ. Нишонга олмоқ. ■ —Тўғри қилгансиз, — деб уни қўлтиқлади комиссар, — жангчининг онги қайралса, ўқи нишонга бехато тегадиган бўлади.* Шухрат, Шинелли йиллар.

5 кўчма Бирор гап қаратилган объект; бирор гапдан кўзланган мақсад; мўлжал. *Иноят сўзининг нишонга бориб тегаётганидан мамнун. С. Абдуқаҳҳор, Санамай саккиз дема.*

6 эск. кам. қўлл. Орден; медаль. *Кўкрагида яқинда олган «Меҳнат шухрати» нишони.. Газетадан.*

7 Нишон (эркаклар исми).

НИШОНА [ф. نشانه — белги, из; асар, кўрсаткич, мўлжал] **1** айн. **нишон 1,2,3.** *Шукуржоннинг.. қуёшда куйган бугдойранг юзида қандайдир теран бир қайғунинг нишонаси бор эди. О. Ёқубов, Ота изидан. Бек ва амир амалдорининг нарида туриб шивир-шивир қилаётганликларини Ҳасан овчи ёмонликдан нишона деб тушунди. Ш. Тошматов, Эрк куши.*

2 Мевали дарахтнинг биринчи марта қилган меваси. *Олма нишона қилди. ■ Ҳали нишона қилмаган мевани ҳисобга киритасанми? Аввал тарбия қил, гулласин, ундан кейин мевасига сават тўқисанг арзийди. Шухрат, Шинелли йиллар.*

НИШОНДОР [ф. نشاندار — нишони, белгиси бор, белги қўйилган] **1** Нишони, белгиси бор, бирор белгига эга бўлган, белгили, белги қўйилган.

2 эск. айн. **орденли.** *Топиб бахту саодат қиз-йигитлар бизда меҳнатдан, Нишондор бўлдилар кўнлар, бу унвон илму фандандир. М. Ҳасанова. «Эл-юрт ҳурмати» ордени нишондорининг [О. Ҳакимовнинг] биргина армони бор. Газетадан.*

НИШОНЛАМОҚ **1** Байрам, қутлуғ кун ва ш.к. ни тантана билан ўтказмоқ, муносиб совғалар билан кутиб олмақ. *Темир-терсақ буюмлари заводининг директори элик ёшга тўлди. Мана шу қутлуғ маросимни нишонлаш учун завод фаоллари клубга йиғилишиди. С. Аҳмад. Сайланма.*

2 Белги, нишон қўймоқ, белгиламоқ. *Ёр етилгандан кейин отам жўяклар жойини нишонлаб берди. С. Айний, Эсдалиқлар.*

НИШТАР [ф. نيشتر — жарроҳ пичоғи] **1** Жарроҳларнинг кескир асбоби. *Ибн Сино ечиб ташлаган қонли яктагини кийиб, қўлида ништар билан ярадорнинг тепасига келди. М. Осим, Аждодларимиз қиссаси.*

2 Умуман, ўтқир ва санчиладиган нарса. *Душман заиф жойдан ништар уради. С. Аҳмад, Ҳукм. Ништардан аччиқ ботди Темирдан бўлган жавоб. Ғайратий.*

3 айн. **ниш 2.** *Чаён заҳарли ништарини бир гал ўртанча бармоғининг учига, иккинчи марта кўрсаткич бармоғига санчиб олди. П. Турсун, Ўқитувчи.*

4 кўчма Ўтқир, кучли. *Қуёшнинг ништар нури баҳор ёмғирида ўсган ўтларни қовжиратиб юборган. Ё. Шукуров, Биринчи парвоз.*

НИШХЎРТ [ф. نشخور — кавшаш, кавш қайтариш; чайнашга қайтарилган озуқа, ем] Ҳайвонларга берилган ем-хашак қолдиғи; чиқит. *Ашурмирзо бурчакда уйиб қўйилган нишхўрдлар устида беҳуш ётар эди. М. Исмоилов, Фарғона т. о.*

НИЯТ [а. نية — мақсад, ўй, мўлжал, ўйлаб қўйилган иш] Кўнгилдаги истак-орзу, аҳд, мақсад. *Яхши ният — ёрти мол. Мақол. ■ Ожизамиз билан мирзо Анварнинг тўйларини қилмоқ ниятимиз бор эди. А. Қодирий, Меҳробдан чаён. [Охун:] Беш-ўн қоғозни белгимга тугиб, уст-бошимни бут қилиб, юртимга жўнаб кетай дегандим, ниятга ета олмай турибман. Ойбек, Танланган асарлар.*

НИҚОБ [а. نقاب — ёпичиқ, юзга тутиладиган тўр] **1** Ўзини танитмаслик ёки ҳимоя қилиш учун юзга тутиладиган, кийиладиган нарса; маска. *Карнавал ниқоби. ■ Унгур қазиётган боёқишларнинг юзлари чақмоқдан яра, ғурра бўлиб кетибди, шуни тутиб олиб ишлашсин, деб қилдим, — деди Қудрат, темир ниқобни чолларга узатиб. М. Исмоилий, Фарғона т. о. Эй моҳтоб, очгил ниқоб, Карнавалда янгарар соз. Т. Тўла.*

2 Махсус тикилган жилд, қоплама. *Уч деразали катта кабинет, баланд суянчиқли стулларга, юшкоқ креслоларга оқ ниқоб ёпилган. П. Қодиоров, Уч юлдуз.*

3 кўчма Ҳақиқатни, ҳақиқий ҳол, қиёфа ва ш. к. ни пардаловчи, яширувчи нарса, восита. *Ниқобини олмоқ. ■ Ҳа, узоқ йиллар мобайнида [Эркиннинг отаси] большевик ниқобида юрган. Т. Малик, Иблис девори. [Мутавалли] Юзидаги газаб ва норозилик аломатларини жўрттага йўқотиб, ясама шодлик ниқобини кийиб олибди. С. Айний, Эсдалиқлар. Бу ҳол [Ҳомиднинг] сирини очар, юзидаги ниқобини олишга, рақиблар ила юзма-юз келишга мажбур ётар эди. А. Қодирий, Ўтган кунлар.*

НИҚОБДОР [а. + ф. نقابدار — (юзида) ниқоби бор] айн. **ниқобли.**

НИҚОБЛАМОҚ **1** Ниқоб тутиб, таниб, билиб бўлмайдиган, кўринмайдиган қилмоқ.

Сувонжон қопқонни иннинг шундай олдиғинасига, тулки бошини чиқариши билан бир парча гўшти кўрадиган қилиб ўрнатди. Утчўп билан ниқоблади. С. Анорбоев, Оқсой.

2 ҳарб. Кўшинларни, ҳарбий объектларни душмандан беркитиш, ўз ҳарбий кучлари, уларнинг таркиби, жойлашиш ўрни ҳақида душманни чалғитиш бўйича чора-тадбирлар кўрмоқ.

3 кўчма Яширмоқ, пардаламоқ. Чет эллик баъзи арбоблар кейинги вақтларда зўр бериб ҳийла-найранг ишлатмоқдалар, ўз мақсадларини ва ниятларини ниқобламоқдалар. Газетадан.

НИҚОБЛАНМОҚ Ниқобламоқ фл. мажҳ. н. Ниқобланган душман. ■ Йўлда ҳарбий юк ва аскар ортган машиналарнинг кети қарийб узилмас эди. Уларнинг ҳаммаси шохлар билан жуда моҳирона ниқобланган. Ойбек, Қуёш қораймас.

НИҚОБЛИ Ниқоби бор, ниқоб кийган, ниқобланган.

НИҚТАЛАМОҚ Узлуксиз ниқтамоқ, ниқталайвермоқ. Бола кучли оёқлари билан эшакни шундай ниқталадики, жонивор.. қаттиқ йўғалаб кетди. Ойбек, О. в. шабадалар.

НИҚТАЛМОҚ Нигоҳини қаратмоқ, қаттиқ тикилмоқ. Назир полвоннинг кўзлари ўзидан-ўзи чамадонга ниқталди. «Шарқ юлдузи». Мана ҳозир ҳам қурилишнинг оқсаб қолишига фақат Дониёров айбдордай, бош инженер фақат унга ниқталиб туриб гапирарди. Ж. Абдуллахонов, Тўфон.

НИҚТАМОҚ 1 Таёқ санчиб ёки оёқлари билан икки ёнига тепкилаб, юришга, илгарилашга ундамоқ (от-уловни). У [отлиқ] шеригидан қолмаслик учун отининг тизгинини силтайди, оёғи билан унинг бағрига ниқтайди. П. Турсун, Ўқитувчи.

2 Қўл ёки оёқ учи билан туртмоқ. -Фафлатда қолмай ўлинг, отаси, — деди эрининг бошига ниқтаб. — “Лайлатулқадр” бизларни иззат қилиб, ўз оёғи билан уйимизга кириб келган экан. Н. Мақсудий, Лайлатулқадр. Баланд бўйли, пахмоқ сочли, дов казак аскарлар халқни уриб, ниқтаб, орқага суришга киришди. Ойбек, Танланган асарлар.

3 Тигизлаб жойламоқ, муштлаб тикмоқ. Қодир, ниқтаб пахта тиқилган қанорнинг оғзини тикиб, тарозига келтириб қўярди. С. Маҳқамов, Дала тонги.

НИҲОЛ [ф. نهال — янги ўтказилган, ўстирилган дарахт; қаламча] **1** Ёш новда ёки кўчат. Ёш ниҳолга усталлик билан қилинган пайванд тез амал олади. М. Исмоилий, Фарғона т. о.

2 Янги униб чиққан ўсимлик, экин. Ғўза ниҳоллари. Дарахтдан мева оламан десанг, ниҳолидан парвариш қил! Мақол. Болани ёшдан асра, ниҳолни бошдан асра. Мақол.

Нозик ниҳол 1) ёш новда ёки кўчат. Нозик ниҳол дарахтлар; 2) кўчма нозик қомат ва шундай қоматли киши. Бежирим, келишган нозик ниҳолинг, Беқасам камзулинг ярашибди хўп. Х. Расул.

3 кўчма Етилмаган ёш нарса; мурғак, куртак. Фуломжоннинг кўнгли синди, йўқ, кўнгли эмас, умр орзусининг ниҳоли синди. М. Исмоилий, Фарғона т. о. Ишдан қайтган чоғимда Қийқиради ўғилчам, — Ҳали ниҳол боғимда, Баргин ёзмаган гунчам. Ё. Мирзо.

НИҲОН [ф. نهان — пинҳон, яширин, махфий] эск. кт. Киши билмайдиган, сезмайдиган; яширин, пинҳон. Муҳаббат кўнгил ичра эрди ниҳон, Бўлиб анга ҳар дам тилм таржимон. Ҳабибий. Бу гал эса кўзлардан ниҳон, Уттиз тўрт газ минора нечун? М. Али, Боқий дунё.

НИҲОЯ [а. نهايه — охир; чек, чегара] Сўнгги чек, чегара, охир, поён. Ниҳоясига етмоқ. Ишни ниҳоясига етказмоқ. ■ Бекнинг асабийлиги ниҳоясига етди ва у Лаълининг сочидан бураб, теракзорга судраб кетди. Ҳ. Фулом, Машғал.

НИҲОЯСИЗ Ниҳояси, охири, поёни йўқ; бениҳоя. У онани қўлтиқлаб, ичкарига бошлади. Ҳозир буларнинг ниҳоясиз қувончларини тасвирлаш учун сўз топмиш қийин эди. Ш. Фуломов, Ёрқин уфқлар.

НИҲОЯТ [а. نهايت — охир; чек, чегара] **1** айн. ниҳоя. Элликбоши уруш ниҳоятда оқподшо ғолиб келишини исбот қилишга тиришди. Ойбек, Танланган асарлар.

2 рвш. Ғоят, жуда, ниҳоятда. Элмурод уларнинг овозларидан ўз ишларидан ниҳоят хурсанд эканликларини сезди. П. Турсун, Ўқитувчи.

3 крш. с. Охир-пировардида, охири. Ниҳоят, ҳар миноти бир кундай туюлган бир соат вақт утгач, бутадан йигирма-ўттиз метрча берда қора каска кўринди. А. Қаҳҳор, Олтин юлдуз. Ниҳоят, улар ҳам чарчади шекилли, вагонга сукунат чўкди. Газетадан.

НИҲОЯТДА *рвш.* Гоят даражада, гоят, жуда ҳам. *Ниҳоятда оғир масала. Ниҳоятда яхши иш.* ■ *Бу гапни олтимшига бориб қолган бир чолдан эшитганлиги унга [Сидиқжонга] ниҳоятда наша қилди.* А. Қаҳҳор, Қўшчинор чироқлари.

НИҲОЯТИ Ҳаммаси бўлиб, бор-йўғи, атиги, фақатгина. -*Ота, — деди Салим жеркиб, — бу нарса кўпга келган тўй. Ўғлингиз ниҳояти бир неча ой ишлаб қайтади. Нимасига қайгурасиз?* Ойбек, Танланган асарлар. -*Ўғлингни ўлимга олиб бораётганим йўқ, ниҳояти бир пиёла чой ичади-ю келади!* — дедим. А. Қодирий, Ўтган кунлар.

НИҲОЯТСИЗ *айн. ниҳоясиз.* Унсин қабр тупроғига гоҳ бошини, гоҳ кўксини қўйиб, ўлчовсиз, ниҳоятсиз қайғу билан узоқ йиғлади. Ойбек, Танланган асарлар.

НО- [ф. *ن* — эмас, йўқ; инкор маъносини ифодаловчи префикс] Қарама-қарши, инкор маънодаги сўзлар ясовчи олд кўшимча; ўзакдан англашилган белги-хусусият йўқлигини, шундай белги-хусусиятга эга эмасликни билдиради, мас., *ноаниқ, ноилож, нопок* каби.

НОАЁН [но.. + аён] Аниқ бўлмаган, номаълум. *Ранги ҳам, туси ҳам ноаён дунё, Қирқми ё эллик бу, умр ўртаси.* А. Орипов, Йиллар армони.

НОАНИҚ [но.. + аниқ] 1 Унча аниқ, равшан бўлмаган, ҳақиқатдагига унча мос келмайдиган. *Ноаниқ тасвир.* ■ -“*Мажара*” эмас, “*можаро*”, яъни жанжал деган сўз, — деди [Элмурод] бир гал болаларнинг бир шеърдаги шу сўзини ноаниқ талаффуз қилганларидан гаши келиб. П. Турсун, Ўқитувчи.

2 Унча ишонарли эмас, шубҳага, иккиланишга ўрин қолдирадиган. *Ноаниқ гап. Ноаниқ маълумотлар.*

3 *кесим* *взф.* Шубҳали, гумон. *Келиш-келмаслиги ноаниқ.*

4 Мўҳмал, мужмал, дудмол. *Ноаниқ жавоб.*

НОАНИҚЛИК Ноаниқ хусусиятга эгалик, аниқ эмаслик, номаълумлик. *Врач чиқиб кетгандан кейин, Мамлакатнинг кўнглини ғашликми, ноаниқликми, ишқилиб, ғалати бир туйғу қамраб олди.* Ў. Усмонов, Сирли соҳил.

НОАҲИЛ [но.. + аҳил] Бир-бири билан унча аҳил бўлмаган; ноиноқ. *Ноаҳил оила.* ■ *Водокачкалардан бирини тиклашда..*

ўшанчалик ноаҳил бўлган капсанчилар ҳозир бунчалик иттифоқ бўлиб қолганларига ўзлари ҳам ҳайрон эди. А. Қаҳҳор, Қўшчинор чироқлари.

НОБАКОР [ф. *ناپکار* — ишга ярамайдиган; ёвуз, баттол; ахлоқсиз; бекорчи] 1 Хулқ-атвори, юриш-туриши, хатти-ҳаракати ёмон одам. *Биласизки, чиқиб Ниёз баччағар, Атрофига йиғилди қулбаччалар. У нобакор озор берар тинч халққа, Кирдикори нуқул зарар тинч халққа!* И. Султон, Номаълум киши.

2 сўк. Ярамас, аблаҳ, разил.

НОБАКОРЛИК Нобакорга хос хусусиятга эгалик, нобакорга хос хатти-ҳаракат. *Қулмуҳаммад ёнида турган Пирназар ота ҳам ялт этиб қараб, нима деяётганига тушунгач, «бу қандай нобакорлик», деб кўзларига ғазаб тўлди.* Мирмуҳсин, Бибиғул.

НОБОП [ф. *ناپاپ* — мос, мувофиқ эмас; ярамас; яроқсиз] Унча мос, мувофиқ эмас; қўл келмайдиган, номувофиқ, яроқсиз. *Нобоп жой. Нобоп ер.* ■ *Айрим қишлоқ кутубхоналари нобоп ва кўримсиз хоналарга жойлашган.* Газетадан.

2 Унчалик шай эмас, бузуқ. -*Дехқон ака, эҳтиёт бўлинг, аравангиз нобоп.. — бошини чайқаб гапирди Йўлчи.* Ойбек, Танланган асарлар. *Нобоп йўлнинг, нобоп машинанинг заҳматидан Темиржоннинг бутун суяклари зирқираб оғир, қулоқлари шанғилларди.* Ж. Абдуллахонов, Орият.

3 Хулқ-атвори, юриш-туриши ёмон, ярамас. *Нобоп одам.* ■ *Йўқ, у бола кўп нобоп чиқди, шариатга шак келтирадир.* М. Исмоилий, Фарғона т. о.

4 Нотинч, ноқулай. *Бир оз жимликдан сўнг Равшан гапира бошлади: -Бўри ака, замон нобоп, деб тунов кун Абдураҳмон ака айтган гаплар қулоғим остидан ҳали-ҳали сира нари кетмайди. Атрофга қараб, одамни ваҳм босади.* С. Кароматов, Бир томчи қон.

НОБУД [ф. *نابود* — мавжуд бўлмаган, йўқ қилинган]: **нобуд бўлмоқ** 1) исроф бўлмоқ, бекорга йўқ бўлиб кетмоқ. *Пахтанинг бир грамма ҳам нобуд бўлмасин;* 2) ҳалок бўлмоқ; ўлмоқ. *Уруш йиллари ташкилотнинг кўп аъзолари нобуд бўлди.* С. Аҳмад, Ҳукм. **Нобуд қилмоқ** 1) яроқсиз ҳолга келтирмоқ, ишдан чиқармоқ. *Мулла Обид билан Усмон полвон қулунли бияни миниб юришга қарши, чунки қулунлар ғўзани босиб нобуд қилади,*

дейдилар. А. Қодирий, Обид кетмон; 2) ўлдирмоқ, ҳалок қилмоқ. *Хотинимни ҳам камбағаллик ойқитди, бу ердаги оғир иш нобуд қилди.* Ойбек, Танланган асарлар.

НОБУДГАРЛИК кам қўлл. айн. **нобудгарчилик**.

НОБУДГАРЧИЛИК Бекорга йўқ қилиб юбориш, нобуд қилиш, исрофгарчилик. *Нобудгарчилик — халқ хўжалиги учун зарар.*

НОВ [ф. نوب — қувур ёки ёғоч тарнов; сув йўли] 1 Сув оқиши учун ёғоч, тахта, цемент ва ш.к. дан ишланган махсус ўзан; тарнов. *Сув шунча кучайган эдики, новни кўпориб, тегирмонни босиб кетиш хавфи тугилган эди.* Ш. Рашидов, Бўрондан кучли.

2 Суғориш ёки умуман сув сақлаш учун ёғоч, тахта, цемент кабилардан ишланган охур; тегана. *Нўмон движокни ишга солиб, бир-бирига шохлари тезиб турган садалар остидаги новларни сувга тўлдирга бошлади.* О. Хусанов, Най.

3 *геогр.* Океанлар остидаги кўпинча узун чўзилган чуқур ботиклар. Масалан, *Мариана нови, Ява нови.*

НОВА [ф. ناوله — елкага қўйиб, лой ёки қоришма ташиладиган тоғорача] айн. **нов.** *Лойқа оқиб ўтадиган нованинг ёнига борганимизда, мастер тўхтади ва менга юзланди.* П. Қодиров, Эрк.

НОВАТОР [лот. novator — янгиловчи, янгилик яратувчи] Кишилик фаолиятининг бирор соҳасида янгича илғор принцип, гоя, усул қиритувчи ва уни амалга оширувчи. *Ишлаб чиқариш новаторлари.*

НОВАТОРЛАРЧА *рви.* Новаторларга ўхшаб, янгичасига. *Эндиликда эскича андозалар, эскирган усуллардан қатъият билан воз кечиш, ишга новаторларча ёндашувлар талаб қилинади.* Газетадан.

НОВАТОРЛИК Кишиларнинг бунёдкорлик фаолиятидаги, новаторлар фаолиятидаги янгилик; новаторга хос хусусият, хатти-ҳаракат. *Новаторлик таклифлари.* ■ *Драматург бу ерда новаторлик йўлидан боради, яъни асарни тўппа-тўғри биринчи нардадан бошлайди.* С. Аҳмад, Сайланма.

НОВВОЙ [ф. نواوي — нон пиширувчи, нон сотувчи] Нон ёпиш, пишириш ва сотиш билан шуғулланувчи шахс. *Япасқи новвой ҳар кун пешин вақтида иккита ширмой нонни бойга ташлаб кетар эди.* Ойбек,

Танланган асарлар. *Тандирдан янги узилган обинонларнинг ёқимли ҳидларини сочиб.. новвойлар шипиллаб ўтадилар.* М. Исмоилий, Фарғона т. о.

НОВВОЙЛИК 1 Нон ёпиш касби, нон ёпиш билан шуғулланиш. [Йўлчи:] *Қалай, новвойликдан бир нима ортадимми?* Ойбек, Танланган асарлар.

2 *тар.* Нон ёпиладиган ва сотиладиган жой. - *Рўмолчани елкага солиб, новвойликка қараб югурдим, — деди Шум бола.* Ф. Фулом, Шум бола.

НОВВОЙХОНА [ф. نواوخانا] Нон ёпиладиган, пишириладиган жой. *Зумрад дадасининг новвойхонасидаги хамир қорадиган йигитлардан бирини яхши кўриб қолган эди.* С. Зуннунова, Гулхан.

НОВВОС Икки-уч яшар буқа. *Чап томонимиздаги тикка тақир тоғ бағридаги бутазорда гала-гала новвослар ўтлаб юрибди.* С. Анорбоев, Йўлда йўлдош бўлганлар.

НОВВОТ I [ф. نبات — кристалл шакли қанд, шакар] Шакар қиёмидан махсус тайёрланадиган ялтироқ кристалл қаттиқ оқ ёки сарғиш ширинлик. *Новвот чой.* ■ *Матлуба хонага кирганда, Асқар Аминович олдида бир ликончада новвот, дўнг пешонасида маржон-маржон тер, фамили чой ичиб ўтирарди.* О. Ёкубов, Излайман.

НОВВОТ II *махс.* Тўқимачилик дастгоҳида: тайёр мато ўраладиган ёғоч валик.

НОВВОТРАНГ Сарғиш-кўнғир ёки оқ ранг, новвот рангига ўхшаш. *Гув-гув шамол.. эшик тирқшишдан уйга кириб, чироқ пилигининг новвотранг алангасини липиллатади.* Ҳ. Фулом, Машғал.

НОВДА Дарахтнинг ёш, ингичка ва узун, бебуюқ тармоғи. *Тол новдаси. Ток новдаси.* ■ *Чарос элик қадамча юриши билан кўча четидаги, новдаларини шода-шода қизғиш гуллар қоплаган шафтоли тагида турган Дилшодни кўриб қолди.* Ў. Ҳошимов, Қалбингга қулоқ сол. *Моҳирона хомтоқ қилинган новдалар, сийрак япроқлар оралаб ерга танга-танга қуёш ёғилади.* Ж. Абдуллахонов, Орият.

2 *кўчма* Ёш, нозик. *Кўнгли сув ичиб қолибди-да, болагинамдан айланай. Келин ҳам новдагина, уйинчи бўлса ҳам, камсухан, шикасталигини айтмайсизми!* А. Мухтор, Асарлар.

НОВЕЛЛА [итал. novella – янгилик < лат. novus – янги] ад. Насрнинг кичик жанри, кичик ҳикоя. Абдулла Қодирий ўзбек адабиётида сатирик новеллага асос солдигина эмас, у 20-йиллардаёқ биринчилардан бўлиб иккита катта роман – «Ўтган кунлар» ва «Меҳробдан чаён»ни ёзди. Газетадан.

НОВЕЛЛИСТ [итал. novellista] Новелла ёзувчи ижодкор; новелла муаллифи. Моҳир новеллист Абдулла Қаҳҳорнинг 30-йиллар ижодини ўтишдан олдин ўқитувчи ёзувчининг замондошлари хотирасини ўқиб, ўрганиши керак. Газетадан.

НОВОКАИН [лат. Novocainum < лат. novus – янги + (ко)каин] фарм. тиб. Сунъий йўт битан олинган ва таркиби жиҳатдан кокаинга яқин бўлган, сувда ва спиртда яхши эрийдиган рангсиз ва ҳидсиз кристалл дори; оғриқ қолдириш хусусиятига эга. Новокаин қонга юборилганда, умумий таъсир кўрсатади. «Фан ва турмуш».

НОВУТ с. т. Нобуд. [Заргаров:] Жоним! Пайт нозик, хотин-қизлар масаласи чирсиллаб турибди – бекорга новут бўлиб кетаман.. Менга раҳм қилинг! А. Қаҳҳор, Оғриқ тишлар.

НОВЧА I Бўйи баланд, дароз, узун. Новча йигит. Бўйи новча одам. ■ Ҳокимнинг новча, ҳайбатли қомати олдидан.. Тешабой ҳам одамлар назаридан четда эмас эди. М. Исмоилий, Фарғона т. о. Новча тераклар учидо ойнинг кумуш парчаси сузди. С. Аҳмад, Қадрдон далалар.

НОВЧА II тар. Қарол, хизматкор. Улар қишлоқдан чиқиб улгурмасданоқ, қариндош бойнинг новчалари кетмон кўтариб келиб, сотиб олинган уйларнинг том тупроғини кўкка совуриб буза бошладилар. П. Турсун, Ўқитувчи. Қанча бойнигида новча бўлиб ишладим-у.. Ҳамма ерда тўғри ишладим. Ш. Тошматов, Эрк қуши.

НОВШАДИЛ [а. نشادر] с. т. Нашатир. Фарғона водийсида, айниқса Ўзганда кўп миқдорда новшадил қазиб олинган ва чет мамлакатларга ҳам сотилган. «Фан ва турмуш».

НОГАҲ [ф. ناگاه – кутилмаганда, бирдан, тўсатдан] айн. **ногаҳон**. Тегмасин ногаҳ маломат ўқлари, Сезгиру хушёр бўл оҳу каби. Ҳабибий.

НОГАҲОН [ф. ناگاهان – тўсатдан, бирдан; кутилмаганда] Кутилмаган, тўсатдан, кўқ-

қисдан юз берган. *Балои ногаҳон.* ■ *Оқсоқол сўзини тугата олмайди, ногаҳон келиб тушган ўтқир болта Шодмонбойнинг бошини баравар иккига бўлади.* А. Қодирий, Обид кетмон.

НОГАҲОНИЙ [ф. ناگاهانی – кутилмаган, тўсатдан, бехосдан бўлган, тасодифий] сфт. Кутилмаганда юз берувчи, юз берган, кутилмаган. *Бу ногаҳоний қазодан эслари чиқиб кетган бечоралар йиғлашадилар.* А. Қодирий, Ўтган кунлар. *Аҳмаджон билан Маннон бу ногаҳоний кулгидан довираб қолишган эди.* Й. Шамшаров, Тошқин.

НОГИРОН [ф. ناگیران – таъсир қилмайдиган, таъсир ўтказиш қобилияти йўқ] I Ишга яроқсиз бўлиб қолган, ожиз (одам ёки унинг аъзолари ҳақида). *Ногирон бола.* *Унинг бир қўли ногирон.* ■ *Пўлатжон.. ногирон оёғига қараб хўрсиниб кўйди.* С. Аҳмад, Қадрдон далалар. *Ўшанда у полиомиелит касаллигига қарши эмлаш жараёнида шифокорнинг қўпол хатоси туйфайли ногирон бўлиб қолганди.* Газетадан.

2 кўчма Нотўғри фикр юритадиган, тўғри фикрга эга бўлмаган. *Ёшлар ўртасида танбаллар, маънавий ногиронлар, ношукурлар ҳали ҳам бор.* Газетадан.

3 кўчма Яроқсиз бўлиб қолган, камчилиги бўлган. *Эскирган ва ёшини яшаб бўлган ногирон ускуналар ғишт заводларида ишлаб чиқарилаётган маҳсулотнинг сифатига ҳам таъсир қилаётганлигига чидаб бўлмайди.* Газетадан.

4 кўчма Юмуқ, ожиз. *Ногирон гунчалар ҳам бирин-сирин очила бошладилар.* Ш. Рашидов, Бўрондан кучли.

НОГИРОНЛИК Ишга яроқсиз бўлиб қолишлик; тўғри фикрлай олмаслик. *Рухий ногиронликни тузатиш қийин.* Р. Азизхўжаев, Яшил чайла.

НОГОҲ [ф. ناگاه] с. т. Ногаҳ. *Ногоҳ бурчакдан кўнгироқли чирманда гулдураб кетди.* Ойбек, Танланган асарлар.

НОГОҲОН [ф. ناگاهان] с. т. Ногаҳон.

НОДАВЛАТ [но.. + давлат] сфт. Давлат тасарруфида бўлмаган. *Нодавлат сектор.* *Нодавлат ташкилот.* ■ *Республикамизда минглаб нодавлат, нотижорат ташкилотлари фаолият кўрсатмоқда.* Газетадан.

НОДАВРИЙ [но.. + даврий] Мунтазам бўлмаган, узлуксизлиги таъминланмаган. *Рустам ака бир неча йиллардан бери нодав-*

рий наирлар бўлими мудир вазифасида фаолият кўрсатмоқда. Газетадан.

НОДАРКОР [ф. نادرکار — кераксиз, ишга яроқсиз; ишга алоқаси бўлмаган] Кераги, даркори йўқ; кераксиз. *Нодаркор қоғозлар.*

НОДИР [а. نادر — сийрак; кам учрайдиган, камёб] **1** Кам топиладиган, ноёб. *Нодир кўлэзма. ■ Нодир ўлка, ҳатто таърифлашга сўз тополмайсан, — деди Комарова. Ойбек, О. в. шабадалар.*

2 Қимматбаҳо, бебаҳо, асл. *-Хазина! — деди Заргаров кафтларида салқин нодир тошларнинг салмоғини сезиб. Кўзларида ҳам кристалларнинг товланиши бордек эди. А. Мухтор. Бўронларда бордек ҳаловат. Зумрад бармоғини силади; нодир узук бармоғини, йўқ, юрагини сиқаётгандек бўлди. С. Сиев, Отлиқ аёл.*

3 Кам учрайдиган.

Нодир металллар Ер қатламида жуда кам учрайдиган элементларнинг шартли номи. *Ўзбекистон — рангли, нодир металлларга бой ўлка. Газетадан.*

4 Нодир (эркаклар исми).

НОДОН [ф. نادان — билмайдиган, хабарсиз; жоҳил, илмсиз; калтафаҳм, бефаросат] **1** Илм-маърифатдан хабари йўқ, онги, тушунчаси паст; ўқимаган, билимсиз; қолоқ. *Нодон одам. Сўзлагувчи нодон бўлса, эшитгувчи доно бўлсин. Мақол. ■ Наҳотки мана шу ерда ўтирган студентлар Юнусов ўйлаганчалик нодон бўлса?! Ҳ. Хошимов, Қалбингга қулоқ сол.*

2 Фаҳм-фаросати кам; тушунмайдиган, тентак. *Ажаб бўлди! Оёғининг тагига ўлигини ташлагин энди, ўз қадрини билмаган нодон. Ҳ. Хошимов, Қалбингга қулоқ сол.*

НОДОНЛИК **1** Билимсизлик, онги пастлик; жоҳиллик. *Мунозара деб ҳар қанақа куракда турмас гапларни айтавериш ғирт нодонлик аломати. М. Маҳмудов, Мангу куй излаб.*

2 Нодон кишиларга хос хатти-ҳаракат, иш; аҳмоқлик. *Опа, кечирасиз-да, янглишиб бир нодонлик қилиб кўйдим. С. Аҳмад, Қадрдон далалар.*

НОДУРУСТ [ф. نادرست — нотўғри, хато, сохта; бузук, шикастланган] Унчалик дуруст эмас; чакки. *Шу дуруст бўлдими, нодуруст бўлдими? Сени ўйлар эди. А. Қаҳҳор, Сароб.*

НОЁБ [ф. ناياب — топилмайдиган, танқис, камёб] **1** Кўп учрамайдиган, жуда кам

бўладиган. *Ноёб талант эгаси бўлган Юсуфжон қизиқ ўз халқининг азиз фарзандларидан биридир. Т. Обидов, Юсуфжон қизиқ.*

2 Қимматли, бебаҳо. *Ноёб кўлэзма. ■ Қадимда нашр этилган энг ноёб асарлар аҳолидан сотиб олинади. Газетадан.*

НОЖИНС [но.. + жинс] **1** Бошқа жинсдаги, жинси номаълум.

2 кам қўлл. Ярамас, ёмон; пасткаш, разил. *У муртад атрофига аллақандай таги паст, ножинсларни тўплаб, подшога, ҳоким тўрага, қолаверса, бизнинг манфаатларимизга зид келадиган гапларни тарқатиш билан одамлар ўртасида нифоқ уруғларини сочмоқда. К. Яшин, Ҳамза.*

НОЖОИЗ [но.. + жоиз] Ўринсиз, муносиб бўлмаган. *-Чунки юртга пахта керак, — кўрсаткич бармоғини кўкка ниқтаб гапирди Иззат Маржонович, — бунининкор этиш сиз билан бизга ножоиз. Ж. Абдуллахонов, Хонадон.*

НОЖЎЯ [ф. ناچويا — қидирилмаган, исталмаган] Одоб-ахлоқ доирасига сифмайдиган, умумий тартибга муносиб бўлмаган; чакки. *Ножўя гап. Ножўя хатти-ҳаракат. ■ Баҳодир ножўя ҳаракати билан Оқилани хижолатга қўйганидан қаттиқ ўқинар, лекин иш ўтган эди. М. Жалолиддинова, Кейинроқ.*

2 Ҳақиқатга мос эмас, нотўғри. *Табиибининг гапи ножўя бўлиб, бир чаламулла боланинг сўзлари эътиборга лойиқ десангиз, миннатингиз бош устига, хоним. С. Сиев, Ёруғлик.*

НОЗ [ф. ناز — таннозлик, карашма, истиғно; ҳузур, маза; кеккайиш; инжиқлик; мулоиймлиқ] **1** Танноз аёлларга хос сериш ва ҳаракат, қилиқ; ишва, карашма. *Ноз қилмоқ. ■ Сўз билан, ноз билан, ҳангома билан йигитларнинг кўкрагига ўт солади қирғиз қизлари. Ойбек, Танланган асарлар. Дилбар қизнинг қилиғи, нози яхши, Сўзнинг ози, машшоқнинг сози яхши! Ё. Мирзо.*

2 Ўз қадрини ошириш учун қилинадиган ноўрин талаб, ортиқча эркалик; таранг қилиш. *Қизи борнинг нози бор. Мақол. ■ Касали нима, озиб кетибди келинчак онамиз? — Муғамбирлик, эркалик, ноз! Ойбек, Танланган асарлар. [Нури] Йўлчини ёдларкан, унинг юрагида энди ғазаб кўзгалар эди.. Ким у? Нега мунча ноз қилади, кеккаяди? Ойбек, Танланган асарлар.*

3 Нозик; жиззаки. *Бошим тоз, кўнглим ноз.* Уйғун.

Ноз уйқу Нозли, хузурли, ширин уйқу.

4 *кўчма* Майинлик. *Гулларда ноз, Елларда ноз, Кел, чаманда қил парвоз!* Т. Тўла, Оромижон.

НОЗАНДАЙ, =дек с. т. х.-қ. Ёмон эмас, туппа-гузук, дурустгина. -*Хотиржамгина ишингни қила бер, болам, Муҳаббатинг нозандек ўрганиб қолди янги жойга, — деди кампир.* Ҳ. Назир, Ўтлар туташганда.

НОЗАНИН [ф. نازنين — мулойим, ёқимли; танноз; суюкли; гўзал] Қадди-қомати келишган ва гўзал (қиз, аёл ҳақида). *Ана шу йигитнинг [Отабекнинг] олган хотини жуда ҳам нозанин бир қиз бўлиб, бу қизга бизнинг Ҳомид ҳам харидор экан.* А. Қодирий, Ўтган кунлар. [Бой:] *Ҳе пишмакан, хом калла! Бу нозанин увол! Чўриликка эмас, бечакликка арзийди-я!* Ҳамза, Бой ила хизматчи.

НОЗИГАРДОН [ф. نازگردان — бўйин бе-заги] Аёлларнинг бўйинга тақадиган тақинчоғи; заргарлик буюми. *Зийнат қутисидай жимирлар шаҳар, Нозигардон мисол чироқлар яшнар.* Т. Жўраева, Менинг маржонларим.

НОЗИК I [ф. نازک — ингичка, енгил; юмшоқ, мулойим; мўрт, бўш; нафис] I Юксак маҳорат ва санъат билан жуда бежирим қилиб ишланган; нафис, латиф. *Искандаро ҳавас ва таажжуб билан биноларга, бой жиҳозларга, айниқса, нозик санъат буюмларига, эшик ва деразаларга назар ташлаб кўярди.* Ойбек, Нур қидириб.

2 Ингичка; юпқа, ҳарир. *Нозик ип.* ■ *Дуторнинг нозик торларидан.. чиққан “Наво” куйи ўз носасига тушунгувчи Отабекдек йигитларга жуда муҳтож эди.* А. Қодирий, Ўтган кунлар.

3 Юпқа, ҳарир. *У гунафша гулли нозик батис кўйлак кийиб, чойшабни томоғигача тортиб, журнал ўқиб ётарди.* Ойдин, Ҳикоялар.

4 Бежирим, латиф; хипча. *Момиқ пахталар унинг нозик бармоқларига ўзи илашиб чиқар, чаноқлар ҳайратдан оғиз очиб, силқиниб қоларди.* Ў. Ҳошимов, Қалбингга кулоқ сол. *Йигит маҳбубасининг нозик қўлларидан тутиб, ўзига тортарди.* С. Анорбоев, Оқсой. *Мурзин унинг паришон сочларини, нозик бўйнига ёпишган майин, жонсизгина соч толаларини томоша қиларди.* Шухрат, Шинелли йиллар.

5 Зайф, нимжон. *Нозик майса.* ■ *Укамни дурустроқ жойга ўрнаштиринг, ўзи нимжон, нозикроқ бола.. шамоллаб-нетиб қолмасин.* П. Турсун, Ўқитувчи. *Нозик, ранг-баранг парвоналар, каналаклар лампа атрофида айланар.. эдилар.* Ойбек, Танланган асарлар.

6 Мулойим, майин ва ёқимли, назокатли. *Нозик табассум.* ■ *“Дилхораж” ўзининг майда қадами, нозик ҳаракатлари билан даврага кириб келди.* М. Исмоилий, Фаргона т. о. *Халқ кўнглини овлаган, Улфатда доим. Овози жонга ёқар, Нозик, мулойим.* Қ. Муҳаммадий. *У куйнинг сеҳрига берилиб, интизор кўзларини нозик юмди, бошини қуйи солди.* Шухрат, Шинелли йиллар.

7 Салга синадиган, узиладиган, йиртиладиган; бўш, мўрт. *Нозик буюм.* ■ *Олимовнинг қўлидаги юклар ҳамманикидан оғирроқ, нозикроқ эди.* Ҳ. Назир, Сўнмас чақмоқлар.

8 *кўчма* Ўзига хос қийинчиликлари бўлган, алоҳида маҳорат, малака, билим талаб этадиган. *Гўза суғориш — нозик иш.* Ойбек, О. в. шабадалар.

9 *кўчма* Ўз ишини майда икир-чикирларигача яхши биладиган; уста. *Секретарнинг отаси.. нозик гулчи эди.* Ойбек, О. в. шабадалар.

10 *кўчма* Алоҳида эҳтиёткорлик талаб этадиган; қалтис. *Нозик масала. Нозик пайт.* *Нозик аҳвол.* ■ *Асрора ўйлаб қараса, кўнгли иши нозик нарса экан.* С. Аҳмад, Уфқ. -*Кейинги пайтда замон нозик бўлиб қолди, — афсус билан бош чайқарди Ўсар бухгалтер.* А. Кўчимов, Ҳалқа. *Бўлмаса, сельпо раислигидай нозик лавозимда ўн-ўн беш йил муқим ишлаш осонми?!* Ў. Ҳошимов, Қалбингга кулоқ сол.

11 *кўчма* Алоҳида эътибор, мулозамат, тақаллуф талаб этадиган, иззатталаб. *Нозик меҳмон.* ■ -*Хўжайин банд, олдиларида нозик одам бор. Мажлис қилишяпти, — деди секретарь.* С. Абдуқаҳҳор, Санамай саккиз дема.

12 *кўчма* Қичиқли; инжиқ. *Бобоқулнинг кўзларидаги нозик киноя унинг иззат-нафисига ханжардек табалди.* Ойбек, Навоий.

НОЗИК ТАБИАТ (НОЗИКТАБИАТ) ёки **ТАБИАТИ НОЗИК** Кўнгли ҳар нарсани ёқтиравермайдиган, кўтаравермайдиган; инжиқ, эрка. *Шу қадар зик, нозик табиат бўлиб қолгани учун Бегимхон кўп дакки эшитди.* И. Раҳим, Чин муҳаббат. **Кўнгли нозик айн. нозик табиат.** **Нозик дид ёки диди нозик** Жуда ҳам сезгир,

нафосатни теран ҳис қилувчи; туйғун. *Нозик дидли рассомларни ҳам ҳайратда қолдирадиган ойнадаги нақш [Элмуроднинг] хаёлини банд этди.* Шуҳрат, Шинелли йиллар. **НОЗИК жойи** Камчилиги, айби. *Азиза Ёдгорнинг нозик жойларини яхши билади. Шунча кўргиликлари эвазига эридан қасос олишга аҳд қилди.* Ў. Ҳошимов, Қалбингга қулоқ сол.

13 Нозик (хотин-қизлар исми).

НОЗИК II [ф. نازک — ингичка, енгил; кичкина] Каштачиликда ишлатиладиган ранг-баранг майда, нафис мунчоқ. *Чойхоначи.. ипак тўри ранг-баранг нозиклар, пистонлар билан безалган тўрқовоқларни.. чакалакка осган эди.* Ойбек, О. в. шабадалар. *Ёстиги устига нозик гулли тўр ёпилган.* Шуҳрат, Шинелли йиллар.

НОЗИКЛАШМОҚ I Нозик, бежирим бўлиб қолмоқ, хипчалашмоқ.

2 Нозик, жони бўш, чидамсиз бўлиб қолмоқ. [Учқун:] *Кабинетда ўтириб нозиклашиб қолганини эндигина сездим.* О. Ёқубов, Бир фельетон қиссаси.

3 кўчма Танг, қалтис бўла бормоқ. *Аҳвол нозиклашди. Масала нозиклашди.*

НОЗИКЛИК Нафислик, назокат; қалтислик; мўртлик. *Асарда ёзувчи табиат манзараларини жуда уста рассомдек нозиклик билан чизади.* С. Аҳмад, Сайланма. *Масаланинг нозиклигига уювлари ҳам тушунарди ва шунинг учун иттифоқ қилгандек, чуқур бир сукутга кетган эдилар.* А. Қодирий, Ўтган кунлар.

НОЗИКНИҲОЛ I [нозик + ниҳол] Бежирим, латиф ва ёш. *Шунда ўзбек қизи — сен нозикниҳол, Ҳуснингни бахш этдинг юрт чиройига.* Т. Жўраева, Менинг маржонларим.

НОЗИКНИҲОЛ II Мураккабгуллилар оиласига мансуб, гуллари оқ, пушти, қизил, сариқ, бир ёки кўп йиллик манзарали ўсимлик; эма гул тури.

НОЗИКТАЪБ [ф. + а. نازگی طبع — нозик табиатли, ҳиссиётга берилувчан] Нозик таъбли, таъби нозик. *Нозиктаъб шоирлар қасидасида, муғаннийлар кўшиғида Найманча таърифланган.* С. Кароматов, Сўнгги бархан.

НОЗИКФАҲМ [нозик + фаҳм] Жуда ҳам сезгир, туйғун фаҳмловчи. *-Хўп.., хўп.. майли, олам кезган нозикфаҳм шоирсиз. Қулоғим сизда, гапираверинг, — деди хунук илжайиб.* К. Яшин, Ҳамза.

НОЗИР [а. نازر — кузатувчи; мудир, бошлиқ; назоратчи; вазир] **1** Назорат қилиб турувчи; назоратчи, қаровчи, мудир. *Қироатхонанинг бир нозири бўлиб, газетхон, китобхон ўқувчилардан йигирма тийиндан ҳақ олиб турарди.* М. Муҳаммадҷонов, Турмуш уринишлари.

2 Бажарилаётган иш-ҳаракатнинг тўғрилигини, мавжуд қонун, қарор ва низомларга риоя қилиб амалга оширилишини назорат қилувчи мансабдор шахс, инспектор. *Солиқ идораси нозири.*

3 эск. Вазир, министр. *Валихон мерган парини Бухорога элтишини, олий ҳазратларининг ўзларига совға қилишини, эвазига тезроқ нозир ёки қушбеги бўлишини хаёлидан ўтказди.* Ш. Тошматов, Эрк қуши.

НОЗ-ИСТИҒНО, нозу истиғно Ноз ва истиғно, ноз ва эркалик(лар). *Дуркунгина келишган қадди-қоматига кўплар суқланиб боқар, ўз навбатида, Зарифа ҳам уларнинг ҳар бирига алоҳида-алоҳида ноз-истиғно билан муомала қиларди.* С. Кароматов, Олтин кум.

НОЗ-КАРАШМА, нозу карашма Ноз ва карашма; ноз ва ишва(лар). *Тўранинг кўнглига шу пайтда на гўзал ёш хотиннинг таъзими, на унинг ноз-карашмаси ва на безаклари сиғар эди.* Ж. Шарипов, Хоразм. *Лаъли ўрнидан туриб, сочларини тузатди. Чироқни пасайтирди-да, ноз-карашма билан "Бўлди, ухланг!" деди.* Ҳ. Ғулум, Машғал.

НОЗЛАНМОҚ I Ноз қилмоқ, ноз-ишва, ноз-карашма қилмоқ. *Йигиталининг саволи жавобсиз қолди. -Шиппакни олиб беринг, — деди қиз яна нозланиброқ.* Д. Нурий, Осмон устунни.

2 Эркалик, тантиқлик қилмоқ; таранг қилмоқ.

НОЗЛИ I Ишвали, серишва; танноз. *Юлдузхоннинг нозли кўзларидаги сирли мавно Муҳиддинни мафтун этди.* Р. Файзий, Чўлга баҳор келди. *-Вой, сиз эплаёлмасангиз, ким эплай оларди? — жувон Хўжабековнинг кўзларига нозли боқди-да, ерга қараб олди.* С. Анорбоев, Оқсой.

2 Ортиқча эркалик талаб қилувчи, нози бор.

НОЗ-НЕЪМАТ Кишига Оллоҳ томонидан табиат орқали инъом этилган неъматлар, анвои мева, озиқ-овқатлар. *Дастурхон турли ноз-неъматлар билан беа-*

тилган. ■ Баҳорлари, ёзлари Бир-биридан ортиқдир, Мазали ноз-неъмат Халқимизга тортиқдир. З. Диев.

НОЗ-ФИРОҚ, нозу фироқ Ноз ва фироқ; ноз ва фироқлар; эркалик ва тантқиқлик. *Шариф, ўзимизнинг ёилигимизни эслансанг-чи. Ноз-фироқ қилиб, мени куйдирган чоғларинг. Н. Сафаров, Кимга тўй, кимга аза. -Э, ҳали ҳам гўр экансан, болам. Дунёда хотин зоти борки, унинг ноз-фироғи бўлмай иложи йўқ, — деди Салтанат Эргашга. Б. Раҳмонов, Қилмиш-қидирмиш.*

НОИБ, нойиб [а. نایب — ўринбосар, ёрдамчи; депутат] **1 тар.** Ўрта асрларда мусулмон давлатларида тобе ўлка ёки вилоят ҳокими, олий ҳукмдорнинг шу ердаги вакили, ўринбосари. *Ноиб унга ишониб топширилган ҳудуднинг сиёсий, иқтисодий, ижтимоий ҳолати учун масъул ҳисобланган. «ЎЗМЭ».*

2 эск. Ўринбосар, ёрдамчи. *Сен вилоятнинг ҳокими бўлсанг, мен сенинг ноибинг бўламан. С. Айний, Дохунда. Хато кетмай, сақлагин, эй яратган! Бу ўша-ку, қочқин беқнинг ноиб. Миртемир, Асарлар.*

НОИЛ [а. نائل — олувчи; туҳфа, совға; фойда]; **ноил бўлмоқ** эск. кт. Эришмоқ, етишмоқ, муяссар бўлмоқ. *Қуруқ томоша билан кечган унинг ой, йиллари бу кун Раёно гулини искаш башоратига ноил бўлгандек эди. А. Қодирий, Меҳробдан чаён.*

НОИЛОЖ [но.. + илож] *рви.* **1** Ўз майлига, эркига, хоҳишига қарши, истаги бўлмагани ҳолда, мажбурият орқасида, мажбур бўлиб, мажбуран. *Маҳкам офтобдан кўзини қисиб, унга қаради-да, жавоб ўрнига кўлини ёйди ва ноилож кулумсиради.*

2 Бирор илож, чора топа олмай, чорасиз, иложсиз. *Бу орада қолган ўн тўрт томошабин бетоқат чапак чалиб, нарда очилишини талаб қила бошлади. Администратор ноилож директор кабинетига кириб, бўлган воқеани айтиб берди. «Муштум». Дилфуза ноилож аҳволда қолди.. Нориннинг қуруғидан озгина чимдиган бўлиб, ётиб олди. Ў. Ҳошимов, Қалбингга қулоқ сол.*

НОИЛОЖЛИК Иложсиз, имконсиз ҳолат, иложсизлик, чорасизлик. *-Санобархон, мени кечиринг, — Алижон яна ялингандек бўлди, — худо ҳаққи, ноиложликдан келдим. М. Хайруллаев, Кўнгил.*

НОИНСОФ [но.. + инсоф] **1** Инсофи йўқ, инсофсиз; виждонсиз; адолатсиз. *Оббо ноинсоф-эй, Ширмонбулоқнинг этагидаги қоратупроқ ерларнинг барисини қўлга киргизиб олди-я! М. Исмоилий, Фарғона т. о.*

2 сўк. Ҳақорат, койиш ифодалайди. *Эрталаб Хўжабеков келиб кетди. Касал бўлсам ҳам, олдига чиқдим. Омонмисан, демади-я, ноинсоф. С. Анорбоев, Оқсой. [Насиба:] Кечагина нима деган эдингиз! Яна лафзингиздан қайтдингизми? Ноинсоф! А. Қаҳор, Оғриқ тишлар.*

НОИНСОФГАРЧИЛИК *айн. ноинсофлик* **2.** Ўғлим билан эликбошининг олишиб турганини кўриб: *-Ҳай-ҳай, бу қандай ноинсофгарчилик! Урманг! — деб ўртага тушиди Вали ака. М. Исмоилий, Фарғона т. о.*

НОИНСОФЛИК **1** Ноинсоф эканлик; адолатсизлик.

2 Ноинсоф кишиларга хос хатти-ҳаракат, иш. *Ноинсофлик қилмоқ ■ Бирон буюмни сифатсиз ишлаб, аъло навга ҳақ олиш ноинсофлик, виждонсизлик, тўғрироғи, ўғриликнинг бошқа бир тури-ку! Н. Сафаров. Оловли излар.*

НОК [ф. ناک — мевали дарахт тури, олмурут] **1** Узоқ яшовчан, меваси турли ранг, шакл ва вазнда бўлган, ёғочи қаттиқ дарахт. *Боғнинг турли жойларида ҳар хил мевали дарахтлар: нок, ўрик, беҳи, жийда ва ҳоказо анчагина. Ойбек, Танланган асарлар. Шокирвали бува ҳовлисидаги катта нок салқинида эски тўшакка ёнбошлаб ётган экан. Х. Тўхтабоев, Ширин қовунлар мамлакатаи.*

2 Шу дарахтнинг меваси. *Хонтахтага терилган ликопчаларда ранг-баранг қандқурс, конфетлар, биллур идишларда олча, узум, нокдан қайнатилган мураббюлар, қулупнай қиёми. С. Анорбоев, Оқсой.*

НОКАС [ф. ناکس — одам эмас; пасткаш, виждонсиз; аблах, разил] **1** Виждони, инсофи йўқ, ярамас, қабиҳ, пасткаш. *Нокас одам. ■ -Хонхўжалик Сайфулла эшонни мен ўзимга устоз деб билар эдим. Аслида ўша нокас мени шу йўлга олиб кирди, — деди Бўронбой. О. Ҳусанов, Кўшиқчининг тақдири.*

2 сўк. Ярамас, аблах. *Ҳа, тутуни булут кўрмаган нокас. Сенинг отанг шундай қурумсоқ эди. П. Турсун, Ўқитувчи. Қора қишда тўй қилмай, Баттар бўлгур нокас, гов. А. Орипов, Ҳайрат.*

3 Бировга ҳеч нарсасини раво кўрмайдиган; бахил, хасис, қурумсоқ. *Нокасдан қарз бўлма — ҳам йўлда қистайди, ҳам гўрда.* Мақол.

НОКАСТА айн. **нокас 3.** Гул даста-даста, гул бермаган нокаста. Мақол.

НОКАУТ [ингл. knock-out < knock — урмақ; зарба + out — четда, ташқарида; четлатиш] *спрт.* Боксчининг қаттиқ зарбдан гандираклаб, йиқилиб, баъзан ҳушини йўқотиб, ўн секунд давомида ўрнидан туролмайдиган ва ютқициқ деб ҳисобланадиган ҳолати. *Бошим гир-гир айланиб, нокаут бўлган боксчидай, гандираклаб кетдим.* С. Сиёев, Ёруғлик.

НОКДАУН [ингл. knockdown < knock — урмақ; зарба + down — пастга, қуйига; қулатиш] *спрт.* Боксчининг зарбдан гарангсиган, йиқилган, лекин ўн секунддан ошмаган вақт ичида ўрнидан туриб, жангни давом эттира оладиган ҳолати. *Оломон якун ясади: Тамом, нокдаун.* Т. Мурод, От кишнаган оқшом. *Артур.. манаман деган чарм қўлқоп усталарини нокаут ёки нокдаунга учратганида, қалбимиз чексиз ғурурга тўлганди.* Газетадан.

НОКЗОР Нок дарахти билан банд ер, майдон, боғ. *Намхуш тупроқ, нокзордаги дарахтларнинг шоҳларида онда-сонда сақланиб қолган ўтган йилги ҳосилнинг туршақлари ҳидига тўлган ҳаво мусаффо эди.* Газетадан.

НОЛА [ф. ناله] **1** Ғам-алам, ҳасрат ифодаловчи аянчи овоз; афгон, фиғон, фарёд. *Инграб, уксиб қолган онасиз.. Кўкка, ерга сиемас носаси.* Ҳ. Пўлат. *Ғулумжон руҳий азоб оташида қовурилиб, хўрлик жон-жонидан ўтиб кетган кезларида ўзини тутолмай нола қиларди.* М. Исмоилий, Фарғона т. о.

2 Ёлвориш, ўтиниш, илтижо ифодаловчи овоз, мунгли товуш. [Мирқарим] *Кечакундуз худога ибодат ва нола қилиб, пачава бўлган ўз ишининг ўнгланишини ва тотли ўтмишининг қайтарилишини сўрарди.* П. Турсун, Ўқитувчи.

3 кўчма Кушлар сайраши ёки мусиқа асбобларидан тарқалган овоз. *Дутор нола-си.* ■ *Девор орқаси Соҳиб қорининг анорзори.* *Ҳаммаёқ жимжит, фақат онда-сонда булбуллар носаси эшитилади.* И. Раҳим, Чин муҳаббат. *Найнинг сеҳрли носаси бутун дала бўйлаб акс садо берди.* Газетадан.

4 Мусиқа безакларидан бири; ашула айтганда, бирор сўз ёки сўз бўғинида овозни чўзиб, тебратиб хониш қилиш.

НОЛАВОР айн. **нолакор.**

НОЛАКОР Нолага эга бўлган, нолали. *Сўнги пайтларда не боиским, бу ҳазин, нолакор байтлар тез-тез хотирга келадиган бўлиб қолди, деб ўйлади Бобур.* Х. Султонов, Бир оқшом эртаги.

НОЛИМОҚ Норозилик изҳор қилмоқ, шикоят қилмоқ, зорланмоқ. *Тиллабувадан кейин сўзга чиққанларнинг бири камбағалчиликдан нолиб, яна бири.. муштумзўрлар ҳақида Тиллабуванинг сўзини қувватлади.* А. Қаҳҳор, Қўшгинор чироқлари. *Раҳмат, биродар. Соғлигимдан нолимайман. Узоқ йиллар шочилик биригадасига бошчилик қилман.* Газетадан.

НОЛИШ [ф. نالش — дод солиб йиғлаш, хўнграш; шикоят, арз, зорланиш] **1** Шикоят қилиш, арз қилиш, норозилик билдириш. *Нолиш билан иш битмайди; Мард номардга тиз чўкмайди.* Мақол. ■ -*Ношукур экансиз, опа, — деди [Зайнаб], — поччамдан нолишингиз яхши эмас, сизнинг ҳам бошингизга менинг кунимни солса, нима қилар эдингиз?* А. Қодирий, Ўтган кунлар.

2 Нола, фиғон. *Ҳар ким титрар Ширинбек нолишига, Ёқаси хўл кўздан оққан ёшига.* «Ширин билан Шакар».

НОЛОЙИҚ [но.. + лойиқ] Лойиқ, муносиб бўлмаган; лойиқ, муносиб келмайдиган, ярашмайдиган, номуносиб. *Ёшлар орасида жамоат тартиб-қоидаларини бузиш сингари юксак инсоний дидга бутунлай нолайиқ хатти-ҳаракатлар учраб туради.* Газетадан.

НОЛОН [ф. نالان — нола, фиғон қилувчи; шикоят қилувчи] *эск. кт.* Нола, фиғон қилувчи, афгон чекувчи. *Отмагай тонг боғ аро азминг хиромон бўлмаса, Булбули шайдолари гул узра нолон бўлмаса.* С. Абдулла.

Нолон боқмоқ Илтижо билан, зорланиб қарамоқ. *Аваз манзилга элувчи йўлни билмас, теваракка нолон боқиб, ўзига содиқ сафдош, аниқроғи, раҳнамо излаб юргандек эди.* С. Сиёев, Ёруғлик.

НОЛЬ [лот. nullus — ҳеч қандай, ҳеч қайси] **1** Муайян бирлик ёки миқдорнинг йўқлигини ифодаловчи “0” белгисининг номи.

2 Иссиқлик ва совуқлик температура-лари ўртасидаги шартли чегара. Сув ноль даражада музлайди. ■ Сув ҳароратини ноль даражада этказгач, яланг оёқ қорда юриш ҳам ҳеч гап эмас. «Фан ва турмуш».

Ноль-ноль Вақтни кўрсатишда «роса, аниқ, тўппа-тўғри» маъносини билдиради. Меҳмонлар кечқурун соат еттига таклиф этилган. Ҳозир соат олтию ноль-ноль. С. Абдуқаҳҳор, Санамай саккиз дема.

НОМ [ф. نام — от, исм; шон-шуҳрат, обрў; от сўз туркуми] **1** Шахс ёки нарса-предметларга қўйилган от; исм. *Шаҳар номлари. Ном қўймоқ. Ном бермоқ.* ■ *Кексайиб қолган эшоннинг хотираси анча пасайганидан кўп вақт ўз ўғилларининг номларини ҳам хотинидан сўраб олар эди.* П. Турсун, Ҳўқитувчи.

2 Бирор соҳага, гуруҳга оидликни билдирувчи атама. *Мансур, Муслим! Сенга бир гап бўлдимиз? Муаллим деган номимиз бор, шундай вақтда иш кўрсатмасак, қачон кўрсатамиз?! З. Саид, Н. Сафаров, Тарих тилга кирди.*

3 Фаолиятнинг бирор соҳасида эришган ютуқ, малака даражасини кўрсатиш учун расмий йўл билан бериладиган унвон. *Фахрий ном. Хизмат кўрсатган артист деган ном. Классик кураш бўйича мамлакат чемпиони деган ном.*

4 Кўпчилик орасида маълум-машҳурлик; донг, доврўг, шуҳрат. *Номи чиққан курашчи. Ном чиқарган жамоа хўжалиги.* ■ *Очил Эшназар.. Сиеб волостининг Қўштамғали қишлоғида ном чиқарган шахс эди.* М. Ҳўрин-хўжаев, Унутилмас кунлар.

Номи билан Топшириғи, ваколоти билан. *Ўзбекистон номи билан. Номига Шунчаки, хўжа кўрсинга, йўли учун. Номига чойхона.* ■ *Айрим туманларда маккажўхори номигагина экилаётганга ўхшайди, акс ҳолда, ер бўш ётмасин деб дон сочиб, кейин ўз ҳолига ташлаб қўйилмас эди.* Газетадан. *Ҳури, олдин номига бир оз кўнмай турар, кейин мазжуран бораётгандай, юзига қайғули ифода бериб чиқиб кетарди.* Ф. Мусажонов, Ҳури. **Номидан** Тарафидан, исми-дан; топшириғи билан. *Жамоа номидан ташаккур билдирмоқ.* Ўз номидан табрикламоқ.

НОМА [ф. نامه — хат, мактуб] эск. кт. **1** Расмий ёзишма, мактуб, хат. [Маждиддин:] *Мўминмирзони ўртага солиб, шахзода Бади-*

уззамонга нома юборинг. Уйғун ва И. Султон, Алишер Навоий.

Номаи аъмол [نامه اعمال — амаллар, ишлар номаси, дафтари] **1**) *дин. гўё икки фаришта ҳар бир кишининг савобли ишларини ва гуноҳларини ёзиб борадиган дафтар. Азал котиблари ҳар мўминнинг манглайига номаи аъмолини ёзмишлар.* С. Сиёев, Ёруғлик; **2**) *кўчма эск. хизмат варақаси, дафтарчаси (ҳар бир хизматчининг қилган ишлари, хизматлари ёзиб бориладиган варақ ёки дафтар). Нормат битни противоваз халтасининг устки чўнтағига солиб қўйди ва медалсонни кўриб, “номаи аъмолимнинг ҳаммаси шунда”, деди.* И. Раҳим, Чин муҳаббат. *Мана, Зиёдилла уч соатдан бери ўз номаи аъмолини ёзаяпти.* Ҳ. Фулом, Машғал.

2 Адабий жанр: Шарқ мумтоз адабиётида реал ёки хаёлий-тўқима шахсга қарата шеърый мактуб тарзида ёзилган бадиий асар тури. *Ўзбек мумтоз адабиётида нома жанрининг пайдо бўлиши Хоразмий номи билан боғлиқ бўлиб, унинг «Муҳаббатнома» асари ана шу жанрда яратилган.* Газетадан.

3 Шу маънода қўшма отлар таркибига киради, мас. *Бобурнома, Акбарнома, Жанг-нома.*

НОМАРД [ф. نامرد — мард, эркак эмас] **1** Эркак эмас, мард бўлмаган. *Кўзларимга ишонмаймен! Бегим, бу не ҳол? Нечун мардона кийим кийибсиз? -Номардлар кўпайиб кетгани учун мардона кийиндим.* П. Қодиров, Юлдузли тунлар.

2 Яхшиликни, адолат-инсофни билмайдиган, қўлидан тантилик келмайдиган; ноинсоф, виждонфуруш. *Номард одам.* ■ *Шушу, жувон “ишим битди, эшагим лойдан ўтди, деб унутиб кетадиган номардлардан эмасмиз”, деб Ҳўжабековнинг олдига келиб турадиган бўлди.* С. Анорбоев, Оқсой.

3 сўж. Ярамас, аблах, нокас.

4 Юраги йўқ, қўрқоқ. *Мард йигит қўлида аждар ўлади, Номард одам ипни аждар билади.* Фозил шоир.

НОМАРДЛИК 1 Пасткашлик, ярамаслик; ноинсофлик.

2 Номард кишиларга хос иш, хатти-ҳаракат. *Иккиланиш — ҳам ўлим, ҳам номардлик.* Ойбек, Қуёш қораймас. *Мардлик, жасорат, матонат ҳам қалб амрининг меваси, номардлик, қаллоблик ҳам шахснинг қаллоб қалбига боғлиқ.* И. Раҳим, Қадриабод одамлар.

НОМАТЛУБ [но.. + матлуб] *кт.* Кўнгилга хуш келмайдиган, кўнгилдагидек эмас; исталмаган, номақбул. *Номатлуб иш. Номатлуб шахс.* ■ *Ўқитувчи учун энг оғир изтироб ва уқубат шогирдларининг номатлуб хатти-ҳаракатларидан етади.* Р. Усмонов, Одобнома.

НОМАЪЛУМ [но.. + маълум] **1** Кимлиги, нималиги аниқ маълум бўлмаган, аниқланмаган. *Номаълум миқдор. Тўйнинг қачон бўлиши ҳали номаълум.* ■ *Номаълум кимса йўлакнинг қоронғи қисмига ўзини олиб, кўзини Сайфидан узмай тура бошлади.* А. Қодирий, Ўтган кунлар.

2 Ҳали ҳеч ким билмайдиган; жумбоқ, сирли. *Номаълум орол.* ■ *Қизлар нимани ўйлайдилар ва нима тўғрисида маъюсланадилар, бу эса қизларнинг бизга номаълум бўлган ички сирларидир.* А. Қодирий, Ўтган кунлар. *Хоразмийнинг бошланғич таълими ва қандай шароитда Хоразмни ташлаб кетганлиги ҳозирча фан учун номаълум.* «Фан ва турмуш».

3 *мат.* Математик йўл билан топилиши зарур бўлган миқдор, катталиқ. *Маълумларни номаълумлардан ажратмоқ.*

НОМАЪЛУМЛИ *мат.* Таркибда номаълум бўлган. *Икки номаълумли тенглама.*

НОМАЪКУЛ [но.. + маъкул] **1** Маъкул эмас, маъкул келмайдиган; нодуруст. *Ҳожи бир неча вақт сўзлагувчини ўз оғзига тикилтириб ўтиргандан сўнг, агар маъкул тушса, “хўп” дейди.. номаъкул бўлса, “дуруст эмас” дейди.* А. Қодирий, Ўтган кунлар. *Кейин у одам номаъкул чиқса, дарҳол амалдан олиб ташлайди.* Ш. Холмирзаев, Қил кўприк.

2 Ақл-идрок билан қилинмаган; ножўя, бемаъни, аҳмоқона. *Шунда мен кеча беихтиёр қилган номаъкул ишимнинг қанчалик фожиаали эканини биратўла англадим.* А. Мухтор, Туғилиш.

Номаъкул бузоқнинг гўштини емоқ Бекор, беҳуда айтмоқ, нотўғри гапирмоқ; нотўғри хатти-ҳаракат қилмоқ. *–Билиб қўйингки, хотиним ҳалол! Тухмат қилганлар номаъкул бузоқнинг гўштини ебди! – деди Қамбар.* Уйғун. Асарлар.

НОМАЪКУЛЧИЛИК Бемаъни, ножўя ҳаракат, иш; бемаънигарчилик. *Номаъкулчилик қилмоқ.* ■ *Бобом узоқ ва оғир суқутдан сўнг кампирни овутади: –Бас, йиғлама, золимлар кўп, хоинлар кўп, уларнинг шундай номаъкулчиликлари, итликлари бўлиб туради.*

Ойбек, Болалик. *–Нимага саланглаб юрибсизлар? Бу қандай номаъкулчилик! – деб қичқирди Саид амин.* М. Исмоилий, Фаргона т.о.

НОМАҚБУЛ [но.. + мақбул] Қабул қилиб бўлмайдиган, тўғри келмайдиган; номатлуб. *Номақбул таклиф. Номақбул усул.* ■ *–Ойнагулни элига ўтказиб юборишнинг бир неча йўллари бор, бироқ бу йўллар номақбул. Шундай қилиш керакки, хамирдан қилни беозор тартиб олишдай бўлсин, – деди Фарҳод.* А. Ҳакимов, Илон изидан. *Деворларга ёзиб-чизиб ташланган номақбул сўзлару антиқа расмларни ўчириб ташлашга ожиздилар.* Газетадан.

НОМАҲРАМ [но.. + маҳрам] *дин.* Яқин қариндошлик алоқаси бўлмаганлиги сабабли бир-бирини кўриш ёки бир-бирига кўриниш ман этилган, лекин никоҳланиши мумкин бўлган эркак ва аёл (бир-бирига нисбатан); *зид.* **маҳрам 4.** *“Абдуваҳобнинг турқини худо кўтарсин, ундан хотин қизганадиган ўрни йўқ. Уни номаҳрам деб бўлмайди, одам эмас – қул”, дейишарди.* Ш. Тошматов, Эрк қуши. *Йўқ, йўқ. Сиз менга номаҳрамсиз. Бошқага қилинган фотиҳани бузмай туриб, менга яқинлашманг.* И. Раҳим, Чин муҳаббат.

НОМ-БАНОМ [ф. نامبنام – ҳар бир номни (алоҳида) айтиб] *айн.* **номма-ном.** *Ўрмонжоннинг бу гапларини, айниқса, тажрибакор чолларни ном-баном айтганини кўриб, Бўтабой ичиди зил кетди.* А. Қаҳҳор, Кўшчинор чироқлари.

НОМГҲЙ [ф. نامگوۋى – номини айтувчи] *этно.* Урф-одатларга кўра, ёшлигида номи айтилиб унаштириб қўйилган йигит ёки қиз. *Нуриддин болаликдан бир хешларининг қизига «номгўй», қиз ҳам сочини тараб, уни кутиб ўтирган эди.* Э. Аъзам, Жавоб. *Номгўйимиз ўтганда, уялибгина қолар эдик, бемаҳал чоғларда келганда, тўрдаги эшикни очиб, ичкарига кириб олар эдик.* «Гулихиромон».

НОМДОР [ф. نامدار – маълум номга эга; машҳур, шуҳрат қозонган] Ном, шуҳрат чиқарган; донгдор, шуҳратли. *Бу кампирнинг етти ўғли бор эди, еттови ҳам номдор алт эди.* «Алпомиш». *Ҳозир Сафаров республикамизнинг номдор, тажрибали пахтакорларидан бири.* Газетадан.

НОМДОРЛИК Машҳурлик, ном чиқарганлик, шуҳратга эгалик. *Ҳозир баъзилар*

отасининг номдорлиги билан гурурланиб, ҳеч кимни менсимай, ўзига бино қўйиб юришни одат қилишган! Мирмуҳсин, Умид.

НОМЕНКЛАТУРА [лот. nomenclatura – номлар, исмлар рўйхати] 1 Ишлаб чиқариш, фан, техника, санъат ва ш.к. нинг бирор соҳасида қўлланадиган номлар, аталар, терминлар ва шу номлар билан аталувчи нарсалар рўйхати ёки мажмуи. *Географик номенклатура. Кимё номенклатураси. Ботаник номенклатура.*

2 Саноат ва бирор ҳўжалик тармоғи ишлаб чиқарадиган маҳсулотларнинг таснифланган рўйхати. *Заводда ишлаб чиқариладиган маҳсулот номенклатураси.* ■ *Мана шу молларни ишлаб чиқариш номенклатурасини ва ҳажмини яқин муддат ичида тиклаш керак.* Газетадан.

3 Бирон-бир юқори (раҳбарий) орган томонидан тайинланадиган ёки тасдиқланадиган мансабдор шахслар ва уларнинг рўйхати. *Абдуллаев ўз оғайнисини номенклатурада сақлаб қолиш учун курашмоқда.* Ш. Рашидов, Бўрондан кучли.

НОМЕР [лот. numerus – сон, рақам] 1 Бир турдаги предметларнинг ичида ҳар бирининг тартиб рақами. *Уй номери. Телефон номери.* ■ *Шукур, эл қатори эшигимда номер қоқилган. Ҳар қаерда бир юзу олтмиш учинчи, деб хат ташласанг келади.* А. Қаҳҳор, Қўшчинор чироқлари.

2 Ҳужжат, рўйхатга олиш ва ш.к. белгиси сифатидаги маълум рақамлар ёзилган ёрлик, тахтача. *Машина номери. Велосипед номери. Паспорт номери.*

3 Кийим-кечак, пойабзал ва ш. к. нинг катта-кичиклигини, ўлчамини билдирувчи рақам. *Мен ундан икки номер катта этик кияман.*

4 Меҳмонхона, ҳаммом ва ш.к. да алоҳида бўлма, хона. *-Меҳмонни меҳмонхонага олиб бордим. Унга икки хонали жуда яхши номер олиб қўйилган экан, – деди Мелибой ака.* А. Қаҳҳор, Думли одамлар. *Қўқонда номерда бир ўрис инженер билан танишдим.* Ойбек, Танланган асарлар.

5 Театр, цирк, концерт ва ш.к. нинг ҳар бир алоҳида ижро этиладиган қисми. *Программа номерини эълон қилмоқ.* ■ *Конферансье – ёшгина бир марий йигити чиқиб: -Концертимизнинг биринчи номерида ўзим машқ қилиб бераман, – деди.* А. Қаҳҳор,

Олтин юлдуз. *Авдеев навбатдаги масъулиятли номерни бажаришга тайёргарлик кўриш учун қўшни хонага кириб кетди.* «Фан ва турмуш».

6 Ҳарб. Тўпчилар, пулемётчилар гуруҳида маълум хизматни бажарувчи жангчи.

Номери ўтмайди с. т. Найранги ўтмайди, кетмайди. *-Ҳар қандай йўл билан ўз ишингизни битириш пайида бўласиз. Энди номерингиз ўтмайди, оғайни, ҳа, билиб қўйинг. Мен сизнинг дўстингиз эмасман, – деди Нуриддин.* О. Хусанов, Дўстлар.

НОМЕРЛАМОҚ Тартиб номери қўймоқ, қўйиб чиқмоқ, рақамламоқ. *Дафтар бетларини номерламоқ.* ■ *Жангчилар бўр билан номерланган вагонларга чиқишди.* И. Раҳим, Чин муҳаббат.

НОМЕРЛИ Номери бор, номер қўйилган, тақилган. *5 номерли уй.*

НОМЗОД [ф. نامزد – куёв, келин; унаштирилган; номи кўрсатилган; кандидат] Давлат ёки жамоатчилик органига сайлаш, бирон-бир лавозимга тайинлаш, бирон-бир ташкилотга қабул қилиш учун белгиланган, кўрсатилган шахс; кандидат. *Номзод кўрсатмоқ. Номзодларни тасдиқламоқ. Номзодлар рўйхати.* ■ *Ишнинг енгил бўлмайди, қизим. Мактаб мудирлигига сиздан бошқа муносиб номзод йўқ экан, рад этманг.* Ж. Шарипов, Хоразм.

2 Фандаги илмий даражанинг маълум босқичи. *Фан номзоди.*

НОМИНАЛ I [лот. nominalis – номи ёзилган] Қоғоз ва танга пуллар, қимматбаҳо қоғозлар, мол ва ш.к. нинг белгиланган, устига ёзилган баҳоси. *Номинал билан сотмоқ.*

НОМИНАЛ II Белгиланган, ёзиб кўрсатилган (нарх, баҳо, ўлчам ва ш. к. ҳақида). *Номинал баҳо. Номинал ўлчам. Номинал иш ҳақи – пул шаклидаги иш ҳақи.*

НОМИНАЛИЗМ [лот. nomina – исмлар, номлар] Ўрта аср фалсафасида оламда фақат якка нарсалар, предметлар мавжуд, умумий тушунчалар эса нарсаларнинг номларидангина иборат деб ҳисоблайдиган оқим, йўналиш.

НОМИНАЦИЯ [лот. nominatio – аташ, номлаш; номзод кўрсатиш] 1 Муайян ижодкорлик, иш-фаолият соҳаси бўйича бўладиган мусобақа-танловларга номзодлар кўрсатиш ва ғолибни аниқлаш жараёни. *«Энг яхши ёш футболчи» номинацияси.* ■ *«Меъ-*

морчилик ва дизайн» каби номинациялар бўйича топширилган ишлар нуфузли ҳакамлар ҳайъати томонидан ўрганиб чиқилади. Газетадан.

2 тли. Номлаш хусусиятига эга бўлган тил бирликлари (сўз, сўз бирикмаси, фразаология ва гап)ни ҳосил қилиш ва шу жараёнинг натижаси.

НОМЛАМОҚ Ном қўймоқ, ном бермоқ, атамоқ. *Янги кўчаларни номламоқ.* ■ *Замондошларимиз ва биздан кейинги авлодлар Тошкентни қайта қуриш билан боғлиқ бўлган ишларни минг бир кунлик жасорат деб номлаши турган гап.* А. Набихўжаев, Жасорат йилномаси.

НОМЛАНМОҚ **Номламоқ** фл. мажх. н. *Бу шароб орқали кучин кўрсатар Ўзбек деб номланган кекса соҳибкор.* Ф. Фулом.

НОМЛИ Номи билан аталувчи, ...номидаги, ...деб аталган, ...деган. *Навоий номли мактаб.* ■ *Бу маҳаллада унга маъқул бўлган икки киши бор эди. Бири — гузарда тақачилик-темирчилик қиладиган Қоратой, иккинчиси — Шокир ота номли маҳсидўз чол.* Ойбек, Танланган асарлар.

НОММА-НОМ [ф. نامنام] рвш. Ҳар бирининг номини айтиб, ҳар қайсисини алоҳида, ўз номи билан. *Самандаров колхозга кириш учун ариза берганларни номма-ном айтиб, мажлисдан ўтказди.* А. Қаҳҳор, Қўшчинор чироқлари. *Мудир докладининг охирида битирувчиларни номма-ном чақириб.. гувоҳнома тақдим қилди.* П. Турсун, Ўқитувчи.

НОМ-НИШОН, **ному нишон** Ном ва нишон, ном ва асар; из; дарак. *Мана уч кун бўлибдики, ундан ном-нишон йўқ.* ■ *Уруш бўлмаганда, мана бу қалдирғочнинг уясига ўхшаган уйлардан, мана бу бўйинчага ўхшаган эшиклардан ном-нишон қолмас эди.* А. Қаҳҳор, Картина.

НОМ-НИШОНСИЗ Хат-хабарсиз, дом-дараксиз, изсиз. *Шамсиддин Иброҳимовнинг ном-нишонсиз йўқолгани ҳақидаги хабар эртаси куни маълум бўлди.* М. Ўринхўжаев, Унутилмас кунлар. *Ёқубжоннинг кўнгли равшанлашди. Севинмасинми, ахир ундан зурёд қолади, зурёд! У энди оламдан беиз, ном-нишонсиз кетмайди.* Р. Раҳмон, Меҳр кўзда.

НОМОЗ айн. **намоз.** Ҳамма хуфтон номозига кириб кетган, кўчалар сув қуйгандек тинч эди. А. Қодирий, Ўтган кунлар.

НОМСИЗ 1 Номи йўқ, беном. *У пайтлар кўчалар номсиз бўлса ҳам, маҳалла тилга олинса бўлди, ҳар қандай хат эгасига аниқ етиб борарди.* Газетадан.

2 кам қўл. Номи, донги чиқмаган, донгдор эмас, шуҳратсиз. *Бир вақтлар номсизроқ, ўртамуёна колхоз эди.* Ойбек, О. в. шабадалар.

НОМУАЙЯН [но.. + муайян] Аниқ, конкрет бўлмаган; нотайин, дудмол. *Номуайян гап. Номуайян жавоб.*

НОМУВОФИҚ [но.. + мувофиқ] **1** Тўғри, мос, муносиб бўлмаган, мувофиқ келмайдиган. *Номувофиқ номзод.* ■ *Ҳужжатлар, қилинган иш билан сарфланган маблағ номувофиқ эканлигини кўрсатиб турарди.* Газетадан.

2 Ўринсиз, ноўрин. *Номувофиқ гап. Номувофиқ гапирмоқ.*

НОМУНОСИБ [но.. + муносиб] **1** Муносиб, мувофиқ, мос бўлмаган, мос келмайдиган; номувофиқ. *Улар бир-бирига номуносиб.* ■ *Шербек жойига ўтирганида, Саидғозининг жисмига номуносиб овози идорада яна дўриллади.* С. Анорбоев, Оқсой.

2 Келишмаган, ярашмаган, полойиқ. *Ўқимишли кишига номуносиб қилиқ.* ■ *Умида сўнги сўзларини ёшига номуносиб бир алам билан, сансираб гапирди.* Д. Нурий, Осмон устун.

НОМУНТАЗАМ [но.. + мунтазам] Мунтазам, изчил бўлмаган; барқарор, доимий эмас. *Номунтазам қўйишлар.*

НОМУС [а. ناموس — қонун; виждон, диёнат; обрў-эътибор; иффат, бокиралик < юн. potos — қонун] **1** Кишининг ўз обрўсини улуғлаш ва ардоқлаш ҳис-туйғуси; орийат, диёнат, виждон. *Номусини ерга букмоқ.* *Номус ва ғайрати бор одам меҳнатдан қўрқмайди.* *Нодон билан юрма, Номусингни букма.* Мақол.

2 Хижолат тортиш ҳис-туйғуси; уят-андиша, шарм, ҳаё, ор. *Номусга қўймоқ.* ■ *[Жамила:] Ҳаё беномусда бўлмайди! Ҳаёсизда номус бўлмайди.* Ҳамза, Бой ила хизматчи. *Номус! Номус эр кишини ўлдирди-я!* Шуҳрат, Шинелли йиллар. *[Ҳайитжон:] Отаси бечора бўлса, қанча вақт элхалқдан номус қилганидан, алақандай шаҳарларга бадарға бўлиб, яқинда келди.* Ҳамза, Паранжи сирлари.

3 Қиз поклиги, бокиралик, иффат, қизлик. *Бахтсиз оналарнинг кўз ёшлари, болаларнинг, қизларнинг таҳқирланган номуци учун сўнги нафасгача курашинг. Ўлим, тиз чўкиш йўқ!* Ойбек, Қуёш қораймас. *Агар ит тегмаган бўлса, покман, номусим жойида десанг, кел, бери кел.* М. Мансуров, Ёмби.

Номусга тегиш Зўрлик ишлатиб, қўрқитиб ёки жабрланувчининг (аёл кишининг) ожизлигидан фойдаланиб, жинсий алоқа қилиш.

НОМУС-ИФФАТ айн. **номус 3**. *Зулфизар.. унинг ўн гулидан бир гули ҳам очилмади. Ёшлиги, номус-иффати, умид-армонлари барбод бўлди.* К. Яшин, Ҳамза.

НОМУСЛИ 1 Орияти, диёнати, виждони бор; ориятли, виждонли. *Номусли, меҳнаткаш йигит топилса, қизни тезроқ узатишга қарор қилганини, бу хусусда кампирнинг фикрини билмоқчи эканини айтди.* Ойбек, Танланган асарлар.

2 Уяти бор, уят-андишани биладиган; шармли, ҳаёли. *Отам Тошкентда экан чоғда бу гапни айтишга уялган эмишсиз.. гўё бунинг ила номусли бўлиб кўринмоқчисиз шекилли?* А. Қодирий, Ўтган кунлар.

НОМУС-ОР айн. **ор-номус**. *Баланд-баланд тоғнинг қори бўлади, Мард йигитнинг номусори бўлади.* Фозил шоир. *Қиз бола нозик гул, у ўз қадр-қимматини биладиган, номус-орли бўлиши керак-да, ахир.* Газетадан.

НОМУССИЗ 1 Орияти, диёнати, виждони йўқ; ориятсиз, виждонсиз. *Номуссиз юрмакдан номусли ўлмак афзал.* Мақол.

2 Уяти йўқ, уят-андишани билмайдиган; шармсиз, беҳаё. [*Юсуфжон:*] *Нимага сен холангга, биз берамиз деган кишига тегмайман, деб эмишсан? Қандай бетишга бўлди, номуссиз!* Ҳамза, Паранжи сирлари.

НОМУССИЗЛИК Номусини йўқотганлик, беҳаёлик, уятсизлик; номуссиз кишиларга хос хатти-ҳаракат, иш. *Бу номуссизлик «четан»чиларнинг етти яшаридан етмиш яшаригача ичдан ғазабга келтиради.* А. Қодирий, Обид кетмон.

НОМУТАНОСИБ [но.. + мутаносиб] **1** Мутаносиб бўлмаган, қисмлари бир-бирига мос тушмаган; бири катта, бири кичик. *Унинг калласи жуссасига номутаносиб — кичкина бўлиб, ҳар гал кийим-кечақларини алмаштирмоқчи бўлганида, энг кичик пи-*

лотка, энг катта пойабзал излайвериб, тинкаси қурирди. В. Гофуров, Вафодор.

2 мат. Узаро пропорционал бўлмаган. *Номутаносиб сонлар.*

НОН [ф. نان — нон; озиқ-овқат] **1** Хамирдан тайёрланиб, тандир, ўчоқ, това ва ш.к. да пишириладиган егулик. *Бугдой нон. Зоғора нон. Ширмой нон. Бўлка нон.* ■ [Кампир] *Нон ясаб бўлгунча, тандир қизиди. Кейин бир чеккадан ёндим.* Ойбек, Танланган асарлар.

2 Умуман, егулик-ичгулик, яшаш, тирикчилик учун зарур нарса. *-Матқовул ака, мен нон топармиканман, деб қорин ғамида мактаб очганим йўқ, — деди у [Фулможон] босиғи билан.* М. Исмоилий, Фарғона т. о.

Нон гадои Нонга зор, камбағал-қашшоқ. *У ё ўз-ўзини ўлдирарди, ё хизматкор йигит билан бир юртга қочиб, камбағалликда, нон гадои бўлиб яшарди.* Ойбек, Танланган асарлар. **Нон емоқ** Бирор нарсдан фойдаланиб тирикчилик ўтказмоқ, кун кечирмоқ. *Доим ҳовли, ер жанжалидан нон еб юрадиган бир эликбоши, афандининг йўлини тўсиб, кўрган тушини айтиб берди.* «Латифалар». **Нон синдириш** (ёки **ушатиш**) этн. Никоҳ тўйи маросимларининг бир қисми: қиз томон, яъни унинг ота-оналари совчи юборган томонга ўз розилигини бергач, совчилар келтирган дастурхон очилиб, шу розилик белгиси сифатида нон синдирилиши ва тўй билан боғлиқ масалаларнинг белгиланиши, ҳал қилиниши. **Нони бутун** Тирикчилик, яшаш учун зарур нарсалари бут, мухайё, ҳеч нарсдан камчилиги йўқ, бекам-кўст, тўкис. *Сартарош у дунё, бу дунё хор бўлмайди. Ҳамма вақт нони бутун [деди кампир Шодига].* Э. Раймов, Ажаб кишлоқ. **Нони яримта** Бирор шерик ёки рақобатчи туфайли топиш-тутиши камайдиган, етишмай қолган. *Нима, Қобилов келиб, номимиз яримта бўлиб қолдимиз, аксинча, қўлни-қўлга бериб ишласангиз, битта нонингиз иккита бўлади.* С. Маҳқамов, Шогирд. **Нонини туя қилмоқ** Бировга тегишли ҳақнинг маълум қисмини олмоқ, ўзлаштирмоқ. *«Бўшанглик қилсам, номимни туя қилиб беришлари аниқ», — уйлади Йўлчи.* Ойбек, Танланган асарлар.

НОНВОЙ айн **новвой**.

НОНДОН [ф. ناندان — нон сақлагич, нонтовоқ] Нон турадиган, сақланадиган

кути, идиш. [Отам] Нондонни очиб, бор нонни.. хуржунига солиб: -Мен шаҳарга кетдим, - деган ҳолда уйдан чиқди. С. Айний, Эслаликлар.

НОНЖИЙДА Жийданинг йирик, сершира, гўштлир мевали тури. Она Жўрабой ота билан Ёвзозхонни Ботирали олиб келган қора булка ва ёнғоқ, нонжийда билан сийлади. Ҳ. Фулом, Машғал.

НОНКЎР [ф. نانكور - яхшилиқни билмайдиган, нон кўр қиладиган] Бировнинг берган туз-намаги, нон-тузи қадрини билмайдиган, яхшилиқка ёмонлик қилувчи, тузини еб, тузлуғига тупурувчи; кўрнамак, нонтепки. *Бой.. қутуриб бақирди: -Сан нонкўрсан, ман сани туққанам, жигарим, дедим. Овқат бердим, кийим бердим, бу - зулм эмиш! Ойбек, Танланган асарлар. Хўжасизлик ва бепарволик орқасида дастурхонимиз зийнати - нон оёғости қилинмоқда, бундай кишиларни эл нонкўр дейди.* Газетадан.

НОНКЎРЛИК Нонкўр кишиларга хос хатти-ҳаракат, иш; кўрнамаклик, нонтепкилик. *Кўрдингизми, ноқобил фарзанд, ман уни юртнинг катта бойига унаштирсам, нодон қиз бир ялангоёқ билан қочибди, кулиб турган бахтига юзни тескари буриш - бу қандай нонкўрлик! Ойбек, Танланган асарлар. -Келинлар, табиатнинг сахийлигига нонкўрлик қилмайлик. Тоғда ўсан мевали дарахтларни.. парвариш қилайлик! - деди Назаров. С. Анорбоев, Оқсой.*

НОН-НАМАК [ф. نانونمک - нон-туз; меҳмондўстлик] 1 Ризқ-рўз, насиба, улуш, ҳисса.

2 Ейишлик-ичишлик нарса, овқат. *Мирҳосил жиннихонага узоқ қатнади. У ҳар гал шаҳарга тушганда, нон-намак олиб, ўша ерга интилар, Лаълининг тузалишидан умидвор бўлар.. эди. Ҳ. Фулом, Машғал.*

Нон-намак бўлмоқ Суҳбатда бўлмоқ, биргаликда овқатланмоқ; бирор ўтиришда, меҳмонда бирга бўлмоқ. *Содиқжон ака билан биз бир неча бор нон-намак бўлганмиз. У киши давранинг гули.* Газетадан.

НОН-НАСИБА айн. **нон-намак 1.** -Йўқ, йўқ! - деди домла бошини чайқаб, - бу ердаги нон-насибамизни ташлаб, қаёққа борамиз?! П. Турсун, Ўқитувчи. *Нон-насибангиз бизда бўлса, қоларсан, бўлмаса, қишлоғингизгами ё бошқа томонгами жўнарсан. Ойбек, Танланган асарлар.*

НОНПАЗ [ф. نانپز - нон пиширувчи] шв. Новвой.

НОНТЕПКИ айн. **нонкўр.** *Сендақа, хукуматнинг тузини ичиб, тузлуғига туфлайдиган нонтепки керак эмас. С. Аҳмад, Хукм.*

НОНТЕПКИЛИК айн. **нонкўрлик 2.** [Мирзақул:] *Бой отам, Сибирга сургун қилинадиган гуноҳни кечириб турибдилар-у, сен нонтепкилик қиласанми, қуллуқ қил! Н. Сафаров, Уйғониш.*

НОНТОПАР Нон топадиган, даромад келтирадиган. *Аммага, бекорчи оғиздан кўра нонтопар қўл керак эди. Ш. Фуломов, Ёрқин уфқлар. Анави бир хонада чолнинг ўзи турaveraди. Ўша эски нонтопар касбини қилaveraди. С. Анорбоев, Ҳаётга йўлланма.*

НОНУШТА Эрталабки нон-чой, хўрак. *Сидиқжон эрталаб нонуштадан кейин жўнамоқчи бўлган эди. А. Қаҳҳор, Қўшчинор чироқлари.*

Нонушта қилмоқ Эрталабки хўракни емоқ. *Ҳар кун эрталаб бир вақтда - бир минут кечикиш ё олдин кетиш йўқ, нонушта қилмасдан, дўканга кетади, оқшом, албатта, уйга қайтиб, оила билан овқатланади. Ойбек, Танланган асарлар.*

НОНХЎР [ф. نانخور - нон еювчи, боқимонда] 1 Нонни яхши кўрадиган, кўп нон ейдиган. *Худое, раҳматиндан ўргилай, ош-хўрга ош, нонхўрга нон етқизурсан. Ҳамза, Майсаранинг иши.*

2 Бирор оила бошлиғининг таъминотида, қарамоғида бўлган киши; хўранда, жон. [Нарзи тоға] *Энди олти нонхўрдан иборат жўжабирдай рўзгорининг жони учун ўз ажалидан бир кўрқса, довюрак ҳамроҳининг жони учун минг карра кўрқади. Ш. Тошматов, Эрк қуши.*

3 *кўчма нафр.* Текинтомоқ, текинхўр. *Ўз уйида бир нонхўр ортиши маҳдумга, албатта, ёқмас эди. А. Қодирий, Меҳробдан чаён.*

НОНХЎРАК [ф. نانخوراک - нон ейиш вақти] тар. Эски усулдаги мактабда та-наффус вақти ва шу вақтдаги овқатланиш. *-Нонхўракда ерсизлар, - деди у, ўғилларининг пешоналарини силаб. М. Исмоилий, Фарғона т. о. [Каромат отам] Бугун тушда нонхўракка уйга келмас экан. Ойбек, Болалик.*

НОН-ҚАТИҚ: **нон-қатиқ бўлмоқ** айн. **ош-қатиқ бўлмоқ қ. ош-қатиқ.** *Даминжон.. бу*

ердаги кўп кишилар билан нон-қатиқ бўлиб кетган эди. А. Ҳайитметов, Пулат бармоқлар.

НООБОД [ф. نوباد — обод бўлмаган; хароб бўлган, бузилган] Унчалик обод бўлмаган; камхалқ. *Нообод шаҳар. Нообод ўлка.* ■ *Битмас-туғанмас табиий бойликлари бўлган нообод жойларга ёш ватан-парварларнинг янгидан-янги отрядлари келади.* Газетадан.

НОПИСАНДЛИК [*ф. ناپسند — беадаб, ахлоқсиз, номаъқул; қабиҳ, ярамас*] Назарга олмаслик, писанд қилмаслик. *Тилга нописандлик — элга нописандлик.* Газетадан. *-Хўш, бўлдингизми? — деди бойвачча нописандлик билан.* К. Яшин, Ҳамза.

НОПОК [ф. ناپاک — ифлос, кир; ифлосланган, тозаланмаган; ҳаром бўлган, ман қилинган] **1** Тоза, озода эмас; ифлос, булганган. *Нопок кийим. Нопок идиш.*

2 кўчма нафр. Ҳеч нарсадан ҳазар қилмайдиган, ҳаром-хариш ишлардан ҳам қайтмайдиган; қалб. *Нопок одам.* ■ *Ташмачи ҳам нафсига кучи етмаган, виждони нопок нусхалар жумласига киради.* Газетадан.

3 кўчма Тоза, соф, пок эмас; ёмон, жирканч; ноқонуний. *Мунаввархоннинг қора юрагида моғор босиб ётган нопок нияти “менга эр эмас, жой керак” хиргойида ошқора бўлди.* М. Иброҳимов, Йўлакдаги муҳаббат. *Серхаражат тўйларнинг палак ёзишига асосий сабаблардан бири, бизнингча, нопок йўл билан пул топувчи шахслардир.* «Саодат».

НОР I 1 Бир ўркачли эркак туя.

Нор туя айн. нор I 1.

2 Умуман, эркак туя. *Қаторда норинг бўлса, юкинг ерда қолмайди.* Мақол.

3 кўчма Бақувват, мард йигит. *Норқўзи йигитларимиз ичида ҳақиқатда нор йигит. Очиқ кўнгли, ростгўй, — деди Турсунхон.* Ҳ. Фулом, Сента интиламан.

НОР II [ф. نار — тамга, белги] **1** Бадандаги туғма қизғиш доғ.

2 Нор (эркаклар ва аёллар исми).

НОР III [ф. نار — анор дарахти ва меваси] айн. **анор.** *Бир боғчада олмамиди, нормиди, Мендан ўзга сенинг ғаминг ермиди? «Равшан».* **Нор пўст** **1)** анор пўсти; **2)** анор пўсти рангидаги, тўқ қизил.

НОР IV [а. نار — олов; ёнғин; дўзах] *эск. кт.* Ўт, олов.

НОРАВО [ф. ناروا — ножўя, мумкин бўлмаган, йўл қўйиб бўлмайдиган; нолойик, номаъқул] **1 кт.** Раво кўрилмайдиган; муносиб, лойиқ ҳисобланмайдиган, номуносиб. *Бўлур меҳнат билан ҳар жойда бўлса лойиқи хурмат, Ҳалол меҳнат билан қилган машият нораво бўлмас.* Ҳабибий.

2 Йўл қўйиб бўлмайдиган, жоиз эмас. *Кулса эл паришонлик одатимга, тонг йўқдир, Аҳли дилга, албатта, нораво паришонлик.* Э. Воҳидов, Муҳаббатнома.

НОРАСИДА [ф. نارسيده — хом, пишмаган; балоғатга етмаган; чала туғилган] Балоғатга, вояга етмаган. *Урушга қирон келсин. Кўплаб норасидаларни ота-оналаридан бевақт жудо қилди.* Р. Файзий, Эл меҳри.

2 кўчма Ёш, ҳали вояга етмаган, *Ҳар япроқ, ҳар новда, норасида шох, Баҳор оғушида рози беармон.* Миртемир.

НОРАСМИЙ Расмий, қонуний бўлмаган. *Умид Иноғомжондан Жаннанинг бундан бир йилча муқаддам кимгадир норасмий теккани, кейинчалик у йигит билан ажралишганини эшитди.* Мирмуҳсин, Умид. *Бу икки хўжалик ўртасида қарор ёзилмаган, қандайдир норасмий мусобақа борга ўхшайди.* Газетадан.

НОРАСО [ф. نارسا — мукамал, тўлиқ эмас; қоникарсиз; вояга, камолга етмаган] **1** Расо, тўлиқ, бут бўлмаган; комплект эмас, нотўлиқ.

2 Ақлий ва жисмоний жиҳатдан етук эмас ёки нуқсонли; ноқис. *Норасо бола.* ■ *Ўйласанг, бошдан-оёқ меҳнат — фазилат, хосият. Норасолар оқибат бўлмай расо меҳнат билан.* Ҳабибий.

НОРАСТА [ф. نارسيده — хом, пишмаган; вояга етмаган] *с. т.* Норасида. *Қотилларнинг назарида Норастанинг “гуноҳи” — Ёш бола ҳам ўз юртини Муқаддас, деб билгани.* Уйғун.

НОРБАЧЧА I Туянинг боласи; бўталоқ.

2 кўчма салб. Лаганбардор, хушомадгўй.

НОРДОН [ф. ناردان — анор донаси; куритилган анор донаси; анор суви] **1** Тишни қамаштирувчи, оғизни буриштирувчи (маза); аччиқ. *Нордон анор. Нордон узум. Нордон олма.* ■ *Элмурод Мурзиннинг кайфи борлигини сизди. Нордон нарса чайнаандек, юзи буришиб кетди.* Шухрат, Шинелли йиллар.

2 ким. Таркибида водород бўлган (тузлар ҳақида).

Нордон гап (ёки сўз, муомала) Аччиқ, таъзир берадиган, қаттиқ ботадиган гап. *Эшикка бордингми? Бобойдан нордон гап эшитганга ўхшайсан. Нима деди? С. Аҳмад, Қадрдон далалар.*

НОРЕАЛ [но.. + реал] Реал, аниқ бўлмаган, реал эмас. *Нореал режа. Нореал иш.*

НОРЕНТАБЕЛ [но.. + рентабел] Харажатларни оқламайдиган, фойда бермайдиган, рентабел эмас. *Устувор тармоқларнинг тезроқ ривожланиши, албатта, норентабел корхоналарни тугатишга олиб келади.* Газетадан.

НОРИЗО [но.. + ризо] айн. **норози**. Бу даргоҳдан ҳеч ким норизо бўлиб кетган эмас. А. Қодирий, Ўтган кунлар.

НОРИМ-НОРИМ [ф. نار — анор] Хоразмда кенг тарқалган куй ва анъанавий рақс номи.

НОРИН Пиширилган хамир ва гўшти (одатда қазини) майда тўграб, аралаштириб тайёрланадиган овқат. *Қуруқ норин (шўрва солинмаган норин). Хўл норин (шўрвали норин).* ■ *Эркин холани мақтар: Ош-овқатни ўхшатар. Хамирни пилик қилиб, Норин, лағмон, увралар, Чучвара ҳам дўлмалар.. Қ. Муҳаммадий. Кечки норин учун катта қозонда қазни пишади.* Ойбек, Танланган асарлар.

НОРИНХҲҮР Норинни яхши кўрадиган, кўп норин ейдиган. *Норинхўр одам.* ■ *Кўрдингми? Бир ярим пуд мой беради. Суягигача мой: эрта норинхўрлар маза қилади-да.* Ойбек, Танланган асарлар.

НОРИНХҲҮРЛИК Тўйиб норин ёйиш, норин билан меҳмон қилиш. *Айта қолинг, Авлиёота — қозоқ юрти, норинхўрликка кўнроқ берилганга ўхшайсиз-а.* Ойбек, Танланган асарлар.

НОРКА [р. норка < нырок < нырять — шўнғимоқ] Юнги қалин, ялтироқ, кулранг тусли йиртқич сугэмизувчи ҳайвон ва унинг мўйнасидан тикилган кийим. *Машинадан Гулсара она тушиб келди. Бошида норка мўйнасидан тикилган телпак, эгнида эркакча пўстин.* Газетадан.

НОРМА [лот. norma — меъёр, ўлчов; қоида, қонун] **1** Расмийлаштирилган қонун-қоида. *Хуқуқ нормалари.*

2 Умум томонидан қабул қилинган ва тан олинган, ҳамма учун мажбурий деб ҳисобланган, қонун ҳукмига кирган тартиб-қоида.

3 Бирор нарсанинг, ишнинг аниқ белгиланган ўртача ўлчами, миқдори, меъёри. *Қундалик иш нормаси. Нормани ошириб бажармоқ.* ■ *Зарбдорларнинг олдида ерга қарамай, Нормадан ҳам оширдим ишни бир талай.* Ғайратий.

НОРМАЛ [лот. normalis — тик, тўғри; меърий] **1** Нормага, меъёрга мос келадиган, норма (меъёр) доирасидаги, белгили талабларга жавоб берадиган; мўътадил. *Нормал шароит. Нормал ҳол. Экинлар нормал ривожланмоқда.*

2 Ақлий ва жисмоний жиҳатдан соғлом, расо. *Нормал бола.*

НОРМАЛАМОҚ Бирор нарсанинг, ишнинг нормаларини, миқдорини, меъёрини белгиламоқ, норма белгиламоқ, қўймоқ. *Ишни нормаламоқ.*

НОРМАЛАШТИРМОҚ Қатъий нормага солмоқ; нормага, маълум тартиб ва қонун-қоидаларга бўйсундирмоқ. *Тилни нормалаштирмоқ.*

НОРМАЛИ Нормага солинган, норма қўйилган, норма билан белгиланган, нормаланган. *Нормали моллар. Нормали томорқа.*

НОРМАЛАШТИРМОҚ Нормал ҳолга келтирмоқ, нормал изга солмоқ. *Дипломатик муносабатларни нормалаштирмоқ.*

НОРМАЛОВЧИ Нормага солувчи, норма қўювчи. *Нормаловчи инженер.*

НОРМАЛЬ [лот. normalis — тик, тўғри] мат. Эгри чизиқнинг бирор нуқтасига ўтказилган уринмага (ёки сиртнинг уринма текислигига) тик тўғри чизиқ.

НОРМАТИВ I [лот. normatio — меъёрлаш, тартибга солиш] Бирон-бир ишни бажариш, дастурни амалга оширишнинг иқтисодий, техник ва б. норма кўрсаткичлари мажмуи.

НОРМАТИВ II 1 Нормалар ёки нормативлар (қ. **норматив I**) билан белгиладиган. *Деталларнинг норматив запаси.*

2 Нормаларни белгиладиган. *Норматив грамматика. Норматив луғат. Норматив ҳисоб.*

НОРОЗИ [но.. + рози] **1** Қаноат ҳосил қилмаган, кўнгли тўлмаган; хурсанд, мамнун эмас. *Усиздан норози. Норози бўлмоқ.*

2 Қўшилишмаган, қўллаб-қувватламаган; қарши. *-Бу шартга кўнмаса, мен татом норозиман.. — қўлини кескин силкиди Салим.* Ойбек, Танланган асарлар.

НОРОЗИЛАНМОҚ кам қўлл. Норози бўлмақ, ранжимоқ. -*Қаёқда юрибсан! Бу ёқда шунча нарса ётибди, эшикларинг ланг очик. Жуда бепарвосан-да, қизим!* — норозиланди Ёрмат. Ойбек, Танланган асарлар.

НОРЧА айн. норбачча.

НОРГУЛ Бақувват гавдали, жуссали, барваста. *Норгул йигит. ■ Менинг набирам ҳам сенга ўхшаб аскарликда хизмат қилади. Сенга ўхшаб жуссадор, норгул, Омон деса, ҳамма билади.* Уйғун.

НОС Тамакидан тайёрланадиган ва тил тагига ташлаб ёки бурунга искаб чекиладиган нарса. *Бектемир қўлбола носдан бир чимдим тил тагига ташлаб, кейин тупурди.* Ойбек, Қуёш қораймас. *Холмирза ака ичидан: “Шу ғайратинг, шу ҳимматинг бўлса, икки йилда хирмонтетадан аниқ айриламиз”, деб ўйлайди, бурнига нос искаб олади.* А. Қодирий, Обид кетмон.

ОҒЗИГА НОС СОЛМОҚ айн. оғзига толқон солмоқ қ. толқон. *Оғзинга нос солиб ўтира-санми, Холик! Гапирсанг-чи!* Ш. Ризо, Қор ёғди, излар босилди.

НОСВОЙ айн. нос. *Қоратой, бир танга пул топиладими сенда. Носвой иўқ, эртадан бери хумориман.* Ойбек, Танланган асарлар. *Аравакаш чол носвой чекиб, отни қамчи билан астагина уриб қўяди.* Ойбек, Болалик.

НОСВОЙЧИ Нос тайёрлаш ва сотиш билан шуғулланувчи одам. *Дадам билан икковимиз.. чанг кўчалардан носвойчиникига қараб кетамиз.* Ойбек, Болалик.

НОСИЛКА [р. носилки < носить — кўтариб олиб бормоқ] Касалларни олиб юриш учун мосланган махсус замбил. *Носилкаларда ярадорларни иккинчи қаватга олиб чиқишади.* Р. Файзий, Сен етим эмассан.

НОСИР [а. نسر — ёрдам, кўмак; галаба, ютук] **1:** носирини ерга букмоқ Обрусини тўкмоқ, ерга букмоқ. *Бир куни одамлар олдида носиримни ерга букиб: “Сиз занглаган кетмонсиз, оловга тоблаб, ўтқир эговда чархлаш керак” деса-я, юзсиз!* Х. Назир, Ўтлар туташганда.

2 Носир (эрқақлар исми).

НОСКАШ Нос чекувчи. *Бувим саксондан ошиб кетган, носкаш кампир эдилар.* Ф. Фулом, Менинг ўригина болам.

НОСКИ [р. носок — бурунча, кичкина бурун ёки носить — кийиб юрмоқ] Тўқилган калта пайпоқ, *Марасул.. кир рўмолчасини*

олиб, Насибанинг кўлига беради, носкисини кўрсатиб, оёғини узатади. А. Қаҳҳор, Оғрик тишлар.

НОСОЗ [ф. ناساز — созланмаган, номутаносиб, номувофиқ; бетоб] **1** Соз эмас, созланмаган ёки сози бузилган (муסיқа асбоблари ҳақида).

2 Бирор мақсад учун мувофиқ келмайдиган; нобоп.

3 кўчма Муросаси, ораси бузуқ. *Улар бири бири билан носоз.*

НОСОЗЛИК **1** Муроса қилмаслик, муросасизлик. -*Энди мен билан ҳам қирпичоқ бўлмақчимисиз, ўртоқ Муҳамедов? Яъни носозлик бошланяптими? — деди Сотиболдиев.* П. Қодиров, Уч илди.

2 Бузилган, яроқсиз ҳолга келган ҳолат; бузуқлик, яроқсизлик. *Мутахассисларнинг фикрича, кеманинг ташқи ёнилғи бакида айрич носозликлар аниқланган.* Газетадан. *Ҳукуматнинг расмий вакили воқеага тезликнинг ошиши ёки поезд филдиракларидаги носозлик сабаб бўлган, деган фикрни билдирган.* Газетадан.

НОСОҒ кам қўлл. Соғ эмас, бирор дард-касали бор; касал, хаста.

НОСТРИФИКАЦИЯ [нем. Nostrifikation < лот. nostrum — бизники, бизга тегишли; ўзимизники; маҳаллий + facere — қилмоқ, ижро этмоқ] Муайян давлат томонидан чет эл дипломи, унвони, илмий даражасини ўз мамлакатадигага муқобил, тенг деб тан олиниши.

НОСФУРУШ Нос сотувчи.

НОСҚОВОҚ Нос солинадиган идиш, носдон, носкади.

НОТА **1** [лот. nota — белги; мулоҳаза, қайд этиш; хат, мактуб] мус. **1** Муайян баландлик ва чўзиқликдаги товушни (мусиқани) ёзиб олишда қўлланадиган шартли график белги. *Малика опера санъати сирларини ўрганиши, нота ёзувларини пухта эгаллаши учун тўққиз йил тинимсиз изла-нишда бўлди.* Газетадан.

2 Муסיқа ёки ашулада товушнинг ўзи. *Баланд нота. Паст нота.*

3 Шундай белгилар билан ёзилган му-сиқа асари матни; шундай матнлар ёзилган дафтар, китоб ва ш. к. -*Композитор қайси чолғувчи қачон чалишини кўрсатиб берган, мана нотаси, — деди дирижёр Салоҳовга.* С. Аҳмад, Музиқали воқеа.

НОТА II Бир давлатнинг бошқа бир давлатга ёзган расмий дипломатик мурожаатномаси. *Дипломатик нота. Россия ҳукматининг АҚШ ҳукматига нотаси.*

НОТАВОН [ф. ناتوان — бўш, кучсиз, нимжон; камбағал, қашшоқ; бечора] **1** Ҳол-қудрати йўқ; заиф, нимжон, ноирон. *Нотавон кампир.*

2 кўчма Ночор, бечора. [Гулбаҳор:] *Мен ғурбат тортиб, бағри эзилган бир нотавонман, раҳм қилинг! Ҳамза, Бой ила хизматчи.*

Нотавон кўнгил ёки нотавон кўнгилга қўтир жомашов Ўзига муносибидан кўра юқориқоқни, яхшироқни истаб қолган ёки ўзига муносиб иш қилган кишига нисбатан айтиладиган ибора. -*Э-ҳе, нотавон кўнгилм қурсин, шундай қаҳрамон йигит турганда, менинг Шокирвойимни бошига бошвоқ қилармиди, — деди Зокир ота. А. Муҳиддин, Зебонинг севгиси. Билган у деди, билмаган бу. Ҳатто оғзига кучи етмаган баъзи бировлар.. «Нотавон кўнгилга қўтир жомашов», деб луқма ташлашарди. С. Сиёев, Райҳон.*

НОТАЙИН [но.. + тайин] **1** Кимлиги, нималиги ёки нима бўлиши аниқ эмас; ноаниқ, номаълум. *Нотайин шахс. Нотайин иш.* ■ *Ҳовлидаги кекса тутга чироқ шуғласи тушиб, унда нотайин бир кўланка кезар, ичкаридан “ширт-ширт” этган товуш эшитилар эди. А. Қаҳҳор, Қўшчинор чироқлари.*

2 Ишониб бўлмайдиган, тайини, субути йўқ; бетайин. Э. *Унинг ўзи шундақа нотайин, юзсиз одам! А. Қаҳҳор, Сароб.*

3 Аниқ-равшан эмас, дудмол, мужмал. *Нотайин гап.*

НОТАМОМ [но.. + тамом] *кам қўлл.* Охирига етмаган, тамом бўлмай қолган; чўлтоқ. *Ҳикоянгиз яхши, аммо нотамом. А. Қаҳҳор, Сароб.*

НОТАНИШ Танишлиги йўқ, аввал таниш-билиш, ошна бўлмаган, кўрилмаган; ёт, бегона. *Нотаниш одамлар орасига келатганидан хижолат чекибми, унинг юзлари, кенг пешонасини майда тер босан эди. П. Турсун, Ўқитувчи. Адолат кўзини очганда, ўзини чоғроқ, нотаниш бир уйда кўрди. С. Зуннунова, Гулхан.*

НОТАРИАЛ Юридик ва б. турли ҳужжатларни расмийлаштиришга, нотариат ва нотариус вазифаларига оид. *Нотариал контора. Нотариал нусха.*

НОТАРИАТ [лот. notarius — мирза, котиб] Юридик аҳамиятга эга бўлган ҳуқуқлар ва воқеа-ҳодисаларни тасдиқловчи давлат органлари тизими.

НОТАРИУС [лот. notarius — мирза, котиб] Турли хил юридик ҳужжатларни (шартнома, васиятнома, ишончнома ва ш. к. ни) гувоҳлантириш, тасдиқлаш ишларини амалга оширувчи мансабдор шахс. *Шунинг билан биргаликда жойларда давлат нотариуслари ҳам ишляпти. Газетадан.*

НОТЕКИС 1 Юзаси, юзи текис эмас, паст-баланд, гадир-будир, ўйдим-чуқур. *Карталарда ҳали ҳам нотекис ерлар бор. Аъзоларни паст-баландни текислашга солиб, ерни бороналашга тайёрласак. Н. Сафаров, Хадича Аҳророва.*

2 Бир текисда бўлмаган, ўлчамлари ҳар хил, катта-кичик, паст-баланд. *Нотекис гўзалар. Нотекис тақсимот. Нотекис ривожланиш.*

НОТЕКИСЛИК 1 Текис, бирдай эмаслик; ҳар хиллик. *Ҳаракатнинг нотекислиги.*

2 Нотекис, паст-баланд ер, жой. *Нотекисликларни тўғриламоқ.*

НОТИЖОРАТ [но.. + тижорат] *сфм.* Тижоратга оид, боғлиқ бўлмаган. *Фаргона вилоятида яна бир нотижорат ташкилот — вилоят кутубхоналар ассоциацияси фаолият кўрсата бошлади. Газетадан.*

НОТИНЧ 1 Шовқини ёки ҳаракати кўп, сершовқин, серқатнов. *Нотинч кўча.*

2 Тинчи, осойиши бузилган; безовта, бесаранжом. *Нотинч вақт. Бемаҳал нотинч қилмоқ.* ■ *Унинг [Ҳакимбойваччанинг] ранги ўчган, кўзлари аллақандай нотинч. Ойбек, Танланган асарлар.*

3 Ғалва, ташвиши кўп; серғалва, серташвиш, ташвишли. *Раҳматилла бирмунча вақт шаҳар маорифи бўлимида, бу ер нотинч бўлгандан кейин, музейда ишлади. А. Қаҳҳор, Қўшчинор чироқлари.*

НОТИНЧЛИК 1 Тинчи бузилганлик, бесаранжомлик; сершовқинлик.

2 Осойишта бўлмаган ҳолат. *Неча йилдирки, қўшни Афғонистонда нотинчлик ҳукм сурмоқда. Газетадан.*

НОТИНЧЛАНМОҚ *кам қўлл.* Бетоқат, безовта бўлмоқ, ташвишланмоқ. *Бой бизларни сўқади, оёғи куйган товўқдай, нотинчланади. Ойбек, Танланган асарлар.*

НОТИҚ [а. ناطق — сўзловчи, гапирувчи; фикрловчи; диктор] Нутқ сўзловчи; гапга чечан, гапга уста, сўзамол. *Тўти холадай тўққиз ўғилнинг онаси, мажлисда нотик, теримда девкор аёлни жондан севмаслик мумкинми?* Ойбек, О. в. шабадалар.

НОТОБ [ф. ناتب — кучсиз, нимжон; чидамсиз] Тоби йўқ, касал, бетоб. *Худо берган бир ўғил, бир қизим бор. Уларни нотоб деб эшитдим.* Ойбек, Танланган асарлар.

НОТЎҚИМА сфм. Йигириш ва тўқувчилик усулларини қўлламаган ҳолда олинадиган (мато ҳақида). *Бу тола ва иплардан нотўқима материаллар ва бошқа халқ истеъмол моллари ишлаб чиқаришда фойдаланилади.* Газетадан.

НОТЎҒРИ 1 Ҳақиқатга мос келмайдиган; янглиш, хато. *Нотўғри фикр. Сўзни нотўғри ёзибсиз.* ■ *Бу гапингиз нотўғри, қори, сизнинг илмингиз эскича илм. Колхозга янгича илм керак.* А. Қаҳҳор, Қўшчинор чироқлари. *Орқада келаётган Мели полвон: -Айб ўзимизда ҳам бор, Эрмат ака. Биттамад «Мана бу тўғри, мана бу нотўғри!» деб дадил гапиролмаймиз, — деди.* П. Турсун, Ўқитувчи.

2 Тартиб-қоидага, умумий меъёрга тўғри келмайдиган; ноўрин, ножўя, чакки. *Нотўғри иш. Нотўғри хатти-ҳаракат.* ■ *Нотўғри тарбия ўсмирларнинг ножоиз йўлларга киришига замин яратади.* Газетадан.

НОУМИД [ф. ناميد — 1 Умиди йўқ, умидсиз, умидсизланган, ҳафсаласи пир бўлган. *Ноумид одам.* ■ *Хотин кишини ҳамма вақт ноумид, норози кўриб ўрганган ва буни хотинлик латофати деб билган Сидиқжонга жувоннинг бу гаплари.. унча ботмади.* А. Қаҳҳор, Қўшчинор чироқлари.

2 Ишонччи йўқотган ҳолда, ишончсиз равишда. *Ноумид бўлмоқ.* ■ *Каскасини бошига тўнкариб, бир инграб қўйди-да, теваракка ноумид қаради.* Ойбек, Қуёш қораймас.

Ноумид шайтон қ. шайтон 1.

НОУТБУК, нотбук [ингл. notebook — дафтар; ёзув дафтарчаси] Одатда кичик япасқи чамадончага ўхшаш портатив шахсий компьютер; имкониятлари жиҳатидан оддий шахсий компьютерларга тенглаша олади ва уяли телефон орқали интернет билан боғланиши мумкин.

НОУ-ХАУ [ингл. know how — қандайлигини биламан] Ҳужжатлар асосида расмийлаштирилган ва қонунчилик билан му-

хофаза қилинадиган, ҳали ҳаммага маълум бўлмаган техникавий билимлар, тажриба, кўникмалар, ҳужжатлар, ишлаб чиқариш сирлари; уларнинг моҳияти лицензион шартномалар ва б. битимлар тузишда изоҳланади. *Бу технология бир қатор «ноу-хау»ни ўз ичига олади.* Газетадан.

НОХОЛИС [но.. + холис] Холис бўлмаган, ғаразли; ҳақиқатга зид. *Марказий сайлов комиссияси ҳисоботи пайдо бўлгандан кейин, сайловларимиз ҳақида нохолис фикрлар, аччиқ-нордон гаплар бўлиши мумкин.* Газетадан.

НОХОСДАН рвш. Бехосдан, кўққисдан, кутилмаганда. *Нега бундай нохосдан шаҳар бормоқчи бўлдингиз?* С. Айний, Эсдалиқлар.

НОХУН [ф. ناخن — тирноқ; чангал] Танбур, саго ва доира чалиш учун ишлатиладиган махсус металл мослама. *Рашид ота танбурнинг филофини очиб, ўнг қўлининг кўрсаткич бармоғига нохун кийди.* Э. Усмонов, Ёлқин.

НОХУНА [ф. ناخونه — кўз доғи, кўзга тушадиган оқ] Кўзнинг бурчагида пайдо бўладиган оқроқ бир парча гўшт (даволанмаса, катталашиб кўзни кўр қилиб қўяди). *Мусулмонлар орасида.. бир касал ҳукм суриб келаётибдир.. бу касал қулғуна ва қайсари нохундан ҳам ёмонроқ.* «Муштум».

НОХУШ [ф. ناخوش — бемор, касал; ёқимсиз, жирканч; ғамгин; кўнгли тўлмаган, норози] **1** Таъби хира, кайфияти ёмон, бузуқ. *Эрталаб Маҳкам уни нохуш аҳволда кўриб, яна мурсалари келишмаганини сезди.* П. Қодиров, Уч илдиш. *Гулсум нохуш кўринарди. Унинг кўнгли нимагадир ғаш экани юзидан билиниб турарди.* П. Турсун, Ўқитувчи.

2 Хуш келмайдиган, ёқимсиз, кўнгилсиз. *Нохуш хабар. Нохуш гап.* ■ *Унинг [Мунисхоннинг] юзи заъфарон бўлди. Айниқса, бугун эрталаб почтальон ташлаб кетган газета нохуш хабар келтирди.* С. Аҳмад, Ойдин кечалар.

3 Носоғ, бетоб, касал. *[Башорат хола] Кечга яқин ўзини нохуш сезиб, вақтли ётиб қолди.* А. Мираҳмедов, Кулган чечаклар.

НОЧОР [ф. ناچار — мажбурий, ноилож; чорасиз; ожиз, нотавон] **1** рвш. Ўз майлига, хоҳишига қарши; чорасиз, ноилож. *Қош қорайиб қолгач, улар ночор шийпонга қайтишди.* И. Раҳим, Чин муҳаббат. *Адолат*

кетгиси келмаса ҳам, ночор ўрнидан турди. С. Зуннунова, Гулхан.

2 сфт. Камбағал, бечора; хароб, абгор. *Ночор хўжалик.* ■ *Ҳовли анча ночор, уйнинг қамиш бўғотини ёмғир суви ўприб тушган.* А. Мухтор, Опа-сингиллар.

НОЧОРЛИК Қийин, мушкул аҳвол; иложсизлик; муҳтожлик, камбағаллик. - *Ер олган кўкаради, ер сотган қурийди. Мана бу ганнинг магзини чақ, жиян! - Ночорлик, тоға.* Ойбек, Танланган асарлар.

НОШАРЪИЙ [но.. + шаръий] *дин.* Шариатда йўл қўйилмайдиган, шариатга хилоф; ғайришаръий. - *Бировнинг келини билан менинг ишим нима, Қўлматов! Қўйинг, ношаръий гаплар билан оғзингизни чарчатманг, - деди Фани ота.* Ҳ. Фулом, Машғал.

НОШИР [а. *ناشر* - тарқатувчи, нашр этувчи] Нашр этувчи, чоп қилувчи, чиқарувчи.

НОШИРЛИК Нашриётлар ташкил этиш, турли хил босма маҳсулотларни тайёрлаш, нашр қилиш ва уни тарқатишга оид соҳа. *Истиқлол мафжураси ҳақида гап борар экан, ноширлик фаолиятини ҳам тартибга солиш муҳимдир.* Газетадан.

НОШОД [ф. *ناشاد* - шод, хурсанд эмас, ғамгин; норози, хафа; бахтсиз] *кам қўлл. кт.* Шод, хурсанд эмас, кайфи бузуқ. *Зотан ким ҳам буларга Қилсин марҳамат, имдод. Уларни каби кўплар Таҳқирланган ва ношод.* Ғайратий.

НОШОЁН [ф. *ناشايان* - арзимайдиган, нолойиқ; эътиборни тортмайдиган] *кам қўлл. кт.* Нолойиқ, номуносиб, ножўя. *Ношоён ибора. Ношоён қилиқ.*

НОШУД [ф. *ناشد* - номукин, амалга ошмайдиган, реал бўлмаган] Қўлидан ҳеч иш келмайдиган, ҳеч қандай ишнинг уддасидан чиқа олмайдиган; эпсиз, эпашанг, лаванг. *У ўзи танлаган уч ношуд навқари билан беш кишилашиб битта ҳам кийик уролмаганликларига диққат.* Ш. Тошматов, Эрк қуши. *Шундай катта даргоҳдан ўрин тополмай, қўлингизни бурнингга тиқиб қайтингми, ношуд!* Ойбек, Танланган асарлар.

НОШУКУР [но.. + шукур] Бориға қаноат, шукур қилмайдиган; яхшиликни билмайдиган; кўрнамак. - *Ношукур экансиз, опа, - деди [Зайнаб], - поччамдан нолишингиз яхши эмас.* А. Қодирий, Ўтган кунлар. [Ро-

ҳила:] *Ҳой, ношукур! Бахт қуши одамнинг бошига бир марта қўнади-я! Ўқиш ҳамма вақт бўлаверади, - магазин тўла китоб!* А. Қаҳҳор, Оғрик тишлар.

НОШУКУРЛИК *айн. ношукурчилик.* *Чирчиқ дарёсига бундай муносабатда бўлиш ношукурлик, гуноҳи азим эмасми?* Газетадан.

НОШУКУРЧИЛИК Бориға қаноат, шукур қилмаслик; кўрнамаклик. *Ношукурчилик бўлмасин, пулни, дон-дунни етказиб беришади, пулга нима оласан, донни нима билан ютасан, дейишмайди.* И. Раҳим, Зангори кема капитани. *Нурмат бобонинг содда, кайвони гапларидан сўнг мен риёкорлик, ношукурчилик ҳақида кўп ўйлайдиган бўлиб қолдим.* Газетадан.

НОЯБРЬ [лот. *november* - тўққизинчи] Григорий календариди йилнинг ўн биринчи ойи (Қадимий Рим календариди 9-ой).

НОЎРИН 1 Ўринли эмас, ножўя, чакки; бемаврид. *Ноўрин гап.*

2 Етарли асосга эга бўлмаган; асоссиз, пуч. *Ноўрин даъво. Ноўрин талаб.*

НОҚИЛ [а. *ناقل* - ҳикоя қилиб берувчи; қайта кўчирувчи] *эск. кт.* Нақл қилувчи, ҳикоя айтувчи.

НОҚИС [а. *ناقص* - етишмайдиган, кам топиладиган; нуқсонли; нотўлиқ] Камчилиги, нуқсонли бор, нуқсонли.

НОҚОБИЛ [но.. + қобил] **1** Қобилияти, лаёқати йўқ; лаёқатсиз. *Шарқ халқларини ҳақорат қилмоқ, улар ақли, қобилияти чала, тарихий ижодга ноқобил деб исботламоқ.. учун буржуазия идеологлари мингминг томлаб китоб ёздилар.* Ш. Рашидов, Танланган асарлар. *Майда ишга зўр берган одам каттасига ноқобил бўлади.* А. Мухтор, Туғилиш.

2 Сўзга кирмайдиган; ўжар, қайсар. [Ёрмат] *Халқумини бўғган йиғидан қийналиб, базўр гапирди: - Алҳамдулилло, кўрдим, тирик экансан, ноқобил болам.* Ойбек, Танланган асарлар.

3 Хулқи ёмон, ярамас. *Ноқобил ўғил.* ■ *Ҳали ҳам анов.. маҳсидўзникидамисан? Аканг - тентак йигит, кўп ноқобил чиқди.* Ойбек, Танланган асарлар.

НОҚОНУНИЙ [но.. + қонуний] Қонунга зид, қонуний бўлмаган. *Агар ҳуқуқшунос-маслаҳатчи фаолият юритганда эди, ноқонуний қарорлар қабул қилинишининг олди олинарди.* Газетадан. *Эрон ҳукумати мамла-*

катдан ноқонуний олиб чиқиб кетилган маданний-тарихий ёдгорликларни қайтаришни АҚШдан талаб қилмоқда. Газетадан.

НОҚУЛАЙ 1 Иш-ҳаракат учун қулайлиги йўқ; қулайлик бермайдиган, қўл келмайдиган; ўнғайсиз. *Ноқулай кресло.* ■ *Бектемир ноқулай ерда узала тушиб ётар ва тинмасдан отар эди.* Ойбек, Қуёш қораймас.

2 Мувофиқ келмайдиган, номувофиқ. *Ноқулай пайт.* ■ *Баҳорда об-ҳаво ноқулай келишига қарамасдан, бу звенодаги кишиларнинг фидокорона меҳнати натижасида пахтадан яна мўл ҳосил етиштирилди.* Н. Сафаров, Курбонали.

3 Кишини ўнғайсиз аҳволга соладиган, хижолат қиладиган; хижолатли. *Бу гапни унга сиз айтинг, менга ноқулай.*

НОҒОРА [а. نقاره — кичик ноғора] Туваксимон сополга тери қоплаб ясалган ва иккита чўп билан уриб чалинадиган бир жуфт мусиқа асбоби. *Ноғора овози. Ноғора чалмоқ.* ■ *Ноғора чўпининг тез урилиши, баччанинг бир айланиши ва кучли, ялпи қийқириқ билан базмнинг биринчи қисми тугади.* Ойбек, Танланган асарлар.

Ноғора қилмоқ Жар солиб ҳаммага маълум қилмоқ, дўмбира қилмоқ. *Қарасам, айбимни оламга ноғора қиладиган.* «Муштум». [Бировнинг] **ноғорасига ўйнамоқ** Бировнинг айтганини қилмоқ, бировнинг изми, гапи билан иш қилмоқ. *Йўқ, деб кўринг-чи, правление Ойқиз билан Олимжоннинг ноғорасига ўйнайди.* Ш. Рашидов, Бўрондан кучли. **Тўйдан кейин ноғора** Вақти ўтгандан сўнг, ғанимат фурсат қўлдан берилгандан кейин ғайрат кўрсатилганда айтиладиган ибора. **Тўйдан олдин ноғора чалмоқ (ёки қоқмоқ)** Ўзи йўқ, ҳали бўлмаган нарса ҳақида жар солмоқ. *Узоқ тўйга олдиндан ноғора қоқиш ярамайди.* Ойбек, О. в. шабадалар. **Ўзингга боқ — ноғора қоқ** Аввал ўзингга қара, сўнгга бировнинг айби, камчилиги ҳақида гапир.

НОҒОРАЧИ Ноғора чалувчи.

НОҲАҚ [но.. + ҳақ] **1** Қонунга хилоф, зид; ғайриқонуний. *Тунов кун унга [Ўрмон полвонга] бориб, “бизнинг ғаллаларимизни ноҳақ ва зўр билан босиб олдилар”, деб арз қилган оёқ яланг деҳқон, чўпон ва ўтинкашлар кириб келдилар..* С. Айний, Қуллар. *Кўнгил тўла армон, йўқдир дармон, Оҳ, ҳар кун ноҳақ қурбон, мудҳиш қон.* С. Абдулла.

2 Ҳаққоний бўлмаган, адолатсиз, нотўғри. *Ноҳақ ҳукм. Ноҳақ ишга ривож йўқ.* Мақол. ■ *Ноҳақ ишга қуяман.. Бой, камбағал, мулла, эшон демасдан, ҳамманинг боласига бир текис қаралса, отамга лаънат, ўғлимни юбормасам.* Ойбек, Танланган асарлар. *Маҳкам.. ноҳақ гаплардан қаттиқ норози бўлиб, яна юзининг қони қоча бошлади.* П. Қодиров, Уч илдиш.

3 кесим взф. Ҳақли эмас. *Ким ҳақ, ким ноҳақ — аниқ бўлди. Бу масалада сиз ноҳақсиз.*

НОҲАҚЛИК 1 Ғайриқонунийлик, адолатсизлик; ҳақ эмаслик. *-Ҳа, кечирасизлар, ўртоқлар, айтгандай, раиснинг сўзидаги ноҳақликларни айтмай бўлмайди, — деди Элмурод.* П. Турсун, Ўқитувчи.

2 Ноҳақ иш, хагги-ҳаракат. *Дадаси оддий темирчи бўлса ҳам, ноҳақликка қарши курашда ўз жонини аямай, янгича ҳаёт учун курашган ажойиб кишилардан бўлган!* С. Анорбоев, Оқсой.

НОҲУКУМАТ [но.. + ҳукумат] сфт. Ҳукуматга тегишли эмас, ҳукуматники бўлмаган. *Республикамизда ўн учта ноҳукумат ташиқлот ишлаб турибди.* Газетадан.

НУЖУМ [а. نجوم — юлдузлар; юлдузлар жадвали, гороскоп]: **илми нужум** эск. кт. айн. **астрология.** *Мадрасаларда Улуғбек замонида ўқитилган илми нужум ва риёзиёт фанлари чиқариб ташланган, муллаваччалар фақат диний масалаларнигина ўрганар эди.* М. Осим, Элчилар.

НУКЛИОН [лот. nucleus — ядро; мағиз] Атом ядроларининг таркибий қисмлари бўлмиш протон ва нейтронларнинг умумий номи.

НУКТА [а. نكته — ўткир, донолик билан айtilган гап; қочирим; туб маъно, моҳият; нозик тафсилот, икир-чикир] Мулоийм гап-сўз, рамзу ишоралар билан ифодаланган жумла, гап.

НУКТАДОН [нукта + ф. دان — билувчи, билафон] кам. қўлл. айн. **нуктафаҳм.** *Нуктадон олим.*

НУКТАФАҲМ [нукта + фаҳм] кам. қўлл. Масаланинг туб моҳиятини, нозик, майдачуйда тафсилотларини яхши биладиган, ўткир фикрловчи. *Эргаш ака туғма олим, нуктафаҳм матншунос ва манбашунос эди.* Газетадан.

НУЛЛИФИКАЦИЯ [лот. nullificatio — йўқотиш] Бирор ҳужжатни, қонунни қонунийликдан маҳрум этиш, бекор қилиш.

НУМИЗМАТИКА [лот. numisma — танга] Тангалар ва уларни зарб қилиш, танга, ёмби шаклидаги пул муомаласи тарихини ўрганувчи ёрдамчи тарих фани. *Унинг [музейнинг] экспозиция ва фонлари.. археология ва нумизматика, антропология, этнография бўлимлари билан бойитилади.* Газетадан.

НУР [а. نور — ёруғлик, ёғду] 1 Ёруғлик манбаидан таралган ва ингичка тола кўринишида тасаввур этиладиган зиё, ёғду. *Кўёш нури. Ой хира нур сочмоқда.*

2 физ. Мусбат ёки манфий зарралар, электромагнит тебранишлар оқими. *Рентген нурлари. Катод нурлари.*

Нур касаллиги (ёки касали) Радиоактив нурларнинг организмга таъсир этишидан юзага келадиган касаллик. *Чернобиль авариясини бартараф этишда иштирок этган кўпчилик ватандошларимиз нур касаллигига чалинмасликлари учун профилактика ишлари амалга оширилди.* Газетадан. *Натижада японларнинг бир қисми нур касалига мубтало бўлиб қолган.* Ҳ. Ҳасанов, Экватордан ўтганда.

3 Умуман, ёруғлик, зиё; ёруғлик энергияси. *Электр нури.* ■ *Балиқ тирик сув билан, Гиёҳ яшар нур билан, Денгиз равшан дур билан, Иксон эркин у билан.* Қ. Муҳаммадий.

4 кўчма Ҳақиқат, бахт-саодат, эркинлик, маърифат рамзи. *Билим нури.* ■ *Кўча жанги бошланганди. Зулмат билан нур тўқнашган, ҳаёт-мамонт уруши бормоқда.* Ш. Тошматов, Эрк қуши.

Кўз нури Ардоқли, кўз қорачиғидай азиз киши (асосан фарзанд ҳақида). *У [она] Гулнор каби севикли қизини, кўз нурини оловга отиб, яна унинг бахт ва саодати тўғрисида насихат қилиши керак.* Ойбек, Танланган асарлар. **Кўз нурини тўқиб** Узоқ вақт кўз узмай, кучини аямай, қунт билан. *Кўз нурини тўқиб ишламоқ.* **Нур ало** (ёки устига) нур Яна ҳам яхши, кўнгилдагидан ҳам аъло. *Ихтиёр ўзингизда, қутлайман десангиз айтиб кўринг, хўп деса — нур ало нур.* М. Исмоилий, Фарғона т. о. **Нури дийда қ. дийда.**

5 Нур (эркаклар исми).

НУРАМОҚ 1 Эскириб емирилмоқ, бузилмоқ. *Бўтабой.. баҳор ёмғирида нураган ўчоқни яхшилаб сувади.* С. Аҳмад, Ҳукм. *Келган киши, овоз чиқмагандан кейин, эшик ёнидаги нураб қолган девор устидан мўралай бошлади.* Т. Обидов, Юсуфжон қизиқ.

2 Табиий куч (шамол, зилзила, атмосфера ёгинлари ва ш.к.) таъсирида емирилмоқ, ўзгармоқ.

3 кўчма Ичдан зил кетмоқ, емирилмоқ. *Маърифат ва билимга муштоқ бу йигит, нураб кетган эски дунёдан кўрган жафоларини хотирлаб, ўтмишига лаънатлар айтар эди.* Н. Сафаров, Султон бўзчининг неваралари.

НУРАТМОҚ Емирмоқ, бузмоқ, йўқ қилмоқ. *Йиллар — асрларни қувиб ўтади. Томирсиз ишларни ювиб ўтади. Аммо юволмайди, нуратолмайди, Биз қўйган ғиштларни қулатолмайди.* Ф. Ғулом.

НУРАФШОН [а. + ф. نورافشان — нур сочувчи, нур тарқатувчи] кт. Нур сочувчи, нурли, порлоқ. *Юртимизнинг нурафшон эртаси ёшларимизнинг янада юқори чўққилар сари интилишига имкон яратмоқда.* Газетадан.

НУРАШ 1 **Нурамоқ** фл. ҳар. н.

2 геол. Тоғ жинслари ва минералларнинг шамол, атмосфера ҳодисалари ва ш.к. таъсирида бузилиш ва емирилиш жараёни. *Нураш конлари. Нураш пўсти.*

НУРЛАНМОҚ 1 Нур сочмоқ; нур билан ёритмоқ; порламоқ. *Ой хира нурланиб турибди.*

2 физ. Ўзидан нурли энергия чиқармоқ. *Радиоактив моддаларнинг нурланиши.*

3 кўчма Ёрқин намоён бўлмоқ, акс этмоқ, порламоқ. *Ефим Даниловичнинг юзида оталик меҳрининг ажойиб илиқлиги нурланди.* А. Мухтор, Опа-сингиллар.

НУРЛАНТИРМОҚ 1 Нур билан ёритмоқ, кўринадиган қилмоқ. *Мана, ҳовли орқасидаги чакаладан секин-секин ой кўрина бошлади. Кечанинг қоронғисида эриб йўқолган дарахтларни нурлантириб, уларга кўркам ҳаёлий манзаралар шаклини беради.* Ойбек, Танланган асарлар.

2 Бирор манба нурини йўналтирмоқ, ёғдирмоқ (даволаш ёки бошқа бирор мақсад билан). *Оғриқ жойни кварц лампа билан нурлантирмоқ.* ■ *Даволаш мақсадида тирик организм ультрабинафша.. нурлар билан сунъий нурлантирилади.* «ЎзМЭ».

НУРЛИ 1 Нур, ёғду берадиган; ёғдули. *Нурли қўёш. Нурли энергия (физ.).*

2 кўчма Ёруғ, равшан, порлоқ. *Даданг урушда ғолиб бўлиб, омон-эсон қайтсин. Бу нурли кунларни кўриб яйрасин.* Ойдин, Ҳикоялар.

НУРОНИЙ [a. + ф. نورانى — ёрқин, порлок; нурли; файзли, истараси иссиқ] **1** Юздан нур ёғилиб турадиган, файзли (кексалар ҳақида). *Салим ота нуроний, хушчақчақ киши эди.* Газетадан.

2 Кекса, оқсоқол; ветеран. *Марказ биносида нуронийлар кенгаши, ногиронлар жамияти жойлашган.* Газетадан.

НУРСИЗ 1 Нур бермайдиган ёки ёритилмаган; хира. *Ҳамиджон ойнанинг нурсиз ёруғи тушиб турган деразадан кўчага қаради.* Ў. Умарбеков, Чўлда бир кун.

2 кўчма Қони қочган, рангпар; хира (юз, кўз ҳақида). - *Кунимиз қурсин, Жумагул. Сен ҳам ҳалак, мен ҳам, — дерди чол нурсиз кўзларидан оққан ёшни артиб.* Ж. Шарипов, Хоразм. *Унинг [афғон чойфурушини] азалдан кулга ўхшаш нурсиз юзи баттар қорайиб кетгандай кўринди.* А. Мухтор, Опа-сингиллар.

3 кўчма Бадийий жиҳатдан бўш, қизиги йўқ, мазмунсиз. *Нурсиз асар.*

4 кўчма Рўшноликдан йироқ, оғир. *Тийрак Ҳамиднинг нурсиз ҳаётини безаган бирдан-бир нарса онаси Комила опанинг сўзлаган эртақлари.. бўлди.* «Ўзбек адабиёти».

НУРСИЗЛАНМОҚ Нури кетиб, қони қочиб хираланмоқ, хира тортмоқ. *Нурсизланган юзига қон югуриб тиниқланди.* А. Қаҳҳор, Сароб.

НУСРАТ [a. نصرت — ёрдам; ғалаба] *эск. кт.* **1** Ёрдам, мадад, кўмак. *Менинг нусратим, кароматим шу — киндик қоним тўкилган ерга меҳрим, холос.* Н. Ёқубов, Бўсағада.

2 Ғалаба, зафар.

3 Нусрат (эркаклар ва хотин-қизлар исми).

НУСХА [a. نسخه — андоза, ўхшаш, намуна; алад, дона] **1** Бир турдаги нарсалар ҳақида тасаввур берадиган намуна. *Молларнинг нусхалари.* ■ *Улар буни [альбомни] варақлаб, керакли газламаларнинг парча-пурча нусхаларини кўриб, (материал) танлайдилар.* Ойбек, Танланган асарлар.

2 Бир хил қилиб яшаш, кўчириш учун тайёрланган буюм намунаси, андаза; қолип. *Эндиги хатни ниҳоятда эҳтиёт билан, нусхага қараб ёздиршини кўнглидан ўтказди.* А. Қодирий, Ўтган кунлар.

3 Гул, нақш ва ш. к. нинг тури; шундай гул, нақш тури билан ишланган маҳсулот. *Дўппининг чуст нусхаси.* ■ *Ягона машаққати — қизга безак моллари тайёрлаш, яғни*

нусхалар топтириш, чеварларга тиктириш ва ҳоказодан иборат. Ойбек, Танланган асарлар.

4 Босма ёки ёзма асарнинг ҳар бир донаси. *Китоб минг нусха босилди.* ■ *Тошкентда бу китобдан фақат икки нусха бор, холос.* С. Аҳмад, Ҳукм. «Чағаниён» газетаси қарийб 8 минг нусхада чоп этилади. Газетадан.

5 Бирор нарсанинг аслидан олинган кўчирма. *Баённома нусхаси. Нусха олмоқ. Нусха кўчирмоқ..*

6 с. т. Бирор салбий тоифага мансуб одам. *Умуман олганда, туҳматчи нусхалар йўқолиб борапти.* Ш. Рашидов, Бўрондан кучли.

7 шв. Афғ, башара, ангор. *Нусханг қурсин. Нусхангни кўрсатма.*

НУСҚА с. т. Нусха.

НУТРИЯ [исп. nutria] Сувда яшайдиган, қимматбаҳо мўйнаси учун фермаларда боқиб кўпайтириладиган кемирувчи ҳайвон. *Мўйначилик фермаларида яқин-яқингача нутрия боқиш ва уни кўпайтириш яхши йўлга қўйилмаган эди.* Газетадан.

НУТҚ [a. نطق — сўзлаш, нутқ; гапириш қобилияти] **1** Тилнинг фикр ифодалаш ва алмашиш жараёнларида амал қилиши; сўзловчининг тил воситаларидан фойдаланиш жараёни ва шу жараённинг ҳосиласи. *Нутқи ёмон. Боланинг нутқини ўстирмоқ.* ■ *Очилнинг нутқи.. яхши эди.* П. Қодиров, Уч илди.

Нутқ аъзолари Одам организмнинг нутқ товушлари ҳосил бўлишида қатнашадиган турли қисмлари (тил, лаб, тиш, ҳиқилдоқ ва б.). **Нутқ товушлари** Нутқни вужудга келтирувчи, инсон томонидан талаффуз қилинадиган товушлар.

2 Амалдаги, сўзлашув жараёнидаги тил. *Нутқ маданияти. Биз нутқимизда айрим сўзларни ўзаро бириктириб, гап тузамиз.*

3 Тилнинг алоқа-аралашув мақсади ва шароитига қараб лисоний воситалардан мувофиғини танлаб ишлатиш билан фарқланувчи тури, услуб. *Поэтик нутқ. Бадийий нутқ. Оғзаки нутқ.*

4 Жамоат олдидан айтиладиган, ўқиладиган гап, ваъз. *Оташин нутқ. Ҳаяжонли нутқ. Нотиқнинг нутқи. Нутқ сўзламоқ. Нутққа тайёрланмоқ.*

НУФУЗ [a. نفوذ — таъсир; обрў-эйтибор] Обрў-эйтибор; таъсир. *Бек ўз нуфузининг йўқолиб бораётганидан диққати ошиб кетди.* Ш. Тошматов, Эрк қуши. *Бугун Ўзбекис-*

тоннинг жаҳон ҳамжамиятида ўз ўрни ва нуфузи борлигидан фахрлансак арзийди. Газетадан.

НУФУЗЛИ Обрў-эътиборли; таъсирли. Нуфузли кишилар. ■ Шу сабабли бу йил мазкур нуфузли уюшмага Ўзбекистон Марказий давлат депозитарийси аъзо этиб қабул қилинди. Газетадан.

НУФУС [а. نفوس — аҳоли, халқ] айн. аҳоли. Шаҳримиз нуфуси уч миллионга яқинлашди.

НУЧУК с. т. Нечик, қандай. Модомики шундоқ экан, қори шундоқ қилишга нучук журъат қилди? А. Қаҳҳор, Кўшчинор чироқлари.

НУҚРА [а. نقره — кумуш] поэт. айн. кумуш 1.

НУҚС [а. نقص — етишмовчилик; камайиш; нуқсон, камчилик] Нуқсон, камчилик. [Маҳдум:] ..камина ва ожизамизда бир қанча гуноҳлар, нуқслар, узрлар бор, тақсирлар! А. Қодирий, Мехробдан чаён. Домла ҳикоядаги суратларни кўрди. Сўнгга ўрта бир еридан бир-икки жумла ўқиб, тилидан нуқс топди. А. Қаҳҳор, Сароб.

Нуқси урди Таъсири урди, таъсири ўтди. Шербекка меҳнат билан ўтган кунларнинг нуқси урди. Сезиларли озди. Олдин қон томиб турган юзлари қорайиб пишди. С. Анорбоев, Оқсой.

НУҚСОН [а. نقصان — камайиш, озайиш; камчилик, нуқс] 1 Киши номига номуносиб, уни салбий жиҳатдан кўрсатадиган белги; камчилик, иллат, қусур, айб. Унинг бир нуқсони — ёлғончилиги. ■ Қизини еркўкка ишонмаган, унинг бутун нуқсонларини бир фазилат деб билган онаси.. бу қизни катта шавкат ва дабдаба билан узатишни орзу қилар эди. Ойбек, Танланган асарлар.

2 Жисмоний ёки руҳий камчилик, иллат. Унинг бир нуқсони бор: сал оқсаб юради.

3 Сифат жиҳатидан етишмовчилик, камчилик, кам-кўст. Ёғочнинг нуқсонлари. Ишдаги нуқсонлар.

НУҚСОНЛИ Нуқсони, камчилиги, иллати, айби бор; қусурли. Нуқсонли мол. Нуқсонли бола. ■ Нуқсонли деб топган нуқталарни ишловчиларга малол келтирмасдангина танқид қилади. А. Қодирий, Обид кетмон. Сорахон Саидийнинг нуқсонли бўлишидан манфаатдор эмас! А. Қаҳҳор, Сароб.

НУҚТА [а. نقطه — нуқта; пункт, пост; томчи; тиниш белгиси] 1 Макон ёки фазодаги маълум бир ўрин; пункт. Бир нуқтага тикилиб қолмоқ. ■ Ҳар вақтдагидан кўркамоқ, тиниқроқ кўринган тўлин ой самонинг бир нуқтасида қотган каби. Ойбек, Танланган асарлар.

2 Дарак гап ва тинч оҳанг билан айтиладиган ундов гап охирида, шунингдек, шартли қисқартмаларда қўлланадиган тиниш белгиси (.).

Гапга нуқта қўймоқ Гапни тугатмоқ, бораётган баҳс-мунозарани тўхтатмоқ, якунламоқ. **Икки (ёки қўш) нуқта** Уюшиқ бўлақлар умумлаштирувчи сўздан кейин, шунингдек, кўчирма гаплар муаллиф гапидан сўнг келганда қўйиладиган тиниш белгиси (:). **Кўп нуқта** Матнда тушириб қолдирилган парча ўрнига, мазмуни тугамаган гаплар охирига қўйиладиган уч нуқта (...).

3 Нота ёзуви, географик харита, план кабиларда бирор нарсанинг шартли ифодаси бўлган белги(.). **Шаҳарнинг планини келтириб берди ва дорилфунунга борадиган трамвай йўлини қизил сиёҳ билан чизиб, тушиладиган ерларга қизил нуқталар қўйди.** А. Қаҳҳор, Сароб.

4 Маълум бир тармоқли тизимда бирор тармоқ, нарса ўрнашган жой, пункт. **Пулемёт нуқтаси.** Савдо тармоқларининг нуқталари. ■ Артиллерия худди рўпарадан отгандай душман околарини, ўт очиш нуқталарини бирин-кетин тор-мор қилмоқда эди. А. Қаҳҳор, Олтин юлдуз.

5 Математикада, механикада, физикада ўлчови йўқ пункт, ўрин, кесмалар чегараси. **А нуқта билан Б нуқта ораси.** Тўғри чизиқларнинг кесишган нуқтаси.

Таянч нуқтаси физ. Ричаг таянган жой. **Уриниш нуқтаси мат.** Бир чизиқнинг иккинчи чизиққа уриниб ўтган ери.

6 физ. Модданинг бир ҳолатдан иккинчи ҳолатга ўтиш пайти, чегараси (ҳарорат билан боғлиқ). **Қайнаш нуқтаси, Музлаш нуқтаси.** Эриш нуқтаси.

7 Воқеа, ҳодиса, ижтимоий тараққиёт ва ш.к. жарёнларда маълум бир пайт, чегара.

Нуқтаи назар қ. назар.

НУҚТАВОР снт. Нуқталар асосида яратилган нақш.

НУҚТАЛИ Нуқтаси бор.

Нүқтали вергул Қўшма гапларда ёйиқ ва кўпроқ мустақил бўлган бўлақларни ажратишда, шунингдек, гапнинг мураккаб уюшиқ бўлақлари гуруҳланганда қўлланадиган тиниш белгиси (:).

НУҚУЛ [а. نقول — «нақл» с. кўпл.: бир жойдан иккинчи жойга кўчириш; узатиш, ўтказиш; таржима] *рвш.* 1 Турган-битгани, бошдан-оёқ. —*Ҳа, — дейди Холмирза ака, — мана шу хирмонтепанинг тупроғи нуқул гўнг-да.* А. Қодирий, Обид кетмон. *Тепалик нуқул қайинлар билан қопланган эди.* Ойбек, Кўёш қораймас.

2 Ҳеч нарса аралашмаган, соф, тоза. *Безаклар нуқул олтиндан.*

3 *рвш.* Доимий равишда, доимо, ҳадеб, фақат. *Қурбон ота.. ўзи кўрган томошаларни негадир Урмонжон кўрмаган гумон қилиб, нуқул унга табрифлар, қайта-қайта мақтар эди.* А. Қаҳҳор, Қўшчинор чироқлари.

НҲНОҚ Уддабурон эмас; эпсиз, ношуд. *Гапга нўноқ одам. — У гап орасида Ашир маҳрамнинг яхши томонларини табрифлаган бўлиб, лекин “ҳали ҳарбий ишларга нўноқ”, деб қўйди.* Ж. Шарипов, Хоразм.

НҲХАТ [ф. نخود] Бир йиллик дуккакли ўсимлик ва унинг овқатга ишлатиладиган, мошдан каттароқ, юмалоқ сариқ дони. *Қовурилган нўхат. Нўхат шўрва.*

НҲХАТГУЛ Дуккакдошлар оиласига мансуб бир йиллик сертук ўт. *Тоғ ёнбағирлари лолақизғалдоқ, чучмома, нўхатгул билан қопланиб, ўзгача бир чирой бағишлаган эди.* Газетадан.

НҲХАТХҲРАК [нўхат + хўрак] Нўхатдан зираворлар қўшиб тайёрланадиган куюқ таом.

НҲХАТШҲРАК [нўхат + шўрак] Нўхатни гўшт билан қайнатиб, димлаб тайёрланадиган тансиқ овқат.

НҲХАТШҲРАКЧИ Нўхатшўрак пишириш ва сотиш билан шуғулланувчи одам. *Бир*

чеккада оғзи қулоғига етган.. нўхатшўракчилар ёш болаларнинг пулларини алдаб олмоқдалар. М. Муҳаммаджонов, Турмуш уринишлари.

НҲХТА От-уловни боғлаш, етаклаш, ҳайдаш учун бошига солинадиган абзал. *Отнинг юганини бошига солиб, нўхтани хуржунга тиқиб.. отга минди.* С. Айний, Қуллар. *Майна эшакнинг нўхтасидан ушлаганича, нарироқда ерга қараб турарди.* Ш. Тошматов, Эрк куши.

НҲХТАЛАМОҚ 1 Нўхта солмоқ. [Зулфизар] *..қора қашқа отни саралаб олди, эгарлаб, нўхталаб, ишни яхши пухталаб, Истамбул кўчаларини ўрталаб, канизлар олдига етди.* «Зулфизар билан Авазхон».

2 кўчма Ўз эрк-ихтиёрига бўйсундириб олмоқ, ўз измига солиб олмоқ, жиловламоқ. *Синф раҳбари жуда зўр муаллим-ку, наҳотки, улар ҳам асовни нўхталаб оломасалар, а? М. Исмоилий, Бизнинг роман.*

НҲШ I [ф. نوش — ичиш; ширин ичимлик]: **нўш айламоқ** (ёки **этмоқ**) *эск. кт. айн. ичмоқ.*

НҲШ II: **нўш пиёз** Кузда тиқма қилиб экилган пиёз.

НҲҚИМОҚ *шв.* Туртмоқ, ниқтамоқ. —*Мингбоши! — деди у [ҳоким], қўлидаги ўрма қамчисининг юлғун сопи билан додхоҳ қорнини нўқиб. — Бўлисингда ишга чиқмайдиган биттаям одам бўлмаслиги керак!* М. Исмоилий, Фарғона т. о.

НҲҒАЙ қ. нўғайлар. *Нўғай тили. Нўғай аёл.*

Нўғай дўппи Тепаси ясси чамбар дўппи. **Нўғай чой** с. т. Оқ чой, сутли чой. **Нўғай қошиқ** с. т. Гулли заранг (ёғоч) қошиқ.

НҲҒАЙЛАР I с. т. *эск.* Татарлар.

2 Россия Федерациясининг Ставрополь ўлкаси, Доғистон, Чеченистон, Ингушистон республикаларида яшовчи, туркий тиллардан бирида сўзлашувчи халқ.



О (чўзиқ) унд. с. 1 Завқланганликни ёки мамнунликни билдиради. *О, қандай гўзал манзара! ■ Ойни чўмилтирган тинч тунларингни Тушимда кўрганда не қиларман, о?* У. Носир.

2 Ҳайратни, ажабланишни ифодалайди. *О, у юрак, о, у тилла бош, Ёлим учун чиққанми эдинг?* У. Носир.

3 Мурожаатда фикрни қувватлаш, кучайтириш учун қўлланади. *О, қандай бефаросатсиз, дуддан бу уйларда туриб бўлмайдикун!* С. Нуоров, Нарвон.

4 Сўзнинг охирида келиб, хитоб, нидон англатади. *Собир-о! Собир!*

ОБ [ф. *أب* – сув] **1** Сув. *Бўлса – оби, бўлмаса – ёби.* Мақол.

Об бўлмоқ Сувда ёки ёмғирда ивиб, шалаббо бўлиб кетмоқ.

2 Форс тилидан изофа шаклида бир бутун сўз тарзида ўзлашган бирикмалар, шунингдек, тенг боғловчилари ёки боғловчисиз жуфт сўзлар таркибида келиб, уларнинг сувга, намлик ва захга алоқадорлигини билдиради (Имлода изофали бирикмалар яхлит сўз сифатида қўшиб, жуфт сўзлар чизиқча билан ёзилади). Мас., *обидийда* – кўз ёши, *об-ҳаво* ёки *обу ҳаво* каби. *Шийтонни айланаб кўриб, Зумраднинг кўнгли синди: ҳамон ўша байроқ, ўша гўшти-сиз об-ёвғон, кўша қора қумғон, тол тагига осилган қадимий беланчақлар..* С. Сиёев. *Жуда обу тобида, мазали пишган ҳолва, мураббо ёки овқатни ҳам халқимиз «қийём бўлиб кетибди», дейди.* Н. Аминов.

3 махс. Ойнанинг (кўзгунинг) орқасига берилган сир, амальгама.

Об бермоқ Сирламоқ, жило бермоқ, амальгама суртмоқ.

ОБАКИ I [ф. *آبکی* – сувли, суюқ; серсув, ширали] Оқ чиллакига ўхшаш, ўртапишар маҳаллий узум нави. *Обаки Тошкент, Сирдарё, Наманган вилоятларида кўп экилади.* Газетадан.

ОБАКИ II [ф. *آبکی*] айн. **обакиданон.** *Сесканиб тушган Салтанат, обаки шимиб лаззатланаётган ёш боладай, қалампирни шимарди.* Р. Файзий, Ҳазрати инсон.

ОБАКИДАНДОН [ф. *آبکی* – суюқ, сувли + *دندان* – тиш] Шакар қийемидан тайёрланган ширинлик тури. *Пенсияга борса, бир қарич келадиган қизил обакиданон, бир дўпни олиб келади. Ойхонга ҳам эрмак топилди, уларнинг қилиқларига қараб, қаҳ-қаҳ уриб кулгани-кулган.* А. Мухтор, Опа-сингиллар.

ОББА унд. с. 1 Ҳайрат, таажжуб билдиради. *-Обба, бобожон-эй, – дейман қувончдан энтикиб, – зап қутулиб кепсиз-да?* Х. Тўхтабоев, Ширин қовунлар мамлакатаи.

2 Ачиниш, нафратни билдиради. *-Обба, – дея кўнглидан ўтказди Қорабоев. – Туфламасдан артса ҳам гўрга эди.* С. Аҳмад, Асарлар. *-Обба иблис-эй, – деди устозим уф тортиб, – обба лаънати-ей, бу кеча яна ухламабди.* Х. Тўхтабоев, Ширин қовунлар мамлакатаи.

3 Зорланиш, норозиликни ифодалайди. *Обба.. Жайнақбой, бизнинг кампирнинг тоби қочибди.* Н. Сафаров, Уйғониш.

ОББО I айн. **обба.**

2 (охирги о – чўзиқ) бол. Болани ухлатиш алласи. *Оббо қилсин, алла-яй, ухлаб берсин, алла-яй!* «Бойчечак».

Оббо айтмоқ Болани алла айтиб ухлатмоқ. **Оббо қил** Ухла.

ОББОЛАМОҚ Болани оббо айтиб, алла-лаб ухлатмоқ. *Аёл боласини обболамоқда.*

ОББОҲОЛАМ *крш. с., с.т.* Балки, эҳтимол, бўлса, ажаб эмас. *Оббоҳолам, бугун жума бўлса керак. ■ Отанинг жавобларидан терговчи норози эди: -Оёғида нима эди? -Оббоҳолам, ботинка. Шухрат, Олтин зангламас.*

ОБГАРДОН [ф. آبگردان — сувни шопириш, айлантириш: чўмич, ёғлоғи; ковш] Ошпазларнинг узун дастали, катта, ичи чуқур чўмичи. *Шу вақтда обгардон, капгир кўтариб, бир ошпаз келиб қолди. «Орзигул».*

ОБДАН *рвш. 1* Роса; *хўп. Овқатни хўп чайнаган яхши, гапни обдан ўйлаган яхши.* Мақол. *■ Агар бошқа йигит бўлганида, шу тунда ё обдан калтак ерди, ё қуён бўлиб қочарди — Ҳафизани шарманда қиларди.. Мирмуҳсин, Умид.*

2 Жуда, жуда ҳам. *Шаҳарда бир маҳаллада бўлганимиз учун обдан яхши биламан.* Ойбек, Танланган асарлар. *Балиқни димламоқчи бўлсангиз, обдан қиздирилган духовқада димланг. «Саодат».*

3 Батамом, бутунлай; мукамал суратда. *Кенжа бригадаси янги ерга обдан ўрнашиб олгунча, колхоздан кўпчилик ҳашарга бориб турди.* Ҳ. Назир, Маёқ сари. *Стол турли нознеъматлар билан обдан ясатилган.* М. Жабборов, Севинч ёшлари.

ОБДАСТА [ф. آبداسته — қўл (ювиладиган) сув] Рўзғор буюми; юз-қўл ювиш учун ишлатиладиган узун ва ингичка жўмракли, қорни кенг, бўғзи тор идиш. *Соғол обдаста. Чўян обдаста. ■ Ҳафиза обдаста билан дастшўй олиб кириб, бувисининг қўлини атирсовун билан ювдирди.* Мирмуҳсин, Умид.

Обдаста самовар Обдаста шаклидаги маҳаллий самовар. **Обдаста тутмоқ** Обдастан сув қўйиб туриб, қўлини ювдирмоқ. **Пучуқ обдаста** Ўзига алоқаси йўқ ёки ақли етмайдиган гап-сўзга, ишга аралаша берадиган кишига қарата, уни камситиб, танбеҳ юзасидан айтиладиган ибора. *Сен пучуқ обдаста ўлгурга ким қўйибди бировларнинг ишига аралашини?* С. Аҳмад, Чўл шамоллари.

ОБДАСТАГАРДОН [ф. آبداسته گردان — обдаста айлантириш] *этно.* Йўқолган ёки ўғирланган нарса ўғрисини «топиш» усули

(бунда ичига сув солинган обдастани бўғзидан ип боғлаб, бармоққа осиб айлантирилади, дуолар ўқилади, обдаста айланнишдан тўхтаганда, унинг жўмраги даврада ўтирган гумондорлардан қайси бирининг қаршисида тўхтаса, ўша киши «ўғри» саналади). *Кампир «дуонинг зўри билан қулф очадиган» азайимхонга обдастагардон қилдиргани қатнаб, ярим қоп жийда, уч елпиш-товоқ жўхори, икки калава ип элтди, аммо иш чиқмади.* А. Қаҳҳор, Ўғри.

ОБДИРАМОҚ Ўзини йўқотмоқ, гангимок, довдирамоқ. *-Нега обдираб қолдиларинг? Отинглар, босинглар бу уйинг куйгурни! — деб бақирди.* С. Айний, Қуллар. *Тўхтаб туриб яна тупроқни ташлаб, бир тарафга қочиб, чўчиб, яқосини ушлаб, лаҳадга қараб, обдираб.. ҳой, ҳой, ҳой, бай, бай — деди.* Ҳамза, Танланган асарлар.

ОБДИШ *шв. 1* Чойдиш, човгун. *Чол бесаранжом кириб келибоқ, дарров обдишга қўл урди.* А. Мухтор, Опа-сингиллар.

2 Қайнаган сув. *Чойдишда обдиш қолган бўлса, сув солмай туринг.*

ОБДОВ *с.т.* Томдан ёғин суви тез оқиб тушиб кетиши учун том сатҳида қилинадиган қиялик; нишаб.

Обдовини олмоқ Нишабини тўғриламоқ. *Томнинг обдовини қаёққа олмоқчисиз?*

ОБДОР [ф. ابدار — сувли, суви кўп; жило берилган] *эск. кт. 1* Тиниқ, шаффоф, ялтиратилган (қимматбаҳо тошлар ҳақида).

2 *кўчма* Оқ юзли, гўзал. *Хайри Бердибой каби йигитларнинг юрагини ўйнатарлик даражада обдор.* А. Қодирий, Обид кетмон.

3 *фольк.* Сув берилган, яхши тобланган, ўткир (қилич, пичоқ ва ш.к. ҳақида). *Қосимхон шоҳнинг аччиғи келиб, ҳар туки обдордай бўлиб, қизига бир сўз деди. «Зулфизар билан Авазхон». Ҳар бир туким бир ханжари обдор бўлди.* А. Қодирий, Кичик асарлар.

4 Учига заҳар суртилган. *Обдор ўқ.*

ОБДОРЛИК Сувчилик, сув тутишлик. *Ернинг бошига етганда, ота гапирди: -Сизлар сувни шу ергача етказиб берсаларингиз бўлгани, обдорликни фақат ўзим қиламан.* Ҳ. Олимжон, Танланган асарлар.

ОБЕД [р. обед — «обедать» (тушлик овқат емоқ)] *фл. дан* < еда — овқат] *с.т. 1* Тушки овқат. *-Ҳой, нима бало бўлди? — деб аланглади Иноят оқсоқол. Бир шўхроқ йигит унга*

жавоб қилди: -Оқсоқол ота, эшагингиз сизни обедга чақиряпти. С. Аҳмад, Уфқ.

Обед қилмоқ Тушки овқатни емоқ, тушда овқатланмоқ.

2 Тушки овқат вақти. *Обедда бир келиб кетинг.*

ОБДУЗДЛИК [ф. *об* – сув + *دزد* – ўғри > *أب دزد* – ер остидаги сув ўтадиган ёки йўқолиб кетадиган тешик, йўл] Суғориш тармоқларидан сувни навбатдан ташқари яширинча боғлаб олиш. *Бухоро воҳасида июль ойининг охири ва августнинг бошида сувга бўлган талаб ниҳоятда авж олиб, обдуздлиқ кучайган.* А. Муҳаммаджонов, Куйи Зарафшон водийсининг суғорилиш тарихи.

ОБЕЛИСК [фр. *obelisque* < юн. *obeliskos*, *obelos* – қилич, шамшир] Юқорига томон ингичкалашиб борадиган тош устун шаклидаги ёдгорлик. *...жангчилар хотирасини абадийлаштириш, ёдгорликлар, обелисклар, хотира лавҳалари қуриш ва буларни сақлаб қолиш учун улар кўп иш қилмоқдалар.* Газетадан.

ОБЕРМОҚ с. т. айн. Олиб бермоқ. *Ароқни камайтиринг, пулига қўшнилардан қатиқ обериб турай десам, айюҳаннос тортворди.* А. Обиджон, Аканг қарағай Гулмат.

ОБЕРТОН [нем. *Obertöne* < нем. *ober* – катта, юқори + юн. *tonos* – кучланиш, ургу] **1** мус. Асосий товуш (тон) билан бирга пайдо бўладиган ва унга бошқача тус берадиган товуш.

ОБЖУВОЗ [ф. *об* – сув + *جواز* – ёғоч ёки тош ўғир] **1** Сув кучи билан юрадиган, шоли оқлайдиган қурилма. *Саломни этакдаги обжувоздан шоли обкетаётган кишилар кўрибди.* Ш. Холмирзаев, Оғир тош кўчса. *Шербек ўз овозидан ўзи кўрқиб кетди: юраги обжувоздек гурс-гурс урарди.* С. Анорбоев, Оқсой.

2 Шундай қурилма ўрнатилган хона; обжувозхона.

Қошини обжувоз қилмоқ Икки қошни галма-гал учирмоқ. *Домла.. қошларини обжувоз қилиб, Элмуродга тикилди.* П. Турсун, Ўқитувчи.

ОБЖУВОЗХОНА Обжувоз ўрнатилган хона; обжувоз.

ОБЖУВОЗЧИ **1** Обжувозда ишловчи, обжувозда шоли оқловчи одам. *Улар Хўжамозорда эскидан таниш бўлган обжувозчи чолнинг уйига қўнишди.* «Ёшлик».

2 Обжувоз эгаси, хўжайини.

ОБЖЎШ, обижуш [ф. *آب جوش* – қайнаган, қайноқ сув] *шв.* **1** Чой дамлаш учун қайнатилган сув. *Шу чойнинг устига обжуш солиб қўя қол.*

2 Ҳайвон ва ўсимлик ёғларини аралаштириб доғ қилинган ёғ.

ОБЗОР [р. *обзор* < обозреть – «қўз ташламоқ, кўриб чиқмоқ; текширмоқ, таҳлил қилмоқ» фл. дан] Ўзаро боғланган масалаларга доир маълумотларни хулосалаб, қисқача қилиб берилган оғзаки ёки ёзма ахборот. *Матбуот обзори. Халқаро обзор. Обзор қилмоқ.*

ОБЗОРЧИ Газета, журнал, радио ва ш.к. га обзор мақолалар бериб турувчи мухбир. *«Халқ сўзи» газетасининг обзорчиси. Радио обзорчиси.*

ОБИ **I** [ф. *آب* – сув] Форсча изофалар таркибида келиб, шу сўз (сўз бирикмаси)нинг сувга алоқадорлигини билдиради, мас., *обидийда, обирахмат.*

ОБИ **II** [ф. *آبی* – сувли; ҳўл, нам; осмонранг] Тайёр ноннинг сарф қилинган унга нисбатан ошган оғирлиги.

ОБИД [а. *عابد* – сажда қилувчи, сиғинувчи; ихлосманд; руҳоний] **1** *эск. кт.* Тоатибодатни қанда қилмайдиган, художўй, тақводор эркак.

2 Обид (эркаклар исми).

ОБИДА **I** [а. *عابده*] **1** *эск. кт.* Тоатибодатни қанда қилмайдиган, художўй, тақводор аёл.

2 Обида (хотин-қизлар исми).

ОБИДА **II** *кт.* **1** Қабр устига ўрнатилган ёдгорлик. *Украинанинг бу қишлоғида ватандошларимиз хотирасини абадийлаштириш учун рамзий қабр устига обида ўрнатилган.* Газетадан.

2 Археологик ёдгорлик, узоқ ўтмишдан қолган моддий ёдгорлик. *Ўрта Осиё наққошлари қолдирган ва ҳозир давлат муҳофаза қилаётган обидаларда асрлар ёдгорлигининг изи бор.* «Гулистон». *Ёдгор Чаросга ғолибона қараб қўйди: -Эсингиздами, янги йил куни қадимий обидаларни замонавий қурилишларга қандай татбиқ этса бўлади, деган эдингиз.* Ў. Ҳошимов. *Қалбингга қулоқ сол. Зеро, бу обидаларни топшиш ва ўрганиш туфайли ўзбек халқининг ибтидоий давр тарихи.. [халқнинг] урф-одати ва эътиқодига оид янги маълумотлар билан бойитилди.* Газетадан.

ОБИДИЙДА [ф. *آبديده* — кўз ёши, ашк] Кўз ёши, ёш. *Элчиев бир лаҳза юзини деворга бурди, вужуд-вужудини жимирлатиб келган обидийдани ютишга уринди, ютди.* «Ёшлик».

Обидийда қилмоқ Йиғламоқ. *Оғзингдаги ошни олдириб қўйиб, обидийда қиласан-а! Отингни эртароқ қамчиласанг, ўларминдиг!* С. Аҳмад, Уфқ.

ОБИЁВҒОН Жазсиз, ёғсиз суyoқ ош; умуман фақирона овқат. *Бобомнинг кампири Башорат хола хурмачага обиёвғон қуйиб берди.* С. Сиёев, Ёруғлик.

ОБИЗАМЗАМ [ф. + а. *آب زمزم* — Замзам суви] *дин.* Маккадаги Замзам булоғининг табаррук суви; умуман, табаррук, муқаддас саналадиган сув.

2 кўчма Май, спиртгли ичимлик. *Муш-дай-мушдай гўшларни тўғраб, ош устига босаётган ишчининг оғзида сўлаги тўп-ланди. Қилт ютинди: -Бундай ошни «обизамзам»сиз ейиш гуноҳи азим бўлади-я!* С. Нуров, Нарвон.

ОБИНОВВОТ [ф. *آب نبات* — новвот суви, шира] **1** Ўрикнинг жуда ширин бир тури.

2 Пўсти сариқ-ола, сергўшт ширин қовун; чўгири. *Дарвозага яқинлашиб қолишган пайтда димоққа обиноввот қовуннинг иси урилди.* А. Обиджон, Аканг қарагай Гулмат.

ОБИНОН [ф. *آبى نون*] Оширма хамирдан ёпилган юпқа нон (кўпинча бозор учун ва тўй-ҳашамда тайёрланади). *Зиёфат дастурхони чинакам бойвачча номига яраша эди. Дастурхон чеккаларига седанали обинон, мушдай қип-қизил гижда нон, ёғлик патир, жиззалик нон, қатламалар қўйилган.* «Ёшлик».

ОБИРАВОН I [ф. *آبروان* — оқаётган, оқар сув] **1** Оқар сув. *Боғлар хароб бўлар боғбон бўлмаса. Дарёларда обиравон бўлмаса.* «Рустамхон».

2 кўчма Сувдай сероб нарса, мўл-кўлчилик. *Бу ер тўйхона, майхона, обиравон жой.* Т. Обидов, Юсуфжон қизиқ.

ОБИРАВОН II [ф. *آبروان*] Бир турли гулдор, юпқа газлама. *Шундай совуқ бўлишига қарамай, Тўхтагон эски обиравон кўйлақда, унинг ҳам бир енги йўқ.* С. Зуннунова, Олов.

ОБИРАҲМАТ [ф. + а. *آبرحمت* — хайр-барака суви; баҳор ёмғири] Раҳмат ёғдирувчи сув (ёмғир, қор суви ҳақида). *Болам, Оллоҳдан обираҳматини сўра, лалми бугдўй ўшанга вобаста.* «Ёшлик».

ОБИҲАЁТ [ф. + а. *آب حيات* — ҳаёт, тириклик суви] **1** *миф.* Ҳаёт суви (афсонавий чашма суви; уни ичган кимса гўё абадий яшар эмиш).

2 кўчма Ҳаёт бағишловчи сув. *Зўр дарёдан канал, ариқ ва эгатлар орқали ғўзаларга обиҳаёт олиб борилгани каби, тарих дарёсидан ҳар бир бўлажак эшитувчисининг онига оловли ҳақиқат олиб бормоқчи эди.* П. Қодиров, Уч илдиз.

ОБКАНД [ф. *آب كند* — сел ўтадиган жой, йўл; сув ювиб, ўйиб кетган жой] *тар.* Қадимда ва ўрта асрларда шаҳарни сув билан таъминлаш мақсадида қазилган суғориш тармоғи, сув йўли. «Обканд» шаҳар суви, шаҳар ариғи маъноларини англатиб, шаҳар суғориш тармоғидир. «ЎЗМЭ».

ОБКАШ [ф. *آب كاش* — сув тортувчи, ташувчи] Икки учигаги илмоғига челақ осиб, елкада сув ва б. нарсалар ташиш учун мосланган ёғоч асбоб. *Бир обкаш сув. Обкаш билан сув ташимоқ.* ■ *Дарсдан кейин Омон уни кўпинча елкасида обкаш — сувга кетаётганда учратади.* Х. Султонов, Бир оқшом эртаги.

Бошимни баркаш, елкамни обкаш қилиб Белни букиб, қаттиқ меҳнат, машаққат тортиб. [Қизим Райҳонни] *Ахир не-не кўре-ликлар билан, бошимни баркаш, елкамни обкаш қилиб, вояга етказдим.* С. Сиёев, Райҳон. **Обкаш бўлиб кетмоқ** с. т. Эгилиб, букилиб кетмоқ. *Белим обкаш бўлиб кетди.*

ОБКМ [р. «областной комитет» бирикмасининг қисқартмаси] эск. Баъзи ижтимоий ташкилотларнинг сайлаб қўйиладиган область раҳбар органи ва унинг биноси. *Обком секретари.* ■ *Ҳаққулов обкомдан топиширқ олгандан буён ўз кучига ишонган, ишга боши билан шўнғиб кетган, кўриниши, кайфияти ҳали тетик эди.* С. Нуров, Майсаларни аёз урмайди.

ОБЛАСТЛАРАРО Бир неча область учун умумий бўлган, бир неча областга барабар хизмат қиладиган, бир неча область ўртасида бўладиган. *Областлараро электр станцияси. Қишлоқ хўжалик ходимларининг областлараро кенгаши.*

ОБЛАСТЬ [қад. р. об + волюсть — худуд, давлат] қ. **вилоят** **4.** Бир неча районни ўз ичига олган йирик маъмурий-худудий бирик. Самарқанд области. Тошкент области. Область ижроия комитети. ■ *Унинг отаси*

колхозда боғбон, онаси бўлса областда машхур сут соғувчилардан эди. С. Зуннунова, Кўк чироқлар.

2 с.т. Шундай маъмурий-территориал бўлинма маркази. Бугун областдан улуглар келишармиши? С. Аҳмад, Уфқ.

ОБЛИГАЦИЯ [лот. obligatio — мажбурият] Ютуқ ёки маълум фоиз тарзида даромад келтирувчи қимматбаҳо қоғозларнинг бир тури. *Облигациянинг бозор нархи унинг номиналидан юқори ёки паст бўлади.* «ЎзМЭ».

ОБЛО с.т. Оллоҳ. *Банданинг боши — облонинг тоши.* Мақол. ■ *Зиёда бибининг неки тилаги бўлса, облонинг ўзи мушарраф қилсин!* Х. Тўхтабоев, Йиллар ва йўллар.

ОБМОТКА [р. обмотка — болдирга ўраладиган пайтава < обмотать — ўрамоқ, ўраб боғламоқ] Тўпикдан тизагача шимнинг почаси устидан ўраладиган пайтава. *Элмурод шошганидан бир оёғига шим почасини киймай, обмотка ўраб қўйди.* Шухрат, Шинелли йиллар.

ОБНУС [а. أبнос < юн. ebenos — қора дарахт] Тропик мамлакатларда ўсадиган, ёғочи қаттиқ ва оғир қорамтир ёки қора дарахт.

ОБОД [ф. آباد — одам яшайдиган; ишлов берилган; гуллаб-яшнаётган] **1** Кўркам бинолар, чиройли кўчалар, боғу роғлар билан гўзаллик касб этган, гуллаб-яшнаган. *Обод шаҳар.* ■ *Ватанни обод қилиш фидокорликдир.* Газетадан. *Бақақуруллоқ сердарахтлиги, майдондаги бир-иккита оқ уйлари билан Кўғазордан хийла обод кўринар эди.* А. Қаҳҳор, Кўшчинор чироқлари.

2 Яхши қаров, парвариш билан етиштирилган. *Обод боғ.* ■ *Ҳирот музофотида Хурруд бўйида бир оила томонидан каттагина бир боғ обод қилинган эди.* С. Айний, Қуллар. *Яхши ишласак, ўз турмушимиз фаровон, юрт обод бўлади.* Ойбек, О.в. шабадалар.

3 Халқ кўп йиғиладиган, гавжум ва серфайз. *Обод парк.* ■ *Қишлоқнинг бу овлоқ жойи мактаб қурилиши бошланганидан буён обод бир сайилгоҳ бўлиб қолди.* П. Турсун, Ўқитувчи. *Қиш кечалари жуда узун, шунинг учун чойхоналар обод.* А. Қодирий, Ўтган кунлар.

4 Хурсанд, шод. *Кимдир тама билан дунё кезади, Кимдир ўксик дилни этади обод.* А. Орипов, Йиллар армони.

5 Баъзи отларга ёки айрим сифатларга қўшилиб, шаҳар, қишлоқ ва ш.к. номини ясайди, мас., *Нуробод, Ишқобод, Бекобод, Янгиобод.* ■ *Улар Қурбақаобод мавзеига етиб, одамлардан Норматхўжанинг боғини суриштирди.* Ойбек, Танланган асарлар.

ОБОДЛАШМОҚ Тобора обод бўлиб бормоқ. *Ободлашган шаҳар.* *Қишлоғимиз ободлашиб қолди.*

ОБОДОН [ф. آبادان] айн. **обод.** *Юртимиз тинч, ободон, тўйинчилик.* *Қурдош гурунгида биз ҳам соҳибнафасмиз.* Ф. Фулом, Танланган асарлар.

ОБОДОНЛАШТИРИШ Кўркамлаштириш; обод қилиш, чиройли тусга киритиш. *Баҳорнинг айна шу ғанимат кунларида ҳамшаҳарларимиз ҳовли-жойларни, боғ-томорқаларни, кўча ва хиёбонларни саранжом-саришта этиб, кўкаламзорлаштириш ва ободонлаштириш ишларини қизитиб юборишди.* Газетадан.

ОБОДОНЛИК 1 Обод эканлик, кўркамлик.

2 Обод жойлар, қурилишлар. *Тоғу тош, саҳрою чўллари гулистон айлабон, Шаҳарлар, ободонликлар, хушҳаво қилди қалам.* Ҳамза.

3 Обод этиш, қурилиш ишлари. *Ободонлик ишлари.*

ОБОДОНЧИЛИК айн. **ободонлик 3.** «Тинчлик» маҳалласининг аҳолиси шаҳримиз ободончилиги йўлида қилинаётган хайрли ва эзеу ишларга ўз ҳиссасини қўшади. Газетадан.

ОБОЗ [р. обоз — аравалардан қилинган тўсиқ, ғов; от-арава, машина ва ш.к. карвони] Ҳарбий қисмларнинг транспорт воситалари мажмуи. *Полк обози.*

ОБОЙМА [р. обойма — ўқ жойланадиган рамка, ҳалқа] **1** ҳарб. Автомат ёки тўппончанинги ўқ жойланадиган ва магазин коробкасига суқиб қўйиладиган рамкаси. *Обоймага ўқ жойламоқ.*

2 тех. Машина деталларининг маҳкам ушлаб, тутиб турувчи гардиш қисми. *Подшипник обоймаси.*

ОБОРМОҚ с.т. Олиб бормоқ. *Бор, қозонни юв! Бирон иссиқ овқат қилайлик, аянга оборамиз.* С. Аҳмад, Уфқ.

ОБОРОТ [р. оборот — айланиш, айлантириш; буриш] **1** Пулнинг айланиши, муомалада бўлиши. *Капитал обороти.* *Оборотдаги пуллар.* ■ *Халқ хўжалигининг транс-*

порт, алоқа, капитал қурилиш, товар обороти, фан, маданият ва бошқа тармоқлари ҳам илдам ривожланмоқда. «Фан ва турмуш». Бу одам асли паландаралик бўлади. Кредит техникумида ўқиб юрганымда, бизга пул оборотидан банкда практика олиб борарди. С. Аҳмад, Жимжитлик.

2 Шундай муомалада айланган ёки тўп-ланган пул. Корхонанинг йиллик обороти. Маблаг обороти.

3 тш. Бир синтактик бутунликни ташкил этган сўзлар гуруҳи, гап қурилиши. Сифатдош оборот. Равишдош оборот.

ОБ-ОТАШ, обу оташ [ф. آب – сув + آتش – олов] Овқат пишириш ва умуман бирор нарса тайёрлашда сув ва ўтдан фойдаланиш қойдаси. Ошнинг об-оташини яхши билиш қерак. ■ Пахта иши ҳам обу оташдай гап. Йилнинг қандай келишига боғлиқ. Н. Сафаров, Катта карвон йўлда.

ОБОШ бол. Тамом, одош. Обош бўлди.

ОБОҒА эск. айн. аваға. Обрўли обоғалари.. ҳам бирин-сирин мавқеларини йўқотдилар. Ойбек, Навоий.

ОБПАРТОВ [ф. آب پرتاو – сувни чиқариб юбориш; чиқариб юборилган сув] Сув ҳавзалари ва гидротехник иншоотларда партов сувни чиқариб юбориш учун қурилган махсус иншоот; оқова. Обпартов ва пастдаги ташлама ариқда гуркираб қамиш ўсган, унинг майин укпари шамолда инакдай товланиб ҳилпирарди. С. Нуров, Нарвон.

ОБРАЗ [р. образ – юз, ёноқ; тасвир, тим-сол; икона] **1** Бадиий асарларда яратилган тип, характер. Ойбек ўзининг «Навоий», «Қутлуғ қон» романларида не-не уста фирибгар, маккорлар образини яратган. Шукрулло, Сайланма. Саҳнада Зебинисо образи Гулбахор талқинида янада ўзгача жонланганини кўрдим. «Саодат».

2 Санъатнинг ўзига хос бир категорияси: санъаткорнинг воқелик ҳақидаги тасаввурининг аниқ ҳис этиладиган бир тарзда гавдаланиши. Бадиий образ. Шоир образлар орқали тафаккур этади. ■ Ботир ака шеър ўқиганда, образга кириб кетарди. «Ёшлик».

3 Маълум нарса ёки ҳолатнинг ифодаси. Тазод талабига кўра, бир-бирига қарама-қарши тушунча ёки образ бир-бирини рад этиши лозим. «ЎТА».

ОБРАЗЛИ **1** Образлар орқали тасаввур этиладиган ёки тасаввур этилган. Образли тасвир. Образли асар.

2 Ёрқин, жонли, ифодали, тасвирли. Образли ибора. Образли қилиб гапирмоқ. Мақол фикрни ихчам, лўнда, образли қилиб берганлиги сабабли узоқ ёдда сақланади.

ОБРАЗЛИЛИК Ифодалилик, таъсирчанлик; муайян образга асосланиш. Ҳикоянинг образлилиги. ■ Образлилик – бутун санъатнинг хусусиятидир. «Адабиёт назарияси».

ОБРАҲА [ф. آبراه < آبراهه – сув йўли] Сув йўли, ариқ (қўшнининг ери, ҳовлижойи орқали ўтказилган ариқ). Бизнинг экинларга обраҳа Мамасоли аканинг чорбоғи орқали ўтарди. «Ёшлик».

ОБРЕЗ [ф. آب – сув + ريز – қуйилувчи, тўкилувчи: обтова, обдаста; ҳожатхона] Уйнинг пойгагида ёки даҳлизда ювиниш, юзқўл ювиш учун махсус ясалган, усти берк ўра; ҳаник. Узун, пахтали камзул кийган яланг оёқ аёл рўмоли билан юз-кўзини беркитиб, обрез ёнида дилдираб турарди. Н. Сафаров, Оловли излар. Бу ҳужрада обрез – сув тўкадиган жой бўлмаганидан, қўл-юзимизни ҳам кўчага чиқиб ювардик. С. Айний, Эслаликлар.

ОБРОГАЦИЯ (лот. obrogatio – мавжуд қонунни янгиси билан бекор қилиш) Қонунни ўзгартириш ва қўшимчалар киритиш йўли билан янгилаш. Қонун оброгацияси.

ОБРУЎ(Й) [ф. آبروي – шон, шараф орномус, қадр-қиммат; ифтихор] **1** Кишининг тутган иши ва яхши хислатлари туфайли жамоатчилик қошида топган эътибори; хурмат, нуфуз. Директоримизнинг обрўйи баланд. Обрўйини кўтармоқ (оширмоқ). Обрў(ни) сақламоқ. ■ [Ўзбек ойим:] Ахир, менинг ҳам ўзимга яраша обрўйим бор: Тошкентда кимсан – Юсуфбек ҳожининг кўчман. А. Қодирий, Ўтган кунлар.

Обрў кўрмоқ Жамоатчилик ўртасида эътибор, хурмат қозонмоқ. Шундай обрў кўрган бир киши келиб-келиб, наҳотки ўз қудасидан ва келинидан мунчалик обрўсизлик кўрса! А. Қодирий, Ўтган кунлар. **Обрў олмоқ** Ҳеч нарсаи йўқлигига қарамай, бор имкониятдан фойдаланмоқ, меҳмондўстликни жойига келтирмоқ (сир бой бермаслик учун). **Обрў орттирмоқ айн. обрў кўрмоқ. Обрўйи бир (ёки уч) пул бўлди айн. обрўйи кетди. Обрўйи кетди (ёки тушди, тўкилди)** Обрўсизланди, хурмат-эътибори кетди. Шавла кетса-кетсин, обрў кетмасин! Мақол. **Обрўйини кетказмоқ (ёки**

тўқмоқ, туширмоқ) Эътиборини, ҳурматини йўқ қилмоқ, беобрў қилмоқ. *Шоқосимнинг муштуми йўғон, урушқоқ, обрўси тўкилишидан кўрқмайдиган, безбетроқ йигит эканини ҳам биларди.* Мирмуҳсин, Умид.

2 Шундай ҳурмат соҳиби. Унинг [меҳмоннинг] ёнида ётган катта бир қора муқовали дафтар бу киши шубҳасиз Қамиш-капанинг обрўларидан эканига далолат бериб турарди. П. Турсун, Ўқитувчи.

3 Шараф, ифтихор; фахр; шўҳрат, нуфуз. Раис бўлар колхозчининг каттаси. Обрў бўлар ерга эккан пахтаси. Фозил шоир. Тошкент — ўзбекнинг санъати, товуши, Кувноқ музикаси, куйи, обрўи. Ф. Фулом.

ОБРЎДОР айн. **обрў(й)ли** Қишлоқ обрўдорларининг маълумотлари бўйича оқсоқолнинг қотили деб Бердибой кўрсатилди. А. Қодирий, Кичик асарлар.

ОБРЎ(Й)ЛИ Обрўга эга бўлган; эътиборли, нуфузли. Обрўли одам. Обрўли раис. ■ *Ажаб эмас, бахти очилиб, Гулнор ҳам яхши, обрўли жойларга келин бўлса.* Ойбек, Танланган асарлар. *Ҳайдарбой қишлоқ обрўлларининг олдига чой билан пиёла келтириб қўйди ва қўлини кўкрагига қўйиб, мулозамат қилди.* П. Турсун, Ўқитувчи.

ОБРЎ(Й)СИЗ Обрўйи йўқ; эътиборсиз, нуфузсиз. Обрўсиз одам.

ОБРЎ(Й)СИЗЛАНМОҚ Обрўйи кетиб, ҳурмат-эътибордан қолмоқ, нуфузини йўқотмоқ.

ОБРЎ(Й)СИЗЛАНТИРМОҚ Обрўйсиз қилмоқ, обрўйига путур етказмоқ. *Бўтани обрўсизлантириб, аёлларни колхоздан бездириши кимга зарур экан?* С. Аҳмад, Ҳукм.

ОБРЎ-ЭЪТИБОРЛИ айн. **обрў(й)ли** Избоскан райиэрокомининг раиси Бузрук Усмонхўжаев ҳамма ерда ҳозир-нозир, обрў-эътиборли одам. С. Аҳмад, Уфқ.

ОБСЕРВАТОРИЯ [лот. observare — кузатмоқ; муҳофаза қилмоқ] **1** Махсус асбоблар ёрдами билан осмон жисмларини ва метеорологик ҳодисаларни кузатиш билан шуғулланувчи илмий муассаса; расадхона. *Обсерватория ходими. Обсерватория кузатишлари.*

2 Шундай муассаса жойлашган бино ва иншоот. *Обсерватория қурилиши учун жой танлаш мақсадида Крым, Кавказ, Урта Осиё ва ҳатто Шарқий Сибирь, Узоқ Шарққа ҳам жами 16 та экспедиция юборилди.* «Фан ва турмуш».

ОБСЕРВАЦИЯ [лот. observatio — кузатиш, назорат; гамхўрлик қилиш] Касаллар билан мулоқотда бўлган соғлом одамларни алоҳида ажратиб, тиббий кузатувдан, кўриқдан ўтказиш. *Обсервация мuddати обсервация қилиш буюрилган касаллик яширин даврининг энг узоқ мuddатига боғлиқ.* «Фан ва турмуш».

ОБСИДИАН [лот. Obsidianus (lapis) — Обсидий тоши, тошни Эфиопиядан келтирган римлик Обсиус номидан] Шишасимон тоғ жинси. *Инсон ов қилишда ва бошқа хўжалик ишларида асқатадиган қуроллар яшашда, қайроқтош, чақмоқтош, обсидиан, кварцит, суяк ва ёғочдан фойдаланган.* «Фан ва турмуш».

ОБ-ТАОМ, обу таом [ф. + а. آب و طعام — озиқ-овқат; егулик ва ичкиликлар] Суюқ-куюқ таомлар.

ОБ-ТОБ, обу тоб [ф. آب و تاب — сув ва ҳарорат, ёду: серхашамлик, дабдабалилик] Бирор ишнинг, нарсанинг етилганлик даражаси. *Жуда обу тобида, мазали пишган ҳолва, мураббо ёки овқатни ҳам халқимиз «Қиём бўлиб кетибди», дейди.* Н. Аминов, Ёлғончи фаришталар. *Агроном деган номингиз бор.. гўзанинг об-тобига қараб иш тутинг.* Н. Сафаров, Ҳаёт мактаби.

Об-тобига келмоқ Етилмоқ. *Узумлар фарқ пишиб, об-тобига келибди.*

ОБТОВА [ф. آفتابه — қўлга сув қуйиладиган идиш] шв. Обдаста. *У ғазабини аранг босиб, ўрнидан турди, супа лабидаги обтовадан ҳовучига сув қуйиб, қизининг юзига сепди.* Н. Қиличев, Чигирик.

ОБУНА [фр. abonner — имзо чекмоқ, имзоламоқ; ёзилмоқ] Газета, журнал ва ш.к. га олдиндан ҳақ тўлаб ёзилиш. *Вақтли матбуотга обуна қабул қилиш бошланди. Обуна бўлмақ. Обуна тўпламоқ.* ■ *Мулкчилик шаклидан қатъи назар, қайси хўжалик юритувчи субъект «Хуррият» газетасига 50 дона йиллик обуна бўлса, 50 кв.см. ҳажмдаги хабар, эълон ёки рекламаси йил давомида текин бериб борилади.* Газетадан.

ОБУНАЧИ Газета, журнал ва ш. к. га олдиндан ҳақ тўлаб ёзилган шахс, ташкилот; муштарий. *Обуначилар сони йилдан-йилга ошмоқда.*

ОБХОНА [ф. آبخانه — сувли, нам жой, хона] **1** Масжид, мадраса ҳовлисида таҳорат қилиш учун ажратилган алоҳида хона.

2 тар. Бухоро хонлиги даврида: алоҳида зах ва қоронғи қамоқхона, зиндон. *Ахир, Қурбон олти ой амир обхонасида ётиб чиққан одам.* Газетадан. *Амирнинг дори бор, минори бор, ноғорахонаси бор, бу зиндондан бошқа яна «обхона», «канахона» номли дўзахлари бор.* С. Айний, Дохунда.

ОБ-ХУДОЙИ, обу худойи этн. Оллоҳ йўлида қилинган эҳсон. - *Шу.. онанг раҳматликка обу худойи қилсак, деган эдим, — чол чойни симириб, пиёла устига кафтини қўйди.* Х. Султонов, Бир оқшом эртаги.

ОБЧИҚМОҚ с.т. Олиб чиқмоқ *Ниёз бобо деган қўшинимиз бор. Лекин-чи, амаки, Ниёзбобо байту ғазални жонидан ҳам яхши кўради. Шу ёққа обчиқайликми сизларни?* С. Сиёев, Ёруғлик.

ОБЪЕКТ [лот. objectum — нарса] **1** флс. Биздан ташқарида ва бизнинг онгимизга боғлиқ бўлмаган ҳолда мавжуд бўлган, субъект (инсон)нинг амалий ва билиш фаолияти қаратилган ташқи олам, борлиқ, воқелик, моддий дунё, мавжудот; **зид. субъект.** *Объектнинг қайси галактикага ва юлдуз туркумига тегишли эканлиги тўғрисида нима дея оламиз?* С. Сиёев, Ёруғлик.

2 Киши фаолияти, диққат-эътибори қаратилган ҳодиса, нарса. *Қиз ўзи билмаган ҳолда рассомнинг объектига айланган эди. Бундан Жамолзода севинар, ишқилиб, кетиб қолмасин-да, деб жадал чизарди.* «Ёшлик».

3 Хўжалик ёки мудрофаа аҳамияти бўлган корхона, қурилиш, айрим участка ва ш.к. *Қурилиш объекти. Ҳарбий объект.* ■ *Микрорайонда, шунингдек, савдо магазинлари, мактаб, болалар боғчаси, стадион ва маиший хизмат кўрсатиш объектлари қурилди.* Газетадан. *Мустақилликдан сўнг туманда қатор муҳташам бинолар: 2 та касб-хунар коллежи, касалхона ва бошқа қатор объектлар қад кўтарди.* Газетадан.

ОБЪЕКТИВ I [лот. objectivus — буюм, нарсага оид; моддий] **физ.** Оптик асбоб, фотоаппарат, киноаппарат ва ш.к. нинг бир неча линза ёки кўзгулардан иборат, объектининг тескари тасвирини ҳосил қиладиган олд қисми. *Фотоаппарат объективи. Микроскоп объективи. Телескоп объективи.* ■ *Бу камеранинг «Гис Волна-3» объективи кўп қатламли ёритиш хоссасига эа.* Газетадан. *Фақат объективнинг олдида ўзингизни табиий туюлсангиз бўлгани.* Т. Ашуров, Оқ от.

ОБЪЕКТИВ II **1** флс. Онгдан ташқарида бўлган ва онга бевосита боғлиқ бўлмаган. *Табиатнинг объектив қонунияти. Объектив борлиқ (реаллик).*

2 Янглиш ёки субъектив фикрдан холи бўлган; холис, холисона, бетарафона. *Объектив баҳо, Объектив хулоса. Масалага объектив ёндашмоқ.* ■ *Бизга шикоят йўллашган экан, бу фактга объектив қарашимиз керак!* «Ёшлик».

ОБЪЕКТИВИЗМ I флс. Ижтимоий ҳаёт воқеа-ҳодисаларини қайд этиш, уларнинг зарурлигини таъкидлаш билангина чекланувчи нуқтаи назар. *Объективизм ташқи олам предмет ва ҳодисалари қандай бўлса, шундай баён қилишдир.* «ЎТА».

2 Дунёқарашдаги, ижтимоий фанлардаги, адабиёт ва санъатдаги йўналиш.

ОБЪЕКТИВИСТ Объективизм тарафдори.

ОБЪЕКТИВЛИК Объектив борлиққа алоқадорлик; объектив борлиққа мослик; холислик, бетарафлик. *Муҳокамаларнинг объективлиги.*

ОБ-ҲАВО, обу ҳаво [ф. + а. آب و هوا — сув ва ҳаво] **1** Атмосфера қуйи қатламининг маълум вақт ва маълум жойдаги ҳолати. *Қиш об-ҳавоси. Об-ҳаво инжиқлиги.* ■ *У [Элмурод] қайтган вақтда ёмғир тинган, лекин бу ернинг ўзига хос обу ҳавосига мувофиқ, ёмғирдан кейин қаттиқ шамол турган эди.* П. Турсун, Ўқитувчи.

2 Маълум жой ёки ҳудуд атмосфера-сидаги метеорологик ўзгаришлар мажмуи; иқлим. *Мулла Туроб бир ёз фаслида.. Самарқанд саёҳатида бориб, у шаҳарнинг обу ҳавосини ёқтирган.* С. Айний, Эсдалиқлар. *Об-ҳавони, оқар сувларни ифлослантирмаслик тўғрисида қарорлар қабул қилинди.* Газетадан.

Об-ҳаво бюроси Об-ҳаво ўзгаришларини, метеорологик шароитларни ўрганиб, кузатиб борувчи махсус илмий муассаса.

3 кўчма Вазият, ҳолат. *Бу гаплар қишлоқда нечоғлиқ тарқалганлиги, яъни у ердаги об-ҳавони билиш мақсадида Насибани автобусга ўтқазиб, тонгда қишлоққа жўнатди.* «Ёшлик».

ОВ I Ёввойи ҳайвон, балиқ, қуш ва ш.к. ни турли йўлар билан туттиш, овлаш ёки отиш. *Балиқ ови. Бедана ови. Мерган овда билинар, ботир — ёвда.* Мақол. ■ *Раҳимов*

куёвни тез-тез Тошкентга чорлаб турарди. Куёв ов ишқибози эди. Мирвали кўп қийинчиликлар билан бу тоғларга ўргатган кийикларни у қийтарди. С. Аҳмад, Жимжитлик.

Ов қилмоқ 1) ов иши билан шуғулланмоқ; 2) кўчма бирор кимсани қўлга олиш учун унинг пайига тушмоқ. **Ов қуши** Илвасинга солинадиган қуш (мас. қирғий). **Ови юришмоқ ёки ови бароридан келмоқ** Иши юришмоқ, кўзланган мақсадга эришмоқ. -*Ови юришиб кетибди!* — деб аммамга қараган эдим, энсаси қотиб, ижирганиб ўтирган аммам киноя билан деди: -*Ови юришмасинми, ахир бир кунда икки-уч жойни овласа!* Газетадан.

2 Ов қилинадиган, овладиган жонивор; илвасин. *Овага бой чўл. Шу кунларда Олой тоғида ов кам.*

3 кўчма Қўлга туширилиши мўлжалланган кимса ёки нарса. *Юмалоқ, қорагина одам қўлидаги тўптончани маҳкам ушлагани ҳолда гандираклаб, сўкиниб. «овини» қидира бошлади.* Ойбек, Танланган асарлар.

4 Овчининг ўлжаси. *Арслон оғзидан ов олинмас. Мақол. ■ Сувонжон, тузоққа илинган овни чиқариб юборишдан кўрққан овчидек, қизни маҳкам кучоқлаганича, ёнғоқ томонга кета бошлади.* С. Анорбоев, Оқсой.

5 кўчма Содир бўлиши кутилаётган бирор воқеа-ҳодиса ҳақида. *Халқ қамирлаб қолди. Одамлар қўлоғи овда. Турли-туман миш-миш гаплар. Одамлар аниқ бир тасаввурга эга бўлмагани учун ҳар ким ўз ҳолича фол очарди. «Ёшлик».*

Мурид ови эск. Эшон ва хўжаларнинг муридларни товлаш учун узоқ-яқиндаги муридлариникига қилган сафари. -*Ҳа, эшон нега кетди экан? - Тирикчилик-да! Ҳа, мурид овига чиқиб кетган экан-да, эски хунар!* П. Турсун, Ўқитувчи.

ОВАЛ [фр. ovale < лот. ovum — тухум] **1** от. геом. Тухумсимон чизик; ясси, қавариқ ёпиқ эгри чизик; эллипс. *Овал нуқталари орасидаги масофа.*

2 сфт. Чўзиқ думалоқ; овал шакли.

ОВБОШИ Овла қўлга киритилган биринчи ўлжа.

Овбоши қилмоқ Овдаги биринчи ўлжани бирор кимсага тортиқ қилиб олиб бормоқ. *Чиқариб бер, овбоши отган ғозимни.. Бек отамга овбоши қиб борайин. «Ширин билан Шакар».*

ОВЛАМОҚ 1 Ов билан шуғулланмоқ, ов қилиб тутмоқ. *Бедана овламоқ. Тулки овламоқ. ■ -Кўлдан балиқ овляяпсанми? — сўради у. Ж. Шарипов, Хоразм.*

2 кўчма Қўлга олиш, илантириш мақсадида пайига тушмоқ, тутмоқ. *Бошқа ер эгалари кечалари болта кўтариб, одам овлаб юрган бир вақтда бу одамнинг [қорининг] шундоқ деб чиқиши катта гап эди. А. Қаҳҳор, Қўшчинор чироқлари.*

3 кўчма с.т. Товламоқ, алдамоқ. *Қув, эчил, дағдағали аллофлар қўллари, оғизлари, кўзлари билан ишлаб, «тош-тарозидан уриб», бева-бечорани овлайдилар. Ойбек, Танланган асарлар. Шу ернинг одами у. Ҳар шаҳардан дўндиқларни овлайди — қўлга тушгансиз. Тақдирда ёзилганни кўраверасиз. Ойбек, Танланган асарлар.*

Кўнгил (ёки дил) овламоқ қ. кўнгил. *Кулишга бало борми. Тезроқ кўнглини овла, ўзингга ўчакиштириб нима қиласан. М. Мансуров, Ёмби. Мурид овламоқ қ. мурид. Тўрам билан бир ҳаз этиб, мурид овламоқчи эдим. С. Сиёев, Ёруғлик. Тил овламоқ* ҳарб. *Урушда душман кишисини қўлга туширмоқ, асир олмақ. Граната портлади. «Тил» овлаш учун бизнинг марраимизга келган фашист қароқчилардан жўрттаси тилка-пора бўлди. Н. Сафаров, Жангчи шоир.*

ОВЛОВЧИ 1 Овламоқ фл. сфш.

2: Балиқ овловчи Балиқ ови билан шуғулланувчи, балиқ ови ишқибози. *Сув ҳавзаси хўжалик ҳисобига ўтказилгач, назорат кучайди, турли ерлардан келган ҳаваскор балиқ овловчилар сони кескин камайди. Газетадан. Кўнгил овловчи* Бировни ўзига мойил этувчи; хурсанд қилувчи, кайфини чоғ этувчи. *Мирвали Толибжоннинг жасадини олиб ўтган машина кўздан йўқолгунча ниचा дилхун бўлиб турди-да дарров бу дилхунлик ўрнини бошқа — кўнглини овловчи, туйғуларни эркалатувчи овунчоқ эгаллаб олди. С. Аҳмад, Жимжитлик.*

ОВЛОҚ 1 Ов қилинадиган қуш ва ҳайвонлар сероб жой. *Тирикчилисини шикордан топадиган ҳар бир овчи шикор учун овлоққа ёлғиз бир ўқ билан чиқсин. «Фан ва турмуш».*

2 Марказдан узоқ, чет жой; кимсасиз ер. *Овлоқда яшамоқ. ■ Тошкентнинг шундай биқинида етти ухлаб тушга кирмайдиган ажойиб овлоқ жойлар борлиги ҳаммани ҳайратга солар эди. М. Мансуров, Ёмби. Жўра-*

лари билан шу овлоқ оролчада ўтказган бахтиёр кунлари ёдига тушиди. А. Кўчимов, Ҳалқа.

3 Пастқам, хилват жой, одамдан холи жой; пастқамлик, хилват. *Севаргул то онаси овлоқ кўчанинг муқолишида кўздан пана бўлгунча қараб турди.* Н. Қиличев, Чигирик. *Кимёхон икки-уч кун Азизахоннинг йўлини пойлади, ниҳоят, овлоқроқ бир жойда учрашди ҳам.* Н. Аминов, Қаҳқаҳа. *Уларни одамлар нигоҳидан на қуюқ боғлар, на тун зулмати, на бирон овлоқ гўша яшира олади.* О. Мухтор, Бухоролик бир йигит.

Овлоқда юрмоқ Четда юрмоқ, жамоатдан ёки ишдан ўзини олиб қочмоқ. [Акрам] *..Касаба ташкилотидан овлоқроқ юришга ҳаракат қиларди.* С. Анорбоев, Оқсой.

4 рви. шв. Кишилардан холи; танҳо. *Ойжамол овлоқ ўтирган пайтда қизига гап ташлаб кўрди.* «Ёдгор».

ОВОЗ [ф. *أواز* — товуш, шовқин, садо; миш-миш; кўшиқ] **1** Гапириш, қичқириш, куйлаш, сайраш пайтида ўпкадан чиқаётган ҳавонинг урилиши билан товуш пайчаларининг тебранишидан ҳосил бўладиган товуш; садо, сас. *Баланд овоз. Паст овоз. Майин овоз. Мусичаларнинг кукулашган овози эшитилар эди.* ■ *Анвар Муқаддамнинг овозини эшитиб, бурилиб қаради-ю, унинг ваҳимадан катта-катта очилиб турган кўзларини қоронғиликда аниқ кўрди.* Ў. Ҳошимов, Қалбингга қулоқ сол. *Бу ерда минг турли қушлар минг турли овоз билан сайраб, анвойи гуллар очилиб, атрини сочиб ётган экан.* С. Зуннунова, Олов.

Овоз пардалари Товуш ҳосил бўлишида қатнашувчи оғиз бўшлиғидаги пайчалар. *Мен сени куйламоқ истайман. Аммо шундай куйласамки, Йиртилиб кетса овоз пардаларим...* А. Орипов, Йиллар армони. **Овозинг чиқмасин ёки овозингни чиқарма** Жим бўл, дамингни чиқарма. **Овозинг ўчгур!** қарғ. Ўлгур! Яшамагур! **Овозингни ўчир!** Жим бўл!

2 Товушнинг куйлашдаги паст-баландлик, жарангдорлик даражаси. *Овози яхши ашулачи. Овози ўткир.* ■ *Шарофнинг қон босими кучайиб, юрак уриши авжига етган пайт директор ҳамдардона овозда деди: -Тушунман, ҳаммамиз ҳам ёшликда ўт-олов бўлганмиз, кўзимизга фил ҳам чумолича кўринган.* «Ёшлик».

Овози бузилмоқ **1)** томоқ, товуш пайчалари шамоллаши ёки зўриқиши натижасида овози ўзгармоқ, ишдан чиқмоқ; **2)** кўчма балогатга эришиб, овози дўриллаб, йўғонлашиб қолмоқ.

3 Вокал мусиқа асарида ҳар бир куйчи учун белгиланган партия. *Икки овоз учун ёзилган романс.*

4 Нарсаларнинг урилиши ёки ҳаракатидан чиқадиган товуш. *Қарсақ овози. Тўқмоқ овози. Шамол овози. Момақалдиروқ овози. Соат овози. Дутор овози.* ■ *Йигирма олтинчи кун тонгаторда гумбуллаб чалинаётган карнай овозидан уйғониб кетдим.* Х. Тўхтабоев, Ширин қовунлар мамлакати. *Узоқдан ҳар замон тўп овози эшитилар эди.* А. Қаҳқор, Олтин юлдуз.

5 кўчма Фикр, мулоҳаза. *Шарқ ёзувчиларининг овози.* ■ *-Сизга ўхшаш даллоларга ҳожат йўқ. Сиз халқ бўронини тўсмоқчимисиз? Овозини бўғмоқчимисиз? Ойбек, Танланган асарлар.*

6 Ички ҳис-туйғулар нидоси, амри. *Ғулумжон юрагида портлаган ғазаб уввосига эмас, инсоф овозига қулоқ солди.* М. Исмоилий, Фарғона т.о. *Лекин қамоқ ҳам шоирнинг иродасини буколмади, овозини сўндиролмади.* «Саодат».

7 Давлат ва жамоатчилик ташкилотларида сайлов ўтказиш ёки бирор масалани ҳал қилишда сайловчилар ёки мажлис иштирокчиларидан ҳар бирининг алоҳида фикри, ўз фикрини баён этиш ҳуқуқи ва усули. *Ҳал қилувчи овоз. Маслаҳат овози.* ■ *Раис ҳар иккала таклифни ўртага ташлаганда, Холматжон саккиз овоз ортиқ олди.* С. Аҳмад, Уфқ.

Бир овоздан Барча иштирокчиларнинг розилиги билан, юз фоиз овоз билан; бир оғиздан. *Қарор бир овоздан қабул қилинди.* ■ *Ун бир олим бир овоздан, илмий даражасиз ишлайдиган аҳмоқ йўқ, деб туриб олишди.* Х. Тўхтабоев, Ширин қовунлар мамлакати. **Ёпиқ (ёки яширин) овоз бермоқ** Сайловда бюллетень ташлаш йўли билан ўз майлини билдирмоқ. *Депутатлар сайлашда яширин овоз берилади.* **Овоз бермоқ** **1)** товуш чиқариб қақирмоқ ёки қақирққа жавоб бермоқ. *Эшикни тақиллатдим, ҳеч ким овоз бермади;* **2)** бирор масаланинг ҳал этилишига, ўртага қўйилган таклифга ёки сайлаш, сайламасликка ўз майлини билдирмоқ. **Овозга қўймоқ**

Бирор масалани ҳал қилиш ёки сайлашда мажлис иштирокчиларининг шу масала ҳақидаги фикрини, розилигини, майлини сўрамоқ. *Элмурод борганда, бюро тўпланган, кимнингдир номзодини овозга қўймоқда эдилар.* Шухрат, Шинелли йиллар.

ОВОЗА [ф. آواز — ашула, куй; шовқин-сурон; дув-дув гап, миш-миш, доврүк] **1** Юрт-эл орасида бирор нарса, воқеа ва ш.к. тўғрисида тарқалган хабар, гап-сўз, миш-миш. *Бироқ тез кунларда Фозилжон уйланоқчи эмиш, аммаси қиз қидириб юрибди, деган овозаларни эшитишди.* С. Зуннунова, Кўк чироқлар.

2 Шухрат, доврүк, донг. *Гўзал Арманистон, мени афв эт, Даввом йўқ шуҳратинг овозасига.* С. Абдулла.

Овоза бўлмоқ ёки овозаси кетмоқ Шухрати ҳар тарафга тарқалмоқ, машхур бўлмоқ; шуҳрат, донг чиқармоқ. *Бой ҳаммага созу томоша, атрофга овоза бўлсин, деб келин ўтов и учун баланд супа қуриб устига оқ ўтов тиктирди.* «Ёшлик». **Овоза қилмоқ** Бирор хабарни эл-юрт орасига тарқатмоқ, доврүк қилмоқ, ёймоқ. *У каналга келиб, юрт оғзига тушиб қолганиданми ё атоқли шоир у тўғрида каттакон очерк ёзиб, республикага овоза қилганиданми, ҳар қалай, энди анча босиқ бўлиб қолганди.* С. Аҳмад, Уфқ.

3 мус. Ўн икки мақом тизимидаги пардалар тузилмаси.

ОВОЗКУЧАЙТИРГИЧ Овозни кучайтириб берувчи радиомослама. *Магазин орқасидаги ўша ҳовличанинг пастак, лойишвоқ томига ўрнатилган сандиқдек овозкучайтиргич тўй оқшоми бошланишидан аввалги ғалаговурни район марказининг қарийб ярмига анчагача эшиттириб турди..* «Ёшлик».

2 айн. **микрофон.** *Қарсақ янраб, овозкучайтиргич бирдан жаранглаб кетди.* Н. Аминов, Қаҳқаҳа.

ОВОЗЛИ Овоз чиқарадиган, овози бор; товушли. *Овозли кино тизими ХХ асрнинг 20-йилларида юзага келди..* «ЎзМЭ».

ОВОЗСИЗ Овоз чиқармайдиган, овози йўқ; товушсиз. *Ўзбекистонда овозсиз кино даври 1925—35 йилларни ўз ичига олади.* «ЎзМЭ».

ОВОРА I [ф. آواره — таъби хира, хўнгли гаш; дайди, дарбадар, саргардон] **1** Бирор жойда кўним топмаган; дарбадар, саргардон. *Камситилган, хўр тутилган бечоралар.*

Қадру қиймат, шон-шарафсиз оворалар. Ғ. Ғулом, Танланган асарлар. *Ким билади, сен сингари, ўғлим ҳам бу кун Қайлардадир кезиб юрар овора, сарсон.* А. Орипов, Йиллар армони.

2 Бирор иш, ҳаракат билан банд, машғул. *Қураев билан Нусратилла юк орттириб жўнатиш билан овора.* А. Мухтор, Опа-сингиллар. *Баъзилар кўчат ўтқазшига ёрдамлашар, баъзилар оз-оздан бўлса ҳам тупроқ ташиш билан овора.* С. Зуннунова, Олов.

Икки жаҳон овораси Бирор ишни на у ёқли, на бу ёқли қилолмай, икки ўртада қийналиб қолган, сарсон бўлган, сарсон-саргардон. *Абдурахмонбой: -Улик бўлиб гўрда, тирик бўлиб сонда йўқ, деб шуни айтар экан, Мирзақул икки жаҳон овораси бўлиб қолди.* Н. Сафаров, Уйғониш. **Овора бўлмоқ** Ўзини койитмоқ; уринмоқ. *Холажон, сиз овора бўлмай, бир оз ўтиринг, мен сиз билан гапиришгани келдим.* С. Зуннунова, Олов. **Овора қилмоқ 1)** кимсани бирор ишга уринтириб қийнаб қўймоқ; койитмоқ; **2)** сарсон қилмоқ. *Эсонбойни умидвор қилиб, уни овора қилишининг нима кераги бор эди?* «Ёшлик».

ОВОРА II: икки овора 1 с. т. қ. икковара. *Тошкентлик Мирсоат заргарнинг тўйига келган кишиларга икки оворадан ош тортилиб, нон улаштирилибди.* М. Муҳаммаджонов, Турмуш уринишлари.

2 Кишиларни тенг гуруҳларга бўлиш, -тадан (иккитадан, учтадан). *Ширкат вакили ёлланма ишчиларни икки оворадан қилиб ажратди.* С. Сиёев, Ёруғлик.

ОВОРАГАРЧИЛИК 1 Бекорга овора бўлиш, уриниш, сарсон-саргардонлик. *Дўс-мат сўраб-суриштиришга киришди. Кўп оворагарчиликдан кейин лунжи осилган бир одамни топди.* П. Турсун, Ўқитувчи.

2 Бехуда меҳнат, ташвиш. *Оворагарчиликка арзимайдиган иш.*

ОВОРАЛИК 1 Овора, дарбадар, саргардон эканлик; овора бўлишлик.

2 айн. **оворагарчилик.**

ОВОСКОП [лот. ovum — тухум + юн. skopeo — қарайман] Тухумнинг сифатини текширадиган асбоб. *Новларга қатор териб қўйилган тухумларни текшириш учун ёритувчи блокли овоскоп-столдан фойдаланилади.* «ЎзМЭ».

ОВОҚТА эск. айн. **авахта.** *Аяжон, бой билган билан итингизни овоқта, мушугин-*

гизни турма қилармиди? Ҳамза, Танланган асарлар. Ҳамма бойларни тумтарақай қилиб, овоқтага қамаб қўйибди. У. Исмоилов, Сайланма.

ОВРЎПАЧА айн. европача. Остонада оврўпача тўқ яшил кўйлақда, гўзал қомабини кўз-кўз этиб Малоҳат турарди. «Ёшлик». Яхшибоев ғалати одам экан, деб ўйлади ичиди, ростдан ҳам оврўпача тарбия олган кўринади. М. М. Дўст, Лолазор.

ОВСАР I Гап англамайдиган, эси пастроқ, Муҳсина хоним, овсарлиги бекор; ахир, Нина Ричи ёинки Рина Ничини билган кампирни овсар деб бўлармиди? М. М. Дўст, Лолазор.

ОВСАР II Туя бошига кийдириб қўйиладиган махсус бошвоқ. Жигаси нуқрадан, овсари тилла. Мен бўламан ушбу норнинг эгаси. «Нигор ва Замон».

ОВСАРЛАНМОҚ Ўзини гўлликка солмоқ; гап англамаслик, телбаламоқ. Беканинг кўз ўнгимда кечган сўнги икки йиллик умри давомида мудом овсарланиб, паришонхотир юриши, дам-бадам чуқур хўрсиниб қўйиши сабаблари аёнлашгандек бўлди. «Ёшлик».

ОВСАРЛИК Овсар эканлик; ўзини тентакликка, гўлликка солиш. Мингбоши ўзини овсарликка солиб кулди. М. Исмоилий, Фаргона т. о.

ОВСИН I Ака-укаларнинг хотинлари (бир-бирига нисбатан). -Кеча келиб, бугун хўжайинлик қилишни сенга ким қўйибди, оймча, — деди қўлини паҳса қилиб [келиндарнинг] каттаси. Кичиги ҳам овсинидан қолишмай, баттар ўчакишарди. А. Кўчимов, Ҳалқа.

2 Овсинлар ёки қўшни хотинлар орасида бир-бирига нисбатан мурожаатда ишлатилади. -Оҳ, айланай, овсинжон, — деди бир жувон кулгидан ўзини тийиб, — кўзимиз довуччада бўлган замонлар қандоқ замонлар экан-а? С. Зуннунова, Олов.

ОВУЛ Кўчманчи чорвадорлар ўрнашган жой; қишлоқ. Ҳасан қайғичини Хиванинг катта-кичиги, олис овуллардан келувчилар ҳам танийди. С. Сиёев, Ёруғлик. Колхозда ишлар тугагач, овулда одамлар уч ой дам олишади. «Ёшлик».

ОВУЛДОШ Бир овулда яшовчи киши; ҳамқишлоқ. Хурमतойга овулдоши Нурбердининг сирли қарашлари тинчлик бермасди. «Саодат».

ОВУЛЛАМОҚ шв. Вовулламоқ.

ОВУНМОҚ I Йиғидан тўхтамоқ. Хайриятки, бола тезда овунди, асалу ёғ омухтаси суртилган эмизикни шимганича ухлаб қолди. М. М. Дўст, Лолазор.

2 Бирор иш билан машғул бўлиб, ўзини тинчитмоқ; юпанмоқ, дард-аламни унутмоқ. Аҳмад бригадир меҳнат билан овуниб, қарилликка чап бериб келаётганлар хилидан эди. С. Нуров, Майсаларни аёз урмайди. Руҳан эзилиб, бўшашиб кетаётганини сезган маҳал тезда ўзини қўлга олишга, бошқа бирон аёлни кўз олдига келтириб, овунишга уриниб қоларди. Ж. Абдуллахонов, Хонадон.

ОВУНТИРМОҚ Турли йўлар билан тинчлантирмоқ, тасалли бермоқ. Болани овунтирмоқ. ■ Ёдгорбойдан хат келмай турган бўлса, кампирни шунақа овунтириб турганинг ҳам тузук. А. Қаҳҳор, Асрор бобо.

ОВУНЧ айн. овуноқ. Ёшига этиб, кимнидир ва қандайдир юпанч, овунч излаган йигит қалбида ўзи ҳам маъносига тушуниб етмагани муҳаббат деган нарсанинг учқуни туташаётганини сезмай қолди. С. Аҳмад, Ҳукм.

ОВУНЧОҚ Кишини овунтирадиган, юпатадиган нарса, кимса, иш; овунч, юпанч. Қорабой бирпасда ҳаммамизнинг сеvimли овунчоғимизга айланиб қолди. Ш. Холмирзаев, Сайланма. Кўнглимга яқин биронта дўстим йўқ. Ҳаётимдаги бирдан-бир илинжим, овунчоғим — иш. С. Нуров, Нарвон.

ОВУТМАЧОҚ Болалар ўйинининг бир тури. М. Андреев эса Ўрта Осёё халқлари орасида тарқалган «Ҳавзак-ҳавзак» овутомачоғининг 13 намунасини нашр эттирди. Газетадан.

ОВУТМОҚ I Йиғидан тўхтатмоқ. Нафиса сукут ичра йиғлаётган гўдакни овутишга киришди. Мирмуҳсин, Топилган хусн.

2 Тасалли бериб юпатмоқ, овунтирмоқ. Нега Асроранинг олдига кирмадим, нега икки оғиз илиқ сўз билан уни овутмадим, деб ўзини ўзи койиди. С. Аҳмад, Уфқ. -Кўпи кетиб, ози қолди, — овутди уни Усмонжон, — ҳеч нарса эмас, бу қийинчиликлар ўтиб кетади. С. Зуннунова, Олов.

ОВУШМОҚ шв. Алишмоқ, алиштирмоқ.

ОВЧИ Ов иши билан шуғулланувчи, ов қилувчи киши. Милтиқ кўтарган билан овчи бўлмас. Мақол. ■ Овчи бўлиш учун қизи-

қилишнинг ўзи кифоя қилмайди, нишонга тўғри ура билиш ҳам зарур. Шукрулло, Сайланма.

Овчи ит Овга ўргатилган ит.

ОВЧИЛИК Ов билан шуғулланишлик; овчи касби. *Овчи одам боғбонлик қилиб даромад топишидан кўра, кўпроқ қандай бўлса ҳам, ўз овчилиги орқали каттароқ ўлжа тушириши, унинг бўладиган жойлари ҳақида кўпроқ бош қотириши маъқул.* Шукрулло, Сайланма.

Овчилик хўжалиги Мамлакатдаги овчилик майдонларини қўриқлаш, тиклаш ва улардан фойдаланиш, умуман, ов ишларини назорат қилиш билан шуғулланувчи хўжалик.

ОВШУНОСЛИК Ов қилиш ва овчилик хўжалиги, ов қилинадиган ҳайвонлар турларини бойитиш, ундан самарали фойдаланиш ҳақидаги фан. *Ўзбекистонда овшуносликка оид ишлар овчилик хўжаликлари, Ўзбекистон ФА институтлари давлат қўриқхоналарида олиб борилади.* «ЎЗМЭ».

ОВҚАТ I [a. أقوات — озиқ-овқат, егулик; озуқа, ем; бу сўз **қут** — قوت с. кўпл. бўлиб, у ўзбек тилига метатеза йўли билан ўзлашган: авқот < ақвот] **1** Ризқланиш, ейиш-ичиш учун тайёр нарса; емиш, таом, емак. *Тамли овқат. Иссиқ овқат. Енгил овқат. Парҳез овқат. Хушхўр овқат. Кечки овқат. Тушки овқат. Болага овқат едирмоқ.* ■ *Мулла Норқўзи овқатини еб, чойга умидвор бўлиб ўтирганида, кўча эшигидан ёшигина бир хотин кириб келди. А. Қаҳҳор, Майиз емаган хотин. Аҳмад бригадир овқатга нон тўғраб, иштаҳа билан овқатланди. С. Нуоров, Майсаларни аёз урмайди.*

Овқат қилмоқ **1)** таом тайёрламоқ, пиширмоқ. *Тезроқ уйга бориб, чолнинг оғзига ёқадиган овқат қилиб беришга шошилди. С. Аҳмад, Юлдуз. 2) таом емоқ, овқатланмоқ. *Биз.. уларни ёнимизга, бирга овқат қилишга чақирдик. А. Раҳмат, Соқов бола.**

2 Овқатланиш. *Сидиқжон овқатдан кейин қўлига газета олган эди, бир мақолани яримлатмасдан кўзи сузилди. А. Қаҳҳор, Қўшчинор чироқлари.*

Овқат устида Овқат ейилаётган вақтда, дастурхон устида. *Овқат устида ҳеч ким ортиқча сўзламади.* Ойбек, Танланган асарлар.

3 Уй ҳайвонларининг ем-хашаги; озиқ; озуқа. *Молларга овқат солмоқ.*

4 Ейиш, ичиш, тирикчилик учун даркор нарсалар; озиқ. *Фуод афанди бизга меҳрибончилик қилиб, овқатимизга қарашиб турди.* М. Исмоилий, Фарғона т. о.

ОВҚАТ II [a. أوقات — вақт (وقت) с. кўпл.] Вақт(лар), даврлар, мавсумлар; тирикчилик, кун ўтказиш.

Овқат(ини) ўтказмоқ Тирикчилик қилмоқ, кун кечирмоқ. *Катта ўғли ҳар кимларга сув ташиб бериб, овқатини ўтказиб юрди.* Ойдин, Ҳазил эмиш.

ОВҚАТЛАНИШ I **Овқатланмоқ** фл. ҳар. н. *Овқатланиш вақти. Овқатланиш маданияти.*

2 Овқат ейиш; кун кечириш тарзи. *Умумий овқатланиш. ■ Сифатли овқатланиш, завқли меҳнат, яхши дам олиш узоқ умр гаровидир.* Газетадан.

ОВҚАТЛАНМОҚ Овқат емоқ, ризқланмоқ. *Умид Қўшичи бобо звеносида ишлар, бирга овқатланар, тракторчини шийпонга ўтказиб, бир-икки соат ўзи тракторда культивация қиларди.* Мирмуҳсин, Умид.

ОВҚАТЛИК Овқат бўладиган нарсалар (дон-дун, ёғ-гўшт, сабзавот ва ш.к.). *Қишга овқатлик ғамламоқ.*

ОВҚАТ-ОЗИҚ айн. **озиқ-овқат.**

ОВҚАТХОНА [овқат + хона] Овқат ейиладиган, таом ейиш учун ажратилган махсус хона; ошхона. *Бошиқа мамлакатларда ташкил этилган шундай овқатхоналар ҳам ресторан деб атала бошланди. К. Маҳмудов, Қизиқарли пазандалик.*

ОГОҲ [ф. آگاہ — билувчи, хабардор, зийрак, ҳушёр] **1** Бўлиб ўтган ёки бўладиган иш, ҳаракат, воқеа-ҳодиса ва ш.к. дан хабари бор; хабардор, воқиф. *Алишернинг барча яқинлари бу гаплардан огоҳлар.* Ойбек, Навоий. *Шу ҳафталарда Заргаровнинг авзойидан огоҳ бўлиб юрган Дмитрий Казимирович бир кун тонг бўзармай, унинг уйига кириб келди. А. Мухтор, Танланган асарлар.*

2 Ҳушёр, сергак. *Молларнинг сўйилиб ёки йўқ қилиб юборилмаслиги учун огоҳ бўлиб туриш керак. П. Турсун, Ўқитувчи. Огоҳ бўлки, ғазаб бамисоли инсон ичидаги ёниб турган чўғдир.* «Фан ва турмуш».

ОГОҲЛАНТИРИШ I Маълум иш-ҳаракат ҳақида хабардор, огоҳ қилиш. *Маҳаллий аҳолини сел ва кўчки хавфидан огоҳлантириш керак.*

2 Ишда камчиликка йўл қўйган, хато қилган ходимларни расмий йўл билан жазо-

лаш чораси; танбеҳ. Бу галча унга огоҳлантириши берилди.

ОГОҲЛАНТИРИШСИЗ Огоҳ этмасдан, хабардор қилмасдан; кўққисдан. *Биринчи котиб йиғилганлар олдига ҳақиқ, озгина сўзлагандан кейин, ўтирган халққа қарата огоҳлантиришсиз ўқ узилди.* «Фан ва турмуш».

ОГОҲЛАНТИРМОҚ 1 Огоҳ, хабардор қилмоқ, хабар бермоқ. *Нима қиламиз? Прокурорни огоҳлантирдик, ғаввосларни чақирдик. Ҳозирча шов-шув кўтармай туриш керак.* «Ёшлик».

2 Бирор тўғрида танбеҳ бериб қўймоқ, эслатмоқ. *Зиёдилла укасининг қулоғига шивирлаб, алланима демоқчи эди, Сергей нагани билан унинг биқинига туртиб, огоҳлантирди: Гаплашиши мумкин эмас! Ҳ. Фулом, Машғал. Солиев уни кўп огоҳлантирди, бўлим бошлиғига ҳам айтди. Бироқ Эшбоев бари бир ўзиникини маъқуллади.* «Ёшлик».

ОГОҲЛАНТИРУВ айн. **огоҳлантириш.**

ОГОҲЛИК Огоҳ бўлишлик, хушёрлик. *Огоҳлик — давр талаби.* Газетадан. *Огоҳликни кўрдан ўрган, Доноликни — илмдан.* Мақол.

ОДА [юн. ode — кўшиқ] **1** ад. Бирор муҳим воқеа, нуфузли шахс шарафига ёки ўта аҳамиятли мавзуда тантанавор руҳда яратилган шеърӣ асар (Шарқ мумтоз адабиётидаги қасида жанрига яқин туради).

2 мус. 17-асрдан Европа мусиқасида бирор муҳим воқеа ёки галаба муносабати билан яратилган тантанавор вокал-чолғу мусиқа асари. *Кўнчилик ижодкорлар Тошкент юбилейига муносиб туҳфалар тайёрлаш ҳамда танловда муваффақиятли қатнашиш учун драма, мусиқали драма, опера, ода, кантата, сюита ва бошқа сахна асарлари яратишмоқда.* Газетадан.

ОДАМ [а. آدم — Одамато; инсон] **1** Фикрлаш, сўзлаш ва меҳнат қилиш қобилиятига эга бўлган, шу туфайли бошқа ҳамма махлуқотдан устун турувчи жонли зот; киши, инсон. *Ибтидоий одам.*

2 Кишилик жамиятининг айрим бир аъзоси, шахс. *Яхши одам. Ҳалол одам. Асл одам. Аблаҳ одам. Одам борки, одамларнинг нақшидир, одам борки, ҳайвон ундан яхшидир.* Мақол. ■ *Одам тафтини одам кўтаради деганидек, Низомжон келиб, уй тўлиб қолгандек бўлди.* С. Аҳмад, Уфқ. *Аваз ўзича ўйланди: «Бир улуг одамнинг, бир ғарибнинг жанозасига одам кўп келади, деганлари рост*

экан-да». С. Сиёев, Ёруғлик. *Булар бу ерга ўтиргани келгани йўқ, бир одамни қидириб келишган.* А. Қаҳҳор, Оғайнилар. *Бизнинг Набиғул одам эмас ўзи! Ёш-да, ҳали ошна-оғайнигарчиликни билмайди.* А. Қаҳҳор, Қанотсиз читтак.

Одам боласи (ёки фарзанди) 1) одамзод, инсон. *Одам боласининг қўллари қўл ҳолида турганда чиройли экан.* Х. Тўхтабоев, Йиллар ва йўллар. *Тавба, хурсандчилик одам боласини нималар қилмайди-я!* М. Исмоилий, Фарғона т.о.; **2)** чин инсоний фазилатларга эга бўлган шахс, чин инсон. *Отанг боласи бўлма, одам боласи бўл!* Мақол. ■ *Ҳе, хотин, улар бизни одам боласи деб келган, одамгарчилигимиздан миннатдор бўлиб, хурсанд бўлиб кетишди.* Шукрулло, Сайланма. **Одам бўлмаслик** Тузалмаслик, шу куйи қолмоқ. *Мен севган дўстларимдан ажралдим, одам бўлмадим, бу кунимдан ўлганим яхши, деб кайф билан эшикдан кириб келиб қолди.* Шукрулло, Сайланма. **Одам бўлмоқ 1)** тарбият топиб, яхши фазилатларга, чин инсоний хислатларга эга бўлмоқ. *Ҳар бир ота-она ўғил ва қизининг одам бўлишини, бахт-саодатли ҳаёт кечиршини, турмуши лаззатли бўлишини истайди.* Газетадан; **2)** кўчма тузалиб, семириб, ёшариб қолмоқ. *Турсунбойни кўриб қолдим, анча тўллишиб, одам бўлиб қолибди.* «Ёшлик».

Одам қилмоқ 1) тарбиялаб, чин инсонга, яхши фазилат соҳибига айлантирмоқ. *Ган шуки, шу канал, шу муҳит мени одам қилди.* С. Аҳмад, Уфқ; **2)** кўчма боқиб, тарбиялаб катта қилмоқ. *Худойқул менинг ўз жигарим, аммадан қолган сағир. Етти ёшидан боқиб, одам қилдим.* П. Турсун, Ўқитувчи; **3)** кўчма тузатмоқ; яроқли ҳолга келтирмоқ. *Ташландиқ «Урал»ни одам қилган, шу приёминики тузата олмайсанми?* Т. Ашуров, Оқ от. **Нима деган одам бўлди** Бировнинг олдида хижолат бўлди; уялиб қолди, обрўси тўкилди обрўсиз бўлди. *Вой шўрим, энди нима қиламан, Расулжон олдида нима деган одам бўлдим.* Т. Ашуров, Оқ от.

3 Жамоа хўжалиги, оила аъзоларининг ҳар бири; жон. *Одам бошига беш сўмдан. Харажат ва даромадларни одамга қараб тақсимламоқ.* ■ *Ҳашарга ҳар бир хўжалик қирқтадан одам беради.* Т. Ашуров, Оқ от.

4 Бирор бой-бадавлат ёки амалдор кишининг хизматкори ёки тарафдори. *Кейинги йилларда хон одамлари қишлоқма-қишлоқ*

юриб, кўпроқ пахта экишни талаб қилиш-япти. С. Сиёев, Ёруғлик. Бундан кейин гапларимни уқиб олинг, модомики мен билан биргасиз, менинг одамимсиз, ҳар бир ишни мен билан баҳамжиҳат қилинг. Ойбек, Танланган асарлар.

5 Ўзга жамоа ёки оила вакили. Лекин қизлардан яширинча кувёниқидан одам келиб қолар, деб кутдилар. С. Зуннуова, Кўк чироқлар.

ОДАМАТО, одам алайҳиссалом Қуръонга кўра, Оллоҳ томонидан яратилган ер юзидаги биринчи одам ва инсон зотининг отаси. Бир пайтлар бўлмиш у жаннатмисол боғ, Адолат, бахт-иқбол, комронлик аро, Одамато қавми яшамиш ул чоғ Масъуд, шод: тенг экан шоҳу фуқаро. А. Шер, Қадимги куй.

Одаматодан қолган Жуда қадим замонлардан, дақёнусдан қолган.

ОДАМБОП Одамга муносиб; одам туриши, яшаши учун мосланган. «Бизнинг колхозчилар ажойиб-да. Қаерга қадами тегса, у ерни бирпасда одамбоп қилади», — деб ўйлади ичида Ўктам. Ойбек, О.в. шабадалар.

ОДАМГАРЧИЛИК 1 Одамларга муҳаббат, меҳрибонлик; инсонга яхши муносабатда бўлиш; инсонийлик, инсонпарварлик. Бирдан Азизхоннинг одамгарчилиги тутди-ю, илдам бориб, Эш полвонни белидан кўтарди. Эш полвон унинг одамгарчилигини писанд қилмади. С. Аҳмад, Уфқ. «Элга қўшилмайсан, одамгарчилигинг борми?» дейишавериб бошимни огритишди. Газетадан. «Иш, иш» деб, одамгарчиликниям унутиб қўйибман, шекилли. «Ёшлик».

Одамгарчилик қилмоқ (ёки кўрсатмоқ) 1) инсонпарварлик юзасидан иш қилмоқ, чин инсон каби муносабатда бўлмоқ; шафқат ва меҳрибончилик кўрсатмоқ. Биз уни тарбият қилгин.. хор-зор бўлмасин, деб одамгарчилик қилдик. А. Қаҳҳор, Сароб; 2) илтифот қилмоқ, лутфан қаршиламоқ. Сенга биров одамгарчилик қилиб, ёнингни олса.. Одамгарчилик кони зарар, деб шунга айтишади-да, ўртоқ. Х. Тўхтабоев, Йиллар ва йўллар.

2 Инсоний қиёфа, юриш-туриш.

Одамгарчиликдан чиқмоқ Инсоний қиёфасини йўқотмоқ, ножўя юриш-туриш туйфайли кишилар назаридан четда қолмоқ. Эшбоев, жиноятчи — одамгарчиликдан чиққан шахс, шунинг учун ҳам у билан одам

тилида гаплашиш шарт эмас, деб ҳисобларди. «Ёшлик». —Афюннинг кайфи қурсин, домла! Сизни одамгарчиликдан чиқариб қўйибди, — деди Абдураҳмонбой. Ҳ. Гулом, Машғал.

ОДАМЖОН Одамдан жонини ҳам аямайдиған; одамсевар, меҳрибон. Бобомирза оиланинг одамжони, ақлли кенжаси бўлиб, ота эшигидаги тартиботни унча ёқтирмас эди. И. Раҳим, Тақдир.

ОДАМЗОД [a. + ф. آدمزاد — одамдан тугилган, одам боласи; инсон] **1** Одам боласи; инсон, киши, башар. Ер юзида одамзоднинг пайдо бўлиши. ■ Жоҳиллик, қабоҳат, ҳасад одамзоднинг юрагини моғорлатиб, ишдан қолдиради, асл мақсадидан узоқлаштириб, умрининг беҳуда елдек ўтишига сабаб бўлади. С. Нуров, Майсаларни аёз урмайди. Одамзоднинг кўзи ёмон бўлар экан, ука. Ойбек, Танланган асарлар.

2 с.т. Инсоният, одамият.

ОДАМИЙ [a. آدمى — инсоний, инсонларча; тирик мавжудот, инсон] **1** от Чин одам, ҳақиқий инсон, одамларга жонкуяр. Ким, кучук бирлан хўтикка қанча қилсанг тарбият, Ит бўлур, эшак бўлур бўлмаслар асло одамий. Алишер Навоий.

2 сфт. Одамга, чин инсонга хос хусусият. Одамий қиёфа. Одамий фазилатлар.

ОДАМИЙЛИК Одамга, чин инсонга хос хислатлар; чин одамлик, инсонлик. Одамнинг одамийлиги унинг фарзандларига, оиласига ва яқинларига бўлган мурувватидан бошланади. Газетадан. Одамийлик фазилатлари ҳеч қачон магазинда сотилмайди. Газетадан.

ОДАМИЯТ [a. آدميت — инсон табиати; инсон қадр-қиммати; инсоният, инсонийлик] кт. **1** Одамзод; кишилик, инсоният, башар. Мана, ҳар бир ишда садоқат ва матонатни ва ахлоқда хусну назокатни, одамиятда ғайрат ва жасоратни кўриб, тажриба қилган Абдулраҳмонбой ёлғизгина қизи Назокатхонни Олимжонга берди.. Ҳамза, Танланган асарлар.

2 Одамийлик, одамгарчилик. Сизда одамият бўлса, бу ғариби нотавонга раҳм қилмаганингизда ҳам, анови шўрлик болаларнинг зорига раҳм қилишингиз керак эди. М. Исмоилий, Фарғона т. о.

ОДАМКУШ [a. + ф. آدمكوش — одам ўлдирувчи] **1** Одам ўлдирувчи; қотил; жаллод. «Элчи» ўрнига бирорта одамкушни юбориб,

шундоқ суробини тўғрилаб қўйса-чи? Қўлидан келади буларнинг. «Шарқ юлдузи». - Бор — деди Яхшибоев, — Бориб, мени Ёшуллига сот, бирорта одамкушини ёллаб юборсин. М. М. Дўст, Лолазор.

2 кўчма Раҳм-шафқатни билмайдиган; раҳмсиз, шафқатсиз.

ОДАМКУШЛИК Одам ўлдириш билан шуғулланиш. *Одамкушлик, ўғрилик, фирибгарлик, манфаатпарастликни ўзига касб қилиб олган айрим палидларни кирдикорлари ҳам ёвуз ироданинг амалдаги кўринишлари дандир аслида.* «Фан ва турмуш».

ОДАМЛАРЧА *рвш.* Одамлардай, чин инсонга хос бир тарзда, одамийлик билан, одамийлик юзасидан. *Симхаев заводидаги ерлик ишчилар иш ҳақининг оширилишини, жарималарга барҳам берилишини, ишчиларга одамларча муомала қилинишини талаб этиб, иш ташладилар.* М. Исмоилий, Фарғона т.о. *Менга бундай бақирма, одамларча муомала қил!* П. Турсун, Ўқитувчи.

ОДАМЛИК 1 Одам, инсон эканлик, одам бўлишлик.

2 *айн. одамийлик.* У оилавий муносабатлардаги бурчни тушунар ва одамликнинг бошланиши деб қарар эди. С. Зуннунова, Олов. *Йўлчида ўз кучига ишонган, қадр-қимматини баланд тутган камбағал йигитнинг, одамликнинг гурури кучли эди.* Ойбек, Танланган асарлар.

Садқайи одамлик (кетсин)! Одамгарчиликка тўғри келмайдиган ишни қилган кимсага танбеҳ юзасидан айтиладиган ибора. *Қўйинг, Салимаҳон, хафа бўлманг, садқайи одамлик кетсин, у бу яхшиликни билмаса ҳам, халқ билади.* «Ёшлик».

ОДАМОВИ Одамлардан ўзини четга олиб юрадиган, ҳеч кимга қўшилмайдиган, эл-халққа аралашмайдиган. *Ражаб болаликдан камгап, одамови чиқди.* Ҳ. Назир, Индамас. *Йигитлардан кимдир Ҳури ҳақида гап очиб, уни одамови дебди.* Ф. Мусажонов, Ҳури.

ОДАМОХУН [одам + *ф.* آخوند — диний арбоб, муаллим, мураббий] Одамгарчиликни билладиган, одамнинг иззат-ҳурматини бажо келтирадиган, биров учун жонини ҳам аямайдиган; олижаноб. *Одамохун одам.* Одамохун оила. ■ *Абдуваҳоб билан бир суҳбатлашган киши яна суҳбатлашай дейди.* Ажойиб одамохун, шинаванда йигит. Ш.

Тошматов, Эрк қуши. *Барака топсин, янги секретарь жуда одамохун чиқиб қолди.* Уйғун, Дўстлар. *Тавба, хўп аломат одам-да! Бу қўтир дунёда шунақа одамохунлар борлигига ҳеч ақлим етмайди.* М. Исмоилий, Фарғона т.о. *Фарзандларимизнинг одамохун.. бўлишини хоҳласак, уларнинг.. кайфияти билан ҳисоблашиб катта қилайлик.* Газетадан.

ОДАМПАРВАР [а. + *ф.* آدمپاروار — одам-севар, инсонпарвар] *айн. инсонпарвар.* Улар шу қадар одампарвар аёл билан учрашганларидан ниҳоят руҳландилар. П. Турсун, Ўқитувчи.

ОДАМПАРВАРЛИК Одампарвар эканлик, инсонсеварлик; инсонийлик. *Одампарварлик кўрсатмоқ.* ■ *Элмурод саволларнинг мазмунини дарров англаб, раҳбарнинг бунчалик одампарварлиги ва зийраклигидан жуда қойил бўлди.* П. Турсун, Ўқитувчи.

ОДАМСИМОН Одамга ўхшаган, одам тахлитигаги; одамсифат. *Одамсимон маймун.*

ОДАМСИФАТ [одам + сифат] *айн. одамсимон.* *Эртактларда одамсифат ялмоғиз, Ёвуз девлар бўлар эди бегумон.* «Шарқ юлдузи».

ОДАМТАХЛИТ [одам + тахлит] *айн. одамсимон.* *Одамтахлит маймун.*

ОДАМХЎР [а. + *ф.* آدمخور — одам еювчи] **1** Одам гўштини ейдиган; ёввойи, ваҳший. *Бир тоғнинг изасида одамсифат, одамхўр, ваҳший жондорларнинг макони бор эди.* «Ёдгор».

2 кўчма Ўтакетган ёвуз, золим, қотил, жаллод. *Одамхўр золимлар, беклар, хоқонлар Олтин қадаҳларда шароб ичарди.* Уйғун. *Ҳайитгул опа каби аёллар фронт орқасида одамхўр Гитлер уясини ўққа тутганлар.* «Саодат».

ОДАМХЎРЛИК 1 Одамхўрларга хос хусусият; одамхўр эканлик.

2 Ибтидоий тараққиёт босқичидаги одамлар ўртасида кишининг гўштини ейиш одати.

ОДАМШАВАНДА [а. + *ф.* آدمشونده] **1** Одамнинг қадрига етадиган, кишининг хурматини бажо келтирадиган; одамохун. *Одамшаванда йигит.* ■ *-Назираҳон жуда одамшаванда, яхши қўз экан, шу қизни келин қилсак қандай, биларкин, — деди Саодат.* Ф. Мусажонов, Яхши қиз.

2 кўчма Одамга ўхшаган, одам қаторидаги. *Колхоз тузилгандан бери аввалда хор-*

зор бўлиб юрган бирмунча батрак.. одамшаванда бўлиб, қаторга кириб қолган. Ҳ. Шамс, Характеристика. Энди одамшаванда сўзлашайлик, йиги нима ҳожат! А. Қодирий, Меҳробдан чаён.

Одамшаванда қилмоқ Одам қаторига, тахлитига киритмоқ, тарбияламоқ. Ҳуллас, мулла Обидни бошқа эпақага олиш, одамшаванда қилиш Тиктепа меҳнаткашлари учун арзонга тушмади. А. Қодирий, Обид кетмон.

ОДАМШАВАНДАЛИК Одамнинг қадрига етишлик, ҳурмати бажо келтиришлик; одамгарчилик; олийжаноблик. Фидоқорлик, ташкилотчилик, камтарлик, одамшавандалик — буларнинг ҳаммаси талантли олимларга хос фазилат. «Ёшлик».

ОДАТ [ا. عادات — удум, таомил; ўрганиш; малака, одатланиш] 1 Ўрганиш бўлиб қолган ҳаракат, қилиқ. Яхши одат. Ёмон одат. Сенинг одатинг менга маълум. Бу отнинг тишлайдиган одати бор. Одат қилмоқ. Тарки одат — амри маҳол. Мақол. ■ Ҳасаналининг ортиқча берилиб ўйлаган кезде соқолини қайчириб тишлайдиган бир одати бўлиб, ҳозир ҳам соқолини ямлаш билан машғул эди. А. Қодирий, Ўтган кунлар. Ҳар қандай ерга сўрамай-нетмай кириб боравериш оқсоқолга одат эди. П. Турсун, Ўқитувчи.

2 Ота-бободан қолиб келаётган ва кишиларга сингиб кетган ёки янгидан сингиб бораётган расм-русум, удум, тартиб. Эски одат. ■ Йилни ўн икки ҳайвон номи билан аташ одати ва 12 йиллик давр билан вақт ҳисоблаш анъанасига Қадимги Хитойда асос солинган. «Фан ва турмуш». Эрталаб, одат бўйича, Нури тўр рўмол ёпиниб, бешикдаги боладан то кексаларга қадар — ҳаммага салом қилар экан. Ойбек, Танланган асарлар. Ҳатто шундай бир одат борки, кимдир вафот қилса, унинг тобутини кўтариш олдидан, албатта, кўпчилик ўртасида, марҳумнинг олган-бергани борми, деб сўралади. Шукрулло, Сайланма.

Одатдан ташқари Одатдагича эмас, ундан ўзгача; фавқулодда. Саман йўрга йўлга тушди, човига одатдан ташқари бир-икки қайта келиб тушган ачиқ қамчи зарбидан бир онда кўздан ғойиб бўлиб кетди. А. Қодирий, Ўтган кунлар.

ОДАТАН *рви. кт.* Одат бўйича, одатдагича, ҳар вақтдагидек. Одатан кун қиёмга етганда, завод гудок берар эди.

ОДАТДА *рви.* Одат бўйича, одатга кўра. Одатда кичиклар катталарга салом беради. ■ Одатда эр-хотин орасида гап қочганда, бегона ёнида бўлса, данакдек жанжал ёнғоқдек бўлиб кетади. С. Аҳмад, Уфқ. Одатда ишчанлик қобилиятини қайта тиклаш учун 3 соат дам олиш етарли бўлади. «Фан ва турмуш».

ОДАТДАГИ Одатда бўладиган, одат, ўрганиш бўлиб қолган, одат ҳукмига кириб қолган; одатий. Одатдаги иш. Одатдаги муомала. ■ У ҳужрага кириб, яна одатдаги жойига ўлтирди. А. Қаҳҳор, Сароб. Мавлуда қизчасини кўтариб кириб келганда, Марзия хола унинг одатдаги келиши деб ўйлаб, хушнуд қарши олди. С. Зуннунова, Кўк чироқлар.

2 Қоида, қонун кўринишидаги; доимий. Гап бўлақларининг деярли ҳаммаси одатдаги ўрнини ўзгартириб, тургун инверсион ҳолатда бўла олади. «ЎТА».

ОДАТДАГИДАЙ, =дек айн. **одатдагича.** Сарви хола, одатдагидек, ширин бўпти, яхши бўпти деган гапларни айтмади. С. Зуннунова, Кўк чироқлар. Абдурасул одатдагидек жуда барвақт уйғонди ва меҳмон тургунча, нимадир юмуш билан кўчага чиқиб кетди. П. Турсун, Ўқитувчи.

ОДАТДАГИЧА *рви.* Ҳар вақтдагидай, одатда бўладигани каби; одат бўйича. Гузарда одам одатдагича қалин ва суронли эди. Ойбек, Нур қидириб.

ОДАТИЙ Одат бўлиб қолган, одат ҳукмига кирган, одатда бўладиган; одатдаги. Одатий нарса. Одатий байрам. ■ Ҳасанали дастурхон ёзиб, қумғон киргизди. Одатий такаллуфлар билан дастурхон ва чойга қаралди. А. Қодирий, Ўтган кунлар. Бадиий фикрнинг ўзи одатий фикрнинг қайта қурилишидир. Газетадан.

ОДАТЛАНМОҚ Одат қилмоқ, бирор ишга, нарсага ўрганиб қолмоқ. Эрталаб барвақт туришга одатландим. ■ Мирзакаримбой, савдогар назокатиданми ёки одатланганиданми, нонни жуда майда ушатган эди. Ойбек, Танланган асарлар.

ОДАТЛАНТИРИЛМОҚ Одатлантирмоқ фл. мажҳ. н. Бола катталарни ҳурмат қилишга одатлантирилмоғи керак.

ОДАТЛАНТИРМОҚ Одатланмоқ фл. орт. н. Болани ёшлигидан озодаликка одатлантириши керак.

ОДДИЙ [а. عادى — одатдаги, одатга айланган; кундалик; меъёрий; содда] **1** Одатдаги, ҳар вақт бўлиб, учра турадиган, ўрганиш бўлиб қолган. *Оддий машғулот.* ■ *Оддий ёз тонги.. Қуёш Калковуз суви бўйлаб ўсган қалин толларнинг учуда ўйнайди. Ойбек, Танланган асарлар. Юсуфбек ҳожи бекнинг уйланишини ҳам оддий гаплар қаторида эшитиб ўтказди. А. Қодирий, Ўтган кунлар.*

2 Англашилиши, ҳал этилиши осон, унча мураккаб бўлмаган; осон, жўн. *Оддий савол. Оддий масала.* ■ *Биз, катталар, кўпунча оддий ҳақиқатни унутамиз, ёшларга ишончсизлик билан муомала қиламиз.* Газетадан. *Найнов оддий нарсага ҳам ақли етмагани алам қилиб, яна сигаретага ёпишди. Ф. Мусажонов, Ҳиммат.*

3 Кўп қаторидаги, бошқалардан алоҳида ажралиб турмайдиган. *Бир вақт ўртага сочлари ўсган, ўзига ортиқча эътибор қилмай, оддийгина кийинган бир ёш шоир чиқиб, муҳаббат ҳақида шеър ўқий бошлади. Шукрулло, Сайланма.*

4 Сифат жиҳатидан айтарли яхши эмас; жўн; содда, ҳашамдор эмас. *Оддий чит.* ■ *Гулнор оддий қизил кўзли кумуш узукни чўнтагидан олиб, Унсинга берди. Ойбек, Танланган асарлар. Салим аканинг тепаликдаги уйи оддий қишлоқ уйларидан бўлиб, ташқаридан тўғри уйга қирилди. «Ёшлик».*

5 Камтар, камсуқум, одми. *Оддий одам.*

6 Шунчаки, номига. *Бир ҳафтадан кейин қиз Жамолзоданинг устахонасига таширф буюрди. У «Кўккўл тонги»ни кўриб, оғзи очилиб қолди. Ушанда кўргани ҳозирги полотнонинг олдида оддий эрмак эди. «Ёшлик».*

Оддий аскар Унвон олмаган аскар; солдат. **Оддий каср** *мат.* Сурати махражидан кичик мусбат каср. **Оддий моддалар** *ким.* Молекулалари бир хил атомлардан тузилган моддалар.

ОДЕКОЛОН [фр. eau de Cologne — Кёльн (шаҳар номи) суви] Хушбўй моддаларнинг спирт-сувдаги эритмаси; хушбўй исли, роҳатбахш гигиеник суюқлик; атир. *Бинафша ҳиди одеколон. Одеколон сепмоқ.* ■ *Киприкка суртиладиган тушь қуриб қолган бўлса, идишининг ичига бир неча томчи одеколон томишинг керак. «Саодат».*

ОДЕЯЛ [р. одяляло < одеть — ёпмоқ, қопламоқ, ўрамоқ> фл. дан] Ухлаганда одам устига ёпинадиган, жун ёки бошқа матери-

алдан тўқилган кўрпачасимон буюм; аёл. *Нафиса уйғониб кетиб, аллавақтгача хомуш ўтирди. Пишиллаб ухлаётган ўғлини тўғрилаб, устига одяля ёпиб кўйди. Мирмуҳсин, Умид.*

ОДИЛ [а. عادل — адолатли, ҳаққоний; қонунга асосланган] **1** Бирор томонга ён босмай, қонун, адолат юзасидан ҳолисона, ҳаққоний иш тутадиган; адолатли, бегараз, тўғри. *Одил одам. Одил ҳукумат. Одил судья. Одил турмоқ.* ■ *Рихси бундай гапларни, унинг меҳнатини, уни ҳимоя қилиб айтилаётган бундай сўзларни биринчи марта эшитар, бу хилда одил одамлар борлигини энди кўриб турмоқда эди. С. Зуннунова, Олов.*

2 Адолат билан тузилган, адолат руҳи билан суғорилган; адолатли. *Аммо бунинг учун сен таклиф этган кураш фалсафаси эмас, гўзал ва одил қонунлар, ислохотлар керак. Ойбек, Нур қидириб.*

Одил судлов Ҳақиқий ҳолатни аниқлаб, томонлар ўртасидаги келишмовчилик ва низоларнинг фақат суд томонидан ҳал этиб берилиши.

2 Одил (эркаклар исми).

ОДИЛЛИК **1** Одил кишиларга хос хатти-ҳаракат. *Одамлар оғзида Элмуроднинг астойдиллиги, одамшавандаллиги, ақли, билими, одиллиги, ғайрати тўғрисида гап кўпайгач, Тожибой ён босишга мажбур бўлди. П. Турсун, Ўқитувчи.*

2 айн. адолат **1.** *Одиллик билан иш тутмоқ.*

ОДИЛОНА **1** *рвш.* Одиллик билан, адолат юзасидан, ҳақиқатга асосланиб, адолатли равишда; бегараз, ҳаққоний. *Одилона суд қилмоқ. Одилона иш тутмоқ.* ■ [Навоий]: *Менингча, халқнинг талабига одилона қулоқ солмоқ лозим. Уйғун ва И. Султон, Алишер Навоий.*

2 *сфт. вэф.* Адолатли, ҳаққоний; қонунга, ҳуқуққа асосланган. *Одилона ҳукм. Одилона хатти-ҳаракат. Одилона талаб.* ■ *-Вазири бузрук, мен хон ҳазратларининг одилона ишларини халққа кўрсатмоқ тараддудидаман, — деди Пирназарбой. Ж. Шарипов, Хоразм.*

ОДИМ **1** Олға ёки орқага, ўнг ёки сўлга оёқ ташлаб қилинган ҳаракат; қадам. *Кучанинг бурилишида яна бир оз унинг [Отабекнинг] одимлари секинлашса ҳам, лекин олдин-*

лашни қўймай бораверди. А. Қодирий, Ўтган кунлар.

Одим олмоқ Юра бошламоқ, юришда, қадам ташлашда давом этмоқ. *Бирга одим олдик чўққилар сари.* Т. Тўла. **Одим отмоқ** (ёки **ташламоқ**) 1) қадам ташлаб олдинга юриб бормоқ. *Барчиной лангарни маҳкам ушлаб, оҳиста одим отган куйи, тобора илгарилайверди. Одамлар унинг ҳар бир қадамини ҳадиқли бир ҳайрат билан кузатишарди.* Н. Қиличев, Чиғирик; 2) кўчма илгари силжиб бормоқ, илгари босмоқ. *Истиқбол сари ишонч билан одим ташламоқ.* **Одим қўймоқ** 1) қадам босмоқ, юрмоқ. *Бола одим қўйиб кетяпти;* 2) бирор жойга етиб бормоқ, эришмоқ. *Ю. Гагарин тарихда биринчи бўлиб космосга одим қўйди.* **Одимини бўшаштирмоқ** Юришини секинлаштирмоқ, секинлашмоқ. *Йўл бошловчи нарвойифалак, бархан ошиб, илгарилаб борарди. Худди жон керак бўлса, етиб олсин дегандай, одимини бўшаштирмайди.* М. Мансуров, Ёмби. **Одимини тезлатмоқ** Юришини тезлатмоқ, тезроқ юрмоқ.

2 Бир қадам оралигидаги масофа; шу масофага тенг ўлчов бирлиги. *Бир одим. Орамиз икки одимча келади.* ■ *Бойнинг дарвозасидан йиғирма одим наридаги эски, кичкина эшик кишининг гагини келтирувчи товуш чиқариб очилади.* Ойбек, Танланган асарлар.

3 кўчма Ўсиш, ривожланиш суръати. *Қайта қуришининг одимлари тобора шиддаткор бўлиб боряпти.* Газетадан.

4 кўчма Ҳаракат, қадам олиш, юриштириш. *Унинг одими бежо!*

Бир одим Яқин, бир қадам. *Бошқалар учун узоқ, жуда узоқ туюлган район маркази унинг учун бир одим — на қиш изғиринини билади, на саратон жазирамасини.* Н. Норқулов, Тўқнашув. **Одимда, одим жойда** (ёки **сайин**) Ҳар қадамда (тез-тез учраб турадиган нарса ҳақида). *Одимда чойхона.* ■ *[Отабек ва Али] Одим сайин бир ўликка учрар эдилар.* А. Қодирий, Ўтган кунлар. **Одимни санаб босмоқ** 1) секин, имилаб юрмоқ; 2) кўчма эҳтиётлик билан иш тутмоқ. *[Отабек] Одимини санаб босиш, бир чўқиб саккиз ёққа қараш каби эҳтиётликларга.. ўрганиб қолган.* А. Қодирий, Ўтган кунлар.

ОДИМЛАМОҚ 1 Қадам ташлаб юрмоқ, қадам босиб бормоқ, қадам босмоқ. *Аста*

одимламоқ. Тез одимлаб бормоқ. ■ *Ҳақназар машинасидан илдам тушиб, гавжум дарахтлар орасидаги қаҳвахонага ёнма-ён ўрнашган магазин томон одимлади.* «Шарқ юлдузи».

2 кўчма Олға томон жилмоқ, олдинга жилиб бормоқ, илгари босмоқ. *Иш тез суръатлар билан одимламоқда.* *Юртимизда футбол марафони одимламоқда.*

3 Одим билан ўлчамоқ, қадамлаб ўлчамоқ. *Ҳовлининг узунлиги одимлаб чиқилди.*

ОДИМЛОВЧИ: одимловчи экскаватор Таянч қисмларини галма-гал одимлатиб, олға силжувчи экскаватор. *У [Шерали] ҳар тонг одимловчи экскаваторнинг кабинкасига чиқиб, қош қорайгунча канал қазирди.* Ҳ. Фулом, Сенга интиламан.

ОДМИ 1 Ранги-туси, гули кўзга яққол ташланмайдиган; содда, сипо. *Одми чит. Одми кўйлак. Одми кийинмоқ.* ■ *Ёш жувонлар гажак қўйиб, кексароқлари соч фарқини тўғри очиб, одмигина кийиниб, концертга жўнаб кетишди.* С. Аҳмад, Уфқ. *Ўзбек ойим тўйга борадиган хотинлардек ясанган, эғнида одми хонатлас кўйлак, бошида оқ шоҳи дакана, кўзида сурма эди.* А. Қодирий, Ўтган кунлар.

2 кўчма Оддий, содда, камтар. *Одми одам. Одми гап.* ■ *Эломонов атрофга кўз югиртирди. Хона одмироқ экан.* М. М. Дўст, Галатепа қиссалари.

ОДМИГАРЧИЛИК Одмилиқ, соддалиқ, камтарлиқ. *Одмигарчилик қилмоқ.*

ОДОБ [а. آداب — «адаб» (ادب) с. кўпл.] айн. адаб. *Бола — азиз, одоби ундан ҳам азиз.* Мақол. ■ *Ироданинг уятчанлиги бўшанглик ёки ношудликка эмас, ишва ва одобга асосланган эди.* Ф. Мусаёнов, Ҳиммат.

ОДОБЛИ айн. адабли. *Умид жуда одобли йигит экан, бир рюмка ҳам ичкилик ичмади.* Мирмуҳсин, Умид.

ОДОБНОМА 1 Одоб-ахлоққа оид фикрлар баён қилинган китоб ёки дарслик.

2 Ўқув-тарбия муассасаларида одоб-ахлоқ ҳақида таълим берувчи ўқув фани, предмети.

ОДОБСИЗ айн. адабсиз. *Бир-бирига андак одобсиз гап айтишиб, хохолашаётган икки кишидан бири қайрилиб, орқада жадал келаятган Ҳафиза билан Умидга қаради.* Мирмуҳсин, Умид.

ОДОБХОНА Одоб-ахлоқ тарғиб қилинадиган жой. *Чойхона* — юксак ахлоқий меъёрлар тарғиб қилинадиган маскан ҳисобланади. Шундай экан, уни ўзига хос одобхона, тарбия ўчоғи дейиш мумкин. Газетадан.

ОДОШ с.т. Одоқ, тамом. *Одош бўлди. Одош қилмоқ.*

ОДОҚ [оёқ сўзидан] с.т. Охир, пировард, сўнг, ниҳоят. *Шу билан сўзим одоғига етди. У шунча кўп эртақ билардики, кети-одоғи бўлмасди. Янгерар овоз хушчақчақ, ҳосил мўл.. бўлмас одоқ.* Миртемир, Асарлар.

2 Дарё ва сойлар этаги, куйилиш ери. *Дарё одоғи.*

ОЁҚ I 1 Одам, ҳайвон, қуш ва умуман жонли организмлар гавдасининг таяниб туриши ва юриши ёки ўрмалаши учун хизмат қиладиган аъзо. *Ўнг оёқ. Чап оёқ. Ипак қуртининг оёқлари. Отнинг орқа ва олдинги оёқлари. Дўст — бошга, душман оёққа боқадди.* Мақол. ■ *Ўнг оёғимни кўтарсам, чап оёғим ерга кириб кетаётгандек бўлаверади.* Х. Тўхтабоев, Ширин қовунлар мамлақати. У [«фаришта»] атлас қўйлак, лозим кийган, бош яланг, оёқ яланг, ёшгина.. бир йиғит эди. А. Қаҳҳор, Майиз емаган хотин. Шарофат.. ўзига келди-ю, оёқ учида бориб, дарчанинг ёнига чўнқайди. А. Қаҳҳор, Қўшчинор чироқлари.

Оёқ босмоқ 1) қадам ташламоқ, юрмоқ. *Бемор энди-энди оёқ босаяпти. У ўнг оёғини босолмайди.* ■ *Сақлаб сукут оёқ босди. Ҳама жимжит, бошлар қуйи.* Ф. Фулом, Қўкан; 2) кўчма ўйлаб, мулоҳаза билан иш тутмоқ. *Оёғингни билиб бос!*; 3) бирор жойга бормоқ, келмоқ. *Одам оёқ босмаган саҳро. Сизникига оёқ босмаганим бўлсин! Оёқ ости (ёки оёғости) бўлмоқ* Топталмоқ, эзилмоқ, босилмоқ, поймол бўлмоқ, босиб-янчиб ташланмоқ. **Оёқ ости (ёки оёғости) қилмоқ** Топтамоқ, эзмоқ, босмоқ, поймол қилмоқ, босиб-янчиб ташламоқ. *У ўз ҳақини таниган, энди ўзини бировага оёқ ости қилдириб қўймайди.* С. Аҳмад, Уфқ. **Оёқ остида** 1) юриш, қадам босиш лозим бўлган жойда, одамларнинг йўли устида. *Болалар, оёқ остида ўралашманглари!;* 2) ҳар қадамда. *Фалокат оёқ остида.* Мақол; 3) кўчма поймол бўлган бир ҳолда. *Бу замонда.. ҳақиқат оёқ остида қолиб кетмайди.* С. Аҳмад, Ҳукм. **Оёқ устида** Тикка турган ҳолда. *Мана, ўртоқлар, оёқ устида, иш бошида умумий йиғилиш ҳам*

ўтказиб олдик. Ш. Рашидов, Бўрондан кучли. **Оёқда (ёки оёқ устида, оёқ узра) турмоқ** 1) тик(ка) турмоқ. *Оёқда турган ҳолда яна бир оз гаплашиб, сўнг Эшвой жўнаб қолди.* Ойбек, Танланган асарлар. *Отабек ҳолсизланиб, оёқ узра турар.* А. Қодирий, Ўтган кунлар; 2) ўзини тутиб (тик ҳолатда) турмоқ. *У, йўлдан чарчаб келганидан, оёқ устида зўрға турар эди.* А. Қаҳҳор, Қўшчинор чироқлари. **Оёқдан йиқитмоқ (ёки йиқмоқ)** 1) ағанатмоқ, йиқитмоқ; 2) кўчма ишдан, издан чиқармоқ, ишни бузмоқ. *Бу ёлғиз Бўтани беобрў қилиш учун эмас, колхозни оёқдан йиқитиш учун қилинган ифво.* С. Аҳмад, Ҳукм. **Оёқдан қолмоқ** Юролмайдиган бўлиб қолмоқ, бир жойда ўтириб қолмоқ (қарилик, хасталик, бедармонлик сабабли). *—Бошимга бир мушкул тушди, — деб гап бошлади Бозор, — бугун укам бирдан касал бўлиб, ҳам тилдан, ҳам оёқдан қолди.* С. Айний, Дохунда. **Оёққа босмоқ** 1) юра бошламоқ (ёш бола ёки бемор ҳақида); 2) кўчма йўлга, изга тушмоқ, тартибга тушиб, олға босмоқ, ривожлана бошламоқ. *Колхозимиз сал оёққа босгандан кейин, ўзим бориб, сизни олиб келаман.* А. Қаҳҳор, Қўшчинор чироқлари. **Оёққа бостирмоқ** 1) айн. **оёққа турғизмоқ** I; 2) кўчма даволаб юргизиб юбормоқ; 3) кўчма йўлга, изга солиб, ривожлантириб юбормоқ. *Туғонни қуриб, колхозимизни оёққа бостириб олайлик, уйларингга радио тушириб берамиз.* С. Аҳмад, Ҳукм. **Оёққа турмоқ** 1) ўрнидан турмоқ. *Девонбеги.. меҳмонхонага кирганда.. бутун меҳмонхонадагилар оёққа турдилар.* С. Айний, Қуллар; 2) кўчма бош кўтармоқ, қўзғалмоқ, қарши чиқмоқ, оёқланмоқ. *Уша кунин бутун шаҳар оёққа турди.* Ж. Шарипов, Хоразм; 3) кўчма касалдан соғайиб, юриб кетмоқ. *—Яхшиликнингизни асло унутмайман, — деди врачга бемор, — оёққа туриб кетай, сизни хурсанд қиламан.* Газетадан. *Қани энди оёққа туриб кетса-ю, бутун умрини ана шу одамни асраб-авайлаш учун бағишласа.* С. Зуннуова, Кўк чироқлар. 4) кўчма йўлга, изга тушмоқ, яхшиланмоқ. *Колхозимиз қанча оёққа турса, шу бизнинг душманга зарбамиз бўлади.* С. Аҳмад, Ҳукм. **Оёққа турғизмоқ (ёки қўймоқ)** қ. **турғизмоқ.** *Колхозни колхоз қилиб, оёққа турғизгунча, эҳа, қанча қурбон бермадик! Ҳ. Назир, Узр, отахон. Абдулла ука, бутун халқни қандай қилиб оёққа тур-*

ғизиш мумкин? Ш. Холмирзаев, Қахрамоннинг сўнги кунлари.

2 Стол, стул, сўри, каравот каби буюмларнинг ерга таяниб турадиган қисми, пояси. *Дадам сувоғи кўчган деворларга, эски шкаф, оёғи маймоқ стулларга бир қараб қўйди.* С. Сиёев, Ёруғлик.

3 Охир, одоқ. *Кўчанинг бошидан оёғига-ча тош терилган. ■ Подачи поданинг оёқ томонидан чанг ютиб, элан-қаран юриб келаятган сигирни таёғи билан кўрсатиб: «Анави сеники», деди. С. Анорбоев, Ҳам-суҳбатлар. Отабек киши орқасидан кетди, олдинма-кетин, сўзлашмасдангина кўчанинг оёғига қараб борар эдилар. А. Қодирий, Ўтган кунлар.*

4 Фасл, давр ва ш.к. нинг охири, тугаётган вақти. *Куз кунларининг оёғи ва қиш кунларининг боши эди. А. Қодирий, Ўтган кунлар.*

Оёқда қолдирмоқ Орқادا қолдирмоқ. *Мен буларга ўргатармишман.. Мени оёқда қолдириб кетишади бу шумтакалар. Ҳ. Назир, Олмос.*

5 Чет, чекка; қуйи томон; этак. *Экинзорнинг оёғи. Ернинг оёғи.*

6 Уйнинг, хонанинг эшикка яқин ўрни; пойгак; *зид. тўр* II. *Асалхон бир тўда қизлар билан оёқроқда ғуж бўлиб турганини кўрган Сорахон ўртага тушиб, йигитларни чақиб олди. Ҳ. Фулом, Сенга интиламан.*

Бир оёғи тўрда, бир оёғи гўрда Жуда қариб, мункиллаб қолган. *Отамнинг қилаётган ишига қараб, ёшини суриштириб: Тўқсондан ошибсиз, бир оёғингиз тўрда, бир оёғингиз гўрда, тиниб ўтирмайсизми, — дебди. Шукрулло, Сайланма. Енгил (ёки суюқ) оёқ ёки оёғи енгил салб. Бузуқ, фоҳиша. Ёлғиз оёқ йўл қ. ёлғиз. Икки оёғини бир этикка тикмоқ (ёки суқмоқ)* Айтганининг дарҳол бажарилишини талаб қилмоқ, қистовга олмоқ. *Отам уйлантираман деб, икки оёғини бир этикка суқиб олган, ҳол-жонимга қўймайди. С. Аҳмад, Қадрдон далалар. Оёқ олиш* 1) юриш, қадам ташлаш. *Умматали хотинининг оёқ олишига қараб юрадиган бўлса, отлик келаятган Акбарали ундан олдин Азизхонни топади, унга бирор шикаст етказадигандай бўлиб туюлади. С. Аҳмад, Уфқ;* 2) юриш-туриш, хатти-ҳаракат. *Унинг оёқ олиши бежо. Оёқ остидан чиқмоқ* Тўсатдан пайдо бўлиб қолмоқ. *Душман учун ку-*

тилмаган бу фалокат худди оёқ остидан чиққандек бўлди. Н. Сафаров, Жангчи Шокир. Уша катта иш кеча оёқнинг остидан чиқиб қолди. С. Аҳмад, Уфқ. Оёқ тирамоқ Ўз айтганида қаттиқ туриб олмоқ, бошқа гапга кўнмаслик. *Болаларнинг бўйи етиб, тўй бошлаймиз деганда, қизи қурмагур бирдан оёғини тираб олди. Ойбек, О.в. шабадалар. У уйлансам, Маҳбубага уйланаман, бўлмаса, фронтга ариза бериб кетаман, деб икки оёғини бир этикка тиқиб туриб олди. С. Аҳмад, Уфқ. Оёқ узатмоқ (ёки чўзмоқ)* 1) кўнгли тинчимоқ, ғам-ташвишдан холи бўлмоқ. *Офтоб ойим ҳамон оёқ узатмади. А. Қодирий, Ўтган кунлар;* 2) кўчма ўлмоқ, жон бермоқ. **Оёқ узмоқ** Келиб-кетишни тўхтатмоқ, тамоман келмаслик. *Бўри Пайғамов, Нусратбекнинг бу ердан оёғи узилиб, гаплар бости-бости бўлгунча, панароқда турди. С. Нуров, Майсаларни аёз урмайди. Оёқ учи билан (ёки учида) кўрсатмоқ* Менсимаслик, назарга илмаслик. *Чўри қиз бошимизга чиқиб, бизларни оёқ учи билан кўрсатади. Ойбек, Танланган асарлар. Одамни оёқ учида кўрсатиб, калака қилади. Ҳ. Назир, Ўтлар туташганда. Оёқ учида* Секин, товуш чиқармай. *Шерали оёқ учида келиб, девор тағида бир ёнбошда ухлашгагина етадиган жойга ўтирди. С. Кароматов, Олтин қум. Оёқ чиқармоқ* Сўроқсиз ҳар тарафга бора берадиган бўлиб қолмоқ, тартибдан чиқа бошламоқ. *Бизнинг хотин тил чиқарган десам, оёқ ҳам чиқарипти. А. Қаҳҳор, Оғриқ тишлар. Оёқ қўймоқ* Бирор ишга киришмоқ. *Унинг розилигини олмасдан туриб, бу ишга оёқ қўйиш мумкин эмас. А. Қодирий, Ўтган кунлар. Оёғи куйган товукдек* Безовталиқ билан, зир югуриб, ўзини ҳар ёққа уриб. *Одамлар оёғи куйган товукдек пишиллаб югурдилар. Ойдин, Ўзидан кўрсин. Оёғи олти, қўли етти* Шодликдан ўзини ҳеч қаерга сиздиrolмайди, гоят хурсанд. *Зайнаб оёғи олти, қўли етти бўлгани ҳолда, эрини тўрт қават кўрпача устига ўтқазиб, ёнига учта нар ёстиқни қўйди. А. Қодирий, Ўтган кунлар. Оёғи осмонда с. т.* Қулади, йиқилди, иши чаппа. *Лашкарбоши уста бўлса, душман оёғи осмонда. Мақол. Оёғи осмондан бўлди (ёки келди) с.т.* Қулади, йиқилди, иши чаппасига айланди. *Чекинадиган жой йўқ, орқада жаҳаннам, бир қадам чекинсак, оёғимиз осмондан келади. Ш. Ра-*

шидов, Бўрондан кучли. **Оёғи тортмаслик** Боргиси келмаслик. **Оёғига болта урмоқ қ. болта.** **Оёғига бош урмоқ (ёки қўймоқ)** ёки **оёғига йиқилмоқ** Паноҳ тортиб ёки нажот излаб келмоқ; сажда қилмоқ. **Оёғидан тортмоқ с.т.** Жиноятда қатнашган шерикларини айтиб бериб, жавобгарликка торттирмоқ. **Оёғини осмондан келтирмоқ с.т.** Кулатмоқ, афанатмоқ, ўрнидан туширмоқ, ишини чаппасига айлантирмоқ. **Оёғини қўлга олиб с.т.** Тез, ғириллаб. *Шартта ўрнимдан туриб, қалпоқчамни олдим-да, оёғимни қўлга олиб, уй томон югурдим.* «Ёшлик». **Осмонга чиқсанг, оёғингдан тортаман, ерга кирсанг — қулогингдан** Мендан қочиб қутулолмайсан, қарерга қочсанг ҳам, бари бир, тутиб оламан. *[Солиҳбой:]* **Менинг олтинларим шундай зийрак жосус.. шундай улуг ҳокимки, ерга кирсанг — қулогингдан, осмонга чиқсанг, оёғингдан тортиб, менинг қўйнимга олмадай қилиб солиб қўяди!** Ҳамза, Бой ила хизматчи. **Оғир оёқ** Ҳомиладор. **Совуқ оёқ айн. шум оёқ қ. шум.** *Кенг соҳилингда кезди шум оёқ, Синдирди нечанинг бошида таёқ.* Файратий. **Юзига оёқ қўймоқ (ёки тирамоқ)** Кимсаннинг хоҳишига қарши, унинг ҳурмати билан ҳисоблашмай иш қилмоқ. *Турғун акам билан раиснинг юзларига қандай қилиб оёқ қўя оламан.* Н. Сафаров, Ҳаёт мактаби. *Сен юзингга оёқ тираб кетган ўша бети қаттиқ хотинингникига бордингми?* С. Аҳмад, Уфқ. **Ўз оёғи билан** Ўз хоҳиши, ихтиёри билан, ўзича. *Дард аригиси келса, табиб ўз оёғи билан келади.* Мақол. **Ўз оёғидан йитмоқ** Ўз ихтиёри, хоҳиши билан йўқолмоқ, йўқ бўлиб кетмоқ.

ОЁҚ II эск. 1 Коса, идиш.

2 айн. **қадаҳ.** *Аччиғланма, бек йигит.. ширингина таом қилиб бераман, бир-икки оёқ бўза ҳам келтираман.* Ойбек, Навоий. *Новча йигит сузган бўзадан озгина татиб кўриб, биринчи оёқни Султонга узатди.* Ф. Гулом, Шум бола.

ОЁҚДУМЛИЛАР Қанотсиз ҳашаротларнинг туркуми. *Оёқдумлиларнинг Урта Осиё деҳқончилик минтақаларида 50 га яқин тури маълум.* «ЎзМЭ».

ОЁҚЛАБ: икки (ёки қўш) оёқлаб Иккала оёқ билан. *Икки оёқлаб тепмоқ* (ҳайвон ҳақида). **Тўрт оёқлаб** Икки қўл ва оёқда (эмакламоқ). *Тўрақул тошбақадай тўрт оёқлаб, эмаклаб кетди.* А. Кўчимов, Ҳалқа. *Набираси йигитнинг елкасига эски тўнни тў-*

шаб, миниб олди-да, энди тўрт оёқлаб чопасиз, дея талаб қилди. Х. Тўхтабоев, Йиллар ва йўллар.

ОЁҚЛАМОҚ 1 Охирига етиб қолмоқ, охирламоқ. *Куз оёқлаб қолиб, ҳолдан тойгану, лекин ўз ўрнини ҳали қишга бўшатиб бермаган эди.* С. Нуров, Нарвон. *Кўклам оёқлаганда келиб, [ўрик] еб кетинглар.* Газетадан.

2 кам қўлл. **Тарқалмоқ, овоза бўлмоқ, «юрмоқ».** *Эл орасида уни Тошкентга олиб кетиб отиб ўлдиришгани, кейин жарликка улоқтиришгани ҳақидаги гаплар кўп оёқлабди.* Газетадан.

3 шв. **Йўлга кирмоқ, юра бошламоқ** (гўдак ҳақида). *Қишлоқ боласи оёқлабдики, шу тепага тирмашади, шу тепада ўйнаб ўсади.* Н. Норқобилов, Бекатдаги оқ уйча.

ОЁҚЛАНМОҚ Бош кўтармоқ, кўзгалмоқ, қарши чиқмоқ. *[Мансур Меҳрига:]* *Камбағал батрақлар биз томонда, ҳозир ҳамма уларга [душманга] қарши оёқланган.* 3. Саид, Н. Сафаров, Тарих тилга кирди.

ОЁҚЛАНТИРМОҚ Бош кўтаришга даъват этмоқ, қарши қўймоқ. *Сиз марғилонлик оғайниларни қипчоқларга қарши оёқлантирмоқчи бўласиз.* А. Қодирий, Ўтган кунлар.

ОЁҚЛИ 1 Оёғи бор. *Тўрт оёқли ҳайвон.* *Узун оёқли чигиртка.* ■ *[Кампир]* «Мишмиш» ларни ҳар вақт эзмалик билан сўзлар эди: «..Фалончининг келини тўрт оёқли бола тугибди!» Ойбек, Танланган асарлар.

2 Пояли, тагида кўтариб турадиган қисми бор. *Икки оёқли скамейка. Уч оёқли стул.* ■ *Уста кулол Ҳамроқулнинг аҳволини кўриб, дарров боққа олиб кирди ва қайрағоч остидаги чўян оёқли зангор эшакка ўтқизиб қўйди.* А. Қаҳҳор, Томошабоғ.

Оғир оёқли айн. оғир оёқ қ. оёқ 1.

ОЁҚСИЗ Оёғи йўқ, оёғидан маҳрум бўлган. *Уни бир уямд урушдан қўлсиз, оёқсиз бўлиб қайтган ҳамқишлоқларини кўргани етаклаб борди.* Т. Ашуров, Оқ от.

ОЁҚЯЛАНГ 1 Оёқ кийимсиз, оёғига ҳеч нарса киймаган. *Нигина кимсасиз даштда ортидаги дарё томон оёқяланг юриб кетди.* Мирмуҳсин, Темур Малик. *Бир тўда болалар чуғурлашиб, боғдан чиқиб келишди. Оёқяланг, дўмбоқ, офтобда тобланган.* С. Нуров, Нарвон.

2 кўчма Камбағал, қашшоқ. *Тоштемур ҳам кейинги тоифа оёқяланглардан бўлиб,*

Мирзачўлга борувчилар тўпига қўшилди. Ҳ. Фулом, Феруза. -Ҳим, ана шунақа оёқялангдан кўрқ-да, — бошини лиқиллатди Хўжаёр. А. Нарзикулов, Ҳаёт ёлқини.

ОЁҚ-ҚҮЛ 1 Оёқ ва қўл(лар). Оёқ-қўлини боғламоқ. Оёқ-қўли чаққон одам. ■ Ойша холанинг оёқ-қўли бўшашиб, стулга ўтириб қолди. С. Зуннунова, Кўк чироқлар.

2 кўчма с.т. Кўмакчи, дастёр. Ўғлимиз — бизнинг оёқ-қўлимиз.

ОЁҚ-ҚҮЛЛИ с.т. Чаққон, эпчил, уддабурон. Моҳира она! Сиз Насиба холанинг қизини кўрганмисиз? Оёқ-қўлли, пазанда, қизмисан — қиз-да! «Ёшлик».

ОЖИЗ [а. عاجز — нимжон, бўшашган, кучсиз, заиф; нўноқ, ноқобил; кўрмайдиган, кўр] 1 Жисмоний жиҳатдан кучсиз; заиф, беқувват, нотавон. Ожиз кампир. ■ Шундай кезларда Сирож қандайдир нотавон, ожиз бир кишига айланади-да, бошини ғамгин эгиб, соатлаб жойидан қимирламай қоларди. С. Зуннунова, Олов. Гулнор эса, оёқда туришига ожиз, тинкаси қуриган бир хаста каби, умидсизлик билан яна секунггина ўтирди. Ойбек, Танланган асарлар.

2 кўчма Бирор иш қилиш учун ҳеч қандай чора-илож қўлидан келмайдиган; иложсиз, ноиллож. Исфандиёр деб аталмиш ёвуз ва манфур махлуқ қаршисида ҳамма ожиз эканлигини ўйлаб, баттар эзилди. С. Сийёев, Аваз. Мадаминхўжа унинг кўзларидаги илтижони тушунди, лекин.. хурофот, бидбат олдида ожиз эди. М. Исмоилий, Фарғона т.о. Биров бировга мурувват қилишдан ожиз бўлган ўша замонда Ҳамро ота ва унинг оиласига ўхшаш инсофли одамлар ҳам бор эди. Н. Сафаров, Катта қарвон йўлда.

3 кўчма Қурби, кучи етмайдиган, кучсиз. Тошкентимиз — бағри кенг, гўзал шаҳар. Унинг табрифига унча-мунча қалам ожиздир. Газетадан.

4 Бўш, кучсиз, паст. Йўл четида бўғзига пичоқ тортилган бир буқача жон таслим қилаётган бўлса керак, орқа оёғини ҳар замон, бир ожиз силкитиб қўярди. С. Аҳмад, Жимжитлик. У [Қумри] ярани боғлаётганда, Ботирали ожиз товуш билан бир ингради-ю, яна жимиб қолди. Ҳ. Фулом, Машъал.

5 Хира, кучсиз; ёрқин эмас. Фонарнинг хира шишасидан атрофга ожизгина қизғиш шуъла ёйилди. Ҳ. Фулом, Машъал.

6 Қуриш қобилиятини қисман ёки батамом йўқотган; кўр. Кўзи ожиз одам. ■

Майна Абдуваҳобнинг ёшланган ожиз чап кўзига, мулойим тикилиб турган ўнг кўзига назар ташлади. Ш. Тошматов, Эрк қуши. Бавзан тушлик овқат вақти, кўпинча шидан кейин, тўртта-бешта кўзи ожиз эркак-аёллар йиғилишиб, ўзро гурунглашиб қолишарди. Шукрулло, Сайланма.

ОЖИЗА [а. عاجزه] 1 Ожиз аёл.

2 эск. с. т. Қиз фарзанд, қиз. Мирзакаримбой қичқирди: -Мулла Абдишукур, эртага ожизамизга тўй келади, марҳамат қилинг. Ойбек, Танланган асарлар.

ОЖИЗЛАНМОҚ Ожиз бўлиб қолмоқ, ожизлик қилмоқ. Касалдан кейин ожизланиб қолди. Кўзлари ожизланиб қолди.

ОЖИЗЛИК Жисмоний жиҳатдан кучсизлик, заифлик; бирор иш қўлидан келмаслик, нотавонлик. Унинг гўзаллиги таърифидан қаламим ожизлик қилади. ■ Яхшибоев дўстларининг кўрқоқлигидан завқланди, ёйилиб кулди — уларнинг ожизлигини ўзича тушунган ва кечирган бўлди. М. М. Дўст, Лолазор. Қайнатанинг пўнисаси куёвнинг шахтини қайтаришга ожизлик қилди. М. Исмоилий, Фарғона т.о.

ОЖИЗ-НОТАВОН, ожизу нотавон Ожиз ва нотавон, жуда ҳам ожиз. [Солиҳ махдум:] Жанобларига ожизона узр.. Аввало камина ожиз-нотавон, афтодаҳол, пушти паноҳ жиҳатларидан содир бўлган улуг марҳаматга сазовор ва лойиқ эмасдирман. А. Қодирий, Меҳробдан чаён.

ОЖИЗОНА 1 рвш. Ожизларча, заиф ва нотавонларча. [Кампир] Оғир юк остида эзилган каби, узун бир «уҳ» тортиб, ожизона, шикоят оҳанги билан ўз-ўзига деди: «Эй, дунёйи бевафо!» Ойбек, Танланган асарлар.

2 сфт. Итоаткорона, ҳақирона ёлвориш билан қилинган, ўтинчли. Ожизона узр. ■ Узимнинг содиқона бу хизматим эвазига жанобларидан ожизона ўтинчим шулки, бу сирни сизларга билдирувчи мен бўлганлигимни ўзларидан бошқа кимса билмасин. А. Қодирий, Ўтган кунлар.

ОЗ 1 Сон ёки миқдор жиҳатдан унча кўп бўлмаган; кам. Оз вақт. Ҳовузда сув оз. Гап кўп, кўмир оз. Мақол. Оз емак — соз емак. Мақол. ■ Яқинда табибларга кўрсатган эдим, қонингиз оз, қимиз ичинг, деди. А. Қодирий, Ўтган кунлар.

2 Етарли эмас, кифоя қилмайдиган, қаноатланарли бўлмаган; кам. Бир йигитга

етмиш ҳунаро оз. Мақол. *Мақтанма, ғоз, ҳунаринг оз.* Мақол. *Кўп бўлса — кетар, оз бўлса — етар.* Мақол. ■ *Икковимиз ўтказадиган олтин умрнинг олтин минутларини ҳар қанча олтин соат санаса оз!* А. Қаҳҳор, Оғриқ тишлар. *Электр қуввати шу қадар оз эдики, насос моторларни айлантиришга ҳам ожизлик қилиб қолди.* С. Аҳмад, Уфқ.

3 рви. Баъзи-баъзида; гоҳо-гоҳо, камдан-кам. *Анвар ўз тенги болалар билан оз алоқа қилар, уларга кам аралашар ва ортиқча ўйнаб-кулмас.. эди.* А. Қодирий, Меҳробдан чаён. *Қизлик вақтида Нури уларнинг кулбасига жуда оз чиқар эди.* Ойбек, Танланган асарлар.

Бир оз Озгина, андак. *Бир оз тузи кам бўлибди.* ■ *Робия хола бир оз букчайганича, майда қадамлар билан шитиллаб, супага йўл бошлади.* С. Зуннунова, Олов. **Кўпи кетиб, ози қолди** Яримдан кўпи кетиб, ундан озроқ миқдори қолди (қийинчилик кунлар, оғир иш ва ш.к. ҳақида). *- Кўпи кетиб, ози қолди, — овутиди уни Усмонжон, — ҳеч нарса эмас, бу қийинчиликлар ўтиб кетади.* С. Зуннунова, Олов. **Оз бўлмаса** Нақ бўлмаса; сал бўлмаса; нақ, худди. *- Оз бўлмаса, ҳаром ўлар экан, жонивор, — дейди у [йўловчи], бир тутам яшил беда билан пичоғини артаётиб.* П. Турсун, Ўқитувчи. **Оз қолди** Сал қолди. *Ҳар сафар момақалдироқ гулдураганда, «ойи», деб додлаб юборишига оз қоларди.* С. Анорбоев, Ҳамсўхбатлар. *Боя синфда болалардан бири ҳимоя тилаб: «Ҳурматли ўқитувчим!» деб юборишга оз қолди.* М. Исмоилий, Фарғона т.о. **Энг ози** Кам деганда, энг ками, ақалли. *Уятни билсангиз, энг ози шунинг андишаси керак эмасми?* А. Қодирий, Ўтган кунлар.

ОЗАЙМОҚ I Миқдор, ҳажм жиҳатидан камаймоқ, камиб қолмоқ. *Боғда мевалар озайган вақти.* Ариқнинг суви озаydi. ■ *Суви озаyиб қолган самоварнинг жигиллаши, чой учун қайта дастурхон ёзаётган Рузвоннинг гилам устидаги шип-шип юришигина жимликни бузар эди.* С. Зуннунова, Олов. *Кетиб-кетиб озаyиб қолган кишилар гуруллаб, ичкари киради.* П. Қодирий, Уч илди.

2 Кам учрайдиган бўлиб қолмоқ; камаймоқ. *Шундан бери фикри сал ўзгарди чоғи, гарчи аввалгидай «девонайи Машраб» дейишини қўймаса ҳам, камситишлари озаydi.* О. Ёқубов, Эр бошига иш тушса.

3 Пасаймоқ, тушмоқ. *Кечга яқин Гулнорнинг руҳи анча енгиллашди, иссиғи озаydi.* Ойбек, Танланган асарлар.

ОЗАР кт. айн. **озарбайжон.** *Мен Ереван кўчасида озар қизин учратдим, Умрим бўйи илк мартаба дуч келдим мен рўёга.* А. Орипов, Йиллар армони. *Тарихи, тили, маданияти халқимизга жуда яқин бўлган озарлар бизни яхши кутиб олишди.* Газетадан.

ОЗАРБАЙЖОН қ. **озарбайжонликлар.** *Озарбайжон тили. Озарбайжон аёл.* ■ *Қиз кўринишдан озарбайжон бўлса керак, русча гапирар, гап-сўзларидан анчагина саводли эканлиги кўриниб турар эди.* Шухрат, Шинелли йиллар.

ОЗАРБАЙЖОНЛИКЛАР Озарбайжонда яшовчи, туркий тилда сўзлашувчи халқ, Озарбайжоннинг туб аҳолиси.

ОЗАРИЙ Озарларга, Озарбайжонга тегишли, оид. *Озарий мусиқа. Турғунали, ҳар галгидай, пенсия олганида шаҳардан келтирадиган совғасини — бу гал шапалоқдай-шапалоқдай катта қизил гулли озарий рўмол эди — елкасига ёпиб, белидан қучди.* А. Мухтор, Кумуш тола.

ОЗГИНА I Миқдор жиҳатидан жуда ҳам оз; қиттак. *Озгина сув беринг.* ■ *Атайин сизни ичинг деб суюқ ош қилдим. Озгина бўлса ҳам ичангиз, дармон бўлади.* С. Зуннунова, Олов.

2 Сал, андак, жиндай. *Озгина ухлаб олай.* ■ *Сизда озгина одамгарчилик бўлганда, бир муштипарнинг дилини вайрон қилмасдингиз.* Т. Ашуров, Оқ от. *Ҳовлининг кунботар томонида, харобаликдан озгина берида бўлган бояги йўлакка тираб солинган икки даричалик бир уй [бор эди].* А. Қодирий, Ўтган кунлар.

ОЗДИР-КЎПДИР айн. **озми-кўпми.**

ОЗДИРМОҚ I **Озмоқ** I фл. орт. н. *Кўйларни оздириб қўйибсиз.*

ОЗДИРМОҚ II **Озмоқ** II фл. орт. н. *Йўлдан оздирмоқ.* ■ *Ҳафиза, кўзингизни очинг!* У [Умид] қаллоб сизни йўлдан оздирмасин тагин! Мирмуҳсин, Умид.

ОЗИБ-ЁЗИБ рви. с.т. *Зўрға имкон ёки вақт топиб, замоннинг зайли билан. Озиб-ёзиб бир кеннойисини кўриб келмоқчи эди, бу ниятидан ҳам қайтди.* Ў. Усмонов, Қисмат. [Саломат:] *Озиб-ёзиб бир томошага борадиган бўлганингизда, иш-пиши чиқиб қолибдими-а?!* И. Аҳмедов, О. Толипов, Ким айбдор?

ОЗИБ-ТЎЗМОҚ Озиб, касалманд ҳолга келмоқ, илгариги ҳолатини йўқотмоқ. *Бултур қишининг бошлари бўлса керак, кучқувватини алақандай кўринмас жонзот сўриб олгандек, бирдан озиб-тўзиб, тирсиллаган юзи, оёқ-қўлининг териси сўлишиб, ранги олинди, бурунги ғайратидан асар ҳам қолмади.* «Ёшлик». *Дўсталининг кўзига от бир зумда озиб-тўзиб кетгандек кўринди.* Т. Ашуоров, Оқ от.

ОЗИҚ 1 Овқат бўладиган маҳсулот, овқатли дон-дун; емиш. *Озиқ маҳсулоти. Бир кунлик йўлга чиқсанг, бир ҳафталик озиқ ол!* Мақол. *Ёзининг ёзиғи — қишининг озиғи.* Мақол. ■ *Йигитлардан бири дастурхон ёзиб, йўлга олган озиқларини ўртага қўйди.* А. Қаҳҳор, Мастон. *Нима, озиқ биттами, қозон осмадингиз!* Ойбек, Танланган асарлар.

2 Ҳайвонлар овқати, ем-хашак. *Ҳайвонлар учун қишга озиқ тайёрламоқ. Қуртларга озиқ бермоқ.*

3 Ўсимликлар ўсиш жараёнида ердан оладиган моддалар. *Ўсимликларга қўшимча озиқ бериш. Илдиз озиқ берса, новда кўкарар.* Мақол.

Жон озиғи ёки жонга озиқ Роҳат. *Яхши сўз — жон озиғи, ёмон сўз — бош қозиғи.* Мақол. ■ *Майин эсган насими, obu ҳавоси, Бўлур жонга озиқ завқу сафоси.* Ҳабибий. **Маънавий (ёки руҳий) озиқ** Кишига маънавий завқ бағишлайдиган, унинг маънавий жиҳатдан ўсишига, такомиллашувига хизмат қиладиган восита. *Гўзал адабиёт — руҳий озиқ.* А. Қаҳҳор, Сароб. **Озиқ тиш** Киши ва ҳайвонларнинг овқат чайнаш, эзиш учун хизмат қиладиган тиши; жағ тишлари.

ОЗИҚА айн. **озиқ.** *Арабларда хурмо энг муҳим озиқалардан бири ҳисобланади.* К. Маҳмудов, Қизиқарли пазандалик.

ОЗИҚЛАНМОҚ 1 Озиқ, овқат еб олмоқ, овқатланмоқ. *Отлар озиқланди.* ■ *Юлғич ва ўғриларнинг кун кўриш усули битта: ўзгалар ҳақидан озиқланади.* «Ёшлик».

2 Ўсиш жараёнида озиқ олмоқ (ўсимликлар ҳақида).

3 кўча Илҳом олмоқ, руҳланмоқ. *Ҳозирги медицина халқ табобати илдизларидан озиқланиши керак.* «Ёшлик». *Шоирнинг юраги туйғулардан озиқланади.* Газетадан.

ОЗИҚЛИ 1 Озиғи, озиқ-овқати бор, озиқ-овқат билан таъмин этилган. *Озиқли от ҳоримас, қариндошлик қаримас.* Мақол.

2 Таркибида озиқ моддалари бор, озиқ бўладиган. *Озиқли моддалар.*

ОЗИҚЛИК Озиқ бўладиган, озиқланиш учун яроқли; емишли. *Озиқлик экинлар.*

ОЗИҚ-ОВҚАТ Турли озиқ ва овқатлар, емишлар. *Озиқ-овқат ҳозирлаш. Озиқ-овқат магазини. Озиқ-овқат маҳсулотлари. Озиқ-овқат саноати корхоналари.* ■ *Пичан ўришга ажратилган одамларни тўплаб, керак-яроғини, бир ҳафталик озиқ-овқатни олди.* С. Анорбоев, Оқсой. *Озиқ-овқат магазинларига бориб келган Холиса белига пешгир тутиб, эри ёқтирадиган таом тайёрлашга киришди.* С. Нуров, Майсаларни аёз урмайди.

ОЗМИ-КЎПМИ Маълум миқдорда; маълум даражада. *Озми-кўпми, ёрдами теги.* ■ *Мажлис қизиб кетди. Қатнашувчиларнинг кўпчилиги, озми-кўпми, яхшими-ёмонми, ишқилиб, гапирди.* А. Қаҳҳор, Қанотсиз читтак. *Муҳаббат бу пулга ўхшаган нарса, пул шохда ҳам, гадода ҳам озми-кўпми бўлади.* Шукрулло, Сайланма.

ОЗ-МОЗ рви. **1** Озгина, жиндай, унчамунча. *Оз-моз ишлаб турибмиз. Оз-моз мурч сепмоқ.* ■ *Нихоят, Барно соғайиб, касалхонадан чиқди. Оз-моз оқсоқланиб бўлса-да, мактабга қатнай бошалди.* «Ёшлик».

2 Бир оз, сал-пал. *Бир оздан кейин Ботирали ҳам оз-моз гандираклар чиқди.* Ш. Ризо, Қор ёғди, излар босилди. *Мана энди оз-моз тилим чиқди, гапирадиган бўлдим.* М. Исмоилий, Фарғона т. о.

ОЗМОҚ 1 Эти қочиб, озғин тортмоқ; озғинланмоқ, ориқламоқ. *Бир терининг ичида қўй неча бор семириб, неча бор озар.* Мақол. *Озган от аргимоқ бўлмас.* Мақол. ■ *Умиднинг ёқаси титилиб кетган ўша эски костюми-ю, шимининг таги йиртилиб, ямоқ тушганига, озиб, чаккалари туртиб чиққанга қараб, ҳайрон бўлган бўлса керак.* Мирмуҳсин, Умид. *Бу орада у озиб, шундоғам сўлгин юзлари баттар заъфарон бўлиб кетди.* С. Аҳмад, Уфқ.

ОЗМОҚ 2 Тўғри йўлдан тоймоқ, алашмоқ. *Кенгаш қилган эл озмас, кенг бичилган тўн тўзмас.* Мақол. *Эгри — озади, тўғри — ўзади.* Мақол. ■ *Исловотхоналари.. тараққий топган мамлакатларда адашган қизлар, озган жувонлар кўпичча Фуод афанди тутган йўллар билан қўлга туширилар эди.* М. Исмоилий, Фарғона т. о.

Ақлдан (ёки эсдан) озмоқ қ. ақл. Ширмонхон қимир этмай ўтирар, унинг ифодасиз кўзларига қараб Маҳмуд, ақлдан озиб қолмадими, деб кўрқиб кетди. С. Зуннунова, Олов. Яна қайтиб олдинга ўгирилганимда, ёнимдаги аёлнинг йўқлигини кўриб, ақлдан озаёздим ва телбалардек гандираклаб, ҳовли юзида у ёқдан-бу ёққа юзурганча, уни излай бошладим. «Ёшлик». **Йўлдан озмоқ** 1) йўлини йўқотиб қўймоқ, бошқа йўлга кириб кетмоқ, адашмоқ; 2) кўчма нотўғри йўлга кирмоқ, нотўғри, сохта фикрга эргашмоқ, адашмоқ. Мен бола-чақали одам, янглишиб, йўлдан озиб, сизга уйланган эканман, никоҳимдан чиқдингиз, мени кутманг. Ойбек, Танланган асарлар. Жар чақирилиб, «Худо йўлидан озган осий Аваз»га юз дарра буюрдилар. Аваз сураткашиникидан жилмай, жон ҳовучлаб ётаверди. С. Сиёев, Аваз. **Кўнгли** (ёки юраги) озмоқ Кўнгли айнимоқ, беҳуд, беҳузур бўлмоқ, ўзини нохуш сезмоқ. Юрагим озиб кетди. ■ Отамурод ўзини қўлга олмоқчи, яна олға интилмоқчи бўларди, лекин бораан сари кўнгли озиб, кўзи тиниб кетарди. М. Мансуров, Ёмби.

ОЗМУНЧА рвш. (кўпинча бўлишсиз фл. билан) Оз эмас, анча-мунча, кўпгина. Тошкент билан Кўқон ораси озмунча йўлми? ■ Бошқалар қилган ишни нега мен қилолмайман, бекор ўтирдандан, бекор ишла, деб ҳаракат қилиб, ўқишни ҳам битириб, ишни ҳам уддалаб кетганлар озмунчами? Шукрулло, Сайланма. Утган йилги қиш озмунча боғларни қуритдимиз? С. Зуннунова, Олов.

ОЗОД [ф. آزاد – эркин, хур; асоратдан қутулган; ғам-ташвишдан холи; олийжаноб; саховатли] 1 Ўз эрки, ҳақ-ҳуқуқи ўз қўлида бўлган, озодликка эришган; эркин, хур. Озод ўлка. Озод мамлакат. Озод меҳнат. ■ Тоза ҳаво, тоза сув, Озод Ватан сеники. Ф. Фулом. Бу аёллар тенг ҳуқуқли, эркин, озод, хур бир мамлакатда ўсмоқдалар. «Саодат».

2 Қулликдан озод этилган, эркинликка чиққан, асоратдан қутулган. Орёл, Белгород шаҳарлари душмандан озод қилинганда, Москвада биринчи марта берилган салют одатга айланди. С. Зуннунова, Олов.

3 Ўз ҳолига, майлига қўйилган, бўшатиб юборилган, ҳеч қандай мажбурият билан боғланмаган; бўш. Эшоннинг заҳарханда таънасини Элмурод ерга тикилганича, индамай

тинглади. Бу ғап унга: «Сен озодсан, кета бер!» бўлиб эшитилди. П. Турсун, Ўқитувчи. Мажлисага қатнашишдан ўзларини озод ҳисоблаган кишилар бу мажлис ва унинг белгиланган вақтидан олдин бошланганига ҳам ўзларича маъно беришди. А. Қаҳҳор, Кўшчинор чироқлари.

4 Холи. Ташвишдан озод кишилар. ■ Қаламни ҳам бу ғиди-бидидан озод қилишни мувофиқ кўрдим. А. Қодирий, Ўтган кунлар.

5 рвш. вэф. Эркинлик билан, бемалол, даст. Йиғит.. билазимдан озод кўтариб, тандирдан суғуриб олди. Ф. Фулом, Шум бола. Ғайбаров, қўлида маъбуда қизни [ҳайкални] ердан озод кўтарди, маҳкам бағрига босдида, юзу кўзидан ўнди. «Ёшлик».

6 рвш. вэф. Тик, тикка, кўкракни кериб. Ингичка, узун оёқларини чаққон босиб, чиройли бошини озод кўтариб келаётган қашқа саман бирдан паҳса девор томонга бурилди. М. Исмоилий, Фаргона т. о.

Озод турмоқ Дадил ўриндан турмоқ, шахдам кўтарилмоқ. Устидан алак чопонини иргитиб, озод туриб кетган йиғит.. тузоққа тушган беданадек питирилаб қолди. Ҳ. Расул, Адолат.

7 ким. Қўшилмаган, бирикмаган ҳолдаги. Озод кислород.

Озод қилмоқ Қутқармоқ, халос қилмоқ. Ишлаб чиқариш жараёнларининг автоматлаштирилиши кишиларни бир қатор оғир юмушлардан маълум даржада озод қилади. «Фан ва турмуш». **Озод қўймоқ** Бўшлатмоқ, жавоб бермоқ (ўқишдан). Нигор ойим ҳозиргина [ўқувчи] қизларини озод қўйиб, кўкрак боласини бағрига олган эди. А. Қодирий, Меҳробдан чаён.

8 Озод (эркаклар исми).

ОЗОДА [ф. آزاد – эркин, хур; ғам-ташвишдан холи; саховатли] 1 Ифлосланмаган, кир тегмаган, кирланмаган; тоза, покиза. [Хотинлар] Эски, лекин озодагина кўрпа ёпилган сандал атрофига тиқилишиб, секин-секин суҳбатлашишарди. С. Зуннунова, Гулхан.

2 Супуриб-сидирилган, тоза. Уй махсус меҳмонлар қутиладигандек озода ва саришта. П. Турсун, Ўқитувчи. Яшил уфққа туташган тўппа-тўғри ва ниҳоятда озода тош йўл. А. Қаҳҳор, Кўшчинор чироқлари.

3 Ўзини ва ўзига қарашли ҳамма нарсани тоза тутадиган, тозалikka риоя қиладиган;

саранжом-саришта. *Озода хотин. Соғ юрай десанг, озода бўл. Мақол.*

4 Озода (хотин-қизлар исми).

ОЗОДАГАРЧИЛИК Озодаликка риюя этиш, ҳар нарсени ва ўзини озода, пок тутиш.

ОЗОДАЛИК Тоза, покиза, саранжом-саришта бўлиш; тозалик, покизалик. *Уйдаги тартиб ва озодалик унинг баҳрини очиб юборган эди. С. Зуннунова, Кўк чирок.*

ОЗОДЛИК I Эркинлик, ҳурилик; ҳеч қандай мажбурият билан боғланмаганлик. *Миллий озодлик. ■ Бахт озодлик ва фаровонликдир.* Газетадан. ..*Чунки озодликни ҳамма ҳам чапак чалиб, хурсандчилик билан кутиб олмаслиги табиий.* Газетадан. *Аҳмад Хусайннинг бутун дили, фикри, эътиқодича, ҳақиқат озодлик демакдир.* Ойбек, Нур қидириб.

Озодликдан маҳрум қилиш Жиноят содир этган шахсни махсус ажратилган тарбиявий муассасаларда мажбурий сақлашдан иборат жазо тури. **Озодликка чиқармоқ** Асоратдан, қулликдан чиқармоқ, эркинликка эриштирмоқ, эрк бермоқ. **Озодликка чиқмоқ** Асоратдан, қулликдан чиқмоқ қутулмоқ; эркинликка эришмоқ; қамоқдан чиқмоқ, озод бўлмоқ. *Баҳромбекнинг кўз олди қоронғилашиб кетди. Олти ярим йил! Озодликка чиқсам ҳам, шунча йил умр кўрармиканман? Бу ерда қолсам, қаерларда хор-зор бўлади жасадим.* «Ёшлик».

2 тар. Эски мактабда ҳар пайшанба куни домлага ёки отинбибига ўқувчилар томонидан келтириладиган ҳақ; пайшанбалик (пул, нон, дон каби). -*Домлагаям озодлик опкелдинми? — деди бола дам дастурхонга, дам тугунга тикилиб. П. Турсун, Ўқитувчи. — Бувингга бориб айт! Агар озодлик келтирмасанг, янги сабоққа тушмайсан!* — деди домла. Н. Сафаров, Султон бўзчининг неваралари.

ОЗОКЕРИТ [юн. ozo — ҳид таратаман + kegos — мум] Тоғ муми — битумлар гуруҳига мансуб минерал (мой, крем ва ш.к. тайёрлашда ишлатилади. *Фарғона воҳасида озокерит конлари мавжуд.* Газетадан. *Эритилган шифобахш озокерит иссиқликни узоқ вақт сақлаб туради ва уни аста-секин баданга ўтказилади. У оғриқ қолдириш хусусиятига эга.* «ЎЗМЭ».

ОЗОН [юн. ozon — ҳид таратувчи] ким. Кислороднинг бир кўриниши, ўзига хос ҳиди бўлган газ (зўр оксидланиш ва сувни зарарсизлантириш, мой ва қоғозни оқартириш хусусиятига эга.) *Агар стратосферада озон қатлами бўлмаса, юқори энергияга эга бўлган қисқа тўлқинли фотонлар Ер сатҳига етиб қолар, ундаги ўсимлик ва ҳайвонлар бундай юқори энергияли нурга бардош беролмаган бўлар эди.* «ЎЗМЭ».

ОЗОНОСФЕРА [озон + юн. sphaera — шар] Ер сиртидан 10–50 км баландлиқда жойлашган озонли атмосфера қатлами. *Озоносфера маълумотлари Кўёш радиациясининг Ер атмосферасида ютилиш табиатини ўрганишда жуда муҳим.* «ЎЗМЭ».

ОЗОР [ф. آزار — ранж-алам, хафалик; ҳақорат, таҳқир; ғам-ғусса; хижолат бўлиш] Кимсага етган, етказилган жисмоний ёки руҳий азоб, жабр. *Зумрад эрининг бугунги озорини ўйлаб, кўнгли оғриди ва жаҳл билан тескари ўгирилиб, тушакни бошига тортди. С. Сиёев, Отлиқ аёл. Умузроқ ота кўндан буён юрак касалидан озор чекарди. Ш. Рашидов, Бўрондан кучли.*

Озор бермоқ (ёки етказмоқ) Азоб бермоқ, қийнамоқ ёки ранжитмоқ. *Шаффоф уни ҳақорат қилмаса ҳам, кишининг нафсониятига озор етказадиган гапларни айтиб чиқиб кетди.* «Ёшлик».

ОЗОРИЖОН [ф. آزارجان — жоннинг озори, жон ачитувчи] Жонга озор берувчи, қийновчи, ранжитувчи.

ОЗОРЛАНМОҚ Ранжимоқ, хафа бўлмоқ. *Замира ортиқ кулмай қўйди. —Бас энди, — деди озорланиб. М. М. Дўст, Галатепага қайтиш. Гапнинг оҳангидан чолнинг дили озорланганини сезиб, аста ғингшийди. Н. Норқобиллов, Бекатдаги оқ уйча.*

ОЗСИНМОҚ Оз, етарли эмас деб билмоқ; кифоя эмас деб топмоқ; кўнгли тўлмаслик. *«Ёпирай, озсиндиёв, қурғур» деб қўрқдим. —Ариза ўринласа, яна хизмат қилармиз, мирзабоши. А. Қодирий, Меҳробдан чаён. [Алпомши ўлига қараб:] Ўз юртинда, отананг бағрида юришингни озсинма. «Ёдгор».*

ОЗУРДА [ф. آزرده — хафа бўлган, ранжиган; хўрланган; қайғуга botган, маъюс] кт. Озор кўрган, ранжиган. *Озулда бўлмоқ. Озулда қилмоқ (этмоқ). ■ —Сизнинг Оқ-жарга бадарга бўлганингизни қўшнилардан эшитиб, қаттиқ озулда бўпти, кўп фарёд*

чекибди! — деди Мавлавий Йўлдош Муқимийга. С. Абдулла, Мавлоно Муқимий. Бу шомолнинг тортқилишдан озурда баргинг шитирлашими ё зарғалдоқ қанотларидан чиққан сасми, билмадим. «Ёшлик».

ОЗУҚА айн. **озиқ**. *Ғўза шоналаш ва гуллаш даврида озуқани кўп талаб қилади.* ■ Дон маҳсулотлари орасида гуруч Осиё халқларининг асосий озуқаси ҳисобланади, бинобарин, дунё аҳолисининг тенг ярми гуруч билан тирикчилик қилади. К. Маҳмудов, Қизиқарли пазандачилик.

Озуқа рациони Молларга маълум вақтда (кун, ой, мавсумда) бериладиган ем-хашак. Чорва молларини тўйимли озуқа билан боқиб, озуқа рационига риоя қилиш маҳсулдорликни оширишнинг муҳим омилдир. Газетадан.

ОЗУҚАБОП Озуқа учун қулай, мос, яроқли. Булар — ҳам доривор моддаларга бой, ҳам озуқабоп ўсимликлардир. «Фан ва турмуш».

ОЗЧИЛИК Кишилар мажмуининг оз қисми, белгиланганидан ёки мўлжалланганидан кам бўлаги. Озчиликни ташкил этувчи миллатлар. ■ -Вақт ўтди, биз озчиликмиз, — деди ҳазрат тушкун овоз билан. К. Яшин, Ҳамза.

ОЗҒИН I Эти қочган, этдан тушган; ориқ. *Озғин мол. Озғин сигир.* ■ *Нега Зайнаб семиз-у, Кумуш озғин?* А. Қодирий, Ўтган кунлар. Бола озғин юзчасини тириштириб.. чўзилиб борар эди. М. Исмоилий, Фарғона т. о.

2 Қотма, камгўшт; чувак, ингичка. *Мадаминхўжа эса бошини солинтириб, мумдек эриб ўтиради. Фақат озғин гавдаси ашулага монанд чайқалади.* М. Исмоилий, Фарғона т.о. -*Дўстларим, — деди у, озғин бармоқларини қайчи қилиб ўйнар экан.* Ҳ. Фулом, Машғал.

ОЗҒИН II кам қўлл. Йўлдан озган, тўғри йўлдан чиқиб кетган; айниган; бузуқ. *Гоҳи маҳаллар юраги сиқилиб, тоғни ҳам ташлаб кетгиси келар, лекин шундай фикрга йўл қўймаслик учун ўзини айблаб, дарҳол бу озғин фикрини ўздан қувлар эди.* М. Исмоилий, Фарғона т.о.

ОЗҒИНЛАНМОҚ Ориқламоқ, озмоқ. [*Кумушининг*] *Бурунги тўлалиги кетиб, озғинланган ва лекин бу озғинлик унинг ҳуснига камчилик бермай, билъакс юқорилатган.* А. Қодирий, Ўтган кунлар.

ОЗҒИНЛИК Ориқлик, қотмалик; озғин бўлишлик. *Озғинлик раис одамга ярашмайди, десам, озғинлик соғломликнинг биринчи белгиси, дейди.* «Ёшлик».

ОЗҒИРМОҚ Йўлдан оздирмоқ, адаштирмоқ, йўлдан урмоқ. *Бизларга пирлик қиласан, Тағин келиб энди мунча Шайтондай бўб озғирасан!* Фозил шоир.

ОИД [а. عائد — қайтувчи, қайтиб келувчи] кўм. Тегишли, тааллуқли, доир. *Ишқ-муҳаббатга оид шеърлар. Тарихга оид китоблар.* ■ *Орада ўтган шу икки ой ичида Аҳмад-жон.. ҳарбий техникага оид кўп нарсалар ўрганди.* А. Қаҳҳор, Олтин юлдуз.

ОИЛА [а. عائله — бола-чақа, хонадон; уруғ, авлод] **1** Эр-хотин, уларнинг бола-чақалари ва энг яқин туғишганларидан иборат бирга яшовчи кишилар мажмуи; хонадон. *Аҳил оила. Санъаткорлар оиласи. Оила бошлиғи.* ■ [*Эшвой*] *Камбағал бўлишига қарамай, Йўлчининг оиласига.. ёрдам кўрсатар эди.* Ойбек, Танланган асарлар. *Оиланинг ҳар бир аъзоси ўз иши, юмуши билан машғул.* Ҳ. Фулом, Машғал. *Бировга қизиқиш, оила қуриш.. Бу гаплар Замирани чўчитар, Очил уни ёмон йўлга бошлаётгандай туюларди.* П. Қодиров, Уч илдиш.

Оилани бузмоқ Эр-хотинликка барҳам бермоқ, ажралмоқ. *Жаҳл устида уришиб қолган бўлсангиз, эҳтимом, ярашиб қоларсиз. Қайнатангиз, қайнатангиз келиб қолишар? Ошлангизни бузмане!* Мирмуҳсин, Умид.

2 кўчма Бир мақсад, маслак билан бирлашган кўп кишилар, халқлар, мамлакатлар. *Ўзбекистонда турли миллат вакиллари бир оила бўлиб яшамоқдалар.* Газетадан. -*Бутун аскарлар бир оила, аҳил, меҳрибон ва қалин дўстмиз, — деди Бектемир.* Ойбек, Куёш қораймас.

3 Ўсимликлар ва ҳайвонлар систематикасида тузилиш жиҳатидан бир-бирига ўхшаш, келиб чиқиш жиҳатидан ҳам ўзаро яқин бир неча уруғни ўз ичига олган гуруҳ. *Дуккаклилар оиласи. Ўрдактумшуклилар оиласи.* ■ *Турп бутагулдошлар оиласига мансуб икки йиллик, илдизмевали кўкат ўсимлиги дейишади ботаниклар.* К. Маҳмудов, Қизиқарли пазандалик.

4 Қардош тиллар гуруҳи. *Олтой тиллар оиласи. Сом-ҳом тиллари оиласи.*

5 с.т. Рафиқа, хотин. *Ошам мактабда ўқитувчи.*

ОИЛАВИЙ Оилага мансуб, оилага тегишли; оилада бўладиган. *Оилавий аҳволингиз қандай? Оилавий ўтириш.* ■ Саидийни кўрганيدا, ўзини ҳатто ўз турмушидан, оилавий ҳаётидан жуда мамнун қилиб кўрсатишга тиришар эди. А. Қаҳҳор, Сароб.

ОИЛАЛИ Оиласи, бола-чақаси ва рўзғори бор; уйланган (хотин олган ёки эрга теккан). *Самовар — келди-кетди жой. Бу ерда сиздек оилали одамга бир кун эмас, бир соат ҳам туриш малол келади.* П. Турсун, Ўқитувчи. *Бу чоққача, балки оилали бўларди, балки она бўларди.* С. Зуннунова, Кўк чироқлар.

ОИЛАПАРВАР Ўз оиласини, бола-чақасини севувчи, у ҳақда доимо ғамхўрлик қилувчи. *У киши ниҳоятда оилапарвар, кўнгли кенг, ҳеч бир ишдан эринмайдиган инсон.* Газетадан.

ОИЛАСИЗ Хотин олмаган ёки эрга тегмаган; ёлғиз. *У ўзини оиласиз яшашга кўниктирмақчи бўларди, кунини ҳаёл суриш билан ўтказарди.* С. Зуннунова, Кўк чироқлар.

ОИЛАЧИЛИК 1 Оила, рўзғор ташвишлари, оила икир-чикирлари. *Салим ака ҳовли этагида жойлашган айвондаги сигир ва қўйларга назар ташлаб: -Оилачилик экан, мана шуларсиз қишлоқда ҳаёт йўқдек туюлади, — деди қулиб.* Газетадан.

2 Оиладаги тартиб ва муносабатлар.

3 салб. Кадрлар танлашда, уларни ишга жойлашда, нарса, ҳақ ва ш.к. ни тақсимлаш каби жараёнларда ўз яқинларини тўплаш ва уларга имтиёз беришдан иборат ғайриқонуний ҳаракат. *Оилачиликка қарши курашиш.*

ОЙ 1 (О — катта) астр. Кўёшдан нур олиб, ёғду сочувчи самовий жисм, Ернинг табиий йўлдоши. *Ўн тўрт кунлик ой. Тўлин ой. Ой нури. Ой чиқди. Ой ботди. Ойнинг юзидаги доғлар. Ойнинг Ер атрофида айланиши. Ойни этак билан ёпиб бўлмайди.* Мақол. ■ *Кечки гуллар очилиб турибди. Кўкда танҳо ой кезмоқда.* И. Раҳим, Чин муҳаббат.

Ой юз Чиройли юз, гўзал юз. *Ой юзинг қора чиммат зулмидан қутултирғил. Чиқ қоронғи турмушдан, нур ичинда жавлон қил.* Ҳамза. **Ой деса — ойга, кун деса кунга ўхшайди** Жуда гўзал, жуда ҳам чиройли.

2 Астрономик йилнинг ўн иккидан бирига — Ойнинг Кўёш атрофидан бир марта айланиб чиқиш муддатига яқин вақт оралиғи; ўлчов бирлиги: 28, 29 30 ёки 31 кунлик

давр. *Ой боши. Май ойи. Бир йил — ўн икки ой. Бу орада уч ой ўтди. Ёз ойлари ҳам ўтиб кетди. Ойнинг ўн беши қоронғи бўлса, ўн беши ёруғ.* Мақол. ■ *Ўғлим бечора ой ўтмасдан бўзчининг моксидек қатнаб турса.* А. Қодирий, Ўтган кунлар.

Ойдан ой, кундан кун ўтиб Анча вақт ўтиб. *Ойдан ой, кундан кун ўтар дарёдил, Менга танҳо бўлган сен йўқсан моҳим.* Ҳабиб Абдуназар, Анжир гули. **Ой-кун(лар) ўтиб** Вақти, умри, ҳаёти кечиб. *Шу йўсин оромсизлик ва бесаранжомлик ичида [Отабекнинг] ой-кунлари ўтиб турар эди.* А. Қодирий, Ўтган кунлар.

3 Уч-тўрт кунлик ой шаклидаги безак ёки белги. *Мезана устидаги ой.*

4 Аёллар исми таркибига киради ёки аёллар номига қўшилиб, эркалаш, хурматни билдиради. Мас.: *Ойпошиша, Ойқиз, Ойтўти, Ойниса; Турсуной, Ширмоной, Кундузой.*

Ой бориб, омон кел Сафарга кетаётган кимсага яхшилик тилаб айтиладиган ибора, оқ йўл тилаш. *У [Элмурод] йўлда кетар экан.. «Ой бориб, омон келинг!» деб, оқ йўл тилаб қолган Гулсумни хийлагача ўйлаб ётди.* П. Турсун, Ўқитувчи. **Ой кўрмоқ** Ҳайз кўрмоқ. **Ойи тўлди** Туғиш вақти етди. *Кумушнинг ойи тўлмасдан оқ, у [онаси] бешик ясатиш билан машғул эди.* А. Қодирий, Ўтган кунлар. **Ой-куни яқин** Туғиш арафасида, олдида.

ОЙБА Эрнинг ораси (хотинига нисбатан) ва унга муножаат шакли.

ОЙБОЙ унд с., с.т. Вой-бўй.

ОЙБОЛДОҚ Исирганинг олтин, кумуш, мисдан уч-тўрт кунлик ойга ўхшатиб ишланган, нақшсиз, шокиласиз бир тури. *Олтин ойболдоқ. Ойболдоқ тақмоқ.*

ОЙБОЛТА 1 тар. Болтанинг тиғи ярим ой шаклида, икки учи гажак бўлиб қайрилиб келган, дастаси узун бир тури; табар (Хонлик даврларида ҳарбий қуроли сифатида ишлатилган). *Елкаларига ойболта қўйган соқчилар шаҳар дарвозаси ёнида саф тортган эди.* М. Осим, Элчилар.

2 Болтанинг қассоблар гўшт чопадиган ва рўзғорда ишлатиладиган кичик бир тури. *Мамасидиқ қўлидаги кетмонни ёнига суриб қўйиб, ойболта билан юлғун илдизини бир уришда узиб ташлади.* С. Маҳкамов, Гулистон.

ОЙГУЛ Кўп япроқли мойчечак шаклидаги нақш. *Ойгулни наққошлар бахт-иқбол*

рамзи сифатида қўлаб келганлар. Бухорода ойгулни «нақши моҳий» деб юриштишади. «ЎЗМЭ».

ОЙДА-ЙИЛДА *рви.* Узоқ вақт давомида бир марта; гоҳ-гоҳ, онда-сонда. *Ойда-йилда бир кўринади.* ■ -Ўзимиз ойда-йилда бир палов еймиз, — Ибодулла бошидаги баргикарам духоба дўпписини тузатар экан, гап кўшди. Х. Фулом, Машғал.

ОЙДИН 1 *сфт.* Ой чиқиб, ҳамма ёқ ой нури билан ёриган, ёруғ. *Ойдин кеча.* ■ *Кеча ойдин, қабристон тип-тинч.* А. Қодирий, Ўтган кунлар.

Кўр (ёки хира) ойдин Булутлар орасидан ўтиб тушаётган ой ёғдуси ва шундай ёғду билан ёришган кеча. *Хира ойдинда қоп-қора ҳайкалдай бўлиб бир отлиқ кўринди.* А. Қаҳҳор, Қўшчинор чироқлари. **Сутдек ойдин** Бегубор, ёп-ёруғ ой ёғдуси ва шундай ёғду билан ёришган кеча. *Менглибой чакмонини елкасига ташлаб, кўйлардан хабар олгани ташқарига чиққанда, сутдек ойдин эди.* С. Аҳмад, Юлдуз.

2 Ой нури, ёғдуси. *[Отабек] Ичидан тақинган ханжарини қинидан суғуриб олди-да, дамини ойдинга солиб боқди.* А. Қодирий, Ўтган кунлар. *Олисадаги уйларнинг томлари ойдинда йилтирайди.* Ойбек, О.в. шабадалар.

Ойдинда оёғим қилади Менга ҳеч қийинчилиги йўқ, кўзимни юмиб ҳам қила оламан.

3 кўчма Аниқ, кўриниб, билиниб турган, равшан. *Бу масала ҳамма учун ойдин.* ■ *[Нор:] Ҳаммага қоронғи бўлса ҳам, менга ойдин.* Ҳамза, Паранжи сирлари. *Булар бари, оға, офтобдай ойдин гаплар, лекин шуларни Яхшибоевнинг ҳам ўйлаган-ўйламаганлиги мени бир оз таажжубга солади.* М. М. Дўст, Лолазор.

3 Ойдин (хотин-қизлар исми).

ОЙДИНЛАШМОҚ 1 Ой ёғдуси билан ёримоқ. *Тун ойдинлашди.*

2 кўчма Аниқ-равшан бўлмоқ, очиқ-ойдин, тушунарли бўлмоқ; ечилмоқ. *Аҳвол ойдинлашди. Масала ойдинлашди.* ■ *Комилжоннинг фикри ойдинлашган сари кўпчилик Комилжон томонга ўта бошлади.* И. Раҳим, Ихлос. *Ёлғон туманга ўхшайди. Туман тарқагач, ҳамма нарса ойдинлашади.* «Саодат».

ОЙДИНЛАШТИРМОҚ Аниқлик киритмоқ. *Биз ушбу музейимизга қўйиладиган экспонатлар, ноёб ҳужжатлар орқали ана*

шу тарихий ҳақиқатни бир қадар ойдинлаштириш ниятидамиз. Газетадан.

ОЙДИНЛИ Ой чиқиб турган, ҳамма ёқ ой нури билан ёришган; ойдин. *Қайғурма.. Бу кеча сенинг қайғули кечаларингнинг энг кейингиси ва ойдинли ҳам шеъриятли тунларингнинг арафасидир, бегим!* А. Қодирий, Ўтган кунлар.

ОЙДИНЛИК Ойдин эканлик, ёришганлик, ёруғлик; аниқлик. *Кечанинг ойдинлиги. Масалага ойдинлик киритмоқ.* ■ *Конференция муаммоларга аниқлик, ойдинлик киритади.* Газетадан.

ОЙДИНСИЗ Ой чиқмаган, ой ёғдуси билан ёримаган. *Ер оппоқ қор. Ҳаво очиқ. Ойдинсиз кеча.* А. Қаҳҳор, Сароб.

ОЙИ *с.т. шв.* Она. — *Бир оздан кейин чиқиб, ойм билан сўрашинг, — деди Қумуш.* А. Қодирий, Ўтган кунлар. — *Ойижон, сиз ҳеч ташвиш тортманг, чарчадим, холос, — жавоб берди Нури.* Ойбек, Танланган асарлар.

Катта ойм 1) ота ёки онанинг онаси; 2) этн. катта хотин (кичик хотиннинг болаларига нисбатан); 3) кекса хотинга нисбатан мурожаат шакли. *Йўлчи пишқирган отини тўхтатиб, кичқирди: — Катта ойм, ийгитчаларни хурсанд қилинг!* Ойбек, Танланган асарлар. **Келин ойм** қ. **келиноий. Кичик ойм** этн. Кичик хотин (катта хотиннинг болаларига нисбатан).

ОЙИМ 1 *с.т.* **Ойм** с. 1-ш. эгалик шакли. *Бун и [узукни] ёш қиз вақтимда.. ойм сотиб олиб берганди.* Ойбек, Танланган асарлар.

2 тар. Оқсуяқларга мансуб аёлларга мурожаатда уларнинг номига, унвонига қўшиб ишлатилган ёки унинг таркибий қисмини ташкил этган сўз. *Моҳлар ойм.* ■ *Нигор ойм ҳозиргина [ўқувчи] қизларини озод қўйиб, кўкрак боласини бағрига олган эди.* А. Қодирий, Меҳробдан чаён. *Катта уйда эшон оймлар ҳам Тўрахўжабойнинг хотини, келинлари.. ўтиришпти.* Ойбек, Танланган асарлар. *Бир вақтлар мен ҳам хоним оймларга чўри эдим.* А. Қодирий, Ўтган кунлар.

3 Умуман, аёл кишига мурожаат қилганда, ҳурматлаш, улуғлаш маъносида унинг номига қўшиб айтиладиган сўз. *Раҳима ойм, Мастура ойм* каби.

4 с.т. Танноз, нозанин.

Ойим қиз Қизларга ҳурмат юзасидан ёки кесатиқ билан мурожаат шакли. *{Заргаров:}*

Аравани қуруқ олиб қочманг, ойим қиз! А. Қахҳор, Оғриқ тишлар.

ОЙИМПОШША 1 Ҳурмат юзасидан ёки кесатиқ билан аёлларга нисбатан ишлатиладиган сўз. [Домла Фотимага:] Бир оз тобим йўқ деб ёзибсиз, нима бўлди, ойимпошша? Ҳамза, Тухматчилар жазоси.

2 Ойимпошша (хотин-қизлар исми).

ОЙИМСУПУРГИ 1 Поясидан супурги қилинадиган, дони қизил бошоқли ўсимлик.

2 Шу ўсимлик поясидан боғланган супурги.

3 *кўчма салб.* Супургидай эгилиб-букиладиган, мулойим одам ҳақида. [Мўмин ака] Нечундир, тўсатдан кирпи қиёфасидан ойимсупурги қиёфасига кирган, мулойимлашиб қолган эди. О. Ёқубов, Бир фельетон қисаси.

ОЙИМТИЛЛА с.т. 1 Меҳнатга тоби йўқ, қўлини совуқ сувга урмайдиган аёл; оқсуяк аёл. Ойимтилла бу келин, Аҳволига бир қаранг, Тирноқ қизил, лаб қизил, Усмандан қошлар таранг. Ф. Комилов. [Ҳаётхон:] Унга мен эмас, ойимтилла бўлиб, уйда ўтирадиган хотин керак-да. Р. Раҳмонов, Бахт билан учрашув.

2 Енгилтак, танноз аёл. -Бу ойимтилла тоза енгилтак экан-ку, - деди ўзига-ўзи Қумри. Мирмуҳсин, Ажрим.

3 *кест.* Сояпарвар, иш ёқмас, хотинчалиш эркак. Уша ойимтиллаларнинг ишини қилмайди деб ўйлайсизми, нархимизни кўпам ерга ураверманг. С. Аҳмад, Қадрдон далалар.

ОЙИМЧА 1 тар. Оқсуяклар, шоҳлар, хонлар оиласига мансуб ёш хотин. Ойимчалар сунбул сочини тарашди, атрофдан қирқ канизи келиб қарашди. «Нигор ва Замон».

2 *эркл.* Нозанин, танноз. Боғда очилган гул гунчалар. Ҳолин билмас бир нечалар. Олинг гулгун ойимчалар, Болам алла-ёр, алла-ёр! «Ширин билан Шакар». -Дўстим, кечга меҳмонларни жўнатиб, иккаламиз, ойимчалардан ғалатисини топиб, гаит қиламиз. -Кўлингни бер, шоввоз! Ойбек, Танланган асарлар.

3 *кест.* айн. **ойимтилла 1.** Кеча келиб, бугун хўжайинлик қилишни сенга ким қўйибди, ойимча. А. Кўчимов, Ҳалқа. Ҳа, ойимча, эрга теккан бўлсам, хўп қипман, ажаб қипман. Эрга тегиб, ёмон бўлганим йўқ. И. Раҳим, Чин муҳаббат.

ОЙИМҚОВОҚ Ошқовоқнинг эртапишар бир тури. Хуллас, икки-уч йил ичида пешонаси икки ҳиссага кенгайиб, боши ойимқовоқдек ялтиради-қолди. Н. Аминов, Ёлғончи фаришталар.

ОЙИНА [ф. آينه — кўзгу; шиша] айн. **ойна.** Гўзал Нурхон, боқиб ойинага биздан уялдингми? Ҳамза. Ой олади дала тўшидан, Денгиз - кенг оламга сайқал ойина. Миртемир.

ОЙЛАБ рвш. 1 Бир неча ой ичида, кўп ойлар давомида. Москва, Петербурга кўп қатнадим, ойлаб у шаҳарларда қолдим. Ойбек, Танланган асарлар. Бу ўтиришдан сўнг у [Отабек] бир ойлаб бўзахонага келмай кетди. А. Қодирий, Ўтган кунлар. ..ойлаб кутубхонаю лабораториялардан бери келмай, сўнгги имтиҳонга пухта ҳозирлик кўрадиган, битирув ишини ёзишга қиришадиган талабчан ёшлар ҳам оз эмас. Газетадан.

2 Ойлар билан. Вақтни ойлаб ўлчамоқ.

ОЙЛАБ-ЙИЛЛАБ рвш. Ой ва йиллар бўйи, ойлар ва йиллар мобайнида. Ойлаб-йиллаб кутмоқ.

ОЙЛАР: ойлар шафтоли шв. айн. луччак шафтоли қ. луччак 1.

ОЙЛИ 1 Ой чиқиб, ёғду сочиб турган; ойдин. Ойли кеча. Ойли тун. ■ Баъзан кўшиқ тинглаб қолдим ойли тунларда. Файратий. Тун шу қадар ойли эдики, Топиларди игна йўқолса.. Қандай ухлар, ойли тун қизнинг Юрагига ҳаяжон солса? Уйғун.

2 Ой шаклидаги гули, нақши бор. Дўппи тикдим чиройли. Гуллари ярим ойли. «Кўшиқлар».

ОЙЛИК 1 Ой мобайнида давом этадиган. Бир ойлик отпуска. Тўққиз ойлик йўл.

2 Бир ойма мўлжалланган. Ойлик режа. ■ «Кўшчинор» тўғон участкасида.. икки ойлик иш қолди. А. Қахҳор, Кўшчинор чиқоқлари.

3 Ҳар ойда чиқадиган. Ойлик журнал.

4 Ойига тўлган, маълум бир (муддат) ой яшаган. Бир ойлик қўзи. Икки ойлик бола.

5 Бир ой мобайнида қилинган меҳнат учун тегадиган ҳақ, маош. Неча пул ойлик оласиз? ■ Бокс тўғарагининг тренери сифатида у бекорга ойлик олянтими? А. Обиджон, Аканг қарағай Гулмат.

6 Бирор ижтимоий ишни бажариш, тадбир ўтказиш учун белгиланган бир ой муддат. Китоб ойлиги. Шаҳарни ободонлаштириш ойлиги.

ОЙЛИКБАЙ Ҳар ойда қилинган ишга ҳақ тўлаш шарти билан ёллаш-ёлланиш усули. *Мен ҳам ҳаммоликни ташладим-у, ўзимни ойликбай ишга урдим.* П. Турсун, Ҳўқитувчи.

ОЙЛИКХҲҮР кам қўлл. Ойлик билан яшовчи; ойлик (маош) олувчи. *Оилада нечта нонхўр бўлса, ҳаммаси ойликхўр. Эртага барвақт уйғот!* Газетадан. [Тожибой:] -Ишни биз қиламиз-у, ойликнинг каттасини булар ейди. *Ойликхўрлар!* — деб тўнғиллаб ҳам кўяр эди. П. Турсун, Ҳўқитувчи.

ОЙМА-ОЙ Ҳар ойда мунтазам. *Нусратбек маошидан ўз харжига кераклигини ажратиб, қолганини хотинига ойма-ой юбориб турди.* С. Нуров, Майсаларни аёз урмайди.

ОЙМОМА с.т. Ой. *Маҳваш яна оймома сиймосида пайдо бўлди-ю, аста-секин юлдузлар мисолида жимир-жимир қилиб, узоқлашиб кетди.* Т. Ашуров, Оқ от. *Унга кўксин тутди, нурга кўмилиб, Туллари — оймома, кунлари — қуёш.* Х. Даврон, Қақнус.

ОЙНА [ф. آئینه] 1 Одатда дераза, эшик кўзларига ўрнатиш учун ишлатиладиган яси шиша. *Бир тахта ойна. Дераза ойнаси. Ойна заводи. Ойна синиги. Ойна кесмоқ.* ■ *Туманланган дераза ойналарида йирик қор парчалари оқ капалакдай кўринади.* Ойбек, Танланган асарлар.

2 с.т. Дераза. *Қор-ку майли-я, бўронига нима бор, — деди блиндаж ойнасидан қараб турган Нормат.* И. Раҳим, Чин муҳаббат. *-Икки томон тоғ.. — деди Ҳафиза машина ойнасидан баланд тоғларга ағрайиб, — мунча чиройли!* Мирмуҳсин, Умид.

3 Қаршисидаги нарсаларни акс эттирадиган, одатда киши ўз аксини кўрадиган, орқаси сирланган махсус шиша; кўзгу. *Башаранг қийшиқ бўлса, ойнадан ўпкалама.* Мақол. ■ *Дахлиздаги ойна олдида сочларини тараётган Холиса уларга сохта жаҳл аралаш ғурур ва бир оз меҳр билан киноя қилди.* С. Нуров, Майсаларни аёз урмайди. [Зебо] *Ойнага қараб, ўзини тузатди.* Шухрат, Шинелли йиллар.

4 кўчма Бирор ҳолатни, ҳодисани акс эттириб ёки ёритиб турган нарса; кўзгу. *Дўст дўстнинг ойнасидир.* Мақол. ■ *Кундалик дафтар — мактаб боласининг хулқ-атворини, олган баҳоларини равшан кўрсатиб турадиган тиниқ ойна.* М. Исмоилий, Бизнинг роман.

Ой(и)наи жаҳон 1) жаҳонни кўрсатувчи, бошқа жойлардаги нарсаларни, бўлиб турган ҳодисаларни кўрсатиб турувчи афсонавий ойна. *Илгари болалар орзу қиларди. Бўлса деб ўйларди ойнаи жаҳон.* Ф. Йўлдошева; 2) с.т. телевидение. *Хайриятки, ойнаи жаҳонимизнинг айрим раҳбарлари ижодкор халқимизнинг онги ва тафаккурини кўтариш, савиясини ошириш заруратини яхши тушунадилар.* Газетадан; 3) с.т. телевизор. *Тантаналар ойнаи жаҳон орқали намойиш этилди.* Газетадан.

5 с.т. Кўзойнак. *Ойна ортидан тикилиб турган бир жуфт ўтли кўз унинг онгига анчадан кейин етди.* П. Қодиров, Уч илди.

Ўзини ойнага солмоқ Ўз ҳолатини кўзгуда кўрмоқ. *Қиз ўзини ойнага солди.* «Шарқ юлдузи».

ОЙНАБАНД [ойна + ф. بند — боғлам; кишан, тўр; тўсиқ, ғов] 1 Ойна ўрнатилган, қуйилган, солинган. *Ойнабанд айвон.* ■ *Ойнабанд эшиқларига номер ёзилган кабиналардан хилма-хил товушлар келади.* П. Қодиров, Уч илди.

2 Ойна ёки кўзгу қошлаб безатилган; ойнакор. *Ойнабанд зал.* ■ *Кўринар кўргондан ям-яшил қишлоқ. Оқ уйлар нақадар сулув, ойнабанд.* Х. Расул.

ОЙНАВАНД с.т. Ойнабанд. *Шаҳарда уч қаватли ойнаванд ёруғ бинолар қурилиб, тўғри кўчалар очилди.* Мирмуҳсин, Чиниқиш.

ОЙНАДОР Ойнали, ойна тутилган; ойнабанд.

ОЙНАК [ф. آئینک — кичкина ойна] 1 айн. **ойна** 2. *Шу пайтда штаб томонидан келган кимдир автомобиль ойнақларидан бошини текиб қаради.* Газетадан. *Ёрни ойнақдан қаранг, Ноз уйқуда ётганмикин? «Кўшиқлар».*

2 с.т. айн. **ойна** 3. [Хонзода:] *Сен нимангга бино кўясан? Ҳуснинггами? Ойнакка қара. Ҳамза, Бой ила хизматчи.*

3 айн. **кўзойнак.** *Пойақдаги каравотда китоб ўқиб ётган Ҳожи ака.. чаққонлик билан бошини кўтариб, кўздан ойнагини олди.* А. Қаҳҳор, Минг бир жон. *Кителининг чўнтақларини титиб, ойнагини тополмади.* С. Аҳмад, Уфқ.

ОЙНАКЛИ Кўзойнак таққан, кўзойнакли. *Орқа ўриндиқда ўтирган ойнакли киши негадир безовта эди.* «Ёшлик».

ОЙНАКОР с.т. Ойнабанд. Очилбек.. бориб, Холбўта туркманнигига тушиди. Деразали, ойнакор меҳмонхоналар. «Очилдов».

ОЙНАКСОЗ [ойнак + ф. ساز — қурувчи, тузатувчи, созловчи] Кўзойнакларни тузатувчи уста.

ОЙНАЛАТМОҚ Ойна солмоқ; шиша қўймоқ. Барча деразаларни ойналатгач, хоналар анча исиб қолди. Газетадан.

ОЙНАЛИ 1 Ойна солинган, ойнабанд.

2 Кўзгу ўрнатилган, кўзгули. Ойнали шкаф.

3 с.т. Деразали. Уйнинг ойнали девори.

ОЙНАСИМОН Ойнага ўхшаш; шиша тахлит. Иморат олди ойнасимон материаллар билан қопланди. Газетадан.

ОЙНАСОЗ шв. Ойначи.

ОЙНАСОЗЛИК Ойна ишлаб чиқариш; саноатнинг шу соҳаси. ..ёғочни қайта ишлаш, мебелсозлик, ойнасозлик, кўнчилик сингари соҳалар ривожланмоқда. Газетадан.

ОЙНАХАЛТА Ойна солиб қўйиладиган, матодан тикилган жиҳоз. Қувват момо қошиқхалта, хуржун, қуроқ, гулдор кўрпачалар, ойнахалталар қилишда гузарда ном чиқарган эди. «Ёшлик».

ОЙНАЧИ Деразаларга ойна солувчи уста.

ОЙНОМА айн. журнал. Кейинги пайтда сеvimли ойномамиз «Шарқ юлдузи» халқимизга ҳақиқатни етказишда ибратли ишларни амалга оширмоқда. «Шарқ юлдузи».

ОЙПАРАСТ Уйқусирайдиган, уйқусида гапирувчи, турли ҳаракатлар қилувчи. Султон худди ойпарастларга ўхшаб, уйнинг у бурчидан бу бурчига бориб келарди. «Шарқ юлдузи». У яхши гап, «ҳақиқат» билан ойпараст уйқусидан уйғотилгач, раиш алангаси ўчиб, яна илгариги ҳолига келарди. Мирмуҳсин, Илдишлар ва япроқлар.

ОЙПАРЧА Ойдек гўзал, моҳпора, нозанин. Колхоз шийтонига йиғилган барча, Келди Гулбахори худди ойпарча. М. Алавия.

ОЙПОШША 1 айн. ойимпошша 1. - Мен сени ойпошша бўлиб ўтирадиган, қўлингни совуқ сувга урмайдиган жойга тинчитаман, дейди, — деди Ҳикоятнинг онаси. Ибохон, Феруза кўзли исирга.

2 Ойпошша (хотин-қизлар исми).

ОЙСИЗ 1 айн. ойдинсиз. Ойсиз кеча.

2 Маълум ой, вақт ўтмасдан. Мабодо келмасангиз, бир-икки ойсиз қишлоқдан кел-

майман, деб маъшуқангиз Зайнаб. Ҳамза, Ким ўғри?

ОЙТАМФАЛИ Ўзбек халқининг дўрмон, қипчоқ, қўнғирот каби йирик қабиалари таркибига кирган уруғлардан бири (асосан Ўзбекистон ва Қозоғистон ҳудудларида учрайди).

ОЙҚАРА: ойқара ёпмоқ Бир барини бошга, бир барини оёққа қилиб узунасига ёпмоқ (чопон, пўстин, чакмон ва ш.к. ни). Аваз отасини Таваккал ғорига олиб бориб, ўлик суратида чалқанча ётқизиб, устига пўстинини ойқара ёпиб қўйди. «Балогардон».

ОЙҚУЛОҚ Балиқ ва бошқа баъзи бир сувда яшовчи жониворларнинг нафас олиш аъзоси; жабра.

ОКЕАН [юн. okeanos — Ерни айланиб оқадиган азим дарё < Okeanos — юнон мифологиясида: сув офати маъбуди номи] Ер қитъалари орасидаги улкан сув ҳавзаларидан ҳар бири. Атлантика океани. Тинч океан. Ҳинд океани. ■ Ер юзининг учдан икки қисмидан кўпроғини сувлик — денгиз ва океанлар қоплаган. «Фан ва турмуш». Тинч, Атлантика ва Ҳинд океанлари қирғоқларида жойлашган мамлакатларда ва шу океанлардаги оролларда яшовчи халқларнинг кўпи денгиз тошбақаларини ейди. К. Маҳмудов, Қизикарли пазандалик.

ОКЕАНОЛОГ айн. океаншунос. Океанологларнинг аниқлашича, Атлантика океанининг тубида фақат майда жониворлар билан озикланадиган йиртқич ўсимлик мавжуд экан. «Ёшлик».

ОКЕАНОЛОГИЯ [океан + юн. logos — фан, таълимот] айн. океаншунослик. Океанология, асосан, кемаларда ва гидрологик станцияларда ўлчовлар ўтказишга асосланади. «ЎЗМЭ».

ОКЕАНОРТИ Америка; Америка қитъаси. Қирқ саккизинчи чемпионатда 3 та олтин, 3 та кумуш ва 3 та бронза медалини қўлга киритган ўзбекистонлик боксчиларга океанортида ҳам тан беришди. Газетадан.

ОКЕАНШУНОС [океан + ф. شناس — ўрганувчи, текширувчи] Океан ва денгизларни текширувчи олим, океаншунослик мутахассиси. -Геологлар бу ерда [Қизилқумда] худди океаншунослар сингари, триллионлар билан иш кўришади! — деди Ваҳобжон. А. Мухтор, Давр менинг тақдиримда.

ОКЕАНШУНОСЛИК Табиий географиянинг океан ва денгизларда рўй берадиган физик, кимёвий, геологик, биологик ҳодисаларни ўрганадиган бўлими.

ОККАЗИОНАЛИЗМ [лот. occasionalis — тасодифий] тлш. Умумистеъмолга мувофик, тўғри келмайдиган, индивидуал тарздаги маънога эга бўлган тил бирлиги.

ОККУЛЬТИЗМ [лот. occultus — яширин, сирли] Инсонда ва космосда, умуман дунёда сирли, яширин кучлар мавжудлигини эътироф этувчи, тафаккурга зид таълимотларнинг умумий номи. *Оккультизмга кўра, яширин кучларни махсус психик машқлардан ўтган ва ўзини фақат шу йўлга бағишлаганларгина пайқай олади.* «ЎЗМЭ».

ОККУПАНТ Оккупация қилувчи, оккупация қатнашчиси, босқинчи. *Немис оккупантларидан озод қилинган ҳудудларда халқ хўжалигини тиклаш чоралари ҳақида чиқарилган қарорларни ўқиб ўтирган Ширмонхоннинг кўнгли ғурурга тўлган эди.* С. Зуннунова, Олов.

ОККУПАЦИОН Оккупация қилган ёки қилувчи. *Оккупацион армия.*

ОККУПАЦИЯ [лот. occupatio — эгаллаш, босиб олиш] Бошқа давлат ерларини қуроли куч воситаси билан босиб олиб, унинг суверен ҳуқуқларини поймол қилган ёки чеклаган ҳолда вақтинча эгаллаб туриш. *Оккупация зонаси. Оккупация қилмоқ.*

ОККУПАЦИЯЧИ айн. **оккупант.** *Оккупациячи қўшинлар.*

ОКОП [р. окоп — ковланган жой, чуқур < окопать — «чуқур қазиб, атрофини ўрамоқ» фл. дан] *ҳарб.* Жонли кучлар ва жанговар техникани душман ўтидан пана қиладиган ҳарбий иншоот. *Урушда окопда ётиб орзу қилардик — эл-юртга омон қайтиб, бир зиттасак «Қора тўрғай»ни деб!* О. Ёкубов, Эр бошига иш тушса. *Морозов ротаси халқ лашкарлари ковлаб қўйган окопларга икки взводни жойлаб, қолган взвод билан танкка қариш мудофаа чораларини кўра бошлади.* И. Раҳим. Чин муҳаббат.

ОКРУГ [р. округ — теварак, атроф < окружать — «қуршаб олмоқ; атрофини ўрамоқ» фл. дан] **1** Баъзи давлатларда маъмурий-ҳудудий бирлик. *Исландия маъмурий жиҳатдан 23 округга, улар эса жамоаларга бўлинади.* «ЎЗМЭ».

2 Йирик ҳудудий ҳарбий бирлашма, бўлинма. *Эртага округ штабидан генерал келиши кутилади.* Шухрат, Шинелли йиллар. *Туркистон ҳарбий округи ўз ихтиёридаги машиналарни чўлли ўзлаштиришга берапти.* С. Аҳмад, Уфқ.

3 Вақтинчалик тузилган ҳудудий бўғин. *Сайлов округи.* ■ *Кўп мандатли округларда сайловчилар яширин овоз бериш бюллетенларига ёзиб қўйилган.* Газетадан.

4 эск. тар. Ҳозирги вилоят бараваридagi ҳудудий бирлик, музофот. *Тошкент округи. Андижон округи.*

ОКСИД [юн. oxys — нордон + eidos — кўриниш, қиёфа; ҳолат; тур, нав] Кимёвий элементнинг кислород билан бирикишидан ҳосил бўлган модда. *Натрий оксиди.*

ОКСИДЛАМОҚ ким. Бирор элементнинг оксидини ҳосил қилмоқ. *Темирни оксидламоқ.*

ОКСИДЛАНИШ ким. Турли моддаларнинг кислород билан бирикиши; кимёвий реакция тури. *Думба — қўй танасидаги ҳароратни бир меъёрда сақлашга, оксидланиш, модда алмашилишининг яхшиланишига ёрдам беради.* С. Анорбоев, Оқсой.

ОКСИДЛОВЧИ ким. Оксид ҳосил қилувчи. *Оксидловчи моддалар.*

ОКТАВА [лот. octo — саккиз; octavus — саккизинчи] мус. **1** Диатоник гамманинг саккизинчи босқичи; шу гаммада бир номдаги икки нота оралиғи (мас., до — кейинги до).

2 Жуда паст эркак овози — баснинг алоҳида кўриниши.

3 ад. Саккиз қаторли шеърий банд.

ОКТАНТ [лот. octans, octantis — саккиздан бир] **1** геом. Уч ёқли бурчакларнинг саккиз соҳасидан исталган биттаси.

2 астр. Авваллари осмон ёритқичлари ўртасидаги бурчак масофалар(и)ни ўлчашда қўлланган астрономик асбоб.

3 Осмон гумбазининг Жанубий яримшаридаги юлдуз туркуми.

ОКТАЭДР [юн. oktaedron < octo — саккиз + hedra — асос, қирра, ёқ, томон] геом. Саккизта учбурчаклик билан чегараланган жисм; саккизёқлик.

ОКТЕТ [итал. ottetto < лот. octo — саккиз] мус. **1** Саккиз ижрочи хонанда ёки чолғучи (созанда) учун ёзилган мусиқий асар (бунда уларнинг ҳар бирига алоҳида ижро қисми ва нота мўлжалланган бўлади).

2 Шундай асарнинг саккиз ижрочи томонидан ижро этилиши, шунингдек, саккиз ижрочидан иборат ансамбль.

ОКТАБРЬ [лот. octo – саккиз] Қадимги Рим календариди йилнинг саккизинчи ойи; янгича календарь йили ҳисобида ўнинчи ойнинг номи.

ОЛ кт. Қизил, қирмизи. Ол юзли.

ОЛА 1 Оқ-қора, оқ-малла ва ш.к. қо-ришиқ тусли (ҳайвонлар туси ҳақида). Ола от. Ола ҳўкиз. Ола товўқ сомон сочар, ўз айбини ўзи очар. Мақол. ■ Бу пулга манман деган галанский [голланд] ола сигир олишин-гиз мумкин. Н. Аминов, Қаҳқаҳа.

Оқ ола Асосан оқ туси билан ажралиб турадиган ола-була. **Қора ола** Асосан қора туси билан ажралиб турадиган ола-була.

2 Турли хил рангли, йўлли ёки гулли; чипор. Ола (йўлли) беқасам. Илон чаққан ола арқондан кўрқар. Мақол. ■ Хонанинг тўри-даги нўстак устида оппоқ соқоли кўксига тушган, катта саллали, ола чопонли домла ўтирарди. П. Турсун, Ўқитувчи.

3 кўча Келишмовчилик, нифоқ, низо. Олтовлон ола бўлса, оғиздагини олдира. Мақол. Овул ити ола бўлса, бўри келса бирикар. Мақол. ■ [Тожибой:] -Йўқ, менинг фуқаром ичида оласи йўқ, – деди. П. Турсун, Ўқитувчи.

Ола чиқди Иттифоқи, ораси бузилди. Оқ пошшонинг аскарлари ўртасидан ола чиқиб, «Урушмаймиз, урушса пошшо билан вазирлар уруша берсин», деб турган эмиш. Ф. Фулом, Шум бола.

4 кўча Тугал эмас, ҳаккам-дуккам, бир текис униб чиқмаган; чала. Чигит сифатсиз экилиб, кўчат ола чиқса, кимга фойда-ю, ким-га зарар? М. Назаров, Жилвон жилвалари.

Ола кўз, олакўз 1) чақчайган катта кўз; 2) шундай кўзли киши. Элмурод атрофига қараган эди.. олакўз завҳоз ҳам саҳна олдида томоша қилиб турганини кўрди-ю, ўзининг бор-йўқлигини унутди. П. Турсун, Ўқитувчи. **Ола қарамоқ** 1) кўзларини олайтириб, ўқ-райиб қарамоқ. Деҳқоновага ва унга танбеҳ бердим. Энди иккови ҳам менга ола қараб юрибди. С. Нуоров, Нарвон; 2) ёмон ният, ёмон кўз билан қарамоқ, кўз олайтирмоқ. -Сиз яхши кўрган бир қизга биров ола қара-са, сиз нима қилардингиз? – деди. Н. Сафа-ров, Уйғониш; 3) душманлик билан қара-моқ, бир текисда, баравар кўрмаслик. Ул-

тонни ҳеч ким бек қилгани йўқ, у ўзи ўзини бек қилиб, Кўнғиротга ола қаради. «Ёдгор». **Оқ уй, ола баргак қ. баргак.**

ОЛАБАЙРОҚ Ола-була, йўл-йўл ёки катак-катак. Олабайроқ беқасам. ■ Иккин-чи киши.. Бухоронинг олабайроқ матосидан чопон кийиб, камар ўрнига чопонини турмак-лаган мулланома бир зот бўлиб, бу киши яроқ-сиз эди. А. Қодирий, Ўтган кунлар. Олабай-роқ уфқнинг ранги тобора ўчиб, аста-секин қоронғиликка чўкди. Ҳ. Фулом, Машғал.

Олабайроқ варрак Йўл-йўл ёки катак-катак қилиб бўялган катта варрак.

ОЛАБАРГОҲ шв. кам қўлл. Ҳашаматли уй. Суйганинг билан бўлсанг, қора уй ҳам олабаргоҳ кўринар. Мақол. ■ Тоға оқ уй, олабаргоҳ уйда яшайсиз. Тинч-хотиржам-сиз. «Ёшлик».

ОЛА-БУЛА 1 Оқ ва бошқа ҳар хил ранг аралаш тусли; гулли. Ола-була чит. ■ Ола-була тўн кийиб, бошига кичкина оппоқ салла ўрган, ковуш-маҳсули йғит салом бериб кирди. Ш. Холмирзаев, Қаҳрамоннинг сўнг-ги кунлари.

2 кўча Хусусиятлари жиҳатидан бир хил бўлмаган; аралаш, курама. Ўтган йил-ларда мактаблар жуда ола-була, ўқувчилар-нинг маълумотлари нотекис эди. Газетадан.

Кўзини ола-була қилмоқ Кўзларини катта очиб бесаранжом ўйнатмоқ, олай-тирмоқ. **Кўзлари ола-була** Кўзлари катта очилган, олайган, бесаранжом. Бир куни отам чақ-чақ уриб кириб келди. Кўзлари ола-була эди. М. Исмоилий, Фарғона т. о.

ОЛАБУТА бот. Шўрадошларга мансуб бир йиллик ўтсимон ёки ярим бута ўсимлик. [Олабутанинг] Пояси тик, шохланиб ўсади, бўйи 1 м ёки ундан ортиқ бўлади. «ЎзМЭ.»

ОЛАБУҒА Усти кўндаланг қора йўллар билан қопланган, сузгичлари қизғиш, йи-рик тангали балиқ.

ОЛАБЎЖИ 1 Ҳайбатли, қўрқинчли аф-сонавий махлуқ (ёш болаларни қўрқитиш учун айтиладиган сўз). Олдин Аввалбек ун-даган, Тамара кўнмазан. Энди, қарабсизки, манави олабўжи қилтириқдан ҳам зурриёт қолади. М. М. Дўст, Лолазор.

2 кўча Ваҳимали, қўрқинчли нарса. -Шўр чигитни қуритади, зах илдизни чи-ритади, деб чўлни олабўжи қилиб кўрса-тишга уринмоқдалар, – деди раис. М. Наза-ров, Жилвон жилвалари.

ОЛАЗАРАК: олазарак бўлмоқ У ёқ-бу ёққа бесаранжом қарамоқ, аланг-жаланг бўлмоқ. *Қиёмхон атрофга олазарак бўлиб қарагач, дарвозахона ёнидаги харобага ишора қилди.* Н. Аминов, Қаҳқаҳа. **Кўзи олазарак** Кўзи бесаранжом, аланг-жаланг. ■ *Бола, кўзлари олазарак, ҳадиксираб, ҳайдовчига яқинлашди.* Х. Султонов, Бир оқшом эртаги.

ОЛАЙЛИК криш. с. өзф. Масалан, чунончи, фараз қилайлик. *Олайлик, бу ерда ҳам одамлар ўз билганларини, эшитганларини гапирадиган бўлишди.* Газетадан.

ОЛАЙМОҚ Катта очилиб, чақчайиб кетмоқ, бесаранжом ўйнамоқ, ола-кула бўлмоқ (кўз ҳақида). *Мирзонинг кўзлари олайиб, ходимгарларга қаради.* А. Қаҳҳор, Мирзо. *Йўлчининг ранги ўчди, кўзлари олайиб, титроқ овоз билан қичқиришдан ўзини тиёлмади.* Ойбек, Танланган асарлар. *Башорат ялт этиб қайрилиб, сингелисиза олайиб қаради.* А. Мухтор, Опа-сингиллар.

ОЛАЙТИРМОҚ Олаймоқ фл. орт. н.

Кўз(ни) олайтирмоқ 1) кўзларини олакула қилиб қарамоқ, кўзларини ўйнатмоқ, ўқрайтирмоқ. *Қиз кўзларини олайтириб, Элмуроднинг юзига қаради.* П. Турсун, Ўқитувчи; 2) *кўчма ёмон ният, ёмон кўз билан қарамоқ.* *Бировнинг мол-дунёси ошиб-тошиб ётса-ю, фақирга кўз олайтирса, ҳақиқат борми ахир, эй фалак!* Ж. Шарипов, Хоразм. *Шакархондек қудратли ноибнинг хасмига кўз олайтиришга кимнинг ҳадди сиғди экан!* Х. Тўхтабоев, Йиллар ва йўллар.

ОЛА-КУЛА Бесаранжом олайган, катта очилиб ўйнаб кетган (кўз ҳақида). *Бедана эгалари ва уларга пул тиккан тарафкашларнинг кўзлари ола-кула, юраклари тақапука бўлиб, нафаслари ичига тушиб кетди.* М. Муҳаммадждонов, Турмуш уринишлари. *-Аҳ-а-а...! — Валихон бўзариб кетган совуқ кўзларини ола-кула қилиб, Майнага тикилди.* Ш. Тошматов, Эрк куши.

ОЛАКЎЗ Оқ қисми кўп, соққаси бирмунча кўтарилган катта кўз; шундай кўзли одам. *Бир неча кундан кейин кўнғиз мўйловли олакўз киши келиб, Мустафони олиб кетди.* С. Сиёев, Ёруғлик.

ОЛАКЎЗАН Сувсарлар оиласига мансуб, мўйнали, йиртқич сутэмизувчи ҳайвон. *Олакўзан ола бўлса ҳам, арслон бўлмас.* Мақол.

ОЛАЛАНМОҚ кам кўлл. 1) Ола-кула бўлмоқ (кўз ҳақида). *Мирҳосилнинг кўзлари ола-*

ланди, медаль ярқираб турган кўкрагига мушт урди. Х. Фулом, Сенга интиламман.

2) *Ўртага низо тушиб, иккига айрилмоқ, низолашмоқ.* *Шаҳарнинг олаланиш хабари ўрдагача ҳам эшитилди.* А. Қодирий, Ўтган кунлар.

ОЛАЛИК 1) Ола эканлик, турли рангда бўлишлик.

2) Келишмовчилик, нифоқ, низо.

ОЛАМ [а. عالم — дунё, жаҳон; коинот; халқ, омма] 1) Бутун мавжудот, борлиқ, коинот, дунё. *-Айб менинг ўзимда, — деди у [бой] зардаси қайнаб. — Олам бино бўлгандан бери яхшиликка — ёмонлик, хизматга — тухмат бўлиб келган.* С. Айний, Дохунда.

Ўн саккиз минг олам эск. Бутун коинот, бутун борлиқ, бутун дунё.

2) Бутун жаҳон, дунё, ер юзи ва ундаги инсонлар, халқлар *Пахтамининг шухрати бутун оламга машҳур.* ■ *Ҳакимбойваччанинг овозаси оламни тутуди.* Ойбек, Танланган асарлар.

3) Табиатда мавжуд бўлган нарсаларнинг алоҳида бир тўпи, дунёси. *Ўсимликлар олами.* ■ *Титраш ўсимлик оламига ҳам ҳалокатли таъсир этади.* «Фан ва турмуш».

4) Ўзига хос хусусиятлари, мақсади, маслаги билан ажралиб турадиган ижтимоий гуруҳ, жамият.

Янги олам 1) бирор ижтимоий формация ўрнини олган иккинчи, янги формация. *Янги оламга кирган одамларнинг ҳаммаси оёғида эски оламнинг лойи билан кирган.* А. Қаҳҳор, Кўшчинор чироқлари; 2) *кўчма янги шароит, янги муҳит.* *Умрини шаҳарда, шовқинли цехларда ўтказган бу йигит учун қишлоқ мутлақо янги олам эди.* С. Аҳмад, Ҳукм.

5) Одамнинг маънавий, ички дунёси; ўзига хослиги. *Инсон руҳий оламининг энг нозик нуқталарини ҳис этиб, воқеа ва ҳодисаларнинг энг долзарб жиҳатларини бадиий акс эттирмоғим лозим бўлади.* «ЎТА».

6) Бирор соҳа, жабҳа. *Илм олами.* *Сиёсат олами.* ■ *У энди.. Салимхондан кўп сўзлайди, ҳатто Салимхондан сиёсат оламига судрайди.* А. Қаҳҳор, Сароб. *Фан оламида янгилик яратиб истаги унинг қалбини қамрай бошлади.* С. Кароматов, Олтин қум.

7) дин. Бу дунё; мавжуд дунё. *Оламдан ўтмоқ.* ■ *Қутбиниса онаси оламдан ўтгандан*

буён энди оҳорли кийим кийиши эди. С. Аҳмад, Уфқ.

Бир олам 1) ўзига хос бир дунё. [Нор-мат] 1940 йили [Москвадаги] қишлоқ хўжалик виставкасини кўргандаёқ: -Виставканинг ўзи бир олам, — деган эди. И. Раҳим, Чин муҳаббат; 2) жуда кўп, беҳад кўп, кўпдан-кўп, сон-саноксиз. У Москвадан бир олам таассуротлар билан қайтди. Т. Ашуров, Оқ от. **Бошқа олам** Хулқ-атвори бўлак, бошқача. *От эса тамом бошқа олам, айниқса менинг қорабайириим.* Ҳ. Ғулум, Машғал. **Жумла(и) олам** Оламдаги ҳамма одам ёки нарса. *Олтин тупроғингда жумла олам бор.* Ҳ. Ғулум. **Икки оламда** Ҳеч вақт, ҳеч қачон. **Олам гулистон қ. гулистон.** Ҳаммасига ўша мошак сабабчи. «Келинг», деб телефон қилмаганда, олам гулистон эди. Н. Аминов, Қаҳқаҳа. **Олам ҳодис** Мабодо, эҳтимол, бўлиши мумкин, балки. *Олам ҳодис, қўлга тушиб қолсанг, сўроқ кезида айбни фақат ўз бўйнингга олиб, орага мени қотиштирмайсан!* А. Қодирий, Ўтган кунлар. **Оламга сиғмай кетди** Беҳад хурсанд бўлди. *Кўрмайсизми: сувнинг шарпасини эшитиб, бечора [деҳқон]лар оламга сиғмай кетди.* М. Исмоилий, Фарғона т.о. **Парвардигори олам** Оллоҳ; оламнинг яратувчиси, халлоқи олам, худо. *Парвардигори олам дуоларимизни мустажоб қилгай.* **Подшоҳи олам** эск. Зўр подшоҳ, улуг подшоҳ. **Халлоқи олам қ. халлоқ.** **Хусн олами** Хусндор кишилар, нозанинлар тоифаси. *Бу узатиш (тўй) мажлисини жонли, руҳли ўтказмоқ учун барча қизлар ўзларининг энг асл, энг нафис кийимларини кийиб, фавқулодда хусн оламини яна бир қат, яна бир қайта безабдилар.* А. Қодирий, Ўтган кунлар.

ОЛАМГИР [a. + ф. عالمگير — оламни олувчи, дунёни эгалловчи] *кт.* 1 Оламни фатҳ этувчи, оламни олувчи; жаҳонгир. *Агар мен ўша оламгирга замондош бўлсам эди, ўлим соатида бошида турсам эди, дейлик, унга гассоллик қилсам эди.* М. М. Дўст, Лолазор.

2 кўчма Жаҳонни ўзига қаратувчи, мафтун этувчи. *Агар куйлар эсам, Ширин жимирлаш бошланур танда, Бу биз — ботир, бу биз — ғолиб, бу биз — ҳар ишда оламгир.* Ф. Ғулум.

ОЛАМ-ЖАҲОН айн. олам-олам. Тўйга олам-жаҳон одам тўпланди. ■ Баъзан нозик имосида олам-жаҳон қудрат ифодаланган ҳаракатлар, баъзан ғазабкор, баъзан эса

мулоийм ва нозли боқишлар Ҳасаннинг кўз унгидан кетмасди. С. Зуннунова, Кўк чи-роқлар.

ОЛАМ-ОЛАМ Беҳад кўп, жуда кўп; бир олам, олам-жаҳон. *Сиздан олам-олам миннатдорман. Ҳикматли сўзларда олам-олам маъно бор.* ■ Унинг олам-олам тажрибаси бор эди. Шухрат, Шинелли йиллар.

ОЛАМОРО [a. + ф. عالمآرا — оламни безовчи] *кт.* Оламга оро берувчи, дунёни безовчи; дунё безаги, зийнати.

ОЛАМПАНОҲ [a. + ф. عالمپناه — олам паноҳи, оламни сақловчи] *эск.* Подшоҳлар, хонлар эпитети. *Ўз устозини билмаган бу бепадар, олампаноҳнинг ҳам бетлариға оёқ қўйишдан тоймай, устозининг қиблагоҳи учун мувофиқ кўрилган қизини йўлдан оздириб, бу кун кечаси уни қочириб, менинг ҳовлимга олиб келди.* А. Қодирий, Мехробдан чаён. -Олам-паноҳ.. — Ҳофиз Куйкий шоҳга қимтинибгина мурожаат қилди. Х. Султонов, Бир оқшом эртаги.

ОЛАМТОБ [a. + ф. عالمتاب — оламни қиздирувчи, ёритувчи] *кт.* Оламни ёритувчи (кўёш эпитети).

Офтоби оламтоб 1) оламни ёритувчи кўёш. *Сони шулки, офтоб оламтоб бўлса, бешак-шубҳа тўртинчи осмонга михлангандир.* А. Қодирий, Кичик асарлар; 2) кўчма кўёш юзли гўзал.

ОЛАМШУМУЛ [a. + ф. عالمشمول — оламга эга бўлган, оламни қамраб олувчи] *кт.* Жаҳонро аҳамиятга эга бўлган; аҳамияти жуда катта, жаҳоншумул. *Ҳар кунимиз ажойиб, оламушумул воқеалар билан тўла.* ■ Насриддин Тусий тажрибаларидан фойдаланиб, оламушумул аҳамиятга эга бўлган натижаларга эришди. «Ёшлик». Чиндан ҳам, «Темур тузуқлари»дек оламушумул асарни яратиш учун Амир Темурдек қудратли шахс бўлиш керак. П. Қодиров, Тил ва эл.

ОЛАОҒИЗЛИК Бир хил фикрга келмаслик; келишмаслик. *Олаоғизлик қилиб, колхозни ҳар ёғидан кўпқари қилиб тортмай, ўзидан чиққанини ўзига сарфласак, анча қаддимизни тиклаб оламиз.* С. Сиёев, Отлик аёл.

ОЛАПАР Ола тусли ит лақаби ва шундай лақабли ит. *Бир олапар элик қадамча нарида алланарсани ғажир эди.* М. Исмоилий, Фарғона т.о. *Бостирма тагида мудраб ётган қари олапар эгасига кўмакка отлан-*

ди-ю, қоқ ягринига Маматқассобнинг калтагини еб, вангиллаганича жуфтакни ростлади. «Ёшлик».

ОЛАПЕС 1 Баданида оқ доғлари бўлган; пес.

2 Туси айниб, ола-була бўлиб қолган. Самоварчи жўмраги учига жез қопланган чойнакни ва бир олапес пиёлани йигитнинг олдига дўқ этиб қўйиб кетди. Ойбек, Танланган асарлар.

ОЛАПЕСЛАНМОҚ Ранги айниб, олапес тусга кирмоқ, олапес бўлиб қолмоқ. Оёқларида эскириб, олапесланган амиркон маҳси, йиртиқ калши. Ойбек, О.в. шабадалар.

ОЛАПОПИШ шв. Попишак.

ОЛАПОПИШАК айн. **попишак**. Юмронқозик уни оғзида, тупроқ уюми устида ўтирган олапопишак гажагини елиғичдек ёзиб, тупроқни чўқилайди. Ш. Холмирозев, Оқ отли.

ОЛАПЎЧОҚ Қовуннинг тўқ сариқ тусли, шакли чўзиқ тухумсимон, кечпишар тури. Олапўчоқ қишда асраша ва узоқ жойларга олиб боришга яроқли. «ЎЗМЭ».

ОЛАРМОН айн. **олғир**.

ОЛАСИ Кимсадан олиниси, ундирилиши керак бўлган нарса; ҳақ. Хўжайиннинг учтўртта қўшни деҳқонлардан оласи бор экан, менга чўтти қўлтқлатиб олдилар, орқаларидан эргашиб юрдим. Ф. Фулом, Шум бола. Юринг бўлмаса, Холдорхонниқига, хўжайин, Қорақўзда ҳам жиндақ оласим бор. Ф. Фулом, Танланган асарлар.

ОЛАСИ-БЕРАСИ 1 Икки орада ўтишган нарса; ҳақ.

2 Олди-берди муомаласи.

ОЛАТ [а. آلت — асбоб, жиҳоз] кт. айн. **асбоб**. Физик олат. ■ Пўлат отлар, соз олатлар Юборди сенга. Миртемир.

ОЛАТАРОҚ Ола-була, оқ-қора, рангоранг. Эндигина ранг солаётган баркаш нондек, олатароқ тоғлар ортидан қўйи кўтарилмоқда эди. Ў. Умарбеков, Баҳор нафаси. Ҳар кетмон урганда, нами қочиб, олатароқ бўлиб қолган ердан енгил чанг кўтарилади. Х. Тўхтабоев, Йиллар ва йўллар.

ОЛАТАСИР Бетартиб тасир-тусир товуш; бетартиб иш ва ш.к. ҳақида. Олатасир отишди. ■ Халқ қўрғонни мустаҳкамлашга киришди. Олатасир иш бошланди. Ойбек, Навоий. Тўйимиз бошланди. Нима бўлди-ю, олатасир қий-чув бўлиб кетди. Ж. Шарипов,

Хоразм. Ташқари олатасир қий-чув бўлиб кетди. Ж. Шарипов, Хоразм. Ташқари олатасир бўлиб кетди: кимдир югуриб ўтди, кимдир додлади. Х. Тўхтабоев, Йиллар ва йўллар.

ОЛАТЎЗОН айн. **чанг-тўзон**. Гирдоб раққосадек чирпирак бўлиб айланиб келиб, ўтиб кетди-ю, саксовулзорда олатўзон бошланди. М. Мансуров, Ёмби.

ОЛАТЎПОЛОН Тартибсиз тўполон, ғала-ғовур, қий-чув, тартибсизлик. Олатўполон бошланди. ■ Ҳаким ва Шерюрак иккови олатўполон ичига кириб келишди. Мирмуҳсин, Темир Малик.

ОЛАТЎГАНОҚ Чумчуқсимонлар туркумининг қарқуноқлар уругига мансуб йиртқич қуш. -Астробод осмон бўлса, Маймана қаро ер, — деди Бадиуззамон, — Ҳе, лочинни олатўганоққа алмаштириб бўларми? М. Осим, Карвон йўлларида.

ОЛАЧА 1 Ингичка йўлли, одатда пахта ипидан, баъзан ип ва ипакдан тўқиладиган мато. Бир кийимлик олача. Олача қоп. ■ Ун солинган олача бўз халта ҳам оғзи очиқлигича қолиб кетаверибди. Н. Мақсудий, Лайлатулқадр. Эрали бошида янгича гилам дўппи, эғнида оҳорли олача тўн кийиб келган эди. С. Аҳмад, Жимжитлик.

2 айн. **ола-була 1**. Олача қовун.

ОЛАЧАЛПОҚ 1 Дарахт барглари оралаб тушган парча-парча офтоб, ойдин ёки кўланка. Олачалпоқ соя. ■ Хиёбондаги дарахтлар орасида олачалпоқ ойдин кезади. Ҳ. Нуъмон, Фасллар. Сутдай ойдин. Ун тўрт кунлик ой тераклар орасидан мўралаб, ҳамма ёққа олачалпоқ кўланка ташлаб турар эди. Файратий, Довдираш.

2 Бир текис эмас; у ер-бу ерда, парча-пурча. Олачалпоқ булутлар. Даштнинг у ер-бу ерида олачалпоқ қор пагалари. ■ Одам бўйи ўсган олачалпоқ маккажўҳорининг сўлинқираган нимжон барглари сарғайиб, осилиб ётарди. Қ. Кенжа, Нотаниш гул.

ОЛАЧИПОР Оқ доғлари бор; чипор. Олачипор илон. Олачипор товуқ. ■ Пастда, полда олачипор нақир билан примус турарди. С. Зуннунова, Гулхан. Узоқда, сувни.. жимирлатмасдан, секин ва майин сузган оқ, олачипор ўрдаклар ҳар томонга илдам қочибди. Ойбек, Танланган асарлар.

ОЛАЧИҚ кт. Капа, чайла. Ҳув бир қатор тўрт олачиқ, беш капа. Бу қишлоқнинг бошланғич биналари. Ф. Фулом.

ОЛАШАҚШАҚ Қарғанинг бир тури. Дала эпкинидан бир-бирига суйкалиб, сирли шивирлаган қиёқзорларда овозинг ўчкур олашақшақ учади. А. Мухтор, Кумуш тола. Хотин-халажнинг энг олижаноби ҳам олашақшақдай, ялтироқ нарсага ўч бўлади. С. Нуоров, Нарвон.

ОЛАШОВУР 1: олашовур ёмғир Сийрак, аммо катта-катта, тасир-тусур ёққан ёмғир. Шу вақтда сийрак булутлардан олашовур ёмғир куйиб ўтди. Ойбек, Навоий. **Олашовур қор** Ёмғир аралаш ёққан қор. *Атроф олашовур ёққан қор билан қопланган.. эди.* А. Қодирий, Ўтган кунлар.

2 кўча Тўполончи, шўх, тартибсиз. Кампир буви билан Нафисахон бир-бирларига қарашди: «Мана, кўрдингми? Бу олашовур қизининг ишларига тушуниб бўлмайди.» Мирмуҳсин, Умид.

Олашовур бўлмоқ Шовқин-сурон бўлмоқ.

ОЛАҚАНОТ 1 Ёввойи ўрдакларнинг бир тури.

2 Чумчүксимонларнинг бир тури. Дарахларда чумчүк, олақанот, қалдирғоч ва бошқа хил қушлар чуғурлашди, мусича кукулади. Н. Аминов, Қаққаҳа.

ОЛАҚАРОҚ I 1 Яккам-дуккам, ола-қура, сийрак, чала. Унинг [Тўлаганинг] культивация қилган ғўзаларида олақароқ жойлари учрамайди. Х. Назир, Механизатор Тўлаган.

2 с.т. Олазарақ. *Атрофга олақароқ кўз югуртирмоқ.* ■ [Арслонқул] Гўё ундан бошқа ҳеч ким Навоийни огоҳлантириши мумкин эмас каби, олақароқ бўлиб, шоирни қидирди. Ойбек, Навоий.

ОЛАҚАРОҚ II От ва молларда бўладиган бир турли мия касаллиги. *Хоса тулпор бир ерда туриб қолса, олақароқ бўлиб қотиб қолар эди.* Гўрўглининг туғилиши.

ОЛАҚАРҒА Чумчүксимонлар туркумининг қарғалар оиласига мансуб, қора ва кулранг патли қарға. *Том бўғотлари ва тарновлардан узун-узун сариқ сумалаклар чўзилишган. Ўқтин-ўқтин шум олақарғаларнинг қутуриб қағиллашлари эшитиларди.* П. Турсун, Ўқитувчи.

ОЛАҚОН Қамчи ўримининг даста билан бириккан жойи.

ОЛАҚОРОНҒИ Бир томонига ёруғ тушиб турган, бошқа ерлари қоронғи, ярим

қоронғи. *Алмисоқдан бери ерда, захда ўтириб.. олақоронғи хонада ўқиб келган авлод бирданига оппоқ, ёруғ, тоза хонада, тахтачалардан қилинган ўриндикларда ўтириб ўқишса-я, бу ҳўрматни ким кўрган, ким эшитган.* М. Исмоилий, Фарғона т.о.

ОЛА-ҚУРА Турли тусдаги, ола-була. *Тонг азон бўлишига қарамасдан, бир тўда оч ола-қура итларни эргаштириб, эски каппон томондан Малла жинни жавраб келар эди.* Ф. Ғулум, Шум бола.

ОЛА-ҚУРОҚ 1 Турли тусдаги латта парчалари, лахтақлардан улаб тикилган; қуроқ. *Ола қуроқ пахтали тўнлар елкадан тушан.* С. Аҳмад, Ҳукм. *Жануб сувлари, тошқин сойи, кўм-кўк дарахлари, қаландарларнинг чопонига ўхшаш ола-қуроқ экинлари, қори эрмаган баланд тоғлари билан.. одамни ҳайратга солади.* М. Исмоилий, Фарғона т.о.

2 кўча Турли парчалардан улаб-қураб, бир бутун ҳолга келтирилган; қурама. *Киш-лоққа келадиган кўча кинонинг укувсиз механиклари узиб ташлаган ямоқ ленталардан йиғиб, ола-қуроқ кинофильм қилган эди.* С. Аҳмад, Чўл шамоллари.

3 кўча Узуқ-юлуқ, маромига етмаган. *Унинг миясида ола-қуроқ мулоҳазалар қоришиб кетди.* «Шарқ юлдузи».

4 кўча Ёши, касби, билими ва ш.к. жиҳатидан ҳар хил, турли-туман. *Иш юришмади, ўзи сафарбар қилиб келган турли касбдаги ола-қуроқ ёшлар уни хуш кўришмади.* А. Мухтор, Туғилиш.

5 айн. олақароқ I 1. Экинлар ола-қуроқ чиқибди. ■ *Ҳадемай эгатлар ола-қуроқ бўлиб қолади.* «Ёшлик».

ОЛАҒОВУР Бир-бирига қовушмаган, тартибсиз гап; ғовур-ғувур, қий-чув. *Ботирали кириши билан нотиқ гапдан тўхтади, олағовур ҳам тинди.* Х. Ғулум, Маъғал.

Олағовур кўпормоқ Шов-шув, тўполон солмоқ. *Мана шу гап устида ерсизлар олағовур кўпормоқчи, мулла Обидни ўз ичларидан тамоман четга чиқариб ташламоқчи бўладилар.* А. Қодирий, Обид кетмон.

2 Нотинч; шов-шувли. *Бегматжон, замон олағовур, ит ҳам, бит ҳам зақунчи. Шунақа қалтис пайтда Фармонга, хўжа-кўрсинга бўлса ҳам, қаттиқроқ чора кўрмасангиз, анави «ёзувчи»лар тинчимас, деб кўрқаман.* А. Кўчимов, Ҳалқа.

ОЛАФОН айн. олғир.

ОЛАҲАККА шв. Зағизғон. Ултонтознинг энаси Бодом бикачнинг тилини олаҳакка чўқиб, соқовроқ бўлиб қолган эди. «Алпомиш».

ОЛВОЛИ [ф. *أولوالو* — олча] шв. Олча; олхўри.

ОЛД 1 Нарсаларнинг кузатувчига қараган қисми; пеш, юз. *Бинонинг олдига шиорлар осилган. Кўйлакнинг олди узунроқ бўлибди. ■ От олд оёқларини иргитиб сапчиди-да, шамолдек учиб кетди. С. Аҳмад, Уфқ.*

2 Нарсаларнинг илгари томонидаги ёки қисмидаги жой, ўрин. *Уйнинг олдини супуриб, жой қилмоқ. ■ Мастонга араванинг олдидан жой беришди. А. Қаҳҳор, Мастон.*

3 (3-ш. бирл. шаклда) Бирор иш-ҳаракат, воқеа-ҳодиса ва ш.к. дан олдин бўладиган, рўй берадиган, ўтказиладиган. *Байрам олди мусобақаси. Сайлов олди кампанияси.*

4 3-ш. эгалик ва ж.к., ў.-п.к., ч.к. аффикслари билан кўмакчи вазифасида қўлланади (қ. **олдига, олдида, олдидан**).

Олдини олмоқ Хавф-хатарнинг юз беришидан илгари чорасини кўрмоқ; ёмон оқибатнинг юз беришига йўл қўймаслик. *Урушнинг олдини олмоқ. ■ Хотиринг жам бўлсин, дўстим, балонинг олдини олдим. Ойбек, Навоий. Олд кўшимча айн. префикс. Тил олди товушлари тлш. Тилнинг олд қисмида ҳосил бўладиган товушлар.*

ОЛДДА айн. олдинда. *Олдда бормоқ. Олда турган вазифалар.*

ОЛДДАН айн. олдиндан. *Келажакни олддан кўрмоқ. Пахта ҳосилини олддан ҳисоблаб чиқмоқ.*

ОЛДИ Бирор нарсанинг бошқалардан илгариде турган, олдинги вазиятни ишғол этган қисми, кишиларнинг энг олдингиси, сараси, кўзга кўрингани. *Энди Зайнаб буйи етиб қолди. Юртимизнинг мана энг олди. Ҳ. Олимжон.*

2 Бирор иш ёки ҳолатнинг бошланиш арафаси, яқин етган пайти. *Уйқу олди. Қиш чиқар олди. Ёз олди. ■ Ҳой, келинг! Олди ёз, деразаси қурилса бас-да, печкаси ҳам уй ҳаммом бўлиб кетади. Н. Сафаров, Олияхон Султонова.*

ОЛДИ-БЕРДИ 1 Бир-бировидан нарса олиб, нарса бериб туриш, бир-бировининг ҳожатини чиқариб туриш ва шу асосдаги муомала, алоқа. *Мулла Обид каби ўз олдига деҳқончилик қилмоқчи бўлган.. келгиндилар*

билан уларнинг кўнда олди-бердиси бўлмайди. А. Қодирий, Обид кетмон.

2 айн. олиқ-солиқ **2.** -Тўйчиқнинг олди-бердиси бир гап бўлар, — деди Эшон Сурхонбойга. И. Раҳим, Тақдир.

3 Савдо-сотик, савдо муомаласи. *У [Тешабой] савдо-сотик, олди-берди масалаларида, яъни бирни ўн қилиш бобида икки онани эмган қув бузоқлардан. М. Исмоилий, Фарғона т.о.*

ОЛДИГА кўм. взф. **1** Ҳузурига, ёнига, қошига. *Ўқитувчининг олдига бормоқ. ■ Кўплашиб мактаб директорининг олдига киринглар, деб ўргатган бўлди. «Ёшлик». Низомжон унинг олдига жадал юриб кетди. С. Аҳмад, Уфқ.*

2 Олд томонига, олд томонидаги жойга. *Мактаб олдига гул экилди.*

Олдига тушмоқ Ўтиб кетмоқ, ўзмоқ. *Бу борада унинг олдига тушадиган одам йўқ.*

ОЛДИДА кўм. взф. **1** Ҳузурида, ёнида, қошида; кўз ўнгида. *Бу ишлар кўпчиликнинг олдида бўлди. ■ Янги келган вақтингизда мени ёмон йўлдан қайтардингиз.. Бутун звенo олдида таъзир бериб, одам бўл, дедингиз. А. Қаҳҳор, Қўшчинор чироқлари. У [мингбоши] кенг қилиб тикилган зар кимхоб тўн ичида йўғон гавдаси билан одамлар олдида савлат тўкиб турибди. М. Исмоилий, Фарғона т.о.*

Виждон олдида Виждонан. *Отабек ўзининг ёлғонлашидан виждон олдида қизаринди. А. Қодирий, Ўтган кунлар.*

2 Нисбатан, қараганда. *Бу Фуломжоннинг бояги таъвиши олдида ҳеч нима бўлмай қолди. М. Исмоилий, Фарғона т.о.*

3 Арафасида. *Бадал эса учинчи қаторни битириш олдида турибди. А. Қодирий, Кичик асарлар.*

ОЛДИДАН кўм. взф. Илгари, олдин. *Чой олдидан. Уруш олдидан. ■ Мансур хайрлашиш олдидан эшик ёнида туриб секингина: -Бир ёққа борсангиз, Зулайхо опангизга айтиб кетинг, — деди. Ў. Ҳошимов, Қалбингга қулоқ сол.*

Олдидан ўтмоқ 1) бирор кимса ёки нарсанинг ёнидан, рўпарасидан ўтмоқ; **2)** бирор иш ҳақида кимсанинг фикрини олмоқ, у билан маслаҳатлашмоқ. *Бу ишга қадам қўйишидан илгари, бир карра сизнинг олдингиздан ўтиб, раъйингизни билишга тўғри келди. Ойбек, Танланган асарлар.*

ОЛДИ-КЕТИ Олд ва орқа томони, гир атрофи. *Ҳар қанча бой бўлмасин, олди-кети тўла набира бўлган чолга дуруст оила қиз берадими?* Ойбек, Танланган асарлар.

Олди-кетини ўйлаб Ҳар томонлама мулоҳаза қилиб, оқибатини ўйлаб, атрофлича фикр юритиб. *Олди-кетини ўйлаб иш тутмоқ.*

ОЛДИН 1 *рвш.* Олд томонда, олдинда; илгари. *У мenden олдин. Олдин турмоқ.* ■ *Шу пайтда олдин кетаётган йўловчи ташийдиган автобус тўхтади.* С. Зуннунова, Олов.

2 Дастлаб, биринчи галда. *Кўрққан олдин мушт кўтарар.* Мақол. ■ *У ёққа боргани ҳаммадан олдин бу янги ўқитувчиларнинг ўзлари уялишлари табиий эди.* П. Турсун, Ўқитувчи.

3 кўм. (ч.к. билан) Муқаддам, илгари, аввал, бурун. *Овқатдан олдин. Сиз келмасдан олдин. Бундан бир йил олдин.* ■ *Ундан олдин Тўланбой жавоб қилди.* С. Аҳмад, Уфқ.

ОЛДИНГА *рвш.* Олд томонга, олға, илгарига. *Мингбоши.. олдинга юрди, қўлидаги қамчинни ўқталиб, хунук овоз билан ўқирди.* М. Исмоилий, Фарғона т.о. [Гулнор] *Орқага қайтиш-қайтмаслик тўғрисида бир лаҳза ўйлаб, кейин олдинга қараб юрди.* Ойбек, Танланган асарлар.

ОЛДИНГИ 1 Бошқаларга нисбатан олдинда, илгарида турган, олд томондаги; олд томонда жойлашган. *Олдинги қатор. Бинонинг олдинги хонаси.* ■ *Қисм қоронғи тушгунча, душманни олдинги окоплардан суриб чиқарди.* А. Қаҳҳор, Олтин юлдуз. *Нигора Қоплонга қаради: ит тумишугини олдинги оёқлари орасига олиб, бемалол мудраб ётибди.* С. Анорбоев, Оқсой. *Қирмизхон тушаётиб, олдинги ўриндикдаги тугунни олди.* Н. Аминов, Қаҳқаҳа.

2 Илгари бўлиб ўтган; аввалги, бурунги. *Тарихдан олдинги давр. Олдинги тўрт йил ичида эришилган муваффақиятлар.* ■ *Салимжон бундан бир неча йил олдинги қизиқари воқеаларни эслаиб, даврага илиқлик киритди.* «Шарқ юлдузи».

3 кўчма Бирор ишда ҳаммадан олдинда борувчи; пешқадам. *Мамлакатимизнинг олдинги кишилари.* ■ *Мирзакаримбой Тошкентнинг энг олдинги бойларидан.* Ойбек, Танланган асарлар.

ОЛДИНДА *рвш.* **1** Илгари томонда; олдида. *Олдинда йўл йўқ.* ■ *Кўзимизни очиб қарасак, ҳақиқий синовлар ҳали олдинда экан.* Газетадан.

2 Ҳаммадан илгарида, биринчи ўринда, биринчи сафда. *Ишда, ўқишда бошқалардан олдинда бормоқ.* ■ *Дўнан полвон билан Тоғжамат Хидиров қурилиш бўйича энг олдинда боришарди.* С. Аҳмад, Уфқ.

ОЛДИНДАГИ Олдинда турган; олдинда борувчи. *Олдиндаги бола.* ■ *Қози қўлидаги ҳассаси билан олдиндаги столни тўқ этказиб урди-ю: -Йўқол! Йўқол ҳамманг буёндан, — деб қичқирди.* М. Исмоилий, Фарғона т.о. *Олдиндаги аёл ялт этиб унга бир қаради-ю, яна орқасини ўгириб олди.* С. Зуннунова, Кўк чироқлар.

ОЛДИНДАН *рвш.* Бирор иш, воқеа-ҳодиса бошланмасдан, рўй бермасдан илгари. *Об-ҳавони олдиндан айтиб бермоқ. Бўладиган ишни олдиндан кўрмоқ.* ■ *Совхозда қоладиган бўлсак, икки ойлик маошни икковимизга олдиндан берармиш.* С. Аҳмад, Уфқ.

ОЛДИНИГА *рвш.* Аввал бошда, дастлаб. *Кўрага этиб келганида, баданидаги ланжлик кучайди. Қўл-оёқлари зирқираб оғриди. Олдинига, ўтиб кетар, деб эйтибор қилмади.* С. Анорбоев, Оқсой.

ОЛДИН-КЕЙИН *айн.* олдинма-кейин. **ОЛДИН-КЕТИН** *айн.* олдинма-кейин. *Олдин-кетин бормоқ.* ■ *Мана, узоқда бомбалар олдин-кетин портлади.* Ойбек, Қуёш қораймас.

ОЛДИНЛАМОҚ Олдинга томон босмоқ, бормоқ, юрмоқ; илгариламоқ. *Азизбек.. қамчисини кўкрагига кўндаланг қўйиб, боши билан жавоб ишораси бериб олдинлар эди.* А. Қолирий, Ўтган кунлар.

ОЛДИНМА-КЕЙИН *рвш.* Биринкетин, кетма-кет, бири кетидан бошқаси. *Меҳмонлар олдинма-кейин кириб келишди.* ■ *Прагер яна хотира дафтарчасини варақлади-да, олдинма-кейин экилган бугдойларнинг ўсишидаги фарқни кўрсатиб берди.* Н. Сафаров, Дон.

ОЛДИНМА-КЕТИН *айн.* олдинма-кейин. *Тилла тепаликнинг ярмига ҳам етмади, бола елкасидан ағдарилиб, иккови олдинмакетин пастга қараб думалади.* «Ёшлик». *Улар олдинма-кетин юриб, иборага кирадилар.* Ш. Рашидов, Бўрондан кучли.

ОЛДИ-ОРТИ *айн. олди-кети.*

Олди-ортига қарамай Кетини ўйламай, суриштирмай; пала-партиш. *Олди-ортига қарамай иш қилмоқ. ■ Одамлар олди-ортига қарамайпти.. ишқилиб, охири бахайр бўлсин. Н. Норқобилов, Тўқнашув.*

ОЛДИ-ОРҚАСИ 1 Олди ва орқа томони, атрофи. *Олди-орқасига қараб қўймоқ. Олди-орқаси баравар қизариб пишган нон. ■ Мирзакаримбой нақшкор меҳмонхонада атлас кўрпачалар тўшалган танчада олди-орқаси тўла ёстиқ ўтирар эди. Ойбек, Танланган асарлар.*

2 Бирор нарсанинг ўнг ва терс томони, орқа-олди. *Гилямнинг олди-орқаси.*

Олди-орқасини ўйлаб иш тутмоқ Чуқур мулоҳаза юритиб иш қилмоқ, ўйлаб иш қилмоқ. *Акрам қилни қирқ ёрган эсли йигитлардан эмасми, олди-орқасини ўйлаб боқса, келажаги хавф остида қоладиганга ўхшаб кўринди. С. Анорбоев, Оқсой.*

ОЛДИРМОҚ Олмоқ фл. орт. н. Соч олди-рмоқ. *Тиш олди-рмоқ. ■ Моҳира ойим ҳар бир ҳайитда бирор ойлар илгари эрига айтиб, болаларига кийимлик олди-рар эди. А. Қодирий, Ўтган кунлар.*

Олинг, олди-рманг Муваффақият тилаш ибораси. *Худо ҳаммангизга қувват берсин! Олинглар, олди-рманглар! Омин!* М. Исмоилий, Фарғона т.о. **Оғиздагини (ёки оғиздаги ошни) олди-рмоқ** Қўлдан чиқармоқ, бой бермоқ. *Ақлсиз оғиздагини олди-рар. Мақол. ■ Ёрмат уни [Йўлчини] одамлар олдида бўшбаёвликда айблади: -Бу нима, оғиздаги ошни олди-риш? - деди. Ойбек, Танланган асарлар.*

Юрак олди-рмоқ Қўрқиб қолмоқ, чўчиб қолмоқ. *Мадамин юрагини олди-риб, ўз кўланкасидан қўрқадиган бўлиб қолди. П. Турсун, Ўқитувчи. Ўзини олди-рмоқ* Ориқлаб, этдан тушиб қолмоқ. *-Сиқилманг, асло сиқилманг, хоним.. Акс ҳолда, ўзингизни олди-риб қўясиз, - деди Ҳамдамий Мунавварга. С. Анорбоев, Меҳр. Палончининг хотини ҳалиям ўзини олди-рмабди, деса ёмонми? С. Аҳмад, Юлдуз. Ўт олди-рмоқ 1) ўт ёқмоқ. Юк машинасида олиб келинган самоварлар туширилди, қутида олиб келинган ўтин-қўмирлар бирпасда қаланиб ўт олдирилди. С. Аҳмад, Жимжитлик; 2) с.т. моторни ишга туширмоқ. Тракторни ўт олди-рмоқ. ■ Моторни ўт олди-рди. С. Аҳмад, Уфқ.*

ОЛДИ-СОТДИ 1 Нарса, мол олиш ва сотиш, савдо муомаласи; савдо. *Олди-сотди қилмоқ. ■ Ноиб жанобларининг ясовуллари ҳайҳайлашиб, омади юришмай, олди-сотдигини тугатолмай қолган бозорчиларни ҳам ҳайдаб келмоқдалар. Х. Тўхтабоев, Йиллар ва йўллар. Кўргазма давомида тадбиркорлар ўзaro шериклик битимларини тузишлари, олди-сотди шартномаларини имзолашлари ҳам мумкин.. Газетадан.*

2 ҳуқ. Фуқаролик ҳуқуқий муносабатларида кенг тарқалган, асосий вазифаси товар-пул алмашинувини амалга оширишдан иборат шартнома.

ОЛДИ-ҚОЧДИ с.т. Хаёлий нарсалардан иборат, уйдирма, ёлғон-яшиқ. *Олди-қочди хабарлар. ■ [Акрам] Мен нима деяпман ахир? ..олим одамнинг шунақа олди-қочди гапларга учиб юрганига биз ҳам ҳайронмизда, отахон! О. Ёқубов, Айтсам тилим куяди, айтмасам - дилим. -Энди, жўра, буларнинг бариси олди-қочди гаплар, - деди Самад. М. М. Дўст, Галатепага қайтиш.*

ОЛД-ОРҚА Олд ва орқа томон; атроф. *Олд-орқанга қараб юр!*

ОЛИБСОТАР Арзонга мол олиб, қимматга сотувчи, майда савдогар. *Пахта суврати солинган чинни идишлар олиб-сотарларнинг уйда қаланиб ётса. Мирмуҳсин, Илдизлар ва япроқлар.*

ОЛИБСОТАРЛИК 1 Арзонга мол олиб, қимматга сотишлик ва шу иш билан шуғулланиш. *Зебо хола унча-мунча бозорга айланиб туради. Олиб-сотарлик қилмайди. Газетадан.*

ОЛИГАРХИЯ [юн. oligarchia - озчилик ҳокимияти] Давлат бошқаруви шакли; кичик бир гуруҳга бирлашган шахсларнинг сиёсий ва иқтисодий ҳукмронлиги; шу ҳукмрон гуруҳнинг ўзи.

ОЛИГОПОЛИЯ [юн. oligos - оз, кам + poleo - сотаман] Бозорни ташкил этиш шаклларида бири; бунда бир қанча йирик фирма ва компаниялар норасмий келишувлар асосида асосий маҳсулот турларини ишлаб чиқариш ва сотишни назорат қилиб туради. *Монополия каби олигополия ҳам номукамал рақобат кўриниши ҳисобланади. «ЎзМЭ».*

ОЛИЙ [а. على - юқори, юксак, баланд] **1** Мавқеи, мартабаси, раҳбарлик роли ва

ш.к. жиҳатидан энг юқори; бош. *Олий Мажлис. Олий суд. Олий бош кўмондон.* ■ 30 октябрь куни Ўзбекистон Республикаси Олий Кенгашининг XI сессияси ўз ишини давом эттирди. Газетадан.

Жаноби олийлари 1) эск. олий табақага мансуб ёки олий мансабга эга бўлган киши (подшоҳ, хон, амир, бек ва ш.к.) ва уларнинг номини улуғлаб айтиладиган мурожаат шакли. - *Эрта билан жаноби олийга ариза ва совринимизни тортиқ қилгандан кейин, агар рухсати олий бўлса, сўнгра савдога киришармиз, — деди карвонбоши. С. Айний, Қуллар. Зоти олийларига подшоҳ ҳазратларининг илтифотлари баланд эмиш. Ойбек, Навоий;* 2) ҳозирда: олий даражадаги ёзишмаларда ҳукумат ёки давлат бошлиғига ҳурмат юзасидан бевосита ёки унинг номига қўшган ҳолда мурожаат шакли. *Президент жаноби олийлари. Бош вазир жаноби олийлари. Фармони (ёки амри) олий ёки олий фармон* Энг юқори ташкилот, давлат органи ёки бошлиқнинг фармони. [*Салимбойвачча:*] *Хўш, айтинг-чи, подшонинг мардикор олишига нима дейсиз? Мана, фармони олий чиқди. Ойбек, Танланган асарлар.*

2 Сифат жиҳатидан энг юқори, энг яхши. *Олий нав. Олий сифат.* ■ *Боғда ҳовуз бўйига шинам шийпонларга ёзилган дастурхонлар ёзилганича, беш юлдузли олий нав коньяклар очилганича, сўйилган бўрдоқилар сўйилганича қолиб кетди. О. Ёқубов, Диёнат.*

3 Энг юқори даражали, энг юқори, юксак. *Олий мақсад.* ■ *Ўзбек адабиёти ҳақиқатан ҳар жиҳатдан баркамол, таҳсинга лойиқ, халқимизнинг олий мақсади учун курашда катта куч бўлиб қолди. К. Қаҳҳорова, Чорак аср ҳамнафас.*

4 Тараққиётнинг энг юқори даражасига эришган, баркамол. *Ташкилотнинг олий формаси.*

5 Таълим тизимидаги юқори босқич. *Олий ўқув юрти.* ■ *Баъзан олий маълумотли кишилар ўз таржимаи ҳолларини бир вараққина ёзиб беришга оғринадилар. Шукрулло, Сайланма.*

6 Энг кучли, энг юқори. *Сирасини айтганда, мавсум бошидаёқ олий лигага берилган кўш йўлланмадан бирини қўлга киритиш осон бўлмаслиги кўзга ташланмоқда. Газетадан.*

7 Юқори, мураккаб. *Олий математика.*

8 Юқори, сўнги. *Олий жазо.*

ОЛИЙЖАНОБ [a. عالی جناب — улуғ, юксак мартабали афанди, тақсир, жаноб] **1** Юқори даражада одобли, хулқ-атвори, одамгарчилиги жуда баланд; улуғ, асл. *Умид, сен олийжаноб, оқила бир қизнинг муҳаббатини оёғости қилдинг, сен бу аламни ўлгунингча тортасан. Мирмуҳсин, Умид. Яхшиларга эргашган муродга етади. Деганларки, олийжаноб одамлар ҳар қачон йўлдошимиз бўлади. Газетадан. Ўз ҳамқишлоқларимиз, ҳамшаҳарларимизнинг нақадар ажойиб, одамоҳун, олийжаноб, дилкашлигини бошқа юрт халқлари билан мулоқотда бўлганингиздан кейин янада яхшироқ тушунаркансиз. Газетадан.*

2 Юқори даражада ҳимматли, олийҳиммат, ҳиммати баланд. *Раисимиз жуда олийжаноб одам, эшитгандирсиз, ёрдам бериб турадилар. Мирмуҳсин, Илдишлар ва япроқлар.*

3 Жуда яхши, мисли йўқ. *Олийжаноб уй.*

4 Эзгу, эзгули. *Олийжаноб гап. Олийжаноб касб. Олийжаноб иш.* ■ *У одамликнинг энг олийжаноб, энг юксак, энг ширин ҳисларидан махрум бўлади. С. Зуннунова, Олов. Нодирнинг хаёлига олийжаноб бир фикр келди. «Шарқ юлдузи».*

ОЛИЙЖАНОБЛИК Олийжаноб хусусиятларга эгалик. - *Бу йиртқиқларнинг даҳшатли гуноҳларидан кечиш учун ҳам юрак керак, олийжаноблик керак, — деди кекса солдат. А. Мухтор, Асарлар. Ҳаётда шундай яхши одамлар борки, уларнинг олийжаноблигига, камтарлиги ва кишиларга беминнат хизмат қилишларига чин дилдан таҳсин айтгинг келади. Газетадан.*

ОЛИЙМАҚОМ [a. عالی مقام — юксак мартабали, юқори даражали] Юқори даражали, юксак. *Ошинога ошно бўлсам, олиймақом рағбатлар олсам, мен ўзимнинг ҳам Яхшибоевга айланишим муқаррар бўлиб туюлади. М. М. Дўст, Лолазор.*

ОЛИЙҲИММАТ [a. عالی همت] Ҳиммати баланд, кимсага ҳимматини, яхшиликни аямайдиган; саховатли. *Олийҳиммат одам.* ■ *Шариф ака Нодирбек сингари хорижда даволанишга муҳтож уч кишига амалий ёрдам бериб, ўзининг саховатпеша, олийҳиммат инсон эканлигини яна бир бор исботлади. Газетадан.*

ОЛИМ [a. عالم — билимли, илмли, доно; маълумотли] **1** Фаннинг бирор соҳаси бў-

йича махсус билимга эга бўлган киши. *Ўзбекистон олимлари. Ёш олим. Тилишунос олим.*

2 Умуман, билимли киши. *Олим бўлсанг, олам сеники.* Мақол. *Оз-оздан ўрганиб, олим бўлур.* Мақол. ■ *Афлотун ҳам, Арасту ҳам замонасининг кўп доно, кўп ақли олимлари бўлган, шубҳасиз.* П. Турсун, Ўқитувчи.

3 Олим (эркаклар исми).

ОЛИМА [a. *عالمه*] 1 Олим аёл. *Гулчеҳра опа иқтидорли олима бўлгани учун ҳам ўн икки илмий иш яратишга ва иккита муаллифлик гувоҳномасини олишга муяссар бўлди.* Газетадан.

2 Олима (хотин-қизлар исми).

ОЛИМЛАРЧА айн. *олимона.* *Олимларча айтилган гап.*

ОЛИМЛИК Олимга хос хусусият, хатти-ҳаракат. *Фақат ҳамма тан олган шоирларни тан олиш, фақат обрўга эга бўлганларнинг шеърларига тушуниш олимлик эмас,* Шукрулло, Сайланма.

ОЛИМНАМО [a. + ф. *عالمنامه* — сохта олим] Олимга ўхшаган, олим кўринишидаги. *Меҳмонлар орасида тор пешонали, жингалак оқ сочлари, бироқ қошлари юзига улғуворлик бахш этган олимнамо киши бор эди.* С. Нуров, Майсаларни аёз урмайди.

ОЛИМОНА [a. + ф. *عالمانه* — оқилона, донолик билан, олимларча] *рвш.* Олимлар каби, олимларга хос бир йўсинда, олимларча. *Олимона кўриниш. Олимона мулоҳаза юритмоқ.* ■ *Мен чашначиман. Ишим оғир, масъулиятли, олимона кунт, заргарона маҳорат талаб қилади.* «Фан ва турмуш».

ОЛИМПИАДА [юн. *Olympias, Olympiados* — Юнонистонда Олимпия шаҳрида Зевс (олий маъбуд) шарафига ҳар тўрт йилда ўтказиладиган тантанали байрам ва спорт мусобақалари; ана шу тўрт йиллик давр] 1 Халқаро олимпиада кўмитаси томонидан ҳар тўрт йилда ўтказиладиган йирик халқаро замонавий спорт мусобақалари, олимпиада ўйинлари.

Олимпиада (ёки Олимпия) ўйинлари 1) Юнонистонда умумхалқ байрами ва мусобақалари (2 гилдиракли аравада тез юриш, бешкураш, муштлашиш мусобақалари, санъат танлови); 2) Юнонистоннинг Олимпиада ўйинларини эслатувчи жаҳон спорт мусобақалари.

2 Ўқувчилар, талабаларнинг бирор фан ёки санъат соҳаси бўйича мусобақаси, билимларини синаш бўйича танлов. *Математика бўйича олимпиада.* ■ *Бизнинг тўғарак район олимпиадасида биринчи ўринни олган! — деди..* *Муҳаббат. Ҳ. Назир, Бир туп гўза. Студентлар бу талабларни яхши тушунишди ва олимпиадага йил бўйи тайёргарлик кўришди.* «Фан ва турмуш».

ОЛИС 1 Бирор ердан узоқда, йироқда бўлган. *Олис жой. Олис қишлоқ.* ■ *Ахир бундан ўн беш кун илгари Умид юк машинасида Мирзачўлдаги олис совхозга чиқиб келди.* Мирмуҳсин, Умид. *Ўспиринлар, олис манзилни кўзлаган сайёҳлардай, сафарга пухта ҳозирланган эдилар.* «Ёшлик». *Олис бир қишлоқдан келиб, мураккаб санъат йўлини тутиб, уни пухта эгаллашнинг ўзи катта жасорат.* Газетадан.

2 Узоқ давом этадиган; давомли, узоқ. *Олис йўл. Олис сафар.* ■ *Йўллар азоби энди унутилди, деганда яна олис сафарга жўнатиб юборишмоқчи.* С. Аҳмад, Жимжитлик.

3 Ўтмишдаги, қадимги. *Лекин танимизда кезар-ку, бешак, Олис боболарнинг минг йиллик қони.* А. Орипов, Йиллар армони.

Олисни кўзламоқ Узоқ келажакда, охирида бўладиган ишни кўзламоқ, охирини ўйламоқ, [Зикриё қори:] *Эшон олисни кўзлайди.* Н. Сафаров, Шарқ тонги.

ОЛИСДА *рвш.* Узоқда, йироқда. *Олисида адирлардаги нефть вишкаларида чироқлар йилтирайди.* С. Аҳмад, Қадрдон далалар.

ОЛИСДАГИ Узоқдаги, йироқдаги. *Олисидаги қариндошдан яқиндаги ёт яхши.* Мақол.

ОЛИСДАН *рвш.* Узоқдан, йироқдан. *Олисида гумбураб тўп овози эшитилди.* ■ *Олисида осмонга интилган қизғиш нур борган сари авжланарди.* С. Зуннунова, Гулхан.

Олисида келмоқ ёки гапни олисида бошламоқ Гапни узоқдан келтириб, батафсил, даромади билан бошламоқ. *Комил гапни олисида бошлади.* Ҳ. Фулом, Машғал.

ОЛИСЛАМОҚ 1 Бирор ердан узоқлашмоқ, йироқ кетиб қолмоқ. *Отлиқ олислаб кетди.* ■ *Саид бугун яна шу киши келар экан-да, дея мингиллаб, ичида сўкинди-да, улардан олислади.* «Ёшлик».

2 Узоқ вақт тутилиб қолмоқ, ҳаялламоқ. *Кўп олислама, тез қайт.*

ОЛИСЛАШМОҚ **Олисламоқ** фл. бирг. ва ўзл. н. *Биз шаҳардан анча олислашдик.*

Самолёт аэродромдан анча олислашди. Йўл олислашиб қолди.

ОЛИСЛИК Узоқлик, йироқлик. *Мен ҳам қарши эмасман-у, бир томони — ёлғизлик, яна бир томони — шаҳарнинг олислиги.* Ҳ. Фулом, Машғал. *Мухтасар янги уй қуриб олгач, эски уйи қошидаги оғилхона олислик қилиб қолди.* «Саодат».

ОЛИС-ЯҚИН Узоқ-яқин, йироқ-ёвуқ. *Клуб олис-яқиндан келганлар билан тўлди.* ■ *Уни кўргани олис-яқиндан қариндош-уруғ, ёр-биродарлари келишди.* Ш. Холмирзаев, Оғир тош кўчса.

ОЛИФТА 1 Кийимига ва ўзига зеб берувчи; сатанг, башанг. *Олифта йигит.* ■ *Сочини иккита қилиб ўриб олган, икки чеккасига гажак қўйган бу олифта жувон тугунини сўрига ташлаб, бир уҳ тортиб олгач, Салимга қараб бақрайиб қолди.* И. Раҳим, Чин муҳаббат.

2 Шундай кишилар учун мос, сатангларга хос. *Олифта кийим. Олифта кийинмоқ.* ■ *[Салимбойвачча] Олифта тикилган қора мовут чакмонга ўралиб, бир қўлида зонтик ушлаб, ҳеч қаяёққа назар ташламай, гердайиб келади.* Ойбек, Танланган асарлар.

ОЛИФТАГАРЧИЛИК салб. Олифталарга хос хатти-ҳаракат, юриш-туриш, қилиқ. *—Қаернинг ҳандалаги, амаки? — деди олифтагарчилик қилиб.* С. Аҳмад, Уфқ.

ОЛИФТАЛИК айн. **олифтагарчилик.** *Биров жиғимга тегса аямайман. Сизга биров олифтагарчилик қилса, менга рўпара қилинг.* «Ёшлик». *[Салимбойвачча] Чўнтагидан арзон напиросни чиқариб, бойваччага тутди ва ўзи ҳам олифталик билан лабига қистирди.* Ойбек, Танланган асарлар.

ОЛИШ-БЕРИШ айн. **олди-берди.**

ОЛИШИШ 1 Олишмоқ фл. ҳар. н. Бел олишиш. *Яккама-якка олишиш. Фикр олишиши.*

2 Даҳанаки жанг, жанжал, олишув.

ОЛИШМОҚ 1 Олмоқ фл. бирг. н. *Фикр олишмоқ.* ■ *[Ошдан] Емаган бўлсангиз, сиз ҳам олишинг, — деди бек.* А. Қодирий, Ўтган кунлар.

2 Уришмоқ, курашмоқ, жанг қилмоқ; муштлашмоқ. *Қаҳҳор ва Озод олиша кетишди. Озод бир амаллаб унинг исканжасидан чиқаркан, қайта сўради: —Нима гап ўзи? «Ёшлик».*

Бел олишмоқ Курашмоқ, кураш тушмоқ, беллашмоқ. *Мен кўп давраларда бел*

олишганман. С. Аҳмад, Уфқ. **Ёқа олишмоқ** Ёқасидан тутиб бўғишмоқ, уришмоқ.

3 кўчма Бирон-бир тўсиқни енгиш, уни бартараф этиш мақсадида тинимсиз ҳаракат қилмоқ. *Каналга келмаганлар пахта билан олишиб ётишибди.* С. Аҳмад, Уфқ. *Бутун халқ Конибодомдан Учқўрғонгача қўзилган қурилишда тиним билмай меҳнат қилар, ер билан, тошу шағаллар билан олишарди.* С. Аҳмад, Уфқ.

4 кўчма Баҳслашмоқ, ҳақ-ҳуқуқ талашмоқ, тортишмоқ; бир-бирини енгиш учун тиришмоқ. *Ҳакимбойваччанинг яқин дўстларидан бир киши.. Мирзакаримбойга орқаворотдан тил текизганини эшитиб, у билан узоқ замон олишган.* Ойбек, Танланган асарлар. *Қудрат.. камбағаллар тарафини олиб, қишлоқ балохўрлари билан олишмаган кунини билмайди.* М. Исмоилий, Фарғона т.о.

Дон олишмоқ қ. дон. *Хотини автобусда қайтаётиб, «Эшқобил ферма сигир соғувчиси Ёрозгул билан дон олишиб юради», деган гапни эшитиб қолибди.* «Ёшлик». **Кўл олишмоқ** Келишмоқ, бир тўхтамага келмоқ. *Ҳар гал Мирвали Раҳимов билан учрашганда, қизикчилик орасида, кўл олишганларини эслатиб кўярди. Раҳимов унга, сабр қилинг, деб кўярди.* С. Аҳмад, Жимжитлик.

ОЛИШ-СОТИШ айн. **олди-сотди.** *Олиш-сотии ишлари. Олиш-сотиишга уста одам.*

ОЛИШУВ Кураш, жанг, муштлашиш. *Тунлари жиноятчини қувишлар, аёзли кунларда дилдираб йўл пойлашлар, олишувлар.. ҳаммаси тушида кўргандек ўтади-кетади.* «Ёшлик». *Олишувга талабгор Турон Бурҳон ўғли! «Шарқ юлдузи».*

2 айн. **олишиш 2.**

ОЛИҚ-СОЛИҚ 1 тар. Юртдан, аҳолидан солиқ тариқасида олинадиган, тўпланадиган пул ва б. нарсалар. *Олиқ-солиқ тўплаш.* ■ *Қайта ундай текинхўрлар бевабечораларни кемирдилар. Қани, улар олиқ-солиқ билан қаноатлансалар ҳам гўрга эди.* Ҳамза, Танланган асарлар.

2 этн. Қудалар орасида бир-бирига бериладиган нарсалар ҳақидаги музокара ва шу музокара натижасида йигит томондан қиз томонга бериладиган қалин ва б. тўйларимизда олиқ-солиқлар, олди-бердилар борган сайин кўпайиб борапти. Газетадан.

ОЛИҚ-СОТИҚ айн. **олди-сотди.** *Гоҳо ютқизишда, гоҳо ютукда, Бир-бирин англарди*

олиқ-солиқда. М. Шайхзода. *Ўғлим Тошкент билан Марғилон орасида қатнаб, олиқ-солиқ қиладир.* А. Қодирий, Ўтган кунлар.

ОЛКИШЛАМОҚ I Итни итга ёки бирор кимсага тезламоқ, гижгижламоқ.

2 кўчма Кишиларни бир-бирига зидламоқ, уриштириш учун ундамоқ; тезламоқ, хезламоқ.

ОЛЛО(Х) [а. الله — илоҳий куч, худо] дин. айн. **аллоҳ.** *Темур, инсонпарварлик ва мардликни Оллоҳ ҳам, халқ ҳам улуғлайди, деган гапни кўп такрорлар эди. «Фан ва турмуш». Уруш қилай десанг, Оллоҳ на ҳожат, Топилар жаҳонда баҳона бисёр.* А. Орипов, Йиллар армони.

Ё олло(х) унд. с. 1) таажжуб, ҳайрат билдиради; тавба. *У мулоим чеҳра билан жилмайди: -Ё оллоҳ, шундай одамлар ҳам бўлар эканми? — деди.* П. Турсун, Ўқитувчи; 2) худога ёлвориш, сийғиниш ибораси. **Оллоҳу акбар** [а. الله أكبر — оллоҳ буюк, улуғ] Овқатдан сўнг ёки йўлга кетиш олдидан ўқиладиган дуо-фотиҳанинг охирги ибораси. *Умумий «оллоҳу акбар» дан сўнг Ҳасанали отни йўлга солди.* А. Қодирий, Ўтган кунлар.

ОЛМА I Атиргуллар оиласига мансуб кўп йиллик мевали дарахт. *Олма кўчати.* ■ *Бу олмалар ҳосилга киргач, беш-олти йил ўтиши керак.* С. Зуннунова, Олов.

2 Шу дарахтнинг меваси. *Оқ олма. Қизил олма.* ■ *Жувон қўлидаги олмани устма-уст бир неча мартаба тишлади ва чала чайнаб ютди.* А. Қаҳҳор, Минг бир жон. *Олма шарбати организмни бақувват қилади.* «Саодат».

Кекирдак олмаси айн. қуштомоқ. **Олма гули** 1) пушти ранг. *Олма гулли рўмол;* 2) олма гуллаган пайт, палла. *Тўйлари олма гулида бўлган эди. Олма чой* Олмақоқидан қовуриб тайёрланган чой. *Суви қочган нон, олма чой билан нонушта қилишаётганда Гадейбой пайдо бўлди.* Ҳ. Фулом, Феруза.

ОЛМАЗОР Нуқул олма дарахти билан банд ер, майдон; олма боғи. *-Кўрдинларми, — деди Комилжон тўхтаб, — бу ер олмазор эди.* С. Зуннунова, Олмазор.

ОЛМА-КЕСАК: кўз(лар)и олма-кесак таради с.т. Бесаранжом бўлиб, ҳар ёққа қарайди, аланглайди. *Чол бесаранжом бўлиб, кўзи бежо, олма-кесак тара бошлади.* И. Қаландаров, Шохидамас, баргида. *Собирнинг қийиқ кўзлари олма-кесак терар, лаблари асабий титраётганди.* А. Кўчимов, Ҳалқа.

ОЛМАХОН Ўрмонда дарахтда яшовчи, узун бароқ думли кичкина кемирувчи ҳайвон.

ОЛМАҚОҚИ Кесиб қуритилган олма. *Дастурхонда туришак, олмақоқи, ёнғоқ, па-тир бўларди.* Ш. Холмирзаев, Оғир тош кўчса. *Фронтга бор-йўғи уч марта борган у: икки марта агиттеатрда, бир марта олмақоқи ортланиш эшелонни кузатиб.* М. М. Дўст, Лолазор.

ОЛМОН [фр. Alleman — немис] эск. Герман халқи, немислар.

ОЛМОС I [т. + а. ألماس — қимматбаҳо тош < юн. adamas — бузилмас, мустаҳкам] **1** Шаффоф, ялтироқ соф углероддан иборат ўта қаттиқ, қимматбаҳо тош (тарашлаб маълум шаклга келтирилгани «бриллиант» деб аталади). *Олмос ерда қолмас.* Мақол. ■ *Табиятда мавжуд бўлган нодир тошлар ичида энг машхури олмос ҳисобланади.* «Фан ва турмуш».

2 Шундай тош ўрнатилган кескич; олмосли кескич. *Олмос билан ойна кесмоқ.*

3 Олмосдан ясалган, олмос билан безатилган, зийнатланган. *Олмос қилич. Олмос зирак.*

4 кўчма Шундай тош сингари ўткир, кескир; қимматли, бебаҳо. *Инсон ақли — олмос.* Мақол. ■ *Бу олмос сатрлар муаллифи буюк шоир ва мутафаккир Паҳлавон Маҳмудга қўйилган ёдгорлик қадимий Хоразм усталари қандай мўъжизавор санъат обидаларини яратишга қодир бўлганликларидан гувоҳлик бериб турибди.* Н. Сафаров, Оловли излар. *Куйла, сазим, юрагим, шеърим, Бахт китобин қилгил тарона. Замирида ҳуқуқ, эрк, номус. Ҳар бир сатри олмос, дурдона.* Файратий.

ОЛМОС II Заҳарли, сариқ гулли ёввойи ўт; олмосўт.

ОЛМОШ тлш. От, сифат, сон ўрнида қўлланадиган сўз туркуми. *Кишилик олмоши. Кўрсатиш олмоши. Сўроқ олмоши.*

ОЛМОҚ I Нарсани ушлаб ёки бирор асбоб билан тутиб қўлга киритмоқ. *Ариқдан сув олмоқ.* ■ *Саодатхон капалак ушлагандек эҳтиётлик билан қутичани қўлига олди.* С. Зуннунова, Олов. *Ўзбек оғим бурчакда бола кўтариб ўтирган Зайнабдан чақалоқни олиб, уни жомни тўкиб келишга буюрди.* А. Қодирий, Ўтган кунлар. *Йўлчи кетмонни олиб, ишига жўнади.* Ойбек, Танланган асарлар.

Бағрига олмоқ 1) ўз қучоғига олмоқ, қучоқламоқ. *Болани бағрига олиб, анча вақт йиғлади.* М. Маҳмудов, Булбулиғўё; 2) кўчма ўз қарамоғига, паноҳига, ҳимоясига олиб ардоқламоқ. *Колхоз.. буларни хурсандлик билан ўз бағрига олар эди.* А. Қаҳҳор, Кўшчинор чироқлари. **Кўлини олмоқ** 1) кўлидан ушламоқ. *Уста Олим Отабекнинг кўлини олиб сўрашди.* А. Қодирий, Ўтган кунлар; 2) келишмоқ, розилигини олмоқ. **Кўлтиғига олмоқ** 1) кўлтиғига қистирмоқ, кўлтиқламоқ; 2) кўчма ўз ёнига тортмоқ. *Ёрмат эса Йўлчини ўз кўлтиғига олиб, бошқаларга қарши кўйишни истар эди.* Ойбек, Танланган асарлар. **Кўлтиғидан олмоқ** Кўлтиғидан тугтиб бормоқ ёки кўтармоқ. **Ҳиқилдоғидан олмоқ** Ҳиқилдоғидан, томоғидан бўғмоқ.

2 Қабул қилмоқ; ёлламоқ. *Ишга олмоқ. Болага энага олмоқ.*

3 Бўшатмоқ, бекор қилмоқ, туширмоқ. *Сизни бугундан бошлаб ишдан олдик.* ■ *У аввалги директоримизнинг бошига тўхмат ёғдириб, ишдан олдирди.* Х. Тўхтабоев, Ширин қовунлар мамлакати.

4 Қирқиб, кесиб, тортиб, суғуриб чиқармоқ. *Тирноқ олмоқ. Кўйнинг жунини олмоқ. Соч олмоқ. Оёққа кирган тиканни олмоқ.* ■ *[Али охун] Дўпписи ичига тўғналган игнани олди.* Ойбек, Танланган асарлар.

5 Ечмоқ, солмоқ. *Хотин бошидан жун рўмолини олди-да, бир-икки қоқиб, яна ўради.* М. Исмоилий, Фарғона т.о.

6 Туширмоқ, бўшатмоқ; холи қилмоқ. *Елкасидан юкани олмоқ. Машинадаги яшиқларни олмоқ.* ■ *Уста Олим отнинг жиловидан кўлини олиб, сўради..* А. Қодирий, Ўтган кунлар.

7 Қўлга киритмоқ; эга бўлмоқ. *Даромад олмоқ. Пахтадан мўл ҳосил олдик.* ■ *[Йўлчи] Икки ярим йил бойнинг бўйинтуруғини судради. Нима олди?* Ойбек, Танланган асарлар. *Феруза Йигиталиева шу олимпиадада бир йил биринчи ўринни олди.* С. Аҳмад, Юлдуз.

8 Емоқ, емоқ-ичмоқ, тановул қилмоқ. *Ҳаммаси сизнинг тегишингиз, ҳеч кимга қараманг. Балиқни олинг!* А. Қаҳҳор, Кўшчинор чироқлари.

9 Ўзига сингдирмоқ, қабул этмоқ. *Рангни яхши оладиган ипак.*

10 Пайдо қилмоқ, ҳосил этмоқ, йиғмоқ. *Яра йиринг олибди. Ғўзалар кўсак олди.*

11 Айтмоқ, қуйламоқ. *«Насруллои», «Гиря» ол! Ибодхўжа, «Фигон»ни ол! Шукрулло, Сайланма. Зўр қўшиқлардан биттасини ўрганиб, катта тўйда ўртага чиқиб, бир олайки.* А. Кўчимов, Ҳалқа.

12 Уйланмоқ, хотин олмоқ. *[Зухра:] Ёш қизни олганинг бир сари, энди буни ўқишдан қўйиб, курортга олиб кетаётганинг нимаси?* А. Қаҳҳор, Оғриқ тишлар.

13 Харид қилмоқ. *Бу пальтони неча пулга олдингиз? Ҳовли олма — кўшни ол.* Мақол. ■ *Анча нарса олдик.. Сенага бир жўра беқасам.* А. Қаҳҳор, Кўшчинор чироқлари.

14 Қўлга киритмоқ, қозонмоқ. *Обрў олмоқ. Эркинлик олмоқ. Дарсдан «аъло» баҳо олдим. Илмий даража олмоқ. Олқиш олган омондир, қарғиш олган ёмондир.* Мақол. ■ *Ўн беш кунлик синовдан кейин тракторчи номини олдик.* А. Қаҳҳор, Хотинлар.

15 Кетказмоқ, йўқотмоқ. *Чаённинг захрини чаён олади.* Мақол. ■ *Фотиҳадан кейин Офтоб ойим.. куёвга қатиқ олиб чиқди ва Отабекнинг ичмаганига ҳам қўймай, «ичингиз, йўл губорини оладир», деб қистай бошлади.* А. Қодирий, Ўтган кунлар.

16 Қопламоқ, чулғамоқ, ўрамоқ, тутмоқ. *Тўқайни ўт олган. Кабобнинг ҳиди бутун ҳовлини олди. Мени иситма олди.* ■ *Сен бундан кетмайсан омон, Унгу сўлни олса туман.* «Ёдгор».

17 Эгалламоқ, ишғол қилмоқ, банд этмоқ. *Роял кўп жойни олди. «Гўрўғли келиб, фалон шаҳарни олибди, деса семирив, эшикдан ичкарига базўр кираман.* «Гулихиромон». *Можаро устига Фосих афанди кириб қолди. У тўғри айвонга чиқиб, мингбошининг пинжи-дан жой олди.* М. Исмоилий, Фарғона т. о.

18 Камаштирмоқ. *Тонг ёришиб, қамиш поялари офтоб тиғида лов-лов ёнаётганга ўхшаб кўзни олади.* С. Аҳмад, Уфқ.

19 Етакчи феъл сифатида от туркумидаги сўзлар билан бирикиб, қўшма феъл ясайди, мас., *амал олмоқ, авж олмоқ, аланга олмоқ, баҳра олмоқ, бош олмоқ, ёнини олмоқ, ёш олмоқ.*

Амал олмоқ Ўсмоқ, ривожланмоқ, юксалмоқ (ўсимликлар ҳақида). *Дарахтлар деярли ҳаммаси амал олиб, анча юксалиб қолган эди.* М. М. Дўст, Лолазор. **Бўйнига олмоқ** 1) иқрор бўлмоқ. *Бу шеърни ўқиган баъзи таниш-билишларим, қарилликни бўйнига олиб қолибди-да, деб ўйлашлари мумкин.* Шук-

рулло, Сайланма; 2) зиммасига, ўз жавобгарлигига олмоқ. **Йигим-теримни олмоқ** Экинларни ўриб, териб ҳосилни йиғиштирмоқ. У. *йигим-теримни олгандан кейин Фарҳодга кетиб, қиши билан ўша ерда қолиб кетди.* А. Қаҳҳор, Хотинлар. **Тескарисига олмоқ айн. аксига олмоқ қ. акс I 2.** Мен *жўрттага баъзи гапларни тескарисига олиб кўрсам ҳам, у чурқ этмайди.* А. Қодирий, Ўтган кунлар. **Юз олмоқ айн. юз тутмоқ қ. юз I.** Кун баралла кўтарилиб, қиёмга юз олди. М. Исмоилий, Фарғона т. о. **Қаламга олмоқ** Ёзмоқ, хатга туширмоқ. Бу кун мен шу *«Ўтган кунлар»ни қаламга олганимда ҳам, ўша ўзимни зериктирган фасли ташлаб ўтишга мажбур бўлдим.* А. Қодирий, Ўтган кунлар. **Қарши олмоқ** Кутмоқ, пешвоз чиқмоқ. *Меҳмонларни нон-туз билан қарши олишди.* Газетадан. **Қийиғига олмоқ** Аксини тутмоқ, акс иш қилмоқ. **Кўй оғзидан чўп олмаган қ. кўй.** *Бизнинг қишлоқда Ғофуржон деган кўй оғзидан чўп олмаган, бунинг устига ҳеч кими йўқ бир йигит бор эди.* А. Қаҳҳор, Хотинлар.

20 Равишдош шаклида бошқа феъллар билан бирикиб, қўшма феъл ҳосил қилади, мас. *олиб бермоқ, олиб бормоқ, олиб келмоқ, ола билмоқ, ола бошламоқ, ола келмоқ.* Узум сув олиб қолди.

21 =и(б) аффиксли равишдошлар билан бирикиб, қўшма феъл ҳосил қилади ва иш-ҳаракатнинг ўзи учун бажарилганлигини билдиради, мас. *билиб олмоқ, тортиб олмоқ, етиб олмоқ, йиғиб олмоқ, суғуриб олмоқ, ёза олмоқ, қила олмоқ.*

ОЛМУРУТ шв. Нокнинг майдароқ бир тури.

ОЛОВ 1 Юқори ҳароратда ёниб, нурланиб турган газ, аланга, ўт. *Олов ёқмоқ. Оловни ўчирмоқ. Қумғонни оловга қўймоқ. Оловнинг тиши йўқ, ҳўл-қуруқ билан иши йўқ.* Мақол.

2 Чўғ. *Танчанинг оловини очинг, тақсир, баданимда қалтироқ турди.* Ҳ. Ғулом, Машғал. [Йўлчи] *Бир қўлини қизнинг пешонасига қўйди: -Нақ оловдай.. — деди.* Ойбек, Танланган асарлар.

3 Иссиқлик, ҳарорат. *Қуёш олови.* ■ *Қуёш осмондан олов қуйяпти.* С. Аҳмад, Таъзим. *Ҳувиллаган тундай ёлғизлик қурсин, Ёлғиз чақмоқтошдан чиқмайди олов.* Ч. Эргаш, Орзунинг оғир киприклар. *Йўлчи*

қуёшнинг олов селида чўмилиб, тўнка ковлар эди. Ойбек, Танланган асарлар.

4 *кўчма* Ғайрати ичига сиғмайдиган, юрагида ўти бор, жўшқин. *Олов йигит.* ■ *Синфнинг энг шўх, олов ўқувчиси Санжар бўлса, оғзини катта очганча, Ойша холага тикилиб қолди.* С. Зуннунова, Кўк чироқлар. *Ўзиям десангиз, отинойиси, олов. На бир кўрқишни билади, на бир нарсадан тап тортишни.* Ш. Тошматов, Эрк қуши.

5 Жўшқин туйғу, ҳиссиёт. *Шунча тутқун бўлишига қарамасдан, бу қизнинг қалбига муҳаббат олови аллақачон тушган эди.* С. Зуннунова, Олов. *Исфандиёрнинг инжиқ ва худбин кўнглида ўч олови ёнарди.* С. Сиёев, Аваз.

Икки олов орасида (ёки ўртасида) қолмоқ Жуда мушкул аҳволда, нима қиларини билмай қолмоқ. *Шўрлик асирлар икки олов орасида қолган эдилар: чиқмай десалар, мўғуллар орқаларидан санчар, чиқай десалар, мудофаачиларнинг ўқ ва найзасига санчилар эдилар.* М. Осим, Ўтрор. **Кесақдан олов чиққандай** Ғайрати йўқ, лоқайд одам кутилмаган бир иш қилганда айтиладиган ибора. **Олов кўзлар** Чарақлаб, ёниб турган кўзлар. *Ёш Ҳожия олов кўзларини чарақлатиб, Онахонга тикилган эди.* А. Мухтор, Опасингиллар. **Олов нафасли** Сўзи ўткир. *Уайтган толлар қулапти, бош тикмоқчи бўлган мактаб-маориф соҳасига тамоман янги одамлар, олов нафасли ёшлар келипти.* А. Қаҳҳор, Кўшчинор чироқлари. **Уруш оловини ёқмоқ** Уруш чиқариш учун халқларни бир-бирига гижгизламоқ, уруш чиқармоқ, урушни бошлаб бермоқ.

ОЛОВБАРДОШЛИК Оловга чидамлик. *Ушбу иншоот материалларнинг юқори температурадаги шароитда ишлатилишини, яъни оловбардошлик хусусиятини ҳисобга олиб бунёд этилди.* Газетадан.

ОЛОВДАЙ, =дек: оловдай кўринмоқ Яқин таниш кишидай иссиқ кўринмоқ.

ОЛОВДОН Сандал, самовар, печка ва ш.к. нинг олов турадиган жойи: ўтхона.

ОЛОВКУРАК Чўғ солиш ёки олиш учун ишлатиладиган қисқа дастали металл куракча: ўткурак; хокандоз. *Фотима қайтиб, қўлидаги оловкуракни ўчоқ олдига иргитди.* Т. Ашуров, Оқ от.

ОЛОВЛАНМОҚ 1 Оловдек яллиғланмоқ, қизармоқ, тафт олмоқ. *Мастуранинг*

лўппи юзи оловланди. Ойбек, О.в. шабадалар. Ҳамкасбининг нордон гапидан кейин юзи оловланиб, слесарлар хонаси томон чоғиб кетди. «Саодат».

2 кўчма Аланга олмоқ, кучаймоқ, зўраймоқ. *Лейтенантнинг нафрати оловланиб, нима қиларини билмасди.* Шухрат, Шинелли йиллар. *Ҳайдарнинг кўзига кечаги воқеа кўринди, унинг алами оловланди.* И. Раҳим, Ихлос. *Ўз-ўзидан оловланиб кетишими ённки бошқа жиҳатларими бошқаларга ҳам ёқмапти.* Ш. Бўтаев, Қўрғонланган ой.

ОЛОВЛИ 1 Олови, ўти бор. *Оловли ўчоқ.* ■ Пулемёт қисқагина тириллаб, ёнгинамда бир оловли ханжар йилтиллади-ю сўнди, мен гурс этиб йиқилдим. А. Мухтор, Асарлар.

2 Иссиғи, ҳарорати бор, иссиқ, ҳароратли. *Меҳмон унинг [Жапақнинг] қўлини олиб, иситмаси чиқиб турган оловли кафтига босгандагина эсига келди.* А. Мухтор, Қорақалпоқ қиссаси.

ОЛОВ-ОТАШ Ҳаддан ташқари иссиқ. *Уч ҳафтадирки, Пўлат шаҳар касалхонасида ётибди. Тўрт кунгача олов-оташ бўлиб ёнди, ўзига келмади.* Ш. Рашидов, Қудратли тўлқин.

ОЛОВ-СЕЛЛИ с.т. Жуда иссиқ, ҳароратли. *Ёз ойининг олов-селли кунлари бошланди.* М. Жабборов, Севинч ёшлари.

ОЛОВХОНА айн. оташхона.

ОЛОМОН Ўз-ўзидан, кутилмаган ҳолда тўпланган одамлар; халойиқ. *Оломондан қочган сира қутулмас.* Мақол. ■ *Оломон аркка ҳужум қилди, деразаларнинг тарақлагани.. эшитилади.* Уйғун ва И. Султон, Алишер Навоий. *Намозгарга яқин куёв катта оломон билан келди. Тўрт карнай, олти сурнанинг шовқини кўкни тутди.* Ойбек, Танланган асарлар.

Оломон қилмоқ Судсиз-бошқасиз кўплашиб урмоқ, уриб ўлдирмоқ. *Гап шу, мусулмонлар, агар бугун ҳам бир гап чиқмаса, бизни лақиллатганлари учун учовининг бошига тўн ёпиб, оломон қиламиз.* Х. Тўхтабоев, Йиллар ва йўллар.

ОЛОН, олонг шв. Қаровсиз, ташландиқ ер; тепалик, паст-баландлик. *Кўп ўтмай, ҳовлига яқин олонга оқ «Волга» келиб тўхтади.* Н. Аминов, Ёлғончи фаришталар.

ОЛТИ снқ. сон 6 рақами ва шу рақам билан ифодаланган сон, миқдор. *Олти сўм. Олти кун. Олти йил. Оғриқ жойини топса,*

олти ой қишлайди. Мақол. ■ *Ана ўшанда унинг қизи Доно олти ёшда эди.* С. Зуннунова, Кўк чироклар.

ОЛТИБУРЧАК мат. Олти бурчакли текис геометрик шакл. *Олтибурчак чизмоқ.*

ОЛТИЛИК 1 Олтита холи бўлган қарта. *Фиштиннинг олтилиги.*

2 Олти мисрадан иборат шеър; мусаддас.

ОЛТИН 1 Менделеев даврий системасининг I гуруҳига мансуб кимёвий элемент; сариқ-қизғиш тусли қимматбаҳо номир металл; зар: тилла. *Соф олтин. Олтин соат. Йўқолган пичоқнинг сопи олтин.* Мақол. ■ *Директор ўша терилар учун кўрғазманинг олтин медалини олди.* С. Аҳмад, Юлдуз. *Хомток қилинган ишқомда ҳусайни узумлар олтиндек товланмоқда.* И. Раҳим, Ихлос.

2 кўчма Ҳар қандай қимматбаҳо ёки азиз нарса ҳақида. *Ер – хазина, сув – олтин.* Мақол. *Дўст-ёрлар аҳил бўлса, Чўлда олтин ундирар.* Мақол. ■ *Кўшиқ айтиб келаман қир ёқалаб. Гул-чечаклар тераман Сир ёқалаб. Тер тўкиб этиштирган «олтинимиз» Туради чаноғида бизга қараб. «Фольклор».*

Олтин суви қ. зарҳал, ҳал. *Олтин суви югуртирилган соат.*

2 Шу металлдан зарб қилинган пул. *Ҳомид ёнчиғини чиқариб, бир қўлидан иккинчи қўлига олтинларни санаб тушира берди.* А. Қодирий, Ўтган кунлар. *Бунчалик дабоба, албатта, хазинадаги олтинлар кучи билан бўлгандир, деб баъзиларнинг кўнглига келар.* А. Қодирий, Меҳробдан чаён.

3 сф.т. кўчма Қимматли, бебаҳо (фикр, гап, сўз, иш, вақт ва ш.к. ҳақида). *Олтин ёшлик. Ёш чоғим – олтин чоғим.* Мақол. ■ *Кам бўлманг, раисим, олтин сўзларни айтдингиз.* Ш. Рашидов, Бўрондан кучли. *Амунинг бўйида кезардим танҳо. Шу олтин дамларни сезардим танҳо.* Файратий.

Олтин бош Яхши идрок этадиган, яхши ишлайдиган бош, ўткир ақл; шундай бош, шундай ақл соҳиби. *Ниҳоят, Қоратой Йўлчининг елкасини дўстона қоқиб деди: -Роса бошинг бор, уним Йўлчи, олтин бошинг бор. Гапларинг бари ҳақ.* Ойбек, Танланган асарлар. **Олтин водий** Ноз-неъматларга бой, обод, яшнаган водий. **Олтин кўз** Йилнинг ҳамма нарса фарқ пишган тўкин-сочин пайти, мўл-кўлчилик фасли. *Баҳор бўйи, ёз бўйи заррама-зарра йиққан бунёдини буюк саховат билан деҳқон этагига солаётган мана*

шу олтин кузда унинг юраги қафасдан чиққан қуш юрагидай яйрай бошлади. М. Исмоилий, Фарғона т. о. **Олтин одам** Жуда яхши одам, тенги-мисли йўқ одам. **Оқ олтин** Пахта. **Қора олтин** Нефть ёки кўмир. **Кўли олтин** ёки **олтин кўл** Ҳар ишга моҳир кўл ва шундай кўлли киши. *Сизларни кўрганымда.. Олтин кўл албатта тушар эсимга.* Х. Салоҳ.

ОЛТИНГУГУРТ Менделеев даврий системасининг VI гуруҳига мансуб кимёвий элемент; тез ёнадиган сариқ рангли металл (тиббиётда ва саноатда кенг ишлатилади). *Олтингугурт оқсилнинг муҳим таркибий қисми ҳисобланади.* «Фан ва турмуш».

ОЛТИНЛАМОҚ Олтин билан қопламоқ, олтин югуртирмоқ, зарламоқ, зар қопламоқ.

ОЛТИНЛАНМОҚ Олтин каби ярқирамоқ, товланмоқ. *Бургут қуёш доирасини кесиб ўтаркан, бир зум ёниб кетгандай олтинланиб кўринди.* А. Мухтор, Қорақалпоқ қиссаси.

ОЛТИНЛАТМОҚ Олтинламоқ фл. орт. н. *Қуёш чиқиб, анҳор ёқасидаги толларни олтинлатган; тоза, ёрқин ҳаво кўзни қамаштиради.* Ойбек, Танланган асарлар.

ОЛТИНСИМОН Олтинга, тиллага ўхшаш, олтин рангли, ялтироқ, сап-сариқ олтиндай. *Қуёшнинг олтинсимон нурлари. Олтинсимон бугдойлар.* ■ *Дўстлар бир оз сўлган бананларнинг олтинсимон пўстлогини артиб, нон билан ея бошладилар.* Ойбек, Нур кидириб.

ОЛТИНТАМФА Ўзбек халқининг этник таркибига кирган қабилалардан бирининг номи.

ОЛТИНЧИ 1 *тртб.* сон Тартиб ўрни 6 рақами билан белгиланган, 6 номерли. *Олтинчи ой. Олтинчи кун.*

2 Катта-кичик нарсаларнинг бешинчидан катта, еттинчидан кичик ўлчами. *Олтинчи қалиш. Олтинчи лампа.*

ОЛТИНҚОЗИҚ (О – катта) айн. **Қутб юлдузи** қ. **қутб 1.** -*Хув анов, шимолдагиси – Олтинқозик юлдузи. У осмоннинг ўқи бўлади. Шунга қараб юрган киши йўлидан адашмайди, – деди чол Шум болага.* Ф. Гулом, Шум бола.

ОЛТИНҚЎНФИЗ айн. тиллақўнғиз.

ОЛТМИШ снқ. сон 60 рақами ва шу рақам билан ифодаланган сон, миқдор. *Олтмиш сўм, Олтмиш киши. Олтмишдан ўттиз-*

ни олмоқ. Олтмишга кирган отадан ош сўрама. Мақол.

ОЛТОВ жамл. сон Олти киши ёки олти-та нарса. *Олтов бўлиб жўнамоқ.* ■ *Ҳар тарафни юрдим сўраб, Сенинг олтовингни қараб. Олтовинг ҳам келиб қолдинг, Куни битган ажал ҳайдаб.* «Ёдгор».

ОЛТОВЛОН бирг. сон Олти киши, олти киши бўлиб, олти киши биргаликда. *Олтовлон ола бўлса, оғзидагини олдирар, Тўртовлон тугал бўлса, унмаганни ундирар.* Мақол.

ОЛТОЙ қ. **олтойлар.** *Олтой халқи. Олтой тили. Олтой аёл.*

ОЛТОЙЛАР Олтой ўлкасидаги туб аҳолининг асосий қисми.

ОЛУ [ф. *ألو*] шв. Олхўри.

ОЛУВ 1 **Олмоқ** фл. ҳар. н.

2 мат. Бир сондан иккинчи сонни айириш амали; айирув, тарҳ. *Ҳисобдан ҳам қўшув, олуларни ўрганибсиз, тузук!* Ф. Гулом, Машғал.

ОЛУВЧИ Бирор нарсани қўлга киритувчи; харидор. *Сотувчи олувчи, олувчи сотувчи ахтаради.* Ҳ. Олимжон, Танланган асарлар.

ОЛУД, олуда [ф. *ألوده / ألود* – булганган, ифлосланган, ботган] Бирор нарсага булганган, ботган, қоришган. *Тўғриси, заҳар олуд мактубингизга одамларча тушуна олмадим ва тушунишга ҳам лузум кўрмадим.* А. Қодирий, Ўтган кунлар.

ОЛХЎРИ [ф. *ألو* – олхўри + *خوری* – ейишли] **1** Раънодошлар оиласига мансуб данакли мева дарахти. *Бир туп олхўри. Олхўри экмoқ.* ■ *Дадаси, не ҳасратда кўкараётган олхўрининг ҳамма шохини бита қўймай кесиб ташлабди.* С. Зуннунова, Кўк чироқлар.

2 Шу дарахтнинг ширин меваси. *Сариқ олхўри. Қора олхўри.*

ОЛЧА [олу + =ча: кичик олхўри] **1** Раънодошлар оиласига мансуб данакли мева дарахти. *Бир туп олча.* ■ *Атроф ҳали ёруғ бўлса ҳам, настлик булутли кунни эслатар, гулини тўккан олчаларнинг тиниқ барглари қорамтир бўлиб кўринар эди.* С. Зуннунова, Олов.

2 Шу дарахтнинг юмалоқ нордон меваси. *Олча мураббоси.* ■ *Ёзнинг энг жазирамасида олчанинг сувини шарбат қилиб ичилса, ташналикни қондиради.* К. Маҳмудов, Ўзбек тансиқ таомлари.

ОЛЧАЗОР Нукул олча билан банд ер, майдон, боғ. *Моҳидил у ёқ-бу ёққа алангла олиб, қалин олчазор орасидан қўшинининг томорқасига ўтди.* С. Зуннунова, Кўк чироқлар.

ОЛЧАРАНГ Олча рангига ўхшаш; қизил. *Аясининг бўйнида шода-шода марварид. Оёғида учи бигиздек ингичка, олчаранг туфли.* С. Аҳмад, Жимжитлик.

ОЛЧИ 1 Ошиқнинг ўйиқ ён томони.

2 Ошиқ ўйинида ошиқнинг шу томони юқорига қараб турган ютуқ вазияти. *Товва пуккани ейди, олчи чиккани ейди.* А. Мухтор, Опа-сингиллар.

Ошиғи олчи Иши ўнгдан келган, юришган, омади келган. *Қодировнинг ошиғи олчи, дўписи яримта.* Ш. Рашидов, Бўрондан кучли. *Энди мен билан бамаслаҳат иш юритсангиз, кам бўлмайсиз, доим ошиғингиз олчи бўлади.* Ж. Абдуллахонов, Хонадон.

ОЛЧИН I 1 Ўзбек халқининг этник саставига кирган уруғлардан бирининг номи.

2 Шу уруққа мансуб киши. *Хўш, биз те-мурий эмасмизми? Ул ўзбекнинг барлосидин эрса, биз олчиниданмиз!* «Ёшлик».

ОЛЧИН II Узунлик ўлчов бирлиги; аршин (қ.) ва газ (қ.) қийматларига тенг. *Москогда саккиз олчин шойи йигирма танга тураркан.* М. Осим, Карвон йўлларига.

ОЛЧИН III: олчин тўқмоқ Дастаси узун катта ёғоч тўқмоқ.

ОЛЧОҚ кт. Ўтакетган разил, паст; ёвуз, номард; хоин. *Олчоқ одамлар.* ■ *Домлам дарс орасида гоҳо замондан шикоят қилади, ёмонларнинг, олчоқларнинг кўплигини айтади.* Ойбек, Болалик. *Мен шайтондан минг мартаба ваҳшатли бўлган Олчоқларни кўриб, чидаб турганман аввал.* А. Орипов, Йиллар армони.

ОЛЧОҚЛИК 1 Олчоққа хос хусусиятга эгалик. *Олийжаноблик билан олчоқлик, ҳақиқат билан ёлғон, валломат билан макрҳийла, ҳалол билан ҳаром ёнма-ён.* С. Нуоров, Нарвон.

2 Олчоқ кишиларга хос хатти-ҳаракат, иш; разиллик.

ОЛҚАМОҚ Бировга яхшилик, бахт, саломатлик тиламоқ, муваффақиятлар тилаб қоламоқ. *Ботирларни олқайди, Ҳурматлайди бу диёр.* З. Диёр. *Ичимда Яхшибоевни олқайман, денг. Агар бу иш хаёлига келмаганда,*

ким билади дейсиз, мен яна қачон дашт ҳавосини ҳидлар эдим. М.М. Дўст, Лолазор.

ОЛҚИНДИ Қайта-қайта ишлатилавериб юпқа бўлиб кетган совун; совун қолдиги. *Тонг қоронғисида кир қўйганимча олтига совундан олқинди ҳам қолмади.* А. Қаҳҳор, Сароб. *Редактор ўринбосари кўк майсадек пойандозда шоколад қоғозлари ва иккига бўлинган, олқинди совундек шоколадни кўрди.* Н. Аминов, Қаҳқаҳа.

Олқинди қайроқ Ейилиб кетган юпқа қайроқ. *Эшимқул эшикдан пичоғини юпқа олқинди қайроқда қайраб келгач, Насимжон боши кўкка етгудай севинди.* Ойбек, О.в. шабадалар.

ОЛҚИШ 1 Яхшилик тилаб айтилган, айтиладиган сўзлар, мақтов, дуо. *Олқиш олган омондир, қарғиш олган ёмондир.* Мақол. ■ *Тақдир тақозоси билан йўл-йўлакай беҳисоб аччиқ-чучук мазасини тотди, пичинг ҳам, олқиш ҳам эшитди.* «Ёшлик».

2 Мамнунлик, таҳсин билдирувчи қарсақлар. *Мирсоатнинг ҳисоб маърузасидан кейин узоқ олқиш бўлади.* А. Қодирий, Обид кетмон. *Қўшиқнинг охири олқишларга кўмилиб кетди.* Н. Аминов, Ёлғончи фаришталар.

ОЛҚИШЛАМОҚ Мамнунлик, таҳсин билдирмоқ, олқиш сўзлари билан табрикламоқ; таҳсинлаб қарсақ чалмоқ. *Ўзбекистон халқ артисти Юсуфжон ака тўқсон ёшга кирган кунни халқ уни кулиб-кулиб олқишлайди.* Т. Обидов, Юсуфжон қизиқ. *Тонг ёришгани, дунёга нур тўлгани учун қувонаётгандек, осмонда тўрғайлар.. кундузни олқишлайдилар.* М. Исмоилий, Фарғона т. о.

ОЛҚОР I қ. **алқор, архар.** Олқор кўз олдимизда қайгадир йўқолди. А. Суюн, Олис тонлар.

ОЛҚОР II бот. Ёввойи ўт, ўсимлик тури. *Олқор билан кийикўт қизлар қулоғида бўлди, кўкракларига бўлди.* Т. Мурод, От кишнаган оқшом.

ОЛҒА 1 рвш. Олдинга, илгари томонга. *Олға юрмоқ.* ■ *Ўзи пулемётини судраб, олға эмаклаб кетди.* А. Қаҳҳор, Олтин куз.

Олға босмоқ 1) олдинга томон юрмоқ, илгарига қараб силжимоқ. *Хон ёнида турган хос навкар қиличини ушлаб, беихтиёр бир қадам олға босди.* С. Сиёев, Аваз; **2)** ривожланмоқ, илгариламоқ. *Иш олға босмоқда.*

2 унд. с. Илгари томон силжишга, олдинга томон юришга чақириниш нидоси. Қани, олға, ғалаба арслонлари! Қани, олға, ватан қахрамонлари! Х. Олимжон, Танланган асарлар.

ОЛҒИР I Овни яхши оладиган. *Олғир ит. Олатўғаноқ олғир бўлса ҳам, қарчиғай бўлмас.* Мақол.

2 кўчма Ҳақини кеткизмайдиган; олағон. *Бувинисо олғир ва эпчил аёллардан ўтиб, қозонга яқин йўлай олмади.* П. Турсун, Ўқитувчи.

3 салб. Бировнинг, жамоат ёки давлатнинг пулини, мол-мулкини юлиб, талаб олувчи; юлғич. *Олғир одам.* ■ *Бу олғирлар меҳнаткашларнинг ҳамёнига човут соляпти.* «Муштум».

ОЛҒИЧ шв. Олғувчи, олувчи. *Боғбон бўлиб, қизил гулни терди, де, Жон олғич жаллодинг — Шакар келди, де.* «Ширин билан Шакар».

Кўз олғич Кўзни оладиган, кўзни хира қиладиган, қамаштирадиган (даражада). *Кўёшда дам кўз олғич чарақлаб, дам кўкатлар орасига яширинган бу кичкина ариқнинг наъбаси бошқача эди.* Ойбек, О.в. шабадалар.

ОЛҒИРОТ [ф. ألوهرات — Ҳирот олхўриси] айн. олхўри. *Машхур боғбон Дарвеш ҳожиди шафтоли, олхўрот кўчатларини ўтқазмоқда.* Ойбек, Навоий. *Нонуштага қиёмолхўрот, Кечга палов, беҳи босилур.* Миртемир, Асарлар. *Олхўрининг жайдариди номи турлича: қораоли, олхўри, олхўрот, ғайноли.* К. Маҳмудов, Ўзбек тансиқ таомлари.

ОМ I [а. عام — умумга тегишли, умумхалқ; кенг тарқалган] (о — чўзиқроқ) Умум; умумга тегишли.

Рухсат(и) ом этн. Умумга рухсат (ўликни кўтариш олдиндан ўлик эгаси томонидан «энди истаганларга рухсат» маъносиди ишлатиладиган ибора). **Ом бўлмоқ** Маълум бўлмоқ. *Кўринди маърифат хуришиди, нури бўлди элга ом.* Ҳамза. **Қатли ом** Ҳаммани қатл қилиш, оммавий, ёппасига қирғин. *Ҳақиқатан ҳам шахсга сиғиниш йилларида оммавий қатли омгача идеология ва қонунчилик соҳасида ўзига хос тайёргарлик олиб борилган.* Газетадан.

ОМ II [немис физик олими Г.С.Ом (Ohm) номидан] физ. Халқаро бирликлар тизимида электр қаршилиқ бирлиги.

ОМАД [ф. آمد — келди; келиш; бахт; ким, даромад] Ишнинг ўнгдан келиши,

илгари босиши; бахт, толе. *Омадингиз баланд. Ҳар йигитга бир омад.* Мақол. *Ишнинг омади — ўз вақти.* Мақол. ■ *Эҳҳе, иш катта-ку! Омад тилайман, чўталдан чўзасизда!* Ойбек, Танланган асарлар. *Бунини омад дейдилар: ҳам иш ундирибсан, ҳам томоша қилибсан.* Ойбек, О.в. шабадалар.

Омад қуши бошига кўнди айн. бахт қуши бошига кўнди қ. бахт. Омади гап ёки гапнинг омади Холисона айтилган гап; гапнинг тўғриси, ўрни, мақоми. *Мен омади гапни айтибман, ўртоқ Самандаров, албатта, мени билмайдилар.* А. Қаҳҳор, Кўшчинор чироқлари. *-Жаноби олий ва сизнинг давлатингиз ҳаммаси меники, нега хафа бўлайин, гапнинг омадини айтдим-да, — деди Ўрмон полвон.* С. Айний, Куллар. **Омад(и) келмоқ** (ёки **юришмоқ**) Иши ўнгидан келмоқ, бахти келмоқ, юришмоқ. *Рўзиқулнинг омади келиб, чўнтаги хўпная бошлади.* Ғайратий, Довдираш. **Омади кетмоқ** Иши ўнгидан келмаслик, орқага кетмоқ, бахт йўли тўсилиб қолмоқ. *Омадинг кетганда, кунлар тошбақа юриш қилиб, секин ўтади.* Н. Қобил, Унутилган соҳиллар.

ОМАДЛИ Омади, толеи баланд, бахтли. *Омадли одам.* ■ *Кимгаки ақлу идрок насиб этган бўлса, демак, у омадлидир.* «Фан ва турмуш».

ОМАДСИЗ Омади, толеи паст, бахтсиз. *Омадсиз одам.* ■ «Аравакаш» — унинг ҳов ўша уруш давридаги омадсиз ёшлигидан қолган лақаби, холос. А. Мухтор, Кумуш тола.

ОМАДСИЗЛИК Омад келмаслик, муваффақиятсизлик, *Омадсизликни тоқат билан енг.* «Ёшлик».

ОМБИР I қ. омбур.

ОМБИР II шв. Девор тагидан сув ўтиши учун қолдирилган туйнук; қувур.

ОМБОР [ф. انبار — ғалла, озиқ-овқат сақланадиган хона, бино; омборхона, магазин] Озиқ-овқат, асбоб-анжом, мол ва ш.к. сақланадиган бино. *Омбор тўла дон.* ■ *Ҳовли ўртасида қаққайиб турган Умиднинг тахминича, бу ҳовлида ошхона, омбор, гараж ва ҳоказолардан ташқари ё ўн икки, ё ўн уч хона бор.* Мирмуҳсин, Умид.

Сув омбори Сунъий сув ҳавзаси, сув тўпланадиган жой. *Каттақўрғон сув омбори.* ■ *Амударёда йирик Туямўйин тўғони ва сув омбори қурилиши охирига етди.* «Фан ва турмуш».

ОМБОРХОНА [омбор + хона] айн. **омбор**. Бой омборхона калидини Ойшабонуга узатди. Ҳ. Фулом, Машғал. Бино минерал сувлар сақланадиган омборхона қилиб қўйилган. Газетадан.

ОМБОРЧИ Омбор мудир. *Ўтган йили анови омборчи Абдусамаднинг ўгли ҳам имтиҳондан ўтолмай қайтиб келди. С. Зуннунова, Олов. Полвон отдан тушиб, бозордан келтирилган нарсаларни.. омборчига берди. Ж. Шарипов, Хоразм.*

ОМБУДСМАН, омбудсмен [швед. ombudsman — бирон киши манфаатларининг вакили] Турли хил маъмурий органлар, шунингдек, хусусий шахслар ва бирлашмалар фаолиятининг қонунийлигини, уларнинг фуқаролар ҳуқуқ ва эркинликларига риоя этишини назорат қилиш учун махсус сайланган (тайинланган) мансабдор шахс. *Омбудсман хизмати ходимларининг қайд этишича, болалар жиддий, чуқур мазмунли саволлар беришиб, улар билан баҳсга киришишган. Газетадан.*

ОМБУР [ф. انبور — қисқич, омбур] Мих суғуриш, нарсаларни қисиб ушлаш, кўтариш, эгиш, қирқиш, синдириш каби ишлар учун қўлланадиган икки жағли асбобларнинг умумий номи. *Юмалоқ жағли омбур. Оғриқ тишининг давоси — омбур. Мақол. ■ Чолининг қалбини аллақандай совуқ бир қўл омбур орасига олиб сиқар, оғриғи юзига уриб борар эди. М. Исмоилий, Фарғона т. о. Гулсумбиби қизини оёқ остига олиб, унинг баданини, омбур билан чўзиб тортгандай, уза бошлади. Ойбек, Танланган асарлар.*

ОМИ [а. عامى — халққа тегишли; жамоатга оид; оддий, содда] (о — чўзиқ) Саводсиз, ўқимаган; авом. *Хон ҳазратлари, мен ўқимаган, ёвонлик бир оми одамман. Ж. Шарипов, Хоразм. Сизнинг ҳар бир гапингиз биздек оми одамларга ўрнатқан бўлиши керак. П. Турсун, Ўқитувчи. -Ҳа, энди.. биз оми одамлармиз, — деб қўйди Тойлоқов. М. М. Дўст, Галатепага қайтиш.*

ОМИЛ I [а. عامل — сабаб; таъсирчан куч] Иш-ҳаракат, воқеа-ҳодиса ва ш.к. нинг юзага чиқиши, содир бўлиши учун сабаб бўлган нарса; сабаб. *Отабекнинг маънавий падари бўлган Ҳасанали ота унинг махфий дардининг асли омилини излайди. А. Қодирӣ, Ўтган кунлар. Чигитга гамма нурлари*

бериш вилтга қариши кураидаги асосий омиллардан бири. Мирмуҳсин, Умид.

ОМИЛ II [а. عامل — ишловчи, ҳаракатдаги; ҳақиқий; ишчи, хизматчи] **I** Бирор ишни яхши эгаллаган; уста, моҳир, омилкор. *Бирни иккига қақиб, иккени тўрт қилишга омил ота қизини [Таннозхонни] ишлагани қўймаган эди. Қ. Махсумов, Муҳаббат қўшиғи.*

2 Омил (эркаклар исми).

ОМИЛИК Авом бўлишлик, саводсизлик. *Ўргилай, ҳамма касофат омилигимизда-де! Ҳамза, Танланган асарлар.*

ОМИЛ-КОМИЛ Жуда омил, етук уста. *У ҳар қандай ишга омил-комил одам.*

ОМИЛКОР [а. + ф. عاملكار — ишбилармон, моҳирлик билан ишловчи, оқил] Омиллик, усталик билан иш кўрувчи; уста, омил. *Омилкор деҳқон. Омилкор тўқувчи. ■ Амакиларининг бу борада омилкор, пухта кишилар эканини билгани учун Исломбой индамай қолди. Х. Султонов, Бир оқшом эртаги.*

ОМИЛКОРЛИК Усталик билан, оқиллона иш кўришлик. *Пахта териш машиналаридан омилкорлик билан фойдаланмоқ.*

ОМИЛЛИК Бирор ишни яхши эгаллаганлик, усталик. *Ўз ишига омиллик.*

ОМИН [а. آمن — ишонувчи; ишончи бор; хавф-хатардан холи бўлган] Ислом, яҳудий ва христиан динларида диндорлар ўртасида «қабул этилсин», «ижобат бўлсин» маъносига, оддий халқ орасида эса «илоҳи шундай бўлсин», «айтганингиз келсин» маъносига ишлатиладиган сўз. *-Энди мусофир қизингизнинг бахтига сиз ўлманг, омин! — деди Кумуш онасига. А. Қодирӣ, Ўтган кунлар. -Худо ҳаммангизга қувват берсин! Олинглар, олдиранглар. Омин! — деди Алим бува. М. Исмоилий, Фарғона т.о.*

ОМИХТА [ф. آميخته — аралаш, аралаштирилган] **I** *от* Бир неча маҳсулот аралашмаси. *Хайриятки, бола тезда овунди, асалу ёғ омихтаси суртилган эмизикни шимганича ухлаб қолди. М. М. Дўст, Лолазор.*

2 сфт. Аралаш, бошқа нарса аралаштирилган. *Омихта ёғ. ■ Омихта емлар бу ерда бугдой, арпа, сули маҳсулотларидан тайёрланади. Газетадан. Азизхоннинг димоғига қалампирмунчоққа омихта атир ҳиди урилди. С. Аҳмад, Уфқ.*

3 кўча с. т. Аралаш-қуралаш, мошкичири, қоришиқ. Турмушдаги бошқаю, китобдагиси ҳаводан олинганми? Китобдаги билан турмушдагини бир-бирига омихта қилиш кимнинг иши? Х. Назир, Кўктерак шабадаси.

ОМИХТАЛАНМОҚ Аралашиб, қўшилиб кетмоқ. Носоз транспорт воситаларидан чиқаётган ортиқча газлар бир-бири билан омихталаниб, шундай қўланса ҳид тарқатяптики, бунақасини ҳеч ерда учратмайсиз. «Муштум».

ОММА [а. عافه — умумийлик; оддий халқ] Бирор ижтимоий гуруҳнинг катта кўпчилиги, умум, кўпчилик, халқ. *Меҳнаткашлар оммаси. Деҳқонлар оммаси. Ишчилар оммаси. Зиёлилар оммаси.* ■ У [Йўлчи] бўйинини чўзиб, қайноқ, асабий, ғазабли оммани, зулм ўчоғини портлатишга тайёр ботиб халқни кўздан кечирди. Ойбек, Танланган асарлар.

ОММАБОП Умумга, оммага тегишли, омма учун белгиланган, мўлжалланган. *Оммабоп адабиёт. Оммабоп журнал. Оммабоп тилда ёзилган мақола.* ■ Ота оммабоп тилда.. ер ислоҳоти ҳақида гапирдилар. Ш. Холмирзаев, Сўнмас ўт.

ОММАВИЙ [а. عامه‌وى — умумга, умум-халққа тегишли, оид] 1 Оммага, кўпчиликка оид; омма, кўпчилик томонидан ёки омма орасида бажариладиган. *Оммавий иш. Оммавий ҳаракат.* ■ Айрим оммавий-даврий нашрларнинг аниқ фуқаролик позицияси ва қиёфаси кўзга ташланмайди. Газетадан.

2 Кенг қўламдаги, кенг қўлам олган.

Оммавий ахборот воситалари Хилма-хил мазмундаги ахборотларни кенг оммага етказиб берувчи воситалар — даврий матбуот, радио, телевидение ва ш.к. нинг умумлашма номи. *Жаҳон оммавий ахборот воситалари хабарларида айтилишича, учрашув чоғида Украинанинг альянсга қўшилиш масаласи кўтарилмаган.* Газетадан. **Оммавий қирғин қуроллари** Душманнинг кучларига, қурол-аслаҳаларига, иншоотларига ялпи талафот етказувчи қуролар. Айни пайтда, ядровий қуролсизланиш бўйича тадбирлар билан бир қаторда, оммавий қирғин қуролларининг бошқа турлари ҳам тарқалишининг олдини олишга қаратилган савй-ҳаракатлар амалга оширилиши лозим. Газетадан.

ОММАВИЙЛАШМОҚ Умумий, оммавий тус олмоқ; омма орасида кенг ёйилмоқ.

Қишлоқ ёшлари ўртасида спорт оммавийлашиб бораётир.

ОММАВИЙЛИК Оммавий хусусиятга эгалик. *Мен ушбу тамойиллар қаторига оммавийлик принципини ҳам киритган бўлардим.* Газетадан. *Ўқиш ҳам, обуна ҳам, борингки, фаолиятнинг барча жабҳаси оммавийликка асосланган эди.* Газетадан.

ОММАВИЙ-МАДАНИЙ Омма ўртасида ўтказиладиган маданий ишларга оид, шундай ишларни амалга оширадиган. *Район комитетининг оммавий-маданий бўлими. Оммавий-маданий ишлар.*

ОММАВИЙ-СИЁСИЙ Омма ўртасида ўтказиладиган сиёсий ишларга оид, шундай ишларни олиб борадиган. *Оммавий-сиёсий ишлар.*

ОММАЛАШМОҚ Омма, кўпчилик, халқ орасига ёйилмоқ, кенг тус олмоқ, кенг тарқалмоқ. *Илғорларнинг тажрибаси оммалашмоқда.* ■ Унинг ўз таърифича, бу сўзлар.. эндигина оммалашаётган фан ва техника қуроллари, буюм ва асбоб-анжомларининг «ўзбекча атамаси» эди. П. Турсун, Ўқитувчи.

ОММЕТР [нем. Ohm — ом + юн. metreo — ўлчайман] физ. Электр қаршилигини бево-сита ўлчаш учун ишлатиладиган асбоб.

ОМНИБУС [лот. omnibus — ҳамма учун] эск. 20-аср бошларигача: муайян аҳоли масканлари орасида мунтазам қатновчи кўп ўринли от-арава; дастлабки жамоа транспорти.

ОМОН [а. امان — хавфсизлик; хотир-жамлик; раҳм-шафқат] 1 Соғ-саломат, эсон-соғ. *Бош омон бўлса, дўппи топилар.* Мақол. ■ *Қоратегиндан келдингми, опанг омонми?* А. Қодирий, Ўтган кунлар. *Бу бош бевафо дунёда нималарни кўрмади дейсиз. Кўп тўполонлардан омон қолди.* С. Анорбоев, Оқсой. *Тоҳир омон, ҳеч бир шикаст еган йўқ.* С. Абдулла, Тоҳир ва Зухра.

Омон бермай Аямай, шафқатсиз равишда. *Сен қўлима тушиб бўлдинг гуноҳкор, Омон бермай ўлдираман муқаррар.* «Рустамхон».

2 Тинч, осойишта. *Она юртинг омон бўлса, ранг-рўйинг сомон бўлмас.* Мақол. ■ *Дунёдаги барча тинчликсевар кишилар она заминнинг омон қолиши учун ҳамжиҳатлик билан ўз хоҳиш-иродаларини намойиш этмоқдалар.* Газетадан.

3 Омон (эркаклар исми).

ОМОНАТ [а. *آمانت* – ишончлилик; тўғрилиқ, ҳалоллик; сақлаш учун берилган нарса; туҳфа; мерос] **1** Сақлаб бериш, вақтинча фойдаланиш ёки бошқа бир кишига элтиб бериш учун топширилган. *Омонат хат. Омонат пул.*

2 Омонатга сақланган пул ва б. нарса, буюм. *Анов куни қўйиб кетган омонатга келдим. И. Раҳим, Чин муҳаббат. Омонатларни эгаларига топширганамиздан кейин, майли.. кувётўра қизимизни Маккага олиб борсалар ҳам, монелик йўқ. И. Ўктамов, Ҳикоялар.*

3 Мижознинг маълум бир шартлар асосида банкка қўйган пул маблағи.

Омонат дафтarchаси Омонат кассага пул қўйилгани ҳақидаги шахсий ҳужжат. *Салимхон Обидий.. алақандай зарур ҳужжатларни, омонат дафтarchасини рўмолга тугди. Мирмуҳсин, Умид. Омонат кассаси* Фуқароларнинг пулини вақтинча сақлаб берадиган муассаса. **Омонатини топширмақ** Вафот этмоқ, оламдан ўтмоқ. *Кампир уйга кирган-у, шу қисқа фурсат ичида чоли тўшакка беозор чўзилганича, омонатини топшириб қўйганининг гувоҳи бўлган. «Ёшлик».*

2 Номигагина, шунчаки; зўрга. *Чол супадаги ёғоч сўрғага омонат илиниб, ниятини айтишга сўз тополмай қийналди. «Ёшлик».* Тўйчи пойгадаги чўян печь устига омонат ўтирди-да, ерга қараганча, индамай, папиросга зўр берди. *А. Кўчимов, Ҳалқа.*

3 Вақтинчалик. *Одам – омонат, дийдор – ғанимат. Мақол. ■ Жиян ижара уйда омонат ўтирди. «Ёшлик».*

4 Путурдан кетган ёки зўрга илиниб турган. *Омонат бино. ■ Ошпаз косага лағмон сузиб, йўнилмаган тахтадан омонат ясалган стол устига қўйди. С. Аҳмад, Уфқ.*

ОМОНАТЧИ Омонат кассасига пул қўйган киши. *Бугунги кунда банкда 70000 дан ортиқ омонатчига самарали хизмат кўрсатилмоқда. Газетадан.*

ОМОНИМИК Омонимга хос, тегишли. *Сўзнинг омонимик хусусияти.*

ОМОНИМИКА [«омоним» с. дан] *тлш.* **1** Бирор тилдаги омонимларнинг жами, йиғиндиси.

2 Тилшуносликнинг омонимларни ўрғанадиган бўлими.

ОМОНИМИЯ [«омоним» с. дан] *тлш.* Бирдан ортиқ тил бирлигининг талаффуз ва ёзилиш жиҳатидан бир хил бўлиш ҳодисаси.

ОМОНИМЛАР [фр. *omonymie* < юн. *homos* – тенг, бир хил + *onyma* – ном, исм] *тлш.* Шакл ва талаффузи, яъни ёзилиши ва айтилиши бир, аммо маъноси бошқа-бошқа сўзлар, шаклдош сўзлар.

ОМОНЛАШМОҚ 1 Бир-бири билан саломлашмоқ, бир-бирини ҳол-аҳвол сўрашмоқ. *Элмурод челақларини ерга қўйди-да, бориб [Норжон билан] омонлашди. П. Турсун, Ўқитувчи. Аҳмадали Рўзихон ая билан йўл-йўлакай омонлашди, ундан кўнгул сўради. «Ёшлик».*

2 шв. фольк. Видолашмоқ, хайрлашмоқ. *Холдор кетар бўлди, беклар, дунёдан, Розинаниб, омонлашиб қолинлар. Эргаш Жуманбулбул. Ана шундай қилиб, Муродхон синглиси билан омонлашиб, йўлга тушиб жўнайверди. «Муродхон».*

ОМОНЛИК Соғ-саломатлик, тинч-осойишталик. *Сизга омонлик тилайман. ■ Омонлик бўлса, бу бағри кенг одамлар Хайрининг невараларигача, улардан қолажак авлодигача боқади. «Ёшлик».*

ОМОН-ОМОН Тинчлик, осойишталик (кўпинча урушдан кейинги даврда). *Бир куни бир алвон замон келади, Замин узра омон-омон бўлади. М. Юсуф, Уйқудаги қиз.*

ОМОНСИЗ айн. **беомон.** *Мирзакаримбой Йўлчига далда бериш учун.. ўлим ҳар кимнинг бошида омонсиз қиличини тутиб турганлигини гапирди. Ойбек, Танланган асарлар.*

ОМОН-ЭСОН айн. **омон 1.** *Агар Каримжон омон-эсон қайтиб келса, раислигини ҳам ташлайман. С. Аҳмад, Уфқ.*

ОМОЧ эск. қ. х. Улов қўшиб ер ҳайдаладиган, металл тишли қадимги энг оддий ёғоч ёки темир асбоб. *Омоч билан ер ҳайдамоқ. ■ Ҳўкиз калласини эзиб, омочни тортишга уринар, қўйчи эса ҳадеб қистар эди. М. Исмоилий, Фарғона т. о. [Абдурасул] Дастлаб Олахўжанинг сигирларини боқади, кейин омоч қўлоғини ушлайдиган бўлгач, қўшга чиқади. П. Турсун, Ўқитувчи.*

ОМОЧ-БҮЙИНТУРУҚ Ер ҳайдаш учун керакли бўлган омоч, бўйинтуруқ ва бошқа асбоблар мажмуи.

Тарақа туруқ, омочга бўйинтуруқ ҳазил Арзимаган ишга тўполон, шов-шув, тартибсизлик кўтарилганда айтиладиган ибора.

ОМОЧЛИ Омочга, плугга эга бўлган. *Томорқа этагидаги деворнинг омочли трак-*

тор киргудек жойи бузиб ташланган эди. А. Обидов, Аканг қарағай Гулмат.

ОН I [ф. آن — у, улар]: **он ҳазрат(лари)** у олий ҳазратлари (подшоҳ, амир, хон ва ш.к. ҳақида). *Мирзо Анвардан он ҳазратга номус-сизона бир хиёнат содир бўлди.* А. Қодирий, Мехроблан чаён.

ОН II [а. آن — вақт, давр, пайт] Қисқа бир замон: лаҳза, пайт. *Бир он. Шу онда. ■ Бир оннинг баҳосин ўлчамоқ учун Олтиндан тарозу, олмосдан тош оз.* Ғ. Ғулом. *Умид Ҳафиза билан бўлган ширин онларини хаёлидан ўтказарди.* Мирмуҳсин, Умид.

ОНА I Фарзанди ёки фарзандлари бўлган хотин (ўз туққан фарзандларига нисбатан); болали хотин. *Кўп болали она. Бола йиғламаса, она эмчак бермас.* Мақол. *Эрка тутса онаси, талтаяди боласи.* Мақол. ■ *Қиз эрталаб туриб, дарров онасига разм солди.* Ойбек, Танланган асарлар.

Она тили Боланинг гўдақликдан катталарга тақлид қилиб ўрганган тили, туғма тил (одадта гапирувчи шахс мансуб бўлган халқ тили). **Онаи зор, онаизор** Меҳрибон, ғамхўр она; онанинг муштипарлигини, мушфиқлигини, меҳрибонлигини ифодалаш шакли. *Онаи зор эмасми, устунни ушлаганча.. боласининг товуши келаётган томонга термилиб қолди.* Ойдин, Мардлик — мангулик. *Тошкентдан келган хат онаизор юрагига ғулғула солди.* Мирмуҳсин, Умид. *-Болам, — деди-ю, онаизор яна оламга тинчлик тилайди: -Оналар.. ғам чекмасин, осмонимиз мусаффо бўлсин.* **Онанг ўргилсин қ. ўргилмоқ.** **Онаси этн.** Эрнинг ўз хотинига унинг исмини айтмай мурожаат этиш шакли. *Ҳой, онаси, суюнчини чўз.* Э. Раҳим, Янги қадам. **Қайин она айн. қайнана.** **Қаҳрамон она** Ўнта ва ундан ортиқ бола туғиб вояга етказган оналарга бериладиган фахрий унвон.

2 Оила бошлиғи, тарбиячиси. *Булар учун алоҳида қозон осилармиди. Сиз ҳаммасининг онаси, у киши — ота. Уста болани жуда яхши кўрадилар.* А. Қаҳҳор, Томошабоғ.

3 Кекса аёлларга ҳурмат юзасидан уларнинг номига кўшилиб ишлатилади, мас. *Тожиҳон она, Норжон она.*

4 Кекса аёлларга ҳурмат билан мурожаат этиш формаси.

5 Бола туққан жонивор. *Тойчоқнинг онаси.* Она қўй. *Яхши бузоқ икки онани эмар.* Мақол. ■ *Она ари уруғлагандан кейин бир*

суткада 1500—2000 тагача тухум қўяди. «Фан ва турмуш».

б кўчма Яратувчи, вужудга келтирувчи. *Ер — ҳаётнинг онаси.*

Гапнинг онаси Гапнинг пўскаллари, бўлган-тургани, ҳақиқати. *-Отангизга раҳмат, Юсвали тоға! — деди бошини қимирлатиб Мели полвон. — Гапнинг нақ онасини айтдингиз-қўйдингиз.* П. Турсун, Ўқитувчи. **Она Ватан (ёки юрт)** Киши туғилиб ўсган, унинг учун муқаддас саналган мамлакат. *Яна кўнгли она юртини, баланд тоғлар, кўм-кўк яйловларни кўмсаб, бағрини зах ерга бериб ётиб олди.* С. Анорбоев, Ҳамсуҳбатлар. **Она сути оғзига келди қ. оғиз.** *Вой-вой, Гулнора синглингни Азизбойникидан олиб чиққунимча нақ она сутим оғзимга келди.* Н. Сафаров, Шарқ тонги. **Она сутидай пок (ёки ҳалол)** Ҳеч қандай нопоклик, қалбакилик аралашмаган, кишининг ўз пешона тери эвазига келган. *Пулни олмадим, минг марта розиман, сизга она сутидай ҳалол бўлсин.* А. Қаҳҳор, Қўшчинор чироқлари. **Она тупроқ** Киши туғилган жой. *Кейин билсам, худди ўша бир қулоч ер менинг она тупроғим экан.* А. Обиджон, Аканг қарағай Гулмат. **Она халқ** Кишининг ўзи мансуб бўлган халқи. *Бечора эмас, йўқ, кўнгли сутдай пок, аммо кўп жабру жафо чеккан менинг она халқим бугун маънавий мададаг жуда-жуда ташна.* Газетадан. **Она қизим** Эркалатиш, алқаш маъносида қўлланадиган ибора. *Шундай экан, мен сенга ёмонликни раво кўрмасман, она қизим.* Т. Ашуров, Оқ от. **Онадан туғма бўлиб** Ҳар қандай касалликдан ёки балоқазолардан холи бўлиб, аслидагидай; соғлом, ҳеч нарса кўрмагандай. *Бу ўзгаршидан кейин онадан туғма бўлиб, енгил тортди.* А. Қодирий, Ўтган кунлар. **Онаси ўпмаган қиз** Бегона қўл тегмаган, пок, ифбатли қиз; бокира. *Пулинг бўлса, онаси ўпмаган малика қизлар санга қучоқ очади.* Ойбек, Танланган асарлар. **Онасини кўрсатмоқ** Таъзирини бермоқ, жазоламоқ. *Устозим иккимиз лабораторияга ўтиб олиб, шунақанги сеҳрли дорилар ясайликки, эй иблис, энди онангини учқўрғондан кўрасан.* Х. Тўхтабоев, Ширин қовунлар мамлақати.

ОНА-БОЛА Она ва бола (бирликда). *Она-бола нонушта қилаётганларида, гузар тарафдан Абдулла бақироқнинг овози келди.* С. Аҳмад, Уфқ. *Она-бола тунни билан ҳасрат-*

лашиб, охири маслаҳатни бир ерга қўядилар. П. Турсун, Ўқитувчи.

Она-боладай Она ва бола каби, бир-бирига меҳрибон; иноқ. *Бу бечоранинг ҳам ҳеч кими йўқ экан. Она-боладай бўлиб қолдик.* А. Қаҳҳор, Қўшчиноҳ чироқлари.

ОНА-БОЛАЛИ Онаси ва боласи бор, онаси ва фарзанди билан (бирликда). *Совхоз маъмурияти [Қурбонали полвон оиласини] она-болали бир говмиш сигир билан.. мукофотлади.* Н. Сафаров, Қурбонали.

ОНА-БОЛАЛИК Она ва бола ўртасидаги муносабатларга оид, шу муносабатлар билан белгиланадиган, она ва болага тегишли. *Онахон уларнинг она-болалик меҳридан завқланиб, ўйчан кўзларини бир нуқтага тикканча, қўлини иягига қўйиб ўтирарди.* А. Мухтор, Опа-сингиллар.

ОНАБОШИ с.т. 1 Рўзғор бошлиғи ёки бирор жамоатга бош бўлган, уни бошқариб турган ҳурматли аёл. *Нафиса ёшлар ичида аллақачон бўлгуси оналик ҳурматини қозонган, гапида ҳам, ишида ҳам салмоқли, қизларгагина эмас, йигитларга ҳам онабоши бўлиб қолган эди.* А. Мухтор, Тугилиш.

2 Болалар ўйинида: қатнашувчи икки томондан ҳар бирининг бошлиғи. *«Қушим боши» шунақа ўйин: болалар икки тўдага ажралиб, улар ичидан иккитаси «онабоши» бўлади. Улар битта латтани қушга ўхшатиб тугади. Ҳар икки бола бир-бирига шивирлашиб, бир қушининг отини яширишади.* Ф. Ғуллом, Шум бола.

ОНАЖОН эркл. Онаси ёки кекса аёлни севиб, эркалатиб, уни жуда яқин олиб мурожаат этиш шакли. *Элмурод, кампирнинг сямимий муомаласини кўриб: -Саломат бўлинг, онажон! - деди.* П. Турсун, Ўқитувчи.

ОНАИЗОР қ. **онай зор**. қ. **она 1**.

ОНАЛАРЧА рвш. Аналар каби, оналарга хос меҳрибонлик, шафқат билан. *Оналарча ўпмоқ. Оналарча ғамхўрлик. ■ Альбина Петровна курсантларга оналарча ғамхўрлик қилди. «Саодат».*

ОНАЛИК 1 Она мавқеи, унга хос ҳислатлар — ҳомиладорлик, туғиш, болани тарбиялаш ва шунга боғлиқ она бурчи. *Оналик ва болаликни ҳимоя қилиш. Оналик муҳаббати. Оналик ҳисси. ■ Тўсатдан вужудини қамраган оналик меҳри ғолиб келиб, тортган азоби ҳам эсидан чиқди.* П. Турсун, Ўқитувчи.

Бу сўздан сўнг Офтоб ойимнинг оналик кўнгли эриб кетган.. эди. А. Қодирӣ, Ўтган кунлар.

2 **бот.** Ўсимликларда уруғчи жинсий аъзо; уруғчи. *Ток гулида оналиги яхши ривожланган бўлиб, оталиги эса унча яхши тараққий этмаган. «Фан ва турмуш».*

ОНАСИЗ Онаси йўқ, онаси вафот этган. *Онасиизнинг умри — хор.* Мақол.

ОНАСИЗЛИК Онаси йўқлик, онасиз қолиш. *Айтибсанки, онасизлик келмасин ҳеч ўйига. Сарф қилингиз, менга эмас, Абдулланинг тўйига.* А. Орипов, Йиллар армони.

ОНАХОҲ 1 Онани ёки кекса аёлни севиб, эркалатиб, жуда яқин олиб мурожаат этиш шакли. *Қўшариқлик бир онахоннинг уйига бориб, бош ювиб, кир чайқаб келмоқчи эди.* С. Аҳмад, Уфқ.

2 Хотинларга бош, ҳурматли кекса аёл. *Ўзбек ойимнинг обрўси ёлғиз шулар билангина чекланиб қолмас, уни ўрда хонимлари ҳам эҳтиром қилиб, ўзларининг «онахонлари» деб билар эдилар.* А. Қодирӣ, Ўтган кунлар. *Яқинда маҳалламизда истиқомат қиладиган Тўти ая исмли онахон вафот этди.* Газетадан.

ОНАХОТИН 1 Ҳурматли, қадрли кекса хотин; бошлиқ, раҳбар аёл. *Рўпарамдан келмоқда расмона — онахотин, Намойишлар эгаси салобат билан босиб.* Ф. Ғуллом.

2 Сергап, маҳмадона қизчаларга нисбатан айтиладиган сўз.

ОНАҒАР сўк. Нафрат, ғазаб, қаттиқ қойишни ифодалайди. *Уларга луғатда топилган йўқ ном, Улар яъжуж-маъжуж, онағар, ём-ём.* Миртемир, Асарлар.

ОНГ 1 1 Одам руҳий фаолиятининг олий шакли; кишининг фикрлаш қобилияти; ақл, идрок. *Боланинг онгини ўстириш. ■ Инсон мавжудотлардан онг, тафаккурининг улуглиги, сезги ҳиссиётининг чексизлиги билан ажралиб туради. «Саодат».*

2 Одамнинг ёки одамлар гуруҳининг ижтимоий ҳаётни тушуниши, сезиши, унга муносабати. *Сиёсий онг. Синфий онг. ■ Бизнинг мақсадимиз кишиларга онг, тушунча бермоқ; токи ҳар бир киши яхшилик ва ёмонликни, оқу қорани ўзи ажратиб оладиган бўлсин!* П. Турсун, Ўқитувчи.

3 **флс., псих.** Воқеликнинг киши миясида унинг бутун руҳий фаолиятини ўз ичига олган ва маълум мақсадга йўналган ҳолда акс

этиши. *Онг мянинг функциясидир. Модда — бирламчи, онг иккиламчидир.*

4 флс. Белгили бир ижтимоий гуруҳ вакили бўлган кишиларнинг психологик, сиёсий ва фалсафий нуқтаи назарлари; диний, бадиий қарашлари мажмуи. *Турмуш онгни белгилайди. Ижтимоий онг.*

ОНГ II шв. Ов, илвасин. *Жуда мерган эди, қушларнинг, онгларнинг додини берган эди. «Равшан».*

ОНГЛИ I Онгга эга, ақл-идрокли. *Онгли киши. ■ Ҳар бир онгли ишчи бизнинг улуғ ҳақиқатимизнинг ташвиқотчиси бўлиши керак. Ойбек, Нур қидириб. Ахир шу пайтгача, чексиз коинот қаърида биздан ўзга онгли мавжудот сақланиб қолганини била олмагандик-ку?! С. Сиёев, Ёруғлик.*

2 Онг, ақл-идрок билан боғланган, ақл-идрок тақозоси билан қилинадиган; шундай онг-тушунчага асосланган. *Онгли ҳаёт. ■ Албатта, бу натижа тинимсиз онгли машғулот, ўз устида ишлаш эвазига қўлга киритилади. «Фан ва турмуш».*

3 Воқеликни, ижтимоий ҳаётни, ўз мавқеи ва тарихий бурчини тўғри тушунадиган; онги балан; белгили тушунчага эга, билимли; маданиятли. *Ўқитувчи ва ўқувчи муносабатдаги мажбурий итоаткорлик ўрнини онгли интизом эгаллаши жуда қийин кечяпти. Газетадан. Тешабой замонасининг беш-олти хотинлик қолоқ бойларидан бўлмай.. онгли бойлардан эди. М. Исмоилий, Фарғона т. о.*

Онгли равишда 1) онг, ақл-идрок тақозоси билан. *Онгли равишда фикр юритмоқ;* 2) атайлаб, кўра-била туриб. *Онгли равишда қилинган иш.*

ОНГЛИЛИК Муайян онг, ақл-идрок, тушунчага эгалик.

ОНГСИЗ I Онги, ақл-идроки йўқ; ақл-сиз.

2 Тушунчаси йўқ, тушунмаган, онги паст.

ОНГСИЗЛИК I Онги йўқлик ёки пастлик; ақлсизлик.

2 психл. Онг иштирокисиз бўладиган руҳий жараён ва ҳолатлар.

ОНГ-ШУУР Ақл-идрок. *Унинг демократиклиги ва инсон манфаатлари билан уйғунлиги жиҳатлари ҳам тинчликсевар, ҳам адолатпеша давлатлар аҳолисининг онги-шуурига мос келади. Газетадан.*

ОНДА-СОНДА *рвш. 1* Баъзи-баъзида, гоҳо. *Акром.. институтда ўқиб юрганда ҳам онда-сонда қишлоққа келар, шунда Шарофатдан ўзини олиб қочиб юрарди. «Ёшлик». — Қишлоқда турган вақтимида ҳам онда-сонда учрашардик, — деди Раҳимов Туйғунойга. Б. Раҳмонов, Олтин одамлар.*

2 У ер-бу ерда, унда-мунда, сийрак. *Умид ва Ҳафиза тор кўчага бурилишди, онда-сонда симёғочлардаги чироқлар ёниб турарди. Мирмуҳсин, Умид. Қўриқни кўм-кўк ўт қоплаб ётган бўлса ҳам, мол кам, онда-сонда битта-иккита сизир, қўй кўринар эди. А. Қаҳҳор, Қўшчинор чироқлари.*

ОНДАТРА [фр. *ondata* < *индейс тилларидан*] Дала сичқонлари оиласига мансуб кемирувчи жонивор; мушкли каламуш. *Бу териси шилиниб олинган ондатранинг буйруғи.. Н. Аминов, Қаҳқаҳа.*

ОНИЙ [а. *أنى* — ҳозирги, айна пайтдаги; долзарб] Жуда қисқа вақт давом этган, эгандиган, бир лаҳзали. *Оний ўзгарди. ■ Ҳаманинг юзида оний бир фалокат зарбини тортганларнинг ҳаяжон ва ташвишини кўрди. Ойбек, Навоий. Икки севишган юракнинг бу оний учрашувини ҳеч ким пайқамади. Мирмуҳсин, Умид.*

ОНИКС [юн. *опух* — тирноқ] Ақиқнинг оқ ва қора қатламлари алмашилиб жойлашган йўл-йўл тури. *Имом ал-Бухорий ёдгорлиги пойдевори ониксдан ишланган безаклар билан безатилди. Газетадан.*

ОНКОЛОГ Онкология мутахассиси, врач.

ОНКОЛОГИК Онкологияга оид. *Онкологик диспансер. ■ Мамлакатимизда онкологик (ўсмали) беморларда иммунотанқислик (иммунитет етишмаслиги) ҳолатини даволаш усуллари аниқланди. Газетадан.*

ОНКОЛОГИЯ [юн. *onkos* — шиш, ўсма, шишган жой + *logos* — фан, таълимот] Ўсма (шиш)ларнинг пайдо бўлиш сабаблари, уларнинг келиб чиқиши, ривожланиши, шунингдек, ўсма касалликлари билан оғриш, уларнинг олдини олиш ва даволаш йўлларини ўрганувчи тиббий-биологик фан. *Вилоятда ҳанузгача ихтисослаштирилган кардиология, онкология ва эндокринология диспансерлари мослаштирилмаган биноларда ишламоқда. Газетадан.*

ОНОМАСТИКА [юн. *onomastike* — номлаш, ном қўйиш санъати] **1** Тилшунослик-

нинг ҳар қандай атоқли номларни, уларнинг пайдо бўлиш ва ўзгариш тарихини ўрганувчи бўлими.

2 Муайян тилда мавжуд бўлган барча атоқли номлар мажмуи.

ОНТ Муқаддас нарсалар ёки кимсаларнинг номини айтиб, уларни ўртага қўйиб берилган қатъий ваъда; қасам. *Онт ичмоқ.*

■ *Башарти шу хизматни бажариб беришни буйинингга олсанг, онт билан айтаманки, давлатимнинг ярмиси сеники бўлсин!* А. Қодирий, Ўтган кунлар.

Онт ичмоқ айн. қасам ичмоқ қ. қасам. *Ошно онт ичди. Отасини, онасини, уйда қолган учта укасию иккита сингисини ўртага қўйиб онт ичди.* М. М. Дўст, Лолазор.

ОНТАРИЛМОҚ *шв.* Ағдарилмоқ, тўнтарилмоқ. *Тўнғич бўрининг гавдаси, чўзилиб онтарилганча, ўз қонига олуца бўлиб тушди.* «Шарқ юлдузи».

ОНТАР-ТЎНТАР *шв.* Ағдар-тўнтар.

ОНТОГЕНЕЗ [юн. *on, ontos* – борлиқ + *genesis* – келиб чиқиш] Организмнинг индивидуал ривожланиши давомида бўладиган кетма-кет ўзгаришлар мажмуи. *Онтогенез даври. Ҳайвонлар онтогенези. Ўсимликлар онтогенези.*

ОНТОЛОГИЯ [юн. *on, ontos* – борлиқ + *logos* – фан, таълимот] Фалсафанинг борлиқ, унинг тамойиллари, асослари, тузилиши ва қонуниятлари ҳақидаги бўлими. *Онтология масалалари Шарқда, айниқса, бизнинг юртимизда «Авесто» замонларидан бошлаб фалсафий қарашларнинг таркибий қисмига айланган.* «Фан ва турмуш».

ОНТХЎР Бўлар-бўлмасга қасам ичаверадиган, аммо қасамнинг устидан чиқмайдиган қасамхўр; бебурд. *Онтхўр одам.*

ОПА 1 Бир ота-онадан туғилган фарзандлар ичида ўзидан кичикларга (укаларга, сингилларга) нисбатан катта қиз. *Опаси эрга текканда, Адолат ўн бир яшар қиз эди.* А. Қаҳҳор, Қизлар. *Низомжон опасига кўринмай, ёнғоқ орқасидан айланиб ўтиб кетди.* С. Аҳмад, Уфқ.

2 Ўзидан катта, баъзан кичик аёлларга ҳурмат юзасидан уларнинг исмига қўшиб ишлатилади, мас., *Мастура опа, Малика опа.* ■ *Раис опа ҳам шу ерда бўлсалар керак.* С. Аҳмад, Уфқ. *Йўқ, Мўттихон опа, бу ишни кечиктирманг, жон Мўттихон опа.* С. Зуннунова, Олов.

3 Ўзидан катта, баъзан кичик аёлларга ҳурмат билан мурожаат қилиш шакли. *Сухбатда Мастоннинг салмоғи тобора ортмоқда эди. Илгари «синглим» деб турган йигитлар сал ўтмай «опа» дейдиган бўлишди.* А. Қаҳҳор, Мастон. *Ҳорманг, опа, чарчамадингизми? Ишлар қалай? Т. Ашуоров, Оқ от.* – *Опа, нима иш билан шуғулланасиз? – деди официантка.* Газетадан.

ОПАЛА(Р) *миф.* Гўё хотин қиёфасида кўринадиган ажиналар.

Опала(р) тегибди *с. т.* Жин урибди, ажина чалибди.

ОПА-СИНГИЛ Бир ота-онанинг турли ёшдаги қизлари (бир-бирига нисбатан). *Улар опа-сингил.* ■ *Мастура Насимжоннинг ёш хотини билан опа-сингил тутиниб, у боёқчини шундай аврайдди.* Ойбек, О.в. шабадалар.

ОПА-УКА 1 Бир ота-онанинг ёши катта қизи билан ёши кичик ўғли (бир-бирига нисбатан). *Сени деб ота-бола, опа-ука бир-бирига тескари бўлишди.* С. Аҳмад, Уфқ.

2 с. т. Опа-сингил. *Менинг хотиним онам билан опа-ука бўлади.* П. Турсун, Ўқитувчи.

ОПАЧА *с. т.* Кичик опа, опаларнинг энг кичиги (икки ва ундан ортиқ опаси мавжуд бўлган ука ёки сингилга нисбатан). *Бу қоғозни олиб борсанг, опачанг [Мавлуда] ҳам қўл қўйиб беради.* «Ёшлик». *Болалигимда опачам йиқитиб қўйган экан, Ўша пайтда эътиборсизлик қилинганлиги сабабли кўзим ожиз бўлиб қолди.* Газетадан.

ОПЕРА [итал. *опера* < лот. *опера* – ижод маҳсули, асар] **1** Мусиқали-драматик санъат жанри ва шу руҳдаги сахна асари. «Гулсара» операси. ■ *Кўпчилик ижодкорлар юбилейга муносиб тухфалар тайёрлаш учун драма, мусиқали драма, опера, вокал-хореографик симфония, сюита ва бошқа сахна асарлари яратишмоқда.* Газетадан. *Санъатта иштиёқи баланд Малика Маматова у вақтларда ҳали опера нималигини билмайдиган содда қиз эди.* Газетадан.

2 Шундай асар ижро этиладиган театр. *Бугун операда «Майсаранинг иши» қўйилади. Ўзбек давлат опера ва балет театри.* ■ *Мамлакатимизда ўша йилларда драма, опера давлат театрлари очилди.* Газетадан.

ОПЕРАТИВ 1 Ҳарбий операцияга оид, ҳарбий операция билан боғлиқ бўлган. *Оператив карта. Оператив маълумот.*

2 Топшириқни ёки ўз вазифасини тез ва амалий ҳал этадиган, бажарадиган. *Оператив гуруҳ. Милиция бўлимининг оператив вакили.* ■ *Шошилинич оператив группа тузилиб, Тошкент-Қарши йўлларига ҳушёр туриш топширилди.* С. Аҳмад, Юлдуз.

3 Тезлик, зудлик билан амалга ошириладиган, тез қўлланадиган; тез, ишчан, амалий. *Оператив чоралар. Оператив ишламоқ. Масалани оператив ҳал қилмоқ.*

ОПЕРАТИВЛИК Оператив хусусиятга эгаллик; тезлик, амалийлик. *Оперативлик кўрсатмоқ. Оперативлик билан иш қилмоқ.* ■ *Тошкентдан беш-олти минг километр нарида кечаётган шахмат воқеалари газетамиз саҳифаларида оперативлик билан ёритиб борилаётгани мухлисларни жуда қувонтирмақда.* Газетадан.

ОПЕРАТОР [лот. operator — ишловчи, ишлаб турган] **1** махс. Мураккаб механизмлар ишини пульта ёрдамида бошқариб турадиган мутахассис. *Машиналарни бошқариш оператордан зийраклик, чаққонлик ҳамда муайян малакани талаб қилади.* «Фан ва турмуш». *Бу ерда ўқувчиларга.. чуқурлаштирилган билим бериш билан бирга ЭЎМ оператори, иш юритувчи мутахассислиги бўйича ҳам диплом берилади.* Газетадан.

2 Кино-, теле- ҳамда видеофильмни суратга олувчи. *Фильм оператори.* ■ *Азизхоннинг бояги қанор кўтаришини кинога олган хроника операторлари асбоб-ускуналарни елкага ортиб қайтишаётган эди.* С. Аҳмад, Уфқ.

3 Компьютерларда ахборотларни қайта ишлашда маълум мақсадда дастур тузиш кўрсатмаси.

4 мат. Икки тўплам элементларининг ўзаро мос келишини ифодалайдиган математик тушунча. *Квант механикада оператор билан муҳим амаллар бажарилади.* «ЎЗМЭ».

ОПЕРАЦИЯ [лот. operatio — иш, ҳаракат, фаолият] **1** Баъзи касалликларни даволаш мақсадида касалланган жойни жарроҳлик йўли билан ёриш, кесиш, тикиш. *Кўз операцияси. Операция столи.* ■ *У врачларнинг таклифини кутмай, операция хонаси ёнига ўзи чиқиб турди.* Т. Ашуров, Оқ от.

2 Бирор мақсадни кўзлаб ёки бирор оператив ёки стратегик вазифани бажариш учун ягона режа бўйича ва келишилган вақтда олиб бориладиган жанг ҳаракатлари

мажмуи. *Жанговар операция. Операция картаси.* ■ *Майор Мақсуд Солиев ярим тунда операцияни якунлаб, уч ойдан бери изма-из қувиб келаётган жиноятчини қўлга олгач, уйга қайтган эди.* «Ёшлик». *Ҳар кун актив операциялар олиб борилди: Варшава йўлларига пистирмалар қўйилди, миналар кўмилди.* И. Раҳим, Чин муҳаббат.

3 Савдо, молия, почта, саноат, компьютер, суғурта ва б. билан боғлиқ вазифаларни бажаришга қаратилган фаолият ёки хатти-ҳаракат. *Банк операциялари.* ■ *Бугунги кунда 6 минг кичик ва хусусий корхона ҳисоб-китоб рақамида ҳеч қандай операция амалга оширилмаган.* Газетадан.

4 Технологик жараённинг бир иш жойида бажариладиган алоҳида бир қисми. *Деталга сайқал бериш операцияси. Битта трансформатор ишлаб чиқариш учун қанчадан-қанча операция бажарилади.*

ОПЕРАЦИЯВИЙ Операцияга оид. *Масалан, «Вога» вируси фақат Windows операциявий тизимида ишлайди ва шунинг учун Windows вирусларига киради.* «Фан ва турмуш».

ОПЕРЕТТА [итал. operetta — кичик опера] **1** Ашула, рақс ва сўзлашув (диалог) аралаш, комедия характеридаги мусиқали саҳна асари. *Оперетта турли халқлар маданиятига хос мусиқали сахнавий жанрлар.. аломатларини ҳам мужжасам этган.* «ЎЗМЭ».

2 Шундай асар ижро этиладиган театр. *Опереттага бормоқ. Оперетта театри.* ■ *1971 йилда Тошкент оперетта театри ташкил қилинди.* Газетадан.

ОПИЙ, опиум [лот. opium < юн. opion — кўкнор шираси] айн. **афюн.**

ОПИЧЛАМОҚ айн. опичмоқ 1. *Мен нима қилибманки, колхозни опичлаб катта қилган одамлар қатори «Кўшчинор»нинг хўжайини бўламан.* А. Қаҳҳор, Кўшчинор чироқлари.

2 *кўчма* Кўтармоқ, тутиб турмоқ. *Елкасида улкан дардни опичлаб, Дарахтлар титрайди ғамгин, безабон.* «Ёшлик».

3 *кўчма* Етакламоқ, қўллаб-қувватламоқ. *Кечирасиз-у, домла, сизни Султон ака опичлаб, шу даражага етказди.* «Ёшлик».

Тишда тишлаб, орқада опичлаб *Кўз қорачиғидай сақлаб, ардоқлаб. Мен бу болани тишимда тишлаб; орқамда опичлаб катта қилганман.*

ОПИЧМОҚ 1 Кимсани орқасига миндириб кўтармоқ, кўтариб юрмоқ. *Болани опичмоқ. ■ Агар дунёнинг нариги бурчагига сизни опичиб боришга тўғри келса, мен суюна-суюна бажарардим.* Ойбек, Танланган асарлар.

2 Кимсанинг орқасига минмоқ, миниб ёпишиб бормоқ. *-Тўлқинбой, — деди Фани ота.. елкасини болага тутиб, — қани опичиб олинг, саройга тушамиз.* Ҳ. Фулом, Машғал. *Қани, азамат, менга опич, мардона ишинг бу ерда тугади.* В. Ғофуров, Вафодор.

ОПИЧҚИЛАМОҚ кам қўлл. айн. **опичмоқ**. [*Эвзозхон*] *Тўлқинни опичқилаб, Учқунни қўлга кўтариб олиб, базўр қадам ташлаб бораёттибди.* Ҳ. Фулом, Машғал.

ОПКЕ, **опкел** с.т. Олиб кел. *Муҳсина пиширган экан, касалингизни ўйлаб, мурч қўшолмабди, мурчни алоҳида опкелдим.* М. М. Дўст, Лолазор. *Қовунни опке, мен сўйиб бера қолай.* С. Анорбоев, Ҳамсуҳбатлар.

ОП-ОЧИҚ айн. **оппа-очик**. *Аёзий ўз шеърини шундай муболага билан мақтар эдики, шеърнинг оп-очик нуқсонларини ҳам танқид этмоққа киши илож тополмай қоларди.* Ойбек, Навоий.

ОПОҚ (**оппоқ** с. қисқ. шакли) 1 бол. Тоза, яхши.

Опоқ бўлиб қолдингми? Яхши бўлиб, тузалиб қолдингми? *Мен баҳорда, сен опоқ бўлганингда, яна қайтиб келаман, Заррагул.* «Ёшлик».

2 **Дада, буви, ойи** каби қариндошлик билдирувчи сўзларга қўшилиб, «катта» сўзи ўрнида келади ёки ҳурмат ифодалайди. *Опоқ буви. Опоқ дада. Опоқ ойи. ■ Бизнинг шахримизда чет элни кўрган, қандайдир бир чет тилни билган битта одам бор. У ҳам бўлса Ҳожжи бува — Душаннинг опоқ дадаси.* А. Мухтор, Давр менинг тақдиримда.

ОПОҚИ с.т. Опоғойи. *Ҳозиргача Озод қишлоққа борганида, онаси аввало опоқини сўраб суриштиради.* «Ёшлик».

ОПОҒОЙИ Ёши катта аёлларга ҳурмат билан мурожаатда ишлатиладиган сўз.

ОППА-ОЙДИН **Ойдин** 1, 2 с. куч. *Оппа-ойдин кеча. Оппа-ойдин масала. ■ Рўпарага келиб қолган тўлинойи йўлни, ўртадаги олабула, пастак деворни, икки томондаги ҳайбатли қояларни оппа-ойдин ёритмоқда эди.* Н. Қиличев, Чиғирик.

ОППА-ОСОН Жуда осон. *Бироқ саккиз иккига оппа-осон бўлинишини биларсиз?* «Ёшлик».

ОППА-ОЧИҚ **Очиқ** с. куч. кам қўлл. айн. **очикдан-очик**. *Бек.. Лаълининг қўйинини шу вақтгача пуч ёнғоққа тўлдириб келаётганини оппа-очик айтди-қўйди.* Ҳ. Фулом, Машғал.

ОППОЗИЦИОН Оппозицияга оид, оппозициядан иборат бўлган, оппозиция руҳидаги. *Оппозицион ҳаракат. Оппозицион блок. Оппозицион партия.*

ОППОЗИЦИЯ [лот. oppositio — қарама-қарши қўйиш] 1 Қарама-қарши ҳаракат; ихтилоф; ўз дунёқарашини, сиёсатини бошқаларнинг қарашларига, сиёсатига қарши қўйиш.

2 Ҳукмрон мафкура ёки ҳукумат сиёсатига қарши чиқувчи ва масалани бошқача ҳал қилиш йўлини, бошқача сиёсатни таклиф этувчи партия ёки ижтимоий гуруҳларнинг умумий номи.

3 Бир хил сатҳдаги тил бирликларини (фонема, морфема, сўз маънолари ва б. ни) улар орасидаги фарқни билиш учун ўзаро қарама-қарши қўйиш. *Сўз маъноларини оппозицияда ўрганиш барча семаларни аниқлашда қўл келади.* «ЎТА».

ОППОЗИЦИЯЧИ Оппозиция қатнашчиси ёки тарафдори. *Ўнг оппозициячилар. Оппозициячи гуруҳ.*

ОППОНЕНТ [лот. opponens, opponens — эътироз билдирувчи] 1 Очиқ суҳбат ёки баҳс-мунозарада қарши тараф. *Шундай қилиб, 1925 йилда оппонентлар позицияларининг хилма-хиллиги йироқ истиқболда бир-бирига қўшилиб кетган.* Газетадан. [*Ёқуб:*] *Нима, бизнинг оппонентлар ҳеч нарса билмайдиган одамларми?* С. Зуннунова, Олов.

2 Диссертация ёки маърузани танқидий баҳолай оладиган, таҳлил қила биладиган мутахассис. *Умиднинг йигирма минут атрофидаги ҳимоя сўзидан кейин расмий оппонентлар сўзлади.* Мирмуҳсин, Умид.

ОППОН-СОППОН: **оппон-соппон бўлмоқ** Тамом бўлмоқ, тугамоқ, битмоқ. *У ҳамма ёқ оппон-соппон бўлганда келди. ■ Катта уруш оппон-соппон бўлиб, йигитлар қайта бошлади.* Ҳ. Назир, Ўтлар тугашганда.

ОППОРТУНИЗМ [фр. opportunisme < лот. opportunus — фойдали, қулай] Мослашувчанлик, замонасозлик, иккиюзлама-

чилиқ; шундай хислатларни ўзига асос қилиб олган сиёсий оқим.

ОППОРТУНИСТ Оппортунизм тарафдори; оппортунизм сиёсатини амалга оширувчи шахс.

ОППОРТУНИСТИК Оппортунизмга оид, оппортунизм руҳидаги, оппортунизм сиёсатини юргизувчи. *Оппортунистик гуруҳ. Оппортунистик назария.*

ОППОҚ ОҚ с. куч. *Оппоқ қор. Оппоқ ойдин.* ■ *Йигит чаноқлардан тошиб чиққан оппоқ пахталарни кўрди-ю, ўзининг ҳам ёш хечраси шу чаноқлардай очилиб кетди.* М. Исмоилий, Фарғона т.о. *Қиз бош яланг, сочлари турмакланган, оппоқ халат кийган эди.* Ҳ. Ҳошимов, Қалбингга қулоқ сол.

Оппоқ болам, оппоқ қизим айн. **ОППОҒИМ.** **Оппоқ қиз** Ҳар қандай қизга эркалишти мурожаат этиш шакли. **Оппоқ қилиб кўрсатмоқ** Айбсиз, бегуноҳ қилиб кўрсатмоқ. *Сиз ҳам анойи эмассиз. Ўзингизни оппоқ қилиб кўрсатмай қўя қолинг.* М. Мансуров, Ёмби. **Оппоғим** Ўз боласини эркалиштиш формаси. *Кўнғиз боласини, оппоғим, дейди, кирпи боласини, юмшоғим, дейди.* Мақол.

ОПТИК 1 Оптика ҳодисаларига оид. *Оптик кузатишлар.* ■ *Бироқ бу ерда кузатишнинг оптик усулларидан узил-кесил воз кечмоқчи эмаслар.* Газетадан.

2 Оптикага оид, оптика билан боғлиқ. *Оптик асбоблар.*

ОПТИКА [юн. optike – кўриш ҳақидаги фан] **1** Физиканинг ёруғликнинг табиатини, ёруғлик ҳодисалари қонуниятларини, ёруғлик билан бошқа моддаларнинг ўзаро таъсирини ўрганадиган бўлими. *Боболаримиз – Беруний, Мирзо Улугбеклар назари тушган ҳикмат шми – оптика ҳамон навқирон.* «Фан ва турмуш».

2 Ёруғликнинг акс этиш ва синиш қонунларига асосланган асбоб-ускуналарнинг умумлашма номи. *«Киев» маркали фотоаппаратлар аъло сифатли оптикаси ва механикаси билан донг таратган.* Газетадан.

3 Кўзойнак, контакт линзалар танлаш ва сотиш учун ихтисослашган магазин.

ОПТИМАЛ [лот. optimus – энг яхши, энг мақбул] Энг мувофиқ, энг яхши, энг қулай. *Чигит экиннинг оптимал режими.* ■ *Тананинг оптимал температураси нерв системасининг фаолияти туфайли вужудга келтирилади.* Э. Маҳмудов, Терлаш ва унинг аҳамияти.

ОПТИМЕТР [юн. optos – кўринувчи + metro – ўлчайман] Ўта аниқ чизиқли ўлчамлар учун ишлатиладиган ричагли-оптик асбоб.

ОПТИМИЗМ [лот. optimus – энг яхши, энг мақбул] Келажакка ва умуман ҳар ишга ишонч билан қараш; ҳар бир нарсанинг яхши ва порлоқ томонини кўришга мойиллик. *Бизнинг дунёқарашимиз ҳаётбахш оптимизм билан суғорилган.* Газетадан.

ОПТИМИСТ Оптимизм руҳи билан суғорилган, ҳар насага, ҳаётга комил ишонч билан қаровчи, ундан завқланувчи киши.

ОПТИМИСТИК Оптимизм руҳи билан суғорилган, ҳар насага, ҳаётга комил ишонч билан қарайдиган, қувноқ, кўтаринки руҳдаги. *Оптимистик кайфият. Ҳаётга оптимистик кўз билан қарамоқ.* ■ *Фақат умумий ишга қўлидан келганича улуш кўшаётганини чуқур англай билган кишигина зиддиятли ҳаётни оптимистик тарзда идрок эта олади.* «Фан ва турмуш».

ОПТИМИСТЛИК 1 Оптимистга хос хусусиятга эгалик. *Раҳим аканинг оптимистлиги, унинг оёққа туриб кетишига сабаб бўлди.* Газетадан.

2 айн. **ОПТИМИЗМ.**

ОПТОВА [ф. آفتابه – кўза] шв. Офтоба, обдаста. *Анорхон кампирни суяб турғизди, кучоқлаб сўридан настга тушириб, оптовада сув келтириб берди.* И. Раҳим, Ихлос.

ОПЦИОН [нем. Option < лот. optio, optionis – танлаш; истак] **1** Шартнома шартларига кўра томонлардан бирига мажбуриятларни бажариш йўли, шакли, ҳажми, техникасини танлаб олиш учун берилган ҳуқуқ.

2 Сотувчи ёки харидорга қимматбаҳо қоғозлар ёки товарларни муайян муддат давомида белгиланган нархларда сотиб олиш ёки сотиш ҳуқуқини берадиган шартнома.

ОР [а. عار – уят, шармандалик, номус; уялиш] **1** Ўзига номуносиб ёки эп кўрилмаган ишдан, нарсадан хижолат тортиш, уялиш туйғуси; уят, номус. *Хато қилмоқ бордир, тузатмаслик ордир.* Мақол. ■ *Қишлоқда бировдан калтак ейиш азал-азалдан эр йигит учун ор саналади.* Н. Норқобилов, Тўқнашув.

Ор билмоқ Ўзига эп кўрмаслик. *Мирза-каримбой билан пул юзасидан хириллашиш-*

ни, ёқа бўғишни [Йўлчи] ўзига ор билди. Ойбек, Танланган асарлар. **Ор қилмоқ** (ёки **этмоқ**) Уялмоқ, номус қилмоқ, ўзига эп кўрмаслик. [Раъно:] *Агар ор этса Лайли ҳақлидир Қайснинг жунунидин*. А. Қодирий, Меҳробдан чаён. **Ори келмоқ** Уялмоқ, номус қилмоқ. -Йўқ, тоға, ўрганиб олдим, — деди уквсизлигидан ори келган Қўзибой. Х. Назир, Сўнмас чақмоқлар.

2 Обрў, фахр. *Нори борнинг ори бор*. Мақол. ■ *Сен менинг чин ёримсан. Дилда йўғу боримсан, Гам номусу оримсан, Ой бориб, омон келгил*. Т. Тўла.

ОРА I Икки нарса ёки нуқта ўртасидаги масофа. *Москва билан Тошкент ораси 3500 километр. Колоннада машиналар ораси*. ■ *Ора узоқ, қарийб бир километрча келар эди*. М. Исмоилий, Фарғона т.о.

2 Нарсалар ўртасидаги жой, бўшлиқ, майдон; очиқ ёки тешик жой. *Ғўза қаторлари орасини юмшаттиш*. ■ *Сени унда, мени мунда яратди. Орамизда оқар дарё яратди*. «Қўшиқлар». Супаларнинг ораларига, атрофига анвои гуллар экилган. А. Қаҳҳор, Асрор бобо. *Булутоллар орасидан оининг бир парча кумуши кўриниб қолди*. Ойбек, Танланган асарлар.

3 Нарсаларнинг бир-бирига туташган жойи, ўртаси. *Этаги эшик орасига қисилиб қолди*. ■ *Саман отиқ, қамчисини буқлаб, пиёзи чакмонининг ёқаси билан гардан орасига қистирди—да, отини қистаб, деворга яқинлашди*. М. Исмоилий, Фарғона т.о.

Тирноқ орасидан кир қидирмоқ қ. **тирноқ**.

4 Нарсаларнинг ичи, ўртаси. *Беда ораси жуда иссиқ, гўё қуёшнинг бутун олови беда ичига яширингандай*. Ойбек, Танланган асарлар.

5 Қатор, саф; тўда, давра. *Орамизда ҳар хил одамлар бор. Орамиздан яқин дўстимиз кетди*. ■ *Буни ҳайданг.. орадан, жўралар! Яна ёлғонлар ила кўп Сизни сарсон қиладир*. Ҳамза. *Қўшин Тошкентга этган баъдида бизлар ташқаридан ва сизлар ичкаридан бўлиб, Мусулмонқулни орадан кўтаргаймиз*. А. Қодирий, Ўтган кунлар.

6 Икки воқеа, ҳодиса ёки пайт ўртасида ўтган, ўтадиган вақт, фурсат *Меҳмонлар жўнаб, орадан сал вақт ўтмай Асрорқул келди*. А. Қаҳҳор, Асрор бобо. *Орадан тўққиз йил ўтди. Булар тўрт бола кўришди*. А. Қаҳҳор, Бошсиз одам.

Бу (ёки шу) орада 1) шу вақт ичида, маълум вақтдан бошлаб ўтган вақт давомида. *Иккала хатга ҳам тезда жавоб кела бермади. Бу орада жанглар бўлиб, Мирзаевнинг қисми — гвардиячи қисм, ўзи гвардиячи сержант бўлди*. А. Қаҳҳор, Кўк конверт; 2) бу (шу) ўртада, бу (шу) жойларда, яқин атрофда. -*Бу орада Ҳомид нима қилиб юрибдир, ўзига тузуккина бой киши эмасми эди?* — деди *Офтоб ойим*. А. Қодирий, Ўтган кунлар. **Кун ора** Кун оша, икки кунда бир, орадан бир кун ўтиб. *Мулла Муҳсин, шу ҳовуздан кун ора сув ўтадимми ё йўқ?* А. Қодирий, Кичик асарлар. **Тез орада** қ. **тез**. 1. **Яқин орада** 1) яқин вақт ичида, яқин кунлар ичида, шу кунларда. *Агар яқин орада ҳаво очилмай, сурункасига ёмғир ёғиб берса, нима қиламиз?* Н. Сафаров, Хадича Ахророва; 2) бу (шу) ўртада, яқин атрофда. *Яқин орадаги обжувоз пойкўпининг зарби ерни силкитиб, тўлқин берар эди*. А. Қодирий, Ўтган кунлар.

7 Кишилар ўртасидаги ўзаро муносабат, алоқа. *Бу ҳақда энди бизнинг орамизда гап бўлмасин, ўртоқ Нурмонов*. С. Зуннунова, Олов. -*Ҳалиги гаплар ёлғонми! Орада ҳеч нарса.. бўлган эмасми?* — сўради юмшоқланиб она. Ойбек, Танланган асарлар.

Ора очиқ (қилмоқ) 1) ўзаро ҳисоб-қитоб тугади. [Бой Гофирга:] *Туй баҳонасида мендан сенга ўтиб қолган арзимаган нарсалар бор. Шуларни пулга чақиб, орани очиқ қилиб қўйсақ, деган эдим*. Ҳамза, Бой ила хизматчи; 2) орада юз берган англашилмовчилик ёки нохушлик тугади, икки томон баравар бўлди. -*Сен хато қилган бўлсанг, мен ҳам хато қилдим, ора очиқ, — деди Тўлаган қистаб келаётган кулгидан лаби пирпираб*. А. Қаҳҳор, Кўшчинор чироқлари. **Орага одам (ёки киши) қўймоқ** Икки томонни битиштириш, улар ўртасидаги иш ҳақида келишиш учун учинчи бир шахсни воситачи қилиб юбормоқ. *Мендан ўзи хафа бўлган бўлса, орага киши қўйса ҳам бўлар эди*. А. Қодирий, Ўтган кунлар. **Орага суқилмоқ** Бошқаларнинг гапига, суҳбатига ёки ишига аралашмоқ. *Дув орага суқилибди неча даллол: «Барака де, барака де, сен сот, сен ол»* Ф. Фулом. **Орага тушмоқ (ёки кирмоқ)** Ўзаро мунозара қилаётган, тортишаётган ёки уришаётган кишилар орасидаги ихтилофни бартараф қилиш учун уринмоқ. *Эр-хотин-*

нинг орасига эси кетган тушибди. Мақол. ■ Эр-хотиннинг орасига тушган киши баъзан ўша тобда, аксари кейинчалик сўкиши эшитади. А. Қаҳҳор, Қўшчинор чироқлари. **Орада қолмоқ** Маълум кишилар ўртасидаги воқеалар ёки гапдан бошқалар хабар топмаслигига ахдлашмоқ. -Назар ака, — деди биринчи ёрдамчи босиқлик билан. — Гап орамизда қолди, деб ваъда бердингиз. М. М. Дўст, Лолазор. **Орада (ёки орага) қора тиканак бўлмоқ айн. тикан бўлмоқ қ. тикан. Орада(н) гап ўтди (ёки қочди)** Икки томон ўртасида нохуш, бир-бирига қаттиқ тегадиган, айил ботадиган гап бўлди. *Сиз пайқамабсиз.. Орада жиндай гап қочди.* А. Қаҳҳор, Миллатчилар. **Ораларидан қил (ҳам) ўтмайди қ. қил. Ора(ни) бузмоқ** Кишилар ўртасидаги алоқани, муносабатни ёмонлаштирмоқ, ўртага адоват солмоқ, дўстни душманга айлантирмоқ. *Биноийдек бош қўшиб турган икки элатнинг ораси яна бузилди-қўйди.* А. Мухтор, Қорақалпоқ қиссаси. **Ораси яқин бўлмоқ** Ўзаро муносабати, алоқаси яхши бўлмоқ. *Яхшибоев раисни лақаби билан айтса ҳам, раиснинг ўзи заррача хафа бўлмасди, шундан билдимки, буларнинг ораси яқин.* М. М. Дўст, Лолазор.

8 3-ш. эгалик ва ў.-п. к. қўшимчалари билан кўмакчи вазифасида ишлатилади (қ. **орасида**).

ОРА II: **ора ойи** Қамария йил ҳисобидаги шаввол ва зулҳижжа оралигидаги ой; зулқаъда.

ОРАБУЗАР Кишилар орасидаги муносабатни бузувчи, кишиларни бир-бирига ёмонлаб, улар ўртасида ихтилоф туғдиришга уринувчи. — *Бу гапни орабузар Салима ўйлаб топган бўлса керак, чунки менинг гулдек ҳаётимни кўришга кўзи йўқ.* «Ёшлик».

ОРАЗИ I [а. عراض — ташқи кўриниш; юз, ёнок] *поэт.* Чиройли юз, бет, чеҳра; жамол. *Оразингни, эй маҳваш, боғ аро намоён қил. Муқимий. Яшнамоқда оразинг гулзори доим навбахор, Сўхбатинг бўлса муяссар кимга, бўлгай бахтиёр.* Ҳабибий.

ОРАЗ II 1 Ўн икки мақом тизимидаги шўъба номи. *Орази Наво, Орази Дугоҳ.*

2 Сурнай йўлларида бири.

ОРАЛАМОҚ I Ўртасидан, ичидан юрмоқ, ўтмоқ; кезмоқ. *Аҳмаджон.. немислар буталарни оралаб юз эллик метрча яқин келганда, устма-уст икки сидра ўқ ёғдир-*

ди. А. Қаҳҳор, Олтин юлдуз. *Қўшиқ оралайди оролма-орол, Асрлар уйқусин бузиб, уйғотиб.* Т. Тўла.

2 Яшириниб кирмоқ, пайдо бўлмоқ, دورимоқ. *Қишлоққа бўрилар оралаб қолди.*

3 Суқилиб кирмоқ. [Домла:] *Жўрабой, кўнглингизга шайтон оралаб қолибди, калима келтиринг.* И. Султон, Бургутнинг парвози.

4 Аралашмоқ. [Ботиржон:] *Колхоз рўзғорига ҳаром қўл оралаганини сезиб, қараб туролмадим.* Н. Сафаров, Ҳаёт мактаби.

5 Битта-ярим тушмоқ, ора-сира пайдо бўлмоқ. *Қори битта-иккита оқ оралаган чўққи соқолининг учини ушлаб илжайди.* А. Қаҳҳор, Қўшчинор чироқлари.

6 Икки орада, кишилар ўртасида пайдо бўлмоқ, туғилмоқ. [Опоғойи] *Зайнаб сиқилмасмикин, икки ўртага совуқчилик ораламасмикин, деб қўрқади.* А. Қодирий, Ўтган кунлар.

Кун оралаб Кун оша, орадан бир кун ўтказиб, кун ора. *Баъзан ҳар кун, баъзан кун оралаб кечқурун Унсинни кўргали [Йўлчи] Шокир отаникига келди.* Ойбек, Танланган асарлар. **Ой оралаб** Орадан бир ой ўтказиб, бир ой оша. *Журнал ой оралаб чиқади.*

ОРАЛАТМОҚ I Ораламоқ 1, 2, 3, 4 фл. орт. н.

2 Қатордаги киши ёки нарсалардан бирини қолдириб ўтмоқ. *Ғузани оралатиб сугормоқ.* ■ *Ҳадеб менга бераверасанларми, оралатиб Жаннат опамга ҳам бериб қўй, ха-ха-ха!* А. Қодирий, Ўтган кунлар.

Кун оралатиб айн. кун оралаб қ. ораламоқ. *Кун оралатиб келиб турмоқ.*

ОРАЛИҚ I Нарсалар ўртасидаги жой, масофа. *Тоғ оралиғи.* ■ *Студентлар ётоқхонаси. Кичикроқ хонада икки каравот, оралиқда тумбочка.* М. Бобоев, Ғўзалик истаба. *Ҳалиги отлиқ яна кўринди. Оралиқ тобора қисқара борди.* С. Анорбоев, Оқсой.

2 Икки пайт, он, лаҳза ўртасидаги вақт. *Кичик вақт оралиғи.*

3 тиб. Одам дум суягининг учи ва қуймич дўмбоқлари оралиғида ётган юмшоқ тўқималар йиғиндиси.

Оралиқ назорат Талабаларни машғулотлар, муайян дарс соатлари ўтгандан кейин синаш, баҳолаш усули. *Оралиқ назоратни ўтказмоқ.* **Оралиқ экинлар** Асосий экинлар ҳосили йиғиб олингандан кейин экиладиган қўшма экинлар (алмашлаб экишда).

Ўзбекистонда оралиқ экинларни етиштириш учун ниҳоятда қулай шароит мавжуд. «Фан ва турмуш».

ОРАНГУТАНГ [малайяча orang hutan — ўрмон одами] Одамсимон маймунлар уругининг ягона тури.

ОРАНЖЕРЕЯ [фр. orangerie < orange — апельсин] Ноодатий иқлим шароитида ўсимликларни қишлатиш, совуқдан сақлаш, қишда ҳам ўстириш учун зарур шароитлар муҳайё қилинган ойнаванд бино.

ОРАОЧДИ Кишилар орасида ўзаро муносабатдаги нохушлик ёки англашилмовчиликни ҳал қилувчи мулоқот. *Энг безор дала сайилларида ҳам душманларини кўриб қолишдан чўчиб, баъзан эса ораочдининг тезроқ рўй беришини истарди.* «Ёшлик».

ОРАСИДА кўм. вzf. 1 Ўртасида, ичида. *Жуфтлик ёлғиз кишилар орасидагина эмас, ер юзидаги ҳар бир махлуқда ҳам бор.* А. Қодирий, Меҳробдан чаён. *Сел шаршараси, момақалдирок гулдураси орасида Баҳромнинг қулоғига қўй маърагани чалингандай бўлди.* С. Анорбоев, Ҳамсуҳбатлар.

2 Давомида, мобайнида. *Бу кунги беш дақиқа орасида бўлиб ўтган воқеани [Отабек] ҳеч бир йўсин билан миясига сиғдира олмас.. эди.* А. Қодирий, Ўтган кунлар. *Вақт шом билан хуфтон орасида эди.* Ойбек, Танланган асарлар.

3 Ўртасида, чегарасида. *Меҳмонларнинг аксари ўрта ёшли — ўттиз-қирқ орасидаги одамлар эди.* Ойбек, Танланган асарлар.

4 Ичида. *Қий-чув орасида заиф йиғи товуши ҳам келиб қўйди.* А. Қодирий, Ўтган кунлар. [Отабек Кумушга:] *Бу телбаларча мактубингизни иситма орасида ёзганга ўхшайсиз.* А. Қодирий, Ўтган кунлар.

5 Ўртасида (қиёслашда). *Товуқ билан одам орасида қанча фарқ бўлса, бу икки жониворнинг муҳаббати орасида ҳам шунча фарқ бор.* А. Қаҳҳор, Мастон.

ОРА-СИРА рвш. 1 Гоҳо-гоҳо, баъзи-баъзида. *Чирилдоқлар тинимсиз чириллар, орасира настдан — қишлоқ томондан итларнинг ҳургани эшитиларди.* Э. Усмонов, Ёлқин. У [Фуломжон] *томоғини ора-сира қириб, энтиқиб туриб гапирди.* М. Исмоилий, Фарғона т.о.

2 Унда-мунда, у ер-бу ерда. *Анвар машиналарнинг ишини кўриб қувониб кетди.* Бироқ *ора-сира галтаклар ҳам, замбиллар*

ҳам кўриниб қоларди. Ш. Рашидов, Кудратли тўлқин.

ОРАСТА [ф. آراسته — безатилган, зийнатланган; тарбияли, одобли] Тартибга солинган, оро берилган, ясатилган, безатилган. *Тилларанг сочлари ораста қилиб таралган, кўзлари ҳаворанг бу жувон, қўлларини халати чўнтагига тиққанича, бизга кулиб қараб турарди.* «Ёшлик». *Тонг ёришмасдан туриб, қўлига супурги олади-да, ярим соатга қолмай ҳаммаёқни ораста қилиб қўяди.* С. Аҳмад, Юлдуз.

ОРАСТАЛИК Ораста хусусиятга эгалик, тартибга солинганлик. *Ҳовлидаги орасталик уй эгасининг яхши дид эгаси эканлигидан далолат эди.* «Ёшлик».

ОРАТОР [лот. orator < orare — гапирмоқ, сўзламоқ; илтижо қилмоқ] Нутқ сўзловчи, нотиқ. *Сиз ажойиб оратор — нотиқсиз, Баширжон ака.* Н. Аминов, Қаҳқаҳа. *Ҳақиқий нотиқлар, тажрибали ораторлар соатлаб гапира оладилар.* «Саодат».

ОРАТОРИЯ [итал. oratorio < лот. oratorium — ибодатхона] Умумий хор, якка ашулачи ва симфоник оркестр учун ёзилган драматик сюжетли йирик мусиқа асари. *И. Акбаровнинг «Тошкентнома» ораторияси унинг ижодиди алоҳида ўрин эгаллайди.* Газетадан. *Йигирмата шоир ҳашар қилиб, «Тантана» деган манзума ёздилар.* *Бастакорлар куй басталадилар — оратория бўлди.* М. М. Дўст, Лолазор.

ОРАТОРЛИК Сўзамоллик, гапга чечанлик; нотиқлик. *Ораторлик санъати.*

ОРА-ЧИРА, ора-чора айн. ора-сира. *Профессор ора-чира ҳазил-мутойиба гап ҳам ташлаб қўяр, давлат, мулк топилиши, аммо инсон топилмаслиги ҳақида гапириб ҳам қўярди.* Мирмуҳсин, Умид. *У ора-чора табибчилик билан ҳам шуғулланарди.* «Ёшлик».

ОРБИТА [лот. orbita — йўл, из; бўшлиқ, чуқурлик] астр. Ихтиёрий табиий ёки сунъий космик жисмнинг фазода бошқа осмон жисмига нисбатан ҳаракатланиш йўли (мас., Ернинг Қуёш атрофидаги йўли Ер орбитаси дейилади). *Ракетанинг сўнги босқичи автоматик планеталарро станцияни мўлжалдаги орбитага олиб чиқди.* Газетадан. *Озиқ-овқат, асбоб-ускуна ва аппаратлар, шунингдек, хат-хабарлар орбитага етказилди.* Газетадан.

ОРБИТАЛ Орбитага оид, орбитага тегишли; орбитадаги. *Ер сунъий йўлдошининг орбитал ҳаракати. Космик орбитал станция.* ■ *Мутлақо кутилмаганда «Салют-7» орбитал станцияси билан алоқа узилди. «Фан ва турмуш».*

ОРГАН I [юн. organon — қурол, асбоб] **1** Одам, ҳайвон, ўсимлик ва умуман, жонли организмларнинг маълум бир вазифаларни бажарадиган қисми; аъзо. *Сезги органлари. Эшитиш органи.*

2 Ҳаётнинг муайян бир соҳасида белгили вазифаларни бажарувчи муассаса, ташкилот. *Орган ходимларига Бегматовнинг яширинмай, очиқчасига бемалол юриши ёқмас эди. «Ёмлик».* Бу қарорга биноан, ОАК Олий ва ўрта таълим вазирлиги қарамоғидан олиниб, *Вазирлар Маҳкамасининг органига айлантирилди. «Фан ва турмуш».*

3 Бирор партия, ташкилот ёки муассаса томонидан нашр қилинадиган ва шу ташкилотнинг қарашларини акс эттирадиган вақтли матбуот. *«Шарқ юлдузи» журнали — Ўзбекистон Ёзувчилар уюшмасининг органидир.*

4 *тех.* Механизм ва машиналарнинг маълум вазифани бажарадиган мураккаб мустақил қисми. *Тракторнинг бошқариш органи.* ■ *Роботнинг ишчи органи — ҳаракат қилувчи ва юмуш бажарувчи механик қўли одамнинг қўлига ўхшайди. «Фан ва турмуш».*

ОРГАН II [юн. organon — қурол, асбоб] Дамли-клавишли, трубаларига юборилган ҳаво ёрдамида чалинадиган мусиқа чолғу асбоби. *Орган 14-асрдан Фарбий Европада аввал черков, кейинчалик дунёвий чолғу асбоби сифатида кенг тарқалган. «ЎЗМЭ».*

ОРГАНИЗМ [лот. organismus < юн. organon — қурол, асбоб] Ҳар қандай тирик мавжудот. *Соғлом организм.* ■ *Очиқ ҳавода сайр қилиш бола организми учун ниҳоятда фойдалидир. «Фан ва турмуш».* *Олма шартли организмни бақувват қилади. «Саодат».*

ОРГАНИК Органик кимё мутахассиси, олими.

ОРГАНИК I **1** Организмга, жонли мавжудотга оид, тирик мавжудотлар билан боғлиқ бўлган; тирик, жонли. *Органик дунёнинг тараққиёт қонунари.* ■ *Йод органик бирикма сифатида барча тирик организмларда бўлади. «Фан ва турмуш».*

2 Ҳайвон ёки ўсимликларнинг чиршидан ҳосил бўлган; тирик организмлар маҳсулидан олинган. *Органик модда. Органик ўғитлар.*

Органик кимё Кимёнинг углевод бирикмаларини, уларнинг турли хил ўзгаришларини ўрганувчи бўлими.

ОРГАНИК II *айн. узвий 2.* *Органик равишда боғланган масалалар.*

ОРГАНИСТ Орган чалувчи мусиқачи; орган созловчи ёки таъмирловчи уста.

ОРДЕН I [нем. Orden < фр. ordre < лот. ordo, ordinis — қатор, даража; тартиб; тузум] Ҳарбий ёки гражданлик бурчини намунали бажарганлик учун бериладиган турли даража ва номдаги нишон, мукофот. *«Соғлом авлод учун» ордени. Орден билан мукофотламоқ.* ■ *Халқ хўжалиги ва маданиятнинг турли соҳаларида юксак меҳнат кўрсаткичларига эришган кишилар шу қимматли металлдан тайёрланган орден ва медаллар билан тақдирланади. «Фан ва турмуш».*

ОРДЕН II [лот. ordo, ordinis] Католик монахларнинг муайян низомномага эга бўлган ташкилоти.

ОРДЕНДОР *айн. орденли.*

ОРДЕНЛИ Орден олган, орден билан мукофотланган. *«Дўстлик» орденли ўқитувчи.*

ОРДЕР [нем. Order < фр. ordre — тартиб, буйруқ < лот. ordo — қатор, тартиб] **1** Бирор нарсани олиш, бериш, бирор ишни бажариш ҳақида берилган ижозат қоғози, буйруқ варақаси, расмий ҳужжат. *Квартира (олиш) учун берилган ордер. Ордер бланкаси.* ■ *Умид ғоятда хурсанд, икки хонали квартирага ордер олган кунийёқ, даров кўчиб келди. Мирмуҳсин, Умид.*

2 Бухгалтерияда: пул маблағлари ёки моддий бойликлар билан операцияларни амалга оширишга оид ҳужжат. *Тўлов ордери. Касса ордери.*

ОРДИНАРЕЦ [фр. ordonnance — хабар берувчи; чопар] *ҳарб.* Командир ёки штаб ҳузурида ҳар хил топшириқларни бажарувчи ҳарбий хизматчи. *Туламан урушда.. қайси бир генералга ординарец бўлган экан. С. Анорбоев, Оқсой.*

ОРДИНАТА [лот. ordinatus — тартибланган; тартиб билан жойлаштирилган] *мат.* Фазодаги нуқтанинг вазиятини аниқловчи уч координатадан бири.

ОРДИНАТОР [лат. ordinator — бош-қарувчи; тартибга келтирувчи] Шифохоналарда (касалхона, клиника ва ш.к. да) талқикот ва даволаш ишини бажарувчи, одатда бўлим мудирини раҳбарлиги остида ишловчи врач.

ОРДИНАТУРА [лат. ordinator — бош-қарувчи; тартибга солувчи] тиб. 1 Ординатор иши, вазифаси; ординаторлик.

2 Амалий тиббиёт аспирантурасининг бир тури. *Клиника ординатураси.*

ОРДОНА Эгасиз қолган, эгаси ўлган; сабил. *Ордона кетмонни узат! Ордона қолгур (қолсин)! (қарғ.).* ■ *Ҳа, ордона, менинг айтганларим у ёқда қолиб, ўзингизнинг дардингизда юрган экансиз-да! Ҳ. Назир, Ўтлар туташганда. -Қуриб кетсин! — деди у [жувон] йиғламсираб. — Ўқишинг бошингдан ордона қолсин, Мастон! А. Қаҳҳор, Мастон.*

ОРЗИҚМОҚ [асли **орзу қилмоқ**] Қаттиқ истамоқ, эришиш, етишиш истаги билан ёнмоқ; интизор, муштоқ бўлмоқ. *О, юрак, ёр келмай, орзиққанинг келмай туриб мунча ўртанмасанг! М. Исмоилий, Фарғона т.о. Ўз номи чақирилишини орзиқиб кутган Холмурод зипиллаб саҳна олдиға борди. П. Турсун, Ўқитувчи.*

Юраги (ёки кўнгли) орзиқмоқ Юраги дукилламоқ, юраги шув этиб кетмоқ (шодлик, кўрқув, ҳаяжон каби туйғулардан). *Балки, муҳаббат шудир? Бўлмаса, нега юрагим орзиқади. Шухрат, Шинелли йиллар.*

ОРЗУ [ф. آرزو — хоҳиш, интилиш; истак] Дилдаги истак; эзгу умид; интилиш. *Орзу қилмоқ. Орзуга етмоқ. Орзуга эришмоқ. Орзуга айб йўқ. Мақол. Ҳар ерни қилма орзу, ҳар ерда бор тош-тарозу! Мақол. ■ Умид орзу қилган турмуш сароб бўлиб қолаётганға ўхшарди. Мирмуҳсин, Умид.*

Орзуси ушалмоқ қ. ушалмоқ. Бола-чақаларнинг орзусига етинг Болаларни ўстирибундириб, уйлаб-жойлаб, тўй-томошаларини кўринг, бахтли-саодатли бўлишларига эришинг. [*Нусрат хола:*] *Бола-чақангизнинг орзусини кўринг, оталик қилдингиз. Ойдин, Эр юрак.*

ОРЗУ-АРМОН Дилдаги орзу ва армонлар. *Бирор киши, нима қилмоқчисан, қандай орзу-армонларинг бор, деб сўрагани, шу ҳам одам-ку, деб гапимга қулоқ солгани йўқ. А. Қаҳҳор, Кўшчинор чироқлари.*

ОРЗУ-ИСТАК айн. **орзу-армон.** *Қайта қуриш ва ошкоралик меваларини кўрмоқ ҳар бир виждонли кишининг орзу-истагидир. Газетадан.*

ОРЗУЛАМОҚ Орзу қилмоқ, муштоқ бўлмоқ, ҳаваси келмоқ. *Ёқимтой бўл ҳар ерда, Мактаб, кино, лагерда. Ҳар сўзингдан бол томсин, Кўрган орзулаб қолсин. Қ. Муҳаммадий.*

ОРЗУЛИ 1 Кўпдан бери орзу қилинган, орзиқиб кутилган; кўнгилдаги. *Орзули тўй.* ■ *Отабекнинг орзули келин олдиға кирмаслиги важдан Ўзбек ойим аччиғланди. А. Қодирий, Ўтган кунлар.*

2 Орзулар билан тўлиб-тошган. *Орзули дунё.*

ОРЗУМАНД [ф. آرزومند — истовчи, хоҳловчи, интилувчи; орзу қилувчи] Орзу қилувчи, истовчи; интизор, муштоқ. *У сени бир кўришга орзуманд. ■ Нусратбек машшоқларнинг бир-икки ашуласини эшитишга орзуманд эди. С. Нуров, Майсаларни аёз урмайди. -Сўхбатингизга орзуманд эдик, шошманг, марҳамат қилинг! — дастурхонга ишорат қилди Олимхон. Ойбек, Танланган асарлар.*

ОРЗУМАНДА [ф. آرزومنده] с.т. Орзуманд. [*Тўна хола:*] *Анорхон сиз билан гаплашгани орзуманда эди. И. Раҳим, Ҳаёт булоқлари. Урушга орзумандамисиз, мана бу бойвачча укангизни олиб жўнайверинг, йўл очиқ. Ойбек, Танланган асарлар.*

ОРЗУМАНДЛИК Орзумандга хос хусусият; муштоқлик. *Раим оқсоқол гапдан тўхтади, кўзларида ёнган орзумандлик бирдан ўчди. М. М. Дўст, Галатепега қайтиш.*

ОРЗУ-УМИД Дилдаги орзу ва умидлар, истаклар. *Икки ёшнинг орзу-умидлари, ғоялари бор. Ойбек, Нур қидириб.*

ОРЗУ-ХАЁЛ Истак, умид ва ўй-фикр. *Дангасанинг орзу-хаёли — чўкиб кетган хумча мисоли. Мақол.*

ОРЗУ-ЎЙ айн. **орзу-хаёл.** *Аллаларда онанинг руҳий дунёси, фарзандга бўлган муҳаббати, орзу-ўйлари акс этади. «Саодат».*

ОРЗУ-ҲАВАС 1 Дилдаги эзгу истак ва ниятлар. [*Ғулломжон*] *Қалбидаги тилак ва истакларни аввалги кунни дадил айтолмаган бўлса, эртасига ҳаммасини — бутун орзу-ҳавасини, севги ва сезгисини очиқ айтди. М. Исмоилий, Фарғона т.о.*

2 Орзули катта тўй-томошалар, тантанали маросимлар. -*Не-не орзу-ҳаваслар билан келин қилган эдим, — ҳасратини тўка бошлади энамиз, — кўнглимдагидай чиқмади. «Ёшлик». Ҳалиги мен айтган ўртоғимнинг ота-оналари.. орзу-ҳавас қидириб, бечора қизларини қаритиб қўйдилар!* А. Қодирий, Ўтган кунлар.

Орзу-ҳавас кўрмоқ Бола-чақаларини ўстириб-ундириб, уйлаб-жойлаб, барча тўй-маросимларини, қувончларини кўрмоқ. *Худога шукур, тўй кўрдим, чимилдиққа кирдим, орзу-ҳавас кўрдим.* И. Раҳим, Чин муҳаббат. *Биз бурун замонда шунча давлат билан бу хилда орзу-ҳавас кўрган эмасмиз.* А. Қаҳҳор, Йиллар.

ОРЗУ-ҲАВАСЛИ Орзу-ҳавас қиладиган; лабдабали тўй-маросимларни яхши кўрадиган ва уларни ўтказишга қурби етадиган. *Орзу-ҳавасли жойни қидирмасдан, қизларини бир кишига бериб қўя қолсалар, албатта, бу савдолар йўқ эди.* А. Қодирий, Ўтган кунлар.

ОРИГАМИ [яп.] Қоғоздан турли шакллар, буюмлар ясаш санъати. *Тошкентда Япониянинг оригами санъати бўйича дарслар бошланди.* Газетадан.

ОРИГИНАЛ I [лот. originalis — илк, дастлабки; асл, туғма; ўзига хос] **1** Асл нуса; бирор асар ёки нарсанинг бевосита муаллиф ёки ихтирочи томонидан яратилган нусхаси; асли. *Мақоланинг оригинали.* ■ [Ҳофиз] *Асарларининг оригинали билан таънишиша ҳам имкон бериш ниятида китоб форс ва ўзбек тилларида нашрга тайёрланди.* Ш. Шомухамедов, Ҳофиз.

2 Нашр, чоп этиш учун асос бўлиб хизмат қилган кўлёмза; кўпайтирилиш учун мўлжалланган тасвир, фотосурат ва ш.к.

3 Бошқа тилга таржима қилишга асос бўлган матн.

ОРИГИНАЛ II Бошқаларга ўхшамайдиган, ўзига хос; ажойиб. *Оригинал безаклар. Оригинал конструкция. Раққосанинг оригинал портрети.* ■ *Театримизнинг кадрдони, олим ва драматург Иззат Султон «Абдулла Қодирийнинг ўтган кунлари» деган оригинал асар ёзиб берди.* Газетадан.

ОРИЕНТАЦИЯ [фр. orientation — шарқ томон йўналиш < лот. orient, orientis — шарқ] **1** Дунё томонларига (шарқ, ғарб, шимол ва жанубга) нисбатан ўзининг тур-

ган жойини, қаердалигини аниқлаш, белгилаш (дастлаб — шарққа нисбатан аниқлаш). *Бир жойда туриб, горизонт томонларини топа билиш ориентация олиш деб аталади.* «География».

2 кўчма Ўз фаолиятида бирор кимса, нарса, маслак, йўналиш ва ш.к. га қараб иш тутиш.

ОРИЕНТИР [«ориентация» с. дан] Ҳаракат йўналишини, дунё томонларини, ўзи турган жойини аниқлашга ёрдам берадиган, яхши кўриниб турадиган ва қимирламайдиган нарсалар (мас., алоҳида дарахт, бино, тепалик); аниқлагич; кўрсаткич. *Радиооператор эфирга ориентир берар эди.* А. Мухтор, Қаноти синган орзу.

ОРИЙ I [лот. Aryan < юн. Ariana (Ариана) ва санскр. Арьяварта — мазкур номдаги қабилалар яшаган жой номи (ҳозирги Афғонистон худудига) санскритда «келгинди», «бегона», «хўжайин» маъноларида ҳам қўлланган] Ҳинд-европа, энг асосан ҳинд-эрон халқларининг умумий шартли номи.

ОРИЙ II [ф. اری — ҳа; шундай; ҳақиқатан] тасд. юкл., эск. кт. Ҳа шундоқ; рост; албатта, ҳақиқатан. *Орий, мирзам, камина бу бобда мақтанса арзийдур.* М. Осим, Сеҳрли сўз.

ОРИФ [а. عارف — билувчи, хабардор] **1** эск. кт. Илм билан ахлоқий етукликка эришган шахс, маърифатли, билимдон, доно. *Нодонлар илҳида ориф қисмати, Рухсиз сурат каби тебранар ҳаёт..* Ҳ. Асқар, Ёшлик.

2 Ориф (эркаклар исми).

ОРИФЛИК Орифга хос хусусият. *Маърузаларда мумтоз адабиётга доир мақолалар тўғрисида бирор жўяли фикр йўқлиги, танқидчилар ижодидида орифлик кам кўриниётганлиги алоҳида таъкидланади.* Газетадан.

ОРИЯТ [а. عاریت — бировдан вақтинча олинган нарса; қарзга берилган буюм] **1** Ор-номус; иззати нафс. *Ориятинг бўлса, сен ҳам далага чиқ, кучингни кетмонда кўрсат, мен сени мард билай.* С. Аҳмад, Кадрдон далалар. *Ёш эмасми, бирдан унинг орияти кўзгалди, Шартта пастаа тушиди у ҳам, У ҳам яёв йўл олди.* А. Орипов, Йиллар армони.

Орият талашмоқ Ор-номус талашмоқ, ўз иззати нафсини ҳимоя қилмоқ, обрўни қўлдан бермаслик, ўз обрўйига доғ туширмаслик учун курашмоқ.

2 Уят, шарм; ор. *Бойлар етимчани чўри қилишга ҳам орият қилади*. П. Турсун, Ўқигувчи.

Орият келмоқ Ор қилмоқ, уялмоқ.

3 *сфт. эск.* Асли ўзиники бўлмаган, бировдан вақтинча сўраб олинган. *Орият тўн.*

■ *Масалан, Саримсоқ, унга ерни ҳукумат берган. Орият ер.* А. Қаҳҳор, Сароб.

ОРИЯТЛИ Ор-номусни биладиган, ўз обрўйини қадрлайдиган; номусли. *Ориятли одам.* ■ *Акбарали ориятли одам! Қасд олмай қўймайди.* С. Аҳмад, Уфқ.

ОРИЯТМАНД айн. **ориятли.** *Мурод аканинг ориятманд одамларга ўхшаш, ўзи тўқиган тарихи йўқ.* М. М. Дўст, Галатепага қайтиш.

ОРИЯТНИШИН [*а. + ф. عاريت نشين* – вақтинча ўтирувчи, яшовчи] *кам қўлл. кт.* Бировнинг уй-жойида вақтинча истиқомат қилувчи; ижарачи. [*Маъсумхўжа*] *Ҳамма талабаларга, айниқса, қашшоқ ва ориятнишнларга хурмат аралаш муҳаббат билан салом берар ва меҳрибончилик билан ҳол-аҳвол сўрарди.* С. Айний, Эслалиқлар.

ОРИЯТСИЗ Ор-номусни билмайдиган, ўз обрўйини қадрламайдиган; номуссиз, ор-сиз. *Ориятсиз одам.*

ОРИЯТСИЗЛИК Ориятсиз кишиларга хос хатти-ҳаракат, қилиқ, иш. *Ориятсизлик қилмоқ.*

ОРИЯТЧАН Жуда ҳам ориятли, обрўйига доғ туширмасликка, гард юқтирмасликка қаттиқ тиришувчи; номусли.

ОРИЯТЧИ айн. **ориятчан.**

ОРИҚ Баданига эт битмаган; озгин, камгўшт. *Ориқ одам. Ориқ қўй. Ориқ отга чанг юқар.* Мақол. ■ *Пўстақда сўлжайиб ўтирган ориқ боланинг нурсиз кўзлари ҳали ўртадаги унда эди.* М. Исмоилий, Фарғона т.о.

Ориқ ер Ўсимликка керакли озиқ моддалари етишмайдиган, камҳосил ер. *Холбой минг йилдан бери устида мол боқиб келинган хирмонтепадан нуқул тупроқни келтириб, қақшаб ётган ориқ ерга солиниши кераклигини билиб олди.* К. Яшин, Ҳамза.

ОРИҚЛАМОҚ 1 Эти қочиб озгин тортмоқ; озмоқ. *Нусратбек холасининг ориқлаб, суяклари кўйлагини туртиб турган елкасида, косовдай қўлларига қараб, маънос тортиб кетди.* С. Нуоров, Майсаларни аёз урмайди.

2 Кучи, ҳосилдорлиги кетмоқ, камаймоқ. *Устига-устак, сурункасига пахта экил-*

ган ерлар ориқлаб, ҳосил камаяди, ҳар хил қурт-қумурсқа кўпаяди. С. Сиёев, Ёруғлик.

ОРИҚЛИК Озгинлик, камгўшлик; шундай хусусиятга эгалик. *Мол ориқликда билинади, йигит – ғарибликда.* Мақол. ■ *Баданнинг ташиқи кўриниши офатлари – ўтакетган семизлик ва ўтакетган ориқлик.* «Саодат».

ОРИҚ-ТИРИҚ Жуда ҳам ориқ, рамақижон. *Биздан сўнг яна учта-тўртта дўқондор кириб келади. Ориқ-тириқ, зиқна, кўпчилиги пасткаш одамлар.* Ойбек, Болалик. *Ем-хашак йўқ, бир пой ҳўкиз ориқ-тириқ.* Ф. Фулом.

ОРКЕСТР [*фр. orchestre* – театрдаги ўтириш жойи < юн. orchestra – рақс майдончаси; юнон театрида саҳнанинг олд майдончаси] 1 Мусиқа асарини биргаликда ижро этадиган турли хил чолғу асбоблари йиғиндиси ва шу асбобларни чалувчи мусиқачилар жамоаси. *Торли оркестр. Симфоник оркестр. Оркестр садоси.* ■ *Миллий чолғу асбоблари оркестри халқ куйларидан ижро этди, қизлар ўйин тушди.* Ҳ. Турсунқулов, Ҳаётим қиссаси.

2 Театр саҳнаси олдида мусиқачилар учун қилинган махсус жой.

ОРКЕСТРАНТ Оркестр чолғучиси; оркестр иштирокчиси. *Шу давр ичида ўқув даргоҳимизда 3 мингдан ортиқ юқори малакали пианиночилар, оркестрантлар ва халқ чолғулари ижрочилари тайёрланди.* Газетадан.

ОРЛАНМОҚ Ор-номус қилмоқ, уялмоқ; тортинмоқ, ўзига муносиб кўрмаслик. *Билмагани сўраб ўрганган олим, орланиб сўрамаган ўзига золим.* Мақол. ■ *-Мен шу чоққача, – деди Хушрўй, – бандасига бош эгишни ва бандаси олдида тавба қилишни ор билдим ва шу орланишим орқасида ҳар кимнинг устида юрдим.* А. Қодирий, Ўтган кунлар.

ОРЛИ айн. **ориятли.** *Орли одам.*

ОРНАМЕНТ [*лот. ornamentum* – безак, нақш < ornare – беза(т)моқ] Геометрик шакллар билан ўсимлик ёки ҳайвонлар оламидан олинган тасвирларни ритмик тартибда қўшиб, уйғунлаштириб ишланган бўёқли, ўйма ёки чизма нақш, безак.

ОРНИТОЛОГИЯ [*юн. ornis, ornithos* – қуш + logos – фан, таълимот] Қушларни ўрганувчи соҳа. *1884 йилда орнитология соҳасидаги илмий тадқиқотлар ва амалий*

ишларни мувофиқлаштириш мақсадида *Халқаро орнитологлар комитети тузилди.* «ЎЗМЭ».

ОР-НОМУС 1 Хижолат тортиш, уялиш туйғуси; уят, ор, номус. *Ор-номуси йўқ одам.* ■ *Муҳтожлик — инсон ор-номусига таъжовуз қилади, иродасини букади, чора ахтартиради.* «Ёшлик».

2 Кишини улуғлайдиган, унга нисбатан хурмат туғдирадиган иш, нарса ёки хислат-фазилат; шон-шараф. [*Сидиқ:*] *Муҳаббат севгани, ор-номусни товламачи бир савдогарга сотди, виждонни латта-путтага айирбош қилди.* Н. Сафаров, Ҳаёт мактаби.

ОР-НОМУСЛИ Ор ва номуси бор; ориятли, орли. *Ор-номусли одам.* ■ *Дунёда яхши умр сурдинг, ор-номусли, адолатли яшадинг.* Т. Обидов, Юсуфжон қизиқ.

ОРО [ф. *آرا* — безатувчи, зеб берувчи] *кт. 1 айн. оройиш.*

Оро бермоқ Зеб бермоқ, беэмамоқ; пардозламоқ. *Французлар дунёда хунук аёллар йўқ, фақат ўзига оро бермаган, парваришсиз аёлларгина бор, деб ҳисоблашади.* «Саодат». *Тўлган ойдек, тўлганиб, ул қомати зебо яна, Ўз жамолига бериб пардоз ила оро яна. Ҳабибий. Қир бағрига қўйин ёяр чўпонлари, Боғларига оро берар боғбонлари.* Я. Курбон.

2 Баъзи отларга қўшилиб, «безак, безовчи, қизитувчи, шодлик бағишловчи» каби маънолар беради, мас., *жаҳоноро, мажлисо, суҳбаторо.*

ОРОЙИШ [ф. *آرايش* — безак, зийнат; кийим-кечак; саф тортиш, тартиб] *кт.* Зеб, зийнат, пардоз, оро; чирой. *Яхши либос танга оройиш, Яхши йўлдош жонга осойиш.* Мақол. ■ *Борисов кийим-бошларини кўздан кечириб, ўзига оройиш берди-да, бигиз бўлиб уфққа санчилиб кетган йўлга қаради.* Шуҳрат, Шинелли йиллар.

ОРОЛ Атрофи, ҳамма томони океан, денгиз, дарё ёки қўл суви билан ўралган қуруқлик. *Сахалин ороли. Қрим ярим ороли.* ■ *Дала шийони кўм-кўк пахтазор ўртасида оролга ўхшаб туради.* Ш. Рашидов, Бўрондан кучли. *Филиппин оролларида яшовчи халқларнинг энг севимли, ноёб таоми митти балиқлардир.* К. Маҳмурдов, Қизикарли пазандалик.

ОРОЛАНМОҚ *поэт.* Безанмоқ, ясанмоқ; гўзаллашмоқ. *Яхши оролан, безан, э боғлар, мавсум учун.* «Гулистон».

ОРОМ [ф. *آرام* — тинчлик, хотиржамлик; дам олиш, ҳордик] *Жон-тан роҳати; дам олишдан, тинчликдан, осойишталикдан топиладиган роҳат, ҳузур. Ором бермоқ. Ором олмоқ.* ■ [*Навкарларнинг*] *Ҳайқирик ва сўкнишлари.. бева-бечораларнинг оромини бузар ва чўчитарди.* Ш. Тошматов, Эрк қуши. *Сув жилдираб оқар, унинг салқини кун бўйи иссиқдан пишган қизларга ором бағишларди.* С. Зуннунова, Гулхан.

Нафси ором олди Нафси қонди. *Асрор муздек сувдан симириб, нафси ором олди.* «Ёшлик». **Ороми бузилмоқ** Осойишталиги, тинчлигига халал етмоқ. *Нормўмин бўла бошлаганими биламан, уйдагаларнинг ороми бузилди.* М. М. Дўст, Лолазор.

2 Тинчлик, осойишталик. *Сокин тун оромини онанинг ноласи бузди: — Ёлғизимдан жудо қилдинглар-ку, қон қусгурлар.* Газетадан.

ОРОМБАХИШ [ф. *آرامبخش* — тинчлик, хотиржамлик бағишловчи] Ором берувчи; роҳат, ҳузур, осойишталик бағишловчи. *Оромбахш шабада.* ■ *Эй, қуёшли республикам, сен Шарқ машъали, Оромбахшир қучоқларинг, толи, наъвали.* Файратий. *Хонага баҳор ҳавосининг оромбахш нафаси кирди.* Газетадан.

ОРОМГОҲ [ф. *آرامگاه* — дахма, мақбара; дам, ором олиш хонаси] **1** Кишилар дам оладиган, роҳат қиладиган жой. *Раҳмага ҳамроҳ бўлиб келганларнинг кўпи йўлнинг нариги бетида — ёнғоқзордаги меҳмонлар учун қурилган оромгоҳда қолишди.* С. Аҳмад, Жимжитлик.

2 Мактаб ўқувчиларининг ёзги таътилда дам олиши учун қурилган жой. *«Соғлом авлод йили»да 26 мингдан зиёд ўғил-қизлар вилоятимиз ёзги оромгоҳларида дам олиб, янги куч-ғайрат тўладилар.* Газетадан. *Ёз фаслининг жазирамасида таътилни мазмунли ўтказишни истаган болажонларнинг аксарияти турли оромгоҳларга ошиқадилар.* Газетадан.

ОРОМИЖОН [ф. *آرامجان* — маҳбуб, маҳбуба; юпатувчи, тинчлантирувчи] **1** Танга ором берувчи. *Оромижон ичимлик хиллари тобора кўпайиб боряпти.* «Фан ва турмуш». *Муздек сувда яйраб-яшнаб қулоч отиш бир роҳатижон, ўзни офтобга тоблаб ётиш бир оромижон.* М. Мансуров, Ёмби.

2 кўчма Севикли ёр, маҳбуба. *Эй менинг нозик ниҳол, оромижоним, қайдасан, Бу кўн-*

гил бўстонида гунча даҳоним, қайдасан? Машраб.

ОРОМИЙЛАР Арабистон ярим оролидан чиққан ва милоддан аввалги 14–11-асрларда Фарбий Осиё бўйлаб тарқалган кўчманчи сомиё қабилалар.

ОРОМКУРСИ айн. кресло. Улар тушиликдан қайтиб, Одиловнинг бўлинмасидаги оромкурсиларга ўтирдилар. «Ёшлик». Жобу қишлоғида бир гуруҳ дугоналар Шўрчи мебель фабрикасининг чапдаст усталарини дол қолдириб, диван, оромкурси ясамоқдалар. Газетадан.

ОРОМЛАНМОҚ кам қўлл. Ором олмоқ, тинчланмоқ, роҳат қилмоқ.

ОРОМСИЗ Ороми йўқ, нотинч, беором. Оромсиз кунлар.

ОРОМСИЗЛИК Оромини йўқотган кишининг ҳолати; нотинчлик, беоромлик; бетоқатлик. Шу йўсин оромсизлик ва бесаранжомлик ичида унинг [Отабекнинг] ойкунлари ўтиб турар эди. А. Қодирий, Ўтган кунлар.

ОРСИЗ Беор, ориятсиз, ори йўқ. Орсиз одамдан қоч. Мақол.

ОРСИЗЛИК Орияти, ори йўқлик. Отанинг ўлими ҳақидаги машҳур сўзлар ғам-ғусса ёки дард-алам билан эмас, маст-аласт бақирчиққа кўшиб, орсизлик билан ўқилмоқда эди. А. Муҳтор, Кумуш тола.

ОРТ 1 Кимса ёки нарсанинг юз, бет, олд томонига тескари томон; орқа, кет. Ортга қарамоқ. Ортга тисарилмоқ. Ортда қолмоқ. Ортидан бормоқ. Юк машинанинг ортидаги прицеп. ■ Ёрмат бошини ортга, хотини томонга буриб, ўқрайди. Ойбек, Танланган асарлар.

2 Бирор нарсадан нариги томон; нариги, у ёқ. Девор ортида бир одам бор. ■ Қуёш олтин баркаш бўлиб, уфқ ортига яшириниши билан салқин тушади. Газетадан.

3 3-ш. эгалик ва ж.к., ў.-п. к. ва ч.к. қўшимчалари билан кўмакчи вазифасида қўлланади (қ. ортига, ортида, ортидан). Муаммони ҳал қилиш учун бу иш ортидан кўп югурди. Бормаган ташкилоти қолмади. Газетадан.

ОРТИГА айн. орқасига.

ОРТИДА айн. орқасида. Егани олдида, эмагани ортида қ. емоқ.

ОРТИДАН айн. орқасидан **3**. Ўринбой бир сўзни икки қилмай, хаёл суриб чиқиб кетди,

раис унинг ортидан илжайиб қолди. Ойдин, Юрагида ўти бор.

ОРТИЛМОҚ Ортмоқ II фл. мажх. н. Десант ортилган паром кўзгалганда, Днепр чайқалди. Н. Сафаров, Соҳиб чангал. Бу аризаларда Ўрмонжонга ортилмаган жиноят қолмаган. А. Қаҳҳор, Қўшчинор чироқлари.

ОРТИҚ 1 рвш. **1** Белгили миқдордан, меъёрдан зиёд; ошиқ, кўп. Йиғилишга юздан ортиқ киши келди. ■ Адолат касалхонада бир ойдан ортиқ ётди. С. Зуннунова, Гулхан. Элликдан ортиқ дурадгор фақат белкурагу кетмонга соп ясаш билан овора. С. Аҳмад, Уфқ. [Элликбоши] Дарров ҳовлини ўз баҳосидан анча ортиққа олибди. А. Қаҳҳор, Қўшчинор чироқлари.

Ортиғи билан 1) ошиғи билан, ошириб; белгиланган миқдордан ҳам кўпайтириб. Режа ортиғи билан бажарилди; **2)** кўп деганда, жуда борса, нари борса. Бу мақола, ортиғи билан, ўн бет бўлади.

2 Меъёридан ёки керагидан ошиқ, ҳаддан ташқари. Ортиқ даражада қайғурмоқ. Ҳаддан ортиқ кулмоқ. ■ Ҳар ҳолда, Тошкент аҳолиси Азизбек истибодидан ортиқ тўйди, кимдан кўмак сўрашни ҳам билмади! А. Қодирий, Ўтган кунлар.

3 (ч.к. билан, фақат қиёслашда) Зиёд, яхши, афзал. аъло. Унинг сендан ортиқ жойи йўқ. Сени жонимдан ортиқ севаман. Ақлдан ортиқ бойлик йўқ. Мақол. ■ Ўзингиз ҳам, келин ойим текканида, Фаффордан ортиқ эмасдингиз-ку! С. Зуннунова, Кўк чироқлар. Тегса арзийдирган йиғит. Бундан ортиғини топармидим, дедим, кўнгиел қўйдим. Ойдин, Садағанг бўлай, командир. -Зулм, хўрланиш, ҳақорат шунчалик бўлар, Қоратой ака! Бундан ортиғини каллам сиғдирмайди, — ғазабдан титраб гапирди Йўлчи. Ойбек, Танланган асарлар.

Ўлса ўлиги ортиқ Икки нарсани ўзаро қиёслашда қўлланадиган ибора: ҳатто ўлиги афзал, зиёд. Бир ҳисобда ҳар қадамда минг битта ваъда бериб, сал нарасага йиғлаб юрдиган йиғитлардан Шукруллонинг ўлса ўлиги ортиқ. «Ёшлик».

4 Кучли, зўр. [Холисхон:] Ҳақиқат: ишқ ўти ортиқ экан дўзах ўтиданким, Куйиб бағрим, кулим кўкларга совилганга йиғлайман. Ҳамза, Паранжи сирлари.

5 Бўлиб ўтгандан, кўрилгандан, кечирилгандан ташқари, ундан ошиқ. Ортиқ чора

йўқ эди. У, истар-истамас, Гулнордан воз кечди. Ойбек, Танланган асарлар. Бу тўғрида [Юсуфбек ҳожи ҳақида] ортиқ баҳс қилинмади ва сўз бошқа хусусларга ўтди. А. Қодирий, Ўтган кунлар. [Бадрий:] Мен бундай ҳақоратга ортиқ чидамайман! З. Саид, Н. Сафаров, Тарих тилга кирди.

6 Ортиқча, беҳуда, ўринсиз. Ёмоннинг бир қилиги ортиқ. Мақол. ■ Худо ўша қора кунни ҳам ортиқ кўриб, қаҳрига олди. М. Исмоилий, Фарғона т.о.

ОРТИҚ II 1 Баданда ёки бирор аъзода бўртиб, ўсиб чиққан жой (кўпинча туғма бўлади). Ўнг қоши устидаги кичкина ортиқ ҳам қуруқ қолмади, қоп-қора хол бўлиб, тиниқ юзда «мана мен» деб ўз рассомини қувонтирди. Ойдин, Кўнгил тўлдими, яхши йигит. У [раис] ҳар гал бизникига келганда, ортиғи бор дағал қўллари билан елкамга қоқиб, хафа бўлма, Наби.. дер эди. С. Аҳмад, Ойдин кечалар.

2 Ортиқ (эркаклар исми).

ОРТИҚЛИК Метёридан зиёдлик, кўплик; афзаллик. Иссиғим ортиқлигидан сув устига сув ичардим. М. Исмоилий, Фарғона т.о.

ОРТИҚЧА 1 Белгили микдордан ортиқ; кўп. Ортиқча пул. Ортиқча харажат.

2 Керагидан, йўл қўйилиши мумкин бўлганидан ортиқ, ҳаддан зиёд. -Мени ортиқча иззату икром қилиб, ноқулай аҳволга соляпсизлар, - деди Умид. Мирмуҳсин, Умид. Содда одам ортиқча хурсандчиликдан ҳам ўзини йўқотиб қўйса ажаб эмас. П. Турсун, Ўқитувчи. Эрининг бу сўзига Ўзбек оийм ортиқча қизишади, лаби-лабига тегмай бобиллаб беради. А. Қодирий, Ўтган кунлар. Бизники [томорқа] нормадан уч ҳисса ортиқча. Ойбек, О.в. шабадалар.

3 Кераксиз, фойдасиз. Ортиқча гап. ■ Назокатга болалари йўғида эрмак бўлган Назми кейинчалик ортиқча бўлиб қолди. Шухрат, Умр поғоналари. Қирқилган қулоғи теп-текис бўлиб кетган, бу унинг [Қўлмат қорининг] силлиқ калласига шундай ярашганки, соғ қулоғи худди ортиқчадай кўринарди. А. Мухтор, Опа-сингиллар. Ҳасанали эндиги ўтиришни ортиқча топиб, ўрнидан турди. А. Қодирий, Ўтган кунлар.

ОРТИҚЧАЛИК Керагидан, мумкин бўлганидан кўплик, ҳаддан зиёдлик; бефойдалик. Улар.. радио эшитиб қувнашса, жаҳонда нима кечаётганидан хабар топиб ту-

ришса, ортиқчалик қиладими? С. Анорбоев, Оқсой.

ОРТМАЧОҚЛАМОҚ шв. Ортмоқламоқ, кўтариб олмоқ. Кунларнинг бирида Мўтилла ўзидан катта велосипедни ортмачоқлаб, зинапоялардан юқорига чиқаётганда, ҳаддан зиёд толиб, кўзи тиниб, йиқилиб тушди. Мирмуҳсин, Қаҳрамоннома. Ниёзмурод катта-кон хумчани ортмачоқлаб, Бибигул кетидан Тошқудуқ томон жўнади. Мирмуҳсин, Чўри.

ОРТМОҚ I 1 Кўпаймоқ, ошмоқ. Меҳнатдан дўст ортар, гийбатдан - душман. Мақол.

2 кўчма Кучаймоқ, ошмоқ, ўсмоқ; мустаҳкамланмоқ. Инсониятнинг энергияга эҳтиёжи кун сайин ортиб бормоқда. «Фан ва турмуш». Отабек тўғрисидаги ташвиш боягидан ўн қайта ортган эди. А. Қодирий, Ўтган кунлар. Иссиқ тобора ортар, «ғир» этган шамол йўқ. Ойбек, Танланган асарлар.

3 кўчма Устига кўшилмоқ, юкланмоқ. Саримсоққа яна бир янги вазифа ортди. А. Қаҳҳор, Сароб.

4 Устун келмоқ, ошиб тушмоқ. Ўйинчининг санъати дафчиникидан, дафчиники ўйинчиникидан ортар эди. М. Исмоилий, Фарғона т.о.

5 Ошиб қолмоқ, ортиқча бўлиб қолмоқ. Бу ош ўн кишига етиб ортади. Харажатлардан беш сўм пул ортди.

6 Етиб ва ошиб қолиб тўпланмоқ. Қалай, нонвойликдан бир нима ортдими? Ойбек, Танланган асарлар.

7 Маълум бир чегара, микдор ёки меъёрдан ошмоқ, ўтмоқ. Уста Баҳромнинг юракбуруғ бўлганига ўн беш кунчадан ортибди. М. Исмоилий, Фарғона т.о.

ОРТМОҚ II 1 Юкни транспорт воситасининг устига ёки ичига жойламоқ, юкламоқ. Машинага кўмир ортмоқ. ■ Ўқ-дориларни отларга ортиб, қолганларини ўзимиз елкалаб олдик. И. Раҳим, Чин муҳаббат. Пахта ортган сон-саноқсиз карвонлар қатор. Файратий. Фақат ўз соҳасини билувчи одам худди бир томонига юк ортилган қайиққа ўхшайди. Шукрулло, Сайланма.

2 кўчма Зиммасига юкламоқ, бўйнига қўймоқ, тақмоқ. -Билсанг, - деди ҳожи, - менинг устимга мундоғ туҳмат ортишдан уял, бола! А. Қодирий, Ўтган кунлар.

[Бировга] оғирлигини ортмоқ қ. оғирлик **3**.

ОРТМОҚЛАМОҚ Орқасига олиб кўтармоқ; елкасига ортиб олмоқ. *Хотинлар ҳам, эркаклар ҳам болаларини ортмоқлаган, йўлга тушишига тайёр.* С. Нуоров, Дурдона. *-Сени қай фурсатда ортмоқлаб олганимни билмайсан-да, чувринди чопончада эдинг, оёқларингда эски калиш эди, — деди Яхшибоев.* М. М. Дўст, Лолазор. *Текиширув пайтида чет элдан ортмоқлаб келинган.. кийим-кечакларгина эмас, сохта тадбиркорнинг ўзи ҳам ҳужжатсиз эканлиги маълум бўлди.* Газетадан.

ОРТО-, ОРФО- [юн. orthos — тўғри, тўппа-тўғри] Байналмилал ўзлашма қўшма сўзларнинг биринчи қисми: бирор нарса-ҳодисанинг тўғрилигини, тиклигини, тўғридан-тўғри рўй беришини билдиради (Юнонча олд қўшимчанинг икки хил ўқилишидан икки хил вариантда ёзилади), мас.: *ортопедия, орфография.*

ОРТОДОНТИЯ [орто.. + юн. odus, odontos — тиш] Стоматологиянинг тишларнинг ногўғри жойлашиши ҳамда жағ-юз суякларининг деформациясини ўрганувчи, уларнинг олдини олиш ва даволаш усулларини ишлаб чиқувчи соҳаси.

ОРТ-ОЛД Орқа-олд.

Орт-олдини ўйламоқ кўчма Ҳар томонлама ўйламоқ; маълум нарсанинг натижасини олдиндан мўлжалламоқ. *Чўпон орти-олидини ўйлаб келган экан, пулни ҳамёнга солиб, хуржундан сур тери чиқарди.* М. М. Дўст, Галатепага қайтиш.

ОРТОПЕДИЯ [орто.. + юн. paideia — парвариш қилиш; ўқитиш-ўргатиш] Тиббиётнинг қўл, оёқ ва умуртқа поғонасининг туғма ёки кейин орттирилган касалликларини ўрганувчи, уларнинг олдини олиш ва даволаш усулларини ишлаб чиқувчи бўлими (травмотология билан биргаликда ягона мутахассислик ҳисобланади). *Тургунали ўтган сафар ортопедия институтига «оёғини янгилагани» борганда, пенсияга олган икки юз эллик сўмини Саттор номидан Мудофаа комитетига юборган экан.* А. Мухтор, Кумуш тола.

ОРТТИРМА: сифатларнинг орттирма даражаси тлш. Белгининг бошқа предметлардагига нисбатан ортқ эканлигини билдирувчи сифат шакли, мас., *энг яхши китоб. Фейлларнинг орттирма нисбати тлш.* Ишнинг бирор восита ёки бошқа шахс ор-

қали бажарилишини билдирадиган феъл шакллари, мас., *ёздирмоқ, ўқитмоқ.*

ОРТТИРМОҚ I I **Ортмоқ** I I-6 фл. орт. н. *Ихлосни орттирмоқ. Кувончини орттирмоқ. Шубҳани орттирмоқ.* ■ [Раис:] *Гўё кўринишида иш қиласиз, ҳақиқатда бошқаларга иш орттирасиз.* Н. Сафаров, Хадича Аҳророва. У [Саодатхон] *устаси Александр Михайловичнинг кўрсатмаларини кўнгилдагидан кўра ҳам орттириб бажарар.. эди.* Н. Сафаров, Уйғониш.

2 Тежаб-тергаб, иқтисод қилиб кўпайтирмоқ, оз-оздан йиғиб тўпламоқ. *Бир қанча танга орттириб қола билса, рўзғорга харжлайди.* Ойбек, Танланган асарлар. [Али] *Ўзининг бахтсизлигидан, топганини рўзғордан орттиролмай, шу кунгача уйланомай келишидан ҳасрат қилиб кетди.* А. Қодирий, Ўтган кунлар.

Дунё орттирмоқ Бойлик тўпламоқ. *Мен кимларнингдир молу мулкани талаб, дунё орттириб, донг таратиб, қадр-қиймат топдимми?* Шукрулло, Сайланма.

3 Топмоқ, эришмоқ, етишмоқ; эга бўлмоқ; қозонмоқ. *Обрў орттирмоқ. Хунар орттирмоқ.* ■ *Боисжон Эргашев армия сафида хизмат қила бошлаган йилнинг дастлабки ойидаёқ янги ихтисос орттириб олди.* Н. Сафаров, Янги ер. *Минг афсуслар бўлсинким, ким номимни эшитса, лаънатлади, лаънат орттирдим!* Шукрулло, Сайланма. *Бола-чақа орттириб, деярли Тошкентда тургун бўлиб қолаётганига қарамай, киндик қони тўкилган она тупроқ тортгани-тортган эди.* Ж. Абдуллахонов, Хонадон.

ОРТТИРМОҚ II **Ортмоқ** II фл. орт. н. *Вагонларга юк орттирмоқ.*

ОРТҚИ Кейинги, орқадаги. *Ортқи айшнинг ботганини эгаси эмас, от билар.* Мақол.

ОРФО-, ОРТО- [юн. orthos — тўғри] қ. **орто-, орфо-**.

ОРФОГРАФИК Орфографияга, имлога оид, тўғри ёзиш қоидалари билан боғлиқ бўлган, шунга хизмат қиладиган. *Орфографик луғат. Орфографик хатолар.*

ОРФОГРАФИЯ [орфо.. + юн. grapho — ёзман] Сўзларни тўғри ёзиш ҳақидаги қоидалар; имло. *Ўзбек орфографияси. Орфография қоидалари.*

ОРФОЭПИК Орфоэпияга, талаффузга доир, тўғри талаффуз қилиш билан боғлиқ

бўлган, шунга хизмат қиладиган. *Орфоэпик лугат.*

ОРФОЭПИЯ [орфо.. + юн. epos – нутқ, талаффуз] Сўзларни тўғри талаффуз қилиш ҳақидаги қоидалар; тўғри талаффуз.

2 Гилшуносликнинг шундай қоидалар тизими ишлаб чиқадиغان бўлими.

ОРҚА 1 Гавданинг қоринга нисбатан терс томони, бўйиндан думгазагача бўлган қисми. *Қўлни орқасига қилиб юрмоқ.* ■ *Мингбоши ерда ғужанак бўлиб ётган Матқовулнинг орқасига қамчини шилп эткизиб туширди.* М. Исмоилий, Фаргона т.о. *Сайдий эшикка орқасини бериб ўтирар эди.* А. Қаҳҳор, Сароб.

2 Нарсаларнинг терс ёқдаги қисми, юз, бет, олд томонига тескари томони, тескариси. *Суратнинг орқаси. Тешанинг орқаси.* ■ *Самандаров чироқнинг пилигини кўтарди, қаламнинг орқаси билан столни қоқиб, ғовурни босди.* А. Қаҳҳор, Қўшчинор чироқлари. *Чиннигул дарвоза тағиға етганда, орқасига қайрилиб қаради-ю, ичкарига кириб кетди.* С. Зуннунова, Қўк чироқ. *Она шу сўзларни айтиб, ўтирган еридан кафтларининг орқасини ерга тираб, турди.* Шухрат, Шинелли йиллар.

3 Нарса ёки кимсанинг юз, бет, олд томонига қарши томон; орт. *Орқага қарамоқ. Уйнинг орқа девори.* ■ *Шу онда орқасидан гуруллаб автомобиль келиб қолди.* А. Қаҳҳор, Каравот. *Йўлдош орқадан аста келиб, Элмуроднинг кўзини икки қўли билан бекитди.* Шухрат, Шинелли йиллар.

4 Ортда, кейинда жойлашган. *Велосипеднинг орқа ғилдираги. Тил орқа товушлари (грам.).*

5 Ортда қолган, ўтилган йўл; шахс ёки предмет чиқиб келган томон; ҳаракат йўналган томоннинг акси. [*Отабек*] *Эшик занжирига қўлини олиб боргани ҳолда ўйланиб тўхтади ва эшикни очмай, орқасига қайтди.* А. Қодирий, Ўтган кунлар. *Олға босиш, ҳар ҳолда, орқага қайтишдан хатарли эмас.* А. Қаҳҳор, Мастон.

Орқада қолмоқ Қолоқлик қилмоқ; бирор вазифани ўз вақтида бажармаслик. *Шалола қурилиши ҳозир энг орқада қолди.* С. Аҳмад, Уфқ.

6 *кўчма* Ҳомий, суянчиқ, тирак. *Тоғдан орқаси бўлганнинг тошдан юраги бўлар.* Мақол.

Орқа қилмоқ Бирор шахс ёрдамига, ҳимоясига, кучига ишонмоқ, унга таяниб иш тутмоқ. *Сени орқа қилиб, бунда юраман, Ортсиртингдан кўп ҳимоят қиламан.* «Алпомиш».

7 3-ш. эгалик ва ж.к., ў.-п.к. ва ч.к. қўшимчалари билан кўмакчи вазифасида ишлатилади (қ. **орқасига, орқасида, орқасидан**).

Орқага кетмоқ Таназулга юз тутмоқ, олға босишдан тўхтамоқ. [*Отабек:*] *Бизнинг кундан-кунга орқага кетишимизга ўзаро низойимиз сабаб бўлмақда.* А. Қодирий, Ўтган кунлар. **Орқага сурмоқ (ёки ташламоқ, силтамоқ)** Бирор ишни пайсалга солмоқ, кечиктирмоқ. *Бунинг ҳар иккиси ҳам колхозлаштириш ишини орқага суриши, хийлагина орқага суриши мумкин эди.* А. Қаҳҳор, Қўшчинор чироқлари. **Орқасидан гапирмоқ** Ўзи йўғида у ҳақда гапирмоқ; гийбат қилмоқ. *Дўст олдинда гапирар, Душман – орқандан.* Мақол. [**Бировнинг**] **орқасидан кесак (ёки тош) отмоқ** 1) иккинчи қайтиб келмаслигини тилаб лаънатламоқ; 2) кимсанинг орқасидан уни ёмонлаб гийбат қилмоқ. **Орқасидан кулмоқ** Ўзи йўғида масҳара қилмоқ, мазах қилмоқ. [*Гулнор:*] *Ойи, сиз сезасизми, бойникида орқамдан кулишади, гапиршади, пичинг, кесатиқ-месатиқ.* Ойбек, Танланган асарлар. **Орқасидан қувмоқ** Етишиш, эришиш пайига тушмоқ. **Оғирликни орқага ташламоқ** Қийинчиликларга парво қилмай, ўзини дадил тутмоқ, уларни дадиллик билан енғмоқ. [*Гуландон:*] *Укаларимни, дадамни севганимдан ҳар қандай оғирликни орқага ташладим.* Ойбек, Танланган асарлар. **Фронт орқаси ҳарб.** Мамлакатнинг жанг ҳаракатларидан йироқ ичкари қисми. **Юраги орқасига тортиб кетди қ. юрак.** *Шундай дейишга деди-ю, отанинг қаҳрли нигоҳини кўриб, юраги орқасига тортди.* «Ёшлик».

ОРҚАВОРАТДАН *рвш.* **1** Бировнинг орқасидан, ўзи йўғида; зимдан. *Унинг шондай мўйловига қараб, орқаворатдан Муҳиддин мўйлов деб атаймиз.* С. Абдуқаҳҳор, Санамай саккиз дема. *Улар [мардикорлар] Ёрматнинг кўз олдига унга қарши бир нима демасалар ҳам, орқаворатдан уни масҳаралашар, ҳатто сўқишар эди.* Ойбек, Танланган асарлар.

2 Бевосита эмас, балки биров орқали, бировлардан. *Бошқа безориларни орқаво-*

ратдан эшитиб юрардим-у, ана шу Шоқулни ўз кўзим билан кўрганман. М. М Дўст, Лолазор. - Сизни орқаворатдан сўраб-суриштириб, ўзим ҳам кузатиб келаман, — деди Фарида. «Ёшлик».

ОРҚАДОШ 1 Кўмакдош, кўмак, ёрдам берувчи; ўртоқ. Бўлурмиз биз бақувват орқадошлар, Қирар албатта ёвни жангчи ёшлар. Ҳабибий.

2 Ўсиб келаётган ёш авлод, кекса авлоднинг ўринбосари. Кекса отахон-онахонларимиз дунёдан ўтадилар. Ўрнига орқадошлар ўтирадилар. Газетадан.

ОРҚАЛАМОҚ Орқасига олиб кўтармоқ. Гуломжон орқалаб чиққан тошини энди ағдариб, қаддини ростлаган эди. М. Исмоилий, Фаргона т.о. Азизхон тугунларни орқалаб, олдинга тушиб йўл бошлади. С. Аҳмад, Уфқ.

ОРҚАЛАНМОҚ 1 Орқаламоқ фл. мажҳ. н. Орқаланган юкни ерга қўймоқ.

2 шв. Бировга орқа қилмоқ, суянмоқ, таянмоқ. Орқали орқаланиб сўзлар, орқасиз кўрқиб сўзлар. Мақол.

ОРҚАЛИ 1 кўм. (б.к. билан) **1** Бирор нарсанинг ичидан, орасидан, ўртасидан ёки устидан, бирор нарса оралаб, бир томондан иккинчи томонга. Боққа ҳовли орқали кирилади. ■ [Элмурод] Эртасига Красноводск орқали Тбилисига — ҳарбий хизматга жўнади. Шухрат, Шинелли йиллар. Халойиқ гуруллаб.. уч эшик орқали залга кирди. А. Қаҳҳор, Кўшчинор чироқлари.

2 Бирор кимса ёки нарса воситасида, ёрдамида, ёрдами билан. Телефон орқали гаплашмоқ. Хат орқали хабардор қилмоқ. ■ Ҳиндлар ҳам бошқа мамлакатлар билан асосан англиз тили орқали алоқа қилишади. Газетадан. Элмурод шу куни бир бола орқали Давлатёрни ўз ҳузурига чақирди. П. Турсун, Ўқитувчи.

3 Туфайли, сабабли. [Юсуфбек ҳожи] Сен билан ифтихор қилмасак-да, сен орқали хижолат чекмасимизга ишондик. А. Қодирий, Ўтган кунлар. Мен ҳали ёш боламан, Кўп жойни кўраганим йўқ. Лекин китоб орқали Билдим талай йўл-йўриқ. Қ. Муҳаммадий. Битта сиёҳдон орқали шунча гапларни топиб айтиш менинг хаёлимга келмаган эди. Шукрулло, Сайланма.

ОРҚАЛИ II Орқаси, суянчиги, ҳомийси бор. Орқали орқаланиб сўзлар, орқасиз кўрқиб сўзлар. Мақол.

ОРҚАМА-КЕТИН рвш. Бири орқасидан иккинчиси, бирин-кетин, кетма-кет. Орқамакетин бормоқ.

ОРҚАМА-ОРҚА рвш. **1** Бири орқасидан иккинчиси; кетма-кет, изма-из. Маъмуржон улар [Райҳонбиби ва Ойпошшалар] билан орқамакетинга ЗАГСга кириб келди. П. Турсун, Ўқитувчи.

2 Қаторасига, узлуксиз. Орқамакетин узмоқ.

ОРҚА-ОЎД айн. олд-орқа. Онахон орқалдига қараб олди. А. Мухтор, Опа-сингиллар.

Орқа-олдини ўнглаб олмоқ айн. орқа-ўнгини олмоқ қ. орқа-ўнг. Бу кунларда халққа ўттиз икки қора пул солиш ҳам оғир. Юрт беш-ўн кун орқа-олдини ўнглаб олсин. А. Қодирий, Ўтган кунлар. Гапнинг орқа-олдига қарамай Ўйламай-нетмай гапириш ҳақида. Азизхон гапнинг орқа-олдига қарамай айтиб юбораверарди. С. Аҳмад, Уфқ.

ОРҚАСИГА Орқа томонига, кетига, ортига. Ой булут орқасига яширинди.

ОРҚАСИДА кўм. вzf. **1** Оқибат(и)да, натижа(си)да. Гулнор бошидан кечган даҳшатли воқеалар орқасида оёқларида заррача мадор сезмас эди. Ойбек, Танланган асарлар. Кечанинг ўта қоронғуси орқасида лойхонада киши бўлганлигини пайқаш қийин эди. А. Қодирий, Ўтган кунлар.

2 Туфайли, сабабли; шарофати билан. Тирикчилигимиз шу боғ орқасида бир нав ўтиб турарди. Ойбек, Танланган асарлар. [Хонзода:] Ғофиржоннинг ошиғи олчи! Хотини орқасида бой бўляпти? Ҳамза, Бой ила хизматчи.

ОРҚАСИДАН кўм. вzf. **1** Нариги, орқа томондан. Булутлар орқасидан ой кўринди.

2 Кетидан, кейинидан. Бировнинг орқасидан эргашмоқ. Шўрва орқасидан ош келди. Кун орқасидан кун ўтади. Қайгу орқасидан шодлик келади. ■ [Ўрмонжон Сиддиқжонга:] Меҳмонларни бизникига олиб бор, мен орқаларингдан етиб бораман. А. Қаҳҳор, Кўшчинор чироқлари.

3 Кетидан, изидан. Мен йигитнинг орқасидан кузатиб бордим. Ғайратий, Унутилмас кунлар.

4 Туфайли, сабабли. Ўтган йиллар мобайнида ғишт орқасидан қанча даромад қилгансиз? С. Аҳмад, Юлдуз.

ОРҚА-ЎНГ айн. олд-орқа. Орқа-ўнгига қарамоқ. ■ Унинг [Кумушининг] нафис қора сочлари орқа-ўнгига тўзғиб, ажиб бир манзара бердилар. А. Қодирий, Ўтган кунлар. Кителени елкасига ташлаб, зум ўтмай чиқди-да, орқа-ўнгига қарамай, кўчага отилди. С. Аҳмад, Уфқ.

Орқа-ўнгини олмоқ Ўзини, хўжалигини ўнглаб, тиклаб олмоқ; нафасини ростламоқ.

ОСЕТИН қ. осетинлар. Осетин тили. Осетин аёл.

ОСЕТИНЛАР Россия Федерацияси ва Грузияда яшовчи халқ; осетин халқи.

ОСЁТР [р.] Йирик ов балиғи; бакрабалиқ.

ОСИЙ [а. عاصى — исён қилувчи, итоатсиз, гуноҳкор] **1** айн. гуноҳкор **1**. Осий банда. ■ Кимда-ким худонинг осий бандаси.. бетавфиқ Аваз Ўтар ўғлининг дўконига оёқ босса, соч-соқол олдирса, имони куйга-ай! С. Сиеёв, Аваз.

2 эск. кт. Гуноҳкор, айбли. [Отабек Кумуш қаршисида] Осийлар каби кўзини ерга тикди. А. Қодирий, Ўтган кунлар.

3 эск. кт. айн. исёнкор. Оналар йиғлади ҳасратли, маҳзун, Осийлар ё дорга кетди, ё сургун. М. Шайхзода.

ОСИЙЛИК Осийга хос хусусиятларга эгаллик; итоатсизлик, гуноҳкорлик. -Тангри ҳикмати, ўғлим, осийлик қилма! — Топган сўзи шугина эди мазлумнинг. Миртемир, Асарлар.

ОСИЛМОҚ 1 Осмоқ 1 фл. ўзл.н.

2 Осмоқ 2, 3, 4 фл. маж. н. Дарахтларга осилган катта лампалар кўзни қамаштиради. Ойбек, Танланган асарлар. Камарда кумуш соғли қилич осилиб турарди. М. Исмоилий, Фарғона т.о.

3 Ўз оғирлиги билан эгилиб ёки солиниб турмоқ. Анор дарахтларида анор шигил, чойнакдай-чойнакдай бўлиб осилиб ётибди. А. Қаҳҳор, Анор.

4 Бирор кимса ёки нарсага маҳкам ёпишиб, чирмашиб, ўз оғирлигини ортмоқ. Уйғониб кетган Мақсуда ҳам дадасининг бўйнига осилиб, севинганидан дағ-дағ титрарди. С. Зуннунова, Олов. Қори қийқириб, унинг [Сиддиқжоннинг] елкасига осилди. А. Қаҳҳор, Қўшчинор чироқлари. Раҳим бўлса Қудратлар келган машинага анча ергача осилиб борди. Ҳ. Назир, Сўнмас чақмоқлар.

5 Осмоқ 4 фл. ўзл. ва мажж. н. Бир четга иккита дошқозон осилган. «Шарқ юлдузи». Она тепасига қумғон осилган омонат ўчоққа ўт қалади. Т. Ашуров, Оқ от.

6 кўчма с.т. Хиралик билан бирор нарса сўраб ёпишиб олмоқ. -Жон ўртоқ, ҳозир олиб бор касалхонага! — деб [Валивой] унга [Жўрага] осилди. Ҳ. Назир, Онаизор.

7 Шилқимлик билан бировга ёпишмоқ. Сен тикка Раҳмонбердининг уйига бориб, хотинига осилибсан. А. Қаҳҳор, Сароб.

8 кўчма салб. Бировни ҳадеб айблай-вермоқ, бировга айб тақамоқ. [Содик:] Ҳой, менга осилма! Хафа қиламан!. Н. Сафаров, Уйғониш. Ўша пайтларда матбуотда чиқиш қилган амалдор борки, ўзбек халқига осилди. «Фан ва турмуш».

ҚОВОҒИ (ёки қош-қовоғи, димоғи) осилмоқ Хафа ёки норози бўлиб ўшшаймоқ. Чолнинг қовоқ-димоғи осилиб кетди. С. Аҳмад, Юлдуз.

ОСИЛТИРМОҚ 1 Осилмоқ фл. орт. н.

2 Пастга солинтирмоқ, қуйи солмоқ, эг-моқ. Оёқларини осилтириб ўтирмоқ. Қўлларини осилтирмоқ. Бошини осилтирмоқ. ■ Шайх калласини осилтириб, бир нимани пи-чирлаб ўтирди-да, юзига фотоҳа тортиб, ўрнидан турди. С. Сиеёв, Аваз.

ОСИҚ Осиб қўйилган, осилган. Янги типда қурилаётган молхона ёнидан чапга бурилганда, лунжи осиқ каттакон сариқ итга қараб, баъзи бир шумроқлар қўлларини чиқариб, ол, ҳа ол, дея кулиб қийқиришарди. Н. Аминов, Қаҳқаҳа.

ОСИҒЛИҚ 1 Осиб қўйилган, осилган ҳолдаги; осилган ҳолда. Эшикдан кираверишда ўнг қўлда эркак кишининг костюми осиглиқ турибди. С. Зуннунова, Гулхан. Бобоқул ота ўзининг темир ҳассаси билан йўғон тут дарахтига осиглиқ чўян зангни чалмоқда. Ҳ. Назир, Сўнмас чақмоқлар. -Бўронбек Арслонбеков, — деди у елкасига осиглиқ чарм сумкасини очаркан. Ҳ. Фулом, Машғал.

2 Бириктирилган, тиркалган. Сўнги вагон орқасига осиглиқ қизил фонаргина яна бир неча дақиқа кўриниб турди. Ҳ. Фулом, Феруза. Прицеп осиглиқ машиналар тўхтовсиз қатнарди. Газетадан.

ОСКОЛКА [р. осколок — парча; бирор нарсадан узилиб, парчаланиб ажралган қисм] Замбарак ўқи, мина, бомба ва ш.к.нинг портлашидан пайдо бўлган металл

парча. -*Душман бомбаси шундай блиндаж устига тушиди. Уч-тўрт жойимга осколка тегди, — деди раис. Ў. Умарбеков, Севгим, севгимим. Куз келди дегунча оёғимнинг осколка урган жойи зирқираб, жонимни суғуриб оламан дейди. С. Аҳмад, Жимжитлик.*

ОСМА Осиб қўйиладиган, осиб қўйиш учун мослаштириб ясалган; осиб қўйилган. *Осма чироқ. Осма календарь. Осма кўприк. Осма культиватор. Осма соат. ■ Фуломжон баландда кесиб ўтган темир йўл осма кўпригига етмай, бир табақали кичик эшикни очиб, ичкари кирди. М. Исмоилий, Фарғона т.о. У ўрнидан турганида, девордаги осма соатнинг мили иккини кўрсатиб турарди. С. Зунунова, Олов.*

ОСМАДЎЗИ махс. Аёлларнинг тиллақошга ўхшаш, бошга тақиладиган зийнат буюми. *Ҳалигина гулхан атрофида одам тирбанд, қизлар кўксиди осмадўзи, йигитлар қўлида қўш қайроқ, даврада гоҳ чирпирак бўлиб, гоҳ эшилиб айланишар, тўйхонани қийқириқ тутган эди. А. Мухтор, Кумуш тола.*

ОСМИЙ [юн. *osme* — ҳид, ис, бўй] Менделеев даврий системасининг VIII гуруҳига мансуб кимёвий элемент, кўкимтир — кул ранг қаттиқ, ўта оғир металл.

ОСМОН [ф. *آسمان* — кўк, само, фалак] **1** Ер устида гумбаз шаклида кўриниб турган мовий фазо; само, фалак, кўк. *Осмон гумбази. Осмонни булут қоплади. Осмон узоқ, ер қаттиқ. Мақол. Туяни шамол учирса, эчкини осмонда кўр. Мақол. ■ Тиниқ осмонда юлдузлар чарақлаб турибди. И. Раҳим, Чин муҳаббат. [Бой Жамилага:] Менинг олтинларим шундай.. улуғ бир ҳокимки, ерга кирсанг — қулоғингдан, осмонга чиқсанг — оёғингдан тортиб, менинг қўйнимга олмадай қилиб солиб қўяди! Ҳамза, Бой ила хизматчи.*

2 Ер атрофини ўраб олган олам фазоси (астрономик жисмлар макони). *Юлдузлар осмони. Осмон механикаси.*

3 Баланд, тепа, юқори. *Осмонга отган тошинг Қайтиб тушиб, ёрар бошинг. Мақол.*

4 кўчма Юқори, баланд, қиммат. *Нима учун шундай пишиқчилик пайтида меваларнинг нархи осмонда? Газетадан.*

5 кўчма с.т. Жуда баланд, етиб бўлмайдиган даражада юқори. *Варрак осмонга чиқиб кетди. -[Ёқут] Ҳали ҳам осмонда, — деди Ҳамро Кароматга. Х. Раҳим, Чин ҳаёт.*

Боши осмонда Хурсанд, шод. *Шу боисдан қўлим кўксимда, бошим осмонда! Газетадан.*
Дуди осмонга чиқмоқ айн. фиғони осмонга чиқмоқ қ. фиғон. *Мана шу ерда мингошининг дуди осмонга чиқди. М. Исмоилий, Фарғона т.о. Ер билан осмонча фарқи бор Жуда катта фарқи бор. Оёғини осмондан келтирмоқ қ. оёқ. Осмонга устун бўлармидинг айн. дунёга устун бўлармидинг қ. дунё. Нима бўлади, осмонга устун бўладими? — деди Ашур Мирзо очик бир киноя билан. М. Исмоилий, Фарғона т.о. Осмонда юрмоқ Ўзини катта фаҳмлаб, кеккайиб юрмоқ, ҳеч кимни менсимаслик. Осмондан келмоқ Жуда баланддан келмоқ, ўзини баланд олиб, мағрурланиб гапирмоқ. Холиқов гоҳо баралла қаҳқаҳлайди, баъзан «Мен ундай қилдим, мен бундай қилдим, қотирдим, дўндирдим», деб осмондан келади. А. Муҳиддин, Чап чўнтак. Осмондан олиб гапирмоқ Тахминан гапирмоқ; омилсиз, асоссиз гапирмоқ. Осмондан осилиб (ёки оёғини узатиб) тушган кесат. Ҳаммадан юқори, улуғ. Ҳа, мунча! Хотинингиз осмондан тушибдими? Биз ҳам одам боласи, турибмиз. А. Қаҳҳор, Қўшчинон чироқлари.*

ОСМОНИЙ [ф. *آسمانى* — осмонга, самога алоқадор; осмон рангли, мовий] кт. **1** Осмонга доир, осмондаги, осмонда бўладиган. *Осмоний жисмлар.*

2 Мовий, кўк. *Осмоний ранг. ■ Ёргинам рўмол юборди осмони(й), Учига тугиб юборди ўсмани. Ўсмаси хароб экан, ҳеч тутмади, Вавдаси ёлғон экан, бир келмади. «Халқ дурдоналари».*

3 Мавҳум, шунчаки. *Халқ, жамоат деган тушунчалар осмоний тушунчалар эмас, реал, ҳаракатдаги тирик одамлар бирлигини англатувчи атамалардир. «Саодат».*

ОСМОНЛАМОҚ Осмонга кўтарилмоқ, ердан баланд кўтарилмоқ. *Бургут осмонлаб учди. ■ Қалдирғочлар баланд-баланд, осмонлаб учса, ҳаво қуруқ келади. Газетадан.*

ОСМОНЎПАР Жуда баланд, осмонга етгудек баланд кўтарилган. *Осмонўпар бинолар. ■ Аён бўлдики, олти миллион тоннали осмонўпар «оқ олтин» тоғлари Ошнинг олтмиш ёшига совға экан. М. М. Дўст, Лолазор. Мана, қадрдон Кавказ! Унинг осмонўпар тоғлари беҳисоб лолалар ичида кўмилиб кетган. Н. Ғойибов, Айланма кинопанорама. Бугунги сайёҳ, миллатимизга мос бетакрор маъмурий мажмуалар, осмонўпар қошо-*

налар, сайилгоҳлардан бир олам завқ олади. Газетадан.

ОСМОҚ 1 Бўйнидан сиртмоққа илиб ўлдирмоқ. *Дорга осмоқ.* ■ [Азизбек] *Хазина ҳисобини олиш учун келган девонбекларни ўлдириб, ўрда дарвозасига осди.* А. Қодирий, Ўтган кунлар. [Зуннунхўжа:] *Уйимга ўт қўяман! Узимни осаман! Ўғлим, жон ўғлим, мен сизни шу умид билан ўғлим деганмидим.* А. Қаҳҳор, Кўшчинор чироқлари.

2 Маҳкамлаб, миҳлаб ёки илиб осилтириб қўймоқ. *Деворга соат осмоқ. Дорга гилам осмоқ. Қозиққа сочиқ осмоқ. Арчага ўйинчоқ ва лампочкалар осдик. Қўйни ҳам ўз оёғидан осадилар, эчкини ҳам ўз оёғидан осадилар.* Мақол.

3 Бел, бўйин ёки елкага илиб кўтариб юрмоқ, тақмоқ. *Белга қилич осмоқ.* ■ *Йигитлар милтиқларини пайпаслаб топиб, елкага осдилар ва кўчага отилдилар.* Ойбек, Кўёш қораймас.

4 Тақмоқ, илмоқ. *Қулоққа сирға осмоқ.* ■ *Нури олтин занжирни бўйнига осди, соат, кўкрагидан пастроқда юлдуздай ярқиради.* Ойбек, Танланган асарлар. *Бўйнига осиб лола, Келди шу гўзал кўклай.* Файратий.

5 махс. Ўрнатмоқ, жойлаштирмоқ; илмоқ. *Тракторга культиватор осмоқ. Қозон осмоқ.*

Қулоқ осмоқ айн. **қулоқ солмоқ** қ. **қулоқ I 1.** *Норқул маҳаллада истиқомат қилувчи баобру кишиларнинг фикрларига ҳам қулоқ осмади.* Газетадан. **Қовоқ осмоқ** айн. **қовоқ солмоқ** қ. **қовоқ II.** *Ошино Яхшибоевнинг гапини эшитди-ю, қовоқ-тумишугини осди.* М. М. Дўст, Лолазор.

ОСОЙИШ [ф. *أسایش* — тинчлик, хотиржамлик; ором, ҳордиқ, бўш вақт] **1** кт. Тинч, уруш-жанжалдан, ғавғо-ташвишдан холилиқ; тинчлик, хотиржамлик, тиним. *Бировнинг осойишини бузмоқ.* ■ *Осойиш замондан қалбингда ғурур, Ватанинг, диёринг муборак бўлсин!* А. Орипов, Йиллар армони. *Дунё ҳамон осойиш, чароғону чиройли — қараб ҳеч тўймайсан.* М. М. Дўст, Лолазор. *Юсуфбек ҳожи элнинг осойиши ва мамлакатнинг ободлиги номига бу таклифни бўйнига олди.* А. Қодирий, Ўтган кунлар.

Кўнгли осойиш топмоқ Тинчланмоқ, хотиржам бўлмоқ. *Кейинроқ ўликни ҳамқишлоқлари олиб кетганини эшитиб, кўнгли сал осойиш топди.* М. М. Дўст, Галатепа қис-

салари. Аммо [Элмуроднинг] *кўнгли осойиш топмади.* Шухрат, Шинелли йиллар.

ОСОЙИШТА [ф. *أسایشته* — тинч, хотиржам; беғам] **1** Уруш-жанжалдан, ғавғо-ташвишдан холи; тинч, бежавотир, хотиржам. *Осойишта шаҳар. Юрт осойишта. Осойишта яшамоқ.* ■ *Шундай пайтда кишининг бу хилда осойишта ва ҳатто хотиржам бўлишини тасаввур қилиш қийин эди.* А. Қаҳҳор, Олтин юлдуз. *Гўзал манзара руҳимизни бардам, асабларимизни осойишта қилади.* «Саодат».

2 Ҳаяжондан, изтиробдан холи; беташвиш. *Бу қоматни [Фотимани] кўриши биланоқ Элмуроднинг осойишта қалбида нимадир кўзгалди.* П. Турсун, Ўқитувчи.

3 Хотиржам, бамайлихотир, босиқ. *Осойишта сўхбат.* ■ *-Кимсан ўзинг? Мадамин? — деди Абдурашул анча осойишта товуш билан.* П. Турсун, Ўқитувчи. *Сергей ўрнидан туриб, олдинги стулнинг суянчигига қўлини қўйдида, осойишта гапира бошлади.* П. Қодиоров, Уч илдиш.

4 Сокин, ҳаракатсиз. *Денгиз осойишта дам олмоқда.* ■ *Чанг аралаш тутун ҳалқа-ҳалқа бўлиб, кўкка, осойишта бўшлиққа интилар эди.* Шухрат, Шинелли йиллар.

ОСОЙИШТАЛИК Тинчлик, хотиржамлик, осойиш; беташвишлик. [Оилада] *Осойишталик бузилди ва бунга сабаб, кампирнинг гумонича, Сиддиқжоннинг онаси эди.* А. Қаҳҳор, Кўшчинор чироқлари. *Ғузурда осойишталик йўқолди. Унинг кичкина ва тор кўчаларида ярим кечагача отларнинг дупури тинмади.* Ш. Тошматов, Эрк қуши. *Ҳамма осойишталик билан экин-тикинга қаради.* М. Муҳамедов, Машқ.

ОСОН [ф. *آسان* — енгил, жўн; қийин эмас; содда] **1** Ечилиши, бажарилиши жиҳатдан унча қийин, мураккаб бўлмаган, унча кўп меҳнат, куч ёки билим талаб қилмайдиган, содда. *Осон масала. Осон вазифа. Осон иш.* ■ *Бу ёқнинг тоши у ёқники сингари қаттиқ, яхлит эмас, жуда бўш, гўраша эди. Шунинг учун тошлар осон кўчиб, осон йиқилади.* М. Исмоилий, Фарғона т.о.

2 Қийин эмас; жўн, енгил. *Тилангандан тилинган осон.* Мақол. *Касалнинг келиши осон, кетиши қийин.* Мақол. ■ *Гипертония хасталиги кишининг карлиги оқибатида ҳам келиб чиқиши мумкин бўлиб, касалликнинг бу тури анча осон ўтади.* «Саодат».

Мушкули осон бўлмоқ Қийинчиликдан қутулмоқ. Унинг [Сидиқжоннинг] бутун мушкули осон бўлгандай, қувониб кетди. А. Қаҳҳор, Қўшчинор чироқлари. **Мушкулини осон қилмоқ** Қийинчиликларини бартараф қилмоқ, оғир аҳволдан қутқармоқ. Бу кунларда унинг мушкулини осон қилган киши Нозимнинг онасининг йўқлигини билдирмай, бағрини тўлатган Нина Ивановна билан синглиси Нигора бўлди. С. Зуннунова, Олов. **Осон кўчмоқ айн. енгил кўчмоқ қ. енгил.** Қани энди, сенга ўхшаш қизлар врач, ҳамширалар бўлса.. касалларни даволаш ҳам осон кўчарди. Ш. Рашидов, Қудратли тўлқин. **Осон қилмоқ** Осонлаштирмоқ, енгиллаштирмоқ.

ОСОНЛАШМОҚ Осон бўлиб қолмоқ; соддалашмоқ, енгиллашмоқ. [Саидий] Мағлубиятга учраса, Аббосхоннинг иши қанча осонлашар эди. А. Қаҳҳор, Сароб. Ўзингиз айтсангиз, суд пайтида ишингиз осонлашади. С. Аҳмад, Юлдуз.

ОСОНЛАШТИРМОҚ Осонлашмоқ фл. орт. н. Машиналар деҳқончилик ишларини осонлаштирди. ■ Яхши кайфият инсонлар қалбига йўл топшини осонлаштиради. Газетадан.

ОСОНЛИК Осон хусусиятга эгалик; осон бўлишлик. Ишнинг осонлиги. ■ Гулсум осонлик билан ҳарфларни ўрганибди. П. Турсун, Ўқитувчи. Чамаси, Азизбек осонлик билан жон берадиган кўринмайди. А. Қодирий, Ўтган кунлар.

ОСОНЛИКЧА рвш. 1 Осонлик билан, кўп куч, меҳнат сарфламасдан; осонгина, жўнгина, бемашаққат. Ютуқлар осонликча қўлга кирмади. ■ Бу муаммо осонликча битадиган иш эмасди. «Ёшлик». Фуломқодирнинг ашуласини жуда соғиниб қолдик. Бир-икки ашула қилиб бермаса, биздан осонликча қутулмайди. М. Исмоилий, Фарғона т.о.

2 Қаршилик кўрсатмай-нетмай. Холқўзи Зумрадни билади. У осонликча жон берадиган аёллардан эмас. С. Сиёев, Отлиқ аёл. Бизнинг қишлоқда катта ер эгалари осонликча жон бергани йўқ. А. Қаҳҳор, Қўшчинор чироқлари.

ОСОР [اثر — آثار (из, қолдиқ, белги; ривоят; қадимият ёдгорлиги; таъсир) с. нинг. кўпл.] эск. кт. Асар, белги, нишона. Бу овоз ва бу оҳанг шунчалар қадимийки, не-не гўзал аёллару саодатманд эрларнинг безавол орзуларидан жонсиз бир осор. М. М. Дўст, Гала-

тепага қайтиш. *Ким билурди одаму олам на-дур, ҳайвон нечук? Бўлмаса эрди агар инсонда бу осори илм.* Ҳамза.

Осори атиқа [a. + ф. آثار عتيقه — қадимий, антик ёдгорликлар] Қадим дунё нишонлари, қадимдан, антик дунёдан қолган ёдгорликлар, обидалар. *Ўрта Осиё осори атиқалари.* ■ *Хива, Бухоро, Самарқанд каби қадимий шаҳарларимиз, асрий осори атиқалар, улуғлар қадамжоларини олиб кўрайлик, ахир, уларнинг ҳар бирини бино этиш учун не-не заҳмат чекилмаган.* Газетадан. Уларни кўриб, Самарқанднинг маҳобатли осори атиқаларини куриш нияти янада ортди. Газетадан.

ОССУАРИЙ [лот. ossuarium — мархум суяги сақланадиган идиш < os, ossis — суяк] қ. **остадон.**

ОСТ 1 Нарсанинг таг қисми, таги, туби. *Қурбон ота энгашиб, самоварнинг остига сим тикаётган эди, қаддини ростлаб, Сидиқжонга қаради.* А. Қаҳҳор, Қўшчинор чироқлари.

2 Нарсанинг қуйи қисмига, тагига яқин жой. *Гулнор дераза остига кўрпача солиб, қизни ўтқазди.* Ойбек, Танланган асарлар.

3 Нарсанинг яқин атрофи, тевараги. *Йўлчи, қулоқлари остида ўқ узилиб тураркан, томирларида жўшқин куч, юрагида юксак ҳисларнинг, орзуларнинг бўронини сезди.* Ойбек, Танланган асарлар. *Она боққа этиб келганда, Турсунбой кўчатлар остини юмшатаётган эди.* Т. Ашуров, Оқ от.

4 Нарсалар эгаллаб, босиб ёки қоплаб турган жой, нарсанинг тагидаги жой, таг. *Дарахтларнинг ости салқин эди.*

5 Нарсанинг ички қисми, ичи, ораси, қаъри. *Ер ости суви. Ер ости бойликлари.* ■ *Бегойим ер остида илон қимирласа, биладиган қув хотин.* М. Исмоилий, Фарғона т.о. *Уни [тоғни] ер ости зилзилалари ҳам халқ овозидек титратмаган эди.* М. Исмоилий, Фарғона т.о.

6 Таг, туб (сув ҳавзаларида). *Денгиз ости.* ■ *Кўп одамлар бу дарёнинг остида ер тишлади.* Ойбек, Танланган асарлар.

7 3-ш. эгалик ва ж.к., ў-п. к. ва ч.к. қўшимчалари билан кўмакчи вазифасида қўлланади (қ. **остиға, остида, остидан**).

ОСТАДОН [юн. osteon ёки лот. os, ossis — суяк + ф. دان — «идиш», «жой» маъноларини билдирувчи сўз ясовчи қўшимча] Зар-

душтийликда 5–8-асрларда марҳумнинг суяклари солиб сақланадиган, тош, сопол ёки ганчдан ясаладиган идиш, суякдон; оссуарий. *Баъзи қавмлар ўликни куйдирганларидан сўнг, жамоада аждодлар руҳини авайлаб, ана шу суякларнинг баъзи қисмини, кулли сақлаш мақсадида.. қанор ёки япсақи хумга ўхшатиб қопқоқли, баъзиси тутқичли оstdон – суякдонлар яшашган.* Газетадан.

ОСТАНОВКА [р. остановка < остановиться «тўхтамоқ» фл. дан: тўхташ, тўхтайдиган жой] Транспорт воситаларининг пассажир ёки юк тушириш ва олиш учун тўхтайдиган жойи, бекат. *Автобус остановкаси. ■ Тошкентнинг Эскижўва бекатида бир сўм пулини тушириб қолдирган гражданин Самарқанд шаҳар «Боғишамол» остановкасидаги сартарошхонага келиб, уста Мухиддинга учрашсин.* С. Аҳмад, Юлдуз.

ОСТЕО- [юн. osteon – суяк] Байналмилал ўзлашма кўшма сўзларнинг биринчи қисми бўлиб, шу сўзларнинг суякка, суяк тўқимасига алоқадорлигини билдиради.

ОСТЕОЛОГИЯ [остео.. + юн. logos – фан, таълимот] Нормал анатомия ва антропологиянинг умуман одам скелети, қисман ундаги айрим суякларнинг тузилиши, ўлчам ва шаклларидаги ўзгаришлар ҳамда уларнинг ривожланишини ўрганувчи бўлими.

ОСТЕОМА [остео.. + юн. oma – хом; нам: ўсма, шиш борлигини билдирувчи аффиксоид] *тиб.* Суяк тўқимасидан иборат зарарсиз ўсма, шиш.

ОСТЕОМАЛЯЦИЯ [остео.. + юн. malakia – юмшоқлик, бўшанглик] *тиб.* Модда алмашинувининг бузилишида организмда витаминларнинг етишмаслиги оқибатида суякларнинг юмшаб қолиши ва қийшайиб ўзгариши (деформацияси).

ОСТЕОМИЕЛИТ [остео.. + юн. myelos – мағиз, илик, кўмик + лот. itis – яллиғланишни билдирувчи кўшимча] *тиб.* Кўмикнинг яллиғланиши. *Остеомиелит кўпинча, одам скелети ғовак суякларининг бўғимга яқин жойида учрайди. «ЎЗМЭ».*

ОСТЕОХОНДРОЗ *тиб.* [остео.. + юн. chondros – тоғай] *тиб.* Умуртқалараро тоғайпай тўқималарининг турли хил ўзгаришлари натижасида келиб чиқадиган касаллик. *Остеохондроз кўпроқ бўйин ва бел дисklarида учрайди. «ЎЗМЭ».*

ОСТИГА *кўм. вzf.* Тагига, тагидаги жойга. *Оёқ остига пойандоз солмоқ.*

Кўз остига олиб қўймоқ Бирор мақсадни мўлжалламоқ; ният қилмоқ. *Айта қол, ё бошқа ўз кўз остига олиб қўйганинг борми?* М. Мансуров, Ёмби.

ОСТИДА *кўм. вzf.* 1 Бирор ҳаракат ёки ҳодиса ва ш.к. нинг бошқаси билан бирга ёки унга боғлиқ ҳолда содир бўлишини ифодалаш учун ишлатилади. *Хижолат остида қолмоқ. Раҳбарлиги остида ишламоқ. ■ Куёв қаттиқ қарсақлар остида бориб, келнининг ёнига ўтирди.* А. Қаҳҳор, Тўй.

2 Бирор ҳаракат ёки ҳолатни юзага чиқарган бошқа бир ҳаракат, ҳолат ёки кечинмани ифодалашда ишлатилади. *Ким билади, [Гулнор] ота-она сиқиғи остида балки (бойга турмушга чиқишга) кўниккандир.* Ойбек, Танланган асарлар. *Карим ўзининг диққат бўлиб турганлигини сездирмаслик учун мажбурият остидагина бир илжайдида, қўл бериб кўришди.* Ойдин, Фонарь тагида.

3 Маълум нарса номи билан, воситасида. *Газетанинг биринчи бетида «Олимнинг яни кашфиёти» сарлавҳаси остида катта мақола чоп этилди.*

Оёқ остида қ. оёқ 1 1. Қаноти остида бўлмоқ қ. қанот. Қўл остида қ. қўл.

ОСТИДАН *кўм. вzf.* Тагидан, ичидан. *Пальто остидан костюм киймоқ.*

Ер остидан қарамоқ (ёки боқмоқ, разм солмоқ, кўз қирини ташламоқ) Зимдан қарамоқ. *Ҳожжи йўлакдаги ойимга ер остидан кўз қирини ташлади.* А. Қодирий, Ўтган кунлар. *Яхшибоев ер остидан боқиб, ҳамма ёғи жой-жойида, тиқлачоқдай, деб ўйлади.* М. М. Дўст, Лолазор.

ОСТИН-УСТУН 1 сфм. Бирини устидан иккинчиси; икки қаватли, қават-қават. *Остин-устун иморатлар.*

2 Хароб, вайрон; тўс-тўполон. *Ҳамма ёқ остин-устун, Остин-устун қилмоқ. Остин-устун бўлмоқ. ■ Шамолнинг қудрати ҳазилакам эмас. У саҳрони остин-устун қилиб, кўм тепаларни учуриб олиб юради. «Фан ва турмуш».*

Остин-устун қилмоқ *кўчма* Чалғитмоқ, бузмоқ. *Ёқубжон менинг мудроққа мойил танимга ғулғула солди, хаёлларимни остин-устун қилиб юборди.* М. М. Дўст, Лолазор.

ОСТИРМОҚ **Осмоқ** фл. орт. н. *Тракторларга культиваторларни остирмоқ. Қозон остирмоқ.* ■ -Кун сайин неча гуноҳсизларни остирган, кестирган, болаларимизни етим, оналаримизни қон йиғлатган сен эмасмидинг? — дер эди халқ Азизбекка. А. Қодирий, Ўтган кунлар.

ОСТИГ [остео.. + лот. itis — яллиғланишни билдирувчи кўшимча] тиб. Суяк тўқимасининг яллиғланиши ёки дистрофиясидан иборат касаллик.

ОСТКИ Остда, пастки томонда жойлашган; пастдаги, қуйидаги, пастки. *Бионинг остки қавати.* ■ *Тешабой остки лабини тишлаб, нича ўйланиб турди.* М. Исмоилий, Фарғона т.о.

ОСТЛИК Бирор нарсанинг остига қўйиладиган бошқа нарса, таглик. *Дазмол остлиги.*

ОСТОНА [ф. آستانه — киравериш, бўсаға; арафа; шоҳ саройи; дахма] 1 Эшик, дарвоза чорчўпининг остки кўндаланг ёғочи; бинога, ҳовлига кираверишдаги ерга кўндаланг ётқизилган ёғоч, тахта, ҳарсанг ва ш.к.; бўсаға. *Баланд остона. Уй остонаси. Кўча эшик остонаси.* ■ *Эшик қаттиқ теги билан очилди-ю, остонада чувалчандай чувак.. бир киши пайдо бўлди.* М. Исмоилий, Фарғона т.о. *Аҳмад бригадир Нусратбекни янги дарвоза остонасида кўриши биланоқ аҳволи руҳиясини тушунди.* С. Нуров, Майсаларни аёз урмайди.

2 *кўчма* Уй, хонадон, даргоҳ. -*Шу ер туфайли бизлар сенинг остонанга бош эгиб, қуллуқ қилиб келдик, — деди Ойимхон.* П. Турсун, Ўқитувчи. *Санъат шундай буюк даргоҳки, унинг остонасига қадам қўйдингми, орқага чиқишининг имкони йўқ.* «Саодат».

3 *кўчма* Қишлоқ ёки шаҳарга кираверишдаги жой, бўсаға. *Искандар Хўжанд остонасида қаттиқ талафот кўрган.* Мирмуҳсин, Темур Малик. *Чекинган душман қишлоқ остонасидаги тепаликка чиқиб олиб, қаршилик кўрсата бошлади.* Н. Сафаров, Комиссар Қорабоев.

4 *кўчма* Бирор воқеа ёки ҳодисанинг бошланишига яқин қолган пайт; арафа. *Ҳали эсини танимаган, ўт-олов бола шу ерда балоғат остонасига етди.* С. Аҳмад, Кадрдон далалар. *Юртим, сени яна қутлаб қўяйин, Қутлуғ Янги йилнинг остонасида.* А. Орипов, Йиллар армони.

5 *геогр.* Дарё остидаги, баъзан сувдан чиқиб кўриниб турадиган ва сув оқимини тезлаштириб, кемалар қатновини қийинлаштирадиган баландроқ жой, дўнглик.

ОСТ-УСТ айн. **остин-устун.** *Ҳовлимни у [Зиёдхўжабой] ўзиникига қўшиб, ост-уст иморат қурмоқчи, яйраб яшамоқчи.* Ойбек, Танланган асарлар. *Унинг [Султонмуроднинг] бу қарашлари халқ бўрони ичида ост-уст бўлди.* Ойбек, Навоий.

ОСУДА [ф. آسوده — тинчланган; тинч, осойишта, хотиржам] Тинч, беташвиш; хотиржам. *Шу кунларни, шу осуда ҳаётни қанчалар орзу қилган эдик.* «Ёшлик». *Маъсум, осуда юзи юрагимга шундай яқин туюлдики, унинг очик, нозик туйғуларидан иборат бўлиб кўринган қалбини ҳар қандай шикастдан ҳимоя қилишга тайёр эдим.* А. Мухтор, Асарлар. [Навоий:] *Ҳайҳот, бирор осуда дам йўқ. Кўнгли йиғлайди-ю, кўзларда нам йўқ.* Уйғун ва И. Султон, Алишер Навоий. *Бутун шаҳар халқи сокин уйқуда. Ором олмоқдасан сен ҳам осуда.* Х. Расул.

ОСУДАЛИК Тинчлик, осойишталик; сукунат. *От туёғининг қаттиқ дупури тун осудалигини буюди.* Н. Фозилов, Дийдор.

ОТ 1 1 Якка туёқлиларга мансуб ўтхўр, сутэмизувчи йирик иш-улов ҳайвони. *Оқ от. Қашқа от. Йўрға от. От абзали. Отга тақа қоқмоқ. Отга минмоқ. Яхши отга бир қамчи, ёмон отга минг қамчи.* Мақол. ■ *Сидиқжон эгарга яхшироқ ўрнашиб, отнинг жилловини силкиди.* А. Қаҳҳор, Қўшчинор чироклари. *Узоқдан от елдириб келувчи отлиқни кўрган Содиқ кўчанинг ўртасида тўхтади.* А. Қодирий, Ўтган кунлар.

От заводи От наслини яхшилаш ва наслдор, юқори сифатли отларни кўпайтириш билан шуғулланувчи махсус хўжалик, корхона. **От кучи** махс. 75 кг/м секундга ёки 0,736 квтга тенг қувват. *80 от кучига эга бўлган трактор.* **От спорти** Отда юриш, машқ қилиш мусобақаларининг умумий номи. *Олимпиада ўйинлари дастурига от спортининг бир неча турлари киритилган.* **От ўйин** эск. 1) айн. **цирк.** -*Шу, театр дегани нима, от ўйиними?* — Абдишукурдан сўради чойфуруш Садриддин бойвачча. Ойбек, Танланган асарлар; 2) айн. **карусель.**

2 Отнинг бошига ўхшатиб ясалган шахмат донаси, асп. *Отни юрмоқ. От билан шоҳ бермоқ.*

3 Мучал йил ҳисобида еттинчи йил номи. Унинг йили от.

От йили Мучал йил ҳисобида еттинчи йил (қ. мучал). **От миндирмоқ** От совға қилмоқ, от билан мукофотламоқ. *Эшитганлар шоирга раҳмат айтиб, бири тўн кийдириб, бири от миндирибди.* Шукрулло, Сайланма. *Бугун биз канал қазिश муддатини тезлаштишга ташаббускор бўлган икки донгдор қурувчига от миндирмоқчимиз.* С. Аҳмад, Уфқ. **От солмоқ айн. от қўймоқ 2. От қўймоқ 1)** отнинг жиловини бўш қўйиб елдирмақ; 2) минган отини бирор кимса томон йўналтириб ҳужум қилмоқ. *Кеча-кундуз тоғма-тоғ душманга қарши от қўйиб, уруш очамиз.* М. Муҳамедов, Машқ. **Отдай бўлиб кетмоқ** Соғаймоқ, касалликни унутиб юбормоқ. *Ота, ташвиш тортманг, сал ўтмай отдай бўлиб кетасиз.* «Шарқ юлдузи». **Отдан тушса ҳам, эгардан тушмайди** Илгариги мавқеи ёки мартабасидан тушгандан кейин ҳам такабурлигини ташламаган киши ҳақида. **Отни қамчиламоқ қ. қамчиламоқ.**

ОТ II 1 Кишининг шахсий исми, ном. *Чақалоққа от қўймоқ. Оти(нг) ўчсин (ўчгур)! қарғ. Оти(нг) курсин (қурғур)! қарғ. ■ [Мирзакаримбой:] Отинг нима жиян? -Отим Йўлчи.* Ойбек, Танланган асарлар. *Яхши қиз, кечирасиз, отингизни билмайман, сиз хотиржам бўлинг, бирон жойи бир нима бўлса, ўзим тузатиб бераман.* С. Аҳмад, Уфқ.

2 Ўргатилган ҳайвонларнинг номи; лақаб. *Бунинг оти Тўрткўз эмас. Арслон.*

3 Умуман, нарсаларнинг, ҳодисаларнинг номи, ном билдирувчи сўз. *Бу.. тоғнинг оти Музлоқ эди.* М. Исмоилий, Фарғона т.о. *Мингўрик мавзеи отидан ҳам маълум — бунда минг чоғлиқ ўрик дарахти ўсгани учун.. эди.* А. Қодирий, Ўтган кунлар. [*Сафар бўзчи:*] *Чўзма кекирдагингни, буқоқ.. андишанинг отини қўрқоқ қўйдингни?! А. Қодирий, Меҳробдан чаён. [Жаннат опа:] Қиҳ.. ҳалиги оти курсин.. Маликбойнинг майдонида! А. Қодирий, Ўтган кунлар.*

От қўймоқ Ном бермоқ, атамоқ. **Оти йўқ эвф.** Чаён ҳақида айтилади. **Отига(гина)** Шунчаки, кўринишга, номига. *У отигагина раис, ҳамма иш муовин кўлида. ■ Отигагина хон бўлиб ўтирувчи Худоёрхон, Мусулмонқул майдондан олингунча ўзининг қўғирчоқ сифат юра беришини тушунди.* А. Қодирий, Ўтган кунлар. **Отимни бошқа қўяман**

Қасам, онтни ифодаловчи ибора. *Бошланган ишни охиригача олиб бормасам, отимни бошқа қўяман.* Ойдин, Садаганг бўлай, командир.

4 Унвон, мансаб, ном. *Бир қари одамга «куёвлик» отини бериш ҳам уни куёв бўлгандай қувонтиради.* С. Айний, Қуллар.

5 с.т. Зот, уруғ. [*Суннат:*] *Кел, ўша Муҳарраминг бўлмаса, бошқаси-да, қиз оти қуриб кетибдими?* Шухрат, Шинелли йиллар.

6 Шухрат, донг. *Яхшидан от қолар, ёмондан дод қолар.* Мақол. ■ *Излар бўлдим Қоражоннинг қизини, От кўтарган Зулхуморнинг ўзини.* Эргаш Жуманбулбул ўғли.

От чиқармоқ Ном чиқармоқ, донг таратмоқ, шухрат қозонмоқ, машҳур бўлмоқ, танилмоқ. *Кўлингдан келганча чиқар яхши от. Яхшилик қил, болам, ёмонликни от!* Эргаш Жуманбулбул ўғли.

7 Шаън, номус, ғурур. [*Уста Олим:*] *Сизга хабар бериб ўтиришни йиғитлик отига эл билмай, менга ҳам бир нарса сездирмаган.* А. Қодирий, Ўтган кунлар.

8 тли. Предметни билдириб, «ким?» ёки «нима?» сўроғига жавоб бўладиган сўз. *Турдош от. Атоқли от. Мавҳум от. ■ Бирор шахс, нарса ёки жойга атаб қўйилган номлар атоқли отлар саналади.* «Она тили» дарслиги.

ОТА I 1 Фарзандли, бола-чақали эр киши (ўз болаларига нисбатан). *Ота бўлмай, ота қадрини билмас.* Мақол. ■ *Сиз отамисиз, нимасиз ахир, ўглингизни тийиб олиш сира эсингизга келадими?* А. Қодирий, Ўтган кунлар. *Тожиддиннинг отаси ҳам камтирининг ўлимидан кейин кўп ўтмай вафот этган эди.* С. Зуннунова, Олов.

Ота касб Ота шуғулланган касб (фарзандга нисбатан). *Бешиқсозлик Раҳим акага ота касб.* «Саодат». *Катта бўлган, ҳаммолик менга ҳам ота касб бўлиб қолади.* П. Турсун, Ўқитувчи. **Ота юрт** (ёки **макон**) Ота туғилган, ўсиб-улғайиб яшаган жой. *Нусратбекнинг ота юртида илгари ҳам саратонда, икки-уч йилда шундай бир шамол эсиб, палакларни ағдариб кетарди.* С. Нуров, Майсаларни аёз урмайди. *Бир зумгина чайқалиб олди Ота макон — қирларим, чўллар.* С. Саййид. **Отаси этн.** Хотиннинг ўз эрига мурожаат этиш шакли. **Қайин ота (қайнота)** Эр-хотиннинг оталари (эрга нисбатан хотиннинг отаси ёки хотинга нисбатан эрнинг отаси). *Сал ўтмай,*

ҳовлига Салимжоннинг қайнотаси савлат тўқиб кириб келди. Газетадан.

2 Ёши катта кишиларга мурожаат қилишда ёки уларни ҳурматлаш учун ишлатилади. *Оталар сўзи — ақлнинг кўзи. Мақол.* ■ *Юнусали ота қаёққа боришни билмай, ҳардамхаёл бўлиб тургандан кейин идора тарафга йўл олди. С. Аҳмад, Уфқ. Қоратой Ҳозирни дарров Шоқир отага юборди. Ойбек, Танланган асарлар.*

3 Ўғил болани эркалатиш учун ишлатилади.

4 *кўчма* Бирор иш ёки ҳаракатни бошлаб берган, унга асос солган киши ҳақида. *Абдулла Қодирий ўзбек романчилигининг отасидир. Жуковский рус авиациясининг отасидир.*

5 *кўчма* Меҳрибон бошлиқ, раҳнамо ҳақида. *У [Михаил Маркович] колхозчиларга ота бўлди, ғамхўрлик қилди, иш ўргатди. Ойдин, Мардлик — мангулик.*

6 Эл-юртга бошчилик қилувчи, ёши ёки мансаби улуғ зот ҳақида [*Ёрмат:*] *Тайёрлан, қизим, Сенга юрт отаси, эликбошимиз гапирдилар. Ойбек, Танланган асарлар.*

Бор отанга, бор онанга Сансалорликни ифодалаш учун ишлатилади. **Ота гўри қозихонами? қ. гўр. Отанга раҳмат** Кимсадан мамнун эканликни ифодаловчи олқиш ибораси. **«Отанг яхши, онанг яхши» қилиб** Ялиниб-ёлвориб; олқаб-мақтаб.

ОТА II айн. орол.

ОТАБЕЗОРИ Безорилиги ва дилозорлиги учун ҳатто ўз отаси ҳам юз ўғирган; оқпадар. *Бой эса яна отабезори ўғилларининг надомати билан юзма-юз, ёлғиз қолди. «Ёшлик». Сен ҳали шунақа ўзбошимча бўлиб қолдингми? Бундай ишни отабезорилар қилади. Газетадан.*

ОТАБЕК тар. 1 Яқин Шарқдаги айрим мамлакатлар давлат (князлик, беклик) бошлиқларининг унвони.

2 Салжуқий султонлар валиаҳдларининг мураббийси (унинг вазифаси шаҳзода ва хонзодаларни тарбиялаш ва улар ихтиёридаги улусни балоғатга етгунларига қадар бошқаришдан иборат бўлган).

ОТА-БОБО(ЛАР) Ўлган яшаб ўтган кишилар; аждодлар. [*Рўзимат:*] *Э, Сиддиқжон ака, бизга иш топилади, ота-боболаримиз қилмай, қилолмай, бизга ташлаб кетган иш кўп! А, Қаҳҳор, Қўшчинор чироқлари. У*

етти ухлаб ҳам ота-бобосининг тушига кирмаган шаҳарни кўрди. Т. Ашуров, Оқ от.

ОТА-БУВА(ЛАР) с.т. Ота-бобо(лар). *Бахтимизга ота-бувамиздан қолган чойхоналар бор экан, номардга муҳтож бўлмай, буқадек лорсиллаб юрибмиз. А. Обиджон, Аканг қарагай Гулмат.*

ОТАЛАРЧА рвш. Ўз отасидай, ўз отаси каби. *Оталарча насиҳат қилмоқ. Оталарча ғамхўрлик.* ■ *Ҳалим бобо Ойқизнинг қўларини сийпалаб, оталарча эркалади. Ш. Рашидов, Бўрондан кучли. Жўраполвон ўридан туриб, Азизхонни оталарча бағрига босиб, қўйиб юборди. С. Аҳмад, Уфқ.*

ОТАЛИ Отаси бор, отаси ҳаёт. *Отали етим — орсииз етим, онали етим — орли етим. Мақол.* ■ *Ўлган аллим тирилиб келар дейман, ёр-ёр. Ёдгоржоним отали бўлар дейман, ёр-ёр. «Алпомиш».*

ОТАЛИК 1 Отанинг ўз фарзандига бўлган муносабатлари ва шу муносабатларга боғлиқ ҳолатлар. *Оталик бурчи. Оталик муҳаббати.* ■ *Қутбидиновнинг оталик меҳри жўш уриб кетди, Суярнинг бошидан, юздан ўнди, қучоқлади. А. Қаҳҳор, Ўжар. Тоғай ўша тун оталик бахтини ҳис этиб, хаёл қанотида юксак-юксакларга учди. «Ёшлик».*

Оталик қилмоқ 1) отага хос вазифани ўтамоқ; боқмоқ, кийинтирмоқ, тарбияламоқ (фарзандга нисбатан); 2) оталарча ғамхўрлик, меҳрибонлик қилмоқ, ёрдам бермоқ (бошқа кишига нисбатан). *Юртга оталик қиладиган, кўп азаларда етимларнинг бошини силаб, кўз ёшини тиндирган Тоға Азизхонни овутиш учун бисотидан бирон жўяли гап тополмади. С. Аҳмад, Уфқ. Болачақангизнинг орзусини кўринг, оталик қилдингиз. Ойдин, Эрк юрак.*

2 бот. Ўсимликларда ҳосилни вужудга келтирувчи эркак генератив аъзо; чангчи. *Ток гулида оналиги яхши ривожланган бўлиб, оталиги эса унча яхши тараққий этмаган. «Фан ва турмуш».*

ОТАЛИҚ 1 Моддий, маданий ёки бошқа хил ёрдам кўрсатиш, шу йўл билан ташкилотлар ва кишиларни бир-бирига боғлашдан иборат ижтимоий бурч, фаолият. *Оталиққа олмоқ.* ■ *Ҳар биримизни алоҳида-алоҳида тўқувчи мастер хотинлар оталиққа олишди. А. Мухтор, Опа-сингиллар. Туман саноат корхоналари ва ташкилотлари*

жорий ва капитал ремонт қилиш учун уй-жой биноларини оталиққа олишни ташкил этмоқда. Газетадан.

2 Шундай ёрдам кўрсатишни ўз зиммасига олган киши ёки ташкилот.

3 тар. Кавказ халқлари, араблар ва б. баъзи халқларда бадавлат ота-оналар томонидан фарзандларини маълум ёшгача тарбиялаш учун вассаллар ва хизматкорларга бериш олати.

4 тар. айн. отабек 2.

5 тар. Хонлар саройида энг юқори амаллардан бири; хоннинг маслаҳатчиси. *Қуш-бегилар, оталиқлар ўзимиздан, ўртада улардан битта-яримта додхоҳлар бўлса бор.* А. Қодирий, Кичик асарлар.

ОТАМЛАМОҚ Отани кўсмамоқ; отам деб долламоқ. *Олдинда бели боғлиқ, ҳасса тутган Йўлдош, Хайри ва яна тўрт-беш киши «отамлаб» боришди, орқада тобут, эр-каклар марҳумни навбат билан елкаларида кўтариб, сўнги йўлга кузатдилар.* «Ёшлик».

ОТАМЛАШМОҚ 1 Ҳасратлашмоқ, юракдаги дард-аламларни ўртоқлашмоқ. *У [Умурзоқ ота] ҳар гал Фани самоварчининг ҳужрасига тушар, у билан отамлашиб, дардини ёзиб келарди.* Ҳ. Фулом, Машъал.

2 Ёзилиб, мириқиб, кўнгилли суҳбат қилмоқ, улфатлашмоқ. *Улар меҳмонлар кетгандан кейин ҳам аллаҳалга ҳам отамлашиб ўтиришди.* Т. Ашуров, Оқ от. -*Ҳа, қаёққа, — деди Мадамин ҳам шовқин солиб, — отамлашиб ўтирайлик ахир бирпас!* П. Турсун, Ўқитувчи.

ОТА-ОНА Боланинг ота ва онаси. *Ота-оналар мажлиси.* ■ *Ота-оналарингизга нисбатан қандай яхши муомалада бўлсангиз, фарзандларингиз ҳам сизга шундай муомалада бўладилар.* «Фан ва турмуш».

ОТАР I 1 **Отмоқ** фл. сфдш. *Тонг отар чоғи. Олти отар миномёт.*

2 от, с.т. Катта базм, тўй. *Қирмизхон ҳали ҳам гоҳ-гоҳида хуфёна тўйга чиқар, отардан тушган тўн, кўйлак, дўппи, ҳеч бўлмаганда, бир жуфт ароқ ёки коньяк билан бошлиғининг кўнглини олиб турар эди.* Н. Аминов, Қаҳқаҳа.

Отар пули Тўй ёки базмда хизмат қилган машшоқ, хонанда, ўйинчиларга тушган пул.

ОТАР II Яйловда боқиладиган қўйларнинг йирик тўдаси; йирик пода ва у сақланадиган жой. *Отар серўтроқ жойга кўчи-*

рилди. ■ *Рўзи бобо бутун отарга бир ўзи қараб, чўпонларни пичан ўриш, йиғишга солган.* О. Қўчқорбеков, Чўпон Рўзи Бахши. *Тўртта отаримиз қор остида қолиб кетди, — деди директор.* Ш. Холмирзаев, Бодом қишда гуллади.

ОТ-АРАВА От ва арава; от қўшилган арава. *Қовун пишиб чириб кетди.. Кўшимдан от-аравани бир кунга тилаб олган эдим.* Ойбек, Танланган асарлар. *От-аравалар бирин-бирин саройга олиб кирилди.* Ҳ. Фулом, Феруза.

ОТАРЧИ с.т. Тўй ва базмларда мўмай пул топишга мослашган мусиқачи, ашулачи, раққоса. *Эсонбой суратдаги тўйма-тўй юрдиган шу қишлоқлик отарчини таниди.* «Ёшлик». *Тўйма-тўй юришини асосий касбига айлантириб олган ашулачини «отарчи» дейишади.* Газетадан.

ОТАРЧИЛИК Тўй, базмларда юриш билан шуғулланиш. *Тўтихон отарчиликда бозори касодега учраган, гўяндалик ва «хотинча хатми қурвон оши, биби сешанба»ларда кайвониликни машқ қила бошлади.* Н. Аминов, Қаҳқаҳа.

ОТАХОН 1 Кекса кишиларга ҳурмат учун қўлланадиган мурожаат шакли. *[Ўрмонжон:] Отахон, дейман, ўйинга уста экансиз-ку.* А. Қаҳқор, Қўшчинор чироқлари.

2 Кишилар ўз отасидай ҳурмат қиладиган кекса одам. *Кулги таққа тўхтади, қаёқдандир, темир ҳассасини дўқиллатиб Бобоқул ота — қишлоқ болаларининг яқин отахони пайдо бўлди.* Ҳ. Назир, Сўнмас чақмоқлар.

3 Ўз соҳасида ёшларга раҳнамо кекса киши. *Отахон шоирларимиз.*

4 Отахон (эркаклар исми).

ОТАШ [ф. *آتش* — ўт, олов; отишма, ўт очиш] кт. **1** Ўт, олов. *Одам — ишдан, маъдан — оташдан бахра топади.* Мақол. ■ *У ўз муродига етгани учун муқаддас оташ ва сув худосига шукур қилиб, аллақандай бир дуони ўқиди.* М. Осим, Карвон йўлларида. *Юрьев батареялари ёпиқ позициядан туриб, ёв устига жаҳаннам оташи ёғдирди.* И. Раҳим, Чин муҳаббат.

2 кўча Дилни ёндирадиган, ўртантирадиган ҳароратли ҳис-туйғу, *Ҳижрон оташи.* ■ *Ҳафиза Умид юрагидаги оташга сув селиб, ўчириб кетмоқчи бўлди.* Мирмуҳсин, Умид.

ОТАШАРАВА [оташ + арава] *с.т. эск.* Паровоз, поезд.

ОТАШГОҲ [ф. آتشگاه — оташпарастрлар ибодатхонаси] **1** *к.т.* Ўт, олов ёниб турган жой.

2 Оташпарастрлар сиғинган, доимий олов ёниб турадиган махсус бино. *Қадимда ҳокимиятни қўлга олган ҳар бир подшоҳ ўз номидан махсус оташгоҳлар қурдирган.* «ЎЗМЭ».

ОТАШДОН [ф. آتشدان — манқал; кабоб кўра] Олов, ўт солинган идиш; кабоб кўра. *Эрназар сихларни оташдонга териб, чап кўлдаги еллиғич билан елиб пишираверибди.* «Эртақлар».

ОТАШЗАБОН [ф. آتشزبان — ўткир тили; қочиримли сўзлайдиган; тили аччиқ] *к.т.* Нутқи ўткир, таъсирчан; сўзга уста, сўз билан қалбларни ҳаяжонга келтирадиган. *Оташзабон нотик.* ■ *Сочма шеър ёзганда, ростдан ҳам Миртемир оташзабон шоирга айланади.* Т. Жалолов, Миртемир.

ОТАШИН [ф. آتشين — қизгин, жўшқин; эҳтиросли; алангали] **1** *к.т.* Қалб ҳарорати билан иситилган; қизгин, жўшқин; эҳтиросли, алангали. *Оташин салом. Оташин муҳаббат. Оташин нутқ.* ■ *Дунёда қолмасин фашист деган ном. Меҳнат диёридан оташин салом!* Миртемир, Асарлар. *Сўзлар қарсақларга, қарсақлар оташин хитобларга улаиб кетди.* А. Мухтор, Опа-сингиллар.

2 Бутун қалби, жони-гани билан берилган, қалби олов. *Оташин нотик. Оташин курашчи.*

ОТАШКУРАК Ёниб ёки қизиб турган нарсани, чўғни қисиб олиш, оловни тузатиш учун ишлатиладиган уй-рўзғор асбоби. *Оташкурак билан чўғ олмоқ.* ■ *Дмитрий Казимирович оташкурак билан печкадан чўғ олиб, самоварнинг ўтхонасига ташлади.* А. Мухтор, Асарлар.

ОТАШЛАНМОҚ *поэт.* Оташдек ёнмоқ, жўш урмоқ.

ОТАШЛИ *к.т.* Оловли, ўтли; қизгин, жўшқин. *Оташли йиллар.* ■ *Гарчи яшамдим беиқбол, нигун, Гарчи давраларим нурли, оташли.* А. Орипов, Йиллар армони.

ОТАШНАФАС [оташ + нафас] **1** Нафаси, дами оташдек иссиқ, ҳароратли. *Чўлдан воҳага гармсел деб аталадиган оташнафас шамол эсиб туради.* Газетадан.

2 Нутқи ўткир, таъсирли, эҳтиросли. *Машираб гоҳ ниёда, гоҳ эшакда кўп ўлкаларни*

кезган оташнафас бир шоир. Ойбек, О.в. шабадалар.

3 *эск. дин.* Гўё дуоסי ижобат бўладиган, нафаси дардга даво бўладиган. *Одамлар Султондеванани «оташнафас» вали деб мақташар эди.* М. Муҳаммаджонов, Турмуш уринишлари.

ОТАШПАРАСТ [ф. آتشپرست — ўтга топинувчи] Ўтга топинувчи, ўтга сажда қилувчи; мажусий. *Оташпарастр қабилалар.*

ОТАШПАРАСТЛИК *айн. зардуштийлик.* Олимларнинг эътирофига қараганда, оташпарастрлик Хоразмда вужудга келган. Газетадан.

ОТАШХОНА [оташ + хона] **1** *айн. ўтхона.* Паровознинг оташхонаси. ■ *Уйнинг ўнг бурчагида чўян печ, карнайи шифтдан чиқарилган, оташхонаси қизариб, карнай чирс-чирс этарди.* Ш. Холмирзаев, Т. Усмонов, Сўнмас ўт. *Самоварнинг оташхонасига чўп тикаётган Ражаб бобо ҳам унга қараб кулди.* С. Аҳмад, Қадрдон далалар.

2 *айн. оташгоҳ 2.*

ОТАШҚАЛБ [оташ + қалб] *поэт.* Қалби оташ, юрагида ўти бор; оташин. *Оташқалб ёшлар.* ■ *Машираб ўз замонасининг оташқалб ва теззабон шоирларидан бўлган.* Газетадан.

ОТБОҚАР Отларга қаровчи, отларни парвариш қилиш билан шуғулланувчи киши. *Отбоқар фонусини ерга қўйиб, юурганича отхонага кирди ва ҳаял ўтмай бир отни такабб чикди.* А. Қаҳҳор, Қўшчинор чироқлари. *Биринчи механик соатни от тортиб юрган, унинг тўғри юриши отбоқар гарданида бўлган.* «Фан ва турмуш».

ОТДОШ Бошқа биров билан исми бир; бир хил исмли кишилар ёки нарсалар; адаш. *-Итингнинг оти ўз тусига муносиб экан-куя, — деди Қулмуродга Шокир, — эсизки, Қўшбегининг ўғли билан отдош экан.* С. Айний, Қуллар.

ОТЕЛЬ [фр. hotel — ҳашаматли уй, бино] Меҳмонхонанинг халқаро номи. *Халқаро меҳмонхоналар тармоғидан муносиб ўрин олган мазкур уч юлдузли отель туризм тоифасига ҳам киритилди.* Газетадан.

ОТИАТРИЯ [юн. us, otos - қулоқ + iatreia — даволаш] Оториноларингологиянинг қулоқ касалиқларини, уларни даволаш ва олдини олиш усулларини ўрганувчи бўлими.

ОТИЗ *шв.* Бир марза ер; марза. *Ариқ қазимасанг, отизга сув чиқмас.* Мақол. ■

Бекжон кетмон билан отиздан отизга ўтиб, кичик ариқларни боғлайди, чарчаган отасининг ўрнини босади. Ж. Шарипов, Хоразм.

ОТИЛМА геол. Вулканлардан отилиб чиққан; отқинди. *Отилма тоғ жинслари.*

ОТИЛМОҚ 1 Отмоқ 1, 3, 5-6, 9-12 фл. мажҳ. н. *Яқинда учта бўри отилди. Айтилган сўз — отилган ўқ. Мақол. ■ Оғзи катта қора тўплар Отилди майдон ичинда, Мард йигитнинг ширин жони Сотилди майдон ичинда. «Равшан».*

2 Отмоқ 3 фл. ўзл. н. *Шу вақт команда берилди: «Сафлан!» Нормат Адолатнинг ширмон юзидан ўпди ва она бағрига отилди. И. Раҳим, Чин муҳаббат. Қамариддин отилиб келиб, унинг бўйнига пичоқ санчди. «Ёшлик».*

3 Ўзини бирор томонга урмоқ. *Йўлчи кескин ҳаракат билан қайрилиб, ташқарига отилди. Ойбек, Танланган асарлар.*

4 Шиддат билан юқорига кўтарилмоқ. *Қайнаб чиқар нефть булоқлари, Фонтан бўлиб отилар тикка. Ў. Мирзо. Шариллаб отилиб чиқайтган артезиан сувига бошини тўтиб турди. С. Аҳмад, Уфқ.*

5 кўчма Ўз ихтиёри билан талабгор бўлиб чиқмоқ, сафарбар бўлмоқ. *У биринчи отилиб чиқиб, паранжи ташлаган хотин. ■ Халққа эрк учун, нон учун, маданият учун курашга отилмоқ керак. Ойбек, Нур қидриб.*

ОТИМ Бир отишли, бир чекишли. *Бир отим нос. ■ [Ниёз қушбеги] Носқовоғини қоқа-қоқа, бир отимини тилининг тагига ташлади. А. Қодирий, Ўтган кунлар.*

ОТИН 1 тар. Эски мактабларда қизлар ўқитувчиси; дин ва шариат билимдони. *Ҳар кун қўшимиз отин бибида қиёмгача ўқиб, кейин то кечгача, кўпинча кечалари ҳам, аямнинг ёнига кириб, тикиш тикдим. Ойбек, Танланган асарлар.*

Отин биби (ёки буви, ойи) Уйида мактаб очган аёл. *Ёзини билмайдими? - Қайдан билади, қишлоғимизда отин буви бўлмаса, ўқимаган-да. М. Исмоилий, Фарғона т.о. Опанинг овози, отин ойиларнинг овозига ўхшаб, фақат битта нотада юрар экан. С. Аҳмад, Жимжитлик.*

2 этн. Аёллар ўртасида диний маросимлар (мас., мавлуд) га бошчилик қиладиган аёл.

3 с.т. Ҳар қандай ўқимишли ёки ўқитувчи аёл. *Шу чинорга чиққанга, Чиқиб уни йиққанга, Сўзсиз, хотин бўламан. Гўзал отин*

бўламан. Ҳ. Олимжон. - Ойинг ҳам отин бўлади, — Мавлон ака Кароматнинг гапидан завқланиб кулиб қўйди. Ҳ. Фулом, Машғал. Гулнор Йўлчига хат ёзишга қарор қилган ва сузларини айтиб турган, отин қиз эса Гулнор сузларини силлиқлаб, қоғозга кўчирган. Ойбек, Танланган асарлар.

4 Ўқимишли, обрўли аёлларга мурожаатда ёки улар тўғрисида гап борганда, исмига қўшиб ишлатиладиган сўз. *Шакар отин. Фотима отин. ■ [Юсуфбек ҳожи:] Болам, Зайнаб отин, сиздан ҳали ёшлик ғурури кетмаган, лекин менинг болам бўлганингизни сиз ҳам унутманг! А. Қодирий, Ўтган кунлар.*

ОТИНЧА Ўқимишли ёш хотин ёки қиз. *Энди ўзи ўқимаса ҳам, отинча бўлиб, болаларни ўқитади. «Қаҳрамонлар». - Ҳа, айланай отинчадан! — кўкрагига бир урди бойвачча. Ойбек, Танланган асарлар. Отинча қизим-ҳо, ўзимнинг отинча қизим, қанисан? И. Раҳим, Чин муҳаббат.*

ОТИНЧАХОН айн. **отинча.**

ОТИТ [юн. us, otos — қулоқ + itis — яллиғланишни билдирувчи қўшимча] Қулоқнинг яллиғланиши.

ОТИШ 1 Отмоқ фл. ҳар. н. *Диск отиш. Найза отиш.*

2 Жанговор куруллардан ўқ узиш; ўқни мўлжалга уриш машқи, маҳорати. *Отини ўрганмоқ. Отишдан аъло баҳо олмоқ. ■ Командир отиш қондасини бир-бир сўраб чиқди. Шухрат, Шинелли йиллар.*

Қулоч отиш Сувда эркин сузиш, чўмилиш. *Муздек сувда яйраб-ййраб қулоч отиш бир роҳатижон, ўзни офтобга тоблаб ётиш бир оромижон. М. Мансуров, Ёмби.*

3 айн. отишма.

ОТИШМА Жангдаги икки томоннинг бир-бирига қарши узлуксиз ўқ узиши, ўқ отиши, ўқ ёғдириши; отиш, отишув. *Артиллерия отишмалари. ■ Отишмалар Нормат ётган ердан узоқлашиди-ю, бир оздан кейин яна яқинлашди. И. Раҳим, Чин муҳаббат. Кечга яқин отишмалар, портлашлар тинди, вайрона шаҳар устига тун чўкди. Мирмуҳсин, Қаҳрамоннома.*

ОТИШМОҚ Отмоқ 1-6, 9-10, 12-13 фл. бирг. н. *Қизлар жанларда йиғитлар билан ёнма-ён туриб отишадилар. Ойдин, Ўзидан кўрсин. Ёшу яланг, қарию қартанглар.. бир-бирларига гап отишади, аския қилишади, куйлашади. М. Исмоилий, Фарғона т. о.*

ОТИШУВ 1 Отишмоқ фл. ҳар н.

2 айн. **отишма**.

ОТКРИТКА [р. открытка — очик хат < открытый — очикъ] Почта орқали табрик ёки маълум хабарлар ёзиб жўнатиладиган, безакдор, одатда очик, конвертсиз ишлатиладиган варақча. Бу *откриткага атир гулинг* нухаси солинган бўлиб, орқасига *Бахтиёрнинг кўли билан қинғир-қийшиқ хатлар ёзилган эди*. С. Зуннунова, Олов. *Ота-онангизга, яқин дўстларингизга улуғ ва мўътабар шахсларга ёзилган откриткани конвертга солиб юборинг*. Газетадан.

ОТЛАМОҚ 1 Қадам ташламоқ, одимламоқ. *Энг олдинда, байроқ тагида Тикка отлаб ўғлим боради*. Ҳ. Пўлат.

2 кам қўл. Сакрамоқ, ирғимоқ, ҳатламоқ.

От отлаб, туя қўмлаб қ. қўмламоқ. [Ўзбек ойм:] *Марғилон деган юртдан от отлаб, туя қўмлаб кел эмиш-да, бир ойгина турмай, кет эмиш!* А. Қодирий, Ўтган кунлар.

ОТЛАНИШМОҚ Отланмоқ фл. бирг. н. *Тўлқинни етаклаб, уйга кирган Адолат Эъзозхон билан қизининг тоқчадан дафтарқалам олиб, йўлга отланишаётганини кўриб, ҳайратда қолди*. Ҳ. Фулом, Машғал.

ОТЛАТМОҚ 1 Отга минмоқ. *Ўрмонжон [Аҳмедовнинг] бир гагини.. отлангани узангига оёқ қўяётганида эслади*. А. Қаҳҳор, Кўшчинор чироқлари.

2 *кўчма* Бирор жойга бориш учун шайланмоқ, тайёрланмоқ, ҳозирлик кўрмоқ. *Кечки соат олтиларга яқин кўп қатори Тоштемир ҳам учрашувга отланиб, кўчага чиқди*. «Ёшлик». [Кумушга онаси:] *Тур, бўлмаса, юз-қўлингни ювиб отлан, худо ўлим берсин уятсиз эринга!* А. Қодирий, Ўтган кунлар.

3 *кўчма* Бирор ишни бажариш учун шайланмоқ, жазм қилмоқ. *Янги ғалабалар сари отланмоқ*. ■ *Сен ёвга қарши отлан, Мен жиловдоринг бўлай*. Миртемир, Асарлар.

Жини (ёки *ажинаси*) отланмоқ айн. **жини кўзгамоқ қ. жин 1**. [Набижон] *Уни [Отажонни] кўрдими, ажинаси отланаверадиган бўлиб қолган эди*. Ф. Насриддинов, Ота ўғли.

ОТЛАНТИРМОҚ Отланмоқ фл. орт. н. *Қишлоқ меҳнаткашларини пахта учун курашга отлантирмоқ*. ■ *Эгарлаб берайин Чибор отингни, Отлантирай сендай валламатимни*. Фозил шоир. *Мени жанг-жадал-*

га отлантирган фақатгина қуролим борлиги бўлган эмас, чунки қурол бошқаларда ҳам бўлган. Шукрулло, Сайланма.

ОТЛИ 1 Оти бор; от қўшилган. [Салим-бойвачча] *Кўш отли извошни кира қилиб, ясаниб, «иўхлик» қилиш учун янги шахарга жўнаб қолди*. Ойбек, Танланган асарлар.

ОТЛИ 2 Исмли, номли; исм ёки номга эга бўлган; ..деб аталадиган. [Тўра] *Ёвонизмида Жумагул отли бир қиз бор*. Ж. Шарипов, Хоразм.

Ёмон отли бўлмоқ Эл-юрт ичида ёмон от чиқармоқ, бадном бўлмоқ. *Ахир, бош олиб кетадиган бўлса, бир умр ёмон отли бўлади-ку, эл олида шармандаю шармисор бўлади-ку, уят ўлимдан қаттиқ, дейдилар*. Ш. Рашидов, Бўрондан кучли. *Ўз қизимни тўй қилиб бериб, эшитган гапим шу бўлдимми? Ўғри бўлиб чиқдимми! Ёмон отли бўлдимми!* М. Мансуров, Ёмби.

ОТЛИҚ От минган; сувори. *Отлиқ аскар*. *Отлиқ полк*. ■ *Икковга биров ботолмас, отлиққа яёв етолмас*. Мақол. ■ *Кўчанинги бир томонида булутга ўхшаиш чанг-тўзон кўтарилди ва ҳадемай бир тўда отлиқ кўринди*. С. Зуннунова, Олов. У [Тўламат] *урушда ҳам отлиқ армияда хизмат қилган, қайси бир генералга ординарең бўлган экан*. С. Анорбоев, Оқсой.

Отлиққа (ҳам) йўқ Ҳеч қаерда йўқ, сира топиб бўлмайди. *Асал отлиққа йўқ, ҳали биз пиёда-ку!* А. Қаҳҳор, Анор.

ОТМОҚ 1 Кўлни силтаб ёки қулочкашлаб, қўлидаги нарсани узоққа ёки мўлжалга ирғитмоқ, улоқтирмоқ. *Тош отмоқ*. *Гранат отмоқ*. *Кўпга кесак отма*. Матал. ■ *Ёрмат пичоқни суғуриб олиб, узоққа отди*. Ойбек, Танланган асарлар.

2 *Ташламоқ, ирғитиб юбормоқ*. *Танти-бойвачча кўрпачага бемалол ўтириб, дўпписини бир чеккага отди*. Ойбек, Танланган асарлар.

Ошиқ отмоқ қ. ошиқ 2.

3 Шиддат билан бирор томонга, жойга ташламоқ ёки ташланмоқ, отилмоқ. *Гулнор хушсизланган каби, бошини онанинг тиззасига отди*. Ойбек, Танланган асарлар. *Болакай, ястаниб ётган поёнсиз лозардан югуриб келиб, ўзини унинг қучоғига отди*. «Шарқ юлдузи».

4 *Кўтариб ерга урмоқ, йиқитмоқ* (курашда). У [Сиддиқжон] *ҳозир кураишда рақи-*

бини ёнбошга олиб отган. А. Қаҳҳор, Қўшчинор чироқлари. *Қўтосни отмади, зўр билан уни майдоннинг четига — қаттиқ ерга судради.* А. Қаҳҳор, Сароб.

5 с.т. Чекмоқ; тортмоқ. *Чори ота бармоқлари титраб, нос отди.* С. Нуров, Нарвон. *Шу вақтда кимдир, бурнаки отгандек, қайта-қайта апишурди.* Ойбек, Навоий.

6 Тортмоқ, ичмоқ (ичимлик ҳақида). *Ёсонбой чорпояга чиқиб, у билан ёнма-ён ўтириганда, чол жиндай отиб олганини сезди.* «Ёшлик».

7 *кўчма кам қўлл.* Улоқтириб ташламоқ, тарк этмоқ, йиғиштирмоқ. *Қўлингдан келганча чиқар яхши от, Яхшилик қил, болам, ёмонликни от!* Эргаш Жуманбулбул ўғли.

8 *кўчма* Чиқармоқ, ёзмоқ, ёймоқ (асосан ўсимлик ҳақида). *Чечак отмоқ. Палак отмоқ. Куртак отмоқ.* ■ *Ҳадемай карнай-гуллар, жуда ҳафсала билан чиройли қилиб тортилган илларга чирмашиб, катта-катта япроқлар отди.* А. Қаҳҳор, Қўшчинор чироқлари. *Зилол сувли шаршара ёнида икки баҳайбат чинор, Бобур замонидан гувоҳлик бериб, шох отиб турибди.* Ҳ. Ҳасанов, Экватордан ўтганда.

Томир отмоқ қ. томир. Тонг отмоқ қ. тонг. *Бағрига кимгадир бахт, кимгадир қайғу юклаб, яна тонг отмоқда.* «Ёшлик».

9 Бирор қурол воситасида ўқ, тош, снаряд ва ш.к. узмоқ. *Сопқон отмоқ. Камалак отмоқ. Миноёт(дан) отмоқ. Отган ўқ қайтмас.* Мақол. *Ётиб қолгунча, отиб қол.* Мақол. ■ *Танкларимиз душманнынгни олдинги окопларидан ўтиб, танкка қарши отадиган батареяни тўпга тута бошлади.* А. Қаҳҳор, Олтин юлдуз.

10 Отиш қуроли воситасида уриб шикастламоқ ёки ўлдирмоқ. *Урдак отмоқ. Қуён отмоқ.* ■ *[Йўлчи] Тишини қисирлатиб деди: -Тўпнинг оғзига қўйиб, отиб юборинглар мени, қонхўрлар!* Ойбек, Танланган асарлар. *Баъзан қизиқсиниб, биз ҳам каптар отиб кўрмоқчи бўлардик.* Шукрулло, Сайланма.

11 Куч билан итариб, итқитиб чиқармоқ; учириб юбормоқ. *Шиша пробкасини отиб юборди. Вулқон юз тонналаб оловланган тоғ жинсларини ҳавога отди.* ■ *Сув дам оқизиб кетади, дам четга отади.* С. Аҳмад, Уфқ.

12 *кўчма* Қўймоқ, ташламоқ. *Шиор отмоқ. Масалани ўртага отмоқ.* ■ *Дастлаб бу гапни дадангиз ўзлари ўртага отдилар.*

Ойбек, Танланган асарлар. **Гап (ёки пичинг) отмоқ** Киноя, кесатиқ маъноли гап, сўз айтмоқ; пичинг қилмоқ. *У келин ойисини очиқ-ошкор суймас, кесатиб, пичинг отиб, унинг кўнглига озор берар эди.* С. Зуннунова, Кўк чироқлар.

13 Учмоқ, сирғанмоқ. *Яхмалак отмоқ. Коньки отмоқ.* ■ *Менинг ёшлигимда бирга ошиқ ўйнаб, яхмалак отиб ўсган бир оғайним бор.* Шукрулло, Сайланма.

Нафси ҳаккалак отади Мазахўракка ўрганиб, нафсини тиёлмайди. **Шаталоқ отмоқ қ. шаталоқ.** *Қизинг ҳозир қаёқни хоҳласа, ўша ёққа шаталоқ отиб, чопиб юрибди.* Мирмуҳсин, Умид.

ОТНОН эск. От шаклида пиширилган ширин кулча. *Ҳолвафурушлар бақришиб, кунжут ҳолва, мағиз ҳолва, пашмак, отнон сотмоқдалар.* М. Муҳаммадзонов, Турмуш уринишлари. *-Сенинг келишингни билганимда, хўрозқандми, отнонми олиб келарканман, — деди почча Ҳамидага.* С. Анорбоев, Меҳр.

ОТО- [юн. *us, otos* — кулоқ] Байналмилал ўзлашма қўшма сўзларнинг таркибий қисми бўлиб, кулоққа, кулоқ касалликларига алоқадорликни билдиради (мас., *отит, оториноларингология*).

ОТОРИНОЛАРИНГОЛОГ Оториноларингология мутахассиси, кулоқ-бурун-томоқ касалликлари шифокори.

ОТОРИНОЛАРИНГОЛОГИЯ [ото.. + юн. *rhis, rhinos* — бурун + *larynx, laryngos* — бўғиз + *logos* — фан, таълимот] Тиббиётнинг кулоқ, бурун, ҳалқум, бўғиз тузилиши ва вазифаларини ўрганувчи, уларни даволаш, шундай касалликларнинг олдини олиш усулларини ишлаб чиқувчи бўлими.

ОТОСКОП [ото.. + юн. *skopeo* — қарайман, кузатаман] Кулоқни тозалаш пайтида уни эшитиб кўриш учун ишлатиладиган, ҳар иккала учи йўғонлашган ингичка резина найчадан иборат тиббий асбоб.

ОТ-ОТАКАМ бол. Бири иккинчисининг этагидан ушлаб от қилиб ёки ёғоч от миниб чопишдан иборат болалар ўйини. *Қудрат билан Камол тол новдасини миниб, от-отакам ўйнашиб, кўча чангитиб юришган эди.* Ҳ. Назир, Сўнмас чироқлар.

ОТОФОН [ото.. + юн. *phone* — товуш] тиб. Кулоғи кар одамларнинг эшитиш қобилиятини кучайтирадиган аппарат, эшитиш найчаси.

ОТПУСКА [р. отпуск < отпустить «кетишга рухсат бермоқ; бўшатмоқ, бўш қўймоқ» фл. дан. ясалган от] *айн. таътил. Бир ойлик отпускаи. Ёзги отпускаи. Декрет отпускаи. Отпускаи даври. Отпускаи пули. Отпускаи олмоқ. Отпускаиға чиқмоқ.* ■ *Яхши уришгани учун, эҳтимол, командирлари унга отпускаи бергандир?* «Ёшлик».

ОТРЕЗ [р. отрез < отрезать «кесмоқ, кесиб олмоқ» фл. дан қўшимчасиз ҳосил қилинган от: маълум ўлчамада қирқиб олинган мато] *с.т. Кийим тиктириш учун мўлжалланган бир бўлак мато, бир кийимлик газмол. Бир костюмлик отрез.* ■ *Бухоро зардўзлари тайёрлаган тилла кавушлар, бриллиант кўзли узуклар, отрезлар бўларди. С. Аҳмад, Жимжитлик.*

ОТРЯД [р. отряд < отрядить «бирон топшириқ, вазифа билан юбормоқ» фл. дан қўшимчасиз ҳосил қилинган от: бирон топшириқ олган гуруҳ] **1** Жанговар ёки махсус вазифаларни бажариш учун тузиладиган вақтинчалик ёки доимий ҳарбий тузилма. *Денгизчилар отряди. Парашютчилар отряди. Отряд командири.* ■ *-Йўқ, — деди командир, — ҳозир фурсат йўқ. Ҳозирча буларни олиб, от чоптириб, тезроқ отрядга ет. С. Айний, Қуллар. Шу вақт унинг бахтига партизанлар отрядининг рациясидан хабар келиб қолди. И. Раҳим, Чин муҳаббат.*

2 Бирор иш, фаолият, хизмат учун уюшган кишилар гуруҳи, жамоаси. *Қуёш қумтепалар орқасига ёнбошлаб, губорли уфқни алангалатганда, барги тўкилган қумранг саксовул буталари орасида геологлар отрядидан қолган эски шаҳарча кўринди. А. Мухтор, Асарлар.*

3 Умуман, жамиятнинг маълум белгилар билан бирлашган гуруҳи. *Илғор ёшлардан тузилган отряд чўлда янги иншоотлар қуриш учун отланди. Газетадан.*

4 зоол. Ҳайвонлар систематикасида: маълум белгилар билан бирлашган гуруҳ; туркум. *Кемирувчилар отряди.*

ОТТИРМОҚ **Отмоқ** фл. орт. н. *Тош оттирмоқ. Соқпон оттирмоқ.* ■ *Бу хунук сўз Жўраҳонни шатта оттириб юборди. М. Исмоилий, Фарғона т. о.*

Тонг оттирмоқ Тонг отгунча ухламай чиқмоқ. *Ухлай олмай тонг оттирдим. Китоб ўқиб тонг оттирдим.* ■ *Салимжон Обидий шу алфозда тонг оттириб, эрта*

билан янги шофёрға машинани тайёрлашни буюрди. Мирмуҳсин, Умид.

ОТТИСК [р. оттиск < оттиснуть «босиб из қолдирмоқ; босиб нусха олмоқ» фл. дан ясалган от] *Журнал, тўплам ва ш.к. да босилган мақоладан олинган алоҳида нусха. -Хўш? — деди Саидий, қулидаги оттискларни олаётиб. А. Қаҳҳор, Сароб. Ҳали материал тушир, ҳали макет қил, ҳали оттиск — кечга яқин бошим оғриб, аранг судралиб, кабинетдан чиқдим. Н. Аминов, Қаҳқаҳа.*

ОТУВЧИ 1 **Отмоқ** фл. сфдш.

2 Жанговар қуроллардан, мас., милтиқдан ўқ уза биладиган, яхши отадиган киши. *[Кўрқмас:] Ўртоқ командир, яхши отувчи бўлиш учун кишининг икки қўли бўлиши шартми? З. Саид, Н. Сафаров, Тарих тилга кирди.*

ОТ-УЛОВ Миниладиган иш ҳайвонлари (от, эшак, хачир ва ш.к.) *Бир куни денг шу икковлон, Қайгадир йўл олишди. Минай деса от-улов йўқ, Ўйланишиб қолишди. А. Орипов, Йиллар армони.*

ОТХОНА Отлар сақланадиган бино; оғилхона. *Зиёдулла отхонадан қора йўрғасини етаклаб чиқди. Ҳ. Фулом, Машғал. Йўлчи уларга [отларга] беда ташлади, кейин курак ва супурги олиб, отхонани тозалай бошлади. Ойбек, Танланган асарлар.*

ОТЧОПАР Отларни синаш, от чопиш ва отда машқ қилиш, умуман, от спорти мусобақаларини ўтказиш учун махсус жиҳозланган майдон; ипподром. *Тошкент отчопари.*

ОТҚИНДИ геол. Вулкандан отилиб чиққан моддаларнинг (лаванинг) совиишдан ҳосил бўлган тоғ жинслари. *Вулкан отқиндилари. Отқинди тоғ жинслари.* ■ *Туб конларнинг вужудга келиши табиатда кенг тарқалган магма ва унинг қотишидан ҳосил бўлган отқинди тоғ жинслари билан боғлиқдир. «Фан ва турмуш».*

ОТҚУЛОҚ Отнинг қулоғига ўхшаш катта-катта ва узун баргли кўп йиллик ёввойи ўт. *Қорабойни уйга опкелиб, айвонга ётқиздик. Ярасига баргизуб қўйиб, отқулоқ босдик. Ш. Холмирзаев, Оғир тош кўчса.*

ОФАРИН [ф. آفرين — яратувчи; мақтов, олқиш; балли, тасанно] **1** Мамнунликни, завқланганликни, қойил қолганликни ифодаловчи олқиш сўзи; таҳсин, тасанно. *Офарин айтмоқ (ўқимоқ).* ■ *Ҳамма Қаҳрамон-*

га офаринлар айтиб, уни қутлашибди. «Эр-таклар».

2 унд. с. *взф.* Балли, баракалла. -Офарин, Мавлоннинг даъволари исбот бўлди, — деб юборди ҳамма. М. Осим, Сехрли сўз. Чаққон, эччил ишлаётган аскарлар олдида тўхтаб: -Офарин баҳодирлар! — деб мақтаб ўтарди генерал. Ойбек, Куёш қораймас.

ОФАТ [а. *أفت* — ранж, алам; жирканиш; бахтсизлик, бало; хавф] **1** Бошга кулфат солувчи ёки ҳалокатга олиб келувчи бахтсизлик; бало. *Халқ бошига кўп офатлар келтирган Андижон зилзиласи Қорабулоқни сувдан маҳрум қилиб қўйди.* М. Исмоилий, Фарғона т. о.

2 кўчма Йўқ қилувчи; кушанда; илож, даво. *Тақсир, гуноҳнинг офати тавба-ку.* Ҳамза, Танланган асарлар.

ОФАТИЖОН [а. + ф. *آفت جان* — жонга озор берувчи; жафокор маъшуқа] Ўзига мафтун қилиб, дилдан урадиган ғоят гўзал аёл. *Шу ондаёқ бўлдим паришон, Шу ондаёқ ўртанди таним, Қайдан келдинг, эй офатижон?* Уйғун. *Қизларнинг ҳаммаси сутга чайилгандай оқ, офатижон! Атрофимизда гирдиқанапалак бўлишади.* «Ёшлик».

ОФАТЛИ Офат билан ўтган, офат бошлаб келган ёки келадиган. *Офатли йўл.*

ОФЕРТА [лот. *offertus* — таклиф этилган] Товар етказиб бериш, бирор-бир хизмат кўрсатиш учун шартнома хабарномаси. *Халқаро савдода офертанинг қатъий ва эркин турлари бор.* «ЎЗМЭ».

ОФИЦЕР [нем. *Offizier* < лот. *officiarius* — мансабдор шахс < *officium* — иш, хизмат] Куролли кучлар, полиция ва жандармериянинг командирлар таркибидаги ҳарбий хизматчи. *Артиллерия офицери.* Алоқа офицери. *Денгиз флоты офицери.* ■ *Полковник солдат ва офицерларнинг жанговар тайёргарлиги қандай бораётганлигини текширди.* А. Қаҳҳор, Олтин юлдуз.

ОФИЦИАНТ [лот. *officians, officiantis* — хизматчи, хизмат қилувчи] Ресторан, кафе ва ш.к. да хўрандаларга хизмат қилувчи, улардан буюртма олиб, овқат келтириб берувчи ходим. *Официант бир шиша коньяк, бир шиша қизил вино олиб келди.* Ойбек, Танланган асарлар. *Официант овқат келтириб қўйди. Қамариддин қадахни яна тўладирди-да, ичиб юборди.* «Ёшлик».

ОФИЦИАНТКА Аёл официант. *Официантка қанот пайдо қилгандек, енгил одим билан янги буюртмани адо этгани кетди.* Ф, Мусаёнов, Ҳиммат.

ОФИЯТ [а. *عافيت* — соғлиқ; яхши кайфият; хотиржамлик] *эск. кт.* Соғлиқ; соғсаломатлик. *Тангридан тўғри эътиқод ва офият сўранглар (ҳадис).* «Фан ва турмуш».

ОФОҚ [а. *أفاق* — «уфқ» (أفق) с. кўпл.: уфқлар, дунё мамлакатлари, осмонлар] *эск. кт.* Дунёнинг ҳар томони; дунё, жаҳон. *Яна ҳимматлиғ элга кам бўлур офоқ аро душман, Валекин ул бўлур эрмиш ҳамиша душмани ҳисса.* Аваз Ўтар, Девон.

Ягонаи офоқ Дунёда ягона, тенги йўқ. **Забардасти офоқ** Дунёда энг зўр.

ОФСЕТ [инг. *offset (printing)*]: **офсет босма** Тёкис босма усули; бунда буюёқ босма қолипдан оралиқ резина цилиндрга, ундан қоғозга ўтади. *Офсет босма корхонасида ранг бериш, фотоҳарф териш автоматлари, офсет ротациялари, автоматик линиялар бўлади.* «ЎЗМЭ».

ОФТАЛЬМОЛОГИЯ [юн. *ophthalmos* — кўз + *logos* — фан, билим] Тиббиётнинг кўзнинг нормал ҳолати ва касалликларини ўрганадиган бўлими. *Офтальмология фани ютуқларининг амалиётда жорий этилиши туфайли Ўзбекистонда ўткир эпидемик конъюнктивит эпидемияси, трахома (шиллик) бутунлай тугатилди.* «ЎЗМЭ».

ОФТОБ [ф. *آفتاب* — қуёш; қуёш нури] **1** Қуёш, кун. *Одамнинг юзи офтобдан иссиқ.* Мақол. ■ *Офтоб чиқди оламга, Югуриб бордим холамга.* «Фольклор». *Палатага кирдик. Шу пайт офтоб яна булут остига кирди-ю, палатани шом қоронғилиги босди.* А. Қаҳҳор, Минг бир жон.

Офтоби оламтоб қ. оламтоб.

2 Қуёш тарқатаётган нур; қуёш ҳарорати. *Танаси икки катта қулочка сиғмайдиган бир туп сада теваракка тангадай офтоб туширмайди.* Ойбек, Танланган асарлар. *Устидаги гимнастёркаси ёмғирда ювилиб, офтобда ўнгиб, оқариб кетган эди.* И. Раҳим, Чин муҳаббат. *Аям мени бундақа офтобда жизгинак бўлиш учун туққан эмас.* Ойбек, О.в. шабадалар.

Офтоб урмоқ Офтоб ҳароратидан касал бўлмоқ.

3 Қуёш нури тушиб турган, қуёш иситиб турган жой. *Офтобда исинмоқ.* *Текинга му-*

ноилж ариза ёзишга роғиб бўлди. А. Қодирий, Меҳробдан чаён.

РОҲ [a. راه / راه — йўл, кўча] *кт. кам қўл. айн. йўл. Соғинчлар шамолдай оқади Юрак-ка кўринмас роҳлардан. Ш. Раҳмон, Юрак қирралари. Хатарли, қалтис роҳда титрар икки биродар. «Шарқ юлдузи». Гар ғубори хоки роҳин айласа бежо насим, Сабру бетоқатли-ғи таъби паршонимдадир. Нодира.*

РОҲАТ I [a. راحت — тинчлик, хотир-жамлик, ором] I Эстетик завқ ёки ором берадиган нарсалардан олинадиган лаззат, ҳузур, гашт. *Севгисин айтмаслик — қизлар одати, Нозу карашмаси — йигит роҳати. М. Алавия. Кундузлари иссиқдан беҳол бўлган одамлар кечадан роҳат кутадилар. М. Исмоилий, Фарғона т. о.*

Роҳат олмоқ (ёки **топмоқ**, **қилмоқ**) Лаззатланмоқ, ҳузур қилмоқ. *Куч, роҳат олар эдим, Ипак сочларинг силаб. Ғайратий. Аваз ҳар вақт Собир акалар сингари ҳунарманд меҳнаткашлар гурунгида роҳат топади. Ж. Шарипов, Хоразм. Утирганлар ажойиб овоз билан айтилган лирик ашулани роҳат қилиб тинглайдилар. Т. Обидов, Юсуфжон қизик.*

2 Ҳузур-ҳаловат, фароғат, тинч ва фаровон ҳаёт. *Роҳатда яшамок. Меҳнат, меҳнатнинг таги — роҳат. Мақол. Меҳнатсиз роҳат йўқ. Мақол. ■ Энди сенлар омон бўлинглар. Дунёнинг роҳатини сенлар кўринглар. Ойдин, Олтин узукка олмос кўз. [Пулдорларнинг] Қорнилари тўқ. Бола-чақалари роҳатда, уйларига қазичарта қайнайди. Ойбек, Танланган асарлар.*

3 Роҳат (хотин-қизлар исми).

РОҲАТ II Рост мақомининг Ушшоқ шувъбаси асосида яратилган ўзбек халқ куйи.

РОҲАТБАДАН [a. + ф. راحتبدن — баданнинг, таннинг роҳати] I *от* Одатда олма гулли, кўйлакбоп ҳарир газлама. *Роҳатбадан кўйлак. ■ -Поплин дейсизми.. чиданганга чиқарган дейсизми, роҳатбадан дейсизми.. кеп қолинг, харидор! — деб [Хуснибий] бозорни бошига кўтариб, бақириб юрар эди. Ф. Ғулом, Шум бола.*

2 *сфт.* Баданга роҳат бағишлайдиган. *Пирпираб роҳатбадан шаббода қирғоқлаб эсиб, Шарқираб уйнаб тўлиб, тўлқин уриб кулгу келур. Ҳабибий.*

РОҲАТБАХШ [a. + ф. راحتبخش — роҳат, ҳузур бағишловчи] Роҳат бағишлайдиган, киши ҳузур қиладиган; оромбахш.

Роҳатбахш жой. Роҳатбахш куй. Роҳатбахш ичимлик. ■ Жабборов шу роҳатбахш кайфият билан уйига борди. Н. Ҳайиткулов, Ер тафти. Ташқарида ҳавонинг тафти баланд, аммо куле муздек салқин, роҳатбахш. Газетадан.

РОҲАТИЖОН [a. + ф. راحتجان — жоннинг роҳати] I *от* Шиннига муз қириб солиб тайёрланадиган морожнийсимон овқат. *Роҳатижон халқ таботатида дизентерия касаллигига қарши дори сифатида ҳам қўлланган. Газетадан.*

2 *сфт.* Жонга роҳат бахш этадиган, жонга роҳат бағишлайдиган. *У [Нигора] ипакдай майин, шишадек тиниқ, роҳатижон илиқ булоқ сувини кучоқлар, оппоқ тўшига босиб яйрар. С. Анорбоев, Оқсой. Ғулом аканинг кабинети узун коридордан иборат эди. ..Шу оддийгина хона бош инженер ёрдамчиси учун роҳатижон макон эди: ҳам иссиқ, ҳам озода. Ж. Абдуллахонов, Тўфон.*

РОҲАТЛАНМОҚ Роҳат қилмоқ, ҳузур, гашт қилмоқ. *Муסיқадан роҳатланмоқ. Роҳатланиб дам олмоқ. ■ Ўзгалар оғирини енгили қилишдан роҳатланади. Т. Ашуров. Оқ от. Холида терлаб, товонлари қорайиб кетган оёқларини сувга тиқиб шалоплатди — жони роҳатланди. «Ёшлик». Азиза, курсдош қизларнинг ғашчи келаётганини сезган сайин, ўзини ғолиб ҳисоблаб, роҳатланарди. Ў. Ҳошимов, Қалбингга кулоқ сол.*

РОҲАТЛИ Кишига роҳат берадиган; оромли. *Донг таратган зарбдор Аллақачонлар Кечирмакда меҳнат-ла Роҳатли онлар. Ғайратий.*

РОҲАТСИЗЛИК Кишига ҳузур, ором бермайдиган ҳолат, оромсизлик. *..бу изғирик кишига унча роҳатсизлик бермаса-да, лекин қаердадир доғ қилинмоқда бўлган зигир мойининг аччиқ исини димоққа келтириб уришидан кишида бир беҳузурлик ҳосил бўлар эди. А. Қодирий, Ўтган кунлар.*

РОҲАТ-ФАРОҒАТ Тинч ва фаровон ҳаёт, ҳузур-ҳаловат. *Рўпарангиздаги катта дарвозали ҳовлида Шоназар табиб бола-чақалари билан роҳат-фароғатда яшайдилар. Газетадан. Султон Ҳасанбек ва Мирзабек Ҳиротда роҳат-фароғатда умр кечириб, ўз ажаллари билан ўлдилар. М. Осим, Сеҳрли сўз.*

РОҲИБ [a. راهب — монах] Христиан динидаги ва умуман монах, зоҳид. *Бизнинг*

4 Оқибат, натижа; пировард. *Ёмон ишининг охири вой.* ■ *-Хай, ишқилиб, охири бахайр бўлсин, — деди Махсум.* П. Турсун, Ўқитувчи.

ОХИР II [ф. *آخر* — отхона; оғил, охур] с.т. Охур.

ОХИРАТ [а. *آخرت* — сўнг, ниҳоя, тамом бўлиш; нариги, у дунё; охирги кун] дин. Одам ўлгандан кейин борадиган дунё, олам; дунёнинг тугаш куни, қиёмат. [*Азизбой:*] *Бу фоний дунёда оч ўлди нима-ю, тўқ ўлди нима? Охирати бахайр, имони басаломат бўлсин.* Н. Сафаров, Шарқ тонги. *-Бу дунё беш кунлик, ёлгон дунё. Охиратни эсдан чиқарманг, ҳа!* — деди домла. П. Турсун, Ўқитувчи. *Наҳот охиратга юз бурса жаҳон, Наҳот кароматлар ҳақ чиқса, наҳот.* А. Орипов, Йиллар армони.

Охират оши Ҳаётнинг сўнги дамида ейилган овқат. **Охиратда** 1) нариги дунёда; қиёматда. *Йигирма сўм қарз эди, охиратда ҳам жавобини беради.* Ойбек, Танланган асарлар; 2) сира, ҳеч вақт. *У охиратда ҳам тугалмайди. Охиратни куйдирмоқ* Имон-этиқодидан айирмоқ, айрилмоқ; хонавайрон қилмоқ. *Маълум бўлишича, ер ютгур Асқад онасининг охиратини куйдириб, укаларининг ризқини қийиб, етмиш сўмнинг ҳаммасини ўғирлаб, шаҳарга кетиб қолибди.* «Ёшлик».

ОХИРГИ Нарса ёки ҳодисалар қаторининг энг сўнгидаги; сўнги, энг кейинги. *Охирги курс. Охирги сўз. Романнинг охирги боби.* ■ *-Чекинмаймиз. Охирги томчи қонимиз қолгунча курашамиз!* — деди Чернецов. И. Раҳим, Чин муҳаббат. *Пайғамов дафтарни чамалаб кўриб, охирги саҳифасига қаради.* С. Нуров, Майсаларни аёз урмайди.

ОХИРЗАМОН [а. *آخر زمان*] дин. Дунёнинг, ҳаёт ва борлиқнинг сўнги дамлари, қиёматга яқин қолган замон. *Бизнинг замонамиз «охирзамон» бўлгани учун ҳеч бир киши вали бўлмас ва шунинг учун шоир ҳам бўлмас экан.* С. Айний, Эсдалиқлар.

ОХИРИ рвш. 1 Охир-пировардида, ахир. *«Сабр туби — олтин» мақолига амал қилиб, арқонни узун ташлаб кўйган эдик. Охири сабр косамиз тўлиб-тошиб кетди.* «Муштум».

2 Бориб-бориб, ниҳоят. *Тақдир шамоли уни [Зағчақўзни] турли бурчакка учирди ва охири, мана шу Қамшикапага келтириб ташлади.* П. Турсун, Ўқитувчи.

ОХИРИДА рвш. Охири, ахири, пировардида. *Зайнабнинг ўн беш дақиқали муо-*

маласида Отабек юқоридаги каби «эсдан чиқариш» ҳолатига бир неча қайта учради ва охирда сўрамоққа мажбур бўлди. А. Қодирий, Ўтган кунлар.

ОХИРЛАМОҚ Охирга, поёнига етмоқ, тамом бўлмоқ, тугамоқ. *Қиш охирламоқда. Қурилиш охирлаб қолди.* ■ *Сал ўтиб, ёзувларим охирлайди ва мен кекса танимга озгина ҳордиқ бераман. Сўнг Тошкентга жўнайман.* М. М. Дўст, Лолозор. *Пахта йиғим-терими охирлаб турганда, Ойқиз Бойчиборга миниб, райондан қайтарди.* Ш. Рашидов, Бўрондан кучли.

ОХИР-ОҚИБАТ рвш. Натихада, охир-пировардида; ниҳоят. *Нусратбек қишлоқни қўмсай-қўмсай, бир талай дард орттирди, охир-оқибат янги шароитга мослашиб олди, жонининг ҳаловатини билди.* С. Нуров, Майсаларни аёз урмайди.

ОХИРУЛАМР [а. *آخر الامر* — охири, пировардида, оқибатда] эск. кт. Охири, охир-пировардида, ниҳоят. *Охируламр, бу кун бир чор деворга кириб, ўлиб ётган эшакни кўриб, гўштидан бир миқдор кесиб, уйга келтирди.* А. Қаҳҳор, Бошсиз одам.

ОХРА [юн. *ochros* — рангсиз, ранглар, оқиш; сарғиш] Сарик ёки сарғиш-қизил тусдаги табиий минерал буюёқ.

ОХУН(Д) [ф. *آخوند* — руҳонийлар пешвоси, мулло; устоз] 1 Ўқимишли, илмли киши; мулла, домла. *Момонинг мурсаги охун йиғитнинг қўлида кетди.* «Ёшлик».

2 Ўқимишли, илмли кишилар исмига кўшиб айтиладиган сўз. *Юсуфбек ҳожи билан қутидор Солиҳбек охуннинг Кўкалдош хужрасига меҳмон бўлиб кетганлар.* А. Қодирий, Ўтган кунлар.

3 Хитой мусулмонлари орасида мударрисларга, имомларга нисбатан кенг тарқалган ном.

4 с.т. Халқ ичида уйғурларга, қашқарликларга кўйилган лақаб.

ОХУР [ф. *آخر* — отхона; оғил, охур] Чорва моллари (қўй, эчки, сигир, от) га ем-хашак солиб бериладиган мослама (идиш). *От охури. Мол охури.* ■ *Тоштемур қудуқдан бир неча марта сув чиқариб, отларни сугорди, охурларга беда солди.* Ҳ. Фулом, Феруза. *Фуломжон отхонага кириб, тўкилган бедаларни охурга териб солди, қоронғида ҳам кўзлари чақнаб турган саман-*

ни пешонасидан силаб, суйиб қўйди. М. Исмоилий, Фарғона т.о.

Баланд (ёки катта) охурдан ем еган (ёки сув ичган) Катталар, боёнлар билан яқин алоқада бўлиб кеккайган ёки ўзи катта боён бўлиб ўтган. [Ўрмонжон:] *Сен катта охурдан ем еб ўргангансан, чидолмайсан. А. Қаҳҳор, Қўшчинор чироқлари. Саид ака, Яхшибоевга суйкалманг, сизга панд беради, катта охурдан ем еб ўрганган одам, ажабмаски, қулай келган онда сизни оёғига патак қилиб кетса. М. М. Дўст, Лолазор. У чет элларда дипломатлар билан гаплашган, катта охурдан сув ичган. С. Аҳмад, Жимжитлик.*

ОХУРЧЎП [ф. *آخورچوب*] Пойабзалнинг дастаги маҳкам, тик туриши учун унинг ичига (авра-астар орасига) қўйиб тикиладиган юпқа, эгиловчан тахтача, картон ёки қаттиқ чарм. *Мусулмон усталар кавушининг дастагига охурчўп қўйиб тикадилар. С. Айний, Эсдаликлар.*

ОЧ I 1 Қорнида, меъдасида овқат қолмаган, очкич, овқат тусаб қолган, очкиқан. *Оч одам. Оч ит. Оч қолмоқ. Оч қолдирмоқ. Оч қўймоқ. Оч қоринга аччиқ саримсоқ. Мақол. Оч қорним — тинч қулоғим. Мақол. Хунарли киши оч қолмас. Мақол. Оч, дилдираб қолган Умид иссиққина танчада ўтириб, танига қайта жон кирди. Мирмуҳсин, Умид. Сувонжон қўрага ҳужум қилган бир оч бўрини отиб олибди. С. Анорбоев, Оқсой. [Йўлчи] Бир сўмга ўзи нон-чой олиб ичди-да, оч қорнини бир қадар овутиди.. Ойбек, Танланган асарлар. Тўқлар кулади, очлар йиғлайди. Ойбек, Танланган асарлар.*

Оч биқин қ. биқин.

2 Очлик ҳолати. *Ҳамма халқ очдан ўлмаслик учун бир амал-тақал қилиб турибди. Ойбек, Танланган асарлар.*

3 Ингичка, кичик (тешикка нисбатан кичиклик-ингичкалик қилган соп, вал ва ш. к. ҳақида).

Соп оч келдн Соп ингичкалик қилди.

ОЧ II Кучсиз, нимхуш (ранг-тус ҳақида). *Оч кўк. Оч сариқ. Оч қизил. Ариқ бўйларида ўсган кўм-кўк майсалар қуёшнинг тиниқ нурида оч яшил рангда товланар, киши кўнглига ором, хузур бағишларди. С. Зуннунова, Олов.*

ОЧАМБИТИ айн. жағжағ.

ОЧАР Мевадан, кўпинча беҳидан пиширилган мураббо. *Икки қозонда тўғралган*

беҳидан очар пиширилди. М. Муҳаммаджонов, Турмуш уринишлари.

ОЧАРВОҲ I Баъзи халқларнинг эътиқодига кўра, гўрдан чиқиб, одамларнинг қонини сўрувчи арвоҳ.

2 кўчма Қонхўр, золим. *Бундай одамларни фанда очарвоҳ, яъни вампир дейишади. Ҳ. Шайхов, Туташ оламлар.*

ОЧАРЧИЛИК Иқтисодий таназзул ва танглик ёки табиий офат, турли сабаблар туфайли жамият миқёсида юзага келадиган кескин озиқ-овқат танқислиги; қаҳатчилик. *Очарчилик йиллари сомсапазларнинг сомсасини очлар олиб қочарди-да, тутиб олиб дўппосласа ҳам, бошини кийимига буркаб, сомсасини оғзидан қўймасди. Шукрулло, Сайланма.*

ОЧАТҚИ Очликдан озиб-тўзган; озгин. *Очатқи қўй. Оҳистахон тилингандан тиланган ёмон, дедию ичида, саратонда соясини одамдан азиз тутадиган нокас йигитга гинахонлик қилганидан ўкиниб кетди. Уғлининг цехига кирди. Бошлаб ҳар кўрганда «менга ҳам ўзингизникига ўхшаган келин топиб берасиз», деб юрган очатқигина, ўзи хунук, истараси иссиқ йигит чопиб келди. Шухрат, Умр поғоналари.*

ОЧАҒА Бировга тегишли, қарашли одам. *Мана бу ерда гап бор. Агарда биронта нозик иш чиқиб қолса ва ҳам ҳоким тўра билан хилватда гаплашмакни тақозо қилинса, ҳамма гапни Зуннунбой орқали ноийб тўра-нинг очағаларига айтилсин. Чўлпон, Кеча ва кундуз.*

ОЧЕРЕДЬ [р. очерель < чередовать «навбатлашмоқ, алмашланмоқ» фл. дан] **1** ҳарб. Автомат ёки пулемётдан бир йўла, бирин-кетин отилган ўқ; шу зайлда ўқ узиш. *Узоқда гоҳ-гоҳ автомат очередами тарақлаб қўяди. Ойбек, Қуёш қораймас. Ун иккита патроннинг ўн биттасини уч қисқа очередда нишонга жойлади Элмурод. Шухрат, Шинелли йиллар.*

2 с. т. Навбат. *Очередь олмоқ.*

ОЧЕРК [р. очерк < очеркать «таърифлаб, тасвириб бермоқ, баён қилмоқ; чизмоқ» фл. дан суффиксиз ҳосил бўлган от] Ҳаётий фактларнинг қисқача тасвиридан иборат кичикроқ бадиий асар. *Ҳарбий очерк. Биографик очерк. Библиографик очерк. Ибодов газетадаги очеркни кўриши билан Аҳмедовнинг олдига чопди. С. Зуннунова, Олов.*

-Ука — деди шоир, — штабдан тайинлашди, сен тўғрингда бир галати очерк ёзмоқчиман. С. Аҳмад, Уфқ.

ОЧЕРКИСТ айн. очеркчи. 1942 йилгача баъзан «Қизил Ўзбекистон»да, баъзан «Муштум», «Ер юзи» журналларида адабий ходим, очеркист, фельетонист, секретарь бўлиб хизмат қилдим. Ф. Фулом, Танланган асарлар.

ОЧЕРКЧИ Очерк ёзиш билан шуғуланувчи журналист ёки адиб. -Э, бари бир эмасми, — деб қўл силтади Тўпори, — шоир билан очеркчининг фарқига бормасам ҳам, сиз билан Қурбононинг фарқига бораман.. М. М. Дўст, Лолазор.

ОЧИЛИБ-ЁЗИЛИБ айн. очилиб-сочилиб. [Генерал] Расмиятчиликка йўл қўймай, очилиб-ёзилиб ўтиришни буюрди. З. Фатхуллин, Сўнмас юлдуз.

ОЧИЛИБ-СОЧИЛИБ Очиқ чеҳра билан, хурсандлик билан, ўйнаб-кулиб. Тўла кейинги вақтларда.. негадир очилиб-сочилиб юрмас эди. М. Исмоилий, Бизнинг роман. Жўравой Нафиса билан шунчаки гаплашиб турарди. Суннат билан Жалил ширакайф эдилар. Ана шу ширакайфликданми, бегона одамнинг ўз курсдошлари билан очилиб-сочилиб гаплашиб тургани ҳақоратдек оғир боғди. «Ёшлик».

ОЧИЛМОҚ 1 Очмоқ 1-8 фл. мажҳ. н. Эшик очилди. Сандиқ очилди. Йўл очилди. Янги мактаб очилди. Қинғир иш қирқ йилдан кейин ҳам очилади. Мақол. ■ Бир ҳафтага қолмай каналга сув очилади. С. Аҳмад, Уфқ. Мана шу тоғларнинг икки тарафидаги адирлар, Макрит чўлидан очилган ерларнинг ҳаммаси меники, менга қарайди. С. Аҳмад, Жимжитлик. Ҳайкалчанинг очилиш маросими бўлиб ўтганидан беҳабар, парда тутушига ҳожат қолмаганини билишмайди. М. М. Дўст, Лолазор. Яқинрингизда ўлмақ учун.. душман томонидан уйингизга очилган туйнукчага кирдим. А. Қодирий, Ўтган кунлар. [Ҳасанали] Узоқ ўйлагандан сўнг ишининг очилмай қолган қисмини ечишни бошқа вақтга қолдирмоқчи бўлди. А. Қодирий, Ўтган кунлар.

2 Очмоқ 1, 2, 9-12 фл. ўзл. н. Фикри очилди. Ранги очилди. ■ Келди очилур чоғинг, ўзлигинг намоён қил, Парчалаб кишанларни, ҳар томон пиришон қил. Ҳамза. Бу пахта экан-ку, ҳали шошмай туринглар, очилган хотинлар бошқатдан паранжига киради. С.

Аҳмад, Ҳукм. Томлардаги.. лолалар қипқизил бўлиб очилди. М. Исмоилий, Фарғона т. о. Сўнги қуёшли кунларда пахта яна қийғос очилди. И. Раҳим, Ихлос.

3 Бошланмоқ, иш бошламоқ. Эртага шу муаммога бағишланган олимларнинг йиғилиши очилади. С. Зуннунова, Кўк чироқ.

4 Кўринмоқ, намоён бўлмоқ. Йўлчининг кўзига жаннатдай катта боғ манзараси очилди, томоша қилиб, кекса тоғанинг орқасидан юра берди. Ойбек, Танланган асарлар. Агар мана шу Музлоқ тоғнинг.. сиртига чиқилса, кишининг кўзи олдида бири-бирига зид икки дунё очилади. М. Исмоилий, Фарғона т. о.

Башараси очилмоқ Кирдикори, айби, аслида кимлиги фош бўлмоқ. Тўғри, Раҳимжон Мўйдиновга тўхмат қилганларнинг авра-астари ағдарилди, ҳақиқий башараси очилди. «Муштум».

5 Хафалиги ёки қаҳр-ғазаби йўқолиб хушнуд бўлмоқ, ёзилмоқ. -Гоҳо бирон киши [бувимнинг] кўнглини оғритганда, мен унга бир оғиз юмшоқ гап айтсам, ўша замони очилиб кетақоларди, — деди Кенжа. Ҳ. Назир, Асарлар. Элмурод унинг [Гулсумнинг] бу қадар очилиб кулганини биринчи кўриши эди. У бундан роҳат қилди. П. Турсун, Ўқитувчи.

Баҳридили очилмоқ Кайфияти яхши бўлмоқ, чеҳраси ёришмоқ. Шийпон орқасидаги гўзаларни кўриб, Пайғомовнинг баҳридили очилиб кетди. С. Нуоров, Майсаларни аёз урмайди. **Чеҳраси очилмоқ** айн. баҳридили очилмоқ.

6 Ҳуснига ҳусн қўшилиб, тобора чиройли бўлмоқ, гўзалашмоқ. Зуннуновнинг назарида Саодатхон янада очилиб кетганга ўхшайди. И. Раҳим, Ихлос. Қора кўйлак ичида бўғилиб ётган экансан. Қара, нақ шафтоли гулидек очилибсан, кел, пардоз қиламиз. Н. Сафаров, Шарқ тонги. Баширжон узоқроқдан келинга тикилиб тураркан: «Жуда очилиб кетибди», деб ўйлади. Н. Аминов, Қаҳқаҳа.

Бахтинг очилсин қ. бахт 2. Жағи очилмоқ Тўхтовсиз гапирмоқ; кўп, узоқ гапирмоқ. Ошно бир муддат жимиб қолди, лекин лаҳза ўтиб, тағин жағи очилди. М. М. Дўст, Лолазор. **Иштаҳаси очилмоқ** Иштиёқ билан овқат емоқ; -Ана энди, чарчоқ ҳам унутилади, иштаҳа ҳам очилади. Унинг гапи тўғри

чиқди. С. Аҳмад, Жимжитлик. **Кўзи очилмоқ** қ. **кўз**. Таъзимини еганим шу бўлдики, кўзим очилди, тушуниб олдим. С. Зуннунова, Олов. **Оғзи очилмоқ** Хайрон бўлмоқ. Бир ҳафтадан кейин қиз Жамолзоданинг устахонасига ташриф буюрди. У «Кўккўл тонги»ни кўриб, оғзи очилиб қолди. Ушанда кўргани ҳозирги полотнонинг олдида оддий эрмак эди, холос. «Ёшлик». **Ҳаво очилди** Ҳаво булутдан тозиланди. Осмонни қоплаган чанг-тўзон аллақачон ғойиб бўлди, ҳаво чарақлаб очилиб кетди. Ш. Рашидов, Бўрондан кучли.

ОЧИЛТИРМОҚ Очилмоқ 3-5 фл. орт. н. Пахтани очилтириб термоқ. Қирни очилтириб ювмоқ.

ОЧИН-ТЎҚИН рвш. Тўйиб овқат емасдан, чала-ярим овқат еб, гоҳ оч, гоҳ тўқ ҳолда. Умиднинг кайфи настлиги ва бунинг устига анчадан буён очин-тўқин юрганини эшитган Ҳотам, жилла бўлмаганда шу бугун, юрагидан алам туғён ураётганда дардлашиб малҳам бўлай, дегандек атай келган эди. Мирмуҳсин, Умид.

ОЧИНҚИРАМОҚ Сал очикмоқ, очлик сеза бошламоқ.

ОЧИРИЛМОҚ Очирмоқ фл. мажҳ. н. Инкубаторда ун минг жўжа очирилади. Қурт уруғи очирилади.

ОЧИРМОҚ Очмоқ 12 фл. орт. н. Жўжа очирмоқ. Қурт уруғини очирмоқ.

Кўз очиргани қўямаслик 1) атрофга қараш, кўриш учун имкон бермаслик. Августларга бориб, араваларнинг ғилдирагидан, отларнинг туёғидан кўтарилган чанг кўз очиргани қўймайди. С. Аҳмад, Хукм; 2) тинчлик бермаслик; у-бу деб доим хафа қилмоқ, аччиғини келтирмоқ (яна қ. **кўз очирмаслик**. қ. **кўз**). Уялинг! Илгарилари, бўқоғинг бор, деб кўз очиргани қўймак эдингиз-ку! Неча марта йиғлатангиз? А. Қаҳҳор, Жонфигон.

ОЧИҚ 1 Ҳеч нарса билан бекитилмаган, тўсилмаган. Икки томони очик шийпон. Тepasи очик йўлак. ■ Искандар эса қизил дастурхонни яна хазина устига ёпди-да, тоқчадан соқол оладиган асбобларини олиб, очик шийпонга чиқди. М. Мансуров, Ёмби.

2 Бекитилмаган, маҳкамланмаган, қулфланмаган. Очик дарвоза. Очик дераза.

3 Яланғоч. Очик бадан. ■ Полиция бошлиғи.. пишиқ ўрилган чарм қамчин билан Йўлчининг очик кўкрагини ва бўйинини узиб олди. Ойбек, Танланган асарлар.

ОЧИҚ ЭШИК Ҳамма учун кириш мумкин бўлган жой.

4 кесим өзф. Берк эмас, очилган ҳолда. Дарвоза ланг очик. ■ Эшик ва даричалар очик бўлса ҳам, уйда биров кўринмади. А. Қодирий, Ўтган кунлар. Кечаги боржом оғзи очик қолибди, гази чиққандан кейин бир пулга қиммат. А. Қаҳҳор, Санъаткор.

5 Ёрилган, очилган. Мана бу очик пис-талар ҳам ўзимизнинг тоғларники! Ш. Холмирзаев, Т. Усмонов, Сўнмас ўт.

6 кўчма Равшан; аниқ; аён; кўриниб, билиниб турадиган. Қишлоқ аҳолиси Мулла Ўсар деган очик фикрли ўрта деҳқонни комиссар қилиб сайлади. М. Ўринхўжаев, Унутилмас кунлар. У ўзини жуда эркин тутар ва ҳар бир саволга очик, тўғри жавоб берар эди. Ойдин, Икки кўзи шунда. Қоронғу бўлса ҳам, Ўзбек ойимнинг тусидаги шодлик белгилари очик кўриниб турар эди. А. Қодирий, Ўтган кунлар.

7 Тўғри, ҳақиқий. Очик гап.

ОЧИҚ ГАПИРМОҚ (ёки айтмоқ, сўзламоқ) Яширмасдан, ҳаммасини айтмоқ; тўғриси-ни айтмоқ. Элмурод кўнглидагини очик ай-тиб қўя қолди. П. Турсун, Ўқитувчи. Очиғи-ни айтганда, мен сиз билан сира учрашмоқчи эмас эдим. Н. Сафаров, Шарқ тонги.

8 Ҳеч кимдан яширилмаган. Очик муносабатлар. Очик қаршилиқ. ■ Душманлигини очик билдириб, қайтага ҳаётимни хавф остига қолдирдим чамамда. «Шарқ юлдузи».

9 кўчма Ҳамма, хоҳлаган киши қатнашса бўлаверадиган. Очик савдо. Очик суд. Очик чемпионат.. ■ Ўрмонжон.. активлар иштироки билан бўладиган очик партия мажлисининг вазифасини тушунтириб берибди. А. Қаҳҳор, Қўшчинор чироқлари. Шу ҳафта ичи очик дарс ўтказишни бошлаймиз. С. Зуннунова, Олов.

10 Ранги тиниқ, шўхшанг. Очик чит.

11 Хушфёъл, юрагида кири йўқ; хушчақ-чақ. Очик қиз. ■ У [Али] ичи кирсиз, серкулги, очикқина бир йигит.. эди. А. Қодирий, Ўтган кунлар.

ОЧИҚ Кўнги ёки **кўнгли очик** қ. **кўнги**. **Очиқ чехра** қ. **чехра**.

12 тар. Паранжи ташлаган, озодликка чиққан (хотин-қизлар ҳақида). Бир куни беш-олтита очик хотин орасида тушиб қолиб, не вақтгача кўнглим ғаш, таъбим кир бўлиб

юрдим. А. Қаҳҳор, Майиз емаган хотин. *Йиғилганларнинг кўпчилиги хотин-қизлар бўлиб, улар орасида очиклар ҳам, паранжчилар ҳам бор эди.* С. Зуннунова, Гулхан.

Бети (ёки юзи) **очик** Уят-номусни билмайдиган, беҳаё, одобсиз. **Боши очик** 1) ҳали унаштирилмаган, никоҳ қилинмаган. *Энди у [Мунаввар] боши очик қиз бола эмас. Оилали.* С. Анорбоев, Мехр; 2) ҳеч ким ҳали савдо қилиб олмаган, сотилмаган. *Боши очик мол. Кўзи очик* Ўлмаган, ҳаёт, тирик. *Лутфинисанинг кўзи ҳали очик, танаси совмаганди.* С. Аҳмад, Уфқ. **Масалани очик қолдирмоқ** Масалани ҳал қилишни кейинга қолдирмоқ. **Орани очик қилмоқ қ. ора. Очик акциядорлик жамияти иқт.** Иштирокчилари ўзларига қарашли акциялардан эркин фойдаланиши мумкин бўлган жамият. **Очик бозор** Товарнинг бошқа ердан эркин келтирилиб ва чегараланмаган миқдорда олди-сотди қилиниши. **Очик бўғин тлш.** Унли товуш билан тугаган бўғин. **Очик денгиз** Барча давлатлар эркин фойдаланадиган денгиз саҳни. **Очик хат** Ҳамма ўқиши учун одатда матбуотда эълон қилинадиган расмий хат. **Очик ҳаво** 1) булутсиз, беғубор осмон. *Совуқ бир оз юмшаб тушган, қуёш очик ҳавода ҳаракат этмоқда эди.* А. Қодирий, Ўтган кунлар; 2) усти ёпилмаган жой, ташқари, дала. *Мана чинакам болалик: ...мактаб саҳнида очик ҳавода физкультура машқлари қилиш, шашка-шахмат ўйнаш, кўшиқлар айтиш.* П. Турсун, Ўқитувчи. **Чакаги очик айн. жағи очик қ. жағ. Кўли очик қ. кўл.**

ОЧИҚАРЛИ с. т. Киши оч қоладиган, еярли бирор нарса топилиши мушкул. *Давлат тўғрисида бўлса, очиқарли ерда эмасми.* А. Қодирий Ўтган кунлар.

ОЧИҚГҲЙ кам қўл. Очигини айтадиган, юрагидагини ҳеч яширмайдиган; тўғрисиўз.

ОЧИҚДАН-ОЧИҚ рвш. 1 Аниқ-равшан, шак-шубҳасиз. *Бу очиқдан-очик тухмат.* ■ *Дарҳақиқат, унинг [Зайнабнинг] бу иши очиқдан-очик болаларча кетган эди.* А. Қодирий, Ўтган кунлар.

2 Ошкора, намоийшкорона; рўйирост. *Очиқдан-очик қаршилик қилмоқ.* ■ *Очиқдан-очик Акбаровга қаратилган бу истеҳзо Зуфар Ҳакимовични алланечук яйратиб юборди.* П. Қодиров, Уч илдиш.

3 Тап тортмасдан, ибо қилмасдан, уялмай-нетмай. *Очиқдан-очик сўқинмоқ.*

ОЧИҚ-ЁРУФ айн. **очик-ойдин.** Ҳа-а, энди ўзинга келдинг, очик-ёруф гапиравер. *Искандар, мавриди келганини сезиб, сўради: -Кўнғироқ қилдими?.* М. Мансуров, Ёмби.

ОЧИҚЛИК 1 Очик эканлик; равшанлик; ошкоралик. *Ҳавонинг очиклиги.* ■ *Одамзоднинг фитнаси ёмон бўлади. Кўнгли очикликка не етсин.* Мирмуҳсин, Умид.

2 Очик, эркин жой; эркинлик. *Зиндондаги ширин-шарбатдан очикликдаги ситам, ғурбат яхшироқмасми?* Ҳамза, Майсаранинг иши.

3 Оралиқдаги жой, оралиқ. *Товуш пайчалари ўртасидаги очиклик.*

Кўзим очиклигида Тириклигимда, ҳаётлигимда.

ОЧИҚМОҚ Оч қолмоқ, қорни очиб, овқат тусаб қолмоқ. *Йўлдан очикиб келган кишининг димоғига қилинаётган овқатнинг ҳиди кирганда, тезроқ пиша қолса эди, деб безовта бўлади.* М. Исмоилий, Фарғона т. о. *Шавкат кечқурун туз тотмагани учун қаттиқ очикқанди.* Қ. Кенжа, Тоғ йўлида бир оқшом.

ОЧИҚ-ОЙДИН 1 Аниқ-равшан; шубҳасиз. *Очик-ойдин масала. Очик-ойдин жавоб.* ■ *У [Нури] келин бўлиб боргуси оиланинг бойлигини ўйламаган, чунки бу нарса у учун очик-ойдин эди.* Ойбек, Танланган асарлар.

2 Очик, рўйирост. *Йўлдош боланинг эси-настлигига ишонмаса-да, буни Хайрига очик-ойдин айтолмади.* «Ёшлик». *Мана ви сабил аризада очик-ойдин ёзиб қўйилган.* С. Аҳмад, Ҳукм.

ОЧИҚ-ОШКОР рвш. Яширмасдан, рўйирост, ошкора. *У онасига ёзган хатида аҳволни очик-ошкор айтди.* С. Зуннунова, Кўк чироқлар.

ОЧИҚ-СОЧИҚ айн. **очик-чочик.** Уйим шундоқ очик-сочик қолган эди-да. Т. Ашуров, Оқ от.

ОЧИҚТИРМОҚ Оч қолдирмоқ. *Ернинг кўпи очиктиради, молнинг — ози.* «Қанотли сўзлар».

ОЧИҚЧА айн. **очикчасига.** У [Гулнор] билан очикча сўзлашув керак. Ойбек, Танланган асарлар.

ОЧИҚЧАСИГА рвш. 1 Яширмасдан, тўппа-тўғри, очик, рўйирост. *Очикчасига тан-*

қид қилмоқ. ■ Мирвали Эралининг сўнги сўзидан кейин айтар гапини йўқотди, «энди очикчасига гаплашиш пайти келди», деб ўйлади. С. Аҳмад, Жимжитлик. Шундай экан, кел, очикчасига гаплашайлик. Т. Ашу-ров, Оқ от.

2 Тап тортмасдан, уялмасдан; ҳаёсизлик билан. -Рост, қизлар, — деди Қумри очик-часига ўтиб, — вофуруш Қилтириқ махсумни ўша вақтдаёқ ахта қилдирган, дейишади. А. Мухтор, Опа-сингиллар.

ОЧИҚ-ЧОЧИҚ Йиғиштирилмаган, бесаранжом. Ҳамма нарса очик-чочик эди. ■ -Кори хайри бор одам ҳам уйни шунақа очик-чочик ташлаб кетадими?! — деди Каромат. И. Раҳимов, Чин ҳаёт.

ОЧИҚҚҮЛЛИК Сахийлик, қўли очиклик. Очикқўллик доим яхшилик келтиради. «Қанотли сўзлар».

ОЧИҒИ 1 Гапнинг тўғриси, тўғри гап, очик гап. Очигини айтганда. ■ Гапнинг очигини айтсам, бу ишда менинг ҳам, Тешавойнинг ҳам айбимиз бор. С. Аҳмад, Уфқ.

2 крш с. Тўғриси, очигини айтганда, гапнинг пўскаллasi. Очиги, ўзи туғилиб ўсган, ўрганган уйдан кетиш Қудратга осон эмасди. Ҳ. Назир, Сўнмас чақмоқлар. Таомилга қарши борган.. ўзгалар урфини ўткинчи ҳою ҳаваслар билан қабул қилаётган тенгдошларимизга, очиги, ачинамиз. Газетадан.

ОЧИҒИЧА рвш. 1 Очик, ёпилмаган ҳолда; очиклигича. Эшик очигича қолди. Қозон очигича турган экан.

2 Ҳал қилинмасдан, ечилмаганича. Иккинчи масала очигича қолдирилди.

ОЧКО [р.] 1 Ҳайинда, спорт мусобақаларида ютуқни белгилаш учун бериладиган ҳисоб бирлиги. Ҳшанда фақат бир киши — ёш шашкачи Шариф Ёқубов у билан очкони бўлишиб олди. Газетадан. Раҳим хиёл ўйланиб қолди. Энди у, икки метрга сакраб, етти очко олишни эмас, балки биратўла олти катакка сакраб, ўн бир очко эгаллашни чамаламоқда эди. Ҳ. Назир, Сўнмас чақмоқлар.

2 с. т. Қарта ўйинининг бир тури; йигирма бир. Очко ўйнамоқ.

ОЧКЎЗ 1 Еб тўймайдиган, нафсини тилмайдиган, нафси бузуқ, суқ. Очкўз бўри. Очкўз ит. Очкўзда бўлса ҳам — йўқ, Сахийда бўлмаса ҳам — тўқ. Мақол.

2 Бирор нарсага ўч, ҳар нарсага ортиқча хирс қўйган. Соҳиб қори молпараст, очкўз одам. И. Раҳим, Чин муҳаббат.

ОЧКЎЗЛИК Очкўзга хос хусусият; хатти-ҳаракат. Очкўзлик қилмоқ. ■ Аброр магазинга кирган харидорларни очкўзлик билан шилиш пайида бўларди.. А. Кўчимов, Ҳалқа.

ОЧЛИК 1 Оч қолишлик, оч эканлик, оч ҳолат. Очликдан сулаймоқ. Бир очликнинг бир тўқлиги бор. Мақол. ■ Зиркнинг яшил барглари ҳузурбахш тағмга эга бўлиб, кишини чанқаш ва очликдан сақлайди. «Фан ва турмуш».

Очлик эълон қилмоқ Сиёсий, иқтисодий ижтимоий норозилик белгиси сифатида овқат ейишдан бош тортмоқ. Борди-ю, очлик эълон қилиб, берганларини емай, биратўла нариги дунёга равона бўлиб қолсам-чи. Ҳ. Тўхтабоев, Ширин қовунлар мамлакати.

2 айн. **очарчилик.** Революциядан кейинги илк йиллар. Вайрона қилинган мамлакатда очарчилик ҳукм сурарди. Т. Обидов, Юсуф-жон қизиқ.

ОЧМОҚ 1 Йўлни тўсиб турган нарсани бир томонга суриб, кўтариб қўйиб, кириш ёки чиқишга имкон туғдирмоқ. Дарвозани очмоқ. Дерзани очмоқ. Эшикни очмоқ. ■ Ўғилларга тайинлаб қўйган эдим, бориб дарвозани ланг очишди. М. М. Дўст, Лолазор.

2 Олиш-қўйиш йўлини, оғзини бекитиб турган тиқин, қопқоқ, қулф ва ш. к. ни кўтариб, суриб қўймоқ, ипини бўшатмоқ, ечмоқ ёки олиб ташламоқ. Чемоданни очмоқ. Шишанинг оғзини очмоқ. Қопни очмоқ. ■ У [Аҳмаджон] эшик ёнига чўнқайиб ўтирдида, милтигининг затворини бир неча мартаба очиб ёпди. А. Қаҳҳор, Олтин юлдуз. Қори тугунчани очиб, ўриқдан иккитасини Сидиқжонга узатди. А. Қаҳҳор, Қўшчинор чироқлари.

3 Ўралган, қопланган, паналанган ёки кўмилган нарсаларни бекитиб, ўраб, қоплаб турган нарсадан холи қилмоқ, яланғочламоқ. Ток очмоқ. Кўкракни очмоқ. ■ [Гуландом] Атлас қўйлакнинг кенг енгини тирсакка қадар шимариб.. гўзал билакларини очиб, дуторни чертди. Ойбек, Танланган асарлар. Ҳамма кулиб юборди, Кўрпани бир оз очиб қараган Гулшан ҳам.. ичи қотиб қолди. А. Қодирий, Меҳробдан чаён. Табиб кетди, Отабек телбаларча югуриб, Қумуш-

нинг бошига келди, юзини очиб, манглайини босди ва ўпди. А. Қодирий, Ўтган кунлар.

4 Кўтармоқ, сурмоқ ёки олиб ташламоқ (парда, ниқоб ва ш.к. ни). *Пардани очмоқ.*

5 Тўсиқни, ғовни олиб ташламоқ, тақиқни бекор қилиб, ўтиш, юриш учун имкон бермоқ. *Йўлни очмоқ. Чегарани очмоқ.*

■ *Мирвали, Жайрона қочиб кетгандан кейин, йўлни портлатиб, бошқа томондан йўл очган эди. С. Аҳмад, Жимжитлик.*

6 Бирор нарсанинг ҳаракатига йўл бермоқ, йўл қўймоқ, қўйиб юбормоқ, бўшатмоқ. *Газни очмоқ. Жўмракни очмоқ.* ■ *Яна кечагидек сувни очиб, ўзи уриб кетди, деб ўлтирадиган бўлсанг, сен мендан яхшилик кутма!* Н. Сафаров, Уйғониш.

7 Ёзмоқ, ёймоқ, кермоқ (тахланган, букланган, йиғилган, юмилган нарсалар ҳақида). *Зонтикни очмоқ. Кафтини (қўлини) очмоқ. Қанотини очмоқ. Ёмондан қоч, яхшига қўлоч оч. Мақол.* ■ *Кумуш айвон томонга қайтар экан, ошиқиб хатни очди. А. Қодирий, Ўтган кунлар. Режиссёр яна дафтари-ни очиб, бир нималарни ёзиб қўйди. А. Қаҳҳор, Картина.*

8 Куриб, солиб, битириб, ишга туширмоқ; расмий равишда ишга туширмоқ. *Мактаб очмоқ. Санаторий очмоқ. Янги йўл очмоқ. Кўргазмани очмоқ.* ■ *[Ҳасанали] ..ғузардан баққоллик дўкони очган эди. А. Қодирий, Ўтган кунлар. Мени ғафлат уйқуси босмаган бўлса, нега бир газлик пахсани кесар эмишлар-да ва бошимдан туйнук очар эмишлар-да, мен ҳеч нарса сезмас эмишман!* А. Қодирий, Ўтган кунлар.

9 Янги бир нарса яратмоқ; кашф этмоқ, топмоқ. *Янги юлдуз очмоқ. Кон очмоқ.* ■ *Ахир сиз билан биз катта иш қиляпмиз, ўзбек хотин-қизлари ҳаётида бутун бир давр очяпмиз. А. Мухтор, Опа-сингиллар.*

10 Кўпчилик иштирокида бирор ишни бошлаб бермоқ, бошлаб юбормоқ; очиқ деб эълон қилмоқ. *Мунозара очмоқ. Митингни очмоқ.* ■ *Ўзбек ойим қора кийиб, таъзия очди. А. Қодирий, Ўтган кунлар. Мажлисни Иброҳимов очди ва кун тартибини эълон қилди. А. Қаҳҳор, Қўшчинор чироқлари. Бувиси аза очиб, ҳовлида хотинларнинг чувос ишлагани ҳамон қўлоғида. Мирмуҳсин, Қаҳрамоннома.*

11 Нарса, воқеа, ҳодиса ва ш.к. нинг қандайдир томонларини ёритиб баён, ошкор

қилмоқ, аниқламоқ. *Масаланинг моҳиятини очмоқ. Асар қаҳрамонларининг характерини очмоқ. Ҳақиқатни очмоқ. Гапнинг тагини гап очар. Мақол.*

12 Очиқ изҳор қилмоқ, маълум қилмоқ, айтмоқ. *Йўлчи аксар вақт, ишдан қутулгач, у [Қоратой] билан вақт кечирар, қайғусини, севинчини унга очар эди. Ойбек, Танланган асарлар. Асар улар [Тешабойлар] бу мақсадларини очиб айтмаётган бўлсалар, балки бунда бир сирлари бордир. М. Исмоилий, Фарғона т. о.*

Гап очмоқ Гап бошламоқ; бирор воқеа, ҳодиса, нарса ёки киши ҳақида гап бошламоқ. **Юрагини (ёки дардини) очмоқ** Юракдаги қайғу-ҳасратини, орзу-умидларини, тилак-истагини билдирмоқ. *Кимга суянсам, дардимни очсам, у ҳам менга ўхшаган чиқади. С. Аҳмад, Уфқ.*

13 Фош қилмоқ, ҳаммага маълум қилмоқ. *Жиноятни очмоқ. Камчиликларни очмоқ. Сир(нинг) учини сўз очар. Мақол. Ола товуқ сомон сочар, ўз айбини ўзи очар. Мақол.* ■ *«Йўқ, бунда бир сир бор. Мен бу ишни, албатта, очаман», деб ўйлар эди Нури. Ойбек, Танланган асарлар.*

14 тар. Паранжи ташлатмоқ, паранжисиз юришга имкон ёки рухсат бермоқ. *Мулла Норқўзи жаҳл билан унинг [хотинининг] аламини босмоқчи бўлди: -Э, ҳали мен сени очаман деб юрибман-ку. А. Қаҳҳор, Майиз емаган хотин. Яқин орада хотин-қизларнинг ёппа очилишини ташкил қилиш керак, тушундирингизми? С. Зуннунова, Олов.*

15 Ҳуснига ҳусн қўшмоқ, гўзаллаштирмоқ, кўрк бермоқ. *Ловуллаган гилам уйни жуда очиб юборди. Кийим қиз ҳуснини янада очибди. Эр юзини ер очар, ер юзини эр очар. Мақол.*

16 Кучайтирмоқ, ривожлантирмоқ, ўс-тирмоқ. *Киши фикрини китоб очади. Иш иштаҳа очар, дангаса ишдан қочар. Мақол.* ■ *Мактаб, анжуман борғил, унда фикр очиб гоҳи, Илму фан тиғи бирлан жаҳл бағрини қон қил. Ҳамза.*

17 Тухум босиб, ундан жўжа чиқармоқ. *Товуқ ўнта жўжа очибди. Мусича бола очибди.* ■ *-Биз ёруғ дунёни кўриш учун туғилганмиз, Турғуной! - деди Мастон. - Биз товуқ эмасмизки, қандай тухум бостирса, шуни очиб чиқарсак. А. Қаҳҳор, Мастон.*

Америка очмоқ с. т. Аллақачон маълум бўлган нарсаларни янгилик деб эълон қилмоқ. **Биқинингдан** (ёки қулоғининг тагидан) дарча очиб қўйми қ. дарча. **Очди қилмоқ** Ким ҳақ, ким ноҳақлигини кўпчилилик ўртасида ҳал қилмоқ. *Бутун гапларни орада очди қилмасак, таъна-тавбалардан қутулмайдиганга ўхшайман.* Ҳ. Назир, Ўтлар тутаганда. **Фол очмоқ** Тахмин қилмоқ; бирор ҳолат, ҳодиса ёки нарса ҳақида асоссиз гапирмоқ. *Одамлар аниқ бир тасаввурга эга бўлмагани учун, ҳар ким ўз ҳолича фол очарди.* Н. Сафаров, Оловли излар. **Қорни очмоқ** Очиқмоқ, оч қолмоқ. **Қўриқ очмоқ** Ер ўзлаштирмоқ; фойдаланилмаган ерга экин экомқ. *Қўриқлар очилиб, ҳали сизот сувлар оқиб кетадиган қувурлар ётқизилмай туриб, уларга ҳам чигит экилди.* М. М. Дўст, Лолазор.

ОЧ-НАҲОР рвш. 1 Эрта билан нонушта, наҳорлик қилмасдан. *Онамга аччиқ қилиб, мактабга оч-наҳор кетдим.* С. Анорбоев, Ҳамсуҳбатлар.

2 Очин-тўқин, оч. *Ҳар кун қармоқ ташлайман, ўғлим оч-наҳор келса, тўйдираман деб.* Ҳ. Фулом, Машғал.

ОЧОФАТ Ўтакетган очкўз, ебтўймас, баднафс. *Очофат ит.* ■ **Қоп-қора паишалар** болакайнинг оёқларига, кир юзларига очофатдай ёпишар, келинойим эса ўчоқ бошида ҳеч нима эшитмаётгандай, нимадир нишираётгандай. А. Кўчимов, Ҳалқа. *Очофат тиши билан ўзига гўр қазийди.* «Қанотли сўзлар».

ОЧ-ЯЛАНҒОЧ Овқат ва кийимга ёлчи-маган, зор, муҳтож; тирикчилиги оғир, қашшоқ. *Оч-яланғоч, эшикларда кўплар гадо, Кўролмайн бир дақиқа завқу сафо.* Файратий.

ОЧҚАМОҚ шв. Очиқмоқ. *Бир куни тулки бўрининг олдига келса, бўри жуда очқаб турган экан.* «Эртақлар».

ОЧҚИЧ айн. калит.

ОШ I [ф. آش — ёвғон шўрва, хўрда; овқат] 1 Пиширилган иссиқ овқат. *Угра ош. Хўрда ош.* ■ **Совчиларни** яхши сўзлар ва қуюқ-сууюқ ошлар билан жўнатиб, иккинчи келишига ўйлашиб жавоб берадиган бўлдилар. А. Қодирий, Ўтган кунлар.

2 Умуман, ҳар қандай овқат, таом. *Ош тузи. Ошинг ҳалол бўлса, кўчада ич!* Мақол. *Элга берсанг ошингни, Эрлар силар бошингни.* Мақол. *Жон бўлса, жаҳон топилар, Ош бўлса, қозон топилар.* Мақол. ■ **Тўра қозон**

бошидан мис товоқда сууюқ ош олиб келиб, чордана қуриб ўтирди. Н. Фозилов, Дийдор.

3 айн. палов. *Ош дамламоқ.* ■ **Илгарилари лағмон ёки ош ейиш** учун нуқул корхонадан ташқарига чиқишига мажбур бўлар эдик. Газетадан. *-Ўлтиринг, ўлтиринг, меҳмон! — деди уста Фарфи. — Ошга сабзи босилди-пишиди.* А. Қодирий, Ўтган кунлар.

Юртга ош бермоқ Тўй ва б. маъракаларда катта қозонда ош дамлаб, юртни зиёфат қилмоқ. *Ана холос, қози поччанг юртга ош бераётган бўлсалар, туянинг думи ерга тегибди-ку.* М. Исмоилий, Фарғона т. о.

4 этн. Баъзи муносабатлар билан ўтказиладиган зиёфатлар номининг таркибий қисми, мас. *қиз оши, хотин оши, арвоқ оши, маслаҳат оши.*

Ош бўлсин Еган-ичганинг татисин, сингин, ёқсин каби маъноларда ишлатиладиган ибора. *Зарра бировнинг ҳақи ўзгага ош бўлмагай, Охири шармандалик, кимки ҳазар қилмаса.* Ҳабибий. **Ош қилмоқ** 1) ҳазм қилмоқ, сингдирмоқ; 2) бировнинг мolini, пулини еб кетмоқ, ўзлаштириб юбормоқ. **Оғзидаги ошни олдирмоқ қ. олдирмоқ.**

ОШ II махс. Тери опшанда ишлатиладиган модда.

ОША I **Ошмоқ** фл. рвдш. *Орзулари амалга оша боилади.*

2 кўм. (б.к. билан) Устидан ёки ичидан ўтиб; орқали. *Алимардон унга елкаси оша қаради.* Ў. Ҳошимов, Қалбингга қулоқ сол. *Қалам ва қалб соҳиби бениҳоя хилма-хил йўллар ва сўқмоқлар оша бетиним ўз чўққисини излайди, меҳнат ва машаққат билан унга етади.* Ш. Тошматов, Тонгдаги қўланка.

3 кўм. (б. к. билан) Давомида, мобайнида, бўйи. *Чақалоқлар оч ва яланғоч, Ер ва сув деб ўтди деҳқонлар, Йиллар оша, асрлар оша Ҳўкм сурди шундай замонлар.* Э. Раҳим.

4 Орадан маълум вақт ўтказиб, орада маълум вақт қолдириб. *Кун оша. Ой оша. Йил оша.*

5 рвш. шв. *Жуда, ўта; ҳаддан ташқари. Хур-ойимнинг дарди оша ёмондир, Рустамни кўрмоғи унинг гўмондир.* «Рустамхон».

6 рвш. шв. Узок, йироқ, бегона (юрт, эл, мамлакат ҳақида). *Оша юртдан келдим сени сўроқлаб. Пиёда йўл юрдим, бағримни доғлаб.* Фозил шоир. *Оша юртдан келган экан зўравор, Бундай меҳмон, болам, сенга не даркор?* «Алпомиш».

ОШАЛАМОҚ айн. **ошамоқ 1.** *Марат қовурилган гўшт устидан тўғроғлиқ майда пиёз, пиёз орқасидан тузланган карамдан олиб ошалади.* Ж. Абдуллахонов, Хонадон.

ОШАМ Бир марта ошаш учун мўлжаллаб сиқимланган куюқ овқат (ош, шавла, норин ва ш. к.). *Биров бировни уйига таклиф қилса: «Чой қуйиб бераман, ош дамлаб берман», «Марҳамат қилинг, бир ошам ошимиз бор»,— дейди.* К. Маҳмудов, Қизиқарли пазандалик. *Бердибойнинг қорни ҳар қанча оч ва ўн беш кунлардан буён иссиқ кўрмаган эсада, олдига қўйилган паловдан бир-икки ошам олиб, томоғидан нарига ўтказолмади.* А. Қодирий, Кичик асарлар.

Бир (ёки бир-икки) ошам Озгина, арзимаган. *Афанди мардикорчилик қилар эди, бир хасис одам уни ярим танга пул, бир ошам ошга баҳолашди.* «Лағифалар».

ОШАМЛАМОҚ Ошам-ошам сиқимлаб олиб емоқ. *Эр-хотин лаганга қўл қўзиб, ошамлаб ея бошлашди.* Р. Файзий, Сен етим эмассан.

ОШАМОҚ 1 Қўл билан ошамлаб олиб емоқ. *Паловни ким ёмон кўрарди, лекин профессор Обидийчалик унга бино қўйиб, чиройли ошайдиган одамлар кам бўлса керак.* Мирмуҳсин, Умид. *Қизил чиллақини иштаҳа билан ошаб, сўзни давом эттирди* Фазлиддин. Ойбек, Танланган асарлар.

2 Умуман, емоқ. *Нонсиз яшаб бўлмас, гапни ошаб бўлмас.* Мақол. *Яхши бўлсанг яшарсан, насибанени ошарсан.* Мақол.

3 Бировнинг қўлидан бир ошам ош емоқ.

4 этн. Зиёфатда бировнинг қўлидан бир ошам ош еб, галдаги зиёфатни ўз устига олмоқ.

Ёшини яшаб, ошини ошаган қ. ёш II 1.

ОШАТМОҚ Ошамоқ фл. орт. н. *Ерга ошатсанг — ош битар, ошатмасанг — тош битар.* Мақол. ■ *Табаррук қўлингиз билан [ошдан] битта ошатингиз!* А. Қодирий, Ўтган кунлар.

ОШАМГИР айн. **дамгир.** *Иккита оқ пиёзни майда тўғради, унга пича мурч сепди, пиёзни гурунчининг бир чеккасига кўмиб, ошдамгирни ёпди.* Ойдин, Кўнгиш тўлдими, яхши йигит.

ОШЁН [ф. آشيان — уя, ин; уй, кулба, бошпана] кт. **1** Кўш уяси; ин. *Кўшлар ошёнидан учиб кетмишлар, Кеч кузак ҳайбати соя солганда.* А. Шер, Қадимги куй. *Чегара*

билмаган озод қалдирғоч Ошён топади бўғотимизда. Ғ. Фулом.

2 Ҳовли-жой, бошпана. *Мен у тарафларда ҳовли-жой йўқ бўлса керак, деб хаёл қилган эдим, йўқ, қишлоқ аҳли биз кетган сойликнинг икки лабини ошён тутган экан.* М. М. Дўст, Лолазор. *Ватан деган чоғда оддий ошён — Улан тўшагини англаганлар мўл.* А. Орипов, Йиллар армони.

3 кўчма Макон, эгалланган жой. *Лола деганимизда, қир-адирлар маликаси, лаъл бисотли гуллар ошённи кўз олдимишга келтирамиз.* Газетадан. [Бурут] *Шамол қанотида йўл олди хушнуд Ошёнидан узоқ-узоқ томонга.* А. Орипов, Йиллар армони.

ОШЁНА [ф. آشيان — ин, уя; уй, бошпана] кт. эск. Бинонинг юқори қавати; юқори қаватдаги хона.

ОШИРИЛМОҚ **Оширмоқ** фл. мажҳ. н. *Ўқитувчиларнинг малакаси оширилди.* ■ *Симхаев заводидаги ерлик ишчилар иш ҳақи оширилишини.. талаб этиб, иш ташладилар.* М. Исмоилий, Фарғона т. о. *Иш прокуратурага оширилган эди.* А. Муҳтор, Кумуш тола.

ОШИРМА Хамири оширилиб, кўпчи-тиб тайёрланган. *Оширма нон.* ■ *Оширма, яъни хамиртуруш солинган хамирда ҳар хил нон ёпиш мумкин.* Д. Сиддиқов, Лаззатли таомлар.

ОШИРМОҚ 1 **Ошмоқ 1–7, 9–10** фл. орт. н. *Ойликни оширмоқ. Товуқлар сонини оширмоқ. Ҳосилни оширмоқ. Дарё сувини баҳор тоширар, одам қадрини меҳнат оширар.* Мақол. ■ *Князь сув пулини уч баравар ошириб юборибди.* А. Қаҳҳор, Кўшчинор чироқлари. *Одамларнинг руҳини кўтариш, ҳосилдорликни ошириш керак.* Т. Ашуров, Оқ от. *Мавжуд корхоналарнинг ишлаб чиқариш қувватини ошириш билан янги объектлар ҳам барпо этилди.* «Фан ва турмуш».

Бошидан (ёки ўзидан, елкасидан) оширмоқ Масъулиятни бировга юклаб, ўзини ташвишдан, ишдан холи қилмоқ.

2 с. т. Бировга бериб, ўтказиб юбормоқ; пулламоқ, сотмоқ. *Жиноят ишини коптоксимон терговдан терговга, суддан судга ошираверди..* Газетадан. *Агар.. қутичани бирор ерга оширган бўлсанг, ҳали ҳам яхшиликча ўрнига қайтар, — деди Ҳожи бобо Шум болага.* Ғ. Фулом, Шум бола. [Марасул:] *Хуморхон шунгақ нарсаларга ўч, ушанга оширамиз.* А. Қаҳҳор, Оғриқ тишлар.

3 Бўрттирмақ, муболаға қилмоқ. Мақтовини оширмақ. ■ -Йўқ, сиз жуда ошириб юбордингиз, Сайфуллаҳўжа, — деди бошини чайқаб, — сизларникида кунига уч-тўрт маҳал эмас, бир маҳалгина иссиқ овқат ер эдим. П. Турсун, Ўқитувчи. Сидоров ошириб юборганини тушунди. Э. Самандар, Дарёсини йўқотган қирғоқ.

Оширмай-тоширмай Қандай бўлса ўша ҳолича; бўрттирмай, муболаға қилмай. Кунлар ўтаверди. Умид асло пинагини бузмади. Комиссияга бор ҳақиқат ганин оширмай-тоширмай айтди. Мирмуҳсин, Умид.

4 Маълум чегара ёки баландликдан ўтказмоқ. Бу сафар Ҳабибулло полвон Куллалик полвонни елкаси узра ошириб, отиб ташлади. Т. Ашуоров, Оқ от. Тўрт-беш метр баландга етганда, инқиллаб, қанордаги тупроқнинг ярмини елкасидан ошириб тўкади-да, қолганини дўннга опчиқиб кетади. С. Аҳмад, Уфқ.

Амалга оширмақ қ. амал 1. Ўйлаган режасини амалга оширмақ.

ОШИФТА [ф. آشفته — ҳайрон, лол бўлиб қолган; хижолатда қолган; ошиқ] кт. Севиб, мафтун бўлиб қолган; ошиқ, шайдо. Табиат ошифталарининг маълумотларига қараганда, дунё бўйича лоланинг 140 дан ортиқ тури қайд қилиниб, мамлакатимиз кўламида 83 тури рўйхатга олинган. Газетадан. Ўзбек тупроғидан келибман бу бор, Сенгадир ошифта қалбим сафоси. А. Орипов, Йиллар армони. Ошифта бу дил сатрини сайқалласа зора, Бўстон бўйи кокиллари, тўхтаган, менга навбат! Т. Тўла.

ОШИФТАЛИК Ошифта эканлик; мафтунлик. Одам бор экан, унинг идеалдаги барнолиги, ошифталиги паривашиги ҳар доим тараннум этилаверади, меҳнатдаю хуснда яккалиги куйланаверади. «Ёштлиқ».

ОШИФТАҲОЛ [ф. + а. آشفته حال] кт. Ҳаяжонга тушган, эс-ҳушидан адашган, паришонхотир. Харобат аро кирдим ошифтаҳол, Май истарга илкимда синган сафол. Алишер Навоий.

ОШИҚ I [а. عاشق — севувчи, севиб қолган; хуштор; мухлис] 1 Бировни жуда севиб, унга шайдо бўлиб қолган, бировга муҳаббат қўйган киши; хуштор. Ошиқи беқарор. ■ Муҳаббат дардига мубтало ошиқ, Сенга ҳавас билан боқурман чиндан. А. Орипов, Йиллар армони. [Тухфа:] Мирзо Анвар-

га ошиқ бўлган экансан, Нозик! А. Қодирӣ, Меҳробдан чаён.

2 кўчма Бирор нарсани жуда яхши кўриб қолган, унга берилган; мухлис. Шевр ошиғи. Мусиқа ошиғи. ■ Ботирали! Ёзозхон! Қани, бери келинлар! — деб [Ғофир ота] гул ошиқларини ўз ҳузурига чақирди. Ҳ. Фулом, Машғал. Ойқиз бу қизга узоқ тикилгач, уни ашула ва дутор ошиғи бўлса керак, деб ўйлади. Ш. Рашидов, Бўрондан кучли.

ОШИҚ II I анат. Айрим ҳайвонларнинг орқа оёғи тизза бўғимидаги бириктирувчи чорқирра суякча. Эчкининг ошиғи. Туянинг ошиғи. ■ Энди ҳовлиларнинг эшиклари очилган, болалар чўнтақларини ёнғоқ, ошиқларга тўлдириб, кўчага чиқа бошлашган эди. Қ. Кенжа, Нотаниш гул.

2 Шундай суякча (одатда қўй ошиғи) воситасида ўйналадиган ўйин. Ошиқ отмоқ. ■ Менинг ёшлигимда бирга ошиқ ўйнаб, яхмалак отиб ўсган бир оғайним бор. Шукрулло, Сайланма. Тавба! Эшон «гардка» деб ошиқ отадими, а? Ойбек, Танланган асарлар.

Ошиғи олчи бўлмоқ Иши бароридан келмоқ, муваффақиятга эришмоқ Аранг галабага эришдим. Энди мен билан бамаслаҳат иш юритсангиз, кам бўлмайсиз, доим ошиғингиз олчи бўлади. Ж. Абдуллахонов, Хонадон.

ОШИҚ III I Маълум миқдордан кўп; ортиқ. Мажлисга юздан ошиқ одам қатнашди. Бу китобни ёзишга беш йилдан ошиқ вақт сарф бўлди.

2 Белгиланган нархдан юқори, ўз нархидан ортиқ, қиммат. Мендан беш сўм ошиқ олибсиз. Ошиқ баҳо билан сотмоқ.

Ошиғи билан 1) маълум миқдордан ошириб; ортиғи билан. Режа ошиғи билан бажарилди; 2) кўп деганда, кўпи билан, нари борса. Ремонт учун ошиғи билан бир ой кетади. Бу нарса ошиғи билан минг сўм туради.

3 Метёрдан ортиқча. Яхшибоев сўзларни сал бетартиб тизганини, керагидан ошиқ баландпарвоз оҳанг тутганини найқади. М. М. Дўст, Лолазор. Сал бурнидан ошиқ гапирсанг, бирор йиғин-пиғинда, «Аҳли жамоа, қассобни алмаштираман, бўлмайди», деб қолишдан тоймайди бу чол! Н. Норқобилов, Тўқнашув.

ОШИҚИНМОҚ кам қўлл. Сабрсизлик билан интилмоқ. Мулла Абдураҳмон Қўқон

сафарига ҳозирланаркан, кўнгли Қўқонда ўзини кутиб турган уламолик шуҳратига: муфтилик, қози ва аъламлик мансабига ошиқинар эди. А. Қодирий, Меҳробдан чаён.

ОШИҚЛАРЧА Ошиқларга ўхшаб, ошиқона. Кечагина мен ошиқларча Ялингандим: «Унутма мени». «Саодат».

ОШИҚЛИК I Севиб қолганлик, хушторлик. Ошиқликдан жинни бўлай деяпти. Ойдин, Садаганг бўлай, командир. -Энди билдим, ошиқлик оғир дард экан. Бошимга тушганда билдим,— деди [йигит]. П. Турсун, Ўқитувчи. -Йўлчига ачинаман,— деди чол,— ошиқлик йўлига кирганини билар эдим. Ойбек, Танланган асарлар.

ОШИҚЛИК II Кўплик, ортиқчалик Ҳосилинг режадагидан анча ошиқлиги аниқланди.

ОШИҚ-МАЪШУҚ [عاشق معشوق] Бир-бирини севган, бир-бирига муҳаббат боғлаган йигит билан қиз. Бироқ бу икки бахтиёр ошиқ-маъшуқ олдинда тақдирнинг қандоқ ўйинлари борлигини билишмас эди. С. Аҳмад, Уфқ. Иккиси ошиқ-маъшуқ.. манга қолса, айб йўлчида эмас, айб Гулнор шайтонда [деди Нури]. Ойбек, Танланган асарлар.

ОШИҚ-МОШИҚ [қ. ошиқ-маъшуқ] Эшик, дераза каби нарсаларни ўрнатиш ва уларнинг очилиб-ёпилиши учун хизмат қиладиган металл буюм. Ҳў, зинанинг тепасидаги қопқоқни кўрясанми? Ушанинг ошиқ-мошиқини кўчирса бўларкан. Фақат бунинг учун бир парча темир керак. Х. Тўхтабоев, Йиллар ва йўллар. Бу вақт ҳовли эшиги тарақ этиб очилиб, бир тавақаси ошиқ-мошиқидан учиб кетди. А. Мухтор, Опа-сингиллар.

ОШИҚМОҚ Кўзланган ишнинг, мақсаднинг тез амалга ошуви учун интилмоқ, сабрсизлик билан ҳаракат қилмоқ; шошилмоқ, интиқмоқ. Ёрдам беришга ошиқмоқ. Ошиққаннинг ошиғи олчи бўлмайди, Мақол. ■ Тўхтахола.. қанчалик ошиқмасин, чолларга ета олмайди, улар идорага кириб кетишиди. И. Раҳим, Чин муҳаббат. Мамат қассоб қанчалик ошиқмасин, қадами унмаётгандек эди. Н. Норқобилов, Тўқнашув.

Юраги ошиқмоқ Юраги бесаранжом бўлмоқ, ҳовлиқмоқ. [Ҳожи хола:] Эртасига.. Фуод афандининг келишини ё чақиртиришини кутмасдан-ла, юрагим ошиқиб, ҳужрасига кириб бордим. М. Исмоилий, Фарғона т. о.

ОШИҚОНА [a. + ф. عاشقانه — муҳаббат, меҳр қўйиб, эҳтирос билан; сидқидилдан] 1 рвш. Ошиқлар каби, ошиқлардек, ошиқларча. Ошиқона кўйламоқ. ■ Чекка-чеккада жуфт-жуфт бўлиб, ошиқона кезаётганлар кўзга алақандай шарпадек кўринарди. «Ёшлик».

2 Севги, ишққа тегишли, оид. Ошиқона хат. Ошиқона ғазал. ■ Ошиқона сўзлар, асрлик мунг ва зорлар битилган қутилмаган мактуб Аброр кўнглини бутун ўзгартирди. Ҳамза, Танланган асарлар.

ОШИҚЧА 1 Керагидан ортиқ, кўп; ортиқча. Ошиқча юк. Ошиқча ҳаракат.

2 Кераксиз, беҳуда. Ошиқча гап. ■ Ҳозир у Яхшибоевдан норози бўлди, лексин сиртига чиқармади, гарчи ошиқча ташвиш бўлса-да, ўзи гап қотди. М. М. Дўст, Лолазор. Вазири бузрук Шерназарбойнинг муддаосини пайқади, энди у билан ошиқча сўзлашиб ўтиришининг фойдаси йўқлигини билди. Ж. Шарипов, Хоразм.

3 Қўшимча, ортиқча. Режадан ошиқча маҳсулот. Ошиқча ҳақ тўламоқ.

ОШИҒИЧ Тез бажарилиши, тезда амалга оширилиши лозим бўлган, кечиктириб бўлмайдиган; шошилинч, зуд. Яхшибоев қабулдан кўнгли тоғдай кўтарилиб чиқди-ю, Қурбонойга ошиғич телеграмма жўнатди. М. М. Дўст, Лолазор. Қутилмаганда кўча эшик тагига алақандай машина шитоб билан келиб тўхтаб, кимдир ошиғич настга тушиди. М. Мансуров, Ёмби.

ОШИҲАЛОЛ, ошҳалол [ф. + а. آش حلال — ҳалол меҳнат билан топилган овқат] Чўпон ёки подачининг меҳнати эвазига оладиган озиқ-овқати, нони. -Уйдаям иш кўп, бозор куну ошҳалолгаям чиқа олмайман, — деди Эшмамат подачи. М. М. Дўст, Галатепа қиссалари. Ошҳалолни одамлар пул йўғида ўйлаб топшиган. «Ёшлик». Ниёз бобо менга тўланадиган ҳақдан гап очди: -Энди, келин, ўзинг тушунасан, юртда оғирчилик, ошҳалолга подани боқади-да ўғлинг. С. Сиёев, Саратонда қор ёғди.

ОШКАДИ с. т. айн. ошқовоқ. Ошқади каллага ҳар хил гап келади. Ш. Холмирзаев, Т. Усмонов, Сўнмас ўт.

ОШКОР [ф. آشكار — аниқ, равшан, кўриниб турган, очиқ-ойдин] 1 сфт. Ҳаммага маълум, кўриниб турган, аён; очиқ-ойдин. Ошкор иш. Ошкор зиддият. Ошкор

муҳаббат. Касални яширсанг, иситмаси ошкор қилади. Мақол. ■ Раҳимов қаҳ-қаҳ уриб кулиб юборди. Унинг кулгисини микрофон ҳаммага ошкор қилди. С. Аҳмад, Жимжитлик. Нечук, юрак сирларини ошкор этмоқ унга жуда зарур бўлиб қолибди? Мирмуҳсин, Умид.

2 рвш. Яширмасдан, рўйирост; ошкора. Бу гал, эл-юрт олдида ошкор, тортинмай узоқ ўпишдилар. Шухрат, Шинелли йиллар. Домла.. заҳарли экани ошкор сезилиб турган бу чучмал кулгига эътибор қилмади. М. Исмоилий, Фарғона т. о.

ОШКОРА [ф. آشكارا — аниқ, очиқ-ойдин, очиқчасига] **1 айн. ошкор 2.** Ошкора сўзлашмоқ. ■ Фотиҳа бўлгандан кейин ошкора учрашув уларга ман этилди. Урф шунақа, одат шунақа, начора. Х. Тўхтабоев, Йиллар ва йўллар. Ўзларингиз ошкора гаплашиб олинглар. Орқадан ғийбат қилгунча, ҳар қандай гап бўлса, шартта бетга айтиши керак. С. Сиёев, Отлиқ аёл.

2 сфт. Очиқ-ойдин, ҳаммага маълум бўлиб, кўриниб турган; аён. Яширин дўстдан, ошкора душман яхши. Мақол. ■ Шаҳарнинг кўп хуфия ва ошкора савдогарлари Муҳаммадражабга қойил қоладилар. А. Қаҳҳор, Сароб. [Нури] Қизнинг юрагидаги сирларни бутунлай ошкора қилишни истади. Ойбек, Танланган асарлар.

ОШКОРАЛИК Ошкора хусусиятга эгаллик; очиқ-ойдинлик. Суднинг ошкоралиги. ■ Ошкоралик салбий ҳодисаларга қарши, жамиятимиз қонунларини бузаётган кимсаларга қарши қудратли қуролдир. Газетадан. Райком вакили, гарчи ўзи бирон кишининг шаънига танқидий фикр айтмаган бўлса-да, бошқаларни ошкораликка даъват этди. «Ёшлик».

ОШКЎК Таомларга қўшиладиган, овқат билан қўшиб ейиладиган кашнич, барра пиёз, укроп каби кўкатлар. Маълумки, иссиқ иқлимли мамлакатларда яшовчи аҳолининг пазандчилигида зирворлар ва ошкўклар кенг қўлланади. К. Маҳмудов, Ўзбек тансиқ таомлари. Эътиборлиси, улар томонидан ташкил этилган ярмарка савдоларида ошкўклардан тортиб қовун-тарвузгача, чорвачилик маҳсулотларигача бор. Газетадан.

ОШЛАМОҚ 1 Махсус моддалар, эритмалар билан хом терига, мўйнага ишлов бермоқ, терининг жунини тўкмоқ, терини яланғочламоқ. Кеч билан ўзим бош бўлиб

таначани сўйиб, ёғ-гўштини хумга урдик. Терисини эшон, вақти келганда пишириб, маҳси қиларман, деб ошлашга буюрди. Ф. Ғуллом, Шум бола. Ҳар қандай ҳайвон териси ҳам ошланса, тоза ва пок бўлади. «Фан ва турмуш». Чавандоз эгарга қоплама қиламан деб, тери ошлаётган экан. Ш. Бўтаев, Кўрғонланган ой.

ОШЛАМОҚ 2 с. т. Ош емоқ, овқатланмоқ; ош, овқат бермоқ. Энди ошин ошлайди, Тоғдан аста настлайди. «Нурали».

ОШЛИ сфт. Ошга эга бўлган. Ошли қозон. Ошли қўл. ■ Ошли оғиз билан бошланган ҳиргойи томоққа тиқилди, мингбоши кўрқиб кетди ва оғзидоги ошини косага пуркаб, яна ошга қўл узатди. Чўлпон, Кеча ва кундуз.

ОШЛИК Ош қилиш учун етарли масаллик, нарса. Бир ошлик масаллик. Икки ошлик туз.

ОШЛИК эск. кт. Ғалла, дон. Кузга бориб ошлиқ ҳам, пахта ҳам ёлчитмади. С. Сиёев, Ёруғлик. Не ажабким, марҳум Шариф тарро хондан бир ғалвир ошлиқ сўраганида, унга ўлим йўқ эди. «Ёшлик».

ОШЛОВЧИ 1 Ошламоқ 1 фл. сфдш. Тери ошловчи ишчилар.

2 Тери ва мўйна ошлашда ишлатиладиган, ошлашга ёрдам берадиган. Ошловчи модда.

ОШМОҚ 1 Миқдор ёки ҳажм жиҳатидан кўпаймоқ; ўсмоқ; ортмоқ. Факультетдаги талабалар сони беш юздан ошди. ■ Пахта йилдан йилга мўл бўлиб, фойдаси ҳам ошиб турибди. Ойбек, Танланган асарлар.

Иши бошидан ошиб ётмоқ (ёки кетмоқ) Иши жуда кўп бўлмоқ, жуда кўпайиб кетмоқ. Директорнинг нешонлари тиришиди-ю, салгина норозилик маъносида ўзига-ўзи деди: «Мана, ишлар ҳам бошимдан ошиб кетди». Ш. Рашидов, Бўрондан кучли. Набирали бўладиган Ўзбек ойимнинг иши бошидан ошган.. эди. А. Қодирий, Ўтган кунлар.

2 Ортмоқ, ортиб қолмақ. Харажатдан беш сўм ошиб қолди.

3 Кўтарилмоқ. Ойим куйди-ёнди, даданнинг қон босими ошиб, касалхонага тушиб қолди. С. Сиёев, Ёруғлик. Саодат лабини жийриб, ишичани қайтиб узатди: -Йўқ, беш сўмдан ошса олмайман.. «Ёшлик». Ҳали офтобнинг дами қайтмаган, Қўшариқнинг катта кўчасидаги азамат тераклар толдан

ошиб, ҳовлига тўрт энликкина соя ташлаган пайт эди. С. Аҳмад, Уфқ. *Ҳар кун мол нархи ошади, бозорда савдогарларнинг қулоғи тик-кайган.* Ойбек, Танланган асарлар.

4 Маълум бир пайт чегарасидан ўтмоқ; кечмоқ; оғмоқ. *Вақт ярим кечадан ошди. Соат учдан ошди. Иш бошлаганимга беш ойдан ошди. Ёшим қирқ бешдан ошди.* ■ *Соат олтига белгиланган тўй соат ўндан ошганда бошланибди.* А. Қаҳҳор, Тўйда аза.

5 Мол сотиб олишда унинг баҳосини оширмоқ, нархига нарх қўшмоқ, орттирмоқ. *Бошқа бир рақиб илмасин, деган андиша билан баққол ҳам бир тангалаб ошаверди.* Ойбек, Танланган асарлар.

Ким ошди савдоси Молини очиқ савдога қўйиб, уни энг юқори нарх қўйган кишига сотиш усули; аукцион.

6 Кучаймоқ, зўраймоқ; янада сезиларли, таъсирли бўлмоқ. *Алами ошди. Завқим ошди. Ихлосим ошди. Кайфи ошди. Ғайрати ошди. Ишга ҳаваси ошди.* ■ *Уйда ўтиравериб, Муроднинг хуноби ошиб кетди.* Т. Ашуrow, Оқ от. *Искандар ич-ичидан жиғибийрони ошиб, терс бурилиб чиқиб кетди.* М. Мансуров, Ёмби.

7 Такомиллашмоқ, яхшиланмоқ; юқори босқичга кўтарилмоқ. *Сотувчининг малакаси ошди. Ҳуқуқий онгимиз ошмоқда. Қадрласанг, қадринг ошар.* Мақол. ■ *Бу ҳужжатни бутун районга тарқатмоқчимиз, Шер, обрўйинг ошиб, чўққига кўтарилмаётганингни билясанми?* И. Раҳим, Ихлос.

8 Бирор жиҳатдан ёки бирор соҳада бошқалардан ўтиб кетмоқ, ўзмоқ, зўр чиқмоқ, орқада қолдирмоқ. *Агар енгсанг, зўр келсанг, ошсанг, Доим сени тўйга бошлайман.* Э. Раҳим, Янги қадам.

Ошиб тушмоқ қ. тушмоқ 24. *Мамат қас-собники ҳаммадан ошиб тушди. У бошқалардек қилмади-ю, лекин чиқиб кетди. «Ёшлик».*

9 Маълум бир тўсиқ, чегара ёки баландликдан ўтмоқ. *Довон(дан) ошмоқ. Девордан ошмоқ. Тоғ(дан) ошмоқ. Сув тўғондан ошиб тушяпти. Қимирлаган қир ошар.* Мақол. ■ *Шермат девордан ошиб, ҳовлига тушди ва оёқ учуда юрганча, бурчакдаги уй олдига келди. «Ёшлик».* Саломат қизлар билан боғма-боғ ошиб келиб, девор раҳнасидан қўшиққа қулоқ соларди. С. Аҳмад, Ҳукм.

Умбалоқ ошмоқ қ. умбалоқ. *Ит умбалоқ ошиб, бели билан деворга бориб урилди, кўз-*

лари тубсиз қаҳрга тўлиб, гингшиди. С. Нуrow, Майсаларни аёз урмайди.

10 Кўлдан қўлга, бир ташкилотдан бошқасига ўтмоқ. *Иш терговдан судга ошди.*

11 Кўпмоқ, кўпчимоқ (хамир ҳақида). *Хамир ошди.*

Амалга ошмоқ қ. амал 1.

ОШНА [ф. *ашна* – таниш, маълум, дўст киши; бир нарсани билувчи] **1** Таниш, таниш-билиш. *Бир кўрган ошна, Икки кўрган қариндош.* Мақол. ■ *Норбўтанинг қизи докторликка ўқийди, мингта ошниси бор десанг-чи!* А. Қаҳҳор, Майиз емаган хотин.

2 Ўртоқ, дўст. *Пул ошнаси ошна бўлмас, пўкакдан пошна бўлмас.* Мақол. ■ *Ўрмонжоннинг отаси Омон ака Сидиқжоннинг отаси Соҳибжон ака билан жуда қалин ўртоқ эди; икки ошна ўлиб кетгандан кейин, Ёрмонжон билан Сидиқжон чинакам ака-укадай бўлиб қолишган эди.* А. Қаҳҳор, Кўшчинор чироқлари. *Аҳмад Ҳусайн Искандаро олдига бориб келиб, қалин ошна бўлди.* Ойбек, Нур қидириб.

3 Ўз тенгқурларига нисбатан мурожаат шакли.

4 Илгаридан маълум, таниш. *Уш тоғлари, кўрқинч жарлари, жилғалари, адирлари – барчаси бизга кўндан ошна.* Миртемир, Асарлар. *Сафарғалдига бу қумлар чақалоқ вақтидан ошна. Қорақумда унинг киндик қони тўкилган.* Ж. Шарипов, Хоразм.

5 Хабардор; биладиган. *Анвар.. яхшигина форсixon ва бир даража араб тилига ошна эди.* А. Қодирий, Меҳробдан чаён. *Менингча, машинанинг «иллати» тўғрисида гапириб юрувчилар техникага ошна бўлмаган кишилар бўлса керак.* М. Жўра, Қуёшдан нур эмганлар.

Моховга ошна қилмоқ қ. мохов. *Яхши-боевнинг биринчи бор сўкиши эмас, лоф бўлсаям, бирор минг бора моховга ошна қилиб сўккандир?* М. М. Дўст, Лолазор.

ОШНА-ОҒАЙНИ Яқин таниш-билишлар, дўст-биродар, қадрдонлар. *Ошна-оғайниларнинг ҳашари билан данғиллама қилиб бир уй, бир айвон солиб олдим.* Ф. Ғулом, Тирилган мурда. *Нормат қадрдон батальонига келиб, ошна-оғайнилари билан учрашаркан, севинчини юрагига сиғдиролмади, жуда гапдон бўлиб кетди.* И. Раҳим, Чин муҳаббат.

ОШНА-ОҒАЙНИГАРЧИЛИК 1 Ошна-оғайнилар, дўстлар ўртасидаги муноса-

батлар, борди-келди алоқалари. *Бизнинг Набигул одам эмас ўзи! Ёш-да, ҳали ошна-оғайнигарчиликни билмайди.* А. Қаҳҳор, Қанотсиз читтак.

2 Ошна-оғайнилар манфаатини кўзлаб, ишга зарар келтириш, ошна-оғайнилар манфаатини хизмат манфаатидан юқори кўйиш. *Ишда ошна-оғайнигарчилик бўлмайди.*

ОШНА-ОҒАЙНИЛИК айн. **ошна-оғайнигарчилик.** *Ҳой, Эргаш полвон, дунёда ошна-оғайнилик бор экан, тўғриланмайдиган иш бўлмайди.* Шукрулло, Сайланма.

ОШНАЧИЛИК айн. **ошна-оғайнигарчилик** **1.** Мен биров билан ошначилик қилсам, ҳатто ундан жонимни ҳам аямай, кўнглини олмоққа тиришаман. А. Қодирий, Ўтган кунлар.

ОШНО [ф. آشنا] айн. **ошна.** *Қушдан дўст топгандим, кўп кўрди фалак, Энди қайлардасан, ошно каклигим.* А. Орипов, Йиллар армони.

ОШ-НОН Озиқ-овқат. *Муҳаббат ош-нон бўлиб қорин тўйғазмайди.* Т. Ашуров, Оқ от.

ОШПАЗ [ф. آشپز — овқат, ош пиширувчи] **1** Овқат тайёрлаш, пишириш билан шуғулланувчи шахс. *Ошпаз йигит қайрағоч тагидаги катта супага жой қилиб, дастурхон ёзди.* С. Аҳмад, Уфқ. *Шавла жуда тотли туюлди — ошпазни мақтадилар,* Ойбек, Куёш қораймас.

ОШПАЗЛИК Овқат пишириш билан шуғулланиш; ошпаз касби. *Жўра ака ошпазлик сирларини отасидан ўрганди.* Газетадан.

ОШПИЧОҚ Сербар, учи тўмтоқ махсус катта пичоқ. *Искандар, ёмон ҳид келгандай, бурнини жийириб, ошхона тарафга қаради, айвон устунига суяб қўйилган кунда ва катта ошпичоқни кўрди.* С. Нуоров, Майсаларни аёз урмайди.

ОШСИРАМОҚ с. т. Ош истаб қолмоқ, ошни тусамоқ; очикмоқ. -А, — деди мингбоши фикриниб, — ошсираб қолдингми? Очиман? М. Исмоилий, Фарғона т. о.

ОШ-СУВ Қуюқ-сууюқ овқат, ош-нон; зиёфат. *Кампир: -Бир кеча меҳмон бўлиб кетсанг, ҳеч нарса қилмас, ош-сув қилмасдан ҳеч қаяққа юбормайман, — деб туриб олди.* «Ёшлик». [Олаҳўжа:] *Тезроқ тўй қилиб, ош-сув билан халойиқнинг оғзини мойлаши керак.* П. Турсун, Ўқитувчи.

ОШТАХТА Хамир ёйиш ва ундан лағмон, угра, шилпилдоқ ва ш. к. кесишда фойдаланиладиган махсус тахта. *Кўзи ошхтада-ю, хаёллари қўшниси Мирзаалининг ҳовлисида кезаётган бўлса ҳам ажаб эмас..* Х. Тўхтабоев, Йиллар ва йўллар.

ОШУФТА айн. **ошифта.** *Биринчи галда аёл муҳаббат ошуфтаси.* «Ёшлик». *Шунинг учун синфдаги ҳамма болалар Нилуфарга ошуфта.* «Ёшлик».

ОШУФТАҲОЛ айн. **ошифтаҳол.** *..Кўр бахшиларнинг термасини эшитиб, Аваз ошуфтаҳол бўлди.* С. Сиёев, Аваз. *Ариқчада гирдобланар бир хаёл, Термулганда мироблар ошуфтаҳол.* М. Қўшмоқов, Али Қамбар.

ОШХАМИР Лағмон, угра, чучвара каби таомлар қилиш учун мослаб тайёрланган пишиқ хамир.

ОШХОНА [ф. آشخانه] **1** Овқат тайёрлаш учун мосланган махсус хона ёки бино. *Ошхонада ғимирсиб юрган Рисолат укасининг олдига бир чойнак чой келтириб, ўзи ҳам ёнига ўтирди.* С. Аҳмад, Уфқ. *Бу хонадоннинг ошхонаси бўлмагани учун бўлса керак, ҳалиги айвоннинг бир бурчагига ўчоқ қурилган.* А. Қодирий, Ўтган кунлар.

2 Умумий овқатланиш муассасаси. *Ариқ бўйига ўнлаб чойхона ва ошхона қурилган.* С. Аҳмад, Уфқ. *Кинодан чиқиб, ошхонада бирга овқатланишди, биринчи марта икковлари бир стол атрофида ўтириб овқатланишарди.* Мирмуҳсин, Умид.

ОШХЎР [ф. آشخور — ош еювчи] **1** Паловни яхши кўрадиган киши. *Профессор жуда ошхўр, девзира гуручдан дамланган думба ёғининг паловини ҳамма таомлардан аъло кўради.* Мирмуҳсин, Умид.

2 Овқатга солинадиган, овқат учун ишлатиладиган; овқат билан ейиладиган. *Ошхўр кукатлар киши саломатлигини мустаҳкамлайди.* «Саодат».

ОШХЎРАК [ф. آشخوراك — овқат ейиш] **1** Овқат еяётганда уст-бошга тегизмаслик учун бўйинга боғлаб олинадиган, кўкракни ёпиб турадиган фартукча. *Болага ошхўрак боғламоқ.*

2 эск. Ўқувчиларга овқатланиб олиш учун бериладиган танаффус.

ОШХЎРЛИК **1** Ошни, паловни яхши кўришлик; тўйиб ош ейиш.

2 Улфатлашиб ош қилиб ейиш. *Луғумбек чойхоналарида ошхўрлик, аскиябозлик алла-*

паллагача давом қиларди. С. Аҳмад, Уфқ. Назиркул яна ошхўрлик бўлишидан севиниб, пилдираганича Азим бойваччанинг ҳовлисига қараб кетди. С. Аҳмад, Ҳукм.

ОШ-ҚАТИҚ Тириқчилик учун зарур озик-овқат. Энди беш-олти кунлик ош-қатиққа нафи тегмаса, нима қилиб ўстирдим буни? П. Турсун, Ўқитувчи.

Ош-қатиқ бўлмоқ Бирор шахс билан борди-келди қилмоқ, яқин муносабатда бўлмоқ. Кулогингизда бўлсинки, мана шу Турғунбоевнинг бир бошлиғи бор, зинҳор у билан ош-қатиқ бўла кўрманг. А. Муҳиддин, Тўғри таъбир. Муроддан сўрайсиз. Бинафша-хон Гайбаров билан ош-қатиқ, дейишади. «Ёшлик».

ОШҚОВОҚ қ. қовоқ I. Ошқовоқ сувда, сутда қайнатиб, буғлаб, димлаб, қовуриб истеъмол қилинади. К. Маҳмудов, Ўзбек тансиқ таомлари. Ошқовоқ билан тошқовоқни фарқ қилмайди, деб ўйлайсизми? Ойбек, О. в. шабадалар.

ОШҚОЗОН анат. Инсон ва ҳайвонларда овқат ҳазм қилиш йўлининг кенгайган қисми; қопчага ўхшаш овқат ҳазм қилиш аъзоси; меъда. Ошқозон касалликлари. Ошқозон ости безлари. ■ Ушбу ичимлик иштаҳа очадиган, чанқоқни босадиган, буйрак, ошқозон ва ичак хасталикларига дори эканлигини тасдиқлашди. К. Маҳмудов, Қизикарли пазандалик.

ОЯТ [а. آیت — белги, нишон; мўъжиза] дин. Қуръон сураларининг ҳар бир жумласи, ҳар бир банди. Мехроблар тепасига «хатти шикаста» хати билан оят ёзилган. Мирмуҳсин, Илдишлар ва япроқлар. Баъзилар чўккалаб ўтириб олиб, ўзлари билган оятни тиловат қилмоқда. М. Муҳаммаджонов, Турмуш уринишлари. Қуръони каримда Од қавми тўғрисида жуда кўп оятлар нозил қилинган. Газетадан.

ОҚ I 1 сфт. Қор, сут, пахта рангидаги. Оқ дока. Оқ қоғоз. Оқ нон. Оқ ит, қора ит — бари бир ит. Мақол. ■ Салимбой.. йўғон гўштдор қўлларини қордай оқ сурп тўшалган столга қўйди. Ойбек, Танланган асарлар. [Кумушининг] ..илжайишидан ёқутдек лаблари остидаги садаф каби оқ тишлари бир оз кўриниб қўйдилар. А. Қодирий, Ўтган кунлар.

2 Оқ тусга мойил, тиниқ (юз, бадан туси ҳақида). Оқ бадан. Оқ танли. Оқ юзли. ■

Хотин ўтирмоқчи бўлган эди, паранжи ичидан унинг атлас кўйлаклари ва нафис оқ қўллари кўриниб кетди. А. Қодирий, Ўтган кунлар.

Оқ билак Кўлини совуқ сувга урмайдиган, фақат ўзига оро берадиган (аёл ҳақида).

3 айн. оқлик. Болаларим, оққа етамиз, деб кўзларингиз оқараёзди, бу зормондани сўйиб, пулига жой қиламиз, дедилар. Н. Аминов, Қаҳқаҳа. Оилага берилган ана шундай соғлом сигир туфайли неча киши, айниқса, болаларнинг оғзи оққа — сут-қатиққа тегеди. Газетадан.

4 от, с. т. Ароқ. Хоҳи пиво, хоҳи вино, хоҳи коньяк, хоҳи оқ, Нўш этиб, уйга келурман, ерда турмайду оёқ. Ҳабибий.

5 сфт. кўчма тар. Чор Россияси подшосига тегишли; унинг тарафдори; контрреволюцион. Оқ амалдорлар. Оқ гвардиячилар. ■ Оқ пошшонинг кумуш нишони билан Кўтариб юрди у ўша ханжарни.. Х. Даврон, Қақнус.

Оқлар (фақат кўпл. ш.) Оқ гвардиячилар. Чапай аскарлари келдилар босиб, Босиб келди улар оқлар устига. А. Орипов, Йиллар армони. Раззоқ қизил армияга кўнгилли бўлиб ёзилиб, оқларга қариши курашаман, деб қолибди. Ҳ. Фулом, Машғал.

6 сфт. Охирги, тоза (қўлдан чиқариш ёки пардозлаш учун қилинган охирги иш ҳақида). Оққа кўчириш. ■ Жавоб мактубини оққа кўчириб улгурмасидан, ҳовлини отларнинг дупури қолаб кетди. Х. Тўхтабоев, Йиллар ва йўллар. Муҳаммад энгилланиб ўрнидан турди ва сўнгги шеърини бир оз тузатиб, оққа кўчириш учун уйига бормоғи кераклигини айтди. Ойбек, Нур қидириб.

Оқ сувоқ Қора сувоқ устидан бериладиган текис сувоқ, пардоз сувоқ.

7 от Гуноҳсиз, шаънига доғ тушмаган киши; тўғри, ҳақиқат. Текширамиз: оқни оққа, қорани қорага ажратамиз. С. Аҳмад, Ҳукм. Бизга ўқитувчилар ҳам, Султонова ҳам тенг: оқ бўлса — оқ деймиз, қора бўлса — қора. С. Зуннунова, Олов.

Оқ-қорани таниган қ. танимоқ. Оқдан қорани (ёки оқ-қорани) ажратмоқ Ёмон билан яхшини, дўст билан душманни, фойда билан зиённи фарқламоқ, тушунмоқ. -Бизнинг мақсадимиз - кишиларга онг, тушунча бермоқ, токи ҳар бир киши яхшилик ва ёмонликни, оқу қорани ўзи ажрата ола-

диган бўлсин! — деди Элмурод. П. Турсун, Ўқитувчи.

8 от Оқарган тук, мўй; соч ва соқолнинг оқарган қисми. Сочнинг оқи. Соқолнинг оқи. ■ «Отни единг», дедим ичимда. Бошқаси бўлса, қамчин билан солар эдим, лекин соқолнинг оқини ҳурмат қилдим. Ойбек, Танланган асарлар.

Сочига (ёки соқолига) оқ кирган (ёки тушган, оралаган) Сочи ёки соқоли оқара бошлаган. Ёши эликдан ўтган бўлса-да, Бўри аканинг сочига оқ ораламаганди. С. Нуров, Майсаларни аёз урмайди. У, қирқ беш ёшларда, новча, соқол, мўйловларига анчагина оқ тушган эди. Ойбек, Танланган асарлар.

9 от Кўзнинг қорачиқни ўраган, тиниқ рангли, шаффоф қисми. Кўзнинг оқи.

10 от Баъзи касалликлар натижасида кўз қорачиғида пайдо бўладиган оқиш доғ, парда. Унинг кўзига оқ тушибди. ■ Бечоранинг жиндек айби бор экан: юзи чўтир, ўнг кўзида нўхатдаккина оқи бор экан. П. Турсун, Ўқитувчи. Зарчаванинг шираси кўзни ўткирлаштиришга, қорачиғидаги катаракта ва оқни кетказишга жуда фойда қилади. К. Маҳмудов, Қизиқарли пазандалик.

11 от Тухумнинг оқсил моддаси.

Кўзининг оқу қораси қ. кўз. Манглайи оқ бўлсин Яхшилик ниятида тиланган олқиш, дуо. Толенинг тоабод бўлмасин қора, Манглайинг оқ бўлсин, ярқироқ бўлсин. А. Орипов, Йиллар армони. **Оқ ичмоқ (ёки урмоқ)** Қадаҳда ёки идишда қолдирмай, ҳаммасини ичмоқ, сипқармоқ. Мана шу қимизни бир оқ уриб беринг. С. Аҳмад, Уфқ. [Шариф:] Дарҳақиқат, ўртоқ Камолов, пахтакорларнинг меҳнати энгиллашсин, деб янги ихтиро яратган экан, келинг, дўстлар, оқ ичайлик! Н. Сафаров, Кимга тўй, кимга аза. **Оқ йўл қ. йўл. Оқ киймоқ этн.** Мотам либосини киймоқ, баъзи жойларда, аксинча, таъзия муддати тугагач, қора кийимни оқ кийим билан алмаштирмоқ, мотам либосини ташламоқ. Рўзимуроднинг онаси аза очди. Қариндошлар оқ кийиб, овоз чиқардилар. Ш. Ашурова, Янга. **Оқ кўнгил қ. кўнгил 1. Оқ олтин** Пахта. **Оқ сутини оққа, кўк сутини кўкка соғмоқ** Берган сутига, боққанига норози бўлмоқ, фарзандидан норози бўлиб, ундан юз ўгирмоқ. [Ўзбек ойми:] Энди менга мундоқ ўғил керак эмас.. оқ сутимни оққа, кўк сутимни кўкка соғдим.. Энди Тошкентга

келмасин. А. Қодирий, Ўтган кунлар. **Оқ фотиҳа қ. фотиҳа 3. Оқсоқол уларни йўлдан қайтаришга ожиз эканлигини сезиб жим қолди.** —Йўл олдидан бизга оқ фотиҳа берсангиз, — дейишди ўспирилар. «Ёшлик». **Оқ чой 1)** сут кўшилган чой. Уста Аҳмад Муртазога халтани кўрсатиб: — Эрталаб оқ чойни сеникида ичамиз, — деди. Ш. Бўтаев, Қўрғонланган ой; 2) шв. кўк чой. **Оқ ювиб, оқ тарамоқ** Авайламоқ, асрамоқ. Роҳила хола Шохрухни ўз фарзандидай оқ ювиб, оқ тараб ўстирди. «Ёшлик». **Оқ ўрамоқ этн.** Қиз билан йигитни унаштиришга розилик белгиси, маросими. Эшитмадингизми? Кеча Хайринисоникига бориб, оқ ўраб келдик. «Ёшлик». **Тишининг оқини кўрсатмоқ қ. тиш.** — Чатоқ экан, — деди карвонбоши, сўнг илк бор тишининг оқини кўрсатди. М. М. Дўст, Лолазор.

ОҚ II [a. عاق - бўйсунмас, итоатсиз, сўзга кирмайдиган, ҳурмат қилишни билмайдиган (ўғил)]: **оқ қилмоқ** Ўз фарзандини лаънатламоқ, нафрат ўқиб ундан юз ўгирмоқ, воз кечмоқ. Азар қизим юзимни ерга қаратган бўлса, жувонмарг бўлсин, оқ қилдим. С. Зуннунова, Олов. **Ғиёсиддин Бухоронинг Девонбеги мадрасасида таҳсил кўриб, ўқиб юрган пайтларида отаси уни оқ қилади.** С. Аҳмад, Ҳукм.

=**оқ 1** куч. юкл. (унлилардан кейин — =ёқ) Пайт билдирувчи сўзларга кўшилиб, иш-ҳаракатнинг дарҳол бажарилишини ифодалайди. Мусобақага ҳозирданоқ тайёрланмоқ керак.

2 =(и)б аффиксли равишдошларга кўшилиб, кейинги иш-ҳаракатнинг бевосита шу равишдош ифодалаган иш-ҳаракатдан кейин бажарилишини билдиради. У уйга келибоқ ўғлини йўқлади.

ОҚАВА айн. оқова.

ОҚАР 1 Оқмоқ фл. сфдш.

2 Оқадиган, доим оқиб турадиган. **Оқар дарё.** ■ Демак, бизнинг қилган ишимиз ис-сиз кетмайдиган, умримиз оқар сувдек бекорга оқмайдиган бўлибди. П. Турсун, Ўқитувчи.

ОҚАРИНҚИРАМОҚ Оқара бошламоқ; ранги ўчмоқ. Чиройли юзлари оқаринқираб, кўзларининг атрофи аламдан бужмайиброқ қолгандай. Ж. Абдуллахонов, Хонадон. Кароматхон ширали кўлларини ёйганча, оқаринқираб қолди. А. Мухтор, Кумуш тола.

ОҚАРИШМОҚ 1 Оқармоқ фл. бирг. н.

2 Гира-шира оқармоқ, сал оқармоқ; оқара бошламоқ. *Салимжоннинг оқаришган юзига қон югурди.* А. Қаҳҳор, Сароб.

ОҚАРМОҚ 1 Оқ тусга кирмоқ, оқ тус олмоқ. *Қор ёғиб, ерлар оқариб қолибди.* ■ *Биз меҳнатда топдик бахтимиз, Меҳнатда соч оқарса, майли!* Ё. Мирзо, Ўғил меҳри. [Турғун:] *Йўқ. Аксинча, оқарибсиз. Жиндек озиб, яна ҳам чиройли бўлибсиз.* Н. Сафаров, Ҳаёт мактаби. *Чинни пиёласимон чаноқлар оқариб кўзга ташланади.* С. Қодиров, Тонг юлдузлари.

2 Қонсизланиб ёки қони қочиб, қизилликни йўқотмоқ, ранги ўчмоқ, бўзармоқ. *Унинг ранги оқариб кетди.* ■ *Умри бир оқарди, бир қизарди-ю, мени қучоқлаб йиғлади.* А. Қаҳҳор, Хотинлар. *Собирга қараган эди, у бир оқарди-ю, энгашиб, портфелини титкилашга тушиди.* А. Кўчимов, Ҳалқа.

3 Ўнғмоқ, рангини йўқотмоқ, айнимоқ (кўпинча, бўялган нарсалар ҳақида). *Устидаги гимнастёркаси ёмғирда ювилиб, офтобда ўнғиб, оқариб кетган эди.* И. Раҳим, Чин муҳаббат. *Дехқон нигоҳи жиддий, олийжаноб, устида чакмон, оёғида оқариб кетган маҳси.* «Фан ва турмуш».

4 Ёруғ бўлмоқ, ёришмоқ. *Кечаси соат тўртданок шарқ томон оқара бошлади. Ҳадемай тун оқаради.* ■ *Адир томондан уфқ, худди парда орқасидан чироқ ёққандек, оқариб келяпти.* С. Аҳмад, Хукм. *Машҳар тонги аста-секин оқариб келар, Кўз олдимда содир бўлди Улуғ Қиёмат.* А. Орипов, Йиллар армони.

Косаси оқармаган 1) уйида соғин сигири бўлмаган; косаси сут кўрмаган; 2) топганига барака кирмаган, бири икки бўлмаган. *Икромжон бундоқ ўйлаб қараса, бу артист-мижоз шериги билан ишлайдиган бўлса, сира косаси оқармайдиган.* С. Аҳмад, Уфқ. *Ўз ота-онасининг раъйини қайтарган боланинг ҳеч қачон косаси оқармайди!* Мирмуҳсин, Чиниқиш. **Оғзи оқариб қолди** Сигири туғди ёки уйида соғин сигир пайдо бўлди; доим сутқатиқ ичадиган бўлиб қолди. *Ола бузоқ туғиб олди, Оғзимиз ҳам оқариб қолди.* Ф. Фулом. *Худо хоҳласа, айна қиш чилласида болаларнинг оғзи оқариб қолади, биродар!* «Ёшлик».

ОҚАРТИРМОҚ 1 Оқармоқ фл. орт. н. *Уйни оқартирмоқ.* ■ *Пешиндан бери ёғатган ҳўл қор том бўғотларини, ариқ бўй-*

ларини оқартирди. Ҳ. Фулом, Машғал. *Оғир меҳнат ва оиладаги бахтсизлик Мастура холанинг сочларини бевақт оқартириб, муси-чадай ювош қилиб қўйган.* А. Кўчимов, Ҳалқа.

2 махс. Қалай югуртирмоқ, қалай югуртириб, металл буюмлар сиртини қошламоқ. *Мис тоғорани оқартирмоқ.*

3 махс. Турли ашёларнинг оқлик даражасини кучайтириш учун баъзи технологик жараёнларни амалга оширмоқ.

4 кўчма Билим-маърифат бермоқ, онгини оширмоқ. *Қора элларни оқартирмоқлик учун Белни маҳкам боғлаб ишлов кун, бу кун.* Ҳамза.

ОҚАРТУВ 1 Оқартмоқ фл. ҳар. н.

2 Халқнинг билим ва онгини оширишга қаратилган иш; маърифат. *Маданий-оқартуви ишлари.*

ОҚБОШ Бўйи ярим метрча келадиган, сербарг, майда оқ тўпгулли ёввойи ўт. *Ернинг бор бисоти — оқбош, қамиш, янтоқ.* Г. Нуруллаева, Юрак ёнмоғи керак. *Оқбош, супурги, шувоқ, ёвшан, читир дасталарини райҳон сувига чайиб, қуришиб, тахлаб қўйибдилар сояга.* А. Мухтор, Кумуш тола.

ОҚИБАТ I [а. عاقبت — натижа, яқун, самара; из, асар; эргашиб, таъқиб қилиш] Қадрдонлик, дўстлик туйғуси, меҳр, муҳаббат ва шундан келиб чиқадиган яхши муносабат; мурувват. *Инсоннинг инсонга қиёмати узоқ сафарларда билинади.* Газетадан. *Ҳа, шуми ҳали, Бўтабой ака, орамизда пулдан ҳам каттароқ нарса — меҳру оқибат бор эди-ку.* А. Қаҳҳор, Кўшгинор чироқлари. *— Мунаввархон, қоқиндиқ, сиздан келган оқибат шуми? Боққа бир бордингиз-у, бадар кетдингиз, — деб гинахонлик қилиб кўришди амма.* С. Анорбоев, Меҳр.

ОҚИБАТ II [а. عاقبت] I Охирги яқун, натижа. *Ишнинг оқибати.* ■ *Азар Болта муаллим уни судраб кетмаганида, оқибати нима бўлиши номаълум эди.* Н. Норқобилов, Тўқнашув. *Адолат аризасининг оқибатини кутиб юрди.* И. Раҳим, Чин муҳаббат.

2 рвш. Ҳамма нарса (воқеа ёки ҳаракатлар) бўлиб ўтгандан кейин, охири, натижада, охир-пировардида, ниҳоят. *Оқибат шу натижага келинди: майли, Саидийни қисман хабардор қилиш керак.* А. Қаҳҳор, Сароб. *Тишченко уни бирмунча вақт шофёрлар курсига тайёрлабди, оқибат киргизиб ҳам қўйибди.* А. Қаҳҳор, Жонфигон. *Тушиди сени*

деб бошима жабру ситам, ҳадсиз азоб, Ақлу хушимдан оқибат бегона бўлдим соғиниб. Ҳамза.

ОҚИБАТДА *рвш.* Охир-пировардида, охири, натижада, ниҳоят. *Оқибатда иш қалай бўларкин? Оқибатда ҳамма нарсалардан ажралди.* ■ *Дастлаб қайғу билан кўз очган бу сабоҳ оқибатда эл учун хайрли бўлиб чиқди.* Т. Малик, Қалдирғоч.

ОҚИБАТЛИ Оқибати бор, меҳр-муҳаббатли. -*Раҳмат, хоним, — деди Яхшибоев. — Сиз оқибатли хотинсиз, ўз вақтида танбех берибсиз.* М. М. Дўст, Лолазор. *Бир кун туз ичган жойга қирқ кун саломдир жоиш* - *Оқибатли халқимда мақол бор шундоқ қадим.* А. Орипов, Йиллар армони.

ОҚИБАТСИЗ I Оқибатни, яхшиликка яхшилик қайтаришни билмайдиган; бемехр, муруватсиз. *Оқибатсиз одам.* ■ *Намунча бу болаларнинг ота-оналари оқибатсиз бўлишмаса?! «Шарқ юлдузи».*

ОҚИБАТСИЗ II *рвш.* Эътибор берилмасдан, текширилмасдан, натижасиз. *Темур Малик ва Жалолиддин режалари оқибатсиз қолди.* Мирмуҳсин, Темур Малик. *Салимнинг Тўла тўғрисида онасига куйиниб айтган сўзлари оқибатсиз қолиб кетди.* М. Исмоилий, Бизнинг роман.

ОҚИЗИЛМОҚ **Оқизмоқ** фл. мажх. н. *Дарё суви янги ерларга оқизилди.* ■ *Бу ерга колхоз ёшларининг ҳаракати туфайли.. чигир билан сув оқизилди.* И. Раҳим, Чин муҳаббат.

ОҚИЗИҚ *геол.* Сувда эриб ва сув билан бирга оқиб келиб ўрнашган минерал ва органик жинслар.

ОҚИЗМАЙ-ТОМИЗМАЙ *рвш.* Бир оғиз сўзни ҳам тушириб қолдирмай, бутун тафсилоти билан; батафсил. *Низомжон бўлган воқеани оқизмай-томизмай айтиб беришга мажбур бўлди.* С. Аҳмад, Уфқ.

ОҚИЗМОҚ **Оқмоқ** I фл. орт. н. *Ариқдан сув оқизмоқ.* ■ *Сув оқизилганда, бу лойқалар шағал ораларига кириб, сув шимилишидан сақлаб қолади.* С. Аҳмад, Уфқ.

Сувга оқизмоқ қ. сув.

2 **Тўқмоқ, оқиб тушмоқ.** *Кўз ёшини оқизмоқ. Пешона терини оқизмоқ.* ■ *Саиднинг отаси сувни лунжларидан оқизиб ичди, рўмол билан оғзини артиб, оёқлари остига ташлади.* «Ёшлик».

3 *кўчма* Маълум қилмоқ, етказмоқ. *Ўғил боламан, опа! Бировнинг сирини Санжарга*

ўхшаган шалтоқлар оқизиб юради. С. Зуннунова, Олов.

ОҚИЗОҚ I Бирор нарсани ипга боғлаб сувга ташлаб оқизиш ўйини. *Оқизоқ ўйнамоқ. Оқизоқ қилмоқ.* ■ *Ўзбекнинг боласи узумга тўйса, ангишвона қилади деганларидай, болалар сал ўтмай, еб турган нонларини оқизоқ қилиб ўйнай бошладилар.* «Ёшлик».

2 Оқиб турган, оқаётган ҳолда. *Балки кутар мени бир қиз, кўз ёшлари оқизоқ.* «Шарқ юлдузи».

3 қ. х. Эгатлардан узоқ вақт сув оқизиб кўйиб, экинларни қондириб сугориш усули.

ОҚИЛ [a. عاقل - ақли, фаросатли, эсхушли; бамаъни] I Ўткир ақл соҳиби; ақли, доно. *Оқил одам. Семиз кўзининг гўшти яхши, Оқил онанинг — қизи.* Мақол. ■ *Сен [Умид] олийжаноб, оқила бир қиз муҳаббатини оёғости қилдинг, сен бу аламини ўлғунингча тортасан.* Мирмуҳсин, Умид.

2 Ақл билан айтилган, қилинган; бамаъни. *Ёрни гўзал дема, оқил сўзи бўлмаса, Тотли бўлмас таом, агар тузи бўлмаса.* Ҳ. Мирзо.

3 Оқил (эркаклар исми).

ОҚИЛА [a. عاقله — «оқил» с. нинг муаннаси] I Ўткир ақл соҳибаси; ақли, доно (аёл ҳақида). *Гавҳаршодбегим кўп оқила, жуда ҳозиржавоб бўлган, деб эшитганман.* Мирмуҳсин, Илдизлар ва япроқлар.

2 Оқила (хотин-қизлар исми).

ОҚИЛЛИК Донолик, ақллилик; бамаънилик. *Ҳаётда адолат ва разолат, садоқат ва қабоҳат, оқиллик ва нодонлик, поклик ва жирканчлик, тўғрилик ва ўғрилик бор экан, табиийки, жинойят ҳам содир бўлиб туради.* Газетадан.

ОҚИЛОНА [a. + ф. عاقلانه — маъқул, ақлга мувофиқ, ақл билан; доноларча] *рвш.* Оқил кишилар каби, оқилларча ўйлаб, ақл билан, бамаъни. *Оқилона маслаҳат бермоқ. Маблағларни оқилона ва ишнинг кўзини биллиб ўзлаштирмоқ. Оқилона гап.* ■ *Бу гапларнинг барини Ҳафиза хомуш ва оқилона тинглаб, уларни тасдиқлар, Умиднинг ҳамма фикрларига қўшилишини бош қимирлатиб билдирарди.* Мирмуҳсин, Умид. *Таклиф оқилона бўлгани учун қуйидаги хатни ёзишибди.* Х. Тўхтабоев, Ширин қовунлар мамлақати.

ОҚИМ I Маълум бир томонга оқаётган сув, суyoқлик ёки газ жараёни. *Иссиқ оқим. Совуқ оқим. Газ оқими.* ■ *Рашид қайиқни*

оқим ихтиёрига қўйиб юборди. Шухрат, Шинелли йиллар.

2 Шундай жараён йўналган томон, йўналиш. Азизхон ариққа тушганда, беш-олти йигит оқимга қарши сувни шалолатиб сузиб юришарди. С. Аҳмад, Уфқ. Чавандоз отини орқага буриб, сув оқимига қараб кетди ва юз қадамча юргандан кейин юганини тортиб, қамчи урди. Ҳ. Фулом, Машғал.

3 физ. Берилган сиртдан вақт бирлиги ичида ўтаётган тўлиқ энергия миқдори. Ёруғлик оқими. Электронлар оқими. Магнит оқими.

4 кўчма Маълум бир томонга йўналган киши ёки нарсалар жараёни. Одамлар оқими. Хатлар оқими. ■ Майдон атрофидаги кўчаларда, паркларда халқ оқими тошар, чайқалар эди. Ойбек, Нур қидириб. Пул оқимини Алиқулнинг ўзи бошқарарди. Ш. Рашидов, Бўрондан кучли. Ёмғир шаррос қуяр, кўчадаги йўловчилар соябон остида шошилиб қадам ташлар, улкан машиналар оқими ёмғир селини шириллашиб кесиб борарди. А. Нурмуродов, Уруш.

5 кўчма Ижтимоий фаолият, илм-фан, назария ва ш. к. нинг бирор соҳасидаги йўналиши; қараш. Реакцион оқим. Сиёсий оқим. Замон оқими. ■ Ёшлар ҳали оқим сифатида ўзларини намоён қила олганлари йўқ. Газетадан.

Гапнинг оқими Гапнинг йўналиши, бориши, омади. Саидғози бунни дарров пайқади, гапнинг оқимини ўзгартирди. С. Анорбоев, Оқсой. **Оқимга қарши юрмоқ** (ёки **суз-моқ**) Жамиятда устун йўналишга қарши ҳаракат қилмоқ.

ОҚИМТИР айн. **оқиш** **1**. Оқимтир тутун. ■ Шифтнинг баъзи жойларида оқимтир гуллар, сумалаксимон нарсалар осилиб турарди. А. Кўчимов, Ҳалқа.

ОҚИН **1** **1** сфт. Доим оқиб турадиган; оқар. Оқин дарё. ■ Шоҳиста.. оқин сувдай шарақлаб, қулиб кириб келди. А. Мухтор, Опа-сингиллар. Шавкат, ҳовуздан оқин сувга қайтган балиқдай, эркин-эркин қулоч отиб, яйраб чўмилди. Қ. Кенжа, Тоғ йўлида бир оқшом.

2 айн. **оқим 1, 2**. Қўёшга оқмоқда минг дарё оқин. Шу оқин ичида бир томчи мен ҳам. Қ. Муҳаммадий. Халқ оқини — энг кучли оқин. Ҳ. Пўлат. Умид Эргашдан. Лекин Эргаш оқинга қарши якка туроладими? И. Раҳим, Чин муҳаббат.

ОҚИН **II** [т. آقین < ф. آخوند — ўқимишли одам] Қозоқ ва қирғизларда: балиҳағўй шоир, куйчи; халқ шоири; бахши. Эй сен, жавон шоир, ўспирин оқин, Ўтли юрагинга қилурман ҳавас. А. Орипов, Йиллар армони.

ОҚИНДИ: **оқинди сувлар** Корхона ёки хонадонлар ҳовлисида ўтган ариқлардан оқиб чиқаётган чиқинди сувлар ёки ёгин сувлари.

ОҚИШ **I** Оққа мойил, ним оқ; оқимтир, оқчил. Оқиш булут. Оқиш бўёқ. Оқиш қоғоз. ■ Осмон ўзининг ёзги тиниқлигини йўқотган, оқиш хира. С. Анорбоев, Оқсой. Даладан илон изи бўлиб кетган оқиш йўлнинг уфқида бир нима «йилт» этди. А. Қаҳҳор, Қўшчинор чироқлари.

ОҚИШ **II** **Оқмоқ** фл. ҳар. н. Сувнинг оқишига қара, халқнинг хоҳишига қара. Мақол.

ОҚИШОҚ Шоли оқланганда майдаланган, синган гуруч; гуручнинг майдаси. Оқишоқдан ош бўлмас. Мақол. ■ Эрталаб Тозагул меҳмон опани янги туққан сигирининг оғизи ва ўғирдан иссиққина чиққан оқишоқ толқон билан сийлади. Ҳ. Фулом, Машғал.

ОҚКАЛТАК-ҚОРАКАЛТАК: **оққалтак-қорақалтак бўлмоқ** Тўғри келган нарса билан қуролланиб уришмоқ; савалашмоқ. Тангриқул ҳожи бошлиқ оломон оққалтак-қорақалтак бўлиб, водокачкага қараб юрибди. А. Қаҳҳор, Қўшчинор чироқлари.

ОҚКИЯР этн. Оқсалор. Айвонда кампир Жўрахонга Шопўлат даллолнинг оқкиярди Парихон отининг гапирган гапларини.. сўзлаб берди. А. Мухтор, Опа-сингиллар.

ОҚЛАМОҚ **1** Оҳак, бўр каби оқ тусга киритувчи нарсалар билан бўямоқ. Деворни оқламоқ. Уйни оқламоқ. ■ Дарахтларнинг танасини оқлаб юрган чол энги билан пешонасини арта туриб, шийпонга қараб қичқирди: Ҳой Комилжон! С. Зуннунова, Олов.

2 Овқатга қатиқ қўшмоқ, қатиқламоқ, Мошхўрдани оқламоқ. ■ Ойхон кўйқулоққа қатиқ ивитиб қўйган экан, маставани оқлаб ичдилар. А. Мухтор, Кумуш тола.

3 Чойга сут аралаштирмоқ. [Қутидор:] Туйбека, Кумушнинг чойини оқлаб бер-чи. А. Қодирий, Ўтган кунлар.

4 махс. Металл нарсаларнинг сиртига қалай югуртирмоқ. Мис қозонни оқламоқ.

5 Донни, ғаллани туйиб, пўстини ажратмоқ, тозаламоқ. Ўрта яшар хотин кўй-

лак енларини билагигача шимариб, тўқ-тўқ қилиб, келида шולי оқлайди. С. Аҳмад, Уфқ. *Куювингиз обжувозда шולי оқлапти. Тинч-омонлик, отаси. Ҳ. Фулом, Машғал.*

6 кўча Бирор кишининг гуноҳсиз эканлигини тасдиқламоқ, кимсани айбдор эмас деб топмоқ. *Суд гуноҳсизларни оқлади.* ■ [Ҳамида:] *Мен қизни оқлаб, бутун гуноҳни унинг хўжайинига, ёш қизни бу қадар бераҳм эксплуатация қилган кишига қўймоқчиман.* А. Қаҳҳор, Адабиёт муаллими. *Қодир Набигулга «Ҳолингга вой» дегандай қилиб қаради. Буни Набигул фаҳмлаб, ўзини оқлашга киришди.* А. Қаҳҳор, Қанотсиз читтак.

7 Бирор ҳаракат ёки ҳолатнинг тўғрилигини тасдиқламоқ, ҳақ, тўғри деб топмоқ. *Қизига бўлган ғазабини юраги оқласа, ақли қораларди.* Ш. Рашидов, Бўрондан кучли. *Қиз-жувонларимизнинг эғнидаги ғалати-ғалати кийимлар ҳақида гап борганда, уларни нима деб оқлашни ҳам билмайсан киши.* Газетадан.

Ишончни оқламоқ Билдирилган ишончга муносиб иш қилмоқ. *Бу ишгит лаёқатли, ишчан, шубҳасиз, ишончларингизни оқлайди.* «Шарқ юлдузи». **Она сутини оқламоқ** Онага мардларча хизмат қилиб, уни рози қилмоқ, фарзандлик бурчини бажармоқ. **Тузини оқламоқ** Ўз паноҳига олиб боққан, тарбия қилган кишининг хизматига яраша хизмат қилмоқ. *Улуғ бурчим тузингни оқламоқдир, Ҳамиша ҳурматингиз сақламоқдир.* Ҳабибий.

ОҚЛАМОҚ Оқламоқ фл. мажҳ. н. Айбдор оқланди. ■ *Эҳтимола, ҳақиқий ўғри ушланиб, Ҳимматилла оқланиб чиқар.* Шухрат, Умр поғоналари. *Қуёш нури.. оппоқ оқланган деворларда кўзни тиндирувчи ёлқин билан жимирлар эди.* П. Турсун, Ўқитувчи.

ОҚЛИК Оқ хусусиятига эгалик. *Қорнинг оқлиги. Сочнинг оқлиги. Кўнгилинг оқлиги.* ■ *Отабек билан Ўтаббой қушбеги Кўқонга чақириладилар-да, сўроқдан сўнг яна оқликка чиқадилар.* А. Қодирый, Ўтган кунлар.

ОҚЛИҚ 1 Сут ва сутдан тайёрланган маҳсулотлар (қатиқ, қаймоқ ва ш. к.). *Агар бўлса оқлиғинг, билинмайди йўқлиғинг.* Мақол. ■ *Эчки бўлса ҳамки, болачақага оқлик ўзимиздан чиқиб турган эди, гўшит-пўшитини олиб, битта соғин эчки берсанглар.* С. Аҳмад, Ҳукм. *Анчадан бери оқлиқ кўрмаган фарзандларимнинг сутни ниҳоятда иштаҳа ва иштиёқ билан ича-*

ётганини кўриб, ўпкам тўлиб йиғлаб юбордим. Газетадан.

2 Пиширилган сутни ивитиш (қатиқ қилиш) учун унга солинадиган озгина қатиқ; томизғи. *- Ҳозир сут соққандирсиз, ахир. - Соғдим.. Пишириб, оқлиқ солиб қўйган эдим.* А. Қаҳҳор, Сароб.

3 этн. Тўйга розилик белгиси сифатида совчиларга совға қилинадиган оқ ёки очик, оч рангли газлама, рўмол, кийим-кечак. [Эшон] *Кўйнидаги бир кийим читни Сурхонбойнинг олдига қўйди-да, гап бошлади: - Мана бу хамир учидан патир, ҳожим.. Оқлиқ.. Қуда бўлмақчимиз.* И. Раҳим, Тақдир.

4 этн. Кўмиш маросимига, азага келганларга бўлиб бериладиган рўмолчабоп газлама; йиртиш. *Оқлиқ йиртиш.*

5 этн. Кафан, кафанлик. *Абдурахмонбой Олимжонни бойлигига соҳиб қилиб, ўзи икки газликкина оқликка эга бўлиб, ҳовли-жойларини ташлаб, бир бўйгина чуқургача кириб, бедому дарак кетди.* Ҳамза, Танланган асарлар.

ОҚЛОВ 1 Оқламоқ фл. ҳар. н.

2 кўча Оқлайдиган, гуноҳсизликни исботлайдиган. *Адвокатнинг оқлов нутқи.* ■ *Агар у кишининг оёғи чиндан касал бўлмаса, дўхтирлар ҳам унга оқлов қоғози қилиб бермасди.* С. Сиеёв, Саратовда қор ёғди.

ОҚЛОВЧИ 1 Оқламоқ фл. сфдш. *Уй оқловчи. Шולי оқловчи.*

2 ҳуқ. Судда бирор киши ёки тарафни ҳимоя қилувчи юрист, адвокат. *Қораловчи гапириб, оқловчи гапириб, Олиянинг ўзи охирги сўздан кечиб, суд ҳайъати қамоқ муддатини эълон қилди.* М. М. Дўст, Лолазор. [Орипов:] *Дуруст, дуруст.. Аслида-ку қораловчибон кишисиз-у, оқловчи бўлиб, бекорга умрингиз ўтяпти-да!* З. Саид, Н. Сафаров, Тарих тилга кирди.

ОҚМА тиб. Аъзо ва тўқималардаги бузилиш жараёнлари оқибатида пайдо бўладиган, узоқ вақт битмайдиган, йирингли тешик яралар. *Вали урушдан қайтганида, Карим аъзойи бадани илвираб, оқма бўлиб ётарди.* «Ёшлик».

ОҚМИЯ айн. эшакмия.

ОҚМОҚ 1 Паст томонга қараб узлуксиз, сурункасига ҳаракат қилмоқ, юрмоқ (суяқлик ҳақида). *Олдиндан оққан сувнинг қадри йўқ.* Мақол. ■ *Қонқус тун бўйи ғазаб билан, алам билан тўлганиб оқди.* Ў. Ҳошимов,

Қалбинга қулоқ сол. *Филатовнинг бир қўли қон оқаётган елкасида, иккинчи қўли пулемёт лентасида, боши қуйи солинган эди. А, Қаҳҳор, Олтин юлдуз.*

2 Тез-тез томмоқ, бирин-кетин юмаламоқ (томчилар ҳақида). [*Қизнинг*] *Кўзларидан оққан томчилар қуёшда инжудай ёнади. Ойбек, Танланган асарлар. Ошино дўстининг кўзларидан дув-дув ёш оқаётганини кўрди, хўрланди.. М. М. Дўст, Лозазор.*

3 Сув оқими билан бирга силжимоқ, сузмоқ. *Қолганлардан бир қисми сойнинг ўртасига етмасдан қайтишга мажбур бўлди. Икки киши оқиб кетаёзди. А. Қаҳҳор, Олтин юлдуз.*

4 Қуйилиб келмоқ; ўтмоқ. *Ўтказгичлардан электр токи оқа бошлади.*

5 кўчма Келиб, тушиб турмоқ. *Конвейерлардан дон оқади. ■ Хона ичига қуёшнинг илиқ ёрқин ипаги жимгина оқди. Ойбек, Навоий.*

Оқиб келмоқ Мунтазам келиб, тушиб, етишиб турмоқ. *Арзимас амалини, оқиб келиб турган ҳаром-хариш нуллари деб, жуфти ҳалолдан кечган кимсани нима деб аташ керак?! М. М. Дўст, Ёмби.*

6 Жараён тарзида, кўплашиб бирор томонга юрмоқ, ўтмоқ. *Отлиқлар Оқмачит қири томон оқиб борарди. Т. Ашуров, Оқ от. Эрталабдан бошлаб қишлоқ аҳолиси мактаб томон оқди. П. Турсун, Ўқитувчи.*

7 Тўкилмоқ, осилиб тушмоқ. *Икки атрофда пахтасининг чўғи қочган далалар гоҳ чўп бўлиб ғўзапояси қолган, гоҳ пахтаси эгатларга оқиб тушган пайкаллар билан алмашинади. М. Мансуров, Ёмби.*

8 кўчма Ўтмоқ, кечмоқ. *Ҳаёт бир маромда, бир изда оқа бошлади. С. Абдуқаҳҳор, Кўзлар. Йиллар оқар йилларни ювиб, Тақдирига тан берар ҳавас. А. Шер, Қадимги куй.*

ОҚОВА 1 Ҳовуз, экинзор каби жойларга бир томондан кириб, иккинчи томондан чиқиб кетадиган сув.

Оқова қилиб суғориш Экинни эгатлардан сув оқизиб қўйиб, мириқтириб суғориш.

2 Партов сув, чиқит, ифлос сув. *У қўлини юваётиб, қувурга жилдираб оқаётган оқовага тикилган куйи, беихтиёр хаёлга толди. Н. Қиличев, Чиғирик.*

3 кўчма с. т. Бўлиб ўтган ишнинг қолдиқ асари, оқибати. *Бултурги ишнинг оқоваси. ■ Бу йўл-йўлакай узоқ давом этган дар-*

ғазаб суҳбатнинг совиброқ қолган оқоваси эди, шекилли. А. Мухтор, Кумуш тола. Гарчанд айнан шунақа деб айтишмаган бўлса ҳам, гапнинг оқоваси шунга олиб келар эди. «Ёшлик».

ОҚПАДАР [*а. + ф. عاقيدار* — отаси (ота-онаси)ни норози қилган фарзанд] **1** Жуда қаттиқ гуноҳи, ноҳўя хатги-ҳаракати учун отаси (ота-онаси) оқ қилган, лаънатлаган, юз ўгирган фарзанд (ўғил ёки қиз). *Оқпадар бола энди бу уйда туришга ҳақсиз. С. Аҳмад, Уфқ.*

2 сўк. айн. **лаънати.** *Бунақа оқпадар, каллакесарларни пешонасидан отиш керак. С. Аҳмад, Уфқ.*

ОҚПАЛАК Ўсимликларнинг баргларига оқиш доғлар тушириб, сўлдирадиган ва қуритадиган касаллик (вилт касалининг бир хили). - *Олимлар оқпалакка чидамли нав топишди-ку! — гапга аралашди талаффузи ширинроқ йиғит. С. Нуров, Нарвон. Оқпалак бўлаётган пахтани ўғит сепиш билан соғайтириш мумкин. С. Айний, Қуллар.*

ОҚПАР Оқиш, оққа мойил, оқ аралашган. *Оқ, оқпар кундузлар қоронғу бўлди, Шамоллар хор-хасни отди юзларга. А. Суюн, Олис тонглар.*

Оқпар чой Оқ гулбарглари аралашган хушбўй, аъло навли чой. *Оқпар чойга тўлган кўк чойнак Менга азиз чин армуғондек. М. Шайхзода.*

ОҚСАМОҚ 1 Бир оёғи калталиги, майиб ёки касаллиги туфайли чайқалиб, чўлоқланиб юрмоқ, оқсоқланмоқ. *Хийла олислаб қолган Маҳмуд ака сал оқсаганича кетиб борарди. С. Зуннунова, Олов. Командир Стеклол оқсарди. У баъзан беихтиёр равишда тиззасини чангаллар, юзлари, гўё алам ғижимлагандай, бир он буришиб кетарди. Ойбек, Қуёш қораймас.*

2 кўчма Сустлашмоқ, орқада қолмоқ, қониқарсиз ёки паст савияда бормоқ. *Янги навлар яратиш, эртапишар, узун толали ва ҳар қандай касалликларга чидамли, айниқса, вилтга чидамли навлар яратиш иши оқсаятти. Мирмуҳсин, Умид.*

3 кўчма Ноқислик, калталиқ қилмоқ. *Нега ҳар бир нарсага етган ақлинг шунга келганда оқсайди. А. Қодирий, Ўтган кунлар.*

4 (*ч. к. билан*) с. т. Камчилик, етишмовчилик туфайли қийналмоқ, йўқликдан ноилож қолмоқ. *Пулдан оқсамоқ.*

ОҚ-САРИҚ Оққа мойил сариқ, оч сариқ. *Сўнги жумлани айтганда, генералнинг оқ-сариқ юзидаги сийрак ажинларини табасум тўдиди.* Шухрат, Шинелли йиллар. *Нариги томонда эса кун нурида қизиган оқ-сариқ қумлар ястаниб ётарди.* Ш. Рашидов, Бўрондан кучли.

ОҚСИЛ I I биол. Ҳайвон ва ўсимликлар организмнинг энг муҳим таркибий қисмини ташкил этган, таркибида азот бўлган мураккаб органик модда. *Оқсил ҳужайралар тузилиши учун зарур бўлган моддадир.* Н. Исмоилов, Касалларни парвариш қилиш. *Нон маҳсулотлари таркибида оқсил, турли минерал моддалар ва витаминлар бўлиши муҳим аҳамиятга эга.* «Фан ва турмуш».

2 Товуқ тухумининг оқ моддаси. *Аёл тухумни чақди. Ютоқиб оқсилени сўрди. Кейин тухумдаги тешиқни бармоғи билан кенгайтириб, сариғини ютди.* «Ёшлик». *Бунинг учун тухумнинг оқсил қисмидан сариғи ажратиб олинади-да, сув билан аралаштирилади.* Газетадан.

ОҚСИЛ II Чорва моллари ва чўчқаларда бўладиган, шиддатли ўтадиган юқумли касаллик, яшчур.

ОҚСИМ I с. т. айн. **оқсил I.**

ОҚСИМ II с. т. айн. **оқсил II.**

ОҚСИЧҚОН Сувсарлар оиласига мансуб, оқ мўйнали кичкина йиртқич сутэмизучи ҳайвон ва шу ҳайвоннинг териси, мўйнаси. *Оқсиққон овламоқ. Оқсиққон териси.*

ОҚСОЛАР Мотам муддати (бир йил) ўтиши муносабати билан ўтказиладиган маросим (бунда мархумнинг яқин кишилари бир-бирларига оқ кийимлик тақдим қиладилар ва мотам либосларини ташлаб, оқ оддий кийимларини киядилар).

ОҚСОЧ I тар. Бойлар, зодагонлар оила-сида ёлланиб хизмат қилувчи аёл, хизматкор аёл; чўри. *Холнисонинг онаси Ёрмозор қишлоқлик бир бойнинг эшигида оқсоч эди.* А. Мухтор, Опа-сингиллар. *Ойхола ғоят хунук, озгин бир кампир бўлиб, Ёдгорнинг ҳужра оқсочидир.* Ҳамза, Танланган асарлар.

2 сфт. Оқ сочли, сочи оқ. *Хайриятки, анави оқсоч профессорнинг ўзи келмагани, бўлмаса, унгаям ҳурматим қолмас эди.* М. М. Дўст, Лолазор. *-Шу ғалваларни биттагина майор бошлаб юрибдими? — деб сўради оқсоч киши.* «Ёшлик».

ОҚСОҚ I Оқсаб юрадиган; бир оёғи калта ёки чўлоқ. *Оқсоқ қоровул ундан кўзини олмай, қўлтиқтаёғини тўқиллатганича, зинадан тушиди-ю, анҳор кўпригидан берида тўхтаб қолди.* А. Қаҳҳор, Картина. *Жангчилар ҳалиги кичкина, ориқ, юпун оқсоққа «ўртоқ майор» деб мурожаат қилардилар.* Ойбек, Кўёш қораймас.

2 кўчма Орқала қолаётган, қониқарсиз, паст даража ёки савиядаги. *Оқсоқ соҳа. Ишнинг оқсоқ томонлари.*

ОҚСОҚЛАНМОҚ Оқсаб, чўлоқланиб юрмоқ. *Унинг [Отабекнинг] оёқ олишида ҳам бир оз оқсоқланиш сезилар эди.* А. Қодирий, Ўтган кунлар. *Акбарали севинганидан бир оёғида қолган этиқни ечиб ташлашни ҳам унутиб, оқсоқлаганича қамишлар оралаб кетди.* С. Аҳмад, Уфқ.

ОҚСОҚЛИК Оқсоққа хос хусусиятларга эгалик; оқсоқ эканлик. *Назокат оқсоқлигимни билса, мендан айнаб қолади.* С. Аҳмад, Қадрдон далалар.

ОҚСОҚОЛ I Соч-соқоли оқарган кекса одам; мўйсафид. *Бу оқсоқол кетса, ўрнига ёшироқ қорасоқол келади.* С. Сиёев, Ёруглик.

2 тар. Илгариги даврда бир ёки бир неча маҳалла ёки қишлоққа бошлиқ бўлган маҳаллий амалдор. *Ҳайъат аззолари йигирма кун қишлоқ оқсоқолинигида туриб, текширув ўтказдилар.* С. Сиёев, Аваз.

3 Ҳозирги кунда: қишлоқ фуқаролар йиғинлари ва шаҳарлар маҳалла кўмиталари раиси. *Уни [маҳаллани] обод этиш, тинчлик-хотиржамликни таъминлаш, катта-кичик тадбирларга бош-қош бўлиш маҳалла оқсоқолининг зиммасида.* Газетадан.

4 кўчма Гуруҳ ёки синф бошлиғи. *Олд қаторда ўтирган синф оқсоқолимиз муаллимга бир нима деди.* «Ёшлик».

5 кўчма Бирор соҳада кўп ишлаган, меҳнати синган кекса киши; раҳбар. *Эртасига Қамишқапага Ўзбекистон оқсоқоли Йўлдош Охунбобоев келди.* П. Турсун, Ўқитувчи.

6 Кексаларга ёки улуг кишиларга нисбатан ўз тенгқурлари томонидан ишлатиладиган мурожаат шакли.

ОҚСУВ Тоза чучук сув, оқар сув; музлик суви. *Оқсув ичмоқ.*

ОҚСУЯК Эксплуататорлик жамиятида имтиёзли табақаларга, зодагонларга мансуб киши; аристократ. *Хўжалар илгаридан «биз*

араб авлодимиз, оқсуякмиз», деб ўзларини баланд тутиб келади. П. Турсун, Ўқитувчи.

ОҚСУЯКЛАРЧА рвш. Оқсуякларга ўхшаган, оқсуякнамо. Турмушда ҳам, фикрда ҳам оқсуякларча олифтагарчилик! А. Мухтор, Асарлар.

ОҚУВЧАН Оқиб -кетадиган, яхши оқадиган. Эриган чўян оқувчан бўлади ва қолипти яхши тўлдиради.

ОҚУВЧАНЛИК Сууюқликнинг ўз оғирлик кучи таъсирида ёйилиб кетиш хоссаси. Сууюқликнинг асосий хоссаси — оқувчанликдир. «Физика».

ОҚУРУФ Қовуннинг пўсти оқиш, уруги, эти оқ ширин бир тури.

ОҚЧА айн. ақча. Оқчалининг қўли ўйнар, Оқчасизнинг — кўзи. Мақол. ■ Тошкандда ямоқчиликдан оқча орттира олмай саргاردон юрган Абдулқаҳҳорни олиб келмоқ учун Олимжон Тошканд жўнади. Ҳамза, Танланган асарлар.

ОҚЧЕЧАК Заранг дарахтининг Ўрта Осиёда учрайдиган гули оқ тури.

ОҚЧИЛ 1 сфт. Оққа мойил; оқиш, оқимтир. Оқчил мато.

2 сфт. Рангсиз, рангпар; оқдан келган. Шокир.. оқчил юзини қоплаб олган қалин ва узун соқолини тутамлаб.. -Ёши эликдан ошган одамнинг соқолига оқ тушмайди [деди]. С. Айний, Қуллар.

3 от Аёлларнинг жинсий аъзоларидан ажраладиган чиқинди сууюқлик.

ОҚЧОР айн. оқчорлоқ. Танаффус маҳалида оқчорлар галаси қўнган денгиз ёқасини эслатувчи ҳашаматли мактаб бир зумда тинди. М. Исмоилий, Бизнинг роман.

ОҚЧОРЛОҚ Балиқ ва ҳашаротлар билан тирикчилик қиладиган, сув билан боғлиқ қуш; балиқчи. -Мен умримда денгизни, оқчорлоқни кўрган эмасман.. — деди Аҳмад. А. Мухтор, Давр менинг тақдиримда. Оқчорлоқлар йўл-йўлакай кемамизга ҳамроҳ бўлишди. «Ёшлик».

ОҚШОМ 1 Қуёш ботиши билан тун бошланиши ўртасидаги ғира-шира ёруғ пайт. Қуёш ботган, лекин кун ҳали ёруғ, ҳар ёққа оқишом сукунати чўзилган. Ойбек, Танланган асарлар. Кўнгилни қон қилувчи оқишом кўнди. Ў. Ҳошимов, Қалбингга қулоқ сол.

2 Кеч, кечқурун. [Ойсара] Жисман заифлигига қарамай, кўп юмуш қилар, ҳар оқишом ўз болалари билан танча атрофини тўл-

дириб, китоб ўқир эди. Ойбек, Танланган асарлар. Ўша оқишом Усмонхўжанинг ҳовлисида тонг отгунча чироқ ўчмади, улфатлари хўп кайф-сафо қилишди. Х. Тўхтабоев, Йиллар ва йўллар.

Ярим оқишом Тун, ярим кеча. Ярим оқишом сержант Орзиқулов ўғли йўғида унинг хонасига кирди. «Ёшлик». Ярим оқишом ноз уйқуда ётувдим, икки жувонмаргинг минди тўшимма. «Эрали ва Шерали».

ОҚШОМГУЛ шв. Намозшомгул.

ОҚШОМЛАБ айн. оқшомлатиб. Бойбўрига билдирмаймиз, оқишомлаб жўнаймиз. «Алпомиш».

ОҚШОМЛАТИБ Қоронгу тушгандан кейин; кечлатиб. Хон оқишомлатиб, жияни Абдулкаримни Нурлавоёга чақиртирди. С. Сиёев, Аваз.

ОҚШУВОҚ Оқиш майда баргли, ўткир ҳидли, аччиқ, пояси пишиқ, ингичка ва узун ёввойи ўт (ундан супурги қилинади).

ОҚҚАНОТ Ўсимликлар ривожига зарар келтирадиган майда ҳашарот. Оққанот ҳашароти эрта кўкламда далага тарқалиб, то кузгача ўсимликларни қийратади. С. Нуоров, Майсаларни аёз урмайди.

ОҚҚОВУН Қовуннинг туси кўкиш-оқ, шакли тухумсимон, ўртапишар, серҳосил нави.

ОҚ-ҚОРА кўчма Ҳаётнинг яхши-ёмон, паст-баланд томонлари (инсонга нисбатан ишлатилади). Мавсума тушунган, оқ-қорани таниган аёл. М. М. Дўст, Галатепага қайтиш. Равшан мен учун оқ-қорани фарқига етадиган расмана ҳамроҳ. Қ. Кенжа. Нотаниш гул. Муҳаммад ҳали ҳам гўдак, ҳали ҳам оқ-қорани танимайдиган болакай. «Ёшлик».

ОҚҚУВ айн. оққуш. Мовий кўллар узра сузса чағалай, Адирларда кезса оққув галалар. А. Орипов, Йиллар армони. Кўк юзида паға булут, оқ булут.. Бир қарасанг — осмон тўла оққувлар. Миртемир.

ОҚҚУЙРУҚ Кийикларнинг бир тури. Орол денгизидаги «Борса келмас» оролида оққуйруқ ва жайранлар заповедниги вужудга келтирилган. М. Мусаев, Ўзбекистон.

ОҚҚУШ Фозлар оиласига мансуб, патлари оқ, бўйни узун йирик сув қуши; қув. Эскидан сақланиб қолган ёдгорлик — оққушлар сузиб юрган кўллари дарахт тагида най чалиб ўтирган йиғит-қизларнинг суратлари. М. М. Дўст, Лолазор.

ОҚҚҶТОН Узун оёқлилар туркумининг қарқаралар оиласига мансуб, паги оқ, бўйни ва тумшуги узун ўлаксахўр йиртқич қуш.

ОҒ Иштон ёки шимнинг икки почаси кўшиладиган жойи, чови.

ОҒА 1 айн. ака. *Матназар ўз оғасига мўлтираб тикилганча, бетоқат ҳўкизнинг бўйнидаги арқонни тортиб турарди.* С. Сиёев, Ёруғлик. *Ширин уканг келди оғасин излаб, кўрар кўзим, жоним акам, бормисан?* «Ширин билан Шакар».

2 Туғишган акадай яқин, қадрдон киши. *Кўни-кўни, кичик-катта Оғамларга салом айтнинг!* Ҳамза. [Салимбойвачча:] *Сиз ёлғиз поччам эмас, ҳам дўстим, ҳам оғамсиз.* Ойбек, Танланган асарлар.

3 тар. Юртнинг, элнинг каттаси, ҳокими. *Мени билсанг - Кўнгиротнинг оғаси.* Бошимда бор эр йигитнинг жиғаси. «Алпомиш».

Юрт оғаси айн. оға 3. *Очил ҳовлиқиб хитоб қиларди: -Кўйинг, юрт оғаси, мен ўзим суробини тўғрилайман!* М. М. Дўст, Галатепага қайтиш. *У ўзини юрт оғасидек эркин, сарбаст тутаётган Тешабойнинг мингбоши бўлиб келганми-йўқлигини билишни истар, лекин билолмай тажанг бўларди.* М. Исмоилий, Фаргона т. о.

4 тар. Турли лавозим ва унвон номлари таркибига киради, мас. *ҳарам оғаси, эшик оғаси.*

5 Ўзидан катталарга нисбатан мурожаат шакли. *Оға, шу ерни азонлаб ҳайдасак бўлмайдимиз?* С. Сиёев, Ёруғлик.

ОҒА-ИНИ 1 айн. ака-ука. *Овсинлар иноқ бўлса, оға-инилар чиноқ бўлмас.* Мақол. ■ *Кел, оға-ини бўлайлик. Сенга қиёматлик ака бўлай.* Катта тўйлар қилиб, уйлаб қўяман. С. Аҳмад, Уфқ.

2 Туғишгандек, ака-укадек бир-бирига яқин, қадрдон кишилар. *Ўзбекистонда яшаётган халқлар бир-бирига оға-ини, биродар.*

ОҒА-ИНИГАРЧИЛИК айн. оға-инилик 2.

ОҒА-ИНИЛАРЧА Ака-укага ўхшаб, ака-укалардек. *Улар оталари бошқа яйловга кўчганини эшитиб, Азизхон билан оға-иниларча хайрлашдилар.* С. Аҳмад, Уфқ.

ОҒА-ИНИЛИК 1 Ака-укалик, биродарлик.

2 Ака-укалар, оға-инилар ўртасидаги қариндошлик ҳисси ва муносабатлари, оға-иниларнинг бир-бирига оқибати, муруввати.

ОҒАЙНИ Яқин ошна, ўртоқ; дўст. *Оғайни тутинмоқ.* ■ *Менинг ёшлигимда бирга ошиқ ўйнаб, яхмалак отиб ўсган бир оғайним бор.* Шукрулло, Сайланма.

Етти оғайни қ. етти. Тўрт оғайни Қамария йил ҳисобида учинчи, тўртинчи, бешинчи, олтинчи ойларнинг (раббулавлал, раббуссоний, жумодилавлал, жумодиссоний) умумий номи. **Қирқ оғайни** Атиргулнинг жуда сершоҳ ва сергул бир тури.

ОҒАЙНИГАРЧИЛИК айн. ошна-оғайнигарчилик. *Ҳозир ўша улфатлар, ўша оғайнилар кўчада кўрса, тескари қароб ўтади. Шуми оғайнигарчилик!* А. Қаҳҳор, Оғайнилар.

ОҒАЙНИЛАШМОҚ Оға-ини бўлиб кетмоқ, ака-укалардек, яқин, қадрдон бўлиб кетмоқ, дўстлашмоқ.

ОҒАЙНИЛИК 1 Оғайни эканлик, дўст эканлик.

2 Оғайнилар, дўстлар ўртасидаги муносабатлар, оғайниларнинг бир-бирига оқибати, муруввати. *У менга оғайнилик қилди.* ■ *У ёзбиди: «Баракалла, ўртоқ шоир, Қани дўстлик, оғайнилик, ҳафсалам пир».* Ф. Фулом, Танланган асарлар.

ОҒАЙНИЧИЛИК айн. ошна-оғайнигарчилик.

ОҒАЛИК 1 Оға, ака, ёши катта эканлик, акалик.

2 Оғаларнинг иниларга муносабати, оғаларга хос оқибат, мурувват. *Оғалик қилмоқ.* ■ *Оқсоқол ҳамиша, ёлғиз ўғлимга Хайри оғалик қилади, деб ишонди.* «Ёшлик».

ОҒАЛИҚ тар. Бухоро хонлигидаги мансабдор шахс; хон, амир маслаҳатчиси.

ОҒАЧА тар. 1 Хон саройи ёки бойлар эшигидаги канизак, хизматкор аёл; чўри.

2 Бой уйгурлар оиласидаги энг кекса хотин.

ОҒДИРМОҚ 1 Оғмоқ 1-3, 6-7 фл. орт. н. *Шамол кемани оғдирди.* ■ *Эҳтимол, бирор таси Муниснинг йўлига ғов солиб, унинг содда кўнглини ўзи томон оғдиргандир, деб ўйларди Қудрат.* З. Фатхуллин, Сўнмас юлдуз. *Мамаюсуф болаларнинг ҳаммасини ўз томонига оғдириб олди.* А. Кўчимов, Ҳалқа.

2 кам қўлл. Ҳайдамоқ, етакламоқ. *Чатоқ бобонинг неваралари отарларни Балхияк яйловларига оғдириб кетишди.* С. Нуров, Дурдона.

ОҒЗАКИ 1 Нутқ воситасида қилинадиган, амалга ошириладиган, ёзма эмас. *Оғ-*

заки буйруқ. *Оғзаки имтиҳон. Халқ оғзаки ижодиёти.* ■ *Ошино ёзувчи ёки журналист эмаски, кўрган-эшитганларини газетага сошти олдидан оғзаки пишитиб оляпти, деб ўйласанг.* М. М. Дўст, Лолазор.

Оғзаки жанг айн. даҳанаки жанг қ. даҳанаки. *Шу кунни кечаси уйимизда оғзаки жанг бўлди.* Ойдин, Садаганг бўлай, командир. **Оғзаки нутқ тлш.** Нутқнинг ёзма нутқдан товуш орқали фарқланадиган сўзлашув шакли.

2 с. т. салб. Куруқ расмият учун айтилган; пуч. *Оғзаки гап.* ■ *Замира оғзаки куруққина сўрашди, Очил ҳам расмий салом берди.* П. Қодиров, Уч илдиш.

ОҒИЗ I (3-ш. бирл. оғзи) I Икки жағ ўртасидаги, овқатланиш, сўзлаш ёки овоз чиқариш учун хизмат қиладиган бўшлиқ. *Балиқнинг оғзи. Оғиз бўшлиғи. Одамнинг оғзи. Яхши гап ҳам бир оғиздан чиқади, ёмон гап ҳам бир оғиздан чиқади.* Мақол. *Эл оғзига элак тўтиб бўлмайди.* Мақол. ■ *Йўлчи узумдан бир неча донани оғзига ташлади.* Ойбек, Танланган асарлар.

2 Икки лаб ва уларнинг бир-бирига тегиб турган жойи ва атрофи. *Оғзидан ўлмоқ.* ■ *Гулнорнинг кичкина чиройли оғзи ҳайратдан бир нафас очилиб, кўзлари, «ростми?» деган каби Нурига тикилди.* Ойбек, Танланган асарлар.

3 кўчма Сўзловчи киши, одам. *Кўп оғиз бир бўлса, бир оғиз енгиледи.* Мақол. — *Ҳа, баракалла. Шунинг учун бундай гапларни фақат оғизма-оғиз, ўшанда ҳам фақат сигналган, ишончли оғиз орқали етказилади.* М. Исмоилий, Фарғона т. о.

4 кўчма Бировнинг қарамоғида бўлган одам; хўранда, нонхўр. *У дув-дув ёш тўкар, қўлларини осмонга кўтариб нола қиларди: -Худовандо! Бу на кўргилик? Энди нетаман? Тўққиз оғизни қандай боқаман? С. Сиёев, Ёруғлик. Баззоз поччанинг бекорчи оғизга тоби йўқ эди.* М. Исмоилий, Фарғона т. о.

5 Милтиқ, тўппонча, миномёт, замбарак каби отиш қуролларининг ўқ отилиб чиқадиган тешиги, стволи. [*Йўлчи*] *Тишини қисирлатиб деди: -Тўпнинг оғзига кўйиб отиб юборинглар мани, қонхўрлар!* Ойбек, Танланган асарлар.

6 Ички бўшлиғи, ичи бўлган нарсаларнинг кириш-чиқиш учун хизмат қиладиган жойи, тешиги. *Ўранинг оғзи. Форнинг оғзи.* ■

Чайла оғзида қўлида тугун билан Азизхон кўринди. С. Аҳмад, Уфқ.

7 Идишларнинг нарса олиш-қўйиш учун хизмат қиладиган тешиги. *Шишанинг оғзи.* ■ *Бўриной оғзига дока ўралган сопол кўзани билагига осиб, биқинига қўйганча Ширинқудуққа борди.* С. Нуров, Нарвон.

8 Кўчанинг, йўлнинг бошланиш, кира-вериш жойи. *Кўча оғзи.*

Балонинг оғзи Жуда хавфли, қўрқинчли жой. **Беш бармоғини (ёки панжасини) оғзига урмоқ қ. беш I. Бир (ёки икки) оғиз гап (ёки сўз)** Озгина гап, қисқа гап. -*Сайланганидан бери бир оғиз ҳисоботини эшитганимиз йўқ, — деган гаплар эшитилди.* П. Турсун, Ўқитувчи. [*Ширмонжон:*] *Ашурхон, ишларингизни кейин қиларсиз. Келинг, сиз билан икки оғиз гаплашай, деб келдим.* С. Зуннунова, Олов. **Бир оғиздан айн. бир овоздан қ. овоз 7.** *Ўн нафар чашначи бир оғиздан «аъло» баҳо қўйишди.* К. Маҳмудов, Қизикарли пазандачилик. **Гапи (ёки сўзи) оғзида қолди қ. гап I I. Болта муаллимнинг гапи оғзида қолди.** *Тоғайга олайиб қаради.* Н. Норқобилов, Тўқнашув. **Гапи оғиздан тушиб кетадиган** Гапини эплаб гапиролмайдиган; ношуд, ландавур. **Гапи оғзида қолмоқ** Гапини охиригача етказолмай қолмоқ, чала гапирмоқ. *Азизхоннинг гапи оғзида қолди.* С. Аҳмад, Уфқ. **Гапини (ёки сўзини) оғиздан олмоқ (ёки илиб кетмоқ) қ. гап I I. Дарвоза оғзи тар.** Шаҳар, қалъа дарвозаси ёки умуман дарвоза яқинидаги жой. *Назарида, худди шу дарвоза оғзида велосипед устаси бордай бўлди.* А. Қаҳҳор, Сароб. **Катта оғиз ёки оғзи катта** Унча-мунчани писанд қилмайдиган; катта гапиришга ўрганган; мақтанчоқ. *Отасининг давлати, катта оғиз, ҳовлиқма ва такаббур онасининг эркалаши қўшилиб, қизга ортиқча гурур берган, ҳаракатларига ўзбошимчалик, қилиқларига ноз-карашма бағишлаган эди.* Ойбек, Танланган асарлар. **«Олма пиш, оғзимга туш», деб ўтирмақ** Ишни тезроқ бажариш учун жон куйдирмаслик, ўзи бўлар, деб бепарво ўтиравериш. *Ўзлари ҳам олма пиш, оғзимга туш, деб қўлларини қовуштириб ўтиравермасинлар-да, ахир.* Ш. Рашидов, Бўрондан кучли. **Она сути оғзига келмоқ** Жуда кўп уринмоқ, қийналмоқ, машаққат чекмоқ. *Бу атласларни Отабойдан ундиргунча нақ Қўзбойнинг она сути оғзига келди.* С. Аҳмад, Чўл шамоллари. **Оғзи бема-**

за қ. бемаза 4. **Оғзи билан иш битирадиган** Ишни осон фаҳмлайдиган, ҳар қандай ишни гап билан битирадиган. **Оғзи билан юрадиган** Ёмон гап тарқатадиган; ғийбатчи. **Оғзи бормайди айн. тили бормайди қ. тил 2. Оғзи ботир қ. ботир 1. Оғзи бузук (ёки ёмон) айн. оғзи шалоқ қ. шалоқ 3. Оғзи бўш(лик) қ. бўш.** Севаргул чой қуйиб узатаркан, оғзи бўшлик қилиб қўйганига кўнглида пушаймон бўлди. Н. Қиличев, Чигирик. **Оғзи куйган** Панд еган. **Оғзи куйган қатиқни пуфлаб ичади.** Мақол. ■ **Тўғриси, бу ишни у [Йигитали] ҳеч кимга, ҳатто Сафарбаровга ҳам ишонмади.** Чунки бу борада унинг неча марта оғзи куйган. И. Раҳим, Зангори кема капитани. **Оғзи очилиб қолмоқ** Ҳайрон бўлиб, ҳуши кетиб қолмоқ, ҳанг-манг бўлмоқ. *Хола лабини буриб, атрофда оғзи очилиб қолган аёлларга ҳайрат билан бир-бир қараб чиқди.* С. Нуров, Майсаларни аёз урмайди. *Эшитиб, Фузурдагиларнинг оғзи очилиб қолади.* Ш. Тошматов, Эрк қуши. **Оғзи очик** Рўза тутмаган киши; кўза. **Оғзи қулоғида (ёки қулоғига етди) с. т.** Жуда хурсанд бўлди, суюнди. *Тўранинг оғзи қулоғида, кўнгли нимадандир таскин топган эди.* Н. Фозилов, Дийдор. *Фуломжон.. оғзи қулоғига етиб куларди.* М. Исмоилий, Фарғона т.о. **Оғзига кучи етмаган қ. куч.** **Оғзига сиққанича** Кўнглига келганича, хоҳлаганича (ошириб). *Ҳар ким ўз қаҳрамонлиги ҳақида оғзига сиққанича сўзлай бошлади.* «Латифалар». **Оғзига (ёки оғзи) тегди** Ейиш, ичишга муяссар бўлди; еди, ичди, етишди. *Шу ерда туриб янги апельсинга ҳали оғзим теккани йўқ.* С. Аҳмад, Юлдуз. **Оғзига урмоқ 1)** сўзлаш учун йўл қўймаслик, сўзлатмай қўймоқ. *У-бу дейдиган одамнинг оғзига уриш керак.* Ким нима деса, мен ҳамма вақт оғзига ураман. А. Қаҳҳор, Қўшчинор чироқлари; 2) айн. **оғзини мойламоқ.** Тўраларнинг оғзига уриш учун пулни бойвачча беради. *Мандан нима кетади.* Ойбек, Танланган асарлар. **Оғзига қарамоқ (ёки тикилмоқ) 1)** сўзини диққат билан тингламоқ. *Сидиқжон юзларча киши оғзига қараб турган мажлисни кўз олдига келтириб, жуда катта ташвишга қолди-ю, дами ичига тушиб кетди.* А. Қаҳҳор, Қўшчинор чироқлари; 2) бировдан бирор гап кутмоқ, бировнинг бирор нарса дейишини пойламоқ; 3) бировнинг гапига қараб иш тутмоқ. *Заводда ишлайдиган мингдан ортиқ эркак, шулар қатори эри ҳам ўша-*

нинг [Кароматнинг] оғзига қарайди. А. Қаҳҳор, Қизлар. **Оғзига қаратмоқ** Гапириб бошқаларнинг диққатини ўзига жалб қилмоқ. *Умуман, Авзамжон бошқаларни оғзига қаратишни яхши кўради.* С. Аҳмад, Уфқ. **Оғзига қоқмоқ айн. оғзига урмоқ 1.** **Оғзидагини (ёки оғзидаги ошни) олдирмоқ қ. олдирмоқ.** **Оғзидан гулламоқ қ. гулламоқ II.** **Оғзинг қани деса, қулоғини кўрсатадиган** Ҳеч нарсага ақли етмайдиган, анқов. **Оғзингга ёғ (ёки мой)** Бирор яхши хабар келтирган кишига миннатдорлик билдириб айтиладиган ибора. *Вой, оғзингизга ёғ, ўғлим! Келин кўрадиган куним ҳам бормикин!* А. Қаҳҳор, Қўшчинор чироқлари. **Оғзингга қараб гапир! қ. гапирмоқ 1.** *Оғзингизга қараб гапиринг, тасқара бўлиб нима қипти!* С. Зуннунова, Олов. **Оғзингдан чиқарма** Ҳеч кимга айта кўрма. *Бўлар иш бўлпти, энди ҳеч кимга оғзингдан чиқарма.* А. Қаҳҳор, Қўшчинор чироқлари. **Оғзини мойламоқ (ёки ёғламоқ) қ. мойламоқ.** **Оғзини пойламоқ айн. оғзига қарамоқ 2.** *Кампир ҳамон келиннинг оғзини пойлади, лекин келиндан ҳеч бир ҳасрат қиладиган гап чиқмади.* Ойдин, Мардлик – мангулик. **Оғзининг суви келмоқ** Бирор нарсани кўриб, жуда ҳаваси келмоқ, егиси ёки ичкиси келмоқ; кўнгли суст кетмоқ. **Оғзининг таноби қочмоқ** Жуда хурсанд бўлмоқ, суюниб кетмоқ; илжаймоқ. *Тўпанисо, ўзи ҳақидаги мақтовга келганда, оғзининг таноби қочиб: -Мен нима қилибман?.. Менда нима гап?.. Ҳеч-да, - деди.* А. Қаҳҳор, Қўшчинор чироқлари. **Оғиз бирлик** Аҳиллик, иноқлик. *Давлат – оғиз бирликда.* Мақол. **Оғиз боғлар шв. этн.** Тўй қилиш ҳақида қиз томоннинг розилигини олиш, унаштириш маросими, фотиҳа. **Оғиз жуфтламоқ** Гапириш учун тайёрланмоқ, ҳаракат қилмоқ. *Она бир-икки марта гапга оғиз жуфтлади-ю, гапиролмади.* С. Аҳмад, Уфқ. **Оғиз кўпиртирмоқ қ. кўпиртирмоқ.** **Оғиз очмоқ 1)** гапирмоқ, сўзлай бошламоқ. *Мулла Абдураҳмон яна оғиз очолмади.* Чунки Сафар бўзчи «китоб сўзи» билан уни енгиб қўйди. А. Қодирий, Меҳробдан чаён; 2) *дин.* шом пайтида бирор нарса истеъмол қилмоқ, рўзани очмоқ (рўза тутган кишилар ҳақида). **Оғиз солмоқ** Бировнинг қизини келинликка ёки ўғлини куёвликка сўрамоқ, сўратмоқ. *Энди кимга оғиз солсанг, гиринг демай тегиши аниқ.* С. Аҳмад, Юлдуз. *Тўғри сўзлаб, мен гапирдим юзингга, Оғиз солдим уйда турган қизингга.*

«Ёдгор». **Оғизга олмоқ** 1) емоқ, ичмоқ. *Асли мени [ичишига] хўжайин ўргатди. Илгари бир қатра оғзимга олмас эдим.* Ойбек, Танланган асарлар; 2) бирор гапни гапирмоқ, айтмоқ; 3) бировнинг номини айтиб эсламоқ, йўқламоқ. *Орада бир неча кун ўтди — Муҳаммадражаб жим, Мирзамухиддинни оғзига ҳам олмади.* А. Қаҳҳор, Сароб. **Оғизга тушмоқ** Ҳамма ерда тез-тез тилга олинадиган бўлиб қолмоқ, гап бўлмоқ; танилмоқ. *Абдумаликнинг асарлари Москвадаги санъатшунослар орасида ҳам ростмана оғизга тушиди.* «Ёшлик». *Мен бу сирни шу чоққача ичимда сақлаб келаётган эдим, энди айтмасам бўлмайди, чунки бу миш-миш оғизга тушиб бораётитти.* А. Қаҳҳор, Кўшчинор чироқлари. **Оғизда** Фақат тил учида, шунчаки; юзаки. *Айниқса бу колхозда мусобақа оғизда, қоғозда.* Ойбек, О. в. шабадалар. **Оғиздан оғизга кўчмоқ (ёки ўтмоқ)** 1) бир авлоддан иккинчи авлодга оғзаки равишда ўтиб келмоқ. *Ўзбек халқ эртаклари оғиздан оғизга ўтиб, асрлар бўйи сақланиб келмоқда. Қимматбаҳо тошлар ҳақида қадим замонларда тўқилган ғаройиб афсоналар ҳамон оғиздан оғизга ўтиб келади.* «Фан ва турмуш»; 2) одамлар орасига тарқаб кетмоқ, гап бўлмоқ. *Йўлдош ота келатибдилар, деган гап оғиздан оғизга ўтди.* С. Аҳмад, Уфқ. *Оқсоқолнинг қандай ажойиб томошаларни кўргани, қандай муҳомхонага тушгани тўғрисидаги гаплари қўлдан қулоққа, оғиздан оғизга ўтди.* П. Турсун, Ўқитувчи. **Эллик оғиз гап (ёки сўз)** Кўп гап, эзмалик. *Элакка чиққан хотиннинг эллик оғиз гапи бор.* Мақол.

ОҒИЗ II (3-ш. бирл. оғизи) Янги туққан сигирнинг уч-тўрт кунли сутини йиғиб пиширилган пишлоқсимон таом. *Эрталаб Тозагул меҳмон опани янги туққан сигирнинг оғзи ва ўғирдан иссиққина чиққан оқишмоқ толқон билан сийлади.* Ҳ. Фулом, Машъал. *Биринчи сут — оғиз бўлади, Седанадан мағиз бўлади.* Ф. Фулом, Танланган асарлар.

Оғиз сути Янги туққан сигирнинг хом сути.

ОҒИЗ-БУРУН Оғиз ва бурун. *Оғзи-бурунини қоп-қора қон қилмоқ.*

Оғиз-бурун ўпишмоқ салб. Жуда иноқ бўлиб кетмоқ, топишиб олмоқ. *Бойлар, катта ер эгалари, амалдорларнинг ҳаммаси бири-бири билан оғиз-бурун ўпишган.* М. Ўринхўжаев, Унутилмас кунлар. **Оғиз-бурунини**

мойламоқ айн. оғзини мойламоқ қ. мойламоқ. *Хумпарнинг оғзи-бурунини мойлаб, қўлга олиб бўлмасмикин?* П. Турсун, Ўқитувчи.

ОҒИЗЛИК шв. айн. Сувлик.

ОҒИЗМА-ОҒИЗ рви. Бир-бирига айтиш, хабар қилиш йўли билан, оғиздан оғизга ўтиб ёки ўтказиб. *Ҳа, баракалла. Шунинг учун бундай гаплар фақат оғизма-оғиз.. етказилади.* М. Исмоилий, Фарғона т. о. *Ови бароридан келган кишининг қилган иши дарҳол оғизма-оғиз бутун қисмга тарқалди.* А. Қаҳҳор, Олтин юлдуз.

ОҒИЛ Уй ҳайвонларини сақлаш ва боқиш учун қурилган махсус бино; молхона, оғилхона. *Мен оғилдаги устунга бойлоғлигича қолиб кетган чилвирдан кесиб келдим.* Ш. Холмирзаев, Оғир тош кўчса. *Мирҳомидхўжа оғилнинг эшигини секин ёнди-да, имо билан Қамбаралини бир чеккага чақирди.* А. Қаҳҳор, Кўшчинор чироқлари.

ОҒИЛХОНА айн. оғил. Аҳмад бригадир ўтти ўроқ билан дасталаб, қўлтиқлаганча оғилхонага кетди. С. Нуров, Майсаларни аёз урмайди.

ОҒИР I Вазни катта бўлган, тош босадиган; вазнли, вазмин. *Оғир юк. Оғир от. Юки оғир арава. Оғир вазнли курашчи. Олтин кумушдан оғир. Оғир тошни сув элтмас.* Мақол. ■ *Яна жимлик ҳукм сурди. Бу сукунат оғир тегирмон тоши бўлиб, мулла Норқўзини янчиб юборди.* А. Қаҳҳор, Майиз емаган хотин. *Бойвачча кавакчадан чўп тикиб, занжирни туширди, каттагина оғир дарвоза «ғурр» этиб очилди.* Ойбек, Танланган асарлар.

Оғир сув ким. Водород изотопи дейтерийнинг кислород билан бирикмаси.

2 Кўп куч ёки билим талаб қиладиган; қийин, мураккаб; машаққатли, сермашаққат. *Оғир иш.* ■ *У [Йўлчи] ҳар хил оғир юмушларни қилиб ўрганган бўлса ҳам, тўнка ковламаган эди.* Ойбек, Танланган асарлар. *Шундай қилиш керакки, халқнинг пешона тери билан, оғир меҳнати билан чиқариладиган сув битта ё бир неча балохўр қўлига ўтиб кетиб қолмасин.* М. Исмоилий, Фарғона т. о. *Бу савол аввалги иккита саволдан оғирроқ эди.* С. Аҳмад, Уфқ.

3 Мушкул; масъулиятли. *Оғир масала.* ■ *-Баҳор-да, қизим, бундан буён кун исийверади, — қизини оғир ҳолатдан чиқаришига тиришиди она.* Шуҳрат, Шинелли йиллар. *Эл-*

муродга машғулотлар оғир туюлмади. Шухрат, Шинелли йиллар. *Йил оғир келди-ю, бригадир шийпонда тунаб қоладиган бўлди.* Ш. Рашидов, Бўрондан кучли.

4 Салмоқли, салобатли. *Ғўлабирдан келган, қоп-қора, семиз киши оғир юриб, даврага чиқди.* Н. Аминов, Қаққаҳа. *Ҳовли ичкарироқ бўлганидан, ҳамма ухлаб қолганидан, дарвозанинг оғир гумбурига ичкаридан ҳеч ким чиқмади.* Ойбек, Танланган асарлар. *-Бунисини кўяверинг, қори, худо ишингизни унғласа, ҳеч гап эмас, гард юктирмай чиқиб кетасиз, - дея р эди оғир, салмоқли товуш.* М. Исмоилий, Фарғона т. о.

5 Секин, шошмасдан қилинган; босиқ, вазмин. *Оғир қадам.* ■ *Қора терга тушиб, ҳассасига таяниб қолган домла уфқдан кўзини олиб, оғир бош чайқади.* М. Мансуров, Ёмби. *Ғуломжон бошини оғир кўтариб, уста Баҳромга қаради.* М. Исмоилий, Фарғона т. о.

6 кўчма Ўзини тута биладиган; сипо, вазмин, босиқ. *Аминжон, ўзи ёш бўлса ҳам, жуда пишиқ, оғир, ғайратли.* А. Қахқор, Хотинлар. *Камтар ва камсухан, гўзал Искандаро қулоқ солиб, жиддий ва оғир ўтирарди.* Ойбек, Нур қидириб.

Оғир бўл Ўзингни бос, сабр қил. *Одамлар Тожбойни тартибга чақиритиб чуғурлашди: «Ҳа, ҳа, бир оз тишини тишга кўйиш керак». «Ҳа, сал оғир бўлинг».* П. Турсун, Ўқитувчи.

7 кўчма Муайян меъёри бузилган, меъёрга, талабга жавоб бермайдиган. *Хонанинг ҳавоси оғир: чанг, овқат, тамаки ҳидлари бир-бирига аралашиб-қуралашиб кетганди.* С. Нуров, Майсаларни аёз урмайди.

8 кўчма Ёмон оқибатларга олиб бориши мумкин бўлган; жиддий, хавфли. *Оғир жароҳат. Оғир дард.* ■ *Отаси оғир касалликдан сўнг вафот этди.* М. Исмоилий, Фарғона т. о. *У [Элмурод] ҳеч нарсани билмас, аҳволи оғир эди.* П. Турсун, Ўқитувчи. *У [Салтонбу] шундай бақириб юбордики, уй бурчида оғир ётган ун уч яшарли.. қизи чўчиб кетар, деб ҳам ўйламади.* М. Исмоилий, Фарғона т. о.

9 кўчма Ташвиш, иқтисодий муаммо. [Ҳаким:] *Ҳам ишлаб, ҳам ўқийман, акамга оғирини тушмасин.* «Ёшлик».

Оғирини енгил қилмоқ Бировнинг мушқулини, муаммосини осон қилмоқ, унга ёрдам қилмоқ. *-Холбой бойнинг рўзғорига*

бўлишиб, унинг оғирини енгил қилиб турганлиги учун ўйли-жойли бўлиб олди. К. Яшин, Ҳамза.

10 кўчма Машаққатли, уқубатли, азобли; мураккаб, мушкул. *Оғир кун. Оғир ҳаёт.* ■ *Элмурод оиласи ва ўзининг оғир ўтмишини қисқача тасвирлаб келиб, охирида шундай деган.* П. Турсун, Ўқитувчи. *Отамурод узоқдан бўлса-да, сезди: бошлиқ оғир аҳволда қолибди.* М. Мансуров, Ёмби.

11 кўчма Қаттиқ жазолашни талаб қиладиган, жуда қатга. *Оғир гуноҳ. Оғир жиноят.*

12 Нотинч, ташвишли, ҳаяжонли. *Оғир туш. Оғир хаёл. Оғир ўй.* ■ *Чолнинг юрак яраларини очишда ўзини айбли санаган Йўлчининг кўкраги оғир туйғулар билан тўлди.* Ойбек, Танланган асарлар.

13 кўчма Қаттиқ тегадиган, хафа қиладиган, кўнгилсиз; малолли. *Раиснинг уни кўриб, худди кўрмагандай ёнгинасидан машинасида кўчани чангитиб ўтиб кетиши унга оғир тегди.* А. Кўчимов, Ҳалқа. *Қамбар бирдан кулиб юборди. Унинг кулиши Йўлчига оғир тегди.* Ойбек, Танланган асарлар.

Кўнглига оғир олмоқ қ. кўнгил. Оғир ботмоқ 1) хафа қиладиган, малолли. *Назаров эшитдингизми, дегандай қараш қилди. Назаровнинг шу боқиши Шербекка оғир ботди.* С. Анорбоев, Оқсой; 2) ҳазм бўлмаслик (овқатга нисбатан). *Бу хил паловларни ёш гўдаклардан тортиб қарияларгача ва ҳатто беморлар ҳам истеъмол қилса, оғир ботмайди.* К. Маҳмудов, Қизиқарли пазандалик. **Оғир гап** 1) малол келадиган, қаттиқ тегадиган гап; 2) ҳал қилиш қийин бўлган масала; 3) кўнгилсиз, ачинарли воқеа.

14 кўчма Ҳаддан зиёд, киши бардош беролмайдиган; қаттиқ. *Оғир алам. Оғир жуздоллик. Оғир кулфат. Оғир мусibat.* ■ *Инсон ҳаётидаги энг оғир қайғу - онадан айрилиқ қайғуси.* П. Турсун, Ўқитувчи. *-Энди билдим, ошиқлик оғир дард экан. Бошимга тушганда билдим, - деди [йигит] П. Турсун, Ўқитувчи.*

15 кўчма Қаҳратон, совуқ, ташвишли. *Воҳа раҳбари саволни кутмаган экан, даб-дурустан довдираб қолди, сўнг шошиб: -Тўғри, устод, бу йил анча оғир қиш бўлди - деди..* М. М. Дўст, Лолазор.

16 кўчма Куч келадиган, қийин; дардли. *Оғир нафас. Оғир энтикмоқ.* ■ *Зиёдилла кетгандан кейин Ботирали бешик тебратиб*

ўтирган хотинининг ёнига чўжиб, оғир уф тортди. Ҳ. Фулом, Машғал. Қизил қонига бўялган қаҳрамон нулёмётчи оғир нафас олмоқда эди. Н. Сафаров, Қаҳрамоннинг туғилиши.

17 кўчма Мунгли, гамгин, қайғули; салмоқли, вазмин. *Оғир сукунат.* ■ *Оғир, юракни эзувчи куй шамоллар қанотида у ёқдан бу ёққа сузиб юрибди.* С. Аҳмад, Уфқ.

Оғир артиллерия Узоққа отадиган катта тўп ва замбараклар. **Оғир карвон қ. оғиркарвон.** -*Йўқ, менга сира ўхшамайди, — деди Шарофатбиби шикоятланган оҳангда. — Оғир карвон у. Ойбек, О. в. шабадалар. Оғир кўчмоқ Қийинчилик билан ҳал бўлмоқ (бирор иш ёки масала ҳақида).* **Оғир оёқ қ. оёқ.** *Икромжоннинг кўнгли нотинч. Хотинининг оғир оёқ бўлганидан хаёли қишлоқда, уйда эди.* С. Аҳмад, Уфқ. **Оғир саноат айн. оғир индустрия қ. индустрия. Тарбияси оғир** Хулқи яхши бўлмаган. *Бўлғуси педагоглар, тарбияси оғир ўқувчилар билан ишлаш каби масалалар устида иш олиб борадилар.* «Фан ва турмуш». **Қулоғи оғир** Гапни яхши эшитмайдиган, карроқ; кар. *Қулоғи бир оз оғир, товушни бирмунча кўтариброқ гапиришга тўғри келди.* А. Қодирий, Кичик асарлар. **Ҳавоси оғир жой** Ҳавоси бузилган, нафас олиш қийин бўлган жой.

ОҒИРБҮЙ *ив. айн. оғир оёқ қ. оёқ.* *Озодахон оғирбўй бўлишига қарамай, югуриб-елиб чой дамлади.* Ф. Насриддинов, Ота ўғли.

ОҒИРКАРВОН Шошмасдан, бамайлихотир иш қиладиган; секин қимирлайдиган, имиллаган; сусткаш. *Солижон — йигирма ёшлардаги дароз, оғиркарвон, камгап йигит.* С. Сиеев, Отлиқ аёл. *Самад Ғайбаровнинг галатепалик бир тўпори эканидан хабарсиздек, манави оғиркарвон қизни кўриб, кулмаслигини истайди.* М. М. Дўст, Галатепага қайтиш.

ОҒИРЛАТМОҚ Юкини ёки вазнини оширмақ; оғирлаштирамақ.

ОҒИРЛАШМОҚ 1 Вазни, оғирлиги ошмоқ, оғирроқ бўлиб қолмоқ, оғир тортмоқ; вазминлашмоқ; кўпайиб бормоқ. *Ёғоч бўжиб, анча оғирлашди. Машинанинг юки оғирлашиб кетди.* ■ *Қордан кичкина юмалок ясаб, думалата-думалата, ўз бўйларидан баланд катта курра ясаганлар. У жуда оғирлашган.* Ойбек, Танланган асарлар.

2 кўчма Тобора машаққатли бўлмоқ. *Ботиралининг хаёли унинг елкасига оғир юк*

бўлиб тушди ва бу юк кундан-кун оғирлашарди. «Ёшлик».

3 Қийинлашмоқ, мураккаблашмоқ. *Иш оғирлашди.*

4 Оғир тортмоқ, мушкуллашмоқ. *Беморнинг нафас олиши оғирлашди.*

5 Моддий жиҳатдан ночор ҳолга тушиб қолмоқ; машаққатли, уқубатли бўлиб қолмоқ. *Аям ўлгандан кейин аҳволимиз яна оғирлашди.* Ойбек, Танланган асарлар. *Замон оғирлашиб кетганмиш, нима қилай, қон ютиб ўтирибман.* Т. Малик, Иблис девори.

6 Ноқулай, қийин бўлиб қолмоқ. *Энди қизининг олдига кириб, унинг бетига қараш унга [қутидорга] жуда ҳам оғирлашган эди, чунки бу фожиянинг бош омили деб ўзини таниган эди.* А. Қодирий, Ўтган кунлар.

7 Хавфли тус олмоқ, хавфли, хатарли бўлиб қолмоқ, жиддийлашмоқ. *Аҳвол борган сари оғирлашди. Погодин кўшинлари ярим ҳалқа ичида қолди.* И. Раҳим, Чин муҳаббат. -*Бойларнинг чақиғи билан Йўлчининг иши оғирлашди, — деди Шокир ота.* Ойбек, Танланган асарлар.

8 Кучаймоқ, зўраймоқ, тузалиши маҳол бўлиб қолмоқ. *Бемор кундан-кунга оғирлашяпти.* ■ *Фазилат опанинг аҳволи оғирлашиб борарди. Ранги сарғайиб, озиб чўп бўлиб қолди.* М. Ҳазратқулов, Журъат.

9 Ошмоқ, кучаймоқ. *Жинояти оғирлашди. Жазо чоралари оғирлашди.*

10 кўчма Гангиб қолмоқ, ўзини ёмон ҳис этмоқ. *Киши дардини англатормасга оғирлашади.* А. Қаҳҳор, Сароб. *Қотмадан келган Смирнов бу сўзларни эшитгач, оғирлашиб кетгандай бўлди.* Ш. Рашидов, Бўрондан кучли.

Боши (ёки калласи) оғирлашмоқ Боши гангибоқ, ғовлаб кетмоқ; ўзини бошқара олмай қолмоқ. *Чинни коса беш-олти бор қўлдан қўлга ўтгандан кейин, ҳар икковининг ҳам боши хийла оғирлашиб, кайф ғалаба қила бошлади.* Ҳ. Фулом, Машғал. *Елкасининг офтобда куйган жойлари ачишар, боши оғирлашиб, ёстиқдан бош узолмасди.* С. Аҳмад, Уфқ.

ОҒИРЛИК Вазнининг ортиқлиги; қийинлик, мушкуллик. *Ишининг оғирлиги. Масаланининг оғирлиги. Аҳволнинг оғирлиги. Керакли тошининг оғирлиги йўқ.* Мақол. ■ *Карвон жўнади. Юкнинг оғирлигиданми, ёки гунчаклари ёғсирасанданми, аравалар гирчиллаб,*

ўз музикаси ўзи билан жадал бормоқда. И. Раҳим, Чин муҳаббат. Тошкентдан уйланганимдан сўнг, ёлғиз бошимга ҳам Тошкентдан, ҳам Марғилондан икки хотин ушлаб туриш оғирлик қила бошлади. А. Қодирий, Ўтган кунлар.

Калланг оғирлик қиялпими Жонингдан умидинг йўқми, ўлгинг келялпими.

2 физ. Жисмларнинг ерга тортилиш кучи.

3 кўчма Ташвиш, малоллик. Сизларга оғирлигим тушаётгани йўғу.. Уйда нима бор менга? А. Кўчимов, Ҳалқа. Ҳар куни эрталаб ишга кетаётганингда, [болани боғчага] элиб қўясан, ўзингдан бошқа ҳеч кимга оғирлиги тушмайди. А. Қаҳҳор, Қўшчинор чироқлари.

[Бировга] оғирлигини ортмоқ 1) бировга осылмоқ, устига чиқиб (миниби ёки опичлаб) олмоқ; 2) кўчма боқинди, қарам бўлиб олмоқ, ўз ташвишини бировнинг зиммасига юкламоқ. *Мунаввар, Йўлдошга оғирлигини ортмаслик учун, ўзига иш ҳам топди: тўғруқхонага доя бўлиб кирди*, С. Анорбоев, Меҳр.

4 кўчма Мушкул, қийин, ноқулай аҳвол; қийинчилик; азоб-уқубат. Соқинанинг бир ўзига икки бола билан юриш оғирлик қилади. М. М. Дўст, Лолазор. *Момо у кунларнинг оғирлиги, ташвиши ҳақида кўпам сўйлайвермайди*. «Саодат». Улар бир-бирларига қарашиб, илжайишдилар. *Нигор ойим ҳам оғирликдан чиқди*. А. Қодирий, Меҳробдан чаён.

5 кўчма Ўзини тутта билиш, сиполик; босиқлик, вазминлик. *Кимнинг номуси, кимнинг ақли, кимнинг сабри, оғирлиги уни шармандаликдан қутқариб қолди?* Ойбек, Танланган асарлар. *Ботирали оғирлак билан онасига қаради*. «Ёшлик». У, қўлларидаси нарсаларни стол устига қўйгач, оғирлик ва босиқлик билан Турсун хола ёнига борди. Газетадан.

Ўзини оғирликка солмоқ ёки оғирлик қилмоқ Ўзини босмоқ, ўзини қўлга олмоқ, сабр қилмоқ. У ўзини оғирликка солиб, хотинининг бош-кўзини силади, эркалатди. Ойдин, Кўнгли тўлдими, яхши йигит. *Юраги орқасига тортиб кетган Жўмард ўзини оғирликка солди*. Мирмуҳсин, Илдизлар ва япроқлар.

ОҒИРОЁҚ (тўғриси — оғир оёқ) с. т. Ҳомиладор. *Тоғай оғирёёқ хотинларга хос*

сусткашлик билан ўчоқ бошида куймаланиб юрган Марҳаматга эътибор бермади. «Ёшлик».

ОҒИРСИНМОҚ 1 Оғир, қийин деб билмоқ.

2 айн. оғринмоқ.

ОҒИРЧИЛИК Қийинчилик, оғир, мушкул аҳвол; машаққат. *Оғирчилик кўрган одам*. ■ *Ўғлингни тирик етим қилма. Боланг туфайли ҳар қанча оғирчилик бўлса, устинга ол*. А. Қаҳҳор, Қўшчинор чироқлари. *Улар ҳар қанча оғирчиликка чидаб, бирлашишлари керак*. С. Аҳмад, Уфқ.

ОҒИШ 1 **Оғмоқ** фл. ҳар. н. *Нурнинг турли муҳитларда турлича оғиши*. ■ *Ҳар қандай ионнинг оғиш бурчаги унинг бир қанча параметрларига, жумладан, массасига боғлиқ бўлишини инглиз физиги Ж. Томсон кашф этган эди*. «Фан ва турмуш».

2 махс. Меридиан чизиги билан компас стрелкаси йўналишлари орасида ҳосил бўладиган бурчак. *Магнит стрелкасининг оғиши*.

Орамизда оғишимиз бор шв. Бир-биримизга ўтишганимиз бор, бир-биримизда қарзимиз бор.

ОҒИШМАЙ 1 **Оғишмоқ** фл. рвдш.

2 рвш. Изчиллик билан, иккиланмасдан, чекинмасдан. *Ҳужуматимиз ўзининг тинчликсевар сиёсатини оғишмай амалга ошириб келяпти*. «Фан ва турмуш».

ОҒИШМОҚ 1 **Оғмоқ** 3, 6 фл. бирг. н. *Улар тўғри йўлдан оғишмади. Ота-она келин томон оғишди*. ■ [Отабек] *Онасининг нима бўлса ҳам Марғилон тарафга оғишганини ва ўзининг кучли бир душмандан қутулаётганини.. пайқади*. А. Қодирий, Ўтган кунлар.

2 Бирор томонга қийшаймоқ, оғмоқ. *Дунё ўқи горизонтга оғишган ва шунинг учун ёриткичлар осмон гумбазининг жанубий томонида ҳаммадан баландроқ кўтарилади*. «Астрономия».

3 кам қўлл. Бирор томонга юрмоқ, йўл олмоқ, ўтмоқ. *Ҳомид ўзининг нажот томониغا оғишганини сезиб энтикди*. А. Қодирий, Ўтган кунлар.

4 шв. Алмашмоқ, адашмоқ, ўзгармоқ. *Кийимлари оғишиб қолибди*.

5 шв. Ўзаро олди-берди қилиб, бир-бирига қарздор бўлмоқ, ўтишмоқ ёки ўтишган қарз-қурзларини бир-бирига тўлаб, орани очиқ қилмоқ. *Шуни айтаётибман-да! Қий-*

налиб қолманг, менда бор, бериб турай, кейин оғишиб кетармиз. Уйғун, Сўнгги пушаймон.

ОҒИШТИРМОҚ ОҒИШМОҚ 1, 3, 4 фл. орт. н. Чўпон подани қирнинг у томониغا оғиштирди. ■ [Хушрўй] *Ҳафта, ўн кун ўтмасдан, эрини ўз томониغا оғиштириб, кундоши ёнига киргизмаёқ қўядир.* А. Қодирий, Ўтган кунлар.

ОҒМА 1 с. т. ай. **оғмачи 1.**

2 мат. Бирор тўғри чизикни 90° дан кичик бурчак ҳосил қилиб, кесиб ўтадиган иккинчи тўғри чизиқ. *Оғма призма. Оғма цилиндр.*

3 сфт. Ўтиқ, қия. *Оғма минора.*

ОҒМАХОН Ғалла ўсимликларига зарар келтирувчи, каламушдан каттароқ кемирувчи ҳайвон.

ОҒМАЧИ 1 Бир гапда турмайдиган, ҳадеб айнийверадиган иродасиз одам, иккиланувчи; иккиюзламачи. *Оғмачи камбағалларимизнинг оғзини мойлашяпти тулки бойлар.* Н. Сафаров, Оловли излар.

2 сиёс. Бош йўлдан чекинувчи, четга чиқувчи, оғувчи. *Ўнг оғмачилар. Сўл оғмачилар.*

ОҒМАЧИЛИК Оғмачига хос хусусиятга эгалик.

2 сиёс. Бош йўлдан чекиниш, четга чиқиш, оғиш. *Ўнг оғмачилик. Сўл оғмачилик.*

ОҒМОҚ 1 Бирор томонга ётиб, қия ҳолат олмоқ, қийшаймоқ, энгашмоқ, ёнбошламоқ. *Кема ўнг томонга оғди. Девор оғиб қолди.* ■ *Ортиқ сўзлай олмади, боши бир томонга оғиб тушди-ю, жим бўлди — жони узилган эди.* Х. Тўхтабоев, Йиллар ва йўллар. *Анисимов ҳамиша деворни оғган томонга йиқитади.* Э. Самандар, Дарёсини йўқотган қирғоқ.

2 Бирор томонга, пастга сирғаниб, осилиб тушмоқ. *Қоринбоғ бўшаб, отнинг эгари чап томонга оғиб кетибди.*

3 Тўғри, тик йўлдан ёки белгили йўналишдан четга чиқмоқ. *Самолёт курсдан оғди.*

4 Бурилмоқ, четга чиқмоқ; бирор томон силжимоқ. *Яхшибоев гап мавзуси четга оғиб кетганини сезди.* М. М. Дўст, Лолазор. *Бек ака бошини кафтлари орасига олди: — Бибурд бўлиб қолдим чоғи ёшим оғиб!* С. Нуров, Нарвон.

5 Бўлинмоқ, чалғимоқ (ўй-хаёл, диққат-эйтибор ҳақида). *Бирдан диққати оғиб, уларга қулоқ тутди.* «Шарқ юлдузи».

6 Кўчма Тўғри йўлдан адашмоқ, четга чиқмоқ, тоймоқ; бирор сиёсий оқимдан, маслақдан тоймоқ, қайтмоқ. *Менимча, ўр-*

тоқлар, Қўчқоров партия йўлидан оғиб, ёт унсурлар таъсирига тушиб қолган одам. С. Анорбоев, Оқсой.

7 Бирор томонга йўналмоқ, қарамоқ (кўз ҳақида). *Ҳожи хола, Тўрахоннинг хаёлчан кўзларига қараб олиб, жавоб кутди. Жувон кўзлари секин ерга оғди: «Розиман».* М. Исмоилий, Фарғона т. о. *Раънонинг ерга қараган кўзи секингина Анварга кўтарилиб, яна ерга оғди.* А. Қодирий, Мехробдан чаён.

8 Энг юқори нуқтадан, зенитдан ўтмоқ (Қуёш, Ой ва юлдузлар ҳақида). *Қуёш кун-ботарга оғиб, соялар чўзилиб қолган бўлса ҳам, тепалар ҳамон офтоб селида жимирлаб ётарди.* М. Мансуров, Ёмби. *Уфққа оққан қуёш кўкни тутган тутун.. орасидан гўё қора шиша орқали кўринганга ўхшайди.* Ойбек, Қуёш қораймас.

9 Маълум бир муддатдан, пайтдан ўтмоқ, ошмоқ. *Вақт ярим кечадан оққан эди.* М. Муҳамедов, Қахрамон изидан. *Кун асрдан оғиб, шомга яқин қолган, шунинг учун гузардаги дўконлардан очиги уч-тўртта.. эди.* А. Қодирий, Ўтган кунлар.

Кун оғди Кундузнинг ярмидан кўпи ўтди, кеч кира бошлади. *Кун оғиб, ерга соя тушиши билан Ҳамро опанинг юраги питирчилаб қолди.* Ойдин, Ўзидан кўрсин. **Тун оғди** Кечанинг ярмидан кўпи ўтди, ярим кечадан ошди. *Тун оққан, батальон келди.* Шухрат, Шинелли йиллар.

10 Кўчма Бирор томонга ўтмоқ, унга мойил бўлмоқ ёки ён босмоқ. *Бирон эйтиборлироқ одам закон [қонун] сўқиб қолса, дарров ўша томонга оғиб кетишарди.* Ж. Абдуллахонов, Хонадон. *Бу замонда кимнинг жин чақаси кўп бўлса, одамлар ўшанга оғади.* Ойбек, Танланган асарлар. *Саломат қақшоқ ўгай она билан чиқишолмади. Ҳар кун жанжал, эшитмаган гапи, емаган турткиси қолмади. Ота ҳам суюкли хотин томонга оғиб кетди.* С. Аҳмад, Ҳукм.

Боши оғиб Фалакнинг гардиши билан; беихтиёр, ўйламай-нетмай, боши айланиб. *Боши оғиб келиб қолди.* **Боши оққан томонга кетмоқ** қ. **бош.** *Нусратдек вужудини чуллаган паришон кайфиятдан фориг бўлиш учун бирдан боши оққан томонга кетиш ишқига тушди.* С. Нуров, Майсаларни аёз урмайди. **Кўнгли оғмоқ 1)** мойил бўлмоқ, муҳаббат кўймоқ. *Қизинг, туркман элдан биров топибди, Қизинг кўнгли шу туркманга оғибди.*

«Равшан»; 2) айн. эси оғмоқ 1. Эси (ёки хуши) оғмоқ ёки эсидан (ёки хушидан) оғмоқ 1) эс-хушини йўқотиб қўймоқ, маҳлиё бўлиб қолмоқ. Мен, эсим оғиб, унинг оғзига тикилганимча, қимирламай ўтириб қолдим. Ойдин, Садағанг бўлай, командир; 2) ақлдан озмоқ. Адолатнинг бир нуқтага тикилган кўзларига қараб қўрқиб кетди: эсидан оғиб қолса-я! Хали бу кўреулик ҳам бормиди унга. С. Зуннунова, Гулхан. Ҳафизанинг бирдан ранги оқариб, гўё бошига юз пудлик гурзи тушгандек, эси оғиб қолди. Мирмуҳсин, Умид.

ОҒОЗ [ф. آغاز — боши, аввали, бошланиш жойи; бошланиш, киришиш]: **оғоз қилмоқ** (ёки **этмоқ**, **айламоқ**) эск. кт. Бошламоқ, (бажаришга, ижро этишга) киришмоқ. Доя фақирни ердан олиб, йўрғакламоқчи бўлганида, камина чирқираб, гиря оғоз қилиб, асло йиғидан тўхтамаганимдан, падар сезбидиларки, фарзандлари бежиз эмасдир. А. Қодирий, Кичик асарлар.

ОҒОЧ кт. 1 айн. дарахт. Олма оғочи. ■ Кўм-кўк оғочларнинг қалин шохиди Қанотли куйчилар сайраида эди. Миртемир.

2 эск. Ёғоч, хода. Йигит чирик оғочлар тирқишидан пастга қаради. С. Сиёев, Ёруғлик. Дўконга бир шайтони ланн оғоч қоқиб қўйибди-ку, энди нетиб очдим? «Ёшлик».

ОҒРИМОҚ 1 Касал бўлмоқ, бирор касалликка йўлқилмоқ, дардга чалинмоқ. Иш-ламай еган, оғримай ўлар. Мақол. ■ Буюк аллома Абу Али ибн Сино мя, қонтомир, ўпка касалликлари билан оғриган кишиларни даволашда ёнғоқ мағзидан самарали фойдаланган. «Фан ва турмуш». Бирдан Зеби хола оғриб қолди-ю, ўша ётганча ўрнидан турмади. Ҳ. Назир, Сўнмас чақмоқлар.

2 Касалланиб, шикастланиб, жароҳатланиб ёки чарчаб оғриқ бермоқ, оғриққа кирмоқ. Оёғим оғрияпти. Пичоқни аввал ўзинга ур, оғримаса, бировга ур! Мақол. ■ Унинг тани зирқираб оғрив, айниқса, бели шундай оғрирдики, асло чидаб бўлмасди. С. Аҳмад, Уфқ. Бутун баданим зирқираб оғрийди, энди жуда кучайди оғриқ. Ойбек, Танланган асарлар.

3 Касалланиб ёки қурт еб тўкилмоқ (хўл мевалар ҳақида). Оғриган олма.

Бели оғриманганим нон ейишига қара қ. бел 1 1. Дили (ёки кўнгли) оғримок Ҳафа бўлмоқ, ранжимоқ, дили озор чекмоқ. Зум-

рад эрига кўз қирини солди. Унинг бугунги озорини ўйлаб, кўнгли оғриди ва жаҳл билан тескари ўгирилиб, тўшакни бошига тортди. С. Сиёев, Отлиқ аёл. Гулнорни олмоқчи экан, олсин. Ука, биз тўсиқ бўлмайлик, чолнинг дили оғримасин. Ойбек, Танланган асарлар. **Жони оғримок** Азоб чекмоқ, қийналмоқ.

ОҒРИНМОҚ 1 Норозилик ёки малоллик билан бирор ишни бажармоқ. Мамат қассоб, қаршисида қимтиниб турган ранги синиқ жувонга тикилиб, оғринибгина ярим килодан ошиқ думбани тарозига ташлади. Н. Норқобилов, Тўқнашув. Шопмўйловли киши оғриниб ўрнидан турди. «Ёшлик».

2 Ўзига оғир олиб ранжимоқ, хафа бўлмоқ. Ошно, гарчи оғринган эса-да, уларни унутмади, ўзи бормаса ҳам, касалхонага хотини Муяссарни юбориб турди. М. М. Дўст, Лолазор. Мен бу гага унча оғримадим, эркак киши баъзан шунақа юраги торлик қилади, деб қўя қолдим. А. Қаҳҳор, Хотинлар.

ОҒРИНТИРМОҚ Оғринмоқ фл. орт. н. Саидий аллақачон салом беришга қарор берди, аммо сўрашиш керакми, ё бўлмаса, сўрашиш улуғ кишини йўлдан қўйиб оғринтириш бўладими? А. Қаҳҳор, Сароб.

ОҒРИТМОҚ 1 Оғримок фл. орт. н. Намгарлик аъзойи баданимни зирқиратиб оғритяпти. Этик оёғимни оғритди. ■ Йиғлама, Турсуной, йиғлама. Йиғи бошни оғритиб, кишини лоҳас қилади. А. Қаҳҳор, Мастон.

2 Хафа қилмоқ, ранжитмоқ, дилига озор бермоқ. Кўнглини оғритмоқ. ■ Дилдор шу ёшга кириб, бировнинг дилини оғритмаган. С. Аҳмад, Уфқ. [Кумуш Отабекка:] Шу яқин орадаги унинг [Зайнаб] билан бўладиган масъуд дақиқаларингизда худо йўлига ваъда олингиз — мени оғритмасин, рақибам келди, деб ўйламасин. А. Қодирий, Ўтган кунлар. Ука, ман уч-тўрт кундан кейин Фарғонага жўнайман. Лекин, сан чолнинг кўнглини заррача оғритма, дурустми? Ойбек, Танланган асарлар.

Бош оғритмоқ 1) бошни оғритмоқ, бошга оғриқ киритмоқ. Заъфарон фойдали ўсимлик бўлиш билан бирга нохуш асоратлари ҳам бор. Бошни оғритади. «Саодат»; 2) бош қотирмоқ, фикрламоқ. Бу йил идора чопиқ, сугорши каби ишларни ташкил қилиш; иш битдими, орқада қолдими, ҳар кун кўздан кечириш тўғрисида бош оғритмайди. А. Қо-

дирий, Кичик асарлар; 3) тинчлик бермаслик, ҳоли-жонига қўймаслик. «Элга қўшилмайсан, одамгарчилигинг борми?» дейишавериб, бошни оғритишди. Газетадан.

ОҒРИҚ 1 Касалланиш, шикастланиш, жароҳат ёки чарчаш натижасида сезиладиган жисмоний азоб, дард. *Оёғининг оғриғи босилди. Ярам яна оғриққа кирди.* ■ *Бир оздан кейин Малик муаллимнинг биқинидаги оғриқ хиёл босилди.* А. Кўчимов, Ҳалқа. *У ўз азобиға, куюк оғриғига чидаб, бардош қилиб, ўзига-ўзи далда берарди.* Н. Сафаров, Водиллик қаҳрамон.

2 Касаллик, хасталик, дард. *Бел оғриғи. Кўз оғриғи. Оёқ оғриғи. Оғриққа чалинмоқ.* ■ *Оғриқнинг биринчи кунни Кумуш ҳеч кимға сездирмай юрди.* А. Қодирий, Ўтган кунлар.

Юрак оғриғи 1) дил касаллиги, юрак хасталиги; *Кўк чой бош, юрак оғриғига, қон босимиға дучор бўлганлар учун фойдали.* «Фан ва турмуш»; **2)** с. т. меъда бузилиши, ич кетиши; **3)** кўчма с. т. ланж одам. - *Қорангни кўрсатмай қўйдинг. Нима бўлди, шунақа юрак оғриғимидинг? — деди қорақош йигит ўспиринга.* Ҳ. Назир, Ўтлар туташганда.

2 Бемор, касал, хаста. *Улар оғриқнинг ўлгани яхши, уйдагиларнинг тингани яхши.* Мақол. *Оғриқнинг тузалгиси келса, эмчи ўз оёғи билан келар.* Мақол. ■ *Бу воқеанинг учинчи кунни Кумушбибли йиллаб ётувчи оғриқлардек сарғайиб озган.* А. Қодирий, Ўтган кунлар. *Ҳар иккала оғриқнинг номи битта — муҳаббат.* Э. Самандар, Дарёсини йўқотган қирғоқ. *Бирон жойда ишлаш у ёқда турсин, «кўчага чиқай» деган ўйнинг ўзи унинг учун оғриқ кўз билан офтобга қарашдай ёқимсиз эди.* А. Қаҳқор, Сароб.

3 кўчма Рухий азоб, дард, алам. *Элмурод Фотима билан тенглашиб олғач, бир энтикди-да, гўё қалбини жазиллатиб турган оғриқни битталаб олиб ташлаётгандай гапирди.* П. Турсун, Ўқитувчи. *Чолнинг қалбини аллақандай совуқ бир қўл омбур орасига олиб сиқар, оғриғи юзига уриб борар эди.* М. Исмоилий, Фарғона т. о.

4 кам қўлл. Ташвиш, ғам. - *Ажабо, маккажўхоридан бошқа оғриғим йўқми, — деди раис ўзига-ўзи.* Ш. Рашидов, Бўрондан кучли. *Мўминлар бир-бирларининг оғриғига шерик бўлиши керак.* «Фан ва турмуш».

5 кўчма Иллат, камчилик. - *Бу оғриқ янгина тузилган колхоз шароитида юқумли бир офат.* А. Қодирий, Кичик асарлар.

Бош оғриғи қ. бош. Бош оғриғи қилмоқ с. т. Ичкиликдан кейинги қарахликни тарқатиш учун яна бир оз ичмоқ, заҳар босди қилмоқ.

ОҒРИҚЛИ 1 Оғриқ мавжуд бўлган, жисмоний азоб берувчи. *Оғриқли яра.*

2 Рухий оғриқ берувчи, дардли. *Болалигимдан бери бир оилани кузатаман. Шу ўйнинг она бўлғич аёли мен учун оғриқли дунёдир.* «Ёшлик».

ОҒРИҚСИЗЛАНТИРУВЧИ Оғриқни баргараф этувчи, оғриқни сездирмайдиган. *Оғриқсизлантирувчи дорилар.* ■ *Ўрта асрларда Европада ҳали тиббиётда жарроҳлик амалларида оғриқсизлантирувчи яхши воситалар бўлмаганлиги туфайли, табиблар ёғоч «гурзи»га «мурожаат» қилар эканлар.* Газетадан.

ОҒУ айн. заҳар. Ҳа, у арзанда! *Яшайверсин, лекин ўз тўшагида, бировларнинг ошиға оғу солмасдан яшасин!* С. Нуров, Нарвон. [Зухра] *Сенсиз бу олам бўлди қоронғу, Ҳар лўқма ошим сенсиздир оғу.* С. Абдулла.

ОҒУЛАМОҚ 1 Заҳар солмоқ, заҳар қўшмоқ. *Пахта далаларини турли хилдаги ўғитлар билан заҳарлаб келдик. Кўра-била туриб ерни, ўзимизни оғуладик.* А. Нурмуродов, Уруш бевалари.

2 кўчма Заҳарга, оғуга айлантirmoқ, заҳарламоқ. *Умрининг энг қимматли кунларини оғулаган, икки йил бўйи давосиз дардга мубтало қилган ўз онаси эмасиди?* А. Қодирий, Ўтган кунлар.

ОҒУЛИ 1 Заҳар солинган, заҳар қўшилган; заҳарли. *Оғули ош.* ■ *Бу оддий рашк эмас, бу бўҳтон кучи, Кўксига қадалар оғули тикан!* Ж. Жабборов.

2 кўчма Заҳарга, оғуга айланган, заҳарланган; заҳарли. *Оғули гап.* ■ *Турмушининг оғули дарахти иккита ширин мева қилади: булар — шеърят гўзаллигидан роҳатланишу яхши одамлар билан муносабатда бўлиш.* Газетадан.

ОҒУШ [ф. آغوش — қучоқ, бағир; қўйин, кўкрак; кўкс] **1** кт. Қучоқ; қўйин, бағир. *Ўз оғушиға олмоқ.* ■ *Раъно жавоб бермай, Анварнинг оғушидан ўзини қутқазиб, ўрнидан турди.* А. Қодирий, Меҳробдан чаён. *Сенинг оғушинг офтобнинг ётоғиға ўхшайди.. баданингдан беҳишт ялпизининг бўйи келади, кўкрагингдан олма ҳиди анқиб туради.. «Ёшлик».*

2 Қаър, бағир. *Кўп ўтмасдан ўлим ўз оғушига тортди.* Ойбек, Навоий. *Саратонда муаллақ қотган ҳаво ғубори шабнам билан яна ўз онаси — тупроқ оғушига оҳиста чўкди.* «Саодат».

3 Куршов, кўйин. *Толибжон омонат ёғоч кўприк устида шундай, ҳам ширин, ҳам юракни ўртовчи ҳислар оғушида гарангсиб турарди.* С. Аҳмад, Жимжитлик. *Мурод қандайдир қувонч оғушида онасига қаради.* Т. Ашуоров, Оқ от.

Оғуш қилмоқ эск. Кучоқламоқ, кучоғига олмоқ, бағрига босмоқ.

ОҲ унд. с. 1 Кувонч, завқ, қойил қолиш каби ҳис-туйғуларни ифодалайди. *Оҳ, у дамлар!.. Эсласам, қалбимни қувонч, руҳимни шодлик қучади.* Ж. Жабборов, Севинч ёшлари. *Оҳ, бу ёқимли ҳид қаердан келди экан.* Х. Тўхтабоев, Ширин қовунлар мамлакати. *Оҳ, гўзал жонон ҳаёт, сенда эрур озод киши.* З. Диёр.

2 Соғиниш, интизорлик каби маъноларни ифодалайди. -*Кел, бир ўнай!* — деди Абдуманноф. — *Оҳ!.. Азиз оғайним! А. Қаҳҳор, Оғайнилар. Баъзи вақтда унча-мунча пул ҳам сўраб оламан, Лекин чирт-пирт бўлиб, қўлдан учади-кетади. Оҳ, пул! Ойбек, Танланган асарлар. -Оҳ, айланай, овсинжон, — деди бир жувон кулгидан ўзини тийиб, — кўзимиз довуччада бўлган замонлар қандоқ замонлар экан-а? С. Зуннунова, Олов.*

3 Ачиниш, дард-алам, ҳасрат туйғусини ифодалайди. *Қани Гулнор? Қани жонони? — Оҳ, у йўқ.* Ойбек, Танланган асарлар. *Оҳ, фалокат, надар лаънат! Шарманда қилдингку охири!* Ҳамза, Танланган асарлар.

4 Оғриқ, дард туйғусини ифодалайди. [*Заргаров дарров креслога ўтириб:*] *Оҳ! Воҳ! Суғур! Суғурсанг-чи!* [*Марасул омбурни чоғлаб:*] *Ҳозир.. Ҳозир.* А. Қаҳҳор, Оғриқ тишлар.

5 *от* взф. Дод-фиғон, нола, афғон, зорланиш. *Оҳ тортмоқ (урмоқ, чекмоқ).* ■ *Эй, телба кечмишининг тилсиз гувоҳи, Тингланар қалбингдан йилларнинг оҳи.* Файратий. *Танҳо ётар эдим бўм-бўш қирғоқда, Телпамда юлдузлар чекар эди оҳ.* А. Орипов, Йиллар армони. *Саид Жалолхон ишонган тоғи хусусидаги бу хабарни эшитиб, оҳ тортди.* А. Қаҳҳор, Башорат. *Оғриқ аламидан тинмай оҳ урарди.* Мирмуҳсин, Темур Малик.

ОҲАК [ф. *آهك* — оҳак] Оҳактошни ўта юқори (900° дан ортиқ) температурада куйдиришдан, пиширишдан ҳосил бўладиган оқ модда; кальций оксиди (қурилиш, металлургия, кимё саноати ва б. соҳаларда кенг қўлланади). *Оҳак қоришмаси.* ■ *Қизлар кўпроқ дарахтларга оҳак суриш, супуриб тозалаш ишларини бажарардилар.* С. Зуннунова, Олов. *Эртага ишдан қайтаётиб, оҳак ола келсангиз, катта меҳмонхонани бўшатиб, оқлаб олардик.* А. Мухтор, Кумуш тола.

Оҳак сути Пиширилган оҳактошнинг сувдаги эритмаси, сув куйиб эритилган оҳак. *Баъзи бир захарловчи моддалар оҳак сути билан йўқотилади.*

ОҲАКИ [ф. *آهكى* — оҳакка оид, оҳакли, оҳак кўшилган]: **оҳаки намат** Оҳак сути билан намлаб қотирилган, сифати паст кигиз.

ОҲАКЛАМОҚ 1 Оҳак билан оқламоқ. *Раис хонанинг юлқа тахталари очилиб қолган полига, оҳакланган, лекин сарғайиб қолган деворига, газета тўтиб кўйилган деразасига қаради.* С. Нуров, Майсаларни аёз урмайди.

2 *махс.* Ерни оҳак билан ўғитламоқ. *Оҳаклаш ер шўрини ейди.* Э. Самандар, Дарёсини йўқотган қирғоқ.

3 *махс.* Тери, намат каби нарсаларга оҳак суви билан ишлов бермоқ.

ОҲАКЛИ Таркибида оҳак бўлган, оҳак аралашган; оҳакдан қилинган.

Оҳакли сув Тиндирилган оҳак сути, ўювчи кальцийнинг тиниқ эритмаси.

ОҲАКТОШ Таркибида оҳак бўлган чўкинди тоғ жанси. *Цемент хомашёси оҳактош ва гил конларидан қазиб олинди, майдаланади.* «Фан ва турмуш».

ОҲАНГ [ф. *آهنگ* — келишув, ҳамжиҳатлик; ёқимли товуш, куй; ҳамоҳанглик, уйғунлик] 1 Бир-бирига уланган, уйғунлашган ёқимли товушлар оқими. *Ариқдан майин оҳанг билан сув оқар.* Ойбек, О. в. шабадалар.

2 Турли товушларнинг маълум бир тартибда уйғунлашиб, мусиқий бутунлик ташкил этган бирикмасидан иборат мусиқа асари; куй. *Бу ашуланинг оҳанг жуда яхши экан!* ■ *Буларнинг [шеърларнинг] ҳаммаси деярли газетада босилар, баъзиларини болалар оҳангга солиб, саҳналарда ашула қилиб айтар эдилар.* А. Қаҳҳор, Сароб.

3 Нутқда маънога қараб овознинг кўтарилиши ва пасайиши; интонация. *Буйруқ оҳанги, Сўроқ оҳанги. Тинч (босиқ) оҳангда сўзламоқ.* ■ У вақтларда мен шеърларнинг маъносини тўла тушунмасам ҳам, уларнинг ўқишдаги оҳанги мени завқлантирарди. С. Айний, Эслаликлар. *Зиёдаҳон.. баъзи жумлаларни маъносига мос келмайдиган оҳангда ўқиб, тингловчиларга уқтира олмагани учун, ҳикоянинг давомини Иброҳимовнинг ўзи ўқиди.* А. Қаҳҳор, Қўшчинор чироқлари.

4 Сўзловчининг ички ҳис-туйғуларини ифодалайдиган талаффуз услуби. *Аразлаган оҳангда сўзламоқ. Йигламсираган оҳангда гапирмоқ.* ■ Ойша хола қалбдан силқиб чиққан меҳрибон бир оҳангда гапирди. С. Зуннунова, Кўк чироқлар. *Гулнор тўғрисида сўзлаганда, товушига сирли оҳанг берди.* Ойбек, Танланган асарлар. -*Кечир демоқчисиз, — деди Инобат майин, аламли оҳанг билан.* Х. Тўхтабоев, Фельетондан сўнг.

5 кўчма кам қўлл. Нарсаларнинг ўзаро қўшилишидаги мослик, уйғунлик. *Бўёқларнинг нафис оҳанги.. бениҳоят нозик товланар эди.* Ойбек, Навоий.

Ҳар (ёки юз, минг) оҳангга солмоқ Гоҳ ундоқ, гоҳ бундоқ қилиб кўрмоқ. *Дангасага иш буюрсанг, ўзини ҳар оҳангга солади.*

ОҲАНГДОР [ф. *آهنگدار* — уйғун, ҳам-оҳанг, хушоҳанг] 1 Кулоққа ёқадиған, хуш келадиган, хузур бағишлайдиган; ёқимли, мусиқий; оҳанги яхши. *Оҳангдор мусиқа.* ■ *Алла! Дунёдаги энг содда, энг соф, энг оҳангдор, эрка туйғули она қўшиғи.* «Саодат». *Гуландом оҳангдор, жарангли овоз билан сўзлади.* Ойбек, Танланган асарлар.

2 Маълум оҳангга эга бўлган, маълум оҳанг билан талаффуз қилинадиган; оҳангли, жарангли. *Оҳангдор шеър.* ■ *Утқир оҳангдор товушдан сесканганда, юк машинаси дарҳол ўзини йўл четига олиб, ўтавер, дегандек дуддудлади.* С. Нуров, Нарвон. *Соқолли кампир бир қўлини Нурининг бошига энгил қўйиб, баланд.. товуш билан худди куйлагандек, сўзларни оҳангдор ҳўзиб қичқирди.* Ойбек, Танланган асарлар.

ОҲАНГДОШ 1 Айтилиши ўхшаш, талаффуздаги оҳанги бир хил. *Оҳангдош номлар. Оҳангдош сўзлар.*

2 Маълум оҳангга, куйга мос тушган, мос келадиган. *Оҳангдош ашулалар.*

3 кўчма Бир-бирига мос, уйғун, ҳамоҳанг. *Оҳангдош бўёқлар.*

ОҲАНГДОШЛИК 1 Бир хил оҳангга эгаллик, оҳанг жиҳатидан ўхшашлик. *Сўзларнинг оҳангдошлиги.*

2 мус. Турли баландликдаги мусиқа товушларининг бир вақтда садоланиб кўшилиши. *Куйларнинг оҳангдошлиги.*

3 эск. айн. **сингармонизм.**

ОҲАНГЛИ Маълум бир оҳанг ёки куйга эга, маълум бир оҳанг, куй билан ифодаланадиган, чалинадиган, айтиладиган; оҳангдор. *Бир турли, бир оҳангли нафис, мусиқавий товушлар кишининг борлиқ вужудига, қон томирларига ажойиб бир ўзгартиш берган эдилар.* А. Қодирий, Ўтган кунлар.

ОҲАНЖАМА [ф. *آهنگنامه* — темир қоплама, жилд] с. т. 1 Ажойиб-фаройиб безак, бежама. *Ёш-яланг орасида неки либос, неки оҳанжама расм бўлса, дастлаб шу қизнинг эғнида кўрардингиз.* «Ёшлик». «Оқтой» чиндан ҳам оқиш бўлиб, шалпанг қулоқлари хачирларникидай узун, оҳанжамаси зўр эди. Х. Назир, Сўнмас чақмоқлар.

2 Ажойиб-фаройиб иш, ҳаракат, тартиб, қилиқ, ғалва. *Тўйнинг оҳанжамаси кўп.* ■ *Бу оҳанжама саломлардан сўнг куёв йигитнинг кимлари борлиги ва улар қандай одамлар эканлиги билинди-қўйди.* С. Нуров, Майсаларни аёз урмайди.

ОҲАНРАБО [ф. *آهنگرآبا* — темирни тортувчи < *آهن* — темир + *رآبا* — ўғирловчи, тортувчи] 1 эск. айн. **магнит.** *Кишилик тарихи давомида оҳанрабо ва кейинчалик электрон кварц соатлар яратилди.* Газетадан.

2 кўчма Ўзига тортувчи, ўзига жалб этувчи, мафтун этувчи; фусункор. *Оҳанрабо куй.* ■ *Узоқ кетдим, бахт келтирай деб сенга, Оҳанрабо муҳаббатинг бор учун.* Т. Тўла. *Яқинатрофдан эшитилаётган оҳанрабо куйлар кишини мафтун этади.* «Саодат».

ОҲ-АФҒОН, оҳу афғон Оҳу нола, оҳу фиғонлар. *Оҳ-афғон қилмоқ.* ■ *Онанинг оҳу афғонига манқурт пинагини ҳам бузмади.* «Ёшлик».

ОҲ-ВОҲ, оҳу воҳ айн. **оҳ-афғон.** *Бундан қутулиш учун оҳ-воҳ, йиғи-сиғи сира фойда бермайди. Қулчиликдан чиқмоқчи бўлсак, курашга бел боғлашимиз керак.* Ойбек, Танланган асарлар.

Оҳ-воҳ қилмоқ 1) оҳ-фиғон чекмоқ, додвой қилмоқ; азобланмоқ. *Қон ҳиди оч*

бўриларни шу қадар маҳлиё этгандики, на ўқлар овози, портлаш даҳшати, на жон бераётганларнинг оҳ-воҳ қилишлари уларга таъсир қиларди. «Ёшлик». Эшикда оҳ-воҳ қилганча жиккак кампир пайдо бўлди. Н. Норқобилов, Тўқнашув; 2) кўчма муҳаббат куйида сохта куйди-пишди бўлмоқ. Икки чаккасида соч ўстирган, қаншари наст сартарош йигит аввал оҳ-воҳ қилиб, иккиқат бўлган қизни ташлаб қочиб кетган эди. Мирмуҳсин, Умид.

ОҲ-ЗОР, оҳу зор айн. **оҳ-афгон**. [Мамат:] Менинг оҳу зорларим бундай қулай фурсатларни келтирди. Ҳамза, Паранжи сирлари.

ОҲИСТА [ф. *آهسته* — секин, аста, аста-секин; шовқинсиз; осойишта] *рвш.* 1 Аста, қаттиқ овоз чиқармасдан, секингина. *Оҳиста гапирмоқ. Деразани оҳиста ёпмоқ. — Раҳмат.. Раҳимжон ака! — деди Раъно секин. Деди-ю, энтикди, сўнгра чуқур нафас олиб, оҳиста тақорлади: — Катта раҳмат! О. Ёқубов, Баҳор кунларидан бирида. Аваз уйғоқ эди, отаси билан оҳиста гаплашиб кираётган кишининг товушини эшитди-ю: «Яна бир ҳамдard шекилли», деб шифтга қараб ётаверди. С. Сиеёв, Аваз.*

2 Шошмасдан, секин, аста; шов-шув кўтармасдан. *Раъно оҳистагина Анварнинг ёнига келиб, супага суянди. А. Қодирий, Меҳробдан чаён. Умид кир. да оҳиста у ёқ-бу ёққа қараб киргани билан, чиқишда мушукдек эпчиллик билан занаялардан тушди. Мирмуҳсин, Умид.*

3 Билинар-билинемас, сал-пал, зўрға пайқаб оладиган даражада. *Кўзни оҳиста очиб, юммоқ. Бошни оҳиста чайқалмоқ. Ой оҳиста силжимоқда. — Қайғуга ботган кўзларини юмиб, бошни оҳиста ирғади. «Саодат». Пастдан шоша-пиша чиқиб келаётган врачнинг шарпасини сезгач, хиёл кўзғалиб, оҳиста кўзини очди. Н. Аминов, Қаҳқаҳа.*

4 Ҳовлиқмасдан, босиқлик билан, ётиғи билан. *Воқеани оҳиста баён қилмоқ. — Сизга шундай вазифа юкланди: укангиз, синглингиз, хўш, яна ким бор — шуларга оҳиста тушунтирасиз, яъни улар Мирзакаримбой отамга араз қилмасинлар. Ойбек, Танланган асарлар.*

5 Билдирмай, билинтирмай, ошкор қилмай, яширинча. *Оҳиста ишора қилмоқ. — Замира Очилнинг ўтли қарашларини аввал-*

дан ҳис қилар, лекин уларда суқлик сезмас, аксинча, кўз-кўзга тушганда, йигит оҳиста кўзини олиб қочар ва уялиб, ўзини мумкин қадар тортиб юрар эди. П. Қодиров, Уч илдиэ. Шийпон яқинига бориб, оҳиста мўраласам, каттакон гужум тагида Холчучук ўтирибди. «Саодат».

6 Эҳтиётлик билан, авайлаб, астагина. *Ярани оҳиста боғламоқ. Беморни оҳиста ётқизмоқ. — Қайғу билан чарчаган қизнинг кўзлари юмила бошлади. Йўлчи унинг бошини кир ёстиққа оҳиста қўйди. Ойбек, Танланган асарлар. Қамчи билан Мавлон ака Ботиралнин оҳиста кўтариб, аравага олдилар. Ҳ. Фулом, Машғал.*

7 Тинч, осойишта. *Бу қишлоқда ҳаёт оҳиста ва бир маромда кечарди. «Шарқ юлдузи».*

8 Енгил, осонгина. *Самолёт оҳиста Андижон тунроғига қўнди. «Ёшлик».*

ОҲ-НОЛА, оҳу нола айн. **оҳ-афгон**. *Оҳ-нола қилмоқ. — «Дадажон, раҳмингиз келмайдимми? Биз сизни соғиниб, юракларимиз эзилди-ку, жон дадажон», деб қилган оҳу-нолалари ёдига тушди. Ҳамза, Танланган асарлар.*

ОҲО унд. с. Кутилмаган воқеа ёки ҳодисадан таажжубланганликни ифодалайди. [Маҳкам:] Салом алайкум. *Оҳо, янги меҳмонлар-ку! Т. Сафаров, Уйғониш. — Оҳо, агрономча, — деди Ҳамдам [Комилга] қошини чимириб, — далада роса пишибсан-ку. Ҳ. Аҳмар, Ким ҳақ?*

ОҲОР [ф. *آهار* — крахмал; газламага пардоз бериш] 1 *махс.* Ип, газлама ёки кийимга пардоз бериш ёки қотириш учун ишлатиладиган модда; крахмал.

Оҳор бермоқ Оҳорлаб пардоз бермоқ, крахмалламоқ. *Чит тўқилгандан кейин оҳор берилади. Бунинг учун кўп миқдорда крахмал керак. Ойдин, Суҳбаги жонон.*

2 Шундай модда билан янги нарсага, кийимга берилган ишлов, пардоз.

Оҳори кетган (ёки тўкилган) ёки оҳордан тушган Кийилган, тутилган, эски. *Оҳори кетган дўппи. — Нодир Сайхоний ҳар гал оҳори тўкилган, атрофини куя еб, тақир қилиб қўйган деворга осиглиқ гиламни.. кўр-ганда, бу бевафо дунё ўзини хору зор бўлиб юрган кишиларга ўхшаб кўчага иргитиб ташламагани учун парвардигори оламга шукроналигини изҳор қиларди. «Ёшлик».*

Оҳори тўқилмаган ёки оҳордан тушмаган 1) янги, пардози кетмаган, кўп ишлатилмаган. *Болтавой энди оҳори тўқилмаган беқасам тўн ўрнига елкасига ямоқ тушган гупти киядиган бўлди.* С. Аҳмад, Қадрдон далалар. *Унинг [Элмуроднинг] солдатча камари ҳали оҳордан тушмаган эди.* Шухрат, Шинелли йиллар; 2) кўчма обрўси кетмаган, ҳурмати сақланган, баобрў; 3) кўчма илгари ишлатилмаган, тutilмаган, янги. *Оҳори тўқилмаган гап.* **Оҳорини тўқмоқ** 1) янги нарсани кийиб, тутиб эскиртмоқ, пардоздан туширмоқ; 2) кўчма обрўсини тўқмоқ, беҳурмат қилмоқ. *Оғзингизга қараб гапиринг, ўғлимнинг оҳорини тўқяпсиз. Ўғлим санъаткорларнинг султони бўлади.* Ш. Саъдулла, Икки билагузук.

3 кўчма Обрў; ҳурмат. *Ори йўқнинг оҳори йўқ.* Мақол.

ОҲОРЛАМОҚ Ип, газлама ёки кийимни оҳор бериб пардозламоқ, қотирмоқ; крахмалламоқ. *Ташқаридан ип оҳорлаётган хотинларнинг ўзаро гапи, чархларнинг гув-гувлаб айланиши, савағичларнинг гуп-гупи эшитиларди.* А. Мухтор, Опа-сингиллар.

ОҲОРЛИ 1 Оҳор берилган, оҳорланган. *Оҳорли чит.*

2 Оҳори кетмаган, тutilмаган; кийилмаган, янги. *Эрали бошида янгича гилам дўппи, эгнида оҳорли олача тўн кийиб келган эди.* С. Аҳмад, Жимжитлик. *Тўхта холанинг ўзи ҳам оҳорли кўйлагини кийиб, оқ*

дока рўмолини ўраб олган. И. Раҳим, Чин муҳаббат.

ОҲОРСИЗ Оҳор берилмаган, пардозланмаган; крахмалланмаган.

ОҲУ [ф. *أهو* — жайран, физол; ёввойи эчки] 1 Чиройли қора кўзли кийик. — *Масалан, тоғлардаги оҳулар, ўрмондаги тўтилар, чамандаги булбуллар ҳам ёлғиз эмас, жуфай яшайдилар, — деди Анвар.* А. Қодирий, Мехробдан чаён. *Кўлини тортиб, яна юзига парда қилди ва оҳу чаққонлиги билан йигит ёнидан ўтиб, шипиллаганича югуриб кетди.* М. Исмоилий, Фаргона т. о.

2 кўчма Нозик, сергак маҳбуба. *Хайр энди. Қалбимда бир видо қолади, Хайр энди, сен кетдинг, беғуноҳ оҳу.* А. Орипов, Йиллар армони. *Муҳаббатим, қайдасан, қалб ардоғим, Жайронкўзим, қирларда қолган оҳум.* М. Юсуф, Уйкудаги қиз.

Оҳу кўз Оҳу кўзига ўхшаш чиройли кўз. *Унинг оҳу кўзларида на мағрурлик, на бир бошқа маъно бор эди,* Ш. Холмирзаев, Оғир тош кўчса.

ОҲ-ФИҒОН, оҳу фиғон Оҳ-воҳ ва афғон; оҳ-воҳ ва афғонлар. *Оҳ-фиғон қилмоқ.*

■ *Бу ошиқларнинг афсус-надомат, оҳу фиғонларининг боиси не?! Шукрулло, Сайланма. Таъсир айламас, дилхаста Ниҳон, Қилганинг билан минг оҳу фиғон.* Ҳамза.

ОҲ-ҲО айн. **оҳо.** *Оҳ-ҳо, қиз бечоранинг ички дунёсини беш қўлдай билар экансиз-ку?* А. Мухтор, Туғилиш.

П

ПА [фр. pas — одим, қадам] Рақсада оёқларнинг ритмик ҳаракати, муқоми.

ПАВИАН [нем. Pavian — фр. babouin — аҳмоқ < лот. papio] Мартишкалар кенжа оиласига мансуб тор бурунли маймунлар уруғи.

ПАВИЛЬОН [фр. pavillon < лот. papilio — капалак; хурсандчилик қилинадиган капалаксимон чодир] **1** Чакана савдо учун мўлжаллаб мавсумий ёки доимий қурилган усти берк, енгил бино, дўконча. *Минерал сувлар павильони.* ■ *Кўчанинг Охунбобоев канали кесиб ўтган ерида морозний павильони, тиш техниги будкаси очилган.* С. Аҳмад, Қадрдон далалар.

2 Боғ ва паркларда қурилган енгил бино, шийпон. *Болалар айланма йўллар, каруселлар, павильонларда ҳар хил ўйинлар ўйнашади, ашулалар айтишади, кечқурун эса қизиқ эртақлар тинглаб, уйқуга кетишади.* Газетадан.

3 Вақтинча ва доимий фойдаланиш учун қурилган енгил иншоотлар (хона ёки бино). *Бадийий фильмлар суратга олинадиган павильон. Павильонда кинога олиш.* ■ *Экспозицияларнинг асосий қисми марказий павильоннинг 1-қаватида жойлашган.* Газетадан.

ПАДАР [ф. پدر — ота] кт. айн. **ота 1.** *Сизнинг таъбирингизча, маънавий бир падар ўз ўғлига ёмонлик соғинарми, бу тўғрида жавоб берингиз-чи?* А. Қодирий, Ўтган кунлар. *Одамлар бор — падарин мазорида йиғлаб бот, Бемерос йиғлаёлмас — таъма бор аъмолида.* А. Орипов, Юртим шамоли.

Падари бузруквор қ. бузруквор. - *Иложи йўқ, ака, — деди Аваз отасининг кўзига тик боқиб, — агар сиз падари бузрукворим бўлмаганингизда, буни сувга отиб юборажак эдим.* С. Сиёев, Ёруғлик. **Падар лаънат(и)** ёки **падарига лаънат** сўк. *Отаси лаънатланган, лаънатининг ўғли; умуман, қаргаш, ҳақорат ифодаси. Падар лаънати ҳаромзода Собиржон сизнинг қадрингизни билмади. Туйғун, Зулфизар. — Падар лаънати, одобсиз! — деди Самад, — домлага шундай сўзни айтадими-я?! А. Қодирий, Меҳробдан чаён. Варақлайсиз газетани, Дуч келасиз оловга: Мукофотни беришибди Падар лаънат ановга. А. Орипов, Йиллар армони. Пул бўладими, кулми — падарига лаънат. Лекин нораста болани оч қолдирма. Ў. Ҳошимов, Икки эшик ораси. Падар(и) қусур Ҳазил-мутойиба тарзидаги енгил сўкиш. Падарига қусур бунақаларни! Кеча кечқурун холи топиб, гапни майдалаштириб юрمانми деб, ёнига яқинлашсам, бу аблаҳни қаранг, кимлигимни суриштирмасданоқ шапалоқлаб тушириб қолса бўладими, лаънати! Шукрулло, Сайланма.*

ПАДАРКУШ [падар + ф. كوش — ўлдирувчи] кт. Ўз отасини ўлдирган қотил. *Урди-ю Мирзо Улуғбекка падаркуш ханжарин, Қабри узра ҳам ўзи минг йил чекар қайғу замон.* Э. Воҳидов, Муҳаббатнома.

ПАДАРОНА [ф. پدرانہ] кт. *Оталарча, меҳрибонларча. Ҳасаналининг юзига падарона тараҳҳум туси кириб, кексаларга хос оҳангдор бир товуш билан бекнинг устидаги оғир юкни ола бошлади.* А. Қодирий, Ўтган кунлар.

ПАЁК [р. паёк < т. پاي — «ҳисса, улуш» с. кичр.] эск. Бирор кишига маълум вақтга мўлжаллаб бериладиган озиқ-овқат миқдори. *Бир ҳафталик паёк.* ■ *Дадавой ака бугун ҳар кунгидан эртароқ келди. У ойлик паёгига гўшт, ёғ, гуруч, қандни бир халта қилиб кўтариб кирди.* Ҳ. Фулом, Тошкентликлар.

ПАЁМ [ф. پیام — топшириқ; хабар; билдириш; даъват] кт. айн. **пайғом.** *Эзгу йилда эзгу ўйлар топсин қарор, Салом бўлсин хуш саодат айёмига, Салом бўлсин зафарнинг илк паёмига.* А. Орипов, Йиллар армони. *Кўзи ёшли, дилхасталардан Келтирдик биз дўстлик саломин, Ғойибона дуо паёмин.* Ғайратий.

ПАЖМУРДА [ф. پژمورده — сўлгин; ғамгин, руҳи тушган; нимжон] кт. **1** Сўлгин, ғамгин, беором. *Шўрлик онангинг пажмурда гавдаси кўзинг ўнгида бутун даҳшати-ла акс этар энди?* Ғ. Фулом. *Пажмурда тангага жон берган кўлларингиз кўзима тўтиё!* Н. Ёқубов, Жон. *Аммо бу чашмага етмоқ ўзга бир оролда уни кута-кута сарғайган, пажмурда жисми нуқтага айланган Мажнунга осон эмас.* Газетадан.

2 кўчма Нимжон, сўлгин. *Ҳа, лекин у шу нарсани эсдан чиқарадики, сояда ўсган нарса пажмурда бўлгани билан, яхши боғбон уни кўёш нури елдиган қилиб қайта экса, у яна гуркираб ўсаверади.* А. Эшонов, Ҳаётга қайтиш. *Вужудимни ғижимлар оғир Руҳим ичра пажмурда виждон.* Р. Парфи, Кўзлар.

ПАЗАНДА [ф. پزنده — пиширилган; пиширувчи] Лазиз таомлар пишириш санъатини яхши эгаллаган киши, моҳир ошпаз. *Пазанда аёл.* ■ *Бувим хўп пазандада, ҳар қанақа томоққа маза киритиб юборди.* Ҳ. Назир, Ёнар дарё. [Журналда] *Ҳар хил таомларни қандай пишириш ҳақида пазандаларнинг тажрибалари босилади.* С. Аҳмад, Қадрон далалар.

ПАЗАНДАЛИК 1 Турли ўсимлик ва ҳайвон маҳсулотларидан овқат тайёрлаш, пишириш сирларини билиш. *Қудрат Хадича аянинг пазандалигини энди билаётган бўлсада, унинг бошқача таърифини илгари эшитган эди.* Ҳ. Назир, Сўнмас чақмоқлар. *Бошлиқ ҳар гал мантини оғзига солаётганда, келиннинг пазандалигини мактаб, Ориф-жоннинг қўли очиқлигини таърифлаб турди.* С. Аҳмад, Сайланма.

2 Лазиз таомлар тайёрлаш санъати. *Пазандалик илми.* ■ *Чунончи, пазандалик*

санъати ҳам бошқа соҳалар каби ҳеч қачон ҳолис тараққий эта олмайди. К. Маҳмудов, Ўзбек тансиқ таомлари. *Жаҳон пазандалигида сутдан тайёрланадиган маҳсулотлар ичида энг хили кўпи бу пишлоқ экан.* Газетадан. *Бундан икки йиллар бурун миллий пазандалик мавзuida бир неча мақолалар ёзиб беришимни илтимос қилишди.* Газетадан.

ПАЗАНДАЧИЛИК Лазиз таомлар тайёрлаш маҳорати ва саноати. *Ўзбек пазандачилигида технология жараёни мукаммаллашиб, ноннинг хиллари бениҳоя кўпайди.* Газетадан.

ПАЙ 1 [ф. پاي — томир, пай, асаб] **1** анат. Тана мушакларини суякка бириктириб турувчи мустаҳкам, эластик тўқима. *Сўйилган кўйни пайдан осмоқ.* ■ *Отақўзининг кўзлари қисилиб, жағ пайлари туртиб чиқди.* О. Ёқубов, Диёнат. *Яна ҳар қандай гўшtda пай, чочўсар, тоғай каби бириктирувчи тўқималар бўлади.* К. Маҳмудов, Ўзбек тансиқ таомлари.

2 сфт. кўчма Меҳнатда пишган, чайир. *У қоп-қора, қотма, вужуди пай бир йигит бўлиб, афтидан ёшини чамалаш қийин эди.* А. Қаҳҳор, Қўшчинор чироқлари. *Забардаст, паҳлавон, кўркам, келишган, Вужуди пай, чайир, меҳнатда пишган.* Ҳабибий.

Пайини қирқмоқ Мавқеидан маҳрум этадиган зарба етказмоқ. *Ҳозир эса онасининг қорнидан кеча тушган тирранчалар ҳам нуқул катталарнинг пайини қирқиб, кўпчилик олдидан обрўсизлантиришни ўйлайди.* Д. Нурий, Осмон устунни. *Қизиқ одамлар, — деди у яна, — бир-бирини кўролмайди: ўзидан чиққан ёқмайди, юқоридан келганни сиғдирмайди.. Давроновнинг ҳам пайини қирқибди.* И. Раҳим, Ихлос.

ПАЙ 1 [ф. پاي — оёқ, қадам] эск. Оёқ, қадам. *Бу янглиғ муддате йўл қилдилар тай, Ки Арман кишварага кўйдилар пай.* А. Навоий.

ПАЙ 2 [ф. پاي — товон, оёқ; из] (асосан ў.п. ва ж.к. шаклида) Бирор мақсадни амалга ошириш йўлидаги астойдил ҳаракат, уриниш, қасд. *Холдор ишга кириш пайида уч-тўрт жойга учради.* И. Раҳим, Зангори кема капитани. *У [Кўзибой] чўққига чиқиб «Тошбулоқ»ни топишда ҳам биринчи бўлиш пайида эди.* Ҳ. Назир, Сўнмас чақмоқлар.

Пайига тушмоқ 1 айн. **пайида(н) бўлмоқ.** *Билим олиш пайига тушмоқ. Пул топиш пайига тушмоқ.* ■ *Қори ўйлаб-ўйлаб, шеър*

ёзиб, пул топишининг пайига тушади. С. Аҳмад, Сайланма. Оқсоқол *Ғиёсиддинни куёв қилиш пайига тушиб, тез-тез уйига чақирадиган бўлди.* С. Аҳмад, Хукм; 2) изига тушмоқ, из қувмоқ. - *Милиция пайимизга тушганга ўхшайди, - деди шофёр орқага аланлаб.* Ё. Шукуров, Уч савол. **Пайида(н) бўлмоқ** Бирор мақсадни кўзламоқ, бирор мақсад йўлида астойдил ҳаракат қилмоқ, уринмоқ. *Ўқишининг пайида бўлинг, болалар.* ■ *Хунарни ўрганиш пайидан бўлгин, болам [деди кампир Саудага].* Э. Раимов, Ажаб қишлоқ. *Сен ҳам ахир қараб турмасдан, бошқачароқ йўл билан бўлса ҳам, тирикчиликнинг пайида бўлсанг, ўғлим.* Ф. Фулом, Танланган асарлар. **Пайида юрмоқ** Бирор мақсад билан кетига тушиб, пайт пойлаб юрмоқ. *У бир нарсанинг пайида юрибди.* ■ *Абдужабборхўжа.. пулни кўрганда, раҳм-шафқатни унутиб қўядиган, ғайратли, бўш-баёв одамларни ишлатиб, бойлик орттириш пайида юрган кишилардан эди.* М. Осим, Тилсиз гувоҳ.

ПАЙ IV [ф. پای: **пай урмоқ** Ерга ёйиб териб қўймоқ (узум, қовун, тарвуз, олма, нок ва ш.к. ҳақида) *Узумларни пай урмоқ.*

ПАЙ V [т. پی - ҳисса, улуш] *икт.* Бирор ширкат, акциядорлар жамияти ишида қатнашиш учун қўшиладиган ҳисса, улуш. *Пай пули. Пай қўшмоқ.* ■ *..кўнлаб акциядорлар ўзларининг сотиб олган акция ва пайлари эвазига дивиденд, яъни даромад олишлари керак.* Газетадан. *Пай бўйича ҳам унинг эгаси, қўлидаги пай миқдорига қараб, умумий даромаддан ўз улушини олади.* Газетадан.

ПАЙВАНД [ф. پیوند - қўшиш, боғлаш; қариндошлик; боғланган, ажралмас] **1** Бирор ўсимликнинг новда ёки куртагини бошқа ўсимлик танасига ўтқазиш, улаш усули ва шу усулда улаб ўстирилган ўсимлик. *Искана пайванд. Куртак пайванд. Қаламча пайванд.* ■ *Олимларимизнинг берган маълумотларига қараганда, лимонни экиб, қаламча пайванд ва пархиш қилиб кўнпайтирилади.* Газетадан.

2 *тех.* Металл бўлақларини эритиб ёки парчинлаб, бир-бирига ёпиштириш, бириктириш ва шу усулда ҳосил қилинган чок. *Электр пайванд.* ■ *Насос станцияси корпусининг йўғон пўлат арматураларини пайванд қилиш бошланди.* «Ўзбекистон кўриқлари».

3 *махс.* Уланган бўлак, улоқ. *Шогирд бола лаб-лунжини осилтириб.. энди пайванд тиқишга бошлади.* Ойбек, Танланган асарлар.

4 *сфт.* кўчма Ўзаро боғланган, пайваста. *Куйга куйлар бўлармиди банд, Диллар дилга бўлмаса пайванд.* Г. Жўраева, Менинг маржонларим. *Кўнгил яйраб кетар, ором олар жон. Гуллар манзараси севинчга пайванд.* Миртемир, Асарлар. *Навойнинг дили билан халқнинг дили ҳамшиша пайванддир.* Ойбек, Навоий.

ПАЙВАНДИ [ф. پیوندی - пайвандланган, дурагай] қ. х. Пайванд қилинган, уланган. *Пайванди дароҳт.* ■ *У ёғи Тўлқинжоннинг пайванди қантаклари, бу томон Эркинжоннинг кишиши, чарос тоқлари.* Қ. Муҳаммадий.

ПАЙВАНДКАШ қ. **пайвандчи.** *Рашид, пайвандкашдан таралаётган ёқимсиз ҳидни сезиб, бурнини жийирди.* Газетадан.

ПАЙВАНДЛАМОҚ 1 қ. х. Бирор ўсимликнинг куртак ёки новдасини бошқа ўсимлик танасига уламоқ, пайванд қилмоқ. *Гилосни олчага пайвандламоқ.*

2 *тех.* Металл бўлақларини эритиб ёки парчинлаб, бир-бирига ёпиштирмоқ, уламоқ. *Рельсни пайвандламоқ. Деталларни пайвандламоқ.* ■ *У [ишчи] қувурни қўлига олиб, бир нафасда учини пайвандлаб бекитди.* А. Мухтор, Опа-сингиллар.

ПАЙВАНДЛОВЧИ қ. **пайвандчи.**

ПАЙВАНДТАГ *бот.* Пайвандуст пайванд қилинадиган ўсимлик ёки унинг қисмлари. *Мана шу ер қатламларида ток ва кучли пайвандтагда ўстириляётган мева дароҳтларининг асосий «ишчи» илдизи жойлашган бўлади.* Газетадан.

ПАЙВАНДУСТ *бот. 1* Пайвандтагга уланадиган қаламча ёки куртак.

2 Уланган қаламча ёки куртакдан ўсиб чиққан ўсимликнинг ер устки қисми.

ПАЙВАНДЧИ Улаш, пайванд қилиш иши билан шуғулланувчи мутахассис (қ. **пайванд 1, 2**). *Дарвоза очилиб, занжири шақирлаганда, Чори ота пайвандчи йигит, деб ўйлади-да, ишини давом эттираверди.* С. Нуров, Нарвон. *Бош пайвандчи ва бошқа мутахассислар масъулияти оширилди.* Газетадан.

ПАЙВАСТ [ф. پیوست - боғловчи; алоқа; боғланиш; бириктириш, қўшиш] Туташ, уланиб кетган, бириккан. *Пайваст қошлар.*

■ Ё ёр, абруларинда қалам изи деганим, Тугатмаган шеърларимнинг шони қошингга пайваст. А. Исроилов, Биз дунё одамлари. Негаким, нонни ҳар қанча бўлса ҳам пайда ёшиб берадилар. Негаким, уч тандирда пайваст нон ёпишмоқда. Ҳамза, Танланган асарлар.

ПАЙВАСТА [ф. پیوسته — доимий, узлуксиз; бириккан, қўшилган] Ўзаро боғланган, туташган. Қодиржон пайваста қошларини чимирганча аниқ жавоб кутарди. Ҳ. Назир, Сайланма. Узун-узун, қора, пайваста Киприклари титрар, қалтирар. М. Али, Боқий дунё. Бунда икки катта ва ўн тўрт кичик гумбазли жой бўлиб, пишиқ гиштдан қалин қилиб шиланган пайваста арқлар бор. Ж. Шарипов, Хоразм.

ПАЙГИР [ф. پایگیر — боғланган; ўралган; боғлиқ] тар. Найча шаклида ўралган узун қоғозга ёзилган ёрлиқ.

ПАЙДАР-ПАЙ [ф. پی‌درپی — изчил, кетма-кет; узлуксиз, тўхтовсиз] рвш. Бирин-кетин, кетма-кет, узлуксиз. Одамлар пайдар-пай келиб туришибди. ■ Хўжанддан пайдар-пай учирилган кабутарлар Жиззахга, Жиззахдан Самарқандгача жўнатилди. Мирмуҳсин, Меъмор. Наврўзий беданаларнинг пайдар-пай сайрашлари кўклам келишига «Хушвақт, хушвақт» деб чучут отади. Ф. Фулом, Шум бола. Хурсандман: оламга доврўқ тарқатиб, Юртимда ўтмоқда пайдар-пай тўйлар. Уй-гун, Тонг қўшиги.

ПАЙДО [ф. پیدا — кўринадиган, кўринарли; аниқ; очиқ-ойдин]: **пайдо бўлмоқ** 1) юзага келмоқ, яратилмоқ. Кейинги йилларда Хива атрофида янгича тарзда қурилайтган қишлоқлар пайдо бўлаётган эди. С. Сиёев, Ёруғлик. [Бой:] Бу Эшмат, бу Тошмат деб кўрсата берсак, орамизда фитна пайдо бўлади. Ойбек, Танланган асарлар; 2) қаердандир келиб қолмоқ, ҳозир бўлмоқ. Азизхон сувда мириқиб шўнғиб, қулочкашлар сузиб юраркан, унинг тепасида Жўра полвоннинг қораси пайдо бўлди. С. Аҳмад, Уфқ. Суви қочган нон, олмачой билан нонушта қилишаётганда, Гадоввой пайдо бўлди. Ҳ. Фулом, Феруза. Дарров қалам-дафтарни олиб Баёнқул ака пайдо бўлди. С. Сиёев, Ёруғлик; 3) кўринмоқ, кўзга ташланмоқ. Кўп қаватли бинолар гоҳ булутлар соясига қўшилиб, йўқ бўлиб кетади, гоҳ яна қуёш чиқиб, оламга иссиқ-иссиқ нур сочганда, қайтадан пайдо бўлади. П. Қодиров, Уч илди; 4) яратилмоқ,

келиб чиқмоқ. Ерда ҳаётнинг пайдо бўлиши. ■ Тош Эронга ўтди ва салкам юз йилдан сўнг унда «Кожар Фатҳали шоҳ султон (ҳижрий 1242 йил)» деган ёзув пайдо бўлди. С. Кароматов, Олтин қум; 5) намоён бўлмоқ, акс этмоқ (ҳис-туйғу, кечинма кабилар ҳақида). Анвар Муқаддамнинг чехрасида бир лаҳза ғам соясига ўхшаш аллақандай ҳайрат пайдо бўла бошлаганини пайқаб олди. Ў. Ҳошимов, Қалбингга қулоқ сол. Кўкламда одамлар кўнглида кўтаринкилик пайдо бўлади. Газетадан. **Пайдо қилмоқ** (ёки **этмоқ**) Вужудга, юзага келтирмоқ, чиқармоқ. Қанот пайдо қилмоқ. Ҳавас пайдо қилмоқ. Ҳасад пайдо қилмоқ. ■ Қимиз кайфи, от минши завқи унга гўё қанот пайдо қилиб учирди. С. Аҳмад, Уфқ. Ноннинг хоми гард пайдо қилар, Гўштининг хоми дард пайдо қилар. Газетадан.

ПАЙДОР [ф. پی‌دار — мушакдор, пайли] Мушаклари ривож топган; бақувват, чайир. -Кечаги рейс муваффақиятли ўтгани билан табриклайман, — унинг [Нозимнинг] сўзини бўлди машинист-инструктор ва йигитга ўзининг бармоқлари йўғон, пайдор қўлини чўзди. Ў. Ҳошимов, Пўлат чавандоз. Мажлиснинг сўнгида у яна асл ҳолига қайтди, пайдор жуссаси, ўйнаб чиққан мушаклари — бутун аъзоси кийимлари остида кўздан йўқолди. «Ёшлик».

ПАЙК [ф. پیک — хабарчи; чопар; ўқ] кт. Хабарчи, элчи, даракчи; хизматкор. Муҳаммад Валибек кулумсираб, кўзи билан пайклар ўтирган томонга ишора қилиб жавоб берди. М. Осим, Сеҳрли сўз. Ияқларини майин тук босган, мўйлаблари энди сабз уриб келатган бу йигитчалар подшоҳнинг пайклари — жиловдорлари эди. М. Осим, Сеҳрли сўз.

ПАЙКАЛ [т. پی — ҳисса, бўлак, улуш + ф. کال — чуқур, хандақ] қ. х. Марза, ариқ, йўл кабилар билан ажратилган катта экин майдони; пол, чек. Ғуза пайкали. ■ Трактор пайкал бошига етти-саккиз бориб келгунча ҳам Дилдор хаёлидан бўшамайди. С. Аҳмад, Уфқ. Бугдойзорда пайкал бўлмаса, боланинг қўлида метрлаб ўлчайдиган газ бўлмаса, қаяқдан билсин! Ў. Ҳошимов, Икки эшик ораси.

ПАЙКОН [ф. پیکان — ўқ, найза кабиларнинг ўткир учи; камон ўқи, найзача] 1 Камон ўқи учигада металл бошоқ. Кўксима ўқларки отдинг ғамздаин, пайконларинг Чекмаким, жонингга қолсун ёдгор, эй сарвиноз.

Фурқат. *Тиг бўлиб ботқучи — сен, Пайкон ўзинг, қалқон ўзинг.* Э. Воҳидов, Муҳаббат.

2 кўчма Киприк. *Сўзлаганда, эй қора кўз, юзларда хандон ўйнасин. Дилга туғён солиб ҳар сўз, кўзларда пайкон ўйнасин.* Б. Бойқобилов, Мени кутинг, юлдузлар.

ПАЙМА-ПАЙ [ф. پی پایی — орқа(си), кетида(н)] с. т. қ. **кетма-кет.** *Турналар учар пайма-пай, Гўё чалиб битта най.* «Шарқ юлдузи».

ПАЙМОН [ф. پیمان — ваъда; битим, аҳд; иттифоқ] Аҳд, ваъда. *Биз у билан аҳду паймон қилганмиз.* Х. Тўхтабоев, Ширин қовунлар мамлакати. *Ошиқ-маъшуқ паймонлари сиру синоатдадир.* «Шарқ юлдузи».

ПАЙМОНА [ф. پيمانه — ўлчов, ўлчам; қадаҳ] *поэт.* Ичкилик ичиладиган идиш; қадаҳ, пиёла. *Фаровон кунларнинг нашъаси билан шарбат селобига тўлди паймонам.* Ғайратий.

Паймонаси тўлди қ. тўлмоқ 4. ..*Паймонам тўлибди-да, деб йиғлаб юбордим.* «Ёшлик». *Пайт келар, ваъданинг қиммати қолмас, Муҳлат бермас у дам тўлган паймона.* А. Орипов, Йиллар армони.

ПАЙНОВ [ф. پای — оёқ; адоқ; этак + ناول сув қувури] **1 айн. пойнов.** *Манзилига шунча-ям ошиқмаса-я бу шошқин дарё! Минг шошсин, пайнови кўм саҳролариға етиб сингигунча қўймай, неча ерда жолов солиб олишади.* Ҳ. Назир, Кўктерак шабадаси. *Иномиддин сув чиқиб кетадиган пайновларни ўйиб кенгайтирди.* Қ. Кенжа, Нотаниш гул.

2 кўчма с. т. қ. **пайров 3.** *Сув сойға оқар, дегандек, гапнинг пайнови Чинорбигиға келиб тўхтади.* Ш. Ризо, Қор ёғди, излар босилди. *Гапнинг пайновини керакли томонга буриб юборадиган сўзамол одамлар ҳам топилб туради.* Газетадан. *Гапнинг пайновидан билиб қолдимки, у бола-нақаси ёки аёли билан.. мол-дунёға шерикликни тиклаш учунгина ярашмоқчига ўхшайди.* Газетадан.

ПАЙПАСЛАГИЧЛИЛАР зоол. Денгизлар ва чучук сувларда яшайдиган умуртқасиз ҳайвонлар типиди. *Пайпаслагичлилар ўлжани бало-қазодек чирмаб оладикки, фақат саккизоёқнинг ўлимигина бу даҳшатли чангални бўшатиши мумкин.* «Фан ва турмуш».

ПАЙПАСЛАМОҚ 1 Қўл билан ушлаб ёки силаб кўрмоқ; шу йўл билан қидирмоқ. *Чўнтагини пайпаслаб, суғурт ахтармоқ.* ■ *Нормат энгашиб, этигининг кўнжани пай-*

паслаб кўрди. С. Аҳмад, Уфқ. *Чўнтагини пайпаслаб, хушбўй атир ҳиди уфуриб турган рўмолчани чиқарди-да, бурнига яқин келтириб, узоқ ҳидлади..* Х. Тўхтабоев, Йиллар ва йўллар. *Аҳмаджон милтигини пайпаслаб кўрди.* А. Қаҳҳор, Олтин юлдуз.

2 кўчма Бекитишга, юмшагишга уринмоқ, хаспўшламоқ. *У ўз айбини пайпасламоқчи бўлди.*

ПАЙПОҚ 1 Тўпиқ, болдир ёки сонгача беркитадиган, асосан тўқиб тайёрланадиган оёқ кийими. *Жун пайпоқ. Капрон пайпоқ.* ■ *Ипак пайпоқ болдирларидан сидирилиб тушиб кетаётгандек.* С. Аҳмад, Уфқ. *Ҳақиқатан ҳам ип пайпоқ ишлаб чиқариш билан фақат биргина Қўқондаги пайпоқ тўқиш фабрикаси шуғулланади.* Газетадан. *Туршак, ёнғоқ, жун пайпоқ — нима топсак жўнатдик.* «Саодат».

2 зоол. Панжа устини, тўпиқни қоплаб турувчи пат (паррандаларда).

ПАЙПОҚДОР Панжа усти-тўпиқдан узун пат ўсиб чиққан (парранда ҳақида). *Пайпоқдор каптар.* ■ *Ҳайтовур домла иштонбоғини маҳкам боғламагани учун, чопиш вақтида [иштони] оёғига тушиб, кишан бўлиб, пайпоқдор товуқдай каловлаб қолди-да, мен қочиб қутулдим, — деди Шум бола.* Ғ. Фулом, Шум бола.

ПАЙРАВ с. т. қ. **пайров 3.** *Нуктадон Мутриб дарҳол ҳовлисининг кичиклигидан кун тушмаслиғига ишора қилиб, пайрав билан жавоб берди.* «Ёшлик».

ПАЙРАҲА, параҳа I [ф. پيرهه] **1** Ёғоч-тахта чопилганда, рандаланганда ҳосил бўладиган чиқинди. *Уста Мақсуд [ўтинлар] сал оғирроқ келса, ўзининг ўроқ рандасида шир этиб йўниб олиб, чиққан пайраҳани сийлов қилиб беришга олиб қоларди.* Шукрулло, Жавохирлар сандиғи. *Назар ота пайраҳаларга кўмилиб, пойтеша чопаетган уста Шоқосим билан гаплашиб турган экан.* С. Аҳмад, Қадрдон далалар.

2 Юпқа кесилган (нон, яхна гўшт, пишлоқ ва ш.к.); япроқ. *Бир пайраҳа қазди.*

ПАЙРАҲА II [ф. پيراهه — ёндама сўқмоқ, айланма йўл] Лойгарчиликда, қорда одамлар юравериб ҳосил қилган йўл, сўқмоқ. *Шундай пайтларда МТС ҳовлиси ҳам қиш либосини кияр, устахона ёки чехдан бошқа бир жойга бормоқчи бўлсангиз, девор тагидан.. «пайраҳа» йўлкадан юришга тўғри келарди.* С. Маҳкамов, Дала тонги.

ПАЙРОВ [ф. *پیرو* — издош, изидан борувчи; ихлосманд; тарафдор] **1** Кетма-кет келувчи, эрганувчи, издош. *Ёзга пайров куз эди, кишига ҳам баҳор.* Уйғун.

2 Сув оқими, йўналиши. *Қорабулоқ камбағаллари минг азобу уқубат билан тоғдан унғур қазиб чиқарган сув пайрови лапанглаб оқайтган анҳор бўйида машина корпусининг баланд қадди кўринди.* М. Исмоилий, Фарғона т. о.

3 Аския учун танлаб олинган, аскиячилар бирин-кетин давом эттирадиган маълум мавзу; аскиянинг ижро услуби. *Ашула пайрови. Пайров қилмоқ. Пайровдан чиқмоқ.* ■ *Хум ичида кўпирган бўза, Тил қичитар аския, пайров!* М. Али, Боқий дунё. *Бошқа бир гал аскиялар устидан чиқиб, эски-янги пайровларда тарафлашамиз.* А. Исроилов, Биз дунё одамлари. *Шодон аскиялар, пайров ва тақлид — Даврани порлатар мисоли чироқ.* А. Исроилов, Биз дунё одамлари.

4 Гап ёки суҳбатдан келиб чиқадиган маъно; гапнинг мақсади; хулоса. *Гапнинг пайровини кутмоқ.* ■ *Бу [Алиқул] гапнинг пайровини келтириб, анча эиди.* П. Турсун, Ўқитувчи.

ПАЙРОВЛИК: пайровлик қилмоқ Бировнинг кўнглига қарамоқ, унинг изми, хоҳиши билан иш тутмоқ. *Неча йиллар пайровлигинг қилганман.* «Муродхон».

ПАЙСА I [ф. + ҳинд. *پيسه* — Ҳиндистон ва Покистонда: чақа пул, майда танга] **1** эск. Тахминан 50 граммга тенг оғирлик ўлчов бирлиги. [Юзурдак:] *Мана, тақсир, олиб келдим, текшириб кўринг!* *Икки пайса етмас экан беҳиштга.* А. Орипов, Йиллар армони. *Беш пайса ем аяган кезларингда қор кураб, илдиз топиб бердим уларга.* И. Раҳим, Зангори кема капитани. *Етмиш икки хунаринг бор, лекин хумчангда беш пайса жиринг йўқ!* А. Қодирий, Обид кетмон.

2 тар. Бухоро хонлигида беш тийинлик чақа. *Етмишинчи йилларда.. хукмдорнинг мис пайсага зарб этилган муҳрини топдилар.* Газетадан.

ПАЙСА II тиб. Терининг қизариши.

ПАЙСАЛ: пайсал топмоқ Тинчимоқ, ором топмоқ. *Чиндан ҳам оғриқ тўхтагандек эди.* *Пича пайсал топди.* Н. Қиличев, Қуюн. **Пайсалга солмоқ** Турли сабаблар билан кечиктирмоқ, галга солмоқ. *..қани, юр, хайрли ишни пайсалга солиб бўлмайди.*

«Ёшлик». - *Пайсалга солмайлик, — деди Асадулла, — тездан бир фикрга келиб олишимиз керак.* Т. Малик, Қалдирғоч. *Абдулла Қаҳҳор у кишига телефон қилсам нима бўлади, қилмасам нима бўлади, борди-ю, повесть ёқмаган бўлса, хижолатга қолдирмайин, деб учтўрт кун пайсалга солиб юргач, ниҳоят, қимтинибгина телефон қилдилар.* К. Қаҳҳорова, Чорак аср ҳамнафас.

ПАЙСАЛИК I эск. Пайса оғирлигидаги, оғирлиги бир пайса бўлган. *Беш пайсалик тош.*

ПАЙСАЛИК II эск. Бир пайса турадиган, баҳоси, нархи бир пайса бўлган. *Икки пайсалик чой.*

ПАЙСАЛЈАМОҚ I Бирор ишни судрамоқ, кечиктирмоқ, пайсалга, галга солмоқ, орқага сурмоқ. *Улар қандай фармон беришмасин, бош тортмасдан бажарган одам уларнинг жон-дили!* *Озгина пайсалласа борми?* Н. Сафаров, Узоқни кўзлаган қиз.

2 Секин, ивирсиб, имиллаб ҳаракат қилмоқ. *Тез бўл, пайсаллама, манзилимиз жуда олис.* «Ёшлик».

ПАЙСАЛЧИ кам қўлл. Ишни орқага судровчи, кечиктирувчи шахс. *Йиғилишида оғизга сиққунча ваъда берган.. жамоа хўжалиги раҳбарлари.. қурилиш ташкилотига пайчи бўлиб кириб, пайсалчига айландилар.* Газетадан.

ПАЙСА-ПАЙСА: пайса-пайса қилмоқ Уриб, чақиб қавартириб юбормоқ. *Чивин ҳамма ёғимни пайса-пайса қилиб юборди.*

ПАЙТ I Бирор иш, воқеа-ҳодиса содир бўлган ёки бўладиган вақт, фурсат, он. *Туш пайти. Ўқ отилган пайт.* ■ *Тонготар пайтида Азизхон Қўшариқ гузарига етиб келди.* С. Аҳмад, Уфқ. *Чой пайтида Мақсуда онасига кўнглини бир оз очишга журъат қилди.* С. Зуннунова, Олов.

2 Муайян шароит билан боғлиқ бўлган давр, замон. [Заргаров:] *Жоним. Пайт нозик, хотин-қизлар масаласи чирсиллаб турибди — бекорга нобуд бўлиб кетаман.* А. Қаҳҳор, Оғриқ тишлар. *Яна жазо отрядининг кўзига қон тўлиб, кимга тегишини билмай турган нозик пайтда бир кор-қол бўлмасин дейман.* *Тағин ўзингиз биласиз..* К. Яшин, Ҳамза.

3 Бирор ишни амалга ошириш учун қулай вақт, фурсат, имконият. *Пайт топмоқ. Пайтни қўлдан бермоқ. Пайт келганда айтмоқ.* ■ *Мен пайт пойлаб қочшини мўл-*

жаллаб борардим. Ҳ. Аҳмар, Ким ҳақ? Ўзи ҳам, пайти келиб, мана шу қизлардай дугоналари билан яйраб-яшнаб, қийқириб ўйнай олармикан! Ў. Ҳошимов, Қалбинга кулоқ сол.

Пайт равиши тлш. Иш-ҳаракатнинг бажарилиш пайтини билдирувчи равиш: *илгари, ҳозир, кейин* каби. **Пайт эргаш гап** Бош гапдан англашилган ҳаракат, воқеа-ҳодисаларнинг юзага келиш пайтини (вақтини) билдирувчи эргаш гап. *Бир куни кўчада кетаётсам, Умри бир бош узум кўтариб келяпти.* А. Қаҳҳор, Асарлар. **Пайт ҳоли** Иш-ҳаракатнинг рўй бериш вақтини билдирувчи ҳол. *Ҳайдар ота бир куни Ултармага бориб, тегирмондан хабар олди.* А. Қаҳҳор, Ас-рор бобо.

ПАЙТАВА [ф. پای تابه — оёқни қизитувчи, иситувчи] Кўнжли пойабзал кийилганда, оёққа ўраладиган мато. *Унинг бир пой ботинкаси титилиб кетган, ичидаги пайта-васи осилиб, юришига халақит берарди.* С. Кароматов, Олтин кум. *Тўрақулнинг оёғи музлаб қолаётгандай эди. Нам пайтавадан ўтиб, совуқ игнадай санчиларди.* А. Кўчимов, Ҳалқа. *Санобархон оёғига пайтава ўраб, маҳсисини кийди.* С. Зуннунова, Гулхан.

Пайтавасига қурт тушди Безовта бўлиб, ташвишланиб, елиб-югуриб қолди. *Файратнинг йўқлиги эрталаб маълум бўлди. Ҳамма ташвишига тушди. Айниқса, ўқитувчиларнинг пайтавасига қурт тушди.* М. Ҳазратқулов, Журъат. *Ҳудайчи жўнагач, қўрғонбегининг пайтавасига қурт тушиб, типирчилаб қолди ва у ёқдан бу ёққа югура бошлади.* А. Қодирий, Ўтган кунлар. **Патаки-пайтава** кўчма Ҳушомадгўй, сермулозамат. *Йўқ ердаги дўстларинг бирдан остонангда пайдо бўлиб, сенга патаки-пайтава бўлишади.* Н. Қобил, Унутилган соҳиллар. [Ўзунсойликлар] *Мансабинг бўлса, сенга патаки-пайтава бўлади.* Н. Қобил, Унутилган соҳиллар.

ПАЙТАВАҚОВОҚ қ. пайтавақулоқ 1. [Қобилжон:] *Сен пайтавақовоқни болалардан ҳимоя қилиб юрибман-а. Сен хомкала энди кўзимга кўринма.* Газетадан.

ПАЙТАВАҚУЛОҚ 1 дағл. от Гапни дарров уқолмайдиган, фаҳми етавермайдиган, галварс киши. [Мулладўст Муллаўзига:] *Ҳафтада бирини қўйиб, иккинни олаверасизлар.. Бизга лоақал, йўлакка тўнғак бўлган пайтавақулоғиям тегмайди. Ҳамза, Майсаранинг иши.*

2 сфт. Гапни дарров уқолмайдиган, калтафаҳм, галварс. *Ёмонлик жавобсиз қолмасмиш. Аризабозлик қилиб юриш ўзбекчиликка тўғри келмасмиш. Ўргилдим, сенга ўхшаган пайтавақулоқ ўзбекдан!* Ў. Ҳошимов, Икки эшик ораси.

ПАЙЧА: товуш пайчалари анат. Бўғизнинг ён деворларига жойлашган ва овоз чиқариш учун хизмат қиладиган иккита ўзаро параллел эластик мушакча.

ПАЙЧИ Шерикчилик асосидаги иш учун пай қўшган киши; ҳиссадор.

ПАЙЧИЛИК Шерикчилик асосида иш юритишлик. *..энг аввало пахтачилик ва ғаллачилик пайчиликка ва оила пудратига асосланган.* Газетадан. *Ана шу ҳолатни инобатга олиб, пайчилик усулидан фойдаланиш мақсада мувофиқдир.* Газетадан.

Пайчилик жамияти Пайга асосланган, пайга оид жамият, ҳиссадорлик жамияти.

ПАЙШАНБА [ф. پنج — беш + شنبه — шанба] Ҳафтанинг чоршанбадан кейинги, тўртинчи куни. *Пайшанбанинг келиши чоршанбадан белгили.* Мақол. ■ *Пайшанба куни эрта билан ишлаётган одамлардан сал четроқда Меъмор.. келиб қолди.* Мирмуҳсин, Меъмор.

ПАЙШАНБАЛИК 1 тар. Эски мактабларда пайшанба куни болалар домўлага келтирадиган пул, нон ва ш.к. инъомлар. *Ҳозир эски мактабларимизда болалар ҳар пайшанба нон ё ноннинг пулини, яъни пайшанбалик олиб борадилар. Бундан бошқа бўйра пули, кўмир пули ҳам бор.* Ойбек, Танланган асарлар.

2 Пайшанба кунлари масжидларга чиқариладиган хайру эҳсонлар. *Пайшанбалик деб, одамлар тўртта нон, бир ҳовуч ширинлик ва ош ёки сумалак солинган косани ярим қулоч сурпага ўраб, туғунни кўчага чиқаверишидаги супага ташлаб кетишади.* Ойбек, Танланган асарлар.

ПАЙҚАМОҚ 1 Сезмоқ, ҳис қилмоқ, билмоқ. *Йигит ҳеч нима сезмади. Кўзларини очган вақтда, тупроққа кўмилиб ётганини пайқади.* Ойбек, Кўёш қораймас. *Шўрхоқ сув билчиллаб ётган тўқай ичидан югуриб борарканман, чап оёғим ерга муздай тегаётганини пайқадим.* Ў. Ҳошимов, Икки эшик ораси.

2 Маъносини англамоқ, уқмоқ, тушунмоқ; сезмоқ. *Мудир унинг ишга уринмай тик*

турганидан, нимадир демоқчи бўлаётганини пайқаб, секин сўради. «Саодат». Умиднинг расмият учун гапирган гаплари унга ёқмади, унинг ўзгариб қолганини, юрагида қандайдир ғумону шубҳалар борлигини пайқади. Мирмуҳсин, Умид. Темур Малик муншийнинг мақсадинию юрагидаги аламини пайқади. Мирмуҳсин, Темур Малик.

ПАЙҒАМБАР [ф. پیامبر / پیغمبر — хабар берувчи, олдиндан хабар келтирувчи] **1** дин. Худонинг хоҳиш-иродасини бандаларига етказувчи илоҳий вакили, наби, расул. Мен [Амир Темур] пайғамбар авлодларига, олимлар ва кексаларга нисбатан буюк ҳурмат ва эҳтиромда бўлдим. «Фан ва турмуш». Эшит, тўрам, банда бўлдим олога, Уммат бўлдим пайғамбари худога. Эргаш Жуманбулбул ўғли.

Пайғамбар оши Пайғамбар яшаб ўтган ёшга (63 ёш) етганда бериладиган ош. Нурбобо Сатторқулнинг магазини ёпиқлигини, унинг пайғамбар оши бераётганлигини айтади ва икковлари ўша ерга кетишади. «ЎТА».

ПАЙҒАМБАРЛИК 1 Хабарчилик, элчилик. Бу кун менинг пайғамбарлигимга ваҳий келди. «Латифалар». Барчанинг отаси ҳазрати одам, Пайғамбарлик анга бўлди мусаллам. «Маликаи айёр».

2 кўча Олдиндан айтиш, каромат. Бир қанча француз газеталари ҳам ҳозирги сессиянинг муваффақиятсизликка учраши эҳтимоли ҳақида умидсизлик билан пайғамбарлик қилаётирлар. Газетадан.

ПАЙҒАМБАРОНА Пайғамбар сингари, пайғамбарга хос; пайғамбарларча. Лекин академик Сергей Павлович Королёв пайғамбарона башорат қилганидек, космонавтиканинг келажаги — ниҳоясиз. «Фан ва турмуш».

ПАЙҒОМ [ф. پیغام — топшириқ; хабарнома, билдириш; салом] **1** эск. кт. Хабар, мужда. Тарки пайғом ўлғонга, эй биродарлар, сабаб: Мунда бўлдим муддате уч-тўрт ой беморман. Муқимий.

2 Яхши хабар, хушхабар. Айни тонг чоғида кўз очди илҳом, Боқди атрофига соллаиб, кушод. Порларди чашмида илҳомий пайғом.. А. Орипов, Йиллар армони.

ПАЙҲОН: пайҳон қилмоқ **1)** айн. пайҳонламоқ. Дарахт шохларини синдираётган, гулларни пайҳон қилаётган болаларга бепарво бўлманг. «Саодат». Уларни узиб пайҳон қилиш ғуноҳ, улар осмон гуллари. Э. Самандар, Дарёсини йўқотган қирғоқ; **2)** йўқ қилмоқ; ўл-

дирмоқ, жонини олмоқ. У [йигит] деб эди: «Яратибди бизни худойим, Начораки, унинг ўзи қилади пайҳон..» А. Орипов, Йиллар армони.

ПАЙҲОНЛАМОҚ 1 Босиб-янчиб оёғости қилмоқ, топтамоқ, эзиб, босиб ташламоқ. Қўйлар анчагина жойнинг пахтасини пайҳонлаган экан. Ф. Фулом, Шум бола. Ноиб келган йўли билан, гўзаларни пайҳонлаганча, от солиб кетди. С. Сиёев, Ёруғлик.

2 кўча Яраламоқ, топтамоқ, эзмок. У [дўл] пахтазорнигина эмас, балки дарахт панасига ўзларини олган деҳқонлар ва Боймуроднинг юрагини қаттиқроқ пайҳонлади. Ш. Фуломов, Қалб ундайди.

ПАКАНА [ф. پکانه — бўйи, қадди паст] **1** сфт. Бўйи ўртачадан паст, бўйи ўсмай қолган, бўйи паст. Пакана йигит. ■ Бу хотиннинг ёши элликлардан ошган бўлиб, ўзи пакана, думалоқ эди. С. Зуннунова, Олов. Бир куни ишхонада ўтирган эдим, пакана, қорача бир ўсмир қўлида латта сумка билан кириб келди. Н. Аминов, Қаҳқаҳа.

2 Шундай бўйли шахс. Йўқ, бобом бўлса, бунақа гап чиқмасди. «Овозингни ўчир, пакана», деб бир мушт кўтарса, ойим пилдирпис бўп қоларди. Ў. Ҳошимов, Икки эшик ораси.

3 Унча баланд бўлмаган, пастак. Пакана уй. ■ .. беҳизор манзараси ўзгача, ёш-ёш, бўйи пакана беҳи дарахтларининг серҳосил шохлари таралиб, ер ўпиб ётмоқда. Н. Сафаров, Оловли излар. Тонг тонди, йўл четидаги икки туп пакана тут томондан қорашақшақ шақиллаб учиб-қўнди. М. Мансуров, Ёмби.

ПАКАНАЛИК Бўйнинг ҳаддан ташқари паст бўлиши; миттилик. Паканаликда ақл-хуш нормал бўлса ҳам, гавда болалар гавдасига ўхшайди. «ЎЗМЭ».

ПАКАР 1 от. шв. айн. пакана **1.** -Бу жинқарча кўчатларни оҳаклайман деб, белим қотиб кетди. Манави пакар энгашмай, тик туриб оқласа, мен икки букилиб оқлаяман! — деди узун бўйли йигит Тўппонча полвонга. С. Аҳмад, Чўл бургути.

2 сфт. айн. пакана **3.** Сўқмоқ бирдан иккига бўлинди-ю, бири соҳил ёқалаб кетгани, бири пакар арчаларни айланаб ўтиб, пастликка кетганини кўрдим. Ҳаялламай иккинчи сўқмоққа тушдим. Ш. Холмирзаев, Йўллар, йўлдошлар. У пакар арча остига — кўрпа бўлиб тўкилган нинабарлар устига қафасни қўйди. Ш. Холмирзаев, Сайланма.

ПАКГАУЗ [нем. Packhaus — омбор < Pack — халта, тугун, бўғча + Haus — уй, хона] Темир йўл станциялари, порт кабиларда юклар вақтинча сақланадиган омбор. — *Металлургия заводи қаяёқда? — деб сўради Эргаш, пакгауздан чиқиб келган юкчиларнинг бирини тўхтаббат.* И. Раҳим, Чин муҳаббат.

ПАКЕТ [фр. paquet — тугунча, бўғча; халта] **1** Қоғоз ёки целлофан халта(ча). *Шофёр изза бўлган бир алпозда багажникдан пакетларни олиб, «Нива»нинг орқасига эҳтиётлаб қўйди.* С. Аҳмад, Жимжитлик. *Маҳсулот Россия технология линияси ёрдамида бир литрли, 0,5 ва 0,2 литрли пакетларга қадоқланмоқда.* Газетадан.

2 Расмий хат, хужжат ва ш. к. солинган катта конверт ва шундай конвертдаги хат-хужжат. *Усар бухгалтер Эшмаматнинг елкасига қоқиб қўйди. Атрофга ўғринча назар ташлаб олиб, қўйнидан пакетни чиқарди.* А. Кўчимов, Ҳалқа. *Мария ўқ ёмғири остида эмаклаб, пакетни полковник Проценкога олиб бориб топширди.* «Саолат».

Индивидуал боғлов пакети тиб. Жанговар шароитларда ярадорларга биринчи ёрдам кўрсатиш учун тайёрланган махсус бинт (жароҳатга қўйиладиган иккита докпахта ёстиқча ва бинтдан иборат).

ПАККА с.т. **1** Мусобақа ва спорт ўйинларида етиб бориш ёки тўпланиш олдиндан белгиланган жой, нуқта, марра; финиш. *У паккага биринчи бўлиб етиб келди.* ■ *Пойгада қаттиқ зўриқиб чопган от паккага етганда сулайиб қолар эмиш.* Э. Аъзам, Кечикаётган одам. *Футбол ишқибозлари ҳам чойхонамизни пакка қилиб олишган.* «Шарқ юлдузи».

2 Ишнинг олдиндан белгилаб қўйилган чамаси; мўлжал, режа. *Ишни паккага етказмоқ.* ■ *Ҳар бир кўсак, ҳосил берган ҳар чигит Бизнинг кўзга илашмасдан қолмайди. Паккасига тўлдирмасдан толмайди Биздаги ҳар хотин-қиз ҳам эр йигит.* Ғ. Фулом.

Паккасига етмоқ Охирлаб қолмоқ, поёнига етмоқ. *Урмим паккасига етай деганда, худонинг қаҳрига учрадим, қизим. Гуноҳим нималигини билмайман.* К. Яшин, Ҳамза.

ПАККИ шв. Тиғи сопи ичига қайириб ёпиб қўйиладиган пичоқча; қаламтарош. *«Кескир» лақабини эса иш услуби, яъни йўловчиларга паккими, устарамии, ишқилиб, бирорта тиғлироқ матоҳни кўрсатиб дўқ*

ургани туфайли орттирган эди. М. М. Дўст, Лолазор.

ПАККИЧИ шв. Пакки ясовчи шахс.

ПАК-ПАКАНА Бўйи жуда паст, жуда ҳам пакана; митти. *У сўзини тугатгач, пакпакана бир қизикчи чиқади-да, салом беради.* Т. Обидов, Юсуфжон қизик.

ПАКТ [лот. pactum — шартнома, битим] Муҳим сиёсий аҳамиятга эга бўлган халқаро шартнома, битим. *Хужум қилмаслик ҳақидаги пакт. Пактни ратификация қилиш.* ■ *Асосий халқаро пактлар ва битимларнинг Ўзбекистон томонидан имзоланиши мамлакатимизнинг.. тарихида сифат жиҳатидан янги саҳифа очди.* Газетадан.

ПАЛАК I [ф. فاك — тўғарак майдон < а. فاك — само, осмон] Қовун, бодринг каби ўсимликларнинг ерда ёйилиб ўсадиган тана, шох ва барглари. *Қовун палак отибди. Палак ёзган тарвуз.* ■ *Домлаларни чой ва дастурхон тайёр бўлгунча овутиб туриш учун мулла Обид палакдан уч-тўртта қовун узиб чиқади.* А. Қодирий, Обид кетмон. *Ишқом ва шафтолилар участка четидаги қовун-тарвуз палаклари устидан ўз сояларини йиғиб олмоқда эди.* П. Қодиров, Уч илдиз.

Палак отмоқ Илдиз отмоқ, авж олмоқ; кўпаймоқ, мустаҳкамланмоқ. *Натижада VIII—IX асрлардан бошлаб Термизда сайидлар авлоди палак отиб, машҳур бўлиб кетди.* «Фан ва турмуш». *Чунки бу ерда расмиятчилик палак отган: мендан кетгунча, эгасига етгунча, қабилда иш тутилмоқда.* Газетадан. **Туп қўйиб, палак отмоқ** Мустаҳкам ўрнашиб, мартабаси ошмоқ; бола-чақали бўлиб кетмоқ. *Станциядаги мўтадил ҳаво секин-аста Салимжонни аввал доцент, кейин профессор қилиб, туп қўйиб, палак оттира бошлади.* Мирмуҳсин, Умид. *Қайтиш бизнинг қисматимизда бўлмаса, сизларда бордир. Зурриётимиз ота юртда туп қўйиб, палак отса, минг бор шукр қиламиз.* «Ёшлик».

ПАЛАК II [а. فاك — само, осмон] Осмон гумбазига ўхшаш доира шаклидаги гулнақшлар билан қопланган, одатда уй деворларига безак учун осиб қўйиладиган каштачилик буюми. *Илгари қиз узатган одамлар қизининг уйини безаш учун палак, зардевор, чойшаб, гилам, сандиқ қилишар эди.* Газетадан. *Ҳовлилардан келинларнинг палаги олиб чиқилиб, чойхонага осилди.* Мирмуҳсин, Ҳикоялар, қиссалар.

ПАЛАКМУРДА [палак I + ф. مرده — ўлган; ўлик] *шв.* Полиз экинларининг қуриган палаги. Палакмурдадан териб олинган тарвузлар.

ПАЛАКҚУШ *фольк.* Куш кўринишга эга бўлган афсонавий учар от. *Тўрт қиз палакқушга миниб, тўққиз кеча-кундузда Чамбилга етдилар.* «Зулфизар билан Авазхон».

ПАЛАНГ I [ф. پلنگ — қоплон; йўлбарс] *айн. йўлбарс.*

Паланг йили айн. барс йили қ. барс 2. Паланг от фольк. Афсонавий учар от. *Келиб, паланг отни созлаб кўради, Паланг отни миниб, бундан жўнади.* «Ширин билан Шакар». *Паланг отдай гувлаб борасан, Булут настда, осмон ёрасан. Қачон ерга настлаб борасан? Уч-қо, учгил, давримнинг оти.* Отаёр, Оқ фасл.

ПАЛАНГ II [ф. پلنگ — йўлбарс териси; шу теридан қилинган пўстин] Орқалаб юк ташишда ишлатиладиган махсус ёстиқча. *Ҳозир [Қаибберган] кифтига паланг кўйиб, Аллонбийнинг юкни ташиydi.* А. Мухтор, Қорақалпоқ қиссаси.

ПАЛА-ПАРТИШ I Айқаш-уйқаш, тартибсиз, бетартиб. *Ўзиям [уй] анчадан бери супурилмаган.. стуллар ҳам жойларидан сурилган, пала-партиш қўйилганди.* О. Ёқубов, Аямажиз. *Унинг ёғи чиқиб кетган дўппи, пала-партиш кийимда кириб келганига Онахон ҳайрон қолди.* Мирмуҳсин, Илдишлар ва япроқлар.

2 Бир-бирига боғланмаган, қовушмаган; пойма-пой, ғализ. *Пала-партиш жумлалар. Пала-партиш гапирмоқ.* ■ *Пала-партиш гапга чечан Араббой яна бир нарса топиши мумкин эди.* П. Турсун, Ўқитувчи.

3 Ўйламай-нетмай қилинган; бемуро-ҳаза, чала-чулпа. *Пала-партиш иш. Пала-партиш иш қилмоқ.*

4 Ўйламай-нетмай, чала-чулпа иш қиладиган, тартибсиз. *Пала-партиш одам.* ■ *..фақат айтилган ишни чала-чулпа бажарадиган ходим билан меҳнат интизомини бузувчи, ишда пала-партиш ходимнинг ўртасида қандай фарқ бор? «Ўзбекистон кўриқлари».*

ПАЛАПОН *с. т. I* Паррандаларнинг ҳали пат ва қанот чиқармаган ёки эндигина чиқара бошлаган боласи; жиш. -*Буни қаранг, — деди жилмайиб Нафисахон ўзида йўқ шод. — Мусичанинг палапон боласи ҳам, шунақа*

кап-катта бўлса ҳам, онаси кетидан қанот силкиб, осилиб юради. Мирмуҳсин, Умид. *Том бўғотига уя қурган чумчуқлар бот-бот палапонларини учирма қлишарди.* Н. Қобил, Унутилган соҳиллар.

2 Ғўдак болаларни, ёшларни эркалиатиб айтиладиган сўз. *Илк бор ҳаётингда қор сайлидир бу, Изингдан шугладек югурар кўзим. Кўрқма, палапоним, чекмагил қайғу, Йиқилсанг, турғизиб қўяман ўзим.* А. Орипов, Йиллар армони. *Йўлинг очиқ бўлар, бўлсанг сен очиқ қўл, Омин энди, палапоним, сенга оқ йўл.* Й. Эшбек, Соғиниб яшайман.

3 *кўчма бетклф. ҳазил.* Ҳеч нарса билмайдиган, тажрибасиз. *Ўрта мактабдан яқинда учирма бўлган, лекин ҳали чинакам турмуш нималигини билмайдиган бу палапонларга нима десин?* С. Анорбоев, Оқсой.

4 Бесўнақай, катта; салмоқланиб, лапанглаб юрадиган. *Палапон товуқ.*

ПАЛАТА I [лот. palatium — сарой, қаср] **1** Баъзи мамлакатларда: парламент ёки бошқа олий давлат органининг таркибий қисми.

Умум (ёки жамоа) палатаси Англия ва Канадада: парламентнинг сайланувчи қуйи палатаси. **Лордлар палатаси** Англия парламентининг асилзодалардан ёки қирол томонидан тайинланадиган аъзолардан иборат юқори палатаси.

2 Ўзбекистонда: парламент — Олий Мажлиснинг икки таркибий қисми: қуйи палата — Қонунчилик палатаси, юқори палата — Сенат. *Палаталар билан ҳамкорлик қилиш, уларга ҳар томонлама ёрдам бериш вазифаси Адлия вазирлигининг барча тизимларига юклатилади.* Газетадан. **Юқори палата таркибини вилоят, шаҳар ва туманлардан маҳаллий кенгашларга сайланган депутатларнинг вакиллари ташкил этади.** Газетадан.

3 Баъзи давлат ёки жамоат ташкилотлари ва муассасаларининг номи. *Савдо палатаси. Китоб палатаси. Тадбиркорлар ва товар ишлаб чиқарувчилар палатаси.* ■ *Вилоят тадбиркорлар ва товар ишлаб чиқарувчилар палатаси қошида кичик ва ўрта тадбиркорликни ахборот ва маслаҳат билан қўллаб-қувватлаш марказлари ташкил этилганди.* Газетадан. *Илмирахон билан танишгунимга қадар Ўзбекистон Ёшлар палатаси ҳақида кўп нарса билмас эканман.* Газетадан.

Ўзбекистон Республикаси миллий китоб палатаси Ўзбекистонда нашр этиладиган барча босма асарларни ҳисобга олиб, уларга библиография тузиб борувчи муассаса.

ПАЛАТА II [р. < лот. palatium – сарой, қаср] **1** Даволаш ва дам олиш муассасаларида беморлар ёки дам олувчилар ётадиган алоҳида бўлма, хона. *Ахир, сен даволаётган беморларнинг палатасига телевизор қўйиб беришмайди-ку.* Т. Ашуров, Оқ от. *Уша куни палатамизга сотувчи аёл атлас олиб келганди.* Газетадан.

2 қ. палатка. *Ёмғир палатадан ўтиб, кўрпа-ёстиқларни ҳам шалаббо қилиб юборди.* С. Аҳмад, Уфқ. *Ўрмон ичкарасидаги дала госпиталида брезент палатада ётибман. Қора Лочин палатага ҳар замон бир бош суқиб, менга қараб қўяди.* С. Аҳмад, Жимжитлик.

3 Баъзи ҳашаматли уй, қасрлардаги ички иморат, зал. *Яроғ-аслаҳа палатаси.*

ПАЛАТКА [р. «палата» с. кичр.: кичик палата] Сув ўтмайдиган пишиқ матодан, теридан тикилган ёзги қапа, чодир. *Ана ҳозир қамиш капалар, брезент палаткалар, ертўлалар кўриниб қолар деб келяпман.* Ҳ. Назир, Чўл ҳавоси.

ПАЛАХМОН [ф. پلخمان – сопқон, тошотар] тар. Тош отиш учун ишлатилган жуда қадимий ибтидоий қурол. *Кўрғон ҳимоячилари уқ-ёй ва тош отадиган палахмон билан қуролланган эдилар.* М. Осим, Аждолларимиз қиссаси. *– Қиз бола палахмоннинг тоши, дейдилар: қаерга отса, шу ерга бориб тушади, – деди Ёринжон хола.* С. Йўлдошев, Қиз қалби.

ПАЛАХСА I Ер чопганда ёки ҳайдаганда уваланмай, бутун ҳолда кўчган катта япалоқ кесак. *Ер палахса-палахса бўлиб кўчяпти. Ерни палахса-палахса қилиб ағдариб ҳайдамоқ.* ■ *Чўл қушларининг қилиғи қизиқ: улар палахса-палахса ағдарилиб, қалайдай йилтираб ётган шудгорда ўлжа талашади.* Ҳ. Назир, Бир туп гўза.

2 Умуман, ҳар қандай қаттиқ нарсанинг ундан ажралган яхлит, япалоқ парчаси. *Бир палахса мрамар.* ■ *Фуломжон ҳар гурзи урганда, тоғ палахса-палахса бўлиб ағдарилар, одамлар қийқиришиб, югуришиб ташишар эмиш.* М. Исмоилий, Фарғона т. о. *Тоғнинг тошилари палахса-палахса ушалиб, худди тирик мавжудотдек, настега силжийди.* «Ёшлик».

ПАЛАҒДА [ф. پلغده – айниган, бузилган тухум] **1** Айниган, бузилган, сасиган (тухум ҳақида). *Палағда тухум.* ■ *Уни қанақа чиройли сўзларга ўрамасин, палағда тухумга мурч сепиб бергандай гап – бари бир еб бўлмайди.* А. Қаҳҳор, Бек. *Олқинди кетдию, уйда аллақандай моғор ҳиди билан бешта палағда тухум қолди.* С. Аҳмад, Сайланма.

2 Унмайдиган, қуруқ, қовжироқ (уруқликлар ҳақида). *Палағда уруғ.*

3 кўчма Пўнғиллаган, ёқмайдиган, ёқимсиз, хира (овоз ҳақида). *Унинг [Очиловийнинг] овози аллақандай хириллаб, палағда чиқади.* *Иззатулла ака ўрнидан қўзғалиб, унга кулумсираб қарайди.* Н. Аминов, Қаҳқаҳа. *Чол кафтини тўлдириб нос отди-да, палағда товуш билан гапга тушиб кетди.* С. Аҳмад, Ҳукм.

4 кўчма Ҳеч нарсага ярамайдиган, фойдасиз. *Нишонбой, бу саволинг палағда чиқди.* А. Қаҳҳор, Кўшчинро чироқлари.

ПАЛЕО [юн. palaios – қадимги, бурунги] Байналмиал ўзлашма қўшма сўзларнинг биринчи қисми: «қадимги, қадимийликка, қадимиятга алоқадор» каби маъноларни билдиради (мас., *палеоботаника, палеография*).

ПАЛЕОАНТРОПОЛОГИЯ [палео.. + антропология] Антропологиянинг қазиб олинган қадимги одам (питекантроп, синантроп ва ш.к.)ларнинг типларини ўрганувчи соҳаси.

ПАЛЕОБОТАНИКА [палео.. + ботаника] Ботаниканинг қазилма ўсимликларни ўрганувчи соҳаси. *..қазилма бойликларни қидиришда палеоботаника маълумотларидан фойдаланилади.* «ЎЗМЭ».

ПАЛЕОГРАФ Палеография олими, мутахассиси.

ПАЛЕОГРАФИК Палеографияга оид. *Тўртламчи даврнинг ўрталарида Хоразмнинг палеографик тузилишида анча ўзгаришлар рўй берди.* И. Жабборов, Кўҳна харобалар сири.

ПАЛЕОГРАФИЯ [палео.. + юн. grapho – ёзаман] Қадимги қўлёзмалар ва ёзувларни, ёзув белгиларининг яратилиш тарихини ҳамда уларнинг ташқи кўриниши (ёзилиш усули, ҳарфлар шакли, ёзув ёзилган материал тури кабилар)ни ўрганадиган фан.

ПАЛЕОЗОЙ [палео.. + юн. zoe – ҳаёт] геол. Ер геологик тарихининг учинчи эраси (бу

эрада ер юзида папоротниклар, яланғоч уруғли биринчи игнабаргиллар, балиқлар, амфибиялар пайдо бўлган). *Палеозой эраси.* ■ *Мумийёи аслнинг пайдо бўлишида қуёш энергияси катта роль ўйнайди. Мумийёи аслии палеозой эрасининг жинслари тарқалган жойларда учратиш мумкин. «Фан ва турмуш».*

ПАЛЕОЛИТ [палео.. + юн. lithos – тош] Энг қадимги тош асри, даври.

ПАЛЕОНТОЛОГ Палеонтология олими, мутахассиси.

ПАЛЕОНТОЛОГИК Палеонтологияга оид. *Палеонтологик экспедиция. Палеонтологик таҳлил.*

ПАЛЕОНТОЛОГИЯ [палео.. + юн. on (ontos) – борлиқ, ҳақиқатда мавжуд (нарса) + logos – билим, фан, тушунча] Қирилиб, ўлиб, йўқ бўлиб кетган ўсимлик ва ҳайвонларни уларнинг қазиб топилган қолдиқларига қараб ўрганадиган фан.

ПАЛЕОЭКОЛОГИЯ [палео.. + экология] Палеонтология фанининг қадимги даврларда яшаган ҳайвонот ва ўсимликларнинг ўша давр муҳити билан ўзаро муносабатини, ҳаёти ва яшаш шароитларини ўрганадиган бўлими.

ПАЛЁН [р. полено – «ёрилган ғула, тараша» с. нинг бузилган шакли] Ғуланинг ёриб ажратилган бир бўлаги. *Бир палён ўтин.* ■ *-Бўлмаса бундай қиламиз. Қўлингиздаги болта билан анави палённи олинг-чи, – деди режиссёр. «Муштум».* Арзанда бир палён чайир ўтинни тик қўйибди-да, шошиб, зарб билан болта урибди. Ё. Шукуров, Она меҳри.

ПАЛИД [ф. پليد – кир, ифлос; нопок, мурдор, ҳаром] 1 Жуда, ўта ортиқ даражада кир, ифлос. *Палид нарса.* ■ *Аммо бундай палид жойга кирганимни арвоҳлар ҳам ёқтирмаган бўлсалар керак. А. Қодирий, Кичик асарлар. Олтин палид ва ҳаром нарса, мен уни қўлимга олишга ҳазар қиладурман. М. Осим, Карвон йўлларида.*

2 кўчма Ўтакетган ярамас, қабих, разил, жирканч, ёмон. *Палид одам.* ■ [Миркомил] *Эндиликда кўршапалакдек тунда изгиб юрган зараркунанда, палид. Ҳ. Ғулом, Машғал. Ҳайҳот, ўшал жойда қайсидир палид Унинг қисматиға қайрайди пичоқ. А. Орипов, Йиллар армони.*

ПАЛИТРА [фр. palette – темир, ёғоч ёки бошқа нарсадан бўлган ясси тахтача] 1

Рассом ишлаш жараёнида бўёқларни ара-лаштирадиган, тўртбурчак ёки овал шаклидаги тахтача. *Дафъатан бирор одам олди-га бориб, палитрани, мўйқаламни кўз-кўз қилиб.* М. Қўшжонов, Дийдор.

2 кўчма Ёзувчилар, композиторлар ижодида таъсирчанлик ва бўёқдорлик воситалари мажмуи. *Актёр қаҳрамоннинг хатти-ҳаракатларини белгилашда ўзининг бўёқдор ҳаётбахш палитрасини равшан намоён қилган. С. Хўжаев, Ўзбек тарихий фильмлари.*

3 кўчма Рассомнинг рангтаъсир услуби ҳамда алоҳида рангтаъсир асари учун хос бўлган ранглар тўплами.

ПАЛЛА I [ф. پله – поғона, босқич; даража, мартаба] 1 Муайян давр, вақт, пайт. *Ёз палласи. Ёшлик палласи. Шу паллада.* ■ *Дехқон тонг палласи сафарга чиқди, Юртим деб бир йўли ҳашарга чиқди. М. Юсуф, Уйқудаги қиз. Арпа ўроққа кирган палла эди. Матпано ўроғини йўқотиб қўйиб диққат бўлди. С. Сиёев, Аваз. Далада ёз палласида ёйилиб ўтириш – роҳат. Ойбек, Танланган асарлар.*

2 Босқич, поғона, давр. *Тарихий тараққиётнинг янги палласи.* ■ *Эл билан бирга узоқ йўл босдим, бундай паллаларни яхши биламан. Халқнинг қисматида тарихий кунлар бошланмоқда. «Шарқ юлдузи».*

ПАЛЛА II [ф. پله – тарози коса(ча)си] 1 Тарозининг нарса ёки тош қўйиладиган ҳар бир тақсимчаси. *Тарози палласига тош қўймоқ. Тарози паллаларини мувозанатга келтирмоқ. Тарози палласига қараб иш тутадиган одам.* ■ *Пештахта олдиға бориб, саватдаги узумдан бир бош танлади-да, тарози палласига қўйди. К. Яшин, Ҳамза. Дунё тарозисининг икки палласи: бирида қувонч, бирида ғам; бирида нур, бирида зулмат бўлса, Назокат энди фақат биттасини – қувонч билан нурга тўласини кўрарди. Шухрат, Умр поғонаси.*

2 Юмалоқ нарсанинг тенг иккига бўлинган қисмларидан бири, ярми. *Ёрмат.. тарвузни кесди. Бир палласини Йўлчи ва Ўроз олдиға қўйди. Ойбек, Танланган асарлар. Кўзим ичга ботиб кетган, худди қуруқ икки ёнғоқ палласи. Т. Фаттоҳ. Тарвузнинг бир палласида сузар юзлаб чумоли. «Ёшлик».*

3 бот. Уругнинг мустақил муртакли ҳар бир бўлаги.

Палласи босмоқ Устун бўлмоқ, зўр чиқмоқ. Эшоннинг панд-насихатлари зўр келди. Эшоннинг палласи босди. С. Аҳмад, Сайланма.

ПАЛЛАДИЙ [лот. Palladium < юн. Palladion – Паллада кичик сайёраси номидан < Pallas – юнон маъбудаси Афинанинг номларидан бири] Менделеев даврий системасининг VIII гуруҳига мансуб кимёвий элемент; платина (оқ олтин) металллар гуруҳига кирувчи юмшоқ ва енгил, кумушсимон оқ металл.

ПАЛОВ [ф. پلو / پلو – палов] Асосий масаллиги гуруч, ёғ, гўшт ва сабзидан иборат, қовуриб, қайнатиб ва дамлаб тайёрланадиган қуюқ овқат; ош. *Нўхатли палов. Майизли палов.* ■ Хотинлар паловни дамлаган вақтда бой келиб қолди. Ойбек, Танланган асарлар. *Нигор ойим сопол лаганда палов келтириб, ҳаммалари бирга ошга ўлтирдилар.* А. Қодирий, Мехробдан чаён.

Ивитма палов Олдиндан ивитиб қўйилган гуручдан тайёрланган юмшоқроқ палов. **Самовар палов** Чойхонада сара масаллиқлардан яхши пазанда тайёрлаган палов. Унинг илгариги чойхўрлари, бирга самовар палов ейишган улфатлари Ёвариқ бўйида тўкин дастурхон атрофида ўтиришибди. И. Раҳим, Ихлос. **Халта палов** Гуручи алоҳида халтада сувда қайнатиб, пишириб олинган палов. **Чойхона палов** айн. самовар палов. *Йигитсиз ўчоқда олов қайдадир, Хилватда чойхона палов қайдадир.* Э. Охунова, Кулогингизга гапим бор. **Қовурма палов** Масаллиги обдан қовуриб, гуручи ивитимай тайёрланадиган палов.

ПАЛОВХОНТЎРА с.т. айн. палов. -О, келин паловхонтўрани бошлабдилар-ку, тилладай ош бўпти-ку, маза қиламиз экан-да! – Зиёд мақтай-мақтай енг шимаришга тушди. М. Мансуров, Ёмби.

ПАЛОВХЎР [ф. پلاخور – палов еювчи] Паловни яхши кўрадиган, кўпроқ палов ейдиган киши. *Айниқса, шўх ўзбек халқи паловхўр, Иш вақтида бир-биридан чайир, зўр. Ҳабибий, Девон. Паловхўрларнинг аксарияти бу ерда доимий яшайди.* Қ. Кенжа, Нотаниш гул.

ПАЛОВХЎРЛИК Тўйиб палов ейиш, паловга тўйиш. *Маҳаллада ҳар кун тўй, ҳар кун паловхўрлик.* ■ Раис мазнунтол тагидаги паловхўрликдан кейин ажойиб бир

ҳодисага дуч келибди. М. Муҳамедов, Юрак сўзлари.

ПАЛОН с.т. айн. фалон. *Қишлоғимизнинг қизига палон қишлоқнинг йигити гап ташлабди, деб эшитса, атайин муштлашгани учтўрт йигит ўшаққа бориб, бирон жанжал бошламай қайтишмайди.* С. Аҳмад, Уфқ.

ПАЛОН-ПИСТОН с.т. айн. фалон-пистон. *Бир кун у [Оқилжон] Бухорога жўнайман, деб қолди, алақандай мол келтириб, мана мунчага сотаман, палон-пистон деб ҳовлиқди.* Ойбек, Танланган асарлар.

ПАЛОНЧИ с.т. айн. фалончи. *Қайси ҳайкал тагидаги ёзувни ўқиманг, албатта «ҳайкалтарош палончи архитектор Одинаев» деган ёзувни ўқийсиз.* С. Аҳмад, Юлдуз. *Палончининг хотини ҳалиям ўзини олдирмапти, деса ёмонми?* С. Аҳмад, Юлдуз.

ПАЛОС [ф. پلاس – туксиз дағал гилам; дарвешларнинг жун, қилдан тайёрланган дағал кийими] 1 Қўлда ёки машинада тайёрланадиган катта жун шолча, туксиз гилам. *Бўш турган айвонлар ҳам турлитуман гиламлар, палослар билан безалган.* Ж. Шарипов, Хоразм. *Супачада қизил гилам, палослар, Парқуларга ёнбошлаган бир кекса.* Ф. Фулом.

2 Ерга, полга тўшаладиган буюм (гилам, кигиз, шолча каби) ларнинг умумий номи. *Бир вақтлар дошқозонлар қуриладиган ўчоқлари, палос тўшаладиган супалари ҳам йўқ.* И. Раҳим, Ихлос. *Узун айвонларда палос ўрнига қора қум солиниб, бошдан-оёқ қум қоплилар тизилган.* Ойдин, Бечора.

ПАЛОЧ шв. Бошоғи тўкилиб кетган ёки юлинган бугдой, арпа пояси.

ПАЛПИС 1 шв. Пок-нопокнинг фарқига бормаидиган; ифлос, исқирт; бефарқ. *Полпис одам.*

2 Ишни эплаёлмайдиган; уқувсиз, ношуд.

ПАЛУБА [р. < қад. р. па (суфф.) + луба – йўнилган тахта] Кемаларнинг горизонтал ҳолда тахта қопланган юзаси, саҳни. *Юқори палуба. Қуйи палуба.* ■ *Талабалар парохдага чиқшиди, Ойжамол эса парохнинг палуба, каюталаридан кўзини олмасди.* Ж. Шарипов, Хоразм.

ПАЛЬМА [фр. palme – хурмо шоҳи, новдаси < лот. palma – панжа, кафт; пальма, хурмо] Жануб томонларда ўсадиган, доим яшил, катта баргли тропик ва суб-

тропик баланд дарахтларнинг умумий номи. *Юқори синф шогирдларидан бир нечаси адил, юксак пальма дарахтлари остида.. жиддий суҳбатлашмоқда эдилар.* Ойбек, Нур қидириб. *Мазкур ўрмонлар қарағай, ҳатто пальма ёнғоғи, банан сингари дарахтлардан иборат бўлган.* «Фан ва турмуш».

ПАЛЬМАЗОР Пальма билан банд, пальма ўстирилган ер, майдон.

ПАЛЬПАЦИЯ [лот. palpatio — пайпаслаб, силаб кўриш] тиб. Беморни текшириш усулларидан бири: юза тўқималар ва чуқур аъзоларни мунтазам пайпаслаш ва шу йўл билан касалликни, касаллик белгиларини аниқлаш.

ПАЛЬТО [фр. paletot — пальто < лот. palla — енгсиз, халатсимон кийим, ридо] Одатда совуқ кунларда кўйлак ёки костюм устидан кийиладиган узун устки кийим. *Қишлик пальто. Мавсумий пальто.* ■ *Вагон деярли бўш эди. Уртадаги ўриндиқда жигарранг пальто кийган қиз билан бир йигит ўтирар эди.* Ў. Ҳошимов, Қалбингга қулоқ сол.

ПАЛЬТОБОП Пальто тикиладиган, пальто бўладиган, пальтолик (мат). *Пальтобоп мовут.*

ПАЛЬТОЛИК айн. пальтобоп. *Пальтолик драп. Пальтолик астар.*

ПАМИЛДОРИ с.т. Помидор.

ПАМИЛЧОЙ [р. фамильный чай — оилавий, хос чой] айн. **қора чой.** *Халқ табобатида мурчи памилчой билан дамлаб, асал билан ичириб, шамоллаган касалларни терлатишган.* К. Маҳмудов, Ўзбек тансиқ таомлари. *Чол бетакаллуфгина чордана қуриб ўтириб, хотини қуйиб узатган аччиқ памилчойни пуфлаб ича бошлади.* Ҳ. Фулом, Феруза.

ПАМФЛЕТ [ингл. pamphlet — рисолача; кичик асар] Ижтимоий-сиёсий мавзуга бағишланган, аниқ бир шахс ёки ижтимоий ҳодисани мазах қилиб, уларнинг иллатларини фош қилишга қаратилган кичикроқ публицистик асар. *Маълумки, ўзбек прозасининг дастлабки босқичида сатирик ҳикоялар, памфлет, кулгили ҳангомалар жуда кўп яратилган.* «ЎТА».

ПАМФЛЕТЧИ Памфлет ёзувчи адиб ёки журналист.

ПАН [пол. pan — жаноб] **1 тар.** Россия империяси ғарбида ва Польшада катта ер эгаси, помещик.

2 Шарқий Европанинг бир қатор мамлакатларида эркакларга ҳурмат юзасидан мурожаат қилганда, «жаноб», «тақсир» маъноларида ишлатиладиган сўз.

ПАН- [юн. pan — барча, ҳамма] Байналмилал ўзлашма қўшма сўзларнинг таркибий қисми бўлиб, «умумий хосса-хусусият, барча нарсани қамраб олиш, барча нарсага алоқадорлик» маъноларини билдиради (мас., панзоотия).

ПАНА [ф. پناه — бошпана; хавфсиз жой; ҳимоя; ҳомийлик] **1 от** Бошқаларнинг назаридан яширадиган ёки бирор нарса таъсиридан сақлайдиган, ҳимоя қиладиган жой, нарса, тўсиқ. *Ёмғирдан пана изламоқ. Панада турмоқ. Томнинг панасига яширинмоқ.* ■ *Лаъли шу зулмат кучоғига кирганда, ўзини бир дарахт панасига олиб, орқасига қаради.* Ҳ. Фулом, Машғал. *Ширин, симчироқ ёритиб турган остонадан ичкарига қадам қўйиши билан, мушукдай келадиган сариқ ит ақиллаб, оёғига ёпишди. У қўрқиб, жирканиб, кампирнинг панасига ўтди.* «Ёшлик».

2 сфт. Бировнинг назари тушмайдиган ёки бирор нарса таъсиридан паналанган, ҳимоя қилинган, тўсилган. *Чироқ шишасини рўмолим билан пана қилиб, ҳовлига тушдим.* Ёмғир ҳамон эзмаланиб ёғарди. Ў. Ҳошимов, Икки эшик ораси. *Кувёликдан ёдгор бўлган беқасам чопони билан юзини қордан пана қилиб, йўлакка борди.* *Пастак эшикнинг халқасидан ушлаб тортди.* Ў. Ҳошимов, Қалбингга қулоқ сол.

Фақир (ёки ғариб) киши панада Ҳар нарсага аралашавермай, камтарлик билан ўзини четга олиб юрадиган киши. *Ақли бор одам «фақир киши панада» қабилида ўзини четга олиб, ишини ўхшатиб юраверади.* В. Ғофуров, Вафодор. *Ғариб киши панада, Пўстини сомонхонада.* «Халқ дурдоналари».

ПАНАЛАМОҚ 1 Назардан, бирор киши ёки нарсдан яширмоқ, беркитмоқ. *Машинани ёмғирдан паналамоқ.*

2 Ўзини панага олмоқ, бирор нарса панасига олмоқ, орқасига яширинмоқ. *Бирон тайинли хулосага келолмагач, паналаб, маслаҳатгўйи Азимбойваччанинг кўрғонига жўнади.* С. Аҳмад, Ҳукм. *Шербек йўғон, учи кавак толни паналаб тўхтади.* С. Анорбоев, Оқсой. *Ўрмонни паналаб юриб, немисларга дуч келишди.* «Шарқ юлдузи».

3 Тўсиб, бекитиб турмоқ. *Маъсумаойни паналаб турган қизча қизил сочидаги бантини шошилиб тузатди-да, олдинга чиқди.* Н. Сафаров, Танланган асарлар.

ПАНАМА [фр. *panama* — Панама Республикаси номидан] Сербар соябонли ёзлик шляпа; ушбу бош кийими ўзи тарқалган жой номи билан аталган. *Жангчилар байрам олди-дан олган панамаларини ҳўлаб олган.* Шуҳрат, Шинелли йиллар. *Юзини беркитиб турган, теграси гўлдор боғичли похол панама ҳам унинг нафасидан қимирлаб қўяди.* Н. Аминов, Қаққаҳа.

ПАНБАРХАТ [р.] Духобага ўхшаш, тукли юпқа шойи мато. *Зокир Фаридога пушти гулли панбархат ҳада қилган.. эди.* П. Қодиров, Уч илди.

ПАНГ 1 Ўзаги қуриб, бўш бўлиб қолган. *Панг сабзи. Панг шолғом.*

2 кўчма Ноаниқ, ёқимсиз, пўнғиллаган. [Амин] *Негадир устунни қимирлатиб ҳам кўрди, сўнгра Қобил бобони чақирди ва панг товуш билан деди.* А. Қаҳҳор, Ўғри. *Эҳсоннинг кўзлари ночор жавоиради, сўнг панг овозда бидиллаб кетди.* Ш. Холмирзаев, Бодом қишда гуллади.

ПАНД I [ф. *پند* — маслаҳат, ўгит, насиҳат] *кт.* Ўгитли гап, сўз, ўгит, насиҳат. *Панд бермоқ (айламоқ).* ■ *Қол, деганда қонлар ютиб қолмадим, Отам пандин қулоғима олмадим.. Беш юз йиллик йўлдор сенинг маконинг. «Фольклор». Мана бугун яна бир панд бериб, насиҳат қилмоқчи бўлиб келган эдим, тузук, иш ўнганлиб кетганга ўхшайди.* А. Мухтор, Опа-сингиллар.

ПАНД II [ф. *پند*]: **панд бермоқ** Алдамоқ, аврамоқ, лақиллатмоқ, алдаб зиён келтирмоқ, фириб бермоқ. *Вафо бўлмас хоиннинг севисиди ҳеч! Панд беради бир кун: хоҳ эрта, хоҳ кеч.* Шуҳрат, Шинелли йиллар. [Миша:] *Миянгни ишлат, ҳийла билан душманга панд бер.* Уйғун, Ҳаёт кўшиғи. **Панд емоқ** Алданмоқ; алданиб, зарар-зиён кўрмоқ, фириб емоқ. *Яхшидан қанд ейсан, ёмондан — панд (ейсан).* Мақол. ■ *Қариганингда панд емаслик учун болангни талтайтирма.* «Ёшлик».

ПАНДАВОҚИ Гапга, унча-мунчага тушунавермайдиган; калтафаҳм, анқов. *Ўзи ҳам пандавоқи, гўл эди, у билан мозорга шамчироқ бўлармидингиз?* А. Мухтор, Туғилиш. -*Ўзингизни гўлликка солманг, — деди*

ийгит жеркиб. — Ё ҳеч нарса тушунмайдиган пандавоқи деб ўйлаясизми? У. Назаров, Биринчи учрашув.

ПАНДАВОҚИЛИК Пандавоқиға хос, пандавоқиға оид. *Пандавоқилик қонда бўлса қийин экан, буларнинг авлиёсининг ҳам ҳеч балого ақли етмайди.* Н. Қобил, Унутилган соҳиллар.

ПАНДЕМИЯ [юн. *pandemia* — бутун халқ < *pan* — бутун, барча + *demos* — халқ] *тиб.* Эпидемик касалликнинг бир мамлакат, бир неча мамлакат ёки қитъада ёппасига тарқалиши.

ПАНД-НАСИҲАТ Панд ва насиҳат(лар), ўгит ва насиҳат(лар). *Шодиёр кенжа ўғил эмасми, отасининг бу тахлит панд-насиҳатларини кўп эшитган.* Н. Норқобилов, Тўқнашув. *Вақт алламаҳал бўлганда, ёшларга панд-насиҳат қилиб, бу ёғига ширин турмуш тилаб, Муҳсиннали акалари чиқиб кетишди.* Д. Нурий, Осмон устунни.

ПАНДНОМА [ф. *پندنامه* — насиҳатнома] Насиҳатлардан иборат китоб, панду насихатлар китоби, насиҳатнома.

ПАНЕЛЛИ Панели бўлган, панеллардан қурилган. *Йирик панелли уй.* ■ *..маиший объектларни йирик панелли вариантга ўтказиш сингари тадбирлар бор.* Газетадан.

ПАНЕЛЬ [нем. *Paneel* < лат. *pannellus* — мато бўлакчаси, лахтақ] **1** *бнк.* Бино, хона ичидаги деворнинг тахта-ёғоч, пластмасса ёки мой-бўёқли безак қопламаси. *Кўк бўёқли панель. Ёнғоқ дарахтидан ишланган панель.*

2 *бнк.* Заводда тайёрланиб, қурилишда ишлатиладиган йирик ўлчамли ясси темир-бетон ёки ёғоч плита. *Йирик панеллардан қурилган уй.*

3 *махс.* Электр тармоқлари, бошқариш пульти, радиотехник асбоб ва б. нинг сигнал берувчи, назорат қилувчи, ўлчовчи ускуналар ўрнатиладиган олд девори.

ПАНЖА I [ф. *پنجه* — қўл бармоқлари; чангал; бешлик] **1** Қўлнинг кафт ва бармоқлардан иборат қисми. *Раис.. кенг панжаси билан пиёлани қоплади.* Ойбек, О. в. шабадалар. *Акбарали ҳансирар, панжалари пичоқ дастасини шундай қаттиқ қисиб ушлаган эдики, бўғинлари кўкариб, қон таллашиб кетган эди.* С. Аҳмад, Уфқ.

2 *с.т.* Бармоқ. *У буни беш панжасидай билади.* ■ *Закот бобидаги барча таомил, қоида ва тартиб каминага беш панжадай*

аён. Ойбек, Навоий. *Элмуроднинг панжралари орасида нуфакчалар пайдо бўлибди. Шухрат, Шинелли йиллар. Иккита панжраси шартта узилиб тушиди-ю, жон ҳолатда бир қўли билан осилиб, тутдан тушиди. С. Аҳмад, Уфқ.*

Беш панжани оғзига урмоқ (ёки **тиқмоқ**) қ. **беш 1.** - *Сенга неча марта айтдим, — ярим танасини деразадан чиқариб, укасини койиди Малик муаллим, — нафсингни тий, беш панжани оғзинга тиқма. А. Кўчимов, Ҳалқа. Панжа орасидан қарамоқ* Ишга, масалага расмиятчилик, совуққонлик, бепарволик билан қарамоқ. *Нега унинг қилмишларига панжа орасидан қарайсиз? Ш. Рашидов, Бўрондан кучли.*

3 Баъзи ҳайвон ва қушлар оёғининг уч қисми; чангал. *Айиқнинг панжаси. Бургутнинг панжаси. Ёш қўл — арслон панжаси. Мақол. ■ Қиррадор тошларга панжралари билан ёпишиб олган калтакесақлар нурсиз кўзларини бақрайтириб, тилларини чиқариб қўйишарди. «Ёшлик».*

4 кўчма Исканжа, тутқунлик; тобелик. *Бу баҳонада у бечорани ҳам золимнинг панжасидан қутқазиб, ўз севанига қўшиб олиб кетурмиз. Ҳамза, Паранжи сирлари. Ўнлаб қишлоқни ўз панжасида ушлаб турган Саид Жалолхон эшоннинг панд-насиҳатлари кучлилик қиларди. С. Аҳмад, Ҳукм.*

ПАНЖА II Панжа кўринишидаги шакллари бўлган билагузук тури.

ПАНЖАРА [ф. پنجره — дераза; панжара] Орасини очиқ қилиб, ёнма-ён бирлаштирилган сим, таёқ, темир, сопол, ганч ёки тахтачалардан тайёрланган ёхуд ўйиб ясалган тўсиқ. *Темир панжара. Дераза панжараси. ■ Аммо Анвар ҳамон сўри панжарасига тирсагини тирагани.. оёқларини чалиштириб, хотиржам турарди. Ў. Ҳошимов, Қалбингга қулоқ сол. Ҳозир ўша девор ўрнида тароққа ўхшаган чиройли панжара кўндиришибди. С. Аҳмад, Сайланма. Пишиқ гиштдан болохонадор қилиб солинган каттакон уй.. деразаларига темир панжаралар тўсилган эди. Ў. Ҳошимов, Қалбингга қулоқ сол.*

ПАНЖАРАГУЛЧИН [панжара + ф. گلچين — гул терувчи, узувчи; танланган, сараланган] Ўйма панжаралар билан безатилган; жимжимадор, серҳашам. *Панжарагулчин темир дарвоза икки томонга қулочини ёзиб, тарвақайлаб очилди. «Муштум». -Хўп, омонат кассадаги пулдан жиндак олинг, ғалати*

панжарагулчин тахта девор қилдириб берман, — деди [Ҳамдам]. Уйғун, Асарлар.

ПАНЖАРАДОР [ф. پنجرهدار — панжараси бор] айн. **панжарали.** *Баланд қад кўтарган минора ва қуббалар, панжарадор чиройли болохоналар унинг кўз олдидан бирма-бир ўтаверди. П. Турсун, Ўқитувчи. Қарчиғайни Мирёқубга топширгач, панжарадор айвонга чиқди. Мирмуҳсин, Қахрамоннома.*

ПАНЖАРАЛИ Панжараси бўлган, панжара ўрнатилган, панжара билан тўсилган. *Панжарали дераза. ■ Парк ёпилишига яқин иккови қўл ушлашиб, яшил панжарали дарвозадан шод-хуррам чиқиб кетишди. П. Қодиров, Уч илдиз. Кираверишда, ўнг томонда ташқаридагидек панжарали зина ҳовли бўйлаб тушган иккинчи болохона айвонига олиб чиқади. С. Кароматов, Сўнгги бархан.*

ПАНЖАРАСОЗ [ф. پنجره‌ساز — панжара ясовчи] Панжара ясовчи уста.

ПАНЖАРАСОЗЛИК Панжара ясаш билан шуғулланувчи тармоқ. *Ўзбек халқ амалий санъатининг кенг тарқалган турларидан бири панжарасозлик ҳисобланади. Газетадан.*

ПАНЖШАНБА [ф. پنج شنبه — бешинчи шанба] кт. айн. **пайшанба.** *Баҳор айёми, бир панжшанба куни Мир Алишер мавлоно Абдурахмон Жомий билан Гозургоҳдин хиёбон сари борур эркалар. М. Осим, Сеҳрли сўз.*

ПАНЖШАНБАЛИК кт. айн. **пайшанбалик.** *Анвар ўқишни давом эттирар, қорни панжшанбалик нонлар билан тўқ, уст-боши ямоқ бўлса ҳам, яланғоч эмас эди. А. Қодирий, Мехробдан чаён.*

ПАНЗООТИЯ [пан.. + юн. zoon — ҳайвон] Ҳайвонлар ўртасида юқумли касалликнинг бутун мамлакат, бир қанча мамлакат, қитъа бўйлаб жуда тез ва кенг тарқалиши.

ПАНИСЛОМИЗМ [пан.. + ислом] *сиёс.* 19-аср охирида Яқин ва Ўрта Шарқдаги мусулмон мамлакатларида вужудга келган, ислом динидаги барча халқларни ягона мусулмон давлатига бирлашишга даъват қилган диний-сиёсий оқим.

ПАНКРЕАТИТ [юн. pankreas, pankreatos — меъда ости бези + лат. itis — яллиғланиши билдирувчи қўшимча] *тиб.* Меъда ости безининг яллиғланиши.

ПАННО [фр. panneau — мато бўлаги] **1** *архит.* Девор ва шифтнинг атрофи ҳошия билан ўралган ва бўртма сурат ёки нақшлар билан безатилган қисми. *«Ўзбекистон» меҳ-*

монхонаси биноси фестиваль эмблемаси акс эттирилган жозибали панно билан безатилган. Газетадан.

2 Махсус жойларга мўлжаллаб ишланган рангтаасвир асари ёки бўртма тасвир. *Хиёбонга Ватан ботиқларининг қаҳрамонликлари ёзилган лавҳалар, паннолар, суратлар қўйилади. Назармат, Жўрлар баланд сайрайди. Қадим қалъа деворига ёпиштириб ишланган паннода Хоразмнинг узоқ ўтмиши ва бугуни ранг-баранг кошинлар жилосида ўз аксини топган.* Газетадан.

ПАНО [ф. پناه — бошпана; ҳимоя] с.т. айн. **паноҳ**. Тақдирнинг балоси кўп, сақласа — наноси кўп. Мақол. ■ Парвардигор пано-дир, ҳолин билган донодир, Гўрўглидин дуо олиб, Ҳасан полвон жўнади. Эргаш Жуманбулбул ўғли.

ПАНОРАМА [пан.. + юн. panorama — кўри-ниш] **1** Бирор жойнинг узоқ уфққа қадар кўриниб турадиган теварак-атроф манзараси. — *Бу ердан ҳамма ёқ яққол кўринади, — деди у [Комилжон], йироқ-йироқларга қулоч ёйган қурилиш панорамасини кўрсатиб.* Ж. Абдуллахонов, Тонг ёришган соҳилда. *Кечқурун дарёдан қараганда, шаҳарнинг гўзал панорамаси чирой кўрсатади.* Т. Жўраев, Улуғ Хитойда.

2 Тасвирий санъат тури; айлана шаклли зал деворига горизонтал қошлаб ишланган, томошабинга ҳақиқий манзарадай кўринадиган жуда катта сурат. *Севастополь панорамаси.*

3 ҳарб. Тўп, замбарак каби отиш қуролларида: аниқ мўлжалга олиш учун хизмат қиладиган оптик бурчак ўлчагич асбоб.

Панорама(ли) кинотеатр Панорама фильмларни намоиш этишга мўлжалланган кинотеатр. **Панорама фильм** Катта ярим доира экранларда ёки томошабинлар чор атрофини ўраб оладиган экранларда намоиш этишга мўлжалланган, махсус аппаратларда суратга олинган ва кўрсатиладиган фильм. *Панорама фильми кўрмоқ.*

ПАНОҲ [ф. پناه — бошпана; ҳимоя, ҳомийлик; муҳофаза] **1** Сақлаш, асраш, ҳимоя қилиш қобилияти ёки қудратига эга бўлган кимса, нарса; ҳимоя; ҳомий. *Иссиқдан паноҳ топмоқ.* ■ *Бошига оғир кунлар келганда, Хўжанд аҳли яна шу эски қалъага паноҳ излаб келди.* М. Осим, Карвон йўлларида. *Паноҳ бўлди бизга бу ўрмон, Кўплар*

биздай асрар бунда жон. Х. Салоҳ, Излар ва ҳислар.

2 кўча Ҳимоя, ҳомийлик. *Мулла Фазлиддин Қувата турган пайтларида Тоҳирга хат-савод ўргатган эди. Энди жияни паноҳ истаб борса, қаноти тагига олиши мумкин.* П. Қодиров, Юлдузли тунлар. *Зайнаб қолди бечора якка, Кимса келмас унга кўмакка, На бир паноҳ, на бир ошиён, На бир гамхўр, на бир меҳрибон.* Ҳ. Олимжон, Зайнаб ва Омон. *Барча улуғларга ялиндим, ёлвордим, йиғладим, сиқтадим. Мана энди охирида сизнинг паноҳингизга келдим.* Ж. Шарипов, Хоразм.

3 кўча Ҳимоячи, яқин киши, дўст. *Йигитлар мактубин битганда қондан, Келинлар фироқдан чекканда ёҳу, Унинг ҳам паноҳи қайтмади жангдан. Ўн тўққиз ёшида бева қолди у.* А. Орипов, Йиллар армони. *Баҳор, қатра ёшим айлағил қабул, Онам бошига ҳам бординемикан, айт?! Унинг оромгоҳи бундан олис жой, Олисида ётибди менинг паноҳим.* А. Орипов, Йиллар армони.

Паноҳ тортмоқ Ҳимоясига суянмоқ. *Ҳеч бўлмаса, бирон ишга жойлаб қўйинг. Мен сизга паноҳ тортиб келдим.* С. Зуннунова, Гулхан. **Пушти паноҳ** Энг ишончли ҳимоячи, ҳомий. — *Эй, ҳикмат аҳлининг пушти паноҳи, — деб гап бошлади Ибн Сино таъзим қилиб.* М. Осим, Ибн Сино қиссаси. *Лекин бу амалдорлар телефонни мўлжалга олиб, оёқяланг югуриб қолардилар, ўз пушти паноҳларига қўнғиркоқ қилишарди.* Газетадан. *Унинг мақтаб тилга оладиган бирдан-бир пушти паноҳи шу Турсунхўжабой эди.* П. Турсун, Ўқитувчи.

ПАНОҲҚОР Ҳимоя, паноҳ бўла олувчи. *У одам Жаҳонгирни паноҳқордай билиб қолган эди.* «Шарқ юлдузи».

ПАНОҲСИЗ Ҳимоясиз, ҳимоячисиз, ҳомийсиз. *Ҳеч қандай паноҳсиз қолган Зайнаб очик-сочик юришдан жуда хавотирланар ва бир илож қилиб, ўз бошимни беркитиб олсам, деб ўйлар эди.* Ҳ. Олимжон, Танланган асарлар.

ПАНСИОН [фр. pension < лот. pensio — тўлов, бадал] **1** Баъзи чет мамлакатларда аристократ болалар учун очилган махсус (ётоқхонали) хусусий ёки давлат ўқув-тарбия муассасаси.

2 Айрим мамлакатларда: истиқомат қилувчиларни барча нарса, жумладан, озиқ-овқат билан таъминлайдиган меҳмонхона.

ПАНСИОНАТ [фр. pensionnat] Истиқомат қилувчиларни барча зарурий шарт-шароитлар (озик-овқат, ётоқ, автомашина учун жой) билан тўла таъминлайдиган меҳмонхона, санаторий, дам олиш уйи. - *Олдиндан оққан сувнинг қадри йўқ, деб шуни айтадилар-да. Қани энди, ташкилотларимиз шу тоғлар орасига пансионатлар қуришса. С. Аҳмад, Жимжитлик. Жиззах қариялар пансионати таширф буюрувчиларга беминнат хизмат кўрсатмоқда.* Газетадан.

ПАНТЕИЗМ [пан.. + юн. theos — худо] дин. флс. Худо табиат билан бир нарса, улар бир бутунни ташкил қилади, деб қарайдиган диний-фалсафий таълимот. *Пантеизм ва деизм ўрта аср шароитида илғор фалсафий ғояларни олға суришнинг энг муҳим шакли эди.* «Гулистон».

ПАНТЕИСТ Пантеизм тарафдори.

ПАНТЕИСТИК Пантеизм ва пантеистга оид. *..бу бир қирраси билан худога интилиш — пантеистик ғояларга йўл очган.* «Фан ва турмуш».

ПАНТЕОН [юн. pantheon — барча худолар макони] **1** тар. Қадимги Римдаги «барча худолар ибодатхонаси» — ярим доира шаклидаги қиррадор гумбазли иншоот.

2 Буюк, машҳур кишилар дафн этилган ёки уларнинг жасаdlари сақланадиган маҳобатли бино.

ПАНТОМИМА [юн. pantomimos — барча нарсани тақлид билан ифодаловчи] Кишининг кечинмаси, фикрлари, ҳаёт лавҳалари, инсон характерлари фақат тана ҳаракати, мимика ва имо-ишоралар билан ифода этиладиган сўзсиз театр томошаси.

ПАНТОМИМИК Пантомимага оид. *Пантомимик томоша. Пантомимик ҳаракат.*

ПАНТУРКИЗМ [пан.. + туркий] тар. Туркий халқларни бирлаштириш ғоясини илгари сурган оқим. *Халқимиз тарихан туркий халқлар оиласига мансуб бўлишига қарамай, пантуркизмни ва «Буюк Турон» шовинистик ғоясини қатъиян рад этди.* Газетадан.

ПАНТУРКИСТ Пантуркизм тарафдори.

ПАНШАХА [ф. پنج شاخه — беш шоҳли] Одатда бешта эгри санчиғи бўлган, пахта, хашак кабиларни олиш, суриш учун ишлатиладиган узун сопли асбоб. *Оппоқ соқолли чол қўлидаги пахта ағдариб турган паншахасини бош узра кўтариб, бир-икки силкиди.* С. Абдуқаҳҳор, Олтин водийларни

кезганда. *Сўнг қўлидаги паншахани гўнгтепа четига санчиб, уйга томон ошиқди.* «Шарқ юлдузи».

Қўлини паншаха қилмоқ Қўлни тингловчи томон чўзиб, бармоқларини кериб, дағдага қилмоқ. *Қори қўлини паншаха қилиб, ўзини оқлай бошлади.* П. Турсун, Ўқитувчи.

ПАПА I: папа қилмоқ бол. Яширмоқ, бекитмоқ. *Коптокни папа қил.*

ПАПА II [лот. papa < юн. pappas — ота] Католик черкови ва Ватикан давлатининг раҳбари. *Рим папаси.*

ПАПАЛАМОҚ с.т. Паҳпаҳламоқ, ардоқламоқ, авайламоқ, эҳтиёт қилмоқ. *Бевалигига қарамай, папалаб ўстираётган тўнғич қизининг дарди Солия опани гангитиб қўйган эди.* А. Муҳиддин, Ҳ. Тожибоев, Оташ қалбли қиз. [Кампир:] *Барака топсин, худди ўз боласидек папалаб қараяпти-я.* Газетадан.

ПАПАХ Мўйнаси сиртга қилиб тикилган чўзинчоқ телпак. *Туркманча папах.* ■ *Бошига қоракўл папах кийган бир турк офицери нима ҳақидадир қизишиб гапирмоқда.* С. Аҳмад, Хукм. У [қулжаллоб] *чўмичдай бурнини жийриб, бошидаги катта папахини тўғрилаб қўйди.* М. Осим, Карвон йўлларида.

ПАПАҚ қ. попоқ.

ПАПИРОС [нем. Papier < лот. papyrus < юн. papyros — қоғоз] Чекиш учун ичига тамаки тикилган қоғоз найча. *Папирос чекмоқ.* ■ *Чекканда ҳам қошки дурустроқ папирос чекса.* С. Аҳмад, Юлдуз. *Бир ҳафтагача ҳамма нарсадан папирос ҳиди келиб туради.* К. Қаҳҳорова, Чорак аср ҳамнафас.

ПАПИРУС [лот. papyrus < юн. papyros — қоғоз] **1** Тропик ва субтропик мамлакатларда ўсадиган қамишсимон кўп йиллик ўсимлик.

2 Қадимги мисрликлар ва бошқа халқлар томонидан шу ўсимлик пояси тилимларини елимлаб ёпиштириб, ўрама шаклида тайёрланган, қоғоз ўрнида фойдаланилган материал. *Рассомларнинг асарлари, папирус ва терига битилган йилномалар сил касали, ўпка касали каби дардлар тўғрисидаги маълумотларни етказиб келган.* «Фан ва турмуш».

3 Шундай материалга ёзилган қадимги матн. *Миср папирусларини ўрганиш.*

ПАПКА [нем. Papp — картон] Қоғоз, хат-хужжатлар солиб қўйиладиган, картон, чарм ва ш. к. дан ясалган жилд ёки муқова.

Умид ғаладон ичидаги қора чарм папкасини олди. Унинг боядан бери нима бўлаётганига ҳеч ақли бовар қилмас эди. Мирмуҳсин, Умид. У учинчи папкани жаҳл билан суриб қўйди. С. Кароматов, Олтин қум.

ПАПОРОТНИК [р. папороть — қанот, пат < юн. ртегон — қанот] Гулсиз, спорали, йирик баргли ўсимлик.

ПАР I [ф. پاز — пат; қанот; япроқ] **1** от Парранда танасини қоплаб турадиган юмшоқ ва нафис пат. *Товуқнинг пари.* ■ *Яйраб ҳаволарда бир қуш учади.. Чарчаркан, симларни секин қучади, Юмшоқ парлар билан ёпиб юзини.* Ҳ. Олимжон.

2 сфт. Ичида пари бўлган, пар солинган. *Пар ёстиқ. Пар тўшак.* ■ *Кенг тахта қаработ. Устига чойшаб ёпилиб, катта пар ёстиқ қўйилган. Деразага оқ шоҳи парда тутилган.* С. Нуоров, Нарвон. *Чўтир хола уни гапга тутмай, пар ёстиқ билан янги атлас кўрпани тахмондан олди, Умид устига ташлади.* Мирмуҳсин, Умид.

3 кўчма айн. **паға 2.** *Ёш бургут учмоқда кўкда шиддаткор, Кумуш булутларнинг тўзғитиб парин.* А. Орипов, Йиллар армони. *Пар булутлар, марварид қорлар Юксак чўққи узра қўйган бош.* А. Орипов, Йиллар армони.

ПАР II [р. пара < нем. Рааг < лот. раг — бир хил; тенг] **1** айн. **жуфт 3.** *Бир пар этик.* ■ *Кечқурун.. пар отли извош кўчанени бошида тўхтаб, ундан терговчи тушди.* А. Қаҳҳор, Сароб. *Уйда оёқ кийими бир неча пар: чувак, маҳси, сандал, калиш, туфлилар.* Ф. Фулом.

2 Бирга ишлатиладиган иккита бир хил нарсанинг бири, биттаси. *Пари йўқ пайпоқ.*

3 Ўз хислатлари билан бир-бирига мос, тенг икки кишининг бири. *Бу йигит сенга пар эмас.* ■ *Қизим бор эди якка, исми Қамар, Оз эрди ҳусн бобида унга пар.* С. Абдулла, Тоҳир ва Зуҳра. *Таърифу тавсифингиз қилсам агар, афандим, Баджаҳллик бобида йўқ сизга пар, афандим.* «Гулдаста».

ПАР III [р. пар < лот. varog — буг; буғла-ниш; иссиқлик] **1** с.т. қ. **буғ.** *Суюқликнинг парга айланиши. Хонани пар билан иситмоқ.*

2 Қаттиқ моддаларнинг буғга айланган ҳолати. *Камфара пари. Симоб пари.*

ПАРА [р. пара < нем. Рааг < лот. раг — бир хил; тенг] с.т. Иккита 45 минутдан иборат 90 минутли ёки иккита 40 минутдан иборат 80 минутли дарс соати. *Бир пара*

қолиб кетсанг, бир ҳафта ўзингга қийин бўлади. Т. Ашуров, Оқ от. — *Бизда ҳозир гистология, бир пара ўқиб чиқаман, сен кўчада кутиб тур, хўпми, Мурод, — деди қиз атрофга олазarak боқиб.* Т. Ашуров, Оқ от.

ПАРА- [юн. пара — ёнида, яқинида; ташқари(да)] тлш. Байналмилал ўзлашма кўшма сўзларнинг биринчи қисми: «бирор нарсанинг яқинида ёки ундан четлашиш, узоқлашиш; ўзгариш» каби маъноларни билдиради (мас., *парамагнетизм*).

ПАРАБОЛА I [юн. parabole — чоғиштириш; ёнма-ён жойлаш(тир)иш; рамзли ҳикоя] мат. Очиқ, ясси эгри чизиқ; тўғри конуснинг унинг ясовчиларидан бирига параллел текислик билан кесишишидан ҳосил бўлади.

ПАРАБОЛА II Бадиий адабиётда рамзга мойил киноявий образ; рамз ва рамзий ҳикоя ўртасидаги адабий тур.

ПАРАБОЛИК мат. Парабола шаклига эга бўлган; парабола шаклидаги. *Параболик орбита. Параболик антенна.* ■ *..уй томида параболик антеннанинг улкан косаси ялтираб турибди.* А. Ибодинов, «Латофат» дўқонидаги қатл.

ПАРАВУЗ шв. айн. адип. *Чопоннинг паравузи.*

ПАРАГРАФ [юн. paragrapbos — ёнма-ён, яқин ёзилган] Китоб, мақола каби матнларнинг маъно жиҳатидан мустақилликка эга бўлган, одатда § белгиси орқали ёки тартиб сон билан кўрсатиладиган қисми; § белгисининг ўзи. *Боланинг мияси шундай мияки, чунончи.. бизнинг молия тили билан айтганда, алоҳида параграф.* А. Қаҳҳор, Асарлар.

ПАРАД [фр. parade < исп. parada — тўхташ, етиб келиш жойи < лот. paro — тайёр қиламан, тайёрлайман] **1** Қўшинларнинг жанговар тайёргарлигини текшириш мақсадида ўтказиладиган тантанали кўрик. *Мардоналик парадини бошласак агар, Қизғин қўёш бошимиздан тўқиб қолур зар.* Ф. Фулом, Танланган асарлар.

2 Спортчилар, мактаб ўқувчилари кабиларнинг тантанали юриш кўриги. [*Мирвали Эралига:*] *Қандоқки мажлис бўлса, фронтвик, деб президиумга чиқазаман. Ёдгорлик очилишида сизни эл танисин, катталар назарига тушсин, деб атайин отлар парадини ташкил қилдим.* С. Аҳмад, Жимжитлик.

ПАРАДИГМА [юн. *paradeigma* – мисол, намуна] *тлш.* 1 Тил бирликлари, грамматик шаклларнинг умумий маъносига кўра бирлашувчи, хусусий маъносига кўра фарқланувчи тизими.

2 Бирор сўзнинг турланиш ёки тусланиш шакллари тизими.

ПАРАДОКС [юн. *paradoxos* – қутилмаган, ғалати] Кўпчилик томонидан қабул этилган анъанавий фикр, тажрибага ўз мазмуни ва шакли билан кескин зид бўлган, қутилмаган фикр, мулоҳаза. *Парадокс пайдо бўлишининг асосий сабаби инсон билиш жараёнининг мураккаб диалектик характерга эгаллиги ва бунда шакл ва мазмуннинг ўзаро зиддиятли муносабатда бўлишидир.* «ЎЗМЭ».

ПАЗИТ [юн. *parasitos* – текинхўр; ҳамтовок] 1 *сфт. биол.* Бошқа организмларнинг танасида ёки ичида яшаб, унинг ҳисобига озикланувчи жонивор ёки ўсимлик. *Паразит ўсимлик. Паразит ҳайвон.*

2 *кўчма* Бошқалар меҳнати ҳисобига яшовчи: ҳаромтомок, текинхўр. *Паразит синфлар.*

3 *сўк.* Текинхўр, балохўр, ифлос. *Қаердан пайдо бўлдикин бу паразит? Ҳ. Назир, Ёнар дарё.*

ПАРАЗИТИЗМ [юн. *parasitos* – текинхўр; ҳамтовок] *биол.* Бирор паразит организмнинг бошқа организм танасида, унинг ҳисобига, унга зарар келтирган ҳолда яшаши.

ПАРАЗИТОЛОГ Паразитология мутахассиси.

ПАРАЗИТОЛОГИЯ [паразит(лар) + юн. *logos* – билим, таълимот] *биол.* Паразитлар ва паразитизм ҳодисалари ҳақидаги фан. *Паразитология илмининг хабар беришича, бир хил йилтироқ пашша бор, у баъзида бақанинг тумшугига яқин келиб, гингиллаб уча беради.* Мирмуҳсин, Умид.

ПАРАЛИЧ [юн. *paralysis* – дармон қуриши, бўшашиш] *қ.* **фалаж.**

ПАРАЛЛЕЛ [юн. *parallelos* – ёнма-ён боровчи] 1 *мат.* Бир текисликда ётган ва ҳар икки томонга давом эттирилганда ҳеч қачон ўзаро кесишмайдиган; мувозий, ёндош. *Параллел тўғри чизиқлар. Параллел текисликлар.*

2 Бир томонга қараб йўналган ва бир-биридан деярли тенг узоқликда ёнма-ён жойлашган. *Параллел кўча. Параллел жўяклар.*

3 *кўчма* Айни бир вақтда мавжуд бўлган ёки давом этадиган воқеа-ҳодиса (бир-бирига

нисбатан). *Ўқиш йилининг ярмида «А», «Б» бўлиб келган параллел синфлардан ўн олти киши териб олиниб, қолганлари бирлаштирилди. П. Турсун, Ўқитувчи. Билимдонлик билан гапонлик ҳар доим параллел юра олмайдди.* «Саодат».

4 *тлш.* Бир хилдаги, турдаги. *Бунда синтактик параллел қаторлар тўртликда мунтазамлик ва бир бутунликни юзага келтирган.* «ЎТА».

ПАРАЛЛЕЛЕПИПЕД [параллел + юн. *epipedon* – текислик] *мат.* Қарама-қарши ёқлари ўзаро параллел ва тенг параллелограммлардан иборат олти ёқли геометрик жисм.

ПАРАЛЛЕЛИЗМ [юн. *parallelos* – ёнма-ён боровчи] 1 *мат.* Тўғри чизиқларнинг текисликдаги ва текисликларнинг фазодаги ўзаро кесишмаслик хоссаси; параллеллик. *Текисликлар параллелизми. Чизиқлар параллелизми.*

2 *кўчма* Айни бир ишнинг ўзаро келишмасдан бир вақтда бажарилиши, бир-бири билан тўлиқ мос келиши, бир-бирини такрорлаши. *Ишдаги параллелизм.*

3 *тлш.* Ёнма-ён гаплар, синтагмаларнинг бир хил синтактик қурилишга эга бўлиши.

4 *ад.* Бадиий матннинг ўзаро боғлиқ қисмларидан нутқ унсурларининг ўхшаш ёки айнан бир хилда жойлашувини тақозо этувчи поэтик нутқ усулларидан ва тасвир воситаларидан бири.

ПАРАЛЛЕЛОГРАММ [параллел + юн. *gramma* – чизиқ] *мат.* Қарама-қарши томонлари тенг ва параллел тўртбурчак.

ПАРАЛЛЕЛЬ [юн. *parallelos* – ёнма-ён боровчи] 1 *мат.* Ўзаро ёндош чизиқларнинг ҳар бири. *Бирор чизиққа параллель ўтказмоқ.*

2 *геогр.* Ер юзасидан экваторга параллел ҳолда ўтказилган шартли, фаразий чизиқлардан ҳар бири. *Боку билан Тошкент бир параллелда ётади.* «География».

ПАРАМАГНЕТИЗМ [пара. + магнетизм] Ташқи магнит майдонига киритилган жисмларнинг шу майдон йўналишига мос йўналишда магнитланиш хоссаси.

ПАРАМАЧ Қиздирилган ёғда пишириладиган сомса турларидан бири.

ПАРАМЕТР [юн. *parametron* – ўлчаб ажратувчи] 1 *мат.* Математик формулада қўлланадиган ва ўзининг маълум қийматида шу тенглама билан ифодаланган муно-

сабатлардан муайян бирига олиб келадиган миқдор.

2 физ. тех. Бирор технологик жараён, ҳодиса, тизим, техник қурилма ва б. нинг асосий хусусиятларидан бирини ифодалайдиган миқдор. *Электр лампа параметрлари.* ■ *Протоплазманинг физик параметрлари унинг [ҳужайранинг] сиртида мембрана бўлиши кераклигидан далолат беради.* «Фан ва турмуш».

3 кўчма Бирор воқеа-ҳодисани тавсифлаш ва баҳолаш учун зарур бўлган белги, мезон. *Рўйхат тузувчиларнинг фикрича, университетнинг ўтган йилларда айрим параметрлар бўйича кўрсаткичлари пасайган.* Газетадан. *Янги йилга мўлжалланайтган Давлат бюджети лойиҳасининг параметри устида тўхталдилар.* Газетадан.

ПАРАМЕТРИТ [пара.. + юн. metra – бачадон + лот. itis – яллиғланишни билдирувчи кўшимча] *тиб.* Бачадон атрофидаги ёғ тўқимасининг яллиғланиши.

ПАРАНГ 1 с. т. қ. фаранг 2. *Юқоридан келаман от ўйнатиб, Қўлимда паранг милтиқ – қуён отиб, Қуёним пешонаси қашқа экан. Йигитлар, кўнгил ови бошқа экан. Т. Тўла, Асарлар. -Чинор домлага теккандан кейин паранг рўмол, шоҳи кўйлақларни кийиб, бир очилиб кетди-ей зангар! – деди Ботирали. Ш. Ризо, Қор ёғди, излар босилди.*

2 қ. фаранг 3. *Устаси паранг экансан-да! Ахир бу Гофир ҳам ҳийла-найрангни ҳўжайинидан таълим олган-да.. Бунинг муддаоси бўлак! Ҳамза, Бой ила хизматчи.*

ПАРАНЖИ [а. فرجيه – шайхларнинг ҳам ўзи, ҳам энги кенг устки кийими] *этно.* Кўпчилик мусулмон аёллар бегона эркакларга очиқ кўринмаслик учун бошга ёпиниб юрадиган, бичими кенг ва узун тўн шаклидаги, сохта энгли ёпинғич (юз чачвон билан беркитилади). – *Болаларни рўйхатга олиб келамиз, – деди Тозагул қозиқдан паранжисини олиб, бошига ёпина туриб. Ҳ. Фулом, Машғал. Зайнаб ёш, ҳали паранжи ёпинишга улгурганича йўқ эди. Ҳ. Олимжон, Зайнаб ва Омон. Бойнинг хотини аравадан тушиб, уйга кириб, паранжи-чачвонини отиб ташлаб, кўзини ёшлабди.* «Луқмони Ҳаким».

ПАРАНЖИЛИ Паранжи ёпинган ёки ёпинадиган. *Ёшлар, кексалар, паранжисиз ва паранжилли қизлар, жувонлар.. бир қайғу, бир*

алам доғини чекар эдилар. П. Турсун, Ўқитувчи.

ПАРАНЖИСИЗ Паранжи ёпинмаган ёки ёпинмайдиган, бепаранжи, очиқ. *Паранжисиз аёл.* ■ [Чол:] *Биз сизлардек чоғимизда етти-саккиз яшар қиз бола ҳам кўчага паранжисиз чиқа олмас эди-да. П. Турсун, Ўқитувчи.*

ПАРАПРОКТИТ [пара.. + юн. proktos – орқа чиқарув тешиги, йўли + лот. itis – яллиғланишни билдирувчи кўшимча] *тиб.* Орқа чиқарув тешиги ва тўғри ичак атрофидаги тўқималарнинг яллиғланиши.

ПАРАТИФ [пара.. + ва юн. typhos – оннинг хиралашиши, эснинг пасайиши] *тиб.* Ич терлама касаллигига ўхшаш, турли бактериялар таъсирида келиб чиқадиган оғир юқумли касаллик.

ПАРАФИН [нем. Paraffin < лот. parum – оз, sal + affinis – яқин, ўхшаш; кўпчилик реактивларга нейтраллиги сабабли шундай аталган] Нефтдан олинадиган, қаттиқ углеводородлар аралашмасидан иборат оқиш, баъзан сарғиш мумсимон модда. *Парафин билан даволаш. Парафин шам.* ■ *Сунбий совуқ парафин синтетик бўёқлар тайёрлашда иш беради, резина санюатида ҳам ишлатилади.* «Фан ва турмуш».

ПАРАШЮТ [фр. parachute < parer – олдини олмоқ, ҳимояланмоқ + chute – тушиш, йиқилиш] Учиш аппаратларидан сакраш ва юк тушириш учун белгиланган, ҳавода соябонсимон очилиб кетадиган, пишиқ тўқимадан ясалган мослама. *Парашют билан сакрамоқ. Парашютда тушмоқ. Парашютда озиқ-овқат ташламоқ.* ■ *Шу кунгача парашют билан йигирма икки марта сакради. С. Аҳмад, Юлдуз.*

ПАРАШЮТИЗМ Учиш аппаратларидан парашютда сакраш санъати ва спорти, парашютдан фойдаланиш қоидалари ҳамда амалиёти.

ПАРАШЮТЧИ Парашют билан учиш аппаратларидан сакрайдиган, парашют спорти билан шуғулланадиган киши. *Парашютчилар спорти.* ■ [Алижон] *Парашютчилар секцияси ташкил қилингандан бери эртаю кеч аэродромда, ёшларни самолётдан сакратгани-сакратган. Ҳ. Фулом, Тошкентликлар.*

ПАРАШЮТЧИЛИК айн. парашютизм.

ПАРВАРДА [ф. پرورده – керагида фойдаланиш учун тайёрланган; маринадланган] Олий нав буддой уни, ўсимлик ёғи ва қиёмдан тайёрланадиган маҳаллий ширинлик. *Зухра кўнмасдан, дастурхонга ликопчада пашмак, парварда, новот олиб кўйди.* С. Зуннунова, Олов. *Баширжон газетани очиб, парварда, шоколад, шўрданак ва қора майиз аралаштирилган қурама ширинликлардан битта парвардани олиб, оғзига солди.* Н. Аминов, Қаҳқаҳа.

ПАРВАРДИГОР [ф. پروردگار – яратувчи, халлоқ; ризқ берувчи; худо] дин. Борлиқни яратувчи; оллоҳ, худо. *Парвардигори олам.* ■ *Ахир, айбисиз бир парвардигор, дейдилар.* Сизнинг ҳам ишингиз тушиб қолар. С. Зуннунова, Олов. *Эй парвардигор, мен сендан фойдасиз илм, қабулсиз амал, ижобатсиз дуодан паноҳ тилайман.* «Фан ва турмуш». *Муштипарман, мен йиғлайман зор-зор, Бандам, десин яратган парвардигор.* «Нурали».

ПАРВАРИШ [ф. پرورش – боқиш, едириш; озиклантириш; тарбия] 1 Асраш, ўстириш, вояга етказиш учун қилинадиган ҳаракат. *Ғўза парвариши.* *Дарахтдан мева оламан десанг, ниҳолни парвариш қил.* Мақол. ■ *Сифатли парвариш – ерга оройиш.* «Қанотли сўзлар».

2 Тарбиялаш, вояга етказиш, боқиш каби мақсадда қилинадиган ҳаракат; қаров, боқув, тарбия. *Чақалоқ эса она ҳидига, унинг парваришига, кўкрак сутига муҳтож эди.* Газетадан. *Кампирнинг гаплари менга кулгили туюлса ҳам, ҳурмат юзасидан ҳамда болага яхши парвариш қилиш зарурлиги важдан бир нима демасдан, унга тасалло берар эдим.* Ғ. Фулом, Ёдгор.

ПАРВАРИШЛАМОҚ Парвариш қилмоқ, қарамоқ; боқмоқ, тарбиялаб ўстирмоқ, ундирмоқ, вояга етказмоқ, оёққа қўймоқ. *Боғни парваришламоқ.* *Беморни парваришламоқ.* ■ *Бу камбағал бобо мардикор ишлаб, болаларини ўқитиб, парваришлаб юрар экан.* М. Маҳмудов, Булбулигўё. *Ўз уйидай бўлиб қолган бу хонадондан оёғи узилмаётган Мели, Энани худди энди атакчечак қила бошлаган гўдакдай парваришларди.* «Ёшлик».

ПАРВАРИШСИЗ Парвариши йўқ, қаровсиз. *Парваришсиз дарахт.* *Ипак қурти бир кун ҳам парваришсиз қолмасин.* ■ *Французлар дунёда хунук аёллар йўқ, фақат ўзи-*

га оро бермаган, парваришсиз аёлларгина бор, деб ҳисоблашади. «Саодат».

ПАРВИН [ф. پروين – Савр юлдузлар туркуми] (П – катта) астр. Савр юлдузлар туркумидаги етти юлдуз.

ПАРВО [ф. پروا – ғамхўрлик; парвариш (тарбия) қилиш; ҳимоя (қилиш)] Кимса ёки нарасага бўлган диққат-эътибор, қизиқиш, назар-писанд, назарга олиш. [Ойхон:] *Мен сени суйдим, ўзгасига не парвойим бўлмай!* Ҳамза, Майсаранинг иши.

Парво қилмоқ ёки парвойига келтирмоқ Диққат-эътибор бермоқ, диққат-эътибор билан қарамоқ, назар-писанд қилмоқ. *Анвар бўлса ундан тескари бурилиб кетадиган бўлиб қолди.* *Аммо Алимардон парво ҳам қилмасди.* Ў. Ҳошимов, Қалбингга қулоқ сол. *Шу масалада бошингизни тошга уриб гапиринг – парвойига келтирмайди.* Ойдин, Икки кўзи шунда. **Парвойи фалак (ёки палак) қ. фалак.** *Овқат еб, каравотга чўзилган Қудратжон парвойи фалак, хириллаб ухлаб қолди.* *Мирмуҳсин, Умид. У эса парвойи палак – қуёш ботишини кутиб, уйда ўтирди.* Т. Малик, Шайтанат.

ПАРВОЗ [ф. پرواز – учиш, учиб бориш] 1 Осмонга кўтарилиш, учиш. *Қушларнинг парвози, елларнинг нози, Бахмал водийларда, қирларда баҳор..* «Саодат». *Бошларидан учар оқ тўш қалдиғоч, Парвоз қилармиди, бўлмаса қанот?* Шукрулло.

Парвоз қилмоқ (ёки этмоқ) кўчма Ёйилмоқ, тарқамоқ, таралмоқ. *Янги орзу, янги умидлар қанот ёзиб парвоз қиларди.* Н. Сафаров, Оловли излар. *Ёнғоқзор боғ устида ҳар саҳар унинг янғроқ, дилбар овози парвоз этар, у кўшиқ бошлаганида, табиатнинг ўзи ҳам тан бериб, қулоқ солгандай бўларди..* Ў. Ҳошимов, Қалбингга қулоқ сол.

ПАРВОНА I [ф. پروانه – тунги капалак] 1 Шуъла ёки чироқ атрофида айланувчи тун капалаги. *Токчадаги бешинчи чироқ пириллаб ёнар, унинг атрофида катта бир парвона айланар эди.* А. Қаҳҳор, Анор. *Дилшод кечқурун чироқ атрофини ўраб оладиган парвоналарга ҳам ҳайрон бўлиб боқарди.* С. Зуннунова, Гўдак ҳиди.

2 кўчма Мехрибонлик, меҳр-муҳаббат, парвариш каби муносабатлар мажмуи. *Сени деб жанг қилар йигитларимиз, Сени деб парвона аёллар бунда.* Уйғун, Тонг кўшиғи. *Кун кеча эмасми, хислатинг санаб, Шезъ*

ёзиб юрардим, сенга парвона. А. Орипов, Юртим шамоли.

Парвона (*ёки гирдикапалак*) бўлмоқ Меҳрибонлик ёки хушомадгўйлик билан атрофида айланмоқ. *Ҳамза анча юмшади, уйга томон йўл олишди. Зулфизар эрининг атрофида парвона бўлиб, тагига кўрпача ташлаб, ёнбошига ёстиқ қўйди. К. Яшин, Ҳамза. Бугун атрофида парвона бўлаётган қадрдон жигарларига айтгулик бирон гапи йўқми? С. Аҳмад, Жимжитлик.*

ПАРВОНА II [ф. پروانه — шоҳ фармони, буйруғи] *тар.* Амир, хон фармони, ёрлиғи.

ПАРВОНАЧИ *тар.* Хонликлар даврида: хукмдор фармони ва буйруқларини битувчи котиб; олий даражадаги сарой мансабдорларидан бири. *Шунинг билан Азиз парвоначининг истиқболига лозим ва вожиб бўлган барча тартиб ва тантананага ҳозирланган бўлинди. А. Қодирий, Ўтган кунлар. У [соқчи] қорабайир отини Минор ортидаги карвонсаройда қолдириб, тор кўча билан Абдулқалом парвоначининг ҳовлисига йўл олди. Ш. Холмирзаев, Қил кўприк.*

ПАРВОСИЗ *айн. бепарво. Парвосиз одам.* ■ Алимардон унинг қўлини парвосизгина қисаркан, яна кинояли бир хаёл кўнглига шарна солиб ўтди. Ў. Ҳошимов, Қалбингга кулоқ сол. Султонани кўрғон остидаги йиғитларга кўз қирини ташлаб, уларни ўзидан парвосиз топди. А. Қодирий, Меҳробдан чаён.

Парвосиз қарамоқ Дикқат-эътибор, аҳамият бермай, бепарволик, аҳамиятсизлик билан қарамоқ. *Онахон бу гапга парвосиз қаради, қайтага чехраси очилди. А. Мухтор, Опа-сингиллар.*

ПАРВОСИЗЛИК *айн. бепарволик. Ишга парвосизлик ҳам эви билан-да.*

ПАРГАР, паргор [ф. پرگار — циркуль; доира, тўгарақ] **I** *эск. айн. циркуль. Унинг [меъморнинг] чизгичу паргар ва бошқа асбоблари кўп йиллардан буён тутиллар, аммо қамиши қалам чидамас, тез-тез бозордан унун беиталаб олиб келиб қўйиларди. Мирмуҳсин, Меъмор. Қўлингга паргор олиб, доира чиз-да, уни тўртга бўл. М. Осим, Карвон йўллари.*

2 *кўчма* Атрофида айланувчи, айлана ҳосил қилувчи. *Паргор бўлуб гавҳари дарёи муҳаббат, Бир нуқтага жон гавҳарини боғлаганинг хўб. Машраб, Девон. Қанча хатлардан муаммо битта чанбардир бу йўл,*

Худди паргар айланурсан муттасил кетмак билан. Ф. Фулом.

ПАРГАРИ Паргар ёрдамида нақш яратиш усули ҳамда шу усулда яратилган нақш.

ПАРДА I [ф. پرده — дарпарда, эшик ёки дераза пардаси; ёпинчиқ; товуш, оҳанг, нога] **1** Хонани қуёш нури, шамол ва ҳоказолардан тўсиш ёки безак учун дераза, эшик ва ш.к. га тутиладиган газлама, мато. *Эшик пардаси. Духоба парда. Чий парда. Чимилдиқ пардаси. Парда тутмоқ. Пардани очмоқ.* ■ *Анвармурод кенг деразаларнинг шоҳи пардаларини кўтарди. Ойбек, Нур қидириб. Ходимларга хоналарни берухсат тарк этиш, эшик ва деразаларни очиш ман этилди. Деразаларга қалин парда ва қора қоғозлар тутилди. «Ёшлик». Чимилдиқ пардаси туширилиб, иккови ёлғиз қолгач, қиз унинг пинжиге сурилади. С. Нуров, Майсаларни аёз урмайди.*

2 *кўчма* Борлиқни кўздан беркитиб, тўсиб турган нарса, мас. қоронғилик, туман, булут, кўз ёши. *Чимён тоғининг чўққилари парда орасида тургандек, хирагина туман ичра кўзга ташланади. Мирмуҳсин, Умид. Ана, кўкка туташган чўққиларни палахса-палахса булутлар қоплаб, бутун олам кулранг пардага ўралгандай бўлди. Ҳ. Назир, Сўнмас чақмоқлар. -Уятсиз! — У кўз ўнгини тўсган ёш пардасидан ҳеч нимани кўролмай, тусмоллаб, стол ёнига борди. Ў. Ҳошимов, Қалбингга кулоқ сол.*

3 *с.т.* Экран, кино экрани.

4 *анат.* Организмда айрим аъзоларни қоплаб, ўраб ёки бир-биридан ажратиб турадиган юпка тўқима. *Ўпка пардаси. Ўрдакнинг панжасидаги сузиш пардаси. Юрак пардалари. Кулоқ пардаси.* ■ *Ёшигина йиғит барвақт оламдан ўтди. Ичкилик туфайли унинг ўпка пардаларини зардоб ўраб, сил хасталигига дучор этди. Газетадан.*

5 Саҳна асарининг ёхуд фильмнинг мустақил воқеликдан иборат тугал бир қисми. *Пьесанинг учинчи парда олтинчи кўриниши. «Шоҳи сўзана» пьесаси тўрт пардадан иборат.* ■ *Драманинг биринчи пардаси бошланди. С. Аҳмад, Сайланма.*

6 Театрда томоша бошлангунга қадар саҳнага илинган мато. *У саҳна чеккасига суриб қўйилган парда олдига борганда, концерт қизиб кетган эди. Ў. Ҳошимов, Қалбингга кулоқ сол. Парда очилгандан то томоша*

тугагунча зал кулидан ларзага тушиди. С. Аҳмад, Юлдуз.

7 кўчма Бирор ҳолатни яшириш воситаси, тўсиб турувчи ниқоб. *Дин илм-фан юзига парда тортмайди.* «Қанотли сўзлар». *Нусратбекнинг юзларидаги шунча йиллар ниқоб бўлиб келган зиёлинамо юмшоқлик пардаси йиртилиб, жағ пайлари, ёноқлари қизариб бўртди.* С. Нуров, Майсаларни аёз урмайди. *..баъзан кимгадир яхши кўриниш илн-жида виждоннинг кўзини нафс пардаси билан пана қилади.* «Ёшлик». *Яна бир нарсани айтиб кўяй: эр-хотин ўртасида парда бўлиши шарт.* «Ёшлик».

8 айн. **товуш пайчалари.** қ. пайча. *Мен сени куйламоқ истайман. Аммо шундай куйла-самки, йиртилиб кетса овоз пардаларим.* А. Орипов, Йиллар армони.

9 Парда (эркаklar исми).

ПАРДА II мус. 1 Торли чолғу асбоблари дастасини бўгинларга ажратувчи тўсиқлар. *Ўткинчи бир мусофир Тор қоронғу ҳужрада Ўқирди янги дoston, Ўйнаб қўли пардада.* Ғайратий. *Шодлик куйчисисан, бахт булбулсан, Айни авж пардада жаранлар созинг.* Уйғун.

2 Шарқ мусиқа назариясида: муайян баландликдаги товуш. *У ҳамма вақт бошқа кўшиқларга қараганда бир-икки парда баландда юради.* С. Аҳмад, Юлдуз. *Турсуной кўшиқлари, нафис овози қалбнинг интим ҳиссиётларига монанд, куй пардаларига уйғун.* «Саодат».

ПАРДАВОР кам қўл. Пардаланган, пардали; яширин, сирли. *Қандайдир ўзга мақсадлари борлиги ҳақида жуда туманли, пардавор қилиб мингиллади.* Ойбек, Навоий.

ПАРДАЛАМОҚ I кам қўл. Парда билан тўсмоқ, парда тутмоқ. *Деразани пардаламоқ.*

2 кўчма Очиқ-ойдин ифодаланмай, шама ёки қочирим билан айтмоқ, ниқобламоқ. *Мен кўкламда Сумбула билан бўлган воқеани, бир оз пардалаб бўлса ҳам, сўзладим.* Ойдин, Икки кўзи шунда.

ПАРДАЛИ I 1 Парда тутилган, парда билан тўсилган, ажратилган. *[Ҳамдамформа] Ҳовлининг орқасига ўтиб, ёвонга қараб очиладиган оқ пардали бир деразани тирноғининг орқаси билан бир-икки чертди.* С. Айний, Қуллар. *Олимжон сартарош уста Фанининг дока пардали деразасини чертди.* Н. Аминов, Қаҳқаҳа.

2 Органик пардага эга бўлган, парда билан қопланган. *Ўрдакнинг пардали панжаси.*

3 кўчма Мустақил пардалардан, қисмлардан иборат бўлган. *Тўрт пардали саҳна асари.* ■ *Кунларнинг бирида Хуршид ўзининг «Эски одат қурбони» номли бир пардали пьесасини ўқиди.* Ф. Жўраев, Обид Жалилов.

4 кўчма Очиқ-ойдин ифодаланмай, шама, қочирим билан айтилган, яширинган, ниқобланган, ниқобли. *Пардали қилиб гапирмоқ.* ■ *Бошим шишган. Сенинг бу пардали гапларингдан ҳеч нарса тушунолмаётирман.* С. Айний, Дохунда. *[Хусайн Бойқаро] Баъзи яқинларидан пардали шикоят қилди.* Ойбек, Навоий.

ПАРДАЛИ II мус. Тovuш ноталарини белгилловчи бўғимларга эга бўлган, парда боғланган (торли чолғу асбоблари ҳақида). *Пардали чолғу асбоби.*

ПАРДАСИЗ I 1 Парда тутилмаган, пардаси йўқ. *Пардасиз дераза.*

2 кўчма Очиқ-ойдин айтилган; ниқобланмаган, дағал, қўпол. *Пардасиз гап.* *Пардасиз гапирмоқ.* ■ *-Худо кўтарсин бу расм-русмларини. - Ҳадянинг ғашни келди. - Оламга пардасиз нигоҳ ташлашга ҳали ҳақинг йўқ.* Ш. Тошматов, Эрк қуши.

ПАРДАСИЗ II мус. Пардаси йўқ, парда боғланмаган. *Пардасиз чолғу асбоби.*

ПАРДЕВОР [ф. پردیوار — пардай, қанотдай юпқа девор] шв. Бир қатор ғишт терилган ёки синчли юпқа девор. *Пардевор билан ажратилган уй.*

2 Бино устидаги тўсинлар оралиғига қўйиладиган ярим паҳса лой.

ПАРДОЗ [ф. پردان — безатувчи, оро берувчи; зебу зийнат, сайқал] 1 Амалий санъат ва ҳунармандчиликда нарсалар сиртини бўяш, силлиқлаш ва б. йўллар билан уларни чиройли, кўркам қилиш ва шундай ишловнинг ўзи. *Пардозни бузилмаган этик.* *Пардозни яшиш буюм.* *Тайёр маҳсулотларга пардоз бермоқ.* ■ *Хира сахтиён маҳсиллар пардоздан сўнг ялтирайди, очилади.* Ойбек, Танланган асарлар. *Эндиликда цех қуввати ортди. Бир кунда 12 тоннага яқин мато бўялиб, пардоздан чиқариладиган бўлди.* Газетадан.

2 Ҳусни очиш ёки сунъий гўзаллик ҳосил қилиш учун ўсма, хина, упа-элик суртиш, бўяш, ўзига оро, зеб бериш ва шу жараён натижаси. *Кунига пардозини неча марта янгилар, қанақа кийими бўлса, ҳаммаси-*

ни бир кунда кийиб, бир кунда ечарди. С. Аҳмад, Уфқ. -Нега бўлмасам мажлисга борганигда, ярим соат ойнага қараб пардоз қиласан? С. Аҳмад, Юлдуз. Хотиннинг ёши ўттиздан ошган бўлса-да, упа-элиги, парدوزи билан ёшироқ кўринар эди. Ойбек, Танланган асарлар.

ПАРДОЗ-АНДОЗ [пардоз + ф. انداز — отиш, улоқтириш; ёйиб, ёзиб қўйиш] Ҳаддан ортиқ пардоз, зеб-оро. *Пардоз-андоз қилмоқ.* ■ Улар [қизлар] олдида мен ҳеч нарса билмайдиган, дунёга фақат зеб-зийнат, пардоз-андоз учун келган бир кимса бўлиб қолдим. С. Аҳмад, Севгинга содиқман.

ПАРДОЗВОЗЛИК Бўлар-бўлмас пардозлайвериш, қайта ишлаш; ортиқча пардозга берилганлик. *Биз, адабиётчилар, тарих фактларини ҳам пардозлаб кўрсатишга уринамиз. Ана шундай пардозвозлик орқасида Ҳамзанинг бер қанча асарларини китобхондан яшириб келамиз.* Ш. Ризаев, Жалид драмаси.

ПАРДОЗЛАМОҚ 1 Пардоз бермоқ, силлиқлаб, бўяб, чиройли, жилоли қилмоқ. [Унсин] Ичкари уйда ўтириб, маҳсиларга шон қоқади, шон туширади, пардозлайди: қора гул, лок суркайди. Ойбек, Танланган асарлар. *Пардозлаш ишлари охирлаб қолган мазкур биноларнинг лойиҳаси чет элдан олиб келингани йўқ.* Газетадан.

2 кўча Пардоз қилмоқ, ўзига зеб-оро бермоқ. *Сочларини ювдириб, гул суви билан пардозлаб.. кўйлак кийдирди.* Ойбек, Навоий. *Қиз-жувонлар ўзларини ҳафсала билан, бир-биридан ўтишга пардозладилар.* Т. Ашуров, Оқ от.

3 кўча Ишлов бериб мукаммаллаштирмоқ, бадий қийматини оширмоқ, силлиқламоқ. *Халқ ижодчилари.. куйланиб келган асарларга ўзгартиш ва янгиликлар киритганлар, уларни пардозлаганлар.* «Ватан адабиёти».

ПАРДОЗЛОВЧИ айн. пардозчи 1. *Бир ойда ўнта уй пардозловчиларга топширилди.* Газетадан.

ПАРДОЗСИЗ айн. бепардоз. *Ҳаёт, бир кун илгари қўйган ўсма қошларида сал-пал билиниб тургани бўлмаса, одатдагича, пардозсиз эди.* М. Исмоилий, Фарғона т. о.

ПАРДОЗХОНА [пардоз + хона] Пардоз қилинадиган хона. *У пардозхонага кириб, ўзини яна бир марта кўзуга солди-да, торини кўтариб, қайтиб чиқди.* Ў. Ҳошимов, Қалбинга қулоқ сол.

ПАРДОЗЧИ 1 сфт. от Нарсаларни силлиқлаб, бўяб, чиройли, жилоли, кўркем қилувчи, пардоз берувчи. *Пардозчи ишчи.* ■ *Пардозчилар станциянинг ичини сайқаллашда энг ноёб мрамар ва керамика буюмларидан фойдаланяптилар.* Газетадан.

2 Пардозга берилган, пардоз қилиб юришни яхши кўрадиган. *Пардозчи хотин.*

3 айн. **грамчи.**

ПАРЕЗ [юн. paretis — бўшашиш, заифлашиш] тиб. Нерв системаси зарарланиши оқибатида бирон-бир мускул ёки мускуллар гуруҳи эркин фаолиятининг заифлашуви; фалажнинг энгил тури.

ПАРЕМА, паремия [юн. paroimia — масал, рамзли хикоя] ад. Маълум бир тилдаги авлоддан авлодга оғзаки шаклда кўчиб юрвчи, ихчам ва содда, қисқа ва мазмундор, мантиқий умумлашма сифатида пайдо бўлган турғун ибора; мақол, матал.

ПАРЕМИОЛОГИЯ [парема + юн. logos — билим, тушунча] **1** Паремаларни ўрганадиган фан соҳаси.

2 Муайян тилда мавжуд бўлган паремалар тизими.

ПАРЁСТИҚ Паррандалар патидан қилинган ёстиқ. *Бошлаб кирган аёллардан бири остига юмшоқ кўрпача ёзиб, орқасига парёстиқ қўйиб берди.* Х. Тўхтабоев, Ширин қовунлар мамлакатаи.

ПАРИ [ф. پرى — гўзал аёл; яхшилик қилувчи руҳ] **1** миф. Шарқ халқлари фольклорларида кенг тарқалган, жуда гўзал қиз қиёфасидаги, нурдан яратилган, кишиларни инс-жинслардан сақлайдиган афсонавий образ; гўзаллик рамзи. *Қари билганини пари билмас.* Мақол. ■ *Букри домла Майнани жинми, парими деб ўйлади, шекилли, турган жойидан силжимай, аллақандай дуони пичирлади.* Ш. Тошматов, Эрк куши.

Илҳом париси поэт. Ижодкорга илҳом берувчи кимса ёки нарса. **Санъат париси** айн. **илҳом париси.** *Мени сеҳрлайди атлас кийганлар. Санъат парисидай қўзғатиб ҳавас.* Уйғун, Тонг кўшиғи. **Сув париси** Сувда яшайдиган пари. *Чироқ шувласида унинг узун-узун сочлари кўрпада судралиб, гуё сув парисини эслатарди.* У. Исмоилов, Сайланма.

2 кўча Жуда гўзал, хушрўй аёл, нозанин. -*Сизни шу парига уйлантириб қўяйми? — деди Тожибой ва оғзини очиб, носни тилининг тагига ташлади.* П. Турсун, Ўқитувчи.

Анвар.. ўйин-кулгини бир дақиқа қўйиб туролмаган парининг санъаткор шу вазиятига кулмуслираган кўйи анча қараб турди. А. Қодирий, Меҳробдан чаён.

ПАРИВАШ [ф. *پرىۋاش* — парига ўхшаш, фариштадек мулойим; сулув] *кт.* Парига ўхшаш, паридек жуда гўзал, хушрўй, нозанин. *Париваш аёл. ■ Еллар, соғинганимни ул гулузора айтинг, Қоши қалам, париваш, кўзи хумора айтинг. Уйғун, Тонг кўшиги. Шийпондаги кенг-мўл майдон эса сочлари елкаларида селкиллаган йигитлар билан, париваш қизлар билан тўлиб кетди. Н. Қиличев, Чиғириқ. Азизбек бўлса жавахор қадалган тожлар, олтин тахтлар, нозанин паривашлар, донгдор маҳрамлар ҳақидагина ўйлар эди. А. Қодирий, Ўтган кунлар.*

ПАЗИЗОД [ф. *پىرىزاد* — паридан туғилган] **1** *миф.* Паридан туғилган. *Паризод дасангиз ҳам ишонаман. Ойбек, Навоий.*

2 *кўчма* Париваш, гўзал, чиройли, паридек. *Қаердасан, паризод, бормисан, бормисан, Бахт сийлаган кимсага ёрмисан, ёрмисан. А. Пўлкан, Изҳор. Бу паризоднинг — зиёли кўринишли қизнинг ўша Ҳуббижамол эканига дафъатан ишонмадим. Ш. Холмирзаев, Бодом қиша гуллади.*

3 *Паризод (хотин-қизлар исми).*

ПАРИК [фр. *parique* < *итал.* *parigussa* — бошга қопланган ясама соч] Тутам-тутам сочлардан шакли ва рангини киши сочига ўхшатиб, бирор матога ёпиштириб тайёрланган ясама соч. *Театр париклари. Парик киймоқ. ■ Анвар.. парик кийиб, орқасига сумка осди-да, «юринлар» деди. А. Мухтор, Туғилиш.*

ПАРИЛЛАМОҚ 1 *Тез қанот қоқиб, «парр» этган товуш чиқармоқ (парранда ҳақида). Тоғ жилғаларининг яқинида, катта тошлар парасида [Элмурод] писиб ётиб, каклик пойлар ва жилғадан жилғага париллаб учган какликларга ўқ узар эди. П. Турсун, Ўқитувчи.*

2 *Тез югуриб кетмоқ, елдек учмоқ, фирилламоқ. Сувсиз чўлда Фиркўк от бораётир париллаб. «Равшан».*

3 *Қаттиқ овоз чиқармоқ. Париллаган товушдан ангадим, отим чопиб келаятганга ўхшайди. «Фольклор». Пиллапоя олдидаги табуреткада оппоқ самовар париллаб қайнаб турибди. С. Аҳмад, Оқ сут ва оппоқ нур.*

ПАРИПАЙКАР [ф. *پىرى پىكار* — пари қоматли; соҳибжамол] Парига ўхшаш, паридек, ғоят гўзал, нозанин, париваш. *[Бой Жамилага:] Мен сендай бир парипайкарни ўша гадо Ғофирга бериб, қараб ўтирмайман! Ганнинг нўскаллеси шу! Ҳамза, Бой ила хизматчи.*

ПАРИРУХСОР [ф. *پىرىرخسار* — юзи, рухсори парига ўхшаш] *айн.* **париру(й).** *Тушимда бир парирухсор қиз Ечиб олди қулоқдан сирғам. «Саодат». Жамшид остонада парирухсорни кўриб, андак довдиради. Т. Малик, Шайтанат.*

ПАРИРҲ(Й) [ф. *پىرىرۋى* — пари юзли; зебо, хушрўй] Паричехра, париваш, гўзал, нозанин. *Бир-биримиз билсак ҳам зимдан, Келмагандик лекин рўбарў. Миннатдорман бугун ўзимдан Учратган-чун сени, париру(й).* Б. Бойқобилов, Мени кутинг, юлдузлар. *Мубталоман париру(й)га, ул кўзлари охуга. Я. Маматхонов.*

ПАРИТЎП *Ўзбек халқи таркибидаги уруғлардан бирининг номи. Қишлоқ одамлари олчин, тоғчи, паритўп, қавчин, гўрков, юз.. дея аталмиш уруғ-аймоқларга бўлиниб олишади. Т. Мурод, От кишнаган оқшом.*

ПАРИХОН [пари + ф. *خوان* — ўқувчи] *этно.* Пари, жин каби ғайритабиий кучлар ёрдамида беморларни касалликлардан халос қилувчи; дуохон, азайимхон, фолбин. *«Ўғри қариса — сўфи, ғар қариса — парихон бўлади», деб бекорга айтилмаган-да. Ғ. Фулом, Шум бола.*

ПАРИЧЕХРА [ф. *پىرىچەره* — пари юзли; жуда хушрўй] Жамоли парига ўхшаш, ғоят гўзал; париваш, парирў, нозанин. *Паричехра қиз. ■ Сизлардек паричехралар шундай ёмон тиканларнинг панжасига тушмаса, бизга бундай базмларни гўрда насиб қилармиди? Ҳамза, Паранжи сирлари. Қиз руҳида ташвиш сояси, Ўйланади ул паричехра, Балки, шеърдир бу қиз дояси? М. Қўшмоқов, Али Қамбар.*

ПАРИШОН [ф. *پرىشان* — сочилган, тўкилган; тартибсиз; хаёли қочган, хафа; уялиб қолган; безовталанган] **1** *Ҳар томонга сочилган, тўзгиган, тартибсиз. Кумушнинг кўзи юмуқ, сочлари юзи устида паришон ҳолатда эди. А. Қодирий, Ўтган кунлар. ..Ёнимда Раёно ётибди. Сочлари паришон ёйилган, ғира-шира тонг нурида оппоқ юзи аяна тиниқроқ кўринади. Ў. Ҳошимов, Икки эшик ораси.*

2 *кўчма* Бир ерга тўпланмаган, бўлинган, сочилган, тарқоқ (фикр-хаёл, диққат-эътибор ҳақида). *Вали ака.. ўлининг ғўзалар ичида паришон турганлигини кўриб, уни ёнига чақирди. М. Исмоилий, Фарғона т. о. Ҳа, Шавкатбек, Эйнштейнга ўхшаб паришонроқ кўринасиз. С. Сиев, Ёруглик.*

Хаёли паришон ёки паришон хаёл Хаёли тарқоқ, фикри-хаёли жойида эмас, бўлинган, сочилган. *Аммо шоирнинг хаёли паришон, кўнгли алағда эди. М. Осим, Карвон йўлларида. Карвон Андижон музофотини ортда қолдириб, Аравонга етганда дам олишди. Аҳмадбек ҳожи Учкўприкда илк бор пешин намозини безовталаниб, хаёли паришон аҳволда ўқиди. «Ёшлик».*

ПАРИШОНЛАНМОҚ Паришон бўлмоқ, фикри-хаёли тарқоқ ҳолатда бўлмоқ. *Аброр асабийлашиб, паришонланиб кийинди. Улар кўчага чиқиб, уй олдидаги узун йўлакда пойи пиёда одимлаша бошлади. О. Мухторов, Эгилган бош. -Шуларнинг орасида бўлиши керак эди! – паришонланди Тожи Исмоил. О. Мухтор, Аёллар мамлакати ва салтанати.*

ПАРИШОНЛИК Фикри-хаёли бир жойда бўлмаслик, бир ерга тўпланмаслик, хаёли бўлинганлик, тарқоқлик. *Толибжон энди анча ўзига келган, паришонлиги ҳам тарқанган эди. У Мирвалининг болалик йилларини энди аниқ кўз олдига келтира бошлади. С. Аҳмад, Жумжитлик.*

ПАРИШОНХОТИР [паришон + *а. خاطر* – ўй, хаёл; ақл, фаҳм] Хаёли тарқоқ, фикри, диққат-эътибори бўлинган. *Сал ўтмай хотин кирди, ҳақиқатан ҳам унинг кўзи қизариб, паришонхотир ҳолда эди. Шухрат, Шинелли йиллар. Башарти, бу ҳол сурункасига давом этадиган бўлса, ўқувчи кўрс ва паришонхотир бўлиб қолиши эҳтимол. «Фан ва турмуш».*

ПАРИШОНХОТИРЛИК Диққатнинг беқарорлиги, бошқа нарсаларга чалғишидан иборат руҳий ҳолат. *Ўз кучингизга, имкониятларингизга ишонишга интилинг. Паришонхотирлик, хаёлот тарқоқлигидан қутулишга интилинг. Газетадан.*

ПАРИШОНҲОЛ [паришон + *а. حال* – аҳвол, ҳолат; вазият] Нима қилишни билмай, ўйланиб туриш ҳолати. *Халқ тарқаб кетмаган, кўплар чинор остида паришонҳол эди. Ш. Холмирзаев, Қил кўприк.*

ПАРИШТА *с.т. айн. фаришта. Омин, деса париштаю малойик, Яратган раҳмондан мақсад тилайик. «Маликаи айёр». Беш вақт намозни қанда қилма! Бўлмаса, уйингдан паришталар қочади. Ҳамза, Бой ила хизматчи.*

ПАРК [ингл. park < лот. parricus – ихота қилинган, ўраб олинган жой] 1 Гулзор, дарахтзор ва хиёбонлари бўлган, дам олиш, кўнгили очиш учун мослаштирилган катта боғ. *Парк оқшомда ясан-тусан одамлар, рангбаранг чироқлар, хилма-хил ажойиботлар билан тўлиб, жуда катта кўринар экан. П. Қодиров, Уч илди.*

2 Транспорт воситалари (трамвай, автобус, такси кабилар) турадиган ва уларга техник хизмат кўрсатиладиган жой. *Троллейбус парки. ■ Элмурод Муҳаррам билан хайрлашиб, Хадрага келганда, трамвайлар паркка кириб кетмоқда эди. Шухрат, Шинелли йиллар.*

3 Халқ хўжалиги, саноат тармоғи, корхона ва ш.к. га қарашли транспорт ёки ишлаб чиқариш воситалари мажмуи. *Тракторлар ва қишлоқ хўжалик машиналари парки. ■ Отаси – трактор парки қоровули. Илгари дурустгина машина ҳайдаб юрганди. «Ёшлик».*

4 ҳарб. Ҳарбий машиналар ва б. техника воситалари сақланадиган, таъмирланадиган ҳудуд; шунингдек, ҳарбий мол-мулк сақланадиган стационар (кўчмас) ёки кўчма омбор. *Артиллерия парки. Паркда, полигонда ва бўлинмада ички тартибни таъкил этиш.*

ПАРКАНД(А) [ф. پارکنده] **Пароканда** с.нинг қисқарган шакли. *У асло кўксинга ўқ каби ботмас, Танинг зирқиратиб, бурнинг қонатмас. Умринг йўлларига бўлмаган у банд Ё кўнгили шишасин этмагай парканд. А. Орипов, Йиллар армони.*

ПАРКЕТ [фр. parquet < лот. parricus – девор, тўсиқ, ихота] 1 Тураржой ва жамоат бинолари полларига қопланадиган, қаттиқ ёғочдан тайёрланадиган юпқа тахтача. *Дуб паркет. Полга паркет термоқ. ■ Палаталарнинг поли паркет ёки оддий тахтадан ясаиб, устига линолеум солинган бўлиши яхшироқдир. Н. Исмоилов, Касалларни парвариш қилиш.*

2 Шундай тахтачалардан ётқизилган пол. *Ялтираган паркет полга ташлаб қўйилган қип-қизил гилам устида оёқлари йўлбарс*

панжасига ўхшаган ёзув столи турарди. «Шарқ юлдузи».

ПАРЛАМЕНТ [фр. parlement – расмий сўзлашиш жойи < parler – гапирмоқ, сўзламоқ] Демократик мамлакатларда бутунлай ёки асосан сайлов асосида тузиладиган олий вакиллик ва қонунчилик органи. Мустақил Ўзбекистоннинг парламенти – Олий Мажлис. *Парламент сайлови.* ■ *Парламент бу таклифларни инobatга олиб, қонун лойиҳасини биринчи ўқишда маъқуллади.* Газетадан. *Мамлакатимизда ҳокимиятларнинг бўлиниши тўғрисидаги принцип парламент қабул қилган бир қатор қонунларда янада ривожлантирилди.* «Ҳаёт ва қонун».

ПАРЛАМЕНТАР Парламентаризмга асосланган, парламентаризмга алоқадор. *Парламентар республика. Парламентар тузум.*

ПАРЛАМЕНТАРИЗМ сиёс. Конституцияга мувофиқ, давлат органи тизимидаги раҳбарлик роли парламентга тааллуқли бўлган давлат ҳокимияти тузуми. *Дастурда парламентаризм, жамиятни демократлаштириш, инсон ҳуқуқлари, соғлом турмуш тарзи тушунчаларини тарғиб қилиш билан боғлиқ масалалар асосий ўрин тутди.* Газетадан. *Парламентаризм ғояси биринчи минг йиллик бўсағасида Римда, кейинчалик Англия ва Испанияда халқ мажлислари шаклида юзага келган.* Газетадан.

ПАРЛАМЕНТАРИЙ [нем. Parlamentarier] Парламент аъзоси, парламент депутаты. *Хорижлик парламентарийларга ватанимиз ҳақида маълумот бердик.* Газетадан.

ПАРЛАМЕНТЁР [фр. parlementaire < parler – сўзламоқ, гапирмоқ] Ўзаро урушаётган томонлардан бирининг бошқа (душман) томон билан музокара олиб бориш учун юборган вакили; элчи.

ПАРЛАМЕНТЧИЛИК Парламентга асосланганлик, парламентаризм. *Маълумки, демократик жамиятда ижтимоий-сиёсий ҳаётнинг энг муҳим соҳаларидан бири парламентчилик иши ҳисобланади.* Газетадан. *Ушбу вазибаларни уддалаш учун, ростини айтсам, ўқини, изланиш, парламентчилик сир-асрорларини ўрганиш ва тажриба орттириш лозим.* Газетадан.

ПАРЛАМОҚ Жуфт-жуфт қилмоқ, жуфтламоқ.

ПАРЛАНМОҚ I Парламоқ фл. мажҳ. н.

ПАРЛАНМОҚ II с.т. Буғланмоқ, буғга айланмоқ. *Ғўза суғорилгандан кейин сувнинг 20–35 фоизи ер бетидан парлашиб кетади.* ■ *Тамара деразадан ташқарига тикилганча, белига тушиб турган тилларанг сочларини тўзғитиб, тартибга солди; қуёш нурида парлаётган шудринг каби, гўё айбу гуноҳдан ўзини маъсум ҳис эта бошлади.* «Ёшлик».

ПАРМА [ф. پرمه – тахта, ёғочни тешувчи асбоб] 1 Айланма ҳаракат қилиб, тиғи билан нарсаларни тешадиган асбоб. *Кичкина парма. Парма тиғи.* ■ *У [Икромхўжа] йўғонлиги билакдай ва узунлиги бир олчин сада ёғочнинг ичини парма билан тешиб, «тўппонча» ясади.* С. Айний, Эсдалиқлар.

2 с.т. Бурғи. *Газободда газнинг киндиги қаердалигини аниқлаб олгач, бирданга уч жойга парма вишкаси тиклади.* И. Раҳим, Тақдир.

ПАРМАКАШ [ф. پرمه کش – пармаловчи] Парма ёки бурғи билан ер қазувчи уста, ишчи. *Тажрибали пармакаш эди, лекин фалокат босиб, қўли ишлаб турган дизелга кирди-ю, вентилятор парраклари икки бармоғини узиб кетди.* Газетадан.

ПАРМАЛАМОҚ I Парма билан тешмоқ. *Ҳайдар унинг [Умаралининг] қаршилигига қарамай, ўрта уйнинг деворини пармалай бошлади.* И. Раҳим, Ихлос.

2 с.т. Бурғи билан кавламоқ, бурғиламоқ. *Нефть ва газ қудуқларини пармаламоқ.*

3 кўчма Қаттиқ банд қилмоқ, қийнамоқ, азоб бермоқ (ўй-хаёл, гап-сўз ҳақида). *Шу фикр амакининг миясини яшин тезлигида пармалаб ўтди.* Ҳ. Фулом, Замин юлдузлари. *Камол чиқмаса-я, деган ўй миясини пармалай бошлади.* «Саодат».

ПАРМАЛАШ Металл ва ёғоч буюмларга тешик очиш, чуқурроқ ўйиш. *Пармалаш ишлари.*

ПАРМАЛИ I Пармаси бор, парма ўрнатилган.

2 кўчма Ўймали, кесатик. *Ўзингиз шунақасиз, эшикдан кирмай, тешикдан танқид қиласиз. Пармали гаплар сизда ҳам кўпми?* «Аския».

ПАРМАЛОВЧИ от Пармалаш билан шуғулланувчи киши. *Геологлар, қурувчилар, пармаловчилар ва денгизчиларнинг икки йилдан ортиқроқ вақт мобайнида Каспийни тинимсиз штурм қилиш-қидиришлари ор-*

қасида бу олий мақсад юзага чиқди. Н. Сафаров, Оловли излар. *Уша ишчи хоҳ пармаловчи, хоҳ гишт терувчи, хоҳ сувоқчи ёки бўёқчи бўлсин, менинг назаримда, ўз юртининг гуллаши, гуркираши учун қўлидан келган ишни сидқидилдан бажарди.* Газетадан.

ПАРМАНЧАК *шв.* Маймунжон. *Бунда [лагерда] икки юздан ортиқ бола дам олади. Бирни чўмилиб шамолласа, бошқаси, парманчак тераман, деб оёқ-қўлини тимдалатиб келади.* С. Аҳмад, Сайланма.

ПАРМУДА Гўштли кўшалоқ сомса. *Пармуданинг таърифин Айтаберсам, деманг лоф. С. Абдулла. Ундан кейин ошпаз йигит мудирликка келди. Аммо пармуда сомсага уста эди. Мен жилд очиб бериб турардим, у тугиб ташлайверарди.* С. Аҳмад, Сайланма.

ПАРНИЁН [ф. پرنیان — ипак, шойи] *шв.* Юпқа ипак кийим. *Ўрнидан туриб, эгнига парниёнини ташлади.* Э. Самандар, Тангри кудуғи.

ПАРНИК [р. пар — «буғ, иссиқлик» с. дан] Эртагишар сабзавот, резавор экин ва гул экиб ўстириш учун қурилган, ойнаванд ёки шаффоф плёнка билан ёпилган жой, хона. *Парник ва теплицаларда кўчатлар етиштириш.* ■ *Парникда битган бодринг, помидорлар тақсимчада гулдек очилиб турибди.* «Шарқ юлдузи».

ПАРОВОЗ [р. пар — буғ + воз(ить) — элгмоқ] Темир йўл поездларини тортиш учун белгиланган, буғ двигатели билан ҳаракатга келадиган машина, буғ двигатели локомотив. *Паровоз буғ чиқариб, чўзиқ гудок берди-да, катта қизил составни судраб кетди.* И. Раҳим, Чин муҳаббат.

ПАРОВОЗСОЗЛИК Паровоз ва унинг қисмларини ишлаб чиқариш; транспорт машинасозлигининг паровоз ишлаб чиқарадиган тармоғи.

ПАРОВОЗЧИ Паровоз ҳайдовчи киши, машинист.

ПАРОДИЯ [юн. parodia — зид, тескари кўшиқ] Адабиёт ва баъзан мусиқада, тасвирий санъатда: бирор асарга тақлидан яратилган, унинг заиф томонларига ҳажвий, киноявий ёндашилган асар; сатирик ўхшатма. *Юсуф ака қаламкаш дўстлари Э. Воҳидов, А. Эшоновлар билан бир сафда туриб, адабиётимизда пародия жанрининг юксалишига ҳам муносиб ҳисса қўшди.* «Шарқ юлдузи».

ПАРОДОНТОЗ [пара. + юн. odontos — тиш] Тишларни ўраб турувчи тўқималарнинг сурункали яллиғланиши. *Оғиз бўшлиғида кўп учрайдиан иккинчи бир касаллик пародонтоздир.* «Фан ва турмуш».

ПАРОКАНДА [ф. پراگنده — тўкиб, сочиб, тарқатиб юборилган; хафа, гамгин, маъюс; ташвишли] *кт.* 1 Турли томонга, дуч келган ёққа тарқанган, тўзган, тарқоқ, тартибсиз. *У даҳшатли қуюндан ярим-ёрти саломат қолган пароканда карвонни тартибга солди. Ойбек, Қуёш қораймас. Утнинг шиддати-дан душман танқларни пароканда бўла бошлади.* Ойбек, Қуёш қораймас.

2 *кўчма* Тарқоқ, жамланмаган, тартибсиз, бир жойга тўпланмаган. *Қандайдир бир куч пароканда бўлган хаёлларини яна бир жойга тўплади.* Мирмуҳсин, Умид. *Вужуди пароканда бўлиб юранда Ҳирота Маматшариф келди.* «Шарқ юлдузи». *Энг муҳими, сайловлар халқимизни пароканда ва бир-бирига қарши қилишга эмас, балки элу юрт манфаати йўлида янада бирлаштиришга хизмат қилиши зарур.* Газетадан.

ПАРОКАНДАЛИК Тарқоқлик, тартибсизлик. *Шу-шу Бўри полвон Момоқизни ўйлаганда, кўнглининг туб-тубида бир парокандалик уйғонадиган бўлди.* Т. Мурод, Кўшиқ. *Кўшиндаги парокандалик Жалолиддинни ҳам, унинг яқин дўсти Темур Маликни ҳам ҳалокатга олиб келди.* Газетадан. *Миллий адоват, ишонсизлик, парокандалик инсоният бошига нақадар муҳши кулфатларни солганлиги тарихдан маълум.* Газетадан.

ПАРОЛЬ [фр. parole — гап, сўз] Ҳарбий хизматда ёки яширин ташкилотларда ўз кишиларини таниш учун айтиладиган ва олдиндан белгилаб қўйиладиган шартли махфий сўз. *Ҳа, майли, тонг отсин, кўрармиз. Паролга жавоб беради, бермаса, ўзимни билмасликка олиб, алоқанинг бошқа йўлини излайман.* К. Яшин, Ҳамза.

ПАРОМ [р. паром — дарёдан, умуман сувли жойдан ўтиш мосламаси] Одамлар, транспорт воситалари, юкларни дарё ва кўллардан ўтказиш учун мўлжалланган махсус қурилма, сол. *Швеция билан Финляндия ўртасида қатнайдиған янги паром қурилиши бошлаб юборилди.* Газетадан.

ПАРОМЧИ Паромни бошқарувчи, паром ҳайдовчи киши. *Чакмонини елкага ташлаб, қумгон тагига ўт қалаётган паромчи*

чол от дупурини эшитиб, ўрнидан турди. С. Аҳмад, Қадрдон далалар.

ПАРОНИМЛАР [пара.. ва юн. опута — ном, исм] Талаффузи, эшитилиши ва морфем таркиби ўхшаш, лексик маънолари бошқа-бошқа ёки қисман яқин бўлган сўзлар: *шараф-шароб, танбур-тамбур, афзал-абзал* каби.

ПАРОГИТ [пара.. + юн. otos — қулоқ + лат. itis — яллиғланишни билдирувчи қўшимча] *тиб.* Қулоқ ости безининг яллиғланиши билан ўтадиган юқумли касаллик, тепки.

ПАРОХОД [р. пар — буг + ход(ить) — юрмоқ] Буг двигателли кема. *Дарё пароходи.* ■ *Каспий денгизида пароходлар қатнови баҳорга нисбатан кўпайди.* Шухрат, Шинелли йиллар.

ПАРОХОДЧИЛИК Пароход транспорти ва унда йўловчи ҳамда юк ташиш билан шуғулланадиган муассасалар мажмуи. *Термиз давлат пароходчилиги.*

ПАР-ПАР 1 Парр с. тақр. *Пар-пар учар чумчуқлар, ҳам тинмайин чурқ-чурқлар.* 3. Дийр.

2 тасв. с. Нурнинг, шуъланинг парпираши, жилваси ҳақида. *Матлуба нам киприклари орасидан пар-пар ёниб турган кўзларини сузиб қаради.* О. Ёқубов, Бир фельетон қиссаси.

ПАРПАША [ф. پرپشه — пашшанинг қаноти (каби)] Дастгоҳда тўқилган, нафис йўлли юпка ва пишиқ мато. *Бир кийимлик парпаша. Парпаша тўн.* ■ *Бир нафасдан кейин нурсизина парпаша паранжи ёпинган, ўрта бўй аёлни қўлидан етаклаб, тортиқлаб кириб келди.* С. Зуннунова, Олов.

ПАРПИ 1 бот. Таркибида бир турли алкалоид бўлган ўтсимон кўп йиллик ўсимлик.

2 Парпи (эркаклар исми).

ПАРПИРАМОҚ 1 Ёруғ нур таратиб ёнмоқ, нур сочиб турмоқ. *Ёритди ўлкани нур, парпираб электрлар.* Ҳабибий. *Ярим тун.. юлдузлар жимирлар кўжда. Чироқлар парпираб вишкаларда ҳам.* Ж. Жабборов.

2 айн. ҳилпирамоқ. *Парпирайди донг чиқарган байроғим, Асли маҳкам юксак суянган тоғим.* Ҳабибий.

3 кўчма Жилваланмоқ, жилва қилмоқ. *Ўн саккизу йигирмада ёшлари, Парпирайди ўйнаб кўзу қошлари.* Ҳабибий. *Муқаддам унинг қувонч тўла кўзлари парпираб кетганини,*

хўрсинганини сезди. Ў. Ҳошимов, Қалбингга қулоқ сол.

ПАРР тақл. с. Учаётган парранда қанотидан, айланаётган паррак ва ш.к. дан чиқадиган товуш. *Чумчуқ парр этди.* ■ *Қушлар парр этиб, осмонга кўтарилди.* Ойбек, Навоий.

ПАРРА 1 с.т. айн. паррак. *Чархимнинг паррасидан учди қушим, Қаландар чорбоғиға тушди қушим.* «Халқ дурдоналари». *Фақат уни биласанми, кимнинг қули? Паррасини айлантирган кимнинг пули? Чўлпон, Яна олдим созимни.*

2 шв. Гул нақштини ташкил этувчи доира-симон шакллар.

ПАРРАК [ф. پرک — кичик пар, қанотча] **1** Сув ёки шамол кучи билан айланадиган куракли содда механизм. *Сув тегирмонининг парраги. Шамол тегирмонининг парраги. Тулука паррак.* ■ *Улар конга тескари ёқдаги катта харсанг тошлар панасида шамол тегирмони парраклари вазмин айланиб турган қишлоқ томонга туша бошладилар.* Х. Гулом, Замин юлдузлари.

2 с.т. Ҳар хил машиналарнинг шу шаклдаги қисми. *Вентилятор парраги. Самолёт парраги.* ■ *Даланинг у бошида парраги чарх уриб, комбайн ўрмаларди.* С. Анорбоев, Оқсой. *Бирпас ўтмай вертолётнинг қудратли мотори гуруллаб, устидаги катта парраклари айлана бошлади.* Н. Фозилов, Дийдор.

3 кўчма Юпқа қилиб тўғралган, кесилган, бўлақларга бўлинган бирор нарса. *Бир бўлак гўшт ўн парракка бўлинди.* ■ *Отамурод нима учундир дастлабки тўрт парракни жонлироқ-жонлироқ қилиб кесди.* М. Мансуров, Ёмби.

4 с.т. кўчма Телефоннинг рақамлар тегирланди айланувчи чамбараги. *Қушларга қуриладиган ин шаклидаги ёғоч уйчани бир ўзи тўлдириб ўтирган биққи қоровул Ала-мазонни четроққа турғизиб қўйиб, телефон парразини гилдиратишга тушди.* А. Обиджон, Аканг қарағай Гулмат.

Бурун парраги Бурун катакларининг икки четидаги мускул. *Нафас олишда қийналаётган бўлса керак, бурун парраклари учиб турарди.* Шухрат, Шинелли йиллар.

ПАРРАКЧА с.т. Парча, бўлак(ча); кичкина паррак. *Муздек қор парракчалари отанинг боши устида айланиб, ерга тушгиси*

келмас, унинг бўйни ва кўксига, соқолига кўнарди. С. Нуров, Нарвон.

ПАРРАНДА [ф. پرندە — учадиган нарсалар, қанотлилар; қуш] Қуш зоти, қушлар; қуш. *Уй паррандаси. Ов паррандаси.* ■ *Мушукка қанот битса, ҳеч бир паррандани қўймак экан. П. Турсун, Ўқитувчи. Ушунчалик хушсурат, нозу иболи эканки, сойга юзени ювгани тушса, сой бир зум тўхтаб, уни томоша қилар, қора қош, саллона юришдан барча паррандага сабоқ берадиган какликлар ҳам зориқиб учиб келар экан.* «Ёшлик».

ПАРРАНДАБОЗ [ф. پرندهباز — қуш ўйновчи, қуш ишқибози] Парранда тутиш, боқиш ва ўргатишга ишқибоз киши.

ПАРРАНДАБОҚАР с.т. айн. **паррандачи**.

ПАРРАНДАХОНА Товуқ, ўрдак, бедана ва ш.к. лар парвариш қилинадиган махсус бино, жой. *Гўшт учун боқиладиган жўжалар.. махсус паррандахоналарда ўстирилади.* «ЎЗМЭ».

ПАРРАНДАЧИ Парранда боқиш ва уни кўпайтириш иши билан шуғулланувчи киши.

ПАРРАНДАЧИЛИК Қишлоқ хўжалигининг уй паррандаларини боқиш ва кўпайтириш билан шуғулланадиган тармоғи. *Паррандачилик фермаси. Паррандачилик курси.*

■ *Паррандачиликнинг асосий маҳсулоти — озиқ-овқатга ишлатиладиган тухум ва гўшт, қўшимча маҳсулоти — парранда пати ва пари.* «ЎЗМЭ».

ПАРРОН [ф. پَران — учувчи, учадиган]: **тиғи паррон** Учиб келаётган, тешиб ўтадиган ўқ. *Чавандоз, нонуштадан мақсад фақат қорин тўйдирши деб билганида, ҳозир тиғи паррондай олиб бораётган тулпоридан фарқ қилмай қоларди-ку!* Ш. Бўтаев, Қўрғонланган ой. **Тиғи парронга учрагур қарғ.** Балонинг ўқига учрагур, ўлгур. *Менинг кўзимга тўнғиздан ҳам хунук кўринади у, тиғи парронга учрагур бойвачча.* Ҳамза, Паранжи сирлари.

ПАРР-ПАРР қ. айн. **пар-пар**.

ПАРТ I: парт бўлмоқ Қайноқ сувда куймоқ. *Қайнаб турган самовар ағанаб, оёғи парт бўлди. Парт қилмоқ* Қайноқ сувда куйдирмоқ. *Товуқни парт қилиб, патини юлмоқ.*

ПАРТ II: шартти кетиб, парти қолган 1) қариб, куч-қуввати кетиб қолган, мункиллаган, бедармон. *Кейин кеч бўлади. Мана, биз: шартимиз кетиб, партимиз қолди.* «Шарқ юлдузи»; 2) эски, шалоқ; хароб. *Шартти кетиб, парти қолган арава.*

ПАРТ III тақл. с. Кескин қанот қоқиш пайтида чиқадаган товуш.

Парт этиб 1) «парт» деган овоз чиқариб. *Жуволдиз қонга парт этиб кирди. Бедана қўлдан чиқиб, парт этиб учиб кетди;* 2) кутилмаганда, тўсатдан. [Тулжи] *Шошиб бориб, тишлаб тортиб эди, парт этиб тумшугидан илиниб қолди.* «Этрактлар». *От устидан парт учиб кетди, Наҳот, сўнги дақиқа етди?* У. Носир, Юрак.

ПАРТА [р.] Ўқувчилар учун мўлжалланган, устки тахтаси ўтирган ўқувчи томон бир оз қия ўрнаштирилган, остки қисми ўриндиғи билан бирлаштирилган махсус стол. *Бир партада ўқиган болалар.* ■ *Ўқитувчимиз Исоқ ака ўқиш китобимизни парта устига олиб қўйишни айтдилар.* С. Фафуров, Жонли совға. *Ичкаридаги ҳар бир парта рақамланган: назоратчи қуръа ташлаш йўли билан абитуриентларни жойлаштиради.* Газетадан.

ПАРТАВ [ф. پارتو — қуёш, ой, чироқ шуъласи, нури] эск. кт. Нур, шуъла. *Унинг [Кумушбидининг] кўз ўнгида жой олган қораликлар шу ёқила бошлаган нажот шамлари партави билан ўз-ўзларидан йўқолгандек кўринарлар эди.* А. Қодирий, Ўтган кунлар.

ПАРТАДОШ Бир партада ёнма-ён ўтирувчи (ўқувчи). *Танаффус пайтида партадоши Шокир тўполончи билан уришиб қолди-ю..* Ё. Усмонов, Қисмат. *Дафтарларим бор, дарсликни эса ёнимда ўтирган партадошимдан олиб тураман.* Газетадан.

ПАРТАК бот. Чирмашиб ўсадиган бир йиллик ўтсимон ўсимлик.

ПАРТЕР [фр. par terre — ер бўйлаб < par — бўйлаб, бўйича + terre — ер, замин] 1) Театр ва б. томоша залларининг томошабинлар ўтирадиган, саҳнага нисбатан пастроқ бўлган қисми ва унда жойлашган ўринлар.

2) Парк ёки боғларнинг обод қилинган, майсазор, гулзор, ҳовуз, фонтан, ҳайкал ва ш.к. лари бўлган очиқ қисми.

ПАРТИЗАН [фр. partisan < итал. partigiano — тарафдор, ихлосманд] тар. Душман босиб олган жойларда озодлик учун куrolли кураш олиб боровчи кўнгилли халқ армиясининг аъзоси. *Партизанлар отряди.* ■ *Куrolланган етти партизан оғир қадамлар ташлаб, хилват ва сўқмоқ йўллари*

дан юриб, Мостовойнинг отрядига қараб бормоқда. А. Раҳмат, Соқов бола.

ПАРТИЗАНЛИК Душман босиб олган жойларда озодлик учун кўнгилли равишда қуроли кураш олиб бориш; партизан бўлишлик. *Партизанлик қилмоқ.* ■ *Ҳасанжонни масъулиятли ишлардан чиқарган бўлсалар ҳам, ота-бобосининг қул бўлиб келганлигини, отасининг партизанлигини назарда тутиб, ишни бости-бости қилиб юборган эдилар.* С. Айний, Қуллар.

ПАРТИЗАНЧИЛИК 1 *с.т. айн. партизанлик.*

2 *кўчма салб.* Ишда ўзбошимчалик, тартиб-қоидага риоя қилмаслик, ҳар кимнинг ўз билганича ҳаракат қилиши.

ПАРТИЯ I [*фр. parti < лат. pars, partis* – бўлак, қисм; гуруҳ] 1 *Ғоявий жиҳатдан маслакдош, манфаатлари муштарак бўлган кишилар гуруҳидан иборат, муайян ижтимоий гуруҳ ёки қатламларнинг манфаатларини ифодаловчи ва ҳимоя қилувчи сиёсий ташкилот. Халқ демократик партияси.* ■ *Ҳозир кучга кираётган партияларга, янги пайдо бўлаётган партияларга ишончимиз катта.* Газетадан. *Сир эмас, партиямиз ташкил топган дастлабки йиллар вилоятда унинг молиявий асоси ҳам пишиқ-пухта бўлиши лозимлигини кўрсатди.* Газетадан.

ПАРТИЯ II 1 *Бирор мақсадда муайян ишни бажариш учун бирлаш(тирил)ган кишилар гуруҳи. Геология-қидирув партияси.*

2 *Муайян ғояга бир пайтда жўнатиладиган нарса, товар кабиларнинг маълум (одатда кўп) миқдори. «Асака» қўшма ҳиссадорлик корхонаси «Нексия», «Дамас», «Тико» каби енгил автомобилларнинг партияларини ишлаб чиқаради.* Газетадан.

3 *шахм.* Бир давра, бир қур ўйин (бошдан охиригача). *Шахмат партияси.* ■ *Мусобақанинг 10-куни ўйналган А. Ненашев – Р. Қосимжонов партияси ўша кунги, балки бутун турнир давомидаги учрашувларнинг марказида бўлганлиги муқаррар.* Газетадан. *Қозон шахрида ўтган мусобақаларнинг финалида россиялик тенгқурларини уч партияда мағлубиятга учратишди.* Газетадан.

4 *мус.* Кўп овозли мусиқа асарининг (оркестр, хор ёки операнинг) якка созанда ёки хонанда ижро этадиган таркибий қисми ва унинг нотаси. *«Лайли ва Мажнун» мусиқали*

драмасидаги Қайс партияси. ■ *Мақсадим – келгусида ўқишни муваффақиятли тамомлаб, театрда катта партияларни ижро этиш.* Газетадан.

ПАРТИЯВИЙ Маълум партия, гуруҳнинг мафқурасига, манфаатларига мос бўлган; маълум партия тамойилларини амалга оширадиган. *Ана шундан келиб чиқиб, партиявий фракциялар ва гуруҳлар фаолиятини қонунлаштириш керак, деб ўйлаймиз.* Газетадан.

ПАРТИЯВИЙЛИК 1 *Дунёқараш, адабиёт ва санъатнинг муайян синфлар, ижтимоий гуруҳларнинг манфаатларини ифодалайдиган ғоявий йўналиши, ғоявий кураш қуроли. Адабиётнинг партиявийлиги. Санъатнинг партиявийлиги.*

2 *Шахснинг бирор сиёсий партияга дахлдорлиги. Унда мафкура, синфийлик, партиявийликдан асар ҳам йўқ.* Газетадан.

ПАРТИЯДОШ Бирор партияга биргаликда аъзо бўлган киши. *-Зумрат Ҳайитова – партиядошимиз, – дейди Халқ демократик партияси Қумқурғон туман кенгаши биринчи котиби Салтанат Зуннунова.* Газетадан. *Дарҳақиқат, фидойи партиядошимиз айтганидек, инсон ўз меҳнатининг самарасини кўрганда суюнади.* Газетадан.

ПАРТИЯЛИ *эск.* Партия аъзоси. *Колхоз янги туғилганда, бутун қишлоқда тўрттагина партияли бор эди.* А. Қодирий, Обид кетмон.

ПАРТИЯСИЗ Партияга аъзо эмас, партия аъзоси бўлмаган.

ПАРТКОМ [*р. партийный комитет* – «партия комитети» бирикмасининг қисқартмаси] 1 *Партия комитети, йирик бошланғич партия ташкилотининг сайлаб қўйиладиган раҳбар органи. Партком аъзоси.*

2 *Партия кўмитаси ўрнашган бино, хона.*

3 *с.т.* Партия ташкилотининг бошлиғи.

ПАРТНЁР [*фр. partenaire*] Бирор ишда ёки ўйинда, саҳна асарига бирга иштирок этувчилардан ҳар бири, шерик. *Шахматчи партнёрлар.* ■ *О. Жалилов, О. Жўраев, Н. Раҳимов, А. Турдиевлар билан партнёр бўлиш менга насиб этганди.* Газетадан.

ПАРТОВ [*ф. پارتاو*] *от* Экилмай қолган, қаровсиз, ташландиқ ер, экин майдони. *Партов ерларни ўзлаштирмоқ.* ■ *-Илгари экин экилиб, кейин ташлаб қўйилган ер партов бўлади-да, – деб панишах тутган Эр-*

гаш кўса Замоналига бўлишди. П. Қодиров, Қора кўзлар.

ПАРТЎШАК Пардан қилинган, пар тикланган тўшак. *Чувринди унинг ташвишини тушунди — кўнгли боласида. Бу ерда партўшак солиб берсанг ҳам, тиканзорда ётгандек бўлади.* Т. Малик, Шайтанат. *Чекаман: тутунга тўлади хона, Илк севгим мўралар тўрт бурчагидан. Мен далли, юрагим мендан девона. Ётмайман деб йиғлар, партўшагингда.* М. Юсуф, Осмонимга олиб кетаман.

ПАРФЮМЕР 1 Парфюмерия соҳасида ишловчи киши.

2 эск. Парфюмерия моллари сотувчи киши, аттор.

ПАРФЮМЕРИЯ [фр. parfumerie < parfum — ёқимли ҳид, атир] **1** Атир, одеколон, упа-элик каби пардоз моллари. *Парфюмерия савдоси. Парфюмерия моллари.*

2 Шундай моллар ишлаб чиқарувчи саноат тармоғи.

ПАРХИШ Ўсимликнинг узун шохини ерга кўмиб, учини нарироқдан чиқариш йўли билан унинг янги туپини ҳосил қилиш.

ПАРЧА 1 [ф. پارچه — қисм, бўлак, бурда; мато бўлаги; ипак мато тури] **1** Бутундан кесиб, қирқиб, йиртиб, синдириб олинган ёки ўзи ажраган қисм; бўлак, бўлакча. *Қоғоз парчаси. Бомба парчаси.* ■ *Баҳодир каллакланган тол орасидан суяк, совун парчаларини олар экан, бирдан Нилуфарнинг елим кўғирчоғи чиқиб қолди.* С. Аҳмад, Юлдуз. *Кекса ишчи сўнги гўшт парчасини оғзига солди.* А. Қаҳҳор, Қанотсиз читтак. *Дераза ойналарига йирик қор парчалари оқ капалакдай уринади.* Ойбек, Танланган асарлар.

Бир парча 1) унча катта бўлмаган; кичкина, озгина, арзимайдиган. *Бир парча ер.* ■ *-Бир парча нон учун сенинг эшигингда чўрилик қилиб, болаларининг кирини ювганман, — деди Ойимхон.* П. Турсун, Ўқитувчи. *Йигитали бир парча қоғозга қалам билан ёзилган хатни ўқий бошлади.* С. Кароматов, Бир томчи қон; **2)** кўчма оз (гина), пича, кўп эмас. *Агар уларнинг тили бўлганда эди, ҳар бир жанг тагида кимларнинг манглай терию кимларнинг бир парча умри қолиб кетганини сўйлаб берарди.* Х. Султонов, Онамнинг юрти.

2 ад. Асарнинг тугал мазмунли кичик қисми. *Романдан парча.* ■ *Кўпгина оқшомхонлар ёзувчиларнинг янги асарларидан пар-*

чалар бериб боришни, санъаткорларимиз ҳақида кўпроқ ёзишимизни илтимос қилишди. Газетадан. *Абдулла Қаҳҳор, то асар битгунча, таассуротингиз бузилади, фикрингизни тўла ифодалай олмайсиз, деб ҳатто парча ўқигани руҳсат бермас эдилар.* К. Қаҳҳорова, Чорак аср ҳамнафас.

3 кўчма Бўлак, бўлакча, қисм. *-Ўғлим, — деди она ўрnidан туриб, юз-кўзларини бошидаги дуррасининг учига артар экан, — фарзанд — қалб парчаси.* Газетадан.

Парча гулли Йирик-йирик гулли. *Парча гулли лас.* ■ *Хола диванга ўтирди. Бошидан кизил парча гулли жун рўмолини олиб қолди.* *Пешонасини, бўйнини артди.* С. Нуоров, Нарвон. *Парча гулли чит кўйлагини ҳилтиратганча Гулзебо завқ билан ўйинга тушди.* С. Кароматов, Олтин қум.

ПАРЧА II [ф. پارچه] Зар ип аралаштириб тўқилган қалин ипак мато, кимхобнинг бир тури. *Қаторга тиркадик лўк билан норча, Устига юкладик қирмизи парча.* «Алпомиш». *Туман орасига ўралган чўққининг учи қилич дамидек ярқираб кетди-ю, бир дам кимхоб парчасидек булут ялт-ялт ёниб, кўзни қамаштирди.* С. Аҳмад, Йўлда.

ПАРЧАЛАМОҚ 1 Кесиб, қирқиб, йиртиб, синдириб, майда қисмларга, бўлакларга бўлмоқ, ажратмоқ; тилка-пора қилмоқ, бурдаламоқ. *Ойнани парчаламоқ. Фиштни парчаламоқ. Қоғозни парчаламоқ.* ■ *-Мени ҳам ёзибди рўйхатига! Мақсадинга етолмайсан!.. — дея рўйхатни парчалаб ташлади.* К. Яшин, Ҳамза. *Келди очилур чоғинг, ўзлинг намён қил, Парчалаб кишанларни ҳар томон паришон қил.* Ҳамза.

2 Бўлак-бўлак қилиб юбормоқ, пароканда қилмоқ. *Бектемир душманларни ўқ билан урди, найза билан санчди, гранаталар билан парчалади.* Ойбек, Куёш қораймас.

3 ким. Таркибий қисмларга ажратмоқ, ажратиб олмоқ, бўлиб юбормоқ. *Атомни парчаламоқ.*

4 Мустақил қисмларга ажратмоқ, бўлиб, ажратиб юбормоқ. *Ўтган асрнинг охириларида ўзбек ерлари Туркистон генерал-губернаторлиги, Бухоро ва Хива хонлиги ўртасида парчаланган эди.* «Фан ва турмуш».

5 кўчма Йўқ қилиб юбормоқ, йўққа чиқармоқ, маҳв этмоқ, емирмоқ, битирмоқ, тугатмоқ. [Йўлчи] «Ҳамёни зўрлар»нинг ҳокимиятини парчаламоқ учун бел боғлаган ку-

рашчиларга табиий бир ички интилиш билан яқинлашади. Ойбек, Танланган асарлар. Зулмат тунин парчалади кучли қуёш. Файратий. Танимга ўт қалаб кетди, Умидим парчалаб кетди. Газетадан.

ПАРЧАЛАНМОҚ Бўлақларга бўлинмоқ, қисмларга ажралмоқ, йўқ бўлмоқ. *Разведкачи кемачаларимизнинг хабар қилишича, номаълум кема атом ядросининг парчаланиши ҳисобига ажралиб чиқувчи энергия ёрдамида ҳаракатланади. С. Сиёев, Ёруғлик. Бу ерда парчаланган севгимни қайси кўз билан томоша қилиб юраман. П. Турсун, Ўқитувчи.*

ПАРЧА-ПАРЧА Парчаларга бўлинган; бўлак-бўлак, бурда-бурда, чилпарчин. *Парча-парча булутлар. Пиёла парча-парча бўлди. ■ ..ўнлаб йигит мақбара томон тош ота бошлади. Бир лаҳзада мақбара эшиги тошлар зарбига бардош беролмай, парча-парча бўлиб кетди. К. Яшин, Ҳамза. Болта қассоб ўлғудай бесабр одам, ҳаром томчиларни авайлаб ажратишга вақт топмайди. Уларни парча-парча лаҳм гўштга қўшиб, кесиб олади. М. М. Дўст, Галатепа қиссалари.*

ПАРЧА-ПУРЧА 1 Катта-кичик парчалардан иборат, ҳар хил катталиқдаги парчаларга бўлинган; бўлтак-сўлтак. *Чўнтакдан.. катта-кичик михлар, парча-пурча тахтачалар чиқди. Ойдин, Ўзи монанд. Ердан бир қарич кўтарилган торғина саҳнда, парча-пурча чирик наматлар солинган айвонга паранжисини отди. Ойбек, Танланган асарлар. Арава ҳам кўҳна, ямоқ-ясоқ, гилдирак темиридан унда-мунда парча-пурча қолган: кегайлари шалоқ. Ойбек, Танланган асарлар.*

2 Арзимайдиган, кичкина, озгина. *Ҳозирча очган ерларни, менимча, парча-пурча деб ҳисоблаш керак. Ойбек, О. в. шабадалар.*

ПАРЧИН I [ф. پارچين / پرچين - ғов, тўсиқ; парчинмих билан маҳкамлаш] Архитектура безакларида ишлатиладиган, учбурчак, тўртбурчак ва ҳоказо шаклли сирланган сопол тахтача; кошнингнинг бир тури.

ПАРЧИН II 1 айн. парчинмих.

2: парчин қилмоқ айн. парчинламоқ 2. *Пиёлани ерга уриб парчин қилди. ■ Иккинчи офицерни кимдир ерга парчин қилди. Назармат, Жўрлар баланд сайрайди.*

Ер парчин (ерпарчин) бўлиб ётмоқ Қи-мирлашга ҳоли бўлмай ётмоқ.

3 шв. Тақа, нағал. *Отамнинг қўлида бир от турибди, Оёғига темир парчин урибди. «Алпомиш».*

ПАРЧИНЛАМОҚ 1 Металл ва ш.к. материалларни парчинмихлар билан ажралмас қериб бириктирмоқ, маҳкамламоқ; умуман маҳкамлаб қўймоқ, бириктирмоқ. *Эшикни парчинлаб ташлади. ■ Саидийни факультетга парчинлаган катта мих – Муниسخон. А. Қаҳҳор, Сароб*

2 кўчма Қапиштириб, ёпиштириб юбормоқ, эзиб ташламоқ, дабдала, ер билан яқсон қилмоқ, парчин қилмоқ. *Мезбоннинг ўзидек содда ва кенг феълони ҳукми унинг қатъиятию баландпарвоз хаёлларини парчинлаб ташлади. «Ёшлик».*

ПАРЧИНМИХ Нарсаларни бириктиргач, учли томони ялпоқлаб қўйиладиган, тана ва каллақдан иборат деталь; михпарчин.

ПАРҚ с.т. қ. **фарқ** II. *Ҳар икки-уч кунда ёғли қатиқ билан ювиб, майин тишли тароқда гоҳ орқага, гоҳ ён томонга қайириб тараб, чаккадан парқ очарди. Н. Аминов, Ёлғончи фаришталар.*

ПАРҚИОН фольк. Отнинг қўлтиғи, қўлтиқ (афсонавий «учар» отда қанот ўрнашган жой). *Шакарбекнинг минган оти Ҳар тарафга олиб қочди, Парқинидан кўпик сочди. «Ширин билан Шакар».*

ПАРҚУ [ф. پرقو – оққуш пари, пати] сфт. 1 Оққушнинг пари билан тўлдирилган (ёстиқ, тўшак ҳақида). *Парқу ёстиқ. ■ Шакархон гўё кириб келаётгандек, парқу болишларга ёнбошлаганича.. тоқиларига солинган ўймакор гулларга разм ташлаётгандек.. Х. Тўхтабоев, Йиллар ва йўллар.*

2 от Пар солиб тикилган болиш ёки тўшак; пар ёстиқ. *Сунабон туркман гилам, кўрна-тўшаклар қатма-қат, Ултириб сўзлашгани ёнбошда парқу ҳам шинам. С. Абдулла. Утирдилар бари, ёнбошда парқу: Бошин қўйса, кишини элтар уйқу. М. Алавия. Сарҳовузнинг тўрт ёғи шоҳсуна эди.. тўрт ёғига каравотлар қўйилган, парқу тўшалган, ёстиқ қўйилган, ётмоққа ажойиб салқин жой эди. «Фольклор».*

2 кўчма Булутлар. *Ой сузар оромижон Парқуларни оралаб, Нурлар ўйнар беармон, Деворларни мўралаб. А. Суюн, Замин тақдири.*

ПАРҲЕЗ [ф. پرهيز – нафсини тийиш, сақланиш, сабр; мўътадиллик] 1 сфт. Сог-

лом кишилар ҳамда беморларга мўлжалланган овқат рационни ва овқатланиш режими. *Парҳез овқатларнинг аҳамияти. Парҳез овқат ейдиган кишилар учун мослаштирилган ошхона.*

2 *от* Соғлиққа тўғри келмайдиган овқатлардан ўзини тийиш ва унинг тартиби. *-Бахузур, — деди Яхшибоев кўксига қўлини босиб, — мен парҳездаман, Муяссархон. М. М. Дўст, Лолазор.*

Парҳез қилмоқ 1) соғлиғига тўғри келмайдиган овқатдан ўзини тиймоқ. *Чунончи, ёғлиқ гўшт билан қайнатилган сабзи юрактомир ва ошқозон-ичак касалликларида парҳез қилинади.* К. Маҳмуров, Қизикарли пазандалик; 2) *кўчма* ҳазар қилмоқ, жирканмоқ, йирганмоқ. *Бу киши ҳеч нарсадан парҳез қилмайди.*

ПАРҲЕЗДОР [ф. *پرهيزدار* — парҳез қилувчи, парҳездаги] Парҳез билан овқатланадиган, парҳездаги киши. *Парҳездорлар ошхонаси. Парҳездорларга текин талон берилади.*

ПАРҲЕЗКОР [ф. *پرهيزكار* — парҳез қилувчи] *эск.* Ҳаёт лаззатларидан, айш-ишрат, майшатдан ўзини тиювчи; тақводор. [Мас-тура:] *Ҳа, нима бу, жаям парҳезкор бўлиб кетиб, уйгача паранжилик бўлиб қолиб-сизларми? Ҳамза, Паранжи сирлари.*

ПАРҲЕЗЛИ 1 Парҳезга оид, парҳездорлар учун белгиланган. *Парҳезли овқат.*

2 *айн. парҳездор.* *Парҳезли бемор.* ■ *Бу ерда ёвгон шўрва ичадиган парҳезлилар йўқ. Шухрат, Шинелли йиллар.*

ПАС I [фр. *passé* — (ўйинни) ўтказиб юбораман] Карта ўйинида: ўйиннинг айнаи бир даврасида (карта айланишида) фаол қатнашишдан воз кечиш ёки мағлубиятни тан олиш.

ПАС II [ингл. *pass* — узатмоқ, оширмақ] *спорт.* Баъзи спорт ўйинларида бир ўйинчининг ўз шериги (жамоадоши)га тўп ёки шайбани узатиши.

ПАСАЙМОҚ 1 Баландлиги нисбатан камайиб қолмоқ, чўкмоқ, чўкиб қолмоқ. *Ер зичланиб, анча пасайди.* ■ *1989 йил Орол денгизининг сатҳи яна бир метрга пасайди.* «Фан ва турмуш». *Каналда сув пасайди, қишлоқ кўчалари, пахтазор пайкаллари селгиб қолди.* Ў. Ҳошимов, Қалбингга қулоқ сол.

2 Камаймоқ, кучсизланмоқ, қайтмоқ (ҳодисаларнинг кучи, шиддати, даражаси,

миқдори ва ш.к. ҳақида). *Оғриғим пасайди. Қуёш ҳарорати ҳали пасайгани йўқ. Шамол анча пасайди. Боланинг иссиғи пасаймади. Радионинг овози пасайиб қолди.* ■ *Йўлдошевнинг йиғиси борган сари пасайиб, ниҳоят.. хўрсина-хўрсина жим бўлди.* Н. Сафаров, Жанговар саҳифалар. *Унинг вужудини қамраб олган ўт аста-секин пасайиб, кўнгли тобора совий бошлади.* Ҳ. Фулом, Машғал.

3 Юқори амалдан пастроқ амалга тушиб қолмоқ. *Мартабаси пасайди.*

4 *кўчма* Кибру ҳавоси йўқолиб, шахти қайтиб, эпақага келиб қолмоқ, ҳовуридан тушмоқ. *Бир оз пасайинг. У анча пасайиб қолди.*

Попуги пасаймоқ Шаштидан қайтмоқ, ҳовуридан тушмоқ, бўшашиб қолмоқ. *Даввогарнинг попуғи пасайди.*

ПАСПОРТ [фр. *passport* < *итал.* *passa-* porto — портга кириш ёки у орқали ўтиш учун рухсатнома] 1 Муайян давлат фуқароси эканлигини ва эгасининг шахсини кўрсатувчи ва тасдиқловчи асосий ҳужжат. *Муддатсиз паспорт. Паспорт олмақ.* ■ *-Паспортингизни беринг, — деди [ҳодим] тортмасидан қандайдир қоғозни оларкан.* Х. Султонов, Онамнинг юрти. *Паспорт ёзиш идоралари ходимларининг тил билмаслиги ҳам қанчадан-қанча «кашифёт»ларни келтириб чиқармоқда.* «Муштум».

Паспорт тизими Аҳолини ҳисобга олиш ва унинг кўчиб юришини тартибга солиш қоидалари мажмуи. *Низомда.. паспорт тизими қоидаларини бузганлик учун жавобгарлик тартиблари ҳам белгилаб берилган.* «Ўзбекистон Республикаси» (энциклопедия).

2 Корхона, бино, технологик қурилма, асбоб-ускуна қисми, транспорт воситаси ва ш.к. ҳақидаги асосий маълумотлар қайд этилган ҳужжат, гувоҳнома. *Автомобиль паспорти. Телевизор паспорти. Магнитофон паспорти.*

ПАССАЖ [фр. *passage* — ўтиш жойи, йўл] 1 Икки томонида қатор савдо дўконлари жойлашган ёпиқ бино, раста.

2 Бир хил мол-товар сотиладиган катта магазин. *Китоблар пассажи.*

3 Мусиқада: баланд пардадан паст пардага ёки, аксинча, паст пардадан баланд пардага изчил ва тез ўтиб ижро этишдаги тон (товуш)лар изчилиги.

ПАССАЖИР [фр. *passager* — ўтувчи, борувчи] Поезд, самолёт, пароход каби транспорт воситаларида уларнинг бошқарувчиси сифатида эмас, балки мижози сифатида борувчи, қатновчи киши. *Пассажирларга хизмат кўрсатиш.* ■ *Шу пайтда олдинда кетаётган пассажир ташийбган автобус тўхтади.* С. Зуннуова, Олов. *Пассажир поезда гуруллаб ўтиб кетди.* С. Аҳмад, Уфқ.

ПАССАТ [нем. *Passat* < голл. *passaat*] геогр. Тропик кенгликларда океанлар узра эсиб турадиган барқарор шамол, ҳаво оқими.

ПАССИВ I [лот. *passivus* — ҳаракатсиз] бухг. 1 Корхона ва ташкилотларнинг барча қарзлари ва мажбуриятлари.

2 Бухгалтерия балансининг ўнг томони: корхона ва ташкилотларнинг мансублиги ва мақсадига кўра гуруҳланган маблағларининг (ўз захиралари, бошқа муассасалардан олинган қарзлар) ҳосил бўлиш манбаларини ифодалайди; *зид. актив I.*

ПАССИВ II [лот. *passivus* — суст, сусткаш; лоқайд, иродасиз; мажҳул] Атрофдаги нарса ва ҳодисаларга, кишиларга нисбатан бефарқ, лоқайд қарайдиган; ғайратсиз, фаолиятсиз, шижоатсиз; *зид. актив II, фаол.* *Пассив киши. Ишга юзаки, пассив қараш.* ■ *Мунисдаги норозилик ва пассив исёнларнинг ўзанлари ва шохобчалари муаллифнинг шахсий ҳамда ижтимоий ҳаёти билан боғлиқдир.* «УТА».

ПАССИВЛАШМОҚ Фаолияти сустлашмоқ, пассив, лоқайд бўлиб қолмоқ.

ПАССИВЛИК Нофаоллик, сусткашлик; лоқайдлик. *Агар кимдир ўзини сипороқ тутиб, гапларини ўйлаб, шошмай сўзласа, бундай одамларни юрагида ўти йўқ, деб пассивликка йўядилар.* Шукрулло, Жавоҳирлар сандиғи.

ПАСТ [ф. *پست* — бўйи қисқа, пакана, унча баланд бўлмаган; пасткаш; жирканч] 1 Юқори томон ўлчами, қадди, бўйи унча баланд бўлмаган, баландлиги, бўйи нисбатан қисқа; пакана, пастак. *Паст девор. Паст бўйли дарахт. Бўйи паст одам.* ■ *Боғнинг атрофи эски, паст, лекин ямалиб, ясқалиб бутунланган деворлар билан ўралган.* Ойбек, Танланган асарлар. *Шу заҳоти ҳовлида паст бўйли йигит пайдо бўлди.* «Шарқ юлдузи».

2 Унча чуқур бўлмаган, саёз. *Паст дарё.*

3 Миқдори, даражаси, нархи унча катта, баланд бўлмаган, нисбатан кам, оз, куйи.

Нархи паст мол. Паст маош олиб ишламоқ. ■ *Бунақа ювош хотинларга қайси эркак паст молни раво кўради.* Э. Самандар, Дарёсини йўқотган қирғоқ.

Тузи паст 1) тузи кам, керагидан оз туз солинган. *Овқатнинг тузи паст;* 2) кўчма мантиқ-мазмун, маъноси йўқ. *Намунча гапининг тузи паст.*

4 Шидлати, кучи, даражаси унча катта бўлмаган, нисбатан кучсиз, заиф (иссиқлик, босим кабилар ҳақида). *Паст температура.* ■ *Стрелка сал кўтарилди-ю, яна ҳоли келмай, пастга тушди.* Ортиқ, бензин қанча қолганини кўриб, ўзининг ҳам капалаги учиб кетди. М. Мансуров, Ёмби.

5 Унча баланд бўлмаган, бўш (овоз, нота кабилар ҳақида). *Кейин беғуноҳ кўзларини Алимардондан узмай, яна ўша паст, ўйчан оҳангда гапирди.* Ў. Ҳошимов, Қалбингга қулоқ сол. *У ўзини бир оз тутиб олдида, паст овозда давом этди: -Кўрқманг, институтдан ҳайдамаймиз. Лекин одам деган бунақа маҳмадона бўлмайди.* Ў. Ҳошимов, Қалбингга қулоқ сол.

6 Сифати унча яхши бўлмаган; оддий, жўн. *-Кўп хонали уйлар қуриш масаласига келсак, аввало, бизда сифат паст, — деди Ёдгор ўйлаиб.* — *Қўлингизни чўзсангиз, шифтга тегади.* Ў. Ҳошимов, Қалбингга қулоқ сол. *Лекин агар бирон ёш ёзувчи ўз имконияти даражасидан настроқ асар ёзса, уни дарров огоҳлантириб қўяр эдилар.* К. Қаҳҳорова, Чорак аср ҳамнафас.

7 Унчалик яхши эмас, юришмаган («бахт», «омад», «толе» каби сўзлар билан). *Ҳа, ўша толеи паст Жамила.* Ҳамза, Бой ила хизматчи.

8 Серёгин, ёмон, совуқ; *Бу йил ҳаво паст келди.* ■ *Барг етилмаяпти, баҳор паст келди.* А. Мухтор, Кумуш тола.

9 Келиб чиқиши, насл-насаби юқори табақаларга хос бўлмаган, асилзода эмас. [Қизнинг] *Юзида оз-моз чиройи бўлгани билан, ўзи таги паст. Сизнинг остонангизга сира арзимайди.* Ҳамза, Танланган асарлар. [Имом:] *Отасини кўндирамиз, унинг таги паст, жазоси пул-да.* Ж. Шарипов, Хоразм.

10 айн. **пасткаш.** Ҳаммага ҳам қилигингиз шуми ёки мени шундай паст хотин деб ўйладингизми? Ойдин, Икки кўзи шунда. *Паст кишига одамият нима қилсин.* А. Қодирий, Мехробдан чаён. *Денгиз тубида дур,*

устида чўп-хас. *Ўзгани паст билур кимки ўзи паст.* Ш. Шомухамедов, Одам борки.

Назари паст ёки паст назар айн. паст 10. *Ҳазрат гоҳо сезиб қоларди: кўпларга паст назар билан қарашни ҳам ўрганганди Қурбон.. Ш. Холмирзаев, Қил кўприк. Арзу ҳолинг эшитмас, Унда ишинг ҳеч битмас. Шунчалик назари паст — Нима берсанг олар у.* «Муштум».

11 Нисбатан қуйи ўрнашган жой; пастлик, чуқурлик. *Пастга тушмоқ.* ■ *Алимардон сирғаниб, соҳилдан авайлаб юриб, пастга тушиди.* Ў. Ҳошимов, Қалбингга қулоқ сол. *Олмани тутиб, орқасига қайтса, тут шохидан шошиб, пастга ёшгина бир қиз тушиб келяпти.* С. Зуннунова, Олов.

12 с.т. Ер, пол. *Челакни пастга қўй.*

13 Уйнинг кираверишидаги эшикка яқин жой; пойгак. *Ибодулла ҳам акасидан бир қадам пастга тиз чўка қолди.* Ҳ. Фулом, Машғал. *Этиги лой бўлганидан, Йўлчи танчага ўтирмай, наमतнинг учини қайириб, пастроққа чўккалади.* Ойбек, Танланган асарлар.

Авжи паст 1) ўсиши, ривожланиши орқада қолган, унча яхши ўсмаган, ривожланмаган. *Авжи паст экинлар;* 2) *кўчма кайфияти бузуқ, ҳар вақтдагидан кўра ҳафсала си йўқроқ, суст. Бугун дўстимнинг авжи пастроқ кўринади. Ақли (ёки зеҳни, эси) паст* Ақли калта, ақли кўп нарсага етмайдиган, фикрлаш қобилияти нормал эмас. *-Эси паст, — деди Дехқонбой аканинг энсаси қотиб.* С. Зуннунова, Олов. *Ақлинг паст, миянг ёғочдан, қалбинг темирдан!* Х. Тўхтабоев, Ширин қовунлар мамлақати. *Сен зеҳни паст, безътиқод одам экансан.* «Луқмони Ҳаким». **Машқи паст айн. авжи паст 2. Паст келмоқ** Бўш келмоқ, ён бермоқ (баҳсда, жанжалда). *Саҳийлик, меҳмондўстликда андижонликлар Ҳотамдан ўтса ўтардики, амо паст келмас эди.* Шукрулло, Сайланма. **Паст тушмоқ** 1) жаҳлдан, ҳовуридан тушмоқ. *[Ботобой ота] Ўзининг бу ерга нима мақсадда келгани ёдига тушиди шеклли: -Бир санамас, мен ҳам дор тагидан қочганлар неварасиман, — деди бир поғона паст тушиб.* «Ёшлик»; 2) *хўрланмоқ, ўзини пастга урмоқ. Мен ҳали ҳасратимни, дардимни келиб-келиб сизларга айтдимми? Мен ҳали келиб-келиб одамгарчиликни, диёнатни, номусни тупроқ билан тенг қилган сиздай разил хо-*

тинфуруш, қўшмачилар олдида шунчалик паст тушдимми? Ҳамза, Бой ила хизматчи. Пастга урмоқ Камситмоқ, ерга урмоқ; *хўрламоқ. Сизни ҳеч ким ҳозиргидай пастга урмайди. У ёғидан ҳам ташвиш тортиб юрмай қўя қолинг. Тўйни мана шу ерда ўтказамиз.* К. Яшин, Ҳамза. *Бировнинг уйига бостириб кирибки, шунчалик пасткашлик қилишяптими, қўйинг, гаплашманг, нима қиласиз ўзингизни пастга уриб, жон ўелим.* М. Исмоилий, Фарғона т. о. **Қўли паст** 1) иши ўнгидан келмаган, омад кулиб боқмаган; 2) ютқизиш ҳолига келган, ютқизиш олдида турган.

ПАСТА [итал. pasta — хамир] Тиббиёт, косметика, пазандалик, рассомлик соҳаларида қўлланадиган турли хил хамирсимон моддаларнинг умумий номи. *Тиш пастаси. Совун пастаси. Антисептик паста. Бўёқ пастаси.* ■ *Биринчи қилган ишим — юзимни икки-уч қайта совунлаб ювиб, оғзимни чайиб ташладим. Уйга бориб, тиш пастаси билан ҳам ювдим.* «Ёшлик».

ПАСТАК [ф. پستک — «паст» с. нинг кичр.] с.т. Бўйи унчалик балинд бўлмаган, паст, пакана. *Пастак девор. Пастак уй.* ■ *Умид хаёллар оғушида маст эди. У жимжит хонада деразадан пастак томларга, этдабетда қўққайиб турган мўриларга тикилганича, хаёл наҳрида сузарди.* Мирмуҳсин, Умид. *Пастак уйларнинг лойсувоқ томлари яхшилаб куралган, икки томондан тушган қор тор кўчани тўлдириб юборган, чеккада ингичка сўкмоқ йўл қолган эди.* Ў. Ҳошимов, Қалбингга қулоқ сол.

ПАСТАРИН [ф. پستارين — жуда паст] эск. кт. **1** Сифати, даражаси, мавқеи унчалик балинд бўлмаган; оддий. *Пастарин мол.*

2 Пасткаш одамларга хос; тубан, разил. *Азизбек.. қамалнинг иккинчи куни ўрда томига чиқди, энг кейинги, ҳам энг пастарин чорани кўрмакчи эди бу хоқон.* А. Қодирӣ, Ўтган кунлар. *Нодон, пастарин одамлар ушбу замондаги баъзи арбоби ҳукуматларимиздан шикоят қилиб айтурларким.. А. Қодирӣ, Кичик асарлар.*

ПАСТ-БАЛАНД 1 Бўйи, балиндлиги ҳар хил, ҳар хил балиндликдаги. *Паст-балинд болалар.* ■ *Уфқни ўз гавдаси билан тўсган паст-балинд тоғлар қоп-қорайиб, ридо кийгандек силлиқ кўринарди.* Шуҳрат, Шинелли йиллар.

2 Турли табақалаги одамлар, катта-кичиклар. [*Оқилова:*] *Сиз маҳалланинг паст-баландини биласиз.* И. Қаландаров, Шохидамас, баргида.

3 Пастлик ва баландликлардан иборат; ўйдим-чуқур, нотекис. *Паст-баланд йўл.* ■ *Мана, ўшандан бери бир соатча вақт ўтди, шаҳар боғлари орқада қолиб, олдинда куйган калладай тап-тақир дашт, паст-баланд адирлар бошланди.* О. Ёқубов, Эр бошига иш тушса. *Улар тор кўчани чангитиб, гурс-гурс қадам ташлаб ўтишди, паст-баланд тепаликлар этагида тўхташди.* С. Сиёев, Ёруғлик.

3 Турли икир-чикир, майда-чуйда, борди-келдилардан иборат бўлган. *Паст-баланд гаплар.* ■ *Ҳаммада бўладигандек, тирикчилик важдан баъзан ўртамизда паст-баланд гаплар ҳам ўтган.* К. Яшин, Ҳамза.

ПАСТ-БАЛАНДЛИК Паст-баланд, нотекис жой. *Улар паст-баландликлардан туртиниб-суртиниб ошиб, қурилишдан узоқландилар.* Ойбек, О. в. шабадалар. *Ҳаёт асфальтга ўхшаган текис эмас, паст-баландликдан иборат.* К. Қаҳҳорова, Чорак аср ҳамнафас.

ПАСТЕРЛАШ, пастеризация [*фр. Pasteur* – айни жараённи таклиф этган француз олими Луи Пастер номидан] *махс. ким.* Суюқликлар ва озиқ-овқат маҳсулотлари (мас., вино, сут)даги микроб ва замбуруғларни муайян муддат муайян ҳароратда қиздириш билан йўқотиш усули.

ПАСТКАШ [*ф. پستکش* – пастлик, разиллик қилувчи] **1** Арзимаган нарсанинг ҳам юзига борадиган, арзимас нарсаларга ҳам ўзини урадиган, назари паст. *Биздан сўнг яна учта-тўртта дўкондор кириб келади: ориқтирриқ, зиқна, кўпчилиги пасткаш одамлар.* Ойбек, Болалик. *Аёлларни фақат улуг одамлар ҳурмат қилади. Уларни фақат пасткаш одам хўрлайди.* Газетадан.

2 сўк. Разил, ярамас. *Шунақа бибурд, пасткашмидинг, Нейматжон, илон бўлиб авраган экансан-ку мени.* А. Муҳиддин, Куёв қочди.

ПАСТКАШЛАШМОҚ Пасткаш, назари паст бўла бормоқ, разиллашмоқ.

ПАСТКАШЛИК Разиллик, ярамаслик, назари пастлик. *Бир умр эсимдан чиқаролмасам ҳам, бир умр ўтда қовурилсам ҳам, бундай пасткашлик қилмайман.* С. Зуннуно-

ва, Олов. *Ҳафиза Умиднинг садоқатини бир неча бор синаб кўрган. Бу йигитдан номаъқулчилик – пасткашлик чиқмайди.* Мирмуҳсин, Умид.

ПАСТКИ 1 Пастда ўрнашган, жойлашган, нисбатан қуйидаги, пастдаги. *Бинонинг пастки қавати. Дарахтнинг пастки шохлари. Пастки жағ. Пастки лаб.* ■ *Сихларда кабоб келгач, Бозоров жавоннинг пастки тортмасини очиб, бир шиша беш юлдузли коньяк олди.* И. Раҳим, Чин муҳаббат. *Тоҳир пастки қаватдаги очиқ эшикларга бош тикиб қаради.* П. Қодиров, Юлдузли тунлар.

2 Куйи, бошланғич, биринчи босқичдаги. *Пастки курс.* ■ *Қори пастки синфларни ўқитар ва ҳар ёз ўқитувчилар қайта тайёрлов курсида ўқиб, билимини ошириб турарди.* П. Турсун, Ўқитувчи.

ПАСТЛАМОҚ 1 Пастроқ тушмоқ, пастга (томон) ҳаракат қилмоқ, пасаймоқ. *Самолёт пастлаб учиб ўтди.* ■ *Ҳатто бир куни Мирвали тоғ йўлида кета туриб, пастлаб учиб юрган вертолётни қирқма милтиғи билан отиб туширмоқчи бўлиб чоғланганди-ю, катта жанжалга айланишини ўйлаб, бу шахтидан қайтганди.* С. Аҳмад, Жимжитлик.

2 кўчма Паст тушиб, пасайиб кетмоқ. *Иш суръати пастлаб кетди. У сўнги йилларда пастлаб кетди.*

3 кўчма Пасайтирмоқ, паст қилмоқ. -*Э, шоирлар бор бўлсин. Халқнинг дилидаги гапни топиб айтишади барака топқурлар, – деди кейин овозини пастлаб, Ҳамзага шивирлади.* К. Яшин. Ҳамза.

ПАСТЛАШМОҚ 1 Пастламоқ фл. ўзл. н. *Унинг авжи анча пастлашди. Ҳаво пастлашди.*

2 айн. пасткашлашмоқ.

ПАСТЛИК 1 айн. пасткашлик. -*Бу одамгарчиликдан, виждондан эмас, бу пастлик, – деди Элмурод.* П. Турсун, Ўқитувчи.

2 Паст ер, ўра, чуқурлик. *Канизак пастликка тушиб кетганида, орқасига бир қайрилиб қаради.* А. Қаҳҳор, Қўшчинор чироқлари. *Улар сув ёқалаб бориб, пастликка тушдилар.* Шухрат, Шинелли йиллар. *Йўлчи отни елдириб, тепаликда кетаркан, орқада қолган пастликдаги боққа беихтиёр қаради.* Ойбек, Танланган асарлар.

ПАСТТЕКИСЛИК геогр. Океан сатҳидан 200 метргача баланд бўлган қуруқлик.

ПАСТҚАМ 1 Киши назари тушмайди-ган; одамлар кам бўладиган; хивват, одамдан холи жой, овлоқ. *Ҳар замон-ҳар замонда обкаши кишиларнинг пастқам кўчаларда ғизиллаб кетаётганини учратиш мумкин эди. Мирмуҳсин, Тунги чақмоқлар. Ҳозир дод соламан, бошимга одам йиғиб, мелиса мени пастқамга опкелиб, пора сўрапти, дейман. С. Аҳмад, Уфқ. Ҳозга қараб кампир ўғли жўнади. Пастқамдан паналаб кетиб боради. «Алпомиш».*

2 шв. Унча баланд бўлмаган, пастак, паст ва кўримсиз (уй ёки бино ҳақида). *Уша [ўттизинчи] йиллардаги уйлар пастқам, диққинафас гувала уй, сомон томлар эди. Н. Сафаров, Оловли излар. Ўз шеърининг пастқам уйларда жаранлаганидан Аваз бениҳоя хурсанд, бу нарса унга яна илҳом бағишлар эди. Ж. Шарипов, Хоразм.*

3 Теварак-атрофга нисбатан паст, чуқур. *Пастқам жар лабида шумтолу анор Ҳамда бир итбурун ўсарди қатор. Я. Қурбон.*

ПАСТҚАМЛИК 1 айн. **пастқам 2, 3.** *Пастқамликдаги уйлар.*

2 Кишиларнинг назаридан узоқ, пастқам жой. *Сидиқжон Баҳрободга кечки пайт, пастқамликдан, қалин дарахтзор ва адир оралиқларидан бошланган шом қоронғуси борлиққа тарқала бошлаганда кириб келди. А. Қаҳҳор, Кўшчинор чироқлари.*

ПАСХА [юн. pascha < қад. ях. песах – ўтмоқ] **дин. 1** Христиан динининг православ мазҳабида шу диннинг асосчиси Исонинг тирилишига бағишланган байрам.

2 Яҳудийларда: баҳорги диний байрам (яҳудийларнинг Фиръавн асоратидан қутулиб чиқишига бағишланади).

ПАТ 1 1 Парранданинг дум ва қанотларини ташкил қилган, мугузсимон узун найчанинг икки ёнида икки қатор бўлиб ўсиб чиқадиغان парлардан иборат аъзоси. *Товуқ пати. ■ Саид Амин сўйилган ўнчача беданани олдига уйиб қўйиб, патларини юлмоқда. М. Исмоилий, Фарғона т. о. Товус патидан ясалган елпигичи билан чиройли юзини елтиб-елтиб қўяди. Х. Тўхтабоев, Ширин қовунлар мамлакатаи.*

2 Мато, гилам ва ш.к. нинг юзини қоплаган сунъий тук. *Уй ўртасидаги сандал устида исқирт кўрпа, ерда пати тўзиб кетган эски гилам, кичик бир нолча.. тўшалган. Н. Сафаров, Оловли излар. Чўққи*

соқол, бошига пати тўзиб кетган сурмаранг духоба дўппи кийган, кўзойнакли, олтмиш ёшлардаги чол велосипед миниб келиб қолди. С. Аҳмад, Чўл бургути.

Пати тўзимок **1)** тўзондек ҳар ён сочилмоқ, тўзимок. *Улар [самолётлар].. орқасидан тўзонли из қолдириб, ўқдай учиб борар, момиқ булутларнинг патини тўзитиб, олға парвоз этар, аммо овози эшитилмас эди. Ў. Ҳошимов, Қалбинга қулоқ сол; 2) кўча жаҳди чиқмоқ, салга тутақиб кетмоқ. Асарингни бугун босимаса, эртага босишади. Назирийнинг битта таънасига дош беролмай, патинг тўзиб кетди-я! Эҳ, афсус! Шу ўринда жиндак худбинлик қилдинг. К. Яшин, Ҳамза. Патини юлмоқ Бор-йўгини олиб қўймоқ, шилмоқ. Қитиқ патига тегмоқ Нозик жойини топиб, жаҳдини чиқармоқ, нафсониятига тегмоқ. Айниқса, Фафур Фуломнинг гаплари баъзиларнинг қитиқ патига тегиб, ўйлантириб қўйди. Шукрулло, Жавоҳирлар сандиғи. Бир мажлисда ҳам Шариф Рустамович бировларнинг қитиқ патига тегадиган сўзларни айтганди. О. Мухторов, Этилган бош. Қитиқ патини юлмоқ Нозик жойини топиб, тилини қисиб, мулойим қилиб қўймоқ. [Берди:] Мен буларининг қитиқ патини юлиб, ром қилиб олмоқчиман! А. Қодирий, Обид кетмон. Қитиқ патини ўлдирмақ айн. қитиқ патини юлмоқ. Бунинг қитиқ патини ўлдириб, ром қилиб олишим керак, деган фикр ялт этиб ўтди унинг миясидан. К. Яшин, Ҳамза.*

ПАТ II [фр. pat – топшириш] Шахматда: ўйин дуранг ҳисобланадиган ҳолатларнинг бири, пот. *Ўйин пат бўлди.*

ПАТАК 1 *от* Оёқ кийими ичита қалин ва юмшоқ мато (мас., кигиз)дан қирқиб солинадиган тўшаме. *Кавушим патагин қалин сол, Оёғимни қабартмасин. «Фольклор».*

Патагига қурт тушди айн. пайтавасига қурт тушди қ. пайтава.

2 сфм. Чигиллашиб, бир-бирига ёпишиб кетган (соч, соқол, юнг кабилар ҳақида). *Ўнг қўлини аста узатиб, унинг патак сочларини силади. А. Мухтор, Туғилиш. Қирқ ёшлардаги патак соқол, суяги бузуқ, бадбашара киши кирди. С. Сиёев, Ёруғлик.*

Патак илдиз Ўйғун илдиздан ўсиб чиққан майда зич илдизчалар.

ПАТАКЛАШМОҚ Чигиллашиб, бир-бирига ёпишиб, киришиб кетмоқ, патак

ҳолга келмоқ (қ. **патак 2**). *Қиш бўйи қўрада ётавериб, доғ-дўғ жуналари патаклашган қўйлар.. «Ёшлик».*

ПАТАРАТ с.т. Пароканда, тартибсиз, алғов-далғов. *Янги кўчиб келган кезлари бу ерлар бир патарат қурилиш майдони эди. Э. Аъзам, Кечикаётган одам.*

Патарат топмоқ с.т. Парокандаликка учраб маҳв бўлмоқ, йўқ бўлиб кетмоқ. *Сарсон-саргардон бўлиб ўлиб кетган хотинимнинг умрини нима билан тўлайсан? Йўқ бўлиб, тўзиб, патарат топиб кетган оиламга қанча ҳақ тўлайсан? С. Аҳмад, Жимжитлик. Омбор, сушилка қуриш учун берилган материалларни ўз ўрнида фойдаланмай, патарат топтириб, хижолат бўлиб юрган бетайин раисларни ҳам биламиз. А. Муҳиддин, Ошаналар.*

ПАТЕНТ [лот. patens, patentis – аниқ, очиқ] **1** Ихтироцига Давлат патент идораси томонидан бериладиган, унинг ўз ихтиросига муаллифлиги ва мутлақ ҳуқуқини тасдиқловчи ҳужжат. *«Амиридин» деган препарати учун АҚШ, Буюк Британия, Швейцарияда патент олинди. «Фан ва турмуш». Таниқли ботаник олим Қаҳҳор Ҳоҷиматов бошчилигида ушбу шифобахи воситани яратган тадқиқотчилар эса Давлат патент идорасидан патент олишди. «Фан ва турмуш». Маъданларни қайта ишлашга оид ишлаб чиқилган технологияларга патентлар олинди. Газетадан.*

2 Савдо-сотиқ ёки бирор касб-ҳунар билан шуғулланиш учун рухсат берилганлиги ҳақидаги ҳужжат. *Илгариги катта дўконини ёпиб, патентини топширди. А. Қаҳҳор, Сароб. Ҳожатбарорликда қадамлари ростлашиб, хуусий меҳнат фаолиятини юргизиш учун патент олди. Газетадан. Уша вақтлари патент олиб, ўзимнинг шахсий «Москвич»имда киракашлик қилар эдим. Газетадан.*

ПАТЕНТЛАНМОҚ Патентга эга бўлмоқ, патент олмақ. *Бундай қайта ишлаш усули Тошкент Ирригация ва қишлоқ хўжалигини механизмлаштириш институтининг доценти Бахтиёр Шоймардонов томонидан патентланди. «Фан ва турмуш».*

ПАТЕФОН [фр. Pathe (Пате) – фирма номи + юн. phone – товуш] эск. Грамофон пластинкасига ёзиб олинган мусиқа, ашула,

нутқ кабиларни қайта эшиттириш учун хизмат қиладиган аппарат. *Патефон пластинкаси. Патефон қўймоқ. Патефон эшитмоқ. ■ Лутфиниса туриб, патефон мембранасини кўтариб қўйди. С. Аҳмад, Уфқ. Муяссар ўрнидан туриб, патефонга пластинка қўйиб келди. Бирор ўн минут жимгина тамадди қилдилар. М. М. Дўст, Лолазор.*

ПАТИЛА [а. فتلہ – бурам, ўрам, ҳалқа; жингала(к), гажақ; ип, тола] Ўрилмаган, шокила (соч, гажим, попук кабилар ҳақида). *Зубайда онасининг заҳил рангига, беш-ўнта оқ оралаган патила сочларига, лекин ҳали ҳам пистадек оғзига.. тикилганча, миқ этмай ўтираверди. К. Яшин, Ҳамза. [Ғозидин] Уй олдидаги йўлкада юнун кийинган, патила соч бир йигит қорга бурканиб, қорни ғирчиллатганича, у ёқ-бу ёққа тажсанг одимлаётганини кўрди. О. Мухторов, Эгилган бош.*

ПАТИЛА-ПАТИЛА Ўрилмаган, тарқоқ, шокила-шокила, жингалак. *Рустам уни дарров таниди: Катя! Ўзи. Қўнғир сочлари патила-патила, мовий кўзларида қуёш ёнади. В. Ғофуров, Вафодор. Унинг [Жасур] ёнига боргиси, патила-патила сочларини силаб, бўртиб турган мушақларини.. ушлаб кўргиси келди. Н. Қиличев, Ёронгул.*

ПАТИЛЛАМОҚ «Пат-пат» овоз чиқармоқ, патирламоқ. *Ора-сира мотоцикл патиллаб ўтиб қолади-да, чўл бағрига ўқдек санчилиб, бир зумда йўқ бўлиб кетади. С. Аҳмад, Чўл бургути. Хотин чарс беданадай патиллаб, қочмоқчи бўлганида, юзини карнайгулнинг поясига уриб олди. А. Қаҳҳор, Майиз емаган хотин.*

ПАТИНЖОН шв. Потинжон.

ПАТИР **1** [а. فطير – оширилмаган, қўптирилмаган (нон)] Кўпинча ёғ аралаштирилган, оширилмаган хамирдан чекичлаб тайёрланадиган юпқароқ нон. *Шўрвага патир тўғрамоқ. ■ [Жондор] Хамири нуқул қаймоққа қорилиб, оғизда эриб кетувчи оппоқ патир нонларни.. ушатиб ташлади. Ойбек, Танланган асарлар. У [Паҳлавон] ёш шоирнинг ғамини ёб, патир нон, қатлама, шарбат олиб келган эди. М. Осим, Карвон йўлларида.*

Патир ушатиш этн. Унашиш, унаштириш маросими. *Хадича келин Шакархоннинг сочини ўриб туриб: -Ҳа, нима гап, яна патир ушатиш бўляптими? – деди. Ойдин, Ўзи*

монанд. **Хамир(нинг) учидан патир** Катта нарсанинг, ишнинг бошла(н)маси, дастлабки кичик бир қисми, улуши. Бу ўтириш хамир учидан патир, катта зиёфат кейин бўлади. ■ Бу хамирнинг учидан патир, ўз қўлим билан эккан ҳандалакнинг тўнғич ҳосили. Ш. Рашидов, Бўрондан кучли.

ПАТИР II тақл. с. Кескин қанот қоқиш, тез айланиш ва ш.к. ҳаракат ва улардан чиқадиган товуш. *Каптар патир этиб қўлдан чиқди.*

ПАТИРЛАМОҚ I «Патир-патир» овоз чиқармоқ, патилламоқ. *Ўрмон шитирлаб қолди, Барглар патирлаб қолди.* Ҳ. Олимжон. *Терак шохларидаги каптарлар уни танибми, патирлаб, осмону фалакка кўтарилди.* А. Кўчимов, Ҳалқа.

2 Тез ва кетма-кет пайдо бўлмоқ. *Тиниқ кўк юзида юлдузлар патирлай бошлади.*

ПАТИР-ПАТИР Патир II с. тақр. *Қушлар патир-патир учиб кетди.* ■ *Метин, беллар патир-патир Ишлайди канал ичинда.* «Фольклор». *Фаранг милтиқ патир-патир Отилди майдон ичинда.* «Равшан».

ПАТИР-ПУТУР тақл. с. Тез, кескин ҳаракат ва ундан ҳосил бўладиган товуш. *Хўрозларнинг патир-путури. Патир-путур отишма.* ■ *Кунлардан бир кун қош қорайганда.. каптархона ичи бирдан тўс-тўполон, патир-путур бўлиб қолди.* Мирмуҳсин, Чинкиш.

Патир-путур ишламоқ Тез, апил-тапил, шоша-пиша ишламоқ.

ПАТИССОН [фр. patisson – кулча қовоқ < rate – пирог] Қовоқдошлар оиласига мансуб бир йиллик сабзавот ўсимлиги. *Патиссон тузламоқ.*

ПАТЛИ I Пат билан қопланган, пати бор. *Кўркам патли қуш.*

2 Сунъий тук билан қопланган, тукли. *Патли мовут.* ■ *Паст бўйли, янги брезент этик, галифе шим, гимнастёрка кийган.. бир киши таклифни кутмай, патли гиламдан дадил келиб, қўлтиғидаги қора чарм напқасини стол четига қўйди.* С. Нуров, Нарвон. *Маликаҳон ҳеч нарса демади, лабини истиғно билан буриб, пахтасини хирмонга бўшатди, кейин юзи патли, сариқ шиппагини ечиб, қоқди.* Н. Аминов, Қаҳқаҳа.

ПАТНИС [р. поднос < подносить – олиб келмоқ] **I** Идиш-товоқ ёки бошқа бирор нарсани ташиш ёхуд нон, қанд-қурс, мевачева кабиларни солиб, дастурхонга қўйиш учун мўлжалланган, кенг, ясси, четлари сал қайрилган металл ёки пластмасса буюм. *Гулдор патнис.* ■ *Хилма-хил, ранг-баранг қимматбаҳо мева-чевалар билан лим тўла бўлган патнислар кетма-кет етказилиб турилади.* Ойбек, Танланган асарлар. *Фулломжон кулиб туриб, олдидаги бўш қовун косаларини патнисга солди.* М. Исмоилий, Фарғона т. о.

2 Меҳмонларнинг олдига қўйиш учун тузалган шундай идиш. *Унинг [Мирзакаримбойнинг] кампири патнис ва бир чойнак чой олиб чиқди.* Ойбек, Танланган асарлар. *Холдорхон дастурхонга патнис қўяр экан, энгашиб туриб гапирди.* С. Зуннунова, Олов.

Самовар патнис Самовар остига қўйиладиган патнис.

3 Духовкада пишириладиган нарса териб қўйиладиган ясси тунука. *Сомсаларни патнисга териб, духовкага қўймоқ.* ■ *Сомсаларни қизитилган тандирнинг жағига ёпиб ёки патнисга ёғланган духовкага қўйиб пиширасиз.* К. Маҳмудов, Ўзбек тансиқ таомлари.

ПАТО- [юн. pathos – дард-алам, қайғу; бахтсизлик, касаллик] Байналмилал ўзлашма қўшма сўзларнинг таркибий қисми бўлиб, шу сўзларнинг касаллик, дард, азобга алоқадорлигини билдиради (мас., *патология, патопсихология*).

ПАТОГЕНЕЗ [пато.. + юн. genesis – пайдо бўлиш, келиб чиқиш] *тиб.* Касаллик ва унинг айрим белгилари пайдо бўлиши ҳамда ривожланишидаги жараёнлар мажмуи ва уларни ўрганадиган соҳа.

ПАТОЛОГ Патология врачлари, мутахассиси.

ПАТОЛОГИК *тиб. I* Патологияга, касалликка оид. *Патологик анатомия. Патологик физиология.*

2 Меърдан ташқари, носоғ аъзога хос. *Патологик белгилар. Патологик ҳодиса.* ■ *Одам тишларида баъзи ноноормал ва патологик ўзгаришлар жуда аниқ билиниб туради.* «Фан ва турмуш». *Мен патологик жараён мияга боғлиқ эмаслигини аниқладим.* Н. Ёкубов, Жон.

ПАТОЛОГИЯ [пато.. + юн. logos – билим, тушунча] *тиб. I* Тиббиётнинг организмдаги касаллик жараёнлари ва ҳолатларини, касалликнинг пайдо бўлиш сабабларини ва оқибатини ўрганадиган соҳаси.

2 Меъёрдан четга чиқиш ҳолати, анормал тузилиш; анормаллик.

ПАТОПСИХОЛОГИЯ [пато.. + психология] Психологиянинг инсон бош миясининг зарарланиши ёки унинг етарли даражада ривожланмаганлиги натижасида келиб чиқадиган руҳий касалликларни ўрганадиган бўлими.

ПАТ-ПАТ тақл. с. Мотордан отилиб чиқаётган газнинг узиқ-узиқ товуши ҳақида. *Раёно идорага яқинлашар экан, бирдан пат-пат қилган мотор товуши жимликни бузди.* О. Ёқубов, Баҳор кунларидан бирида.

ПАТПАТЛАМОҚ «Пат-пат» овоз чиқармоқ. *Движок патпатлаб, тариллаб юбордию, Денов хурмосидай қизарган лампочкалар бирдан ёниб, стол устию бутун хона ичи ғайритабиий ёришиб кетди.* М. Мансуров, Ёмби.

ПАТРИАРХ [юн. patriarches < pater, pater – ота + archo – бошқараман] **1 тар.** Уруғчилик жамиятида уруғ бошлиғи.

2 Православ черковида: энг олий ҳуқуққа эга бўлган руҳоний ва унинг унвони; православ черкови бошлиғи.

ПАТРИАРХАЛ Патриархатга, оила бошлиғи сифатида эркаклар чекланмаган ҳокимиятга эга бўлган даврга оид. *Патриархал тузум. Патриархал муносабатлар.*

ПАТРИАРХАТ [юн. pater, pateros – ота + arche – ҳокимият] **1 тар.** Ибтидоий тузумнинг матриархатдан кейинги, оилада, хўжалик ва ижтимоий муносабатларда эркаклар ҳукмронлик қилган даври, оталик даври.

2 Патриарх қўл остидаги черков бошқаруви тизими.

ПАТРОН [фр. patron – қолип, андоза] **1** ҳарб. Гильзага бир бутун қилиб жойланган (отилиб чиқадиган) ўқ, порох заряди ва пистон (капсюль). *Милтиқ патрони. Пистолет патрони. Унта патрон жойланадиган магазинли автомат.* ■ *Қоровуллар қўлларидаги милтиқларни яна бир карра кўздан кечириб, эҳтиёт патронларни ҳозирладилар.* С. Айний, Қуллар. *Натижа ёмон бўлмади: булар ёрдамида учта пулемёт, ўттиздан ортқ патрон ўлжа олинди.* Н. Сафаров, Оловли излар.

2 тех. Токарлик ёки пармалаш станокларида станокнинг айланувчи қисмига ўрнатиладиган, ишлов бериладиган детални

ёки кесувчи асбобни сиқиб тутиб турадиган мослама. *Пармани патронга ўрнаштирамоқ.*

3 Электр лампочкаси бураб киритиладиган ва уни электр тармоғига улайдиган мослама. *Куйган патронни алмаштирамоқ.*

ПАТРОНАЖ [фр. patronage – ҳомийлик] Тиббий муассасалар томонидан ёш (ғўдак) болалар, ҳомиладор аёллар ва айрим беморларга уй шароитида тиббий ёрдам кўрсатиш тизими. *Айниқса, аҳолининг ижтимоий кам ҳимояланган қатламларига тиббий ёрдамни такомиллаштириш, самарали патронаж хизматини йўлга қўйишга катта эътибор берилди.* «Фан ва турмуш».

ПАТРОНТАШ [нем. Patronatsche – патрон халта] Милтиқ ва гўппонча ўқлари жойлаб олиб юриладиган махсус халта, ўқдон. *Лола югурганича ўтовига кириб, қозиқдан милтиқ, патронташни олиб чиқди.* Ё. Шукуров, Довюрак қиз. *Ўқ-дорилар ҳам етарли эканлиги кўриниб турарди: баъзилар катта патронташларини елкага осиб.. олган эдилар.* И. Раҳим, Чин муҳаббат.

ПАТРУЛЬ [фр. patrouille – қўриқчи, қоровул] Маълум худуднинг хавфсизлигини таъминлаш ва тартиб сақлаш учун қўйилган қуролли кишилар ёки ҳарбий самолёт, кема кабилар гуруҳи. *Қуролли патруль. Милиция патрули. Дружиначилар патрули.* ■ *Билагига қизил лента боғлаган патруль-матрос вокзалга яқин келган халқ тулқинини кузатар ва тартибга солиб турар эди.* Ғайратий, Унутилмас кунлар.

ПАТТА [ф. پتہ – талон; рухсат, рухсатнома; чек] с.т. **1** Билет; чек; талон. *Поезд паттаси. Бозор паттаси.* ■ *Борса, дугониси келмаган экан. Патта олиб, кино бошланар пайтигача уни бетоқат кутди.* Н. Қиличев. Чигирик. *Ота, «Ҳеч бўлмаса шу зиёлинамо одам патта йиртиб олади», деб ўйлаган эди. Йўқ, у йўлкира ҳам тўламай, зинага оёқ қўйиб тураверди.* С. Нуров, Нарвон.

2 Гувоҳнома, ҳужжат. -*Кувинг Маъмуржон билан загсинг никоҳ паттасини оласизлар, – деди Мамасаид.* П. Турсун, Ўқитувчи.

Паттасини қўлига бермоқ (ёки тутқазмоқ) Рухсатини бермоқ, бўшатмоқ, ҳайдамоқ, жўнатмоқ. *Фиди-биди қилса, паттаси ўша кун қўлига тутқазилади.* ■ *Раис-*

нинг паттасини қўлига бериб юборганимизга бу йил роса тўрт йил бўлди. Н. Сафаров, Катта карвон йўлда. **ПАТТАСИ (қўлига) тегди** Рухсат берилди, бўшлатилди, жунатилди.

ПАТТАЧИ с.т. Патта, билет, чек, талон сотувчи киши. -Бунга [трамвайга] тушиб, бир гашт қилардик, муллажириг йўқ. Осилсак, паттачидан калтак еймиз, — деди ўртоқларимиздан бири. Ойбек, Болалик. -Бозор дарвозаси олдида турган паттачининг олдига қовун билан тарвузни омонат қўйиб, ичкари кирдик, — деди Шум бола. Ф. Фулом, Шум бола. Бахтимга танишим — мош бозорининг паттачиси учраб қолди, сара мошдан анча арзонга бира тўла ўн килосини пакетга солиб берди. Газетадан.

ПАТТАЧИЛИК Патта сотиш билан шуғулланиш. -Олий маълумотли одам бозорда паттачилик қилгани уялмайсизми? — деб хижолат қилишди. Газетадан.

ПАУЗА [лот. pause < юн. pauses — тўхта-тиш, тугатиш] **1** Нутқ орасидаги, маълум иш жараёнидаги узилиш, тўхташ. Пауза чўзилиб кета бошлагандан кейин Гавҳар ўрнидан туриб, орқасига ўгирилди-да: -Ҳа, қани ким қайси мавзуга қизиқади? — деб сўради. П. Қодиров, Уч илдиш.

2 мус. Куй, ашула ўртасида муайян вақт узилиш, тўхташ ва унинг нотадаги белгиси.

ПАУПЕРИЗМ [лот. pauper — камбағал, мулксиз] иқт. Жамиятда ишсизлик, инфляция, кам даромад топиш, мулкий тенгсизлик билан боғлиқ бўлган оммавий қашшоқлик.

ПАФОС [юн. pathos — ҳис, завқ; эҳтирос] кт. Кўтаринки руҳ, жўшқинлик, завқшавқ. Пафос билан гапирмоқ. ■ Ҳамма теримда унумли меҳнат пафоси билан ишламоқда. И. Раҳим, Ҳаёт булоқлари. Шоир фикрларидаги етакчи концепция, бош пафос замондошларимизнинг ҳаётий позициясидан, ҳаёт фалсафасидан нур эмиши, айниқса, нуфуздир. «ЎТА».

ПАФОСЛИ кт. Завқ-шавқ билан тўлган, кўтаринки, жўшқин. Пафосли шеърлар.

ПАХМАЙМОҚ Тартибсиз ўсиб кетмоқ, чигаллашиб ва тўзиб кетмоқ, хурпаймоқ (соч, соқол, юнг ҳақида). Кийимларим йиртилиб, тиззаларимнинг кўзи шилиниб, соқолларим пахмайиб кетди. И. Раҳим, Оловкор.

ПАХМОҚ **1** сфт. Тартибсиз ўсиб кетган, ўсиқ, хурпайган. Пахмоқ соч. ■ Чўпон

ота.. пахмоқ соқолларини силаб, багрини офтобга тоблаб, тоғ бағрига ёнбошлади. Ойдин, Ширинга мактуб. Пахмоқ соқол ўтирган ерида саломга алик олди. Т. Малик, Шайтанат.

2 Шох-шаббаси тартибсиз ўсиб тарвақайлаган сада шаклидаги. Сидиқжон катта йўлдан анча четда, каттакон пахмоқ бир дарахт остида милтиллаб турган чироққа томон бурилди. А. Қаҳҳор, Қўшчинор чироқлари.

3 Юнги ёки соч-соқоли ўсиқ, бароқ. Жунлари ўсиқ пахмоқ қўйлар бўйинларини чўзганча сув тўлатилган охурларга интилади. С. Анорбоев, Ҳаракатда баракат. Тупроққа қоришиб ётган катта, пахмоқ кучук занжирини шалдиратиб, ўрнидан турди. Ойбек, Танланган асарлар.

ПАХМОҚ **II** Бир томони тукли, майин ва қалин ип газлама; бумазей. Пахмоқ кўйлак.

ПАХСА [ф. پسخه] **1** Пишитилган лойдан устма-уст босиб қурилган девор ва унинг ҳар бир қавати, қатори. Бир пахса девор. Пахса қўймоқ (урмоқ). ■ Уч кундан кейин эшигимизга қора отлиқ келди. Пахсадан бўйини чўзиб қичқирди. С. Сиёев, Ёруғлик.

2 Пахсадан иборат, пахсадан қилинган, қурилган. Унда-бунда қурилган пахса уйларда гўё ҳаёт йўқдай. «Саодат». Пахса деворлар нураб, қатор туяларнинг ўркакларидек баланд-паст бўлиб қолган. Ҳ. Фулом, Машъал.

Қўлини пахса қилмоқ Кафтини катта очган ҳолда қўлини тингловчи томон чўзиб, дагдага билан гапирмоқ. Оқсоқол одамларни клубга тўплаб, ваъзхонлик қилди. Қизиқ, чол қўлини пахса қилиб, шунақанги гаплар айтдики, ҳаммаси қулоғимга михланиб қолди. Ў. Ҳошимов, Икки эшик ораси. Болта муаллим тезгина унинг олдига ўтиб, қўлларини пахса қилиб, алланималарни тушунтира кетди. Н. Норқобилов, Тўқнашув.

3 кўчма Карра, даража. Ганжанинг кайфияти яна бир пахса кўтарилди. Э. Самандар, Дарёсини йўқотган қирғоқ.

ПАХСАКАШИ [ф. پسخهکش — пахса урувчи, кўювчи] Пахса девор урувчи, деворзан.

ПАХСАЛИ Пахсадан қурилган. Ичкари ҳовли тўққиз пахсали девор билан ўралган. Ж. Шарипов, Хоразм. Ҳув оқарган қўшқаватли

қўрғонча, Деворлари тўрт пахсали, мустаҳкам. Ф. Ғулом.

ПАХСАЧИ айн. пахсакаш.

ПАХТА 1 Ғўза ўсимлигининг чигит ва толалардан иборат оппоқ юмшоқ ҳосили. *Узун толали пахта. Чигитли пахта. Чигитсиз пахта. Пахта териш. Эски пахта бўз бўлмас, асли душман дўст бўлмас.* Мақол. ■ *У кечқурун терган пахтасини табелчига ўтказиб, ювиниб-тараниб.. қишлоққа жўнади.* И. Раҳим, Чин муҳаббат.

Ипак пахта Толаси ингичка, узун ва пишиқ пахта. *Тилда дoston Фарғона — Ипак пахта диёри.* Ё. Мирзо. **Пахта тозалаш** 1) пахтани хас-хашак, чанг-тўзондан тозалаш; 2) пахтани чигитдан айириш. *У шаҳарга киргандан кейин пахта тозалаш заводи ёнидаги бекатда тушиди.* Т. Ашуров, Оқ от.

2 Чигитдан ажратилган шу маҳсулот; момиқ. *Пахтадан ип йигирмоқ.* ■ *Вазиранинг эғнида шафтоли гулига монанд, кўкси очиқ, елкасига пахта кўйиб тикилган шойи кўйлак.* С. Аҳмад, Уфқ. *Республика пахта толаси ишлаб чиқариш бўйича дунёда тўртинчи ўринда.. туради.* Газетадан.

3 с.т. айн. ғўза. *Узоқ-узоқда ҳали кун кўтарилмаганига қарамай.. қўлларига кетмон ушлаган йигитлар пахта суғориб юрибдилар.* А. Қодирий, Обид кетмон.

4 сфт. Гули, тасвири (очилган) пахтага ўхшаш. *Қурбонов чўнтагидан ён дафтарча чиқарди: — Бу кишига ўттизта чойнак, юзта пахта гулли пиёла.. тақсимчаси билан.* Н. Аминов, Қаҳқаҳа. *Пахта гулли чойнакни олдиға тортиди.* Т. Ашуров, Оқ от.

Кўзининг пахтаси чиқмоқ Ғазаб ёки ҳаяжондан кўзлари катта-катта очилмоқ, кўзи ола-кула бўлмоқ. *Ортиқ талвасада, қўллари билан бошини тўсиб, кўзининг пахтаси чиқиб, тисарилди.* М. Мансуров, Ёмби. **Пахта олма** Узоқ сақланмайдиган эртапишар маҳаллий олма нави. *Пахта олма пишди, шотут қизарди. Учинчи чопиқни бошладик кеча.* Ф. Ғулом.

ПАХТАДОҒ Пахтани ўтга тоблаб ёки қизитилган ёққа булаб, шишга, ярага қўйиладиган иситувчи компресс. *Пахтадоғ шишини қайтаради.*

Пахтадоғ қилмоқ Қизитилган ёққа буланган ёки ўтда тобланган пахта билан компресс қилмоқ. *— Нима гап бўлди, дадаси?*

— *сўради пахтадоғ қилиб келган онайи зор шошилиб. «Шарқ юлдузи».*

ПАХТАЗОР Ғўза экилган жой, ғўза билан банд ер, дала, майдон. *Пахтазор водий.* ■ *Катта кўча билан айланиб ўтамизми? Пахтазорни кесиб чиқа қолайлик.* Ў. Ҳошимов, Қалбингга қулоқ сол. *Ху ана, сомон шяпали Олимов пахтазор чеккасидан келяпти.* Ҳ. Назир, Ёнар дарё.

ПАХТАК Дуккакдиларга мансуб, бўёқчиликда хомашё сифатида ишлатиладиган бута.

ПАХТАКАШ тар. Чувилмаган кўсақларни сотиб олиб, чувиб ёки чувитиб, баъзан чигитдан ҳам ажратиб сотиш билан шуғулланадиган киши; пахтафуруш. *— Илоҳи тавба, — деди бир пахтакаш, — болачақалар бир ҳафта тирноқ кўчириб, ғўза чувиганлар.* С. Айний, Қуллар.

ПАХТАКОР 1 Чигит экиш билан шуғулланувчи, пахта етиштирувчи киши. *Илғор пахтакор.* ■ *Оддий пахтакор аввал қандай ишлаган бўлса, ҳамон шундай, пахтага ҳеч қачон хиёнат қилмайди.* «Саодат». *Чорвадорсан, ботирсан — қўлда қўбизинг билан, Пахтакорсан, ишчисан, дарёни бурувчисан.* А. Орипов, Йиллар армони.

2 сфт. Чигит экиб, пахта етиштирадиган. *Пахтакор ерлар.*

ПАХТАКОРЛИК 1 Чигит экиш билан шуғулланишлик; пахтакор касби. *Донгдор пахтакорлигимиз оламга машҳур. Пахтакорлик шарафли касб.*

2 айн. пахтачилик 2. Бироқ пахтакорликни ривожлантиришдан туб аҳолининг ҳаёти яхшиланди. Газетадан.

ПАХТАЛИ Пахтаси бўлган, пахта солинган. *Пахтали шим. Пахтали чопон.* ■ *Очил эса ёқаси ва енларига қўнғир клеёнкадан жияк кўйиб тикилган эски пахтали фуфайкада.. эди.* П. Қодиров, Уч илдиш. *Саодат кампир пахтали нимчасини олиб кийди.* «Саодат».

ПАХТАЛИК с.т. от Авра ва астар орасига пахта солиб тикилган қишлик уст кийим. *Кумуш тонг билан бирга уйғонган Фароғат калта пахталигини кийиб, далага чиқиб кетди.* Р. Файзий, Кишиларимиз қиссаси. *Кўп ўтмай, чайлада мен билан пахталик кийган йигитдан бошқа ҳеч ким қолмади.* Ў. Умарбеков, Олтин япроқлар.

ПАХТАТИКАН Пояси қисқа, барглари майда тиканли, кўп йиллик ёввойи ўт.

ПАХТАФУРУШ тар. Пахта савдоси билан шуғулланган киши. *Мен Абдурашид пахтафуруш деган бойнинг аравасини минар эдим.* А. Қаҳҳор, Кўшчинор чироқлари.

ПАХТАЧИ 1 эск. Пахта тозалаш ва пахта савдоси билан шуғулланган бой. *Дада, энди пахта заводи қурмасак бўлмайди. Модомики, пахтачи бўлдим, заводсиз илож йўқ.* Ойбек, Танланган асарлар.

2 с.т. айн. пахтакор. Кампирнинг бир қизи колхоз раиси.. *битмаси колхознинг сут фермасида ишлайди, ўғли тажрибакор пахтачи.* Ф. Расул, Тўнғич ўғил.

ПАХТАЧИЛИК 1 қ. **пахтакорлик 1.** Пахтачилик билан шуғулланмоқ. Пахтачиликда катта ва кўп тармоқли хўжаликни бошқаришда ўттиз йиллик тажриба эгаси! К. Қаҳҳорова, Чорак аср ҳамнафас.

2 Қишлоқ хўжалигининг ғўза экиш, пахта етиштириш билан шуғулланувчи тармоғи. *Ўзбекистонда қишлоқ хўжалигининг асосий тармоғи — пахтачиликдир. Пахтачиликнинг ривожланиши. Пахтачиликни механизациялаштириши. Пахтачилик илмий-текшириш институти.* ■ *Бироқ пахтачиликни ривожлантиришдан туб аҳолининг ҳаёти яхшиланди.* Газетадан.

3 Муайян туркумга мансуб ғўзанинг келиб чиқиши, эволюцияси, ўсиши ва ривожланиши, уни деҳқончиликда етиштириш қонуниятлари ҳақидаги фан.

ПАХТАШУНОС Пахта илми, пахтачилик билан шуғулланувчи мутахассис.

ПАЦИЕНТ [лот. *patiens, patientis* — азоб тортувчи, бемор, сабр қилувчи] Тиббий хизмат кўрсатилаётган ёки тиббий кўрик жараёнида бўлган шахс.

ПАЦИФИЗМ [лот. *pacificus* — келиштирувчи, тинчлантирувчи] Ҳар қандай урушга қарши бўлган ва ер юзида тинчлик бўлишини ёқловчи дунёқараш, оқим. [Эйнштейн] *Халқаро пацифизмга яқиндан ёрдам бериш учун кўп куч сарфлади.* «Фан ва турмуш».

ПАЦИФИСТ Пацифизм тарафдори.

ПАЦИФИСТИК Пацифизмга ва пацифистга оид. *Пацифистик қараш. Пацифистик ҳаракат.*

ПАЧАВА Ниҳоят даражада ёмон, расво (иш, аҳвол ҳақида). [Шокир ота] *Ёлғиз ўзи эмас, балки бутун аҳли касибнинг аҳволи*

пачава эканини очиб ташлади. Ойбек, Танланган асарлар.

ПАЧАВАСИ ЧИҚМОҚ Ниҳоят даражада ёмонлашмоқ, расво бўлмоқ, расвоси чиқмоқ. *Ахир, салгина ношудлик ишининг пачавасини чиқариб қўяди.* Н. Фозилов, Оқим. *Ўз бошлигининг.. «Ишнинг пачавасини чиқардингиз», деган товуши эшитилгандек бўлди.* Шухрат, Умид поғоналари.

ПАЧАКИЛАШМОҚ Бекорга тортишмоқ, баҳслашмоқ, ади-бади айтишмоқ, гап талашмоқ. *Соҳиб қори бетачонар Бегимхон билан пачакилашиб ўтиргиси келмай, ташқарига чиқа бошлаган эди, Бегимхон уни этагидан судраб, яна айвонга олиб чиқди.* И. Раҳим, Чин муҳаббат. - *Сен бошингни кўтар, мишиқилар билан пачакилашма, — дейди Турғунали.* А. Мухтор, Кумуш тола.

ПАЧАҚ 1 Букилиб, эзилиб ёки синиб ичига ботган; абжағи чиққан; мажақ. *Пачақ челак. Машинанинг қаноти урилиб пачақ бўлибди.* ■ *Йигит узоқда ҳайбатли темир уюмлари сингари ағанаб ётган пачақ паровозларга тикилди.* Ойбек, Қуёш қораймас. У [самоварчи] *устанинг қўлига туша-туша хўп эзилган, қорни пачақ, чиркин катта самоварнинг олдида ёғоч елкасини қисиб ўтирарди.* Ойбек, Танланган асарлар.

2 Синиқ, синган. *Пачақ тухум.*

ПАЧАҒИ ЧИҚМОҚ 1) пачақ бўлмоқ. *Челакнинг пачағи чиқди;* 2) кўчма абжағи чиқмоқ, тор-мор бўлмоқ. *Урушда пачағи чиққан бу “зобит”лар ҳали ҳам ўзларини кўкларда ҳис қилар, ҳали ҳам ғолиблардек мағрур эдилар.* Ҳ. Фулом, Машғал.

3 Уринган, эзилган. *Пачақ олма.*

4 кўчма Яхши ўсмай, ривожланмай, майда бўлиб қолган; реза, ушоқ. *Пачақ бола. Пачақ ўсимлик.* ■ *Ҳавас қилиб келган Бургутим ҳар кунни кўриб юрган оддий кишилардай, жуссаси ҳам, юзи ҳам, қарашлари ҳам оддий, пачақ бир йигит бўлиб чиқди.* С. Аҳмад, Чўл бургути.

ПАЧАҚЛАМОҚ 1 Пачақ қилмоқ, мажақ қилмоқ, эзмоқ. *Бола тухумни пачақлади.*

2 кўчма Тор-мор қилмоқ, абжағини чиқармоқ. *Душман армиясини пачақламоқ.* ■ *Пачақлаймиз кириб, қўрқинч ёв бу, Шаҳарга ўт қўювчи зўр олов бу.* Ҳабибий, Девон. *Бутун юлдузларингни тош қилиб от, Пачақлаб ерга ур, чалпак қилиб қот.* Ҳабибий, Девон.

ПАЧАҚ-ПАЧАҚ Бутунлай майда-майда, поря-поря бўлган, пачағи, абжағи чиққан. *Тарелка тошга урилиб пачақ-пачақ бўлди.* ■ *Шашвар тўқмоқ билан бошига урдим, боши пачақ-пачақ бўлиб кетди.* «Эртақлар».

ПАЧКА [р. пачка < нем. Pack, Packer — боғлам, ўрам; даста, шода] Тахланган, ўралган, боғланган ёки қутичага жойланган бир турдаги нарсалар. *Ўн пачка қалам. Тўрт пачка папирос. Бир пачка чай.* ■ *Дўкондан бир пачка сигарета олиб, уйдан унча узоқ бўлмаган зоопаркка йўл олди.* Мирмуҳсин, Умид.

ПАЧКАЛАМОҚ Бир хилдаги нарсаларни тахлаб, ўраб боғламоқ ёки қутичаларга жойламоқ. *Юз сўмликларни пачкаламоқ. Дафтарларни пачкаламоқ. Сигареталарни пачкаламоқ. Чай пачкаламоқ.* ■ *Зоҳир ака қирқиб четин, Пачкалаб тез бирин-кетин, Ҳар томонга жўнатади, Китобхонни қувнатади.* О. Юнусхонов.

ПАЧКАЛИ Пачкаларга жойланган, пачкаланган. *Пачкали қалам. Пачкали печенье. Пачкали пул.*

ПАШМАК I [ф. پشمک — тола-тола шаклли ҳолва] Ёғда қовурилган ун ва қиёмдан тола-тола қилиб тайёрланган ва махсус ўлчовда кесилган маҳаллий ширинлик. *Баққоллар кичкина-кичкина дўкончаларида ярим кечага қадар савдо қиладилар. Пашмак, турли-туман.. ҳолвалар, пистабодом, аччиқ-чучук мағизлар, новвотлар, парвардалар, отнон, хўрозқандлар сероб.* Ойбек, Болалик.

ПАШМАК II бот. Шўрадошлар оиласига мансуб, танаси қалин тола ва тангачалар билан қопланган бир йиллик ўсимлик.

ПАШМАЛОҚ I Бошқаларга нисбатан энг кейинги ўринда турган, ҳали кўзга кўринмаган, мавқеи, мартабаси паст; оддий. *Пашмалоқ савдогар.* ■ *Мен энди.. мадрасада пашмалоқ махдумлардан бўлиб қолдим.* М. Муҳаммаджонов, Турмуш уринишлари.

2 кўчма Оддий, жўн, шунчаки. *Тегирмончи: -Лекин сиз ҳануз пашмалоқ гапларни айтиб келгансиз! — деди.* А. Қодирий, Кичик асарлар.

ПАШША [ф. پشه — чивин] Ёзда жуда кўнайиб кетадиган, турли суюқ органик моддалар билан озиқланадиган кўш парда қанотли ҳашарот. *Йўл пашша. Пашшаларни кўримоқ. Қора пашша.* ■ *Атрофда гув-гув*

пашша: оёқларга ёпишади, бурун катакларига суқилади, қулоқларни узади. Ойбек, Танланган асарлар. *Ҳамма ёқ жим. Фақат пашша гинғиллайди.* А. Қаҳҳор, Бемор.

Ошга пашша бўлмоқ айн. ошга пашша тушмоқ. *Марзияникига борганимда доим ошга пашша бўладиганлар Душан билан Фозил эди.* А. Мухтор, Давр менинг тақдиримда. **Ошга пашша тушмоқ** Бегона киши аралашиб, ишни бузмоқ, ишнинг белига тепмоқ. *-Эсизгина, энди гаплаша бошлаган эдик-а. Ошга пашша тушди, — деди Элмурод бошини чайқаб.* П. Турсун, Ўқитувчи. **Пашша(ни) кўриб ўтирмоқ** Бекор вақт, кун ўтказмоқ, кунни бекорга ўтказмоқ. [*Бобоқул ота:*] *Ҳамма далага ёпишиб ётган бўлса-ю, мен идорада пашша кўриб ўтирсам келишмас.* Ҳ. Назир, Сўнмас чақмоқлар. **Пашшадан фил ясамоқ ёки пашшани (ёки пашшадай нарса-ни) фил қилмоқ** Арзimas нарсани ошириб юбормоқ, улғайтириб кўрсатмоқ, ҳалдан ташқари муболага қилмоқ. *Уззукун пашшани фил қилиб, қаяёқдаги гапларни чулғатиб юрдингиз, мана энди эл олдида юзингиз шувут.* А. Муҳиддин, Кўнгиллар.

ПАШШАЛАШМОҚ Атрофида айланиб, ёпишиб хиралик қилмоқ, майда-чуйда гап, ноўрин хатти-ҳаракатлар билан жонга тегмоқ. *Терганлари паллага келмайди-ю, яна биз билан пашшалашадилар.* «Аския». *Мудир ўртоғингиздан ҳам хафа бўлдим, тозалikka эътибор бериш ўрнига ошхонада ҳамма билан пашшалашиб ўтирибди.* «Аския».

ПАШШАХОНА [пашша + хона] Пашша ва чивин каби ҳашаротлардан сақланиш учун тутиладиган махсус чодир. *Пашша-хонада ухламоқ.* ■ *Сўнг кечқурун савдогар вазир келиб кирса, оқ пашшахона тугилган сўрида Қундузхон ётган эмиш.* «Фольклор». *Пашшахонага қамалиб олган искабтопар Иқболнинг юзини чақиб, уйғотиб юборган эди.* С. Абдулла. Иқбол.

ПАШШАХЎРДА [ф. پشه خورده — пашша еган, талаган; пашша чаққандан кейин узоқ тузалмайдиган яра, жароҳат] Бирор жойга тез-тез келиб турадиган, хира бўлиб ёпишиб оладиган одам. *Пашшахўрда бўлмоқ.* ■ [*Уста:*] *Пашшахўрдаларни қувиб, полвоннинг жиловини тортиб кўясан.* О. Ёкубов, Ларза. *Карвонсаройларда нияти бузуқ, шубҳали одамлар ҳам пашшахўрда бўларди.* М. Осим,

Ўтрор. Бу ялоқи, Гавҳарнинг атрофида бекорга пашишахурда бўлаётгани йўқ. Ў. Ҳошимов, Қалбингга қулоқ сол.

ПАШШАҚҰНМАС Тиканакли, хушбўй йирик гулли бутасимон ўсимлик.

ПАҚ тақл. с. Портлаш, отилиш каби ҳолларда эшитиладиган кескин товуш. *Шар “пақ” этиб ёрилиб кетди.* ■ Милтиғидан “пақ” этган овоз чиққач, бир одам дарахтнинг катта томирига.. мункиб тушиб, қимирламай қолди. Ҳ. Турсунқулов, Ҳаётим қиссаси. Хотини сут соғаётган пақирини пақ эткизиб ерга қўйди-да, даст ўрнидан турди, Карим акага қараб шанғиллаб кетди. М. Ҳазратқулов, Журъат.

ПАҚИЛЛАМОҚ “Пақ” этган товуш, овоз чиқармоқ. *Аллақачон ширатхона лиқ тўлган, эшикбон эшикка тамба урган эди. Орадан ҳаял-замон ўтмай, у ер-бу ердан шишаларнинг пақиллаб очилаётгани эшитила бошлади.* Н. Қиличев, Чигириқ. *Йўлнинг ярмига борганда, мотор тумов бўлгандек бир-икки пақиллаб, машина тўхтаб қолди.* С. Абдуқаҳҳор, Санамай саккиз дема. *Аввалига пақиллаган, кейин вишиллаган, сўнг қўлт-қўлт этган овоз чиқди.* С. Маҳқамов, Ёстиқ ичида игна.

ПАҚИР I Сув ва б. суюқликларни ташиш ва асраш учун ишлатиладиган, бандли, цилиндрсимон идиш; челақ. *Афанди бир кун кечаси қудуддан сув олгани пақир солган эди, сувда ойнинг аксини кўрди.* «Латифалар». У [Азизбек] қопдаги какликларнинг тиригини товўқхонага қамаб, уқ еганларини қопқоқли пақирга солиб, супага олиб чиқиб қўйди. С. Аҳмад, Жимжитлик.

ПАҚИР II эск. Икки тийинлик чақа. Сўзимга ишон, бошқа бир пақир ҳам пулим йўқ. И. Акрам, Адолат. *Шундай хурсандликдан бир-икки марта бўлса, менинг ёнимда бир пақир ҳам қолмас экан.* «Латифалар».

Бир пақирга олмаслик Назар-писанд қилмаслик, баҳосини, қадр-қимматини ерга урмоқ. *Ҳафиза ўзини у ёқ-бу ёққа солиб, пинагини бузмай тура берди. У ҳатто бу аччиқ таъналарни эшитмагандай, эшитса ҳам, бир пақирга олмай, сур бўлиб турарди.* Мирмуҳсин, Умид. **Бир пақирга қиммат** (ёки арзимайди) Ҳеч нарсага арзимайди, жуда ёмон, паст, арзимас.

ПАҚПАҚ I Болаларнинг бир бўлак лойни пиёла шаклига келтириб, тўнтариб ерга уриб пақиллатиш ўйини. *Пақпақ ўйнамоқ.*

ПАҚПАҚ II Кўсакка ўхшаш, ичи бўш мевали кўп йиллик ўсимлик.

ПАҚҚОС рвш. 1 Бус-бутун, қолдиқсиз, қолдирмай; бутунлай, тамомила. *Эргаши чой дамлаб келганда, Азмиддин лагандаси ошнинг қолганини паққос тушириб, ёғини ҳам ялаб бўлган эди.* Ҳ. Фулом, Замин юлдузлари. *Айтмоқчи, мен сизларни таништиришни паққос унутибман-ку. Уни қаранглар-а! Бу киши — Аълам ака бўладилар.* М. Мансуров, Ёмби. *Унинг ёнида бўлсанг, ўтмишингни паққос унутасан, соп бўлган одам эмаслигингни дарров пайқайсан.* А. Мухтор, Тугилиш.

ПАҒА I эск. Чархда ип йигириш учун тахтакача пилталаб, юмалоқлаб қўйилган бир сиқим чигитсиз пахта, пахта пилтаси.

2 Пахта каби юмшоқ ёки тарқалувчан нарсаларнинг бир парчаси, уюми ёки тўдаси. *Пахта пағалари. Тутун пағаси.* ■ *Даштнинг у ер-бу ерида.. қор пағалари ётар эди.* Ҳ. Турсунқулов, Ҳаётим қиссаси. *Тоғ томонидан кўтарилиб, қуёш бетини қоплаб турган бир паға булут чўкканда, Тиктепа ерлари нур ичига чўмиб кўринади.* А. Қодирий, Обид кетмон.

Паға бўлмоқ Жуда оқариб, рангсизланиб кетмоқ. *Холбўта бошини кўтарганда, Саидмурод ўқ узди. Қўрбошининг ранги паға бўлиб кетди. Нариги томонда раҳбада чўзилиб ётишган Комил билан Ҳамид сапчиб туришди ва дарров нима гап-сўзлигини фаҳмлаб, Саидмуродга ташланишди.* «Ёшлик».

ПАҒАМОЛ эск. Чигитсиз пахтани ҳимариб, пилталаб юмалоқлаш учун ишлатиладиган қаламсимон асбоб; пилтакач.

ПАҒА-ПАҒА Тўда-тўда, парча-парча (пахта, булут, тутун кабилар ҳақида). *Паға-паға пахта. Паға-паға қор.* ■ *Паға-паға тутунлар Кўтарилар мўридан.* С. Акбарий. *Қорамтир булутлар.. паға-паға бўлиб, тез сузиб кетди.* Ҳ. Назир, Сўнмас чақмоқлар.

ПАҲЛАВОН [ф. پهلووان — қаҳрамон, ботир] I Барваста ва забардаст; жисмоний бақувват, баҳодир. *Паҳлавон ўғлон.* ■ *Аҳмадҷон у ёқ-бу ёққа борса, ёнида паҳлавон оға-уни, вафодор ёр, садоқатли жўралар ҳамроҳ бўлиб юргандай, ҳеч кимдан ҳайиқмайди, кўнгли тўқ.* С. Нуоров, Майсаларни аёз урмайди. *Ўзи ҳам худди шерга ўхшаган, чиройли паҳлавон йигит экан.* С. Исмоилзода, Темур.

2 Ботир, қаҳрамон. *Паҳлавон жангчи.* ■ Бугун яна Нилдан ўтган қарвонлар, Девни йиққан паҳлавонлар сўзласин. А. Шер. Ривоятда айтилишича, шаҳарликлар паҳлавоннинг жасадини топиб, тантана билан дафн этишибди. «Фан ва турмуш». *Йигит куйласин, жангда Чин паҳлавон бўлдим, деб.* Х. Пўлат.

3 кўчма Забардаст, кучли. *Дўстларим, ҳайратда қолмангиз фақат, Паҳлавон асрга шу гаплар мосдир. Инсон боласига меҳр ила шафқат — Ҳаммага хос эди, бизга ҳам хосдир.* А. Орипов, Йиллар армони.

ПАҲЛАВОНЛАРДАЙ, =дек айн. **паҳлавонларча.** *Паҳлавонлардек улкан гавдали, айна куч-қувватга тўлган Усмоҳўжага бир пиёла май ялагандек ҳам таъсир қилмас, кўпинча, лабларини алам билан чапиллатиб, қайтиб кетарди.* Х. Тўхтабоев, Йиллар ва йўллар.

ПАҲЛАВОНЛАРЧА *рви.* Паҳлавонлар каби, паҳлавонлардек, паҳлавонларга ўхшаб.

ПАҲЛАВОНЛИК Ботирлик, қаҳрамонлик; бақувватлик. *Паҳлавонлик кўрсатмоқ.*

ПАҲЛАВОНСИФАТ Қомати, қуввати паҳлавонларга ўхшаш, паҳлавон гавдали. *Ияклари осилган бу паҳлавонсифат киши минбар зиналарига катта, қўпол оёқларини бир-бир босиб чиқаркан, товони зарбидан тахталар ғирчилларди.* Х. Фулом, Тошкентликлар.

ПАҲПАҲЛАМОҚ *с. т.* Ҳаддан ташқари аямоқ, авайламоқ, ардоқламоқ. *Болани паҳпаҳлаб ўстирмоқ.*

ПЕДАГОГ [юн. paidagogos — тарбиячи] Педагогика мутахассиси; болалар ва ёшларни тарбиялаш ва ўқитиш билан шуғулланувчи, шу соҳа бўйича махсус тайёргарликка эга бўлган шахс, ўқитувчи. *Моҳир педагог. Мактаб педагоглари жамоаси.* ■ *Ўз талабаларида география фанига алоҳида меҳр уйғота олган моҳир педагоглардан..* С. Аҳмад, Юлдуз. *Педагогнинг вазифаси юксак, мураккаб ва олийжанобдир.* «Фан ва турмуш».

ПЕДАГОГИК 1 Педагогга оид, хос. *Педагогик жамоа. Педагогик фаолият. Педагогик маҳорат. Педагогик амалиёт.*

2 Педагогикага оид. *Педагогик асарлар. Педагогик билимлар. Педагогик жараён.*

ПЕДАГОГИКА [юн. paidagogike < pais, paidos — бола + ago — етаклаб бораман, тар-

бия қиламан] **1** Тарбия, таълим ҳамда маълумот беришнинг назарий ва амалий жиҳатларини ўрганувчи фанлар мажмуи. *Бўлғуси педагоглар практика жараёнида педагогика ва психологиянинг долзарб масалалари устида иш олиб борадилар.* «Фан ва турмуш».

2 Айна шу соҳа (мутахассислик) бўйича ўқув фани.

ПЕДАГОГЛИК Педагогнинг вазифаси, иши, фаолияти; ўқитувчилик, мураббийлик. *Педагоглик қилмоқ.* ■ *Боланинг раъйини — кўнглини синдирган, тушунмаган одамга педагоглик касби хайфдир.* Газетадан.

ПЕДАЛЬ [фр. pedale < лот. pes, pedis — оёқ] Машина, велосипед, дастгоҳ ва баъзи мусиқа асбобларининг оёқ билан ҳаракатга келтириладиган ричаги, тепкиси. *Велосипед педали. Пианино педали.* ■ *У [Мирвали] газ педалини охиригача босди. Машина гўё ҳавога кўтарилиш олдидан тезлик олаётган самолётга ўхшарди.* С. Аҳмад, Жимжитлик.

ПЕДАНТ [фр. pedant < итал. pedante — педагог, ўқитувчи] Расмиятга, амалдаги тартиб ва қоидаларга изчил риоя қилувчи, ўтакетган синчков киши. [Усмонов]: *Инсон зоти табиатан педант ва консерватор бўлади.* Н. Қобил, Унутилган соҳиллар.

ПЕДАНТИЗМ айн. қ. **педантлик.**

ПЕДАНТЛИК Расмиятга, амалдаги тартиб ва қоидаларга ёпишиб олиш, ўтакетган синчковлик, расмиятчилик.

ПЕДИАТР Педиатрия мутахассиси, болалар врач.

ПЕДИАТРИЯ [юн. pais, paidos — бола + iatreia — даволаш] Тиббиётнинг болалар анатомияси, физиологияси, патологияси ҳамда касалликлари ва уларни даволаш усулларини ўрганувчи бўлими.

ПЕДИКЮР [фр. pedicure < лот. pes, pedis — оёқ + curare — парвариш қилмоқ] Оёқ бармоқларини махсус парвариш қилиш.

ПЕДОЛОГ Педология мутахассиси, педология соҳасидаги олим. *Маиҳур педолог олимларнинг асарлари ва фаолиятлари оппонентлар томонидан кескин танқид қилинди.* Газетадан.

ПЕДОЛОГИЯ [юн. pais, paidos — бола + logos — фан, таълимот] Бола ривожланишига нисбатан психологик, биологик, ижтимоий (социологик) қарашлар мажмуи; болалар ҳақидаги фан (19-аср охирида АҚШ

ва Фарбий Европада пайдо бўлган). *Шахс ва жамият ҳақидаги фанлардан социология, генетика, педология каби фанларни ўқитиш тақиқлаб қўйилди.* Газетадан.

ПЕЙЖЕР [ингл. pager] Кодланган хабарни матнли, рақамли, овозли ахборотга айлантириб, махсус сигналлар ёрдамида узоқ масофага узатувчи қурилма. *Сенга пейжер орқали хабар бераман.*

ПЕЙЖИНГ [ингл. raging] Пейжер воситасида алоқа қилиш усули.

ПЕЙЗАЖ [фр. paysage < pays – жой, макон] 1 Бирор жойнинг кўзга ташланиб турган умумий кўриниши; манзара. *Урмон пейзажи. Тоғ пейзажи.*

2 Тасвирий санъатнинг табиат манзараларини тасвирлаш билан шуғулланадиган тури; табиат манзараси тасвирланган сурат.

3 Адабий асарда манзара тасвири, табиат манзараси, табиат лавҳалари. *Ҳамид Олимжон бу шеърида Ўзбекистоннинг пейзажини яратишда моҳир бир санъаткор сифатида гавдаланади.* «Ватан адабиёти».

ПЕЙЗАЖЧИ Пейзаж чизадиган rassom. У [Урол Тансиқбоев] *ҳаваскорликдан Ўзбекистоннинг кўзга кўринган пейзажчи rassomi бўлиб етишгунга қадар катта меҳнат ва ижодий изланиш йўлини босиб ўтди.* Газетадан.

ПЕЛЛАГРА [итал. pelle agra – дағал, гадир-будур тери] тиб. Организмда айрим витаминларнинг етишмаслигидан келиб чиқадиган, терининг, ошқозон-ичак йўлининг зарарланиши ва руҳий хасталиклар билан кечадиган касаллик.

ПЕМЗА [ингл. pumice < лот. pumex – говак тош, кўпик] махс. Говак, жуда енгил, кулранг вулканик жинс (асосан қурилиш sanoатида ишлатилади).

ПЕНАЛ [нем. Pennal < лот. penne – перо; пат] Ручка, қалам, резина солиб қўйиладиган чўзинчоқ қутича, ғилоф.

ПЕНАЛЬТИ [итал. penalty – жазо(лаш), жарима] спорт. Айрим спорт ўйинларида жарима майдончасида қондани бузганлиги учун рақиб дарвозаси томон белгиланадиган ва йўналтириладиган жарима зарбаси (тўпи); мас., футболда – 11 метрли, тўпли хоккейда – 12 метрли масофадан зарба берилади.

ПЕНИЦИЛЛИН [лот. Penicillium – замбуруғларнинг бир тури < penicillum – панжа;

попук, шокила] Кимёвий тузилиши бир-бирига яқин, тиббиёт амалиётида кенг қўлланадиган табиий ва ярим синтетик антибиотиклар гуруҳи. *Пеницилдиндан укол қилмоқ*

ПЕНСИОНЕР [фр. pensionnaire < лот. pensio, pensionis – тўлов] Пенсия олувчи киши. *Мен 72 ёшдаман, пенсионерман. Лекин, уч ой бўлди, яна заводга ишга қайтдим.* И. Раҳим, Чин муҳаббат.

ПЕНСИЯ [лот. pensio – тўлов; тўлов муддати] Қариган, меҳнат қобилиятини йўқотган, узоқ йил хизмат қилган, боқувчисидан жудо бўлган кишиларни моддий жиҳатдан таъминлаш мақсадида уларга давлат томонидан доимий бериб бориладиган пул; нафақа. *Пенсия олмоқ. Пенсияга чиқмоқ.* ■ *Пенсияга чиқаман деб турганимда, уруш бошланиб қолди.* С. Зуннунова, Олов. *Сен уни бекорга олиб кетмайсан, унинг ўзидан кўра пенсияси керак сенга, билдингми?* С. Аҳмад, Юлдуз.

ПЕНТАГОН [юн. pentagonon < penta – беш + gonia – бурчак] 1 мат. Беш бурчакли геометрик жисм; бешбурчак.

2 (П – катта) АҚШнинг ҳарбий вазирлиги жойлашган, Вашингтондан унча узоқда бўлмаган беш бурчакли бино; АҚШнинг ҳарбий маҳкамаси.

ПЕНТАГРАММА [юн. penta – беш + gramma – ҳарф; ёзув] мат. Ҳар бир томонига бир хил тенг ёнли учбурчаклар ясалган мунтазам бешбурчак.

ПЕНЯ [лот. роена – жазо] эск. Пул-тўлов мажбуриятларини ўз вақтида бажармаганлик учун тўланадиган жарима. *..бир қатор ташкилотлар ўзлари билан тузилган шартнома суммасининг қарийб 100 миллион сўмини ўзлаштирганлиги учун, энди кечиккан ҳар бир кун учун пеня тўлашга мажбур.* Газетадан. *Суд, муддати ўтказиб юборилгани учун, ҳар кун ҳисобига 0,4 фоиздан пеня тўлаш лозимлиги ҳақида қарор чиқарди.* Газетадан.

ПЕПСИ-КОЛА [ингл. Pepsi-Cola < юн. pepsis – овқат ҳазм қилиш + лот. Cola – Африка тропик ўрмонларида ўсадиган доим яшил дарахтларнинг бир тури] Қувватни ошириб тетиклантирувчи, газланган муздай ичимлик.

ПЕРГАМЕНТ [юн. pergamenos < Pergamon (Пергам) – Кичик Осиёда айна шу материал кенг қўлланган шаҳар номи] 1

Қоғоз ихтиро қилингунга қадар махсус йўл билан тайёрланган ва қоғоз ўрнида ишлатилган ҳайвон териси; тери қоғоз.

2 Шундай терига ёзилган қадимги қўл-ёзма.

3 Сув ва мой ўтказмайдиган пишиқ юпқа шаффоф қоғоз.

ПЕРЕВОД [р. переводить — «юбормоқ, жўнатмоқ, ўтказмоқ» фл. дан суффиксиз ҳосил қилинган от] эск. Почта ёки телеграф орқали пул юбориш ҳамда шу йўл билан юборилган ёки олинган пул. *Перевод қилмоқ.*

ПЕРИ- [юн. peri — атрофида, яқинида; юқорироқ, баландроқ, ҳаддан ташқари] Байналмилал ўзлашма қўшма сўзларнинг таркибий қисми бўлиб, бирор нарсага яқинликни, қўшниликни, атрофида ёки олдида, яқинида жойлашганликни билдиради (мас., *перикардит*).

ПЕРИГЕЙ [пери.. + юн. ge — er] *астр.* Ер атрофида орбита бўйлаб айланувчи жисмларнинг, ой ёки сунъий йўлдошнинг ерга энг яқин нуқтаси; *зид.* **апогей.**

ПЕРИКАРД [пери.. + юн. kardia — юрак] Юракни сиртдан ўраб турадиган халтасимон қобиқ.

ПЕРИКАРДИТ [перикард + лот. itis — яллиғланишни билдирувчи қўшимча] Перикарднинг яллиғланиши.

ПЕРИМЕТР [юн. perimetron — айлана, доира < perimetreo — атрофни ўлчайман] *мат.* Ёпиқ эгри чизиқнинг узунлиги (мас., кўпбурчакнинг периметри унинг ҳамма томонлари йиғиндисига тенг).

ПЕРИСКОП [пери.. + юн. skopeo — қарайман, кузатаман] *махс.* Бевосита кузатиш мумкин бўлмаган берк, пана жойлардан (мас., бронетранспортёр, сувости кемаси ва ш.к. дан) кузатиш имконини берувчи оптик асбоб.

ПЕРИТОНИТ [юн. peritonaion — қорин пардаси + лот. itis — яллиғланишни билдирувчи қўшимча] *тиб.* Қорин пардасининг яллиғланиши.

ПЕРКУССИЯ [лот. percussio — тўқилатиш] *тиб.* Беморнинг ички аъзоларидаги касалликни бадан устидан махсус болғача ёки бармоқлар билан уришдан ҳосил бўладиган товушга қараб аниқлашдан иборат тиббий-физик усул.

ПЕРО [р. перо — пат, қанот] *эск.* Сиёҳ, тушъ ва ш.к. билан ёзиш учун ручка учига

ўрнатиб ишлатиладиган ёзув-чизув асбоби. *Пўлат перо. Чизмакашлик пероси. Перо билан ёзмоқ. ■ Перони сиёҳдонга ботириб, ёза бошлади. «Шарқ юлдузи».*

ПЕРПЕНДИКУЛЯР I [лот. perpendicularum — шоқул; тик тушган чизик] *мат.* Бирор тўғри чизик ёки текислик билан тўғри бурчак ҳосил қилувчи чизик. *Текисликка перпендикуляр туширмоқ.*

ПЕРПЕНДИКУЛЯР II [лот. perpendicularis — шоқулий, тик тушган] Тик, шоқул. *Перпендикуляр чизик. Ўзаро перпендикуляр текисликлар.*

ПЕРРОН [фр. perron] Темир йўл станциясида: поезд келиб тўхтайдиган ва жўнайдиган майдонча, поезд кутувчи йўловчилар ёки кузатувчилар турадиган платформа. *Поезд келишидан хабар топган пассажирлар бирин-кетин перронга чиқа бошлади. Ў. Хошимов, Пўлат изларда. Қизнинг назариди, она перронда ҳамон рўмол силкиб тургандек эди. С. Аҳмад, Қадрон далалар. Энг охирида қаддини ғоз тутган Оқсоқол «пўштпўштлаб», перрон томон юрди. Ў. Хошимов, Икки эшик ораси.*

ПЕРСОНА [лот. persona — шахс, кимса, зот]: **персона грага** [лот. persona grata — матлуб шахс] 1) *ҳўқ., сиёс.* муайян давлатга дипломатик вакиллик номзоди шу давлат ҳукумати томонидан маъқулланган киши; 2) *кўчма* хайрихоҳлик билан қараладиган одам. **Персона нон грага** [лот. persona non grata — номатлуб шахс] 1) *ҳўқ., сиёс.* Бирор давлатга дипломатик вакил этиб тайинланишига ўша давлат ҳукумати томонидан розилик берилмаган ёки ишонччи йўқотган ва чақириб олинishi лозим бўлган дипломатик вакил; 2) *кўчма* хайрихоҳлик билан қаралмайдиган киши.

ПЕРСОНАЖ [лот. persona — шахс] Санъат ва бадий адабиётда (ҳикоя, роман, пьеса, кинофильм кабиларда) муаллиф томонидан тасвир этилган ҳар бир шахс. *А. Қаҳҳор асарларидаги персонажлар. Пьеса персонажлари. ■ Учала персонажнинг нигоҳи уч томонга қадалган. «Ёшлик».*

ПЕРСОНАЛ [лот. personalis — шахсий] Корхона, муассаса ходимлари ёки уларнинг ихтисосига кўра бир гуруҳи. *Театр персонали. Уқитувчилар персонали. Маъмурий персонал.*

ПЕРСПЕКТИВ *эск.* Келгусида қилинадиган ишларга доир, келгусидаги тараққи-

ётни кўзда тутувчи; истиқболдаги. *Перспектив режа.*

ПЕРСПЕКТИВА [фр. perspective < лот. perspicere — ич-ичидан кўрмоқ, синчиклаб қарамоқ] эск. 1 Келажакдан қутилган ёки келажакда амалга оширилиши кўзда тутилган мақсад, ният, режа. *Тараққиёт перспективаси.*

2 *геом.* Нарсанинг, у текисликда кузатувчидан, кузатиш нуқтасидан узоқлик даражасига кўра ҳақиқатда қандай кўринса, худди шундай тасаввур берадиган тасвири.

3 Геометриянинг шундай тасвирлар яшаш қоидалари ҳақидаги бўлими.

ПЕРСПЕКТИВАЛИ эск. Келажаги бор, бўлган, истиқболли. *Перспективали ходим. Перспективали ишлар.*

ПЕРСПЕКТИВАСИЗ Истиқболи номаяълум, аниқ режаси бўлмаган. *Перспективасиз иш.*

ПЕС [ф. پیس — ифлос, иркит; теридаги оқ доғ; мохов] 1 *тиб.* Пигмент етишмаслиги натижасида терида пайдо бўладиган оқ доғ. — *Қуймучида тангадек песи бор.* — *Пес эмас. Яранинг ўрни эди-ку.* А. Қаҳҳор, Қўшчинор чироқлари.

2 Шундай касали бўлган киши. [Мозордаги] *Қудуқнинг суви фақат касалларнинг, айниқса пес ва кўзи оғриганларнинг шифоланишларига ва зиёратчиларнинг “табаррук” деб олиб боришларига сарф қилинар эди.* С. Айний, Эсдалиқлар.

3 *сўк.* Ярамас, мохов. *Пес песни қоронғида топар.* Мақол. ■ [Нор:] *Паранжиси қурсин, қайданам шу песни ёпиниб, суқмозорга бордим-у, ўзимга дардисарни орттирдим-келдим.* Ҳамза, Паранжи сирлари. [Йўлчи:] *Гулнорни севишимни биларди-я, пес чол.* Ойбек, Танланган асарлар. *Совчи қўйдим, бермади. Отанг қурғур пес экан.* «Фольклор».

ПЕСЕТА [исп. peseta < peso — вазн, бўлак] Испаниянинг асосий пул бирлиги.

ПЕСЛИК Разиллик, пасткашлик. *Сени одам дедим, ўғлим тойладим, Ишониб, ўзинга шогирд айладим, Болани ёнингга олиб, баччағар, Қанча шумлик, песликларни ўйладинг.* «Гурўглининг туғилиши».

ПЕСО [исп. peso — вазн, бўлак] Лотин Америкасининг бир қатор мамлакатларида ҳамда Филиппинда асосий пул бирлиги.

ПЕССИМИЗМ [лот. pessimus — энг ёмон] Келажакка ишончсизлик, умидсизлик

билан қараш, ҳар бир нарсанинг ёмон томонини кўришга мойиллик, руҳий тушкунлик.

ПЕССИМИСТ Руҳий тушкунликка юз тутган, ҳаётга, келажакка умидсизлик билан қарайдиган киши.

ПЕССИМИСТИК Пессимизм руҳи билан суғорилган. *Пессимистик кайфият. Пессимистик характердаги асар.* ■ *Гарчи Фурқат лирикасида ҳасрат, қайғу, дард мотивлари катта ўрин тутса ҳам, бу мотивлар сира пессимистик моҳиятга эга эмас.* М. Шайхзода, Фурқатнинг бадиий маҳоратига доир.

ПЕССИМИСТЛИК 1 Пессимистларга хос хулқ-атвор, кайфият.

2 *қ. пессимизм.*

ПЕСТИЦИДЛАР [лот. pestis — юқумли касал, мараз + caedere — ўлдирмоқ] Ўсимлик ва ҳайвонларнинг касаллик ҳамда зараркундаларига, бегона ўтларга қарши курашда фойдаланиладиган кимёвий моддалар. *Ўзбекистонда ноорганик минерал ўғитлар, гербицидлар ва пестицидларнинг қўлланиши энг юқори нормалардан ҳам ўнлаб баравар ортиқ эди.* Газетадан.

ПЕТИТ [фр. petit — майда, кичик] *плгрф.* Майда босма ҳарфлар.

ПЕТИЦИЯ [лот. petitio — даъво қилиш, шикоят, ариза] эск. Олий давлат органига ёки ҳукумат бошлиғига қўпчилик томонидан биргаликда берилган расмий ёзма ариза, илтимоснома.

ПЕТЛИЦА [р. петлица < петля — илмоқ, сиртмоқ, ҳалқа] Формали кийим ёқасига чатиладиган, хизмат тури ёки даража, унвонни кўрсатадиган рангли тўртбурчак мато. *Темирийўлчилар петлицаси.* ■ *Курсантлар.. чемодан, одеколон, тароқ, устара, топилса — командир петлицаси харид қилар эдилар.* Шухрат, Шинелли йиллар.

ПЕТРОГРАФ Петрография олими, мутахассиси.

ПЕТРОГРАФИК Петрографияга оид. *Петрографик қидирув ишлари.*

ПЕТРОГРАФИЯ [юн. petra — тош, қоя + grapho — ёзма] *геог.* Геологиянинг тоғ жинсларини, уларнинг минерал ва кимёвий таркибини, тузилишини, Ернинг қаттиқ қатлами ва устки қисмида тарқалиш ва келиб чиқиш қонуниятларини ўрганувчи тармоғи.

ПЕТРУШКА [*лот. Petroselinum < юн. petroselinon — тоғ сельдерейи*] Соябонгулдошлар (соабонгуллилар оиласи)га мансуб бир ёки икки йиллик, кашничсимон ўсимлик. *Петрушка барги кўринишдан кашничга ўхшаса-да, ҳиди ва мазаси ўзига хос дағалроқ.* К. Маҳмудов, Ўзбек тансиқ таомлари.

ПЕЧ [*ф. پیچ — қийшиқлик, эгрилик; қат, бурма; ҳалқа; жингалак, гажак*] Бошга ўрилган салланинг чеккадан осилтириб кўйилган қисми, учи. *Узун печи осилган катта саллани бошини чайқади.* Ойбек, Навоий. *...Худди фуқаҳо, яъни қонушунослардек салласи печини томоғининг тагидан ўтказиб, ўнг елкасига ташлади.* М. Осим, Карвон йўлларида.

ПЕЧАК I [*ф. پیچک — чирмашиб ўсадиган ўт; чирмовуқ*] Ўсимлик танасига ва б. нарсаларга чирмашиб ўсадиган бир йиллик ўсимлик; чирмовуқ. [*Навоий:*] *Гуллининг қабрига эккан чечаклар очилгандур бу чоқ.. оҳим печаклар Каби кўк тоқига чирмашмасинму?! Уйғун ва И. Султон, Алишер Навоий. Ярим халта печак юлиб келди.* Ш. Холмирзаев. Оғир тош кўчса.

ПЕЧАК II [*ф. پیچک — ўрам, копток; галтак*]: **печак ҳандалак** Ҳандалакнинг пўсти қўнғир-сарғиш тусли майдароқ бир тури. *Асад қори олдида турган печак косасини олдида тортиб, ундан бир тилимини олди-да, оғзини катта очиб, тиқиб юборди.* М. Исмоилий, Фарғона т. о.

ПЕЧАКГУЛ [печак + гул] Карнайгуллилар оиласига мансуб, чирмашиб ўсадиган бир йиллик ўсимлик ва унинг гули; карнайгул. *Марказий кўчадаги уйларнинг деразаларида оқ пардалар ҳилпирайди, деворларига печакгуллар тирмашиб ётибди.* И. Раҳим, Тақдир.

ПЕЧАН Ишни, гапни ўринлатадиган; уста, чечан. *Ишга печан.* ■ *Мулла Авзам ҳамма каллар сингари гапга печан, қочирик гапларни гапириб.. пешқадамларни ҳам кулдирар эди.* М. Муҳаммаджонов, Турмуш уринишлари.

ПЕЧАНЛИК Ишни, гапни уддалашлик, усталик, чечанлик. *Раис, ундан шундай иш чиқишини, Абдулла индамасхоннинг гапга шунақанги печанлигини билмаган эди.* Т. Пўлат, Хижадат.

ПЕЧАТЛАМОҚ I қ. муҳрламоқ I. *Ҳужжатни печатламоқ.*

2 қ. муҳрламоқ 2. Эшикларни печатлаб қўймоқ. ■ *-Адо бўлдим, ака. Уйим куйди. Орган дўконни печатлаб кетди, — деди Тўйчи.* А. Кўчимов, Халқа.

ПЕЧАТЬ [*р. печать < қад. р. пеку — куйдириб белги (тамға) кўйиш асоби*] **1 қ. муҳр 1.** *Идора печати. Конверт устиса печать босмоқ.* ■ *-Столнинг тортмасини қидиравериб, илма-тешик қилиб юбордим, печать йўқ, — деди Мирашир.* О. Толибов, Анқов.

2 Шундай тамганинг қоғозга ёки бошқа нарсага босиб туширилган акси, изи. *Маълумотноманинг печати хира экан, ўқиб бўлмади.*

3 Фойдаланишни тақиқлаш ёки бошқалар очмаслиги учун қўйилган ёки урилган тамға, сургуч. *Бойлар бой бўлиб, илмсиз яшаб, Ориқларни семизи ошаб, Олти кун ўтмай ҳовлида печать, Ҳажж кетар хотинболани ташаб.* Ҳамза.

ПЕЧЕНЬЕ [*р. печь — «оловда пиширмак, ёпмоқ» фл. дан ҳосил қилинган от*] Кўпинча ширин хамирдан кичик тўтарак, тўртбурчак ва б. шаклларда ўтда, ўт тафтида пиширилган егулик. *Ширин печенье. Печенье билан чой ичмоқ.* ■ *Уй бекаси ўзининг асл руҳига кирди, жангчиларни қиём ва печенье билан меҳмон қилди.* Ойбек, Қуёш қораймас.

ПЕЧКА [*р. печь — «қизитмоқ, қиздирмоқ» фл. дан ҳосил қилинган от*] Бино ва хоналарни иситиш ёки овқат пишириш учун ишланган қурилма. *Тунука печка. Фишт печка. Голландча печка. Газ печкаси.* ■ *Адолат уйига келганда, печкага ўт қалаётган аясини кўрди.* С. Зуннунова, Гулхан. *Аҳмад бригадир ўрнидан туриб, печкага тараша ташлади.* С. Нуров, Майсаларни аёз урмайди.

ПЕЧКАЧИ Печка қуриш ва таъмирлаш иши билан шуғулланувчи киши. *Ҳозирда печкачиларга ҳам талаб камайиб кетди.* ■ *Ҳайратдан ёқа ушладик: печкачи одамнинг бир думалаб туриб, табиб бўлиб қолишига сабаб нима? «Муштум».*

ПЕЧЬ 1 айн. **печка.** *Нурлавой деб аталадиган ушбу сарой кенг, баланд заллари, баланд ойнабанд деразалари, рус печлари, махсус истироҳат хоналари билан маҳлиё этарди.* С. Сийёев, Аваз.

2 Материалларни қиздириш, эритиш ёки уларга ишлов бериш учун қурилган махсус иншоот. *Тоблаш печи. Темир эритиладиган печь.* ■ *Цехда ҳозирок ойна пиширадиган печь қурилмақда.* Газетадан.

Домна печи айн. **домна. Мартен печи** қ. **мартен.**

ПЕШ I [ф. پیش — олди, олд томон; олдинда, яқинида; аввали] **I** Баъзи нарса-ларнинг олдинга қараган томони, лаби, чети, қирғоғи. *Айвоннинг пеши. ■ -Аяжон, айёмингиз муборак! — деб совға-саломни айвоннинг пешига қўйди-да, онасига кифтини тутди. К. Яшин, Ҳамза. У қопидан кетмони олиб, пешини эговлай бошлади. «Шарқ юлдузи».*

2 Кийимнинг олд этаги, бари. *Камзулингнинг пешини боссам, гард бўлар, Ошиқлик деганинг қийин дард бўлар. «Кўшиқлар». Арғуншоҳ тиз чўкиб, подшоҳнинг этакларини юзига суртмоқчи бўлганди, Шохрух унинг қўлидан пешини тортиб олди. Б. Аҳмедов, Улуғбек. Енглари шимарилган Комилжон, этагининг пешини қайириб олган Давронс энг олдинда борарди. И. Раҳим, Ихлос.*

Пеш келтирмоқ Далил қилиб кўрсатмоқ, исбот сифатида фойдаланмоқ. *-Агроном илми ҳам, ер ҳайдасанг — куз ҳайда, куз ҳайдамасанг — юз ҳайда, дейди, — деди халқ мақолини пеш келтириб Сотиболди ота. Н. Сафаров, Хадича Аҳророва. Пеш қилмоқ* Мақтаниб гапирмоқ, дастак қилмоқ, рўкач қилмоқ. *Ўз хизматларини пеш қилмоқ. ■ Халққа тўхмат қилманг. Сиз меҳнаткаш халққа нима каромат кўрсата қолдингизки, унга дўстлигингизни пеш қиласиз? К. Яшин, Ҳамза. Кимдир пеш қилганда найзанинг кучин, Алишер қаламни кўрсатган, холос. А. Орипов, Юргим шамоли.*

ПЕШ II [ф. پیش — олдинда; ёнида, яқинида] *рвш. (бирин-кетин содир бўладиган иш-ҳаракатни билдирувчи икки феъл олдида такрорланганда) Фурсат ўтмасдан, дарров, дарҳол, пешма-пеш. Пеш терилган нахтани пеш топириб турмоқ. ■ [Иқбол сатанг] Ҳовли саҳнини кўздан кечирди. Ҳамма ёқ чиннидек. Шунча дарахт-у, тагида битта барг кўринмайди. «Пеш тушганини пеш олиб турадим дейман, — ўйлай кетди у, — қачон қарасанг, [Меҳринисонинг] ҳовлиси ёғ томса ялағудек». Р. Файзий, Ҳазрати инсон. Энгингиздан пеш тушган кийимни пеш ювиб турган бўлсак.. С. Аҳмад, Юлдуз.*

ПЕША [ф. پیشه — машғулот, касб, ихтисос] *эск. кт. I* Иш, машғулот; касб, хунар. *Хоннинг ўғли, деб қилманглар андиша,*

Тўққиз ёшда қилди шу ишни пеша. «Эрали ва Шерали». Бировнинг қўлида арра, тешаси, Васса яшаш — қадим иши-пешаси. Н. Назруллаев, Сайланма. Эл дерки: нодон дўст — бошингга жафо, Қора кунда чин дўст — пешаси вафо! Миртемир.

2 қ. **пешвоз.** *Дарахтни ҳамшиша ўрайди шамол, Шоирни ташвишлар чулғар ҳамшиша. Сен шоир умрини дема безавол — Унинг ҳар онлари ташвишга пеша. А. Орипов, Йиллар армони.*

ПЕШАЙВОН [ф. + а. پیشايوان — хона олдидаги айвон] *Иморат ва хоналарнинг олдида тақаб қуриладиган айвон. Умид кичкинагина чамадонни кўтариб, ичкарига кирди. Пешайвонга кўтарилиб, зал уйга кўз ташлади: узун стол устига оқ дастурхон ёзилиб, зиёфат нозу неъматлари уйиб ташланган эди. Мирмуҳсин, Умид.*

ПЕШАЙВОНЛИ *Пешайвони бўлган, пешайвон солинган. Пешайвонли сариқ бино олдида ўтаётганимизда, бир боғлам сирень кўтарган кичкина бир қизча бизга қўл силтаб қўйди. Ў. Умарбеков, Баҳор.*

ПЕШАНА *с.т. айн. пешона. Кўчқор бўлар қўзининг пешанаси дўнг бўлур, Оға бўлар йигитнинг пешанаси кенг бўлур. Мақол. ■ -Кечиринг, Гавҳар, — у нима дейишини билмай, пешанасига тушиб турган сарғиш сочларини тутамлади. Ў. Ҳошимов, Қалбингга қулоқ сол.*

ПЕШАНАБОҒ *с.т. айн. пешонабоғ. Пешанабоғ бошида, Доим меҳнат қошида. Ғайратли бу чечан қиз Энди ўн беш ёшида. «Кўшиқлар».*

ПЕШБАНД I [ф. پیشبند — олд томонга боғланадиган мато; фартук] *эск. айн. фартук. Холиса газўчоққа товўқларни димлаб қўйган. Белига пешбанд боғлаб, турли хил таомлар пиширяпти. С. Нуров, Нарвон. Шавкатнинг дадаси эркак киши бўлсаям, ҳар куни пешбанд тутиб, овқат пиширади. Қ. Кенжа, Тоғ йўлида бир оқшом.*

ПЕШБАНД II [ф. پیشبند — олд томони боғланган; олд томонга боғланадиган мато; фартук]: **пешбанд қилмоқ** *эск. Қўлини олдида қилиб боғламоқ. Бошқа бандиларнинг қўллари ҳам пешбанд қилингандан кейин, уларни мишрабхона дарвозасидан ташқарига — кўчага чиқардилар. С. Айний, Қуллар.*

ПЕШБУРУН *бнк. Эшик ёки дераза тавақаларининг бириккан жойидаги тир-*

қишни беркитиш учун ёнига ёки ёгин сувидан сақлаш учун тепасига қоқиладиган энсиз тахтача. *Дераза пешбуруни*. ■ [Санамнинг] *Дарвоза пешбурунидан осилиб тушган сумалакка кўзи тушди*. Ш. Холмирзаев, Тўлқинлар.

ПЕШВО [ф. *پيشوا* — раҳнамо; раҳбар, устоз] *кт.* 1 Маълум бир соҳа ёки ишда етакчи, илғор киши. *У барча мавжуд илмларни эгаллаб, замона олимларининг пешвоси.. бўлишга тиришади*. Ойбек, Навоий. *Холқўзи Худоёрлов Зумратнинг синфдоши эди.. Синфдаги қизлар ичидан энг сулуви Зумрат бўлса, ўғил болаларнинг пешвоси Холқўзи эди*. С. Сиёев, Отлиқ аёл.

Шариат пешволари Динни, шариат қонун-қоидаларини ҳимоя қилувчи руҳонийлар, уламо-ҳукамолар. *Саройда барча: шариат пешволаридан тортиб то кичкина амалдоргача шоирлик даъво қиларди*. С. Сиёев, Ёруғлик. *Секин-секин гап-сўзлар аёни мамлакат, шариат пешволари, уламо-фузалога етиб, эшонийимнинг бу ҳаракатларини айни муддао деб топдилар*. Ў. Усмонов, Сайланма.

2 Йўлбошчи, дохий. *Халқ пешвоси*.

ПЕШВОЗ [ф. *پيشواز* — учрашув; кутиб олиш]: **пешвоз турмоқ** Туриб қарши олмоқ, кутмоқ; юзма-юз турмоқ. *Совчиларнинг қадами тинди*. Қиз тенгилар кўришди рўзғор, *Унга пешвоз турарди энди Ўн тўққиз ёш, ўн тўққиз баҳор*. О. Ҳожиёва, Ҳаётга таъзим. *Раҳмонқулов кириши билан Элчибек бошқаларга жавоб берди, жилмайиб пешвоз турди*. А. Мухтор, Туғилиш. **Пешвоз чикмоқ** Истиқболга, йўлга чиқиб қарши олмоқ, истиқболига чикмоқ. *Бино панасидаги темир ўчоқда овқат пишираётган малла чойхоначи бир қўлида капгир билан югургилаб, уларга пешвоз чикди*. Э. Усмонов, Ёлқин. *Олма гулли кўйлак кийган жувон даҳлизда меҳмонга пешвоз чикиб, салом берди*. «Ёшлик». *Ҳовлимизга яқин қолганда, беш-олти хотин олдинда бораётган қўқон аравага пешвоз чикди*. Ў. Ҳошимов, Икки эшик ораси. **Пешвоз юрмоқ** айн. **пешвоз чикмоқ**. *Эмин уни кўриб, пешвоз юрди*. Эсонбойнинг ичкарига кириш тараддуди йўқлигини сезиб, унга саволомуз қаради. «Ёшлик».

ПЕШВОЗЛИК: **пешвозлик қилмоқ** Биринчи бўлиб гапирмоқ, гап бошламоқ.

ПЕШГИР [ф. *پيشگیر* — олдини олувчи, огоҳлантирувчи; пешбанд, фартук] 1 *эск. айн. фартук*. *Озиқ-овқат магазинларига бориб келган Холиса белига пешгир тутиб, эри ёқтирадиган таом тайёрлашга киришди*. С. Нуров, Майсаларни аёз урмайди. *Зоҳид бир чеккада бош ирғаб ўтирди*. *Эшикдан пешгир бойлаган бир аёл бош суқди-ю, ош сузарга рухсат сўради*. М. М. Дўст. Лолазор.

2 *махс.* Темирчи ва б. металлсозлар иш вақтида тутиб оладиган чарм фартук, пешбанд.

ПЕШДОР [ф. *پيشدار* — олдинда борувчи, илғор] *эск. ҳарб.* Қўшин олдида борувчи, илғор; авангард. *Ислим барлос.. катта сувори тўданинг бошида чанг кўтариб, пешдор аскар сифатида илдам йўлга тушди*. Ойбек, Навоий. *..Сардор Хунхоршоҳнинг буйруғи билан ўн минг аскарни олиб, ўздан олдин бир чўлоқ саркардасини минг аскар билан пешдор қилиб жўнатиб юборди*. «Авазхон».

ПЕШИН [ф. *پيشين* — аввалги, олдинги, дастлабки, қадимги; куннинг ярми] 1 Куннинг ярми ўтган пайт. *Жаҳонгир яшаган қишлоққа эртаси кун пешинга етиб боришди*. «Шарқ юлдузи». *..яна Яхшибоев иккимиз ёлғиз қолдик*. *Вақт пешинга оғиб борарди*. *Узоқда тоғлар қорайиб кўринади*. М. М. Дўст, Лолазор.

Охир (ёки кеч) пешин Куннинг ярмидан кўпи ўтган, кечки пайт. *-Вақт охир пешин бўлиб қолган эди*. *Қорним очган.. — деди Шум бола*. Ф. Фулом, Шум бола.

2 *дин.* Кун ярмида ўқиладиган намоз. *Пешинни ўқимоқ*. ■ *-Ўзимиз ҳам тамадди қилиб олайлик, — деди Махсум пешин намозига ҳозирлик кўраётим*. С. Анорбоев, Оқсой. *Уч дўст, пешин қазоси ўтгунча, Иноқий мадрасасининг бир кунжагида бекиниб ўтирдилар*. С. Сиёев, Ёруғлик. *Хўжа Хизр ҳар кун пешин намозини Бухородаги Мағоки Аттори масжидида ўқир экан*. Газетадан.

ПЕШИНЛИК Пешинда ейиладиган овқат, тушлик. *Бу камбағаллар овқати бўлиб, уларнинг тушлиги ҳам, пешинлиги ҳам шу эди*. *Ўрик билан зўфорани иштаҳа билан едилар*. П. Турсун, Ўқитувчи. *Йигитали, пешинликка деб онаси қилган овқатдан озгина еган бўлди-да, кўчага чиқиб, гузар тарафга йўналди*. Д. Нурий, Осмон устунни.

ПЕШКАШ [ф. پيشكاش – кичикларнинг катталарга совғаси, туҳфаси] эск. кт. Ҳадея тарзида бериладиган нарса; тортиқ, совға. *Подшоҳ чодирига йиғилган уламо, фузало ва лашкарбошилар Соҳибқиронни янги туғилган меҳмон билан қутладилар, ҳар ким ҳолига яраша пешкашлар қилди. Б. Аҳмедов, Улугбек. Келсанг, ўзинг келмай, ёринг билан кел. Дилкашларнинг қўлида торинг билан кел. Кел, сенга даламиз, лоламиз пешкаш, Гиёҳлар ичиде аъломиз пешкаш. Т. Сулаймон.*

ПЕШЛАВҲА [ф. + а. پيش لوهه – олд томонга осиладиган лавҳа(а)] Корхона, идора, муассаса, ўқув юрти кабилар ҳақида қисқа, ихчам, аниқ маълумот ёзилган ва шуларнинг кираверишида кўринарли жойга ўрнатиладиган махсус тахтача. *Ҳозирда шаҳримизда жуда кўлаб пешлавҳалар янги қабул қилинган лотин алифбосида ёзилмоқда. Газетадан. Лойиҳанинг ушбу бандида муайян биноларга ўрнатилган пешлавҳаларнинг ҳам, гарча реклама ҳисобланмаса-да, маълум бир талаблар асосида ёзилиши белгилаб қўйилса.. Газетадан. Ўша йиллари идоралар ва турли ташкилотларда пешлавҳалар ўзгараётган эди. С. Аҳмад, Сайланма.*

ПЕШЛАМОҚ Теша, кетмон каби асбобларни болғалаб уриб, тигини, дамини тикламоқ, пеш чиқармоқ. *Кетмонни пешламоқ. ■ Йўл-йўлакай канал қазичига келган кишиларнинг чодирлари, ошхоналар, кетмон, белкуракларни пешлайдиган кўчма устахоналар учраб туради. С. Аҳмад, Уфқ.*

Ақлни пешламоқ Ақл-идрокни ўстирмоқ, зеҳни очмоқ, ўткирламоқ. *Билим ақлни пешлайди. Р. Усмонов, Одобнома. Яхши китоб бола қалбини нурга чулғайди, маънавий озик беради, ақлини пешлайди, яқин маслаҳатчисига айланади. Газетадан.*

ПЕШМА-ПЕШ [ф. پيش پيش – олдинма-олдин, кетма-кет] рвш. Пеш келганини пеш бажариб, тўхтаммай, кетини узмай, кетма-кет. *Очилвой балиқтутнинг мустаҳкамроқ шохига қўл тарози осиб, пахталарни пешма-пеш ўлчаб олишга тушди. Н. Аминов, Тилло табассумлар. У [Озод] Райҳон оққа кўчирган саҳифаларни пешма-пеш диққат назаридан ўтказишга тутинди. «Ёшлик». Ҳосилдан бўшаган майдонларга эса пешма-пеш галла уруғи сепилмоқда. Газетадан.*

ПЕШМАТ [ф. پيش بند – олди боғлиқ; фартук] Тиззагача тушадиган, хипча бел

устки кийим; бешмат. [Бўрихўжа] *Ҳамма вақт узун пешмат ва мошранг духоба дўппи кияди. Мирмуҳсин, Чиниқиш. [Эшон оғим] Оқ шоҳи кўйлак устидан қора духоба пешмат кийган, бошига майин мисқоли дока рўмол устидан товар дуррача танғиган – олифта. Ойбек, Болалик. Устида беқасам пешмат, пешонасини танғиб боғлаб олган Сунбулхон аяни куни бўйи ваҳимали хаёллар чулғаб.. хаёл сурарди. Мирмуҳсин, Умид.*

ПЕШНОП [ф. پيش ناپ – киндик олди, атрофи] Кўйнинг киндик атрофидан олинган ёгли гўшт. [Муллажон:] *Шу қарздан узилмай, ундан кейин гўшт дўконига ишга кирман, еганинг пешноп, кийганинг атлас бўлади. С. Аҳмад, Муллажон. Сихкабоб, кунжутли нон, пешноп сомсалардан еб қолинг. И. Раҳим, Ҳаёт булоқлари.*

ПЕШОБ [ф. پيشاب – сийдик] айн. сийдик. *Селдир ейиш иштаҳани очади, пешобни ҳайдади, иситмада фойда қилади. К. Маҳмудов, Ўзбек тансиқ таомлари.*

ПЕШОЙНА [ф. پيش آينه – олд ойна] Автомобиль, трамвай, троллейбус кабиларнинг олд қисмига ўрнатилган ойна. *Чанг босилиб, юриш енгиллашгач, ҳайдовчи пешойна теңасидаги кўзеу орқали Йигиталига қаради. Т. Малик, Шайтанат.*

ПЕШОНА [ф. پيشانه / پيشانی – манглай, пешона] 1 анат. Юзнинг қошдан сочгача бўлган қисми, манглай. *Кенг пешона. Пешона суяги. ■ Бу гаплардан ҳашарчилар қотиб-қотиб кулишарди. Раззоқ буқачи пешонасини уқалаб, терга пишиб, индамай ўтирарди. С. Аҳмад, Жимжитлик. Икромжон тер босган пешоналарини, бўйинларини қийиғи билан артаркан, Азизхон тарафга бир қараб қўйди. С. Аҳмад, Уфқ.*

Пешонани боғлаб, ишга киришмоқ Астойдил ишга киришмоқ. **Пешонасини силамоқ айн. бошини силамоқ 2. қ. бош. [Бой:] Баракалла ўғлим! ..Ҳалол меҳнат қилсанг, ҳамиша бахтинг олчи-да! Ҳамиша пешонангни силайман!** Ҳамза, Бой ила хизматчи.

2 кўчма Диний тасаввурларга кўра: қисмат, тақдир. *Наҳот пешонамга тоабат тобелик, қуллиқ мақоми битилган бўлса. С. Сиёев, Ёруғлик.*

Пешонага ёзилгани Тақдирда белгиланган нарса; тақдир, қисмат. *Пешонамга ёзгани сен экансан, менда нима чора!* Ҳамза, Танланган асарлар. *Билмадим, тақдир унинг*

ва менинг пешонамга нималар ёзгандир. Ф. Гулом, Ёдгор. **Пешонада битганини** (ёки **ёзилганини**) **кўрмоқ** Тақдирда белгиланган нарсадан, қисматдан қочиб қутула олмаслик. *Уйнашмагин арбоб билан, арбоб урар ҳар боб билан. Пешонада битганини кўрасан.* Ҳамза, Бой ила хизматчи. *Зероки, рисоаларимиз мавжуд, ҳар ким ўз толеидан, пешонасига ёзилганини кўрадир.* У. Исмоилов, Сайланма. **Пешонамдан кўрдим** 1) таваккал, нима бўлса бўлар. «*Бахтинг бўлса, тузалиб кетасан*», дейишяпти. У ёғини пешонамдан кўрдим. «Саодат»; 2) тақдирда ёзилгани шу экан, на чора. *Хола, кўп эзмаланмай, чиқиб айта-веринг-да. Бўладиган бўлса, мендан сўраб нима қиласиз? Нима бўлса, пешонамдан кўраман.* Ҳамза, Танланган асарлар. **Пешонаси ёруғ** Омади келган, бахтли. *Пешонамиз ёруғ экан, ўғлим.* П. Турсун, Ўқитувчи. **Пешонасига сифмади** Айрилди, жудо бўлди.

3 с.т. Бисот, буду шуд, бор-йўғи. *Пешонагинамизда биттагина-да, ўргилай, биттагина.* С. Аҳмад, Уфқ. *Пешонамда битта ўғил, ёнимда юрсин, деб туриб олди.* С. Сиёев, Ёруғлик.

Пешона тери Меҳнат ва унинг маҳсули. *-Агар ўзининг пешона тери билан бойлик орттирган шайх топилса, — деди истехзо билан, — майли, мақбарани ўша бошқара қолсин, мен розиман! Шу билан гапим тамом.* К. Яшин, Ҳамза. *Ўғирлик қилиб тонган бўлсам айтинглар. Улар пешона тери билан топилган. Ҳалоллик билан орттирганман уларни мен.* К. Яшин, Ҳамза. **Пешона тери тўкмоқ** Тиришиб, астойдил меҳнат қилмоқ. *Мусобақадошингиз кўйган шартларни бажариш учун ҳалол меҳнат қилинг, баравар пешона тери тўкинг!* У. Исмоилов, Сайланма. **Пешонаси деворга тегмоқ** Тавбасига таянмоқ, қилмишига пушаймон бўлмоқ, туншунмоқ. **Пешонаси кўҳлик** айн. **пешонаси ёруғ** қ. **пешона** 2. *Олло таоло бировнинг пешонасини кўҳлик, бировникини қуп-қуруқ қилиб яратади. У бандаларига ризқ-рўзни ҳар кимнинг ўзига яраша ўлчаб сочади.* К. Яшин, Ҳамза. **Пешонаси очилмоқ** Иши юришмоқ, омади келмоқ, бахти очилмоқ. *Бой ҳам шу мулкнинг бадалига, пешонам очилиб, бирор иш-пишига тушиб кетгунимча, бирор йил чамаси боқмоқчи бўлибди.* Ф. Гулом, Шум бола. **Пешонаси шўр** ёки **шўр пешона** Бахтсиз, бебахт. *-Эҳ, пешонам шўр экан, ошина! Бир*

тавишидан қутулмасимдан иккинчиси таппа босади, — деди Алижон Омонтойга, бирон нажот топ, дегандай мўлтираб. К. Яшин, Ҳамза. [Жамила:] *Ёки Ғофирдек бахтсиз, онангдай пешонаси шўр бўлиб туғилармидинг?* Ҳамза, Бой ила хизматчи. **Пешонаси қора айн. пешонаси шўр.** *Йўл узунми, дард узун? Дарвиш ашуласи узун. Тун қорами, дард қора? Дарвиш пешонаси қора.* Х. Даврон, Қақнус. **Пешонасини тириштирмоқ** Энсаси қотмоқ ёки жаҳли чиқмоқ. *Олчинбек дабдурустдан кириб келиб, тилёғламачилик билан бошлаган гапи Ҳамзанинг энсасини қотирди. Пешонаси тиришиб, қаттиқ гапиргиси келди-ю, лекин ўзини босди.* К. Яшин, Ҳамза. *Мансур бир нафас пешонасини тириштириб, ўйланиб турди-да, эшик тутқичига қўл чўзди.* Ў. Ҳошимов, Қалбингга қулоқ сол.

ПЕШОНАБАНД [пешона + банд] 1 Аёллар бошига, пешонасига боғлайдиган, танғиб ўрайдиган кичкина рўмол.

2 эск. Рўмол устидан пешонага боғланадиган, кашта билан безатилган боғич.

ПЕШОНАБОҒ айн. **пешонабанд** 1. *Сора кампир.. елкасига тушиб кетган кўк штапель пешонабоғини бошига тортганди, у билан баробар сочи учудаги чўлпилари ҳам шиқирлаб, юқорига кўтарилди.* «Ёшлик». *Холанинг пешонабоғи остидан оқ кулранг сочлари чиқиб турар, кўз атрофи, бўйнида ажинлар қуюқлашгандай эди.* С. Нуров, Майсаларни аёз урмайди.

ПЕШРАВ [ф. پيشرو — олдинда борувчи; илғор; раҳбар, раҳнамо] кт. Бошлаб борувчи, етакловчи; нишона. *Соқол оқи ўлимга пешравдир. Тириклик сабзаси узра қировдир.* Алишер Навоий.

ПЕШТАХТА [ф. پيش‌تخته — олдинга қўйилган тахта, стол] 1 Дўконда, магазинда, бозорда сотувчини харидордан ажратиб турадиган, устига соғиладиган моллар қўйиладиган, кўпинча харидор томони ёпиқ махсус стол. *Магазинда одам йўқ.. Пештахта орқасида ёшигина сотувчи йигит ўтирарди.* С. Аҳмад, Жимжитлик. *Мудир пештахтани айланиб ўтиб, Гулчеҳрага яқин келди.* «Саодат». *Бу ерда ҳозирча деҳқонлар ўз маҳсулотлари билан савдо қилишяпти, пештахталар қўйиб берганмиз.* Газетадан. *Яқинда «Шарқ зийкори» китоб дўконида пештахтани безаб турган бир ноёб альбом-китобга кўзим тушиб, беихтиёр уни варақладим.* Газетадан.

2 бнк. Карнизнинг бўйламасига қўйилган кичик тўсин ёки тахта.

ПЕШТАҲАМ [ф. پيشدهن / پوچدهان — беодоб, беҳаё сўз айтувчи] Оғзига келган ножўя, уятли сўзларни қайтармай айтaveraдиган, оғзи бузуқ киши. *Пештаҳам одам.* ■ *Ҳа, атрофида бидъатга муккасидан кетган беш-ўнта нодон, иғвогар, шилқим.. пештаҳамлари ҳам бор.* А. Мухтор, Опа-сингиллар.

Оғзини пештаҳам қилмоқ Уятли сўзлар айтмоқ, сўкинмоқ. *Қамчи:* — *Менимча, бу тўнғиз ёлғиз эмас, шериклари бор,* — *деганда, Қобил бир ижирганиб, яна оғзини пештаҳам қилди.* Ҳ. Фулом, Машъал.

ПЕШТОҚ [ф. پيش — олд ва а. طاق — гумбаз, кубба; арка] *архит.* Мадраса, масжид, мақбара, карвонсарой каби биноларнинг олд томондаги серҳашам юқори қисми; меҳроб шакли баланд дарвоза, арк. *Деразадан аллақандай мадрасанинг кунгурдор пештоқи кўрипти туради. Пештоқ чеккасида шерлар тасвирилган.* Ў. Ҳошимов, Икки эшик ораси. *Анвар пештоқиди чироқ ёниб турган жимжимадор дарвоза олдида етганида, бирдан юраги гупиллаб кетди.* Ў. Ҳошимов, Қалбингга қулоқ сол.

ПЕШҚАДАМ [ф. + а. پيشقدم (пеш + қадам) — илғор, ташаббускор; зарбдор] **1 сфт.** Иш, ўқиш, спорт кабиларда бошқалардан олдинда боровчи, ўрнак кўрсатувчи; илғор. *Пешқадам теримчи.* ■ *Пешқадам ишчи кунига режадаги 480 та ўрнига 650 тача рўмоннинг четини тикади.* Газетадан.

2 от Шундай хусусиятга эга бўлган киши, ўқувчи ёки спортчи. *Тиришиб машқ қилишим орқасида, ҳамсабоқ ўртоқларим орасида иншо ёзишда пешқадам бўлиб олдим.* Н. Сафаров, Оловли излар. *Гуруҳ пешқадами — Бразилия терма командасининг кутилмаган мағлубияти вазиятни ўзгартириб юборди.* Газетадан. *Кимдир эски усуллар билан ишлайди, кимдир компьютер техникаси афзаллигига ишонади, кимдир эса ўз соҳасининг пешқадами бўлади.* Газетадан.

ПЕШҚАДАМЛИК Иш, ўқиш, спорт кабиларда бошқалардан олдинда бўлишлик, ўрнак кўрсатиш, илғорлик. *Пешқадамлик учун курашмоқ. Пешқадамликни қўлдан бермай ишламоқ.*

ПИАНИНО [итал. pianino — кичик фортепьяно] *мус.* Торли урма-клавишли мусиқа асбоби, фортепьянонинг бир тури.

Дам олиш минутларида Фарида унга пианино чалиб берар.. эди. П. Қодиров, Уч илдиш. *Қаердадир, аллаким пианинода «Жонон»ни чалмоқда.* С. Зуннунова, Олов.

ПИАНИНОЧИ Пианино, рояль чалувчи созанда. *2002 йили Италиянинг Агрополи шаҳрида бўлиб ўтган ёш пианиночилар танловида иштирок этдим.* Газетадан.

ПИВО [р. пиво < пить — «ичмоқ» с. дан ҳосил қилинган от] Кўпинча ундириб янчилган арпадан тайёрланадиган, кам спиртли ичимлик. *Қйрай пивоси. Пиво заводи.* ■ *Ҳа, айтгандай, Самарқанд пивосини мақташарди. Чанқовбосди қилмайсизми? «Аския».* *Дарҳақиқат, қассоб пиво дўконининг орқа эшигига яқин бориб, ўша болага кўз қисиб имлади.* Н. Аминов, Қаҳқаҳа.

ПИВОХОНА Пиво сотиладиган, сотиб олиб ичиладиган махсус дўкон; майхона. *Кеча қайси пивохонада ичиб қолганингизни ҳам мenden сўрайсизми? А. Қаҳҳор, Сароб. Сандироқлаб юриб, пивохона ёнида тўхтади, бир оз чайқалиб тургач, ичкарига кирди. «Ёшлик».*

ПИВОХЎРЛИК Пиво ичиш билан шуғулланиш, пивони кўп ичишлик. *Трест дарвозасининг олдидаги пивохонада шериклари билан роса пивохўрлик қилган.* Ў. Умарбеков, Юлдузлар.

ПИГМЕНТАЦИЯ [лот. pigmentum — бўёқ, бўёвчи модда] Пигментлар таъсирида организмларнинг тегишли тусга кириши, рангининг ўзгариши.

ПИГМЕНТЛАР [лот. pigmentum — бўёқ, ранг] **1 биол.** Тирик организм (ҳайвон ва ўсимлик) тўқималари таркибида бўладиган ва уларнинг рангини белгилайдиган бўёқ моддалар. *Соч оқариши унда пигмент этишмаслиги оқибатидир.* «Фан ва турмуш». *Чунки қудуқ суви, айниқса, пигмент этишмаслиги натижасида терида пайдо бўладиган оқ доғларга «шифо» бўлар эмиш.* «Фан ва турмуш».

2 ким. Лак-бўёқ маҳсулотлари, кимёвий толалар, пластмасса, резина ва қоғозга ранг берувчи, сувда ва органик эритувчиларда эримайдиган кукунсимон кимёвий бирикмалар.

ПИДЖАК [ингл. pea-jacket < голл. rij — дағал мато + jekker — куртка] Қайтарма ёқали, олди очик, тугмаланадиган калта уст кийим — эркалар костюмининг бир қисми.

Олимжон пиджагини ечди-ю, мулойимлик билан Ойқизнинг елкасига ташлади. Ш. Рашидов, Бўрондан кучли. Яхшибоев энидаги пиджакни ечиб, отиб юборди. М. М. Дўст, Лолазор. Гаёҳар ўт устида ётган пиджакни олди-да, унинг елкасига ташлади. Ў. Ҳошимов, Қалбинга кулоқ сол.

ПИДИНА [ф. پودنه — ялпизнинг бир тури] с.т. айн. **ялпиз**. Ялпиз. Баъзи жойларда пидина ёки наъмо деб аташади. К. Маҳмудов, Ўзбек тансиқ таомлари.

ПИЕЛИТ [юн. pyelos — жом + лат. itis — яллиғланишни билдирувчи кўшимча] тиб. Буйрак жомининг яллиғланиши.

ПИЕЛОНЕФРИТ [юн. pyelos — жом + nephros — буйрак + лат. itis — яллиғланишни билдирувчи кўшимча] тиб. Буйрак ва буйрак жомининг яллиғланиши. Пиелонефрит буйрак тўқимасига касаллик микроблари кириши натижасида вужудга келади. «ЎЗМЭ».

ПИЁВА [ф. پيادە — пиёз + آب — сув] Пиёздоғ ва сувдан тайёрланган гўштсиз суyoқ овқат; ёвгон шўрва. Тур, қизим! Ҳа, аччиққина бир коса пиёва қилгин, кўнглим озиб кетди. Ҳамза, Танланган асарлар. Мазифа она эса кунора айвондаги ўчоқда бир иссиқ пиёва қилади. Ш. Холмирзаев, Танланган асарлар.

ПИЁДА [ф. پياده — яёв, оёқ билан; уловсиз аскар] 1 рвш. Уловсиз, ўз оёғи билан; яёв. Одамлар нимагадир трамвай-троллейбусга ўтирмай, тўда-тўда бўлиб, пиёда кетишяпти. Ў. Ҳошимов, Қалбинга кулоқ сол. Ҳожи ота карвонбоши билан кўришиб, Рўзиохунбой боғининг ниҳоясигача отнинг чилвирдан ушлаб, пиёда юрди. «Ёшлик».

2 сфт. От-уловга эга бўлмаган, яёв юрадиган. Самолётлардан сўнг танклар ҳужума кирди. Унинг орқасидан пиёда роталар кўзгалди. И. Раҳим, Чин муҳаббат. Шу чоқ қишлоқнинг кун ботиш томонидан баланд “ура” овози эшитилди ва қишлоққа мўр-малахдай ёпирилиб келаётган пиёда аскарлар кўринди. А. Қаҳҳор, Олтин юлдуз.

3 от ҳарб. (асосан кўпл. шаклида) Яёв жанг қилиш учун белгиланган кўшин тури. Отлиқлар кетидан пиёдалар ҳам юзуриб кетишиди. Ш. Холмирзаев, Қил кўприк. Гулдурс билан келаётган танклар орқасидан пиёдалар югурди. Ойбек, Кўёш қораймас.

4 от Шахмат ўйинида: энг кучсиз дона. Ўйин билмасанг, пиёдани сур. Мақол. ■ [Мухторжон] Саидийга энди жавоб бераман деб турганда, Мирза Муҳиддин бир пиёда суриш билан унинг илгариги ҳолатда қолдирди. А. Қаҳҳор, Сароб.

5 қ. йўловчи. Тротуар — пиёдалар юрадиган йўлка.

Пиёда ўчоқ 1) ошхонада бошқа ўчоқлардан алоҳида қурилган ўчоқ, шунингдек, очиқ ҳовлидаги алоҳида ўчоқ; 2) ерга қурилган, оғзи осмонга қараган тандир.

ПИЁДАЛАБ фольк. Пиёда юриб, пиёда, яёв. От-арава чўлда қолиб кетади, Пиёдалаб шоҳ қошига етади. «Алпомиш». Пиёдалаб Ҳақиқ тоғдан жўнади, Борар ернинг тайинини билмади. «Ширин билан Шакар».

ПИЁДАЛАШМОҚ Кўпчилик бўлиб пиёда юрмоқ, бормоқ, айланмоқ.

ПИЁЗ [ф. پياز — пиёз, бир бош пиёз] 1 Барглари найчасимон узун бўлиб ўсадиган, илдииз бўғида юпқа қат-қат пўстлардан юмалоқ тугунақ ҳосил қиладиган, тугунаги ва ёш барги овқатга ишлатиладиган икки йиллик ва кўп йиллик сабзавот ўсимлиги. Оқ пиёз. Қизил пиёз. Барра пиёз. Кўк пиёз. Топган гул келтирар, топмаган — бир боғ пиёз. Мақол. ■ Бутун оиласи бу ерга помидор, пиёз, редиска, карам ва ҳоказо резавор экиб, мумкин қадар элдан бурунроқ бозорга чиқариб, «пул» қилишга тиришар эди. Ойбек, Танланган асарлар.

Пиёзи ансурий Ўрта Осиёнинг тоғли худудларида ўсадиган, тугунақ ҳосили овқатга ишлатиладиган сервитамин ёввойи пиёз. **Саримсоқ пиёз айн. саримсоқ 1.**

2 Баъзи ўсимликларнинг пиёзсимон илдизи, тугунаги. Лола пиёзи.

Пиёзнинг пўстидай Жуда юпқа. Пиёзнинг пўстидай парда. Қорни пиёзнинг пўстидай бўлди Қорни жуда, ниҳоят очди. Аммо қасмёд қилиб айтаммизки, қоринларимиз пиёзнинг пўстидай бўлиб кетди. Ш. Рашидов, Бўрондан кучли.

ПИЁЗГУЛ [ф. پيازگل] Лолагуллилар оиласига мансуб узун пояли, пиёз илдизли хушманзара ўсимлик ва унинг карнайсимон йирик гули.

ПИЁЗДОҒ [ф. پيازداغ] Ёғда қовурилган пиёз. Пиёздоғ қилмоқ. ■ Пиёздоғнинг ҳидлари димоғимга кириб, иштаҳа ҳам намозшомгулнинг карнайндай очилиб кетган. Ф.

Фулом, Шум бола. *Кўшни ҳовлида кимдир жаз-буз қилиб пиёздоғ қилмоқда.* С. Аҳмад, Хукм. *Ҳозиргина пода қайтган, қишлоқ бузоқларнинг қий-чуви билан тўлган, ҳавода пиёздоғ иси анқийди.* Ў. Ҳошимов, Қалбингга кулоқ сол.

ПИЁЗИ [ф. پیازی — пиёзга оид, пиёз каби] Жундан юпқа қилиб тўқилган (мато ҳақида). Унинг бошида *Бухоро амалдорлариникидек ўралган дока салла, эғнида пиёзи мовутдан чакмон, оёғида сариқ кавуши-маҳси.* С. Айний, Дахунда. *Пиёзи чакмоннинг барини қатимига қисиб, қора бахмал ҳошияли оқ қалпоғини бостириб олган хушрўй йигит баланд пахсадан осилиб тушган беҳи шохига қараб борар эди.* М. Исмоилий, Фарғона т. о.

ПИЁЛА [ф. پیاله < юн. phiale — сув ичиладиган ясси косача] Тубидан юқорига томон кенгайиб борадиган, косадан кичик, тагликли идиш (асосан чой ичиш учун ишлатилади). *Чинни пиёла. Сопол пиёла.* ■ *Ўн уч кундан бери туз тотмаган одам ўша кунни ярим пиёла товуқ шўрва ичдилар.* К. Қаҳҳорова, Чорак аср ҳамнафас. *Азизхон қўлидаги пиёлани бўшатиб, хайрлашиб чиқиб кетди.* С. Аҳмад, Уфқ.

ПИЁН [р. пьяный — маст, кайфи бор] с.т. Ичкиликдан кайфи ошган, маст. *Пиён бўлмоқ. Пиён улфат — бепоён кулфат.* Мақол. ■ *Ҳаммадан олдин ўсмирча гавдали Султон пиён дикиллаб турди.* Н. Аминов, Қаҳқаҳа.

ПИЁНИСТА, пияниста [р. пьяница — ичкиликбоз, ароқхўр] с.т. Спиртли ичимликни кўп ичадиган; ичкиликбоз, ароқхўр, майпараст киши. *Эй шўринг қурсин. Роса пиёниста экансан.* С. Аҳмад, Уфқ. -*Пиёниста бўлмасин ишқилиб, — Бахринисонинг оҳиста айтган бу сўзини ҳеч ким эшитмади.* «Гулдаста». *Битта ўзининг боққанимиз ҳам етарди. Йўқот пияниста ўртоқларинени!* Ў. Ҳошимов, Қалбингга кулоқ сол.

ПИЁНИСТАЛИК эск. с.т. Спиртли ичимликни кўп ичиш, ичкиликбозлик, майпарастлик. *Пиёнисталикка барҳам бермоқ.*

ПИЖАМА [ингл. pyjamas < ф. + ҳинд. پای — оёқ + جامه — кийим] Юмшоқ матодан тикилган, шим ва кенг калта халатдан иборат, уй ичида кийиладиган енгил кийим. *Штапель пижама. Қишлоқ пижама.* ■ [Борис Александрович] *Ўрнидан туриб, чироқни ёқди. Эғнида йўл-йўл пижама,*

кўзойнагини кўтариб-кўтариб, у ёқдан бу ёққа юра бошлади. С. Анорбоев, Меҳр. *Шукуров йўл-йўл пижамасининг кенлигиданми, жуда бақувват, миқти кўринарди.* О. Ёқубов, Диёнат.

ПИЗИЛЛАМОҚ Жуда тез юрмоқ, елдай югурмоқ; зипилламоқ, зингилламоқ. *Дарвозасидан қарасам, пешонасига шоҳи белбоғини танғиб олиб, ҳовлида яқтакчан пизиллаб юрибди.* И. Раҳим, Ҳилола. *Ун қадамча наридан чиябўри кўзларини ёндириб, жар томонга пизиллаб ўтди.* Ҳ. Назир, Ўтлар туташганда.

ПИЙМА [р. пимы < шимол халқлари тилларидан: буғу терисидан қилинган қишқи этик] Жундан босиб тайёрланган, узун кўнжли, иссиқ қишлик оёқ кийим. *Оёқ яланг қор кечади, сўнгги пиймасини жангчиларга икки қўллаб тутқазди.* С. Кароматов, Олтин қум.

ПИЙМАЧИ Пийма тайёрловчи уста. *Кўчкин бир пиймачи латиш ҳовлимизда яшарди.* С. Аҳмад, Сайланма.

ПИЙПАЛАМОҚ 1 Босиб-янчиб ёки уриб-туртиб эзгиламоқ, эзмоқ. *Мард бўлсанг, тўғрини эмас, ўғрини пийпала.* Мақол. ■ *Агар Валиев ёмонликка олса, уни бирназдаёқ пийпалаб ташлайди.* Э. Усмонов, Ёлқин. *Кейин бировлар консервани пийпалаб кетди, бировлар уйда тартиб ўрнатишга уннади.* А. Мухтор, Туғилиш.

2 айн. пайнасламоқ 1.

ПИЙПАЛАНМОҚ Пийпаламоқ фл. мажҳ. н. *Ҳали вақт кўп, тиқилинчда пийпаланиб нима қиламан, деб ярим йўлда тушиб қолдимда, папирос тутатиб, секин пиёда кета бошладим.* У. Назаров, Биринчи учрашув.

ПИЙПАМОҚ айн. пийпаламоқ. *Чўлоқ девни пийпаб олди остига.* «Нигор ва Замон».

ПИЙПАСЛАМОҚ 1 айн. пайнасламоқ 1. *Бир пайт бола уйқусираб ингради, кўзларини очмасдан, кўрпанинг четини пийпаслаб ушлаб, юзига тортиди.* Ш. Холмирзаев, Оқ отли. *Шерали ўтириб, ўнг оёғи тиззасини пийпаслаб кўрди.* С. Кароматов, Олтин қум.

2 Юпатмоқ, овутмоқ. *Сарви хола овсинининг хафалигини бир оз ёзиш учун пийнаслаб гапира кетди: -Шаттакилигим ўлсин, овсин, гапиравераман. Аслида ўзи шу яхши.* Р. Файзий, Қайнона.

ПИЙСАБИЛЛО [а. فى سبيل الله — оллоҳ, худо йўлида (садақа сўраш маъносида)] с.т.

Кўнгилдан, дилдан чиқариб. — *Жиян, сенинг мендан бўлак жони ачийдиган кишинг йўқ, домланнинг қизидан айрилма, майли, мен пийсабилло сени ўша олижаноб домлага бердим, унга ўғил бўл, бахтли бўл, — деди Умидга тоғаси.* Мирмуҳсин, Умид. *Ишин пийсабилло бўйинга олгандан кейин, уодасидан чиқсангиз қилинг-да!* У. Исмоилов, Сайланма.

ПИКАП [ингл. pick-up — < pick up — кўтариш] Юк ва одам ташиш учун белгиланган очиқ кузовли, ўриндиқлари борт бўйлаб жойлашган кичик автомобиль.

ПИКЕТ [фр. piquet — қозик, қозикча] I ҳарб. Кам сонли соқчилар отряди.

2 Иш ташлаш юз берган жойда қорувлик қилиб юрувчи ишчи гуруҳ.

3 сиёс. Одатда ҳукумат идоралари олдига бирор нарсдан норозиликни ифодалаш учун қўйиладиган вакиллар гуруҳи.

ПИКИРОВКА [фр. piquet — қозик, қозикча] қ. х. Полиз-сабзавот, мева, манзарадор ўсимликларнинг янги униб чиққан кўчатларини олиб, уларнинг ўсиш шароитларини яхшилаш мақсадида бошқа жойга ўтказиш (кўпинча қозикчалар ёрдамида). *Бир парник ёки яшикдаги кўчатларни бошқа парник ёки яшикка олиб, сийрак қилиб экиш «пикировка» деб аталади.* Газетадан.

ПИКТОГРАФИЯ [лот. pictus — бўёқда чизилган, тасвирланган + юн. grapho — ёзаман] тлш. Нарса-буюм, воқеа-ҳодиса, иш-ҳаракатларни шартли белги-расмларда акс эттиришдан иборат ибтидоий ёзув тури (бундай ёзув излари ҳозирги кунда йўл ҳаракатини тартибга солувчи белгиларда, турли кўрсаткич ва пешлавларда қўлланмоқда).

ПИЛДИРАМОҚ I Кўз илгамас даражада тез айланмоқ, ҳаракат қилмоқ. *Мотор гулдураб, ғилдирак пилдираб, цехда яна иш бошланди.* А. Қаҳҳор, Қанотсиз читтак. *Сой оқимиға қарши бир қарич, бир ярим қарич катталикдаги балиқлар пилдираб сузишарди.* С. Аҳмад, Жимжитлик.

2 Майда қадам билан тез, шошиб-пишиб юрмоқ (кўпинча болаларга нисбатан). *Тўланбой йўқ дейай, пилдираб кетаверарди.* С. Аҳмад, Уфқ. *Эрта тонгда бирин-кетин катталар ишга, кичкинтойлар пилдираб, боқча ва мактабларга йўл олишади.* «Ёшлик». *Карим энтикканича, қўрқа-писа дадам кетидан пилдираб кетди.* Ҳ. Назир, Бир туп гўза.

ПИЛДИРОҚ с.т. қ. **пирилдоқ.**

ПИЛДИРПИС с.т. Индамай, жимгина. *Болалар пилдирпис бўлиб, жой-жойига ўтиришди.* Шерзод ҳам қорнини чангаллаганча, ўз партасига кетди. Ў. Ҳошимов, Икки эшик ораси. *Донибой ҳар замон-ҳар замонда бир қорасини кўрсатиб қўяр, шундаям оёқ-поёғидан сал совуқ ўтди, пилдирпис жўнаб қоларди.* Ш. Бўтаев, Кўрғонланган ой.

ПИЛЕСОС [р. пылесос — чангсўргич] Кийим-кечак, гилам, мебель кабиларни чангдан тозалайдиган аппарат, чангсўргич. *Врач пилесосни ўчириб, ўриндиқ четига ўтирган проводник билан сўзлашади.* Ҳ. Аҳмар, Яккама-якка. *1988 йилдан бошлаб Париж метроси бекатларида роботлаштирилган пилесослар ишлаб бошлади.* «Фан ва турмуш».

ПИЛИК I Бир учи ёритқич асбоб ичидаги керосинни ёки мойни шимиб, иккинчи — ёнувчи учига ўтказиб берадиган лентасимон мато ёки эшилган пахта. *Қорачироқ пилиги. Шамнинг пилиги. Лампа пилиги. ■ Мойи тугаб, пилиги сўхта бўлган чироқ бир лип этиб сўнди.* С. Аҳмад, Ҳукм. *Ёшига нисбатан анча тетик, барваста чол остона ҳатлади. Гулрўйнинг юраги безовта теганча, яна бир бор эшитилар-эшитилмас, ўтиринг, деб қўйди-да, чироқ пилигини бир оз кўтариб, кўрпача ташлади.* «Ёшлик».

Пилигини кўтармоқ кўчма Бирор нарсанинг, иш-ҳаракатнинг даражасини, савиясини, миқдорини кўтармоқ, оширмоқ. [Расулжон:] *Йўқ, дўстим, ҳозирги замонда математикадан оқсаиш ярамайди. Математикадан баҳонинг пилигини кўтариш керак.* Ж. Абдуллахонов, Хонадон. — *Сиз ҳам бизнинг диний урф-одатларимизга дахл қилманг, оқибати яхши бўлмайди, — деди мулойимлик билан. Кейин пилигини сал баланд кўтариб, илова қилди. — Сиз ёшликда қандай бўлсангиз, ҳалиям ўша-ўша чўрткесар, ўжар, қизикқонсиз.* К. Яшин, Ҳамза.

2 тўқм. Пахта, жун, ипак ва зиғир толарини бўшгина ҳимариб, чўзиб, тўғрилаб ҳосил қилинадиган маҳсулот. *Пилик ип йиғириш учун асосий хомашё ҳисобланади.* «ЎЗМЭ».

3 Соч ўрими ечилиб кетмаслиги учун унинг учига қўшиб ўрилган пахта. *Сочини майда ўриб, учига пилик таққан, оёғига кавуш, энига чит кўйлак кийган ўн олти ёшлардаги бир қиз анор узиб, саватга терарди.* С. Аҳмад, Сайланма.

4 Арвоҳларга, инсу жинсларга агаб ёқиш учун бир учига пахта ўраб, ёққа ботирилган чўп. *Камзулининг чўнтагидан қамишига ўралган бир неча пиликни олиб, учтасини Сурмаҳон қабрининг бош томонига тиқиб, ёндириб қўйди.* И. Раҳим, Ихлос.

5 Қош, киприкни бўяш учун ишлатиладиган, учига пахта ўралган чўп. *Сатимхоннинг қўшнилари билан тотувлашиб олганини айтмайсизми — бир пиёла кетидан ўсма қўйиб, бир пиликдан сурма тортгандай!* Шуҳрат, Умр поғоналари.

ПИЛИКДАЙ, -дек 1 Пилик каби, пиликка ўхшаш ингичка, нозик. *Эсимда, оёғи пиликдай гўдак Очликдан қоқ уриб, берган эди жон.* «Ёшлик».

2 Чиройли, гўзал. *Сувдан чиққан зулукдай, Қошу кўзи пиликдай Келин पोшишага салом.* «Оқ олма, қизил олма».

ПИЛИКЛИ 1 Пилиги бўлган, пилик воситасида ёнадиган. *Ҳар маҳаллага шаҳар думахонаси ўтқазган фонусларнинг ичида биттадан еттинчи пиликли керосин лампа ёнар эди.* Ф. Фулом, Шум бола.

2 Учига пилик қўшиб ўрилган (соч ўрими ҳақида). *Ўша йили сочим эди — оқ пиликли жамалак.* Ф. Фулом.

ПИЛЛА I [ф. *پيله*] — ипак курти пилласи, ғумбак] **1** Ипак курти ғумбакка айланишдан олдин ўз устига ўраб ҳосил қилган қобиқ, ипак куртининг маҳсули; табиий ипак олинадиган хомашё. *Пахтанинг ҳар шонаси — Мўл ҳосил нишонаси. Пилланинг ҳар толаси — Шойи-атлас онаси.* «Кўшиқлар». *Пилла қуртлар сўрида, Уйимизнинг тўрида, Тут барг ейди вишиллаб.* Қ. Ҳикмат.

Пилла тортмоқ Пиллани махсус йўл билан ишлаб, ипак толасига айлантирмоқ. **Пўчоқ пилла** Ичидан капалаги тешиб чиқиб кетган пилла. **Тўқ пилла** Қобиғи қалин етук пилла.

2 Кўпгина ҳашаротлар ғумбагининг ҳимоя қобиғи.

ПИЛЛА II [ф. *پيله* — йирингли яра, чипқон; милкнинг йиринглаши] *тиб.* Тиш милкнинг шишиб, йиринг бойлаши.

ПИЛЛАКАШ [ф. *پيله كاش*] — пилла тортувчи] **1** Пиллани махсус йўл билан ишлаб, ундан ипак олувчи, пилла тортувчи киши. [Низомжоннинг] *Қиладиган иши — пиллакашларнинг қозонига ўт қалаш.* С. Аҳмад, Уфқ. *Пилла тортишда пилла сир-*

тидаги чулғамлар, ипак толаси ва пилла ичидаги чулғанмайдиган парда олинади. «ЎзМЭ».

2 айн. пиллачи.

ПИЛЛАКАШЛИК 1 Пиллакаш касби. *Бу ерда [фабрикада Мунисхон] пиллакашлик касбининг нозик томонларини қунт билан ўрганди.* Газетадан.

2 Пилла тортиш, ундан ипак олиш иши, шу иш билан шуғулланувчи соҳа. *Иш жараёнларига сарфланадиган меҳнат каммайсин учун, пиллакашликни автоматлаштириш лозим.* «Фан ва турмуш».

3 айн. пиллачилик 1. Пиллакашлик бригадаси.

ПИЛЛАКОР айн. пиллачи. Пиллакору чорвадор, ғаллакор, боғбону соҳибкор — ҳаммасининг юзи ёруғ. «Саодат». *-Катта концерт! — деб кулди секретарь, — пиллакорларнинг йиғини бор, шахсан саркотибнинг ўзлари қатнашади.* С. Сиёев, Отлиқ аёл.

ПИЛЛАКОРЛИК айн. пиллачилик.

ПИЛЛАПОЧА [ф. *پيله پاچه*] — оёқ қўйиладиган поғона] Пиллапоя, поғона.

ПИЛЛАПОЯ [ф. *پيله پايه* — зина; оёқ қўйиладиган поғона] **1** Зина ёки нарвоннинг ҳар бир поғонаси, босқичи; поғона. *Жўрабой уйқусизликдан мудраб, зинанинг икки-уч пиллапоясига барабар оёқ ташлаб юборган эди, қалқиб кетди.* С. Аҳмад, Қадрдон далалар. *Бир оёғини вагоннинг юқориги, бир оёғини пастки пиллапоясига қўйиб турган Саодатнинг кўзи онасида эди.* Н. Сафаров, Саодатнинг қиссаси. *Тезда орқасига қайтдида, тепаликнинг нариги томонидаги махсус пиллапоядан пастга тушиб, боланинг олдида чопди.* С. Зуннунова, Олов.

2 *кўчма* Босқич, кўтарилиш босқичи. *Ҳақиқий илм фидойилари фаннинг машаққатли, аммо фахрли пиллапоялари сари илгарилаетиб, ўзларини очилмаган кўриқ сари бораётгандай ҳис этишади.* Газетадан. *Ҳаёт инсонни аста-секин вояга етказар, ўз пиллапояларидан бирин-кетин етаклаб чиқарар экан.* «Ёшлик».

ПИЛЛАХОНА [пилла + хона] Пилла курти боқиладиган, пилла етиштириладиган махсус жой, хона. *Инкубаторлар учун жой тайёрлаш, пиллахоналарни ремонт қилиш, ёқилғи жамғариш, биноларни дезинфекциялаш ишлари авж олиб кетди.* Газетадан.

ПИЛЛАЧИ Ипак курти боқиш ва пилла етиштириш билан шуғулланувчи киши. «*Қишлоқ ўқитувчиси*» қиссаномам унинг қаҳрамони — *Давлат мукофоти лауреати, новатор пиллачи, қишлоқ ўқитувчиси Олия-хон Султонованинг издошларини етиштирди*. Н. Сафаров, Оловли излар.

ПИЛЛАЧИЛИК 1 Ипак курти боқиш ва пилла етиштириш иши, касби. *Пиллачилик — фахрли ва масъулияти касб*. Газетадан. *Раён бош пиллахонасида ипак курти боқиш мавсуми олдидан пиллачилик мутахассислари учун малака ошириш курслари ташкил этилди*. Газетадан.

2 Қишлоқ хўжалигининг пилла етиштириш билан шуғулланувчи соҳаси. *Хўжалик сертармоқ: колхоз боғдорчилик, узумчилик, деҳқончилик, чорвачилик, пиллачилик билан шуғулланади*. Газетадан.

ПИЛОРАМА [р. пила — арра + нем. Rahmen — ром, таглик, асос] Ғўла ёғочдан тахта тилиш, аралаш дастгоҳи. *Пилорамада тахта тилмоқ. ■ Бу ерда [устахонада] бир неча пилорама ва станоклар ишлаб турибди*. Газетадан.

ПИЛОТ [фр. pilote — учувчи] Самолёт, дирижабль ва ш.к. учуш аппаратларини бошқарувчи мутахассис, учувчи. *Ўлчови бор ҳар маҳсулотнинг, Хирмонда доимо тайёр тарози; Тонналаб ўлчайди ишчи пўлатни, Километрлар билан — пилот нарвози*. А. Мухтор, Асарлар.

ПИЛОТАЖ [фр. pilotage — учуш маҳорати] Учуш аппаратларида ҳавода турли хил шакллар яшаш учун уларни горизонтал, вертикал ва қия йўналишларда маҳорат билан бошқариш санъати. *Олий пилотаж*.

ПИЛОТКА [«пилот» с. дан] Ҳарбий хизматчилар (дастлаб учувчилар)нинг ёзлик бош кийими. *Гимнастёрка барини тортидим, камаримни қаттиқроқ қисиб, пилоткамни тўғриладим. «Муштум».* [Аскар йигит] *Ўсиқ қошларигача тушган пилоткасини кўтарди*. Ойбек, О. в. шабадалар.

ПИЛ-ПИЛ Тез ва енгил такрорланадиган оний ҳаракат. *Ўртадаги катта текис тош устида фонарь пил-пил ёнмоқда*. С. Анорбоев, Оксой.

ПИЛПИЛЛАМОҚ 1 “Пил-пил” қилиб ёнмоқ, липилламоқ, милтилламоқ. *Милт-милт пилпиллаган шу кўримсиз шам Яратмиш жаҳонга етеулик зиё*. Миртемир, Асар-

лар. *Тўсатдан турган шамол пилпиллаб зўрға ёнаётган лампани бир этак силкишдаёқ ўчириб қўйди*. С. Зуннунова, Олов.

2 Тез-тез ҳаракатланмоқ, пирпирамоқ, учмоқ (мас., киприк ҳақида). *Қозининг туссиз кўзлари атрофидаги сийрак киприклари пилпиллади, лаблари пичирлади*. М. Исмоилий, Фаргона т. о.

3 Тез-тез юмилиб очилиб пирпирамоқ (кўз ҳақида).

ПИЛТА [پيلته < ا. فتله — ўрам, калава, ип; فتيله — пилик; ёндирувчи портлатувчи ип, шнур] **1** Пилтакачга ўраб, дўппи тепчигига, баъзан тўн ёқасининг қа-виғига тикиладиган қоғоз. *Ёқага урилган пилта. Дўппи пилтаси. ■ Дўппи ёмон эмас, — дейди Мусавой. — Пилталарини қара, шалдироқ қоғоздан шекилли*. Ойбек, Болалик. *Аскар дўппилар тепчигидан қирқилиб, пилтаси кўриниб туради*. А. Қодирий, Обид кетмон.

Пилтаси чиқмоқ 1) эскириб, йиртилиб тўзмоқ (асосан дўппи, тўн ҳақида). *Мирза Муҳиддин унинг пилтаси чиққан дўпписини яқин тож ўрнида кўрар эди*. А. Қаҳҳор, Сароб; **2)** кўчма чагоғи чиқмоқ, айби, сири очилмоқ. *Доим бир иш қилса, орқасидан пилтаси чиқиб юради. «Муштум».*

2 Пахта, жун, ипак ва зиғир толаларини бўшгина ҳимариб, чўзиб, текислаб ва тўғрилаб ҳосил қилинадиган тўқимачилик маҳсулоти (лента); пилик олишдаги хомашё.

3 Бирор нарсани маълум масофадан туриб ёндириш ёки портлатиш учун ишлатиладиган ёнувчи чизимча, шнур. *Милтиқнинг пилтасига ўт тегизмоқ.*

Пилта милтиқ тар. Порох заряди пилта билан аланга олдириладиган силлиқ стволли милтиқ. *Бу томондаги кенг майдонда ҳарбий машқ — отда чолиб новда қирқши, тирандозлик, пилта милтиқ отиш каби машқлар ўтади*. Мирмуҳсин, Қаҳрамоннома.

4 қ. пилик 1. Тумшуқларнинг ҳар бирида бир пилта ёниб туриб, ҳар икки томонни — ҳам ғўза чувувчилар олдини, ҳам чигириқлар олдини баравар ёритарди. С. Айний, Эслаликлар.

5 эск. Чархда ип йигириш учун пилтакача юмалоқланган бир бўлак пахта, паға. *Онам шу қадар тез, шу қадар ингичка йигирар эдики, пилтадан чиқаётган ипни кўзим илғамасди*. Ё. Шукуров, Қасос. *Элмурод унга*

[отинойига] савалган пахтадан пилта ўраб бериб ўтирди. П. Турсун, Ўқитувчи.

6 с.т. қ. пилк 3. ..тўпти кийиб, сичқон думидек сочларига пилта ўраган жамалак қизалоқ унинг диққатини тортди. Мирмуҳсин, Қахрамоннома.

7 Дўппидўзлик, мискарлик ва б. амалий санъат турларида безак тури: чивик каби ингичка бўртма безак йўл.

ПИЛТАКАЧ [ф. *پيلتهكش* — пилта қилувчи, пилта ясовчи (аёбоб)] Қоғоздан пилта ўраб, тепчик орасига тиқиш учун ишлатиладиган дастали ингичка сим. *Теп пилтакач. Кизак пилтакач.* ■ *Расмий қишлоқ бозори: ..қўлларида пахта тўшакдан тортиб пилтакачгача кўтариб юрган олиб-сотарлар; товукфурушлар, хуллас, ажойиб “универсал магазин”.* Ш. Ризо, Қор ёғди, излар босилди.

ПИЛТАЛИ 1 Авраси билан астари орасига пилта урилган. *Майда пилтали дўппи. Ёқаси пилтали тўн.*

2 Пилта билан отиладиган. *Пилтали милтиқ.*

ПИЛТАЧИРОҚ Пилигидан тутаб ёнадиган шишасиз чироқ, қорачироқ. *Липиллаб ёниб турган пилтачироқ торгина уйни аранг ёритарди.* Мирмуҳсин, Чўри. *Ошино ялт этиб шифтга қаради. Ранги қув оқариб кетди — шифтда пилтачироқ осадиган пишиққина илгак бор эди.* М. М. Дўст, Лолазор.

ПИЛЧИЛЛАМОҚ “Пилч-пилч” қилмоқ, “пилч-пилч” овоз чиқармоқ. *Оёқ остида лой пилчиллайди. Пилчиллаган лой. Қор эриб, ҳамма ёқ пилчиллаб кетди.* ■ *Хотинларнинг қий-чуви эшитилди. Кимдир «дод, сўяди!» деб чинқирди. Қарасам, пилчиллаб кетган майдонда ўзимиздан бошқа ҳеч ким қолмабди.* Ў. Ҳошимов, Икки эшик ораси.

ПИЛЧ-ПИЛЧ тақл. с. Суюқ, ёпишқоқ лойдан юрганда, оёқ остидан чиқадиган товушлар. *Этик жикқа ҳўл, қадам боссанг, пилч-пилч қилади.* ■ [Кўча] *Тунда қатқалоқ бўлган, қуёшда эриб, пилч-пилч лой бўлган эди.* Ойбек, Навоий.

ПИНАК [ф. *پيناك* — уйқунинг боши, уйқу элитизи] Уйқу элитган ҳолат; мудроқ; ўй-хаёл.

Пинак сурмоқ қ. пинакка кетмоқ 2. *Камолитдин махдум, пинак сураётганда шарпадан чўчиган бангидай, уламо шарпасини эшитиб, бирдан сесканиб тушди.* М. Исмои-

лий, Фарғона т.о. **Пинагини бузмай** Парво қилмай, аҳамият, эътибор бермай; бепарво, хотиржам. *Ҳафиза ўзини у ёқ-бу ёққа солиб, пинагини бузмай тура берди. У ҳатто бу аччиқ таъналарни эшитмагандай, эшитса ҳам, бир нақирга олмай, сур бўлиб турарди.* Мирмуҳсин, Умид. *-Аммо менга жой бўлиши керак, — деди меҳмон пинагини бузмай.* Х. Султонов, Онамнинг юрти. **Пинакка кетмоқ 1)** уйқуга кетмоқ, мудрамоқ. [Собир] *Пинакка кетиб қолган Фулом акани уйғотди.* Х. Тўхтабоев, Фелъетондан сўнг; **2)** хаёлга берилиб, борлиқни унутмоқ. *Қария пинакка кетди: оқ сочли бошини қўллари билан сиқиб, кўзларини юмиб, узоқ ўйга толди.* Ойбек, Нур қидириб.

ПИНГВИН [фр. *pingouin*, ингл. *pinguin* < лот. *pinguis* — ёғли, семиз] Қушларнинг Антарктида ва Жанубий яримшарнинг ўрта минтақаларида тарқалган, қорни ва кўкраги оқ, орқаси тўқ кўк ёки қора, қанотлари куракоёққа айланган тури.

ПИНГ-ПОНГ [ингл. *ping-pong* — стол теннисининг эскирган номи; товушга тақлид сўз] Целлулоид коптокчани ракетка билан уриб, стол ўртасига тортилган тўрдан ошириб, столга тушириб ўйналадиган ўйин; стол тенниси. *Мен шахмат ва пинг-понг чемпионларини ютиб келдим.* «Фан ва турмуш».

ПИНЖ 1 Кимса ёки нарсага энг яқин бўлган жой, кимса ёки нарсанинг ёни, биқини; бағри. *Қор босган дарахтлар худди бир-бирларининг пинжига суқилиб олгандай эди.* Ў. Усмонов, Сирли соҳил. *Аввалига Мулла Тошпўлат узоқдан, бозорда дарвоза пинжиде ёймачилар қаторида нўстак устида ўтирган кимсага кўзи тушди.* О. Мухтор, Аёллар мамлакати ва салтанати.

2 кўча Паноҳ, ҳимоя.

Пинжига кирмоқ (ёки суқилмоқ, тикилмоқ) 1) ёнидан жой олмоқ, бағрига кирмоқ. *Бой қўрбошининг пинжиге кириб, уни туртар эди.* А. Қаҳҳор, Кўр кўзнинг очилиши. *Пўстин устида ёнма-ён ўтирган Ойсулув Сувонжоннинг пинжиге суқилди.* С. Анорбоев, Оқсой. *Негадир қизча, ҳадиксираган янглиғ, секин аёлнинг пинжиге тикилди.* Н. Қиличев, Чиғирик; **2)** кўчма бировнинг кўнглини, тилини топиб, унга яқинлашмоқ, бировнинг ҳомийлигида паноҳ топмоқ. *Ҳамдам катталар ва ўқитув-*

чиларнинг пинжига кириб оладиган бўлиб қолди. Х. Аҳмар, Ким ҳақ? **Пинжига олмоқ** 1) ёнига, бағрига олмоқ. *Пальтосини елкасига солди-да, қизни ҳам пинжига олди.* А. Мухтор, Туғилиш; 2) кўчма паноҳига, ҳимоясига олмоқ. *Акам бизни пинжига олиб ардоқлади.* **Пинжидан чиқмоқ** Бағридан чиқмоқ. *Итларнинг бетоқат вовуллашидан ўзимизга келдик.* **Пинжимдан чиқди-да, у битта-битта қадам ташлаб, нари кетди.** «Ёшлик».

ПИНЦЕТ [фр. pincette — қисқич; омбурча] Майда, сирғалувчан, мўрт, нозик нарсаларни маҳкам ушлаб (тутиб) туриш учун ишлатиладиган омбурсимон асбоб, қисқич (тиббийёт, техника ва б. соҳаларда қўлланади).

ПИНФИЛЛАМОҚ Димоғи билан секин овоз чиқариб гапирмоқ; пўнфилламоқ, тўнфилламоқ. *Содиқ амин.. нарёққа қараб пинфиллади.* М. Исмоилий, Фарғона т. о. *У димоғида гапирар эди. Унинг овози пинфиллаб эшитилгани учун, Бегимхон ниқиллаб кулди.* И. Раҳим, Чин муҳаббат.

ПИНФИЛЛАТМОҚ Димоғида пинфиллаган овоз чиқармоқ. *Соли совуқ.. бақа бурнидан пинфиллатиб шу сўзларни чиқарди: -Шундай сизни бир кўриб чиқай, деб кирувдим-да.* М. Исмоилий, Фарғона т. о.

ПИНХОН [ф. پنهان — яширин, махфий; сирли] 1 Кишининг назаридан яширинган, кўзга кўринмайдиган; яширин. *Минг тасаннога лойиқ ўсимликларнинг ажойиб хислатларидан бири — инсонга ер остида ўзини пинхон тутган конлардан хабар қила билшидир.* Газеталан.

2 Кишилардан махфий тутилган, сир сақланган; махфий. *Сир пинхон. Дарди пинхон. Пинхон бўлмоқ. Пинхон тутмоқ.* ■ *Неча йилдирки, Феруз Авазга пинхон меҳр қўйган эди. Бунни худодан яширмайди, аммо бандасига билдирмайди.* С. Сиёев, Аваз. *Дастлаб туйғуларини ҳаммадан пинхон тутиб юрди.* «Ёшлик». ..*ахир, унинг пинхон армонларини Нуриллахонгина эмас, Саид Олимхон ҳам яхши биларди.* Ш. Холмирзаев, Қил кўприк.

ПИНХОНА [ф. پنهانه — яширинча, билдирмаган ҳолда] *рвш.* Кишилардан махфий равишда, бировга билдирмай: яширинча. *Бемаврид келганига Равшан пинхона*

афсусланмоқда эди, тезроқ чиқиб кетиш учун баҳона қидирарди. «Шарқ юлдузи». *Газмолларни тахлаётган мудирига пинхона назар ташлаб, бир дақиқа тауриб қолди.* «Саодат».

ПИНХОНИЙ [ф. پنهانی — яширинча, бекитиқча, махфий] *кт.* Пинхон тутилган, сир сақланган, яширин; махфий. *Бегимнинг кўзларида кишини чўчитадиған пинхоний бир маъно бор.* О. Ёқубов, Кўҳна дунё. *Ҳазилмutoйибаю кўз ёшлариғача, ошқора ва пинхоний алам-армонларғача — барчаси умр китобининг қадрдон саҳифалари эди..* Х. Султонов, Онамнинг юрти.

ПИНХОНИЙ БОЗОР Қонунчилик томонидан тақиқланган товар ва хизматлар билан олди-сотди қилиш, шундай фаолият билан шуғулланиш.

ПИОДЕРМИЯ [юн. руон — йиринг + degma — тери] *тиб.* Терининг йиринг ҳосил қилувчи микроблар кўзгатадиган йирингли яллиғланиш касаллиги.

ПИОНЕР [фр. pionnier — бошлаб берувчи; ташаббускор] 1 Фан, техника, санъатда, умуман, тадқиқ қилинмаган муайян соҳада йўл очиб, бошлаб берган киши. *Космосни ўзлаштириш пионерлари.*

2 *тар.* Шўролар даврида (1922–91 йилларда): болалар пионер ташкилотининг аъзоси. *Пионерлар отряди.* ■ *Пионер ва ўқувчиларнинг бу севимли ансамбли [«Пахтаой»] бу йил қатор янги номерларни ўрганди.* Газетатка.

ПИПЕТКА [фр. pipette — найча] *тиб.* Бирор миқдор дорини тортиб (сўриб) олиш ва томизиш учун ишлатиладиган, бир томонига оғзи берк резина қалпоқча кийдирилган шиша найча. *Мирвали уни [туғунни] Расулбекнинг қўлидан олиб очди. Кичкинагина пенициллин шишасида қандайдир оппоқ суюқлик эди: -Асаларининг сути. Пипетка билан тил тағига томизиб, бирон соат суюқлик ичмай турасиз.* С. Аҳмад, Жимжитлик.

ПИР 1 [ф. پير — кекса, қари; диний мазҳаб, тариқат асосчиси; хунармандлар саркори] 1 Узоқ умр кўрган киши; кекса (қари 2).

Пир бадавлат Узоқ умр кўриб, болаларини уйлаб-жойлаб, роҳатда-фароғатда яшаётган киши. *-Кўчқордек ўғилларнинг соясида пири бадавлат бўлиб яшанг, — деди Эргаш Қоратойга.* Б. Раҳмонов, Юрак сирлари. *Илоҳим, пири бадавлат бўлгин, мени*

иззат қилсанг, сани худо иззат қилсин, — деб дуо қилди Бўрихўжа Валижонни. Мирмуҳсин, Чиниқиш. *Пири бадавлат отахону онахонларимиз жуда кўп.* Газетадан.

2 Диний маъжаб бошлиғи, диний раҳбар. *Худо хоҳлаб, пирлар мададқору азиз авлиёлар қўллаб юборса, ҳаммасини даф қиламиз.* Х. Тўхтабоев, Ширин қовунлар мамлакати. «Қоч, йўлни бўшат, пирим келяптилар!» деб кимгадир ўқиқирган.. К. Яшин, Ҳамза. *Арвоҳлар ёр, пирлар мададқор бўлиб, овимиз бароридан келсин.* Ҳамза, Танланган асарлар.

Ё **пирим** қ. ё III. Ё *пирим! Шарманда қилма! (Битта-битта кетадилар).* Ҳамза, Танланган асарлар.

3 Бирор касбнинг асосчиси, ҳомийси деб тушуниладиган, кўпинча, афсонавий ва афсоналаштирилган шахс. *Мискарлар, чегачилар, тунукасоллар кўп антиқа гапларни, ҳар қайсилари ўзларининг пирларини, рисоаларини яхши биладилар.* Ойбек, Болалик.

4 *кўчма* Бирор иш, касб ёки соҳани жуда яхши эгаллаган, шу соҳада ўта моҳир уста киши, устоз. *Бундай раҳбарлар, гуё ҳамма соҳанинг пири ҳисобланадилар.* Н. Аминов, Ёлғончи фаришталар. -*Боланг бой бўлгур Шоди ошпаз бу касбнинг зап пири-да! — чолнинг таърифини келтиришади чинорликлар.. «Ёшлик».* Улар ўрни келса, *отаси экану, ҳатто пирининг ҳам бетига қоракуя чаплаб, мақсад сари талпинади.* С. Сиёев, Ёруғлик.

Пир урган Энг ёмон, арвоҳ урган, ярамас. *Зикнанинг пир ургани эди. Хасислигини, исқиртлигини ҳамма билади. Кимсан — терифуруш фалончи бой!* Ойбек, Танланган асарлар.

ПИР II: ҳафсаласи пир (бўлмоқ) 1) ишончи, эътиқоди йўқолмоқ, кўнгли қолмоқ. *Энг ишонган кишисидан ҳам ҳафсаласи пир бўлибди.* ■ *У ёзбди: Баракалла, ўртоқ шоир, Қани дўстлик, оғайнилик, ҳафсалам пир.* Ф. Ҳулом, Танланган асарлар. *Болаликдан кўз очиб кўргани туя ўркачидай ҳайбатли тепаликларни эмас, кафтдек текис даштни кўриб, ҳафсаласи пир бўлди.* «Ёшлик»; 2) ҳафсаласи, интилиши, иштиёқи йўқолмоқ. *Ишдан ҳам ҳафсаласи пир бўлибди.* ■ *Кўрса, ҳафсаласи пир бўлиб, қўли ишга бормай қолади.* С. Аҳмад, Уфқ.

ПИР III тақл. с. Майда кушларнинг қанот қоқишидан, паррак қабиларнинг айла-

нишидан чиқадиган товуш. *Чумчуқ пир этса, юраги шир этади.* Матал. ■ *Қорабайирнинг туюқлари остидан пир этиб бедана учди.* С. Анорбоев, Оқсой. -*Ҳамма сенга ўхшаганми, чумчуқ пир этса, юраги шир этадиган, — деб кулди Ҳайдар.* А. Кўчимов, Ҳалқа.

ПИРАМИДА [юн. pyramis, pyramidos] **1** мат. Асоси кўпбурчак, ён ёқлари эса умумий учда бирлашган учбурчаклардан иборат геометрик шакл. *Беш ёқли пирамида.*

2 Шундай шаклдаги жисм. *Кристалл пирамидалар.*

3 Шундай шаклда устма-уст терилган нарсалар. *Гугуртлар пирамидаси.*

4 қ. **эҳром.** *Мисрликлар тошдан инсон ақлини лол этувчи пирамидалар яратганлар.* «Фан ва турмуш».

5 *ҳарб.* Милтиқлар тик ҳолда териб қўйиладиган махсус қурилма, шунингдек, учлари туташтириб тик турғизиб қўйилган милтиқлар. *Милтиқлар пирамида қилиб қўйилди.*

6 Спортчилар бир-бирларини кўтариб ҳосил қилган акробатик ёки гимнастик шакл. *Физкультурачи ўқувчилар пирамидалар тайёрладилар.* П. Турсун, Ўқитувчи.

7 Бильярд ўйинининг бир тури, шунингдек, ўйин бошида учбурчак қилиб терилган бильярд шарлари. *Пирамидани бузмоқ.*

ПИРАМОН [ф. *пирамон* — атрофида, те-варак-атроф; доира, айлана] **1** Дераза ёки эшик тепасидаги ганч ёки тахтадан қилинган энсиз тоқча. *У деразадан ёғаетган қорга, дарахтларга, дераза пирамонида жунжиб ўтирган икки мусичага тикиларди.* Мирмуҳсин, Илдизлар ва япроқлар. *Токчалар ва пирамонларнинг зиҳлари ганчдан қабартма қилиб ишланган эди.* М. Осим, Ўтрор.

2 Бўғот остидаги бўш, очиқ жой. *Айвон пирамониға хас ташиётган бир жуфт мусича супа атрофида беозор айланиб юрарди.* Мирмуҳсин, Чиниқиш.

ПИРЗОДА Пирнинг ўғли, меросхўри; пирларнинг пири. *Мен сизларнинг пирзодаларингиз бўлиб туриб, сизларга ёмонлик тиламайман.* У. Исмоилов, Сайланма.

ПИРИЛДОҚ Шамол, пружина ёки қўл кучи билан ҳаракатга келиб, ўз ўқи атрофида тез айланадиган ўйинчоқ.

ПИРИЛЛАМОҚ 1 “Пир-пир” овоз чиқариб, тез қанот қоқмоқ ёки айланмоқ.

Пирилдоқ пириллаб айланмоқда. ■ Куш ҳам итга тутқич бермай, яна пириллаб учди. Х. Назир, Сўнмас чақмоқлар. Толибжон вентилятор вилкасини розеткага тиқиши билан, урчуқ пириллаб айлана кетди. С. Аҳмад, Жимжитлик.

2 Титраганнамо ҳаракат қилмоқ, ҳил-пирамоқ. *Шамол стол устидаги дафтар, китобларнинг саҳифаларини шитирлатиб варақлади, дераза пардаси бетўхтаги пирил-лоқ бошлади. Ф. Мусажонов, Дарадаги қишлоқда. Майин ел шивирлаб, бошиндан эсса, Рўмолинг пириллаб ўйнаб кетади. Уйғун.*

3 Пирпирамоқ, учмоқ (мас., киприк, мушак ҳақида). *Чолнинг кўзлари асабий пириллади, туриб, аста уйга кирди. Х. Аҳмар, Ким ҳақ? Салимбойваччанинг кўзлари олакула бўлиб, юзидаги гўштилари пириллади, Бу қандай гап? Ойбек, Танланган асарлар. Унинг [кампиринок] этсиз лаблари асабий пириллар, нешонбоғи елкасида осилиб тушган, қақшиқ оёқлари яланг эди. Н. Қиличев, Чиғирик.*

4 Майда қадам ташлаб, тез юрмоқ; пилдирамоқ. *Бобомирзо елкасида сочиқ, олдиди фартук, дўпписини яримта қилиб, пириллаб юрибди. И. Раҳим, Тақдир.*

ПИРИЛЛАТМОҚ 1 Пирилламоқ фл. орт. н. Бола пирпиракни пириллатиб югуриб кетди. ■ Улар киприкларини тинмай пириллатиб, соқчилик қилардилар. С. Анорбоев, Оксой.

2 Тез, ғириллатиб олиб кетмоқ, олиб бормоқ. *Алижон ўз кучига ишониб, бир обкаш сувни пириллатиб олиб кетиш билан мақтанадиган, кучини мансаб билиб юрадиган йигит эканлигини ҳамма билади. Мирмуҳсин, Чиникиш.*

ПИРЛИК Раҳнамолик, диний раҳбарлик; устозлик. *Бизларга пирлик қиласан. Тагин келиб энди мунда, Шайтондай бўлиб озғирасан. «Фольклор».*

ПИРОВАРД [ф. *پيرآورد* – бажариш, адо этиш, охирига етказиш, тугаллаш] Тугалиш, охир, ниҳоя, сўнг. *Гапнинг пироварди. Иш пировардига етди. Уқшини пировардига етказмоқ. ■ Элмурод мактубни шеър ўқигандай ўқиб келиб, пировардида баландроқ овоз билан тугатди. П. Турсун, Ўқитувчи. Йиғилиш пировардида Қодирқулнинг шубҳаси чиптакка чиқди. А. Муҳиддин, Инсон қалби оташ. «Озод ва обод Ватан, эркин ва*

фаровон ҳаёт — пировард мақсадимиз» маърузасида ўртага қўйилган вазифалар асосида. Газетадан.

ПИРОГ [р. пирог < пир – «базм, зиёфат» с. дан] Қийма, мева, қиём ва ш. к. солиб, духовкада пишириладиган егулик. *Гўштли пирог. Ширин пирог. ■ Қовурилган кўкдан кўк сомса, кўк чучвара, кўк пирог каби таомлар тайёрланади. К. Маҳмудов, Ўзбек тансиқ таомлари.*

ПИРОЖНИЙ [р. пирожное < «пирог» с. дан.] Ёғ, сут, тухум ва шакар аралаштириб қорилган хамирдан турли шаклда тайёрланган, баъзан юзига кремдан гуллар солинган қандолат маҳсулоти. *Муборак ишдан қайтаётиб, йўл-йўлакай болаларга пирожний олмақчи бўлиб, магазинга кирди. С. Зуннунова, Кўк чироқлар.*

ПИРОТЕХНИК Пиротехника мутахассиси.

ПИРОТЕХНИК Пиротехникага оид, алоқадор, пиротехникага асосланган. *Пиротехник воситалар. ■ Пиротехник воситаларни ўйнаш оқибатида содир бўлаётган кўнгилсиз ҳодисалар кузатилмоқда. Газетадан.*

ПИРОТЕХНИКА [юн. руг – ўт, олов + техника] Портловчи, ёнувчи ва тутовчи аралашмалар, сигнал берувчи ракеталар, мушаклар тайёрлаш ва уларни амалда қўллаш билан шуғулланувчи техника тармоғи.

ПИРОҚ [асли **буроқ**] фольк. Афсонавий учар от. *Асли зотинг сенинг пироқ, Арзирум шаҳар кўп йироқ; Келгин юганга сен тезроқ. «Нигор ва Замон». Эшон бедовга қамчилар уриб, тинмайин чўлда юриб, чоптириб пироқ отди, кун тушликда Майманоққа етди, супа бўйда отни тўхтатди. «Зулфизар билан Авазхон». Ёнида бор кесадаган яроғи, Юлдузни кўзлайди минган пироғи. «Эрали ва Шерали».*

ПИР-ПИР 1 Пир III с. тақр. *Чумчуқлар пир-пир учмоқда.*

2: **пир-пир учмоқ** Пирпирамоқ, титрамоқ (қош, киприк, мушак кабилар ҳақида) *Илҳомжоннинг қалин қовоқлари пир-пир учди, кўзойнаги устидан отага қаради. С. Нуров, Нарвон. Ўнг ёноғининг пир-пир учушидан нимадандир қаттиқ жсаҳли чиққани кўриниб турарди. «Ёшлик».*

ПИРПИРАК Тўрт қанотли паррак шаклида қоғоздан ясалган, шамол ҳаракати

билан пириллаб айланадиган ўйинчоқ. *Шу саволлар кўнглида пирпирак бўлиб айлангани сари, Аъзам кўзига баттар бадбашара кўри-наверди. Шухрат, Жаннат қидирганлар.*

ПИРПИРАМОҚ 1 Кўз илгамас даражада тез-тез ҳаракатланиб, силкиниб, елпиниб турмоқ, ҳилпирамоқ. *Ойнинг дастлабки шуғласи тўғоннинг тепасида пирпираб турган байроққа тушди. А. Қаҳҳор, Қўшчинор чироклари. Уларнинг тепаларида.. кўк ва қизил рангдаги ҳисобсиз қоғоз гуллар, оёқларидан шлинган қушчаларга ўхшаб, пирпираб турадилар. П. Турсун, Ўқитувчи.*

2 Титрашга ўхшаш ҳаракат қилмоқ, учмоқ (мушак, қош, кўз кабилар ҳақида). *Барно эса биринчи тўртликдан кейиноқ бурун катакалари пирпираб, ерга қараб қолган. О. Ёқубов, Эр бошига иш тушса. Қизнинг узун, қора киприклари пирпиради. Э. Самандар, Дарёсини йўқотган қирғоқ. -Нима дейсан? – Алимардон кескин бурилиб қарадию, хотинининг лаблари пирпирай бошлаганидан, қўлол гапириб юборганини сезди. Ў. Ҳошимов, Қалбингга кулоқ сол.*

ПИРПИРАТМОҚ Титрашга ўхшаш ҳаракат қилдирмоқ. *Эргаш кипригини пирпиратиб, дўқондорга яна тикилди. А. Мухтор, Опа-сингиллар. Исмоил Ойша холага жавдираб бир қаради-ю, кўзини пирпиратиб, юзини четга бурди. С. Зуннунова, Кўк чироклар.*

ПИРРА 1 Карталар сони ва айрим хиллари ҳисобига очко йиғишдан иборат карта ўйини.

2 Шу ўйиннинг ютуқ билан тугалланиши.

Пирра қилмоқ 1) белгиланган миқдорда кўп очко тўплаб, маррага етмоқ, ютмоқ; **2)** кўчма қойил қилиб бажармоқ, дўндирмоқ. *Паловхонтўра, қайнатма шўрва, чучвара ва ҳоказо.. овқатларни пирра қилади, қўлинг дард кўрмагур! М. Муҳамедов, Мулзам.*

ПИРС [ингл. pier (кўпл. piers) – устун; пристань] Портда қирғоққа қурилган, кемалар икки томондан келиб тўхтаб турадиган гидротехник иншоот.

ПЕРСИЁН [р. персианин – форслик, эроний (Форс – Эроннинг қадимги номи)] с. т. эск. Келиб чиқиши эронлик, Ўрта Осиёнинг айрим ҳудудларида яшайдиган, форсий тилда сўзлашадиган халқ вакили; форс, эроний. *У ўзбекка ҳам ўхшамайди. Ё армани, ё персиён бўлса керак бу хотин. С. Зуннунова, Гулхан. Аравадан иккита ар-*

манинамо персиён башара йигитлар тушиб эрдилар, фақир, улуғларимиздан бўлмағай, деб тавозе қилдим. А. Қодирий, Кичик асарлар.

ПЕРСИЛЛАМОҚ “Пирс-пирс” товуш чиқармоқ. *Хўл ўтин персиллайди.*

ПЕРС-ПЕРС тақл. с. Паст узуқ-узуқ эшитиладиган товуш. *Жиққа хўл ўтин ёлғиз “пирс-пирс” қилиб, аччиқ заҳар тутун буруқтиради. Ойбек, Танланган асарлар.*

ПИРТ тақл. с. Игна, миҳ каби нарсалар санчилганда ёки тортиб олинганда, данак сингари нарсалар ситиб чиқарилганда эшитиладиган товуш. *Игна пирт этиб санчилди. Олча данаги пирт этиб учиб кетди.*

ПИРТИНГ-ЧИРТИНГ с. т. Унчалик муҳим бўлмаган, арзимайдиган, бўлар-бўлмас, беҳуда; майда-чуйда. *Пиртинг-чиртинг гаплар. Пиртинг-чиртинг ишлар билан овора бўлмоқ. Пулни пиртинг-чиртинг сарф қилмоқ.*

ПИРХОНА [пир + хона] **1** Пир (қ. пир **1**)нинг даргоҳи, пир яшайдиган хонадон.

2 Пирнинг назари тушган ёки қадами теккан, муқаддас ҳисобланадиган жой, макон, хонадон. [*Мирзакарим:*] *Шундай пирхонани кўйиб, бошқа жойни нима қиласан. Ҳамза, Паранжи сирлари. [Этикдўз:] Биласан-ку, сендан бошқа одамни бу пирхонамга, устахонамга қўймайман. Н. Қобил, Унутилган соҳиллар.*

ПИРҚ тақл. с. Бурун тортганда ёки йиғлаганда димоғдан чиқадиган узуқ-узуқ овоз. *Пирқ этиб йиғлаб юборди.*

ПИРҚИЛЛАМОҚ Бурундан пишқирган овоз чиқармоқ, пишқирмоқ. *Йўлга тушди қирқ ботир, Бедов отлар пирқиллаб. «Хушкелди».*

ПИРҚИРАМОҚ айн. **пирқилламоқ**. *Фиркўт от фирқирайди, Уқталиб пирқирайди, Олисин кўлаб бедов, Чопмоққа зирқирайди. «Гўрўелининг туғилиши».*

ПИРҚ-ПИРҚ Пирқ с. тақр. *Пирқ-пирқ йиғламоқ.*

ПИС тақл. с. Тор тешиқдан ҳаво, буғ, газ чиққанда, чўғга сув сепилганда эшитиладиган товуш. *Велосипед камерасининг дами пис этиб чиқиб кетди. ■ Дала ошхонасидан аҳён-аҳён тушаётган чўғ ёмғир тегиб, пис этиб ўчиб, кўмирга айланарди. М. Муҳамедов, Қаҳрамон изидан.*

ПИСАНД [ф. پسند – маъқуллаш, ижобий фикр; маъқулловчи, мухлис; мамнун] (*фақат*

бўлишсиз шаклда) Дикқат-эътибор, назар-эътибор. *Хон ҳеч қулоқ солмади, Писандига олмади. Ҳ. Олимжон. Бошқа болалар мана мени қанча уйларига чақирсалар, зиёфат қилсалар ҳам, сени бу остонагча писандимга келмайди. Ҳамза, Танланган асарлар.*

Писанд эмас 1) кўнглига сифмайди, кўзига кўринмайди. *Унга ҳозир уй ҳам, боғ ҳам, машина ҳам писанд эмас;* 2) назари илмайди, менсимайди. *Унга ҳеч ким писанд эмас;* 3) ҳеч гап эмас, осон. *Бу иш менга писанд эмас.*

■ *Бизга, опа, мол-жон писанд эмас. Менга келининизни бир кўриш минг подшоҳликдан афзалроқ.* Ҳамза, Танланган асарлар. -*Дунёда одамнинг қўлидан келмайдиган иш бор эканми! Фақат истак бўлсин, кўпчиликка ҳеч нарса писанд эмас, — деди Абдурашул. П. Турсун, Ўқитувчи. Писанд қилмаслик* Назарга илмаслик, менсимаслик. *У ҳеч кимни писанд қилмайди. ■ Шундай казо-казоларнинг қизлари Пошишойимлар, Хонзодалар қоқ саҳар туриб, хизматига ҳозир бўлса-ю, сен бенасаб, исқирит, атлас кўрпада мени писанд қилмай, хуррак отиб ётсанг! Ҳамза, Бой ила хизматчи. Ҳозирдиннинг назарида, уни фақат бир киши — Қодиржон четдан кузатиб, мунтазам таъқиб қилгандек эди. У аслида Қодиржонни писанд қилмас, одам ўрнида ҳам кўрмасди. О. Мухтор, Эгилган бош. Бу бўлса бизни писанд қилмайди, бу ерда ит ўлтирганми, эшак ўлтирганми — парвосига келтирмайди. А. Қодирий, Обид кетмон.*

ПИСАНДА [ф. *پسندیده / پسندده* — дилга тўғри келган, мақбул; мақтовга, маъқул-лашга сазовор] 1 Олдиндан қўйилган талаб, шарт. *Уларнинг ўзаро писандаларига мувофиқ, янги ерлар, чиқариладиган сувлар Тешабойга текин ўтади. М. Исмоилий, Фарғона т. о.*

2 Талаб ёки шарт тарзида айтиладиган баҳона.

Писанда қилмоқ 1) олдиндан бирор талаб ёки шарт қўймоқ. *Шу аснода Давронга паспортни узатаркан, писанда қилди: -Энди сизга гап шу, ака: бундан кейин ичган пайтингизда кўча-кўйда санқиб юрманг. Н. Қиличев, Чигирик;* 2) таъкидламоқ; луқма ташламоқ. -*Кори хайр иши давлатга қарамайди, оғайни, — писанда қилди мулла Бердиёр, — ҳимматга қарайди, ҳимматга. «Мўштур».*

ПИСИЛЛАМОҚ Паст оҳангга, “писпис” овоз чиқармоқ. -*Ҳа, — деди Баширжон*

писиллаган овоз чиқариб. — Сизга қарғанинг умрини тилайман. Н. Аминов, Қаҳқаҳа. Бошлиқнинг писиллаб гапирётганидан Солиҳов батамом ҳайрон қолди.. Н. Аминов, Қаҳқаҳа. Ҳар бир челақ сув сепилганда, олов харилар, синчларнинг қолдиқларида писиллаб ўчар, бир оз тутун сочиб, кейин бутунлай жимиб қоларди. Ҳ. Фулом, Машғал.

ПИСКА с.т. Соч-соқол олиш ва бошқа мақсадларда ишлатиладиган хавфсиз устарага ўрнатиладиган, ҳар икки қирраси ҳам ўткир, тўртбурчак юпқа пўлат пластинка. ..*Ёки қозонлик бир пенсионер қандай қилиб қўлига пискани олганини ва ўз томирини кесмоқчи бўлганини ўзи сезмайди. Газетадан.*

ПИСМИҚ Мақсадини, сирини бировга айтмайдиган, индамай иш битирадиган, ичидан пишган (одам). *Писмиқ одам. Содда сири тилида, писмиқ сақлар дилида. Мақол. ■ Кундошиннинг кўриниши баёвга ўхшаса ҳам, алмо ўзи писмиқ экан.. Бундай одамдан, амбатта, ҳазар керак. А. Қодирий, Ўтган кунлар. Соддадил ва кўнчиличан Раҳим акани, писмиқ ва юмшоқсупурги Ибодовни, сергайрат ва удабурро Халил акани ҳам эслади. Ф. Мусажонов, Ҳиммат.*

ПИСМИҚЛИК Писмиққа хос хусусият. *Кимдир [Шамсининг] писмиқлигига мослаб, “фитнаи охир замон” деб лақаб қўйибди. Мирмуҳсин, Чиниқиш. -Очиқ ҳаракат қилишга.. халқдан кўрқадилар. Писмиқлик билан, кўзбўямачилик билан иш кўрадилар, — деди Алексей. П. Турсун, Ўқитувчи.*

ПИСМОҚ 1 Ўзини панага олмоқ; бекинмоқ, яширинмоқ. *У, жўралари билан атрофи яшил чакалак билан ўралган гулзор яқинида писиб ўтирганча, қушни томоша қиларди. С. Нуров, Нарвон. Пулемёт уяси.. бурчакларида писиб ётганларнинг [немисларнинг] учтаси ўлиб, биттаси ярадор бўлган. Н. Сафаров, Оловли излар. Баҳодир йигит оёғи учда турган гранаталарни олиб, чаққонлик билан душманга қарши ирғитди, ўзи эса траншеяга писди. Н. Сафаров, Жанговар саҳифалар.*

2 Индамай қолмоқ, жим бўлмоқ. *Муҳсина хоним бирдан писиб қолди. Яхшибоев ичидан кулди. М. М. Дўст, Лолазор. Ошно, қишлоққа кетаман, деб фингшимоғи мумкин, лекин уни учирши қийинмас — Майрани бир эслатмас бас, писиб қолиши тайин. М. М. Дўст, Лолазор.*

ПИС-ПИС Пис с. тақр. *Уй ичида жинчи-чироқ липиллаб турар, ўртада пис-пис қилиб хўл ўтин — гулхан ёнмоқда.* Ж. Шарипов, Хоразм.

ПИСТА [ф. *پیسته*] 1 бот. Жануб тоғларида ўсадиган паст бўйли, ёнғоқмевали дарахт ёки бута. Табиатнинг меҳри билан ясалган кўм-кўк арчазорлар ва тоғ ариқларидаги жарлар ёқасида саф тортган писта зумраддек товланиб, кўзни қамаштирар эди. Туйғун, Шоир ҳақида ҳақиқатлар.

2 Шу дарахтнинг қаттиқ қобикли меваси. Одам одам билан, Писта бодом билан. Мақол. ■ *Лекин писта, бодом, майиз, жийдани кўриб, тарвузим қўлтигимдан тушиди.* Ф. Мусажонов, Ҳиммат. *Ана ширинлик, мана ширинлик, деб мураббою нишолда, пистаю мағиз, қанд-қурс, яна алланималарни ҳеч суриштирмасдан, аралаш-қуралашига покпокиза тушираверибди.* Н. Мақсудий, Мечкай эшон.

Хандон писта қ. хандон. *Жигару буйрак, думба ёгдан тайёрланган қўшалоқ пармуда сомсалар, хушбўй мурабболар, Бешкарамнинг анорию, Файзиободнинг тилёра қовунлари, хандон писта, майизларнинг энг тозалари, яхна гўшт.. «Ёшлик».*

3 с.т. Кунгабоқарнинг хом ёки қовурилган уруги. *Бир вақтлар эри уруида ўлган хотин шу тош устида ўтириб, писта сотарди.* Ў. Ҳошимов, Қалбингга қулоқ сол.

Писта даҳан Оғзи пистага ўхшаш кичик ва келишган. [Холмат:] *Оби равон.. писта даҳан, нозик адо, нари жаҳон, яъни исм шарифлари Жамилахон. Ҳамза, Бой ила хизматчи. Писта кўмир қ. кўмир. Кейин писта кўмир сўраб кирганимда, бирам бесаранжом эдики ўтинхоналари.* С. Зуннунова, Олов. **Писта пўчоққа жо қилмоқ** (ёки жойламоқ) Гап билан оғиз очдирмай, бир бурчакка тикиб қўймоқ.

ПИСТАЗОР Писта дарахтлари билан банд ер, майдон. *Ўрмон хўжалигига қарашли пистазорлар.* ■ *Тун яримдан оғди. Ой пистазор тоғларнинг орқасига аста-секин яширинди.* Ё. Шукуров, Юраклар така-пука.

ПИСТАФУРУШ [писта + ф. *فروش* — сотувчи] Писта сотувчи киши. *Унинг отаси ҳам пистафуруш эди.*

ПИСТАЧКА [р. фисташка < ф. *پیسته*] с.т. Кунгабоқарнинг уруги. *Хом пистачка. Қовурилган пистачка.*

ПИСТИРМА 1 Тўсатдан хужум қилиш ёки ов пойлаш учун фойдаланиладиган яширин қурилма, жой. *Тулқи овлаш учун пистирма қўймоқ. Пистирмадаги овчи.* ■ *Йўлда бир ёки икки ёнда пистирма бор, пистирмани яхши пойлаб, чап бериб ўтолсанг, қишлоқ йўлига чиқасан.* Файратий, Унутилмас кунлар.

2 Шундай мақсад учун белгиланган киши ёки кишилар гуруҳи; ҳарбий бўлинма. *Пистирма қўйган одамларингиз ишончлими? «Шарқ юлдузи».*

ПИСТОЛЕТ [фр. *pistolet* — тўппонча] Яқиндаги нишонга ўқ узиш учун мўлжалланган, ёнда олиб юриладиган қурол, тўппонча. *Етти ўқли автоматик пистолет.*

Пистолет-пулемёт Автоматик равишда бирин-кетин ўқ узадиган, яқин масофадаги жангларда қўлланадиган отиш қуроли; автоматнинг иккинчи номи. *Самолётлар машиналар тўпланган жойга хужум бошлаган ҳамон, фронт томонидан кетаётганларнинг бири.. пистолет-пулемётдан ўқ уза бошлади.* И. Раҳим, Чин муҳаббат.

ПИСТОН [фр. *piston* — зарбдор, урувчи, синдирувчи] 1 Патроннинг порохли зарядини ёндириш учун оз миқдорда портловчи модда солиб, ўқ тубига ўрнатиладиган металл косача; капсюль. *Милтиқ ўқининг пистони. Снаряд пистони. Чақилган пистон.* ■ *Лутфилла боши янчилган илондек тўлғаниб ётар эди, тезлик билан пистони чақилмаган тўппончани олди.* «Муштум».

2 Ўйинчоқ милтиқ ёки тўппончада отиш учун белгиланган, оз миқдорда портловчи моддаси бўлган тангачасимон қоғоз ғилоф.

3 Пичоқчиликда: пичоқнинг дастасига қадалган садафнинг атрофига айлантириб қўйилган ҳалқа-сим (садафни маҳкам тутиб туради).

4 Кийим-кечак, парда ва ш.к. га зийнат учун қадаладиган йилтироқ пластинкача. *Дўппига пистон қадамоқ.* ■ *У [қиз] туш-ётганда, бошидаги қора тўр пардага қадалган олтин пистонлар йилтираб, жилва сочди.* Мирмуҳсин, Чўри.

Пистон тугма Бир-бирига қадаб қўйиладиган икки қисмдан иборат тугма; шиқ-шиқ тугма.

5 Пуфлаб чалинадиган мусиқа асбобининг ижрочи-созанда қўл билан босиб очиб-ёпиб турадиган тугмаси.

6 Ботинканинг ип ўтказиладиган тешикларига изма ўрнига ўрнатиладиган темир ҳалқача.

ПИСТОҚИ [ф. *пистеҳай* — оч яшил] Писта мағзи рангидаги, оч баргикарам, очиқ яшил. *Пистоқи ипак.* ■ -Кўк, қизил, зангори, сариқ, оқ, пушти, жигарранг, гўлос, пистоқи — боринги, дунёда қанча ранг бўлса.. тўтининг патида бор эди, — деди Шум бола. Ғ. Фулом, Шум бола. Тўй оқсоқоли дарров пистоқи яловни Гўрўели султоннинг бошига кўтарди. «Авазхон».

ПИТАК қ. **питрак**. *Баширжон кўкрагини столга тираб, бошини юқорироқ кўтарди. Исломотани кўрган заҳоти хаёлидан, «Уша питак чол-ку!» деган фикр кечди ва креслога ястаниб ўтирди.* Н. Аминов, Қаҳқаҳа.

ПИТЕКАНТРОП [юн. *pithekos* — маймун + *anthropos* — одам] Калла суяги тузилиши ҳали одамсимон маймунларникидан фарқ қилмаган энг қадимги одам (суяклари 19-аср охирида Ява оролидан топилган).

ПИТИЛЛАМОҚ айн. **питирламоқ**. *Бола онасига кўзи тушиши ҳамон, беланган оёқ-қўлини пителилатганча, бўшатишига уринди.* «Ёшлик».

ПИТИРЛАМОҚ 1 Жон талвасасида ўзини ҳар ёнга урмоқ, сапчимоқ, питир-питир қилмоқ; питирчиламоқ. *Сўйилган товۇқни кўрганмисан? Питирлайди, кўтарилиб-кўтарилиб тушади.* А. Қаҳҳор, Сароб.

2 *кўчма* Тез, шошилинч ёки безовта ҳаракат қилмоқ, шошилиб, ҳовриқиб қолмоқ. *Оёғи куйган товۇқдай питирламоқ.* ■ *Уйда Анзират кампир билан Ҳожия ўтирарди. Улар аҳволни кўриб питирлаб қолишди.* А. Мухтор, Опа-сингиллар.

ПИТИР-ПИТИР тасв. с. 1 Жон талвасасидаги кескин, нотинч ҳаракат. *Питир-питир қилмоқ. Тўрға тушган бедана питир-питир қиларди.*

2 *кўчма* Тез, шошилинч ёки безовта ҳаракат. *Мунча питир-питир қиласан.*

3 с. т. Ўрнида тинч турмайдиган; серҳаракат; ҳар нарсага уринадиган. *Питир-питир бола. Бу одам мунча питир-питир экан.*

ПИТОМНИК [р. питомник — тарбияхона, парваришхона < питомец — тарбияланувчи] Ўсимлик ёки ҳайвонлар ўстириладиган ва кўпайтириладиган, ўрганиладиган махсус жой. *Мевали дарахтлар питомниги. Балиқчилик питомниги.* ■ *Қумлик*

питомникларида дарахт, бута ва гиёҳлар экиб ўстиришига киришиш керак. «Фан ва турмуш».

ПИТОН [юн. *Python* — юнон мифологиясида: баҳайбат илон] Бўғма илонлар оиласига мансуб, Африка ва Осиёнинг тропик минтақаларида тарқалган заҳарсиз йирик (1,5 метрдан 10 метргача бўлган) илон тури.

ПИТПИЛДИҚ Бедананинг сайраши, битбилдиқ. *Махсум беданаларнинг питпилдиғига қулоқ солганча.. бир чойнак чойни эрмак қилиб ўтирди.* В. Ғофуров, Вафодор. *Тўқай томонда бедана питпилдиқ отади. Кунботар уфқда тиллақошдек нозик ой ялтираб турибди.* Ў. Ҳошимов, Икки эшик ораси.

ПИТПИЛИҚ қ. **питпилдиқ**. *Ҳа, субҳи козибда эмас, субҳи содиқда, хўрозлар қичқирар-қичқирмас.. тезотар беданалар на тун демай, на тонг демай «вавағ-вавағ, питпилиқ-питпилиқ»лаб сайраб турган бир паллада.. тўрт аскар ошналарининг кўрғонига этиб келишганди.* «Ёшлик».

ПИТРА Ов милтиқ ўқи ва снарядлар учун ишлатиладиган юмалоқ кўрғошин донаси; сочма ўқ. *Майда питра. Гильзага питра солмоқ.* ■ *Йирик питра ўнг елкасини титиб юборганди.* «Шарқ юлдузи».

ПИТРАК шв. Серҳаракат, уринчоқ. *Тиниб-тинчимас, питрак бу кампирнинг бошида дунёнинг ташвиши: эртадан кечгача юғуриб-еларди.* Мирмуҳсин, Илдизлар ва япроқлар. *Аслида Ғозиддиннинг кичик жуссали, питрак қариядан кўрқадиган жойи йўқ.* О. Мухторов, Эгилган бош. *Кундуз ёш бўлса ҳам, жуда питрак қиз.* Ойдин, Бечора.

ПИТРУЗА с. т. айн. **фитри рўза** қ. **фитр 2**. *Валлоҳи аълам, жами мусулмонларга аёндирки, питруза тўламоқ фарздир.* «Муштум».

ПИХ 1 Айрим эркак паррандаларнинг оёғида бўладиган мугузсимон учли ўсимта. *Хўрознинг пихи.*

Пихи қайрилган ёки пих(ини) ёрган Кўп иш кўрган, кўп ишларни бошдан кечириб, айёр, қув бўлиб кетган. *Аммо Ҳожимурод ҳам кўпни кўрган, пихи қайрилганлардан эди.* С. Аҳмад, Жимжитлик. *Маккор, пихини ёрган айёр қанча ниқобланмасин.. кўп жиноятчиларни чаққонлик билан қўлга туширган изқуварларимизнинг темир чангалидан қочиб қутула олмади.* С. Аҳмад, Юлдуз.

ПИХ II: пих қилмоқ бол. Кесмоқ, сүймоқ. *Қовунни пих қилмоқ.*

ПИХ III тақл. с. Мушукнинг ўз рақибини қўрқитиш учун хурпайиб олиб, томоқ қириб чиқарадиган товуши. *Бошқа бири орқадан мушуксимон “пих” деб, мени чўчитмоқчи бўлди. Ойбек, Болалик.*

ПИХ IV шв. Пўпанак, могор. *Пих боғлаган нон.*

ПИХИЛЛАМОҚ I Хурпайиб томоқ қириб, «пих» деган товуш чиқармоқ (мушук ҳақида). *Мушук итга қараб пихиллади.*

2 Томоғидан бўғиқ товуш чиқариб, хирллаб нафас олмақ; пихиллаган овоз чиқармоқ, хирилламоқ. *Қизнинг ич-ичидан қуюндай хуруж қилиб келган аччиқ фарёд бўғзида пихиллаб тинди.. А. Мухтор, Кумуш тола. Юмалоқ оқсоқол ёқасини ушлаб, бош чайқатди, ҳам одамларга кўз оқини ўйнатиб, пихиллади. Ойбек, Навоий. Қассоб пихиллаб кулганича, менинг қўлимдан пулни олиб, зўрлаб, кўкрак чўнтагимга солиб қўйди. Н. Аминов, Қаҳқаҳа.*

ПИЦЦА [итал. pizza] Юпқа хамир устига гўшт, қўзиқорин, сабзавотлар, сир (пишлоқ) қўйиб пиширилган итальянча таом. *Пицца тайёрламоқ.*

ПИЧА рвш. I Оз миқдорда, озгина. *Икки оқ пиёзни майда тўғради, унга пича мурч сенди, пиёзни гуручнинг бир чеккасига кўмиб, ошдамгирни ёнди. Ойдин, Йигит. Маҳаллий аҳолидан алланарсаларни бир неча тухум ва пича ёққа алмаштириб олади. К. Маҳмудов, Қизикарли пазандалик.*

2 Оз вақт, бир оз, андаккина, андак. *Мингбоши пича кутди, Матқовул гапиравермаганидан кейин, яна бақирди. М. Исмоилий, Фаргона т. о. Жуда чарчадинг, пича ухлаб, дам олсанг бўларди. Ш. Рашидов, Бўрондан кучли. Яна пича вақт куттишди — жимжитлик. «Ёшлик».*

3 Оз даражада, сал(гина). *Кўнглим пича тинчиди. ■ Кундузи ишлари, ниҳоят, ресторандаги сўхбат унинг [майорнинг] кўнглига равшанлик олиб кирди. Иш пича силжиган эди. «Ёшлик». Узим айтувдим кеча! Қўзибой пича ўзини босиб олди. Ҳ. Назир, Ёнар дарё.*

ПИЧАН Ҳайвонларга озуқа бўладиган ўт; ўриб қуритилган ўт; хашак. *Бир боғ пичан. Пичан ўриш машинаси. ■ Ўртадаги уюлган пичан ғарами олдидан ўтиб, қоронғи уйга кирди. С. Зуннунова, Олов. Томга кўп-*

роқ пичан босди. Э. Самандар, Дарёсини йўқотган қирғоқ. У бостирма деворига беҳол суяниб қолди. Ичкари қуруқ, пичан иси, иви-ган оҳак ҳиди келарди. Ў. Ҳошимов, Қалбингга қулоқ сол.

ПИЧАНЗОР Пичанбоп ўт ўсган майдон; ўтзор. *[Бригадир] Бошида қоракўл телпак, эғнида китель-шим, оёғида туфли, ҳозиргина пичанзордан келгандай. С. Нуров, Нарвон. Мана, кўз ўнгимизда қуёшнинг ҳаётбахш тафтига тоб бериб, кенг пичанзор водий ястаниб ётибди. А. Шермухамедов, Ўтўланлар водийси.*

ПИЧАНХОНА Пичан сақланадиган хона, бино. *Пичанхонага кириб, эшикни тамбалаб, қалин, майин ва хушбўй пичанга болани кўмди: «Ухла! Йиғлама!» Ойбек, Кўёш қораймас.*

ПИЧИНГ Бировнинг шахсига тегиш, гашини келтириш, масхаралаш учун ай-тилган илмоқли гап; қочирим, қочирик. *Бу пичинг Назирийнинг жон-жонидан ўтиб кетди. Лекин бу ерга у Ҳамза билан жиртак отишга келмаган эди. К. Яшин, Ҳамза. Мансур Талъатнинг пичингини тушунмай, кескин қадамлар билан уларга эргашди. Ў. Ҳошимов, Қалбингга қулоқ сол. Уста юрагидаги гапларни кўпчилик ўртасида бирма-бир айтиб ташламоқчи эди, аммо раиснинг пичинги шаштини қайтарди. С. Маҳқамов, Дала тонги.*

ПИЧИНГ ОТМОҚ (ёки қилмоқ) Бировнинг шахсига тегадиган, гашини келтирадиган ёки масхаралайдиган илмоқли гап айтмоқ. *Автобус ичида олатасир бошланди. Ким сўкинди, ким пичинг отди. Ким тақдирга тан бериб, муросаи мадорага чақирди. М. Мансуров, Ёмби. Бора-бора Азиза ҳам уни жеркийдиган, ҳар гапида пичинг қиладиган бўлиб қолди. Ў. Ҳошимов, Қалбингга қулоқ сол. -Ҳай, эссиз, сўл кўзингни ҳам кўр қилиб қўйганимда бўлур эркан, — дея пичинг қилди Темур Малик душманига қараб. М. Осим, Карвон йўлларига.*

ПИЧИНГЧИ Пичинг қилишни яхши кўрадиган, пичингга одатланган киши. *Ойхон эса кутади, аяси — ёнида, интизорликда бўйи чўзилиб, эси кириб, Саттор акасининг қадрига етадиган бўлиб қолади бу пичингчи.. А. Мухтор, Кумуш тола.*

ПИЧИР I Сўзловчи билан тингловчидан бошқа одам эшитмайдиган қилиб, паст

овоз билан айтилган гап, пичир-пичир, шивир-шивир. Гапнинг ёмони пичир, этнинг ёмони қичир. Мақол. ■ Ёнимда ўтирган икки қизнинг пичири қулоғимга чалинди. М. Жалолодинова, Журъат.

2 Бошқалар эшитмайдиган даражада паст овоз. -Касали нима экан, озиб кетибди келинчак онамиз? — пичир билан сўради Салимбойвачча. Ойбек, Танланган асарлар.

ПИЧИРЛАМОҚ Бошқалар эшитмайдиган даражада паст овоз билан гапирмоқ; шивирламоқ, шивир-шивир қилмоқ. -Мамажон ўрнидан туриб, орқароқда елкасини қисиб бораётган агрономнинг тирсагидан ушлаб, қулоғига пичирлади. С. Нуров, Нарвон. Абдували ўн сўмлик, беш сўмлик, уч сўмлик пулларни олиб, пичирлаб санай бошлади. Ў. Ҳошимов, Икки эшик ораси. -Билганини қилмайдимиз! — пичирлади Муқаддам ўкинч билан. Ў. Ҳошимов, Қалбинга қулоқ сол.

ПИЧИРЛАШМОҚ Пичирламоқ фл. бирг. н. Шу гапдан кейин кампир Инобатга унча рўйхуш бермай қўйди. Аммо олти овсин ҳар куни пичирлашиб, ниманидир маслаҳат қилишарди. С. Аҳмад, Сайланма. Озодахон чолғучилар билан янги айтиладиган қўшиқ ҳақида пичирлашиб турган эди. Н. Аминов, Қаҳқаҳа.

ПИЧИР-ПИЧИР Пичир с. такр. 1 Шивирлашиб сўзлашганда чиқадиган паст товуш. Ўртанча овсин айвонни супуриб бўлиб, сават кўтариб, кўчага чиқиб кетиши билан, қолган олти овсин супага чиқишиди. Пичир-пичир қилиб, узоқ гаплашишди. С. Аҳмад, Сайланма. Ўтириб, китобни тиззасига қўйди ва пичир-пичир дуо ўқиб, юзини сийпади. А. Қодирий, Мехробдан чаён.

2 Ўзаро хуфия гап; шивир-шивир. Орқасидан пичир-пичир қилиб қолишди. Т. Ашуров, Оқ от. Нодира хола ханг-манг бўлиб қолди. Унинг қулоғи остида домланинг гўнғир-гўнғир, пичир-пичири эшитилгандай бўлди. «Муштум».

ПИЧМОҚ шв. Бичмоқ. [Алиохун:] Сизни эгам сўзга пичиб қўйган экан-да. Ойбек, Танланган асарлар. Авзойимизни кўрган киши, индамасдан ҳаммангнинг ишинга нарх пичиб қўя қолади. И. Раҳим, Ихлос.

ПИЧОҚ 1 Дастага ўрнатилган ясси ва узун тигли рўзғор асбоби. Йўқолган пичоқнинг сопи олтин. Мақол. Ўтмас пичоқ қўл кесар. Мақол. Яхши гап билан илон изидан,

ёмон гап билан пичоқ қинидан чиқар. Мақол. ■ Зокир ота қочиш йўлларини яхши ўқтиргач, йиртиқ кўн этигининг кўнжидан бир пичоқни олиб, секин менга узатди. Файрағий, Унутилмас кунлар. Тўланбой сўрида чордана ўтириб олган, пичоқни тахтага тақ-тақ тегизиб, сабзи тўғрайпти. С. Аҳмад, Уфқ.

Пичоқ тортмоқ (ёки қўймоқ) Пичоқ билан кесмоқ, сўймоқ. Мабодо ҳукиз ёмонлаб қолгудай бўлса, бориб, дарров бўғзига пичоқ тортиб юборасан. Ф. Фулом, Шум бола.

2 тех. Турли асбобларнинг кесувчи қисми. Гўшт қўймалагич пичоғи.

Пичоқ (бориб) суякка етмоқ (ёки тақалмоқ) Чидам, бардош туғамоқ. Пичоқ бориб суякка етгандан кейин, нима қилсин бечора халқ.. К. Яшин, Ҳамза. Ҳожииона.. Йўқ, пичоқ бориб суякка тақалди. Ҳамза, Бой ила хизматчи. **Пичоқ учидай** Озгина, зигирдай. -Эй ўртоғей, — деди у, — нимасини сўзлайсиз, шу замоннинг қизларида пичоқ учидай шарму ҳаё қолмади. Ф. Фулом, Танланган асарлар. **Пичоққа илинмайди** Арзимайди, арзигулик ери йўқ, арзигудай эмас. Пичоққа илинмайдиган ҳосил. **Пичоғи кескир** Ўтқир, гапи бировларга ўтадиган киши. ..Ҳожимурод эса пичоғи кескир раислар қаторида юрарди. У райком секретари билан прокуратурадан бошқа раҳбарларни раҳбар қаторида кўрмасди. С. Аҳмад, Жимжитлик. **Пичоғи мой устида қ. мой.** -Ҳа, Содиқжон бойваччага худо берган, — деди Бўронбой учуриқ қилиб, — ҳаммиша отган ошиғи олчи, пичоғи мой устида одам у! К. Яшин, Ҳамза. **Ўтмас пичоқ билан сўймоқ** Чидаб бўлмас даражала азобламоқ. [Одилжон:] Қаёқдан ҳам тўйда ўша қиз билан ашула айтдим, ўйин тушдим, ўшандан бери Гулчехра мени ўтмас пичоқ билан сўйиб юрибди. У. Назаров, Фурур.

ПИЧОҚБОЗЛИК Бир-бирига пичоқ уриш, пичоқ билан ҳужум қилиш. Йўқ, масалан, қиличбозлик, пичоқбозлик ҳам жанг, ҳозир одам бамисоли чумолидай бўлиб қолди-ку. Ойбек, Қуёш қорамас. Улфатлар орасида низо чиқиб, муштлаш, пичоқбозлик бошланди. Ҳ. Фулом, Машғал.

ПИЧОҚЛАМОҚ Пичоқ билан жароҳатламоқ ёки ўлдирмоқ, пичоқ урмоқ, суқмоқ. Агар эрим билиб қолса, нақ икковимизни пичоқлаб ташлайди-я. С. Аҳмад, Уфқ. Энди мактабга кирганимда, кайф устида отамни пичоқлаб қўйишди-ю, ёлғиз қолган онам

мени олиб кетди. Ў. Ҳошимов, Қалбингга қулоқ сол. *Ёдгор ота қозихонада ўзини пичоқлаб қўйди.* А. Қаҳҳор, Қизлар.

ПИЧОҚСОЗ қ. **пичоқчи.** *Бугун пичоқсозлар бозори гавжум.*

ПИЧОҚЧИ Пичоқ ясовчи хунарманд, пичоқсоз уста. *Пичоқчи уста.* ■ *Кези келса пичоқчи, кези келса сувоқчи.* Ойбек, О. в. шабадалар.

ПИЧОҚЧИЛИК 1 Пичоқ ясаш билан шуғулланиш. *Пичоқчилик қилмоқ.*

2 *Тар.* Бозорда пичоқчилар растаси.

ПИШАК [ф. پوشک / پوشک — мушук] шв. Мушук. *Баширжон: «Нега пишак шоколад эмас экан-а?» дея ўйлай бошлади.* Н. Аминов, Қаҳқаҳа. *Индан чиқиб, пишак билан ҳазиллар, Магар ажал қўмсаб келса сичқонга.* «Алпомиш».

Пишагини пишт демоқ айн. мушугини пишт демоқ қ. **пишт.** *Ишда ҳам биров пишагини пишт демайди. Эрталаб туриб, далага йўл олади. Чарчадим демайди, ишим бор, жавоб беринлар, деб ҳеч кимдан илтимос қилмайди.* «Ёшлик».

ПИШАНГ эск. айн. **ричаг.** *Яна тушки сменага ўтган кунларимиз эди. Вишканинг тепасидаги пишангнинг ўқи сал қийшайиб қолган экан.* П. Қодиров, Қадрим.

Пишанг бермоқ Бирор хатги-ҳаракатга ундамоқ; атайлаб гижгижламоқ. *Балки Раим оқсоқолнинг ўзи Шукур базозга пишанг бергандир. Бунисини Раим оқсоқол айтмайди.* М. М. Дўст, Галатепага қайтиш. *Мамат қас-соб, одатда, муштлашувга аралашмайди, бир четда ўғилларига пишанг бериб туради.* «Ёшлик». *Ашур ҳамишаги чаптаст усулларни қўллай-қўллай, рақибининг солқи белбоғидан олиб олди. -Қайтариб бос? — дея пишанг берди кимдир баралла.* «Шарқ юлдузи».

ПИШИЛЛАМОҚ Бурун орқали "пиш-пиш" товуш чиқариб нафас олмоқ, «пиш-пиш» товуш чиқармоқ. *Нафиса уйғониб кетиб, алавақтгача хомуш ўтирди. Пишиллаб ухлаётган ўғлини тўғрилаб, устига одеял ёпиб қўйди.* Мирмуҳсин, Умид. *Ҳожимурод ниҳоятда очикқан эди. Ҳеч қаёққа қарамай, пишиллаб, дунжига овқат тиқарди.* С. Аҳмад, Жимжитлик.

ПИШИЛМОҚ **Пишмоқ** II фл. мажх. н., ивимоқ. *Табиат чиндан ҳам бевақт йўлга чиққан бу йўловчини сувга пишилган паррандадек жабрлаган эди.* П. Турсун, Ўқитувчи.

ПИШИМОҚ I 1 Ишлов билан ёки ривожланиб этилмоқ, меъерига, обу тобига етмоқ, фойдаланса бўладиган ҳолга келмоқ. *Лой яхши пишиди. Ип ҳали пишимабди.* ■ [Раис:] *Қалай? Ерлар кўнгилдагидек пишидими? Ойдин, Юрагида ўти бор. Энди тўхта, укажон. Бўлди-е, кувидаги қатиқдай пишийвериб, ёғимни чиқариб юбординг.* С. Сиёев, Отлиқ аёл.

2 *кўча* Кўпни кўриб, бошдан кечириб, бой тажриба орттириб вояга етмоқ, етуклик даражасига эришмоқ, етишмоқ. *Шаҳдам қадам босиб минбарга чиқишидан, гап оҳангидан бунақа даврага кўп тушиб, хийла пишиган, сертажриба кўринади.* Ҳ. Назир, Маёқ сари.

3 **Чиниқмоқ, тобланмоқ.** *Киши меҳнатда пишиди. Ёшсан пиширсан, бу дамнингдан туширсан.* Мақол. ■ *Эрғаш Баҳромов немисфашист босқинчиларига қарши олиб борилган жангларда пишиди, чиниқди, тобланди.* Н. Сафаров, Оловли излар.

Кўзи пиш(и)моқ айн. кўзи пишмоқ қ. **кўз. Қулоғи пишимоқ** 1) эшитавериб кўникиб қолмоқ. *Хўжайинларининг таъналарини эшитавериб, етимнинг қулоғи пишиган, эти кўниқкан эди.* П. Турсун, Ўқитувчи; 2) кўп эшитиб уқиб олмоқ, қулоғига қуйиб олмоқ. *Фотиманинг қулоғи ўзи кўрмаган харидорлари тўғрисидаги гаплар билан пиший борди.* П. Турсун, Ўқитувчи.

ПИШИМОҚ II кам қўлл. *Пишилмоқ, ивимоқ. Ёмғирда қолиб роса пишидим.*

ПИШИРИҚ Хамирдан тайёрланадиган турли хил егулик. *Дастурхон башанг: иссиқ нон, патир, хилма-хил пишириқлар, қазикарта, яхна гўшт, турли ширин нозу неъматларга тўла.* Ойбек, Улуғ йўл. *Баҳор таоми сумалак ва турли ширинликлар, миллий пишириқлар.. ҳиди димоққа урилади.* А. Суюн, Ўзлик.

ПИШИРИМОҚ **Пишмоқ** 1-5, 8-9 фл. орт. н. *Ошни пиширмоқ. Масалани пиширмоқ.* ■ *У қайроқ бугдой ундан ёғли патир, сомса ёнди, қатламалар пиширди.* И. Раҳим, Чин муҳаббат. *Ганни аввал Муродова билан пишириб қўйган экансан-ку, нега менга иларироқ айтмадинг.* И. Раҳим, Ихлос. *Новвот пишириши айниқса қийин.* Газетадан.

ПИШИТМОҚ I **Пишимоқ** I фл. орт. н. *Ипакни пишитмоқ. Ерни пишитмоқ. Лойни пишитмоқ.*

Қулоғини пишитмоқ (ёки пишиқтирмоқ)

1) яхшилаб тушунтирмоқ, миясига қўймоқ. *Мингбоши.. Жўраҳонни ҳам сўроққа талаб қилиб қолишлари мумкинлигини ўйламаган эди. Қизининг қулоғини пишиқтириб қўймаганига мана энди афсус еб қолди. М. Исмоилий, Фарғона т.о.; 2) тайинламоқ, уқтирмоқ. Қулоғини Тулки роса пишитган. А. Шер, Қадимги куй.*

2 Олдиндан гаплашиб, келишиб, маслаҳатни бир жойга, ерга қўймоқ, аниқ, равшан, пухта қилмоқ. *Барака топсин Тошпўлатов, ўшанда ҳам, правление билан, раис билан гаплашиб, Хосият холаининг [сафарга чиқиш] ишини пишитиб берди. Р. Файзий, Чўлга баҳор келди. Қурилишни эсон-омон тугатиб топширсам, бас, трестга лип этиб ўтаман-кетаман. Кеча борганимда яна пишитдим. А. Мухтор, Туғилиш.*

ПИШИҚ 1 Пишган, пишиб етилган (мева, сабзавот, дон ва ш.к. ҳақида). *Олмани хом, пишиқ аралаш термоқ. ■ [Амлоқдор:] Ўғрилар.. подшоҳлик ҳақини аниқламасдан бурун, хом демай, пишиқ демай, кўзга кўринган нарсани еяверасанларми?! С. Айний, Қуллар.*

2 от Полиз экинлари, мева, сабзавот кабиларнинг пишган вақти, мавсуми (шу нарсаларнинг номи билан қўлланади). *Қовун пишиғи. Тут пишиғи. Авжи ўрик пишиғи. ■ Буғдой, жўхори пишиғида.. енгил чархини елкасига солиб, ўғилчасини етаклаб, дала айланади, ўроқ чархлайди. А. Қаҳҳор, Сароб. Тут пишиғи эди. Пешиндан кейин ҳовлида картошка чопиқ қилаётгандим. М. Мансуров, Ёмби.*

Етти қовун пишиғи бор Ҳали узок, кўп вақт бор.

3 Тезда синмайдиган, йиртилмайдиган, узилмайдиган, бузилмайдиган; пухта, мустаҳкам, қаттиқ, чидамли. *Пишиқ чит. Пишиқ чарм. ■ [Мастон] Оёғидаги пишиқ ағдарма этикни кўздан кечирди. А. Қаҳҳор, Мастон. [Унсин] Маҳсининг чоки пишиқ бўлсин учун, мумли ёпишқоқ ипни ҳар қатимда бармоқлари билан “қир-қир” тортиб қўярди. Ойбек, Танланган асарлар.*

4 Эшилган, пишитилган, чийратма.

Пишиқ ип 1) пухта ип. *Чўзаберсанг, пишиқ ип ҳам узилади. Иш, вақтида қилинмаса, бузилади. «Муштум»; 2) чийратма ип.*

5 Ўтда, оловда пиширилган. *Пишиқ ғишт. ■ Хайруллаев олдида Шамси Тўраевич дар-*

возаҳонанинг бир бурчагига териб қўйилган пишиқ ғишт уюмини унга [Баширжонга] кўрсатди. Н. Аминов, Суварак.

6 Жисмоний жиҳатдан бақувват, миқти, чайир. *Қўл олиб кўришар экан, унинг пишиқ жуссасига, болаларча ийманиб турган кўзларига қаради. С. Аҳмад, Уфқ. Вужудидан ўсмир болалардай куч-ғайрат тўлиб турар, гавдаси пишиқ, терилмаган қуюқ қош остида ўйчан юмалоқ кўзлари тимқора бўлиб кўринар эди. А. Мухтор, Давр менинг тақдиримда.*

7 кўчма Ўз ишига пухта, бировга сўзини бермайдиган, ҳақини олдирмайдиган. *Пишиқ, сўзамол кампир, ҳар хил баҳона топиб, кунда бир-икки марта бойникига кирар эди. Ойбек, Танланган асарлар. У [Абдурасул] энди турмушининг оғир кулфатларини енгиб, пишиқ йигит бўлиб етишган эди. П. Турсун, Ўқитувчи. Пишиқ бўл. Нима мақсадда юрганингни ҳеч ким билмасин. П. Турсун, Ўқитувчи.*

8 Ўз нарсасини, меҳнатини бировга анойи қилмайдиган, қаттиқ. *Кузда тоғамдан пул олиб юбораман-да. Лекин қариндошларимиз ўлғудай пишиқ одамларга ўхшайди. Ойбек, Танланган асарлар.*

9 кўчма Асосли равишда ишланган; яратилган; пухта. *Пишиқ асар. Пишиқ иш қилмоқ. ■ [Ҳақимов] Эшонбоев тез ўсиб келаётган кадрлардан эканини, анча пишиқ илмий иш ёзганини айтди. П. Қодиров, Уч илдиз. Остонбек агрономлик маълумоти борлигига шаҳодатнома олиб келганди, дадаси ўғлининг ишни пишиқ қилганидан хурсанд бўлди. «Ёшлик». Бўри Пайғамов, Нусратбекининг олдин — журналларда жиддий, пишиқ мақолаларини ўқиганда, кўз остига олиб қўйган, бу ерга атайлаб уни кўриш, кўнглига қўл солиш учун кирган эди. С. Нуров, Майсаларни аёз урмайди.*

10 Зийрак, удабурон. *Мен бошқа нарса демоқчиман: ишининг кўзини биладиган одам, пишиқ, хат-саводи бор.. шу одамни секретарликка тавсия қилсак, демоқчиман. А. Қаҳҳор, Қўшчинор чироқлари.*

Зуваласи пишиқ қ. зувала. *Лолахон — зуваласи пишиқ, йигитларча абжир қиз, алланималар дея, унга йиғламсираб сўзляпти. Х. Назир, Ёнар дарё.*

ПИШИҚЛАМОҚ 1 Бирор ишни пишиқ-пухта бажариш учун йўл-йўриқ кўр-

сатмоқ; пишиқ-пухта ўргатмоқ, тайинламоқ. Олдиндан пишиқлаб қўйилган бўлса ҳам, гапидан адашиб кетди. ■ Абди ака бу гапларни айтиб, Пардавойни яна бир бор пишиқлаб, қишлоққа қайтиб кетди. У. Пўлкан, Бир баҳор достони.

2 Тўғриламоқ, нуқсонларини тузатмоқ; пухталамоқ, -*Оворагарчилиги бор эканми, — деб кесатдим.* —Элик бетини пишиқлаб чиқдим. Бу ёғи битгунча, борини радионадиога, газет-пазетга пуллаб турамиз. М. М. Дўст, Лазор.

ПИШИҚЛИК 1 Мустаҳкамлик, қаттиқлик, маҳкамлик. *Пишиқлик нишонаси бўлган тош ҳам ўзгаради, чунки тошни ташкил этувчи атомлар ҳамшиша ҳаракатда бўлади.* А. Е. Ферсман, Қизиқарли геохимия.

2 Ҳаётнинг қийинчиликлари билан чиниққанлик; ўз ишига пухталиқ. *Унинг [Ҳикоятнинг] пишиқлиги, удабуронлиги шу ҳолда ҳам сезилиб турарди.* А. Убайдуллаев, Ҳаёт оқшоми. *Коля ҳам, шунча дадил ва пишиқлиги билан, баъзи саволларга қийна-либроқ жавоб қайтарарди.* Ҳ. Назир, Сўнмас чақмоқлар.

ПИШИҚМОҚ 1 кам қўл. Зўриқиш ёки бошқа бирор сабаб билан бўртмоқ. *Унинг [Баширатнинг] эрталабки совуқдан ва ҳовлиққанидан қип-қизил бўлиб пишиққан лўппи юзида тоқатсизлик билиниб турар эди.* А. Мухтор, Опа-сингиллар.

2 Пишимоқ, чиниқмоқ, тобланмоқ. *Меҳнатда пишиқмоқ.*

ПИШИҚ-ПИШИҚ *рви.* Гапни ўз ўрнига қўйиб, пишиқ-пухта, бурро-бурро, аниқ-ойдин. *Пишиқ-пишиқ гапирмоқ.* ■ *Ўзбекча сўзларни секин ва пишиқ-пишиқ айтиб берди.* Ойбек, О. в. шабадалар.

ПИШИҚ-ПУХТА 1 айн. **пишиқ-пишиқ.** *Пишиқ-пухта гапирмоқ.*

2 айн. **пишиқ 3, 6-10.** *Пишиқ-пухта этик.* ■ *Мулла Мухсин Хатиб домла каби пишиқ-пухта, яъни замона ишларига тушунадиган киши эмас.* А. Қодирий, Обид кетмон. *Улар ишга пишиқ-пухта эдилар; икки савдо ходимининг тили бир бўлса, кўп иш қилса бўларкан.* Ш. Холмирзаев, Бодом қишда гуллади. *Ҳабиба Қудратга, пишиқ-пухта, икки юз сўмдан ошиқ маош оларкан, деб дарров унаганди.* Қ. Кенжа, Тоғ йўлида бир оқшом.

ПИШИҚЧИЛИК Мева, сабзавот ва ш.к.нинг фарқ пишган пайти. *Айни пишиқчилик,*

ҳар уч хонадоннинг бирида базми жамшид. «Шарқ юлдузи». Жайнақ Мирзо буйил ёзнинг айни пишиқчилик чоғида, ўғилларини укаси Ҳалим бойваччанинг ёнида қолдириб, Паркентга хотини билан қизини олиб келди. «Ёшлик».

ПИШКАК Кув дастаси. *У бошини эгиб, пишакни жадал ураётганда, узун сочлари олдига тушиб, пишакка ўралар ва халал берарди.* С. Айний, Дохунда. *У нимчасининг чўнтагидан рўмолчасини олиб, пешонасига босади, юз-кўзини артади-да, яна пишак уради.* С. Анорбоев, Оқсой.

ПИШЛОҚ Сутни махсус усулда ачитиб тайёрланадиган, сирга ўхшаш егулик. *Пишлоққа қўшилган турп ошқозон, жигар, талоқ ва буйрак учун яхши шифо бўлади.* К. Маҳмудов, Ўзбек тансиқ таомлари. *Фермаизда сутлардан қатиқ, қаймоқ ишлаймиз, Жангчиларга чарчамай мой ва пишлоқ ишлаймиз.* З. Дийр.

ПИШЛОҚЧИ Пишлоқ тайёрловчи киши.

ПИШМОҚ 1 1 Ўсиб, ривожланиб, таркиби яхшиланиб, истеъмол қилиш ёки ишлатиш учун яроқли ҳолга келмоқ, етилмоқ (мева, сабзавот, дон, сув кабилар). *Қулундай пишиди. Помидор пишгани йўқ.* ■ *Мол ўтмайдиган баландликдаги деворлари ҳам нураган, боғ ичидаги олма ва тоғолчалар эса пишиб ётибди.* Ш. Холмирзаев, Йўллар, йўлдошлар. *Мана бу узумни олинг, жуда яхши пишибди.* Ойбек, Танланган асарлар. *Қора гилослар фарқ пишиб, шохлари томга тушиб турар эди.* М. Исмоилий, Фарғона т. о. *Оқар сувларнинг барчаси пишган, ер остидаги кам ҳаракатдаги сувлар хомдир.* Газетадан.

2 Ривожланиб етилмоқ. *Пишмаган новда. Пишган уруғ.* ■ *Эгатлардаги тутларнинг новдалари пишибди.* М. Исмоилий, Фарғона т. о.

3 Қайнатиш, қовуриш, димлаш ва ш.к. натижасида истеъмол учун тайёр бўлмоқ. *Палов пишиди. Тухум пишиди. Нон қизариб пишиди. Бермаснинг оши пишмас, пишса ҳам, қозондан тушмас.* Мақол. *Пишган ошнинг умри қисқа.* Мақол. ■ *Кечки норин учун катта қозонда ёғли қази пишади.* Ойбек, Танланган асарлар. *Қурбоннинг бир томонида пишиб қотиб кетган кабоблар устма-уст тахлаб қўйилган.* Э. Усмонов, Ёлқин. *Феруз бирла бир хонада ўтириб гурунг этмакка, бир*

қозонда пишган таомни емакка ор қилганими бу? С. Сиёев, Ёруғлик.

4 Ўтда ишлов еб, зарур технологик хусусият касб этмоқ. *Пишт яхши пишибди.*

5 Тобланмоқ, қораймоқ; чиниқмоқ. *Офтобда роса пишидик. ■ -Оҳо, агрономча, — деди Ҳамдам қошини чимириб, — далада роса пишибсан-ку. Х. Аҳмар, Ким ҳақ? Ёшлар ишласин, пишсин, энди бизлар чарчаб қолдик, десак ҳам, қари билганни пари билмас, деб юз балага рўпара қилишаверади. С. Нуров, Нарвон. Шукуровнинг офтобда пишган қорача юзи, сал қисилган қўй кўзларига чуқур ўйчанлик чўккан эди. О. Ёқубов, Диёнат.*

6 с. т. Тўлишиб, ёрилиш даражасига келмоқ (яра-чақа ҳақида). *Малҳам кўйилса, чипқон тез пишади.*

7 кўчма Умри охирига етиб, қартайиб, ўлими яқинлашмоқ. *-Ўзи пишиб қолгандай-ку, Назар ака, — дедим. -Кўйинг, уч-тўрт кулиги борми-ўўқми.. М. М. Дўст, Лолазор. Эшон аянинг бирдан-бир нияти — қўлда қолган қўр-қутларни сақлаб қолиш, пишиб, ҳилвираб турган эшонни ўз масканига кўйиб, бойликларга эга бўлиш. С. Аҳмад, Ҳукм.*

8 кўчма с. т. Ҳал бўлмоқ, тайёр бўлмоқ. *Иш пишди — Тешабойнинг ўрнига сизни бригадир қилмоқчи бўлдик. Уйғун, Дўстлар. [Эгам хотинига:] Гапни бўлма! Ҳой, нари бор! Иш пишди. Шукрулло, Сайланма. Мунаввар, Назокат фожиасини ўз фожиасидай юрагига яқин олди. Шунгами, постановка тез пиша қолди. С. Анорбоев, Меҳр.*

9 кўчма Мукамал ҳолга келмоқ. *Фикрлар пишиб, етилиб, юракдан тўлиб чиқмасидан асар ёзишга, айниқса, уни нашр этишга шошилиш керак эмас. Шукрулло, Жавоҳирлар сандиғи. Бу ҳол Ойбекнинг дастлаб ўз ҳаёлида пишиб етилган эпизодларнигина ёза бошлаганини кўрсатади. «ЎТА».*

10 кўчма Ой-куни яқинлашмоқ. *Шуни яхши билингки, ишингиз энди кўп бўлади. Пишиб турган хотин кўп. Уйма-уй юриб, консультация берасиз. С. Аҳмад, Чўл шамоллари.*

Ичи пишмоқ қ. ич. *Кўзибойнинг ичи пишиб кетаётган эди. У чўққига чиқиб, «Тошбулоқ»ни топишга ҳам, бошқа вақтдагидай, биринчи бўлиш пайида эди. Ҳ. Назир, Сўнмас чакмоқлар. Ичидан пишган қ. ич. Аслида Тўпори жудаям унчалик тўпори эмас, ичидан пишган, ўлғудай қув, қувлиги шунчаликки,*

бирор ўн беш йилдан бери Ошнога довдирроқ бўлиб кўринмоқнинг урдасидан чиқяпти. М. М. Дўст, Лолазор. Калла пишмоқ Уйқуга тўймоқ. -Калла пишидими, полвон? — деди Тўланбой сабзи тахтадан бош кўтармай. С. Аҳмад, Уфқ. Кўзи пишмоқ қ. кўз. Маҳкам устаникида мустақил ишламаган бўлса ҳамки, кўзи пишган, қўли кўп нарсага ўрганиб қолган эди. Р. Файзий, Ҳазрати инсон. Жанг кўриб, қон тўкиб.. кўзи пишиб кетган Анвар.. бундай пайтда айтиладиган бир оғиз сўз, ҳатто бир имо тақдирни ҳал қилиб юборишини ҳам биларди. Ш. Холмирзаев, Қил кўприк.

ПИШМОҚ II 1 *Сувга, суюқликка ботириб хўл қилмоқ. Дўпписини сувга пишди. ■ Ойим аралашса ҳам, Солиҳ қўйвормай, мени ҳовузчага пишмоқчи бўляпти. Ҳ. Назир, Ёнар дарё. Унинг очиқ ёқали узун кўйлаги, устидаги олача яктаги сувга пишгандай жиққа хўл бўлган.. Ойбек, Танланган асарлар.*

ПИШНАМОҚ *Оғирлик, иссиқ, совуқ, ҳаяжон таъсирида қизариб ҳарсилламоқ, пишилламоқ. Шотўра муаллим пишнаб, кўзларини пирпиратар.. эди. Ш. Холмирзаев, Сайланма. Абдуқодир ярим палла тарвузни кўтариб, пишнаб чиқиб кела бошлади. Ш. Холмирзаев, Сайланма.*

ПИШ-ПИШ I *унд. с. Мушукни чақиритиш учун ишлатилади.*

ПИШ-ПИШ II *тақл. с. Бурундан нафаснинг бўғилиб, сиқилиб ўтаётганида ҳосил бўлган товуш ҳақида. Пиш-пиш ухламоқ. ■ Алихон жим қурди чордана, Қур-қур тортди чилимни бирпас. Сигмай кетди гўё кенг уйга, Пиш-пиш олди чуқур бир нафас. Ҳ. Пўлат. Фарзандлари ҳали ўринларидан турмаган, еттовлари бир ўринда.. бири иккинчисининг қорнига бош қўйиб, пиш-пиш ухлашар эди. Х. Тўхтабоев, Йиллар ва йўллар.*

ПИШПИШЛАМОҚ *Пиш-пиш деб айтмоқ. Мушукни пишпишлаб чақирмоқ.*

ПИШТ *унд. с. Мушукни ҳайдаш учун ишлатилади. Мушукка «пишт» демаган товуққа «кишт» дермиди? Мақол.*

Мушугини пишт демаслик *Ҳеч қандай озор етказмаслик, қаттиқ гапирмаслик. ..Қаландарлар ҳалқаси дахлсиз эди, хонликда биров уларнинг мушугини пишт демасди. С. Сиёев, Аваз. Энди уйга бемалол борсам бўлади, деб ҳаёл қилди, қани, биров мушугимни пишт, деб кўрсин-чи. М, М. Дўст, Лолазор.*

ПИШҚИРИҚ 1 Бурундан чиққан бўғиқ баланд товуш. *От пишқириғи.*

2 кўчма Қаттиқ босим билан пишиллаб чиққан буғнинг кучли товуши. *Паровоз пишқириғидан кишилар бир-бирининг товушини эшитмайди.*

ПИШҚИРМОҚ 1 Бурундан кучли бўғиқ товуш чиқармоқ (от, қорамол ҳақида). *Канадан ҳам кўра сизир унинг аччиғини келтирди: канани терай деса, қўймайди: бошини силкийди, пишқиради.* А. Қаҳҳор, Адабиёт муаллими. *От бўлса, ҳавонинг бузилганини сезибми, йўлнинг ёмонлигидан нолибми, қаттиқ пишқириб қўяркан.* Ҳ. Назир, Сўнмас чақмоқлар. *Сизир пишқириб, қўлимни ҳам ямлаб ютай деди.* С. Сиёев, Ёруғлик.

2 Пишқириққа ўхшаш қаттиқ товуш чиқармоқ. *Поезд — гўё улкан тимсоҳ, пишқириб, қирларни чўрт кесиб югурарди.* Мирмуҳсин, Қаҳрамоннома. *Машина олов отдай пишқириб уади.* С. Сиёев, Ёруғлик. *Паровоз, худди чарчаган отдай, бир пишқириб тўхтади.* Ж. Шарипов, Саодат.

3 кўчма Шиддат билан шовулламоқ, вишилламоқ. *Ҳамма пишқириб ёнаётган оловни ўчиришга ёпишди.*

4 кўчма Ҳайқириб гапирмоқ, бақирмоқ. *Жавоб ўрнига бошини чайқаб пишқирди.* С. Аҳмад, Уфқ. *У, Зулайҳо Мансурни чақириб борганини эшитган бўлса керак, югуриб келган.. кўзлари ўт бўлиб ёнар, бурун катакларини кериб, пишқирарди.* Ў. Ҳошимов, Қалбингга қулоқ сол. *-Эшитдингми? — Кимсан акам газаб билан пишқирди. — Жон керак бўлса, туёғингни шиқиллат.* Ў. Ҳошимов, Икки эшик ораси.

5 кўчма салб. Шошилиб кетмоқ, босартусарини билмай қолмоқ. *Пишқирган бойлар. ■ Пишқириб келган Салимхон Обидий ели чиқиб кетган нуфакдек бўшашиб, бир чеккада ўтирарди.* Мирмуҳсин, Умид.

ПИҚ тақл. с. Кулганда ёки йиғлаганда, томоқдан портлаб чиққан қисқа, бўғиқ товуш ҳақида. *Гавҳарнинг лайлакка ўхшаб бир оёғини кўтариб туриши ўзига шу қадар нашъа қилиб кетдики, пиқ этиб кулиб юборди.* Ў. Ҳошимов, Қалбингга қулоқ сол. *Анзират кампир пиқ этиб йиғлаб юборди.* А. Мухтор, Опа-сингиллар.

ПИҚИЛЛАМОҚ Кулги ёки йиғи аралаш қисқа, бўғиқ товуш чиқармоқ, “пиқ-

пиқ” этмоқ. *Сотиболди ҳарчанд ўзини тутишига ҳаракат қилса ҳам бўлмади — пиқиллаб кулиб юборди.* А. Қаҳҳор, Қўшчинор чироқлари. *Узилган қайишларнинг улоғини улоғига тўғри қилиб тикмоқда ва пиқиллаб, ўпкамини тутиб ололмай йиғламоқда эдим.* Ф. Фулом, Тирилган мурда. *Азиза юзини кафти билан яширганича, пиқиллаб йиғлаб юборди.* Ў. Ҳошимов, Қалбингга қулоқ сол.

ПИҚИР тақл. с. Кулги ёки йиғидан ўзини тута олмай қолганда чиқариладиган қисқа, паст товуш ҳақида. *Пиқир этиб кулмоқ.*

ПИҚИРЛАМОҚ Кулги ёки йиғидан ўзини тута олмай қолганда, қисқа, паст товуш чиқармоқ, пиқир этмоқ. *Мастура пиқирлаб кулиб юборди, яна кулди, ёш боладай ўзини тутолмай қиқирлар эди.* А. Қаҳҳор, Минг бир жон.

ПИҚИР-ПИҚИР **Пиқир** с. такр. *Қизлар.. нималарнидир аста-аста сўзлашиб, пиқир-пиқир кулишарди.* Ойдин, Мардлик — мангулик. *Дам овозининг борича, дам пиқир-пиқир кулаверди.* «Ёшлик». *Орқада пиқир-пиқир кулги эшитилди.* П. Қодиров, Уч илди.

ПИҚ-ПИҚ **Пиқ** с. такр. *Зарофат пиқ-пиқ йиғлаганича, унинг ёнидан ўтиб, эшикка калит солиб очди.* С. Аҳмад, Сайланма. *Бир зум тилдан айрилиб, гунг бўлиб қолган оломон орасида пиқ-пиқ кулги ва гала-ғовур кўтарилди.* О. Ёкубов, Кўҳна дунё. *Аёл кўйлагининг энги билан кўз ёшларини артиб, пиқ-пиқ йиғлади.* Т. Малик, Иблис девори.

ПЛАГИАТ [лот. plagiat — ўғирланган] Бировнинг асарини ёки ундаги фикрларни ўзиники қилиб кўрсатиши, адабий, ижодий ва илмий ишдаги ўғирлик.

ПЛАГИАТОР [лот. plagiator — ўғри] Бировнинг асарини ёки ундаги фикрларни ўзиники қилиб кўрсатувчи муаллиф; плагиат билан шуғулланувчи шахс. *«Плагиатор» деган сўзни эшитганмисан? — деди у [Амирий], тўсатдан қошларини чимириб.* А. Кўчимов, Ҳалқа.

ПЛАГИАТОРЛИК Бировнинг асарини ўзиники қилиб кўрсатишлик. *Асардан малумки, Санжаров Орифнинг плагиаторлигини очиб ташлайди.* «ЎТА».

ПЛАЗМА [юн. plasma — ясалган нарса; тизилма] **1** биол. Қоннинг суюқ қисми. *Қоннинг суюқ қисми — плазмаларни қуйиш ҳам яхши натижа бермоқда.* Газетадан.

2 Кучли даражада ионлашган, юқори ҳарорат ёки газ заррачалари билан тезлашган электронлар тўқнашуви натижасида ҳосил бўладиган модда. *Қаттиқ водород ҳамда литий гидриди нишонига нур юбориш йўли билан юқори ҳароратли плазма олинди.* «Фан ва турмуш».

ПЛАКАТ [нем. Plakat < фр. placard — эълон, афиша < лот. plaquet — ёпиштирмақ] Тарғибот, ташвиқот, ахборот ёки реклама мақсадларида кўча ва жамоат муассасаларига илиб қўйиладиган қисқа матнли сурат, тасвир. *Масъулиятсизлик билан тайёрланган кўчалардаги плакатлар, ташкилот ва магазин пешлавҳалари дилингизни хира қилади.* Газетадан. *Бу анжуманга атаб шаҳарни безатиш бўйича макетлар, эскизлар ва плакатлар тайёр бўлди.* Газетадан.

ПЛАКАТЧИ Плакатлар чизувчи rassom.

ПЛАН [лот. planum — юза, сатҳ, текислик] **1** Текисликдаги жой, нарса, иншоот ва ш.к. ни машғаб бўйича батафсил тасвирловчи шартли белгилари бўлган чизма. *Бинонинг плани. Шаҳарнинг плани.* ■ *Геологлар шаҳарчасининг марказий кўчаси план асосида қайта қурилмоқда.* С. Анорбоев, Ўзбекистон олтини. *Қишлоқнинг планини, кўчаларини, уйларини кўрдингиз. Мана бу кўча ҳозирги гўристоннинг бир чеккасидан ўтади.* А. Ҳажор, Кўшчинор чироқлари.

2 айн. **режа 2.** *Беруний тумани соҳибкорлари йиллик план бажарилганлиги ҳақида рапорт бердилар.* Газетадан. *[Дилбар:] Пешқадам ишчи кунига пландаги 480 та ўрнига 650 тача рўмолнинг четини тикади.* Газетадан.

3 эск. Бирор ишни амалга ошириш тартиби. *Саёҳат плани.* ■ *Солиҳ лабораторияга кириб, ўз жойига ўтирди-да, қилиниши керак бўлган тажрибалар планини туза бошлав.* О. Мўминов, Хиебондаги уч учрашув. *Қани, айт-чи, бирор мақсадинг, планинг борми ўзи ўйлаб юрган?* Т. Ашуров, Оқ от.

4 эск. Бирор нарсани баён этишдаги муайян тартиб, изчиллик. *Диссертация плани. Лекция плани. Ҳикоя плани. Дарс плани.* ■ *Ўртоқ Обидов.. бу конспект эмас, план [деди Нишонов].* С. Зуннунова, Янги директор.

5 кино Объектнинг, мас., кинокадрда суратга олинган майдоннинг тасвирдаги ўрни ва унинг катта-кичиклиги. *Олдинги план.*

Йирик план. Тасвирларни ўртача планда бермоқ. Юзни йирик планда суратга олмақ.

ПЛАНЕРИЗМ Планёрда учиш назарияси ва амалиёти; планёр спорти. *Планеризм билан шуғулланмоқ.* ■ *Юқори синфда ўқийтганимда планеризмга қизиқиб қолдим.* «Шарқ юлдузи».

ПЛАНЕРИСТ [фр. planeuriste — планерчи] қ. **планерчи.**

ПЛАНЕРЧИ Планёрда учувчи, планеризм билан шуғулланувчи киши.

ПЛАНЕТА [лот. planete < юн. (aster) planetes — адашиб юрувчи (юлдуз)] *астр.* Куёш атрофида айланувчи ва ундан ёруғлик ва иссиқлик олиб, уларни қайтарувчи эллиптик ёки шарсимон осмон жисми; сайёра. *Планеталар ғоят катта шарлардир, улар ўлчамлари ва ёруғлик нури чиқармаслиги жиҳатидан Ерга ўхшайди.* «Астрономия».

ПЛАНЕТАЛАРАРО 1 Планеталар ўртасида бўладиган. *Планеталараро саёҳат.*

2 Планеталар ўртасида жойлашган. *Планеталараро бўшлиқ.*

ПЛАНЕТАЛОГИЯ [планета + юн. logos — билим, таълимот] Астрономиянинг Куёш системасидаги сайёралар ва уларнинг йўлдошларини ўрганувчи бўлими.

ПЛАНЕТАРИЙ [лот. planeta — сайёра]

1 Гумбазсимон экраннинг ички сатҳида энг муҳим ёритқичлар ва буржлар жойлашган юлдузлар осмони манзарасини кўрсатувчи, Куёш, Ой, сайёралар ва б. осмон ёритқичлари кўринма ҳаракатини худди ўзидай акс эттирувчи проекцион аппарат. *Қаҳқаҳа ур, шоир!.. Шовуллайди тинсиз дарахтзор тунда, Планетарийнинг зангор гумбаз зарҳал.* А. Орипов, Йиллар армони.

2 Астрономия, космонавтика, Ер ҳақидаги фанлар бўйича тадбирлар (мас., маърузалар, семинарлар) ўтказиладиган илмий-маърифий муассаса, шу муассаса биноси. *Тошкент планетарийси.*

ПЛАНЁР [фр. planeur < planer — учмоқ, парвоз қилмоқ] Моторсиз, қанотли, ҳаводан оғир учиш аппарати.

Планёр спорти Авиация спорти тури.

ПЛАНИМЕТРИЯ [лот. planum — сирт, сатҳ + юн. metreo — ўлчайман] Геометриянинг текисликдаги шакллارни ўрганадиган бўлими.

ПЛАНИРОВКА [р. планировка — режалаш(тириш)] **1** Келажакда қилинадиган иш-

лар режасини, лойиҳасини тузиш; режа (план) ишлаб чиқиш.

2 Нарса, жой ёки иншоотнинг, ер (экин) майдонининг айрим қисмларини план асосида бир-бирига нисбатан маълум тартибда жойлаштириш, режалаш; режа. *Паркнинг планировкаси.* ■ *Дала ишларини тўла машиналаштириш мақсадида планировкага алоҳида аҳамият берилди.* Газетадан.

ПЛАНЛАШТИРМОҚ 1 Жой, нарса, иншоот кабиларнинг планини чизмоқ, тузмоқ. *Завод қурилишини планлаштирмоқ. Янги истироҳат боғини планлаштирмоқ. Шаҳарни планлаштирмоқ.*

2 Иш, тadbир, дастур ва ш.к. нинг режасини тузмоқ, белгиламоқ. *Дарсни планлаштирмоқ. Дала ишларини планлаштирмоқ. Ишлаб чиқаришни планлаштирмоқ.* ■ *Планлаштиришни такомиллаштириш ва бошқарувнинг янги схемасини амалга ошириш — қайта қуришдаги бир-бирига боғлиқ муҳим вазифалардир.* Газетадан.

3 Амалга оширишни, бажаришни кўзда тутмоқ. *Сайлни майга планлаштирмоқ.*

ПЛАНЛИ қ. режали. *Планли иш. Планли юриш. Бутун ишларни планли равишда олиб бормоқ.* ■ *Планли иш туйфайли коллеж жамоаси барча соҳаларда юксалиш пилла-полярларидан дадил одим ташлаб бормоқда.* Газетадан.

ПЛАНСИЗ 1 Планга асосланмаган, олдидан планлаштирилмаган, план билан қилинмайдиган. *Плансиз уй.* ■ *Паст-баланд, қинғир-қийшиқ.. плансиз пастак уйлар.* И. Раҳим, Тинимсиз шаҳар.

2 қ. режасиз. *Плансиз иш — қолипсиз ғишт.* Мақол.

ПЛАНТАЖ [*лот. plantare — кўчат ўтқазмоқ*] қ. х. Ерни, кўпинча мевазор тупроғини чуқур қилиб ағдариб ҳайдаш, ағдарма қилиш. *Илгари, кучли машиналар бўлмагандан, тоқзорларнинг ери плантаж қилинмас эди.* Газетадан.

ПЛАНТАТОР *Плантация эгаси. Плантаторлар ширкати.*

ПЛАНТАЦИЯ [*лот. plantatio — ўсимлик ўтқазуш, экиш*] **1** Фақат биргина махсус экин экилган катта ер майдони. *Чой плантацияси. Пахта плантациялари.* ■ *Ҳар йили 25-30 гектар янги плантация барпо қилиняпти.* Газетадан.

2 Алоҳида экинлар, мас., шакарқамиш, пахта, чой, кофе кабилар етиштириладиган йирик деҳқончилик хўжалиги. *Тоғ ёнбағирлари, адирлар, чўл, саҳро зоналарида йирик боғдорчилик плантацияларини ташкил этишга киришайлик.* Газетадан.

ПЛАНШЕТ [*фр. planchette — тахтача*] **1** геод. Жойни планга олишда қалин чизма қоғози маҳкамлаб қўйиладиган юпқа тўртбурчак тахта.

2 геод. Қаттиқ асосга ёпиштирилган ва топографик сураглар олишда ишлатиладиган қалин қоғоз варағи.

3 Харита жойлаб, ёнга осиб юриладиган, юза қисми юпқа тиниқ нарса билан қопланган ясси сумка. *Черницов планшетдан харитасини чиқарди ва генерал Погодин қўйган белгиларни кўздан кечирди.* И. Раҳим, Чин муҳаббат.

ПЛАСТИК [*юн. plastikos — ҳайкалтарошликка, ганчкорликка оид*] **1** Пластикага, ўймакорликка, ҳайкалтарошликка оид. *Пластик санъат.*

2 Тананинг нафосатли, майин ритмик ҳаракатларига асосланган; гўзал, мулойим. *Пластик ҳаракат. Пластик пантомималар.* ■ *Теранлик ҳам, юксаклик ҳам қалбда туғилади. Ана шу қалб манзараларини, ҳолатларини пластик ҳаракатлар орқали ифодалаш мумкин.* «Саодат».

3 Босим, ташқи куч таъсирида муайян шаклга кира оладиган ва босим тўхтагач, шу шаклини сақлаб қоладиган. *Пластик масса. Пластик модда.*

Пластик карточка айн. кредит карточкаси қ. карточка. *Улар пластик карточкалар бўйича халқаро тўлов тизимига чиқиш имкониятларини муҳокама қилиб, ассоциацияга аъзо бўлиш шартлари.. билан танишишди.* Газетадан. *Нақд пулсиз пластик карточкалар воситасида ҳисоб-китобга ўтиш йўлида олиб борилаётган ишлар шу жиҳатдан диққатга лойиқдир.* Газетадан. *Пластик карточкадан мамлакатимизнинг исталган ҳудудида тўлов воситаси сифатида фойдаланиш мумкин.* Газетадан. **Пластик операция** *Жарроҳлик йўли билан киши аъзосидаги шикастланган, жароҳатланган аъзоларнинг шакли, функциясини қайта тиклаш; киши баданидаги туғма ёки жароҳат ва касалликлардан кейин пайдо бўлган нуқсонларни бартараф этиш.*

ПЛАСТИКА [фр. *plastique* < юн. *plastike* (techne) — ҳайкал яратиш (санъати)] **1** Ўймакорлик (ганчкорлик) ва ҳайкалтарошлик санъати. *Ўзбек пластикаси. Пластика мактаби.*

2 Ҳайкалтарошликда ва текисликдаги тасвирда бадиий шаклнинг ҳажмий, кўзга кўринарли сифатлари.

3 Хореографияда: тананинг рақс руҳи ва услубига мос мулозим ва нафис ҳаракатлари ҳамда шундай ҳаракатлар санъати.

ПЛАСТИКЛИК [юн. *plastikos* — ишловга мойиллик] Ташқи куч ёки зўриқши таъсирида қаттиқ жисмларнинг ўлчамлари ва шакли дастлабки ҳолига қайтмайдиган бўлиб ўзгариш хоссаси. *Жисмларнинг мўртлиги, пластиклиги шароитга боғлиқ. «ЎЗМЭ».*

ПЛАСТИЛИН [итал. *plastilina* < юн. *plastos* — ёпиштирилган, ясалган] Лой, мум ва мойбўёқлардан тайёрланадиган, тез қуримайдиган пластик масса. *Пластилиндан ҳайкалчалар ясамоқ. ■ Тугманинг изи.. пластилинга туширилиб, унинг катта сурати олинди.* Газетадан. *Боғчада бола расм чизади, пластилиндан турли буюмлар ясашни ўрганади.* Газетадан.

ПЛАСТИНКА [р. *пластина* — қаттиқ модданинг юпқа парчаси] **1** Металл, шиша каби қаттиқ нарсанинг юпқа ялпоқ парчаси, тахтаси. *Стаканинг оғзига бир чўп кўйиб, унга рух пластинканинг бир учини қайириб илиптиринг-да, пластинкани эритмага ботириб кўйинг.* «Кимё».

2 Патефон, радиолога кўйиб эшитиш учун овоз ёзилган, одатда пластмассадан ясаладиган доира шакли юпқа диск. *Анорхон радиолога пластинка танламоқда. Й. Раҳим, Ихлос. Товушим ёмон бўлса, нега пластинкага олди? А. Қаҳҳор, Санъаткор. -Наълат, — деб ўйлади у [Ақбарали] йўлакай, — эски кўшиқни янги пластинкага кўчирибди. Й. Шамшаров, Танланган асарлар.*

3 Фоторасм олишда фойдаланиладиган, сезувчи модда билан қопланган ойна. *Пластинкага олинган негатив.*

ПЛАСТИНКАЛИ Пластинка билан ишлайдиган, пластинкаси бўлган. *Пластинкали фотоаппарат.*

ПЛАСТИРЬ [юн. *emplastron* — суртма дори] Ярага, чипқонга ёпиштириб кўйиладиган, ёпишқоқ дори суртилган қалин мато парчаси. *Пластирь цилиндр шаклига ўхшашиб ўлиб, чипқонларни пишириш ёки яллиғлан-*

ган ўчоқларни бартараф қилиш ва ҳоказолар учун ишлатилади. Н. Исмоилов, Касалларни парвариш қилиш.

ПЛАСТМАССА [р. «пластическая масса» бирикмасининг қисқартмаси] Босим ёки иссиқлик таъсирида керакли шаклга кира оладиган ва шу шаклини сақлаб қоладиган материал; пластик масса. *Пластмассада қурилган экспериментал уйлар. Пластмасса идиш. Пластмасса ғилдирак. ■ Чамаси, касалхона ақинидаги бу бозорча ўзидан ўзи пайдо бўлган, кейинчалик бир қатор раста қурилиб, устига рангдор пластмасса шифер ёпиб кўйилган эди. Ў. Ҳошимов, Нур борки, соя бор. Пластмасса ва синтетик смолаларнинг енгил саноатда қўлланиш кўлами кенгайиб бормоқда. «Фан ва турмуш».*

ПЛАТИНА [исп. *platina* — кумуш парчаси < plata — кумуш] Менделеев даврий системасининг VIII гуруҳига мансуб кимёвий элемент; қаттиқ, чўзилувчан, юқори ҳароратда эрийдиган кулранг нодир металл. *Платина гуруҳига кирадиган металлни жаҳон миқёсида қазиб олишнинг умумий миқдори 1967 йилда 93 тоннани ташкил этди.* Газетадан. *Оптик шишалар эритишда кўпинча платина идишлардан фойдаланилади. «Фан ва турмуш».*

ПЛАТО [фр. *plateau* — ясситоғлик < юн. *platys* — ясси] *геогр.* Денгиз сатҳидан анча баланд бўлган ва атроф жойлардан йирик нишабликлар билан бўлинган, кенг пастак ясситоғлик ёки баланд текислик. *Устюрт платоси.*

ПЛАТФОРМА [фр. *plate-forme* — текис, ясси шакл; майдонча] **1** Темир йўл станцияларида пассажирларнинг поездга чиқиш ёки тушиши, юк тушириш ёки ортиш учун темир йўлга нисбатан баландроқ қилиб ишланган узун саҳн, майдонча. *Юк платформаси. Йўловчилар платформаси. ■ Платформадан чиққандан сўнг Саудий булардан ажралиб, қочиш йўлини излади ва эпини қилиб қочди. А. Қаҳҳор, Сароб.*

2 Идиш-қопсиз юклар, контейнерлар ташиладиган, ён деворлари учча баланд бўлмаган, усти очиқ юк вағони. *Платформаларга юк ортмоқ. ■ Юкдан бўшаган платформалар яна бир кун бекор турди. «Ёшлик».*

3 *сиёс.* Бирор сиёсий партия, ижтимоий ташкилот ёки арбобнинг дунёқараши, маслағи, тугган йўли, иш, ҳаракат дастури.

Мени уларнинг платформаси қизиқтиради.
Т. Малик, Қалдирғоч.

4 Унча катта бўлмаган станция.

ПЛАЦДАРМ [фр. place d'armes — қўшин тўпланадиган майдон] ҳарб. 1 Бирор давлат томонидан бошқа давлатга ҳужум қилишга тайёргарлик чоғида қўшинлар ва жанговар техникани тўплаш, ҳарбий ҳаракатларни кенгайтириш учун база сифатида фойдаланиладиган ҳудуд.

2 Сув тўсиқларидан ўтишда эгаллаб олинган ёки чекинишда тутиб турилган соҳил бўйи майдони. Днепрдан ўтиш жойи немислар назоратида бўлганидан, биз плацдармга керак вақтда қурол-яроғ, озиқ-овқат ва резервимизни эркинлик билан етказолмасдик. Н. Сафаров, Оловли излар. Артиллерия разведкачиси Карим Қосимов плацдармда бир ойдан ортиқ жанг қилди. Газетадан.

3 Денгиз десанти асосий кучларининг тушиши ва ёйилишини таъминлаш мақсадида соҳил бўйида эгалланган жой, майдон. Бу урушда на одатдаги жанг майдонлари ва на денгиз плацдармлари бўлади. Газетадан.

ПЛАЦКАРТ(А) [нем. Platzkarte < Platz — жой + Karte — билет] т. й. Пассажир поезде вагонида муайян рақамли алоҳида жойни эгаллаш ҳуқуқини берадиган билет.

ПЛАЦКАРТ, плацкартали Алоҳида жойни эгаллаш ҳуқуқини берадиган; алоҳида жойлари бўлган. Плацкартали билет. Плацкартали жой. ■ Кечагидай эсимда.. плацкарт вагонга чипта ололмасдан, умумий вагонда минг азобда манзилга етгандик. Газетадан.

ПЛАЩ(Ч) [р. плащ < плат — газлама, бўз парчаси] Сув ўтказмайдиган материалдан тикилган енгил пальто, уст кийим. Бир қадам ташлаб, биров орқасидан тортгандай тўхтади: машина эшиги плашининг белбоғини қисиб олган эди. А. Кўчимов, Ҳалқа. Салқин сезилиб қолган, олди одамлар плаш кийиб олишган эди. Ў. Ҳошимов, Қалбингга қулоқ сол.

2 Елкага ташланадиган енгсиз кенг кийим.

ПЛЕБИСЦИТ [лот. plebiscitum — омма, халқ қарори] Бирор муҳим масалани ҳал қилиш учун умумхалқ овозига қўйиш; умумхалқ муҳокамаси; референдум. Плебисцит ўтказмоқ.

ПЛЕВРА [юн. pleura — ёнбош, биқин, ён томон] анат. Ўпкани ва кўкрак қафасининг ички томонини зич ўраб турувчи юпка парда. Ўпка, плевра, юрак, буйрак касалликларида плевра пардасига сероз [зардоб], йиринг, қон каби суюқликлар тўпланиши мумкин. Н. Исмоилов, Касалларни парвариш қилиш.

ПЛЕВРИТ [плевра + лот. itis — яллиғланишни билдирувчи қўшимча] тиб. Плевранинг яллиғланиши. Қуруқ плеврит. Йирингли плеврит. ■ ..экссудатли [суюқ ажралмали] плеврит касаллигида суюқлик ўпкани босиб қўйганидан, нафас олиш қийинлашади. Н. Исмоилов, Касалларни парвариш қилиш.

ПЛЕЕР, плейер [ингл. player — ўйинчи, актёр; ўйновчи < play — ўйин; ўйнамоқ] Магнит тасмасидаги ёзувни қулоқчин (наушник) орқали айнан қайта эшиттирувчи портатив магнитофон.

ПЛЕНАР [лот. plenarius — тўлиқ, ҳаммаси] Бирор ташкилотнинг сайлаб қўйилган барча аъзолари, илмий сессия ва ш. к. ларнинг барча иштирокчилари қатнашган; ялпи, умумий. Илмий конференциянинг пленар ва секция мажлислари.

ПЛЕНУМ [лот. plenum — тўлиқ, тўла-тўқис нарса] Бирор ташкилотнинг сайлаб қўйилган барча аъзолари иштирокидаги ялпи мажлиси ёки пленар кенгаши. Тошкент шаҳар журналистлар ташкилотининг ташкилий пленуми бўлиб ўтди. Газетадан. Ўзбекистон хотин-қизлар қўмитасининг пленуми бўлиб ўтди. Газетадан.

ПЛЕОНАЗМ [юн. pleonasmus — ортиқчалик] тлш. Бир хил ёки синонимик тил бирликларининг семантик жиҳатдан такрор ҳолда қўлланиши (мас., бош-оёқ сарпо бирикмасидаги форсча сарпо сўзи ҳам «бош-оёқ» маъносини ифодалайди).

ПЛЕЯДА [юн. Pleias, Pleiados — юнон мифологиясида: Атлантнинг Зевс томонидан юлдузларга айлангириб қўйилган 7 та қизи; кейинчалик: Юнонистоннинг 7 та трагик шоиридан иборат гуруҳнинг номи] Маълум бир даврда бирор соҳада кўзга кўринган, атоқли арбоблар гуруҳи. Университететимиз босиб ўтган шонли 40 йил ичида ўзбек олимларининг катта плеядаси етишиб чиқди. Т. З. Зоҳидов, Минг ташаккур. Кинороманда истеъдодли артистлар плеядасини кўрамыз. Газетадан.

ПЛЁНКА [р. плена — юпқагина пүст, баданнинг нозик пүсти, териси] **1** Фотосуратлар ва кинотасвирлар олиш учун мўлжалланган, ёруғлик сезувчи қатлам билан қопланган, махсус материалдан қилинган эластик лента. [Қудратнинг] *Тоғда олган расмлари ҳали фотоальбом учун етарлимас, борларини ҳам плёнкадан чиқариш учун уйда лабораторияси йўқ.* Ҳ. Назир, Сўнмас чақмоқлар.

2 Умуман, ҳар қандай юпқа парда, қобик; қолама материал. *Полиэтилен плёнка.* ■ *Плёнка остига чигит қадалган майдонларда ғўза ривожини айниқса яхши.* Газетадан. *Уруғлар шу йил баҳорда плёнка остига қадалгач, мутахассислар томонидан мунтазам кузатиб борилди.* Газетадан.

3 Магнитофон ёзуви учун махсус материалдан тайёрланган эластик лента.

ПЛЁНКАЛИ Плёнка билан ишлайдиган, плёнкага эга, плёнкаси бўлган. *Плёнкали фотоаппарат.* ■ *Кимдир унга район кинотеатрдан плёнкали гардиш тунука қутичалар бериб кетди.* Ҳ. Назир, Ўтлар туташганда.

ПЛИНТУС 1 [юн. plinthos — гишт, ясси тоштахта] *бнк.* Бинонинг ички девори бўйлаб пол билан девор орасидаги тирқишни бекитиш учун қоқиладиган узун ингичка тахта, часпак.

2 Деворнинг пастки туртиб чиққан жойи, шунингдек, устуннинг тўртбурчак асоси.

ПЛИТА [р. плита — тош, гишт; тоштахта < юн. plinthos] **1** Катта, ясси, текис тош, темир ва ш. к. бўлаги, тоштахта. *Мармар плита. Пўлат плита. Темир-бетон плиталар ётқизилган кўча.* ■ *Икки кунда цемент ҳам топилди, бульдозер ҳам, бетон плиталар ҳам топилди.* С. Аҳмад, Тоғ афсонаси. *Мармар ва чиғаноқли плиталаримиз турдош корхоналарда тайёрланаётган маҳсулотлардан ажралиб турибди.* Газетадан.

2 Овқат тайёрланадиган уй печкасининг бир тури. *Плитада овқат пиширмоқ.* ■ *Лолахон плита устидаги чойнакнинг сувини тўлатиб туриб ганирди.* С. Зуннунова, Янги директор. *Электр плитада чой қўйиб, ўтган куни олиб келган қотган нонни чойга бўктириб еди.* Мирмуҳсин, Умид.

ПЛИТКА [«плита» с. нинг кичр.] **1** Плита с. нинг кичр., кичкина плита. *Мармар плитка.*

2 Умуман, кичик тўртбурчак шаклидаги ясси нарсаси. *Шоколад плиткаси.* ■ *Дада-си кизга иккита плитка шоколад берди.* С. Аҳмад, Зумрад.

2 айн. **кошин.** *Нақидор плиткалар.*

3 айн. **плита 2.** *Электр плиткада чой қайнатмоқ. Газ плиткада овқат пиширмоқ.*

ПЛОМБА [фр. plomb < лот. plumbum — кўргошин] **1** Беркитилган эшик, яшик ёки ўралган молнинг очиладиган жойига ёпиштирилган ва муҳр ёки тамға белгиси босиб қўйилган кўргошин ёки тунука тахтача.

2 Тегишли даволаш муолажаларидан кейин катта тиш ёки суякдаги кавак, тешикни беркитиш учун ишлатиладиган, қотиб қолувчи қуюқ масса.

ПЛОМБАЛАМОҚ 1 Беркитилган эшик, яшик ва ш.к. га пломба ёпиштириб тамғалаб беркитмоқ. *Электр ҳисоблагични пломбаломоқ.*

2 Тиш қавагини пломба билан тўлдириб, беркитиб қўймоқ. *Тишни пломбаломоқ.* ■ *У [маргимуш] бузилган тишларни пломбаломоқда тиш нервларини ўлдириш учун қўлланади.* «Кимё».

ПЛОМБАЛИ 1 Пломба ёпиштирилган, пломба ёпиштириб тамғалаб беркитилган. *Пломбали яшик.*

2 Қаваги пломба билан маҳкамланган. *Пломбали тиш.*

ПЛОМБИР [фр. plombieres < Франциядаги Пломбьер (Plombieres) курорт шаҳарчаси номи] Қаймоққа мева, шарбат, ёнғоқ ва ш.к. қўшиб тайёрланган олий нав музқаймоқ (дастлаб тайёрланган ва тарқалган жой номи билан аталган).

ПЛОТИНА [р. плот — «девор, ғов, тўсиқ» с. дан.] қ. **тўғон.** *Майли, танги турамиз, плотинани чин дил билан, чин виждон билан кўрганмиз.* Ш. Рашидов, Бўрондан кичил.

ПЛУГ [р. плуг < нем. Pflug — қоziқча] Ер ҳайдаш учун мўлжалланган махсус тишли ёки дискли қишлоқ хўжалик қуроли. *Пахта майдонлари ўғитланиб, икки ярусли плугларда чуқур шудгорлаб қўйилди.* Газетадан. *Тракторчиға шоширд тушган кезларида, плуг остида қолиб, бир оёғидан ажралувди.* А. Кўчимов, Ҳалқа.

ПЛУТОКРАТ Плутократик давлат тузумида: энг бой табақа вакили.

ПЛУТОКРАТИЯ [юн. plutokratia < plutos — бойлик + kratos — куч-қудрат, ҳокимият]

сиёс. Ҳокимият расман ва батамом жамиятнинг энг бой, мулкдор табақа вакиллари — плутокраглар кўлида бўлган давлат тузуми, бойлар ҳукмронлиги.

ПЛУТОН [юн. Pluton — юнон мифологиясида Ер ости дунёси ва ўликлар салтанати худоси] (П — катта) Қуёш системасининг Қуёшдан узоқлиги бўйича тўққизинчи, ҳозирча энг охириги ўринда турган сайёраси.

ПЛУТОНИЗМ [юн. Pluton — Ер ости дунёси худоси Плутон номидан] Ер геологик тарихида Ер пўстининг даврий ўзгарувчанлигида асосан ички, қисман ташқи кучлар ҳал қилувчи роль ўйнайди, деб ҳисобловчи таълимот, йўналиш. *Плутонизм тарафдорлари, Ер юзаси тарихида вулкан ҳаракатлари ҳал қилувчи аҳамиятга эга, деб ҳисоблаганлар.* «ЎЗМЭ».

ПЛУТОНИЙ [лот. Plutonium < Плутон сайёраси номидан] Менделеев даврий системасининг III гуруҳига мансуб, сунъий йўл билан олинган кумушранг радиоактив кимёвий элемент.

ПЛЮРАЛИЗМ [лот. pluralis — кўп учрайдиган, кўп миқдордаги] 1 Сиёсий, иқтисодий ва маданий ҳаётнинг турли хил шакллариининг бир пайтда бирга яшаши, мавжуд бўлиши — ҳуқуқий жамият тузилишининг асосий тамойили.

2 Ғоялар, қарашлар, манфаатлар ва ш.к.нинг танлаш эркинлигига имкон берувчи хилма-хиллиги, кўплиги.

3 *флс.* Борлиқнинг, ҳаётнинг бир неча (ёки кўпгина) мустақил ибтидоси, билимнинг бир неча асоси мавжуд, деб ҳисобловчи фалсафий таълимот, оқим.

ПЛЮС [лот. plus — кўпроқ, каттароқ] 1 *мат.* Икки сон орасида келганда, шу сонларнинг бир-бирига қўшилишини кўрсатадиган белги (+) номи; қўшув белгиси. *Тўрт плюс икки.*

2 Сонларнинг мусбат эканлигини ёки миқдорнинг ошиб боришини ифодалайдиган белги.

3 Температуранинг нолдан юқори эканлигини, яъни илиқлик, иссиқликни ифодаловчи белги. *Бугун кун — плюс ўттиз даража.*

4 *кўчма* Ижобий натижа, ютуқ; афзаллик, фойда. *Ҳар чизиги — қурилишдан бир белги, ютуқлардан плюс.* Ғ. Фулом.

ПЛЯЖ [фр. plage — соҳил, қирғоқ < лот. plaga — мамлакат, воҳа; минтақа] Денгиз,

дарё, кўллarning ётиқ, бир оз нишаб қирғоғида чўмилиш, қуёш ваннаси қабул қилиш учун қулай бўлган, кум ёки майда шағал билан қопланган узунчоқ ер майдони (кўпинча махсус жиҳозланган бўлади). *Бир зумда денгиз соҳили одамларга тўлди. Пляжлар гавжум.* Ж. Абдуллахонов, Орийат.

ПНЕВМАТИК [юн. pneumatikos — нафас ва нафас олишга, ҳаво оқимига оид] 1 Сиқилган ҳаво ёрдамида ҳаракат қиладиган, ишлайдиган ёки амалга ошириладиган. *Пневматик насос. Пневматик тормоз. Пневматик бурғилаш.* ■ *Ҳозирги вақтда пневматик усул билан ишлайдиган пахта териш машиналарини синаш мақсадида яратилган намуналар бор.* «Фан ва турмуш».

2 Сиқилган ҳаво билан тўлдирилган. *Пневматик ғилдирак.* ■ *Ғилдиракнинг ҳар бир спицаси ўз ўлчамини ўзгартира олувчи ўзига хос пневматик цилиндрга эга.* Газетадан.

ПНЕВМАТИКА [юн. pneumatikos — нафасга, ҳавога оид] Пневматик механизм ва мосламалар.

ПНЕВМОГРАФИЯ [юн. pneuma — нафас, ҳаво + юн. grapho — ёзаман] Одам ва ҳайвонлар кўкрак қафасининг нафас олиш вақтидаги ҳаракатини ёзиб олиш.

ПНЕВМОКОККЛАР [юн. pneumon — ўпка + kokkos — дон] *тиб.* Одам ва ҳайвонларнинг нафас олиш аъзоларида яллиғланиш касалликларини (мас., зотилжам) келтириб чиқарувчи шарсимон бактериялар.

ПНЕВМОНИЯ [юн. pneumon — ўпка] *тиб.* Ўпканинг яллиғланиши; зотилжам.

ПОВ 1 тақл. с. Шиддатли жараён, тез ёниш ва ш. к. да чиқадиган товуш ҳақида. *Гулхан керосиндан пов этиб ёнди.* ■ *Кўраман ҳали, ўғирлаган бедаси яна пов этиб ёниб кетади.. Отнинг устида ўтиришини қаранг, бир кунни мана шу отнинг ҳам уволи уради.* «Ёшлик».

2 *кўчма* Бирданига, тезда юз берадиган шиддатли вазият, ҳолатни ифодалайди. *Хотин кишининг жаҳли чиқса, бир пов этади-ю, яна ўчади. Кампир ҳам бир-икки кундан кейин ҳовридан тушиб қолар.* С. Аҳмад, Сайланма.

ПОВЕСТКА [р. повестить — «хабар бермоқ, огоҳ қилмоқ, билдирмоқ» фл. дан ясалган от] *эск.* Чақирилганлик ҳақида қисқача ёзма хабар; чақириқ қоғози. *Элмурод уйга келиб, столи устида ҳарбий комис-*

сарликнинг повесткасини кўрди. Шухрат, Шинелли йиллар. *Йўлдош бугун эрталаб чой устида онасига повестка кўрсатди.* Ҳ. Фулом, Тошкентликлар.

ПОВЕСТЬ [р. повествовать — «ҳикоя, баён қилмоқ, айтиб бермоқ» фл. дан ясалган от] қ. **қисса**. Қаҳрамонлар тўғрисида минглаб шеър, дoston, ҳикоя, повесть, сахна асарлари яратса арзийди. Н. Сафаров, Оловли излар. А. Қаҳҳор бу комедияга нуқта қўйишлари биланоқ «Муҳаббат» повестини бошладилар. К. Қаҳҳорова, Чорак аср ҳамнафас.

ПОВИДЛО [пол. povidla] Майда тўғралган ёки қирилган, эзилган хўл ёки резавор мевани шакар билан қайнатиб тайёрланган куюқ ширин таом, куюқ шиннининг бир тури. *Олма повидлоси. Олхўри повидлоси.* ■ Фаргона консерва заводи сабзавот, мева консервалари, компотлар, қиёмлар, повидло, маринадлар ишлаб чиқаради. Газетадан.

ПОВИЛЛАМОҚ «Пов» этган товуш чиқармоқ. *Сут челақка повиллаб тушмоқда.* ■ *Примуснинг тинмай повиллаши унинг [Ширмонхоннинг] хаёлига қанот бергандай, у атрофдаги ҳамма нарсани унутгандай эди.* С. Зуннунова, Олов.

ПОВ-ПОВ Пов с. такр. *Пов-пов сут соғайтган Тошхоннинг челаги тўлай деб қолганда, Тарғил қурғур шарт тепди-ю, ҳаммасини ағдариб юборди.* А. Мираҳмедов, Ўт юраклар.

ПОГОН [р. погон — бирор нарсани маҳкамлаш, қадаб ёпиштириш мосламаси] Ҳарбий ва б. расмий кийимларнинг елкасига тақиладиган, шу кийим эгасининг унвонини кўрсатадиган белгили, кўпинча тўртбурчак қалин мато парчаси. *Темирйўлчилар погонни. Офицерлар погонни.* ■ -Биласизми, — дедилар Абдулла Қаҳҳор, — сизнинг бу ерда ота-онангиз бўлмаса, елкангизда погону эгингизда шинель бўлса, мен сизнинг қанақа аёллигингизни кимдан сўрайман? К. Қаҳҳорова, Чорак аср ҳамнафас.

ПОГОНЛИ Погони бор, погонга эга. *Юлдуз погонли дада, юлдузли шапка кийган дада бир кўринди-ю, яна йўқ бўлди.* С. Аҳмад, Уфқ. *У гурур ва сипоҳлик билан извошни қоқ «Қосим» номерининг олдида тўхтатди ва бир офицер формасидаги погонлига хитобан рус тили билан сўзлаша бошлади.* Ф. Фулом, Танланган асарлар.

ПОДА [ф. پادا — гала, тўда, уюр; яйлов] 1 Бирга ҳайдаб борилаётган ёки бирга ўтлаб юрган, одатда бир турга оид чорва моллари тўдаси. *Кўй подаси.* ■ *Ғужбоғ йўлларидан подалар чувалаб келарди.* А. Мухтор, Кумуш тола. *Пода тегирмон яқинидан ўтаётганда, Йигиталининг димоғига ёқимли бир ис урилди.* Т. Малик, Ажаб дунё.

2 кўчма Бирор нарсанинг тўпи, уюми. *Ёмғир тинган, ҳарир рўмолдек узук-юлуқ булутлар подасини шамол тўзғитмоқда.* Газетадан.

Подадан олдин чанг чиқармоқ Бирор иш, воқеа ва ш. к. ҳақида улар содир бўлмастан олдин ҳовлиқиб гапириб юрмоқ. *Бошлиқ индамади. Икки кишини ёнига олиб, қолганларни огоҳлантирди: -Подадан олдин чанг чиқарманглар. Биз ҳозир аниғини билиб келамиз.* Шухрат, Жаннат қидирганлар. *Кўзибойнинг гоҳо подадан олдин чанг чиқариш одати борлигидан, баъзилар уни «сўнги ахборот» деб ҳам аташаркан.* Ҳ. Назир, Сўнмас чақмоқлар.

ПОДАГРА [юн. podagra — оёқ қоққони < podos — оёқ + agra — қоққон] тиб. Одамлар ва ҳайвонлар организмида пурин моддалар алмашинувнинг бузилиши натижасида келиб чиқадиган сурункали касаллик.

ПОДАХОНА 1 Пода турадиган жой ёки бино.

2 кўчма Қаровсиз, назоратсиз, тартибсиз жой. *Бу жой сизга подахонами?*

ПОДАЧИ Подани ҳайдаб олиб юрувчи, пода боқувчи. *Мактабга келдим. Ҳеч ким йўқ. Бир пайт Қодир подачининг кичкина невараси келиб қолди.* Ш. Холмирзаев, Оғир тош кўчса. *Ҳамма бало-қазога балогардон — биз: бугун ўқитувчи келиб дўқ уради, эртага подачи гаврон кўтариб келади.* А. Кўчимов, Ҳалқа. *Подачи йўқ. Ҳар йили баҳорда унга эланиб, бунга эланиб, кунимиз ўтади.* М. Ҳазратқулов, Журъат.

ПОДАЧИЛИК Пода боқиш билан шуғулланиш; подачи касби. *Босқинчиликми, подачиликми, кетмончиликми — қандай иш бўлса ҳам майли.* И. Раҳим, Ихлос. *-Мен бундай подачиликка ярамайман, тақсир! — деб кулади Мулла Обид.* А. Қодирий, Обид кетмон.

ПОДБОР [р. подобрать — «териб, йиғиб, йиғиштириб олмақ» фл. дан ясалган от] эск. Пахта теримида ерга тўкилган, одатда хас-

хашак аралашган пахталарни йиғиб-териб олиш ва шу йўл билан терилган пахта. *Этак боғлаб ортда жим, Подбор терар ёшлигим. «Шарқ юлдузи».*

ПОДБОРКА [р. подобрать — «йиғиб-териб олмоқ; хилламоқ, сараламоқ» фл. дан ясалган от] *эск. плгрф.* Бир сарлавҳа остида бирлаштирилган, бир мавзуга оид бир неча мақола. *Конференция материалларига бағишланган подборка.*

ПОДБОРШЧИК [р. подборщик — йиғиб-териб олувчи] *тех.* Тўкилган пахта, ўрилган поя, ўт ва пичанни йиғиб оладиган мослама ёки машина. *Пахта териш машинасининг подборшчиги.*

ПОДВАЛ [р. подвал — тупроқ кўтармаси остидаги хона, жой] **1** Бинонинг остидаги, ер юзасидан паст жойлашган хона ёки хоналардан иборат қисми; ертўла, омборхона. *Аҳмаджон подвалнинг ёнига бориб, икки тешикка иккита граната ташлади. А. Қаҳҳор, Олтин юлдуз. Таманно газмоллар уйиб ташланган ярим қоронғи подвалга тушиб кетди. Мирмуҳсин, Ҳикоялар, қиссалар.*

2 *плгрф.* Газета саҳифаларининг алоҳида мақола босилган пастки қисми ва унда босилган мақола. *Газетанинг икки подвалини банд қилган бу мақолада Саидий, Ёқубжон ва округ газетасининг муҳаррири исмлари бутун колонкаларни чипор қилиб юборган эди. А. Қаҳҳор, Сароб.*

ПОДПОЛКОВНИК [р. под — остида, қуйида + полковник] *ҳарб.* Майордан юқори, полковникдан паст офицерлик унвони.

2 Шу унвонга эга бўлган киши. *Ўртоқ подполковник, батальоннинг шахсий таркиби умумий йиғилишга етиб келди. Газетадан.*

ПОДПОРУЧИК [р. под — остида, қуйида + поручик] *тар. ҳарб.* Чор армиясида: прапоршчикдан юқори, поручикдан паст офицерлик унвони ва шу унвонга эга бўлган киши.

ПОДСТАНЦИЯ [р. под — каттага нисбатан кичик, қўшимча маъносини ифодаловчи префикс + станция] *тех.* **1** Асосий электрстанциядан келаётган ток кучланиши ва турини ўзгартириб берадиган ёрдамчи электрстанция. *Ургут тумани Навоий номидаги ширкат хўжалигининг Тирсак қишлоғида янги подстанцияни ишга тушириш мўлжалланмоқда. Газетадан.*

2 Оралиқ, ёрдамчи телефон станцияси. **ПОДШИПНИК** [р.] *тех.* Машина ва механизмларнинг вал, ўқ каби айланувчи қисмини тутиб турадиган ва уларнинг осон айланишини таъминлайдиган ёрдамчи деталь.

ПОДШО 1 қ. **подшоҳ.** *Тонг саҳарда подшо овга кетаётиб, йўлда деҳқонни учратиб қолди. Газетадан. Ие, ахир, сизни подшонинг ўзи хизматига олган эмасмиди? П. Қодиров, Юлдузли тунлар.*

Оқ подшо, оқпошо тар. Рус императорининг ўзбеклар орасидаги номи. *Худо ўлим берсин оқ подшоинг Мекалайга, қайт эмиш-а, эркак бўлсанг, йўл бошла! Ойбек, Танланган асарлар. Ярим подшо қ. ярим. Мен оқ подшонинг юзига ва у кишининг Тошкентдаги вакили ярим подшо генерал-губернаторнинг юзига қандай қарайман? М. Жўрабоев, М. Б. маргабаси.*

2 *кўчма қ. сара.* *Юлдуз-ку, мен билган қизларнинг подшоси десам бўлади, уни жондилимдан яхши кўраман. Р. Файзий, Чўлга баҳор келди.*

ПОДШОЛИК қ. **подшоҳлик.**

ПОДШОПАРАСТ қ. **подшоҳпараст.**

ПОДШОҲ [ф. *پادشاه* < қад. ф. *پاد* — хукмдор + *شاه* — улуғ, буюк] Баъзи Шарқ мамлакатларида: мутлақ ҳокимлик қилувчи хукмрон унвони ва шундай унвонга эга шахс, шоҳ. *Эрон подшоҳи (тар). ■ Абдулла: -Мен кириб, подшоҳга хабар берай, — деб кириб кетди. Усмон баҳши Мамат ўғли, Бўтакўз. Мулла Фазлидин ёш подшоҳнинг амри билан Буратоғнинг чиқиш қийин бўлган хушманзара бир қоятоши устига кичкина хўжера қурган. П. Қодиров, Юлдузли тунлар.*

ПОДШОҲЛИК 1 Подшо(ҳ)га хос ҳислат, хатти-ҳаракат; подшо унвони. *Муродхон тахтда подшоҳлик дағдағасини қилиб ўтирди. «Муродхон».*

2 Шоҳ қўл остидаги давлат, салтанат. *Рус подшоҳлиги қўшни бўлмаганда, амир, бек ва уларнинг мансабдорлари, ҳар ҳолда, тортиниброқ турардилар. Ф. Расул, Алолат. -Мен бир оми одамман, — деди мингбоши, — сиёсатингизни билмайман. Қўлимдан келганича подшоҳликка хизмат қилиб келдим. Чўлпон, Кеча ва кундуз.*

3 Шоҳга ёки унинг қўл остидаги давлатга тегишли нарса; ҳазина. *-Нобудчилик-да, тақсир, — деди оқсоқол бутун деҳқонларга*

эшиттириб, — бир неча жўяк билан подшоҳлик хазинаси тўлмайди ҳам, бўшаб қолмайди ҳам. С. Айний, Қуллар. Бухорода ўлган ҳар бир хиндининг моли-пули ўз меросхўрига юборилмай, подшоҳлик қилинади. С. Айний, Дохунда.

4 кўчма Умрнинг энг яхши даври. Болалик — подшоҳлик. Мақол. ■ Ёшлик бир подшоҳлик: ўйнагани қоладир шу гўдакларнинг! А. Қодирий, Кичик асарлар.

ПОДШОҲПАРАСТ [ф. پادشاهپرست — подшоҳни севувчи, ёқловчи] Мамлакатда подшо ҳукмрон бўлишини ёқловчи, подшоҳга таянувчи. *Подшоҳпараст бой.* ■ [Йўлчи:] *Бойлар, амалдорлар ўз подшосига ён босади, подшоҳ уларга ён босади. Бойларнинг подшоҳпараст бўлиши бекорга эмас. Ойбек, Танланган асарлар.*

ПОДЪЕЗД [р. подъехать, подъезжать — «етиб, яқинлашиб келмоқ, кириб бормоқ» фл. дан ясалган от] Кўп қаватли уйларнинг кириш жойи. *Подъездеа киришлари билан қандайдир аёлларнинг йиғи товушлари эшитилди. Ў. Умарбеков, Ёз ёмғири. Йигитали подъезд эшиги олдида Мударрисовга дуч келди. Аммо иккови ҳам бир-бирига индашмади. Д. Нурий, Осмон устун.*

ПОЕЗД [р. поездить — «транспорт воситасида роса юрмоқ, кезмоқ» фл. дан ясалган от] Бир-бирига кетма-кет тиркалган ва локомотив ёрдамида юрадиган темир йўл вагонлари қатори. *Поезд қачон келиши, қачон Наманган тарафдан қайтиб ўтишини станция бошлиқлари ҳам аниқ билишмайди. С. Аҳмад, Уфқ. Диктор аллақайси поезд келганини эълон қилди. Ў. Ҳошимов, Қалбингга қулоқ сол.*

Поезд йўл с.т. Поезд, трамвай ва ш. к. транспорт воситалари юриши учун махсус ўрнатилган темир из, темир йўл.

ПОЁН [ф. پایان — охир, хотима, тугаш; чек, чегара, ҳад] **1** Жой, масофа, йўл кабиларнинг охирги чегараси, этаги, охири. *Поёни кўринмайдиган дала.* ■ *Бинафша, лолалардан гилам тўшалган тоғ-қилларни кезиб, поёнига етолмайсиз. Н. Сафаров, Оловли излар. Низомжон шу топда шундай кучли бўлиб кетган эдики, бир ўзи мана шу поёни йўқ чўлни ағдар-тўнтар қилиб ташлашга қодирдек эди. С. Аҳмад, Уфқ. Қамишлар икки одам бўйи ўсган, поёни кўринмас,*

шабадада бир оҳангда мунгли шовуларди. Ҳ. Фулом, Феруза.

2 Иш, гап, воқеа-ҳодиса кабиларнинг охири, интиҳоси. *Ҳикояни поёнига етказмоқ.* ■ *Умрнинг поёни кўринган пайтда уй қайгусига тушдим. «Ёшлик». Фазал поёнига етди. Табибий камтарона кулумсиради. Ҳарёндан олқишлар эшитилди. С. Сиёев, Аваз. [Майсара:] Шу хиёнаткорларнинг жазосини бериш учун бошлаган ишимни поёнига етказай. Ҳамза, Майсаранинг иши. Бу сўзингнинг, дилбар, йўқдир поёни. «Алпомиш».*

3 кўча Сўнг, чек, ниҳоя (ҳис-туйғу, кечинма кабилар ҳақида). *Ҳазабнинг поёни йўқ.* ■ *Неча фарёд тошиб келди кўксин ёрғудай, Кўзи тиниб, изтироби поёнга етди. А. Мухтор, Асарлар. Сирим борки, осмони кўринмас, Ғамим борки, поёни кўринмас. «Ёшлик». Ҳар бир нарса каби меҳр-муҳаббатнинг ҳам аввали, авжи ва поёни бўлиши табиий. Х. Султонов, Онамнинг юрти.*

ПОЁНСИЗ айн. **бепоён.** *Поёнсиз пайкаллар. Поёнсиз йўл. Поёнсиз кенг чўл.* ■ *Поёнсиз, ҳиссиз қуруқ чўллар гулбоғларга айланади меҳнат қаршисида. Миртемир, Асарлар. Азим тажанг даҳшат тўла қонли кўзлари билан Фуломжонга ўқрайиб қаради. Лекин унинг юзида поёнсиз бир нафрат борлигини кўриб, юзини қайнатасига бурди. М. Исмоилий, Фарғона т. о.*

ПОЗИТИВ I [лот. positivus — мусбат, ижобий] Негативдан кўчирилган ва нарсанинг ҳақиқий ранг-тусини (оқ, қора ёки бошқа рангларни) акс эттирадиган фотосурат ва шундай сурат туширилган пластинка ёки плёнка; *зид. негатив I.*

ПОЗИТИВ II [лот. positivus] **1** Позитивга алоқадор; нарсанинг ҳақиқий кўринишини акс эттирадиган. *Позитив фотосурат.*

2 Фактларга, тажрибага асосланган; ишончли, тасдиқловчи. *Позитив мулоҳаза. Позитив қараш.*

ПОЗИТИВИЗМ [фр. positivisme < лот. positivus — ижобий] Барча чинакам (позитив) билимлар, бирор фалсафанинг ўз устидан ҳукмронлигига муҳтож бўлмаган махсус фанларнинг биргаликдаги, умумий натижасидир, деб ҳисобловчи фалсафий йўналиш.

ПОЗИТИВИСТ Позитивизм тарафдори.

ПОЗИТРОН [лот. posi (tivus) — мусбат + (элек)трон] *физ.* Массаси электрон массасига, заряди электрон зарядига тенг, аммо

ишораси унга қарама-қарши (мусбат) бўлган моддий заррача; мусбат электрон. ..космик нурларни ўраниши чоғидагина.. биринчи марта позитрон, мезон ва гиперон сингарии заррачалар борлиги маълум бўлди. Газетадан.

ПОЗИЦИОН Позицияга алоқадор, позиция эгаллаш, муайян жойга ўрнашиш билан боғлиқ. *Позицион жанг. Позицион мудофаа. Позицион устунликка эга бўлмоқ. Позицион ютуқ.* ■ ..позицион урушларнинг оқибати эса Германия учун ҳалокатли бўлди. «Янги тарих».

ПОЗИЦИЯ [лот positio – ҳолат, вазият] **1 с.т.** Ҳар қандай кимса ёки нарсанинг тўтган ўрни, ишғол қилиб турган жойи, макъеи, ҳолати, вазияти. *Қулай позиция. Ноқулай позиция.* ■ Аминов бошқа позицияга ўтди. Э. Самандар, Дарёсини йўқотган қирғоқ. *Ўзинга маълум позиция танлаб ол.* «Шарқ юлдузи». *Фан ва техника тараққиётининг кўп соҳаларида мамлакатимиз дунёда етакчи позицияларни эгаллаб турибди.* Газетадан.

2 ҳарб. Қўшиннинг мудофаа ёки ҳужум қилиш мақсадида эгаллаб турган ва инженерлик нуқтай назаридан жиҳозланган ер майдони. *Душман позицияларини тўпга тутмоқ.* ■ Шу йигит бир ҳужум вақтида душман позициясига жуда яқин бир ғарамга кириб олиб, батареянинг кўзи бўлиб турган эди. А. Қаҳҳор, Асарлар. *Қулай бир позиция топиб тўхтаган танк аланга тубига бронетешардан ўқ уза бошлади.* П. Қодиров, Эрк.

3 Шахмат ва шашка ўйинида доналарнинг жойланиш ҳолати. *Ўн олти юришдан кейин юзага келган позиция.* ■ Сўнгра Шўхрат юриш сайин позициясини кучайтириб, ғалабага эришди. Газетадан.

4 кўчма Бирор масалада тутилган йўл, нуқтай назар; воқеа-ҳодисанинг муайян баҳоси. *Қишлоқ хўжалиги ишлаб чиқаришини ёппасига давлат тасарруфидан чиқаришдан воз кечиш бизнинг қатъий позициямиздир.* Газетадан.

ПОЙ [ф. پاي / پای – оёқ; товон; этак] **1** *эск. кт. айн. оёқ 1. Пирназар полвон қизига бир эланди-ю, бошини четга бурди. Ота юзини терс бургач, Ёрқиной баттар эзилди, энди у дадасининг пойини қучоқлаб йиғлади.* Р. Раҳмон, Меҳр кўзда. *Пойига йиқилиб: -Момоқиз, мен сенга нима ёмонлик қилиб эдим, – дейман!* Т. Мурод, Юлдузлар мангу ёнади.

Пойи пиёда Яёв юриб; яёв, от-уловсиз. *Машҳур ҳофиз ва машҳур ўйинчи чол ўн километр масофадаги Урганчгача пойи пиёда йўл оладилар.* М. Қўшжонов, Дийдор. *Шопур бу шаҳардан чиқиб, пойи пиёда калласи оққан ёққа кетиб бораётиб эди.* «Баҳром ва Гуландом». *Улар кўчага чиқиб, уй олдидаги узун йўлакдан пойи пиёда одимлаша бошлашди.* О. Мухтор, Эгилган бош.

2 (эгалик ва ў.-н. к. аффикси билан) Бировнинг ихтиёрида, қўлида ёки оёғи остида. *Лекин асло қилма армон, Армон қилма, гул жамол, Пойиндадир ёруғ жаҳон, Кенг жаҳонга назар сол.* Ҳ. Шарипов.

3 Бирор нарсанинг қуйи қисми, тағи, этағи. *Улуғ шоир ҳайкали пойига меҳр-муҳаббат ва чуқур эҳтиром рамзи сифатида гуллар қўйилмоқда.* Газетадан. *Фақат дарё лаби гезариб, Ёлиб ётар тоғнинг пойини.* У. Қўчқор, Ҳаяжонга кўмилган дунё. *Саҳнаю минбар пойида ижод аҳли билан учрашувга талпиниб келган кишилар.* Газетадан.

Хоки пой Оёқ остидаги тупроқ. *Нарзининг изига тушгим келаверди. Унинг хоки пойини топиб, кўзимга суртсам.* Н. Сафаров, Оловли излар. *Ўғли борнинг эгалидир қалъаси, Хоки пойин суртар мендек энаси.* «Эрали ва Шерали».

4 Жуфт ҳолда ишлатиладиган нарсанинг ҳар бири, бир тоқаси (асосан пойабзал ҳақида, одатда «бир» сўзи билан ишлатилади). *[Бир] пойи йўқ этик.* Маҳсининг бир пойи. ■ *Унинг бир пой пайтаваси осилиб, юришига халақит берарди.* С. Кароматов, Олтин қум. *Очил Шаропов ўгирилиб, пойгакдаги пойабзаллар ичидан бир пой кавушни олиб кўрсатди.* Ш. Холмирзаев, Сўнмас ўт. *Нозима даҳлизда ётган бир пой туфлисига кўзи тушиди.* «Ёшлик».

ПОЙАБЗАЛ [ф. پای‌افزار – оёқ кийими, оёқ жиҳози] Оёқ кийими. *Ёзлик пойабзал. Спорт пойабзали. Пойабзал магазини.* ■ *Очил Шаропов ўгирилиб, пойгакдаги пойабзаллар ичидан бир пой кавушни олиб кўрсатди.* Ш. Холмирзаев, Сўнмас ўт. *Теридан булган пойабзалга ҳафтада икки марта крем суртиши шарт.* «Саодат».

ПОЙАБЗАЛЧИ Пойабзал саноати ходими, ишчиси. ..кўпчилик пойабзалчиларимиз бир қарашдаёқ Тошкент ёки Фрунзеда тайёрланган чармнинг фарқига боришади. Газетадан.

ПОЙАБЗАЛЧИЛИК Пойабзаллар ишлаб чиқариш билан шуғулланувчи саноат. *Индустриалаштиришнинг дастлабки йилларида кўпгина тўқимачилик, пойабзалчилик, кўнчилик, пиллакашлик саноати ишлаб чиқаришига ҳам катта эътибор берилди.* Газетадан.

ПОЙАНДОЗ [ф. پایانداز — остонага, оёқ остига тўшаладиган гилам ёки ипак мато] **1** Алоҳида ҳурматга сазовор кишини ёки келин, куёвни кутиб олиш учун унинг йўлига, оёғи остига солинган ёки солинадиган гилам, палос ёки мато. *Йўллариغا пойандоз солмоқ.* ■ *Хайрибиби билагига ташлаб чиққан оқ крендешин пойандозни келин оёғи остига ёзиб, қўярдан-қўймай уни бостирди, патнисдаги қанд-қурсни бошидан сочиб юборди.* Д. Нурий, Осмон устун. *У [қиз] оналикка узатилган кун хотирида бир умр қолсин деб, тўй-томошалар қилдилар, йўлига пойандоз солдилар.* Х. Аҳмар, Яккама-якка.

2 Умуман, полга тўшалган гилам, палос. *Тошнўлатов пойандоз солинган узун коридордан бамайлихотир кириб борар экан, оёқ шарпасини эшитиб, ичкаридан Хосият хола чиқиб қолади.* Р. Файзий, Чўлга баҳор келди. *Султон пиёладаги чойни жаҳл билан гилам пойандозга сепаб юборди.* Э. Усмонов, Ёлқин.

3 ив. Кўрпача.

ПОЙАФЗАЛ с.т. айн. пойабзал.

ПОЙБАНД [ф. پایبند — оёғи боғланган, кишанланган; банди, асир; кишан] Оёғи боғланган, бандга тушган. *Толиби дунё, гирифтори каманди хирс ўла, Пои(и)банд ўлмас тааллуқ домига озода мард.* Нодира, Девон.

ПОЙГА 1 срт. Ким ўзди мусобақаси. *Югуриш пойгаси. Автомобиль пойгаси. Велосипед пойгаси.* ■ *Ҳамма пойгада маррага етай деб қолган чавандознинг ҳаяжони билан яшайди.* С. Аҳмад, Қадрдон далалар. *Мабодо пойгада қатнашмаса, гўё отини камситгандек бўларди ўзича.* Т. Ашуров, Оқ от.

Пойга қилмоқ (ёки қўймоқ) Бир-биридан ўтиб, ўзиб кетиш учун мусобақалашмоқ; тезликни ошириб, ўтиб кетишга уринмоқ. *Юрай, деса тўрт оёғи толади, Пойга қилса, пиёдадан қолади.* «Нурали».

2 кўчма Бирон иш-ҳаракат, жараёнда бошқаларга нисбатан юқори нагижаларга, кўрсаткичларга эришиш учун бўлган ҳаракат; мусобақа. *Пахта теримида Фарғона пойганинг олдида боряпти.* Газетадан.

3 кўчма Бирор соҳада бир-биридан ўзиб, устун туриш учун бўлган ҳаракат, рақобат. *Бугунги кунда ер юзида ядро қуроллари билан қуролланиш пойгасига қариш овоз тобора баралла янграмоқда.* Газетадан.

ПОЙГАК [ф. پایگه / с.т. қ. **пойгаҳ**. Гулнор ўзига бўлган эътибордан уялиб, пойгакка бориб, секин ерга қаради. С. Зуннунова, Олов. *Назирқул, эшоннинг қўлини олиб, кўзига суртди-да, орқаси билан пойгакка чўккалади.* С. Аҳмад, Ҳукм. *Аваз пойгакка омонат чўккаламоқчи эди, Табибий уни қистаб, тўрга ўтказди.* С. Сиеёв, Ёруғлик.

ПОЙГАЧИ Пойга қатнашчиси; пойгада қатнашадиган. *Тасаввур қилинг. майдон атрофидаги айлана йўлка бўйлаб бир гуруҳ велосипед пойгачилари шамолдек олиб бормоқда.* «Фан ва турмуш». *Пойгачиларнинг барчасига эсдалик совғалари топширилди.* Газетадан.

ПОЙГАҲ [ф. پایگاه / پایگه — остона, киравериш; кавуш ечиладиган жой] Хонанинг эшикка яқин қисми, паст томони; *зид. тўр* П. *Ясовул пойгаҳдаги эшикдан Султон Али мирзони бошлаб кирганда, Шайбонийхон ҳали ҳам шахнишинда ўша жойнамоз устида ўтирган эди.* П. Қодиров, Юлдузли тунлар. *Навоий эшикдан кириши билан таъзим қилиб тиз чўкди ва ижозатдан кейин пойгаҳда чўкка тушиб ўтирди.* М. Осим, Қарвон йўлларида.

ПОЙГУМБАЗ [ф. پایگنبد — гумбаз оёғи, ости] Гумбаз ўрнатиладиган махсус қурилма, асос.

ПОЙДЕВОР [ф. پایدیوار — деворнинг остки қисми, асоси] **1** Иморат ёки иншоотнинг ост қисми; машина, механизмларнинг асоси. *Тош пойдевор. Устун пойдевори.* ■ *Бир ҳовуч сув айвоннинг пишиқ ғишдан урилган пойдевориغا сачради-да, шимилиб кетди.* Ў. Ҳошимов, Қалбинга кулоқ сол. *Иморатнинг пойдевори харсанг тошлардан кўтарилди, деворлари синч қилинди.* «Ёшлик». *У ҳовлига кириши билан, айвон пойдевориغا суянганича, бошини осилтириб ухлаётган онасини кўрди.* Т. Малик, Шайтанат.

2 кўчма Замин; негиз, база. *Меҳнат — роҳатнинг пойдевори.* Мақол. ■ *Инсонни маънавий шахс сифатида шакллантиришда мактаб пойдевор десак бўлади.* М. Жўра, Ноширнома. *Таълимнинг пойдевори билимнинг ҳаётда кераклигини боланинг онига еткази*

билишдир. Р. Усмонов, Одобнома. *Ҳар томонлама ўзаро алоқаларимизга пойдевор бўлиб хизмат қилувчи мазкур ҳужжат асосида мамлакатларимиз ўртасидаги ҳамкорлик тобора равнақ топаётир.* Газетадан.

ПОЙДОР [ф. پايدار — мустақил, барқарор, абадий; асоси бор] *кт.* Мустаҳкам асосга, заминга эга бўлган, барқарор. *Юрт бу кун охудай хўн ишвакордир. Сир каби сермавждир, Томирдай пойдор.* А. Орипов, Йиллар армони. *Зебининг бу хурсандлиги, албатта, кузатган мақсадига эришмоқ билангина пойдор бўларди.* Чўлпон, Кеча ва кундуз.

ПОЙИНТАР-СОЙИНТАР 1 Мазмуни бир-бирига қовушмаган, боғланмаган; пойма-пой, маъносиз. *Пойинтар-сойинтар гап.* ■ *Ашуртой ака кайф аралаш нима деяётганини ўзи ҳам яхши сезмасди — пойинтар-сойинтар гапирарди.* Р. Файзий, Ҳазрати инсон. *Маллаевнинг пойинтар-сойинтар туюлган гапларидан бир нима илғамай, аста ташқари чиқди.* «Ёшлик».

2 с.т. Гандираклаган, алпон-талпон. *Пойинтар-сойинтар қадам ташламоқ. Пойинтар-сойинтар юрмоқ.*

ПОЙКЎП [ф. پايكوب — оёққа урувчи, босувчи; оёқ билан босилувчи] Обжувознинг шоли янчадиган, бир учи босилганда, иккинчи учи кўтарилиб тушадиган қисми, обжувознинг гурзиси. *Яқин орадаги обжувоз пойкўпининг зарби ерни силкитиб-силкитиб тўлқин берар эди.* А. Қодирий, Ўтган кунлар. *Жувозкашнинг пойкўпи гутиллашдан тинган, қамишзор шовулламас, фақат қаердадир, кўл ичида, урғочи оқчорлоқнинг хунук қаҳқаҳаси эшитилар эди.* А. Мухтор, Қорақалпоқ қиссаси.

ПОЙКЎПХОНА *шв.* Жувозхона, обжувоз.

ПОЙКЎПЧИ *шв. айн. жувозкаш.* Маҳалламизда 3 қўшни нари, Қосимбой деган катта пойкўпчи бўлиб, унинг 4–5 жойда катта-катта жувозлари, гуручбозорда 5–6 та дўконлари бўлар эди. Ф. Фулом, Танланган асарлар.

ПОЙЛАМОҚ 1 Бирор кимса ёки нарсанинг келишини кутмоқ. *Трамвай пойламоқ.* ■ *Эндигина ўн уч ёшга кирган Усмоножон эса кундузи одамларнинг келишини пойлаб, бир-икки танга пул ишлар.* С. Зуннунова, Олов. *Ахир, бу бола тили чиққандан бери дадасини йўқлайди, келишини кутиб, йўлини пойлайди.* С. Аҳмад, Уфқ. *Бекатда*

чамадонини ёнига қўйиб ўтириб, автобус пойлади. «Ёшлик».

2 Бирор воқеа ёки ҳодисанинг содир бўлишини, рўй беришини кутмоқ. *Ёмғир тинишини пойламоқ.* ■ *Бошқа уйларда қариндош-уруғлар ва никоҳни пойлаб ётган.. хотинлар бор эди.* Ойбек, Танланган асарлар. *Дошқозонда қайнар сумалак, Онахонлар тонгни пойлайди.* «Саодат».

Пайт (ёки фурсат) пойламоқ Кулай фурсатни кутмоқ. *Куёв билан келин пайт пойлаб, бир-бирларининг атрофида анчагина айланиб юришди.* М. Осим, Карвон йўлларида. *Пайт пойлаб юрарди, мана бугун ўша пайт келди.* М. М. Дўст, Лолазор. *Фурсат пойлаб, атрофида айланишиб юраверади.* «Шарқ юлдузи».

3 Бирор кимса ёки нарсанинг хавфсизлигини, дахлсизлигини сақламоқ, кўриқламоқ. *Нега бойлар уйин пойлаб, Томда шамдек қотамиз!* Ҳамза. *Мингбошининг дарвозасини миришаб пойлаб турибди.* М. Исмоилий, Фарғона т. о.

4 Зимдан кузатмоқ, таъқиб қилмоқ; пайида бўлмоқ. *Уни бирдан кўрқув босди: гўё аллақандай яширин кўзлар теваракдан уларни пойлаб тургандек сезилди.* Ойбек, Танланган асарлар. *Пойлаб борибсан-да, ҳаммасини кўрибсан-да..* С. Аҳмад, Сайланма.

5 с.т. Мўлжалга, нишонга олмоқ, мўлжалламоқ. *Айиқнинг оёғини пойлаб ўқ узмоқ. Олмани пойлаб тош отмоқ. Куёни пойлаб отмоқ.* ■ *Аждарнинг тўхтаганини пойлаб туриб, яна иккинчи кўзига ёйдан ўқ отиб юборди.* М. Маҳмудов, Булбулигўё.

Гап пойламоқ Бировларнинг гапига зимдан кўлоқ солиб, маълумот тўпламоқ, гап ўғирламоқ. *Гап пойламоқ сиздан лозимми, ахир.* П. Турсун, Ўқитувчи. *Қайси бурчакдадир бекиниб, гап пойлаб ётган Раҳим «Тарзан»ни эргаштириб келди.* Ҳ. Назир, Ёнар дарё. **Оғзини пойламоқ** Бировнинг белгили бир масала юзасидан нима дейишини, қандай мулоҳаза билдиришини ёки жавоб айтишини кутмоқ. *Низом бўлса тўнг, кечгача оғзини пойласанг ҳам, бир сўз чиқмайдиган камгап бола бўлди.* С. Аҳмад, Уфқ. *Нусратбек ўзини қийнаб юрган саволларга бир йўла нажот топадигандек унинг оғзини пойлади.* С. Нуров, Майсаларни аёз урмайди. **Қадамини пойламоқ 1)** кимсанинг юриш-туришини зимдан

кузатмоқ, таъқиб қилмоқ. *Яхшибоев сассиз кўлди. Таърифи шуки, ўлғудай хира, деб ўйлади, касалхонада менга кўшни, қадамимни пойлайди.* М. М. Дўст, Лолазор; 2) кимсанинг келишини зориқиб, интизор бўлиб кутмоқ.

ПОЙЛОҚ Пойлоқчи турадиган жой; соқчилик, қоровуллик. *Тўра [навкарларга] нонушта қилишни, отларни суғоришни буюрди. Беш отлиқни пойлоққа қўйди.* Мирмуҳсин, Чўри.

ПОЙЛОҚЧИ 1 Бирор кимса, нарса ёки жойни сақлаб, кўриқлаб турадиган, бирор хавф юз берганда, уни даф қилиш учун чора кўрадиган киши; соқчи. *Бу ҳам майли, Комил билан Инобатнинг ўтирганини айтинг пойлоқчи бўлиб!* О. Ёқубов, Эр бошига иш тушса. *Соқчилар бу ерда пойлоқчи бўлиб ўтирганларидан жуда асабий эдилар. Чунки ҳозир бошқа ғолиблар Бобур тарафдорларининг молу мулкларини талон-торож қилиб бойимокда эди.* П. Қодиров, Юлдузли тунлар.

2 *кам қўл.* Айғоқчи, жосус. *Сардор буларни Ҳирот ва Тежен йўли томонларига пойлоқчи қилиб юборган эди.* С. Айний, Куллар.

3 *с.т.* Аниқ мўлжалга олувчи; мерган.

ПОЙЛОҚЧИЛИК 1 Соқчилик, кўриқчилик. *Ана шундай пойлоқчилик қилиб юрган кунларининг бирида бўрини кўрди.* С. Анорбоев, Ҳамсуҳбатлар. *Укалари ҳам навбат билан пойлоқчилик қилишибди. Ортиқ ҳеч нарса рўй бермабди. «Чалпак ёққан кун».* Худойбердиев билан Козлов хандақни чуқурроқ қазиб, навбати билан пойлоқчилик қилишди. Н. Сафаров, Оловли излар.

2 Айғоқчилик, жосуслик. *Парнихўжа ёғчи пойлоқчилик, чақимчиликнинг муваффақиятидан ғурурланиб, кўз учи, қулоғи билан тўплаган маълумотини сўзлаб бораркан, эллиқбоши уни тўхтатди.* Ойбек, Танланган асарлар.

ПОЙМА-ПОЙ [ф. *پا پيا* – изма-из, кетма-кет] 1 Бир-бирига жуфт ёки мос бўлмаган, жуфти, пойи адашган, бошқа-бошқа, адаш (жуфт ҳолда ишлатиладиган нарсалар ҳақида). *Пойма-пой туфли. Пойма-пой қўлқоп. Пойма-пой пайпоқ.* ■ *У ҳам шу лаҳза Умидни кўриб, юраги уриб кетди. У Умидга яқинлашган сари, қадамлари беўхшов тушар, пойма-пой туфли кийиб олгандек, қийналар эди.* Мирмуҳсин, Умид. *Домла*

ғулдураб, бир нави дуо қилди-да, калишини аввал пойма-пой кийиб, букчайиб, бошқатдан тўғрилаб олди. Ҳ. Фулом, Машғал.

2 *кўчма* Мазмуни бир-бирига боғланмаган, қовушмаган, пойинтар-сойинтар, телба-тескари. *Пойма-пой гап. Пойма-пой сўзлаб бермоқ.* ■ *Асрора Каримжоннинг келишини кутиб, дунёдаги жами таъвишларни унутган, гаплари ҳам аллақандай пойма-пой, қилиқлари ўзига ярашмагандек, ерда юраётганга эмас, осмонда учиб юрганга ўхшарди.* С. Аҳмад, Уфқ. *Гавҳар уни кўрганнда ҳам, пойма-пой гапларини эшитганнда ҳам индамай тураверди.* Ў. Ҳошимов, Қалбингга кулоқ сол.

ПОЙМОЛ [ф. *پامال / پامال* – топталган, оёғости қилинган, йўқ қилинган]: **поймол бўлмоқ 1)** оёқ остида эзилмоқ, босилмоқ, топталмоқ; пайҳон бўлмоқ. *Пайҳон бўлган экинлар.* ■ *Қорахитой саросима бўлиб, тоққа қочди, неча минг аскари бизнинг отлар оёғи остида поймол бўлди.* М. Осим, Карвон йўлларида; 2) *кўчма* оёғости бўлмоқ, барбод бўлмоқ, йўққа чиқмоқ; таҳқирланмоқ. [*Воҳид*] *Ҳамма орзумидлари поймол бўлишини тасаввур этмаган эди.* О. Ёқубов, Тилла узук. *Унинг бу нидоси ниятига етмаган, армони ичида қолган, юрак-бағрини ўртаган туйғулари поймол бўлган аёл кишининг нидоси эди.* С. Аҳмад, Уфқ. **Поймол қилмоқ (ёки этмоқ) 1)** оёқ остига олиб эзмок, босмок, топтамоқ; пайҳон қилмоқ. *Экинзорни поймол қилма;* 2) *кўчма* оёғости қилмоқ, барбод қилмоқ, йўққа чиқармоқ; таҳқирламоқ. *Ўл-а, опанг гапирса, алам қилганди! Баттар бўл, ғурурингни поймол қилишинга оз қолди-ку! Тағин нима керак сенга!* Ў. Ҳошимов, Қалбингга кулоқ сол. *Одоб, ҳаё-чи? Ота-она олдидан одобни унутсин, ҳаёни поймол қилсинми? «Менга фалончини олиб беринглар!» десинми? М. Исмоилий, Фарғона т.о.*

ПОЙНАК [ф. *پاينوك* – «паст, остки қисм» с. дан] 1 Тухумнинг тўмтоқ томони, кети. *Қарға тухумининг пойнак томонида оқсил тухум пўчоғига етмайди.* «Зоология».

2 *махс.* Пичоқ, ханжар, қилич ва ш.к. асбоблар қинининг учига кийгизиб қўйиладиган, қинни тешилишдан сақлайдиган металл учлик. *Мис пойнак.* ■ *Пойнаги тупроққа беозор, сассиз санчилди.* С. Аҳмад, Уфқ.

ПОЙНАКЛИ Пойнакка эга, пойнаги бор (қ. **пойнак 2**). Тукли чакмон ичидан, яктаск устидан икки қават белбоғ боғлаган, бирида носқовоқ, бирида жез пойнакли, дандон сопничоқ билан соқолтароқ осилган эди. Мирмуҳсин, Умид.

ПОЙНОВ [ф. پاي‌ناو ёки پاي‌ن‌آب – новнинг, сув йўлининг охири, адоғи] Ариқ, ҳовуз ва ш.к. нинг ортиқча суви оқиб чиқиб кетадиган томони, этағи. Сув эгатларда оқмоқда, қақраган тупроққа сингиб, эгатнинг пойновига томон аста йўл олмоқда. Ҳ. Нувмон, Фасллар. *Опаси қўлтиқтаёғини остига қўйгани ҳолда ҳовузнинг пойнови томонда ўлтирар ва қурумли қўлларини латта билан секин-аста ишқар эди. А. Қаҳҳор, Сароб.*

Пойнов ариқ шв. Ортиқча сув оқиб чиқиб кетадиган ариқ, оқова ариқ. Янги усул беш тармоқ ва пойнов ариқларни йўқотиш.. шу орқали экин майдонини кўпайтиришга имкон беради. Газетадан.

ПОЙТАХТ [ф. پایتخت – тахтнинг куйи, этак қисми, асоси] Давлатнинг бош шаҳри, мамлакатнинг маъмурий-сиёсий ва маданий маркази. Ўзбекистоннинг пойтахти Тошкент шаҳридир. ■ Тошкентим, порлаган пойтахтсан бу кун, Юксалди кўксингда не-не қасрлар. А. Орипов, Йиллар армони. *Мен тажриба орттириш мақсадида Ўзбекистон пойтахтига келган эдим. К. Қаҳҳорова, Чорак аср ҳамнафас.*

ПОЙТЕША [ф. پاي‌تېشا – шакли оёқнинг тагига ўхшаш теша] Тик туриб ёғоч йўниш ва текислаш учун ишлатиладиган, дастаси узун катта теша. Жами меҳнатга яроқли эркаклар арраю пойтешасини кўтариб, Самарқанд, Каттақўрғон тарафларга устачилик қилишга кетадилар. С. Аҳмад, Жимжитлик. *Долимбой пойтешани қалин пайраҳалар устига эҳтиёт қилиб қўйиб, сўрига келиб ўтирди. С. Аҳмад, Жимжитлик.*

ПОЙУСТУН [ф. پاي‌ستون – устун ости, таглиги] бнк. Маҳаллий мезморчиликда: устун ўрнатиладиган асос, таг курси.

ПОЙЧА [ф. پايچه] шв. айн. поча 1-3. Шимнинг пойчасини қайтармоқ. ■ Сўнгера кийикни чалқанчасига ағдариб, орқа оёғининг пойчасини кесиб, дамлашга ҳозирлади. Ш. Бўтаев, Қўрғонланган ой.

ПОЙҚАДАМ [ф. + а. پاي‌قدم – оёқ изи, оёқ ости] 1 Оёқ; оёқ изи, йўл; оёқ ости. [Ғофир:] Ёлғиз гавҳардан тиниқ, қуёшдан ҳам

юксак муҳаббатим бор, холос! Сенинг пойқадамингга сочмоқ учун зарларим йўқ! Ҳамза, Бой ила хизматчи. Ахир у ёшликдан орзу қилган ниятига етди.. геология алломаларининг муборак пойқадами етган тоғтошлардан кўтарилди, уларнинг қутлуғ қўллари теккан тоғ жинсларига болга урди. С. Кароматов, Олтин кум. -Усмон отанинг пойқадами етди-ю, ҳамма ёқда боғлар пайдо бўла бошлади, – деди Жўра ака. «Ўзбекистон кўриқлари».

2 Қадам қўйиш, ташриф буюриш, келиш. *Уша ўқитувчининг пойқадамидан ўргилай [деди Рихси хола]. С. Зуннунова, Янги директор. -Пойқадамларингиз қутлуғ келди, – деди биз билан кўришаркан биринчи котиб. Газетадан. Оғайниларининг пойқадами биланми ё дори-дармоннинг нафи туйфайлими, Шаҳоб чиндан ҳам одатдагидан тезроқ оёққа турди. Л. Тожиева, Меҳрим сизга, одамлар.*

ПОК I [ф. پاک – тоз, покиза; ифбатли, уятчан] кт. 1 Топ-тоза; гард-ғубор, кир, чанг кабилардан холи; покиза. *Пок булоқлар. Пок идишлар. ■ Шунқор кўкрагингиз истеҳкомдан зўр, Чунки пок ҳавода олмишдир нафас. Ф. Фулом. Ҳар қандай ҳайвон териси ҳам ошланса, тоза ва пок бўлади. «Фан ва турмуш».*

2 Кўчма Номига гард юкмаган, ҳалол, соф, мусаффо, тўғри. *Нормурод отанинг виждони пок, у ўз виждонига хилоф иш қилгани йўқ. О. Ёқубов, Диёнат. Врач юксак унвонлар эгаси бўлиши шарт эмас, лекин пок виждонли бўлиши керак. Газетадан. Фақат бизнинг пок ниятимизга шубҳа билан қарайсизлар! Ш. Холмирзаев, Қил кўприк. Ўзининг гард қўнмаган, нурдан пок туйғуларини кимга ишониб топшираётганини у билмаса, Ёдгорга аён-ку! Ў. Ҳошимов, Қалбингга кулоқ сол.*

3 Кўчма Холи. *Ун минутдан кейин йигит хотинининг ҳар қандай шубҳадан пок эканига ишонди. А. Қаҳҳор, Асарлар. Биринчи фазилат: буларнинг дили ҳасад, бахиллик деган қабиҳ туйғудан пок. К. Қаҳҳорова, Чорак аср ҳамнафас.*

ПОК II [ф. پاک – тўлиқ, тамомила, батамом, мутлақо] I рвш. с.т. Бутунлай, батамом, паққос. -Яхши ҳам чол шаҳарга ўрганмаган итни, адашиб кетишидан қўрқиб,

эшакнинг қанжигасига боғлаб олган экан, бўлмаса, пок титиғимни чиқарар экан, — деди Шум бола. *Ф. Гулом, Шум бола. Шу эримга кал новвойнинг қизи ҳазиллашиб, тегаман деса, пок бўғиб ўлдириб қўйи деган эканман.* Ҳамза, Танланган асарлар.

ПОКДИЛ [ф. پاکدل — дили, кўнгли пок, тоза] Кўнглида кири йўқ, виждонли, дили пок, софдил ва самимий. *Покдил кишилар.* ■ -*Меъмор саломатлар, — деди мешкобчи кулолга жилмайиб, — сиз мендан кўп нарсаларни сўрайяпис, кулол. Энди ҳеч нарса сўраманг, билмайман! Сизни покдил одам деб биламан.. хайр, мен кетдим.* Мирмуҳсин, Меъмор.

ПОКДОМОН [ф. پاکدامن — этаги, бари тоза: гуноҳсиз, айбсиз; ифбатли; соф, ҳалол] Ор-номусини сақлаган; ифбатли, номусли, ҳалол. *Покдомон хотин.* ■ *Наҳотки шундай покдомон одамнинг хонадони эгери кўчага киришга мажбур бўлса! Пора берса!* Шуҳрат, Умр поғоналари. *Ўзини Искандарга покдомон қилиб кўрсатмоқчи, шу баҳона оқлаб олмоқчи экан-да?* «Ёшлик». *Наҳот энди ҳаммасига сен жавоб берсанг, Ахир ўзинг покдомонми, шунинг ўзи бас.* А. Орипов, Йиллар армони.

ПОКИЗА [ф. پاکيزه — тоза, соф; ифбатли; бенуқсон; ёқимли] I Топ-тоза, пок. *Покиза идиш. Покиза кийим.* ■ *Она табиатимизни ҳамиша тоза, покиза сақлаш ҳақида қайғурмоғимиз лозим.* Ш. Рашидов, Янги ер ҳақида сўз. *Булоқ суви қанчалик беғубор ва покиза. У тоғ бошидан ана шу сифатлари билан пастга интилади.* «Ёшлик». *Одам деган покиза юриши керак. Тоза юрган одамнинг табиати равшан бўлади.* С. Аҳмад, Суд.

2 *кўчма* Ҳалол, пок, тўғри; соф, мусаффо. *Олима [Ҳадича Сулаймонова] ҳаётининг охирига қадар халқ учун покиза виждон билан хизмат қилди.* «Саодат». *Оқкўнгул, покиза, ҳалол ўқитувчининг яшаш тарзи, фикрлаш йўсини доимо барча учун мактаб бўлиб келган.* «Фан ва турмуш». *Покиза кўнгли билан, баъзан ўта қаттиқ қаҳри, баъзида жуда юшоқ меҳри билан боғлаб олган.* С. Зуннунова, Олов.

3 *Озодаликка қаттиқ риюя қиладиган, озода. Покиза аёл.* ■ *Карим ака ниҳоятда покиза, содда эди.* «Ёшлик».

ПОКИЗАЛАМОҚ Покиза қилмоқ, тозаламоқ. *Баданини покизаламоқ. Уйни поки-*

заламоқ. ■ *Йўнғичқа [янги кўкарган беда]. Иссиқлик нарса.. ички авзоларни меъёрида тозалайди.. сиқиб чиқарилган селини ярачакага суртилса, покизалайди..* Газетадан.

ПОКИЗАЛИК I Тозалик, поклик. *Кийимнинг покизалиги. Идиш-товоқнинг покизалиги.* ■ *Аввал [қишлоғи] бозорига бориб, савдо-сотик қилаётган эркак-аёлларга ҳам ҳифзи сиҳат, покизаликнинг фойдасини қайта-қайта тушунтирар эди.* К. Яшин, Ҳамза.

2 *кўчма* Ҳалоллик, поклик, тўғрилик. *Аввалига ётсираш, беоналик уни қийнади. Кейин эса Мирзони одамларнинг ўша баланд тоғлардай улғу қалби, покизалиги ўзига ром қилиб олди.* «Ёшлик».

ПОКЛАМОҚ *кт.* Пок, тоза қилмоқ, тозаламоқ. *Мунисхон ўз устидан оғир бир юк тушгандай яйраб кетди-да, шу ондаёқ бу гуноҳнинг бутун ғуборидан кўнглини поклашга шошилди.* А. Қаҳҳор, Сароб. *Фақат меҳнат одамни ҳар қусурдан поклайди, меҳнат. М. Бобоев, Гўзалик истаб. У сувпуркагични айлантириб, ваннахонанинг ҳамма ёғини ораста ювиб, поклаб чиқди.* Э. Аъзам, Кечикаётган одам.

ПОКЛАНМОҚ *Покламоқ* фл. ўзл. ва мажҳ. н. *Гуноҳлардан покланмоқ.* ■ *..Биз иқтисодий йўналиш, иқтисодий ривожланишнинг маънавий ўнгаланиш, маънавий покланиш, маънавий юксалиш ҳаракатлари билан уйғун бўлишини истаймиз.* Газетадан.

ПОКЛИК Соф виждонлилик, ҳалоллик, софлик, тўғрилик. *Мана унинг мен яхши кўрган жилмайиши! Кўнглининг поклиги, ишонч, меҳр — ҳаммаси шу жилмайишида.* А. Мухтор, Давр менинг тақдиримда. *Замонлар ўтар, фидойилик, самимийлик, поклик — буюк туйғулигича қолар.* «Саодат». *Мен учун биринчи ўқитувчим ҳалоллик, поклик рамзи эди.* Газетадан.

ПОК-ПОКИЗА I I Топ-тоза, ниҳоятда тоза, озода. *Пок-покиза ҳусндек Тун-кун хаёлимдасан.* С. Акбарий.

2 *кўчма* Соф виждоний, ҳалол, мусаффо. *Ўқитувчи! У пок-покиза туйғуларга тўла қалб меъмори.* «Саодат».

ПОК-ПОКИЗА II *рвш. с.т.* Бутунлай, батамом, пок, паққос. *Паловни пок-покиза туширди.* ■ *Хўш деганингиздан билсак, ҳалиги энг яхши қандак ўрикдан уч пуд, Каттақўрғон мағизидан беш пуд, мағиз билан ўрикни бир оз қурт еган бўлса ҳам, пок-*

покиза уриб кетишипти, азаматлар! Ҳамза, Танланган асарлар.

ПОКРИШКА [р. покрыва < покрывать – «қопламоқ, ўрамоқ, устини ёпмоқ» фл. дан ясалган от] Автомобиль ва ш.к. гилдираги шинасининг муайян ҳаво босими остидаги камерани қоплаб, тутиб турувчи, қалин резинадан ишланган қобиқ қисми.

2 Футбол ёки волейбол тўпининг камерасини қоплаб, тутиб турувчи чарм жилд, қобиқ. *Покришканинг ичига камерани қўймоқ.*

ПОКРИШКАЛИ Покришкага эга, покришкаси бор. *Унинг қайишиб кетган ёғоч гилдираги ўрнига, худди раис миниб юрадиган «Победа» машинасиникидай, йўғон покришкали гилдирак ўрнатилибди.* Ҳ. Назир, Сўнмас чақмоқлар.

ПОЛ I [ф. پال / پل (пал) – экин майдонининг атрофи марза билан кўтарилган ҳар бир қисми] қ.х. 1 Экин майдонининг атрофи марзалар билан тўртбурчак шаклида кўтарилган ва бостириб суғориш учун мосланган бир бўлаги. *Бир пол шоли. Икки пол ниёз. Полга сув қўймоқ.* ■ *Чарақлаб офтоб чиқиб, шоликорлик полларини тўлдирган ёмғир сувларини ойнадек ялтиратди.* С. Аҳмад, Уфқ. *Тушгача аранг уч пол ердаги пичанни ўриб олдим.* «Ёшлик».

Пол олмоқ (ёки қилмоқ) Атрофини марза билан ўраб, ерни пол шаклига келтирмоқ. *Пол олиб, ниёз уруғи сепмоқ.* ■ *Барча экин майдонлари йигирманчи ноябрдан йигирманчи декабрғача пол олиб, икки марта қалқитиб суғорилади.* «Ўзбекистон кўриқлари».

2 с.т. Марза. *Пастга экдим шолини, Баланд кўтар полини.* «Кўшиқлар».

ПОЛ II [р. пол – ер; замин, асос] 1 Уйнинг, хонанинг оёқ босиб юриладиган ва ўтириладиган сатҳи. *Тахта пол. Паркет пол. Цемент пол.* ■ *Қурбонбой, хотинларнинг ҳайҳайлашига қарамай, полни ҳам ўзи ювди, гиламни ҳам ўзи кўчага олиб чиқиб, қоқиб келди.* С. Аҳмад, Сайланма. *Зулайхо яланг оёқлари билан полни чип-чип босиб, унинг тепасига келди.* Ў. Ҳошимов, Қалбингга қулўқ сол.

2 Уйнинг, хонанинг оёқ босиб юриладиган сатҳига қопланган тахта ёки паркет. *Пол тахтаси. Пол қоқмоқ.*

ПОЛАПОН I қ. **палапон.** *Фил йўлда бора туриб, тўрғайнинг уйини босиб, палапон-*

ларини янчиб ташлабди. Х. Тўхтабоев, Йиллар ва йўллар. *Юлғун орасидаги беланчак инда ётган полапонлари сап-сарик оғизчаларини индан чиқариб, бир овоздан чирқиллай кетадилар.* М. Мансуров, Ёмби. *Бир она чумчуқ дарё ёқасидаги жарликка ин қўйиб, учта бола очибди. Бироқ дарё суви кўтарилиб, полапонлар хавф остида қолибди.* Газетадан.

2 **кўчма қ. палапон 2.** *Қани, полапонларим, дарров туриб, юзларингни ювингларчи? Кейин тоғангникига борамиз.* Газетадан.

ПОЛВОН [ф. پهلوان / پالوان – бақувват, ботир, қаҳрамон, баҳодир] 1 Жисмоний жиҳатдан кучли, бақувват киши; баҳодир, паҳлавон. *Кўрсатур ўз ғайратин иш узра, роҳат истаса, Рўзғори гулламас, меҳнатда полвон бўлмаса!* Ҳабибий. *У аслида жуда кўркам ва полвон йигит бўлиб, қоп-қора, чақмоқ мўйлаби ўзига жуда ҳам ярашиб турарди.* Мирмуҳсин, Меъмор.

2 Кураш тушадиган спортчи. *Ахир бу бола не-не полвонларнинг белини букиб, елкасини тупроққа қориштирмапти.* С. Аҳмад, Уфқ. *Миллий кураш бўйича кеча бўлиб ўтган олишувда Абдурайим полвоннинг ютиб чиққани бекор қилиниб, йиқилган Карим полвон фойдасига ҳал қилинди.* С. Аҳмад, Юлдуз. *73 килограмм вазнли полвонлар ўртасида гиламга чиққан Рустамжон Умаров.. рақиблари курагини ерга текизиб, турнир голиби бўлди.* Газетадан.

3 с.т. Экскаватор, кўтаргич кран каби машиналарга халқ томонидан берилган ном. *-Миша, полвонингнинг томири бўшаб, хирллаб қолмадими? – деб сўради Валентин этиб келгач.* Ш. Фуломов, Азим дарёман дебон.

ПОЛВОНЛИК I Баҳодирлик, паҳлавонлик. *Салобатидан полвонлиги кўриниб турарди.*

2 Полвонларга хос иш, хатти-ҳаракат, қаҳрамонлик. *Душман бўлса, омон кетмас қўлимдан, Полвонлик бобида мени кам дема!* «Ёдгор». [Бой:] *Холмат! Полвонлигингни кўрсат дейман!* Ҳамза, Танланган асарлар.

ПОЛИ- [юн. poly – кўп, анча, кўпгина] Байналмилал ўзлашма қўшма сўзларнинг биринчи қисми: бирор нарсанинг кўплигини, хилма-хил, мураккаб таркибли эканини кўрсатади (мас., *полиартрит, полигон*).

ПОЛИАРТРИТ [поли.. + юн. arthron — бўғим, бўғин] *тиб.* Бир неча бўғимларнинг бир вақтда ёки кетма-кет яллиғланиши.

ПОЛИГАМИЯ [поли.. + юн. gamos — никоҳ] **1** Кўп никоҳчилик: кўп хотинлилик ёки кўп эрчилик; кўпинча кўп хотинлиликни ифодалаш учун нотўғри қўлланади.

2 Ҳайвонларда: муайян жинснинг бир мавсум давомида ўзига қарама-қарши бир неча жинс билан қўшилиши.

ПОЛИГЛОТ [поли.. + юн. glotta — тил] Кўплаб тилларни билувчи киши. *Японияда туғилиб ўсган Наори Такедани бемалол полиглот дейиш мумкин, чунки у япон, итальян ва испан тилларини мукамал билади.* Газетадан.

ПОЛИГОН [юн. polygonos — кўп бурчакли < поли.. + gonia — бурчак] **1** *геом.* Кўп бурчак(лик); текисликдаги синиқ чизиқ.

2 *ҳарб.* Қуруқлик ёки денгизнинг махсус иншоотлар, қурилмалар билан жиҳозланган ва ҳар хил қуруллар ва жанговар техникани синаб кўраш, шунингдек, ҳарбий машқлар ўтказиш учун мўлжалланган қисми. *Артиллерия полигони.* ■ *Капитан полигонда солдатларнинг қаерда эканликларини билиш мақсадида улардан бирига мурожаат этди.* Газетадан. *Ўқув синфлари, полигонларда машғулотлар қизгин олиб борилмоқда.* Газетадан. *Шимолий Корея ядро полигонларида кузатилаётган фаоллик шундан дарак беради.* Газетадан.

3 *бнк.* Йиғма қурилиш конструкциялари ва қисмлари (мас., темир-бетон панеллари) тайёрлаш учун махсус жиҳозланган очиқ майдон.

4 *қўчма* Муайян иш-ҳаракат, фаолият билан шуғулланиш майдони, соҳаси. *Қизиқ, аслида инсон қалби ва онгани эгаллаш учун кураш асосий мақсадга айланган таъдирда мафкурамиз полигонларини кучайтириш, ривожлантириш ўрнига майдонни индамайгина, қўл қовуштириб бошқаларга бериб қўядиган замонми ҳозир?* Газетадан. *Мафкура полигонлари ядро полигонларидан кучлироқ.* Газетадан.

ПОЛИГРАФИК Полиграфияга оид, алоқадор. *Баъзи туман газеталарининг полиграфик базаси ҳамон ночор.* Газетадан. *Бу ҳол нашрлар тиражининг кўпайганлиги, полиграфик сифатининг яхшиланганлигида ҳам кўриниб турибди.* Газетадан.

ПОЛИГРАФИСТ Полиграфия саноатининг ишчиси; полиграфия мутахассиси.

ПОЛИГРАФИЯ [юн. polygraphia — кўп ёзиш < поли.. + юн. grapho — ёзаман, ёзяман] Техниканинг китоб, газета, журнал, плакат каби босма маҳсулотлар тайёрлаш ва чоп қилиш билан боғлиқ барча жараёнларни ўз ичига олган тармоғи. *Полиграфия саноати.* ■ *Полиграфия аста-секин меҳнаткашларни маънавий руҳда тарбиялашнинг қудратли ишлаб чиқариш базасига айланди.* «Фан ва турмуш».

ПОЛИДАКТИЛИЯ [поли.. + юн. daktylos — бармоқ] *тиб.* Кўп бармоқчилик: қўл ёки оёқ панжасида ортиқча бармоқ(лар) бўлиши.

ПОЛИЗ [ф. палин] Қовун, бодринг каби палак отиб ўсадиган экинлар экиладиган майдон, пайкал. *Полиз экинлари. Полизни суғормоқ.* ■ *Ана, икки ёндаги пахса деворлар чекиниб, олдинда теп-текис полиз кўринди.* О. Ёқубов, Эр бошига иш тушса. *Полизларда қовун-тарвузлар ширага тўлган, ишкомлар ҳосилдан бели букилиб қолган тўкин, баракали куз боши эди.* С. Аҳмад, Уфқ.

ПОЛИЗЧИЛИК Полиз экинлари экиш ва етиштириш; полиз хўжалиги. *Жамоода боғдорчилик ва полизчилик масалалари ҳал этилди.* Газетадан.

ПОЛИКЛИНИКА [юн. polis — шаҳар + klinike — даволаш < klinē — ўрин-кўрпа] Қатнаб даволанувчиларга, шунингдек, уйдаги беморларга турли касалликлар бўйича тиббий ёрдам кўрсатадиган даволаш-профилактика муассасаси ҳамда шу муассаса жойлашган бино. *Поликлиникага даволаниш учун қатнамоқ. Поликлиника врачлари.* ■ *Махсус поликлиника — 50 каравотлик шифохона турли касалликларни даволашга мослаштирилган.* Н. Сафаров, Оловли излар.

ПОЛИМЕР Полимерларга оид, полимерлардан иборат. *Полимер моддаларнинг молекулалари.. бир неча минг ва миллионлаб атомлардан таркиб топгандир.* «Фан ва турмуш». *Тошкент кимё-технология институтининг конструкторлик бюроси полимер иситкичлар яратди.* «Фан ва турмуш».

ПОЛИМЕРЛАНИШ, полимерлаш *ким.* Қуйи молекулали модда (мономер)ларнинг муайян кимёвий боғ орқали бирикиб, юқори молекулали бирикма (макромолекула)лар ҳосил қилиш жараёни.

ПОЛИМЕРЛАР [юн. polymeres – кўп қисмлардан ташкил топган; хилма-хил] *ким.* Молекулалари бир ёки бир неча турли кўп сонли такрорланувчи ҳалқалар – мономерлардан ташкил топган, юқори (кўп) молекулали кимёвий бирикмалар (синтетик материаллар, пластмассалар, резина, лак-бўёқ моддалари ва б. тайёрлашда хомашё сифатида ишлатилади). *Ҳозирги полимерлардан халқ хўжалигининг турли соҳаларида кенг фойдаланилмоқда.* «Фан ва турмуш».

ПОЛИНЕВРИТ [поли.. + юн. nervon – нерв] *тиб.* Кўл-оёқ нервларининг бир вақтда касаллиши.

ПОЛИОМИЕЛИТ [юн. polios – кулранг + myelos – орқа мия] *тиб.* Марказий нерв системасининг (орқа мия кулранг моддасининг) зарарланишидан келиб чиқадиган, кўпинча болаларда бўладиган оғир юқумли касаллик. *Унинг [ўсмирнинг] танасида полиомиелит касаллигидан қолган асорат шундоққина билиниб турибди.* «Фан ва турмуш».

ПОЛИП(ЛАР) [юн. polypos < поли.. + pus – оёқ] *тиб.* Сурункали яллиғланиш натижасида шиллиқ парданинг маълум қисмларида ҳосил бўладиган сўрғичсимон ўсиқчалар.

ПОЛИС I [юн. polis – шаҳар-давлат] *тар.* Юнонистон ва Қадимги Римда муайян бир шаҳар ва унинг атрофидаги худудни қамраб олувчи шаҳар-давлат.

ПОЛИС II [фр. police < итал. polizza – тилхат, патта] Суғурта жамияти томонидан суғурта қилинган шахс ёки муассасага бериладиган ва суғурта шартномаси ва унинг шартларини тасдиқлайдиган гувоҳнома.

ПОЛИСЕМАНТИК *тлш.* Кўп маънога эга бўлган; кўп маъноли. *Полисемантик сўзлар.* ■ *Фразеологик антонимлар моносемантик ва полисемантик бўлиши мумкин.* «ЎТА».

ПОЛИСЕМИЯ [поли.. + юн. sema – белги] *тлш.* Бир сўз ёки белгининг бир неча маънога эга бўлиши, кўп маънолилиқ. *Полисемия тилшуносликнинг энг муҳим масалаларидан бири ҳисобланади.* «ЎТА».

ПОЛИТЕИЗМ [поли.. + юн. theos – худо] Бир неча худого сифинувчи, бир неча худони эътироф этувчи дин ёки диний эътиқод, кўп худодилиқ; *зид.* **МОНОТЕИЗМ.**

ПОЛИТЕХНИЗМ [поли.. + techne – санъат, маҳорат; касб-хунар] Мактаб ўқув-

чиларини ишлаб чиқаришнинг асосий тармоқлари билан ҳам назарий, ҳам амалий жиҳатдан таништиришни мақсад қилиб қўйган таълим тизими.

ПОЛИТЕХНИК I Политехнизмга оид. *Политехник таълим.*

2 Техниканинг турли соҳаларини ўрганиш ва турмушга татбиқ қилиш билан боғланган. *Политехник институт. Политехник музей.*

ПОЛИТЕХНИКА Техника тармоқлари мажмуи. *Политехника музейи. Политехника таълими. Политехника институти.* ■ *Зал бирдан жимиб қолди. Устахонаси йўқ мактабда қандай қилиб политехника таълими йўлга қўйилиши мумкин эканини билишга қизиқиб, директорнинг оғзига тикилишди.* С. Аҳмад, Сайланма. –*Ёдгор.. Ёдгор Мирзаев.. Политехника институтида ўқийди.* Ў. Ҳошимов, Қалбинга қулоқ сол.

ПОЛИТОЛОГИЯ [юн. polis – шаҳар, давлат + logos – фан, таълимот] *қ.* **СИЁСАТУЧУНОСЛИК.**

ПОЛИТРУК [р. политический руководитель – «сиёсий раҳбар» бирикмасининг қисқартмаси] *тар.* Ҳарбий қисм ва бўлинмаларга сиёсий-тарбиявий ишлар бўйича раҳбарлик қилувчи, сиёсий ва жанговар тайёргарлик учун командир билан тенг жавоб берувчи шахс (1942 йилга қадар). *Беш хонали ёғоч уйга рота командирлари, политруклар, штаб командирлари йиғилдилар.* И. Раҳим, Чин муҳаббат.

ПОЛИТУРА [нем. Politur < лот. politura – безак, безаш, силлиқлаш] Ёғоч буюмлар сиртини пардозлаш учун ишлатиладиган лак-бўёқ материали.

ПОЛИУРИЯ [поли.. + юн. uron – сийдик] *тиб.* Сийдикнинг ҳаддан ташқари кўп ажралиши.

ПОЛИФОНИЯ [поли.. + юн. phone – товуш, овоз] *мус.* Икки ёки бир неча овоз (қуй)нинг бир пайтнинг ўзида уйғун ҳолда қўшилиши ва ривожланиб боришига асосланган кўп овозлилиқ тури.

ПОЛИЦИЯ [нем. Polizei < юн. politeia – давлатни бошқариш; маъмурият] **1** Айрим мамлакатларда: мавжуд ижтимоий ва давлат тузумини ҳимоя қилувчи, жамоат тартибини сақловчи, жиноятчилик ва ҳуқуқбузарликка қарши курашувчи маъмурий органлар тизими. *Полиция маҳкамаси олдидан ўтар-*

кан, ҳар кимни титроқ босар, унинг жабри-ни, даҳшатини халқ ҳар кун, ҳар соат, ҳар минут тотиб турарди. Ойбек, Танланган асарлар. Италия полицияси мамлакатнинг маркази ва жанубий районларида жиноят-чиликка қарши катта кураш операцияси ўтказди. Газетадан.

2 айн. полициячи. Одамлар бурчак-бурчакда тўхтаб, бир-бирларидан янгиликларни суриштиришар, ҳар қадамда кўчма митинглар бўлаётганди. Полиция, миришбларнинг эса қоралари кўринмасди. К. Яшин, Ҳамза. Полиция ўтказган ялпи тинтув вақтида ўттиздан кўпроқ контрабандист қамоққа олинди. Газетадан.

ПОЛИЦИЯЧИ Полиция хизматидаги киши, полиция ходими. Шаҳарда ўрнашиб олган полициячиларни тор-мор қилиш зарур эди. Н. Сафаров, Оловли излар. Полициячилар роса синчиклаб текшириб чиқишди.. «Фан ва турмуш».

ПОЛИЦМЕЙСТЕР [нем. Polizeimeister – полиция бошлиғи] тар. Чор Россияси ва баъзи Фарбий Европа давлатларида: катта шаҳарлар полициясининг бошлиғи. ..Тошкент эски шаҳар полицмейстери Колесниковнинг Олмазор маҳалласидан туриб, халқни – бола-бақра, ёш-қари, хотин-қиз демай оттириши.. ҳам жойларда бирин-кетин кўтарилган норозилик кўзғолонлари алангасини ўчиролмади. К. Яшин, Ҳамза.

ПОЛИЭТИЛЕН [поли.. + этилен] Этиленни полимерлашдан ҳосил қилинадиган оқ ёки рангсиз шаффоф, қаттиқ модда; синтетик полимер (ўров материаллари, электротехникага оид буюмлар, қувурлар ва ш.к. ишлаб чиқаришда қўлланади). Иморатларнинг кўпгина деразаларига полиэтилен плёнка қоқилган. Э. Усмонов, Ёлқин. Сўнгра ундан [ҳовуздан] боғ томонга қаратиб.. полиэтилен қувурлар тортилади. «Фан ва турмуш». Жорий йилнинг ўтган даврида.. озиқ-овқат саноати учун зарур бўлган 18 миллион дона полиэтилен қоплар тайёрланди. Газетадан.

ПОЛК [р. полк – бир гала, тўп (қиз); тўда, оломон; кўшин] Одатда дивизия ёки бригада таркибига кирадиган ва бир неча батальон ва ротадан ташкил топган ҳарбий қисм. Пиёда аскарлар полки. Танкчилар полки. ■ Эрталаб госпиталь жойлашган боғ олдидидаги майдонга бутун полк йиғилди. О.

Ёкубов, Излайман. Полк икки кунли маршдан кейин бепоеън, кун тушмас қалин бир ўрмонга ўрнашганича қолиб кетди. А. Қаҳҳор, Олтин юлдуз.

ПОЛКА [р. полка – девордаги идиш тоқчаси] **1** Идиш-товоқ, китоб қабилар қўйиш учун деворга ёки шкафага ўрнатилган, тахта ёки қаттиқ материалдан қилинган тоқча. Улардан бири ерда тартибсиз сочи-либ ётган бир даста китоб ва қандайдир қўлёзмаларни, чувалалиб кетган канои боғичлардан ажратиб, полкага тахлаш билан банд. Ҳ. Аҳмар, Яккама-якка.

2 Темир йўл вагониди одам ўтирадиган ёки ётадиган алоҳида жой. ..юқори полкадаги Шерали деразага бағрини бериб ётиб олган, ойнага тиралган бурни пучуқ кўринарди. Ҳ. Фулом, Феруза. Менинг жойим юқорида эди. Уни тинчитиб, чамадончамни полкага ир-ғитдим-да, ўзим ҳам бир сакраб чиқиб олдим. С. Аҳмад, Сайланма.

ПОЛКОВНИК [пол. polkownik] ҳарб. Подполковникдан юқори, генерал-майордан қўйи офицерлик унвони ва шундай унвонга эга бўлган ҳарбий киши. Полковник баъзан ҳикоя айтишдан тўхтаб қоларди. Ҳар икки-миз учун ҳам бу сукунат чўзилиб кетганга ўхшарди. Н. Сафаров, Оловли излар. Полковник солдат ва офицерларнинг жангага тайёргарлиги қандай бораётганлигини текширади. А. Қаҳҳор, Олтин юлдуз.

ПОЛЛИ Тагига тахта қоқилган, пол қилинган. Шерзод каттак-катак линолеум полли йўлакдан юриб бораркан, икки кундан буён девор остиди турган каравот йиғиб олинганини кўриб, тагин қувонди. Ў. Ҳошимов, Нур борки, соя бор.

ПОЛЛЮЦИЯ [лот. pollution – булғаниш, ифлосланиш] физиол. айн. **ИХТИЛОМ.**

ПОЛОНИЙ [лот. Polonium < Polonia – Польшанинг лотинча номидан] Менделеев даврий системасининг VI гуруҳига мансуб радиоактив кимёвий элемент; юмшоқ кумушранг оқ металл.

ПОЛОСА [р. полоса – камбар ер майдони; чарм тасма] **1** Муайян текислик, расм ёки чизмадаги узун текис из; муайян майдон, бўшлиқнинг тор, камбар қисми.

2 Бирор нарсанинг алоҳида, чўзилиб кетган қисми, минтақа. Довул 200 метрдан 6 километргача кенликдаги узун энсиз полоса бўйлаб ҳаракатланади. «Фан ва турмуш».

3 *пгрф.* Терилган матндаги, босма нашрдаги бет, саҳфа. *Мақола газетанинг икки полосасини эгаллади. Газетанинг сўнги полосасидаги эълон.*

ПОЛОТНО [*р.* полотно — қалин газлама, кийим, ёпинғич] **1** Арқоғи ва ўриши бир хил йўғонлик ва қалинликда бўлган, ипак, ип, каноф ва ш.к. дан тайёрланган пишиқ ва силлиқ газлама ва ундан тикилган кийим. *Инакли полотно. Штапель полотно.*

■ *Уларда [дастгоҳларда] ранг-баранг трикотаж полотнолар тўқиш имкониятига эгамиз. Газетадан. -Духоба, крендешин.. полотно, шотландкалар тўқиймиз, — дейишибди чеварлар. Ш. Фуломов, Ёрқин йўллар. Юпқа блузкадан ҳам, крендешин, полотно кўйлақлардан ҳам унга тўқ кўк шол кўйлақ маъқул бўлди. «Саодат».*

2 Одатда бўзсимон махсус матога чизиладиган катта яхлит сурат. *Машхур рассом полотнолари.* ■ *Рассом Шарқ аёллари образини яратиб устидаги ишларни давом эттириб, бир қатор ранг-баранг полотнолар яратди. Газетадан. Айни кунларда Т. Жамолдиннинг янги полотнолар устидаги излашларини давом эттирмоқда. Газетадан.*

3 *кўчма* Бирор тарихий воқеа-ҳодисани кенг ва ҳар томонлама тасвирлаган бадиий асар. *Т. Қайипбергенов адабиётимизни «Қорақалпоқ достони» номли йирик тарихий полотно билан бойитди. «ЎТА».*

4 *махс.* Темир йўл ёки шоссенинг тош, шағал ва ш.к. дан кўтариб ишланган асоси, кўтармаси. *Олисларга чўзилиб, уфққа сингиб кетган темир йўл полотноси хаёлимни олиб кетди. С. Аҳмад, Қадрдон далалар.*

ПОЛЬКА [*чех.* polka — поляк: жабрланган поляклар билан бирдамлик рамзи сифатида шундай номланган] **1** Давра бўйлаб жуфт-жуфт бўлиб, тез, сакраб-сакраб ўйналадиган чех халқ рақси.

2 Шу рақс ритмидаги мусиқа асари. *Андижон полькасига ўйнамоқ.* ■ *У [Қиёмхон] узоқ ўинади. «Андижон полькаси», «Лазги», «Дилхирож» куйларига хиром айлаб, дам бошлиққа, дам Ислом отага, дам юбиляр — Фая опага қош учуриб, тилла тишларини йилтиратиб им қоқарди. Н. Аминов, Қаҳқаҳа.*

3 Эркакларнинг соч қўйиш турларидан бири (бунда соч чакка ва орқадан сал олиб текисланади).

ПОЛЯК 1 Польша Республикасининг туб (асосий) аҳолисини ташкил этган халқ (миллат)нинг номи.

2 Шу халққа мансуб (шахс, тил ва ш.к.) *Поляк халқи. Поляк тили. Поляк аёл.*

ПОЛЯКЛАР Польша Республикасининг асосий аҳолисини ташкил қилган, ғарбий славянларга мансуб халқ.

ПОМАДА [*фр.* pomade < pomme — олма (ушбу малҳамни тайёрлашда дастлаб олмадан фойдаланилган)] Турли хушбўй моддалар аралашмасидан тайёрланган косметик восита, суртма малҳам. *Лабга помада суртмоқ.*

ПОМЕЩЧИК [*р.* помещик < поместье — «хизматлари учун берилган чек ер» с. дан] *тар.* Чор Россиясида, шунингдек, ер хусусий мулк бўлган мамлакатларда катта ер эгаси.

ПОМИДОР [*итал.* pomodoro < pomo d'oro — олтин олма] Итузумдошлар оиласига мансуб сабзавот ўсимлиги ва шу ўсимликнинг олмасимон юмалоқ, қизил, баъзан сариқ рангли меваси. *Помидор ўзининг дармондорилиги билан жуда қимматлидир. К. Маҳмудов, Ўзбек тансиқ таомлари. Қандли диабет билан хасталанган беморнинг кундалик овқатида қовоқ, бодринг, укроп, помидор бўлиши керак. «Фан ва турмуш».*

ПОМОЛОГИЯ [*лот.* pomum — мева + юн. logos — фан, таълимот] Мевали ва резавор мевали ўсимликлар навлари ҳақидаги фан; навшунослик.

ПОМПА [*голл.* pomp — сўргич, насос] *махс.* Ортиқча сувни чиқариб ташлайдиган ва ёнғинга қарши қурилмалардаги сув насоси; умуман, суюқликларни тортиб, чиқариб ташлайдиган насос.

ПОНА 1 Нарсаларни ёриш, кериш ёки бириктириш учун ишлагиладиган, бир учи тигли ёғоч ёки темир. *Темир пона. Ёғоч пона. Пона қоқмоқ. Пона қоқиб маҳкамламоқ.* ■ *Унинг бир қўлида мушук калласидай калтасоп болга, бошқа қўлида темир пона. М. Исмоилий, Фарғона т.о. Терлаб қизариб кетган бўлса-да, омбирни пона қилиб, занжирни дўқиллатиб ураверди. С. Сиёев, Саратонда қор ёғди.*

Пона урмоқ 1) нарсаларни ёриш, кериш учун улар орасига (ёриғига) пона тикмоқ, ўрнаштирмоқ. *Замон тош қатламларини пона уриб кўчирар, икки ённи бўшатиб,*

гурзига йўл очиб берарди. М. Исмоилий, Фарғона т.о.; 2) орага нифоқ солиб, зарар етказмоқ. *Дарҳол ҳар хил шаклга солиб, шу баҳона бирлигимизни бузишга, мафкурамизга пона уришга уринадилар.* Газетадан.

ПОНСАД [ф. پانصد — беш юз] тар. Хонликлар даврида: аскар бошлиқларига берилган унвонлардан бири ва шу унвонга эга бўлган, одатда 500 кишидан иборат ҳарбий қисмга бошчилик қилган шахс. *Султон Содиқ акалари — Тойчоқ ва Аҳмад билан 1860 йилда Қўқон хони хизматига келиб, понсад унвонини олди.* «Фан ва турмуш».

ПОНТОН [фр. ponton < лот. pons, pontis — кўприк] 1 Вақтинчалик кўприк, иншоот ва ш.к. ни сув юзида кўтариб туриш учун таянч сифатида ишлатиладиган таги ясси қайиқ.

2 Шундай қайиққа ўрнатилган вақтинчалик кўприк. *Баҳодир жангчилар қўлбола қайиқ ва резинка понтонларда дарёни ҳаммадан олдин кечиб ўтиб, душман истеҳкомларининг дабдаласини чиқариб, у ерда жойлашиб олдилар.* Газетадан. *Бир чеккада устига понтонлар ортан юк машиналари елиб боряпти..* М. Мухамедов, Одерга.

ПОП I [юн. pappas — ота, отахон ёки лот. pora — қурбонлик пайтида қоҳин ёрдамчиси] Православие черковида ўрта даражали руҳоний. *Поплар қўнғироқларни ура берди, қўнғироқнинг товуши оламни тутди.* «Гўр-ўглининг туғилиши». *Рустам камсап бўлиб юрар эди, баъзан бутхонага поп билан бирга бориб, тушган пулларни йиғиб олар эди.* «Ёшлик».

ПОП II тақл. с. Бирор нарсага юмшоқроқ нарса билан урилганда чиқадиган товуш. *Қопқоқ поп этиб ёпилди.*

ПОПИЛЛАМОҚ «Поп-поп» этган товуш чиқармоқ. *Китоблар попиллаб ерга тушди.* ■ *Дакан ерга оғир юкдай попиллаб тушди.* М. Исмоилий, Фарғона т.о. *Тўла ўртоғининг юпун пальто тагидан суяги туртиб чиққан елкасига попиллатиб урди.* М. Исмоилий, Бизнинг роман.

ПОПИЛТИРИҚ с.т. 1 Баъзи ўсимликларнинг пояси учига ҳосил бўладиган, етилганда момиқсимон тўзғоққа айланадиган тўпгули, попуги. *Енгил шабада қамишларни шитирлатиб, учларидаги попилтириқларини сувга учиради.* М. Маҳмудов, Мангу куй излаб.

2 Шокила, попук. *От ёпиғининг попилтириғи.*

ПОПИШАК зоол. Олачиפור патли, елпиғичсимон тожли, қайрилма тумшуқли ҳашаротхўр қуш; сассиқпопишак. *Аллақаердан учиб келган попишак ўзини товус ҳис қилиб, қуёш нурлари остида товланиб, ўйин қиларди.* Ҳ. Фулом, Тошкентликлар.

ПОПЛИН [итал. papelino — папага, папа қароргоҳига тегишли] Арқоғи йўғонроқ, ўриши ингичкароқ, ип ёки ипакдан, баъзан кимёвий толалардан тўкилган газлама. *Ипакли поплин.* ■ *Улар орасида поплин, батис(т), пахмоқ ва рўмолбоп газламалар ҳам бор.* Газетадан.

2 Шундай материалдан тикилган. *Поплин кўйлак.*

ПОП-МУСИҚА [ингл. pop (popular) music — оммабоп мусиқа] 20-асрнинг ўрталаридан қарор топган енгил (кўнгилочар) эстрада мусиқасининг хилма-хил услублари ва жанрларини қамраб олувчи тушунча.

ПОПОП [р. ихтирочи конструктор Попов номидан] 1: **попоп машина** Матоларга илма игна билан гул тикадиган машина. *Набигулининг акаси Қодирга попоп машина билан гул солинган қора бахмал бир рўйжа кўрсатди.* А. Қаҳҳор, Қанотсиз читтак.

2 Каштачиликда чок тури, йўрма.

ПОПОПЧИ Каштачилик билан шуғулланувчи киши. *Тўтибу тўй ҳаракатида попопчиникига кетган.* С. Зуннунова, Гулхан. *Хоҳ учиринг, хоҳ учирманг, дугона, Тилак - қизлар иқболдан нишона, Сўроғлабсиз, атай бўлдим попопчи, Бўлурми деб ишқимизга баҳона..* Т. Тўла, Оромижон.

ПОПОПЧИЛИК Машинада кашта тикиш касби; попоп машинада йўрма чоки билан бадий буюмлар (чойшаб, сўзана, палак, дўппи ва ш.к.) тайёрлаш.

ПОПОҚ с.т. қ. **қалпоқ**. *Бошинда попоқи ақлимни олди, Ҳам йўлдан чиқарди, ҳам йўлга солди.* «Кўшиқлар».

ПОП-ПОП Поп II с. тақр. *Поп-поп қилмоқ.*

ПОПУК I Нарсаларга безак учун тақилладиган бир боғлам тола, пат, ип ва ш.к. *Дўппи попуги.* ■ *Шарофат, паранжининг попугини эшиб, ерга қараганича ўтирар, афтидан, бу саволга жавоб бермоқчи эмас эди.* А. Қаҳҳор, Қўшчинор чироқлари.

2 Гажим, шокила. *Байроқ попуги.* ■ *Зайнаб гиламинг попугини чирмаб, нима-нигдир хаёлини сурар.* А. Қодирый, Ўтган кунлар. *Каромат она.. дастурхон попугини ўйнашда давом этди.* Т. Алимов, Совчи.

3 Ёш қизларга нисбатан эркалаш маъносида ишлатилади. *Олдинда сизлар, ой попуқларим.* Ойбек, О. в. шабадалар. -*Сиз, попуқ қизим, этагингизга намилдори, ловия териб чиқинг,* — деди амма Мунавварга. С. Анорбоев, Меҳр.

4 Шокилалар қоғозга ўралган конфет. *Бир кампир сенкидор боланинг чап ёнидаги кўйлак кийдан қизгага попуқ узатади, кейин уни кўтариб олади.* Р. Файзий, Сен етим эмасан.

5 Попук (хотин-қизлар исми).

Попуги пасаймоқ қ. пасаймоқ 4. *Домланинг нутқларидан кейин одамларнинг попуги пасайиб қолди.* Э. Раимов, Ажаб қишлоқ. *Раҳимжон попуги пасайиб, нафаси чиқмай қолди.* Ҳ. Назир, Ёнар дарё. **Попук илдиз** Ўқ илдиз қуригач, унинг ўрнига пояннинг остидан ўсиб чиқадиган кўп сонли майда илдизчалар (кўриниши попуқка, шокилага ўхшайди).

ПОПУКДАЙ, -дек Бежирим, чиройли. *Қош-кўзи попуқдай, доим кулиб турадиган Шоира деган дўндиққина жувон беморларга укол қилишга киришади.* Ў. Ҳошимов, Нур борки, соя бор. *Аваллари Фотима-Зухраларни доимо адаштириб юрардим. Ҳозир ҳам иллкаси бир-бирига ўхшайди.* *Попукдек қош-кўзли, кулча юзли.* Ў. Ҳошимов, Икки эшик ораси.

ПОПУКЛИ Попукка эга. *Иброҳим попукли лўла болишни тортиб, тиззасига қўйди.* Ш. Холмирзаев, Қил кўприк.

ПОПУЛЯЦИЯ [лот. populatio < populus — халқ, аҳоли] Узоқ муддат муайян бир жойни эгаллаб яшайдиган ва бир қанча авлодлар оша аслидагидай тикланиб турадиган бир турга мансуб зот (организм)лар йигиндиси.

ПОРА I [ф. پاره — бўлак, лахтақ, парча; ҳисса, улуш; йиртилган, кесилган] (о-узуи) I Парчаланган нарсанинг бир қисми; бўлак, парча. *Пора бўлмоқ. Пора қилмоқ.* ■ *Қудрат, тахта пораси устида ҳушсиз қолган Фарҳоддай, ўз ихтиёрини унга бериб ожиз қолди.* З. Фатхуллин, Сўнмас юлдуз. *Бургут уни чангалга олиб, Мушук жағин қилибди пора.* Я. Қурбон. *Ўсма қўйдингму қошингга,*

Бунчалар ҳам қорадур, Билмадим, бу қошларингдан Қанча диллар поради. Э. Воҳидов, Ёшлик девони. *Сенинг юрагингда лахта-лахта қон, Сийнаг нималардан бўлмаган пора.* А. Орипов, Йиллар армони.

2 *эск. кт.* Тўда, тўп, гуруҳ. *Мен бир пора йигитларни олиб, ёвнинг орқасига ўта билдим.* Ойбек, Навоий.

3 *эск. кт.* Асарнинг тугал қисмларидан бири; қисм, бўлим; боб. *Ўттиз пора қуръонни ёд олмоқ.*

ПОРА II [ф. پاره — майда пул, чақа; хайр-садақа: ришва, пора] Бирор ишни ноқонуний тарзда битириб бергани учун мансабдор шахсга берилган ёки берилган нарса ёки пул. *Пора олмоқ. Пора бермоқ. Пора емоқ.* ■ *Абзамжон ака ҳозир пора билан иш битказиш мумкинмаслиги, пора берган ҳам, пора олган ҳам қия бўлиб кетишини айтиб қолди.* С. Аҳмад, Сайланма. *Тавба, порага келган нулни тарозида тортиб оладиган одам қандай қилиб прокурор бўлиб қолди экан?* Х. Тўхтабоев, Ширин қовунлар мамлақати.

ПОРАЛАМОҚ I кам қўлл. Пора-пора қилмоқ, парчаламоқ. *Кўйлақни пораламоқ.* ■ *Тез-тез ўқчийди. Ҳар йўталганида ичичини.. ўша махлуқ ўткир панжаси билан тимдалаб, поралаб ташлаётгандек бўлаверди.* С. Сийёв, Аваз. *Кун булутни поралаб пар-пар, Бошлар узра кезиб юрибди.* М. Али, Боқий дунё.

2 *кўчма* Пора-пора қилмоқ, яраламоқ, тилмоқ. *Дилни пораламоқ. Юракни пораламоқ.*

ПОРА-ПОРА [ф. پاره پاره — йиртилган, парча-парча қилинган] *рви.* Бўлак-бўлак, парча-парча, чилпора. *Юрагим-ей, бошлаб келдинг мени қайга? Бағрим ўхшар пора-пора бўлган найга.* М. Юсуф. *Фанимлар дастидан мулк пора-пора.* «Шарқ юлдузи». *Бошидан ошириб ерга уради, Тушиб ерга, пора-пора бўлади.* «Алпомиш». *Биттадан чўқиганларингда ҳам мени пора-пора қилиб қўясизлар.* Ойбек, Навоий.

ПОРАХЎР [ф. پاره خور — пора еювчи, олувчи] I *сфт.* Пора оладиган, порага ўрганган. *Порахўр одам,* ■ *Бир порахўр амалдор амалидан тушиб, ғалати дардга йўлиқди.* А. Қаҳҳор, Пора. *Ғиёс каллага ўхшаш порахўр қози бўлар, шу-да?* М. Исмоилий, Фаргона т. о.

2 *от* Пора олиш билан шуғулланувчи киши. *Азиз дўстим, мени эмас, аввало, ўз*

нафси, шуҳратини ўйлаган порахўрларни ўқотиши керак. Шукрулло, Сайланма. «Бу беномус порахўрнинг пўстагини энди қоқаман» деган қатъий фикр билан сўзини давом эттирди. С. Аҳмад, Чўл бургути.

ПОРАХЎРЛИК 1 Пора олиш, пора ейиш билан шуғулланиш. *Порахўрлик қилмоқ.* ■ У аслида Содиқжон бойваччанинг қопағон ити.. порахўрликка зўр берган, подшоликка йиғиладиган солиқларнинг юздан тўқсонини уриб, ҳамёнини муттасил қап-пайтиришни ўйлаган аждарнафс бир бадкир эди. К. Яшин, Ҳамза.

2 ҳуқ. Пора олиш, пора бериш, бу ишда воситачилик қилиш каби мансабдорлик жиноятлари. «Порахўрлик ҳаётимизга типик эмас» деганларнинг қанча-қанчаси пора билан қўлга тушиб, жазоланиб кетдилар. Газетадан. *Шаҳарда.. коррупция, порахўрлик ва рэкэтга нисбатан бешафқат кураш олиб борилмоғи лозим.* Газетадан. -[Ҳомид] У ерда [Кўқонда] ҳам тинч ётмай, Утаббой қушбегини порахўрликда айблаб, Мусулмон чўлоққа ариза берган, — деди [Уста Фарфи]. А. Қодирӣ, Ўтган кунлар.

ПОРИЛЛАМОҚ 1 Кучли нур сочмоқ, гуруллаб ёнмоқ. *Хуройимнинг уйида катта чироқ пориллаб ёниб турибди, болаҳона орқасидан ярқираб ой кўтарилмоқда.* У. Исмоилов, Сайланма. *Кимдир пирпираб турган машъалага керосин қуярди, машъала пориллаб кетарди.* Газетадан.

2 кўчма Ялтирамоқ, ярқирамоқ, ёнгандай бўлиб кўринмоқ. [Каримжоннинг] Қошкўзлари пориллаб.. ёқимтой чеҳрасига қизиллик югурди. М. Исмоилий, Одамийлик қиссаси. *Касал кўзлари пориллайди, қоронғи кулбага қандайдир ёруғ киргандай бўлди.* М. Исмоилий, Фарғона т. о.

3 тақл. с. «Пор-пор» этган товуш чиқармоқ. *Кўп ўтмай ҳовлидан мотоцикл моторининг пориллаган товуши эшитилди.* М. Хайруллаев, Кўнги.

ПОРЛАМОҚ 1 Ёрқин нур сочиб турмоқ, равшан ёнмоқ. *Булутсиз кўкда қуёш порлайди.* ■ *Дарахтлар орасида порлаб турган чироқлар бирин-бирин сўнди.* Ў. Ҳошимов, Қалбингга қулоқ сол. *Порлаган чироқлар атрофни кундуз қилиб юборган.* «Шарқ юлдузи». *У ётоқхоналарнинг электр нури порлаган деразаларига анграйганича битта-битта*

юриб келаркан, беихтиёр узоқ шаҳарчадаги қадрдон уйини эслади. «Ёшлик».

2 кўчма Нур сочмоқ, барқ урмоқ, балқимоқ. *Хадича аянинг ташвишли кўзлари қувончдан порлаб кетди.* Ҳ. Назир, Ёнар дарё. «Севиб қолган!» У кўзларида порлаган қувонччи яшира олмас, тасаввурида бирданига фариштага айланган шу одамни хафа қилмаслик учун бошини кўтармас эди. Ў. Ҳошимов, Қалбингга қулоқ сол. *Ёшгина бир аёл кулиб турган кўзларини порлатиб:* -Хадичахон, холам узр сўраяттилар, эшитинглар, ўртоқлар, — деди. Н. Сафаров, Хадича Аҳророва.

ПОРЛОҚ 1 Порлаб, нур сочиб турадиган, нурдек равшан. *Қуёш нури жуда кўркам, юксак ва порлоқ, Нуриин ҳатто аямайди вайронадан ҳам.* Ф. Фулом, Танланган асарлар. *Фазодан теранроқ нима бор экан? Юлдузлар базмидан порлоқ қай йиғин? А. Орипов, Йиллар армони.*

2 кўчма Бахт-саодат, истиқбол сари бошловчи; равнақли, нурафшон. *Порлоқ келажак.* ■ *Эй яша, порлоқ кун, бахтли келажак.* Омон бўл, Ватаним, минг йиллар боқий! Ф. Фулом, Танланган асарлар. *Дадил босилган қадам порлоқ келажакнинг устунидир.* «Саодат». «Чўл ҳавоси»ни ўқиб, суюниб кетдим. *Бирдан лов этиб, аланга билан бошланган ижоднинг келажаги порлоқ бўлади.* А. Қаҳҳор, Асарлар.

ПОРНОГРАФИК Порнографияга оид, асосланган. *Порнографик нашрлар ва суратларнинг тарқалиши.. ёш авлод маънавиятининг таназзулига сабаб бўлиш хавфи бор.* Газетадан.

ПОРНОГРАФИЯ [юн. pornos — бузуқ, ахлоқсиз, фоҳишабоз + grapho — ёзаман] Адабиёт, тасвирий санъат, театр, кино, телекўрсатув, радиоэшиттириши ва ш.к. да жинсий ҳаётни қўпол-яланғоч ҳолда, беҳаёларча тасвирлаш, намойиш қилиш; шундай тасвирга асосланган асарларнинг ўзи.

ПОРОМ Дилга мос келадиган, кўнгилдагидек, ёқимли. *Пором келмоқ.* ■ -Бу ер менга пором келиб қолди. *Хизматни аямасим, — деди Шум бола.* Ф. Фулом, Шум бола. *Комиссиянинг сўзлари Авазбойга унча пором келмади.* Н. Сафаров, Оловли излар. *Кино муҳаббатдан баҳс қиладиган бўлганидан жуда дуруст, айниқса, менга пором эди.* Ф. Фулом, Танланган асарлар.

ПОРОХ [р. порох, прах — чанг, гард, хок] Патрон ва снарядлар тайёрлаш учун ишлатиладиган, кўп таркибли портловчи моддаларнинг зичлаштирилган қаттиқ аралашмаси. *Тутунсиз порох. Қора порох.* ■ *Отиладиган қуролларда ишлатиладиган портловчи модда — порохни дастлаб хиндлар кашф этди.. «Фан ва турмуш». Шамол порох тутунининг ўтқир ҳидини олиб келди. П. Қодиров, Уч илдиз.*

ПОРОШОК [р. «порох» с. дан] 1 Куқун ҳолидаги қаттиқ модда. *Графит порошоги. Бўр порошоги.*

Тиш порошоги Тишни тозалаш учун ишлатиладиган махсус порошок. *Агар клеёнкада сиёҳ доғи бўлса, хўллаб, устига тиш порошоги сепинг, сўнг артиб ташланг.* «Саодат».

2 Куқунланган дори. *Сап-сарик порошок ҳолдаги бу зирвор Ҳиндистон ва Афғонистонда ўсадиган бир турли бута ўсимлигининг томиридан тайёрланади. К. Маҳмудов, Қизикарли пазандалик.*

ПОРСИЛЛАМОҚ Торс-торс ёрилмоқ (тери ҳақида). *Лабларим порсиллаб ётибди.* ■ *Мунир ўрнидан тургач, «улар»нинг дуч келганини ура кетди. Унинг кўзларига қон қўйилиб, анчадан бери йиғилиб ётган аламлари ёмон яранинг патосидек порсиллаб ёрилди.* «Ёшлик».

ПОРСИЛЛОҚ Терининг қуруқшаб торс-торс ёрилишидан иборат касаллик. *У бир-бирига ёпишган лабини остдан тили билан хўллаб, юмшатиб, қонатмасдан ажратишга уринганда, лабларининг порсиллоқ боғлаганини сизди. А. Қаҳҳор, Сароб. У [Тешабой] Воҳиднинг орқасидан бир хезланди-ю, порсиллоқ боғлаган яранинг ёрилишидан қўрқиб, ўзини босди. М. Исмоилий, Фарғона т. о.*

ПОРСИН айн. **порсиллоқ.** *Лабларим порсин боғлабди.*

ПОРСО [ф. پارسا — диндор, тақводор, художўй; табаррук, покиза] 1 Ёмон ишлардан сақланувчи, художўй, тақводор. *Шарму иффат, ору номус, сабру имон ўргатуб, Айлаб инсон ваҳши(й)ларни, порсо қилди қалам. Ҳамза, Танланган асарлар.*

2 Порсо (эркаклар исми).

ПОРТ I [фр. port < лот. portus — гавань, бандаргоҳ] Денгиз ёки дарё қирғоғида кемалар турадиган ва таъмирланадиган, юк юклаш ва туширишга мўлжалланган, кема-

ларни ноқулай об-ҳаводан муҳофаза қилувчи иншоотлари бўлган, махсус жиҳозланган жой. *Дениз порти.* ■ *Порт осмонини қора тутун қоплади. Ҳ. Фулом, Замин юлдузлари. Дунёдаги энг гавжум порт Роттердам (Голландия) ҳисобланади. Газетадан.*

Ҳаво порти айн. аэропорт.

ПОРТ II тақл. с. 1 Юмшоқ идишдаги газ ёки суюқликнинг куч билан отилиб чиқиши, тўқиманинг бирдан ёрилиши ва ш. к. да ҳосил бўладиган товуш ҳақида. *Қоп порт этиб ёрилиб кетди.*

2 айн. **парр.** *Бедана порт этиб учиб кетди.*

ПОРТАЛ I [нем. Portal < лот. porta — эшик, дарвоза] Бинонинг меъморий жиҳатдан алоҳида ишлов берилган, бир қадар ажралиб турадиган олд, кириш қисми.

ПОРТАЛ II Конструкция ёки машинанинг П-симон таянч қисми.

ПОРТАЛ III Интернетда: у ёки бу мавзу бўйича доимо тўлдирилиб, янгиланиб борувчи тўлиқ маълумотларни қамраб олувчи универсал тусдаги ахборот саҳифаси. *Порталдан сиз ўзингизни қизиқтирган педагогика соҳасига оид янгилıklar, мунозаралар, янги педагогик технологиялар ҳақида кўплаб маълумотларни топишингиз мумкин. Газетадан.*

ПОРТАТИВ [фр. portatif < porter — олиб, кўтариб юрмоқ] Кўтариб юришга, бир жойдан иккинчи жойга кўчиришга қулай, енгил ва ихчам. *Портатив фотоаппарат.* ■ *Бундай вазиятда [юррак хуружда] беморга универсал портатив асбоб — электрокардиограф ёрдамга келади. Газетадан.*

ПОРТЛАМОҚ Газларнинг кучли реакция ёки алангаланиш натижасида жуда тез кенгайишидан ёрилиб парча-парча бўлмоқ, бўлақларга ажралиб сочилмоқ (бирор нарса ёки объект ҳақида). *Порох портлаб кетди. Газ портлаб кетди.* ■ *Энди нафас ростлайман деганида, сал нарида бомба портлагани, оёғи жиз этиб куйгани ҳам эсида. Т. Малик, Ажаб дунё. Биринчи дарахт йиқилиши билан иккита мина портлаб, бир неча кишини учириб кетди. И. Раҳим, Чин муҳаббат.*

ПОРТЛАТГИЧ Артиллерия снаряди, мина, ракета ва бомбалардаги зарядни портлатувчи механизм. *Уч юз йиғирма тонна портлатгич бир ярим километр масофадаги тошлоққа чуқур ўрнатилган. С. Аҳмад, Уфқ.*

ПОРТЛАШ 1 Бирор нарсанинг кучли босим остидаги, ўта қиздирилган газлар ҳосил бўлиши билан кечадиган оний парчаланиши, вайрон бўлиши. *Даҳшатли портлаш товушлари, ернинг тинмай силкиниши, Нориннинг чайқалиши одамларни ваҳимага солиб қўйди. С. Аҳмад, Уфқ. Замин қандайдир кучли қувватдан титраб кетди ва шу лаҳзада қулоқ эшитмаган портлаш рўй берди.* Газетадан.

2 кўчма Ҳазабланишдан келиб чиқадиган руҳий-асабий ҳолат. *Назар хотинининг тўлиб турганини, ҳадемай «портлаш» юз беришини биларди.* Э. Усмонов, Ёлқин.

3 тлш. Жипслашган фаол ва нофаол нутқ аъзоларининг ҳаво оқими босими таъсирида оний ёрилиши (очилиши).

ПОРТЛОВЧИ 1 Портлаш хусусиятига эга бўлган, портлайдиган. *Портловчи моддалар.* ■ *Бундай қарорларнинг оқибатлари империянинг ўзи учун портловчи модда бўлиб хизмат қилади.* Газетадан.

2 тлш. Нутқ аъзоларининг жипслашуви ва ҳаво оқими босимининг шу аъзоларни ёриб ўтиши натижасида ҳосил бўладиган (ундош). *[Б ундоши] Ўзбек тилида жарангли портловчи ундошлар орасида максимум жаранглилик касб этади. «ЎТА».*

ПОРТРЕТ [фр. *portrait* — тасвир] **1** Реал ҳаётда мавжуд бўлган бир ёки бир неча кишининг ёки рассом тасавуридаги қиёфанинг тасвири ёки фотограф томонидан ишланган сурати. *Декан чиқиб кетганидан кейин Гавҳар нам ўтиб кетган газетани варақлади. Иккинчи саҳифанинг чап томонида Гавҳарнинг катта портрети босилганди.* Ў. Ҳошимов, Қалбингга қулоқ сол. *Чап девордаги гилам устига қоқилган Шамси Тўраевичнинг портретига тикилиб қолди Баширжон. Н. Аминов, Қаҳқаҳа. Рассом ижодига портрет жанри асосий ўрин эгаллайди.* Газетадан.

2 кўчма Адабий асарда персонажлар қиёфасининг тавсифи, тасвири. *Л. Толстой портрет устаси эди.* ■ *Драматик достонларда ҳам портрет, пейзаж бўлади.* «ЎТА».

ПОРТРЕТИСТ айн. **портретчи.**

ПОРТРЕТЧИ Портрет устаси, портрет чизувчи.

ПОРТСИГАР [фр. *porte-cigares* < *porter* — олиб юрмоқ + *cigarette*] Сигара ёки папи-

рос солиб юриладиган қутича; папирос қути. *Чарм портсигар. Қумуш портсигар.* ■ *Терговчининг газаби қайнаб кетди. Аммо буни сездирмаслик учун портсигаридан папирос олиб тутатди.* И. Қаландаров, Шоҳидамас, баргида.

ПОРТУГАЛ қ. **португаллар.** *Португал халқи. Португал тили. Португал аёл.*

ПОРТУГАЛИЯЛИКЛАР Португалиянинг туб аҳолисини ташкил этган, роман тиллари гуруҳига мансуб тилда сўзлашувчи халқ. *Португал халқи.*

ПОРТУГАЛЛАР айн. **португалияликлар.**

ПОРТФЕЛЬ [фр. *portefeuille* < *porter* — олиб юрмоқ + *feuille* — варақ] **1** Китоб, дафтар, ҳужжат кабилар солиб олиб юриладиган дастали ва қопқоқли махсус сумка. *Ҳафиза портфелини айвонга отиб юбориб, ичкарига, уйга кирди-да, ечинмай, ўзини каравотга ташлади.* Мирмуҳсин, Умид. *Портфелни олиб, эшик олдига бориб турдим.* С. Сиёев, Ёруғлик. *Айниқса, отам олиб берган янги портфелнинг ҳиди бошқача туюларди.* Газетадан.

2 Нашриётларда, газета, журнал муҳарририятларида навбатдаги нашр учун тўп-ланган қўлёзма материаллар мажмуи. *Муҳарририят портфелида анчагина мақола бор.*

ПОРЦИЯ [лот. *portio* — ҳар бир одамга тегишли улуш, ҳисса] **1** Бирор нарсанинг кимгадир, нимагадир мўлжалланган ўлчовли бўлаги, миқдори. *Доривор порциялари.*

2 Ресторан ёки ошхонада бир хўрандага мўлжалланган маълум миқдордаги егулик. *Икки порция шўрва. Тўрт порция лағмон.* ■ *Ярим порция карам шўрва ичдим. Парҳездаман [деди ишчи]. «Саодат».*

ПОРШЕНЬ [қад. р. *поршень* — енгил оёқ кийими тури] Насос, двигатель, компрессор каби асбоб ва машиналарнинг цилиндри ичида тигиз ҳаракат қиладиган, суюқлик, газ ёки буғни ҳайдовчи, сўрувчи ҳаракатчан деталь. *Чўян поршень. Трактор двигателининг поршени. Поршень ҳалқаси.* ■ *-Тўхтанг, ички двигателнинг поршенида бир гап борга ўхшайди, — деди Раҳимжон. О. Ёқубов, Баҳор кунларидан бирида.*

ПОСАНГИ [ф. *پاسنگ / پارسنگ* — тарози паллаларини тенглаштирувчи қўшимча тош] **1** Тарози паллаларини тенглаштириш ёки идиш оғирлигини чиқариб ташлаш учун тарозининг бир томонига қўйиладиган қў-

шимча тош. *Тарозига посанги қўймоқ.* ■ *Тарозибон гангиб қолиб, посанги тошни шимининг чўнтагига солди.* М. Муҳамедов, Қаҳрамон изидан.

2 кўчма Тенглик, мувозанат. *Ашурмирзо посангисини йўқотиб, ерга ўтириб қолди.* М. Исмоилий, Фарғона т. о. *Ҳа, табиат адолатли, азизим, у доим тарозининг посангисини тенг ушлайди.* «Ёшлик». *Муҳаббатда бой ила гадоёй Посангиси бир эмиш азал.* М. Али, Боқий дунё.

3 айн. балансир 2.

4 Турли машина ва конструкцияларга таъсир қиладиган куч ва моментларни мувозанатлаш учун бириктириладиган қўшимча юк.

ПОСБОН [ф. پاسبان — қоровул, кўриқчи < پاس — туннинг бир қисми + بان — сақловчи, кўриқловчи] *кт.* **1** Бирор кимса ёки нарсанинг хавфсизлигини, дахлсизлигини таъминлаш учун постда турган киши; кўриқчи, соқчи, қоровул. *Бири кўжда шунқор.* *Бири чегарада юрт посбони.* С. Абдулла. *Шоир, тевараги Ширим қоровул бошлиқ махсус посбонлар кўриқлаган ҳашаматли ипак чодирга кирди.* Ойбек, Навоий. *Нақшинкор дарвозанинг икки ёнида икки қуролли посбон шамдек қотиб турарди.* М. Осим, Карвон йўлларида.

2 кўчма Муҳофаза, ҳимоя қилувчи; сақловчи, ҳомий. *Саломатлик посбонлари (шифокорлар).* ■ *Ширин сўз, ширин муомала, ширин турмуш — саломатликнинг посбони бўлиб хизмат қилади.* Газетадан. *Малоҳат — ҳаё ёнида посбон.* Газетадан.

ПОСБОНБОШИ Бирор кимса ёки нарсанинг хавфсизлигини, дахлсизлигини таъминлаб турган кўриқчи ёки соқчиларнинг бошлиғи. *Шунақами? Хўп ғалати эканку жаннат, Посбонбоши келганида бу сирни айтай.* А. Орипов, Йиллар армони.

ПОСБОНЛИК Кўриқчилик, соқчилик; қоровуллик. *Посбонлик қилмоқ.* *Посбонликда турмоқ.*

ПОСЁЛКА [р. посёлок — кичик аҳоли маскани < поселение — истиқоматгоҳ, қароргоҳ < селить — яшаш учун жой бермоқ, жойлаштирмоқ] **1** Одатда шаҳар ёки катта қишлоқдан унча узоқ бўлмаган кичик қишлоқ. *Буларни станциядан посёлкага олиб келган шофёр йигит тақир ерда танҳо тиккайган водопровод жўмрагига шланг тиқиб,*

юк машинасини ювяпти. Ҳ. Фулом, Замин юлдузлари. *Бу масканда темирйўлчилар учун йиғирмата коттеждан иборат мўъжаз посёлка қад ростлади.* Газетадан.

2 Шаҳар кўринишидаги катта қишлоқ. *Дехқон хонадонлари шаҳар типида қурилган обод посёлкалардаги шинам, данғиллама уйларида фаровон ҳаёт нашидасини суряпти.* Газетадан. *Мамлакатимизда беш ярим мингдан ортиқроқ шаҳар ва шаҳар типидagi посёлка бор.* Газетадан.

ПОСИЛКА [р. посылка — ўраб, идишга жойлаб жўнатилган нарса < послать — бирон жойга жўнатмоқ, юбормоқ] Яшикка жойлаб ёки ўраб, почта ёки бирор кимса орқали юборилган нарса. *Посилка юбормоқ.* *Китобларни посилка қилмоқ.* ■ *Ундан кўра отанг бечорага битта-ярымта посилка юборсангчи, оғайни!* О. Ёкубов, Эр бошига иш тушса. *Мунаввархон унга посилка жўнатди.* С. Зуннунова, Гўдак ҳиди.

ПОСИРА I [ф. پاسره] **1 тар.** Катта ер эгалари томонидан батракларга вақтинча фойдаланиш ва ҳосилдан давлат солиқларини тўлаш учун ажратилган ер майдони.

2 шв. Томорқа. *Янги ерлар ўзлаштирдик — сизга посира, Пахта, ғалла таишвишини тортмангиз сира.* Т. Н. Қориниёзий.

ПОСИРА II Йиғилган, ғамланган нарса; кўр. *Посира қилмоқ.* ■ *Бугдойпоя! Биздан илгари раис бу ерни одамларга бериб қўйган экан. Посира экиб олишарди-да.* Ш. Холмирзаев, Оғир тош қўчса.

ПОСОН [«фасон» с. дан] *с.т. қ. олифта.* *Ёнида посонроқ кийинган кишиям бор.* *Райондан келган вакил экан у.* С. Сиёев, Саратонда қор ёғди. *Бу ердан исқирт кўйлагини кийиб чиқиб кетиб, у ерда посон бўлиб олар экан.* «Муштум».

ПОСТ [фр. poste < итал. posto — муайян жойга қўйилган] **1** Кўриқлаш ва мудофаа қилиш учун соқчига ёки соқчилар гуруҳига топширилган жой. *Майли, ёмғир, қор ёғсин, Ўз постимдан кетмайман. Аскарлик қасамимга Ҳеч хиёнат этмайман.* Уйғун. *Майли, иғволарда ой ҳам тутилсин, Шу постда солдатсан, токи ҳаётсан.* Ф. Фулом, Танланган асарлар. *Биз, Ватан ҳимоячилари, ўз постимизда ҳушёр турсак, ҳеч ким бизнинг тинч ва осойишта ҳаётимизга раҳна сололмайди.* Газетадан.

2 Муайян ҳудудни қўриқлаш, кузатиш учун қўйилган ёки ёрдам кўрсатиш учун уюшган кишилар гуруҳи. *Санитария постлари.* ■ *Ремонт технологиясини тубдан ўзгартириб, унда ремонт турлари бўйича постлар ташкил этилди.* Газетадан. *..устахона халқ назорати пости қандай иш билан шуғулланаётгани менга қоронғи.* Газетадан.

3 Масъулиятли лавозим, мансаб, вазифа. *Директорлик пости. Раҳбарлик пости.* ■ *-Аввал каттароқ постда ишлаганмисиз? -Э, йўқ, — деди у киши, соддалигимни кўриб, завқи келди чоғи, тиззаларига уриб кулди.- Борзорда оддий паттачи бўлганман.* Н. Аминов, Қалтис хато.

ПОСТАМЕНТ [лот. postamentum] Музей, бадий кўргазмаларда ҳайкалларнинг тагига қўйиладиган мрамор ёғоч таглик. *Гранит постамент.* ■ *Йўлдош Охунбобоевнинг баланд постаментга ўрнатилган, бронзадан ишланган ҳайкали узоқдан кўзга ёрқин ташланиб туради.* Газетадан.

ПОСТАНОВКА 1 [р. поставитъ — қўймоқ] Томошабинларга кўрсатиш учун тайёрланган сахна асари, спектакль. *Цирк ўқувчилар учун турли томошалар, постановка кўрсатади.* ■ *Ўзбекистон телевидениесида Санъат Рўзиматов «Бир гўзал бормиш» постановкасини кўяркан, этакчи образга Турсунойни чиқарди.* «Саодат».

2 Драматик асарни, пьесани тайёрлаб сахнага қўйиш. *Пьесанинг янги постановкаси. Постановка қилмоқ.* ■ *Жамоа унга Н. Сафаровнинг «Уйғониш» драмаси постановкасини топширди.* Газетадан.

ПОСТАНОВКАЧИ Пьеса, фильм кабиларни постановка қилишга, спектаклни сахнага қўйишга раҳбарлик қилувчи мутахассис; режиссёр.

ПОТ шахм. қ. пат II. *Нафақат пиеда ёки бирорта сипоҳ, балки шоҳ ҳам ўрнидан жилломай қолганда, уйин пот бўлади.* Газетадан.

ПОТАШ [ингл. potash < pot — кўза, тувак + ash(es) — кул] ким. Ишқор хусусиятига эга бўлган оқ донатор, порошоксимон модда. *Калий тузларидан кимё саноатида поташ, калий селитраси, бертоле тузи каби.. маҳсулотлар тайёрланади.* М. Зокиров, Бебаҳо хазина.

ПОТЕНЦИАЛ I [лот. potentia — куч, қувват] 1 физ. Электр ёки магнит майдони-

нинг маълум нуқтадаги ҳолатини белгилайдиган миқдор, катталиқ. *Ҳужайрадан чиқувчи калий ионлари ҳужайра мембранасининг ички ва ташқи сиртлари ўртасида доимий электр потенциални пайдо қилади.* «Фан ва турмуш».

ПОТЕНЦИАЛ II [лот. potentia — салоҳият] 1 Бирон-бир жиҳатдан имкониятлар, куч-қудрат даражаси; фойдаланилиши мумкин бўлган воситалар, имкониятлар мажмуи. *Ўзбекистон Республикаси ўз сиёсий ва иқтисодий мустақиллигини ҳимоя қилиш имконини берадиган етарли потенциалга эга.* Газетадан. *Бухоронинг ер ости ва ер усти бойликлари, моддий потенциали жуда буюк.* Газетадан.

2 Фойдаланилиши мумкин бўлган, аммо рўёбга чиқмаган. *Потенциал имкониятлар.* ■ *Ватанимиз жанубий чегаралари яқинидаги қуролли можароларнинг ўчоқлари ҳарбий хавфнинг потенциал манбаларибдир.* Газетадан. *Муҳими — маъжуд илмий потенциалдан фойдаланиш, шу потенциални тезроқ ишга солиш.* Газетадан.

ПОТИНЖОН I айн. бақлажон. *Потинжон украси.*

2 шв. Памилдори, помидор.

ПОТИРЛАМОҚ I с.т. қ. **ПАТИРЛАМОҚ I.** *Қалъа девори қавакларидан потирлаб қушлар учиб чиқарди.* «Ёшлик».

2 кучма с.т. Безовта бўлмоқ, шошилиб, ҳовриқиб қолмоқ. *Лекин юраги безовта. Нимагадир потирлайди.* Т. Малик, Шайтанат. *Зайнабнинг эса юраги потирлаб, жони ҳалқумига келиб қолди.* Т. Малик, Шайтанат.

ПОТИҲА с.т. қ. **ФОТИҲА.** *Потиҳа қиб, арвоҳиға бағишлаб, Бу мазордан чиқиб кетди йўл бошлаб.* «Баҳром ва Гуландом».

ПОХОЛ I Бугдой, шоли каби бошоқли ўсимликларнинг дони янчиб олингандан кейин қолган қуруқ пояси. *Бир боғ похол.* ■ *Қорамоллар рационни асосан дағал хашак, похол ва ўсимликлар поясидан иборат эди.* Н. Мавлонов, Қорамолчилик.

2 Походдан қилинган (тўшак ёки бошқа нарса). *Сўридаги похол устига ҳар ким ўз ўрнини ёза бошлади.* Ҳ. Фулом, Замин юлдузлари. *Бир гал Фарғона водийсини кезиб юрганимизда, бизга ҳамроҳ бўлган яқин дўстимизнинг рафиқаси магазинга кириб, похол иляпа олиб чиқди.* К. Қаҳҳорова, Чорак асп ҳамнафас.

Олдига похол солмоқ Куруқ гап, ваъдалар билан алдамоқ, лақиллатмоқ, кишини аҳмоқ қилмоқ. - *Олахўжа махсум, "Қарга қарганинг кўзини чўқимайди," деб нодонларнинг олдига похол солиб туради.. — деди Абдурашул. П. Турсун, Ўқитувчи.*

ПОЧА [ф. *پاچه / پاچه* — кичик оёқ; оёқнинг пастки қисми; қўй ва б. ҳайвонлар оёғининг оқват сифатида ейиладиган пастки қисми] 1 Ҳайвонлар оёғининг тиззадан пастки қисми. *Бўри қўйнинг почасидан олибди. ■ Улоқчи, қамчиннинг дастасини тишлаб, улоқчининг почасидан тортади.* Газетадан.

2 Оёқнинг тизза билан тўпиқ ўртасидаги қисми; болдир. *Ит почамдан олди. ■ Нусратбекнинг танидаги титроқ бир оз пасайди. Секин, салмоқли одимлаб бораётиб, ўз хатти-ҳаракатини оқлашга уриниб, ўзига тасалли бера бошлади: «Йўлдан чиққан ҳар қандай дайди лайча вовулади, почамга ёпишса, индамай кетавераманми?». С. Нуров, Нарвон. *Ғайбулла қизариб, ўрнига бориб ўтирмақчи эди, Ҳасан унинг почасига ёпишди. С. Сиёев, Ёруғлик.**

3 Шимнинг, шалварнинг тиззадан пастки қисми. *Низомжон, шоликорликка кирман, деб шимининг почасини шимараётган эди, Тўланбойнинг ўғли келиб қолди. С. Аҳмад, Уфқ. Оғзидаги носини тупуриб, бисмилло, деганича шимининг почасини шимариб, кетмон билан ўрага тушди. С. Аҳмад, Сайланма.*

4 Устки узун кийимнинг этагига тикилган жияк, ҳошия. [*Шоир*] *Шоҳи тўн устидан.. қундуз почаси бор пўстинини кийди. Ойбек, Навоий.*

5 Поя, оёқ. *Стул почаси. ■ Ота писмиқ келиб, каравотнинг почасига суянди. Э. Раҳимов, Ажаб қишлоқ.*

6 Пиллапоя, поғона. *Мирзиёд.. оёғини нарвон почасидан аста олди. А. Мираҳмедов, Кулган чечаклар.*

ПОЧАПУЎСТИН [ф. *پاچه پوستين* — почадан қилинган пўстин] Тулки ва б. ҳайвонларнинг оёғи мўйнасидан тикилган сирма пўстин. *Уч ой ёз демасангиз, эғнидан сариқ почапўстинини ечмайди. С. Сиёев, Аваз. Ниҳоят, эғнида почапўстин, бошида тулки тумоқ кийган Умаршайх мирзо узангига оёқ кўяди. Х. Султон, Бобурийнома.*

ПОЧАПУЎСТИНЛИ Почапўстинга эга, почапўстин кийган, почапўстини бор. *Зум ўтмай, ранги ўчган дадамнинг кетидан*

Далавой билан почапўстинли меҳмон уйга кириб келишди. «Ёшлик».

ПОЧАҚИРҚАР Сертикан, оқ гулли наъматак.

ПОЧИН [р. чинить — «қилмоқ, яратмоқ, барпо қилмоқ» фл. дан ясалган от] 1 Бирор ишга киришиш, бирор ишни бошлаш; ташаббус. *Ҳар қандай почин, қимматли ташаббусларнинг бошида ветеранларнинг доимо бош-қош бўлиб туриши ажойиб анъанага айланиб қолди.* Газетадан.

2 с.т. Бирор ишнинг бошламаси. -*Ҳар нарсадан ишқал топадиган бўлибсиз, — деди Нафиса. — Ҳар ҳолда ташаббус ахир! Ибрат, почин!* А. Мухтор, Туғлиш.

Почин қилмоқ 1) биринчи бор бошлаб бермоқ; 2) савдони очмоқ, савдо-сотикни бошламоқ.

ПОЧТА [пол. *poczta*, итал. *posta* < лот. *positus* — хат, хабар етказувчи отлик чопар; бекат, станция] 1 Хат, хабар, жўнатма, газета-журнал, ҳужжат, пул ва ш.к. ни қабул қилиб, тайинланган кишига ёки жойга етказиб берадиган давлат алоқа муассасаси ва шу муассаса жойлашган бино. *Шаҳар почтаси. Дала почтаси. ■ Почтага борсам, пул билан шу қоғозни қўшиб берди. С. Зуннунова, Кўк чироқлар. Уни шаҳар одамлари, айниқса, ерли халқ кам танийди. Ниҳоят почтада ишловчи [ўзи ерли халқдан етишиб қолган!] настрок бир маъмур.. Чўлпон, Кеча ва кундуз.*

2 Шундай муассаса томонидан етказиб берилган ёки олинган нарсалар (хат, жўнатма ва ш.к.). *Менга почта келтирган хатларнинг сони 200 дан ошиб кетди. Н. Сафаров, Оловли излар. Агарки қўшингиз почта қутисидан сиз обуна бўлган адабиёт газетасини олиб, сиздан олдин ўқишга тушса, хафа бўлманг.* Газетадан.

ПОЧТАЛЬОН [фр. *postillon*] Хат, газета, журнал кабиларни эгаларига етказиб берувчи почта ходими. *Ҳовлидан почтальон чолнинг чақиргани эшитилди. «Шарқ юлдузи». Почтальон индамай, кўк қоғознинг бир чеккасини кўрсатди. Л. Тожиева, Меҳрим сизга, одамлар.*

ПОЧТАМТ [нем. *Postamt*] Шаҳарнинг марказий почтаси, марказий почта идораси.

ПОЧТАХОНА [почта + хона] Почта ўрнатишган бино. *Район алоқа бўлими бу ишни жуда қулай ва маъқул кўриб, кейинчалик бир мунча колхозларда шундай почтахоналар*

ташқил қилди. А. Қаҳҳор, Қўшчинор чироқлари. Кузда почтахона ёнида аллақандай эски бинога жойлашган мактабга қатнай бошладим. Ў. Ҳошимов, Икки эшик ораси. Толибий шўрва стипендия ололмай ва кунига уч марта почтахонага зир югуриб, уйдан пул кутиб юрган студентларга мўлжалланади. Газетадан.

ПОЧТАЧИ айн. **почтальон**. Кейин газета тарқатиб юрган почтачи боладан икки-уч газета олиб, турган жойида саҳифаларга кўз югуртира бошлади. С. Аҳмад, Уфқ. Анави Абдурахим почтачининг ўғли ҳам тасқара бўлиб олиб, копток тепгани тепган.. Мирмуҳсин, Умид. *Уч ҳафтадан бери на хат бор, на бир хабар.. дарвоза тиқ этса, почтачи хат ташлаб кетдимикан, деб кўчага югурман. Н. Қиличев, Чигирик.*

ПОЧЧА 1 Опанинг эри. *Ия, почча, нима қилиб юрибсиз? С. Аҳмад, Уфқ. Кичик поччам ўйланиб, менга юзланди. С. Сиёев, Ёруғлик. Сал ширакайф бўлиб ўтирган Содиқжон аллақандай сирли иш борлигини, поччаси ундан яшираётганини сезиб қолди. Р. Файзий, Чўлга баҳор келди.*

2 эск. Исмларга қўшилиб, ҳурмат маъносини билдиради. *Фақирдек бир содда муллонинг ўрус забонида сўзлаша билганимга таажжубланди шеклли, бошдан-оёқ Маҳзум поччангизни кузатиб чиқди. А. Қодирий, Кичик асарлар. Баззоз поччанинг бекорчи оғизга тоби йўқ эди. М. Исмоилий, Фарғона т.о. Озгина таҳаммул қилсин-чи, бек почча. А. Қодирий, Мехробдан чаён.*

3 шв. Ўздан катталарга мурожаат шакли.

ПОШИКАСТА [ф. *پاشكاسته* — оёғи синган; синиқ оёқ] с.т. Ожиза, заифа. *Пошикаста заифаларни сўкманглар. Т. Мурод, Отамадан қолган далалар. Ай пошикасталар, девордан кўп бўйлай берма, полвонларнинг хаёлини бўласан! Бор, ўсмангни қўй. Т. Мурод, От кишнаган оқшом.*

ПОШЛИНА [қад. р. пошлина — қадимги урф-одат] Муайян иш, амаллар, кўрсатилган хизматлар учун фуқаролардан, муассаса ва ташкилотлардан давлат органлари ундириб оладиган пул йиғимлари. *Божхона пошилиnasi. Суд пошилиnasi. ■..сай-ёҳлик мақсадларига мўлжалланган транспорт воситалари учун божхона пошиналари тўлашдан 3 йил муддатга озод қилинсин. Газетадан.*

ПОШНА [ф. *پاشنه* — оёқ кафти, товон; пошна] Оёқ кийимининг товонига таг-чармдан баландроқ қилиб қоқилган қаттиқ чарм ёки бошқа бирор нарсa. *Ботинканинг пошнаси. Этикнинг пошнаси. ■ У баланд пошналарини полга дўқ-дўқ уриб, хонадан чиқиб кетди. «Ёшлик». Қайтиб келганларининг эртасигаёқ Собирова она ишда киядиган пошнаси йўғон туфлиси ва одми атлас кўйлагини кийиб, райкомга борди. Ш. Холмирзаев, Бодом қишда гуллади.*

ПОШНАЛАМОҚ 1 Пошна қўймоқ, пошна қоқмоқ. *Этикни пошналамоқ.*

2 Пошна билан ниқтамоқ, босмоқ, тепмоқ. *Аваз отини ўйнатди.. Пошналаб чўлда жўнатди. «Зулфизар билан Авазхон» [Малай] ..уни [отини] қамчилаб, пошналаб қистаб суриб, бир зумда кўздан ғойиб бўлган. С. Айний, Эсдаликлар.*

ПОШНАЛИ Пошнаси бор; пошнаси баланд. *Резина пошнали этик. ■ ..Лекин сочларини тепасига кўтариб турмаклар, [Раиса] оёқларига баланд пошнали туфли кийса, бўйи чўзилиб, анча хушқомат кўринарди. М. Хайруллаев, Тилла маржон. [Зиёдулла:] Этигим баланд пошнали, така терисидан. Т. Мурод, От кишнаган оқшом.*

ПОШНА 1 Хотин-қизларга мурожаатда ҳурмат ёки эркалатишни ифодалайди. *-Хушвақт бўлинлар, айланай, пошша қиз.. — деди хотин ва Кумушга қараб давом этди, — ану кунги сўзингиз билан йўлдан қайрилиб кирган эдим. А. Қодирий, Ўтган кунлар. Юринг, келин пошша, уйингизни кўрсатинг. Х. Гулом, Машғал. Шу пайт Руқия пошша эшон ойига духобадай майин овози билан деди.. К. Яшин, Ҳамза.*

2 Пошша (хотин-қизлар исми).

ПОШШАХОН 1 Хотин-қизларга мурожаатда ҳурмат ёки эркалатишни билдиради. *Кўзимиз тўрт бўлди, пошшахон, базмингизга муштоқмиз, қани, ўтиринг. Ойбек, Танланган асарлар.*

2 с.т. Энг яхши, сара. *Элмурод ҳам йигитларнинг пошшахони-да! Майли, иккови қовушсин. Шухрат, Шинелли йиллар. -Ҳуснда тенги йўқ. Қизларнинг пошшахони. -Билар экансиз, ҳазратим. Узи ҳам ўн еттидан ўн саккизга ўтиб турибди. Мирмуҳсин, Чўри.*

ПОШШО с.т. Подшо(х). *Оқ пошонинг кумуш нишони билан кўтариб юрди у ўша ханжарни. Х. Даврон, Қақнус. Уинқилобни ҳам*

билгани йўқ, бироқ «Некалай пошшонинг тахту тождидан айрилганидан» хабардор, холос. К. Яшин, Ҳамза.

ПОЭЗИЯ [юн. poiesis – асар, ижод; ижод маҳсули] 1 Бадиий ижоднинг шеърий шакли, шеърият, назм. *Поэзия назарияси.* ■ *Поэзиянинг энг салмоқли, катта истеъдод талаб қилувчи поэма жанри Эгам Раҳимов ижодининг негизини ташкил этади.* Х. Ёдгоров, Ҳаёт тўлқинлари. *Поэзиянинг менга маълум бўлмаган сирларини айтиб берди.* Шукрулло, Сайланма.

2 Бирор шоирнинг, халқнинг ёки даврнинг шеърий асарлари мажмуи; шеърлар. *Фурқат поэзияси. Ўзбек поэзияси.* ■ *Ҳ. Олимжон янги ўзбек поэзиясига асос солган шоирлардан биридир.* Н. Сафаров, Оловли излар. *Ўзбек поэзиясида сиқиклик эмас, ёйилмалик ҳукм суради.* «Ёшлик».

ПОЭМА [юн. poietema – ижод маҳсули, яратилган нарса] 1 *ад.* Воқеа, ҳикоя тарзида баён қилинадиган, катта ҳажмдаги шеърий асар жанри, сюжетли шеърий қисса, достон. *Лирик поэма. Эпик поэма.* ■ *Ҳамид Олимжон ғазаллари, шеърлари, баллада ва поэмалари кишилар қалбига жуда раво кириб боради ва сингиб кетади.* Н. Сафаров, Оловли излар. *Ғайратийнинг «Онамга хат» поэмаси унинг ижодиди алоҳида ўрин тутди.* Н. Сафаров, Оловли излар.

2 *мус.* Лирик-драматик ёки лирик-ҳикоявий характерга эга ҳамда эмоционал жўшқинлик билан суғорилган эркин шаклдаги мусиқа асари.

ПОЭТИКА [юн. poietike – поэтик санъат] *ад.* 1 Адабиёт назариясининг сўз санъати асарлари тузилишини унинг изчил ва тарихий қонуниятлари асосида ўрганадиган бўлими; бадиий асарларда қўлланувчи ифода воситалари тизими.

2 Адабиётдаги ёки айрим шоир, ёзувчига хос бирон-бир йўналишнинг бадиий тамойлари ва хусусиятлари тизими.

ПОЯ [ф. پایه – зинапоя, поғона; босқич, пой; оёқ, этак] 1 Ўсимликнинг шохларини, барг, гул ва мевасини кўтариб турадиган, тик ўсадиган ер усти қисми. *Жўхори пояси. Шоли пояси.* ■ *Буғланиб кетган дераза ортида қамиш томдан сизиб тушаётган томчилар кўриниб қолар, ҳовли этагидаги маккажўхори поялари ёмғирдан жунжикиб эгилган.* Ў. Ҳошимов, Қалбингга

кулоқ сол. *Бугдой қип-қизариб пишган, пояларигача қовдек қовурилган эди.* С. Айний, Куллар.

2 Ишқом ёки сўрининг бағазлар маҳкамланадиган ёғочи. *Боғда саккиз узун ишқом: ҳаммасининг поялари яхши ишланган, пушталари чопилган.* Ойбек, Танланган асарлар. *Кўприкнинг нарёғида, ишқомга пояси кесиб олинган кекса тола ёнида Дилдор билан Аъзамжон турарди.* С. Аҳмад, Уфқ. *Бултур эллик киши борган эди. Ҳаммаси хурсанд экан, толлари пояга яраб қолди.* Ҳ. Фулом, Феруза.

3 Оёқ, поча. *Каравот пояси.*

4 Устун. *Рузвон хола аста юриб келиб, Онахоннинг қаршисидаги дўкон поясига суянди.* А. Мухтор, Опа-сингиллар.

5 *шв. айн. поча 1.* Бир нечалар кетар қочиб, Ботир юрар жардан кечиб, Остидаги минган оти Поясидан қонни кечиб. «Муродхон».

6 Замбил, тобут кабиларнинг тутқичи, дастаси. *Кўзлари қизарган одамлар навбат билан тобутнинг поясини елкаларига қўйиб, тез-тез қадам ташлаб кетмоқдалар.* М. Осим, Карвон йўллариди.

7 Поғона, пиллапоя. *Ўртаси даҳлиз билан ажралган икки хона бор, рўпарада болохонага чиқадиган ёғоч зинанинг баъзи поялари тушиб кетган, ўзи лопилларди.* Мирмуҳсин, Умид.

8 *кўчма* Поғона, даража, босқич. [*Навоийнинг*] *Давлатда юқори пояга кўтарилиши хабари уни [Султонмуродни] самимий қувонтирди.* Ойбек, Навоий. *Тарбиялаб, етиштирди вояга, Топди шухрат, чиқди буюк пояга.* Ҳабибий.

9 Баъзи ўсимликларнинг номи билан бирикиб, улар экилган ер, майдон маъносини ифодаловчи қўшма сўз ясаиди, мас: *шолипоя, бедапоя.*

ПОЯКИ [ф. پایه‌کی] *этно. тар.* Чилим кўтариб юриб, кашандаларга чектириб тирикчилик қилган киши. *У вақтларда бозорларда баъзи кишилар чилим кўтариб юрар, чекувчиларга чектириб, бирор нарса олардилар. Бундай одамларни «пояки» дер эдилар.* С. Айний, Эсдалиқлар. *Олма отдим поякининг қизина, Бориб тегди юрагининг кўзина.* «Кўшиқлар».

ПОЯКИЛИК 1 Пояки касби; тамаки, нос сотиш билан шуғулланишлик.

2 Бозорда тамаки ва носвой дўконлари, растаси. *Поякиликдан носвойни оламан-да, таниш ипакфуруш яхудийдан онам буюрган ипакларни харид қилгани жўнайман.* Ойбек, Болалик.

ПОЯКИЧИЛИК айн. **поякилик.** *Искандаров ҳикоясини бошлади: -Менинг отам бўзчи эди. Бойлар уни синдиргач, бўзчиликни йиғиштириб, поякичилик қилди.* Ё. Шукуров, Қасос.

ПОЯМА-ПОЯ кўчма Поғонама-поғона, босқичма-босқич. *Юлдузларга бўлдим ҳамсоя, Чиқдим кўкка пояма-поя.* М. Шайхзода, Чорак аср девони. *Йиллар ўтавериб пояма-поя, Йиллар — умидларга оташин чароғ.* А. Орипов, Йиллар армони.

ПОЯНДОЗ с.т. қ. **пойандоз** 2. *Анвар машина хонасидан чиқди-ю, қўлидаги қоғозни секин-секин силкитганча, ёруғ йўлакдаги гулдор пояндознинг бир чеккасидан бошини қуйи солганича юриб кетди.* Ў. Ҳошимов, Қалбингга кулоқ сол. *Оппоқ нур юқоридан пояндоз сингари тушиб, оёқлари остида тўхтаган эди.* Т. Малик, Шайтанат.

ПОЯС [р. пояс — тасма, камар, белбоғ; ер юзасининг ажратилган бир қисми] 1 *геогр.* Ер шари юзасининг ёнма-ён жойлашган паралеллар ёки икки меридиан оралиғидаги, маълум белгиларга қараб ажратилган қисми. *Меридианлар Ер юзини 24 поясга бўлади. Вақтнинг пояс ҳисоби. Пояс вақти.*

2 Ер шари юзасининг меридианлар билан ажратилган, табиий-иқлимий шароитлари бир хил қисми; минтақа. *Мўътадил пояс. Иссиқ пояс.* ■ *Бу жой жуда кўп иссиқлик олади ва шунинг учун иссиқ пояс деб аталади.* «География».

3 *иқт.* Мамлакатнинг маълум иқтисодий белгиларига кўра ажратилган қисми. *Тариф пояси. Пояс нархлари.*

ПОФОНА I [ф. *پاغانه / پغنه* — зинапоя, нарвон] 1 Зинанинг, нарвоннинг оёқ қўйиб чиқиладиган ва тушиладиган пояларидан ҳар бири; пиллапоя. *Нарвоннинг поғонаси.* ■ *Шотининг бир поғонасига оёқ қўйиши билан калласига, қўшинининг хотини кишидан қочадиган бўлса, андишалик иш бўлмасмикин, деган ўй келди.* С. Аҳмад, Сайланма. *Искандар зинадан икки поғона настга тушиб, автобус эшигида турганча, миннатдор бош силкиди.* М. Мансуров, Ёмби.

2 *кўчма* Ўсиш, юксалиш, тараққиёт каби тадрижий жараёнларнинг ҳар бир босқичи. *Тараққиёт поғоналари.* *Юксалишининг энг юқори поғонаси.* ■ *Мажлисида таъкидландики, мамлакатимизда иқтисодиётнинг муҳим тармоғи бўлган қишлоқ хўжалигида ислохотлар самарадорлигини янги поғонага кўтаришга алоҳида эътибор берилаётир.* Газетадан.

3 *кўчма* Амал, унвон, мартаба каби-ларнинг ҳар бир босқичи. *Домла ўзи етган поғонани ҳам, олдинда уни кутиб турган мартабаларни ҳам севарди.* «Ёшлик». Ҳа, у камолот поғоналаридан тез, ишонч билан кўтарилиб борарди. Ў. Ҳошимов, Қалбингга кулоқ сол. *Аммо кейинги пайтда бу аҳволни тубдан яхшилаш учун бир талай ишлар қилинди. Энг аввало, барча поғонадаги раҳбар кадрлар янгиланди.* Газетадан.

4 Бирин-кетин содир бўладиган иш-ҳаракатнинг ҳар бир босқичи. *Қиз эскичасига яширин равишда сотилди. Энди энг сўнги поғона — домла имомнинг никоҳ ўқиши қолди.* П. Турсун, Ўқитувчи.

Умуртқа поғонаси *анат.* Одам скелетининг бўйин, кўкрак, бел умуртқалари, думгаза, дум суякларининг — умуртқаларнинг устма-уст бирикишидан ташкил топган қисми.

ПОФОНА II *мус.* Товушқатор; ундаги изчиллик ва уйғунликни ташкил этган ҳар бир товуш.

ПОФОНАЛИ 1 Поғоналари бўлган, поғонадан иборат. *Қирқ поғонали зина. Ўн поғонали нарвон.*

2 *кўчма* Босқичлари бўлган; тадрижий. *Поғонали сайловлар.*

ПРАВЛЕНИЕ [р. править — «бошқармоқ, раҳбарлик қилмоқ» фл. дан ясалган от] *эск.*

1 қ. **бошқарма, бошқарув.** *Колхоз правленийеси.*

2 с.т. Шундай орган аъзолари ёки мажлиси, ййғилиши. *Ишни правленийеда ҳал қилмоқ.* ■ *Хўп, бу тўғрида эртага правленийеда гаплашамиз.* А. Қаҳҳор, Қўшчинор чироқлари. *Правление мажлиси эрталаб соат саккизга чақирилган эди.* С. Аҳмад, Уфқ.

ПРАВО [р. право — ҳуқуқ; имконият; асос, сабаб < правый — тўғри, чин, ҳақиқий] Кимсага автомобиль, мотоцикл ва б. транспорт воситаларини бошқариш ҳуқуқини берадиган ҳужжат, гувоҳнома. *Шофёрлик правоси.* ■ *Сиз билан кўришиш учун ҳамма*

шофёрларингизнинг правосини олиб қўйиш керак шекилли. С. Аҳмад, Юлдуз.

ПРАВОСЛАВИЕ [р. православие – түғрилиққа эътиқод] Христиан динининг асосий оқим (мазҳаб)ларидан бири; XI асрда Византияда шаклланган шарқий христианлик (эътиқоддаги маълум қарашлар бўйича Фарбдаги католицизмдан фарқ қилади). *Православие руҳонийлари. Православие черкови.*

ПРАГМАТИЗМ [юн. pragma – иш, ҳаракат] 19-асрнинг 70- йилларида АҚШда кенг тарқалган фалсафий таълимот: билиш объектлари онгдан ташқарида мавжуд бўлмайди, балки амалий масалаларни ҳал қилиш жараёнидаги билиш ҳаракатлари орқали шаклланади, амалиётда инсонга нима кўпроқ фойда берса, ўшанга кўпроқ аҳамият бериш зарур, деган ғояни илгари сурувчи оқим.

ПРАГМАТИК Прагматизм тарафдори. *Яна қизиғи шундаки, мухбир саволига жавоб бера туриб М. Раҳимов, «мен сиёсатга жуда кеч келганман, мен иқтисодчи, реалист ва прагматикман», дейди. Газетадан.*

ПРАГМАТИКА [юн. pragma, pragmatos – иш, ҳаракат] тлш. Семиотика ва тилшуносликнинг нутқда тил белгиларининг амал қилишини, уларнинг ўзаро муносабатини ўрганувчи соҳаси.

ПРАЗЕОДИМ [юн. prasinus – яшил (тузларининг рангига кўра) + dymos – эгизак] Менделеев даврий системасининг III гуруҳига мансуб кимёвий элемент, металл (металлургия саноатида қўлланади).

ПРАКТИК эск. Ўз ишида, соҳасида катта тажрибага эга бўлган, омилкор, тажрибакор мутахассис, шунингдек, фақат амалий иш орқали тажриба, билим орттирган киши. *Практик олим.*

ПРАКТИК қ. **амалий. Практик машғулот. Практик метод.**

ПРАКТИКА [юн. praktikos – фаол, ишчан, серҳаракат] 1 *фл.* Кишиларнинг моддий олам ва жамиятга таъсир ўтказиш йўлида қиладиган ўзгартирувчилик ва бунёдкорлик фаолияти.

2 қ. **амал 1, амалиёт.**

3 қ. **амал 3, амалиёт. Автомат манипуляторлари ишлаб чиқариш ва практикага кенг жорий этиш ҳамкорликнинг асосий йўналишларидан биридир.** Газетадан.

4 эск. Олий ва махсус ўрта ўқув юрларида ўқиш-ўқитиш шаклларидан бири – ўқувчи ва талабаларнинг таълим жараёнида олган назарий билимларини корхона, муассаса ва б. жойларда татбиқ этиши ва мустақкамлаши; амалиёт. *Ишлаб чиқариш практикаси. Талабаларнинг педагогик практикаси. Практикага бормоқ. ■ Аҳмад таътил пайтида Фарғона водийсига практикага борди-ю, у ердаги одамларга қойил қолди. Ф. Мусаёнов, Ҳиммат. Мактабларига практикага келган қиз ёшгина, чиройли студент йигита турмушга чиқди. Ў. Ҳошимов, Қалбингга кулоқ сол.*

ПРАКТИКАНТ эск. Амалиёт ўтаётган ўқувчи, талаба. *Врач практикантлар билан касал кўрмоқда. ■ Шаҳардан чиққан бир тўда практикант-студентлар.. ўша даврда машҳур бўлиб кетган бир қўшиқни айтишар.. эди. С. Аҳмад, Тоғларда.*

ПРАКТИКУМ [юн. praktikos – фаол, ишчан] Асосан олий ўқув юртида бирор ўқув фани бўйича ўтказиладиган амалий машғулотлар мажмуи. *Кимё практикуми. Практикум раҳбари.*

ПРЕДМЕТ [р. предмет – нарса, объект] 1 Сезги аъзолари орқали ҳис қилинадиган, онгимиздан ташқари мавжуд бўлган ҳар қандай аниқ моддий нарса. *..дунёдаги нарсалар, предметлар туғилади, унади, тарқалади, яралиб, йўқ бўлиб туради. «Гулистон».*

2 Айрим ўқув фанини ташкил этган билимлар мажмуи; ўқув фани, дарс. *-Лекин ўқитувчилар ўз предметини яхши билсагина [конспект тузиш] шарт эмас, – деди Нишонов. С. Зуннунова, Янги директор.*

ПРЕДОХРАНИТЕЛЬ [р. предохранять – «сақламоқ, эҳтиёт қилмоқ» фл. дан ясалган от] Отиш қуроли, электр тармоғи ва ш.к.нинг хавфсизлигини таъминловчи мослама. *Электр предохранители. Милтиқ предохранители.*

ПРЕЗЕНТАЦИЯ [лот. praesentatio – тақдим этиш, кўрсатиш] Бирор янги, яқинда пайдо бўлган, яратилган нарсанинг (мас., китоб, журнал, кинофильм, телестур, ташкилот ва ш.к. нинг) жамоатчиликка расман тақдим этилиши. *Кўп ўтмай Вазирлар Маҳкамасининг тегишли қарори ҳам чиқди. Яқинда эса худди шу жамғарманинг презентацияси бўлиб ўтди. Газетадан.*

ПРЕЗИДЕНТ [лот. praesidens, praesidentis — олдинда ўтирувчи] **1** Республика бошқаруви шаклидаги кўпчилик мамлакатларда маълум муддатга сайлаб қўйиладиган давлат бошлиғи. *Ўзбекистон президенти.* ■ Бунда Президент Ислом Каримовнинг «Ўзбекистон театр санъатини ривожлантириш тўғрисида»ги фармони муҳим омили бўлиб хизмат қилмоқда. Газетадан. *Деҳли сафари чоғида Ҳиндистон раҳбарлари билан, жумладан, президент, вице-президент, бош вазир, бошқа ҳукумат аъзолари билан учрашувлар ўтказилди.* Газетадан. *Ўзбекистон Республикаси Президенти кубоги учун ўтказилаётган мусобақанинг барча иштирокчилари ва ташкилотчиларини табриклаш менга улкан мамнуният бахш этади.* Газетадан.

2 Баъзи илмий муассаса ёки жамиятларнинг маълум муддатга сайлаб қўйилган бошлиғи, раҳбари. *Фанлар академиясининг президенти.* ■ Конференцияда Марказий Осиё халқлари маданияти ассамблеяси президенти, таниқли ёзувчи Ч. Айтматов сўзга чиқди. Газетадан. — Юзаки қараганда, мураббийлардан давлат мадҳиясини айтиб беришни сўраб ўтириш баъзиларга бошқачароқ бўлиб туюлиши мумкин, — дейди федерация президенти Пўлат Усмонов. Газетадан.

3 Фирма, банк, компания ва ш.к. даги юқори мансабдор шахс. *Банк президенти. Компания президенти.*

ПРЕЗИДЕНТЛИК 1 Президент лавозими, мансаби. *Президентликка сайламоқ.*

2 Республика тузумидаги мамлакатларнинг маълум муддатга сайлаб қўйиладиган раҳбарлиги. *Президентлик ҳоқимиятида Президентнинг давлат бошлиғи ва ижро этилувчи ҳокимият бошлиғи сифатидаги вазифалари мужассамлашган.* Газетадан.

Президентлик бошқаруви Фавқулодда ҳолатлар жорий этилганда давлат бошқарувида қўлланиладиган вақтинчалик бошқарув шакли. *Президентлик бошқарув усули — шу тизимнинг ўзагидир.* Газетадан.

ПРЕЗИДИУМ [лот. praesidere — олдинда ўтирмоқ, раислик қилмоқ] **1** Мажлис, кенгаш ва ш.к. катта ййғилишларни бошқариб бориш учун сайланган кишилар гуруҳи; ҳайъат. *Олий Мажлис президиуми. Президиум сайламоқ.* ■ Азизхон кейинги

найтларда президиумларда ўтириб ўрганган, наstdа қолиб кетган найтларда мажлисга келгандек бўлмасди. С. Аҳмад, Уфқ. *Ёзувчилар уюшмасида бўладиган ййғинларга келган ёшлар ҳамиша Абдулла Қаҳҳорнинг сўзга чиқишини сабрсизлик билан кутишар, президиумга доимо даста-даста саволлар тўшарди.* К. Қаҳҳорова, Чорак аср ҳамнафас.

2 Баъзи ташкилот, жамият ёки илмий муассасанинг сайлаб қўйиладиган раҳбарлик органи. *Фанлар академиясининг президиуми.*

ПРЕЙСКУРАНТ [нем. Preiskurant < фр. prixcourant < фр. prix — нарх, баҳо + courant — жорий, ҳозирги кундаги] *иқт.* Товарлар, турли хизматлар ва маҳсулотларнинг тизимлаштирилган нархлар рўйхати; нархлар ҳақида маълумотнома; нархнома.

ПРЕМЬЕРА [фр. premier — биринчи] Янги спектакль, эстрада, цирк томошалари, янги фильм кабиларнинг биринчи бор оммавий намойиш қилиниши. *..Уша куни премьера экан, билим юртининг кичкина залига одам сиғмайди.* О. Ёқубов, Излайман. *Премьера. Бугун ҳамма: режиссёрдан тортиб раққосагача, гримчидан тортиб монтергача ҳаяжонда.* «Ёшлик». *Муаллиф номига жуда кўп театрлардан устма-уст телеграммалар келар, улар Абдулла Қаҳҳорни премьерага таклиф қилишар эди.* К. Қаҳҳорова, Чорак аср ҳамнафас.

ПРЕМЬЕР-МИНИСТР [фр. premier ministre — биринчи, бош вазир] Ҳукумат бошлиғи, Вазирлар Маҳкамаси кенгаши раиси.

ПРЕПАРАТ [лот. praeparatus — тайёрланган] **1** *ким.* Лаборатория ёки фабрикада тайёрланган кимёвий ёки фармацевтик маҳсулот. *Дори-дармон препаратлари.* ■ *Эшитиш ҳиссиёти суст бўлган, эшакем касаллигига мойил, қон ивиши паст бўлган кишилар учун ҳам аспириин препарати салбий таъсир кўрсатади.* Газетадан. *Янги препарат қўлланганида, тери тоза бўла бошлайди.* Газетадан.

2 Жонивор ёки ўсимлик организмнинг анатомик, гистологик ва б. жиҳатдан ўрганиш жараёнида кузатиш ёки текшириш учун тайёрланган қисми. *Анатомик препарат. Бақа юрагининг препарати. Препаратлар кўрғазмаси.*

ПРЕСС [лот. presso – босаман, эзаман] Материалларни кучли босим билан (босиб, сиқиб) текислайдиган, деталга босим остида ишлов берадиган машина; исканжа. *Қўл пресси. Штамповка пресси. Прессда сиқиб олинган кунжара.* ■ Юқори унумли прессларда соатига 350 та деталь ишлаб чиқариш мумкин. «Фан ва турмуш».

ПРЕССА [фр. presse – матбуот] Оммавий даврий матбуот (газеталар, журналлар).

ПРЕСС-АТТАШЕ [фр. press-attache] Матбуот ва жамоатчилик билан алоқа масалаларини амалга оширувчи атташе, вакил.

ПРЕСС-БЮРО [ингл. press-bureau < фр.] айн. **матбуот бюроси** қ. **матбуот**.

ПРЕСС-КОНФЕРЕНЦИЯ [ингл. press-conference < фр.] айн. **матбуот конференцияси** қ. **матбуот**.

ПРЕССЛАМОҚ Пресс билан ишлов бермоқ ёки босиб жойламоқ, тахламоқ, исканжаламоқ. *Детални прессламоқ. Пахтани прессламоқ.*

ПРЕССЛОВЧИ Пресс билан ишлов берувчи, исканжаловчи киши. *Мева консерва заводининг прессловчиси Аҳмад Сатторовнинг гапини ҳамма маъқуллади.* М. Хайруллаев, Алёр.

ПРЕСС-ПАПЬЕ [фр. press-papiers < presser – босмоқ, қисмоқ + papier – қоғоз] Босма қоғоз маҳкамлаб қистирилган канцелярия асбоби; босма.

ПРЕСС-СЕКРЕТАРЬ [ингл. presse-secretary] Президент ёки бош вазирнинг матбуот бўйича котиби (вакили); матбуот котиби.

ПРЕФЕКТУРА [лот. praefectura – раҳбарлик, бошчилик; маъмурий даҳа; ноиблик, ноиб қўл остидаги ўлка] Баъзи мамлакатларда, мас., Японияда, асосий маъмурий-худудий бирлик; вилоят.

ПРЕФЕРЕНЦИЯ [лот. praefere – афзал кўрмоқ, имтиёз бермоқ] Бирор бир фаолият турини (мас., айрим ёки барча турдаги импорт молларни олиб киришни) қўллаб-қувватлаш учун айрим давлатлар, корхоналар, ташкилотларга бериладиган афзаллик, имтиёзлар.

ПРЕФИКС [лот. – praefixum < praef – олдан, олдиндан + fixus – бириктирилган] тлш. Сўзнинг ўзак олдидан қўйиладиган қисми, олд қўшимча (бе-, но- каби: *бенуқсон, нотўғри*).

ПРИБОР [р. прибор – асбоб, мослама] **1** Бирор ишни бажариш, бошқариш, тартибга солиш, ҳисоблаш учун ишлатиладиган махсус мослама, аппарат, асбоб. *Ўлчаш прибори. Оптик прибор. Иситиш прибори.* ■ *Пахта толаси сифатини аниқлайдиган прибор ҳам яратилди.* Газетадан. *Сезгир приборлар ер бағрининг ҳолатига туну кун қулоқ солиб туради.* Газетадан.

2 Маълум бир иш ёки мақсад учун қўлланадиган нарсалар мажмуи. *Ёзув прибори.*

ПРИВАТИЗАЦИЯ [лот. privatus – хусусий, айрим шахсга тегишли ёки алоқадор] иқт. Давлат ёки маҳаллий бошқарувга тегишли мол-мулкни (ер майдони, sanoат корхонаси, банк, транспорт ёки алоқа воситалари, бино, уй-жой ва ш.к. ни) пулга ёки текин хусусий мулк қилиб бериш; хусусийлаштириш. *Приватизация шароитига қараб пулли, бепул ёки имтиёзли тарзда ўтказилади.* «Иқтисодиёт назарияси».

ПРИЁМНИК [р. принять – «қабул қилиб олмақ» фл. дан ясалган от] эск. **1** Радиотехника ва телемеханикада электромагнит, ёруғлик ва б. тўлқинлар ёрдамида сигнал, нутқ, мусиқа, тасвир кабиларни қабул қилиш учун мўлжалланган аппарат.

2 с.т. Радиоприёмник. *Ўрнидан туриб, приёмникни буради-да, унга бағрини бериб, тирсаги билан сунганича, дераздан ҳовлига қараб, индамай тураверди.* С. Зуннунова, Кўк чироқлар. *Бу устахонада турли марказдаги приёмник, телевизорлар чанг босиб ётарди.* Т. Ашуров, Оқ от.

ПРИЗМА [юн. prisma – қирқилган, араланган] **1** мат. Икки ёғи (асослари) тенг ва параллел кўпбурчакдан, ён ёқлари эса параллелограммлардан иборат бўлган кўпёқлик. *Уч ёқли призма. Кўп ёқли призма.*

2 физ. Худди шундай шаклга эга бўлган, турли оптик, спектрал асбоб ва аппаратларда ёруғлик нурининг йўналишини ўзгартириш, мураккаб нурни спектрга ажратиш ва б. жараёнлар учун хизмат қиладиган шишасимон ўта тиниқ жисм. *Нурни призма орқали спектрларга ажратмоқ.*

Призмадан ўтмоқ кўчма Муайян омилларнинг билвосита таъсирида бўлмоқ, шундай таъсирни бошдан ўтказмоқ. *Мазкур ғоялар, шак-шубҳасиз, бутун бир миллий қадриятлар ва тасавурлар призмасидан ўтган эди.* Газетадан.

ПРИКАЗЧИК [р. приказать — «буйурмоқ, буйруқ, фармойиш бермоқ» фл. дан ясалган от] эск. 1 Савдогарларга ёлланган ва уларнинг савдо-сотик ишларини олиб борган хизматчи; гумашта. *Улар харидор билан битишгандан сўнг, қолган ҳамма ишни.. приказчик Саидмурод бажарар эди.* Ойбек, Танланган асарлар.

2 Помешчикнинг ер-мулкни бошқарувчи, хўжалик ишларини бажарувчи хизматчи.

ПРИЛАВКА [р. прилавок — пештахта] с.т. эск. айн. **пештахта**. *Салимжон прилавка устига молларни ёйди.* Ҳ. Фулом, Замин юлдузлари.

ПРИМИТИВ [лот. primitivus — биринчи, илк, дастлабки, энг аввалги] 1 Замонавий талабларга жавоб бермайдиган, жуда содда, ибтидоий. *Примитив асбоб.*

2 Илмга асосланмаган; оддий, содда. *Примитив қарашлар.* ■ *Ота-боболаримиздан қолган примитив методлардан аллақачон воз кечганмиз.* С. Аҳмад, Юлдуз.

ПРИМУС [лот. primus — биринчи] эск. Рўзғорда овқат пишириш, сув иситишга мўлжалланган, керосинни горелкага ҳайдаб берувчи насоси бўлган асбоб. *Гугуртни топиб, примусни ёқди.* «Ёшлик». *Ҳозирда примусни бағиллатиб, чой қўйди, нон ушатди, пиёздай юпқа қилиб колбаса тўғради.* «Шарқ юлдузи».

ПРИНТЕР [ингл. printer] Компьютерда матн ёки график тарздаги маълумотларни қоғозга чиқариш (чоп қилиш) учун мўлжалланган босиш қурилмаси. *Бу йил яна шу туманлардаги мактабларга университет балансидан 22 та компьютер, принтерлар, лингафон синфлари учун жиҳозлар ҳада этилди.* Газетадан.

ПРИНЦИП [лот. principium — асос, негиз; ибтидо] 1 Бирор назария, таълимот, дунёқараш ва ш. к. нинг дастлабки, асосий қонун-қоидаси; фаолият учун асос қилиб олинадиган бош ғоя, қонун-қоида. *Қонунларимизда сайлов принциплари тўла ва аниқ акс этиши зарур.* «Фан ва турмуш». *Қонуннинг устуворлиги ҳуқуқий давлатнинг асосий принциpidir.* Газетадан. *Бизнинг принципларга мувофиқ бозор иқтисодиётига босқичма-босқич ўтиш керак.* Газетадан.

2 Хулқ-атвор, хатти-ҳаракат меъёрларини белгилайдиган, киши оғишмай амал

қиладиган ички ишонч, нуқтаи назар, қараш, маслак. *Принципи йўқ одам.* *Принцип юзасидан иш тутмоқ.*

ПРИНЦИПАЛ [лот. principialis — бош, асосий] сфт. Принципдан келиб чиқадиган, муҳим, жиддий. *Принципал қарама-қаршилик.* *Принципал масала.* ■ *Жаҳондаги ҳозирги вазиятга икки принципал ҳолат хосдир.* Газетадан.

2 қ. **принципи**. *Принципал одам.*

ПРИНЦИПАЛЛИК 1 Принципал ҳолатга хослик, муҳимлик, жиддийлик. *Масаланинг принципиаллиги.*

2 Ишда ўз принципини изчиллик билан амалга ошириш, бир принципда маҳкам туриш. *Раҳбарнинг принципиаллиги.*

ПРИНЦИПЛИ Принципга қаттиқ риоя қиладиган, бир принципда маҳкам турадиган. *Принципли олим.*

ПРИНЦИПСИЗ Бир фикрда маҳкам тура олмайдиган; бурди йўқ, бебурд. *Принципсиз киши.*

ПРИСТАВ [р. приставить — «қараб, назорат қилиб туриш учун қўймоқ, тайинламоқ» фл. дан] тар. Чор Россиясида: кичикроқ ҳудуддаги маҳаллий полиция бошлиғи. *Ҳали ҳоким билан приставларга берадиган ақча, мингбошилик буйруғини олганда қиладиган чиқимлар бу ҳисобдан ташқаридир.* Ҳамза, Танланган асарлар.

ПРИСТАНЬ [р. пристать — «келиб тўхтамоқ» фл. дан ясалган от] Дарё ва б. сув ҳавзалари соҳилида қайиқлар, кемалар тўхтайдиган, махсус жиҳозланган жой; кичик порт. *Амударё пристанлари.*

ПРИЦЕП [р. прицепить — «тиркамоқ, уламоқ» фл. дан] Ўзйуорар транспорт воситаларига тиркалган арава (моторсиз вагон, платформа); тракторга тиркалган машина, қурул. *Пахтани прицеплар билан ташимоқ.* ■ *У худди юк машинасининг орқасига тирков қилиб қўйилган прицепдек гап.* С. Аҳмад, Юлдуз.

ПРОБА [лол. proba — текшириш, синаш < лот. probare — текширмоқ, синаб кўрмоқ] 1 Қотишманинг муайян масса улушлари миқдорига қанча қимматбаҳо металл борлигини билдирувчи рақам. *96 пробага эга бўлган олтин.*

2 Шундай рақам (миқдор)ни кўрсатувчи тамға. *Пробаси ўчиб кетган олтин қошиқ.*

3 Модда, материал, овқат ва ш.к. нинг синаш, текшириш, таҳлил қилиш учун олинган бир қисми, намунаси. *Текшириш учун газ пробасини олмоқ.*

ПРОБИРКА [р. пробирка < нем. probieren – “текширмоқ, синаб кўрмоқ; тотиб, еб кўрмоқ” фл. дан] Лаборатория ишларида қўлланадиган бир томони берк юпқа шиша найча.

ПРОБКА [р. пробка – пўкак, тиқин < нем. stop] **1 айн. пўкак 1.**

2 Бутилка ва ш. к. идишларнинг қопқоғи; тиқин. *Пробкаси отилиб, қиттак шароб тўкилди, Ранжима, қиз, доғ бўлмас, ширин гулоб тўкилди. Ў. Мирзо. Шишанинг оғзига қараб интилган муз пробкани утариб чиқаради. Ҳ. Назир, Сўнмас чақмоқлар.*

3 с.т. Электр сақлагичи; предохранители.

ПРОБЛЕМА [юн. problema – вазифа, топшириқ] қ. **муаммо 3. Тинчлик проблемаси. Халқаро проблема.**

ПРОБЛЕМАЛИ эск. қ. **муаммоли 2.** Бу проблемали масала. *Проблемали иш.*

ПРОБЛЕМАТИК эск. қ. **проблемали.** *Проблематик масала.*

ПРОВАЙДЕР [ингл. provider] Ўз мижозларига интернет тармоғидан фойдаланиш бўйича турли хизматлар кўрсатувчи фирма, воситачи ташкилот. «Интернет» тармоғига уланиш ва ундан фойдаланиш баҳоси нисбатан юқори бўлгани ҳолда, *провайдердан кўрсатилаётган хизматларнинг сифат даражаси у қадар талабга жавоб бериши.* Газетадан. *Интернет тармоғидан фойдаланувчилар ва провайдерлар сони торабора ортиб бормоқда.* Газетадан.

ПРОВИЗОР [лот. provisor – бирор нарса ҳақида олдиндан ғамхўрлик кўрсатувчи, олдини олувчи] Олий фармацевтика маълумотига эга бўлган дорихона ходими.

ПРОВИНЦИАЛИЗМ [лот. provincialis – провинцияга оид] кам қўлл. Провинцияларга, чекка жойларга хос ҳаёт, тартиб-қоида ва хусусиятлар.

ПРОВИНЦИЯ [лот. provincia – мамлакат; Римга тегишли вилоят] **1 тар.** Қадимги Римда: римликлар забт этиб олган ва уларнинг ноиблари томонидан бошқарилган худудлар, ўзга мамлакат.

2 18-асрда Россияда ва ҳозирги баъзи давлатларда (Италия, Канада каби): маъмурий-худудий бирлик, вилоят.

3 Пойтахтдан, маданий марказлардан узоқ жойлар, чекка ўлкалар.

ПРОВОДНИК [р. проводить – «кузатмоқ, жўнатмоқ» фл. дан ясалган от] Вагонни кузатиб борувчи ва йўловчи (пассажир)ларга хизмат кўрсатувчи темир йўл ходими. *Бир куни яна проводник йигит унинг остонасида пайдо бўлди. С. Зуннунова, Кўк чироқлар. Поезд тўхтаганда, юзургилаб битта проводникка рўпара бўлдим. С. Сиёев, Ёруғлик.*

ПРОВОКАТОР [лот. provocator – бир иш-ҳаракатга, жангга чорловчи] **1** Иғво, ғаламислик йўли билан иш кўрувчи; кишиларни номақбул ишларга гижгижловчи; иғвогар, фитначи, ғаламис.

2 Провокация уюштириш мақсадида айрим ташкилотга суқилиб кириб олган айғоқчи; сотқин.

ПРОВОКАЦИЯ [лот. provocatio – чақирик; шикоят аризаси, шикоят ҳуқуқи] **1** Қасдан уюштирилган ва оғир оқибатларга олиб келадиган хоинона иш ёки хатти-ҳаракат; фитна, иғвогарлик.

2 Ҳарбий тўқнашув, можаро келтириб чиқариш мақсадида қилинган тажовузкорлик хатти-ҳаракати. *Курулли провакация.*

3 тиб. Касалликнинг охиригача даволаш мақсадида унинг айрим белгиларини сунъий равишда атайлаб кўзгагиш ёки кучайтириш.

ПРОГНОЗ [юн. prognosis – олдиндан билиш, илмий асосланган башорат] **1** Бўлажак воқеа ёки ҳодисаларнинг қандай кечишини, ривожланишини ва оқибатини махсус изланишлар, мавжуд далиллар ва маълумотларга асосланиб, олдиндан айтиб бериш; олдиндан чиқарилган хулоса. *Об-ҳаво прогнози. Сиёсий воқеалар прогнози. Касаллик прогнози. ■ Зилзилани прогноз қилиш унинг ўчоғи ва атрофидаги барча жараёнларни билиш демакдир.* Газетадан. *2001 йилнинг белгиланган прогноз кўрсаткичлари ба-жарилишини таъминлаш.. юзасидан амалга оширилган ишлар муҳокама этилади.* Газетадан.

ПРОГНОЗЛАШ 1 Прогноз тузиш, тай-ёрлаш.

2 Бирор-бир ижтимоий ҳодисанинг аниқ истиқболларини махсус илмий тадқиқ этиш. *Иқтисодий прогнозлаш.*

ПРОГРАММА [юн. programma – эълон; кўрсатма, йўл-йўриқ] қ. **дастур 1. Қишлоқ**

меҳнаткашлари мамлакат озиқ-овқат программасига улкан ҳисса қўшимоқдалар. Газетадан.

2 Ҳукумат, сиёсий партия, жамоат ташкилоти ёки айрим давлат, жамоат арбоби томонидан мўлжалланган асосий вазифа ва мақсадлар баён қилинган ҳужжат. *Ҳамкорлик программаси қимзоланди.* Газетадан.

3 Мажлис, йиғилиш, конференция катталикларнинг кун тартиби; уларда қўриладиган масалалар рўйхати.

4 Театр, концерт, цирк томошалари бўлимларининг, радиоэшиттириш ва телекўрсатувларнинг мундарижаси, рўйхати, шунингдек, ижро этиладиган роллар, номерлар, чиқишлар ва ижрочиларни ўзида акс эттирган босма варақа ёки китобча. *Бу пайт Ефим Данилович билан Абдусамат концерт программаси ҳақида гаплашишарди.* А. Муҳтор, Опа-сингиллар.

5 Муайян ўқув фани бўйича олиб бориладиган таълим (ўқиш-ўқитиш ишлари) нинг қисқача изчил баёни; ўқувчи ўзлаштириши шарт бўлган билим, кўникма ва малакалар мажмуи. *Олий ўқув юртларида илмий-тадқиқот ишлари билан ўқув программасини жипслаштириш мақсадга мувофиқ.* «Фан ва турмуш». Дарслик, программа тузувчи олим ва педагогларимиз ҳозирги мактаб ўқувчиларининг бир йўла уч тилда ўқишларини ҳисобга олсалар, ёмон бўлмасди. «Ёшлик». *Ун уч ёшида мактаб программасини битириб, ёш бўлса ҳам, Анвар халфалик, яъни домлага кўмакчилик қила бошлади.* А. Қодирий, Меҳробдан чаён.

6 Бирор ўқув фани ёки курснинг белгиланган ҳажми баён қилинган варақа ёки китобча. *Математикадан программа.*

7 Ҳисоблаш техникасида: масалани ечиш алгоритмининг программалаш тилидаги тавсифи, баёни.

ПРОГРАММАЛАШ Электрон машиналарда масалаларни ечиш ҳамда уларда ҳар хил ақлий меҳнат турларини бажариш назарияси ва усулларини ишлаб чиқиш билан шуғулланадиган фан; алгоритмлар назариясининг амалий бўлими.

Программалаш тили Маълумотлар (информациялар)ни ва уларни электрон машиналарда ишлаш алгоритмларини баён қилувчи расмий тил.

ПРОГРЕСС [лот. progressus — олдинга ҳаракатланиш] Ривожланишнинг куйидан юқорига борадиган йўналиши; ривожланишнинг янада юқорироқ босқичига ўтиш; яхши томонга ўзгариш. *Техника прогресси.* ■ *Умуман, мен фанни «илғор, тараққиёт, прогресс» деган сўзлар билан ёнма-ён қабул қиламан.* Газетадан.

ПРОГРЕССИВ 1 Прогрессга, ривожланишга оид, тараққиётга олиб борувчи, унга ёрдам берувчи; илғор, тараққийпарвар. *Прогрессив ёзувчи. Прогрессив инсоният. Прогрессив ҳаракат.* ■ *Бир вақтлар камтар бир муаллим, прогрессив интеллигент, бир неча ёшларни зиёфатга таклиф этган экан.* Ойбек, Нур қидириб.

2 Мунтазам равишда ўсиб борадиган, тобора ривожланадиган. *..Ислохотларнинг иккинчи босқичидаги вазифа.. чуқур прогрессив силжишларга эришишдир.* Газетадан.

3 Тобора кўпроқ фойда келтирадиган, меҳнат унумини оширадиган. *Прогрессив технология. Пахта етиштиришнинг прогрессив усуллари.*

ПРОГРЕССИЯ [лот. progressio — олдинга силжиш, ўсиш] мат. Иккинчи ҳадидан бошлаб ҳар бир ҳади ўзгармас бўлган доимий сонни қўшишдан ёки доимий сонга кўпайтиришдан ҳосил бўладиган сонлар кетма-кетлиги. *Арифметик прогрессия. Геометрик прогрессия.* ■ *Ҳозирги даврда инсониятнинг ривожланиши геометрик прогрессия бўйича бормоқда.* «Фан ва турмуш».

ПРОГУЛ [р. прогулять — «ўйнаб юриб кечкиб қолмоқ, ишга бормаи (келмай) қолмоқ» фл. дан] эск. Ишга ёки ўқишга сабабсиз келмай қолиш. *Эртасига, кечроқ бўлса ҳам, ишга бордим. Аммо картошка кавлашганида, бир-икки кун боролмадим. Мана шу жуда ёмон бўлди: бошқа прогулларни ҳам кўзга кўрсатиб юборди.* А. Қаҳҳор, Қанотсиз читтак. *Саккиз соат прогул қилган одамга ҳеч нарса демасликка менинг ҳаққим йўқ.* С. Зуннунова, Кўк чироқлар.

ПРОГУЛЧИ эск. Ишга ёки ўқишга сабабсиз келмай қолган, прогул қилган киши. *Жонфигон охири инсофга келиб, шу бу йил кишида нон заводига ишга кирибди, аммо бир ой ишлашмасдан, прогулчи тарзида ишдан ҳайдалибди.* А. Қаҳҳор, Жонфигон. *Сифат учун жиддий кураш бошланган жойларда дангасалар ва прогулчилар камайди.* Газетадан.

ПРОДЮСЕР [ингл. producer < лот. producere — ишлаб чиқармоқ; яратмоқ] **1** Кинокомпаниянинг кинофильмлар ишлаб чиқаришда гоаявий-бадий ва ташкилий-молиявий назоратни амалга оширувчи ишончли киши. *Танлов шартларига кўра бу мукофот фильм продюсерига топирилди.* Газетадан. *Продюсерлар ўз маблағларини бугун ишга солишдими, эртагаёқ унинг фойдасини олишга уринишади.* Газетадан.

2 Бирор хонанда ёки эстрада гуруҳи томонидан тайёрланган концерт ёки томоша дастурига оид бўлган маъмурий-молиявий ишларни ташкил қилувчи киши. — *Айниқса, вокал бўйича педагог, таниқли композитор Дилором Омонуллаева, продюсер Фарҳод Жўраевлар менга катта ёрдам беришди, — дейди Диана.* Газетадан.

ПРОЕКТ [лот. projectus — олдинга иргитилган, отилган] **1** қ. лойиҳа **1.** Ҳайкал проекти. *Курилиш проекти.*

2 қ. лойиҳа **2.** Қонун проекти. Шартнома проекти. *Қарор проекти.*

ПРОЕКТЛАМОҚ қ. лойиҳаламоқ. *Қишлоқ қурилишини проектламоқ.*

ПРОЕКЦИЯ [лот. projectio — олдинга, иргитиш, отиш] **1** мат. Бирор нарсанинг текисликдаги, мас., қоғоздаги акси, тасвири. *Нуқта проекцияси. Чизиқ проекцияси. Цилиндрнинг горизонтал текисликка проекцияси.* ■ *Проекциялари тенг бўлган икки оғма тенгдир.* «Геометрия».

2 Оптик асбоблар воситаси билан экранга туширилган тасвир.

ПРОЕКЦИЯЛАМОҚ Проекциясини туширмоқ, ясамоқ, ҳосил қилмоқ. *Детални горизонтал текисликка проекцияламоқ.*

ПРОЖЕКТОР [фр. projecteur < лот. projectio — олдинга иргитиш, отиш] Ёруғлик нуруни, шуълани тўплаб, маълум томонга йўналтирадиган оптик қурилмали ёритиш асбоби. *То тонг саҳаргача прожекторлар дарё қирғоқларини кундуздек ёритиб турар, тракторларнинг шовқини, одамларнинг у қирғоқдан бу қирғоққа қараб бақариб-чақаришлари қишлоқларга ҳам эшитилар эди.* С. Аҳмад, Уфқ.

ПРОЗА [нем. Prosa < лот. prosa (oratio) — оддий, жўн (нутқ)] **1** ад. Бадий ижоднинг асосий турларидан бири, адабий тур; наср.

2 Ўлчамли мутаносиб бўлақлар — шеърларга бўлинмаган оғзаки ёки ёзма нутқ; наср

билан ёзилган бадий асар. *Проза билан ёзилган асар.* ■ «Миллий роман» асида ўзбек адабиётида, ўзбек прозасида янгилик эди. Ю. Султонов, Ҳамза. *Фафур Фуломнинг ўзбек прозаси тараққиётидаги ўрни ва ролини белгилашга бағишланган қатор илмий мақолалар, асарлар ёзилган.* С. Мамажонов, Фафур Фулом прозаси.

ПРОЗАИК I [лот. prosaicus — проза яратувчи] Проза йўли билан ёзувчи, насрий асарлар яратувчи адиб. *Прозаик ёзувчи.*

ПРОЗАИК II [лот. prosalis — прозада ёзилган] Проза жанрига оид; наср, проза билан ёзилган. *Прозаик асар.*

ПРОЗАЧИ айн. прозаик I.

ПРОКАТ I [р. прокатать — «жўваламоқ, ёймоқ» фл. дан] **тех. 1** Прокатка йўли билан тайёрланган металл маҳсулот [металл тахта (лист), тўсин, рельс, сим ва ш. к.]. *Прокат ишлаб чиқариш.* ■ *Бекободдаги металл заводи қувватини дастлаб 1,5 миллион тоннага қадар прокат ишлаб чиқарадиган даражага етказиш ғоят муҳим аҳамиятга эга.* «Фан ва турмуш».

2 айн. прокатка.

ПРОКАТ II [р. прокат — ижарага (кирага) бериш ёки олиш] Рўзгор буюмлари, машина, мотоцикл ва ш. к. ни маълум миқдордаги ҳақ эвазига вақтинча фойдаланиш учун бериб ёки олиб туриш. *Спорт буюмлари прокати. Прокатга машина олмақ.*

ПРОКАТКА **тех.** Айланувчи икки жўва (вал) орасидан сиқиб ўтказиш йўли билан турли шаклдаги металл маҳсулотлар ишлаб чиқариш, прокат ҳосил қилиш. *Тулука прокатка қилмоқ. Прокатка қилинган труба. Металлни прокатка қилиш.*

ПРОКАТЧИ **тех.** Прокатка қилувчи ишчи, прокатка мутахассиси.

ПРОКЛАМАЦИЯ [лот. proclamatio — мурожаатнома, чақириқ] Ташвиқот мазмунидаги босма мурожаатнома, варақа.

ПРОКТИТ [юн. proktos — орқа чиқарув тешиги, йўғон ичак + лот. itis — ялиғланишни билдирувчи қўшимча] **тиб.** Тўғри ичак шиллиқ қаватининг ялиғланиши.

ПРОКТОЛОГИЯ [юн. proktos — тўғри ичак + logos — фан, таълимот] Тиббиётнинг тўғри ичак, орқа чиқарув тешиги ва оралиқ соҳаси касалликларини, шунингдек, уларни даволаш усулларини ўргандиган бўлими.

ПРОКУРАТУРА [«прокурор» с. дан] Мамлакатда қонунларга тўла амал қилиниши ва уларнинг тўғри қўлланиши устидан назорат қилиб турувчи ва судда давлат манфаатларини, давлат номидан тузилган айбномани ҳимоя қилувчи давлат органи. *Прокуратура органлари.* ■ *Мирсаид унинг прокуратурада ишлайдиган Маннонов эканини пайқади-ю, шоша-пиша изоҳ берди.* П. Қодиров, Уч илдиз. *Ушбу ҳолатлар юзасидан шаҳар прокуратураси томонидан жиноят ишлари қўзғатилиб, тергов ҳаракатлари олиб борилмоқда.* Газетадан.

ПРОКУРОР [фр. procureur < лот. procurare — ғамхўрлик қилмоқ] **1** Қонунларга тўла амал қилиниши ва уларнинг тўғри қўлланиши устидан давлат назорати олиб борувчи мансабдор шахс. *Республика прокурори.* ■ *Қонунлар ижроси устидан назорат прокурорнинг вазифаси эмасми?* Газетадан.

2 Суд жараёнида давлат қораловчиси. *Маҳаллий терговчининг «тергов протоколи» билан ҳарбий суд прокурорининг айблаш қоғози топширилган вақтида, у бошқа катта бир ишни олиш тўғрисида ўзига ўхшаган бир киши билан гаплашиб ўтирган эди.* Чўлпон, Кеча ва кундуз.

ПРОЛЕТАР(ИЙ) [лот. proletarius — қадимги Римда: камбағал, қашшоқ фуқаро] эск. Ёлланма ишчи.

ПРОЛЕТАРИАТ [«пролетарий» с. дан] эск. Марксистик назария ва шунга яқин оқимларда: ишчилар синфи; яшаш манбаи ўз ишчи кучини ишлаб чиқариш воситалари эгаларига сотишдан иборат бўлган ёлланма ишчилар синфи.

ПРОЛОГ [юн. prologos — муқаддима < про — олд, олдинда + logos — сўз, нутқ] **1** Театрда спектакль бошланиши олдидан ижро этиладиган кўриниш, сахна.

2 Адабий-бадиий асарларда асосий баён-дан олдин келадиган воқеаларни тасвирловчи ёки уларни тушунтирувчи муқаддима қисми; *зид. эпилог.*

ПРОЛОНГАЦИЯ [фр. prolongation < лот. prolongare — узайтирмак, чўзмак] ҳуқ. Заём, вексель ва шартномаларнинг амал қилиш муддатларини узайтириш.

ПРОМЕТЕЙ [юн. Prometheus — Прометей (юнон мифологиясида осмондан олов ўғирлаб, кишиларга ҳады этган ва ундан фойдаланишни ўргатган афсонавий баҳодир) номидан] Менделеев даврий системасининг

III гуруҳига мансуб радиоактив кимёвий элемент; табиатда учрамайдиган, сунъий йўл билан олинган металл.

ПРОМИЛЛЕ [лот. pro mille — мингга, мингтага] Бирон-бир соннинг мингдан бир улуши.

ПРОПАГАНДА [лот. propaganda < propagare — ёймоқ, тарқатмоқ] **1** Муйян ғоялар, назария ва таълимотлар, қарашларни оммага ёйиш, тарқатиш, тушунтириш; оммага ғоявий таъсир ўтказиш; тарғибот. *«Янги урф-одат, маросимларни пропаганда қилиш, уларни меҳнаткашлар турмушига жорий қилиш — мафкура ишининг муҳим соҳаси» деган мавзуда республика семинари ўтказилди.* Н. Сафаров, Оловли излар.

2 Мафкура ва сиёсатни тарғиб этишга қаратилган фаолият.

ПРОПАГАНДИСТ қ. тарғиботчи. *Пропагандист кадрлар.* ■ *Пропагандистлар билан ишлашни яхши йўлга қўйиш иқтисодий таълимнинг самарадорлиги ва сифатини таъминлашнинг ҳал қилувчи йўлидир.* Газетадан.

ПРОПЕЛЛЕР [лот. propellere — олдинга ҳайдамоқ, итармоқ] Самолёт, вертолёт, дирижабль ва ш.к. нинг учини, аэрочананинг ҳаракатланиши учун зарур бўлган тортиш кучи олинадиган қурилма. *Эҳ, жанговар пропеллерлар товуши. Нав бўсадай ширин туюлди.* А. Мухтор. *Ҳашаротнинг қанотлари самолётнинг қанотларига ўхшамайди, ҳашарот қанотларидан ҳар бири — ўнг ва чап қаноти алоҳида-алоҳида ишлайдиган пропеллерлардир.* «Фан ва турмуш».

ПРОПИСА [р. прописать — «қайд қилмоқ, рўйхатдан ўтказмоқ» фл. дан ясалган от] Кимсанинг маълум манзилда яшаб турганлигини уй дафтариغا расмий суратда қайд қилиш ва шу ҳақда паспортга қўйилган белги. *Прописка штампи. Тошкентда прописка билан яшамоқ. Прописка қилмоқ. Пропискадан ўтмоқ.* ■ *-Афсуски, меҳмонни прописка қилишимиз керак эди-да, — деб Рафиқ соатиға қаради, бошини чайқади.* Ў. Усмонов, Қисмат.

ПРОПОЛИС [юн. propolis < pro — олдида + polis — шаҳар] Асаларилар ажратадиган елимсимон, смолали хушбўй модда (тиб-биёт ва фармацевтикада қўлланади).

ПРОПОРЦИОНАЛ [лот. proportionalis — мос, мутаносиб; тенг] **1** *мат.* Миқдорлардан

бири қанча ошса ёки камайса, бошқаси ҳам шунча ўзгарадиган; мутаносиб. *Тўғри пропорционал миқдорлар. Тескари пропорционал миқдорлар.*

2 Қисмлари, ўлчамлари ўзаро маълум нисбатда бўлган; бўйи энига мос; мутаносиб, уйғун; келишган. *Пропорционал қомат. Пропорционал тақсимламоқ. ■ Ижтимоий тараққиёт қонуниятини беш бармоқдай билиш керак.. Энг зарури — халқ хўжалигимизни планли пропорционал ривожландиришнинг объектив қонунари билан қуроллантириш керак. С. Анорбоев, Оқсой.*

ПРОПОРЦИОНАЛЛИК **1** *мат.* Функционал боғланишнинг энг содда кўриниши; пропорционал эканлик (қ. **пропорционал** **1**). *Миқдорларнинг пропорционаллиги.*

2 Тўғри пропорцияларга эга бўлишлик, мутаносиблик, мувофиқлик.

ПРОПОРЦИЯ [*лот.* proportio — мослик, мутаносиблик] **1** *мат.* Икки нисбатнинг тенглиги. *Арифметик пропорция. Геометрик пропорция.*

2 Бутуннинг қисмлари ўртасидаги муайян ўзаро нисбат, мутаносиблик; умуман, нарсалар ўртасидаги миқдорий муносабат. *Бу концентрат маъданли сувга маълум пропорцияда қўшилиб, ичимлик ҳолига келтирилади. Газетадан.*

ПРОПУСК(А) *қ. рухсатнома. Залга пропуски билан киргизмоқ.*

ПРОРАБ [*р.* производитель работ — «иш бошқарувчи, ишбоши» бирикмасининг қисқартмаси] Қурилишда ишни ташкил қилувчи ва қурувчиларга бевосита раҳбарлик қилувчи техник ёки инженер; ишбоши. *Прораб «халақит берасан», деб неча марта мени девордан қувиб туширар, мен эса яна тирмашиб чиқаверардим. С. Аҳмад, Қадрдон далалар. Прораблар, техниклар ва участка бошлиқларининг гапларига қараганда, яна икки кундан кейин иш бутунлай тугайди. С. Аҳмад, Уфқ.*

ПРОРЕКТОР [*лот.* pro — ўрнига + ректор] Олий ўқув юрғларида: ректорнинг маълум соҳа бўйича ўринбосари. *Илмий ишлар бўйича проректор. Маънавият ва маърифат ишлари бўйича проректор. ■ -Хушхабар бўлганда қандоқ, — деди проректор қувонч билан, — Обид Йўлдошевичнинг гипотезаси тўғри чиқди. Бекилиб қолган қадимги бир кон шу гипотеза асосида очилди. П. Қодиров, Уч илдиз.*

ПРОСПЕКТ **1** [*лот.* prospectus — кўри-ниш, манзара] Шаҳарларда кенг, катта ва тўғри кўча. *Проспект ёқасида ажойиб муҳташам тураржой бинолари қад кўтармоқда. Газетадан.*

ПРОСПЕКТ **II** [*лот.* prospectus — кўри-ниш, манзара] **1** Нашрга тайёрланаётган ёки ёзилаётган асарнинг қисқача баёни ёки кенг ва мукамал режаси. *Адабиёт дарслигининг проспекти. Журнал проспекти.*

2 Реклама характеридаги босма маълумотнома ёки ишлаб чиқариш ва сотишга мўлжалланган нарсалар рўйхатидан иборат савдо каталоги.

ПРОТАКТИНИЙ [*юн.* protos — биринчи + актиний] Менделеев даврий система-сининг III гуруҳига мансуб радиоактив кимёвий элемент; кумушранг-оқ, ялтироқ, болғаланувчан металл.

ПРОТЕЗ [*юн.* prothesis — қўшиш, бириктириш, илаштириш] Организмнинг бирор аъзоси шаклида тайёрланган ёки зарарланган, олиб ташланган аъзоси ўрнига қўйиладиган мослама (мас., сунъий қўл, сунъий оёқ, сунъий тиш). *Сиз оймнинг агентисиз. Доим бизнинг устимиздан материал берасиз. Оймга протез тиш қилдириб бериб, пинжларига кириб олгансиз. С. Аҳмад, Сайланма.*

ПРОТЕЗА [*юн.* prothesis — олдиндан жойлаш] *тлш.* Талаффузни қулайлаштириш учун сўзнинг энг бошида товуш орттирилиши (*истол, иштраф каби*).

ПРОТЕЗЛАШ Гавданинг майиб бўлган аъзолари ёки қисмлари шакли ва вазифаларини тиклашга қаратилган тиббий-техник тадбирлар тизими ва уларни ўрғанувчи соҳа.

ПРОТЕКТОРАТ [*лот.* protector — ҳомий] *сиёс.* **1** Тенгликка асосланмаган шартнома натижасида белгиланадиган, асосан мустамлакачилик руҳидаги қарамлик шакли.

2 Шундай қарамлик ҳолатида бўлган мамлакат. *Россия Афғонистонга таъсир ўтказиш юзасидан бўлган ҳамма даъволаридан воз кечди ва Англиянинг Афғонистон устидан протекторатини амалда тан олди. «Янги тарих».*

ПРОТЕКЦИОНИЗМ [*фр.* protectionnisme < *лот.* protectio — ёпиш, беркитиш; ҳимоя қилиш] Давлатнинг ўз миллий иқтисодиётини чет эл рақобатидан ҳимоя қи-

лишга қаратилган иқтисодий сиёсати (мас., импорт молларга юқори пошлиналар жорий қилиш, уларнинг олиб кирилишини чеклаш ёки умуман тақиқлаш ва б.). *Пировард натижада протекционизм ва субсидияларга қарамай, заводлар ёпилиб, ходимлар иш жойларини йўқотадилар.* «Хаёт ва қонун».

ПРОТЕСТ [лот. protestari — қатъий норозилик, баёнот эълон қилмоқ] ҳуж. Тегишли суд ва прокуратура органларининг суд ҳукмлари ва қарорларини қайта кўриб чиқиш ҳақидаги расмий ёзма баёноти, илтимосномаси. *Ушбу қарор, ҳукумат топшириғига зид бўлганлиги сабабли, вилоят прокуратурасининг протести билан бекор қилинди.* Газетадан. *Олий суд протестни қанотлантиради.* Газетадан.

ПРОТЕСТАНТИЗМ [лот. protestans, protestantis — қаршилик билдирувчи, норози] Христианликдаги асосий оқимлардан бири: 16-асрда Рим католик черковига норозилик тарзида пайдо бўлган ва асосан АҚШ, Англия, Канада ҳамда Скандинавия ва Болтиқбўйи мамлакатларида тарқалган.

ПРОТИВОГАЗ [р. против — қарши + газ] Заҳарловчи модда, газ, тутун кабилардан нафас олиш аъзоларини, юзу кўзни асрайдиган филтрли ниқоб. *Оксиген (кислород) тўлдирилган нўлат баллонли противогаз.* ■ *У ерда бир тўп противогаз таққан йигитлар ҳарбий машқ учун саflanмоқда эди.* П. Қодиров, Уч илди.

ПРОТО- [юн. protos — биринчи] Байналмиал ўзлашма кўшма сўзларнинг биринчи қисми бўлиб: 1) дастлабки, илк, биринчи маъноларини; 2) черков амаллари ва унвонларида катталик, юқориликни билдиради (мас., *прототип, протоиерей* каби).

ПРОТОИЕРЕЙ [прото.. + юн. hiercus — руҳоний] Православ черковида катта руҳоний.

ПРОТОКОЛ [юн. protokollon — биринчи варақ (ёзилиш санаси ва котибнинг исми кўрсатилган ҳолда ўрама папирус хатга ёпиштирилган) < прото.. + юн. kollao — ёпиштираман, елимлайман] эск. **1 қ. баённома 2. Мажлис протоколи** ■ *Сергей кабинетда ёлғиз қолиб, кейинги кунлардаги сўроқ протоколларини шошмасдан, бирма-бир варақлади.* Ҳ. Фулом, Машғал. *Эшонбоев деканнинг бетараф қолиш сабабини протоколга яхшилаб ёзиб қўйди.* П. Қодиров, Уч илди.

2 Мансабдор шахс томонидан тузилган ва бирор воқеа-ҳодиса ёки ҳолатни тасдиқловчи ҳужжат. Экспертларнинг протоколи. ■ *Маҳаллий терговчининг «тергов протоколи» билан ҳарбий суд прокурорининг айблаш қоғози топширилган вақтида, у бошқа катта ишни олиш тўғрисида ўзига ўхшаган бир киши билан гаплашиб ўтирган эди.* Чўлпон, Кеча ва кундуз.

3 Жамоат тартиби ва қонунчиликни бузганлик ҳақида тузилган далолатнома. Автоинспекция протоколи.

4 Халқаро конференцияларнинг халқаро шартнома, битим кучига эга бўлган қарори. Савдо муносабатлари ҳақидаги протокол. ■ *Давлат ва ижтимоий қурилиш академиясида иқтисодий таълимни ташкил этиш тўғрисида протокол ҳамда бошқа ҳужжатлар ва битимлар имзоланди.* Газетадан.

5 дип. Турли дипломатик ҳужжатларни амалга ошириш тартибини бошқариб турувчи қоидалар мажмуи.

ПРОТОН [юн. protos — биринчи] физ. Атом ядросининг мусбат электр зарядига эга бўлган таркибий қисми — барқарор элементар зарра; енгил водороднинг ядроси.

ПРОТОПЛАЗМА [прото.. + юн. plasma — шакланган, безатилган] биол. Жонивор ва ўсимликлардаги тирик ҳужайранинг цитоплазма ва ядродан иборат таркибий қисми. *Тирик протоплазма ўз атрофидаги нотирик муҳитдан ҳужайра мембранаси билан ажратилади.* «Фан ва турмуш».

ПРОТОТИП [юн. prototypos — дастлабки аломат, белги, образ] ад. Бадиий образ яратишда ёзувчига манба, намуна бўлган реал шахс. *Шуниси диққатга сазоворки, томошабинлар асарни яхши тушунишлари учун ҳар бир картина олдида жонли прототиплар турарди.* С. Аҳмад, Юлдуз.

ПРОФЕССИОНАЛ [лот. professio — расмий белгиланган касб] **1** Бирор касбга оид, хос, бирор касб билан боғлиқ бўлган. *Профессional одат. Professional маҳорат. Professional тайёргарлик.* ■ *Энг ёмони — жойларда бозор иқтисодиёти тамойилларини яхши билмаслик ва professional малакага эга эмаслик каби салбий ҳолатлар кўпроқ намён бўлмоқда.* Газетадан.

2 Бирор ишни ўзига касб қилиб олган, ўз касбининг мутахассиси бўлган (шахс).

Профессионал боксчи. *Профессионал ашулачи.* ■ ..профессионал журналистлар ва оммавий ахборот воситалари ходимларини тайёрлаш жараёнини қайта кўриб чиқиши зарур. Газетадан. *Лекин ўша йилдан эътиборан мусобақага профессионал теннисчилар ҳам қўйилган.* Газетадан.

ПРОФЕССИОНАЛИЗМ [лот. professio – касб-кор, мутахассислик] **1** тлш. Бирор касб-ҳунар соҳаси вакиллари нутқига хос сўз ёки ибора.

2 Бирор касб-ҳунар, мутахассисликни юқори даражада ўзлаштириш; юксак маҳорат. *Чин истеъдод ва юксак маҳорат сари етакловчи профессионализм унинг ижод шиоридир.* Газетадан.

ПРОФЕССОР [лот. professor – муаллим, ўқитувчи; мураббий] Олий ўқув юрларидаги энг малакали ўқитувчиларнинг, шунингдек, илмий-тадқиқот институтларидаги илмий ходимларнинг илмий унвони ва лавозими; шундай унвон ва лавозимли шахс. *Университет профессори.* ■ *Профессорнинг қаршисига келганда эсанкираб қолди.* Ў. Ҳошимов, Қалбингга қулоқ сол. *Профессорнинг гапидан хурсанд бўлиб ўтирганларида, одатдагидек шовқин-сурон, ҳазил-ҳузул билан оғайнилари Шаҳобни кўргани келиб қолишди.* Л. Тожиева, Меҳрим сизга, одамлар.

ПРОФИЛАКТИК Профилактикага оид; касаллик ёки бирор бошқа ҳодисанинг олдини олиш учун хизмат қиладиган. *Профилактик эмлаш. Профилактик тадбирлар. Боғларга профилактик ишлов бериш.* ■ *Бу эса, аввало, касалланишнинг олдини олишга доир тизим муассасаларида профилактик ишларнинг султ йўлга қўйилганлиги оқибатидир.* Газетадан. *Солиқчилар фаолиятида профилактик тадбирлар ҳам катта ўрин тутмоқда.* Газетадан.

ПРОФИЛАКТИКА [юн. prophylaktikos – сақловчи, олдини олувчи] **1** Одамлар соғлигини сақлаш, касалликларнинг пайдо бўлиши ва тарқалиб кетмаслигининг олдини олиш, аҳолининг жисмоний ривожланишини яхшилаш ва узоқ умр кўришини таъминлашга қаратилган чора-тадбирлар мажмуи. [Шербек:] *Сиз касал кўргани, профилактика ўтказгани хонадонларга кўп кирасиз.* С. Анорбоев, Оқсой. «Дори-дармон»

уюшмаси келгусида ҳам республика аҳолиси ва даволаш-профилактика муассасаларини дори-дармонлар билан таъминлаш аҳолини яхшилаш учун ўзининг барча имкониятларини ишга солади, деб ишонтирамиз. Газетадан.

2 Умуман, бирор ҳодисанинг олдини олиш, механизм, машиналарнинг муддатидан олдин ишдан чиқиши, бузилишидан сақлаш учун кўриладиган чоралар. *Ўза зараркунандалари ва касалликларига қарши профилактика.* ■ *Газдан қонунга хилоф равишда фойдаланаётган истеъмолчилар орасида профилактика ишлари олиб бориляпти.* Газетадан.

ПРОФИЛАКТОРИЙ [«профилактика» с. дан] Йирик ўқув юрлари ва саноат корхоналари қошида ишлаб чиқаришдан ажралмаган ҳолда дам олиб даволанишни амалга оширувчи даволаш-профилактика муассасаси. *«Навоийазот» очиқ акциядорлик жамияти профилакторийсида йил бошидан бери 993 киши соғломлаштирилди.* Газетадан.

ПРОФИЛЬ [фр. profil < итал. profilo – ташқи кўриниш, қиёфа < filo – чизик, йўл] **1** Юз ёки бирор нарсанинг ён томондан кўриниши. *Ҳайкалнинг профили.*

2 Бирор нарса ёки сатҳнинг, мас., деталь, қурилма, ер бўлаги ва ш.к. нинг тиккасига кесилгандаги кўриниши. *Йўлнинг профили. Бинонинг профили.*

3 Хўжаликнинг, бирор касб соҳаси, корхона, ўқув юрти ва ш.к. нинг асосий ўзига хос белгилари мажмуи; касб ёки соҳанинг асосий йўналиши. *Журналларнинг профили. Жамоанинг асосий профили – пахтачилик.*

ПРОЦЕНТ [нем. Prozent < лот. pro centum – юз ҳисобидан, юз ҳисобига; юз- (та)ликка] **1** Бирор сон ёки микдорнинг юздан бир ҳиссаси, улуши; % белгиси билан ифодаланади (*яна қ. фониз*). *Планнинг бир проценти.* ■ *Унингчи октябрда йиллик пахта шартномамизнинг саксон процентини бериб битирамиз.* А. Қодирий, Обид кетмон. *Кўпи билан бир ой ичида биронта ҳам якка хўжалик қолмаслиги, ҳамма юз процент колхоз бўлиши керак [деди Шодиев].* А. Қаҳҳор, Кўшчинор чироқлари.

2 Қарзга олинган пулдан фойдаланганлик учун қарздор томонидан пул эгасига тўлаб туриладиган ҳақ, фойда. [Фазлиддин:] *..кеча Абдулла акам йигитчани тутиб, ота қарзини уз, деб маҳкамроқ ушлабди. Кейин ҳисоблаб қарашса, йигитчанинг гарданига*

процент билан роса саккиз юз сўм пул тушибди. Ойбек, Танланган асарлар.

ПРОЦЕНТЛИ 1 мат. Процентга оид; процент билан ифодаланадиган. *Сонларнинг процентли нисбати.*

2 Маълум процент ҳисобида фойда келтирадиган. *Уч процентли заём.*

3 Таркибидаги асосий модда миқдори процент билан ифодаланган. *Уч процентли сирка. Қирқ процентли ўғит.*

ПРОЦЕНТЧИ 1 с.т. Ишни ошиғи билан бажариб, маълум процентга етказувчи ишчи. *Бизда икки юз процентчилар сон-саноқсиз.*

2 салб. Белгили фоиз ҳисобида фойда олиш шарти билан қарз берувчи; судхўр.

ПРОЦЕСС [лот. processus – илгарилаш, илгари силжиш] 1 қ. **жараён.** *Тафаккур процесси. Ўсимликнинг ривожланиш процесси. ■ Зеро, янги-янги илмий кашфиётлар, илмий-мантиқий тафаккур процесслари ёлғиз улкан меҳнат мевасигина бўлиб қолмай, балки шиддатли илҳом ва эҳтирос, эмоционал кечинмалар маҳсули ҳамдир. «ЎТА».*

2 Маълум натижа, мақсадга эришиш учун изчиллик билан амалга ошириладиган иш ёки ҳаракатлар мажмуи. *Технологик процесс. Ишлаб чиқариш процесси. Уқув-тарбия процесси.*

3 Суд иши; тергов, маъмурий ва суд органлари фаолиятини амалга ошириш тартиби. *Жиноий процесс. Намунали процесс. Процессда қатнашмоқ. ■ Суд процессини тўғри ташкил қилиш ва ўтказиш айниқаса муҳимдир.* Газетадан.

ПРОЦЕССОР [лот. processus – сурилиш] Рақамли ҳисоблаш машинасининг дастур (программа)да кўзда тутилган арифметик ва мантиқий амалларни; ахборотларни ўзгартириш, барча ҳисоблаш жараёнларини ва ш.к. ни бошқариб туриш учун мўлжалланган марказий қурилмаси. *Компьютернинг процессори.*

ПРОЦЕССУАЛ [«процесс» с. дан] Суд ёки маъмурий жараёнларга оид; суд жараёни билан боғлиқ бўлган, судда ишнинг қўрилиш тартибини белгиловчи. *Процессуал муддат. Процессуал кодекс. ■ Чунки унда амалдаги процессуал кодексда кўрсатилиши лозим бўлган бир қанча моддалар мавжуд.* Газетадан.

ПРУЖИНА [р. пружина – камбар эластик металл тахта ёки чизимча] Машина,

механизм ва ш.к. нинг пўлат тасма ёки симдан спиралсимон ўралган ёки устма-уст терилган, муайян куч таъсирида қисилгандан кейин яна асл ҳолига қайтадиган, турткиларни юмшатадиган қайшиқоқ қисми, детали. *Соат пружинаси. Эшик пружинаси. Патефон пружинаси. ■ Ичкарида, Самандарнинг олдида яна икки киши ўтирган экан. Сафаров булар билан ҳам саломлашди-да, титилиб, пружиналари кўриниб ётган диванга ўтириб, напирос чекди. А. Қаҳҳор, Қўшчинор чироқлари.*

ПРУЖИНАЛИ Пружинаси бўлган, пружина воситасида ҳаракат қиладиган, ишлайдиган. *Пружинали каравот. Пружинали ўйинчоқ. ■ Эшик қаршисидаги девор олдида устига майда ёстиқлар ташлаб қўйилган пружинали диван, унинг икки ёнида китоб жавонлари бор эди. М. Исмоилий, Фарғона т.о.*

ПРЯНИК [р. пряный – ўткир ва хушбўй мазали, ҳидли < юн. ререгі – қалампир] Хамирга ўсимлик ёғи, асал, шакар, қиём қўшиб тайёрланган яримшарсимон қандолат маҳсулоти, ширинкулча (дастлабки вақтларда унга зираворлар, жумладан, хушбўй қалампир қўшилган).

ПСИХИАТР Руҳий касалликлар врачлари, мутахассиси. *-Уни [Ботировни] хирург эмас, психиатр даволаши керак, – деди Раҳимов Николаевга. Б. Раҳмонов, Олтин одамлар. Қизалоқнинг ой сайёраси ҳақидаги ғалати ҳикояларини эшитгач, ота-онаси уни психиатр қабулига етаклаб боради.* Газетадан.

ПСИХИАТРИК Психиатрга, психиатрияга, руҳий касалликларга оид. *Психиатрик клиника.*

ПСИХИАТРИЯ [психо.. + iatreia – даволаш] Тиббиётнинг руҳий (психик) касалликларни, уларни даволаш ва олдини олиш усулларини ўрганувчи бўлими.

ПСИХИК Психикага, руҳий ҳолатга оид; руҳий. *Психик касалликлар.*

ПСИХИКА [юн. psychikos – руҳий] Юксак даражада ташкил топган миянинг объектив воқеликни сезги, идрок, тасаввур, фикрлаш, ҳис-туйғу ва иродавий хатти-ҳаракатлар тарзида акс эттириш хусусияти; инсон ва ҳайвонлар хатти-ҳаракатининг ўзига хослигини белгилайди; инсон онги психиканинг олий шакли ҳисобланади. *Соғлом психика. Боланинг психикаси. Киши психикасини ўрганмоқ*

ПСИХО- [юн. psyche — руҳ, жон; қалб, кўнгил] Байналмилал ўзлашма қўшма сўзларнинг биринчи таркибий қисми: психикага, руҳиятга алоқадорликни билдиради (мас., психоанализ, психология, психотерапия)

ПСИХОАНАЛИЗ [психо.. + анализ] Рухий (психик) касалликларни даволаш усули ва 19-аср охири — 20-аср бошларида австриялик олим З. Фрейд томонидан ишлаб чиқилган ва ривожлантирилган психологик таълимот.

ПСИХОЗ [юн. psyche — руҳ, жон] Киши онгининг борлиқни акс эттириш фаолиятининг кучли даражада бузилиши билан кечадиган руҳий касалликларнинг умумий номи.

ПСИХОЛИНГВИСТИКА [психо(логия) + лингвистика] Нутқий ифодаларнинг пайдо бўлишини ҳамда нутқнинг тил тизими билан ўзаро муносабатда ўзлаштирилиши (идрок этилиши) қонуниятларини ўрганувчи фан.

ПСИХОЛОГ 1 Психология бўйича олим-мутахассис (врач ёки ўқитувчи). *Ҳозирги кунда психологик касбга йўналтирувчи тиббий ходим, дефектолог, психолог каби мутахассислар ушбу тизимда хизмат қилмоқда.* «Мақтаб ва ҳаёт».

2 *кўчма* Кишининг руҳиятини яхши билладиган, шунга қараб муомала қиладиган сезгир одам. [Фармонов:] *..бу кампир ё ўзгаларнинг фикрини ўқий олади, ё менга ўхшаган лақмаларни кўравериб, ўтқир психолог бўлиб кетган.* «Муштум».

ПСИХОЛОГИЗМ [«психология» с. дан] Адабиёт ва санъатда инсоннинг психик, руҳий кечинмаларини теран тасвирлаш.

ПСИХОЛОГИК Психологияга оид, руҳий ҳолат ва кечинмаларни теран тасвирлашга асосланган. *Психологик анализ. Психологик тадқиқот. Психологик роман. Психологик драма.* ■ *Ойқизнинг психологик ҳолати роман марказида турган муҳим туғунни, унинг ечими учун Ойқиз типидаси, балки ундан ҳам юқорироқ бошқа бир кучли тажрибакор шахс иштирокни талаб қиларди.* «ЎТА».

ПСИХОЛОГИЯ [психо.. + юн. logos — фан, таълимот] **1** Инсон фаолияти ва ҳайвонлар хатти-ҳаракатида борлиқнинг акс этишини, руҳий жараёнлар, ҳодисалар ва ҳислатларни ўрганувчи фан. *Элмурод институтда пси-*

хологиядан лекция тинглар экан, профессор Иванов: «Киши характери ни белгилловчи омиллардан бири унинг нутқи», — деган эди. Шухрат, Шинелли йиллар. Бўлғуси педагоглар практика жараёнида педагогика ва психологиянинг долзарб масалалари устида иш олиб борадилар. «Фан ва турмуш».

2 Бирор фаолият билан боғлиқ бўлган психик жараёнлар мажмуи. *Меҳнат психологияси. Санъат психологияси.* ■ *Рангларга муносабатда ҳам халқ психологияси намоён бўлади.* «ЎТА». *Ижод психологияси фақат китобхонларни эмас, адабиётшуносларни ҳам қизиқтиряпти.* У. Норматов, Талант тарбияси.

3 Кишининг ички дунёси, кечинмалари, характер хусусиятлари, руҳий ҳолати. *Отахон шоирларимиз болалар қалби ва психологиясини, маънавиятини очиш орқали уларнинг бетакрор шахсиятини улуғладилар.* «Фан ва турмуш». *Ҳаётнинг ўзи ана шу дунёқарашлар, психологиялар, даъволар орасидан ўтишга мажбур қилмоқда.* Газетадан.

ПСИХОПАТИЯ [психо.. + юн. pathos — ғам-алам, азобланиш, касаллик] Шахснинг, ақл-идроки сақланиб қолгани ҳолда, феъл-атвори, ҳиссиёти, хулқининг чуқур ва доимий бузилишидан иборат ирсий, туғма ёки ҳаётда орттирилган норасолиги.

ПСИХОПАТОЛОГИЯ [психо.. + патология] Психиатриянинг руҳий касалликлар, патологик жараёнлар ва ҳолатларнинг пайдо бўлиши, ривожланиш механизми, пайдо бўлиш сабабларини ўрганувчи, уларни таснифлаш ва даволаш усулларини ишлаб чиқувчи соҳаси.

ПСИХОТЕРАПИЯ [психо.. + терапия] Рухий таъсир қилиш (мас., гипноз) йўли билан даволаш усули. *Шу боис шифохонада психотерапия кабинетини ташкил этамиз.* *Ҳозир у ерда сўз сеҳри билан даволаш сеанслари ўтказилмоқда.* Газетадан.

ПСИХОТРОП [психо.. + юн. tropos — бурилиш, буриш, йўналтириш]: **психотроп воситалар** Инсоннинг руҳий ҳолатига, умуман психик жараёнларга кучли таъсир этувчи дори моддалар. *Ўзбекистон Республикаси ва Эрон Исломи Республикаси ўртасида гиёҳвандлик моддалари ва психотроп воситаларнинг ноқонуний айланишига қарши курашда ҳамкорлик қилиш тўғ-*

рисидаги меморандум имзоланди. Газетадан. Президентлар наркотик моддалар, психотроп воситаларнинг ноқонуний савдосига қарши курашдаги ҳамкорлик концепциясини тасдиқлашди. Газетадан.

ПСОРИАЗ [юн. psoriasis < psora — қичима] Қипиқли темирастки — юқмайдиган сурункали, вақти-вақти билан кучайиб, зўрайиб турадиган тери касаллиги.

ПУБЛИЦИСТ Долзарб, мунозарали ижтимоий-сиёсий мавзуларда асар ёзувчи адиб. *Публицист ёзувчи. ■ У адабиёт ва санъат оламининг зукко билимдони, оташин публицист, ажойиб нотиқ ва улкан санъаткор эди. Газетадан. Санжар Сиддиқов ижоди ҳақида шу фикрни айтиш мумкин: у тарихчи, публицист, таржимон, тақризчи, санъатшунос, педагог эди. Х. Ёдгоров, Ҳаёт тўлкинлари.*

ПУБЛИЦИСТИК Публицистикага ёки публицистга оид. *Публицистик асар. ■ Унинг овози публицистик руҳни, гоҳ лирик, гоҳ бахтиёрлик туйғусини ифода этади. Газетадан.*

ПУБЛИЦИСТИКА [лот. publicus — жамиятга, жамоатчиликка оид, ижтимоий] **1** Давр (замона)нинг долзарб ижтимоий-сиёсий масалалари ҳамда жамиятнинг кундалик ҳаётига бағишланган адабиёт тури. *Публицистика сиёсий курашнинг ўткир қуролидир.*

2 Шу жанрга хос асар ёки асарлар (мақола, очерк, памфлет, фельетон ва ш.к.) мажмуи. *А. Қаҳҳор публицистикаси.*

ПУД [р. пуд — 16,38 кг га тенг оғирлик ўлчов бирлиги < лот. pondus — оғирлик, ўлчов] эск. Метрик ўлчовлар тизими қабул қилинганга қадар қўлланган, 16,38 килограммга тенг оғирлик ўлчов бирлиги. *Бир тояна — салкам 63 пуд. ■ [Кампир:] Дастмония бир пуд ун эди, тунов кун бирдан илгирма беш қадоққа тушиб қолди. Ойбек, Танланган асарлар. Биринчи йил гектаридан юз пуд олдик, Эру хотин меҳнат ҳақин қонга солдик. Ғ. Ғулом, Танланган асарлар. ..бир ярим пуд гўштнинг аъзолар ризоликлари билан бир пудини Мулла Обидга ва ярим пудини Мардонбойга орттириб берадилар. А. Қодирий, Кичик асарлар.*

ПУДЛИ 1 Пуд оғирлигидаги. *Икки пудли тош. ■ [Бобом:] Молхонага киринг, ярим пудли кетмон турибди. Ана ўшани мининг-*

да, далага чиқиб, айриплон қилиб учинг, хўпми? Давлатимизнинг сиздан бошқа учувчлариям бор. Ў. Ҳошимов, Икки эшик ораси.

2 Маълум пуд юк элтадиган, кўтарадиган. *Хўжабеков, куни билан елкасидан беш пудли қоп тушмаган юкчидай, эшикнинг кесақисига суянди. С. Анорбоев, Оқсой.*

ПУДРАТ [р. подрядить — «вақтинчалик ишга юбормоқ, бирор нарсани олмоқ, топмоқ» фл. дан] Бир томон иккинчи томон буюртмаси асосида маълум бир ишни тўлиғича (батамом) бажариб бериш мажбуриятини олганлиги ҳақидаги шартнома ва шу асосда бажариладиган ишнинг ўзи. *Пудратни ўз вақтида бажармоқ. Ишни пудратга олмоқ. Бинони пудратга олган қурилиш ташкилоти. ■ Ҳамма юракдан меҳнат қилади — менга оилавий пудратнинг шуниси маъқул. «Саодат». Қурилишдаги пудрат ишлари ҳажми 13 фойизга кўпайди. Газетадан.*

ПУДРАТЧИ [р. подрядчик] Пудрат асосида ишлайдиган киши ёки ташкилот. *Ассий пудратчи. Пудратчи ташкилотлар. ■ Пудратчи бракка йўл қўйган экан, буюртмачи қаёққа қаради, дерсиз. «Муштум». Корхонамиз аксарият қурилишларда бош пудратчи сифатида иштиради. Газетадан. Пудратчилар бу йил ҳар гектар майдондан камида 70 центнердан хирмон кўтариш ниятидалар. Газетадан.*

ПУК(КА) Ошиқнинг чиккага қарамақарши, дўмбоқ томони. *Тавва пуккани ейди; олчи чиккани ейди дегандек, бой берсангиз нима, сиз ҳам ютиб юргансиз. А. Мухтор, Опасингиллар. Ошиғим пукка тушса ҳам розиман, деб турган эдим, бирдан олчи бўлиб кетди. Б. Раҳмонов, Хўжайин кўчди. [Муллаўст:] Қўйинг, ўша қози домлангизга ҳам отган ошиқнинг ҳаммаси пуккасига тушиди. Ҳамза, Танланган асарлар.*

ПУЛ 1 [ф. پول — пул, ақча; балиқ тангаси] **1** Олди-сотди ёки тўлов муомалаларида нарх, баҳо, қиймат ўлчови бўлган металл ёки қоғоз белги; ақча. *Қоғоз пул. Танга пул. Нақд пул. Пул майдаламоқ. Пул бўлса, чангалда шўрва. Мақол. Пули куйган қалампир чайнар. Мақол. ■ Сидиқжон.. кечки пайт кўчага чиқмоқчи бўлган эди, Анзират ҳола, унинг пули йўқлигини билгандай, соч олдиригани пул берди. А. Қаҳҳор, Кўшчинор чирроқлари. Йўлкирага пулимиз, пиёда қайтишга иложимиз бўлмаганидан қолиб кетдик.*

М. Исмоилий, Фарғона т.о. [*Санавбар Хайринисога:*] *Сизга ҳам гапираман, пул учун имони ва қизини сотадиган отамга ҳам гапираверман.* Ҳамза, Тухматчилар жазоси.

Пул бўлмоқ Пулга алмашинмоқ, сотилмоқ. *Нарса сотсанг, пул бўлади, Эрта-индин кул бўлади.* Мақол. **Пул қилмоқ** 1) пул ҳисобига бермоқ, сотмоқ, пулламоқ. *Уйни безашдан бошқа нарсага ярамайдиган асбобларни йиғиштирдим, барини сотиб пул қилдим.* Ойбек, Танланган асарлар; 2) ишлаб ёки бошқа йўл билан пулни қўлга киритмоқ, пул тўпламоқ. **Пул(нинг) қадрсизланиши қ. инфляция.** *Пулни қадрсизланиши суръатлари мунтазам равишда ва изчиллик билан пасайиб бормоқда.* Газетадан.

2 Сармоя, маблағ. *Қурилишга пул ажратмоқ.* ■ *Пул-чи? Пул ҳам туғади. Жуда кўп туғади, тез туғади, айниқса, бу замонда пул сертухум бўлиб кетган.* Ойбек, Танланган асарлар. *Нуқул пул ва фойда кетидан қувсақ-да, аммо одамларимиз руҳан қашшоқ бўлиб қолишса, бундай жамиятнинг ҳеч кимга кераги йўқ.* Газетадан.

3 с.т. Иш ҳақи; маош. *Қоровул пули. Бугун пул оладиган кунимиз.*

4 эск. Баъзи ерларда ярим тийинга, баъзи ерларда бир тийинга тенг бўлган пул ўлчов бирлиги ва шу қийматдаги майда пулнинг ўзи. *Нарх бериб келган болага йигирма пул бериб, орқаси куймаганини олиш шарти билан нонга юборди.* А. Қодирий, Меҳробдан чаён. *Йиқитган болаларга икки пулдан соврин бериб томоша қилиб ётган икки бойнинг бири шу – Ниёзмат ҳожи бўлиб, ҳаждан янги келган йиллари эди.* А. Қаҳҳор, Сароб.

Бир (ёки икки, уч) пул 1) бир ёки икки, уч тийин. *Бир пул бериб йиғлатдим, минг пул бериб тиндирдим.* Мақол; 2) ҳеч нарсага арзимайдиган, аҳамиятсиз, бир тийинга ҳам қиммат. *Бу гаплар унга бир пул. Ҳамма унга бир пул.* ■ *Жўрабоев Юсуфийнинг далилларини бир пул қиладиган мақола ёзибди.* Ш. Рашидов, Бўрондан кучли. *Турди ғилай олти йиллик тоат-ибодатини бир пул қилди.* А. Кўчимов, Ҳалқа.

5 Афғонистоннинг асосий пул бирлиги – афғонийнинг юздан бир улушига тенг майда пул, танга.

Пулга чақмоқ қ. чақмоқ I. **Пулни пул билан ўйнамоқ** дағл. Меҳнат қилмай осонлик билан пул топиб, бебилатса сарф қилмоқ,

унча-мунча пулни назарга олмаслик. **Пулнининг сассиғига ётолмайди** с.т. Жуда бой, пулдор одам ҳақида айтиладиган ибора.

ПУЛ II [ф. پۇل – кўприк] эск. кт. айн. **кўприк.**

Пули сирот қ. сирот.

ПУЛДОР [ф. پولدار – пулга эга бўлган, пулли] Кўп пулга эга бўлган, пули кўп. *Пулдор одам – қанотли одам, бу қанот билан мағрибдан машриққача учасан, ҳар ерда ошина-оғайни, дўст-ёр топасан.* Ойбек, Танланган асарлар. *Қарздор бўлишдан пулдор бўлиш яхшироқ.* Газетадан. *Пулдорлар ҳар бир нарсани ўз вақтида ғамлаб, арзонга туширишади.* Ойбек, Танланган асарлар.

ПУЛЕМЁТ [р. пуля – ўқ ва метать – отмоқ] Ўқни тез отадиган автоматик қурол. *Қўл пулемёти. Лентали пулемёт.* ■ *Бу орада халқ оқими Ўрда томонга йўл олди. Аллақарда пулемёт тариллади.* Ҳ. Фулом, Машғал. *Тепаликнинг этагида писиб ётган немис пулемёти ниёда аскарларимизни ёнбошдан ўққа тута бошлади.* А. Қаҳҳор, Олтин юлдуз.

ПУЛЕМЁТЧИ Пулемёт отувчи, пулемёт билан қуролланган аскар. *Пулемётчилар взводи.* ■ *Узоқда машҳур пулемётчи Абдуллаев, унинг орқасидан Асқар полвон пулемётни судраб борарди.* Ойбек, Қуёш қораймас.

ПУЛЛАМОҚ с.т. Нарсани пул эвазига бермоқ, сотмоқ. *Маҳсини уч кун ҳайитда кийиб, сақлаб қўйгандим, ана уни пуллаб, тагчарм оламиз.* Ойбек, Танланган асарлар. *-Хўжайин, – деди, – аввало Деҳқонбой бўйинтоблик қилди, бизлар ҳам бўш келмай, ҳукм чиқариб, ҳовлисини пулладик.* У Исмоилов, Сайланма.

ПУЛЛИ I Пули бўлган, пули бор. *Пулли – ботир, пулсиз – ётир.* Мақол.

2 Пул тўланадиган, пул эвазига олиннадиган, бериладиган ёки қилинадиган. *Пулли концерт. Пулли маъруза.* ■ *Қизил Ярим ой жамияти томонидан ташкил қилинган пулли поликлиникага директор қилиб тайинлашни сўради.* А. Қаҳҳор, Сароб. *Пулли хизматларни бир ярим баравар кўпайтириш режалаштирилди.* Газетадан. *«Олий бизнес мактаби»да ўқishi пулли-контракт асосида бўлиб, «Бошқарув бизнес магистри» дастури бўйича халқаро талаб-*

лар ва халқаро программа асосида олиб борилади. Газетадан.

3 (фақат миқдор ифодаловчи сонлар билан) Пул, тийин қийматидаги. *Тўққиз пулли носвой. Уч пулли аҳамияти йўқ нарса.* ■ *Олти пулли тақадек. Кўзи ирғиб бақадек, Оч мухлиснинг қўлида Утмай қолган чақадек Шайх ҳазратларига салом. Ҳамза.*

ПУЛПАРАСТ [ф. پولپرست — пулни севувчи, пулга сиғинувчи] Пулга ўч, пул тўплаш пайига тушган. *Пулпараст одам.* ■ *Ўғил отасига ўхшаган хасис, пулпараст, судхўр эмас. Бироқ виждонсизлик, хасислик ва шафқатсизликда отасидан сира қолишмайди. М. Қодиров, Бой ва судхўрнинг фош этилиши.*

ПУЛСИЗ 1 Пули бўлмаган, пули йўқ. *Пулдор одам Москвага, Варшавага боради. Пулсиз одам ўз жойидан бир қадам силжисинчи! Ойбек, Танланган асарлар.*

2 с.т. Пул тўланмайдиган, текин, бепул. *Пулсиз лекция. Пулсиз тарқатилган брошюра.*

ПУЛСИЗЛИК Пулга эга бўлмаслик, пули йўқлик. *Саудий бир сўм ишласа, оила ўн сўм талаб қилади. Саудий ўн сўм ишласа, оила пулсизликдан қон-қора қақшайди. А. Қаҳҳор, Сароб.*

ПУЛСИРОТ с.т. айн. пули сирот қ. сирот. *Дўзах узра, ўт узра, ҳайҳот, Кўрик шуми.. яъни пулсирот? М. Али, Боқий дунё.*

ПУЛЬВЕРИЗАТОР [фр. pulverisateur < лот. pulvis, pulveris — чанг, кукун] Суюқликларни пуркайдиган ёки кукун моддаларни чангитиб, тўзгитиб сепадиган асбоб; пуркагич. *Дарахтларга дори сепадиган пульверизатор. Пульверизатор билан бўёқ бермоқ.*

ПУЛЬМОНОЛОГИЯ [лот. pulmo, pulmonis — ўпка + юн. logos — фан, таълимот] Тиббиётнинг ўпка, бронхлар ва плевранинг тузилиши, иш фаолияти ҳамда касалликларини ўрганувчи, ушбу касалликлар профилактикаси ва даволаш усулларини ишлаб чиқувчи соҳаси.

ПУЛЬПА [лот. pulpa — эт, гўшт; юмшоқ нарса] Тишни қон билан таъминлайдиган қон томирлари, лимфа томирлари ва нерв толаларидан ташкил топган юмшоқ тўқима.

ПУЛЬПИТ [пульпа + лот. itis — яллиғланишни билдирувчи қўшимча] Тиш бўшлиғини тўлдириб турадиган ғовак бириктирувчи тўқима — пульпанинг яллиғланиши.

ПУЛЬС [лот. pulsus — туртки, зарба] тиб. Юракнинг қисқариши натижасида ундан келаётган қон оқими таъсири билан қон томири деворчаларининг ритмик силкиниши, тепиши, уриши, шунингдек, баданнинг томир тепкиси сезиладиган жойи. *Пульс — саксон. Беморнинг пульсини кўрмоқ. Пульсни ўлчамоқ.*

ПУЛЬТ [нем. Pult < лот. pulpitum — тахтасупа, кафедра] **1** Ноталар қўйиш учун ишлатиладиган, бир томонга нишаб, узун оёқли столча. *Дирижёр пульти.* ■ *Кийинишидан олақарғани эслатувчи, сочи жингалак, чиройли бир йигит дирижёрлик пультига чиқиб, қўлидаги таёқчасини қимирлатувдизамки, залда оркестр садолари янгради. Н. Аминов, Қаҳқаҳа.*

2 тех. Бирор нарсани автоматик бошқарадиган асбоб, аппаратлар ўрнатилган жой (стол, стенд ва ш.к.). *Бошқариш пульти. Диспетчерлик пульти.* ■ *У бошқариш пульти ёнидаги креслога ўтириб, бир оз мизгимоқчи бўлди. Афсуски, бу ҳам nasib этмади. «Ёшлик». Бу жойда каттагина бошқариш пульти ўрнатилган экан. О. Мўминов, Хийбондаги уч учрашув.*

3 Радиотелеаппаратураларни бошқарувчи асбоб. *Телевизор пультини босмоқ.*

ПУМА [исп. puma < индейс тилларидан] Американинг тоғ ўрмонларида яшовчи, мушуксимонлар оиласига мансуб йиртқич сутэмизувчи ҳайвон.

ПУНКТ 1 [лот. punctum — нуқта] **1** Ер юзидаги ёки фазодаги алоҳида белгиси, хусусияти билан ажралиб турадиган нуқта, маълум бир жой, ер. *Географик пункт. Стратегик пункт. Аҳоли яшайдиган пункт.* ■ *Кунни кеча жойлардаги қабул пунктларига янги пилла ҳосили ортилган карвонлар кела бошлади. Газетадан. Шаҳарларда ва аҳоли пунктларида патрул-йўл хизмати бўлинмалари ташкил этилган. Газетадан.*

2 Бирор иш, машғулот, тадбир кабилар учун белгиланган, махсус жиҳозланган бино ёки жой. *Телефон станциясининг гаплашиш пункти. Тиббий ёрдам пункти. Пахта пункти. Команда пункти.* ■ *Полковник Грейдер ўз кузатиш пунктида туриб, стереотруба орқали жангни кўздан кечирди. И. Раҳим, Чин муҳаббат. Мактаб, боғчаю қишлоқ врачлик пункти курса, ёмонми? Газетадан.*

3 Матн, қонун, қарор кабиларнинг рақам ёки ҳарф билан белгиланган алоҳида қисми; параграф, модда. *Уч пунктдан иборат қарор. Йигирма пунктдан иборат қоида.*

4 *плерф.* Босмаҳона белгилари (ҳарф, рақамлар ва б.) ўлчамларини аниқлашда энг кичик бирлик.

ПУНКТИР [лот. punctum — нуқта] Алоҳида-алоҳида ўзаро яқин жойлашган нуқталардан (...) ёки чизиқчалардан (---) ташкил топган узун чизиқ. *Пунктир билан чизилган тасвир.* ■ *Агар ёйилмани пунктир чизиқлар бўйича керакли тарзда буксак, унда тўрт бурчакли тўғри призма деб аталувчи геометрик жисм ҳосил қиламиз. «Геометрия».*

ПУНКТУАЦИОН Пунктуацияга, тиниш белгиларига оид. *Пунктуацион қоидалар. Пунктуацион белгилар. Пунктуацион хатолар.* ■ *Китобда баъзи имловий ва пунктуацион хатолар учрайди.* Газетадан.

ПУНКТУАЦИЯ [лот. punctum — нуқта] тил. **1** Маълум бир тил ёзувидаги тиниш белгилари тизими.

2 Ёзма матнни пунктуацион расмийлаштиришни тартибга солувчи, ҳар бир тилда тарихан шаклланган қоидалар, меъёрлар. *Ўзбек тили пунктуацияси.*

3 Тиниш белгилари тизими қонуниятларини, шунингдек, тиниш белгиларининг қўлланиш меъёрларини ўрғанадиган тилшунослик бўлими.

ПУНКЦИЯ [лот. punctio — санчиш] тиб. Даволаш ёки диагностика мақсадида организмдаги бирор бўшлиқ, қон томири ёки аъзога шприц игнаси санчиш муолажаси.

ПУР [ф. *پُر* — тўла, тўлиқ, жуда кўп] Тўла, кўп. *Кўз равоқини сен эттинг пур нур, Кўнгил эвини сен эттинг маъмур.* М. Солиҳ, Шайбонийнома.

ПУРВИҚОР [пур + виқор] кт. Виқорли, сервиқор. *Устига-устак заминнинг — пурвиқор, улугвор тоғлар ўлкасининг табиати, оппоқ кўприб оқаётган дарёнинг шовуллаши менинг руҳиятимга нўртаналар, тошқинлар олиб келади.* Газетадан. *Бўйдор қарағайлар кучли қўлларини ёруғликка чўзгандай яна ҳам азамат ва пурвиқор кўриндилар.* Ойбек, Куёш қораймас. *Тоғларнинг пурвиқор салобати, сирли улугворлигидан ҳайрат, ҳаяжоним ҳаприқиб кетди.* «Саодат».

ПУРИЗМ [фр. purisme < лот. purus — соф, тоза] **1** Адабий тилни бошқа тиллардан олинган ўзлашмалар, неологизмлардан, вульгаризмлардан сақлашга интилиш. *Маърузада белгиловчи қоида сифатида миллий тиллар терминологияси ўртасида минимал тафовут принципи майдонга қўйилади, чунки максимал тафовут принципи муқаррар пуризмга олиб боради.* «ЎТА».

2 Урф-одатлар (фёъл-атворлар)нинг софлиги ва жиддийлигига интилиш.

ПУРКАГИЧ Ўсимликларга сув ва суюқ моддалар пуркаш учун ишлатиладиган мослама, асбоб. *Пуркагич билан экин майдонига дори сепмоқ.* ■ *Мавсум муваффақиятини таъминлаш учун аниқ тадбирлар ишлаб чиқилган. Пуркагичлар, терим машиналари, транспорт воситалари созланиб, старт кутиб турибди.* Газетадан.

ПУРКАМОҚ 1 Сув ёки бошқа суюқ нарсани куч билан зарраларга айлантириб сочмоқ. *Вилтга қарши дори пуркамоқ.* ■ [Чол] *Терига сув пуркайди ва кўва билан дўқ-дўқ уриб, чармни текислайди.* Ойбек, Танланган асарлар. *Биров қанотларингизнинг тағиса сув пуркаб қўйганми дейман, даврага тушолмай, мирғайиб турибсиз.* «Аския».

2 *кўчма* поэт. Сочмоқ, таратмоқ. *Ҳозиргина дилига нур пуркаган ўйлар яна кўнглини ғаш қилувчи оғир гўмонлар билан алмашинганди.* О. Ёқубов, Ларза. *Аммо саратон тандири ўчакишгандай яна ҳам аланга олиб, оташ пуркарди.* Мирмуҳсин, Умид.

ПУРКАШ қ.х. Ўқинлар ҳамда ўрмонзорларни зараркундалар, касалликлар ва бегона ўтлардан ҳимоя қилишда махсус пуркагичлар билан пестицид эритмаларини сепиш; дефолиация усулларида бири.

ПУРМАЗМУН [пур + мазмун] Мазмунли, сермазмун. *..ҳар бири дард билан суғорилган бениҳоя пурмазмун ва гўзал шеърлар.* Газетадан.

ПУРМАЪНО [пур + маъно] Маъноли, сермаъно, маънодор. *Албатта, бунда рамзий, тасаввуфга хос пурмаъно ҳам бор.* Газетадан. *Назм гулшанининг пурмаъно ҳикмат соҳибларини ўзбекнинг ўзига бек бўлганига 7 йил тўлиши муносабати билан «Истиқлол мушоираси»га чорлаймиз.* Газетадан.

ПУРҚУДРАТ [пур + қудрат] кт. Қудратли, серқудрат. *Афсуски, радиомиз кўпин-*

ча халқ билан мана шу бой, чиройли, пурқудрат тилда гаплашмайди. К. Қаҳҳорова, Чорак аср ҳамнафас.

ПУРҲИКМАТ [пур + ҳикмат] *кт.* Ҳикматли, серҳикмат, ҳикматга бой. *Муҳтарам устод Шавкат афандининг пурҳикмат китобларида.. муҳим гаплар бор.* К. Яшин, Ҳамза. *Буюк бобокалонларимизнинг пурҳикмат сўзлари битилган лавҳалар маърифатингизни бойтади.* Газетадан.

ПУСМОҚ *шв. айн. писмоқ.* Бўрибосарлар ҳаво димлигида қаерларда пусиб ётганини ҳеч ким билмасди. «Ёшлик». *Уруш! Бундай пайтда эр кишининг жойи жанггоҳда! Бировлар қон кечиб юришса-ю, сен уларнинг панасида пусиб ўтирсанг.* «Ёшлик».

ПУТ I шв. I айн. оёқ I.

2 Икки оёқ оралиғи, чатаноқ. *Лайлакнинг юришини қиламан, деб читтакнинг пути йирилибди.* Матал. ■ *Уккининг оёқларини бириктириб боғлаб, бошини путига қистирган.* Ф. Фулом, Соялар.

ПУТ II [р.] с.т. Пуд. [Кўй] *Бир ярим пут мой беради. Суягигача мой: эртага норинхўрлар маза қилади-да.* Ойбек, Танланган асарлар. *Юки бир чарх ила 3 пут келатурган эски-туски, латта-путталардан иборатдур.* М. Бехбудий, Қасди сафар.

ПУТЁВКА [р. путёвка — йўлланма < путь — «йўл» с. дан] I Бирор жойга, мас., ўқишга, дам олиш уйига, ишга юбориладиган кишига бериладиган махсус ҳужжат, йўлланма. *Санаторий путёвкиси.* ■ [Пўлатжон] *Учувчилик мактабини яқинда битириб, Тошкент аэропортига путёвка олармиш.* Ҳ. Назир, Сўнмас чақмоқлар. *Алоҳида комиссиядан ўтиб, академияга путёвка ҳам олдим.* Ф. Фулом, Танланган асарлар.

2 махс. Автомашина ва б. транспорт воситалари ҳайдовчиларининг қўлига бериладиган, маршрут ёки бажарилиши зарур бўлган иш ёзиб қўйилган варақа.

ПУТУР *с.т.* Футур, шикаст, зарар. *Бу ҳол китоб тили учун катта путурдир.* М. Жўра, Ноширнома. *..У бир оз тўлишибди. Лекин бундан ҳуснига заррача путур етмабди.* «Ёшлик».

ПУФ тақл. с. Нафас олиш, ўтти ўчириш ёки алангалатиш ва иссиқ нарсани совитишда икки лаб орасидан кучли босим билан ҳаво чиқишида эшитиладиган товуш ва шу ҳаракатнинг ўзи ҳақида. *Мулла Саид Жалол-*

хон.. бурнига қўнган пашшани қўлидаги рўмолча билан кўриш малол келди шекилли, остки лабини чўзиб, «пуф» деди. А. Қаҳҳор, Башорат. [Гулнор] *Ёнидаги чироқни «пуф» деб ўчирди.* Ойбек, Танланган асарлар. *Шунинг учун болалари касалманд кўринишаркан-да! Далавойнинг аёли «пуф» деса, учиб кетадиган, рамақижсон экан.* «Ёшлик».

Пуф сассиқ шв. Ёқмай қолган, ёмонга, яроқсизга чиқарилган кимса, нарса ҳақида айтиладиган иборат. *-Ёшироғини топдингизми? — деди Қимматхон [Умматалига] дабдурустдан. — Сен топганингдай, менга ҳам на-сиб қилгани бордир. Ҳар ким ўз кўнгли тортган ошни ичади. — Ҳо-о, — деди Қимматхон чўзиб, — энди мен «пуф сассиқ» бўлдимми?* Шуҳрат, Жаннат қидирганлар.

ПУФАК I Суюқликда, суюқ массада ҳосил бўладиган, ичи ҳаво билан тўлган шаффоф шарча. *Совун пуфаклари.* ■ *Пайт баҳор эди, Ёлғир тушиди-да, Томчидан улкан Бир пуфак шишди.* Нурбек.

2 Қайноқ сув ва б. нарсадан куйиш натижасида терида пайдо бўладиган, ичи суюқликдан иборат оғриқли бўртиқ, пўрсилдоқ.

3 *анат.* Одам ва ҳайвонлар организмда суюқлик тутиб турувчи ёки суюқлик тўп-ланадиган юпқа қопчиқ. *Ут пуфағи. Сийдик пуфағи.* ■ *Ўрта мия пуфағи одамда ва юқори ҳайвонларда бош миянинг нисбатан жуда оз қисмини ҳосил қилади.* «Анатомия».

2 Ичига ҳаво ёки енгил газ тўлдириб шиширилган, юпқа, чўзилувчан нарса; шар. *Бирпасдан кейин лагерь устида думига каттакон пуфак боғлаб олган самолёт пайдо бўлди.* А. Қаҳҳор, Олтин юлдуз.

ПУФАКЧА Пуфак с. кичр. *Совун пуфакчалари. Мия пуфакчалари.* ■ *Элмуроднинг.. панжалари орқасида пуфакчалар пайдо бўлибди.* Шуҳрат, Шинелли йиллар.

ПУФЛАМА: **пуфлама мусиқа асбоблари** Ҳаво оқимининг чолғу каналида тебранишидан товуш ҳосил бўладиган созлар гуруҳи (сурнай, карнай, флейта ва б.).

ПУФЛАМОҚ I Икки лаб орасидан кучли босим билан ҳаво чиқармоқ, дам урмоқ. *Чироқни пуфлаб ўчирмоқ. Шарни пуфлаб шиширмоқ. Халқ пуфласа, бўрон бўлар. Мақол.* ■ *Рафиқ пуфлаган эди, [ҳуштак] жуда қаттиқ чуруллади. Бола бениҳоят суюнди.* Ойбек, Танланган асарлар. *Эргаш ўрнидан*

туруиб, чайла бурчагида илиғлиқ турган чопинини олиб, елкасига ташлади. Пуфлаб, чироқни ўчираётган эди, ташқарида мотор овози эшитилди. «Ёшлик».

2 Оғзидаги нарсани ўпкадан чиқаётган ҳаво оқими билан чиқариб, туфлаб ташламоқ. Абдуманноп иштаҳа билан чайнаб турган гўштни пуфлаб ташлади. А. Қаҳҳор, Оғайнилар. У Саидийнинг шарбатини сўриб бўлди. Энди пўчоғини пуфлаб ташлаши керак. А. Қаҳҳор, Сароб. Оғзи куйган одам қатиқни ҳам пуфлаб ичади, деган мақол бор. К. Қаҳҳорова, Чорак аср ҳамнафас.

ПУФПУФЛАМОҚ с.т. 1 қ. **пуфламоқ** 1. У газга чой кўйиб, эрталаб ювиб, ёйиб кўйган кирларини дордан йиғиштирди-да, иссиқдан пуфпуфлаб, уйига кириб кетди. С. Зуннунова, Кўк чироқлар.

2 Авайламоқ, асрамоқ. Уни пуфпуфлаб катта қилди.

ПУХТА [ф. پخته — қайнатилган; пишган; тажрибали, моҳир] **1** Узоқ чидайдиган қилиб ишланган; пишиқ, мустаҳкам. *Пухта газлама. Пухта арқон. Пухта иморат. Пухта тўқилган пайпоқ.* ■ Куннинг қизиғида кенг тош йўлда пухта этикларини қалдиратиб илдам юрган аскар йигит.. терлаган юзида бирдан шабада нафасини сезди. Ойбек, О. в. шабадалар. Кўчама-кўча пухта гўштлардан тўшаб, тахтиравон йўл солди. «Нурали».

2 Пишиқ, ҳар томонлама ўйлаб иш қилдиган. *Пухта одам. Пухта ташкилотчи. Пухтанинг иши беш, шошманинг иши бўш.* Мақол. ■ -Ҳа, сен пухтасан, — дея Тўғайсарни яна ёнбошлади. — Балки сеням билганинг билгандир. Ш. Холмирзаев, Қил кўприк.

3 Атрофлича, чуқур ўйланган, асосли; пишиқ. *Пухта фикр. Пухта иш. Пухта асар.* ■ Хатиб домла ҳақсизликка қарши.. пухта тадбирларни кўради. А. Қодирий, Обид кетмон. Бу гапни алоҳида эътироф этиши керакки, буларнинг бариси ҳаётний, бадиий жиҳатдан пухта, ишонарли чиқади. К. Қаҳҳорова, Чорак аср ҳамнафас. *Йўл-йўлакай қиз жуду кам гапирар, фақат саволларга жавоб берар эди, жавобларни ҳам олдин пухта ўйлаб, кейин айтарди.* Ф. Мусажонов, Ҳури.

4 Камчилиги, кам-кўсти бўлмаган, бекам-кўст; тўла-тўқис. *Назарий жиҳатдан пухта тайёргарликка эга бўлган мутахас-*

сис кадрлар. Қишлоғва пухта тайёргарлик кўрмоқ. ■ *Сийсий мустақиллик пухта ва мустаҳкам иқтисодий заминга эга.* Газетадан.

ПУХТАЛАМОҚ 1 Пухта қилмоқ, пиширмоқ. [*Мастура:*] *Айтмоқчи, биз поччангиз билан маслаҳатни хўп пухталаб кўйганмиз.* Ҳамза, Паранжи сирлари. *Иш бошдан пухталанган, қандай ерга бораётганлари айтилган экан, хайрият!* Ойдин, Мардлик — мангулик.

2 Асосли равишда, тўлиқ ўзлаштирмоқ. *Билимини пухталамоқ.* ■ *Холиқ чираниб дейди: -Осонгина кирман. Уч ой пухталаб ўқиб, Монтёр, радист бўлман.* Қ. Муҳаммадий.

Оғзини пухталамоқ Ошиқча сўз демайдиган, сир айтмайдиган қилмоқ. *Боланинг оғзини пухталаб кўймоқ.*

ПУХТАЛИК 1 Ҳар тарафлама асослилик, пишиқлик; тўла-тўқислик. *Асарнинг пухталиги. Пухталиқ билан иш олиб бориш.*

2 Буюмнинг белгиланган хизмат муддати давомида иш қобилиятини муайян чегарада сақлаган ҳолда ўз функциясини бажариш хоссаси; пишиқлик, мустаҳкамлик.

ПУЧ [ф. پوچ — бўш, ғовак; қуруқ, мазмунсиз; бекор, фойдасиз, самарасиз] **1** Ичи бўш, мағзи йўқ ёки тўлиб етилмаган. *Пуч ёнғоқ. Пуч данак. Пуч уруғ. Пуч пилла.* ■ *Ота-онам эски одамлар. Булар олдида ишқининг пуч ёнғоқча қадри йўқ.* Ф. Фулом, Танланган асарлар.

Пуч калла Ақлдан, билимдан холи калла.

2 кўчма Асоссиз; амалга ошмайдиган; хом, қуруқ, ёлғон. *Пуч даъво. Пуч ваъда.* ■ *Олий мактаб орзуси мен учун ёлғиз пуч хаёл бўлса ҳам, ундан воз кеча олмадим.* Ойбек, Нур қидириб. *Дўстлар, деманг бу пуч хаёл.* Ҳамза.

Пучга чиқмоқ Асоссиз бўлиб чиқмоқ, амалга ошмай қолмоқ, йўқ бўлмоқ. *Сидик-жоннинг бу вазоҳати Зуннунхўжанинг ўйини пучга чиқарди.* А. Қаҳҳор, Қўшчинор чироқлари. *Охирги умиди ҳам пучга чиқди.* Ў. Ҳошимов, Қалбинга қулоқ сол. **Таги пуч** 1) асоси йўқ, асоссиз. *Таги пуч гап;* 2) замири бўш, таянчи йўқ. *Оқ подшонинг таги пучга ўхшайди.* Ойбек, Танланган асарлар. **Кўйинини пуч ёнғоқча тўлдирмақ** Амалга ошмайдиган, қуруқ ваъдалар билан алдамоқ.

ПУЧАЙМОҚ Шишган, қаппайган ҳолатидан бўшаб, кичрайиб қолмоқ; бўшашиб, шалвираб кичраймоқ. *Копток пуча-*

йиб қолибди. Қорни пучайиб қолибди. Дами чиққан пуфакдай пучаймоқ.

Илиги пучаймоқ (ёки куримоқ) Ҳол-қудратдан кетмоқ, тинка-малори куримоқ (яна қ. **илик**). Ариқ қазувчиларнинг овқатдан силлалари қуриб, иликлари пучайган.. дармонсиз эдилар. А. Қодирий, Меҳроблан чаён. Очликдан силлам қуриб, илигим пучайган чоғимда ҳам сизларга ялинмайман. Ҳамза, Бой ила хизматчи. **Кармони пучайди** Кармонида ҳеч нарса қолмади.

ПУЧАК [ф. پوچك] **1** Ичи бўш; пуч. Пучак шар. Баллон пучак бўлди.

2 кўча Ҳеч нарсага арзимайдиган, қиммати тушиб кетган; қалрсиз, пуч. [Ғофир:] Бу ёруғ дунёга нима учун келдик? Наинки муҳаббат, дўстлик, мурувват, одамгарчилик деган улуг гапларни бозорга олиб чиқсалар, пучак пулга сотсалар! Ҳамза, Бой ила хизматчи.

3 кўча Асоссиз, пуч. У [Машҳадий] султонларни, бекларни.. пучак, лекин кўз қамаштиргич ялтироқ сўзлар билан мадҳ этмоққа моҳир. Ойбек, Навоий.

4 Қўлидан иш келмайдиган; қуруқ. Шундай улуг ишларда кишиларнинг сараги саракка, пучаги пучакка чиқади. Ойбек, О. в. шабадалар.

ПУЧАКИ айн. **пучак**. Пучаки чигит. Пучаки пул. Пучаки гап. Пучаки одам.

ПУЧМОҚ 1 эск. кт. Чет, пастқам жой, овлоқ; бурчак. Қишлоқнинг қоронги пучмоғи. ■ Ахир, фольклорчи бўлиш, қайси бир пучмоқларда кўздан пана ётган халқ ижодининг дурдоналарини қидириб топши.. уларни ёзиб олиб, китоб қилиб чиқариши.. — эҳ, ҳа, игна билан қудуқ қазинининг айни ўзи ку! «Саодат». Тоғларнинг бу хил пучмоқлари унга бегона эди. С. Аҳмад, Жимжитлик. Атроф тумонат оппоқ эди. Бу оқлик жамики пучмоқлару хилват гўшаларга ҳам алланечук гайритабиий куч орқали тарқалган. Ш. Бўтаев, Қўрғонланган ой.

2 кўча Таг, туб; чуқур жой. Юрак пучмағида қолган кирларни қалам билан тозалов шоирнинг иши. Ф. Фулом, Танланган асарлар. Ён-атроф қанчалик рутубатли, яъни қанчалик қора-қуюқ ранглар билан ўралган бўлмасин, кўнглингизга негадир илиқлик инди, бундан ҳам кўнглингиз ёришади, ҳам шуурингизнинг хира торган пучмоқларида нимадир ғимирлайди. Газетадан.

ПУЧУҚ 1 Ясси, ёпишган ёки шикастланган (бурун ҳақида). Раҳимжон.. жуда хунук эди: қип-қизил гўшт, пучуқ бурнида доғлар, бошида тук. А. Мухтор, Туғилиш.

2 Қаншари паст, бурни ясси, ёпишган, кичик ёки шикастланган. Пучуқ бола. ■ Кўса ва пучуқ хоннинг бошидаги қимматбахо тожи худди сигирга урилган эгардек бесўнақай кўнқайиб турарди. М. Осим, Элчилар. Пучуқнинг келишдан мақсади фақат шу ёзиб бериладиган хатгина эди. А. Қодирий, Ўтган кунлар. Бизни ҳақорат қилиб саваётган киши шу ерларнинг эгаси, машҳур Азим пучуқ деган бой экан. Ф. Фулом, Шум бола.

3 Болаларга нисбатан эркалаш, суйиш маъносига қўлланади. Пучуқ қизим, мунча ширинсан. ■ Кичик Тельман, сал пучуққина, қорагина, ўзи шўхгина. Миртемир, Асарлар.

4 Жўмраги синган ёки учган. Пучуқ чойнак. ■ Бояги гапни айт, деяпман! Сен пучуқ обдаста ўлгурга ким қўйибди бировларнинг ишига аралашини? С. Аҳмад, Чўл шамоллари.

5 кўча Япасқи, учи кемтик (пойабзал ҳақида). Пучуқ этик. ■ Оёқларида кавуш ўрнига пучуқ калиш. «Ёшлик».

ПУШАЙМОН [ф. پوشیمان — ўқинувчи, ачинувчи, тавба қилувчи; ўз қилмишидан афсусланувчи] Ўз қилмиши учун руҳий эзилиш ҳисси; афсусланиш; афсус, надомат. Пушаймон бўлмоқ (емоқ, қилмоқ). Сўнги пушаймон — ўзинга душман. Мақол. ■ Иқрор бўлдим: гуноҳим йўқдир, Очиқ юриб топган кишимдан Ва беизн қилган ишимдан Пушаймоним ва оҳим йўқдир. Ҳ. Олимжон.

Пушаймон бўлмоқ (ёки емоқ, қилмоқ) Ўз қилмиши учун руҳан эзилмоқ, афсус қилмоқ, афсусланмоқ. Отаси жаҳл устида шундоқ қилаётганини, зум ўтмай пушаймон бўлишини, бутун умидлари шу қизидан эканини билади. Ў. Ҳошимов, Қалбингга кулоқ сол. Қудратнинг ўзи ҳам кўчиб келишганига пушаймон еди. Ҳ. Назир, Сўнмас чақмоқлар. Гулнор айтганига пушаймон қилди, хатосини тўғрилаш учун сўзлашмоққа мажбур бўлди. Ойбек, Танланган асарлар.

ПУШТ [ф. پشت — орқа, елка; бел, сперма жойи; таянч, ҳимоя; ҳомий] **1** Одам ёки жониворнинг уруғ ёки тухумида бўладиган,

маълум шароитда ривожланиб, болага айланадиган, ўз ривожланишининг бошланғич босқичидаги аъзо; эмбрион. *Одамнинг пушти. Товуқнинг пушти.*

Пушти камар 1) оталик уруғи, сперма; 2) кишининг ўз фарзанди. *Менинг пушти камарим бу, суюкли ўғлим, Нурийдийдам васли учун тангрига шукур.* А. Орипов, Ёиллар армони. **Пушти куйиш** Бирор касаллик натижасида бола кўрмайдиган бўлиб қолиш.

2 Кимса ёки оиланинг ўзидан аввалги авлоди ёки кейинги авлоди, авлод-аждод; насл. *-Менинг эрим.. тўплаган мол-дунёси икки пуштга етади, - деди Кумуш.* Т. Жалолов, Олтин қафас.

Етти пушт Етти авлод ва аждод. *Етти пуштим ўтмаган отда, Бу аслида эмас катта ғам.* «Шарқ юлдузи». *Болангдан айланай, ундай қилманг. Сулаймоннинг қарғиши етти пуштимга етади, айланай.* А. Кўчимов, Ҳалқа. *Мирбадалбек, ҳушёр бўлинг, менинг қоним етти пуштингизга сачрайди!* П. Қодиров, Юлдузли тунлар. **Пушти паноҳ** (тўғриси **пушту паноҳ**) қ. **паноҳ**. *Дўстим бор, душманим бор, маҳалла-кўй, гузарим бор, қариган чоғимда кенжагинамнинг хотини менга пушти паноҳ, қўл-оёқ бўлармикин, деган эдим.* Ф. Ғулом, Танланган асарлар. *Суянган тоғлари, пушти паноҳлари эшони Судурни бошлаб келишиди.* Ш. Холмирзаев, Қил кўприк. **Пушти кўтармаслик** Ёқтирмаслик, тоқат қилолмаслик. *Ойиси этагидан тутган боладек юрадиганларни пуштим кўтармайди.* О. Мухтор, Аёллар мамлакатаи ва салтанати.

ПУШТА 1 [ф. پشته — боғ, боғлам; тепача, дўнғча; тупроқ девор, ғов; марза] қ.х. Ёнма-ён жўяклар орасидаги, одатда қатор қилиб экин экиладиган узун ер бўлаги, экин палак отиши учун қолдирилган бўш жой. *Қовун пуштаси.* ■ *Бир-икки қадам юргандан кейин эса, бирдан помидор пуштасида кундадай гўдайиб турган эрига бир қарадию, юришиниям, юрмасиниям билмай қолди.* А. Кўчимов, Ҳалқа. *Қиз қошиқдай қора туфлисининг учи билан эгат пуштасини шиббалади.* С. Нуров, Майсаларни аёз урмайди.

2 Икки ток қатори орасидаги ёки ишқом ўртасидаги бўш жой. *Боғда саккиз узун ишқом, ҳаммасининг поялари яхши ишланган, пушталари чопилган.* Ойбек, Танланган асарлар.

ПУШТАН Эгарнинг от қорнидан айлангириб ўтқизиб боғлаб қўйиладиган тасмаси; қоринбоғ. *Боз устидан тортади, ярақлатиб тилла пуштанни.* «Нурали». *Бир ёндан хазиначи бўлган қирқ йигитнинг бири бир тилла эгар.. пуштанлар, тилла узангиларни ҳозир қилди.* «Гўрўғлининг туғилиши».

ПУШТИ Шафтоли гули рангидаги; оч қизил. *Пушти гул. Пушти лента.* ■ *Зумрат ичкарига кириб, кийиниб чиқди. Эғнида гулдор пушти халат, дуррани дол қўйган, оёғида қизил бахмал шиптак.* С. Сиёев, Отлиқ аёл. *Тувакларда оқ, сариқ, пушти гуллар очилиб ётибди.* С. Сиёев, Ёруғлик.

ПУШТУ(Н)ЛАР қ. **афғонлар**.

ПЬЕСА [фр. piece] **1** *ад.* Саҳнага қўйиш учун мўлжалланган драматик асар. *Тўрт пардали пьеса. Комил Яшиннинг «Номус ва муҳаббат» пьесаси.*

2 *мус.* Кичик ҳажмли мусиқа асари.

ПЮРЕ [фр. puree < purer — тозаламоқ < лот. purus — тоза] Мевалар ёки қайнатиб пиширилган сабзавотларни қирғичдан ўтказиб ёки эзиб, ийлаб тайёрланадиган егулик, қайла.

ПЎК 1 1 Ичи чириган ёки қавак. *Пўк дарахт. Пўк ёғоч. Бу толнинг ичи пўк.* ■ *Нусратбек ҳам шундай қилди. Бироқ редиска пўк экан. Туғлаб ташлашга уялди.* С. Нуров, Нарвон.

2 Бирор касаллик туфайли дарахт танасидан ўсиб чиқадиган, ғовак тўқимадан иборат ўсимта; дарахт буқоғи. *Толнинг пўки. Тут пўкидан сариқ буюёқ сифатида фойдаланилган.* ■ *Бу жангга душман ўз ихтиёридаги ҳамма нарсани ташлади; унинг орқа томони қуриган дарахтдек пўкдир.* Ҳ. Олимжон, Танланган асарлар.

3 *кўчма* Семиз, лекин кучи кам; хом-семиз. *Даланинг кўкига, одамнинг пўкига ишонма.* Мақол. ■ *Меҳнат қилиб ўрганмаган Камол пўк эди, бир-икки силтаниб, қўлларини Нодирдан зўрға бўшатиб олди.* С. Юнусов, Кутилмаган хазина.

4 *кўчма* Маъносиз, саёз, бўш (умри қисқа). *Замон пўк нарсани тез унутдирар, Яъни турғунликдан ҳаёт уч олар, Эски лой қалға йўқ, қиссаси турар, Ерга чўки кетган эски кўчалар.* М. Шайхзода, Тошкентнома.

5 *шв.* Пўкак, тиқин. *Тарелка ёнида ётган пичоқни олиб, унинг учи билан шиша оғзида-*

ги пўкни олмоқчи бўлди. Ш. Ризо, Қор ёғди, излар босилди. [Мингбоши] Шижанинг тагига йўғон шапалоғи билан икки марта урди, пўк сачраб чиқиб, шипга тегди, сўнгра у ердан сачраб, токчадаги катта жомга келиб тушди; «жар-р-ранг» .. этди жом. Чўлпон, Кеча ва кундуз.

Пўк бермоқ Қўрқиш ёки қатъиятсизлик орқасида оғиздан гулламоқ, валдирамоқ, сир бой бермоқ. ■ Нима бало бўлди, эринг икковимизнинг ишимизни сезиб қолганми дейманов, ёки пўк бериб қўйдингми? [деди йигит хотинга]. Ф. Фулом, Шум бола. **Пўк учмоқ** Ёлғон гапга ишонмоқ, лаққа тушмоқ, лақилламоқ. -Омон ҳам менинг гапимга «пўк» учган бўлса керак, икки гапнинг бирида «ҳаҳа, ҳаҳа», деб қўяр эди, — деди Шум бола. Ф. Фулом, Шум бола.

ПўК II тақл. с. Ичи бўш ёки қавак нарсани урганда, қиздирилмаган чилдирмани чертганда, юракнинг қаттиқ уришида чиқадагиган товуш ҳақида. Пишган қовоқ чертилса, пўк этади. ■ Аҳён-аҳёнда шампанскийнинг «пўк» этган овози эшитилиб қолади. «Муштум». Дуторнинг тинғир-тинғиршо чилдирманинг пўк-пўк товушини апроф ютиб юбораетгандай эди. «Ёшлик».

Пўк этиб Бирдан, тўсатдан, кутилмаганда. Қизинг беш-олти кун йиғлаб-сиқтаб кўникиб ҳам қолар. Ўтдами, сувдами беш-олти кунда пўк этиб униса ҳам ўлса, ана ундан кейин ўзининг хоҳлаганига берармиз, эсидан ҳам чиқиб кетар. Ҳамза, Танланган асарлар. Нима, ажали этиб, иякни қоқишга қараб қолди, пўк этиб ўлса, бўлганимиз бўлди. Ҳамза, Танланган асарлар.

ПўКАК I Қорақайинлар оиласига мансуб доим яшил бир турли дарахтнинг (пўкак дубининг) пўстлогидан тайёрланадиган енгил материал. Пўкакнинг енгиллик, шовқин ва иссиқликни ўтказмаслик хусусиятлари. ■ Пўкак қурилиш материалларининг энг енгили ҳисобланади. «Фан ва турмуш».

2 Шундай материаллардан қилинган тик; пробка. Бир маҳалда кўзи олазарак бўлиб кўшимнинг ўзи хонамга кирди. Эшикни зичлаб ёпди-да, шимининг чўнтагидан пўкага очилган бир шиша вино олиб, стол устига қўйди. С. Аҳмад, Сайланма.

3 Ичи қавак, пўк. ..Ғиёсиддин суянадиган толларнинг ичи пўкак бўлиб, нураб қолган эди. С. Аҳмад, Ҳукм.

4 кўчма Бўш, лапашанг. Сен «тўнгак»-лар мунчалик пўкак бўлмаганларингда, бунақанги сасимасдиларинг. Ҳ. Шамс, Душман. Пўкакларни олиб отар қирғоққа, Мардлар юрагини обод этар вақт. Б. Бойқобилов, Мени кутинг, юлдузлар.

5 кўчма Маъносиз, бўш. Замиранинг ҳаёти Равшанга қаҳрамонликдек бўлиб туюлди. Унинг кунлари эса бекорга ўтди, ҳаёти пўкак, бемаъно. Ф. Мусажонов, Равшан.

ПЎКИЛЛАМОҚ I «Пўк-пўк» этган товуш чиқармоқ. Қизлар бир-бирини ўйинга тортади, чилдирма пўкиллайди. Н. Фозилов, Оқим.

Юраги пўкилламоқ айн. юраги безилламоқ қ. безилламоқ. Ҳафиза автобусдан тушиб, юраги пўкиллаб, институт биносига кирди-да, тўппа-тўғри аспирантлар ўтирадиган умумий хона эшигини очди. Мирмуҳсин, Умид. [Мунаввар:] Юрагим пўкиллаб, ҳовлига кирдим. Ойим очик айвонда, хонтахта олдида ўтирган экан. Ў. Ҳошимов, Икки эшик ораси.

ПЎКОН Йўғон ичак. Пўкондан қилинган ҳасип. ■ Мана шу пўконни ўйингизнинг шипига осиб қўйинг. «Муштум».

Пўконидан ел ўтмаган Қийинчилик кўрмаган; меҳнат қилмаган; меҳнати сингмаган. Жанг кўрмаган, пўконидан ел ўтмаган, хом сут эмган йигитчадек, мусичаи бегуноҳ бўлиб туришингизни қаранг. С. Кароматов, Олтин қум. Баъзи ёшларнинг шундай ёмон бўлиб кетгани ҳақида боши қотарди. Пўконидан ел ўтмаганларнинг ҳаммасини ётқизиб қўйиб, камар билан савалагиси келарди. Мирмуҳсин, Умид.

ПЎК-ПЎК Пўк II с. тақр. Йўлда яланг-оёқ кетаётган барваста, гавдали одам, тутуннинг аччиғидан ўпкаси узилаётгандек, тез-тез ва пўк-пўк йўталарди. «Ёшлик».

ПЎЛА [ф. پوله — шикастланган, эзилган] Зарб еб ёки пишиб ўтиб кетиб ичи тушган, ичи бўш. Пўла қовун. Қовуннинг ёмони — пўла, Хешнинг ёмони — бўла. «Фольклор».

Боши пўла бўлмоқ Мияси қаттиқ зарбдан чайқалмоқ, лат емоқ. **Пўла бош** Гап уқмайдиган, калтафаҳм, галварс. Бу пўла бошга энди тушунтирдим-а. Ўзи юмшоқ супурги бўлиб кўринса ҳам, тошдан ҳам қаттиқ экан, занғар, — деб яна сипқорди. К. Яшин, Ҳамза. **Пўла бўлмоқ** Зарб, лат емоқ. Сафарбой ўн йигити билан дабдала бўлиб,

балки тоза пўла бўлиб, кўп қамчини еб, Чамбилга қайтидилар. «Авазхон».

ПҮЛАТ [ф. پولاد — жуда қаттиқ кулранг металл] **1** Темирнинг маълум миқдордаги углерод билан қўшилишидан ҳосил бўлган, кулранг, чўкичланувчи қаттиқ металл. *Зангламайдиған пўлат.* ■ *Бе-е, менда пўлат нима қилади, тақсир. Эски тақалар, темир-терсақлар билан зўрға қимирлаб турибмиз.* М. Исмоилий, Фарғона т. о.

2 Шу металлдан тайёрланган, ясалган. *Пўлат сим. Пўлат қайчи. Пўлат тиш. Пўлат пичоқ кинсиз қолмас.* Мақол.

Пўлат из поэт. Темир йўл. *Янги машиналар келар бирин-кетин Дўстлик қура олган пўлат излардан. Зулфия. Пўлат от поэт. айн. трактор. Пўлат отни ўйнатиб, Тракторчи бўламан. Қ. Муҳаммадий. Пўлат сандиқ қ. сандиқ. Пўлат қуш поэт. айн. самолёт. Кўкда ранго-ранг пўлат қушлар ҳамиша посбон. Ҳабибий, Девон.*

2 фольк. Қилич, шамшир. *Олмос пўлат боғлаб мен ҳам белимдан, Дев излаб чиққанман ўсган элимдан. «Маликаи айёр».* Пўлат билан қирди девни, кескир ханжарини урди, яланғочлаб қилич солди. «Маликаи айёр».

3 кўчма Метиндай мустақкам, бузилмас, енгилмас. *Пўлат қалъа.*

4 Кучли, забардаст. *Қиш. Дехқон аҳлининг пўлат мускулларига ҳордиқ берадиган, кўнгил ёзадиган фасл. «Ўзбекистон қўриқлари».* Бизнинг пўлат қудратимиз — бирлигимизда. М. Шайхзода.

5 Пўлат (эркаклар ва хотин-қизлар исми).

ПҮЛОТИЙ Сарик мағиз буғдой унидан тайёрланган, чакич билан юзига гул солиб ёпилган йирик нон. *Самарқанднинг сарик мағиз буғдойидан пиширилган, ҳар биттаси ойбаркаш нуха пўлотий, осеъйи нонларни еганмисиз? Ф. Фулом, Самарқанд сайқали. Чойхоначи бир чойнак кўк чой билан патнисда тўрт чақмоқ қанд ва янги узилган нони пўлотийдан келтириб қўйди. Ў. Умарбеков, Севгим, севгилим.*

ПҮМ бол. Бир-бири билан гаплашмай қўйган, уришиб қолган; араз. *Биз у билан пўммиз.*

Пўм бўлмоқ (ёки чикмоқ) -*Дада, ойимла билан пўм бўлдингизми? — сўради Витя. -А? Ким айтди? — кулгисини босолмай зўрма-*

зўраки қовоғини солиб сўради Маҳкам ака. Р. Файзий, Ҳазрати инсон.

ПҮНГ с.т. пўк. *Азиза шу вақтгача қамчисидан қон томиб, сўзидан илон пўст ташлаган дадасининг ичи пўнг эканини энди тушуниди. Шухрат, Олтин зангламас.*

ПҮНГҚАРҒА шв. Қора қарға, гўнгқарға. *Қассоб дўкони олдидаги қанорада уч-тўртта пўнгқарға ивирсираб сакрайди. Ш. Тошматов, Эрк қуши.*

ПҮНҒИЛЛАМОҚ Норози кайфиятда димоғ билан секин ва ноаниқ сўзламоқ, гўнғилламоқ, пинғилламоқ. *қора Аҳмад бир нима деб пўнғиллади-да, ҳовлининг четидан юриб, бир уйча олдида тўхтади. Ойбек, Танланган асарлар. Шу лаҳза Шукур Каримович гўдайиб турган Салимхон Обидийга хўмрайди, «Домла, расво қилдингиз!» деб пўнғиллади. Мирмуҳсин, Умид.*

ПҮПАК шв. айн. попук. **1.** *Бу туяларнинг.. бўйинларига ва тиззаларига кумуш.. кўнғироқлар, нўхталарига ипакли қизил пўпақлар тақилган экан. С. Айний, Эсдалиқлар. Сўйла, дўмбира, боқайин, Бошинга пўпақ тақайин. М. Алавия.*

ПҮПАКЛИ 1 шв. Пўпаги бор, пўпақ тақ(ил)ган. *Отлар оппоқ кўпикка ботган, ҳар жунидан тер чиққан.. қирқ йигит, пўпакли найзаси париллаб, қалқон елкасида дириллаб.. келаяпти. «Юсуф ва Аҳмад».*

ПҮПАНАК 1 бот. Зах ерларни қоплаб ўсадиган яшил ранг замбуруғ ёки йўсин. *Ғишткўприк ёнбошидаги ҳаммомнинг гум-базарини пўпанак босиб кетган. С. Аҳмад, Хукм.*

Пўпанак ўт Замбуруғ ва сув ўсимлигининг бир-биридан фойдаланиб, бирга яшашидан вужудга келган кўк моғорсимон ўсимлик. *Ҳовузнинг четларини ҳар хил пўпанак ўтлар босиб кетган. Ф. Фулом, Шум бола. Илқ пўпанак ўтга юзимни босиб ётардим, бирдан шамоллаган одам товушидай хирқироқ товушлар эшитилди. А. Муҳтор, Давр менинг тақдиримда.*

2 шв. Моғор.

Пўпанак босган 1) пўпанак билан қопланган, моғорланган. *Ётоқда, айниқса полда ётадиганларнинг тўшаги доим нам, қуримаган этиклари эрталабгача пўпанак босиб қолади. А. Муҳтор, Туғилиш; 2)* кўчма ишлатилмасдан узоқ туриб қолган, чанг босган. *Уч тонна кунжара нега омборда пўпанак босиб ётади? И. Раҳим, Зангори кема капитани.*

ПЎПИСА Шунчаки қўрқитиб қўйиш учун қилинган дўқ, юзаки дағдаға. *Ҳокимнинг боя қилган зуғуми хўжа кўрсинга қилинган қуруқ пўписа эканини билгани учун зиғирча ҳам кўнгли чўкмади.* М. Исмоилий, Фарғона т. о. Унинг дабдурустандан пўписа қилиши нафсониятимга тегди. «Ёшлик».

ПЎРИМ [р. форма — «расмий кийим» с. дан] **1 с.т.** Башанг, олифта. *Улардан бири шимиға гард юқтирмаслик учун икки ёнидан кўтариб олган, авайлаб қадам босаётган пўрим йигит Шавкат эди.* Ж. Абдуллахонов, Тонг ёришган соҳилда. — *Жа пўрим бўлиб олибсанлар, — деди у дўлвор табиатига ярашмайдиган жиддий қиёфага кириб.* «Шарқ юлдузи».

2 Зеб берилган, ҳашамдор. *Биздан нари уч кишлоқнинг колхозида Ҳисобчимиш, пўрим ойнак шум кўзида.* Ф. Фулом. — *Сиз, — деди Азмиддин калта сийрак соқолини пўрим тарашлаган Бўронбекка қараб.* — *Сиз, Бек жаноблари, Камол билан бирга.. Раҳмонқул қароргоҳига жўнайсиз.* Ҳ. Фулом, Машъал.

ПЎРСИЛДОҚ I Дуккакдиларга мансуб, ҳосили пуфакка ўхшаш бута.

ПЎРСИЛДОҚ II 1 Теридаги қаварик, шиш; қавариб, қуруқшаб ёрилган жой. *Пўрсилдоқ лаблар.* ■ *Нусратбек беихтиёр, тушимми, деб кўзларини юмиб очди: — Аҳмад тоға?! — Ҳа, ман, жияни! — у пўрсилдоқ қалин лабини ялади.* С. Нуоров, Нарвон.

Пўрсилдоқ боғламоқ Шишмоқ, қавармоқ, қуруқшаб ёрилмоқ. *Пўрсилдоқ боғлаб ёрилган лаблари оҳиста пичирлади.* «Ёшлик». *Совуқда кўкариб, пўрсилдоқ боғлаган лабларини кўз олдига келтирди.* А. Мухтор, Туғилиш.

2 кўча Қуруқ, баландпарвоз, шунчаки. «қошинг, кўзинг», «қомати аъло, кўзлари лайло..» деган гаплар барчаси ёлгон, пўрсилдоқ гаплар. Мирмуҳсин, Чодрали аёл. *Пўрсилдоқ гаплар турғунлик даврида авж олиб, жонга тегиб кетган.* Газетадан.

ПЎРСИЛДОҚ III 1 Кўпчиб, бўртиб турган, билқиллама, юмшоқ. *Пўрсилдоқ бугдой нон.* ■ *Қоронғироқ бурчакдаги стол атрофида кўр тутиб ўтирган овқат ташувчилардан бири ўрнидан туриб, газда пиширилган, мағзи қалин пўрсилдоқ иккита нон келтирди.* С. Нуоров, Майсаларни аёз урмайди. *Азамат теракларга чирмашган аймоқи узумлар, пахса деворлар орасида ёқутдек ялти-*

раган олчалар, пўрсилдоқ оқ ўриклар.. С. Аҳмад, Қадрдон далалар.

ПЎРСИЛЛАМОҚ Бўртиб қаваринқирамоқ, кўпчиб, билқиллаб турмоқ. *Даладан ҳаллослаб Ҳақима ҳам келди.* Унинг юзи иссиқдан, тердан пўрсиллаган эди. Ойбек, О. в. шабадалар. *Пўрсиллаб қабарган сахро яшил гиламлар билан қопланди.* Ойбек, Навоий.

ПЎРТ тақл. с. Игна, тикан каби ўткир нарса кирганда, тешганда эшитиладиган товуш. *Игна қўлимга пўрт этиб кириб кетди.* ■ *-О, боламей, тақдир-да, тақдир, — дедилар бувим кўрпага пўрт этказиб игна урар эканлар.* Э. Раимов, Ажаб кишлоқ.

Пўрт учмоқ Дарҳол ҳушидан кетмоқ, донг қотмоқ; тил тортмай ўлмоқ. *Маст бўлиб, пўрт учди.* ■ *Парвардигор нега бу шайтонларни пўрт учуриб юбормаяпти? Ш. Тошматов, Тонгдаги кўланка.*

ПЎРТАНА I Кучли денгиз тўлқини, узоқ давом этадиган довул, бўрон. *Денгиз пўртанаси.* ■ *Пўртана ҳамма ерда шовқинсурон кўтармоқда. Десапчи кемалар унсиз бўғозга яқинлашдилар.* Т. Рустамов, Мангу жасорат. *Кейин Тошкентда ҳам пўртана кўтарилди! Ниҳоят Бухорода.* Ш. Холмирзаев, Қил кўприк.

2 кўча Туғён, эҳтирос. *Сезмакдаман, тўлмоқдадир паймонанг. Ўт олмоқда юрагингда пўртана.* Э. Охунова, Мен тонгини уйғотдим. *Маллаев газабим пўртанасини ломмин демай кузатиб турди.* Х. Султонов, Онамнинг юрти. *Лекин бу — юрагидаги пўртана кўлмакка айланди, деган гап эмас.* «Шарқ юлдузи».

ПЎРТАНАЛИ кўча Туғёнли, эҳтиросли, жўшқин. *..ўша пўртанали воқеалар кечган жойларда эсимни таниганман, ўша воқеалар болаликдан менга азиз эртақдек бўлиб қолган эди.* Ш. Холмирзаев, Қил кўприк.

ПЎРТАХОЛ [a. پورتهال / ф. برتهال — апельсин Жанубий Европада дастлаб етиштирилган Португалия номидан] эск. айн **апельсин.** — *Йўқ, — деди хатлар бўлимининг мудири билимдонлик билан. — Мандарин бул пўртахол, апельсиндан кичикроқ, лимондан ширинроқ цитрус дарахтининг меваси.* Н. Аминов, Қаҳқаҳа.

ПЎСТ [ф. پوست — тери, қобик, пўчоқ; пўстлоқ; қўй териси] **1** Мева, сабзавот ёки дон сиртини ўраб турувчи қатлам, юпқа

пўчок. *Олманинг пўсти.* ■ *Эри сумкани очиб, олиб келган меваларидан бошқа беморларга улашди-да, апельсин пўстини арчиб, хотинига тутди.* С. Зуннунова, Кўк чироқлар. *Дўстлар бир оз сўлиган бананларнинг олтинсимон пўстларини арчиб, нон билан ея бошладилар.* Ойбек, Нур қидириб.

2 Одам ва жониворларнинг танасини қоплаб турувчи юпқа тўқима, тери устидаги юпқа парда. *Унча-мунча гап менга юқмайди-да. Чунки терим пўст ташлайвериб, чармага айланиб кетган.* М. Иброҳимов, Эгасини топмаган мактуб. *Нусратбек холанинг офтобда қорайиб, пўсти кўчган муштдаккина юзи, пешонасидаги ажинларга разм солди.* С. Нуров, Майсаларни аёз урмайди.

3 Тери. *Оқ пўст одам.* ■ *...Ўрта бўй, оқ пўст, қора кўз, содда табиат бир хотин бўлиб, Тўлахоннинг онасидир.* Ҳамза, Паранжи сирлари.

4 геогр. Ер қобиғи. *Ер пўстида кислород, кремний, магний элементлари кўп учрайди.* «Фан ва турмуш».

5 анат. Мия яримшарларининг қобиғи. *Мияча ва катта мия яримшарларининг юзаси остида ёки умумий айтилишича, пўст остида ҳам кулранг модда тўпламлари бор.* «Анатомия». *Фарбий Онтарио университетининг тадқиқотчилари бош мия пўстининг кўриш зонасига электродлар ўрнатилди.* «Фан ва турмуш».

Илон пўст ташлайди қ. илон. [Фотима:] *Буларнинг тайини йўқ, буларнинг қилиб юрган ишига илонлар пўст ташлайди.* Мирмуҳсин, Қаҳрамоннома. **Пўсти устухонига ёпишган айн. устухони қолган қ. устухон. Пўстига сомон тўқмоқ айн. терисига сомон тўқмоқ. қ. тери.** *Ишонмагин дўстингга, сомон тўқар пўстингга.* Мақол.

ПўСТАК [ф. پوستک — «пўст» с. нинг кичр.] **1** Ўсиқ жунли ошланган теридан иборат тўшак. *Айиқ пўстаги. Эчки пўстаги.* ■ *Элчи ва унинг мулозимлари ҳам қатор қилиб солинган пўстақлар устига ўтирдилар.* М. Осим, Карвон йўлларида. *Ўртага бир яшиқни хонтахта ўрнига қўйиб, атрофига пўстақлар солди.* Х. Назир, Ёнар дарё.

2 кўчма Қўлидан иш келмайдиган, ҳеч нарсада йўқ, эплай олмайдиган, калтафаҳм. *Э, нима қиламан ўша пўстақни?* А. Обиджон, Аканг қарағай Гулмат. *Бу ўзи пўстақ, дадамларнинг обрўсини қилиб, мактабда унга*

баҳо қўйишган. Мирмуҳсин, Илдиз ва япроқлар.

Пўстагини қоқмоқ Аёвсиз танқид қилмоқ, боплаб танқид қилмоқ, астар-пахтасини ағдармоқ. *Ҳа, кеча кўпроқ ичиб қўйган эканман. Болалар билан муштлашибмиз. Боплаб пўстагимни қоқишибди.* Ў. Ҳошимов, Қалбингга қулоқ сол. - *Тоза пўстагини қоқишганга ўхшайди, — дея кулди ўзича шофёр.* - *Энди шўринг қургур бир бечорадан боплаб аламини олади.* А. Кўчимов, Ҳалқа. **Қора пўстақдан бурга қидирмоқ** (ёки топмоқ) Бажарилиши қийин, маҳол бўлган ишга киришмоқ, ҳал бўлмайдиган ишга беҳуда вақт сарфламоқ. - *Қишлоқдан-ку бадаргаман, чумчуқдек жоним билан шаҳарга тушиб кетсам, «қора пўстақдан бурга қидириш қийин» дегандай, шаҳардан мени ким ҳам топа ола қолади? — деди Шум бола.* Ф. Ғуллом, Шум бола. [Муриддин баққол]: *Бу замонда адолатни топишдан кўра, қора пўстақдаги бургани тутуш осонроқ, акаси.* А. Мухтор, Тонг билан учрашув.

ПўСТДУМБА [пўст + думба] Қўй думбасининг алоҳида ажратиб олиб пишириб ейиладиган ёғли териси. *Пўстдумба солинган шавла.* ■ *Мамадали ҳам бувасига ўхшаб паловни яши кўради.* Айниқса, пўстдумба солинганини. Ў. Умарбеков, Бобоёғоқ. *Қази, пўстдумба, сиркаланган ва тузланган сабзавотлар эса қиш ойларида тановул қилинади.* К. Маҳмудов, Ўзбек тансиқ таомлари.

ПўСТИН [ф. پوستين — пўстин, шуба] Мўйнали ошланган теридан тикилган узун, иссиқ устки қишлик кийим. *Сирма пўстин. Поча пўстин. Одамни пўстин эмас, иш қизидира.* Мақол. ■ [Дарвозабон] *Ошланган қўй пўстагидан пўстин кийиб.. белбоғига ярим газ чамали калид осган туркман папахли бир киши.* А. Қодирий, Ўтган кунлар.

ПўСТИНБОП Пўстин тикиш учун ярайдиган. *Пўстинбоп тери. Пўстинбоп қўйлар.*

ПўСТИНДЎЗ [пўстин + ф. دوز — тикувчи] Пўстин тикадиган уста, мўйнадўз. *Пўстиндўзга буюртма бермоқ.* ■ *Паҳлавон Маҳмуд 1247 йили Хива яқинида пўстиндўз оиласида дунёга келган.* Х. Ҳомидий, Тасаввуф алломалари.

ПўСТИНДЎЗЛИК Пўстин тикиш билан шуғулланиш. [Паҳлавон Маҳмуд] *Пол-*

вонликни касб қилиб олмаган, балки салафлари анъанасини давом эттирган ва пўстиндўзлик, телпақдўзлик билан шуғулланиб, тирикчилик ўтказган. «Фан ва турмуш».

ПЎСТИНЛИК Пўстинга етарли (тери, мўйна ҳақида). *Икки пўстинлик тери.*

ПЎСТИРМА *шв.* Пўстдумба.

ПЎСТКАЛЛА, **пўскалла** [ф. پوست كنده — териси шилинган]: **гапнинг пўсткалласи** *с.т.* Гапнинг лўндаси, қисқаси, хулласи; асосий мақсад. *Гапнинг пўсткалласини айтсам, шу ишни қилсак, ойим раҳматли гўрларида тинч ётадилар. С. Аҳмад, Юлдуз. Саидхон дудуқлиб қолди. Бирдан гапнинг пўскалласини айтишига юраги бетламади. Ш. Тошматов, Тонгдаги кўланка.*

ПЎСТЛОҚ Ўсимликнинг танасини, новда ва илдизларини қоплаб турган қисми; пўст, қобиқ. *Тол новдасининг ёш пўстлоғи. Терак пўстлоғи. Зигироя пўстлоғи. ■ Ўчоқдаги кул чангиди, чайланинг томига осилган тол пўстлоғи шитирлаб тебрана бошлади. Ш. Холмирзаев, Бодом қишда гуллади. Қорақанд меваси билан чинор пўстлоғидан тайёрланган шарбат ҳам қандли диабетни даволашда яхши восита экан. «Фан ва турмуш».*

ПЎТА **1** Косиб ва кўнчиларда 9,3 квадрат дециметрга тенг сатҳ ўлчов бирлиги. *Беш пўта тери.*

2 с.т. фўта. Белима яраша заррин пўтамади(р), Ўзинг кечир менинг қилган хатомди. «Нурали». *Қулоқ солгин мендай бебахт тилига, Беклардайин пўта боғлар белига!* «Гўрўғелининг туғилиши».

3 шв. Тивит салла, рўмол; дакана. *Майрам опа, бошидаги пўтаси эшик тепасига тегмасин учун, ҳам бўлиб, ичкарига кирди. Ш. Холмирзаев, Оғир тош кўчса. Онам баланд бўйли, қотма аёл. Бошиларида ҳамма вақт пўта бўлади. Ш. Холмирзаев, Оғир тош кўчса.*

ПЎТАКА *шв.* Қушларнинг ошқозони.

ПЎЧОҚ **1** Мева, сабзавот, данак ва ш.к.нинг устини қоплаб, уни ташқи таъсирдан

ҳимоя қилувчи қаттиқ қобиғи, қалин ва зич пўст. *Тарвузнинг пўчоғи. Картошка пўчоғи. Тухум пўчоғи. Ёнғоқ пўчоғи. Гўза пўчоғи. ■ Сидиқжон акам тупроққ шайий қолсинлар, ўзим яхши ошқоқ пўчоққа узун ип боғлаб берман. А. Қаҳҳор, Кўшчинор чироклари.*

2 Мева, сабзавот қолдиғи, чиқинди. *Кўйга пўчоқ бермоқ. Пўчоқ йиғиштирмоқ. ■ Кетиш олдидан Аҳмад ерга тушган ҳандалак уруғи ва пўчоқларини битталаб тердирди, дарёга ташлаттирди. «Ёшлик».*

Пўчоқ пул *с.т.* Қиймати тушиб кетган, қадрсизланган пул. **Пўчоқча ёки писта пўчоқча** *кўча с.т.* Зигирча, озгина, қиттай. *Раис Жамолнинг гапини пўчоқча фаҳлмаганини билдирди. Э. Усмонов, Ёлқин. [Нор:] Бугдойданми? [Кумуш:] Нимадан бўлса очиб гапираверинг! Юрагим шу тўғрида писта пўчоқча андиша қилмайди. Ҳамза, Танланган асарлар.*

ПЎШАК [ф. پوشاک — кийим, либос; кўйлақ] Кийим, либос; ёпинғич.

ПЎШТ *унд. с. 1* Одамларни йўлдан қочирish учун қилинадиган хитоб. *Пўшт, арава келяпти!*

2 этн. Эркаклар бегона ҳовлига кирганларида, аёлларни яшириниш ҳақида огоҳлантириш учун айтиладиган хитоб. *Бодомбек, пўшт, деб девор тепасига чиқди-ю, кўшни ҳовлига қарамай, осилиб қолган ғиштни олди. С. Аҳмад, Сайланма. Эшон, меҳмон эшик очмай туриб, отинойига қичқирди: «Пўшт! Пўшт!» Бу: «Эркак одам кираётинти, қочинг», деган сўз эди. П. Турсун, Ўқитувчи.*

ПЎШТНЎШТЛАМОҚ Одамларни йўлдан қочирish ёки панага ўтказиш учун «пўшт-пўшт» демоқ. *Отлиқ сарбозлар халқ орасида пўштпўштлаб борардилар. М. Жўрабоев, М.Б. мартабаси. Тирикчилик дардида қоп орқалаган деҳқонлар, қаяққадир шошаётган ёш-яланг ва юк тўла аравачасини итариб, пўштпўштлаётган киракашлар бу ҳаётнинг ажралмас, табиий қисми. «Ёшлик».*

Р

РАБ(Б) [а. رَبّ — оллоҳ, худо; жаноб; ҳукмдор; хўжайин] *дин*. Худо, тангри, парвардигор. *Ё раббим!* ■ — *Кимсан, раббинг ким? — деди мункарнакир. — Уста Турдиали бўламан. А. Қаҳқор, Қабрдан товуш. Бергин шифои комил, ё рабб, ўзинг опамга, Кенгдир караминг, Аллоҳ, бергин шифо опамга. Фозил қори, Ҳалол ва ҳаром.*

РАББАНО [а. رَبَّنَا — бизнинг раббимиз] *дин*. Бизнинг раббимиз, тангримиз, худомиз. *Суйганим олдимга келди, Раббанодан ўргилай. «Кўшиқлар». Бир ўзига сиғиниб, Раббано, деб жўнади. «Ойсулув».*

Раббано бўлмоқ Парвона бўлмоқ, айланиб ўргилмоқ. *У ёз бўйи Мансур учун атайлаб ялпиз, «сариқбош», исирик, яна алақанақа гиёҳларни йиғиб юрар, «иҳ» деса, ҳозир ундан айрилиб қолаётгандай, бошида минг раббанно бўларди. Ў. Ҳошимов, Қалбингга қулоқ сол.*

РАББИЙ, ё раббий [а. رَبِّي — менинг раббим] *Ё худо, ё парвардигор. [Қулмуҳаммад:] Балхда Дарвиш Али бош кўтарибди. [Ғули:] Ё раббий! Алишер қаерда? Уйғун ва И. Султон, Алишер Навоий. Ё раббий, наҳотки ҳаммадан ҳам ажралиб қолсам, йўқ, йўқ! Х. Тўхтабоев, Йиллар ва йўллар. — Ё раббий, дини исломга ўзинг қувват бер, — деб соқолини силади. С. Зуннунова, Гулхан.*

РАББИМСАН: раббимсан деб Худо ўзинг мадад бергин деб, зўр бериб. [*Йигитлар*] *Раббимсан, деб чунонам кетмон чопшидики, ҳаш-паш дегунча алақанча ерни чўлдан юлиб олишди. С. Аҳмад, Чўл бургути.*

РАБИУЛАВВАЛ [а. رَبِيعُ الْأَوَّلِ — л.м. аввал баҳор; баҳорнинг боши, аввалидаги ой]

Қамария йил ҳисобида 30 кундан иборат учинчи ойнинг арабча номи. *..Хабарингиз борки, рабиулаввал ойига оз кун қолди, бу ерга Мирзо келиб, ишларни кўрмоқчилар. Мирмуҳсин, Меъмор.*

РАБИУЛОХИР [а. رَبِيعُ الْآخِرِ — л.м. охир баҳор; баҳорнинг охиридаги ой] *айн. рабиуссоний.*

РАБИУССОНИЙ [а. رَبِيعُ الثَّانِي — л.м. иккинчи баҳор; баҳорнинг сўнги] Қамария йил ҳисобида 29 кундан иборат тўртинчи ойнинг арабча номи. *Рабиуссоний ойининг йигирма учинчи кунини Ҳиротда, жума намозидан чиқиб келаётган Шохруҳ мирзога суқасд қилинди. Мирмуҳсин, Меъмор.*

РАБОТ [а. رِبَاط — мусофирхона; карвонсарой] *тар. 1* Мустаҳкамланган қўрғонларда соқчилар туралиган жой ёки бир-биридан маълум масофада жойлашган истехком; қўрғон. *Мирзачўлдаги ҳар бир дарахт, уй.. работ жуда кўп номаълум қаҳрамонларни тилсиз ҳикоя қилиб бериши мумкин. С. Акбарий, Шодлик давоми.*

2 Савдо йўлларидаги мустаҳкамланган манзил, карвонсарой. [*Навоий:*] *Ариқ қазмоқдамиз, чўлларда иш кўп. Работу мадраса, йўлларда иш кўп. Уйғун ва И. Султон, Алишер Навоий.*

3 Шаҳардан четроқдаги тураржой. *Шаҳарнинг меҳнаткаш ҳунармандлар яшайдиган янги қисми — работда ҳаёт қайнайди. М. Аминжонова, Шишанинг кашф этилиш тарихидан. Шунча йиллар тер тўкиб, кимсан — фалончи бўламиз, Энди қишлоқ менгами, работ бормаيمان, деди. Ф. Ғулом, Танланган асарлар. Дустим, кечир гуноҳимни, Бориб кўр*

манзилгоҳимни, Оқ работга элтиб сени, Ювай рўйи сиёҳимни. «Авазхон». Ҳоким яшайдиган ва бошқарув муассасалари жойлашган арк.. шаҳристон ҳамда унинг ташқарисиди рабoт жойлашган бўлади. Газетадан.

РАБТ [а. رېت — боғлаш, бириктириш; алоқа; белгилаш, қайд этиш] эск. Боғланиш, алоқа, алоқадорлик. *Дамашқ аш-Шомнинг Солиҳия қисми асл Шомга электрикли қўша трамвай ила рабт қилинган ва Шом марказида 30 дақиқалик йўлдир.* М. Беҳбудий, Қасди сафар.

РАБФАК [р. рабочий факультет — «ишчилар факультети» бирикмасининг қисқартмаси] тар. 1919—1936 йилларда ишчи ва деҳқонларни тезлик билан олий ўқув юрларига кириш учун тайёрлаган махсус ўқув юрти. *Техникумдан рабфакка ўтибсан деб эшитдим, ростми?* А. Қаҳҳор, Адабиёт муаллими. *Шошилинч рабфакнинг биносига кўчиб ўтдик ва бир кунда уч сменалаб ўқий бошладик.* «Саодат».

РАВ [ф. رو — юриш, бориш, ҳаракат; йўл, тарз, усул] 1 Бир он, вақт, бир лаҳза, бир дам, бир зум. *Рав ичида шунча ишлар бўлиб кетибди.*

2 *рви.* Қисқа вақтда, дарров, тез. *Рав келиб, рав кетмоқ.* ■ *Мен рав бориб келаман. Андак қутасизлар.* Ш. Тошматов, Эрк куши. *Бир рав сиз билан учрашиб кетай, дедим.* Ойбек, О. в. шабадалар.

РАВЗА [а. روضه — ўтлоқ, кўкаламзор; боғ] эск. кт. 1 Гулзор, гулшан; боғ.

2 *кўчма* Боғ, чаман. *Қадининг хаёлин кўз асраб магар, Кўнгил равзасига ниҳол этадур.* Бобур.

3 Жаннат, беҳишт. *Дўстлар, жаннатни кўрмак истасангиз — марҳабо. Боғи эрам, равзадан бордир мисол Душанбада.* Уйғун, Тонг кўшиғи.

4 *РАВЗА* (хотин-қизлар исми).

РАВИШ [ф. روش — юриш, рафтор; ҳаракат тарзи; усул, услуб] 1 Иш-ҳаракат, воқеа-ҳодиса, жараён ва ш.к. нинг боришидаги ўзига хос хусусият; юриш-туриш тарзи. *Секретарь ҳавонинг равишини, ноз ва қилиқларини олдиндан сезишга интилар эди.* Ойбек, О. в. шабадалар. *Ҳар неча пок, порсо равиш бўлсанг ҳам, ўзингни тариф қилмагилки, ҳеч киши сенинг гувоҳлигини эшитмас.* Газетадан.

2 Усул, тарз, йўсин, шакл. *Бавзи янгликдан сўнг, у пулытда жойлашган сариқ*

рандаги тугмани босиб қўярди — улар бир оз ўтмай ёзма равишда етиб келиши керак. О. Мўминова, Хиёбондаги уч учрашув. *Шарқ ғазалиётида гўзалик ўзига хос равишда тараннум этилади.* Ф. Саломов, Таржима назарияси. *Бўлаётган гаплар бирон жойда ёзма равишда қайд қилинмасин.* С. Аҳмад, Юлдуз.

3 *тлш.* Иш-ҳаракатнинг белгисини, пайтини, ўрнини, ҳолатини, даража ва миқдори билдирадиган сўз туркуми. *Ўрин-пайт равиши. Ҳолат равиши.*

РАВИШДОШ [ф. + туркий روشداش] *тлш.* Фейлнинг равишга хос вазифага хосланган, иш-ҳаракатнинг белгисини кўрсатувчи функционал шакли. *Бу равишдош кўмакчи феъллар орқали конкрет замон маъносини билдиради.* «ЎТА».

РАВИШ-РАФТОР [ф. روشرفتار — юриш-туриш] Иш-ҳаракат, воқеа-ҳодиса, жараён ва ш.к. нинг боришидаги ўзига хос хусусият, юриш-туриш тахлити. *Қушларнинг равиш-рафтори. Кузнинг равиш-рафтори.* ■ *Ислим барлос.. қушларнинг «равиш-рафтори» ҳақида қизиқ маълумотлар бермоққа бошлади.* Ойбек, Навоий.

РАВНАҚ [ф. رونق — ёруғ, нурли, ёрқин; аниқ, кўринарли] кт. 1 Порлаш, ялтироқлик; хусн, кўрк. *Энди кечалар тўпланиб, жумбоқ ечишлар тугаган, мадрасадан равнақ кетган эди.* С. Абдулла, Мавлоно Муқимий.

2 Тараққиёт, ривож, барқ уриш, гуллаб-яшнаш. *Миллий маданият равнақи. Равнақ топмоқ.* ■ *Давлат фан равнақи учун ҳеч нарсани аямай, маблағ ажратса-ю, уни кимлардир талон-тороғ қилса.* С. Кароматов, Олтин кум. *Айни пайтда у миллий равнақ учун кенг имкониятлар яратади.* Х. Султонов, Ватан туйғуси. *Зеро, юрт тараққиёти, равнақи ҳар биримизнинг фидойилигимизга боғлиқ.* Газетадан.

РАВНАҚЛИ 1 кт. Порлоқ; кўркам.

2 Тараққий этаётган, ривожланаётган, гуллаб-яшнаётган. *Ривожланаётган равнақли ўлка. Ўзбекистон равнақли мамлакатлар қаторидан жой олмоқда.*

РАВО [ф. روا — йўл қўйилган, рухсат этилган, мумкин бўлган, мақбул] 1 Йўл қўйилиши мумкин бўлган; ўринли, жоиз. *Насиҳатим аччиқ, аммо даводир, Ҳарна десам, отангизман, раводир.* Ҳабибий.

2 Муносиб, лойиқ бўлган, тўғри келадиган; мос. *Кишиларга ҳама нашбу намо ҳар*

чоқ раво бўлса, Менга қоҳиш насиб бўлмиш, сафони нораво тутмиш. С. Абдулла. Агар сен бадавлат бўлсанг, қашиқоқни дўст тутсанг, раводир. «Қобуснома». Юртимиз таянчи — азаматлар, ҳей.. Сизга хурмат раво, валла-матлар, ҳей. Миртемир, Асарлар.

Раво кўрмоқ 1) жоиз деб ҳисобламоқ, ўринли деб топмоқ. Қилинган ишни раво кўрмоқ. Унинг у ерга боришини раво кўрмоқ; 2) лойиқ, муносиб деб билмоқ, лойиқ топмоқ. Сиз бўлсангиз, ўзингиз кўрган шундай оғир қулнарни қизингизга ҳам раво кўриб ўтирибсиз. С. Зуннунова, Олов. *Ўзинг севган нарсани одамларга ҳам раво кўр — саломат юрасан.* «Фан ва турмуш». Раво кўр, юзингда бир хол бўлайин, Кўрсат ағрингни — завола бўлайин. А. Орипов, Йиллар армони; 3) феъл бўлишсизлик шаклида келиб, “аямоқ”, “арзимаслик” маъноларини ифодалайди. *Уртоғингиз хужрасини биздан аямас, лекин бошқалар бизга ҳеч нимани раво кўрмайдилар.* Ойбек, Танланган асарлар. **Ҳожатини раво қилмоқ** Ҳожатини чиқармоқ, тилагини амалга оширмоқ. *Ўғлон, мақсадинг не бўлса тутгайсан қалам, Чунки жумла ҳожатин бори раво қилди қалам.* Ҳамза.

РАВОҢ I [ф. روان — борувчи, ўтувчи; силлиқ, бир текис] I Бир текисда ва тўхтовсиз борадиган ёки бораётган, силлиқ. РавоҢ ҳаракат. Машина равоҢ ишлаяпти. *Ғўзалар равоҢ ўсмоқда.*

2 РавоҢ текисда, тинч оқаятган. РавоҢ сув. *Оби равоҢ. Унинг кўз ёши равоҢ.* ■ *Тўлқинлар шовулар, сўнг оқар равоҢ, Туташган беш денгиз, ўнлаб дарёлар.* Х. Расул. *Кечаси чархпалак янги жойга кўчирилди ва тонготарда даштга бир жўяк сув равоҢ оқди.* И. Раҳим, Чин муҳаббат. *Кемалар равоҢ оқиб кетишиди.* Мирмуҳсин, Темур Малик.

3 Тўғри ва текис (йўл ҳақида). РавоҢ йўл. *Ёмон йўлдош ёв бўлар, равоҢ йўлда гов бўлар.* Мақол. ■ *Ҳаммаёқ серқатнов, равоҢ йўл, ҳаммаёқ адил иморатлар, қасрлар, боғлар, фонтанлар..* Ҳ. Ғулом, Замин юлдузлари.

4 Мантиқ ва услуб жиҳатидан пухта ва силлиқ, бир-бирига яхши боғланган. РавоҢ шеър. РавоҢ услуб. Унинг нутқи равоҢ. РавоҢ ўқимоқ. ■ *Адолат шеърни равоҢ, чиройли ўқиди.* С. Зуннунова, Олов. *Нутқи равоҢ болаларнинг баҳолари, кўпинча, юқори бўлади.* «Саодат». *Муҳаррам равоҢ гапирарди.* Унинг бундай нутқни биринчи марта сўз-

ламаётганлиги кўриниб турарди. Шухрат, Шинелли йиллар. *Янги ерда янги чаман яратган қизлар, Янграмоқда янги, равоҢ куйларингиз-а!* Т. Тўла.

5 кўчма Силлиқ, бир текис. *Ҳа, ҳаёт равоҢ эмас, Бордир пасту баланди.. Шу фикрга келганда, Яна боб тугалланди.* А. Мухтор, Асарлар. *Ақл ва бахт бирлашса, инсоннинг ҳаёт йўли равоҢ бўлади.* Газетадан. *Бироқ ҳаётнинг равоҢ йўлидан кўра сўқмоғи кўп.* С. Кароматов, Олтин қум.

6 Осон ва бир текисда ҳаракатланадиган, ишлайдиган. РавоҢ эшик. *Чархи равоҢ.*

7 айн. равоҢа. *Девнинг аслаҳасин Шакар олади, Отланиб Шакарбек равоҢ бўлади.* «Ширин билан Шакар».

Руҳи равоҢ Жон, ҳаёт. *Фидойи халқим ўлсин танда жоним, Бўлиб қурбон сенга руҳи равоҢим.* Ж. Шарипов, Хоразм. *Ҳолимиз беҳад ёмондур, келмасанг ҳолим сўраб, Эй мени хуш меҳрибон, руҳи равоҢим, қайдасан?* Машраб, Девон. **Сарви равоҢ** Сарвдек хушқомат ва юриши, ҳаракати ўзига ярашган, келишган. *Эй сарви равоҢ, надур хаёлинг, Жон ўртади ваъдаи висолинг.* Нодира. *Қадинг, эй гул, ҳаётим боғининг сарви равоҢидур.* Бобур.

РАВОҢ II с.т. қ. равоҢ. РавоҢ панжарасида ўзини офтобга солиб турган мусича париллаб учиб бориб, кўча томонга тортилган электр симига кўнди. С. Зуннунова, Кўк чироқ. *Хайри ундан жавоб кутмай, ой нури тушиб турган равоҢ томон юра бошлади.* С. Аҳмад, Қадрдон далалар.

РАВОҢА [ф. روانه — борувчи, кетувчи жўновчи]: **равоҢа бўлмоқ** 1) бирор томонга йўл олмоқ, жўнамоқ, кетмоқ. *Ҳожи бобо қистаб кўймади, бирага ўтириб, чой ичишидик.* Кейин бозорга қараб равоҢа бўлдим. Ф. Ғулом, Шум бола. *Кун қизий бошлагач, Аваз эшикка сардўз боғлаб, Полвонён буйидаги ўша салқин оромхонага равоҢа бўлди.* С. Сиёев, Ёруғлик. *Ўғлон эса аллақачонлар Бу оламдан бўлмиш равоҢа.* Э. Воҳидов, Муҳаббат; 2) оқмоқ, ҳовуз суви.. *оппоқ кўпиклар сачратиб, каналга равоҢа бўларди.* Ш. Рашидов, Бўрондан кучли.

РАВОҢЛАШМОҚ с.т. РавоҢ бўлмоқ, силлиқлашмоқ. *Машина зарб билан силтаниб, тағин иштов билан олға интилди, салдан сўнг мотор товуши яна равоҢлашиди.* «Шарқ юлдузи».

РАВОҢЛИК Мантиқ ва услуб жиҳатдан пухталиқ, силлиқлик, тиниқлик. *Табиий шеър*

рий равонлик, фикрий бурролик ўрнини ўзаро мантиқан ёпишмайдиган сўзлардан тузилган ноқулай мисрала эгаллаган. Ф. Саломов, Таржима назариясига кириш. «Бобурнома» халқ тилига яқинлиги, сўз ва ибораларнинг ихчам, пухта ва равонлиги билан машҳурдир. «Фан ва турмуш».

РАВОТ с.т. айн. работ 3. Томорқа десам, жонингиз чиқади. Одамлар бешикдаги боласигача жой олиб, равот тиклаб қўйяпти-ку. А. Кўчимов, Ҳалқа.

РАВОЧ с.т. айн. ровоч. Тоғларингда шимидим равоч, Кетар бўлдим тагин ноилож. Х. Салоҳ, Излар ва ҳислар. Равоч барзбандларининг қобиғини арчиб, «нўхат» усулида тўғрайсиз. К. Маҳмудов, Ўзбек тансиқ таомлари.

РАВОҚ [а. رواق – пештоқ, пешайвон; ёпиқ йўлак; безакдор чодир] 1 Бинонинг олд томондаги, пештоқ ва устунлар билан безатилган қисми. Боққа кирилгандан кейин тўғридаги яни ўрданинг дарвозаси, муҳташам.. тоқ ва равоқлар кўзни қамаштирар.. эди. А. Қодирий, Меҳробдан чаён. Пешайвон пештоқидан, Тоқилар равоқидан Чирт узилди бир уя. Т. Тўла, Асарлар.

2 Ҳашаматли бино; сарой, қаср. Ўзганинг тоқу равоқидан ўзингнинг айвонинг яхши. Мақол. ■ -«Менинг давлатим хонларнинг давлатидан кам эмас», деб қизига яхши жойлардан арку равоқ қилиб, чиройли қизлардан қирқ канизак қилиб берди, — деди Оқшибой. Усмон бахши Мамат ўғли, Бўтақўз.

3 бнк. Токча ва тоқнинг меҳроб шаклида бирлашган юқори қисми.

4 Ҳовли ёки боғ ўртасида тепаси ёпиқ қилиб тахтадан ишланган ойнабанд уй.

РАВШАН [ф. روشن – ёруғ, нурли, ёрқин; аниқ, кўринарли] 1 Ёрқин нур сочадиган; ёруғ, ёрқин. Равшан чироқ. Равшан ёнмоқ. ■ Олдинда қишлоқ чироқлари равшан порлаб, кўзни қамаштиради. Ў. Усмонов, Сирли соҳил.

2 Яхши ёритилган, ёп-ёруғ. Равшан тун. ■ Кундек равшан истиқболнинг, камол топ, республикам. Ё. Мирзо.

3 Яхши кўрадиган, ўткир (кўз ҳақида). Кўзим равшан. Кўзим равшан тортди. ■ Равшан кўзларин ёшлаб, Урди қамчин қулочлаб. «Маликаи айёр».

4 кўчма Аниқ, тушунарли, тушуниш осон бўлган. Равшан фикр. Равшан жавоб.

Фикри равшаннинг сўзи равшан. Мақол. ■ Онанинг барча ташвишли ўйлари совун кўнигидай ўчди. Воқеа равшан эди. Шухрат, Шинелли йиллар. Демак, масаланинг бир томони равшан, энди иккинчи томонини ўйлаб кўриш керак. А. Обиджон, Аканг қарағай Гулмат. Элмуроднинг кўнглидан: «бу подшо-лар ҳам ёмон экан-да», деган.. фикр ўтди, унинг гўдак ақли буни равшан ифодалашга ожиз эди. П. Турсун, Ўқитувчи.

5 кўчма Кўзга яққол ташланадиган; очиқ-ойдин, аниқ, яққол. Равшан сурат. ■ Ойлар, йиллар ўтиши билан менинг кўзимга бу нарса очиқ-ойдин, равшан кўрина бошлади. «Ёшлик». Ойдинда уларнинг паранжили иккита хотин эканлиги равшан кўриниб турар эди. М. Исмоилий, Фарғона т. о.

6 кесим өзф. кўчма Яшириб, сир тутиб бўлмайди, маълум, ошкор. Бунинг хатолиги равшан. ■ -Аҳволимиз сизга равшан, — бемор йўтала-йўтала, чолга ишорат қилди. Ойбек, Танланган асарлар.

7 Равшан (эркаклар ва хотин-қизлар исми).

Кўнгли (ёки дили, таъби, табиати, дунёси) равшан бўлмоқ (ёки топмоқ) Кўнглида хафачилик ёки шубҳа аломати қолмаслик, кўнгли, дили ёришмоқ, кўнгли тинчимоқ. [Ғуломжон] Отасининг хуррагини эшитиб, кўнгли равшан топди. М. Исмоилий, Фарғона т. о. Раҳматилла унинг хуш қабул қилишидан, муомалаларидан кўп саволларига жавоб топди, дунёси равшан бўлди. А. Қаҳҳор, Қўшчинор чироқлари. Умид уйқудан кўз очиб, гариб, аммо ҳаммаёғи чиннидек озода бир уйда бўлганидан кўнгли равшан тортди. Мирмуҳсин, Умид. **Кўнглини (ёки таъбини) равшан қилмоқ** Кўнгилдаги хафагарчиликни, шубҳани йўқотмоқ, кўнглини тинчитмоқ, кўнглини, дилини очмоқ. [Холмат Рузвонга:] Бу — одамнинг таъбини жуда равшан қилади. Мана бу товуқ гўшитидан олинг, жуда соз бўлибди-да. Ҳамза, Ким ўғри?

РАВШАНЛАНМОҚ 1 Ёришмоқ, ёрқин бўлмоқ. Чироқ равшанланди.

2 кўчма Хурсанд бўлмоқ, очилмоқ. -Навоийдан дилим равшанланади, — деди Аваз устозларига аҳтиромни зўрлигини билдириб. Ж. Шарипов, Хоразм.

РАВШАНЛАШМОҚ 1 Ёриша бормоқ, ёруғ бўлмоқ. Хона равшанлашди. Тун равшанлашмоқда.

2 Яхши кўрадиган бўлиб бормоқ, очилмоқ, равшан тортмоқ, тузалмоқ (кўз ҳақида). Унинг кўзи равшанлашди. ■ Уларга тикилиб тураркан, Марҳаматнинг кўзи равшанлашиб кетди. Ҳ. Назир, Ёнар дарё.

3 кўчма Аниқ, очиқ-ойдин бўлиб бормоқ, ойдинлашмоқ. Масала равшанлашди. ■ Эрининг феъли, мижоз-табиати кун сайин унга [Нурига] равшанлашди. Ойбек, Танланган асарлар.

Кўнгли равшанлашмоқ айн. кўнгли равшан бўлмоқ қ. равшан. Елкасидан босиб турган ғам юки енгиллашиб, кўнгли равшанлашар экан, «тавба, нега шундай бўлар экан-а?» деб ўйларди. Ҳ. Тўхтабоев, Ширин қовунлар мамлақати. Солиев, Асрорнинг жавобларини эшитиб, кўнгли равшанлашди. Тўғри ўйлагу тушиб олганини ҳис этди. «Ёшлик».

РАВШАНЛИК 1 физ. Ёруғлик манбаининг берилган йўналишдаги ёруғланишини ифодаловчи ёруғлик катталиги.

2 Ёруғлик, ёрқинлик. Юлдузларнинг равшанлиги. Кўзнинг равшанлиги. ■ Улуғбек юлдузларга кўзларини тикканда, Кўзимиз равшанлиги беш қуёшча бор эди. Ҳ. Фулом, Танланган асарлар.

3 кўчма Аниқлик, тиниқлик, осойишталик, мамнунлик. Масалага равшанлик киритмоқ. ■ Кундузги ишлар, ниҳоят, ресторандаги суҳбат унинг кўнглига равшанлик олиб кирди. «Ёшлик». Шу фикр миясига равшанлик бериб, яна тўхтади. «Шарқ юлдузи».

РАГУ [фр. ragoût] қул. 1 Майда тўғралган гўштдан қайла қўшиб тайёрланган егулик.

2 Гўшти чала шилинган суяк.

РАД(Д) [а. رَدّ — қайтиш, қайтариш; акс этиш; жавоб; 3-ш. бирл. — радди] Инкор ёки қайтариш.

Рад бермоқ 1) чап бермоқ; чап бериб енгмоқ. Қиличга бу рад бериб, Бошига сипарин тутди. «Ширин билан Шакар». Калтазини олиб ҳамла қилади, Калтакка рад бериб Баҳром туради. «Баҳром ва Гуландом»; 2) қайтармоқ, даф қилмоқ. Рад берарман кўкдан келган балога. «Маликаи айёр». **Рад жавоби** Инкорни ёки қайтаришни, қабул этмаганликни билдирувчи жавоб. Қизнинг рад жавоби йигит қалбига тушиб қолган ишқ чўғини шўх шамолдек алангага айлантирарди. Ҳ. Мусажонов, Ҳури. Маълум бўлишича, Замира, бошқаларга рад жавоби бергани учун, унга ҳам йўқ деган экан. П. Қодиров, Уч ил-

диз. **Рад этмоқ (ёки қилмоқ)** 1) инкор қилмоқ. «Ҳар бир гапида рад этиб бўлмайдиган мантиқ бор», деди у ўзига-ўзи. С. Анорбоев, Оқсой; 2) қайтармоқ, қабул қилмаслик. Таклифни рад этмоқ. ■ Унинг илтимосини рад этиши учун жиддий асос йўқ-ку. Ш. Рашидов, Бўрондан кучли. Каромат Адҳамни қайтаргани, кузатиб қўй, деганда таклифни рад қилгани яхши бўлди. Р. Файзий, Чўлга баҳор келди; 3) қайтармоқ, даф этмоқ. Этикчи бошини эгиб, бу ҳамлани рад қилди, бўлмаса, боши тарс ёрилар эди. С. Айний, Қуллар; 4) воз кечмоқ. Бироқ мулла Обид бой ва домлаларнинг қутқуси биланми ёки ўзининг диний таассуби орқасиданми, баҳарҳол, ерни рад қилди. А. Қодирий, Обид кетмон. **Радди бало** 1) балони қайтарувчи, даф этувчи. Ҳар замон яқин-йироқдан гадой товуши эшитилади: «Ҳей дўст, шайдулло баномни ало, садақа — радди бало». А. Қаҳҳор, Бемор; 2) балога йўлиқувчи. Жим тур сен, радди бало бу, — деди бригадир шофёрнинг изидан эргашиб. Қ. Кенжа, Тоғ йўлида бир оқшом. ..бутун умидимиз Авазбекдан, деб айтишаркан, токи бу расвою радди бало бўлса, менинг ишларим чапнасига кетса. М. М. Дўст, Лолазор. **Радди маърака** Жамиятдан сурилган, кишилар назаридан қолган. Расвоий радди маърака одам.

РАДАР [ингл. radar < radio detecting and ranging — «радио ёрдамида масофани излаб топиш ва аниқлаш» бирикмасининг қисқартмаси] айн. **радиолокатор**.

РАДДИ Рад(д) с. нинг изофа ҳолати ва 3-ш. бирл.

РАДДИЯ [а. رَدِيَة — инкор қилиш, рад жавоби] 1 Бирор хабар, маълумотни рад этувчи, уларнинг нотўғрилигини ёки асоссизлигини исботловчи расмий баёнот. Ташқи ишлар вазирлиги раддияси. ■ [Нусратбек] Охири Пайғамовнинг олдига кириб, норозилигини айтиб: -Редакцияга раддия юбораман, — деди. С. Нуоров, Нарвон. Бир мажлисда ё раддия бериб улгурасан киши, ё улгурмайсан. П. Қодиров, Уч илди. Суд жараёнида у чиқарган ҳукмга ҳеч ким раддия билдиришга ҳақи бўлмаган. Газетадан. Истеъ-молчининг ҳуқуқлари бузилганда, зудлик билан корхонанинг мансабдор шахсига оғзаки раддия билан мурожаатларнинг ўзи истеъ-молчининг ҳуқуқини тиклаш учун кифоя бўлади. Газетадан.

2 Рад жавоби. *Бир ёқдан хушхабар.. юрагини орзиқтирса, иккинчи ёқдан раддия ваҳми қалбига наштар бўлиб санчилар эди. М. Исмоилий, Фаргона т. о.*

РАДИАКТИВ қ. радиоактив. *Радиактив материаллар контрабандаси билан боғлиқ мазкур воқеа юзасидан Ўзбекистон Республикаси Давлат божхона қўмитаси жиноий иш очиб, ҳозир текширув олиб борилмоқда. Газетадан. Таркибида зарарли моддалар бор ёки йўқлигини ҳамда радиактив нурланишни аниқлашди. Газетадан.*

РАДИАЛ [«радиус» с.дан] Радиус бўйлаб йўналган, тарқалган. *Радиал нурлар. Радиал тезлик.*

РАДИАТОР [лот. radiare – нур чиқармоқ, тарқатмоқ] *тех.* **1** Ички ёниш двигателидаги совитувчи суюқлик ёки мой ҳароратини пасайтирувчи асбоб. *Самолёт радиатори. ■ Иссиқда радиаторнинг суви «бақир-бақир» қайнаб, буғ нуқаб борарди. С. Нуров, Майсаларни аёз урмайди.*

2 Биноларни иситиш тизимида: ичида иссиқ сув ёки буғ айланадиган, чўян, пўлат, керамика қувурлардан иборат иситиш асбоби. [*Отамурод*] *Энгашиб, нималарнидир титқилай бошлади. Кейин радиатор тағига пақирчани қўйиб, унинг сувини оқизиб юборди. М. Мансуров, Ёмби.*

3 Иш пайтида қизиб кетадиган радиотехник элементларни совитувчи қурилма.

РАДИАЦИОН Радиацияга, нурланишга, нур сочишга оид. *Радиацион гигиена. Радиацион кимё. Радиацион ҳимоя. ■ Институт олимлари радиацион моддаларни аниқловчи ускуна яратиб, республикамизнинг Фишқўприк ва Олой божхона бекатлари ҳамда Тошкент аэропортига ўрнатдилар. Газетадан.*

РАДИАЦИЯ **1** [лот. radiatio – нурланиш < radiare – нур чиқармоқ, тарқатмоқ] Ядровий ўзгаришлар оқибатида вужудга келадиган электромагнит ва корпускуляр (майда заррачали) нурланишлар; Қуёш нурланиши, космик нурлар оқимлари. *Қуёш радиацияси. ■ Мамлакатимизда ядро ва элементар заррлар физикаси, радиация физикаси бўйича фундаментал тадқиқотлар айниқса кенг ривожланди. Газетадан. Ҳомиладор аёл эрига шикоят қиляпти: ҳозир ҳамма жойда радиация бор.. Газетадан.*

РАДИЙ [лот. radius – нур] Менделеев даврий системасининг II гуруҳига мансуб радиоактив элемент; иссиқлик ва нур энергияси сочадиган кумушсимон оқ металл. *Радий билан даволаш. ■ Қимматбаҳо металлларга платина, палладий, радий, иридий, рутений, осмий ва уларнинг бир-бирлари ва бошқа оддий металллар билан қотишмалари киради. «Фан ва турмуш».*

РАДИКАЛ **I** [лот. radicalis – илдизга оид] **1** Радикализмга асосланган партия аъзоси ёки шундай партия тарафдори (қ. **радикализм 2**). *Радикаллар партияси.*

2 Туб ва кескин ўзгаришлар тарафдори. *Бизнинг душманимиз – террористларнинг радикал тармоғидир. Газетадан. Ҳозирча Туркиядаги радикал гуруҳларнинг биронтаси ҳам портлашни ўз бўйнига олмаган. Газетадан.*

РАДИКАЛ **II** [лот. radicalis – илдизга оид] **1** *мат.* Илдиз чиқариш амалининг белгиси ($\sqrt{\quad}$) ва шу амалнинг натижаси, илдизи.

2 *ким.* Молекуладаги атомларнинг бир кимёвий бирикмадан иккинчи кимёвий бирикмага ўзгармасдан ўтадиган гуруҳи.

РАДИКАЛ **III** Қатъий, кескин, туб. *Радикал чоралар. Радикал ўзгаришлар.*

РАДИКАЛИЗМ [лот. radicalis – илдизга оид] **1** *сиёс.* Мавжуд давлат тузумини танқид остига олиб, радикал ўзгаришлар ва ислохотлар ўтказишни талаб этувчи сиёсий оқим. *..диний фундаментализм ва радикализмни тамомила рад этиш иштиёқи тобора яққол намоён бўлмоқда. Газетадан.*

2 Назарий ва амалий масалаларни ҳал этишда радикал усуллар – туб ва қатъий чоралардан фойдаланиш; қатъий ҳаракат талаб қилиш ва уларни қўллаш.

РАДИКУЛИТ [лот. radícula – илдизча, томирча + itis – яллиғланишни билдирувчи қўшимча] *тиб.* Орқа мия нервлари илдизчаларининг орқада, бўйин ва белда қаттиқ оғриқ билан намоён бўладиган яллиғланиши. *Радикулит касаллиги. Радикулити тубтиб қолмоқ. Радикулит билан оғримоқ.*

РАДИО [лот. radiare – нур чиқармоқ, тарқатмоқ] **1** Сигнал, овоз каби ахборотларни маълум масофага электромагнит тўлқинлар ёрдамида симсиз узатиш ва қабул қилиш усули. *Радио орқали бошқариш. Радио алоқаси. ■ Радио, кино, телевидение ҳаётга чуқур кириб борган ҳозирги шароитда ҳам бадиий асарларга эҳтиёж ортиб бораётгани*

шундан далолат беради. У. Норматов, Талант тарбияси.

2 Фан ва техниканинг ушбу усул асосидаги физик ҳодисаларни ўрганиш, бу усулдан турли соҳаларда кенг фойдаланиш билан боғлиқ соҳаси.

3 Оммавий ахборот воситаларидан бири – матнни ва мусиқий дастурларни эшиттириш; радиоэшиттириш. *Аммо Азизхон бўлаётган воқеаларга бепарво. Ким қанча ишлапти, радио нималар деяпти – қизиқмасди. С. Аҳмад, Уфқ. Уйда радио эшитиб ўтирган Мақсуда шовқин-сурон билан эшикни тарақлатиб очиб, ташқарига отилди. С. Зуннунова, Олов.*

4 с.т. Радиоприёмник; репродуктор. *Фақат кўча бетидаги симёғочда радио чўлни бошига кўтариб гапирарди. С. Аҳмад, Уфқ. [Яхшибоев:] Ҳозирги чўпонлар нуқул бўйнига кичкина радио осиб юришади. Лекин менинг отам дўмбира чаларди. М. М. Дўст, Лолазор.*

РАДИО- [лот. radiare – нур чиқармоқ, тарқатмоқ] **1** Байналмилал ўзлашма қўшма сўзларнинг таркибий қисми бўлиб, радиога (1-маъносида) оидликни, радио билан боғлиқ эканликни билдиради. (мас., *радиоаппарат, радиогазета*).

2 Ўзлашган қўшма сўзларнинг таркибий қисми бўлиб, радиёга, радиацияга, радиоактивликка алоқадорликни, оидликни билдиради (мас., *радиоактивлик, радиобиология, радиология*).

РАДИОАКТИВ [радио.. + лот. activus – фаол, ҳаракатчан] **1** Радиоактивликка оид. *Радиоактив парчаланиш. ■ Бу улкан аппарат.. радиоактив парчаланиш маҳсулотлари ҳосил бўлишини ўрганишда, ҳатто жисмоний ишларни текширишда катта фойда бераётир. «Фан ва турмуш».*

2 Радиоактив хусусиятга эга бўлган. *Радиоактив элементлар. Радиоактив изотоплар. Радиоактив рудалар. ■ Радиоактив материаллар контрабандаси билан боғлиқ мазкур воқеа юзасидан ҳозир текширув олиб борилмоқда. Газетадан. Фан ва техникада ҳам радиоактив, ҳам турфун изотоплардан турли мақсадларда кенг фойдаланилади. «Фан ва турмуш».*

РАДИОАКТИВЛИК Баъзи кимёвий элементлардаги беқарор атом ядроларининг элементар зарралар, ядровий нурлар чиқариши билан бир вақтда содир бўладиган ўз-

ўздан парчаланиши ва б. элементлар ядроларига айланиши.

РАДИОАЛОҚА [радио.. + алоқа] Радио-тўлқинлар ёрдамида амалга ошириладиган алоқа, радио орқали алоқа қилиш. *Самолёт синиқларини текшириб, радиоалоқаларни қайта эшитишди ва гувоҳларни сўроқдан ўтказишди. Газетадан.*

РАДИОАППАРАТ [радио.. + аппарат] Радио тўлқинларини қабул қилиб олиш ёки узатиш учун хизмат қиладиган аппарат.

РАДИОБИОЛОГИЯ [радио.. + биология] Биологиянинг радиоактив нурланишнинг тирик организмлар, уларнинг уюшмалари ва умуман биосферага таъсирини ўрганувчи бўлими. *Ҳозирда радиобиология амалиётга кенг татбиқ қилинмоқда.*

РАДИОГРАММА [радио.. + юн. gramma – ёзув] Радио орқали олинган ёки берилган хабар. *Майор радиограмmani тагин бир марта кўздан кечиргандан кейин навбатчида буюрди: –Жанговар тревога эълон қилинг, сержант! Ҳ. Гулом, Тошкентликлар. Шу кеча душман полки дислокация қилинаётгани ҳақидаги радиограмма қўлга туширилди. А. Мухтор, Давр менинг тақдиримда.*

РАДИОЖУРНАЛ [радио.. + журнал] Радио орқали эшиттириладиган оғзаки журнал. *Бунгача Тolibой Алимов радиода мухбир, катта муҳаррир, бўлим бошлиғи, «Табассум» радиожурналининг муҳаррири лавозимларида 33 йил ишлабди. Газетадан.*

РАДИОЗОНД [радио.. + зонд] Ҳаво шари (зонд) ёрдамида кўтарилиб, атмосферанинг юқори қатламларидаги ҳаво ҳарорати, босим ва намликни ўлчаш ва бу ҳақда радио орқали маълумот бериб туриш учун хизмат қиладиган метеорологик асбоб. *Ҳозирги вақтда турли мамлакатлар атмосфера қатламларидаги босим, температура ва намликни ўлчашда.. радиозондлардан фойдаланмоқдалар. «Фан ва турмуш».*

РАДИОКАНАЛ [радио.. + канал] **1** Муайян радиоэшиттириш учун ажратилган частоталар доираси.

2 Радиоузаткич, радиоалоқа линияси ва радиоприёмникдан иборат алоқа канали. *Ҳозирги кунда кўпчилик радиоканалларга қулоқ тутуди, интернетни ковайди. Газетадан. Очиғи, «Ёшлар», «Пойтахт», «Замин».. радиоканалларидан бошқа радиостанциялар ва тижорат телеканалларида эртаю кеч*

тинмасдан айлантириляпти бу каби шовқинли муסיқалар. Газетадан.

РАДИОКАРНАЙ [радио.. + карнай] Радиоэшиттиришларни қабул қилиб олиб, баланд, кучли товушда эшиттирадиган электроакустик ёки механик мослама; репродуктор. *Радиокарнай ғуриллаб туриб, бирдан гапира бошлади. С. Аҳмад, Уфқ. Эшикнинг тепасидаги радиокарнай эртадан кечгача тинмайди. «Шарқ юлдузи». Радиокарнай орқали чақирилиб, бир нафар ёшлар имтиҳон залларига кириб кетишди. Мирмуҳсин, Умид.*

РАДИОКИМЁ [радио.. + кимё] Кимёнинг радиоактив элементлар ва изотоплар хоссаларини, уларни ажратиб олиш, тўплаш ва турли фан соҳаларида қўллаш усулларини ўрганувчи бўлими.

РАДИОКОМИТЕТ [радио.. + комитет] эск. Радио эшиттиришлар бўйича давлат комитети. *Туроб Тула радиода диктор бўлиб ишлар экан, Жонрид акани маънавий фарзандидек қабул қилиб, радиокомитетнинг бурчагидан ҳужра ҳам топиб берибди. Газетадан.*

РАДИОЛА [лот. radiare — нур чиқармоқ, тарқатмоқ] Радиоприёмник ва электр патефон деталлари бирга қўшилган радиоаппарат. *Анорхон радиолога пластинка танламоқда. И. Раҳим, Ихлос.*

РАДИОЛАШМОҚ Радио орқали қабул қилиш ёки узатиш қурилмалари билан таъминланмоқ, жиҳозланмоқ. *Қишлоғимиз ёппасига радиолашди.*

РАДИОЛОГ Радиология мутахассиси; радиология соҳасидаги врач.

РАДИОЛОГИЯ [радио.. + юн. logos — фан, таълимот] Тиббиётнинг ионловчи нурлардан касалликларга ташхис қўйиш ва уларни даволашда фойдаланиш назарияси ва амалиётини ҳамда ушбу нурларнинг биологик таъсирини ўрганувчи бўлими.

РАДИОЛОКАТОР [радио.. + локатор] Узоқдаги объектларнинг, мас., самолёт, кема ва ш. к. нинг қаердалигини улардан қайтган радиотўлқинлар ёрдами билан топадиган, аниқлайдиган асбоб, радар. *..Бундай аппарат, радиолокатор сифатида, учиб келаётган бомбардимончи самолёт ва ракеталарни осмондаги бошқа учар объектлардан ажратган ҳолда, улар тўғрисида аниқ информация бериши мумкин. «Фан ва турмуш».*

РАДИОЛОКАЦИЯ [радио.. + лот. locatio — жойлаштириш, ўрнаштириш] **1** Узоқдаги объектларнинг, мас., самолёт, кема ва ш.к. нинг қаердалигини улардан қайтган радиотўлқинлар ёрдами билан топиш, аниқлаш, фарқлаб ажратиб олиш усули ва воситалари. *Исроил ўзининг ҳарбий самолётлари Суриянинг радиолокация станциясини бомбардимон қилганлигини расман тан олди. Газетадан.*

2 Фан ва техниканинг қуруқлик, сув ва фазодаги объектларни радиотехник усул воситасида топиш ва турган жойини аниқлаш билан шуғулланувчи соҳаси.

РАДИОМАРКАЗ [радио.. + марказ] Радиоалоқа ва радиоэшиттиришни амалга ошириш учун мўлжалланган иншоотлар ва техник воситалар мажмуи.

РАДИОМЕТР [радио.. + метр] **1** Электромагнит нурланиш энергиясини ўлчайдиган асбоб.

2 Радиоактив манбалар фаоллигини ўлчайдиган асбоб.

3 Товуш нурланишлари босимини ва товуш майдонининг бошқа сифатларини ўлчайдиган асбоб.

РАДИОНАВИГАЦИЯ [радио.. + навигация] **1** Учиш аппарати ёки кеманинг қаердалиги ва йўналишини радиотехник воситалар ёрдамида аниқлаш.

2 Навигациянинг кемалар, учиш аппаратларини бошқариш назарияси ва амалиётини радиотехник воситалар ёрдамида ўрганувчи ва ишлаб чиқувчи бўлими.

РАДИОПЕРЕДАТЧИК [радио.. + р. передатчик — узаткич, узатувчи] қ. **радиоузаткич**. *Йўлдошга ўрнатилган «Маяк» радиопередатчиги ҳозир ҳам пухта ишлаб турибди. Н. Сафаров, Оловли излар.*

РАДИОПОРТЛАТГИЧ Радиолокацион усул билан снаряд, бомба ва ш. к. ни портлатувчи қурилма.

РАДИОПРИЁМНИК [радио.. + приёмник] Радио орқали бериладиган товуш ва сигналларни қабул қиладиган аппарат. *Қаердадир, йироқда радиоприёмник вағиллайди. С. Зуннунова, Олов. У радиоприёмник қулоғини буради. «Ёшлик».*

РАДИОРЕПОРТАЖ [радио.. + репортаж] Бевосита жойнинг ўзидан (стадион, завод, фабрика ва ҳ. к. дан) олиб берилган эшит-

тириш. *Стадиондан футбол ҳақида радиопортж эшиттирилди.*

РАДИОСИГНАЛ [радио.. + сигнал] Радио орқали берилган сигнал.

РАДИОСПЕКТАКЛЪ [радио.. + спектакль] Радио орқали эшиттиришга мослаштирилган, шу мақсадда ёзиб олинган спектакль. *Ҳозирги кунда ҳам радиотингловчилар мириқиб эшитадиган «Ўтган кунлар», «Уфқ», «Ёртиқулоқ» сингари радиоспектакллар айнан Убай ака раҳбарлик қилган йиллари магнит лентасига туширилган эди.* Газетадан.

РАДИОСТАНЦИЯ [радио.. + станция] Радиотўлқинларни узатувчи ёки қабул қилувчи мослама ва қурилмалар мажмуи ҳамда улар ўрнатилган жой, бино. *Туманларда кўплаб янги радиостанциялар қурилмоқда.*

РАДИОСТУДИЯ [радио.. + студия] Радиоэшиттириш учун махсус жиҳозланган бино. *Ҳозирги кунда радиостудиялар янги, замонавий жиҳозлар билан таъминланган.*

РАДИОТЕЛЕГРАФ [радио.. + телеграф] 1 Махсус радиоалоқа линияси ва радио орқали хабар узатувчи алоқа тизими.

2 Шундай алоқа мосламалари жойлашган бино. *Замонавий радиотелеграфлар қурилмоқда.*

РАДИОТЕЛЕСКОП [радио.. + телескоп] Осмон jismlарининг хусусий радионурланишларини қабул қиладиган ва бу манбаларнинг хоссаларини ўрганадиган астрономик асбоб.

РАДИОТЕЛЕФОН [радио.. + телефон] Оғзаки хабарларни радиотўлқинлар воситасида узатувчи алоқа тизими ва шу тизим асосида ишлайдиган телефон. *Шу заҳоти радиотелефондан бир дўстига телефон қилиб, бизнинг дардимизни тушунтирди.* Х. Султон, Бобурийнома.

РАДИОТЕРАПИЯ [радио.. + терапия] Ионловчи нур билан даволаш усули. *Усма касаллиги кўпинча радиотерапия усули билан даволанмоқда.*

РАДИОТЕХНИК [радио.. + техник] 1 Радиотехника мутахассиси.

2 Радиоаппаратларни ўрнатиш ва таъмирлаш билан шуғулланувчи мутахассис.

РАДИОТЕХНИКА [радио.. + техника] 1 Юқори частотали электромагнит тебранишлар ва радиотўлқинлар ҳақидаги — уларни пайдо қилиш, кучайтириш, узокқа радиосигналлар бериш, радио нурлантириш, қа-

бул қилиш ва турли соҳаларда қўллаш усуллари ҳақидаги фан. *Ҳозирги армиялар ядро қуролига, хилма-хил ракета техникасига, радиотехника ва электрон-ҳисоблаш аппаратларига, космик ва сув ости атом кемаларига эа бўлди.* «Фан ва турмуш».

2 Техниканинг ахборотларни узатишда радиотўлқинлар ва электромагнит тебранишларни қўллайдиган тармоғи.

РАДИОТИНГЛОВЧИ қ. радиоэшитувчи. *У тайёрлаган туркум эшиттиришлар радиотингловчилар эътиборини қозонди.* Газетадан. *Ҳозирги кунда ҳам радиотингловчилар мириқиб эшитадиган «Ўтган кунлар», «Уфқ», «Ёртиқулоқ» сингари радиоспектакллар айнан Убай ака раҳбарлик қилган йиллари магнит лентасига туширилган эди.* Газетадан.

РАДИОТЎЛҚИНЛАР [радио.. + тўлқин] Радиоэшиттиришда: сигналларни узатишда фойдаланиладиган электромагнит тўлқинлар. *Юзлаб телеканаллар, радиотўлқинлар орқали ахборотлар тарқатилди.* Газетадан.

РАДИОУЗАТКИЧ [радио.. + узаткич] Нутқ, товуш, сигнал кабиларни, радиоэшиттиришларни электромагнит тўлқинлар тарзида узатувчи қурилма.

РАДИОУЗЕЛ [радио.. + р. узел — айн. тугун] Бирор жой аҳолиси ёки корхона, ташкилот ходимларига марказий радиостанциялар дастурини олиб эшиттирадиган ҳамда маҳаллий эшиттиришлар олиб борадиган симли радио тармоғи ва унинг маркази. *Штаб радиоузелидан тинмай қурувчилардан тартиб сақлашни, ўзбошимчалик қилмасликни сўрашарди.* С. Аҳмад, Уфқ. *Радиоузел юракни ўртовчи мақом куйларини тинмай эшиттириб турибди.* С. Аҳмад, Жимжитлик.

РАДИОФИЗИКА [радио.. + физика] Физиканинг радиотўлқинлар ва электромагнит тўлқинларнинг уйғониши (қўзғалиши), тарқалиши ва қабул қилиниши билан боғлиқ жараёнларни ўрганадиган тармоғи.

РАДИОЧИ қ. радист.

РАДИОЭЛЕКТРОНИКА [радио.. + электроника] Фан ва техниканинг радиотехника ва электроника асосида ўсиб ривожланган айрим тармоқларининг умумий номи. *Ёш шоирлар ва журналистлар клуби, либос-дизайн, тасвирий санъат, ёғоч уйма-*

корлиги, радиоэлектроника, шахмат клуби шулар жумласидандир. Газетадан.

РАДИОЭФФИР [радио.. + эфир] Радио-тўлқинлар тарқаладиган ҳаво, фазо. *Афтидан, эшиттириш радиоэффир орқали бир зумда ҳавога учади-кетади, биров билиб ўтирибдими, деган хаёлга боришса керак-да.* Газетадан.

РАДИОЭШИТТИРИШ Оммавий ахборот воситаларининг ўзига хос электрон техникага асосланган тури; радио орқали олиб борилган эшиттиришларнинг ўзи.

РАДИОЭШИТУВЧИ Радио орқали берилган эшиттиришларни тингловчи.

РАДИОҲАВАСКОР Радиотехника билан – радиоприёмник, телевизор ва ш. к. лар қуриш, яшаш, радиоалоқа тажрибалари ўтказиш ишлари билан ҳаваскор сифатида шуғулланувчи киши. *Радиоҳаваскорлар тўғраги.*

РАДИСТ Радиоаппаратни бошқарувчи, радио орқали хабарлар узатувчи ва қабул қилувчи мутахассис. *Радист югуриб келиши билан буюрди: -Фронтга дарҳол хабар қил, Клязьмага самолёт чақир.* И. Раҳим, Чин муҳаббат. *Мўмина Фиёсова шаҳар ички ишлар бошқармаси қошида очилган алоқачи-радиотлар курсини тугаллаб, фронтга бориш йўлланмасини олди.* «Саодат».

РАДИУС [лот. radius – нур] мат. Айлана ёки шарнинг бирор нуқтасини унинг маркази билан туташтирувчи тўғри чизик кесмаси.

РАДИФ [а. رديف – бирор нарсанинг ортидан, кетидан келувчи] ад. Шарқ халқлари шеърлятида мисра ёки байт охирида асосий қофиядан кейин такрорланиб келувчи сўз, ибора ёки гап.

РАДОН [лот. radiare – нур чиқармоқ, тарқатмоқ] Менделеев даврий системасининг VIII гуруҳига – инерт газлар гуруҳига мансуб, радийнинг парчаланишидан ҳосил бўлган радиоактив элемент. [Бу жараён] *Ер ости қатламидаги элементларнинг, шу жумладан, радиоактив газ бўлмиш радоннинг юқорига кўтарилишини тезлаштиради.* «Фан ва турмуш».

РАЁСАТ [а. رياست – раислик қилиш, президентлик; президиум] кт. **1** Мажлис ёки кенгашга раҳбарлик қилиш учун сайланган бир гуруҳ кишилар; президиум. *Раёсатга Рафиқов, Собиров, Берди татар,*

Мардонбой, Мирсоатлар сайланиб, мажлисни Собиров олиб борди. А. Қодирӣ, Обид кетмон. *Азмиддин ўрнидан туриб, суд раёсатига қараб алланима деб бақирди.* Ҳ. Фулом, Машғал.

2 Давлат ҳокимияти органи. *Пленум ва Раёсат муҳокамасига, қонунга биноан, уларнинг ваколатига тааллуқли бўлган масалалар киритилади.* Газетадан.

3 Баъзи ташкилот ва муассасаларнинг раҳбарлик органи. *Мажлисида Олий аттестация комиссияси раёсатининг аъзолари.. иштирок этди.* Газетадан. *Бу хатоларга вилоят судининг судлов ҳайъати ва раёсати ҳам эътибор бермайди.* Газетадан. *Раёсатимиз қарорига кўра, биз ҳар йилли Бобур мирзо таваллуд топган муборак кунда унинг илмий меросига бағишлаб халқаро илмий анжуман ўтказишимиз лозим.* Газетадан.

РАЁХИН [а. رايحين – «райҳон» с. нинг кўпл.] эск. поэт. Райҳонлар; хушбўй ўсимликлар.

РАЖАБ [а. رجب < «қўрқмоқ» фл. дан] **1** Қамария йил ҳисобида 30 кундан иборат еттинчи ойнинг арабча номи. Ойлар «рабу-ссоний», «ражаб» деган номлар билан аталади. «Фан ва турмуш».

2 Ражаб (эркаклар исми).

РАЖАЗ [а. رجن – мақтов, ўз-ўзини мақташ; арузда шеър ўлчовларидан бири] Аруз шеър тизимидаги 19 та баҳрдан бири.

РАЖМ [а. رجم – тошбўрон (қилиш)] дин. Тошбўрон қилиш; фақат зино қилганлик, фаҳш ишлар билан шуғулланганлик учун қўлланадиган қатл тури. *Ражм фақат суд хулосасига биноан, қози ёки унинг вакили назорати остида амалга оширилади.* «Ислоҳ. Энциклопедия».

РАЖО [а. رجاء – умид, орзу; ишонч; илтимос] эск. кт. Умид, орзу, тилак; илтимос, ўтинч. *Ражо қилмоқ (этмоқ).*

РАЗВЕДКА [р. разведать – «суриштириб, текшириб билмоқ, қидириб топмоқ» фл. дан ясалган от] **1** геол. Ер ости бойликларини қидириш. *Битта янги газ-конденсат кони разведка қилинади ва очилади.* Газетадан. *Ҳатто олтин учун қидирув ва разведка ишларини ҳам шу нуқтаи назар асосида олиб бориб, давлатнинг юз минглаб сўм маблағини кўкка совуряптилар.* С. Кароматов, Олтин кум.

2 ҳарб. Душман ва унинг қўшинлари, уларнинг кучи, жойлашиши тўғрисида маъ-

лумот тўплаш учун айрим ҳарбий гуруҳлар, бўлинмалар ёки жангчилар томонидан олиб бориладиган тезкор иш, ҳарбий ҳаракат. *Разведка қилмоқ. Разведкага чиқмоқ.* ■ *Разведкага юбориб, душманнинг кучи, техникасини аниқлаш зарур бўлиб қолди.* Т. Рустамов, Мангу жасорат. *Ҳар бир кўнгилли отряд разведка ишлари олиб борар, душман кучларини аниқларди.* Н. Сафаров, Оловли излар.

3 Шундай иш олиб борувчи ҳарбий қисм, бўлинма.

4 Ўзга мамлакатларнинг иқтисодий ва сиёсий ҳолатини ҳамда ҳарбий имкониятларини ўрганиш билан шуғулланувчи ташкилот.

РАЗВЕДКАЧИ 1 *ҳарб.* Разведка ишлари билан шуғулланувчи киши (қ. **разведка 2, 4**). *Довюрак разведкачи.* ■ *Разведкачиларни ҳамиша бургутга қиёс қилиб келишган.* Газетадан. *Разведкачи жангчилар бу галги синов машғулотларида ҳам текширувчи комиссия аъзоларининг олқишига сазовор бўлишди.* Газетадан.

2 Разведка учун белгиланган самолёт ёки кема. *Разведкачи самолёт.*

3 *геол.* Қидирувчи. *Нефть разведкачилари.* ■ *Мен Қизилқум тагида яширинган беҳисоб бойликни топган уша разведкачиларни қидириб, геологлар шаҳарчаси — Мурунтоьга бордим.* С. Анорбоев, Ўзбекистон олтини.

РАЗВЁРТКА [р. развертеть — «бураб бўшатмоқ; бурайвериб кенгайтирмоқ» фл. дан ясалган от] Металл деталларнинг тешикларига тоза ишлов бериш учун мўлжалланган кўп тигли асбоб.

РАЗЗОҚ [а. رزاق — яшаш учун маблағ, бойлик берувчи] **1** *дин.* Ризқ-рўз берувчи (Оллоҳнинг сифатларидан бири).

Ё раззоқ! Оллоҳга мурожаат шакли: етишмаган ёки жуда кам нарсани Оллоҳнинг ўзи кўпайтириб, етказиб беришига ишонч ёки бўлажак ишларга Оллоҳ мадакор маъносида қўлланади. ■ *Эрталаб думалаб турайлик-чи, кейин бувим айтмоқчи, «ё раззоқ!».* С. Сиёев, Ёруғлик. *-Икки ҳафтага етадиган бўлди, у ёғи — ё раззоқ, — деди аям.* С. Сиёев, Саратонда қор ёғди. *..Уша довонга етайлик, у ёғи — ё раззоқ!* Х. Султон, Бобурийнома.

2 Раззоқ (эркаклар исми).

РАЗИЛ [а. رذيل — пасткаш, палид; ахлоқсиз, бузуқ] **1** Кишини жиркантирадиган; ярамас, қабих, паст, тубан. *Разил одам. Разил хатти-ҳаракат. Разил ниятлар.* ■ *Одамлар разил ниятли кимсаларга ҳам хизмат қилавериши мумкин.* Э. Усмонов, Ёлқин. *Мен инсонни бир инсондай севардим, лекин Нечун кўпдир ҳалигача разил одамлар.* А. Орипов, Йиллар армони.

2 Манфур, малъун. *Разил душман.* ■ *Разил, маккор, ярамас Гитлер дастидан Ватан таҳликада қолмишдир энди.* Ф. Фулом, Танланган асарлар.

РАЗИЛЛАШМОҚ Тобора разил, қабих бўлиб бормоқ, разиллик, пасткашлик йўлига ўтмоқ.

РАЗИЛЛИК 1 Пасткашлик, тубанлик, нокаслик. *Бу қандай разиллик, қандай пасткашлик ахир?* О. Ёқубов, Эр бошига иш тушса. *Дунёдаги барча разиллик, барча қабохат рамзи сифатида сени гўрга тиқмагунимча еганим ҳаром!* Х. Тўхтабоев, Ширин қовунлар мамлакатаи.

2 Разил хатти-ҳаракат, разолат. *Разиллик қилмоқ.* ■ *Ватанни тарк этувчи ҳар қандай киши разиллик қилувчидир.* «Ақл ақлдан қувват олади». *Бироқ дунёда адолат бўлса, шунча ёмонликлар қилган Аҳмад Танбалдан ҳаёт нега қасд олмайди? Шундай разилликлар қилган одам..* П. Қодиров, Юлдузли тунлар.

РАЗИЛОНА [а. + ф. رذيلانه — разилларча] *рвш.* Разилларга хос бир равишда; разилларча. *Разилона ҳаракат. Разилона иш.*

РАЗМ I [ф. رزم — уруш, жанг; олишув]: **разм солмоқ ёки разм солиб қарамоқ** Назар солмоқ, синчковлик билан кузатмоқ, диққат билан қарамоқ, кузатмоқ, кўздан кечирмоқ. *Самандаров унга бошдан-оёқ разм солди-ю, бошқа гап сўрамади.* А. Қаҳҳор, Қўшчинор чироқлари. *Онахон ҳовлидаги ўзгаришларга разм солди.* А. Мухтор, Опа-сингиллар. *Яхшилаб разм солинса, тиниқ қонқора кўзлари ҳамма вақт ҳозиргидай қувноқ, юзларида аллақандай иссиқлик бўртиб тургандай.* Р. Файзий, Чўлга баҳор келди.

РАЗМ II [ф. رزم — уруш, жанг; олишув] Уруш, жанг. *Базмда давволари ҳотамлик, размда талашлари рустамлик.* А. Навоий, Маҳбул-қулуб.

РАЗМЕР [р. измерить — «ўлчамоқ; чамаламоқ» фл. дан: ўлчам] Уст-бош, пойаб-

зал ва ш.к. нинг катта ёки кичиклигини билдирувчи ўлчов, номер. *Маҳкам ҳам Очил каби энди йигирма иккига қадам қўйган.. кийимни ҳам Очилдан икки размер катта қияди.* П. Қодиров, Уч илди.

РАЗОЛАТ [а. رذالت – пасткашлик, қабиҳлик] Ярамас, жирканч хатти-ҳаракат, қабиҳ, разил иш; тубанлик, разиллик. *Гудак қалби оқ вараққа ўхшатилади. Агар она ўзининг теран аллалари билан шу вараққа эзгулик ва нафосат мисраларини тушира борса, унда розолат ва қабоҳатга ўрин қолмайди.* «Саодат». *Меҳрдан жаннатга айлансин бағир, Розолатни ютсин жаҳаннамий чоҳ.* А. Исроилов, Биз - дунё одамлари. [Зухра:] *Айни ўрни-да! Сен менинг оғзимга урма! Бундай розолатни кўра туриб, юз буриб кетолмайман.* Н. Сафаров, Кимга тўй, кимга аза.

Разолатга тушмоқ Тубанликка юз тутмоқ.

РАЗРЯД I [р. разряд – тур, туркум, гуруҳ; даража < разрядить – «бўлмоқ, тақсимламоқ» фл. дан] I Предмет, ҳодиса кабиларнинг ўзаро бирор белги ёки ўхшашлигига кўра тури, даражаси, тоифаси. *Иш разряди. Тариф разряди.*

2 Касб-ҳунар, ихтисос, спорт ва ш.к. бўйича расмий тасдиқланган малака, маҳорат даражаси. *Иккинчи разрядга эга бўлган дурадгор. Шахмат бўйича биринчи разряд олмақ.* ■ Бугундан бошлаб шахмат конкурсида спорт разряди олган ишқибозларнинг номларини эълон қилиб борамиз. Газетадан. *Маҳорат кўрсатганларга тегишли спорт разрядлари берилди.* Газетадан. *Ҳарбийда бокс спортига қизиқиб, разрядни ҳам олибди.* Мирмуҳсин, Умид.

РАЗРЯД II [р. разрядить – «ўқсизлантирмоқ, электрсизлантирмоқ» фл. дан] физ. Электр зарядини йўқотиш, зарядсизланиш, электрсизланиш. *Разряд токи.* ■ Ҳозир олимлар, электр разряди илоннинг асаб системасини ишдан чиқаради, деган хулосага келмоқдалар. Газетадан.

РАЗРЯДЛИ Бирор разрядга, даражага эга бўлган. *Олтинчи разрядли токарь. Биринчи разрядли шахматчи.* ■ *Хотиржам бўлинг, разрядли устамиз, боппаймиз.* С. Аҳмад, Сайланма. *Ҳозир билим даргоҳида 265 оммавий разрядли спортчи бор.* Газетадан.

РАЗРЯДЧИ Разрядга эга бўлган шахс. *Спортчилар орасида ўнлаб жамоатчи инс-*

трукторлар, тренерлар, разрядчилар етишиб чиқди. Газетадан.

РАЗЪЕЗД [р. разъехаться – «бошқа-бошқа ёққа кетмоқ; тўқнашмай бир-бирининг ёнидан ўтиб кетмоқ» фл. дан ясалган от] 1 т. й. Қарама-қарши томондан келадиган поездларнинг ўтиб кетиши учун йўлнинг иккига ажралган жойи; шундай жойдаги кичик станция. *Поезд ярим тунда Мирзачўлнинг бир разъездига бориб тўхтади.* П. Қодиров, Уч илди. *Станциядан ўн беш километр наридаги разъездага етганда, паровоз тормоз берди.* О. Хусанов, Қўшиқчининг тақдири.

2 ҳарб. Разведка ёки соқчилик учун юборилган кичик отлик қисм.

РАИС [а. رئیس – раҳбар, бошлиқ, сардор, бошқарувчи] 1 Баъзи орган, ташкилот, идора, жамият ва ш.к. нинг бошлиғи, раҳбари. *Ашурхон, раиснинг бевақт келишидан чўчиганиданми ё ўзининг гуноҳкорлигини билганиданми, аввал бир оз ўзини йўқотган бўлса ҳам, дарров ўнглаб олди.* С. Зуннунова, Олов. *Маҳаллий комитет раиси топшириқларни ўз вақтида бажариш учун қанчадан-қанча вақт кетишини ўйлаган эди.* Газетадан.

2 Мажлисни бошқарувчи шахс. *Мажлис раиси.* ■ *Нутқ.. давомида раис мажлис аҳлини икки марта тартибга чақирди.* А. Қаҳҳор, Нутқ.

3 тар. Диний маросим ва урф-одатларнинг бажарилишини кузатиб борувчи, шунингдек, ўлчов ва тош-тарозиларнинг тўғрилигини текширувчи мансабдор шахс. *Ақлим олган заргар қизи, Муфтий, аълам, раис, қози, Тенгдошларим, хуш қол энди! «Баҳром ва Гуландом». Ўқи! Ҳар қандай қийинчилик билан бўлса-да, ўқи! Лекин қози бўлма! Раис бўлма! Имом бўлма! Азар мударрис бўлсанг, майли.* С. Айний, Эсдалиқлар.

РАИСА I [а. رئيسه] Раис аёл. *Колхоз раисаси.*

2 Раиса (хотин-қизлар исми).

РАИСДОШ Биргаликда раислик қилувчи. *Ўзбекистон халқ ёзувчиси Тўлепберген Қаипбергенов ва таниқли тожик адиби Масъуд Муллажонов жамоатчилик қўмитасининг раисдошлари этиб сайландилар.* Газетадан.

РАИСЛИК Раҳбарлик, бошлиқлик; бошқарувчилик иши. *Мен маҳалламизнинг «қулуб»ига кириб келганимда, орада қизгин бир*

музокара давом этиб, мажлисининг раислик лавозиматини мухтарам Тошпўлат ака адо қилар эди. А. Қодирий, Кичик асарлар. Оладигани раислик бўлса — олсин. О. Ёкубов, Эр бошига иш тушса. Ер ислохоти ўтказилиш олдидан қишлоқ камбағаллар уюшмаси тузилади ва уюшманинг раислигига Бердибой сайланади. А. Қодирий, Обид кетмон.

РАИСХОНА [раис + хона] тар. Раис маҳкамаси, идораси (қ. раис 3). Жаноби олий замонларидаги раис қочгандан кейин раисхона таланганда, мен шу даррани олиб, бир ерга яшириб қўйиб эдим. С. Айний, Куллар.

РАИЯТ [а. رعيّة — пода; қавм; фуқаролар, аҳоли] эск. кт. Бирор ўлка ёки мамлакатда яшовчи халқ, фуқаро. Хукмдор қанчалик оқил ва одил бўлса, раият, уламо, фузало ҳам ҳақгўйликка юз тутгай. М. Маҳмудов, Мангу куй излаб. Йиғилган раият пичирлаб гаплашар, ҳамманинг чехрасида қандайдир таҳлика ва тараддуд муҳрланган, гўё ҳозир ёмон, мудҳиш воқеа содир бўлгуси эди. О. Ёкубов, Қўҳна дунё. Хон ҳали ички ўрдадан чиқмаган, ҳамма раият жаноби олийни кутиб, мухташам дарвозага кўз тиккан эди. А. Қодирий, Меҳробдан чаён.

РАИЯТПАРВАРЛИК эск. кт. қ. халқ-парварлик. Мустақил мамлакатимиз инсон-парварлик, раиятпарварликка қаратилган, оламуҷумул аҳамиятга молик ишлари ила белгилаиб, тан олиниб келинмоқда. Газетадан.

РАЙ [а. راي — нуқтаи назар, мулоҳаза; ақл-идрок] қ. раъй. Дунёда бирон инсон йўқдирки, кўнгли нималигини, кўнгли раий нималигини билмасин. М. Исмоилий, Одамийлик қиссаси. Боланинг райини — кўнглини синдирган, тушунмаган одамга педагоглик касби хайфдир. Газетадан.

РАЙИЖРОКОМ [«район ижроия комитети» бирикмасининг қисқартмаси] тар. 1 Меҳнаткашлар депутатлари район ижроия комитети ва у жойлашган бино. Райижроком қарори. Райижрокома бормоқ.

2 с.т. Меҳнаткашлар депутатлари район ижроия комитетининг раиси. Расулов райижрокомнинг кабинетидан унга қоғозларни кўрсатиб, нималарнидир қизғин исботлади. Ш. Рашидов, Асарлар. Райижрокомнинг муовини Фаттоҳ Ўлмасбоевнинг кайфияти бугун ёмон. Ў. Умарбеков, Сирли соҳил.

РАЙКОМ [р. районный комитет — «район комитети» бирикмасининг қисқарт-

маси] тар. 1 Район комитети ва у жойлашган бино. Райком мажлиси. ■ Бу ишда ўзбошимчалик қилганингиз учун райком бюросида масалангиз кўрилар эмиш. О. Ёкубов, Эр бошига иш тушса. Адолат аризасининг оқибатини кутиб юрди. Ҳадеганда жавоб кела бермади. У райкомга, военкоматга яна хат юборди. И. Раҳим, Чин муҳаббат.

2 с.т. Район комитетининг котиб. Йўлдош барака топсин, хўп райкомимиз бор-да! Уйғун, Дўстлар. Бу гапни у райкомга бориб айтиди. Газетадан.

РАЙОН [фр. rayon — кенг майдон, катта кенглик < лот. regio, regionis — вилоят, ўлка; чегара] 1 қ. туман IV. Тошкент шаҳар районлари. ■ Азиза қишки имтиҳонларни топшириб, районга қайтиши билан яна ишга тушиб кетди. Ў. Ҳошимов, Қалбингга қулоқ сол. Шу куни Чилонзор район халқ суди яна бир аёл устидан ҳукм чиқарди. Газетадан.

2 с.т. Район (туман)нинг маъмурий маркази. Райондан келган вакил. ■ Биз район каттаконларининг буйруғини бажардик, холос. О. Ёкубов, Эр бошига иш тушса. Райондан телефон қилишди [деди Нишонов Саодатхонга]. С. Зуннуова, Янги директор.

3 Бирор географик, иқтисодий ва ш. к. белгилар, хусусиятлар билан ажралиб турадиган жой, ҳудуд. Мамлакатнинг муҳим иқтисодий районлари. ■ Жанговар байроқ ҳар доим ўз ҳарбий қисми билан, жанг майдонидан эса қисмнинг жанговар ҳаракатлари районларида бўлади. Газетадан.

РАЙОНЛАРАРО Район неча туман учун умумий бўлган, бир неча туман ўртасидаги, муштарак. Районлараро электростанция.

РАЙОНЛАШТИРИШ Географик фанлар тизимида қўлланадиган илмий тадқиқот усули: географик қобик ёки унинг айрим қисмларининг ҳудудий табақаланишини, табиат ва жамият ўртасидаги таъсирнинг табиий ва ижтимоий-иқтисодий жараёнларини ўрганади.

РАЙОНЛАШТИРМОҚ 1 Бирор жойни маъмурий-ҳудудий бўлинмаларга — туман (район)ларга ажратмоқ. Ҳудудни сейсмик жиҳатдан районлаштириш ишлари амалга оширилди ва сейсмик жиҳатдан фаол ҳудудлар харитаси тузилди. Газетадан.

2 Қишлоқ ҳўжалик экинлари ва чорва моллари учун энг мувофиқ об-ҳаво, иқлим, тупроқ шароитларини ҳисобга олиб, уларни

мамлакат ҳудудига тўғри тақсимламоқ, жойлаштирмоқ. *Заводлар, ҳар бир зона учун илмий асосда районлаштирилган навларни ҳисобга олиб, уруғлик етказиб бермоқдалар.* Газетадан.

РАЙҲОН [а. ريجان – хушбўй ўсимлик тури] **1** бот. Лабгулдошларга мансуб, ошкўк учун экиладиган бир йиллик хушбўй ўсимлик. *Ош райҳон.* ■ *Жамбил, райҳоннинг иси етти маҳалла наридани димоққа урилади.* Шукрулло, Жавоҳирлар сандиғи. *Ойим райҳонни яхши қўрарди, қишин-ёзин чаккасидан қўймасди.* С. Сиёев, Ёруғлик.

2 Райҳон (хотин-қизлар исми).

РАЙҲОНИЙ [а. ريجانى – ранги ёки кўриниши райҳонга ўхшаш]: **ёқути райҳоний қ. ёқут** **1**. **Райҳоний ранг** Яшил ранг. **Хатти райҳоний** Араб ёзувидаги хат услубларидан бири; сарлавҳаларда ва нарсаларнинг устига хат ёзишда ишлатиладиган ёзув тури.

РАК [р. рак – қисқичбақа; кана < қад. р. орке – ёпишиб олиб сўрувчи] *тиб.* Одам ёки ҳайвонларнинг ички ёки ташқи аъзоларидаги эпителий тўқимасидан ривожланадиган, ҳаёт учун хавфли ўсма; саратон касаллиги. *Қайси кунни марказдан келган врач Ханифа холанинг касали рак экани, санокли кунлари қолганини айтган эди.* Ў. Ҳошимов, Қалбингга кулоқ сол. *Вилт, рак муаммоси ҳам ҳал бўлар, лекин Шукр Каримович айтганидек, баъзи кишилар феълу атворидидаги «вилт ва рак»ни тузатиш амримаҳол бўлади.* Мирмуҳсин, Умид.

РАКААТ, ракат [а. ركعت – намоз вақтида тиз чўкиб таъзим (сажда) қилиш; намознинг бир қисми] *дин.* Намознинг бир қисми, бўлаги; намозда муайян ҳаракат ва вазифаларнинг ҳар бир такрорлиши. *Афанди бир кун икки ракаат пешин намозини ўқигандан кейин, саждадан бош кўтармай ёта берди.* «Латифалар». *Бошга тушса бир фалокат, Намоз ўқиб бир ракаат..* «Нурали».

РАКЕТА [нем. Rakete < итал. rochetta, госса – дук, йиг, урчуқ] **1** Ичидаги заряди ёнганда осмонга кўтариладиган, мушакбозликда ёки ҳарбий ишларда сигналлар бериш ва керакли жойларни ёритиш учун қўлланадиган снаряд; мушак. *Қишлоқнинг кун ботиши томонидаги ўрмон бурчагидан икки марта оқ ракета отилди.* И. Раҳим, Чин муҳаббат.

2 Реактив куч таъсирида ҳаракатланадиган учувчи аппарат. *Тинчлик мақсадида қўлланадиган ракеталар.* *Жанговар ракета-малар.* ■ *Космонавтикага ракета техникаси йўл очди.* «Фан ва турмуш». *Ракета тепага кўтарилиб, берилган орбита бўйлаб учиб ўрнига, одамларнинг боши устида тариллаб тураверади.* Газетадан.

РАКЕТАБОЗЛИК Ракета ишлаб чиқариш ва уни амалда қўллаш бўйича ким ўзарга мусобақалашиб, шу йўл билан бири-бирига таҳдид, пўписа қилиш. *АҚШ ва совет Совет Иттифоқи ўртасида ракетабозлик мусобақаси айни авжигача чиққан йиллар эди.* Газетадан.

РАКЕТАСОЗЛИК Саноатнинг ракеталар ишлаб чиқарадиган тармоғи.

РАКЕТАЧИ **1** Ракета қўшинларида хизмат қилувчи шахс. *Бугун ракетачи деган сўзни ҳаяжон ва ҳурмат билан тилга олмайдиган киши топилмаса керак.* Газетадан.

2 Ракета учириб сигнал берувчи киши.

РАКЕТКА [фр. raquette – < итал. rochetta, retichetta < лот. rete – тўр, матрап] *спорт.* Теннис ёки бадминтон ўйинида шар, волан ёки копток урадиган дастали, овал шакли, ёғочдан қилинган ёки тўр чамбрак ўрнатилган куракча. *Ракетка билан урмоқ.* ■ *Шуни таъкидлаш жоизки, ёш, иқтидорли катта ракетка устамиз турнирни муваффақиятли бошлади.* Газетадан.

РАКЕТОДРОМ [ракета + юн. dromos – югуриш жойи, йўлкаси] Ракеталарни синаш ва учуриш учун махсус техникавий воситалар билан жиҳозланган жой, ҳудуд.

РАКУРС [фр. rascourci – қисқартириш] **1** *снт.* Тасвирий санъатда ва графикада муайян фигура ёки предметларнинг томошабиндан узоқроқ бўлган қисмларини қисқартириб, перспективада тасвирлаш.

2 Объектни ҳаракатланувчи ёки ҳаракатланмайдиган видео- ёки кинокамера билан турли томонлардан тасвирга тушириш – операторлик маҳоратининг бир усули.

РАЎЛИ [ингл. rally – йиғилиш, йиғин; тўпланиш] *спорт.* Махсус тайёрланган автомобиллар ва мотоциклларда белгиланган маршрут бўйлаб ҳаракатланишда уларни бошқариш маҳорати бўйича мусобақалар.

РАМ *с.т. қ. рамка.* [Уйнинг] *Жиҳозлари Ойнисанинг эътиборини унча тортмаса ҳам, ёзув столи устига қўйилган каттагина ойна*

рамдаги фотосуратлар сеҳрлаб қўйди. Ҳ. Фулом, Тошкентликлар.

РАМА [р. рама < нем. Rahmen – машина, механизмларни кўтариб турувчи қисм, асос] **1** Машина ёки қурилмаларнинг юк кўтариувчи, уларни тутиб турувчи асос қисми. *Автомобил рамаси.* ■ *Катта диаметри труба тарзидаги рама машина асосини ташкил этган.* «Фан ва турмуш».

2 Бир-бирига бириктириб маҳкамланган чорқирра ёғоч ёки темир мослама. *Станок рамаси.*

3 Дерзанинг ойна солинган ёки солинмаган ҳар бир қаноти.

РАМАД [а. رمد – кўзнинг яллиғланиши; رماذ – кул, хок] Оғрик, дард. *Оташин ишқ ичра жисму жон ўлуб мисли рамад, Ҳеч қилмас кўнгли қаттиғлиғдин ул бераҳм ёд.* Увайсий.

РАМАЗОН [а. رمضان – рўза оёи] **1** Қамария йил ҳисобида 30 кундан иборат тўққизинчи ойнинг арабча номи (шариатга кўра, бу ой давомида мусулмонлар рўза тутадилар). *Рамазоннинг охириги ҳафтаси қолиб, катта ҳайитнинг баҳор ойларига тўғри келгани ҳаммага севинч бағишларди.* Мирмуҳсин, Меъмор. *Бекларнинг машваратида Самарқанд юришини рамазон оёида бошлашга, тайёргарлик ишларининг асосий қисмини Ушнинг ўзидаёқ битириб кетишга қарор қилинди.* П. Қодиров, Юлдузли тунлар. *Тез орада рамазон оёи бошланиб, ҳаммалари рўза тутишга киришдилар.* П. Турсун, Ўқитувчи.

2 Шу ойда болалар ва гадоилар эшикмаэшик юриб айтадиган кўшиқ. *Рамазон айтмоқ.*

3 Рамазон (эркаklar исми).

Рамазон ҳайити Мусулмонларнинг рамазон (рўза) оёи тугаган кундан кейин ўтадиган байрами. *Рамазон ҳайитини байрам сифатида нишонлаймиз.* Газетадан.

РАМАЛ [а. رمل – «қум» с. дан] Аруз баҳрларидан бири. *Улар ҳазаж, ражжас, рамал, муқтазаб, мужтасс, мушокил баҳрларида мисол қилиб берилган.* «ЎТА».

РАМАҚ [а. رمق – охириги куч, нафас; ҳаёт учқуни, нишонаси] Жон чиқар олдидаги нафас, охириги нафас. *Паривашни ул хабар ношод қилди, девонасин сўрағар нома савод қилди, Қосидким ул номани Маржунга еткуруб берди, руҳидин танида рамақ йўқ эрди.* А. Навоий, Маҳбул-қулуб.

РАМАҚИ Ниҳоят даражада озган, ҳолдан тойган, эти бориб суюкка тақалган. *У рамақи бўлиб қолибди.* ■ *Не уқубатларни кўриб, баҳорга чиқдинг рамақи, Қовурғаларинг саналиб, қоқ қуриб жиринг, сигирим.* «Муштум».

РАМАҚИЖОН [а. + ф. رمق جان – жоннинг рамақ ҳолати] айн. **рамақи.** *Рамақи-жон бузоқ.* ■ *Чол озгин, эти бориб суюгига ёпишган, кўзлари киртайиб, рамақижон бўлиб қолган.* Н. Сафаров, Наврўз. *Шўринг қургур укам мардикорликдан рамақижон бўлиб қайтиб келди.* М. Муҳаммаджонов, Турмуш уринишлари.

РАМЗ [а. رمز – белги, имо, ишора; лақаб, тахаллус] **1** Бирор ғоя, тушунча, ҳодиса кабиларни ифодаловчи, эслатувчи шартли белги, ишора. *Дўстлик рамзи. Кабутар – тинчлик рамзи.* ■ *Она ўлкам менинг рамзи садоқат, Дурлар шодасида дурдона гўё.* Э. Воҳидов, Муҳаббат. *Санъаткор Бернора, мовий кўл фарзанди, садоқат рамзи – Оққушга айланиб, равон сузиб чиқади саҳнага.* «Саодат». *Ёдгорликлар муқаддас нодир мерос сифатида Ватанга садоқат рамзи бўлиб, авлоддан авлодга ўтиб боради.* Н. Сафаров, Оловли излар. *Биз, озод Ўзбекистон фуқаролари учун мустақилликнинг муқаддас рамзлари – Давлат герби, Давлат мадҳияси азиздир.* Газетадан.

2 Қочириқ ёки ишора билан айтилган гап; имо-ишора, шама. *Рамз билан гапирмоқ.* ■ *Латифа, аския, рамзу киноя Ўтар ул-фатлар ичра бениҳоя.* Ҳабибий. *Саидий, гарчи кейинчалик Ёқубжоннинг рамзига тушунган бўлса ҳам, бу гапни ҳақоратга қарши ҳақорат тарзида айтди.* А. Қаҳҳор, Сароб. *Ҳасрат тўла сўзингдан озор топар ниғорим, Рамзи ишора билан қилгин уни ифода.* Э. Воҳидов, Ёшлик девони.

3 Рамз (эркаklar исми).

РАМЗИЙ [а. رمزی – рамзли, рамзга асосланган] **1** Рамздан иборат бўлган; рамзли, ишорали. *Йўлнинг ҳам, манзилнинг ҳам ўз рамзий маъноси бор.* Ҳ. Фулом, Сенга интиламан. *Буюк одамлар тириклигида ўздан нишона бермайди.* С. Кароматов, Сўнги бархан.

2 Расмийат учун қилинган, юзаки, шунчаки. *Биз ядро қуролидан холи Марказий Осиё зонасининг барпо этилиши рамзий тадбирга*

айланиб кетмаслиги кераклигини яхши биламиз. Газетадан.

РАМЗИЙЛИК Алоҳида белги, ишорага, рамзга эгалик, рамзлик. *Навоий шеърисида ишқнинг шартлилиги ва рамзийлиги таркидунёчи дарвеш сифатидаги лирик қаҳрамон образининг хусусиятларида ҳам кўрилади.* «ЎТА».

РАМЗИЯТ [а. رمزيّات – белгилар, рамзлар; символизм] с.т. Рамзлар. *Ўрдак ва кабутар Хоразмдан топилган буюмлар рамзиятида кўп учрайди.* «Фан ва турмуш».

РАМЗЛИ 1 Рамзга эга, рамзи бўлган; белгили. *Рамзли тасвир.* ■ *Ўзбекистон пойтахтида ўн кун давомида ўзбек музикаси фестивали – «Тошкент баҳори»нинг рамзли машғали порлаб турди.* Газетадан.

2 Қочириқ ёки ишора билан айtilган; шамали. *Рамзли гап.* ■ *–Азимжондан сизга ям хат бор, мана ушланг, – деди почтачи рамзли оҳангда [Ислом отага].* У. Назаров, Исмоил тажанг.

РАМКА [«рама» с. нинг кичр.] 1 Портрет, расм ва ш.к. солинадиган, картон, металл ва б. материалдан қилинадиган, асосан, тўрт бурчакли ҳошия. *Жимгина хона билур қандилдан ёғилаётган нурга тўлган, деворлардаги кекса артистларнинг суратлари солинган рамкалар ойнаси ярақлаб турарди.* Ў. Ҳошимов, Қалбингга қулоқ сол. *Бугунча аслига ўхшаса сурат, Заррин рамкаларга қувнаб солгайсиз, Юз рангда товланиб келганда шухрат, Сувратин чизолмай шошиб қолгайсиз.* А. Орипов, Ёиллар армони.

2 Матн ёки расм атрофига чизилган тўғри тўртбурчакли қора ҳошия (мотам, аза билан боғлиқ). *Марҳумнинг суратини ёки номини рамкада бермоқ.*

3 кўчма Иш-ҳаракат, фаолият, воқеа-ҳодиса кабилар доираси; чек, чегара. *Рамкага солмоқ. Рамкадан чиқармоқ.* ■ *Фурқат юбилеи ўзининг салмоғи, моҳият эътибори билан адабиёт ҳодисалари рамкасида ташқарига чиқиб кетади, кенг маънодаги маданиятимиз, маънавий ҳаётимиз тараққиёти масаласига айланиб кетади.* «ЎТА».

РАМКАЛИ Рамкага эга, рамкаси бўлган. *Катта рамкали портрет.*

РАМЛ [а. رمل – кум] Кум билан фол очиш; фолбинлик. *Соли домла.. рамл кўришдан бошқа.. иссиқ-совуқ.. шунга ўхшаиш косиб-*

чиликдан ҳам хабардор бўлган эдилар. Чустий, Пардаи асрор.

РАММОЛ [а. رمال – кумга қараб фол очувчи] Фолбинларнинг бир тури: кум ёки тупроққа, уларнинг юзасидаги нуқталарга қараб фол очувчи шахс. *Кўҳна бир китоб ногоҳ чорлар сеҳрли фолдек. Мен ҳовлиқма раммолдек очаман ҳар сўз, э воҳ.* А. Шер, Куз ҳилоли. *Кимлар-да ажнабий бир раммол бўлиб, Умрини сарф этди фолга иқтидор.* А. Шер, Роз.

РАМПА [фр. rampe – тўр, панжара] 1 Театр саҳнаси полига унинг олд қирраси бўйлаб ўрнатилган, саҳнани олдиндан ва пастдан ёритиш учун мўлжалланган ёритиш асбоблари.

2 Театрда саҳнага қаратилган ёритувчи асбобларни томошабинлар кўзидан паналаш учун авансцена бўйлаб ясалган узун тўсиқ ва шу тўсиқ ортига ўрнатилган ёритиш асбоблари. *Шу пайт Шокир ака илдам саҳнага чиқди, ҳеч кимга қарамай, олдинга юрди, рампанинг олдида борганда тўхтаб, қаддини ростлади-ю, қоронғи залга тикилди.* М. Хайруллаев, Кўнгил.

РАНГ 1 [ф. رنگ – тус, ранг, бўёқ] 1 Бўяш учун ишлатиладиган модда; бўёқ. *Қуруқ ранг. Инак бўййдиган ранг. Ранг бермоқ.* ■ *Стадион ремонт қилина бошлаган, панжаралар қизил, сариқ рангга бўялган.* «Ёшлик».

2 снт. Рангтасвирнинг асосий ифода ва тасвир воситаси.

3 Нарсаларга суртилган ёки сингдирилган бўёқ, сир. *Шипи шарқча нақидор уй, нақшлари эскириб, ранги хираланган, лекин ҳали диққатни тортарлик ҳолда.* Ойбек, Танланган асарлар. *Бугун у ишдан барвақт қайтди. Оч зангори рангга бўялган дарвозадан ўтиб, ҳовлига кирди.* Ў. Ҳошимов, Қалбингга қулоқ сол.

4 Бирор нарсанинг ўзига хос бўёғи; тус. *Ранги сариқ рўмол. Ҳайвонларнинг муҳитга мослашадиган ранги. Олмага ранг кириб қолди.* ■ *Ғўзаларнинг рангини кўрган сари, ичгинам туздай ачийди.* Н. Сафаров, Жасоратнинг давоми. *Бир туп дарахтда қанча шох-шабба, қанча ранг, қанча гул-мева, қанчалаб сир-синоат бор.* Газетадан. *Овқат пишди. Қозоннинг занги чиқиб қорайган гўжага қатиқ ҳам ранг киргизолмади.* А. Қаҳҳор, Анор.

5 Кишининг юзидаги қизиллик даражаси. Унинг рангида қони йўқ. Унинг ранги қип-қизил. Ранг кўр, ҳол сўр. Мақол. ■ Негадир Чароснинг юзи худди шу гул билан бир хил рангда эканини энди сезди. Ў. Ҳошимов, Қалбингга қулоқ сол. Турсуной билан Шарофатнинг ранги бўздай оқарди. Ойбек, Танланган асарлар.

Ранги кетиб қолмоқ Юзида дард, оғриқ, уйқусизлик азоби намоён бўлмоқ; озиб, тўзиб кетмоқ. -Рангинг кетиб қолибди, — деди у Дилфузанинг кўзларига тикилиб. Ў. Ҳошимов, Қалбингга қулоқ сол. **Ранги синиқмоқ қ. ранги кетиб қолмоқ.** Ёдгор унинг ранги синиқиб, кўзлари киртайиб қолганини сезар, изтироб чекиб юрганни билар, югуриб бориб, кўлидан тутгиси, «мен сени соғиниб кетдим ахир», дегиси келар, аммо журъати етмас, бундай қилишга ўзини ҳақсиз деб билар эди. Ў. Ҳошимов, Қалбингга қулоқ сол. **Ранги ўчиб кетмоқ** 1) ранги оқариб, бўзариб кетмоқ. -Ҳақорат қилди! — деди Искандаров анчадан кейин тилга кириб. У ранги ўчиб, ўрнидан туриб кетди: -Нега мени ҳақорат қилдинг, ифлос! Ў. Ҳошимов, Қалбингга қулоқ сол; 2) кўчма озайиб қолмоқ, баракаси учиб кетмоқ. Икки-уч олишдаёқ лагаканинг ранги ўчиб кетди. Ф. Фулом, Шум бола.

6 кўчма Гап, нутқ, оҳанг ва ш.к. даги нозик бўёқ, тус; кўриниш, жилва. Бир зумдан кейин яна айни товуш парвоз қилди. Аммо ўзга мақомда.. кўнгилни яна қаттиқроқ сеҳрловчи.. ранглар билан. Ойбек, Танланган асарлар. Бир-икки кун миёнасидаги кечинмалар турли ранг билан унинг уйқули димоғида акслана бошладилар. А. Қодирий, Ўтган кунлар. Энг яқин кишиларидан ҳам яшириб юрган, алақачон ўтмиш дафтарларида ранги хиралашиб кетган хотиралар бирдан туғён урди. Ў. Ҳошимов, Қалбингга қулоқ сол. Ранги ҳам, туси ҳам намоён дунё, Қирқми элик бу, умр ўртаси. А. Орипов, Йиллар армони.

7 кўчма Жонлилик, файз. Тошкентлик машхур бир бойнинг хасислиги ҳақида энг кейинги, ҳали ҳеч кимнинг қулоғига чатилмаган латифалар суҳбатга “ранг” бериб турар эди. Ойбек, Танланган асарлар.

РАНГ II [нем. Rang < фр. gang — қатор] дипл. ҳарб. Унвон, рутба даражаси. Биринчи ранг капитани.

РАНГ III [ф. رنگ] Қиёққа ўхшаш ёввойи ўсимлик.

РАНГ-БАРАНГ [ф. رنگ برنگ — турли рангдаги, турли хил, ҳар хил] 1 Турли рангдаги, ранги ҳар хил. Ранг-баранг бўёқлар. Ранг-баранг товланмоқ.

2 Турли-туман, хилма-хил, ҳар хил. Ранг-баранг фойдали қазилмалар. ■ Таом иштаҳа билан ейилгандан сўнг, ранг-баранг қимматбаҳо мевалар.. билан тўла дастурхон ёзиб, [Ҳакимбойвачча] ачиқ чойни қуя бошлади. Ойбек, Танланган асарлар. Ранг-баранг суратли одамлар яшар, Ишлар, куйлар ҳамда курашар. А. Орипов, Йиллар армони. Журналистлар келгуси йилда ҳам газета ва журналларда ранг-баранг мақолалар, тарих, маънавият ва маърифатга оид материаллар берилажагини айтиб ўтишди. Газетадан.

РАНГВОР [ф. رنگوار — рангли, рангдор] Бирор мақсад учун зарур бўладиган бўёқ моддалар мажмуи. Шакарпазлик рангворлари.

РАНГДОР [ф. رنگدار — маълум рангли, рангга эга бўлган] 1 Бирор рангга эга бўлган ёки бўялган; рангли; ранг-баранг. Рангдор қаламлар. Рангдор қоғоз. ■ Паркнинг рангдор маржон чироқлари ҳам сўнди.. ҳамма ёқ жимжит бўлиб қолди. А. Мухтор, Чинор. Чамаси, касалхона яқинидаги бу бозорча ўзидан-ўзи пайдо бўлган, кейинчалик бир қатор раста қурилиб, устига рангдор пластмасса шифер ёпиб қўйилган эди. Ў. Ҳошимов, Нур борки, соя бор.

2 кўчма Бежамали, жилвали, тамтароқли, баландпарвоз (гап, сўз, услуб ва ш.к. ҳақида). Сайрамов болаликда, узун қиш кечалари.. чолнинг ўзига хос рангдор сўзи ва услубини диққат билан тингларди. Ойбек, О. в. шабадалар. ..умрдош танлашда янглишма, қизларнинг ташқи қиёфасига, рангдор сўзларига уча кўрма, — деди меҳмон Мансурга. Ё. Шукуров, Уч савол.

РАНГДОРЛИК кўчма Жилвадорлик, сержилвалик, жозибалилик. Саид Аҳмад асарларини ўқиган китобхон уларнинг тилидан ҳам бениҳоя чуқур эстетик завқ олади, ҳам тилимизнинг қудратига, рангдорлигига, бойлигига яна бир марта қойил бўлади. «ЎТА».

РАНГИН [ф. رنگين — рангли, рангдор, муайян рангга бўялган] айн. **ранг-баранг, рангдор I.** Рангин плакатлар. ■ Косалар, пиёлалар, қадаҳларнинг гуллари баҳор чаман-

ларидай бой, нафис, рангин эди. Ойбек, Навоий.

РАНГИНЛИК Ранг-баранглик, хилма-хиллик, ҳар хиллик. *..билимдонлик мубоҳасалари охир-оқибат фикрий рангинликка йўл очини аниқ.* Ш. Ризаев, Жадид драмаси.

РАНГЛАМОҚ *с.т.* Ранг бермоқ, бўямоқ. Сочларини ранлагани билан, бари бир, юзига кексаликнинг нуқси урибди. Газетадан.

РАНГЛИ 1 қ. рангдор 1. Рангли телевидение. Рангли чит. Рангли қалам. ■ Сарик рангли бино олдида, умрида овқат емандек қотма, новча, ранглари тоза, ҳаракатлари энгил одамлар қаршисида тўхтадик. Х. Тўхтабоев, Ширин қовунлар мамлақати. Тўрт марта пул мукофоти берди, икки йилдан бери рангли суратим «Хурмат тахтаси»да. С. Аҳмад, Юлдуз.

Рангли металллар Темир ва унинг қотишмаларидан бошқа барча металллар.

2 кўчма айн. рангдор 2. Ким билади.. *Машҳадийнинг силлиқ назми, рангли услуби валинеъматнинг кўнглини шундай қиларди, у.. бир неча кўй.. инъом қилиб юборар!* Ойбек, Навоий.

РАНГО-РАНГ [ф. رنگارنگ — турли рангдаги; хилма-хил] *с.т. айн. ранг-баранг.* Ўктам столни бирпасда ранго-ранг мевалар билан яшнатиб юборди. Ойбек, О. в. шабадалар. *Ранго-ранг мушаққар ловуллаб кўкка интилди.* «Саодат».

РАНГПАР [ф. رنگپریده — ранги ўчган, йўқолган] Ранги заҳил, синиққан, рангсиз. *Ҳовузнинг у томонида ярим гумбаз шаклида тош терилган, унинг остида мўйлов индигина сабза урган рангпар йигит кабоб пиширяпти.* Э. Усмонов, Ёлқин. *Ибн Сино тўрдаги ипак тўшак устида ёстиққа суяниб ўтирган рангпар кишига таъзим қилди.* М. Осим, Карвон йўлларида. *Уларнинг ғўзалари рангпар, нимжон; ўсимлик чанқоқ: «Сув бер!» деб фарёд чекаётибди.* Газетадан.

РАНГ-РУХСОР, ранги рухсор [ф. رنگ رخسار — юзининг ранги] *айн. ранг-рўй.*

РАНГ-РҮЙ, ранги рўй [ф. رنگروى — юзининг ранги] Киши юзининг ранги ва кўриниши. *Унинг ранг-рўйи яхши. Она юртинг омон бўлса, ранги рўйинг сомон бўлмас.* Мақол. ■ *Фарқланадиган ранги рўйимиз, Туриш-турмуш, орзу-ўйимиз.* Н. Нарзуллаев, Ёғду. *Ранг-рўйлари бир ҳолатда, қони қочган кўллари ёнларига мажолсиз чўзилган.* Н.

Аминов, Ёлғончи фаришталар. *Бригадир қорнини силаб, Нусратбекнинг ранг-рўйи, кийим-бошига разм солди.* С. Нуров, Майсаларни аёз урмайди.

РАНГСИЗ 1 Бирор рангга эга бўлмаган; туссиз. *Рангсиз суюқлик.*

2 Ранги номаълум, хира. *Рангсиз чит.*

3 Ранги кетган, ранги йўқ. *-Сизга бари бир эмасми? — Клара ҳамон унинг қўлини қўйиб юбормас, ойдинда чехраси бир оз рангсиз, аммо жозибали кўринарди.* Ў. Ҳошимов, Қалбингга кулоқ сол. *Калтакесадек рангсиз, қонсиз мавлоно Шаҳобиддиннинг кайфи жойида эди.* Ойбек, Навоий.

4 кўчма Тил ёки услуб жиҳатидан бўш; туссиз. [Абдишукур] *Шоирлик истеъдодидан матом маҳрум бўлишига қарамай.. вазни бузуқ, фикри саёз, рангсиз назмлар ёзди.* Ойбек, Танланган асарлар.

5 Нисбатан ожиз, бўш. *Унинг назарида, севги сўзи ҳаёт севгиси олдида рангсиз, туссиз эди.* М. Исмоилий, Фарғона т. о.

РАНГСИЗЛИК Ранги заҳиллик, синиққанлик. [Абдурахмон домла:] *Рангсизлик ортириб, йигирма саккиз ёшида “хатми кутуб” қилишга муваффақ бўлди.* А. Қодирий, Меҳробдан чаён.

РАНГТАСВИР Тасвирий санъат тури; бирор қаттиқ юзада рангли ашёларда, мас., бўёқлар ёрламида бадий асар яратиш усули ва шу йўл билан яратилган бадий асар. *Фестивалда мамлакатимизнинг 250 дан ортиқ иқтидорли ёш ижодкорлари рангтасвир, графика, ҳайкалтарошлик, амалий санъат, дизайн ва бошқа санъат турлари бўйича сара ижод намуналари билан иштирок этдилар.* Газетадан.

РАНГ-ТУС Ранг ва тус(лар). *Ранг-тус билдирувчи сифатлар (тлш).*

РАНГ-ҚУТ Кишининг ранги-рўйи ва файзи. *Ранги-қути ўчиб, дир-дир қалтираб турган йигитча қоғозларга кўл қўйди.* Ж. Шарипов, Хоразм. *-Уртоғингизнинг адаси ким? — ранги-қути ўчиб сўради Муборак Азизович.* Газетадан. *-Нима гап? Тинчликми? — деб сўради олим ранг-қути ўчган мулозимга қараб.* М. Осим, Карвон йўллари.

РАНДА [ф. رنده — тахтани силлиқловчи дурадгорлик асбоби] Ёғоч ва тахталарни текис қилиб йўниш, силлиқлаш учун ишлатиладиган, ўртасига пўлат тиг ўрнатилган дастали асбоб. *Мушт ранда. Дароз ран-*

да. ■ Коля гапга аралашмай, жингала-жингала қириндилар сачратиб, тахтача устидан ранда юритарди. Ҳ. Назир, Сўнмас чақмоқлар.

РАНДАЛАМОҚ Ёғоч-тахталарнинг сиртини ранда билан текисламоқ, силлиқламоқ. *Тахтани рандамоқ.*

РАНДАЛАШ Маълум қалинликда қиринди олиши йўли билан материаллар сиртига ишлов бериш усули. *Тахтани рандалаш.*

РАНЕЦ [нем. Ranzen – халта, сумка] Ҳарбийлар ёки ўқувчиларнинг елкага тасма билан осиб юрадиган сумкаси. *Ранецга ортиқча нарса солиб қўйилгандай орқага тортади.* Шуҳрат, Шинелли йиллар.

РАНЖ [ф. ранж – меҳнат, машаққат; ташвиш; ғам, алам; дард] 1 Кўнгила етган озор, алам. *Оламда ҳар нарса эсдан чиқishi, ҳар қандай ранж, кулфат кўнгиладан кўтарилиши мумкин, лекин уч ярим яшар бўлиб ўлган фарзанд доғи.. йўқ! А. Қаҳҳор, Қабрдан товуш.*

Кўнглини ранж қилмоқ Бировни ранжитмоқ, кўнглига озор бермоқ. [Бировдан] **Ранж топмоқ (ёки чекмоқ)** Бировдан ранжимоқ, озор топмоқ. *Мард атаймиз кимки турса аҳду паймон устида, Чекса ҳам ранж, узмагай меҳрин қадрдон устида.* Ҳабибий.

2 эск. Меҳнат, машаққат. «Ибодулло маҳсум шунча жойдан ранж чекиб келибди-я», деб такрор ўйлади Эломонов. М. М. Дўст, Галатепа қиссалари. *Ҳақ йўлида ким сенга бир ҳарф ўқитди ранж ила, Айламак осон эмас ҳаққин адо минг ганж ила.* Алишер Навоий.

РАНЖИГАННАМО Ранжиганга ўхшаш, ранжигансимон, ранжигандай. –*Сал наст-роқ туш, – деди Кесақполвон сал ранжиганнамо оҳангда.* Т. Малик, Шайтанат.

РАНЖИДА [ф. ранжиде – уринган, қийналган]: **қадам ранжида қилмоқ** Бирор ёққа ташриф буюрмоқ, бормоқ, келмоқ. –*Шу шарт биланки, кейин бизниқига ҳам қадам ранжида қиласиз.. – жавоб берди Ўктам.* Ойбек, О. в. шабадалар. *Сафарда юрган кезларим бу ерга навбати билан Намангандан ва Тошкентдан санъаткорлар қадам ранжида қилишди.* Газетадан.

РАНЖИМОҚ Бировдан ёки бирор кўнгилсиз иш, ножўя хатти-ҳаракатдан озор чекмоқ, хафа бўлмоқ. *Унинг кўнгли нимадан ранжиди? ■ Эҳтимол, анов кунги воқеадан ранжигандир.. Нега шундай қилдинг, онажон,*

нега Адолатни мендан қочирдинг? И. Раҳим, Чин муҳаббат. Оталар боладан ранжиса озроқ, Гоҳида шундайин сўзни дейдилар: –Болам, кексаларни қадрла кўпроқ, Боғлаб қўйган эмас бизни, дейдилар. А. Орипов, Йиллар армони. *Кўзингизни очинг, отажон, қачон сизни ранжитдим, қачон? Э. Раҳим, Янги қадам.*

РАНТ [нем. Rand – чет, чекка; қирра, зиҳ] маҳс. Пойабзалнинг юқори қисмини пошна билан сиртдан бириктирувчи камбар тери тасма.

РАНТЬЕ [фр. rentier – рента] *иқт.* Қарзга берилган пул маблағидан тушадиган фоизлар ва қимматбаҳо қоғозлардан тушадиган даромадлар ҳисобига яшовчи шахс.

РАНЧО [исп. rancho] Лотин Америкасида ҳовли-жой; Фарбий АҚШда чорвачилик фермаси. *Американинг Жанубий Дакота штатидаги ранчолардан бирида унча катта бўлмаган динозаврнинг тошга айланган скелети топилди.* «Фан ва турмуш».

РАП с.т. Раф. *Элмурод.. полк ҳовлисига қараган дераза рапига икки тирсагини қўйиб, бошини кафтлари орасига олганича, эртаги машгулот юзасидан китоб кўрар эди.* Шуҳрат, Шинелли йиллар.

РАПИДА 1 [ф. рапиде < а. رفاده – боғ, боғич; белбоғ] Тандирга нон ёпиш учун ишлатиладиган, матодан тикилган, тўгарак шаклдаги қалин кўлқоп. [Меҳрихон] *Рапидадаги ноннинг юзига сув сеиб, саватга ташлади.* С. Аҳмад, Қадрдон далалар.

2 кўчма Думалоқ, доирасимон, рапидага ўхшаш. *Баширжоннинг рапида юзлари, хум калласи қип-қизариб, лаблари кўкариб кетди.* Н. Аминов, Ёлғончи фаришталар. *Яхшибоев Ёнгулиннинг қиёфасини эслади: рапида юз, бароққош бир кимса..* М. М. Дўст, Лозазор. *Унинг рапида сингари юм-юмалоқ, қип-қизил юзида, аланг-жаланг кўзларида аллақандай тараддуд бор эди.* О. Ёқубов, Улугбек хазинаси.

РАПИРА [нем. Rapier < фр. rapiere] *снрт.* Қиличбозликда: расмий мусобақаларда қўлланадиган қайишқоқ, тўрт қиррали, ҳар бир санчқини қайд этувчи электр алоқали қурилмаси бўлган шамширдан иборат санчувчи қурол.

РАПОРТ [фр. rapport – олиб келиш; олиб бориш; қайтариб олиб келиш] **1** Идора ёки муассаса бошлиғига ёки ўз раҳбарига бирор

воқеа-ҳодиса, бажарилган иш, режа, мажбурият ҳақида тақдим этилган хабар, ахборот. *Ишга тушганлиги ҳақида рапорт бермоқ.* ■ *Бошқа бригадирлар ўз планларини бажариб, рапорт бера бошладилар.* У. Исмоилов, Сайланма.

2 Куйи унвонли ҳарбий хизматчининг ўзидан юқори унвонли ҳарбий бошлиққа маълум топшириқ бажарилганлиги ҳақида низомда белгиланган тартибдаги ёзма ёки оғзаки ҳисоботи. *Алижон полк командири қаршисига югуриб келди ва ғоз туриб рапорт берди.* Ҳ. Фулом, Тошкентликлар. *Разведкачи топшириқни вақтида бажарганлиги ҳақида командирга рапорт берди.* Газетадан.

РАПС [нем. Raps] бот. Карамдошлар оиласига мансуб, бир йиллик мойли емхашак экини (озиқ-овқат ва тўқимачилик саноатида, чорвачиликда ишлатилади).

РАПСОДИЯ [юн. rhapsodia – рапсод (достончи) кўшиғи] мус. Халқ кўшиқлари ва рақслари мавзуида ёзилган эркин шаклдаги чолғу ёки вокал мусиқа асари.

РАСАД I [а. رصد – пистирма; (астрономик) кузатиш; кўриқлаш; телескоп] кт. астр. Осмон жисмларини кузатиш, астрономик кузатишлар.

РАСАД II [р. рассада – кўчат]: **расад қилмоқ** с.т. Униб чиққан кўчатларни тез етилтириш учун яшиқдан ёки кўчатхонадан олиб, ерга сийрақроқ қилиб қайта ўтказмоқ. *Янги кўчатлар расад қилинди.*

РАСАДХОНА [расад I + хона] Қадимги Шарқ обсерваторияларининг номи (яна қ. **обсерватория**). *Беруний бу жумбоқни ечиш умидида ўзи қурган расадхонада кечани кундуга, кундузни кечага улаб, расад ўтказди.* О. Ёқубов, Кўҳна дунё. *Самарқанд қалъасининг ташқарисидати боғ кўчалар, Улуғбек расадхонасининг атрофлари, Обираҳмат ариғининг бўйлари беҳисоб кўшинга тўлиб кетган.* П. Қодиров, Юлдузли тунлар. *Катта боғни эслатувчи сердарахт ҳовли кимсасиз, расадхона жимжит эди.* О. Ёқубов, Кўҳна дунё.

РАСАМАД [ф. رسمد < а. رسومات] с.т. Бирор нарсани ҳар бир киши ёки ҳар бир нарсага тўғри келган, тенг улушларда тақсимлаш. *Расамад қилмоқ.* ■ *Ўртоқларимга яши кўриниш учун, расамадда кўрсатилмаган бўлса ҳам, ёғ ёнига тухумни қўшиб олиб боришни ўзимга маъқул қилган эдим, – деди Шум бола.* Ф. Фулом, Шум бола. *Асли*

ғалат экан бу дунё, Расамадни билмас экан ҳеч. А. Мухтор, Тонг билан учрашув.

Расамади билан 1) тўғри тақсимлаб, бўлиб. *Ерга расамади билан ўғит солмоқ.* ■ *Уртага каюб келди. Авзамжон ака ўз қўли билан икки-икки сихдан расамади билан меҳмонларнинг ликопчасига қўйди.* С. Аҳмад, Гутурт; 2) тартиби билан. *Унинг [янги шаҳарнинг] кўчалари тўғри ва кенг. Иморатлари расамади билан солинган.* 3. Акрамов, Ҳиндистон лавҳалари.

РАСВО [ф. رسوا – шарманда, бадном бўлган, уятга, иснодга қолган] 1 Ножўя хатти-ҳаракати, юриш-туриши билан эл назаридан қолган; ярамас, разил. *Расво одам.* ■ *Тавба, – деди у ўзига-ўзи, – ярим соат ичида икки расво одам билан учрашсам-а.* *Ҳаётида ҳеч маҳал бунчалик ярамас тасодифга йўлиқмаган эди.* Мирмуҳсин, Умид.

2 Жуда ҳам ёмон, танқиддан тубан. *Расво гап.*

3 Жуда ҳам ёмон, ярамас; нокас. *Унинг хунуқлиги устига икки дунёси ҳам расво – ҳасадчи эди.* Мирмуҳсин. *Божаси расво эканини билардим.* Шукрулло, Сайланма. *Жайдари ғўзадай мижғов, расво экинни деҳқон боласи билмаса керак.* Ф. Фулом, Алиқулнинг қарзи.

4 Издан чиқиб кетган, ёмон аҳволга тушиб қолган; ёмон, пачава. [Ўрмон Дадавойга:] *Қаердаки интизом маҳкам, у ерда иш йирик. Қаердаки интизом бузилди, у ерда иш расво.* Уйғун, Навбаҳор. *Ишни расво қилдику Падар ланғат Тошбақа.* «Ёшлик».

5 Бузуқ, бадахлоқ.

Расво бўлмоқ ёки расвоси чиқмоқ 1) эл назаридан қолмоқ, эл назарида шармандаи шармисор бўлмоқ. *Ана шундай қилиб эсан ҳам ажрарсиз. эл ичида кулгига ҳам қолурсиз, расво ҳам бўлурсиз!* А. Қодирий, Ўтган кунлар; 2) ишдан чиқмоқ; бузилмоқ. *Лой сачраб, кийими расво бўлди. Яп-янги жинсишим ҳам расво бўлди.* «Шарқ юлдузи»; 3) пачава бўлмоқ, бузилмоқ. *– Башарти хат душман қўлига тушгудай бўлсам, ишимиз расво бўлади, – деди унга командир вазифани тушунтирар экан.* А. Раҳмат, Варрақчи чол; 4) бузилмоқ, ёмон йўлга кирмоқ. **Расво қилмоқ ёки расвосини чиқармоқ** 1) шармандаи шармисор қилмоқ. *– Лозимидан бўлак ҳамма ёғини ечириб, расво қилиб чиқаришибди, – деди Ҳожи хола.* М. Исмоилий, Фарғона т.

о.; 2) кирдикорларни очиб ташламоқ. -*Ҳароми мени тоза расво қилганга ўхшайди, — деди ўзича [Ҳожичи]. А. Қаҳҳор, Йиллар. -Расвомизни чиқаришибди, — деди Саидваққос энтикиб [Обидхўжага]. Сўнг чўнтагидан газета чиқарди. — Фельетон қилишибди. Х. Тўхтабоев, Фельетондан сўнг;* 3) ифлос қилмоқ, ёмон аҳволга келтирмоқ. *Она! — Ҳолиса ўгирилиб қаради, катта хона полида мушукчасига сут бўктирилган нонни едиrolмай ўтирган ўғилчасига кўзи тушди: -Ҳой, полни расво қилибсан-ку! С. Нуров, Нарвон. -Войбў, ҳовлини расво қилибсизлар-ку, — дейди Фотима опа тоғора эвларини кўриб. Р. Файзий, Сен етим эмассан;* 4) издан чиқармоқ, бузмоқ, пачава қилмоқ. *Шукур Каримович ғўдайиб турган Салимхон Обидийга хўмрайди: -Домла, расво қилдингиз! — деб пўнғиллади. Мирмуҳсин, Умид. -Ўша фельетон ҳамма ишни расво қилиб ташлади. Матбуотда эълон қилдингими — тамом. Фишт қолипдан кўчди. Н. Аминов, Қаҳқаҳа;* 5) бузмоқ, ёмон йўлга солимоқ. *Қизларни ҳам расво қиялсиз. С. Зуннунова, Олов. -Болалар мени яхши кўрсин, деб уларни расво қиялсиз, ўртоқ Султонова [деди Баратов]. С. Зуннунова, Янги директор. Чакки қилади Шоқосим ака. Наша бир куни уни расво қилади. Ойбек, Танланган асарлар. Расвои олам (ёки жаҳон) бўлмоқ* Ҳамманинг олдида шармандаи шарминсор бўлмоқ, обрўси тўкилмоқ. *Замондин замон ўтиб, уларнинг дилида яхшилик, мурувват, ҳамият, инсофу адолат чироғи ёнармикин ёхуд то қиёмат қадар шундай бадбахтлик ботқоғида расвои олам бўлиб қолармикинлар? С. Сиёев, Ёруғлик. Буларни ўйлаганда, Тожибойнинг ичини қоронғи босиб, кўз олди тиниб кетди. Йўқ, кимсан — Тожибой оқсоқол бундай расвои жаҳон бўлиш учун туғилган эмас. П. Турсун, Ўқитувчи.*

РАСВОГАРЧИЛИК 1 Одоб-ахлоқ чегарасидан ташқари иш, ножўя хатти-ҳаракат; шармандалик. *Нега расвогарчилик қилдинг?*

2 Бошбошдоқлик, бебошлик. *Бундай расвогарчиликни қаердан ўргандинг? «Ёшлик».*

3 Ахлоқи ёмонлик, бузуклик, фаҳш. [*Насиба:*] *Расвогарчиликка судраган кишиларни дўст деб, уларнинг тақдирини ўйлаяпсизми? С. Зуннунова, Олов.*

РАСВОЛИК 1 Ярамаслик, разиллик. *Ёқут ая ўз расволигига аччиқ-аччиқ, юмма-юмма йиғлади. Ф. Фулом, Соялар.*

2 *айн. расвогарчилик* 2. -[«*Мусулмон лигаси*»] *Уламолар билан биргалашиб, яна Америка “ёрдамини” бош усти қабул этишга фатво берди, бу қандай расволик! — деди Муҳаммад Жамол. Ойбек, Нур қидириб.*

3 *айн. расвогарчилик* 1. *Одамлар суюгоёқ хотинидан эмас, расволикни бўйнига олган эридан жирканишарди. Мирмуҳсин, Умид.*

РАСВОЧИЛИК *айн. расвогарчилик. Подшо бўлсанглар, отланиб юрсанглар бўлмай-дими? Бу қандай расвочилик. «Маликаи айёр».*

РАСИДА [ф. رسیده — етган, етишган, эришган; пишган, етилган; комил; вояга етган] *эск. кт. I Жисмоний жиҳатдан тўла ривожланган, камолотга эришган; етук, баркамол. ..Овозим дўриллаб, расида бўлгунимча отамнинг ёнида ётдим. «Ёшлик».* *Ҳасан қайғичи — хоннинг хос қизикчиси, бўйи икки газча келар, ориқ, кўса, узун қўллари тиззасигача етар, товуши ҳам расида бўлмаган ўспиринларникидек чийиллаб чиқар эди. С. Сиёев, Аваз.*

2 *айн. расида* II.

РАСИДАЛИК *Жисмоний жиҳатдан тўла ривожланганлик, камолотга эришганлик, етуклик. Элчин хушсурат бўлгани учун, расидалик чегарасидан ўтмаёқ, қизларнинг хумор кўзлари таъқибига учраган эди. Т. Малик, Шайтанат.*

РАСКЛАДУШКА [р. раскладывать — «тахлаб қўймоқ; ёймоқ» фл. дан ясалган от] *Енгил букма каравот. Ойхонада ўтган ҳам, кетган ҳам қоқиладиган раскладушкада ётганини мақтайдими? С. Зуннунова, Олов. Жувон.. шафтоли тағидаги раскладушкага жой қилиб, чироқни ўчирди. С. Аҳмад, Таъзим. Чодирлардан бирига кириб, раскладушкларга ўзимизни ташладик. П. Қодиров, Уч илди.*

РАСМ I [а. رسم — чизма, тарх; сурат, тасвир, портрет, фоторасм; из, белги] *Қўлда чизилган, босма ёки фотографик тасвир, сурат. Расмлар билан безатилган китоб. Расм дарси. Расм олмоқ. Расм солмоқ. ■ [Қўзибойнинг] Ишлаган расмларидан битта-яримтаси гоҳо деворий газета редколлегиясига маъқул тушиб қолади. Ҳ. Назир, Сўнмас чақмоқлар. Ўсмани узиб қўйдим, Сўлиса кўяман деб, Расмингизни сўрадим, Соғинсам кўраман деб. С. Сиёев, Ёруғлик.*

РАСМ II [а. رسم — маросим, урф-одат, таомил; диний маросим] *Бирор жамиятда*

одат ҳукмига кирган тартиб-қоида; урф, удум, таомил. *Меҳмон олдида дастурхон ёзиш оина-боболаримиздан қолган расм.* ■ *Уларнинг расми шунақами, шиқилиб, аввал обдан ғазал айтишди, кейин ичкари киришди. С. Сиёев, Ёруғлик. Юракка энг яқин кишисини йўқлаш — азал одамзод расми.* «Шарқ юлдузи».

Расм бўлмоқ 1) одат ҳукмига кирмоқ, одатга айланмоқ. *Эҳтимол, пайшанба куни ош дамлаш ўшандан кейин расм бўлгандир? К. Маҳмудов, Қизиқарли пазандалик. Ҳозирги кунга келиб, жамият босиб ўтган йўлни ошқора тадқиқ-таҳлил ва танқид қилиш расм бўлди.* «Ёшлик». *Санжар тарбия топган оилада одамларни навларга ажратиб муомала қилиш расм бўлганлиги сезилиб турибди.* «Ёшлик»; 2) кенг тарқалмоқ, ёйилмоқ; мода бўлмоқ. *Унинг [Дилдорнинг] энида ўша пайтларда расм бўлган пушти крепдешин кўйлак, оёғида баланд поиннали туфли. С. Аҳмад, Уфқ.*

Расм қилмоқ 1) одат ҳукмига киритмоқ, одатга айлантирмоқ. *-Бўш вақтларда шундай физкультурачилар кийимида майдонда тўп ўйнашни бошқаларга ҳам расм қиласан! — деди Ўктам. Ойбек, О. в. шабадалар;* 2) кенг тарқатмоқ, ёймоқ. *Зулҳумор шу вақт йигитларга қалпоқни расм қилди.* «Равшан». **Расми кушод этн.** Бирор нарсанинг тантанали очилиш маросими. *Янги ҳовлининг "расми кушоди" да иштирок қилган Мирвали банги ҳўтикдек чилимни кўтариб келади. А. Қодирӣ, Обид кетмон. ..биз бу оқшомни Муҳаммаджон боғида, унинг расми кушодида ўтказдик. К. Қаҳҳорова, Чорак аср ҳамнафас.*

РАСМАН [а. رسمًا — расмий, қонуний тарзда] *рвш.* 1 Расмий равишда, расмиятга мувофиқ. *Дўнанбекнинг меҳмондорчилиги, расман бек қилиб тайинланганига йил тўлиши муносабатига бағишланган бўлса-да, асосий мақсад гап терии эди.* «Шарқ юлдузи». *Наврўз байрамининг халққа расман қайтариб берилиши ниҳоятда адолатли иш бўлди.* Газетадан. *Давлат мустақиллигимизни дунёнинг 120 дан ортиқ мамлакати расман тан олди.* Газетадан.

2 **Куруқ**, расмият юзасидан, расмиятчилик билан. *Расман, юзаки иш кўришларга, ваъдалар беришга.. қатъиян хотима бериш керак.* Газетадан.

РАСМАНА с.т. қ. **расмона.** *Расмана кетмон.* ■ [Пакана қизиқ] *Амирнинг навкарла-*

ри, мен яхши разм солдим, расмана навкарлар! А. Мухтор, Тонг билан учрашув. *Бу кўзлар расмана тикилганда, не-не қизларни қалқитиб, қоқилтирмаган. М. Мансуров, Ёмби. Яхшибоев Муҳсинанинг кўнглини топганидан сўнг, ўзи расмана совчилик қилган. М. М. Дўст, Лолазор.*

РАСМИ *рвш. с.т.* Одатга кўра, одатда. *Дадам кулиб гапида давом этади: -Расми, овулга меҳмон келса — танишими, нотанишими, отдами, пиёдами — бари бир, қозақлар уни яхши қабул қилишади.* Ойбек, Болалик.

РАСМИЙ [а. رسمى — маъмурий, маъмуриятга алоқадор] 1 Ҳукумат, давлат ёки бирор ташкилотга оид, шулар томонидан белгиланган. *Расмий вакил.* ■ *Ўрдага ариза билан мурожаат қиладиган ҳар ким, ҳатто расмий кишилар ҳам аввал маслаҳат сўраш учун Анварнинг ёнига келар эдилар. А. Қодирӣ, Меҳробдан чаён. Таъкидланганидек, Ўзбекистон ва Украина расмий делегацияларининг кенгайтирилган таркибдаги музокараларида, асосан, иқтисодий масалалар муҳокама этилди.* Газетадан. *У ҳеч кимга, айниқса, расмий кишиларга оиланинг икир-чикирларидан гапирмасди.* Ў. Умарбеков, Ёз ёмғири.

2 Ҳукумат, давлат органлари ёки бирор ташкилот томонидан эълон қилинган, чиқарилган, тарқатилган. *Расмий маълумот. Расмий ахборот.* ■ *Бунга ташкилотлар ва шахслар ўртасидаги расмий ишга тааллуқли бўлган хатлар, ёзишмалар киради.* «ЎТА». *Улар асосан расмий хабарларни эълон қилиш билан чекланадилар. Газетадан. В. В. Решетов 50 дан ортиқ докторлик ва кандидатлик диссертацияларига расмий оппонент бўлди.* «ЎТА».

3 Қонуний равишда тасдиқланган, расмийлаштирилган. *Расмий ҳужжатлар. Расмий ташкилот.* ■ *Мамлакатимиз мустақиллигининг расмий даражасини халқаро майдонда янада яққолроқ кўрсатиш учун шундай таширфлар бўлиши лозим.* Газетадан. *Ҳар эҳтимолга қарши расмий қоғоз олиб келгандим.* «Шарқ юлдузи».

4 Ҳамма қоидаларга, расмият талабларига риоя қилиб бажарилган, ўтказилган. *Расмий таклиф. Расмий мажлис.* ■ *У [профессор Жамолов] президиумга чиқиб ўтириши билан, расмий қисм ўз-ўзидан юришиб кетди. Ж. Абдуллахонов, Орият. Ҳали расмий сўз олганимча йўқ.* «Шарқ юлдузи». *Жум-*

ладан.. расмий таширф вақтида Европа қайта тикланиш банки билан битим имзоланди. Газетадан.

5 кўча Куруқ расмият юзасидан бажарилган, куруқ расмиятдан иборат бўлган. -*Афв этасиз, — деди Тўғайсари расмийроқ оҳангда. Ш. Холмирзаев, Қил кўприк. Совчилар шунчаки расмий нарса. «Шарқ юлдузи». Умуман, жамоат олдидан гапиришни сезмайдиган одам: ўзининг имомлик вазифасига ҳам жуда расмий равишда қарайди. Чўлпон, Кеча ва кундуз.*

6 кўча Куруқ, совуқ. Замира оғзаки куруққина сўрашди, Очил ҳам расмий салом берди. П. Қодиров, Уч илдиш.

7 Давлат йўли билан олиб бориладиган муомала, ёзишма ва ҳужжат тилига хос бўлган; мактубий. Расмий услуб. ■ Маълум бўлишича, бу одам ҳам мазкур тилни расмий, қаердадир тасдиқланган тил деб билар, бу тилда сўзланадиган ўлик нутққа жон киргизгани қилинадиган ҳар хил ҳаракатни «қуюшқондан ташқари чиқиш» деб ҳисоблар.. экан. А. Қаҳҳор, Куюшқон. Республикамизда ўзбек адабий тилининг расмий-иш услубини ўрганиш бўйича илк қадам қўйилган. «Иш юритиш».

8 Одатдаги, оддий, расмана. Расмий уй. ■ Мана, кўрмайсанми, расмий одамдан бунинг нима фарқи бор? Ойдин, Кўнгли тўлдими, яхши йигит.

РАСМИЙЛАШМОҚ Расмий йўл билан тасдиқланмоқ, расмий тус олмоқ. *Ҳужжатлар расмийлашди. Расмийлашган ташилот.*

РАСМИЙЛАШТИРМОҚ Расмийлашмоқ фл. орт. н. *Қарорни расмийлаштирмоқ. ■ Ҳужжат тайёрлаш ва расмийлаштиришда энг аввало ўзбек тилининг барча асосий қонуниятлари ва қоидаларини маълум даражада тасаввур этиш зарур. «Иш юритиш». - Баъзи ҳужжатларни расмийлаштириш керак эди, эртага комиссия келиши мумкин! — дея гудранди. Н. Аминов, Қаҳқаҳа.*

РАСМИЯТ [a. رِسْمِيَّةٌ — расмийлик; расмий ҳужжатлар] **1** Бирор ишни, вазифани бажариш учун ўрнатилган тартиб-қоида, ишнинг расмий томони; расмийлик. *Бутун расмиятларга риоя қилмоқ. ■ Агар ўртада расмият бўлмаганда.. бизларни кучмоқчи экани [Лутфиланинг] қиёфасидан сезилиб турарди. Мирмуҳсин, Созанда.*

2 Куруқ хўжа кўрсинга қилинган иш, хатти-ҳаракат, юзакилик. *[Ҳафиза] Севиклисидан икки хат олди; унинг назаридан, бу хатлар расмият учун ёзилгандай туюлди. Мирмуҳсин, Умид. Гуреевнинг саволларига расмият учунгина жавоб берди-ю, ўзига кўрсатилган креслога ўтирди. С. Кароматов, Олтин кум.*

РАСМИЯТЧИ Куруқ расмиятга ёки такаллуфга риоя қилувчи; бюрократ. -*Жуда расмиятчи бўла берма! Мен ҳамма нарсага расмий қарай берадиган одамларни ёқтирмайман, — деди Шукур Каримович Умидга. Мирмуҳсин, Умид. Ишларингизнинг қадрини мана шунақа ҳовлиқмалар, маҳмадоналар, расмиятчилар туширяпти. П. Қодиров, Уч илдиш. Бутун юриш-туриши, кўз қарашларидан фирт.. расмиятчига ўхшаб кўринган одамнинг «санъатингизни ўратинг» деган сўзи [Тешавойга] мойдек ёқиб тушди. Ж. Абдуллахонов, Йўл.*

РАСМИЯТЧИЛИК Куруқ расмиятга ёки такаллуфга берилиб кетишлик; юзакилик, тўрачилик. *Расмиятчиликка чек қўймоқ. ■ Бу лақаб ҳар қандай расмиятчиликни улоқтириб ташлаб, уни [Аҳмадни] яна ўша беғам студентлик даврига чорлади. Ф. Мусажонов, Ҳиммат. Бу расмиятчиликни бажариш фарзанд учун оғир, шарафли.. Ҳам қарз, ҳам фарз.. Зеро, ҳаёт занжири тамомила узилмаганлигини англатувчи бир удум.. «Ёшлик». Ҳамон тармоқда расмиятчилик ва тўрачилик, хўжа кўрсинга ишлаш ва кўзбўямачилик ҳоллари кўп. Газетадан.*

РАСМЛИ Расм чизилган, расм билан таъминланган, расм солинган. *Расмли китоб.*

РАСМ-ОДАТ қ. расм-русум. *Бу расм-одатга аёл зоти борки, рози бўлмай иложи йўқ. К. Яшин, Ҳамза.*

РАСМОНА [a. + ф. رسمانه — оддий, одатдаги] **1** Рисоладаги, оддий, расмана. *Қиз расмона кетмон билан тез ва пишиқ ишлаб кетди. Ойбек, О. в. шабадалар.*

2 Чинакамига, астойдил, ростакамига. *Гўёки ўзининг армони эканини расмона ағлайдиган ягона одам ҳам унинг ўзи. «Ёшлик». Шоиргаям қийин, битта ўзини деб расмона уруш очолмаса. М. М. Дўст, Галатепага қайтиш.*

3 Шунчаки, юзаки. *Буларнинг ҳаммаси шунчаки расмона ишлар. «Ёшлик».*

РАСМ-РУСУМ [а. رسم – расм + رسوم – расмлар] Расм ва таомиллар, урф-одатлар. *Кўп камбағаллар бу эски расм-русум ва одатларни бажо келтираман деб, неча йиллар қиз чиқара олмай, ўғилларини уйлантира олмай сарсон бўлардилар.* М. Муҳаммаджонов, Турмуш уринишлари. *Тошкентликларнинг расм-русумлари бу жойларга ҳам ёйилибди, фақат карнай-сурнай йўқ.* С. Нуров, Майсаларни аёз урмайди. *Ота-боболаримиз азалдан мусулмончилик расм-русумларига қаттиқ амал қилиб, ҳалол-покиза умр кечирганлар.* Газетадан.

РАСМЧИ с.т. 1 Расм олувчи, сураткаш; фотограф. *Расмчи йигит.*

2 Рассом.

РАСО [ф. رسا – тўлиқ, бутун, етарли; мукамал] 1 Ками йўқ, тўлиқ, бут. *Расо пачкалар. Пул расо чиқди.* ■ [Алишернинг] *Кетганига бугун расо бир ой бўлди. Нега бунча ҳаяллади экан?* Уйғун ва И. Султон, Алишер Навоий.

2 Ақлий жиҳатдан тўла ривожланган, камолотга эришган; етук, баркамол. *Хотин бўлса қобилу ақли расо, Эрин шоҳ этар, гарчи бўлса гадо. «Ақл ақлдан қувват олади».* Усмонали ака ер илмини ҳаммадан кўра яхши биладиган ақли расо одамга ўхшайди. С. Аҳмад, Чўл шамоллари.

Расо қилмоқ 1) бут қилмоқ, тўлдирмоқ, расоламоқ. *Пачкани расо қилмоқ;* 2) вояга етказмоқ, камолотга эриштирмоқ, етилтирмоқ. *Афтидан, буларни машқ қилдиришга, машини тезроқ расо қилиб, фронтга жўнатишга ҳеч ким шошилмас ва лозим ҳам кўрмас эди.* А. Қаҳҳор, Олтин юлдуз. **Қадди расо** Қадди, бўйи-басти келишган, қоматли. *Эшон ая қадди расо, кўзидан сурма, юзидан уна-элик аримаган кўҳлик бир хотин эди.* С. Аҳмад, Сайланма.

3 Бутунлай, тамоман.

РАСОЛАМОҚ 1 Бут қилмоқ, расо қилмоқ, тўлдирмоқ. *Асбоблар комплектини расоламоқ.*

2 Нишонга тўғри урмоқ, тўғриламоқ. *Хан-жарингни дадил суғур қинидан Ва расолаб сангил унг биқинидан! Миртемир, Асарлар.*

РАСОЛИК Етуклик, камолотга эришганлик. *Фикримни дарҳол қувватлагани ақли расолигидан, донолигидан далолат беради.* Ш. Рашидов, Бўрондан кучли. [Ферузанинг] *Ўзи озгин, бели нозик бўлса ҳам, болдирлари, би-*

лаклари тўлишиб, қаддига ажиб расолик баҳиш этади. Ҳ. Гулом, Сенга интиламан.

РАСПИСКА [р. расписаться – «қўл қўймоқ, имзо чекмоқ» фл. дан ясалган от] с.т. қ. **тилхат.** У кўзларини чирт юмганича, яна гапирди: *-Истасанг, иккинчи бундай қилмасликка расписка бераман. Кўр эканман, қадрингни билмаган эканман.* С. Аҳмад, Сайланма.

РАССОМ [а. رسام – чизмакаш; тасвирчи, мусаввир] Расм солувчи санъаткор; сураткаш. *Ўзбек халқ рассомлари.* ■ *Нозик дидли рассомларни ҳам ҳайратда қолдирадиган ойнадаги нақш [Элмуроднинг] хаёлини банд этди.* Шухрат, Шинелли йиллар. *Рассом ўз асарларини бошқа санъаткорларга ўхшаб халқ оммасига кенг тарқатиш имкониятига эга эмас.* Ф. Мусажонов, Ҳиммат. *Ёзувчи билан рассом қўлни қўлга бериб, дўстона хайрлашиди.* С. Аҳмад, Юлдуз.

РАССОМЛИК Расм солишдаги ижодкорлик, сураткашлик. *Рассомлик санъати.* ■ *..Ошно ортиқча гап кавлаб ўтирмади. Аввалбекнинг дипломатик ўқишини ташлаб, рассомлик қилиб юрганини кечирди.* М. М. Дўст, Лолазор. *Ҳа, иннайкейин. Кўзибой рассомликдаям чаканамас-да. Ишлаган расмларидан битта-яримтаси гоҳо деворий газета редколлегиясига маъқул тушиб қолади.* Ҳ. Назир, Сўнмас чақмоқлар.

РАССОМЧИЛИК айн. **рассомлик.** *Сиз рассомчилик факультетининг иккинчи курс студенти Чароснинг онасимисиз ахир? Ў. Ҳошимов, Қалбингга кулоқ сол. Рассомчиликка қизиқиш уни 1969 йили Беньков номидаги рассомлик билим юртига етаклади.* Газетадан.

РАСТА I [ф. رسته – қатор; қаторга қўйилган, қаторда турган] Бозорларда бир турдаги мол билан савдо қиладиган дўконлар қатори ва улар ўртасидаги бозор, кўча, йўлак. *Чит растаси.* ■ *Чамаси, касалхона яқинидаги бу бозорча ўзидан-ўзи пайдо бўлган, кейинчалик бир қатор раста қурилиб, устига рангдор пластмасса шифер ёпиб қўйилган эди.* Ў. Ҳошимов, Нур борки, соя бор. *Келтирилган қоп-қоп гуручларни тушириш керак, расталарга жойлаш керак.* Ш. Холмирзаев, Оғир тош кўчса. *Баширжон раста оралаб юраркан, ён томондан таниш бир овоз келди: -Ҳо, жиян!* Н. Аминов, Суварак.

РАСТА II [ф. رسته – ўсиб етган, пишиб етилган] с.т. Балоғатга етган пайт; балоғат.

Раста бўлмоқ Балоғатга етмоқ.

РАСТА-РАСТА Қатор-қатор, кетма-кет. *Раста-раста ўтади ёшлар, Тавзимдадир кувё ва келин. Т. Тўла, Асарлар. [Содиқ мингбоши:] Сенларга раста-раста қилиб бозор очиб қўйган ким ўзи? А. Мухтор, Тонг билан учрашув.*

РАСТРАТ(А) [р. растрата — сарф қилиб қўйиш] с.т. эск. Давлат ёки жамоат пулини, мол-мулкни қонунга хилоф равишда сарфлаш, ўзлаштириш, еб қўйиш. *Растрат қилмоқ. Растратни ундирмоқ. ■ Растрат учун ҳовли мусодара қилинадиган бўпти. С. Аҳмад, Юлдуз.*

РАСТРАТЧИ с.т. Пул, мол-мулкни ўз манфаати учун сарф этган киши.

РАСУЛ [а. رسول — чопар, вакил; элчи; олдиндан хабар берувчи] **1** Оллоҳнинг вакили, элчиси (Муҳаммад пайғамбарнинг сифати). *Набилар, расулар, доҳийлар унда, Қабрлар, қасрлар тургандир қатор. А. Орипов, Йиллар армони. Худо ва Расулга бўлган ҳақорат — куфр ва муртадлик бўлиб, кофир ва муртаднинг жазоси қатл, дорга осилиш ва сангсор қилиш эмасми? С. Айний, Куллар.*

2 Расул (эркаклар исми).

РАСУЛУЛЛОҲ [а. رسول الله — Оллоҳнинг расули] айн. **расул 1.** *Бир кун сўрадилар Расулуллоҳдан: -Тақдир ҳукми экан — бўлгани бўлди, Зарра фойда йўқдир гарчи оҳ-воҳдан, Айтинг, мен нетайин, надарим ўлди? А. Орипов, Ҳаж дафтари.*

РАСЧЁТ I [р. расчёт — ҳисоблаш, ҳисоблаб чиқариш; ҳисоб-китоб қилиб (ҳақини бериб) ишдан бўшатиш; ўч олиш] **1** тех. Лойиҳалаш маҳалида керакли маълумотларни ҳисоблаб чиқариш. *Буг қозонининг расчёти.*

2 бухг. қ. **ҳисоб-китоб.** *Гани ака тушунтирди: -Гузарда завхоз бизни учратди-ю, Инжиқободдаги мактаб боғига олиб бориб, олмаарнинг тагини чоптирди. Ундан кейин шергимга расчёт бериб, менга мактаб орқасидаги ариқларни тозалатди. П. Турсун, Ўқитувчи.*

3 с.т. Ўч олиш, ҳисоблашиш. *Ҳа, бир мушт урдим, ўртоқ полковник, икки мушт кўтара олмас эди. Чамаси, биз қарздор, расчётни Берлинда қиламиз. А. Қаҳҳор, Олтин юлдуз.*

РАСЧЁТ II [р. расчёт — ихтисослашган жангчилар гуруҳи] ҳарб. Битта тўп (замбарак), пулемёт ёки миномётни бошқарувчи

жангчилар гуруҳи. *-Жангга ҳозирланинг! — вэвод командирининг буйруғи расчёт жангчиларини сергаклантирди. Газетадан. Тирик қолган жангчиларни дарҳол ҳар иккала тўп расчётига бириктириб, тўпларни жанговар ҳолатга келтирди. Газетадан.*

РАТИФИКАЦИЯ [лот. ratificatio < ratus — ҳал қилинган, тасдиқланган + facere — қилмоқ, бажармоқ] **1** Халқаро шартнома ёки конвенциянинг олий давлат ҳокимияти органи томонидан тасдиқланиши (айни мамлакатларда қонуний кучга киритилиши). *Олий Мажлиснинг ўн тўртинчи сессиясига ратификация учун киритилган ҳужжатлар ҳақида ахборот тингланди. Газетадан. Ўзбекистон ҳукумати халқаро фуқаро авиацияси тўғрисидаги конвенцияларни ўзгартиришга доир яна 13 та баённомани ратификация қилди. Газетадан. Инсон ҳуқуқлари бўйича яна бир қанча халқаро ҳужжатлар кўриб чиқилиши ва ратификация қилиниши мўлжалланмоқда. Газетадан.*

2 Баъзи мамлакатларда (мас., АҚШда) конституцияга киритилган тузатишларни тасдиқлашнинг махсус тартиби. *Мальта парламенти Европа иттифоқи конституциясини ратификация қилди. Газетадан.*

Ратификация ёрлиғи Халқаро шартномалар ва конвенцияларни тасдиқлашда расмийлаштирилмадиган ва олий мартабали раҳбарлар томонидан имзоланадиган расмий ҳужжат.

РАТУША [пол. ratusz < нем. Rathaus < Rat — кенгаш + Haus — уй] **1** Баъзи хорижий мамлакатларда ва 18–19-асрларда Россияда: шаҳар ўз-ўзини бошқариш идораси.

2 Европанинг бир қанча мамлакатларида шундай идора, орган жойлашган бино.

РАУНД [ингл. round — тўғарақ, давра, доира] **1** Боксда бир қур жангнинг ўзи учун ажратилган ва уч дақиқа давом этадиган муддат (ҳаваскор ва профессионал боксчилар жангида раундлар сони ўзаро фарқланади). *Қитъавий чемпионлик камари учун рингга чиққан ўзбекистонлик Қувонбек Тойганбоевнинг шиддатли зарбаларига Кван Хун Жим (Жанубий Корея) бир раунд ҳам бардош бера олмади. Газетадан.*

2 Халқаро муносабатларда музокаралар жараёнидаги алоҳида, мустақил босқич.

РАФ [ф. رف — деворнинг баландроқ қисмида ўйиб ясалган тоқча; идиш тоқчаси]

Дераза тоқчаси. *Тасаввур қилдики, у ўзи йўлакдаги дераза рафига тизилган гуллар ортидан томоша қилиб туради.* М. М. Дўст, Лолазор. *Катта дераза рафидоғи тувакда ўсган бодринг палак отиб, шифтга етай деб қолибди.* С. Аҳмад, Чўл шамоллари.

РАФИНАД [фр. raffinade – тозалаш] Шакарга махсус ишлов бериш орқали турли шаклларда тайёрланган оқ қанд.

РАФИНАЦИЯ (ЛАШ) [нем. Raffinieren < фр. raffiner – тозалamoқ] Саноатнинг турли тармоқларида металлар ва қотишмалар, ёғ ва мойларни кераксиз ёки зарарли қўшимчалардан тозалаш.

РАФИҚ [а. رفیق – йўлдош; шерик, ўртоқ, дўст; маъшук, маҳбуб] *кт.* 1 Ўртоқ, дўст. -*Эй, муҳтарам рафиқларим, дўстларим, – дея мурожаат этди Аҳмад Ҳусайн.* Ойбек, Нур қидириб. *Якка ўзим нима иш қилай, Рафиқларим бор бўлса экан.* «Гулнорпари». *Саждага бошинг уриб фарёд чекма, эй рафиқ, Энди сен топаймидинг, топмабди-ку агёрлар.* А. Орипов, Йиллар армони.

2 Умр йўлдоши; эр. [Марям Қодиржонга:] *Мен ҳам ўқиган, тўғри рафиқ истаган хотинман.* Ҳамза, Ким ўғри?

3 Рафиқ (эркаклар исми).

РАФИҚА [а. رفیقه] *кт.* 1 Дугона, ўртоқ, дўст.

2 Умр йўлдоши, хогин, ёр. *Фарзандим, отам, рафиқам – мендин сўнг ёнар чирогим – ана шу дўстларим.* С. Сиёев, Ёруғлик. *Ишдан ҳориб қайтдинг, дилгир, ҳойнаҳой, Рафиқанг узатди бир пиёла чой, Унут бўлди шунда зоринг, чарчоғинг, Кўнгилдан бир нафас кетди губоринг.* А. Орипов, Йиллар армони. *Юзидан мулойимлик, эрига итоат, тўғрилиқ маънолари томиб турган бу хотин қутидорнинг рафиқаси – Офтоб ойим.* А. Қодирий, Ўтган кунлар.

3 Рафиқа (аёллар исми).

РАФТ [ф. رفت – бориш, жўнаб кетиш] с.т. Шашт; ғайрат; кайфият. *Махсумнинг рафти йўқ экан, қўлида титилган бир китоб, мунғайиброқ ўтирарди.* М. М. Дўст, Галатепа қиссалари.

РАФТ-ОМАД, рафту омад [ф. رفت و آمد – борди-келди; бориш ва келиш] *кт.* 1 Борди-келди муносабатлари, бориш-келиш. *У билан бизнинг рафт-омадимиз йўқ.* ■ *Олимжон тарафидан келтирилмиш янги либосларга ўралган Абдулқаҳҳор иккинчи бир зўр давлат*

нишонларини кутиб, аввалги давлатига шерик бўлган, иззат ва ҳурмат қилган ошноларни эндиликда ҳеч бири била рафт-омад қилмасликка.. ҳар нафасда қасамлар ёд қилмоқда эди. Ҳамза, Танланган асарлар.

2 Юриш-туриш, оёқ олиш. *Йигитнинг рафт-омадига қараганда.. шоҳона бир участкани қонуний йўл билан қуриб, баъзи таъна-маломатларни даф айлабдир.* Ғайратий, Довдираш.

Рафт-омадини олмоқ Разм солиб, кузатиб, бутун сиру асрорини билиб олмоқ, азмойишини олмоқ. -*Ўғлим, – дедилар [эшон Шум болага] – мана энди бизга анча хизматинг сингди. Ички-ташқининг рафт-омадини олдинг.* Ғ. Ғуллом, Шум бола.

РАФТОР [ф. رفتار – юриш, қадам ташлаш; юриш-туриш, феъл-атвор] эск. *кт.* 1 Хатти-ҳаракат, юриш-туриш, қадам олиш. *Лекин адо бўлгур мени хушламади, рафторим, юриш-туришим ёқмаган эмиш.* Н. Аминов, Ёлгончи фаришталар. *Од капитанни таниганди, албатта, бироқ унинг рафторидан ғирт телба эканлигини англаб, янада ҳайратга тушди.* «Ёшлик». *Асқар ота, бу ҳурматли жувон бошқа хотинлардан рафтори билан ажралиб турар, деган бир ўйда эди.* А. Қаҳҳор, Хотинлар.

2 *кт.* кўчма Юз, бет; ташқи кўриниш. *Юнусхоннинг рафтори дув қизариб, зумда аслига қайтди.* «Ёшлик». *Сал чимирилган қошлари демаса, Авазнинг рафторидан бир нима англаб олиш қийин эди.* С. Сиёев, Ёруғлик.

РАХ [ф. رخ – кертик (кертма) белги; дарз, ёрик; тирқиш] 1 *айн.* рахт 1.

2 Эшик, девор ва ш.к. ларнинг бурчаги, қирраси, зиҳи. *Рах чиқармоқ.* ■ *Муқаддам айвон деразасининг муздек қиррадор раҳига нешонасини босди.* Ў. Ҳошимов, Қалбингга кулоқ сол. *Гавҳар бу гапни ёзишни ҳам, ёзмасликни ҳам билмай, тирсақлари билан стол раҳига таянганича, узоқ ўтириб қолди.* Ў. Ҳошимов, Қалбингга кулоқ сол. *Деразанг раҳида ёронгўл ўсар. Мен сени соғиндим.* Х. Даврон. *Пошиша хола айвон раҳидан икки бўз сури олиб келди, ерга ёзди..* Д. Нурий, Осмон устуни.

3 с.т. кўчма Кийим-кечак қирраси. *Рахи чиқсин, деб матрас тагига ёзиб қўйган шимини олиб кийди.* С. Кароматов, Олтин қум. *Тилла сочини жайранинг сихидек тиккай-*

тириб тараган, еңги шимариқ оқ кўйлак, рахи қийшиқ шимда. Э. Аъзамов, Жавоб.

РАХИТ [юн. rhachis – умуртқа] Ёш, эми-цикли болалар организмда D витамини етишмаслигидан минерал моддалар алма-шинувининг бузилиши натижасида юзага келадиган ва суяқ ҳосил бўлиш жараёнининг ҳамда нерв системаси функцияларининг бузилиши билан кечадиган касаллик. *Остеопороз, рахит каби касалликлар сифатсиз овқат истеъмол қилинганидан дарак беради.* «Фан ва турмуш».

РАХНА [ф. رخنه – тешик, ёриқ; ўпирилган жой; шикаст(ланиш)] 1 Ўйилган, ўпирилган жой, тешик, ёриқ. *Рахналарига янтоқ ва шох босилган наст деворли ҳовлиларнинг бузилган уйлари ташқаридан кўри-ниб турар эди. С. Айний, Қуллар. [Отабек] Хароба иморатларнинг ўрта бир еридаги рахнадан ошиб тушиш қулайроқ бўлгани учун, шунинг остига шумшайиб ўтирди. А. Қодирий, Ўтган кунлар.*

2 кўчма Путурдан кетган, бўшашган жой, нозик ер.

Рахна солмоқ Путур етказмоқ, тагидан зил кетказмоқ. *Охир-оқибатда у интизомни мустаҳкамлашга эмас, аксинча.. жамоаларнинг қонунчиликка бўлган ишончига рахна солади..* Газетадан. *Мен қатъий ишонч билан айта оламанки, бу кимсалар пок ниятли, эътиқоди мустаҳкам халқнинг маънавиятига, унинг тинч ҳаётига, бунёдкорлик ишларига асло рахна сола олмайди.* Газетадан. *Оббо, Қоработир бўлиб қолдинг шекилли. Бировнинг севгисига рахна солишинг қолувди. Ў. Ҳошимов, Қалбингга кулоқ сол. Юракка рахна солмоқ* Юракни яраламоқ, юракни доғ қилмоқ. *Мақсад – юракларга солишдир рахна, Мудҳиш қабиҳликнинг кирдикоридан. Ж. Жабборов.*

РАХТ [ф. رخت – уй-рўзгор жиҳозлари; кийим-кечак] 1 Пойабзалнинг тагчарм билан бошлиғи бириккан еридаги гир айлана нақшдор бўртиғи. *Рахт солиб тикилган этик.*

2 Зийнат, ҳашам. *Кулоҳ кийиб йўл бошладим, Очилмади менинг бахтим! Бузилгандир бунда рахтим! Сабил бўлди тожу тахтим! «Ширин билан Шакар». Булбул бойламасин гулнинг рахтини, Худо очсин эрийгитнинг бахтини. «Юсуф ва Аҳмад».*

РАХТЛИ Рахт солиб тикилган, рахт солинган. *Рахтли этик.*

РАЦИОН [нем. Ration < лот. ratio, rationis – ўлчов, ҳисоб; ҳисоблаб чиқариш] Маълум муддатга мўлжалланган, миқдори ва таркиби белгиланган овқат ёки озуқа, ем. *Кўп сут соғиб олишнинг сири кўп, бунинг учун сизиларни рацион асосида боқиш лозим. ■ Бир кун у сизиларига рациондагидан кўп ем берган экан, бу гап бутун қишлоққа овоза бўлди. «Ёшлик».*

РАЦИОНАЛ [лот. rationalis – оқилона, ақлга мувофиқ, тўғри; маъқул] Ақлга асосланган, мақсадга мувофиқ, оқилона, тўғри, маъқул. *Ишнинг рационал усули. ■ Бўш вақтдан рационал фойдаланиш натижасида меҳнат ижодий характер касб этиб, кишиларнинг унга муносабати ҳам ўзгаради. «Фан ва турмуш». Аҳолининг тўғри ва рационал овқатланишини, экологик жиҳатдан тоза маҳсулотлар истеъмол қилишини таъминлашга эришиш зарур.* Газетадан.

Рационал сонлар *мат.* Барча бутун ва каср сонлар (мусбат, манфий сонлар ва ноль сони).

РАЦИОНАЛИЗАТОР Рационализация қилувчи, ишлаб чиқариш жараёнларини ихчамлаштирувчи ва такомиллаштирувчи. *Рационализатор томонидан яратилган янгиликлар ишлаб чиқаришда кенг қўлланмоқда.* Газетадан. *Комбинатда сифат ва самардорликнинг ортиб боришида ихтирочи ва рационализаторларнинг ҳам салмоқли ҳиссаси бор.* Газетадан.

РАЦИОНАЛИЗАТОРЛИК Аниқ бир машина, технологик жараён, деталь ва б. ни такомиллаштиришга, иш унумдорлигини оширишга, ишлаб чиқариладиган маҳсулот сифатини яхшилашга қаратилган фаолият; шундай фаолият билан шуғулланиш. *Рационализаторлик таклифлари. ■ Рационализаторлик ва ихтирочилик ҳаракатини кенг қўлоқ ёйдиришга ёшлар ҳам фаол қатнашяптилар.* Газетадан. *Ҳозир корхонада рационализаторлик таклифлари билан шуғулланётганларнинг сони тобора ортиб бормоқда.* Газетадан.

РАЦИОНАЛИЗАЦИЯ [лот. rationalis – ақлга мувофиқ, оқилона] Бирор ишни, ишлаб чиқариш жараёнини ва унинг методларини тобора такомиллаштириш, ихчамлаштириш, мақсадга энг мувофиқ равишда ташкил этиш.

РАЦИОНАЛИЗМ [фр. rationalisme < лат. rationalis — ақлга, ақл-идрокка асосланган] флс. Ақлни ҳақиқий билишнинг асосий, ҳал қилувчи манбаи деб ҳисобловчи фалсафий йўналиш.

РАЦИОНАЛИСТ Рационализм тарафдори.

РАЦИОНАЛЛАШМОҚ Рационализация натижасида тақомиллашмоқ, ихчамлашмоқ. *Рационаллашган иш усуллари.*

РАЦИЯ [«радиостанция» с. нинг қисқарган шакли] Қабул қилувчи ва эшиттирувчи кўчма радиостанция. *Капитан Азро қовоғидан қор ёғиб, рация орқали кимгадир жаҳл билан гапирарди. «Ёшлик». Рация чўзиб-чўзиб гудок берди. Шофер трубкани олиб, яна босиб қўйди. С. Аҳмад, Жимжитлик. Уларни соқчилик машинасига келтириб, рация орқали навбатчи қисм билан боғланишганда, ҳамма нарса ойдинлашди.* Газетадан.

РАШК [ф. رشك — қизганиш; кунчилик; кўра олмаслик; рақиблик] **1** Яхши кўрган кишисини бировдан қизганиш, кунчилик. *Севи бор ерда рашк бор.* Мақол. ■ *Кўксимда яна юракни ўртовчи рашк аланга олди. П. Қодиров, Уч илдиш. Сен дейсан, дилим пок, рашкдан йироқман. Сен ундинг, мен эса ҳануз тупроқман.* А. Орипов, Йиллар армони.

2 Кўролмаслик, гашик, ҳасад. [Канзаск:] *Биламан, мусобақадош икки кишидан бирининг ютуғи иккинчисининг рашкини эмас, ҳавасини, ғайратини келтириши керак.* А. Қаҳҳор, Кўшчинор чироқлари. *Одамнинг икки душмани бўлса, биттаси — рашк, иккинчиси эса ўзини идора қила олмаслик.* С. Кароматов, Бир томчи қон.

РАШКЛИ **1** Севгилиси, ёри ёки яхши кўрган кишисини ҳеч кимга ишонмайдиган, қизганчиқ, кунчи. *У жуда рашкли эди.*

2 Ҳасад қиладиган, кўролмайдиган; ҳасадчи. *Рашкли одам. Рашкли иш синдирар тиш.* Мақол.

РАШКЧИ **1** Яхши кўрган кишисини бировдан қизганувчи, рашк қилувчи киши. *Сен мени эркала дунёнинг энг гўзал сўзлари билан, Сен мени қизгангин энг рашкчи аёлнинг кўзлари билан. «Ёшлик». Ортиқнинг хаёлига ялт этиб рашкчи Собир келди: Хумпар, жаҳл қилиб, чироқни ёқмай ўтирган бўлса-чи? М. Мансуров, Ёмби. Агар.. хатлардан бирортаси ёзувчи бўлмаган одамнинг рашкчи хотини қўлига тушиб қолса борми,*

ўша уйда нима бўлишини кўз олдингизга келтира оласиз. Шукрулло, Жавоҳирлар сандиғи.

2 қ. **рашкли** **2.** [Олима] *Кийим танлашда, соч турмаклашда дидсиз, аммо тили бийрон, жанжалкаш, ўта рашкчи, қадам ташлашданоқ тажанглиги билиниб турадиган аёл. С. Кароматов, Ҳижрон.*

РАШКЧИЛ с.т. қ. **рашкчи** **1.** *Бундай рашкчил муҳаббатнинг келажаги яхшилик билан тугамади. «Ёшлик».*

РАШК-ҲАСАД, рашку ҳасад Рашк ва ҳасад, ўта кўролмаслик. *Чунки мен: «Улар мени қолдириб, ўзлари созандаларга қўшилиб, бошқа тўйхонага боргандирлар», деб ўйлаб, рашк-ҳасад билан безовта бўла бошладим. С. Айний, Эсдалиқлар. Устод Қавом, гарчи отасининг яқин оинаси бўлса ҳам, бу икки донгдор меъмор ўртасида азалий бир яширин рашку ҳасад мавжуд.. Мирмуҳсин, Меъмор.*

Рашк қилмоқ (ёки этмоқ) Ҳасад қилмоқ, қизганмоқ. *Рашк этиб ҳасрат ила қолди рақиблар ҳайрон, Шону шавкат бирла бир келди, аломат келди. Ҳабибий, Девон. Йигитликда дилим бўғдинг, қайирдинг, Кўролмай, рашк этиб, ёрдан айирдинг. Ҳабибий, Девон.*

РАБЪ [а. رءى — фикр, нуқтаи назар, қараш, мулоҳаза; ақл, идрок] Хоҳиш, майл; рағбат. *Бировнинг рабъига қарамоқ. Рабъига юрмоқ. ■ Дўстларим, мен сизга талпинган дамда Қалбимда бўлади ёлғиз бир рабъим: Хиёнат бўлмаса дейман ҳеч кимда, Дўстларнинг имони бут бўлса доим. А. Орипов, Йиллар армони. Бозорова янги эмасми, бошлиқнинг рабъига қараб иш тутишга ҳаракат қилади. Н. Аминов, Қаҳқаҳа. Иншоолло, бул андишамиз киромларга маъқул тушган тақдирда, жаноби тождорнинг ҳам рабъларини олмоқ.. маъқулдир. А. Қодирӣ, Ўтган кунлар.*

РАБНО [а. رءن — гўзал, зебо; л.м. енгилтак, мулоҳазасиз; ўйламасдан қилинган] **1** Атиргуллилар оиласига мансуб кўп йиллик ўсимлик ва унинг қизил ёки сариқ хушбўй гули. *Райҳонлар, рабнолар, оқ, пушти гуллар — она табиатнинг қизалоқлари. «Ёшлик». Чучмома, рабно, бинафша — кўзни боғловчи фаранг. Ф. Фулом, Шеърлар.*

2 кўчма Гўзал, барно аёл ҳақида. *Чаманга бахш этди беқийс камол Бир рабно ишқида куйиб-ёниши. М. Икром. -Меники муболага*

эмас, — деди Анвар, — масалан, сен ҳозир гуллар ёнидасан, ҳам чиндан-да гулларнинг раъносисан. А. Қодирий, Мехробдан чаён. Сен сози муҳаббатсан, гулшанда гули раъно. О. Ёқубов, Эр бошига иш тушса.

3 Раъно (хотин-қизлар исми).

РАЪЯ [а. رعاءه — ғамхўрлик, эътибор; парвариш; ҳомийлик] с. т. айн. **рinoa** **1.** Раъя қилмоқ. ■ Бой экан, деб кўрқиб хурмат қилманглар, Амалдорни раъя қилиб турманглар! «Матқарим полвон». Тоғам деб мен раъя қилиб турмайман, Ёмонларнинг жазосини берайман. «Интизор».

РАЪЯ-АНДИША Хурмат юзасидан ёки бирор кимса билан босиқ ва тортиниброқ қилинадиган муомала. Раъя-андиша қилмоқ. У раъя-андишани билмайди. ■ -Кошкийди, ҳаммамиз шунақа очиқ гапиришга ўргансак. Қачонгача, ахир, раъя-андиша қилиб, айбимизни хаспўшлаймиз, — деди Қурбон отарисга. Ҳ. Назир, Кўктерак шабадаси.

РАҚАМ [а. رقم — сон, миқдор; сана; номер] **1** Сонни ифодаловчи график белги. Бу рақамлар ҳар қандай баландпарвоз гаплардан қудратли ва рад қилиб бўлмас фактлардир. С. Аҳмад, Уфқ. Сен дунёга келдинг, юртим боласи, Ўн саккизинчи миллион рақами билан. «Ёшлик». Табиийки, бу рақам сизни даҳшатга солади. Газетадан.

2 Бирор сон билан ифодаланган миқдор, кўрсаткич. Раиснинг охири якунловчи сўзи, Кўчқоровнинг нутқидай, рақамлар, муваффақиятлар, мақтовдан нари ўтмади. С. Анорбоев, Оқсой.

3 Бир турдаги предметларга тартиб билан қўйилган сон; номер. Тартиб рақами.

РАҚАМЛАМОҚ Тартиб билан рақам қўйиб чиқмоқ, номерламоқ. Дафтар бетларини рақамламоқ.

РАҚАМЛИ **1** Сонлар, рақамлар билан ифодаланган, рақамга эга бўлган. Рақамли ҳисоблаш машинаси. ■ 76-АТС доирасида ҳам келгусида 1440 та телефон нуқтасига эга бўлган янги рақамли ускуна ўрнатиш режаслаштирилмоқда. Газетадан.

2 Тартиб рақамлари қўйилган, рақамланган, номерланган, номерли. Иккинчи рақамли уй.

РАҚИБ [а. رقيب — соқчиликда турувчи; назоратчи, кузатувчи; айғоқчи; нозир] **1** Душман, ағёр, ёв. Сиёсий рақиблар. ■ Отабек қўлларини бўшатувчи кўрбошининг

бунчалик титраб-қалтирашидан ўз рақибларидан биттаси шу киши бўлганини ўйлади. А. Қодирий, Ўтган кунлар. Вақт ўтиши билан рақиб томонлар келишиб олиши мумкин бўлган позициялар бой берилмоқда. Газетадан.

2 Бирор нарса, кимса учун талашувчилар, курашувчилар, рақобат қилувчилар (бир-бирига нисбатан). Сўрсангиз ҳолим, азизлар, сийнаси афғорман, Қоработирдир рақибим, Зухра қизга ёрман. С. Абдулла, Тоҳир ва Зухра. Мирвали шу пайтгача рақиб деб тахмин қилиб юрган ҳамқишлоқларининг таъзирини беришни дилига тугиб қўйди. С. Аҳмад, Жимжитлик. ..Қаҳҳор шартта тўхтаб, бутун гавдаси билан рақибига юзланди. -Айтар гапингни айта қол шу ерда, юрамизми энди узун-қисқа бўлиб?! — деди Тоштемир. «Ёшлик».

3 Спорт ўйинлари, тортишув, мунозара ва ш.к. да қарама-қарши томонлар (бир-бирига нисбатан). Рустам, тўрнинг нариги томонидан туриб, тўпга сакраётган рақибини кўрди-ю, қисилган пружинадек осмонга сапчиди, шундай зарб билан урдик, тўп рақибининг бошига тегиб, чеккага учиб кетди. Ў. Ҳошимов, Қалбингга кулоқ сол. Рақиб деганнинг кироий айтишига сўзи, мушлашишга мушти бўлса. Ҳ. Фулом, Машғал.

РАҚБА шв. айн. **раҳба**. Отларни кўм-кўк барра ўтлар ўсиб ётган рақбада яйдоқ қолдиришди. «Ёшлик».

РАҚИБЛИК Кўролмаслик, душманлик. Рақиблик қилмоқ. ■ Эшикдан чиқиши ҳамон Анварга рақиблигини ошкор қилиб қўймасликни ғойибдан тилади. Ш. Холмирзаев, Қил кўприк.

РАҚОБАТ [а. رقابت — кузатиш, назорат] **1** Басма-басликка беллашув; ким ўзди. Барчамиз мана шундай кескин рақобат шариоотида ғалабага эришиш, муносиб ўрин эгаллаш нақадар оғир ва машаққатли кечганининг гувоҳи бўдик. Газетадан. Нега деганда, рақобат бўлмаган, боқимондалик, давлат ҳисобидан кун кўриш кайфияти устун бўлган жойда бундай илғор тартиб ва ёндашув мутлақо бўлмаслиги табиийдир. Газетадан.

2 Талаборлар, рақиблар кураши. Кундошлар рақобати. ■ Кумушининг рақобат ўти бир оз ўча тушган эди, уч-тўрт кунлик можародан яхшигина ҳасрат очилди. А. Қодирий, Ўтган кунлар.

3 иқт. Мустақил товар ишлаб чиқарувчи (корхона)лар ўртасида товарларни қулай шароитда ишлаб чиқариш ва яхши фойда келтирадиган нархда сотиш, умуман, иқтисодиётда ўз мавқеини мустақамлаш учун кураш. *Қишлоқ жойларда рақобат қила оладиган корхоналарни ташкил этишининг барча мураккабликларини бартараф этиш ва республика қишлоқ аҳолисини иш билан таъминлаш керак. Рақобат бўлмаса, бозор иқтисодиётини барпо этиб бўлмайди.* Газетадан.

РАҚОБАТБАРДОШ [рақобат + бардош] *иқт.* Рақобатлаша оладиган, рақобатга чидайдиган. *Бу ерда йилига 4,5 минг тонна рақобатбардош калава ишлаб чиқарилади.* Газетадан. *Улар [ишбилармонлар] халқ хўжалигининг турли соҳаларида мавжуд бўлиб, рақобатбардош, импорт ўрнини босадиган маҳсулот ишлаб чиқаришига ҳаракат қилмоқдалар.* Газетадан.

РАҚОБАТБАРДОШЛИК Рақобат кила олишлик, рақобатга чилашлик; рақобатга кириша олиш қобилияти. *...Ўзбекистондаги кичик қишлоқ корхоналари маҳсулотларнинг юқори даражада рақобатбардошлигини таъминлай олади.* Газетадан.

РАҚОБАТЛАШМОҚ Беллаша олмоқ, тенг келмоқ, рақобат қила олмоқ. *Эндиликда Тошкент қомат кериб, гўзаллашиб, жаҳондаги энг ажойиб шаҳарлар билан рақобатлашадиган даражага етди.* Газетадан. *Бу йўл билан.. ташқи бозорга ҳам фаол аралашган ва рақобатлаша бошлаган бўлур эдик.* Газетадан.

РАҚОБАТЧИ 1 Рақобат қилувчи киши ёки томон. *Бир-икки ойдан кейин бўлса ҳам, уларга [яна бир] рақобатчи [Анвар] ортади.* А. Қодирий, Меҳробдан чаён.

2 иқт. Бозор иштирокчилари, товар ишлаб чиқарувчилар ўртасида курашувчи шахс. *Бозорда рақобатчилар қанча кўп бўлса, деҳқонга шунча яхши.* Газетадан.

РАҚОБАТЧИЛИК *иқт.* Ўзаро рақобат қилишлик, рақобатбардошлик. *Фақат янги мулкдорлар пайдо бўлиб қолмасдан, балки рақобатчилик муҳити ҳам аниқ шаклланиб бормоқда.* Газетадан. *..рақобатчиликни вужудга келтириш учун шароит яратиш керак.* Газетадан.

РАҚС [а. *رقص* – ўйин, ўйинга тушиш ва унга мослаб ёзилган мусиқа] **1** Раққос(а)-нинг гармоник ҳаракати ва ҳолатлари,

пластик ифодавийлиги, юз имо-ишоралари ва б. орқали образ яратишдан иборат санъат тури. *Ўзбек миллий рақслари. Рақс тарихи.*

2 Турли мақомлар билан бажариладиган ритмик ҳаракат; оёқ ўйин ва шундай ўйин учун ёзилган мусиқа. *Рақс мусиқаси. Рақс(га) тушмоқ. Рақс қилмоқ.* ■ *Қобил ҳам қизишиб, билар-билмас, фарғоначасига рақсга туша бошлади.* Х. Назир, Сўнмас чақмоқлар. *Шийпонда энгил куй янграмоқда, хушқад, хушсурат бир жувон рақс тушмоқда.* О. Ёқубов, Диёнат. *Бир-биридан шўх, бир-бирдан ўйноқи оҳангларга ёш-яланглар рақс тушишяпти.* Газетадан.

3 Оёқ ўйин, танса кечаси, базм. *Рақслар бошланур, гул ўйин, чапак, Хунарин кўрсатар қиз, жувон, хоним.* Ф. Фулом.

РАҚҚОС [а. *رقاص* – ўйинга, рақсга тушувчи] Рақсга тушувчи санъаткор эркак; ўйинчи. *Зангиота сайридаги базмда ногора ва чилдирма авзга чиққан, сурнайлар чийиллаган, ўртада ёш раққослар ўйин тушиб турар эди.* М. Муҳаммаджонов, Турмуш уришилари. *Кўриб раққослар ҳайратда қолди, Адашди рақсидан, ҳатто уялди.* Ҳабибий, Девон. *Самандар – актёр, сўз устаси, раққос ва хонанда.* Газетадан.

РАҚҚОСА [а. *رقاصه* – ўйинга тушувчи аёл; балерина] Раққос аёл. *Саҳнага раққоса қизлар чиққанда, Нормамат узоқ вақт қидирган нарсасини топгандай қувонди.* «Ёшлик». *Ушу тобда гўзал раққосани жудаям кўргиси келиб кетди.* Мирмуҳсин, Темур Малик.

РАҚҚОСЛИК Рақс тушиш санъати. *Бир раққосликда бўлди мумтоз, Бўлиб зийнат яратгай ғамзаю ноз.* Ҳабибий, Девон.

РАҒА Япроқ ва меваларда (асосан тоқда) сариқ, жигарранг доғ қолдирадиган юқумли замбуруғ касаллиги ва шу касаллик натижасида ҳосил бўлган доғлар. *Раға тушган олма.*

РАҒБАТ [а. *رغبت* – хоҳиш; яхши ният, истак] **1** Бирор ишга бўлган хоҳиш, истак, майл, раъй. *Менинг бу ишга рағбатим йўқ.*

■ *Баҳордан буён бир рағбатингиз йўқ, Меҳнат қилдингиз-ку, миннатингиз йўқ.* М. Юсуф, Осмонимга олиб кетаман. *Гулламас яшнаб Ватан, то элда меҳнат бўлмаса, Ҳар иш олға босмагай, меҳнатга рағбат бўлмаса.* Ҳабибий.

2 Қизиқтирувчи, кўзғатувчи омил, сабаб; манфаат келтирувчи (берувчи) нарса. Мен жўраларимнинг олдида фахр этиб юрман. Аваз оғам ғазалларимни ўқиб, рағбат берди, дейман. С. Сиёев, Аваз. *..қонунчиликда бу борада кўзда тутилган рағбат ва имтиёзларнинг амалга оширилишини таъминлаш зарур.* Газетадан.

3 псих. Инсон ҳис-ғуйғулари, руҳий ҳолатларини ривожлантирувчи, уни фаолликка ундовчи руҳий (психик) таъсир.

РАҒБАТЛАШМОҚ Манфаатдорлик ошуви ёки тақдирлаш натижасида бирор иш, фаолиятга қизиқмоқ, рағбати ошмоқ. Муваффақиятдан рағбатланган пахтакорлар гайратга гайрат қўшмоқдалар.

РАҲА [ф. راه / ره — йўл, кўча] кт. Йўлка, кўча. Мен йўлимни танлаганман чорраҳада, Сенга ўхшаб қолмай шундай тор раҳада. Т. Тўла, Асарлар.

РАҲБА [а. رحبه — бўш жой, кенглик; майдон; ҳовли] шв. 1 Очиқ кенг майдон, дала. Холбўта бошини кўтарганда, Саидмурод ўқ узди. Нариги томондаги раҳбада чўзилиб ётишган Комил билан Ҳамид сапчиб туришди ва дарров нима гап-сўзлигини фаҳмлаб, Саидмуродга ташланишди. «Ёшлик».

2 Масжид ҳовлиси (хонақоҳ ва кўча эшиклари ўртасидаги майдон). Ундан раҳбага ҳам эшик бўлиб, ташқаридан одамларнинг паст-баланд овозлари эшитилиб турарди. Э. Самандар, Тангри кудуги.

РАҲБАР [ф. راهبر / رهبر — йўлбошчи, йўл бошловчи (кўрсатувчи), бошлиқ] 1 Бирор давлат, ташкилот, гуруҳ, жамоа ва ш.к. га йўл кўрсатиб, бошчилик қилиб борувчи, раҳбарлик қилувчи; йўлбошчи, раҳнамо. Ҳукумат раҳбарлари. Раҳбар ходим. ■ Мустақиллик шароитида яшаш ҳар бир раҳбар, фуқаро зиммасига улкан масъулият ҳам юклайди. Газетадан. Бугун бошқарув тизимига миллати, элати, уруғидан қатъи назар, эл ишончига сазовор бўлган раҳбарлар кириб келмоғи зарур. Газетадан.

2 Таълим-тарбия берувчи, йўл-йўриқ кўрсатувчи; устоз. Мусиқа раҳбари. Илмий раҳбар. Яхши раҳбар — чин падар. Мақол. ■ Режиссёр ижодий ташкилотнинг ҳам ғоявий, ҳам бадиий раҳбаридир. Газетадан.

Синф раҳбари Синф болаларининг ўзлаштиришини ва интизомини кузагиб бориш ва уларга доимий раҳбарлик қилиб

туриш учун биркирилган ўқитувчи. Синф раҳбаримиз ақлли, доно аёл. Мен синф раҳбарим билан бамаслаҳат иш қиламан.

РАҲБАРИЯТ [ф. + а. رهبریت] Раҳбарлик қилувчи гуруҳ, доира. *..мамлакат раҳбариятининг сиёсати халқаро майдонда юксак обрў топгани алоҳида таъкидланди.* Газетадан. Тоғ ёнбағридаги касалхонага келганда, кеч кириб қолгани учун, раҳбарият уй-уйига тарқалган эди. Т. Малик, Шайтанат.

РАҲБАРЛИК 1 Раҳбар эканлик, раҳбар мавқеи, мақоми.

2 Бошчилик, бошлиқлик; йўлбошчилик, раҳнамолик; мураббийлик, устозлик. Ишчилар раҳбарлигида ўқувчилар меҳнат кўникмалари ҳосил қиладилар. Газетадан.

3 айн. раҳбарият.

РАҲИМ [а. رحيم — меҳрибон, шафқатли] 1 Меҳрибон, шафқатли, раҳмдил (Оллоҳнинг сифатларидан бири). Худоё худовандо, яккаю ягоналигинг, раҳим ва раҳмонлигинг ҳаққи, мендек бир балакаш, гуноҳкор оғизга бандангдан марҳаматингни дариг тутмағайсан. К. Яшин, Ҳамза.

2 Раҳим (эркаклар исми).

РАҲМ [а. رحم — шафқат, марҳамат; ачиниш; меҳрибонлик, меҳр] Аянч ёки мушкул аҳволдаги кимсага, нарсага нисбатан ачиниш туйғуси ва шундай туйғу таъсирида кўрсатилган шафқат, марҳамат. Сизни оғзи қон бўри дедим, чунки сизда раҳм йўқ. А. Қодирий, Ўтган кунлар. Бир кун ундан қиттай раҳм тилаган аёлларимизни кўндок билан саваб бақирди. Ойбек, Кўёш қораймас.

Раҳм қилмоқ 1) шафқат қилмоқ, марҳамат қилмоқ. [Ойиша бегим Бобурга:] Самарқанд сизга жангсиз дарвоза очмас, энди ўзингизга раҳм қилинг. Урушга борманг, ўтинман! П. Қодиров, Юлдузли тунлар. Сизда одамият бўлса, бу ғариб нотаваонга раҳм қилмаганингизда ҳам, анови шўрлик болаларнинг зорига раҳм қилишингиз керак эди. М. Исмоилий, Фарғона т. о.; 2) аямоқ, ачинмоқ. Биров зулм қилса, биров раҳм қилар экан, биров ош берса, биров нон берар экан. Ойдин, Садағанг бўлай, командир. **Раҳми келмоқ** Ачиниш ҳисси пайдо бўлмоқ, ачинмоқ; аямоқ; ёрдам бергиси келмоқ. Яланг бошидан қон оқаётган, йиртилган кўйлаги орасидан моматалоқ бадани кўриниб турган, ўзи чўкка тушиб, одамлардан шафқат сўраётган йигирма ёшлардаги йигитга Тоҳирнинг раҳми

келди. П. Қодиров, Юлдузли тунлар. Хотин кишининг кўз ёши ширин бўлади. Ёдгорнинг раҳми келди. Хотинини овутиди. Ў. Ҳошимов, Қалбингга кулоқ сол. **Раҳмини келтирмоқ** Кимсада ачиниш, аяш ҳиссини туғдирмоқ, пайдо қилмоқ. *Баширжон одамнинг раҳмини келтирар даражада юпун, одмигина кийиниб, Шамси Тўраевичникига йўл олди.* Н. Аминов, Суварак.

РАҲМАТ [а. رحمت – шафқат, марҳамат, меҳрибонлик; ачиниш] **1** унд. с. Ташаккур ва миннатдорчиликни ифодаловчи сўз. *Катта раҳмат! Отанга раҳмат! ■ -Раҳмат!* – Муқаддам унга меҳр билан тикилиб қолганини пайқаб, дарров кўзларини яширди. Ў. Ҳошимов, Қалбингга кулоқ сол.

Раҳмат айтмоқ Миннатдорчилик билдирмоқ. *Муборак Набижонга раҳмат айтиб хайрлашди-да, ёш боладай ликиллаб, чопқиллаб кетди.* С. Зуннуова, Кўк чироқлар. *У қайта-қайта раҳмат айтиб, мени машинага кузатиб қўйди.* С. Сиёев, Ёруғлик.

2 Ташаккур, миннатдорчилик, шукроналик. *Ким яхшилик уруғини сепса, раҳмат ҳосилини олади.* Газетадан. [Ойимхон] *Мадамнинг хотинларининг ҳовлисини супуриб, сувини ташиб берган, аммо раҳмат ўрнига қарғиш ва жеркиш эшитган.* П. Турсун, Ўқитувчи.

3 дин. Марҳамат, мурувват. [Ҳидоят ўз-ўзига:] *Худоё, раҳматингдан ўргилай, ошхўрга – ош, ношхўрга нон еткизурсан.* Ҳамза, Майсаранинг иши.

Худо раҳмат қилсин (ёки раҳматига олсин) Худо ўз марҳаматига сазовор қилсин (вафот этган киши ҳақида). *Худо раҳмат қилсин. Ўзи ҳам хатини олиб, муҳрга қараб қолган экан-да.. бечора. Ҳай, начора, бандалик экан.. – деб қўйди.* К. Яшин, Ҳамза.

РАҲМАТЛИ дин. Худонинг раҳматига лойиқ, мўмин (вафот этган киши ҳақида). *Онаси раҳматли мунгли, қобил хотин эди.* С. Аҳмад, Уфқ. *Воажаб! Бу қадрдон гўшанинг ҳамшиша файзлилиги раҳматли чоли Тожи Давлат билан экан.* «Ёшлик».

РАҲМАТНОМА қ. **ташаккурнома**. *Розик [бошлиқдан] икки марта раҳматнома олган.* С. Аҳмад, Сайланма.

РАҲМДИЛ [а. + ф. رحمدل – кўнгли, дили раҳмга тўла; шафқатли] Бировга озор бермайдиган; кўнгли юмшоқ, раҳмли, шафқатли. *Раҳмдил одам. ■ Илгари одамлар анча*

содда, раҳмдил, мўмин эканини, айниқса, ўзининг тенгдошлари қувлик – шумликлардан узоқ, инсофли, фариштаси бор одамлар эканини дилдан ўтказди. Мирмуҳсин, Меъмор. *Ҳозир кўзимга Султон амаки ҳар вақтдагидан кўра ғамхўр, раҳмдил кўришиб кетди.* Ҳ. Назир, Ёнар дарё. *Зоҳир шайх, оғасидек руҳоний бўлгани билан, оғаси каби арзимаган нарсага ловуллаб кетадиган тажанг, жаҳлдор эмас, кўнгилчан, раҳмдил киши эди.* С. Сиёев, Ёруғлик.

РАҲМДИЛЛИК Бировга озор бермаслик, кўнгли юмшоқлик; шафқатлилик. *..тенгдош дўстларимдан бири.. очерк ёзиш ёшларнинг иши, журналистларнинг иши, деб менга раҳмдиллик қилади.* Н. Сафаров, Оловли излар. *Бу нигоҳда ҳамдардликкаям, раҳмдилликкаям ўхшаб кетувчи ҳазин бир ифода яллиғлиб турарди.* А. Обиджон, Аканг қарағай Гулмат.

РАҲМЛИ Бировга раҳм қиладиган; кўнгли юмшоқ, раҳмдил. *Раҳмли одам.*

РАҲМОН [а. رحمان – меҳрибон, шафқатли] **1** Раҳм қилувчи, шафқатли (Оллоҳнинг сифатларидан бири). *Тоғажон, беринг суюнчи, Қўллагай яратган раҳмон.* «Юсуф ва Аҳмад». *Худоё худовандо, якка ва ягоналигинг, раҳим ва раҳмонлигинг ҳаққи, мендек бир балокаш, гуноҳкор оғизга бандангдан марҳаматингни дариғ тутмагайсан.* К. Яшин, Ҳамза.

Сабр таги – **раҳмон** Сабр қилинса, Оллоҳ ажрини, мукофотини беради, раҳм-шафқатини аямайди, деган маънода қўлланадиган ибора. *-Сабр қилинг, болам, сабр таги – раҳмон! Ишлаяпсизми, шихонанинг борми? – деди Чўтир хола Умидга.* Мирмуҳсин, Умид. *Сабр таги – раҳмон дерлар, айла бардош, Бошинг тошдан, наҳот сабринг бўлмаса тош.* Т. Тўла, Асарлар.

2 Раҳмон (эркаклар исми).

РАҲМСИЗ **1** Раҳм-шафқатни билмайдиган; бераҳм, шафқатсиз. *Раҳмсиз одам. Раҳмсиз суратда ишлатмоқ. ■ Шунинг учун меҳнаткашини раҳмсиз ишлатиб, мадрасалар бино қилмоқда, ариқлар чиқармоқда.. эди.* А. Қодирий, Меҳробдан чаён. *..Оҳ Олимжон, аягинанг ўлсин! Раҳмсиз отанг ўлсин. Нима қилди? Айтгил, ким урди?* Ҳамза, Танланган асарлар.

2 кўчма Шафқатсизликни ифодалайдиган, аямасдан, бераҳмларча қилинган.

Хушрўйнинг раҳмсиз муҳокамасидан оққан бу ҳақиқатлар Зайнабни йиғлатди. А. Қодирӣ, Утган кунлар. Қайнатанинг қарашлари раҳмсиз ва беаёв эди. Ш. Рашидов, Қудратли тўлқин.

РАҲМСИЗЛИК Раҳм-шафқатни билмаслик, бераҳмлиқ. Болаларни шаддодликка ўргатмангиз, Раҳмсизлик, бедодликка ўргатмангиз, То улғайиб, дуч келганда инсонларга, Ўшамасин андишасиз шайтонларга. Э. Воҳидов, Муҳаббатнома.

РАҲМ-ШАФҚАТ Кимсага ёки нарсага кўрсатилган меҳрибончилик ва марҳамат. Раҳм-шафқат бўлмас шоирга, Заъфар дунё босар изидан. Р. Парфи, Кўзлар. Эъвозхон Зиёдилланинг кўзларига қарайди, уларда раҳм-шафқатдан асар ҳам йўқ. Ҳ. Фулом, Машғал. Одамларда раҳм-шафқат тугаб кетган. Х. Тўхтабоев, Ширин қовунлар мамлакати.

РАҲНАМО [ф. رهنا / راهنا — йўл кўрсатувчи (бошловчи)] кт. Йўл кўрсатувчи, бошчилик қилувчи; раҳбар. [Навоӣ:] Халқ ҳақсизликка қарши бош кўтарар экан, унга кимдир раҳнамо бўлиши муқаррар. Уйғун ва И. Султон, Алишер Навоӣ. [Устозни] Тўғри йўл кўрсатувчи раҳнамо, деб қабул қилганман ва бундан кейин ҳам шундай бўлиб қолади, иншооллоҳ. Газетадан.

РАҲНАМОЛИК Йўлбошчилик, раҳбарлик. Бу ерда Мовароуннаҳр амирига буйсунишдан бош тортеганларга раҳнамолик қилганларни йиғишган эди. С. Кароматов, Сўнги бархан. ...халқингизга раҳнамолик қилишингизда омад ёр ва тангри мададкор бўлишини яратгандан сўраб қоламиз. Газетадан.

РЕ [лот. re] Мусиқа гаммасининг иккинчи товуши ва унинг нота белгиси.

РЕ- [лот. re..] Байналмилал ўзлашма сўзларда сўзнинг олдидан қўшиладиган (ва 1) ҳаракатни янгидан (қайтадан) бошлаш, тиклаш ёки унинг тақрорланиши (мас., реабилитация), 2) иш-ҳаракатнинг қарама-қаршилиги (мас., реактор) каби маъноларни билдирадиган қўшимча.

РЕАБИЛИТАЦИЯ [лот. rehabilitatio — қайта тиклаш] 1 тиб. Организмнинг издан чиққан функцияларини ҳамда беморлар ва ногиронлар меҳнат қобилиятини тез ва тўлатўқис тиклашга қаратилган тиббий, педагогик ва ижтимоӣ чора-тадбирлар мажмуи. Реабилитация маркази. ■ Унда.. ногиронларни реабилитация қилиш марказининг иш фао-

лиятини кучайтириш масалалари кўрилди. Газетадан. Гулистондаги Сирдарё вилоят реабилитация ва саломатлик марказида республика семинари бўлиб ўтди. Газетадан. Энди аёлингизни реабилитация бўлимига ўтказамиз [деди ҳаким]. Газетадан.

2 ҳуқ. Жиноят содир этишда асоссиз гуноҳ қилинган ёхуд айбланган шахснинг пок номи, шаъни ва қадр-қимматининг ҳуқуқни муҳофаза қилувчи давлат органлари томонидан тикланиши. Реабилитация қилмоқ. ■ Тошев масаласига аралашиб қамалган Умаров.. реабилитация бўлиб, оқланиб келибди. П. Қодиров, Уч илди.

РЕАГЕНТ [ингл. reagent] Кимёвий реакцияда иштирок этувчи модда; реактив.

РЕАКТИВ I [фр. reactif < ре.. + лот. activus — ҳаракатдаги] ким. Бошқа моддалар билан бирга маълум кимёвий реакцияда иштирок этувчи ва шу реакция орқали изланаётган модданинг бор-йўқлигини аниқлаб берувчи модда.

РЕАКТИВ II сфт. 1 Кимёвий анализда аниқлагич (қ. реактив I) бўлиб хизмат қиладиган. Реактив моддалар.

2 Буғ, газ ва ш.к. оқимининг тепки кучи натижасида ёки шундай куч билан ҳаракат қиладиган. Реактив артиллерия. Реактив двигатель. Реактив самолёт. ■ Сув ости кемалари ёрдамида қуриш мўлжалланаётган бу иншоот бўйлаб реактив двигательли вагон-снаряд қатнаши кўзда тутилмоқда. «Фан ва турмуш».

РЕАКТОР [ингл. reactor < ре.. + лот. actor — ҳаракатга келтирувчи] 1 Ўзгарувчан ток занжирида қисқа туташув содир бўлганда, токни чеклаб қўядиган юқори вольтли электр аппарати.

2 ким. Муайян температура ва босим шароитида кимёвий ва биокимёвий реакциялар ҳосил қилиш учун ишлатиладиган аппарат.

3 физ. Бошқарилувчи радиоактив реакция — атом ядроларининг парчаланиш реакцияси амалга ошириладиган қурилма. Ҳозир ядро реакторларида уран ядроларининг парчаланиши туфайли жуда кўп радиоактив моддалар олинади. «Фан ва турмуш». Шимолӣ Корея матбуотининг хабарларига қараганда, уларнинг атом реактори ядро қуроли яратишга эмас, электр энергияси ишлаб чиқаришга хизмат қилади. Газетадан.

РЕАКЦИОН I *сиёс.* Реакция манфаатлари учун курашувчи, эски тартибларни сақлаб қолишга ёки тиклашга уринувчи. *Реакцион ғоя.* ■ *Реакцион оқим тарафдорлари дастлаб Фарғона водийси, сўнг бутун республикада ислом давлати қуришни ҳаёл қилдилар.* Газетадан.

2 Кимёвий реакцияга оид, алоқадор.

РЕАКЦИОНЕР [*фр.* reactionnaire — *ре.. + лот.* actio — ҳаракат] Сиёсий реакция тарафдори ёки қатнашчиси; прогрессив, илғор ҳаракатлар ва демократия душмани.

РЕАКЦИЯ I [*ре.. + лот.* actio — ҳаракат] 1 *псхл. тиб.* Ташқи ва ички қўзғатувчиларга жавобан инсон ва унинг тана аъзоларида пайдо бўладиган ҳаракат, жараён ёки ҳолат; акс таъсир.

2 *ким.* Икки ёки бир неча моддалар ўртасида кечадиган ва янги моддалар ҳосил қиладиган ўзаро кимёвий таъсир. *Кимёвий реакция. Реакцияга кирмоқ.* ■ *Ядровий таркибга кирувчи лимон кислота билан темир оксидлари ўртасида ҳам реакция кечади.* «Фан ва турмуш».

РЕАКЦИЯ II *сиёс.* Эски, умри тугаган ижтимоий тартибларни сақлаб қолиш, қайта тиклаш ва мустақамлаш мақсадида ижтимоий тараққиётга фаол қаршилик кўрсатиш.

РЕАКЦИЯЧИ *қ.* реакционер.

РЕАЛ [*лот.* realis — моддий; ҳақиқий < *res* — нарса, буюм] 1 Ҳақиқатан ҳам мавжуд бўлган; ҳақиқий, чин, воқеий. *Реал воқелик.* ■ *Кўргиликдан, таваккалдан, тақдирдан воз кечиб, халқ реал нарсаларга аҳамият берадиган бўлди.* Ойбек, Нур қидириб. *..Биз ҳозир энг чуқур ҳаёлот билан реал воқелик орасидаги масофа шиддат билан тезликда қисқарётган бир даврда яшаймиз.* «Ёшлик».

2 Амалий; амалга ошиши аниқ бўлган, бажарилиши мумкин бўлган. *Реал режа. Реал вазифа.* ■ *Ҳар қандай дадил фантазиянинг замирида ҳам ҳаётий тажриба, реал фактлар, манзаралар ётади.* У. Норматов, Талант тарбияси.

Реал даромад *икт.* Аҳолининг пул даромадларига сотиб олиши мумкин бўлган товар ва хизматлар миқдори. *Самарадорлик, айниқса, кишиларнинг реал даромадлари жадал ошаётгани каби масалаларни таҳлил қилиш долзарб муаммодир.* Газетадан.

РЕАЛИЗАЦИЯ [*лот.* realis — моддий, ҳақиқий] 1 Маълум бир режа, лойиҳа, дастур, мақсадни амалга ошириш, турмушга татбиқ этиш.

2 *икт.* Мол-мулк ёки қимматбаҳо қоғозларни пулга айлангириш; мол сотиш. *Ой охиригача 28 млн сўмликдан зиёд маҳсулот реализация қилинади.* Газетадан.

РЕАЛИЗМ I [*лот.* realis — моддий, ҳақиқий] 1 *ад.* Адабиёт ва санъат (тасвирий санъат, театр, мусиқа ва б.) да воқеликни, ҳаётни ифода воситалари орқали, бадний образларда бутун тўлалиги билан ўзига ўхшаш шаклларда ҳаққоний акс эттириш усули.

РЕАЛИЗМ II *филс.* Онгдан ташқаридаги мавжуд реаллик гўё идеал объектларнинг мавжудлигидан ёки субъект, билиш жараёни ва тажрибага боғлиқ бўлмаган билиш объектдан иборатдир, деб ҳисобловчи фалсафий йўналиш.

РЕАЛИСТ I Адабиёт, санъат ёки фалсафадаги реализм издоши, реализмга амал қилувчи. *Реалист ёзувчи ўзи кўрмаган ҳодисаларга ҳам ўзининг кўрганлари, кузатганлари, шахсий-ҳаётий тажрибалари асосида ёндашади.* У. Норматов, Талант тарбияси.

2 Ўз фаолиятида реал воқелик, атроф муҳит ва иқлим шарт-шароитларини, мавжуд имкониятларни ҳисобга олиб иш кўрувчи. *Реалист одам.*

РЕАЛИСТИК I Реализм тамойилларига асосланган, реализмга хос. *Реалистик асар. Ҳаётни реалистик акс эттирмоқ.* ■ *Бобур ўзи кузатган табиий ҳодисаларни реалистик асосда акс эттирган.* «Фан ва турмуш».

2 Реал, ҳақиқий, амалий. *Ҳаётга реалистик қараш. Реалистик сиёсат.*

РЕАЛЛАШМОҚ Ҳақиқий, реал тус олмақ, реал равишда намоён бўлмоқ, аниқланмоқ, амалга ошмоқ. *Сўзнинг маъноси контекстда реаллашади.*

РЕАЛЛИК I Ҳақиқийлик, аниқлик, амалийлик, амалга ошириш мумкинлик. *Фикрнинг реаллиги.* ■ *Элмуродда, бошланган ишнинг реаллигига қатъий ишонч туғилди.* П. Турсун, Ўқитувчи.

2 Ҳақиқатда, объектив мавжуд бўлган воқеа-ҳодиса, воқелик, ҳақиқат. *Булар икки-та алоҳида-алоҳида олам, реалликни қабул қилишнинг икки усули бўлиб, ҳаракат йўналишлари бир-бирига мос келмайди, балки қарама-қаршидир.* Газетадан.

РЕАНИМАТОЛОГИЯ [реанимация + юн. logos – фан, таълимот] Тиббиётнинг организмни жонлантириш ва тасодифий ўлимдан сақлаб қолиш, турли касалликлар оқибатида юзага келадиган оғир ҳолларда организмнинг ҳаётий муҳим функцияларини бошқариш ва тиклаш масалаларини ўрганадиган бўлими.

РЕАНИМАЦИЯ [ре.. + лот. animatio – жонлантириш, ўзига келтириш] *тиб.* 1 Клиник ўлим ҳолатидаги кишиларни тирилтириш; жонлантириш, шунингдек, ҳаётий муҳим аъзоларнинг турли сабаблар оқибатида тўсатдан йўқолган ёки ўзгарган функцияларини тиклаш учун кўриладиган чора-тадбирлар мажмуи. *Биз реанимация ҳақида бир оз маълумотга эгамиз.* Газетадан.

2 Шундай чора-тадбирларни амалга оширувчи бўлинма, врачлар гуруҳи. *Аҳмад-ни ўша кунгидек зудлик билан вилоят касалхонасининг реанимация бўлимига олиб келишди.* Газетадан. *Ушбу тиббий ёрдам маркази диагностика, шошилинч терапия, нейрохирургия, жарроҳлик, болалар ва реанимация бўлимларини ўз ичига олади.* Газетадан.

РЕБУС [лот. rebus – нарсалар билан, воситасида < res – нарса, буюм] Сурат, ҳарф ва баъзи бир шартли белгилар воситасида ифода этиладиган топишмоқ (ушбу сўз дастлаб ҳажвий сурат маъносида қўлланган).

РЕВАЛЬВАЦИЯ [ре.. + лот. valeo – аҳамиятга, қийматга эгаман] *иқт.* Миллий валюта-пул бирлиги курсини бошқа мамлакатлар ёки халқаро валюта-пул бирликлари курсига нисбатан расмий равишда ошириш.

РЕВАНШ [фр. revanche – ўч, қасос (олиш); қаримта] 1 Урушда енгилган томоннинг ўч олиши, қаримта қайтариши ёки ўч олиш учун қилган ҳаракати. *Реванш олмоқ.*

2 *спорт.* Спорт ўйинларида: енгилган, голибликни қўлдан берган спортчининг ёки команданинг голиб устидан галаба қозониш ва голибликни қайтариб олиш мақсадида қайтадан ўтказадиган ўйини ва унинг ижобий натижаси. *Англиялик Льюис катта боксга қайтадиган бўлса, Виталий сўзсиз у билан реванш жангни ўтказишга рози бўларкан.* Газетадан. *Унда французлар 3:1 ҳисобида галаба қозониб, америкалик чарм тўп усталаридан ўзига хос реванш олишди.* Газетадан.

РЕВАНШИЗМ [фр. revanche] *сиёс. тар.* Урушда енгилган томоннинг илгари қўлдан кетган ҳудудларни қайтариб олишга, илгариги мавқеини тиклаш мақсадида янги уруш очиш ёки унга тайёргарлик кўришга қаратилган сиёсати.

РЕВАНШИСТ *тар.* Реваншизм тарафдори, реваншизм сиёсатини юргизувчи; қаримта қайтаришга интилувчи. *Реваншистлар сиёсати.*

РЕВИЗИОНИЗМ [лот. revisio, revisionis – қайта кўриш, тафтиш] Бирон-бир таълимот, назария, нуқтаи назар принциплари ва қоидаларини қайта кўриб чиқиш (тафтиш қилиш)ни талаб қилувчи ғоявий-сиёсий ёки илмий-назарий йўналиш.

РЕВИЗИОНИСТ Ревизионизм тарафдори, ревизионизмга амал қилувчи.

РЕВИЗИЯ [лот. revisio – қайта кўриш] 1 Муайян корхона, ташкилот, муассаса ёки мансабдор шахснинг маълум бир даврдаги иш-фаолиятига доир ҳисоботларни текшириш, тафтиш қилиш; тафтиш. *Ревизия акти. Ревизия қилмоқ.* ■ *Магазинга тўсатдан ревизия келиб қолибди.* Х. Тўхтабоев, Ширин қовунлар мамлакатаи.

2 *сиёс.* Бирор таълимот ёки назарияни ўзгартириш, унинг асосларини бузиш ниятида қайтадан кўриб чиқиш.

РЕВИЗОР [«ревизия» с. дан] *эск.* 1 Муайян бир муассаса ёки мансабдор шахс фаолиятини текшириш (тафтиш қилиш)га ваколати бўлган шахс. *Ўздан кўрсин, ревизор билан орани бузма, деб неча марта айтганман.* ■ *Ревизор халқи топаман деса, ҳар қанақасидан ҳам ишқал топади.* С. Аҳмад, Сайланма.

2 Темир йўл соҳаларида назоратчи ходим.

РЕВМАТИЗМ [юн. rheumatismos – (тана бўйлаб) тарқалиш, ёйилиш] *тиб.* Юрак-томир системаси, бўғин ва пайларнинг кенг тарқаладиган яллиғланиши натижасида юзага келадиган оғир касаллик; бод. *Ревматизм оғриғи. Ревматизм билан оғримоқ.*

РЕВМАТОЛОГИЯ [ревматизм + юн. logos – фан, таълимот] *тиб.* Клиник тиббиётнинг турли ревматик касалликларни ўрганувчи бўлими. *Ревматология маркази.*

РЕВМОКАРДИТ [ревматизм + юн. kardia – юрак] Ревматизм оқибатида келиб чиқадиган, юракнинг ички, мускулли ёки ташқи қаваги яллиғланишидан иборат касаллик.

Ревмокардит қайталаганда, беморнинг аҳволи оғирлашади, қон айланиши бузилади.. «ЎЗМЭ».

РЕВОЛЬВЕР [ингл. revolver < лот. revolvere — орқага думалатмоқ, айлантирмоқ] Бир неча ўқ жойлашадиган айланувчи ўқдонли, шахсий ўқотар қурол. *Револьвердан ўқ узмоқ.*

Револьвер станок *тех.* Кесувчи асбоблар ўрнатиладиган қисми айланиб, турли кескичлар галма-гал ишга солинадиган токарлик станогли.

РЕВОЛЮЦИОН 1 қ. **инқилобий.** *Революцион кураш. Революцион ташкилот.*

2 Туб, жиддий ўзгаришларга олиб келувчи. *Техникада революцион ўзгариш.* ■ *Жаҳон тажрибаси кўрсатишича, бозор иқтисодиётига революцион йўл билан, яъни жадал усулда ёки эволюцион йўл билан, яъни босқичма-босқич ўтиши мумкин.* Газетадан.

РЕВОЛЮЦИОНЕР [фр. revolutionnaire < лот. revolutio — тўнтариш] қ. **инқилобчи.**

РЕВОЛЮЦИЯ [лот. revolutio — бурилиш, тўнтариш] 1 қ. **инқилоб** 2. *Пролетар революцияси. Буржуа-демократик революцияси.*

2 қ. **инқилоб** 1. *Маданий революция.* ■ *Ҳозир космонавтика илмий-техник революциянинг ажралмас қисми бўлиб қолди.* Газетадан.

РЕГАТА [итал. regata < riga — қатор, саф] *спорт.* Эшаккли, елканли ёки моторли қайиқларда туркум пойгалардан иборат спорт мусобақалари.

РЕГБИ [ингл. rugby < Англиянинг Регби шаҳарчаси номидан] *спорт.* Ҳар бири 15 кишидан иборат икки жамоа тухумсимон тўп билан ўйнайдиган спорт ўйини [бунда спортчилар тўпни қўл ёки оёқ билан узатиб, уни рақиб дарвозасига киритиш ёки дарвоза чизиги ортига (ичига) туширишга ҳаракат қиладилар].

РЕГЕНЕРАЦИЯ [лот. regeneratio — қайта тикланиш, қайта туғилиш, янгиланиш] 1 *биол.* Организмнинг йўқолган ёки жароҳатланган аъзолар ва тўқималарни қислаб олиши, шунингдек, унинг айрим қисмларидан бутун организмнинг тикланиши.

2 *тех.* Иш бажариб бўлган (эски) маҳсулотга унинг дастлабки сифатларини қайтариш.

3 Ядро техникасида: реакторда ишлатилган ядро ёнилгисини радиокимёвий ва ки-

мёвий-металлургик қайта ишлаш жараёнлари мажмуи.

РЕГИОН [лот. regio, regionis — вилоят, ўлка] Бир неча вилоятларни, ҳатто давлатларни ўз ичига олган йирик ҳудудий birlik. *Олимларнинг фикрича, региондаги экологик вазиятни яхшилаш учун туб чоралар кўриш талаб этилади.* Газетадан.

РЕГИОНАЛ Регионга, алоҳида вилоят, ўлка ёки қўшни мамлакатларга оид; маҳаллий. *Регионал кенгаш.* ■ *Регионал можароларни, аввало, яқин Шарқдаги можарони бартараф этиш масалалари муҳокама қилинди.* Газетадан.

РЕГИОНАЛИЗМ [лот. regionalis — маҳаллий] *сиёс.* Иқтисодий, ижтимоий, сиёсий ва б. муаммоларни у ёки бу регион (минтақа, ҳудуд) нинг манфаат ва эҳтиёжлари нуқтаи назаридан кўриб чиқиш ва ҳал қилишдаги ёндашув, муносабат. *Зотан, регионализмдан глобализмга, яъни янги минтақавийликдан ялтиликка ўтиш тенденцияси умумжаҳон миқёсда кучайди.* «Фан ва турмуш». *Президентимиз айтганидек, глобализмга фақат регионализм орқали борилади.* Газетадан.

РЕГИСТОН [ф. ريگستان — қумлоқ, қумли жой; майда тош тўшалган жой] Ўрта Шарқ мамлакатлари шаҳарларидаги марказий майдон (одатда шаҳар арки ёки ҳоким саройи ёнида барпо этилган).

РЕГИСТР I [нем. Register < лот. registrum — рўйхат] Муайян ҳуқуқий аҳамиятга эга бўлган рўйхат, ҳисобга олиш ҳужжати; қайднома. *Регистрга ёзиб қўймоқ.* ■ *Тегишли техник воситалар мавжуд бўлганда.. дастлабки ҳужжатларни ва регистрларни тузишга рухсат берилади.* Газетадан.

РЕГИСТР II *мус.* 1 Клавишли мусиқа асбобларида товуш кучи ва тембрини ўзгартиришга имкон берадиган мослама.

2 Хонанда ёки чолғу асбоби диапазонининг бир хил тембрга эга бўлган товушлар гуруҳи.

РЕГИСТР III *тех.* 1 Рақамли ҳисоблаш машинасининг кодларни хотирлашга мўлжалланган элементи.

2 Автомат телефон ва телеграф станциялари ҳамда алоқа узелларида бирон манзилга юбориладиган абонент ахборотларини рақамлар шаклида қабул қилувчи ва ёзиб олувчи қурилма.

3 Компьютер ва ёзув машинкаси клавиатурасининг ўнг ва чап томонида жой-

лашган, катта ва кичик ҳарфлар ёзилиш тартибини бошқарувчи иккита клавиш.

РЕГИСТРАТОР [нем. Registrator < лот. *registrum* — қайд этилган, ёзиб қўйилган] **1** Регистратсия ишларини олиб борувчи, рўйхатга олувчи киши.

2 Муайян параметрларни автоматик қайд қилувчи ўзидар асбоб.

3 Идораларда хат-ҳужжатлар, қоғозлар солиб қўйиладиган картон папка; жилд.

РЕГИСТРАТУРА [нем. Registratur < лот. *registrum* — қайд этилган, ёзиб қўйилган] Муассаса, идора, поликлиника ва ш. к. нинг рўйхатдан ўтказиш бўлими.

РЕГИСТРАЦИЯ [ингл. registration < лот. *registrum* — қайд этилган, ёзиб қўйилган] Рўйхат қилиш, рўйхатга олиш, қайд этиш; рўйхатдан ўтказиш. *Регистрация дафтари. Регистрациядан ўтмоқ.* ■ [Заргаров:] *Кўёв билан келин менинг олдимда, ҳозир боради. Регистрация қилинг, булак гап йўқ!* А. Қаҳҳор, Оғриқ тишлар.

РЕГЛАМЕНТ [фр. *reglement* < лот. *regula* — тартиб, қоида] **1** Йиғилиш, мажлис, кенгаш ва ш.к. ни олиб бориш, ўтказиш тартиби. *Мажлис регламенти. Регламент белгиламоқ.* ■ *Мажлисларни олиб бориш унгагина топширил, у регламент ва бошқа тартиб-қоидаларга риоя қилишининг ҳадисини олган.* Ж. Абдуллахонов, Хонадон. *Регламент бўйича шахматчилар. 12 партиядан дон сурадилар.* Газетадан.

2 Бирор давлат органи, муассаса, ташкилот ва ш.к. нинг фаолият тартибини белгилувчи низом ва қоидалар мажмуи. *Ялли мажлис муҳокамасига Ўзбекистон Республикаси Олий Мажлиси Сенатининг муваққат регламентини тасдиқлаш тўғрисидаги масала киритилди.* Газетадан. *Қонунчилик ва суд-ҳуқуқ масалалари қўмитаси раиси Ўзбекистон Республикаси Олий Мажлиси Қонунчилик палатасининг регламенти лойҳасини иккинчи ўқишда тақдим этди.* Газетадан.

3 Халқаро конгресслар ва конференциялар томонидан қабул қилинган баъзи ҳужжатларнинг номи (мас., 1815 йил Вена регламенти).

РЕГЛАН [ингл. Reglan < инглиз генерали Реглан номидан] **1** Енги елкаси билан бир бутунликда бичилган пальто ёки қўйлак андозаси (дастлаб 19-аср ўрталарида Реглан модага киритган) ва шундай андоза (бичим)даги устки кийим.

РЕГРЕСС [лот. *regressus* — орқага кетиш; акс ҳаракат(ланиш)] **1** Ривожланишнинг юқорироқ шаклдан қўйи шаклга ўтиши; орқага қайтиш, таназзул; ёмон томонга ўзгариш; *зид. прогресс.*

2 биол. Тирик табиатда яшаш шароитларининг ўзгаришига мослашиш оқибатида организмларнинг соддалашувидан иборат эволюцион жараён.

РЕГРЕССИВ 1 Ўз тараққиётида орқага кетган, таназзулга, инқирозга юз тутган; таназзулга, инқирозга олиб келувчи. *Регрессив ҳаракат.* ■ *Кўриниб турибдики, инсон фикрлаш тарзида бири иккинчисига зид бўлган қутблар, прогрессив ва регрессив томонлар мавжуд бўлади.* Газетадан.

2 Реакцион, антидемократик. *Регрессив ҳодиса.*

РЕГУЛЯТОР [лот. *regulare* — тартибга келтирмоқ, йўлга қўймоқ] Автоматик бошқарув тизимида механизмнинг бир текис ишлашини таъминлаб турадиган ҳамда температура, босим, тезлик ва ш. к. ни бирдай сақлайдиган ёки ўзгартирадиган асбоб, мослама.

РЕДАКТОР [фр. *redacteur* < лот. *redactus* — тартибга келтирилган] қ. **муҳаррир 1-2.** *Техник редактор. Бош редактор. Масъул редактор. Газета редактори.* ■ *Ходимлар Аҳмаднинг гапини тинглаб ўтирар эканлар, ора-чора редакторга қараб қўярдилар.* Ф. Мусаёнов, Ҳиммат.

РЕДАКТОРЛИК Муҳаррир иши, вази-фаси; муҳаррирлик. *Редакторлик қилмоқ.*

РЕДАКЦИОН 1 Нашриёт таҳририятига мансуб. *Редакцион кенгаш.*

2 Таҳрир жараёнига оид; таҳририй. *Мақолага киритилган редакцион ўзгариш. Редакцион тузатиш.*

РЕДАКЦИЯ [фр. *redaction* < лот. *redactus* — тартибга келтирилган] *эск.* **1** Таҳрир жараёни, таҳрир; қўлёзмани муҳаррир тузатишлари билан нашрга тайёрлаш. *Редакция қилмоқ.*

2 Муайян ишловдан ўтган, тузатилган матн. *Романнинг янги редакцияси.*

3 Нашриёт органларида нашр ишини олиб борувчи, қўлёзма матнларни ишлаб, нашрга тайёрлаб берувчи ходимлар жамоаси. *Журнал редакцияси. Редакция мажлиси.* ■ *Усмон Яхшиев таҳрир қилган материалларнинг таржимаси тўғри ва аниқлиги-*

га редакцияларнинг ходимлари заррача шубҳа қилмас эдилар. Х. Ёдгоров, Ҳаёт тўлқинлари. Кўп сонли газетхонлар редакциямизга муурожаат қилиб, ёш олимга берилган илмий даража етарли эмас, деб ҳисобламоқдалар. Х. Тўхтабоев, Ширин қовунлар мамлакати.

4 Таҳририят ходимлари ишлайдиган бино. Аҳмад редакциядан чиқиб, муюлишига борганида, орқасидан Раҳим ака етиб келди. Ф. Мусажонов, Ҳиммат.

РЕДИСКА [р. < лот. radix — илдиз, илдизмева] Эрта кўкламда очиқ ёки ёпиқ ерларга экиладиган полиз экини ва унинг ейишли думалоқ ёки чўзинчоқ оқ, қизил рангли ҳосили. Салатнинг янги узилган барги редиска, бодринг ва ошкўклар билан яхши ҳамоҳанг бўлади. Газетадан.

РЕДКОЛЛЕГИЯ [р. редакционная коллегия — «таҳрир ҳайъати» бирикмасининг қисқартмаси] Китоб, журнал, газета ва ш.к. ни биргалликда таҳрир қилувчи жамоа; таҳрир ҳайъати. У деворий газетанинг редколлегия аъзоси эди, прогуччиликка қарши чиқарилаётган шошилинч сон учун уч-тўрт банд ҳажв ёзиб беришни топширишди. П. Қодиров, Уч илдиз. Алманах материалларини махсус редколлегия ишлаб беради. Н. Сафаров, Оловли излар.

РЕДУКТОР [лот. reductor — орқага қайтарувчи] тех. **1** Айланма ҳаракатни тишли филдираклар ёрдами билан бир валдан иккинчи валга узатувчи механизм.

2 Трубопровод, газ баллони ва ш.к. идишдаги суюқлик ёки газнинг босимини камайтириш ёки бир хилда сақлаб туриш учун мўлжалланган асбоб, мослама.

РЕДУКЦИЯ [лот. reductio — қайтиш, орқага қайтариш] **1** махс. Мураккабдан солдага ўтиш, содаллашиш.

2 биол. Муайян аъзоларнинг ўз функциясини йўқотганлиги туфайли кичрайиши ёки йўқолиши.

3 ким. Тикланиш, қайтарилиш; оксидланишнинг акси.

4 тлш. Кучсиз талаффуз натижасида товушнинг ўзгариши, товушнинг миқдор ва сифат белгиси жиҳатдан пасайиши (бу ҳодиса асосан ургусиз бўғиндаги униларга хос бўлади). Редукция натижасида ҳамда тез суръатда гапириш жараёнида товуш тушиб қолади. «ЎТА».

РЕДУПЛИКАЦИЯ [лот. reduplicatio — иккиланиш, қўшалоқланиш] тлш. Сўздаги дастлабки бўғинни ёки ўзакни, бутун сўзни такрор қўллаш билан такрорий сўз, грамматик шакл ҳосил қилиш усули.

РЕЕСТР [лот. regestrum, registrum — рўйхат, санок] Маълум ишлар, ҳужжатлар, мол-мулк ва б. рўйхати ҳамда шу рўйхатлар қайд қилинадиган дафтар. Амалдаги қонунчиликка ўзгартиришлар киритилганлиги муносабати билан **22 та идоравий-меъёрий ҳужжат давлат реестридан чиқарилди**. Газетадан. *Айни пайтда гўзанинг йигирмата селекция нави давлат реестрига киритилган*. Газетадан.

РЕЖА [ф. رجه < رجه — кир ёйиладиган ип, арқон; саф, қатор] **1** Деворзанлик ва шунга алоқадор касбларда: девор ва ш.к. нинг текис, тўғри чиқиши учун усталар таранг қилиб тортиб қўядиган ип, сим ва ш. к. *Режа олмоқ. Режа солмоқ.* ■ -Бектурди ака, — дерди у [Қозоқбой] *ғишт тераётган устага қараб, — ғиштни яхши тераётган бўлсангиз ҳам, режа ипини тортиб олмаганингиз ёмон*. М. Қўшоқов, Уста йигит.

2 Бирор ишни тартиб билан ва ўз вақтида бажариш учун олдиндан белгилаб олинган аниқ ёки тахминий мўлжал. *Эртанги ишга бугун режа туз*. Мақол. ■ *Бўрон режаларимизни бузолмайди, тақдиримиз ҳам бўроннинг қўлида эмас*. Ш. Рашидов, Бўрондан кучли. *Адолат қизларга ўз режасини тушунтирди*. И. Раҳим, Чин муҳаббат. [Бригада аъзоларининг] *Ҳар йили пахта тайёрлаш шартномавий режасини мамлакат бўйича биринчи бўлиб.. уddалашларига ўрганиб қолдик*. Газетадан.

3 Белгили тартиб, қоида, ўлчов. *Иш режага тушиди.* ■ *Бу оилада ейиш-ичиш белгили тартиб ҳам режага тобе эса-да, ҳар кун ширин-ширин овқатлар тайёрланади*. Ойбек, Танланган асарлар. *Албатта, кампир келинларини рўзгордан сирқмасди*. Аммо режани бузмай, масаллиқни исроф қилмай иш тутарди. С. Аҳмад, Сайланма.

РЕЖАЛАМОҚ **1** Олдиндан режа тузмоқ; режалаштирмоқ. *У [Солижон] вақтини фаслдек, Бўлиб қўйган режалаб*. Қ. Муҳаммадий.

2 Режа солиб ўлчамоқ, режа солмоқ, режа солиб иш қилмоқ. *Мақтаб ер участкасини режалаш*. *Режалаб чигит экмоқ*.

3 Тартибга, режага солмоқ, тизимга туширмоқ.

РЕЖАЛАШТИРИШ Миллий иқтисодиётнинг турли даражаларида ижтимоий-иқтисодий жараёнларни тартибга солиш ва бошқариш шакллари мажмуи.

РЕЖАЛАШТИРМОҚ Маълум режага солмоқ; мўлжалламоқ. *Ислохмўжа.. йўллари тузатиш, темир кўприклар қурдириш ишларини режалаштирди.* Ж. Шарипов, Хоразм.

РЕЖАЛИ 1 Маълум бир режа асосида қурилган; тартибли. *Режали иш. Режали иш бузилмас.* Мақол. ■ *..ҳар бирининг [ўт ўчирувчининг] ҳаракати чаққон ва режали.* М. Хайруллаев, Тилла маржон.

2 Тежаб сарф қиладиган, режа билан иш тутадиган. *Режали аёл.* ■ *Моҳира назанда, чаққон, саранжомли, режали келин эди.* М. Осим, Тилсиз гувоҳ.

РЕЖАСИЗ 1 Режа билан қилинмаган, тартибсиз. *Режасиз иш. Қолипсиз ғишт чиқмас, режасиз иш битмас.* Мақол.

2 Тежаб-тергашни билмайдиган, тежамсиз. *Режасиз одам.*

РЕЖАСИЗЛИК Тежаб-тергаб қилинмаган иш; тежамсизлик. *Ишни режасизлик билан бажармоқ.*

РЕЖАЧИ Режа тузувчи киши. *-Ражаббекниқандаги мажлисда, — деди заҳарханда билан [Отабек], — бу йиртқичликнинг режачиси ким эди? А. Қодирий, Ўтган кунлар.*

РЕЖАЧЎП [ф. ريجه چوب] айн. **газчўп 1.**

РЕЖИМ [фр. regime — давлат тузуми, бошқариш тарзи < лот. gego — бошқараман, раҳбарлик қиламан] **1** Давлатни бошқариш, идора этиш усули; тузум. *Демократик режим. Тоталитар режим.*

2 Меҳнат, дам олиш, овқатланиш, ухлаш ва умуман ҳаётнинг аниқ белгиланган тартиби. *Овқатланиш режими. Режим билан ухлаш.* ■ *Фурсат қадрини ҳаётий режаси ва кундалик вақт режими бўлган одам билди.* Р. Усмонов, Одобнома. *У тинмай машқ қилиш, алоҳида белгиланган режимга амал қилиш туфайли спорт формасини яна тиклашга муваффақ бўлди.* Газетадан.

3 Иш фаолияти ёки ҳаёт шароити. *Ўсимликларнинг иссиқлик режими. Машинанинг иш режими.* ■ *Иқтисод ва тежамкорлик режимида риюя қилишнинг муҳим омилларидан бири давлат ва ишлаб чиқариш интизомига қатъий бўйсунушидир.* Газетадан.

РЕЖИССЁР [фр. regisseur — бошқарувчи < лот. gego — бошқараман] Саҳна ёки кино асарини саҳналаштирувчи бадиий раҳбар; асарни тайёрлаш, саҳнага қўйиш билан боғлиқ бўлган ижодий ишларнинг ташкилотчиси, бошлиғи. *Постановкачи режиссёр. Кино режиссёри.* ■ *Тошкент кўриги бизни ўнлаб ёш тажрибали режиссёрлар, операторлар ва сценаристлар билан ошно қилади.* Газетадан. *Томошанинг ёмон чиқишига кўпинча режиссёр айбдор бўлади.* «Фан ва турмуш».

РЕЖИССЁРЛИК Саҳна ёки кино асарларини саҳналаштириш билан шуғулланиш; режиссёр касби, вазифаси. *Режиссёрлик қилмоқ. Режиссёрлик санъати.* ■ *Бу киши артистларга театрда режиссёрлик қиладилар.* Шукрулло, Сайланма.

РЕЖИССУРА [«режиссёр» с. дан] **1** Режиссёрлик иши, фаолияти. *Кинодраматургининг ишини режиссура, монтаж янада такомиллаштириши ҳам мумкин.* Б. Имомов, Сценарий ва фильм.

2 Фильм, спектакль ва ш.к. нинг бирор режиссёр томонидан тайёрланган постановкаси. *У [Хуришд] театр санъати билан, режиссура билан [Ўзбекистонга] гастролга келган озарбайжон театри, театр ҳаваскорларининг труппалари орқали таниш эди.* Ф. Жўраев, Обид Жалилов.

РЕЗ [ф. ريز — майда; кичкина] **1** Мусиқа асбобларидан бир ритмда чиқадиган узук-узук қисқа садолар. *Ноғораларнинг.. рези, сурнайнинг бир маромдаги мунгли ноласи ҳозир қандайдир қалтис ўйин бўлишидан дарак беради.* М. Қодиров, Асака дорбозлари.

2 Шу турдаги куй номи. *Бу вақтда Регистонда турган сарбозларнинг музика тўдаси миллий асбобларни “рез” ҳавосида чала бошладилар.* С. Айний, Эсдалиқлар.

РЕЗА [ф. ريزه — ушоқ, парча; ёғоч қириндиси] **1** сфт. Унча катта бўлмаган; майда, кичик. *Ёноқларини реза тер қоплаган қизлар жимгина қўшиққа қулоқ солар.. эди.* С. Аҳмад, Қадрдон далалар. *Норматовнинг қисташи билан Алитириш дуторини олиб, реза куйларга тушиди.* Файратий, Менинг ёшлигим. *[Алижонни] Ичкари уйга бошлаб кирди-да, олдида қазии билан тузланган бодринг келтириб қўйди: -Мана буларни реза қилиб туринг, — деди Ҳалима. Ҳ. Назир, Ўтлар туташганда.*

2 от Майда нарса (сув ёки тер томчилари ҳақида). Кучли кулгидан Рағнонинг кўзи ёшланиб, ўсиқ киприги жуфтланди, кулги ва ўчоқ ҳарорати билан икки юзи қизил олмага айланиб, латиф бурни устида марварид резалар ҳосил бўлди. А. Қодирий, Меҳробдан чаён. *Мавжларидан резалар учиб, чайқалади муққадас дарё.* Газетадан.

РЕЗАВОР [ф. *ريزهوار*] 1 Майда-чуйда. Резавор моллар.

2 Овқатга солиш учун ишлатиладиган кўкат ва сабзавот. *Уйларнинг ҳовлиларида мевали дарахтлар, гулзор, чорпоя, резавор экинлар учун ҳам алоҳида майдонлар мавжуд.* Ж. Абдуллахонов, Хонадон.

3 Боғчилик экинлари ва уларнинг мевалари. *Резавор боғ. Резавор экинлар. Резавор мевалар.* ■ *Резавор мевалардан смородина.. ўстириш айна муддао бўлади.* Газетадан.

4 айн. **зирвор.** *Сабзавот, мева ҳамда резаворларнинг ўзбекча тансиқ таомлар тайёрлашда аҳамияти каттадир.* К. Маҳмудов, Ўзбек тансиқ таомлари.

РЕЗАВОРФУРУШ [резавор + ф. *فروش* — сотувчи] Резавор моллар ёки ошкўклар билан савдо қилувчи киши; резаворчи. *Ҳеч ўйламаганда, Ҳусни баққол билан Жалил резаворфуруш ўртасида жанжал чиқиб қолди.* Ф. Фулом, Шум бола.

РЕЗАВОРЧИ 1 айн. **резаворфуруш.**

2 Кўкат ва сабзавот экинлари етиштирувчи ва сотувчи киши.

3 Зирворлар савдоси билан шуғулланувчи киши.

РЕЗАВОРЧИЛИК Резавор экинлар экиш ва резавор сотиш ишлари билан шуғулланиш. *Резаворчилик қилмоқ. Резаворчиликни ўрганмоқ.*

РЕЗАЛАМОҚ Майда тўғрамоқ, майдаламоқ, майда-майда қилмоқ. *Пиёзни резаламоқ. Резаланган сабзи.* ■ *Қиз.. бурни устида резаланиб турган ёмғир томчисини артиб, қаддини ростлади.* У. Назаров, Одамлар.

РЕЗАПАРВАР [ф. *ريزهپارور* — майда экинларни парваришловчи] Резавор экинларни яхши парвариш қиладиган; миришкор. *Резапарвар одам.*

РЕЗГИ [ф. *ريزگی* — майдаланганлик; майда-чуйда нарсалар] 1 Қийқинди чарм; қийқим-қийқим чармлар. *Пошнабон резгилар.* ■ *Ҳар хил синиқ-миниқ қолиплар, чарм*

резгиси, ширач коса, маҳси ичига ёпиштирадиган эски латталар ва ҳоказо дўконхона юзини тутган. Ойбек, Танланган асарлар. *Тери резгилари ҳар хил кийим-кечак безакларида ишлатилади.* Газетадан.

Резги одам ҳазил Ўсмай қолган ёки кичкина одам. *Боқса, резги қаримсиқ одам Имоқилар унга дамо-дам.* М. Али, Боқий дунё.

РЕЗЕКЦИЯ [лот. *resectio* — кесиб ташлаш] тиб. Касаллик оқибатида зарарланган ёки шикастланган аъзо, суяк ва ш.к. нинг бирор қисмини жарроҳлик йўли билан кесиб ташлаш.

РЕЗЕРВ [фр. *reserve* < лот. *reservare* — сақламоқ, эҳтиёт қилмоқ; тежамоқ] 1 Янги, ҳали ишга солинмаган куч, маблағ ва ш.к. манбаи. *Ишлаб чиқариш резервлари. Пахта етиштиришни кўпайтирувчи резервлар.* ■ *Қодирали икки нарсдан беҳад хурсанд бўлди. Биринчидан, бўй қолган жойларни тўлдириш учун катта резерв топилди..* И. Раҳим, Чин муҳаббат. *Бу маблағларнинг барчаси ўз ички резервларимиздан ажратилмоқда.* Газетадан.

2 қ. **заҳира** 1. *Озиқ-овқат резервлари.* ■ *Ҳар бир хўжаликда анчагина резервлар ва кучимкониятлар юзага чиқарилди.* Газетадан.

3 қ. **заҳира** 2. *Резервдаги офицер.* ■ *Сафарбарлик чақирuvi чоғида резервдаги хизматга чақирилганлар ойлик йиғинда иштирок этиб, техник воситалардан ва қурол-яроғдан фойдаланиш сирларини мукаммал ўргандилар.* Газетадан.

4 Кўшиннинг зарур пайтда жангга кiritиш учун қўмондонлик ихтиёрида қолдирилган қисми. *Туркистон ҳарбий округи бутун уруш давомида ҳарбий резервлар ўчоғи бўлди.* Газетадан.

РЕЗЕРВИСТ Бир қатор мамлакатлар армияларида: резервга ўтказилган, резервда, захирада турган ҳарбий хизматчи.

РЕЗЕРВУАР [фр. *reservoir* < лот. *reservare* — сақламоқ, эҳтиёт қилмоқ] Суюқлик ёки газ сақланадиган катта идиш. *Резервуарнинг сифми катталиги сабабли ёнғинни тўхтатишнинг иложи бўллади.* Газетадан.

РЕЗЕРВЧИ қ. **резервист.** *Шу билан бирга, мазкур комиссияга мамлакатимизда Куролли кучлар заҳираси, яъни резервчилар институтини ташкил этиш концепциясини ишлаб чиқиш вазифасини топшириш керак.* Газетадан.

РЕЗИДЕНТ [лот. *residens, residentis* – ўтирувчи, жойида қолувчи] **1** Элчидан пастроқ мавқега эга бўлган дипломатик вакил.

2 Бирон давлатнинг бошқа бир хорижий давлатда доимий яшовчи фуқароси.

3 Бирон давлат разведкасининг бошқа бирор давлат ҳудудида иш олиб борувчи вакили.

4 Хорижий банк, компания, фирма ва ш.к. нинг бошқа мамлакатда доимий ишловчи, у ёки бу ишни амалга оширувчи вакили (ўзи ишлаётган мамлакат қонунчилигига тўла риоя қилади). *Ўзбекистон Республикаси Марказий банки томонидан жисмоний шахслар – резидентларга нақд чет эл валютасини ..ташқарига олиб чиқишга рухсат бериш тартиби белгиланган.* Газетадан. *Тендерда фақат Ўзбекистон резидентлари қатнашиши мумкин.* Газетадан.

РЕЗИДЕНЦИЯ [лот. *residens, residentis* – бирор жойда бўлувчи, турувчи] Давлат бошлиғи ёки ҳукуматнинг, шунингдек, катта мансаб эгаларининг доимий қароргоҳи, тураржойи, саройи. *Президент резиденцияси.*

РЕЗИНА [лот. *resina* – қатрон (смола) < юн. *retine* – ёғоч қатрони] Каучукни вулканизлаш йўли билан олинадиган эластик маҳсулот ва ундан тайёрланган нарса, буюм. *Дағал резина. Резина этик.* ■ *Эмин қаради: автоматчи немислар дарёнинг кун чиқиш қирғоғидан резина қайиқда шу томонга тўпна-тўғри босиб келяпти.* И. Раҳим, Чин муҳаббат. *Қўшнисиникидан ўн беш метрли резина шланг опчиқиб берди.* С. Аҳмад, Сайланма..

РЕЗИНКА [«резина» с. дан] **1** Ёзилган ёки чизилган нарсани ўчириш учун ишлатиладиган махсус резина бўлаги. *Сиёҳ ўчирадиган резинка.*

2 Торгганда чўзиладиган резинали шнур, ип ва ш.к. *Кампир, резинкаси оёғини қисиб юборган шекилли, капрон пайпоғини ҳимариб, тўпниғига тушириб олибди.* С. Аҳмад, Сайланма.

3 с.т. Резина. *Унинг оёғида таги резинка қора туфли.* П. Қодиров, Уч илдиш.

Резинка қилмоқ (ёки қилиб чўзмоқ) **1)** бирор ишни вақтида бажармай чўзиб юрмоқ, пайсалга солмоқ. *-Бу монтажчилари тушмагур газ плитаси ўрнатишни роса резинка қилиб чўзишса бўладими, – деди Афзал ака.* А. Шайхов, Ушовидан тушови қиммат;

2) гапни чўзмоқ. *Мунча резинка қилиб чўзмасанг!* Ш. Рашидов, Бўрондан кучли.

РЕЗОЛЮЦИЯ [лот. *resolutio* – қарор] **1** Ўйгилиш, мажлис, конференция ва ш.к. да бирор масала муҳокамасидан кейин қабул қилинган қарор. *Мажлис резолюцияси.* ■ *Бирлашган Миллатлар Ташкилоти Хавфсизлик кенгаши яқинда махсус резолюция қабул қилди.* Газетадан.

2 Раҳбар ходимнинг расмий ҳужжатдаги фармойиши, якуний хулосаси. *Аризага резолюция қўймоқ.*

РЕЗОНАНС [фр. *resonance* < лот. *resonans* – акс-садо берувчи] **1** физ. Ташқи таъсирлар остида жисмнинг мажбурий тебранишлари амплитудасининг кескин ошиб кетиши. *Резонанс ҳодисаси.*

2 Бинонинг товушни кучайтириш қобилияти. *Залнинг резонанси яхши.*

3 кўчма Жамоатчиликнинг фикри, бирор нарса, воқеа-ҳодисага муносабати, жавоб ҳаракати, билдирган фикри. *Унинг нутқи катта ижтимоий резонанс уйғотди.*

РЕЗОНАТОР [лот. *resonare* – акс-садо бермоқ] *тех.* Резонанс ҳодисаси туфайли содир бўладиган тебранма тизим (жисм).

РЕЗЬБА [р. *резать* – «кесмоқ» с. дан] *тех.* Болт, гайка ва ш.к. нинг ички ёки ташқи сиртига ўйилган ариқча ва бўртма. *Метрик резьба. Болт резьбали.*

РЕЗЬБАЛИ Резьбаси бор, резьба солинган. *Ўн резьбали болт.*

РЕЗЮМЕ [фр. *resume* < *resumer* – қисқача баён қилмоқ] Ёзилган, айтилган ёки ўқилган матн мазмунининг қисқача баёни. *Авторефератнинг резюмеси.*

РЕИМПОРТ [ре.. + импорт] *иқт.* Чет элга чиқарилган, аммо у ерда сотилмаган ёки яроқсиз деб топилган, қайта ишлов берилмаган товарларнинг уни қайтарган мамлакатга қайтариб олиб кирилиши.

РЕИНВЕСТИЦИЯ [ре.. + инвестиция] Инвестициялар муомалалари бўйича даромадлар шаклида олинган маблағларни ишлаб чиқаришни кенгайтириш учун қайта йўналтириш, қайта фойдаланиш.

РЕЙД **1** [ингл. *raid* – ёпирилиб келиш, босиб келиш < нем. *bereit* – тайёр, шай] **1** Давлат ёки жамоат ташкилотлари, матбуот органлари топшириғига мувофиқ муайян объектларни, корхона ва ш.к. фаолиятини тўсатдан текшириш. *Солиқчилар билан со-*

ликқа оид жиноятчиларга қарши курашиш департаментининг ходимлари ўртасидаги яқин ҳамкорлик рейд ва текширишлар самарасини таъминламоқда. Газетадан. «Ишонч» телефонига тушаётган тезкор маълумотлар асосида ўтказилаётган рейдлар давомида бир қанча қонунбузарлик ҳолатлари барҳам топмоқда. Газетадан.

2 ҳарб. Душманнинг базаларига, штаб ва б. объектларига қарши жанговар иш олиб бориш мақсадида ҳаракатдаги ҳарбий ёки партизан отрядларининг душманнинг орқа томонига ўтиши.

РЕЙД II [гол. reede — кемалар тўхтайдиган жой] Денгиз портига кираверишда, соҳил яқинида кемаларнинг лангар ташлаб туриши ва юк тушириш учун қулай жой.

РЕЙКА [р. рейка — ясси чорқирра юпқа тахта] **1** Юпқа, энсиз узун тахта. *Рейкалардан қилинган девор. Полга рейка қирқиш.*

2 махс. Даражаларга бўлинган ва ер, сув ҳамда қор қатламининг паст-баландлигини (чуқурлигини) аниқлашда қўлланадиган чорқирра ёғоч.

РЕЙС [нем. Reise — саёҳат] Кема, самолёт, машина каби транспорт воситаларининг маълум маршрут бўйича (бир томонга) қатнов йўли. *Қурилиш ва техника материаллари ташиб турган автомашиналар ҳар сменада ўн беш-ўн олти рейс қилади.* А. Муҳиддин, Ҳалъя.

РЕЙТИНГ [ингл. rating — баҳо, даража] **1** Ўқувчилар ва талабалар билимини назорат қилиш ва баҳолаш усули ва тизими. *Қолаверса, ҳар бир фандан тўпланган балларга асосланиб, ўқувчиларнинг ўқишдаги ютуқларини таққослаш ва рейтинг натижаларига қараб, уларни фарқлаш имконияти яратилади.* Газетадан. *Маорифимиздаги ислохотлар ҳақида сўз кетар экан, мактабларимизда тобора кенг қўлланаётган ўқувчилар билимини аниқлашда рейтинг тизимидан фойдаланиш усули хусусида алоҳида тўхталиб ўтиш даркор.* Газетадан. *Олий таълим тизимида бакалаврлик ва магистрлик босқичларидаги таълим тобора такомиллашмоқда, талабалар билимини баҳолашнинг рейтинг усули кенг жорий этилмоқда.* Газетадан.

2 спорт. Спортнинг баъзи турларида (мас., шахматда) эришилган ютуқларнинг самарадорлиги ва нуфузини баҳолашда рақамлар билан ифодаланадиган шахсий кўр-

саткич. *Спортчиларнинг рейтинг кўрсаткичи. Боксчиларнинг рейтинг жанглари.* ■ *Халқаро футбол федерацияси (ФИФА) миллий терма жамоалар учун август ойи рейтинг жадалини эълон қилди.* Газетадан.

3 Сиёсат, маданият ва б. соҳалардаги таниқли арбобларнинг жамоатчилик фикрини ўрганиш йўли билан аниқланадиган машхурлик даражаси. *Баъзи туман газеталарининг рейтинг бугун, очигини айтсак, кўнгилдагидек эмас.* «Саодат». *Машғулот олиб борадиган ўқитувчиларнинг илмий даражаси, рейтинг, иш стажига қараб, қўшимча ҳақ тўлаш жорий этилди.* Газетадан.

РЕЙХСТАГ [нем. Reichstag < Reich — давлат, салтанат + Tag — мажлис, кенгаш] *тар.* Германия парламенти (1871 йилдан 1945 йилгача) ва унинг биноси. *Зафар туғин тутиб маҳкам, Рейхстаг узра тиккан ҳам, Ва чеккан ҳам унга имзо Бу қўллардир, бу қўллардир.* Э. Воҳидов, Муҳаббатнома.

РЕКВИЗИТ [лот. requisitum — керакли, зарур] Театр томошаларида ёки кинофильм суратга олинаётганда фойдаланиладиган табиий ёки ясама буюмлар мажмуи.

РЕКВИЗИТЛАР ҳуқ. Муайян ҳужжатнинг юридик жиҳатдан кучга эга эканлигини кўрсатувчи, қонун-қоидалар билан белгиланган зарурий маълумотлар. *Банк реквизицлари фақат ҳисоб-пул муомалалари масаллари бўйича хатларда, масалан, кафолат хатларида қўйилади.* «Иш юритиш». *Қимматли қоғозларда ифодаланган мажбурий реквизицлар муомалага чиқарилаётган ҳар бир қимматли қоғозда кўрсатилади.* «Ҳаёт ва қонун».

РЕКВИЗИЦИЯ [фр. requisition — мол-мулкдан маҳрум қилиш < лот. requisitio — талаб; тўлатиш] Хусусий кишиларнинг ёки жамоат ташкилотларининг мулкани ҳақ тўлаб мажбурий равишда доимий ёки вақтинча давлат ихтиёрига олиш. *Ўзбекистон Республикасидаги хорижий инвестициялар национализиация ва реквизиция қилинмайди.* Газетадан. *Реквиция ўтказилишига сабаб бўлган вазиятларнинг амал қилиши тўхтагандан кейин реквизиция қилинган мол-мулкнинг собиқ эгаси сақланиб қолган мол-мулкни ўзига қайтариб беришни талаб қилишга ҳақли.* Газетадан.

РЕКЛАМА [фр. reclame < лот. reclamare — қаттиқ қичқирмоқ] **1** иқт. Муайян товар

ёки кўрсатиладиган хизмат турлари ҳақида харидорларни хабардор қилиш, уларга нисбатан талаб, эҳтиёжни юзага келтириш ёки кучайтириш мақсадида ана шу товар ва хизматлар тўғрисида берилган маълумот. *Савдо рекламаси.* ■ *Маркетинг концепциясида маҳсулотни сотиш тадбирлари мажмуасида марказий ўринни реклама эгаллайди.* «Иқтисодий назария». «*Оила ва жамият*» бошқа газеталарга ўхшаб реклама қилинмаса ҳам, харидоргир, савдоси чаққон. Газетадан. *Реклама ўз номи билан маҳсулотни овоза қилиш демакдир.* Газетадан.

2 Бирон шахс, ташкилот, нарсани оммалаштириш мақсадида улар ҳақида маълумотлар тарқатиш. *Сийсий реклама. Газетанинг реклама ва эълонлар бўлими.* ■ *Трибуналларда шу гап, телевизор экранлари, рекламаларда шу мавзу.* Э. Охунова, Икки океан оша. *Сиз биз билан ҳамкорликда реклама унумдорлигига эришишингизга шубҳа йўқ.* Газетадан.

3 Шу мақсадда чиқарилган эълон, плакат. *Реклама осмоқ.*

РЕКЛАМАЦИЯ [лот. reclamatio — бақриб норозилик билдириш] Етказиб берилган ёки сотилган мол, буюм, маҳсулотнинг, кўрсатилган хизматнинг сифатсизлиги натижасида кўрилган зарарни тўлаш, улардаги нуқсонларни бартараф этиш ёки уларнинг баҳосини пасайтиришни талаб қилувчи даъво хати.

РЕКЛАМАЧИ **1** Реклама ясовчи, реклама тузувчи киши.

2 Ўзини, ўз ишини мақтовчи, кўз-кўз қилувчи киши.

РЕКОГНОСЦИРОВКА [лот. recognoscere — билмоқ; эсга туширмоқ; кўриб чиқмоқ] **1** *ҳарб.* Жангвар ҳаракатлар бошланиши олдиан душман ҳақида тўлиқ, батафсил маълумотлар олиш мақсадида командирлар, офицерлар томонидан ўтказиладиган разведка.

2 *геод.* Муайян жойда геодезик ишлар бошлашдан олдин шу жойни текшириб чиқиш; эскирган топографик хариталарни жойнинг ҳозирги ҳолати билан мувофиқлаштириш.

РЕКОМЕНДАЦИЯ [лот. (re)commendatio — маъқуллаш] **1** Бирор ташкилотга ёки янги жойга ишга киришда бериладиган ёзма ёки оғзаки тавсия.

2 *қ. тавсиянома. Рекомендация бермоқ.*

РЕКОНСТРУКЦИЯ [ре.. + лот. constructio — тузиш, бириктириш; тузилиш, қурилиш] **1** Такомиллаштириш, яхшилаш мақсадида қайта қуриш, янгидан қуриш, бутунлай янгича ташкил қилиш, қайтадан усқуналаш. *Реконструкция даври.* ■ *Тармоқнинг янги корхоналарини қуриш, ишлаб турган корхоналарини реконструкция қилиш, замонавийлаштириш керак.* Газетадан. *Вокзал ва станцияларимиз янгидан қурилди ва реконструкция қилинди.* «Фан ва турмуш».

2 Қадимги иншоот, санъат асари ва ш.к. ни уларнинг ҳозиргача сақланиб келган айрим бўлақларига, ёзма манбалардаги тавсиф ёки тасвирларига асосланиб қайта тиклаш.

РЕКОНСТРУКЦИЯЛАМОҚ Реконструкция қилмоқ. *Ҳайкални реконструкцияламоқ.*

РЕКОРД [ингл. record — мисли кўрилмаган муваффақият < фр. record — эслаш, хотирага келтириш] Иш, фаолиятнинг бирор соҳасида, спорт мусобақаларида эришилган энг катта муваффақият, энг яхши натижа, энг юқори кўрсаткич. *Жаҳон рекорди. Янги спорт рекорди кўймоқ.* ■ *Жонжаҳдим билан ишлаб, рекорд устига рекорд кўймаганимда, бу хурматлар қайда эди.* Х. Тўхтабоев, Ширин қовунлар мамлақати. *Улар ҳосил йиғим-теримини максимал даражада механизациялаш ва тайёрлаш суръатларини тезлаштиришда рекорд кўрсаткичга эришмоқдалар.* Газетадан. *Рауфни рекорд билан яна бир бор табриклашди.* «Ўзбекистон кўриқлари».

РЕКОРДЕР [ингл. record — ёзмоқ] **1** Товуш ёзиш аппаратларида товушни граммофон пластинкаларига механик усулда ёзиб олиш учун мўлжалланган қурилма.

2 Кема ва қирғоқ гидролокация станцияларида акс-садо тарзида қайтган сигналларни ёзиб олиш учун фойдаланиладиган қурилма.

РЕКОРДСМЕН [ингл. recordsmen — рекордчи, рекордга эришган киши] *қ. рекордчи.*

РЕКОРДЧИ Спортнинг муайян турида ёки бирор иш, фаолият соҳасида рекорд кўрсаткичга эришган киши. *Жаҳон рекордчиси. Рекордчи пиллачилар.* ■ *-Рекордчиларга бир эмас, икки ҳисса мошхўрда бера-*

ман! — Абдухалил унинг косасига бир бўлак гўшт ташлади. Ў. Ҳошимов, Қалбингга қулоқ сол. *Баландликка лангарда сакраш бўйича жаҳон рекордчиси Е. Исинбаева Лондондаги турнирда қатнашди.* Газетадан.

РЕКТОР [лот. *rector* — бошқарувчи; раҳбар] Университетлар ва б. айрим олий ўқув юртлирининг раҳбари. *Ректор ташқи иқтисодий масалаларни ўз зиммасига олиши зарур.* Газетадан. *Шартномаларга ректорлар жавобгар бўлиши керак.* Газетадан.

РЕКТОРАТ I Олий ўқув юртлирининг ректор ва проректорлар раҳбарлик қиладиган маъмурий-ўқув органи. *Институт ректорати, профессор-ўқитувчилар жамоасининг вазифаси фақат меъмор ва қурувчи муҳандисларни тайёрлашдан иборат бўлиб қолмай, бугунги кунда вужудга келиши лозим бўлган меъморчилик-қурилиш мажмуаларининг шарт-шароит ва омилларини ўрганишни ҳам талаб қилишини англаб етганмиз.* Газетадан.

РЕЛЕ [фр. *relais* < *relayer* — алмаштирмақ] *тех.* Ташқи таъсир натижасида электр занжирида кескин ўзгаришлар рўй берганда, электр токини автоматик тарзда улайдиган ёки узадиган қурилма, асбоб.

РЕЛЬЕФ I [фр. *relief* < лот. *relevo* — (бир оз) кўтараман] *геогр.* Ер сиртидаги табиий ёки сунъий равишда ҳосил бўлган ҳар хил нотекисликлар — паст-баландлик, тоғликнишабликлар мажмуи. *Тоғли рельеф. Ўзбекистон рельефининг тузилиши хилма-хил.* ■ *Тошкент заминининг устки қиёфаси, яъни рельефи худди шу босқичда шаклланди.* «Фан ва турмуш».

РЕЛЬЕФ II Ҳайкалтарошликнинг бир тури: муайян сатҳга нисбатан бўртма ёки ўйма тасвир; бўртма нақш.

РЕЛЬС [ингл. *rails* — тўсин < лот. *regula* — тўғри таёқ] Темир йўл транспорти, трамвай, кўтарма кран, вагонетка гилдираклари юрадиган пўлат из. *Трамвай рельслари.* ■ *У болалари билан поезд келишини рельс устида кутиб ўтирди.* Газетадан.

РЕЛЬСЛИ Рельси бўлган, рельс ўрнатилган; рельсларда юрадиган. *Рельсли йўл. Рельсли транспорт.*

РЕЛЬССИЗ Рельси бўлмаган, рельси йўқ. *Рельсиз транспорт.*

РЕЛЯТИВИЗМ [лот. *relativus* — нисбий] *фил.* Билимнинг нисбийлиги, шартлилигини эътироф этувчи, объектив ҳақиқатни би-

лиш мумкин эмас, деб ҳисобловчи фалсафий қараш.

РЕЛЯТИВИСТ Релятивизм тарафдори.

РЕМАРКА I [фр. *remarque* — белги, изоҳ] I *ад.* Драматик асарда қаҳрамонлар ташқи қиёфаси, ёши, хулқи, хатти-ҳаракати, сахна манзараси ва б. ҳақида муаллиф томонидан бериладиган изоҳлар. *Актёрлар образ яратишда автор ремаркаларини, режиссёр айтган ва кўрсатганларини амалга ошириш билан кифояланарди.* Ф. Жўраев, Обид Жалилов.

2 *снт.* Гравюранинг очиқ ҳошиясига ишланган, кўпинча асар сюжети билан боғлиқ бўлмаган кичик ҳажмдаги тасвир.

РЕМИЛИТАРИЗАЦИЯ [ре. + милитаризация] *сиёс.* Аввал қуролсизлантирилган (демилитаризация қилинган) давлат қуролли кучлари ва ҳарбий имкониятларини қайта тиклаш; қайта қуроллантириш. *Ремилитаризация қилмоқ.*

РЕМОНТ [фр. *remonte* — тузатиш, сошлаш < *remonter* — тузатмоқ, қайта бутунламоқ, йиғмоқ] *эск.* Бузилган, ишдан чиққан, синган ва ш.к. нарсаларни тузатиш, тиклаш, таъмирлаш. *Ремонт қилмоқ.* ■ *Ўқувчилар кучи билан мактаб дарвозаси биқинига пойабзал ремонт қиладиган устахона, бир сартарошхона қурамиз.* С. Аҳмад, Сайланма. *Стадион ремонт қилина бошлаган, панжаралар қизил-сарик рангга бўялган.* Ў. Ҳошимов, Қалбингга қулоқ сол.

РЕМОНТХОНА [ремонт + хона] *эск.* Таъмир ишлари олиб бориладиган ишхона, таъмир устахонаси; таъмирлаш хонаси.

РЕМОНТЧИ Таъмир қилувчи уста, ишчи; таъмирловчи. *Хўжаликда ташкил этилган 8 та махсус бригадага ва ремонтчиларга етарли маданий ва маиший шароитлар яратилган.* Газетадан.

РЕНЕГАТ [лот. *renegare* — тонмоқ, бўйнига олмаслик] *сиёс.* Ўз маслагидан қайтиб, душман томонига ўтиб кетган одам: муртад, хоин. *Барча мамлакатларда ҳам ренегатлар бўлди.*

РЕНЕССАНС [фр. *Renaissance* — Уйғониш; қайтадан юзга келиш, тикланиш] Инсониятнинг маънавий ва ғоявий тараққиётидаги уйғониш, кўтарилиш даври (Европанинг бир қатор мамлакатларида бу давр 14–16-асрларга тўғри келади). *Бу давр тарихида меъморчилик, адабиёт, тасвирий*

санъат, илоҳий ва дунёвий илмлар ривожланиб, теурийлар сулоласини буюк ренессанс – уйғониш даври яратувчилари, десак хато қилмаймиз. Газетадан. *Инсоният тўғрисидаги қарашлар Ренессанс даврида янада юксакликка кўтарилди бошлади. «Фан ва турмуш».*

РЕНИЙ [лот. Rhenium – Германиянинг Рейн (Rhenus) вилояти номидан] Менделеев даврий системасининг VII гуруҳига мансуб кимёвий элемент; оч кулранг, жуда қийин эрийдиган ва ўта оғир металл. *Уран билан йўл-йўлакай рений, скандий ва бошқалар ҳам қазиб олинмоқда.* Газетадан. *Саноатда ренийдан авиация ва космик техника учун ўтга чидамли қотишмалар, электрон ускуналар, нефтни парчалаш учун катализаторлар ишлаб чиқаришда кенг фойдаланилади.* Газетадан.

РЕНТА [нем. Rente, фр. rente < лот. red-dita – қайтариб берилган (нарсаси)] *иқт.* 1 Мулк эгаларининг тадбиркорлик фаолияти билан шуғулланмасдан ер ёки мол-мулкдан фоиз шаклида мунтазам оладиган даромади. *Дифференциал рента. Абсолют рента. Ер рентаси.* ■ *Бозор иқтисодиёти тизимида ерни ишлатишдаги кенг тарқалган усул уни ижарага бериб, рента олишидир.* Газетадан.

2 Айрим мамлакатларда давлат заёмлари облигациялари бўйича фоиз ёки ютуқ шаклида тўланадиган даромад.

РЕНТАБЕЛ [нем. rentabel – фойдали, даромадли] Хўжалик жиҳатдан мақсадга мувофиқ, харажатларни қолайдиган ва фойда келтирадиган. *Қишлоқ хўжалигининг рентабел тармоқлари. Рентабел корхона.* ■ *Давлатдан дотация олмаслик ва рентабел ишлаш учун кўпроқ пул топиш лозим.* Газетадан.

РЕНТАБЕЛЛИК [нем. rentabel – фойдали, даромадли] Корхона ва тадбиркорликнинг даромаддорлиги, самарадорлиги; микроиқтисодий миқёсдаги иқтисодий фаолиятнинг самарадорлик кўрсаткичи. *Чорвачилик маҳсулотлари етиштиришни кўпайтириш, бу соҳанинг рентабеллигини ошириш кўп жиҳатдан ўзимизга боғлиқ эди.* Газетадан. *Реконструкция ишларига эътибор кўнгилдагидай эмас, шунинг учун бир қанча йирик корхоналарда рентабеллик даражаси паст.* Газетадан.

РЕНТАБЕЛСИЗ Иқтисодий жиҳатдан фойдасиз, харажатни қоламайдиган, фойда келтирмайдиган. *Рентабелсиз корхона.*

РЕНТГЕН [< немис физиги Рентген (Röntgen) номидан] 1 *физ. тиб.* Рентген нурлари билан ёритиб кўриш, рентген аппаратида текшириш.

2 *с.т.* Рентген аппарати. *Рентгенга солиб текшириш.*

3 *физ.* Рентген нурлари ва гамма-нурларнинг доза бирлиги; нурланиш дозаси.

Рентген аппарати Рентген нурларини ҳосил қилиш ва улардан фойдаланиш учун мўлжалланган қурилма. *Кабинетга янги рентген аппарати зарур эди, Р. Муродов ана шу аппаратни олиб беришни сўраб, яна бош врачча мурожаат қилди. «Муштум».* *Илмий марказда айни кунларда телеускунали ҳаракатланувчи рентген аппарати ва бошқа ноёб асбоб-ускуналар ишлаб турибди.* Газетадан. **Рентген нурлари** Тиниқмас материаллардан ўтиш хусусиятига эга бўлган, қисқа электромагнит тўлқиндан иборат кўзга кўринмас нурлар.

РЕНТГЕНОГРАММА [рентген + юн. gramma – ёзув] Текширилаётган объектнинг рентген нурлари ёрдами билан махсус фотоплёнкага туширилган тасвири. *Тил оғизда эркин ётган аззо бўлиб, рентгенограммада унча катта бўлмаган ясси ёй шаклида кўринади. «ЎТА».*

РЕНТГЕНОГРАФИК Рентгенографияга оид; рентгенография усулига асосланган, шу усулда бажарилган. *Рентгенографик анализ.*

РЕНТГЕНОГРАФИЯ [рентген + юн. grapho – ёзаман] Рентген нурлари ёрдамида тиниқмас нарсаларнинг ички тузилишини расмга, суратга олишдан иборат рентгенологик тадқиқот усули.

РЕНТГЕНОДИАГНОСТИКА [рентген + диагностика] Рентгенологик текширишлар натижасида олинган маълумотларга қараб, касалликни аниқлаш, ташхис (диагноз) қўйиш.

РЕНТГЕНОЛОГ Рентгенология ва рентгенотерапия бўйича врач, мутахассис. *Рентгенолог врач.* ■ *Рентгенолог врачнинг рангиқути ўчди: беморнинг томоғида билинар-билинмас доғ бор эди..* И. Раҳим, Тинимсиз шаҳар.

РЕНТГЕНОЛОГИЯ [рентген + юн. logos – билим, тушунча] Рентген нурлари ва улардан фойдаланиш усулларини ўрганидиган фан; радиологиянинг бир бўлими.

РЕНТГЕНОСКОПИК Рентгеноскопияга оид. *Рентгеноскопик текшириш.*

РЕНТГЕНОСКОПИЯ [рентген + юн. skopeo – қарайман] Тиниқмас нарсаларнинг ички тузилишини текшириш, буюмларнинг ички нуқсонини аниқлаш, касалликларни топиш мақсадларида рентген нурлари ёрдамида уларнинг тасвирини махсус экранга тушириб текшириш; рентгенодиагностиканинг асосий усулларидан бири.

РЕНТГЕНОТЕРАПИЯ [рентген + терапия] Шишли (ўсмали) ва б. турдаги касалликларни рентген нурлари билан даволаш. *Рентгенотерапиядан фойдаланиш.*

РЕОЛОГИЯ [юн. rheos – оқиш, оқим + logos – фан, таълимот] Физиканинг ёпишқоқ, пластик ва қайишқоқ моддаларнинг (муҳитларнинг) оқувчанлиги ва деформацияланишини ўрганиш билан шуғулланадиган бўлими.

РЕОСТАТ [юн. rheos – оқиш, оқим + statos – тик турувчи, кўзғалмас] *физ.* Электр занжиридаги ток кучини ёки кучланишни равон ёки поғонама-поғона ўзгартирувчи (тартибга солувчи) аппарат. *Лампали реостат. Реостат токи.*

РЕПАРАЦИЯ [лот. reparatio – қайта тиклаш] **1** *сиёс.* Урушда қўрилган зарарларни тўла ёки қисман қоплаш учун енгилган ва айбдор мамлакат томонидан голиб мамлакатга тўланадиган товон. *Репарация тўловлари. Репарация тўламоқ.*

2 *биол.* Барча организмлар ҳужайраларининг ташқи кимёвий ва физикавий омиллар таъсирида ҳаётий зарур (ДНК) молекулалардаги зарар-шикастларни қайта тиклай олиш хоссаси.

РЕПАТРИАЦИЯ [лот. repatriatio – ватанга қайтариш, қайтиш] *сиёс.* Уруш оқибатида ўз ватанидан четда қолган ҳарбий асирлар ва фуқароларни, шунингдек, фуқаролик ҳуқуқи қайта тикланган муҳожирларни халқаро битим ва келишувлар асосида ватанга қайтариш. *Репатриация қилмоқ.* ■ *Бунинг устига улар Швейцария ҳукуматиининг репатриация ҳақидаги талабини рад этса, бунинг учун белгиланадиган қамоқ жазоси мuddати бир ярим йилгача узайтирилиши қайд этилди.* Газетадан.

РЕПЕРТУАР [фр. repertoire < лот. repertorium – рўйхат, маълумотнома] Турли театр, концертларда ёки айрим хонанда

томонидан муайян давр мобайнида ижро этиладиган асарлар мажмуи. *Театр репертуари. Халқ ансамбли репертуари.* ■ *Кўнлаб театрларнинг репертуари тубдан янгиланди.* Газетадан. *Хонанда репертуарида С. Жалилнинг «Зебуннисо» операсидаги Зебуннисо ва бошқа кўнлаб бош ролларни кўраимиз.* Газетадан. *Ҳар йили янги репертуар яратиб, яккахон концертларимни тақдим этиб келаяман.* Газетадан.

РЕПЕТИТОР [лот. repetitor – орқага қайтаришни талаб қилувчи; такрорловчи] **1** Таълимда ўқувчининг маълум бир фан ёки курсни яхши ўзлаштириши учун пулли қўшимча машғулотлар ўтказувчи шахс (ўқитувчи).

2 Олий ўқув юртига кирадиган ўқувчига мактаб дастурини ўзлаштиришига ёрдам берувчи шахс; уй ўқитувчиси. *Ҳатто тайёргарлигим мукамал бўлиши учун репетиторга ҳам қатнадим.* Газетадан. *Ҳозирги кунда ота-оналар фарзандларини ўқишга киритиш учун албатта репетитор ёллайдилар.* Газетадан.

РЕПЕТИТОРЛИК Репетитор фаолияти, репетитор бўлиб ишлаш; абитуриент ва ўқувчиларга маълум ҳақ эвазига дарс ўтиш. *Репетиторлик қилмоқ.* ■ *Аксарият билим даргоҳларидаги пулли репетиторлик курслари йил давомида фаолият кўрсатаяпти.* Газетадан. *Умуман олганда, расмий таълим тизимисиз репетиторлик мавжуд бўлиши мумкин эмас.* Газетадан.

РЕПЕТИЦИЯ [лот. repetitio – такрорлаш, қайтариш] **1** Театр, эстрада, цирк томошалари, концерт дастурлари, айрим чиқишлар, сахналарни режиссёр раҳбарлигида кўп марта такрорлаш орқали тайёрлашнинг асосий шакли. *Бадийий ҳаваскорларнинг сўнги репетицияси бормоқда.* А. Алиев, Диққат, репетиция боряпти. *Нима бўлганда ҳам, бугунги учрашув жамоамизга келгусидаги мураккаб баҳслар олдидан навбатдаги репетиция вазифасини ўташига ишониб қоламиз.* Газетадан.

2 *мус.* Айни бир товушнинг клавишли ва б. мусиқа асбобларида тез такрорланиши.

РЕПЛИКА [фр. replique < лот. replico – қаршилиқ, норозилиқ билдираман] **1** ҳуқ. Суд жараёнида бирор томоннинг қаршилиқ, норозилиқ билдириши.

2 снт. Саҳна диалогиди партнёрнинг жавоб нутқи, бирор персонажнинг охириги, яъни бошқа персонаж нутқи бошланишидан олдинги сўзи.

3 Съезд, мажлис ва ш.к. ларда ўтирган жойидан туриб айтилган фикр, мулоҳаза; луқма ташлаш.

4 Муסיқа фразасининг бошқа овоз билан ёки бошқача тон билан такрорланиши.

РЕПОРТАЖ [фр. reportage < ингл. report — хабар бермоқ, хабардор қилмоқ] Воқеа содир бўлган жойнинг ўзидан матбуот, радио, телевидение орқали зудлик билан хабар етказиш; шундай хабарнинг ўзи. *Газета илғор теримчилар ҳақида репортажлар босиб бормоқда. Футбол матчи ҳақида репортаж. Янгилик репортажнинг асоси ҳисобланади.* ■

Воқеа содир бўлган жойдан репортаж. Газетадан. Репортажда образли иборалар баъзан муқаддима ва хулосада учрайди. Газетадан.

РЕПОРТЁР [ингл. reporter] қ. **мухбир**. *Газета репортёри.*

РЕПОРТЁРЛИК қ. **мухбирлик**. *Репортёрлик вазифаси. Репортёрлик қилмоқ.*

РЕПРЕССИВ Репрессия, жазо ва қатагонлардан иборат бўлган, шунга асосланган. *Репрессив чоралар.*

РЕПРЕССИЯ [лот. repressio — куч билан бостириш, тўхтатиш] Давлат органлари томонида номақбул, номатлуб деб топилган аҳоли қатламга нисбатан қўлланадиган жазо чораси, қатагон қилиш. *Репрессия чоралари. Репрессия қилмоқ.* ■ *..Бундай ёзувчиларнинг оқланганлиги уларнинг 30-йилларда репрессия қилинганлиги нотўғри бўлганлигини кўрсатади, холос. «ЎТА». Шўро ҳукумати шундай репрессия қиладики, бундан ҳеч қайсингиз ўзингизни четга олиб, қутулиб қололмайсиз. К. Яшин, Ҳамза. Ассосиз тарзда репрессияга дучор бўлган кишиларнинг орномуси, қадр-қиммати, покиза номини тиклашни ўзимизнинг биринчи галдаги бурчимиз деб биламиз. Газетадан.*

РЕПРИВАТИЗАЦИЯ [ре.. + привати-зация] *иқт.* Илгари давлат ихтиёрига олинган ер-мулк, корхона, банк, акция кабиларни қайтадан хусусийлаштириш. *Реприватизация қилмоқ.*

РЕПРОДУКТИВ [ре.. + лот. productio — ишлаб чиқариш, ҳосил қилиш]: **репродуктив аъзолар** *биол.* Ўсимлик ва ҳайвонларнинг кўпайиш функциясини бажарадиган

аъзолар. **Репродуктив саломатлик** Инсон саломатлигини қайтадан тиклаш; қайтадан тиклан(ади)ган соғлиқ. *Сўнги йилларда мамлакатимизда оналар ва болаларни ижтимоий ҳимоялаш, репродуктив саломатликни сақлаш борасида қатор ибратли ишлар амалга оширилди. Газетадан. Республика болалар ва туғруққа ёрдам бериш муассасаларининг моддий-техника базасини мустаҳкамлаш, аҳолининг репродуктив саломатлигини муҳофаза қилиш тизимини такомиллаштириш борасида муайян натижаларга эришилди. Газетадан.*

РЕПРОДУКТОР [ре.. + лот. producere — ҳосил қилмоқ, яратмоқ] **1** Радиоэшиттиришни кучайтирувчи аппарат; радиокарнай. *Маҳкам.. икки дераза оралиғига осилган кичкина репродукторни буради. П. Қодиров, Уч илдиз. У [Шербек] кўчага чиққанида, узоқдан репродукторнинг товуши эшитилар эди. «Клубда пластинка кўйишяпти», деди ўзига ўзи. С. Анорбоев, Оқсой.*

2 Информацияларни кўчириб ёзишда қўлланадиган аппарат.

РЕПРОДУКЦИЯ I [ре.. + лот. productio — ишлаб чиқариш, ҳосил қилиш] **1** Расм, сурат, чизма ва ш.к. лардан полиграфия ёки фотография усули билан нусха олиб кўпайтириш. *Репродукция қилмоқ.* ■ *Муҳарририят деворий расмлар репродукцияларини тайёрлаганликлари учун меъморларга ўз миннатдорчилигини билдиради. «Фан ва турмуш».*

2 Шундай нусханинг ўзи. *Репродукциялар альбоми.*

3 *псхл.* Хотирада сақланган нарсаларни қайта тиклаш, жонлантириш.

4 *биол.* Организмларнинг ўзига ўхшаш организмларни яратиши, ҳосил қилиши.

РЕПС [ингл., фр. reps] Пишиқ қалин жун, ип ёки ипак газлама (уст кийим ва пойабзал тикиш учун ишлатилади).

РЕСПИРАТОР [лот. respiro — нафас оламан] **1** *сфт. тиб.* Нафас олишга, нафас аъзоларига оид. *Респиратор касалликлар.* ■ *«Оқтош» санаториясида респиратор ва астматик касалликларга чалинган кекса кишилар учун бино ва бошқа объектлар қурилиши бошланди. Газетадан. Мамлакатимизда респиратор ва бошқа вирусли касалликлар бўйича эпидемиологик барқарорликни таъминлаш муҳим аҳамият касб этади. Газетадан.*

2 Инсон нафас олиш аъзоларини заҳарли газ ва чангдан сақлайдиган индивидуал ҳимоя мосламаси. *Респиратор тақмоқ.*

РЕСПОНДЕНТ [*ингл. respond* — жавоб бермоқ] Ижтимоий сўровда қатнашувчи шахс; анкета саволларига жавоб берувчи киши.

РЕСПУБЛИКА [*лот. res publica* — умумхалқ, жамоатчилик иши < res — иш + publica — ижтимоий, умумхалқ] Олий давлат ҳокимияти маълум муддатга сайланадиган ҳокимият органи (президент ёки парламент)га тегишли бўлган бошқарув шакли; шундай бошқарув шаклига эга бўлган давлат. *Биз республикамиз пойтахтининг ўзгаллиги билан фахрланамиз ва унинг шуҳратига шуҳрат қўйишига ҳамisha интиламиз.* Газетадан. *Республикамизнинг деярли барча ҳудудларида шаҳарлар қиёфаси ўзгарди ва ободонлашди.* Газетадан.

Парламентар республика Парламент тўлиқ ҳокимиятга эга бўлиб, ҳукумат унинг олдида сиёсий жавобгар ҳисобланадиган, парламент томонидан сайланган президент эса фақат давлат бошлиғи, ижро этувчи ҳокимият бошлиғи саналадиган давлат бошқаруви шакли. **Президентлик республикаси** Президент умумхалқ сайловида сайланадиган ва бир вақтнинг ўзида давлат ва ижро этувчи ҳокимият бошлиғи ҳисобланадиган давлат бошқаруви шакли (Ўзбекистонда президентлик республикаси бошқарув шакли амал қилади).

РЕСПУБЛИКАЧИ **1** Республика тарафдори, республика тузумини ёқловчи.

2 Айрим мамлакатларда, мас., АҚШда: республикачилар партиясининг аъзоси.

РЕССОР(А) [*фр. ressort* — пружина; тараглик, қайишқоқлик] Транспорт воситаларида уларнинг филдираклари ўқини кузов билан бирлаштирувчи ва йўлнинг нотекислигидан пайдо бўладиган зарбалар кучини пасайтирувчи қайишқоқ, эгилувчан қисм. *Автомобиль рессораси. Рессора болти.*

РЕСТАВАТОР [*лот. restaurare* — янгиламоқ, қайта тикламоқ] **1** Эскирган ёки бузилган бадиий асарларни, архитектура ёдгорликларини тикловчи, асл ҳолига келтирувчи мутахассис. [*Мухиддин*] *Бу соҳада ҳақиқий ижодкор олим ва моҳир реставратор эканини кўрсатди.* «Шарқ юлдузи».

2 *сиёс.* Реставрация тарафдори, инқилоб йўли билан ағдариб ташланган тузумни тиклаш учун курашувчи.

РЕСТАВРАЦИЯ [*лот. restauratio* — тиклаш, қайта яратиш] **1** Даврлар ўтиши билан эскирган ва маълум қайта ишлашлар натижасида асл ҳолини йўқотган, бузилган санъат асари ёки архитектура ёдгорликларини, археологик қазилмалар ва қадимий скелетларни дастлабки ҳолатига келтириш, тиклаш ҳамда тикланган асарлар, нарсаларнинг ўзи. *Реставрация қилмоқ. Ўзбекистондаги тарих музейи реставрация қилинди.*

■ *Энг қувонарлиси, Вазирлар Маҳкамасининг махсус қарори асосида Шоҳи Зинда ёдгорлик мажмуаси тўлиқ реставрация қилинди.* Газетадан. *Бошқа томондан, деярли икки юз йиллик тарихга эга бўлган жиҳозлар реставрация қилиниши ва мутахассислар назорати остида бўлиши зарур эди.* Газетадан.

2 *сиёс.* Инқилоб йўли билан ағдариб ташланган эски тузум ёки салтанатни тиклаш.

РЕСТОРАН [*фр. restaurant* — (едириб-ичириб) тетик қилувчи, қувват берувчи < restaurer — қайта тикламоқ] **1** Мижозларга юқори даражада хизмат кўрсатадиган, муסיқа эшитиб, рақс тушиш, қимматли егулик ва ичимликларга буюртма бериш мумкин бўлган умумий овқатланиш корхонаси. *Кеч-қурун меҳмонлар билан танишиш учун ресторанга тушганида, биронта ҳам таниш учратмади.* Л. Тожиева, Меҳрим сизга, одамлар.

2 Ана шундай корхона жойлашган бино.

РЕСТОРАНЧИ Ресторан хўжайини ёки ходими.

РЕСУРС [*фр. ressource* — ёрдамчи восита, усул; пул маблағи] Инсон турмуш шароитини янада яхшилаш учун зарур бўлган нарсаларнинг мавжуд захираси. *Ички ресурслар. Хомашё ресурслари. Ўзбекистоннинг табиий ресурслари.* ■ *Молиявий ресурслардан қанчалик тежамкорлик билан фойдаланилаётганлиги ҳам ҳисобга олинаётир.* Газетадан. *Вилоят [Самарқанд] хомашё ресурсларига эга минтақалардан ҳисобланади.* Газетадан. *Аҳоли маблағидан унумли фойдаланиш ҳисобига ресурс базасини мустаҳкамлашга етарли эътибор бериланти.* Газетадан.

РЕТОРТА [*лот. retorta* — орқага бурилган] *махс.* Қийин эрувчи шиша, чинни ёки

металлдан нок шаклида ясалган, узун най-часи бир томонга букилган лаборатория идиши.

РЕТРАНСЛЯЦИЯ [ре.. + трансляция] Марказий радиостанция эшиттиришларининг маҳаллий станциялар томонидан олиб эшиттирилиши ва шундай эшиттиришларнинг ўзи. *Узоқ масофалардан алоқа боғлашнинг халқаро системаларини вужудга келтирмоқ учун Ернинг сунъий йўлдошларидан ретрансляция станциялари сифатида фойдаланилади.* «Фан ва турмуш».

РЕТУШЛАМОҚ Турли хил расм ва тасвирларни ретушь йўли билан тузатмоқ, тўғриламоқ.

РЕТУШЧИ Ретушь қилувчи, ретушловчи киши.

РЕТУШЬ [фр. retouche — ўзгартириш, тўғрилаш] Расм, фотосурат, негатив ва ш.к. тасвирларнинг кам-кўстини қалам, бўёқ ва ш. к. билан тўғрилаш, тузатиш. *Ретушь қилмоқ.*

РЕФЕРАТ [лот. referre — билдирмоқ, хабар қилмоқ] **1** Муайян мавзуга бағишланган, тегишли бадиий, илмий ва б. манбалар шарҳини қамраб олувчи маъруза. *Реферат тайёрламоқ.*

2 Бирор илмий асар, китоб, мақола мазмунининг қисқача ёзма баёни.

РЕФЕРЕНДУМ [лот. referendum — хабар берилиши, маълум қилиниши зарур бўлган нарса] Давлат аҳамиятига эга бўлган муҳим масалалар бўйича ўтказиладиган ва баъзан қонунлар қабул қилиш учун асос бўлиб хизмат қиладиган умумхалқ сўрови, овоз бериш йўли билан халқ фикрини аниқлаш. *Умумхалқ (умуммиллий) референдуми.* ■ *Референдум ўтказиш тартиби қонун билан белгиланади.* Газетадан. *Овоз бериш референдум белгиланган кун.. амалга оширилади.* «Ҳаёт ва қонун». *Референдум ўтказиш тўғрисидаги масалани биз сессиянинг энг муҳим масалаларидан бири, деб ҳисоблаймиз.* Газетадан.

РЕФЕРЕНТ [лот. referens, referentis — хабар берувчи, маълумот берувчи] **1** Реферат тайёрловчи, уни ўқиб берувчи; маълумот, хабар берувчи шахс. *Бу эса икки мутахассислик: испан тили бўйича филологлар ва таржимон-референт бўладиган талабалар учун бугунги Испания ҳаётини ўрганишга катта омил бўляпти.* Газетадан.

2 Раҳбар ходим топшириқларини бажа-рувчи, унга маълум масалалар бўйича мас-лаҳат берувчи, тегишли маълумотлар асо-сида маърузалар тайёрловчи лавозимли шахс. *Этиборлиси, референтларнинг аксарияти энг чекка ҳудудларимиздан келган.* Газетадан.

РЕФЕРИ [ингл. referee < лот. refero — ха-бар қиламан] Спорт мусобақалари (мас., футбол, кураш, бокс, теннис кабилар)ни ўтказувчи ҳакам, судьянинг халқаро ном-ларидан бири.

РЕФЛЕКС [лот. reflexus — қайтариш, акс эттириш] Организмнинг у ёки бу ташқи таъ-сирга олий нерв системаси орқали рўёбга чиқадиган акс таъсири, жавоб реакцияси. *Рефлекс марказлари.* ■ *Чайнашнинг аҳа-мияти шуки, ошқозон шираси рефлекс орқа-ли чиқа бошлайди.* Н. Исмоилов, Касаллар-ни парвариш қилиш.

РЕФЛЕКСИЯ [лот. reflexio — ортга қай-тиш, акс этиш] флс. Кишининг ўз хатти-ҳаракатлари ва уларнинг асосларини тушу-ниб етиши, фаҳмлашига қаратилган назарий фаолияти; билишнинг алоҳида бир шакли.

РЕФЛЕКТИВ Рефлекс натижасида рўй берадиган, беихтиёр. *Рефлектив ҳаракат.*

РЕФЛЕКТОР [лот. reflectere — акс эттир-моқ, орқага бурмоқ] **1** Ёруғлик, товуш, ис-сиқлик тўлқинлари, электромагнит энергия оқимлари йўналиши ва жадаллигини ўз-гартириш учун мўлжалланган қайтаргич ку-рилма.

2 Кўзгули (асосий ботиқ кўзгу ва қўшим-ча қавариқ ва ясси кўзгулар) объектив би-лан жиҳозланган телескоп.

3 Электр лампа ва қайтарувчи-акслан-тирувчидан иборат иситиш асбоби.

РЕФЛЕКТОРЛИ Рефлекторга эга бўл-ган, рефлектор ўрнатилган. *Рефлекторли лампа.*

РЕФОРМА [фр. reforme < лот. reformare — қайта курмоқ, тубдан ўзгартирмоқ] қ. **ис-лоҳ, ислоҳот.**

РЕФОРМАТОР [лот. reformator — тубдан ўзгартирувчи] эск. Ислоҳ (реформа) ўтка-зувчи, қайтадан қурувчи, тубдан ўзгарти-рувчи; ислоҳотчи.

РЕФОРМАЦИЯ [лот. reformatio — ўзгар-тириш, ислоҳ қилиш] тар. 16-асрда Фарбий ва Марказий Европада катта ер эгалари ва уларнинг асосий таянчи — католик черко-

вига қарши курашган ижтимоий-сиёсий, диний-идеологик ҳаракат. *Реформация даври.*

РЕФОРМИЗМ [лот. *reformare* — тубдан ўзгартирмоқ, ислоҳ қилмоқ] *тар.* 19-аср охириларида капитализм доирасида ислоҳ (реформа)лар ўтказиш ёрдамида социализмга ўтиш учун асос яратишга интилган сиёсий оқим. *Реформизм таъсирида мухолифат нисбатан тинчроқ жабҳа — ғоялар курашига кўчса-да, лекин шиддатини сусайтирмайди.* Газетадан.

РЕФРАКТИСТ Реформизм тарафдори.

РЕФРАКТОР [лот. *refractus* — синган; эгилган] *астр.* Осмон ёритқичларидан келадиган нурларнинг бир ёки бир неча линзалар объективда синиши натижасида уларнинг тасвири ҳосил бўладиган телескоп.

РЕФРАКЦИЯ [лот. *refractio* — синиш] **1** *физ.* Ёруғлик нурларининг бир муҳитдан иккинчи муҳитга ўтишида синиши, шунингдек, товуш нурлари йўналишининг бир жиқли бўлмаган муҳитда синиши, эгриланиши.

2 *астр.* Ер атмосферасидан ўтиб келадиган нурларнинг синиши натижасида осмон ёритқичларининг ўз ўрнидан силжиганга ўхшаб кўриниши.

РЕФРИЖЕРАТОР [фр. *refrigerateur* < лот. *refrigerare* — совитмоқ, музлатмоқ] **1** Музлаткичларнинг суяқликни буғлатиб, паст температура ҳосил қиладиган қисми, буғлаткичи.

2 Ғўшт, сут ва ш.к. тез бузиладиган маҳсулотларни паст температурада ташиш учун махсус музлаткич билан жиҳозланган кема, вагон ёки автомобиль.

РЕЦЕНЗЕНТ [«рецензия» с. дан] қ. **тақризчи.** *Рецензент унинг асарига рецензия ёзиб берди.*

РЕЦЕНЗИЯ [лот. *recensio* — текшириш, кўриб чиқиш] қ. **тақриз.** *Ижобий рецензия. Рецензия ёзмоқ. ■ Уларнинг китоблари тўғрисида нари борса кафтдеккина рецензия битиш билан чекланиб қўя қоласизлар.* Газетадан. *— Рецензия дегани ана шунақа тиштинроқли, тишлаб оладиган бўлса, — деди муҳаррир.* С. Абдуқаҳҳор, Санамай саккиз дема.

РЕЦЕПТ [лот. *receptum* — олинган, қабул қилинган нарса] *тиб.* **1** Врачнинг дори таркиби, дозаси ва ундан қандай фойдаланиш ҳақида беморга (одатда дорихона учун)

берадиган ёзма кўрсатмаси. *Рецепт билан дори олмоқ. Рецепт ёзиб бермоқ. ■ Одамлардан рецептларни қабул қилиб, дафтарга қайд этиши, тайёр дориларни эгаларига бериш, дориларни қандай тайёрлаш — бари кишидан қунт талаб қилади.* С. Анорбоев, Меҳр.

2 Бирор нарсани тайёрлаш ҳақида қоида ва маълумотлар мажмуи (мас., тайёрлаш йўллари, қанча масаллиқ, доривор кераклиги ва ш.к. ҳақида). *Пиво рецепти. Торт рецепти. Печенье рецепти.*

3 *кўча с.т.* Оғир, нокулай ҳолатлардаги ҳаракатлар учун тайёр йўл-йўриқ, қолип, андаза. *Ҳар хил вазиятга ярайдиган, ҳаммабоб ахлоқий-эстетик қоидалар рецепти йўқ.* Р. Усмонов, Одобнома. *Биз илгари дуч келмаган ўта мураккаб.. бир-биридан оғир масалаларни ечиш учун тайёр рецептлар бўлмаган ўша дастлабки пайтларда бундай иккиланиш ҳолатлари юз бериши ҳам табиий эди.* Газетадан.

РЕЦЕПТОРЛАР [лот. *receptor* — қабул қилувчи] *биол.* Ташқаридан ёки организмнинг ички муҳитидан юзага келадиган қўзғалиш (таъсир)ларни қабул қилиб, уларни нерв қўзғалишларига айлантириб, марказий нерв системасига ўтказиб берадиган сезувчи нерв толаларининг учлари ёки махсус хужайралар. *Кўз рангдор пардаси беш қават тузилган бўлиб, минглаб рецепторлар ёруғлик импульсларини қабул қилади.* «Фан ва турмуш».

РЕЦИДИВ [лот. *recidivus* — қайталанувчи] **1** Ғўё йўқ бўлиб кетгандек туюлган бирор нарсанинг, ҳодисанинг такрорланиши, такрор юз бериши.

2 *тиб.* Бирор касалликка учраган ва тuzала бошлаган беморда мазкур касалликнинг қайталаниши.

3 *ҳўқ.* Аввалроқ бирор жиноят учун жазоланган кишининг яна шундай ёки шунга ўхшашроқ жиноят содир қилиши.

РЕЦИДИВИСТ [«рецидив» с. дан] Такрор жиноят содир этган шахс.

РЕЦИПИЕНТ [лот. *recipientis* — олувчи, қабул қилувчи] *биол.* Бирор (одатда соғлом) организмнинг муайян аъзоси, тўқимаси, ҳужайраси кўчириб ўтказиладиган бошқа тирик организм (одам ёки ҳайвон).

РЕЧИТАТИВ [итал. *recitativo* < лот. *recitare* — овоз чиқариб ифодали ўқимоқ]

Баъзи вокал мусиқа асарларининг (мас., операнинг) куйга мос ҳолда оддий тилда айтиладиган ёки бадий оҳангда ўқиладиган сўзлари. *Операнинг асосий вокал шакллари* — *речитатив, ария, ариозе, ансамбль ва хорлар ҳисобланади*. Ҳ. Носирова, Опера ҳақида айрим тушунчалар.

РЕША [ф. ريشه — илдиз, томир; тола] *эск. кт.* Илдиз, томир. *Бориб анга кесди яғоч решасин, Кўйди ўшал ерда унутиб тешасин.* Гулҳаний.

РЕЭВАКУАЦИЯ [ре.. + эвакуация] Уруш, табиий офатлар туфайли хавфсиз ҳудудларга кўчирилган аҳоли ва муассасаларни, уларга тегишли мол-мулкларни, уруш ва табиий офат оқибатлари бартараф этилгач, аввалги жойига қайтариш.

РЕЭКСПОРТ [ре.. + экспорт] *икт.* Чет эллардан келтирилган молларни, қайта ишлов бермай, бошқа бирор мамлакатга қайта сотиш.

РЕЭМИГРАНТ *эск.* Муҳожирликдан ўз ватанига қайтиб келган киши.

РЕЭМИГРАЦИЯ [ре.. + эмиграция] Ўзга мамлакатларда яшаётган кишилар — муҳожирларнинг ўз ватанига қайтиши.

РИБО [а. ربا — судхўрлик; порахўрлик] *эск. кт.* 1 Пулдан эвасиз фойда (фоиз) олиш; ғайриқонуний фойда; судхўрлик.

2 *икт.* Қарзга берилган пулдан олинadиган фойда; фоиз, суд.

3 *кт.* Пора. *Қулоқ солинг, қайси виждон билан «фалон муфти рибо еди.. бу мударрис ҳам ислом оламига хиёнат қилишликни қабул қилди», деб айтасиз? «Шарқ юлдузи». Бугун ён-атрофимизда мункир ишлар урчиб кетган: ўғирлик, бузуқлик, алдов, рибо, хиёнат, фиқс.. «Мусулмонлар тақвими».*

РИБОХЎР [а. + ф. رباخور — судхўр, порахўр] *эск. кт.* Фойдахўр, судхўр.

РИВОЖ [а. رواج — тарқалиш, ёйилиш, кенгайиш; оммалашуш; пулнинг айланиши] 1 Бир сифат ҳолатидан иккинчи, юқори сифат ҳолатига ўтиш, ўсиш, юксалиш; тараққиёт, равнақ. *Фан ва техника ривож.* Ноҳақ ишга ривож йўқ. Мақол. ■ [Сафаров:] *Хўжайин бўлгандан кейин киши ўз хўжалигининг кам-кўсти, унинг ривож* тўғрисида *уйлайди, жон куйдиради.* А. Қаҳҳор, Кўшчинор чироқлари.

2 Ўсиб-униш, улғайиш, авж. *Пахтанинг ривож* яхши.

3 Муваффақият; равнақ, юксалиш. *Бу савдогар [Абдулзий] ишининг ривож* ва *кўраётган фойдаларидан оғиз очмади.* Ойбек, Навоий. *Дўстлик бўлмаган жойда ишининг ривож* ҳам бўлмайди. С. Зуннунова, Янги директор. *Сенга бахтдан тахт тиларман, Толедан бошингга тож, Мулки ҳуснингга омонлик, Тожу тахтингга ривож.* Э. Воҳидов, Муҳаббат.

РИВОЖ БЕРМОҚ Ривожлантирмоқ, юксалтирмоқ. *Эҳтимол, у подшоҳ илм-маърифатга ривож бериб, аҳли фузалога меҳрибонлик кўрсатар.* Мирмуҳсин, Меъмор. **РИВОЖ ОЛМОҚ** (ёки **ТОПМОҚ**) ёки **РИВОЖГА МИНМОҚ** 1) равнақ топмоқ, юксалмоқ, ўсмоқ, тараққий этмоқ. *Сўзни билган зарга бўлмайди муҳтож, Зар қиммати топар сўз билан ривож.* «Ақл ақлдан қувват олади». — *Муҳтарам карвонбоши, илоҳи сафарингиз бехатар бўлсин, савдонгиз ривож топсин, ҳузурингизга бир илтимос билан келдим, — деди бир карвонбоши иккинчисига.* Р. Файзий, Чўлга баҳор келди. *Ҳа, майли, ишларинг ривожига миниб, станцияларинг битсин.* С. Аҳмад, Қадрдон далалар. *Тадбиркорлик ўз-ўзидан давлат иштирокисиз, унинг ёрдამисиз ривож топмайди.* «Иқтисодий назария»; 2) кучаймоқ, зўраймоқ, авж олмоқ. *Боғиэфзал қишлоқларида қадимги замонларда бир неча катта бойлар бўлиб, улар орасида қулдорлик жуда ривож топган экан.* С. Айний, Эсдалиқлар; 3) ўсиб-унмоқ, улғаймоқ. *Ғўзалар яхши ривож олмоқда;* 4) муваффақият қозонмоқ. *Асриян ишга қанчалик диққат бермасин, ривож топмади.* Шухрат, Шинелли йиллар.

РИВОЖЛАНМОҚ 1 Равнақ топмоқ, тараққий этмоқ, ўсмоқ; юксалмоқ, гуллаб-яшнамоқ. *Бу ҳамкорлик бугунги кунда янада ривожланиб, янги-янги уфқлар очмоқда.* Газетадан. *Яхшилик ва фаровонлик илдизи илм билан ривожланади.* Газетадан. *Донишманд халқнинг оғзаки ижоди асрлар оша авлоддан авлодга, тиллардан тилларга ўтиб яшаб, ривожланиб келади.* Газетадан. *Қишлоқда ривожланган инфратузилмани барпо этсакки-на, қишлоқ хўжалигида кескин ўзгаришлар рўй бериши мумкин.* Газетадан.

2 Ўсиб-унмоқ, улғаймоқ, авж олмоқ. *Экинлар яхши ривожланмоқда.* ■ *Яхши парвариш қилинган ғўзалар мавж уриб ривожланыпти.* Газетадан.

РИВОЧ [ф. ريواس] қ. **ровоч**. Меҳмон келса, жойи тўр, жавзо келмай, ривоч сўр. ■ Қир этакларида ўсган ривочни топиб, чайнаб кўрдим. Бу ўт менга сув ўрнини босгандай бўлди. Ғайратий, Унутилмас кунлар.

РИВОЯ [а. روايه — ҳикоя, қисса; афсона] Адабий асарда воқеаларни изчиллик билан сўзлаб бериш, баён этиш; баён.

РИВОЯТ [а. روايت — ҳикоя, қисса; афсона] 1 Авлоддан авлодга ўтиб келаётган, воқеа ва ҳодисаларни, инсон фаолиятини баъзан уйдирмалар воситасида, баъзан реал тасвирловчи оғзаки ҳикоя; нақл, афсона. Мавлоно Лутфий каби кекса шоир ҳали гўдак Навоийнинг ўзбек тилидаги бир байти учун ўзининг.. жамики ғазалларидан воз кечишга тайёр эканини билдирган экан. Бу ривоятга не дейсиз? Ойбек, Навоий. Баъзи ривоятларга қараганда.. фаришталар, жаннатдаги кавсар сувидан қумғонларимизга қуйиб кетар эмиш! М. Муҳаммаджонов, Турмуш уринишлари. Денгиз, кўҳна ривоятлардан Биттасини сўйлаб бер менга. Э. Воҳидов, Нидо.

2 Умуман, оғиздаги гап, ҳикоя. Ривоят қилишларича, Деҳлида шоҳ Акбар ҳукмронлик қилган замонда бир савдогар яшар экан. Газетадан. Ривоятларга қараганда, баъзи бир иссиқ мамлакатларнинг одамлари ҳароратдан дармонлари қуриб кун кечирганлар. Газетадан.

3 кўчма дин. Бирор масала юзасидан шариат қонунлари асосида чиқарилган ҳукм, ҳулоса. [Ғофир қозига:] Бу қандай зулм.. севган хотинимни зolim бой тортиб олмоқчи бўлса-ю, менга ёрдам бериш ўрнига бойнинг ёнини оласиз! Ривоятлар топасиз! Фатволар ясайсиз! Ҳамза, Бой ила хизматчи. Уламолар Ёдгор ва унга эргашиб келган хотинни тошбўрон қилиш тўғрисида ривоят ёзиб, эшон Султонга бердилар. С. Айний, Дохунда.

РИВОЯТЧИ Ривоят тўқувчи, ривоят айтувчи; ровий.

РИДО [а. رداء — халат, кийим] 1 Шайхлар, умуман руҳонийлар елкасига ёпинадиган чойшабсимон ёпинчиқ, либос; дарвишларнинг устки кийими. Баъзи бурчакларда қора ридо кийган роҳиблар китоб варақлар, у ер-бу ерда олимлар қўлёзмаларга тикилиб ўтирарди. Ҳ. Фулом, Куба ҳақида ҳикоялар. Уфқни ўз гавдаси билан тўсган наст-баланд тоғлар қоп-қорайиб, ридо

кийгандек силлиқ кўринади. Шухрат, Шинелли йиллар.

2 кўчма кт. Қоронғилик, зимистон, қора тун. Эй йироқлар эркаси, сен Лутф эт-у ёнимда қол, Жисму жонингга бу севгим бўлмаса оғир ридо! А. Қаҳҳор, Оқ ўрик. Келар қора ридо кийган тун, сукунатнинг қушларин суяр. Ш. Раҳмон, Юрак қирралари.

РИЕЛЬ Камбоджа Қироллигида пул бирлиги.

РИЁ [а. رياء — иккиюзламалик, мунофиқлик; носамимийлик] Мунофиқона хатти-ҳаракат; иккиюзламалик. Қўшиқларим билмай ғаш, риё, Ошкор қулдим, ошкор чекдим ғам. Зулфия, Хаёллар. Туйғулар оламни пайпаслаб мисли ногирон, Топанлари бўлди жаҳолат, риё. А. Орипов, Йиллар армони. Фақир одамнинг дили равшан, риё ва макрдан холи, раҳм-шафқатга лиммо-лим бўлади. Газетадан. Анвар самимий ва риё аралаш табриклардан унғайсизланган эди. А. Қодирий, Меҳробдан чаён.

Аҳли риё ёки риё аҳли Мунофиқлар, риёкорлар. Самимий ошноман деб, ҳамиша айбинг истовчи, Тили дилга мувофиқ бўлмаган аҳли риёдан кеч! Ҳабибий. Риё аҳлининг алдоқ ҳурматига нафратим бордур. Э. Воҳидов, Муҳаббатнома. **Риё қилмоқ** 1) иккиюзламалик, мунофиқлик қилмоқ; 2) риёкорлик билан эзгу ишни йўққа чиқармоқ.

РИЁЗАТ [а. رياضت — гимнастика машқлари, спорт машғулоти; математика; қийинчилик, машаққат] 1 Қийинчилик, машаққат, оғир меҳнат, заҳмат. Нега мени йўқла-мас дўстлар, Бир дўст, дея чекмас риёзат? Кимдир бугун ҳолимга кулар, Кимдир менга қилар хиёнат. А. Пўлкан, Изҳор. Бу изтироб кўнглини лаҳза сайин юксалтириб борар, чеккан ниҳоясиз риёзат ва азоблари эвазига унга юпанч берар, ҳамдard бўлмоққа ваъда этар эди. Ҳ. Султонов, Онамнинг юрти. Педагог обрўйини топиш учун чуқур билим эгаллаб, ақлу одоб касб этиб, бир умр ғалол риёзат чекмоқ лозим. Р. Усмонов, Одобнома.

2 дин. Дунёвий ишлардан ўзини, нафсини тийиб қийналиш, ўзини қийнаш; тасаввуфда тариқатнинг асосий шартларидан бири. Риёзатнинг натижаси — фақру фано, яъни илоҳий ахлоқ соҳиби бўлиш. Газетадан

РИЁЗАТЧИ с.т. қ. **риёзиётчи**. Дунёга донги кетган риёзатчилар, коинотишунослар шу жамоадан чиққан. Газетадан

РИЁЗИЁТ [a. رياضيات – математика, математик фанлар] қ. **математика**. Абу Наср.. вақтини риёзиёт, ҳандаса, фалакиёт илмларини ўрганишга сарф этар эди. М. Осим, Жайхун устида булутлар. Дарҳақиқат, Худодёрбекнинг риёзиётга асло тоқати йўқ, уни отда чопиш, қилич солиш, базм.. кўпроқ қизиқтирарди. Мирмуҳсин, Меъмор. Бу мактабларда ҳандаса, жуғрофия, риёзиётдан сабоқ бермоқдалар. С. Сиёев, Аваз.

РИЁЗИЁТЧИ Математика илми билан шуғулланувчи. Олим, фозил, риёзиётчилар, файласуфлар, – ҳозир бўлганлар фармонигизга мунтазилар. У. Исмоилов, Сайланма.

РИЁЗИЙ [a. رياضى – математикага, спортга оид] эск. айн. **математик**.

РИЁКОР [a. + ф. ریاکار – иккиюзламачи, мунофиқ] Мунофиқона иш қилувчи, мунофиқларча иш тутувчи одам; иккиюзламачи. Мен қорнидан бўлак ғами йўқ, риёкор, жоҳил уламоларни ёмон кўраман. С. Сиёев, Аваз. [Обидахон:] Эй, сен риёкор, маккор! Бир тўйни азага айлантириб, мағрур эдинг. Мана бу тўй – абадий. С. Абдулла, Мавлоно Муқимий. - Шу бугуноқ орани очди қиламан, риёкор хотин, – деди Камолитдин Нурига. С. Юнусов, Осон ишнинг охи бор.

РИЁКОРЛИК 1 Мунофиқлик билан шуғулланиш, мунофиқона хатти-ҳаракат, иккиюзламалик. Риёкорлик қилмоқ. ■ Наҳотки у [Эсон бобо] риёкорлик қилиб, милтиқни йўқолдига чиқарса? [деб ўйлади Нурилло] С. Юнусов, Қутилмаган хазина. Моманг риёкорлик билан отамнинг кўп пулини олди. «Гулихиромон».

2 Савобли, эзгу ишларни, хусусан хайр-эхсонни одамлар кўриб мақтасин, деб манманлик билан амалга ошириш. Салқин хона ичида ўтирган усталарнинг биронтаси ҳам Бойсунқур ёнида Аҳмад Чалабийнинг риёкорлик билан айтаётган гапларига жавоб тариқасида бирон сўз айтиша олмади. Мирмуҳсин, Меъмор.

РИЁКОРОНА [a. + ф. ریاکارانه] рвш. Риёкорлик билан, иккиюзламалик билан; мунофиқона. Риёкорона иш тутмоқ. Риёкорона хатти-ҳаракат. ■ Шундай экан, риёкорона ҳаёт кечириш бизнинг жамиятимиз аҳлига муносиб эмаслигини ҳар биримиз англаб етмоғимиз лозим. «Ҳаёт ва қонун».

РИЁЛ, **риал** [a. + ф. ريال] Саудия Арабистони, Эрон Ислом Республикаси, Яман, Қатар ва Уммонда пул бирлиги.

РИЖО [a. رجاء] кт. айн. **ражо**. Париваи Лайлисан, билсанг, Инон, гарчи тасаввур бу; Тафаккур не! Севолсанг, бас, Кўнгилда ранж, рижо йўқдир. А. Қаҳҳор, Оқ ўрик. Улар [Жаҳон опа] ялини рижо-ёлвориб, Ўғилойни кутқариб қолишни рижо қилғон эдилар. М. Осим, Карвон йўлларида.

РИЗВОН [a. رضوان – мамнунлик, мамнуният; хурсандчилик; розилик; хайрихоҳлик] 1 кт. Саккиз беҳиштнинг бири, розилик ва мамнуният жаннати. Келдинг оламга, демак, Ерни этмоғинг керак Бўстон ўзинг, ризвон ўзинг. Э. Воҳидов, Муҳаббат.

2 кўча Жаннатмисол боғ, боғ-бўстон. Қиёсинг ой, қуёш бўлмиш азадан.. Боболар куйлаган дилбар ғазалсан, Жаннатсан, ризвонсан, юртим, гўзалсан. У. Пўлкан, Бир баҳор достони.

РИЗО [a. رضاء – мамнунлик, хурсандчилик; розилик; хайрихоҳлик] 1 Розилик жавоби, розилик. Ризо қилмоқ. Ризо бўлмоқ. Сукут – аломати ризо. Мақол. ■ Олимхон аканинг олдида сўз бердим. Ота ризоси – фотиҳа билан баравар. Ойбек, Танланган асарлар.

2 кесим взф. Рози, рози бўлди, кўнди. Онажон, сизнинг шодлигингиз йўлида ҳар бир оғирликларга бу бахти қаро қизингиз ризодур, онажон! А. Қодирий, Ўтган кунлар. Эрта она тилим агар йўқолса, Мен бугун ўлишига бўлурман ризо. Э. Воҳидов, Муҳаббат.

РИЗОЛИК кт. айн. **розолик**. Ризолик бермоқ. Ризолигини олмоқ. ■ Ўзбек ойим боши билан келинига ризолик билдириб, «баракалла» деб қўйди. А. Қодирий, Ўтган кунлар. Қулингиз айтмоқчиманки, бундай муҳим ишда барча нуфузли бекларнинг ризолигини олмасак бўлмас. П. Қодиров, Юлдузли тунлар. Ахир келган-кетганга ризолик бериб, видолашиб ётган эмиш. Мен ҳам сўнги бурчимни адо этиб қўйсаммикан? Йўқ, энди дўстлик рийтаси узилди! С. Сиёев, Аваз.

РИЗОСИЗЛИК кт. айн. **норозилик**. Зайнаб эгачисининг ҳалиги гапига ризосизлик билдирди. А. Қодирий, Ўтган кунлар. Эрининг бу жасоратига қарши Офтоб ойимнинг юзига ризосизлик белгиси чиқди. А. Қодирий, Ўтган кунлар.

РИЗҚ [a. رزق – яшаш воситаси, таъминот; улуш, насиба] 1 Ҳаёт учун зарур озуқ, озуқа, қут, насиба, овқат. Қунт билан ўрган ҳунар, Ҳунардан ризқинг унар. Мақол. Меҳ-

мон келар эшикдан, Ризқи келар тешикдан. Мақол. ■ Ҳар бир одам дунёга келар экан, ўз ризқи билан туғилади, деган гап бор. «Ёшлик». ..Ризқи она ерга сепилган халқим, Ушоқ чигитни ҳам этмай деб увол, Миллион эгатларга эгилган халқим. А. Орипов.

2 кўчма Бирор иш, ҳаракат ва ш. к. учун асос бўлган нарса; озуқа, озиқ. *Қудрат.. ялмоғиз қашшоқликнинг заҳарли томирлари ўз [унинг] ризқини қаердан ва қандай олишини яхши билиб олди. М. Исмоилий, Фарғона т. о. Отлар даштларда қўйларга қараганда кўпроқ чидамли бўлади, ўз ризқини бемалол топиб ейди.* Газетадан. *Дон — инсоннинг, сомон — чорва молларининг ризқи.* Газетадан. *Бу ўрик меҳнатсевар деҳқоннинг меҳри ва муҳаббатидан ризқ олиб ўсарди. Ш. Рашидов, Бўрондан кучли.*

3 дин. Қуръони карим, Ислом динига кўра, худо ҳар бир киши, жонивор учун атаган, ўлчаб, белгилаб қўйган насиба, улуш. *Карвон кўп, ризқи бўлак. Мақол. ■ Оллоҳ йўлида ҳижрат қилган, сўнгера қатл қилинган ёки вафот топган зотларни, албатта, Оллоҳ гўзал ризқ билан руҳлантирар.* Газетадан. *Сен билан менинг тан-жонимиз соғ бўлса, бу жўжаларнинг ризқини худо беради.. К. Яшин, Ҳамза. [Зеби:] Йигит моли ерда, ҳар кимни худойи таоло ўз ризқи билан яратади, ўғлим. У. Исмоилов, Сайланма. Эй парвардигори олам, ўғлим Ҳамзахоннинг умрини узун, иқболини баланд, ризқини мўл қилгайсан. К. Яшин, Ҳамза.*

Ризқи тугамоқ Ўлмоқ, йўқ бўлиш, тугаш вақти келмоқ. *Гўдакнинг ризқи тугаб, куни битган. Тақдири азалда битилгани шундай бўлгач, начора! Бандалик экан.. К. Яшин, Ҳамза.*

РИЗҚЛАНМОҚ 1 Ризқ, озуқа олмоқ, озиқланмоқ, овқатланмоқ. *Тупроқдаги бактериялар ҳаводаги азот билан ризқланиб, азотли бирикмаларни ҳосил қилади. ■ Тақсир, мен хон бераётган пулга қизиқмайман, у пул ўзимни ҳам тўйғизмайди. Мени хунарим қизиқтиради, ундан ризқланаман. Ж. Шарипов, Хоразм.*

2 кўчма Бирор иш, ҳаракат ва ш. к. учун озиқ, озуқа олмоқ.

РИЗҚЛИ 1 Озуқа, овқат моддасига бой бўлган; тўйимли. *Ризқли моддалар. ■ Ҳаводаги азотдан ризқли моддалар тайёрлайдиган бактериялар нўхат, ловия, беда ва бошқа*

ўсимликларнинг илдизида кўп бўлади. Газетадан.

2 Насибали, ризққа эга, ризққа бой. *-Болаларингиз ҳамма вақт ризқли бўлишин. Илло, ўзинглар ҳам катта савоб иш қилгансизлар, у дунёю бу дунё кам бўлмасизлар, — деди чол Меҳринисага. Р. Файзий, Ҳазрати инсон. -Рост айтасиз, ризқли молда, қўлдан берганингизга қаноат қилмайди, энди кўклам чиқиб келаётир, бундан бу ёққа озгани озган, — деди канизлар. «Алпомиш».*

РИЗҚ-НАСИБА, ризқу насиба қ. ризқ 1, 3. *Инсон қаерда бўлмасин, ўз ризқу насибасини теради, фақат фидокорона меҳнати, она ерга муҳаббати туфайли бахт топади.* Газетадан. *Раҳматилла ва Нозимахон ўқишини тугатгач, ризқ-насиба экан, шаҳарда яшаб қолдилар. Х. Султонов, Онамнинг юрти. Сен билан бизнинг бу ердан ризқ-насибамиз узилди. П. Турсун, Ўқитувчи.*

РИЗҚ-РЎЗ, ризқи рўз [а. + ф. رزقروز — кун(да)лик ризқ, овқат] Кундалик ҳаёт учун зарур озуқа, овқат. *Тошкент қадим-қадимдан нон шаҳри, ризқ-рўз шаҳри бўлиб келган.* Газетадан. *Нон — ризқ-рўзимиз, фаровон ҳаётимиз кўрки, файзи, бебаҳо бойлигимиз.* Газетадан. *Пахта шундай бир мўъжизавий неъматки, у кўп жиҳатдан ризқи рўзимизни ҳам таъминлайди.* Газетадан.

РИКША [ингл. ricksha — яп. дзинрикиса < дзин — одам + рики — куч + ся — арава] Шарқий ва Жанубий Осиёнинг айрим мамлакатларида одам тортиб юрадиган, одам ва юк ташувчи икки гилдиракли қўларав ва шундай аравани тортиб юрувчи киши, ҳам-мол. [Ҳиндистонда] *Рикшадан тортиб, ялтироқ енгил автомобилларгача — ҳаммаси бор. З. Акрамов, Ҳиндистон лавқалари. Уша кун Пекинда рикша бир гўдак Очлик, ишсизликдан қотди кўчада.* Миртемир, Танланган асарлар. *Рикшалар ўтарди йўлда пилдириб, Иссиқдан тиқилиб жони ҳалқумга. Ҳ. Шарипов, Куёшга ошиқман.*

РИМ: Рим папаси қ. папа II. Рим рақамлари Қадимги римликлардан олинган I, II, III, V каби рақамлар.

РИНГ [ингл. ring — доира] *спорт.* Бокс мусобақалари ўтказиладиган, атрофи ҳимоя арқонлари билан ўралган чорбурчак майдонча. *Тренерлик иши эса негадир қовушмади. Сабабини айта олмайман. Лекин рингда секундантлик қилишида унга тенг келадигани*

йўқ. Газетадан. *Рингда бир неча бор зафар қучган ҳамюртимиз А. Григоряннинг жанг ўтказган қўлақонини кўрдим.* Газетадан.

Ринг қироли с.т. кўчма Бокс бўйича машхур чемпионларга берилган лақаб.

РИНГИТ Малайзиянинг асосий пул бирлиги; Малайзия доллари.

РИНД [ф. رند — чаққон, олғир; муғамбир; доворак, ботир; сохта художўй] **1** эск. кт. Шариат қоидаларига бўйсунмовчи; эркин фикр юритувчи; доворак. [Абдуваҳобнинг] *Ҳар бир ҳаракатини диққат билан кузатиб турган Мирҳайдар унинг ўзига яраша ринд табиатли киши эканини пайқади.* Мирмуҳсин, Тунги чақмоқлар. *Отасининг қадрдони, Ҳиротнинг мўътабар зотларидан бири — Бадиянинг отасини ўз эшигида кўриш ринд табиатли йигитни доводиратиб қўйди.* Мирмуҳсин, Меъмор. *Рўзимбой чойхонаси созандалар, умуман, ринд кишилар йиғиладиган ер эди.* С. Сиёев, Ёруғлик.

2 Тасаввуфда: ботинан художўй, тақводор бўлса-да, зоҳиран майхўр, ишратпараст бўлиб яшовчи киши.

РИНДЛИК Шариат қоидаларига бўйсунмаслик, эркин фикр юритишлик. *..Муқимийнинг риндлиги кўзий бошлади.* С. Абдулла, Мавлоно Муқимий.

РИНИТ [юн. rhis, rhinos — бурун] Тумов; бурун шиллиқ қаватининг яллиғланиши. *Ринит билан оғримок.*

РИНОЛОГИЯ [юн. rhis, rhinos — бурун + logos — фан, таълимот] тиб. Оториноларингологиянинг бурун тузилишини ўрганувчи, бурун касалликлари ҳамда уларнинг олдини олиш ва даволаш масалалари билан шуғулланувчи соҳаси.

РИНОСКОПИЯ [юн. rhis, rhinos — бурун + skopeo — қарайман, кузатаман] тиб. Бурункергич ва пешонага тақиладиган махсус ойнак ёрдамида бурун бўшлиғи ва деворини текшириш.

РИОЯ [а. رعاية — ғамхўрлик, парвариш; ҳомийлик, васийлик; амал қилиш, бўйсуниш] **1** Ҳурмат ёки юз-хотирлик юзасидан қилинган муомала; ҳурмат, андиша. *Улим деган нарса кўз ўнгига келиб тўхтагандан кейин, Отабекдек меҳмонлар риояси кўнглидан ювилур, сўзнинг тўғрисини айтишига мажбур бўлурлар.* А. Қодирий, Ўтган кунлар. *У [Азимжон] мастликда ҳеч кимни риоя*

қилмаслигини мингбоши яхши билар эди. М. Исмоилий, Фарғона т. о.

2 Бўйсуниш, амал қилиш, сақлаш. *Қонунга риоя қилмоқ. Тартибга риоя қилмоқ. — Аҳмаджон, командирнинг буйруғига қаттиқ риоя қилиб, жанг майдонини диққат билан кузатар эди.* А. Қаҳҳор, Олтин юлдуз.

РИОЯ-АНДИША айн. **риоя 1.** — «Эскилик, эскилик» деб юриб, яхши-яхши урф-одатларимизни йўқотиб юбордик. *Риоя-андишани унутдик, — деди Пирназар полвон.* Р. Раҳмон, Меҳр кўзда.

РИОЯЛИ Риоя, андиша қиладиган, андишали. *Риояли одам.*

РИОЯСИЗ Риоя, андиша қилмайдиган, андишасиз, беандиша. *Риоясиз аёл.*

РИОЯСИЗЛИК 1 Риоясиз эканлик. *Бу қадар риоясизлигиниз кишига қаттиқ таъсир қилади.* А. Қодирий, Меҳробдан чаён.

2 Риоясиз кишиларга хос хатти-ҳаракат; андишасизлик. *Риоясизлик қилмоқ.*

3 Бўйсунмаслик, амал қилмаслик. *Баъзи ҳолларда санитария назорати органлари.. санитарияга риоясизлик фактларини қуруқ қайд қилувчилар ролини бажарадилар, холос.* Газетадан.

РИСОЛА [а. رساله — юсак вазифа, ваколат; мактуб, нома; илмий асар, маъруза; хат-хабар] **1** тар. Бирор касбга, соҳага ва унинг тартиб-қоидаларига оид китобча, йўриқнома, низомнома. *Темирчилар рисоласи. Кўнчилар рисоласи.* — Мискарлар, тунукасозлар кўп антиқа гапларни, ҳар қайсилари ўзларининг.. рисолаларини яхши биладилар. Ойбек, Болалик.

2 Айрим масалаларга бағишланган илмий асар, китоб. [Восифий:] *Рост айтдингиз, шайх Баҳлул! Яхши ном китобнинг ҳусни турур. Китобхон рисоланинг номига қараб сотиб олур, мазмунига қараб баҳо берур.* М. Осим, Зулмат ичра нур. *Бахтиёр ҳаётнинг рисоласига Дебоcha бўлолгай албатта фарзанд.* С. Абдулла.

3 Кичик ҳажмли китоб, брошюра. *Лотин алифбоси ҳақида рисола. Одоб-ахлоқ ҳақида кичик рисолалар сотувда кўп.*

Рисолага тўғри келмаслик Талаб, метёрга жавоб бермаслик, белгиланган тартибга мувофиқ бўлмаслик. *Лекин тақлиф илгарироқ манзират қилинган, бюродаги тортишувдан сўнг эса рад этиш рисолага сира тўғри келмасди.* Ж. Абдуллахонов, Хонадон.

Рисоладаги(дек) Рисолада кўрсатилганига жуда мос; талабга, меъёрга жавоб берадиган даражада, ҳақиқий, расмана. *Қорачадан келган эпчил Маҳкамбой ака маслаҳат ошлари тепасида тургани учун, ҳар бир тўй ва маърака рисоладагидек ўтарди.* М. Осим, Тилсиз гувоҳ. [Директор Аъзамга:] *Мен қизни суриштирдим. Рисоладаги қиз.. Қани, тўйни қачон қиламиз.* Шухрат, Жаннат қидирганлар. *Мўъжас фаввора, шийпон, уйларнинг жойланиши – ҳаммаси рисоладагидек.* Т. Малик, Шайтанат. *Улар ўзларига берилган топшириқни рисоладагидек ўринлатишга интилишяпти.* Газетадан.

РИТМ [юн. *rhythmos* < *rheo* – оқаман] **1** Ҳодисалар ва жараёнларга хос айрим элементларнинг муайян изчиллик, кетма-кетлик асосида такрорланиб, алмашилиб келиши ва шундай такрорийлиқнинг ўзи. *Кишининг рухий ҳолати ва иш қобилияти муайян ритмга бўйсунганини одамлар аллақачон пайқашган.* Газетадан. *Қаердаки ҳаёт мавжуд экан, ўша ерда ҳаётнинг жараёнларининг мунтазам ритми, маромийлиги мавжуд.* Газетадан.

2 Шеърийят, мусиқа, рақс, тасвирий санъат, меъморлик ва б. санъат турлари шаклларининг асосий жараёни, тартиби, қонун-қоидаси. *Музыкада товуш билан ритм чамбарчас боғланган бўлади.* И. Акбаров, Музыка саводи. *Саҳнада икки аёл қўлларини ритмга мослаб, ҳинд рақси учун характерли бўлган мақомда ўйнамоқда.* Газетадан. *Усуллар рақсининг ритмларидир.* Т. Обидов, Юсуфжон қизик. *Бармоқ вазнида ритм мисрадаги бўғинларнинг сони, миқдорига, гуруҳланиб такрорланишига боғлиқдир.* «Адабиёт назарияси».

РИТМИК [юн. *rhythmicos*] Ритми, ритмга асосланган, бўйсундирилган; бир ўлчамдаги, бир вазндаги.

Ритмик гимнастика Мусиқа садолари остида ижро этиладиган, соғломлаштиришни кўзда тутувчи бир қанча жисмоний машқлар; аэробика.

РИТМЛИ Маълум бир ритмга эга бўлган. *Ритмли мусиқа.*

РИТОР [юн. *rhetor* – нотик, оратор] Юнонистон ва Қадимги Римда чиройли сўзлайдиган киши, нотик.

РИТОРИК Нотиклик санъатига оид; нотиклик қоидаларига асосланган. *Риторик нутқ. Риторик услуб.*

РИТОРИКА [юн. *rhetorike* – нотиклик] **1** Антик даврда ва кейинги даврларда нотиклик санъати ва умуман бадиий наср ҳақидаги фан; нотиклик назарияси ва санъати.

2 Баландрпарвоз, тамтароқли, лекин қуруқ, мазмунсиз нутқ, баён. *Шоир мардлик, жасорат ҳақида куйлаганда, бир томонлама қуруқ мақтов, баландпарвоз, ҳиссиз риторикадан қочади.* Газетадан.

РИХТАГАР [ф. *рихтегар*] – металл эритувчи, қуювчи] *тар.* Қуйма металл буюмлар тайёрловчи уста; куймачи.

РИХТАГАРЛИК *тар.* Рангли металл (асосан мис, бронза, қалай)дан турли буюмлар куйиш касби. *13–14-асрларда Византия, Венеция.. ўзининг рихтаргарлик буюмлари билан шухрат қозонди.* Газетадан.

РИЦАРЛИК 1 *тар.* Рицарь унвони.

2 Ўрта асрларда Фарбий ва Марказий Европада асосан ҳарбий феодаллардан иборат имтиёзли ижтимоий табақа. *Альамон! Альамон! Бу не ҳақорат! Қайда олийжаноб рицарлик руҳи?* А. Шер, Қадимги куй

3 кўчма Фидокорлик, олийҳимматлик, олийжаноблик.

РИЦАРЬ [нем. *Ritter* – отлик, чавандоз] **1** *тар.* Ўрта асрларда Фарбий ва Марказий Европада ёшлигидан жасорат, мардлик, бурчга садоқат, аёлларга нисбаган олийжаноблик руҳида тарбияланган жанговар феодал. *Рицарлар солиб юришларининг асосий ҳарбий кучини ташкил этган.* Газетадан.

2 кўчма Фидокор, олийҳиммат, олийжаноб киши.

РИЧАГ [р. рычаг – тўқмоқ, сўйил, гаврон] **1** *физ.* Бирор таянч нуқтасига эга бўлган ва оз куч билан катта кучни мувозанатга келтирадиган оддий қурулма; пишанг. *Юкни ричаг ёрдами билан кўтармоқ.*

2 Бирор ишни бажариш, бошқариш учун хизмат қиладиган дастали пишанг. *Ғанижон ака отдан сакраб тушиб, плугларнинг ричагини туширди.* О. Ёқубов, Баҳор кунларидан бирида.

РИЧАГЛИ Ричагга эга бўлган, ричаг билан таъминланган. *Ричагли тарози. Ричагли механизм.*

РИШВА(Т) [а. رشوة / رشوت – пора; пора билан сотиб олиш] *эск.* Бирор ишни битириш учун манфаатдор киши томонидан амалдорга яширин ва гайриқонуний равишда берилган пул ёки ашё; пора. [Қори:] *Ху-*

куматимиз даврида адлу адолат барқарор бўлди. Лекин афсус ва надоматлар бўлсин-ким, ришват, яъни пора отлиқ бало адолат қалъасига раҳна солмоқда. А. Қаҳҳор, Тобутдан товуш. Айрим пьесалар нашри ва спектакль ижроси учун рухсат берилмаса, маъмурларга «ришват», яъни пора беришга мажбур бўлинган. Ш. Ризаев, Жадид драмаси.

РИШВА(Т)ХҲҮР [а. + ф. رشومخور – ришва еювчи, порахўр] эск. қ. **порахўр**.

РИШВА(Т)ХҲҮРЛИК эск. қ. **порахўрлик**. -Э, ришватхўрлик роса авж олган бу ерда, — деди Абдулазиз ака хўрсиниб. Х. Султон, Бобурийнома.

РИШВАТЧИ эск. қ. **порахўр**.

РИШТА [ф. رشته — ип, тола] 1 эск. Ип, каноп. Пардалари риштаси эл жонидин. Ойбек, Навоий.

2 тиб. Тери остида пайдо бўладиган, ип каби узун курт; шу курт орқали тарқаладиган касаллик. ..одам бошига бало бўлиб келган ришта касаллиги ҳам бутунлай тугатиб юборилди. Газетадан. ..ўғли фронтга жўнаётганида, «Бухорога борсанг, сувидан ичма — ришта касали бор», деб меҳрибонлик қилган. А. Қаҳҳор, Танланган асарлар.

3 кўчма Икки нарса, кимса, ҳодиса ва ш. к. ни ўзаро узвий боғловчи восита; боғланиш. Дўстлик риштаси. ■ Севги фариштаси, Ҳар найза киприги, Гўё жон риштаси, Гўё ишқ кўприги. Х. Салоҳ, Излар ва ҳислар. Вужудини ширин туйғу қамраб олди. Бу туйғу, кўзга кўринмас ришталари билан уни сеҳрлагандай, ўйлаганларини тўзитди. С. Кароматов, Сўнгги бархан. Ахир келган-кетганга ризолик бериб, видолашиб ётган эмиш. Мен ҳам сўнги бурчимни адо этиб кўйсаммикан? Йўқ, энди дўстлик риштаси узилди. С. Сиёев, Аваз.

Кўнгил риштаси Кўнгил ипи, юрак томири.

РИҚО [а. رقاع — кичик мактублар; ёзув тури] эск. Араб ёзувидаги нозик хат услубларидан бири. Бир неча лаҳзадан кейин сарғиш қоғоз бетига риқо билан ёзилган хат пайдо бўлди. М. Исмоилий, Фарғона т. о.

РИҚҚАТ [а. رقت — нозиклик, мулойимлик, кўнгилчанлик] Нозиклик, юмшоқлик. Дуо асноси, айниқса биринчи хонадаги аёнинг йиғи ва риққат оҳанглик «омин! омин!» садолари «хузури муборак»ни титратди. А. Қодирий, Меҳробдан чаён.

РИҲЛАТ [а. رحلت — сафар, саёҳат; жўнаш, жўнаб (кўчиб) кетиш.] Кўчиш; ўлиш. Одам эса гуноҳу савобнинг ўртасида, куни битганини билмай, нариги дунёга риҳлат қилади. Н. Қобил, Унутилган соҳиллар. Волида ҳам дорилфанодан дорилбақога риҳлат қилдилар. «Муштум».

РОБИТА [а. رابطه — алоқа, муносабат, боғланиш; иттифок] 1 эск. кт. Ўзаро муносабат, алоқа, боғланиш. Гарчи Алишер жаноблари билан фақирнинг орасида муносабат ва робита унчалик барто бўлмаган эса-да.. у жанобнинг ҳаётларида доир баъзи жиҳатлардан хабардорман. Ойбек, Навоий. -Лекин, — деди Қулмурод ўз сўзининг давомида, — сиёсий бўлим бу жиноят орасида бир робита топмоқчи бўлиб, кўп ишлади. С. Айний, Қуллар. Семинар давомида сўзга чиққан нотқлар икки халқ ўртасидаги ҳар томонлама ҳамкорлик робиталари ҳақида атрофлича тўхталдилар. Газетадан.

2 Тасаввуфда: мурид билан унинг пири ёки авлиё (валий) ўртасида пайдо бўладиган руҳий алоқа, боғланиш.

РОБИТАСИЗЛИК Ўзаро муносабатсизлик, алоқасизлик, боғланишсизлик. Йўлчи ўрнидан туриб, елкасига эски юпқа пахталик чопонни ташлади, дераза орқали кўринган бир нарча кўкка қаради, юрагида қандайдир бир бўлишсизлик, ҳаёт билан робитасизлик сезди. Ойбек, Танлаган асарлар.

РОБОТ [чехча robot — эрксиз меҳнат; бу сўз биринчи марта чех ёзувчиси К. Чапек пьесасида ишлатилган] Инсон ҳаёти учун хавфли шароитларда, одам бориши қийин бўлган объектларда унинг функциясини — мураккаб ҳаракатларини қисман ёки тўла бажарувчи машина-одам; автомат. Роботлар фақат инсон ҳаётини енгиллатиш учунгина яратилади. О. Мўминов, Хиёбондаги уч учрашув. Ўзимни одам эмас, қандайдир бир маълум вазифани бажарадиган роботдек ҳис эта бошладим. Н. Қобил, Унутилган соҳиллар. Саноат роботлари машиналарнинг янги вақили сифатида дунёга келди. «Фан ва турмуш».

РОВ [ф. ров — юриш; юрувчи] с. т. қ. **рав**. [Йигит] Шакарга бир нималар деб пичирлабди-да, уни олиб кетибди. Ров бориб келаман деган, Зиннат буви кечгача кутибди. Шакар келмабди. Х. Назир, Кўкгерак шабадаси. Унсин ўрнидан турди. Шу тонда кайфи

жуда чоғ эди, дугонаси Раъноларникига ровчиқиб келгиси келиб кетди. Ойбек, Улуғ йўл.

РОВИЙ [а. راوى — ҳикоя қилувчи, ривоят, қил айтиувчи] эск. Ривоят қилувчи, нақл қилувчи; қисса айтиувчи. *Ровий айттар: фалокатга учраб карвон Поёни йўқ саҳрода, омон қолди бир одам. Э. Воҳидов, Шарқий қирғоқ. Ва шу сабаб ровий сифатида сўз навбатини муҳтарам «Бой ота» — Зокиржон акага бермоқчиман. Х. Султон, Бобурийнома. Девлар ва жинлар ақлчироқ ровийни, ровийлар эса яна бир зукко одамни — Муҳаммад пайғамбарни кутарди. М. М. Дўст, Галатепага қайтиш.*

РОВОН Деразалар билан ўралган айвон, ойнабанд айвон. *Абдулла чамадонини ерга қўйиб, ровонга кўтарилди. Ў. Умарбеков, Одам бўлиш қийин. Ровонимизнинг тўрида дадам тиш ковлаб, ёнбошлаб ётибди. С. Сиёев, Ёруғлик. Катта ҳовли: тоқлар баланд кўтарилган, олди ровон беш хонали уй, эшик-деразалари дид билан бўялган. Й. Шамшаров, Тошқин.*

РОВОЧ [ф. ريواج / ريواس] Тоғларда ёввойи ҳолда ўсадиган, пояси серсув, нордон, ейишли, кўп йиллик ўтсимон ўсимлик. *Тоғли аҳоли қадимдан ровочнинг поясини майдалаб, мураббололар тайёрлаган. Газетадан.*

РОВОЧЗОР Ровоч кўп ўсадиган жой.

РОВОЧФУРУШ Ровоч етиштирадиган ва уни сотадиган деҳқон.

РОГАТКА [р. рог — «шоҳ, мугуз» с. дан] Кичик тош, кесак ва ш. к. отиш учун айри ёғочга резинка ўрнатиб ясалган асбооб. *Рогатка отмоқ. ■ Рогаткадан отилган тош каптарнинг ўнг оёғига, қаноти остига теккан эди. Газетадан.*

РОДИЙ [юн. rhodos — гул, атиргул] Менделеев даврий системасининг VIII гуруҳига мансуб кимёвий элемент; кумушсимон кўкиш рангли, коррозияга чидамли қаттиқ металл.

РОЖА [санск. राजа > ф. + ҳинд. राजे — ҳинд ҳукмдорларининг номи] *тар. Ҳиндистондаги ҳокимлар унвони.*

РОЖДЕСТВО [р. рождество — туғилиш, милод] Христиан динининг асосий байрамларидан бири; Исо пайғамбарнинг туғилиш куни байрами.

РОЗ [ф. راز — сир; махфий нарсa, гап] *кт. 1 Махфий тутилган нарсa; сир. Ҳали*

қалби роз айтмаган, сўз бермаган ҳеч кимга. Р. Бекниёз, Тўтиё.

2 Дилдаги орзу, тилак, дард. *Булбул гулларга этиб роз, Навоий назмига кўп асир. Т. Тўла, Асарлар. Кўнглида олов, сўроқ, гина.. нича ноз ҳам бор: янги хўжалик.. ёрдам керак деган роз ҳам бор. Э. Охунова, Мен тонгни уйғотдим.*

РОЗЕТКА [фр. rosette — кичкина, майда гул] Турли электр асбобларни электр тармоғига улаш учун хизмат қиладиган икки тешикли мослама. *Ихтирочи.. стол лампасининг ипини розеткадан чиқариб олиб, ўрнига машинасининг вилкасини тиқди. «Муштум».*

РОЗИ [а. راضى — қониққан, мамнун; ёқимли] (кўпинча кесим взф.) Мамнун, хурсанд, шод. *У турмушидан рози. Ота рози — худо рози. Мақол. ■ Мирзакаримбой жиянининг ишга тайёрлигидан рози каби кудиди, индамасдан ичкари кириб кетди. Ойбек, Танланган асарлар. [Ҳожя:] Уғил деган шундоқ бўлсин, отасини рози қилсин. Кўп хурсанд бўлдим. А. Қаҳҳор, Йиллар.*

Рози бўлмоқ Розилик бермоқ, унамоқ, кўнмоқ. *Нисо буви, нима бўлди-ю, уста Абдураҳмон киши қўйганда, дарров рози бўла қолди. А. Қаҳҳор, Бошсиз одам. У рози бўлиб, хотини, қизи, уч шогирди ва аравакашини олиб, нажжор Абдулазиз ҳовлисига жўнади. Мирмуҳсин, Меъмор. Лекин бугун илк марта ўз эрким, ўз иродам билан қилган хайрли бир ишимдан рози бўлиб турибман. С. Сиёев, Ёруғлик. Рози дил ёки дил рози* Дилдаги орзу, истак, дард. *Рози дил айтай десам, хилват қилолмай доғман. Муқимий. Бу ёзувларда менга нотаниш бир кимсанинг чуқур ҳасрати, дил рози бор эди. «Ёшлик». Нуҳсонингни айтган дўстга дил розингни изҳор этсанг арзийди. Газетадан.*

РОЗИДИЛ [ф. رازدل — кўнгил сири] *с.т. қ. рози дил. Ҳаёт, булоқ бошидаги розидилдан кейин онасига ёрилган, йиғлаб туриб, истакларини айтган эди. М. Исмоилий, Фарғона т. о.*

РОЗИЛАШМОҚ Бир-бири билан розизолик тилаб видолашмоқ. *-Туғилиб ўсган жойлардан кетиш кўзимга ўлимдан ҳам ёмон кўринаётгани учунми, билмадим, ҳамма билан розилашим келяпти, — деди Салтанат. О. Ёкубов, Бир фельетон қиссаси.*

РОЗИЛИК 1 Мамнунлик, хурсандлик. *Йўлчи унинг ҳар бир сўзида, овозида, кулги-*

сида қувонч ҳам тақдирдан розилик сезди. Ойбек, Танланган асарлар. *Енгил таъзим билан [Навойи подшоҳа] ўз розилигини билдириб, табассум қилди-да, секингина деди..* Ойбек, Навойи.

Розилик тиламоқ (ёки сўрамоқ) Бир-биридан қилмишларини кечиришни сўраб видолашмоқ, розилашмоқ.

2 Унаганлик, кўнганлик ҳақидаги тасдиқ жавоби. *Розилигини олмоқ. ■ Собир, то кампирнинг розилигини олишгунча, тўй қилишга жазм қилмади.* Р. Файзий, Чўлга баҳор келди. *Қиз томон, зарчанд тўйни бир йил кейин қилиш шарти билан бўлса ҳам, розилик берибди.* О. Ёқубов, Эр бошига иш тушса.

РОЗИ-РИЗОЛИК Ўлим ёки видолашиш олдидан бир-биридан розилик сўраш. *..бобо кампири билан рози-ризолик тилашиши пайти келганини тушунди ва авзойи бадани бирдан бўшашиб кетди.* Ҳ. Фулом, Тошкентликлар. *-Рози-ризолик сўраладиган бир пайтда, ҳурматли бек, сиз мени синглинғиз ёнида олиб қолиб, кўнглинғиз борлигини айтмоқ-чисиз, кечикдинғиз, бек! [деди Бадиа Худойбекка].* Мирмуҳсин, Меъмор. *Шу кеча унинг онаси қазо қилди, ўлим олдидан неварачеварасигача ёнига чақириб, улардан рози-ризолик олди.* Ш. Холмирзаев, Оғир тош кўчса.

РОЗИЧИЛИК айн. **розолик 2.**

РОЗМАРИН [лот. *ros marinus* — денгиз шудринги] Жанубда ўсадиган, қишга сақланадиган ширин, хушбўй олма тури.

РОЙ(И) с. т. Раъй.

Ройи келди, ройикелди Раъйи келса, хушига ёқса жуда яхши; раъйи тез ўзгарадиган. *Ройи келди одам. ■ Кўзибойни болалар аълочилиги учунгина эмас, ҳеч ким билан уришиб-талашмайдиган, ройи келди бўлаени учун ҳам ёқтирайдиган керак.* Ҳ. Назир, Сўнмас чақмоқлар. *У [Дамин] Собирни унча-мунча нарсани кўнглига олмайдиган ройи келди деб юрарди.* Ҳ. Назир, Танланган асарлар.

РОЙ(И)КОРЧИ салб. Ҳар кимга ақл ўргатаверадиган, ақл ўргатишни, йўл-йўриқ кўрсатишни яхши кўрадиган; маслаҳатгўй. *Ройикорчи одам. ■ Халқимизда мардикор бир танга, ройикорчи ўн танга, деган мақол бор.* Н. Сафаров, Оловли излар. *-Оббо, ройикорчининг кўплигидан куйдим-да!* — деди Ражаб ака Искандарга. П. Қодиров, Эрк. *Бу ўзимизнинг театр. Қанча хоҳласанг, шунча айт-*

тирамиз. Сендақа ройикорчини қара-ю! С. Аҳмад, Уфқ.

РОЙИШ [ф. *رایش* — унинг раъйи, кўнгли] с. т. **1** от Майл, мойиллик, раъй. *Кечгача, Элмуроднинг ройишига қарамай, унга учтўрт телефон қоқди.* Шуҳрат, Шинелли йиллар. *Розиқжон илгариги авжи йўқ, менга унча ройиши бўлмай, қўл учиди кўришди.* И. Ўктамов, Ҳикоялар.

2 сфт. Сўзга кирадиган; мўмин, мўминтой. *Ройиш бола. ■ ..боланинг уволи тутсин ўша сариқ Потмани. Битта боланинг тирноғига зор одамлар бор. Бу хотин шундоқ ройиш болани оч ташлаб қўйибди. Эшикдан киришиданоқ пайқовдим..* Мирмуҳсин, Умид.

РОК [ф. *راک* — жанг ноғораси; алоҳида куй, оҳанг номи] Шашмақом таркибидаги Бузрук мақоми ашула бўлимининг иккинчи гуруҳ шўъбаларидан бири.

РОКИРОВКА [фр. *roquer* — руҳнинг ўрнини алмаштириш < ф. *روح* — рух, тўра] Шахмат ўйинида: шоҳга яқин ёки узокроқ турган руҳнинг шоҳ билан ўрнини алмаштириб, уларни ёнма-ён жойлаштиришдан иборат бир юриш. *Катта рокировка. Кичик рокировка. Рокировка қилмоқ.*

РОЛИК [нем. *Rolle* — ғўла, ўқ] **1** Электр шуруни девор, шип ва б. жойга маҳкамлаш учун ишлатиладиган чинни ёки сопол галтак.

2 Машина, механизм, деталь ва ш. к. нинг галтаксимон айлана қисми.

3 Асфальтланган сатҳда учишга мўлжалланган конькининг ғилдиракчалари.

4 кўчма Реклама ёки ахборот мазмунидаги қисқача фильм; видеоклип. *Реклама ролиги. ■ Махсус лавҳа, ролик ва телекўрсатувлар тайёрланиб, эфирга узатилмоқда.* Газетадан.

РОЛИКЛИ Ролиги бўлган, ролик билан таъминланган. *Роликли подишник. Роликли коньки.*

РОЛЬ [фр. *role* — ўрама қоғознинг биринчи бети, рўйхат] **1** Ёзувчи томонидан пьеса ёки сценарийда яратилган образ ва шунга мувофиқ актёр томонидан саҳнада, экранда ижро этилган бадиий образ. *-Ҳожибеков комедиясини саҳнага қўйиш олдидан роль тақсимлаш пайтида менга асар қаҳрамони Гулчехра роли топширилди, — деди Ҳалима.* Ҳ. Носирова, Мен ўзбек қизиман. *Саҳнага чиққан артист ўзи ижро эта-*

ётган ролини охирига етказмагунча тиниб-тинчимайди. Газетадан. Бош ролда чиқади-ган атоқли артистка парда четини кўта-риб, залга мўралади. С. Аҳмад, Сайланма.

2 Актёрнинг бутун пьеса, сценарий да-вомидаги нутқи. *Демак, у [Рустамжон] Шо-кир акага тақлид қилишдан қочиб, ролини ўзи-ча талқин этган.* М. Хайруллаев, Кўнгиш.

3 кўча Кимсанинг таъсир кўлами, би-рор нарсада иштирок даражаси, тутган ўр-ни; мавқеи. *Тарихда шахснинг роли.* ■ *Бо-лаларимизни жамиятга, меҳнатга ҳар та-рафлама соғлом, етук қилиб топширишда мактаб, шубҳасиз, етакчи роль ўйнайди.* М. Исмоилий, Одамийлик қиссаси. *Мутахас-сисларнинг ташкилотчилик ролини бутун чоралар билан кучайтирмоғимиз керак.* Га-зетадан.

РОМ I [ф. *رام* — ювош, итоаткор, мўмин-қобил; кўлга ўргатилган]: **ром бўлмоқ** 1) мойил бўлмоқ, оғмоқ; 2) ўрганмоқ. *Буни [Ёдгорни] саркарданинг мирзахонасига олиб бор.. Сўнгра қайта бу ерга олиб кел. То ром бўлгунча, бизнинг уйда хизмат қилиб юради.* С. Айний, Дохунда; 3) бўйсунмоқ. *Агар қийинчиликдан қўрқилмаса-чи, инсонга ром бўлмаган нарса йўқ экан.* Ҳ. Назир, Васият. **Ром келмоқ** Кўнглига ёқмоқ, мос келмоқ. *Менга нима ром келишини ўзим ҳам бил-майман.* Ойбек, Танланган асарлар. **Ром қилмоқ** (ёки **этмоқ**) 1) ўзига қаратмоқ, ўзига мойил қилмоқ, оғдирмоқ. *Садосиз, фақат сезиш мумкин бўлган бу куй аллақандай сеҳрли қудрат билан дилларни ром қиларди.* Ф. Му-сажонов, Баҳор нафаси; 2) ўзига, кўлга ўр-гатмоқ. *Мартен печининг ҳайбат билан ўт сочиб, вағиллаб ёниши ром қилинган ёлдор шерни эслатади.* Мирмуҳсин, Қизил дурра-лар; 3) бўйсундирмоқ. *Сенинг режанг билан жўшқин сувларни Оқиздик ром қилиб ҳаёт боғига.* Ғайратий.

РОМ II [а. *رمل* — қумга қараб фол очиш] Бировнинг ўтмиши ва келажаги ҳа-қида гуё «олдидан айтиб бериш»; фол. *Ром очмоқ. Ром кўрмоқ. Ромчининг ромидан ўзинг-нинг хом хаёлини яхши.* Мақол. ■ *Намозхон йилдан-йилга камайиб, мачит ўз-ўзидан ёпи-либ қолгандан кейин махсум.. баъзан битта-яримтага ром очиш билан тириклар хизма-тини ҳам қилиб юрар эди.* А. Қаҳҳор, Қўш-чинор чироқлари.

РОМ III қ. **рама 3.** *Икки кундан кейин арваларда тахта, эшик ва ром, тунука олиб*

келдилар. П. Турсун, Ўқитувчи. [Чўтир хола] *Челақда сув олиб чиқиб, дераза ромларини, стол-стулларни ювди.* Мирмуҳсин, Умид. *Бино томи янги шифер билан қопланиб, пол, эшик, ромлар янгидан ўрнатилган.* Газетадан.

РОМ IV [ингл. *rum*] Шакарқамишнинг ачитилган шираси ёки қиёмидан ҳайдаш йўли билан тайёрланадиган кучли спиртли ичимлик.

РОМАН [фр. *roman* < *romane* — лотин тилида эмас, роман тилида ҳикоя қилиш] Ҳажми анча катта, хилма-хил қаҳрамонлар, сертармоқ сюжетга эга бўлган, одатда проза йўли билан ёзиладиган асар; адабий жанр тури. *Тарихий роман. Шеърый роман.* ■ *Кич-кинагина бир ҳикоя шунчалик азоб билан ёзилса, энг камиди қирқ-эллик ҳикояга тенг келадиган роман қандоқ ёзилар экан?* У. Нор-матов, Талант тарбияси. *Романдаги аёллар образи ҳам алоҳида эътиборга молик.* С. Ка-роматов, Олтин қум. *Шарқ халқларида роман жанрининг туғилиши ва камолотида муайян муштараклик мавжуд.* Газетадан.

РОМАННАВИС [роман + ф. *نویس* — ёзувчи] қ. **романчи.**

РОМАННАВИСЛИК қ. **романчилик.** *Романнавислик ва драматургия соҳасида ҳам яхши натижалар кўзга ташланади.* Га-зетадан.

РОМАНС [фр. *romance* < *roman* — ро-ман тилига оид] мус. Чолғу жўрлигида як-кахон ашулачи ижросига мўлжалланган кич-чик мусиқий-шеърый лирик асар. *М. Бур-ҳонов романслари.* ■ *Мен 1936–1938 йил-ларда Машраб сўзига «Токай мани бечорага бу дарду аламдур» романсимни ёзган эдим.* Газетадан.

РОМАНТИЗМ [фр. *romantisme*] **1** 18-аср-нинг охири — 19-асрнинг биринчи чораги-да Европа, шунингдек, Америка адабиёти ва санъатида пайдо бўлган, классицизм қонун-қоидаларига қарши чиқиб, миллий ва индивидуал ўзига хосликка, идеал қаҳ-рамонлар ва туйғуларни тасвирлашга инти-лиш билан ажралиб турувчи йўналиш, оқим.

2 Адабиёт ва санъатда: оптимизм руҳи билан суғорилган ва инсоннинг юксак бур-чини ёрқин образларда тасвирлашга интил-ган йўналиш.

РОМАНТИК I **1** Романтизм вакили, из-доши (қ. **романтизм I**).

2 Романтизм таъсирига берилган, романтизмга мойил одам.

РОМАНТИК II 1 Романтизмга оид, романтизм руҳи билан суғорилган, романтизм руҳидаги. *Романтик поэзия. Романтик мусиқа. Романтик асар.*

2 Хаёлпарастлик руҳида бўлган, романтика таъсирига берилган. *Романтик қаҳрамон. Романтик кайфият.*

РОМАНТИКА [«романтизм» с.дан] Кишида зўр кўтаринки руҳ уйғотадиган, уни улуғликка илҳомлантирувчи гоё ва ҳис-туйғулар билан тўлиб-тошган нарса; дунёни юксак эмоционал ҳис этишга ёрдам берувчи вазият, турмуш шароити. *Кураш романтикаси.* ■ *Тарихнинг романтикаси йўқ дейсизми? Ўҳҳў! Ҳамма романтика тарихда. Учувчиларингиз ҳам, хирургларингиз ҳам буюк тарих машинасининг алоҳида ғилдиракчаларини айлантиради, холос.* П. Қодиров, Уч илдиш. *Ёшликдан менинг романтика, саргузаштларга мойиллигим бор эди. «Ёшлик».*

РОМАНЧИ Роман ёзувчи адиб.

РОМАНЧИЛИК 1 Одатда проза йўли билан ҳажми анча катта, мураккаб сюжетли асар ёзиш, яратиш. *Ўзбек романчилиги. Романчиликка ҳисса қўшмоқ.* ■ *Ўзбек романчилиги тараққиётида ҳам Иброҳим Раҳимнинг муносиб улуши бор.* Газетадан.

2 Роман жанри. *Ойбек прозамиз соҳасида янги романчиликни яратган забардаст адибларимиздан биридир.*

РОМБ [юн. rhombos – пирилдоқ, доира; қийшиқ квадрат] 1 *мат.* Ҳамма томонлари тенг бўлган ясси параллелограмм.

2 *тар.* Собиқ Шўро армиясида 1943 йилгача (погон киритилгунга қадар) олий кўмондонлик таркиби петлицаларида шундай шаклдаги даража фарклаш белгиси.

РОМБИК Ромб шаклидаги.

РОМСОЗЛИК Ром яшаш билан шуғулланувчи тармоқ. *Ромсозлик устахонаси.*

РОМЧИ Ром очувчи, ром кўрувчи; фолбин. *Ромчининг ромидан ўзинининг хом хаёлинг яхши.* Мақол. ■ *Тошбуви қўшини қишлоқдаги дами сувни қайтарадиган аллақандай ромчига ром очтирди. «Шарқ юлдузи».*

РОНДО I [итал. rondo – айлана] мус. Асосий оҳанги бир неча марта такрорланадиган, унга иккинчи даражали оҳанглар қарама-қарши қўйиладиган мусиқий пьеса.

РОНДО II [фр. rondeau < rond – думалоқ, доиравий] 1 *ад.* Қофияларнинг мураккаб алмашинуви ва такрорланувчи қофияланмаган нақароти бўлган шеър шакли.

2 Юмалоқ шаклдаги ёзма ва босма ҳарф, шрифт.

3 Шундай шрифтни ёзиш учун мўлжалланган учи кесик перо.

РОСА [ф. رسا – етук, етарли, тўлиқ, бутун, мукаммал] *рвш. с. т.* 1 Бекаму кўст, тўлиқ, тўла. *Зарҳал кўринар сохта, Роса билиб, сўнг мақта.* Мақол. ■ *Жангчилар кўзларини роса очмасдан, милтиқларига ёпишдилар.* Ойбек, Қуёш қораймас.

2 Тугал, тўла, тўлиқ; тўппа-тўғри. *Ола-хўжабойнинг ҳовлисига қадам босмаганимга роса йиғирма йил бўлди.* П. Турсун, Уқитувчи. [Дилбар:] *Уйғотаймикан? Йўқ, нича ухлаб ором олсин, роса бир ой бўлдики, от устидан тушмайди.* К. Яшин, Пьесалар.

3 Ниҳоят даражада, ниҳоятда, жуда. *Роса чарчадим.*

4 Тўйгунча, мириқиб. *Роса ўйнадик.* ■ *Мавлон мингбоши.. тасодифан лойга сирганиб йиқилди. Кишилар роса кулишди.* Т. Обидов, Юсуфжон қизиқ.

РОСАЛАМОҚ с.т. Расоламоқ, бутламоқ.

РОСАЛИК с.т. Расолик, бутлик.

РОСЛАМОҚ с.т. қ. **ростламоқ.**

РОСМАНА с.т. қ. **расмона.** Умид Робертнинг даҳанига бир мушт туширди. Бир зарбадаёқ давангирдек йиғит полга росмана ағдарилди. Мирмуҳсин, Умид. *Судралиб юрувчи росмана илонлар чақаман, деб ният қилмайди, икки оёқли илонлар эса пайт пойлайди.* Т. Малик, Шайтанат. *Сайфини энди росмана кўрқув ўз тўрларига ўрай бошлади.* Т. Малик, Шайтанат.

РОСТ I [ф. راست – ҳаққоний, ишончли, тўғри, тўппа-тўғри; ҳақиқат] 1 *сфт.* Тўғри, адил, тик. *Бу кун сиз айтган ўшал Офарин эмас, устоз, Мусибат остида рост қомати дуто кўринур.* С. Абдулла. *Тўла, қаддини рост тутган ҳолда, калласини хиёл эгиб, эркакча таъзим қилди.* М. Исмоилий, Бизнинг роман.

2 *сфт.* Ҳақиқатдан иборат бўлган, ҳақиқатга асосланган; тўғри, чин. *Рост гап. Рост сўз – ҳаққа қарор.* Мақол. *Ёлғончининг рост сўзи ҳам ёлғон бўлур.* Мақол. ■ *-Боязи семиз одам айтган гаплар рост экан, – деди ичида [Шарофат].* А. Қаҳҳор, Қўшчинор

чироқлари. *Рост айтяпман, буни мен бир неча бор синаб кўранман.* Х. Тўхтабоев, Ширин қовунлар мамлақати.

3 *от* Ҳақиқат, ҳақ. *Ростга завола йўқ.* Мақол. ■ *Маҳкам биргина шу Акбаров ва Тошев масаласидаги ҳақни ноҳақдан, ростни ёлғондан ажратиб, тўғри баҳолаш учун қанча куч, вақт, қунт, ирода кераклигини энди аниқ кўз олдига келтирди.* П. Қодиров, Уч илдиз. *Ёдгор шундоқ бўлишини билгандирки, ростини айтгандир.* Ў. Ҳошимов, Қалбингга қулоқ сол.

4 *крш. с. взф. Тўғри. [Саодат:] Вой, нима деб алжирайсан? Авжи ўйнаб-куладиган чоғинг-ку. Рост, баъзи вақтда дунёдан чиқиб кетгинг келади. Дунё қурсин, ғам кўн.* Ойбек, Танланган асарлар.

Гапнинг рости Гапнинг очиғи, тўғриси. *Гапнинг рости, бугун лекция қулоғимга кирмаяпти. Рост келмоқ* Тўғри келмоқ, мос келмоқ; ёқиб тушмоқ. *Бу гапнинг менга рост келди. Рост кўтармоқ* Бемалол, азот кўтармоқ. *Юкни рост кўтармоқ. Рост кўча қолиб, паст кўча билан* Алдам-қалдамлик билан, чап бериб. *Нега ўзингизни гўлликка соласиз? Ҳамма эрталаб далага шошилса, сиз.. рост кўча қолиб, паст кўча билан бозорга чопасиз.* «Муштум».

РОСТ II [ф. *راست* – алоҳида куй номи] (*Р – катта*) Шашмақом тизимидаги бешинчи мақом номи (қ. **шашмақом**).

РОСТАКАМ *с. т. I сфт.* Ҳақиқий, чин. *Бу ўйинчоқ ростакам самолётга ўхшайди.* ■ *-Қаранг, худди ростакам дурга ўхшайди, – деган эди уни олиб келганда Мунисхон.* Ў. Умарбеков, Ёз ёмғири.

2 *рвш.* Ҳақиқатан, чиндан ҳам, жиддий. *Боланинг ростакам жаҳли чиқди.* ■ *Турсуной аввал ишонмагандай кўзларини катта очиб қаради-ю, кейин Ефим тоғанинг ростакам ичкари бошлайётганини кўриб ишонди.* А. Мухтор, Опа-сингиллар.

РОСТАКАМИГА *айн. ростакам 2.* Тўртинчи куни кечга яқинлаб қолгандагина ёмғир ростакамига тинди. Ш. Ғуломов, Ташаббус. *Қаҳатчилик ростакамига ўрнашиб олганди.* Н. Сафаров, Наврўз.

РОСТГҲЙ [ф. *راستگوى* – рост, тўғри гапирувчи] Ростини, ҳақиқатни гапирадиган; тўғрисиўз. *Ростгўй бола.* ■ *Ҳукумат арбоблари соғлом, ростгўй, сўзга уста, иродали бўлишлари керак.* М. Осим, Ибн Сино

қиссаси. – *Йўқ, Бойхонов, сиз қип-қизил ростгўйсиз, – деб олдиға милиция хўжжатларини ташладим.* С. Сиёев, Ёруғлик.

РОСТГҲЙЛИК Ростини, ҳақиқатни гапириш, тўғрисиўзлик. *Наҳот у кун ростгўйликнинг қудратли қўли Номард ўлим чилвирида чулғаниб қолди.* А. Шер, Қадимги куй. *Камтарлик инсон ўзлигини билиши, ўзгаларни ҳурмат қилиши, самимийлик, тўғрилик ва ростгўйлик каби нодир фазилатларни ўзида мужассам этади.* Газетадан.

РОСТДАН I *рвш.* Ҳақиқатан, чиндан ҳам. *-Рафиқ, найни ким чалди? -Йўлчи акам. -А! Ростданми! Алдама! Ойбек, Танланган асарлар.*

2 *крш. с. взф. Ҳа, айтгандай. -Ҳа, ростдан ҳам, қизлар, фронтда ҳеч кимингиз борми? – деди комиссар.* Ойдин, Асл ёр. *Ростдан ҳам, товуқ тимдалагандай ёзарканман [деди Саид].* Э. Раимов, Ажаб қишлоқ.

РОСТЛАГИЧ *тех.* Механизм, машина ва ш.к. лар иш режимини автоматик тарзда тартибга солиб турадиган мослама.

РОСТЛАМОҚ I Тўғриламақ, тикламақ. *Беш-ўн йигит шоҳарик, ўқариқларни ростлаб, тут тагига чиқишди.* Й. Шамшаров, Кўрк меъморлари.

2 *кўчма* Ишини, хўжалигини ўнгламоқ, тиклаб олмоқ. *Уинститутни битиргач, ўзини анча ростлаб олди.*

3 Тартибга солмоқ, тузатмоқ. *Қилич ботир шошилмасдан ўзини ростлаб олиб, уйга кирса, Оқбилак ойим ухлаб ётипти.* «Эртаклар».

Нафасини ростламақ 1) дам олиб, нафасни жойига келтирмоқ. *Саломат нафасини ростлаб, яна йўл юрди.* С. Аҳмад, Ҳукм; 2) ўзини ўнглаб олмоқ. *Полк командири, душман нафасини ростлаб олмасдан туриб, қарши хўжумга ўтиш тўғрисида буйруқ берди.* А. Қаҳҳор, Олтин юлдуз. **Қаддини** (ёки **белини**) **ростламақ** 1) қаддини кўтармоқ, тикламоқ; ғоз турмоқ. *Биров эшитиб қолишидан чўчигандай, секингина уф тортди-ю, қаддини ростлаб ўтирди.* Ў. Ҳошимов, Қалбингга қулоқ сол. *Шерзод қаддини ростлади-ю, ичкарига кириб келаётган мудирни кўрди.* Ў. Ҳошимов, Нур борки, соя бор. *Санобар аҳён-аҳёнда қаддини тиклаб, белини ростлаб оларди-да, яна жадал теришга тушиб кетарди.* М. Хайруллаев, Кўнгил; 2) ўзини, хўжалигини тикламоқ, оёққа тур-

ғизмоқ. *Тошкентимизнинг қайта тикланиб, қаддини ростлашида халқлар дўстлиги.. нималарга қодир эканини ҳам бутун олам кўрди.* Р. Файзий, Таъзим; 3) барпо бўлмоқ, қурилмоқ. *Бинокор қадами етган жой тез обод бўлади, улкан завод-фабрикалар қаддини ростлайди, ишлаб турган корхоналарнинг қудрати ортади.* Газетадан.

4 с. т. Адабини бермоқ, бопламоқ. *Шошмай тур, сени бир ростлайки, дунёга келганинга юз пушаймон қил.* Ҳамза, Майсаранинг иши.

5 тех. Қурилма, механизм ва ш. к. ни тўғри ишлайдиган ҳолга келтирмоқ, созламоқ. *Тормозларни ростламоқ.*

Жуфтакни ростламоқ қ. жуфтақ. *Кишилар етиб келганларида, жиноятчилар аллақачон жуфтақни ростлаб бўлишган, ҳовлида эса жабрланувчи Шарофат она дағ-дағ титраб турарди.* «Муштум». [Ортиқ:] -*Хушёр бўлиб ётасан, бугун кечаси жуфтақни ростлаймиз.* М. Мансуров, Ёмби. **Оғиз ростламоқ** 1) айн. **оғиз жуфтламоқ қ. жуфтламоқ;** 2) оғзига олиб бормоқ, тўғриламоқ. *Ҳайдар ота шуни [чилимини] сўрай, деб энди оғиз ростлаган эди, кампирга кўзи тушиб қолди.* А. Қаҳҳор, Асрор бобо.

РОСТЛИК Тўғрилиқ, чинлик. *Гапнинг ростлиги. Мастлик — ростлик.* Мақол. ■ *Ростликнинг китобин ортиб борамиз, Пастликнинг ниқобин йиртиб борамиз.* «Муштум».

РОСТЧИ с. т. Рост гапирадиган; ростгўй. *Биз ёлғончи-ю, сен ростчи бўлдингми? М. Исмоилий, Фарғона т. о.*

РОТА [пол. rota < нем. Rotte — оломон; жангчилар гуруҳи] ҳарб. Одатда бир неча взводдан ташкил топган, батальон таркибига қирадиган ҳарбий бўлинма, қисм. *Пулемётчилар ротаси.* ■ *Қулбоев кейинчалик ҳамюрти Уроқов ротасига взвод командири қилиб тайинланди.* Н. Сафаров, Оловли излар. *Гвардиячи капитан, қўлларини орқасига қилганича, ротага яқинлашди.* О. Ёқубов, Излайман. *Рота командири батальон командирига бўйсунди ва рота бутун шахсий таркибининг тўғридан-тўғри бошлиғи саналади.* Газетадан.

РОТАПРИНТ [лот. goto — айлантираман + ингл. print — чоп қилмоқ, босмоқ] плгрф. Офсет босма усулида ишлайдиган, хизмат ва ахборот ҳужжатларини кам тиражда чоп

қиладиган ихчам босма машина ва шундай чоп қилиш усули.

РОТАТОР [лот. rotator — айлантиргич] 1 плгрф. Қўлёзма, чизма, расм ва ш. к. лардан нусха кўпайтирадиган, айланма валли аппарат. *Ротатордан чиқармоқ. Ротаторда босмоқ.*

2 Бирор марказ ёки ўқ атрофида бир меъёردа айланадиган жисм.

РОТАЦИОН: ротацион машина плгрф. Газета, китоб кабиларни кўп нусхада босадиган айланма машина.

РОТМИСТР [пол. rotmistrs < нем. Rittmeister < Ritt — отлиқ аскарлар отряди + Meister — бошлиқ] тар. Чор армияси ва жан-дармериясида: отлиқ аскар офицерларига берилган унвон (пиёда қўшинлардаги капитан) ва шу унвонга эга бўлган шахс.

РОТОР [лот. rotare — айлантирмоқ] Турбина, электр двигатель ва ш. к. нинг кўзгалмас қисми ичидаги айланадиган қисм. *Ротор деган оғир бир нарса қудуқ оғзини бекитиб тураркан.* П. Қодиров, Уч илдиз.

РОШ [ф. راش — янчилган дон уюми, тўплами] шв. Ариқ тозалаш ёки қазилар вақтида унинг ичидан олиб, икки четига ташланган тупроқ, лойқа; пайкалларни бир-биридан ажратувчи марза. *Ерга — рош, қизга қош.* Мақол. ■ *Мана шу чорвоқ, йўнғичқа иси, оёғимиз остида кўпчиб ётган мана бу рош ҳам — ҳамма-ҳаммаси кишлоқни ёдимга соялатти.* Н. Қиличев, Ёронгул. *Одамлар пайкал четидаги рошларга қатор чизилди.* «Ёшлик». *Фазлиддин арна рошида отдан тушиб, ён-верига қаради.* Э. Самандар, Тангри қудуғи.

РОЯЛИЗМ [фр. royalisme] Қирол ҳокимиятига тарафдорлик, қирол ҳокимиятини ёқлаш; монархизм.

РОЯЛИСТ [фр. royalist < roy — қирол] Роялизм тарафдори; монархист.

РОЯЛЬ [фр. royal — қиролга оид, тегишли] Торлари, қопқоғи ва механизми горизонтал жойлашган, клавишли мусиқа асбоби. *Рояль чалмоқ.* ■ *Одатим бўйича тўғри клубга кириб борсам.. Лата рояль чашиб, менинг қўшиғимни куйлаб ўтирибди, — деди Рустамжон.* Қ. Мақсумов, Мухаббат кўшиғи.

РОҒ [ф. راغ — кўм-кўк тоғ ёнбағри; кўкаламзор майдон] қ. **боғ-роғ.**

РОҒИБ [а. رغب — рағбат қилувчи] Хошиш, майл билдирувчи, мойил. *Калоншоҳ*

ноилож ариза ёзишга роғиб бўлди. А. Қодирий, Меҳробдан чаён.

РОҲ [a. راه / راه — йўл, кўча] *кт. кам кўлл. айн. йўл. Согинчлар шамолдай қаҳди Юрак-ка кўринмас роҳлардан. Ш. Раҳмон, Юрак қирралари. Хатарли, қалтис роҳда титрар икки биродар. «Шарқ юлдузи». Гар ғубори хоки роҳин айласа бежо насим, Сабру бетоқатлиги табъи паришонимдадир. Нодира.*

РОҲАТ I [a. راحت — тинчлик, хотир-жамлик, ором] I Эстетик завқ ёки ором берадиган нарсалардан олинадиган лаззат, ҳузур, гашт. *Севгисин айтмаслик — қизлар одати, Нозу карашмаси — йигит роҳати. М. Алавия. Кундузлари иссиқдан беҳол бўлган одамлар кечадан роҳат кутадилар. М. Исмоилий, Фарғона т. о.*

Роҳат олмоқ (ёки **топмоқ, қилмоқ**) Лаззатланмоқ, ҳузур қилмоқ. *Куч, роҳат олар эдим, Инак сочларинг силаб. Файратий. Аваз ҳар вақт Собир акалар сингари хунарманд меҳнаткашлар гурунгидан роҳат топади. Ж. Шарипов, Хоразм. Утирганлар ажойиб овоз билан айтилган лирик ашулани роҳат қилиб тинглайдилар. Т. Обидов, Юсуфжон қизик.*

2 Ҳузур-ҳаловат, фароғат, тинч ва фаровон ҳаёт. *Роҳатда яшамоқ. Меҳнат, меҳнатнинг таги — роҳат. Мақол. Меҳнатсиз роҳат йўқ. Мақол. ■ Энди сенлар омон бўлинглар. Дунёнинг роҳатини сенлар кўринглар. Ойдин, Олтин узукка олмос кўз. [Пулдорларнинг] Қорнилари тўқ. Бола-чақалари роҳатда, уйларида қази-қарта қайнайди. Ойбек, Танланган асарлар.*

3 Роҳат (хотин-қизлар исми).

РОҲАТ II Рост мақомининг Ушшоқ шувбаси асосида яратилган ўзбек халқ куйи.

РОҲАТБАДАН [a. + ф. راحتبدن — баданнинг, таннинг роҳати] I *от* Одатда олма гулли, кўйлакбоп ҳарир газлама. *Роҳатбадан кўйлак. ■ -Поплин дейсизми.. чиданганга чиқарган дейсизми, роҳатбадан дейсизми.. кеп қолинг, харидор! — деб [Хуснибий] бозорни бошига кутариб, бақириб юрар эди. Ф. Фулом, Шум бола.*

2 *сфт.* Баданга роҳат бағишлайдиган. *Пирпираб роҳатбадан шаббода қирғоқлаб эсиб, Шарқираб уйнаб тўлиб, тўлқин уриб кулгу келур. Ҳабибий.*

РОҲАТБАХШ [a. + ф. راحتبخش — роҳат, ҳузур бағишловчи] Роҳат бағишлайдиган, киши ҳузур қиладиган; оромбахш.

Роҳатбахш жой. Роҳатбахш куй. Роҳатбахш ичимлик. ■ Жабборов шу роҳатбахш кайфият билан уйига борди. Н. Ҳайиткулов, Ер тафти. Ташқарида ҳавонинг тафти баланд, аммо купе муздек салқин, роҳатбахш. Газетадан.

РОҲАТИЖОН [a. + ф. راحتجان — жоннинг роҳати] I *от* Шиннига муз қириб солиб тайёрланадиган мержонийсимон овқат. *Роҳатижон халқ таботатида дизентерия касаллигига қарши дори сифатида ҳам қўлланган. Газетадан.*

2 *сфт.* Жонга роҳат бахш этадиган, жонга роҳат бағишлайдиган. *У [Нигора] инакдай майин, шишадек тиниқ, роҳатижон илиқ булоқ сувини кучоқлар, оппоқ тўшига босиб яйрар. С. Анорбоев, Оқсой. Ғулом аканинг кабинети узун коридордан иборат эди. ..Шу оддийгина хона бош инженер ёрдамчиси учун роҳатижон макон эди: ҳам иссиқ, ҳам озода. Ж. Абдуллахонов, Тўфон.*

РОҲАТЛАНМОҚ Роҳат қилмоқ, ҳузур, гашт қилмоқ. *Мусиқадан роҳатланмоқ. Роҳатланиб дам олмоқ. ■ Узгалар оғирини енгил қилишдан роҳатланади. Т. Ашуров, Оқ от. Холита терлаб, товонлари қорайиб кетган оёқларини сувга тиқиб шалоплатди — жони роҳатланди. «Ёшлик». Азиза, курсдош қизларнинг гаши келаятганини сезган сайин, ўзини голиб ҳисоблаб, роҳатланарди. Ў. Ҳошимов, Қалбингга қулоқ сол.*

РОҲАТЛИ Кишига роҳат берадиган; оромли. *Донг таратган зарбдор Аллақачонлар Кечирмакда меҳнат-ла Роҳатли онлар. Файратий.*

РОҲАТСИЗЛИК Кишига ҳузур, ором бермайдиган ҳолат, оромсизлик. *..бу изғир иқ кишига унча роҳатсизлик бермаса-да, лекин қаердадир доғ қилинмоқда бўлган зиғир мойининг аччиқ исини димоққа келтириб уришидан кишида бир беҳузурлик ҳосил бўлар эди. А. Қодирий, Ўтган кунлар.*

РОҲАТ-ФАРОҒАТ Тинч ва фаровон ҳаёт, ҳузур-ҳаловат. *Рўпарангиздаги катта дарвозали ҳовлида Шоназар табиб бола-чақалари билан роҳат-фароғатда яшайдилар. Газетадан. Султон Ҳасанбек ва Мирзабек Ҳиротда роҳат-фароғатда умр кечириб, ўз ажаллари билан ўлдилар. М. Осим, Сеҳрли сўз.*

РОҲИБ [a. راهب — монах] Христиан динидаги ва умуман монах, зоҳид. *Бизнинг*

эрамиздан икки аср бурун будда роҳиблари қояларни ўйиб, ибодатхона ва монастырлар қурганлар. Н. Сафаров, Узоқни кўзлаган қиз.

РОҲИБА [а. راهبه — монах аёл] Роҳиб аёл.

РОҲИЛА I [а. راحله — миниладиган туя] I От-улов, юк ҳайвони.

РОҲИЛА II [а. راحله] Йўл озуқаси. Манзил узоқ, роҳила оз.. бу ҳолим билан.. акамнинг мойжувозига ҳам ярамайман. А. Қодирий, Кичик асарлар.

2 Роҳила (хотин-қизлар исми).

РОҲ-РОСТ, роҳи рост [ф. راه راست — тўғри йўл] кт. Тўғри йўл; ҳақиқат, тариқат йўли; мусулмончилик. Гапинг ҳақ, сени роҳ-ростдан оздирган бу китобларни отанг бизга топширди. К. Яшин, Ҳамза. [Махзум] Қавмларига бир қараб.. гап бошлади: -Мачитингизга келиб, оз муддат хизмат қилиб, жуда кўп тузингизни ичдим, диний йўлда сизларни роҳ-ростга бошладим. Файратий, Довдираш. Бунинг учун шахсан мен, уни роҳи ростга сабр-тоқат билан даъват этмоқ керак, деб ўйлайман. К. Яшин, Танланган асарлар.

РУБИДИЙ [лот. rubidis — қизил, тўқ қизил] Менделеев даврий системасининг I гуруҳига мансуб кимёвий элемент; жуда юмшоқ кумушсимон-оқ ишқорий металл.

РУБИЛЬНИК [р. рубить — «кесмоқ» фл. дан ясалган от] тех. Электр токини узиб-улаб турадиган дастаки очқич. Пўртананинг тўхташи ҳам, худди рубильникдан ўчиргандек, бирданига рўй берди. «Фан ва турмуш». Ҳайдар деворга қоқиб қулфлаб қўйилган яшикни очиб, рубильникни босди. И. Раҳим, Ҳаёт булоқлари.

РУБЛЬ [қад. р. рубль — гўла, кунда; тикин; пул бирлиги] Россия Федерациясининг асосий пул бирлиги.

РУБОБ [ф. رباب — камонча билан чалинадиган мусиқа асбоби] Медиатор билан чертиб чалинадиган беш торли мусиқа асбоби. Қашқарча рубоб. Рубоб тароналари. Рубоб чалмоқ. ■ -Сўйла, рубоб, ким экан Юрагимни тортувчи. Севги, армон, ҳасратни Бошларимга ортувчи? Файратий.

РУБОБИЧ Рубоб чалувчи созанда.

РУБОЙЁТ [а. رباعيات — рубойлар, тўртликлар] Бирор шоирнинг рубойлари мажмуи. Умар Хайём рубойёти. Алишер Навоий рубойёти.

РУБОЙЙ [а. رباعى — тўртлик] ад. Тўрт мисрадан иборат, тугал маъно ифодаловчи, биринчи, иккинчи, тўртинчи мисралари ёки тўртала мисраси ҳам қофиядош бўлган мустақил шеър; Шарқ халқлари шеъриятида кенг тарқалган поэтик жанр. Навоий рубойилари.

РУБОЙЙНАВИС [а. + ф. رباعى نويس — рубойй ёзувчи] Рубойй ёзувчи шоир. У [Шайх Рўзбехон] форс-тожик адабиёти тарихида рубоййнавис сифатида ўзига хос мақоми ва ўрнига эга. Газетадан.

РУБРИКА [лот. rubrica — қизил ранг, бўёқ; қонуннинг қизил рангли сарлавҳаси < ruber — қизил] Газета, журнал ва ш. к. да бирор бўлим (рукн)нинг сарлавҳаси; боб. «Редакциянинг иш кунлари» рубрикаси остида берилган материаллар 8 март — Халқаро хотин-қизлар кунига бағишланган. Газетадан.

РУБЪ [а. ربع — тўртдан бир, чорак]: **рубъи маскун** [а. ربع مسكون — аҳоли яшайдиган чорак ер] эск. кт. Қадимги юнон олимлари, кейинчалик Шарқ географлари тасавурича, Ер шарининг одам яшайдиган, обод ва маъмур чорак қисми (қолган учта чорак қисм эса сув деб тахмин қилинган). Рубъи маскунда Ҳиротдек шахри азим йўқ. Ойбек, Навоий.

РУДА [қад. р. руда — қон; қизил доғ, < рдетъ — «қизармоқ» фл. дан] Таркибида металл ва унинг бирикмалари бўлган табиий минерал хомашё. Темур рудалари. ■ Бир грамм соф радий олиш учун бир неча тонна уран рудасини қайта ишлашга тўғри келади. «Фан ва турмуш». Бизнинг профессоримиз олтин рудасини сунъий таркиб қилиш мумкинлигини назарий жиҳатдан исбот этган. А. Мухтор, Асарлар.

РУДАЛИ Таркибида руда бўлган. Рудали қатлам. ■ Сўнги йилларда Самарқанд ва Тошкент вилоятларида олтин рудали конлар аниқланди. Газетадан.

РУЖУ(Ъ) [а. رجوع — қайтиш, қайтариш; қайрилиб қараш, мурожаат қилиш; 3-ш. бирл. ружуи] Бирор нарсага бўлган ортиқча майл, берилиш. ..ташмачилик — меҳнатсиз даромаднинг оқибати беҳайр бир тури. Унга ружу қилган кишининг обрўси тутдак тўкилади. «Муштум». Тўрдаги ёши улуғлар фотиҳадан сўнг таомларга қарашди. Одоб билан уларни кузатиб ўтирган ёшлар қимизга ружу қилиб, овқатга қўл узатишди. Мирмуҳсин, Меъмор.

РУКН I [а. ركن — асос, устун, таянч; бурчак, бўлим (журнал ёки радиоэшиттиришда)] эск. 1 Устун, колонна.

2 кўчма Асос, таянч. Юсуфбек ҳожи юқорида ўтган гапларни қуруқ ва асоссиз сўзламаган, балки шу турмушнинг рукн ва асосини бир даража айтиб ўтган, Отабек эса бунини шу муҳитнинг бир ўғли бўлиб эшитган эди. А. Қодирий, Ўтган кунлар. ..тасаввуфнинг саховат, шижоат, садоқат, мурувват, ҳиммат, мардлик, инсоф, ҳаё рукнларини ўзида мужассам этган Алишер Навоийнинг ўзи ҳам том маънодаги комил инсон эди. «ЎТА».

3 ад. Арузда қисқа ва чўзиқ, ўта чўзиқ бўғинларнинг мисраларда муайян тартибда гуруҳланиб такрорланиши.

4 Газета, журналлардаги мазмунан яқин туркум мақолаларнинг сарлавҳаси. «Савдогар» газетаси ўз саҳифаларини бундан-да бойитишни, турли-туман янги руқнлар остида материаллар бериб боришни ўз йиллик режасига киритди. Газетадан. «Қилмишқидирмиш», «Турмуш чорраҳаларида» руқнлари остида берилаётган мақолаларни ўқиган ҳар бир инсон яхшиликка, эзгуликка интилади. Газетадан.

РУКН II Исломда энг муҳим, ҳар бир мўмин-мусулмон учун фарз саналган бешта вазифанинг ҳар бири: калимаи шаҳодат, намоз, закот, рўза ва ҳаж ибодати.

РУКУ(Ъ) [а. ركوع — тиз чўкиш, тиз чўкиб сажда қилиш] (3-ш. бирл. — **рукуи**) дин. Намозда бошни эгиш, икки букилиш. Руку қилмоқ. Рукуга кетмоқ. ■ Отабек эса ҳануз рукуьда, сужудда эди. А. Қодирий, Ўтган кунлар. Қози домла худди шу турткини кутиб тургандай, рукуни ўртада қолдириб, саждага бош қўйиб юбора қолди. «Шарқ юлдузи».

Рукуга кетмоқ (ёки бормоқ) 1) дин. руку амалини бажармоқ, тиз букмоқ. Қавмлар ҳам намоз қоидасига мувофиқ, рукуга кетдилар. Рукудан сўнг аввал тиз чўкиб, кейин саждага бош қўйганларида, мингбоши кечикиб кириб келди. «Муштум». Холмат ака, рукуьга кетган кишидай, қўл қовуштириб, ерга қараб ўтирди, аммо қулоғи Исомиддиновда эди. Ҳ. Шамс, Душман; 2) узоқ ўйга толмоқ, жим қолмоқ. Амир Темурурукуга кетди, узоқ жим қолди ва ниҳоят ҳаммага қараб деди: -Мен тангри қули Темурман. Т. Тўла, Асарлар.

РУЛЕТ [фр. roulette — гилдиракча, ролик < rouler — гилдиратмоқ, думалатмоқ; ўрамоқ, ўраб йиғиштириб қўймоқ] кул. 1 Хамир ва ширинликни навбатма-навбат бир неча қават қилиб пиширилган ўрама пирог. Кесилган рулетни дастурхонга тортишди.

2 Тилимлаб майдаланган гўшт ва мол ёки қўй қорнини устма-уст қўйиб ўраб, йўғон қази шаклида пиширилган яхна овқат.

РУЛЕТКА [«рулет» с. дан] тех. Пўлат, мато ва ш.к. дан ўраладиган тасма шаклида ясалиб, махсус шкала ёзилган узунлик ўлчаш асбоби. Уйнинг буйини рулетка билан ўлчамоқ.

РУЛОН [фр. rouleau — ўралган нарса; ўрам найча] Найча шаклида думалоқлаб ўралган қоғоз, мато ва б. материаллар; шундай шаклдаги ўрама. Рулон қоғоз. Рулон газлама.

РУЛЧИ с. т. Рулни бошқарувчи киши; ҳайдовчи.

РУЛЬ [голл. roer — гилдирак] Кема, автомобиль, самолёт ва ш. к. ларнинг ҳаракат йўналишини бошқариш механизми. Трактор рули. Руль чамбараги. ■ Жўрабой бир оз ўйлаб туриб, велосипеднинг рулини ушлади. С. Аҳмад, Қадрдон далалар. -Қани, меҳмон, марҳамат, — деди машина эшигини очиб, рулда ўтирган йигит. С. Анорбоев, Оқсой.

РУМИН қ. руминлар. Румин халқи. Румин тили. Румин аёл.

РУМИНЛАР Руминиянинг асосий аҳолисини ташкил этган халқ.

РУНЛАР, руник ёзув [фин. run — махфий нарса, сир] Скандинавия халқларининг ва б. айрим халқларнинг тош, металл буюмлар ва ш. к. да сақланиб қолган қадимги ёзувлари (баъзи ҳарфларнинг ўхшашлигига қараб, қадимги туркий ёзув ҳам «руник ёзув» деб юритилади). Руник хат. Руник ёзувлар.

РУПИЯ [санск. रुपيه — кумуш] Ҳиндистон, Покистон, Цейлон, Индонезия, Непал ва б. бир қанча мамлакатларда пул бирлиги.

РУПОР [голл. георег — бақирмоқ] Овозни, товуш тўлқинларини муайян йўналишда кучайтириб берадиган, конус шаклидаги карнай.

РУПОҲ [ф. روپاک — сочиқ, рўмолча] Ипак газламанинг бир тури. Сарик рупоҳ атлас кўйлакнинг устидан унинг [қизнинг] ўртача кўкраги бир оз кўтарилиб турмоқда эди. А. Қодирий, Ўтган кунлар.

РУС қ. руслар. Рус халқи. Рус тили. ■ *Ўқиш рус ва ўзбек тилларида олиб борилади. Газетадан. Мунчоқ кўзли новча киши пахта сотиб оладиган рус савдогарлари ширкатида хизматчи экан. С. Сиёев, Ёруғлик.*

РУСИЙЗАБОНЛАР [рус + ф. زبان — тил] Рус тилида сўзлашувчилар. *Лекин энг ёмони, бу мактабга унча-мунча одамнинг боласи қабул қилинавермас, ўқувчиларнинг аксарият қисми ё русийзабонларга мансуб ёки казоларнинг фарзандлари эди. Газетадан. Айниқса, Ҳ. Низомиддинов қаламига мансуб «Зумраша», русийзабонлар учун З. Диёровнинг «Ур, тўқмоқ» асарларининг саҳналаштирилиши алоҳида қизиқиш билан кутиб олинди. Газетадан.*

РУСЛАР Россия Федерациясининг асосий аҳолисини ташкил этган, шарқий славянларга мансуб халқ (улар, шунингдек, аксар МДҲ мамлакатларида, дунёнинг бошқа кўплаб мамлакатларида ҳам яшайди).

РУСЛАШТИРИШ Рус тили ва рус урфодатларини сингдириш, унга бўйсундириш. *Бу эса мустамлакачиларнинг руслаштириш сиёсатига жиддий ғов бўлиб, унга қарши биринчи даражали ишлардан эди. «Фан ва турмуш». Мусулмонлар маорифининг асосида уларни руслаштириш.. ётмоғи лозим, деган XIX аср «рус зиёлилари». Ш. Ризаев, Жадид драмаси.*

РУСТА [ф. رسته — ҳолванинг бир тури] Ичига ўрик ёки бодом мағзи солиб тайёрланган парварда. *Нусратбекнинг диққатини тақсимчада мантибек териб кўйилган руста ҳолваси тортди. С. Нуров, Нарвон.*

РУСТАМ [ф. رستم] 1 «Рустам» эпик халқ достонининг ҳамда Фирдавсий «Шоҳнома» асарининг анъанавий, афсонавий қаҳрамони номи.

2 *кўчма* Рустам сингари баҳодир, паҳлавон. *Унинг узоқ юртида, кўёш ва гуллар диёри Ўзбекистонда қолган дуогўй кампир онаси уни — ёлғиз ўғлини эркалар экан, ҳар вақт: «Рустам тойим! Арслон тойим!» деб атамасмиди. Ойбек, Кўёш қораймас.*

3 Рустам (эрқаclar исми).

РУСТАМДАЙ, =дек Паҳлавон каби, баҳодирлардек. *Рустамдай йигит. Рустамдай курашмоқ.*

РУСТАМНАМО [ф. رستم‌نامه — доно, бадавлат, забардаст] Паҳлавонларга ўхшаш, паҳлавонларга хос. *Тошкентнинг Чўқур қиш-*

лоқ деган ерида қозоқлар томонидан очилган ва ҳамиша рустамнамо кишилар билан айқириб ётган бўзахоналар ҳам йўқ эмас эди. А. Қодирий, Ўтган кунлар.

РУСТАМОНА [ф. رستمانه] *рвш.* Паҳлавонларга хос бир равишда; баҳодирона. *-Баракалла ғайратларингизга! — деди Азизбек, [қўрғонбегига қараб] — Бугун қипчоқларга рустамона жавоб бериб, ўзларини ҳам итдек қиргансиз! Бунчалик ғайрат кўрсатган фуқароларга раҳмат, дунё турғунча турсинлар. А. Қодирий, Ўтган кунлар. Сизлар учун бу — йигитлик, мардоналик, рустамона қаҳрамонлик. Ойбек, Навоий.*

РУСТАМЧА *айн. рустамона.* Урушда ғайрати рустамча борди, Юз қайтармай ул урушда туради. *Кўп лашкарни ўзи ёлғиз қиради. «Фольклор».*

РУСТАХЕЗ [ф. رستخيز — қиёмат куни, ўликларнинг тирилиши; тўс-тўполон, тартибсизлик] Ғавго, тўполон, кўзғолон, қиёмат. *Бехос, қўшин ичра солиб рустахез, От сурди жаҳонгир, қалбимда ларза. Ж. Жабборов, Кўёш юрти.*

РУСУМ [а. رسوم — «расм» с. нинг кўпл.] 1 Расм ва одатлар, расм-русумлар; қоиданизомлар. *Мўғуллар шаҳарни жанг русумига мувофиқ қамал қилишга киришди. М. Осим, Ўтрор.*

2 Мол, товарнинг нави, хили, маркаси.

РУСУМЛИ Русумга эга бўлган, русумга асосланган, маълум маркадаги. *Ташкилот кенг турдаги «Газ» русумли автомобилларни тақлиф этади. Газетадан. «Нексия», «Дамас» русумли енгил машиналар — булар бари Нурилла бобога тегишли. Газетадан.*

РУСУМОТ [а. رسومات — расм-одатлар; белгилар] *эск. кт.* Русум; русумлар. *Русумоти жанг. ■ Кенг, баланд, серҳашам ипак чодирда [Ҳусайн Бойқаро] беклари билан «Русумоти жанг» ҳақида сўзлашди. Ойбек, Навоий.*

РУСЧА 1 Русларга, рус халқи, тили ва маданиятига оид, рус халқига хос бўлган. *Русча рақс. Русча кийим.*

2 Рус тили. *Русча(ни) биласизми? Русча гапирмоқ. ■ Сабогул, одатича, сўзларни бузиброқ русча гапирарди. С. Кароматов, Олтин қум.*

РУСЧАЛАМОҚ *с. т.* Рус тилида гапирмоқ. *[Полиция] Одамларга утириш учун қўполгина ишорат қилди. Кейин тўхтовсиз*

сўкиб, жаҳл билан Йўлчига русчалаб бир нима деди. Ойбек, Танланган асарлар.

РУТА [лот. ruta] Тошбақатоллар оиласига мансуб кўп йиллик доривор ўт ёки чала бута ўсимлик.

РУТБА [а. رتبه — даража, унвон, обрў; лавозим; яхши хислат] эск. Унвон, даража, мартаба. *Хусайн Муродбек юксак рутбани эгаллаб турса-да, бир қадар инсофли, раиятга кўнда зугум қилавермасди. С. Сиёев, Аваз. Ўлтиришда ҳар ким ўз рутбасига муносиб ўринни ишғол этди. Ойбек, Навоий. Барча талабалик рутбасига эришганлар қатори мен ҳам бу даврнинг шоду шодон лаҳзаларини асло унутолмайман. Газетадан.*

РУТЕНИЙ [лот. Ruthenia — Русь, Россия давлатининг номи] Менделеев даврий системасининг VIII гуруҳига мансуб кимёвий элемент; платина металлари гуруҳидаги металл.

РУТУБАТ [а. رطوبت — намлик, захлик] Бирор нарсадаги намлик, захлик. *Ҳавонинг рутубати. ■ Ҳафталаб ёққан ёмғир борлиқни намиқтириб, рутубатга чулғади. М. Маҳмудов, Мангу куй излаб. Дарахтлар куртак отиб, анча бўртиб қолган бўлса-да, ҳаво рутубатга чулганган. С. Кароматов, Олтин қум. Шаббода овулга оралаб ўтди, Сўнги рутубатни боғлардан қувиб. А. Мухтор.*

2 кўчма Фам, мусибат. *Рутубатдан юз берган дунё, Дунё янги дунёни чорлар. У. Кўчқор, Ҳаяжонга кўмилган дунё. Дегилки, борини айтмоқдин ожиз, Рутубат тушмагай бахтига ҳаргиз. Т. Тўла, Асарлар.*

РУТУБАТЛИ 1 Рутубати бўлган; нам, зах. *Кузнинг рутубатли оқишони эди, Боғлар сокингина чекар эди оҳ. Рухимда бир хазон айёми эди, Ажиб гўзалликка дуч келдим ногоҳ. А. Орипов, Онажон. Қош қорайган эди. Далалардан рутубатли совуқ шамол эсиб турибди. А. Мухтор, Чинор. Тунги рутубатли ҳаво баданни жунжиктиради. Л. Тожиева, Меҳрим сизга, одамлар.*

2 кўчма Фам-ғуссали, киши эркини бўғадиган; ифлос, чиркин. *Шунда рутубатли бадбўй бу шаҳар Кўзимга чарақлаб Фарғона бўлди. Э. Воҳидов, Келажакка мактуб. Эртага у диққинафас, рутубатли Ҳиротдан чиқиб кетади, шу йўсин билан бир йўла у беадад ғаму ғуссадан ҳам қутулади! [ўйларди Меъмор]. Мирмуҳсин, Меъмор. Саройнинг фисқу фужурга, фаҳшга тўла рутубатли*

ҳавосию мрамар ҳовузлардаги фавворалар салқини.. — барча-барчаси ўтмишга чекинди. С. Сиёев, Ёруғлик. Беш йил «Ғоя» учун қаттиқ берилиб, рутубатли хужрада захлаб.. йигирма саккиз ёшда «хатми кутуб» қилишга муваффақ бўлди. А. Қодирий, Меҳробдан чаён.

РУХ I [ф. رخ — тўра, рух] Шахмат ўйинида: тахтанинг икки четки қатор охиридаги катакларда жойлашадиган ва тикка ҳамда ёнлама йўналишда истаганча юра оладиган сипоҳ; тўра. *Рухни сурмоқ. Рухни юрмоқ.*

РУХ II [ф. رخ — юз, бет; ёноқ] эск. поэт. Кишининг юзи; рухсор. *Лабларинг остидаги холингдин айлансун қулинг, Лоладек гул-гул рухи олингдин айлансун қулинг. Фурқат.*

РУХ III [ф. روى — рух; қалай; бронза, сариқ мис] Менделеев даврий системасининг II гуруҳига мансуб кимёвий элемент; оч зангори рангли, кумуш каби ялтироқ металл. *Рух купороси. Рух қотишмалари.*

РУХЛАШ Металл буюмларнинг сиртини коррозиядан сақлаш учун уларнинг сиртига рух қатлами ёки қотишмаси югуртириш ёхуд сиртини рух қатлами билан тўйинтириш.

РУХСАТ [а. رخصت — ижозат, изн; ижозат (розилик) қоғози] **1** Бирор ишни бажариш, қилиш, амалга ошириш учун шу ишга тааллуқли ёки жавобгар киши, орган, ташкилот ва ш. к. томонидан берилган ижозат, розилик жавоби. *Рухсат бермоқ. Рухсат олмоқ. ■ Жаноблар! Менга рухсат беринглар, бориб отамга қарашим керак. Ҳамроҳ бўлганингиз учун ташаккур! Мирмуҳсин, Мемор. — Бунақа жиддий нарсаларни ёзиш учун бош редакторнинг рухсати керак, — деб баҳона қилдим. С. Аҳмад, Сайланма. Аъзам Зоҳидовичдан рухсат сўраб, дўстимнинг ишхонасига йўл олдим. О. Мўминов, Хиёбондаги уч учрашув.*

2 кесим взф. Жавоб, ижозат (“сиз бўшсиз”, “кетишингиз мумкин” маъносида). *Сизга рухсат! ■ Менга рухсатми, бек? Азизбек йўл устидан ҳожига қаради: — Рухсат, эртага чойни ўрдага келиб ичинг! А. Қодирий, Ўтган кунлар.*

РУХСАТНОМА [рухсат + нома] **1** Ёзма равишда берилган ижозат, рухсат. *Навбатчи полициячилар рухсатномани кўриб, бизни ичкарига қўйишди. «Фан ва турмуш».*

2 иқт. айн. лицензия 1. ..четга чиқариладиган маҳсулот учун рухсатнома бериш

тартиби анчагина соддалаштирилди. Газетадан.

РУХСАТНОМАСИЗ *икт.* Махсус рухсатномаси, лицензияси бўлмаган, шундай рухсатнома олмаган. *Ўз маҳсулотини рухсатномасиз экспорт қилиш ҳуқуқи берилган бундай корхоналар сони бугунги кунда 800 га етиб қолди.* Газетадан.

РУХСАТСИЗ Рухсат сўрамай; рухсат берилмагани ҳолда, ижозатсиз. *Уста Олим қутидорга кулумсираб олгач: -Рухсатсиз меҳмонхонангизга кирганим учун кечирасиз, - деди.* А. Қодирий, Ўтган кунлар.

РУХСОР [ф. رخسار – ташқи кўриниш, қиёфа; юз, бет; ёноқ] **1** Кишининг юзи; бет; афт-ангор, чеҳра. *Хуросонда бир дарбоза бор, Остонаси гулга кўмилган, Унда яшар бир пари рухсор.* Э. Воҳидов, Муҳаббат. *Бир зумлик безовта ўйлар сўнгида Яна рухсоринга тикиламан жим.* А. Орипов, Юртим шамоли. *Ранги синиқиб, таранг рухсорига ажин тушди.* С. Кароматов, Сўнгги бархан. *Унинг рухсори Аҳмадга танишдай туюлди.* «Ёшлик».

2 кўчма Кўриниш, қиёфа. *Ҳозирги Мирзачўлнинг рухсори бус-бутун бўлакча.* М. Жўра, Куёшдан нур эмганлар.

РУЧКА [р. ручка – қўлча; даста, дастак, тиргак] **1** Ёғоч ёки пластмассадан қилинган, бир учига перо ёки ичига ранг билан тўлдирилган стержень ўрнатиладиган чўзинчоқ тутқич – ёзув қуроли. *Абдураззоқ ружкани сиёҳга ботириб, ҳафсала билан, худди сурат чизаётгандек қилиб имзо чекди.* С. Аҳмад, Сайланма. *Ширинхон столга сурилиб, сиёҳдонга тиреғлик турган ружкалардан бирини олди.* С. Зуннунова, Олов. *Ҳозир ёзув-чизувни шарикли ружкасиз тасаввур қилиб бўлмайди.* «Фан ва турмуш».

2 с. т. Даста. *Эшик ружкаси. Дераза ружкаси.*

РУҲ **1** [а. روح – жон, ҳаёт, кўнги; арвоҳ] **1** *дин.* Киши ҳаётлигида у билан бирга, вафотидан кейин эса танадан чиқиб, абадий қоладиган кўзга кўринмас нарса, куч; арвоҳ. *Руҳ танадан чиққач, тана ўлади.* «Фан ва турмуш». *Ҳозир унинг руҳи, Сидқийнинг арвоҳи Мадина орқасидан эргашиб кетаётгандай кўринарди.* Мирмуҳсин, Чодрали аёл. *Ҳаёлан унинг руҳига сиғинади, ундан мадад истайди.* С. Сиёев, Ёруғлик.

Руҳи пок [а. + ф. روح پاک] Тоза, покиза ном, хотира. *Шу кунни дошқозонда ош дамла-*

ниб, ўтган улуг аждодларимиз руҳи покига дуойи фотиҳалар қилинди. Газетадан. **Руҳи равон** [а. + ф. روح روان] Ҳаракатдаги, юриб турган қон, жон. *Туйғуларим тугёнидан беҳабарсан, Тегма бир дам, гўзал, руҳи равонимга.* Т. Тўла, Асарлар.

2 Кишининг ички ҳолатини, психик кечинмаларини, ҳис-туйғуларини акс эттирувчи кайфияти. *Кўтаринки руҳ. Унинг руҳи кўтарилди.* ■ *Эрталабки соф ҳаво унинг руҳини энгиллатиб юборди.* Х. Назир, Ёнар дарё. *Умиднинг уларникида меҳмон бўлганини эшитган Ҳафиза бирдан руҳи кўтарилиб, хурсанд бўлиб кетди.* Мирмуҳсин, Умид. *Қутидор ҳали ҳам Отабекнинг руҳига тушуна олмаган эди.* А. Қодирий, Ўтган кунлар. [Йўлчининг] *Кўкси гоҳ юпантирувчи кечинмалар билан, гоҳ бутун руҳига сингган тотли ҳасрат билан тўла эди.* Ойбек, Танланган асарлар.

3 Кишининг ички дунёсини, маънавий қиёфасини, ўй-фикрларини, маслак ва мақсадларини акс эттирувчи кайфияти. *Миллий руҳ.* ■ *Саида Зуннунованинг ижоди ҳам бошдан-оёқ мана шундай ифтихор руҳи билан суғорилгандир.* Газетадан. *Болаларни Ватанга муҳаббат руҳида тарбиялайдиган ўйингоҳлар керак.* «Саодат». [Ҳожия] *Мажлиснинг Ниёз қушбеги руҳида боранглигини яхши сездди.* А. Қодирий, Ўтган кунлар. *Васила Назаровна бу қизнинг руҳида бўйсунувчанлик эмас, исёнкорлик борлигини кўриб, тутақиб кетди.* Ў. Ҳошимов, Қалбингга қулоқ сол.

4 Кибр-ҳаво, димоғ. *Манманлик руҳи. Катталиқ руҳи.*

5 Кишининг умумий кайфияти, кайфаҳволи. *Руҳи сўлғиннинг иши сўлгин, Руҳи тетикнинг иши тетик.* Мақол. ■ *Шу кунни Гавҳар ланже бўлиб уйғонди. Унинг руҳи тушиб кетган, нимадан хафалигини ўзи ҳам билмас, лекин ҳеч ишга қўли бормасди.* Ў. Ҳошимов, Қалбингга қулоқ сол. *Рустам қоронғи тушиб қолган қишлоқ кўчасидан руҳи чўккан аҳволда юриб бораркан, ҳадеб шу саволни такрорларди: -Нега олади? Ў. Ҳошимов, Қалбингга қулоқ сол. Ўзгар руҳим, жангари руҳим, Бир зумгина ўйга толсангчи.* А. Шер, Қадимги куй.

Руҳи энгил тортмоқ (ёки энгиллашмоқ) **1)** соғайиб, тузалиб ёки ҳордиқ олиб, ўзини энгил, дуруст ҳис қилмоқ. *Бугунги осойишта уйқу Пўлатжонга анча қувват кир-*

гизди, ўзини тетик, руҳини энгил сеза бошлади. Ойдин, Садағанг бўлай, командир. Атрофга суқланиб қараркан, кўнгли нимадандир шодланиб, руҳи энгиллашди. «Ёшлик»; 2) иши энгиллашиб, ўнгланиб, хоотири жам, кайфи чоғ бўлмоқ. Самандарнинг руҳи анча энгил тортди, яна чорбоққа ўтди. С. Кароматов, Бир томчи қон. Сергей Петрович унинг кўнглини кўтариб ҳазиллашар, у ердан Адолатнинг руҳи энгил чиқарди. С. Зуннунова, Гулхан. **Руҳи тетик** Кайфияти яхши, димоғи чоғ, хурсанд. Уч кундан бери Алимардон шод, руҳи тетик эди. Бутунлай соғайиб қолди. Ў. Ҳошимов, Қалбингга қулоқ сол. Бунақа обрў кимнинг тушига кирибди дейсиз. Руҳим тетик, бир гапириб, ўн куламан. С. Аҳмад, Сайланма.

6 Аъло кайфият; бардамлик, тетиклик; хузур, завқ. *Отабек сунбул исли сочлардан руҳ олар, Кумуш гўё унинг бағрига сингиб кетган эди.* А. Қодирий, Ўтган кунлар.

7 кўчма Жонлилик, файз. *Навоий уй ичига кириши билан мажлисга руҳ кирди.* М. Осим, Аждодларимиз қиссаси. *Уйин қизиб борар эди, уйнинг дарича, эшиклари бекланиб, тоқчаларга шам ёқилгандан сўнг, базмнинг руҳи яна ошди.* А. Қодирий, Ўтган кунлар.

8 Ортик завқ; пафос. [Султонмурод] *Дўстнинг шеврларида бўлган нуқсонларини едириб кетиш учун кўпроқ завқ ва руҳ билан ўқишга тиришди.* Ойбек, Навоий.

9 Иш-ҳаракат, воқеа-ҳодиса ва ш.к. нинг боришидаги, йўналишидаги характерли хусусият. *Замон руҳи.* ■ -Инишоолло, шу йигит мирзабоши бўлар! – деди Сафар бўзчи суҳбатнинг руҳини билмаган ҳолда. А. Қодирий, Мехробдан чаён. *Яхши асар яратиш учун аввало замон руҳини тушунмоқ керак.* Шукрулло, Жавоҳирлар сандиги. *Изланиш ва ижодкорлик руҳи лаборатория муҳитини белгилайди.* Газетадан. *Адабиёт ҳамиша навқирон кучлардан қувват олади, улар ҳисобига бойиб, янгича руҳ ва йўналишлар касб этади.* «Ёшлик».

10 Маслак, таълимот, ҳужжат ва ш.к. нинг асосий моҳияти, улар негизидаги белгиловчи ғоя. *Қонуннинг руҳи. Конституциянинг руҳи.*

Руҳи тушмоқ ёки руҳини туширмоқ Руҳий тушқунликка берилмоқ; ҳафсаласи пир бўлмоқ, кайфияти ёмонлашмоқ. *Бировга айтиб, тушунтириб бўлмайдиган ҳасрат уйқу-*

ни, дармонни қочириб, руҳини тушириб, бир ҳолатга келтиради одамни. А. Мухтор, Тугилиш.

11 флс. Маънавий-руҳий, номоддий ибтидонии фододаловчи фалсафий тушунча; онглилик ва онгсизлик бирлигини фододаловчи фалсафий категория.

РУҲАН [a. روحاً – маънан, ахлоқан, ичдан] рвш. **1** Руҳий жиҳатдан; руҳий. *Руҳан эзилди, бутун вужуди билан унсиз йиғлади.* Т. Ашуров, Оқ от. *Хавотири ва ҳаяжондан руҳан қаттиқ чарчаган Адолатнинг кўзи илинди.* С. Зуннунова, Олов. *Одам табиатга яқинлашиб, уни теран ҳис қилгани сари, ўзини руҳан бардам сезади.* Газетадан.

2 Хаёлан, фикран. [Йўлчи] *Кўкракдан оққан қонга беланиб ётса ҳам, у фикран, руҳан жангда – курашда эди.* Ойбек, Танланган асарлар.

РУҲАФЗО [a. + ф. روح افزا – жон бағишловчи, жонбахш, тириштирувчи; тетиклантирувчи] кт. Руҳни кўтарадиган, жонга руҳ бағишлайдиган, жонлантирадиган. *Руҳафзо ҳаво.* ■ *Яқинлашиб қолди дарёйи азим, Руҳафзо салқинин сезар жону тан.* Ж. Жабборов, Қуёш юрти. *Бугун кечқурун.. кинотеатрдан чиқишимиз билан, руҳафзо ҳаво бизни оғушига олди.* «Ёшлик».

РУҲБОН [a. رهبان – «роҳиб» с. кўпл.] эск. кт. Руҳонийлар, роҳиблар. -*Мазкур томошаларни руҳбонлар, давлат арбоблари, бош кўмондонлар, шаҳар улуғлари кўришга ҳақлидир, – деди Дониш.* Ж. Абдуллахонов, Тўфон.

РУҲИЙ [a. روحى – маънавий, ботиний, ахлоқий] **1** Кишининг руҳига, руҳий кайфиятига, ички кечинмаларига оид, улар билан боғлиқ бўлган. *Руҳий ҳолат. Руҳий кўтаринкилик. Руҳий эзилиш.* ■ *Муттасил руҳий азоб чеккан одам ҳамиша янги зарбаларга чоғланиб туради.* С. Аҳмад, Уфқ. *Ҳафиза ноумид уйга келди. У сўник, кайфи наст эди. Баъзи қизларга ўхшаб ички руҳий ҳолатини яшира олмас – хафалиги дарров билиниб қоларди.* Мирмуҳсин, Умид.

Руҳий энгиллик (ёки тетиклик) Кайфияти яхшилиқ, димоғи (кайфи) чоғлик, хурсандлик. *Касалдан турган ҳар қандай одамда бўладиган алланечук бир руҳий энгиллик унинг ҳам қалбига қувонч тўлдирди.* Ў. Ҳошимов, Қалбингга қулоқ сол. *Кечаги бахтиёр дамларини эслашнинг ўзиёқ Ёдгорга*

баланд бир руҳий тетиклик берган эди. Ҳошимов, Қалбингга қулоқ сол. **Руҳий касалликлар** Бош мия фаолиятининг бузилишидан келиб чиқадиган, руҳий фаолиятнинг функционал ўзгаришидан то унинг бутунлай бузилишигача бўлган ҳолатларда намоён бўлувчи касалликлар.

2 айн. маънавий 1. Руҳий озиқ. ■ Аллаларда онанинг руҳий дунёси, фарзандга бўлган муҳаббати, орзу-ўйлари акс этади. «Саодат». Унда атрофимизда бўлаётган экология ҳалокати эмас, балки руҳий оламнинг ҳалокати акс эттирилган. «Муштум». [Суннатилло маҳсум Шукруллога:] Сен уларга руҳий озиқ берасан, мен моддий томондан суййман. Шукрулло, Жавоҳирлар сандиғи.

РУҲИЯ [a. روحیه — руҳий ҳолат, кайфият] **1:** аҳволи руҳия эск. кт. қ. аҳвол. Бировнинг аҳволи руҳиясига қараб иш қилмоқ. ■ У қўрхонага бу йил қанча милтиқ, тўп, ўқ-дори келтирганини айтди, рус ҳарбийларининг аҳволи руҳияси, ўқитиш усуллари, қурол-аслаҳаларининг қаерда, қай тарзда сақланаётганини билдирди. С. Сиёев, Ёруғлик. Донолар шундай, одамни бир кўришдаёқ унинг аҳволи руҳиясини билишади. С. Нуров, Нарвон.

2 Ташқи кўриниш, қиёфа, авзо. Яна ўн минутлар ўтар-ўтмас катта зал зинапоясида Ҳафиза пайдо бўлди. Ҳаммадан аввал унга Умид тикилди, аммо унинг руҳиясидан ҳеч нимани пайқамади. Мирмуҳсин, Умид.

РУҲИЯТ [a. روحیت — руҳий ҳолат, психика] Руҳий кечинмалар мажмуи, руҳий ҳолат. Алла нафақат ухлатилаётган гўдак қалбига, балки кишилар руҳиятига ҳам ижобий таъсир кўрсатади. «Саодат». Боғларга, маданият уйларига, майдонларга, кўчаларга берилаётган номларнинг халқ руҳиятига ўтказадиган таъсирини фақат зукко одамларгина англайдилар. «Муштум». ..Кишиларимиз онгида, руҳиятида, қалбида ва қиёфасида кузатилаётган ҳурлик ўзгаришларини буй-баста билан кўрсатиш ижод аҳли олдига ўта долзарб вазифа бўлиб турибди. Газетадан.

Миллий руҳият Миллатнинг ички ҳолати, кечинмалари, ҳис-туйғулари, маънавий дунёси, ўй-фикрлари, мақсад ва маслақлари билан боғлиқ мулоҳазалар мажмуи. Миллий руҳиятни мазмунан ва шаклан бойитиш.. янги поғонага кўтариш мустақил-

ликнинг энг муҳим ва долзарб вазифаларидан биридир. «Мустақиллик» лугати.

РУҲЛАНМОҚ Руҳий кўтаринкилик касб этмоқ; илҳомланмоқ, рағбатланмоқ. Бойқаронинг зафар гурури билан руҳланган йигитлари душманни янчиб, даҳшатли сурон билан уни таъқиб этдилар. Ойбек, Навоий. [Элмурод] Гулсумнинг ҳар бир сўзни жону дили билан тинглашидан руҳланди. П. Турсун, Ўқитувчи.

РУҲЛИ 1 Кўтаринки руҳдаги, руҳи баланд. Йигитли жой салобатли, қаҳрамон руҳли бўлади. Шухрат, Шинелли йиллар.

2 Жонли тус олган, жонли, завқ-шавқли. Тўй жуда ҳам руҳли. А. Қодирий, Ўтган кунлар. Қурилиш кундан-кунга қизиқроқ, руҳлороқ давом этди. Ойбек, О. в. шабадалар.

РУҲОНИЙ [a. روحانى — руҳий, маънавий; диний; диндор] Дин пешвоси, дин йўлида, диний лавозимда хизмат қилувчи, уни тарғиб этувчи диний киши; диндор. Эрта билан Султон Абусаид мирзо Бухоронинг руҳоний ва номдор кишиларини чорлаб, улар билан қисқа мулоқотда бўлди. Мирмуҳсин, Меъмор. Зоҳир шайх, оғасидек руҳоний бўлгани билан, оғаси каби арзмаган нарсга ловуллаб кетадиган тажанг, жаҳлдор эмас, кўнгилчан, раҳмдил киши эди. С. Сиёев, Аваз.

РУҲОНИЯТ [a. روحانیت — руҳонийлар; руҳонийлик; руҳий-маънавий куч, таъсир] эск. кт. Руҳий-маънавий куч-қувват, маънавият. Масжид минорасидан руҳоният ёғдириб мунгли азон товуши эшитилди-да, уйқу кучоғида ётган табиат уйғониб жавоб берган каби янграб кетди. А. Қодирий, Ўтган кунлар.

РУҲПАРВАР [a. + ф. روحپرور — жонландирадиган, ҳаётбахш; руҳлантирувчи] Руҳни парвариш қилувчи; руҳлантирувчи. Эсиб ҳар соридин бўстонлар ичра руҳпарвар ел, Масиҳо мўъжизидин ҳар нафас урғуси дам саҳро. Огаҳий. Руҳпарвар овозим тинмагай абад. «Ёшшик».

РУҲСИЗ 1 Руҳи паст, жонли тус олмаган, шавқ-завқсиз. Руҳсиз тўй. Руҳсиз ҳаёт. ■ Мажлис очилмаган, очилса ҳам руҳсизроқ. А. Қодирий, Ўтган кунлар. Уста Сирожиддин «Наво»ни, дарҳақиқат, руҳсиз, ёмон чалди. Мирмуҳсин, Созанда. Абдурахмон.. бир неча ойлар ниҳоятда руҳсиз, кайфсиз ва

дарсига ҳам ҳафсаласиз давом этиб юрди. А. Қодирий, Меҳробдан чаён.

2 Бўш, ланж, кайфиятсиз. *Ўзининг руҳсиз товуши билан Ойша буви ҳам гапга ара-лашди. А. Қодирий, Ўтган кунлар. Тонгда руҳсиз кўз очаман, Қовурилар танда жон. Онажоним, бундай қилма, Бундай қилма, онажон. А. Орипов, Йиллар армони.*

РУҲСИЗЛАНМОҚ **1** Руҳий тушқунлик кайфиятига берилиб умидсизланмоқ, дилликни қўлдан бермоқ. *-Шунча одамнинг мислсиз қийноқларда жон берганини кўрган жангчилар, мағлубиятга учрагандан баттар эсанкираб, руҳсизланиб қолдилар. П. Қодиров, Юлдузли тунлар.*

2 Жонлиликни, қизғинликни йўқотиб, қизиқарсиз, ўлик тус олмақ. *Мажлиснинг бунчалик руҳсизланиб, маъюсият [маъюслик] ичида қолишига Гулсунбиби чидаб туролмади. А. Қодирий, Ўтган кунлар. Бундан сўнги суҳбат жуда руҳсизланиб кетди. А. Қодирий, Кичик асарлар.*

РУҲСИЗЛИК Руҳий тушқунлик кайфиятига берилиш, умидсизлик, завқ-шавқсизлик. *Уйга келсангиз, алақандай кўнглисиз, жимжит руҳсизлик сизни қарши олади. Ойдин, Икки кўзи шунда. Тоштемир хонасига кириб, чироқни ёқди. Руҳсизлик билан хона ичини кўздан кечира бошлади. «Ёшлик».*

РУҲШУНОС [а. + ф. روح شناس — руҳни текширувчи, ўрганувчи] Психология олими, мутахассиси. *Таниқли руҳшунос олимлардан бири А. Пере-Клермон ижтимоий ривожланиш манбалари хусусида эътиборли фаразларни олдинга суради. «Фан ва турмуш». -Инсон турмушида юқоридаги каби қақриқлар, асосан, киши руҳий зарба ёки ҳаяжон остида бўлганида юз беради, — дейди кўпчилик руҳшунослар. Газетадан.*

РЭКЕТ [ингл. gasket — шовқин, тўполон; қўрқитиш, дўқ-пўписа] Зўрлик, қўрқитиш орқали, товламачилик ва таъмагирлик, дўқ-пўписа, зўравонлик ва б. йўллар билан бирор нарса ундириш. *Шаҳарда жиноятнинг олдини олиш борасида.. коррупция.. рэкета нисбатан бешафқат кураш олиб борилмоғи лозим. Газетадан. Вилоятда ташкил қилинган рэкетга, террорчиликка, коррупцияга қарши курашиш бўлими, умуман, қониқарсиз аҳволда ишламоқда. Газетадан.*

РЮКЗАК [нем. Rucksack < Rucken — орқа, орқа томон + Sack — халта, қоп] Кўш тасма

билан орқага осиб юриладиган сумка, юк халта. *Оҳиста бориб, девор тагига қўйган рюкзагини очди. С. Кароматов, Олтин қум. Шерали орқасидаги рюкзакни каравоти тагига қўйиб, Зарифага қўл узатди. С. Кароматов, Олтин қум.*

РЮМКА [нем. Römeg — вино ичиладиган яшил шиша идиш] Спиртли ичимликлар ичиладиган кичкина шиша идиш; кичкина қадаҳ. *Стол устидаги шамларни ёқишиб, биллур рюмкаларга вино қуйишди. Мирмуҳсин, Ҳикоялар. Жавлон қўлларини бир-бирига завқ билан шикаб, стол устидаги фу-жер, рюмкаларни нари-бери қилиб, текислаб қўйди. Л. Тожиева, Меҳрим сизга, одамлар. -Қани, Зокиржон, — деди [Мирсаид]. — Биринчи рюмкани сиз учун кўтарамиз. П. Қодиров, Уч илдиз.*

РЎБАРЎ [ф. روبرو — юзма-юз; рўпарада, қарши томонда] Қарама-қарши томон; қарши, рўпара. *Рўбарў бўлмақ. Рўбарў келмоқ. Рўбарў қилмоқ. ■ Кунлардан бир кун жўрттага ташқари ҳовлига чиқиб, унинг [Зулфиқорнинг] йўлида рўбарў бўлди. Мирмуҳсин, Меъмор. Уларга [врачларга] рўбарў бўлсанг, албатта, бирор касал топишади. «Ёшлик». Рўбарў келдинг сен тошқин дарёга, Қолдинг соҳил узра чорасиз, гирён. А. Орипов, Йиллар армони. Рўбарў келмоққа йўқ бизда тоқат, Такрор учраштирар бизни бу кўча. У. Қўчқоров, Ҳаяжонга кўмилган дунё.*

РЎВАК [ф. روک] **1** Бир турли попукли ўсимлик.

2 Баъзи ўсимликларнинг (мас., қамишнинг) тўпгули, попути. [Қамиш] Гуллаш олдидан пояси учиди рўвак ҳосил қилади. М. Тўйчиев, Қамиш.

РЎВАКЎТ Бошоқдошларга мансуб кўп йиллик ўтлар туркуми.

РЎДАПО [ф. روده < روده — ичак + پای — оёқ; ичаксимон оёқлари бўлган баҳайбат махлук; саккизоёқ] **1** Сўрғичли саккизта катта пайпаслагичи бўлган денгиз ҳайвони, спрут. *Кўчада оёқлари, маталарда айтиладиган рўдапонинг оёқларидай, бир-бирига ўралиб бораётган қўрқинчли бир ажойиб нарсани кўрдим. С. Айний, Қуллар.*

2 кўчма Ҳар қандай баҳайбат, ваҳимали нарса. *-Бир оёғим тўрдаю бир оёғим гўрда, ажал деган рўдапо эшикнинг тирқишидан мўралаб турибди-ю, қолган беш кунимга шукур қилмай, яна орзу-ҳавас қилайми, ай-*

ланай овсин? — деди Шукур кампир. А. Мухтор, Опа-сингиллар. У танкнинг мотор қисмига ёндирувчи бутилка ташлади шекилли, ловуллаган темир рўдапонинг қорнидан офицер ўзини улоқтирди—да, тўппончасини тепадаги алақимга берди. Ойбек, Куёш қораймас. Рўдапо булутлар, сийқа тангадек хира ялтираб турган қуёшни ютиб юборишга ошиқади. Х. Султонов, Онамнинг юрти.

3 кўчма Бичими келишмаган, беўхшов, бесўнақай кийим ёки ёпинчиқ, —Баҳрингиз очилибди, ойи. —Очилганда қандай! Шу рўдапони ёпиниб, умримни хазон қилган эканман. А. Мухтор, Опа-сингиллар. Ичкари уйларнинг биридан, липпасига қистирилган рўдапо қўнғир кўйлагининг этагини шошапиша тузатган кўйи, семиз, бадқовоқ хотин чиқиб келади. Х. Султонов, Бир оқшом эртаги.

4 Кўпол, қовушмаган одам. *Ҳабиба хоним.. Валихоннинг кўз очиб кўргани, Техрон ва Кобулга номи кетган савдогарнинг қизи. Майна-чи? Қишлоқи, сахройи, рўдапо бир қиз. Ш. Тошматов, Эрк қуши. «Бўтам»лаб туриб, жонимни олади шекилли бу рўдапо, дея хаёлланди. С. Сиёев, Ёруғлик.*

РЎЁ [а. رؤياء — кўриш; туш кўриш, тушда кўрилган нарса] Мавжуд бўлмаган нарса, ҳодиса. *Агар алдамаса шу совуқ симлар, Гар шул эшитганим бўлмаса рўё, Сен бешик эмассан, дорсан, табият, Сен она эмассан, жаллодсан, дунё! А. Орипов, Юртим шамоли. Нечун рўёларни тан олиб, таниб, Менинг борлигимга келтиурсан шак! Т. Қаҳҳор, Оқ ўрик. Ёқмайсан: ҳақ қайда, қайдадир рўё. Қоқилиб кетгандек бўлаверасан Кафт каби тептекис жойда ҳам гўё. Газетадан.*

РЎЁБ [ф. روی آب — сув юзаси, сатҳи: маълум бўлиш, воқеланиш]: **рўёбга чиқмоқ** 1) юзага чиқмоқ, амалга ошмоқ; ушалмоқ. *Иншоолло, шу кунларда халқнинг озодлиги учун жонини тиккан жаҳидларнинг эзгу ниятлари рўёбга чиқиб, уларнинг авлодлари мустақилликнинг гаштини сурмоқдалар. Газетадан. Турмушда кишининг тузган режалари ҳамма вақт ҳам рўёбга чиқа бермас экан. О. Ёқубов, Икки муҳаббат; 2) намоён бўлмоқ, воқеланмоқ. *Фикр тил материали базасидагина рўёбга чиқади; 3) айн. рўшноликка чиқмоқ қ. рўшнолик. Боёқиш анча рўёбга чиқиб қолди. Ойбек, О. в. шабадалар.**

РЎЖА с. т. қ. **рўйжо**. *Эрталаб Тўпа хола ўзини бир оз енгил ҳис қилди. Ҳамма ёқ озода, оқ рўжса, тувакда гуллар. И. Раҳим, Ҳаёт булоқлари.*

РЎЗ [ф. روز — кун, кундуз пайт, бир кеча-кундуз; сана; давр] *кт. Кун, бир кун. Рўзингни сот, рўшнолик ол. Мақол. ■ Ул муртаддин.. жаноби тождорга ҳар рўз, балки ҳар соат хавф бордир. А. Қодирӣ, Ўтган кунлар.*

Рўзи азал [ф. + а. روز ازل — қадим вақтлардан, эскидан] Ўтмишдан, аввалдан. *Рўзи азал қиз қисматида Эрга тегмоқ одати бордир. Ҳ. Олимжон. Рўзи қиёмат* [ф. + а. روز قیامت — одамлар қайта тириладиган кун] *қ. қиёмат. Тонгла рўзи қиёматда қилган кавсардан шароб, То ўлгунча сени истар бахти қаро Гулшароб. «Нурали». Жумла мўмин йиғлагайдур рўзи қиёмат, қайдасиз? Эй падар, жаннатмакон, пийрибадавлат, қайдасиз? Н. Аминов, Суварак. [Мастура Мирзараимга:] Сизни деб қора бўлган бу юзларимни байтуллога суркамай ўлсам, рўзи қиёматда қандай бош кўтараман? Ҳамза, Паранжи сирлари.*

РЎЗА [ф. روزە — рўза, кундузги иш] **1 дин.** Мусулмонларнинг ҳар йили бутун рамазон ойи давомида дунёвий ишлардан ўзини тийиб, бутун кун бўйи ҳеч нарса емай-ичмай юриш урф-одати; исломдаги бешта рукн (фарз) дан бири. *Рўза тутмоқ. Рўзани очмоқ. Ўттиз кун рўзанинг бир кун байрами бор. Мақол.*

2 с. т. Рамазон ойи. [*Саховатли бойларнинг*] *У рўзадан бу рўзага берадиган садақаси дарёдан томчи эмасми? Ойбек, Танланган асарлар.*

РЎЗНОМА [ф. روزنامه — газета; эсдалик, кундалик] **1 эск.** Мажлиснинг кун тартиби. *Пирмат аълам мажлисни очиб, рўзномада озиқ-овқат ва думахонага сайлов масаласи турганлигини эълон қилди. М. Осим, Тилсиз гувоҳ. Мажлисни жамоа шўросининг топшириғи билан Жўра батрак очди.. Каримов раисликни олиб бораркан, рўзногани эълон қилди. Ҳ. Шамс, Душман.*

2 с. т. қ. газета. *..рўзнома ва ойномаларни вилоят аҳолисига ўз вақтида етказиб бериш керак. Газетадан. Бугун, шаҳримизда улкан анжуман йиғилган аснода, мен рўзномада эълон қилинаётган ихчамгина мақоламда узоқ тарих ҳикоясига берилиб кетмоқчи эмасман. Газетадан.*

РҮЗҒОР [ф. روزگار — давр, вақт; тақдир, насиба; мавқе, ҳолат, шарт-шароит; қулай имконият; олам, жаҳон] 1 Ҷизга мустақил ҳар бир оила, ҳар бир ҳўжалик. *Аёлниг сариштаси — рўзғорнинг фариштаси.* Мақол. ■ *Сени деб уйимдан, рўзғоримдан кечдим.* С. Аҳмад, Уфқ. *Ҳа, дуруст, ишга яроқли полвондек йигит бўлсанг, рўзғорга бош бўласан энди, ўғлим.* С. Кароматов, Олтин қум. *Шу пайтгача доим рўзғор иши билан банд бўлган Маликаҳон заводга ишга кириб кетди.* С. Зуннунова, Кўк чироқлар.

2 Шундай оила ёки ҳўжаликка тегишли ва унинг тирикчилиги учун зарур анжом-ашёлар, икир-чикирлар. *Рўзғор зийнати — ўтин, Уй зийнати — хотин.* Мақол. ■ *Кўшу омон, бош айланмас кичик кўрғон, Овқат-рўзғор, кавшай десанг — оби ёвғон.* Ҳ. Фулом, Танланган асарлар. *Агар бошқа одам бўлганда, Маҳфузага тўғри йўл кўрсатар, рўзғорини бутлаб олишни ўргатарди.* Газетадан. *Қодир бутун рўзғор ташвишларини зиммасига олишга мажбур бўлди.* «Ёшлик».

3 Турмуш, оила. *Катта қизининг рўзғорини ҳам шу кампир бузган. Магазинда ишлайдиган топармон-тутармон бир йигитни ичкўёв қилиб, роса соғиб ичди, — деди келин.* С. Аҳмад, Чўл бургути. *Буларнинг ҳам айримларининг рўзғор, фарзандлари бор, баъзилари эрта-индин узатиладиган бўлиб, бўй этиб турибди.* Газетадан.

Рўзғор кўрмоқ 1) қ. **рўзғор қилмоқ** 1. *Ҳали Бодомғулнинг тупроғи совимай, янгисини топибди. Бирон марта рўзғор кўрмаган, не-не йигитлар кўзини куйдирган бу тамтам қиз унинг тузоғига тушиб қолганига сира тушунолмасди.* С. Аҳмад, Жимжитлик. *Ахир мен ҳам рўзғор кўрган эдим.* С. Аҳмад, Уфқ; 2) қ. **рўзғор қилмоқ** 2. *Рўзғор кўрса, тушуниб қолар, деган фикрғина Марзия холага таскин берар, келинига ҳам буларнинг ҳаммаси вақтинчалигини ўқтириб, кўнглини овларди.* С. Зуннунова, Кўк чироқ. **Рўзғор тебратмоқ** Оилани иқтисодий жиҳатдан таъминламоқ, оилани боқмоқ. У [Маҳмуд Торобий] ўзининг *Муҳаммад ва Али исми икки укаси билан саҳардан то шомгача меҳнат қилиб, катта рўзғорини тебратиб турарди.* М. Осим, Маҳмуд Торобий. *Бу пальтони меҳнат қилиши, пул топиши, рўзғор тебратиши мумкин бўлган соппа-соғ шу қўллари билан бировга элиб берадими?* С. Зуннунова, Кўк чироқлар.

Рўзғор қилмоқ 1) оила қурмоқ. *Карим қандай ақлли йигит. Бечора ота-онасиз етим ўсди. Рўзғор қилишни тоқатсизлик билан кутяпти.* Ш. Рашидов, Бўрондан кучли; 2) ўз ҳўжалиги учун зарур анжом тўпламоқ, бойлик орттирмоқ. *Шунчалик рўзғор қилиб, лоқал юмшоқроқ нон едирмасак.. Киши жуда ҳам уялади!* А. Қодирий, Меҳробдан чаён.

РҮЗҒОРЛИ Рўзғорга эга бўлган, рўзғор қилган; оилали. *Уй-рўзғорли киши.* ■ [Яхшибоев:] *Айниқса, менга ўхшаган катта рўзғорли одамга — вақтида йиғинмаган эканман, кейин бола-чақани ҳам эринмай кўпайтирибмиз — оғир энди елкага тушяпти.* М. М. Дўст, Лолазор.

РҮЗҒОРХАЛТА Рўзғор учун керакли, рўзғорда ишлатиладиган катта халта. *Савдосотиқ учун юртма-юрт кезадиган, кунора зил-замбил рўзғорхалта билан бозордан қайтадиган, нозик жуссасидан ҳам оғирроқ қопларни у бозордан бу бозорга ташийдиган аёлниг феъли ҳам ўзгара боради.* Газетадан.

РҮЗҒОРЧИЛИК Рўзғор, кундалик ҳаёт ташвишлари, икир-чикирлари, рўзғорга оид иш ва ташвишлар. *Яхши, яхши, қўй сўйганингиз маъқул, беш-ўн қадоқни зиёфатга ишлатсангиз, қолган ёғ-ғўшт, ахир, рўзғорчилик, дейди.* А. Қодирий, Кичик асарлар. *Рўзғорчиликда ҳар гап ўтади.* С. Аҳмад, Уфқ.

РҮЙ [ф. روی — юз, юза, сатҳ] Бирор нарсанинг сиртки томони, юзи. *Офтоб рўйи.* ■ *Бир нафас қуёшдай кўрсатсин у рўй, Бир нафас қуёшдай порласин қуёш.* А. Орипов, Йиллар армони.

Рўй бермоқ Воқе бўлмоқ, содир бўлмоқ, юз бермоқ. *Аҳмаджон қандай ҳодиса рўй берганини дарҳол фаҳмлаб, орқа ёқдан томга чиқди.* А. Қаҳҳор, Олтин юлдуз. *Жамиятимизда рўй бераётган буюк ўзгаришлар, қайта қуриш жараёни олимлардан ҳам астойдил сафарбарликни тақозо этмоқда.* Газетадан. *Чарос нима ҳодиса рўй берганини анчагача ўзиям тушунмай қолди.* Ҳ. Ҳошимов, Қалбингга қулоқ сол. **Рўйи жаҳон** (ёки **замин**) Ер юзи, дунё, олам, жаҳон. *Оташ арава, милтиқ, тўп, ўқ, калиш, газлама.. боринг-чи, шу рўйи заминда кўриниб турган илму ҳунар шулардан чиқади.* А. Қодирий, Обид кетмон. *Бутун рўйи заминга ядро фалокати соя ташлаб турган айни пайтда халқаро бирдамлик тантанаси улкан аҳамиятга эгадир.* Газетадан.

РҲЙЖО [ф. *روی* – юз, юза + *جا* – жой] Гулдор ёки сидирга чойшаб. -*Нима бу?* – *деди хотин, рўйжони ёзиб.* -*Каравотнинг тепасига осгани шундақа бир нарса қидириб юрган эдинг шекилли. Жуда ажойиб нарса.* А. Қаҳҳор, Қанотсиз читтак.

РҲЙИНАТАН [ф. *روئنتن* – мис танали, ўқ ўтмайдиган – Фирдавсий «Шоҳнома»-сидаги Исфандиёрнинг лақаби] Ўтакетган зўравон, олғир; маккор, қув. *Рўйинатан одам.* ■ *Лекин Тошпўлат рўйинатанким, тунув кун газитда [газетада] бир мунча фиксу фасод сўзлардин ёзиб.. жумла уламодин фақирни ҳам ҳақорат қилган эркан..* А. Қодирий, Кичик асарлар.

РҲЙИРОСТ [ф. *روی راست* – очик, дангал юз] *рвш.* 1 Бирор андишага бормасдан, юз-хотир қилмасдан; тўппа-тўғри, дангал, очик. *Рўйирост гапирмоқ.* ■ *Кеча сиз.. роса соат 11 да қаерда эдингиз? Кўчадамидингиз ё ишхонадами? Шу саволга коллектив олдида рўйирост жавоб беринг.* С. Абдуқаҳҳор, Санамай саккиз дема. Булар [пиёда аскарлар] ҳаммаси ҳам милтиқ ва автоматларни тайёр тутган ҳолда, рўйирост бостириб келмоқда.. А. Қаҳҳор, Олтин юлдуз.

2 Тикка; бор бўйича. *Йигитлардан бири.. кўзларини чақчайтириб, оғзини катта очиб, йўгон товуш билан атрофга бонг урди: -Юравер! Йигитлар, юравер! Майдонга рўйирост чиқиб, ҳаққимизни дов қиламиз. Ойбек, Танланган асарлар.*

3 Чинакашига, астойдил. Унинг [Сидиқ-жоннинг] кулиши Ўрмонжоннинг рўйирост ғашини келтирди. А. Қаҳҳор, Қўшчинор чироқлари.

РҲЙИХОТИР [ф. + а. *روی خاطر* – хотира(си) олдида, учун] Андиша, риоя, юз-хотир. *Рўйихотир қилмоқ.*

РҲЙИХУШ [ф. *روی خوش* – ёқимли, қувноқ, очик юз] Очик чехра ва илтифот; яхши муносабат. *Элмуроднинг Анна Ивановна билан бир оз гаплашиб ўтиргиси, унинг энди-ги режалари билан танишиши нияти ҳам йўқ эмасди. Қарасаки, унинг рўйихуши йўқ. Шухрат, Шинелли йиллар.*

Рўйихуш бермоқ Очик чехра билан илтифот қилмоқ, майл билдирмоқ. У [Вали полвон] раисга борган экан, раис ҳам унча рўйихуш бермай, “майли, қурилишда синаб кўрамиз”, дебди. Х. Назир, Ўтлар туташганда.

РҲЙИХУШЛИК Очик чехралик, илтифотлилик, мойиллик, розилик. *Эшонбоев Зокирнинг нега бу ерда турганига энди тушунди ва ўзи бошқа одамга рухсат олмоқчи бўлгани учун рўйихушлик бермади.* П. Қоди-ров, Уч илдиш.

РҲЙХАТ [ф. + а. *روی خط* – хат, ёзув бўйича] Нарсаларни, кимсаларни маълум тартиб билан ҳисобга олиб, ёзиб чиқиш ва шу жараённинг натижаси бўлган ҳужжат. *Бултур раис ениел ишларга ярайдиган қарияларни рўйхат қилганида, отани ёзмаган экан, ота рўйхатга кирмай қолган чолларни йиғиб, мажлис қилди.* А. Қаҳҳор, Асрор бобо. *Асадилло чўнтагидан бугун жуда кўп марта кўз югуртирган рўйхатини олди.* Ф. Мусажонов, Қумри.

РҲЙХАТЧИ Рўйхатга олувчи, рўйхат тузувчи киши.

РҲКАЧ [ф. *روكش* – устки, ҳимоя қатлам, қоплама] Кўз-кўз қилиб, ёмонини яшириш учун ажратиб, олдинга қўйилган сара нарса; молнинг, нарсанинг сараси. *Қулуннайнинг рўкачи.* ■ [“Четан” колхози] *Район бўйича эмас, Ўзбекистон бўйича энг обрўли намунавий колхозлар қаторига кўчади. Районга.. келган меҳмонларга районнинг рўкачи бўлиб қолади.* А. Қодирий, Обид кетмон.

Рўкач қилмоқ 1) пеш қилмоқ, дастак қилмоқ. [Ботир:] *Ҳадеб қўчқорлигингизни рўкач қилаверасизми, Валихўжа ака! Камтарлик ҳам керак кишига!* Н. Сафаров, Ҳаёт мактаби; 2) баҳона қилмоқ. -*Бир нарса деса, уч ойдан бери тўланмаган уй пулини рўкач қилиб, бет-кўзингизни юласиз, – деди Ҳабиба эрига.* Қ. Кенжа, Тоғ йўлида бир оқшом. 1994 йил мавсумида бошқа сабабларни рўкач қилишга ва ўзини оқлашга ўрин йўқ, деб ўйлайман. Газеталан.

РҲМОЛ [ф. + а. *رومال* – л.м. юзга тутилган мато: сочик; рўмол(ча)] 1 Аёллар бошига ўрайдиган, одатда, тўртбурчак шаклдаги мато. *Дока рўмол. Шоҳи рўмол. Эр-хотиннинг уриши, дока рўмолнинг қуриши.* Мақол. ■ *Хотин бошидаги жун рўмолини олдида, бир-икки қоқиб, яна ўради.* М. Исмои-лий, Фарғона т. о. [Анвар:] *Жавоб айтиб кет, Раъно! -Ҳа, шундай! – деди Раъно гул ёнида рўмолини тўғрилаб, – Энди сизнинг олдингизга чиқмайман.* А. Қодирий, Меҳробдан чаён.

2 Умуман, шундай мато, парча. Унинг [Тошматнинг] боши дока билан ўралган, чан

қўли рўмол билан елкасига осиб қўйилган эди. Х. Фулом, Машғал.

РҶМОЛЧА Кичкина рўмол, дастрўмол. Кейин рўмолчасини қўлида ҳимариб ўтириб, ашула бошлади. С. Зуннунова, Олов. -*Офтобнинг тафти ёмонмас-а!* - Зойиржон пиджагини ечиб ташлаб, рўмолча билан бўйинини артди. Ў. Ҳошимов, Қалбингга қулоқ сол. *Ўшанда бир тасодиф сабаб бўлди-ю, касалхонанинг бош ҳамшираси сўроқ пайтида иккита рўмолча ишлатди.* Ў. Умарбеков, Ёз ёмғири.

РҶПАРА [ф. روپرو - юзма-юз] Бир нарсага ёки кузатувчига, сўзловчига қарама-қарши томон; қарши. *Рўпарадаги уй.* ■ *Дераза рўпарасидаги тўйнуқдан Рувоннинг боши кўринди.* С. Зуннунова, Янги директор. *Театр-рассомчилик институтининг шундоққина рўпарасида, кўчанинг бериги бетида, уч туп ёш чинор бор.* Ў. Ҳошимов, Қалбингга қулоқ сол.

Рўпара бўлмоқ (ёки келмоқ) 1) юзма-юз учрашмоқ, учрашиб қолмоқ. *Бироқ унинг тили қисик; онасига сўз қайтариш эмас, рўпара бўлишга ҳам юраги безиллар эди.* А. Қаҳҳор, Кўшчинор чироқлари; 2) дуч келмоқ, йўлиқмоқ. *Шу-шу Адолат Бегимхон билан гаплашмай қўйди. Мана энди улар яна рўпара келдилар.* И. Раҳим, Чин муҳаббат. *Титраб, от чоптириб келаётган Бадиа.. душман отлиқларидан бирига рўпара бўлиб, жон-жаҳди билан қилич солди.* Мирмуҳсин, Меъмор. *Поезд тўхтаганда, югургилаб битта проводникка рўпара бўлдим.* С. Сиёев, Ёруғлик. **Рўпара қилмоқ** 1) юзма-юз қилмоқ, учраштирмоқ. *Сен менга Сулувни рўпара қилавер-чи [деди Аллон Палмонга].* А. Мухтор, Қорақалпоқ қиссаси. «..энди бўлса икки болали одамни рўпара қилиб ўтирибди», - деб ўйлади Азиза ҳамон шифтдан кўз узмай ётаркан. Ў. Ҳошимов, Қалбингга қулоқ сол; 2) дуч келтирмоқ, йўлиқтирмоқ. *Сени илк дафъа Ферузга рўпара қилганимда, имонимдан чекиндимми? Ҳа, бир баҳя чекиндим.* С. Сиёев, Аваз. *Жапақдан қутулдик, Элгелди энди унга қизини эмас, ажалини рўпара қилади.* А. Мухтор, Қорақалпоқ қис-

саси; 3) тўғри қилмоқ; кўрсатмоқ. *Эшоннинг “жилов” тўғрисидаги фикри Элмуроднинг газабини келтирди. Энди у дангал фактларни рўпара қилишга қарор берди.* П. Турсун, Ўқитувчи.

РҶПОЧ [ф. روپوش - ғилоф, қоплама; юзни бекитиб турадиган қалин тўр парда] *шв.* Таннозлик билан юзини бекитувчи аёл. [Ҳолисхон Тожибойга:] *Отим ҳалигидақа.. бўлса ҳам, ўзим бир рўпочдан ортиқман.* Ҳамза, Паранжи сирлари.

РҶШНОЛИК [ф. روشنائى - ёритиш, ёруғлик, равшанлик] Бахтли, фаровон ҳаёт, ёруғлик. -*Аммо унинг [Ҳамид Олимжоннинг] сўзларини эшитган ҳар бир одамнинг юрагидаги тугун ечилгандек, чеҳрасида рўшнолик белгилари пайдо бўлди.* Шукрулло, Жавоҳирлар сандиғи. -*Ҳимматингизга балли, Гулбадан. Оз қолди. Рўшнолик йўлимизни чароғон қилиб, бахтимиз келадиган дамлар яқин.. - деди Рашиан Гулбаданга.* С. Кароматов, Бир томчи қон.

Рўшноликка чиқмоқ ёки **рўшнолик кўрмоқ** Юзага чиқиб, бахтли, фаровон ҳаётга эришмоқ, ёруғликка чиқмоқ, эркин бўлмоқ. *Даврада унинг дастидан рўшнолик кўролмай юрганлар хушвақт бўлди.* Т. Мурод, Қўшиқ.

РҶЯ [ф. رويه - уст, юза қисм] Юз, юза, бет. *Ҳовли рўяси.*

Офтоб рўя Офтоб тушиб, тегиб турадиган жой, томон. *Кампир офтоб рўяга қараб, битбозлик қилиб ўтирса, Гўрўглибек оҳиста-оҳиста ўтиб кетиб бораёттир.* Эргаш Жуманбулбул ўғли.

РҶЯН [ф. روين - ўсимлик номи] Бир йилда икки марта гуллаб, икки марта ҳосил берадиган сариқ гулли ўсимлик (тиббиётда буйрак тошини эритувчи кислота олиш учун, халқ хўжалигида қизил бўёқ модда олиш учун ишлатилади). *Илгари ана шу адирларда бутун бир қишлоққа етиб, ортиб қоладиган ем-хашакбон сунбул, сўзан, рўян, олабута, балиқкўз, жингул сингари юз хил тўйимли гиёҳлар тиззага уриб ётарди.* Ж. Абдуллахонов, Хонадон. *Рўян - фойдали ўсимлик, танаси эгулувчан бўлганлиги сабабли ундан арқон, сават тўқиларди.* Газетадан.



СААМ қ. саамлар. Саам халқи.

СААМЛАР Норвегия, Швеция, Финляндия, Россияда яшовчи, саам тилида сўзлашувчи халқ. Саамлар қадимдан бугучилик, балиқ овлаш ва овчилик билан шуғулланади. «ЎЗМЭ».

САБА шв. Меш, саноч (теридан ясалган, қимиз солинадиган идиш). *Бир саба қимиз. Сабада қимиз келтирмоқ.*

САБАБ [а. سبب — боис, важ, баҳона; йўл, усул; алоқа] **1** Бирор (кўнгилли ёки кўнгилсиз) иш-ҳаракат, воқеа, ҳодисанинг юзага келишида, содир бўлишида омил бўлган бошқа бир воқеа, ҳодиса; боис, омил. *Касалликнинг келиб чиқиш сабаби.* ■ [Меъмор:] *Биз Хуросондан нима сабабдан чиқиб кетаётганимиздан хабарингиз борми? Мирмуҳсин, Меъмор. Дарахтларнинг нобуд бўлиши ернинг қуришига, сув камайишига сабаб бўлади.* Газетадан. *Ядро нурланишлари моддаларга таъсир қилиб, улар молекула-ларининг ўзгаришига сабаб бўлади.* «Фан ва турмуш». *Шеър ун чекса, шоирнинг армони сабаб бўлмай.* А. Орипов.

2 Бирор иш-ҳаракат ёки ҳолат учун асос бўлган нарса; важ, баҳона, боис. *Узрли сабаб.* ■ *Отабек яна ўн беш кун ўтказиб, тағин бир нозик сабабни ўртага ташлаб, онасининг руҳсатисиз Марғилонга жўнаб солади.* А. Қодирий, Ўтган кунлар. *Албатта, аталадан тиши синмайди, аммо бу қимирлаб турган тишининг тушганлигига бир сабаб, холос.* Шукрулло, Жавоҳирлар сандиғи.

Сабаби тирикчилик Яшаш, кун кечириш, тирикчилик воситаси, тирикчилик тақозоси билан. *Эндилкда «мунгли», «муштипар»*

сингари сўзлар қовушмай қолган, бу хотинлардан ҳеч бири қилаётган ишига, касби-кориға сабаби тирикчилик деб қарамайди. А. Қаҳҳор, Танланган асарлар.

3 флс. Оламнинг ҳаракати ва бирон-бир вақт мобайнида бўлган ўзгаришдан сўнг иккинчи бошқа бир нагижанинг заруран келиб чиқишини таъминловчи асосий ҳодиса.

4 сўр. олм. өзф. Нима учун? Нега? *Шоҳ бўлсанг, сабаб ўғрилик қилган фуқароларингни тергамайсан?* А. Қаҳҳор, Башорат.

Сабаб эргаш гап тли. Бош гапдаги иш-ҳаракатнинг сабабини билдирувчи эргаш гап. **Сабаб ҳоли тли.** Иш-ҳаракатнинг сабабини билдирувчи ҳол.

САБАБИЙ [а. سببى — сабабли, сабаб билан бўладиган] флс. Сабабиятга асосланган; сабабли. *Сабабий боғланиш.*

САБАБИЯТ [а. سببیت — боғлиқлик, алоқадорлик] флс. Ҳодисаларнинг табиий, ижтимоий, объектив ўзаро алоқасини, боғланишини билдирадиган категория. *Сабабият қонуни.*

САБАБКОР [а. + ф. سببكار — сабаб, омил бўлувчи; айбдор] кт. айн. **сабабчи.** *Сабаб-корми ёлғиз тақдир ҳолигга санинг?* Э. Воҳидов. [Асад:] *Қани, айтинглар-чи, базмининг сабабкори ким?* Н. Сафаров, Кимга тўй, кимга аза. [Дадавой:] *Ёмон кўрадиган бўлса, сизлар сабабкор. Халқни менга қарши қутуртириб юргансизлар.* Уйғун, Навбаҳор.

САБАБЛИ 1 Бирор ҳодиса, ҳолат таъсирида юз берган, бирор сабабга асосланган. *У кишининг кечикиши сабабли.* ■ *Энди кундош билан уч-тўрт кун апоқ-чапоқ бўлиб,*

оғиз-бурун ўпишгандай бўлар, лекин яна уч-тўрт кун сабабли-сабабсиз сира гаплашмай, тескари бурилар эди. Ойбек, Танланган асарлар.

2 айн. сабабий. Сабабли боғланиш.

3 кўм. (б. к. билан) Учун, туфайли, оқибатида, сабабдан. *Подшонинг хасталиги сабабли мамлакатда тўю маърака, базмлар тўхтатилган.* Мирмуҳсин, Меъмор. *Ҳаво ҳароратининг юқори бўлиши сабабли тутларда ён шохларнинг жадал ўсиши ва барглари сонининг кўпайиши содир бўляпти.* Газетадан. *Шу сабабли куйлаб сени умрим кечар.* Ё. Мирзо. *Антибиотиклар микроорганизмлардан ҳосил қилиниши сабабли қимматга тушади.* «Фан ва турмуш».

САБАБСИЗ Бирор сабаби бўлмаган, асосланмаган; асоссиз, вазисиз, баҳонасиз; узрсиз. *Сабабсиз жанжал.* *Сабабсиз ўқишдан қолмоқ.* ■ *Табиат ва ижтимоий ҳаётда сабабсиз бирорта ҳодиса ёки воқеа содир бўлиши мумкин эмас.* «Фалсафа қомусий лугати».

САБАБЧИ Бирор иш, воқеа-ҳодиса ёки ҳолатнинг юзага келишига, содир бўлишига сабаб бўлган кимса, нарса, омил; сабабкор. *-Бугунги кечамиз сабабчилари бўлмиш келин ва куёвнинг ҳар иккаласи заводимиз ишчилари бўлади, — деди нотих ғурур билан.* «Ёшлик». *-Янглиш сўзлайсиз, онажон, — деди Кумуш, — сиз дунёда туришга лойиқ эдингиз, лекин сизнинг дунёдан тўйишингизга сабабчи мен эдим.* А. Қодирий, Ўтган кунлар. *Қаҳқаҳанинг сабабчиси бўлган тўтиқуш гўё голибона ҳаммага қарагандек эди.* Газетадан.

САБАНТҮЙ [т. сабан — темир омонч + тўй] Татар ва бошқирд халқларида баҳорги дала ишлари тугаши муносабати билан ўтказиладиган байрам.

САБАНЧА Йиртқичлар туркумига мансуб сүтэмизувчи ҳайвон, дала мушуги.

САБЗ [ф. سبز — яшил, яшил рангли; гўр, хом; янги, ёш] Яшил; баргранг, баргикарам, пистоқи (ранг). *Ул надурким, сабз тўнлик қуш дарахтнинг қошида.* Увайсий.

Сабз урмоқ Ўсиб, униб чиқа бошламоқ, ниш урмоқ. *Энди мўйлаби сабз урган, яқиндагина Фарғона жангидан қайтиб келган Низомиддиннинг ранги девор бўлиб оқариб кетган эди.* Мирмуҳсин, Меъмор.

САБЗА [ф. سبزه — яшил ўт, кўкат, майса] **1** Ям-яшил барра ўт, майса. *Баҳор, ҳар ён*

ёзилган сабза. *Оҳуларда шўхлик ва ғамза.* *Файратий.* *Офтоб ҳижрониди тонг сабзаларга қўнди нам, Уйлаким, киприкларимни эгди тонг гирён юки.* Э. Воҳидов, Муҳаббат. *Ором олур қир сабзалари, Ухлар Бўта, ухлайди Ойхон.* Миртемир, Асарлар.

2 Яшил, зумрадранг. *Сабза ўт.* ■ *Довдарахт, гулу гулзорлар, сабза райҳонлар ҳамма ёқни ўраб олган.* Газетадан. *Ёритганча то юрак ичин Сабза ўтлар шабнамга қонар.* Х. Даврон. *Навбаҳор, очилди гуллар, сабза бўлди боғлар.* Муқимий.

Сабза урмоқ айн. сабз урмоқ қ. сабз. *У [Темиржон] энди улғайган, мўйлови сабза уриб, йиғитча бўлиб қолган.* Ж. Абдуллахонов, Орият.

3 Оқ кишмишдан сояда қуритилган оқ кўкиш майиз; сояки майиз.

САБЗАВОТ [ф. سبزیجات — «сабза» с.нинг кўпл.] Резавор ва полиз экинлари ҳамда уларнинг овқатга ишлатиладиган маҳсули (бодринг, карам, сабзи, пиёз, помидор ва ш. к.). *Сабзавот экинлари.* *Сабзавот дўкони.* ■ *Хушбўй мевалар, айниқса, кўкатлар, турли нав сабзавотлар жуда мўл йиғилди.* Ойбек, Нур қидириб. *Чанқоқликни қондириш учун сабзавот, мева шарбатлари, турли қайнатма ичимликлар ҳам тавсия этилади.* Газетадан.

САБЗАВОТКОР Сабзавот экинлари етиштириш билан шуғулланувчи, резавор экинлар экувчи, етиштирувчи. *Сабзавоткор хўжалик.* ■ *Ўтган йил фақат деҳқонлар учун эмас, чорвадору сабзавоткорлар, боғбонлару соҳибкорлар учун ҳам оғир келди.* Газетадан.

САБЗАВОТЧИ 1 айн. сабзавоткор. *Ҳаваскор сабзавотчи экиладиган уруғлар тўғрисида ҳам ҳозирдан бош қотириши даркор.* Газетадан.

2 Сабзавот савдоси билан шуғулланувчи, сабзавот сотувчи.

САБЗАВОТЧИЛИК Деҳқончиликнинг сабзавот экинлари экиш ва сабзавот етиштириш билан шуғулланувчи тармоғи. *Сабзавотчилик хўжалиги.* ■ *Раиснинг машинаси.. сабзавотчилик бригадаси томон бурилиб кетди.* С. Нуров, Майсаларни аёз урмайди.

САБЗАЗОР [ф. سبزهزار — яшил ўтлоқ] Ям-яшил барра ўтлар билан қопланган ер; дала, майсазор. *Шудринг маржонлари тақмиш сабзазор, Сувларга узалмиш толларнинг илки.* Миртемир.

САБЗАК [ф. سبزک — «сабза» с. нинг кичр.: қорачадан келган, буғдойранг] 1 Қорачадан келган, қорамағиз, буғдойранг. *Гофиржон ака кенг елкали, ўрта бўйли, қора қоши, қора кўз, сабзак юзи сал қорайган бир киши эди.* Н. Назаров, Замин.

2 Қовуннинг бир нави. *Яна сабзак била умрбоқий, еган одамгадир умр боқий.* Б. Аминзода.

САБЗИ [ф. سبزی — ошқўқлар, зираворлар; хомлик, пишмаганлик] Сабзавот экинларининг бир тури ва унинг истеъмол қилинадиган маҳсули. *Қизил сабзи. Мушак сабзи. Сабзи эмоқ. Сабзи тўғрамоқ. ■ Экинлар жуда соз. Айниқса, картошка билан сабзи мўл ҳосил беради.* Ойбек, Танланган асарлар. *Уста Олим ошга сабзи босиш билан овора эди.* А. Қодирий, Ўтган кунлар.

Мирзойи сабзи қ. мирзойи. Эркак сабзи. қ. эркак. -*Пули бор ейди, пули йўқ-чи, — баланд овоз билан сўради эркак сабзига ўхшаган бир киши.* К. Яшин, Ҳамза.

САБЗИТЎҒРАР этн. Тўй ошидан бир кун аввал эркакларнинг тўй бўладиган хонадонга йиғилиб, ош сабзисини тўғраб тайёрлаб қўйишидан иборат маросим. *Танишимникида никоҳ тўйидан олдинги сабзитўғраар куни эди.* Газетадан.

САБЗИФУРУШ [ф. سبزیفروش — сабзавот, ошқўқ сотувчи] Сабзи сотувчи. *Бозорчада бир-икки сабзифурушдан бошқа ҳеч ким қолмаган эди.* Газетадан.

САБИЙ [а. صبی — гўдак, бола, йигитча; ёш шоғирд] эск. кт. 1 Кўкракдан ажратилган гўдак. *Йўқ, инсон ҳануз сабий, балоғатга етмагандир.* А. Қаҳҳор, Сароб.

2 кўчма Ҳали вояга етмаган; гўр, пишмаган, тажрибасиз. *Қалби тоғлар қадар зўр, аммо ўзи Энди ўн иккига кирган бир сабий.* Уйғун.

САБИЙЛИК Гўдаклик, болалик. *Вақти келиб инсон балоғатга етади, унинг сабийлик феъл-атворлари орқада қолади.* А. Қаҳҳор, Сароб. *..само ва заминнинг азалий мувоzanатига путур етди, сабийликнинг маъсум хаёллари устуворлашмай.. хотирага айланди.* Ш. Бўтаев, Қўрғонланган ой.

САБИЛ [а. سبيل — йўл; имконият, восита] 1 Эгасиз, қаровчисиз қолган; эгасиз, қаровсиз қолиб хароб бўлган, аянчли, ачи нарли аҳволга тушган. *Сабил бўлди манинг бу ўсган жойим, Сенга тегсам, қаттиқ экан*

манглайм. «Ойсулув». *Қазингиз сабил қоладиган бўлди, бойвачча, кеннойим эртага тугунчага солиб, турмага олиб бормасалар деб кўрқаман.* С. Аҳмад, Ҳукм.

Жони сабил Жони қаттиқ, чидамли, чайир.

2 «Куриб кетгур», «курғур» маъноларида қўлланади. -*Мен жуда-а чарчаганман, биласиз. Олдин шу сабил буқоғимни даволатиб олсайдим [деди Холиса].* С. Нуоров, Нарвон. [Хола:] *Бизларди магазинда бошқа нарса топилмаса ҳам, ароқ деганининг кети узилмайди, уруғи кўпми сабилни(нг) ёки булоғи борми, ҳайтовур босилиб ётибди.* С. Нуоров, Нарвон.

Сабил қолмоқ Эгасиз қолиб, йўқ бўлиб, ўлиб кетмоқ. -*Сабил қолгур бу эшак, — деди бир ўтинкаш, — чопишга йўл бермайди.* С. Айний, Қуллар. -*Шунда биз уни, тек тур, сабил қолгур, дея қамчилаймиз [деди Зиёдулла]* Т. Мурод, От кишнаган оқшом.

САБО [а. صباء — шарқий шамол; ёшлик] Эрталабки майин, ёқимли шамол, бод, тонг шабадаси. *Сабо, арзимни еткур, моҳи тобон бир келиб кетсун, Тамони ҳусн элининг шоҳи султон бир келиб кетсун.* Ҳамза. *Тушда кўрдим дилбаримни, эй сабо, уйғотмагил, Олма бир дам васл шавқин, қўй, мени кўзғатмагил.* Э. Воҳидов. *Ялпизларнинг салқин ҳидин келтирар сабо..* М. Шайхзода.

2 с.т. Сабоҳ. *Гар жондан севмасам, ҳар шому сабо Йўлингга интизор боқарми кўзим?* Шухрат.

Боди сабо Тонг шамоли. *У энди шаффоф осмонга, анвойи гулларга энтикиб боқмас, боди сабо лаззатини, аёл муҳаббатини ҳис этмас.. эди.* С. Сиёев, Ёруғлик. **Субҳи сабо** Эрта тонг. *Куча пойлаб ҳар субҳи сабо Алланарса туяр хаёлинг.* Р. Парфи.

САБОТ [а. ثبات — қатъийлик, қатъият; ирода; барқарорлик] Ўз сўзида, фикрида мустақкам туришлик; матонат, чидам, бардош; букилмас ирода; қатъийлик. *Мард кишига ярашар Аҳдага вафо ва сабот.* М. Шайхзода. *Сабот ва матонат кишиларимизнинг асосий фазилати бўлиб қоляпти.* Н. Сафаров, Оловли излар. *Лекин қутулмоқ йўқ ҳижрон дастидан, Фақат қалбимизда бардош ва сабот.* А. Орипов.

2 айн. **кунт.** *Сабот билан ўқимоқ.*

САБОТАЖ [фр. sabotage < saboter — ёғоч кавуш билан тақиллатмоқ] Ишдан ошкора

бош тортиш ёки ўзини ишлаётган кўрсатиб, аслида ишни бузиш, бўшаштириш; ишга зимдан ёки ошкор қаршилиқ кўрсатиш. *Саботаж қилмоқ.*

САБОТАЖЧИ Саботаж билан шуғулланувчи (одам), саботаж қатнашчиси. -*Умар ака масаласида келдим, — деди Анорхон. Комилжонга қараб. — Уйида ётиб олибди. Калламни олсангиз ҳам, муҳрни топширмайман, деяпти. -Кўрдингизми? — деди у Муродовга қараб. — Учакишини қаранг! Нима қилса бўларкан бу саботажчини? И. Раҳим, Ихлос.*

САБОТКОР [а. + ф. ثابكار — бардош берувчи, чидамли] *кт.* Саботли, мустақкам иродали. *Саботкор кўшин. Саботкор халқ.*

САБОТЛИ 1 Ўз сўзида, маслагиди қатъий турувчи, мустақкам иродали; турғун, собитқадам. *Саботли одам. Салобатли бўлма, саботли бўл. Мақол.*

2 Зўр бардошли, чидамли, матонатли. *Севгимиз ширин, тотли, Лаззатин бирга тортдик. Ҳижронга берган бардош Мен эмасми саботли. Ғайратий.*

3 айн. кунтли.

САБОТ-МАТОНАТ [сабот + матонат] Мустақкам ирода, сабр-бардош. *Сабот-матонат билан курашмоқ. ■ Қобилнинг сабот-матонати унинг хўжайинларини мамнун қилди. Х. Фулом, Машғал.*

САБОТСИЗ 1 Ўз сўзида, ваъдасида қаттиқ тура олмайдиган, иродаси бўш, айнамачи. *Олимжон.. баъзи сўзида саботсиз зиёли ва очиқ фикрларнинг ҳеч бирига қўшилмас.. ўз маслак ва матонатини, ёш бўлса ҳам, қўлдан бермас эди. Ҳамза, Танланган асарлар.*

2 Қийинчиликларга чидамсиз, бардошсиз. *Саботсиз одам.*

3 айн. кунтсиз.

САБОТСИЗЛИК Ўз сўзида, ваъдасида қатъий тура олмаслик, чидамсизлик; иродасизлик. *Ҳатто надаркуш Абдуллатиф ҳам унинг саботсизлигидан, унга титраб-қақшаб ялинишларидан жирканади. «ЎТА».*

САБОҚ [а. سبق — тортишув, мусобақа] **1** Дарс, машғулот, билим, фан. *Сабоқ бермоқ. Сабоқ олмақ. ■ Уларнинг ҳар бири ҳар хил синф ўқувчиси бўлгани ҳолда, бир синфда ўтириб сабоқ олишлари бир-бирларига халақит бермайди. Ш. Холмирзаев, Оғир тош кўчса. Бундан ташқари, болалар ҳисоб (тўрт*

амал) ўрганар, машшоқлик, қўшиқ айтиш бўйича ҳам сабоқ олар эдилар. К. Яшин, Ҳамза.

2 эск. Дарсда (ўқувчиларга) бериладиган вазифа, топшириқ. *Алишер қўл қовуштириб келиб, устод олдида тиз чўкди ва сабоғини ўқий бошлади. М. Осим, Аждолларимиз қиссаси.*

3 кўчма Ибрат, ўрناق, намуна бўладиган, ҳаёт тажрибасини оширадиган иш, ҳаракат, воқеа-ҳодиса. [Фазлиддин:] *Бегим шарму ҳаёдан сизу биза сабоқ беришга қодирлар. П. Қодиров, Юлдузли тунлар. Қора мавр ўғли — телба Отелло Буюк садоқатдан бермоқда сабоқ. Х. Даврон. Бошга тушган мусибат бева учун сабоқ бўлди. Газетадан. Тарих — доно муаллим ва ҳикмати сабоқ берувчидир, дейди мутафаккирлар. Газетадан.*

Тарих сабоқлари Тарихда бўлиб ўтган, эсда қоладиган ва ўрناق бўладиган, тўғри, керакли хулоса чиқаришга ёрдам берадиган воқеа-ҳодисалар.

САБОҚДОШ эск. Бирга ўқиган, сабоқ олган киши; мактабдош. *Мадрасанинг ҳовлисига кирсам, сабоқдош шерикларимдан бир нечаси ниқиллашиб йиғлашиб ўтиришибди. М. Муҳаммадҷонов, Турмуш уринишлари. Аммо [Анварнинг] айниқса хуш кўрган кишиларидан биринчиси Раъно ва иккинчиси мактабдаги шоирлардан сабоқдош шериги Насим исмли бола эди. А. Қодирӣ, Меҳробдан чаён.*

САБОҲ [а. صباح — эрта тонг, саҳар] Эрта тонг; субҳ, субҳидам. *Сизга белгилидирки, сабоҳга қадар қошимда шам ёғдуси, давог-қаламнинг зарурлигини изоҳлашга ҳоҷат йўқ. Ойбек, Навоӣ. Гоҳ сабоҳ ели шивирлаб менга, Мардлингидан сўйлаб кетади. Т. Тўла.*

САБР [а. صبر — чидам, бардош, ирода, қатъият] **1** Бирор ҳолат ёки ҳодисани бардош билан кутиш, қаноат қилиш; ўзини тийиш. *Сабр таги — сариқ олтин. Мақол. ■ Банда деганининг сабрдан бошқа чораси йўқ. Ҳамза, Танланган асарлар.*

2 Ғам-кулфат, азоб-мусибатларга чидаш, тоқат қилиш, бардош бериш. -*Осонми, айланай, — Ўтибор опа ёстиқни Ўзозхоннинг биқинига суриб қўйди. — Тагин ҳам темир экансиз. Сабрингизга балли, гиргиттон! Ҳ. Фулом, Машғал. Сабр — инсон иродасининг тожи! — деди Жўраҳон Мажидга. Назармат, Жўрлар баланд сайрайди.*

Сабр косаси тўлмоқ Ортиқ чидаш ёки кутишга тоқати қолмаслик, тоқати тоқ бўлмоқ. *Халқнинг сабр косаси тўлди.* С. Сиёев, Аваз. **Сабр қилмоқ** Тоқат, чидам билан кутмоқ. *Сабр қилсанг, гўрадан ҳалво битар, Сабрсизлар ўз оёғидан йитар.* Мақол. ■ *Замонага қараб, яна тўрт-беш йил сабр қилиш зарур бўлиб қолди.* А. Қаҳҳор, Асарлар. **Сабри чидамаслик** Сабр қилолмаслик. *Бир оз орқамни ўгириб, индамай ётдим, у ҳам чурқ этмади. Сабрим чидамади, қайрилиб қарадим.* Ойдин, Ҳикоялар. *Барно йўқ экан, бир оз кутди, келавермагач, ўтиришга сабри чидамай, идорадан чиқди.* О. Ёқубов, Эр бошига иш тушса.

САБР-БАРДОШ, сабру бардош қ. сабр 1-2. *Ҳар бир ишда сабр-бардош керак.* ■ *Аммо у сабр-бардошнинг ҳам чегараси борлигини алақачон билиб олган, шу боис китоб саҳифаларидан термулиб турган ўзи каби одамларнинг.. ташвиш-изтиробларининг энди унга қизиғи йўқ эди.* Х. Султонов, Онамнинг юрти.

САБРЛИ 1 Оғир-вазмин, босиқ, ўзини тия биладиган, қаноатли, чидамли, тўзимли. *Сабрли одам.* ■ *Қурбоннинг бир неча оятларида мусулмонларнинг сабрли бўлишларига даъват бор.* «ЎЗМЭ».

2 айн. қаноатли. *Онам диний, дунёвий китобларни ўқиган, саводли, ниҳоятда сабрли, меҳру оқибатли аёл бўлган.* Шукрулло, Жавоҳирлар сандиғи.

САБРЛИЛИК Сабр-бардошли бўлишлик. [*Домла ўз-ўзига:*] *Ҳурматли китобларда айтадилар: «Сабрлилик – худонинг ояти, сабрсизлик – шайтонининг сифати».* Ҳамза, Танланган асарлар.

САБРСИЗ 1 Бесабр, бетоқат, шошмашошар. *Катта бир қувончдан Зиёданнинг кўзлари ёниб, ўзи эса сабрсиз талпиниб турарди.* А. Мухтор, Асарлар.

2 айн. қаноатсиз.

САБРСИЗЛАНМОҚ Сабр қилмаслик, бетоқат, безовта бўла бошламоқ. -*Шошма, Нури, – сабрсизланиб шивирлади онаси.* Ойбек, Танланган асарлар. [*Ориф ака*] *Онабибининг йиғлашга шайланиб, учиб турган лабларига тикилганча.. жонсарақлик билан сабрсизланарди.* А. Мухтор, Чинор. *Кимдир сабрсизланиб, соатга қараса, кимдир асабий ҳолатда у ёқдан бу ёққа юриб турибди.* Газетадан.

САБРСИЗЛИК Сабр қилмаслик; бетоқатлик. *Ориф аканинг бу ерга келишига, алақандай ички, ҳазин сабрсизлик билан рози бўлишига яна бир нозик сабаб бор эди.* А. Мухтор, Чинор.

САБР-ТОҚАТ, сабру тоқат Чидам, қаноат, бардош. *Марям ақлу идроки, сабру тоқати билан бузилган оилани қайтадан обод қилди.* К. Яшин, Ҳамза.

САБР-ТОҚАТЛИ Чидамли, қаноатли, тўзимли, оғир-вазмин. *Зухуржонга қойилман. Шунчаём сабр-тоқатли бўладими киши, десам, Абдуқаҳҳор ака оғир уҳ тортиб олди: –Шу сабр-тоқат ҳам етмасмикан деб қўрқаман-да.* Р. Файзий, Кишиларимиз қиссаси.

САБР-ҚАНОАТ, сабру-қаноат Чидам, бардош, тўзим. *Зиёфат, албатта, тўкин-сочин бўлади. Мана шу ерда.. сабр-қаноатга чақирши.. ваъз-насиҳатлар сўзлаш масалалари музокарага қўйилади.* Ойбек, Танланган асарлар. *Сабр-қаноат қил, эвазига худо сенга бахт ато қилади. Сабр қил, Ҳамроқул, сабр қил.* Ҳ. Турсунқулов, Ҳаётим қиссаси.

САБР-ҚАНОАТЛИ Сабр-қаноати бўлган; сабрли ва қаноатли. *Илм-таҳсил – сабр-қаноатли одамнинг иши.* Ойбек, Навоий.

САБР-ҚАРОР, сабру қарор Сабру тоқат, тўзим, сабот. *Сабр-қарори йўқ одам.* ■ *Бормасам, қолмайди сабру қарорим, Тушимда кўрингай гул ёзди ёрим.* «Нурали».

САБУР [а. صبر – алоэ] **1 айн. алоэ.**

2 Алоэ барги ширасини қуритиб олинандиган дори. *Сабур – алоэ баридан олиниб, қуритиладиган шира.* «ЎЗМЭ».

САБУҲИЙ [а. صبحى – тонгга алоқадор, эрталабки] *эск. поэт. 1* Тонгги, тонг вақтидаги. *Суйганинг лабида реза тер каби Унда титраб турар сабуҳий шабнам.* Ф. Фулом.

2 Хуморни ёзиш учун эрталаб май ичиш; эрталаб ичилган май.

САВА айн. саба. Ёлғиз ёғоч пана бўлмас, Ёлғиз бияга сава тўлмас. Мақол. ■ *Қимиз – дори деган неча такконлар, Чайиб бергин сава билан кўнакни.* «Алпомиш».

САВАЛАМОҚ 1 Хивич, қамчи, таёқ, гаврон каби нарсалар билан устма-уст урмоқ, калтакламоқ. *Кекса подачи шўхлик қилган молларни гаврон билан савалаб, узун таёғини унда-мунда қўйиб кетмоқда.* Ҳ. Назир, Сўнмас чақмоқлар. *Икки навқар икки тарафдан ўтқинчини ҳам, ёшу қарини ҳам аёвсиз савалайтти.* С. Сиёев, Аваз. -*Қулоқсиз*

болани яхшилаб савалаш керак, — деди-да, бир кўзини қисиб қўйди отаси. «Ёшлик».

2 Зарба бермоқ. Душманни саваламоқ.

3 Шиддат билан ёғмоқ, тинимсиз куймоқ (ёмғир, қор, дўл ҳақида). Ёмғир савалаган сайин чанг-ғуборли атроф-жавониб тобора мусаффолашмоқда, файзиёб бўлмоқда эди. «Ёшлик». Унинг [Элмуроднинг] қулоқларини ёмғир аралаш муздек майда дўл савалай бошлади. П. Турсун, Ҳўқитувчи. Машина қайиқдай чайқалар, қор олд ойнани аямай саваларди. Ж. Абдуллахонов, Хонадон.

4 кўчма Танқид қилмоқ, камчиликларни рўйирост айтмоқ. Уни [Шерзодни] мажлисда роса савалашди. Ў. Ҳошимов, Нур борки, соя бори. Мухбирларга рост гапни айтиб бўладими? Роса савалашади [деди кас-сир]. Газетадан.

САВАМ Бир марта саваш учун лойиқ ёки бир савашда чиқарилган пахта ёки жун. Бир савам пахта. ■ Ҳар қизнинг олдида бир савам пахта. Ойбек, Навоий. Ҳув анави, бир савам пахтадай оптоқ булут парчаси қирраларига шафақ акси уриб турибди. Ж. Абдуллахонов, Тўфон.

САВАМОҚ 1 айн. саваламоқ.

2 Савағич билан саваб титмоқ, юмшатмоқ (пахта ёки жун ҳақида). Пахта савамоқ. ■ Устахонага дам-бадам той пахта олиб ўтадиган аравакаш.. пахта саваб ўтирган қизларга тегишган бўлиб, ашуласини маврийдан бурун авжга кўтаради. А. Мухтор, Опа-сингиллар. Хира ёмғир пардасидан тикилганда, қаричга келиб қолган яшил ғўза тупларини жала, худди савағичда юнг савагандай, қаттиқ савалаётганини кўриш мумкин эди. Ҳ. Назир, Сўнмас чақмоқлар.

САВАННА [исп. sabana < индейс тилларидан] Африка, Жанубий Америка, Шимоли-Шарқий Австралия ва Жанубий Осиёда: ўсимликларнинг тропик ўрмонлар ва саҳролар оралиғида тарқалган минтақавий типи; унда баланд, бўлиқ ўтлар орасида ҳақкам-дуккам ёки тўп-тўп дарахтлар ҳамда буталар ўсади. Чўчима, раққоса! Тамтам сасидан Энди янграб кетсин саванналар ҳам. Ҳ. Шарипов, Қуёшга ошиқман. Иссиқ поясадаги чўллар саванналар деб аталади. «География». Менинг кўз ўнгимда товланди ҳатто Беқарор Африка саванналари. М. Кенжабоев.

САВАТ [ф. سيد — тўқима халта, сават] Тол, тут, юлғун новдалари, буғдой пояси,

сим, пластмасса ва ш.к. дан тўқиб тайёрланган рўзғор буюми, идиш. Патнисларда, тоғораларда, саватларда кулча, қовурма чучвара, варақи, қатлама ва бошқа ҳар нав мева-чевалар. Ойбек, Танланган асарлар. Ўртанча овсин айвонни супуриб бўлиб, сават кўтариб, кўчага чиқиб кетиши билан қолган олти овсин супага чиқишди. С. Аҳмад, Сайланма. Директор, столида турган қоғозни йиртиб, бурчакдаги саватга ташлади. Ў. Усмонов, Сирли соҳил.

САВАТ ҚАЛПОҚ Эзиб юмшатиш билан бугдой ва ш.к. нарсалардан тўқилган қалпоқ. Шу вақт отлиқнинг сават қалпоғи тағидан билакдай йўғон икки ўрим сочи тушиб кетиб, елкасида осилганича қолди. С. Анорбоев, Оқсой.

САВАТБОШ Сочи саватдек хурпайган, пахмоқ соч. Ҳалиги саватбош одам одамлар орасига кириб, бир зумда ғойиб бўлди. Газетадан.

САВАТЧИ Сават тўқиб сотувчи одам.

САВАТЧИЛИК Сават тўқиш ва тайёрлаш билан шуғулланиш; бадий хунармандлик тури.

САВАЧЎП шв. Савағич. Ашурмирзо савачўпдай ингичка бармоқли панжани қисди. М. Исмоилий, Фарғона т. о. Кўк қарга шоҳи кўйлакнинг кўк этаги остидан чиққан савачўп сингари оёқлари доим гавдасидан кейинда қолиб, мувозанатни сақлашга шошилади. А. Қаҳҳор, Сароб.

САВАШ 1 Савамоқ 1 фл. ҳар. н. Пахта саваш. ■ Норхўжа хотинининг бузоқни савашига индамай қараб турди. «Ёшлик».

2 фольк. Уруш, жанг. Саваш бўлса, тортилади парли ёй.. «Муродхон». Душман келса, ундан сўнг саваш қилсак, Шердай бўй, Авазни ўртага олсак. «Гулнорпар».

САВАШМОҚ 1 Савамоқ фл. бирг. н.

2 фольк. Урушмоқ, жанг қилмоқ. «Қани, полвон бўлсанг, майдонга чиқ, келинлар, савашамиз, куч синашамиз!» — дейди. «Муродхон». Мард ўғлонлар душман билан савашар. «Ҳасанхон».

САВАҚ Дум, банд. Олма савағидан узилар. Мақол.

САВАҒИЧ 1 Пахта, жун каби нарсаларни саваш учун ишлатиладиган бир жуфт узун, ингичка таёқ ёки чивиклар дастаси. Савағич билан пахта савамоқ. ■ Осмон тўла паға-паға булутлар, худди савағичдан қоч-

ган пахтадек титилиб, кўкни қоплаб олишган. Х. Тўхтабоев, Йиллар ва йўллар.

САВАҒИЧ II от 1 Қамишсимон бўғимли, ичи пўкаксимон моддадан иборат сув ўсимлиги. Низомжон савағичнинг бунақа ўсишини билмасди. С. Аҳмад, Уфқ.

2 от Савағич ўсимлигининг пояси. Хужрадан иккита савағич тоғдим-да, ростакам катта варрак ясаиға тушдим. Х. Назир, Ёнар дарё.

3 сфт. Савағичдан ясалган, савағичдан тайёрланган. Бу иккиси қоғозға шодлангандек, гап-сўзсиз, савағич қаламни қир-қир қоғоз устида юртиб турар эди. А. Қодирий, Меҳробдан чаён. Салимхон тоқчадан довот билан савағич ружкани олиб, хонтахтага қўйди. Х. Фулом, Машғал.

САВАҒИЧЗОР Фақат савағич ўсган ер, савағич босган жой. Куйган ерлар тугаб, гуж-гуж бўлиб ўсган савағичзор бошланди. С. Аҳмад, Уфқ.

САВДО I [ф. سودا — олди-сотди, савдо-сотик; олди-сотди битими] 1 Товарни сотиш, айирбошлаш билан боғлиқ бўлган икки томонлама муносабатга доир муомала; олди-сотди, савдо-сотик. Савдо ходими. Савдо корхонаси. Ташиқи савдо. ■ Бир кун қайнотаси Ёдгорга маслаҳат солди: —Қачонгача қишлик-қировлик кунлардаям лой чангаллаб юрасиз. Савдога киринг. Савдода гап кўп. Ў. Ҳошимов, Қалбингга қулоқ сол. Ўзингизга маълум, савдо аҳли зарарни ёқтирмайдиган, фойдалаб халқ бўлади. К. Яшин, Ҳамза. Бирорта одам савдо соҳасида ишласа, дарров одамларнинг мияларига эгри фикр келади. Ф. Мусажонов, Ҳиммат.

2 Олди-сотди муомаласида молнинг нархи тўғрисидаги тортишув. Бозорнинг ўртасида қовун-тарвузлар уюлиб ётибди. Савдо авжсида. Р. Файзий, Сен етим эмассан.

3 кўчма Савдо-сотикдан тушган пул. Бугунги савдо юз минг сўмга етди.

Умр савдоси Ўғил уйлантириш, қиз узатиш ҳақидаги келишув. Умр савдоси — қийин савдо. Мақол. ■ Мен умр савдоси ишида ихтиёрни [Ҳайдаралининг] ўзига қўйиш лозимлигини ва Ҳайдарали бу соҳада янглишмаганлигини айтиб, бўлажак келинни таърифладим. Т. Тўла, Чақар.

САВДО II [a. سوداء — (қора) сафро, ўт] 1 Инсон ҳаётида учрайдиган ғам-ташвиш, машаққат ва қулфат, мушкул ҳолатлар. Ни-

зомжон ўз бошига тушадиган савдоларнинг худди шу дақиқадан бошланишини қаёқдан билсин. С. Аҳмад, Уфқ. Ҳар савдога кўнади банданинг боши, Тўкилар куйганнинг кўзидан ёши. «Юсуф ва Аҳмад». Гулноз Лабзак ариғи бўйлаб. елиб борар экан, уруш ўз бошига солган савдоларни ўйлар эди. Х. Фулом, Тошкентликлар. Мен бўлсам кўзимни қайгадир тикиб ўйлардим: дунёнинг савдоси шуми? А. Орипов.

2 Бирор нарса, кимса дардига ўта берилиш ҳолати. Ишқ савдоси. Айрилиқ савдоси. ■ Ҳамиша хавфда кўнглум бу муҳаббат интиҳосидин, Мени ҳам этмаса мажнун дебон Раънонинг савдоси. А. Қодирий, Меҳробдан чаён. Дунё экан.. Ишқ деган савдо Борми фақат менинг бошимда?! Э. Воҳидов.

Фарзанд савдоси Фарзанд туфайли ёки фарзанддан айрилиш натижасида бошга тушган ғам-ғусса, ташвиш. Сени адо қилмиш фарзанд савдоси, Эзингга кийибсан мотам либоси. Миртемир, Асарлар.

3 эск. тиб. Инсон аъзосидаги тўрт хил суюқликнинг бири. Ибн Сино савдойилик касалини савдо хилтининг ошиб кетиши натижасида пайдо бўладиган руҳий касаллик дейди. «Фан ва турмуш». Табобатда инсон аъзоларида тўрт хил суюқлик бўлиб, булар — қон, сафро, балғам ва савдодан иборат. К. Маҳмудов, Ўзбек тансиқ таомлари.

САВДОГАР [ф. سوداگر — савдо қилувчи, тижоратчи] Хусусий савдо-сотик билан шуғулланувчи, савдо-сотикни касб қилиб олган киши. Йирик савдогар. Майда савдогар. ■ Кўқон савдогарлари фақат Туркистондагина эмас, балки Москва ва Россиянинг бошқа шаҳарларида ҳам савдо-сотик билан шуғулланар эдилар. К. Яшин, Ҳамза. Ҳар кун мол нархи ошади, бозорда савдогарларнинг қулоғи тиккайган. Ойбек, Танланган асарлар. Майда савдогарлар сақич, гилвата сотишарди. И. Раҳим, Ихлос.

САВДОГАРЛИК Савдо-сотик билан шуғулланиш, савдогар касби. Мирзакаримбой болалик чоғиданоқ ота касби — савдогарликка ўрганди, гилам навларини ажратадиган бўлди. П. Турсун, Ўқитувчи.

САВДОГАРЧИЛИК айн. савдогарлик. [Фазлиддин:] Ҳар бир иш ўз вақтида ярашади, лекин ўшанда ҳам дўконга эрта бориб, кеч қайтаман. Савдогарчиликнинг таомили шу.

Ойбек, Танланган асарлар. [Кушбеги:] Марғилонга нима юмуш билан келган эдингиз? [Отабек:] Савдогарчилик билан, тақсир. А. Қодирий, Ўтган кунлар.

САВДОЙИ [a. سوداوى — дилгир, дилгирликка мойил; маънос, гамгин] 1 Ақлдан озган, телба. -Жинни бўлибсан! Савдойи бўлиб қолибсан! — деди Салимхон Обидий унга [хотинига]. Мирмуҳсин, Умид. Ҳали оққорани танимаган йигитча бу қийинчиликлар, виждон изтироблари олдида савдойидек каловланиб, тақдирнинг аёвсиз ўйинларидан гаранг бўлиб қоларди. С. Аҳмад, Уфқ.

2 Бирор кимса, нарсаларда эс-ҳушидан айрилган. Унинг [Саломатнинг] куйида савдойи бўлиб қолган эдим. Н. Қобил, Унутилган соҳиллар. Хотинлар: -Бечора чол! Суюкли қизидан айрилиб, савдойи бўлиб қолди! — деб пичирлашар эди. О. Ёқубов, Излайман. [Бўронбой:] Ишқ дарди бедаво дард: рўйирост гапирсам, ишқ йўлида савдойи бўлганман. К. Яшин, Ҳамза.

САВДОЛАШМОҚ 1 Молнинг нархи ҳақида тортишиб, ўзаро келишмоқ. Узоқ савдолашувдан кейин Баширжон яна йигирма беш сўм чиқариб берди. Н. Аминов, Суварак.

2 Умуман, бирор олди-берди ҳақида келишмоқ. Аҳмад ака уйда экан. Совчилар билан узоқ савдолашди. «Муштум».

САВДОЛИ Ташвишли, мушкул. Айрича кўринганй ҳар касга дунё, Борлиқнинг савдоли ишларин уйлар. Р. Парфи, Кўзлар.

САВДО-СОТИҚ Олди-сотди муомаласи. Бозор сотувчи ва олувчилар билан гавжум, савдо-сотиқ ишларини терим мавсумида далага кўчириш ғоятда муҳимдир. Газетадан.

САВИЛ с.т. қ. сабил. Бу савил [эшак] ҳам эгасига ўхшаб жуда ўжар экан, ҳаливери ётадиган чўти йўқ. Н. Аминов, Қаҳқаҳа. Бу савил уйда ё укангиз туради, ё мен! О. Ёқубов, Пьесалар.

Жони савил айн. жони сабил қ. сабил. Нене йигитлар ҳалок бўлиб кетишиди. Мен бўлсам, жоним савил эканми, билмадим, ҳалиям юрибман. О. Ёқубов, Излайман. **Савил қолмоқ айн. сабил қолмоқ қ. сабил.** Бу савил қолгур ола мушук қуймоқни еб қўйибди-ку. «Олтин олма».

САВИЯ [a. سويه — тенглик, бараварлик] Шахс, нарса ёки ҳодисанинг сифат, тараққиёт даражаси. Илмий савия. Маданий савия. ■ Таржималари оригинал даражасида фа-

сиҳ ва мукаммал, яратган асарлари эса ўзи таржима қилган авторларнинг ижоди савиясидай юксак, кўламдор. Ф. Саломов, Таржима назариясига кириш.

САВЛАТ [a. صولات — куч-қудрат, қувват; зўрлик; ҳокимият] Улуғвор ташқи қиёфа, салобатли кўриниш, салобат, маҳобат. Уста унинг елкаси, савлати, ғайрати, куч-қувват ёғилиб турган вужудига ҳавас билан боқди. Т. Ашуоров, Оқ от. Пулат полвон дегай номин халойиқ, Иши ҳам савлати номига лойиқ. Ҳабибий, Девон.

Савлат тўқмоқ Бутун савлати билан кўзга ташланмоқ. Умар полвонга энди бари бир бўлгани учун совуққонлик билан қоядай савлат тўқиб турарди. К. Яшин, Ҳамза. **Савлатидан от (ёки ит) ҳуркади** Жуда савлатли; салобати одамни босади. Эрталаб келсам, хонага одам сизмай кетибди, ҳар олимларки, савлатидан от ҳуркади денг. Х. Тўхтабоев, Ширин қовунлар мамлакатаи.

2 кўчма Кўрк, ифтихор. Ўсмирлар — давлатимиз, Кексалар — савлатимиз. Қ. Муҳаммадий.

САВЛАТДОР [a. + ф. صولتدار — савлатли, савлатга эга] Савлатли; серсавлат. Столнинг тўридаги стулда кўринишидан озгин, сочлари юқорига таралган, савлатдоргина киши ўтирибди. С. Кароматов, Ҳижрон.

САВЛАТЛИ Улуғвор кўринишли; серсавлат. Савлатли киши. Савлатли бино. ■ Қарасам, ўн қадамча нарида савлатли бир йигит турибди. С. Сиёев, Ёруғлик.

САВОБ [a. ثواب — ажр, эваз, мукофот; хайрли, эзгу иш] 1 дин. Диний эътиқодга кўра, худонинг марҳаматига лойиқ иш ва шундай иш учун худонинг марҳамати. [Ёрмат:] Нима иш қилдим? Гуноҳми, савобми? Ойбек, Танланган асарлар.

2 Ўзгаларга беминнат қилинган холис ёрдам; яхши, эзгу иш. Дўстларим, қилманглар бағримни кабоб, Ғарибнинг кўнглини овламоқ — савоб. Эргаш Жуманбулбул ўғли. [Давлатёр:] Бир есир-бева. Томини кураб берай, савоб бўлар.. П. Турсун, Уқитувчи.

САВОБЛИ Савоб бўлувчи, худонинг марҳаматига сазовор бўладиган. Ўғлим, дунёда халқнинг раҳматидан ҳам савоблироқ нарса борми? Уйғун, Асарлар.

САВОБТАЛАБ [савоб + талаб] Савоб иш қилувчи, савоб ишдан қайтмайдиган. Йўлдош мусофир камсуқум, меҳнаткаш, бировга

озори йўқ, савобталаб киши эди. С. Сиёев, Аваз. [Абдурахмонни] ..маҳалла кексаларидан иккита савобталаб чол дарвоза ёнида кутиб олдилар. А. Қодирий, Меҳробдан чаён.

САВОД [а. سواد — қоралик; қоралама ёзув; ўқиш-ёзишни билиш] **1** Ўқиш-ёзишдан хабардорлик; хат-савод. *Анвар «тахта»дан ўқиш бошлади, зеҳнининг тиниқлигидан бўлса керак, ўн бир ёшида саводи чиқаёзди.* А. Қодирий, Меҳробдан чаён. *Мана, 3-синф саводимиз бор, ўқиш-ёзишни биламиз.* «Ёшлик».

2 Бирор соҳа бўйича энг зарурий билим, маълумот. *Ҳуқуқий саводнинг мукаммаллиги давр талабидир.* Газетадан.

3 Умуман, билим, тушунча, тажриба. -*Саводингизни анча чиқариб қўйишибдими? -Ким? -Билмасам. Домлангиз. Домлаларингиз. -Менинг домлам йўқ, домлам — икки кўзим.* А. Қаҳҳор, Кўшчинор чироқлари.

САВОДЛИ **1** Ўқиш-ёзишни биладиган, саводи бор. *Ҳамза болаларнинггина эмас, катталарнинг ҳам саводли бўлишини истарди.* Н. Сафаров, Оловли излар. *Мен сизни ўқитиб, саводингизни чиқариб қўяман. Сиз юртинизга саводли бўлиб борасиз.* П. Турсун, Ўқитувчи.

2 Билимли, маълумотли; кўп ўқиган, мустақил фикрловчи. *Онам диний-дунёвий китобларни ўқиган, саводли, ниҳоятда сабрли, меҳру оқибатли аёл бўлган.* Шукрулло, Жавоҳирлар сандиги. *Саводли ўз ҳақини таниган бўлади, бинобарин, уни алдаш осон бўлмайди.* К. Яшин, Ҳамза.

САВОДЛИЛИК **1** Аҳоли маданий савияси кўрсаткичларидан бири: оддий матнларни ўқий олиш ёки уларни ўқиш ва ёза олиш кўникмасига эгалик.

2 Одамнинг адабий тил меъёрларига мувофиқ келадиган оғзаки ва ёзма нутқ мақаларига эгалиги.

3 Муайян соҳа бўйича етарли билимга эгалик. *Техник саводлилик. Ҳуқуқий саводлилик. Тиббий саводлилик.*

САВОДСИЗ **1** Ўқиш-ёзишни билмайдиган, саводи йўқ. -*Ахир улар саводсиз-ку, газетани нима қилишади? — қулди Каримбой.* К. Яшин, Ҳамза.

2 Етарли билими, маълумоти йўқ. *Ўзи билмайди-ю, менга ўргатганига куяман! Сенга ўхшаган саводсизлар «бўса-бўмаса» дейди.* А. Қаҳҳор, Санъаткор.

САВОДСИЗЛИК Саводга эга эмаслик, саводи йўқлик. *Санъаткор тажанг эди: ..бир тракторист уни саводсизликда айблади.* А. Қаҳҳор, Санъаткор. *Саводсизлик қурсин, болам бечора хат ҳам ёзолмайди.* Ҳ. Фулом, Машғал.

САВОДХОН [савод + ф. خوان — ўрганувчи, ўқувчи] **1** Ўқиш-ёзишни биладиган, хат-саводли. *Саводхон одам.*

2 айн. **саводли** **2.** *Асарда Ҳасан овчининг опаси сифатида гавдаланадиган бу отин ўша даврдаги тақводор, анчайин саводхон, тўймавраларни бошқарадиган аёллар типининг умумлашма образидир.* «ЎТА».

САВОДХОНЛИК қ. **саводлилик.** *Аслида, саводхонлик ҳар бир босқичда тақомиллаштира борилиши лозим.* Газетадан.

САВОЛ [а. سؤال — сўроқ; илтимос] **1** Жавоб олиш учун айтиладиган гап, жумла; сўроқ. [Васила Назаровна:] *Сен менинг саволимга жавоб бер, ким у? Ў. Ҳошимов, Қалбингга қулоқ сол. -Жуда яхши савол! — деди Иброҳимов, — қани, бу саволга ким жавоб беради?* А. Қаҳҳор, Кўшчинор чироқлари.

Савол аломати эск. Сўроқ белгиси. *Савол аломати ҳамма вақт «ми» дан кейин қўйилади десам, кулади.* А. Қаҳҳор, Адабиёт ўқитувчиси. *Етти оғайни ҳам кўкда ногаҳон Савол аломати бўлиб кўрингай.* А. Орипов.

2 Имтиҳон билетида ёзиб қўйилган, жавоб бериш лозим бўлган мавзулар номи ёки машқ, масала. *Иккинчи қаторга бориб ўтирганидан кейин машинкада ёзилган саволларни ўқиди: 1. Жоуль- Ленц қонуни. 2. Резонанс. Учинчи савол электромагнит майдони ҳақидаги масала эди.* Ў. Ҳошимов, Қалбингга қулоқ сол.

3 Ечилиши лозим бўлган масала, муаммо. *Буеунги йиғилишимизда иккита саволни ҳал қилишимиз лозим.* Газетадан.

САВОЛ-ЖАВОБ Ўзаро савол бериш ва жавоб олиш тарзидаги суҳбат. *Бу гаплашув ҳам калтагина савол-жавобдан иборат бўлди.* Чўлпон, Кеча ва кундуз. *Дўстлар пайроби мос келган савол-жавобдан завқланиб кулишди.* П. Турсун, Ўқитувчи.

САВОЛЛИ Савол ифодаладиган; сўроқли. *Саволли гап. Саволли назар.* ■ *Унинг саволли қараши юрагига гулгула солиб қўйди.* «Ёшлик».

САВОЛОМУЗ [савол + ф. آمیز — ўхшаш, каби] Саволни ифодаловчи, саволли; савол

тариқасидаги, савол маъноси билан. *Шербек Саидғозига саволомуз боқди. С. Анорбоев, Оқсой. Қирмизхон кириб, унга [бошлиққа] саволомуз қаради. Н. Аминов, Ёлғончи фаришталар.*

САВР [а. ثور – буқа, ҳўкиз] **1** (С – катта) *астр.* Ўн икки буржнинг бири, Ҳамал ва Жавзо буржлари ўртасида жойлашган.

2 Шамсия йил ҳисобидида иккинчи ойнинг арабча номи (22 апрель – 21 май даврига тўғри келади). *Савр кирди, экинларга давр кирди. Мақол. ■ Момақалдироқ гулдураги, савр ойининг беқарор ёмғирлари юракка тўлқинлик беради. «Саодат». Савр эди. Ҳаво ғамзада. «Ёшлик».*

САВСАН [ф. سوسن] *кт. айн. гулсапсар.* Сабзалар узра мусалсал бўлди сунбул турраси, Бир тараф савсан аросидин равондур облар. Фурқат.

САВСАР **1** от Ўрмонда яшайдиган, қимматбаҳо кўнғир мўйнали йиртқич ҳайвон.

2 сфт. Шу ҳайвон мўйнасидан тайёрланган. *У савсар телпагини бошига бостириброқ кийиб олди.. Ҳ. Фулом, Машғал.*

САВТ [а. صوت – овоз, товуш] **1** Ўзбек мумтоз муסיқасида куйнинг асосий қисмидан кейин келадиған сўнги қисми. *Сўхбатимга кўзи шахло, қоши ўқ-ёй истарам, Бошга парқу, тингламоққа савти эшвой истарам. «Муштум».*

2 Овоз, товуш, садо. *Созандаю навозандаларнинг ҳам савти унга ёқмас, хушрўй раққосалар ҳам ўйин тушиб, уни овута олмас эдилар. М. Осим, Ибн Сино қиссаси.*

САВТИЁТ [а. صوتيات] *эск. айн. фонетика.*

САВТИЯ: **усули савтия** Товуш-ҳарф тизими асосида ўқитиш усули. Ҳамза Қўқонда биринчи бўлиб усули савтияни қўлади. К. Яшин, Ҳамза.

САВҚ [а. سوق – бозор; машинани бошқариш; ундаш, қўзғатиш; майл, хоҳиш]: **савқи табиий** Ички ҳис-туйғу, сезги; майл; интуиция. *Нух бинни Мансур савқи табиий билан ўз ҳузурида улуг истейбод эгаси бўлган бир ҳаким ўтирганини пайқади. М. Осим, Карвон йўллариди. Бир-бирига ўхшаш кўчаларда боши айланади, ихтиёрини савқи табиийсига топширади. А. Қодирий, Кичик асарлар. Анвар Солиев ниҳоят тергов учун жиддий кўргазма чиқаетганини ўзига хос савқи табиий ила ҳис қилди. А. Ибодинов, «Латофат» дўқонидаги қатл.*

САГ [ф. سگ – ит] *эск. кт. Ит, кучук.*

Саги об [ф. سگ آب – сув ити] *эск. кт. айн. морж.*

САГБОН [ф. سگبان – итбоқар] *эск. Ит боқувчи.*

САД **1** қ. сад (д). *Шаҳр йўллари барчаси бўлди сад, Шаҳра кирарга чибинга не ҳад. С. Хондайлиқий.*

Сад чекмоқ (*ёки боғламоқ, ясамоқ*) *эск. кт. 1)* мустаҳкам девор, тўсиқ, ғов кўтармоқ. *Мавлоно Аёзий бўлғуси ҳужумларга қарши улуг сад ясамоқдалар ғолибо. Ойбек, Навоий. Азамат йигитлар сув билан курашга, унга сад чекишга ажратилар эди. Ойбек, О. в. шабадалар; 2)* йўлини тўсмоқ, бартараф қилмоқ. *Ҳамзанинг бу ишларига ота бўлиб сад чекмагансиз, балки бу шароитга сиғмайдиган ишларда ўзингиз бош бўлгансиз.. К. Яшин, Ҳамза. Жаноблари огоҳ бўлсинларки, хоинларнинг шаллақиликлари ҳаддан ошгани ҳамон сад чекурмиз. Ойбек, Улуғ йўл.*

САД **II** [ф. صد – юз (сон)] *эск. кт. Юз. Худойи таоло бир ўғил ато қилгон эрди, сад ҳайфи.. қизамиқ деган касал бирлан қазо қилди. А. Қодирий, Кичик асарлар. Сад офарин қилиб келган ҳийланга. Эргаш Жуманбулбул ўғли.*

Сади пок Қиш даврининг тўлиқ 100 куни (90 кун қиш ва 10 кун баҳор – қишнинг батамом ўтганлигини билдиради). *Бугун 10 март – сади пок бўлди.*

САДА *бот.* Эманлар оиласига мансуб сершоҳ, серсоя дарахт. *Сада соя берар, тол хода берар. Мақол. ■ Тўла хола саданинг ғадир-будур нўстлоғини беҳол бармоқлари билан силаб, юзига суртди. И. Раҳим, Ихлос. Тош устида кўкарган сада Бошим узра бўлур соябон. Б. Бойқобилон.*

САДАРАЙҲОН Шох-шабба қисми шар шаклида тўп бўлиб ўсадиган райҳон. *У киши райҳонни, айниқса Наманган садарайҳонини жуда хуш кўрарди. «Гулдаста». Кўзачада садарайҳону жамбиллар тўрт тарафга ҳид таратиб турибди. С. Сиёев, Ёруғлик.*

САДАФ [а. صدف – марварид чифаноғи; садаф, дур] **1** Айрим моллюскалар чифаноғидан олиндиған ок, ялтироқ дур. *Садафсиз дур бўлмас, Тикансиз гул бўлмас. Мақол.*

2 сфт. Садафдан ясалган, тайёрланган. *Зебихон Адолатга миср ипидан тикилган тўн билан олдига садаф тугмалар қадалган нимчани узатди. С. Зуннунова, Ҳикоялар.*

3 сфт. кўча Садафдек оппоқ, ялтироқ. Гулеум ҳам бошини кўтарди ва садаф тишларини кўрсатиб, илжайиб қўйди.. П. Турсун, Ўқитувчи. Юксакдан келасиз, эй тоғ сувлари, Садаф чўққиларнинг юзини ювиб. Файратий.

САДАҚА [а. صدقه — хайр, эҳсон, садақа] **1** Тиланчига, муҳтожларга бериладиган хайр-эҳсон. ..*Шоқосим наст, аянчли овоз билан бир нималар сўзлаб, ўткинчилардан садақа сўрайди.* Ойбек, Танланган асарлар. Эшикдан кириб келган тиланчи садақа сўради. «Муштум».

2 Худо йўлига, азиз-авлиёларга улардан наҳот истаб қилинадиган эҳсон; қурбонлик. *Адолатга қизамиқ чиққанда, эр-хотин уч кунгача китрик қоқмасдан унинг тепасида ўтиришиди, қўлларига илинган ҳар бир нарсани унинг бошидан айлантириб, садақа қилиб юборишаверди.* С. Зуннунова, Гулхан.

3 Олувчи назарида садақа бўлиб туюладиган хайр-эҳсон, пул. *Хотинингиз сизни аллақачон унутибди, садақаларингизга муҳтож эмас экан, деб айтинг.* С. Аҳмад, Қадрдон далалар. *Ўтган куни пул юборган эдим, олмабди. «Менга садақа керак эмас, судга бериб, қонуний алимент оламан», деган эмиш.* А. Қаҳҳор, Оғриқ тишлар.

Бош-кўзидан садақа Сарф қилинган пул, йўқотилган ёки бировга берилган нарса, мол-дунёга ачинмасликни билдирувчи ибора. *Пулига тирноқча ҳам куймасди, болаларимнинг бош-кўзидан садақа, дерди..* Р. Файзий, Ҳазрати инсон. **Жоним садақа (бўлсин)** Бировга чексиз ҳурмат-эҳтиромни ифодаловчи, «сиз учун жонимни ҳам беришга тайёрман» мазмунида айтиладиган ибора. *Хуш келибсиз, бош устига, султоним, Сиздан садақадир бир ширин жоним!* «Ширин билан Шакар». **Садақа(си) бўлмоқ** Кимсанинг қурбони бўлмоқ; кимса ёки нарсага жон фидо қилмоқ; айланмоқ, ўргилмоқ. *Доно одамга садақа бўлсанг арзийди.* Ойбек, Танланган асарлар. **Садақаи одам кет айн. садқаи одам кет қ. садқа.** Анзираат хола Сидиқжонга «Вой, садақаи одам кетинг, наҳот киши шундай хотинини, шундай болани қўйиб, бу ёқларда юрса!» деганидан кейин чеҳраси очилди. А. Қаҳҳор, Кўшчинор чироқлари. **Садақаси кетмоқ айн. садақа(си) бўлмоқ** Тушунган одамнинг садақаси кетсанг арзийди. С. Аҳмад, Қадрдон далалар.

САДАҚАЙРАҒОЧ Шох-шабба қисми шар ёки овал шаклида тўп бўлиб ўсадиган қайрағоч. *Садақайрағоч ва тол шохларида чирқиллашган тинимсиз чумчуқлар.. бўлмаса, гузарни пашиша уса эшитиларлик жимлик қамраган эди.* М. Исмоилий, Фарғона т. о.

САДАҚАЧИ Садақа сўровчи; тиланчи; гадой.

САД (Д) [а. سَد — тўсиқ, ғов; девор; тўғон] *кт.* Мустаҳкам қалъа ёки шаҳар девори, тупроқ қўрғон.

Сади чиний тар. Буюк Хитой девори. **Сади Искандар(ий)** Гўё Александр Македонский қурган афсонавий девор.

САДДИ-БАСТ [сад(д) + ф. بست — бирикиш; тўғон] *фольк.* Бўй-баст, қадди-қомат. *Бир-бир босиб, Равшаннинг олдига келиб, садди-бастига, баланд-настига қараб, «хўп йигит экан», деб Оққиз кўп беҳузур бўлди.* «Равшан».

САДО [а. سدااء — узоқдан эшитилган товуш; чақиряққа жавоб] Товуш, овоз. *Ноғоралар гўмбури ва карнайлар садоси яна осмону фалакка чиқди.* О. Ёқубов, Кўҳна дунё. *Кунгурадор шифтлар қарсак садоларидан титраб кетди..* Ў. Ҳошимов, Қалбингга қулоқ сол.

Акс садо қ. акс I. Садо чиқмади Гапирмади, индамади. *Бир неча сония ҳеч кимдан садо чиқмади.* С. Сиёев, Аваз. *Лекин бу кун гап шу тўғрида соатлаб давом этса ҳам, Тўғонбекдан садо чиқмади.* Ойбек, Навоий.

САДОҚ Камалак ўқлари жойланиб, белга боғланадиган ёки елкага осиб юриладиган асбоб; тирдон, ўқдон. *Қизларнинг ҳам, йигитларнинг ҳам белларида ўқ-ёй ва садоқларида ўқлари бор эди.* М. Осим, Тўмарис. *Улуғбек елкасидан камонини олди, садоқдан ўқ-ёй олиб, камонга жойлади.* Б. Аҳмедов, Улуғбек.

САДОҚАТ [а. صداقت — дўстлик, бирдамлик; самимийлик] **1** Чин қалбдан берилганлик; содиқлик, вафодорлик. *Ўғлон, оқил ҳам мард бўлгин, Мардлик — элга садоқат.* Э. Воҳидов, Нидо. *Гулнор чуқур садоқат ифода этган кўзлари билан йигитга қаради..* Ойбек, Танланган асарлар.

2 Садоқат (хотин-қизлар исми).

САДОҚАТЛИ Чин қалбдан берилган, содиқ; вафодор. *Садоқатли ёр. Садоқатли шогирд.* ■ *Амирзодам, агар бу мардак садоқатли қулингиз бўлганида, ёмон овоза тар-*

қатган навкарни қўлидан тутиб, доруғага топширмасмиди? П. Қодиров, Юлдузли тунлар. Агар Миён Башир ҳазратнинг садоқатли биродарлари Миён Қудрат ҳазратдан ўз вақтида имдод келмаганида, сизлар билан оқиқ еб ўлтириши насиб бўлмасди. К. Яшин, Ҳамза.

САДОҚАТСИЗ Садоқати йўқ; хиёнаткор, бевафо. *Садоқатсиз одам.* ■ *Дастлаб қараганда, ушбу драмада тор оилавий – ота-она ва садоқатсиз фарзандлар ўртасидаги муносабатлар қаламга олингандек туюлади.* Газетадан.

САДОҚАТСИЗЛИК Садоқатли, содиқ бўлмаслик; вафосизлик.

САДПОРА [ф. صدپاره – юз бўлак, қисм; юзга парчаланган] *поэт.* Пора-пора, чил-чил, юз пора. *Чашма бўйлаб юрар у хомуш, Қайғуси тоғ, қалби садпора.* Миртемир. Юрагини қилар садпора Йироқлардан келган бир овоз. А. Пўлкан. *У дилхун, ўзини қайга уришини билмай қолган кезлари кўнглини садпора этадиган аччиқ саволларга жавоб тополмайди.* С. Сиёев, Ёруғлик.

САДР I [а. صدر – юқори ўрин, олий мансаб; ибтидо; биринчи мисра] *тар.* Вақф ва дин ишлари билан шуғулланувчи амалдор. *Бу шеърни эшитган қозию садрлар, муҳтасибларнинг сочи тикка бўлиб кетди.* П. Қодиров, Авлодлар доवони. *У [Навоий] садрлардан бир нечасини йиғиб, вақф ишларининг аҳволи ҳақида маълумот олди.* Ойбек, Навоий.

САДР II [а. صدر – қалб, кўкрак; марказ, ўрталик] **I** Қаландарлар зикрида энг жазавали ҳолат. *Ҳаммаси тушиб садрга, Тепиб ётар бир-бирга.* «Ширин билан Шакар». *Қулоқ солинг айтган дурга, Ҳақ деб тушинглар садрга.* «Ширин билан Шакар». *Бирининг қўлида таёқ, бошқасида панишаха, садрга тушаётгандек чайқалишиб, қичқириб келишяпти.* Х. Тўхтабоев, Йиллар ва йўллар.

2 этн. Одатда, йигит, келинчак, бўйга етган қиз ёки энг яқин киши вафот этганда, унинг «қирқ»игача аёллар иштирокида ўтказил(ади)ган мотам одати (бунда марҳумнинг яқинларидан бир ёки бир неча киши даврага тушиб, олд-орқага ёки икки томонга солланиб, йиги билан тасирчан иборалар айтиб, марҳумни эслаганлар, қолганлар маълум ҳолатда жўр бўлганлар). *Во тўрам, деб юлиб опти бетини, Тўрам, деб канизлар садр тушади.* «Ойсулув». *Ҳовлида*

аёллар давра ҳосил қилиб, садр тушади. *Бирни қўйиб, иккинчиси айтади:* «Қуш эдим, қанотимдан айридим». М. Ҳазратқулов, Журбат. *Ичкарида аёллар онамиз теварагида ҳалқа бўлиб садр тушиди.* Т. Мурод, От кишнаган оқшом.

САДҚА [а. صدقه – «садақа» с. дан]: **жоним садақа айн. жоним садақа (бўлсин) қ. садақа.** *Ой бориб, омон келгин, Жоним садақа, ёлғизим.* «Оқ олма, қизил олма». **Садқаи кўз ёшинг** Кўз ёшингга арзимади. **Садқаи одам кет** Одам бўлмай ҳар нарса бўл, одамга ўхшамайсан. *Садқаи одам кетинг-э, айб эмасми?! А. Қаҳҳор, Майиз емаган хотин.* **Садқаи сар** 1) бошдан садақа. *Икки қўй йўқолган бўлса, садқаи сар, китобларда йўқолган нарсани риёсиз садақа деганлар.* С. Айний, Дохунда. - *Майли, пул садқаи сар, – деб ўйлади у. Н. Аминов, Қаҳқаҳа;* 2) ажаб бўлди (бўлсин), хўп бўлди (бўлсин). *Ўлдирган бўлсангиз, садқаи сар.. Ит деган махлуқ топилади, аммо одам топилмайди.* А. Қодирий, Обид кетмон.

САЁЗ 1 сфм. Унча чуқур бўлмаган, чуқур эмас (дарё, қўл, ариқ ва ш. к. ҳақида). *Ҳали ёмғирлар бошланмагани учун, анҳор суви тиниқ, лекин тошлари кўриниб турган саёз чеккалари шишадай рангсиз-у, чуқур жойлари кўкмигир-яшил.* П. Қодиров, Уч илдиз. *Биз, бир эшелон солдат, бепоён даштга тушиб, саёзгина дарё бўйида чодир тутиб ётардик.* О. Ёкубов, Излайман.

2 рвш. Юзалаб, чуқурлашмасдан. *Бошлиқ, бир колхоз тракторчиси ўн уч гектар ерни саёз ҳайдагани учун суд уни қайта текинга ҳайдаб бериша.. ҳукм чиқарганлигини айтиб берди.* Ж. Абдуллахонов, Тўфон. *Саёз оққан дарё шағиллайди, деганлари-ча бор экан.* С. Кароматов, Ҳижрон.

3 кўча Мазмунан сийқа, юзаки, гўр. *Хомхатала асарларга, ғоявий-бадиий саёз буюртмаларга чек қўйиши вақти аллақачон келди.* Газетадан. [Салимхоннинг] *Илми жуда саёз, фақат қақиллаб гапириши бор.. Мирмуҳсин, Умид.*

САЁЗЛАНМОҚ 1 Суви камайиб ёки тош, шағал, балчиқ тўпланиши оқибатида таги юзароқ бўлиб қолмоқ. *Баҳор чоғлари тезобликини ҳаддан оширса, кузга яқин [дарёнинг] таги кўринар даражада саёзланиб қолади.* Ж. Абдуллахонов, Хонадон.

2 кўча Мазмунан юзаки бўлмоқ. *Фикрингиз саёзлаши қолибди.*

САЁЗЛАШМОҚ айн. саёзланмоқ 1, 2. *Дарёнинг саёзлашиши.*

САЁЗЛИК 1 Соё, кўл, ариқ, дарё каби сув ҳавзаларининг суви камайиб, таги юзароқ бўлиб қолиши. *Кўлнинг саёзлиги.*

2 Таги унча чуқур бўлмаган, саёз жой. *Саёзликнинг нариги томонидаги дарё тармоғига тушиб кўрган эди, чуқур экан, буй бермади. Ж. Шарипов, Хоразм.*

3 кўча Юзакилик, бирор соҳада билим ва маҳоратнинг етарли бўлмаслиги. *Унинг оригинал ижодига тасвирда саёзлик ва сохтакорлик қандай ёт бўлса, таржималари ҳам худди шундай табиий жаранглайди. Ф. Саломов, Таржима назариясига кириш. Ўқийман, деб икки йил институтга борди, киролмади. Билими саёзлик қилдими ё омади чопмадими.. С. Сиёев, Отлиқ аёл.*

САЁҚ 1 Ҳар ерда санқиб, дайдиб юрадиган; дайди. *Саёқ юрсанг, таёқ ейсан. Мақол. — Кеча-кундуз кўча-кўйда тентираб юрдим саёқ, Сўзласа жон куйдириб ким, солмадим ҳаргиз қулоқ. Ҳабибий. Ҳаммаёқ жимжит. Соё тарафдаги саёқ итларнинг ҳам овози ўчган. С. Сиёев, Отлиқ аёл.*

2 Ёмон йўлларга юрадиган; ахлоқи бузук. *Саёқ аёл. Саёқ одам.*

САЁҚЛИК 1 Санқиб юришлик, дайдилик. *— Дарбадарликдан, ўзимнинг симобдай беқарор саёқлигимдан жуда ўкинар эдим, — деди Шум бола. Ф. Фулом, Шум бола.*

2 Ахлоқан бузуклик. *У [Фотима] синглимга ҳар замон ёзган хатида эри ҳақида лом-мим демас, ўзи хоҳлаб текканининг саёқлигидан.. нолишга, очиғи, ор қиларди. Ҳ. Назир, Ўтлар туганганда.*

САЁҲАТ [а. سياحت — сафар, сайр қилиш; туризм] Дам олиш, ҳордиқ чиқариш, дунёни кўриш мақсадида қилинган сафар. *Кинофестиваль қатнашчилари ва меҳмонлари кўҳна Самарқандга ҳам саёҳат қилишмоқда. Газетадан. Олдинда тағин денгиз саёҳатининг узундан-узоқ беш кунни бор. Н. Қиличев, Чигирик.*

САЁҲАТНОМА [саёҳат + нома] Саёҳат таассуротлари ва тафсилотларини тасвирловчи бадиий асар; адабий жанр. *Шоирнинг шеърӣ асарларини қуйидаги гуруҳларга бўлиш мумкин: 1. Лирика. 2. Ҳажвийёт. 3. Саёҳатномалар. 4. Мактубот. «ЎТА».*

САЁҲАТЧИ Саёҳатга чиққан, саёҳатда юрган одам. *Чет эллик саёҳатчилар. — Саёҳатчилар жарликдан ўтиб, тоғ ёнбағрига етдилар. Ҳ. Назир, Сўнмас чакмоқлар.*

САЖ(Ъ) [а. سجع — кумри, булбул, тўти каби қушларнинг сайраши; қофияли наср] Насрий асарлардаги айрим бўлақларнинг вазн ва қофияда мослашиши; қофияли наср. *Саж(ъ) санъати ишлатилган наср насри мусажжа.. деб юритилган. «ЎТА».*

САЖДА [а. سجده — сиғиниш, топиниш; бош эгиб таъзим қилиш] 1 дин. Ибодатда ёки сиғинишда тиз чўккан ҳолда пешона ва кўл кафтларини ерга тегизиш. *Шайбонийхон жойнамоз устида саждага бош қўйиб, худога муножот қилар, кўзларига ёш олиб, «Шарманда қилма, парвардигор», деб пичирларди. П. Қодиров, Юлдузли тунлар. Бўта қайтиб от етаклаб чиққанда, қоровул чопонини ерга ёзиб, саждага бош қўйган эди. С. Аҳмад, Хукм.*

Сажда қилмоқ 1) ибодатда бош қўймоқ; 2) кўча чексиз ҳурмат ва эҳтиром кўрсатмоқ. *Севган одамингга дунёда тенги йўқ фариштадек сажда қиласан. С. Кароматов, Олтин кум. Шу содиқ бевага саждалар қилинг, Шу содиқ бевага айланг эҳтиром. А. Орипов; 3) ҳаддан ортиқ берилмоқ; хушомадгўйлик қилмоқ. Шу билан бирга, раисга сажда қилувчи хушомадгўйлар ҳам озмунча эмас. Ш. Рашидов, Бўрондан кучли.*

САЖДАГОҲ [а. سجدهگاه — сажда қилинадиган жой] 1 дин. Сажда, ибодат қилинадиган жой; қадамжо. *Сиз, бу дунёда неки саждагоҳ бўлса, ялиниб сўрайман, бир лаҳза бўлса ҳам рўшнолик кўринг. А. Нурмуродов, Уруш бевалари.*

2 кўча Муқаддас, азиз жой. *Мана ўша уй, мана менинг саждагоҳим. Т. Жалолов, Олтин қафас.*

САЖИЯ [а. سجيّه — туғма сифат, хусусият; хулқ, табиат] кт. айн. **характер** 1. *Сажиядагина эмас, сурат ва сиймо важида ҳам катта ўзгаликлари бор эди. А. Қодирӣй, Ўтган кунлар. Рафиқов Обид кетмоннинг сажиясига таажжубланади. А. Қодирӣй, Обид Кетмон.*

САЗА шв. айн. **сазо** 2. *— Яхши йигит кўринасиз, одамнинг сазасини ўлдирманг.. — деди Фотима она. Р. Файзий, Сен етим эмассан. Раис сўзида туриб берди-ю, сазасини қайтаролмай, олдим «Москвич»ни. С. Нуров, Нарвон.*

САЗАН айн. зогора балиқ қ. зогора. Бу сувларда сом, илонбалиқ, сазан, маринка каби балиқлар сероб. Газетадан. Бир куни хонзодалар Амударёга сайрга чиқибди. Отам сазан тутиб пиширибди. С. Сиёев, Ёруғлик.

САЗО I [ф. سزا — ажр, эваз, мукофот; қасос, жазо] **I** Қилмишига яраша оладиган танбех, таъзир, дашном. Деворлар ҳам менга сазо бераётгандек қизардим, ҳеч қаёққа қарай олмадим. Ойдин, Ҳикоялар.

2 Оний истак; интилиш; раъй, шахт. *Йигитнинг сазоси сингунча, шайтоннинг буйни узитсин.* Мақол.

Сазосини (ёки сазасини) қайтармоқ (ёки ўлдирмоқ, ерда қолдирмоқ) Илтимосини инобатга олмаслик; шахтини қайтармоқ; уялтирмоқ. *Инсоф керак, Асадвой! Қариянинг сазосини ўлдирши яхшимас, оппоқ соқолини ҳурмат қилиш керак.* Ҳ. Назир, Кўктерак шабадаси. *Қурбон ота унинг суҳбатини ҳушмамаса ҳам, одамнинг юзи иссиқ, ҳамсафар бўлиш тўғрисидаги сазосини ўлдирмади.* А. Қаҳҳор, Қўшчиноҳ чироқлари.

САЗО II шв. Садо, товуш, овоз. *Хотиндан сазо чиқмагач, Соҳиб қори қўлидаги сарполарни Холиданинг бошидан ошириб, ичкарига отди.* И. Раҳим, Чин муҳаббат.

САЗОВОР [ф. سازوار — (жазо, мукофот, мақтовга) лойиқ] Ўз хизмати, савъ-ҳаракати, хулқ-атвори билан ҳурмат-эътиборга, таҳсинга, унвонга, туҳфа-тортиққа арзийдиган; муносиб, лойиқ. *«Не сабадан.. улуг султоннинг инъому эҳсонларига сазовор бўлган устод Нажмиддин Бухорийнинг фарзанди бундай қабих экан», деб ўйлади Гавҳаршод Бегим.* Мирмуҳсин, Меъмор.

Диққатга сазовор Кўзга кўринган, эътиборли; машҳур. *Ҳиротнинг диққатга сазовор жойларидан яна бири Ҳирирудга қурилган Пули Молон бўлиб, унинг атрофидаги ерлар сайргоҳ эди.* Мирмуҳсин, Меъмор.

САЗОВОРЛИК Ҳурмат-эътибор, таҳсин, унвон ва ш.к. га муносиблик, лойиқлик. *Ҳурматга сазоворлик. Халқ шоири номига сазоворлик.*

САЗОЙИ [ф. سزایی — жазога лойиқ қўрилган] Эл ўртасида шарманда қилинган, жазоланган. *Мени турғизиб, қўлимни орқамга боғладилар. Бозорма-бозор айлантириб, бошимга қамчи билан уриб: «Сазойи киши одам ўлдирсин», — деган гапни баланд овоз билан такрор.. қилар эдилар.* Ф. Фулом, Шум бола.

Сазойи қилмоқ Гуноҳкор кишига эл кўзида жазо, танбех, таъзир бермоқ (илгари бу мақсадда гуноҳкорларни эшакка тескари миндириб, юзига қора суриб, одам гавжум жойларда айлантириб юрилар эди). *-Бу муттахам чойхоначини эшакка тескари миндириб, сазойи қилинглар, — деб ҳукм чиқарибди [Исроилбек].* Шукрулло, Жавоҳирлар сандиғи.

САИД [а. سعيد — бахтли, омадли; соз, қулай] кт. **1** Бахтли, саодатли.

Соати саид Бахт соати, бахтли соат, он, пайт.

2 Саид (эркаклар исми).

САЙД [а. صيد — ов қилиш, тутиш; шикор; овланадиган қушлар, илвасин] эск. Ов қилинган нарса: ўлжа. *Найлайин, сайд ўлди холинг донасига жон қуши.* С. Абдулла. *Унинг севгиси дом қўйган овчидай ўз сайдини кўзлаб, бир тош билан икки ўлжани қўлга киритмоқчи.* У. Исмоилов, Сайланма.

Сайд қилмоқ 1) ов қилмоқ, тутмоқ; **2)** кўчма мафтун қилмоқ, банд этмоқ. *Бир табассум бирла сайд этдинг кўнгили аввало, Охири нозу тағофил бўлди иш, эй дилрабо.* Ҳабибий.

САЙЁД [а. صياد — овчи, тутувчи] эск. кт. айн. овчи. *Тоғларда ирғишлаб ўйнасин оху, Уларнинг пойига тушмасин сайёд.* Х. Салоҳ. *Мен бўлибман овчи — элда бир сайёд.* «Гулихиромон».

САЙЁР [а. ستيار — доимо ҳаракатланувчи, ҳаракатчан] **1** Бир жойдан иккинчи жойга кўчиб юриб хизмат қиладиган. *Сайёр кўразма. Сайёр устахона. Сайёр кино.*

2 Доимий жойдан бошқа ерга бориб ўтказиладиган, уюштириладиган. *Суднинг сайёр мажлиси. Сайёр илмий сессия.*

3 Муқим турар жойидан бошқа жойларда кезиб юриб, иш олиб борувчи. *Сайёр мухбир. ■ Унда-бунда сайёр атторларнинг «ип кетди, игна кетди..» каби қичқириқлари.. шаҳар шовқинига мадад бериб туради.* М. Исмоилий, Фарғона т. о.

4 эск. кт. айн. сайёҳ. *Носирбой ҳам бўш келмайди: -Мен! Номим Носир сайёри Самарқандий.* А. Қодирий, Обид кетмон.

5 Сайёр (эркаклар исми).

САЙЁРА [а. ستياره — планета; автомобиль; карвон] **1** Муқим турар жойи йўқ, дарбадар кезувчи, дарбадар. *Сайдинг қўя бер, сайёд, Сайёра экан мендек.* Фурқат.

2 астр. Куёш атрофида айланувчи ва ундан нур олувчи шарсимон осмон жисми, мас., Меркурий, Венера, Ер, Марс. *Маълумки, замин — Ер сайёраси Куёш системасида коинотнинг бир кичик бўлаги сифатида пайдо бўлди ва тараққий этди.* Газетадан.

Она сайёра Ер сайёраси. *О, она сайёра, курраи қутлуғ, Самодан суратинг илк бора курдим.* А. Орипов.

3 Сайёра (хотин-қизлар исми).

САЙЁХ [а. سَيَّاح — саёхатчи, турист] Саёхат қилувчи; саёхатчи. *Ҳа, машҳур сайёҳ Колумб кашф қилган тамаки эндиликда бутун дунёни тутунга тўлдириб юборди.* Газетадан. *Бир сайёхнинг хабарича, Ява оролида бошда бирор нарса кўтариб юриш ман этилган.* «Фан ва турмуш».

САЙИД, сайид [а. سَيِّد — мустақил; ҳукмдор, жаноб; Муҳаммад пайгамбар авлодларидан бўлган мусулмонлар унвони] *дин.* **1** Муҳаммад пайгамбар авлодларига мансуб киши. *Отанг сайид, энанг қандай паризод, Сен шекилли сулув туғмас одамзод.* «Бўтакўз». *Вагондагилар орасида оқ соқолли муллалар, кўк саллали сайидлар, чалмали қариялар, нариги вагонда эса, нуқул аёллар.* Ш. Тошматов, Эрк куши.

2 Эркақлар исмининг таркибий қисми, мас., *Сайидқарим, Сайидолим.*

САЙИЛ [а. سَير < سَير — сайр, пиёда юриш, кезиш] **1 этн.** Баҳорда ўтказиладиган катта халқ сайр-томошалари, сайр-томоша. *Айни баҳор кулган чоғ эди, Сайил жойи сўлим боғ эди.* Э. Воҳидов.

2 Умуман, катта ва тантанали сайр-томошалар. *Халқ сайили. Наврўз сайили. Лола сайили.* ■ *Халқ шоирлари дostonларни турли йиғинлар, тўй ва сайилларда ижро этганлар.* Газетадан.

Сайил боғ Халқ сайиллари ўтказиладиган катта боғ, парк, сайилгоҳ. **Қовун сайли** Қовунхўрлик ва сайр-томоша мақсадида кўпчилик бўлиб далага — қовун полизга чиқиш. *Муҳиддинни бир таниши қовун сайлига олиб кетди.* С. Зуннунова, Ҳикоялар.

3 Сайр-томоша мақсадида айланиб (кезиб) юриш; саёхат. *Сайил ҳам сайил, саргардон ҳам сайил.* Мақол. ■ [Зиёдила:] *Сарсонгарчилиги борми, шу баҳона Тарлон икковимиз шаҳарни сайил қилиб келяпмиз.* Т. Мурод, От кишнаган оқшом.

САЙИЛГОҲ [а. + ф. سَيرگاه < سَيرگاه — сайил жойи] Халқ сайиллари ўтказиладиган жой, боғ, парк. *Сал юришгач, фавворалар осмонга бўй чўзиб турган салқин, сўлим сайилгоҳ жойининг олдида чиқиб қолишди.* Л. Тожиева, Меҳрим сизга, одамлар. *..Қий-чув, кулги, қаҳқаҳа сайилгоҳ осмонини қоплади.* Ж. Шарипов, Хоразм.

САЙИЛЧИ Сайил қилишга чиққан одам. *Сайилчилар роҳат қилиб кулиб қолишди.* К. Яшин, Ҳамза. *Чор-атроф сайилчиларнинг ғовур-ғувури .. билан тўлиб-тошган.* Ў. Ҳошимов, Баҳор қайтмайди.

САЙИН кўм. (б. к. билан) **1** =ган аффиксли сифатдошлар билан келиб, иш-ҳаракатнинг тобора кучая боришини билдиради. *Шерзод бошқа хонадаги беморларнинг унга ҳасад билан қараётганини сезар, сезган сайин гаши келар эди.* Ў. Ҳошимов, Нур борки, соя бор. *Қизининг қийналаётганини кўрган сайин Басранинг касали зўриқарди.* Р. Раҳмон, Меҳр кўзда.

Борган сайин Борган сари, тобора. *Қоронғилик қуюқлаша борар, кўкдаги юлдузлар чамани ҳам борган сайин ёрқинроқ чақнар, ҳаво баданга сезиларли совир эди.* Ойбек, Танланган асарлар.

2 Вақт билдирувчи сўзлар билан келиб, иш-ҳаракатнинг тадрижий ривожланишини ёки такрорланишини билдиради. *Йил сайин. Соат сайин. Кун сайин.* ■ *Кун сайин озади юрагим, Кун сайин вужудим семирар.* Ш. Раҳмон, Юрак қирралари.

Унга сайин Бирор ҳолатдан руҳлана ёки ўчакиша бориб. *Ҳар сафар рақиб унинг тўрига (сеткасига) тўп туширганида, бояги қиз қувониб қарсак чалар, унга сайин Рустам яхшироқ ўйнар эди.* Ў. Ҳошимов, Қалбингга кулоқ сол.

САЙИС [а. سائِس — отбоқар, ҳайвонларга қаровчи] **1 тар.** Ўрта Осиё хонликларида: ҳарбий ва хўжалик эҳтиёжлари учун сақланган отларни парвариш қилувчи шахс.

2 шв. Умуман, отбоқар. *Сайислар билади отнинг тобини, Чечан одам гапнинг қўяр бобини.* Эргаш Жуманбулбул ўғли.

САЙИСХОНА 1 тар. Сайислар яшаши учун бевосита отхоналар ёнига қурилган махсус уй.

2 шв. Отхона. *Ударвозадан кириб, отини сайсхонадаги якка миҳга боғлади.* М. Ҳазратқулов, Журъат.

САЙИШ: сайиш қилмоқ *айн.* расад қилмоқ қ. расад II.

САЙИД *айн.* сайид.

САЙЛАМОҚ 1 Яширин ёки ошкора усулда овоз бериш йўли билан давлат ёки ўзини ўзи бошқариш органлари аъзолигига ўтказмоқ, тайинламоқ, Раисликка сайламоқ. Депутатликка сайламоқ. ■ Уни бир овоздан директорликка сайладилар. Газетадан. Қандолатни ҳам президиумга сайладилар. Ойдин, Ҳикоялар.

2 Танламоқ, танлаб, саралаб олмақ. Хоҳлаб менинг тулпорларимдан бировини сайлаб ол, жўнамоқ бўлсанг, яхши бор. «Муродхон». Қутлуғ бўлсин сайлаб олган ёрингиз. «Баҳром ва Гуландом».

САЙЛАНИШ Сайланмоқ ф. ҳар. н. Президиумга сайланиш. Депутатликка сайланиш. Сайлаш ва сайланиш ҳуқуқи. Сайлаш ва сайланишда хотин-қизлар эркаклар билан тенг ҳуқуқлидирлар.

Табиий сайланиш *айн.* табиий танланиш қ. танланиш.

САЙЛАНМА 1 Сайлаб қўйиладиган, сайлов йўли билан белгиладиган, тайинладиган. Сайланма ташкилотлар.

2 эск. Танланган, танлаб, саралаб олинган. Ёзувчининг сайланма асарлар тўплами.

САЙЛГОҲ *айн.* сайилгоҳ. Сайлгоҳга Завқий, Ҳамза ва Олчинбеклар ҳам чиққан, оддий халқ орасида туриб, улоқни томоша қилишарди. К. Яшин, Ҳамза.

САЙЛИ Қовуннинг узунчоқ тухумсимон, туси яшил, пўсти қаттиқ кечпишар нави.

САЙЛОВ Овоз бериш орқали давлат органлари, маҳаллий ўзини ўзи бошқариш органлари ва б. тузилмаларни ташкил этиш воситаси. Сайлов комиссияси. Сайлов участкаси. ■ Бу сайлов янги сиёсий системанинг энг муҳим принциплари — кўппартиялик ва коалиция принциплари амал қила бошлаганидан далолат беради. Газетадан. Сайлов очиқ ёки яширин овоз бериш йўли билан ўтказилади. «ЎЗМЭ».

САЙЛОВЧИ Сайловда қатнашувчи (овоз берувчи) киши, сайлов мажлисининг, тадбир-маросимининг иштирокчиси. Сайловчилар билан учрашув. ■ Сайловчилар боғча қурилиши ҳақида депутатга наказ беришди. Газетадан.

САЙР [а. سير — пиёда юриш; йўл, ҳаракат] Осуда ерларда, оромгоҳ, сайргоҳларда айланиб юриш, томоша қилиш, ором олиш. Боғ сайри. Гул сайри. ■ Қолмай шаҳарда қоқатим, Қишлоқ чиқардим одатим. Хоҳи яёв, бўлсин отим, Гоҳ сайр ҳам даркор экан. Муқимий. Ҳар навбаҳор бу кўкаламзорга ҳиротликлар от-аравада чиқиб, бир-икки кун сайр этиб, ҳордиқ чиқариб қайтишарди. Мирмуҳсин, Меъмор. Чаман булбулларидек сайр этиб гулзору боғларда, Ҳамиша яйраб эркинликда парвоз этгали келдик. Ҳабибий, Девон. Қилмадим бир бор ўшал гул юзли зебо бирла сайр, Қонмагай дил, айласам минг битта Лайло бирла сайр. Э. Воҳидов.

САЙРАМОҚ 1 Ёқимли оҳангдор овоз чиқармоқ, хониш қилмоқ (қушлар ҳақида). Атрофига эккан тоза шамшод гул, Ҳар шохиди сайраб ўтирар булбул. «Равшан». Толда чумчуқ сайрайди, Тол баргини чайнайди, Тол барги аччиқ экан, Юракка санчиқ экан. «Халқ дурдоналари». Ҳовлидаги ёнғоқнинг тена шохига қўниб олган зарғалдоқ «биёв-биёв» деб сайрарди. М. Мансуров, Ёмби.

2 кўчма Ёқимли, ширали овозда қўшиқ айтмоқ. Созандалар жўрида хушовоз хонанда булбулдек сайрарди.

3 Ёқимли, жарангдор овоз чиқармоқ (муסיқа асбоби ҳақида). Дуторимнинг торлари қўш булбулдек сайрайди. «Кўшиқлар».

4 кўчма салб. Тинмай гапирмоқ, вайсамоқ, жаврамоқ. Жўралари орасида «ширин сухан»лик билан танилган Олимхон сайрайверди. Ойбек, Танланган асарлар. —Жуда сайраб юбордингиз, бекам! — деди илжайиб Заврак, — сизни бир қадрдон синглим деб хурмат қилиб гапирмоқчи бўлган эдим. Мирмуҳсин, Меъмор.

5 кўчма Тез, шиддат билан овоз чиқармоқ (пулемёт, миномёт, автомат ва ш. к. ҳақида) Бир зумда пулемётлар сайраб кетди. Ж. Шарипов, Хоразм.

6 кўчма Кўзни қувонтирмақ. У [қизим] тиккан маҳсиларни қўлингга ол-у, томоша қил — сайрайди-да. Ойбек, Танланган асарлар.

САЙРАТМА Яхши сайрайдиган, сайратиш учун боқиладиган (бедана ҳақида). Сайратма бедана. ■ Сайратмаларнинг ишқибозлари тўрқовоқларини олиб чиқиб, толларга илиб қўйишади, кимники ўзарга ўйнашади. Р. Файзий, Ҳазрати инсон.

САЙРАТМОҚ 1 Сайрамоқ 1, 3, 5 фл. орт. н. Беданоти сайратмоқ. Дуторни сайратмоқ. Автоматни сайратмоқ.

САЙРБОҒ, сайрибоғ айн. сайргоҳ. Чамаси, ўн минутча юрилса, салқин ва сўлим сайрибоғ бор эди. Ф. Мусажонов, Ҳиммат.

САЙРГОҲ [а. + ф. سيرگاه – сайр қилинадиган жой] 1 Сайр қилиб айланиб юриш, ҳордиқ чиқариш учун белгиланган жой. Шаҳримизда сайргоҳлар кўпаймоқда. ■ Майдоннинг кунботар тарафида ўрдани ўраб олган сайргоҳ боғ бор. К. Яшин, Ҳамза. Куннинг иссиғида канизлар терлаб, кўҳна сайргоҳга етди. «Нурали».

2 айн. сайилгоҳ. Терим манзараси ажойиб бир сайргоҳни эслатади. Туйғун, Асарлар.

САЙРОН [а. + ф. سيران – сайр-томошалар] фольк. Сайрлар, сайр-томошалар. Кўҳна қоғни сайрон, Девларни ҳайрон қилган, Тўхтамиш Қора девнинг Маконин вайрон қилган Гурўғли қаттоли шудир, Одамхўр баттоли шудир. Эргаш Жуманбулбул ўғли, Хушкелди. Қуш солиб овлагин ойдин кўлларни, Сайрон қилгин тар очилган гулларни. «Равшан».

САЙРОҚ 1 айн. сайроқи. [Навоий:] Кўзимнинг нури, кел, тоза гулим, кел! Кўнги боғида сайроқ булбулим, кел! Уйғун ва И. Султон, Алишер Навоий.

2 Сайраш, хониш. Мен сизни севаман ялпизар атри, Қушчаларнинг сархуш сайроғи билан.. Х. Даврон, Тунги боғлар.

САЙРОҚИ 1 Давомли, ёқимли ва кўп сайрайдиган. Сайроқи қушлар. Сайроқи бедана. Сайроқи чигиртка. ■ Сайроқи қушлар макони, сарин еллар ардоқлиси бўлган боғлар энди хунук манзара касб этган эди. Р. Умаров, Дўрмон боғлари.

2 кўчма салб. Кўп гапирадиган; вайсақи, сергап. Сайроқи хотин.

САЙР-САЁҲАТ, сайру саёҳат Сайр ва саёҳат, сайр ва саёҳатда кезиш. [Зикриё қори:] Гулчехрахоним озод Туркистонни сайр-саёҳат қилиш иштиёқи билан бизга меҳмон бўлиб келганлар. Н. Сафаров, Танланган асарлар.

САЙР-ТОМОША, сайру томоша Сайр ва томоша; сайр-томоша қилиб кезиш, айланиш. Бенарвон кўкка чиқиб, қиламиз сайр-томоша. Қ. Муҳаммадий.

САЙРЧИ Сайр қилиб юрувчи, сайрда юрган киши. Сайрчиларнинг деярли ҳаммаси.. «сара» халқ. Ойбек, Навоий.

САЙТ [ингл. site – ўрин, жой] Интернетда: муайян мавзу йўналиши бўйича тўпланган ва шакллантирилган, доимо янгиланиб, тўлдириб бориладиган, ўз номи (сарлавҳаси)га эга бўлган маълумотлар йиғиндиси; электрон саҳифа. Осиё футбол конфедерациясининг расмий сайтида тарқатилган хабарига кўра, Ливан терма жамоаси.. «Осиё кубоги – 2007» баҳсларида иштирок этмайди. Газетадан.

САЙҚАЛ [а. صيقل – жилолаш, силлиқлаш; жило, силлиқлик] Нарса сиртига ишлов бериш натижасида ҳосил бўлган жило; пардоз. Сайқал ишларини пардозлаш трести ишчилари олиб боришди. Газетадан.

Сайқал бермоқ 1) силлиқламоқ, жило, ҳусн бермоқ. Бермоқ учун дунёга сайқал Олам аро одам яраган. Э. Воҳидов. Биз ўзбек чиннисига сайқал бераётган Тошкент чинни заводидамиз. «Гулистон»; 2) мукаммаллаштирмоқ; силлиқлаштирмоқ. Ёзган ҳикояларингиз жуода яхши, замонавий, чуқур мазмунли, фақат саҳифаларга бир оз бадиий сайқал бериш лозим. «Гулистон».

2 кўчма Зийнат, ҳусн, чирой, кўрк. Меҳнат, Ризахўжа аканинг таъбири билан айтганда, умр сайқали, ҳаёт безаги. Газетадан. Сатрим сайқалини кўриб шодланган, Азиз шеърхонларим, сиздан ёлчидим. А. Мухтор.

Сайқал топмоқ 1) кўчма ишланиш натижасида мукаммаллашмоқ, силлиқлашмоқ, кўрки ортмоқ. Бино пардозланиб бўлгач, янада сайқал топди. Газетадан. Раққосанинг санъати тобора сайқал топмоқда; 2) кўчма гўзаллашмоқ, ҳусн, баркамоллик касб этмоқ. Ривож олгай муҳаббат бирла меҳнат, Топар меҳнат билан сайқал муҳаббат. Ҳабибий, Девон.

САЙҚАЛАМОҚ 1 Силлиқламоқ, жило, пардоз бермоқ, зийнатламоқ. Бино деворларини сайқалламоқ.

2 кўчма Мукаммаллаштирмоқ, ишлаб камолотга етказмоқ, силлиқламоқ. Асарни сайқалламоқ. Ижодни сайқалламоқ.

3 кўчма Зийнат бермоқ, баркамоллик, кўркамлиқ бағишламоқ. Ошифта бу дил сатрини сайқалласа зора, Бўстон бўйи кокиллари, тўхтанг, менга навбат. Т. Тўла.

САЙҚАЛЧИ 1 Сайқал, жило берувчи; силлиқловчи, жилоловчи уста.

2 кўчма Ишлов бериб камолотга етказувчи, баркамол қилувчи, силлиқловчи.

-Ижодимизнинг асосий сайқалчиси халқдир,
— деди.. Асқад Мухтор ўз нутқида. Газетадан.

САЙФОҚ зоол. Қўш туёқли, кавш қайтарувчи, чўлда яшовчи сутэмизувчи ҳайвон, оққуйруқ. Одамлар яқинидан кўкраклари оппоқ сайғоқлар гала-гала бўлиб чопиб ўтади.. М. Осим, Аждодларимиз қиссаси.

САЙҲОН Катта текис очиқ жой, майдон. Кенг сайҳонда икки чол Йўл ахтариб кезарди. А. Орипов. Подда, қишлоқ кўчасидан шудринг босган сайҳонга чиқиб борди. Ҳ. Назир, Сўнмас чақмоқлар.

САЙҲОНЛИК Сайҳон ер, кенг майдон. Сайҳонликка тушганда, ола ҳўкиз орқада қолаверди ва бирдан тўхтади. Ш. Холмирзаев, Оғир тош кўчса. Қишлоқ подаси ҳайдаб чиқиладиган сайҳонликка етганда, давра қуриб ўтирдик. Н. Қобил, Унутилган соҳиллар.

САК I [ф. سگ — ит] с.т. Саг. Мен сени жоҳил, шуҳратпараст бир сак деб юрсам, сен одам қонига ташна зулук экансан-ку, ҳароми! С. Сиеёв, Аваз.

Сак йили айн. ит йили қ. ит 4.

САК II қ. саклар. Сак тилида ёзилган энг қадимги манба — Олмаота атрофидаги Иссиқ мазорқўрғонидан топилган кумуш идишдаги ёзув бўлиб, у милoddан аввалги 5-аср билан саналанади. «ЎзМЭ».

САКИЛЛАМОҚ салб. Беҳуда чопиб, сакраб юрмоқ. -Ва-а, қолиб кетдинг, энди Ҳалил аканинг итидек сакиллаб, пиёда келасан! — деди у Соат ювошга. Э. Раимов, Ажаб қишлоқ.

САККИЗ снқ. сон 8 рақамини ва шу рақам билан ифодаланган сон, миқдорни ифодалайди. Еттидан кейин саккиз келади. ■ Мана, саккиз ойдан буён [Йўлчи] бир қора чақа сўрагани йўқ. Ойбек, Танланган асарлар.

Санамай саккиз дема Олдиндан хулоса чиқарма, яхши билмасдан туриб иш тутма, ҳукм чиқарма. Султоновнинг айтишига қараганда, ер ҳам ориқ, куч ҳам йўқ.. Султонов санамасдан саккиз дейдиган одам эмас-ку! Ш. Рашидов, Бўрондан кучли.

САККИЗИНЧИ I Тартиб ўрни 8 рақами билан белгиланган, 8 номерли. Саккизинчи уй. ■ Саккизинчи майда Сидиқжонга суддан повестка келди. А. Қаҳҳор, Қўшчинор чироклари.

2 Еттинчидан катта, тўққизинчидан кичик ўлчам номери. Саккизинчи калиш.

САККИЗЛИК I ад. Саккиз сатрли банд усулида ёзилган шеър; мусамман.

2 карт. Саккиз холли қарта. Таппоннинг саккизлиги.

САККИЗОЁҚ зоол. Саккизта сўргичсимон оёғи бор денгиз ҳайвони. Японияда энг сеvimли овқат денгиз саккизоёқларининг гўштидир. «Саодат». Оролда яшайтганимга бир неча ой бўлса-да, саккизоёқ овини илк бор кузатишим эди. «Фан ва турмуш».

САККИЗТЕПКИ: саккизтепки атлас Саккиз тепкили дастгоҳда тўқилган атлас; хонатласнинг бир тури. -Бўлмаса-чи, — деди Отабек, — шу ўн беш куннинг ичида саккизтепки атласдан лоақал икки жўра йиғиб қўйингиз, ёдингиздан чиқармангиз! А. Қодирй, Ўтган кунлар.

САКЛАР, шаклар Илк кўчманчилик даврида: Осиё даштларининг чорвадор аҳолиси. Саклар асосан чорва ва зироат билан шуғулланганлар. Мирмуҳсин, Илдишлар ва япроқлар. -Кетялман, токи ҳеч қачон қул бўлмасин саклар, — деди қабиланинг йигитларига. Х. Даврон, Тунги боғлар.

САКРАМА кт. Ўқтин-ўқтин ёки вақтивақти билан бирдан ўзгарадиган, сакраб ўтадиган. Сакрама характердаги ривожланиш.

САКРАМОҚ I Бутун гавдани ирғитиб, кескин ҳаракат қилмоқ, пастга, юқорига ёки бир неча қадам нарига ўзини отмоқ. Рустам томоша қилиб турган қизлар орасида биттаси чинқириб, осмонга сакраганини, кула-кула қарсак чалганини кўрди. Ў. Ҳошимов, Қалбингга қулоқ сол. Аёл сакраб пастга тушиди-да, сумкасини қовлаб, пул қидира бошлади. С. Аҳмад, Уфқ.

Булутга (ёки кўкка) сакрайдиган Чопқир, ўйноқи (от ҳақида). Халқ бундай отларни, булутга сакрайдиган от, дейди. **Ерга урсанг, кўкка сакрайди** Жуда шўх; тиним билмайдиган (асосан болалар ҳақида). **Юз газ (нари) сакрамоқ** Ўзини четга олмоқ, безилламоқ, Иш талаб қилсанг, хуркиб, юз газ сакрайсиз. Ойбек, О. в. шабадалар. **(Ўрнидан) сакраб турмоқ** Ўтирган жойидан тез, сапчиб турмоқ. Бобур ўрнидан сакраб турди, тақрор эшитилган аламли йиғидан эти жунжикиб, бувисининг хонасига қараб югурди. П. Қодиров, Юлдузли тунлар. Чароснинг.. даҳшатдан кўзлари олайиб, сакраб туриб кетди. Ў. Ҳошимов, Қалбингга қулоқ сол.

2 Урилиб қайтмоқ, иргимоқ, сапчимоқ. *Бола коптокни ерга бир урган эди, копток том бўйи сакради.* ■ *Куёшда олтинланиб, тошдан тошга сакраган сувларнинг шовқинини сизди.* Ойбек, Куёш қораймас.

3 кўчма Жойдан жойга ўтмоқ, кўчмоқ. *Читтак шохдан шохга сакраб, тўғри ҳам эмас, эри ҳам эмас калтак изласа, Набигул заводдан заводга сакраб, нима излайди, дейсиз-да?* А. Қаҳҳор, Қанотсиз читтак.

4 кўчма Навбатдагига тўхталмай, кейингисига ўтмоқ. *Биз, ўтган 51-фаслда Анвар билан Раънони Султоналининг дарвозасида кўйиб, 52-фаслга сакраган эдик.* А. Қодирий, Меҳробдан чаён.

5 кўчма Кўтарилиб-тушиб турмоқ (нарх-наво ҳақида). [*Мирзакаримбой.*] *Шундай бўлиши керак. Нарх-наво ҳар куни сакраб турибди.* Ойбек, Танланган асарлар.

САКРАШ 1 **Сакрамоқ** фл. ҳар. н. *Бир оёқлаб сакраш.* ■ *У девордан бир сакрашда ошиб тушди-ю, кучининг борича олдинга интилди.* С. Анорбоев, Оқсой.

2 Маълум бир спорт турида мустақил машқ. *Парашютда сакраш. Баландликка сакраш. Узунликка сакраш.*

3 флс. Миқдор ўзгаришларининг сифат ўзгаришларига ўтиш жараёни.

САКСОВУЛ Шўрадошлар оиласига мансуб, Марказий Осиёнинг шўрхок ва қумли чўлларида ўсадиган, барги яхши ривожланмаган бута ёки дарахт ва унинг ёнилғи сифатида ишлатиладиган ёғочи. *Қора саксовул. Оқ саксовул. Саксовул ўтин.* ■ *Оқ саксовул, айниқса, унинг уруғи — кўй-эчкилар учун тўйимли озуқа.* «Фан ва турмуш». Чойхона тўрида доим дутор, сетор осғилиқ. Қишу ёз чилдирма қиздиргани манқалда саксовул чўғи яшнаб туради. С. Сиёев, Ёруғлик.

САКСОВУЛЗОР Саксовуллар ўсиб ётган майдон. *Саксовулзорлар, сийрак ўсган чўл шувоқлари, қумлоқ тепаликлар ортда қолди.* «Ёшлик».

САКСОН 1 снқ. сон 80 рақами ва шу рақам билан ифодаланган сон, миқдор. *Саксондан ўн бешни айирмоқ. Саксон сўм пул. Саксон пуд ун.* ■ *Э, бўтам, ўқишга ўқиганман, аммо бунга саксон йилларча бўлдиёв.* Х. Тўхтабоев, Ширин қовунлар мамлақати.

2 Саксон (эркаклар исми).

САКСОФОН [фр. saxophone < Sax — шу асбобни ихтиро қилган бельгиялик уста А.

Сакс номи + юн. phone — товуш] Пуфлаб чалинадиган мусиқа асбобларининг бир тури. *Саксофон чалмоқ.* ■ *Чўққи этагидаги санаторий богидан жаз ва саксофон овозлари келарди.* О. Ёқубов, Излайман.

САКТА [а. سكته — сукунат, жимжитлик; тутқаноқ, фалаж] **1** эск. айн. **апоплексия.** *Сакта касаллиги оғир касалликлардан бири ҳисобланади.* «Фан ва турмуш».

2 Шеърда вазннинг бузилиши, вазндаги етишмовчилик. *Ёқар эди Қудратга азал Полвон ёзган сактароқ ғазал.* М. Али, Боқий дунё.

3 кўчма Ранжитадиган; хато; ёмон. *Аҳмад Сардорнинг қизи Бўтакўзойим Авазхонга «Гўрўғлининг қули бўласан», деб бир нечта сакта сўзлар айтиб, унинг кўнглини қора қилибди.* «Гулихиромон».

САКТАЛИК 1 Шеър вазнидаги хато, етишмовчилик. *Кейин хон, Авазнинг бир байтини ёдаки айтди, бир сакталikka шора қилиб, уни ўзи тузатиб ўқиди.* С. Сиёев, Ёруғлик.

2 кўчма Камчилик; меъёрдан четга чиқиш. *Қалбим уришига соласан қулоқ, Ҳеч қачон сакталик сезмайсан бироқ.* Р. Бобожон.

САКУРА [яп.] Узоқ Шарқда, асосан Японияда ўсадиган, гуллари серяпроқ қизгиш-пушти, меваси ейилмайдиган манзарали дарахт (Япониянинг рамзи). [*Японияда*] *Сакура гулазаанда, баҳор байрами бўлади, ҳар бир меҳмонга сакура гули тақдим этилади.* Ҳ. Ҳасанов, Экватордан ўтганда.

САЛ рвш. Бир оз, озгина, андак. *Сал кунда. Сал ўтмай.* ■ *Меъмор бошқа шогирдларидан кўра ҳам унга [Ғаввосга] ўзгача илтифоту эҳтиром кўрсатар, чунки у ёш жиҳатидан сал каттароқ эди.* Мирмуҳсин, Меъмор. *Султонов чўнтагини ковлаб, калитни тоғди шекилли, сал ҳовуридан тушди.* М. Мансуров, Ёмби. *Қандилларда кўндан бери ёнаётган шамларнинг тутунидан уй сал хира тортиб қолган эди.* П. Қодиров, Юлдузли тунлар. *Орқасига қараса, икки тилиқ этиб олишига сал қолибди.* Н. Фозилов, Оқим.

Сал нарсага ёки **салга** Арзимаган нарсага, бўлар-бўлмаста. *У ноҳақликни кўргани кўзи йўқ, салга «лов» этиб ёниб кетади.* К. Яшин, Ҳамза. *Ичкўёвчилик эмасми, Бадалбек сал нарсага зарда қиладиган, сал нарсага аразлайдиган қилиқ чиқарди.* С. Аҳмад, Сайланма.

САЛАВОТ I [a. صلوات — «салот» с. нинг кўпл.] **1** дин. (Оллоҳ томонидан) Бандаларнинг гуноҳларидан ўтиш; кечириш, кечирим.

Ўтган ишга салавот Ўртада бўлиб ўтган кўнгилсиз ишларни, нохуш, номақбул гапларни унутайлик, гина-қудуратни қўяйлик, деган маънода айтиладиган ибора. *Ўтган ишга салавот, ҳозиргисини гапиринг.* Уйгун, Сўнгги пуншаймон.

2 Мақтов, ҳамд-сано. *Пайғамбарларга салавот айтмоқ.*

САЛАВОТ II қ. салобат.

Салавоти босмоқ айн. салобати босмоқ қ. салобат.

САЛАВОТЛИ қ. салобатли. *Кекса, салавотли кишилардан андак тортиниб, четроқда ёлғиз турган Умид ёнига Жанна келди.* Мирмуҳсин, Умид. *Карим, директорнинг олдидан қандайдир ўзгариб, вазмин ва салавотли бўлиб чиқди.* О. Ёқубов, Каптар.

САЛАМАНДРА [юн. salamandra] **1** зоол. Сувда ва қуруқликда яшовчилар туркумига кирувчи, узун думли, калтакесакка ўхшаш жонивор. *Узун думлилардан Кавказ саламандраси Фарбий Кавказда учрайди.* «ЎЗМЭ».

2 қ. самандар I.

САЛАНГЛАМОҚ I У ёқдан бу ёққа ҳаракатланмоқ, бориб келмоқ; лапангламоқ. *Бошида ияпа, бўйнидаги галстук саланглаб ётибди.* «Ёшлик». *Узун кўчада сумкасию тўрхалтасини саланглаб, калласини осилтириб кетиб боряпти.* С. Сиёев, Отлиқ аёл.

2 кўчма Бекор санқиб юрмоқ, сандирокламоқ. *-Нимага саланглаб юрибсизлар? Унгураги кириб олиб, одамларни нимага ишдан совитасизлар? — деб қичқирди Саудамин.* М. Исмоилий, Фаргона т. о.

САЛАТ I [итал. salato — тузли, тузланган] Турли сабзавотлар (помидор, бодринг), тухум, гўшт ва ш.к. дан тайёрланадиган яхна таом. *Салатни айтмайсизми, кўк қалампир аралашган салат дунёда ягона бўлса ажаб эмас.* С. Аҳмад, Йўғон тепа.

САЛАТ II Истеъмол қилинувчи, витаминларга бой бир йиллик кўкат; полиз экинни. *Салатнинг янги узилган барги редиска, бодринг ва ошқўқлар билан яхши ҳамоҳанг бўлади.* Газетадан.

САЛАФ [a. سلف — аждодлар, ўзидан олдин ўтганлар] Кимсadan илгарироқ ўтган фикрдош, ҳаммаслак, ҳамкасб шахслар. *Шуни ҳам таъкидлаш лозимки, Фурқат деярли*

ҳамиша ўз салафларидан маълум маънода пастда бўлмайди, аксинча, улар билан бир қаторда туради. «ЎТА». *Пўлат ака салафлари қаторида, айрим актёрларга ўхшаб, ўз истеъдоди ва маҳоратини арзон-гаровга пулламайди.* Газетадан.

САЛБИЙ [a. سلبىي — инкор этадиган, қарши, маъқулламоччи] **1** Ёмон; яхши эмас; зид. **ижобий.** *Салбий хатти-ҳаракат.* **■** *Салбий образ ҳам худди ҳаётнинг бир парчасидек яхлит проблематик бўлиши мумкин.* «ЎТА». *Шуни билинги, бошлаган ишингизнинг ижобий томони билан бирга, салбий, жуда катта салбий томони ҳам бор.* С. Анорбоев, Оқсой.

2 Рад этувчи, қайтарувчи. *Салбий жавоб.* *Салбий муносабат.*

САЛБИЯ [a. صلبية — крестгулдош] бот. Шифобахш ўсимлик; барги парфюмерияда ишлатилади.

САЛДОВ Моторсиз ва эшкаксиз кемаларни тортиб юргизадиган арқон ва шундай арқон билан кема тортиш жараёни. *Урганчдан Чоржўйгача салдовда ўн икки кунлик йўлни елканда икки кунда босиб ўтишади.* Р. Бекниёз, Лаққа балиқ барваста. *Балиқ тутсақ, Алонбийнинг чулонига элтиб топширамиз-да, яна қўлда салдов тортиб кетаверамиз.* А. Мухтор, Қорақалпоқ қиссаси.

САЛДОВЧИ Салдов тортувчи, салдов тортиб кема юргизувчи.

САЛДОМ шв. Вазн, салмоқ, оғирлик. *Салдомим синдирар филнинг белини.* «Нигор ва Замон».

САЛДОМЛАМОҚ шв. Салмоқламоқ, салмоқлаб кўрмоқ. *Кўрсатар салдомлаб таёқ муштини.* «Нигор ва Замон».

САЛИБ I [a. صليب — бут, хоч] кт. Бут, хоч, крест. *Салиб шаклидаги нақш Ўрта Осиёда жуда қадим замонлардан мавжуд.* «Фан ва турмуш».

Салиб юришлари тар. 1096—1270 йилларда Фарбий Европа зодагонлари ва католик, черкови томонидан «муқаддас ерларни мусулмонлар асоратидан қутқариш» шиори остида Сурия, Фаластин, Шимолий Африкага қилинган босқинчилик урушлари. *I-Салиб юришлари (1096—99) 1095 йил Клермонда папа Урбан II томонидан эълон қилинган.* «ЎЗМЭ».

САЛИБ II [a. صليب – саллагул, пион] бот. Ўтсимон, бир паллали кўп йиллик ўсимлик; экма гул (меваси табобатда дори учун ишлатилади).

САЛИБЧИ тар. Салиб юришининг ташкилотчиси ёки қатнашчиси. Салибчилар, одатда, кийимлариغا салиб (хоч) белгисини тикиб олишган. «ЎЗМЭ».

САЛИМ [a. سليم – соғлом, бутун, шикастланмаган; ҳақиқий, тўғри] **I** кт. Соғлом одам; соғ-саломат, тўрт мучаси бут киши.

Ақли (ёки фикри) салим 1) тўлиқ, тиниқ ақл; 2) ақли расо, мияси бутун одам. *Фикри салим Олимжон ўзида бўлган жиддиятларни Аҳмаддонда ҳам кўрмоқда эди. Ҳамза, Танланган асарлар. Мамлакатимизнинг истиқбولى учун ақли салим, зийрак ва қувватли ўспиринлар керак.* Газетадан.

2 Салим (эркаклар исми).

САЛКАМ [сал + кам] Асосан миқдорни билдирувчи сўзлар билан қўлланиб, «бир оз кам» маъносини билдиради. *Чолу кампир шошимай салкам Бир асрни яшаб қўйишди.* Ш. Раҳмон, Юрак қирралари. *Одам бир кунда тахминан салкам уч литр сув ичади.* Газетадан.

САЛЛА I [a. سَلَة – саваг, тўрхалта; тугун] Узунлиги 1,5 метрдан 7 метргача бўладиган, дўппи, кулоҳ, телпак устидан ўраладиган сидирға мато, доқа; мусулмон эркакларнинг бош кийими. *Салла ўрамоқ. Калла бошқа, салла бошқа.* Мақол. ■ *Энидаги йўл-йўл беқасам тўн, бошидаги оппоқ мисқоли салла унинг йигитлик кўркини яна ҳам очар эди..* К. Яшин, Ҳамза. *Қоровул чол ҳам бошидан салласини олмоқчи эди, чувалиб, оёғи остига тушди.* Н. Аминов, Қаҳқаҳа.

Бақа салла ёки қурбақа салласи Истеъмом қилиб бўлмайдиган заҳарли замбуруғ ўсимлигининг бир тури. *Қаршидаги бўғоти тушиб, ўртаси емирилган, деворидан бақа салла ўсиб чиққан хароба бинолар..* А. Қодирий, Ўтган кунлар. **Ичагингни (ёки ичак-чавофингни) бошинга салла қилиб қўяман** Дўқ-пўписа ибораси. *Эсинг борида этагингни ёп, бўлмаса, ичак-чавофингни бошинга салла қилиб қўяман.* «Ёшлик». **Пайтава салла кест.** Ҳафтафаҳм, бефаросат. [Холисхон:] *Пайтава саллалардан ўлиб бўлдим. Ухлаб ётибди, денг.* Ҳамза, Паранжи сирлари.

САЛЛА II шв. Маърака-маросимларда тухумга қорилган хамирдан салла шаклида

ўраб, ёгда пишириладиган миллий пиширик; ўрама.

САЛЛАГУЛ [салла + гул] бот. Манзарали, кўп йиллик ўтсимон ёки бутасимон ўсимлик ва унинг йирик гули. *..ўтсимон саллагул турлари илдизларига пайвандлаш, парҳи қилиш орқали, қаламчаси ва уруғидан кўпайтирилади.* «ЎЗМЭ».

САЛЛАЛИ Бошига салла ўраган; салласи бор. *Хон сайлагучилар орасида ёш йигитлар бор бўлганидек, катта саллали мулланамолар, етмиш ёшли кексалар ҳам кўринади.* А. Қодирий, Ўтган кунлар.

САЛЛАЛИК Саллабоп мато. *Саллалик доқа.*

САЛЛАМНО [a. سَلْمَانَا – табриклаймиз, қутлаймиз] кт. Балли, офарин, тасанно, ташаккур. *Қипти отанг сени мулло, Отананга салламо.* «Гулнорпарчи». *У ҳозир ижро этган рақсни.. кўрганларида эди.. Салламо ўқишарди.* К. Яшин, Ҳамза.

САЛЛАЧА I Салла I с. кичр.

2 Бошга танғиб ўраладиган чоғроқ рўмол. *Саллача ўрамоқ.* ■ *Сув бўйида ўлтириб, сувни мунча лойлайсан, Саллачангни дол қўйиб, юрагимни доғлайсан.* «Оқ олма, қизил олма».

САЛЛА-ЧОПОН Намозга ва умуман кишиликка кийиладиган устки кийим. *Дадаси йўлакдан кўриниши билан Раъно Масъудни кўтариб турди ва қозикдаги салла-чопонни олиб, айвон муюшига келди.* А. Қодирий, Меҳробдан чаён. *Содиқжон бойвачча ўрнидан турди-да, Шаҳзодага салла-чопонини ишора қилди.* К. Яшин, Ҳамза.

САЛЛАҚОВОҚ бот. Қовоқнинг бир тури.

САЛЛОНА-САЛЛОНА шв. Ўзини у ёқбу ёққа солиб; тебраниб-тебраниб. *Зоғча кўзли тулпорлари, Чопинг саллона-саллона..* «Юсуф ва Аҳмад». *Аёл хохолаб кулганча, ўрнидан турди, саллона-саллона юриб, столнинг ёнига борди-да, ниёлача чой қўйиб ичди.* Н. Аминов, Қаҳқаҳа.

САЛЛОТ [р. солдат] **I** с. т. Солдат, аскар. *Князь сув пулини уч баравар ошириб юборибди. Капсанчилар гулу кўтаришган экан, князь «шаҳардан саллот чақираман», деб босибди.* А. Қаҳҳор, Кўшчинор чироқлари.

2 карт. Мотқадан кичик, ўнликдан катта қарта. *Фиштиннинг саллоти. Саллотни юрмоқ.*

САЛЛОХ [а. سَلَخ — тери шилувчи; қас-соб] **1** Кушхонада мол сўювчи, қассоб. — *Тик-ка олдига бориб, девкор саллохлардай шохидан ушлаб, «бисмиллоҳу оллоҳу акбар», деб [ҳўкизнинг] бўғзига пичоқ тортиб юбордим, — деди Шум бола.* Ф. Фулом, Шум бола.

2 кўчма нафр. Каллакесар, хунрез. Уруш саллохларин жиловлагали *Тарих ҳукмин кечиктирмайди.* С. Акбарий.

САЛЛОХЛИК 1 Қассоблик; мол сўйиш касби. *Йўлдош ака Тошкентдаги кушхонада саллохлик қилганида, мен унга шогирд эдим.* М. Жўра, Қуёшдан нур эмганлар.

2 кўчма нафр. Каллакесарлик, хунрезлик.

САЛЛОХХОНА [саллох + хона] айн. кушхона. — *Қайси саллоххонанинг ахлати бу? — деди Комилжон папирос тутунини бурнидан чиқариб.* И. Раҳим, Ихлос.

САЛМА шв. Тор, кичик ариқ. *Сигир қозқиқи суғуриб, салмадан ҳатлаб ўтибдида, Матчон тўранинг пахтазорига кириб, гўзани ямлапти.* Ж. Шарипов, Хоразм.

САЛМОҚ 1 Оғирлик, вазн, вазминлик, залвор. *Сони бор, салмоғи йўқ. Мақол. ■ Агапов шошлмайдди.. Юкнинг салмоғига қараб, сўнгга гапиради.* И. Раҳим, Ихлос. *Қаршимда Ер шарин сурати турар, Салмоғи Қуванинг анорича бор.* А. Орипов.

Салмоқ билан **1)** оғирлиги, залвори билан. *Чўпон ота ҳайрон бўлиб, қўлини орқасига қилганча, тик қотиб турган эди, кейин салмоқ билан юра бошлади.* Ойдин, Ҳикоялар; **2)** аста, шошмасдан, салмоқланиб, дона-дона қилиб (гапирмоқ). *Кейин Ҳазрат ёнида ўтирган оқсоқ дарвишга маънодор қараб қўйди-да, аста томоқ қириб, салмоқ билан гапира бошлади.* К. Яшин, Ҳамза.

2 кўчма Жамиятда, кўпчилик ўртасида эришилган ҳурмат-эътибор; мавқе, нуфуз. *Салмоққа яраша иш қилиш керак, Токи дўст-ошинолар десинлар балли.* Ф. Фулом.

3 Нисбий вазн, ҳажм, қиймат, аҳамият, эгалланган ўрин; мазмун. *Оғир саноат маҳсулотининг салмоғи тез ўсиб бормоқда. ■ Адабиётимиздаги ҳужжатга — ҳаётда бор фактларга асосланиб ёзилган воқеий асарлар катта салмоққа эга.* Н. Сафаров, Жасоратнинг давоми. *Бадий таржимага эътибор кучаймоқда, таржима адабиётининг салмоғи ҳам йил сайин ошиб бормоқда.* Ф. Саломов, Таржима назариясига кириш.

САЛМОҚДОР 1 Нисбатан оғир; вазмин, салмоқли, залворли. *Салмоқдор болға. ■ Тоғ каби салмоқдор уй, Ичи тўла лиқ китоб.* Қ. Муҳаммадий.

2 Вазндор, бўлиқ, тўлиқ, бўлали. *Салмоқдор кўсаклар. ■ Салмоқдор бошоқлар шамолда майин тебранади.* Газетадан.

3 кўчма Арзирли; катта; самарали. *Салмоқдор ҳисса қўшмоқ. ■ [Азимжоннинг] Туғилган юртидаги катта Қорақўл доирасида салмоқдоргина ота мерос улуши бор экан.* А. Мухтор, Чинор.

4 Мавқеи, тутган ўрни ва хизматига кўра бошқалардан ажралиб турадиган, бошқаларга қараганда сермаҳсул. *Салмоқдор олим. ■ Бир-биридан афзал ва салмоқдор бўлган йилларимиз ичида бу йил алоҳида ўрин олди.* Ҳ. Назир, Янги саҳифа.

5 кўчма Оғир, вазмин; таъсирчан; донадона. — *Боғчанг-ку яхши-я, — деди салмоқдор овоз билан ҳалиги чол, — лекин ҳар ҳолда ота билан онанинг меҳри бошқа.* И. Раҳим, Чин муҳаббат.

САЛМОҚИ 1 Салмоқлаб, дона-дона қилиб гапирадиган. *Салмоқи одам.*

2 Салмоқлаб, дона-дона қилиб сайрайдиган (бедана ҳақида).

САЛМОҚЛАМОҚ 1 Қўлда кўтариб кўриб, оғирлигини чамаламоқ. *Мирқарим Ойсанамнинг қўлида қолган элик тийинлик тангани ҳам олиб, кафтида салмоқлаб кўра бошлади.* М. Хайруллаев, Қўшнилари. — *Яхши қилич! — салмоқлаб, тигини яна қинига тикди Арслонқул.* Ойбек, Навоий.

2 кўчма Вазминлик билан, дона-дона қилиб гапирмоқ, сўзламоқ. — *Сен қутқариб қолмаганингда, ҳозир булар қаёқда эди, — деди бува салмоқлаб.* Т. Ашуров, Оқ от.

3 кўчма Фикран чамаламоқ; қиёсламоқ. *Иброҳимов.. ўртага ташланган фикрларни ва буларнинг тўғри ё нотўғри эканлигини исбот қилиш учун кўрсатилган далилларни ўлчаб, салмоқлаб кўрди, сарагини саракка, пучагини пучакка ажратиб ёзиб олди.* А. Қаҳҳор, Қўшчинор чироқлари.

4 Шошмасдан, битта-битта қадам ташламоқ, секин юрмоқ. *Холмат беғам, одатдагидек салмоқлаб қадам ташлаб, айвонга ўтиб кетаверди.* И. Раҳим, Чин муҳаббат.

САЛМОҚЛАНМОҚ 1 Салмоқламоқ фл. мажҳ. н.

2 Вазминлик билан, дона-дона қилиб гапирмоқ. *Йўлчи кириши билан [Мирзакаримбой] вазиятни бузмасдан салмоқланиб деди: -Кел, қўзим, нима ишинг бор? Ойбек, Танланган асарлар.*

3 Шошмасдан, битта-битта қадам ташламоқ, секин, вазмин юрмоқ; ҳаракатланмоқ. [*Қозоқ бола*] *Йўлда битта-битта қадам ташлаб бораркан, кўчани кесиб, шу томонга салмоқланиб келаётган қоплонга кўзи тушди.* Р. Файзий, Ҳазрати инсон. *Танклар бир текисда, жуда ҳам шошмай, салмоқланиб борарди.* Шухрат, Шинелли йиллар.

САЛМОҚЛИ айн. салмоқдор. *Салмоқли болга. Салмоқли кўсақлар. Салмоқли мушт.* ■ *Салмоқли дон бошоқлари бу йил ҳам ҳосилнинг яхши бўлишидан дарак беради.* Газетадан. *Бошқа халқлар қаторида ўзбеклар ҳам фанга, маданиятга қўшган салмоқли ҳиссалари билан дунёга машҳур бўлиб қолмоқда.* Н. Сафаров, Оловли излар. *Ойбек уруш мавзуда кўплаб салмоқли асарлар ёзилганлигини кўп таъкидлар эди.* Газетадан. *Усмон ота катта йўлда у ёқ-бу ёққа қараб, салмоқли қадам ташлаб борар эди.* А. Қаҳҳор, Кўшчинор чироқлари. *Бирпасдан кейин шу тинчликда унинг юрагидан тўлқинланиб чиққан майин, лекин салмоқли овози янради.* А. Мухтор, Опа-сингиллар.

САЛМОҚСИЗ 1 Салмоғи, оғирлиги, вазни, ҳажми кам; енгил-елпи. *Салмоқсиз тош.* ■ *Тирик вазни салмоқсиз бўлган чорва молларининг давлатга топширилиши ва сўйиб юборилиши натижасида жуда кўп мол йўқотилмоқда.* Газетадан.

2 кўчма Мавқеи, тутган ўрни, маъномазмуни, хизмати жиҳатидан унча аҳамиятга эга бўлмаган. *Салмоқсиз одам. Салмоқсиз асар.*

3 Таъсири йўқ; таъсирсиз. *Салмоқсиз гап.*

САЛОБАТ [а. *صلاية* – мустаҳкамлик, қаттиқлик; қатъийлик; ўжарлик] Улуғвор ташқи кўриниш; савлат, маҳобат. *Унда [Ҳамид Олимжонда] сеҳрли бир жозиба ва салобат бор эди.* Шукрулло, Жавоҳирлар сандиғи. *Шоди Мударрисович декан ўринбосари бўлгандан бери гап-сўзлари ва юриштуришида алақандай бир ўзгарши, сиполикка ўхшаш салобат пайдо бўлган эди.* Д. Нурий, Осмон устун. *Пойтахт салобати кундан-кунга ошиб, Мирзо мадрасаси ҳукуматнинг*

эмас, Ҳирот аҳлининг ҳам диққатини торта бошлади. Мирмуҳсин, Меймор.

САЛОБАТИ БОСМОҚ Кимса савлати, улуғворлиги олдида тортинмоқ, ўзини йўқотаёзмоқ, доводиранмоқ. *Пошиша хола, уй эгасининг салобати босиб, унга тик қаролмади.* Д. Нурий, Осмон устун.

САЛОБАТЛИ 1 Улуғвор кўринишга эга бўлган, виқорли; савлатли, маҳобатли. *Салобатли киши. Салобатли бино.* ■ *Ҳақиқатан ҳам Ғойибнинг салобатли қиёфаси олдида Темиржон ёш боладай кўринарди.* Ж. Абдуллахонов, Орият. *Улар Аҳмадга қадрдон бўлиб кетган салобатли ва баҳайбат аргувон дарахтига яқинлашдилар.* Ф. Мусажонов, Ҳиммат.

2 Оғир, вазмин; ўз вазминлиги ва сокинлиги билан таъсир этувчи; таъсирчан. *Салобатли тун.* ■ *Шундан кейин уйда салобатли тинчлик чўкди.* А. Мухтор, Опа-сингиллар. *Бош муҳаррир ўзининг майин, вазмин, ширали, салобатли овози билан сўз бошлади.* Ф. Мусажонов, Ҳиммат. *Ташқарида баҳор ёмғири салобатли шовуларди.* П. Қодиров, Уч илдиш.

САЛОМ [а. *سلام* – тинчлик, хавфсизлик; кўришиш, саломлашиш] 1 Кишилarning ўзаро учрашган пайтларида урф-одатга кўра бир-бирига айтадиган сўзи. *Алангали салом. Қизгин салом. Салом ҳам фарз, алик ҳам фарз. Бир кун туз ичган жойга қирқ кун салом бер.* Мақол. ■ *-Салом, профессор! Хуш келибсиз, – деди Ҳамза ва Степановга қараб қулочини очди.* К. Яшин, Ҳамза. *Ғулумжон эгилиб салом берди, соғ-саломатлик сўради.* М. Исмоилий, Фарғона т. о.

Дуойи салом қ. дуо. Салом айтмоқ айн. салом йўлламоқ. *Ҳаводан айланиб учган турналар, Бориб бизнинг элга салом айтингллар, Эй азиз турналар, менинг тилимдан Дўсту ёронларга салом айтингллар.* «Тоҳир ва Зухра». **Салом алайкум айн. салом 1. Салом йўлламоқ** Бирор шахс ёки нома орқали салом айтиб юбормоқ. *-Ҳаммалари соғомон, – деди Низомиддинхўжа. – Сизга матбаа, газеталардаги муҳаррир, мусахҳиҳ дўстларингиз салом йўллашди.* К. Яшин, Ҳамза. **Салом йўқ, алик йўқ** Тўсатдан, ҳеч қутилмаганда, дабдурустан. *У киргач, салом йўқ, алик йўқ, томдан тараша тушгандай: -Нималар деб валдираяпсан, – деб ўшқирди.* «Муштум». **Саломини еб қўймоқ**

Кўпинча, салом бермаган болаларга айтиладиган ҳазил ибора. *Эрта туриб кеч келди, Саломини еб келди.* «Бойчечак». **Соясига салом бермоқ қ. соя.**

2 тар. Амир, хон билан эрталабки учрашув ва ундаги салом-алик маросими. *Эрталаб хоннинг ҳарамдан чиқиш вақти яқинлашган, салом ва истиқбол учун хослардан саккиз-тўққиз киши йиғилган эдилар.* А. Қодирий, Меҳробдан чаён.

Салом оғаси тар. Амир, хон саройида расмий маросимларга бошчилик қилиб, уни назорат қилиб турган лавозимли шахс. *Сўпачалар ўстида ўдайчи. шиговул. салом оғаси, тунқотар ва дарбон каби ташрифот ходимлари ўтирардилар.* С. Айний, Жаллодлар.

3 этн. Келинчакни тўйдан кейинги кун эрта билан олиб чиқиб, куёвнинг ота-оналарига, қариндош-уруғларига таъзим қилдириш маросими ва умуман келинчаклар таъзими; келинсалом. *Эрталаб, одат бўйича, Нури тўр рўмол ёпиниб, бешикдаги боладан то кексаларга қадар — ҳаммага салом қилар экан.* Ойбек, Танланган асарлар. [Роҳила:] *Жон қизим, эрингни иззат қил! Қайнанангни иззат қил! Эрталаб саломга чиқаётибсанми? А. Қаҳҳор, Оғриқ тишлар.*

4 Саҳнада, ўйин-томоша майдонларида актёрларнинг томошабинларга таъзими. *Зулфизар рақсини тугатиб, маҳлиё бўлиб ўтирган томошабинга салом қилиши билан, бирдан ҳамма ёқни гулдуратиб қарсақлар кўтарилди.* К. Яшин, Ҳамза.

5 Салом (эркаклар исми).

САЛОМАЛАЙКУМ [а. سلام عليكم — сизнинг устингизда тинчлик ва соғлиқ бўлсин] (*тўғриси салом алайкум*) **1 қ. салом 1.**

2 бот. Экинлар орасида тез кўпаядиган, илдизпояли кўп йиллик бегона ўт. *Салом-алайкум Ўзбекистоннинг барча сўғориладиган ҳудудларида.. бегона ўт сифатида кўп учрайди.* «ЎЗМЭ».

САЛОМ-АЛИК [а. سلام عليك — «салом-алайкум» с. нинг қисқарган шакли] Бир-бирига салом бериб кўришиш, саломлашиш. *Салом-алик қилмоқ.* Уларнинг бир-бирлари билан салом-аликлари бор, курортда танишиб қолишган. ■ *Одатдаги салом-аликдан сўнг орага ноқулай жимлик чўкди.* С. Сиёев, Эркаклар эртаги. *У отдан тушиб, Меъмор билан салом-аликдан сўнг, бу кеча қандай*

ухлаганини сўради. Мирмуҳсин, Меъмор. *Салом-аликдан сўнг гаплари айланиб келиб Ҳамзанинг мактабида тўхтади.* К. Яшин, Ҳамза.

САЛОМ-АЛИКЛАШМОҚ Ўзаро салом бериб кўришмоқ, саломлашмоқ.

САЛОМАТ [а. سلامت — хавфсизлик, омонлик, хотиржамлик; соғломлик] **1** Тан-жони соғ, соғ-саломат; соғлиги яхши; эсон-омон. *Саломат юрибсизларми? Саломат этиб бормоқ.* ■ *Нимага хафасан? Мана, мен соғ-саломат қайтдим.* Ойбек, Танланган асарлар. *Амирзодам, шукур, онангиз, эгачингиз саломат эканлар, кўп куюнманг, бошингиз омон бўлса, давлат топагур.* П. Қўлиқўров, Юлдузли тунлар.

Саломат бўлинг Миннатдорчилик изҳор этиш, хайрлашишда ёки бирор киши акса урганда айтиладиган ибора. *-Хайр, саломат бўлинг, — қиз югуриб, уйига кириб кетди.* «Ёшлик».

3 Саломат (хотин-қизлар исми).

САЛОМАТЛИК Тан-жони соғ, саломат бўлишлик; тани соғлик. *Саломатлик тиламоқ.* *Саломатлигини сўрамоқ.* *Саломатлик — туман бойлик.* Мақол. ■ *Саломатлигингиз яхшими, уста? С. Сиёев, Аваз. -Ҳаммасидан ҳам саломатлик керак, — деди Муҳиддин. Р. Файзий, Чўлга баҳор келди.*

САЛОМЛАМОҚ Салом бермоқ, қутламоқ. *Бу ердаги ҳар бир шох-шабба, ҳар бир япроқ Моҳидилга қадрдон. Улар қизни саломлагандай, аста чайқалиб туришибди.* Ж. Абдуллахонов, Тўфон. *Чиқаётган куёшни саломлаб, яшил дарахтларда қушлар сайрай бошлади.* Ойбек, Танланган асарлар.

САЛОМЛАШМОҚ Ўзаро бир-бирига салом бермоқ, салом бериб, бир-бири билан кўришмоқ. *Шу куни тушда Иқбол хола ош олиб келганда, Алимардон у билан совуққина саломлашди.* Ў. Ҳошимов, Қалбингга кулоқ сол. *Нишонов шошганидан саломлашишни ҳам унутаязди.* С. Зуннунова, Янги директор.

САЛОМНОМА [салом + нома] Сихат-саломатлик тилаб йўлланган салом хати. *Ўринбой ака хатни очиб ўқий бошлади. Ойсаодат опа фарзанди йўллаган саломномани бутун вужудини кулоқ қилиб эшитарди.* Ш. Курбонов, Хушхабарчи.

САЛОМХОНА [салом + хона] тар. Амирнинг, хоннинг саломга йиғилганларни ёки

иш билан келганларни қабул қиладиган хонаси. *Саройбон.. рўпарадаги эшикдан ағлоҳазратларининг саломхонасига кириб кетди.* О. Ёқубов, Улугбек хазинаси.

САЛОН [фр. salon — меҳмонлар кутиб олинадиган ҳашамдор хона] 1 Кўргазма, музей залларида турли соҳа ва бўлимларга ажратилган махсус хона ёки бўлмалар. *Мураккаб рўзгор техникаси салоида шу ерда мавжуд эҳтиёт қисмлардан фойдаланиб, дазмон, фен, электр устарани ремонт қилса бўлади.* Газетадан.

2 Кийим-кечак, пойабзал, санъат буюмлари ва ш. к. намойиш этиладиган ва сотиладиган махсус магазин ёки унинг бўлими. *Универмагининг аёллар кўйлаги билан савдо қилувчи салои.*

3 Бирон-бир махсус фаолият учун мўлжалланган хона, зал.

Аёллар (ёки гўзаллик) салои Хотин-қизларга сартарошлик, маникюр каби пардоз-андоз хизматларини кўрсатувчи жой.

4 Умуман, транспортда (кема, самолёт, автобус, троллейбус ва ш. к. да) йўловчиларга ажратилган бўлма, хона. *Ҳаво кемаси оҳиста учиб боряпти, самолёт салои оддий иш кунидек йўловчилар билан гавжум.* Газетадан.

САЛОРЛАР Хитойнинг баъзи вилоятларида яшовчи мусулмон туркий халқ (ўзларини салир деб атайдилар). *Хитой йилномаларида салорлар 14-асрдан тилга олинган.* «ЎЗМЭ».

САЛОТ [а. صلات — намоз, ибодат; илтижо, ўтиниб сўраш; шукрона; дуо, фотиҳа] *дин.* 1 Ислום динидаги 5 та рукннинг энг асосийси: бир кунда, муайян вақтларда белгиланган тартиб ва шартлар асосида қилинадиган ибодат. *Салоти жаноза.*

2 Худо ва пайгамбарга аталган мадҳия, ҳамду сано.

САЛОҲ [а. صلاح — яхшилик, эзгулик; тўғрилиқ] 1 Тўғрилиқ, виждонлилик.

Аҳли салоҳ Пок, тўғрисўз одамлар; тўғри иш қилувчи, ҳалол кишилар. *Бу кун кечасиза мулла Султонқулнинг кўрғонидан бир неча аҳли салоҳ йиғилишиб.. кичкина маслаҳат қилишиб олишмоқчи эканлар.* А. Қодирӣ, Обид кетмон.

2 Салоҳ (эркаклар исми).

САЛОҲИЯТ [а. صلاحیت — яроқлилик; ваколат, ҳукмдорлик; тўлиқ ҳокимият] Қо-

билият, иқтидор. *Худованди карим бу зоти муборакка шундай салоҳият ато қилганким, тиббиёт бобида унинг билмаган илми йўқдир.* О. Ёқубов, Кўҳна дунё. *Албатта, Алишер Навоийдаги бу тенгсиз салоҳият қитъа ёзган барча шоирларга хос хусусиятдир, демоқчи эмасмиз.* «ЎТА».

САЛОҲИЯТЛИ Салоҳиятга, катта қобилиятга эга бўлган; иқтидорли. *Салоҳиятли, иқтидорли кадрларни асрашимиз керак.* ■ *Салоҳиятли кадрларнинг маҳоратини ошириб бориш тўғрисида ҳозирдан бошлаб алоҳида ғамхўрлик кўрсатиш лозим.* Газетадан.

САЛ-ПАЛ *рвш.* Иш-ҳаракат бажарилиш даражасининг меъёрдан камлигини ифодалайди; бир оз, озгина, андак. *Сал-пал юзларига шабада урди.* Ойбек, Нур қидириб. *Хоразмишоҳ чўққи соқолини қашлаб, сал-пал илжайган бўлди.* Мирмуҳсин, Темур Малик.

САЛТ 1 Аравага қўшилмаган; яйдоқ. *Салт от.* *Салт от минган киши.* ■ *Измаиз келаётиб, Йўлбарс вовуллади. Ота орқасига қайрилиб қараса, салт отлиққа кўзи тушди.* С. Анорбоев, Оқсой.

2 Юксиз, беюк, енгил-елпи. *Қайтишда чарчаган ориқ отларда, устиларидаги одамларни кўтариш нари турсин, салт ҳолда қадам босиш учун ҳам куч топилмасди.* С. Айний, Қуллар. *Қаранг, салт совлиқлар илдам кетиб, ширали ўтларни еб тинчитишяпти.* «Ёшлик».

3 *тех.* Нагрузкасиз, топшириқсиз, бекоорга, беҳудага қилинган (ҳаракат). *Двигателнинг салт юриши.* ■ *Бехосдан лента узилиб қолса, ғалтак салт айланади.* М. Жўра, Куёшдан нур эмганлар.

САЛТАНАТ [а. سلطنة — султонлик, ҳокимият, ҳукмдорлик] 1 Хон, амир, подшо ҳукмдорлиги ва шундай ҳукмдор қўл остидаги давлат; империя. *Аҳмад мирзо амакиси салтанатининг буюклигидан, унинг катта қўшинидан ҳайиқарди..* Мирмуҳсин, Меъмор. *Шоҳим, дўстлик ҳурмати, мамлакатимиз ва салтанатимизнинг осойишталигидан бўлак муддаом йўқдир.* Уйғун ва И. Султон, Алишер Навоий.

2 Салтанат (хотин-қизлар исми).

САЛТАНАТЛИ Тўлиқ ҳукмронликка эга бўлган, тўла ҳукмрон. *Салтанатли шоҳ.* ■ *Подшолик, салтанатли тахтлар, мунаққашли, кўшкли мазгил жойлар.* «Баҳром ва Гуландом».

САЛТ-СУВОЙ *с. т.* Ташвиш-тахлика-сиз, бола-чақасиз; орқа этагида оғирлиги йўқ; такасалтанг. *Салт-сувой йигит.* ■ *У пайтлар ҳали Султон салт-сувой, ҳали Зумраднн ҳам учратмаган эди.* Х. Султонов, Онамнинг юрти. -*Шахмат ўйнашни ким қўйибди сизга, кап-катта одам, — истехзоли кулди аёл, — шахматни салт-сувойлар ўйнасин.* «Саодат». *Ҳарбий хизматдан қайтгач, рўзғор юмушларига қовушмай қолган салт-сувой ўспирин эмас.* Э. Аъзам, Кечикаётган одам.

САЛФЕТКА [*итал. salvietta*] Овқат вақтида ёки ундан сўнг оғиз ва қўлни артадиган қоғоз ёки кичкина сочиқ. *Қоғоз салфетка.*

САЛЬДО [*итал. saldo* — ҳисоб-китоб, қолдиқ] **1** Бухгалтерия ҳисобиди муайян давр учун пул тушумлари ва қилинган харажатлар ўртасидаги айирма. *Сальдо ҳар ойнинг биринчи санасидаги ҳолат бўйича аниқланади.* «ЎЗМЭ».

2 Биржа алоқа-муносабатларида мижознинг брокерлик фирмасидан ёки аксинча, брокерлик фирмасининг мижоздан қарзи.

3 Ташқи савдо муносабатларида экспорт ва импорт қийматлари ўртасидаги фарқ, тафовут.

САЛЬТО [*итал. salto* — сакраш] Ерга тегмай туриб, ҳавода бир, икки ёки уч марта умбалоқ ошиб сакраш. *Сальто қилгандай ҳавода умбалоқ ошиб, қум устига йиқилиб тушибман.* П. Қодиров, Эрк.

САЛЮТ [*фр. salut* < *лот. salus, salutis* — қутлаш; соғлик] **1** Саломлашув, табрик.

2 тар. Пионерларнинг қўлини бошдан юқори кўтариб саломлашуви. *Кўкка қараб салот бери хандон пионер.* Ф. Фулом.

3 Турли тантана ёки байрам, маросимларда, тарихий саналарни нишонлашда бир неча милтиқдан, тўпдан бир йўла кўпгина ўқ узиш; мушак отиш. *Байрам салюти.* ■ *Кечқурун байрам салютининг ранг-баранг чўғлари бутун шаҳарни ёритди.* Газетадан. *Бу орада тўплар яна бир неча марта салют бери.* П. Қодиров, Уч илди.

САЛҚИ *с. т.* Солқи. *Дарахт шохларини қор босган салқи.. Гўё салқигандай Ер қовоғи ҳам.* Газетадан. *Исломбой унинг салқи қовоқлари шишиб, кўзлари қизарганини пайқади.* Х. Султонов, Бир оқшом эртаги. *Отнинг*

пуштанини салқи қилиб тортидим. Т. Мурод, От кишнаган оқшом.

САЛҚИМОҚ *с. т.* Солқимоқ. *У.. ёш бўлса ҳам, соқол босган, ичкиликдан салқиган юзини кўтариб қаради.* А. Мухтор, Давр менинг тақдиримда. *Кечаги фаввора ёнида Хосият хола билан учрашдик, унинг юзи салқиган, ғамгинроқ эди.* «Шарқ юлдузи».

САЛҚИН 1 Илиқдан пастроқ оромбахш ҳаво ҳарорати. *Бугун ҳаво салқин.* ■ *Тун салқинини ногоҳ ҳис этиб, У уйғониб кетди тонг олди.* Х. Даврон, Болаликнинг овози. *Қудуқ тубидан ураётган салқин хуш ёқиб, Отамурод бирпас ўтирган бўлди.* М. Мансуров, Ёмби.

Салқин тушмоқ Ҳаво ҳарорати пасаймоқ. *Бозоров извошга ўтириб, далага жўнади. Даштга кечки салқин тушиб қолган эди.* И. Раҳим, Чин муҳаббат.

2 Сердарахт, серсоя, қуёш нури тушмайдиган, теварак-атрофга нисбатан совуқроқ жой. *Салқин жой.* ■ *Кун қизий бошлагач, Аваз эшикка сардўз боғлаб, Полвонён бўйидаги ўша салқин оромхонага равона бўлди.* С. Сиёев, Ёруғлик. *Икки четига сарвлар ва шамшодлар экилган салқин хиёбонларда ҳеч кимса кўринмайди.* М. Маҳмудов, Мангу куй излаб.

САЛҚИНЛАМОҚ Жазирама, иссиқ кунларда соя-салқин жойга бориб дам олмоқ, ҳордиқ чиқармоқ. *Сояда салқинлаб ётади беклар.* «Муродхон». *Кеча шу пайтларда Андижонсой бўйида салқинлаб ётгани [Бобурнинг] эсига тушди.* П. Қодиров, Юлдузли тунлар.

САЛҚИНЛАТМОҚ 1 Салқинламоқ фл. орт. н.

2 Бирмунча салқин қилмоқ, совитмоқ. *Назокат дўконхона эшиги тағига сув сеип салқинлатди, шолча устига тўшалган кўрпачага ёнбошлади.* А. Мухтор, Опа-сингиллар.

САЛҚИНЛИК Муздек ҳаво, совуқлик. *Залнинг ўртасида мармардан ишланган ҳовузча, зилол сувлар секин оқади: табиий иссиқ ҳавога бир оз оромбахш салқинлик бери.* Ойбек, Нур қидириб.

САЛҚИНТОБ *салб.* Сояпарвар, танбал. *Салқинтоб одам.* ■ *-Пахтакорга танбаллик ярашмайди, ука, салқинтоб бўлишни ташлаб, бошқа ишларга ҳам қўл уриб тур, — деган эди Ҳасан ака.* А. Муҳиддин, Чап чўнтак.

САЛҚИТ *с. т. айн. сарқит. Ўзи тўймаганнинг салқити қорин оғритади.. А. Қаҳҳор, Кўшчинор чироқлари.*

САМАН [ф. *سمند* — сариққа мойил рангли от] **1** Оч малла, сарғиш, сомонранг (отнинг туси ҳақида). *Ўртадаги юк машинасида саман тойча. Икки қулоғининг ўртасида жиға, устида қизил бахмал ёпиқ. С. Нуров, Нарвон. Саман қашқа эса сой ичида қирғоққа тиралиб олган. Й. Шамшаров, Тошқин.*

2 Шу тусдаги от. *Жиловдор нарироқда ўтлаб юрган саманни олиб келиб, узангисини амира тўғрилади. М. Маҳмудов, Мангу куй излаб.*

САМАНДАР [ф. *سمندر* — саламандра] **1** миф. Афсонага кўра, гўё ўт ичида туғиладиган ва ўтда яшайдиган махлуқ. *Адо бўлар оқибат Ё олов, ё самандар. У. Қўчқор. Овози самандардек, донишда Искандардек, Қаҳр айласа аждардек, чун нури аён келди. «Оқ олма, қизил олма».*

2 қ. саламандра 1.

3 Самандар (эркаклар исми).

САМАНТҮРИҚ 1 Саманга, маллага мойил тўриқ (от туси).

2 Шу тусдаги от. *Самантўриқни эгарламоқ.*

САМАР [а. *ثمر* — озиқ-овқат, мева, ҳосил; фойда, натижа] кам қўлл. *к. т. айн. самара. Совуқ гапнинг нохуш самари икки қалба ёнар ловуллаб. А. Пўлкан, Изҳор.*

САМАРА [а. *ثمره* — мева, ҳосил] Натижа, ҳосила, фойда. *Фидойилик билан қилинган меҳнат ўз самарасини кўрсатди: мўл қилди етиштирилди. Газетадан. Кўёш энергиясидан фойдаланиш халқ хўжалигига жуда катта иқтисодий самара беради. Газетадан. Ҳар бир иш ниҳоясига етгандагина гўзал самара беради. Ҳ. Фулом, Машғал.*

САМАРАДОР [а. + ф. *ثمره دار* — самарали, фойдали] Катта самара, фойда келтирадиган, сермаҳсул; яхши натижа берадаган. *Кино, театр сингари санъат турлари орасида адабиёт ҳам ёшларни тарбиялашда энг фаол ва самарадор омиллардан биридир. «Фан ва турмуш».*

САМАРАДОРЛИК Самарали, фойдали бўлишлик; фойдалилик. *Иқтисодий самарадорлик. ■ Чорвачиликни индустрлаш меҳнат самарадорлигини анча ошириш имконини беради. Газетадан.*

САМАРАЛИ *айн. самарадор. Самарали иш. Самарали меҳнат. ■ Ёзнинг ҳар бир кунидан самарали фойдаланиб, парваришни ҳар томонлама кучайтирмоқ даркор. Газетадан. Баҳром, буғун самарали ишлаганидан руҳи кўтарилиб, енгил кайфият билан йўлга чиқди. Ҳ. Олимжонов, Тақдир тақозоси.*

САМАРАСИЗ Самара бермайдиган, фойдасиз, бесамар; натижасиз, беҳуда. *Самарасиз иш. Самарасиз ҳаракат. ■ Самарасиз ўтмас шоирнинг умри, Тоза юракларда сўз кони қолар. С. Акбарий, Меҳригий.*

САМАРИЙ [лот. *samarium* < илк бор шу элемент ажратиб олинган минерал (самарскит) номидан] Менделеев даврий системасининг III гуруҳига мансуб нодир кимёвий элемент; кумушсимон оқ металл.

САМБИТ *бот.* Тол дарахтининг бир тури ва унинг новдаси; самбиттол.

Самбит қомат Қадди-қомати тик, келишган. *Курбон Ориповнинг самбит қомати худди ари чаққандек силкинди.. А. Муҳиддин, Куёв қочди. Кошкийди мен ҳам шундай бир самбит қомат, гўзал қизга ваъда бериш бахтига муяссар бўлсам. Н. Аминов, Қаҳқаҳа.*

САМБИТГУЛ *бот.* Гуллари оқ, пушти, қизил рангларда очиладиган, барглари доимо яшил манзарали ўсимлик (бута ёки кичикроқ дарахт). *Дераза ёнидаги катта тувакда самбитгул кўм-кўк бўлиб яшнаб турарди. С. Зуннунова, Янги директор.*

САМБИТТОЛ *айн. самбит. Икки четда эса ҳар хил дарахтлар, самбиттоллар, каллакдор тутлар қад кўтарган. Ш. Тошматов, Эрк куши. Соё бўйида самбиттол, савлатинга қойилман. «Кўшиқлар». Ўрмондаги қушлару қирлар, олтин бошоқлар, Самбиттол, камалаклар «ўзингизга қолди..» И. Маҳмуд, Эътироф.*

САМБО [р. самозащита без оружия — «қуролсиз ўзини ҳимоя қилиш» бирикмасининг қисқартмаси] *спрт.* Курашнинг хилма-хил, самарали миллий усулларни қамраб олган бир тури. *Самбо билан шуғулланмоқ. ■ Спортнинг самбо тури бўйича Самарқандда ўтказилган республика биринчилигида 64 курашчи қатнашди. Газетадан.*

САМИМИЙ [а. *صميمي* — тоза, асл; ҳақиқий] **1** Сидқидиллик билан, чин қалбдан, юракдан қилинган, айтилган; юракдан, дилдан чиққан. *Лекин Машраб Мастуранинг гапларидан эмас, унинг овозидаги*

гурурдан, болаларга хос самимий кувончдан жилмайди. О. Ёқубов, Эр бошига иш тушса. *Элмурод кампирнинг самимий муомаласини кўриб*: -Саломат бўлинг, онажон, - деди. П. Турсун, Ўқитувчи.

2 Самимият билан иш тутувчи, софкўнгил; пок, тоза. *Самимий одам.* ■ *Шерали бу содда, самимий қизнинг болалардек хатти-ҳаракатини кўриб таажжубланди.* С. Кароматов, Олтин кум. *Унсиннинг юраги, акасининг юраги каби*, Гулнорга нисбатан тоза ҳам самимий. Ойбек, Танланган асарлар.

САМИМИЙЛАШМОҚ Тобора самимий бўлмоқ, самимийлиги орта бормоқ; самимийлик касб этмоқ. *Уларнинг муносабати яна ҳам самимийлашди.* ■ *Қистирма, чандишлар болалар репертуарида ҳозир ҳам анча актив бўлиб, давр тақозосига кўра, тобора тақомиллашмоқда, мазмунан самимийлашмоқда.* «ЎТА».

САМИМИЙЛИК Самимий муносабатда бўлишлик. *Обид Йўлдошев бу табрикнинг қанчалик самимийлигини билмоқчи бўлгандай, Муҳаммаджонга синовчан назар билан тикилиб, раҳмат айтди.* П. Қодиров, Уч илдиз. *Самимийлик қизларнинг келажак ҳаётларида энг зарур ва олижаноб фазилатлардан биридир.* «Саодат». *Бойлик бор жойда самимийлик ўрнини сохталик эгаллайди.* Ф. Мусажонов, Ҳиммат.

САМИМИЯТ [а. صمیمیت - тозалик, софлик; чинлик, тўғрилиқ] Чин кўнгилдан, беғараз, сидқидиллик билан қилинган хатти-ҳаракат; самимийлик. *Кўзларида мулоимлик, самимият чироғи парпираб ёниб турарди.* Х. Тўхтабоев, Ширин қовунлар мамлаката. *Қутидор меҳмонларни ихлос ва самимият билан кулар, зиёфат қуюқ-суяқлари билан тўла-тўқис давом этар эди.* А. Қодирий, Ўтган кунлар.

САМИМИЯТСИЗ Самимийликни билмайдиган, риёкор, мунофиқ; сохта, қалбаки. *Самимиятсиз одам.*

САМИМИЯТСИЗЛИК Самимий эмаслик, самимияти йўқлик; риёкорлик, сохталик. *Бу ердаги самимиятсизлик ва мунофиқлик, бир-бирини алдаш Элмурод учун оддий бир ҳақиқат бўлиб қолган эди.* П. Турсун, Ўқитувчи.

САМИТ [ингл. summit - тепа, юқори, чўққи; юксак даража (да), авж] сиёс. Икки

ёки бир неча давлат бошлиқларининг муҳим халқаро масалалар бўйича учрашуви; олий даражадаги кенгаш. *Петербургда бўлиб ўтиши кутилаётган саммитнинг асосий иш куни 16 июлдан бошланади.* Газетадан. *Саммит якунида ўндан ортиқ ҳужжатлар қабул қилинди.* Газетадан.

САМО [а. سماء - осмон, кўк] *поэт.* Осмон, фалак. *Тиниқ мовий само.* ■ *О, она сайёра, курраи қутлуғ, Самодан суратинг илк бора кўрдим.* А. Орипов, Юртим шамоли. *Ҳар вақтдагидан кўркамроқ, тиниқроқ кўринган тўлин ой самонинг бир нуқтасида қотган каби.* Ойбек, Танланган асарлар.

САМОВАР [р. сам - ўзи + варить - қайнатмоқ] **1** Чой қайнатишга мўлжалланган, сувхонали ва ўтхонали рўзгор асбоби. *Рух самовар. Самовар қайнатмоқ.* ■ *Самоварда қайнаган чойинг қани, ёр-ёр.* «Кўшиқлар». *Жувон каттакон самовардан тунука чойнакка чой даблаб келди.* А. Қаҳҳор, Кўшчинор чироқлари. *Самовар жиғиллай бошлади, Аваз ўтхонага яна иккита саксовул палён ташлаб, ичкари кирди.* С. Сиёев, Ёруғлик.

2 *айн. чойхона.* *Мингбоши ўнг томондаги озодароқ самоварга чиқиб, чилим буюрди.* Чўлпон, Кеча ва кундуз. *Юсуфжон ака, бу ҳисоб эмас, ҳовлига борамиз, самоварда эмас, бугун бизниқанда ётиб қоласиз.* К. Яшин, Ҳамза.

Самовар қўймоқ **1)** самоварга ўт солиб, чой қайнатмоқ. *Гулнор ўрндан қўзғалди, дармонсизликдан оёқлари титраб, настга тушди-да, самовар қўя бошлади.* Ойбек, Танланган асарлар; **2)** самоварчилик қилмоқ. *Умурзоқ ота: -У ерда ошнам бор, Фани, гузарда самовар қўяди.* Ҳ. Фулом, Машғал.

САМОВАРХОНА [самовар + хона] *эск. айн. чойхона.* Саҳннинг шимол томониغا бориб, унга тутаниб турган самовархона томига чиқиб ўтирдим. С. Айний, Эсдаликлар.

САМОВАРЧИ *айн. чойхоначи.* *Самоварчиларнинг қўли қўлига тегмайди.* С. Аҳмад, Уфқ. *-Саройдан извошимни олиб чиқ! - деб буюрди Бўронбек Фани самоварчига.* Ҳ. Фулом, Машғал.

САМОВАРЧИЛИК Самоварчи бўлиб ишлаш; самоварчи касби. *Бир-икки йил ямоқчилик, ундан кейин Абдусмад қорининг самоварида самоварчилик қилдим.* А. Қаҳҳор, Кўшчинор чироқлари. *Қурбон ота қўлидан*

самоварчиликдан бошқа иш ҳам келаётганига, Урмонжон айтганидай, янги қишлоқни бунёдга келтиришда қатнашаётганига бениҳоя хурсанд бўлди. А. Қаҳҳор, Қўшчинор чироқлари.

САМОВИЙ [а. سماوى — осмонга оид; осмон рангли; илоҳий] кт. 1 Осмонга, самога, коинотга оид; космик. *Самовий кема-лар. Самовий сирлар.* ■ Бу китобчада баъзи бир самовий ҳодисалар ва юлдузлар олами ҳақида маълумотлар берилган. Газетадан. -Самовий жисмларнинг аҳволи яқин орада ҳаво айниб, фалокат юз беришидан далолат бераётми, — деди у шерикларига. М. Осим, Ибн Сино қиссаси.

2 поэт. Мовий, ҳаворанг, кўм-кўк. *Самовий кўзларинг сачратиб учқун, Нега тикилади фақат ўшанда?* А. Орипов,

САМОВОТ [а. سماوات — «само» с. нинг кўпл.] поэт. Осмон, фалак; коинот. *Изми-мизда эмас бу дунё, Самовотга ўтмас сўзи-миз.* Э. Воҳидов, Келажакка мактуб. *Бирдан чирмаб шиддатли чақин, Самовотга солар чир-юлт из.* Р. Бекниёз, Тўтиё.

САМОГОН [р. сам — ўзи + гонять — (спиртни) ҳайдамоқ, тортмоқ] Ғалла, картошка ва б. нарсалардан қўлда тайёрланган хонаки (қўлбола) ароқ. *Яқинда бир гуруҳ милиция ходимлари яширин самогон тайёрловчиларни тутишди.* Газетадан. *Бир кунни Степан, бочка ва яшиқлар орасига самогон яшираётган йигитни учратиб, кўнглига қўл солиб кўрмоқчи бўлди.* А. Мухтор, Қорақалпоқ қиссаси. *Афтидан, улар қишлоқ самогонидан хийла отиб олишганга ўхшайди.* И. Раҳим, Чин муҳаббат.

САМОГОНЧИ Қўлда хонаки ароқ тайёрловчи шахс. *Гладстон Наимийга самогончи дўконларида тўлиб ётадиган лойқа винодан олиб чиқиб, рюмкасига қуйди.* А. Мухтор, Опа-сингиллар.

САМОДЕРЖАВИЕ [р. сам — ўзи якка + держать — тутиб турмоқ, эга бўлмоқ] тар. Монархнинг, подшонинг чекланмаган ҳокимияти ва шундай ҳокимият асосига қурилган давлат тузуми, мустабид (подшонинг ёлғиз ўзи қонунлар чиқарадиган) ҳокимият; монархия.

САМОКАТ [р. сам — ўзи + катать — филдиратмоқ, учирмоқ] Кичик велосипедсимон, тик дастали, иккита филдираги ёки ролиги бўлган, бир оёқда ер тепиб, бир

оёқни асос тахтачага қўйиб училадиган болалар ўйинчоғи. *Кўчада одам сийрак. Фақат нарироқда болалар самокатда учишар, филдиракларнинг вағиллаши қулоқни батанга келтирар эди.* Ў. Ҳошимов, Қалбингга қулоқ сол.

САМОЛЁТ [р. сам — ўзи + летать — учмоқ] Моторли, қанотли, ҳаводан оғир бўлган учиш аппарати. *Пассажир самолёти. Ҳарбий самолёт. Самолёт ҳавога кўтарилди.* ■ Осмондаги самолёт, Қанотингни пастлаб ўт, Мен ёримага хат ёзай, Марғилонга ташлаб ўт. «Қўшиқлар». Анча олисдан вағиллаб самолёт ўтди. С. Сиёев, Ёруғлик.

САМОЛЁТСОЗЛИК Самолётлар ва самолёт қисмларини ишлаб чиқариш; саноатнинг самолёт ишлаб чиқариш билан шуғулланувчи тармоғи. *Самолётсозлик заводи.* ■ 1964 йилда Самара авиация институтининг самолётсозлик бўлимига ўқишга кирган Зулфия ҳаётини самолётлар билан боғлади. Газетадан.

САМОСВАЛ [р. сам — ўзи + свалить — ағдармоқ, тўкмоқ] Юкларни ўзи ағдарадиган кузовли юк машинаси ёки вагон. *Сўнги самосвал оғир бир силкинди-да, ўрнидан қўзғалиб, физиллаганича кетди.* С. Аҳмад, Юлдуз. *Қум ташийётган самосвал машина, ариққа қийшайганча, бир томонга оғиб турибди.* Ў. Усмонов, Сирли соҳил.

САМОСВАЛЧИ с.т. Самосвал ҳайдовчи. *Самосвалчи йигит.* ■ Бобош бугун самосвалчи Ҳожиматнинг ишига анграйиб қолди. А. Мухтор, Бўронларда бордек ҳаловат.

САМУМ [а. سموم — иссиқ, қайноқ шамол] Қумли чўл-саҳроларда қум уюрмаси ҳосил қилиб кўтариладиган қуруқ иссиқ шамол. *Қорақумдан елиб турган самум қалъани улкан дошқозондек қиздиради.* С. Сиёев, Аваз. *Самум ялаб ўтар яланг тўшини, Бунда ёлғиз гиёҳ — шўраю янтоқ.* Э. Воҳидов.

САМУР [а. سمور — сувсар] зоол. 1 Сибирь сувсари.

2 Шу ҳайвоннинг териси, мўйнаси. *Самур пўстин.*

САМУРАЙ [яп. самурау — хизмат қилмоқ] 1 Ўрта асрларда: Японияда зодагонлар, майда дворянларнинг ҳарбий табақаси.

2 кўчма Япон ҳарбий доиралари, умуман, япон ҳарбийлари, аскарлари. *Япон самурайлари ҳамда оқ финлар билан бўлган урушдан кейин, қайтиб келганига энди уч ой*

бўлган эди. Й. Шамшаров, Тошқин. Дарё бўйидаги қамишзор орасида гоҳ эмаклаб, гоҳ бўйларини ростлаб чоғиб бораётган уч-тўртта самурай кўзга чалинди. О. Ёкубов, Излайман.

САН I с.т. Сен. - Сан ўғлимсан, - Йўлчиға меҳр билан тикилди чол. Ойбек, Танланган асарлар.

Сан-манга бормоқ Жанжаллашув, тортишув даражасига етмоқ. Яқинда чойхонада ўтирган улфатлардан биттаси бир-бири билан сан-манга бориб, ҳатто ёқа бўғишгача келиб қолибди. Шукрулло, Жавоҳирлар сандиғи.

САН II [яп. жаноб] Японияда кимсани ҳурматлаб, унинг исми ёки фамилиясидан кейин қўлланадиган муурожаат шакли.

САНА [а. سنه - йил] 1 Йил ҳисоби; йил. Санаи милодий. Санаи ҳижрий. Санаи шамсия. Санаи қамария. ■ ..428-санаи ҳижрия, рамазон ойининг биринчи куну. М. Осим, Ибн Сино қиссаси.

2 Бирор воқеа содир бўлган йил, ой, кун ва шу ҳақдаги маълумот (ёзув). *Тарихий сана*. Санасини аниқламоқ. ■ Бобур Самарқандни Шайбонийхондан тортиб олгандан бери унинг жасоратига тан бериб шеър ёзганлар, сатрлардан абжад ҳисоби билан ғалабасининг аниқ санасини чиқарган тарихнавислар кўп эди. П. Қодиров, Юлдузли тунлар. Одамзонинг тарихий воқеаларга уйғун қўлаб унутилмас саналари бор. «Саодат».

САНАД [а. سند - таянч, тиргак; тилхат, ҳужжат] эск. кт. айн. **ҳужжат**. Сарғайган қўлёмалар, жимжима хатлар, Мулла боболаримиз чизган санадлар. Варақладим бирма-бир ўтмишни эслаб, Асрлар қадамида бир маъно излаб. М. Шайхзода. ..хон қўлида у айтган сўзлардан бўлак далил йўқ. Ишбот керак, санад керак. Э. Самандар, Тангри қудуғи.

САНАЛМОҚ I **Санамоқ** фл. мажҳ. н. Кассадаги пул қайта саналди. ■ Кеча якшанба тагин пул саналди. Ҳисоб мўлжалга яқин борди, шекилли, бобо соқолини ямлаганча, маъноли кулиб қўйди. Ҳ. Фулом, Тошкентликлар.

2 Боғлама вазифасида келиб, «..деб ҳисобланади» маъносини беради. Қуён турли об-ҳаво шароитига тез мослашувчи, озиқларни яхши истеъмол қилувчи жониворлардан саналади. «Фан ва турмуш». *Отам Азиз-*

бекнинг мушовири ва яқин мусоҳиби саналса ҳам, лекин бу жузъий ишлардагинадир. А. Қодирий, Ўтган кунлар.

Қовурғаси саналиб қолибди қ. қовурға I. Йўлакнинг ўнг томонидаги бостирмада қовурғаси саналиб қолган тарғил сизир билан шалпангқулоқ бузоқ. «Ёшлик».

САНАМ [а. صنم - бут, санам; манот] 1 Тошдан, ёғочдан ёки металлдан инсон қиёфасида (кўпинча гўзал аёл образида) ясалган ва зийнатланган бут. Бу вақтда уларнинг ҳаммаси ҳайратдан қотиб қолган, уйнинг бурчагида турган санамга ўхшардилар. «Шарқ юлдузи». *Тўрдаги деворда оқпошонинг йирик портрети, унга уй эгаси санамга сажда қилгандай қарарди. А. Ҳакимов, Илон изидан. Бу даврда будда динига оид турли осори атиқалар, санамлар топилди.* Газетадан.

2 кўчма Гўзал, дилбар аёл, нозанин. Сиздай қизлар бўлди бунда улфатим, Ечиб юбор, санам қизлар, қўлимни. «Муродхон».

САНАМА Шахмат тартибида оралатиб гул тикиш усули, шундай усулда тикилган гул ва шундай гулли буюм. Айвонда салла ўраб овора бўлган маҳдум.. санама тикиб ўтирувчи Раънога: -Йўлакда хотин киши кўринади, хабар ол-чи, болам, - деди. А. Қодирий, Меҳробдан чаён. Элликлаб қозик лунги, юзлаб санама рўмоллар сандиқларни тўлдирган бўлса ҳам, бу нарса Лутфинисо ва унинг қизини ҳали қаноатлантирган эмасди. Ойбек, Танланган асарлар.

САНАМОҚ I Ҳисобламоқ, ҳисоблаб сонини, миқдорини аниқламоқ; ҳисобини олмоқ. Пул санамоқ. *Жуфт-жуфт қилиб санамоқ. Ердан топсанг ҳам, санаб ол. Мақол. ■ Деворнинг паҳсасини санаб кўрди, ўттиз паҳса.* «Нурали». У халтачасидаги кумуш тангаларидан санаб, Меъморга узатди. Мирмуҳсин, Меъмор.

2 Рақамлар номини айтмоқ. *Кимдандир юзгача санасанг, ухлаб қолсан деб эшитувдим. Х. Тўхтабоев, Ширин қовунлар мамлақати. «Бир, икки, уч!» деб санаши билан ўзини сувга шалоплаб ташлади.* «Ёшлик».

3 Бирма-бир айтиб ўтмоқ, зикр қилмоқ. *Бош мақола бу одамлар яратган ва яратётган, тажрибадан ўтган ва ўтаётган янгилликларни бирма-бир санаб.. уларга кенг йўл очиб бериш вазифасини кўяр эди. А. Қаҳҳор, Кўшчинор чироқлари.*

4 кўча Ҳисобламоқ, ..деб билмоқ. Ёдгор Дилшоднинг унга яна зарда аралаш қараб қўйганини илғаб олди. Тагин ўзини айбдор санаб, юраги сиқилди. Ў. Ҳошимов, Қалбингга кулоқ сол. «Гап бу ёқда экан, — ўйлади у ўкинч билан. — Демак, улар мени одам санашмаган». Ў. Ҳошимов, Қалбингга кулоқ сол.

Бармоқ билан санарли Оз, озгина, жуда оз. **Тоқи** (ёки юлдуз) санаб ётмоқ қ. **тоқи**. **Чучварани хом санамоқ қ. чучвара**. **Қадами-ни санамоқ** Доимий равишда кузатиб юрмоқ. Унинг сизнинг қадамингизни санашдан бошқа иши қолмаган. Ойдин, Ҳикоялар.

САНАТОРИЙ [лот. sanatorium — даволаниш жойи < sano — даволайман] қ. **сиҳатгоҳ**. Болалар санаторийси. Санаторийда даволанмоқ. ■ Уч аёл санаторийнинг ши-нам бир хонасида даволанишади. Газетадан.

САНАЦИЯ [лот. sanatio — даволаш, соғломлаштириш] 1 иқт. Корхоналар, фирмалар, компаниялар ва б. ни банкротликдан кутқариш, уларнинг молиявий аҳволини яхшилашга, тиклашга қаратилган давлат ва банк чора-тадбирлари тизими. **Санация қилиш**. ■ Санация орқали давлат бозор иқтисодиётига таъсир этади. «ЎЗМЭ».

2 тиб. Оғиз бўшлиғини соғломлаштириш бўйича даволаш-профилактика чоралари. **Тўшларни санация қилиш**.

САНАЦИЯЛАШ айн. **санация 1**.

САНГ [ф. سنگ — тош; тарози тоши] шв. Тош. *От кўп бўлса, шунга лойиқ чанг қўзғалур, Кучли қўшин тоққа юрса, санг қўзғалур*. К. Яшин, М. Раҳмон, Сирдарё. *Айланур инсон бошидан Минг аср осмон юки, Дона бугдой узра гўё Санги тегирмон юки*. Э. Воҳидов.

САНГБЎРОН [ф. سنگباران — тош ём-ғири] шв. Тошбўрон. -*Сангбўрон қилинглр! Уринглр уни!* — деди шайх амр қилиб. К. Яшин, Ҳамза.

САНГДИЛ [ф. سنگدل — тош юрак, юраги тош] *поэт*. Тошбағир, тошюрак, бераҳм. *Кимга дод айлай бу бедодингни, эй сангдил, Ошно бўлдим десам, кўнглинг сени бегонада*. Муқимий.

САНГЗОР [ф. سنگزار — тошзор, тошлок] шв. Тошлок, тошли жой. *Сарбонни кўмдилар сангзор сохилга*. Ш. Раҳмон, Гуллаётган тош. *Сангзор бўйларига сеп ёйган баҳор Ва тоғларга осган палагин*. «Ёшлик».

САНГОБ [ф. سنگآب — сув солинадиган катта тош идиш; тош суви] *махс*. Тери ошлаш

учун қилинган оҳак ёки кум эритмаси. -*Теринг сангобда чиригур сизир бирдан ирғиб ўр-нидан туриб, думини хода қилиб, бир қочиб берди*, — деди Шум бола. Ф. Фулом, Шум бола.

САНГСАР [ф. سنگسر — тош бош] зоол. 1 Сувсарнинг бир тури.

2 Шу ҳайвоннинг қимматли териси, мўйнаси.

САНГСОР [ф. سنگسار — тош билан уриш, тошбўрон] шв. Тошбўрон (жазонинг бир тури). -*Бу гуноҳинг учун эса сени санг-сор қилмоқ лозим!* — деди у ва ўша онда оломга юзланиб ҳайқирди. К. Яшин, Ҳамза.

САНГАРОШ [ф. سنگتراش — тош йў-нувчи; ҳайкалтарош] Тоштарош; тош йў-нувчи уста. *Баширжон усталар билан хайр-лашиб, сангтарош Ашот хузурига йўл олди*. Н. Аминов, Қаҳқаҳа. *Ишга тушди сонсиз асир, Меъмор, наққош, сангтарош*. Э. Воҳидов.

САНГАРОШЛИК Тош йўниш, тарош-лаш билан шуғулланиш; сангтарош касби. *Мен ўзим наэжжорман, сангтарошлик ҳам қиламан*. Мирмуҳсин, Меъмор.

САНДАЛ I [a. صندلیе < ҳинд. + ф. صندلی — курси, стол] Ўрта Осиё, Яқин Шарқ мам-лакатлари ва Японияда маълум бир жойни иситиш учун мўлжалланган манқал; хонанинг ўртасига ёки чеккароқ ерига чор-бурчак чуқурчага ўрнатилган, устига кўрпа ёпилиб, атрофига кўрпачалар тўшалган хонтахтадан иборат бўлиб, ичига саксовул ёки кўмир чўғи солинади; танча (қиш со-вугида сандалга оёқ-қўлни тиқиб исини-лади, айни пайтда устига дастурхон ёзиб, ундан стол сифатида фойдаланилади). *Кел-инчак хокандозда чўғ келтириб, сандал чуқурчасига солди ва устига янги қуроқ кўрпани ёпди*. Газетадан. *Бу уйдаги сандал атрофига шоҳи ва атлас кўрпачалар тў-шалган, катта-катта парқу ёстиқлар қў-йилган*. А. Қаҳҳор, Қўшчинор чироқлари. *Ундоқ бўлса, олиб киринглр, сандалда исин-син, таом беринглр*. Мирмуҳсин, Меъмор.

САНДАЛ II [юн. sandalon < a. + ф. صندل < санск.] бот. Ниҳоятда хушбўй, эфир мой-ига бой, доимий яшил кўп йиллик дарахт (бўёқ ва хушбўй эфир мойлари олишда фойдаланилади). *Анча тузалиб, йўлга чиқиб кетаётган Меъмор, Ҳожитабиб берган сан-дал ёғочидан ясалган асога тиралиб, хотини билан бир лаҳза гаплашиб қолди*. Мирмуҳсин,

Меъмор. *Хушбўй сандал дарахтидан ишланган миз устида Навоийдан келган олтин боғичли хат турарди.* П. Қодиров, Юлдузли тунлар.

САНДАЛ III [юн. sandalion < а. + ф. صندل — кавушнинг бир тури] Пошнасиз ёзги енгил оёқ кийими; сандалет, шиппак. *Уоёғига доим енгил сандал кийиб юради.* А. Мажидий, Инжик зиёратчи. *Уйда оёқ кийими бир неча нар — чувак, маҳси, сандал, калиш, туфллар.* Ф. Фулом.

САНДАЛЕТ [фр. sandalette < лот. sandalium < юн. sandalion < а. + ф. صندل] айн. **сандал III**.

САНДИРАМОҚ *шв. айн. сандироқламоқ.* Мен билмайман, на ерларда ётибсан, Энасиздай сен сандираб кетибсан. «Гулнорпарии».

САНДИРОҚЛАМОҚ I Бекор, бемақсад санқиб, дайдиб юрмоқ, тентирамоқ, санқимоқ. *-Кўчада сандироқлаб юргандан кўра, онанга боқисанге бўлмайдимиз, кап-катта қиз, — деди Васила Назаровна унинг гапини эшитмагандай.* Ў. Ҳошимов, Қалбингга кулоқ сол.

2 Дарбадарликда юрмоқ, тентирамоқ, кезмоқ. *Элчилар маслаҳат қилишиб дейишди: -Мунча одам беҳуда, биёбон чўлларда сандироқлаб бўйиб (бундай қилиб) юрмас.* «Зулфизар билан Авазхон».

САНДИҚ [а. صندوق — қути, яшик, сандиқ] Турли буюмларни, бисотларни солиб қўйишга мўлжалланган, очилиб-ёпиладиган қопқоқли, қулф-калитли, яшик шаклидаги уй-рўзгор буюми. *Сандиқ ичида подшоҳ инъом қилган олтиннинг бир қисми ҳамёни билан турган эди.* П. Қодиров, Юлдузли тунлар. *Мен келтирган атласни Ёрим солмас сандиққа.* «Кўшиқлар». *Ёшликдан бошлаб келиноийларининг сандиқларини, қутиларини тинтиб ўрганган Нури.. калити бурнида унутилган бир қутини очди.* Ойбек, Танланган асарлар.

Пўлат сандиқ Ўт тушганда куймайдиган, ёнмайдиган металл сандиқ; сейф. *Пўлат сандиқда турган векселларни ковлаштириб, сизникени топиб беришимни осон деб ўйлайсизми?* К. Яшин, Ҳамза.

САНДИҚЗАДА [а. + ф. صندوقزاده — сандиқда уринган] Сандиқда кўп ётавериб, асл сифатини, жилосини, пишиқлигини йўқотган (буюм, мато, кийим-кечак ва ҳ.к.). *Бувимнинг хориждан келтирилган кимҳоб камзуллари кўп ишлар сақланиб, сандиқзада бўлиб қолибди.* Газетадан.

САНДИҚСОЗ [а. + ф. صندوقساز — сандиқ, қути ясовчи] Сандиқ ясовчи уста; сандиқчи. *Бу йигит сандиқсоздан чиққан ёш шоир Усмонхўжа Зорий эди.* С. Абдулла, Мавлоно Муқимий.

САНДИҚСОЗЛИК Сандиқ яшаш касби; сандиқ билан савдо қилиш. *У ерда сандиқсозлик, тунукасослик дўконлари бор эди.* Ж. Шарипов, Хоразм.

САНДИҚЧА Кичкина, жажжи сандиқ; қути. *Бойвачча халталарни ўртага келтириб кўйди-да, миқ этмай ўтирган Қора Қоплонга қараб: -Қани, бу олтин тангалар тўла халталарни сандиқчага жойлаб, хуржунларга солайлик, — деди маккорона илжайиб.* К. Яшин, Ҳамза.

САНДИҚЧИ айн. **сандиқсоз.** *Кумуш яна тинчий олмади: -Бизнинг уришиб қолишимиз учун Карим сандиқчининг ҳам дахли бор! — деди.* А. Қодирий, Ўтган кунлар.

САНДОН [ф. سندان — темир кунда] Темирчи, мискар ва заргарларнинг қиздирилган металлга ишлов бериш (болғалаш) да унинг остига қўядиган асбоби; темир кунда. *Қудрат ярим вайрона дўконда белигача чуқурга тушиб олиб, узун темир қисқичда қисилган бир юмалоқ темир чўғни сандонда болғаламоқда эди.* М. Исмоилий, Фарғона т. о.

САНДУЛОЧ эск. Булбул. *«Девону луғотит турк» да сайрар сандулоч, Кўкшин яроқларда янграйди баҳор.* Х. Даврон, Болаликнинг овози.

САНЖОБ I *шв.* Қаттиқ сиқув, исканжа, тазйиқ. *Санжобга олмоқ. ■ Бир кун ниҳоят учаламиз маслаҳатни бир ерга қўйиб, Ҳакимовни ҳалқумидан бўғандай санжобга олиб қолдик.* «Муштум».

САНЖОБ II *шв.* Бўш; сийрак; кам; холи. *Ҳамма чой ичиб, нон еб хурсандчилик қилди. Шерали ғамгинликда ўтира берди. Одамлар кетиб, санжоб бўлди.* «Эрали ва Шерали». *Йўллар санжоб, ГАИчиларнинг ҳуштаклари ёз, куздааидай асабий чурулламайди.* С. Нуров, Нарвон. *Кимга даркор бунча гап, санжоб қилинг, уламо.* Э. Воҳидов.

САНЖОҚ I эск. Байроқ, туғ.

2 эск. Товус ёки каптарнинг рамзи (тасвири) туширилган мис.

3 тар. Усмонлилар даврида Туркияда маъмурий-ҳудудий бирлик (туман, вилоят).

САНИТАР [лот. sanitas — соғлиқ, саломатлик] **1** Даволаш муассасаларида, ҳарбий-тиббий қисмларда касалларга қаровчи, тозалликни сақловчи кичик тиббиёт ходими. *Блиндажлар ярадорларга тўла. Афтидан, санитарлар шошиб қолганга ўхшайди. И. Раҳим, Чин муҳаббат.*

2 Санитарияга оид. *Санитар поезд. ■ Эргашев олдинги позиция томон эмаклаб кетди. Унинг орқасидан санитар сумкаси билан Петров йўл олди. Н. Сафаров, Оловли излар.*

САНИТАРИЯ [лот. sanitas — соғлиқ, саломатлик] Умуман, аҳолини, атроф-муҳитни соғломлаштиришга, тозалikka, гигиеник талаб ва меъёрларга риоя қилишга қаратилган чора-тадбирлар тизими. *Биз шаҳарнинг санитария ҳолатини тубдан яхшилаш учун барча чораларни кўрамиз. Газетадан. Касалхонага кирган касал санитария ҳақида тушунчага эга бўлиши керак. Н. Исмоилов, Касалларни парвариш қилиш.*

САНИТАРКА Санитар аёл. *Олга юрганмиз сари орқада ярадорлар чўзилиб қолади. Ана шунда бир санитарканинг мардлигига қойил қолдим. Ойдин, Ҳикоялар.*

САНИТАРЛИК Санитар касби; шу касб билан шуғулланиш.

САНКЦИЯ [лот. sanctio — қатъий, ўта жиддий қарор] ҳуқ. **1** Ҳужжат, қарор ва ш. к. нинг олий орган томонидан тасдиқланиши, шундай тасдиқ нагжасида ҳужжат, қарорнинг қонуний кучга эга бўлиши.

2 Ҳуқуқий меъёрнинг, қонун моддасининг ушбу қонун бузилишидан келиб чиқадиган ҳуқуқий оқибатлар кўрсатиб ўтилган қисми.

3 Халқаро ҳуқуқда: халқаро мажбуриятларга ёки халқаро ҳуқуқ меъёрларига риоя қилмаган, уларни бузган давлатларга нисбатан қўлланадиган (иқтисодий, молиявий ёки ҳарбий) таъсир чораси. *Бироқ Техрон расмийларининг баёотларига кўра, ҳеч нарса, ҳатто халқаро санкциялар ҳам Эронни ўз ядро дастуридан воз кечишга мажбур эта олмайди. Газетадан.*

4 Жиноят содир этишда гумон қилинган шахсга нисбатан мажбурий чора (қамоқ, тинтув ва ш.к.) кўриш учун прокурор томонидан бериладиган рухсат.

САННАМОҚ **1** этн. Инс-жинсларни қайтариш, кишиларни даволаш учун дуо

ўқимоқ. [*Кампир буви*] *Фолбиннинг «одамлари» эшикни ғирч этиб очиб келиб, тахмон тепасидаги дорга ўтиришини, саннаб ўқиб турган азайимхонни бўғишини кўрган эди. Мирмуҳсин, Умид.*

2 этн. Азада мархум ҳақида айтиб йиғламоқ. *Аёл ҳамон ўз дардини айтиб саннарди. «Шарқ юлдузи».*

3 кўчма Кўп гапирмоқ, вайсамоқ. *Қоринни тўқлаб олган эмасми, Асад жағига зўр бериб саннаб кетди. Ҳ. Назир, Кўктерак шабадаси. Саннай-саннай бозорчи хотиннинг қораси ўчди. Э. Аъзам, Кечикаётган одам.*

САНО I [а. ثناء — табрик, саломлашиш; мадҳ, мақтов; миннатдорчилик] дин. Худонинг, пайғамбарларнинг шаънига айтилган мақтов сўзлар; мадҳия, мадҳ, ҳамд. *Отанг борми, энанг борми элингда? Худонинг саноси борми тилингда? «Равшан».*

2 Умуман, мақтов, мадҳия. *Зикри сано тилида, Тилло камар белида. «Ҳасанхон». Гуллар қўшиғи Наргизнинг мислсиз ҳусну жамолини, унинг ёрига чексиз садоқатини сано этмоқда эди. Ш. Рашидов, Асарлар.*

САНО II [а. صناعة — Сано шаҳри] бот. **саноий макка** [а. صنعائي — Сано шаҳрига мансуб] Асосан тропик ва субтропик ўсимлик, кўп йиллик ўт, бута ва дарахларнинг умумий номи ва унинг табобатда сурги дори сифатида қўлланадиган барги. *Санонинг барги таркибида ички юмшатовчи антрагликозидлар бор. «ЎЗМЭ».*

САНОАТ [а. صناعة — санъат, маҳорат; касб-хунар; ишлабчиқариш, индустрия] Халқ ҳўжалигининг хомашёни қайта ишлаш, ер ости бойликларини қазиб олиш, ишлаб чиқариш воситаларини ва кент истеъмол молларини яратиш ва ш.к. ни қамраб олувчи тармоғи; индустрия. *Оғир саноат. Енгил саноат Озик-овқат саноати. Саноат маҳсулоти. ■ Водийда саноат корхоналарининг қурилиши кўплаб одамларнинг иш билан таъминланишига сабаб бўлди. Газетадан.*

САНОАТЛАШТИРИШ айн. **индустриялаш**. *Мамлакатни саноатлаштириш.*

САНОАТЧИ Саноат корхоналарига эга бўлган шахс. *Америка саноатчилари.*

САНОБАР [а. صنوبر — қарағай] **1** бот. Қарағайгуллилар оиласига мансуб, доим яшил манзарали дарахт; қарағайнинг бир тури. *Қоматинг гулишандаги сарву санобар-*

дин баланд.. Фурқат. ..қийшайиб ўсган ёлғиз санобар остидаги ёғоч ўриндиқда чекиб ўтирган эди. Ш. Холмирзаев, Сайланма.

2 *поэт.* Қадди-қомати келишган, хуш-қомат, сарвқомат.

3 Санобар (хотин-қизлар исми).

САНОЙИ [а. صنائع — санъатлар]: **санойи нафиса** эск. кт. Нафис, бадий санъат. *Шаҳардаги бир қанча мактабнинг санойи нафиса тўғараклари иштирокида беш пардали катта концерт берилди.* А. Қаҳҳор, Ҳикоялар.

САНОЧ тар. Теридан қилинган идиш; тери тўрва; меш, мешкоб. *Ҳазиначининг айтишича, унинг хуржунда икки саноч олтин бор экан.* Ш. Холмирзаев, Қил кўприк. У [Лола] бир саноч қимиз билан катта заранг косада яхна гўшт, нон олиб чиқди. Ё. Шукуров, Биринчи парвоз. *Убайдулла ака қўли саночдаги қимиздан косага қуйиш билан банд..* Ш. Бўтаев, Қўрғонланган ой.

САНОҚ Доналаб санаш, ҳисоблаш ва ундан олинадиган натижа. *Саноқдан адашмоқ. Саноғига етолмаслик. ■ Тўғонбек.. ёзувчизувга, саноққа берилиб, дастурхонга қарамади ҳам.* Ойбек, Навоий.

Саноқ комиссияси Сайловда у ёки бу шахсга берилган (ошқора ёки яширин) овозларни ҳисоблаб чиқувчи ҳакамлар. **Саноқ сон тлш.** Предметларнинг сонини, саноғини билдирувчи, қанча?, неча? сўроғига жавоб бўлувчи сон тури. **Саноғи йўқ** Беҳисоб, жуда кўп, сон-саноқсиз. *Пул десанг, саноғи йўқ. Санаб тамом қилиб бўлмайди.* М. Исмоилий, Фарғона т. о. **Сонда бор, саноқда йўқ** Айрим обрў-эътиборини йўқотган, назардан қолган шахслар ёки сифатсиз, кадрсиз буюмлар ҳақида айтиладиган ибора. *Боқи энди сонда бор эди-ю, саноқда йўқ эди.* С. Аҳмад, Сайланма.

САНОҚЛИ I Санаб қўйилган, саноғи маълум, ҳисобли. *Саноқли пул. Саноқли мол йўқолмас.* Мақол.

2 *кўчма* Бир нечагина, жуда оз. *Май байрамига саноқли кунлар қолган эди.* С. Кароматов, Бир томчи қон. *Ҳозирча гуруҳимизда саноқли одам бор.* С. Сиёев, Ёруғлик.

САНОҚСИЗ I Саналмаган, ҳисобланмаган.

2 *кўчма* Беҳисоб, жуда кўп, сон-саноғи йўқ. *Ҳозирча ой чиқмаган, саноқсиз юлдузлар, ўз раҳнамоларидан жудо бўлган етимчалар*

дек, атрофга мўлт-мўлт жавдирашарди. Ф. Мусажонов, Ҳиммат.

САНСАЛОР: сансалор бўлмоқ Бирор иш, юмуш бажарилмай арасотда қолмоқ. *Яслибоғча учун етарли миқдорда мебель келтирилиши керак эди.* Аммо бу иш сансалор бўлиб қолган. Газетадан. **Сансалор қилмоқ** Бирор ишни, юмушни бажаришдан ўзини четга олмоқ, бир-бирига солиб ишни чўзмоқ, мен қилмайман, сен қил, деб орқага судрамоқ.

САНСАЛОРЛИК Бирор иш, юмушни бажаришдан ўзини тортишлик; бир-бирига солиб, муаммони ўз вақтида ҳал қилмаслик; пайсалга солиб чўзишлик. *Расулжон буларнинг ҳаммасини кўрди, ўрганди, айниқса, ободончилик соҳасидаги ўрнашиб олган сансалорликдек ярамас иллатни фаҳмлади.* Ж. Абдуллахонов, Хонадон.

САНСАЛОРЧИ Бирор ишни, юмушни бажаришдан ўзини тортувчи, бошқаларга ташлаб қўювчи; ишەқмас, лоқайд. *Сансалорчи нешонасини қашлаб, ўйлалиброқ тураркан..* Газетадан.

САНСАЛОРЧИЛИК Сансалорликка йўл қўйиш; ишни пайсалга солиб, бошқаларга ташлаб кечиктириш. *Сансалорчилик бор ерда ривожланиш бўлмайди.*

САНСАНЛАМОҚ с.т. қ. сенсирамоқ. *Ҳожи Зокир энди кампирни сансанлаб, унга дўқ уради.* С. Айний, Эсдалиқлар.

САНСИРАМОҚ шв. қ. сенсирармоқ. -Қол, — Содиқ энди сансирашга ўтибди. Ҳ. Фулом, Машғал.

САНСКРИТ [ҳинд. санскрит — такомиллаштирилган, қайта ишланган; тузатилган; мумтоз] Ҳинд-европа тиллари гуруҳига мансуб қадимги ҳинд адабий тили (Бу тилда милоддан аввал диний, фалсафий, бадий ва илмий адабиётлар яратилган). *Араб, юнон, санскрит, қадимге славян тилларида бирлик, иккилик категориялари мавжуд бўлган.* «Фан ва турмуш».

САНТАЛ қ. сандал II.

САНТАЛАТ с. т. қ. салтанат I. *Неча дағдаға, санталат билан Юсуф билан Аҳмаднинг олдиға етди.* «Юсуф билан Аҳмад»

САНТИ- [лот. centum — юз] Байналмилал ўзлашма қўшма сўзларнинг биринчи қисми бўлиб, ўзи қўшилган сўз билдирган асосий ўлчов миқдоридан 100 марта кичикликни билдиради; мас., 1 см = 0,01 м.

САНТИГРАММ [санти.. + грамм] махс. Граммнинг юздан бир улушига тенг оғирлик ўлчови.

САНТИМЕТР [санти.. + метр] махс. Метрнинг юздан бир улушига тенг узунлик ўлчови. *Қалдирғочнинг қанотлари узун ва тор, танасининг узунлиги 10–23 сантиметрга етади.* «Фан ва турмуш».

САНЧИЛМОҚ 1 Санчмоқ 1, 2, 4 фл. ўзл. ва мажҳ. н. *Болалар гулхан атрофида ўйнашарди, баъзилари қор устида чўққайиб, баъзилари шохлари қорга санчилиб чўзилиб ётган арча устига миниб олишганди.* Ш. Холмирзаев, Ўн саккизга кирмаган ким бор. *Бойнинг ҳар бир сўзи Раҳим домлага найзаддек санчилди.* Ҳ. Фулом, Машғал. *Дабдурустдан берилган бу савол оғир юк бўлиб, елкасидан босди, дилига наштардек санчилди.* Шуҳрат, Шинелли йиллар.

2 кўча Тик бориб туташиб кетгандек туюлмоқ, қадалмоқ. *Боланинг хаёли шу тобда қўшининг олтин тиглари санчилиб турган баланд гумбазда.. эди.* К. Яшин, Ҳамза.

САНЧИҚ 1 Учили нарса қаттиқ санчилаётгандек туюладиган ўқтин-ўқтин оғриқ. *Баногоҳ Омонгулнинг биқинига санчиқ турди.* «Ёшлик». [Дилбархон] *Ҳусанжон билан Ҳасанжонга ҳомиладор бўлди-ю, қаёқдандир мия санчиги пайдо бўлди.* Х. Тўхтабоев, Садоқат.

2 кўча Аччиқ, кинояли гап; аччиқтирсиқ. *Сўзнинг ёмони – санчиқ, дарднинг ёмони – қуёнчиқ.* Мақол. ■ *Бола болалик қилиб, саволдаги санчиқни тушунмади.* М. Исмоилий, Фарғона т. о.

САНЧИҚЎТ бот. Айиқтовондошлар оиласига мансуб, қизғиш гулли, сершоҳ кўп йиллик ўт. *Санчиқўтнинг экстрактлари қонни тўхташиш ва қон босимини кўтариш хусусиятига эга.* «ЎЗМЭ».

САНЧМОҚ 1 Учи ўткир нарсани куч билан босиб ёки зарб билан уриб киргизмоқ; суқмоқ, тикмоқ, ботирмоқ. *Холмат иккинчи рақибининг кўкрагига қилич санчди, бироқ ўзи ҳам бошидан яраланди.* Н. Сафаров, Оловли йиллар. *Тўтиқиз дўппи хомини тиззасига қўйиб, секин игна босди.* М. Исмоилий, Фарғона т. о. *Мингбоши худди орқасига биров бизи санчиб олгандек сакраб тушди.* М. Исмоилий, Фарғона т. о.

2 Қадамоқ, тақамоқ. *Анвар юзуриб келиб, ёрлиқни олиб ўпди ва уни салласига санчиб,*

орқаси билан юриб, илгариги ўрнига бориб тўхтади. А. Қодирий, Меҳробдан чаён.

3 Бирор нарса санчилгандек, ўқтин-ўқтин оғримоқ. *Бу воқеани эшитиб, Меъморнинг юраги санчиб кетди.* Мирмуҳсин, Меъмор. *Шерзод кўкрагининг қаттиқ санчилигидан уйғониб кетди.* Ў. Ҳошимов, Нур борки, соя бор.

4 кўча Аччиқ гап билан узиб олмоқ, чақмоқ. *Қози ҳам, Асад қори ҳам жадида мактабига қарши эдилар.* Шунинг учун *Асад қори гап билан нишини яна Фуломжонга санчди.* М. Исмоилий, Фарғона т. о.

САНЧҚИ 1 денг. Денгиз ҳайвонларини ов қилишда қўлланадиган махсус асбоб; найза. *Пирнафас ака қайиқ, тўр, чўлти ва санчқи сотиб олди.* Ж. Шарипов, Хоразм.

2 айн. **вилка.** *Темиржон бир қўлида китоб, иккинчиси билан санчқида чучвара илиб ея бошлади.* Ж. Абдуллахонов, Орият.

САНЪАТ [а. صنعت – иш, меҳнат; маҳорат; касб-ҳунар] **1** Ижтимоий маданиятнинг эстетик завқ берувчи, мусиқа, мусаввирлик, ҳайкалтарошлик каби воқеликни бадиий образлар воситасида акс эттирувчи ҳар бир айрим соҳаси. *Тасвирий санъат. Меъморлик санъати. Санъат ва адабиёт.* ■ *Дунёдаги ҳар қайси соҳа ўз санъатига ва ўз маданиятига эга.* «Ёшлик». *Кинематографчилар ўз ижодий режалари, кино санъатини ривожлантириш тўғрисидаги уйлари билан ўртоқлашдилар.* Газетадан. *Заргарлик санъати энг кўҳна санъатлардан бири бўлиб, у декоратив-амалий санъат хили сифатида кенг тарқалган.* Газетадан.

2 Турли амалий-татбиқий соҳаларнинг ўзига хос иш услуби, системаси. *Ҳарбий санъат.* ■ *Уч-тўрт километрга чўзилган тепалик ҳарбий-инженерлик санъати билан узоқ йиллар давомида қурилган мустаҳкам қалъага ўхшарди.* И. Раҳим, Чин муҳаббат.

3 кўча Муайян фаолият соҳасидаги юксак маҳорат, усталик; истеъдод. *Сўз санъати. Нотиқлик санъати.* ■ *Ёш хонандалар, раққосалар ўз санъатларини намойиш этдилар.* Газетадан. *Фурсатдан фойдаланмоқ ўзи бир санъат, ҳунар.* Қ. Муҳаммадий. *Кулдиришга санъат керак, кулишга соф юрак.* Газетадан.

4 Адабиётшуносликда: бадиий асар поэтикасини таъминловчи восита. *Талмеҳ санъ-*

ати. ■ Ружуъ — маънавий санъатлардан бири бўлиб, арабча «кайтиш» демакдир. «УТА».

5 Санъат (хотин-қизлар ва эркаклар исми).

САНЪАТКОР [а. + ф. صنعتكار — санъат билан шуғулланувчи, маълум бир санъат эгаси; хунарманд] 1 Санъат соҳиби, санъатнинг бирор соҳасини эгаллаган ижодкор; санъатчи. Санъаткорлар оиласи. ■ Ҳозир ажойиб санъаткор, халқнинг меҳрини қозонган хушовоз хонанда Таваккал Қодиров ижодининг авж нардасига етган пайт. С. Аҳмад, Юлдуз. Фестивалда ўз фильмларини намойиш қилаётган санъаткорлар ҳар қанча фахрлансалар, ўзларини бахтиёр ҳис қилсалар арзийди. Газетадан.

2 Юксак маҳоратга эга бўлган; яратувчи. Ҳа, Ойбек улкан сўз санъаткоригина эмас, фаол устоз, меҳрибон мураббий ҳам эди. Газетадан. ..Санъаткор табиатнинг мўъжизалари билан кўришмай, танишмай ўтиб кетаётган одамлар ҳам кўп. А. Мухтор, Чинор.

САНЪАТКОРЛИК Санъат билан шуғулланиш, санъаткор бўлиш. Санъаткорлик — унга ота касб. ■ Тавба, бир-иккита чиқишдан сўнг машҳурлик, санъаткорлик мақомини даъво қилаётганларни тушуниш қийин. Газетадан.

2 Маҳорат, моҳирлик. Улуғ аждодларимиз Самарқанд, Кўқон, Хива шаҳарларида бетақрор ислом обидаларини катта санъаткорлик билан яратишган. Газетадан.

САНЪАТКОРОНА [а. + ф. صنعتكارانه — маҳорат, моҳирлик билан; санъаткор каби] рвш. Юксак дид, санъат билан; моҳирона. Санъаткорона ўйилган нақшлар хонага алоҳида кўрк бериб турар, ганч сувоқ ойнадек ялтилар эди. С. Кароматов, Бир томчи қон.

САНЪАТЧИ айн. санъаткор 1. Минбарда фақат санъатчилар қолишди. Созлар филофларидан чиқарилди. Ҳ. Фулом, Тошкентликлар.

САНЪАТШУНОС [санъат + ф. شناس — ўрганувчи] Санъатшунослик мутахассиси. Санъатшунос олим. ■ Санжар Сиддиқов.. тарихчи, публицист, таржимон, тақризчи, санъатшунос ва педагог эди. Ҳ. Ёдгоров, Ҳаёт тўлқинлари.

САНЪАТШУНОСЛИК Санъат ва унинг турларини ўрганадиган фан; санъат назарияси. Санъатшунослик тадқиқотлари. ■

Муҳокамада санъатшунослик доктори Ж. Тешабоев маъруза қилди. Газетадан.

САНҚИ, санғи Сандироқлаб бекор юрадиган; бекорчи, саёқ, дайди. Э, санқи бўлмай ўлсин Шотурсун ҳам! Ушанинг дастидан ҳеч тинчлик йўқ менга! Ф. Мусажонов, Сабоқ.

САНҚИМОҚ, санғимоқ Сандироқлаб, дайдиб бекор юрмоқ; саёқлик қилмоқ. Урмонжон.. ҳар қаерларда санғиб юрадиган бебош бола эмасди. М. Исмоилий, Фарғона т.о. -Ҳов, ким у бемаҳалда санқиб юрган нобакор?! С. Сиёев, Ёруғлик.

САОДАТ [а. سعادت — бахт, омад муваффақият; хотиржамлик] 1 Ёнг катта бахт, юксак иқбол. Ҳалол меҳнат — яхши одат, берур сенга саодат. Мақол. ■ Мен висол қувончидан ял-ял ёнган икки ёшга бахту саодат тиладим. Газетадан. Шоир бўлиб шодлик ва бахтни Куйламоқлик — зўр саодатим. Ҳ. Олимжон.

2 Саодат (эркаклар ва хотин-қизлар исми).

САОДАТЛИ Бахт-иқболга эришган; бахтли, бахтиёр. Бу бино Кумушнинг ўз уйи бўлиб, бу уй ичида Отабекнинг саодатли кунларининг ширин хотиралари сақланар.. эди. А. Қодирӣ, Ўтган кунлар. Бахтли ва саодатли яшаш ҳаммага ҳам насиб этавермайди. Газетадан.

САОДАТМАНД [а. + ф. سعادتمند — бахтли, роҳат-фароғатли] кт. айн. саодатли. Саодатманд одам. ■ Оллоҳ таоло карами билан.. бу саодатманд кунга эришди. Э. Самандар, Тангри қудуғи.

САПЁР [фр. sapeur < sapeг — ерости йўли, лаҳим қазииш] ҳарб. Инженерлик қўшинлари ҳарбий қурилиш қисмларининг солдат ёки офицери. Бу ердан йигирма километр нарида сапёрлар ҳозир қудуқ қазиишпти. О. Ёқубов, Излайман.

САПСАН Лочинсимонлар оиласига мансуб йиртқич қуш (ов қуши сифатида фойдаланилади). 20-аср ўрталарида сони камайиб кетганлиги туфайли АҚШ, Канада, Германия, Швеция ва бошқа мамлакатларда сапсанни тутқунликда кўпайтириш йўлга қўйилди. «ЎЗМЭ».

САПСАР 1 с. т. қ. сафсар.

2 Оч бинафшаранг, бинафша. Сапсар бўёқ. Сапсар ипак.

САПФИР [юн. sapphieres < қад. яҳ. саппир — кўк тош] Шаффоф, тиниқ кўк ранг-

ли қимматбаҳо тош; кўк ёқут. Сапфир са-
ноатда сунбий йўл билан ҳам олинади. «ЎЗМЭ».

САПЧА Пишиб етилмаган кичкина қовун; хомак. -[Бозорда] Қовун туширади-
ганларга ёрдамлашаман, сапча беришади, —
деди Отабой. Ф. Фулом, Шум бола. Энгашиб,
палакларни титиб қарасанг, туғунак, сапча,
хомаклар қийғос.. Н. Фозилов, Дийдор.

САПЧАЛАМОҚ *шв.* Сапча тугмоқ, хо-
макламоқ [Холбойнинг] Қовунлари сапчалади.
К. Яшин, Ҳамза.

САПЧИМОҚ 1 Кескин ҳаракат қилиб,
бирор кимса ёки нарсага ташланмоқ, ўзи-
ни (юқорига) отмоқ. *Рустам.. қисилган пружинадек осмонга сапчиди. Ў. Ҳошимов, Қалбингга қулоқ сол. [Хушрўй] Иккинчи ва учинчи кунларда тўппа-тўғри кундош устига сапчийди. А. Қодирий, Ўтган кунлар. Ҳазон уюмларини оқизиб келаётган тиниқ сумбула суви қирғоққа сапчир эди. М. Муҳамедов, Қаҳрамон изидан.*

2 Умуман, кескин ҳаракат қилмоқ; сак-
рамоқ, ирғимоқ, тўсатдан ўрнидан турмоқ;
ирғиб туриб кетмоқ. *Жувон бехос ток урган-
дек бир сапчиб тушди. С. Сиёев, Ёруғлик. Раис, бехос сапчиган от устидан учиб тушай деди-ю, ўзини ўнглаб олиб, жиловни қаттиқ тортди. Т. Малик, Ажаб дунё. Бирдан аёл кишининг ўкраб йиғлаган овозини эшитиб, сапчиб ўрнидан турди-да, Қашқарча томон югурди. К. Яшин, Ҳамза.*

Бетига сапчимоқ Шартакилик билан жавоб қайтармоқ. **Ерга урсанг, кўкка сапчийди** Жуда шўх, тўполончи, шумтака болалар ҳақида айтиладиган ибора. *Ислонбек жуда шўх бола бўлган, нақ ерга урсанг, кўкка сапчийди. «Ёшлик». Сапчиб кетмоқ (ёки тушмоқ)* Ташқи таъсир натижасида сесканиб ёки чўчиб, қўрқиб, ўрнидан кескин кўзғалиб қўймоқ; қалқимоқ. *Абдуқодирбой ўғлининг «шаккоклигидан» сапчиб тушди. К. Яшин, Ҳамза. -Заҳар ичибди! — деди табиб. Отабек сапчиб кетди. А. Қодирий, Ўтган кунлар.*

САР [ф. سر — бош, калла; бошланиш; уч, чўққи; энг яхши] кам қўлл. Бош, калла. *Саф-саф тизилиб Сафсар оёғинга қўйиб сар, Банд-банд узилиб, Жоним билан банда бўлибдур. Э. Воҳидов, Муҳаббатнома.*

САРА [ф. سره — тоза, аралашмасиз; олий, юқори сифатли; танланган, энг яхши] Энг яхши, аъло, сархил, танланган. *Сара уруғ*

— бўлиқ ҳосил. Мақол. *Узумнинг сарасин ит ейди, Олманинг сарасин қурт ейди. Мақол. ■ От чонса, гумбурулар тоғнинг дараси, Уруйда билинар марнинг сараси. «Алпомиш». Тўпламга шоирнинг энг сара масаллари танлаб киритилган. Газетадан. Биринчи ва иккинчи гуруҳлар ясоғлик уйларида ўтиришади. Овқатларнинг сараси уларга тортилади. Ойбек, Танланган асарлар.*

САРАК [ф. سرک — қўшимча, устама (ҳақ); ортиқлик, мўллик] айн. **сара**. *Бу ойда экинларнинг сараги саракка, пучаги пучакка ажралади. Газетадан. Ҳокимият қўлга текканда, дарров одамларнинг сараги саракка, пучаги пучакка ажралди-қолди. Ф. Мусажонов, Ҳиммат.*

2 Учи синмаган, бутун (тухум ҳақида).

САРАКЛАМОҚ *шв. айн. сарак-сарак қилмоқ қ. сарак-сарак. Жамолиддин бошини сезилар-сезилмас сараклаб, нонни кўзларига суртди. М. Исмоилий, Фарғона т.о. -Бай-бай-бай.. чол қурғуннинг иқболини кўринг! — деди бошини сараклаиб Мирҳож. Ойбек, Улуғ йўл.*

САРАК-САРАК: сарак-сарак қилмоқ Бошини у ён, бу ён чайқатмоқ; силкитмоқ, қимирлатмоқ. *Ниёз тоға бошини сарак-сарак қилиб, ташқари чиқиб кетди. Н. Аминов, Тилло табассумлар.*

САРАЛАГИЧ Чигит ёки ғалланинг чиқиндиларини ёки сараларини ажратадиган, сархиллайдиган асбоб ёки машина. *Чигит саралагич.*

САРАЛАМОҚ 1 Сараларини ёмонларидан ажратмоқ, сархилларини термоқ, хилламоқ, танламоқ, ажратмоқ. *Кўчатларни сараламоқ. ■ Анор серташвиш нарса: уз, сарала, ташиб ол, анор тупини ерга кўм. И. Раҳим, Чин муҳаббат.*

2 Танламоқ, ажратмоқ. *Умарни биласан, одамларни саралаб чақирган. Ш. Холмирзаев, Оғир тош кўчса.*

САРАЛАШ 1 Сараламоқ фл. ҳар. н. *Уруғликни саралаш.*

2 Чорвачилик ва паррандачиликда: наслдор ҳайвонлар ва паррандаларни селекцион белгиларнинг авлоддан авлодга ўтиш хусусиятини сақлаб қолиш мақсадида режа асосида чаতিштириш. *Чорвачилик селекциясида саралаш усуллари ва шаклларидан фойдаланиш кенг йўлга қўйилган. «ЎЗМЭ».*

3 *спрт.* Мусобақа ёки чемпионат финалига чиқувчи жамоаларни аниқлаш мақсадида тегишли спорт турлари бўйича мусобақалар ўтказиш. *Грузия терма жамоаси футболчилари Европа чемпионати саралаш учрашувини 2 сентябрь куни ўз майдонларида бошлайдилар.* Газетадан.

САРАМАС [ф. سرآماس — шишган бош; бошдаги шиш] *тиб.* Терининг, кўпинча бурун атрофининг, баъзан шиллиқ пардаларнинг яллиғланиши; тез тарқаладиган ўткир юқумли касаллик. *Сарамасга шубҳа тутилганда, дарҳол врачга мурожаат қилиш лозим.* «ЎЗМЭ».

САРАНГ *шв.* кам қўлл. Нима қиларини билмай саросималанмоқ, гаранг бўлмоқ. *-Ана шу чалкашлик туфайли, яъни қандай китоб қаерда, қачондан бери ётганини аниқлай олмай сарангмиз, — деди Исмоилов.* «Муштум». *Диққати ошиб, анча саранг бўлиб тургач, отга бир амаллаб миниб олди-да, алланималар дея гулдурлаганча, отни лўқиллатиб кетди.* Ҳ. Назир, Сўнмас чақмоқлар.

САРАНДОЗ [ф. سرانداز — аёлларнинг бошга ўрайидиган рўмоли] Тўйда, саломда келиннинг бошига ёпиладиган, нафис, оқ матодан тикиладиган тўр. *Дастлаб безаксиз бўлган, кейинчалик сарандоз атрофига гир айлантириб ҳошия нақшли кашталар тикиб, четига уқалар тутиб безатила бошлаган.* «ЎЗМЭ».

САРАНЖОМ [ф. سرانجام — охир, интиҳо, хотима; ниҳоят, охир-оқибат] 1 Ҳамма ишни тартиб билан, жой-жойига қўйиб бажарадиган, тартибликни хуш кўрадиган, уй-рўзгорини, асбоб-анжомини батартиб тутадиган, саришта. *Саранжом аёл. Саранжом ходим.*

2 Ҳамма нарса тартибга солинган, жой-жойида, батартиб; ораста, озода, саришта. *Саранжом ҳовли.* ■ *Ҳамма нарса ўз ерида, саранжом эди.* М. Исмоилий, Фарғона т. о.

Саранжом(ини) олмоқ Уй-рўзгор юмушларини тартибга солмоқ; буюм ва жиҳозларни йиғиштириб ёки жой-жойига қўйиб тинчимоқ, хотиржам бўлмоқ. **Саранжом топмоқ** 1) йиғиштирилмоқ; тартибга келмоқ, жой-жойига тушмоқ. *Ҳамма ишлар саранжом топгандан сўн.. тантана билан йўлга тушишди.* Ойбек, Навоий; 2) кўчма с. т. жой-жойини топиб кетмоқ, йўқ бўлмоқ. *Отасидан қолган нарсалар аллақачон*

саранжом топиб кетди. **Саранжом қилмоқ** 1) йиғиб-териб, жой-жойига қўйиб тартибга келтирмоқ, саранжомламоқ. *Қурбонбой уйни саранжом қилиб бўлгандан кейин ҳовлида анча айланиб юрди.* С. Аҳмад, Сайланма; 2) кўчма с. т. ўзлаштириб юбормоқ, ўғирламоқ; гум қилмоқ. *Ҳисобчи.. шу йилнинг ўзидаёқ колхознинг ўнлаб қўйини саранжом қилиб юборди.* «Муштум»; 3) кўчма с. т. ўлдириб, йўқ қилмоқ, гумдон қилиб юбормоқ. [Мастура Гўлжонга:] *Матқосимбойни саранжом қилишибди.* Ҳамза, Паранжи сирлари; 4) сўйиб, калла-поча ва гўштини ажратиб қўймоқ (қўй, мол ҳақида). *Бир барра кўзи бор эди, ота ҳозир шуни саранжом қилиб кирди.* Н. Фозилов, Дийдор.

САРАНЖОМЛАМОҚ 1 Саранжом қилмоқ, тартибга солмоқ, йиғиштирмоқ, саранжом-саришта қилмоқ, (буюмларни) жой-жойига қўймоқ. *Умар идорадаги қоғозларни саранжомлаб, ўзи ҳаммадан кейин кетди.* С. Юнусов, Кутилмаган хазина.

2 кўчма с. т. ўзлаштириб юбормоқ, ўғирламоқ, гум қилмоқ, йўқ қилмоқ. *Мукофотга бериладиган машинани ҳам саранжомлабди, азаматлар.* Газетадан.

3 кўчма с. т. Зимдан тинчитмоқ, жонига қасд қилмоқ; гумдон қилиб юбормоқ. *-Иккитасини ер тишлатаман, — деди шивирлаб Худойбердиев шеригига.* — *Авал олдингисини саранжомлайман.* Н. Сафаров, Оловли излар.

САРАНЖОМ-САРИШТА қ. саранжом 1-2. *Саранжом-саришта хотин. Саранжом-саришта уй.* ■ *Хонадон соҳиби жуда саранжом-саришта одам эди.* «Шарқ юлдузи». *Ҳамма ёқ саранжом-саришта, покиза бўлиб турмаса, балога қоламан.* Ҳ. Назир, Бир туп ғўза.

САРА-ПУЧАК Сара ва пучак. *-Мана бу.. йигитнинг касблари чойфурушлик бўлса ҳам, хушхатликда, шеърни чиройли ўқий ва сарапучакка ажратишда каттагина фазилат эгаси, — деди Йўлдош.* С. Абдулла, Мавлоно Муқимий.

САРАСОБ: сарасоб солмоқ *шв.* Кўз ташламоқ, кузатиб турмоқ; эътибор бермоқ. *-Мен олдин сарасоб солмаган эканман, — дейди Салтонбу.* М. Исмоилий, Фарғона т. о. *Атрофга сарасоб солдим-да, унга дўсти бўлмиш Пашканинг саломини етказдим.* «Шарқ юлдузи».

САРАТОН [а. سرطان — қисқичбақа] **1** (С-катта) астр. Ўн икки буржнинг бири, Жавзо ва Асад буржлари ўртасида жойлашган. *Саратон ўрта кенгликларда куз, қиш ва эрта баҳорда кўринади.* «ЎЗМЭ».

2 Шамсия йил ҳисобида тўртинчи ойнинг арабча номи (22 июнь — 21 июль даврига тўгри келади). *Саратон кирди. Бировнинг ишига саратонда қўл музлайди. Мақол. ■ Саратон кирмасданоқ Қоҳирада ҳаво қизиб кетади.* Мирмуҳсин, Ҳикоялар, қиссалар. *Кўчага чиқишин билан саратоннинг иссиқ тафти юзимга гул этиб урилди.* Газетадан. *Саратон чоғи бу, зарра шамол йўқ, Тутлар қавагида мудрар ғурраклар.* А. Орипов.

Саратоннинг сариқ куни Саратоннинг энг иссиқ кунлари.

3 тиб. Рак касаллиги; рак. *Саратон касаллиги.*

4 зоол. Дарахт, бута ва ўсимликларнинг барг ширасини сўриб зарар келтирувчи ҳашарот тури.

САРАТОНГУЛ [саратон + гул] Пиёздошлар оиласига мансуб, саратонда гуллайдиган кўп йиллик ўт. *Саратонгул совуққа чидамли, манзарали ўсимлик.* «ЎЗМЭ».

САРАТОНИЙ Эртапишар ёзги олма нави.

САРАХБОР [сар + ахбор] Шашмақомнинг ҳар бир мақомда ашула бўлими бошланадиган биринчи, бош шўъбаси. *Ўз навбатидида, ҳар бир сарахборнинг бир неча (6 тагача) тароналари мавжуд.* «ЎЗМЭ».

САРАФАН [қад. р. сарафан — эркаклар чакмони < ф. سرويا — бир сидра кийим; ҳукмдор томонидан туҳфа қилинган кийим-бош] Хотин-қизларнинг енгисиз узун кенг уст кийими. *Юпқа матодан сарафан кийган қиз-жуёнлар тикув машиналари ёнида саф-саф бўлишиб, кийим тикишяпти.* С. Умаров, Бир-бирига устоз.

САРАФРОЗ [ф. سرافراز — боши юқори кўтарилган; мағрур, ғурур-ифтихорли] Бирор мартабага кўтарилган, бирор инъом билан тақдирланган, эъзоз ва эътиборга лойиқ этилган; хурсанд, шод. *Сарафроз қилмоқ (айламоқ).* ■ *Қадами муборақлари билан бизни сарафроз айладилар.* М. Исмоилий, Фарғона т. о. *Устоз қуёш каби ўз юлдузларин Нури зиё билан этар сарафроз.* М. Абдураулов. — *Мақсадимизни равшан қилиб айтсак, бизни фармони ҳумоюн билан сарафроз қил-*

сангиз, — деди Навоий подшога. Ойбек, Навоий.

САРБАДОРЛАР [ф. سربدار — боши дорга осилган; бошини дорга тиккан] Мўғуллар зулмига қарши халқ кўзғолони қатнашчилари. *Сарбадорлар давлати 50 йилча ҳукм сурди.* «ЎЗМЭ».

САРБАЛАНД [ф. سربلند — боши юқори кўтарилган: машхур, номдор; пок, софдил] поэт. Баланд, тик, юқори, улкан. *Ўт ёқиб кетдинг юракка, Мен тиярман кўз ёшим, Чунки истарман: бу гулхан Доим ўлсин сарбаланд.* Э. Воҳидов, Муҳаббат. *Қор каби поккиза, тоғдек сарбаланд, Ўтюррак инсонлар дийдори — армон.* А. Орипов, Йиллар армони. *Кечаги сайҳонда, чакалакзорда Сарбаланд бинолар саф тортган, гўзал.* М. Икром, Кўнгил гули.

САРБАСАР [ф. سربسر — барча, бутун, тўлиғича] поэт. Бошдан-оёқ, бирма-бир, кетма-кет. *Она ғознинг тўши каби юмшоқ қор Сукут билан қуйилади сарбасар.* Ф. Фулом.

САРБАСТ [ф. سربست — эркин, озод; боши боғлиқ: қийин, мушкул; берк, ноаниқ] **1** Эрки ўзида, эркин, мустақил. *У сарбаст, зийрак, ҳаракатлари дадил, сўзлари ўтқир, ўртоқлари орасида онабош қиз.* Ойбек, Улуғ йўл. *У ўзини юрт оғасидек эркин, сарбаст тутаётган Тешабойнинг мингбоши бўлиб келганми-йўқлигини билишни истар, билолмай тажанг бўларди.* М. Исмоилий, Фарғона т. о.

2 Шеър вазни турларидан бири. *Эркин шеър ижодкорлари сафида энг забардаст санъаткорлардан бири бўлган Шайхзода сарбаст вазнида ижтимоий-сиёсий масалаларни ёритишга интилди.* «Шарқ юлдузи».

САРБАСТЛИК Эркинлик. *Чоғир тилларга ва ҳаракатларга сарбастлик берди.* Ойбек, Навоий.

САРБОЗ [ф. سرباز — бош ўйнатувчи: бошни, жонни фило қилувчи] тар. Амир, хон кўшинининг оддий пиёда аскарлари; аскар, солдат. *Ҳар уйда, ҳар кўйда мудҳиш жанг бўлди, Қалъа сарбозлари ҳануе манг бўлди.* М. Шайхзода. *Қуролли сарбозлар дарвозадан отилиб чиқишди.* С. Сиёев, Ёруғлик. *Сарбозлар, асосан, пиёда қўшинларни ташкил этган.* «ЎЗМЭ». *Отлар майдонда кишаншиди, Сарбозлар найза ушлашди.* «Гулшанбоғ».

САРБОЗХОНА [сарбоз + хона] тар. Сарбозлар турадиган, истиқомат қиладиган жой, аскархона. *Карим охун кундуз кунлари*

сарбозхоналарда бўлар, ҳарбий машқлардан сўнг, кеч киргач.. тўғри Кофиробод гузарига йўл оларди. А. Ҳакимов, Илон изидан.

САРБОН [ф. ساربان — тую боқувчи, тую хайдовчи: бошлаб борувчи] **1** Карвонбоши; туякаш. *Сарбон чол бош чайқайди, Туясини ниқтайди.* Х. Даврон.

2 кўчма Йўлбошчи, раҳбар, раҳнамо. *Бригадани олдинга бошлашда Рустам сарбон бўлиб қолди.* А. Эшонов, Сарбон. *Агар ҳаёт бўстон эса, боғбон муаллим, Агар ҳаёт карвон эса, сарбон муаллим.* Шуҳрат, Сенинг севгинг.

САРВ [ф. سرو — конус шаклли, игнабаргли дарахт; қадди расо, хушқомат] **1** бот. Жануб мамлакатларида ўсадиган, игнабаргли доим яшил тик дарахт. *Икки четига сарвлар ва шамшодлар экилган салқин хиёбонларда ҳеч кимса кўринмасди.* М. Маҳмудов, Мангу куй излаб. *Ой келиб, сарв узра қўнди, Бўлди ойрухсор сарв.* Э. Воҳидов. *Сарв турларидан ихота ўрмонлар, истироҳат боғлари барпо этишда фойдаланилади.* «ЎзМЭ».

2 кўчма поэт. Қадди-қомати, баста келишган, хушқомат. *Жонга ҳузур, дилга фарағат, Сарвим яхши, сунбулим яхши.* О. Юнус.

САРВАР [ф. سرور — бошлиқ, раҳбар; йўлбошчи] **1** Йўлбошчи, раҳбар, раҳнамо. *Чанг бўлдилар кўк баробар Чанг кўтарган лашкарлар. Кайҳисравлар ва Доролар, Искандардек сарварлар.* Э. Воҳидов, Шарқий қирғоқ.

Сарвари коинот Бутун борлиқни, замину кўкни яратувчи, сарвари олам [худонинг сифат (ном)ларидан бири]. *Чоллар каби «ё ҳаётаннабий!» ёки кўпичча «ё сарвари коинот!» деб, бошини эзрак жим ўтирди.* Ойбек, Танланган асарлар.

2 Сарвар (хотин-қизлар ва эркаклар исми).

САРВАТ [а. ثروت — бойлик, қатта мол-дунё; мўл-кўлчилик] эск. кт. Бойлик, давлат. *Олмиш юракдан ишқ жойин Шайтони сарват, ҳирси зар.* «Саодат».

САРВАТДОР [а. + ф. ثروتدار — бойлик, мол-мулк эгаси] Қатта бойликка эга бўлган; бадавлат, давлатманд. *Кутилмаган ерда шаҳарнинг энг олдинги аён ва сарватдорларидан бўлган Салим шарбатдор деганнинг Комилбек исмли ўғлидан совчилар келиб қолди.* А. Қодирий, Ўтган кунлар.

САРВЗОР [ф. سروزار] Сарв дарахтлари ўсиб ётган жой, майдон, боғ. *Ҳирот вилоятига салқин нафас ёйиб ўтувчи шамоллар сарвзорларда изғийди.* Ойбек, Навоий.

САРВИНОЗ [ф. سرويناز] Гўзал ва серишва нозанин. *Мизробишоҳнинг қизи бор. Шундайин сарвинози бор.* «Гулшанбоғ».

САРВИРАВОН [ф. سروروان — сарвдек юриш] Қадди-қомати келишган, юриши жозибали гўзал (аёл); нозанин; севикли ёр. *Эй сарвиравон, надур хаёлинг, Жон ўртади ваъдаи висолинг.* Нодира.

САРВИХИРОМОН [ф. سروخرامان — сарвдек нозик юришлар] айн. **сарвиравон.** *Ҳайронлиғим аҳволини, эй булбулу қумри, Фарёд чекиб, сарвихиромони айтинг.* Ҳ. Гулом, Машғал.

САРВҚАД [сарв + қад] Қадди тик, чиройли. *Сарвқад қиз.* ■ *Йўл четидаги қатор сарвқад тераклар барги ялт-юлт қилади.* «Ёшлик». *Мен-ку шеър мажнунидирман, сарвқад Лайло қалам.* Э. Воҳидов.

САРВҚОМАТ [сарв + қомат] қ. **сарв 2.** *Юзи гул, сарвқомат, сочи сунбул, Кўзи наргис каби мастона, бир кел. Ҳабибий.*

САРГАРДОН [ф. سرگردان — л.м. боши айланувчи: адашиб, дайдиб юрувчи; паришон, ночор, нотавон; дайди] **1** Бекорга оворай сарсон бўлиб юрган, ўз йўлини топа олмаган, парокандаликда юрган. *Саргардон бўлмоқ. Саргардон кезмоқ.* ■ *Менга у қанча азоб берган, шу деб қанча юртларда яланг оёқ саргардон кезганман.* С. Аҳмад, Қадрдон далалар. *Бу жудодик мени қилди саргардон, Сиздан дуо тилар Ҳасандек полвон.* «Ҳасанхон». *Шералихон саргардон бўлиб.. етти йилдан сўнг бир чет бозорга келиб ўтирди.* «Эрали ва Шерали».

Сарсону саргардон қилмоқ Овора қилмоқ, қийнамоқ, тўғри йўлдан адаштирмоқ.

2 этн. Қадимги ўзбек урф-одатларига кўра, оғир ётган беморнинг (ирим билан) бошидан айлантириб (ўгириб) бериладиган садақа пули. [Мастура:] *Нега ҳаром бўлар экан? Саргардоннинг пули эмас бу, айланай! Дўппи тикиб тўплаганман, яхши йигит!* Ҳамза, Паранжи сирлари.

САРГАРДОНЛИК Саргардон бўлиб юриш. -*Фаму саргардонлик сен билан мени жаҳонгашта қилиб юборди, — деди Меъмор хотинига.* Мирмуҳсин, Меъмор.

САРГАШТА [ф. سرگشته — л.м. боши айланган: хайрон; уятда қолган; саргардон] Бошидан кўп иш ўтган, оворая саргардон; ночор, нотавон. *Бобомнинг айтишларича, бир замонлар қишлоғимизга саргаштаю жаҳонгашта бир мусофир келиб қолган экан. С. Кароматов, Олгин қум. Бир қарасам, тинч, саргаштасан, Бир қарасам, жаҳонгаштасан. Х. Салоҳ, Излар ва ҳислар.*

САРГУЗАШТ [ф. سرگذشت — бошдан ўтган, кечирилган] Бошдан ўтган воқеа-ҳодисалар, бошдан кечирилган кечинмалар. *Саргузашт фильмлар. Саргузашт асарлар. ■ Тезроқ саргузаштинг сўйла, чироғим. «Тоҳир ва Зухра». Ҳамма уни гапга солиб, кўрган-кечирган саргузаштларини билишга қизиқар эди. С. Аҳмад, Қадрдон далалар.*

САРДАК [ф. سرديگ — қозондаги овқатнинг юза қисми] 1 Қайнатма овқатнинг юзига чиққан ёғ. *Шўрванинг сардаги.*

2 Айрим қайнатма овқатларнинг алоҳида олиб совитиб қўйилган ёғли шўрваси. *Сардакка бостирилган товук.*

3 Қуюқ таом устига солинадиган (қуйиладиган), махсус тайёрланган қайла. *Тайёр таомни дастурхонга тортишда қовлида сузиб, лаган ёки ликопчаларга тақсимлайсиз, сардаги ҳар бир ҳўрандага алоҳида пиёлаларда тортилади. Газетадан.*

САРДАКЛИ Юзасига сардак чиққан; сардак солинган, суртилган. *Она битта чапати ва бир тарелкада озина сардакли гурунч келтирди. Ойбек, Нур қидириб.*

САРДАРА [ф. سردار — пештоқ; бош, асосий дарвоза] *кт. Энг катта, асосий эшик; дарвоза. Мадрасанинг сардараси. ■ Мана, яна сардара олдида иккиланиб тураркан, қизнинг сояси кўриниб қолармикан, деган умид билан чироқ порлаган таниш деразадан кўз узмасди. Ж. Абдуллахонов, Хонадон.*

САРДОБА [ф. سرداب / سردابه — совуқ сув] *тар. Сув танқис бўлган худудларда уни тўплаш ва сақлаш учун деворлари цилиндрсимон, юқори қисми аъло сифатли пишиқ гишт ва ганчдан гумбаз шаклида махсус қурилган, атрофида сув қирадиган тешиклари бўлган ҳовуз. Турнақатор тизилган меш-кобчилар сардобадан сув олиб, катта йўлга сув сепишарди. О. Ёқубов, Кўҳна дунё. Карвон сардобани гир айланиб ўраб, ҳамма ўзини муздек сувга урди. «Шарқ юлдузи».*

САРДОР [ф. سردار — л.м. калласи, боши бор: бош қўмондон, саркарда] 1 *тар. Эрон ва Афғонистонда: йирик амалдор, қабила бошлиғи; Ўрта Осиёда: қўшин қўмондони; Усмонлилар салтанатида: дала армияси қўмондони. Темуралиқ жанг либосларини кийиб, сардор Шохмурод Кўҳистоний билан биргаликда отга миниб, қўшин тўпланаётган томонга жўнади. «Саодат».*

2 Умуман, қўмондон, бошлиқ. *Сенга бермас Гўрўғли ҳеч омона, Хон Гўрўғли Чамбил элнинг сардори. «Маликаи айёр». Кемада айғоқчилар сардоридан бошқа икки киши ҳам бор эди. Мирмуҳсин, Темуралиқ.*

3 кўча Йўл-йўриқ кўрсатувчи; илғор, зарбдор. *Наманганнинг анори, кимни қилмас хумори, Наманганликлар нори, йигитларнинг сардори. Т. Тўла.*

САРДЎЗ [ф. سردوز] *шв. Боғлаш, маҳкамлаш учун ишлатиладиган ингичка кандир каноп. Кун қизий бошлағач, Аваз эшикка сардўз боғлаб, Полвонёп бўйидаги ўша салқин оромхонага равона бўлди. С. Сиёев, Ёруғлик. Қўлида оқ қоғозга бежирим ўралиб, устидан оқ сардўз билан чиройли боғланган [совға]. М. Қўшжонов, Дийдор.*

САРЖА [фр. serge < лот. sericus — шойи, ипакли] Табиий ёки кимёвий толалардан саржа (шойисимон) ўрилишда тўқиладиган газлама. *Саржа астар.*

САРЖИН [р. сажень — уч аршинга тенг узунлик ўлчови] 1 Уч газга (аршинга) тенг узунлик ўлчови (2,13 м га тенг). *Икки саржин девор. ■ Йигитали бундоқ қараса, ҳозир кўприкнинг ўша ерида турган экан. Ўн-ўн беш саржинча настда ҳайқириб сув оқмоқда. Д. Нурий, Осмон устун.*

2 Бўйи уч газ, баландлиги бир ярим газ қилиб маълум тартибда терилган палён ўтин; шу миқдордаги палён ўтин ўлчови. *Ўрмонжон Абдусамодқори билан тил бириктириб, икки юз йигирма беш саржин ўтин сотган ва пулини иккови бўлишиб олган. А. Қаҳҳор, Қўшчинор чироқлари.*

3 *с.т. Арралаб, ёриб тайёрланган ўтин. Нурилло бир қучоқ саржинни ўчоқ олдига тарақлатиб ташлади. С. Юнусов, Кутилмаган хазина. Темир печкада тол саржини чирсиллаб ёнар.. эди. Х. Фулом, Сенга интилама.*

САРЖИНЧИ 1 Ўтин кесиб ва ёриб саржин қилувчи киши. *Бир куни бир одам боғи-*

даги тўнкаларни ёрдириш учун бозордан иккита саржинчи олиб чиқибди. Шукрулло, Жавоҳирлар сандиғи.

2 эск. Ер ўлчовчи.

САРЖИҒА [ф. + т. سرچيغه] фольк. Бош кийимига тақиладиган жиға. Барчин Кўкалдошининг бошидаги саржигани кўриб, алларнинг зўри шу — Кўкалдош эканини билиб, алларга қараб, олти ойга муҳлат сўраб, бир сўз деб турган экан. «Алпомиш».

САРИ I (б.к. ва ж.к. билан) кўм. 1 Маълум томонга, томон қараб. Инсоф сари барака. Мақол. ■ Ахир, балиқ ҳам сувга интилади, кўкат ёруғлик сари буй чўзади. С. Сиёев, Ёруғлик. [Аваз] Қараса, беихтиёр Табибийнинг уйи сари йўл солибди. С. Сиёев, Аваз.

2 **-ган** аффиксли сфдш. билан) айн. **сайин I**. Кўёшли баҳор эртаси жуда ҳам ёқимлики, юрган сари, юргинг келади. А. Мухтор, Опа-сингиллар.

Бир сари Майли эди, майли-ку. Бегона бўлса ҳам бир сари эди, гаплашиши осонроқ бўларди. П. Қодиров, Юлдузли тунлар. **Борган сари айн. борган сайин қ. сайин 2.** Лекин кўчада қатнов, қий-чув борган сари кучаймоқда. Ойбек, Танланган асарлар. **Инсоф сари барака** Инсоф қанча кўп бўлса, барака шунча кўпаяди, деган маънодаги ибора.

САРИ II шв. Энг яхши, сара. [Гўрўғли] Ғиркўкка қамчи бериб, аждаҳога кўндаланг бўлиб, сари ёй билан отиб, қилич билан чопиб ташлаб, катта Мастонни бир ўлимдан айириб юборган жойи бор эди. «Хушкелди».

САРИ III шв. Сарик, сариқ рангли. Йилқи бозори, той бозори, Қурт билан сари мой бозори. «Равшан».

САРИ IV [ҳинд. + ф. ساری] (а-чўзиқ) Ҳинд аёлларининг юбка шаклида белга бир неча бор ўралиб, бир учи рўмол қилиб бошга ташлаб кўйиладиган кийими. У сарини ечиб, уй кийимларини кийди, ювиниб, айвон четига ўтирди. Ойбек, Нур қидириб.

САРИЁҒ Мол сутидан ажратиб олинган ёғ; маска. Сигир сутидан широбча, қаймоқ, сариёғ тайёрланади. К. Маҳмудов, Ўзбек тансиқ таомлари. Ма, болам, кулча билан сариёғ. О. Ёқубов, Эр бошига иш тушса.

САРИМАҒИЗ: саримағиз бугдой Бугдойнинг олтинранг, сариқ, маҳаллий нави. Эгамберди, шу бугдойнинг вазнига бараварлаб саримағиз ундан торт, айбонанг учун устига

ўзимиздан бир пуд ун ҳам қўш! А. Қодирий, Обид кетмон.

САРИМОЙ шв. айн. сариёғ. Ҳар ноннинг устида куйдирилмаган саримой, кўпининг олдига қанд чой [бор эди]. «Далли». Саримойдай сўлқилдоғон ғоз ўмровли қизларинг. Ғ. Фулом.

САРИМСОҚ I Пиёзлар туркумига мансуб, икки ёки кўп йиллик ўсимлик ва унинг овқатга ишлатиладиган ўткир ҳидли, аччиқ пиёзи; сабзавот экинги. Саримсоқ, райҳон ҳиди димоққа урилди. Ў. Умарбеков, Ёз ёмғири.

Саримсоқ пиёз айн. саримсоқ I. Олдига ёйиб қўйган яхна гўшт, шоколад, саримсоқ пиёз, олмаларни битта-битта лунжига тиқарди. С. Аҳмад, Сайланма.

2 Саримсоқ (эркаклар исми).

САРИН I Тоза ва янги; оромбахш, салқин ва ёқимли. Сарин баҳор. Сарин шабада. ■ Умида бир меъёрда шовуллаган куз ёмғирининг сарин салқинидан сал ором топгандек бўлди, бўшашиб, креслога чўкди. А. Мухтор, Чинор. Октябрь ойида оқшомлар сарин ва мусатффо, кундузлар дўст нафасидек илиқ, оромбахш бўлади. Т. Жалолов, Олтин қафас. Мана, кузак келди, еллари сарин, Ёйликдаги каби тиниқ, бегубор. «Ёйлик».

2 Нафис ва ёқимли. «Наврўзи ажам» бошқа бир сарин кўйга уланди ва машиқлар водий йигитлари севиб айтадиган «Тонг отгунча» ялласини бошладилар. Ҳ. Фулом, Тошкентликлар.

САРИТОЛ бот. Толларнинг ёғочи мўрт хили; сариқ тол. Жаноқ ерда ўсган саритол, сўзларимга қулоғингни яхши сол. «Тоҳир ва Зухра».

САРИШТА [ф. سرشته — бирор ишни билиш, хабардорлик; калаванинг учи: бирор масалани ҳал қилиш йўли] айн. **саранжом.** Хотиннинг сариштаси — одамнинг фариштаси. Мақол. ■ Ёруғ, кенггина уй саришта эди. С. Зуннунова, Гўдак ҳиди. Баланд иморатлар, кенг ва саришта асфальт кўчалар Йигиталининг диққатини ўзига тортарди. Д. Нурий, Осмон устуни.

САРИШТАЛАМОҚ Саранжом-саришта қилмоқ, тартибга келтирмоқ. Уй бекаси бепартиб хонани саришталашга тушди. Ж. Абдуллахонов, Тўфон.

САРИҚ I 1 Сомон, зарчува, тилла каби нарсалар тусидаги ранг. Сарик ипак. Оч сариқ ранг. Тўқ сариқ. ■ Дарахтлардаги са-

рик барглар тўкилиб тугалган, ер юзи ўзининг қишки сариқ кийимини кийган эди. А. Қодирий, Ўтган кунлар.

2 Малла ранг, малла (соч, тук, тери ҳақида) *Сариқ соч*. ■ *Рустам унинг узун мўйлови, кўкиш кўзларини қоплаб олгудай қуюқ, сариқ қошларини кўрди-ю, юраги шувиллаб, ўзини орқага ташлади. Ў. Ҳошимов, Қалбингга қулоқ сол.*

Сариқ ирқ Монголоид ирқининг эскирган номи.

3 *от* Тухумнинг оқсил моддаси ўрта-сидаги қисми. *Тухумнинг оқини оқлаб е, сариғини – сақлаб. Мақол.* ■ *Тухум па-чақланган эди. Унинг сариғи оққа аралашиб, чаккамдан сизиб, юзимга оқмоқда эди. Ф. Фулом, Шум бола.*

4 *от с.т.* Жигардаги жиддий салбий ўзгаришлар туфайли тери, кўз оқининг саргайишидан иборат оғир ва юкумли касаллик номи; гепатит. *Сариқ касалиги.*

Сариқ карточка *спрт.* Футбол матчида ҳакам томонидан ўйинчига огоҳлантириш ёки енгилроқ жазо белгиси сифатида кўрсатиладиган сариқ рангдаги карточка. *Матерацци ҳакам тарафидан сариқ карточка билан жазоланди.* Газетадан. **Сариқ матбуот** *кўчма* Уятли, шармандали, жанжалли воқеаларни ёритишни мақсад қилиб олган, сийқа, саёз, паст сифатли матбуот ҳақида. *Иккинчи жиддий қусур шуки, кўпчилик қаламкашлар бугун «сариқ матбуот» саҳифаларида эълон қилинаётган ўртамиёна машқларни шеър, ҳикоя, дея улардан андоза олиб, ижод қилмоқдалар.* Газетадан. *Шунинг учун ҳам кўча-кўйда «сариқ матбуот»нинг воқеа изидан қувувчи ҳикояларига одамлар ўрганиб боряпти.* Газетадан. **Сариқ палак** *қ.х.* Вилт касаллиги, вилт. **Сариқ сув** *айн. назла.*

Сариқ сумалак 1) қамиш билан ёпилган том бўғотларида илк баҳорда ёгингарчиликдан кейин ҳосил бўладиган сарғиш сумалак; 2) шундай сумалак ҳосил бўладиган давр, қишнинг охири. -*Қишдан қитдай бор: хут-ют, сариқ сумалак, аямажиз.. қаторлашиб турибди, – қулумсиради Раъно.* Ойбек, Улуг йўл. **Сариқ чақа** 1) чақа (пул); жуда оз миқдордаги, арзимас пул. *Мана, хотиним ётиб қолди, ёстиқдан бошини узишга дармони йўқ. Киссамда сариқ чақа йўқки, бечоранинг оғзига ёқар овқат берсам.* Ойбек, Танланган асарлар; 2) жуда паст, арзимайдиган; эйтибор-

га лойиқ эмас. *Оммани эргаштира олмаган раҳбарнинг қадри – сариқ чақа.* И. Раҳим, Ихлос. **Сариқ чақалик** (*ёки чақага арзимайдиган*) Ҳеч нарсага арзимайдиган, бир пулга қиммат, арзимас. -*Сўзни тангадай жаранглатиб сўзлашга устасиз. Аммо ҳозирги сўзингиз пучак, сариқ чақага арзимайди, – деди Мирҳайдар.* Ойбек, О. в. шабадалар.

САРИҚ II Ўрта Осиёдаги туркий халқлар таркибига кирган қабила номи. *Сариқларнинг Шимолий Хитойда қолган гуруҳлари шу ерда яшовчи уйғурлар билан қўшилиб, улар ичида сариқ-уйғур этник гуруҳини ташкил этган.* «ЎзМЭ».

САРИҚЛИК Сариқ рангда бўлишлик, маллалик. *Раненинг сариқлиги. Юзнинг сариқлиги.*

САРИҚСОП *зоол.* Қарчиғайлар оиласига мансуб йиртқич қуш; сор.

САРИҚЧА Айрим ҳолларда тилнинг учида пайдо бўладиган сўгалсимон чиқик, тирсак. -*Алдасам, тилимга сариқча чиқсин! – қасам ичди бола.* «Ёшлик».

САРИҚҚАМИШ *бот.* Бошоқли ўсимликларга мансуб, попуксимон тўпгулли кўп йиллик ўсимлик.

САРКАЗМ [юн. sarkasmos < sarkaro – гўштни нимталайман, узиб, юлиб оламан] Сатирик тасвирида фош этувчи муросасиз кулги, истехзоли таъна асосига қурилган фикр-мулоҳаза; бадий услуб воситаларидан бири. *Адабиётшуносликда сарказм антик даврдан маълум.* «ЎзМЭ».

САРКАРДА [ф. سرکرده – бошчилик қилувчи; бошлиқ, раҳбар; доҳий; кўмондон] 1 *тар.* Кўмондон, лашкарбоши. *Саркарда Темур Малик ҳам терга ботиб, анча эсанкиради. Агар у бир лаҳза ташаббусни қўлдан берса, отдан қулаши ҳеч гап эмас эди.* «Саодлат».

2 *кўчма* Бошлиқ, йўлбошчи. *Бир саркарда, йигитларнинг оғаси – Ўз элида обрўйи бор Авазнинг.* «Гулихиромон»

САРКАШ [ф. سرکاش – бош тортувчи; бўйсунмайдиган; мағруп] Бировга итоат этмайдиган, бўйин бермайдиган; итоатсиз, ўжар, қайсар. *Саркаш от. Саркаш одам.* ■ *Ота-она саркаш қизларининг жавобидан тахтадек қотишиди.* «Ёшлик».

САРКОМА [юн. sarx, sarkos – гўшт, эт + otos – хом, пишмаган: шиш, ўсма борлигини билдирувчи қўшимча] *тиб.* Асосан, би-

риктирувчи тўқималардан (суяк, пай-мушак ва б.) пайдо бўладиган хавфли ўсма.

САРКОР [ф. سرکار – ишбоши; бошқарувчи; назоратчи] **1 тар.** Маълум иш ёки соҳани бошқарган лавозимли киши; йўлбошчи. *Солиқ йиғиш ишларини бошқариш бек томонидан тайинланадиган саркор қўлида бўлган.* Ф. Озодаев, Тошкент тарихидан очерклар. *Бир кўрайин Гўрўғли саркорини, Кўрайин ёнида қирқ навкарини.* «Равшан».

2 Хива хонлигида: мудофаа истеҳкомлари ва қалъаларида ўтсочар қурол-тўпни олиб чиқиш ишларига бошчилик қилган одам.

3 Умуман, раҳбар, ишбоши, бошлиқ. *Ух-лаёлмас тунда бироқ Бош инженер Теша саркор.* Миртемир. *Саркор олим ўз атрофига қобилиятли ёшларни жалб қилиб, маишхур илмий мактаб яратди.* Газетадан.

САРКОТИБ [ф. + а. سرکاتب – бош, асосий котиб, мирза] *эск.* **1** Котиблар бошлиғи; бош котиб. *Раис кнопкани босди, шу он кабинетга масъул саркотиб Али Муллаёров кириб келди.* Ж. Шарипов, Хоразм.

2 Умуман, котиб. *Иккита.. столнинг бир-ида колхоз саркотиби Умарали, иккинчисида ҳисобчи Абдулқосимлар шугулланмоқдалар.* А. Қодирий, Обид кетмон.

САРКОФАГ [юн. sarx, sarkos – гўшт, эт + phagos – еювчи, еб қўювчи; очкўз] **1 тар.** Асосан, тош, мрамор, ёғочдан тўғри тўртбурчак шаклида, қайиқсимон қопқоқли қилиб ясалган, бадийий безак ва тасвирлари, ёзувлари бўлган тобут; тоштобут.

2 кўчма махс. Атроф-мухитни ядро реакторлари, қурилмалари чиқиндиларидан ҳимоя қилиш, унга радиоактив нурлар тушишининг олдини олиш мақсадида чиқиндиларни ёки ишдан чиққан реакторларни кўмиш учун қурилган қоплама иншоот.

САРЛАВҲА [ф. + а. سرلوحه – китобда лавҳа безак; титул варағи; эпиграф] Китоб, асар, мақола ва ш. к. нинг ёки уларнинг айрим қисмларининг номини ифодаловчи сўз ёки жумла. *Сарлавҳа қўймоқ.* ■ *Аҳмедов саҳифадаги материалларни кўздан кечиргач, умумий сарлавҳани товуш чиқариб ўқиди.* А. Қаҳҳор, Кўшчинор чироқлари. *Аҳмад очеркнинг сарлавҳасига ва авторига қаради.* Ф. Мусажонов, Ҳиммат.

2 эск. айн. пешлавҳа. Қишлоққа кирай йўлда Мана катта дарвоза. Дарвозага ёзилган «Колхоз» деган сарлавҳа. З. Дийр.

САРМАСТ [ф. سرمست – боши айланган, сархуш; кайфи ошган, маст; мағрур, кеккайган] **1** Андак кайфи бўлган, озгина ичган; ширакайф. *Сармаст одам.* ■ *Андак-андак меърида бошланган шароб ҳаммани сармаст этиб, гангир-гунгурни авжига миндира бошлади.* С. Кароматов, Бир томчи қон. *Маликул шароб маст-аласт майхўрларни сира хушламас эди, бироқ бу ёш сайёҳнинг сармаст қилиқлари самимий ва ёқимтой эди.* О. Ёқубов, Кўҳна дунё.

2 *поэт.* Мамнун, сархуш; масрур. *Ёмғирли кун эди, атроф жим, соқит, Маънос кўзларингга боқардим сармаст.* А. Орипов, Рухим. *Ажаб, ортиқ сармастан бугун, Кўкрагимга сиққудай олам.* Э. Воҳидов,

САРМОЯ [ф. سرمایه – капитал, пул; бойлик; асос, манба, сабаб] **1** Асосий савдо маблағи. *Уйлаб қаранг-а, давлатимиз ҳар йили мамлакатни кўкаламзорлаштириш учун миллион сўмлаб сармоя ажратади.* Н. Сафаров, Катта қарвон йўлда.

2 Умуман, маблағ, пул. *Найманчада ибтидоий таълим мактаби очиш учун фуқаро ўз ташаббуси билан сармоя жамғармоқда.* А. Мухтор, Опа-сингиллар. *Кўп қатори Абдураҳмон ҳам хатга тушган эди. Нўхат шўрва сотиб кун кўраётган отасининг сармоясини ўғлини олиб қололмади.* С. Кароматов, Бир томчи қон.

САРМОЯДОР [ф. سرمایه‌دار – сармоя эгаси] Катта сармоя эгаси. *Жанубий корейлик сармоядорлар юртбошимизнинг соҳани чуқур билишларига тан бердишлар.* Газетадан.

САРМУНШИЙ [ф. + а. سرمونشی – муншийлар бошлиғи; девонхона бошлиғи] *тар.* Амир, хон саройида бош мунший, бош котиб. *Сармуний хонасида Анвардан бошқа яна икки номанавис бор эди.* А. Қодирий, Мехробдан чаён.

САРНАЙЗА [ф. سرنيزه – найза учи] *тар.* Милтиқ найзаси. *Унда-бунда отилган милтиқлар товуши орасидан бир-бирига тегиб шақирлаган қилич ва сарнайзалар садоси.. эшитилмоқда.* С. Айний, Қуллар.

САРНИГҲУН [ф. سرنگون – боши эгик; ағдарилган, тўнтарилган] Ағдарилган, тўнтарилган, оёғи осмондан бўлган.

Сарнигун бўлмоқ **1)** ағдарилмоқ, тўнтарилмоқ; **2)** кўчма шарманда бўлмоқ, боши эгилмоқ, ерга қараб қолмоқ. *Шунча давлат топиб, обрў топиб, эл ичида сарнигун*

бўлишга кимнинг тоби бор. Ҳамза. **Сарнигун қилмоқ** 1) ағдармоқ, тўнтармоқ; 2) кўчма шарманда қилмоқ, юзини ерга қаратиб кўймоқ. -*Сен аҳмоқнинг бу ишинг ҳазрат олдидан менинг юзимни сарнигун қилди, — деди Норбўта.* Ф. Расул, Алолат.

САРНОМА [ф. سرنامه — хатнинг, мактубнинг боши; кириш, муқаддима] *кт.* 1 Номанинг, мактубнинг бошида ишлатиладиган, мунтазам қолип ҳолига келиб қолган ибора, ифода (мас., дуойи салом, алангали салом ва ш.к.).

2 айн. эпиграф.

3 кўчма айн. шиор. Сарнома қилиб олмоқ.

САРОБ [ф. سراب — хаёлий манзара, сароб; куруқ ваъдалар] 1 Атмосферанинг оптик ҳодиса — нотекис ҳароратга эга бўлган ҳаво шароитида нурларнинг ўзига хос сиёниши натижасида уфқ ортидаги (узоқдаги) нарсаларнинг хаёлий, сохта тасвирларининг пайдо бўлиши. *Даштни тўлдириб турган қуёш сели остида «оқаётган» Аму сароби мавжланади.* С. Нуров, Сув кўшиғи. *Узоқларда сароб жимирлайди. Кўл бетида қовжиратган янтоғу исирик сузиб юргандай..* С. Нуров, Нарвон.

2 кўчма Алдамчи тасаввур, хаёлот, хом-хаёл. [Навий:] *Мен ҳақиқат деб ўйлаган нарса сароб бўлиб чиқди. Мен салтанатимизни мустаҳкамламоқчи бўлдим, аммо ҳаракатларим елга кетди.* Уйғун ва И. Султон, Алишер Навоий. *Қани ўша бахт? Бахт деб излагани сароб экан.* «Ёшлик».

САРОЙ I Ўзбеклар таркибига кирган йирик қабилалар уюшмаси. *Саройларнинг таркибида бир қанча кичик ва катта қабилабор бўлган.* «ЎЗМЭ».

САРОЙ II [ф. سرای — уй, бошпана; қаср; карвонсарой; ёпиқ бозор] 1 *тар.* Хон, амир, подшоҳларнинг доимий қароргоҳи бўлиб хизмат қилган ҳашаматли катта бино; кошона. *Подшо уни ҳашаматли саройга чақиртирибди.* «Олтин бешик». *Бухоро амирининг саройидан бор-йўғи ўн-ўн икки чақиримлар чамаси узоқликдаги ғарби-жанубдан ўтадиган темир йўл станцияси — Когонда.. кўрсатилмоқда эди бу томоша.* К. Яшин, Ҳамза.

2 кўчма Саройдаги давлат бошқаруви; ҳокимият, салтанат. *Низомиддин нега салтанатга душман бўларкан? У ҳали бўз йигит, сарой олдидан катта обрўга эга бўлган*

меъморнинг фарзанди. Мирмуҳсин, Меъмор. *У Худойберган отанинг хон саройига яқинлигини билади.* С. Сиёев, Ёруғлик.

3 кўчма Саройга алоқадор, саройда яшовчи, хизмат қилувчи. *Сарой шоири. Сарой аёнлари.* ■ *Рўза тутуш шоҳу малайга баробар келган мажбурият бўлгани учун, сурнай ва нақора сарой аҳлини саҳарликка уйғотмоқда.* П. Қодиров, Юлдузли тунлар. *Ўтар бобонинг отаси Гадоийнӣз бобо ҳам хон табиби эди, сарой одамларидан ҳисобланарди.* С. Сиёев, Ёруғлик.

4 Умуман, истиқомат қилиш ёки бирор ижтимоий фаолият учун мўлжаллаб, замонавий меъморлик услубларида қурилган ҳашаматли катта бино ва мажмуалар. *Спорт саройи. Маданият саройи.* ■ *Гоҳ суюниб, хаёлида олтин саройлар қуради, гоҳ куюниб, ўзини тубсиз чоҳ ёқасида кўради.* М. Исмоилий, Фарғона т. о. *Ҳақиқий санъат саройи сингари қад кўтарган кўркам клуб биносининг олди шинам боғ.* Ж. Абдуллахонов, Орият.

5 Карвонлар, савдогарлар кўнадиган, меҳмонхонали, ҳовли ва отхонали жой; карвонсарой, работ. *Меҳмонмисиз, тарафмисиз, айтингла, Савдогар бўлсангиз, саройда ётингла* «Гулнорпари». [Ўтабек:] *Молимизни ортан туякашир шу саройга тайинланган эдилар.* А. Қодирий, Ўтган кунлар.

6 Омборхона, омбор. *Ғалла саройи.* ■ *Бизнинг Қаландар бой кузда камбағалларнинг пахтасини арзон-арзон сотиб олиб, саройига босиб кўяди.* М. Исмоилий, Фарғона т. о.

7 с.т. Бостирма ёки тўрт девор билан ўралган кенг бино. *Молларни саройга қаммоқ.*

САРОЙБОН I [ф. سرايبان — саройни кўриқловчи; қоровул] Хон саройи кўриқчиси. *Шу Ёвмит элининг бир саройбони бор эди.* «Гўрўғелининг туғилиши».

САРОЙБОН II Карвонлар ва савдогарлар кўнадиган сарой эгаси, кўриқчиси. *Саройбон қотма юзми.. йигитни иккинчи қаватдаги тор бир хўжерага жойлаштирар экан, унинг қаерданлигини, исмини, касбини сўради.* М. Осим, Ибн Сино қиссаси.

САРОМАД [ф. سراماد — ортик даражадаги, устун; машҳур, пешқадам] *кт.* Бирор соҳанинг кўзга кўринган, машҳур арбоби; пешво, пешқадам. *У [Султонмурод] барча мавжуд илмларни эгаллаб, замона олимлари-*

нинг пешвоси, саромади бўлишга тиришади. Ойбек, Навоий. *Хуросон олимларининг саромади* — мавлоно Шаҳобиддин. Ойбек, Навоий.

САРОНА [ф. سرانه — пай, улуш, ҳисса; жон бошига (солик)] *тар.* Жон бошига қараб солинган солиқ. — *Мирзо йиғит*, — *деди оқсоқол*, — *яқинда биз саронадан қутулган эдик.* Ойбек, Навоий.

САРОПАРДА [ф. سراپرده — подшоҳ чодир, қароргоҳи; ҳарам] *тар.* Хонлар, подшоҳларнинг бир қанча катта-кичик чодирлардан иборат муваққат қароргоҳи. *Саропарда ичидаги иккинчи муҳташам чодир «Саодат уйи» деб аталар эди.* П. Қодиров, Авлодлар довони.

САРОСАР [ф. سراسر — буткул, барча; бошдан-оёқ] *рвш. кт.* Бошдан-оёқ, бутунлай, батамом; давомида. *Гўёки беморнинг дарди энгиллашгандек, Авазинг кўнглида неча кунлар саросар кезиб юрган қора булутлар, офтоб нурларига дош беролмай, тарқаб кетгандек эди.* С. Сиёев, Аваз. *Сўнги дам чорасиз Муқанна сифат, Дил сўзим ўзингга айтмай саросар.* А. Орипов, Йиллар армони.

САРОСИМА [ф. سراسيمه — эсанкираш, довдираш; ғашлик, ғулғула; кўрқинч ҳолатида бўлган] Нима қиларини билмай, ўзини йўқотиш, парокандалик, гарангшиш, кўрқинч ҳолати. *Саросимада қолмоқ. Саросимага тушмоқ. Саросимага солмоқ.* ■ *Содда қишлоқ боласи дилига тугилган гапларни айтолмай, кўп вақт ич-этини еб, саросимада юрди.* С. Аҳмад, Уфқ. *Машраб ойисининг чехрасида акс этиб турган саросимага кўзи тушди.* О. Ёқубов, Эр бошига иш тушса.

САРОСИМАЛАНМОҚ *кам қўлл.* Ўзини йўқотмоқ; гаранг бўлмоқ; саросимага тушмоқ. *Табибулла, ҳозир чинданам Ваҳобов айтган денгиз тубига тушиб кетаётгандек саросималаниб, моторни учирди.* С. Кароматов, Сўнги бархан.

САРОСИМАЛИК Саросима ҳолати, саросима. *Саросималикка тушмоқ. Саросималикда қолмоқ.* ■ *Ёрмат ҳеч қандай қисилиш, саросималик сезмади, бўйинни чўзиб, у ёқ-бу ёққа алангади-да, одамлар орасини ёриб кирди.* Ойбек, Танланган асарлар. *Суворийлар дам-бадам орқасига қайрилиб, от қамчилар, улар орқасидан узоқ уфқда сарғиш тутундай тўзон тобора қуюқлашиб, су-*

ворийларни саросималикка соларди. А. Ҳакимов, Илон изидан.

САРПАРДА I [ф. سرپرده — бош, асосий парда] *тар.* Капа, соябонли арава ва ш. к. нинг катта пардаси; ёпинчиқ.

САРПАРДА II [ф. سرپرده] *мус. I* Муסיқа асари бошланадиган асосий парда. [*Умар полвон*] *Туябўзлов, жигарпора, сайқал, сарпардани бирин-кетин астойдил чалди.* К. Яшин, Ҳамза.

2 Нотада сатр бошига қўйиладиган ва ўзидан кейинги ноталарнинг номини ва баландлигини кўрсатадиган белги; калит. *Скрипка сарпардаси.*

3 Ўзбек сурнай йўлларидан бири.

САРПИНКА [р. сарпинка — Сарпа дарёси ва Сарепта қишлоғи номидан] Гуллари йўл-йўл ёки катак-катак ип газлама.

САРПО [ф. سروپا — бош ва оёқ; бош-оёқ кийим] **1** *этно.* Маълум бир шахсга ёки кўпчиликка атаб кўпичча тўй маросимларида ёки турли тантаналарда совға учун тайёрланадиган янги бош-оёқ либос. *Мартабали меҳмонга сарпо кийдирмоқ. Келинга сарпо юбормоқ. Бешик сарпоси.* ■ *Қизнинг қўша-қўша кийимлари бўла туриб, онаси «Қизимга ўн сидра бош-оёқ сарпо қиласизлар», деб туриб олди.* Газетадан. *Низомжон гапирга олмай, дирдир титраб турган эди, худди шу пайт куёвлик сарполарини кийиб олган Абзамжон кириб келди.* С. Аҳмад, Уфқ.

2 Умуман, кийим-бош. *Сарпо тикмоқ.*

САРПОЁҚ *кам қўлл. салб.* Саёқ, бекор, бемақсад сандирақлаб юрадиган; ялангоёқ. — *Мен ким-у, айт-чи, сен ким бўлибсан? Сенинг сарпоёқ ўғлингга гулдек қизимни бериб, охирагимни куйдирайми?* К. Яшин, Ҳамза. *Мен фалонман, онам пистончи деб валдирагунча, бу ерда қорангни кўрсатмай гум бўлмайсанми, сарпоёқ!* С. Сиёев, Ёруғлик.

САРПОЙЧАН Яланг оёқ; оёққа пайпоқ киймай ёки пайтава ўрамай пойабзални ўзини кийган ҳолда. *Қизил паранжисини чимматсиз бошига ташлаб, эски кавушини сарпойчан судраб олган Холнисо эшикдан кириб келди.* А. Мухтор, Опа-сингиллар. *Куз кириб, ҳаво анча салқинлаганига қарамай, Тешабой ташқарида яқтакчан, сарпойчан юрган эди.* М. Исмоилий, Фарғона т. о.

САРПО-СУРУҚ Турли хил сарполар. *Онамнинг қариндошлари сарпо-суруқ, иззат-икром билан кузатиб қолдилар.* Х. Султонов,

Онамнинг юрти. *Ота-бувадан қолган удумни бузиб бўлармиши? Сарпо-суруқ олиб, битта патнусда миёнча тугиб бораман.* С. Аҳмад, Қадрдон далалар.

САРПҶШ [ф. سرپوش — қозон ва ш.к. нинг устини ёпувчи нарсa, қопқоқ] кам қўлл. айн. **қопқоқ.** -*Хотин чиқиб кетгандан кейин, тандирнинг сарпўшини олиб, бир оз эркинроқ нафас олдим, — деди Шум бола.* Ф. Фулом, Шум бола. *Хурмача билкиллаиди, Сарпўшини олиб қўй.* «Кўшиқлар».

САРРОВ [ф. سرراو] бнк. Иморатнинг тўсини ёки стропилалари тагига қўйиладиган узун ёғоч тўсин. *Том ёпиш учун сарров солмоқ. Сарров қўймоқ.* ■ *Мирзатерак баланд ва тўғри ўсади, ундан тўсин, сарров ва синчустунлар сифатида яхши фойдаланилади.* Газетадан. -*Анави уяда, — Абдумажид осма лампани олиб, сарровга солинган қалдирғоч уясини ёритди.* С. Анорбоев, Йўлда йўлдош бўлганлар.

САРРОЖ [а. سراج — эгарсоз, эгар-жабдуқ ясовчи] От-арава абзали тайёрловчи уста. *Сайисга айт: саррождан дарҳол харид қилсин қайрилма эгар.* А. Мухтор, Тонг билан учрашув. -*Ҳа, Абдунаби саррож ҳам бандаликни бажо келтирди, — деди чол Мирҳайдарга.* Мирмуҳсин, Тунги чақмоқлар.

САРРОЖЛИК 1 Саррож касби, хунари. *..тор ҳужрасига кириб, саррожлик хунарини қилар, қайишлар бичиб тикар эди.* М. Муҳаммаджонов, Турмуш уринишлари.

2 Эгар-жабдуқ растаси. -*Кўкалдош мадрасасининг битта мезанаси қийшайиб қолди, саррожликни Мочаловнинг миршаблари талади, — деди Шум бола Ҳожжи бобога.* Ф. Фулом, Шум бола.

САРРОФ [а. صراف — пул алмаштирувчи; кассир; солиқ йиғувчи] Пул айирбошловчи; йирик пулни майдалаб бериш ёки чет эл пулини бирор мамлакат пулига алмаштириб бериш иши билан шуғулланувчи ва шундан фойда кўрувчи шахс. *Тимга кираверишдаги тоқнинг икки томонида шойи чопон кийган, симоби салла ўраган саррофлар олдиларидаги баркашга тангаларни уйиб ўтирар эдилар.* М. Осим, Элчилар. XI асрда яшаб ўтган Носир Хусравнинг маълумотларига қараганда, биргина Исфаҳонда 200 тача сарроф бўлган. «Фан ва турмуш».

САРРОФЛИК Йирик пулни майдалаб бериш ёки чет эл пулини бошқа мамлакат

пулига айирбошлаш билан шуғулланиш, сарроф касби.

2 тар. Бозорда саррофлар дўкони жойлашган раста, саррофлар қатори. *Саррофликда пул майдаламоқ.*

САРСАБИЛ [ф. سلسبيل — жаннатдаги булоқ номи; соф, жаннатий сув] бот. Униб чиқмаган (ер остидаги) ёш пояси ва новдалари сабзавот сифатида овқатга ишлатиладиган кўп йиллик ўсимлик; сабзавот ва манзарали экин. *Сарсабилдан аспаргин олинади.* «ЎЗМЭ».

САРСАРИ [ф. سارسرى — бепарво, эътиборсиз; енгилтак] 1 *поэт.* Тинимсиз; жонсарақ. *Сарсари кезмоқ.* ■ *Мана, қимматлигим, яна баҳор келиб, Сени излаб юрди, кезди сарсари.* Зулфия.

2 Бекорчи; санқи, дайди. *Ажал, бошимизда кезма сарсари, Йўлимизни кесма, эй ёвуз шамол!* Р. Парфи, Кўзлар. *Ўтирсанг — замину юрсанг — соянгман, Изингда сарсари тўзонман, чангман.* Р. Бекниёз, Тўтиё.

САРСОН [ф. سراسان < سراسام — бошдаги шиш; бош айланиши; менингит] Ўз йўлини топа олмаган, овора, саргардон, адашган. *Сарсон ўтган неча насллар Тополмасдан туғилган жойин.* А. Орипов. *Мен йўлларда сарсонман, ҳуморимни излайман.* «Ойсулув». *Салимани бекорга сарсон қилгани учун йўл-йўлакай Замира аччиқ-аччиқ гап эшитиб олди.* Ҳ. Назир, Бир туп гўза.

САРСОНГАРЧИЛИК Беҳуда қатнаш, елиб-югуриш; овора бўлиш; дарбадар кезиш. [Рихсиев:] *Қанчадан-қанча оворагарчилик, сарсонгарчилик!* [Зиёдулла:] *Сарсонгарчилиги борми, шу баҳона Тарлон икковимиз шаҳарни сайил қилиб келяпмиз.* Т. Мурод, От кишнаган оқшом.

САРСОНЛИК айн. *сарсонгарчилик.* *Зулминг билан, золим фалак, Сарсонликда бўлгум ҳалак.* «Тоҳир ва Зухра».

САРСОН-САРГАРДОН Ниҳоят даражада сарсон, овораи сарсон. *Қонуний талабимизни вақтида бажармай, сарсон-саргардон қилган одамларни жазолаш ўрнига, уларнинг бошини силаб.. ўз обрўйимизни ерга уришимиз керакми?* Шукрулло, Сайланма.

САРСОН-САРГАРДОНЛИК Сарсонликдаги ҳаёт, аҳвол. *Уруш туфайли оналаридан бевақт жудо бўлган, сарсон-саргардонлик бошларига тушган гўдакларнинг аччиқ қисмати Маҳкам акалар оиласи*

билан Муборакхонни бир-бирларига боғлаб қўйган эди. Р. Файзий, Ҳазрати инсон.

САРСУЪЗАН [ф. سرسوزن — катта игна] махс. Аёлларнинг бош кийимига тақилдиган (қадаладиган) тўгноғич; заргарлик буюми. ..яланг оёғидан захри қаттол зирапчани игна ёки сарсуъзан билан авайлабгина.. олган аёл эди. А. Дилмурод, Фано даштидаги куш.

САРТ [ф. سارت < санск. sarthavaḥa — карвонбоши, савдогар] тар. Қадимда Ўрта Осиёдаги шаҳар ва қишлоқларда яшаб, деҳқончилик, савдо ва ҳунармандчилик билан шуғулланиб келган туркий халқлар (жумладан ўзбеклар).

2 Чор Россияси ҳукмронлиги даврида ҳозирги Ўзбекистон ҳудудидаги маҳаллий халққа европаликлар томонидан берилган ном. *Наҳотки, сарт одам бўлмаса? Гуноҳим нима экан ахир!* — деб ўйлади Ботирали. С. Аҳмад, Сайланма. *Бир неча қадам нарида, кўчанинг ўртасида, бир ўрис миришаб, икки сарт миришаб, қиличини яланғочлаб, Ёрматни олиб келишар эди.* Ойбек, Танланган асарлар.

САРТАРОШ [ф. سرتراش — бошни қирувчи, қиртишловчи] Соч-соқол олувчи уста. *-Худога шукур, мана, Муллажон сартарош бўлиб, камлик кўраётгани йўқ, — деди кампир Шодига.* Э. Раймов, Ажаб қишлоқ. *Йигит ойнага боқиб, мўйловини чимириб, сартарошга раҳмат айтди.* Ойбек, Танланган асарлар.

САРТАРОШЛИК 1 Одамларнинг соч-соқолини олиш билан шуғулланиш, сартарош касби. *Утар бобо.. табиблик ва сартарошлик туфайли орттирган беш-ўн тангасини ҳовлини кенгайтириб, уй солишга сарфлади.* С. Сиёев, Ёруғлик.

2 айн. сартарошхона.

САРТАРОШХОНА [сартарош + хона] Сартарош дўкони, сартарошлик. *Бир неча кундирки, сартарошхона очиқ. Аваз азонлаб туриб, дўконига шошилади.* С. Сиёев, Аваз.

САРТАХТА [ф. سرتخته — катта, асосий тахта] этн. Ўлик ювиладиган тўрт оёқли пастак (хонтахтага ўхшаш) стол.

САРТИА [ф. سارتیه < санск.] Сартлар (қ. сарт 2). *-Ҳазрати подшоҳимизнинг ўз фуқаролари мусулмонлар.. бизнинг Туркистон сартиялари ҳам фармонбардор бўлиб, хусусан ана шу қаттол жанг кунларида ёрдам бер-*

моқлари фарздор, — деди қаландарлардан бири халойиққа. Ф. Фулом, Шум бола.

САРТОПО [ф. سرتاپا — бошдан оёққача] Бутунлай, батамом, бошдан-оёқ; бошидан охиригача. *У кунлар ўчди менинг Кўзларимдан сартопо.* Миртемир. *Айниқса, Хатиб домла бу кун сартопо бахтсизликка учраб, сувга тушган мушукдек тараниб қолади.* А. Қодирий, Обид кетмон. [Қози:] *Сен бир камбағалсан. Ўз жонингга жабр қилма, сартопо фалокатларга дучор бўлма, деймиз.* Ҳамза, Танланган асарлар. *Умрида қўшиқ айтмаган одам, қизаринқираб, ён-атрофга олазарак сартопо назар ташлаб олди.* Ш. Бўтаев, Қўрғонланган ой.

САРУПО [ф. سروپا — бош-оёқ (кийим)] юқ. усл. айн. сарпо. *-Жанобларини янги сарупо ва улуг мартаба билан табриклаймиз, — деди Ҳусайн.* М. Осим, Сехрли сўз.

САРФ 1 [а. صرف — пулни майдалаш; ишдан озод қилиш, харж, харажат; чиқим] 1 Бирор мақсад учун харж бўлган пул, маблағ; чиқим, харажат. *Пахтадан олинган кўшимча ҳосил барча қилган сарфларимиздан анча ортиқ бўлди.* Газетадан. *-Қаранг, бировларнинг болаларини пул сарф қилиб, вақт сарф қилиб, текинга ўқитса-я!* — деди Матқовул. М. Исмоилий, Фаргона т. о.

2 Умуман, бирор мақсад учун ишлатилган, кетган ёки кетадиган нарса миқдори. *Материал сарфини тежаб-тергаб турмоқ.* ■ *Электр энергияси сарфини ҳар кун назорат қилиш одатга айланиб қолади.* Газетадан.

САРФ 2 [а. صرف — турланиш, тусланиш] эск. айн. морфология. *Ўзбек тили сарфи.*

САРФАРОЗ [ф. سرفراز] эск. айн. сарафроз. *Барча неъмат бир томону шеър, соз, Шеър бирлан бизни айланг сарфароз.* Э. Воҳидов, Мухаббат.

САРФИЙ [а. صرفى — морфологик, грамматик] эск. айн. морфологик.

САРФИЯТ [а. صرفیت — харажатлар, сарф қилинган нарсалар] кам қўлл. кт. Сарф қилиниш; сарф-харажат. *Ўсимлик орқали ва каналлар орқали сув сарфияти даражаси, айниқса, Ўрта Осиё иқлими шароитида юқори бўлади.* «Фан ва турмуш».

САРФЛАМОҚ 1 Харажат, чиқим қилмоқ, сарф қилмоқ. *Пул сарфламоқ.* ■ *Пулни беҳуда сарфламоқ, мулла, уч-тўртта гилам, бир-иккита сизир олиб қўйинг.* П.

Турсун, Ўқитувчи. *Тожи ёш хотинини яхши кўриб, унинг тўйи учун бор-йўғини сарфлаб юборган эди.* Мирмуҳсин, Меъмор.

2 Ишлатмоқ, фойдаланмоқ, кетказмоқ, сарф қилмоқ. *Материални тежаб сарфламоқ. Меҳнат сарфламоқ. ■ Музей залларини безатида илмий-таъмирчилик устaxonаси меъморлари катта куч-ғайрат сарфладилар.* Газетадан. *Эгаллаган илмимни жамият йўлида сарфлайман.* Х. Тўхтабоев, Ширин қовунлар мамлақати.

САРФ-ХАРАЖАТ Кетказилган сарф ва харажат(лар). *Аммо уни [олтинни] очишга кетадиган сарфу харажат олтиннинг ўзидан ҳам қимматга тушади.* С. Кароматов, Олтин қум.

САРХАЛ Таом пиширишда ёғни доғ қилиб, унда гўшт ва бошқа масаллиқлар қовуриб бўлинган дастлабки жараён. *Кампир бечора бир нафасда овқатини сархалда қолдириб, бетини юлиб, саннагани тушиб кетди.* «Шарқ юлдузи».

САРХАТ [ф. + а. سرخات – битим, келишув; тилхат; хуснихат] кт. Чиройли ёзув, хуснихат. *Сархат машқ қилмоқ. ■ Бахтим борки, ҳар нарса гўзал Кўринади менинг кўзимга. Водийларга қуёш тўккан ҳал, Шунинг учун сархат сўзимга.* Ҳ. Олимжон.

САРХИЛ Энг яхшиларидан терилган, сара. *Сархил мевалар. Узумнинг сархили. ■ Гадойбой сархил олма, нок, узумларни вагонларга жойлаб, Россиянинг узоқ-узоқ шаҳарларига жўната бошлади.* Ҳ. Гулом, Сенга интиламан. *Богда эса сархил мевалар пишиб, болтомиб ётганмиш.* Ҳ. Каримов, Санъат сеҳри.

САРХИЛЛАМОҚ Энг яхшисини, сархилини ажратиб олмоқ, сараламоқ. *Олма-ларни сархилламоқ. Узумни сархиллаб, саватларга жойламоқ.*

САРХОВ с.т. айн. **сархок.** Бу тўзон, сархови нураган деворлар оша ҳовлиларга ўтиб, дарахт ва ерларни қоплади. А. Мухтор, Опасингиллар.

САРХОК [ф. سرخاک – тупроқ боши: қабр] Деворларни ёгин-сочиндан сақлаш учун девор устига қўйиладиган серсомон лўмбоз. Сўз маъқулдан ошмас, девор сархокдан. Мақол. ■ *Узоқдаги тераклар, сархоки емирилган девордай қорайиб кўринади.* Газетадан.

САРХОНА [ф. سرخانه – асосий хонача: чилимнинг ўтхонаси] Чилимнинг юқори

қисмида жойлашган, тамаки солиб тутатиладиган сопол ёки ёғоч мослама, чилим ўтхонаси. *Сархонага тамаки солмоқ. ■ Асрорқул чилимни шундай қаттиқ тортдики, сархонада аланга кўтарилди.* А. Қаҳҳор, Асрор бобо.

САРХУШ [ф. سرخوش – ширакайф, кайф қилган; кайфи чоғ, хурсанд; безовта, жўшқин] **1** Кайфи бор, ширакайф; кайфли. *-Оёқларим ҳам қалтирай бошлади, кўчада сархуш одамлардай борардим, – деди Камолиддин.* Т. Жалолов, Олтин қафас. *Бир кеч зиёфатдан сархушроқ бўлиб қайтдим.* Ш. Холмирзаев, Оғир тош кўчса. *Отабек сархуш товуш билан жиддийгина қилиб [машшоққа] жавоб берди: -Билсангиз, ҳайдалиш куйини чалингиз, ажралиш куйини чалингиз!* А. Қодирий, Ўтган кунлар.

2 кўчма Бирор нарсдан кучли таъсирланиб завқланган, кайф қилган; ўта бахтиёр; масрур. *Мен сизни севаман ялпизлар атри, Қушчаларнинг сархуш сайроғи билан.* Х. Даврон, Тунги боғлар. *Бўса мени айлади сархуш, Ўйнаб туриб сочининг учин, Енгил тортдим гўёки бир қуш. Уйғун.*

САРХУШЛАНМОҚ **1** Кайф қилмоқ, ширакайф бўлмоқ. *Меҳмонлар оз-оздан ичиб, сархушланиб олдилар.*

2 кўчма Ўзини ўта бахтиёр сезмоқ, хурсанд бўлмоқ, масрурланмоқ. *Навбатдагилар қанчалик маҳтал бўлса, ўзининг устунлигидан шунчалик сархушланади.* Н. Норқобилов, Бекатдаги оқ уйча. [Отабек] *Кўз ўнгида бировнинг сурати ўтиб, сархушланди.* А. Қодирий, Ўтган кунлар.

САРХУШЛИК Кайфли, ширакайф ҳолат; хурсандлик, масрурлик. *Карим ўпкасини тўлдириб нафас оларкан, вужудида сўз билан таърифлаб бўлмас бир сархушлик тўйди.* Э. Усмонов, Ёлқин.

САРЧАШМА [ф. سرچشمه – булоқ, булоқ боши; манба] **1** Бош булоқ. *Қиз бечора қирқ қулоч сочини яғринига ташлаб, сарчашмага бориб, сув ичиб, юзини ювиб ўтирди.* «Нурали».

2 кўчма Бош манба. *Китоб – маънавият сарчашмаси. ■ Дилбарим, Эркин дилин сен Бир тиниқ сарчашма бил, Акс этар ишқ офтоби Қалбининг кўзгусида.* Э. Воҳидов, Ёшлик девони.

САРҚИТ **1** Бировдан қолган таом, қолдиқ овқат. *Ўзи тўймагanning сарқити қорин*

оғрилади. Мақол. ■ Фарзандим бор эди, деб бир марта йўқламади. Биттаю битта бола-си одамларнинг сарқити билан яшайтган-лигига номус қилмади. С. Аҳмад, Ойдин кечалар. Зокир қўлидаги қадаҳни тақ этказиб столга қўйди. Қадаҳ тарелкага урилиб, чилчил синди, ишича синиқлари овқат сарқитларига аралашиб кетди, дастурхон хўл бўлди. П. Қодиров, Уч илдиз.

2 кўчма Ўтмишдан мерос бўлиб келаятган, баъзан замона руҳига тўғри келмайдиган одат, расм-русум, тартиб ва ш. к. Эскилик сарқитлари. ■ Шаҳар фуқароси ҳаётидаги эскилик сарқитларини тугатиш, дилсийҳлик, асаббузарликни олиб ташлаш — бу осон иш эмас. Х. Тўхтабоев, Ширин қовунлар мамлақати. Ҳаётнинг қанчалар издан чиқиб кетишига сабаб бўладиган сарқит одат — гийҳвандликка лаънатлар ўқийлик! Газетадан.

САРҒАЙМА с.т. айн. сариқ 4. Айниқса, «Ҳожиматов дамламаси» деган дармондори, неча йилдирки, сарғайма билан оғриган беморлар дардига даво бўляпти. Газетадан.

САРҒАЙМОҚ 1 Сарик тус олмоқ. Куз тушди, бағелар сарғайди. Ўрик олтиндай сарғайиб пишибди. ■ Иссиқ жон дейдилар, жон бўлса бўлар, Пайт келса, чечак ҳам сарғаяр, сўлар. А. Орипов, Йиллар армони.

2 кўчма Зориқиб, толиқиб кутмоқ, маҳтал, интиқ бўлмоқ. Идорама-идора бир имзо учун сарғайиб, ҳафталаб умрим зое кетган вақтлар бўлди. Х. Султонов, Онамнинг юрти. Айрилдинг тўрандан, сочинени ёйиб Йиғлай бер, бувишим, энди сарғайиб. «Алпомиш».

3 кўчма Қаттиқ ялинмоқ, илтижо қилмоқ; изтироб чекмоқ. Момо, сизга сўз сўзладик мунғайиб, Арз айтамыз энди сизга сарғайиб. «Рустам».

САРҒАЙТИРМОҚ 1 Сарғаймоқ 1 фл. орт. н. -Жийдани сарғайтириб, анорни қизартирган, пахтани ештириб, қовунни тўрлатган далалар умор қилади, — деди Элмурод. Шуҳрат, Шинелли йиллар. -Сен билан гаплашаман, деб кўйлагимнинг этагини [дазмолда] сарғайтириб қўйдим, — деди Қодир Сатторга. «Шарқ юлдузи».

2 кўчма Кўп куттириб маҳтал, интизор қилмоқ. Унга йўқ, дейсан, бунга йўқ, дейсан, кимни хоҳлайсан ўзи? Мана, синглиннинг ҳам бўйи етиб қолди, қачонгача бизни сарғайтирасан? «Ёшлик».

3 кўчма Қаттиқ изтиробга, жуда оғир аҳволга солмоқ. Фаним босмас, дедим, ўлмай узимни, Фарзанд доғи сарғайтирди юзимни. «Гулшанбоғ».

САРҒАРМОҚ эск. кам қўлл. айн. сарғаймоқ 1. Ёшлик — зангор фасл, кечди, сарғарди.. Р. Парфи, Кўзлар.

САРҒИМТИЛ с. т. Сарғиш, бир оз сариққа мойил ранг (тус). [Мингбоши] Чилимни жуда узоқ тортиб чеккандан кейин, сарғимтил тутунни оғзидан совуриб туриб, ўтирганларга хитоб қилди.. Чўлпон, Кеча ва кундуз.

САРҒИМТИР айн. сарғиш. Сарғимтир чанг. ■ Қоп-қоронғи кечада ҳовлимизга аллақандай сарғимтир нур чўзилиб қираверди. С. Аҳмад, Ҳукм. Завқли баҳор фасли тугаб, ўрик мева берди, майсалар қандайдир сарғимтир тусга қира бошлади. Ҳ. Шайхов, Рене жумбоғи.

САРҒИШ Сарик рангга мойил, сариқроқ, сарғимтир. Сарғиш ўт. Сарғиш қум. Сарғиш соч. ■ Поезд саҳро бағрини ёриб, олдинга интилар, сарғиш қумтепалар, саксовулзорларни орқада қолдириб.. манзилга шошар эди. К. Яшин, Ҳамза. Муқаддам сарғиш жингалак сочли, серҳаракат, хушчақчақ йигитни эслади. Ў. Ҳошимов, Қалбингга қулоқ сол.

САРҲАД [ф. + а. سرحد — чегаранинг боши: чегара, худуд; чек, доира] кт. Чегара, худуд. Давлатнинг сарҳадлари. ■ Бу дунёда сарҳадлар шартли, Бу дунёда собитдир Ватан. У. Кўчқоров, Ҳаяжонга қўмилган дунё. Ҳали бу йўлингнинг поёни узоқ, Ҳали сарҳадларда ағёрларинг мўл. А. Орипов, Йиллар армони.

САРҲАФТА [ф. سرهفته — ҳафтанинг боши] этн. Куёв томонидан ҳар ҳафтада (ҳафта бошида) келин томонга бериб туриладиган совға-салом. Буун бой отанинг ўзлари сарҳафта учун ярим соатдан сўнг келиш қилади. У. Исмоилов, Сайланма.

САРҲИСОБ [а. + ф. سرحساب — оғоҳ ва хабардор бўлиш: асосий ҳисоб-китоб, ҳисобот] Ҳисоб-китоб; якуний ҳисобот. Эҳтимол, ўтирганларнинг ҳар бири жамиятда тутган ўрни, унга қилаётган хизматларини чамалаб, ўзига сарҳисоб бераётгандир. С. Кароматов, Сўнгни бархан. Бош инженер хатни ўқиди-ю, ўзича ўтган йилги ишларни сарҳисоб қилди. Газетадан. Ўз ҳаётимдан ўзимга сарҳисоб айлар ҳаёл. Э. Воҳидов.

САРҲОВУЗ [*a. + ф. سرحوض* — бош, асо-сий ҳовуз] Катта ҳовуз. Бу икки боғнинг орасида сада дарахтлари билан ўраб олинган бир сарҳовуз бор эди. С. Айний, Эсдалиқлар.

САС *позт.* Овоз, товуш; нидо. *Боғ ичра кирдим мен тонгда, Борлиқ сокин: на сас, на товуш.* Х. Даврон, Қақнус. *Тош юрагини юмшасин, Эшитсин қалблар сасин.* Ҳ. Олимжон. *Ўрмон тўлди қуш сасига, Куйлаб оқди ирмоқлар.* Э. Воҳидов, Нидо.

САСИМОҚ 1 Сассиқ ҳид чиқармоқ, ёқимсиз, қўланса ҳид таратмоқ.

2 Сассиқ ҳид келмоқ; ёқимсиз ҳид урилмоқ (бурунга). *Ҳаммом сасиб ётибди.* ■ *Йўлчи отхонанинг бир томонида уюлиб, сасиб-бижиб ётган гўнгни аравага ортди.* Ойбек, Танланган асарлар.

3 Айниб, ҳидланиб, бузилиб, чириб қолмоқ. *Гўшт сасиб қолибди. Қондаги сабзи сасиб қолибди. Асал айнимас, сариёғ сасимас.* Мақол. ■ *Беш килограмм келадиган балиқнинг қулогини очиб қараб, [Шокиржон] балиқчиша нўписа қилди: -Йй-я, ириб қолибдику, сасиганга ўхшайди.* «Гулистон».

4 Ўт чиқармасдан тутаб, қўланса ҳид чиқариб ёнмоқ. *Самовар сасияпти.* ■ *Саройнинг тўрида бошқаларга қараганда кўркамроқ бир ҳужра.. наригиларида қора чироқ сасиганда, бу ҳужрада шам ёнарди.* А. Қодирий, Ўтган кунлар.

5 *кўчма дағл.* Аччиқ-тирсик, кинояли гап қилмоқ. *Ачиган оғиздан сасиган гап чиқади.* Мақол. ■ *У [нотаниши киши] Мўмин хубога нафрат билан қараб олиб, учтўрт оғиз сасиди.* С. Абдулла, Мавлоно Муқимий. *-Уста, аскияни чойхонага чиқиб қиласиз. Бу — мажлис. Гапингиз бўлса, панада сасимай, манови ёққа чиқиб гапиринг! — деди раис.* С. Аҳмад, Чўл бургути.

САСИР *бот.* Соябонгуллилар оиласига мансуб, сариқ гулли кўп йиллик ўтсимон ўсимлик.

САССИЗ Овозсиз, товушсиз; овоз чиқармасдан. *Козим сассиз одим ташлаб, Азим тўпчининг ёнига борди.* Э. Усмонов, Ёлқин.

САССИҚ 1 Ҳиди ёмон, ёқимсиз, қўланса. *Сассиқ газ. Сассиқ саримсоқ. Бурунни сассиқ деб кесиб ташланмас.* Мақол. ■ *-Сассиқ балчиқда ётган сассиқ тўнғиз аввал ўзини қутқарса-чи, бировнинг ғамини ейиш ўрнига! — деди Зулфизар.* К. Яшин, Ҳамза.

2 Сассиқ ҳид ўрнашиб қолган; ҳавоси оғир; бадбўй. *Сассиқ ҳаммом.* ■ *Икки йилгача.. мана шу сассиқ баракда чириб ёта-мизми? А. Мухтор, Туғилиш. Зумрад бензин анқиб турган сассиқ кабинадан сакраб тушиб, шийпондаги хотин-қизлар орасида ғойиб бўлди.* С. Сиёев, Отлиқ аёл.

3 Айниб, ҳидланиб, бузилиб, чириб қолган, ачиган. *Кўкариб кетган бу сассиқ сувда бижиллаб ётган ҳар хил қўртлар, тушган ерида бир-икки қиланлаб, дарров ўларди.* М. Исмоилий, Фарғона. т. о.

4 *кўчма дағл.* Гап-сўзи кишига ёқмай-диган; қўланса (гап, сўз, муомала ҳақида). *Сассиқ одам. Сассиқ сўз.* ■ *Эшон ҳам, отинойи ҳам иккиозлама, ёлгончи ва сассиқ гап одамлар эди.* П. Турсун, Ўқитувчи. *Мени нима учун бундай қийнайсиз.. Кошкийди, қорача бўлиб туғилган бўлсам, кўргами, калгами тегиб, сизнинг таънангизни, сассиқ сўзларингизни эшитмас эдим!* М. Исмоилий, Фарғона т. о.

5 *кўчма* Бировни камситиш, ҳақоратлашни билдиради. *Оҳ болам, ёшлигим қайтиб келса, бу сассиқ чолга ўлсам ҳам тегмасдим.* С. Аҳмад, Сайланма. *-Сен гапирма, сассиқ кампир, — деди Қумри, Қамчининг ёнини олиб, — эринг билан қўшмозор бўл!* Ҳ. Фулом, Машғал.

Сассиқ алаф қ. алаф. Сассиқ кекирдак Овқат ҳазм бўлмаслиги натижасида қўланса ҳидли газ чиқариб кекирадиган. *-Мен ҳам бузун «зиефат» еявериб, жуда ҳам сассиқ кекирдак бўлиб кетдим, — деди Шум бола.* Ф. Фулом, Шум бола.

САССИҚҚОВРАК Зирадошлар оиласига мансуб, елим-смоласи зарарли ҳашаротларни йўқотишда қўлланидиган, пояси йўгон доривор ўт.

САССИҚКЎЗАН *зоол.* Сувсарлар оиласига мансуб, қимматбаҳо мўйнали йиртқич жонивор. *[Амударё дельтасида] Сутэмизувчилардан юмронқозик, қуён, сассиққўзан, бўрсиқ.. ва бошқалар яшайди.* «Иқтисодий география».

САССИҚЛИК Қўланса ҳидлилик, бадбўйлик.

САССИҚПОПИШАК *айн. попишак.* Хизматкор ҳўкизни етаклаб бозорга бораётганда, бир дарахтдаги сассиқпопишак «поп-поп» дебди. «Олтин олма».

САССИҚҚҰНГИЗ Ранги қора, металл-симон товланувчи, тупроқнинг юза қатламида яшовчи йирткич қўнғизларнинг биру тури. *Сассиққўнғизлар тупроқ ҳосил бўлиш жараёнида фаол иштирок этади.* «ЎЗМЭ».

САТАНГ 1 Пардоз-андозга, кийинишга зеб берган; олифта, башанг. *Сатанг аёл.* ■ *Келинининг қуруқ, сатанг, эрига меҳри йўқлигидан хуфтон бўлиб турган Хайрибидинининг юраги.. эзилди.* Д. Нурий, Осмон устунни. -*Эй бебош бола, сочи калта, думи юлуқ бир сатангага уйланиб олибсан-у, онанг бе-хабар, — деди Каромат.* Ш. Саъдулла, Икки билагузук.

Сатанг соқол тар. этн. Олифта аёлларнинг икки қулоқ орқасидан олдинга солиштириб қўйиладиган икки тутам соқолсимон сочи. *Ичкари уйдан қора атлас кўйлак, қора духобадан узун камзул кийган.. икки қулоғи тагидаги сатанг соқоли билан бир қарич келадиган марварид зиракни рўмол устидан чиқарган ёшгина хотин чиқиб, тўрага салом берди.* Ойдин, Ҳазил эмиш.

САТЕЛЛИТ [лот. satelles, satellitis — тансоқчи; йўлдош; шерик] **1** Бировнинг амри, фикри билан иш қилувчи, итоатгўй одам.

2 Расмий жиҳатдан мустақил бўлган, лекин амалда бошқа, ўзидан кучлироқ давлат амри, хоҳиши билан иш тутадиган давлат, ҳукумат. *Сателлит давлатлар.*

3 астр. Бирон-бир сайёранинг (табiiий) йўлдоши.

САТИЛ [а. سطل — пақир; ковш] *шв.* **1** Челак, пақир. *Шу вақт ичкаридан бир қиз икки қўлида икки сатилни кўтариб, дарё лабига келди.* «Гулихиромон». *Бодомгул сатилларни кўтариб, ҳамон шудринг кетмаган ўтзорга оралади.* Ш. Холмирзаев, Оғир тош кўчса.

2 Сирланган кастрюлька. *Сатилга қатиқ шивитмоқ.*

САТИН [фр. satin — атлас, шоҳи мато] **1** Ипаксимон ялтироқ ип газлама. *Олма гулли кўрпабон сатин.* ■ *Сатин олдим кўрпалик, гуллари турлик-турлик.* «Кўшиқлар».

2 Сатиндан тикилган. *Зебихон ўз чодирига кириб, гулли сатин кўйлагини кийиб чиқди-да, машинага ўтирди.* С. Аҳмад, Уфқ.

САТИРА [юн. satira < satira lanx — турли мевалардан иборат овқат; аралашма] Адабиёт ва санъатда: кишидаги нуқсонлар ва ҳаётдаги камчиликлар, салбий ҳодисаларни

аёвсиз танқид қилиш, фош этиш ҳамда шундай мазмунда ёзилган бадиий асар; ҳажвийёт. *Сатирада ижодкорнинг мавзуга қараши ўз сезги ва ҳис-туйғуларидан устун туради.* «Ўзбек адабиёти».

САТИРАНАВИС [сатира + ф. نویس — ёзувчи] *айн.* **сатирик.**

САТИРИК Сатира жанрида асар яратувчи адиб, сатиранавис, ҳажвчи. *Сатирик бу ерда гротеск, муболаға каби сатирага хос хусусиятлардан керагича, унумли фойдаланиши мумкин.* «ЎТА».

САТИРИК Сатирага оид, сатира характеридаги; ҳажвий; киноявий-қулгили. *Сатирик асар.* ■ -*Сизнинг насрий асарларингиз, ҳикояларингизда фикр ёрқин, тил ўтқир ва гўзал сатирик чизиқлар бордир, — деди Аҳмад Ҳусайн.* Ойбек, Нур қидириб. *Масалда сатирик ва юмористик элементлар муҳим ўрин тутди.* «ЎТА».

САТО [ф. سەتار — «сетор» с. нинг бузилган шакли] Танбурнинг камон билан чалинадиган тури (косаси танбурга нисбатан каттароқ ва юпқароқ бўлади). *Сатода, одатда, куйчан, оҳангдор асарлар турли нолиш ва қочиримлар билан бойитилиб чалинади.* «ЎЗМЭ».

САТР [а. سطر — чизик, йўл, қатор] Босма ёки қўлёзма матннинг ёки шеърнинг ҳар бир йўли; бир қатор. *Шеър сатри.* *Тўрт сатрдан иборат шеър.* ■ *Фурсат фаниматдир, шоҳ сатрлар-ла Безамоқ чоғидир умр дафтارين.* Ф. Фулом. *Шеър ёзайин сенга бағишлаб, Мангу қолгин сатрларимда.* Ш. Раҳмон, Юрак қирралари. *Хатнинг сатрлари қора сиёҳда жуда усталик билан ўчириб юборилган.* И. Раҳим, Чин муҳаббат.

САТРАНЖ [а. + ф. سطرانج < ҳинд.] **1** қ. **шатранж 1.**

2 эск. *айн.* **шахмат.** *Маликанинг оҳу кўзлари сатранж тахтасининг катакларидано, хаёллари чарх уриб, олисларда учарди.* М. Маҳмудов, Мангу куй излаб.

САТТА, сатти шв. рвш. **1** Фақат, нуқул. *Томошага жўнади сатта барваста қизлар.* «Юсуф ва Аҳмад». -*Бу унга йўргакда теккан касал экан-да. Қизларнинг сатта ўн гулидан бир гули очилмаганини топади-я, — деди Маҳмуда унга.* Ж. Абдуллахонов, Тўфон. *Бу энди қишлоқ эмас, сатти чордевор эди: томлари бузилган.* Ш. Холмирзаев, Сайланма.

2 Ҳадеб, ҳамиша. -Умарали сатта ўзини мастликка солиб, гапни чалғитади, — деди Ўрик домла. С. Аҳмад, Чўл бургути.

САТГОР [а. ستار — ҳимоя қилувчи, қўриқловчи; тўсиб, беркитиб турувчи; гуноҳларни кечирувчи, афв этувчи (Оллоҳнинг сифатларидан бири)] **1:** ўламан сатгор Ўлсам ҳам, асло, сира, ҳеч. *Сора.. онасини уй ичига киришга ундади. Онаси эса, ўламан сатгор, бу уйга кирмайман, деб қизини уша заҳотиёқ эргаштириб кетмоқчи бўлди.* Ё. Хаимов, М. Раҳмон, Ҳаёт-мамот.

2 Сатгор (эркаклар исми).

САТУРН [лот. Saturnus — Қадимги Рим мифологиясида: экин-тикинлар маъбуди ва зироатчилик ҳомийси] (*С — катта*) астр. Куёш системасидаги сайёралардан Куёшдан узоқлиги бўйича олтинчи, катталиги бўйича иккинчи, атрофида ҳалқаси мавжуд бўлган сайёра; Зуҳал, Кайвон. *Сатурнни илк бор Галилей 1610 йилда кашф этган.* «ЎЗМЭ».

САТҲ [а. سطح — юз, юза; сирт; текислик] **1** Бирор нарса-буюмнинг, жойнинг устки, юза томони; юз, юза, бет. *Ер сатҳи. Ҳовли сатҳи.* ■ *Ой сатҳига қадам қўйган дастлабки инсон америкалик астронавт Нил Армстронг эди. «Фан ва турмуш». Паром парчалари, кураклари, тахта ва резиналар сув сатҳида сузиб юради.* И. Раҳим, Чин муҳаббат.

2 Баландликларни ўлчашда асос қилиб олинган бошланғич юза, савия. *Денгиз сатҳидан минг метр баланд жой.* ■ *Томчилатиб сугоришда боғ сатҳидан маълум даражада баландроқ ерда ҳовуз қазилади.* «Фан ва турмуш». *Бу ёқдаги унгур.. сой сатҳидан бир қулоқ наст қазилаётган эди.* М. Исмоилий, Фарғона т. о.

3 айн. юз **1 8.** Квадратнинг сатҳи. Доиранинг сатҳи. Сатҳ ўлчовлари.

САУНА [фин. sauna — фин ҳаммоми] Ҳаммомнинг қуруқ, иссиқ ҳаволи тури; фин ҳаммоми. *Сауна иссиқхонасининг деворлари ва терлаш супалари игнабаргли дарахт ёғочидан қилинади.* «ЎЗМЭ». *Уйнинг орти қора ойналар билан ажратилган бўлиб, [у ерда] сауна, туркча ҳаммом, терлаш хоналари жойлашганди.* Н. Ёқубов, Жон.

САФ [а. صف — қатор; тартиб билан, ёнма-ён туриш] **1** Ҳарбийларнинг ёки умуман кишиларнинг ва нарсаларнинг маълум тартибда тизилиши, мунтазам қатори. *Саф*

тортмоқ. Бир сафга тизилмоқ. ■ *Шов-шув, гала-ғовур бирдан босилиб, ҳамма сафга турди.* О. Ёқубов, Излайман. *Душман сафи бузилиб, ҳар томон тўзиб кетди.* «Нурали». *Йўлнинг икки четида узун мирзатераклар саф торган.* Н. Аминов, Суварак.

2 кўчма Бирор жараён, фаолиятнинг энг қизгин ўрни. *Ҳар бир виждонли одам бу курашнинг олдинги сафида бормоғи лозим.* Газетадан.

3 кўчма Бирор гуруҳга мансуб кишиларнинг мажмуи, қатори. *Ҳозирги долзарб кунлар масъулияти ҳар бир кишининг ўрни пахтазорда, теримчилар сафида бўлишини тақозо этмоқда.* Газетадан. *Минглаб абитуриентлар талабалар сафида қўшилиш учун синов имтиҳонларидан ўтишяпти.* Газетадан.

Сафга кирмоқ **1)** бирор мунтазам тизилган қатордан жой олмоқ; **2)** бирор гуруҳдан жой олмоқ, унга қўшилмоқ. *Талабалар сафида кирмоқ. Илғорлар сафида кирмоқ. Сафга ўтмоқ айн. сафга кирмоқ. Сафдан чиқмоқ* **1)** мунтазам қатордан олдинга чиқмоқ. *Сафдан бир қадам олға чиқмоқ;* **2)** аъзоликдан чиқмоқ; **3)** кўчма қатордан чиқмоқ, ишдан чиқмоқ. *Эргашевлар окопи ёнида бирданига учта граната портлади. Эргашевнинг жанговар дўстлари яраланиб, сафдан чиқди.* Н. Сафаров, Қаҳрамоннинг туғилиши.

САФАР **1** [а. سفر — саёҳат, сайр; бирор жойга бориш; марта, гал] **1** Хизмат йўли билан ёки саёҳат қилиш, учрашиш мақсадида бирор ерга бориш; йўл. *Узоқ сафар. Бир ойлик сафар. Сафарга чиқмоқ. Сафарга отланмоқ. Сафардан қайтмоқ. Дўст сафарда синалар.* Мақол. ■ *Сидиқжон икки кундан кейин сафар ҳозирлигини кўриб, тушга яқин йўлга чиқди.* А. Қаҳҳор, Қўшчинор чироклари. *Бир-икки ойлик сафардан қайтиб келсам, уйимда анчагина хатлар йиғилиб қолибди.* Шукрулло, Жавоҳирлар сандиғи. *Сафаринг бехатар бўлсин, савдогар, Эсон-омон келгин Хитой элидан.* «Ойсулув».

2 Гал, марта; бор. *Ўтган сафар. Бу сафар. Ҳар сафар.* ■ *Ҳар сафар ҳаққушининг ноласи эшитилса, Гавҳар аясининг пинжига қуриб кетар эди.* Ў. Ҳошимов, Қалбингга қулоқ сол. *Кимдир бўғилиб бақирди. Бу сафар Чарос аниқ эшитди.* Ў. Ҳошимов, Қалбингга қулоқ сол.

Нариги дунёга сафар қилмоқ ҳазил Ўлмоқ, вафот қилмоқ. -*Чекканим ғанимат, —*

деди Али тажанг. — Ҳозир борман, бир минутдан кейин нариги дунёга сафар қиларман. Ойбек, Танланган асарлар. **Сафар қариди қ. қаримоқ.**

САФАР II [а. *صفر* — арабча ой номи] **1** : **сафар ойи** Қамария йил ҳисобида 29 кундан иборат иккинчи ойнинг арабча номи. [*Мулладўст ўзига-ўзи:*] *Билмайман, мучалим тўнғиз бўлиб, сафар ойининг ўн бирида туғилибманми?* Ҳамза, Майсаранинг иши. *Воқеа сафар ойи иккинчи жумасининг ярим кечаси юз бериши керак эди.* А. Мухтор, Чинор.

2 Сафар (эркаклар исми).

Сафар қочди *эти.* Хосиятсиз деб ҳисобланган сафар ойининг охирида бирор кампирга жулдур кийимлар кийдириб, уни қишлоқдан ҳайдаш олати; бунда гўё қишлоқ бало-офатлардан қутулар эмиш. **Сафар қочди қилмоқ** **1)** «сафар қочди» маросимини ўтказмоқ; **2)** *кўчма с. т.* умуман, қувғун қилмоқ, қувламоқ, маҳрум этмоқ. [*Мулладўст ўз-ўзига:*] *Бу дунё ҳамма ёғидан бизни сафар қочди қилган, ўшанинг учун элик тўртга кирибманки, иқболим наҳс фалокатдан сира ажрамайди.* Ҳамза, Майсаранинг иши.

САФАРБАР [а. + ф. *سفربر* — сафарга йўловчи] Бирор тадбирга шай, тайёр. *Баҳор ойлари бошланди. Барча ишчи кучи ва техника далада сафарбар ҳолатга келтирилган.* Газетадан. *Теримга барча куч бўлди сафарбар, Ўлка бўйлаб кезди ҳар кун хушхабар.* Б. Бойқобилов, Мени кутинг, юлдузлар.

Сафарбар қилмоқ (ёки этмоқ) **1)** жанговар, тайёр ҳолатга келтирмоқ, долзарб, муҳим ишга жалб этмоқ, фаоллик билан ишга солмоқ. [*Матбуот*] *Халқни кураш ва ғалабага сафарбар қилаётибди.* А. Қаҳҳор, Қўшчинор чироқлари; **2)** армия (ёки жанговар отряд) сафига чақирмоқ, жўнатмоқ. *Улар [курсантлар] кетгач, ўрнига энди сафарбар этилган кишилар келди.* Шухрат, Шинелли йиллар.

САФАРБАРЛИК I Армия сафларига чақириб, чақирилиш; жанговар ҳолатда бўлиш. *Сафарбарлик бошланиб, қишлоқдан йигитлар кетма-кет армияга жўнаб кетдилар.* «Саодат».

2 *кўчма* Бирор нарсага тайёр, шай туришлик. *Қишлоқ меҳнаткашлари руҳида сафарбарлик, меҳнат шавқ-заъки мавж урмоқда.* Газетадан.

САФАРБОШИ Сафарда сафар қатнашчиларига, гуруҳга бошчилик қилувчи одам. *Сафарбоши билан Матвей Владимирович ҳам келган, Самарқандда яқинлари бўлмагани учун иу ҳовлида туриши керак эди.* Ж. Абдуллахонов, Тўфон.

САФАРДОШ Сафарда бирга бўлган кишилар (бир-бирига нисбатан), сафардаги ҳамроҳ. [*Муҳаммадали*] *Сафардоши Мулла Шокирни кўриши билан юзи ёришиб, ўрнидан туриб ўтирди.* М. Осим, Элчилар.

САФАРЧИ Сафарга чиққан ёки сафарда бўлган киши, сафар қатнашчиси. *Сафарчиларга намунали маиший хизмат кўрсатиш.* ■ *Моҳидил кўринишдан камҳафсала, аммо ичи жўш уриб турган участка бошлиғи билан.. доим худди поездга кеч қолаётган сафарчидай шошиб-пишиб гапиришади.* Ж. Абдуллахонов, Тўфон.

САФ-БАСАФ [а. + ф. *صَفْبَصَف* — саф-саф бўлиб] Саф тортиб, сафга тизилиб. [*Тераклар*] *Дубулғали аскарлардай Туришади саф-басаф.* О. Ҳақимов, Достонлар. *Саф-басаф гуллар аро Кезганда гулшан тонг қизи, Чайқалуур гул денгизи, Бўлғай-да хумор, келадур.* Э. Охунова, Мен тонгни уйғотдим.

САФБАСТА *позт.* [а. + ф. *صَفْبَسْتَه* — саф бўлиб тизилган, боғланган] Сафга тизилган, саф тортган; бир сафдаги. *Сиз меҳнатда ҳамкор, жангда сафбаста, Сиз эзгуликларга тугамас консиз.* Уйғун. *Энг олий бинолар икки кўчанинг Сафбаста қизлардай кўрки бўлади.* Ф. Фулом.

САФБОШИ Сафда турган ёки бирор ташкилот сафига уюшган кишиларнинг бошлиғи; йўлбошчи. -*Сафбоши оёғини тираб олгандан кейин саф унинг хоҳишига қараб оқади-да, — деди Болтаев Раҳимовга.* Ж. Абдуллахонов, Тўфон.

САФДОШ I Ҳарбий хизматда бирга, бир сафда бўлган кишилар. *Жанчилар янги сафдошларини ўраб олишди.* И. Раҳим, Чин муҳаббат.

2 Бир соҳада ёки бир ташкилот сафида биргаликда иш олиб борувчи кишилар. *Бер қўлингни, дилкаш сафдошим, Бўлур ойга етгудек бошим.* Ҳ. Пўлат, Танланган асарлар. *Қаламкаш сафдошлар, газетхонлар.. фан, маданият арбоблари юбиляр газетани қизғин муборакбод қилдилар.* Газетадан.

3 Тенгқур, тенгдош. *Устод Қавомнинг бу феълини сафдошлари билсалар ҳам, билмасликка.. олишарди.* Мирмуҳсин, Меъмор.

САФИЛ [a. سفيل — паст, пасткаш, аблаҳ] эск. кт. **1** Жуда ёмон, ночор; қабиҳ. *Биз қиссамизнинг ҳажми сиғдирмаганликдан унинг шаҳардаги сафил ҳаётига тафсилий тўхтай олмаймиз.* А. Қодирӣ, Обид кетмон.

2 Ярамас, разил, палид, ифлос. *Қадрига етмагани бу оннинг Халқ ичинда юзи қаро бўлсин! Ҳам сафил, ҳамда мохов била тенг, Бутун оламга можаро бўлсин!* Ҳ. Олимжон.

САФЛАМОҚ Бир сафга тизмоқ, қаторга турғизмоқ, саф тортирмоқ. *Аскарларни сафламоқ.*

САФЛАНМОҚ **1** Сафламоқ фл. ўзл. н. *Шу пайт бирдан: -Сафлан! — деган команда эшитилди. Отряд сафланди.* К. Яшин, Ҳамза.

Сафо [a. صفاء — тозалик, тиниқлик, софлик; самимийлик; хотиржамлик] **1** Бегубор тозалик, мусаффолик, софлик. *Инсон туғилмоқда — янги бир одам Кўз очди тонготар сафоси билан.* Ж. Жабборов. *Ўзбек тупроғидан келибман бу бор, Сенгадир ошифта қалбим сафоси.* А. Орипов, Йиллар армони.

2 Хурсандчилик кайфияти, нашъу намо; хузур, гашт. *Кайфу сафо қилмоқ.* ■ [Ғули:] *Ғазалким, сўзлагай меҳру вафодин. Ғазалким, сўзлагай ишқдин, сафодин.* Уйғун ва И. Султон, Алишер Навоӣ. *Бутун умрин кечириб кайф билан, сафо билан, Иши бўлмаган экан «ўткинчи» дунё билан.* Э. Воҳидов, Муҳаббатнома.

3 Сафо (эркаклар исми).

Сафобахш [a. + ф. صفايخش — сафо бахш этувчи; ёқимли, дилкаш] *поэт.* Хурсандчилик кайфияти, хузур бағишловчи, кайф-сафо бахш этувчи; гаштли. *Сафобахи боғлар.* ■ *Фарғонанинг бинафшаранг тоғларидан эсаётган сафобахш елдан тўйиб-тўйиб шимирмадингми ҳали?* Ҳ. Носирова, Мен ўзбек қизиман. *Қайин ўтин чарсиллаб, хушбўй ис таратиб, тоза, чиройли аланга билан гуруллаб ёнаркан, йигит бутун вужудидан уйқу каби элитувчи, май каби сафобахш тотли ором сезади.* Ойбек, Қуёш қораймас.

Сафогоҳ [a. + ф. صفاگاه — кўнгилхушлик жойи] *поэт.* Хурсандчилик, хуш кайфият, хузур бағишлайдиган жой, оромгоҳ.

Сафойил [a. صفائير / صفايفير] Дастага ўрнатилган бир неча ҳалқали урма чолғу асбоби (ўтмишда асосан дарвиш-қаландарларнинг чолғуларидан бири бўлган). *Улар*

[қаландарлар] сафойилларини жаранглатиб, Машраб ғазалларини кўшиқ қилиб, уйинга тушганларида, оломонни бир зумда сеҳрлаб кўярдилар. Н. Сафаров, Кўрган-кечирганларим. *Бир куни Калта Минор ёнидан қаландар либосидаги букри кимса сафойилни шақиллатиб, бақириб ўтди.* С. Сиёев, Аваз.

Сафолат [a. سفالت — тағ, остки қисм; асос; паст(каш)лик] эск. кт. **1** Жуда ёмон, ночор аҳвол, абгорлик. *Сафолатга тушмоқ.*

■ *Кўчанинг икки томонида бўғот томли, қинғир-қийшиқ хароб уйлар, ярим қулаган деворлар оқшом қоронғисида дардли манзара ясайди, сафолатдан, йўқчиликдан қўрқинч сукутга чуқади, қоронғида аста-аста эриб йўқолади.* Ойбек, Танланган асарлар.

2 Ярамас хатти-ҳаракат ёки хулқ-атвор; разиллик, разолат. *Ҳаёт оёқларида одат, шариат кийгизган разолат ва сафолат кишиларини нарчалаб ташлаёлмасанидан, ҳалигача ёр кўксига бош қўйиб, «Севаман!» деб айттолгани йўқ.* М. Исмоилий, Фарғона т. о.

Сафолатли *айн. сафил.* *Унинг [Тўғонбекнинг] сафолатли кунларида танишиб, ҳужрасидан жойи берган эски қадрони Алоиддин Машҳадийни пул, кийим билан йўқлаб турарди.* Ойбек, Навоӣ.

Сафоли Хурсандлик кайфиятини бағишловчи, сафо бахш этувчи; сафобахш, гаштли. *Сафоли тун.* ■ *Ғулумжоннинг сафоли овози ҳар танга ширин жон бўлиб, ҳар онга ойдин он бўлиб кириб борди.* М. Исмоилий, Фарғона т.о. *Куй.. қанчалар сафоли куй бу! Садоланган қайси гулшанда!* М. Али, Гумбаздаги нур.

Сафорат [a. سفارت — воситачилик; элчилик, элчихона] эск. кт. Муайян давлатнинг чет элдаги ваколатхонаси, дипломатик вакиллик.

Сафоратхона [сафорат + хона] эск. кт. Муайян давлатнинг чет элдаги ваколатхонаси биноси.

Сафоҳат [a. سفاهت — ақли камлик, пастлик; тентаклик; уятсизлик, сурбетлик] эск. кт. Нодонлик, нодонларча хатти-ҳаракат, аҳмоқона иш. *Мана бул сабабдан.. фақир ва бечора болалар.. ниҳол умрларин сафоҳатга барбод беруб кетмакдадурлар.* Ҳамза, Танланган асарлар.

Сафро [a. صفراء — сариқ ранг; оқимтир; ўт, сафро] Одам жигаридаги безлар

орқали мунтазам ишлаб чиқиладиган кў-кимтир сариқ суюқлик; зарда, ўт. *Сафро одатда жигардан ўн икки бармоқли ичакка оқиб тушиб, сўнгра ингичка ичакка ўтади*. Н. Исмоилов, Касалларни парвариш қилиш.

Сафро ташламоқ Сафро қайт қилмоқ. [*Жўрабек*] *Душанба, сешанба кунлари сафро ташлаб, руҳи ёришган кишидек, анча енгил тортди*. Мирмуҳсин, Қуламас қоя. **Сафроси қайнамоқ** айн. зардаси қайнамоқ қ. зарда. *Инолчиқ Умархўжанинг тил учидаги тум-тароқли сўзига қулоқ соларкан, сафроси қайнар, ер тепиниб, уни сўкишдан ўзини базўр тутиб турарди*. М. Осим, Ўтрор.

САФСАР 1 Бинафшаранг, бинафша рангли. *Сафсар сиёҳда майда ёзилган сатрлар хира парда орқасидагидек эди*. С. Зуннунова, Кўк чироқлар.

2 айн. **сафсаргул**. *Саф-саф тизилиб, Сафсар оёғинга қўйиб сар, Банд-банд узилиб, Жоним билан банда бўлибдур*. Э. Воҳидов, Муҳаббатнома.

САФСАРГУЛ айн. **гулсапсар**. *Хужра атиргул, пуштигул, сафсаргулларга тўлиб кетди*. К. Яшин, Ҳамза.

САФСАТА [а. *سفسطة* – софизм, сохта хулоса; бекорчи, қуруқ гап; валдираш] **1** Бемаъни гап, тағи пуч, асоссиз даъво, назария ва ш. к. *Хўш, ўзингча фалсафа деб ўйлаган бу.. сафсатанг билан нима демоқчисан?* М. Исмоилий, Фарғона т. о. -*Қўй бу сафсатангени, – деди Шамси Тўраевич Баширжонинг сўзини бўлиб, – ҳамма нарсани динга, худога тақайверма*. Н. Аминов, Суварак.

2 Қуруқ, бекорчи гап. *Бу сафсаталардан мафкуравий муҳолифларимиз кўзлаган мақсад аён*. Газетадан.

Сафсата сотмоқ Бемаъни гаплар гапирмоқ, ёлғон назариялар тўқимоқ. *Али десам, бали дейди, оғзимни очиргани қўймай, нуқул сафсата сотади*. Ж. Абдуллахонов, Хонадон.

САФСАТАБОЗ Қуруқ гап сотишни, сафсатабозликни яхши кўрадиган, сафсата сотувчи. *Сафсатабоз одам*. ■ *Қудрат у [Тешавой] ўйлаганчалик қуруқ сафсатабозлардан эмас экан*. Ж. Абдуллахонов, Йўл.

САФСАТАБОЗЛИК 1 Маънисиз гаплар айтиш, тағи пуч, асоссиз даъво қилиш, ёлғон-яшиқ назариялар тўқиш.

2 Қуруқ гап сотиш, валдираш, вайсаш. *Бехуда сафсатабозлик билан вақт ўтказиш*.

САФСАТАЧИ айн. **сафсатабоз**. *Сафсатачи одам*.

САФСАТАЧИЛИК айн. **сафсатабозлик**.

САФҲА [а. *صحيفة* – «саҳифа» с. нинг метатеза ҳолати] *позт*. Саҳифа, varaқ, бет. *Сафҳада язона сарлавах: «Ҳайкаллар», «Ҳайкаллар»*. Т. Тўла.

САХАЛАР Россия Федерацияси таркибидаги Саха Республикасининг туркий тиллардан бири бўлган саха тилида сўзлашувчи туб аҳолиси [рус манбаларида якут (ёкут) деб аталади]. *Сахалар этногенези жуда мураккаб*. «ЎЗМЭ».

САХАРОЗА [юн. *sakchar* < санск. *sakkhara* – шакар] Ўсимлик баргларида ҳосил бўладиган қанд; углевод. *Асал глюкоза, фруктоза, сахароза ва минерал моддалардан ташкил топади*. «Фан ва турмуш».

САХИЙ [а. *سخى* – қўли очиқ, саховатли, ҳимматли, олийҳиммат] **1** Ҳеч кимдан нарсасини аямайдиган; ҳотам; ҳотамтой; танти. *Сахий одам. Сахий топса, бўлиб ер, бахил топса, босиб ер*. Мақол. *Сахий билан бахил бир қудуқдан сув ичмас*. Мақол. ■ *Вақт-бевақт бировникига бир меҳмон келса, отини ушлаб.. кўнглини хушлаб жўнатса, бул одам – сахий*. «Алпомиш».

2 Кишилардан ўз ёрдамини, хизматини аямайдиган, ғамхўр; меҳрибон. *Сахий устоз*. ■ *Сахий педагог Меҳри опа тарбиялаган ёшларни республикамизнинг ҳамма жойида учратиш мумкин*. Газетадан.

3 кўчма Табиий бойликларга бой; тўкин, мўл; мўл-қўл. *Сахий ер. Сахий ёз*. ■ *Ер! Қандай бойсан, сахийсан, гўзалсан*. Р. Файзий, Чўлга баҳор келди. *Урушдан қайтган ғолиб отадек Кўни-кўнжи тўлиб сахий куз келди*. Ф. Фулом.

4 кўчма Нурини аямай тўкувчи; юқори ҳароратли (куёшга нисбатан). *Ана, йўлнинг иккала бети бўйлаб сахий қуёш нурини беармон эмиб, ястаниб ётган тоқзорлар орқада қолди*. «Шарқ юлдузи». *Хазина ер, зилло сув, Ёз бўйи сахий қуёш*. Ғайратий.

САХИЙЛИК Ҳеч кимдан нарсасини, яхшилигини аямаслик; ҳотамлик. *Сахийлик қилмоқ*. ■ *Сахийлик, меҳмондўстликда андижонликлар Ҳотамдан ўтса ўтардики, аммо наст келмас эди*. Шукрулло, Жавоҳирлар сандиғи. *Сахийликни одат қилган бўлса ким.. Қўлидан давлати кетмасин унинг*. Э. Воҳидов.

САХОВАТ [а. سخاوت — қўли очиклик, олийҳимматлик, саховатлилик] 1 Баланд ҳимматлилиқ, сахийлик. *Кимхобни кийиб олгач, домла Ниёз «саховатда Ҳотамтойдан, адолатда Нўширавони одил» дан ортиқроқ у жанобнинг ҳақиға яна янги дуо ва санолар тўқиди.* А. Қодирий, Мехробдан чаён.

Саховат қўлини чўзмоқ Ҳиммат қилмоқ; ёрдам қўлини узатмоқ. **Саховатнинг етти дарвозасини очмоқ** Ҳиммат билан эҳсону инъомлар улашмоқ.

2 кўчма Табиий бойлик; мўл ҳосил; тўкинлик, мўллик. *Деҳқон ерни ардоқласа, ер ҳам ундан саховатини аямаслигини тажрибада кўриб турибмиз.* Газетадан. *Осмонда офтоб саховат билан нур сочарди.* «Шарқ юлдузи».

САХОВАТЛИ 1 Саховатини аямайдиган, сахий; ҳотамтой, ҳимматли. *Саховатли одам.* ■ *Феъли кенг, саховатли, меҳмондўст ўзбекларнинг донғи ҳамма ёққа кетган.* Мирмуҳсин, Умид.

2 кўчма айн. сахий 2. *Саховатли Фарғона боғларида нишиқчилиқ бошланди.*

САХОВАТПЕША [а. سخاوت پيشه] айн. **саховатли 1.** — *Маскон подшоҳи ростдан ҳам саховатпеша эркан! — деди Хўжа Калон бошини ғоз кўтариб.* М. Осим, Элчилар. *Ҳайлаимизки, бундай саховатпеша кишилар ҳаммаша топилади.* Газетадан.

САХОВАТПЕШАЛИК Саховатпеша бўлишлиқ, саховатпеша эканлик; сахийлик, ҳотамтойлик. *Лекин Худоёрнинг саховатпешалиги ва маъмуриятпарварлиги меҳнаткашнинг хазинага олтин суратида йиғилган кучидан эмас, бевосита билак кучидан, кўз ёшидан эди.* А. Қодирий, Мехробдан чаён.

САХТИЁН [ф. سختيان — ошланган эчки териси] **1** *от* Эчки ёки кўй терисини ўсимлик мойлари билан ошлаб тайёрланган юмшоқ чарм. *Кўнчилар қайиши, сахтиён.. тайёрлаб, вофурушларга, улгуржи пойабзал тикадиган косибларга чакана сотадилар.* Н. Сафаров, Кўрган-кечирганларим. *Дағал сахтиёндан этик кийган оёқларини кериб.. пичан уюмларини аравага отарди.* С. Анорбоев, Оксой.

2 сфт. *кўчма* Сахтиёндан тайёрланган. *Илк бор байрам куни сахтиён этик кийган бола каби чақнар кўзларим.* А. Шер, Қадимги куй. *Ҳофиз Кўйкий кўйиндан нафис сахтиён*

муқовали китобни олиб, Бобурга авайлаб узатди. Х. Султонов, Бир оқшом эртаги.

САЧВОН с.т. айн. **чачвон.**

САЧОҚ 1 Гажим, попук, шокила. *Сулув отларга ярашган, Тилла сачоқ тизга тушган.* «Гулихиромон».

2 Отнинг тўпиги устидаги бир тутам соч.

САЧОҚЛИ 1 Сачоқ тугилган (қадалган); гажимли. *Ёз ёни айвон ўчоқли, Қўли дастурхон сачоқли.* «Кўшиқлар».

2 Оёғида сачоғи бор, оёғи сачоқли (от ҳақида).

САЧРАМОҚ 1 Парчаланиб отилмоқ; сочилмоқ. *Балчиққа кесак отма, юзингга сачрайди.* Мақол. ■ *Машина ўтганда, лой, сув сачрайвериб, деворлар шалтоқ бўлиб кетган.* Э. Усмонов, Ёлқин. *Отларнинг тақаси тош йўлга урилганидан, гоҳо учқунлар сачрарди.* «Шарқ юлдузи». *Ой чиқди. Сербулут осмон худди сиёҳ сачраган зангори кўйлакка ўхшарди.* С. Аҳмад, Уфқ.

2 Иргимоқ, сакрамоқ. *Тўғонбек тоқати тоқ бўлиб, сачраб ўрнидан турди.* Ойбек, Навоий.

3 Боши ёки гавдасини кескин ҳаракатлантормоқ. *Отабек сачраб, Қумушга юз ўғирди: — Бу ўртага Зайнабни келтириб нимага тиқасиз энди? А. Қодирий, Ўтган кунлар.* *Гавҳар, электр токи теккандай сачраб, унинг қучоғидан чиқди.* П. Қодиров, Уч илдиз.

4 кўчма Қаттиқ-қаттиқ гапирмоқ, тўсатдан ўшқириб, ғазаб билан танбеҳ бермоқ. *Унинг [онасини] сачрайдиган, болаларига бақирадиган одати йўқ эди.* М. Исмоилий, Одамийлик қиссаси.

САЧРАТҚИ 1 *бот.* Ҳаворанг гулли кўп йиллик бегона ўт (халқ табобатида фойдаланилади). *Кўёш шувласи ят этиб тегиши билан, сачратқи ўз тожбаргларини ёзди, ҳавони булут қопласа, гулларини юмиб олади.* Газетадан.

САЧРАТҚИ II шв. Баданда, юзда пайдо бўладиган йирингли тошма; иссиқлик. *Баъзан симоб каби лақиллаб турган чўғ парчалари ерга тўкилиб, ҳаммага сачраб кетади.* *Кимнинг қўли, кимнинг оёғи, кимнингдир юзи сачратқи ярадек жсараҳатланиб ҳам олади.* Ойдин, Бечора.

САЪВА [а. صعوه — чумчуқсимонларга мансуб қушча] *зоол.* Чумчуқсимонлар туркумига мансуб, ранг-баранг патли сайроқи қуш. *Ҳозир бу овозга томлар ва пахса де-*

ворлардаги даканг хўрозлар қичқириғи, саъва, булбуллар навоси қўшилишиб, Қудратнинг хаёлини олиб қочди. Ҳ. Назир, Сўнмас чақмоқлар. *Унеурларда сакрайди оҳу, Наъматак-да саъва миттижон.* А. Орипов.

САЪЙ [a. سعى — ҳаж зиёрати чоғида Сафо ва Марва тепаликлари ўртасида югуриш; интилиш, иштиёқ; уриниш, ҳаракат; ҳафсала]: **саъй этмоқ** (ёки **қилмоқ**) Астойдил ҳаракат қилмоқ; тиришмоқ. *Саъй этмоқлик лозимдир бирга, Золимлардан қутулмоқ учун.* М. Али, Боқий дунё. *Аҳмад кўп ёмон ишларни саъй этиб, охири сабр косамизни тўлдирди.* Мирмуҳсин, Мельмор.

САЪЙ-ҲАРАКАТ Астойдил ҳаракат; уриниш. *Бошда бундай саъй-ҳаракатлар Авазга табиийдек туюлди.* С. Сиёев, Ёруғлик. *Кўлмак сингари хор бўлмай деган дангаса одам саъй-ҳаракатдан тинмасин, дангаса бўлмасин, беҳуда хаёлларни кўп сурмасин.* Газетадан. *Уларнинг саъй-ҳаракатлари туфайли жиноятчиликнинг олди олинади, ҳудудда осойишталик ҳукм суради.* Газетадан.

САҚАР [a. سقار — дўзах, жаҳаннам] дин. Мусулмонларнинг эътиқодига кўра, етти дўзахнинг бири; дўзах.

САҚИЧ Чайнаш учун мум ва арча ширасидан махсус технология билан тайёрланадиган модда. *Сақич чайнамоқ.* ■ *Майда савдогарлар сақич, гилвата сотишарди.* И. Раҳим, Ихлос. [Хон ўрдаси мирзосининг] *Мадрасада ўқиб юрган ўғли ва уйда сақич чайнаб ўтирган ўн олти ёшли қизчаси ҳам бор эди.* А. Қодирий, Мехробдан чаён.

Сақич бўлмоқ Гийбат, турли миш-мишлар сабабчиси (объекти) бўлмоқ. *Мен гап-сўздан қўрқмайман-у, эл оғзида сақич бўлиш, миш-мишчиларни ўчакиштириш ҳам ҳавас эмас.* А. Мухтор, Бўронларда бордек ҳаловат. **Сақич қилиб чайнамоқ** Бир гапни ҳадеб гапиравермоқ, эзмалик қилмоқ. *Авалло одамларнинг оғзига тушма, оғзига тушганингдан кейин, сақич қилиб чайналасан.* И. Раҳим, Зангори кема капитани.

САҚЛАГИЧ *тех.* Турли механизм, асбоб ва ш. к. да тасодифий ҳодисалардан сақлаб, хавфсизликни таъминловчи қурилма, асбоб. *Электр сақлагич.* Тўппонча сақлагичини босиб қўймоқ.

САҚЛАМОҚ 1 Эҳтиёт қилмоқ; эҳтиёткорлик билан (бирор жойда) асрамоқ, асраб-авайлаб ишлатмоқ. *Сандиқда пул сақ-*

ламоқ. Омборда қиш учун ғалла сақламоқ. ■ *Маҳсини уч кун ҳайитда кийиб, сақлаб қўйгандим, ана уни пуллаб, тагчарм оламиз.* Ойбек, Танланган асарлар. *Мана, ўшал нафис гулингни Китобимда сақладим бир йил.* Т. Тўла. *..бутун орттирганини «тишининг ковагида сақлаб» тўплайди-да, бир жийрон қашқа от олади ва довондан сўнги марта от миниб ўтади.* П. Турсун, Ўқитувчи.

2 Ташқи таъсирдан муҳофаза қилмоқ; айниш, бузилиш-ёрилиш, нест-нобуд бўлишдан, барбод бўлишдан асрамоқ, эҳтиёт қилмоқ. *Оилани сақлаб қолиш учун, фарзандларим учун ҳаракат қилдим, лекин иложи бўлмади.* Газетадан. *Арча тоғ ёнбағирларидаги тупроқни сув ва шамол эрозиясидан сақлайди.* Газетадан.

3 Эҳтиёт қилиб, асли ҳолати, хусусияти ёки кўринишини ўзгартириш олиб қолмоқ. *Кампир холамиз бу сандиқларда энг олдин беҳи сақлаган бўлса ажаб эмас.* Х. Тўхтабоев, Ширин қовунлар мамлакати. *Лайлонинг онаси... эликлардан ошган, лекин ҳали ҳам ўзини яхши сақлаган, зуваласи пишиқ аёл экан.* М. Қориев, Ойдин кечалар. *Фикримизча, ҳар қандай шароитда жуфтлик хусусиятини сақлаган жуфт сўзлар луғатларда берилиши лозим.* «ЎТА».

4 Бирор кимсага атаб ёки бирор мақсад учун (буюм ёки емишларни) асраб қўймоқ. *Буларни кимга сақлаб қўйибсиз?* ■ *Сулувнинг миясига бир фикр келиб, михдай санчилди: отаси энг сўнги кучини фақат қасос учун сақлаб олиб келган.* А. Мухтор, Қорақалпоқ қиссаси. *Мен унақа кек сақлайдиганлардан эмасман.* С. Аҳмад, Ҳукм.

5 Ҳимоя, муҳофаза, гамхўрлик қилмоқ, қўриқламоқ. *Давлат чегараларини сақламоқ.* *Халқларнинг тинчлигини сақламоқ.* ■ *Бугунги кунда инсоният олдидан ниҳоятда муҳим муаммо турибди, у ҳам бўлса, ер юзидан тинчликни сақлаб қолиш.* Газетадан. *Табиатни муҳофаза этиш, ҳайвонот дунёсини сақлаш ҳозирги даврда муҳим аҳамиятга эга.* Газетадан.

6 Халос қилмоқ, қутқармоқ; омон қолдирмоқ. *Ўлимдан сақламоқ.* *Ҳалокатдан сақламоқ.* ■ *Менинг бурчим — ўлаётган одамнинг олдидан бўлиш, — деди у, — эҳтимол, унинг жонини сақлаб қоларман.* К. Яшин, Ҳамза. *Шунда Қиличқора айтибди: -Аждар-*

дан эли сақлайдиган мард топиладими? «Эртактлар».

7 Бирор хатти-ҳаракатдан қайтармоқ, тўхтатиб қолмоқ, тиймоқ. Ёмон сўздан сақла доим тилингни. «Нурали».

8 Риоя қилмоқ, муайян ҳолатга амал қилмоқ; сукут сақламоқ. Тартиб-одоб, интизом сақламоқ. ■ Жувон ўзини тартибга солиб бўлгунча, жойидан қимир этмай, одоб сақлаб турарди. Ж. Абдуллахонов, Хонадон.

9 Белги, из, нишона олиб қолмоқ. Сақлаб қопти одам изларин Бу тоғларнинг мусаффо қори. Ш. Раҳмон. Бу осори атиқалар ўзида ўтмиш нафасини сақлаб қолган. Газетадан. Ҳар бир ўткинчининг қиёфасини ёдда сақлаб қолиш учун бутун фикру ўйлари, идрокларини бир нуқтага тўнлаб турибдилар. С. Аҳмад, Юлдуз.

10 Доимий равишда қадрламоқ, эҳтиром билан эсламоқ. У [Алимардон].. чинакам санъатни қалбининг тўрида сақлашга қодир бўлган чинакам шинавандалар озмунча эмаслигини билмас, билишни хоҳламас эди. Ў. Ҳошимов, Қалбингга қулоқ сол.

11 Асрамоқ, боқмоқ, тутмоқ. Хизматчи сақламоқ. Қуш сақламоқ.

Жон сақламоқ қ. жон 3. -Қочиб қолганми? — дедилар отам, — бостирмада беркиниб, жон сақлаган бўлиши ҳам мумкин. Ш. Холмирзаев, Йўллар, йўлдошлар. **Сир сақламоқ** Бирор воқеа-ҳодиса, гап-сўз ёки фактни ўзгалардан яшириб юрмоқ, ошкор этмаслик. Мен бу сирни шу қоқчага ичимда сақлаб келаётган эдим, энди айтмасам бўлмайди. А. Қаҳҳор, Қўшчинор чироқлари. Ҳатто ота-онасидан ҳам сир сақлаган бир йигитнинг ўз ўғлим бўлиб чиққани менга қизик кўринадир. А. Қодирий, Ўтган кунлар. **Худо сақласин** Сира кўрсатмасин; бошга тушмасин; асло, ҳеч қачон. Одамларнинг юзига қарай олмайдиган бўлиб қолишдан худо сақласин. Т. Ашуров, Оқ от. **Эсда (ёки ёдда, хотирада) сақламоқ** Ёдда тутмоқ, эсдан чиқармаслик, унутмаслик. **Ўз қўлида сақламоқ** Ўз қўлида, ихтиёрида, амрида тутиб турмоқ. Ҳокимиятни ўз қўлида сақламоқ.

САҚЛАНДИ шв. Асраб олинган, асранди. Сақланди қиз. ■ Сувга ташна бўлди Чамбилнинг чўли, Ташиналикдан ўлар чўлнинг булбули, Ташлаб кетгин олдиндаги улоқни, Гўрўғлининг боқма, сақланди ули. «Бўтакўз».

САҚЛАНИШ 1 Сақланмоқ фл. ҳар. н. Материянинг сақланиш қонуни (флс.).

2 Ўз-ўзини ҳимоя қилиш; муҳофаза, ҳимоя қилиш. Атом радиациясининг таъсиридан сақланиш. Ёнғиндан сақланиш қоидалари. ■ Инсон турли зарарли касалликлардан, юқумли дардлардан сақланиши керак. Газетадан.

САҚМОН I шв. Сопқон, палахмон. Сақмон отмоқ.

САҚМОН II Қўзиларининг ёши ва ривожланиши бир хил бўлган эмзикли она кўйлар гуруҳи. Сақмонлар, одатда, янги кўзиларни бут сақлаш, парваришлаш мақсадида тузилади. «ЎЗМЭ».

САҚМОНЧИ Сақмондаги кўй-қўзиларга қаровчи чўпон, кўйчивон (қ. сақмон II). Ҳар бир сақмонга чўпон вазифасини бажарувчи сақмончи тайинланади. «ЎЗМЭ».

САҚОҚУШ зоол. айн. бирқозон, мешкобқуш.

САҒАЛ рвш. шв. с.т. Бир оз, андак; салпал. Сағал сабр қил. ■ Бу калтаги сийлаб ўтди, Калтак сағал тегиб қобди. «Баҳром ва Гуландом».

САҒАНА [ф. سغانه] с. т. Мақбара. Дўнпайиб турган катта-кичик сағаналар тепасида ярим ой шаклидаги моҳча — тунукачалар совуқ йилтирарди. С. Сиёев, Ёруғлик. Умарқул онаси арвоҳини шод қилди: унинг Туркистондаги қабри устига сағана ўрнатди. Ҳ. Фулом, Машғал.

САҒИР [а. صغیر — унча катта бўлмаган, кичик; майда; ёш бола] I Ҳали вояга етмаган етим бола. Сағир ҳаққига тегиб бўлмас. Сағирнинг ҳақи — сопқоннинг ўқи. Мақол. ■ -Десангиз, Ойнахон, ўзи [Маъмуржон] бир сағир бола, ҳеч кими йўқ, — деди меҳмон хотин. Ш. Холмирзаев, Тўлқинлар. Душман кўрсанг, қўймай издан қувлагин, Сағир кўрсанг, анинг кўнглин овлагин. «Эрали ва Шерали». Мадамин шовқин солди: -Худойқул менинг жигарим, аммамдан қолган сағир. Етти ёшдан боқиб одам қилдим. П. Турсун, Ўқитувчи.

2 Ёш бола, кичкина бола. Маҳалла бу ҳангомадан уйғониб, Эшигига келди сағиру кабир. Муқимий.

САҒИРХОНА [сағир + хона] эск. Етим-хона; меҳрибонлик уйи. Областда.. ота-онасиз қолган болаларни боқиб, тарбиялаш

мақсадида сағирхоналар очилди. М. Ўрин-хўжаев, Унутилмас кунлар.

САҒРИ 1 От, эшак, қорамол кабиларнинг орқа оёгининг устки қисми. *От сағридан, қўй бағридан.* Мақол. ■ *Бек от сағрисига аччиқ билан қамчи босди.* Ҳ. Фулом, Машғал. *Тўнғич ботир шернинг сағрисига қилич урибди.* «Чалпак ёққан кун».

2 Гавданинг думба билан бел ўртасидаги қисми. *Итнинг тиши.. сағримга ханжар ургандай ботган эди.* Ф. Фулом, Шум бола.

3 Отнинг сағри терисидан тайёрланган, кавуш учун ишлатиладиган кўн, чарм. *Кўнчилик корхоналарида сағри тайёрлаш муҳим ўринни эгаллаган эди.* Ф. Озодаев, Саноат.

4 Шундай чармдан қилинган (пойабзал ҳақида). *Қиш-ёз оёғида бир сағри кавуш.* Маҳси ҳам минг ямоқ. Ойбек, Танланган асарлар.

САҒРИЧИ Сағри тайёрловчи, кўнчи (қ. сағри 3). *Абдуваҳоб сағричи бўлса, белбоғига осиб олган соқолтароғини қинидан олиб.. кўнғир соқолини таради.* Мирмуҳсин, Дорбозлар.

САҲАР [а. سحر — эрта тонг, тонготар] Гира-шира тонг ёришган маҳал, эрта тонг пайти; субҳидам, тонг, азон. *Қовун есанг, саҳар е, саҳар емасанг, заҳар е.* Мақол. ■ *Вақт саҳарга яқин, теварак-атрофдаги хўрозлар кетма-кет қичқиришарди.* А. Қодирий, Ўтган кунлар. *Улар саҳар туриб, қишлоққа йўл олдилар.* «Муштум». *Ёз фасллари у деҳқончилик қилади, саҳар кетиб, кеч келади.* М. Исмоилий Фарғона т. о.

Саҳар турмоқ 1) барвақт уйқудан турмоқ; 2) *дин.* рўза ойи кунларида барвақт туриб саҳарлик қилмоқ. **Эрта** (ёки **тонг, каллаи**) саҳар Жуда эрта, тонг отар-отмас. *Тонг саҳарда турмоқ.* ■ *Куз пайти кечқурунлари ва тонг саҳарда ҳаво тоза ва хийла салқин бўлади.* Газетадан.

САҲАРЛАБ *рви.* Эрта билан, барвақт, эрта тонгда; субҳидамда, азонда. *Саҳарлаб турмоқ.* ■ *Аваз аранг тонг оттирди.* Саҳарлаб *Эшжонни етаклади-ю, йўлга тушиди.* С. Сиёев, Аваз.

Каллаи саҳарлаб Жуда эрта, азонлаб, барвақт, тонг отмасдан. *Соҳиб қори кўриб қолса нима дейди, каллаи саҳарлаб боғимда нима қилиб юрипти бу хотин, демайди ми?* И. Раҳим, Чин муҳаббат. *Аёл тонг саҳарлаб*

жунжикиб уйғониб кетди, осмон оқариб келарди. М. Мансуров, Ёмби.

САҲАРЛИК *дин.* Рўза ойи кунларида тонг отмасдан, рўза тутиш вақти бошлангунга қадар ейиладиган овқат ва шунга белгиланган вақт. *Саҳарлик қилмоқ.* ■ *Рўза тутиш шоҳу малайга баробар келган мажбурият бўлгани учун, сурнай ва нақора [ноғора] сарой аҳлини саҳарликка уйғотмоқда эди.* П. Қодиров, Юлдузли тунлар.

САҲАР-МАРДОН [а. + ф. سحرمردان — мардлар тонги] *айн.* саҳари мардон қ. мардон 1. *Саҳар мардонда турмоқ.*

САҲАРХЕЗ [а. + ф. سحرخيز — саҳарда, эрта тонгда турувчи] Эрта билан барвақт, саҳарлаб туришга одатланган, саҳарда турувчи, азонда уйғонувчи. *Саҳархез одам.* ■ *Саҳархез Туробнинг овози ҳаммани оёққа турғизди.* С. Кароматов, Олтин кум. *Узоқ-узоқлардан саҳархез хўрозларнинг қичқириғи эшитилди.* А. Раҳмат, Эллик бир баҳодир. *Саргашта саболар ҳам тин олдилар чаманда, Саҳархез булбуллар ҳам жим қолдилар чаманда.* Э. Охунова, Мен тонгни уйғотдим.

САҲБО [а. صحباء — олтинранг вино, май] *эск. поэт.* Қизил вино, шароб. *Сенсиз гулу боғ хору саҳро, Кўнглим тиламайди кайфи саҳбо.* Ҳабибий.

САҲВ [а. سحو — эътиборсизлик, паришонхотирлик; хато, хатолик] *кт.* Йўл кўйилган хато, камчилик. -*Мен ҳозир сизга Нодирабегим ғазалларидан ўқиб бераман. Саҳв қилсам, кечирасиз, — деди Гулноз бувисига.* Ҳ. Фулом, Тошкентликлар. *Дўстларим, шоир деманг, Эркин ғазал шайдосидир, Ёш денг-у, мавзур тутинг, Саҳв ўлса гар девонида.* Э. Воҳидов, Муҳаббат.

САҲВ-ХАТО, саҳву хато Камчилик ва хатолар. *Йўқ, бойни ўғри ё фирибгар демоқчи эмасман. Лекин саҳв-хато бўлиши мумкин.* С. Айний, Қуллар. *Агарчи мendan ўтган бўлса ҳар саҳву хато, дилдор Кечирсин, тавба қилдим, юз пушаймон, бир келиб кетсин.* Ҳамза.

САҲИЛ [а. سهل — енгил, осон; юмшоқ; текис, силлиқ] *эск. кт.* Вазни кам, енгил.

САҲИФА [а. صحيفة — варақ, бет; юз, юза; газета] **1** Китоб, дафтар ва ш. к. варагининг ҳар бир томони; бет. *Дафтарнинг саҳифаси.* ■ *Ҳаммаси бўлиб беш саҳифали ҳикоячага юз эллик саҳифа қоғоз қораланган.* Газетадан.

Мутриб хатчўн солинган бир саҳифани очдию, «ўқи!» деди. С. Сиёев, Ёруғлик.

2 Варақ бетидаги матн. *Нарзи чўнтагидан газета олиб, уни чироққа тутиб, саҳифаларига кўз югуртирди. Н. Сафаров, Оловли излар.*

3 Газета, журнал ва ш. к. нинг маълум масалага бағишланган ёки бирор умумий мавзу билан боғланган бир бети. *Газетанинг адабиёт саҳифаси. Шеър саҳифаси. ■ Аҳмедов саҳифадаги материалларни кўздан кечиргач, умумий сарлавҳани товуш чиқариб ўқиди. А. Қаҳҳор, Қўшчинор чироқлари.*

4 кўчма Давомли бутун бир ҳодиса, ҳаёт ва ш. к. нинг айрим даври. *Шоир ҳаётининг шонли саҳифалари. Тарих саҳифалари. ■ Тошкент фестивали уч қитъа кинематографчилари ижодиди ёрқин саҳифалар очаётир. Газетадан. Янги йил ҳаётимизга кириб келиши билан олам янгилангандек бўлади — тарих солномасининг яна бир янги саҳифаси очилади. Газетадан.*

САҲИФАЛАМОҚ плрф. Терилган матнни саҳифаларга бўлмоқ; вёрстка қилмоқ. *Машиналар ғириллаб, Саҳифалаб беради. Бир ёқдан корректорлар Солиштириб кўради. Қ. Муҳаммадий. Журналнинг ушбу сони саҳифаланаётганда, редакцияга хунук хабар келди. «Фан ва турмуш».*

САҲИҲ [а. صحیح — соғлом; тўғри, чин; ҳақиқий, ишончли] Энг ишончли деб ҳисобланган ҳадис. *Муҳаддислар ҳадисларни ҳақиқий ва ноҳақиқийга ажратиб (яъни кодификация қилиш) билан шуғулланиб.. улардан асосан саҳиҳларини тўплашга интиланлар. «ЎЗМЭ».*

2 Энг ишончли деб ҳисобланган ҳадислар тўплами. *«Саҳиҳи Бухорий». «Саҳиҳи Термизий».*

3 Тузатилган, тўғрилланган, бехато. *Дарслик ёзувчи киши саҳиҳ матнга таяниш тасмийлини эгаллаши лозим. Газетадан.*

САҲН [а. صحن — идиш, тарелка; ҳовли, очиқ майдон] Бирор чекли (чегарали) юза, майдон. *Ҳовли саҳни. Залнинг саҳни. ■ Ямиш саҳни билан осмон каби кенгдир бу боғ, Ерга кўк тушган каби юлдуз қатор минглаб чироғ. Ф. Фулом. Боғнинг саҳнини Салим уч ярим таноб, Фазлиддин уч таноб мўлжаллади. Ойбек, Танланган асарлар. Ҳовли саҳнида катта ҳовуз, атрофи мрамар тошлар билан ишланган. Ж. Шарипов, Хоразм.*

САҲНА [а. صحنه — томоша кўрсатиладиган жой] **1** Томоша кўрсатиладиган жойда, театр, кинотеатр, концерт зали ва ш. к. томошахоналарда спектакль, кино кўйилладиган баланд жой. *Театр саҳнаси. Саҳна дарпардаси. ■ Қоронғилик секин ёришиб, саҳнада ҳарир кийимларга ўралган раққоса Малак хоним пайдо бўлди. Мирмуҳсин, Йўқолган жавоҳир. Андижон театри саҳнасида Лутфихоним Саримсоқова ижро этган ролни биринчи бор кўрганам ҳамон эсимда. Ҳ. Носирова, Мен ўзбек қизиман.*

2 Умуман, театр хизмати, театрдаги фаолият. *Умрини саҳнага бағишламоқ. ■ Унинг ёши эликдан ошиб, дам олиш пайти яқинлашса ҳам, шу болаларни боқиб, тарбиялаш учун, уларнинг келажаги учун яна саҳнага қайтди. Газетадан.*

3 кўчма Бадиий асардаги айрим қисмовқа, эпизод. *Учрашув саҳнаси. ■ -Хўш, тўй саҳнасини яна бир марта такрорлаймиз, — деди кўзойнакли режиссёр. Газетадан.*

САҲНАБОП Саҳна учун мос, саҳналаштирилиши осон асар. *Саҳнабоп асар.*

САҲНАВИЙ Саҳнага, саҳнадаги фаолиятга оид; саҳна учун мос. *Романнинг саҳнавий талқини.*

САҲНАДОШ Бир саҳнада, театрда бирга ишлаган ёки ишловчи, бир саҳна асарида роль ижро этувчи (бир-бирига нисбатан). *Қаламдош, саҳнадош биродарлар бундан буён ҳам ижодий алоқаларни мустаҳкамлаш ва ривожлантириш режаларини тузиб олишди. Газетадан. Узоққа бормаи, ўз устозларим, тенгқур ҳамкасблар, саҳнадош дўстларимнинг босиб ўтган йўли, фаолияти бунга ёрқин мисол бўла олади. Газетадан.*

САҲНАЛАШТИРМОҚ 1 Бадиий асарни саҳнага қўйиб учун мослаб қайта ишламоқ. *Романни саҳналаштирмоқ. ■ Бир йиғилишда Хурийд ўзининг бир пардали пьесасини ўқиди. Тўғрақ қатнашчилари пьесани саҳналаштиришни ташкил қилишди. Ф. Жўраев, Обид Жалилов.*

2 Саҳнага қўймоқ, постановка қилмоқ. *Янги спектаклни саҳналаштирмоқ. ■ Биринчи йили А. Қаҳҳорнинг «Оғриқ тишлар» драмасидан, келгуси йили С. Аҳмаднинг «Келинлар кўзғолони» комедиясидан кўринишлар саҳналаштирди. Газетадан.*

САҲОБА [а. صحابه — Муҳаммад пайгамбар сафдошлари] Муҳаммад пайгамбарнинг

сафдошлари ва яқин ёрдамчилари; кейинчалик уни бир марта бўлса ҳам кўрган кишилар. У [Анвар қори]. авлиёларнинг гурба-ти, саҳобаларнинг фақирлиги ҳақида турли оятлар, ривоятлар келтирди. Ойбек, Улуғ йўл. Саҳобаларнинг ислом тарихидаги алоҳида аҳамияти шундаки, Муҳаммад (сав) вафот этганидан сўнг, унинг таълимоти ва ҳаммалари бир бўлиб сақладилар. «ЎзМЭ».

САҲРО [а. صحراء — чўл, дашт, биёбон] 1 Ўсимлиги жуда кам, сувсиз бепоён дашт, биёбон; чўл. Саҳройи Кабир. Бийдек саҳро. ■ Тропиклардан унча узоқда бўлмаган ва ёгингарчилик жуда кам бўладиган жойларда саҳролар пайдо бўлади. «География». Кечга яқин улар яйлов тугаб, саҳро бошланадиган ерга етиб келдилар, сарғиш барханлар, чиройли гуллаган саксовул буталари кўринди. А. Мухтор, Чинор.

2 кўча Арктика ва Антарктидадаги қор ва муз қоплаган ерлар.

САҲРОЙИ [а. صحرائى — саҳрога тегишли, саҳрода бўладиган] Саҳрода яшайдиган. Саҳройи халқнинг қишловларига от қўйиб, минглаб қўйларни ўлжа ҳайдашни севади. Ойбек, Навоий. -Саҳройи мўғул ашбор тинг-ладан қочди! — деди кулиб Султонмурод. Ойбек, Навоий.

САҲҲОФ [а. صحاف — газета сотувчи; муқовачи, муқова ясовчи] 1 Китобларни муқоваловчи уста; муқовасоз. [Илғари] Бадий безакли қўлёзма китобларни яратишда наққош ва саҳҳоф сингари бир қанча мутахассислар иштирок этган. «Фан ва турмуш».

2 эск. Китоб сотувчи, китобфуруш. Саҳҳофлар катта пул тўлаб, устоз шоирларнинг девонларини унга [Абдусаммадга] кўчиртирар ва фойдасига сотар эдилар. М. Осим, Сеҳрли сўз. Бобур саҳҳофларни қақриб, бу китобнинг энг баланд нархи қанча бўлишини сўради. П. Қодиров, Юлдузли тунлар.

Саҳҳоф бозор тар. Саҳҳофлар китоб савдоси билан шуғулланадиган бозор. Хусайн шу бугун эрталаб саҳҳоф бозорини айланиб чиқиб, китоб ушлаб турган бир кампирга кўзи тушиб қолган эди. М. Осим, Карвон йўлларида.

САҲҲОФЛИК 1 Қоғозни саҳифалаш ва китобни муқовалаш касби. Кейинроқ тўпланган маълумотимга кўра, мулла Назрулло ёшлигида саҳҳофлик қилар экан. С. Айний, Эсдаликлар.

2 Бозорда саҳҳофлар ёки уларнинг дўконлари ўрнашган жой, саҳҳофлар растаси. Наққош бундай китобларни Раънонинг сўроғи, ялинишига қараб, саҳҳофликдан топиб келтирар, ўқитиб, ўзи ҳам эшитишни севад эди. Ойбек, Улуғ йўл.

СВАРКА [р. сварить — «уламоқ, пайвандламоқ» фл. дан ясалган от] с.т. айн. пайванд 2.

СВАРКАЧИ с.т. айн. пайвандчи

СВЕТОФОР [р. свет — нур, ёруғлик + юн. phoros — элтувчи] Пиёдалар ва транспорт воситаларининг кўчада, йўлда ва темир йўлдан ўтиш жойларидаги ҳаракатини ҳамда темир йўл транспорти қатновини тартибга солишда ишлатиладиган ва ёруғлик сигнали (асосан 3 рангда) берадиган электр қурилма. Автоматик светофор. ■ Узоқдан светофорнинг яшил чироғи кўринди. Ў. Ҳошимов, Пўлат чавандоз.

СВЕЧА [р. свет — «ёруғлик, нур; чироқ» с. дан ясалган от] 1 тех. Ички ёнишли двигателларнинг электр учқун чиқариб, ёнилғи аралашмасини ёндириб берувчи қисми. -Свечалардан учқун чиқяптими? — деди Раҳимжон. -Бўлмаса, ручкани айлан-тиринг-чи, кўрайлик. О. Ёқубов, Баҳор кунларидан бирида.

2 физ. Ёруғлик кучининг ўлчов бирлиги.

СВЕЧАЛИ 1 тех. Свечаси бўлган, свеча ўрнатилган.

2 физ. Ёруғлик кучи қанчадир свечага тенг бўлган. Юз свечали электр лампа.

СВИТЕР [ингл. sweater < sweat — терламоқ, тер чиқармоқ] Жун ипдан тўқилган, тугмасиз калта иссиқ кийим. Эшикда Санам кўринди. Устида кўкиш свитер. Ш. Холмирзаев, Тўлқинлар. Рустам қизнинг хаёлида жонланди. «Бугун ҳам у свитер кийиб юрган бўлса керак», деб ўйлади у. Ў. Ҳошимов, Қалбинга кулоқ сол.

СВОДКА [р. свести — «тўплаб хулоса чиқармоқ, бирор шаклга келтирмоқ» фл. дан ясалган от] эск. Бирор ишнинг бориши, режанинг бажарилиши ва ш. к. ҳақидаги кўрсаткичлар маълум тартибда жойлаштирилган ёзма маълумот. Пахта теримининг бориши ҳақидаги сводка. ■ Ғалла фронтдан олинган сводкага бир назар ташланг-а, республикамиз олган мажбуриятини бажарай деб қолди. Газетадан.

СЕАНС [фр. seance < seoir – мувофиқ бўлмоқ, ярашмоқ; ўринли бўлмоқ] **1** Кино ва б. томошаларнинг ҳар сафар бир марта кўрсатилиши. *Шу чоқ сеансга қўнғироқ бўлди-ю, томошабинлар бирин-кетин залга кетишди.* Газетадан.

3 Такрорланадиган бирор ишнинг ҳар сафарги бажарилиши. *Гипноз сеанси.*

СЕБАРГА [ф. سهبرگه – уч баргли] бот. Дуккакдошларга мансуб, сув бўйида, ўтлоқларда ўсадиган, барги уч бўлакли, беда-симон бир ёки кўп йиллик ўт; ем-хашак экинн. *Келинчак оёқларини ариқча лабидаги себарга устига узатиб, юзини ҳўллади.* С. Абдулла, Мавлоно Муқимий.

СЕБОРЕЯ [лот. sebum – ёғ + юн. gneo – оқмоқ] Ёғ безлари функциясининг бузилиши натижасида келиб чиқадиган, кўпинча балогатга егаётган ўсмирларда учрайдиган тери касаллиги. *Себорея, асосан, юз, бош, кўкракнинг юқори қисми ва елкада, яъни ёғ безлари кўп жойлашган ерларда учрайди.* «ЎЗМЭ».

СЕВАЛАМОҚ Майдалаб, томчилаб ёғмоқ; шиваламоқ (ёмғир ҳақида). *Икки кундан бери гоҳ севалаб, гоҳ шиддат билан ёгаётган ёмғир ҳамма ёқни ивитиб юборди.* А. Қаҳҳор, Қўшчинор чироқлари. *Ташиқарида севалаб ўтган майин ёмғир ҳам тинди.* Н. Аминов, Қаҳқаҳа.

СЕВГИ 1 Қарама-қарши жинсдаги одамларнинг (эр ва хотин, йигит ва қизнинг) бир-бирига нисбатан чуқур интим, чин қалбдан ва фидокорона илиқ муносабат туйғуси; ишқ, муҳаббат. *Севги пулга сотилмас, кўнгил пулга топилмас.* Мақол. ■ *Муҳаббат унинг [Гулнорнинг] юрагини ҳар кун яна чуқурроқ эғаллаб, дардини кучайтиргач, севгининг чин мағносини тушуна бошлаганди.* Ойбек, Танланган асарлар. *Севги одамнинг юрагига тиниқлик, нур, кўнглига эзгу орзулар солади дейишади.* С. Аҳмад, Суд. *Севгини тортиб бўларми Тошу тарозу билан..* Э. Воҳидов, Муҳаббат.

2 Бирор яқин кимса ёки нарсага нисбатан меҳр-садоқат, меҳр-муҳаббат туйғуси. *Вақтим чоғ этган – Ватан севгиси! Кўксим тоғ этган – Ватан севгиси!* Ё. Мирзо.

СЕВГИЛИ 1 Кишининг кўнгил қўйган дилдор; ёр, маъшуқ(а), маҳбуб(а). [Темиржон] *Қандай бўлмасин, севглисининг кўнғироқдай товушини зшитиш дардида из-*

тироб чекар, юраги дам-бадам ҳаприқиб турарди. Ж. Абдуллахонов, Орият. *Севгилим, сени деб кўйдим қанчалар, Севгилим, юракда дардим лиммо-лим.* «Ёшлик».

2 сфт. Севикли, севимли, яхши кўрган. *Севгили ёр.* ■ *Ҳаёт, қулоқлари ёнида севгили оҳанги бирдан янграб кетгандан, шодлик ҳаяжони билан талпинди.* М. Исмоилий, Фарғона т. о.

СЕВГУВЧИ айн. севувчи. *Икки севгувчи қалбнинг орзулари, ўйлари, қарашлари ҳар масалада ғоят мос келар.. эди.* Ойбек, Танланган асарлар.

СЕВИКЛИ 1 айн. севгили **1.** *Шу келишган, хушбичим, башанг кийинган йигит, назарида, худди севикли Холдорбекка ўхшаб кетди.* К. Яшин, Ҳамза.

2 Энг қадрли, севимли. *Севикли ўртоқ.* *Севикли ўқитувчи.* ■ *Севикли устознинг кутилмагандаги буйруғи Зулфиқорнинг ҳафсаласини пир қилди.* Мирмуҳсин, Меъмор.

СЕВИМЛИ 1 айн. севгили **1.** *Акрамхон шу севимли қизнинг севиклиси бўлишни истар, аммо бундай бахтга эришиши осон эмаслигини биларди.* И. Раҳим, Гинимсиз шаҳар. *У [Зебо] севиб, севимли бўлганидан мамнун эди, бахтиёр эди.* Шухрат, Шинелли йиллар.

2 Ёқтирадиган, яхши кўрадиган, суюкли. *Севимли касб.* *Севимли мусиқа.* ■ *Анвар ҳар ким учун севимли ва хушмуомаласи барчага баравар эди.* А. Қодирий, Меҳробдан чаён. *Чой миллионлаб кишиларнинг севимли ичимлигидир.* Газетадан.

СЕВИМСИЗ Киши яхши кўрмайдиган, севмайдиган. *Офтоб ойим учун гўё.. Кумуш энди эрига севимсиз, ишдан чиққан ва бурчакка тиқилган уводадек бўлиб кўрина бошлаган эди.* А. Қодирий, Ўтган кунлар.

СЕВИНАРЛИ Севинса арзийдиган, қувонарли. *Севинарли натижа.*

СЕВИНМОҚ Хурсанд бўлмоқ, шод бўлмоқ, қувонмоқ. *Ич-ичдан севинмоқ.* ■ *Гулнор, кутилмаганда кетмон олиб кетиш баҳонаси билан келган Йўлчини кўриб, ниҳоятда севинди.* Ойбек, Танланган асарлар. *Бойвачча, Ҳамдам Йўлдошевни товушидан таниб, севиниб кетди.* С. Юнусов, Кутилмаган ҳазина. *Ишнинг энгил кўчишини билиб севинган она Отабекнинг бу шартига дарров кўна қолди.* А. Қодирий, Ўтган кунлар.

Ўзида йўқ севинмоқ Ниҳоятда, жуда ҳам хурсанд бўлмоқ. *Анвар капалак ва олтин-*

қўнғизларни гулзорда учириб юборар, агар улар гулларга қўниб қолсалар, ўзида йўқ севиначар эди. А. Қодирий, Меҳробдан чаён.

СЕВИНЧ Хурсандлик ҳис-туйғуси; шодлик, қувонч. *Юраида севинчи тўла, чопади қиз, қуш каби енгил.* Т. Тўла. -Эҳ, маза! Маза! - *Попук севинчидан қуёндай диконг-диконг сакради.* Ҳ. Назир, Ёнар дарё.

СЕВИНЧИ Хушхабар учун бериладиган инъом, совға; суюнчи. *Ўзбек ойим ўрта эшикка бориб етмаган ҳам эди, нариги ёқдан қўшининг боласи югуриб кириб қолди: -Севинчи беринг, бек буви, кеннойим келдила! А. Қодирий, Ўтган кунлар. Ишим яхши, ким келса, хотининг Ҳасан-Ҳусан туғди, деб севинчи олавераман энди.* С. Аҳмад, Таржимаи ҳол.

СЕВИНЧЛИ Кишини хурсанд қиладиган, шод этадиган; қувончли. *Севинчли хабар. Севинчли кун.*

СЕВИШМОҚ 1 Севмоқ фл. бирг. н. *Группадаги талабалар Абдухалилни софдиллиги, меҳнатсеварлиги учун севишарди.* Ў. Ҳошимов, Қалбингга қулоқ сол.

2 Бир-бирини севоқ. *Омон билан Ойчинор севишиб қолди, икковини унаштириб қўйишди.* «Ойсулув».

СЕВМОҚ 1 Ишқ-муҳаббат туйғуси билан муносабатда бўлмоқ; кўнгили қўймоқ, яхши кўрмоқ. *Жонгинам, мен сенга кўрсатай вафо, Гуллаган баҳорим, сени севаман.* У. Исмоилов, Сайланма. *Шу топдагина у [Алимардон] Муқаддамни севганини, қаттиқ севганини тушунди.* Ў. Ҳошимов, Қалбингга қулоқ сол.

2 Меҳр-муҳаббат, садоқат кўрсатмоқ; ғамхўрлик қилмоқ. *Ватанни севоқ. Онани севоқ.* ■ *Она ўз ўғлини севади фақат..* Ҳ. Олимжон. *Отам бўлмасангиз ҳам, мени отам муҳаббати билан севган содиқ ва меҳрибон бир кишимсиз, яъни маънавий отам.* А. Қодирий, Ўтган кунлар.

3 Ёқтирмоқ, яхши кўрмоқ. *Муסיқани севоқ. Гулни севган тиканни ҳам севади.* ■ *Нури кийинишни, безакни севар эди.* Ойбек, Танланган асарлар.

Жини севмаслик Ёқтирмаслик, таъбиға, дидига тўғри келмаслик; ёмон кўрмоқ. *Мингбоши, Содиқ аминни жини севмагани учунми, у бу ерда йўқ.* М. Исмоилий, Фарғона т. о.

СЕГМЕНТ [лот. segmentum – бўлак, лахта; кесма < seco – кесаман] **1** мат. Доиранинг ёй ва ватар билан чегараланган қис-

ми; шарнинг кесувчи текислик билан ажратилган қисми.

2 анат. Қўп бўғинли жониворлар тана-сидаги ҳар бир бўғин ёки умуртқа поғонасининг ҳар бир қисми.

СЕГОҲ [ф. سه‌گه – уч ўринли, уч пардали] (С – катта) мус. **1** Ўн икки мақом тизимидаги маълум шўъба номи (қ. **шашмақом**).

2 Шашмақом ва Хоразм мақомлари таркибида бешинчи мақом номи. *Сегоҳнинг 2-гурух шўъбаси «Мўғулчай сегоҳ» деб номланиб, Талқинча, Қашқарча, Соқийнома ва Уфар қисмларини ўз ичига олган.* «ЎЗМЭ».

СЕДАНА [ф. سه‌دانه – уч донали, уч уруғли] бот. Бир йиллик ўтсимон зиравор ўсимлик ва унинг нон бетига сепиладиган хушбўй уруғи. -*Ахир седана сепилган, сўлқиллаб турган бундақанги нонни ҳеч қаердан тополмайсиз! – деди Жамолiddин.* М. Исмоилий, Фарғона т. о.

СЕДАНАЛИ Седана сепилган. *У седанали нонни яхши кўришимни билиб.. йўл-йўлаккай бозорага кириб, уч-тўртта ёпилган седанали нон олиб келарди.* Мирмуҳсин, Умид.

СЕДИ Гана Республикасининг пул бирлиги.

СЕЗГИ 1 Нарса ва ҳодисалардаги айрим хоссаларнинг миядаги инъикоси. *Кўриш сезгиси. Эшитиш сезгиси. Сизги авзолари.* ■ *Сезги дунёни билишнинг биринчи босқичи ва таркибий қисмидир.* «ЎЗМЭ». *Сен чал буеун ялли ҳаёт куйини, Бутун сезги, ҳиссим билан тинглайман.* Файратий. *Қалтирарсан ажиб сезгидан..* Р. Парфи.

2 Ақл-идрок билан ҳис этилган, фаҳмланган, пайқалган ички туйғу; фаҳм-фаросат; инстинкт. *Қандайдир узук-юлуқ фикрлар, кўнгилини ғаш қиладиган сезгилар уни чулғаб олди.* Ойбек, Қуёш қораймас. *У оналарга хос ички бир сезги билан шунча чақолақ орасидан ўғлининг овозини – баланд йиғисини дарров ажратиб оларди.* Ў. Ҳошимов, Қалбингга қулоқ сол. *Элмуроднинг кўнглида энди чолга нисбатан бўлган ҳалиги нафрат ўчиб, унинг ўрнига аянчга ўхшаш бир сезги пайдо бўлди.* П. Турсун, Ўқитувчи.

СЕЗГИР 1 Сезиш қобилияти кучли, ташқи таъсири тез сезадиган. *Сезгир қиз.* ■ *У [Тожибой] энди тулқидек айёр, бўридек сезгир бўлиб қолган эди.* П. Турсун, Ўқитувчи. *Ибодов юмшоқ супурги бўлса-да,*

табиатан сезгир, зийрак одам эди. Ф. Мусажонов, Ҳиммат.

2 Тез фаҳмлаб оладиган; зийрак, хушёр; фаҳм-фаросатли. Бошлиқнинг хушмуомала, маданиятли бўлгани яхши-ю, қани энди у яна сезгирроқ, ғамхўрроқ ҳам бўлса. Ф. Мусажонов, Ҳиммат. Санъаткорнинг ички дунёси, мураккаб ижодий шахсияти алоҳида сезгир бўлади, ҳаётни тушуниш билан ўткирлашгандир. Газетадан.

3 Энг кичик ўзгаришларни ҳам қайд этадиган. Сезгир тарози. ■ Чуқур қудуқларга ва ер юзига ўрнатилган сезгир асбоблар қаттиқ ер нўстлоғида микроскопик дарзлар ҳосил бўладиган пайтни пайқайди. Газетадан. Адабиётни ҳақли равишда энг сезгир барометрга қиёс этишади. «ЎТА».

СЕЗГИРЛИК 1 Ташқи таъсирга нисбатан сезгир бўлишлик. Рецетторларнинг сезгирлиги. Қулоқнинг сезгирлиги.

2 Хушёрлик, зийраклик; фаҳм-фаросат. Гавҳар бланкаларни тўлдираркан, Талъатнинг зимдан қараб қўяётганини қизларга хос сезгирлик билан ҳис этарди. Ў. Ҳошимов, Қалбингга қулоқ сол.

СЕЗГИСИЗ Сезиш қобилиятини йўқотган; ҳиссиз, туйғусиз. Бармоқларим сезгисиз бўлиб қолибди. Сезгисиз қилиб қўймоқ.

СЕЗИЛАРЛИ 1 Сезилиши, ҳис этилиши мумкин бўлган, фарқи анчагина катта, кучли. Қуёш ботганига анчагина бўлган. Қоронғилик қуюқлашган сари.. ҳаво сезиларли даражада совиб борарди. Ойбек, Танланган асарлар.

2 кўчма Кўзга кўринарли; арзирли, айтарли. Унинг иш фаолиятида сезиларли ўзгариш бўлмади. Сезиларли натижалар қўлга киритилди.

СЕЗИЛАР-СЕЗИЛМАС Билинар-билинамас, унча сезилмайдиган; пайқаш қийин бўлган, Ниҳоят, султоннинг кўкимтирсарғиш юзига сезилар-сезилмас қизиллик югурди. О. Ёқубов, Кўҳна дунё. Ишлаб турган юракнинг жонли хўжайраларидаги сезилар-сезилмас ўзгаришларни ўрганиш қийин. Газетадан.

СЕЗИЛМАС Унчалик сезилмайдиган, билилмайдиган; яширин. Сезилмас истеҳзо.

СЕЗИЛМОҚ 1 Сезмоқ фл. мажҳ. н. Зилзила юқори қаватларда кучлироқ сезилади. ■ Кумда кетаётган кишига нинанг оғирлиги ҳам сезилади. Ж. Шарипов, Хоразм.

2 Акс этмоқ, кўринмоқ, билинмоқ, намоеън бўлмоқ. Ҳаёт ўчоқ ёнидаги шохларни гоҳ оёғи билан босиб, гоҳ тиззасига уриб синдиради, унинг шошқин ҳаракатларидан ҳаяжонланаётгани сезилиб турарди. М. Исмоилий, Фарғона т.о. Бобурнинг Самарқандга яна юриш қилиши қатъий экани унинг гап оҳангидан сезилди. П. Қодиров, Юлдузли тунлар.

3 Туюлмоқ, ўхшамоқ. Содиқнинг жавоби унинг устидаги юкни тағин ҳам оғирлаштиргандек сезилиб, у бошини қуйига энгаштирди ва чувак соқолини тузатиб, фикрда қолди. А. Қодирий, Ўтган кунлар.

СЕЗИШ 1 Сезмоқ фл. ҳар. н. Оғриқни сезиш. Массулиятни сезиш.

2 Сезги, сезув. Сезиш қобилияти. Сезиш аъзолари.

СЕЗМОҚ 1 Сезги аъзолари орқали ҳис этмоқ; ташқи таъсирни туймоқ. Совуқни сезмоқ. Ҳидни сезмоқ. ■ Мансурнинг илиқ қўллари нешонаслини, сочини силаётганини сезиб, кафти билан юзини тўсди-ю, унсиз йиғлаб юборди. Ў. Ҳошимов, Қалбингга қулоқ сол. [Гавҳарнинг] Юраги гупилаб урар, шамолдан қулоқлари шанғиллар, тиззасининг кўзи муздай ерга тегиб турганини сал-пал сезарди. Ў. Ҳошимов, Қалбингга қулоқ сол.

2 Ақл-идрок билан фаҳмламоқ; кузатиш, тажриба орқали ҳис этмоқ. Кейинги вақтларда эрининг нимадандир қаттиқ изтироб чекаётганини Розия сезиб юрибди. С. Сиёев, Аваз. Азиза курсдош қизларнинг ғаш келаётганини сезган сайин ўзини ғолиб ҳисоблаб, роҳатланар.. эди. Ў. Ҳошимов, Қалбингга қулоқ сол.

3 Олдиндан ҳис этмоқ, пайқамоқ, фаҳмламоқ. Совлиқ қандайдир бир ёмонлик юз беришини сезгандек безовта маърар, икки оёғини тинмай силкитаётган қўзи томон интиларди. С. Аҳмад, Юлдуз. Бу воқеадан хабар топган Султон Али мирзо ўлим хавфи ўзига ҳам яқинлашиб келаётганини сезди-ю, қандай қилиб бўлса ҳам қочиб қутулишининг пайига тушди. П. Қодиров, Юлдузли тунлар.

4 Шундай деб ҳисобламоқ, шундай деб билмоқ; туюлмоқ. Лекин Яраш полвон ўз уйида ўзини мусофирдек сеза бошлади. С. Сиёев, Оғлиқ аёл. Фотима бирдан қалтираб, кучсиз, дармонсиз бўлиб қолгандек сезди ўзини. Т. Ашуров, Оқ от.

СЕЗОН [фр. saison < лат. satio, sationis – экиш, экиш мавсуми] эск. айн. **мавсум**. Кузги сезон.

СЕЗОНЛИ айн. **мавсумий**.

СЕЗУВЧАН айн. **сезгир**. Юрак нозик, сезувчан бўлади. М. Жўра, Изтироб.

СЕЗУВЧАНЛИК Тирик организмнинг ташқи ва ички муҳит таъсирини қабул қилиш хусусияти. Нерв системаси қанчалик қўзғалувчан бўлса, сезувчанлик шунчалик юқори бўлади ва аксинча. «ЎЗМЭ».

СЕЙСМИК 1 Ер қобиғидаги тебранишларга, зилзилага оид, шу ҳодисалар билан боғлиқ бўлган. Сейсмик тўлқинлар.

2 Зилзила кўп бўлиб турадиган. Сейсмик ўлка. Сейсмик зона.

3 Ер қимирлашини (зилзила зоналарини) ўрганишга оид; ер қимирлашини махсус асбоблар ёрдамида қайд этиб турадиган. Сейсмик хариталар. ■ Сейсмик ва микро-сейсмик раёнлаштириш хариталари асосида антисейсмик ишларнинг миқёси ва хусусияти аниқланади. «Фан ва турмуш».

СЕЙСМО- [юн. seismos – ер қимирлаши] Байналмиал ўзлашма кўша сўзларнинг биринчи қисми бўлиб, ўзи қўшилиб келган сўзнинг ер қимирлаши ва Ер қобиғидаги турли силкинишларга алоқадорлигини кўрсатади (мас., сейсмограф, сейсмотектоника).

СЕЙСМОБАРДОШ [сейсмо.. + бардош] сфм. Зилзила, сейсмик кучлар таъсирига бардош берувчи. Сейсдобардош қурилиш.

СЕЙСМОГРАММА [сейсмо.. + юн. gramma – ҳарф, ёзув] Ер қимирлаши ёки портлаш натижасида вужудга келадиган ер тебранишлари ёки силкинишларининг сейсмограф ёрдамида қайд этилган ёзуви, чизмаси.

СЕЙСМОГРАФ [сейсмо.. + юн. grapho – ёзаман] Ер қобиғидаги механик тебранишларни, сейсмик сигналларни автоматик равишда қайд қилувчи, ёзиб борувчи асбоб. Ҳар хил турдаги ҳамма сейсмографлар ҳар кундаги ишларини қилиб, оғиқмай-тоғиқмай ишламоқда эди. И. Раҳим, Тинимсиз шаҳар.

СЕЙСМОЛОГ Сейсмология мутахассиси, зилзилашунос. Сейсмолог олимлар зилзила марказига сезгир асбобларни ўрнатиб қўйишди. Газетадан. Бобур мирзо Қандаҳор тоғларининг хусусиятларини худди сейсмологдай жуда келтириб таърифлайди. Газетадан.

СЕЙСМОЛОГИК Сейсмологияга оид. Сейсмологик харита. Сейсмологик тадқиқотлар.

СЕЙСМОЛОГИЯ [сейсмо.. + юн. logos – фан, таълимот] Геофизиканинг ер қимирлашини, зилзилаларни ва улар билан боғлиқ ҳодисаларни ўрганадиган бўлими; зилзилашунослик. Японияда зилзила кўп бўлади. Шу сабабли зилзилани ўрганувчи фан – сейсмология ниҳоятда ривожланган. Ҳ. Ҳасанов, Экватордан ўтганда. Сейсмология физика ва геология фанлари билан узвий боғлиқ. «ЎЗМЭ».

СЕЙСМОМЕТРИЯ [сейсмо.. + юн. metreo – ўлчайман] Сейсмологиянинг сейсмик асбобларни ҳамда Ер қобиғидаги тебранишларни қайд этиш усулларини ишлаб чикувчи соҳаси.

СЕЙСМОТЕКТОНИКА [сейсмо.. + тектоника] Зилзиланинг вужудга келишидаги геологик шароитларни ўрганувчи мустақил фан соҳаси. Сейсмотектоника 20-асрда вужудга келган. «ЎЗМЭ».

СЕЙФ [ингл. safe – хавфсиз, ишончли] Пул, ҳужжат, қимматбаҳо металллар ва б. қимматбаҳо нарсалар сақланадиган мустаҳкам, ёнмайдиган шкаф, қути; пўлат сандиқ. Почта бошилиги пўлат сейфни қулфлаб, энди сургўчламоқчи бўлиб турганда, ҳаллослаб кириб келган чолни кўриб, ишини тўхтатди. Ҳ. Фулом, Замин юлдузлари. Мухтор Алиев синчковлик билан у ёқ-бу ёққа кўз югуртириб чиқиб, сейфни қулфлади. М. Хайруллаев, Ҳикоялар.

СЕКАНС [лат. secans – кесувчи, кесиб ўтувчи] мат. Тўғри бурчакли учбурчакда гипотенузанинг ўткир бурчакка ёпишган катетга нисбатидан иборат тригонометрик функция.

СЕКАТОР [лат. secare – кесмоқ, қирқмоқ] бoғ. Богдорчиликда унча йўгон бўлмаган шох ва новдаларни, янги кўчатларнинг ортиқча қисмларини кесиб тўғрилайдиган асбоб тоққайчи.

СЕКИН рвш. **1** Оҳиста ҳаракат билан, аста, ошиқмасдан, шошилмасдан. Секин юрмоқ. Эшик секин очилди. Дарё секин оқарди. ■ Раёно секин бошини кўтариб кулумсиди ва юзини четга ўгирди. А. Қодирий, Меҳробдан чаён. Қамалган тутун жуда секин тарқалмоқда эди. Ойбек, Танланган асарлар.

2 Билинар-билиномас, сезилар-сезилмас. Шеригим мени секин туртиб имлади. Қа-

булхонага чиқдик. А. Қаҳҳор, Бек. [Фотиманинг] Ўғлининг сочларига теккан бармоқлари секин кимирлади-ю, силашга ҳам журъат этолмай, тўхтаб қолди. О. Ёқубов, Эр бошига иш тушса. Атрофда тобора одам кўпайиб борар, биров унга узоқдан таъзим қилар, биров кўюққина кўришар, нотаниш кишилар секин калла силкиб қўярди. С. Сиёев, Ёруғлик.

3 Эҳтиёткорлик билан, аста-аста; озор бермай, авайлаб. Яранинг латтасини секин кўчирмоқ. Зирапчани секин олиб ташламоқ. ■ Талъат пиёлани секингина стол бурчагига қўйди. Ў. Ҳошимов, Қалбингга қулоқ сол.

4 Вазминлик билан, ҳовлиқмасдан, оҳиста. Секин тушунтирмоқ. ■ Агар мен бир бойнинг ўғли бўлсам, Нури мени севса, ота-онасига айтмаганда ҳам, атрофдагиларга секин билдирган бўлар эди. Ойбек, Танланган асарлар.

5 Паст товуш билан; эшитилар-эшитилмас. -Секин! Секин гапир! — Ҳакимбойвачча лабини тишлади, — хотинлар эшитса, гап-сўз чувалади. Ойбек, Танланган асарлар. Ашмардон секин уф тортиб қўйди. Ў. Ҳошимов, Қалбингга қулоқ сол.

6 Оз-оздан, асталик билан; кам-камдан. Иложсиз қолган деҳқон баҳони секин камайтириб, етти сўмга тушди. Ойбек, Танланган асарлар.

СЕКИН-АСТА айн. **аста-секин**. Секин-аста юрмоқ. ■ Кўёш секин-аста кўтарилиб, қалин шохлар орасидан мўралай бошлади. И. Раҳим, Чин муҳаббат. Қотмадан келган ҳаракатчан бу йигитнинг номи секин-аста одамларнинг тилига туша бошлади. Газетадан.

СЕКИНЛАМОҚ Тезлигини, суръатини пасайтирмоқ. Поезд секинлаб, гоҳ тўхтаб, гоҳ жадаллаб, қор босган бепоён саҳродан борар эди. А. Қаҳҳор, Олтин юлдуз. Шофёр секинлади-ю, тўхтамади. С. Сиёев, Отлик аёл.

СЕКИНЛАТМОҚ 1 Секинламоқ фл. орт. н. Поездни секинлатмоқ. Юришни секинлатмоқ. ■ Саман лўкиллаб бориб, қадамини секинлатди. М. Мансуров, Ёмби.

2 с.т. Пасайтирмоқ, пастроқ туширмоқ (овоз, товуш ҳақида). -Бу жиҳати сизга кўп ғанимат, — деди маҳдум ва товушини секинлатди. А. Қодирий, Мехробдан чаён. Директор онанинг руҳий ҳолатини сездими,

дарҳол унга жой кўрсатиб, радиоприёмникни секинлатди. Газетадан.

СЕКИНЛАШМОҚ 1 Пасаймоқ, сустлашмоқ; сусаймоқ (тезлик, суръат ҳақида). Поезд секинлашди. Иш суръати секинлашди. ■ Хирмонга яқинлашганда, Гавҳарнинг қадамлари секинлаша бошлади. Ў. Ҳошимов, Қалбингга қулоқ сол. Авазнинг қадами бир секинлашади, бир тезлашади. С. Сиёев, Ёруғлик.

2 Пасаймоқ, пастроқ тушмоқ (овоз, товуш ҳақида). Мусиқа овози секинлашди. Газетадан.

СЕКИНЛИК 1 Сустлик, ошиқмаслик; сезилар-сезилмаслик. Ҳаракатнинг секинлиги. Суръатнинг секинлиги. Товушнинг секинлиги. ■ Афсуски, бу иш жуда секинлик билан амалга ошириляпти. Газетадан.

2 Вазминлик; оғирлик. Секинлик билан тушунтирмоқ. ■ Увишган қалбимни секинлик билан Эзар эди бўм-бўш бу шаҳар. А. Орипов.

СЕКИН-СЕКИН рвш. **1** айн. **аста-секин**. Секин-секин юрмоқ. Секин-секин гапирмоқ. Секин-секин кўтарилмоқ. ■ Субҳ азони айтилиб, секин-секин тонг ёриб борди. А. Қодирий, Ўтган кунлар.

2 Тадрижий равишда, даража-бадаража, поғонама-поғона; оз-оздан. Секин-секин унутмоқ. ■ Она ўлимига чидай олмаган каби кўринган Нури секин-секин тақдирга.. тан берган эди. Газетадан.

СЕКРЕТ [лот. secretus — ажратилган, ажратиб чиқарилган] биол. Одам ва ҳайвон организмдаги без ҳужайралари ишлаб чиқарадиган ва ажратадиган модда; ажралма (тупук, шиллик, гормон ва ш.к.). Организмнинг нормал ҳаёти учун секретлар муҳим аҳамиятга эга. «ЎЗМЭ».

СЕКРЕТАРИАТ [фр. secretariat < лот. secretarius — ишончли шахс] қ. **котибият 1**. Бош бошқарма секретариати.

2 қ. **котибият 2**. Мажлис секретариати. **СЕКРЕТАРЛИК** қ. **котиблик**. Секретарлик лавозими.

СЕКРЕТАРЬ [лот. secretarius — ишончли шахс] **1** қ. **котиб 2-4**. Идора секретари. ■ Нега хўп дедингиз, секретарингиз касалхонада, докладни сизга ким ёзиб беради? А. Қаҳҳор, Оғриқ тишлар.

СЕКРЕЦИЯ [лот. secretio — ажратиш] биол. Одам ва ҳайвонлар организмда без-

лардан секретларнинг ҳосил бўлиш ва ажралиб чиқиш жараёни. *Ички секреция. Ташқи секреция.* ■ *Секреция — ҳужайра ичида синтез қилинган маҳсулотнинг аста-секин етилиб, кетма-кет бир органоддан бошқасига ўтказилиб турадиган изчил жараёндир.* «ЎЗМЭ».

СЕКС [лот. *sexus* — жинс] Жинсий майл билан боғлиқ кечинмалар, хатти-ҳаракатлар мажмуи.

СЕКСОЛОГИЯ [секс + юн. *logos* — фан, таълимот] Инсоннинг жинсий ҳаёти физиологиясини ўрганадиган фан. *Сексология мумаммолари билан турли соҳа мутахассислари.. шуғулланадилар.* «ЎЗМЭ».

СЕКСОПАТОЛОГИЯ [секс + патология] Тиббиётнинг жинсий ҳаёт ва хатти-ҳаракатларнинг бузилишидан келиб чиқадиган касалликларни ўрганиш ва даволаш билан шуғулланувчи соҳаси.

СЕКСТИЛЛИОН, секстильон [фр. *sex-tillion*] Бир сони ва йигирма битта нул билан ифодаланган сон, миқдор.

СЕКТА [лот. *secta* — таълимот, оқим, мактаб] **1 дин.** Мазҳаб, маслак; асосий, ҳукмрон диний йўналишдан ажралиб чиққан гуруҳ. *Секталар одатда мавжуд диний йўналишларга қарши муҳолиф ҳаракат сифатида вужудга келган.* «Фалсафа қомусий лугати».

2 кўчма Ўз манфаатлари, фикрлари билан чекланиб қолган, кўпчиликдан ажралган кишиларнинг тор гуруҳи.

СЕКТАНТ [р] **1 дин.** Бирор диний мазҳабга (сектага) мансуб киши.

2 кўчма Секта тарафдори ёки қатнашчиси (қ. **секта 2**).

СЕКТОР [лот. *sector* — қирқувчи, қирқиб ажратувчи] **1 мат.** Доиранинг ёй ва икки радиус билан чекланган қисми ва шу шаклдаги нарса. *Сектор юзини ўлчамоқ. Доира сектори.*

2 эск. Яхлит бир ҳудуднинг маълум радиус ва чегаралар билан чекланган қисми, алоҳида ажратилган ҳудуд. *Мудофаа сектори. Чилонзорнинг еттинчи сектори.* ■ *Шаҳар беш секторга бўлинган.* Газетадан.

3 Баъзи идора ва муассасаларнинг муайян фаолиятга ихтисослашган бўлими. *Кадрлар сектори. Лугатшунослик сектори.* ■ *Тозалик сектори ётоқхонанинг ичи ва ташқарисидаги ишларга яхши раҳбарлик қиляпти.* «Саодат».

4 Халқ ҳўжалигининг муайян иқтисодий ва ижтимоий белгилар билан ажралиб турадиган қисми, соҳаси. *Хусусий сектор. Давлат сектори.*

СЕКУНД [лот. *sekunda (divisio)* — иккинчи (бўлиниш)] **1 айн.** **сония.** *Бир неча секунд вақт. Секунд стрелкаси.* ■ *Зокир унинг бир секунд тўхтаганидан дафтарни таниганини сезиб, дув қизарди.* П. Қодиров, Уч илдиэ.

2 мат. Бурчак градусининг уч минг олти юздан бир улушига тенг бурчак ўлчов бирлиги.

3 с.т. Жуда оз вақт; он, пайт. *Очилнинг энг яқин мақсади аниғини билиш, мавҳумликдан қутулиш бўлгани учун дастлабки секундларда «зап билдим», деб ичида асабий кулиб кўйди.* П. Қодиров, Уч илдиэ.

СЕКУНДАНТ [лот. *sekundans, secundantis* — ёрдам, кўмак берувчи] **1 тар.** Дуэль қатнашчиларидан ҳар бир рақибнинг дуэль шартлари ҳақида музокара олиб борувчи ва уларнинг бажарилишини кузатиб турувчи ишончли кишиси.

2 Бокс ва шахмат ўйинларида мусобақа қатнашчисига воситачилик қилувчи, ўйин давомида, танаффус вақтларида хизмат кўрсатувчи шахс. *Рингда секундант бўлиш.*

СЕКУНДЛИ 1 с.т. Бир секунд (сония) давом этадиган; бир онли. *Беш секундли сукунат.*

2 с.т. Жуда оз давом этадиган, бир онли. *Секундли иш.*

3 мат. Секунд катталигидаги, секунд билан ўлчанадиган. *39 градус 25 секундли бурчак.*

СЕКУНДОМЕР [секунд + р. *мерить* — ўлчамоқ] Жуда қисқа вақт оралиғини секундлар билан ўлчайдиган соатсимон асбоб.

СЕКЦИЯ [лот. *sectio* — кесиш, қирқиш] **1** Баъзи идора, ташкилот, жамият ва ш. к. нинг алоҳида бўлими. *Олий Мажлис Доимий комиссиясининг соғлиқни сақлаш секцияси. Спорт клубининг шахмат секцияси.* ■ *Билим даргоҳида волейбол, баскетбол, стол тенниси, шахмат-шашка, эшак эшиш секциялари ишлаб турибди.* Газетадан.

2 эск. қ. шўъба. Конференциянинг имло ва нутқ маданияти секцияси. *Терминология секцияси.* ■ *Кенгаида уч секция: ижтимоий-сиёсий терминология секцияси, лингвистик секция ва техника терминологияси секцияси ташкил этилди.* «ЎТА».

3 Магазиннинг муайян турдаги товарлар сотишга ихтисослашган бўлими. *Тайёр кийимлар секцияси.*

4 Машина, механизм, ускуна, асбоб кабиларнинг қувур, труба ва ш.к. тизимидаги бир қанча қисмлардан бири. *Бино секциялари. Трубопровод секцияси.*

5 Тураржой ёки саноат биноларининг тугалланган алоҳида қисми. *Пошша хола кўз ўнгида Дороббекнинг фэйзсиз секцияси [квартираси] гавдаланиб кетди. Д. Нурий, Осмон устуни.*

СЕЛ [а. سئل — оқим; сой, анҳор, жилға] 1 Шиддатли, кучли ёгин; жала. *Томчи — сел бўлмас, Душман — эл бўлмас.* Мақол. ■ *Май ойи тугаб боряпти-ю, ҳалиям ҳар куни ёмғир, ҳар куни сел.* Н. Аминов, Қаҳқаҳа. *Баҳорда қаттиқ сел ёғиб, дала бетини қатқалоқ қоплади.* Газетадан.

2 Тоғли худудларда шиддатли ёмғирдан, жаладан ёки қор эришидан ҳосил бўладиган, аҳолига, халқ хўжалигига катта зарар келтирадиган кучли лой-сув оқими. *Тўсатдан келган сел оқими Толлимаржон бош корпусида қурилайётган котлованга урилиб, ишни таққа тўхтатиб қўйди.* Газетадан. *Сел ювиб кетган ёки ёзнинг қаттиқ гирдоблари ялаган тақир ерларнинг майда тошлари оёқ остида ғижирларди.* С. Айний, Куллар.

3 Ғўштнинг суви, қони. *Сели билан қовурилган жигар.* ■ *Ҳа, мулла ака, қулинг ўрғилсин кадоб бор, ейсизми? Сели жисиллаб турибди.* Ойбек, Улуғ йўл. *Неча бор эътибор бергандирсиз, ҳар қандай ғўшт тузланганда, сели чиқиб кетади.* К. Маҳмудов, Ўзбек тансиқ таомлари.

4 кўчма Куёшнинг кучли ҳарорати; куёш нури оқими. *Куёш селига мириқиб чўмилган ям-яшил дала барқ уради.* Ж. Абдуллахонов, Орият. *Осмон беғубор, тиниқ, офтоб сели гўдак кулгусидай ёқимтой эди.* О. Ёқубов, Кўҳна дунё.

5 кўчма Сел томчилари каби шиддатли ва беҳисоб. *Милтиқлардан ўқ сели ёғдирилиб, «ура» садолари қум саҳросини ларзага келтирди.* Ж. Шарипов, Хоразм.

6 кўчма Бирон-бир воқеа-ҳодисанинг, жараённинг кучли, кўпайган ҳолати, оқими. *Ғам сели.* ■ *Элмурод шундай ўйлар селида фарқ бўлиб, уйқуси қочди.* Шухрат, Шинелли йиллар. *Ёши йигирма кичига қадам қўйганда, Бегунийни ҳам ҳодисалар сели юмалатиб, ўзи*

билан бирга жанубга олиб кетди. М. Осим, Жайхун устида булутлар.

Сел бўлмоқ 1) завқланиб хузур қилмоқ; яйрамоқ; эримоқ, секин бош чайқамоқ. *-Дутор чалганимда, [Сулаймон] сел бўлиб ўтирарди, — деди Мехри она.* А. Эшонов, Дутор; 2) дув-дув, жуда кўп оқмоқ. *Зубайданинг онаси қизига ялиниб-ёлвориб, кўзларидан ёш сел бўлиб оқиб, ўкраб-ўкраб йиғларди.* К. Яшин, Ҳамза. **Сел қилмоқ** Хузур бахш этмоқ, завқлантирмоқ, эритиб юбормоқ. *Болтабой суҳбатнинг гули, қўшиқ айтса, одамни сел қилдиган, аскияда пайвордан чиқмайдиган йигит эди.* С. Аҳмад, Қадрдон далалар. *Куйнинг навоси улфатларни сел қилди.* М. Ҳазратқулов, Журъат.

СЕЛАВА [а. + ф. سيلاب — сел суви] 1 с. т. Селоб.

2 айн. сел 3. *Селаваси оқиб турган ғўшт.*

3 с. т. Турли ичкиликлар (пиво, ароқ, коньяк ва ш.к.) аралашмаси; коктейль.

СЕЛГИМОҚ Суви, нами қочиб, бир қадар қуримоқ. *Тог орқасидан аста шамол кўтарилди, ерлар селгий бошлади.* Ойдин, Ширин келди. *-Ҳечқиси йўқ, [костюмни] илиб қўйдим, бир оз селгисин, дазмол билан қурийдим, — деди Нодира Комилжонга.* У. Назаров, Биринчи мактуб.

СЕЛЕКТОР [лот. selector — саралагич, танлаб олувчи] тех. 1 Бир қанча маскан (нуқта)ларнинг марказ билан тезкор телефон алоқасини амалга ошириш мақсадида бошқа аппаратлар тармоғига уланган электрёмеханик қурилма, аппарат.

2 Телевизорнинг зарур телеканални танлаб олиш имконини берувчи, механик ёки электрон тарзда ишловчи механизми.

СЕЛЕКЦИОН 1 Селекцияга оид; селекция иши билан шуғулланадиган. *Селекцион станция.*

2 Селекция йўли билан ҳосил қилинган. *Бўғдойнинг селекцион навлари.*

СЕЛЕКЦИЯ [лот. selectio — танлаш, саралаш] қ.х. 1 Мавжуд қишлоқ хўжалик ўсимликлари ва ҳайвон зотларининг инсонга зарур белги-хусусиятларга эга бўлган навлари, зотлари ва дурагайларини яратиш усулларини ишлаб чиқувчи фан. *Селекциянинг илмий-назарий базаси генетика ҳисобланади.* «ЎЗМЭ».

2 Ўсимлик турлари ва ҳайвон зотларининг мавжудларини сифат жиҳатдан ях-

шилаш ва янгиларини яратиш. Бизда селекция иши тузук ташкил қилинган, дон ва бошқа экинларнинг кўпгина янги навлари етиштирилган. Газетадан.

СЕЛЕКЦИЯЧИ Селекция ишлари билан шуғулланувчи мутахассис. Селекциячи олимлар. ■ Мен кекса селекциячи бўлганим сабабли, ёш укаларимни муваффақият билан табриклайман. Мирмуҳсин. Умид. Галлакор деҳқонлар, олим ва мутахассислар, селекциячиларнинг биргаликдаги сабъ-ҳаракати туфайли қисқа фурсат ичида бу улуг ва мураккаб мақсадга эришилди. Газетадан.

СЕЛЕКЦИЯЧИЛИК айн. селекция 1, 2. У [Дадабоев] қўлида тўлиб-тошиб турган гўза чаноғини олиб, йиғилганларга кўрсатди: -Вилт бу навга яқинлашмайди, бу — ҳозирги энг яхши нав, селекциячилигимизнинг муваффақияти. Мирмуҳсин, Умид.

СЕЛЕН [лот. Selenium < юн. Selene — Ой] Менделеев даврий системасининг VI гуруҳига мансуб кимёвий элемент; жигарранг тусли тўқ кулранг модда, металлоид. Селеннинг энг ажойиб хусусияти шундаки, ёруғлик нури таъсирида унинг электр ўтказувчанлиги кескин ўзгаради. «ЎЗМЭ».

СЕЛЕНОЛОГИЯ [юн. Selene — Ой + юн. logos — фан, таълимот] Ой сиртининг тузилиши ва кимёвий-минералогик таркибини ўрганувчи фан. Селенологияда астрофизик усуллар билан бир қаторда геофизик, геокимёвий усуллардан ҳам фойдаланилади. «ЎЗМЭ».

СЕЛЁДКА [«сельд» с. дан] Тузланган ёки дудлаган сельд балиғи. Чолнинг хотини.. тарелкада юпқа қирқилган нон, иккита селёдка, бир оз шакар олиб келиб, ўртага қўйди-да, чой келтиргани чиқиб кетди. И. Раҳим, Чин муҳаббат.

СЕЛИТРА [лот. sal — туз + nitrum — табиий сода; ишқор] ким. Азот кислотасининг натрий, калий, кальций ёки аммонийли тузи (техникада ва қишлоқ хўжалигида кенг қўлланади). Аммиакли селитра.

СЕКИЛЛАМОҚ У ён-бу ён чайқалмоқ, тебранмоқ, силкинмоқ; ҳилпилламоқ. Онда селкиллаб бормоқ. ■ Қўшоқнинг бу киноясига Жаниш селкиллаб кулди ва қўлини ўтга тутиб жавоб қилди. Ҳ. Шамс, Душман. Бу — бошига оппоқ салла ўраган, селкиллаган оппоқ соқолли кекса деҳқоннинг овози эди. Ҳ. Турсунқулов, Ҳаётим қиссаси. Ос-

тингда ўйнайди минган суворинг, Эгнингда селкиллаб тилла туморинг. «Ойсулув».

СЕЛОБ [а. + ф. سيلاب < а. سيل — сел, тошқин + ф. آب — сув] 1 Сел сувлари.

2 шв. Тошқин; сел. Селоблар вақтида эса дарё тошиб, этагида ҳар йили талай экинзорларни нобуд қилмоқда. Газетадан.

Селоб ёш ёки кўз селоби шв. фольк. Дувдув ёш. Оҳ урганда, кўздан оқар селоб ёш, Золим билан ҳаргиз бўлманглар йўлдош. «Ал-помиш».

СЕЛОН Сидирға рангли астарбоп шоҳи. Ипакдан бахмалу шоҳи, банорас, Жужунча ҳам селону ҳар хил атлас. Ф. Фулом.

СЕЛПИМОҚ Кескин ҳаракат қилмоқ, силтамоқ; силкитмоқ. Агар паровоз қаттиқ селпиб тўхтамаганида, бобо яна анча ухлар эди. Ё. Шукуров, Бобо Тошкентда. Сулаймон ака уста Баҳромни селпиб қичқирди: -Қўворинг! Қўворинг, дейман. М. Исмоилий, Фарғона т. о. Абуали элликбоши, юзбошилар кўрсин, дегандек гир айланиб, қиличини селпирди. Мирмуҳсин, Меъмор.

СЕЛПИНМОҚ Кескин ҳаракат қилмоқ; силтанмоқ, силкинмоқ; тебранмоқ. Поезд ғизиллаб ўтиб кетди, сўнги вагон кетидан шамол селпинди. «Ёшлик». Одиловнинг машинаси юм тепалар орасидан селпинмай борарди. Й. Шамшаров, Танланган асарлар.

СЕЛТАНГЛАМОҚ шв. Гандиракламоқ. Иккаласи чўлда селтанглаб келаётир. «Нурали». Абрай полвон орқасига селтанглаб бориб, кимнингдир фонусига қоқилиб кетди. Т. Мурод, Қўшиқ.

СЕЛХОНА [сел + хона] Сел сувларини оқишиш ва ҳудудни сел офатидан муҳофаза қилиш учун қурилган махсус гидротехник иншоот ёки шу мақсад учун мосланган жар, сой. -Модомики, сел хавфи борми, селхона бўлиши лозим. Сел ҳар йил бир томондан, бир издан келади, — деди Чўли бобо. Ҳ. Фулом, Сенга интиламан. Унинг [Умурзоқнинг] маслаҳати билан.. ортиқча сувни жарга — селхонага буриб юбориш чорасига киришилган эди. Ҳ. Назир, Сўнмас чақмоқлар.

СЕЛЬДЕРЕЙ [фр. celer] Ошкўк сифатида истеъмол қилинадиган икки йиллик сабзавот ўсимлиги; қафас.

СЕЛЬДЬ [р. сельдь < қад. исланд. sild] зоол. Унча катта бўлмаган, овланадиган денгиз балиғи. Астрахан сельди. Океан сельди.

СЕМАНТИК тлш. Семантикага, маънога оид. Сўзнинг семантик тизими. *Семантик таҳлил.* ■ *Бундай феъллар коммуникатив алоқада муҳим семантик роль ўйнайди.* «ЎТА».

СЕМАНТИКА [юн. *semantikos* – ифодаловчи, билдирувчи] тлш. 1 Тил бирликларининг маъноси. *Сўзнинг семантикаси.* ■ *Ўғуз шевалари ўртасида лексик мослик билан бир қаторда, айниқса семантикада кучли фарқлар ҳам бор.* «ЎТА».

2 айн. **семасиология.**

3 Семиотиканинг асосий бўлимларидан бири.

СЕМАСИОЛОГИК Семасиологияга оид. *Семасиологик тадқиқот.*

СЕМАСИОЛОГИЯ [юн. *semasia* – белги, аломат, ифода; маъно, мазмун + юн. *logos* – фан, таълимот] Тилшуносликнинг тил бирликлари маъносини ва уларнинг ўзгаришларини ўрганувчи бўлими. *Семантик майдон назарисининг жорий этилиши ўзбек тили тарихий семасиологияси муаммоларини ҳал этишда муҳим роль ўйнайди.* «ЎТА».

СЕМАФОР [юр. *semaphore* < юн. *sema* – белги, сигнал + *phoros* – ташувчи] Темир йўлда станцияга яқин жойга устун тарзида ўрнатиладиган, ўз қанотларининг турли хил ҳолати ёки яшил, сариқ, қизил рангли (ўчиб-ёниб турадиган) чироқлари воситасида йўлнинг очиқлиги ёки берклиги ҳақида машинистга сигнал бериб турадиган стационар қурилма. *Ҳам ўнг, ҳам чап томондаги семафорларда гоҳ қизил, гоҳ кўк чироқлар ёнади.* Ҳ. Фулом, Тошкентликлар.

СЕМЕСТР [фр. *semestre* < лот. *semestrus* – олти ойлик; ярим йиллик < *sex* – олти + *mensis* – ой] Олий ва ўрта махсус ўқув юрларида ўқув йилининг ярми. *Биринчи семестр.* *Семестр имтиҳонлари.* ■ [Раҳим Саидов] *Базис семестрларда стипендиясиз қоларди.* Ў. Умарбеков, Ёз ёмғири.

СЕМИЗ 1 Этли, тўладан келган; тўла. *Семиз одам.* ■ *Скамейкада ёш болали аёлининг чап ёнида ўтирган семиз киши бепарво газета ўқирди.* Ў. Ҳошимов, Қалбинга кулоқ сол. *Саккиз меҳмон ичида иккиси бениҳоят семиз эди.* Ойбек, Танланган асарлар. [Отабек:] *Нега Зайнаб семиз-у, Кумуш озгин?* А. Қодирйй, Ўтган кунлар.

2 Яхши боқилган, этли; бўрлоқи; вазндор; ёғ босган. *Семиз қўй.* *Семиз гўшт.* ■

Сувонжон августнинг охирларида ўрмон хўжалиги пунктига келди. Унинг қўлида тўртта семиз каклиги бор эди. С. Анорбоев, Оқсой. *Шарофатхон бир катта косада семиз қўй гўшtidан пиширилган шўрвадан келтирди.* Ойбек, Танланган асарлар.

3 қ. х. Ўсимлик учун фойдали моддаларга бой, серҳосил (ер ҳақида). *Тайёр, семиз ер бўлса, 50 центнердан ҳосил олиш унча қийин эмас.* Газетадан. *Тупроқ – семиз, сув – яқин, ҳавоси очиқ, Қуёш эса йил бўйи бу ерга ошиқ.* М. Шайхзода.

4 с. т. Йўғон, қалин, қапайган; энли. *Семиз китоб.* ■ *Кечқурун гузарга кириб туринг, кўрасиз. Семиз-семиз сумка кўтарган хотинлар ўтаверади.* С. Сиёев, Отглик аёл. *Эни бир ярим, бўйи икки қарич чамаси келадиган газетанинг устига қора, семиз ҳарфлар билан: «Туркистон вилоятининг газети» деб ёзилган эди.* М. Исмоилий, Фарғона т. о. *Олдинда серсаватл Мойлихон ака, ортида жигарранг дипломат ва семиз қоғоз папка кўтарган Ғойибжон пилдираб келар эди.* Н. Аминов, Қалтис хато.

СЕМИЗАК бот. Семизўтларга мансуб, тоғли жойларда ўсадиган бир йиллик ўсимлик.

СЕМИЗЛИК Семиз бўлишлик, тўлалик; йўғонлик. *Семизликни қўй кўтаради.* Мақол. ■ *-Қаранг, бу ўлгурни, – болдоқли хотин қошини чимириб, ёнида семизликдан пишиллаб ўтирган аёлга қаради, – чой олиб кир десам, ҳали ўтинхонада ивирсиб юрибди.* С. Зуннунова, Гулхан.

СЕМИЗЎТ Суғориладиган ерларда ўсадиган, поясида оқ сутсимон модда бўлган бир йиллик бегона ўт.

СЕМИНАР [фр. *seminaire* < лот. *seminarium* – кўчатхона; мактаб < *semen* – уруғ] 1 Олий ёки ўрта махсус ўқув юртидан талабаларнинг ўқув режасида белгиланган мавзуларни қанчалик ўзлаштирганликларини аниқлаш, уларнинг мустақиллигини ошириш мақсадида ўқитувчи раҳбарлигида ўтказиладиган машғулот. *Семинар мавзулари тегишли профессор-ўқитувчилар томонидан тузилиб, кафедра мажлисида тасдиқланади.* «ЎЗМЭ».

2 Бирор илмий муассасада, ташкилотда ходимлар малакасини ошириш, илмий ютуқлар ва тажрибани ўрганиш, айирбошлаш ва тарқатиш учун ўтказиладиган йи-

гилиш. *Врачлар семинари.* ■ Тошкентда яқинда катта ёзувчилар учун алоҳида, ёш ёзувчилар учун алоҳида семинарлар ташкил этилди. Н. Сафаров. Оловли излар.

СЕМИНАРИЯ [«семинар» с. дан] **1 тар.** Баъзи мамлакатларда, мас., 18-аср — 20-аср бошларида Россияда бошланғич мактаб ўқитувчилари тайёрлайдиган махсус ўқув юрти.

2 16-асрнинг 2-ярмидан Фарбий Европанинг айрим мамлакатларида ташкил этилган, айрим христиан черковлари учун руҳонийлар тайёрлайдиган ўқув юрти.

СЕМИОТИКА [юн. semeiotik — белгилар ҳақидаги таълимот] Ахборот, маълумотларни сақлаш ва узатиш учун хизмат қиладиган белгилар ва белги тизимларининг умумий хусусиятларини ўрганадиган фан соҳаси. *Лингвистик семиотика.* ■ *Семиотика ғояси кейинчалик америкалик файласуф Ч.У. Моррис томонидан тартибга солиниб ривожлантирилди.* «ЎзМЭ».

СЕМИРМОҚ 1 Эт олмоқ, вазни кўпаймоқ; йўғонлашмоқ; тўлишмоқ. *Бир терининг ичиди кўй неча марта семириб, неча марта озади.* Мақол. *Чумчуқ семирса, ботмон келмас.* Мақол. ■ *Камбағал уруғ-аймоқ, кўни-қўшниллар, тўйда, азада семирадиган юримсак аёллар қоронғида туртиниб, пиёда жунашди.* Ойбек, Танланган асарлар.

2 кўчма с. т. Жуда хурсанд бўлмоқ; кайфияти кўтарилмоқ. *Бу хушxabарни эшитиб, Абдумалик яна ҳам семирадиган бўлди.* Газетадан.

СЕМИРТИРМОҚ 1 Семирмоқ фл. орт. н.

2 Боқиб эт олдирмоқ; бўрдоқи қилмоқ. *Қўйларни семиртирмоқ. Молларни боқиб семиртирмоқ.*

СЕМИТ қ. семитлар. *Семит тиллари.*

СЕМИТЛАР айн. сомиёлар.

СЕМИТОЛОГИЯ қ. сомиёшунослик.

СЕМОН с. т. Цемент. *Юқори навли се-мон. Семон заводи. Семон пол.* ■ *Семон ҳовузга анча сув тўпланиб, устида хазонлар, сочдек майин бақатўнлар қалқиб юрибди.* С. Нуров, Майсаларни аёз урмайди. *Раҳимов узоқ ўтирмади. Мирвалини қўлатиқлаб, семон йўлкада бирпас кезиб юрди.* С. Аҳмад, Жимжитлик.

СЕМУРҒ [ф. *سيمرغ* — ўттизта қуш: афсонавий қуш номи] Шарқ халқлари оғзаки поэтик ижодидаги афсонавий қуш. *Семурғ*

ўйланиб қолди, Қалбини шафқат олди. Ҳ. Олимжон. *Семурғ ўзбек халқ эртақ ва афсоналарида ижобий қаҳрамоннинг дўсти, ҳимоячиси, ҳамроҳи, уни «Етти зулмат ичи»дан олиб чиқувчи фантастик қуш сифатида гавдаланади.* «ЎзМЭ».

СЕН ки. олам. **1** Ўздан кичикларга ёки яқин кишиларга мурожаат тарзида ёки уларнинг номи ўрнида ишлатиладиган сўз. *Сен менга мана бу хатни ўқиб бер.* ■ *Сен — Пушкиннинг севган малаги, Сен — Гёте орзу этган қиз.* А. Орипов. *Сенинг танинганга ўқ ҳам ботмайди, найза ҳам.* А. Қаҳҳор, Бос тепкини.

2 с. т. (кўпл. шаклида) Тингловчига нисбатан менсимаслик, беписандлик каби маънони билдиради. [Фотима:] *Ҳали шошмай тур, сенларга бир жазо берайлик, бошқа диёнатсизларга ҳам ибрат бўлсин.* Ҳамза, Танланган асарлар.

3 Жонсиз нарсаларга мурожаат тарзида ёки уларнинг номи ўрнида ишлатилади. *Ажал, сен найзангни сандингми чиндан Ўзбек шеъриятини паҳлавонига?* А. Орипов. *Рухимда бир маъносиқ сокинлик уйғотганда, Мен сени эсга олдим, биринчи муҳаббатим.* А. Орипов.

Сен е — мен е ёки сен же — мен же Овқат жуда ҳам кўп, ҳаммадан ҳам ортиб қоладиган даражада бўлганда айтиладиган ибора. **Сену менга бормоқ айн. сен-менга бормоқ қ. сен-мен.** *Худди шу масала устида Тожийбой билан Абдурасул орасида жанжал чиқиб, иккови сену менга бориб қолишди.* П. Турсун, Ўқитувчи. **(Ҳан) сеними!** Дўқ-пўписа ибораси. *-Кўраман, кирмаганингни, — деди Бўтабой отланаётиб, — шу қилганинганга, сеними!* А. Қаҳҳор, Кўшчинор чироқлари.

СЕНАЖ [р. сено — пичан] Ўтларни сўлтиб, шиббалаб, витаминларга бойитилиб тайёрланадиган моллар озуқаси. *Сенажни пичан ва силос учун фойдаланиладиган барча турдаги ўтлар ва уларнинг аралашмасидан тайёрлаш мумкин.* «ЎзМЭ».

СЕНАТ [лот. senatus < senex — кекса, қария: қариялар кенгаши] **1 тар.** Қадимги Рим давлатида: олий ҳокимият органи.

2 тар. Россияда: 1711—1917 йилларда қонун чиқарувчи ва давлатни бошқарувчи олий давлат органи.

3 Айрим мамлакатларда, жумладан Ўзбекистонда, парламент юқори палатасининг

номи. *Ўзбекистон Республикаси Олий Мажлиси Сенатининг (жами 100 сенатор) ваколат муддати 5 йил. «ЎЗМЭ».*

СЕНАТОР [лот. senator] Сенат аъзоси.

СЕНИКИ-МЕНИКИ: **сеники-меники йўқ** Ажратиш, қизганиш йўқ, ҳамма нарса ўртада. *Талабалар жуда иноқ, уларда сеники-меники йўқ. Сеники-меники қилмоқ* У сеники, бу меники, деб нарса талашмоқ, ўзиникини қизганмоқ.

СЕНИНГЧА *кри. с.* Сенинг фикрингча, ўйлашингча. *Сенингча ким ҳақ?*

СЕНЛАМОҚ *айн. сенсирамоқ.* Дўстини сенламоқ. ■ *Бозорком дам сизлаб, дам сенлаб, чолга удағайларди.* Т. Ашуруп, Оқ от. [Қоровул:] *Э савдогарбача, мени сенлама! Пайғамбар ёшидаги одамман.* Мирмуҳсин, Ҳикоялар, қиссалар.

СЕН-МЕН: **сен-менга бормоқ** Айтишиб қолмоқ, уришмоқ. *Арзимаган нарсага сен-менга бориб қолдик.*

СЕНСАЦИОН Сенсацияга, шов-шувларга сабаб бўладиган. *Сенсацион воқеа.*

СЕНСАЦИЯ [лот. sensatio — сезиш, ҳис қилиш < sensus — сезги, туйғу] Кутилмаганда содир бўлган, кишиларни ҳаяжонга соладиган ҳайратли ҳодисалар ва бунинг натижасида кўпчиликда туғилган кучли таассурот, шов-шув. *Археологлар топган ҳар бир ажойиб янгилик — ҳам илм, ҳам газета учун сенсацияга айланган эди.* Газетадан. *Карикатура озгина танқидийроқ бўлса, чоп этишмайди.* Чунки сенсацияга тоқатлари йўқ. Газетадан.

СЕНСИРАМОҚ 1 Бирор шахсга «сен» деб мурожаат этмоқ. *Полк командири, Йўлдошни ўзига яқин олиб сенсирай бошлагани, тагин аллақандай сифатлари билан ёш лейтенентни дарҳол ўзига қаратиб олди.* Ҳ. Фулом, Ташкентликлар.

2 «Сен» деб мурожаат қилиш орқали беҳурмат муносабатда бўлмоқ. *Аҳмаджон қисмега янги келган кун бу йигит ундан: -Қаерликсан? — деб сўради. Ўздан кичик бу йигитнинг сенсиргани Аҳмаджонга малол келди.* А. Қаҳҳор, Олтин юлдуз.

СЕНСУАЛИЗМ [лот. sensus — ҳис-туйғу, сезги] *флс.* Билиш назариясида сезгини, ҳис-туйғунини билишнинг асосий манбаи деб тан олувчи фалсафий йўналиш.

СЕНТИМЕНТАЛ [ингл. sentimental < фр. sentiment — ҳис-туйғу < лот. sentire — сезмоқ,

ҳис қилмоқ] **1** Сентиментализмга оид, сентиментализмга асосланган, сентиментализм руҳи, ғоялари билан суғорилган. *Сентиментал роман.*

2 Кўнгли бўш, кўнгилчан, ҳаддан ташқари ҳассос ва йиғлоқи. *Сентиментал аёл.*

СЕНТИМЕНТАЛИЗМ [фр. sentimentalisme < sentiment — ҳис-туйғу] 18-асрнинг иккинчи ярми ва 19-аср бошларида Европа ва АҚШ адабиёти ва санъатидаги оқим. *Сентиментализмда ҳиссиёт яхшилик ва ёмонликни белгиловчи, инсоннинг қадр-қиммати аниқловчи асосий меъёр сифатида талқин қилинади.* «ЎЗМЭ».

СЕНТЯБРЬ [лот. september < septem — етти; еттинчи ой] Қадимги Римда 1 мартдан бошланадиган тақвим йилининг еттинчи ойи; Григорий календариди йилнинг тўққизинчи ойи. *Бешинчи сентябрь. Сентябрь ойи. Биринчи сентябрь — Муस्ताқиллик байрами.*

СЕНЧА *рви.* Сен каби, сендек, сенчалик. *Мен бу тўғрида сенча узоқни ўйлаб турмайман, дарров «лаббай» дейман.* А. Қодирий, Обид кетмон.

СЕНЧАЛИК Сенга ўхшаб; сен каби; сенча. *Шуларнинг [ота-оналар, ака-укаларнинг] ҳам меҳру муҳаббати бордир. Шулар ҳам соғинишар дейман? Ё сенчалик соғинишмасмикин?* А. Қаҳҳор, Асрор бобо.

СЕНЬОР, сеньора [исп. senor, senora < лот. senior — катта] Испанияда: эркаклар ва аёлларга ҳурмат билан мурожаат қилиш шакли.

СЕП *эти.* Қиз узатишда унга ота-онаси ва қариндош-уруғлари томонидан бериб юбориладиган мол, бисот. *Келинни келганда кўр, сепини ёйганда кўр.* Мақол. ■ *Шул замонда олтимиш норни чўктириб, Орта берди Барчин сулув сепини.* «Алпомиш».

Сеп ёймоқ (ёки ёзмоқ) 1) келиннинг молини ёйиб кўз-кўз қилмоқ, у билан келин тушадиган уйни безатмоқ; 2) кўчма чирой бермоқ, ясантирмоқ. *Баҳорги боғларга сеп ёйиб кетган, Чўлларга чашмаю бинафша элтган.* С. Зуннунова.

СЕПАРА [ф. سه‌پار — уч паррали, уч қиррали] Қоп-қанор тикишда ишлатиладиган уч қиррали йўғон игна. *Сепара билан қоп тикмоқ.*

СЕПАРАТ [лот. separatus — алоҳида, ажратилган < separare — ажратмоқ] *сиёс.* Ман-

фаатдор томонлар билан келишмай қилинган, бир томонлама, алоҳида. *Сепарат сулҳ.*

СЕПАРАТИЗМ [*фр. separatisme < лот. separatus* — алоҳида, ажратилган] *сиёс.* Ажралиб чиқишга, алоҳида бўлишга интилиш; давлатнинг бир қисмини ажратиб олиб, янги давлат тузилмасини тузиш ёки мамлакатнинг бир қисмини мухториятга айлантириш ҳаракати. *Сепаратизм ҳаракатлари.* ■ *Кўпинча ички сабабларни кўпайтирувчи, гижгижловчи, ўз мақсадлари йўлида фойдаланувчи кучлар сепаратизмнинг пайдо бўлиши ва кучайишига олиб келади.* «ЎЗМЭ».

СЕПАРАТОР [*лот. separator* — ажраткич] Газдан сууюқ ёки қаттиқ зарраларни, сууюқликдан қаттиқ зарраларни ажратиш, аралашмаларни таркибий қисмларга ажратиш учун мўлжалланган аппаратларнинг умумий номи. *Сут сепаратори. Галла тозалайдиган сепаратор.* ■ *Газ сепараторида газ сууюқ ва қаттиқ зарралардан тозаланади.* «ЎЗМЭ».

СЕПКИЛ Кўпинча юз, бўйин, қўл терисиди пайдо бўладиган сарғиш, кўнғир, қорамғир рангли, шакли ҳар хил бўладиган майда доғлар. *Мирзо Исмоилов қовоқларининг устигача сепкил босган, чуваккина юзини бужмайтирди.* С. Кароматов, Олгин қум. *Баланд тераклар остидаги оқ уйлардан бирида.. бурни устига беш-ўнта сепкил сочилган, жиккаккина қиз дамо-дам кўзларини микроскопга қадайдди..* Мирмуҳсин, Нуқра.

СЕПКИЛДОР Сепкили кўп; сепкил босган; сепкилли. *Сепкилдор қиз.* ■ *Ўнг томонда ўтирган сепкилдор бола Ботирдан кўзини олмайди.* Р. Файзий, Ҳазрати инсон. *Шодимат.. сепкилдор, лўппи юзи тарвақайлаб кулди-да, «Бормисан, ошна?» деб [Мусаевга] ўнг қўлини узатди.* А. Муҳиддин, Ошналар.

СЕПКИЛЛИ *айн. сепкилдор.* Сепкилли бола. ■ *-Энди хотирни жам қил, Аркаш, — деди ёнидаги қизғиш сочли, сепкилли йигит қўшнисига кўз қисиб.* Ҳ. Аҳмар, Ким ҳақ?

СЕПЛАМА Наридан-бери, амал-тақал қилиб ясалган (ишланган); омонат. *Сеплама этик.*

СЕПЛАМОҚ Наридан-бери, бир амаллаб ясамоқ (қилмоқ); амал-тақал қилиб тўғриламоқ. *Оз бўлса, эглаб кўр, кўп бўлса, сеплаб кўр.* Мақол.

СЕПЛИ Сепи (моли) кўп. *Сепли қиз. Сепли келин. Сепли қизим бўлгунча, эпли қизим бўл.* Мақол.

СЕПМА *айн. сочма 1.* Уруғни сепма қилиб экмоқ.

СЕПМОҚ 1 Сочмоқ, пуркамоқ, сачратмоқ (сууюқликлар ҳақида). *Ҳар оқшом аяси ҳовлига кўлоблатиб сув сепарди. Кейин райҳон исидан билан ўткир тупроқ ҳиди бутун ҳовлини тугиб кетарди.* Ў. Ҳошимов, Қалбингта қулоқ сол. *Уста вишиллашиб атир сепгач, мижозининг юзини елиб, сўнг артиб қўяди.* Э. Раимов, Ажаб қишлоқ.

Сув сепгандай (ёки қуйгандай) Жим, жимжит. *Ҳаммаёқ сув сепгандай.* ■ *Сув сепгандай жимжит. Онда-сонда полиз атрофидан бедананинг ширали овози келади.* И. Раҳим, Чин муҳаббат. **Сув сепмоқ 1** юраги ўртанган ғамли, аламли кимсага бир оз таскин-тасалли бермоқ, дардини юмшатмоқ; совитмоқ. *Гапга хотима бермай, бошқа тарафлардан ҳам камчиликлар топиб, асосли суратда қутидорнинг Отабекка томон ҳароратланаёзган юрагига сув сепмоқчи бўлди.* А. Қодирий, Ўтган кунлар; 2) тўхтатмоқ, яқун ясамоқ; пасайтирмоқ. *Журирлаган телефон аланга ола бошлаган мунозара оловига сув сепди.* Газетадан. *Биринчи муҳаббат алангасига сув сепган.. бебурд, ёлғончи қизни [Ҳайдар] шу тобда аччиқ, аламли сўзлар билан чақиб олгиси.. келарди.* С. Аҳмад, Ойдин кечалар.

2 Бир текисда сочмоқ (кукун ҳолидаги нарсалар ҳақида). *Чучварага мурч сепмоқ. Гўштга туз сепмоқ.* ■ *Холниса ёзиқ хамирга бир оз урвоқ сепди-да, ўқлогини айлантариб, яна ёйишда давом этди.* С. Нуоров, Нарвон. *Бу одам шошмасдан тухумни арчиди, ҳафсала билан туз сепиб, оғзига солди..* А. Қаҳҳор, Асарлар.

Ярасига туз сепмоқ Гап ёки хатти-ҳаракат билан дардини кучайтирмоқ. *Болам, шу муштипар, шу бахтсиз онангнинг ярасига туз сепмасанг, юрак-бағрини қон қилмасанг, дадан келтирган хабарни айтаман.* Ойбек, Танланган асарлар.

3 қ.х. Бир текисда тарқатиб сочмоқ; экмоқ (дон-дун, уруғ, ўғит ва ш.к. ҳақида). *Меҳнат қилмай роҳат кўрмас, уруғ сепмай экин ўрмас.* Мақол. ■ *-Ҳой чол, манави ер ўлғур шундай ётмасин.. Озгина сабзи уруғи сепиб қўйсангиз-чи? — деди Тўхтабуви.* Э. Раимов, Ажаб қишлоқ.

4 кўчма Тарқатмоқ, сочмоқ. *Ёғду сепмоқ.* ■ *Кечанинг олтин чечаклари оғочлар орасидан нур сепди.* Уйғун, Асарлар. *Кенг, те-*

кис кўчага узоқдан чироқлар туман ичида хира, совуқ нур сепеди. Ойбек, Танланган асарлар.

Уруғини сепмоқ Бирор жараённинг авж олиши, кенг ёйилиши учун ҳаракат қилмоқ. *Яхшилик уруғини сепмоқ.* ■ *Низомулмулк фитна уруғини узоқни мўлжаллаб, жуда махфий сепмоқда.* Ойбек, Навоий. **Ўтга (ёки оловга) керосин сепмоқ** Гап ёки бирор иш-ҳаракат билан кимсанинг аламига алам қўшмоқ; кайфиятини баттар бузмоқ. *Қодирқул.. турқини бузмай, яна Ҳасан аканинг ўтига керосин сепди.* А. Муҳиддин, Инсон қалби оташ.

СЕПОЯ [ф. سه‌پايه — уч пояли, уч оёқли] 1 Тўғон, дамба қуришда, дарё ва анҳорларнинг қирғоқларини сув ювиб кетишидан сақлашда ишлатиладиган, учта ходани учбурчак шаклида бир-бирига маҳкамлаб, поялар ораси харсангтош ва б. материаллар билан тўлғазиладиган мослама. *Сепоячилар дарёнинг ўртасига сепоялар ўрнатдилар.* Ш. Рашидов, Қудратли тўлқин. *Кўприк хийла узун бўлганлиги учун уч-тўрт жойида тагидан қўйилган зўр сепоя тиргаклари бор эди.* П. Қодиров, Юлдузли тунлар.

2 Бирор нарса осиш, илиш учун мўлжалланган уч оёқли асбоб. *Сепоя остида чимдиб димоғни, Челақда пишади антиқа шўрва.* М. Икром, Балиқ овида.

3 *шв.* Новдалан учбурчак шаклида тўқилган чамбарак. *Усават, (ичида) гўшт бор. Ёнидаги сепояда сут, қатиқ..* С. Нуоров, Нарвон.

СЕПОЯЧИ Сепоя тўсиқлар ясовчи ва ўрнатувчи мутахассис. *Латифжон.. сепоячилар ичида дам кўриниб, дам кўринмай ишлаётган тенгдош дўсти Борис Ешковга тез-тез кўз ташлаб қўяр.. эди.* Ж. Абдуллахонов, Тўфон.

СЕПСИЗ Сепи йўқ; сепи бўлмаган. *Сепсиз қиз.*

СЕПСИЛМОҚ *шв. айн. сепсимоқ.* *Ташқарида қатнов сепсилган, майин оқшом жимлигида бақа қуриллар.. эди.* А. Мухтор, Кумуш тола. *Кузнинг мадади билан очлик ҳам сепилди.* А. Қаҳҳор, Ўтмишдан эртақлар.

СЕПСИМОҚ *шв.* Пасаймоқ, сусаймоқ; сийраклашмоқ. *Бўрон бир оз сепсиган эди, қир настидан яна қуюқ тўзон кўтарилди.* А. Ҳасанов, Чироқлар.

СЕПСИС [юн. sepsis — чириш, ириш] *тиб.* Ўйринг ҳосил қилувчи микробларнинг инфекция ўчоғидан қонга ўтиб, қоннинг заҳарланиши натижасида келиб чиқадиган оғир юқумли касаллик. *Киндикнинг йиринглаши чақалоқлар сепсисига сабаб бўлади.* «ЎЗМЭ». *Сепсис касаллигида тил қуруқ, ёрилган ва қорамтирроқ карашланади.* Н. Исмоилов, Касалларни парвариш қилиш.

СЕР- [ф. سير — тўқ, ҳаддан ташқари тўйган; кўп, мўл, зиёда] Отлардан кўпликни, мўлликни билдирувчи сифатлар ясовчи олд қўшимча, мас., *сербарг, серган, сергўшт, серсув, серҳосил.*

СЕРАВЖ [сер. + авж] 1 мус. Авжи кўп, кўп авжли. *Серавж ашула.*

2 Яхши ривожланган, авж олган, тез етилаётган. *Яхши ишлов берилган, озиқлантирилган гўзалар серавж, ёппасига шоналамоқда.* Газатадан.

СЕРАЖИН Ажини кўп, ажин босган; юзлари бурушган. *Пўлатжон кўзини юмиб, меҳрибон онасининг серажини нуруний юзини кўз олдида келтирди.* С. Аҳмад, Қадрдон далалар. *Чолнинг юзлари бужмайиб, серажин бетлари кичкина бўлиб кетди.* С. Аҳмад, Уфқ.

СЕРБ қ. **серблар.** *Серб тили. Серб аёл.*

СЕРБАР Эни кенг; энли. *Сербар чит.* ■ *Мирзо Улуғбек белидаги сербар камарига осилган калитни олиб, эшикнинг қулфини жаранглатиб очди.* О. Ёқубов, Улуғбек хазинаси. *У ёш йигитлардек чаққон, серҳаркат, соҳида битта ҳам оқи йўқ, белида сербар камар.* Э. Аъзам, Кечикаётган одам. *Улар сербар йўлакдан ўтиб бориб.. тахта сўрига чиқиб ўтиришди.* Ш. Бўтаев, Қўрғонланган ой.

СЕРБАРАКА Баракаси кўп, жуда баракали. *Сербарака меҳнат. Сербарака йил.* ■ *Шоҳаншоҳ менга эмас, менинг юртимга, бойлигимизга ошиқ бўлган.. Шу сербарака юртим унга керак бўлиб қолган.* М. Осим, Тўмарис. *Ажиб сербарака бўлиб келди куз..* А. Ҳамдам.

СЕРБАРГ Барги кўп, барги қалин; қуюқ, зич баргли. *Кўриқ ва бўз ерларда яратилган боғнинг ниҳоллари сербарг ва серновда бўлса ҳам, таналари ёш ва ингичка эди.* Ш. Рашидов, Бўрондан кучли.

СЕРБЕЗАК Безаги, ҳашами кўп; серҳашам. *Баланд, сербезак шифтда, олтин суви югуртирилган кучли занжирда каттакон*

қандил ҳисобсиз чироқлари билан гавҳардай товланиб турар эди. М. Исмоилий, Бизнинг роман.

СЕРБЛАР Сербия ва Черногориянинг серб-хорват тилида сўзлашадиган асосий аҳолиси. *Серблар 12-асрда халқ сифатида шаклланган. «ЎЗМЭ».*

СЕРБОЛА Бола-чақаси кўп; серфарзанд. *Уй бекаси бомбадан қулоғи хийла кар бўлган, юм-юмалоқ, серган, сербола аёл эди. Ойбек, Куёш қораймас. Шу сербола, серхона, сергавго уйнинг нимасидир кўнглимга ором беради. А. Мухтор, Чинор.*

СЕРБОШОҚ Бошоғи кўп; кўп бошоқ чиқарадиган. *Сербошоқ бугдой.*

СЕРБУРМА Бурмаси кўп, кўп бурмали. *Сербурма юбка. Сербурма кўйлак.*

СЕРБУТОҚ Бутоғи кўп, бутуқлаб кетган. *Сербутуқ шох. ■ У эмаклар, сербутуқ қора қайин тагига борди. И. Раҳим, Чин муҳаббат.*

СЕРБЎЁҚ 1 Бўёғи кўп, бўёқдор; қалин бўёқли. *Сербўёқ расм.*

2 кўчма Кўп бўёқ берилган. *Жажжи қизча эдим, ҳавасларга бой, Сирли кўринарди сербўёқ олам. М. Эгамбердиева, Гулбарг.*

СЕРВАНТ [фр. servante] Идиш-товоқ, сочиқ, дастурхон ва ш. к. қўйиладиган, юқори қисми ойнабанд шкаф, буфет. *Сервант полкаларига ажойиб чинни ва биллур идишлар тартиб билан жойлаштирилган эди. Ф. Мусажонов, Ҳиммат.*

СЕРВЕР [ингл. server] тех. Муайян дастурлар тўплами билан таъминланган ва умумкомпьютер тармоғида диспетчерлик, тақсимлаш ва бошқариш вазифаларини амалга оширувчи компьютер ёки компьютерлар гуруҳи.

СЕРВИЗ [фр. service – хизмат; идиш-товоқ тўплами] Маълум миқдордаги кишиларга мўлжалланган, бир хил бадий безакли идиш-товоқ тўплами. *Қаҳва сервизи. Чой сервизи. ■ [Карима] Диван устида чордана қуриб ўтириб, буфетдаги нодир сервизларни томоша қила бошлади. С. Абдуқаҳҳор, Уй остонадан бошланади.*

СЕРВИС [ингл. service – хизмат] Кундалик турмушнинг хилма-хил соҳаларида – магазин, меҳмонхона, сартарошхона, ёнилги қуйиш шохобчалари ва ш.к. да аҳолига сифатли хизмат кўрсатиш ва шундай хизматнинг ўзи. *Шуниси қувонарлики, эндилик-*

да ўқув даргоҳимиз хизмат кўрсатиш ва сервис соҳасини ривожлантириш методологиясини шакллантирувчи муассасага айланди. Газетадан.

СЕРВИТАМИН [сер. + витамин] Витаминларга бой, витамини кўп. *Сервитамин озиқ-овқатлар. ■ Гўзаяндан сервитамин озуқа ачитқилари, фурфурол тайёрлаш мумкин. Газетадан.*

СЕРВИҚОР Ғоят виқорли; кўркам, салобатли. *Сервиқор қоя. Сервиқор тоғлар. ■ Ҳовлиларга кираверишдаги катта ва сервиқор дарвозаларни айтмайсизми. Мирмуҳсин, Умид. Унда баҳайбат ва сервиқор Бобошота чуққиси кўзга ташланади. Газетадан.*

СЕРГАК 1 Тез, дарҳол сезадиған; сезгир, зийрак. *Сергак соқчи. Сергак бўлмоқ. Сергак тортмоқ. ■ Кийикдек сергагу хушёр чавандоз Қадам қўйганда тоғлар қилган овоз. Ҳабибий. Малоҳат ҳам сергак ўтирар, икки қулоғи мунозарада эди. С. Нуров, Нарвон.*

2 Тез фаҳмлайдиган; зеҳни ўткир; фаросатли. *Сергак ўқувчи. ■ Кўнгил қўйган йигитинг сергак бўла қолса, дилингдагини тушуниб, гапинга монанд жавоб қилса.. Р. Файзий, Чўлга баҳор келди.*

3 Уйғоқ; ухлаган эмас. *Маҳкам ёнига ағдарилиб ётди ва кўзини юмди. Лекин бутун вужуди сергак эди. П. Қодиров, Уч ил-диз. -Дарҳол дарвозалар яқинидаги маҳалларга хабар қил, ухламасинлар, сергак бўлиб турсинлар! – деди Темиртош. «Ёшлик».*

СЕРГАКЛАНМОҚ 1 Хушёр тортмоқ, зийрак, сергак бўлмоқ. *Дам қаттиқроқ, дам сустроқ эшитилаётган шовқиндан бировлар ваҳимага тушди, бировлар ҳайрон бўлди, бировлар сергакланди. П. Турсун, Ўқитувчи.*

2 Хушига келмоқ (кайф, уйку, кўрқувдан кейин). *Меҳмонларнинг мастликлари, кайфлари бирдан тарқалган, улар бир онда сергакланган эдилар. Ойбек, Улуғ йўл.*

СЕРГАКЛИК Сергак, зийрак бўлиш хусусияти. *Унда талант билан бира интилиш, ҳаракат ва сергаклик бор. Ф. Фулом, Талант ва маҳорат. Тўлқинжон Ҳурининг сўзларини зўр диққат ва сергаклик билан тинглади. Ф. Мусажонов, Ҳури.*

СЕРГАП 1 Кўп гапирадиган, эзма. *Сергап чол. ■ Корфармо Аҳмад Чалабий қирқ ёшларга борган, йўғон, қаншари наст, кўзлари ўйнаб турадиган сергап одам. Мир-*

муҳсин, Меъмор. *Қизиқ, шундай камгап одам билан сергап, эзма Сабоҳат хола қандай қилиб қирқ йилдан ортиқ бирга турмуш қилишган?* Ю. Шомансур, Қора марварид.

2 салб. Куруқ гап, сафсата сотишни яхши кўрадиган, гап чайнайдиган; доим жавраб юрадиган, вайсақи. *Бизда ҳам сергап, қуруқ маслаҳат берадиганлар жуда кўп, лекин амалда ҳеч балода йўқ.* Т. Обидов, Юсуфжон қизиқ.

СЕРГАПЛИК Сергап, эзма хусусиятга эгаллик. *Мансурининг тутуриқсизлигида, сергаплигида ва мақтанчоқлигида унинг характери яхши гавдалантирилган.* «ЎТА».

СЕРГУЛ 1 Гули кўп, гуж-гуж гуллаган. *Дарҳақиқат, ўрик бу йил мисли кўрилмаган даражада сергул бўлди.* Ш. Рашидов, Бўрондан кучли.

2 Гули кўп, кўп гул, нақш солинган (босилган) ёки тикилган. *Сергул чит.* ■ *Саломатхон эса белигача тушиб турган сочларини сергул қийишча билан боғлаб қўйибди.* С. Қодиров, Қанотлар.

СЕРГҮШТ 1 Этли, семиз, йўғон. *Сергүшт юзлари йилтиллаб турган раис аллақандай қоғозларга имзо чекиш билан овора эди.* Р. Файзий, Чўлга баҳор келди. *Холтой эса қора терга ботиб, бўкиб ўтирар, жиққа хўл бўлган кўйлаги сергүшт танасига ёпишиб кетган эди.* М. Хайруллаев, Алёр.

2 Серт, этли. *Сергүшт ўрик. Сергүшт шафтоли.*

3 Гўшти мўл, кўп гўшт солинган. *Сергүшт шўрва.* ■ *Сергүшт бугдой шавласининг хушбўй ҳиди анқиб, одамнинг димоғига урарди.* М. Муҳамедов, Қаҳрамон изидан.

СЕРДАВЛАТ Давлати жуда кўп; бой. *Сердавлат киши.* ■ *-Эсим қурсин, айтмабман, худоё серфарзанд, сердавлат бўлинг.* П. Турсун, Ўқитувчи.

СЕРДАРАХТ Дарахти кўп, кўп дарахт экилган. *Сердарахт ҳовли.* ■ *Озода ишдан чиқиб, трамвайга ўтирмай, янги барг ёзган сердарахт, гавжум кўчадан уйига қайтди.* С. Аҳмад, Алла. *Сойнинг ўнг бетидеги сердарахт маҳаллада Мавлоно Фазлиддин бултурдан бери истиқомат қилаётган пешайвонли мўъжаз бир уй бор.* П. Қодиров, Юлдузли тунлар.

СЕРДАРОМАД Даромади кўп, кўп даромад келтирадиган. *Сердаромад иш.* ■ *[Али мешкобчи] Ўз наздида мешкобчилик серда-*

ромад бўлганлиги учун шу ишни қиларди. Мирмуҳсин, Меъмор.

СЕРДАХМАЗА Дахмазаси, ташвиши кўп; серташвиш. *Сердахмаза иш.* ■ *Тўйга айтиш жуда қизиқ, аммо айна пайтда жуда сердахмаза юмуш экан.* Ф. Мусажонов, Ҳиммат.

СЕРДИҚҚАТ 1 Кўп диққат қиладиган; юракни сикувчи. *Сердиққат иш.* ■ *Каштага гул тикиш сердиққат, сабр талаб қиладиган хунарлардан ҳисобланади.* «Саодат».

2 Ишга жиддий қарайдиган, жуда эътиборли. *Хунармандлар ўртасида ажойиб истеъдодли, сердиққат, серзавқ одамлар жуда кўп.* Ойбек, Навоий.

СЕРЕНАДА [*фр.* serenade < *итал.* serenata — оқшомги кўшиқ < sera — оқшом, кеча] **1** Ўрта асрларда Италия ва Испанияда маъшуқа шарафига, одатда маъшуқа эшиги ёки деразаси ортида туриб, торли мусиқа асбоби жўрлигида айтилган кўшиқ.

2 Чолгу ансамбли учун ёзилган, сюитага ўхшаш мусиқа асари. *Операда қаҳрамонни тасвирлаш учун.. кўшиқ, романс, серенада ҳам киритилади.* Газетадан.

3 Кўчма Умуман, аниқ бир шахсга бўлган меҳр-муҳаббатни тараннум этувчи ҳар қандай мусиқий асар.

СЕРЁМҒИР Ёмғир кўп ёққан ёки ёмғир кўп ёгадиган. *Серёмғир ерлар. Серёмғир куз.* ■ *Кўклам серёмғир келиб, мардикор бозорда ишининг мазаси бўлмади.* Х. Фулом, Феруза.

СЕРЁҒ 1 Ёғи, мойи кўп; кўп ёғ, мой берадиган. *Серёғ гўшт. Серёғ кунжут.*

2 Жуда кўп ёғ солинган; ҳаддан ташқари ёғли. *Серёғ ош. Серёғ манти.* ■ *Девзира гуруч, зирavorлар ҳиди ҳар ёнга уфурган, серёғишу серёғ ош келдики, кимдир боғия завқли хитоблардан уялган бўлиб, секин уҳ тортди.* М. М. Дўст, Лолазор.

СЕРЁҒИН Ёғингарчилик кўп бўладиган, қор-ёмғир кўп ёгадиган. *Серёғин кун.* ■ *Дехқон баҳорга кўз тикди. Аммо кўклам серёғин келди.* С. Сиёев, Аваз. *Баҳор кези бу ерлар серёғин бўлади, тоғ ва қирларга тушган ёмғир суви жилғаларни тўлғазиб, шу қишлоққа томон оқди.* И. Раҳим, Ҳаёт булоқлари.

СЕРЖАНЖАЛ 1 Жанжал кўп бўлиб турадиган, жанжалли. *Сержанжал уйда барака йўқ.* Мақол.

2 Жанжалкаш; бўлар-бўлмасга жанжал қилаверадиган. *Сержанжал хотин.*

СЕРЖАНТ [фр. sergent < лот. serviens — хизматчи] Милиция, полиция ва армияда кичик командирларга бериладиган унвон ва шу унвонга эга бўлган шахс. *Кичик сержант.* ■ *Мен билан ёнма-ён бир сержант ҳам отишиб туриб эди, бирдан унинг пулемёти тўхтаб қолди.* Ойдин, Ҳикоялар.

СЕРЖАҲЛ Салга жаҳли чиқаверадиган, жаҳли тез; жаҳлдор. *Сержаҳл одам.* ■ *Биринчи қарашда у одам ғоят жиддий, ҳатто бирмунча сержаҳл кўринарди.* Ф. Жўраев, Обид Жалилов. *Мунис тенгқурларига ўхшамасди: жуда эрка эди, сержаҳл эди.* Ў. Умарбеков, Ёз ёмғири.

СЕРЖИЛВА 1 Ранг-баранг тусда товланиб, жилваланиб турадиган, ғоят жилвали. *Сержилва атлас.* ■ *Кўриқчи чол чайла томида милтиқни қучоқлаганча, сержилва юлдузли осмонга тикилиб, хаёл суриб ётарди.* Ҳ. Назир. Ўтлар туташганда.

2 *кўчма* Ранг-баранг оҳангда товланувчи, жилвали, ўйноқи. *Ўзбек мусиқаси мутлақо ўзига хос, оҳангдор, сержилва, ўйноқи мусиқади.* Ҳ. Носирова, Мен ўзбек қизиман.

3 *айн. серишва.*

СЕРЖИЛО *айн. сержилва 1, 2.* Тилла дейилганда, *сержилло* ипак, ранг-баранг шоҳи атласлар, хушбичим кийим-кечаклар кўз олдимизга келади. Газетадан. *Сержилло оҳанглар унинг [қизнинг] хаёлини узоқ-узоқларга олиб кетди.* «Ёшлик».

СЕРЖУН 1 Жуни кўп, кўп жун берадиган. *Сержун қўйлар.*

2 Жуни кўп, жун босган. *Икки тиззасига сержун билакларини қўйиб.. ўй сураётган кекса киши — уста Замон эди.* Ш. Тошматов, Эрк қуши.

3 Кўпроқ жун қўшиб тўқилган. *Сержун газлама.*

СЕРЗАВҚ 1 Кишига катта завқ бағишлайдиган; ғоят завқли. *Серзавқ мусиқа.* ■ *Ишичи хонадониди ноёб танбурнинг серзавқ машқи анчагача жаранглаб турди.* Мирмуҳсин, Созанда.

2 Нарса, ҳодисалардан катта завқ олувчи; ғоят завқли. *Серзавқ шинаванда.* ■ *Қирқта жўраси бор. Ҳаммаси серзавқ, юраги ўтли одамлар.* Ойбек, Танланган асарлар.

СЕРЗАРДА Ҳалеб зарда қилаверадиган, зардаси, жаҳли тез. *Серзарда одам.* ■ *Маъ-*

суманинг эри димогидан эшак қурт ётадиган, серзарда бойвачча эди. М. Осим, Тилсиз гувоҳ. *Раис серзарда, одамларни жеркиб ташлайди, дейишади, тўғрими?* Й. Шамшаров, Танланган асарлар.

СЕРИАЛ [ингл. serial < лот. series — қатор] Кўп серияли, кўп қисмли давомли фильм (кўпинча унча талабчан бўлмаган томошабинларга мўлжалланади, шунинг учун бадиий жиҳати пастроқ бўлади). *Мана шу сериални кўряписизларми, деган саволга эркагу аёл, ёшу қари бараварига ҳа, деб жавоб беришди.* «Саодат».

СЕРИЛДИЗ 1 Илдизи жуда кўп; илдиз отиб, тармоқланиб кетган. *Серилдиз дароҳт.* *Серилдиз бута.*

2 Илдиз босган. *Серилдиз қирғоқ.* ■ *Полковникнинг самимий мақтовидан жангчилар бир-бирларига қараб кулиб кўйиши ва серилдиз ерни тағин ҳам ғайрат билан қўпора бошлашди.* Ҳ. Фулом, Тошкентликлар.

СЕРИШВА 1 Жуда ишвали, ноз-ишва қилаверадиган. *Серишва аёл.* ■ *Маҳбубанинг ширин мақоли яхши, Ҳам серишва қошиҳилоли яхши.* П. Маҳмуд, Рубойилар.

2 *кўчма* Мафтун этадиган, ўзига тортадиган. *Ҳазал ҳам бўлурми мунча дилрабо, Бунчалар серишва, бунчалар серноз.* Э. Воҳидов.

СЕРИЯ [лот. series — қатор] 1 Бир хил, ўхшаш ёки умумий белги, хусусиятлари жиҳатидан ўзаро узвий боғлиқ бўлган нарсалар гуруҳи (китоб, брошюра ва ш.к.). *Илмий-оммабон адабиётлар серияси. Телевизорларнинг янги серияси.* ■ *Сўнги пайтда ҳар йили турли адабий сериялар ташкил этилмоқда.* Газетадан.

2 Қимматбаҳо қоғозлар, ҳужжатлар ва ш. к. нинг ҳарф ёки рақамлар билан гуруҳланиб белгиланган разряди, категорияси. *Облигация серияси. Паспорт серияси.*

3 Давомли кинофильмларнинг ҳар бир мустақил бўлаги. *Кинофильмнинг иккинчи серияси.*

СЕРИЯЛАБ *рви* Серияларга бўлиб, серия-серия қилиб. *Машиналарни сериялаб ишлаб чиқармоқ.*

СЕРИЯЛИ Серияларга бўлинган, сериялаб чиқариладиган. *Серияли маҳсулот. Уч серияли кинофильм.* ■ *Дилрабо ҳинд рақслари уларни сеҳрлаб олди. Икки серияли кино-*

фильм қандай ўтиб кетганини пайқамай қолишибди. Мирмуҳсин, Умид.

СЕРКА Бичилган эркак эчки, ахта така. *Той отга эргашар, қўй — серкага.* Мақол. ■ Кўрққанидан кўзлари олайиб кетган кўк серка жар ёқасига етиб бориб.. соқолини селкиллатганича, таққа тўхтади. С. Анорбоев, Оқсой. *Адир устида чўпонларнинг ити, шохдор серка кўринди.* Т. Мурод, Юлдузлар мангу ёнади.

СЕРКЕПАК Кепаги кўп, кепаги меъёридан ортиқ. *Серкепак ун.*

СЕРКИПРИК Киприги кўп, куюқ. *Салтанат катта, серкиприк кўзлари билан юзимга бир қаради-да, яна бошини эгди.* О. Ёқубов, Бир фельетон қиссаси.

СЕРКЎСАК Кўсаги зич; кўп кўсак тукан. *Серкўсак гўза.*

СЕРМАЗМУН Мазмунан бой, чуқур мазмунли. *Сермазмун маъруза. Сермазмун асар. Сермазмун мақола.* ■ *Ўзини пахта устаси деб юрган баъзи кишилар Саодатнинг сермазмун лекциясини эшитиб, ҳайрон бўлиб қолдилар.* Ж. Шарипов, Саодат. *Ҳаётимиз тобора сермазмун, ширин, фароғатли бўлиб бормоқда.* Газетадан.

СЕРМАМОҚ *шв.* Силкитмоқ; силтамоқ; зарб билан силтамоқ. *Дўнглик устида атлас кўйлак кийган Зулайҳо турар ва бизга оқ рўмолча сермаб, кимнидир чорлар эди.* П. Қодиров, Қадрим. *Ферузанинг кўзларида ўт чақнади, қўлини қиличдай сермаб, устунни кўрсатди.* С. Сиёев, Ёруғлик.

СЕРМАШАҚҚАТ Машаққати кўп, жуда машаққатли. *Сермашаққат иш.* ■ *Чорвадорнинг меҳнати оғир ва сермашаққат.* Газетадан. - *Чигит экиш бултурги йили шунақа сермашаққат бўлди, — дея суҳбатни давом эттирарди раис.* «Шарқ юлдузи».

СЕРМАЪНО Мазмун жиҳатдан бой, чуқур маъноли. *Сермаъно гап. Сермаъно ибора.* ■ *Эҳсон ундан [Саидийдан] чиройли, сермаъно хат кутади, чунки у, Саидийга бўлажак шоир, деб қарар эди.* А. Қаҳҳор, Сароб.

СЕРМАҲСУЛ Маҳсули кўп, кўп маҳсул берадиган. *Сермаҳсул мол. Сермаҳсул тармоқ. Сермаҳсул ижодкор.*

СЕРМЕВА 1 Меваси кўп, кўп мева берадиган. *Зайтун дарахтининг бўйи 4–5 метрча бўлиб, у жуда сершоҳ, сермева бўлади.* Газетадан.

2 Мева дарахти кўп, мева дарахтига бой. *Сермева боғ.*

СЕРМЕҲМОН Уйидан меҳмон аримайдиган, меҳмондўст. *Сермеҳмон хонадон. Сермеҳмон халқ.*

СЕРМЕҲНАТ Кўп меҳнат талаб қиладиган; меҳнати кўп. *Сермеҳнат экин.* ■ - *Чорва иши, ўғлим, жуда сермеҳнат иш, — деди Абдураззоқ ота.* С. Абдуқаҳҳор, Олтин водийларни кезганда. *Қурт боқиш жуда нозик ва сермеҳнат ишдир.* Газетадан.

СЕРМОЙ *айн. серёғ.* *Сермой кунжут. Сермой ош.* ■ *Нусратбек болишига ёнбош-лаб, катта сопол товоқдаги сермой чалобдан ичди.* С. Нуров, Майсаларни аёз урмайди.

СЕРМОЛ 1 Моли, мол-дунёси, сепи кўп. *Сермол қиз.*

2 Моли, товари кўп. *Тишдан қараганда эски, кўримсиз, лекин катта, сермол дўконда Мирзакаримбой билан Салимбойвачча турар эди.* Ойбек, Танланган асарлар.

3 Чорваси, чорва моли кўп. *Сермол ферма.*

СЕРМУЛОЗАМАТ Мулозаматни, такалдуфни ўрнига кўядиган; гоят мулозаматли. *Сермулозамат одам.* ■ *Ўша пайтлардаёқ Маъсумаларнинг эшигини сермулозамат, чаққон, гапдон кампирлар — совчилар черта бошлаган эди.* «Шарқ юлдузи». *Аҳмад сермулозамат, узундан-узоқ хайрлашишни ёқтирмасди, сабр билан илтифотларнинг тугагини кутди.* Ф. Мусажонов, Ҳиммат. *Қандайдир сермулозамат йигитлар келиб, Очил бува билан саломлашишди.* А. Мухтор, Чинор.

СЕРМУЙ *айн. сержун 1.* Ибн Яминнинг уйи ташқарисида тўпланган тўда ҳамон тарқалмаган, ҳалиги девона жазавога тушиб, сермуй кўкрагига муштаб, оғзидан кўпик сочарди. К. Яшин, Ҳамза.

2 Тукли, сертук (гилам, газмол ва ш. к. ҳақида). *Сермуй гилам.*

СЕРНАМ 1 Нами жуда кўп; жуда нам. *Сернам пахта.*

2 Гоят нам, зах. *Бугдой қанчалик сернам ерга экилса, ҳосил шунчалик мўл бўлади.* «Шарқ юлдузи».

3 Нам, рутубатли. *Ҳавонинг иссиқ ёки салқин келиши, қуруқ ёки сернам бўлишига қараб экин экиш муддатлари ҳам ўзгаради.* Газетадан.

СЕРНАСЛ Насли кўп, кўп насл қолдирган ёки қолдирадиган; кўп туғадиган; серпушт. *Сернасл мол.*

СЕРНАҚШ Кўп нақш солинган ёки ўйиб чизилган; жуда кўп нақшли. *Меҳмон сернақиш дарвоза олдига етиб келгач, мис ҳалқани тақшилатди.* М. Осим, Карвон йўлларида. *Кўркам, сернақиш чолгу созандага илҳом, эҳтирос баҳи этишини яхши тушунади уста.* «Гулистон».

СЕРНОЗ Нози, кўп; ноз-карашма қилишни яхши кўрадиган. *Серноз раққоса.*

СЕРОБ [ф. *سيراب* — намга, сувга тўйинган; суғорилган, чанқоғини қондирган] Етарли даражада кўп, мўл-кўл. *Бизда ҳамма нарса сероб.* ■ *Зап ўрик экан-да. Канал битиб, сув сероб бўлиб, боғ-роғ қилганимизда, албатта, шунинг данагидан экамиз.* А. Қаҳҳор, Қўшчинор чироқлари. *Чўлда энг сероб гийёҳ бўлган шувоқ майда кулранг баргларини титратиб, шамолда зўр бериб силкинади.* П. Турсун, Ўқитувчи.

СЕРОБГАРЛИК айн. **серобгарчилик.**

СЕРОБГАРЧИЛИК Ҳамма нарса етарли бўлган пайт, мўлчилик; мўл-кўлчилик; маъмурчилик, фаровонлик. *Ҳамма ёқ серобгарчилик бўлиб қолди. Серобгарчиликда яшамок.*

СЕРОБЛИК 1 Сероб, мўл-кўл бўлишлик. *Она шахримизнинг гуллаб-яшнаб туришининг боиси сувимизнинг сероблигидандир.* Газетадан. *Бозорда мева сероблигидан ҳеч қайёққа сиғмайди.* Газетадан.

2 айн. серобгарчилик. *Бир ёқда — ташналик, сўлғинлик, иккинчи ёқда — сероблик, гулгунлик! Бир-биридан мадад ололмайди, бири-бирига ёрдам қилолмайди.* М. Исмоилий, Фарғона т. о. *Шалодадек булутинг оппоқ, Ёғдиради сероблик ва қут.* Ю. Шомансур.

СЕРОБЧИЛИК айн. **серобгарчилик.** Баркашларда тўлиб-тошиб тортилиб нонлар, Фаровонлик, серобчилик, ҳар уйда байрам. Ҳабийий.

СЕРОҲАНГ Оҳанг жиҳатдан бой; рангбаранг оҳангли. *Сероҳанг куй. Сероҳанг овоз.* ■ «Тинчлик» сўзи.. Бу — ёқимли, сероҳанг бир сўз, Ҳаёт — булоқ, тинчлик — унга кўз. М. Шайхзода.

СЕРПАМОҚ шв. Зарб билан урмоқ, солмоқ; силтамоқ. *Қилич билан серпаб ўтмоқ.*

СЕРПАНТИН [фр. *serpentin* < лот. *serpens* — илон] Бал, маскарад ёки карнавал қат-

нашчиларига иргитиладиган, рангли қоғоздан ясалган узун илонсимон лента.

СЕРПАРДОЗ 1 Пардозга берилган; пардоз-андозни яхши кўрадиган. *Серпардоз хотин.* ■ *Элмира жуда серпардоз бўлиб қолди.* С. Зунунова.

2 Кўп пардоз берилган. *Серпардоз уй.*

СЕРПАХТА Пахтаси кўп, пахта кўп солинган. *Серпахта кўрна. Серпахта чопон.* ■ *Унинг [сандалнинг] бурчагида.. устига серпахта чопонини тортиб Хўжаназарбой ётмоқда эди.* С. Айний, Қуллар.

СЕРПЕНТАРИЙ [лот. *serpens, serpentis* — илон] Тирик ҳолатда заҳар олиш учун заҳарли илонлар боқиладиган, парвариш қилинадиган жой, илонхона.

СЕРПИЁЗ Пиёзи жуда кўп, кўп пиёз солинган. *Серпиёз сомса.* ■ *Столда ширинликлардан кўра серпиёз шакароб, шўртанг бодринг бор эди.* Э. Усмонов, Ёлқин.

СЕРПУЛ Пулдор; пули кўп. *Серпул одам.* ■ *Зокировнинг касби-кори нотайин, аммо серпул.* М. Жўра, Изтироб. [Хотин:] *Иккита анор учун хотинингизни серпул одамга оширгани уялинг!* А. Қаҳҳор, Анор.

СЕРПУШТ [ф. *سيرپشت* — кўп насли] Сернасл; кўп бола туғадиган; кўп тухум берадиган; тез урчидиган. ■ *Ўргимчаккана жуда серпушт бўлади.* Газетадан.

СЕРПУШТЛИК биол. Ҳайвонларнинг табиий ўлим ўрнини қоплаш учун зарур бўлган пушт қолдириш хусусияти. *Серпуштликни ошириш чорвачиликда катта аҳамиятга эга.* «ЎЗМЭ».

СЕРРАЙМОҚ 1 Бир жойда анграйиб, ҳаракатсиз турмоқ. *Серрайиб турмоқ.* ■ *Низомжон нима қилишини билмай, серрайиб туриб қолди.* С. Аҳмад, Уфқ. *Қиз даҳшат аралаш серрайиб қотиб қолди.* У. Назаров, Одамлар.

2 салб. Бирор иш қилмасдан, анграйиб ёки кеккайиб турмоқ. *-Нимага серрайиб турибсан? Бу ёққа кел, чурвақа! — деб қичқирди мингбоши болага қараб.* М. Исмоилий Фарғона т. о.

СЕРСАВЛАТ Ғоят савлатли, жуда ба-савлат. *Лаганлар бўшаётганда, эшикдан серсавлат бир қора одам кириб келди.* П. Турсун, Ўқитувчи. *Сунага келиб ёнбошлаган эллик ёшлар чамаси бу аёл анча серсавлат, ёшлигида ҳусндор бўлгани билиниб турарди.* У. Исмоилов, Сайланма.

СЕРСОЯ 1 Кўп соя берадиган; сояси кўп. *Серсоя сада.* ■ Дарахт кам бўлса-да, лекин куюқ, серсоя. Н. Сафаров, Оловли излар.

2 Жуда соя, салқин. *Салкам миллион туп дарахти бор Тошкентда нима кўп, серсоя кўчалар, жойлар кўп.* П. Қодиров, Уч илди.

СЕРСОҚОЛ Соқоли узун ва қалин, соқоли кўп; соқоли ўсиб кетган. *Серсоқол чол.* ■ Меъмор аравадан тушганидан сўнг, бу томонга келаётган серсоқол Чўли бобо қаршисига чиқиб, у билан эски танишлардек кўл беришиб омонлашди. Мирмуҳсин, Меъмор.

СЕРСУВ 1 Суви кўп, суви мўл, тўла. *Серсув кўллар.* ■ Болалик хотиралари билан алоқадор бу дарёчани у серсув, тубсиз наҳрларга алишмайди. С. Нуров, Нарвон.

2 Сувли; ширадор; сершарбат. *Серсув шафтоли. Серсув турп.* ■ Пахтасеб — олманинг бир тури. Кичкина, сарғиш бўлади. Лекин жуда мазали, серсув. Ш. Холмирзаев, Олма емадим.

СЕРСУТ Кўп сут берадиган, сути кўп. *Серсут сигир.* ■ Отам сигирнинг серсут ёки камсутлигини маърашидан билар эдилар.. А. Қаҳҳор, Асарлар.

СЕРСУЯК Суяги кўп. *Серсуяк гўшт.* ■ Сўнагул мени ёш боладай йиғлатиб, кичкинагина, серсуяк мушти билан кўз ёшларимни артиб кетди. А. Мухтор, Асарлар.

СЕРТАВОЗЕ Ғоят тавозели; сертаъзим. *Сертавозе одам.* ■ [Тўламант] Каттаю кичикни баравар «ако» дейдиган сертавозе бу йигитдан қандай гап чиқаркин, деб кутиб турди. С. Анорбоев, Оқсой. *Ҳозир у [Ирода] нимаси биландир қадимий эртактлардаги сертавозе канизакларни эслатиб юборди Аҳмадга.* Ф. Мусажонов, Ҳиммат.

СЕРТАКАЛЛУФ айн. **сермулозамат.** *Сертакаллуф одам. Сертакаллуф бўлмоқ.* ■ Чўққи соқоли бу одам ғоят сертакаллуф.. эди. Т. Малик, Иблис девори. *Бу мулоийм, сертакаллуф аёлга рўпара келган ҳар қанақа тошжорак ҳам юмшайди.* С. Анорбоев, Оқсой.

СЕРТАРМОҚ 1 Тармоқланган; ён-атрофга қараб ўсган. *Бодом илдизи сертармоқ бўлгани сабабли тупроқ эрозиясига қаршилик қилади.* «Фан ва турмуш»

2 Тармоқлари, соҳалари кўп ва хилма-хил. *Сертармоқ соҳа.* ■ *Ҳозир фанлар жуда чуқурлашиб, сертармоқ бўлиб кетган.* С. Нуров, Нарвон.

СЕРТАШВИШ 1 Ташвиши кўп; ғоят ташвишли, серхархаша. *Серташвиш иш. Серташвиш жой.* ■ *Серташвиш асрда дунёга келдинг..* Э. Воҳидов.

2 Ғам-ташвиши кўп, тиниб-тинчимас. *Серташвиш одам.* ■ *Бирам серташвиш, бирам серташвишсанки, болагинам!* О. Ёқубов, Эр бошига иш тушса. *Соддагина чодирда ёлғиз яшаган Навоий дилгир, серташвиш эди.* Ойбек, Навоий.

3 Ташвиш ифодалайдиган; ташвишли. *Дилоромнинг серташвиш кўзлари бир зумда чақнаб кетди.* Ҳ. Фулом, Машғал. *Азмиддин Талъатбейнинг серташвиш юзига.. совуқ кўзларига қараб, уйга толди.* Ҳ. Фулом, Машғал.

СЕРТАЪЗИМ айн. **сертавозе.** *Сертаъзим одам. Сертаъзим бўлмоқ.*

СЕРТИКАН Тикани жуда кўп. *Сертикан гул.* ■ *Салқин, нам шомол тепалардаги кактус дарахтларининг сертикан шохларини секин чайқатади.* И. Раҳим, Тақдир.

СЕРТИФИКАТ [фр. *certificat* < лот. *certum* — аниқ, тўғри, рост + *facere* — қилмоқ] **1** Давлат органларининг молиявий қарз (заём) мажбурияти; шунингдек, кўрсатувчига бериладиган давлат заёмлари облигациялари ва қимматдор банк қоғозлари.

2 Омонатчининг, белгиланган муддат ўтгач, банкка қўйилган омонат суммасини ҳамда унинг фонизларини олиш ҳуқуқи ҳақидаги ёзма ҳужжат.

3 Ташқи савдо амалиётида: тегишли ваколатли органлар томонидан бериладиган ва товарнинг сифати, оғирлиги, ишлаб чиқарилган жойи ва б. хусусиятларини тасдиқлайдиган ҳужжат. *Маҳсулот сертификати.*

4 Бирор нарса, воқеа ҳақидаги расмий ёзма гувоҳнома; диплом. *Шайхонтоҳур туманида компьютер саводхонлиги бўйича ташкил этилган курсни якунлаган ёшларга сертификатлар топширилди.* Газетадан.

СЕРТИФИКАТЛАШ Бирон-бир маҳсулот ёки хизмат сифат тавсифининг сифат стандартида талаб этилган даражага мос келишини аниқлаш, тасдиқлаш. *Бугунги кунда маҳсулот ва хизматларни сертификатлашда республикамизда фаолият юритаётган 50 дан ортиқ сертификатлаш идоралари ва 250 дан ортиқ синов лабораторияларининг аҳамияти муҳим.* Газетадан.

СЕРТОМИР 1 Томири жуда кўп. *Сертомир гўшт.*

2 Томирлари бўртиб чиққан. *Ойим қирқ беш ёшлардаги.. қотма аёл бўлиб, қўллари эркаларникага ўхшаи йўғон, гўштдор ва сертомир эди. Ў. Ҳакимали, Навбахор.*

СЕРТОМОҚ Овқатхўр; овқатни кўп ейдиган. *Сертомоқ одам. Сертомоқ мол.*

СЕРТУК 1 Туки кўп, хурпайган, пати қалин (гилам, мато, рўмол, шунингдек, айрим мевалар ҳақида). *Боғ кўчалардан аста ўтиб борардик, оёқ остида билқ-билқ иссиқ тупроқ, ўрқачли паҳса деворлардан сертук олтин шафтолилар осилиб ётарди. Мирмуҳсин, Умид.*

2 Тукли, жун босган. *Алиохун ўрнидан туриб, кенг, сертук кўкрагини қавартиб кешиди. Ойбек, Танланган асарлар.*

СЕРТУПРОҚ 1 Тупроғи кўп, тупроқ босган. *Даладан қайтган моллар шовқин-сурон билан катта сертупроқ кўчани чангитиб келмоқда. С. Аҳмад, Муҳаббат.*

СЕРТУХУМ 1 Кўп тухум солинган; тухуми кўп. *Сертухум хамир. Сертухум қуймоқ.*

2 Кўп тухум қиладиган; серпушт. *Сертухум товуқ.*

СЕРУЙҚУ Кўп ухлайдиган, ҳадеб ухлайверадиган, уйқудан бош кўтармайдиган. *Серуйқу одам.*

СЕРУНУМ 1 Яхши унум, маҳсул берадиган. *Серунум иш.*

2 *айн. серҳосил. Серунум ер. ■ Серунум меҳнат уларни тўқ турмушга қараб етаклар эди. Ҳ. Олимжон, Танланган асарлар.*

СЕРУРУҒ 1 *айн. серпушт.*

2 Уруғи кўп. *Серуруғ тарвуз.*

3 *кўчма* Қариндош-уруғи жуда кўп. *Серуруғ одам. ■ Ҳурматли кишилардан бири омонатини топширибди-да. Ўзиям жа серуруғ эканми? Одамларнинг кўплигини қаранг. Т. Ашурув, Марварид тут.*

СЕРФАЙЗ Ҳолят файзли, кўркам, кўзни қувонтирадиган. *Серфайз боғ. Серфайз ҳовли. Серфайз кўча. Серфайз тўй. ■ Улар серфайз ҳовлига кириб келганларида, эндигина тонг ота бошлаган эди. «Ёшлик».*

СЕРФАРЗАНД Фарзанди, боласи кўп. *Серфарзанд она. ■ - Боқижон бўлса, ҳамма ака-укаларига қараганда серфарзанд. Уетти фарзанднинг отаси. Н. Сафаров, Оловли излар.*

СЕРФАҲМ Фаҳм-фаросатли; зийрак; ақли ўткир. *Рустам эси кириб қолган, китоб ўқиб, ҳар гапнинг маънисига тушунадиган, серфаҳм, ўйли, ақлли йигит эди. «Муродхон».*

СЕРФИКР Кўп фикрлайдиган; оғир-вазмин. *Серфикр одам. ■ [Ўзбек ойм:] Кумушинг ўзингга ўхшаи серфикр кўринади, Зайнаб бўлса менга ўхшаи қувноқ! А. Қолирий, Ўтган кунлар.*

СЕРҲАРАЖАТ *айн. серхарж. Бир бойнинг икки ўғли бўлиб, каттаси маишатпараст, серҳаражат, пулни ўринсиз сарф қиладиган экан. Шукрулло, Жавоҳирлар сандиғи.*

СЕРҲАРЖ Чикимдор, кўп харажат қиладиган, кўп пул сарф қиладиган. *Серхарж одам.*

СЕРҲАРХАША 1 Ҳадеб хархаша қилаверадиган, жуда инжиқ; эркатой. *Серхархаша бола. ■ Айниқса, Мавлон аканинг «тўрва қоқдиси» – икки яшар Нишонтой жуда серхархаша бола. Ҳ. Гулом, Маншбал.*

2 Инжиқ; нозиктабиат; ҳеч нарса ёқмайдиган. *Серхархаша аёл. ■ Йўлга чиққандан бошлаб камгап, хомуш бўлиб қолган Ғаввос Андхудан чиқиб, қум ичига киргач, серхархаша, гап ёқмайдиган бўлиб қолган эди. Мирмуҳсин, Меймор.*

СЕРХОСИЯТ Хосияти, фойдаси кўп. *Серхосият ўсимлик. ■ Она сути чиндан ҳам серхосият. «Фан ва турмуш».*

СЕРЧИКИМ 1 Чикими, харажати кўп; маблағни кўп талаб қиладиган. *Серчиқим иш. ■ Ҳозирча қўлда бажарилаётган бу ҳар иккала шиниң серчиқим эканлигини шундан ҳам билиб олаверинг.. Газетадан.*

2 *айн. серхарж. Серчиқим одам.*

СЕРЧИҚИТ Серчиқинди, кўп қисми чиқитга чиқиб кетадиган. *Серчиқит хомашё. Серчиқит дон.*

СЕРШАРБАТ *айн. сершира. Шафтолининг сершарбат этлари ёзнинг иссиқ кунларида «чанқоқ босди» бўлади, десерт сифатида ишлатилади. К. Маҳмудов, Мевалар.*

СЕРШИРА Жуда ширин; ширадор. *Сершира қовун. Сершира анжир. ■ Венгер мускати сершира ва хушбўй бўлиб, ўзига хос ҳиди ва мазаси бор. Р. Мусамуҳаммедов, Мўл узум ҳосили.*

СЕРШОВҚИН 1 Шовқини кўп; шовқин-суронли. *Сершовқин кўча. Сершовқин цех. ■ Маҳкам.. Сирдарё бўйидаги сершовқин, гавжум ишчилар шаҳарчасида кат-*

та бўлган эди. П. Қодиров, Уч илдиэ. Темиржон сершовқин, серқатнов йўлка бўйлаб бемақсад, беихтиёр борар экан, ҳеч нарса ҳақида ўйламасликка уринарди. Ж. Абдуллахонов, Орият.

2 Шовқин чиқарадиган, шовқин кўтарадиган. *Шиорлар ва гуллар билан безатилган катта зал сершовқин болаларга тўлиб кетди.* О. Ёқубов, Каптар.

СЕРШОНА Шонаси кўп, кўп шоналаган. *Сершона гўза. Сувга қонган гўзалар сершона бўлиб ўсади.*

СЕРШОХ Шохи кўп, қуюқ, зич; шохлаб кетган. *Сершоҳ дарахт.* ■ Катта сершоҳ ёнғоқ соясида ўнточа аёл узумларни тозалаб, яшиқларга жойлашарди. С. Юнусов, Кутилмаган хазина.

СЕРЯМОҚ Ямоғи кўп, кўп ямоқ солинган. *Серямоқ чопон.* ■ [Алиохун] Дўпписига тўнғалган игнани олди, қаердандир ип топиб, эски, серямоқ кўйлагининг йиртигини ямашга ўтирди. Ойбек, Танланган асарлар.

СЕРЯПРОҚ айн. **сербарг.** *Серяпроқ дарахт.* ■ [Фуломжон] Кўшни эшигини тўсиб турган серяпроқ, қалин шохлар орасига кириб, мингбоши ҳовлисига қаради. М. Исмоилий, Фарғона т. о.

СЕРЎТ Ўти кўп, ўти қалин, зич. *Серўт яйлов.* ■ *Кенжа серўт жойларни қидириб, сурувни тоғ томонга ҳайдади.* «Олтин бешик».

СЕРҚАВИҚ Қавиғи кўп, ораси яқин қилиб зич қавилган. *Серқавиқ кўрпа.* ■ *Қамчи.. серқавиқ бўз тўни устидан чандиб боғлаб олган қўш белбоғини.. ушлаганча жавоб берди.* Ҳ. Фулом, Машғал.

СЕРҚАДОҚ Қадоғи кўп, ҳамма ёғи қадоқ, қадоқ босган. *Серқадоқ қўл.* ■ *Ҳамроали серқадоқ кафтларини нешонасига соябон қилиб, ўша томонга тикилди-да, ўзича.. қичқирди.* Ш. Фуломов, Ташаббус.

СЕРҚАЙМОҚ Қаймоғи кўп, кўп қаймоқ берадиган. *Сигирлардан қишин-ёзин бирдек кўп, серқаймоқ сут соғиб олсак, етарли озуқа гамлаб қўйсак, гўшт ҳам, сут ҳам, ёғ ҳам, жулн ҳам кўпаяди.* Ҳ. Нурий, Яшил хирмон.

СЕРҚАТИҚ Қатиғи кўп, кўп қатиқ солинган. *Серқатиқ мастава.* ■ *У серқатиқ гўжа ичиб, қорнини тўйғизиб олган бўлса-да, ошпаз Абдулматкарим пиширган овқатларга қараб, кўнгли суст кетарди.* М. Осим, Ўтрор.

СЕРҚАТНОВ 1 Транспорт ва йўловчилар кўп қатнайдиغان. *Серқатнов кўча.* ■ *Темиржон сершовқин, серқатнов йўлка бўйлаб бемақсад, беихтиёр борар экан, ҳеч нарса ҳақида ўйламасликка уринарди.* Ж. Абдуллахонов, Орият.

2 Тез-тез келадиغان; кунда-шунда. *Серқатнов меҳмон.* ■ *Шундан сўнг Поиша хола бу ерга, яъни Йигиталининг уйига серқатнов бўлиб қолди.* Д. Нурий, Осмон устун. *Алихон редакцияга.. айниқса сўнги вақтларда анча серқатнов бўлиб қолган эди.* М. Хайруллаев, Фурур.

СЕРҚИЛИҚ 1 Ножўя ёки келишмаган қилиқлари кўп, жуда қилиқдор. *Серқилиқ бола.*

2 кўчма Тез ўзгариб турадиган, инжиқ. *У узоқ Фарғона қишлоғининг серқилиқ табиятини болалигидан билгани учунми, буюқда қолгандай, эгнига брезент чакмон, бошига оқ намаз қалпоқ кийган.* Ҳ. Назир, Сўнмас чақмоқлар.

СЕРҚИЛТАНОҚ Қилтаноқли, қилтаноғи кўп. *Серқилтаноқ балиқ.*

СЕРҚИРРА 1 Қирраси кўп, қиррадор. *Серқирра стакан. Серқирра тош.* ■ *Олмосдек серқирра, офтобда чўққилари ярқираб турган баланд қорли тоғлар кўзни қамаштирарди.* Мирмуҳсин, Меъмор.

2 кўчма Ҳар тарафлама, кенг; мазмунга бой, сермазмун. *Серқирра истеъдод. Серқирра олим.* ■ *Шоир ижоди шунчалик серқирра, сербарака, сержилоки, ҳаммаси ҳақида бир мақолада айтиб ўтишга асло имкон йўқ.* «ЎТА». *Забардаст олим Тошмуҳаммад Ниёзович Қориниёзининг мураккаб ва серқирра ҳаёт йўли ҳаммамиз учун ҳайратомуз ва ибратлидир.* «Фан ва турмуш».

СЕРҚОШ Қоши қуюқ ва қалин. *Очил бува ўтқир қора кўзли, серқош, чиройли йигит бўлган.* А. Мухтор, Чинор.

СЕРҚУЁШ Қуёш нури кўп тушадиган; қуёшли кунлари кўп. *Серқуёш ёз. Серқуёш Ўзбекистон.* ■ *Шу кунларда серқуёш республикамиз далаларида иш қизгин.* Газетадан.

СЕРҚУМ 1 Қуми кўп, қум босган. *Серқум соҳил. Туби серқум дарё.*

2 Қум кўп солинган. *Серқум сувоқ.*

СЕРҒАЙРАТ Ғайрати кўп; жуда ҳам ғайратли. *Серғайрат бола.* ■ *Бозорқул бундай пайтларда бош эгиб, хомуш ўтирарди, бугун эса серғайрат, жонсарак.* А. Мухтор, Чинор.

Галифе шими, брезент этиги, бутун қиёфаси унинг соғлом, ишчан, сергайрат одамлигини таъкидлар эди. С. Нуров, Нарвон.

СЕРҒАЛВА 1 Ғалваси, жанжал-сурони кўп; ғалвали. *Серғалва жой.* ■ *Сайёра шу серғалва хонадонга келин бўлиб тушиб, нима хузур-ҳаловат кўрди?* Газетадан. *Одам яшар замон юкин орқалаб, Серғалвароқ кечасидан бугуни.* Э. Воҳидов, Муҳаббат.

2 Кўп ғалва, жанжал қилаверадиган; жанжалкаш. *Серғалва одам.*

СЕРҲАРАКАТ 1 Доим ҳаракат қилиб турадиган, тиниб-тинчмас; тез ва чаққон ҳаракат қиладиган; ҳаракатчан. *Муқаддам сарғиш жингалак сочли, серҳаракат, хушчақчақ йигитни эслади.* Ҳ. Ҳошимов, Қалбинга қулоқ сол. *Нажмиддин Бухорий олтиши ёшлардан ошган, наст бўйли, елкалари кенг, серҳаракат одам.* Мирмуҳсин, Меъмор.

2 Кўп ҳаракат талаб қиладиган. *Серҳаракат ўйинлар.*

СЕРҲАФСАЛА Ҳафсалали, ҳар бир ишни ҳафсала билан қиладиган, эринмайдиган. *Серҳафсала одам.* ■ *Саидакбар ҳожи кутини очди-ю, кўзи тиниб кетди.* Унда чиндан ҳам завқли, *серҳафсала устанинг мўъжизакор санъати ўзининг бутун жозибасини намойиш қилиб турарди: бу олтин узук эди.* Шухрат, Жаннат қидирганлар.

СЕРҲАШАМ Ҳашами кўп, ҳашамдор; жуда ҳам ҳашаматли. *Серҳашам бинолар.* ■ *Улар кирган уй меҳмонхона бўлса керак. Ниҳоятда серҳашам эди.* С. Аҳмад, Пойқадам.

СЕРҲИКМАТ Ҳикматга бой. *Серҳикмат мақоллар.*

СЕРҲИММАТ Жуда ҳимматли, сахий. *Серҳиммат одам.*

СЕРҲОСИЛ Ҳосилдор, унумдор, кўп ҳосил берадиган, *Серҳосил ер.* *Серҳосил тупроқ.* ■ *Ўзбекистон деганда, поёнсиз пахтазорлар билан бирга серҳосил мевазорлар, полизу яйловлар кўз олдимизга келади.* «Саодат».

СЕСАРКА [р. сесарка < caesar — цезарь: Қадимги Римда бой, таниқли уруғ номи]: **сесарка товуқ** Товуқлар туркумига мансуб, куркасимон хонаки парранда.

СЕСКАНМОҚ Ташқи таъсирдан чўчиб ёки бирор нарсдан жирканиб сапчиб тушмоқ. *Сесканиб кетмоқ.* ■ *Тўйбека.. совуқ сув келтириб, Кумушнинг манглай ва кўксига сепган эди, сесканиб ўзига келди.* А. Қодирий,

Ўтган кунлар. [Зухраҳон] *Эти сесканиб, бундай қараса, катта-катта чумолилар оёғида ўрмалаб юрибди.* А. Муҳиддин, Куёв қочди.

СЕССИЯ [лот. sessio — мажлис, йиғилиш] **1** Иш, машғулот даврий равишда амалга ошириладиган ваколатли органларнинг, суд ёки жамиятларнинг иш, йиғилиш ўтказадиган даври. *Қонунчилик палатасининг навбатдаги сессияси. Суднинг сайёр сессияси.*

2 Биржалар фаолиятининг ташкилий шакли: кун давомида савдо қилиш учун белгиланган қатъий вақт. *Сессиялардан олдин ёки кейин тузилган савдо битимлари ҳақиқий ҳисобланмайди ва рўйхатдан ўтказилмайди.* «ЎзМЭ».

3 Олий ва ўрта махсус ўқув юртларида: белгиланган вақтларда ўқув режасида кўзда тутилган имтиҳонларни топшириш даври. *Қишки сессия.* ■ *-Бу метод ҳозир бизга иш бермайди, — тушунтирди Зокир юмишаб. — Вақт зиқ. Группаларда муҳокама қилдиргуниimizча, сессия етиб келади.* П. Қодиров, Уч илдиэ.

СЕТ [ингл. set] Теннис ўйинида одатдаги уч партиянинг ҳар бири. *Иккинчи сетда дэдид ҳаракат қилган вакилларимиз ҳисобни тенглаштиришди.* Газетадан.

СЕТКА [р. сетка — кичкина тўр] **1** Ип, пластмасса ва б. дан тўқиладиган тўр халта. [Хола] *Кўлидаги сеткага нон, овқат, бир-икки бош узум солиб, йўл ўртасида бир студент йигитдан клиникага қандай боришни сўради.* Мирмуҳсин, Умид. *Биров ишга шошиляпти, биров бозордан келяпти, икки кўлида сетка.* Ҳ. Умарбеков, Ёз ёмғири.

2 иқт. айн. **жадвал.** *Тариф сеткаси.*

СЕТОР [ф. سەتار — уч торли] Уч торли, чертиб чалинадиган, тамбурсимон мусиқа асбоби. *-Хонандалар сукутда, сеторлар гилофда, — деди Андугоний.* Мирмуҳсин, Меъмор.

СЕШАНБА [ф. سهشنبه] Ҳафтанинг душанбадан кейинги, иккинчи куни. *Алқисса, таҳлил ҳафтада уч кун эрди: шанба, якшанба, душанба; аммо сешанба куни ҳар бир жамоанинг ўз олдига гаплари бор эрди.* А. Қодирий, Кичик асарлар.

СЕЯЛКА [р. сеять — «экмоқ» с. дан ясалган от] қ. х. Уруғларни маълум чуқурликда бир текис экиш, экинларни ўғитлаш ишларига мўлжалланган қишлоқ хўжалиги

машинаси. *Эртадан чигит эсмоқчи эдик, сеялкаларни тайёрлаб қўйяпман. Ойдин, Келин ўғил туғибди. Сеялкалар чигитни майин тупроқли далаларда бир хил чуқурликда ташлаб кетади.* Газетадан.

СЕЯЛКАЧИ Сеялкада ишловчи, сеялка билан уруғ сепувчи деҳқон. *Сеялкачиларнинг қўли қўлига тегмайди, ҳозир улар билан суҳбатлашиш ҳам қийин.* Газетадан.

СЕХР [а. سحر – жозиб, фусункорлик; сеҳргарлик, афсун, жоду; жодугарлик] **1** Гайритабий кучлар, сеҳрли афсун ва дуолар ёрдамида мўъжиза яратувчи ҳаракат ва дуолар; афсун, жоду. *Девлар бунни сезиб, сеҳр билан битта таёқни дуторга, қовун пўчоғини доирага айлантириб, мафтун қилувчи куй чалиб, қўшиқ айта бошлабдилар.* «Олтин бешик». *Ўғлингизнинг бу иши бежиз эмас: марғилонлик сеҳр қилдими, жоду қилдими, ҳайтовур, сиз шу йўсинда юра берсангиз, эрта-индин ўғилдан ажраласиз.* А. Қодирий, Утган кунлар. *Дейдиларки, сенинг кўзларинг Афсунгармиш, сеҳр этармиш.* Р. Парфи, Кўзлар.

2 кўчма Сўз ёки хатти-ҳаракатдан келиб чиқадиган мафтункорлик, фусункорлик, жозиб. *Куй сеҳрига берилмоқ.* ■ *Кўп заҳмат сўнгидан англаб етолдим Устоз Алишернинг буюк сеҳрини.* Э. Воҳидов. *Алимардон ўз овозининг сеҳри бутун тўйхонани ром этганини сезиб, завқ билан ашула айта бошлади.* Ў. Ҳошимов, Баҳор қайтмайди.

СЕХРБОЗ [а. + ф. سحر باز] кам қўлл. айн. сеҳргар.

СЕХРГАР 1 [а. + ф. سحر گر – сеҳр, жоду қилувчи, афсунгар, жодутар] **1** Сеҳр билан ўзи ёки бошқаларни ҳар хил қиёфага киритувчи; афсунгар, жодугар (эртақ ва афсоналарда). *Чиройли йигит қиёфасига кириб олган сеҳргар Иблис, севелимни қўлатиқлаб кетаётганини кўриб, ёниб кетдим.* Х. Тўхтабоев, Ширин қовунлар мамлақати. *У сеҳргар бир думалаб, чумчуқ қиёфасига кирдида, «пир» этиб учиб кетди.* «Олтин бешик».

2 кўчма Мафтун қилиб, ўзига боғлаб олувчи; фусункор. *Сеҳргар кўзлар. Сеҳргар қиз.* ■ *Радиодан дутор садоси таралар, сеҳргар куй Темиржоннинг қалбига кириб борар, унинг юзида масум латофат уйғотарди.* Ж. Абдуллахонов, Орият.

СЕХРГАРЛИК 1 Сеҳр-жоду қилиш ҳунари, касби. *Афлотуннинг қизи отасининг*

сеҳргарлик-жодугарлик ҳунарини ўрганиб олган эди. «Луқмони ҳаким».

2 Халқ этиқодига кўра, зиён етказиш ёки ундан халос қилиш, касалликларни тузатиш борасидаги мўъжизавий қобилият.

3 кўчма Кишининг эс-ҳушини олиб қўйиш; жозибадорлик, фусункорлик.

СЕХР-ЖОДУ Сеҳр ва жоду. *Сеҳр-жоду қилмоқ.*

СЕХРКОР айн. сеҳргар **2.** [Гулхайрининг] *Товуши майин, баҳор шабадасидай сеҳркор мавжланиб, тўппа-тўғри дилга қўйиларди гўё.* Ж. Абдуллахонов, Тўфон.

СЕХРЛАМОҚ 1 Сеҳр-жоду билан эс-ҳушини олиб, ўз измига бўйсундирмоқ (эртақ ва афсоналарда). *Буларнинг ҳаммасини сеҳргар Иблис сеҳрлаб қўйди.* Х. Тўхтабоев, Ширин қовунлар мамлақати.

2 кўчма Эс-ҳушини олиб қўймоқ, мафтун қилмоқ, ўзига тортмоқ; ром этмоқ. *Йўнаётган йигит ўз санъати билан даврадагиларни сеҳрлаб қўйган эди.* Н. Сафаров, Оловли излар. *Лаълининг катта тим қора кўзлари йигитни сеҳрлаб қўйди.* Д. Нурий, Осмон устун.

СЕХРЛИ 1 Сеҳрлаш, мўъжиза яратиш хусусиятига эга, сеҳрловчи; сеҳрланган. *Сеҳрли таёқча* ■ *Шундай бўлгач, сеҳрли қалпоқчанинг ёрдамига муҳтожман.* Х. Тўхтабоев, Ширин қовунлар мамлақати. *-Мен бир сеҳрли буюқ тондим, – деди йигит.* «Эртақлар».

2 кўчма Мафтун этувчи, мафтункор, фусункор, ўзига жалб этувчи. [Гулнор] *Бир ёз кечаси тўлин ойнинг сеҳрли нурида, мана шу терақлар остида Йўлчини кутмаганмиди?* Ойбек, Танланган асарлар.

СЕХРЧИ айн. сеҳргар **1.** [Ўзбек ойм:] *Марғилонликнинг домласи сеҳрчи ҳинди эди, мен бўлсам бу ердан ҳинди домла топа олмадим.* А. Қодирий, Утган кунлар.

СИ I [лот. si |] Мусиқада: муайян изчилликдаги товушқаторнинг еттинчи товуши ва унинг нота белгиси. *Музиқада еттита асосий товуш бор: до, ре, ми, фа, соль, ля, си.* И. Акбаров, Музика саводи.

СИ II [фр. si < Systeme Internationale – «халқаро тизим» бирикмасининг қисқартмаси] Халқаро бирликлар тизими – физик катталикларнинг асосий ва ҳосилавий ўлчов бирликлари тизимининг қисқача номи.

СИБИЗГА *с.т.* Найнинг бир тури; чўпон найи (қ. **най 3**). *Қамиш сибизга. Сибизга чалмоқ.* ■ *Мен ҳам қўлга олиб сибизга созим, Тўйингга шошарман элдан илгари.* Э. Воҳидов.

СИБИЗГАЧИ Сибизга чалувчи.

СИБИР [р. Сибирь – Россия Федерацияси ҳудудининг Осиё қисмидаги табиий ўлка]: **сибир қилмоқ** *с. т. тар.* Сибирга сургун қилмоқ. [Ҳоким:] *Йўқ, ҳукм қатъий. Фофир бир умр сибир қилинди!* Ҳамза, Бой ила хизматчи.

СИБИЗГА *с.т. айн.* Сибизга. *Ана, чўпон йигит яшил майсазорга ёнбошлаб, қамиш сивизгасини чалаётибди.* Ҳ. Фулом, Машғал.

СИГАРА [фр. *cigare* < исп. *cigarro*] Чекиш учун найча шаклида тигиз, зич қилиб ўралган ва сирти елимланган тамаки барглари.

СИГАРЕТА, сигарет [фр. *cigarette* – кичик сигара] Бор бўйича тамаки тиқилган, муштуксиз, шунингдек, зарарли моддалар таъсирини камайтириш мақсадида махсус филтър билан таъминланган қоғоз найча. *Сигарета тутатмоқ. Филтърли сигарет.* ■

Аҳмад коридорга чиқиб, чўнтагидан сигарет олиб тутатди. Ф. Мусажонов, Ҳиммат. *Солиҳ чекаётган сигаретасининг кулини қоқар экан, узилиб қолган гапни давом эттирди.* О. Мўминов, Хиёбондаги уч учрашув.

СИГИР Бузоқлаган урғочи қорамол. *Говмиш сигир. Сигир соғмоқ. Сийлаганни сигир билмас.* Мақол. ■ *Ҳовли этагидидаги оғилхона томондан сигирнинг пишилагани, алланиманинг тап-тап этиб ерга тушгани эшитилди.* Ў. Ҳошимов, Қалбингга қулоқ сол.

Сигир йили Мучал йил ҳисобида иккинчи йил (қ. **мучал**). *Унинг йили – сигир.*

СИГИРХОНА Сигир турадиган жой, молхона, оғилхона. *Самин бобо ухладиев деганда, Сайфи билан икки-уч бўлак кунжарани қўлтиқлаб, сигирхонамизга йўргаладик.* С. Сиев, Ёруглик.

СИГИРҚУЙРУҚ Бўйи 60–105 см, барглари бандсиз, меваси ва пояси тук билан қопланган, сариқ шингилсимон тўпгулли ўсимлик; бегона ўт (халқ табобатида жароҳатни даволашда ишлатилади). *Сигирқуйруқни [заҳарли бўлгани учун] мол емайди.* «ЎЗМЭ».

СИГНАЛ [нем. *Signal* < лот. *signum* – белги] 1 Бирор маълумот, буйруқ, хабар ва ш. к. ни яқин ёки узоқ масофага етказиш, кишиларни ўзига қаратиш, огоҳлантириш,

тартибга чақириш учун қўлланадиган шартли белги, ишора, товуш ва ш.к. *Светофор сигналлари. Товушли сигнал. Аниқ вақт сигнали. Машина сигнали. Сигнал чироқлари.* ■ *Шофёрнинг «Йўл очинглар» магносида бераётган сигнали бефойда эди.* Н. Сафаров, Оловли излар. *Мансур ҳовли ўртасига етиши билан орқадан машина сигнали эшитилди.* Ў. Ҳошимов, Қалбингга қулоқ сол.

2 *кўчма* Бирор ҳодисанинг олдини олувчи, у ҳақда огоҳлантирувчи, таъкидловчи хабар ёки белги, ишора. *–Шундай кўнгилсиз аҳволлар тўғрисида сигналлар бўлганмиди? –Бўлган эди. Бу ерда ўртоқ Эргашевнинг ҳушёрлигига тан бериш керак.* А. Қаҳҳор, Мунофиқ. *Шундан буён икки ой ўтди, ҳали ҳам матбуот сигналига жавоб йўқ.* «Муштум».

СИГНАЛИЗАТОР Сигнализация ускунаси ёки унинг сигнал берувчи қисми.

СИГНАЛИЗАЦИЯ [фр. *signalisation* – белгиларни масофага узатиш < *signum* – белги] Сигналлар системаси ва сигнал берувчи асбоблар, қурилмалар мажмуи. *Автоматик сигнализация. Сигнализация ва алоқа воситалари.* ■ [Сигнализация] *Вазифасига қараб, авариянинг олдини олиш, чақириш, буйруқ бериш, ўт ўчириш, қидириш, огоҳлантириш учун мўлжалланган сигнализацияларга бўлинади.* «ЎЗМЭ».

СИДЕРИК [лот. *sidus, sideris* – юлдуз; осмон ёритқичи]: **сидерик айланиш даври** *астр.* Сайёра, астероид ёки кометанинг Қуёш атрофида, табиий йўлдошнинг ўз сайёраси атрофида бир марта тўлиқ айланиб чиқиш даври (*таққосланг. синодик: синодик айланиш даври*).

Сидерик ой *астр.* Ойнинг Қуёш атрофида тўлиқ бир айланиш даври; *таққосланг: синодик: синодик ой.*

СИДИРИЛМОҚ Сидирмоқ фл. ўзл. ва мажҳ. н. *Териси сидирилиб кетди.* ■ У [Лолахон] *енгини шимариб олган, кулча бетлари терга ботган, қизил рўмолчаси бошидан сидирилиб, узун соч ўримига илашиб қолган.* Ҳ. Назир, Сўнмас чақмоқлар. *Гавдадан кўчган нўст оёқдан ечилган пайпоқдек илон гавдасидан сидирилиб тушади.* «Зоология».

Ичи сидирилиб кетмоқ Ичида ҳеч нарса қолмаслик, қорни очиб кетмоқ. *Кўк чой ичавериб, ичим сидирилиб кетди.*

СИДИРМОҚ 1 Қўл бармоқлари ёки қафтни босиб, бир томонга ҳаракатлан-

тирмоқ. Эргаш қизарган юзини кафти билан сидириб қўйди.. А. Мухтор, Опа-сингиллар. Раҳим Саидов титроқ қўллари билан соч толасини юз-кўзи аралаш сидириб, кичкина ёстиқча билан битта бўлиб ётган сочлариغا секин қўшиб қўйди. Ў. Умарбеков, Ёз ёмғири.

2 Қўл бармоқлари билан тортиб ёки суриб туширмоқ, тозаламоқ. *Пайпоқни сидириб, тўпикча туширмоқ.* ■ - Ёмонликка яхшилик, — деди ўт ёнида дийдираб ўтирган Уббинёз соқолидаги лойни сидириб. А. Мухтор, Қорақалпоқ қиссаси. - Ҳозир жуда қорним очди, — деди Турғунбой пешонасидан терларини сидираркан. Т. Ашуrow. Оқ от.

3 Артиб, қириб ёки кўчириб олиб ташламоқ. *Бу ерда.. майдоннинг ҳар бир қатлами сидириб олиниб, тақир ерда 500 машина сиғадиган катта автобаза қурилайётган экан.* С. Сиёев, Ёруғлик. *Бўтабой ариқ четларидаги ўтларни кетмонлаб сидирди.* С. Аҳмад, Ҳукм. «Овни нима қиламан!» деб ўйлади Ёдгор нон ушоқларини сидириб оларкан. Ў. Ҳошимов, Қалбингга қулоқ сол.

4 кўчма Олиб ташламоқ; холи қилмоқ; кетказмоқ. *Энг мусавфо ҳаёл бўлиб ишқ, Қиз қалбидан сидирди доғни.* О. Ҳожиева. *Кули юраклардаги ғашликни сидирди.* М. Исмоилий, Бизнинг роман.

Сидириб солмоқ Жеркиб бермоқ, койимоқ. - *Санобар билан бир оз ҳазиллашдик, кулишдик. Ўшанда унинг кеннойиси зарда билан уни чақириб, «йигит кишининг олдида ҳадеб ҳингиллайверасанми», деб сидириб солган эди, — деди Баҳром.* М. Қориев, Ойдин кечалар. **Юзини (ёки бетини) сидириб ташлаб** Андиша қилмасдан, уятни йиғиштириб қўйиб.

СИДИРҒА 1 Бир рангдаги, бир тусдаги; гулсиз, сийдам. *Сидирға духоба. Сидирға ранг.* ■ Ёнидаги бўш стул устида турган сидирға қора бахмал дўпписини олиб, тақир бошига кийди. С. Анорбоев, Оқсой.

2 Ялпи равишда, ёппасига, бир текис, узлуксиз равишда. *Мана уч кечаю кундуз ҳавонинг қовоғи солиқ: қора ёғнинг тутунидай қоп-қора булут Асака билан Ўзган оралиғини сидирға қоплаб олган.* Р. Раҳмонов, Чангалзордаги шарпа. *Қор тоғда сидирға бўлмай, қатиқ тўқилгандай олачалтоқ.* Шухрат, Жаннат қидирганлар.

СИДИРҒАСИГА рвш. Ёппасига, ялписига, узлуксиз равишда. *Меваларни сидир-*

ғасига совуқ урибди. ■ - *Сидирғасига ўқий-вер, бу нимаси, бизлар ҳам эшитайлик, шайтон қиз! — дейди Роҳат келинойи.* Ойбек, Болалик.

СИДРА (фақат снқ. сонлар билан) 1 Марта, карра, бора. *Жабборов техникани яна бир сидра кўздан кечириш учун беш кун имконият борлигини айтди.* Н. Ҳайитқулов, Ер тафти. - *Бугун икки гектардан бир сидра теримда 38 центнер ҳосил кўтарибмиз, — деди бригадир.* С. Акбарий, Чўлдаги парвоз.

2 Одатда бир бутунликни ташкил этувчи нарсаларнинг тўлиқ йиғмаси, тўплами. *Бир сидра кийим.* ■ *Бола-чақа маъмур. Егани олдида, емагани кетида. Кийим-кечакдан эса уч-тўрт сидрадан, — деди Нафас Йўлдошев.* Ҳ. Носирова, Мен ўзбек қизиман.

3 Айни бир пайтда; маълум муддатда; қачонлардир. *Бир сидра. Бир сидра шундай воқеалар ҳам бўлиб ўтган эди.* ■ *Кумушининг захарли муаммо мактуби бир сидра Отабекнинг кўз ўнгидан ўтиб кетди.* А. Қодирий, Ўтган кунлар.

СИДҚ [a. صدق — ростлик, тўғрилиқ, самимийлик; ҳақиқат] Чинлик, ростлик, садоқат, содиқлик, самимийлик. *Мастура қилиб нолишни, Сидқ билан тўқди кўздан ёшни.* «Эрали ва Шерали».

СИДҚИ фольк. Рост, ҳақиқий; ростакамига, чин кўнгилдан, дилдан қилинадиган ёки айтиладиган. *Сидқи қасамлардан онт айтиб, ваъдани қаттиқ қилиб дўст бўлди.* «Муродхон». [Энаси ўғиллариға:] *Эна деган тилингдан мен, шўр бебахт, Сидқи йиғла, пирим келсин тезроқ.* «Эрали ва Шерали». ..Энди сидқи сўрашайлик сиз билан, Ўз юртимда она-отам омонми? «Зулфизар билан Авазхон».

СИДҚИДИЛ [a. + ф. صدق دل — кўнгил, қалб садоқати] рвш. Астойдил, чин юракдан; ҳақиқий. *Мана сен, ота-бобонг бизга сидқидил хизмат қилдинглар [деди Махсум].* С. Анорбоев, Оқсой. *Сидқидил бирла қўлига ким они тутса агар, Мақсадиға етказиб, кўнгил ризо қилди қалам.* Ҳамза.

СИДҚИДИЛДАН рвш. Чин дилдан, юракдан; астойдил; садоқат ва самимият билан. *Мен унинг бу ишларни сидқидилдан адо этаётганига, мамлакат учун астойдил қайғураётганига инондим.* Ш. Холмирзаев, Қил кўприк.

СИДҚИДИЛЛИК Садоқатлилик, чин садоқат; самимиятлик. *Сидқидиллик кўрсатмоқ. Сидқидиллик билан бажармоқ.* ■ У буюрган ишни сидқидиллик билан тез ва аниқ ўтайди. Шухрат, Шинелли йиллар.

СИЁ [ф. *سياء* — қора; қоралик] с.т. айн. **сиёҳ**. *Очилган гунча гулидек, Сиё сочлари сунбулдек, Ширин овозли булбулдек Сиз ёрима мендин салом.* «Кўшиқлар».

Дили сиё Кўнгли ғаш, хафа. *Кампирнинг дили сиё.. Боя сўкчак тагидан ўнтача ўлик қурт териб чиқди.* Н. Сафаров, Олияхон Султонова. *Ноз-неъмат муҳайё бўлса-ю, дилинг сиё, руҳинг сўниқ бўлса, ҳаётда не лаззат бор?* М. Жўра, Изтироб.

СИЁСАТ [а. *سياست* — бошқариш; раҳбарлик қилиш, бошлаб бориш] Давлат ҳокимияти шакллари аналга ошириш ва бошқариш; давлат ҳокимиятининг мамлакатни бошқарувда ва халқаро муносабатларда тутган йўли; давлатни бошқариш санъати. *Ички сиёсат. Ташқи сиёсат.* ■ *Мустақиллик туфайли Ўзбекистон Республикасининг давлат сиёсати янгича маъно ва мазмун касб эта бошлади.* «ЎЗМЭ». *Бу кунги шароит тажрибали хонни бошқача сиёсат ушлашга мажбур этди.* А. Қодирий, Меҳробан чаён.

2 *кўча* Ҳийла-найрангга асосланган, йўлига қилинган иш, хатти-ҳаракат; устмонлик. *Шу жойда раиснинг обрўси сал дарз кетибди. У ўзининг бийлигини сиёсат билан ўтказмоқчи бўлган экан-у, бўлмабди.* Н. Фозилов, Дийдор. *Деҳқон, косиб халқи нотинчланиб қолади: албатта, уларнинг болалари кетади-да, фармонда мардикор дейилган, аммо, Салим ака, менимча, бу нарса бир сиёсат, бир алдов бўлса керак.* Ойбек, Танланган асарлар.

3 с. т. Дўк, пўписа, кўрқитув. [Навойи:] *Таҳдид ва сиёсат эмас, меҳрибонлик даркор.* Ойбек, Навойи. [Беклар:] *Сиёсат учун битта итговарнинг бошини кестирмоқ зарур!* П. Қодиров, Юлдузли тунлар. *Ҳа, одамлар айтар эди, Азроил жон оладиган бўлганда, шундай сиёсат билан, ҳайбат билан келади, деб.* «Муродхон».

СИЁСАТБОЗ [а. + ф. *سياستباز* — куруқ сиёсатчи] Сиёсатбозликни яхши кўрадиган, куруқ сиёсат билан иш кўрадиган. *Сиёсатбоз кишилар.*

СИЁСАТБОЗЛИК Куруқ сиёсат билан иш тутиш, сиёсат сўқиш, сафсатабозлик. *Сиёсатбозлик қилиш.*

СИЁСАТДОН [а. + ф. *سياستدان* — сиёсатни биладиган, тушунадиган] Сиёсат билан шуғулланадиган, сиёсатни яхши биладиган, тушунадиган; сиёсатчи. *Сиёсатдон одам.* ■ *Сиз, айтайлик, хорижий мамлакат билан музокара олиб борадиган дипломат ёки сиёсатдонсиз.* «Фан ва турмуш». *Хуллас, атоқли шоир, сиёсатдон, бастакор ва таржимон Комил ижоди.. адабиётимиз тарихидан мустақкам ўрин эгаллаган.* «ЎТА».

СИЁСАТЛИ Гапи ўткир, гапини ўтказа оладиган, ҳайбатли, ўз салобати, теран фикри, қаттиққўллиги билан кишиларни ҳайқтирадиган. *Сиёсатли бошиқ.* ■ *Бир ҳайбатли, сиёсатли нарсалар экан. Булар билан олишиб бўлмаса керак.* «Ёлгор».

СИЁСАТЧИ Сиёсат билан шуғулланувчи, сиёсатдон, сиёсат арбоби. *Сиёсатчилар нега сиёсий партиялар фаолияти ҳақида фикр билдирмаяптилар?* Газетадан.

СИЁСАТШУНОС [сиёсат + ф. *شناس* — ўрганувчи, текширувчи] айн. **сиёсатдон**. *Сиёсатшуносларнинг фикрига қараганда, эфир доирасида берилган вақт давомида Януковичнинг.. нисбатан бир оз устунлиги сезилган.* Газетадан.

СИЁСИЙ [а. *سياسي* — сиёсатга, дипломатияга доир] Сиёсатга оид, сиёсат билан боғлиқ бўлган, сиёсат соҳасидаги. *Сиёсий масала. Сиёсий партия. Сиёсий шарҳловчи.* ■ *Мустақил Ўзбекистон сиёсий партияларнинг шаклланиши ва фаолияти учун зарур шарт-шароитларни яратиб берди.* «Мустақиллик» луғати.

2 Давлатга, давлатчиликка ва фуқаролик ҳақ-ҳуқуқига оид. *Сиёсий тузум. Сиёсий ҳуқуқ.* ■ *Ўзбекистон Республикасининг сиёсий тузumi 1992 йил 8 декабрда қабул қилинган Конституцияси, шу асосда қабул қилинган конституциявий қонунлар ҳамда бошқа расмий ҳужжатлар билан белгиланган.* «Мустақиллик» луғати.

Сиёсий харита Дунёнинг, қитъаларнинг давлатларга бўлинишини, давлатлар ёки уларнинг айрим қисмларининг ҳозирги кундаги сиёсий-маъмурий тузилишини кўрсатувчи харита. *Дунёнинг сиёсий харитаси.* ■ *Европа сиёсий харитасида Могилёв шаҳри*

кичик бир нуқта бўлиб кўринди. И. Раҳим, Чин муҳаббат.

СИЁҲ [а. سباق — оқим, жараён, бирор нарсанинг бориши, давом этиши; матн парчаси] (3-шахс бирл. **сиёқи** ва **сиёғи**) 1 Авзо, афт-ангор, турк, кўриниш. Ҳавонинг сиёқи бузуқ. ■ Ўғил ҳам отага шунча ўхшарми, Кўзингда, сўзингда отанг сиёқи. О. Ҳақимов. Достонлар. Чапдастлиги учар қушни олгудек, Сиёқидан йўлбарсга чанг солгудек.. Я. Қурбон. Энажон, сўрама қайғу ҳам доғим, Ғам билан сарғайди гулдай сиёғим. «Равшан».

2 Ҳолат, аҳвол, феъл-атвор. Гўёки Собировнинг «ўғри» деб қилган ҳақоратига чидамаган сиёқда гузарга чиқиб, бақириб-чақирди. А. Қодирий. Обид кетмон. -[Кумушининг] Кундошликка чидайдиган сиёқи йўқ, ҳар кун Зайнабингиз билан ғиди-биди қилавериб, сизни қийнаб қўярмикин дейман, — деди Отабек. А. Қодирий, Ўтган кунлар. [Йўлдошвойнинг] Сиёқидан зўр генерал бўлишини фаҳмлаб турибман. Ҳ. Фулом, Тошкентликлар.

3 Мазмун, маъно. [Тошмурод:] Гапининг сиёғига қараганда, Йўлдош қизини сенга келинликка беришга рози. Газетадан.

СИЁҲ I [ф. سياه — қора; қоронғилик; бахтсиз, ғамгин] 1 сфт. поэт. Қора, қора рангли. Кўзимга қўйибман сиёҳ сурмани, Жоним отам, севганимга бер мани. «Кўшиқлар». Қор кетди заминда, Бўртди илк гиёҳ, Қоронғи, сиёҳ тунда Шам ёнди гўё. Х. Даврон.

2 от кўчма Ҳат ёзиш учун ишлатиладиган рангли суюқлик. Қора сиёҳ. Қизил сиёҳ. Сиёҳ билан ёзилган хат. ■ Ой чиқди: сербулт осмон худди сиёҳ сачраган зангори кўйлакка ўхшарди. С. Аҳмад, Уфқ.

Дили сиёҳ с.т. айн. дили сиёҳ қ. **сиё**. Ҳайдар Фуломович ҳам уйига дили сиёҳ бир ҳолатда қайтди. Ж. Абдуллахонов, Хонадон. Олчинбекнинг бу аянчли аҳволи Шаҳзоданинг дилини сиёҳ қилди. К. Яшин, Ҳамза. **Рўйи сиёҳ** Юзи қора, қора юзли. Рўйи сиёҳ бўлдиқ ушбу шаҳарга, Бошимиз кесади, осади дорга. «Эрали ва Шерали».

СИЁҲ II эск. айн. **сиёқ**. Ҳавонинг авзойи бузуқ, ёғадиган сиёҳи бор. ■ [Олимовнинг] Шу зеҳни, ғайрати турса, келгусида агроном бўлиш сиёҳи бор. Ҳ. Назир, Сўнмас чақмоқлар. [Зикрийё қори:] Пулат деган шу бўлади,

тақсир. Бунинг икки дунёда ҳам эл бўладиган сиёҳи йўқ. Н. Сафаров, Шарқ тонги.

СИЁҲДОН [ф. سياهدان — сиёҳ идиши] тар. Сиёҳ куйиб қўйиладиган идишча, ёзув-чизув асбоби, довот. Шиша сиёҳдон. ■ Столи устида қоғозу қалам, Сиёҳга тўладир сиёҳдони ҳам. Ж. Жабборов. Сиёҳдон, азизим, қаро кўзлим, Қаро тунлар аро ёриган кўзгу. Ф. Фулом.

СИЗ (киш. олм. 2-ш. кўпл.) 1 Ўзидан катта кишининг ёки хурмат билдириладиган шахснинг номи ўрнида қўлланувчи сўз (тингловчига нисбатан). Бу сизнинг китобингизми? ■ [Оқсол:] Қимирламанг, отахон! Сиз келганда, биз турсак ярашадим, биз келганда, сиз турсангиз, хунук кўринади. А. Қаҳҳор, Асарлар. [Меъмор:] Майманадаги Ҳорун бўзчи — сиз бўласизми? Мирмуҳсин, Меъмор. -Акрам ака! — қизнинг овозида гина аралаш илтнжго бор эди. — Сиз мени тушунишни ҳам хоҳламайсиз! Газетадан.

2 Кўпчиликка қилинган мурожаатда қўлланади. Мана, Назира хола ҳам, Шаҳодат хола ҳам келишди. Яхши бўлди. Узим ҳам сизларни йиғиб, икки оғиз гаплашмоқчи эдим. А. Қаҳҳор, Хотинлар. -Сизлар ким бўласиз? — деди Чўли бобо. -Мана бу йигит бек ҳазратларининг инилари, — деди Меъмор. Мирмуҳсин, Меъмор.

СИЗЛАМОҚ Ўзидан каттага ёки бирор одамга хурмат юзасидан «сиз» деб мурожаат этмоқ. Сизлаб гапирмоқ. ■ Акрамхон ундан жавоб мушти кутиб, жангга ҳозирланган чоқда даъвогар энди газаб билан эмас, ҳазил билан ва сизлаб жавоб қилди. И. Раҳим, Тинимсиз шаҳар.

СИЗЛОВУҚ айн. **сизлоғич**. У [Ҳасан] худди бўйнига сизловуқ чиққандай, калласини бир ёнга қийшайтириб, афтини бужмайтириб, салом-аликсиз тўғри тўрға ўтаверди. С. Сиев, Аваз.

СИЗЛОҒИЧ Тук, соч халтачаси оғзининг йирингли яллиғланиши; фолликулит. Сизлоғичнинг олдини олишда тери тозаланига алоҳида эътибор бериш айниқса муҳим. «ЎЗМЭ».

СИЗМОҚ 1 Бирор нарса орқали ёки унинг орасидан аста-секин ёки томчилаб ўтмоқ. Молхона томининг бўғотидан сизиб тушаётган йирик-йирик томчилар ора-чора ярақларди. Ў. Ҳошимов, Қалбингга қулоқ сол. [Собирнинг] Лабларининг четидан шўртанг

томчилар сизиб кирди. М. Мансуров, Ёмби. Ориф ака тош тагидан сизиб чиққан бир чашмадан ётиб сув ичди. А. Мухтор, Чинор.

2 кўча Аста-секинлик билан, оҳиста. Янғроқ куй юракка сизиб кириб, гўё сизни анвои гуллар чаманзорига етаклагандек бўлади. Газетадан. Нусратбекнинг кўнглидан: «Гулхайри бирон жойга кетсайди», деган истак сизиб ўтди. С. Нуров, Нарвон.

СИЗОТ, сизот сув Ер остидан сизиб чиқадиغان сув, зах суви. Сизот оқар зовурлардан, Отилади шағал ва қум. Миртемир. Зовурни қанча чуқур олсангиз, сизот сув шунча тез йўқолади. Ҳ. Нуъмон, Қаҳрамон пахтакор.

СИЗСИРАМОҚ айн. сизламоқ. Ўзидан катталарни сизсирамоқ. ■ *Ҳожи.. хотинини сизсираб:* -Сиз икки келин ушлашни билмабсиз, Зайнабга жабр қилган кўринасиз.. - дер эди. А. Қодирий, Ўтган кунлар.

СИЗФИМОҚ шв. айн. сизмоқ **1, 2.** Майин ел чўққиларни кучиб ётган қор нафасини олиб келади; музликдан сизғиб тушаётган сув шилдираб оқади. Й. Шамшаров, Тошқин. Ток барглари орасидан сизғиб ўтган тангадек офтоб нурида олтиндек товланиб турган антиқа беҳиларга меҳмоннинг кўзи тушиб, завқланди. М. Хайруллаев, Алёр.

СИЙДАМ шв. Сидирга, бир тусдаги; гулсиз. Бу — инглиз ҳарбий либоси устидан сийдам беқасам тўн кийган 35 ёшлар чама-сидаги киши эди. С. Азимов, Оппоқ тонг кўшиғи. *Ўрта ёшлардаги, сийдам зангор бахмал дўппи кийган бир киши гапга аралашди.* С. Абдулла, Таниш башаралар.

СИЙДИК 1 Буйрак орқали ажралиб чиқадиغان ва таносил аъзолари орқали ташқарига чиқариб ташланадиган суюқлик; пешоб. *Сийдик пуфаги (қовуқ).* *Сийдик йўллари.* *Сийдик тутилиши.* ■ *Организмдан сийдик билан бирга сув, тузлар ва бошқа чиқиндилар, шунингдек, организмга кирган ёки унинг ўзидан ҳосил бўлган турли заҳарли моддалар чиқиб кетади.* «ЎЗМЭ».

2 с.т. Пушт, насл; сперма, маний. *Ўз сийдигидан бўлган бола.* ■ *Мен сенларнинг амирингизга қўшилмадим-у, унинг сийдигидан бўлган сенларга қўшиламанми?* С. Айний, Қуллар.

СИЙЛАМОҚ 1 Ҳурматини бажо келтирмоқ, иззат-икром қилмоқ, эъзозламоқ. *Отасини сийлаганни боласи сийламас.* Ма-

қол. ■ *[Ўзбек ойм:] Ҳали қудаларимизни муддаодагидек сийлай олганимиз йўқ, шу ҳолда жўнатсак, бизнинг шаънимизга яхши эмас.* А. Қодирий, Ўтган кунлар.

2 Қадрига етмоқ, хурматламоқ. *Эр — сийлаган ерда азиз.* Мақол. ■ *Сийланган жойида азиздир инсон.* А. Орипов.

3 Меҳмон қилмоқ, зиёфат қилмоқ; қўллаб юбормоқ (асосан **билан** сўзи билан биргаликда). *Умид Ҳафизани эскимо ва ширин данак билан сийлади.* Мирмуҳсин, Умид. *Овқатдан кейин бобо меҳмонларни қимиз билан сийлади.* Ҳ. Фулом, Тошкентликлар. *Сарихон [подшони] катта ўтовларга тушириб, элини йиғиб, қўйчи сўйиб, зиёфат қилиб, сийлай берди.* «Ойсулув».

4 с.т. Савдо-сотикда хурмат юзасидан ортиқроқ, оғирроқ, яхшироқ қилиб бермоқ ёки камроқ ҳақ олмоқ. *Сизга беш сўм сийладим. Ўн килограмм ҳамма қатори, беш килограмм сизга сийладим.* ■ *Одамлар, ҳеч бўлмаса икки-уч тундан сийланг, деб яли-наверди.* Ҳ. Назир, Бир туп гўза.

СИЙЛИ шв. Сийланган; иззат-икромли, эътиборли, обрўли. *Ҳақиқат сўзласа сизга Аҳмадхон, Сийли ердан келган экан бу меҳмон.* «Зулфизар билан Авазхон». *[Авазхон:] Бориб Хидройга меҳмон бўлайлик, Тургин, ойм, сийли жойга борайлик.* «Зулфизар билан Авазхон».

СИЙЛОВ 1 Сийламоқ фл. ҳар н.

2 Сийлаб, хурмат қилиб бериладиган нарса, совға, туҳфа. *Унинг эғнида Дурди қилич берган сарпо — итак чопон, киссасида «бу биздан сийлов», деб Дурди қилич инъом этган тангалар шарақлайди.* Ж. Шарипов, Хоразм.

3 Савдода хариднинг ортиқроқ, оғирроқ, яхшироқ қилиб берилган ёки ҳақнинг камроқ олинган қисми. *Оғири сизга сийлов.* *Сийлови билан тортиб бермоқ.*

Ўзингга сийлов (бўлсин) кест. Ўзингга буюрсин (яъни менга, бизга кераги йўқ). *Маслаҳатинг ўзингга сийлов.* ■ *[Асад:] Жўхори-пўхорингиз уста бувам билан ўзингизга сийлов.* Ҳ. Назир, Кўктерак шабадаси.

СИЙМ [ф. سيم — кумуш, нуқра] поэт. Кумуш. *Ҳўжасида бўлса ҳам қанча-қанча сийму зар, Қарангки, жулдур кийган Эзон мангу қолибди.* А. Орипов.

СИЙМБАР [ф. سيمبر — оқбадан, гўзал, зебо] Оппоқ, нозик баданли. *Қайрилиб*

боқди қиё ул сиймбар, қайрилма қош, Мен ҳамон урмоқда эрдим тўлғона тошларга бош. Газетадан.

СИЙМИН [ф. *سيمين* — кумуш каби, оппоқ] *поэт.* Кумушранг, кумушга ўхшаш. Кўкда моҳ аста кезар, сочар хомуш Борлиқ узра сиймин ҳал. Э. Воҳидов, Шарқий қирғоқ.

СИЙМО [а. *سيما* — юз, чехра; белги, аломат, қиёфа] *кт.* 1 Шахс, зот. Улуғ сиймо. ■ [Қосимбек:] Мовароуннаҳрдаги темурийлар орасида энг соҳибистеъдод, соҳибқудрат сиймо — Бобур мизодирлар. П. Қодиров, Юлдузли тунлар. Шоир ва академик Фафур Фулом шеърятда ўзига хос, мисли йўқ сиймолардан биридир. «Саодат».

2 Қиёфа, кўриниш; чехра, юз. Улуғвор сиймо. Гузал сиймо. ■ Бизга ғоят азиз, ғоят мўтабар Шифокорнинг илиқ сиймоси. Э. Воҳидов. — Унинг [қизнинг] сиймосида мен ҳаёт гўзаллигини кўрдим. Табиат бунёд этган ноёб гул эди у, — деди Самар. М. Қориев, Ойдин кечалар. Кундузхон бундан икки йил аввал йўқотган онасининг меҳрибон, мунис сиймосини қидиради. С. Аҳмад, Қадрдон далалар.

3 Бирор шахс образи. Уйчан мисраларда таржимон Маргаританинг изтироб тўла сиймосини усталик билан тасвирлайди. «ЎТА».

СИЙМОҚ Қовуқни бўшатмоқ, ёзилмоқ. Эрим урмайди дема, Болам сиймайди дема. Мақол. ■ Отлиқ отини тўхтатиб, ундан тушиди, от сийганда, ундан узоқлашиб турди. С. Айний, Қуллар.

Билиб туриб, сувга сиймоқ Билиб туриб, ноҳўя ёки номақбул иш қилмоқ; гуноҳ қилмоқ (ота-боболар эътиқодига кўра, сувга сийиш катта гуноҳ ҳисобланган).

СИЙМТАН айн. сиймбар.

СИЙНА [ф. *سينه* — кўкрак, кўкс; кўкрак қафаси; қалб, дил] *кт.* 1 Кўкрак, кўкс. Эслаганда, қизнинг сийнаси Чуқур бир оҳ билан кўзгалур. Ҳ. Олимжон. Мирқосимнинг қўлидаги чақалоқ бирдан йиғлаб юборди. Лаъли уни кўлига олиб, бағрига босди-да, лорсиллаб турган оппоқ сийнасини тутди. Ҳ. Фулом, Машғал. Ханжарнинг тиғи унинг [Шаҳзода-хоннинг] сийнасини бир неча бор ялаб ўтди. К. Яшин, Ҳамза.

2 кўчма Дил, қалб, юрак. Булбул учиб, қўнар зоғлар, Сийнам тўла алам-доғлар. «Эрали ва Шерали». Неча вақтлар қўлим

боғли, Банди бўлиб, сийнам доғли. «Юсуф ва Аҳмад».

3 кўчма Кучоқ, бағир; оғуш. Булоқ она Ер сийнасидан Шеър сингари қайнаб оқади. Э. Воҳидов. Сенинг учун очикдир кенг жаҳоннинг сийнаси. Ф. Фулом.

СИЙНАБАНД [ф. *سينه بند* — кўкракпеч, ошхўрак; бюстгальтер, лифчик] Аёлларнинг ички кийими; лифчик. У сийнабандидан рўмолчага ўроғлиқ алланарса чиқариб, эрининг олдига ташлади. Н. Аминов, Қаҳқаҳа.

СИЙПАЛАМОҚ 1 Силамоқ, силаб эркаламақ. Мен унинг узун, нозик бармоқларига қарадим-у: «Насиб қилса, бир куни мана шу бармоқларни сийпалаб, тилла узук тақаман», деб қўйдим ичимда. С. Сиёев, Ёруғлик.

2 Ушлаб, силаб кўрмоқ, силаб текширмоқ, пайпасламақ. Давлатёрни чамадоннинг ялтироқ жезлари жуда қизиқтирди. Уларни қўллари билан сийпалаб кўриб: — Бу папкани ҳукумат берганми ё сотиб олганмисиз? — деб сўради. П. Турсун, Ўқитувчи.

3 кўчма айн. **сийпамоқ 2** (шабада, шамол ҳақида). Кўм-кўк ўтзорлар ичидан ёқимли шабада эсди-ю, қиз билан йигитнинг юзларини сийпалади. Ш. Рашидов, Қудратли тўлқин. Баҳор шабадаси юзни сийпалаб, кўкатларнинг ҳидини димоққа уради. Ҳ. Нуъмон, Фасллар.

4 кўчма Яширишга, юмшатишга, билдирмасликка уринмоқ; хаспўшламоқ. Хуршиданинг илжайиб, сийпалаб гапиришида қандайдир сир бор эди. Д. Нурий, Осмон устуни.

СИЙПАМОҚ 1 Қўл кафти билан силамоқ. Силаганни сийгир билмас, сийпаганни — ҳўкиз. Мақол. ■ Дуодан сўнг барча юз сийпади. А. Қодирий, Меҳробдан чаён. ..эшон алақандай бир дуони ўқиб, соқолини сийпади. Ойбек, Танланган асарлар.

2 кўчма Оҳиста, майин урилиб, тегиб ўтмоқ (шамол, шабада ҳақида). Майин шабада столдаги расмларни сийпаб, уларага жон киргизгандай бўлди. Р. Файзий, Кишилари-миз қиссаси. Азим теракларнинг шохлари оралиғидан ой мўралади, унинг яланғоч тўшини куз ели сийпаб ўтди. Й. Шамшаров, Танланган асарлар.

3 кўчма Гап-сўз, муомала билан вазиятни юмшатмоқ. Сийлагани пул топмасанг, Сийпагани тилинг бор. Мақол.

СИЙРА [а. *سيره* — таржимаи ҳол, турмуш тарзи; тарих] *дин.* Муҳаммад пайгамбар ҳаёт йўлини баён қилишга бағишланган, илк

ислом даврида яратилган диний-тарихий асарларнинг умумий номи.

СИЙРАК 1 Туки кам, қалин, куюқ эмас. *Сийрак соқол. Сийрак соч.* ■ *Мўмин ака пешонасини тириштирди, сийрак бароқ қошлари бир-бирига туташди. О. Ёқубов, Бир фельетон қиссаси. Исфандиёр пинагини бузмади. Сийрак мурти бир учиб қўйди, холос. С. Сиёев, Аваз.*

2 Кўп эмас, кам; онда-сонда. *Чойхонада одам сийрак эди. С. Зуннунова, Янги директор. Бугун майдондаги арчалар кўзимга аввалгидан сийрак, катта кўриняпти. Ҳ. Назир, Сўнмас чироқлар. Бу оилада.. ҳар кун ширин-ширин овқатлар тайёрланади. Аммо меҳмон сийрак бўлади. Ойбек, Танланган асарлар.*

3 Кўзи, тешиклари катта-катта. *Сийрак тўр. Сийрак элак кунда керак, Пахта элак ҳайтда керак. Мақол.*

4 Арқоқ-ўришларининг оралари очиқ-очиқ қилиб тўқилган. *Сийрак доқа.*

5 Унчалик зич бўлмаган, сийраклашган (газ, ҳаво ва ш.к. ҳақида). *Сийрак булут.* ■ *Бу ер бўлса денгиз сатҳидан икки-уч минг метр баланд, ҳаво анча сийрак. С. Анорбоев, Оқсой.*

6 Кам учрайдиган, онда-сонда бўладиган. *Сийрак ҳодиса.* ■ *Учадиган чироқ ёниб ўчади, мақоли каби Туркистон хонларида сийрак кўрилган бу маъмуриятпарварлик бизга қолса шу омиллардан туғилган ва бунда самимий ҳеч нарса йўқ. А. Қодирий, Меҳробдан чаён.*

СИЙРАКЛАШМОҚ 1 Сийрак бўлиб, озайиб қолмоқ. *Кўкдаги юлдузлар ойнинг ўтқир шуъласида эригандай сийраклаша бошладилар. С. Зуннунова, Янги директор.*

2 Камаймоқ, озаймоқ. *Кўчадаги қатнов сийраклашиб, қоронғи туша бошлади. Ҳ. Ғуллом, Машғал. Бирпасда перронда одамлар сийраклашиб қолди. Ў. Ҳошимов, Қалбингга қулоқ сол.*

3 Кенгайиб ёки маълум ҳажмдаги миқдори камайиб, салмоғини йўқотмоқ, сийракланмоқ (газ, ҳаво ҳақида). *Юқорига кўтарилган сари ҳаво сийраклашади.*

СИЙРАКЛИК Зич, тигиз эмаслик; камлик, кўп эмаслик. *Кўчатларнинг сийраклиги.* ■ *У ҳаяжонлана бошлаганидан ва ҳавонинг бу ерда сийраклигидан юраги гупиллаб урди. С. Кароматов, Олтин қум.*

СИЙРАТ [*а. سيرت* — таржимаи ҳол, турмуш тарзи; обрў, эътибор, тарих, умр йўли] *кт. Ички олам; руҳият. Одамнинг суратига қарама, сийратига қара. Мақол.* ■ *Хуллас, сурат бор-у, сийрат йўқ. Сийратсиз тана ўлик эмасми? С. Сиёев, Ёруғлик.*

СИЙҚА 1 Ишқаланавериб, суртилавериб сайқал топган ёки едирилиб теп-текис бўлган, сип-силлиқ. *Сийқа тош. Сийқа чақа.* ■ *Бу кун ҳам қуёш, худди совқотаётгандек, осмонда бир муддат сийқа танга каби хира ялтираб, кўздан йўқолди. Ҳ. Султонов, Бир оқшом эртаги. Бировлар савдо-сотик ёки харж билан овора бўлса, бировлар чўнтакларида сийқа чақаси йўқ, бозор расталарида гаранг судралади. Ойбек, Танланган асарлар.*

Сийқа бош 1) сочлари тўкилиб кетган, кал бош; 2) кал одам.

2 кўчма Кўп қўлланган, ишлатилавериб кўнгилга урган, меъдага теккан (гап, сўз, ибора ва ш. к.) *Сийқа гап.* ■ *-Подшоҳнинг амри вожиб, — деди аллома, сийқа, эски гапни ишлатишга мажбур бўлиб. М. Осим, Ибн Сино қиссаси.*

Сийқаси чиққан Сийқаланиб кетган, кўп чайналган, (ишлатилавериб) кўнгилга урган, эскирган. *..улар [ишни орқага судровчилар] уялмай-нетмай.. сийқаси чиқиб кетган «бажарамиз»ларини такрор-такрор айтишади. Н. Сафаров, Узоқни кўзлаган қиз.*

3 кўчма Фоя, мазмун ва бадиийлик жиҳатидан юзаки, саёз. *Сийқа фикр. Сийқа асар.* ■ *Сотиболдиевнинг баҳслашиши ҳам алланечук сийқа, бачкана эди. П. Қодиров, Уч илдиз.*

СИЙҚАЛАМОҚ Бирор предметни (тошга, темирга) ишқалаб ёки эгов ва ш.к. билан сайқал бериб силлиқламоқ. *Фиштни сийқаламоқ. Тезоқар сувлар ҳатто тошларни сийқалаб юборади.*

СИЙҚАЛАНМОҚ 1 Сийқаламоқ фл. ўзл. ва мажҳ. н. *Сийқаланган тош. Сийқаланиб кетган муҳр. Сийқаланган танга.* ■ *[Равшан бобо] Сийқаланган қабр тошини қўли билан силади. С. Кароматов, Бир томчи қон.*

2 кўчма Кўп ишлатилаверишдан, такрорлайверишдан сийқаси чиқмоқ, кўнгилга, меъдага урмоқ, эскирмоқ. *Сийқаланган ибора.*

СИЙҚАЛАШМОҚ 1 Сийқа, силлиқ бўла бормоқ, силлиқлашмоқ.

2 кўчма Мазмуний ёки бадийий жиҳатдан саёзлашмоқ; кўп қўлланиб меъдага урмоқ, жонга тегмоқ. *Бора-бора Қорача Ҳожибнинг ҳазиллари сийқалашиб, ҳаммининг энсасини қотира бошлади.* М. Осим, Ўтрор.

СИЙҚАЛИК Сийқа хусусиятига, хос-сасига эгалик. *Тошнинг сийқалиги. Асарнинг сийқалиги.* ■ *Умуман, адабиёт фани ўқи-тилганда, сийқаликдан қочиши керак.* Газетадан.

СИЙҒОҚ Кўп сиядиган, қовуғи бўш, беихтиёр сийиб қўядиган. *Сийғоқ бола.*

СИЙҒОҚЛИК Қовуғи бўшлик, беихтиёр сийиб қўйиш, сийдикни тута олмаслик. *Тунги сийғоқлик — уйқуда беихтиёр сийиб қўйиш, асосан, ёш болаларда учрайди.* «ЎзМЭ».

СИЛ [а. سل — туберкулёз] 1 Турли аъзолар, асосан, ўпкада ўзига хос яллиғланиш билан кечадиган сурункали юқумли касаллик; туберкулёз. *Ўпка сили. Суяк сили. Сил шифохонаси.* ■ *Тамаки тутуни таркибидagi заҳарли моддалар турли хил ўпка хасталиклари — бронхит, сил, рак касалликларига олиб келиши мумкин.* Газетадан. *Сут ўпка яраси ва силга қарши ишлатиладиган халқ дори-дармонидир.* К. Маҳмудов, Ўзбек тансиқ таомлари.

Сил бўлмоқ 1) сил касалига йўлиқмоқ; 2) кўчма с. т. жуда сиқилмоқ, зерикиб, қон бўлиб кетмоқ. [*Фотима ўз-ўзига:*] *Ҳеч бир киши билан сўзлашмасдан, сил бўлишга яқин келдим.* Ҳамза, Туҳматчилар жазоси. **Сил касали** (ёки **касаллиги**) *айн. сил. Сил қилмоқ* 1) сил касалига йўлиқтирмақ; 2) кўчма с. т. юрагини сиқавериш, тоқатини тоқ қилиб юбормоқ. *Сил қилиб юбормоқ.* ■ *Пошшахонинг жаҳлига теккан яна бир нарса — Султонхоннинг бепарволиги! Шу бепарволик, шу ўйнаб-қулиб юришлар Пошшахонни сил қилади, сил!* Чўлпон, Кеча ва кундуз. *Юрагимда қабоҳат армон бўлди, Бунинг заҳматлари мени сил қилди.* «Баҳром ва Гуландом».

2 Шу касал билан оғриган бемор. *Силларни даволамоқ. Силларни изоляция қилмоқ.*

СИЛА I *рвш.* Идишининг чети, лаби, оғзи билан баравар қилиб. *Косани сила қилиб тўлдирмоқ. Ошга сила уч пиёла гуруч солмоқ.*

СИЛА II Олабуға балиқлар оиласига мансуб, денгиз, дарё ва қўлларда яшайдиган, овланадиган балиқ.

СИЛАБ-СИЙПАБ *рвш.* 1 Бирор нарса устидан, юзасидан қўлни аста юргизиб,

силаб. *Бир хаёли унинг ёнига боргиси, тиззаси устида турган қўлини силаб-сийпаб, кечирим сўрагиси келди.* «Ёшлик». *Ошпаз қадрдонининг қоқсуяк елкаларини силаб-сийпаб кўришар экан: — Ранжиганам учун кечир, бу гал мандан ўтди, ўртоқ, — деди овози қалтираброқ.* «Ёшлик».

2 Силлиқлаб, пардоз-андоз қилиб, у ёқбу ёгини тўғрилаб. *— Кийимларимни кийиб, ўзимни силаб-сийпаб бинойидай бўлиб, бозор томон жўнадим, — деди Шум бола.* Ф. Гулом, Шум бола.

3 кўчма Енгил, оҳиста тегиб, уфуриб. *Енгилгина шўх еллар, Қанот силжи учади. Силаб-сийпаб юзларимни, Буйларимдан қучади.* Т. Тўла.

4 Силаб ва сийпаб, эркалатиб, ардоқлаб. *Болани силаб-сийпаб эркалатмоқ.*

5 Алдаб-сулдаб, йўлини қилиб. *Материал йўқ. Ҳатто муҳтарам сайёҳ учун ҳам материал тополмай, жума куни келинг, деб силаб-сийпаб жўнатганимни кўрдингиз-ку!* Б. Раҳмонов, Юрак сирлари.

СИЛАМА: **силама сандиқ** Мол-дунё билан лиммо-лим тўлдирилган сандиқ; сандиқ тўла. *Силама сандиқ мол.*

СИЛАМОҚ 1 Устидан кафт юргизмоқ, сийпамоқ. *Дарға оппоқ соқолин силаб, Қараб қолди бўлиб паришон.* Э. Раҳим. *Инобат, худди бўғилиб кетаётгандай, рўмолини ечиб, томоғини силади.* О. Ёқубов, Эр бошига иш тушса.

2 Устидан қўлини астагина юргизиб, сийпаб эркалатмоқ. *Гуломжон отхонага кириб, тўкилган бедаларни охурга териб солди, қоронғида ҳам саманининг пешонасини силаб, суйиб қўйди.* М. Исмоилий, Фарғона т. о.

3 кўчма Майин, оҳиста тегмоқ (шамол, ел, шабада ҳақида). *Ариқлар бўйида майсалар шивирлашарди, шабада қирмизи юзларни силаб, қўшиқ куйларди.* Газетадан. *Майин эсаётган шамол.. дарахтлар соясида югуриб бораётган Саодатнинг юзини, сочларини силаб ўтади.* Н. Сафаров, Саодатнинг қиссаси.

Бошини (ёки **пешонасини**) **силамоқ қ. бош.** *Нодира онаси ўрнида Анварнинг бошини силади, ювиб-таради ва Анварнинг истиқболи учун қайғурди.* А. Қодирий, Мехробдан чаён. **Нон** (ёки **пахта**) **силамоқ этн.** Даволаш мақсадида танадаги оғриқ жой устидан нон ёки пахтани босиб-босиб қўймоқ, айлантирмақ, сийпамоқ.

СИЛЕН бот. Чўлда ўсадиган ва кумни яхши ушлайдиган кўп йиллик бошоқли ўт.

СИЛЖИМОҚ 1 Жойидан кўзгалмоқ, сурилмоқ. *Нарироқ силжимоқ.* ■ *Ҳозир Криловнинг машхур масали эсимга тушди: оққуш, чўртанбалиқ ва қисқичбақа аравани уч тарафга тортади-ю, арава ҳеч силжймайди. «Шарқ юлдузи». [Бўлим мудури] Шундай кулдики, юпқа гардишли кўзойнаги силжиб кетди. Ў. Ҳошимов, Нур борки, соя бор.*

2 кўчма Кетмоқ, жўнаб кетмоқ. [*Офтоб ойм:*] *Янглишяпсиз, ойи!* – [*Ўзбек ойм:*] *Янглишсам, янглишмасам, Кумуш бу уйдан силжймайди.* А. Қодирий, Ўтган кунлар.

3 Бир тарафга қараб ҳаракатланмоқ, илгариламоқ. *Поезд жанубга қараб силжир эди.* Газетадан. *Эримбет чўккалаганича, эшик томонга силжиди.* А. Мухтор, Қорақалпоқ қиссаси. *Туманлар силжийди мисли оқ уюр, Парчин булутлару ўтлоқлар бедор.* Х. Даврон, Болаликнинг овози.

4 Сизиб ўтмоқ, сизмоқ, сизғимоқ. *Шундан сув силжиб томчиламоқда.* ■ *Қалин ток барглари орасидан силжиган қуёш нурлари унинг юзида, сочларида товланиб ўйнайди.* Ойбек, Танланган асарлар.

5 кўчма Ривожланмоқ, илгари босмоқ. *Таржима назарияси сўнги даврда жиддий тарзда олдинга силжиди.* Ф. Саломов, Таржима назариясига кириш. *Шу тарзда ишлар жуда секин силжиди.* П. Қодиров, Уч илдиш.

СИЛЖИШ 1 Силжимоқ фл. ҳар. н. *Йўлчи учун Мирзакаримбойниқидан силжиш* – Гулнордан айрилиш демак эди. Ойбек, Танланган асарлар.

2 Яхши томонга ўзгариш, олға босиш. *Кейинги йилларда қишлоқ хўжалигини ривожлантиришда ҳам ижобий силжишлар рўй берди.* Газетадан. *Чиннисозларнинг ишида жадаллик, силжиш бор.* Газетадан.

3 махс. Модда ёки жисм қатламларининг (қисмларининг) бир-бирига нисбатан сурилиши, кўчиши. *Сейсмик силжиш. Муз қатламларининг силжиши.*

СИЛИКАТ(ЛАР) [лот. silex, silicis – чақмоқтош] 1 Таркибида силикат (кремний) кислота тузлари бўлган минераллар (дала шпата, слюда ва ш. к.). *Сунъий силикатлар.* ■ *Кўпчилик силикатлар кимёвий жиҳатдан барқарор; улар кислоталар таъсирига чидамли.* «ЎЗМЭ».

2 Шундай минераллардан тайёрланган материаллар (шиша, чинни, цемент, гишт ва ш. к.). *Силикат бетон. Силикат бўёқлар.* ■ *Силикат гишт силлиқ ва кўркам бўлгандан, устидан пардоз бериш талаб этилмайди.* «ЎЗМЭ».

СИЛИЦИЙ [лот. silicium < silex, silicis – чақмоқтош; кремний] айн. **кремний.**

СИЛКИЛАШМОҚ 1 Қийишмоқ, талашмоқ, талашиб-тортишмоқ (савдода, битишувда). – *Бир қанча силкилашишлардан кейин бой менга хизмат ҳақи учун ойига она сутидан ҳалол икки пуд ун, хом-пишиқ аралаш етти қадоқдан олма бердиган бўлди, – деди Шум бола.* Ф. Фулом, Шум бола.

2 Айтишиб қолмоқ, сен-менга бормоқ, ади-бади айтишмоқ. *Арзимаган нарсага силкилашиб қолишибди.*

3 Бел олишувда, курашда бир-бирини силтамоқ, силтаб тортмоқ, тортишмоқ. *Полвонлар бир-бири билан силкилашди.*

СИЛКИМОҚ Куч билан у ён-бу ёнга силтамоқ, кескин тебратмоқ. *Қизнинг назарида, она перронда ҳамон рўмон силжиб тургандек эди.* С. Аҳмад, Меҳрибон. *Майсаларни силжиб, шитирлаб бирдан Югуриб ўтди ел – безовта, сергак.* Х. Даврон, Болаликнинг овози. *Сидиқжон эгарга яхшироқ ўрнашиб, отнинг жиловини силкиди.* А. Қаҳҳор, Кўшчинор чироқлари.

Бош силкимоқ 1) бош(ни) қимирлатмоқ. *Турсунбой ота эгарга қийшиқ ўтириб, хиргойи қила боилади. От қўшиқ мақомига бош силжиб, аста-секин йўртиб кетмоқда.* С. Аҳмад, Ҳукм; 2) бошни қўйига ҳаракатлантириш билан тасдиқ ишорасини қилмоқ. *Секретарь ҳам унинг запини тасдиқлагандек, вазмин бош силжиб қўйди.* Ш. Фуломов, Қалб ундайди. **Этак силкимоқ айн. этак қоқмоқ қ. этак. Қанот силкимоқ айн. қанот қоқмоқ қ. қанот 1.** **Қўл силкимоқ 1)** қўлни ҳавода у ён-бу ёнга тебратмоқ. *Ҳамма кўчада. Ҳамма унга оқ йўл тилаб, қўл силкимоқда.* И. Раҳим, Чин муҳаббат; 2) айн. **қўл силтамоқ қ. силтамоқ.** *Али тажанг умидсизларча қўлини силкиб, туриб кетди.* Ойбек, Қуёш қораймас.

СИЛКИНИШ Силкинимоқ фл. ҳар. н. *Сухбат шунчалик қизиган эдики, ташқарида бўралаётган қор бўрони билан палаткаларнинг силкиниши унча сезилмас эди.* Файратий, Узоқдаги ёр.

Ер силкиниши айн. зилзила 1. *Ер силкиниши ҳозир ҳам жуда катта талафотларга сабаб бўлмоқда.* Газетадан.

СИЛКИНМОҚ 1 Силкимоқ фл. ўзл. н. *Ой тепага келган. Тол барглари шабадада силкиниб йлтирайди.* С. Аҳмад, Ҳукм. *Арава ғижирлаб борар, гап мавзудан мавзуга кўчар, Турғуной ганга аралашолмай, бедалар ичида бир боғ бедадай силкиниб борар эди.* А. Қаҳҳор, Мастон. *Машина бир силкиниб юриб кетди.* Э. Раймов. Ажаб қишлоқ.

2 Ўз гавдасини кескин кўтариб туширмоқ, қаттиқ тебранмоқ. *Туя силкинса, бир эшакка юк тушар.* Мақол. ■ - *Кўшиқ айтсанг-чи, Турғуной, — деди Мастон бир силкиниб, устидаги юкларини яхшироқ ўрнаштириб.* А. Қаҳҳор, Мастон. *Толипов жонҳолатда силкиниб, қичқириб юборди.* «Шарқ юлдузи».

СИЛКИТМОҚ 1 Силкимоқ фл. орт. н. *Аҳмаднинг тили калимага келмай қолди, «йўқ» деган маънода бош силкитди.* Ф. Мусажонов, Ҳиммат. *Дутор қуруққина йиғламас эди, балки бутун коинотни «зир» эттириб ва хаста юракларни «дир» силкитиб йиғлар эди.* А. Қодирий, Ўтган кунлар.

2 Ларзага солмоқ. *Момақалди роқдай кўкни силкитиб гумбураётган тўп отишмасини эшитди.* Ойбек, Куёш қораймас.

СИЛКИШМОҚ 1 Силкимоқ фл. бирг. н. *Станция биқинидаги қувурлар устида қизлар қўшиқ айтиб ўтиришарди. Улар Моҳидил билан кўл силкишиб кўришишди.* Ж. Абдуллахонов, Тўфон.

2 айн. силкитмоқ. - *Зарари йўқ, — деди Каримий, бир бош силкиш билан пешонасидаги сочларини орқасига ташлаб.* Н. Аминов, Қаҳқаҳа.

СИЛЛА: **силласи қуримоқ 1)** куч-қуввати кетмоқ, ниҳоятда чарчамоқ, тинка-мадори қолмаслик. [Аматжоннинг] *Силласи қуридим, қорни очдим, кичкина кетмонни елкасига ташлаб, қапа томон юрди.* С. Сиёев, Аваз. *Бу ерлардан эртага ҳам дон олиш керакми? Ким экади, ким ўради, ким янчади? Силласи қуриган аёлларми, эти устухоница ёпишган болаларми?* Т. Малик, Ажаб дунё; **2)** кўчма ёмон, ночор аҳволга тушмоқ. *Мутрибинг ҳазилнома байтида Аваз йўқчилиқ, фақирликдан силласи қуриган, аммо кўнгли қаноатга тўла некбин шоир қалбини кўргандек бўлди.* С. Сиёев, Аваз.

СИЛЛАБИК [юн. syllabikos < syllabe — бўғин]: **силлабик ёзув** График белгилари бўғин ҳосил қилувчи фонема ёки фонема кўшилмаларини ифодалайдиган ёзув. *Энг кейин шакланган силлабик ёзувлардан япон ва корейс ёзувларини кўрсатиш мумкин.* «ЎЗМЭ». **Силлабик шеър тизими** Ҳар сатрда бўғинлар сони бир хил, тенг бўлишига асосланган шеър тизими. *Демак, силлабик шеър тизими ўзбек шеърятига хос бўлган асосий шеър тизимдир.* «ЎЗМЭ».

СИЛЛИҚ 1 Текис, теп-текис, ғадир-бурдурсиз. *Тош шу қадар силлиқки, гўё ҳайкалтарош хўп ҳафсала билан йўнган-у, кўтаролмай ташлаб кетган дейсиз!* Ҳ. Назир, Сўнмас чақмоқлар. *Шерали Оғажонга кўл узатиб кўришаркан, унинг хотинларникидек силлиқ юзига.. қараб, эшитилар-эшитилмас «ғоят мамнунман», деб қўйди одоб юзасидан.* С. Кароматов, Олтин қум.

2 Сирпанчиқ, сирганчиқ, ойнадек. *Силлиқ муз.* ■ [Бектемир] *Нам, силлиқ қияликдан сирпаниб, яна сувга «шалоп» этиб тушиди.* Ойбек, Куёш қораймас.

3 Бежирим, текис, жилоли. [Жўрахоннинг] *Дурраси силлиқ сочларидан сидиришиб, пастга тушиди.* М. Исмоилий, Фаргона т. о.

4 кўчма с. т. Қад-қомати келишган, бежирим, чиройли. *Сирти силлиқ жувон.* ■ *Дуруст, силлиққина йиғит экан, деб ўйлади у юраги тирналиб.* Ў. Ҳошимов, Қалбингга кулоқ сол. *Олимхон замонасига мувофиқ, олифтанома, ёшига нисбатан чиройли, силлиқ киши эди.* Ойбек, Танланган асарлар.

5 кўчма Камчиликсиз, раvon (тил, услуб, нутқ ва ш. к. ҳақида). *Силлиқ услуб. Силлиқ гапирмоқ. Силлиқ нутқ.* ■ *Почтаевнинг тўғри, силлиқ гаплари узоқдан дон-дона янграб эшитиларди.* А. Мухтор, Туғилиш.

6 Кишига ёқадиган, қаттиқ тегмайдиган, юмшоқ. *Силлиқ муомала.* ■ [Собир ака:] *Силлиққина қилиб жавоб бердим. Сен нима дейсан, аяси? О. Ёқубов, Пьесалар.*

7 Муаммосиз; кўнгилағидек, тўсиқсиз; бекам-кўст; бежанжал. *Аммо олдиндан тузилган режалар ҳамиша ҳам силлиққина амалга ошавермайди.* С. Кароматов, Олтин қум. *Бу учинчи хотинимдан ҳам хамирдан қил суғургандек — силлиққина қутулмоқчи эдим, бирок отим ишининг пачавасини чиқариб қўйди.* «Муштум».

Силлиқ кўчмоқ Бетўсиқ, қаршиликсиз, бежанжал бажарилмоқ, ечимини топмоқ (бирор хатти-ҳаракат ҳақида). *Ишининг силлиқ кўчаётганидан боши кўкка етган Вафо автор: «Хўш, хўш, бажонидил, бажонидил», дея у билан узоқ хайрлашди.* Н. Аминов, Қаҳқаҳа.

8 Товушсиз; сездирмасдан. *Алимардон мушукдай силлиққина кириб келганини ва синф журналини алмаштираётганини ҳеч ким сезмай қолди.* Газетадан.

9 махс. Бир текисда, бир маромда, равон, шовқинсиз. *Тўғри, ишни қойил қиласан, машиналар доим силлиқ айланади.* Ф. Мусажонов, Камтарин ишчи.

Сувдан силлиқ чиқмоқ Бирор жанжалли ёки жиноий ишдан беайб тарзда, жавобгарликсиз қутулмоқ. *У ташвишдан, тўғрироғи, жавобгарликдан ўзини холи қилиш мақсадида танқид қилинган ва қилинмаган чойхоналарнинг деярли ҳаммасини беркитишни.. лозим топди.* Мўминов гўё бу билан сувдан силлиқ чиқмоқчи бўлди. Газетадан.

СИЛЛИҚЛАМОҚ 1 Турли материаллар (металл, тош, ёғоч ва б.) га ишлов бериш билан уларни силлиқ қилмоқ, сайқал бермоқ. *Тошни силлиқламоқ. Яхмалакка сув сеппиб силлиқламоқ.* ■ *У толдан қилинган янги кетмон сопини ойна билан қиртишлаб силлиқлар, хаёлида эса Эралини ачитиб олаётган эди.* А. Муҳиддин, Фанишер.

2 кўчма с. т. Қайта ишлаб, камчиликлардан холи, бекам-кўст, равон қилмоқ. *Услубни силлиқламоқ. Тилни силлиқламоқ.* ■ *Гулнор ўз дўсти, сирдоши Зайнаб билан маслаҳатлашиб, Йўлчиға хат ёзишга қарор қилган ва сўзларини айтиб турган; отин қиз эса, Гулнор сўзларини силлиқлаб, қоғозга кўчирган.* Ойбек, Танланган асарлар.

3 кўчма Қўпол, дағал гапни тўғриламоқ, юмшатмоқ. *-Дадангиз шунчалик деган бўлсалар, худо хайр берсин, — деди Сидиқжон, қўпол равишда айтган гапини силлиқлаш учун..* А. Қаҳқор, Қўшчинон чироқлари.

СИЛЛИҚЛИК Текис эканлик, бежиримлик; равонлик. *Юзнинг силлиқлиги.* ■ *У [Нусратбек] онасининг.. қаттиқ қўлларини уқалаётганида, ўзининг қўллари оппоқ, семиз, силлиқлигини сезиб уялган эди.* С. Нуров, Нарвон.

2 Ушумуомалик, юмшоқлик; осонлик. *Шу орада ғаламис оралаб, илоннинг ҳақини*

еган, деган гап чиқиб қолди. Силлиқлик билан, ўз аризамга биноан қуён бўлиб қолдим. С. Аҳмад, Сайланма.

СИЛЛИҚЛОВЧИ 1 Силлиқламоқ фл. сфдш.

2 Буюмларга сайқал берувчи, сайқалловчи ишчи, уста.

СИЛЛОГИЗМ [юн. syllogismos — ҳисоблаш, ҳисобга олиш, хулоса чиқариш] Ўзаро мантиқий боғланган икки қатъий мулоҳазадан учинчи — янги қатъий мулоҳаза ҳосил қилиш; дедуктив хулоса чиқариш тури. *Силлогизмнинг таркиби хулоса асослари ва хулосадан ташкил топган.* «ЎЗМЭ».

СИЛЛОГИСТИКА [юн. syllogistikos — хулоса чиқарувчи] Анъанавий формал мантиқнинг дедуктив хулоса чиқариш қоидаларини ўрганувчи бўлими. *Замонавий математик мантиқда силлогистика алоҳида бўлим сифатида ажратилмайди.* «ЎЗМЭ».

СИЛОВСИН 1 зоол. Мушуксимонлар оиласига мансуб, оёқлари узун, тумшуғи чўзиқ, кўзи жуда ўткир йиртқич ҳайвон. *Тоғда силовсинни ҳам, қоплонни ҳам кўрдик.* Ш. Холмирзаев, Оғир тош кўчса. *Ҳозир ҳам оёғидаги силовсин терисидан тикилган энгил ва чидамли чориққа, сарғиш комбинезон шим ва костюми устидан кийиб олган нимча пўстинига, елкасига осиб олган сафар халтасига қараган киши уни альпинистдан ажратиши қийин.* А. Кўчимов, Ҳалқа.

2 Шу ҳайвоннинг териси, мўйнаси. *Бек бўлиб.. силовсин тўн, зарли камар бойладинг.* «Хушкелди».

СИЛОН Бўри ва итдан туғилган дурагай (гибрид).

СИЛОС [исп. silos — дон сақланадиган ўра] қ. х. Чорва моллари учун ўт, маккажўхори, картошка, кунгбоқар ва ш.к. ларнинг кўк пояларидан махус йўл билан тайёрланадиган тўйимли ем, озуқа. *Силос бостирмоқ.* ■ *Ҳосил мўл, тобида силос қилмасанг, шираси камайиб.. кетади.* Ф. Нуруллаев, Бўз йигит. *Силос, асосан, маккажўхори, оқ жўхори поясидан ёки пояси ва донидан тайёрланади.* «ЎЗМЭ».

СИЛОСХОНА [силос + хона] Силос бостириладиган иншоот, чуқур, ўра ва ш. к. Силосхоналарга маккажўхори кўкпояси узоқ вақт тўжилса, силоснинг сифати бузилади. Газетадан.

СИЛОҲ [а. سلاح — қурол, қурол-аслаҳа; кўшин тури] *эск. кт.* Қурол-яроғ, аслаҳа. *Душманамиз ҳануз силоҳини тарк этмади.* Ойбек, Навоий.

СИЛСИЛА [а. سلسله — занжир; қатор, саф; тизим] *кт.* 1 Маълум тартибда кетмакет тизилган нарсалар. *Тоғлар силсиласи.* ■ *Деразалардан қорга кўмилган дарахтлар, томлар, дала ва узоқда тоғ силсиласи кўринади.* Уйғун, Хуррият. *Бу — Кўҳусиёҳ. Унинг остида яланғоч кўнғир қоялар силсиласи.* Мирмуҳсин, Меъмор.

2 кўчма Бирин-кетин содир бўлувчи ҳодисалар тизмаси, занжири. *Ҳаёт силсиласида Олтин ҳалқа дегудек, Одамлар, ёш онани Қутлаб кўйингиз бу чоқ.* А. Исроилов, Биз — дунё одамлари. *Унинг барча романлари, энг аввало, тарихий-социологик йўсиндаги тадқиқотлар силсиласидир.* «ЎТА».

3 Сулола; шажара. *Бағрига қон шимган бу қадим тупроқ Кўп кўрган авлодлар силсиласини.* А. Исроилов, Биз — дунё одамлари.

СИЛТАМОҚ 1 Куч билан кескин тортмоқ ёки итармоқ. *Отнинг жиловини силтамоқ.* Варракни силтаб тортмоқ. ■ *Анвар алақачон ерга сакраб тушган, эшикни силтаб юборган эди.* Ў. Ҳошимов, Қалбингга қулоқ сол. [Йигит] «Шуни тўлдириб ун кўтариб келаман», дегандай катта қопини силтаб, елкасига ташлади. А. Мухтор, Қорақалпоқ қиссаси. Қиз ҳам уйнаб турган сочини силтаб, орқасига ташлади-ю, унинг кўзларига тик қаради. Ў. Ҳошимов, Қалбингга қулоқ сол.

2 кўчма Сўзини кесмоқ; жеркимоқ. *Эрталаб [Сотти] кампирнинг қулоғига шивирлаётган эди, кампир уни силтаб ташлади: -Болам, бу одатингни ташла.* С. Аҳмад, Сайланма. *Арзимас нарасага унинг [Шакарнинг] чарлиги тутиб, болани силтайдиган, қаргайдиган қилиқ чиқарди.* Ҳ. Назир, Кўктерак шабадаси.

Орқага силтамоқ қ. орқа. Этак силтамоқ айн. этак қоқмоқ қ. этак. Қўл силтамоқ 1) қўлни кескин силкитиб, норозилик, жаҳл, умидсизлик каби маъноларни ифодаламоқ. *-Бас, кўп вақиллама! — деди махдум қўл силтаб.* М. Исмоилий, Фарғона т. о. *Низомиддинов жаҳл билан қўл силтади.* С. Аҳмад, Ҳукм; 2) бепарво бўлмоқ; воз кечмоқ. *Шундан кейин ҳақли савол туғилади: бугун улкан зафарлар олдида боғлардан кечдик, булбулу*

қушларга қўл силтадик. Эртага-чи?! Газетадан; 3) эътиборсизлик, масъулиятсизлик билан қарамоқ. Болалар тарбиясига қўл силтаган шахс келажак олдида жавобгардир. Газетадан.

СИЛТАНМОҚ 1 Силтамоқ фл. мажҳ. н.

2 Силтамоқ 1 фл. ўзл. н. *Холида қўлимдан беҳолгина силтаниб чиқди-ю, япроқлари оқшом шабадасида оҳиста силканиб турган ўрик тагидан бурилиб, муюлишида кўздан ғойиб бўлди.* Ў. Ҳошимов, Хаёлларга бўламан тутқун. *Шу пайт машина силтаниб, жойидан жилди.* М. Мансуров, Ёмби.

Кейинга (ёки орқага, ортга) силтанмоқ 1) ривожланмаслик; судралмоқ; орқада қолмақ. *Ишимиз олға силжиш ўрнига орқага силтанаётгандай бўларди.* Ҳ. Назир, Кўктерак шабадаси; 2) орқага сурилмоқ, кечиктирилмоқ. *Тўйнинг кейинга силтаниши.. эса тақдир иши..* А. Қодирий, Меҳробдан чаён.

СИЛТОВ 1 Силтамоқ фл. ҳар. н. Қўл силтови.

2 Кескин тортиш, кўтариш ёки итариш; кескин қўл ҳаракати. *Илкис бир силтовдан арқон чирт узилди.* «Шарқ юлдузи». *Уларни ажратмоқчи бўлганлар яна силтов еб, четга чиқишар эди.* Қ. Кенжа, Нотаниш гул.

3 кўчма Туртки, баҳона, сабаб. *Тўй силтови билан тўн битар.* Мақол. ■ *-Бугун театрда яхши нараса бор.* Кўриш керак, — *Карим уларни тўхтатмоқчи, шу силтов билан Ойтўтини олиб қолмоқчи бўлди.* Ойдин, Ҳикоялар.

4 Каттиқ гап, туртки, жеркиш. [Нодирнинг] *Келинойисига нисбатан илтифотсизлиги билиниб турса ҳам, айтганини бажарар, ҳатто дағдага, силтовларига бутунлай ўрганиб қолгандай эди.* Ж. Абдуллахонов, Тўфон.

СИЛУЭТ [фр. silhouette — ёндан кўриниши сояга ўхшатиб карикатураси чизилган француз давлат арбоби Эде Силуэт (18-аср) номидан] 1 Шакл ва нарсаларнинг текис юзада яратилган бир тусдаги тасвири.

2 Нарсалар ва қиёфанинг унинг соясига ўхшатиб чизилган шакли. *Силуэт билан Германияда Ф.О. Рунге, А. Менцель, П. Коневка; Россияда Ф.П. Толстой, Е.М. Бем ва бошқалар шуғулланган.* «ЎзМЭ».

3 кўчма Шарпа, қора, кўзга чалинган нараса. *Тоғ силуэти.* ■ *Чироқ шуғласида икки хотиннинг юзи, бурунлари бир-бирига те-*

гар даражада яқин. Четдан қора силуэтдай кўринар эди. А. Мухтор, Опа-сингиллар. Кўчадан кузатган киши кўзига аҳён-аҳёнда уйнинг у ёқ-бу ёғига юраётган киши силуэти чалинади. Газетадан.

СИЛҚИМОҚ *с. т.* Сирқимоқ, сизмоқ; томчиламоқ. *Умри опа силқиб келаётган кўз ёшларини рўмолининг учи билан артиб, Боқи-жоннинг пешонасини силади.* Газетадан. *Шоҳ-шабба орасидан сув силқиб томчиларди.* Ойбек, Кўёш қораймас.

2 кўчма Аста тўпланиб чиқмоқ; пайдо бўлмоқ. Булар, албатта, шоиранинг юрагидан силқиган азиз ва қадрдон ҳис-туйғуларнинг бир зумгина оройиши, ўйчанлик ва сокинликдир. «ЎТА».

СИЛҚОВЛАНМОҚ Ҳолсизланмоқ, мадорсизланмоқ, ҳаракати сусаймоқ. *Нукра бу гапни ҳеч кимга айта олмади. Унинг силқовланиб юргани сабабини билолмай эри ҳам фиғон бўларди.* Мирмуҳсин, Ҳикоялар, қиссалар.

СИМ I [ф. *سیم* – металл чивик, ип; кумуш] **1** Ип, чилвир, чивик кўринишдаги узун металл буюм. *Пўлат сим. Мис сим. Йўғон сим. Ингичка сим. Сим тўр. Сим ғов.* ■ [Ҳожар:] *Нима? Оғзингизни ёпинг! Молхонага сим билан тортиб қўяман, остонадан ўлиги чиқади.* Ҳамза, Паранжи сирларни. *Йўл чеккасидаги янтоқлар худди занг босган симдай қовжираб ётар..* эди. Н. Фозилов, Дийдор.

Тиканли сим Ғов, тўсиқ учун ишлатилган махсус сим. *Ҳар қадамда.. тиканли қарши қазилган чуқур, бир неча қатор тортилган тиканли сим..* А. Қаҳҳор, Асарлар.

2 Электр ёки телефон линиясига тортиладиган ўтказгич. *Электр сими. Телефон сими. Сим тортмоқ.* ■ *Вазонлар ўнтача келади. Уларнинг тепасидан бир-бирига электр сими тортилган.* Ҳ. Назир, Ёнар дарё.

Сим қоқмоқ *с. т.* Телефон орқали гаплашмоқ, телефон (қўнғироқ) қилмоқ. [Назокат] *Кечга яқин сим қоқди. Ҳимматилла у билан жуда яхши гаплашди.* Шухрат, Умр поғоналари.

3 Мусиқа асбобларининг металл ипи; металл тор. *Танбур сими.* ■ *Агар алдамаса шу совуқ симлар, Гар шул эшитганим бўлмаса рўё, Сен она эмассан, дорсан, табиат, Сен бешик эмассан, жаллодсан, дунё!* А. Орипов.

4 Симдан ясалган, тўқилган. *Виктор шундай деди-ю, эски сим каравот тагидан сандиқдек зил-замбил чамадонини тортиб олди.* С. Кароматов, Олтин кум. *Этакдаги сим тўр ортида товуқлар қақағлайди.* Ў. Ҳошимов, Қалбингга кулоқ сол.

Сим жўяк шв. Сим хаткаш ёрдамида тортилган жўяк, ариқ.

СИМ II *кт. айн. сийм.* Хазинанинг симу зарга эҳтиёжи не даражада! Ойбек, Навоий.

СИБМАР *поэт. айн. сиймбар.* Осмонга қарасам – юлдуз уйнайди, Ерга боқсам – ёр кетишга қўймайди. Юзига қарасам холи ярашиб, Симу симбарига кўзим тўймайди. «Кўшиқлар». *Сарвқомат нозик ситора, Оп-поқ томоқ, қора қош симбар, Бир-бирига интиқ икки дил, Бир-бирдан олис икки жон.* М. Али, Боқий дунё.

СИБМАТ *фольк. айн. сумбат.* Менга ҳам берибди сину симбатни, Мен не қилай давлати йўқ келбатни?! «Равшан».

СИБМИОЗ [юн. *symbiosis* – биргаликда яшаш] Икки ва ундан ортиқ турларнинг бир-бирига фойда келтириб бирга яшаши. *Худди шунга ўхшаш симбиоз кавш қайтарувчи сутэмизувчилар билан улар орасида яшайдиган инфузориялар орасида ҳам мавжуд.* «ЎЗМЭ».

СИМВОЛ [юн. *symbolon* – белги, рамз; аломат; тимсол] **1** *айн. рамз 1.* *Оқ каптар – тинчлик символидир.*

2 Кимёвий элементга берилган латинча номнинг қисқартирилган шакли. *Мас., Na – натрий элементининг, N – азот элементининг символи.*

3 Бирон-бир ғояни ўзида мужассамлаштирувчи бадиий образ.

4 У ёки бу фанда қабул қилинган бирон-бир катталиқнинг, бирликнинг шартли белгиси. *Кимёвий символлар.*

СИМВОЛИЗМ [юн. *symbolon* – белги, рамз; тимсол] **1** Символлар, рамзлар мажмуи.

2 19-аср охири – 20-аср бошларида дастлаб Францияда, кейин Европанинг бошқа мамлакатларида пайдо бўлган адабий оқим [Символизмда белги, рамз (символ) поэтик образлиқнинг чўққиси, ғоянинг энг мукамал ифодаси сифатида намоён бўлади]. *Символизмнинг юзага келиши Париж Коммунаси тугатилгандан кейин француз воқе-*

лигида вужудга келган ижтимоий-тарихий шароит билан боғлиқ. «ЎЗМЭ».

СИМВОЛИК *эск. айн. рамзий. Символик тасвир. Символик образ.*

СИМВОЛИСТ Символизм тарафдори, символизмга амал қилувчи киши.

СИМВОЛИСТИК 1 Символизмга ва символистга оид, символизм руҳидаги. *Символисттик асар.*

2 Символик, рамзий. *Символисттик образ.*

СИМДЎЗИ [ф. *سیمدوزی* – кумуш ипда тикилган] Зардўзликда бадий буюмлар кашта гуллари оқ ёки зарҳалланган кумуш ипда қоплаб тикиш усули.

СИМЁН 1 Ориқ, рангпар, пачақ одам. *Туф де, кўзинг тегади, касофат! Шу сўзингни менга айтсанг, тишингни суғуриб олардим. Кошкийди менда тиш бўлса-ю, сенда гавда, симён.* Ойбек, Танланган асарлар.

2 кўчма сўк. Ярамас.

СИМЁҒОЧ Электр симларини ўтказиш учун ерга тик ҳолатда ўрнатилган баланд, йўғон хода. *Алишер дарвозамиз олдидаги симёғочга суянганча, йиқилган машинани томоша қилиб турган экан.* Ў. Усмонов, Сирли соҳил. *Симёғоч учига ўрнатилган лампочка ёруғида ҳовуз суви ялтираб кўринади.* М. Ҳазратқулов, Журъат.

СИМИЛАМОҚ 1 Сирқирамоқ, зирқирамоқ. *Оёқларим симилаб оғрияпти.*

2 шв. айн. имиламоқ.

СИМИРЕНКО [украин олими Л. П. Смирненко номидан] Пўсти яшил, эти кўкимтир-оқ, серсув, хушбўй кечпишар олма нави. *Ўзбекистонда симиренко нави 20-асрнинг 70-йилларида боғларда ўстирилиши жиҳатидан 1-ўринни эгаллаган.* «ЎЗМЭ».

СИМИРМОҚ 1 Ичга тортиб ичмоқ. *Қимизни симирмоқ.* ■ *Валиев илиб қолган чойни симирди.* Э. Усмонов, Ёлқин. *Отанинг қўлига бериб қўбизни, Кетидан тутдилар тўла қимизни. Симирди-да, ота қўбизни тортиди, Эшитганлар чуқур завқларга ботди.* М. Алавия.

2 Чуқур нафас билан ичга ютмоқ. *Тоза ҳаводан симирмоқ баҳонасида Расулжон тезроқ ҳовлига чиқа қолди.* Ж. Абдуллахонов, Хонадон. *Ота райҳон ҳидини симирди.* А. Эшоннов, Ота.

3 кўчма Мириқиб вужудига сингдирмоқ; тўймоқ; руҳан ҳис қилмоқ. [Султонмурод] *Ишқ дардини тотли май каби симирмоқдан*

гўё лаззатланади. Ойбек, Навоий. *Шеър зулолидан симирдим бир пиёла тўлдириб, Воҳ, кўринди менга ҳар бир қатраси уммон қадар.* Э. Воҳидов.

Сув келса симириб, тош келса кемириб Ҳар қандай қийинчиликларни енгиб, уларга бардош бериб. *Ўлиб-тирилиб, тиришиб-тирмашиб, сув келса симириб, тош келса кемириб, эндигина одам қаторига кирдим.* Х. Султонов, Отамнинг юрти.

СИМКОР [ф. *سیمکار* – хунармандларнинг ўз шоғирдларига тўлайдиган иш ҳақи] *тар. 1* Хўжайинлар томонидан шоғирдларга ёки ёлланиб ишловчи хунармандларга ишбай асосида тўланган иш ҳақи. *-Йўқ, йўқ – деб кулди уста Олим, – мен сизга ўхшаб дўконнинг устида сира тухум босган эмасман, симкорни кўзим қиймайдир, десангиз мен ишонар эдим.* А. Қодирий, Ўтган кунлар.

2 Ишбай асосида иш ҳақи олиб ишловчи шоғирд ёки хунарманд. *Эсимда, ёшлик чоғимда шаҳардаги симкорлар иш ташлаганлар, боёнларнинг кўпи ён берган.* У. Исмоилов, Сайланма.

СИММЕТРИК Симметрия қонунлари асосида жойлашган ёки ясалган; симметрияга эга бўлган. *Симметрик бино. Симметрик шакл.* ■ *Тенглик типидagi (мас., айният, эквивалентлик, ўхшашлик) муносабатлар ҳам симметрик бўлади.* «ЎЗМЭ».

СИММЕТРИКЛИК 1 Бирор нарса, предмет қисмларининг симметрия ҳолатида бўлиши. *Иниоот қисмларининг симметриклиги.*

2 мат. Икки ўринли, икки ҳадли муносабатларнинг хоссаси.

СИММЕТРИЯ [юн. *symmetria* – ўлчовдошлик; мутаносиблик, мослик] Бирор нарсанинг маълум нуқта, тўғри чизик ёки текисликка нисбатан қарама-қарши томонларда бўладиган қисмларининг жойлашишидаги мутаносиблик, ўхшашлик, мослик, уйғунлик. *Симметрия маркази. Симметрия ўқи. Симметрия ҳолатини сақламоқ.*

СИМОБ [ф. *سیماب* – кумуш суви] Менделеев даврий системасининг II гуруҳига мансуб кимёвий элемент; оддий температура шароитида суюқ ҳолда бўладиган кумушранг оғир металл. *Симоб кумуш рангли, суюқ ва тез буғланувчи металл бўлиб, ўзининг суюқлиги ва текис юзада.. ҳаракат-*

ланиши билан бошқа металллардан фарқ қилади. «Фан ва турмуш». Ёниб бўлаёзган шам шугласида шайхнинг мижджаларида ёш томчилари симоб зарраларидай милтираб турарди. О. Ёкубов, Кўҳна дунё.

СИМОБИ(Й) [ф. سيمابى — симобдай, симобга ўхшаш] Симоб рангидаги, кумушранг; кумушсимон оқ ялтироқ. *Симоби салла.* ■ *Робия товонига тушадиган узун симоби чакмонини бошига ёпинди-ю, Тоҳирнинг отига мингашиб чиқиб кетди.* П. Қодиров, Юлдузли тунлар. *Бошига симобий салла, энига банорас тўн кийган бир отлиқ дарвоза олдида эгардан тушиди-да, жиловни ўз хизматкорига тутқазди.* М. Осим, Ўтрор.

СИМОБЛИ 1 Таркибида, ичида симоб бўлган. *Симобли руда.*

2 Симоб воситасида ишлайдиган. *Симобли манометр.*

СИМПАТИК [юн. sympathes — раҳмдил, ҳамдард; хайрихоҳ]: **симпатик нерв системаси** тиб. биол. Одам ва умуртқали ҳайвонлар вегетатив нерв системасининг ички аъзолар фаолиятини яхшилаш, тартибга солишда иштирок этувчи, организмнинг ташқи муҳит билан таъсирлашуви учун зарур бўлган энергия ажралувини фаоллаштирувчи қисми. **Симпатик сиёҳ** Махфий ёзишмаларда қўлланадиган, фақат қизитилганда ёки махсус кимёвий эритма билан ҳўлланганда кўринадиган туссиз (рангсиз) сиёҳ.

СИМПАТИЯ [юн. sympathia — раҳмдиллик, ҳамдардлик; хайрихоҳлик] Бирор шахс ёки нарсаси-ҳодисага нисбатан бўлган ижобий муносабат. *Фирдавсий Рустам образини зўр муҳаббат билан тасвирлаб, бутун симпатиясини унинг томонига тўкиб солади.* Газетадан. *Антитеза усулидаги тасвирда ёзувчи ёки шоир бирор шахс ёки воқеага нисбатан китобхонда симпатия ёки антипатия уйғотади.* «ЎТА».

СИМПОЗИУМ [лот. symposium < юн. symposion — мусиқа, шеър ўқиш билан ўтадиган йиғин, зиёфат] Бирор илмий масала бўйича ўтказиладиган халқаро илмий кенгаш; илмий анжуман. *Геолог олимлар халқаро симпозиуми.* ■ *Римда ўтказилган халқаро симпозиумда маълум қилинишича, сўнги 25 йил давомида грипп эпидемиясини юзага келтирадиган вируслар миқдори 231 тага етди.* Газетадан. *Кузда, Темирийлар даври санъатига бағишлаб ўтказилган ЮНЕСКО симпозиуми*

арафасида, телевидениеда студентларнинг топқирлик мусобақаси ташкил қилинган эди. Ў. Ҳошимов, Қалбингга қулоқ сол.

СИМПТОМ [юн. symptoma — воқеа, саргузашт; ўхшашлик; белги, аломат] тиб. Бирор касаллик ёки патологик ҳолатнинг белгиси. *Ҳар қандай касаллик симптомлар йиғиндиси (синдром) га қараб белгиланади.* «ЎЗМЭ».

СИМРАЙМОҚ с.т. Норози, энсаси қотган ҳолда қараб турмоқ. *Нуъмон унинг орқасидан бир зум симрайиб қараб турди.* «Шарқ юлдузи».

СИМ-СИЁ(Х) Қоп-қора, тим қора; қоп-қоронғи, тим қоронғи, зим-зиё. *Олдинда Ҳаким, орқада тўрт оғайни йўлга тушишди.* *Сим-сиё тун.* *Атроф жим-жит.* М. Ҳазратқулов, Журъат. *Не зотлар ўтдилар ҳасратга тўлиб, Кунлари зимистон, тунни сим-сиё.* А. Орипов, Йиллар армони.

СИМСИЗ Сими йўқ, симдан фойдаланмай ишлайдиган. *Симсиз алоқа.* ■ *Бондарни симсиз телефон дейишлари бежиз эмас.* Шухрат, Шинелли йиллар.

СИМ-СИМ 1 рш. Симиллаб; давомли равишда. *Кунлар ўтди. Оёқ оғриги анча босилди. Аммо энди унинг [Йигиталининг] авзойи бадани мисдай қизиб, сим-сим зирқирайдиган, ўзи эса аҳён-аҳён лоҳас бўладиган бўлиб қолади.* С. Кароматов, Тоғ гўзали. *— Қандай оғрийдим? Сим-сим оғрийдими ёки пичоқ санчгандай? — деб сўради ҳамшира.* Н. Аминов, Қалтис хато.

2 кўчма Бир маромда, майдалаб. *Ёмғир ёғди сим-сим.* «Ёшлик». *Ёмғир сим-сим ёғар, саман тоғнинг ёлғизоёқ йўлидан шилт-шилт босиб борар эди.* М. Ҳазратқулов, Журъат.

СИМТАРАШ шв. Қашлағич.

СИМТЎР Симдан қилинган тўсиқ. *Атрофи симтўр билан ўралган майдончада болалар футбол ўйнашмоқда.* С. Нуров, Майсаларни аёз урмайди. *Палата жимжит эди, пашша учса ҳам эшитилади, лекин учадиган пашшанинг ўзи йўқ — деразаларнинг сиртидан майда тешикли симтўр тутилган.* М. М. Дўст, Лолазор. *Этакдаги симтўр ортида товуклар қақағлайди.* Ў. Ҳошимов, Қалбингга қулоқ сол.

СИМФОНИК [юн. symphonos — оҳангдош] Симфония мусиқа шакли билан боғлиқ, шунга алоқадор. *Симфоник мусиқа.* *Симфоник этюдлар.* ■ *Ошхона ёнидаги сим-*

ёғочда ўрнатилган радиодан симфоник куйлардан берилаётган концерт янгарди. Н. Аминов, Қаҳқаҳа.

Симфоник оркестр Торли, пуфлама ва урма (зарбали) чолғу асбоблари ижрочиларини бирлаштирувчи оркестр.

СИМФОНИЯ [юн. symphonia — оҳангдошлик < sym — бирга + phone — товуш] **1** Инструментал (чолғу асбобларида ижро этиладиган) мусиқанинг симфоник оркестр учун ёзилган, одатда 4 қисмдан иборат бўладиган олий шакли. *М. Ашрафийнинг биринчи симфонияси.* ■ *Бундан ташқари, торли оркестр, пуфлама созлар оркестри ва бошқа оркестрларга мўлжалланган симфониялар ҳам учрайди.* «ЎЗМЭ».

2 кўча Турли-туман товуш, ранг, оҳанг ва ш. к. нинг уйғун, ҳамоҳанг ҳолда кўшилиши, бирикиши. *Меҳнат симфонияси.* ■ *Олмадаги майна эса, калта-калта «чах-чахи» билан чумчуқларнинг бетартиб симфониясига жўр бўларди.* Х. Гулом, Тошкентликлар.

СИНАГОГА [юн. synagoga — ййғилиш; тўпланиш жойи] Яҳудийлик ибодатхонаси ва яҳудийлар жамоаси. *Ўзбекистонда ҳозир 7 та — Тошкентда 3 та, Самарқанд ва Бухорода 2 тадан синагога фаолият кўрсатади.* «ЎЗМЭ».

СИНАЛГАН 1 **Синамоқ** фл. сфдш. *Синалган ёв — урушга яхши.* Мақол.

2 Синашта, синовлардан, текширувлардан ўтган, ишончли. *Синалган одам. Синалган қурол.* ■ *Орадан икки ой ўтди. Улар энг яхши ва синалган разведкачилардан бўлиб қолишди.* А. Раҳмат, Соқов бола.

СИНАМАЛИ эск. **1** Амалда, тажрибада синаб кўрилган, синовдан ўтган.

2 айн. **татбиқий, амалий.** *Синамали хандаса (амалий геометрия).*

СИНАМОЛ Текширилган, синалган, синовдан ўтказилган, ишончли. *Синамол от.* ■ *Ҳозир улар менга синамол эмас, ҳали бизларнинг бир-биримизга душманлигимиз бор.* «Мурудхон». -Менимча, биз.. синамол ўзгариларни чўтга солмасдан тadbир кўрмоқдамиз, — деди Мир Алихон. С. Азимов, Қонли сароб.

СИНАМОҚ 1 Синовдан ўтказмоқ, текширмоқ, текшириб кўрмоқ. *Тайёр машиналарни синамоқ. Синамаган отнинг сиртидан ўтма.* Мақол. *Эр йигитни майдонда сина.*

Мақол. ■ *У [Азиз Абдураззоқ] фақат шеър ёзиб қолмай, насрий ҳажвчиликда ҳам кучини синамоқда.* «Муштум. Шилдир-шилдир қамишга сирғам тушди, ёр-ёр, Синалмаган йигитга синглим тушди, ёр-ёр. «Оқ олма, қизил олма».

2 Бир предметни (мас, дорини, таомни) ишлатиб кўриб ёки истеъмол қилиб, таъсирини аниқламоқ. *Тоҳиржон киноя билан жилмайди: -Барча дорини синадим. Меники бедаво дард.* Ойбек, Танланган асарлар.

3 Имтиҳон қилиб, билим даражасини аниқламоқ. *Ўқувчиларни физикадан синаб кўрмоқ.*

4 Ўсмоқчилаб сўрамоқ, қўйнига қўл солмоқ. *Унинг [Ҳотамнинг] сахийлиги ростми, ёлғонми — синаш мақсадиди, бир-икки одам ўша тулпорни сўраб, олдига боришибди.* Шукрулло, Жавоҳирлар сандиғи.

5 Бошидан кечирмоқ, ўз тажрибасида, ҳаётида кўриб билмоқ. *Қарза йўлиққандан кўра, балойи ногаҳонга йўлиққан яхши. Ҳаммасини синадик.* Ойбек, Танланган асарлар. *Синасин ўз бахтини, Бахти қўлласин уни.* Х. Олимжон.

СИНАМОҚЧИЛИК Ўсмоқчилаб текшириш, синаш. *Унга [Ҳафизанинг онасига] шу керак эди — бу хабарни синамоқчилик учун ҳам айтган эди.* Мирмуҳсин, Умид.

СИНАТРОПЛАР [лот. Sina — Хитой + юн. anthropos — одам] Суякларни илк бор Хитойдан (1927—37) топилган энг қадимги одамлар. *Синантропларнинг суяк қолдиқлари билан бирга улар фойдаланган.. тош қуроллар, уларнинг оловдан фойдаланганига гувоҳлик берувчи кул ва ҳайвонларнинг куйган суяк қолдиқлари топилган.* «ЎЗМЭ».

СИНАШ 1 **Синамоқ** фл. ҳар. н. *Машиналарни синаш. Кучини синаш. Курашда (мусобақада) куч синаш.* ■ *Биринчи куёвнинг феъл-тавори унга маъқул тушмагани учун, куёв бўлажак йигитни ҳар ёқлама текширишини, синашни истар эди.* Ойбек, Танланган асарлар.

2 айн. **синов 2.** *Синаш стенди. Синашдан ўтмоқ.*

СИНАШМОҚ 1 **Синамоқ** фл. бирг. н. *Улар меҳмонни хўп синашди.* ■ [Қудрат:] *Ҳозирча мен сиз билан бахт синашиб кўрмоқчиман.* Н. Сафаров, Уйғониш.

2 Ўзаро бир-бирини синамоқ, бир-бирининг хислат-фазилатларини яқиндан ўрган-

моқ, синашта бўлмоқ. *Ҳамма фикру зикри, бутун борлиғи билан кенг даврада куч синашиб юрган икки зур полвонга тикилиб қолган эди.* М. Исмоилий, Фарғона т. о.

СИНАШТА 1 Яхши синалган, текширилган, таниш, қадрдон, яқин. *Қоровул синашта эди, итотақорона бош эди:* - Тушундим, хўжайин. С. Сиёев, Отлиқ аёл. *Пошиохон савдони синашта кишилар орқали зимдан амалга оширадиган йўлни тонди.* Д. Нурий, Осмон устунни.

2 Бошидан кечирилган, синаб, тотиб кўрилган; тажрибадан ўтказилган. *Бу дард айниқса Отабекка уч йилдан бери синашта.* А. Қодирий, Ўтган кунлар.

СИНГАЛ қ. сингаллар. Сингал аёл.

СИНГАЛЛАР, сингаллар Шри Ланка Республикасининг асосий аҳолиси. *Сингалларнинг аجدодлари миллоддан аввалги 5-асрда Шимолий Ҳиндистондан кўчиб келиб, маҳаллий қабилалар билан аралашган.* «ЎЗМЭ».

СИНГАРИ айн. каби. *Ҳар бир она сингари Тўқсон буви ҳам ўз ёлғизининг бахтли бўлишини истарди.* Н. Сафаров, Оловли излар. *Оёқ босган жойлардаги шўр ерлар қор сингари ғирчиллайди.* Р. Файзий, Чўлга баҳор келди.

СИНГАРМОНИЗМ [юн. syn — бирга + harmonia — уйғунлик, оҳангдошлик] тлш. Туркий тилларда ва баъзи бошқа тилларда унлилар уйғунлиги; кўшимчалардаги унлиларнинг ўзақдаги унлиларга мослашуви. *Эски ўзбек адабий тилида эса сингармонизм қонуни анча изчил ва айрим ҳолларда тўлиғича амал қилган.* «ЎЗМЭ».

СИНГАРМОНИК Сингармонизмга оид, сингармонизм қоидаларига, талабларига бўйсунувчи. *Сингармоник мослашув.*

СИНГГА(К): сингга(к) нон Сингиб пишган нон. *Дастурхончи.. дастурхон ёзиб, унинг бетини тандирдан энди узилган, буғланиб турган синггак нонлар.. билан тўлдириб ташлади.* Ойбек, Навоий.

СИНГДИРИШ 1 **Сингдирмоқ** фл. ҳар. н. *Абдужалил тегирмончи мулла Обид ҳақидаги ўзининг васвасасини уларга ҳам сингдиришга муваффақ бўлади.* А. Қодирий, Обид кетмон.

2 физ. Ютилиш, абсорбция. *Ёруғликни сингдириш.*

3 айн. **ассимиляция** 3.

СИНГДИРУВЧАН физ. Ўзига тез сингириб оладиган, тез ютадиган, шимадиган. *Сингдирувчан жисм.*

СИНГИЛ (3-ш. бирл. сингли ва синглиси) 1 Бир ота-онадан туғилган қизларнинг кичиги (опаларига, акаларига нисбатан). *Кичик сингил. Уртанча сингил.* ■ *Энди ишим ўнг бўлади: энди аям, укам, синглим зориқмайди.* Ойбек, Танланган асарлар. *Солиҳ маҳдум наси ва ўн олти ёшли Наима исмли сингисин билан Қўқонда қолди.* А. Қодирий, Меҳробдан чаён.

2 Ўзидан кичик қизларга, аёлларга мурожат қилинганда қўлланадиган сўз. *-Кўп ўқигансиз, лекин кам биласиз, синглим! — деди ўқитувчи [Гавҳарга].* Ў. Ҳошимов, Қалбингта кулоқ сол. *Офтоб ойимни.. Ўзбек ойим ўтқазгани жой топмас, «қуда» сўзи ўрнида «синглим» деб хитоб қилар, ошни ҳам унинг рабъини сўрамасдан буюрмас эди.* А. Қодирий, Ўтган кунлар.

Қайни сингил айн. қайнсингил.

СИНГИЛЛИК Кимсага сингил мақомида бўлиш; сингил каби муносабатда бўлиш. *Сингиллик қилмоқ.* ■ *Шуни қолипга солиб бермасангиз бўлмайди, синглим. Бир сингиллик қилинг!* А. Қаҳҳор, Кўпчинор чироқлари.

СИНГИМОҚ 1 Шимилмоқ, шимилиб ёки сизиб, ички қатламга, қисмига ўтмоқ. *Мой бўёқ тахтага яхшигина сингийди.* ■ *Улар: «Ер тўймагунча, эл тўймас, лалмикор қирларнинг тунроғига қор суви сингимагунча, буғдой унмайди», деб нолир эдилар.* П. Турсун, Ўқитувчи.

Қумга сингиб кетгандай ёки қумга сингган сувдай 1) бекорга, беҳуда, фойдасиз, нафсиз. *Шунча берган таълимларим қумга сингган сувдай сингиб кетаверибди-да.* «Латифалар»; 2) жимжит, унсиз, шовқинсиз, сув қуйгандай. *Комбат шаҳарда мудофаа тутишга буйруқ берди. Душман қумга сингиб кетгандай жим эди.* А. Убайдуллаев, Қонли издан.

2 Ҳазм бўлмоқ, ўзлашмоқ (овқат, озиқ ҳақида). *-Уч тутам ҳолва, уч танга пул, — деди.. йигитча. — Агар ҳаммасини есангиз, ош бўлсин, сингисин.* С. Айний, Эсдаликлар. *Вақтида овқатланмаслик меъда шиллиқ қаватини яллиғлантиради.. натижада киши қайт қилади, еган овқати сингмайди.* Газетадан.

3 физ. Ютилмоқ, шимилмоқ. *Ёруғликнинг жисмга сингиши.*

4 кўчма Бағрига, кўйнига кириб ёки рангига, тусига ўзлашиб кетмоқ ёхуд бирдек бўлиб, изсиз йўқолмоқ. *Отабек сунбул исли сочлардан руҳ олар, Кумуш гўё унинг бағрига сингиб кетган эди.* А. Қодирий, Ўтган кунлар. *Уларнинг бир-бирига монанд гавдаси чироқлар нуруни кесиб ўтиб, қоронғилик кўйнига сингиб кетди.* Ў. Ҳошимов, Қалбингга қулоқ сол.

5 кўчма Ўрнашиб қолмоқ, жо бўлмоқ. *Қишлоқ муҳити, ота-онанинг ўта оқ кўнглилик руҳида берган тарбияси Йигиталининг қон-қонига сингиб кетганди.* Д. Нурий, Осмон устунни. *Бу одам маҳалла ҳаётига, ҳар бир кишининг дилига кириб, шу қадар сингиб кетган эдики, отпуссага ё командировкага кетса, бутун маҳалла ҳувиллаб қолгандай бўларди.* А. Қаҳҳор, Асарлар. *Пишиб ётган боғларга боқдим, Ҳисларимга сингиб кирди куз.* Х. Даврон.

6 кўчма Йўқолмоқ, йўқ бўлмоқ; йўқ бўлиб, хотирага айланиб қолмоқ. *Йиллар қаврига сингиб кетган болалик, олисда судралиб юрган булут парчаларидек, кўз ўнгидан ўтаверади.* С. Аҳмад, Ҳукм.

Сингиб пишган нон Қизариб, мағзигача яхши пишган нон. *Умид дастурхон устидаги новвоту пашмак, қаймоғу асал, тандирда сингиб пишган нонларни кўриб таъсирланди.* Мирмуҳсин, Умид.

СИНГИР айн. пай 1 1.

СИНГИШ 1 Сингимок фл. ҳар. н.

2 физ. Ютилиш, абсорбция.

3 айн. **ассимиляция** 3. Тилларнинг сингиши.

СИНГИШМОҚ 1 Чуқур ўрнашмоқ, ўзлашмоқ, жо бўлмоқ, сингмоқ, сингимок. *Оқшом тинчлигида оламнинг бутун гўзалликлари кўнглимга сингишиб киргандай бўлади.* А. Мухтор, Давр менинг тақдиримда. *Кўзларига ўрнашган, сингишган ғам кетмаган эди.* М. Исмоилий, Фарғона т. о.

2 Ўрганиб олмоқ, одатланмоқ; мослашмоқ. *Қарийб етти йиллик гавжум ҳаёт давомида Йигитали шаҳар шароитига бутунлай сингишиб кетган эди.* Д. Нурий, Осмон устунни.

3 Бағрига, кўйнига ёки рангига, тусига кириб йўқолмоқ; бирга қўшилиб, бирдек бўлиб кетмоқ. *Тоғлар, қирлар, далаларда оқшом тушиб, қош қорая бошлаган, атрофдаги дарахтлар, уйлар ва экинзорларнинг бари бир-бирига сингишиб, кукимтир туман*

пардасига ўралаётган эди. Ҳ. Назир, Сўнмас чақмоқлар.

4 кўчма Ўрганиш бўлиб қолмоқ, одат тусига кирмоқ, ўзлашиб кетмоқ. *[Қандолат-хон] Эри устидан «хукмронлиги»ни Ҳусниддинга ҳам кўрсатмоқчи бўлди. Лекин Ҳусниддинга бу қилиқ сингишмай, аввал бир неча кун таъби тирриқ юрди. Мирмуҳсин, Феълан кучсизлик.*

СИНГМОҚ айн. **сингимок**. *Дилга сингди юрт муҳаббати.* Э. Воҳидов. *Намозбекни ўлдириб, қотиллар тунга сингди.* Х. Даврон.

Меҳнати сингган Кўп меҳнат сарфлаган. *Пардаев – Ватанга меҳнати сингган камтарин одам.* С. Анорбоев, Ўзбекистон олтини. *[Салимхон Обидий:] Бу селекция институтига.. қанча меҳнатим сингган. Мирмуҳсин, Умид.*

СИНДИКАЛИЗМ [фр. syndicat – касаба уюшмаси, бирлашмаси < юн. syndikos – бирга ҳаракат қилувчи, ҳаммаслак] *сиёс.* Ишчилар ҳаракатида 19-аср охири – 20-аср бошларида кенг тарқалган, касаба уюшмалари (синдикат)ни меҳнаткашларни уюштиришнинг энг олий шакли деб қаровчи ва ишлаб чиқариш воситалари касаба уюшмалари ихтиёрига берилиши керак, деб ҳисобловчи оқим. *Ҳозир қатор мамлакатлардаги сўл партия ва ҳаракатларнинг ғоялари ва мафқураларида синдикализм таъсири сезилади.* «ЎЗМЭ».

СИНДИКАЛИСТ *сиёс.* Синдикализм тарафдори, синдикализм йўлини тутувчи.

СИНДИКАТ [фр. syndicat < лот. syndicus – ишончли шахс, вакил < юн. syndikos – бирга ҳаракат қилувчи, ҳаммаслак] **1** *иқт.* Ишлаб чиқариш ва юридик мустақиллигини сақлаган ҳолда, умумий тижорий фаолиятни (нарх белгилаш, маҳсулотни сотиш, хомашё харид қилиш ва б.) амалга оширувчи корхоналар (ишбилармонлар) бирлашмаси; монополиянинг бир кўриниши. *Банк синдикати.* ■ *Синдикат таъсис этган умумий савдо ширкати синдикатнинг ҳар бир аъзоси билан савдо-сотиқ тўғрисида шартнома тузади.* «ЎЗМЭ».

2 Францияда ва б. баъзи мамлакатларда касаба уюшмаларининг номи.

СИНДИРМОҚ **Синмоқ** фл. орт. н. *Тош отиб, ойнани синдирмоқ. Йиқилиб, оёғини синдириб олмоқ. Иш юришмаса, буламиқ дандон синдирар.* Мақол. *Беҳуда ҳаракат*

белни синдирар. Мақол. ■ Акрамхоннинг онаси девори қулаётган уйдан қочиб чиқаман деб, остонага қоқлибди-да, оёғини синдирибди. И. Раҳим, Тинимсиз шаҳар. *Йигит охири Забаржадни ялнтириб, гурурини синдирди. «Ёшлик». Ўз отам синдирди менинг шаънимни, Энажон, олиб кел шу эшонимни. «Эрали ва Шерали».*

Белини синдирмоқ қ. бел I. *Душман белини синдириш учун озмунча қурбон бермадик. Н. Сафаров, Оловли излар. Колхозчи қул эмас-ку? Бир жувоннинг тўрт ой белини синдириб топганини мен, сиз, анавилар ёзда салқин, қишда иссиқ ерда ўтириб олар эканмиз. С. Сиёев, Отлиқ аёл. Илгирини (ёки оёғини) синдираман Дўқ-пўписа ибораси. Ҳа, кўчага чиқмайсан, эшитдингми? Ҳой бола!.. Илгирини синдираман-у, касалигини боқиб ўтиравераман. Н. Сафаров, Саодатнинг қиссаси. Нон (ёки патир) синдирмоқ айн. нон ушатмоқ қ. ушатмоқ. Тийин устида тиш синдирадиган одам Жуда хасис, зикна одам. Малик Раҳимовни бир тийиннинг устида тиш синдирадиган зикна одам, деб бўлмайди. «Муштум». Хари (ёки чўп) синдирмоқ Бирор киши ҳеч қутилмаган ишни қилганда айтиладиган ибора. Шохини синдирмоқ қ. шох II. [Зухра] *Ўтган сафар мажлисда Хўжабековнинг шохини, қолаверса, ўзининг ҳам шохини синдириб, Шербекнинг қўлини баланд қилиб кетган эди. С. Анорбоев, Оқсой. Қанотини синдирмоқ қ. қанот I.**

СИНДРОМ [юн. syndrome — йиғилиш, тўпланиш; бир-бирига дуч, тўғри келиб қолиш] тиб. Келиб чиқиш механизми умумий бўлган ва организмнинг муайян органикли (касал) ҳолатини ифодаловчи белгилар (симптомлар) нинг мос, тўғри келиши.

Орттирилган иммунитет танқислиги синдроми (ОИТС) тиб. Одамларда лимфатик системанинг зарарланиши оқибатида организмнинг ҳимоявий куч-қуввати заифлашувидан иборат вирусли касаллик (асосан жинсий алоқа ва қон орқали юқади, ўтади).

СИНЕКДОХА [юн. synekdoche — муносабатдошлик, ўзаро боғланиш] ад. тлш. Метонимиянинг кўринишларидан бири; бутун (катта) нарсанинг номини унинг қисми (кичик) номи билан ёки аксинча аташдан иборат кўчим тури.

СИНИШ I Синмоқ фл. ҳар. н. *Пиёланине синиши. Дарахт шохининг синиши. ■ Гоҳо қамчининг заҳарли чарсиллаши, таёқнинг «қарс» этиб синиши ва ғазабли ҳайқирик эшитилади. О. Ёқубов, Эр бошига иш тушса.*

2 физ. Бир муҳитдан иккинчи муҳитга ўтишда ёруғлик йўналишининг ўзгариши. *Ёруғликнинг қайтиши ва синиши. Синиш бурчаги.*

3 иқт. қ. банкротлик.

СИНИҚ I сфт. Синган, парчаланган, бирор ери учган ёки дарз кетган, ёрилган. *Синиқ пиёла. ■ Ана шу «боғи эрам» энди эгасиз уйдаи ҳувиллаб ётибди. Синиқ деразалардан қушлар учиб кириб-чиқиб турибди. С. Сиёев, Отлиқ аёл. Кўча ўртасида бир синиқ шиша Қараган одамнинг олар кўзини. Э. Воҳидов, Муҳаббатнома. Анчадан кейин Муқаддам чил-чил бўлган мушукчанинг синиқ бўлақларини босиб ўтиб, ёмғирпўшини кийди. Ў. Ҳошимов, Қалбингга қулоқ сол.*

2 сфт. Синиб ишдан чиққан, яроқсиз ҳолга келган. *Синиқ арава. ■ Тўтибу аллақерда чанг босиб ётган синиқ дуторни олиб чиқиб артаётганида, Тожибой кириб келди. С. Зуннунова, Гулхан.*

3 от кўчма Синган нарсанинг бўлақлари. *Жасура йиғламсираганча пиёла синиқларини тера бошлади. Э. Аъзамов, Жавоб. [Нигора] Полдан термометр синиқларини териб, ўрнидан турганида, ўзини анча босиб олган эди. С. Анорбоев, Оқсой.*

4 от кўчма Одам аъзосининг шикастланиб синган қисми, синган қўл, оёқ ва ш.к. *Хирурглар кенг гулзор ўртасига стол қўйиб, синиқларни гипсламоқда, ярадорларни бинтламоқда. «Шарқ юлдузи». Синиқнинг битишидан мумиёнинг сифатини аниқлаганлар. «Гулистон».*

5 от кўчма Ярим ой ёки Ойнинг сувга бўлак-бўлак бўлиб тушган акси. *Осмонга қарасам — ойнинг синиғи, Ерга кўз ташласам — сувнинг тиниғи. Кўзига қарасам — ёлқинлар сошиб, Жонимга ўт солди ёрнинг қилиғи. «Кўшиқлар». Шуваланиб, шарқираб ётар Кўк сувларда ой синиқлари. Ш. Раҳмон, Юрак қирралари.*

6 кўчма Рангпар, сарғимтил, сўлғин. *Ичкаридан янги беқасам тўн кийган, жуссаси кичик, муллаваччага ўхшаш ранги синиққина бир йигит иккита тугун кўтариб чиқди. А. Мухтор, Чинор. Дўппили одам ранги зар-*

чанинг рангидай синиқ, мендайин бир кал экан. Т. Мурод, От кишнаган оқшом.

7 кўчма Паст ва шикаста, титроқ (гап оҳанги, овоз ҳақида). -*Менга бир киши керак эдилар, — деган синиқ овоз келди ташқаридан. Т. Малик, Ажаб дунё. Синиқ, титроқ товуш билан: -Нимага хафа бўламан, айтаверинг, — деди Ҳаётхон. М. Исмоилий, Фарғона т. о.*

8 кўчма Маъюс, сўниқ; кайфияти паст, хафа ҳолда. [*Усмонжоннинг*] *Отаси бормикин? Етимликда ўсганми, жуда синиқ йигит кўринади, — ўйлади Адолат. С. Зуннунова, Гулхан. -Икковиям тирноққа арзимаиди, морожний обертганим, кинога оптушганим учун шунақа, — деб синиқ илжайди [Собир]. А. Кўчимов, Ҳалқа. Шарифа синиқ кулумсиради. Ш. Холмирзаев, Оғир тош кўчса.*

Кўнгли (ёки руҳи) синиқ Кўнгли чўккан; дили вайрон, машқи паст. *Ғарибнинг кўнгли синиқ. Мақол. ■ Унинг ёмон яшамаётганлигини, лекин руҳи бир оз синиқроқ эканлигини сезди. С. Нуоров, Майсаларни аёз урмайди. Синиқ чизик мат. Бурчак ҳосил қилиб, йўналишини ўзгартирган чизик. Азар синиқ чизикнинг учлари устма-уст тушса, бундай синиқ чизик «ёпиқ синиқ чизик» дейилади. «Геометрия».*

СИНИҚЛИК 1 Бирор нарсанинг синиқ эканлиги. *Пиёланинг синиқлиги кўзга ташланди.*

2 Руҳан хафа эканлик. *Руҳий синиқлик. Кўнгли синиқлиги.*

3 Овознинг маъюс, титроқ бўлиши. -*Албатта, мени олмас, — деди Нозик; унинг товушида шу чоққача эшитилмаган бир синиқлик оҳанги бор эди. А. Қодирий, Меҳробдан чаён.*

СИНИҚ-МЕРТИК У ер-бу ери синган, учган ёки дарз кетган; чақа бўлган. *Синиқ-мертик идишлар. ■ Ўртада манқалдонда олов, олов атрофида синиқ-мертик чойнаклардан уч-тўрттаси терилган. Ф. Гулом, Шум бола. Гулнор бутун жиҳози бир наमत, тоқчадаги бир неча синиқ-мертик коса, пиёла ва.. бир неча эски, ямоқ-ясоққоқ чит кўрпадан иборат бўлган қоронғи, зах уйига кириб, танчага оёқларини узатиб ётар эди. Ойбек, Танланган асарлар.*

СИНИҚМОҚ Рангини олдирмоқ, рангпар бўлиб қолмоқ, сарғаймоқ. *Ранги синиқибди. ■ Отабек кирганда, ўзининг синиқ-*

қан юзи, ичкарига ботинқираган кўзи билан Қумуш илжайиб, унга қаради. А. Қодирий, Ўтган кунлар. Онасининг синиққан ранг-рўйига қараб, Давроннинг боши эгилди. С. Кароматов, Сўнгги бархан.

СИНИҚЧИ *шв.* Синган-чиққанни тузатувчи табиб. *Эрига қараб: -Қорақўзни синиқчига обориб келмайсизми? Бечоранинг қўли чиқиб кетган шекилли, — деган эди, Шамол тоға уришиб берди. С. Сиёев, Ёруғлик.*

СИНИҒАР [*< синглиси ғар (бўлгур)*] *сўк.* Нафрат, ғазаб, сўкиш, койишни ифодаловчи сўз. [*Зийёд:*] *Шу десанг, кўтариладиган хонаси келиб қолган экан, қуруғидан оборсалар, қайтарворганмиш синиғар. М. Мансуров, Ёмби.*

СИНКА *с.т.* Синька. *Деҳқоннинг эғнида синкага солинган хомсурп ятак. С. Аҳмад, Ҳукм. - Қизил булутлар энди сарғимтир тусга кириб, кўз олдимда рангини ўзгартириверди-да, бирдан синкага солгандек зангори ранга бўялди, — деди чол. С. Аҳмад, Чўл бургути.*

СИНКРЕТИК [*юн. synkretismos — бирлашиш*] Қоришиқ; бирилашган; қисм, бўлақларга ажралган. *Яна шу нарсани таъкидлаш жоизки, мазкур моддий таъсирнинг маънавий акс-садоси табиат олами билан инсоннинг маънавий-психологик олами ўртасидаги синкретик гармонини вужудга келтиради. «ЎТА».*

СИНЛИ *шв.* Бўй-басти, қад-қомати келишган. *Синли, синли, синбатлим, Қора шердай ҳайбатлим. «Кўшиқлар». Ҳайвонлар ичида ўзинг синлисан, Тубушқон туюқли, марал беллисан. «Фольклор».*

СИНМОҚ 1 Парчаланмоқ, майдаланмоқ, бўлақларга ажралмоқ, узилмоқ. *Шиша синди. Қалам синиб қолди. Кўза кунда синмайди, кунда синади. Мақол. Қайин дарахтининг эгилгани — сингани, Эр йигитнинг уялгани — ўлгани. Мақол. ■ Кўлидаги дасталанган пахта гулли пиёлдан бири ерга тушиб, чил-чил синди. Т. Ашуров, Оқ от. Оёғининг остида ногоҳ Чирс ётар-у, синиб тушар шох.. Х. Даврон, Болаликнинг осмони. Ел кетма-кет бўқирар, бунга чидай олмаган шохшаббалар қарс-қурс синар.. эдилар. А. Қодирий, Ўтган кунлар.*

2 Зарб еб шикастланмоқ, парчаланмоқ (гавда суяклари ҳақида). *Умар билаги синиб, боши ёрилиб, тупроқда беҳуш ётарди. С. Юнусов, Кутилмаган хазина.*

Бели синмоқ 1) бели шикастланмоқ. *Меъмор Нажмиддин Бухорий кўтарган аламини фил кўтарса, бели синарди.* Мирмуҳсин, Меъмор; 2) кўчма зарбага учрамоқ, хонавайрон бўлмоқ. [*Азизбой:*] *Ҳо, ҳо.. Кўп чираним, Пўлат! Азизбой билан олишганлардан кўпининг бели синиб кетган-а!* Н. Сафаров, Шарқ тонги. **Бошида калтак синмоқ** қ. калтак.

3 Шикастланиб ишдан чиқмоқ, яроқсиз ҳолга келмоқ. *Арава синди, ҳўкиз ўлди.* Мақол. ■ *-Хафа бўлманг, ака, — деҳқоннинг елкасини қоқиб юпатди Йўлчи, — фалокат эмас — арава синади, тузатилади.* Ойбек, Танланган асарлар. *Синган сози қайтадан Тилга киргандай, Ҳазон бўлган баҳори Гулга киргандай.* Файратий.

4 кўчма Конкуренцияда, рақобатда енгилмоқ, банкротлашмоқ, хонавайрон бўлмоқ. [*Саидаҳмад:*] *Замон жуда лойқаланиб кетяпти, ҳали қарасанг, у бой синибди, ҳали қарасанг, бу бой.* Ойбек, Улуғ йўл.

5 кўчма Маънавий зарба олмақ. *Одамнинг кўнели нозик бўлади: бир кичкина нарса билан ё синади, ё кўтарилади.* М. Исмоилий, Бизнинг роман. *-Агар боланинг руҳи синса, шунақа бетга чопар, каттага сўз қайтарадиган, қайсар бўлади, — деди [Акбархўжа].* П. Турсуи, Ўқитувчи.

6 кўчма Енгилмоқ, маҳв бўлмоқ. *Синмас ирода. Ҳақиқат букилади, аммо синмайди.* Мақол.

Бели синмаган пул Янги, шалди роқ пул.

СИНОАТ [а. *صناعت* — санъат, маҳорат; касб-ҳунар] Ажиб иш, сирли ҳодиса. *Бу қандай синоат? ■ Нима сир бу? Не синоат? Ё кўнгилда уйғонди туйғу? М. Али, Бокий дунё. Мўъжиза рўй бермаган бўлса-да, бироқ ҳар куни бизни ҳайратлантирарли синоатлар бўлиб турди. «Фан ва турмуш». Назаримда, буларнинг ўртасида мендан бошқа ҳамма биладиган бир синоат бор эди. Х. Султонов. Онаминг юрти.*

СИНОВ 1 Синамоқ фл. ҳар. н.

2 Сифатини, чидамли-чидамсизлигини аниқлаш учун ўтказиладиган текшириш. *Синовдан ўтказмоқ. Синов мударти. ■ Малакали лабораториялар синовидан муваффақиятли ўтган бундай сополлар асрлардан асрларга ўтади, сақланади.* Газетадан.

3 Сабот ва чидам зарур, керак бўлган палла, воқеа-ҳодиса; имтиҳон. *Сиз тақдир-*

нинг синовларига бардош бериб келган мард одамсиз. М. Осим, Ибн Сино қиссаси. Эл бошига иш тушса, дўст синовдан ўтади. «Шарқ юлдузи». Ёш оиланинг бузилиб кетишига йўл қўймаслик мақсадида суд уларга 6 ойлик синов мударти беради. Газетадан.

4 Олий ва ўрта махсус ўқув юртлари талаба ва ўқувчиларининг ҳамда абитуриентларнинг ўқув режасидаги фанлардан олган билими ва малакаларини аниқлаш ва баҳолаш усули. *Институтда синовлар бошланди. ■ Минглаб абитуриентлар студентлар сафига қўшилиш учун синов имтиҳонларидан ўтишяпти.* Газетадан.

Синов дафтарчаси Олий ва ўрта махсус ўқув юртлари талаба ва ўқувчиларининг муайян таълим муассасасида ўқишини тасдиқловчи, уларнинг баҳолари қайд этилувчи академик ҳужжат. *Синов дафтарчаси битирувчига тегишли мутахассислик юзасидан диплом [сертификат] беришга асос бўладиган расмий ҳужжат ҳисобланади.* «ЎЗМЭ».

СИНОВЧАН Бирор ҳолатга, воқеа-ҳодисага зимдан назар ташлайдиган, разм соладиган, билиб олишга интиладиган. *Обид Йўлдошевчи бу табрикнинг қанчалик самимийлигини билмоқчи бўлгандай, Мухаммад-жонга синовчан назар билан тикилиб, раҳмат айтди. П. Қодиров, Уч илдиз. Тўладан келган хушсурат одам оқ оралаб қолган қалин сочларини силаб, Матлубага синовчан тикилиб ўтирарди. О. Ёқубов, Излайман.*

СИНОВЧИ 1 Синамоқ фл. сфдш. *Кампир синовчи кўзлари билан йигитга узоқ тикилди, бошини оҳиста чайқаб, сўнг енгил бир хўрсиниб деди..* Ойбек, Танланган асарлар.

2 Махсус синовдан ўтказувчи мутахассис. *Синовчи учувчи.*

3 айн. **синовчан.** *Махдум унга синовчи назар билан тикилиб турарди. М. Исмоилий, Фаргона т. о.*

СИНОД [юн. *synodos* — мажлис; йиғилиш] 1917 йилгача чор Россиясида: Рус православ церковининг олий бошқарув органи; ҳозирги вақтда — Москва ва Бутун Русь патриархи қошидаги маслаҳат органи.

СИНОДИК [юн. *synodos* — бирикиш; қўшилиш; бирикма]: *астр. синодик айланиш даври* Куёш системасидаги бирор сайёранинг ўз орбитаси бўйлаб ҳаракатланиб,

Ердан кузатилаётганда, Қуёшга нисбатан дастлабки вазиятига қайтишигача ўтган вақт. **Синодик ой** Сайёралар ёки Ойнинг кетма-кет келадиغان иккита бир хил фазаси орасидаги (*мас.*, ой кўринган кундан янаги ой кўринадиган кунгача бўлган) вақт; *таққосланг: сидерик: сидерик давр, сидерик ой.* Ойнинг кетма-кет келадиغان иккита бир хил фазаси орасидаги вақт синодик ой дейилади. «Астрономия».

СИНОЛОГ Синология олими, мутахассиси; хитойшунос. *Синолог олим.*

СИНОЛОГИК Синологияга, хитойшунослика оид. *Синологик тадқиқотлар.*

СИНОЛОГИЯ [лот. Sina – Хитой + юн. logos – фан, таълимот] Хитой тарихи ва маданияти, тили ва адабиёти ҳақидаги фанлар мажмуи; хитойшунослик. *Синология соҳаси.*

СИНОНИМ [юн. synonymos – бир хил номли] *тлш.* Шакли ҳар хил, маъноси эса бир хил ёки бир оз фарқли бўлган тил бирликлари қаторидаги ҳар бир тил бирлиги. *Ўзбек тилидаги синонимлар. Синоним сўзлар.* ■ *Гулханий тили лексикасининг хусусиятларидан бири шуки, «Зарбулмасал» да маълум бир предмет, нарсаноми бир неча адекват синонимлар орқали ифодаланади. «ЎТА».* Синонимлар асарга сайқал беришда, фикрни жозибали ифодалашда катта аҳамиятга эга. «ЎТА».

СИНОНИМИК *тлш.* Бир-бирига синоним бўлган; маънодош. *Синонимик сўзлар.* ■ *Ҳар бир синонимик қаторнинг чегараси, ундаги сўзлар асосий сўз [доминанта] га қийёслаш орқали белгиланади. «ЎТА».* Синонимик мақолларни эса ҳар бир халқ, ўзининг миллий хусусиятлари ҳамда маҳаллий шарт-шароитлардан келиб чиқиб, мустақил равишда яратади. «ЎТА».

СИНОНИМИКА *тлш.* 1 Бирор тилнинг синонимлари мажмуи. *Ўзбек тили синонимикаси.*

2 Лексикологиянинг синонимларни ўрганувчи бўлими.

СИНОНИМИЯ [юн. synonymia – бир хил номга эгалик] *тлш.* Тил бирликлрининг маъно жиҳатидан яқинлик, маънодошлик ҳодисаси. *Грамматик синонимия.* ■ *Шунингдек, полсемантик сўзлардаги антонимик муносабат ҳамда антонимик сўзлар сино-*

нимияси уларда стилистик имкониятлар кенг эканлигини кўрсатади. «ЎТА».

СИНОПТИК I [юн. synoptikos – барча нарсани бараварига кузата, кўра олувчи] *мтр.* Об-ҳавони кузатувчи, об-ҳавонинг қандай бўлишини одатда синоптик хариталар асосида олдиндан айтиб берувчи мутахассис, метеоролог. *Гарчи синоптиклар бир кун илгари табиий офат содир бўлиши мумкинлиги ҳақида огоҳлантирган бўлишса ҳам, тоғдан бостириб келган сел анча талафот етказди.* Газетадан.

СИНОПТИК II *мтр.* Об-ҳаво шароитларига, метеорологияга оид; турли хил мураккаб ахборотлар мажмуини тезлик билан кузатиш имконини берадиган. *Синоптик кузатишлар.* ■ *Тажрибакор кексалар тахмини ва синоптиклар прогнозига кўра бу йил қиш эрта тушиши кутиляпти.* Газетадан.

Синоптик карта (*ёки харита*) Айни бир вақтда ер устида ва осмонда об-ҳавони кузатишдан олинган натижалар рақамлар ва шартли белгилар билан акс эттирилган географик об-ҳаво харитаси (бундай харита об-ҳавони синоптик таҳлил қилиш ва олдиндан айтиб беришга хизмат қилади). *Радио орқали икки синоптик карта: бири – Европада, иккинчиси – Америкадан қабул қилинди. «Фан ва турмуш».*

СИНОПТИКА [юн. synoptikos – барча нарсани бараварига кузата, кўра олувчи] Метеорологиянинг синоптик хариталар асосида об-ҳавони олдиндан айтиб бериш мақсадида атмосферадаги кенг кўламли физикавий жараёнларни ўрганувчи бўлими.

СИНОҚ *шв. айн. синов.* *Келди дўстлар йироқдан.. Мексикадан, Ироқдан, Қунди бахт манзлига, Ўтиб минг хил синоқдан.* Ё. Мирзо, Ўғил меҳри. *Синоқларнинг қийноғида яшадик бутун.* М. Шайхзода, Чорак аср девони.

СИН-СИМБАТ, сини-сумбат *шв.* Ташқи қийёфа, бўй-баст, қад-қомат. *Бўри полвон Абрай полвоннинг син-симбатига синчиклаб тикилди.* Т. Мурод, Қўшиқ. *Хўб йигит экан. Балли отанга, сини-сумбатинга.* «Равшан».

СИНТАГМА [юн. syntagma – тизим, саф; кўшилган бирор нарса] *тлш.* Бир ёки бир неча сўздан иборат синтактик, интонацион-мазмуний нутқ бирлиги.

СИНТАКСИС [юн. syntaxis – тузиш, бириктириш; тузилма, таркиб, бирикма] *тлш.* 1 Бирор тилдаги сўзларнинг сўз бирикма-

ларига ва гапларга бирикиш усуллари, шунингдек, сўз бирикмалари ва гапларнинг турлари ва маънолари. *Ўзбек тили синтаксиси*. ■ *Гапнинг зарур белгиларидан бири бўлган интонация – синтаксиснинг фонетика билан, тилнинг фонетик системаси билан ҳам боғланишини кўрсатади*. «Ҳозирги ўзбек адабий тили».

2 Грамматиканинг сўзларнинг сўз бирикмалари ва гапларга, содда гапларнинг эса қўшма гапларга бирикиш усуллари, сўз бирикмалари ва гапларнинг тузилиши, маъноси ва вазифаларини ўрганадиган бўлими. *Юқорида қайд этилган фикрлардан шундай хулоса келиб чиқадики, синтаксис сўз бирикмасини ва гапни текширади, унинг асоси гап ҳақидаги таълимотдир*. «Ҳозирги ўзбек адабий тили».

СИНТАКТИК Синтаксисга оид. *Синтактик таҳлил*. Сўзнинг синтактик вазифаси.

СИНТЕЗ [юн. synthesis – бирикиш, қўшилиш; бириктириш, қўшиш] **1** Предмет ва ҳодисаларни бир бутун ҳолда, уларни ташкил этувчи қисмларнинг бирлиги ва ўзаро боғланишида ўрганадиган илмий-тадқиқот усули; *зид. анализ*. *Синтез усули билан фақатгина табиий фанларнинг эмас, балки техник ва ижтимоий фанларнинг интеграциялашуви натижасида кибернетика, бионика, семиотика, тизимлар назарияси яратилди*. «Фалсафа».

2 *ким.* Бир хил кимёвий бирикмалардан бошқа бирикмаларни ёки содда элементлардан мураккаб бирикмаларни ҳосил қилиш; шундай бирикмаларнинг ҳосил бўлиши. *Саноатнинг йирик тармоқлари, жумладан, бўяғичлар, пластмассалар, синтетик каучуклар ва бошқаларни ишлаб чиқариш органик синтез асосида ривожланди*. «ЎЗМЭ». *Ҳужайра ҳаётида оқсил синтези асосий жараён ҳисобланади*. «Фан ва турмуш».

3 *кўчма* Бирор фаолиятнинг умумлашган бирлиги, умумлашмаси; ҳосил бўлган яхлитлик. «*Зайнаб ва Омон*» *позмаси Ҳамид Олимжоннинг урушдан бурунги ижодий фаолиятининг синтезидир*. «Ўзбек адабиёти».

4 Бир неча хил санъат тури қўшилмаси, бирикмаси (инсонга ҳар томонлама эстетик таъсир кўрсатади). *Санъатимизда замонавий меъморчилик билан монументал санъат синтези тобора табиий тус олмоқда*. Газетадан.

СИНТЕЗАТОР [юн. synthesis – бириктириш, қўшиш, боғлаш] Маълум дастур асосида барча куй ва усуллар, турли чолғу асбоблари ва табиат товушлари, қушлар овози, шунингдек, табиатда мавжуд бўлмаган янги товушларни чиқариб берувчи мураккаб электрон муסיқа асбоби. *Синтезатор мусиқаси*. ■ *Ўзбекистонда турли русумдаги синтезаторлар 1980 йилларнинг бошларида пайдо бўлиб.. баъзида концерт жараёнида ҳам жорий этилмоқда*. «ЎЗМЭ».

СИНТЕЗЛАМОҚ 1 Синтез йўли билан текширмоқ, умумлаштирмоқ, бирлаштирмоқ, синтез қилмоқ.

2 *ким.* Синтез йўли билан ҳосил қилмоқ, олмоқ, синтез қилмоқ. *Янги препарат синтезламоқ*.

3 Бир-бирига қўшиб, сингдириб юбормоқ. *Чунки у [Ш. Холмирзаев] ҳикоя ечимида узоқ ўтмишга алоқадор одат билан янги давр воқелигини бадиий синтезлай олади*. «ЎТА».

СИНТЕТИК [юн. synthetikos – бириктирувчи, қўшувчи, уловчи] **1** Синтезга, бутунлигича узвий боғланишда олиб текширишга асосланган. *Тадқиқотнинг синтетик усули*.

2 Узвий боғланишда бирикиб умумлашган, узвий боғланишда умумлаштирилган. *Синтетик образ*.

3 Синтез йўли билан ҳосил қилинган, олинган. *Синтетик каучук. Синтетик тола. Синтетик полимерлар. Синтетик кир ювиш воситалари*. ■ *Синтетик кристалларнинг 10 мингга яқини – анорганик моддалар*. «ЎЗМЭ».

4 *тли.* Қўшимчалар қўшиладиган; морфологик шаклли. *Майл категорияси ўрганилганда, шу кунгача унинг синтетик йўлда ясалишига кўпроқ эътибор берилиб, аналитик йўл билан ясалишига деярли аҳамият бермай келинарди*. «ЎТА».

СИНУВЧАН Салга синадиган, мўрт, нозик. *Синувчан ғишт. Қариганда суяк синувчан бўлиб қолади*.

СИНУВЧАНЛИК *махс.* Металларнинг уларга бирон куч таъсир эттирилганда пайдо бўладиган зўриқишларга қаршилик кўрсатиш хоссаси. *Бирон-бир маҳсулот учун материал танлашда уларнинг синувчанлик хоссаси ҳисобга олинади*. «ЎЗМЭ».

СИНУС [лот. sinus – эгрилик, қийшиқлик] *мат.* Тўғри бурчакли учбурчак ўткир

бурчаги қаршисидаги катетнинг гипотенузага нисбатидан иборат тригонометрик функция. *Бурчакнинг синусига қараб унинг катталигини аниқламоқ.* ■ *Раҳматулла Ибодов Мирзо Улуғбек тузган жадвалдаги синуслар қийматининг тўғрилигини текшириб чиқди.* Газетадан.

СИНУСОИДА [юн. sinus — букилган, эгилган жой, қийшиқлик + eidos — кўриниш; қиёфа; хил, тур] *мат.* Синуснинг бурчак ўзгаришига боғлиқ ҳолда ўзгаришини график тасвириловчи тўлқинсимион ясси эгри чизиқ.

СИНФ I [а. صنف — хил, нав; тоифа, бўлинма] Кишиларнинг тарихан шаклланган ишлаб чиқариш тизимида, ижтимоий меҳнатни ташкил этишда муайян мавқе ва ўринга эга бўлган, ишлаб чиқариш воситаларига, ижтимоий бойликнинг тақсимланишига бир хил дахлдорлиги ва манфаатларининг умумийлиги жиҳатидан бирлашган катта гуруҳи; нисбатан барқарор бўлган катта ижтимоий қатлам. *Ижтимоий синфлар.* *Мулкдорлар синфи.* ■ *Ўзбекистонда фуқароларга мулкдор бўлиш ҳуқуқининг берилиши жамиятни қарама-қарши синфларга бўлиб ўрганиш ғоясини ҳам инкор этади.* «ЎЗМЭ». *Ҳозир социологияда жамиятни синфларга ва бошқа ижтимоий гуруҳларга бўлишнинг турли мезонлари илгари сурилмоқда.* «ЎЗМЭ».

СИНФ II [а. صنف] I Ўқувчилар томонидан бир ўқув йили давомида эришиладиган умумий билим савияси; мактаб таълимнинг ҳар бир босқичи; мактабнинг асосий таркибий бирлиги. *Синфдан синфга ўтмоқ.* ■ *Таълат ўнинчи синфни кумуш медаль билан тамомлади.* Ў. Ҳошимов, Қалбингга кулоқ сол. 10- «А» синфида ўқийдиган Рустам.. *кузда пахта байрамига атаб мактабда ўтказилган кечада рубоб чалиб, ашула айтганида ҳам уни яхши кўраркан.* Ў. Ҳошимов, Қалбингга кулоқ сол.

2 Ўқув юртларида машғулот ўтказиладиган хона, аудитория. *Ёруғ синф.* *Синф доскаси.* ■ *Синфга киришим билан, болалар қичқириб юборишди: -Ур-ре-е, Ҳожжи келди.* Э. Раймов, Ажаб қишлоқ. *Ўқувчи «биз кўпчиликмиз, ўқитувчи ҳаммамизни баравар кўролмайди», деб ўйлайди.* Ҳолбуки, ўқитувчи синфдаги ҳар бир боланинг нима қилаётгани-

ни аниқ билиб туради. Ў. Ҳошимов, Қалбингга кулоқ сол.

3 *Кўчма* Бошланғич ва ўрта мактабларда ўқув йили давомида ягона ўқув дастури асосида таълим олувчи ўқувчилар жамоаси. *Синф раҳбари.* ■ *Синф бир оғиздан «Ассалому алайкум!» деб қичқирди.* М. Исмоилий, Фарғона т.о. *Мактабда ёмон бўлсам, ё икки кун бормасам, бутун синф оёққа турарди.* «Ёшлик».

4 Бадий ўқув юртларида ўқувчиларнинг бирор ўқув фани бўйича ихтисослаштирилган гуруҳи. *Композиция синфи.* ■ *Маликани Ўзбекистон халқ артисти С. Қобулова синфига ўқишга қабул қилиш мақсадида тайёрлов курсида ўқитишди.* Газетадан.

5 *биол.* Ўзаро қариндош ҳайвонлар ёки ўсимликлар туркумларини бирлаштирувчи категория. *Сутэмизувчилар синфи.*

СИНФДОШ Бир синфда ўқийдиган ёки ўқиган болалар (бир-бирига нисбатан). *Синфдошлар билан учрашув.* ■ *Зебунисо — Зумраднинг синфдоши.* *У жуссаси чоғроқ, камган, мулоҳазали қиз эди.* С. Сиёев, Отлиқ аёл. *Шундоқ тўполончи боланинг бирданига ювош бўлиб қолганини кўриб, синфдошлари ҳайрон эди.* Ў. Ҳошимов, Қалбингга кулоқ сол.

СИНФИЙ [а. صنفى — синфга оид, тур, тоифага алоқадор] I Синфларга, ижтимоий қатламга оид. *Синфий жамият.*

2 Бирор синфга хос бўлган, бирор синфга мансуб. *Ишлаб чиқариш, савдо-тижорат, воситачилик, ҳунармандчилик.. эркин ижодий фаолиятда машғул хусусий.. тадбиркорлар мустақил Ўзбекистонда шаклланаётган мулкдорлар синфининг илдам ўсаётган ички синфий қатламларидир.* «Мустақиллик» луғати.

СИНФХОНА с.т. айн. **синф** II 2. *Йўлдошев дарса кирганида, синфхона сеҳрли овозга тўларди.* Газетадан. *Коридорлар, заллар, синфхоналар, фан кабинетлари юксак дид билан қайта жиҳозланди.* Газетадан.

СИНХРОН [юн. synchronos — бир вақтли, даврли < syn — бирга + chronos — вақт, давр] I Бир-бирига мос равишда, айни бир вақтда, баб-баравар содир бўлган ёки бўладиган, синхронизмга, синхронликка эга бўлган. *Синхрон айланиш.* *Синхрон ҳодисалар.* ■ *Имо-ишоралар «тили»ни, аниққса, синхрон таржима ва кинофильмлар ўғирмаси билан шуғулланувчи таржимон-мутахассис-*

лар аниқ фарқламоқлари даркор. *Ф. Саломов, Таржима назариясига кириш.*

2 Айни бир давр тилини давр, вақт омили ва лисоний ўзгаришларга боғлиқ бўлмаган ҳолда тавсифлашга оид, алоқадор. *Синхрон тахлил.*

СИНХРОНИЗАТОР *тех.* Маълум жараёнларни ёки машина, механизм ва ш.к. нинг ишини синхронлайдиган, ўзаро мувофиқлаштирадиган, мослаштирадиган қурилма, мослама.

СИНХРОНИЗМ [*юн. synchronismos* – бир вақтlilik] Икки ёки бир неча ҳодиса, жараён ва ш. к. нинг бир-бирига мос равишда айна бир вақтда, баб-баравар содир бўлиши.

СИНХРОНЛАМОҚ Икки ёки бир неча ҳодиса, жараён ва ш.к. нинг ўзаро мос равишда айна бир вақтда, баб-баравар содир қилмоқ, содир бўлишига имкон яратмоқ.

СИНХРОНЛИК Ўзаро мос равишда, айна бир вақтда содир бўлишлик. *Харакатларнинг синхронлиги.*

СИНЧ *бнк.* **1** Бино ва иншоотлар деворининг таглик ёғоч билан саррови ўртасига қадалган ёғочлар. *Лайлак уя бостирманинг олди кўтарилиб, орқаси кўча томонга босиб кета бошлади. Унча зич қилиб қоқилмаган синчлар орасидан дув этиб гувалалар тўкилиб тушди.* **Д.** Нурий, Осмон устун.

Синч девор Синч қадаб, гувала териб қурилган девор. *Ўртасига атиргул, райхон ва гултожхўроз экилган ҳовлининг ўнг томонидаги йўлак бўйлаб юриб, юқоридаги синч девор(ли) пастак уйга киришди.* «Муштум».

Синч уй Деворлари синч қадаб қурилган уй. *Пастак гувала уйлардан тортиб, болохонали синч уйларнинг кўпи пинагини бузмай, гердайиб турарди.* «Шарқ юлдузи».

2 Иморатнинг, деворнинг шу қисми учун боп ёғоч. *Иморатга синч олмоқ.*

СИНЧАЛАК *зоол. шв.* Читтак. *Девор тагидан пирр этиб синчалак учди.* **А.** Эшон, **Д.** Дутор.

СИНЧАЛОҚ *Жимжилоқ, кичик бармоқ.* *Шунда кампир маликадан бу гапни эшитиб, синчалоғини тишлаб, тўхтаб қолди.* «Эртақлар». *Маматурди қора синчалоғи билан ўнг қулоғини бир кавлаб олгач, жулдуз дўпписини елкасига ташлаб, уйдан чиқади.* **Чўлпон,** **Кеча** ва **кундуз.**

СИНЧИ *фольк.* Отларнинг зотини, наслини, ёшини, феъл-атворини яхши би-

ладиган одам. [*Шербек*] *Отнинг тилини Йўлдош новчадай биладиган синчи йўқлигига иқрор бўлса-да, бирор марта номини оғзига олмаган эди.* **С.** Анорбоев, **Оқсой.** *Синчи, отнинг таърифини қилиб, «чини шул» деб, бир сўз айтиб турган экан..* «Алпомиш».

СИНЧИКЛАМОҚ: *синчиклаб* Зўр диққат билан, майда-чуйдасигача, икир-чикиригача, ипидан игнасигача, миридан сиригача қолдирмай. *Синчиклаб қарамоқ. Синчиклаб текширмоқ.* ■ *Ёдоор оёқларига тош боғлангандай имиллаб олдинга чиқаркан, Маҳмуда Алиевна ўзига синчиклаб қараб қўйганини пайқади.* **Ў.** Ҳошимов, **Қалбингга** қулоқ сол. *Врач болаларни синчиклаб кўрар экан, уларни оналарга хос сўзлар билан эркалайди.* **М.** Хайруллаев, **Оппоғим.**

СИНЧИЛИК Отларнинг зотини, феъл-атворини, ёшини аниқлаш билан шуғулланиш; синчи касби. *Баракалла Равшанининг синчилигига, биз ҳам синчилик даъвосини қилиб юрган эканмиз, синчилик мана бундай бўлар экан.* «Гўрўғли».

2 Бирор нарсани синчиклаб, диққат билан ўрганиш, кузатиш хусусияти. *Баъзида телба-тескари гапириб қўйгани билан, қурғурнинг синчилик сиёғи бор.* «Ёшлик».

СИНЧОКОВ *Синчиклаб, зўр эътибор билан қарашга, текширишга одатланган, ҳеч нарсани назар-эътибордан четда қолдирмайдиган.* *Синчков назоратчи.* ■ *Мирзамухаммад Расулович етти ўлчаб, бир кесадиған, мулоҳазали, синчков, зукко одам эди.* **Ф.** Мусажонов, **Ҳиммат.** *Онаси водопровод жўмраги олдида юз-қўлини юваётган қизига синчков назар билан қаради.* **С.** Зуннунова, **Гўдак** ҳиди.

СИНЧКОВЛИК Зўр диққат, эътибор билан кузатиш хусусияти. *Кузатувчининг синчковлиги.* ■ *Нодира [чолга] синчковлик билан қараб, ундан гап сўрамоқчи бўлиб турарди.* **С.** Юнусов, **Кутилмаган** хазина. *Алимардон билан Муқаддамнинг тўйи ўтганидан бери у одамларга ўзгача бир синчковлик, ички алам, ишончсизлик билан қарайдиган бўлиб қолди.* **Ў.** Ҳошимов, **Баҳор** қайтмайди.

СИНЧКОР *айн. синчли.* *Синчкор иморат.* ■ *Синчкор уйлар қуриш усули ҳам халқимизда кўп асрлардан бери маълум.* Газетадан.

СИНЧЛИ Деворлари синч қадаб қурилган; синчкор. *Синчли девор.* ■ *Синчли уйнинг афзалликлари ота-боболаримиз замонидан маълум.* Ж. Абдуллахонов, Хонадон. *Зилзила бу маҳаллаларни ҳам тебратиб, томларнинг чангини чиқарса-да, лекин синчли уйларни қулатолмаган эди.* «Шарқ юлдузи».

СИНЬКА [р. синий – кўк, кўкиш ва синить – кўкка бўямоқ; кўк бўёк] Газлама, кийим-кечак ва ювилган оқ буюмларга кўкиш тус бериш учун ишлатиладиган кукун бўёқ. *Ювилган кирни синькага солмоқ.* ■ У [Тожибой] *то гапириб бўлгунча терлаб, синькага солинган яктаги жикқа ҳўл бўлиб, олатароққа айланиб кетди.* С. Аҳмад, Муҳаббат.

СИНЬКАЛАМОҚ Синькага солиб кўкиш тус бермоқ. *Кўйлакни синькаламоқ.*

СИОНИЗМ [қад. ях. Қуддус яқинидаги Сион тепалиги номидан] 19-аср охирида вужудга келган, яхудийларнинг Фаластинга келишини рағбатлантириш ва у ерда яхудийлар давлатини тузишни мақсад қилиб қўйган яхудий миллий ҳаракати.

СИОНИСТ Сионизм тарафдори. *Жаҳон сионистлар ташкилати 1897 йилда тузилган, қароргоҳи – Исроил ва АҚШда.* «ЎзМЭ».

СИПАР [ф. سپر – қалқон; тўсиқ, гов] 1 тар. Қалқон, совут; ўқ, найза, қилич ва ш. к. қуроллар зарбидан сақланиш учун қўлланган доира ёки бирор бошқа шаклдаги қадимий аслаҳа; қалқон. *Қиличга бу рад бериб, Бошига сипарин тутди.* «Ширин билан Шакар».

СИПО [ф. سپاه – қўшин, аскар] 1 Камтар, камсуқум, оддий. *Сипо одам.* *Сипо кийинмоқ.* ■ *Комила беқасам кийиб, сўрида сипогина ўтирган Азимжонга кўз қирини ташлаб қўйди.* А. Мухтор, Чинор. *Баланд бўйига сипо қилиб тикилган гўлдор кўйлаги ёпишиб турарди.* Ҳ. Зиёхонова, Биринчи мактуб.

2 Оғир, вазмин, босиқ. *Ўзини сипо тутмоқ.* ■ *Йигит улар билан сипо саломлашиб, қўлидагиларни столга қўйди.* А. Обиджон, Аканг қарағай Гулмат. *Энди иўхлик қаёқда дейсиз, Юришларим сипо ва ўйчан.* А. Орипов, Йиллар армони.

СИПОГАРЛИК айн. **сипогарчилик.** *Саид сипогарликни қўлдан бермаган ҳолда, уларни эркалаган бўлади.* Х. Султонов, Бир оқшом эртаги.

СИПОГАРЧИЛИК Ўзини жуда оддий, камтарона тутишлик; одмилик; хушмуомалалик. [Бой] *Сипогарчиликни йиғиштириб қўйиб, аслига қайтди.* Н. Фозилов, Оқим.

СИПОЛИК Камтарлик, камсуқумлик; босиқлик. – *Мен у кишининг гапларига бирор қўшимча қилишга ожизман, – деди Саидғози ва креслода савлат тўкиб ўтирган раисга қараб, сиполик билан бош ирғатди.* С. Анорбоев, Оқсой. *Қора кийиниб олган Бадиа меҳмонларга чой-нон қўйиб, сиполик билан хизмат қиларди.* Мирмуҳсин, Меъмор.

СИПОРИШ [ф. سفارش / سپارش – топшириқ, буюртма; фармойиш, амр; тавсия, кафолат] 1 эск. кт. Топшириқ, вазифа, ўғит, насиҳат. [Ҳасанали]. *«ўлганимдан кейин.. бир вақтлар Ҳасанали ота ҳам бор эди деб ёдласа, менга шуниси кифоя!»* деб қарор берган ва ҳозирдан бошлаб *Отабекка бу тўғрида сипоришлар бериб, ундан самимий ваъдалар олиб юргувчи оқ кўнгилли бир қул эди.* А. Қодирий, Ўтган кунлар.

2 Эъзоз-эҳтиром, илтифот, мулозамат ёки хушомад. *Тешабой Ашурмирзонинг таънаю таъзиридан ҳали қанчалик ерга кириб кетган бўлса, ҳозирги сипоришдан кўкрагига шабада тегиб, қаддини [шунчалик] ростлаб олади.* М. Исмоилий, Фарғона т. о. [Нор Мастурага:] *Келинг, хола. Ҳаммага сипориш қилсангиз ҳам, менга савдони очиқ қилаверинг.* Ҳамза, Паранжи сирлари.

СИПОРИШЛАМОҚ Мулозамат, иззатикром ёки хушомад қилмоқ. – *Вой, ош айлансин сизлардан. Одам бор ерга одам келарди-да, адаси, – деб гапини сипоришлади энди Ноуба ва дастурхон ёзишга шошилди.* М. Мансуров, Ёмби.

СИПОҲ [ф. سپاه – ҳарбий бирлашма; қўшин, армия] тар. Подшоҳ, хон, амир саройида узоқ хизмат қилган лавозимли киши; амалдор. *Сипоҳнинг оинаси бўлмас.* Мақол. ■ *Эшикни қия очиб, нотаниш кишиларга совуқ назар ташлаган, юзлари гўштдор уй эгаси сипоҳларга хос нурвиқорлик билан «Хизмат?» дегандек қаради.* Мирмуҳсин, Меъмор.

2 Жангчи, аскар. *Деҳқон бўлсанг – қошида бўл, сипоҳ бўлсанг – бошида бўл.* Мақол. ■ *Қиличи синиб, қалқони тешилган сипоҳлардек, она-бола китоб-дафтарларни кўтариб, боғ дарвозаси томон юриша бошлади.* Мирмуҳсин, Умид. *Муҳаммад Раҳимхон йўл ёни-*

да саф тортган сипоҳларга қараб бош чай-қади. С. Сиёев, Ёруғлик.

3 Шахмат ўйинида: пиёдадан катта доналар (фил, от, рух, фарзин). *Бир пиёдага бир сипоҳни қурбон бермоқ.*

4 кўчма айн. сипо. -Қачондан бери сипоҳ бўлиб қолдинг? — таъна қилди бошьяланг. Шуҳрат, Шинелли йиллар. *Шерназарбой ҳаммадан сипоҳ кўринган эди. Ж. Шарипов, Хоразм.*

СИПОҲГАРЧИЛИК айн. **сипогарчилик.** *Сипоҳгарчилик қилмоқ.* ■ [Шарофат] *Сипоҳгарчиликни кўлдан бериб қўймаслик учун бирпас жим қолди-да, кейин қошини бир оз чимириб, сўз бошлади. А. Қаҳҳор, Кўшчинор чироқлари.*

СИПОҲИ(Й) [ф. سپاهى — аскар, жангчи] **1 айн. сипоҳ 1, 2.** *Махдум машқхонадан чиқиб, ичкари киришга одим узган ҳолатда дарвозадан сипоҳи кийимида бир киши кирди ва махдумга салом бериб, яқинига юриб келди. А. Қодирий, Мехробдан чаён.*

СИПОҲЛИК 1 тар. Амалдорлик, иш бошилиқ.

2 Аскарлик, жангчилик.

3 айн. сиполик. *Йўлдошга айтиб қўйинг, ҳадеб менинг жиғимга тегавермасин. -Хўп, — деди Турсунов сипоҳлик билан. Ибохон, Улуғ йўл.*

СИПОҲСОЛОР [ф. سپاهسالار — бош кўмондон; кўшин етакчиси] *тар. ҳарб.* Лашкарбоши, бош кўмондон. *Хива хонлигида жами отлик ва пиёда кўшинга сипоҳсолор кўмондонлик қилган. «ЎЗМЭ».*

СИПСАР [ҳинд. < سپسار — тимсоҳ < ф. سپاهسر — қора бош] *Ҳиндистон дарёларида яшайдиган, тумшуги ингичка ва узун тимсоҳ.*

СИП-СИЛЛИК 1 Силлик с. нинг куч. *Сип-силлик тахта. Сип-силлик ойна. Сип-силлик бош.* ■ *Директорнинг столи сип-силлик эди. Х. Султонов, Онамнинг юрти.*

2 Худди бегуноҳ каби; бежанжал, беишқал, текис. *Саодат давом этди: -Ўтган кенгашда директорингиз бу ҳақда оғиз очмади, сип-силлик бўлиб, минбардан тушиб кетди. А. Мухтор, Қарс икки қўлдан чиқади. Баталов билан Бобожонов милиция ходимларининг бошини айлантириб, сип-силлик чиқиб кетишди. «Муштум».*

СИПҚАРМОҚ Бир симиришда ичмоқ, таги-тутигача симирмоқ. *Аҳмад Танбал мин-*

натдорона бош ирғаб, майни сипқарди-ю, кейин дастурхондаги тандиркабобга қўл чўзди. П. Қодиров, Юлдузли тунлар. Бобо Хурмо, киприксиз кўзларини мастона ўйна-тиб, бир эмас, икки коса шарбатни устустига сипқарди-да, ҳикоясини бошлади. О. Ёкубов, Кўҳна дунё.

СИПҚИРМОҚ с.т. айн. **сипқармоқ.** *Полвоннинг томоғи тақиллаб турган эди: -Бўпти, олдиқ, — деди ва бир сипқириб, пиёлани бўшатди. С. Сиёев, Отлик аёл. Ёзда ариқ лабида ўтириб, бир пиёлага анор сувини сиқиб сипқармоқни ким севмайди дейсиз?! И. Тўлқин, Али бобо боғи.*

СИР 1 [а. سر — махфий нарса, яширин иш ёки гап; қалб, кўнгил] **1** Ўзгалардан махфий тутилган ёки ўзгаларга номаълум бўлган бирор иш, гап, нарса ва б. *Ҳарбий сир. Юракдаги сир. Сир сақламоқ. Сир тутмоқ. Сирни ошқора қилмоқ. Душманнинг кулгани — сирингни билгани. Мақол. Ўз дўстим деб сир айтма, дўстингнинг ҳам дўсти бор. Мақол. ■ Отабек нима деб айтишга сўз тополмай қолди. Чунки юрак сирини ифода қиларлик жумла топиш мумкин эмас эди. А. Қодирий, Ўтган кунлар. Аҳмад юрагида яшириб юрган сир туну кун, бир дақиқа ҳам унга тинчлик бермасди. Ф. Мусажонов, Ҳиммат.*

2 Ҳали очилмаган, аниқланмаган, илмфан ҳали ўрганиб етмаган, инсон учун ҳали номаълум нарса. *Коинот сирлари. ■ Ойга учирилган иккинчи ракетга космос сирларини билишга доир қимматли маълумотлар берди. «Фан ва турмуш». Олимларнинг ушбу ҳолдан Чимирилди қошлари. Бу қанақа сир бўлди, деб Тамом қотди бошлари. А. Орипов, Йиллар армони. Одамзод доимо дунё сирларини билишга ҳаракат қилиб келган. «Фан ва турмуш».*

3 Бирор соҳа ёки фаолият турининг ўзигагина хос бўлган хусусият; малака. -*Бўтам, сиз кошинпазлик ҳунаридаги ҳамма сирларни диққат билан ўрганганмидингиз? [деб сўради Меъмор]. Мирмуҳсин, Меъмор. Бадиий ижод сирларига, ижод психологиясига қизиқиш омавий маънавий эҳтиёжга айланиб қолган экан, уни ўраниш фойдали. У. Норматов, Талант тарбияси.*

Миридан сиригача Ипидан игнасигача, бошдан-оёқ; батафсил. *Зиёдуллага бу ҳунар ёқиб тушган, уни миридан сиригача эгаллаб олиш учун бутун кучи, зехнини ишга солган*

эди. Ҳ. Назар, Ўтлар туташганда. **Сир босмоқ** Салобати босмоқ, ийманмоқ. *Меҳмоннинг сирни босанлигиданми ёки меҳмон кутиш ташивишиданми, у нимагадир ичидагини ташига чиқармас эди.* И. Раҳим. Хислат.

СИР II 1 Ялтироқ минерал ёки мойбўёқ. Унинг [мачитнинг] баланд ва сирни кўчиб кетган эски устунли айвонида уч-тўртта намозхон ўтиришибди. П. Турсун, Ўқитувчи. Бу мақбаранинг ичи сир берилган жуда гўзал тошлар билан безалган бўлиб, Хоразм наққошлик санъатининг юксак намуналаридан биридир. Ж. Шарипов, Хоразм.

2 Металл буюм ва идиш-оёқ сиртига қопланадиган шишасимон масса; эмаль. Сирни кўчган кастрюлька. ■ *Хаял ўтмай, бир чойнакда кўк чой, сирни кўчган патнусда тўртта бозор нони кўтариб келди Қудрат.* М. Исмоилий, Фарғона т.о.

3 Симобнинг бирор металл билан қотишмаси ёки металлнинг симобдаги қотишмаси; амальгама. Сирни кўчган ойна.

СИР III [р. сырой — ҳўл, нам; хом, пишмаган] айн. **пишлоқ**. *Аёл сумкасидан сир билан колбаса олиб, [Олимжон ва Манзурани] меҳмон қилди.* А. Мираҳмедов, Кулган чечаклар. *Рестораннинг орқа эшигидан икки тўр халтани яхна гўшт, сир, коньяк, кўкпиез ва помидорларга тўлдириб чиққан Нусратбек уйга ошиғич қайтиб келди.* С. Нуров, Майсаларни аёз урмайди.

СИРА I рвш. **1** Асло, асти, мутлақо, ҳеч. Бунинг сира иложни йўқ. ■ *Аҳмад бу гапни сира кутмаган эди, ток ургандек эти жимирлашиб кетди.* Ф. Мусаҷонов, Ҳиммат. *Авжи қиш вақти бўлса ҳам, ерда сира қор йўқ.* С. Зуннунова, Янги директор. *У ўтирганлардан сира тап тортмасдан шеърини баланд овоз билан ёддан ўқиди.* К. Яшин, Ҳамза.

2 [фақат бўлишсиз фл. билан] Ҳеч қачон, ҳеч вақт. *Энди бу ерга сира келмайман. ■ Бари бир, мен Гулнор опани унутмайман сира, уни кўргани тез-тез келиб тураман.* Ойбек, Танланган асарлар. *Канал очилган кун эсингизда борми? Каналдан оққан чироқлар кўз олдимдан сира кетмайди.* Бу ўйин эмас, халқнинг орзуси эди. А. Қаҳҳор, Кўшчинор чироқлари.

3 (фақат сўроқ гапларда) Бирор марта, ҳеч. -*Шаҳодат муфтингизнинг афтига сира қарайсизми. Шоирингизнинг пичингларини*

пайқайсизми? — деди Анвар Султоналига. А. Қодирий, Меҳробдан чаён. *Сиз отамисиз, нимасиз ахир, ўлгингизни тийиб олиш сира эсингизга келадими?* А. Қодирий, Ўтган кунлар.

СИРА II 1 Мунтазам, изчил қатор; кетма-кетлик, тартиб, навбат. *Сонлар сираси.*

2 Саф, қатор. *Пиёдалар сирасида кекса муаррих ва шоир Мирзо, Табибий, Баёний кўринди.* С. Сиёев, Ёруғлик.

3 кўчма Қатор, таркиб. *Ҳар ҳолда, шахмат ҳар қандай ўйиндан шу қадар катта фарқ қиладикки, бу фарқ шахматни узил-кесил ўйинлар сирасига қўшишга имкон бермайди.* М. Муҳитдинов, Мия гимнастикаси. *Мулла Абдураҳмон.. Раённинг эрга берилганлигининг хабарини эшитгач, бу тасодифни истиқболнинг хайрли фоллари сирасига киритди.* А. Қодирий, Меҳробдан чаён.

4 Фикрнинг, гапнинг асосий мазмуни, моҳияти, мағзи; гапнинг пўскаллари. -*Сўзламайман, — деди Тўйбека [Кумушга], — лекин сирасини сўзлайман... Оҳ, кўрсанг эди бир куёвни!* А. Қодирий, Ўтган кунлар. -*Гапнинг сирасини айтақолсангиз-чи, холажон, — дедим ниҳоятда чидамай.* Т. Алимов, Тўй қолди.

Сирасини айтганда Тўғрисини айтганда, гапнинг тўғриси. *Сирасини айтганда, пойтахтлик конструкторлар бизга ёрдамга келишади, деб ўйламаган эдик.* Газетадан.

СИРАСИГА рвш. кам қўлл. Сурункасига, қаторасига; бетўхтов. *Уч кун сирасига ёмғир ёғди.*

СИРА-СИРА Сира I 1, 2 с. нинг куч. *Сира-сира билмайман. ■ Гулчеҳра Султон билан Дилбар ўртасида ғов бўлишни сира-сира истамасди.* М. Хайруллаев, Тилла маржон. *Муллажон унинг кўзига мўлтираб қаради.* Бу қараш Башоратга сира-сира таъсир қилмади. С. Аҳмад, Сайланма.

СИР-АСРОР, сир у асрор [сир + асрор] Барча сирлар (қ. сир I). *Бир ҳафта ўтмаёқ, бу уйдаги сир-асрор Инобатга ойнадек бўлди-кўйди.* С. Аҳмад, Сайланма. *Онаси хат танимас, лекин турмушнинг кўп сир-асрорига ақли етадиган, мулоҳазали аёл.* Ш. Холмирзаев, Оғир тош кўчса.

СИРАЧ I бот. Пиёздошларга мансуб, адири ва тоғларда ўсадиган кўп йиллик ўсимлик.

2 Шу ўсимлик илдииздан олинадиган кукун. Буни [тайёр маҳсиларни] сотиб, чарм,

ип, сирач, мум сингари косибчилик учун керакли ашёларни олади. Ойбек, Танланган асарлар.

3 Қоғоз, чарм ва ш. к. ни ёпиштириш учун шу кукундан сувга қориб тайёрланган, кўпинча этикдўзликда, косибчиликда ишлатиладиган елим. Акбарали.. отасининг ёнида ип эшиб, сирач қорар, ойисининг ўғирда жўхори талқон туйиб, заранг косага бир қошиқ шинни солиб беришини тоқатсизлик билан кутарди. А. Мухтор, Чинор.

4 кўча с. т. Сурбет, хира, елим (одам ҳақида).

СИРАЧЛАМОҚ Сирач суртмоқ, сирач суртиб ёпиштирмоқ, сирач билан ёпиштириб ясамоқ. Агар ҳаво варракбон бўлиб, шамол турса, варракни шошиб-пишиб сирачлайман-да, қуримасданоқ кўтариб, томга югураман. Ойбек, Болалик.

СИР-АЪМОЛ [сир + аъмол] айн. **сир-синоат**. Унинг {Ражаб тегирмончининг} сираъмоли Ҳасан овчига маълум. Ш. Тошматов, Эрк қуши.

СИРГОҲ [а. + ф. سرگاھ – сирлар макони] кам қўлл. Сирлар макони, сирли макон. Аввало шунга айтай: бу олам, дарҳақиқат, ғоят мураккаб сиргоҳ ва коргоҳдир. В. Зоҳидов, Гўзаллик нимада?

СИРДОШ 1 Бир-бирига сирини ишониб айтувчи, ҳамлард кишилар (бир-бирига нисбатан). Ёмон билан йўлдош бўлма, Нодон билан сирдош бўлма. Мақол. ■ Улар бир-бирларига сирдош, ҳамфикр, меҳрибон бўлиб улғайдилар. К. Яшин. Ҳамза. Илгарилари ўт билан сувдек бўлган кундошлар энди сирдош бўлиб, чекка-чеккада пичирлашадиган бўлдилар. А. Мухтор, Опа-сингиллар.

2 кўча Барча сир-асрори, тарихининг гувоҳи; асрдош. Бахмал соҳилиннга кўз тикиб қолдим, Асрлар сирдоши, эй улуг дарё. Гайратий. Дарё – саҳронинг азалий сирдоши. У ҳам кўм рангида тўлғанади, у ҳам саҳродек чексиз ва қадимий. А. Мухтор. Бўронларда бордек ҳаловот.

СИРЕНА [фр. sirène < лот. siren < юн. seipen – юнон мифологиясида ўз кўшиқлари билан денгизчиларни хавфли, ҳалокатли жойларга чорловчи, бош ва кўкрак қисми аёл қиёфасидаги афсонавий қуш] Маёқ, кема ва ш. к. да қўлланадиган ва сиқилган ҳаво ёки буғ билан ишлайдиган, кучли товуш сигнали берадиган асбоб ва унинг

сигнали. Кема сиренаси. ■ Йўлдош блиндаждан чиққанда, ўрмоннинг аллақайси бир еридан сирена чинқирғи эшитилди. Ҳ. Фулом, Тошкентликлар.

СИРЕНЬ [нем. Sirene < лот. syringa < юн. syrinx – найча; сибизға] қ. **настарин**. Сирень кўчатики кузда ўтқазган маъқул. «Фан ва турмуш». Сиренлар, сиренлар, ҳар кун эрталаб Деразамни очиб кўраман сизни. Х. Салоҳ, Чашма.

СИРИЛМОҚ 1 Сирмоқ фл. мажҳ. н. Духоба сирилган диван. ■ Шерали, бошиқ кабнетидан чиқиб, рўпарадаги устига қора чарм сирилган эшикни очиб, хонага кирди. С. Кароматов, Олтин кўм.

2 Сирмоқ 2, 3, 4 фл. ўзл. н. Отлар эрта-лабдан бери сирилиб ётибди.

Пиёз пўстидай сирилмоқ Очликдан сулаймоқ, оч қолмоқ, оч ўтирмоқ. Чой-пой ичсак бўлар эди. Қорин ҳам пиёз пўстидай сирилиб кетди-ку. О. Толибов, Анқов.

СИРИУС [лот. Sirius – Катта Ит юлдуз туркуми] Катта Ит юлдуз туркумининг бир юлдузи; осмон сферасидаги энг ёруғ ва Кўёшга яқин қўшалок юлдуз. Сириус қўшалок юлдуз бўлиб, компонентлари бир-бирининг атрофида 50 йил давр билан айланиб туради. «ЎЗМЭ».

СИРИҚ шв. 1 Шипни тутиб, кўтариб туриш учун уй ўртасига ўрнатилган йўғон устун, тиргович. Йигитчиликда ўйнаб-кулиб қолиш керак. Мана, ўзингиз ҳам қора сочу қора кўз, сиріқдек йигитсиз. Н. Қобил, Унутилган соҳиллар.

2 Темир ёки ёғоч косов.

СИРКА I [ф. سرکه / سرکا] Сирка кислота-нинг сувдаги эритмаси – меваларни консервалашда, овқатга қўшиладиган зиравор сифатида ишлатиладиган ўткир ҳидли, ачиқ-нордон мазали суюқлик (уй шароитида узум, олма ва ш. к. ширин меваларнинг шарбатидан ҳам махсус усулда тайёрланади). Узум сиркаси. Овқатга сирка солмоқ. ■ Овқатга мурч, пиёз, сирка кабиларни.. қўшиш, лимон суви ёки нордонроқ дорилар бериш иштаҳа пайдо қилиши мумкин. Н. Исмоилов, Касалларни парвариш қилиш. Тўлаган энгашиб, дастурхоннинг бир четига соқолини артди, дон тиқилган товўқдай бўйинини чўзиб кечирди, сирка ичканди афтини буруштириб: -Жуда тўйдим.. Азбаройи худо!.. А. Қаҳҳор, Танланган асарлар.

Сиркаси сув кўтармайдиган (одам) Гап кўтармайдиган, таъби нозик одам. *Мажлисда унга: -Сен бола, чучварани хом санаб юрибсан. Шошма ҳали, жўжани кузда санаймиз. Бу қанақаси, сирканг сув кўтармайдиган бўлиб қопти, — дейишди.* С. Аҳмад, Сайланма. *Ҳақиқатда, [Исмоил ота] сиркаси сув кўтармайдиган одам.* У. Назаров, Исмоил тажанг.

СИРКА II Бит тухуми. *Ёмондан ит яхши, Сиркадан бит яхши.* Мақол. *Боланинг эркаси — битнинг сиркаси.* Мақол.

СИРКАЛАМОҚ I Юмшатиш, таъм бериш учун сирка қўшиб аралаштирмақ. *Пиёзни сиркаламоқ.* ■ *-Бўлмасам-чи, — деди йигит кулумсираб, — гўшт-да бу, онахон, дудланган, сиркаланган, саримсоқ пиёзи бор, жа хушхўр.* Н. Аминов, Қалтис хато. *Бодрингни қишга тузлаб, сиркалаб ва консерва қилиб олиш эндиликда ғоят кенг урф бўлган.* К. Маҳмудов, Ўзбек тансиқ таомлари.

СИРКАЛАМОҚ II Тухум қўймоқ. *Бунақа жойда ҳар хил қурт, ҳашаротлар сиркалаб, ғуж-ғуж урчиди.* С. Нуоров, Нарвон.

СИРКОЙИ Узумнинг аччиқ тури.

СИРКОР I айн. **сирчи.** *Сиркор уста.* ■ *Меъморларимиз.. сиркор, наққош ва ўймакорлар билан яқиндан ижодий алоқада бўлишлари кутилмаган натижалар беради.* Газетадан.

2 Сирланган, сир (мойбўёк) бериб ишланган, сирли. *Сиркор уй. Сиркор сопол идиш.* ■ *Ҳамма икки тавақали сернақш, сиркор эшикнинг очилишини ва ўз номларининг айтиб чақиришларини кутиб турарди.* М. Осим, Тилсиз гувоҳ. *Исломбой чироғи чарақлаб турган ойнабанд, сиркор айвонда уст-бошидаги қорни қоқиш баҳонасида тўхтаб, ўртадаги деразадан разм солди.* Х. Султонов, Бир оқшом эртаги.

СИРКОРЛИК I Нарсалар сиртига мойбўёк бериб безатиш билан шуғулланиш; сиркор касби. *Сиркорлик касбини ўрганмоқ.*

2 Сир (мойбўёк) билан ишланган безак, гул. *-Тўғри, — деди шипдаги сиркорликка зехи солиб ўтирган дўкон мудури [Холназаровга], — кеча комиссиян магазинда бир буфет кўрдим.* «Мушгум.

СИРЛАМОҚ I Сир (мойбўёк) билан бўймоқ, гул солмоқ. *Деворларни сирламоқ.* ■ *Фақат болохона тагидаги уй ўзгарибди: Оқланибди, янги эшик ўрнатилибди, сирлан-*

ган деразаларда келинлик нишони бўлган нафис дарпардалар.. Ў. Хошимов, Қалбингга кулоқ сол.

2 Сир ёки эмаль билан қопламоқ. *Сопол буюмларни сирламоқ. Тоғорани сирламоқ.* ■ *У устидаги фуфайкасини ечаётиб, бурчакда турган чиройли, чети гуддор, сирланган оқ тоғарачага кўзи тушиб қолди.* Н. Фозилов, Дийдор.

3 Амальгама билан қопламоқ. *Кўзгуларни сирламоқ.*

СИРЛАШМОҚ Бир-бирига сирларини айтмоқ, дардлашмоқ, дилидаги гапларини тўкмоқ. *[Ўзбек ойим ва Офтоб ойим] Сирлашиш учун бошқа уйга чиқиб кетдилар. А. Қодирий, Ўтган кунлар. -Мана, ич, — деди мешкобчи заранг косани тўлдириб узатиб, — ич, жигарим, энди сирлашадиган фақат иккимиз қолганга ўхшаймиз.* Мирмуҳсин, Меъмор.

СИРЛИ I 1 Бошқалардан сир тугилган, яширин, махфий, сири бор. *Чўли бобонинг жой солаётганлар ёнига кетганидан фойдаланиб, Ҳорунбек Меъморга оҳиста сирли бир гапни шивирлади.* Мирмуҳсин, Меъмор. *Улар серсоя дарахтлар остидаги салқин йўлакдан кетиб боришаркан, суҳбатлари яна қуюқлашиб, сирли тус олди.* К. Яшин, Ҳамза.

2 Замирида қандайдир бир сир яширинган; ажиб, ўзига жалб қилувчи. *Шеғрият — ғоят бир сирли олам.* Газетадан. *Унинг узун киприклари ойдинда қоп-қорайиб кўринар, аллақандай сирли гўзаллик берарди чеҳрасига.* Ў. Хошимов, Қалбингга кулоқ сол. *«Тўй» сўзини эшитган Ойнисанинг вужудини сирли бир аланга қамради, юз-кўзи ўт бўлиб ёнди, тошкентликнинг отини ҳам ташлаб, уйи томон қочди.* Ҳ. Фулом, Тошкентликлар. *Бу гапингам тўғри, севги инсоннинг жуда сирли туйғуси деб бекорга айтмаганлар.* С. Кароматов, Олтин қум.

3 Ниманидир, қандайдир сирни яширган, аллақандай бир сири бўлган. *Саидғози.. тингловчиларни энтиктириш учун бир оз тўхтаб, залга сирли назар ташлади.* С. Анорбоев, Оқсой. *У [Баҳром] менга қараб сирли кулди.* М. Қориев, Ойдин кечалар. *-Аканг келяпти, — сирли товуш билан деди Эргаш, — тагин анов кунга ўхшаб бир дўппосласа нима қиласан..* Ҳ. Аҳмар, Ким ҳақ?

4 Кўрқинчли, ваҳимали; юракка кўрқув соладиган. *Шамол ўрмонни сирли, ваҳимали*

садолар билан тўлдирди. Ойбек, Қуёш қораймас. *Бир маромда пишқириётган океан аёлининг кўнглига ваҳм солар, қоп-қора тошлар кўрқинчли ва сирли кўринарди.* «Ёшлик».

5 Илмий жиҳатдан ўрганилмаган, очилмаган, аниқланмаган, маълум бўлмаган. *Ҳамза кўнгида Ҳиндистон сафари иштиёқи туғилган пайдан бошлаб бу сирли мамлакат ҳақидаги ёзма ва оғзаки маълумотларни ўргана бошлаган эди.* К. Яшин, Ҳамза. *Тузди-ю Мирзо Улуғбек Кўрагоний жадвалин, Сирли осмон тоқига илк Кўйди нарвон ўзбегим.* Э. Воҳидов, Мухаббатнома.

СИРЛИ II I айн. сиркор II. *Ағёрнинг сирли меҳмонхонасидан дўстининг сомонхонаси яхши.* Мақол. ■ - *Бу яхши! Бухородек шаҳри азмда юзта кулол бўлса ҳам оз. Бозорларда идишлар кўпайсин, янги биналарга сирли сополлар кўпроқ этказиб берилсин, — деди Меъмор.* Мирмуҳсин, Меъмор.

2 Сир ёки эмаль билан қопланган, сирланган. *Сирли челак.* ■ *Қўлига сирли сопол коса тутган бир қизча қадамларини авайлаб босиб келди-да, косани Ойимхонга топширди ва тез чиқиб кетди.* П. Турсун, Ўқитувчи. *У тахта эшик занжирини тушириб, ичкари кирди. Кигиз ўртасидаги тугунга кўзи тушди. Очса — сирли тоғорада ош, икки шиша ароқ, нон, бозори кулчалар..* «Ёшлик».

СИРМА Усти бирор мато билан қопланган, устига бирор мато сирилган. *Сирма пўстин.*

Сирма тўн (ёки чопон) Пахтаси астар ва миён астар орасига олиб қавилган, устидан авра сирилган тўн. *Унинг бошида қулоқчинли телпак, эгнида кўк сирма калта чопон, чап енига қизил мата боғлаб олибди.* П. Турсун, Ўқитувчи.

СИРМОҚ I I Устини мато билан таранг қилиб қоламоқ. *Диванни қизил духоба билан сирмоқ.*

2 Гавдага ёпишиб таранг турмоқ (кийим ҳақида). *[Аъзам] Бир келса, Таманнонинг ўзи ёлғиз. Худди бир маҳал кўрганидай, баданга сириб тикилган шим ва кофтада.* Шухрат, Жаннат қидирганлар.

3 Маҳкам қилиб боғламоқ. *Уста.. чорсини белига сириб боғлаб, минбарга чиқди.* С. Аҳмад, Ҳодивой.

4 Арқонни калта қилиб боғламоқ, қантариб қўймоқ. *Отни устунга сириб боғламоқ.*

СИРМОҚ II Бирмунча вақт овқат бермай оч қўймоқ, оч қолдирмоқ ёки ўзини овқатдан тийиб, оч ўтирмоқ. - *Овқат-повқатинг борми, опкелсанг-чи, ўлдирдинг-ку сириб, — деди Икромжон Жаннат холага.* С. Аҳмад, Уфқ. *Жувозга қўшилган олимдек чўзилиб, қулоғингиздан кун кўриниб қолбди-ку! Овқатдан ўзингизни сирманг, пул топилади, соғлиқдан ажраб қолманг яна.* С. Нуров, Нарвон.

СИРОП [фр. sirop < а. شراب — шарбат] Мева шарбати ва шакарни қайнатиб тайёрланган қуюқ қиём; шарбат. *Олча сиропи.*

СИРОТ [а. سراط / سراط — йўл] дин. Ислом манбаларида қиёмат куни, охирагда жаннатга бориш йўлида жаҳаннам (дўзах) ўзра тортиладиған қилқўприк [Форсларда ва мусулмон туркий халқларда «пулсирот, пули сирот» деб юритилади. Бунда форсча «пул» (پل) сўзи «қўприк» демакдир. *Тақ-қосланг: Тахтапул — ёғоч кўприк]. Сирот кечмай, қаҳ-қаҳ кулма.* Мақол. ■ *Қурбонлик қилмаган кишилар жаннатга ўзларича ўтишга уринсалар ҳам, сирот кўпригидан йиқилиб, дўзахага тушиб, қаттиқ азоблар эмиш.* Газетадан.

СИРПАНМОҚ I Силлиқ юза, сирт устида монесиз, тўсиқсиз сурилмоқ; сирганмоқ, тойганмоқ. *Сирпаниб йиқилмоқ. Сирпаниб кетмоқ.* ■ *[Адолатнинг] Бошидан сирпаниб кетган паранжиси оёқларига ўралашиб қолди.* С. Зуннуова, Гулхан. *Кабутарлар дам учиб, дам сирпаниб қўниб, гумбаз теварагида қувонч билан иноқ ўйнашар эди.* Ойбек, Навоий.

2 Силлиқ муз, яхмалак ёки қор устида учмоқ, сирганмоқ. *Тепаликдан сирпаниб тушмоқ. Конькида сирпанмоқ.* ■ *Лой, тойғоқ йўлдан эшагимиз қийналиб қадам ташлар, гоҳ сирпаниб, гоҳ йиқилгудек мункиб кетарди.* «Ёшлик».

СИРПАНЧИҚ I Силлиқ, тойғоқ юза, сирт; сирганчиқ. *Сирпанчиқ муз.* ■ *Қаттиқ совуқ бўлиб, кўчалар сирпанчиқ бўлган кунларнинг бирида Афанди Тошкентга ташриф буюрди.* «Муштум».

2 Сирпаниш, коньки отиш учун махсус музлатилган жой, майдон. *Сирпанчиқда коньки учмоқ.* ■ *Болалар танаффусда бири қорбўрон ўйнаб, бири сирпанчиқ учиб юришарди.* Газетадан.

Сирпанчиқ отмоқ Силлиқ муз ёки қор устида учмоқ, сирпаниб ўйнамоқ. *Вали йўлайкай сирпанчиқ отиб келаркан, ўзидан олдинда кетаётган қизчани туртиб юборди.* Газетадан.

3 тех. Станок, мослама, қурилма ва ш. к. нинг сирпанувчи қисмлари сурилиб юрадиган силлиқ йўналтирувчи қисми.

СИРРА: **сирра бўлмоқ** Нима иш қилишини билмай гаранг бўлмоқ, серраймоқ. *Офтоб оймага бу хат музлик сувга шўнғитиб олиш таъсирини берган ва ўтирган ерида сирра бўлиб қотиб қолган эди. А. Қодирий, Ўтган кунлар. Ҳардамхаёллик билан эшикни очиб, Қобил тоғанинг уйига кирдим-у, ўтиришни ҳам, чиқиб кетишни ҳам билмай сирра бўлиб қолдим.* Газетадан.

СИР-СИНОАТ [сир + синоат] қ. **сир** 1, 2. *Ростдан ҳам нима бўляпти ўзи? Ё ўртада мен.. билмаган қандайдир сир-синоат бормикан?* О. Ёқубов, Излайман.

СИРТ 1 Нарсаларнинг ташқи томони, ташқи юзи. *Ер сирти. Ой сирти. Сирти кўк идиш. Мол оласи сиртида, одам оласи ичида.* Мақол. ■ *Бу чойнакнинг сирти ажойиб нақшлар билан безатилган экан. «Олтин олма». Кун тиг тортиб, дарёнинг у томонидаги адирларнинг сирти тўқ яшил, жилғалари қора тусга кирди.* А. Қаҳҳор, Қўшчинор чироқлари.

2 Нарса ёки қимсаннинг ташқи қиёфаси, кўриниши; зоҳирий томони. *Сирти ялтироқ, ичи қалтироқ.* Мақол. *Сирингни сиртинга чиқарма.* Мақол. ■ *Демак, у сиртдан ҳуснга қанчалик бой бўлса, маънавий жиҳатдан ҳам шунча бой экан-ку!* К. Яшин, Ҳамза. *Булар сиртдан мағрурдек кўринадилар. Бироқ бу мағрурликка кирмайдди, буни кибр дейилади.* Шукрулло, Сайланма.

3 Ташқари, чет. *Душманнинг сиртида эмас, ичида бўл.* Мақол. *Синалмаган отнинг сиртидан ўтма.* Мақол. ■ *Зумрад ҳануз сиртда ийманиб турарди. С. Сиёев, Отлиқ аёл. Мен қўл қўйиб, муҳр босар эдим-у, лекин сиртдан туриб сизларга ёрдам берганим мақбул.* Ж. Шарипов, Хоразм. *Йўқ, шоир ҳиссини бўлмайди алдаб, Сиртдан баҳо бериб бўлмас кишига.* Шукрулло, Сайланма.

4 мат. Геометрик шаклнинг ташқи юзи, умумий қисми. *Шар сирти. Цилиндрнинг ён сирти. Ботиқ сирт. Уорма сирт.* ■ *Фанда сиртнинг хусусиятларини ўрганувчи бутун бошли йўналишлар мавжуд. «Фан ва турмуш».*

5 геогр. Тизма тоғ чўққилари. *Агар мана шу Музлок тоғнинг чўккалаган нор туянинг ўрқачига ўхшаган сиртига чиқилса, кишининг кўзи олдида бир-бирига зид икки дунё очилади.* М. Исмоилий, Фарғона т. о.

Сиртдан 1) ташқи томондан, ташқи кўринишидан. *Қиз сиртдан кўримсизроқ бўлса-да, кўзларида қандайдир сеҳр бордек эди. «Ёшлик»; 2) шунчаки йўлига. Капсанчилар сиртдан муросага келган бўлиб, зиммаларига тушган вазифаларни мулкун қадар тезроқ бажаришга сўз бериб тарқалишди.* А. Қаҳҳор, Қўшчинор чироқлари; 3) ғойибона, четдан. *Сизни сиртдан танирдим, сиз тўғрингизда кўп эшитганман.* К. Яшин, Ҳамза; 4) зимдан; яширинча. *Сиртдан гапириб юрмоқ. Сиртдан иш битирмоқ. Сиртдан қараганда* Бир қарашда, шунчаки йўлига, юзаки қараганда. *Эсон бобо сиртдан қараганда бепарводек кўринса-да, милтиқни ўғли олганини аниқ билган, юрагига ғулу тушди.* С. Юнусов, Кутилмаган хазина. **Сиртдан ўқиш** Ўқув юртига қатнамай, мустақил шуғулланиб ўқиш (яна қ. **сиртқи**). *Тоштемир сиртдан ўқиб, педагогика институтини тугаллаб, диплом олишни орзу қилар эди.* Газетадан. **Сиртига сув юқтирмаслик** Сира ўзига олмаслик, парво қилмаслик. *Миркомил ака ғала-ғулага азият чекадиганлардан эмас. Сиртига сув юқтирмайдди.* М. Ҳазратқулов, Журъат.

СИРТЛОН зоол. Ўлимтик билан озиқланадиган, бўйнида ёли бор, ранги яшаш жойига мослашадиган йиртқич сутэмизувчи ҳайвон. *Икки сиртлон бир сиртлоннинг сиртин йиртар.* Мақол. ■ *Ҳазбингни яширолмайд Мисли сиртлон, мисли шер, Тишларингни ёвга санчсанг — Бу энг қутлуғ, улуг шеър.* Х. Даврон, Болаликнинг осмони.

СИРТМОҚ 1 Арқон, чизимча ва ш. к. ларнинг бўйинбоғ шаклида суриладиган ва сиқиладиган қилиб боғланадиган учи. *Сиртмоқ солмоқ. Дорнинг сиртмоғи.* ■ *Қари солдат дор тагидаги тўнкаларни қимирлатиб кўрди, сиртмоқнинг туғунини синчиклаб текширди.* Х. Султонов, Бир оқшом эртаги. *—Раҳмонқул дорга осиладиган бўлса, мен ўзим сиртмоқ ташлаб бераман, — деди Фани ота.* Ф. Фулом, Маъшал.

2 кўчама Асорат, сиқув, исканжа. *Ажал сиртмоғи.* ■ *«Агар сенга ўхшаганлардан яна бир-иккитаси бўлса, покиза ҳаётнинг булғаланиши, соф муҳаббатнинг тухмат сирт-*

могида жон бериши ҳеч гап эмас!» деганимни ўзим ҳам сезмай қолдим. М. Жабборов, Севинч ёшлари. Агар ишлари чаппасидан келса-ю, Шайбонийхоннинг қонқонига тушсалар, ажал сиртмоғи энг аввал Бобурнинг бўйнига тушишини ҳаммалари билардилар. П. Қодиров, Юлдузли тунлар.

СИРТМОҚЛАМОҚ Сиртмоқ солмоқ, сиртмоқ солиб боғламоқ ёки бўғмоқ. *Подшо айтди: -Ингичка симдан чилвир қилинглар, ҳалқа қилиб бўйнига солинглар, сиртмоқлаб, тилла дорга илинглар. «Эрали ва Шерали».*

СИРТҚИ 1 Нарса ёки кимсанинг ташқи, устки томонига оид; сиртидаги, ташқи. *Бинонинг ички ва сиртқи томони. Сиртқи кўриниш.*

Сиртқи дори Ичга ютиб ёки ичиб истеъмол қилинмайдиган дориларнинг умумий номи (мас., кўзга томизиладиган, ярага суртиладиган ва ш.к. дорилар).

3 Ўқув юртига қатнамай ўқишга доир. *Сиртқи ўқиш. Сиртқи таълим. Институтнинг сиртқи бўлими. ■ Ваҳобжон ўтган йилнинг августида сиртқи институтга имтиҳон топширгани Тошкентга тушган эди. С. Аҳмад, Тоғ афсонаси.*

СИРЧИ 1 Мойбўёқ билан ишловчи уста; сиркор. *-Аммо сиз, болаларим, ишнинг оғирини ўз зиммаларингизга олинг. Бундан буёғи сирчиларга, кошинпазларга ёрдам қилинг; кўпи кетиб, ози қолган [деди Меъмор шогирдларига]. Мирмуҳсин, Меъмор.*

2 Кўзгу ясовчи уста.

СИРЧУМЧУҚ Қораялоқлар оиласига мансуб қуш. *Ўзбекистон чўлларида қора бошли сирчумчуқ ёки қора сирчумчуқ уя қуради. «ЎЗМЭ».*

СИРҚИМОҚ 1 Сизиб ўтмоқ, томчилаб оқмоқ. *Бочкадан сув сирқиб турибди. ■ Унинг эски тринка шимининг почаларидан сув сирқиб оқар, эғнидаги бенур чит кўйлаги шалаббо бўлиб, бадағи ёпишиб кетган эди. Н. Фозилов. Дийдор.*

СИРҚИНДИ 1 Идиш тагида қолган суюқлик, қолдиқ. *-[Газнинг] Ҳаммасини тортиб олиб бўлмайтти, масофа узоқ, сирқиндиси қолади, — деди йигитларга. А. Мухтор, Чинор. -Ёнмайдиган сирқинди мой экан! — деди Маҳмуд жувоткаш йигитга таъна қилиб. П. Қодиров, Юлдузли тунлар.*

2 кўчма Қолдиқ, сарқит; эскилик сарқити. *Мен ёзмоқчи бўлиб турган ҳикоянинг*

қаҳрамони ҳам ўша эски сирқинди типларидан бири эди. *Ф. Фулом, Тирилган мурда.*

СИРҚИРАМОҚ айн. **зирқирамоқ**. *Ёдгор совиб қолган чойдан ичди. Колбаса ёмоқчи бўлган эди, тиши сирқираб кетди. Ў. Ҳошимов, Қалбингга кулоқ сол. Дадавойнинг кирза этикдаги болдир суюқлари тиззасига-ча сирқиради, кетаётган ерида бир нафас тўхтаб, нафасини ростлашга мажбур бўлди.. Ҳ. Фулом, Тошкентликлар.*

СИРҚИТМОҚ 1 **Сирқимоқ** фл. орт. н.

2 Бир томчи ҳам сув, суюқлик қолдирмай бўшатмоқ. *Идишини сирқитмоқ. ■ Шарифийн бирпас сукут сақлаб, ароқнинг қолганини пиёлага сирқитиб, бир кўтаришида ичди ва қаттиқ уф тортди. Н. Аминов, Қаҳқаҳа.*

СИРҚОВ Касал каби лоҳас, ланж, беҳол. *Она юртнинг ҳатто суви Не сирқовга даво, дерлар. Миртемир, Асарлар.*

СИРҚОВЛАНМОҚ Бетоб кишидек беҳол, бемажол юрмоқ; дармонсизланмоқ; ланж, лоҳас бўлмоқ. *Фарида касал одамдек сирқовланиб, ҳеч нима ёқмай юрди. Мирмуҳсин, Чиниқш. Охунбува ака қиши билан сирқовланиб юриб, кўклам чиқиш олдида дунёдан ўтди, беш бола тепасида чирқираганча қолди. Ҳ. Нуъмон ва А. Шораҳмедов, Ота.*

СИРҒА Қулоққа тақиладиган безак буюм; исирға, зирак. *Кумуш сирға. ■ Ҳусниддин тўхтаб туриб, марварид сирғаларини серкиллашиб келаётган Қандолатхон билан омонлашди. Мирмуҳсин, Фейлан кучсизлик. Даволовчи врач келди. Унинг ҳам эғнида оқ халат. қалин лаблари бўялган, қулоғига шапалоқдек сирға тақиб олган, хушрўй жувон. Н. Аминов, Қалтис хато.*

СИРҒАЛИҚ шв. Қулоқнинг сирға тақиладиган пастки юмшоқ қисми; солинчак.

СИРҒАЛМОҚ 1 айн. **сирпанмоқ 1**. *Осмонўпар иморатлардан завқланиб, гоҳ ўнга, гоҳ сўлга зехн солиб бораркан, тасодифан оёғи сирғалиб, чалқанчасига қулаб тушибди. «Мушгум».*

2 Сурилиб, айланиб кетмоқ. *Кетмоннинг силлиқ дастаси қўлида сирғалиб кетавергач, кафтига туфлаб қўйди. «Ёшлик».*

3 Сирт устида пастга қараб секин ҳаракатланмоқ. *Бола отасининг қўлидан сирғалиб тушиб, ўзи чопқиллаб кетди. М. Маҳмудов, Мангу куй излаб. Хонзода бегимнинг сўлгин юзига кўзларидан ёш сирғалиб тушди. П. Қодиров, Юлдузли тунлар. Кампирнинг ёноқ-*

лари бўртиб чиққан. Рўмоли сирғалиб, елка-сига тушган. Т. Малик, Ажаб дунё.

4 Сездирмасдан, секингина сурилмоқ, силжимоқ, юрмоқ. *Дераза олдидан иккита шарпа сирғалиб ўтди.* Ў. Ҳошимов, Нур борки, соя бор. *Руқия чаққонлик билан ҳов-лидан сирғалиб чиқиб кетди.* К. Яшин, Ҳамза.

СИРҒАЛУВЧИ Сирғанувчи, сирпанувчи, сурилувчи. *Станокнинг сирғалувчи қисми.*

Сирғалувчи ундошлар тлш. Фрикатив товушлар.

СИРҒАНИШ 1 Сирғанмоқ фл. ҳар. н. *Музда сирғаниш.*

2 физ. Бир юзанинг иккинчи юзада айланмай силжиши. *Сирғаниш коэффициенти.* *Сирғаниш подшипниги.*

СИРҒАНМОҚ айн. сирпанмоқ **1.** *Сирғаниб кетмоқ. Сирғаниб йиқилмоқ.* ■ *Шамол дераза ойнасига қайириб ураётган томчилар кўз ёшидай секин пастга сирғаниб тушарди.* П. Қодиров, Уч илди.

СИРҒАНУВЧИ 1 Сирғанмоқ фл. сфдш. **2 махс.** Бирор юзада айланмасдан силжувчи. *Сирғанувчи нур. Сирғанувчи вектор.*

СИРҒАНЧИҚ айн. сирпанчиқ **1.** *Сирғанчиқ муз.* ■ *Эрталабдан ёмғир шивалай бошлади. Қақраб ётган ерларнинг юзи ялтираб, сирғанчиқ бўлиб қолди.* С. Зуннунова, Янги директор. *Шишадай ялтираб қолган ер бети музлай бошлаган, оёқ ости сирғанчиқ эди.* О. Ёқубов, Бир фельетон қиссаси.

СИРҒИЛМОҚ айн. сирғалмоқ. [Гулноз] *Бу гал ҳам қўл учини сочиққа артиди-да, супадан сирғилиб тушиб, уйига кирди.* Ҳ. Фулом, Тошкентликлар. *-Атрофдаги барча нарсаларни унутиб, уни [асарни] ўқий бошладим. Ёноқларимдан кўз ёш доналари сирғилиб оқарди, - деди Ҳалима.* Ҳ. Носирова, Мен ўзбек қизиман. *У [Тоштемир] ёмғирда бир нафас турди-да, кейин тўндан секин сирғилиб чиқиб кетди.* Ҳ. Фулом, Сенга интиламан.

СИРҒОҚ 1 Серёмғир вақт, ёгингарчилик. *Эскичасига «қирқ кун қурғоқ ёки қирқ кун сирғоқ», дердилар. Мана шу «сирғоғи» бошланганга ўхшайди.* Мирмуҳсин, Жамила.

2 айн. сирпанчиқ 1. *Сирғоқ йўл.*

СИР-ҲОЛ [сир + ҳол] Сир-асрор, ҳолаҳволлар мажмуи. *Аптомиш билан Барчин бир-бирини кўриб, сир-ҳолини билиб, шундай бўлиб юрди.* «Фольклор».

СИСТЕМА [юн. systema — яхлит; қисмлардан таркиб топган] **1** Иш-ҳаракат, турли

жараён ва ш. к. ларда қисмларнинг ўзаро жойлашиши ва боғлиқлигидаги тартибот, тизим.

2 Нарса, ҳодиса ва тушунчаларнинг таснифи. *Линнейнинг ботаник системаси.*

3 Бирор таълимотда асос бўлган қоидалар, қарашлар, тамойиллар мажмуи. *Декартнинг фалсафий системаси.*

4 Бирор иш методлари, тартиб-усуллари мажмуи. *Даволаш системаси. Таълим-тарбия системаси.* ■ *Таълим-тарбия савиясини оширишда кабинет системасига ўтиш ўзининг афзалликларини кўрсатаётир.* Газетадан.

5 Қонуний тартибда жойлашган ва ўзаро узвий боғланган қисмлардан, элементлардан таркиб топган бутунлик. *Тилнинг товуш системаси. Терминологик система. Қон томирлар системаси.* ■ *Маълумки, замин — Ер сайёраси Қуёш системасида коинотнинг бир кичик бўлаги сифатида пайдо бўлди ва тараққий этди.* Газетадан. *Олимларнинг яқдиллик билан айтишларича, марказий нерв системаси ғоят нозик нерв ҳужайраларидан иборат.* «Саодат». *Элементлар даврий системасини яратган Менделеев университетга кириш учун бир неча марта уринган, лекин ҳар сафар.. химиядан «йиқилган». «Фан ва турмуш».*

6 Вазифаларига кўра бир хил ёки ташкилий жиҳатдан бир бутун бўлиб биришган ташкилотлар ёки муассасалар мажмуи. *Халқ маорифи системаси. Фанлар академияси системаси.*

7 Бир мақсад, аини бир иш, вазифани бажариш учун белгиланган мослама, машина, механизм ва ш.к. дан таркиб топган яхлит техник қурилма. *Иситиш системаси. Энергетик система. Суғориш системаси.* ■ *Унинг ташаббуси билан боғча газлаштирилди, қишда буғ билан иситиш системасига ўтказилди.* Газетадан.

8 Бирор ишни ташкил этиш, уюштириш ёки амалга ошириш шакли, принципи. *Сайлов системаси. Меҳнатга ҳақ тўлаш системаси.*

9 Ижтимоий тузум, ижтимоий қурилиш шакли.

10 Меъёрий, одатий, мунтазам тусга кирган, шу тарзда амалга ошадиган иш-ҳаракат, жараён. *Эрталабки гимнастика ўзига хос системага айланди.*

СИСТЕМАЛИ 1 Муайян системага асосланган; мунтазам, тартибли. *Системали иш.*

Ишни системали равишда олиб бормоқ. ■ Боладаги мавжуд қобилиятни юзага чиқариш уни системали меҳнатга ўргатишдан иборат экан. «Фан ва турмуш».

2 Муттасил, мунтазам. *Машғулотларга системали равишда қатнашмоқ.*

СИСТЕМАСИЗ Маълум системаси, режаси бўлмаган; тартибсиз, бетартиб, пала-партиш. *Системасиз иш. Системасиз баён.*

СИСТЕМАТИК Муайян системага, тартибга асосланган; системали, тартибли, мунтазам. *Систематик машғулот.*

СИСТЕМАТИКА [юн. *systematicos* – тартибга солинган] 1 Бир турдаги, ўзаро боғлиқ нарса ва ҳодисаларни уларнинг умумий белгиларига кўра таснифлаш, гуруҳлаш.

2 Биологиянинг ҳозирда мавжуд бўлган ва қирилиб кетган ҳайвон, ўсимлик ва микроорганизмларни ҳар томонлама тавсифлаш, улар ўртасидаги қариндошлик муносабатларини, турларнинг пайдо бўлиш йўларини аниқлаш ва турлар бўйича таснифлаш билан шуғулланадиган бўлими. *Ҳайвонлар систематикаси. Ўсимликлар систематикаси.* ■ *Систематика тирик табиатни муҳофаза қилишни ташқил этишда бениҳоя катта аҳамиятга эга.* «ЎЗМЭ».

СИТАМ [ф. *ستم* – жабр-зулм, жабрлаш; зўравонлик] 1 Жабр, жафо, зулм. *Ситам қилмоқ.* ■ *Барча шодлик сенга бўлсин, Бор ситам, зорлик менга. Барча дилдорлик сенга-ю, Барча хушторлик менга.* Э. Воҳидов, Муҳаббатнома. *Мана, ўша дамлар келди, юрагида йиғилган ҳамма дарду ситамлари, ҳамма алам, ҳамма исёнларини тўкса арзийдиган қасосли онлар келди.* О. Ёқубов, Қўҳна дунё. [Гули]: *Алишер, не учун хўрлик яралган, Нечун жабру ситам, зўрлик яралган.* Уйғун ва И. Султон, Алишер Навоий.

СИТАМГАР [ф. *ستمگار* – зўравон, жабр, ситам қилувчи] 1 Жабр-зулм қилувчи; эзувчи, золим. *Ситамгар фалак.*

2 кўчма Ноз-истигнолари, ғамзаю ситамлари билан қийдирувчи, адо қилувчи. *Ситамгар ёр.* ■ *Мен кимга бориб йиғлай, ул шўхи ситамгардан! Юрт-элга бутун телба, афсона қилиб кетди.* Ҳамза.

СИТАМДИЙДА [ф. *ستمديده* – жабр-зулм, ситам кўрган] *кам қўлл. айн. аламдийда.*

СИТАМКОР [ф. *ستمكار* – зўравон, зулмкор] *кам қўлл. айн. ситамгар. Отаси ўлимидан кейин уйдан қувиб юборган ситамкор ўғай*

онага у яна керак бўлиб қолибди-да! Мирмуҳсин, Умид. *Нима қилдинг, ситамкор дунё, Нега мени яратдинг ёлғиз?* «Шарқ юлдузи».

СИТАМЛИ Аламли, дард-оғриқли; дард-алам ифодаловчи. *Севгининг ширин онлари.. сингари ситамли алами, шафқатсиз кулфати ҳам бўлади.* М. Жўра, Изтироб.

СИТИЛМОҚ 1 Ситмоқ фл. ўзл. ва мажҳ. н. *Яраси ситилибди.*

2 Эскириб, тўзиб, у ер-бу еридан йиртилмоқ ёки чокидан кетмоқ. *Чопон чокидан ситилибди.* ■ *Салтонбу ситилиб кетган эски кўрпага ўралиб, дарча ёнида ётган эди.* М. Исмоилий, Фарғона т. о.

Кўзим ситилсин (ёки **ситилиб оқсин**) Қасам ибораси. *Мен агар шу акамни ёр демасам, Ситилиб оқсин икки кўзимнинг бириси.* «Қўшиқлар».

СИТМОҚ Сиқиб ичидагини чиқармоқ, ажратмоқ. *Ярани ситмоқ.* ■ *Баъзи одамлар данаги олинган олча мураббосини яхши кўрадилар. Лекин олчанинг данагини қўл билан ситганда, шарбати оқиб кетади.* «Саодат».

Ситиб чиқармоқ 1) қисиб чиқариб юбормоқ, олиб ташламоқ. *Зирапчани ситиб чиқармоқ;* 2) кўчма таъйиқ билан йўқ қилмоқ, чиқариб ташламоқ. *Ахир дину имонни муsulмон дилидан ситиб чиқариб бўлмайди-ку?* К. Яшин, Ҳамза.

СИТОР [ҳинд. *ستار / ستهار*] Ҳиндистон ва Покистонда: торли-тирнама мусиқа чолғу асбоби. *Ситорни такомиллаштирган ва (унинг) илк моҳир ижрочиси Хусрав Деҳлавий ҳисобланади.* «ЎЗМЭ».

СИТОРА [ф. *ستاره* – юлдуз; тақдир, қисмат] *эск. кт. айн. юлдуз.*

Ситораси иссиқ айн. истараси иссиқ қ. истара. *Охири бир куни «Сорахон хунук, бу – рост, аммо ситораси иссиқ», деган фикрга келди.* А. Қаҳҳор, Сароб.

СИТРО [фр. *citronnade* – лимондан тайёрланган ичимлик] Мева шарбатидан тайёрланадиган, чанқов босувчи ичимлик. *Лимонад, ситрога ўхшаш ичимликларни тайёрлаган чоғда бутилкага насос ёрдами билан, босим остида карбонат ангидрид юборилади.* «Кимё».

СИТУАЦИЯ [фр. *situation* < лот. *situatio* – аҳвол, вазият] қ. **вазият** 1, 4. *Қулай ситуация.*

СИФАТ [а. *صفت* – хосса, хусусият, ҳислат, характер] 1 флс. Нарса, воқеа, ҳодиса ва ш. к. ни уларнинг ўзига хос белги ва ички

хусусиятларига кўра ифодаловчи фалсафий тушунча. *Миқдорнинг сифатга айланиши.*

2 Нарсанинг, кимсанинг ижобий ёки салбий хусусияти, фазилати, хислати. *Инсон сифатлари ичида камтарлик энг яхши фазилатдир.* Газетадан. *Навоий Ҳусайн Бойқарода шоирлик, илмпарварлик сифатларини кўрди.* Ойбек, Навоий. [*Домла ўз-ўзига:*] *..Хурматли китобларда айтадилар: «Сабрлилик — худонинг ояти, сабрсизлик — шайтоннинг сифати».* Шуларга амал қилиб, бир оз сабр қилмоқ керак. Ҳамза, Танланган асарлар.

3 Молнинг, маҳсулотнинг ёки ишнинг яроқлилиқ даражаси, қўйилган талабларга қанчалик жавоб бера олишини белгилловчи хусусияти. *Маҳсулотнинг сифатини яхшиламоқ. Ишнинг сифатини оширмақ.* ■ *Ноннинг сифати унинг намлиги.. ва говаклиги каби хоссалар билан белгиланади.* Ф. Маҳкамов, Дастурхонимиз файзи. *Фабрикамизда илгорлар жуда кўп, улар ҳам маҳсулот кўлами учун, ҳам сифати учун курашадилар.* Газетадан.

4 Қўшма сўз таркибида «ўхшаш», «-симон» каби маъноларни билдиради, мас., *девсифат, одамсифат, улугсифат.*

5 тли. Предметнинг белгисини билдирувчи сўзлар туркуми. *Нисбий сифат. Туб сифат. Сифат даражалари.*

Сифатида Вазифасида, ўрнида, =дек. *Бир адиб сифатида айтишим мумкинки, бундай фазилатга эришиш осон эмас.* С. Кароматов, Олтин кум. *Мен телепатияга ишонаман. Гарбда телепатия махсус фан соҳаси сифатида ўрганилаётган эмиш..* Ў. Ҳошимов, Қалбинга қулоқ сол.

СИФАТДОШ тли. Фейлнинг сифатга хос вазифани бажарувчи, предмет белгисини билдирувчи шакли, мас., *чиниққан бола, куйлаётган қиз.*

СИФАТЛАМОҚ Бирор жиҳатдан характерламоқ, сифатини ёки сифатларини таърифлаб бермоқ. *Яхши томондан сифатламоқ.*

СИФАТЛАНМИШ тли. Сифатловчи аниқлаб-сифатлаб келадиган сўз; аниқланмишнинг бир тури.

СИФАТЛАШ 1 Сифатламоқ фл. ҳар. н. *Яхши томондан сифатлаш.*

2 ад. Предметнинг бирор хусусиятини ажратиб кўрсатиш ёки унга бошқа бир предметга хос хусусиятни кўчиришдан иборат

бадий-тасвирий восита; эпитет. *Шунга асосланиб, тасвирий воситалардан ўхшатиш, метафора, сифатлашни ўхшатиш кўчимларга; синекдоха, метонимия, муболаға, кичрайтириш, аллегория, қочирақ ҳодисаларини ўхшашсиз кўчима киритиш мумкин.* «ЎТА».

СИФАТЛИ 1 Сифат жиҳатидан талабга тўла жавоб берадиган, сифати яхши. *Сифатли мол. Сифатли иш.*

2 Аниқловчи орқали ифодаланган сифатга эга бўлган. *Аъло сифатли мол. Ёмон сифатли маҳсулот.* ■ *«Майин жун деб юқори сифатли қўй гўшти, диркиллаган думба ёғидан айриламиз денг», — Шербек ёлғиз ўзи кетаётиб ўйга чўмди.* С. Анорбоев, Оқсой. *Деворда ва ерда қимматбаҳо гиламлар, аъло сифатли чет эл гарнитур.* Ф. Мусаёнов, Ҳиммат.

СИФАТЛОВЧИ тли. Предметнинг белгисини-сифатини билдирувчи сўз; аниқловчининг бир тури.

СИФАТСИЗ Сифат жиҳатидан талабга тўла жавоб бера олмайдиган, сифати ёмон, паст. *Сифатсиз маҳсулот. Сифатсиз иш.* ■ *Ичкиликнинг иқтисодий зарари ҳам катта: у меҳнат интизомини бузади, унумдорликни пасайтириб, сифатсиз маҳсулот ишлаб чиқаришга йўл очади.* Газетадан. *Сув исрофгарчилигига, суғоришни сифатсиз ўтказишга қатъий барҳам берингиз!* Газетадан.

СИФИЛИС [Syphilis — итальян врач Ж. Фракасторонинг шу касаллик ҳақидаги достони қаҳрамони — чўпон Сифилус номидан] айн. **захм II.**

СИФОН [юн. siphon — найча] **1** Суюқликни юқорироқ сатҳдаги идишдан пастрок сатҳдаги идишга ўтказувчи, турли узунликдаги тирсақлари бўлган букик найча.

2 Карбонат ангидрид босими остида найча орқали қуйилувчи ичимликни газлаштириш учун мўлжалланган идиш.

СИФР [а. صفر — ноль; ҳеч нарса] эск. айн. **ноль 1.**

СИХ [ф. سبخ — кабоб сихи, чўпи; учли таёқ; бигиз] Кабоб пишириш учун металлдан, баъзан ёғочдан тайёрланадиган учи найза чўп. *Бир сих кабоб. Гўштни сихга тортмоқ.* ■ *Дастурхонда кабоб сихлари, ичиб тугалланмаган коньяк, вино шишалари турлибди; каравотда кимдир хуррак тортмоқда.* И. Раҳим, Чин муҳаббат. *Ўртага кабоб келди. Авзамжон ака ўз қўли билан икки-икки*

сихдан расамади билан меҳмонларнинг ликончасига қўйди. С. Аҳмад, Сайланма.

Сих ҳам куймасин, кабоб ҳам Ҳеч кимга, ҳеч қайси томонга зарар бўлмасин, иш икки томон учун беозор битсин. - *Биласизми, нима? — раис уларни келиштирмоқчи бўлди, — келинг, сих ҳам куймасин, кабоб ҳам деганларидек, иккаласига беш баҳо бериб қўя қоламиз, майлими? «Муштум».*

СИХЛАМОҚ 1 Сихга тортмоқ, сихга тизмоқ.

2 Учини сихга ўхшатиб найзаламоқ.

СИХМОЛА [сих + мола] қ.х. Тишли мола, борона. *Аямларнинг бригадаси шийпони олдида сихмола кўргандим. Ўшани кечаси обкелиб, ишлатволиб, тагин жойига элтиб қўйсак-чи? Р. Раҳмонов, Чангалзордаги шарпа.*

СИЧҚОН 1 Ер юзида кенг тарқалган, хавфли касалликлар тарқатадиган кичик кемирувчи сутэмизувчи ҳайвон. *Шу пайт амманнинг яқинда болалаган тарғил мушуги, оғзида сичқон тишлаганча, уйга кириб кетди. Р. Азизхўжаев, Яшил чайла. Қаердадир юлғун тагида чўл сичқоними, нимадир ногоҳ шитирлади-ю, Зулхумор чўчиб тушди. М. Мансуров, Ёмби.*

2 Мучал йил ҳисобида биринчи йил номи. *Унинг йили — сичқон.*

Сичқон йили Мучал йил ҳисобида биринчи йил (қ. мучал).

Арслоннинг ўлиги — сичқоннинг тириги Катта мартабали киши мартабасидан тушганда ҳам, оддий кишилардан юқори турради, катталигича қолади, деган маънодаги ибора. **Сичқон сифмас инига, галвир боғлар думига** Имкониятларини ҳисобга олмай дахмаза орттирган кишига нисбатан айтиладиган мақол. **Сичқон сурди** Касалликдан эндигина тузалган киши биринчи бор уйдан чиқиб, бирор жойга борганда айтиладиган ибора. - *Ҳамзахонни бугун-эрта сичқон сурди қилиб, кўчага олиб чиқамиз, холажон, худо хоҳласа, — деди Умар полвон қўлидаги туегунни Жаҳонбувига узатиб. К. Яшин, Ҳамза. Сичқоннинг уни минг танга* Қочишга жой топа олмай қолинган пайтда айтиладиган ибора. *Мадрасалар ҳам жимжит, фалакиёт мударрислари, хандасая риёзиёт муллолари учун сичқоннинг уни минг танга бўлиб кетган эди. Мирмуҳсин, Меъмор.*

СИЧҚОНЧА *тех.* Компьютерни бошқариш пульта. *Компьютер сичқончаси.*

СИҚИЛИШ 1 **Сиқилмоқ** фл. ҳар. н. *Троллейбусда одам сиқилиб кетди.. Бундай ҳолларда йўловчиларнинг бир-бирларига уринишлари, туртинишлари, сиқилишлари табиий. М. Исмоилий, Одамийлик қиссаси.*

2 Одамлар тирбанд ҳолат, тиқилинч. *Сиқилишда қолмоқ.*

3 *физ. тех.* Ташқи куч таъсири остида жисмнинг ҳажми торайиб, зичланиши. *Жисмларнинг сиқилиши.*

СИҚИЛМОҚ 1 **Сиқмоқ 1, 2** фл. ўзл. ва мажх. н. *Совуқдан сиқилган жисм. Сиқилган газ. ■ Иккита забардаст одамнинг ўртасида сиқилиб, қимирлашга ҳам журъат этолмай кетаверди! Ф. Мусажонов, Нозик масала.*

2 (ч. к. билан) Танглик сезмоқ, толиқмоқ, зорикмоқ. *Пулдан сиқилмоқ. Рўзгордан сиқилмоқ.*

3 Руҳан эзилиб ёки зерикиб диққат бўлмоқ, диққати ошмоқ, зиқ бўлмоқ. *У кунларни эсласам агар, Сиқиламан, юрагим титрар. Файратий. Анвархоннинг кўнгли эзилган эди, қаршисида ўтирган, руҳан сиқилган йигитнинг аҳволини яхши тушулган эди. Ойбек, Улуғ йўл.*

Юраги сиқилмоқ Юраги зиқ бўлмоқ; руҳан эзилмоқ, қийналмоқ. *Кампири мингирлаган овоз билан зорлана бошлаганда, чолнинг юраги сиқилиб кетди. М. Осим, Тилсиз гувоҳ.*

СИҚИЛУВЧАНЛИК *физ.* Моддаларнинг турли кучлар таъсирида ўз ҳажмини ўзгартириш хусусияти. *Газнинг сиқилувчанлиги. ■ Табиатда мавжуд моддаларнинг барчаси сиқилувчанлик хусусиятига эга. «ЎЗМЭ».*

СИҚИМ Нарса чангаллаб сиқилган кафт ва шу кафт орасига олинган нарса миқдори; қисим. *Сиқимини тўлдириб-тўлдириб писта олмоқ. Ошга бир неча сиқим сабзи солмоқ. ■ Мирвали банги бировнинг қўлидаги беданани кўриб, дидига ўлтирадиган бўлса, сиқимида салмоқлаб кўриб, «ҳамма жойи ҳам келган экан», деб қўяди. А. Қодирий, Обид кетмон.*

Бир сиқим 1) кафт билан чангаллаб олинган миқдордаги, бир қисим. *Қўлимда бир сиқим Тошкент тупроғи, Узоқ ўтмишларга элтади хаёл. Р. Бобожон, Танланма; 2) озгина, бир чўқим. «Камбағал одамга бир си-*

қимгина ош яхши..» деб, таомдан сўнг бирон соат ғоз паатидан ясалган тишқовлагични олиб, тишини қовлаб юради.. Мирмуҳсин, Умид; 3) кичкина, ушоқ. Кампирдан садо чиқмади. У бир нарсадан қўрқиб кетган боладай, иягини тиззасига қўйиб, зинада бир сиқимгина бўлиб ўтирарди. О. Ёқубов, Дийнат. Қарасам, пункт бошлиғи, қабул қилмайман, деб тағин тихирлик қиялпти: нимадангир гайирлиги ёки қандайдир тамаси борага ўхшади. Узи бир сиқимгина йигит. Газетадан.

СИҚИМЛАМОҚ Кафт билан чангаллаб олмоқ, чангаллаб сиқмоқ, ушламоқ, қисимламоқ. Қўрққангидан ётган еримдаги ўтларни сиқимлаб юла бошладим. С. Сиёев, Ёруғлик. Дашт қўйнига кирди-ю Илк бора наъра солди. Ташна ер бағридан у Сиқимлаб тупроқ олди. Э. Воҳидов, Муҳаббатнома. Воҳид жон-жаҳди билан сиқимлаган наъматак тиканлари кафтга эмас, юрагига санчилди гўё! «Саодат».

СИҚИШ 1 Сиқмоқ фл. ҳар. н. Қўлга олиб сиқиш.

2 физ. тех. Босим, куч таъсири остида ҳажмини кичрайтириб зичлаш, қисш.

СИҚИШТИРМОҚ 1 Сиқиб, зичлаб жойлаштирмоқ. Нарсаларни чамадонга сиқиштириб жойламоқ. ■ Омон мумкин қадар қўйларни темир йўлга яқинлаштирмасликка уринар ва кўчанинг девор томонига сиқиштириб олиб борар эди. Ф. Фулом, Шум бола.

2 Сиқув остига, исқанжага олмоқ, сиқув остида текширмоқ. Нор опа Жанишнинг ўша нарсаларни ундириш учун келиб, оқсоқолни сиқиштираётган экан. Ҳ. Шамс, Душман.

СИҚИҚ 1 Сиқилган, қисилган, сиқимланган. Сиқиқ мушт.

2 Тор, кичкина. Кичик масжид қишлоқнинг Эшон маҳалла деб аталган қисмида бўлиб, сиқикроқ бир хонақоҳ ва торроқ бир айвондан иборат. А. Қодирий, Обид кетмон.

3 Ҳақ-ҳуқуддан, эркинликдан маҳрум; сиқув, исқанжа остидаги; танг. Сиқиқ вази-ят. Сиқиқ ҳаёт. ■ Султонхон, бечора, кундошларини «аҳмоқ» деб ўйлайди. Ҳолбуки, у сиқиқ муҳтда.. яшовчиларнинг ҳаммаси бир-бирини алдашга, бир-бирини «аҳмоқ» қилиб қолдиришга уринади.. Чўлпон, Кеча ва кундуз.

4 Чекли, чекланган, танг. -Ер жўнидан сиқикроқмиз, — деди бошини аста қимирлатиб Ўктам. Ойбек, О. в. шабалалар.

5 Мухтасар, ихчам. ..сиқиқ ва чуқур маъно билдирадиган мақоллар тугал бир поэтик асар мазмунига тенг келади. Газетадан. Чиндан ҳам истиора энг сиқиқ шаклдаги ўхшатишни эслатади. «ЎТА».

6 от Сиқув, тазйиқ, исқанжа. [Сулаймонов] Турли фикрлар сиқигидан чиқиб, бир қарорга келгандай, Раҳмон отани олиб келишларини сўради. И. Қаландаров, Шохидамас, баргида.

СИҚИҚА ОЛМОҚ Роса сиқмоқ, қийнамоқ, исқанжага олмоқ. -Бечора Мўмин ака! — раис хоҳолаб кулиб юборди. — Бу ёқда сиз [Юлдузхон], бу ёқда журналист ўртоқ.. Тоza сиқиққа олдиларинг-ку шўрликни. О. Ёқубов, Бир фелъетон қиссаси.

СИҚИҚЛИҚ 1 Торлик; эрксизлик; чекланганлик. Вазиятнинг сиқиқлиги. Жойнинг сиқиқлиги.

2 Сиқув, тазйиқ, исқанжа остидаги шароит, ҳаёт.

СИҚМА Сиқиб чиқариладиган. «Улғбек» хўжалик магазинига кирсам, чиройли идишда сиқма пойабзал мойи турибди. «Муштум». Шароит фалакда космонавтларни концентрат, сиқма овқат истеъмол этишига мажбур этади. «ЎТА».

СИҚМОҚ 1 Ўраб, қамраб ёки босиб эзмоқ, қисмоқ. Тошни сиққан билан сув чиқмас. Мақол. ■ Унинг юзлари худди шарбати сиқиб олинган анор пўстига ўхшаб кетарди. С. Аҳмад, Пойқадам. Дарвоза очилиб, йўғон қоматини спортчилар киядиган қалин трико сиқиб турган Шамси Тўраевич кўринди. Н. Аминов, Суварак. У йигитни тагига босиб олиб, бўйнидан сиқди-да, юзини ерга ишқаб, ура кетди. Т. Ашуров, Оқ от.

2 Сириб боғламоқ. Тонгда жангчилар оқ қорнини камар билан маҳкам сиқиб, йўлга тушидилар. Ойбек, Қуёш қораймас.

3 Босим билан ҳажмини кичрайтириб зичлаштирмоқ. Газни сиқмоқ.

4 Тазйиқ билан суриб бормоқ, танг ҳолда қолдирмоқ. Рақибни бурчакка сиқиб қўймоқ. Машина қўл меҳнатини сиқиб чиқармоқда. ■ Душман бу қийинчиликлардан фойдаланиб, станция томон сиқиб келди. Ойбек, Қуёш қораймас.

5 Эркинлик, ҳуқуқ бермай ёки ўринсиз талаб, даъво, бўҳтон ва ш. к. билан руҳан эзмоқ, қийнамоқ. Болаларни бўлар-бўлмасга сиқавермоқ. Уни, овқатни бузибсан, деб роса сиқдик.

Юракни (ёки қалбни, дилни) **сиқмоқ** Юракни эзмоқ ёки зиқ қилмоқ. *Хавотирли сукут онлари чўзилгандан чўзилар, юракни сиқар, ваҳимага тўлдириб, чорасизлик — ожизлик чоҳга қулатмоқда эди. «Ёшлик».*

б (ч.к. билан) Бирор нарсадан чеклаб қўймоқ; зориқтирмоқ. *Пулдан сиқмоқ. ■ [Хушрўй] Иккинчи ва учинчи ҳафталарда ўчоқ бошини ўз қўлига олиб, кундошини иккита ёш боласи билан томоқ важдидан ҳам сиқа бошлайди. А. Қодирий, Ўтган кунлар. Албатта, кампир келинларини рўзгордан сиқмасди. Аммо режани бузмай, масаллиқни исроф қилмай иш тутарди. С. Аҳмад, Сайланма. Бечора холани худо ҳусндан сиққан, жамолида жиндаккина кулиб турадиган ери йўқ. Мирмуҳсин, Умид.*

Сиқиб сувини ичмоқ Қаттиқ тазйиқ кўрсатмоқ, ниҳоятда қийнамоқ, азоб бермоқ. *[Директор] Буфетчининг ҳам сиқиб сувини ичяпти. С. Зуннунова, Янги директор.*

СИҚТАМОҚ: йиғламоқ-сиқтамоқ Ёлвориб йиғламоқ, йиғи-сиғи қилмоқ. *Хотин йиғлайди, сиқтайди, охири турмушлари бари бир қовушмаслига кўзи етган, лоақал пулдан қуруқ қолмаслиг пайига тушади. «Муштум». Йиғлаб-сиқтаётган Саодатни четга суриб, бемор тепасига борди-да, шприцдан чарсиллатиб, четроққа дори сачратди. А. Мухтор, Асарлар.*

СИҚУВ 1 **Сиқмоқ** фл. ҳар. н. Бўғзим арқон сиқувин сезур, Зирқирайди оғирликдан бел. Х. Даврон, Қақнус.

2 Тазйиқ, исканжа, сиқиқ. *Сиқувни кучайтирмоқ. ■ Собир йиғилишларда Рашидни сиқувга олар, ҳар хил баҳоналар билан кўпчиликнинг олдида уни ерга уришга интиларди. А. Кўчимов, Ҳалқа. Тепалик мудофаачилари душманнинг икки томондан қилаётган сиқувига бардош бердилар. И. Раҳим, Чин муҳаббат.*

Сиқувга олмоқ айн. сиқиққа олмоқ қ. сиқиқ б. *Бригадирларни сиқувга олди.. келгуси йилда бундай хунук аҳвол такоррланмаслиги учун сўз берди. Н. Сафаров, Узокни кўзлаган қиз. Асрор индамади. Бахтига аёл уни сўроққа тутиб, сиқувга олмади. «Ёшлик».*

СИҒАРЛИ Бирор миқдордаги ёки катталикдаги нарса сиғадиган, элтадиган. *Ўн литр сув сиғарли идиш. ■ Дарвозаницг бир қаноти сезилар-сезилмас гижиллабегина бир одам сиғарли очилди. П. Турсун, Ўқитувчи.*

СИҒДИРМОҚ 1 **Сиғмоқ** фл. орт. н. *Ҳамма нарсани чамадонга сиғдирди. ■ Бу куннинг кўркамлигидан олган таассуротини Али ичига сиғдирилмади: -Зап яхши кунми! — деди. А. Қодирий, Ўтган кунлар. У [Ортиқ] сўкиниб, нима қиларини билмай, жаҳлини ичига сиғдира олмай, қўлидаги кружкани қулочкашлаб ерга урди. М. Мансуров, Ёмби.*

2 Ўз ичига жо қилмоқ, элтмоқ. *Минг литр суюқлик сиғдирадиган цистерна. Минг киши сиғдирадиган зал.*

СИҒИМ Бирор миқдордаги нарсани сиғдириш, элтиш қобилияти, ички ҳажм. *Умуман республикамизда деярли Сирдарё сиғимига тенг миқдордаги ер ости сувлари бор. С. Кароматов, Сўнгги бархан.*

Иссиқлик сиғими физ. *Модда температурасини бир градусга кўтариш учун сарф бўладиган иссиқлик миқдори. Электр сиғими физ.* Ўтказгичнинг электр заряд тўплаш хусусиятини ифодаловчи электр катталиқ; миқдор жиҳатидан яққаланган ўтказгичнинг потенциалини бир бирликка ўзгартириш учун зарур бўлган заряд миқдорига тенг. *Конденсаторнинг электр сиғимини аниқламоқ. Кеманинг сув сиғими денг.* Сузиб кетаётган кеманинг ўз оғирлигига тенг миқдорда сиқиб чиқарадиган сув миқдори.

СИҒИМЛИ 1 Бирор миқдордаги сиғимга эга бўлган. *Беш юз литр сиғимли цистерна. ■ Механизациялашган фермалар ва комплекслар, 76,4 минг куб метр сиғимли силос ва сенаж иншоотлари қурилди. Газетадан.*

2 Кўп элтадиган, сиғдирадиган, сиғими катта. *Сиғимли идиш.*

СИҒИНДИ Ўзга юртда ёки бировникида ҳақ-ҳуқуқсиз қарам бўлиб яшовчи одам. *Шунда Бойсари: -Энди биз ўз элимизда сиғинди бўлиб.. юрадиган бўлсак, бу элда бизнинг турилизимиз қолмади, — деди. «Алпомиш».*

СИҒИНИШ 1 **Сиғинмоқ 1, 2** фл. ҳар. н. *Турли диний маросимларни бажариш ҳам сиғинишнинг бир кўринишидир. «ЎЗМЭ».*

2 айн. **ибодат 1.**

СИҒИНМОҚ 1 **дин.** *Худога, азиз-авлиёларга, илоҳий кучга эга деб ҳисобланган нарсаларга сажда қилиш; диннинг асосий элементи. Ҳозир пир ўзларини эмас, сизларни ўйлайдилар, тонг сахарларда жойнамозга тиз чўкиб: «Ҳақ йўлдан адашган гумроҳ бандаларингга ғазаб қилма», деб худога си-*

финадилар. С. Аҳмад, Хукм. Назирқулнинг отаси Шоҳимардонга сиғиниб, қўчқор олиб бориб сўйди. С. Аҳмад, Хукм. Инсон ўзини танигунча кўп нарсаларга сиғинган. Газетадан.

2 кўчма Бирор кимсага, нарсага ортиқ берилмоқ, уни ҳаддан ташқари улуғламоқ. Пулга сиғинмоқ. Куш бутоққа сиғинар. Мақол. ■ Жаҳолатда қолган халқ аълам ҳар борганида, «садағанг кетай, эшоним», деб унинг оёғига тиз чўкиб сиғинар, назр-ниёз берар эди. П. Турсун, Ўқитувчи.

3 Нажот истаб бормоқ, бош урмоқ. Музга суянма, ёвга сиғинма. Мақол. ■ Аймоқ халқи бизни дўстдек кутар деб, Юртингизга биз сиғиниб келганмиз. «Ёдгор».

СИҒИШМОҚ 1 Сиғмоқ 1, 3 фл. бирг. н. [Толзорга] Одам сиғишмай кетарди, кўрпача тугул палос етишмай қоларди. Р. Файзий, Ҳазрати инсон.

2 Айни бир вақтда ёки бир ерда мавжуд бўлмоқ, бирга, ёнма-ён яшамоқ. Бир-бири билан сиғишмайдиган қарама-қарши фикрлар.

3 Бирор кимсаникида ёки бошқалар ўртасида чиқишиб, эл бўлиб яшаб, ишлаб кетмоқ, эликишмоқ. У ҳеч қаерда, ҳеч кимникида сиғиша олмайди.

СИҒМОҚ 1 Жо бўлмоқ, жойлашмоқ, кетмоқ. Кўп нарса сиғадиган идиш. Қучоққа сиғмайдиган дарахт. Бир қўлтиққа икки тарвуз сиғмас. Мақол. ■ [Бу ерда] 500 машина сиғадиган катта автобаза қурилаётган экан. С. Сиёев, Ёруғлик. Ё кечки салқин билан, ё эртага эрталаб шаҳар ҳовлига [беда] олиб тушаман. Қандай беда денг, боғи қучоққа сиғмайди. Ойбек, Танланган асарлар.

2 Лойиқ, мос келмоқ (кийим, пойабзал ҳақида). Этик оёғимга сиғмади.

3 Бемалол кирмоқ, ўтмоқ. Ип игнанинг тешигига сиғмади. ■ Зиндон ёндан бир арава сиғадиган тор кўча ўтган. С. Сиёев, Ёруғлик.

4 Ўзига паноҳ топмоқ, бемалол, хотиржам яшамоқ, турмоқ. Ундан чиқиб қаёққа, кимникига бораман, кимнинг уйига сиғар эдим. А. Қаҳҳор, Мастон. Ўз юртинга сиғмай, бунда келасан, Дарбадар бошинга бало бўласан. «Ширин билан Шакар». Аваз ўз уйига сиғмай қолди. С. Сиёев, Ёруғлик.

5 Кўчма Тўғри келмоқ, мос бўлмоқ. Устозлар турганда, ўзи ҳақида сўзлаш шарқона одобга сиғмайди. Газетадан. Унобакор яқинда

бир ғайридин ожизага уйланмиш. Бу иши энди ҳеч қайси низомга сиғмайди! К. Яшин, Ҳамза.

Ақлга сиғмаслик қ. ақл. Чунки, сен айтгандек, беш-олти кунда Қўқонга бориб келиш сира ақлга сиғмас эди. А. Қодирий, Ўтган кунлар. **Гап сиғмаслик** Бошқа гапга ўрин йўқлик. Шарофат орага бошқа гап сиғмаслигини кўриб: -Боламни олиб кетгани келдим, — деди. А. Қаҳҳор, Қўшчинор чироқлари. **Ичига сиғмаслик** (севинч, шодлик, дард ва ш. к. ҳақида) Тўлиб-тошмоқ. Ҳамза шу аснода юз берган даҳшатли манзарани кўриб эзилиб кетди, у тутаяқар, газаби ичига сиғмай ғижинар, «тақа-тақ» қилиб ўтиб бораётган вагонлардан кўз узмасди. К. Яшин, Ҳамза. **Кўнглига (ёки дилига) сиғмайди айн. юрагига сиғмайди 2. Пешонасига сиғмади қ. пешона 2.** Ойинг фаришта эди, қизим. Нима қилайликки, пешонамизга сиғмади. Ҳ. Фулом, Тошкентликлар. **Тасвирга (ёки таърифга) сиғмайди** Тасвирдан, таърифдан ташқари, таърифлаб ҳам бўлмайдиган; ажойиб. Гўзаллиги таърифга сиғмайди. ■ Тошкент тонготари нақадар гўзал, Чиройли, тасвирга сиғмас, сермазмун. Ғайратий. **Терисига сиғмай** Ҳаддан ташқари қувониб. Улар [йиғитлар] қопларини тўлдириб, териларига сиғмай, олма-узум олиб келаётганида, мўғуллар ушлаб олдилар-да, қулоқ-бурунларини кесиб, қўйиб юбордилар. М. Осим, Ўтрор. Мавлоно Соҳиб Доро жиянининг «абжад» ҳисобини яхши ўрганиб олганини, фаҳм-фаросати ўсганини кўриб, терисига сиғмай кетди. М. Осим, Сехрли сўз. **Хаёлга сиғмайдиган** Хаёлга ҳам келтириб бўлмайдиган, хаёлда ҳам тасаввур қилиб бўлмайдиган. **Юрагига сиғмайди 1)** ичида ётмайди, бировга айтмаса бўлмайди. Ўз юрагинга сиғмаган сир ўзанинг юрагига сиғмас. Мақол; 2) кўнгли кўтармайди, кўнглига ёқмайди, хуш келмайди (фақат нохуш, дилгир кайфиятдаги кишига нисбатан айтилади). Қўлидан гўнғир-гўнғир гапдан бошқа иш келмайдиган бу одамнинг лип этиб кириб келавериши кейинги вақтда Қудратиллаҳўжанинг юрагига сиғмай қолган эди. А. Мухтор, Опа-сингиллар. **Юрагига (ёки кўнглига, дилига) қил (ҳам) сиғмайди** Ҳеч нарса ёқмайди, ниҳоятда юраги гаш, хафа. Умрини ҳалол, бегуноҳ ўтказган йиғитнинг ҳозир кўнглига қил сиғмайди. С. Аҳмад, Хукм. Ҳад-

ди **СИГМАСЛИК** қ. ҳад I 3. *Мозорга тил тек- кизишга қандай ҳаддинг сиғди, муртад?! К. Яшин, Ҳамза.*

СИҲАТ [а. *صحت* — соғлиқ, саломатлик; чинлик, ҳақиқийлик; тўғрилиқ] Тан соғли- ги, соғлиқ, соғломлик. *Сиҳатингиз яхшими? Тан-жонингиз сиҳатми? Сиҳат тиласанг — кўп ема, иззат тиласанг — кўп дема.* Мақол. ■ *Серёмғир, рутубатли Мозандарон Ибн Синонинг сиҳатиға футур етказган, қув- ватдан кетказган эди.* М. Осим, Ибн Сино қиссаси. *Сиҳати бугун хийла дуруст, лекин аввалги кунлардаги каби руҳиятига эзгин бир титроқ солиб, қулоқлари остида бетиним денгиз шовқинию ўтақаси ёрилган одам- ларнинг оҳу фарёдлари тўхтовсиз эшитил- моқда.* Н. Қиличев, Чиғириқ.

Сиҳат топмоқ айн. **сиҳатланмоқ**.

СИҲАТГОҲ [а. + ф. *صحتگاه* — даво- ланиш жойи, шифохона] Беморлар ётиб даволанадиган махсус профилактик даво- лаш муассасаси; санатория. *Юртимизда ҳам шундай гўшалар мавжуд бўлиб, улардан бири Тошкент вилоятининг Қибрай туманидаги.. «Ботаника» сиҳатгоҳидир.* «Гулистон». *Биз дам олаётган сиҳатгоҳ тоғли ҳудудда жой- лашган.* «Шарқ юлдузи».

СИҲАТЛАНМОҚ Касалдан яхши бўлиб турмоқ, тузалмоқ. *Бир ой касалхонада ётиб сиҳатланиб кетдим.*

СИҲАТЛИК Тан-жони соғлиқ, саломат- лик. *Сиҳатлик тиламоқ.* ■ *Нигора қадам босган чўпонларнинг чайлаларига у билан бир- га шодлик, сиҳатлик кириб боради.* С. Анор- боев, Оксой.

СИҲАТ-САЛОМАТ [сиҳат + саломат] Соғ-саломат, эсон-омон. *Қалай, сиҳат-са- ломат юрибсизми? ■ ..Маъсума бека пи- ширган овқатлардан шогирдлар қатори у ҳам тановул этиб: —Саховатли Меъмор ҳаз- ратларининг умрлари узоқ бўлиб, доимо си- ҳат-саломат бўлсинлар, — деб дуо қиларди.* Мирмуҳсин, Меъмор. *Минг шукурким, кел- динг бугун сиҳат-саломат, шодман.* Ҳамза.

СИҲАТ-САЛОМАТЛИК Соғ-саломат- лик, эсон-омонлик. *Асосан устоднинг си- ҳат-саломатлиги, ўз аҳволи ҳамда исмини очиқ зикр этиб бўлмайдиган бир киши ҳақида ҳам гап кетарди.* Мирмуҳсин, Меъмор. *Умр лаззати эса сиҳат-саломатлик билан боғлиқ эканини ҳаммамиз биламиз, шундай экан, уни жуда қадрлашимиз керак.* Газетадан.

СИҲАТСИЗ кам қўлл. *Сиҳати, соғлиғи ёмон; касалманд, касал.* *Сиҳатсиз одам.* *Си- ҳатсиз бўлиб қолмоқ.*

СКАЛЬПЕЛЬ [лот. *scalpellum* — пичоқ- ча] тиб. Жарроҳлик амалиётида тўқима ва аъзоларни кесишда ишлатиладиган махсус металл пичоқча. *Скальпель ўтқир, ушлашга қулай, осон тозаланадиган ва стерилланади- ган бўлиши керак.* «ЎЗМЭ».

СКАМЕЙКА [р. *скамья* < лот. *scamnum* — ўтиргич, ўриндик] Икки ёки тўрт оёқли узун ўриндиқ. *Лолахоҳ скамейканинг бир чеккасига омонатгина ўтирар экан, рассом- га ялт этиб қараб қўйди.* М. Хайруллаев, Тилла маржон. У [Аҳмад] *катта дарахтнинг соясига қўйилган скамейкани танлади.* Ф. Мусаёнов, Ҳиммат.

СКАНДИЙ [лот. *Scandium* < *Scandia* — Скандинавия ярим ороли номидан] Мен- делеев даврий системасининг III гуруҳига мансуб кимёвий элемент; оч сариқ тусдаги енгил, юмшоқ металл. *Скандий кимёвий хос- салари жиҳатидан фаол металллар жумласи- га киради.* «ЎЗМЭ».

СКАНЕР [ингл. *scanner*] Информатикада: тасвирни, маттни компьютерга киритиш мосламаси.

СКАРЛАТИНА [итал. *scarlattina* < лот. *scarlatum* — оч қизил ранг] Кўпинча бола- ларда учрайдиган, нафас сиқилиши ва исит- ма, томоқнинг оғриқли яллиғланиши, бутун тана бўйлаб тарқалган қизил тошмалар билан намоён бўладиган оғир юқумли ка- саллик. *Скарлатинанинг енгил, ўртача оғир ва оғир турлари ажратилади.* «ЎЗМЭ».

СКАФАНДР [фр. *scaphandre* < юн. *skaphe* — қайиқ + *aner, andros* — одам] Сув остига тушишда, шунингдек, стратосфера ва кос- мосга учишда кийиладиган, нафас олиш учун кислород билан таъмин этиб турувчи аппарати бўлган махсус герметик кийим. *Фаввослар киядиган скафандр резиналанган матодан тикилади.* «ЎЗМЭ».

СКВАЖИНА [қад. р. *скважень* — жар- лик, дара; гор] Бурғилаб кавланган қудуқ. *Газ скважинаси. Нефть скважинаси.*

СКВЕР [ингл. *square* — тўртбурчак май- дон < лот. *exquadrate* — тўртбурчак қилиб қирқмоқ] қ. **хиёбон**. *Сквер томондан оқиб тушган баҳор суви тротуарнинг зиҳида кўп- лаб ётар, ўша ёқдан келган кишиларнинг лой*

излари асфальтга мухрдай босилиб, қуриб қолган эди. П. Қодиров, Уч илдиз.

СКЕЛЕТ [лот. *skeletonos* — қуриб қолган < *skello* — қуриتماман] *анат.* Одам ва ҳайвон организмда таянч ва ҳимоя вазифасини бажарадиган қаттиқ тўқималар мажмуи. *Одам скелети. Ички скелет. Балиқнинг тоғай скелети.* ■ *Одам скелети 200 дан ортиқ суякдан иборат бўлиб, тузилиши одамсимон меймунларникига ўхшайди.* «ЎЗМЭ».

СКЕПТИК [юн. *skeptikos* — кўриб чиқишга, ўйлаб кўришга мойил] **1** *флс.* Скептицизм тарафдори. *Скептиклар антик диалектикадек қудратли қуролга эга эдилар.* «Фалсафа».

2 Ҳеч нарсага ишонмайдиган, ҳамма нарсага шубҳа ва ишончсизлик билан қарайдиган одам.

СКЕПТИК 1 *флс.* Скептицизмга оид, скептицизмга асосланган, скептицизм руҳи билан суғорилган. *Скептик идеализм.*

2 Ишончсизлик руҳи билан суғорилган. *Масалага скептик қараш.*

СКЕПТИЦИЗМ [юн. *skeptikos* — кўриб чиқишга, ўйлаб кўришга мойил] **1** *флс.* Объектив ҳақиқатни тўғри ва аниқ билиш мумкинлигига ишончсизлик билан қаровчи идеалистик фалсафий оқим. *Гарчанд скептицизм таълимоти кўп жиҳатдан билиш жараёнининг мураккаб муаммоларини аниқлашга ҳаракат қилган бўлса-да, лекин объектив билишга нисбатан умидсизлик билан қараш ва рад этиши агностицизмга олиб борди.* «ЎЗМЭ».

2 Ҳамма нарсага шубҳа ва ишончсизлик билан қараш; ишончсизлик.

СКИПИДАР [р. < пол. *spikanard* < лот. *spica pardi* — нард (хушбўй ўсимлик) бошоғи] Игнабаргли дарахтларнинг смоласини сув буғи иштирокида ҳайдаш, шунингдек, ёғочни қуруқ ҳайдаш йўли билан олинадиган ўткир ҳидли рангсиз, тиниқ, учувчан суюқлик (лок-бўёқ ишлаб чиқаришда, тиббиётда ва б. соҳаларда ишлатилади).

СКИФЛАР Милоддан аввалги 7- ва миллодий 3-асрларда Дунай ва Волга дарёлари оралигидаги ҳудудда яшаган чорвадор аҳоли. *Скифлар давлати. Скифлар маданияти.* ■ ..скиф қабилалари аслида туркий тилларнинг турли лаҳжаларида сўзлашувчи орийлар эди. «ЎЗМЭ».

СКЛАД [р. складывать — «тахламоқ, жойлаштирмақ, йиғиб, жойлаб қўймоқ» фл. дан ясалган от] *эск. қ. омбор. Тахта склади. Кўмир склади.* ■ *Складда газламалар шифтгача тахлаб қўйилган.* Газетадан.

СКЛАДЧИ қ. **омборчи.**

СКЛЕРОДЕРМИЯ [юн. *skleros* — қаттиқ, берч + *derma* — тери] *тиб.* Терининг, тери ости тўқималарининг, баъзан ички аъзоларнинг қалинлашиб, қаттиқлашиб қолишидан иборат сурункали касаллик.

СКЛЕРОЗ [юн. *sklerosis* — қотиш, қаттиқлашиш] *тиб.* Турли аъзолар, томирлар девори ва тўқималарнинг айрим специфик элементлари ўлиб (камайиб), уларнинг ўрнини бириктирувчи тўқима(лар) эгаллаши натижасида уларнинг қаттиқлашиши. *Мия қон томирлари склерози.*

СКОЛИОЗ [юн. *skoliosis* < *skolios* — қийшиқ, эгри] Умуртқа поғонасининг ён томонга қийшайиши. *Келиб чиқишига кўра, тумға ва орттирилган сколиоз фарқ қилинади.* «ЎЗМЭ».

СКОТЧ [ингл. *scotch (tape)*] Идора, девонхоналарда ишлатиладиган ёпишқоқ лента, тасма.

СКРЕПЕР [ингл. *scraper* — курак, қирғич; ковш < *scrape* — қиртишламоқ, қириб тозаламоқ] *тех.* Ерни қатлам-қатлам қилиб қазиш, ковшни тупроққа тўлдириб, уни белгиланган жойга тўкиш, суриш ва текислаш ишларини бажарадиган машина. *Ялангликда скреперлар, бульдозер ва экскаваторлар, полвон тракторлар саф-саф бўлиб тизилган. Й. Шамшаров, Танланган асарлар. Сал нарида эса, қудратли бульдозерлар ва скреперлар чуқурларни тўлдириб, тепаликларни ағдариб, ер текисларди.* Ш. Рашидов, Бўрондан кучли.

СКРЕПКА [р. скрепить — «бириктирмақ, маҳкамламоқ, қадаб қўймоқ» фл. дан ясалган от] Қоғозларни, ҳужжатларни бир-бирига тиркаш, вақақларни устма-уст қилиб бириктириб маҳкамлаш учун ишлатиладиган сим қисқич.

СКРИПКА [р. скрипеть — «ғижирламоқ, ғарч-ғурч қилмоқ» фл. дан ясалган от] Камонча билан чалинадиган тўрт торли мусиқа асбоби. *Скрипка садоси. Скрипка чалмоқ.*

СКРИПКАЧИ Скрипка чалувчи созанда. *Моҳир скрипкачи.* ■ *19-асрда виртуоз скрипкачи ва машҳур композиторлар Н. Па-*

ганини, П. Сарасате ва бошқаларнинг хизмати катта бўлди. «ЎзМЭ».

СЛАВЯН қ. славянлар. Славян тиллари. Славян аёл.

СЛАВЯНЛАР Келиб чиқиши бир, тили ўзаро яқин бўлган Европа халқларининг энг йирик гуруҳи (уч катта гуруҳга бўлинади: шарқий славянлар, ғарбий славянлар, жанубий славянлар).

СЛАВЯНШУНОС [славян. + ф. شناس — ўрганувчи, билувчи] Славяншунослик мутахассиси.

СЛАВЯНШУНОСЛИК Славян халқларининг тиллари, тарихи, адабиёти ва маданиятини ўрганувчи фанлар мажмуи.

СЛАЙД [ингл. slide] Шиша пластинка ёки плёнка каби шаффоф асосга туширилган оқ-қора ёки рангли фотографик тасвир. Виложлардаги турли хил нон тайёрлаш усуллари фотостендларда, слайдларда, кинолавҳаларда кўрсатиш мумкин. Газетадан.

СЛАЛОМ [норвегча slalom — паства тушадиган из] 1 Ўтиш жойлари байроқчалар билан белгилаб қўйилган махсус йўл бўйлаб чанғида тоғдан тушиш. Тоғ-чанғи слаломи.

2 Табиий ёки сунъий тўсиқлар бўлган дарё ёки каналларда байдарка ва каноэда сузиш. Эшакка эшиш слаломи.

3 Муайян узунликдаги шатак арқони билан махсус трассани бир хил тезликда босиб ўтиш. Сув чанғилари слаломи.

СЛАНЕЦ [қад. р. стланец < стлать — «ёймоқ, ётқизмоқ, тўшамоқ» фл. дан] Қатлам-қатлам тузилишга эга бўлган, юпқа пластиналарга ажраладиган метаморфик тоғ жинси. Ёнувчи сланец. Гилли сланец. ■ Мукамал қават-қаватланган гилли сланецлар томларни ёпишда ишлатилади. «ЎзМЭ». У [олтин] сланецлар, қумтошлар, гранитлар ичида учрайди. С. Кароматов, Олтин қум.

СЛЕСАРЬ [нем. Schlosser < Schloß — кулф, зулфин, тамба] Металл буюмларни қўлда ишлаш, ясаш, тузатиш бўйича мутахассис ишчи; чилангар. Юқори малакали слесарь. Монтажчи слесарь. Ремонтчи слесарь.

СЛЁТ [р. слететься — «ҳар ёқдан йиғилиб, ёпирилиб келмоқ» фл. дан] Оммавий ташкилотларнинг ёки бир касбдаги кишиларнинг катта йиғилиши, кенгаши. Илғор механизматорлар слёт

СЛОВАК Словак миллатига мансуб. Словак тили. Словак аёл.

СЛОВАКЛАР Ғарбий славянларга мансуб халқ; Словакия Республикасининг асосий халқи. Археологик тадқиқотлар словакларнинг аجدодлари — ғарбий славян қабилалари ҳозирги Словакия ҳудудидида 4–5-асрда пайдо бўлганлигини кўрсатади. «ЎзМЭ».

СЛОВЕН Словен миллатига мансуб. Словен аёл. ■ Адабий словен тили 19-аср ўрталарида тўлиқ шаклланган. «ЎзМЭ».

СЛОВЕНЛАР Жанубий славянларга мансуб халқ; Словения Республикасининг асосий халқи. Югославия таркибидан ажралиб чиққан словенлар 1991 йил 25 июндан мустақил давлат барпо этганлар. «ЎзМЭ».

СЛЮДА [қад. р. слуд — юпқа, шаффоф муз қатлами] Юпқа қатламларга ажраладиган қаттиқ шаффоф минерал; муҳим фойдали қазилма. Слюдалар ёпишқоқлиги ва эгилювчанлиги туфайли тез ўзгаради, энгил жилланади. «ЎзМЭ».

СМЕНА [р. смениться — «алмашинмоқ, бошқасининг ўрнига келмоқ» фл. дан] 1 Ўрин алмашиниб ишловчи, ўқувчи, дам олувчи ва ш. к. кишилар гуруҳининг бошқа кишилар гуруҳи билан алмашинувига қадар давом этадиган вақт бўлаги. Икки сменада ишлаш. Биринчи сменада ўқиш. ■ Эртаси иккинчи сменадан қайтишда Набигул Қодир билан бирга кетди. А. Қаҳҳор, Қанотсиз читтак. Қудрат бу бола билан кечагина яқиндан танишиди. Уларнинг иккиси бир мактабдан бўлса ҳам, сменалари бошқа, қишлоқлари ҳам бошқа эди. Ҳ. Назир, Сўнмас чақмоқлар.

2 Шу вақт давомида бирга ишловчи, ўқувчи, дам олувчи ва ш. к. кишилар гуруҳи. Янги смена ишга чиқди. Смена ишдан қайтди. ■ Смена мастери уни биринчи марта ер остига олиб тушганида, Иномжоннинг бўладигани бўлган эди. С. Аҳмад, Мўтти.

СМЕНАДОШ 1 Бир сменада ишловчи, ўқувчи ва ш. к. кишиларнинг ҳар бири (бошқаларга нисбатан).

2 Бир-бирини алмаштирувчи, ўрнини олувчи, ўрнини босувчи. Биз дам олаётган пайтда сменадошларимиз ишни давом эттирдилар.

СМЕНАЛИ Сменалари бўлган, сменаларга бўлинган. Уч сменали иш. Икки сменали ўқиш.

СМЕТА [р. (с)метить — «мўлжалламоқ, кўзламоқ» фл. дан ясалган от] Олдиндан тузилган кирим-чиқим ҳисоби ва шундай ҳисоблар ёзилган ҳужжат. *Харажатлар сметаси. Курилиш сметаси. Сметага киргизмоқ.* ■ *Техник чақириб, план ва смета тузиш, неча пуд тунука керак бўлишини билиш зарур экан.* А. Қодирий, Обид кетмон. *Баъзан ишлаб чиқаришга, объектларни қуришга алоҳида харажатлар сметаси тузилади.* «ЎЗМЭ».

СМЕТАНА [қад. р. сметати — «йғифмоқ, уюм қилиб тўпламоқ» фл. дан: куюқ сут, қаймоқ] Суюқ қаймоққа ивितки кўшиб тайёрланадиган маҳсулот. *Сметана таркибидан сут ёғидан ташқари оқсил, сут қанди, органик кислоталар, минерал тузлар, шунингдек.. витаминлар мавжуд.* «ЎЗМЭ».

СМОЛА [р. смола — елим; қатрон, чирк] Игнабаргли ва б. баъзи бир ўсимликлардан ажралиб чиқадиған, ҳавода қотиб қоладиган елимшак модда; шира. *Қарағай смоласи. Куюқ смола. Хушбўй смолалар. Синтетик смола.* ■ *Баҳайбат қарағайлар шохи ва тана қисмининг синган ва зарарланган жойларидан кўнлаб смолалар ажралиб чиқа бошлаган.* «Фан ва турмуш». *Бу янги материалга цемент ҳам, сув ҳам ишлатилмайди. Улар ўрнига полимер смоласидан фойдаланилади.* «Фан ва турмуш».

СМОЛАЛАМОҚ Смола суртмоқ ёки сингдирмоқ. *Қайиқларни смолаламоқ.*

СМОЛАЛИ Смола берадиган; серсмола. *Смолали дарахтлар.*

СМОРОДИНА [қад. р. смород — ўткир, кучли хид] қ. **қорағат**. *Смородина озиқ моддаларга бой, сернам, сувни яхши ўтказадиган, ер ости сувлари камида 1,5 метр чуқурликда бўлган ерларда яхши ўсади.* «ЎЗМЭ».

СНАЙПЕР [ингл. sniper < snipe — панадан туриб отмоқ] Махбус таълим олган мерган, моҳир отувчи. *Снайперлар милтиғи.* ■ *Дивизияда снайперлар курси очилиб, унга Тешабой Одилов раҳбар этиб тайинланди.* Газетадан.

СНАРЯД [р. снаряд — асбоб; қурол, тўп ўқи, ёрилувчи бомба] 1 Артиллерия қуролларидан отиладиган ўқ-дори тури. *Портловчи снаряд. Ёндирувчи снаряд.* ■ *Артиллерия учун снаряд сув ва ҳаводек зарур бўлгани учун, Воҳидов фурсатни бой бермай, снарядларни елкасига қўйиб таший бошлади.* Газетадан. *Тепада снарядлар портлар, гильзадан ясалган*

заиф исчиноқ ҳар ларзада пиртираб, қоронғи ер қаъридаги ҳаётни зўрға ушлаб тургандек туюлар эди. А. Мухтор, Асарлар.

2 Баъзи техник қурилмалар номи. *Ер қа-зувчи снаряд.*

3 Гимнастика асбобларининг умумий номи. *Снарядда машқ қилмоқ.* ■ *Унда [мусобақада] россиялик спортчи Т. Лисенко снарядни 77 метру 80 сантиметрга улоқтирди.* Газетадан.

СОВАТОР [р. со.. — бирга + автор] эск. айн. **ҳаммуаллиф**. -*Йўқ, ростини айтинг, — деди Яхшибоев қовоғини очмай. — Айтинг, соавтор бўлсам хафа эмасмисиз?* М. М. Дўст, Лолазор.

СОАТ [а. ساعت — аниқ бир вақт, лаҳза; 60 дақиқали вақт] 1 Сутканинг йигирма тўртдан бир улушига тенг вақт ва шу муддатни кўрсатувчи вақт ўлчови. *Бир соат — олтмиш минут. Орадан уч соат ўтди.* ■ *Отабек Марғилонга ҳар нимадир бир соат илгарироқ етиш учун ошиқар эди.* А. Қодирий, Ўтган кунлар. *Эллик қадамча йўлни, назаримда, бир соатда босгандай бўлдим.* С. Сиёев, Ёруғлик.

2 Туш пайтидан ёки ярим кечадан бошлаб шу ўлчовда ҳисобланадиган вақт оралиғи; пайт. *Қутидор, одатига қарши, бозордан кундуз соат учларда қайтиб келди-да, Отабекни сўради..* А. Қодирий, Ўтган кунлар. *Мажлис роппа-роса соат бирда бошланди.* Ў. Ҳошимов, Қалбингга қулоқ сол. *[Ҳасанали] Ухламай кутиб ўтирди. Аммо [Отабек] тунги соат ўн бир бўлса ҳам келмас, ўн иккида ҳам дараксиз эди.* А. Қодирий, Ўтган кунлар. *Солиҳ иш вақти туғашига икки соат қолганда нарсаларини йиғиштирди.* О. Мўминов, Хиёбондаги уч учрашув.

3 Вақтни сутка давомида шу ўлчовда ўлчайдиган асбоб. *Олтин соат. Чўнтак соат. Девор(ий) соат.* ■ *Чарм камзулли йигит ён чўнтагидан занжирли соатини олди, қопқоғини қирс эткизиб очди.* С. Сиёев, Ёруғлик. *Врач Мамлакатнинг томир уришини соати-га қараб ўлчади.* Ў. Усмонов, Сирли соҳил.

4 Ўқув машғулоти учун белгиланган 40 минутли ёки 45 минутли вақт, дарс. *Ўзбек тили учун ҳафтада тўрт соат ажратилган.* ■ *Бир ўқувчининг бир соат дарс қолдириши ҳам унинг билимига таъсир қилади.* Газетадан.

5 Умуман, вақт, фурсат, пайт, он. *Толе соатини кутмоқдан ўзга иложимиз йўқ [деди*

подшоҳ Навоийга]. Ойбек, Навоий. *Бу кунги кеч Отабек билан Ҳомиднинг қайси бирларининг сўнг соатлари етганлиги шу қоронғи тун каби қоронғи эди.* А. Қодирий, Ўтган кунлар. *Меъмор бўлса икки шогирдининг сал қуюшқондан чиқиб, талтайишаётганидан энсаси қотиб келарди: қани шундоқ яхши соатларда унинг ёнида ўғли Низомиддин ҳам бўлса!* Мирмуҳсин, Меъмор.

6 Маълум мақсад учун белгиланган, хос вақт. *Қабул соатлари. Иш соати.* ■ *Ўрдага алоқаси бўлмаган кишилар боққа киролмаслар, фақат ҳафтада бир кун кўнгул очиш соатларида, баъзи мустасно зотлар учун боғнинг йўли очик бўлар эди.* А. Қодирий, Меҳробдан чаён.

7 Соат (эркаклар исми).

СОАТЛАБ *рвш.* Бир неча соат; кўп вақт. *Соатлаб кутмоқ.* ■ *Булар душман позициясига яқинроқ бориб, бирон қулай жойда соатлаб, баъзан кунги бўйи пойлаб ётишади.* А. Қаҳҳор, Асарлар. *Кечагидай эсимда, худди шу вокзалда дадам билан изғиринда соатлаб поезд кутганмиз.* Газетадан.

СОАТЛИ 1 Соат давомидаги, бирор соат давом этган ёки этадиган. *Икки соатли маъруза. Олти соатли иш кунги.* ■ *Баъзи мунишийлардаги ярим соатли бу ўзгаришдан таажжуб қилинмасинким, бунинг сабаби оддий ва очиқдир.* А. Қодирий, Меҳробдан чаён. *Шаҳар билан Келеснинг ораси ярим соатли йўл.* Ў. Ҳошимов, Қалбингга кулоқ соал.

2 Соатлар бўйича тузилган. *Соатли график.*

3 Соати бўлган, соати бор. *Соатли киши.*

СОАТСОЗ [а. + ф. ساعت ساز – соат ясовчи, тузатувчи] Соат ясовчи ёки тузатувчи уста. *Биринчи пружинали соатни женевалик соатсоз Густав Фили ихтиро этган.* Газетадан.

СОАТСОЗЛИК Соат ясаш, тузатиш билан шуғулланиш, соатсоз касби. *Соатсозликни ўрганмоқ.*

2 Соат ишлаб чиқариш. *Соатсозлик заводи.* ■ *А. Розиковнинг шикоятчи асосида соатсозлик устахонасидаги нуқсонлар очиб ташланди.* «Мушғум».

СОБ: **соб бўлмоқ 1** Тамом бўлмоқ, тугамоқ. *Пулим соб бўлди.* ■ *Отасидан қолган кўр-қут соб бўлгандан кейин Нурматжон наст ишни ўзига эп кўрмади, тузук иш уч-*

рамади. А. Қаҳҳор, Асарлар. *Қиш охирилаб, тўйлар соб бўлди.* Т. Мурод, От кишнаган оқшом.

2 кўчма Ҳамма имкониятдан айрилмоқ; умиди узилмоқ. - *Мен учун ҳамма нарса соб бўлди!* – деди Қиём. Ш. Холмирзаев, Қил кўприк.

3 кўчма Жисман ва маънан инқирозга юз тутмоқ. *Шу шўрлик аёлни [касални] бир кириб кўрайлик! Уч кунлиги борми, йўқми.. соб бўлган дейишади..* А. Қаҳҳор, Асарлар. - *Уйни нима қиламан? Соб бўлган одамман мен,* – гўнғиллади Нусратилла. А. Мухтор, Опасингиллар.

Соб қилмоқ Тамом қилмоқ, тугатмоқ. *Гапни соб қилмоқ.*

СОБАЧКА [р. собачка – кучукча; милтиқ тепкиси; бирор деталь тиши] *тех.* Турли машина ва механизмларда айланувчи деталларнинг тескари айланишига йўл қўймайдиган тишсимон қисм.

СОБИР [а. صابر – сабрли, чидамли, матонатли] **1** Сабрли. *Собир одам.* ■ *Очил бува сафарни тугатганидан, эзгу бир фарзни бажо келтириб, кони савобга ботган одамдек мамнун кўринар, сокин ва собир эди.* А. Мухтор, Чинор.

2 Собир (эркаклар исми).

СОБИТ [а. ثابت – мустаҳкам, барқарор, матонатли, букилмас] **1** Бир гапта, мақсадда, маслакда мустаҳкам турадиган; оғишмайдиган. *Собит курашчи. Собит дўст.* ■ *Бу дунёда сарҳадлар шартли, Бу дунёда собитдир Ватан.* У. Қўчқоров, Ҳаяжонга кўмилган дунё. *Наҳот, дейман, дунёда собит нарса йўқ асло, Наҳотки етукликнинг тимсоли йўқ бус-бутун?* А. Орипов, Юртим шамоли.

Собит қолмоқ Бир гапта, мақсадда оғишмай мустаҳкам турмоқ. *Агар биз, шу ўтирган оғайнилар, бояги гапта собит қолсак, сиримизни яна яшириб кетиш мумкин.* А. Қодирий, Ўтган кунлар.

2 Собит (эркаклар исми).

СОБИТҚАДАМ [а. ثابت قدم] (*тўғриси собит қадам*) *айн.* **собит 1.**

СОБИТҚАДАМЛИК (*тўғриси собит қадамлик*) Ўз мақсади, маслагидан оғишмаслик, саботлилиқ. *Аммо шоира иродали бўлгани учун собитқадамлик билан ижод этишда давом қилади.* «ЎТА».

СОБИҚ [а. سابق — қувиб ўтувчи; олдиндаги; аввалги, бурунги] Ўтмишда бўлиб ўтган, илгариги. *Собиқ директор. Собиқ мустамлака мамлакатлар.* ■ -Илиниб турганини сезасанми, раис, — деди у хаёл суриб, — энди сен ҳақиқий раис эмас, собиқ раиссан. Ш. Рашидов, Бўрондан кучли. Тунов куни билет олгани вокзалга чиқсам, собиқ курсдошим Элмуродни кўриб қолдим. С. Сиёев, Эркаклар эртаги.

СОБОЛЬ [р. соболь — юмронқозиқ; олабула, олачипор; хол-хол] Жуни қалин, майин, қора-кўнғир рангли сутэмизувчи ҳайвон (қимматбаҳо мўйнаси учун кўп овла ниши натижасида камайиб кетган). *Соболь ҳар хил ҳайвонлар ва ўсимликлар билан озиқланади.* «ЎЗМЭ».

СОБОР [р. собор — (руҳонийлар) йиғини] Олий мартабали руҳонийлар ибодат қиладиган йирик христиан ибодатхонаси. *Тошкентдаги Спасс Преображенск собори (1888), Самарқанддаги Покровск собори (1902) кабилар Византия меъморилиги таъсирида.. қурилган.* «ЎЗМЭ».

СОБУН [а. صابون — совун] эск. кт. айн. совун.

СОВЕТ I [р. совет — кенгаш; маслаҳат] I тар. Давлат ҳокимиятининг вакиллик органи, жамиятни сиёсий жиҳатдан ташкил этиш шаклларида бири. *Олий Совет. Шаҳар совети.*

2 эск. Турли хил коллегиал органларнинг номи (яна қ. **кенгаш**). *Ҳарбий совет. Педагогика совети.* ■ Унинг ёнидаги стулда отоналар советининг раиси — телевизорда ҳам бир-икки марта одоб ҳақида суҳбат ўтказган чўққисоқол пенсионер чол — Қосим ота жойлашган. Ў. Ҳошимов, Қалбингга кулоқ сол.

СОВЕТ II тар. эск. I Совет мамлакатига, СССРга алоқадор, Советлар мамлакатига мансуб. *Совет Иттифоқи. Совет халқи.*

2 Совет давлат органларига ва уларнинг фаолиятига оид. *Хўжалик ва совет ташкилотлари.*

3 СССРда пайдо бўлган, вужудга келган, шаклланган. *Совет ҳукумати. Совет кишиси. Совет мафқураси.*

СОВИМОҚ I Иссиғи, ҳарорати пасайиб, совуқ ҳолга келмоқ, бирмунча совуқ бўлмоқ. *Сув совиди. Ҳаво совиди.* ■ Ёдгорнинг назарида, уй янаям совиб кетгандек кўринди. Ў. Ҳошимов, Қалбингга кулоқ сол.

Отақўзи бирдан қайнаб тошди-ю, совиб қолган бир пиёла чойни бир кўтаришда бўшатди. О. Ёқубов, Диёнат.

2 Баданидан ҳоври кўтарилиб, ҳарорати нормаллашмоқ. *От совиди.* ■ Чув деб отга қамчини, Чинор бериб боради. Совидими жонивор, Узин отиб боради. «Ойсулув».

3 кўчма Ҳовридан тушмоқ, пасаймоқ. *Тез қайнаган тез совир, дейдилар.* С. Сиёев, Аваз. *Мамашанинг қилиқларидан хафа бўлмайсизда, кўшин.* Кейин совиб қоладилар. «Муштум».

4 Жўшқинлигини, хуружини, авжини, қизигини йўқотмоқ, сусаймоқ, сўнмоқ. *Бозор совиди. Базм совиб қолди.* ■ *Олчинбек унинг [Ҳамзанинг] бу таклифини на рад этди, на қувватлади.* Шу билан суҳбат совиб қолди. К. Яшин, Ҳамза.

5 кўчма Кўнгли қолиб, меҳр-муҳаббатини, майлини, ихлосини йўқотмоқ. *Ишдан совимоқ.* ■ *Дарслардан совидим, ҳеч ким билан ишим йўқ.* А. Мухтор, Давр менинг тақдиримда. [Аваз:] Оға, ўн кунча бўлди, кўлимга қалам олмадим. *Назмдан тамом совидим.* С. Сиёев, Аваз.

Кўнгли совимоқ қ. кўнғил. Тупроғи совимай (ёки совимасдан) Вафот қилганидан

ҳеч қанча вақт ўтмай. *-Дада, уялмайсизми, андиша қилмайсизми? Акамнинг тупроғи ҳали совимай туриб-а? — деди Низомжон.* С. Аҳмад, Уфқ. *-Қандай ота у? — қичқирди Нури.* *-Ойимнинг тупроғи совимасдан, чўри қизга уйланадими? Ойбек, Танланган асарлар.*

СОВИТКИЧ тех. I Озиқ-овқат маҳсулотлари ёки тез айнийдиган маҳсулотлар паст температурада сақланадиган иншоот ёки қурилма; холодильник. *Икки камерали совиткич.* ■ *Уй-рўзғор совиткичида температура +6° дан — 18° гача бўлиши мумкин.* «ЎЗМЭ».

2 Кондиционер. *Қалдирғоч.. хонани бир айланиб, деразанинг юқори кўзига ўрнатилган совиткич устига қўнди.* Ш. Холмирзаев, Сайланма.

СОВИТМА Совитиб тайёрланган, сови тилган. *Совитма ош.*

СОВИТМОҚ I Совимоқ фл. орт. н. Уйни совитмоқ. *Компотни совитиб ичмоқ.* ■ [Гулнор] *Онаси тайёрлаб чиққан хўрда ошни одатда жуда совитиб ичишни яхши кўргани учун четга олиб қўйди.* Ойбек, Танланган асарлар. *Агар ҳоқим ҳеч кимни, айниқса Қудрат акани, қамамаган бўлса, аҳолини қўр-*

қитмаслик, ишдан советмаслик учун қамамаган. М. Исмоилий, Фарғона т. о.

2 махс. Боқувдаги отни секин-аста юргизиб, оёқларининг чигилини ёзмоқ ёки қизиб турган отни секин-аста юргизиб, ҳовридан туширмоқ. *Отни бир оз советдим. Бедда солдим.* Ҳ. Фулом, Машғал.

3 этн. Иссиқ-совуқ, амал қилиб кўнглини қолдирмоқ, ихлосини қайтармоқ. [*Домла Фотимага:*] *Советмоқ учун бир қанча нарсаларга дам солмоқ керак, айниқса, чойга, қандга, ундан кейин бир банд қилиб бераман, эрингиз ётадиган жойга қўясиз.* Ҳамза, Тўхматчилар жазоси.

Иссиқ ўрнини (ёки жойини) советмоқ Яхши ўрнашиб ишлаб ёки яшаб турган жойини алмаштирмоқ.

СОВЛИҚ Қўзилаган, соғиладиган қўй; она қўй. *Қўй соғдиришнинг ўзига яраша гапти бор. Она совлиқни бўйнидан қучиб турасан. У типирчиламаслиги керак.* Ш. Холмирзаев, Оғир тош кўчса.

СОВРИЛМОҚ с. т. Совурилмоқ. *Гоҳо атрофдаги йўлтўсар беклар Дастидан соврилди карвонлар — юклар.* М. Шайхзода, Ташкентнома. *Йиллару йилномалар соврилган йўқ шамолга, Ҳақиқат бўлди бугун тушлару афсоналар.* Миртемир, Танланган асарлар.

СОВРИН Улоқ, пойга, мусобақа ва ш.к. ларда ғолибларга бериладиган мукофот. *Адирда эса сумалак пиширилади, ош тортилади.. [кўпқари] уюштирилади, ғолибларга соврин улаштилади.* Ж. Абдуллахонов, Орият. *Бош соврин таъсис этилди: турнир ғолиби тошкентлик усталар ишлаган катта чинни вази олади.* Газетадан.

СОВРИНЛИ Соврини бор, совринга эга. *Ҳайманки, йигитлар совринли ўринлардан бирини олишга ҳаракат қилишади.* Газетадан. *Мусобақада республикамиз ёшлари ҳам совринли ўринларга даъвогарлик қиладилар.* Газетадан.

СОВУМОҚ айн. **совимоқ.**

СОВУН [a. صابون — совун] Ювиниш ёки кир ювиш учун ёғ ва ишқорлардан тайёрланадиган, яхши кўпирадиган хўжалик буюми. *Атир совун. Кир совун. Совун кўпиртирмоқ. Ёмоннинг совуниди кир ювма.* Мақол. ■ *Бунда кумуш шамдондан тортиб жуфт-жуфт қилиб боғлаб қўйилган қорақўл тери-гача, яшик-яшик кир совундан тортиб юзма-*

юз қилиб бойланган тагчармгача бор эди. С. Аҳмад, Уфқ.

Совун тош с. т. Каустик сода. **Совунига кир ювмабди** Кимсага ҳали иши тушмабди, уни ҳали синаб кўрмабди. *Ўзлари йўл излаб, товонларига қурт тушиб қолсин. Улар ҳали Ортиқнинг совунига кир ювишмабди.* М. Мансуров, Ёмби.

СОВУНАК [a. + ф. صابونیه < a. صابونک] Наврўзгуллилар оиласига мансуб, илдизи совун ўрнида ишлатиладиган бир йиллик ўтсимон ўсимлик.

Совунак ҳолва Парвардасимон оқ ҳолва. *Дастурхонда қатлама патири, ўрикқоқи, майиз, совунак ҳолвадан Ҳазорасп олмасигача бор.* С. Сиёев, Аваз.

СОВУНГАР [a. + ф. صابونگر — совун тайёрловчи] **1** Совун ишлаб чиқарувчи қосиб, хунарманд. *Совунгарнинг ўғли Қаҳҳор менинг тенгдош ўртоғим, уларникида бот-бот бўлардим.* М. Жўра, Ноширнома. *Мен унинг тегмайман, деганига қараб турадиган жониворманми? Гўштини сихга тортиб, ёғини совунгарга сотаман, биласанми?* Ҳамза, Танланган асарлар.

2 Совунгарлик саноатининг ишчиси. *Корхона совунгари.*

СОВУНГАРЛИК **1** Совун ишлаб чиқариш касби.

2 Совун ишлаб чиқариш. *Совунгарлик саноати.*

3 Бозорда совунгарлар растаси.

СОВУНДАРАХТ Мевасида сапонин моддаси бўлган ва совун ўрнида ишлатиладиган паст бўйли дарахтлар ёки буталар туркуми.

СОВУНДОН Совун солинадиган идиш; совун қути. *Хола тиш чўтка, совундонларга боладек қизиқиб термилди.* С. Нуров, Майсаларни аёз урмайди.

СОВУНЛАМОҚ Совун суртмоқ, совун суртиб ювмоқ ёки ювинмоқ. *Кирни совунламоқ. Қўлни совунлаб ювмоқ.* ■ *Амаки ўлғудай хасис эди, умрида оёғини совунлаб ювмас — қиёматда пулсиротдан ўтиб кетаётганида тойиб кетармиш..* Мирмуҳсин, Қаҳрамоннома. *У сувни шариллатиб қўйиб, қўлини наридан-бери ювмоқчи эди, деразадан кузатиб турган буви яна ўшқирди: -Совунлаб юв, икки марталаб совун сур! Башарангни ҳам юв!* Мирмуҳсин, Умид.

СОВУНЛИ Совун кўпиги аралаштирилган. *Супургини ишлатишдан олдин совунли*

қайноқ сувда ҳўллаб олсангиз, кўпга чидайди. «Саодат».

СОВУНЧИ айн. **совунгар 1.** Умарали совунчининг невараси-да, Шоқосим анча нобон бола чиққанидан хабарим бор. Аммо бунчалик газандалигини билмасдим. Мирмуҳсин, Умид.

СОВУНЎТ Пояси тўрт қиррали, ёйилиб ўсадиган, барглари чўзинчоқ бегона ўт.

СОВУРИЛМОҚ **Совурмоқ** фл. ўзл. ва мажх. н. Хирмондаги ҳамма дон шамолда бир соатда совурилди. ■ Шаҳарлар хароба, бир уюм тупроқ, қишлоқларнинг кули кўкка совурилган. Ғ. Фулом, Танланган асарлар. Меҳнатларим зое кетмади, елга совурилмади. «Ёшлик».

СОВУРМОҚ 1 қ. х. Шамолда шопириб тозаламоқ, шопирмоқ. Ўт иши – қовурмоқ, Ел иши – совурмоқ. Мақол. ■ [Бободехқон] Кун қизиб турган пайтларда, бошидан офтоб ўтишига қарамай, янчиқ янчибди. Кечки шамолда бугдой совурибди. С. Анорбоев, Бободехқон сўзи.

2 кўчма Беҳудага кеткизмоқ, беҳуда сарф, харажат қилмоқ. Пулни совурмоқ. ■ Мен учун ҳам, ўзи учун ҳам пулни аямай совувар ва ҳеч қачон менинг мойнам билан қизиқмасди. «Ёшлик».

3 Маҳв этмоқ, йўқ қилмоқ, беҳудага чиқармоқ. Тилакларимни совурганинг етмай, тилак уйимни йиққанинг нимаси. М. Исмоилий, Фарғона т. о. Шоирнинг юрагида ҳақиқат душманларига қарши, ҳаммадан севгани – ҳаёт гулини совурмоқчи бўлган ёвуз кучларга қарши ғазаб ёнар эди. Ойбек, Навоий.

Кулини кўкка совурмоқ Бағамом йўқ қилмоқ, маҳв этмоқ, ағдариб ташламоқ. Чингиз фармони билан шаҳарга ўт қўйилиб, кули кўкка совурилди. Мирмуҳсин, Темур Малик. **Кўкка (ёки беҳудага) совурмоқ айн. совурмоқ 1,2.** Шамол қутувар, қорни оппоқ тўзонга айлантириб, кўкка совувар эди. Ойбек, О. в. шабадалар. -Бизни давлат пулини кўкка совурувчи тентаклар, хаёлпарастлар, деб аташаётганлар ҳам йўқ эмас, – деди До-ниёров Моҳидилга. Ж. Абдуллахонов, Тўфон.

СОВУТ тар. Танани найза, ўқ, қилич зарбидан сақлаш учун кийиладиган, пўлат симдан тайёрланган ҳарбий кийим. **Авазхон** отасидан дуо олиб, совутини кийиб, қалқонини эйнига [эгнига] солиб, ўн олти газ исфиҳони олмосини белига осиб жўнади. «Маликаи айёр».

Темур Малик икки қават совут ва дубулға кийиб, кема тумшугига чиқди. М. Осим, Кар-вон йўлларида.

СОВУҚ 1 от Паст ҳарорат, паст температура. **Совуқ оёқдан урар, Иссиқ – бошдан.** Мақол. ■ Тошкентдан келган лектор «Ойда ҳаёт борми?» деган мавзуда лекция ўқиб: -Ойда кечаси юз градус совуқ, кундузи юз градус иссиқ бўлади, – деганди. С. Аҳмад, Уфқ. Албатта, йўл яхши бўлиб, жадалроқ юришса, совуқ унча билинмас, лекин из тушмаган йўлдан юриш мушкул. О. Ёқубов, Эр бошига иш тушса.

Совуқ емоқ (ёки қотмоқ) айн. совқотмоқ. Бировнинг ишига саратонда қўл совуқ қотади. Мақол. ■ Кун иссиқ, пиджаксиз кетай дейман-у, кечасига қолсам совуқ емай, деб қўрқаман. Шухрат, Шинелли йиллар. **Совуқ олмоқ (ёки урмоқ)** Совуқ қаттиқ таъсир этиб ёки музлатиб ишдан чиқармоқ, шикастламоқ. ..Эндигина авж олаётган ниҳолларни бир кечада совуқ урди. Газетадан. **Куруқ (ёки қора) совуқ** Ҳаво очиқ ёки қор ёғмай турган вақтдаги қаттиқ аёз. Тошкентда.. ўткир қуруқ совуқ!.. Соқолларда, мўйловларда, киприкларда қиров. Ойбек, Танланган асарлар. Бир тундаёқ қора совуқ ғўзани урган эди. Ойбек, О. в. шабадалар.

2 от этн. Совуқлик овқатларни кўп истеъмол қилиш натижасида организм фаолиятининг сусайиши. Совуқни оширадиган овқат.

Совуғи ошиди 1) совуқлик овқатни еявериб ланж бўлди. **Совуғинг ошса – давлат, Иссиғинг ошса – қиёмат.** Мақол. ■ -Сутқатиқларинг совуғимни ошириб юборяпти. Шаҳарда бозор яқин эди, асал олдириб турардим, – деди. Ҳ. Назир, Сўнмас чақмоқлар; **2)** кўчма безор бўлди, кўнглига урди. Ўзимиз ҳам етимваччалар орасида хўп чидам билан ўқидик-да, а? Қайси бирини кўрмай, ҳали ҳам совуғим ошади. П. Турсун, Ўқитувчи.

3 Температураси белгили чегарадан паст ёки жуда ҳам салқин, аёз. **Совуқ ҳаво.** **Совуқ кун.** ■ Мен эса дарчадан тўниб боқаман, Совуқ куз тунидан мағни чақаман. А. Шер, Қадимги куй.

4 сфт. Ҳарорати, температураси паст. **Муздек совуқ сув.** ■ Ичкилик деганни совуқ сувдек симирган билан унча кайф қила олмайсиз. А. Қодирий, Кичик асарлар. **Совуқ**

шамол оқими ҳам юз терисига салбий таъсир кўрсатиши мумкин. «Саодат».

5 Иситилмаган, қизитилмаган. *Совуқ уй*. ■ *Театр биноси совуқ, томошабинлар пальто ва қалтоқларда ўтиришарди*. Газетадан. *Совуқ, рутубатли хонамга шу кеч Олиб қайтдим изтиробингни*. А. Орипов, Йиллар армони.

6 Совиган ёки совитилган, яхна. *Совуқ овқат*. ■ *Қодир уйғонди, у ҳаддан ташқари чанқаган эди, чойнакда қолган совуқ чойни шимириб, атрофига қаради*. А. Қаҳҳор, Қанотсиз читтак.

7 *сфт. кўчма Ўзига жалб қилмайдиган; ёқимсиз. Совуқ одам. Совуқ башара. Ўзи совуқнинг қилиғи ҳам совуқ. Мақол. Қулоқдан кирган совуқ сўз Кўнгилга бориб муз бўлар. Мақол. ■ Бир вақтлар деҳқонларга, деб ҳавас билан қурдирган бу уй-жой, гишт ётқизилган кенг супа.. кўзига совуқ, ғариб, мунгли кўринди*. С. Нуров, Нарвон. *Қора қишда тўй қилмай, Баттар бўлгур нокас гов, Бачча-ғарнинг аслида Феъли совуқ эдиёв*. А. Орипов, Йиллар армони. *Кўйинг, Нуъмонжон ака, қиз болани қўлтиқлаб юришни ҳам билмайсиз-а! Бирам совуқ, бесўнақайсиз*. М. Бобоев, Ғўзаллик истаб.

Турқи (ёки сўхтаси) совуқ Гап-сўзи, ташқи кўриниши билан кишига ёқмайдиган кимса ҳақида айтиладиган ибора. *Э, мени энди кўраяпсизми, Муяссархон, эски билганингиз сассиқ чол — сўхтаси совуқ Назар Яхшибойман-да*. М. М. Дўст, Лолазор.

8 Кўнгилга ёқмайдиган, хуш келмайдиган; кўпол, дағал. *Совуқ ҳазил. Совуқ жавоб. Совуқ муомала*. ■ *[Йигит] Даврон томон яқинлашаркан, совуққина илжайганча: -Одамни кўрқитиб юбордингиз, оқа, — деди*. Н. Қиличев, Чигириқ. *Пўлат у [Хусниддин] билан жуда совуқ саломлашди — энсаси қотиб, қўлининг учини берди*. Мирмуҳсин, Қахрамоннома.

9 Ёқимсиз, кўнгилсиз, нохуш. *Совуқ хабар*. ■ *Ёдимга унинг ўша қисқа, лекин менинг энг азиз ҳис-туйғуларимни ячиб ташлаган совуқ мактуби тушди*. О. Ёқубов, Икки муҳаббат. *Маширқий бу совуқ хабарни эшитгач, бағри ўтда ёниб, нима қилишини билмай, Сурия билан бирга тушган расмидан Сурияни қирқиб олиб, ёқиб юборди*. Мирмуҳсин, Қахрамоннома.

Совуқ уруш сиёс. Мамлакатлар ўртасидаги муносабатларда турли йўл ва воситалар билан кескинлик, душманликни кучайтиришга қаратилган сиёсат.

СОВУҚЛИК 1 Ҳарорати, температура-си паст эканлик. *Ҳавонинг совуқлиги. Уйнинг совуқлиги*.

2 *айн. совуқ 1. Манглайда совуқлик ҳис этиб, Кумуш кўзини очди*. А. Қодирий, Ўтган кунлар.

3 Совуқ гап, муомала, қилиқ; ёқимсизлик; кўполлик. *Қилиқнинг совуқлиги*. ■ *Ганининг кўрслиги, муомаласининг совуқлиги учун қишлоқлар уни Соли совуқ деб атардилар*. М. Исмоилий, Фарғона т. о. *Ҳозир унинг [Сидиқжоннинг] кўзига жувон бирон совуқлиги билан эркакни ўздан қочирадиган қари қиз эмас, кўп йигитларни ўзига шайдо қилган.. бир нозанин бўлиб кўринди*. А. Қаҳҳор, Кўшчинор чироқлари.

4 *айн. совуқчилик. Орага совуқлик солмоқ*. ■ *[Ёрқиний] Дадасининг терс юрганидан қайнонаси олдида ўзини гуноҳкор сезарди. Хайрият, орадаги совуқлик хийла юмшабди*. Р. Раҳмон, Меҳр кўзда.

5 Халқ табобатида: паст калорияли овқатлар (ёвгон хўрда, суг-қатиқ, сабзавот ва ш. к.); *зид. иссиқлик 3. -Э, чойи кабуд, мижозга совуқлик қилур, — деди у*. М. Исмоилий, Фарғона т. о.

СОВУҚСИРАМОҚ Совуқ емоқ, танасига совуқ ўтмоқ; ўзини бир оз совуқ егандай ҳис қилмоқ. *От сувини ичгандан кейин совуқсираб, диркиллаб кишнаб, ўттиз икки нағмада ўйнай беради*. «Нурали».

СОВУҚХОНА 1 *айн. музхона*.

2 Маҳаллий ҳаммомларнинг иссиқхонасига кираверишда жойлашган, иссиқхонадан чиқиб, дам олиб, нафасни ростлаб ўтирилдиган алоҳида совуқроқ хона. *Совуқхонада ювинмоқ. Совуқхонага чиқиб дам олмоқ*.

3 *тар. Зиндоннинг алоҳида муздек совуқ бўлмаси*.

СОВУҚЧИЛИК Бир-бирини ранжитиш, ўзаро адоват, низо ва ш. к. туфайли юзага келган ҳолат, совуқ муносабатлар. *Орага совуқчилик солмоқ*. ■ *Шу сабаб бўлиб, оналар ўртасига совуқчилик тушиб қолиши ҳам ҳеч гап эмас*. Х. Тўхтабоев, Йиллар ва йўллар. *Орага расмиятчилик тушдимми — совуқчилик аломати*. «Шарқ юлдузи». *Совуқчилик қуда чақириқдан бошланди*. «Шарқ юлдузи».

СОВУҚҚОН 1 Бўлар-бўлмасга ҳовлиқиб ёки тутакиб кетмайдиган; оғир, вазмин. *Совуққон одам.* ■ У [Тўғонбек] шахзодага ниятларини дилга яширишни, ҳар қандай шароитда ҳам яширин ишлашни, ҳар вақт совуққон бўлишни кенгаш берди. Ойбек, Навоий.

2 Эътиборсиз, бепарво. *Совуққон раҳбар.*

СОВУҚҚОНЛИК 1 Оғир, вазмин бўлиш хусусияти. *Ўзини совуққонликка солмоқ.* ■ *Албатта, эл фойдасидан кўра ўз манфаатини олдинга сурувчи бу чўталчи бекларга қарши ҳожининг совуққонлик сақлай олиши ва асабийлашмаслиги мумкин эмас эди.* А. Қодирий, Ўтган кунлар. *Сўз Гулшан билан учрашиш ва ундан олинган жавобга етганда, Анварнинг туси ўзгариб, киприк остлари учиб кетди. Аммо кутилмаган равишда яна совуққонлик сақлади.* А. Қодирий, Меҳробдан чаён.

2 Мансабдор шахснинг, умуман, бирор кимсанинг ўз вазифарига эътиборсизлиги, бепарволиги; масъулиятсизлик. *Ўз ишига совуққонлик билан қарамоқ.* ■ *Кейинги пайтда баъзи тиббиёт ходимларининг ўз ишларига совуққонлик ва тамагирлик билан муносабатда бўлаётганликлари аниқланди.* «Саодат».

СОВХОЗ [р. советское хозяйство — «совет хўжалиги» бирикмасининг қисқартмаси] *тар. эск.* Собиқ СССР да қишлоқ хўжалигида ташкил этилган йирик давлат хўжалиги. *Совхоз директори. Совхозда ишламоқ.*

СОВЧИ *этно.* Уйланувчи йигит томонидан бирор хонадоннинг вояга етган қизини кўриш ва уни келин қилиб беришга қиз томон розилигини сўраш учун вакил қилинган киши. *Яхши отга қамчи керакмас, Яхши қизга — совчи.* Мақол. ■ *Қиш ичи ҳам кети узилмаган совчилар бир-икки ҳафтадан бери келишдан тўхтаганлар.* Чўлпон, Кеча ва кундуз. *Кўшни маҳаллалик Орият бувининг уникага совчи қўйиши Саломат холанинг етти ухлаб тушига кирмаган эди.* «Саодат». *Аҳмад негадир паришонроқ бўлиб юрган кунларнинг бирида катта қизига совчи келди.* С. Нуров, Майсаларни аёз урмайди.

СОВЧИЛИК Қиз кўриш ва қиз томон розилигини сўраш мақсадида бировнинг хонадонига бориш; совчи бўлиш. *Совчиликка бормоқ. Совчилик қилмоқ.* ■ [Онаси] *Қаёққа совчиликка борса, ўғлингиз латта экан, деб қайтаришарди.* С. Аҳмад, Юлдуз. *Саври хола*

ўғлини хижолатдан қутқармоқчи, азобдан халос этмоқчи, Малоҳатникига совчиликка бормоқчи бўлади, аммо азодор уйга қандай боради! «Шарқ юлдузи».

СОВҚОТМОҚ Баланидан совуқ ўтиб, оғриқ сезмоқ, жунжимоқ. *У боягина тўрвадаги балигини кўтариб, қишлоқ йўлидан изғиринга юзма-юз келаётганида, танаси бунчалик совқотмаган эди.* Ҳ. Фулом, Машғал.

СОВҒА 1 Кимсанинг кўнглини олиш ёки хизматларини тақдирлаш учун тортиқ қилиб берилган нарса; ҳадя, туҳфа. *Қимматли совға. Совға бермоқ. Душманнинг совғасидан кўрқ.* Мақол. ■ *Шаҳар санитария бўлимининг бошлиғи ҳам машинасидан тушиб, у билан жуда куюқ кўришиб, кўкрак чўнтагида турган авторучкасини совға қилди.* С. Аҳмад, Юлдуз. *Тўйга келолмаган оғайниларидан уч-тўрттаси, Бадалбекни табриклаш учун, совғага магнитофон кўтариб келиб қолишди.* С. Аҳмад, Сайланма.

2 кўчма Кўпчилик учун тайёрланган ва тантанали равишда эгаларига топширил(а)диган нарса. *Сайёҳлар, пойтахтимиз меҳмонлари байрам арафасида ана шундай ажойиб совға [яъни меҳмонхона] оладилар.* Газетадан. *Тарихий саналар ва байрамларни меҳнат совғалари билан кутиб олиш — шонли ва азалий анъаналардан бири.* Газетадан.

СОВҒА-САЛОМ Бирор кимсага аталадиган ёки олиб бориладиган совға ва саломлар. *Жавҳар Янги йил олдидан, онасининг қистови билан совға-салом кўтариб, қизчасини кўргани борган экан.* Ж. Абдуллахонов, Хонадон. *Қодиржон Фарғонадан олиб келган совға-саломларни кўтариб, тўғри Шавкат акаликка борди.* «Ёшлик».

СОВҒОТ *эск. кт.* Совғалар, туҳфалар.

СОДА [итал. soda < лот. soda — натрий] **1** Натрий карбонатларнинг умумий техник номи. *Ичимлик сода. Каустик сода.* ■ *Нўхатни тезроқ ва юмшаб пишиши учун ивиганда, чой содаси кўшсангиз ҳам бўлади.* К. Маҳмудов, Ўзбек тансиқ таомлари. *Қадимги кишилар қума сода ёки ишқор қўшилса, унинг эриш температураси бир қадар пасайишини билишган.* «Фан ва турмуш».

СОДАЛИ Таркибида сода бўлган, сода қўшилган, сода эритилган. *Содали сув.* ■ *Кунжутли ёки содали нонлар асосан қиздирилган тандирларда пиширилгани маъқул.* Газетадан.

СОДДА [ф. سادده — мураккаб бўлмаган, оддий; соддадил, кўнгилчан; камтар] **1** Тузилиши, таркиби жиҳатидан мураккаб бўлмаган; оддий. *Содда механизм. Кимёвий содда моддалар.*

Содда гап тлш. Ўз таркибида биргина предикатив бирликка эга бўлган, маълум фикр ифодалай оладиган гап. **Содда кесим** тлш. Бир мустақил сўз орқали ифодаланган кесим. **Содда сон** 1) *мат. ўздан бошқа сонларга бутун бўлинмайдиган сон; 2) тлш. биргина сўздан ифодаланган сон. Содда сўз* Таркибида биргина луғавий маъноли қисм бўлган сўз.

2 Ечилиши, осон, енгил, жўн. *Содда масала.* ■ *Тешабойнинг ҳисоби содда: бирга — ўн!* М. Исмоилий, Фарғона т. о.

3 Тушунилиши осон, раvon. *Мақола оммабон, раvon ва содда тилда ёзилган эди. Ф. Мусажонов, Ҳиммат. Маршал аслида сўз қидирмасдан, содда ва аниқ иборалар билан гапирса-да, бу сўзларни оҳиста талаффуз этарди.* Газетадан.

4 Ортиқча ҳашами, безаги йўқ, жуда ҳам оддий. *Содда уй.* ■ *Соддагина чодирда ёлғиз яшаган Навоий дилғир, серташвиш эди. Ойбек, Навоий. [Кумуш] Шу соддагина яшанишдан сўнг иккинчи тоқчада тироғлик турган кўзгу ёнига борди.* А. Қодирий, Ўтган кунлар.

5 Ортиқча такаллуф ёки қувлик-шумликни билмайдиган; оддий, камтар, соддадил. *Содда одам.* ■ *Шерали бу содда, самимий қизнинг болаларча хатти-ҳаракатини кўриб, таажжубланди.* С. Кароматов, Олгин кум. *Содда хотин эрининг куйиб-пишиб айтган бу гапларига астойдил ишонди. Сирни бировга айтмасликка ваъда берди.* С. Аҳмад, Сайланма. *Нойиб кулди: -Соддасан, Акбарали! Подшолик ҳамма вақт юртнинг обрўли одамларини ҳимоя қилади. Обрў давлат билан топилади, мунн биласан.* Чўлпон, Кеча ва кундуз.

6 Гўл, лақма. *Содда сири — тилида, писмиқ сақлар дилида.* Мақол. ■ *Мен содда шунинг гапига ишониб ўтирибман.* А. Қаҳҳор, Қўшчинор чироқлари.

7 Соддаларча қилинган, юзаки. *Элмурод Тожибойнинг.. содда ва беғубор мулоҳазасидан завқланиб кулди.* П. Турсун, Ўқитувчи.

СОДДАДИЛ [ф. ساددهل — очиқ кўнгилли, ишонувчан; гўл, лақма] Қувлик-шумликни

билмайдиган, кўнгли очиқ, кўнгли тоза, софдил. *Соддадил йигит.* ■ *Бу соддадил чолнинг куйиб-пишиб отини мақташидан атрофдагилар ҳам завқланиб кулишди.* Мирмуҳсин, Меъмор. *Соддадил авом халқ Олло таолонинг каломини ўртага кўйиб айтилган бу панду насиҳатларга қулоқ солмай иложи йўқ эди.* К. Яшин, Ҳамза.

2 Содда, гўл. *Қовун сайил мавсуми ва кўклам чоқларида бир талай соддадил ва нодон одамлар кўй, кўчқор, сизир ва бузоқ етаклаб.. шайхларга назр қиларди.* М. Муҳаммаджонов, Турмуш уринишлари.

СОДДАДИЛЛИК **1** Қувлик-шумликни билмаслик; софдиллик; гўллик, лақмалик. *Шўхлик ва қувноқлик, самимийлик ва соддадиллик болаларга хос хусусиятлардир.* Газетадан. *Соддадиллик қилиб, фириб еди-ю, қаҳрамонлик қилиб, ўзини оқлади.* Н. Сафаров, Жангчи шоир.

2 Соддадил кишиларга хос иш, хатти-ҳаракат. *Ҳайдарнинг соддадиллик билан ҳеч нарсани яширмай очиқ айтиши, ҳатто амалнинг чизган чизиғидан чиқмаслигини тан олавериши унинг оқкўнгил одамлигини билдиради.* Э. Усмонов, Ёлқин.

СОДДАЛАШМОҚ **1** Тузилиши, таркиби жиҳатидан оддийроқ ҳолга келмоқ, солдароқ бўлмоқ. *Бошқарув аппарати соддалашди. Тенглама соддалашди (мат.).* ■ *Либоснинг кундалик қисми бўлган безаклар бичими соддалашди.* Газетадан.

2 Муомала, юриш-туриш жиҳатидан оддийлашмоқ, оддийроқ, соддароқ бўлиб қолимоқ.

СОДАЛИК **1** Ишонувчанлик, ҳар бир нарсани тўғри қабул қилишлик. *Соддалик қуриб кетсин, «Холматов», деганларида ҳам хаёлимга ҳеч нарса келмабди.* О. Ёқубов, Излайман.

2 Гўл ёки соддадил кишиларга хос иш, хатти-ҳаракат. *Соддалик қилмоқ.* ■ *Темиржон соддалик қилиб, Ғойибжоннинг гапига чиппа-чин ишонарди.* Ж. Абдуллахонов, Орият. *-Отини сўрамадингизми? -Уни қаранг-а, бу ҳам соддалик-да, сўрамабман.* Ойдин, Суҳбади жонон.

СОДИР [а. صادر — келиб чиқадиган; ташқарига чиқадиган; рўй берувчи] **1: содир бўлмоқ** Воқе бўлмоқ, рўй бермоқ, юз бермоқ. *Талиб ака гўё ҳеч нарса содир бўлмагандек юраверди, Аҳмадни ўз ҳолига ташлаб кўйди.*

Ф. Мусажонов, Ҳиммат. *Аҳмад энг яқин одамларидан жудо бўлиб қолганини, мудҳиш воқеа содир бўлганини тушунди.* Ф. Мусажонов, Ҳиммат.

2 Содир (эркаклар исми).

СОДИҚ [а. صادق – самимий, софдил; чин, ҳақиқий] 1 Сидқидилдан берилган, садоқатли. *Содиқ дўст.* ■ [Аваз] Юраги бозиллаб, теваракка нолон боқиб.. ўзига содиқ рафиқ, сафдош, аниқроғи, бир раҳнамо излаб юргандек эди. С. Сиёев, Аваз. [Бобур] *Кетганларни қайтариб келиш учун энг содиқ беклардан бирини Андижонга юборди.* П. Қодиров, Юлдузли тунлар. *Мен буюк юрт ўғлидирман, Мен башар фарзандиман, Лекин аввал сенга бўлсам Содиқ ўғлон, ўзбегим.* Э. Воҳидов, Муҳаббатнома.

2 Содиқ (эркаклар исми).

Субҳи содиқ Куюш чиқишидан сал олдинги тонг ёришиши. *Ана шундай тароватли субҳи содиқда Меҳтаробод маҳалласидан икки киши йўлга чиқди.* С. Сиёев, Аваз.

СОДИҚЛИК Садоқатли бўлиш, сидқидиллик, вафодорлик, садоқат. *Ватанга содиқлик. Дўстларнинг содиқлиги. Содиқлик кўрсатмоқ.* ■ *Адолат бу аҳил эр-хотиннинг ҳаётини доим ҳавас қилар, уларни бир-бирига содиқлиги учун ҳурматлар, ўзининг ҳам ҳаёти ана шундай бўлишини орзу қиларди.* С. Зуннунова, Гулхан.

СОЗ I [ф. ساز – розилик; рухсат; келишув; мослик, мувофиқлик] 1 Яхши, тузук, дуруст, қулай. *Оз сўз – соз сўз.* Мақол. *Иш қуролинг соз бўлса, машаққатинг оз бўлар.* Мақол. ■ *Наманган бораман, создир ҳавоси, Мевалари ширин, дарднинг давоси.* С. Абдулла. *Бу гулшан соз эди, соз устига соз этгали келдик. Қадрдонларни шод айлаб, сарафроз этгали келдик.* Ҳабибий, Танланган асарлар.

Соз тупроқ Механик таркибига кўра энг оғир тупроқ тури. *Агдарма машиналар йўл очилаётган жойга соз тупроқ ташиб келтирмоқдалар.* Газетадан.

2 Ўзаро яхши муносабат, муомала; ҳамжихатлик, иноқлик, иттифоқлик. *Қариндошлар билан созингиз чиқмас эмиш.* Н Норқобилов, Бекатдаги оқ уйча.

Соз(и) келмоқ Гапи, феъл-атвори мос келмоқ. [Зиёдулла:] *Сафар ака, биласиз, бизнинг Гарлоннинг тўригингиз билан сози келмайди. Вақтини топдим, жиққамушт бўлади.* Т. Мурод, От кишнаган оқшом. *Ҳан-*

гомаси соз келмасми, Ҳар кимнинг тенгқури бўлса. «Оқ олма, қизил олма».

3 мус. Созланган, сози тўғрилланган. *Дутор ҳали соз эмас.*

4 Мусиқа асбоби торларининг ёки мусиқа асбобларининг ўзаро мос товуш уйғунлиги. *Роялнинг сози бузилибди. Созини тўғриламақ.*

СОЗ II [ф. ساز – тор; мусиқа асбоби] 1 Миллий мусиқа асбобларининг (мас., дутор, танбур, гижжак) умумий номи. *Қирқида қўлига соз олган қиёматда қулоғини бурар.* Мақол. ■ *Аста-секин бошланган чапак тобора авж олиб, соз овозини босиб кетди.* А. Қаҳҳор, Кўшчинор чироқлари. *Бу симфония орасидан авторнинг якка созда чалган турли пардадаги овози яққол эшитилиб туради.* «ЎТА».

2 Туркия, Эрон ва Озарбайжонда тарқалган торли-тирнама мусиқа асбоби.

3 Мусиқа асбобининг ёки хонандаларнинг овози, садоси, навоси. *Йўрғаларди созга бир гўзал дўндик, Ҳамма эшитарди завқ билан кўшиқ.* М. Алавия.

СОЗ III шв. Қамиш, қамишзор.

Соз силовсин Қамишзорда яшовчи силовсин, ёввойи мушук.

СОЗАНДА [ф. سازنده – қурувчи, яратувчи; чолғучи] Миллий мусиқа асбобларидан бирида машқ қилувчи мусиқачи; машшоқ, навозанда. *Ҳовузнинг икки ёнидаги икки супани хонанда ва созандалар эгаллаган, созларнинг куйи боғдаги булбуллар овозига қўшилиб, юракларда ширин орзулар.. уйғотарди.* О. Ёқубов, Кўҳна дунё. *Ҳовлининг бир томонида, баланд сўрида хонанда ва созандалар мақомни янграймоқда.* Мирмуҳсин, Умид.

СОЗЛАМОҚ I Соз қилмоқ, тўғриламақ, яхшиламоқ; тартиб бермоқ. [Рихсиев] *Қиш бўлсаям, ҳашар қилиб, ҳовлини созлади.* Т. Мурод, От кишнаган оқшом.

2 Яхшиламоқ, яхши қилмоқ. *Саҳар турдим-у, кайфиятни созлаб, мактабга жўнадим.* С. Сиёев, Ёруғлик.

3 Мусиқа асбоблари товушини ўзаро мослаштирмоқ, уйғунлаштирмоқ, созини тўғриламақ. *Гуландом дуторни олиб созларкан, деди: -Дутор бўлмаса, бу зиндонда юрагим ёрилиб улар эдим.* Ойбек, Танланган асарлар.

4 тех. Бирор технологик жараён ёки ре-жимга мосламоқ, ростламоқ, тўғриламоқ. *Станокни созламоқ.*

СОЗЛИҚ *шв.* Қамиш босган ботқоқ ер; қамишзор. *..Биз текис йўл қолиб, созлиқни кечиб кетдик.* А. Мухтор, Давр менинг тақ-дирилда. У [Комил] *йигитларни хирмоннинг орқасидаги созлиққа бошлаб ўтди.* О. Ёқубов, Эр бошига иш тушса.

СОЗЧИ *шв.* Созанда, машшоқ. *Қурбон созчи гармонь садафларини босиб, ажойиб сеҳрли куйлар ҳосил қилар, ўзи ёзган шеърни куйга солиб, қўшиқ айтирди.* Ж. Шарипов, Хоразм. *Холдор созчи қирқ йил чалган эди соз, Гўзал чертар эди танбур-дурторни.* Ойбек, Камончи.

СОЙ 1 Икки адир ёки тоғ оралиғидаги, кўпинча оқар сувлар ҳаракати ва б. нати-жасида ҳосил бўлган пастлик жой, сув йў-ли, водий. *Бой бойга боқар, сув сойга оқар.* Мақол. ■ *Ҳозир кўклам кунлари: қирлар, сойлар кўк-қизил.. пушти, гўлос ва тагин алақанча рангли чечаклар билан устларини бежаб, ошиқларга янги ҳаёт, янги умид бердилар.* А. Қодирий, Ўтган кунлар.

2 Шундай водийда, пастликда доимий ёки мавсумий оқадиган кичик дарё, ариқ, ирмоқ. *Сой суви. Сойда чўмилмоқ. Сойдан кечиб ўтмоқ. Чой тўкилиб, сой бўлмас, Юлдуз йиғилиб, ой бўлмас.* Мақол. ■ *У бомдодни адо этгач, харсанг тошлар оралаб шарқираб оқайтган сой бўйига тушиб, табиатнинг мислсиз жамолини томоша қилди.* Мирмуҳ-син, Меъмор.

3 махс. Милтиқ стволи ичидаги бурама ариқча.

СОЙЛИК Ер юзасининг ботиқ жойи, пастлик, водий, сой. *Сойликлардан чўққига қадар Сўқмоқ йўллар узоқ чўзилмиш.* Х. Са-лоҳ. *Козим сойликка тушиб, яна юқорига ўрмалади.* Э. Усмонов, Ёлқин.

СОКИН [а. ساكن – тинч, ювош, хотир-жам; кўзгалмас, ҳаракатсиз; бир жойда исти-қомат қилувчи] **1 сфм.** Сукунатга чўмган, жимжит. *Ойдин оқшомларда қишлоқнинг со-кин кўчаларида Мансур билан жимгина ке-зишларнинг ҳам.. ажиб бир гашти бор эди.* Ў. Ҳошимов, Қалбингга қулоқ сол. *Кафе сокин ва тинч, одам сийрак, атроф катта дарахт-лар билан ўралган.* Ф. Мусажонов, Ҳиммат. *Қиз ҳамон қўнғироқдек кулар, сокин боғ унинг*

шодон қаҳқаҳаси билан тўлган эди. Ў. Ҳо-шимов, Қалбингга қулоқ сол.

2 сфм. Ҳаракатсиз, тинч. *Денгиз сокин. Менинг кўнглим Бўрон тилаб турибди..* Х. Даврон, Қақнус. *Кузак шамоллари эсдилар яна, Сокин юрагимда туйғулар кўзгаб.* А. Орипов, Ҳайрат. *Оптоқ булут изғир саросар, Оптоқ булут сокин осмонда.* Р. Парфи, Кўзлар.

3 сфм. Паст, босиқ (овоз ҳақида). *Ёдгор ғувиллаб кетаётган бошини базур кўтариб қаради: Маҳмуда Алиевна ҳамон ўша сокин овозда гапирар эди.* Ў. Ҳошимов, Қалбингга қулоқ сол. *Ним шабадада.. азим чинорнинг сирли бағридан чиқиб келган сокин ва қуд-ратли шовуллаш оламни тутди.* А. Мухтор, Асарлар.

4 рви. Аста-секин, бир маромда. *Тиниқ мовий осмонда парча-парча оқ, пуштиранг булутлар сокин сузади.* Н. Аминов, Ёлғончи фаришталар. *Номига яраша қорамтир сув сокин, виқорли оқади, молларнинг йўғон қиз-ғиш илдиэларини ювади.* Ҳ. Фулом, Бинафша атри.

5 рви. Хотиржам, осойишта. *Сарой вазири подшо ҳузурида ўзини сокин ва бетакаллуф тутган ҳақимни биринчи маротаба кўриши эди.* М. Осим, Ибн Сино қиссаси. *Темиржон-нинг боқишлари сокин, қомати ҳам худди та-биатига мос тушгандай нозиккина.* Ж. Аб-дуллахонов, Орият.

СОКИНЛИК 1 Жимлик, жимжитлик, сукунат. *Тун сокинлигини онда-сонда итлар-нинг ҳуриб қўйишлари бузарди, холос.* «Ёшлик». *Қишлоқ узра сокинлик инди, Тун чодирин се-кин ташлайди.* «Шарқ юлдузи».

2 Босиқлик, хотиржамлик. *Мутрибнинг туриши-турмушидаги хокисорликми, ҳалимлик ё сокинликми, нимадир Авазга тез ва кучли таъсир қилади.* С. Сиёев, Ёруғлик. [Про-фессорнинг] *Қорамағиз чехрасида аланечук хотиржамликми, сокинликми, шунга ўхшаш ифода кўриниб турар.. эди.* Ў. Ҳошимов, Нур борки, соя, бор.

СОКИТ [а. ساكت – жим, индамай ту-рувчи; камгап, индамас; осойишта, тинч, ювош] Сукут сақловчи; жимжит, осуда. *Ём-ғирли кун эди, атроф жим, сокит, Маъюс кўзларинга боқардим сармаст.* А. Орипов. *Олима! Ҳаёлчан, кўлда қаламинг, Жим, сокит хонада ўйларинг чексиз.* Газетадан.

СОЛ 1 Бир-бирига арқон ва ш.к. билан маташтирилиб, сувда оқизиладиган ходалар.

Кемачилар узун ёғочларни.. сол билан оқизиб, Гамакўприк ёнида қирғоққа чиқардилар. Ж. Шарипов, Хоразм.

2 Тахта-ёғочларни ёки сувда чўкмайдиган нарсаларни бир-бирига бириктириб ясалган супа; платформа. *Сирдарёда юрибди Сол ҳам қайиқ, ёр-ёр. Қишлоғингизда борми Бизга лойиқ, ёр-ёр.* М. Алавия. *Эртасига эрта билан от-араваларни сол устига чиқариб, дарёдан ўтказиш машаққати бошланди.* Мирмуҳсин, Меъмор.

СОЛДАТ [нем. Soldat < итал. soldato — маош, мोजना олувчи < soldo — пул, танга] Аскар, жангчи, ҳарбий киши. *Дарвоза олдида иккита солдат соқчилик қилиб турар эди.* М. Исмоилий, Фарғона т.о. *Полковник солдат ва офицерларнинг жангга тайёргарлиги қандай бораётганлигини текширди.* А. Қаҳҳор, Асарлар.

СОЛДАТЛИК Солдат бўлиб хизмат қилиш; аскарлик. *Солдатлик бурчи. Солдатлик мундири. Солдатликка чақирилмоқ.*

СОЛДАТЧА 1 сфм Солдатлар учун белгиланган, солдатларга хос. *Солдатча этик.*

2 рвш. Солдатлардек, солдатларча. *Солдатча юрмоқ.*

СОЛДИ-ПИЩДИ Тезпишар тарвуз номи.

СОЛИДОЛ [лот. solidus — куюқ, қалин + oleum — мой, ёғ] Автомобиль, трактор деталларини ва б. механизмларнинг қисмларини мойлаш учун ишлатиладиган куюқ мой.

СОЛИК [а. سالك — йўлчи, йўлдан юрувчи; очик, бўш йўл; суфийликда учинчи босқичга етишган зоҳид] Тасаввуфда: сулук (тариқат)ни ихтиёр қилган, лекин ҳали бирор мақом ёки мартабага эришмаган мурид.

СОЛИМ Улоқни маррага етказган кишига бериладиган соврин. *Кунда чиқиб бул кўпқари қилади, Кунда солим, улоқ бериб туради.* «Алпомиш». *Ғолибни солим берадиганларнинг ҳузурига ўзи етаклаб бормаса, кўнгли жойига тушмайди.* Ш. Бўтаев, Қўрғонланган ой.

СОЛИНМОҚ 1 Солмоқ 1-2, 4-5, 7-9, 12-19, 21 фл. мажҳ. н. *Жажжигина хона биллур қандилдан ёғилаётган нурга тўлган, доворлардаги кекса артистларнинг суратларини сезилган рамжалар ойнаси ярақлаб турарди.* Ў. Ҳошимов, Қалбингга қулоқ сол. *Узукларга солинган Кўздай бўлди Ойчинор.* «Ойсулув».

Сув йўқ, сув солинган кўзача отнинг тагида қолиб синган. А. Қаҳҳор, Асарлар. *Шимининг тиззаси билан ўнг чўнтагининг тагига ямоқ солинган эди.* С. Кароматов, Олтин кум. *Супанинг қаршисига, ўн қадамча нарига мўъжазгина бир чорпоя кўйилиб, унга самоварнинг эски-туски палослари солинди.* М. Исмоилий, Фарғона т. о. *Тўғри, идишларни ўз вақтида қайтармаган савдо ташиқлотларига жарима солиняпти.* Газетадан. *Зайнабнинг.. оғаси томонидан ушланиб, кишанга солинган можароси эшитилди.* А. Қодирий, Ўтган кунлар. *Ҳовлининг уч томони бир уй, бир айвон қилиб қаторасига солинган янги биналар билан ўралган, бир томони гилосзор боғча.* Ойбек, Танланган асарлар. *Набигулнинг акаси Қодирга попоп машина билан гул солинган қора бахмал бир рўйжа кўрсатди.* А. Қаҳҳор, Асарлар. *Лекин схематик, тили ғализ, баъзи қоида ва шаблонга солинган.. асарлар кишиларга ёқмаяпти.* «ЎТА». *Агар соябон аравада кетаётган икки хотиннинг висир-висирига қулоқ солинса, балки Тешабойнинг сирини билиб олиш мумкин бўлар?* М. Исмоилий, Фарғона т. о.

2 Солмоқ 17 фл. ўзл. н. *Фуломжон.. шунча гуллар ичидан излаган гулини топмадими, қўллари осилиб, боши солиниб чиқди гулзордан.* М. Исмоилий, Фарғона т. о.

3 Осилмоқ, осилиб тушиб турмоқ. *Маъмуржоннинг ўсиқ қошлари солинди, гуё шу қошлар оғирлигидан кўзлар ерга қарарди.* Ш. Холмирзаев, Тўлқинлар.

СОЛИНЧАК Қулоқнинг сирга тақиландиган пастки юмшоқ қисми; сирғалиқ. *Солинчақларда бадомнусха кумуш гажаклар, ойнадор болдоқлар ҳалқа-ҳалқа бўлди.* Т. Мурод, От кишнаган оқшом.

СОЛИСТ [итал. solista < лот. solus — бир, ягона] 1 қ. **ЯККАХОН.** *Муҳиддин қори уни [Уста Олимни] ўз ансамблида солист-музикачи бўлиб ишлашга таклиф қилди.* Ҳ. Носирова, Мен ўзбек қизиман. *Ака-сингил оркестрда солист бўлиб ишлай бошладилар.* Газетадан.

2 Операда мустақил партияларни ижро этувчи хонанда, балетда якка номер (рақс)ларни ижро этувчи артист.

СОЛИСТКА Солист аёл.

СОЛИШМОҚ 1 Солмоқ 1-25 фл. бирг. н. *Болалар расм солишмоқда.* ■ *Ўртоқларим солишар қулоқ, Ҳикоянгни сўйлаганимда.* Р. Бобожон, Танланма. *Уч йигит сандалнинг*

оёқ томонига ўтириб, дилдираётган нотани кишини ўраб, гапга солишди. Мирмуҳсин, Меъмор.

2 Жанг қилмоқ, уришмоқ, муштлашмоқ. У [Асқар полвон] қоида, усул ва тартибга риоя қилмасдан, девдек солишади. Ойбек, Қуёш қораймас.

СОЛИШТИРМА Солиштиришга, қиёслашга асосланган, солиштириш, қиёслаш учун асос бўладиган; қиёсий. *Ҳайвонларнинг солиштирма анатомияси.*

Солиштирма оғирлик физ. Бир жинсли жисмнинг ҳажм бирлигига тўғри келувчи оғирлиги. *Муайян жисм солиштирма оғирлигининг қиймати ўлчов ўтказилаётган жойнинг географик кенлигига ва Ер сиртидан баландлигига боғлиқ. «ЎЗМЭ».*

СОЛИШТИРМОҚ 1 Солишмоқ **2** фл. орт. н. *Хўрозларни роса солиштирдик.*

2 Қиёс қилмоқ, таққосламоқ. *Ўтган йилги натижаларни бу йилги натижалар билан солиштирмоқ. Қўлэмани солиштириб ўқимоқ. ■ Беихтиёр у [Низомжон] опаси билан Асрорани солиштира бошлади. С. Аҳмад, Уфқ.*

СОЛИҚ 1 1 Давлат томонидан амалдаги қонунлар асосида юридик ва жисмоний шахсларнинг даромади ёки мол-мулкидан ундириладиган ва бюджетга ўтказиладиган мажбурий тўлов. *Маҳаллий солиқ. Даромад солиғи. Солиқ йиғмоқ. Солиқ тўламоқ. ■ Унинг [Мусулмонқулининг] ўз кайғича ойда эмас, ҳафтада солиб турган солиқлари фуқароларнинг терисини шилса.. остириб, кес-тириб туриши хосни ҳам эсанкиратди. А. Қодирий, Ўтган кунлар. Солиқ имтиёзлари беришининг хилма-хил шакллари жаҳондаги кўпгина мамлакатларнинг солиқ амалиётида қўлланади. «ЎЗМЭ».*

2 Бирор харажатни қоплаш, бирор маърака-маросимни ўтказишга ёрдам бериш мақсадида ўзаро келишиб, кўпчиликка (асосан қариндошлар ва яқин кишиларга) сочилган, тақсимланган тўлов, йиғим.

3 этн. Олиқ-солиқдаги битимга мувофиқ, куёв томондан келин томонга берилиши лозим бўлган пул ва нарсалар.

СОЛИҚ 2 Куйи солинган, осилган, солиғлик. *Унинг [Дадамаст аканинг] қовоғи солиқ, кўринишидан жаҳлдор одамга ўхшарди. Ф. Мусаёнов, Ҳиммат. Ранги қув ўчиб, беҳуш каби қотган.. Аҳмад Ҳусайн боши қуйи солиқ эди. Ойбек, Нур қидириб.*

СОЛИҚЧИ Солиқ олувчи, йиғувчи, тўловчи. *Илгарилар бу ерга елкасига милтиқ тақиб, ёнбошига чарм халта осган отлиқлар келар, одамлар уларнинг қорасини узоқдан кўрибоқ, «солиқчи» дердилар ва бекинишга жой ахтариб, тирқираб кетардилар. П. Турсун, Ўқитувчи.*

СОЛИҒЛИҚ 1 Солиб жойлаб қўйилган, солинган. *Қинга солиғлик ханжар. ■ Китобнинг қатига дафтар, қалам ҳам солиғлиғича қолган. Мирмуҳсин, Умид.*

2 Қўйилган, солинган. *Самоварда сув солиғлик турибди.*

3 Солинган, ёзилган, тўшалган. *-Бу ёққа ўтиринг, — деди у, эрини палос солиғлик супага таклиф қилиб. М. Исмоилий, Фаргона т. о.*

4 Солиб қўйилган, солинган, бекитилган. *Тугмалари солиғлик. ■ Секин келиб, кўча эшикни итарсам, ичидан қулф солиғлик. «Муштум».*

5 айн. солиқ 2. *Одилов.. Мавлоннинг кўнглини кўтаришга уринди. Мавлон эса, қовоғи солиғлиғича.. индамай ўтираверди. Ф. Жўраев, Обид Жалилов.*

СОЛИХ [а. صالح — хушахлоқ; яхши, очик кўнгилли; яхши, эзгу; фойдали; тўғри; салоҳиятли, яроқли] **1** Эзгу, савобли; энг яхши; фойдали. *Қуръонда.. солих амал ҳам имон таркибига киритилган. «ЎЗМЭ».* *Яхши одамлар, гарчанд ўзлари жисман орамизда йўқ бўлсалар ҳам, солих ишлари ва ибратли хислат-фазилатлари билан тирикларнинг ҳаётига кўмакдош бўлиб яшайдилар. Газетадан.*

2 Кишига фақат яхшилик қиладиган, мўмин-қобил, яхши. *Фарзанди солих. ■ Ўғлингизга ўқитиб дину диёнат йўлини, Солиху дупта-дуруст аҳли мусулмон қиламан. Ҳамза.*

3 Солих (эркаклар исми).

СОЛКАШ [ф. سالكش — йил ўтказувчи, йил тортувчи] Йил оша мева қиладиган. *Солкаш олма. ■ -Жийда солкаш кўринади, бу йил мева қилмаяпти, — деди Шум бола. Ф. Фулом, Шум бола.*

СОЛЛАНМОҚ 1 Осилиб тушмоқ, осилмоқ, эгилмоқ. *Қор босган дарахт шохлари солланиб ётибди. З. Дўсматов, Ёқут. ..қия очик қолдирилган шиша тутқичли бир эшикда ҳимарилган дарпарданинг узун этаклари солланиб турарди. У. Исмоилов, Сайланма.*

СОЛЛАНМОҚ II У ён-бу ён тебранмоқ, чайқалмоқ. *Дарҳақиқат, тор кўча ичидан.. Нозикхон амиркон қавушини фирчиллаганча солланиб келарди. Ҳ. Фулом, Тошкентликлар. Қуёш бир маромда нур сепар, теварак тов-ланар, дарё ҳам ўзгача жило ёйиб, солланиб оқар. фақат ўша Сўлимбек йўқ эди. Ж. Абдуллахонов, Хонадон.*

СОЛМА *шв.* Кичкина ариқ, ариқча. *Эшигининг олди солма, Солмадан, оға, сув олма. «Кўшиқлар».*

СОЛМОҚ 1 Бирор нарса ичига ёки устига жойламоқ, қўймоқ, ташламоқ. *Нарсаларни чамадонга солмоқ. Дастрўмолни чўнтакка солмоқ. Пичоқни қинга солмоқ. Самоварга олов солмоқ. Милтиққа ўқ солмоқ. ■ Чол «хўп» деб, бўрини қонга солиб, устига похол ёпиб бекитиб қўйибди. «Чалпак ёққан кун». Бўзўғлоннинг насиҳатин олмадим, Шу Маҳмудни зиндонимга солмадим. «Юсуф ва Аҳмад». Бир балиқчи дарёга қармоқ солиб ўтирган экан. «Эртақлар». Насиба боласини беланчакка солиб аллаламоқда. А. Қаҳҳор, Оғриқ тишлар. Лаълихон соат бешни мўлжаллаб, ошнинг гурунчини солди. Ойдин, Кўнгил тўлдими, яхши йигит?*

Юзига солмоқ Таъна қилмоқ, бирор нарсани таъна билан эсига солмоқ. *Яхши-боевнинг юраги шун этиб кетди. Ҳозир юзимга солади, деб ўйлади, мен ўғлингни ўқшига киртиб қўювдим, дипломатликка ўқиётувди, энди нега рассомлик қилиб юрибди, деб айтади. М. М. Дўст, Лолазор. Ўт солмоқ* Қийнамоқ, азоб бермоқ. **Кўйнига қўл солмоқ** қ. қўл.

2 Ўрнатмоқ, қўймоқ. *Узукка кўз солмоқ. Рамаларга ойна солмоқ. Тиш солмоқ.*

3 Ўтиргизмоқ. [*Хуморхон:*] *Марасул ака, машиналигизга солиб, бир айлантириб келсаниз-чи!* А. Қаҳҳор, Оғриқ тишлар.

4 Метёри билан қўшмоқ; қўймоқ. *Овқатга туз солмоқ. Ерга ўғит солмоқ. Самоварга сув солмоқ. ■ Эрталабки нонуштага бериладиан овқатга сариеғ солинмайди. С. Аҳмад, Юлдуз.*

5 Бермоқ, ташламоқ (молга бериладиан овқат ҳақида). *Тоштемур қудуқдан бир неча марта сув чиқариб, отларни суғорди, охурларга беда солди. Ҳ. Фулом, Феруза.*

6 Бирор ҳолатга туширмоқ ёки бирор ҳолатни юзага келтирмоқ, пайдо қилмоқ. *Ёқубжонни аввалига лаънатладим, кейин*

оқладим. Негаки, у менинг мудроққа мойил танимга гулгула солди, хаёлларимни остин-устун қилиб юборди. М. М. Дўст, Лолазор. Йигиталининг бемаҳал келиши Сафаралининг кўнглига бир оз шубҳа солган бўлса ҳам, у қувонган бўлиб: -Йигитали келди, Муҳаббат, — деди. Н. Фозилов, Дийдор. Қизнинг қийғоч қоши, жарангли кулгилари кимларнингдир юрагига ларзалар солган. «Саодат». Қумушнинг бу ҳоли бечора онанинг юрагини эзар, юз хил васвасаларга солар эди. А. Қодирий, Ўтган кунлар.

7 Бирор тартиб, йўналиш, ўлчов, вазият ва ш.к. га туширмоқ; мослаштирмоқ. *Ишни изга солмоқ. ■ Чунки асарнинг тилини беэаш, ўз услубига солиб таржима қилишни.. услублаштириш деймиз. «ЎТА».*

8 Ёпиштириб тикмоқ, уламоқ. *Улоқ солмоқ. Ямоқ солмоқ.*

9 Тўшамоқ, ёзмоқ. *Ўрин солмоқ. Кўрпача солмоқ. Дастурхон солмоқ. ■ Гўрўғли билан Шерниёзнинг йўлларига пойандозлар солишди, иззат-икром билан Қосимхоннинг олдига олиб боришди. «Гулшанбоғ». Қумушни ўрин ёзишга қўймай, ўзи пар тўшакни олиб, ерга солди. А. Қодирий, Ўтган кунлар.*

10 Тўшамоқ, ётқизмоқ. *Йўлларга шағал солмоқ.*

11 Рўпара қилиб, қаратиб қўймоқ, тугмоқ. *Хатни чироққа солиб ўқимоқ. ■ Қиз ўзини ойнага солди. «Шарқ юлдузи». Карим, Ота писмиқ, Қорахўжалар Миролим буванинг дарвозахонасида ўзларини офтобга солиб ўтирибди [деди Саид]. Э. Раймов, Ажаб қишлоқ. Тоғай кутган ҳол юз берди: отаси шишани ёруққа солиб кўра бошлади. «Ёшлик».*

12 Қуритиш, ачитиш, пишириш учун қўймоқ. *Майиз солмоқ. Қоқи солмоқ. Вино солмоқ. ■ Жаннат хола шошиб ун чалиб, қўймоқ солди-да, болтани қўлига олиб, тўқайга қараб кетди. С. Аҳмад, Уфқ.*

13 Тўлов мажбуриятини юкламоқ, белгиламоқ. *Солиқ солмоқ. Жарима солмоқ. ■ Менга қолса, бу кунларда [халққа] ўттиз икки танга эмас, ўттиз икки қора пул солиш ҳам оғирдир. А. Қодирий, Ўтган кунлар.*

14 Бирор кимса ёки гўпчилик муҳокамасига қўймоқ, ҳукмига топширмоқ, ҳавола қилмоқ. *У киши мажлисга солган иш бўлмай қолмайди. А. Қаҳҳор, Кўшчинор чироқлари.*

Бир-бирига солмоқ Бир-бирига ҳавола қилмоқ, тўнкамоқ, сансалорликка солмоқ.

Ўртага солмоқ 1) кўпчилиكنинг муҳокама-сига кўймоқ, ҳукмига топширмоқ. *Албатта! Умумий мажлис қиламиз, ўртага соламиз.* А. Қаҳҳор, Бек; 2) кўчма рўкач қилмоқ. *Иккинчи марта эрга чиқишим ҳақида биринчи оғиз очган қайнонам бўлди. Болаларимни ўртага солди.* Х. Ғулум, Машғал; 3) кўчма ўртада баҳам кўрмоқ, умумлаштирмоқ. *Капсанчилар Баҳрободда собиқ батрак ва чорақордан ташкил топган бир қолхоз борлигини, улар ер-сув, от-улов, асбоб-уқуналарини ўртага солиб, шериклик деҳқончилик қилишларини эшитган.* А. Қаҳҳор, Кўшчинор чироқлари.

15 Бирор нарса ёки кимсага йўналтирмоқ, кўймоқ. *Овга куш солмоқ.* ■ *Добил чалиб, қушлар солиб келай деб, Ёлғиз бориб қолдим Ховдак кўлига.* «Гулшанбоғ». *Навкар, от солиб борди-ю, Ҳасан қайғичини улоқдай азот кўтариб, эгарга ўнгариб олди.* С. Сийёев, Ёруғлик. *Кеча манави картага Дилдор трактор солмаган эди.* С. Аҳмад, Уфқ.

16 Бирор ишга, ҳаракатга туширмоқ, йўлламоқ, ташламоқ. *Бутун кучларни жангга солмоқ.*

17 Ёллаб ишга туширмоқ. *[Бухгалтернинг хотини] Ўзи ишламагани-ишламаган, яна одам солиб берасан, деб ҳар куни хархаша қилгани ортиқча.* Қ. Мақсудов, Саодатли чаманда. *Менга қаранг, уйга ҳеч уста солганмисиз?* «Ёшлик».

18 Арқон, занжир каби нарсалар уриб, ташлаб банд этмоқ, боғламоқ. *Бўйнига сиртмоқ солмоқ.* *Оёқларига кишан солмоқ.* ■ *Эҳ-ҳе, ҳали шундайми? Нури онангиз тушини сувга айтсин, занжир солиб судрасалар ҳам, бошқа ёққа бормаيمان.* Ойбек, Танланган асарлар.

19 Қисмларини бир-бирига туширмоқ, ўрнига кўймоқ. *Машинага ип солмоқ.* *Кўйлакнинг тугмасини солиб олмоқ.* ■ *Болалар тезгина эшикни ёпиб, орқасидан занжирни солиб кўйдилар.* Ойдин, Ҳазил эмиш.

20 Барпо қилмоқ, қурмоқ, ясамоқ. *Уя солмоқ.* *Уй солмоқ.* ■ *Ҳозир биров иморатини ўхшатиб солса, бошқалар ҳам ундан қолмай деб тиришади.* Н. Норқобилов, Тўқнашув. *Амударё ва Сирдарёнинг қуёи қисми балиқларнинг уруғ ташлайдишган, ёввойи ҳайвонларнинг урчиқдан, қушларнинг уя соладиган жойидир.* «Фан ва турмуш».

21 Ҳозирламоқ, тайёрламоқ; қурмоқ. *Чилим солмоқ.* *Арғимчоқ солмоқ.* ■ *Дарвозадан*

ўн беш одимлар нарида.. дарвоза беклари гулхан солиб, чилим чекиб ўтирадилар. А. Қодирий, Ўтган кунлар.

22 Зарб билан урмоқ, туширмоқ. *Тарсаки солмоқ.* *Мушт солмоқ.* *Айлантириб солмоқ.* *Қилич солмоқ.* *Қулоқ-чаққасига солиб қолмоқ.* ■ *Кўлинг қичиган бўлса, биқинига солмайсанми, бетигаям урасанми, нодон!* «Ёшлик». *Кучинг етмас экан, нима қилардинг беллашиб, тош-пош билан экан жойига солмайсанми ўхшатиб.* «Ёшлик».

23 Чизмоқ, ишламоқ, ясамоқ (гул, нақш ва ш.к. ни). *Расм солмоқ.* ■ *Ҳозирги ўсмирлар ҳар хил нарсаларнинг сурати солинган кийимларни кўпроқ яхши кўришади.* Газетадан.

24 Осилтирмоқ, солинтирмоқ. *Эр йигитнинг бош солгани — ўлгани.* Мақол. ■ *Алимардон каравотга қўлларини тираганча, бошини қуёи солиб ўтирарди.* Ў. Ҳошимов, Қалбингга қулоқ сол.

25 Ечмоқ, олиб ташламоқ, туширмоқ (кийимни). *Кўйлак ечар, — деди Қумри турган қуёи ва кўйлагини ечиб ташлади.* — *Иштон солар.* А. Қодирий, Мехробдан чаён.

26 бот. Тугмоқ, гулдан мева ҳолига ўтмоқ. *Қовоқ бешта солибди.* ■ *Уч туп тарвузнинг ҳар бири ўнтадан солган экан.* «Чалпак ёққан кун».

27 Кўшма феъллар таркибига киради, мас., *асос солмоқ, ваҳима солмоқ, гапга солмоқ, дам солмоқ, даҳшат солмоқ, дод солмоқ, эсга солмоқ, қорин солмоқ, қулоқ солмоқ.* ■ *[Ғазилат опа] Тўғри келган одамнинг кўксига ўзини ташлаб, уввос солади.* М. Ҳазратқулов, Журъат. *Гулнорпари ўтқиздида, канизини гапга солди.* «Гулнорпари». *Нормат кўшиққа қулоқ солиб, ичкаридаги одамнинг чиқишини кута бошлади.* С. Аҳмад, Уфқ.

28 =а/=й ёки =(и)б аффиксли равишдош билан келиб, шу равишдош орқали ифодаланган иш-ҳаракатнинг батамом ёки рўйирост бажарилганлигини билдиради. *Борганни айтиб солмоқ.* ■ *Яхшибоев индамай турди.* *Сездики, Кўзибойнинг дардлари чўнг, дардларини тамом тўкиб солмоқчи — тасалли кор қилмайди.* М. М. Дўст, Лолазор. *Низомжон чидамади.* *Юразида тўлиб-тошган гапларни узил-кесил тўкиб солмоқчи бўлиб, қизни излаб, яна далага қараб кетди.* С. Аҳмад, Уфқ.

29 =а/=й аффиксли равишдош билан кўмакчи феъл вазифасида келиб, шу равишдош орқали ифодаланган иш-ҳаракатнинг дарҳол бажарилганлигини билдиради. *Бола тура солиб, уйига қочди.* М. Исмоилий, Фарғона т. о. *Замон кела солиб, у одамдан сўради.* М. Исмоилий, Фарғона т. о.

Бошига солмоқ Атайлаб ёмонлик қилмоқ. *Бу ерларга келган кетмайди омон, Бошингга соларман охирад замон.* «Маликаи айёр». =**га солмоқ** ..қилиб кўрсатмоқ. *Ўзини ухлаганга солмоқ.* ■ [Мақсуд қори:] *Менга қара, эшон бола, ўзингни гўлликка солма.* Х. Тўхтабоев, Йиллар ва йўллар. - *Ўзингизни овсарликка солаверсангиз, ҳужжатни биз кўрсатамиз, — деди ниҳоят терговчи..* «Ёшлик». *Тошпўлат унинг тағдор гапларига дафъатан тушунмади, ўзини лоқайдликка солиб, уни қувватлаган бўлди.* К. Яшин, Ҳамза. =**дан олиб**, =**га солмоқ** Ҳадеб, зўр бериб тақорламоқ, қайта-қайта айтмоқ, атамоқ (койиш, ҳақорат сўзлари ҳақида). *Борди-ю, ишинг сал «эртага» қолганини билса.. тўрадан олиб, тўрага солади.* А. Мухтор, Опа-сингиллар. *Мажлис тарқагандан кейин Наимий Онахондан узр сўради, ўзини нодондан олиб, нодонга солди.* А. Мухтор, Опа-сингиллар. **Йўлга солмоқ** 1) тартибга чақирмоқ, тўғри йўл кўрсатмоқ. *Аҳмад маҳалладаги болаларни йўлга солиб турарди.* «Ёшлик»; 2) бирор иш-ҳаракатни қилишга ундамоқ. *Ўғлимни шу одам йўлга солган, хотининг билан ажраш, деган;* 3) ҳийла-найранг билан айтганини қилдирмоқ. *Мени алдаб сололмайсан йўлингга..* «Маликаи айёр». **Назар (ёки разм) солмоқ** Қарамоқ, боқмоқ. *Икки нари юзидан пардасини олди. Гўрўғлига қараб, бир назар солди.* «Гулшанбоғ». *Самандар ҳаяжон ичиди қизга бош-оёқ разм солди.* С. Кароматов, Бир томчи қон. **Оғиз солмоқ** Келинликка ёки хотинликка сўрамоқ. *Шу йили кўкламда Мирҳамид миробнинг бевасига оғиз солди.* «Ёшлик». **Ўзини у ёқ-бу ёққа солмоқ** 1) дангасалик қилмоқ; 2) бирор ишни қилмаслик учун баҳона топмоқ.

СОЛНОМА [ф. سالنامه — йилнома; тақвим < سال — йил + نامه — хат, ёзув, битик] **1** айн. **йилнома.** *Тарих солномаси.* ■ *Солнома, одатда, тарихий воқеаларнинг бевосита иштирокчиси томонидан ёзилган.* «ЎЗМЭ». *Баддод тарихидан шундай солнома, Битмиш кўп қадимда қай бир аллома.* А. Шер, Қадимги куй.

2 эск. айн. **календарь, тақвим.**

СОЛО [итал. solo — якка, ягона < лот. solus — бир, битта] мус. Якка созанда, хонанда, раққоса ижро этиши учун мўлжалланган асар ва унинг ижроси. *Скрипка солоси.* ■ - *Овозим яхши бўлгани учун мен унинг [Ҳамзанинг].. қўшиқларининг солосини ижро этардим, — деди Фаёзов.* Э. Зокиров, Хоразм санъатининг фаҳри.

СОЛОР [ф. سالار — бошлиқ, йўлбошчи] эск. Саркарда, бошлиқ.

СОЛТОБ [ф. سالتاب] шв. Ёши катта, анча ёшга бориб қолган, қартага бошлаган. *Ўрта яшар бўлайин деган каниздан қартайган кўҳна солтоб канизлар паст тушиб, қалтоқ сотиб турибди.* «Равшан».

СОЛЬ [лот. sol — куёш] Мусиқа гаммасининг бешинчи товуши ва унинг нота белгиси.

СОЛЯРИГРАФ [лот. solaris — куёшга доир + юн. grapho — ёзаман] Куёш радиациясини қайд этиб борувчи асбоб. *Соляриграф Куёш ва Куёш системасидаги сайёраларни ўрганишда қўлланади.* «ЎЗМЭ».

СОЛЯРИЙ [лот. solarium < sol — куёш] куёш ваннасини қабул қилиш ёки куёш (нурлари) билан даволаш учун махсус жиҳозланган очиқ майдонча ёки хона.

СОЛЯРКА [р. < лот. solaris — куёшга доир] Нефтни ҳайдаш, қайта ишлаш жараёнида ҳосил бўладиган, ўзига хос ҳидли мойсимон суюқлик; соляр мойи (кўпинча мотор ёнилғиси сифатида, шунингдек, техника, кўнчилик, тўқимачилик соҳаларида ишлатилади). - *Бу қозонлар торф билан ишлайди, солярка билан эмас, — жавоб берди куёв.* Ҳ. Аҳмар, Яккама-якка. [Кўчқор:] *Илгари тезак ёқиларди, энди тезакни солярка билан ёқялмиз.* «Ёшлик».

СОЛҚА 1 Яхши тортилмаган, ўртаси осилиб тушган, солинган. *Солқа дор. Солқа тортилган арқон.*

2 Осилиб тушган, лўмбиллаган ёки керккан. *Солқа лунж.*

СОЛҚАЛАНМОҚ айн. **солқимоқ 1.**

СОЛҚИ шв. Солқа.

СОЛҚИМОҚ айн. **салқимоқ 1.**

СОЛҒИТ шв. Солиқ, ўлпон. - *Солғитлар жонга тегди! Хоннинг зулми ошди! — деган гаплар ҳавони қоплар эди.* Ж. Шарипов, Хоразм.

СОМБРЕРО [исп. sombrero < sombra — соя, кўланка] Асосан, Марказий ва Жа-

нубий Америкада тарқалган, соябони кенг шляга.

СОМБУСА эск. кт. айн. сомса.

СОМЕ(Ъ) [а. سامع — эшитадиган, эшитувчи; 3-ш. бирл. **сомен**] кт. 1 Эшитувчи, тингловчи. Кўпинча Абу Убайд «Китобушшифо» дан бир бобни ўқир, унга диққат билан қулоқ солиб ўтирган сомеълар, тушунмаган ерларини сўрар эдилар. М. Осим, Карвон йўлларида. Хотира йиғлатар найга айланиб, Сел бўлиб тин олар соме Регистон. А. Исроилов, Биз — дунё одамлари. Севаргул ўйчанлик билан чўнқайиб, тиловатга соме ўтираркан, тағин беихтиёр таажжубланди. Н. Қиличев, Чиғирик.

2 дин. Куръон ўқийтган қори янглишганда ёки унутиб тўхтаб қолганда луқма солиб турувчи иккинчи қори.

СОМЕЛИК Соме бўлишлик, иккинчи қори вазифасини бажариш. Қишлоқлар менинг қори эмаслигимни, ёлғондан сомеликка ўтганимни пайқаб қолибдилар. М. Муҳаммаджонов, Турмуш уринишлари.

СОМИЙЛАР [а. سامى — олий, олиймақом < а. سام / қад. яҳ. Шем (Сим) — Исм, Ном: Нуҳ пайғамбарнинг ўғилларидан бирининг номидан] Шимолий ва Шарқий Африкада, шунингдек, Олд Осиёда яшаган ва сом тиллари оиласига кирадиган тилларда сўзлашган қадимий (аморийлар, финикийлар, оссурийлар, оромийлар, сурёнийлар ва б.) ва сўзлашувчи ҳозирги (араблар, амхарлар, Исроил яҳудийлари, сурияликлар) халқлар. Фандаги маълумотларга қўра, сомиёларнинг аجدодлари қадимда Саҳрои Кабирнинг шимолида яшаган деб тахмин қилинади. «ЎзМЭ».

СОМИЙШУНОС [а. + ф. سامى شناس — сомиёларни ўрганувчи] айн. семитолог.

СОМИЙШУНОСЛИК айн. семитология.

СОМОН Буғдой, арпа, шоли янчилганда, пояларининг эзилиб майдаланишидан ҳосил бўладиган, маҳаллий бинокорликда ва ем-хашак сифатида ишлатиладиган маҳсулот. Майда сомон. Йирик сомон. Молларга сомон бермоқ. Узоқнинг буғдойидан яқиннинг сомони афзал. Мақол. ■ У ярим ойдан бери ничан тайёрлаш, беда ўриш, сомон ҳозирлаш билан банд. И. Раҳим, Ҳаёт булоқлари.

Сомон сувоқ Сомон солинган лой билан қилинган сувоқ. Сомон сувоқ қилинган айвон

деворидаги катта михга илинган эски радиореодуктор.. бир алфозда хирилларди. С. Нуров, Майсаларни аёз урмайди.

Сомон йўли астр. Ҳаво очиқ тунда оддий кўзга ёруғ йўл каби кўринадиган юлдузлар туркуми. Сомон йўли юлдузлари тўплами тартибсиз бўлмай, ўзаро тортиш кучи билан боғланган системани ҳосил қилади. «ЎзМЭ».

СОМОНИЙ Тожикистон Республикасининг асосий пул бирлиги номи (2000 йилдан).

СОМОНХОНА Сомон сақланадиган жой, хона. Афғоннинг сирли меҳмонхонасидан дўстининг сомонхонаси яхши. Мақол. Бузоқнинг югургани сомонхонагача. Мақол. ■ Бу данғиллама бинонинг ичкари томони катта сарой бўлиб, унинг отхонаси, сомонхона ва узун кетган айвони бор. Ҳ. Шамс, Душман.

СОМОНЧИ Сомон келтириб ёки ёзда сомон босиб, қишда сотувчи савдогар.

Сомончи йўли айн. Сомон йўли қ. сомон. Осмони заминда, арава орқасидан кўтарилган тўзондек бўлиб, Сомончи йўли кўринди. С. Аҳмад, Уфқ. Бу ўлик океан устига тўнкарилган осмонгина гўё барҳаёт: тубсиз қоронғилик тепасида Сомончи йўли нуқрадай жимирлайди. А. Мухтор, Асарлар.

СОМСА Ёйилган хамирга гўшт, қовоқ ва ш. к. солиб тугиб, одатда тандирга ёпиб, шунингдек, газ духовкаларида ҳам пишириладиган егулик. Гўшт сомса. Қовоқ сомса. Ис-малоқ сомса. Сомса ёпмоқ. ■ Сут-қаймоққа йўғрилган жимжимадор патир кулчалар, ҳали совимаган тандир сомсалар.. ҳаммаси фаросат, дид билан қўйилган. С. Анорбоев, Оқсой. Ошхона деразаси ёнида туриб, сомса ясаётган уйғур йигит ҳам гўзал қиздан нигоҳини узмасди. Мирмуҳсин, Умид.

СОМСАПАЗ Сомса пишириб сотувчи шахс. Узоқда қатор чойхоналар, дўконлар кўринар, муюлишида ўчоқ устига мукка тушган сомсапаз оловни қовлаб, тутун бурқитар эди. Ойбек, Улуғ йўл.

СОМСАПАЗЛИК Сомса пишириш ва сотиш билан шуғулланиш. Сомсапазлик қилмоқ.

2 тар. Бозорда сомсапазлар дўкони жойлашган раста.

СОН I 1 мат. Нарсаларнинг қанчалигини, саногини, ададини ҳисоблаш учун хизмат қиладиган восита; математик тушунча. Бутун сонлар. Каср сонлар. Сонлар нисбати.

Сонлар назарияси. ■ Сон тушунчасининг ривожланишига ўрта аср математиклари ҳам қатта ҳисса қўшдилар. «ЎзМЭ».

2 с. т. Рақам. Бир сони. Йигирма беш сони.

3 Миқдор, санок; адал. *Келаётган аёлларнинг сони йўқ*. Ойбек, Танланган асарлар. Сўнги қирқ йил мобайнида республикамизда илмий ходимларнинг умумий сони 103 марта.. кўпайди. «Фан ва турмуш».

Сон мингта Жуда ҳам кўп, неча-неча мингта. ..Ёшуллини, марҳума Курбоной қизимизни мақтаганлар сон мингта. Уларни қўййлик, менинг ўзимни мақтаганлар-чи? М. М. Дўст, Лолазор.

Сони бор, салмоғи йўқ қ. салмоқ.

4 Номер; тартиб номери. Иккинчи сон ўрта мактаб. ■ «Мулла Насриддин»нинг у сонини очиқ эслай олмасам ҳам, кўрганлигим хотирамда равшан бор. А. Қодирий, Кичик асарлар.

5 тли. Предметларнинг миқдорини, сон-саногини ва санок жиҳатидан тартибини билдирувчи сўз туркуми. *Санок сонлар. Тартиб сонлар. Чама сонлар.*

Сон кирди (ёки тегди) Дуруст бўлиб қолди, тузалди. *Унга ҳеч сон тегмайди.* ■ [Кўчқорнинг] Кўполликлари ҳам йўқолиб борапти. Кийим-бошига сон кириб қолди. А. Ёқубов, Ш. Шодиев, Топилган қиз. Сонга қўшилмоқ (ёки кирмоқ) 1) ҳисобга, қаторга кирмоқ. *Кимгаки бўлмаса ақлу билим ёр, Қўшма уни одам сонига зинҳор.* «Фан ва турмуш»; 2) яхшиланмоқ, тартибга тушмоқ. *Сонсиз хотиннинг уйи сонга кирмас.* Мақол. ■ [Ошно:] Бу ерлар ҳам сонга киради, яшилдан либос кияди, боғу бўстонга айланади.. М. М. Дўст, Лолазор. Сондан чиқмоқ 1) ҳисобдан, қатордан, одамгарчиликдан чиқмоқ. *-Ҳадеб уйда ўтиравериш ҳам одамни сондан чиқаради, — деди кампир Санамга.* Ш. Холмирзаев, Тўлқинлар; 2) яроқсиз ҳолга келмоқ. *Уруш ҳаммани сондан чиқарди.* «Ёшлик».

СОН II 1 Одам ва ҳайвон оёғининг тизза билан тос ўртасидаги қисми. *Сони йўғон одам. Сон суяги. Сув унинг сонигача чиқди.* ■ Саид сув тўла чўмични узатаётганда, бир қўлтум сув отасининг сонига тўкилиб кетди. «Ёшлик». *Хумор келин Бўрижоннинг қўлидан гаврон таёқни олиб, ҳўкизларининг сағрисиغا, сонига зарб билан урди.* С. Нуоров, Майсаларни аёз урмайди. *Куйган банда уриб йиғлар*

сонига, Шаҳид бўлган бўялади қонига. «Эрали ва Шерали».

2 Ҳайвонлар оёғининг шу қисмидаги гўшти. *Султонов кийикнинг сонини сонга, тўшини тўшга ажратиб саранжомларкан.. ўзига қарашиб турган Ортиққа кўзи тушган сари, кўнгилгашиги ортиб борарди.* М. Мансуров, Ёмби.

СОНАТА [итал. sonata < лот. sonare — янграмоқ] Умумий бадийий ғоя билан бирлашган, турли мавзу ва характердаги, ўзаро фарқланувчи (секин, вазмин ёки тез) бир неча (одатда 3—4) қисмдан иборат бўлган, икки ёки бир неча чолгу асбоби учун ёзилган мусиқа жанри. *Бетховеннинг тўртинчи сонатаси [тингловчиларда] яхши таассурот қолдирди.* Газетадан.

СОНАТИНА [итал. sonatina — сонатача] мус. Сонатанинг ўз соддалиги, ижро услубининг оддийлиги билан ажралиб турадиган кичик ҳажмли тури.

СОНЕТ [итал. sonetto < лот. sonax — жанрангдор, баланд, чинқироқ] Белгиланган қатъий қонун-қоидалар (ҳажм, ритм, вазн, қофия) асосида яратиладиган, 14 мисрадан иборат шеър жанри. *Сонетнинг шеър тури сифатида шаклланишида Ф. Петрарканинг хизматлари катта.* «ЎзМЭ».

СОНИЯ [а. ثانية — иккинчи] қ. секунд 1. Шундан бир-икки сония ҳам вақт ўтмади, йўлак оғзида бир кўлага кўрунди. А. Қодирий, Кичик асарлар. *Сўйланг-чи, вафонинг надир қиммати, Сиз ҳам кутганмисиз бирор сония?* А. Орипов, Йиллар армони. *Орага бир сония сукунат чўкди.* Н. Норқобилов, Тўқнашув.

СОНЛИ 1 Бирор сон ёки сонлар билан ифодаланган. *Сонли масъаб.*

2 Маълум миқдордаги, маълум миқдорга эга. *Кўп сонли талабалар жамоаси.* ■ *Мақсадимиз кам сонли халқлар вакиллари маданиятини ривожлантиришига кўмаклашишдир.* Газетадан.

3 Номери бор, номерли. *Бешинчи сонли ўрта мактаб.*

СОН-САЛМОҚ Сон ва салмоқ, миқдор ва оғирликлар мажмуи. *Сон-саноғи йўқ.*

СОН-САНОҚ Сон, миқдор ва унинг саноғи, ҳисоби. *Навбатда турганларнинг сон-саноғи йўқ.* ■ *Предметнинг сон-саногини билдирган сўз туркуми сон деб аталади.* «Ўзбек тили» дарслиги.

СОН-САНОҚСИЗ Беҳисоб кўп, сон-саноғи йўқ, беадал. *Ҳаво очиқ, кўжда сон-саноқсиз юлдузлар чарақлаган.* С. Аҳмад, Қадрдон далалар. *Кузги осмонда сон-саноқсиз юлдузлар чарақлаб ётарди.* «Шарқ юлдузи». *Сон-саноқсиз кишилар кетмон билан ер кўпоряпти.* С. Аҳмад, Уфқ.

СОНСИЗ айн. **сон-саноқсиз.** *Сонсиз арилар ва баҳор кўнғизлари гуллар орасида учиб, ажиб мусиқа тарқатарди.* Ойбек, Танланган асарлар. *Кенг йўларда оқиб келади Шаҳар томон сонсиз оломон.* Э. Раҳим.

СОНСИЗ-САНОҚСИЗ айн. **сон-саноқсиз.** *Фарзандларинг бордир сонсиз-саноқсиз.* *Во ажаб, қадрингни гоҳида билмас.* А. Орипов, Она сайёра.

СОП I Баъзи асбобларнинг қўл билан ушланадиган қисми; тутқи, даста, банд. *Теша сопи.* *Қошиқнинг сопи.* *Ўғирнинг сопи.* *Йўқолган пичоқнинг сопи олтин.* Мақол. ■ *Олтмиш ёшлардаги жиккак чол тешасининг сопини белбоғидан ўтказиб, сўрига келади.* С. Аҳмад, Жимжитлик. - *Чиқинглар, — Бек атрофга сергак қулоқ тутиб, ҳеч сас эшитмагач, шундай шивирлади ва ханжарининг сопидан янада маҳкамроқ чангаллади.* «Ёшлик». *Бундай тигли, сопи гулдор пичоқни фақат Хўжанд усталари ясарди.* Мирмуҳсин, Темур Малик.

Кетмоннинг сопини ушламаган Деҳқончилик ишидан хабари йўқ, умрида кетмон билан иш қилмаган; хом. *Ўзингиз айтингчи, ахир, бу елкаси офтоб кўрмаган сояпарварлар, кетмон сопини ушламаган номардлар қолхозда нима қилиб беради?* П. Турсун, Ўқитувчи. **Сопини ўзидан чиқармоқ** Ёнидан маблағ ёки куч сарф қилмай, бошқалар ҳисобига иш битирмоқ. - *Актга қўл қўйилиб, уйингизга етиб олгунча, ҳар қандай ис-писдан холи бўлиб қолади.* *Сопини ўзидан чиқаряпман-да, — деди Одил Эгамбердига.* Б. Раҳмонов, Хўжайин кўчди.

СОП II кам қўлл. айн. **соб.** *Ишқ дардида соп бўлмоқ.* *Ишдан урилиб соп бўлмоқ.* ■ *Ҳа, бир алами бордир-да.. Ё нос соп бўлдимикин?* *Хумори тутган бўлса керак.* П. Турсун, Ўқитувчи.

СОП III фольк. Энг зўр, асл. *Ўн минг уйли кўнғирот элининг соп деган бойваччалари.. ўз кайфу сафоси билан ўтириб эди.* «Алпомиш».

СОПЛАМОҚ I Соп ўрнатмоқ, даста қўймоқ, қилмоқ. *Пичоқ(ни) сопламоқ.* *Болта(ни) сопламоқ.*

СОПЛАМОҚ II с. т. Батамом кеткизмоқ, соп, тамом қилмоқ. *Бор пулни соплдим.*

СОПЛИ Соп ўрнатилгай, сопи бор. *Калта сопли кетмон.* ■ *[Саидқул] Пичоқни қинидан чиқарди.* *Дандон сопли ўткир тиг эди,* *сопига гуллар чекилган, ятиллаган асл мол.* М. М. Дўст, Лолазор.

СОПОЛ [ф. سفال — кулолчилик маҳсулоти; лой идиш] Маҳсус лойдан ясаб, оловда қиздириб тайёрланадиган маҳсулот. *Сопол товоқ.* *Сопол кувур.* *Сопол тувак.* *Сопол чинни бўлмас, бегона — уни.* Мақол. ■ *Нусратбек болишга ёнбошлаб, катта сопол товоқдаги сермой чалобдан ичди.* С. Нуров, Майсаларни аёз урмайди. *Бахт мана бу чиройли сопол кўза эмаски, сотиб олиб келсанг-да ёки ота-онанг олиб берса-ю, маҳлиё бўлиб ўтирсанг.* А. Мухтор, Асарлар.

СОПОЛАК [ф. سفالک — кичкина сопол] 1 Сопол парчаси.

2 Болаларнинг бир қанча ўйинларида ишлатиладиган ясси сопол ёки тош. *Сополак ташламоқ.* ■ *Баъзи одамлар қизларига тўп-тош, лапар ўйнашлари учун силлиқ сополаклар ҳам териб кетишади.* Ш. Бўтаев, Қўрғонланган ой.

СОППА-СОҒ Ҳеч қандай касали йўқ, бутунлай соғ, соғлом. *Мунозаранинг ўрни эмас.* *Кўргангиздек, соппа-соғман.* «Ёшлик».

СОПРАНО [итал. soprano < sopra — устида, юқорида] мус. 1 Аёллар ёки болаларнинг энг юқори хонандалик овози. *Сопрано бошқа овозлардан «бош» регистр устунлиги билан фарқланади.* «ЎЗМЭ».

2 Шундай овозга эга бўлган хонанда аёл.

3 Хордаги баланд овозли партия.

4 Баъзи созларнинг юқори регистрли тури.

СОПҚОН тар. Ичига тош солиб отиладиган қадимги содда курол. *Сағирнинг ҳақи — сопқоннинг ўқи.* Мақол. ■ *Йигитлар дарахтларда, тоғ унгуруларида туриб, сопқон отиб, ёвни шунча думалатиб турсалар ҳам, у газандалар борган сари кўпая берибди.* Ойдин, Олтмиш газ арқон. *Сопқондан қушларга тош отиб юрган..* Ш. Холмирзаев, Сайланма.

Отилмаган сопқон ҳам бошга тегаети, ҳам кетга (ёки қуймучга) Улдасидан чиқа олмай қилинган иш кишининг ўзига зарар етказаети, деган маънода ишлатиладиган мақол. - *«Отилмаган сопқон ҳам бошга, ҳам қуймуч-*

га тегар» деганларидек, қассоб гапни ўзи бошлар қўйиб, пировардида ер ёрилса, ерга кирғудай бўли, — деди Абдурасул. П. Турсун, Ўқитувчи.

СОР [ф. *sar* — чуғурчуқ] Қарчиғайлар оиласига мансуб йиртқич қуш; сариқсор. Сорларнинг икки тури Халқаро табиатни муҳофаза қилиш иттифоқининг Қизил китобига киритилган. «ЎЗМЭ». ..Қор бетига чиқса, дарҳол тулкию сор қушларга ем бўладиган кўрсичқонлар [кабель] симларни емириб ташлаган экан. Ш. Холмирзаев, Сайланма.

СОРТ [фр. *sorte* < лат. *sors, sortis* — қуръа; қисм, улуш; хизмат, мансаб; тур, хил, жинс] 1 Молнинг, маҳсулотнинг муайян сифатий белгиларга эга бўлган категорияси, нави; нав. *Биринчи сорт пахта. Учинчи сорт газмол.*

2 эск. қ. нав. *Пахтанинг янги сортларини етиштирмоқ. ■ Барча маҳсулотнинг 28 фоизи биринчи сортга қабул қилинди. Газетадан.*

СОСТАВ [р. *состав* — бириктирилган нарса; тизим, таркиб] 1 эск. қ. **таркиб 1, 2, 3.** *Тилнинг луғат состави. Шишанинг состави.*

2 Жўнашга тайёр қилинган ёки йўлдаги бир-бирига тиркалган вагонлар мажмуи. *Юк вагонлари состави. ■ Эшелон бошлигининг сигналидан кейин паровоз буғ чиқариб, чўзиқ гудок берди-да, катта.. составни судраб кетди. И. Раҳим, Чин муҳаббат.*

СОСТАВЛИ эск. айн. **таркибли.** *Составли сўзлар.*

СОТИЛМОҚ 1 Сотмоқ фл. мажх. н. *Одоб бозорда сотилмас. Мақол. ■ Бир томон чиннифурушлик, бир томонда атторлар растаси. Бир томон эса ҳар хил ширинликлар ва бошқа моллар сотиладиган “гулбозор”. Ойбек, Танланган асарлар.*

2 *кўчма нафр.* Ўз виждонини сотиб, қарши томонга ўтмоқ; сотқинлик, хоинлик қилмоқ. *Душманга сотилмоқ.*

СОТИХ [р. *сотый* — юзинчи; юздан бир улуш қисм] Гектарнинг юздан бир қисмига тенг сатҳ ўлчови бирлиги. *Уларнинг йигирма сотих томорқаси бўлиб, унда отаси экиб кетган хил-хил мевали дарахтлар кўп эди. Ш. Холмирзаев, Бодом қишда гуллади. Ариқнинг нариги бетиди ўн сотихча томорқамиз бор эди. «Ёшлик».*

СОТМОҚ 1 Пулга айирбош қилмоқ, белгили келишилган пул эвазига бермоқ. *Арзон*

сотмоқ. Қиммат сотмоқ. Пулга сотмоқ. Ўз нархига сотмоқ. ■ -Йўлингдан қолма! — деди у Зулфатарга ўқрайиб. — Сендақаларга сотадиган узумим йўқ! К. Яшин, Ҳамза.

СОТИБ ОЛМОҚ 1) пулга алмаштириб олмоқ, харид қилмоқ. *Бизнинг Қаландар бой кузда камбағалларнинг пахтасини арзон-арзон сотиб олиб, саройига босиб қўяди. М. Исмоилий, Фарғона т. о.; 2) пул бериб, ўз томонига оғдириб олмоқ, оғдирмоқ. Қамбарали акани сотиб олгани кучингиз етмаса керак. Милтиқ билан бўлмади, энди пул билан рахна солмоқчимисизлар. А. Қаҳҳор, Кўнчинор чироқлари; 3) кўчма ўзига орттирмоқ, дардисар қилмоқ (жанжал, гап ва ш.к.ни). Ҳар куни аҳвол шу. Қаерда маишат, кўпқари бўлса — шуники. Уриш-жанжалнику, излаб юриб сотиб олади, лаънати. Н. Фозилов, Оқим.*

2 *кўчма нафр.* Сотқинлик, хоинлик қилмоқ. *Дўстини сотмоқ. Ватанни сотган эр бўлмас. Мақол.*

Гап сотмоқ қ. гап 1 1. Сафсата сотмоқ қ. сафсата 2.

СОТУВЧИ 1 Сотмоқ фл. сфдш. *Олма сотувчи.*

2 Магазинда савдо-сотик билан шуғулланувчи ходим. *Сотувчилар харидорларга холис хизмат кўрсатиш билан банд. Газетадан.*

СОТУВЧИСИЗ: **сотувчисиз** магазин Сотувчиси бўлмаган, харидорлар ўзига ўзи хизмат қиладиган магазин.

СОТҚИН нафр. Ўз виждонини сотиб, қарши томонга ўтган; сотилган, хоин. *Сотқин одам. ■ Ул нобакор Балх ҳокими сотқин тузиб, исён байроғини баланд кўтарди. М. Осим, Карвон йўлларида. Мулла Турсуннинг сотқин ва риёкор эканлиги кўпчиликка маълум бўлди. «Саодат».*

СОТҚИНЛИК Сотқин, хоин бўлиш хусусияти; хоинлик.

СОФ [а. *صاف* — тоза, шаффоф, тиниқ] 1 Беғубор, тоза, мусаффо. *Соф ҳаво. Соф сув. ■ Соф, яшил табиат юракларга куч бағишлади. Ойбек, Куёш қораймас. Соф осмонда маъсум боққан, Тўлин ойдир йўлдошим. Бойчечак. Уфқларга оташ қалаб, Тонг отади соф, нафис. Э. Воҳидов.*

2 Бошқа нарса аралашмаган; асил, тоза. *Соф олтин. Соф ҳолада учрамайдиган кимёвий элементлар. ■ Бир грамм соф радий*

олиш учун бир неча тонна уран рудасини қайта ишлашга тўғри келади. «Фан ва турмуш».

3 Ўзга унсурлардан холи; тоза. У [рус жувон] айвонга қараб келаётган кишини таниб: -Э, Гуломжон, келинг! — деди соф ўзбек тилида. М. Исмоилий, Фаргона т. о.

4 кўчма Доғ тушмаган, ҳар қандай айб, гуноҳ, нуқсондан холи; тоза, покиза, ҳалол. Соф виждон. Соф муҳаббат. ■ Назаримда, шу уй унинг содда, соф юрагига шундай азоб бермоқдаки, бу азоб олдида устида қанот ёзиб турган ўлим ҳам писанд эмасдек туюлар эди. А. Мухтор, Асарлар. Гулнор.. соф номусига отилган қорани бутунлай ювиб ташлашга жазм қилди. Ойбек, Танланган асарлар. Бу бозор аҳлига, бу ердаги софу нософ икир-чикир бандаларга менинг нима дахлим бор?. А. Мухтор, Асарлар.

Соф фойда Чиқим, харажат ва ш. к. чиқариб юборилгандан кейин қолган пул, даромад.

СОФА [фр., итал. sofa — диван < а. صفة — тош супа, ўриндик; бостирма, айвон] Пастак, кенг, ёндори суянчиғи билан бир хил баландликда бўлган диван.

СОФДИЛ [а. + ф. صافدل — кўнгли тоза, самимий] Кўнглида кири, гидри йўқ, дили, қалби пок, соф. Софдил одам. ■ Софдил, камтар, билимдон дўст учун кўксингни оч, Яхшилардан сўз очиб, энг яхши сўз дуррини соч. С. Абдулла. Наврўз баҳорини соғинган ҳар бир софдил инсонга қарата дил сўзларини изҳор этамиз. Газетадан.

СОФДИЛЛИК Кўнглида кири йўқлик, ҳалоллик; самимийлик. Сидиқжон, унинг юзида истеҳзоли бир табассум бор гумон қилиб, ер остидан қаради. Бироқ жувоннинг юзида самимият, софдилликдан бошқа ҳеч нарса йўқ эди. А. Қаҳҳор, Кўшчинор чироқлари. Очиқ чеҳра билан, софдиллик билан, осонгина жуда табиий қилиб айтилган.. гап уни ҳаяжонга солди. И. Раҳим, Ихлос.

СОФИЗМ [юн. sophisma — айёрлик қилиш; алдаш] Расман тўғри, чинга ўхшаб туюладиган, аслида ёлгон тузилган (чиқарилган) хулоса, сохта исбот; маккорлик воситаси. Софизм соддадил кишилар қалбида ҳақиқатга, адолатга шубҳа уйғотувчи, уларни тўғри йўлдан адаштирувчи маккорлик қуролдир. «ЎЗМЭ».

СОФИР [а. سافر — очиқ, очиқ-ойдин; йўлчи, сайёҳ] эск. айн. элчи.

СОФИСТИКА [юн. sophisticate — мунозарани айёрлик билан олиб бориш, унинг йўналишини ўзгартириб юбориш маҳорати] флс. Мантиқ қонуналарини атайин бузиб, ёлгон далилларга асосланган ҳолда муҳокама юритиш.

СОФЛАМОҚ 1 Бегона ёки зарарли нарсалардан тозалаб, соф ҳолга келтирмоқ; покиза, мусаффо қилмоқ. Ҳавони софламоқ. Сувни софламоқ.

2 махс. Аралашмалардан тозалаб, маълум талаблар даражасига етказмоқ. Ёғни софламоқ.

СОФЛИК 1 Тоза, беғубор бўлиш хусусияти. Сувнинг софлиги. Муҳаббатнинг софлиги. Дилнинг софлиги. ■ Анчадан буён давом этиб келаётган баҳслардан бири она тилимизнинг софлигини сақлаб қолиш ҳақида бораётир. «Муштум».

2 Ҳар қандай айб, гуноҳ, нуқсондан холилик; поклик, ҳалоллик. Бойназар ака ҳар соҳада ҳалоллик, софлик бўлишини яхши кўради. Ш. Шокиров, Бойназарнинг байроғи.

СОХТ [ф. ساخت — тайёрлаш, ишлаб чиқиш; иш, амал] Ташқи кўриниш, қиёфа. Салла, оқ тўнлар кўруб, сохтимни инкор айламанг, Бўлмасам ҳамки асл девона, кал девонаман. Муқимий. Ҳамма вақт яхши кўринадиган қоровул шу тобда унинг [Элмуроднинг] назарида жуда сохти совуқ одамга ўхшаб кетди. П. Турсун, Ўқитувчи.

СОХТА [ф. ساخته — тайёрланган, ишлаб чиқилган; сунъий, ясама] **1** Қалбакилик мақсадида аслига ўхшатиб ишланган, ясалган; ясама, қалбаки. Сохта пул. Сохта имзо. ■ Мен билан Отабекни қаматиб, дор остига юборувчи, Отабек тилидан сохта талоқ хати ёзиб, бир-биримиздан жудо этувчи.. баттол Ҳомид экан. А. Қодирий, Ўтган кунлар. Демак, Сиддиқ Шарипов — отангизнинг сохта исми-шарифи. «Шарқ юлдузи». У бу ишга пухта уйлаб киришган. Унинг сохта хужжатлари шундан далолат бериб турибди. «Ёшлик».

2 Етарли асосга эга бўлмаган, асоссиз, пуч. Сохта даъво. Сохта назария. ■ [Фотима:] Бўлмаган сохта далиллар билан гапирувчи ифлосларнинг сўзига кириб, бу хилда қилиш яхши эмас. Ҳамза, Тухматчилар жазоси.

3 Ёлғондакам, таги пуч, юзаки. *Сохта* обрў.

4 Самимиятсизлик билан шунчаки қилинган, носамимий, юзаки, ясама. *Сохта* кулги. *Сохта* мулоимлик. ■ -Э, сизмидингиз, *Шоқосим ака, танимай қолганим учун кечирасиз, — деди [Ҳафиза] жиндек сохта жшмайиб*. Мирмуҳсин, Умид. *Аппон чол унинг сохта, зўраки такаллуфидан ғазабланди. «Ёшлик».* *Меҳмонлар орасида «Марҳабо», талантлар!»* телевизион конкурсининг икки қатнашчиси ҳам бўлиб, улар сохта камтарликданми ёки тортинчоқликданми, бир чеккада қимтинибгина ўтиришарди. Н. Аминов, Қаҳқаҳа.

СОХТАГАР [ф. ساخته‌گر] айн. **сохтакор**.

СОХТАКОР [ф. ساخته‌کار — сунъий, ясама, қалбаки иш қилувчи] Қалбакилик, алдамчилик билан иш тутувчи; қаллоб. *Энди турмушга кўр кўз билан қарама, қизим. Магазинчи йигитинг сохтакорроқ кўринади, эҳтиёт бўл.* А. Муҳиддин, Кувёв қочди.

СОХТАКОРЛИК Қалбакилик, қаллоблик; қинғирлик. *«Автомобилчи».. раҳбари Ч. Абдуназаровнинг иш тажрибасидан шунақанги сохтакорликлар чиқиб қолдики, суд бундай жиноятлар учун фақат жарима солиш жазоси билан чекланганлигига ҳайрон қоласан киши.* Газетадан.

СОХТАЛАШМОҚ 1 Самимийликни йўқотиб, ёлғондакам, сохта, ясама тус олиб бормоқ, юзакилашмоқ. *Сохталашган мулоимлик.*

2 Ҳақиқатдан йироқлашмоқ. *Сохталашган маълумотлар.*

СОХТАЛАШТИРМОҚ Ҳақиқатдан йироқлаштирмоқ, ҳақиқатни бузиб кўрсатмоқ. *Тарихни сохталаштирмоқ.* ■ *Шундоқ ҳам кўҳликкина қизга пардоз-андоз ҳам ортиқчалик қиларкан. Қайтага хусини сохталаштириб турарди.* Ж. Абдуллахонов, Тўфон.

СОХТАЛАШТИРУВЧИ Ҳақиқатни бузиб кўрсатувчи. *Тарихни сохталаштирувчилар.*

СОХТАЛИК Қалбакилик, юзакилик, ясама эканлик. *Хужжатнинг сохталиги.* ■ *..фақат ароқ ичмаган Отамуродгина бу яқинликнинг сохталигию бу меҳрибончиликларнинг шунчаки, йўлига эканини сезиб, ичидан ғижиниб ўтирар, нимагадир унинг кўнгли ғаш эди.* М. Мансуров, Ёмби.

2 Сохта иш, хатти-ҳаракат; қаллоблик. *Тоҳо ахлоқ табиатига безона қилиқлар ҳам учраб қолади. Буларни сохталик ё риёкорлик деб аташ мумкин.* М. Исмоилий, Одабийлик қиссаси.

СОХТ-СУМБАТ Ташқи кўриниш, қиёфа; қал-қомат. *Сохт-сумбати келишган йигит.* ■ *Афанди, семизнинг сохт-сумбатига қараб туриб: -Ўн беш кундан кейин ўласан, дори ҳайф кетади, — деди.* «Латифалар».

СОЦИАЛ [лот. socialis — ижтимоий] Кишилар ҳаётига, уларнинг жамиятдаги ўзаро муносабатларига оид; ижтимоий. *Социал тараққиёт. Социал тузум. Социал муҳит. Жамиятнинг социал таркиби.* ■ *Студентлар.. лекцияларнинг мағзини чақиб, социал баҳо берадиган бўлишлари ҳам керак.* П. Қодиров, Уч илдиз.

Социал таъминот Фуқароларни қариганда, касалланган ва меҳнат қобилиятини йўқотган ҳолларда давлат томонидан моддий жиҳатдан таъминлаш тизими; ижтимоий таъминот.

СОЦИАЛ-ДЕМОКРАТ [социал + демократ] тар. Социал-демократия тарафдори; социал-демократлар партиясининг аъзоси (қ. **социал-демократия**).

СОЦИАЛ-ДЕМОКРАТИК тар. Социал-демократия ва социал-демократга оид. *Социал-демократик партия. Социал-демократик қарашлар.*

СОЦИАЛ-ДЕМОКРАТИЯ [социал + демократия] Халқаро ишчилар ҳаракатида: 19-аср охирида пайдо бўлган, дастлаб инқилобий кураш йўли билан, кейинчалик демократик методлар, ислоҳотлар йўли билан ижтимоий адолатга, эркинлик ва тенгликка асосланган тузумни ўрнатишни ўз олдига мақсад қилиб қўйган ғоявий-сиёсий оқим.

СОЦИАЛИЗАЦИЯ [лот. socialis — ижтимоий] Хусусий мулк ҳисобланган ер, ишлаб чиқариш воситалари ва ш.к. ни жамият мулкига, умум мулкка айлантириш.

СОЦИАЛИЗМ [фр. socialisme < лот. socialis — ижтимоий] 1 тар. Мақсади ва идеали ижтимоий адолатни, эркинлик ва тенгликни амалга оширишдан иборат бўлган, хусусий мулкни ижтимоий (умумий) мулкка айлантириш орқали мазкур принципларга эришиш мумкин, деб ҳисобловчи таълимот. *Социализм ғояси.* ■ *Социализмда*

инсон хусусий мулкдан тамоман ажратилди. «ЎЗМЭ».

2 20-асрда бир қатор давлатларда: жамият ҳаётининг барча соҳаларига давлатнинг ара-лашувини тақозо этувчи ижтимоий-иқти-содий тузумнинг номи; собиқ СССР да ҳукм сурган тоталитар тузум. [Шўролар даврида] Айрим мамлакатларга, жумладан, Ўзбекистонга нисбатан «капитализмни четлаб, социализмга ўтиш» мумкинлиги тўғрисидаги сохта таълимот ҳам ўйлаб топилди. «ЎЗМЭ».

СОЦИАЛИСТ [лот. socialis – ижтимоий]

1 Социализм тарафдори (қ. **социализм** 1).

2 Социалистик партия аъзоси.

СОЦИАЛИСТИК 1 Социализмга оид (қ. **социализм** 2). *Социалистик система.*

2 Социализм принципларига асосланган, шунга жавоб берадиган. *Социалистик тузум.*

3 Социал-демократияга оид. *Социалистик партия.*

СОЦИОЛИНГВИСТИКА [лот. socialis –

ижтимоий + лингвистика] Тилнинг ижтимоий табиати, унинг ижтимоий вазифалари, ижтимоий омилларнинг тилга таъсир кўрсатиши ҳамда тилнинг жамият ҳаётидаги ўрни билан боғлиқ кўплаб муаммоларни ўрганувчи илмий-назарий соҳа.

СОЦИОЛОГ Социология билан шуғулланувчи олим, жамиятшунос.

СОЦИОЛОГИК Социологияга оид. *Социологик тадқиқот. Социологик тафаккур.*

СОЦИОЛОГИЯ [лот. soci(etas) – жамият + юн. logos – фан, таълимот] Жамият ҳақидаги ва айрим ижтимоий тартиботлар, жараёнлар, ижтимоий гуруҳлар, шахс ва жамият муносабатлари, кишиларнинг ўзаро муомала қонуниятлари ҳақидаги фан. [Ўзбекистонда] *Социология фанини мустақилликдан сўнггина лозим даражада ривожлантириш имконияти туғилди. «ЎЗМЭ».*

СОЧ I 1 Одамнинг бош терисидан ўсадиган қил толалар қопламаси ва уларнинг ҳар бири. *Сийрак соч. Қуюқ соч. Бошида битта ҳам соч йўқ. Соч олдирмоқ. ■ Силкиниш орқасида унинг [қизнинг] юзини тўзғиган соч толалари ўраб олиб, жонсиз бир суратга киргизди. А. Қодирӣ, Ўтган кунлар. У машинани бир маромда юргизар, кабинага кирган шамол ўримга сўз бермаган соч толаларини елкасидан олиб, бўйнига ташлар, юзларини беозор савалагандай бўларди. С. Аҳмад, Юлдуз.*

2 Бирор тарзда ўстирилган ва тартибга солинган шундай толалар мажмуи. *Ўртадан фарқ очиб қўйилган соч. Калта қилиб қирқилган соч. Ўрилган соч. ■ У [Кумуш] бу кечаси кўрган баъзи тушларини Отабекнинг бу кун келишига йўйди-да, эрталабдан туриб, сочларини ечди. А. Қодирӣ, Ўтган кунлар. Ўн саккиз ёшлардаги, оқ-сарик, иккита йўғон соч ўрими кифтларига тушган қиз шахдам-шахдам қадам босиб келиб, болаларга кўшилди. Ҳ. Назир, Сўнмас чақмоқлар.*

Чилвир соч 1) майда ўрилган соч. *Комендантнинг чилвир соч қизчаси Нусратбекнинг ёнига югуриб келди. С. Нуров, Майсаларни аёз урмайди; 2) шундай сочли аёл. Учиб ўтган қалдирғоч, Ишқимга қилгин илож, Интизордир чилвир соч, Етказгил саломимни. Ё. Мирзо.*

3 кўчма Тола, нур сингари нарсалар ҳақида. *Қорли тоғлар орқасидан Атлас сочин тараб қуёш, Гоҳ мўралаб ўйнатар қош, Ханда сочар дудоғидан.* Файратий.

⇒ **да сочи оқарган** Бирор ишда узоқ йиллар ишлаган, умрини шу ишга сарф қилган. *-Биз меҳнатда топдик бахтимиз, Меҳнатда соч оқарса, майли! Ё. Мирзо.* **Сочини ёймоқ** Бошига мусибат тушиб ёки доғда қолиб оқ-воҳ қилмоқ, мотам тутмоқ. *Сочин ёйиб, кўкрагига мушлайди, Болам, дейди, кўзларини ёшлайди. «Нурали». Сочини супурги қилмоқ* Чўрилардек бутун хизматини қилмоқ. **Сочини юлмоқ** (ёки **юлиб йиғламоқ**) Дод солмоқ, дод-фарёд қилмоқ. *Бу гапнинг учи чиқарилса, хотинлар сочини юлади, хотинларгина эмас, кўпгина эркаклар ҳам тезда рози бўла қолмайди. А. Қаҳҳор, Кўшчинор чироқлари. Тепа сочи тикка турмоқ (ёки **бўлмоқ**) қ. **тепа.***

СОЧ II Чумчуқсимонлар туркумининг шақшақлар оиласига мансуб кичкина сайроқи қуш; майнанинг бир тури.

СОЧБОҒ Ёши улгайган аёллар сочига осиб юрадиган безакдор танга ва ш. к. юки бўлган, одатда, қора шойидан қилинган боғич. *Сочим узун, сочбоғимни солмийман, Бўйим тенги зар берсангиз, олмийман. «Кўшиқлар». Оёғида эски кирза этик, узун сочлари учиди сочбоғ.. Ш. Холмирзаев, Сайланма.*

СОЧИЛМА Сочилиб ётадиган, сочилган. *Сочилма қум.*

СОЧИЛМОҚ I **Сочмоқ** фл. мажх. н. Бу йил уруғ барвақт сочилди. Ерга гўнг сочилди.

2 Сочмоқ 1-5 фл. ўзл. н. **Фикр сочилди.** ■ Боғларда гуллар очилган, ҳидлари ҳар ён сочилган. М. Исмоилий, Фарғона т. о.

СОЧИЛУВЧАН физ. Сочилган; тўкилувчан. *Сочилувчан модда.*

СОЧИЛУВЧАНЛИК Сочилиш хусусияти. *Модданинг сочилувчанлиги.*

СОЧИСУНБУЛ айн. **болтириқ.**

СОЧИҚ I 1 Сочиб ташланган, сочилиб ётган. *Олимжон тор кўчадан Борар эди қишлоққа, Кўзи тушиди беш, ўн чоғ Йўлда сочиқ ёнғоққа. Қ. Муҳаммадий.*

2 айн. **чочиқ II 2.** *Ой келининг бошидан сочиқ сочинг, ёр-ёр. «Кўшиқлар».*

СОЧИҚ II Юз-қўл ёки идиш-товоқ артиш учун ишлатиладиган буюм. *Қўл сочиқ. Қозон сочиқ. ■ [Қудратжон] *Жўмракда қўлини юваётган адасига уйдан сочиқ олиб чиқди. Мирмуҳсин, Умид. Холиса духовкадаги димланган товуқни ағдариб қўйиб, қўлларини сочиққа артди. С. Нуров, Майсаларни аёз урмайди.**

СОЧМА I қ. х. Сочиб, сепиб экиладиган; сепма. *Сочма экин. Сочма қилиб экмoқ.*

2 от Питра.

Сочма ўқ айн. **питра.** *Душман Исмоиловни жуда яқиндан туриб, сочма ўқ билан отган!* Ҳ. Фулом, Машғал.

3 Питрали ўқ билан отадиган милтиқ. *Ботирали сочманинг тепкисини босиб, ҳар иккала қирғовулни қулатди. Ҳ. Фулом, Машғал.*

4 эск. айн. **проза.**

Сочма шеър Лирик кечинмалар сочма нутқ шаклида ифодаланган, жўшқин ритми билан шеърга ўхшаш бўлган насрий асар; насрий шеър.

5 геол. Нураган тоғ жинслари, минераллар ва руда бўлаклари қайта тўпланган жой; сочма кон. *..орадан олтмиш тўққиз йил ўтгач, Л.И. Брусницин худди шу ердан биринчи марта сочма олтин топишга муваффақ бўлган эди. «Фан ва турмуш». Сочма конлар шағал, қумтош ва қумлар тарқалган жойларда вужудга келади. «ЎЗМЭ».*

СОЧМОҚ I айн. **сепмоқ 1, 2.** *Уруғ сочмоқ. Йўлларга қум сочмоқ. Ҳовлига сув сочмоқ. Арпа сочсанг, арпа урасан. Мақол. Тер тўкиб сочсанг уруғ, Ер сени қўймас қуруқ. Мақол.*

2 Ҳар ён-ҳар ёнга тарқатиб ташламоқ, паришон қилмоқ. *Бошидан гул сочмоқ.* ■

Улардан сал тепада, бархан устида йиртилиб, таги кўчиб кетган бир пой ботинка, ундан нарида оғзи очиқ, бўм-бўш рюкзак ётар, унинг ичидаги нарсалар атрофга сочиб ташланган эди. М. Мансуров, Ёмби.

3 кўчма Тарқатиб юбормоқ, қочирмоқ. *Нормат, унинг хаёлини сочиб юбормаслик учун, ўз ўрнига чўзилди-да, анча вақт ўй суриб, ниҳоят ухлаб қолди. И. Раҳим, Чин муҳаббат.*

4 Тарқатмоқ, ёймоқ. *Узунчоқ омборнинг тўрида йгирма бешинчи лампочка хира нур сочади. Н. Аминов, Қаҳқаҳа. Ёз. Июнь куёши кўкдан заррин нур сочади. «Саодат».*

5 Тарамоқ, ёймоқ, тўкмоқ. *Хилма-хил гуллар хушбўй ҳид сочиб, бўстонни яшнатиб турар, шишадек тиниқ сувлар шилдираб оқиб ётар экан. «Чалпак ёққан кун».*

6 Бирор ўлчовда, меъёрада тақсимлаб тарқатмоқ, солмоқ. *Харажатни ҳаммага барабар сочмоқ.* ■ *Қарорим шундан иборатдир-ким, эртадан бошлаб юртга ўттиз икки тангадан солиқ сочасиз! А. Қодирий, Ўтган кунлар.*

Заҳрини сочмоқ қ. захар 3. *-Нима дейман? — хотинига захрини сочди Малик муаллим. — Бор гапни ўзбекча қилиб тушунтирдим-ку сенга. А. Кўчимов, Ҳалқа.*

СОЧОҚ I 1 айн. **сачоқ.**

2 Сигир, от, эшак думининг учидаги попуги.

СОЧОҚ II шв. айн. **сочиқ II.**

СОЧОҚЛИ I айн. **сачоқли.**

2 Учида попути бўлган. *Сигир унга жавобан сочоқли думини ҳавода ўйнатган эди, учи шилл этиб Тошхоннинг юзига тегди. А. Мираҳмедов, Ўт юраклар.*

СОЧПОПУК I Аёлларнинг сочга тақадиган, қора ип, ипак ёки жундан эшилган, учлари попуксимон безак буюми. *У[Назокат] сочпопугига осилтирган чўлписини жиринглашиб юрар, иккала қошини туташтириб қалин ўсма қўяр, ҳатто устахонада ҳам кўп вақтини ўсма тортиш билан ўтказар эди. А. Мухтор, Опа-сингиллар. Сочпопугим учиди Кўзmunчоғи бир шода. «Оқ олма, қизил олма».*

2 айн. **баргак II 2.** *Қизлар сочиди толбаргакдан сочпопук. С. Аҳмад, Хукм.*

СОЧТАРОШ кам қўлл. айн. **сартарош.**

СОЧҚИ шв. айн. **чочиқ II 2.** *Бир кампир язнамнинг бошидан сочқи сочди. С. Сиёев,*

Саратонда қор ёғди. *Аскар боши узра сочқилар сочилди.* Т. Мурод, От кишнаган оқшом.

СОЮЗ [қад. р. союз — занжир; алоқа, боғланиш; иттифоқ, бирлашма, уюшма] эск. Ижтимоий бирлашма, уюшма; жамоат ташкилоти. *Менинг асаримни юксак мукофотга тавсия этган Ўзбекистон ёзувчилар союзига, Тошкент давлат университетининг филология факультети студентларига, асарга катта баҳо берган ҳамкасбларимга.. чуқур миннатдорчилик билдираман.* А. Қаҳҳор, Асарлар.

СОЯ [яп. shoyu] Дуккакдилар оиласига мансуб, ловияга ўхшаш бир йиллик ўсимлик ва унинг озиқ-овқат саноатида кенг қўлланадиган дони. *Соя унидан сут, творог, қандолат маҳсулотлари тайёрлашда фойдаланилади.* «ЎЗМЭ».

СОЯ [ф. سايه — кўланка; пана жой; ҳимоя, ҳомийлик] 1 Кўёш нури тушмайдиган салқин жой; кўланка. *Сояда дам олмоқ. Ёнғоқ бутун ҳовлини соя қилиб турибди. Сада соя берар, тол хода берар.* Мақол. ■ *Ортиқ, сувсизлик юрак-бағрини ўртаб, иссиққа чидамай, юлғун тагига сурилади, бошини сояга олиб, қўлларини қумга тиқиб, салқин излайди.* М. Мансуров, Ёмби. *Шунча қилдим тол дарахтни парварши, Сояси бор, мевасини кўрмадим.* «Кўшиқлар».

2 Ёруғликни, нурни тўсувчи нарсалардан тушган тасвир, кўланка. *Эгрининг сояси ҳам эгри.* Мақол. *Кўрқоқ от ўз соясидан хурқар.* Мақол. *Теракнинг сояси тагига тушмас.* Мақол. ■ *Чодирнинг чети кўтаралиб, майкачан бўлиб олган Азизхоннинг сояси кўринди.* С. Аҳмад, Уфқ.

Соя солмоқ (ёки **ташламоқ**) 1) соя бермоқ, соя ҳосил қилмоқ, соя қилиб турмоқ, *Шипа осиглик қирқинчи чироқнинг қалпоғи уй деворларининг тепа ёғига чўзиқ соя солган.* Ҳ. Фулом, Машғал. У [Азиза] қуюқ соя ташлаган дарахт остига ўтириб, хаёлга толди. «Ёшлик»; 2) кўчма ғашлик солмоқ, хира қилмоқ. -*Кумуш менга тик қаролмас, юзларига хижолат соя солган эди, — деди Камолиддин.* Т. Жалолов, Олтин қафас. **Соя қайтди** Кун ярмидан оғди, кечга қараб кетди. *Кечки пайт, соя қайтганда, Анзират хола унга [Сидиқжонга] даричанинг олдидаги супага жой қилиб берди.* А. Қаҳҳор, Кўшчиногор чироқлари.

3 кўчма Шарпа, кўланка. [Кудрат:] *Урушининг шум сояси бу ерга ҳам етибди.* Н. Сафаров, Уйғониш. *Вазир: -Подшонинг ўзи худонинг сояси, подшо сўзи Қурбон эмасми, лангати! Қани, халойиқ қаерда, дарвор айт! — деди.* «Тоҳир ва Зуҳра». -*Вой, Роҳиланинг ўғли келибдими?! Роҳила шўрлик кутавериб, соя бўлиб қолувди. Бир жойга айтгани бор экан, беармон ўладиган бўлди, — деди энамиз севишиб.* «Ёшлик».

4 кўчма Ҳомийлик, паноҳ. *Маъқул, маъқул, бой ота, сояи давлатингиз кам бўлмасин.* Ойбек, Танланган асарлар. -*Биздан Тўраҳўжаевга кўндан-кўн дуо денг, тақсир! Биз бу ерларда ўша одамларни соя қилиб юрибмиз, — деди Мадамин.* П. Турсун, Ўқитувчи.

Офтобни сояга етказмай (ёки **келтирмай**) Бир зум ҳам кечиктирмай, дарҳол. [Холмат:] *Тасаддуғингиз кетай. Дўпписини олиб кел, десангиз, ахир биз жаллод.. кимнинг ажали етса, пойқадамингизда офтобни сояга етказмай, бошини кесиб келтирамиз-да!* Ҳамза, Бой ила хизматчи. **Сояда қолдирмоқ** Ўз устунлиги билан кимсани панада, орқада қолдирмоқ. *Йиллар ўтган сари Ислохоннинг таърифи кўп усталарни сояда қолдириб кетди.* М. Исмоилий, Одамийлик қиссаси. **Сояда қолмоқ** Панада қолмоқ, кўзга кўринмай, четда қолиб кетмоқ. *Жўра полвон бригадасига андижонлик полвонларни танлаб олган эди, аммо биронтаси Азизхонга етолмас, унинг соясида қолиб кетарди.* С. Аҳмад, Уфқ. **Сояси юпқа** 1) нозик, нимжон, заиф; 2) гап кўтара олмайдиган, таъби нозик. [Гулчеҳра:] *Келинпошшанинг сояси жуда юпқа, тил теккизманглар унга.* Ойбек, Улуғ йўл. **Соясига кўрпача солмоқ** (ёки **салом бермоқ**) 1) жуда ҳам хурмат қилмоқ, хурматини жойига келтирмоқ. -*Кўрқдингизми? — дейди Абдужалил тегирмончи ўз даввосига асос солиб, — қишлоқ халқи бизнинг соясизга салом беради.* А. Қодирйи. Обид кетмон; 2) хушомадгўйлик, лаганбардорлик қилмоқ. У [Яхшибоев] *келди нимаю келмади нима, боғ қилмоқчи бўлса, ана, мендан бошқа мингта боғбон бор, соясига кўрпача соладиган шогирдлари кўп, майли, ўшалар экиб, ўшалар кўжартириб бера қолсин.* М. М. Дўст, Лолазор. **Ўз соясидан кўрқмоқ** (ёки **чўчимоқ, ҳадиксирамоқ, хурқмоқ**) Ҳар нарсадан кўрқмоқ, жуда ҳам кўрқоқ бўлмоқ. *Кўрқоқ от соясидан хурқар.* Мақол. ■ *Яхши эмас, Фармонқул ака, нега қуёнга ўхшаб ўз*

соянгиздан ҳадиксирайдиган бўлиб қолдингиз?
С. Маҳкамов, Шогирд.

СОЯБОН [ф. سایبان / سایبان — бостирма, айвон; чодир; шамсия, зонтик] **1** айн. **зонтик**. Шойи соябон. Соябон тутмоқ. ■ Бўронбек чарм шапкали бошини соябон тагига яширди. Ҳ. Фулом, Машғал. Нариги хонада дарс тайёрлаб ўтирган неварасига, соябон тутиб, кўчадан тезда адасини чақириб келишни айтди. Мирмуҳсин, Умид.

2 с. т. Шляпа, шапка ва ш. к. нинг соя берувчи қисми. **Шапканинг соябони**. ■ Бижиримгина тилла гардишли кўзойнагию сербар похол соябон ўзига бирам ярашган Валентина ҳорғин жилмайди. М. Мансуров, Ёмби. Рўнарасида шляпанинг кенг соябони тагидан Хуморхоннинг кўзлари ёниб турарди. А. Мухтор, Туғилиш. **Кўлини (ёки кафтини) соябон қилмоқ** Кўлини (кафтини) пешонасига қўйиб, кўзларини куёшдан паналамоқ. **Зокир ота кўлини соябон қилиб, шудгорнинг узоқ этагига чамалаб кўрди**. Ҳ. Фулом, Замиң юлдузлари.

3 Умуман, куёш нуридан ёки ёмғирдан сакловчи ҳар қандай қурилма, пана. **Автобус станцияларига соябонлар қурилмоқда**. ■ **Куёш тиккага келиб, аёвсиз қиздирарётгани учун, ҳар ер-ҳар ерда соябонлар тикилган**. Н. Аминов, Ёлғончи фаришталар. Шундай гаштли кунлардан бирида практикантлар, бошларида соябон, тепа устида давра қурганча, орқаларини офтобга тоблаб, карта ўйнаб ўтиришар.. эди. М. Мансуров, Ёмби.

4 кўчма Паноҳ, ҳомийлик, хайрихоҳлик. **Тоғлар боши хиёбон, Бир худойим соябон**. «Нурали». **Қон йиғлайсиз бу кун онам меҳрибон, Отам экан ҳаммамизга соябон**. «Зулфизар билан Авазхон».

СОЯБОНГУЛЛИЛАР, соябонгулдошлар Соябонга ўхшаш тўпгулли ўсимликлар (зира, кашнич ва ш. к.)

СОЯБОНЛИ Соябони бўлган, соябон тутилган. **Соябонли киши**. **Соябонли арава**. **Кафенинг ранг-баранг соябонли столлари**. ■ **Ичмайдиган, чекмайдиган одам, ранги тоза, руҳи тетик, кенг соябонли шляпасини бошидан олганида, офтоб урмаган манглайига қоп-қора сочлари ёйилиб тушиди**. А. Мухтор, Кумуш тола.

СОЯКИ [ф. سایکی] Хўраки ва винобон узум нави. **Бир бош сояки**.

2 Шу узумдан солинган вино. **Бизда асо-сан узумнинг сапери ва сояки, оқ мускат каби вино сортлари, майизбон қора кишмиш нав-лари ўстирилади**. М. Мирзааҳмедов, Гулистонликлар бўстонида.

3 Шу узумдан қуритилган майиз. **Аҳмад-хон учун маҳрамлар, Тахсимчага соп келди, Сояки, майда майиз**. «Гулшанбоғ».

СОЯЛИ Сояси кўп, серсоя. **Майдоннинг юқорисидаги тевараги шосупалар, сояли дарахтлар билан ўралган сарҳовуз**. С. Айний, Қуллар.

СОЯЛИ Таркибида соя маҳсулоти бўлган. **Сояли шоколад**.

СОЯПАР айн. **сояпарвар**. [Полвон:] Ўлғудай дангаса, сояпар кишилар. **Ишлашмайди, меҳнат кунларидан қирқиб қўйдим**. К. Яшин, Пьесалар.

СОЯПАРВАР [ф. سایه پرور — сояни яхши кўрувчи; сояда ўстирилган] **1** бот. Сояда ўсадиган, сояни яхши кўрадиган. **Сояпарвар ўсимликлар**.

2 салб. Ишламай, соя-салқин жойларда ётишни яхши кўрадиган, ишёқмас; ялқов. **Мен кучимни, теримни тўкай, фойдасини сояпарвар бойлар кўрсин**. **Мен икки қўлимни бурнимга тиқиб қолаверай**. **Қани инсоф?! Ойбек, Танланган асарлар**. **Сенга ўхшаган сояпарвар, бўйни йўғонлар ўзини салқинга уриб, жўжахўрознинг шўрвасини ичиб ўтир-ганда, хотинлар терлаб-пишиб кетмон чоп-ган**. С. Аҳмад, Қадрдон далалар.

СОЯПАРВАРЛИК Дангасалик, ишёқмаслик, енгил яшашга мойиллик. **Дангасаликка, сояпарварликка.. асло йўл қўймаслик керак**. Ойбек, О. в. шабалалар.

СОЯ-САЛҚИН Куёш нури тушмайди-ган, соя ва салқин. **Соя-салқин жой**. **Соя-салқин хиёбонлар**. ■ **Кўйлар илгаригидек ўт-ламайди, ҳовлиқиб соя-салқин жой излайди, дуч келган бута, саксовул остига бош суқиб ётиб олади**. «Ёшлик».

СОЯСИДА (б. к. билан) кўм. вэф. Ту-файли, орқасида, орқали. **Шарофатларин-гиз соясида кўп кишилар билан танишдик**. А. Қодирий, Ўтган кунлар.

СОЯЧИРОҚ этн. Бесоқолларни қизлар қиёфасида кийинтириб, меҳмонхонада бир неча чироқ ёруғида томоша қилиш ёки ўйнатиш одати.

СОҚА I [а. ساقه — олиб борувчи, ҳайдаб келувчи, бошқариб борувчи] *шв.* Дарё ёки

анҳорлардан катта ариқларга сув олинадиган жой; ариқ боши. *Элимизнинг оғаси, Адрас тўннинг ёқаси, Ёнимизнинг соқаси Мироб акага бир салом. «Кўшиқлар». Амунинг қайсарлиги тутиб, қирғоқларидан нарига кетди, соқаларга сув бермай қўйди. Э. Раҳим, Ҳаёт амри билан.*

СОҚА II *шв.* Соққа.

СОҚА III [*а.* ساقه — поя, палак; орқадан борувчи; арьергард] **1** *ҳарб.* Ҳарбий юриш ёки машқлар чоғида асосий кучлар ортидан соқчилик қилиб борувчи махсус қисм.

2 *ҳарб.* Жанг пайтида турли ташқи зарбалардан сақланиш мақсадида тизза ва тирсақларга кийиладиган металл қалқонча.

3 *шв.* Бирор кимсадан ёки бирор ердан тарқаган; авлод, зот. *Аваз ўғлон қирқ йигитнинг оғаси. Ботирларнинг Аваз олтин соқаси. Эргаш Жуманбулбул ўғли.*

СОҚИЙ [*а.* ساقى — май, шароб куювчи] Май куювчи; косагул. *Дўстлар, соқий бўлинг бизга бу кеча, Дўст юзидек иссиқ тонг йўқ дунёда!* Ғ. Фулом, Танланган асарлар. *Ака Ғафур Фулом, эрка, шўх ҳамон, Доно шоир учун жом қуй, эй соқий. Шунчалик ардоқлаб турибди замон, Бу умр боқийдир, бу умр боқий.* А. Орипов, Йиллар армони.

СОҚИЙЛИК Май куйиб беришлик, косагуллик. *Соқийлик қилмоқ.* ■ *Соқийликни Сафобой ўз кўлига олди. Н. Аминов, Ёлғончи фаришталар.*

СОҚИЙНОМА [соқий + нома] **1** Шарқ мумтоз адабиётида соқийга мурожаат шаклида ёзилган, шоирнинг кечинмалари ҳам акс этадиган лирик жанр. *Соқийномани мустақил жанр сифатида ишлатиш форс шоири Умид Техронийдан бошланган. «Ўзбек адабиёти».*

2 Енгил ва жонли суръатдаги доира усули ва мазкур усулда айтиладиган ашула йўллари номи. *Соқийнома йўллари рақсага жўрлов сифатида ҳам айтилган. «ЎЗМЭ».*

СОҚИТ [*а.* ساقط — йиқилган, ағдарилган, тўкилган; нуқсонли, қусурли; бузуқ]: **соқит қилмоқ** (ёки **этмоқ**) Олиб ташламоқ, холи қилмоқ. *Албатта, унинг [Бобурнинг] фотиҳ, шоҳ ва давлат арбоби сифатида жуда мураккаб ҳаёт кечирганлигини ҳам эътибордан соқит қилмаслик керак. «Ёшлик». Шунда азага келганлардан уч-тўрттасини чақириб, уларга васиятни ўқиб бердим-да, гуноҳ-*

ни бўйнимдан узил-кесил соқит этдим. М. М. Дўст, Лолазор.

СОҚОВ **1** Тилсиз, гунг, гунгалак. *Туғма соқов. Кар ва соқов.* ■ *Ўзларини буткул ҳузур-ҳаловатга топширган ширакайф меҳмонлар тасодифан кириб қолган, кўзларидан қўрқув аралаш бесаранжомлик акс этган соқов болага ажабсиниб тикилишиди. «Ёшлик».*

Соқов бўлиб қолмоқ **1)** бутунлай тилсиз, гунг бўлиб қолмоқ; **2)** *кўчма* бирор сабаб билан вақтинча тили ишламай, гапиролмай қолмоқ. *У, бир лаҳза тилига сўз келмай, соқов бўлиб қолди. Мирмуҳсин, Темур Малик.*

2 Баъзи товушларни қийналиб талаффуз қиладиган ёки тутилиб гапирадиган; дудуқ.

СОҚОВЛАНМОҚ Тутилиб гапирмоқ дудуқланмоқ. *Ҳар сафар учрашганда, янгидан танишгандек, аввал бир қизаришиб олиб, кейин гап тополмай соқовланиб, тутилиб гап бошлашарди. Мирмуҳсин, Умид. Кўкрагини баланд тутди-да, яқтак чўнтагидан носини олиб, бир чимдимини тил тагига ташлади. Бир оз соқовланиб сўзлади. Ойдин, Ширинга мактуб.*

СОҚОВЛИК *тиб.* Туғма ёки илк болалик даврида рўй берган карлик оқибатида келиб чиқадиган нуқсон; гунглик, тилсизлик. *Эшитиш қобилияти сақланиб қолганда эса соқовликка нутқ маркази ёки марказий нерв системасининг зарарланиши сабаб бўлади. «ЎЗМЭ». Севаргул нихоят соқовлик азобидан қутулиб, бурро-бурро гапириб юборганиданми.. хийла хушҳол эди. Н. Қиличев, Чигирик.*

СОҚОЛ **1** Иякни қошлаб ўсаданга қилтуқлар. *Қора соқол. Қуюқ оппоқ соқол. Соқол олдирмоқ.* ■ *Йигитнинг кўрки — соқол, Бозорнинг кўрки — баққол. «Қанотли сўзлар». Эллик йил уста бобо деб ном чиқарган отасининг соқолидан, обрўсидан айрилиб, эшакка тесқари миниб кетаётганини тасаввур қилди. С. Сиёев, Аваз.*

Чўққи соқол қ. чўққи. -*Мен дегрезликман, — деди узун пешмат, мошранг духоба дўппи кийган бу чўққи соқол киши. Мирмуҳсин, Қахрамоннома.*

2 *кўчма* Баъзи ўсимликларнинг сочсимон попути. *Маккажўхорининг соқоли.*

=да соқоли оқарган айн. =да сочи оқарган қ. соч I.

СОҚОЛЛИ Соқоли бор, соқол қўйган. *Соқолли киши.* ■ *Баширжоннинг кўзига яна*

Ислол отанинг нафрат ва ҳазардан қийша-йиб кетган соқолли қиёфаси кўриниб кетди. Н. Аминов, Қаҳқаҳа.

СОҚОЛТАРОҚ Соқол тарайдиган кичкина тароқ.

СОҚЧИ 1 Муайян жойни, ҳудудни муҳофаза қилувчи қуролланган кўриқчи, посбон. *Чегара соқчилари.* ■ *Чегарада тиканли симлар, милтиқли соқчилар — қуш учиб ўтиши мушкул.* Газетадан. *Шаҳар атрофини ўраб олган паҳса деворлар устида соқчиларгина у ёқдан бу ёққа юриб турар.. эди.* Ойдин, Ҳикоялар.

2 Кўриқчи, қаровчи, қоровул. *Сурув ўз соқчиларига тўла ишонч билан пиш-пиш мудрамоқда.* С. Анорбоев, Оқсой.

Соқчи кема Соқчилик хизмати учун белгиланган ҳарбий кема.

3 Бирор кимсанинг хавфсизлигини сақлаш учун белгиланган шахс, шахсий кўриқчи. [*Сардор:*] *Ўз еримда жонимни ҳовучлаб, соқчи билан юраманми энди?* «Шарқ юлдузи». *Кўлга тушмоқдан кўрқадиған ташмачидай, мени ўзига соқчи қилиб олармиди?* М. М. Дўст, Лолазор.

4 Муҳофаза, ҳимоя қилувчи, кўриқловчи, сақловчи, посбон. *Тинчлик соқчилари.*

СОҚЧИЛИК Кўриқчилик, посбонлик, қоровуллик. *Назирқул бундай яширин суҳбатларга кўп марта соқчилик қилган.* С. Аҳмад, Ҳукм.

СОҚҚА 1 Зўлдир, шар.

Сайлов соққаси тар. 1917 йилгача: сайлов қутисига ташланадиган, розилик ёки қаршилиқни ифодаловчи оқ ёки қора шарча. *Бу мингбошиқнинг ҳар бир соққаси бир камбағалнинг бир ойлик пулига тушган-а!* Ҳамза, Танланган асарлар.

2 Чўт донаси.

3 Болалар ўйинларида: тикилган ганақни уриш учун белгиланган ошиқ, ёнғоқ ва ш. к. *Тоирларникига келиб, қўллари, тирноқларининг ораси кўкариб кетгунича хом ёнғоқ арчишиб, соққа уйнашди.* Қ. Кенжа, Тоғ йўлида бир оқшом. *Жаҳонгирхон кўчада Соққа ўйнаб юрибди.* «Нурали».

Кўз соққаси анат. Кўзнинг шарсимон юмалоқ қисми. *Кўзларини шундай олайтирдикки, кўз соққалари уқдай отилиб кетадиганга ўхшади.* П. Турсун, Ўқитувчи.

СОҒ I Касали йўқ, сиҳат-саломатлиги яхши; соғлом. *Соғ тиш. Соғ юрай десанг, озо-*

да бўл! Соғ танда соғлом ақл. Мақол. ■ *Соғ бориб, саломат келгин, Авазжон, Боргин, болам, сени ҳаққа топширдим.* «Маликай айёр». *Ёшсан, соғсан, ишла, ўйна, улфат қур, ҳар бир шўхлик йигитликда ярашади, болам.* Ойбек, Танланган асарлар.

СОҒ II шв. Ўнг. *О, бу гузал йўллар, ажойиб йўллар, Гул билан қопланган соғу сўллари.* Уйғун, Тонг кўшиғи. *Баҳайбат калтаги душман кўлинда, Жонкуяри йўқдир соғу сўлимда.* «Гулшанбоғ».

СОҒАЙМОҚ Дарди, касали ариб, яхши бўлмоқ, шифо топмоқ, сиҳатланмоқ. *Уч ҳафта ўтгач, қизча касалхонадан соғайиб чиқди.* «Фан ва турмуш». *Агар унинг ота-онаси оғир-вазминлик билан менинг соғайишимни кутишганда эди, оиламиз бузилиб кетмасди, ўғлим етим қолмасди.* Газетадан.

СОҒАР [ф. *сагар* — май ичиладиган пиёла; қалаҳ] эск. Шароб қуйиб ичиладиган идиш. *Маю майхонаю соқию мутрибни ҳавас қилдим, Менинг-чун ҳар сўзи мутрибу соқию соғар хат.* Ҳабибий.

СОҒДИРМОҚ 1 Соғмоқ фл. орт. н. *Бойсари: —Қизимга Кўкқамиш кўлида қўй соғдириб, чорвадорлик илмини ўргатайин, қўй соғмоққа уста бўлсин, — деди.* «Алпомиш».

2 Соғиб олиш пайтида жим турмоқ. *Бегона одамларга сира соғдирмайдиган сизир.*

СОҒИМ 1 Бир галги сут соғиш, бир гал соғиб олинган сут. *Соғимни оширмоқ. Соғим даври.*

2 айн. **соғин.** *Туркистон халқлари бўлса оқ подшо учун соғим сизирнинг ўзи бўлиб қолганди.* Н. Сафаров, Оловли излар.

СОҒИМЛИ Соғиш учун қулай, соғишли. *Эмчаклари соғимли сизир.*

СОҒИМСИЗ Соғиш учун ноқулай. *Эмчаклари соғимсиз сизир.*

СОҒИН Сут берадиган, соғиладиган.

Соғин сизир 1) сут берадиган, соғиладиган сизир. *Эгамберди, менда бир соғин сизир бор, шуни ола кетинг, ўзингизга..* Ш. Холмирзаев, Оғир тош кўчса; 2) кўчма текин даромад манбаи. *—Хўжаназарнинг ўзи колхоздан чиқдимми? — деб сўради хотини эрдан. —Йўқ, уни колхоздан қувмасалар, ўз ихтиёри билан чиқмайди, чунки ҳозирча колхоз у учун бир соғин сизир.* С. Айний, Қуллар.

СОҒИШМОҚ 1 Айриликдаги яқин кишини ҳуда кўргиси келмоқ; кўмсамоқ; соғинч ҳиссини сезмоқ. *Эй дилрабо, ишқинг*

била девона бўлдим соғиниб, Булбул каби тун-кечалар гирёна бўлдим соғиниб. Ҳамза. Эрини соғиниб юрган Холисанинг юраги негадир бирдан орзиқиб кетди. С. Нуров, Майсаларни аёз урмайди. Биламан, чарчагансизлар, болачақаларни соғингансизлар. С. Аҳмад, Уфқ.

2 Умуман, кўсмаоқ, хумор қилмоқ. *Каналак гулни соғинар, булбул — куйни.* Мақол. ■ *Биз бари бир баҳорни ҳар гал соғиниб кутиб оламиз.* «Саодат». *Қарши бобо ҳар қанча ҳурматга арзийди. Агар бирон кун уйда қамалиб ётса, далани соғиниб қолади.* А. Кўчиров, Ҳалқа. *Ғуломқорининг ашуласини жуда соғиниб қолдик.* М. Исмоилий, Фарғона т. о.

Калтакни соғиндингми? Калтак егинг келяптими?

3 Раво кўрмоқ, истамоқ. *Кўшинингга ёмонлик соғинма.* Мақол. ■ [Ҳасанали:] *Энди сиздан шуни ҳам сўрайин: хўжасига содиқ бир қул, сизнинг таъбирингизча, маънавий бир надар, ўз ўғлига ёмонлик соғинарми, бу тўғрида жавоб берингиз-чи?* А. Қодирий, Ўтган кунлар.

СОҒИНЧ Соғиниш ҳис-туйғуси. *Ҳафиза онаси бағрида кўзига андак ёш олди, бу — соғинч ёшлари эди.* Мирмуҳсин, Умид. *Ўтган кунларимга боқиб мунтазир, Соғинчдан ёнади ёнган бу жоним.* А. Орипов, Йиллар армони. *Гулхайри пинҳона учрашувларга кучли эҳтирос, орзиқиш, ҳаяжон, соғинч билан келарди.* С. Нуров, Майсаларни аёз урмайди.

СОҒИНЧЛИ Соғинч билан тўлиб-тошган, соғинч ифодаловчи. *Соғинчли салом.* ■ *Хат ёзаман, ўнг қўлимда қаламим, Ёрга етгай бу соғинчли саломим.* Газетадан. *Сизлардан соғинчли салом битилган мактублар олганимиз тақдирда, бошимиз кўкка кўтариларди.* Газетадан. *Соғинчли бир оҳанг денгизни бўйлар, Мовий сатҳ айланар ойдин қўшиққа.* А. Шер, Қадимги куй.

СОҒЛИК, соғлиқ Соғ-саломат бўлишлик, саломатлик, соғломлик. *Соғлигим — бойлигим.* Мақол. *Тани соғлик — туман бойлик.* Мақол. ■ *Тенг миқдорда сабзи, қизилча, бодринг шарбатларидан коктейль қилиниб, овқатдан олдин ичилса, соғлик ва кайфият яхши бўлади.* «Фан ва турмуш». Соғлиқни сақлашнинг асосий тадбири бадантарбия бўлиб, кейин овқат ва ундан сўнг уйқу тадбиридир. «Саодат».

СОҒЛОМ 1 Дард-касалдан холи; соғ. *Соғлом одам.* ■ *Зеро, она бўлиш бахти фар-*

зандларни соғлом ва баркамол тарбиялашдек машаққатли меҳнат билан чамбарчас боғлиқ. «Саодат». *Соғлом бўлиб доимо, Ёнгинамда юргин сен.* «Кўшиқлар».

2 Соғлиқни сақлаш талабларига тўла жавоб берадиган; бегубор, тоза, соф. *Соғлом турмуш шароитлари.*

3 кўчма Зарарли таъсирдан, салбий ҳислат, иллат ва ш.к. дан холи; тоза, пок. *Соғлом оила.* *Соғлом ижтимоий муҳит.* ■ *Мазкур йиғилишда мутахассислар бугунги иссиқ иқлим шароитида соғлом турмуш тарзи, тўғри овқатланиш ва кийиниш, шунингдек, сайёҳлик масалаларига алоҳида ургу бердилар.* Газетадан.

4 кўчма Рухий жиҳатдан шикаст етмаган; расо. *Соғ танда — соғлом ақл.* Мақол. ■ *Соғлом ақл китобсиз яшай олмайди.* Газетадан.

5 кўчма Ғоявий-мафкуравий, маънавий жиҳатдан тоза, пок. *Соғлом фикр.* ■ *Жумҳуриятдаги соғлом маънавий-руҳий вазиятни таъминлаш борасида зўр масъулият юклатилганини англаб турибмиз.* Газетадан.

СОҒЛОМЛАНМОҚ Зарарли таъсир, салбий ҳислат, иллат ва ш. к. дан қутулмоқ; мафкуравий, маънавий жиҳатдан тоза, пок, соғлом бўлмоқ; соғломлашмоқ. *Идора аппарати соғломланди.*

СОҒЛОМЛАШМОҚ 1 Дард-касали ариб, яхши бўлмоқ, соғаймоқ, тузалмоқ.

2 айн. **соғломланмоқ.** *Халқаро муносабатлар соғломлашиб бормоқда.*

СОҒЛОМЛИК Соғлик, саломатлик, касал эмаслик. *Ақлнинг соғломлиги.* *Фикрнинг соғломлиги.* ■ *Тишченко деган аёл унинг [Малоҳатнинг] соғломлигига, кучига, абжирлигига, айниқса, зехнига қойил бўлиб юрар экан.* А. Қаҳҳор, Жонфигон.

СОҒМОҚ Эмчакни йдириб, унинг учларини чўзиб ёки машина ёрдамида сутни чиқариб олмоқ. *Сигирни соғмоқ.* *Шақ-шақ этган келини сигир соққанида кўр.* Мақол. ■ *Шу билан бирга қорамолларга йил бўйи ширали кўк масса бериб туриш ҳам соғиб олинаётган сут миқдорини кўпайтиришига хизмат қилади.* Газетадан.

Соғиб ичмоқ Бировнинг бутун топган-тутганидан, куч-қувватидан ўзиникидай фойдаланмоқ. *Амалдор идорани сигирдай соғиб ичарди.* Газетадан.

СОҒОНА [ф. سغانه] **1** Қабр устига қурилган ёдгорлик; мақбара. *Қаерга борасиз, Қулбобо, сиз бизнинг бобомизсиз.. ажалингиз етса, отамнинг гўри ёнига сиз учун катта бир соғона ясаб, сизни элиб кўмамиз.* С. Айний, Куллар.

2 Мозор, гўр, қабр. *Асқар ота бориб, соғонанинг бош томонига чўкка тушди ва баланд овоз билан қуръон ўқиди.* А. Қаҳқор, Хотинлар.

СОҒ-САЛОМАТ айн. **сиҳат-саломат**. *Туз-насиба тортса, қайтиб келармиз, Соғ-саломат келиб, сизни кўрармиз.* «Маликаи айёр». *Улар соғ-саломат манзиллариغا етишди.* «Ёшлик».

СОҒУВЧИ 1 Соғмоқ фл. сфдш.

2 Фермаларда молларни соғувчи ходим. *Илғор соғувчилар.* ■ «Барлос» фермаси кони хазина-да. *Кўпчилик ўзини шу ерга уради. Шунинг учун соғувчини ҳам, молбоқарни ҳам танлаб олишади.* «Ёшлик».

СОҶА [а. ساحه — очиқ кенг жой; ҳовли; майдон] **1** Инсон фаолияти, илм-фан, маданият ва ш. к. нинг ҳар бир тармоғи. *Фан соҳалари. Қишлоқ хўжалигининг етакчи соҳалари.* ■ *Геоботаника номи билан юритилувчи соҳа ер қаърининг сир-асроридан кишиларни воқиф этиб туради.* Газетадан. *Ноқобил кадр, қайси соҳада бўлмасин, ривожланиш олдидаги бир тўсиқ.* «Саодат». *Этнонимика соҳасининг ҳозирга қадар ҳал этилмаган ва мунозарали масалалари бор.* «ЎТА».

2 кам қўлл. Майдон, ер. *Ойнинг тўла тугилиш соҳаси (астр.).* ■ *Сарв ёғочлари билан банд катта соҳа.* Ойбек, Навоий.

СОҶИБ [а. صاحب — ҳамроҳ; дўст, ўртоқ; эга, хўжайин] **1** Эгалик қилувчи; эга. *Уй соҳиби.* ■ *Орал денгизининг жанубидаги шу бепоён чўлланинг соҳиби бўлган кўчманчи массагетлар келин кутмоқда.* М. Осим, Карвон йўлларида. *Қувурларни алмаштириб олишдан хонадон соҳиблари воз кечдилар.* Газетадан.

Соҳиби давлат Давлат эгаси, бадавлат, давлатманд. **Соҳиби тож** Тож эгаси, тождор (шоҳлар, подшоҳлар ҳақида).

2 Бирор илм-хунар ёки хислат, фазилатни эгаллаган. [Қози.] *Яна ўзингиз соҳиби ақлсиз.* Ҳамза, Танланган асарлар. *Шу тарзда бу серқирра фаолият соҳибининг мероси шеърлар, дoston ва манзумалар, ҳикоя ва*

повестлар, очерк ва публицистик асарлардан иборатдир. Ф. Фулом, Танланган асарлар.

Соҳиб(и) каромат Каромат қилувчи, кароматли; мўъжизакор. *Одамлар Султон девонани «оташнафас вали» деб мақташар эди. Уша нодон, алданган кишиларнинг мақтаб.. юрган соҳиби каромати, бир алжиллаб ўтирган банги экан.* М. Муҳаммадҷонов, Турмуш уринишлари. **Қалам соҳиби ёки соҳиб қалам** Қалам тебратувчи; ёзувчи. *Сени яхши танийман-ку! Сен — соҳиб қалам, сен — шоирсан.* А. Орипов.

3 Соҳиб (эркаклар исми).

СОҶИБА [а. صاحبه — дугона; эга] **1** Эгалик қилувчи аёл, соҳиб аёл. *Уй соҳибаси. Хуш овоз соҳибаси.*

2 Соҳиба (хотин-қизлар исми).

СОҶИБЖАМОЛ [а. صاحبجمال — хусн, чирой эгаси] **1** Гўзал хусн-жамол эгаси; хушрўй, барно, зебо. *Соҳибжамол аёл.* ■ *Хотинининг юзига тик қарашга чоғланди-ю, аммо қани энди у малак, у баргикарам кўйлакли соҳибжамол кўз олдидан кетса.* М. Мансуров, Ёмби. *Рўмолини лабга босиб Соҳибжамол кулади..* «Ёшлик».

2 Соҳибжамол (хотин-қизлар исми)

СОҶИБИ [а. + ф. صاحبى] Ўрта Осиёда халқ селекциясида яратилган узум нави. *Оқ кишимши, қора, оқ чиллаки, чарос ва баён ширин, соҳиби ҳамда каттакўрғони каби рангбаранг шиғил-шиғил бошлар кўзларни қамаштиргудек серҳосил.* Н. Сафаров, Оловли излар.

СОҶИБКОР [а. + ф. صاحبكار — ишбилармон, иш берувчи, ёлловчи] **1** Ўз ишининг устаси; омилкор. *Соҳибкор боғбон.* ■ *Дилбар Фарғонадан соҳибкор халқим Ҳар йили узатар тонналаб мева.* А. Орипов, Йиллар армони. *Пахтақору чорвадор, пиллақору галлакор, боғбону соҳибкор — ҳаммасининг юзи ёруғ.* «Саодат».

2 Корхона эгаси; ишбилармон.

СОҶИБКОРЛИК Боғбонлик, узум, мева етиштириш билан шуғулланиш. *Ишқомда тўғилиб, чайлада катта бўлган бу истарали йигит соҳибкорликни ўн беш ёшидаёқ эгаллаб, санъат даражасига кўтарган эди.* А. Мухтор, Чинор.

СОҶИБҚИРОН [а. صاحبقران — қирон эгаси] **1** Астрология ва афсоналарда: Зухра ва Муштарий ёки Зухра ва Қуёшнинг эклиптика даврининг маълум бир даражасида

тўқнаш келиш вақти (қирон)да туғилган бола (бундай боланинг бахтли, голиб, музаффар ва улуг мартабали бўлиши башорат қилинган). Ёвни яқсон этинг, соҳибқиронлар, Мангу омонликда ўтсин наслимиз! Ф. Фулом, Танланган асарлар.

2 Шарқ мамлакатларида: қудратли ҳукмдор, жаҳонгир унвони.

3 Амир Темурнинг шарафли унвони. Соҳибқирон бобомиз Самарқандда гўзал боғлар бунёд этган. Газетадан.

СОҲИЛ [*a.* ساحل – қирғоқ, сув ҳавзасининг чети, лаби] 1 Сув ҳавзаларининг чети; бўй, қирғоқ. *Чакалакзордан бир ҳаққа «шақ-шақ»лаб, узун думини чўзганча, нариги соҳилга учиб кетди.* С. Нуров, Майсаларни аёз урмайди. *Дарё соҳилидаги табиий яшил майсазорлар, чакалакзорлар атроф муҳитга катта ижобий таъсир кўрсатади.* «Фан ва турмуш».

2 Сув ҳавзалари бўйлаб жойлашган ерлар. *Кумуш рангли булутлар Сув олади Оролдан. Лолазорга айланар Соҳил эрта баҳордан.* 3. Диёр.

СОҲИР [*a.* ساحر – сеҳрли, афсонавий; сеҳргар, жодугар] Сеҳрли, фусункор. *Соҳир кўзлар.* ■ *Тоғ қизларин ибo, назокатлари Кузнинг рухсорида бўлади зоҳир, Унсиз латофатдир марҳаматлари, Гоҳ улар ҳикматли, соҳида соҳир.* А. Суюн, Замин тақдири. *Қизликнинг энг маъсум, соҳир туйғулари Абдулмўминга бахшида бўлмаганмиди? А. Ибодинов, «Латофат» дўқонидаги қатл.*

СПАЗМ, спазма [*фр.* spasme < *юн.* spasmus – тиришиш, томир тортишиш] Мускулларнинг беихтиёр таранглашиши, тортишиши. *Скелет мускуллари спазмида ҳаракат қилиш қийинлашади, силлиқ мускуллар спазмида турли авзолар функцияси бузилади.* «ЎЗМЭ».

СПАРТАКИАДА [*лот.* Spartacus (Спартак) – қадимги Римда милоддан аввалги 73–71-йилларда кўтарилган куллар кўзголонининг раҳбари + (олимп)иада] Спортнинг бир неча тури бўйича анъанавий оммавий мусобақалар (20-асрнинг 20-йилларидан бошланган). *Умумий яқунда голиб чиққан ўқувчилар шаҳар спартакиадасида туман терма командаси шарафини ҳимоя қилиш ҳуқуқини қўлга киритишади.* Газетадан.

СПЕКТАКЛЬ [*фр.* spectacle < *лот.* spectaculum – томоша] Саҳнага қўйилган драматик асар, театр томошаси. *Кечада А. Қаҳ-*

ҳор номидаги Сатира театрининг артистлари спектакллардан парчалар ва миниатюралар ижро этишади. Газетадан. *Болалар ва ёшлар театрлари спектакллари ўсиб келатган ёш авлодни эстетик руҳда тарбиялашга даъват этилгандир.* Газетадан.

СПЕКТР [*лот.* spectrum – тасаввур; кўзга кўринадиган, кўриб бўладиган нарса, тасвир] 1 Муайян система ёки жараёни тавсифловчи бирон-бир катталикнинг барча қийматлари йиғиндиси. *Оптик спектр. Акустик спектр.*

2 Мураккаб нурнинг шиша призма ва ш. к. синдирувчи муҳит орқали ўтганида ҳосил бўладиган ранг-баранг чизиқлар мажмуи. *Қуёш спектри. Спектрнинг барча ранглари.* ■ *Ҳисоблашнинг стандарт усуллари спектрдаги турли компонентларнинг хараكتеристикаларини бир-биридан фарқ қила оладиган юқори малакали ходимларни талаб қилади.* «Фан ва турмуш».

СПЕКТРАЛ Спектрга оид.

Спектрал таҳлил Моддаларнинг спектр чизиқларига қараб уларнинг кимёвий таркибини аниқлаш усули.

СПЕКУЛЯНТ *эск.* Спекуляция билан шуғулланувчи одам; олибсотар, чайқовчи.

СПЕКУЛЯЦИЯ [*лот.* speculatio – кузатиб, изма-из бориб, диққат билан қараб топиш] 1 Фойда олиш, бойиш мақсадида камёб нарсаларни сотиб олиб, уларни қиммат нархда пуллаш, сотиш; чайқовчилик.

2 Қимматбаҳо қоғозлар (акция, облигация ва ш. к.) ни сотиб олиш ва қайта сотиш ўртасида юзага келадиган фарқдан фойда олиш мақсадида уларнинг олди-сотдиси билан шуғулланиш.

СПЕРМА [*юн.* sperma – уруғ; пушт] *айн. маний.*

СПЕРМАТОЗОИД [сперма + *юн.* zoon – тирик организм + eidos – кўриниш] *физиол.* Одам, ҳайвон ва кўпчилик ўсимликларнинг эркаклик жинсий ҳужайраси. *Муҳит температураси, босими, кислота-лигидининг ўзгариб туриши сперматозоид функциясининг бузилиши ва тезда ҳалок бўлишига олиб келади.* «ЎЗМЭ».

СПЕЦИФИК [*лот.* specificus – турни, жинсни белгиловчи, турга оид] Бирор кимса ёки нарсанинг ўзига ҳослигини кўрсатувчи, фақат бир киши ёки нарса-ҳодисанинг ўзи учунгина характерли бўлган. *Модданинг*

специфик хусусиятлари. *Ўрмоннинг специфик шароити.*

СПЕЦИФИКА [лот. *specificus* — турни, жинсни белгиловчи, турга оид] Бирор нарса, ҳодиса учунгина хос, характерли хусусиятлар мажмуи. *Ўрта Осиёда ирригация қурилишларининг спецификаси. Пахтачиликнинг спецификаси. Тошкентда метро қурилишининг спецификаси.*

СПЕЦИФИКАЦИЯ [лот. *specificatio* < *species* — тур, жинс + *facere* — қилмоқ, бажармоқ] Машина, асбоб-ускуна, қурилма ва ш.к. нинг батафсил тавсифи акс эттирилган жадвал шаклидаги техникавий ҳужжат.

СПИДВЕЙ [ингл. *speed* — тезлик + *way* — йўл] *спрт.* Трекда ёки яхмалак йўлакда ўтказиладиган мотоцикл пойгаси.

СПИДОМЕТР [ингл. *speed* — тезлик + метр] Автомобиль, мотоцикл ҳаракат тезлигини ва қанча йўл босиб ўтилганини кўрсатувчи асбоб. *Сухбат чоғида унинг [шофёрнинг] варақаси тўла тўлдирилмаганлиги, автомобиль спидометри ишламаслиги ва техник камчиликлари борлиги аниқланди.* Газетадан.

СПИКЕР [ингл. *speaker* — сўзловчи, но-тиқ] 1 Буюк Британияда умум палатасининг раиси.

2 Бир қатор мамлакатлар парламентларида парламент раиси ёки палата раиси.

СПИРАЛ *сфт.* Спираль шаклидаги, спиралсимон. *Спирал зинаоя.*

Спирал галактикалар Ташқи кўриниши спирални эслатувчи гигант юлдуз системалари. *Спирал галактикалар кўпинча бир томонга ўралган икки шоҳобчадан иборат бўлади.* «ЎЗМЭ».

СПИРАЛСИМОН Спираль шаклидаги; спирал.

СПИРАЛЬ [лот. *spiralis* < *spira* — бурилган, эгилган жой; эгик, букик; ўрам] 1 Муайян нуқта атрофида кўп марта ўралиб, унга борган сари яқинлашадиган ёки ундан узоқлашадиган ясси эгри чизиқ. *Спираль хоссаларидан фан ва техниканинг турли соҳаларида фойдаланилади.* «ЎЗМЭ».

2 Винт шаклидаги узлуксиз бурама сим. *Электр плита спирали.*

СПИРТ [ингл. *spirit* < лот. *spiritus* — нафас, дам; жон, рух] 1 Серкрахмал, ширали маҳсулотлардан (буғдой, картошка ва ш.к.

дан) ҳайдаш йўли билан ҳосил қилинадиган, алкогольга бой, ўткир таъмили, туссиз, ёнувчи суюқлик. *Вино спирти.*

2 *ким.* Таркибида водород атоми билан кислород атоми бирикмаси бўлган бир гуруҳ органик моддалар номи. *Ёғоч спирти.*

СПИРТЛАМОҚ 1 Спирт сингдирмоқ, спиртга тўйинтирмоқ.

2 Янги солинган узум виносига унинг қувватини ошириш ва ширасини сақлаш учун спирт кўшимоқ.

СПИРТЛИ 1 Ичида спирти бўлган, спирти бор. *Спиртли идиш.*

2 Спирт кўшилган, таркибида спирт бўлган. *Спиртли ичимликни узлуксиз истеъмол қилиш туфайли киши руҳияти бузилади, қулоқ аслида бўлмаган товушларни эшитади, кўз йўқ нарсаларни кўради.* Газетадан.

СПИРТОВКА [«спирт» с. дан] Спирт билан ёнадиган горелкали мослама.

СПИРТСИЗ Спирт солинмаган, спирт кўшилмаган, таркибида спирти бўлмаган. *Спиртсиз ичимликлар.*

СПОНСОР [ингл. *sponsor* < лот. *spondeo* — кафил бўламан, кафолат бераман] қ. **ҳомий.**

СПОРА [юн. *spora* — сочиш; экиш; уруғ] *биол.* Ўсимлик организми, замбуруғлар ва баъзи содда жониворларнинг кўпайиш ва яшаш учун хизмат қилувчи бошланғич уруғи, муртаги. *Ўйсин споралари.*

СПОРАЛИ Споралар орқали кўпаядиган. *Спорали ўсимликлар.*

СПОРТ [ингл. *sport* < *disport* — ўйин, эрмак; ўйин-кулги] Соғлиқни мустаҳкамлашга ва жисмоний жиҳатдан ҳар томонлама ўсишга қаратилган бадантарбия машқлари, шулар бўйича мусобақалар, кураш, туризм ва ш.к. мажмуи; жисмоний маданиятнинг таркибий қисми. *Спорт зали. Спорт гимнастикаси. Спорт ўйинлари. Спорт билан шугулланмоқ.* ■ *Умиднинг бокс спорти ҳақида баъзан узоқ гапириб, Ҳафизани зериқтирган вақтлари ҳам бўлган эди.* Мирмуҳсин, Умид. *Қолаверса, болаларимиз от спорти билан шугулланса, соғлом, баққуват бўлиб, юртимизга посбон бўлади.* Газетадан.

СПОРТСМЕН [ингл. *sportsmen*] *айн. спортчи.*

СПОРТЧИ Спортнинг бир ёки бир неча тури билан мунтазам суратда шугулланувчи киши. *Ҳозирги юксак тараққиёт*

даврида маҳоратли спортчилар кўрсаткичи ҳам мунтазам ўзгаряпти. «Фан ва турмуш». Мева ва сабзавот шарбати эса спортчилар ҳамда жисмоний меҳнат аҳлларига айниқса фойдали. «Фан ва турмуш».

СПРАВКА [р. справиться – «бирор киши ёки нарса ҳақида суриштириб маълумот тўпламоқ» фл. дан ясалган от] эск. айн. **маълумотнома 1-2.** Соғлиғи ҳақидаги справка. Иш жойидан справка олоқ. ■ [Набигул:] Фарғонада бир бойга хизматкор бўлганман. Борсам. справка топа оламан, аммо бормайман, ўртоқжон. А. Қаҳҳор, Қанотсиз читтак.

СПРАВОЧНИК [р. «справка» с. дан] эск. айн. **маълумотнома 3.** Амалий врачлар учун справочник. Математикадан справочник. ■ Кутубхонадаги справочник материалларга кўз югуртирдим. Газетадан.

СПРИНТ [ингл. sprint – қисқа масофага югуриш] срт. Қисқа масофага югуриш, сузиш ва ш. к. бўйича ўтказиладиган мусобақа.

СПРИНТЕР [ингл. sprinter] срт. Қисқа масофадаги мусобақаларга ихтисослашган спортчи (енгил атлетика, сузиш, конькида югуриш, велопоёга каби спорт турларида).

СТАБИЛ [лот. stabilis – турғун, доимий] Мустаҳкам, ўзгармайдиган, барқарор, турғун. *Стабил баҳо. Стабил кучланиш (эл.).* ■ *Стабил ва мул ҳосил олиб туриш – стабил ва пул даромадлар олиб туриш демакдир.* Газетадан.

СТАБИЛИЗАТОР [лот. stabilis – турғун, барқарор] **1** *тех.* Самолётнинг бўйлама турғунлиги ва бошқарилувчанлигини таъминлайдиган қуйруқ қанотининг қўзғалмас қисми.

2 Бирор жараённи, мас., электр токи ёки кучланишини автоматик тарзда бир текис тутиб турадиган асбоб. *Телевизор стабилизатори.*

3 *ким.* Бирор материал (пластмасса, лок, бўёк, елим ва ш.к.)нинг турли ташқи таъсирлар оқибатида рўй берадиган ўзгариши (эскириши)ни секинлаштирадиган модда.

СТАБИЛИЗАЦИЯ [лот. stabilis – турғун, доимий] Стабил ҳолатга келиш ёки келтириш, стабиллаштириш ёки стабиллаштириш. *Иқтисодиёт стабилизацияси. Стабилизация қурилмаси.*

СТАБИЛЛАШМОҚ Стабил, турғун, барқарор ҳолга келмоқ, текислашмоқ, тур-

ғунлашмоқ. *Баҳолар стабиллашди. Ҳосилдорлик стабиллашди.*

СТАБИЛЛИК Барқарорлик, турғунлик, мустаҳкамлик. *Тезликнинг стабиллиги. Валютанинг стабиллиги.*

СТАВКА I [р. ставить – «жойлаштирмоқ, ўрнатмоқ» фл. дан ясалган от] эск. **1** Олий бош қўмондон қароргоҳи (уруш даврида). *Ставкага бормоқ.*

2 Куролли кучлар раҳбариятининг олий органи (уруш даврида). *Ставка кўрсатмалари.*

СТАВКА II [р. ставить – «баҳоламоқ, санамоқ, бирор киши ёки кимсага қандайдир тарзда муомалада бўлмоқ» фл. дан ясалган от] **1** Солиқ, иш ҳақи ва б. турли хил тўловлар миқдори, меъёри. *Ойлик ставка. Солиқ ставкаси.* ■ *Жисмоний шахслардан олинадиган даромад солиғи ставкаларини пасайтириш ҳисобига аҳолининг реал даромади ошди.* Газетадан.

2 с.т. Бир ойлик иш соати ёки куни. *Мен ишга энди келишим, Назар Яхшибоевич. Бу ерда ярим ставка ишлайман, келаман-у кетаман. М. М. Дўст, Лолазор. Институтни битириш билан «Москвич» сотиб олди. Яқин поликлиникага номига ярим ставка ишга кириб қўйиб, кундузи гулчилик қилди. М. Мансуров, Ёмби.*

СТАДИОН [юн. stadion – Юнонистонда спорт мусобақалари ўтказиладиган жой] Футбол ва б. спорт ўйинлари майдони, югуриш йўлқалари ва томошабинлар учун трибуналари, ёрдамчи иншоотлари ва хоналари бўлган спорт мажмуаси. *«Пахтакор» стадиони.* ■ *Арслон наридан-бери овқатланиб, қайта кийинди-да, стадионга – футболга кетди.* Мирмуҳсин, Қаҳрамоннома.

СТАДИЯ [юн. stadion – қадимда: масофа ўлчов бирлиги] Бирор нарсанинг ривожланишидаги ўзига хос хусусиятларга эга бўлган давр, ҳар бир муайян босқич. *Қурт боқининг биринчи стадияси.*

СТАЖ [фр. stage] **1** Бирор соҳадаги иш-фаолиятнинг давомийлиги, умумий муддати, вақти. *Меҳнат стажи.* ■ *Улар менинг «икки йил ўқишга киролмай, бир шамоллаб, стаж орттирани» келганимга чиппачин ишониди. С. Сиёев, Ёруғлик.*

2 Янги ишга кирган кишининг бирор ишда, соҳада амалий тажриба орттириши,

раҳбарият томонидан унинг қобилиятига баҳо берилиши учун белгиланган вақт. *Бу ишда менинг стажим йўқ.*

СТАЖЁР [фр. stagiaire] Кейинчалик муайян лавозимда ишлаш учун синов мудлатини ўтаётган ва таълим олаётган киши.

СТАЖИРОВКА [«стажёр» с. дан] Тажриба орттириш учун белгиланган синов мудлати ва шу муддат давомидаги амалий иш тажрибаси; стажёр бўлиб ишлаш, синов мудлатини ўташ. *Шу билан бир қаторда таълим олиш ва стажировкадан ўтиш учун ёшларни мамлакатнинг sanoat марказларига кўпроқ юбориб туриш фойдали бўлади.* Газетадан.

СТАЙЕР [ингл. stayer – чидамли одам] Узоқ масофаларга югурувчи ёки сузувчи спортчи; таққосланг: **спринтер**.

СТАКАН [қад. р. – стокан, достакан < т. тостакан – ёғоч косача] Ичимликлар ичиш учун ишлатиладиган, дастасиз цилиндрик шиша идиш. *Қиррали стакан. Биллур стакан. Бир стакан сув.* ■ *Сомсахона орқасига ўтиб, вино будкасидан стакан сўраб олди-да, дўкондан олиб чиққан чоракта ароқни қулуқлатиб қуйиб ичди.* С. Аҳмад, Уфқ.

СТАН [р. стан, станок – манзил, қароргоҳ; дастгоҳ] *тех.* Металл чиғирлайдиган, ёядиган машина. *Прокат стани.*

СТАНДАРТ I [ингл. standard – меъёр, намуна, ўлчам] I Ўзига ўхшаш бошқа объекتلари таққослаш учун асос қилиб олинган намуна, андоза, эталон.

2 Стандартлаштириладиган объектга нисбатан қўлланиладиган меъёрлар, қоидалар, талаблар мажмуини белгиловчи расмий меъёрий-техник ҳужжат. *Давлат стандартлари.* ■ *Нуқсонлар, нон сифати бўйича давлат инспекциясининг текширишича, давлат стандартига ва нон ёпиш технологияси қоидаларига риоя қилмаслик натижасида келиб чиқади.* «Фан ва турмуш».

СТАНДАРТ II 1 Стандартга мувофиқ, мос бўлган, стандарт талабларига жавоб берадиган. *Стандарт уйлар. Стандарт деталлар.* ■ *Синалаётган янги навлар, ҳосилдорлиги ва қимматли хўжалик белгилари бўйича, стандарт навга қийслаб баҳоланади.* «ЎЗМЭ».

2 *кўчма* Бир қолипдаги, шаблон. *Стандарт гап.* ■ *Келганлар мен билан икки сўзли*

стандарт табрик айтиб сўрашдилар. Ш. Ри-зо, Қор ёғди, излар босилди.

СТАНДАРТЛАМОҚ Бир стандартга келтирмоқ, стандартга мувофиқ, бир хилда, бир қолипда ишламоқ, ясамоқ, ҳозирламоқ. *Стандартланган бинолар.*

СТАНДАРТЛАШ Фан, техника ва амалий тажрибаларнинг умумлаштирилган ютуқларига таянган ҳолда стандартлар белгилаш ва уларни тармоқларда қўллаш жараёни. *Стандартлаш халқ хўжалигини бошқаришда муҳим роль ўйнайди.* «ЎЗМЭ».

СТАНДАРТСИЗ Стандартга мос келмайдиган, стандарт талабларига жавоб бермайдиган, стандартдан ташқари; ностандарт. *Стандартсиз мол. Стандартсиз ускуналар.*

СТАНОК [р. станок – кичкина дастгоҳ] 1 *тех.* Металл, ёғоч, қаттиқ материалларга ишлов бериш, улардан бирор нарса тайёрлаш ҳамда газлама тўқиш учун хизмат қилувчи машина. *Пармалаш станогии. Силлиқлаш станогии.* ■ *Минг-минглаб кишилар машина, станоклар, конвейерлар қаршисида эртадан-кечгача туриб меҳнат қилишади.* «Фан ва турмуш». *Сўнги маълумотларга қараганда, духоба тайёрлаш учун янги пневматик-автоматик станоклар тайёрланиши назарда тутилмоқда.* Газетадан.

2 *ҳарб.* Тўп, пулемёт ва ш. к. қуроллар ўрнатилган, одатда, филдиракли асос. *Пулемёт станогии.*

СТАНОКЛИ 1 Станогии бор, станок билан таъмин этилган. *Замонавий станокли цехлар.*

2 Станокка ўрнатилган. *Ун тўртинчи вагон томига қўл пулемёти, охириги вагонга иккита станокли пулемёт ўрнатилди.* И. Раҳим, Чин муҳаббат.

СТАНОКСОЗ [станок + ф. ساز – ясовчи, қурувчи] Станок ясовчи, станок ишлаб чиқарувчи ишчи, мутахассис.

СТАНОКСОЗЛИК Станоклар ишлаб чиқариш; машинасозлик саноатининг станоклар ишлаб чиқарадиган тармоғи. *Станоксозликни ривожлантириш. Станоксозлик саноати.*

СТАНСА с. т. эск. Станция. -*Жўна, бошқа юмушларни қил. Ман ўзим ҳайдаман, стансада юмушим ҳам бор, – деди-да, Ёрмат ҳайдовчи ўрнига ўтириб олди.* Ойбек, Танланган асарлар.

Стансаси йўқ *с. т.* Тайини йўқ, бетайин. **Стансанг ишлайдими?** *даёл.* Миянг ишлайдими? Ақлинг борми?

СТАНЦИЯ [*лот. statio* — тўхташ жойи; бекат] 1 Темир йўл поездлари ёки қуруқликдаги бошқа транспорт воситалари тўхтайдиган жой; шу жойга тегишли иншоот ва хизматлар мажмуи. *Темир йўл станцияси. Метро станцияси.* ■ *Поезд Тошкентдан чиққандан бери йўл-йўлакай ҳар развезд, ҳар станцияда вагонларга гул отаверишган эди. С. Аҳмад, Уфқ. Чоллар, келинчақлар, ҳассага таяниб қолган кампирлар станция биноси тепасидаги радиокарнайга тикилишган. С. Аҳмад, Уфқ.*

2 Махсус вазифа бажарувчи айрим муассасалар, корхоналар ёки илмий-текшириш иши олиб борувчи муассасалар номи. *Телефон станцияси. Метеорология станцияси. Селекцион станция.* ■ *Шу боисдан бу ерда сейсмик станция қурилди ва кенг қўламда сейсмологик, геофизик кузатишлар бошлаб юборилди. «Фан ва турмуш». Зиммамизда бир ярим мингта дизель насос станцияларини электр энергиясига ўтказишдек катта вазифа турибди. Газетадан.*

3 Бортида илмий асбоб-ускуналари бўлган космик аппарат. *Космик станция.* ■ *Мутлақо қутилмаганда «Салют-7» орбитал станцияси билан алоқа узилди. «Фан ва турмуш».*

СТАРТ [*ингл. start* — жўнаб кетиш; ҳаракатнинг бошланиши] 1 Масофани босиб ўтиш ва олдинга ҳаракат қилиш билан боғлиқ спорт мусобақаларининг бошланиш ўрни. *Старт чизиғи. Старт майдони.* ■ *Раҳим цирк полволларидай кўкрагини олдинга чиқариб, лапанлаб, стартга яқинлашди. Ҳ. Назир, Сўнмас чақмоқлар.*

2 Югуриш, велопоёга ва ш.к. спорт мусобақаларининг бошланиш пайти. *Старт бермоқ.*

3 Учиш аппаратларининг ердан кўтарилиш жойи ва пайти.

СТАРТЕР [*ингл. starter* < *start* — бошламоқ, ишга туширмоқ] Ички ёнув двигателини ишга солиш, юргизиб юбориш учун хизмат қиладиган мослама, асбоб.

СТАТИК 1 [*юн. statikos* — турувчи, жойлашувчи; тўхтаб турувчи] Статикага, ҳаракатсизлик ҳолатига, мувозанатга оид, статика қонунарига асосланган. *Статик на-*

ғрузка. ■ *Ҳаракатсиз ҳолатдаги иш, масалан, қўлни чўзиб турган ҳолатда юкни ушлаб туриш статик иш деб аталади. «Анатомия».*

2 Ҳаракатсиз ҳолатни акс эттирувчи, ҳаракатсиз, турғун ҳолатдаги. *Статик тасвир.*

СТАТИКА [*юн. statike*] 1 Механиканинг жисмларнинг муайян кучлар остидаги мувозанат шарт-шароитларини ўрганадиган соҳаси. *Геометрик статика* усулларидан фойдаланиб, қаттиқ жисмларнинг мувозанат ҳолатлари ўрганилади. «ЎЗМЭ».

2 Мувозанат, тинчлик ҳолати.

СТАТИСТИК [*юн. statos* — арзирли] Статистика мутахассиси, статистика билан шуғулланувчи киши.

СТАТИСТИК 1 Статистикага оид. *Статистик маълумотлар.*

2 Статистика методлари асосида олиб бориладиган, шу асосда тўпланган маълумотларга таянадиган. *Статистик кузатишлар. Статистик жадваллар.*

СТАТИСТИКА [*нем. Statistik* < *итал. stato* — давлат < *лот. status* — бойлик, мол-мулк] Турли хил ялпи миқдорий маълумотларни тўплаш ва таҳлил қилиш методларини ишлаб чиқадиغان, шу йўл билан ижтимоий ҳаётнинг умумий қонуналарини ўрганадиган ижтимоий фанлар тармоғи. *Статистика мураккаб ва сертармоқ фанлар мажмуидан иборат бўлиб, ижтимоий ҳаётнинг хилма-хил ҳодисаларини ўрганади ва таҳлил этади. «ЎЗМЭ».*

2 Жамият ҳаётидаги ҳодисалар ва жараёнларга доир ахборотларни йиғиш, қайта ишлаш, таҳлил ва эълон қилиш билан боғлиқ амалий фаолият соҳаси. *Статистика амалиёти билан Ўзбекистон Республикаси Статистика давлат қўмитаси ва унинг вилоят, шаҳар, туман бошқарма (бўлим)лари шуғулланади. «ЎЗМЭ».*

3 Ижтимоий ҳаётнинг бирор соҳасини тавсифловчи якуний кўрсаткичлар йиғиндиси.

СТАТУС [*лот. status* — аҳвол, ҳол, ҳолат] Халқаро ҳуқуқда: ҳуқуқий ҳолат, вазият (*яна қ. мақом* II 3). *Дипломатик статус. Давлатнинг мустақиллик статуси.*

СТАТЬЯ [*р.* статья — мақола; банд, модда] *қ. модда* II 2. *Даромад статьялари. Буромад статьялари.*

СТАХАНОВЧИ [ўтган асрнинг 30-йилларида кўмир қазиб олишда ўта юқори кўрсаткичларга эришган машҳур шахтёр А. Стаханов номидан] *тар.* Стахановчилик ҳаракатининг қатнашчиси; ўтган асрнинг 30–40-йилларида ишлаб чиқаришда янги техникани эгаллаган ва юқори меҳнат унвдорлигига эришган новатор ишчи. *Жонфигон ўтган йил баҳор кечаларининг бирида.. истироҳат боғига кирган экан, қараса, шаҳарнинг манман деган стахановчилари қаторида хотинининг ҳам каттакон портрети турибди.* А. Қаҳҳор, Жонфигон.

СТАЦИОНАР I [*лот.* stationarius – қўзғалмас, ҳаракатланмайдиган] **I** Ҳамиша бир жойда туриб ишлайдиган, кўчмас ишхона, муассаса ва ш. к.

2 Касаллар доимий жой (койка)га эга бўладиган ва бутун сутка (лар) давомида ётадиган даволаш муассасаси. *Стационарда даволанмоқ.*

СТАЦИОНАР II I Бир жойда туриб ишлайдиган, кўчмас. *Стационар устахона. Стационар кутубхона.*

2 Бутун сутка давомида касалхонада ётиб даволаниш билан боғлиқ.

СТАЧКА [*қад. р.* стакаться – тил бириктирмоқ, келишмоқ] *тар. айн. забастовка.*

СТВОЛ [*қад. р.* стибол – поя; шохча] **I** Милтиқ, тўп сингари отиш қуроллариининг ўқ отилиб чиқадиган найсимон қисми. *Милтиқ стволи. Пулемёт стволи.* ■ *Танклардаги тўпларнинг узун стволлари олов пуркай бошлади.* Ойбек, Куёш қораймас.

2 кон. Вертикал шахтанинг оғзидан тубигача бўлган қисми. *Шахта стволи.*

СТЕЛЛАЖ [*нем.* Stelage < *голл.* stellen – қўймоқ, жойлаштирмоқ] Турли нарсалар қўйиш, мас., китоб сақлаш учун ясалган сўкчаксимон устма-уст точка (полка)лар.

СТЕЛЬКА [*р.* стлать – «ёймоқ, солмоқ, тўшамоқ» фл. дан ясалган от] Пойабзалнинг ичига қўйиладиган юпқа чарм, мата ёки картон патак.

СТЕНД [*ингл.* stand – таглик, поя, устун; пештахта] **I** Кўрғазма, музей ва ш. к. да намойиш учун экспонатлар қўйиладиган мослама, шчит. *Адабиёт музейида «Навоий» стенди. Экспонатларни стендларга қўймоқ. Стенд ташкил этмоқ.* ■ *Стендларда ойна тагига қўйилган турли-туман минераллар*

йилт-йилт товланар эди. А. Мухтор, Давр менинг тақдиримда.

2 Тайёр машина ва ускуналар синаладиган қурилма. *Двигателни стендга ўрна-тиб, синовдан ўтказмоқ.*

3 Ҳавода учиб бораётган нишонга сочма ўқ билан отиш учун жиҳозланган махсус жой, майдонча.

СТЕНО- [*юн.* stenos – тор, сиқик, қисқа] Байналмилал ўзлашма қўшма сўзларнинг биринчи қисми бўлиб, «тор, сиқик, тигиз, қисқа» маъноларини ифодалайди.

СТЕНОГРАММА [*стено.. + юн.* gramma – ёзув, ёзув белгиси] Оғзаки нутқни қоғозга сўзма-сўз ёзиб олиш; стенографик усул билан ёзиб олинган матн. *Маъруза стенограммаси.*

СТЕНОГРАФИК I Стенографияга оид. *Стенографик усул. Стенографик алифбо.*

2 Стенография усули билан ёзиб олинган. *Стенографик ҳисобот. Стенографик материаллар.*

СТЕНОГРАФИСТ Оғзаки нутқни стенография усули билан ёзиб олувчи мутахассис.

СТЕНОГРАФИСТКА Стенографист аёл. *Агар стенографистка қиз ушлаб қолмаганида, дераза тагидаги гули қуриб қолган тувакка боши билан уриларди.* С. Аҳмад, Юлдуз.

СТЕНОГРАФИСТЛИК Стенографист касби, стенография билан шуғулланиш. *Стенографистлик курси. Стенографистликни ўрганмоқ.*

СТЕНОГРАФИЯ [*стено.. + юн.* grapho – ёзаман] Оғзаки нутқни турли шартли белгилар ва қисқартмалар билан тез ёзиб олиш усули ва шундай ёзувнинг ўзи. *Стенография курси. Маърузаларни стенографияда ёзиб бормоқ.*

СТЕНОГРАФЧИ *айн. стенографист.*

СТЕНОКАРДИЯ [*стено.. + юн.* kardia – юрак] *тиб.* Юрак ишемик касаллигининг кўкрак қафасининг марказий ёки чап қисмида тўсатдан пайдо бўладиган гижимловчи оғриқ билан, кўркув ва ваҳима билан кечадиган шакли.

СТЕПЛЕР [*итал.* stepler] Қоғоз варақларини металл чангакчалар билан бириктириш, тикишга мўлжалланган дастаки ёки механик мослама.

СТЕРЕО- [*юн.* stereos – қаттиқ; жисмга оид, ҳажмий, фазовий] Байналмилал ўзлашма қўшма сўзларнинг биринчи тарки-

бий қисми: «қаттиқ, қатгий»; «ҳажмдорлик, фазовий тақсимланиш» маъноларини ифодалайди (мас., *стереотип, стереометрия, стереокимё* ва б.).

СТЕРЕОКИМЁ [стерео.. + кимё] *ким.* Молекулалардаги атомларнинг фазовий жойлашиши, тузилиши ва бунинг физик-кимёвий таъсири ҳақидаги таълимот, фан.

СТЕРЕОМЕТРИЯ [стерео.. + метр] *мат.* Геометриянинг бир текисликда ётмаган, фазодаги геометрик шакллари ўрганадиган бўлими.

СТЕРЕОСКОП [стерео + *юн.* skopeo – кўраман] Бир нарсанинг иккита тасвирини бирга қўшиб, бўрттириб, ҳажмдор қилиб кўрсатадиган оптик асбоб.

СТЕРЕОСКОПИК 1 Ҳажми, фазовий шакли яққол кўзга ташланадиган, бўртиб кўринадиган, бўртма. *Стереоскопик тасвир. Стереоскопик фотосурат.*

2 Ҳажмдор тасвир ҳосил қиладиган, бўрттириб, ҳажмдор қилиб кўрсатадиган. *Стереоскопик кино.*

СТЕРЕОТИП [стерео + *юн.* typos – из, тамга; аломат] **1** *плгрф.* Китоб, газета, журнал ва ш.к. ни кўп нусхада нашр этиш учун терилган матннинг металл, резина ёки пластмассадан қилинган яхлит қолипга кўчирилган нусхаси; босма қолип.

2 **Стереотип 1** га оид, стереотипдан кўчириб босилган. *Стереотип нашр.*

3 *кўчма* Бир хил, бир қолипдаги. *Фильмни яратиш учун муаллифлар янги, маънодор шакллар, қаҳрамонларни янгича кўрсатиш йўлларини излаб, ўрганиб қолинган стереотип ва схематизмдан воз кечаётганликларини намойиш этдилар.* Газетадан.

СТЕРЕОТИПИЯ *плгрф.* Стереотиплар тайёрлаш ва улардан фойдаланиб, китоб ва ш.к. босиш усули, техникаси.

СТЕРЖЕНЬ [*қад. р.* стержень – дарах танасининг ўзаги] Металл ёки бошқа материалдан тайёрланган таёқчасимон деталь. *Металл стержень. Затвор стержени.*

СТЕРИЛ [*лот.* sterilis – тоза, пуштсиз, наслсиз] Стерилизация қилинган, стерилланган, микроблардан холи қилинган. *Стерил пахта. Стерил бинт.* ■ *Аппарат бутун асбоблари билан стерил бўлиши лозим.* Н. Исмоилов, Касалларни парвариш қилиш.

СТЕРИЛИЗАТОР Лаборатория идишлари, тиббий асбоб-ускуналарни стериллаш учун хизмат қиладиган қурилма, мослама.

СТЕРИЛИЗАЦИЯ, стериллаш [*лот.* sterilis – тоза, пуштсиз, наслсиз] Қайнатиб, қизитиб, қатрон қилиб ёки кимёвий йўл билан микроблардан тозалаш, зарарсизлантириш.

СТИЛИСТИК Стилга, стилистикага оид, услубий. *Стилистик хато. Стилистик жиҳатдан ғализ жумла.* ■ *Бу синонимик қаторлардаги сўзлардан фақат нейтрал стилистик бўёққа эга бўлган баъзи сўзларгина атрибутив функцияда қўлланади.* «ЎТА».

СТИЛИСТИКА [«стиль» с. дан] **1** Тилшуносликнинг тил ва нутқ бирликларини ўрнида қўллашни, тилнинг тасвирий воситаларини ўрганувчи бўлими. *Лексик стилистика. Фонетик стилистика.* ■ *Стилистика учун адабий-нейтрал услуб муҳим қимматга эгадир.* «ЎТА».

2 *айн. услубшунослик.*

3 Адабиёт назариясининг бадиий адабиёт асарларининг тил хусусиятларини ўрганувчи бўлими.

СТИЛЬ I [*юн.* stylos – ёзув, хат таёқчаси] **1** Муайян давр ёки оқим адабиёти ва санъатидаги, шунингдек, алоҳида бир муаллиф ёки алоҳида асардаги тасвирий воситаларнинг гоёвий ва бадиий жиҳатдан ўзаро боғлиқлиги; шундай воситалар маъмуи; услуб. *Адабиётда романтик стиль. Архитектурада шарқ стили.*

2 *айн. услуб 2.* Ёзувчининг стили. *Китобий стиль. Публицистик стиль.*

3 *айн. услуб 3.* Бадиий стиль. *Илмий стиль.*

СТИЛЯГА [«стиль» с. дан] *салб.* Кийиниш ва юриш-туришда кўпчиликнинг дидига мос келмайдиган, гайриоддий, европача модага зeb берувчи йигит ёки қиз. *Шаҳар стилиягаларини бир чўқишда қочирадиган бу қиз Иномжонни тамоман лол қилиб қўйган эди.* С. Аҳмад, Мўтти.

СТИМУЛ [*лот.* stimulus – ҳайвонларни ҳайдаш учун белгиланган учли таёқ] Бирор ишга қизиқиш туғдирадиган, рағбатлантирадиган, ундайдиган нарса, омил. *Меҳнат унмдорлигини оширувчи стимуллар. Моддий стимул. Маънавий стимул. Стимул бермоқ.*

СТИПЕНДИАТ [*лот.* stipendiatius] Стипендия олувчи шахс. *Президент стипендиати.*

СТИПЕНДИЯ [*лот.* stipendium – тўлов] Олий ва ўрта махсус ўқув юрларининг кундузги бўлимлари талаба ва ўқувчилари-

га, аспирант ва докторантларга, махсус курсларнинг тингловчиларига ҳар ойда бериб туриладиган нафақа, пул.

СТИХИЯ [юн. stoicheion – унсур, элемент; ибтидо, асос] **1** Кучли табиий офат (ёнғин, тошқин, довул, zilzila ва ш. к.). *Табиат стихиясини енга оладиган бирдан-бир куч – одамлар.. улардаги жасурлик.* И. Раҳим, Ихлос.

2 *кўчма* Кўр-кўрона, бебош ҳаракат; уюшмаганлик; уюштириб ва идора қилиб бўлмайдиган ижтимоий куч.

СТИХИЯЛИ **1** Стихияга оид, кишиларнинг иродасидан, хоҳишидан ташқари табиий кучлар таъсири остида юзага келадиган.

2 Уюшмаган, тўғри ташкил этилмаган, идора қилиб бўлмайдиган. *Стихияли ижтимоий ҳаракат.*

СТИХИЯЛИЛИК Уюшмаганлик, тўғри ташкил этилмаганлик; режасизлик. *Ҳаракатнинг стихиялилиги.*

СТИХИЯЧИЛИК Стихияли ҳаракат, бошбошдоқлик. *Стихиячиликни онглиликка айлантириш.*

СТОИК [юн. stoikos] *флс.* Стоицизм издоши, тарафдори.

СТОИЦИЗМ [юн. Stoia (Стоя) – стоиклар мактаби асосчиси Зенон биринчи марта нутқ сўзлаган пешайвон номидан] Юнон фалсафасида милоддан аввалги 2–3-асрларда юзага келган, инсон (доно киши) эҳтирос ва ҳою ҳаваслардан холи бўлиб, ақл-идрокка бўйсуниб яшамоғи керак, деб ҳисоблаган фалсафий оқим. *Гераклит ғоялари таъсирида стоиклар бошланғич оловнинг фаол ролини, унинг ҳамма нарсанинг яратувчиси эканлигини қайд қилганлар, лекин улар кейинчалик ҳаво, сув, тупроқнинг ролини ҳам эътироф этганлар.* «Фалсафа».

СТОЛ [қад. р. стол – курси, ўриндик; тахт] **1** Дастурхон тузаш ёки ишлаш учун мўлжалланган, тиргак ёки оёқчаларга ўрнатилган кенг горизонтал тахтали баланд курси; мебель тури. *Тўғарак стол. Тортмали стол. Ёзув столи. Овқат столи. Операция столи.* ■ [Абдулла Қаҳҳор] *Ҳар куни муайян вақтда ёзув столида ўтиришлари шарт эди. К. Қаҳҳорова, Чорак аср ҳамнафас. Лобархон катта уйдаги столга дастурхон тузаб.. чойнакдаги чойни қайтариб турарди. Га-зетадан. Жувон бир коса хушбўй ва хуштаъм*

овқатни столга қўйиб, секин нари кетди. С. Нуров, Майсаларни аёз урмайди.

2 *кўчма с. т.* Амал, лавозим. [Заргаров:] *Нимадан тап тортаман!.. Олса, столини олади-да, артелимга бориб, яна раислигимни қилавераман. А. Қаҳҳор, Оғриқ тишлар.*

3 Махсус ишлар билан шуғулланувчи муассаса ёки муассасадаги бир бўлим. *Паспорт столи. Адрес столи.*

СТОЛБА [р. столб – ерга тик ўрнатилган хода] *айн. сямёғоч.* *Электр тармоғи столбалари.* ■ *Поезд шу қадар елмоқдаки, Норматнинг назарида поёнсиз дашт чир айланиб, телеграф столбалари унга қараб чопиб кетаётгандай.* И. Раҳим, Чин муҳаббат.

СТОМАТИТ [юн. stoma, stomatos – оғиз + itis – яллиғланишни билдирувчи қўшимча] *тиб.* Оғиз бўшлиғидаги шиллиқ парданинг яллиғланиши.

СТОМАТОЛОГ Стоматология бўйича мутахассис, врач. *Ҳозир стоматолог кабинетлари замонавий аппаратлар билан жиҳозланган.* «Саодат».

СТОМАТОЛОГИК Стоматологияга оид. *Стоматологик операция.* ■ *Стоматологик касалликларни даволашда турли доридармонлар, лазер ва инфрақизил нур, ультратовуш, физиотерапия усуллари ва ш.к. дан фойдаланилади.* «ЎЗМЭ».

СТОМАТОЛОГИЯ [юн. stoma, stomatos – оғиз, + logos – фан, таълимот] Тиббиётнинг оғиз бўшлиғи, тиш, жағ ва юз касалликлари ва уларни даволаш ҳақидаги бўлими. *Ҳозирги замон стоматология фани терапевтик, хирургик, ортопедик, болалар стоматологияси каби бўлимларни ўз ичига олади.* «ЎЗМЭ».

СТОП-КРАН [ингл. stop – «тўхтатмоқ» фл. дан буйруқ шакли + кран] Вагонларга ўрнатилган ва поездни дарҳол тўхтатиш зарурати туғилганда босиладиган тормозлаш ричаги.

СТРАТЕГ [юн. strategos] **1** *ҳарб. тар.* Юнонистонда кенг ҳарбий ва сиёсий ваколатларга эга бўлган лашкарбоши.

2 Йирик ҳарбий операцияларга раҳбарлик қилувчи саркарда, стратегия билимдони.

3 *кўчма* Бирор фаолият соҳасига моҳирлик билан раҳбарлик қилувчи киши.

СТРАТЕГИК **1** Стратегияга оид, стратегия билан боғлиқ. *Стратегик режа.*

2 Ҳарбий аҳамиятга, урушнинг умумий мақсади нуқтаи назаридан аҳамиятга молик бўлган. *Стратегик хомашё. Стратегик қурилишлар.* ■ *Бу тепаликдан туриб, дарё кўприкларини кузатиб туриш, ўққа тутуш мумкин. Бу жиҳатдан 119-тепалик – жуда-жуда муҳим стратегик объект.* И. Раҳим, Чин муҳаббат.

3 Мустақил ҳаракат қиладиган йирик ҳарбий бўлинмаларга ёки бутун армияга оид. *Стратегик фронт. Стратегик авиация. Стратегик разведка.*

4 *кўчма* Бирор-бир иш-фаолиятни, жараёни тайёрлаш ва амалга ошириш учун муҳим бўлган умумий ёки асосий йўл-йўриқларни қамраб олган. *1994 йил 1 июлдан миллий валютамиз – сўмнинг муомалага қиртилиши билан мамлакатимиз энг катта иқтисодий стратегик қадам қўйди.* Газетадан.

СТРАТЕГИЯ [юн. *strategia* < *stratos* – қўшин + *ago* – бошлаб бораман] **1** ҳарб. Уруш олиб бориш санъати; уруш ва ҳарбий операциялар ўтказишнинг умумий режаси. *Яшн тезлигидаги уруш стратегияси.*

2 Уруш олиб бориш ҳақидаги фан. *Стратегия курси. Стратегиядан маърузалар. Ҳарбий стратегия назарияси.*

3 *кўчма* Ижтимоий-сиёсий курашга раҳбарлик қилиш санъати, шунингдек, умуман, бошқарувни тўғри ва истиқболли режалаштириш санъати. *Фан тараққиётида ҳар бир муҳим давр илмий изланишларнинг маълум стратегиясини ўртага ташлайди.* «Фан ва турмуш».

СТРАТОСТАТ [лот. *stratum* – тўшама, қатлам + *statos* – турғун, кўзгалмас] Стратосферага учуриш учун белгиланган азростат; ҳаво шари. *Ҳозир стратостатлардан илмий текшириш мақсадларида.. метеорологик ракеталар учуриш ва бошқаларда фойдаланилади.* «ЎЗМЭ».

СТРАТОСФЕРА [лот. *stratus* – тўшама, қатлам + *sphaera* – шар] Атмосферанинг тропосферадан 8–10 километрдан то 50 километр баландликкача бўлган ораликда жойлашган қатлами. *Стратосферадаги озон қатлами ультрабинафша нурларни Ер сиртига ўтказмайди, акс ҳолда, Ерда ҳаёт бўлмас эди.* «ЎЗМЭ».

СТРАХОВАНИЕ [р. *страховать* – «эхтиёт қилмоқ, хавфсизлигини таъминламоқ» фл. дан ясалган от] қ. **суғурга.**

СТРЕЛКА [р. *стрела* – «ўқ, найза; мил, тил» с. нинг кичр.] **1** Турли ўлчов ва назорат асбобларида: ўз ўқи атрофида айланиб, ўлчанаётган нарса миқдорини кўрсатувчи ингичка учли, камбар найза. *Соат стрелкаси. Манометр стрелкаси.* ■ *Очилнинг ҳислари ҳаракатдаги пўлатлар орасига тушиб қолган магнит стрелкасидай титраб, у ёқдан бу ёққа бориб келар эди.* П. Қодиров, Уч илдиз. [Ҳайдовчи] *Газни шундай қаттиқ босдики, кўз очиб-юмеунча спидометр стрелкаси «100» дан ўтиб, «120»га яқинлашиб қолди.* Ж. Абдуллахонов, Хонадон.

2 Шу шаклдаги чизиқ ёки белги. *Йўл кўрсатувчи стрелка.* ■ *Хаританинг ҳар хил жойларига рангдор қаламлар билан белгилар, стрелкалар, рақамлар қўйилган эди.* М. Муҳамедов, Одерга.

3 *т. ў.* Темир йўлларда бир изни иккинчи изга улаш, ҳаракатдаги составни бир йўлдан иккинчи йўлга ўтказиш учун хизмат қиладиган мослама. *Трамвай стрелкаси. Стрелкани бир издан иккинчи изга ўтказмоқ.*

СТРЕЛКАЛИ Стрелкаси бўлган. *Стрелкали гальванометр. Стрелкали чизиқ.*

СТРЕЛКАЧИ Темир йўл изларининг стрелкасини буриб, ўзгартириб турувчи ишчи. *Разбезд стрелкачиси.* ■ *Бир куни бригада сменадан чиқиб келаётганда, Иномжон улардан сурилиб, стрелкачи қиз Мўттихоннинг олдида қолади.* С. Аҳмад, Мўтти.

СТРЕСС [ингл. *stress* – босим; кучланиш, танглик] Одам ва ҳайвонларда кучли ташқи таъсиротлар натижасида содир бўладиган ўта ҳаяжонланиш, безовталиқ, асабийлик ҳолати. *Одамда бир хил кучдаги стресс ҳам хавфли, ҳам ижобий бўлиши мумкин.* «ЎЗМЭ». *Турмуш тарзимизда кулгининг аҳамияти шу қадар муҳимки, кўпгина муаммоларни кулги ёрдамида енгиб, стресс оқибатида пайдо бўладиган касалликларнинг олдини олишимиз мумкин.* Газетадан.

СТРОНЦИЙ [лот. *Strontium* < *Strontion* (Строншион) – Шотландиядаги кичик бир қишлоқ номи] Менделеев даврий системасининг II гуруҳига мансуб кимёвий элемент, кумушсимон оқ енгил металл. *Кальций бор жойда ҳамшиша стронций учрайди.* «Фан ва турмуш».

СТРУКТУРА [лот. *structura* – тузилиш; боғланиш] Муайян нарсаларнинг тузилиши, қурилиши; таркибий қисмларнинг ўзаро

боғлиқлиги. *Тупроқнинг структураси. Сўз структураси. Бошқариш аппаратининг структураси.* ■ *Структурани билиш — элементларни, уларнинг ўзаро алоқадорликларини аниқлаш, бу элементлар бир бутунлигининг ўзига хос табиатини тушуниб олишдир. «ЎЗМЭ».*

СТРУКТУРАВИЙ Структурага, тузилишга, таркибга оид. *Структуравий тилшунослик.* ■ *Оламда сифат жиҳатдан турли системаларда структуравий муносабатларнинг беҳисоб кўп даражалари, типлари мавжуддир. «Фалсафа». Кейинги вақтларда табиатунослик ва ижтимоий фанлар соҳаларида.. структуравий таҳлил усуллари ишлаб чиқилди. «ЎЗМЭ».*

СТРУКТУРАЛИ Муайян структурага, тузилишга эга бўлган. *Структурали тупроқ.*

СТУДЕНТ [лат. studens, studentis — кунт, ғайрат билан ишловчи, шуғулланувчи] айн. **талаба.** *Институт студенти.* ■ *Бир гуруҳ юқори курс студентлари турадиган бу уйда.. ҳар хонанинг калити маълум бир жойга яшириб кетиларди. П. Қодиров, Уч илди.*

СТУДЕНТКА Студент қиз.

СТУДЕНТЛИК қ. **талабалик.** *Элмуроднинг студентлигида.. Маяковский ҳақида доклад қилганида фамилиясини билиб олган эди йигит. Шухрат, Шинелли йиллар. Студентлик йиллари ихлос билан ўқидик. М. Қориев, Ойдин кечалар.*

СТУДИЯ [итал. studio — ҳафсала, кунт; ўқиш, ўрганиш] **1** Рассом ёки ҳайкалтарош ишхонаси.

2 Рассом ёки актёрлар тайёрлайдиган мактаб.

3 Таълим-тарбия машғулоти амалий-ижодий иш билан биргаликда олиб бориладиган, актёр, созанда, рассом ва ш. к. тайёрлайдиган мактаб. *Балет студияси. Опера студияси.* ■ *Москвадаги ўзбек театр студияси ўқувчилари жиддий постановкалар тайёрлаган эдилар. Ҳ. Носирова, Мен ўзбек қизиман.*

4 Саҳнавий (ёки тасвирий) санъат асосларини ўрганадиган, асосан ёшлардан ташкил топган театр (ёки рассомлар) ижодий жамоаси. *Бу орада ёнимга зарварақ тўн кийган икки артист келиб ўтирди. Студиянинг таомилига кўра, мен ҳам уларга парво қилмай, ўтиравердим. Ҳ. Аҳмар, Яккама-якка.*

5 Бадиий ва б. фильмлар яратувчи ижодий ва техник ходимлар жамоаси; шу жамоа ишлайдиган жой, киностудия. *Ҳужжатли фильмлар студияси.* ■ *Фильмлар Тошкент студиясининг ўз ижодий кучлари билан ўз навбонида олиниб, ўз фабрикасида тайёрланади. Газетадан.*

6 с. т. Радио эшиттириш ва телекўрсатувлар олиб бориладиган махсус бино; радиостудия ёки телестудия.

7 Умуман, сурат олиш, овоз ёзиш ва ш. к. мақсадлар учун жиҳозланган иш жойи. *Тошкентда яқинда грампластинкалар учун овоз ёзиб оладиган студия очилган эди. Л. Пўлатов, Янги студияда.*

СТУЛ [р. стул < нем. stuhl] Одатда суянчиги бўладиган, бир кишилик ўриндиқ; курси. *Дадам сувоғи кўчган деворларга, эски шкаф, оёғи маймоқ стулларга бир қараб қўйди. С. Сиёев, Ёруғлик. Ҳафиза Умиднинг кўзларига тикилди. Бир лаҳзадан кейин стулга ўтирди. У Умиднинг юрагида бир нима борлигини сезарди. Мирмуҳсин, Умид.*

СТУН айн. **сутун.** У [Марайим] *хаш-паш дегунча стунга тирмашиб чиқиб, картонни эски деворий газетанинг устига михлаб тушди. А. Мухтор, Опа-сингиллар. Султон Муҳаммаднинг давлати — стунлари чириган кўҳна бир иморатдир. М. Осим, Ўтрор.*

СТЮАРДЕССА [ингл. stewardess] Самолёт ёки кемаларда йўловчиларга хизмат кўрсатувчи шахс. *Стюардесса қиз. Стюардессалар махсус мактабларда тайёргарликдан ўтадилар.*

СУБСТАНЦИЯ [лот. substantio — моҳият] *флс.* Қадимги фалсафа тарихида бутун борлиқ ва ҳодисаларнинг моҳияти, дастлабки асоси. *Арастунинг ўзи эса субстанция — моҳият, барча категорияларнинг реал асоси.. деб таъкидлайди. «Фалсафа».*

СУБСТРАТ [лот. substratum — тўшама, асос] **1** *флс.* Турли-туман ҳодиса ва жараёнларнинг умумий моддий асоси, ҳодисалар ўртасидаги умумийлик ёки ўхшашликнинг негизи.

2 *тлш.* Маҳаллий аҳолининг келгинди (босқинчи)лар тили томонидан сиқиб чиқарилган тили; шу тилнинг келгиндилар тилидаги излари, қолдиқлари. *Формал ҳажмнинг бу даражадаги ихчамлиги мураккаб семантик субстратнинг ифодаланишига, бирор даражада бўлсин, монелик қилмайди. «ЎТА».*

СУБТРОПИК [лот. sub — остида, яқинида, ёнида + тропик] Субтропикларга оид, хос. *Субтропик иқлим. Субтропик ўсимликлар.* ■ *Цитрус ўсимликларидан бири — лимон субтропик ва тропик мамлакатларда ўсади. Газетадан. Совуқ ҳаво бостириб кириши натижасида гоҳо субтропик зонада ҳам қор ёғиши мумкин. «Фан ва турмуш».*

СУБТРОПИКЛАР Ер шарининг Шимолий ва Жанубий яримшарларидаги тропик зоналар билан мўтадил зоналар ўртасида жойлашган икки географик зона.

СУБУТ [а. ثوبت — қатъийлик, барқарорлик, мустаҳкамлик] Сўзнинг, ваъданинг ёки тутган ишининг ишончга сазоворлиги, тайинлилиги; эътибор, бурд. *Субути йўқ одам.* ■ *Субутинг йўқ сенинг. Булар ишни расво қилганда, яна бошқа ёққа ўтиб оласан!* А. Мухтор, Тугилиш.

СУБУТЛИ Субутини, эътиборини йўқотмаган, ишонса бўладиган; бурди бор, тайинли. *Пахта даласи — мардлар майдони, гапининг устидан чиқадиған, лафзи ҳалол, субутли одамлар.. майдони.* С. Абдуқаҳҳор, Кувондиқ.

СУБУТЛИЛИК Ўз сўзида, ваъдасида қатъийлик, барқарорлик. *У [Раҳима] оз вақт ичида.. покизалиги, субутлилиги билан халқни ўзига жалб этди.* Н. Сафаров, Раиса.

СУБУТСИЗ Субутини йўқотган, ишониб бўлмайдиган; тайини, бурди йўқ, бетайин, бурдсиз. *Ваъдага вафо — марднинг иши, Ваъдасиз — субутсиз киши.* Мақол. ■ *Олимжон — содда ва оққўнғил йигит, сўзлари вазмин ҳам маъноли. У Анварга ўхшаган субутсиз эмас.* Т. Расулов, Марҳамат.

СУБУТСИЗЛИК Ўз сўзида, ваъдасида турмаслик, беқарорлик, субути йўқлик. *Темур афандининг субутсизлигидан ғижиниб айтди.. «Латифалар».*

СУБЪЕКТ [лот. subjectum — остида, асосида турувчи] Мантиқда: муҳокама қилинаётган, ҳукм чиқарилаётган предмет; мантиқий эга.

2 Фаол иш-ҳаракат қилувчи, билувчи, онг ва иродага эга бўлган индивид ёки ижтимоий гуруҳ. *Индивид — ижтимоий мавжудот, шу маънода субъект ижтимоий мазмун касб этади, яъни жамиятнинг ўзи ҳам субъект бўлиб келиши мумкин. «ЎЗМЭ».*

3 тлш. айн. эга **2.** Гапининг субъекти.

СУБЪЕКТИВ 1 Бир шахснинг, субъектнинг ўзигагина хос, ўзигагина тегишли; шахсий. *Субъектив омиллар.*

2 Бир кишининг шахсий фикрига, қарашларига асосланган, бир тарафлама, бир томонлама. *Субъектив кечинмалар. Субъектив баҳо. Субъектив қарашлар.*

Субъектив идеализм флс. Инсон онгидан ташқарида ва инсон онгига боғлиқ бўлмаган ҳолда ҳеч қандай реаллик, воқелик йўқ, деб талқин қилувчи фалсафий таълимот; идеалистик фалсафанинг икки асосий оқимидан бири. *Субъектив идеализм.. янги замоннинг йирик мутафаккирлари — Лейбниц, Кант, Фихте, Шеллинг фалсафий қарашларида аксини топди. «Фалсафа».*

СУБЪЕКТИВИЗМ 1 айн. субъектив идеализм қ. субъектив.

2 флс. Нарса ва ҳодисаларнинг мавжудлиги ва ўзгариб боришини қонуниятлар асосида эмас, балки субъект фаолиятига боғлаб тушунтирувчи идеалистик таълимот.

3 Субъектив қараш, масалага бир томонлама, ўз шахсий фикри, мулоҳазалари нуқтаи назаридан ёндашиш. *Ҳаёт ҳодисалари талқинида авторнинг ҳароратли «субъективизми» лирик, ҳиссий стихиядан озик олади. «ЎТА».*

СУБЪЕКТИВИСТ Субъективизм тарафдори (қ. субъективизм **1, 2**).

СУБЪЕКТИВЛИК айн. субъективизм. *Баҳонинг субъективлиги. Фикрнинг субъективлиги.* ■ *Воқелик ёзувчининг қалб призмасидан ўтади, тасвир объектига муносабат субъективликнинг нозик моментларида кўринади. «ЎТА».*

СУБҲ [а. صباح — эрталаб, тонг, тонготар] Эрта тонг пайти; сабоҳ, саҳар. *Тинмагур шаҳримизнинг Субҳида шунча овоз.* Ғ. Фулом. *Субҳ чоғида магар чиққанда ёрим тўлғаниб, Гул ёқасин чок этар, булбулда афғон қўзгалур. Ҳабибий.*

Субҳи козиб (л. м. ёлғон тонг) Тонготардан анча олдин, тонг ёришгандек туюладиган пайт. *Ҳа, субҳи козибда эмас, субҳи содиқда, хўрозлар қичқирар-қичқирмас, булбулу майналар хонишини бошлар-бошламас, тўрт аскар оиналарининг қўрғониға этиб келишганди. «Ёшлик».* **Субҳи содиқ** (л. м. чин тонг) Ҳақиқий тонготар пайти. *Шарқ уфқидан аста-аста қоронғилик кўтарилиб, ўрнига субҳи содиқ жойлашмоқда эди. А. Қо-*

дирий, Кичик асарлар. *Излаб бораётган Барчин ёри ҳам, бахмал ўтовда ётиб, субҳи содиқ туққан вақтда бир туш кўрди.* «Ал-помиш».

СУБҲИДАМ [a. + ф. صباح دم — эрта тонг; тонг сахарлаб] Эрта тонг пайти; тонг, субҳ. *Субҳидамда турмоқ. Субҳидам чоғи.* ■ *Субҳидам сабоси кўзғалиб, Зулфингни тортқилар оҳиста.* А. Шер, Қадимги куй. [Ёдгорбек] *Ювиниб айвонга чиққанида, кеч кузнинг саҳарги совуқ ҳавосидан бадани жунжикди. Лекин бари бир субҳидам тоза ва ёқимли эди.* «Ёшлик».

СУБҲОН [a. سبحان — мақтов, мадҳ] дин. Мақтов, мадҳия; мадҳлар.

Субҳон олло Оллонинг мадҳи; Оллога мадҳлар бўлсинки.. [Уста Олим:] *Субҳон олло! Қандай юрагингиз бор экан, Отабек! А. Қодирий, Ўтган кунлар.*

СУБҲОНИ 1 Эртапишар серҳосил маҳаллий ўрик нави.

2 Шу ўриқдан солинган туршак.

СУВ 1 Водород билан кислороднинг кимёвий бирикмасидан иборат рангсиз, ҳидсиз шаффоф суюқлик; табиатда муз ва буғ ҳолида ҳам учрайди, барча тирик организмларнинг ва кўпгина моддаларнинг таркибий қисмини ташкил қилади. *Қор суви. Денгиз суви. Оқар сув. Турғун сув.* ■ *Зиллол сувлар, эрам каби боғу бўстонлар, Менинг совғам кошоналар, олтин тупроқлар. Ғайратий. Атмосферада сув буғ, туман, бутлут, ёмғир, қор ҳолатида бўлади.* «ЎзМЭ».

2 Шундай суюқлик ичимлик сифатида. *Минерал сувлар.* ■ *Садақанинг афзали чанқоқ одамларга сув улашмоқдир.* «Фан ва турмуш». *Организмга йод озик-овқат ва сув билан киради.* «Фан ва турмуш».

Жон (ёки ҳаёт) **суви 1)** ҳаёт бағишловчи, ҳаёт-мамот масаласини ҳал қилувчи сув. *Улар ўзларига, ўз ерларига, ўз уйларига ҳаёт суви келтириш учун.. курашга борадилар.* М. Исмоилий, Фарғона т. о; 2) кўчма ҳаёт бағишловчи, жон, файз қиритувчи нарса. *Ташқарида бир қўша созандалар дутор, танбур, ғижжак, рубоб, най билан дунёга жон суви сепаб, шаҳарнинг машҳур ҳофизлари ашула айтадилар.* А. Қодирий, Ўтган кунлар. *Машқ бошланиши билан бутун вужудимга ҳаёт суви югурди.* А. Қодирий, Кичик асарлар. **Сув ичмоқ 1)** сув истеъмол қилмоқ. *От бошига иш тушса, сувлиги билан сув ичар, Эр бошига*

иш тушса, этиги билан сув кечар. Мақол; 2) суғорилмоқ. *Шолининг орқасидан курмак сув ичибди.* Мақол. ■ *Кўз тикиб турган ерларимиз эски ариқдан сув ичолмайди, янги ариқдан тақир ичолмайди, яна азалидай қақраб ётаверади.* М. Исмоилий, Фарғона т. о. **Сув йўли** Кемалар қатнайдиган йўл. **Сув қўймоқ** Суғориш учун сувнинг йўлини очмоқ, суғормоқ. *Экинга сув қўймоқ.*

3 Сой, кўл, дарё ва ш. к. нинг сувли сатҳи ҳақида. *Сув бўйи. Сувнинг нариги бети. Сувнинг кўтарилиши.*

4 Гармева, сабзавот ва ш.к. таркибидаги шира, шарбат, суюқлик. *Анор суви. Сабзининг суви.* ■ *Боғингда очилган қизил гулларинг, Узумнинг сувидай ширин тилларинг.* «Кўшиқлар».

5 Тирик организм ва аъзолардан ажралиб чиқадиган суюқлик, шира. *Ошқозон суви.* ■ [Ёрмат] *Тумов орқасида бурнидан тўхтовсиз оққан сувни ҳам сезмайди.* Ойбек, Танланган асарлар.

Оғзининг суви келди Ҳаваси келди; егиси, ичгиси келди. *Ундан нарида каттакон дошқозонда ош дамлаб қўйилибди. Зарчува солинган, сап-сарик. Оғзининг суви келиб кетди.* «Ёшлик».

6 Умуман, турли нарсалар таркибидаги намлик. *Суви қочган нон, олмачой билан нонушта қилишаётганда, Гадоёбой пайдо бўлди.* Ҳ. Ғулум, Феруза.

7 кўчма с. т. Маза-матраси, шираси ёки жири йўқ (мева ёки овқат ҳақида). *Қовун қипқизил сув қиқди. Бу шўрва эмас, шилдир сув.*

8 Каштачиликда: тўғри ёки тўлқинсимон чизиқ шаклидаги гул элементи. *Суви оқ, гули турли қийиқча.*

9 эск. Ўн танобга тенг ер ўлчов бирлиги. *Ҳар ўн таноб ер бир сув ҳисобланиб, мана шу майдон ҳисобидан ариқ тозалашга бир ҳашарчи юборилар эди.* И. Жабборов, Кўҳна харобалар сирӣ.

10 Турли бирикмали номлар таркибида келади, мас., *сув каламуши, сув эчкилари, сув ости кемаси.*

Анча (ёки кўп, қанча-қанча) сувлар оқди Кўп замонлар ўтиб кетди, анча вақт бўлди. *Ҳа, қизим, ундан буён қанча-қанча қорлар ёғди, қанча-қанча сувлар оқди, у вақтларда ёш эканмиз, фаросат оз экан, кўп-кўп камчиликлар ўтди.* Ш. Рашидов, Бўрондан кучли. **Сиркаси сув кўтармайдиган одам қ. сирка**

1. Сиртига сув юқтирмаслик қ. сирт. Сув бўлмоқ 1) терлаб жиқ ҳўл бўлмоқ, терга ботмоқ. *Бемор иситмалаб, сув бўлиб ётибди;* 2) эриб сувдек бўлмоқ. *Темирчининг қўлида темир эриб сув бўлар.* **Сув йўғида таяммум қ. таяммум. Сув текин қ. текин. Сув қилиб (ёки сувдек) ичмоқ (ёки ичиб юбормоқ) айн. сув қилмоқ** 2. **Сув қилмоқ** 1) зимдан ўзлаштирмоқ, ўзлаштириб, гумдон, йўқ қилмоқ. *Наврўзда дув-дув гап тарқалганди: Саидхон колхознинг фалонча пулини гумдон қилиб, қамалиб ётганмиш, писмадончи молни сув қилиб, қўлга тушиб қолганмиш.* Ш. Тошматов, Тонгдаги қўланка; 2) миридан сиригача пухта эгалламоқ, беш қўлдай билиб, ёдлаб олмоқ. *Ўн етти кун деганда [Мўминжоннинг] хати келди.. яна хати келгунча, билмадим, неча марта ўқиб чиққанмикинман уни. Худди сув қилиб юбордим.* К. Максумов, Муҳаббат қўшиғи. **Сув қуйгандек (тинч, жимжит)** Чурқ этган овоз йўқ, жимжит. *Навойнинг уйи сув қуйгандек жимжит, ҳамма оёқ учиди юрар, бир-бирлари билан шивирлашиб гапиришар эди.* М. Осим, Сеҳрли сўз. **Сувга оқизмоқ (ёки ташламоқ)** Бехудага кеткизмоқ, совурмоқ, шамолга учирмоқ. У [деҳқон] молини сотмади – сувга оқизди. *Йўқ, сувга оқизгандан баттар бўлди.* Ойбек, Танланган асарлар. **Сувга тушган нондек бўшаши-моқ** Жуда ҳам бўшашиб кетмоқ, ҳовридан тушмоқ. [Отабек] *Сувга тушган нондек бўкиб, бўшашиб, юз хил совуқ, ярамас хаёллар қўлида эзилиб, ўзининг дунёда борми-йўқлигига ҳам тушунмай кета берадир.* А. Қодирий, Ўтган кунлар. **Сувга тушса, қуруқ чиқадиған** Жуда қув, айёр, ҳар қандай мушкул вазиятдан сип-силлиқ кутулиб чиқадиған. **Сувга уриб кетмоқ** Зим-зиё бўлиб кетмоқ, бедарак йўқ бўлмоқ, йўққа чиқмоқ. *Дунёдан умиди бўлмаган одамда дид ҳам, орзу-ҳавас ҳам сувга уриб кетар экан.* А. Қаҳҳор, Қўшчинор чироқлари. **Сувда маза бор, бунда маза йўқ кест.** Жуда бемаза нарса ҳақида. **Сувдай билмоқ (ёки ичмоқ, эзиб ичмоқ)** Жуда яхши билмоқ, чуқур, пухта билиб олмоқ, эгалламоқ. [Эртўғон ота] *Сув илмин сувдай ичган Дарёларнинг султони. Қирқ колхозга сув сурган Миробларнинг полвони.* Қ. Муҳаммадий. **Сувдай сероб бўлиң** Ҳеч нарсадан камчилигингиз бўлмасин. **Тагига сув кетди** Таги, замири бўшашиди. *Бойликнинг тагига сув кетди.* Ойбек, Танланган асарлар. **Тушингизни**

сувга айтиңг қ. туш. Ўзини ўтга (ҳам), сувга (ҳам) урмоқ қ. ўт 1. **Ўт билан сувдек** Бир-бири билан сира ҳам келиша олмайдиған даражада зид, қарама-қарши, ит-мушук. *Илгарилари ўт билан сувдек бўлган кундошлар энди сирдош бўлиб, чекка-чеккада пичирлашадиған бўлдилар.* А. Мухтор, Опа-сингиллар. **Қўлини совуқ сувга урмайди қ. қўл. Ғалвирни сувдан кўтармоқ қ. ғалвир.**

СУВАМОҚ 1 Лой, алебастр каби материаллар билан қошлаб силлиқламоқ; сувоқ қилмоқ. *Уйларни сувамоқ. Том сувамоқ.* ■ У [Толибжон] *уйдалик пайтида ҳовлининг кемтикларини тузатади, лой қориб, деворларнинг нураган жойларини сувайди.* С. Аҳмад, Жимжитлик. *Бўтабой баҳор ёмғирида нураган ўчоқни яхшилаб сувади.* С. Аҳмад, Ҳукм.

2 **кўчма салб.** Ошкор қилмай бекитиб, тўғрилаб юбормоқ, текисламоқ, хаспўшламоқ. *Камчиликларни суваб ўтмоқ.*

СУВАРАК зоол. Қора ёки тўқ кўнғир рангли, узун қилсимон мўйловли, ер юзида кент тарқалган кемирувчи ҳашарот; таракан. *Ўзбекистонда суваракларнинг 30 га яқин тури, жумладан, хонадонларда 2 тури (сарик суварак ва қора суварак) тарқалган.* «ЎЗМЭ». Бунақа кимсалар пана-пастқам ерларда кўзга ташланмай, ивирсиб юришаверади-да, бир пайт қарабсизки, суваракдек лоп этиб ёруғликка чиқиб олишади. Н. Аминов, Ёлғончи фаришталар.

СУВБУРГУТ Қарчиғайлар оиласига мансуб, дарё, денгиз ва қўл қирғоқларида яшовчи йиртқич қуш. *Ўзбекистонда оқ думли сувбургут ва узун думли сувбургут учрайди.* «ЎЗМЭ».

СУВДОН 1 Қушларга сув бериладиған идиш. *Бедананинг сувдони. Сувдонларга сув қуймоқ.* ■ [Жўра] *“Хайрият, тирик экансан”, деди-да, сувдон билан дон соладиган синиқ товоқни олиб, ҳужрадан дон, ариқдан сув тўлдириб келиб, товуғининг олдига қўйди.* У. Назаров, Замон.

2 Ёнда олиб юриладиған сув идиш. *Бектемир сувдонни кўтариб, бир неча қултум ютди-да, яна пўки билан оғзини маҳкамлаб қўйди.* Ойбек, Қуёш қораймас.

3 Умуман, сув солиб қўйиладиған идиш. *– Сувдонни олиб, чўнтакларга озгинадан қаттиқ нон солволамиз, – деди у буйруқ оҳангида.* А. Обиджон, Эй, ёруғ дунё.

СУВЕНИР [фр. *souvenir* – хотира; ёд-горлик] Эсдалик учун бериладиган, бирон мамлакат, шаҳарга қилинган сафардан эсдалик бўлиб қолган ёки қоладиган бадиий ҳунармандлик буюми, совға. *Сувенирлар магазини. Сувенир олмоқ.* ■ *Галина Васильевна сувенир фигураларнинг нодир коллекциясини яратди.* Газетадан.

СУВЕРЕН I [фр. *souverain* – олий] Халқаро ҳуқуқда: мустақил олий ҳокимият эгаси.

СУВЕРЕН II Суверенитетга, мустақилликка эга бўлган; эркин, ҳур; мустақил. *Суверен давлат.* ■ *Ўзбекистон Республикаси Конституциясида давлат суверенитети масаласига алоҳида боб ажратилган бўлиб, унинг I-моддасида «Ўзбекистон – суверен демократик республика» дейилган.* «Мустақиллик» лугати.

2 Олий ҳокимиятни амалга оширувчи.

СУВЕРЕНИТЕТ [фр. *souverainete* – олий ҳокимият] Халқаро ҳуқуқда: давлатнинг ички ишларни олиб боришда ва ташқи муносабатларда бошқа давлатлардан тўла мустақиллиги. *Давлат суверенитети. Миллат суверенитети.* ■ *Ўзбекистон Республикасининг Конституциясида давлат суверенитети алоҳида бобда ўз ифодасини топган.* «ЎЗМЭ».

СУВЕРЕНЛИК айн. **мустақиллик.**

СУВИЛОН зоол. Ерда, дарахтда, сувда, сув бўйида яшовчи, узунлиги ва ранги ҳар хил, ер юзида кенг тарқалган илон тури. *Сувилоннинг 10 тури Халқаро Қизил китобга киритилган.* «ЎЗМЭ».

СУВЛАМОҚ I Сув билан ҳўлламоқ, намламоқ. *Латтани сувлаб, этик артмоқ.*

2 шв. Сув ичмоқ. *Булар шу Чилбир чўлида, Ойна кўлида қўниб, сувлаб, моллари ўтлаб ётаверсин.* «Алпомиш». *Бу булоқдан ўнлаб қишлоқлар сувлайди.* «Ёшлик».

СУВЛАНМОҚ I Сувламоқ I фл. мажҳ. н. *Сувланган латта.*

2 Сув очмоқ, сув олмоқ. *Гулноз [олмани].. ғарчиллатиб тишлади – нордонгина экан, оғзи сувланиб, кўзи чарақлади.* Ҳ. Фулом, Тошкентликлар..

СУВЛАТМОҚ I Сувламоқ фл. орт. н.

2 шв. Суғормоқ, сув бермоқ (ҳайвон ва паррандаларга). *Ўшанда Эрназар полвон отини сойдан сувлатиб қайтаётган эди.* Н. Норқобилов, Бекатдаги оқ уйча. *Эшакларни гал-*

ма-гал миниб, пастдаги булоқдан сувлатиб келдик. Э. Аъзам, Кечикаётган одам.

СУВЛИ I Ичида суви бор. *Сувли идиш.*

■ *Ортиқ ўриндиқ тагидан сувли мешини тортиб олиб, кўринарли ерга қўяркан, бир чеккада гарангсиб турган Зулхуморга пичинг қилди.* М. Мансуров, Ёмби. *Осмондаги ой бўлсам, Тиниқ сувли сой бўлсам, Севган ёрнинг кўксинда Кеча-кундуз жой бўлсам.* «Кўшиқлар».

2 Таркибида суви бўлган. *Сувли эритма.*

3 Суви, шираси кўп, серсув, сершира. *Сувли шафтоли. Сувли мевалар.*

4 Сув билан таъмин этилган, сув бор бўлган. *Сувли ерлар.* ■ *Ўтли, сувли яйловининг йўли олис, Ўлан бўлса, айтишайлик бизлар холис.* «Кўшиқлар».

СУВЛИК Сув ҳавзалари, денгиз, океан кабиларнинг жами. *Ер юзасининг учдан икки қисмидан кўпроғини сувлик – денгиз ва океанлар қоплаган.* «Фан ва турмуш».

СУВЛИҚ с. т. Сувлуқ. *Эр бошига иш тушса, этик билан сув кечар, От бошига иш тушса, сувлиқ билан сув кечар.* Мақол. ■ *Ферузнинг оппоқ самани тилла сувлигини чайнаб, пишқириб бормоқда.* С. Сиёев, Аваз. *Сувлиқ тишлаб араб оти, Белида кескир пўлати, Яқин қолди Чамбил юрти, Бораётир валламатини.* «Гулшанбоғ».

СУВЛОҚ Дарё ва умуман сув ҳавзаларининг ҳайвонлар, моллар сув ичадиган жойи. *Молларни сувлоқда суғормоқ.* ■ *Улар [турналар] гоҳо сувлоққа бориб чўмилгандан кейин ҳам илқ қўмлоқда туриб, патларини шу хилда қуритишар эди.* Ш. Холмирзаев, Бодом қишда гуллади. *Ой синиғи тўла сувлоққа Шаршарадай қуйилган ёллар.* Бу ёлларни силар меҳрибон Шаббодалар – маънос аёллар. Ш. Раҳмон, Уйғоқ тоғлар.

СУВЛУҚ Юганнинг от оғзига солинадиган металл қисми. *Сувлуғини чайнатиб, Йўлда отни ўйнатиб, Чўлда кетиб боради Бир қаландар йўл тортиб.* «Нурали». *От сувлуғини чайнаб, бекни опқочиб келяпти.* «Гўрўелининг туғилиши».

Оғзига сувлуқ солиб олмоқ Жиловлаб олмоқ, бўйсундирмоқ. *Оғзига сувлуқ солиб олганимдан сўнг, измигга юрмай кўрсин-чи!* С. Анорбоев, Оқсой.

СУВОРА [ф. *سواره* – отлик; от-уловга минган ҳолда] мус. **I** Шашмақомнинг Буз-

рук мақоми асосида яратилган куй ва ашулалар. *Суворанинг яна уч хили — машхур чолғу куйларидир.* «ЎЗМЭ».

2 Хоразмдаги машхур мақом ашула йўллари ва мумтоз ашулалар туркуми. *Суворалар шеърий матнида кўпроқ тасаввуф мавзуидаги мухаммаслар қўлланган.* «ЎЗМЭ».

СУВОРИ [ф. *سواری* — отда, от-уловда юриш; салт (миниладиган) от] От минган киши; отлиқ аскар. *Икки суворининг қора шарпаси Ҳамон келаберди Телбасой сари.* А. Мухтор, Асарлар. *Алим бува билан Ҳасан сўфи дарров настга қарашди. У ерда, оломон орасида, бир неча сувори отлардан тушаётган эди.* М. Исмоилий, Фарғона т. о.

СУВОРИЙ айн. *сувори.* *Қора Бахмал итоат қилишга мажбур эди. Эгардаги суворий жиловни қаёққа тортса, ўша томонга йўл соларди.* С. Аҳмад, Жимжитлик. *Тилмоқ ўнг қўлини кўтариб, енгил бир ишора қилди, хезланиб турган суворийлар отларидан кетма-кет сакраб тушишди-ю, ўзларини қабил аъзолари устига отишди.* Газетадан.

СУВОСТИ 1 Сув остида қилинадиган, бажариладиган, сув остида мавжуд бўлган. *Сувости спорти. Сувости телевидениеси. Сувости тизмалари.*

2 Сув остида ҳаракатланадиган (кема ҳақида). *Сувости кемасини қуриш 17-асрдан бошланди.* «ЎЗМЭ».

СУВОТ шв. Мол, от сугориладиган ёки ювиладиган жой. *От сувот.* ■ *Кўзиларни тушда сувотга олиб бориб ювамиз.* Н. Фозилов, Иншо.

СУВОҚ Суваш ва унинг натижасида ҳосил бўлган қатлам. *Лой сувоқ. Сомон сувоқ. Сувоқ қилмоқ.* ■ *Четроқда, қари тол остида, сувоқлари кўчиб ётган баланд лой суна.* «Ёшлик». *Тўкилади девордан сувоқ, Ғижиллайди саҳарда эшик.* Х. Даврон, Болаликнинг овози.

СУВОҚЛИ Сувоғи бор, сувалган. *Сомон сувоқли айвон деворидаги катта миҳга илинган эски радиорепродуктор ҳам гўё мудроқ бир алфозда хирилларди.* С. Нуров, Майсаларни аёз урмайди.

СУВОҚСИЗ Сувоғи йўқ, сувалмаган. *Сувоқсиз уй.* ■ *Мана шофёр кўрсатган уй: хом ғиштдан қурилиб, деворлари сувоқсиз, томи чала ёпилган.* Ҳ. Назир, Чўл ҳавоси.

СУВОҚЧИ Сувоқ қилувчи уста. *Сувоқчи йигит. Ямоқчининг ишини сувоқчи билмас.*

Мақол. ■ *Эргаш.. бир камбағал сувоқчининг ўғли бўлиб, катта бир бойнинг молларини боқаркан.* П. Турсун, Ўқитувчи.

СУВОҚЧИЛИК Сувоқчи касби. *Сувоқчилик қилмоқ. Сувоқчиликни ўрганмоқ.* ■ *Исломжонга сувоқчилик ота касб.* М. Исмоилий, Одамийлик қиссаси.

СУВПИЁЗ Серсув, ботқоқли жойларда ўсадиган ўсимлик.

СУВРАНГ Тоғ-адирларда ўсадиган кўп йиллик қиёқсимон ўт.

СУВСАМОҚ Сувга ташна бўлмоқ, чанқамоқ, чўлламоқ. *Қизни сўраганга бер, Қимизни — сувсаганга.* Мақол. ■ *-Танидинг-а, жонивор, — деди Суярқул хаёдан сигирга мурожаат қилиб. — Қорнинг оқдими, сувсаб кетгандирсан? А. Кўчимов, Ҳалқа. Кал кетаверди, кетаверди, ҳориб, сувсаб, очқаб, бошини бир жойга қўйиб ётди.* «Эртақлар».

СУВСАР Қимматбаҳо, қалин ва юмшоқ мўйнали йиртқич сутэмизувчилар оиласининг бир тури ва унинг мўйнаси. *Сувсар териси.* ■ *Сувсарлар қимматли мўйнаси учун овланади, бир қанча турлари мўйначилик фермаларида боқилади.* «ЎЗМЭ».

Тош сувсар Сувсарнинг тоғли жойларда яшайдиган тури.

2 Шу ҳайвоннинг майин бароқ териси. *Сувсар телпак.* ■ *[Савдогарлар] Ёш кийик муғузлари, боғлам-боғлам сувсар терилар.. ва бошқа нарсаларни олиб кира бошладилар.* М. Осим, Карвон йўлларида.

СУВСИЗ 1 Ичида суви йўқ. *Сувсиз идиш.*

2 Таркибида суви йўқ. *Сувсиз кислота.*

3 Сув билан таъмин этилмаган, сув чиқарилмаган. *Сувсиз ерда тол бўлмас.* Мақол. ■ *Булар сувсиз чўлдан ўтиб, Бораётир йўллар тортиб.* «Маликаи айёр». *Дайди шамол чангли, дағал япроқларни, сувсиз ариқ ёқаларидаги кир, сарғайган ажриқларни титкилаб, мунгли шовуллади.* С. Нуров, Майсаларни аёз урмайди.

4 Суви, шираси кам. *Сувсиз беҳи.*

СУВСИЗЛИК 1 Сувга ташналик, чанқашлик. *Ортиқ, сувсизлик юрак-бағрини ўртаб, иссиққа чидамай, юлғун тагига сурилади, бошини сояга олиб, қўлларини қумга тиқиб, салқин излайди.* М. Мансуров, Ёмби. *Қипқизил қумда пиеда юриб, очликда, сувсизликда овора бўлиб, икковинг ҳам ўласан.* «Маликаи айёр».

2 Сув танқислиги, етишмаслиги. *Миллий матбуот марказида Орол денгизи ҳамда сувсизлик каби асосий масалаларни муҳокама қилишди.* Газетадан.

СУВСИРАМОҚ Сувга жуда ҳам ташна бўлмоқ, сувга ташналикдан қуришмоқ, қақрамоқ. *Сувсираган ғўзалар.*

СУВСОҚ Сувга ташна, сувсираган, чанқоқ. *Сувсоқ ерлар. Сувсоқ ғўзалар. Сувсоқнинг ўйи — сувда.* Мақол. ■ [Тўғонбек] *Осиё чўлларининг жаҳаннам ёнғинига, қум тўлқинларида чидаш бериб, оч, сувсоқ кезишни машаққат ҳисобламас эди.* Ойбек, Навоий.

СУВСОҚЛИК Сувга ташна бўлишлик.

СУВХЎР Сувни кўп ичадиган. *Сувхўр мол.*

СУВЧЕЧАК тиб. Температура кўтарилиши, тери ва шиллиқ қаватларга пуфакчалар тошиши билан кечадиган ўткир юқумли касаллик. *Сувчечак тошмаси баданнинг ҳамма қисмига бир вақтда эмас, балки 1—2 кун оралатиб тошади.* «ЎЗМЭ».

СУВЧИ 1 қ. х. Экинларни, хусусан, ғўзаларни суғорувчи деҳқон, суғориш бўйича мутахассис. *Моҳир сувчи.* ■ *Сувчи, теримчи ёки механизатор чанқаб бораётганда, олдида калладай қовун ёки тарвуз дўппайиб кўринса, чанқоқбости қилади.* С. Нуров, Майсаларни аёз урмайди. *Хув юқорида, дарёнинг ёқасида бир қора кўринди.* «Бул ўтинчими, сувчими, бундан бир савол сўрайин», деб Авазхон бурилиб борди. «Гулшанбоғ».

2 Сув келтирувчи, сув билан таъмин этиб турувчи ходим (мас., тракторчилар бригадасида).

3 тар. Сув ташиб бериш, сув билан таъминлаш ишларини бажарувчи киши. *Бухорода эса сувчини мешкобчи деб аташган.* «ЎЗМЭ».

4 Сув сотувчи.

СУВЧИЛИК Экинларни суғориш билан шугулланиш; сувчи касби. *Сувчилик қилмоқ.* ■ *У [Тождидин] сувчиликнинг сувини ичиб юрган одам.* А. Абдукаримов, Чўл бургути.

СУВЎТ Содда тузилган ва асосан сувли муҳитда ўсадиган турли ўтларнинг умумий номи. *Қизил сувўтлар. Яшил сувўтлар.* ■ *Аёллар ва болалар ихтиёрида қолган экинзорлар чуқур, яхши ишланмаганидан ёввойилашиб, ҳамма ёқни шўра, ғумай, сувўт, тикан босиб кетган.* С. Нуров, Нарвон. *Сувўтлар энг қадимги организмлар бўлиб, улардан бошқа ўсимликлар келиб чиққан.* «ЎЗМЭ».

СУВҚОВОҚ 1 Ичи ўйиб ташланиб, қобигидан идиш сифатида фойдаланиладиган қовоқ. *Нимтатир шабада, шабнам, бедана, Чайлага ўрмалаб чиққан сувқовоқ.* Ғ. Фулом.

2 Шундай қовоқ қобигидан ясалган, сув, дон сақланадиган идиш. *Унда [чайлада] яқинда.. Суюм оға ўзи орқалаб келган ола хуржун, бир чети синиқ сопол коса, сувқовоқ турарди.* Н. Фозилов, Оқим.

СУВҚОҒОЗ 1 Кунга, ёруққа солганда, ичида сурати кўринадиган шаффоф қоғоз. *Каримов юпқа сувқоғозга машинкада босилган узундан-узоқ хатни синчиклаб ўқий бошлади.* Ҳ. Шамс, Душман. *[Яхшибоев] Сандиқдан кўнгли тўқ эди. Шунчаки сувқоғознинг бармоқлар орасида шитирлашига қулоқ тутди.* М. М. Дўст, Лолазор.

2 с.т. Полиэтилен ёки целлофандан тайёрланган ўров материали, халта. *Комил сувқоғоз ичидан бир бурда нон олиб, дераза олдида борди.* «Ёшлик».

СУД 1 [қад. р. судъ — иш; ҳукм] **1** Муайян фуқаровий (айрим шахслар ёки муассаса ва ташкилотлар ўртасидаги, шахслар билан муассаса ва ташкилотлар ўртасидаги) низоларни ҳал қилувчи ҳамда жиноий ишларни кўриб чиқувчи — одил судловни амалга оширувчи давлат органи. *Халқ суди. Суд қарори. Суд ҳукми. Суд органлари. Судга бермоқ. Суд тизими.* ■ [Қосимжон:] *Ўртоқлар, олиб боринглар буларни, адолат судига топшинглар! Тегишли жазосини кўрсин.* Ҳамза, Тухматчилар жазоси.

2 Шундай орган жойлашган бино, хона, жой. *Суд эшигининг олдида ўтирганларнинг кўпчилиги ёшлар.* Газетадан.

3 Шундай орган ходимлари ёки судьялар ҳайъати. *Суд мажлиси.* ■ *Суднинг саволига жавобан Сидиқжон ўн бир гувоҳнинг номини айтганда, Шарофат рўмолининг учини тишлаб, донг қотиб қолди.* А. Қаҳҳор, Қўшчинор чироқлари.

4 Фуқаровий ёки жиноий ишнинг шундай органда кўрилиши. *Судда ютиб чиқмоқ.* ■ *Суд муҳокамаси вақтида суднинг чиқарган ҳар бир ажрими дарҳол эълон қилиниши керак.* «ЎЗМЭ». *Суд ўн бешинчи майда бўлиши керак эди. Шу кунни Сидиқжон судда нима дейишдан ҳам кўра Шарофатга рўпара бўлишни кўпроқ ўйлаб, хўп ясанди.* А. Қаҳҳор, Қўшчинор чироқлари.

СУД II [ф. *سود* – фойда, даромад; фоиз] 1 эск. Фойда, наф. *Энди суд қилмасдир ғаму ҳасратинг, Билгин, йўлдош бўлди доғу кул-фатинг.* «Эрали ва Шерали».

2 Судхўрлар томонидан қарзга берилган пул эвазига олинадиган фоиз.

СУДБОЗ [суд I + ф. *بان* – ўйновчи; бирор нарса ишқибози] с. т. Бўлар-бўлмас ишлар билан судга мурожаат қилаверадиган, суд-бозликни, судлашишни яхши кўрадиган; қозибоз. *Судбоз одам.*

СУДБОЗЛИК с. т. Бўлар-бўлмас ишлар билан судга мурожаат қилавериш, судла-шиш; қозибозлик. *Судбозлик қилиб юрмоқ.*

СУДЛАМОҚ Белгиланган тартибда фу-қаровий ёки жиноий ишни судда кўрмоқ; суд қилмоқ.

СУДЛАНГАНЛИК ҳуқ. Шахснинг содир этган жинояти учун ҳукм этилганлигидан келиб чиқадиган ҳуқуқий ҳолат: суд ҳукми билан жиноий жавобгарликка тортилганлик. *Судланганлик айблов ҳукми кучга кирган кун-дан бошланади.* «ЎзМЭ».

СУДЛАНМОҚ Суд қилинмоқ; судда жи-ноий жавобгарликка тортилмоқ.

СУДЛАНУВЧИ I **Судланмоқ** фл. сфдш. 2 ҳуқ. Судга берилган айбланувчи; судда иши кўрилатган шахс. [Суд жараёнида] *Айб-ланувчи, судланувчи ҳимояланиш ҳуқуқи би-лан таъминланади.* «ЎзМЭ».

СУДЛАШМОҚ Суд орқали даъволаш-моқ, даъволашиб, бир-бирини судга бер-моқ. *Ер тўғрисида бир чатоқ одам билан суд-лашиб юрган эди.* Ойбек, Танланган асарлар. [Қаршибой] *Бир парча гўшт бўлиб дунёга келганидан бери иссиқ бағрида иситиб ўс-тирган отасини судлашиш даражасигача етказди.* М. Исмоилий, Одамийлик қиссаси.

СУДЛОВ Маълум тартибда фуқаровий ёки жиноий ишни судда кўриш; шундай ишларнинг судда кўрилиши. *Одил судлов.* Судловнинг ошкоралиги.

СУДМАНД [ф. *سودمند* – фойдали, даро-мадли] эск. Фойда келтирадиган, фойдали, нафли.

СУДРАЛМОҚ I **Судрамоқ** фл. ўзл. ва мажх. н.

2 кўчма Орқала қолмоқ, чечикмоқ, чў-зилмоқ. *Ишининг судралиши.* Курилишининг суд-ралиши. ■ *Колхоз тинчишга тинчиди-ю, кўклам иши ниҳоятда судралди.* А. Қаҳҳор, Қўшчиноҳ чироқлари.

3 Имиллаб юрмоқ, секин бормоқ; имил-лаб юриб ёки сусткашлик қилиб, кейинда қолмоқ. *Охирги ўринда судралиб бормоқ.* ■ [Мели полвон] *Ҳамманинг астойдил кетмон ураётганини кўриб, мамнун бўлди.* *Энг чет-даги Мўмин қийшиқнинг судралаётгани унинг гашига тегди.* П. Турсун, Ўқитувчи. *Чанг ва шовқин орасида аста судралган ҳорғин граж-дан аҳоли: аёллар, болалар, чоллар ҳам кўп эди.* Ойбек, Кўёш қораймас.

Судралиб юрувчилар айн. **судралувчилар** қ. **судралувчи** 2. *Гавдаси ерда судралиб юр-ганлиги учун, калтакесак ва унга ўхшаш ҳайвонлар судралиб юрувчилар деб аталади.* «Зоология».

СУДРАЛУВЧИ I **Судралмоқ** фл. сфдш.

2 (асосан кўпл. шаклда) Асосан ер ба-ғирлаб ўрмалаб (судралиб) ёки қорни билан сурғалиб ҳаракатланадиган умуртқали ҳай-вонлар синфи (илон, калтакесак, тимсоҳ, тошбақа).

СУДРАМОҚ I Ердан узмай, кўтармай сирпантириб тортмоқ, сургамоқ. *Ходаларни судрамоқ.* *Этакларини ерда судраб юрмоқ.* ■ *Қиш суви кўйилган катта пайкал музлигида икки қора кўринди.* *Бу муз устида бир-бирини судраб, сирғанчиқ учаётган болалар эди.* Н. Аминов, Қаҳқаҳа. *Заргаров қумда этигини судраб.. трассанинг охирроғига етганда, нақ қулоғининг тагида қаттиқ занг чалинди.* А. Мухтор, Асарлар. [Искандар] *Ёмбини апиш-тапи қопчиққа жойлаб, нарида ётган кич-кина замбилни судраб келди.* М. Мансуров, Ёмби.

Оёғини судраб босмоқ (ёки юрмоқ) Оёғини зўр-базўр босиб, секин-аста юрмоқ, судралмоқ. *Оёғини судраб, яна Боғчадарвоза томон борар экан, «Шоир замон қаерда бўлди экан-а?» деб хаёлланди.* С. Сиёев, Ёруғлик.

2 Зўр билан бирор томонга тортмоқ, ун-дамоқ. *Бошим қотиб, райондаги чойхонада чой ичиб ўтирсам, Матқовул пайдо бўлди.* *Мени уйига судровди, бормадим.* Ҳ. Назир, Ўтлар туташганда. *Дод-фарёдимга қулоқ солмай, дадам қўлимдан судраб, уйга олиб кетди.* Ой-бек, Танланган асарлар.

3 с. т. Амал-тақал қилиб кийиб юрмоқ. *Ўзингиз биласиз, тўрт йилдан бери бу ерда ишлайман, тиним йўқ, ишдан бошим чиқмай-ди.* *Лекин ҳали ҳам бир чопоним икки бўлма-ди.* *Ҳали ҳам қиш-ёз битта чорқиқи судрай-ман.* Ойбек, Танланган асарлар.

4 кўчма Пайсалга солиб ёки сусткашлик қилиб, орқага чўзмоқ, кечиктирмоқ. *Ишни судрамоқ.*

СУДРАТМА 1 Тортиб, судраб юрилади-ган; тиркама. *Судратма арава.*

2 *тар.* Одамга сиртмоқ солиб, отда судраш йўли билан жазолаш, қатл қилиш усули. *Ўғри энди мени отига судратма қилмоқчи бўлди.* «Ёшлик». *Тошкент оломонининг талаблари билан Азизбекнинг икки оёғидан арқон билан боғлаб, отнинг човига судратма қилдилар.* А. Қодирий, Ўтган кунлар.

СУДРАШМОҚ 1 **Судрамоқ** фл. бирг. н. Семён билан Лўли.. мени судрашмади-ю, икки биласиздан маҳкам ушлашди. А. Мухтор, Давр менинг тақдиримда.

2 Бир-бирини судраб, биргалашиб юрмоқ; бирга санғимоқ, дайдимок. *Эланганга, ёлборганга бўлмади, Уларман [улар билан] судрашиб юрган кунларим.* «Фольклор».

СУДХЎР [ф. سودخور – фойдахўр, фойда олувчи] 1 Пул қарз бериб, фоизи, фойдаси ҳисобига бойлик орттирувчи шахс. 1919–1920 йилларда *Сурхон воҳасининг энг катта судхўр бойи Суюн Пинхос ўғли эди.* Ш. Холмирзаев, Қил кўприк. *Кўп ҳолларда қарздорлар қарзни ўз вақтида уза олмай, еридан, уй-жойидан, мол-мулкидан ажралиб, хонавайрон бўлган, судхўрлар эса бойиб кетган.* «ЎзМЭ».

СУДХЎРЛИК Оғир шартлар билан қарз бериб, фойда олинадиган фаолият. *Судхўрлик қилмоқ.* ■ *Судхўрликда қарзни қайтариш муҳлати, тўпланадиган фоиз миқдори оғзаки келишув ёки тилхат билан расмийлаштирилган.* «ЎзМЭ».

СУДЬЯ [«суд» с. дан] 1 Суд органларида судга тушган ишларни кўрувчи ва шу ишлар бўйича ҳукм чиқарувчи лавозимли шахс. *Судьядан муайян суд ишларининг моҳияти бўйича бирон-бир тушунтиришлар беришни.. талаб қилиш тақиқланади.* «ЎзМЭ».

2 Спорт ўйинларида, мусобақаларида: ўйин қоидаларига риоя қилинишини кузатиб борувчи ва юзага келган низоларни ҳал қилувчи шахс; ҳакам, арбитр.

СУДЬЯЛИК Судья касби. *Судьялик қилмоқ. Судьяликка сайламоқ.*

СУЁҒЛИҚ Суяб кўйилган, суялган, суянган. - *Мана ҳассангиз, – Шер каравотнинг оёқ томонида суёғлиқ турган ҳассани олиб, бобосига берди.* С. Анорбоев, Ҳамсуҳбатлар.

Абзамжон ҳаяжонда қандай қилиб уйга кирганини, қандай қилиб деворга суёғлиқ турган мотоциклини етаклаб чиққанини билмайди. С. Аҳмад, Уфқ.

СУЖУД дин. [а. سجود – «сажда» с. кўпл.] Сажда, ибодат. [*Домулла:*] *Хуллас, бизни ҳам бир оз хотиржам қилинг. Аниқ хабарми шу? Рукуъ, сужудда ҳам хаёлимиз паришон бўлди-да.* Ҳамза, Танланган асарлар. *Рухимда ҳам ишқидир, вужудимда – ишқ, Осийлигимда ҳам, сужудимда – ишқ. Ёр, менга қисматдан омонлик тила, Ки менинг барбоду мавжудимда – ишқ.* Газетадан.

СУЗАҒОН I Тез ва яхши сузадиган, сузишга уста. *Сузағон бола.*

СУЗАҒОН II Дуч келганни сузаверади-ган; сузонғич, асов. *Сутсиз сигир сузағон бўлар.* Мақол. ■ *У [Полвон ота] моллардан қайсиси сузағон-у, қайсиси қочағон.. бир қарашдаёқ пайқарди.* Ҳ. Назир, Сўнмас чақмоқлар.

СУЗГИЧ I Суюқликларни турли хил механик аралашмалардан тозаловчи асбоб, мослама; филтёр. *Сутни сузгичдан ўтказмоқ.* ■ *Янтоқдан тайёрланган дахлама сузгичдан ўтказиб олинади ва ваннада чўмилганда ишлатилади.* «Фан ва турмуш».

СУЗГИЧ II I Сув юзида ва умуман суюқлик бетида сузувчи, турли мақсадлар учун белгиланган енгил нарса, деталь; қалқович. *Қармоқ сузгичи. Карбюратор сузгичи. Сув йўлини кўрсатувчи сузгичлар.*

2 Балиқ ва б. сув ҳайвонларининг сувда сузиш (ҳаракат қилиш) аъзоси. *Балиқнинг кўйруқ сузгичи.*

СУЗГИЧ III Сув бетида жуда тез сузиб юрадиган кўнғизсимон ҳашарот, сув кўнғизи. *Сув ниҳоятда соф; офтоб нурида живир-живир товланувчи майда шағал юзида кичкина балиқлар сайр қилади, ғир-ғир сузгичлар айланади.* Ҳ. Аҳмар, Ким ҳақ?

СУЗГИЧЛИ Сузгичи бўлган, сузгичи бор. *Сузгичли жониворлар. Сузгичли камера. Лўкак сузгичли қармоқ.*

СУЗГУН айн. **сузук.** *Сузгун кўзлар.* ■ *Қора, ўсиқ киприклари остида сузгун Машъал каби порлар бир жуфт чағир сурма кўз.* Ғ. Фулом, Танланган асарлар. *Тўлин ойнинг сузгун боққан чоғи, Яшил атлас қирлар уйқуда.* Миртемир, Асарлар.

СУЗИЛМОҚ I **Сузмоқ** I фл. мажҳ. н. [*Хотин*] *Уйга бир-икки қатнаб, сузилган*

шўрваларни ташиб битиргач, уйнинг эшигини беклади-да, кириб кетди. А. Қодирий, Ўтган кунлар. *Биз лойқа сув ичмаймиз ҳовуз, ариқ, анҳордан.. Шишадек тозаланган, сузилиб сув омбордан.. Қ. Муҳаммадий.*

2 Эскириб, тўзиб йиртила бошламоқ; ситилмоқ. *Битта пишиқроқ кўйлак ҳам олсанг бўларди ўзинга.. анов ювилган кўйлагининг елкалари сузилиб қопти.* А. Мухтор, Давр менинг тақдиримда.

3 Андиша ёки ноз билан ўзини сиполикка солиб, тортиниб турмоқ. *Бир оздан сўнг, яна ғалаба нашъасидан сузилаётган хумор кўзларини бир оз қисиб, кулумсираганча гапида давом этди: -Мен хиёнатинг учун сендан қасос олмақчи эдим. «Ёшлик».*

Кўзи сузилди 1) уйқу босиб ёки хумор тутиб, кўзи қисилди. *Қиз яна анчагача хаёл суриб ётди. Ниҳоят, бу кунги серҳаяжон воқеалар анча чарчатган эканми, кўзи сузилди.* Ф. Мусажонов, Ҳури; 2) ноз-ишва билан кўзлари ярим юмилди. *Фунажиннинг кўзи сузилмас, буқа ипини узмайди.* Мақол. ■ *Зор инграб йиғларман, кўнглим бузилиб, Талпиниб келарман, кўзим сузилиб. «Тоҳир ва Зухра».*

СУЗМА Сурп халтага солиб, осиб кўйилган қатиқнинг зардоби сизигач ҳосил бўлган сут маҳсулоти. *Ёғли сузма. Сузма қурт. Сузма халта.* ■ *Мурчи сузмага қўшиб ейилса, иштаҳани очади.* К. Маҳмудов, Ўзбек тансиқ таомлари. *Дастурхонда яна ўша қурт, сузма, сўк пайдо бўлди, салдан кейин эшикда бир гуруҳ қизлар кўринди.* О. Ёқубов, Эр бошига иш тушса. *Назар пишиқ ўроғини сузма халта осилган тутга санчиб, хонага йўналди. «Ёшлик».*

СУЗМОҚ I Сузгич ёки бошқа бирор нарса орқали ўтказиб, механик аралашмалардан тозаламоқ. *Бензинни машина бакига сузиб солмоқ.*

2 Суюқ нарсаларнинг керакли қисмини ажратиб олмақ. *Сирка сузмоқ. Сузиб сутнинг қаймоғини олмақ.* ■ *У киши [бой] шўрвани пиширади, лекин мойини сузиб ичади, гўштини ейди, менга тақир суяк, бир коса жирсиз сув келтиради.* Ойбек, Танланган асарлар.

3 Тайёр овқат ёки ичимликни ейиладиган ёки ичиладиган идишларга тақсимлаб солмоқ. ■ *Палов сузилиб, Нусратбек икки лаганни келтирганда, йигитлар Соҳиб ака-*

нинг елкасига туртишди. С. Нуров, Нарвон. *Махсумов ҳаммага шўрва сузди.* М. М. Дўст, Лолазор. *Бир сиқимгина ош қилиб, сузиб олишга ҳайрон бўлиб ўтирган эдим.* С. Аҳмад, Уфқ.

4 Карталарни ўйновчиларга бўлиб бермоқ. *Карта сузмоқ.*

Кўз сузмоқ Ноз-ишва билан қарамоқ, кўзларини ярим юммоқ. *Фунажин кўзини сузмаса, буқа ипини узмайди.* Мақол. ■ *Ёши қирқларга бориб қолган бўлса ҳам, икки бети қип-қизил.. жория бўш халтани ноибнинг қўлидан оларкан, қоп-қора кўзларини алла-нечук сузиб, гамзали бир оҳанда: -Бизга-чи, бегим? — деб сўради.* Х. Тўхтабоев, Йиллар ва йўллар.

СУЗМОҚ II 1 Кўл-оёқ ёки сузгичларини қимирлатиб, сувда турмоқ ёки бирор йўналишда ҳаракат қилмоқ. *Кулоч отиб сузмоқ. Қурбақача сузмоқ. Чалқанчасига сузмоқ.* ■ *Терак тагидан шопипоя бўйлаб йўл бор. Чирчиққа тик чиқади. Дарёдан сузиб ўта-миз.* Ҳ. Фулом, Машғал. *Балиқ сувда сузади, сувда ухлайди.* Ойбек, Танланган асарлар.

2 Сув транспорти воситаларида юрмоқ, сайр ёки сафар қилмоқ. *Қайиқда сузмоқ. Кемада сузиб, денгиздан ўтмоқ.*

3 Суюқлик ёки газ бетида қалқиб турмоқ ёки оқмоқ. *Итарувчи куч жисм оғирлигига тенг бўлганда, жисм суюқликнинг юзиде ёки ичиде сузиб юради. «Физика».* Бу «Волга» ҳам тун оғушида, худди сувда сузиб бораётган кемадек, аста-секин узоқлашди.. «Ёшлик». *Эскидан сақланиб қолган ёдгорлик — оққушлар сузиб юрган кўллару дарахт тагида най чалиб ўтирган йигит-қизларнинг суратлари.* М. М. Дўст, Лолазор.

4 *кўчма* Бир маромда бир тарафга қараб ҳаракат қилмоқ, кезмоқ, оқмоқ. *Домла кўзларини ишқаб, атрофга қайта тикилди-ю, қандайдир баҳайбат қушларнинг қумда оҳиста сузиб юрган сояларини кўриб, беихтиёр тепага қаради.* М. Мансуров, Ёмби. *Самода эса ҳеч кимга кераксиз ғариб ой мунғайиб сузарди.* С. Нуров, Майсаларни аёз урмайди. *..пуштиранг улкан булут самонинг қоқ ўртасида сузиб бориб, рўпарадаги қўшининг пастак, лойшувоқ томига.. юққа ва шаффоф соя ташлади.* Н. Аминов, Қаҳқаҳа.

СУЗМОҚ III Шохи билан урмоқ, шохини санчмоқ. *Эчкининг ажали етса, қасосни сузар.* Мақол. ■ *Ҳа, асов сигирнинг*

фезлини билмасанг, олдига йўлатмайди — сузади, тепади, сут бермайди. М. Жўра, Куёшдан нур эмганлар.

Ер сузмоқ Ерга тикилиб қолмоқ, ердан кўзни узмай ўтирмоқ ёки бормоқ. *Дилдор Низомжонни кўриб, секин шийпондан туширди, ер сузганча ариқ томонга ўтиб кетмоқчи бўлди.* С. Аҳмад, Уфқ. **Пул(ни) сузиб олади** Ердан супуриб олгандай пул топади, катта пул, фойда олади. *Шу давр ичида қўшмачи ҳожжи пулни сузиб олди.* — *шинам ҳужрасидан меҳмон аримади.* М. Исмоилий, Фарғона т. о.

СУЗОНҒИЧ айн. **сузагон** II. Сузонғич сигир. ■ [Пайғамов:] Нодонни сийласанг, чориги билан тўрга чиқади. *Илмий ходим, деб сузонғич ҳўкиз олиб келган эканмиз.* С. Нурув, Нарвон.

СУЗУВЧИ I Сузмоқ I фл. сфдш. *Овқат сузувчи. Карта сузувчи.*

СУЗУВЧИ II Сузмоқ II фл. сфдш. Сузувчилар мусобақаси. ■ *Сув полоси бўйича машҳур сузувчи А. Зулфиддинов мuddатидан олдин чемпионлик нормативини бажариб бўлди.* С. Аҳмад, Юлдуз.

СУЗУК Уйқутираб, хумор тутиб ёки нозишва билан қисилган, юмилиңқираган, хумор (кўз ҳақида). — *Вой, эсим қурсин!* — *деди [Лобар], эрига сузук шахло кўзлари билан кулиб қараркан.* Х. Фулом, Тошкентликлар. *Кўлимда энг қиммат узугим бўлса, Ундан ҳам қимматли кўзи сузугим.* Ф. Фулом.

СУИИСТЕЪМОЛ [a. سؤالاستعمول — ноўрин, нотўғри ишлатиш, ўз манфаати учун фойдаланиш] Бирор нарсадан, мас., амал, бойликдан ўз манфаати учун йўл қўйилганидан ортиқча фойдаланиш. *Сиз менинг меҳримни суиистеъмол қиляпсиз.* Т. Малик, Қалдирғоч. *Терговчи очиққина йиғит экан, кўнглидагини шундоқ айтиб кўя қолди: мансабини суиистеъмол қилган деган гумонимиз бор.* М. М. Дўст, Галатепа қиссалари.

СУИҚАСДИ [a. سؤالقصد — ёмон ният] Бирор кимсани йўқ қилиш, ўлдириш учун қасдан қилинган ҳаракат, қасд. *Суиқасднинг олдини олмоқ. Суиқасд қилмоқ. Суиқасд йўлга ўтмоқ.* ■ *Ёмонлар суиқасдидан саломат қутулишингиз муборак бўлсин!* А. Қодирий, Утган кунлар. *Тайёрланган суиқасддан у беҳабар бўлишиям мумкин.* «Ёшлик».

СУИҚАСДЧИ Суиқасд қилган ёки суиқасд йўлини тутган киши.

СУЙКАЛМОҚ Суйкамоқ I фл. ўзл. ва мажх. н. *Деворга суйкалмоқ.*

2 Суянмоқ; бир-бирига тегмоқ.

3 Эркаланиб ёпишмоқ.

4 кўчма Яқинлашмоқ; яқин муносабатда бўлишга ҳаракат қилмоқ. *Суймаганга суйкалма.* Мақол. ■ *Хотин имласа бас, не-не ёш эркаллар суйкалиб келган бўларди.* Яхшибоевнинг ўлигини ўртага тиқиб, *ғийбат урчишига ҳеч ҳожат қолмасди.* М. М. Дўст, Лолазор.

СУЙКАМОҚ Суркамоқ, суртмоқ. *Бўёқни суйкамоқ. Бетига атир-уна суйкамоқ.*

СУЙКАНМОҚ I Суйкамоқ фл. ўзл. ва мажх. н.

2 Яқинлашмоқ суркалмоқ. *Ёмонга суйкансанг, доғи юқар, Деворга суйкансанг — тупроғи.* «Қанотли сўзлар».

СУЙМОҚ с. т. **I** Яхши кўрмоқ, севмоқ. *Ҳақ суйган ишни халқ суяр.* Мақол. *Сулув — сулув эмас, Суйган — сулув.* Мақол.

2 Эркаламоқ, эркалатмоқ. — *Мениям шу мактабда.. ўқитасизми? — Албатта, албатта, — деди Элмурод қизни суйиб.* П. Турсун, Ўқитувчи.

Икки суймаслик Ёқтирмаслик. *Индамаган одамларни иқим суймас кўн.* «Ёшлик».

СУЙРИ Ташқи шакли балиқ сирти сингари секин-аста, равон ўзгариб борадиган, ўз ҳаракатида муҳитнинг энг кам қаршилигига учрайдиган. *Суйри вагон. Суйри қанотлар (авиа.).* ■ — *Оқ-қизғиш ёноқларида майда кулгичлар. Бурни суйри бўлиб борган-у, учи бир оз эгилиб, эркакча “қушбурун” бўлиб қолган.* П. Қодиоров, Уч илди.

СУКУН [a. سکون — ҳаракатсизлик, тинчлик; сокинлик, жимлик] Араб ёзувида: ёпиқ бўғин охиридаги ундош устига қўйиладиган диакритик белги (шу ундошдан кейин унли келмаслигини билдиради).

СУКУНАТ [a. سکونت — сокинлик, жимжитлик] **I** Ҳеч қандай товушнинг йўқлиги; жимжитлик, сокинлик. *Сукунат масканисан, Кўм-кўк мусаффо само.* Газетадан. *Кўш от қўшилган арава шаҳар сукунатини бузиб, Рафинак томон елиб кетди.* С. Сиёев, Аваз.

2 Сукут, сўзсизлик. *Ўртага ноҳуш сукунат чўкди.* «Шарқ юлдузи». *Сукунатни яна отанинг товуши бузди: — Ҳеч нарса деёлмайсан! Қайси юз билан сапирасан?!* «Ёшлик».

СУКУНАТЛИИ Сукунатга чўккан, сукут босган, сокин, жимжит. *Сукунатли кеча.* ■

Жўра қишлоққа етганда, қуёш ботиб, кечанинг сукунатли қора тўрлари дала устини қоплаган эди. Ҳ. Шамс, Душман.

СУКУТ [а. سڪوت – жимжитлик; гапирмаслик; камгаплик] **1** Кимсадан ёки ҳеч кимдан чурқ этган товуш, садо чикмай, жимлик ҳукм сурган ҳолат; сўзсизлик. *Сукут қилмоқ. Сукут сақламоқ. Сукутга кетмоқ (ботмоқ, чўммоқ). Сукут – аломати ризо. Мақол. Аҳмоққа жавоб – сукут. Мақол. ■ Қизча болаларга хос қайсарлик билан бошини эгганича жим турар, унинг сукутида, бутун хатти-ҳаракатида нимагадир қарши сўзсиз исён бор эди. «Ёшлик». Сукут сақламоқ ҳамма вақт ҳам ақллиликдан дарак беравермайди, аммо билганини шақиллаб гапира бериш – ўз обрўйингни пақирлаб тўкиш демак.. Мирмуҳсин, Умид.*

2 айн. **сукунат 1.** Тўрғайлар ухлашур ёвшан тағида, Дарё бўйларида – тўқайда сукут. Миртемир, Асарлар. *Дунёда шундай қўшиқ борки, янграганда, олам бир дақиқа сукутга чўмади. «Саодат».*

СУКЧАК кам қўлл. қ. **сўкчак.**

СУЛАЙМОҚ Ҳолдан тойиб шалпайиб қолмоқ, шилқ этиб тушмоқ. *Очликдан сулаймоқ. Чарчаб сулайиб қолмоқ. ■ Хон тарафдан.. ишбоши қилиб белгиланган саркорлар, [уларнинг] очлик дармонсизлигини яқовлик ҳисоблаб.. сулайиб йиқилмагунча, кетмонни ташлатмас эдилар. А. Қодирий, Меҳробдан чаён. Очликдан кечгача сулайиб юрдим. «Шарқ юлдузи».*

СУЛГИ шв. Лунги, сочиқ. *Шабада экинидан сулги қимирлаб кетди. «Афсунгарлар туҳфаси».*

СУЛИ Бошоқдошларга мансуб, ем учун экиладиган галла ўсимлиги ва унинг дони, галласи. *Отинг охурида гулбеда, тўрвасида арпа, сули қанда бўлмади. С. Нуров, Майсаларни аёз урмайди.*

СУЛИШ айн. **сўлиш.** Сулиш олмақ. ■ *Шоир бир сулиш олиб, танбурни тоқчага тираб қўйди. Ойбек, Навоий.*

СУЛЛА шв. айн. **суллоҳ.** Буни ҳайданг, баччағарни. *Мулла деган сулла шу! Ҳамза.*

СУЛЛОҲ [а. سلاخ – ўтакетган хира, сурбет, шилқим. Балки сен ҳам ўғридирсан ё нокас, суллоҳ, Тургандирсан ноилождан буйинингни буриб. А. Орипов, Йиллар армони. Қандай суллоҳ одам у? Ейдиганини еб кетди! Яна нима дейди?! С. Аҳмад, Лаъли Бадахшон.

СУЛЛОҲЛИК Сурбетлик, шилқимлик, суллоҳ бўлишлик. *Суллоҳлик билан олмақ. Суллоҳлик қилмоқ.*

СУЛОЛА [а. سلاله – насл, зот, зурриёт; авлод, болалар; уруғ, оила] **1** Бир авлоддан тарқалиб, ворислик, валиаҳдлик ҳуқуқига асосан бирин-кетин тахтга ўтирган подшоҳлар, амирлар, хонлар ва ш.к; династия. *Сомонийлар сулоласи. Ғазнавийлар сулоласи. ■ Бадиуззамон, Темур сулоласига мансуб бир кўп шоҳлар, шаҳзодалар каби, шеърдан завқланар, ўзи ҳам гоҳо-гоҳо бирор нарса ёзиб қўярди. Ойбек, Навоий.*

2 Иш-фаолият анъаналарини, маҳорат сирларини давом эттирувчи авлод, насл. *Ҳиндистон кинематографиясининг довруғига довруқ қўшаётган санъаткорлар орасида Капурлар сулоласи алоҳида ажралиб туради. Газетадан. Унга [Тошпўлат отага] қарилки йўл бермади. Лекин фарзандининг фозиаси Ғозибой дарбозлар сулоласини давом этишдан тўхтатди. Мирмуҳсин, Қахрамоннома.*

СУЛС [а. ثلث – учдан бир қисм; хаттотлик ёзуви (хуснихат) тури] Араб ёзувидаги хат услубларидан бири; хаттотлик услуби. *Сулс дастлаб расмий ҳужжатларни ёзиш, кейинроқ Қуръон кўчиришида қўлланган. «ЎзМЭ».*

СУЛТОН [а. سلطان – олий ҳукмдор, подшо] **1** Мусулмон давлатларида амир, хон, шоҳлар унвони. *Киши юртида султон бўлгунча, ўз юртингда ултон бўл. Мақол. ■ Бу чоққача қанча замонлар ўтди, Қанча подшо, амир ҳам хонлар ўтди, Йўқ-юқа камбағал билан иши йўқ.. Ўз кайфини суриб султонлар ўтди. Эргаш Жуманбулбул ўғли. Жаҳонда энг кўп сармоёга эга бўлган Бруней султони 1788 хонадан иборат бўлган саройда яшайди. «Фан ва турмуш».*

2 кўчма Ўзгалар ичида энг олдингиси, сараси; шоҳи. *Сабо, арзимни еткур, моҳи тобон бир келиб кетсун. Тамоми хусн элининг шоҳи – султон бир келиб кетсун. Ҳамза. Ман сизни биламан, олийжаноб, ҳар қандай майда гаплардан устун турадиган, кек сақламайдиган йигитсиз. Йигитларнинг султони – олмос фақатгина зебу зийнат бўлибгина қолмасдан, балки забардаст ҳамда нозик техника маҳсулоти ҳисобланади. Газетадан.*

3 Султон (эркаклар ва хотин-қизлар исми).

СУЛТОНИ [а. سلطانى] Узум навларидан бирининг номи ва шу узумдан солинган майиз.

СУЛТОНЛИК 1 Султон, шоҳ бўлишлик.
2 Султон қўл остидаги давлат. *Туркия султонлиги.*

СУЛУВ Гўзал, чиройли, кўркама. *Сулув қиз. Сулув баҳор. Сулув — сулув эмас, суйган — сулув.* Мақол. ■ Қизилқумнинг қоқ ўртаси, Ултирардик овулда, Қимиз сузиб, ўртар сулув — Кўҳлик эди охудан. Отаёр, Оқ фасл. Нақадар сулуван, нақадар инжу, Эй, сен шимол юртин чўнг ўрмонлари. А. Орипов, Йиллар армони.

СУЛУК [а. سلوك — хатти-ҳаракат ва турмуш тарзи; йўл; хулқ, ахлоқ] *дин.* Солиқнинг тариқат йўлини ўтиш жараёни; муриднинг руҳий-ахлоқий камолотга эришиш йўли. *Тасавуфнинг амалий-ахлоқий сулуки.* ■ Кушларнинг Семурғни қидириб қилган фантастик сафари ва бу сафардаги кечинмалари ҳамда тортган азоб-уқубатлари риёзат ва сулук йўлининг рамзий ифодасидир. «ЎТА».

СУЛУКАТ [а. سلوكات — хатти-ҳаракат ва турмуш тарзи] Кишилар билан муомалада, жамиятда ўзини тутиш тарзи; хулқ-атвор, қилиқ. *Сулукати совуқ одам.*

СУЛУКАТЛИ Кишилар билан муомалада, жамиятда ўзини яхши тута биладиган, қилиғи ёқимли. *Сулукатли одам.*

СУЛЬФАТ [лот. sulphur — олтингугурт] қ. **сульфатлар.** Аммоний сульфат. *Сульфат кислота.*

СУЛЬФАТЛАР *ким.* Олтингугурт (сульфат) кислотасининг тузлари. ■ Сульфатлар табиатда кенг тарқалган ва турли саноят соҳаларида хомашё сифатида қўлланади. «ЎЗМЭ».

СУЛҲ [а. صلح — тинчлик; ярашиш] 1 Урушувчи томонлар ўртасидаги ярашув, яраш-яраш. *Сулҳ шартномаси. Сулҳ тузмоқ.* ■ Умумий сулҳдан кейин, одатда, сулҳ шартномаси тузилади. «ЎЗМЭ».

2 Умуман, келишув, тотувлик, тинчлик. *Шомат, Яхшибоевнинг зўрлигини тан олди, тан олгани баробар, «сулҳ» дея қўлини берди.* М. М. Дўст, Лолазор.

3 *дин.* Мусулмонлар билан фатҳ этилган вилоятлар аҳолиси ўртасида тузиладиган тинчлик битими.

СУЛҲПАРВАР 1 [а. صلحپور — сулҳни ёқловчи, тинчликсевар] *айн.* **тинчликсевар.** *Сулҳпарвар мамлакатлар.*

2 Келишувчи, ярашувчи. -*Ке, қўй, хотин, шуни туғиб қўя қол, — деди Тош жуда сулҳпарвар оҳангда.* 3. Аълам, Зарб.

СУЛҲ-САЛОҲ [сулҳ + салоҳ] Сулҳ, келишув. *Икковлари [йигит билан жувон] уришиб, мени энга олмагач, сулҳ-салоҳга келишди.* Ф. Гулом, Шум бола.

СУМАК *этно.* Бешикка беланган чақалоқнинг сийдигини тувакка йўналтирувчи найсимон асбоб. *Қиз сумак. Уғил сумак.* ■ *Бешик, беланчак, қиз сумак, ўғил сумак, ип ўрайдиган урчуқ, заранг чўмич, ўроқ бозори қозондек қайнарди.* С. Аҳмад, Жимжитлик. *Муборакнинг отаси қишда дурадгорлик қилар, эшик, бешик, сумак, сандал, заранг товоқ ясарди.* С. Нуров, Майсаларни аёз урмайди.

СУМАЛАК I Қорнинг эриб оқиб, қайта музлаши натижасида ҳосил бўлган найсимон, чўзинчоқ муз. *Унг томонда шоҳи пардадек осилиб турган япалоқ, лентасимон сумалаклар ҳам жуда чиройли эди.* А. Кўчиров, Ҳалқа. *Ер, томлар қор. Тарновларда сумалаклар осилган. Изғирин юзни ялайди.* С. Нуров, Нарвон.

СУМАЛАК II Ундириб янчилган бугдой, ун ва ёғ аралашмасидан тайёрланадиган, сервитамин, хушхўр ҳолвайтарсимон овқат (одатда баҳор кезлари аёллар ўртасида халфана асосида пиширилади). *Бу кеча — гулгун кеча, Ўчоқда ўт тонггача, Ким пиширса сумалак, Яшасин — эй минггача!* А. Суюн, Олис тонглар. *Дошқозонда қайнар сумалак, Онахонлар тонгни пойлайди.* «Саодат». *Бинобарин, сумалак йилда бир мартагина тайёрлаш мумкин бўлган ноёб таомдир.* К. Маҳмудов, Ўзбек тансиқ таомлари.

СУМАН [ф. سمن — оқ гулли, хушбўй ўсимлик] Оқ хушбўй гулли ўсимлик ва унинг гули; ясмин, ёсуман. *Хати мушкинмудурур гул юзида Ё суман устида райҳон кўринур.* Бобур.

СУМАНБАР [ф. سمنبر — оқбадан ва суман исли] *поэт.* Гуландом, хушруй, зебо. *Бир парипайкар суманбар ёра ошиқ бўлмишам.* Увайсий.

СУМБА 1 *айн.* **шомпол.** *Эркинжон кичик уста, Станокда бирпасда Беҳи шохидан атай*

Силлиқ қилиб сумбадай, Бувига қилар ҳасса. Қ. Муҳаммадий, Одам-олам кўшиғи. Сешан-баликларнинг қуроллари эски тарзда ясалган милтиқлар бўлиб, ўқ ва дорилари оғздан солинар ва сумба билан жойланарди. С. Айний, Эсдаликлар.

2 тех. Тешик тешиш ёки белги солиш учун хизмат қиладиган, учи найза пўлат асбоб.

СУМБАТ Ташқи кўриниш; қад-қомат. *Сумбати келишган йигит. ■ Дарҳақиқат, қиз тўлишган — қарғашойи кенг кўйлаги ҳам унинг етилган сумбатини кўздан яширолмас эди. Ш. Холмирзаев, Оғир тош кўчса. Сумбатинг келишган, эй барно йигит, Ҳорманг, харидорим, қайдин бўласиз? «Тоҳир ва Зухра».*

СУМБУЛ с. т. Сунбул. *Шўр ерда сумбул уммас. Мақол. ■ Сумбул ҳам, нарғис ҳам, гунча ҳам, гул ҳам Атлас кийган қизда бўлмиш жамулжам. Уйғун, Тонг кўшиғи.*

Сумбул соч Сунбул каби узун ва чиройли соч. *У ҳозир мана шу янгасининг илгари қиқир-қиқир куладиган, сумбул сочлари тақимиға тушган гўзал бир қиз бўлганиға ишонмаётгандек эди. «Ёшлик».*

СУМБУЛА с. т. Сунбула. *Асадда оралаб е, Сумбулада саралаб е. «Қанотли сўзлар».* Сумбула сувидай тиниқ манглай тер Марварид доналар бўлди оқибат. Ф. Фулом, Танланган асарлар.

СУМБУЛСОЧ бот. Соя-салқин жойларда, сув сирқиб турадиган унгулларда, булоқлар атрофида ўсадиган кўп йиллик манзарали ўт.

СУМКА [р. сума, сумка — тўрва, хуржун] Нарса солиб кўтариб юриладиган, чарм, мато ва ш.к. дан ясалган буюм. *Чарм сумка. Почталъон сумкаси. ■ Тамара кўлига сумкасини олиб, нон харид қилиш баҳонасида биринчи қаватга тушди. «Ёшлик».* Ёрдамчилар машинадан тушиб, қўлларигадаги сумкаю сеткаларини яккаю ягона балхи тутнинг шохига илиб қўйишди. Н. Аминов, Қаҳқаҳа.

СУММА [лот. summa — якун, умумий миқдор] Бир миқдор пул, маблағ. *Нафақалар суммаси йилдан-йилга ошмоқда. ■ Яқинда поччам катта сумма зарур бўлиб қолганини сўз орасида қистириб ўтди. Ойбек, Танланган асарлар.*

СУНБУЛ [а. سنبل — бошоқ] Пиёзгуллилар оиласига мансуб, лола баргига ўхшаш

узун баргли ўтсимон манзарали ўсимлик ва унинг гуж бўлиб очиладиган хушбуй, чиройли гули. *Сен чиндан ҳам гўзалсан, Лабларинг ол, қирмизи.. Сочларингга сунбул банд, Кўзларинг тонг юлдузи. А. Орипов, Йиллар армони. Отабек сунбул исли сочлардан руҳ олар, Кумуш гўё унинг бағрига сингиб кетган эди. А. Қодирий, Ўтган кунлар.*

Сув сунбул(и) Сочдек узун-узун пояли ва жуда нозик баргли папоротник.

СУНБУЛА [а. سنبله — бошоқ; бурж номи] **1** (С — катта) астр. Ўн икки буржнинг бири, Асад ва Мезон буржлари ўртасида жойлашган (қ. бурж).

2 Шамсия йил ҳисобида олтинчи ойнинг номи (22 август — 21 сентябрь даврига тўғри келади). *Сунбулада сув совийди. Мақол. ■ Ташқаридаги шох баргларининг сунбула шабадаси билан шивирлашаётгани эшитила бошлади. Қ. Кенжа, Нотаниш гул. Тиниб борар ариқлар, Буғдой тўла сариқлар, Чарс бедовлар ориқлар, Ҳай-ҳай, жоним сунбула!. М. Кўшмоқов, Али Қамбар.*

Сунбуланинг сувини ичган экин Куз сувини ичган экин (бундай экин ҳосили қишда яхши сақланади, дейдилар).

СУНДИРМОҚ: бўйин сундирмоқ айн. бўйсундирмоқ.

СУНМОҚ эск. кам қўл. Тутмоқ; узатмоқ. *-Агар йўқ деганингизда, бошингиздан қуйиб юборар эдим, — деди новчадан келган бир йигит.. унга [пахлавонга] май косасини сунар экан. М. Осим, Сеҳрли сўз. Ичига шабнам йиғилган лолақизғалдоқлар унга [капалакеула] майи ноб сунар эдилар. М. Осим, Карвон йўлларида.*

Бўйин сунмоқ айн. бўйсунмоқ. *Номардларга асло сунма бўйинингни, Пуч ёнғоққа тўлдирди қўйинингни. Мақол.*

СУННА [а. سنة — олат, анъана, хатти-ҳаракат тарзи; қонун] дин. Ислолда мусулмонлар учун ибрат ҳисобланган Муҳаммад пайғамбарнинг сўзлари, амаллари, хатти-ҳаракатлари. *Сунна исломда Куръондан кейинги, уни тўлдирувчи манба, ислом илоҳиёти ва шариатнинг иккинчи асоси сифатида эътироф этилган. «ЎЗМЭ».*

СУННАТ [а. سنت] **1** дин. Ҳадисларда тарғиб этилган, ибодатда ҳам, муомалада ҳам қўлланувчи амал. *Ўғил болани хатна қилиш, уйланиб ошла қуриш, фарзандларга яхши исм қўйиш суннат амалларидан саналади. «ЎЗМЭ».*

Ортиқча молу дунёсидан хайру эҳсон қиладиган ва суннатга амал қилиб, бидъатларга ўтиб кетмаган кишиларга қандай яхши! «Фан ва турмуш».

Суннат тўйи Ўғил тўйи, хатна тўйи. Қиз чиқарадиган, ўғил уйлантирадиган, суннат тўйи қиладиган хотинлар ўз тўйларини Ўзбек ойим кенгашидан ташқари жўната олмас эдилар. А. Қодирий, Ўтган кунлар. **Ҳам фарз, ҳам суннат айн. ҳам фарз, ҳам қарз қ. қарз 2.** -Қизим, — деди Эрназар ака соқолини уйчан силаб, — ўтеан сафар жуда маъқул гап айтдиниз. Уйлаб қарасам, ерни яхлитлаш ҳам фарз, ҳам суннат экан. И. Раҳим, Ихлос.

3 Суннат (эркаклар исми).

СУННИЙ [а. سنئى — суннага амал қилувчи] қ. **суннийлар**.

СУННИЙЛАР *дин*. Куръондан ташқари сунна(т)ни ҳам имон-этиқод манбаи деб тан олувчи мусулмонлар; *таққосланг*: **шиалар**.

СУННИЙЛИК [«сунна» с. дан] *дин*. 1 Исом динидаги икки асосий йўналиш (мазҳаб)дан бири ва энг кенг тарқалгани.

2 Сунний мазҳаби.

СУНЪИЙ [а. صنئى — ясама, ишланган; табиий эмас] 1 Бирор усул билан табиийга ўхшатиб ясалган, тайёрланган, юзага келтирилган. *Сунъий каучук. Сунъий тола. Сунъий буйрак. Ернинг сунъий йўлдоши.* ■ Эндликда жаҳондаги энг йирик стадионлардаги югуриш йўлкалари сунъий қопламалар билан ишланмоқда. «Фан ва турмуш». Котибанинг кўкка бўялган қовоқлари, ҳар бири тикандай ажралиб турган сунъий китриклари пирпиреди. С. Нуров, Майсаларни аёз урмайди.

2 Табиий бўлмаган йўл билан амалга ошириладиган; нотабиий. *Сунъий ёритиш. Сунъий сугориш.* ■ Уни дарҳол дераза ёнига яқинроқ келтиришиб, сунъий нафас олдиришди. «Ёшлик». *Сунъий ишлов берилган, аёллар зийнати ҳисобланган олмос «бриллиант» деб аталади.* «Фан ва турмуш».

3 Кўчма Ясама, сохта, ёлғондакам; но-самимий. *Сунъий табассум. Сунъий хотиржамлик.* ■ Куёв олдин манзират қилиб кўрди. Лекин сўзлари анча сунъий чиқаётганини ўзи ҳам сезди шекилли, миннатдорчилик билдириб қўя қолди. С. Анорбоев, Оқсой. *Очил ўзини вазмин тутиб, табиий муомала қилган сари,*

Замира ўнғайсизланар, сунъий равишда босиқ бўлишга уринарди. П. Қодиров, Уч илдиз.

СУНЪИЙЛИК Ясамалик, сохталик, табиий эмаслик. *Материалнинг табиийлиги ёки сунъийлигини аниқламоқ. Кулгининг сунъийлиги.* ■ *Илтифот кўрсатиш меъёридан ошса, бачканалик ёки сунъийликка ўхшаб қолади.* Газетадан.

СУПА [а. صفة — тошдан қилинган дўнг, тош ўриндиқ, токча; айвон, шийпон] 1 Ҳовли, боғ ва умуман очиқ ерда ўтириш, ётиш-туриш учун тупроқдан чорбурчак шаклида кўтариб қурилган жой. *Баланд супа. Супа қурмоқ. Супага жой қилмоқ.* ■ *—Уйга кириб ўтирмайлик, супага жой қилиб қўя қолинг, девкор,* — деди кўринишидан оғзи катталиги ҳам билинмайдиган меҳмон дўрилдоқ товушда. «Ёшлик». *Ҳовуз атрофидаги супа дид билан безатилган.* «Гулдаста».

Шоҳ супа айн. шосупа.

2 Умуман, чорбурчак шаклидаги, ердан баланд жой ёки қурилма. *Ҳайкал ўрнатилган супа.*

СУПАТОҒ *геогр.* Усти супага ўхшаш текис, ёнлари тик тоғ.

СУПАЧА 1 Кичкина супа. *Супачада ухлар эркак ва аёл, Ёғоч бешик ўрталарида.* М. Юсуф, Уйқудаги қиз. *Тоғасиникига келган куни кечқурун боғдаги супачада ётар, қушларнинг сайрашига қулоқ соларди.* М. Осим, Карвон йўлларида.

2 Супа шаклидаги кичикроқ, ердан баланд жой ёки қурилма. *Ҳайкал супачаси.*

СУПЕР- [лот. super — юқорида, устида] Байналмилал ўзлашма қўшма сўзларнинг биринчи қисми бўлиб, «олий сифатли, юқори даражали», «бош, асосий» ва «устиди, юқорида жойлашган» деган маъноларни билдиради, мас., *супермаркет, суперфосфат.*

СУПЕРМАРКЕТ [ингл. supermarket < супер.. + ингл. market — бозор; сотиш, пуллаш] Турли хил озиқ-овқат ва саноат маҳсулотлари сотиладиган катта дўкон. *Куйи Чирчиқ туман марказида тумандаги илк супермаркет ўз эшикларини очди.* Газетадан.

СУПЕРОҒИР: *супероғир вазн спрт.* Боксда энг оғир вазни (ўйинчи). *Супероғир вазнда ўзбекистонлик боксчи Р. Чагаевнинг кейинги рақиби маълум бўлди.* Газетадан.

СУПЕРФОСФАТ [супер + фосфат] Апатит ва фосфоритларни олтингургурт

кислотаси билан ишлаб ҳосил қилинадиган юқори сифатли фосфорли ўғит. *Донадор суперфосфат. Суперфосфат заводи.*

СУПРА [а. سفره — сафар озуқаси (овқати); тушлик дастурхон, суфра] *Хамир ёйиш, нон яшаш учун мўлжалланган, одатда ошланган теридан қилинадиган дастурхонсимон рўзгор буюми. Тери супра. Ҳар супранинг нони бор. Мақол. ■ Раҳбархон қўлидаги ўқлогини супрага дўқ этиб урди. Ў. Усмонов, Қисмат. -Вой, ўла-ай! — деди Бувиражаб супрани очиб. «Ёшлик». Мезбонлар кўй терисидан қилинган супраларда.. пиширилган гўшт келтира бошладилар. М. Осим, Карвон йўлларида.*

Номи (ёки оти) улуғ, супраси қуруқ *Номига яраша қўли, дастурхони очиқ бўлмаган, мартабасига мувофиқ иш тута олмайдиган одам ҳақида айтиладиган ибора. Биладик, [Севаргул] кўк диплом билан институтда қололмади, мабодо унинг шарофати туфайлидан қолдирилганда ҳам, оти улуғ, супраси қуруқ юраверади. Н. Қиличев, Чигирик. Қулоқ супраси анат. Қулоқнинг товуш тутувчи ташқи тоғай қисми. Султон тандирчи — қотма, кўк кўзлари ҳорғин ва хаёлчан.. бармоқлари, ҳатто қулоқ супраларини майин жун босган калта соқолли чол. «Ёшлик».*

СУПРАҚОҚДИ 1 Катта зиёфат, тўй ва ш.к. дан кейин қолган нарсалар билан кичик доирадаги яқин кишиларни меҳмон қилиш ва шундай меҳмондорчиликнинг ўзи.

2 *кўчма* *Энг кичик, кенжа (фарзанд ҳақида). Мўминбой — унинг супрақоқдиси, эликка кирганда кўрган фарзанди. «Ёшлик».*

СУПТА *Жуссаси унча катта бўлмаган, хипчадан келган; бежирим. Супта аёл. ■ [Хуррам:] Чуқурни хушрўй қилиб қазинг. Қизнинг бетидай супта бўлсин. «Ёшлик».*

СУПУРГИ 1 *Супуриш-сидириш, тозалаш учун бурган, шувоқ, маккасупурги ва ш.к. дан дасталаб боғлаб ясаладиган рўзгор буюми. Шувоқ супурги. Чўлтоқ супурги. ■ У тахмондаги, шифтлардаги исларни супурги билан олиб, полни икки қайта ювди. Мирмуҳсин, Умид. Янги супургини ишлатишдан олдин совулли қайноқ сувда хўллаб олсангиз, кўпга чидайди. «Саодат».*

Хотин (ёки хотинак) супурги *Банди қисқа, одатда уй супуриладиган супурги. Эркак супурги* *Банди узун супурги. Чол ғира-*

ширада уйдан чиқарди. Қўлида кетмон сонидек узун сопли эркак супурги, челак. Ў. Умарбеков, Дутор. Қоровул супурги *Узун ёғоч дастали катта супурги.*

2 *бот.* *Чўл, қирда ўсадиган сершоҳ, уруғи заҳарли бир йиллик ўсимлик.*

3 *айн. маккасупурги.*

Супурги пули тар. *Эски мактабларда болалардан уларни ўқитганлик учун олинadиган солиқларнинг бир тури. Юмшоқ (ёки мулойим) супурги* *Муомаласи юмшоқ, мулойим, аммо ўзи қаттиқ ёки қув одам ҳақида. [Алижон] Учрашганда шундай мулойим супурги бўлиб кетадики, унча-мунча одам лақ этиб учиб, бундан яхши йигит бўлмаса керак, деб ўйлайди. Ҳ. Нуъмон, Фасллар. Қўли косов, сочи супурги* *Ҳамма уй-рўзгор ишларини ва б. оғир юмушлар, топшириқларни хизматкордек бажарувчи одам ҳақида. Сизни деб қўлим косов, сочим супурги бўлса-ю, ҳали сиздан келган гап шуми? А. Муҳиддин, Давлат қораловчиси.*

СУПУРГИЧИ *Супурги боғлаб сотувчи киши. Мана Барат супургичи! Бозордан супургисини чақа қила олмай, яна орқалаб қайтаётир. Ойбек, Танланган асарлар.*

СУПУРИБ-СИДИРМОҚ *Супуриб, гард қолдирмай тозалаб олмоқ. Ўзи супуриб-сидириб, супада чордана қуради. Тиззалари орасига патила-патила эчки юнларини уяди. Чувий бошлайди. «Ёшлик». Ҳамма ёқни супуриб-сидириб, ёғ тушса ялагудай қилиб, Ҳожиди бобонинг чиқишига мунтазир бўлиб турдик. Ф. Ғуллом, Шум бола.*

СУПУРИНДИ 1 *Супурганда тўпланган ахлат. Супуридиларни ерга тўплаб ёқмоқ. ■ Бу ерга ёзда супуринди, қишда қор ташлайдилар. Ойдин, Ҳазил эмиш.*

2 *кўчма нафр.* *Одамгарчилигини йўқотиб, кишилардан ажратиб қолган, маиший ёки мафкуравий жиҳатдан тубан киши.*

СУПУРМОҚ 1 *Супурги билан чанг-тўзон, ахлат ва ш.к. дан тозаламоқ, ахлат ва ш.к. нарсаларни сидириб олмоқ, тўпламоқ. Уй супурмоқ. Ҳовли супурмоқ. Янги супурги тоза супура. Мақол. ■ Ўнлаб фаррошлар ҳафсала билан ер супурган, мешкобчилар этикларини белбоққа қистириб, сув сепган.. С. Сиёев, Аваз.*

2 *кўчма* *Тағ-томири билан сидириб, ордан кўтармоқ, сурмоқ. Юлғичларни орамиздан супуриб ташлаш керак.*

3 кўча Йўқ қилмоқ, йўқотмоқ, барҳам бермоқ. *Гул боғларга еллар кўклам нафасини уфурди. Ердан қору мовий кўкдан булутларни сунурди. Э. Воҳидов.*

Ер супурмоқ Этаги ерга тегиб судралмоқ. *Ўлмас этаклари билан ер супурганча, унга эргашиди. «Ёшлик».*

СУР I Дудлаб ёки осиб қўйиб қуритилган, қоқланган. *Сур гўшт. Сур балиқ. ■ Қозоқ қизи тутган қимиз, қалбидек соф, Эсдан чиқмас сур қазининг тўғрамчаси. С. Абдулла. -Бу ану кунги сур гўшт, - деди Нозик кампир гуноҳини енгиллатадиган вазж топилганидан қувониб. «Ёшлик».*

СУР II Без, сурбет. *Сур одам. ■ Нигоранинг кўз олдига Ёқутойимнинг тухумдай тиғиз завдасию пардоз-андоз қилган сур башараси келди. С. Анорбоев, Оқсой.*

СУР III [ф. سور / سرخ - қирмизи, қизил, қизғиш] **1** *от Тўқ кулранг, тилларанг қорақул. Лолаларнинг унар жойи қил бўлур, Қоракўлнинг кўркам тури сур бўлур. Я. Курбон. Эшик зинапоясида сур қалпоқ кийиб, қизил астарли чакмонининг барини кумуш камарига қистириб олган киши кўринди. «Шарқ юлдузи».*

2 сфт. Тўқ кулранг тусдаги; сурранг. *Сур қоракўл тери. ■ Бутхонанинг сур деворига Ҳар ўткинчи бир сатр битмиш. Миртемир, Асарлар.*

СУР IV шв. Салобат. *Умида ҳали бирор марта ҳайфсан олмаган, беозор Саидхонни прокурорнинг сури босиб қолди. Ш. Тошматов, Тонгдаги кўланка. Дуруст, ўзим ёлғиз бўлганда дадил айта бераман-ку! Лекин ўша.. учраган вақтда.. баччагарнинг сури босиб қолади, дейман. Ҳамза, Танлаган асарлар.*

СУР V [а. سور - шох, мугуз; карнай] *дин.* Қурьонда айтилишича, қиёмат куни Исрофил фаришта томонидан чалинадиган, шох (мугуз)дан ишланган карнай.

СУРА [а. سورة] (*у - чўзиқ*) *Қурьоннинг 114 бобидан ҳар бири. "Бақара" сураси. ■ Баъзи сураларнинг номи суранинг бошида келган сўздан олинган. «ЎЗМЭ». Бу «Ҳаж» сураси Мадинада нозил қилинган бўлиб, етмиш саккиз оятдан иборатдир. «Шарқ юлдузи».*

СУРАЙЁ [а. ثريا] **1** (*С - катта*) *астр.* Савр юлдузлар туркумидаги бир гуруҳ юлдузлар номи. *Бир оқшом, ой тўлган, ел ўйнара то баланд Сурайё ташгори. У. Носир, Юрак.*

2 эск. Маъшуқа, ўйнаш.

3 Сурайё (хотин-қизлар исми).

СУРАЛАЙ: *суралай ғоз* Ғозсимонлар туркумининг ўрдақлар кичик оиласига мансуб кўл қуши; шомруқ.

СУРАТ [а. صورت - кўриниш, тимсол; тасвир, тасаввур; фоторасм; шакл, нусха] (*у - чўзиқ*) **1** *Расом томонидан чизилган тасвир, расм. Сурат солмоқ. ■ Тунги боғлар суратга ўхшар, Ҳар бир чизик аниқ ва қора. Кундузи у мен каби яшар, Тунда - қотиб қолган хотира. Х. Даврон, Болаликнинг овози. Шоирлар сурати турибди қатор, Мана бу - Лермонтов, мана бу - Фуркат. А. Орипов, Йиллар армони.*

2 *Босма тасвир, китоб, журнал ва ш. к. да босилган расм, иллюстрация. Суратлар билан безатилган китоб. ■ Абдурасул ўқишни билмаса ҳам, китобларни иштиёқ билан варақлай бошлади ва баъзи бир суратларга тикилди. П. Турсун, Ўқитувчи.*

3 *Фотографик тасвир, фоторасм. Сурат олдирмоқ. Суратга олмақ. Суратга тушмоқ. ■ Жамолзода Гулгинага қараб турди-да, ички завқ ила Ботирга деди: -Қара, Ботир, Гулгинахоним оҳу ила сўзлашяпти.. Таассуфки, фотоаппаратимиз йўқ, суратга олсак бўларди. «Ёшлик». Ёнаётган бағрини қандай қилиб совитса экан?! Ҳеч совитиб бўлмайди! Девордан Ҳафизанинг суратини олиб, бурдаласинми? Мирмуҳсин, Умид.*

4 *Ташқи қиёфа, кўриниш; сиймо. Уйқусиз кечаларда Суратинг кўз олдимда. Миртемир, Асарлар. Муқбил бир қаландар суратига кириб, сафарга чиқибди. «Эртақлар».*

СУРАТИ ОДАМ *Ташқи кўринишигина одам, лекин эзилган, ҳолсиз ёки инсонийлигини йўқотган, разил. Бузилдим, одамгарчилигим қолмади, суратим одам, бойвачча ака, мендан ҳайвон яхши, Ойбек, Танланган асарлар. СУРАТИ ҚОЛМОҚ* *Касаллик, кўрқув ёки руҳий азобдан озиб-тўзиб кетмоқ. Ортиқча меҳр қўйганиданми, ўғлининг саратондаги чақмоқдек ногоҳ қамалиб қолишидан Оҳистахон шунақа кўрқиб кетдики, икки-уч кунда сурати қолди. Шухрат, Умр поғоналари.*

5 (*ў.-п. к. шаклида*) *Кўшма равиш таркибида келади. Шошилиш суратда. Расмий суратда. Мунтазам суратда.*

6 мат. *Оддий касрда чизик устидаги сон. Сурат ва махраж.*

Баайни (*ёки худди*) *сурат* *Жуда чиройли, жуда гўзал. Баайни сурат: киши ҳам бун-*

дай бежирим бўлар экан. А. Қодирий, Меҳробдан чаён. **СУРАТ БЎЛИБ (ҚОТИБ) ҚОЛМОҚ** Хайратда қолмоқ, ханг-манг бўлмоқ. Зулукхон Норқўзининг турган ерида сурат бўлиб қолганини, йигитнинг қалби қўрқувга тўлганини фаҳмлади. Ҳ. Фулом, Сенга интиланман. Шу пайт бир ҳодиса рўй берди-ю, болаларнинг ҳаммаси сурат бўлиб қотиб қолишди. О. Акрамхўжаев, Кониютнинг сири.

СУРАТКАШ [а. + ф. صورتکش — сурат чизувчи, расмга олувчи] 1 с. т. Сурат чизувчи, сурат солувчи; рассом. *Сураткаш чизган манзара.*

2 айн. **фотограф.** *Новча сураткаш чигирткадай дам у ёққа, дам бу ёққа сакраганича, тинмай фотоаппаратини чиқиллатарди. «Ёшлик». Эшик оғзида рўйхатга олаётган қизларга юзландик. Ҳисобдан ўтиб, энди залга қараб юрган ҳам эдикки, нақ пешонамизда сураткашларнинг чироғи икки марта ярқ этди. М. М. Дўст, Лолазор.*

СУРАТКАШЛИК Сурат чизиш ёки сурат олиш билан шуғулланиш; сураткаш касби. *Сураткашлик қилмоқ.*

СУРАТЛАНМОҚ кам қўлл. айн. **гавдаланмоқ.**

СУРАТЛИ 1 Сурати, суратлари бўлган; суратлар билан безатилган. *Суратли журнал.* ■ *Мен суратли китобни яхши кўраман. Мирмуҳсин, Умид.*

2 *поэт.* Бирор кўринишга эга бўлган, кўринишидаги, қиёфасидаги. *Қараса, Юсуф талғатли, Искандар савлатли, Рустам жасадли, ажаб суратли бир йигит ёнбошлаб ётибди. «Маликаи айёр». Малойик суратли, гул юзли дилбар, Ростин дегин, дилбар, қайдин бўласан? «Маликаи айёр».*

СУРАТХОНА [сурат + хона] эск. 1 Фотосурат олинадиган ишхона, фотография.

2 Расмлар музейи, галереяси.

СУРАТЧИ с. т. 1 айн. **рассом.** *Суратчи чизган портрет.*

2 айн. **фотограф.** *Бизнинг суратчимиз яна сурат олди. Хотин бундан жуда хурсанд бўлди. Ҳ. Олимжон, Танлаган асарлар.*

СУРБЕТ Гап таъсир қилмайдиган; сур, безбет. *Сурбет одам.* ■ *Баширжон енгил нафас олиб: «Уф, хайрият! — деди ва: -Жуда исқирт, сурбет чол-да! — дея қўшиб қўйди. Н. Аминов, Ёлғончи фаришталар. Тоғай унинг башарасига текилиб тураркан, кўнглида шу истакни туйди: қани энди бу сурбетни қўли*

толгунча қамчин билан саваласа, отга топтатса.. «Ёшлик».

СУРБЕТЛАРЧА рви. Сурбет одамлардек, сурбет одамларга хос равишда гапга парво қилмай. - *Энди хотинимиз ўқимаган хотин, — сурбетларча илжайди Обидов. С. Зуннунова, Олов. Бир ёқда Тўйчининг сурбетларча зуғум қилиши, бир ёқда тийинлаб тўпланган икки мингдан ажраб қолаётгани Рисолат холани ўртаб юборди. А. Кўчимов, Ҳалқа.*

СУРБЕТЛАШМОҚ Сурбет, безбет бўлиб бормоқ.

СУРБЕТЛИК Сур, безбет бўлишлик; сурбет эканлик. *Унинг сурбетлиги мени ганигиб қўйди. «Ёшлик».*

2 Сурбет одамларга хос иш, хатти-ҳаракат, қилиқ. *Қоровой ака ҳеч қандай савол-жавобсиз ичкарига кириб, сурбетлик билан салом берди. К. Яшин, Ҳамза. Лекин билинг, бунақа сурбетлик билан.. ҳеч қачон косангиз оқармайди. «Ёшлик».*

СУРГАМОҚ айн. **судрамоқ.** *Маматнинг катта ўғли аёлнинг қўлидан косовни тортиб олиб, сўкина-сўкина, уни четга сургади. «Ёшлик». Эти сўнгақларидан ажралиб кетаётгандек, бесўнақай гавдасини аранг кўтарганча, тегирмон бўйлаб оёқларини сургаб босарди. «Афсунгарлар туҳфаси».*

СУРГИ I Ични юмшатадиган, сурадиган дори-дармон. *Сурги ичмоқ. Сурги дори.* ■ *Тузли сургилар мунтазам ишлатилганда, улар ичакни таъсирлантириши натижасида ичак шиллиқ пардаси яллиғланиши мумкин. «ЎЗМЭ».*

СУРГИ II шв. Юз-қўл артадиган сочиқ, лунги.

СУРГУН эск. 1 Давлат органларининг қарори ёки суд ҳукми билан жазо тариқасида бошқа бир ерда яшаш учун мажбурий равишда кўчириш; бадарға. *Сургун қилмоқ. Сургунга юбормоқ.* ■ *Сал норозилик қилиб, ишдан бўйин бурганларнинг боши балога қолар, бундайларга сургун, бадарға доимо таҳдид солиб турарди. К. Яшин, Ҳамза. Бош вазир Исфандиёрни тахтдан тушириш йўлини ўйлаб, уйи томон борар, хон эса Исломуҳжани сургун қилиш ё қатл этиш режасини туза бошлаган эди. С. Сиёев, Аваз.*

2 Шундай жазога маҳкум этилган кишилар бадарға қилинадиган жой ва у ердаги ҳаёт. *Бир ўқитувчи рус аёл ҳам сургун қилинган экан. У сургундаги саводсизларни ўқита*

бошлади. П. Турсун, Ўқитувчи. *Сургунда қон ютган йилларни айтиб, Дер экан: -Эсимда: бир вақтлар йироқ Юртда бошимизга тушганди фироқ.* М. Шайхзода.

СУРДОЛОГ [лот. surdus – қар + лот. logos – сўз, тушунча; таълимот] Қар ёки заиф эшитувчи болаларни ўқитувчи педагог. *Малакали сурдолог тарбиячи ва ўқитувчилар Б. Исмоилова, Д. Ражабовалар болалар билан эринмай шуғулланишади.* Газетадан.

СУРДОПЕДАГОГИКА [лот. surdus – қар + педагогика] Дефектологиянинг қар ёки заиф эшитувчи болаларни ўқитиш ва тарбиялаш жараёнларини ўрганувчи тармоғи. *Сурдопедагогика отоларингология, акустика, логопедия, умумий педагогика, тилшунослик, психология, физиология билан узвий боғлиқ.* «ЎзМЭ».

СУРИК [қад. р. сурикъ – қизил бўёқ < юн. surik – сурия бўёғи] 1 Таркибида кўрғошин оксид ёки темир оксид бўлган, техникада ва лоқ-бўёқ санотида қўлланилган минерал.

2 Шундай минералдан тайёрланган қизғиш-зарғалдоқ ёки қизғиш-жигарранг бўёқ.

СУРИЛМА 1 У ён-бу ён суриладиган; сурма. *Сурилма қопқоқ.*

2 геол. Тоғ жинсларининг гравитация жараёнига таъсирида ёнбағир бўйлаб пастга томон силжиши. *Ётиқ сурилма. Тик сурилма.*

■ *Қизилжарга соҳиллардан сурилмалар кўп тушган, қанчалаб арчаларнинг илдизлари очилиб ётар.. эди. Ш. Холмирзаев, Сайланма.*

СУРИЛМОҚ 1 **Сурмоқ** фл. ўзл. ва мажж. н. Орқа қаторда ўтирган кексароқ бир рус, скамейка четига сурилиб, *Икромжонга ёнидан жой кўрсатди. С. Аҳмад, Уфқ. Уларни [лолаларни] ердан кавлаб олиш жуда осон. Кавланмайди ҳам, шунчаки тупроқ четга сурилса бас, ҳар лола тупи сопол туваги билан очилиб қолади. М. М. Дўст, Лолазор. Кечга бориб хон: «Ғолиблар шарафига.. зиёфат берилсин», деб фармон берди. Тонготар бзм бўлиб, кайф-сафо сурилди. Ж. Шарипов, Хоразм.*

2 Иши орқага кетиб пастлашмоқ, қатордан, сафдан чиқмоқ. *Бечора, иши юришмай, анча сурилиб қолибди.*

СУРИНМОҚ 1 Қоқилиб-суқилиб, туртиниб юрмоқ. *От суринмай, йўл танимас. Мақол. ■ Нурбек сўқмоқ устида ётган тўнкага суришиб йиқилди. Кафтию юзи,*

тиззалари сидирилди. «Ёшлик». Лоилоҳа қудратингга, илоҳим, Йиқилсам, суринсам, пушти паноҳим. «Юсуф ва Аҳмад».

2 Қийин аҳволга тушмоқ, қийинчилик билан кун кўрмоқ. *Бўлар-бўлмас уринма, Охирида суринма. Мақол. ■ Биров ҳолинг не деб сўрармикан, деб умид қиламан. Яққаланганинда, суринганинда бу жуда билинади. «Ёшлик». Мудҳиш шарпалардек суринган халқнинг Оҳу фиғонлари тутун ё губор. Ф. Фулом, Танлаган асарлар.*

СУРИШ 1 **Сурмоқ** фл. ҳар. н. *Нарсаларни у ёққа-бу ёққа суриш. Ишни олдинга суриш. Хаёл суриш. ■ -Жамоани орқага суришга, обрўйини тўқишга ҳеч қандай ҳаққингиз йўқ. – деди директор. Газетадан.*

2 фольк. Жанг, уруш. *Оломондан неча ўлиб, Жуда қирғин суриш бўлди. «Фольклор».*

СУРИШМОҚ 1 **Сурмоқ** фл. бирг. н. *Умид билан бир ёстиққа бош қўйиб, нималарни орзу қилишмасанди. Кучоқлашиб, кўзуга тикилганча, ширин ўйлар суришарди. «Ёшлик».*

2 Жанг қилмоқ, олишмоқ. *Ҳасанхон шу майдонда урушиб, суришиб, олишиб, солишиб, урушмоқдан армони қолмади. Эргаш Жуманбулбул ўғли.*

3 с. т. *Мириқиб шахмат ўйнамоқ, шахмат тахтасида жанг қилмоқ. Бироқ масаллиқ қозонга тушиб, улар беш-олти қўл эзилишиб шахмат суришди ҳамки, Зиёд муддаога ўтмасди – ёрила қолмасди. М. Мансуров, Ёмби.*

4 Ҳисоб-китоб қилиб, бир-бирига ўтган қарз ёки ҳақни тўлаб, орани очмоқ. *-Дийдиёйингни қўй, – деди Зариф найза. – Ака-ука кейин суришиб кетаверасанлар. Х. Султонов, Бир оқшом эртаги.*

СУРИШТИРМОҚ I Биридан бирига ёки у ён-бу ён сурмоқ. *Харажатларни бир моддадан иккинчи моддага суриштириб қопламоқ. Нарсаларни суриштириб, икки яшикка жой қилмоқ.*

СУРИШТИРМОҚ II Бутун тафсилоти билан билиб олиш, тагига етиш учун сўроқлайвермоқ, сўраб-сўраб билмоқ, аниқламоқ. *Авлодни суриштирмоқ. Узумини е, боғини суриштирма. Мақол. ■ Суриштириб келса, ҳаммамиз бир томирданмиз. «Ёшлик». Қийимлари-да нақ рисоладагидек: бошдан-оёқ чет элники. Феълни суриштирсангиз, мисоли ўт-олов! «Ёшлик».*

Суриштирмай ёки суриштирмасдан 1) сўроқлаб аниғини билмасдан, аниқламай-нет-

май; 2) фарқига бормай, фарқ қилмай, ара-лашига. *У овқатнинг яхши-ёмонини суриш-тирмайди.*

СУРКАЛМОҚ 1 *Суркамоқ* фл. мажҳ. ва ўзл. н. *Деворга суркалмоқ.* ■ [Мухсина хоним:] *Ҳадеганда йўғлай олмайман, айниқса, кинода панд беради шу одатим, ноиложликдан дори суркалган рўмолчани кўзга суртаман.* М. М. Дўст, Лолазор. *Урғочи шер ҳеч қандай ҳужум қилмасдан, кўзидан ёшини тўкиб, ерга суркала-суркала келаверибди.* «Эртақлар».

2 Ёйилиб кетмоқ, ёйилиб, ифлос, доғ-дуғ бўлмоқ. *Стул қимирлаб, хатим суркалиб кетди.*

3 *кўчма салб.* Хиралик билан суқилмоқ, ёпишмоқ, кимса атрофида ёки бирор доирада ўралашиб юрмоқ, пашшахўрда бўлмоқ. *Мулла Мамасолиҳ Уста Бабудни ийдириш учун хушомадомуз бир оҳангда балчиқдай суюлиб, суркалиб давом этди.* Н. Мақсудий, Лайлагулқадр.

СУРКАМОҚ 1 Бирор нарса бетини, сир-тини бошқа нарса бетига, сиртига ишқамоқ, суйқамоқ. *Товонини гиштга суркаб ювмоқ.*

2 Бирор нарса бетига, сиртига юқади-ган ёки сингийдиган нарса бермоқ, сурт-моқ. *Деворга бўр суркамоқ. Машинага мой суркамоқ. Ярага дори суркамоқ.* ■ [Унсин] *Ичкари уйда ўтириб, маҳсиларга шон қоқадди, шондан туширади, пардозлайди, қора гул, лок суркайди.* Ойбек, Танланган асарлар. *Мели полвон Худойқулга яна имо қилди: -Қани, бармоғингни тўғрила, - деди ва.. бош бармоғига сиёҳ суркади.* П. Турсун, Ўқитувчи.

СУРКАТМОҚ 1 *Суркамоқ 2* фл. орт. н. *Оёғига дори суркатмоқ.*

2 Ёйилтириб юбормоқ, ёйилтириб, ифлос, доғ-дуғ қилмоқ. *Хатни суркатиб юборибди.*

СУРЛАМОҚ Осиб кўйиб қуришмоқ, қоқ қилмоқ, қоқламоқ. *Гўшт сурламоқ. Балиқ сурламоқ.*

СУРЛИК Безбетлик, сурбетлик; шил-қимлик. *Сурлик хўрлик келтирар.* Мақол.

СУРМА 1 1 Менделеев даврий система-сининг V гуруҳига мансуб кимёвий элемент, кумушсимон оқ, мўрт металл. *Сурма кони.* *Сурма рудаси.* ■ *Сурманинг алюминий, галлий, индий билан ҳосил қилган қотиш-малари яримўтказгичлар ишлаб чиқаришда қўлланади.* «ЎЗМЭ».

2 Таркибида шу элемент бўлган қорам-тир пардоз бўёғи (қош, киприкларни бўяш учун ишлатиладн). *Сурма қўймоқ. Кўзига сурма тортмоқ. Ўсма кетар - қош қолар, Сурма кетар - кўз қолар.* Мақол. ■ *Саломатнинг сурма тортилган кўзлари ола-кула бўлиб кетди.* Х. Султонов, Бир оқшом эрта-ги. *Юзлари худди олмадай таранг. Бир жуфт қуралай кўзи сурма босгандай қора, бир қараш биланоқ юрагимни така-пука қилиб ташлади.* Ҳамза, Танланган асарлар.

Сўқир кўзга сурма Номуносиб ёки беҳу-да иш қилган кишига нисбатан айтилади-ган ибора. *Ўрмонжон кулди: -Сўқир кўзга сурма.. нима қиласизлар, нима қиласан ал-даб? А. Қаҳҳор, Қўшчинор чироқлари.*

СУРМА II Суриладиган, сурилма. *Сурма қопқоқ. Столнинг сурма яшиги.*

СУРМАДОН Сурма солинадиган идиш. *Бир кун сени кўтариб, қўшининикига ўтдим. Уй эгаси ичкари ҳовлида экан, ташқарида сурмадон қўйилган эди.* «Саодат».

СУРМАЛИ 1 Таркибида сурма бўлган. *Сурмали тоғ жинси.*

2 Сурма қўйилган ёки сурма қўйилган-дек қора. *Кўйлақлари бурмали, Қошу кўзи сурмали Қайнопасига бир салом.* «Қўшиқлар». [Баширжон] *Ниҳоят, жувонни чироқ томон ўгириб, чўғдек ёнаётган сурмали кўзларига ютоқиб тикилди.* Н. Аминов, Қаҳқаҳа.

СУРМАРАНГ Тўқ симоби ранг, қорам-тир. *Уфқдаги олачалпоқ булутлар қирмизи ранга кирди, денгиз қорайиб, сурмаранг тус ола бошлади.* «Ёшлик». *Сурмаранг духоба дўтпи кийган, кўса, олтмишларга борган жиккак киши электр плитада қайнаётган сувни кичкина рух чойнақчасига дамлаб олаётган эди.* Ў. Усмонов, Қисмат.

СУРМАЧЎП Сурма суртадиган махсус ингичка чўп.

СУРМОҚ 1 Итариб, бир жойдан иккин-чи жойга кўчирмоқ; жилдирмоқ, силжит-моқ. *Ориқ, кўзи ичига тортиб кетган, ияк-лари ингичка келин айвон тахмонндаги сан-дикни нари-бери сурар эди.* «Саодат».

Олдинга сурмоқ 1) олд томонга сил-житмоқ; 2) *кўчма олға бостирмоқ. Ишни ол-динга сурмоқ. Орқага сурмоқ қ. орқа. Акаси қисташини қўймабди, укаси эрта-индин, деб орқага суришини қўймабди.* «Эртақлар». **Сув сурмоқ** Суғориш учун сувни бирор томонга йўналтирмоқ, йўналтириб олиб бормоқ. *У*

[Йўлчи] ер ҳайдади, чоғиқ чопди, сув сурди, далага гўнғ ташиди. Ойбек, Танланган асарлар. **Суриб бормоқ** Куч билан сиқиб, босиб бориб, илгари ҳайдамоқ. *Ҳайдар, рақибини суриб бораётиб, чалиниб йиқилиб тушиди.* И. Раҳим, Ихлос. **Суриб кетмоқ** 1) куч билан олиб, тортиб, судраб ёки эргаштириб кетмоқ. *Тингловчи эса шу дарё юзидаги елканга ўхшайди. Сизларга кўчган хотиралар эса елканни суриб кетувчи шамолга ўхшайди.* А. Нурмуродов, Уруш бевалари; 2) олиб қочмоқ (от ҳақида). *Саман хуркиб, келган томониға — Кукоролга суриб кетди!* Х. Назир, Сўнмас чақмоқлар; 3) кўчма фойда бермай, зарар келтирмоқ. *Ҳаром пул суриб кетади.* **Суриб чиқармоқ** Куч, тазйиқ билан сиқиб чиқармоқ. *Қисм қоронғи тушгунча душманни олдини оқоплардан суриб чиқарди.* А. Қаҳҳор, Олтин юлдуз. **Четга сурмоқ** 1) чет томонга силжитмоқ; 2) кўчма четга чиқариб юбормоқ, четлатмоқ.

2 Юрмоқ (шахмат ва шашка ўйинида). *Пиёдани сурмоқ. Филни сурмоқ.*

3 Бирор томонга йўналтирмоқ, солмоқ. *Лашкар сурмоқ. Карвон сурмоқ.* ■ *Ажаб, бунда нечун ёлғиз юради, Ким экан у, кечаси от суради? «Гулшанбоғ». Фиротга мен аччиқ қамчи урайин, Ёв кетиндан шу кеча от сурайин. «Гулшанбоғ».*

4 с. т. Суртмоқ, суркамоқ. [Нафиса] *Икки қўли ёрилган, ҳадеб глицерин сурмоқ ҳам фойда бермасди.* Мирмуҳсин, Қахрамоннома.

5 Отлар билан кўшма феъл ясаиди, мас., *давр сурмоқ, кайф сурмоқ, хаёл сурмоқ, ҳукм сурмоқ.* ■ *У шилдираб оқаетган ариқ ичидан балиқчалар излаб, хаёл сураётган Ҳафизага боқиб турарди.* Мирмуҳсин, Умид. *Уларни кузатиб турган она, қизининг энг ўйнаб-куладиган, аёллик, оналик бахтини сурадиган вақти ўқиш билан ўтаётганига ачинар.. эди. С. Нуров, Майсаларни аёз урмайди. Боғда гулли тергин энди, Давру даврон сургин энди.* «Гулнорпари».

Насл (ёки суяк) сурмоқ Наслдан наслга ўтмоқ (бирор касаллик, ирсий ҳолат ва ш.к.). **Тирноғи сурибди** Янги тирноқ чиқиб ва ўсиб, эски, зарарланган тирноқни туширибди. **Умр сурмоқ** Умр кўрмоқ, яшамоқ. **Қалам сурмоқ айн. қалам тебратмоқ қ. тебратмоқ.** *Навоий улуғ форс шоирлари каби, шеърнинг ҳамма шаклларида қаламни жасур сурди.* Ойбек, Навоий.

СУРНАЙ [ф. سورناى — тўйда чалинадиган най < سور — тўй, зиёфат + ناى — най, сибизға] Тешиқларини бармоқлар билан очиб-ёпиб, пуфлаб чалинадиган мусиқа асбоби. *Сурнай овози. Сурнай навоси. Сурнай чалмоқ.* ■ *Энди билдим, бир кун сенинг тўйинг бўлиб, Сурнай йиғлар саҳаргача ўйин бўлиб.* М. Юсуф, Уйқудаги қиз. *Хоразм отлиқ аскарлари карнай, сурнай, ноғора садолари остида душман билан чоғқилаша бошладилар.* М. Осим, Карвон йўлларида. *Қирқин қизлар қўлларига карнай-сурнай, чилдирма, чанқовуз олиб, ҳар қайсиси бир нағма қилиб бораётур.* «Маликай айёр».

Сурнайингни тортма Йиғи-сиғи қилаверма, йиғингни кўй. **Сўк ошига сурнай кест.** Арзимаган ишга ортиқча дабдаба, дарангдурунг қилинган ҳолларда ишлатиладиган матал.

СУРНАЙЧИ Сурнай чалувчи одам. *Ғатгат қилган карнайчи, Балога қолган сурнайчи.* Мақол. *Қарға қақимчи экан, ғоз карнайчи экан, ўрдак сурнайчи экан..* (эртакларнинг бошламасидан).

СУРОБ: суроби тўғри бўлмоқ (ёки тортилмоқ) 1) ҳолдан тоймоқ, ҳол-жони қолмаслик. *..Турқинга бир қара, икки кунда суробинг тўғри бўп қопти-ю!* «Ёшлик»; 2) адабини, таъзирини емоқ; бўлари бўлмоқ. *Хўп, бу одамнинг бугун қўли узун. Эртага-чи? Эртага суроби тўғри бўлгач, бу думбул эркатой нима қилади? «Ёшлик».* **Суробини тўғриламоқ (ёки тортмоқ)** 1) ҳолдан тойдирмоқ, жонини кўзига кўрсатмоқ; 2) адабини, таъзирини бермоқ, кунини кўзига кўрсатмоқ. [Турди ғилай:] *Шошмай тур, сеням суробингни тўғрилаб қўядиган пайт келади.* А. Кўчимов, Ҳалқа.

СУРОН 1 Кучли шовқин, ғовур-ғувур, шов-шув. *Бобур умрининг сўнги йилларида саройдаги хушчақчақ сурон билан тўла базму томошалардан совиган эди.* Х. Султонов, Бир оқшом эртаги. *Сурон тиниб, ҳамма яна жойига ўтириб бўлгач, Ошно ҳеч гап айтмагандай, воҳа раҳбарига юзланди-да, жўнгина сўради..* М. М. Дўст, Лолазор.

Сурон солмоқ (ёки кўтармоқ) Кучли шовқин кўтармоқ, шовқин солмоқ, ғовур-ғувур қилмоқ. *Кўпчилик дам урса, бўлади бўрон, Саҳрога солади даҳшат ва сурон.* А. Пўлат. *Тракторлар сурон кўтариб, ер бағрини тилка-пора қилади.* «Шарқ юлдузи».

2 **ҳарб.** Қўшинларнинг жанг майдонида бир-бирига қарама-қарши турган ёки ҳужум вақтидаги аскарлар ҳайқириғи.

3 **кўчма** Катта қийинчилик, азоб, машаққат. *Суронлар йўлимда турибди кутиб, Ўзинг қўлла энди мени, онажон.* А. Орипов, Йиллар армони. *Балки, ўз набиралари қучоғида осуда ҳаёт кечираётгандир? Ҳар уруш суронлари ёдга тушганда, юракда бир оғриқ билан сизларни эслар? «Шарқ юлдузи».*

СУРОНЛИ 1 Шовқин-сурон, говур-гувур билан тўлган; шовқинли. *Суронли жанглар.* ■ *Никоҳ тўйи фавқулодда суронли ва тантанали бўлди.* Ойбек, Танланган асарлар.

2 **кўчма** Дабдабали, бўронли. *Суронли йиллар.*

СУРП Сидирға ип газлама ва ундан тикилган кийим. *Оқ сурп. Қора сурп. Сурп яктак.* ■ *Корхонанинг 2-тўқув цехи жамоаси ноябрь ойида 85200 метр хом сурп тўқиб, режа топшириқларини бажарди.* Газетадан. *Меҳмонлар кун оққанда келишди. Ҳаммаси силлиқ дазмолланган қора шим, ени калта оқ сурп кўйлак кийишган.* С. Нуров, Нарвон. *Майкачан, оқ сурп иштон.. кийган Аҳмад бригадир пайкалда ўт ўраётган эди.* С. Нуров, Майсаларни аёз урмайди.

Хом сурп айн. без П.

СУРПА шв. айн. супра.

СУРРА 1 Кенг ола-була йўлли маҳаллий нимшойи мато. *Бир жўра сурра. Сурра тўн.* ■ *Адҳамбой маъракасидан кийган сурра пўшакни.. волидангиз ҳайф кўрди.* А. Қодирӣ, Кичик асарлар.

2 Шундай матодан тикилган тўн. *Сурра тўн.*

СУРРАНГ айн. сур III 2. *Сурранг ипак.* ■ *Бу кўчаларнинг тупроғи ҳам бошқа: йўл-каларга сурранг майда шлак тўкилибди, юрганда гичир-гичир қилади.* А. Мухтор, Опасингиллар.

СУРРОГАТ [лот. *surrogatus* — бошқасининг ўрнига қўйилган] 1 Бирор нарсанинг ўрнида ишлатиладиган, лекин унинг ўрнини тўла боса олмайдиган, унинг хоссалари-гагина эга бўлган нарса. *Озиқ-овқат суррогатлари.* Сахарин — қанднинг суррогати. ■ *Тўғри, на матнининг, на оҳангининг тайини йўқ, маза-матрасиз ашулалар, тақлид ва кўчирмакашликдан иборат суррогатлар ҳам кам эмас.* Газетадан.

СУРСАТ эск. фольк. Ўлпон, солиқ. *Учқур эдинг, қанотингдан қайрилдинг, Югурук бўлсанг, туёғингдан тайрилдинг, Биз овқатдан, сен сурсатдан айрилдинг.* «Алпомиш».

СУР-СУР 1 Тиқилинчдаги ур-йиқит ҳаракати, бир-бирини туртиб-суртиб, итариб, босиб бориш. *Бозордаги сур-сур.* ■ *Давидни сур-сур қилиб, қоронғи бир хонага олиб кириб кетишди.* Ё. Хаимов, М. Раҳмон, Ҳаёт-мамот.

2 Жанжал, олишув, тортишув. *Бу ғалва, сур-сур бўлиб, Қори ўша баттол амин билан чап бўлиб қолади.* Ш. Тошматов, Эрк қуши.

СУРТКИ I шв. Сочик лунги.

СУРТКИ II: суртки дори Ярага ёки оғриқ жойга суркаладиган дори.

СУРТМОҚ 1 айн. суркамоқ. *Деворларга бўёқ суртмоқ. Юз-қўлига совун суртмоқ.* ■ *Пайғамов лабига, чаккаларига билинар-билинимас атир суртди.* С. Нуров, Майсаларни аёз урмайди. *Аҳмад бригадир боласи олиб келган пиёзни белбоғидаги пичоқ билан иккига бўлиб, сувини боланинг бармоғига суртди.* С. Нуров, Майсаларни аёз урмайди. *Чол икки қўлини юзига суртди.* С. Аҳмад, Уфқ.

2 Артмоқ, артиб-суртиб тозаломоқ. *Гўр-ўғли қандай таом бўлмасин, еб бўлгандан кейин, агар сув ўрнига захар ичса ҳам, шу рўмол билан оғзини суртса, еган-ичгани баданига мойдай эриб, сингиб кетар эди.* «Гулшанбоғ».

Бурнига кесак суртмоқ Лақиллатиб, бирор нарсадан қуруқ қолдирмоқ, чув туширмоқ; фириб, панд бермоқ. **Кўзга (ёки юзга) суртмоқ қ. кўз.** *Кўзга суртиб, фарзанд, дедим, ўзингни, Жон борида суртдим кўзга изингни.* «Маликаи айёр». **Оёғига юз суртмоқ** 1) оёғига йиқилмоқ, бош урмоқ, ялиниб, илтижо қилмоқ; 2) таовф қилмоқ, кимсани муқаддас билиб зиёрат қилмоқ.

СУРУВ Қўй-эчки подаси. *Сурув боқиб, қир бағрида юрдингми, Қўйлар боқиб, хўб кай-фингни сурдингми?* «Гулихиромон». *Илгарилари Усмонали дўхтирнинг қўли қўлига тегмасди. Ҳали мол фермасида, ҳали яйловга чиқиб кетган қўйлар сурувида, ҳали тоғда ўрмалаб юрган эчкилар орасида.* С. Аҳмад, Жимжитлик.

СУРУНКАЛИ Сурункасига, бетўхтов давом этадиган; узлуксиз. *Сурункали ёмғир.* ■ *Сурункали бавосирга янтоқ аралашмасидан тайёрланган малҳам қўлланади.* «Фан ва турмуш».

Сурункали касаллик Тузалиши қийин бўлган, давомли ёки ҳеч тузалмайдиган касаллик.

СУРУНКАСИГА *рвш.* Муттасил равишда, узлуксиз, бетўхтов. *Тўрт йил сурункасига битта ўқишга кираман деб.. бу йигитнинг қийинчиликларни писанд қилмаслиги [Сатторни] ҳайрон қолдирди. Ў. Усмонов, Қисмат. Башарти бу ҳол сурункасига давом этадиган бўлса, ўқувчи сержаҳл бўлиб қолиши мумкин. «Фан ва турмуш».*

СУРУР [*а.* سرور — шодлик, хурсандчилик, шодиёна] *поэт.* Шод-хурсандлик ҳисси, нашъаси; севинч, қувонч. *Кўклам нохуш кўнгилнинг бир четини ёриштириб турар, сурур, севинч бағишлар, кўркини «кўз-кўз» қиларди. М. Хидир, Қирғоқлар. Шамдонлардан шамлар ҳам гўё Ёруғ тортди — қўшилди сурур. Х. Даврон, Тўмариснинг кўзлари.*

СУРХ [*ф.* سرخ — қизил, қирмизи; қизартириб қовурилган] Ёш, янги, сурхун (новда ҳақида). *Сурх новда. ■ Зум ўтмай, тутнинг сурх новдалари орасидан бошқаси учиб чиқиб, унга қўшилди. Кейин қир устида сўфитўрғай нозик чулдиради. М. Мансуров, Ёмби.*

СУРХОН Узум турларидан бирининг номи ва шу узумдан солинган майиз.

СУРХУН [*ф.* سرخون — тўқ кулранг] *айн.* **сурх.** *Ерга дув этиб қор тўкилди. Ёш сурхун новдалар оғир юкларидан бўшаб, қадларини кўтарди. М. Исмоилий, Бизнинг роман.*

СУРЪАТ [*а.* سرعت — тезлик, жадаллик; шошилиш, ошиқиш] **1** Иш-ҳаракат, воқеа-ҳодиса, жараён ва ш.к. нинг жадаллик даражаси; тезлик; шошилиш. *Қурилиш суръати. Иш суръатлари тобора ошмоқда. ■ Қурилиш иши қишин-ёзин тўхтамайди, жадал суръат билан кетиб.. муддатдан анча бурун битди. А. Қаҳҳор, Қўшчинор чироқлари.*

2 *эск. айн. тезлик 2. Лекин ул ҳаромзодаи бедин орқамдин тамоми бир суръат билан қувлаб келур эрди.. А. Қодирий, Кичик асарлар.*

СУРҒУЧ 1 Тез эриб, тезда қотадиган рангдор смола ва мум қотишмаси. *Қизил сурғуч.*

2 Шундай смола ёки мумдан фойдаланиб босилган тамға, қопқоқ ва ш. к. *Кулфнинг сурғучини кўчирмоқ. ■ Полвон этигининг кўнжидан пичоқ олиб, унинг сопи билан*

бутилка учудаги сурғучни уриб туширди. С. Аҳмад, Қадрдон далалар.

СУРҒУЧЛАМОҚ Сурғучдан фойдаланиб тамға босмоқ ёки қопқоқламоқ. *Кулфни сурғучламоқ. ■ Даҳлиздан унинг [Нозимнинг] нимадир деганча хохолаб кулгани эшитилди. Хиёлдан сўнг каттакон биллур бодияда шарқона ачиқ-чучук ҳамда оғзи сурғучланган узунчоқ бир шишани столга келтириб қўйди. Н. Қиличев, Чиғириқ.*

СУС: **кўнгли сус кетмоқ** Кўнгли жуда ҳам тусаб кетди. *Кўнглим олмага сус кетди.*

СУСАЙИШ 1 **Сусаймоқ** *фл. ҳар. н. Суръатнинг сусайиши.*

2 Кейинга кетиш, таназул.

СУСАЙМОҚ 1 Илгариги кучини, шиддатини йўқотмоқ; секинлашмоқ, пасаймоқ. *Нусратбекнинг ташидаги титроқ бир оз сусайди, секин, вазмин, салмоқ билан одимлаб кетди. С. Нуоров, Майсаларни аёз урмайди. Ҳарсиллашлар сусайиб, тиқ этган товуш ҳам аниқ эшитилади. Қаердадир, ер остида, юмронқозиқ ниманидир келтиради. М. Мансуров, Ёмби. Ниҳоят, чаккасидаги шанғиллаш сусайиб бориб, алланарса жинг этди-ю, қулоқлари очилиб кетди. М. Мансуров, Ёмби.*

2 Шаштидан қайтмоқ, илгариги ғайратини, жўшқинлигини ёки қизиқшини йўқотмоқ; бўшашмоқ, пусмоқ. *[Кумуш] Кундан-кунга Зайнабнинг сусайиб, ўзига бегоналашиб борганини яхши англари эди. А. Қодирий, Ўтган кунлар.*

Меъдаси сусаймоқ Меъдаси овқатни яхши ҳазм қила олмайдиган бўлиб қолмоқ.

3 Кучини, таъбирини йўқотмоқ, кучсизланмоқ. *У [Ҳакимбойвачча] юртдаги тинчсизликнинг сабабини диннинг сусайганидан, уламоларнинг халққа раҳбарлик қилмаганидан кўрди. Ойбек, Танланган асарлар.*

4 Бўш қўйилганлик натижасида орқага кетмоқ, ёмонлашмоқ, пасаймоқ, бўшашмоқ. *Интизом сусайди.*

СУСПЕНЗИЯ [*лот.* suspensio — илиш, осииш; илиниш, осилиш] *физ.* Таркибида майда қаттиқ зарралар муаллақ ҳолда бўлган суяқлик. *Бу турманнинг деярли ҳамма хўжаликларида хлорелла суспензияси ишлаб чиқарадиган қурилмалар ишлаб турибди. «Фан ва турмуш».*

СУСТ [*ф.* سست — бўш, кучсиз, нимжон; бўшанг, ланж; қатъий эмас; зич эмас] **1** Унча кучли, шиддатли бўлмаган; секин, паст.

Суст оқим. Суст олов. ■ Тез маслаҳат ёвнинг буйинин эдидурур, Суст маслаҳат бул ўлжадан қўйдурур. «Гулихиромон». Эрталаб туриб, газета варақлашга юрагим дов бермайди. Нега қўрқаман, нимага ишончим суст? А. Мухтор, Асарлар.

2 Секин иш қиладиган, камфаол, имиллаган; сусткаш. *Суст одам. Бозор суст. Қўли суст косибдан оёғи чаққон гадой яхши. Мақол. ■ Омборхоналар таъминоти суст амалга ошириляпти.* Газетадан.

3 Ланж, бўшашган. *Даввогар суст бўлса, қози муттаҳам бўлади.* Мақол.

СУСТКАШ [ф. *سستكاش* – ланж, беғайрат] Секин қимирлайдиган, имиллаб иш қиладиган; суст, ланж. *Сусткаш одам. Сусткаш уста.*

СУСТКАШЛИК Суст бўлишлик, имиллашлик, бўшашганлик, ланжлик. [*Али тажанг*] *Элатлари қошига келиб ёнбошлагач, унинг эски сусткашлиги тўғрисида ҳазил қилишди. Ойбек, Куёш қораймас. Қийинчиликларни баҳона қилиб, сусткашлик қилсак, катта меҳнат эвазига етиштирилган ҳосилни бой бериб қўйишимиз мумкин.* Газетадан.

2 Сусткаш одамларга хос хатти-ҳаракат, суст иш; сустлик.

СУСТЛАНМОҚ Суст бўлиб қолмоқ, секинламоқ, пасаймоқ, сусаймоқ. *Султонали бир оз сусланиб, ўзидан ўн от одими йироққа борган тунқотарни чақириб тўхтатди. А. Қодирий, Меҳробдан чаён.*

СУСТЛАШМОҚ 1 Тобора сусайиб, секинлашмоқ, пасаймоқ. *Иш сушлашди. ■ -Диёра, – мурोजаат қилди Жонибек негадир тобора қадам олиши сушлашиб. «Шарқ юлдузи». Исми тилга олиними билан Ажабнинг нафас олиши сушлашди. «Шарқ юлдузи».*

2 айн. **бўшашмоқ II 6.** [У] *Интизомнинг сушлашиб кетаётганини, бунга баъзи командирларнинг ўзлари ибрат кўрсатаётганларини.. сўзлади. Шухрат, Шинелли йиллар.*

СУСТЛИК 1 Шашти пастлик, ғайратсизлик; кучсизлик; ланжлик. *Йигитлик – мастлик, Қариллик – сустлик.* Мақол. ■ *Юсуфбек ҳожии.. ўғлининг бу сустликка ўхшаб кўринган ҳолини ёмонга йўйди. А. Қодирий, Ўтган кунлар.*

2 Суст одамларга хос хатти-ҳаракат, суст иш; сусткашлик. *Ўртоқлар.. ишга келганда, сустлик, ҳафсаласизлик қилишди. Ойбек, О. в. шабадалар.*

СУТ 1 Одам (аёл) ва сутэмизувчи ҳайвонларнинг лактация даврида сут безларида ишлаб чиқариладиган, янги туғилган наслни озиқлантирадиган мураккаб кимёвий таркибли оқ рангдаги суюқлик. *Сут безлари. Бола йўғламаса, она сут бермайди.* Мақол. ■ *Кўрагимда сутим деб, Юрагимда ўтил деб, Энаси шўр йўғлайди, Қайдасан, Аҳмадим, деб. «Ойсулув». Искандар елиннинг сўргичдек учларидан тиз-тиз отилиб чиқиб, хурмага оппоқ индек пов-пов чўзилиб тушаётган сутга ҳайрат билан тикилиб қолди. С. Нуров, Майсаларни аёз урмайди.*

2 Сигир, қўй, эчки ва ш.к. чорва молларининг эмчагидан соғиб олинган шундай суюқлик (овқат ва маҳсулот сифатида). *Сигир сути. Ёғли сут. Сут саноати. Сут маҳсулотлари. Сутдан оғзи куйган қатиқни пуфлаб ичар.* Мақол. ■ *Кечаги чоршанба бозорда бир сигир олдим денг, егани қуруқ хашагу сутига қошиқ ботмайди – шундоққина қаймоқ. «Аския». Ошқозонда ҳазм бўлиб кетиши зарур бўлган дориларни сут билан ичиш мутлақо мумкин эмас. «Фан ва турмуш».*

3 Баъзи ўсимликларнинг танаси, пояси ёки ҳосилидаги оқ суюқлик. *Семизўтнинг сути. Думбул жўхорининг сути. ■ Бир куни Файзулла билан сути қотган думбул ўрикларни териб олиб, жуфтми-тоқ ўйнаб ўтирсак, кўчада биров чақиргандай бўлди. С. Сиёев, Ёруғлик.*

Она сути оғзига келмоқ қ. оғиз. *Наинки сен, ишлайверсак, бизларнинг ҳам, бил, Оғзимизга келиб қолар она сутимиз. А. Орипов, Йиллар армони. Она сути оғзидан кетмаган Ҳали ёш, турмушнинг аччиқ-чучугини, тажрибасини кўрмаган; гўдак. Она сути оғзидан кетмаган бола. Она сутидай ҳалол (ёки пок) қ. она. Оқ сутини оққа, кўк сутини кўкка соғмоқ қ. оқ. Сут билан кирган жон билан чиқади* Ёшлиқдан ўрганган одат ўла-ўлгунча сақланади, деган маънода ишлатиладиган матал. *Маҳдум.. Анварнинг бирор камбағал билан “ёзилишиб” ўтирганини кўрса.. “сут билан кирган, жон билан чиқар, мақоли кўп тўғри сўз”, деб ўйлар ва энгаси қотиб, четга кетар эди. А. Қодирий, Меҳробдан чаён. Сутдан оқ, сувдан тиниқ* Беғубор, пок, бегуноҳ одам ҳақида. **Хом сут эмган банда** (ёки **инсон**) қ. **эммоқ.** *Исҳоқ Махсум билан Уста Мўмин ҳам хом сут эмган банда эдилар.* Газетадан.

СУТАК 1 *айн. тентакқуш.*

2 қ. **сүтак.**

СУТКА [*қад. р. сутки* — кун билан туннинг туташуи жойи, чегараси] Бир кеча-кундузга, 24 соатта тенг вақт ўлчов бирлиги ва шу ўлчовдаги вақт. *Ойни тадқиқ қилишнинг амалий томонлари ҳам бор. Аслида Ой ракетада Ердан бор-йўғи бир неча суткалик йўл. «Фан ва турмуш». Одамга бир суткада бир килограмм нон ва умуман овқат, бир-икки литр сув ва йигирма беш килограмм ҳаво зарур. «Фан ва турмуш». Сутканинг ёруғ қисми тобора қисқариб бормоқда. «Ёшлик».*

СУТКАЛИ 1 Белгили сутка давом этган, сутка билан ўлчанадиган. *Икки суткалик парвоз.*

2 Бир сутка давомиди юз берадиган. *Кўешинг суткалик ҳаракати.*

СУТКАЛИК Бир суткага тўғри келади-ган. *Суткалик иш ҳақи. Суткалик ўртача ҳарорат.*

СУТЛАМА Адир, қир ва тоғларда ўса-диган, заҳарли сут ширани кўп йиллик ўт.

СУТЛИ 1 Ичида сути бор. *Сутли идиш.*

2 Таркибида сути бўлган. *Сутли ўт.*

3 Сут солинган, сут кўшилган. *Сутли кофе.*

4 Сут берадиган, софиладиган; софин. *Сутли сигир. ■ Зотли молим, хўш-хўш, Сутли молим, хўш-хўш. «Кўшиқлар».*

СУТПЕЧАК Пояси чирмашиб ўсади-ган, барглари юраксимон ёки уч бурчакли бегона ўт; илонпечак. *Сутпечак гўза тунлами ва бошқа зараркунандалар кўпайиши учун макон (вазифасини бажаради). «ЎЗМЭ».*

СУТТИКАН Поясида сутсимон шираси бўлган, тик ўсади-ган бегона ўт; чойяпроқ.

СУТУН [*ф. ستون* — устун; тиргак, тирговуч] 1 Устун, столба, колонна. *Пештоқ сутунлари.*

2 Газета, журнал ва ш.к. нинг ҳар бир устун. *Газета ҳар сониди шаҳар ободонлигига айрим сутун берадиган бўлди. А. Қаҳҳор, Сароб.*

3 *айн. графа 1.*

СУТХЎР Сутни яхши кўради-ган, кўп сут истеъмол қиладиган. *Сутхўр бола.*

СУТХЎРЛИК 1 Сутни яхши кўришлик.

2 Мириқиб сут ичиш. *Сутхўрлик қилмоқ.*

СУТЧИ Сут соғувчи ва сут сотувчи. *Сутчи аёл. ■ Оппоқ тонг отган эди. Шаҳар кўчаларига бирпасда жон кириб, асфальт йўлақларда тўқ-тўқ оёқ товушлари.. сут-*

чиларнинг чақирқлари эшитилди. А. Мухтор, Чинор.

СУТЧИЛИК 1 Сут сотиш билан шуғулланиш. *Сутчилик қилмоқ. ■ Шу тўртинчи йилда аъзолардан йиғилган сут, қатиқ, сузма ва сарийёларни сотиш учун шаҳарда сутчилик дўкони очилди. А. Қодирий, Обид кетмон.*

2 Сут етиштириш. *Сутчиликни ривожлантириш. Сутчилик фермаси.*

СУТЭМИЗУВЧИЛАР зоол. Болаларини ўз сути билан боқувчи умуртқали ҳайвонлар синфи. *Сутэмизувчилар ер юзидида Шимоллий қутбдан тортиб Антарктида қирғоқларигача бўлган барча ҳудудларни эгаллаган. «ЎЗМЭ».*

СУТҚОН Заҳарли сути бўлган ўсимлик, суғламанинг бир тури.

СУФ *этно.* Дам солганда, дуо ўқиганда, беморга ёки унга бериладиган нарсага нафас уриб чиқариладиган товуш; куф-суф.

Суф демоқ 1) дам солиб, дуо ўқиб нафас урмоқ. *Дадам раҳматли «туф» десалар, сувни тескари оқизиб, «суф» десалар, кўрнинг кўзини очиб юборадиган улуг зот эдилар. Ф. Фулом, Шум бола; 2) кўчма воз кечмоқ, йиғиштирмоқ; ташламоқ. Суф де шофёрлигигаю берадиган олти юз сўлкавойига! Қачон пулга зориқсанг, менга келабер. А. Мухтор, Туғилиш. Суф сенга (ёки сизга) кест. Баракалла сенга (сизга). Қанақа одамсиз ахир. Суф сизга-е! ..сиз билан ҳазил қиялпмиз-а? Ш. Тошматов, Эрк қуши.*

СУФИЙ [*а. صوفى* — жун газламага оид; тасаввуф вакили, зоҳид < صوف — дағал жун газлама] *дин.* Тасаввуф, суфийлик издоши, давомчиси, мухлиси.

СУФИЙЛИК *дин. қ. тасаввуф.*

СУФ-КУФ *айн. куф-суф.*

СУФЛАМОҚ Дам солиб, дуо ўқиб нафас урмоқ, суф демоқ. *Домла.. дуо ўқиб, отга дам урди, суфлади. Ойбек, Танланган асарлар.*

СУФЛЁР [*фр. souffleur* < souffler — уқтирмоқ, ўргатмоқ; секин айтиб турмоқ] Театрда саҳнага чиққан артистларга уларнинг сўзларини, томошабинларга кўринмайди-ган махсус жойда туриб, айтиб бериб, эслатиб турувчи ходим. *Тажрибали суфлёр. Суфлёр будкаси. ■ Театримизда.. режиссёр, костюмер, суфлёр.. ҳаммаси бор, фақат раҳбар йўқ. Ш. Саъдулла, Икки билагузук.*

СУФФИКС [лот. suffixus — қадалган, бириктирилган] тли. Сўз ўзагига кўшилиб, унинг маъносини ўзгартирадиган ёки бошқа сўз билан боғлаш учун хизмат қиладиган морфема; кўшимча. Сўз ясовчи суффикс. ■ ..сувчи, олмазор, онахон, китоблар сўзларидаги -чи, -зор, -хон, -лар кўшимчалари суффикслардир. «ЎЗМЭ».

СУХАН [ф. سخن — нутқ; сўз, ибора, суҳбат] Сўз; гап; суҳбат. Сухан қилмоқ. Сухан бошламоқ. ■ Бу зolim фалақдан минг дод айлайин, Қулоқ солгин, тўрт-беш сухан сўйлайин. Эргаш Жуманбулбул ўғли. Китобу дoston бир қанча назму наср ила ёздинг, Сухан майдонида жавлон қилиб топдинг зафар, Жомий. Ҳабибий, Девон.

СУХАНБОЗЛИК 1 Суҳбат, гаплашиш, чақчақлашиш. У [Раъно] ҳовлида Нафисахон, кампир бувилар билан ҳам жиндек суханбозлик қилиб, шатиллаганча жўнади. Мирмуҳсин, Умид.

2 айн. сафсатабозлик 2. Навоий суханбозлик қилмаган, масаланинг моҳиятини асло жўн тушунмаган. «Ёшлик».

СУХАНВАР [ф. سخنور — ёзувчи, шоир; нотик, сўзамол] **1 айн. сухандон 1.** Қулоқ солинг суханварнинг сўзига, Ўзи тирик, душман тушмас изига. «Хушкелди».

2 Ширинсўз, ширинсухан. Бўз қарчиғай эдинг, парвоз айладинг, Суханвар тўтисан, ҳар хил сўйладинг. «Равшан».

3 Кўп гапирадиган; сергап.

СУХАНВАРЛИК 1 Гапга чечанлик, сўзамоллик.

2 Ширин суҳбат. Бунда келинг, иним, бир нафас суханварлик қилайлик. Ойбек, Навоий.

СУХАНГАР [ф. سخنگار — сўзловчи, гапирувчи] айн. **суханвар 1, 2, 3.** Ана энди шу хушвақтликда кундуз куни кўпқари, тўй, кечаликка созанда, дуторчи, оҳангар, сухангарлар сўз айтади. «Юсуф ва Аҳмад».

СУХАНДОН [ф. سخندان — сўзни билувчи; силлик, равон гапирувчи; ёзувчи, шоир; нотик] **1** Гапга чечан, сўзамол; нотик. Олурман бахра ҳикматли сўзингдан, Сухандонсан, сухандонсан, сухандон. Ҳабибий, Девон. Қулоқ солинг сухандоннинг тилига, Булбул ошина бўлар боғнинг гулига. Эргаш Жуманбулбул ўғли.

2 Бадиий сўз устаси. [Шоҳ ал-Форобийга деди:] Сен дониши сухандонсан, биламиз, ҳазил-мутойиба қилмоқдасан. А. Мухтор, Чи-

нор. Кечалари сухандонлар сўз айтиб, Келганларнинг димоғини хушлади. «Гўрўғлининг туғилиши».

3 айн. диктор. Радио сухандони.

СУХАНДОНЛИК Гапга чечанлик, сўзамоллик. Теша кўнгулчан сухандонлик билан Севаргулга чой кўйиб узатди. «Ёшлик». ..Аёл боши билан баъзи «шоири замон»ларни сухандонликда мағлуб этгани эл орасида гап бўлиб кетган. «Ёшлик».

СУХАНЧИН [ф. سخنچين — гап терувчи; гийбатчи, чақимчи; гап ташувчи] Гап ташувчи, бировнинг гапини бировга етказиб юрувчи; галямис; чақимчи. Суханчи одам.

СУХАРИ [қад.р. сухара — қуриган дарахт < сухой — қуруқ, қуриган, қотиб қолган] Япроқ-япроқ қилиб, қирқиб қуритилган нон. Ширин сухари. Сухари билан чой ичмоқ.

СУХСУР 1 айн. суқсур 1.

2 кўчма айн. **суқсур 2.** Вой, бўйгинангдан онагинанг айлансин! Бунча суқсур экансан, худди сутга чўмилтиргандай-а! Ҳ. Фулом, Машғал.

СУХСУРДАЙ, -дек 1 Суқсур каби чиройли. Сизнинг ўз ўғлингиз бўлиши керак, суқсурдай жувонсиз.. А. Мухтор, Кумуш тола. Хонадонга кирганига икки ҳафта ўтмай, Зеби исмли бўйига етган суқсурдек қизини никоҳ қилиб, кўшиб кўйди. Газеталан.

2 Кап-катта, кўзга кўринган. Йигитлар ўтди.. Этак остида қолган Комилжон укам ҳам суқсурдай йигит бўлди. А. Нурмуродов, Уруш бевалари.

СУЧУК айн. чучук. Тиллари сучуккина, Бурниси пучуққина. «Кўшиқлар».

СУЧУКТОМОҚ Ширинликни яхши кўрадиган, чучуктомоқ, ширинтомоқ.

СУШИЛКА [р. сушить — «қуритмоқ, намини, сувини қочирмоқ» фл. дан ясалган от] **1** Бирор нарсани қуритиш учун хизмат қиладиган қурилма. Газ сушилка. Электр сушилка.

2 Шундай қурилма ўрнатилган хона, жой. Пахта сушилкаси. ■ [Жўрабой] Кечалари сушилкада, пунктда юриб, алла-паллада уйига қайтар эди. С. Аҳмад, Қадрдон далалар.

СУЮК Энг яхши кўрилган, севикли. Боболардан сўзладим, аммо Бир зот борким, баридан суюк: Буюкларга бахш этган даҳо, Она халқим, ўзингсан буюк. А. Орипов, Йиллар армони.

СУЮКЛИ айн. суюк. Кўзимга зиндон бўл тахту жаҳоним, Ҳасратим кўп, йўқ суюкли ўғлоним. «Эрали ва Шерали». Менинг пушти камарим бу — суюкли ўғлим, Нуридийдам васли учун тангрига шукур. А. Орипов, Йиллар армони.

СУЮЛМОҚ I 1 Маълум даражадан суюқроқ бўлмоқ. Лойга сувни кўп қуяверманг, суюлиб кетади.

2 физ. Сиқилиб ёки эриб, суюқ ҳолга келмоқ (газ ёки қаттиқ jismlар ҳақида).

Мияси суюлмоқ Ақли пасаймоқ, мияси айнимоқ. Махдум уламо, амалдор ва ғайрилардан шунинг каби сиפורиларни.. қабул қила-қила, жуда мияси суюлган эди. А. Қодирий, Меҳробдан чаён. **Қариб қуюлмаган, ачиб суюлмаган** Ёши анча улғайган бўлсада, бемаъни ишларини, одатларини, қилиқларини ташламаган одам ҳақида. -Ҳали ҳам ўша шилқимлигинг қолмабди. Қариб қуюлмабсан, ачиб суюлмабсан, — деди мулла Мамасолиҳ Худхуд сўфига. Н. Мақсудий, Лайла-тулкадр.

СУЮЛМОҚ II Сийлаган, ҳурмат-иззат қилган ёки эркалатган сари ҳаддан ошмоқ, чегарадан ташқари иш қилмоқ. Раҳимов Масафоевни чап ёнидаги жойга чақирди. Бунақа пайтларда Масафоев жуда суюлиб кетарди. С. Аҳмад, Жимжитлик. -Ҳумор бўлганда қандоқ! — дедим бир оз суюлиб. Газетадан.

СУЮМЛИ айн. суюкли. Сиз туш кўринг севглингизни! Соҳилларга боринг у билан. Айтилмаган энг суюмли сўзларингизни Унга айтинг! «Ёшлик».

СУЮНАРЛИ айн. севинарли.

СУЮНМОҚ айн. севинмоқ. Яхши сўз суюнтирар, Ёмон сўз куюнтирар. Мақол. Ёз куюнган қиш суюнар. Мақол. ■ Авазни кўриб, Рўзимбой суюнди, дарров патнис тўла ширинлик, ёлғиз чинни чойнагида чой келтирди. С. Сиёев, Аваз.

СУЮНЧ айн. севинч. Фақат.. қўлга кирган ҳар ўлжа Дармон, қувват, суюнч беради. Миртемир, Асарлар. Беҳад суюнч ила қайтаман, Шу йўл.. бироқ еллар мулойим. Миртемир, Асарлар.

СУЮНЧИ Бирон қувончли воқеа тўғрисида хушхабар келтирувчига бериладиган совға, мукофот; севинчи. -Э, аҳмоқ кампир, бир норнинг баҳоси минг тилла бўлмас-у, сенга мен суюнчига минг тилла берайми?! «Ну-

рали». Зулфлари сунбулинг келди, Гўрўғли, бергин суюнчи! «Гулнорпар».

СУЮНЧЛИ айн. севинчли.

СУЮРФОЛ [мўғ. сўёрхўл — инъом, совға қилиш] тар. Шоҳ, хон, амир томонидан амалдор ва саркардаларга салтанат олдида кўрсатган алоҳида хизмати учун инъом қилинган ер-сув, мол-мулк. Амир Темур ўзининг энг истеъдодли саркардаларидан бири — амир Шоҳмаликка бир қанча ерларни суюрғол қилиб берган. «ЎЗМЭ».

СУЮҚ I Оқиш ва ўзи ишғол қилиб турган идиш шаклини олиш хусусиятига эга бўлган. Суюқ жисм. Суюқ модда. Суюқ ёқилғи. ■ [Суюқ шиша] Кимёвий фаол, қаттиқ, суюқ ва газсимон моддалар билан реакцияга киришади. «ЎЗМЭ».

2 Суви меъеридан ортиқ ёки нисбатан кўп бўлган; серсув. Яна бир кетмон урганда, ажриқзордан билқиллаб суюқ лой чиқди-да, кейин кучли тиниқ сув тикка отилди. И. Раҳим, Чин муҳаббат.

3 Маза, куч берувчи таркибий қисми меъеридан кам ёки нисбатан оз бўлган; кучсиз. Суюқ сут. Суюқ қатиқ. Суюқ эритма. ■ Ҳайдарбойнинг кўримсиз чойнақларидаги қуюқ ва суюқ чойлари бу ердаги жуда кўп одамларнинг ҳам, утган-кетган йўловчиларнинг ҳам чанқовини босиб туради. П. Турсун, Ўқитувчи.

Суюқ ош Угра оши, хўрда, мастава, мошхўрда ва ш. к. қуюқ бўлмаган овқатлар. Шокир баззоз Аппон чолга қатиқ билан райҳонни узатди. У косасига керагини солиб бўлгач.. -Қани, Аппон, овқатга қара, — деб, косадаги суюқ ошни уч-тўрт бор шопириб қўйди. «Ёшлик».

4 Унчалик қалин, зич бўлмаган, ҳаккам-дуккам, сийрак. Суюқ тутун. ■ Офтоб ҳали қор ташлаган суюқ, оқиш булутлар ортидан чиқмаган бўлса ҳам, тушга бориб, ҳамма ёқ илиб кетди. П. Қодиров, Уч илдиз.

5 кўчма Мазмунан саёз, сийқа ёки бемаза. Суюқ гап. Суюқ асар. ■ -Постановканг ёғи олинган сутга ўхшайди, суюқ, — деб танқид қилдим. С. Абдуқаҳҳор, Санамай саккиз дема.

6 кўчма Фаҳш йўлига кирган; бузуқ. Суюқ эркак. ■ [Умар] Кўп юрди, кўп тонди, тонганини совурди. Албатта, у пуллар суюқ аёллар йўлига кетди. Ш. Холмирзаев, Бодом қишда гуллади.

СУЮҚЛАНМОҚ *айн. суюлмоқ* 1. Органик моддалар 350-380°да суюқланади. «ЎзМЭ».

СУЮҚЛАШМОҚ 1 Суюқ ҳолга келмоқ, суюлмоқ.

2 кўчма Мазмунан саёзланмоқ, сийқалашмоқ ёки бемазалашмоқ.

3 кўчма Ахлоқий жиҳатдан бузулмоқ, ёмонлашмоқ.

СУЮҚЛИК 1 Оқиш ва ўзи ишғол қилиб турган идиш ҳажмини олиш хусусиятига эга бўлган модда. *Кичкинагина, пенициллин шишасида қандайдир оптоқ суюқлик эди. С. Аҳмад, Жимжитлик. Жазирама ёз кунлари янтоқ ўзидан сарғиш елимга ўхшаиш суюқлик ажратиб чиқаради. «Фан ва турмуш». Укунда уч маҳал беморнинг қон томирига игна санчиб, аллақандай суюқлик юборади. С. Сидёев, Аваз.*

2 физ. Модданинг қаттиқ ва газсимон ҳолатлари ўртасидаги механик ҳолат. *Модданинг суюқлиги. Сутнинг қуюқ ёки суюқлигини ўлчамоқ.*

3 кўчма Суюқ кишиларга хос иш, хатти-ҳаракат, юриш-туриш, қилиқ. *Кунлардан бирида у, беадаблик қилгани учун, бир шаддод қиздан шопалоқ егани эсида. Уша-ўша, Валивой қизларга суюқлик қилмайдиган бўлди. Ҳ. Назир, Онайизор.*

СУЮҚ-ҚУЮҚ *айн. қуюқ-суюқ.* Суюқ-қуюқдан кейин Моҳидилга оқ йўл тилашлар, беҳисоб истаклар баён қилинди. Ж. Абдуллахонов, Тўфон.

СУЮҒОЁҒ *айн. суюқ* 5. *Йўқ, келинни суюғоёғ дейиш хаёлига ҳам келмасди-ю, аммо бундай хотиннинг эри шу кенжа ўғлидақа бўлмаслигини аниқ биларди. «Ёшлик». Умиджон, гапингиз менга ёқди. Хотин суюғоёғ бўлса-ю, йигитман, деб юриш яхши эмас! Мирмуҳсин, Умид.*

СУЮҒОЁҒЛИК 1 Фаҳш йўлига кирган кишиларга хос хатти-ҳаракат. *Суюғоёғлик кўчасига кириб кетишда ўзи ва ота-онаси ҳам қайсидир маънода айбдор. Газетадан.*

2 Суюғоёғ, бузуқ эканлик; ахлоқан бузуқлик. *Раиснинг суюғоёғлиги элга жория бўлди. Т. Мурод, Қўшиқ. Бир куни онаси кўчадан, қайнонаси Фаридани суюғоёғлиги учун ҳайдаб юборганмиш, деган гап топиб келди. «Ёшлик».*

СУЯК 1 Одам ва умуртқали ҳайвонлар скелетининг ҳар бир қисми; сўнгак. *Умров суяги. Тизза суяги. Суяк оғриғи. Фил суяги. ■ Суяк бутун бўлса, эт битиб кетар.*

Мақол. ■ Бўрижоннинг ориқ, умуртқа суяклари бўртиб, қовурғалари саналиб турган қўш ҳўкиси омовчи зўрға тортиб боряпти. С. Нуров, Майсаларни аёз урмайди. Бобо.. умр бўйи кўксини бекитмаган, анордек қизғиш кўксидоги суяклар бўртиб чиқиб турарди. Мирмуҳсин, Умид. Одам қони таркибида, шунингдек, суягида ўттиздан зиёд элемент учрайди. «Фан ва турмуш».

Суяги бузуқ Суяклари йўғон, бўлиқ, бўлали. **Суяги қотмаган** Етилмаган; ёш, гўдак. *Мен мағрурликка берилиб, суяги қотмаган ўғлимни бу қўшинга.. бош қилиб юбордим ва манманликнинг жазосини тортдим. М. Осим, Аждодларимиз қиссаси. Суяклари чиққан (ёки саналиб қолган) айн. қуруқ суяк. Суяк-суягидан ўтмоқ 1) бутун танасига, суякларига таъсир этмоқ. *Тоғдан эсган изғирин одамнинг суяк-суягидан ўтиб кетади. М. Осим, Карвон йўлларида;* 2) руҳиятига жуда қаттиқ таъсир қилмоқ. *Бу сўзлар Нусратбекнинг суяк-суягидан ўтиб кетди. С. Нуров, Нарвон. Эти – сизники, суяги – бизники* Тўлиқ сизнинг ихтиёрингизга топширдик, ҳар қандай йўл, восита билан тарбиялаб, одам қиласиз, деган маънода қўлланилган ибора. *Бола олти яшар бўлганда, подшо дастурхонни катта қилиб, боланинг қўлидан етаклаб, мактабга олиб борибди: -Эти – сизники, суяги – бизники, – деб домлага берибди. «Луқмони Ҳаким». Эти суягига ёпишган айн. қуруқ суяк. Тишлари тушиб, жағи-жағига киришиб кетган катта буеиси ҳасасини ерга тақ эткизиб урди-ю, қуришиб, эти суягига ёпишиб кетган башарасини буриштириб, шанғий бошлади. М. Исмоилий, Фарғона т.о. Қуруқ (ёки қоқ) суяк* Жуда ориқ, озғин, қотма.*

2 Сўйилган молнинг этли устухони (овқат сифатида). *Суяк қайнатмоқ. Суяк тозаламоқ. ■ Гўшт суяксиз бўлмас, Шоли – курмаксиз. Мақол. ■ Ахир сен ит эмасдингку, беланиб лойга, Бир-бирингни ғажисанг то суяк талашиб. А. Орипов, Йиллар армони.*

3 Этдан тозаланган устухон (хомашё, материал сифатида). *Суяк елими. Суяк ўймакорлиги. Суяк тугма. Суяк уни. ■ Суякка гул чизиб, асбоблар (парма, аррача, эгов ва б.) ёрдамида ўйиб, нақиллар ҳосил қилинади ҳамда жилоланади. «ЎзМЭ».*

4 сфт. Жуда ориқ, озғин, Суяк одам. ■ Чол сесканиб, бошини кўтарди, йигитни

қучоқлаб, суяк қўллари билан унинг елкасини силади. Ойбек, Танланган асарлар.

5 кўчма Авлод, насл; уруф. Султон суягини хўрламас. Мақол.

..да суяги қотган Бирор ишда кўп ишлаган, вояга етган, чиниққан; тажрибакор. Мени кичкина, нимжон деманг. Далада ўсганман. Кетмонда суягим қотган. С. Аҳмад, Уфқ. **Пичоқ (бориб) суякка қадалмоқ (ёки тақалмоқ, етмоқ, тегмоқ)** Аҳвол чидаб бўлмас даражага етмоқ, сабр косаси тўлиб-тошмоқ. *Бас, пичоқ бориб суягимга етди.* Ш. Рашидов, Бўрондан кучли. *Жон дўстим, пичоқ бориб суякка тақалди, бу кеча ҳам ухламай чиқдим.* Р. Файзий, Чўлга баҳор келди. **Суяги йўқ** Ҳеч нарсага йўқ демайдиган, қайтармайдиган; бирор нарсага ҳирс қўйган одам ҳақида. [Қози:] *Хотиржам бўлинг, бой. Қодирқул додхоҳнинг бунақанги ишларга суяги йўқ.* Ҳамза, Танланган асарлар. **Суяги тинч** Ғам-ташвишни билмайдиган, ҳеч ғами, ташвиши бўлмаган одам ҳақида. **Суяги тинчиб қолмоқ** Ғам-ташвиш, жанжал ва ш.к. дан қутулмоқ, ўзидан тинчиб, хотиржам бўлиб олмоқ. **Суягига (ёки суяк-суягига) сингимоқ** Одат тусига кириб, муштаҳкам ўрнашиб олмоқ, ўрганиш бўлиб қолмоқ. *-Ажабо, — деди Собиржон чиқиб кетаётган ҳалиги юнунгина чолга қараб, — мутелик ҳам одамнинг суяк-суягига мунчалик сингиб кетар экан-да.* «Шарқ юлдузи». **Суяк сурмоқ қ. сурмоқ.** *Ўзи суяк сурадиган бир дард экан бу.* С. Аҳмад, Ҳукм. **Тилнинг суяги йўқ** Тилни тиймасанг, ҳар нарсани гапиравереди, кўнгилга келганини қайтармайди. *Аввали уриш бўлмасин, уриш бўлгандан кейин, тил ўлгурнинг суяги йўқ.* А. Қаҳҳор, Кўшчинор чироқлари.

СУЯКДОР Суяклари йўғон, бўлалли, бўлиқ суякли. **Суякдор одам.** ■ *Жундор билакларини тирсагидан пастроққача шимариб, маърака қозондаги ошни ағдараётганда, ошпазнинг суякдор ёноқлари лоладек қизаради, текис, кенг пешонасига реза-реза тер қалқиб чиқади..* «Ёшлик». *Рустак — сочсоқоли оқарган, бир оз мункайиб, чўкиб қолган суякдор чол.* М. Осим, Карвон йўлларидан.

СУЯКЛАНИШ физиол. Суякка айланиш. Суякланиш жараёни.

СУЯКЛИ айн. суякдор. Суякли, бўйчан йигит.

СУЯМ Ёзилган ҳолдаги кўрсаткич бармоқ учи билан бош бармоқ учигача бўлган масофага тенг узунлик ўлчови. *Фарҳод чўнтагидан уч суям занжир чиқариб, шаҳодат бармоғида айлантириб ўйнай бошади.* «Ёшлик». *Мана кураш эсдалиги, яхши қара: Бўқасида бир суямча ямоқ-яра.* Ғ. Фулом.

Беш суям Тахминан бир метр. **Бир суям** Озгина, кичкина, бир парча. *Бир суям нон.* ■ *Бир суям бўлса ҳам, ўз мулкингиз.* А. Қаҳҳор, Сароб.

СУЯМОҚ 1 Бир учини ерга, иккинчи учини бирор тик нарсага тақаб турғизиб қўймоқ; тирамоқ, таямоқ. *Ҳассани деворга суяб қўймоқ. Тениб ўтма, суяб ўт.* Мақол. ■ *У деворга суяб қўйилган ойболтага ташланди.* «Ёшлик».

2 Бирор еридан тутиб, кўтариб мадад бермоқ. *Кампир, азиз меҳмонларни ўтқизгандан кейин, чолни суяб олиб кирди.* А. Қаҳҳор, Олтин юлдуз. [Соқи бобо] *Уни қўлтиғидан суяб, отга миндирди.* Эргаш Жуманбулбул ўғли. *Оёқлари увушган бойни аравадан суяб туширишда букрига Тоштемур кўмаклашди.* Ҳ. Фулом, Феруза.

3 кўчма Мадад, ёрдам бермоқ; қўлламоқ. *Сен йўғингда мени шулар суяб юришди-да.* Ҳ. Фулом, Машғал.

СУЯНМОҚ 1 Орқасини, елкасини, кифтини бирор нарсага тираб ўтирмоқ ёки турмоқ. *Деворга суянмоқ. Ёстиққа суянмоқ. Эчкининг таёғ егиси келса, чўпоннинг таёғига суянади.* Мақол. ■ *Улуғбек чайқалиб, деворга суянди.* «Ёшлик». *Ая кейин кўрса, Кароматхон ҳам келиб, эшик кесакисига суянганча, гапларига қулоқ солиб турган экан.* А. Мухтор, Кумуш тола.

2 Гавда оғирлигининг бир қисмини бирор нарсага ташламоқ; таянмоқ. *Ёзилган таёққа суянма, сени ҳам эгади.* Мақол. ■ *Яхшибоев ўтирган харрагидан турди. Қўлидаги аждарбош ҳассасини ерга қўйиб, секин суянди, юрагига қулоқ тутди.* М. М. Дўст, Лолазор. *Искандар эса беихтиёр сўри панжарасига оғир суяниб.. чуқур тин олди.* М. Мансуров, Ёмби.

3 кўчма Мадад олмоқ, ёрдамига таянмоқ, ёрдамига таяниб иш тутмоқ. *Халққа суянсанг — бўласан, халқдан чиқсанг — сўласан.* Мақол. ■ [Яхшибоев:] *Қариган чоғингда одамнинг ҳар бири ғанимат: дардингни айтсанг, чайқалган чоғинг суянсанг.* М. М. Дўст,

Полазор. Тоғай ким — ёлғизқўл бир йигит. Ўлармон отасию пуф деса, довоonga бориб тушадиған қилтириқ ујасини демаса, бошқа суянадигани йўқ. «Ёшлик».

4 Ишонмоқ, таянмоқ; асосланмоқ. Мақсуд Солиев ўттиз йиллик иши давомида одамларнинг турфа хилини кўрди. У, тажрибасига суянган ҳолда, бир нарсага амин бўлди: жамият учун жинойатчидан кўра лоқайд одам хавфлироқ! «Ёшлик».

Сувга суянмоқ Пуч нарсага, бевурд кимсага суянмоқ. Сувга суянма, ёвга сиғинма. Мақол. **Суянган тоғи** Ишонган кўмақчиси, ёрдамчиси, мадалкори. **Суяниб қолмоқ** Бир-бирига ўрганиб, бир-бирининг ёрдамисиз яшай олмай қолмоқ. *Чолу кампир бир-бирларига суяниб қолган, бир-бирларига жуда меҳрибон.* Ойдин, Ширин келди.

СУЯНЧ Таянч бўлиб хизмат қилувчи, мадал берувчи куч; таянчиқ, таянч. *Сендан ўзга ҳеч суянчим бўлмади, Не сабабдир — кулиб келдинг, Ёдгоржон?* «Алпомиш». Бу дунёда бировга суянч бўлганинғи қолади. Э. Самандар, Дарёсини йўқотган қирғоқ.

СУЯНЧИҚ 1 Ўриндиқларнинг суяниш ёки тирсак тираб ўтириш учун хизмат қиладиган қисми. *Кресло суянчиғи.* ■ *Илҳомжон машина эшигини очиб, ўриндиқ суянчиғини бир оз орқа суриб қўйди.* Н. Аминов, Қаҳқаҳа. *..деворга тираб қўйилган, орқа суянчиғига кафтдек ойна ўрнатилган эски диванда ўқитувчи ва тарбиячилар зич ўтиришибди.* Н. Аминов, Қаҳқаҳа. *Унинг кўзи стул суянчиғига илинган кителига, шимига тушди.* С. Аҳмад, Уфқ.

2 кўчма айн. **суянч.** Оиланинғ суянчи. ■ *Мусулмонқулнинг биринчи суянчиғи ўзининг одамлари бўлса, иккинчиси — уламолар эди.* А. Қолирий, Ўтган кунлар. *Авалло, ўз тинчингизни ўйланг, ука. У киши сизга суянчиқ бўлоладими, йўқми — шуни ўйланг.* М. М. Дўст, Полазор. *-Ўзимнинг улигинам (ўғилгинам), суянчиқинам, — деб эркаларди баъзан уни онаси..* «Саодат».

СУЯҒИЧ Суяб кўтариб туриш учун хизмат қиладиган нарса; тирговуч.

СУҚ 1 Бировнинг оғзидаги, қўлидаги, олдидаги овқатига ҳавас, суқлик билан қаровчи; бировнинг дастурхонига бетакаллуф суқилувчи; очкўз. *Оч тўяр, суқ тўймас.* Мақол. ■ *Қосим суқ, Қорни қудуқ, Кўзи оч, Нафси қулоч.* «Бойчечак».

2 Ҳирс, эҳтирос; ҳавас. *Баширжон унга [Қирмизхонга] суқ билан тикилди..* Н. Аминов, Қаҳқаҳа. *[Йигит] Қизнинг қадди-қоматига суқ билан тикилди.* «Ёшлик». *Парво қилма. Омон-эсон Тошкент борайлик, бировнинг суқи тушмаганидан топиб бераман.* Кўрибсанки, у ҳам шайдо, сен ҳам. Шухрат, Шинелли йиллар.

3 этн. «Ёмон кўз», кинна. *Даф бўл, фалокат шўртумишук, Тегирамонда туз еган суқ, кет, кет, кет, кет!* Ҳамза, Танланган асарлар. *Ажаб бўпти! Ўғлингизга ҳали бу ҳам оз! Бўлмаса Зулфия кимдан кам? Ҳуснига суқингиз қиради.* О. Ёқубов, Чин муҳаббат.

СУҚАТОЙ Суқ, очкўз бола; суқтой. *-Мен суқатой эмасман, — Набижон Арслон берган олмани олмади.* К. Раҳим, Суқатой.

СУҚИЛМОҚ 1 **Суқмоқ** фл. мажҳ. н. *Девор қавагига суқилган қозиқ. Қинга суқилган ханжар.* ■ *[Чол:] Аммо-лекин шунақаям бопланги, уясига чўп суқилган асаларидай, ўзларини қаёққа уришларини билмай қолишини.* О. Ёқубов, Қаҳрамон излаб.

2 Ичга, орасига ёриб кирмоқ, тиқилиб, орасига кириб жойлашмоқ; тиқилмоқ. *Танчага суқилмоқ. Кўрна орасига суқилмоқ.* ■ *Тоғ пинжиге суқилиб, бир чойхона, бир кабобхона ҳам пайдо бўпти.* С. Аҳмад, Жимжитлик.

3 Бошпана, нажот излаб, ўзини бирор ерга урмоқ, бош суқмоқ. *Суқиладиган бошқа қавак қолмади.* С. Аҳмад, Ҳукм.

Бағрига (ёки кучоғига, пинжиге) суқилмоқ Бағрига кирмоқ. *Назар ака икки-уч қаддам ташлади, шу аснода қўлларини ёзиб очдики, ношлож бориб, бу улкан, бу забардаст одамнинг пинжиге суқилдим.* М. М. Дўст, Полазор.

4 кўчма Билдирмасдан ёки сурбетлик, зўрлик, хиралик билан бирор жамоа, ташкилот ва ш.к. га кириб олмоқ. *Милиция сафларини унга суқилиб кирган номуносиб кишилардан тозалар эканмиз, биз ошкораликдан чўчимаймиз.* Газетадан. *Кўпчиликка том ус-тидан қарайдиган бу зотлар бундай пайтларда «мансабдан тушиб», кўпчилик орасига суқилишга мажбур бўлдилар.* П. Турсун, Ўқитувчи.

5 Қотишмоқ, аралашмоқ. *Орага Мастура хола суқилди: -Ҳа, юра турсин, синглингиз, меҳмон. Жуда соғиниб ўлганман.* Ж. Абдуллахонов, Тўфон. *[Зулфия:] Мен уни деб..*

сизни ҳам, Рустам акамни ҳам хафа қилдим. Агар у келиб суқилмаганда, биз бахтли бўлардик. О. Ёқубов, Чин муҳаббат.

Гапга (ёки сўзга) **суқилмоқ** Гапга аралашмоқ. -Дугонажоним сизни еру кўкка ишонмайди, — дея гапга суқилди Муяссар хоним. М. М. Дўст, Лолазор. -Йўқотиб нима қилади, — деди Карим подачи гапга суқилиб. «Шарқ юлдузи».

СУҚЛАМОҚ 1 этн. Суқ кирган кишини дам солиб «даволамоқ», кинна солмоқ.

2 с. т. «Суқ-суқ» деб қўймоқ (бошқа одам емасин деб тақиқлаб қўймоқ).

СУҚЛАНМОҚ Суқ назар, ҳавас ёки эҳтирос билан боқмоқ; ҳаваси келмоқ. Суқланиб қарадим тонгинг юзига, Бир қарашда оппоқ шоҳига ўхшар. Уйғун, Тонг кўшиғи. Сувга суқланар, Капалакка суқланар Ёруғ олам остонасида Бир куртак. М. Қўшмоқов, Али Қамбар. -Ўзинг-чи? Гулзорга бўйин чўзган тўндай, ҳар аёлга суқланасан! — деди Али тажанг жаҳл билан. Ойбек, Куёш қораймас.

СУҚЛИ Суқ-ҳавас билан тўлиб-тошган; ҳавасли, эҳтиросли. Суқли назар. ■ Нигора сувдан чиққанда, баданидаги томчилар гўё бегона суқли кўзларни қайтаришга қасд қилгандай, кўёш нурида марвариддек ялтирайди. С. Анорбоев, Оқсой. Кенг қирларга суқли боқиб Борар эдим бир ўзим, Она юртим чиройига Тўймас эди ҳеч кўзим. Шухрат.

СУҚЛИК Суқ эканлик, очкўзлик, тўймаслик. Суқлик қилмоқ. Суқлик хўрлик келтирар. Мақол.

СУҚМА Суқиб қўйиладиган, тикма. Суқма даста.

СУҚМОҚ 1 Куч ёки зарб билан учли нарсани бошқа бирор нарсага киргизмоқ; санчмоқ, тикмоқ. Найза суқмоқ. Игна суқмоқ. ■ Малик муаллим ялт этиб келинига қаради. Биров бигиз суқиб олгандай, кўкрагининг ости санчиб оғриди. А. Кўчимов, Ҳалқа. Нусратбек ҳозир бу силлиқ башарага мушталаса, игна суқса, тепкиласа ҳам, қонамаса, қизармаса керак. С. Нуров, Майсаларни аёз урмайди.

2 Бирор нарса ичига, орасига жойламоқ, тикмоқ. Ханжарни қинига суқмоқ. ■ Йўлдош эгилиб, бошини тиззаси орасига суқди. қўллари билан қулоқларини беркитди. «Ёшлик». Гавҳар зимдан Талъатга қаради. У бошини баланд кўтариб, қўлларини шимининг

чўнтагига суқиб борарди. Ў. Ҳошимов, Қалбингга қулоқ сол. У [Искандар] бир қўли билан қопчиқни очиб, бир қўлини хумчага суқди. М. Мансуров, Ёмби.

[Бировнинг] киссасига (ёки ҳамёнига, чўнтагига) **қўл суқмоқ** Бировнинг киссасига, пулига қўл урмоқ, хўжайинлик қилмоқ. Ука, мен ҳақимни сўрайман. Бировнинг киссасига қўл суқаётганим йўқ. Ойбек, Танланган асарлар. **Бош суқмоқ қ. бош.** Қодиров чайлага бош суқиб, ноз-неъматлар тўла дастурхонга кўз югуртирди. Ш. Рашидов, Бўрондан кучли. **Бурун суқмоқ айн. бурун тикмоқ қ. бурун I.** Ойқиз бўлса ҳаддан ошиб кетди, ҳамма ишга бурнини суқяпти. Ш. Рашидов, Бўрондан кучли. **Гапни гапир** (ёки айтгин) **уққанга, жонни жонга суққанга** Гапни фикрингга, мақсадингга тушунадиган, сенга жон куйдирадиган одамга гапир, деган маънода ишлатиладиган матал. [Бўтабой ака] «Тушунтириш керак» дейдилар, тўғри, лекин «гапни айтгин уққанга, жонни жонга суққанга, гапни айтиб нетарсан онаси бемаҳал туққанга!» А. Қаҳҳор, Кўшчинор чироқлари. **Икки қўлини бурнига суқиб қ. бурун.** Катта ўғлим билан икки қўлимизни бурнига суқиб, ўз уйимизга бордик. С. Айний, Қуллар. **Кўзига чўп суқмоқ айн. кўзига чўп солмоқ қ. кўз.**

СУҚСУР Ўрдаксимонлар оиласига мансуб, патлари узун ва ингичка куш. Кўкқамиш кўлидан суқсур учирдим, Суқсурни излаган лочин бўламан. «Алпомиш».

СУҚСУҚ Ўрдақлар оиласига мансуб, ёввойи ўрдакдан кўра кичикроқ куш.

СУҚТОЙ айн. суқатой. Қўлидан нонини Қоплон опқочди: Унутган эди у суқтой кучугин. Ф. Фулом, Танланган асарлар.

СУҚУТ [а. سقوط — йиқилиш, ағдарилиш; пасайиш, камайиш; ажралиш, кўчиш; йўқ бўлиш] эск. кт. Китобнинг, матннинг тушириб қолдирилган, етишмайдиган ери.

СУҒД, сўғд [суғд. سوز — куйиш, ёниш ёки سغد — ёмғир суви тўпланган сойлик; сернам, унумдор ер] қ. **суғдлар.** Суғд халқи. Суғд тили. ■ Суғд ёдгорликлари орасида Рустам ҳақидаги эпосдан парчалар (5–7-асрлар) катта адабий қимматга эга.. «ЎЗМЭ».

СУҒДИЙ Суғдларга, суғд халқига оид. **СУҒДИЙЛАР** айн. суғдлар.

СУҒДЛАР Зарафшон водийси ва Қашқаларё воҳасида яшаган қадимий эроний халқ; этник уюшма сифатида милоддан аввалги 12-11-асрларда пайдо бўлган. *Суғдлар Буюк ипак йўли халқаро муносабатларида катта нуфузга эга эдилар.* «ЎЗМЭ».

СУҒДШУНОС Суғдшунослик мутахассиси. *Суғдшунос олим.*

СУҒДШУНОСЛИК Суғдларнинг тарихи, тили, адабиёти, маданиятини ўрганувчи фан соҳаси. *Ҳозирги кунда Ўзбекистонда ҳам ўзига хос суғдшунослик мактаби вужудга келган.*.. «ЎЗМЭ».

СУҒОРИШ 1 Суғормоқ фл. ҳар. н. Ғўзаларни суғориш. *Томчилатиб суғориш. Жилдиратиб суғориш.* ■ *Айланма сув этакка бориб етганда, суғориш тамом бўлади. А. Қодирий, Обид кетмон.*

2 Экин майдонларини сув билан таъмин этиш, сув чиқариш чора-тадбирлари ва воситалари мажмуи; ирригация. *Суғориш режими. Суғориш шохобчалари.* ■ *Сувни тежаш тақозоси туфайли деҳқончиликда канал ва суғориш тармоқлари ўзанига темирбетон нов, қувур ёки плёнка ётқизиляпти.* «Фан ва турмуш».

СУҒОРМА Сув билан етарли таъминланмаган ҳудудларда вужудга келган қишлоқ хўжалиги экинларини суғориб этиштириш. *Суғорма шароитлар.* ■ *Суғорма деҳқончилик экинлардан энг юқори ва барқарор ҳосил этиштиришини таъминлайди.* «ЎЗМЭ».

СУҒОРМОҚ 1 Экин майдонларини, ўсимликларни сув билан таъминламоқ, сув қўймоқ. *Экин суғормоқ. Ғўзаларни суғормоқ. Йиғлаб-йиғлаб марза олсанг, кулиб-кулиб суғорасан. Мақол.* ■ *Эшикка ярим бўйра эни ўсма эккан бўлсалар, шуни ҳам обкаида сув ташиб суғоришган. С. Аҳмад, Уфқ.*

2 Сув бермоқ, сув ичирмоқ. *Қўйларни суғормоқ. Туяни чўмич билан суғориб бўлмас. Мақол.* ■ *Тоштемур қудуқдан бир неча марта сув чиқариб, отларни суғорди, охурларга беда солди. Ҳ. Ғулом, Феруза.*

3 кўчма («билан» сўзи иштирокида) Сингдирмоқ. *Меҳр, ғамхўрлик билан суғорилган тарбия, албатта, ўз самарасини беради. Газетадан.*

4 тех. Тобламоқ. *Пўлатни суғормоқ.*

СУҒОРУВЧИ 1 Суғормоқ фл. сфдш.

2 айн. сувчи 1.

СУҒУР Тийинлар оиласига мансуб, бўйни калта, кўзи катта, мўйнали кемирувчи сутэмизувчи ҳайвон. *Ўзбекистонда узун думли (қизил) суғур ва кўк суғур учрайди.* «ЎЗМЭ». *..Судда ишлайдиган Лапасов иккита суғур тутиб беринглар, деб қанақа тиқилинч қилди.* «Ёшлик».

СУҒУРИЛМОҚ 1 Суғурмоқ 1, 2 фл. ўзл. ва мажҳ. н. *Икки кундан кейин Аваз дўконига келиб, уни танимай қолди. Зулфин суғурилган, эшикка қорақуя билан катта қилиб «Кофир» деб ёзилган эди. С. Сиеёв, Аваз. Қиличлар қўндан суғурилди.* «Шарқ юлдузи».

2 кўчма с. т. Билдирмай, сездирмай секингина чиқиб кетмоқ; сирғилмоқ. [*Сотқин*] *Ғала-ғовурдан киши билмас суғурилди.* «Ёшлик».

СУҒУРМОҚ 1 Ўрнашган жойидан куч билан тортиб чиқармоқ. *Илдиз суғурмоқ. Омбур билан миҳ суғурмоқ.* ■ *Тушида қора матога ўралган киши унинг [чолнинг] соғ қолган яғона жағ тишини суғуриб олаётган эмиш.* «Ёшлик». *Холматжон сувсизликдан қорайиб кетган бир туп ниҳолни суғуриб олмоқчи эди.. С. Аҳмад, Уфқ. Қассоб қийма кабобни сихдан суғуриб олиб, савзидек тишлаб ерди. Н. Аминов, Қаҳқаҳа.*

2 Тиқилган, ботган жойидан чиқариб олмоқ. *Мўйтаннинг кекса балиқчиси.. чоригини лойдан зўрға суғуриб, қора тутун ичига кириб кетди. А. Мухтор, Қорақалпоқ қиссаси.*

Хамирдан қил суғургандай қ. хамир. *Узоқ йиллар мобайнида тўпланди қолган ортиқча кунлар, хамирдан қил суғургандай, осонгина йўқотилди.* «Фан ва турмуш».

3 кўчма Бирор ердан, тўладан, муҳитдан ажратиб, узиб олиб кетмоқ. *Попукдай қизни иссиқ уясидан суғуриб, олиб келдим. Ойбек, Улуғ йўл.*

4 Солиб қўйилган, жойланган еридан чиқармоқ, чиқариб олмоқ. -*Бермайман дегин, ҳали шунақами? — аравакаш қалтираб турган қўллари билан пайпасланиб, ёнидан пичоғини суғурди. Х. Тўхтабоев, Йиллар ва йўллар. Уқиличини ғилофидан суғуриб, осмонда ярқиратди. Мирмуҳсин, Темур Малик.*

5 кўчма Сўриб, тортиб олмоқ; олиб қўймоқ. *Безгакни ҳазил фаҳмлама. Киши кучини суғуриб, шалпайтиради. Ойбек, О. в. шабадалар.*

6 Чиқариб юбормоқ, тарқатмоқ, ёзмоқ. *Унинг баданидан она тупроқ интизорлиги,*

жанг-жадал суронлари ҳордиғини суғуриб олаётгандай бўлди. Шухрат, Шинелли йиллар.

Жонни (ёки юракни) суғуриб олмоқ Каттик руҳий ёки жисмоний азоб бермоқ, ўлгудай қийнамоқ, жонини олмоқ. *Отаси энди Тоғайни тавбасига таянтирамагунча, бобосини таъриф ва тавсиф этавериб, жонини суғуриб олди.. «Ёшлик».* **Таг-томири билан суғуриб ташламоқ** 1) бутунлай юлиб ташламоқ; 2) йўқ қилмоқ, бартараф этмоқ. **Тилингни суғуриб оламан** Дўқ-пўписа ибораси. *Аё кофир, билиб сўзла сўзингни, Тилларинг суғуриб, ўяй кўзингни.* «Маликаи айёр». **Юракдан (ёки кўнгилдан, миядан, хаёлдан) суғуриб олмоқ** Дилдан чиқариб ташламоқ, батамом унутмоқ. *[Туйғуной:] Бари бир, унинг {Раҳимовнинг} номини юрагимдан суғуриб ташлай олмайсиз.* Б. Раҳмонов, Олтин одамлар.

СУҒУРТА Табиий офатлар, турли бахтсиз ҳодисалар рўй бериши натижасида кўрилган зарарни қоплаш учун мақсадли пул жамғармаларини ташкил этиш ва ундан фойдаланиш билан боғлиқ иқтисодий муносабатлар тизими. *Суғурта компанияси. Суғурта полиси. Суғурта шартномаси. Суғурта қопламаси.* ■ -*Ҳуқуматимизга раҳмат. Шартнома бўйича суғурта идорасидан пул олдим, — деди шофер йигит.* Н. Сафаров, Оловли излар. *Одамларни, уй-жойларни, мол-ҳолларни суғурта қилиб юрибмиз.* Н. Аминов, Ёлгончи фаришталар. *Пиримқул молия — Мустафонинг укаси, Галатепада томорқа солиғию суғурта пулини йиғади.* М. М. Дўст, Галатепа қиссалари.

СУҒУРТАЛАМОҚ Суғурта қилмоқ ёки қилдирмоқ. *Мол-мулкни суғурталамоқ.* ■ *Суғурталаш мажбурий ва ихтиёрий шаклларда амалга оширилади.* «ЎзМЭ».

СУҒУРТАЛАНУВЧИ Суғурта қилинувчи шахс ёки томон. *Суғурта ҳодисаси рўй берганда, суғурталанувчи тезда бу ҳақда суғурта компаниясига хабар бериши зарур.* «ЎзМЭ».

СУҲБАТ [a. صحبت — бирлашма, уюшма; алоқа қилиш, муносабат, дўстлик] 1 Икки ва ундан ортиқ киши ўртасидаги ўзаро сўзлашув; мусоҳаба; гурунг. *Қизгин суҳбат. Гангир-гунгур суҳбат. Хушчақчақ суҳбат. Суҳбати ширин одам. Булоқнинг суви тиниқ, Дононинг — суҳбати.* Мақол. ■ *Санжар Тилла суҳбат чоғи гинахонлик тарзида деди..*

К. Қаҳҳорова, Чорак аср ҳамнафас. *Мёморнинг икки қўли орқасида, ошналарининг суҳбатига қулоқ солиб тургандек бўларди-ю, кўзлари юз қадамча нарида чодир қураётган шогирдларида, ўғил бола кийимини кийиб олган шаддод қизиди эди.* Мирмуҳсин, Мёмор.

СУҲБАТ ҚИЛМОҚ (ёки айламоқ, қурмоқ) Йиғилишиб суҳбатлашмоқ, гаплашмоқ, мусоҳаба қилмоқ; гурунглашмоқ. *Аҳмон дев суҳбат қилмоққа мойил бўлди.* «Маликаи айёр». *Навбахор очилди гуллар, сабза бўлди боғлар, Суҳбат айлалик, келинлар, жўралар, ўртоқлар.* Муқимий. *Чойхона сўрларида одамлар чой ичиб, суҳбат қуриб ўлтириптилар.* «Шарқ юлдузи».

2 Бирор мавзуда эшитувчилар билан фикр алмашинув, савол-жавоб тариқасида ўтказиладиган машғулот; мулоқот. *Экология ҳақида суҳбат.* ■ *Муфтий ҳазратлари, сиз билан ахлоқ-одоб ҳақидаги суҳбатимиз аҳли жамоага фойда бўлади.* Газетадан.

3 кўча ма қўл. Ўтириш, улфатчилик. *Тантибойвачча. базмини, суҳбатини кўрган.. кўп хотинларни энди секин-секин унута бошлади.* Ойбек, Танланган асарлар. *Адабсиз, баҳрасизлар суҳбатин ҳаргиз ҳавас қилма, Тўкилтай обрўйинг, беҳуда завқу сафодан кеч.* Ҳабибий.

СУҲБАТДОШ Суҳбатда иштирок этувчи киши, суҳбат қатнашчиси; суҳбатчи, ҳамсуҳбат. *Ажойиб суҳбатдош.* ■ *Шерали, суҳбатдошининг айтганларини тасдиқлагандек, бош чайқади.* С. Кароматов, Олтин қум. *Донларим — кенгашимдан, Неча бек суҳбатдошимдан — Барисидан жудо бўлдим.* «Ойсулув».

СУҲБАТИЖОН [a. + ф. صحبتجان — суҳбатнинг жони, суҳбати ширин] Суҳбати ширин, суҳбаторо. *Суҳбатижон одам.*

СУҲБАТЛАШМОҚ Йиғилишиб, ўзаро гаплашмоқ; суҳбат қилмоқ, суҳбат қурмоқ; гурунглашмоқ. *Фозил одам билан суҳбатлашсанг, роҳат қиласан.* Ойбек, Танланган асарлар. *Одатда кўпчилик қизларнинг ҳусни танишиб, суҳбатлашиб, дўстлашиб кетганиндан кейин очилади.* Шухрат, Шинелли йиллар.

СУҲБАТОРО [a. + ф. صحبتآرا — суҳбатга оро берувчи, файз киритувчи] айн. **суҳбатижон.** *Суҳбаторо одам.* ■ У [Мулла Бурҳон] сўзамол ва суҳбаторо бўлиб, тоғликларнинг қаттиқ муомалалигини бухоролик-

ларнинг нозик гаплиги билан қўшган эди. С. Айний, Эсдалиқлар.

СУХБАТЧИ айн. *сухбатдош*.

СФЕРА [юн. *sphaira* — шар] *мат.* Ҳамма нуқталари фазонинг бирор маркази (нуқта-си)дан барабар узоқликда жойлашган берк сирт; шар сирти. *Сфера марказидан ўтувчи текислик уни катта айлана бўйлаб кесади.* «ЎЗМЭ».

Осмон сфераси Осмон ёритқичларининг кўринарли жойлашуви ва кўринарли ҳаракати ҳақида тасаввур берувчи, радиуси ихтиёрий бўлган шарсимон сирт; осмон гумбази. *Осмон сферасидаги ёритқичга бўлган ҳар бир йўналиш сферада нуқта билан, текислик эса доира билан тасвирланади.* «ЎЗМЭ».

СФЕРИК Сферага оид; сфера шаклидаги. *Сферик сирт. Ботик сферик кўзгу. Сферик геометрия.* ■ *Бир координата системасидан иккинчи координата системасига ўтиш сферик тригонометрия формуллари ёрдамида амалга оширилади.* «ЎЗМЭ».

СФИНКС [юн. *sphinx* — бўғувчи ўлим руҳи] **1** Юнон мифологиясида: қанотли ярим урғочи шер, ярим аёл кўринишидаги махлуқ.

2 Қадимги Мисрда: танаси шерники, калласи одамники бўлган, ўтирган ҳолатдаги афсонавий махлуқ ҳайкали.

СФРАГИСТИКА [юн. *sphragis* — муҳр] Тарих фанининг муҳрларни ўрганадиган ёрдамчи соҳаси.

СХЕМА [юн. *schema* — қиёфа, кўриниш, шакл] **1** Бино, иншоот, машина, механизм ва ш.к. нинг умумий муҳим томонлари ва қисмлари ўртасидаги боғланиш шартли белгилар билан масштабсиз ифодаланган чизма. *Станок схемаси. Ёритиш системасининг схемаси. Радиоприёмник схемаси.*

2 Бирор нарсанинг умумий тасвири ёки тавсифи, баёни; хомаки режа. *Атом схемаси. Сейсмик ҳудудлар схемаси.*

СХЕМАТИЗМ [«схема» с. дан] Бир қолипдаги тайёр қоида ва формулаларга ёпишиб олиб, ишнинг асосий моҳиятига зид равишда умумий тарзда юзаки муҳокама юритиш, тасвирлаш, тавсифлаш.

СХЕМАТИК 1 Схема равишидаги, схемадан иборат бўлган, схемага оид (қ. **схема 1**). *Қурилманинг схематик тасвири. Жойнинг схематик плани.*

2 Умумий тарздаги, содда. *Схематик баён.*

СХОЛАСТ 1 *флс.* Схоластика тарафдори. *Схоластлар Платон, Аристотелнинг таълимотларини ўз мақсадаларига мослаштириб, христианлик ақидаларини асослаш йўлида талқин этишган.* «ЎЗМЭ».

2 Бирор нарса-ҳодиса ёки фаннинг фақат ташқи, шаклий жиҳатларинигина идрок этувчи киши, ҳарфхўр; юзаки фикрловчи.

СХОЛАСТИК айн. *схоластик*.

СХОЛАСТИК 1 *флс.* Схоластикага оид, схоластикага асосланган, схоластикадан иборат бўлган. *Ренессанс даврида схоластик анъаналарнинг айрим жиҳатлари янада ривожланди.* «Фалсафа».

2 кўчма Формал, юзаки; ҳаётдан, амалиётдан ажралган, қуруқ сафсатадан иборат бўлган. *Схоластик танқид.*

СХОЛАСТИКА [юн. *scholastikos* — мактабга оид; илмий; билимли] **1** Диний дунёқарашни назарий асослашга интилган, ўрта асрларда Фарбий Европада тараққий этган диний фалсафа. *Схоластика антик фалсафадан, хусусан, Прокл таълимотидан кўп баҳраманд бўлган.* «Фалсафа».

2 кўчма Ҳаётдан ажралиб қолган юзаки билим, беҳуда, қуруқ сафсата; ақидапарастлик.

СЦЕНАРИЙ [итал. *scenario* < лот. *scenarius* — саҳнага оид, алоқадор] **1** Пьеса, опера, балет спектакллари, оммавий тadbирлар ҳамда томошаларнинг режаси, сюжет тузилиши. *Наврўз байрами сценарийси.*

2 Кино санъати ва телевидение воситалари ёрдамида гавдалантириб кўрсатиш, экранлаштириш мақсадида ёзилган адабий-драматик асар. *Ўзбекистонда сценарий жанрининг ривожланишида кинорежиссёр Наби Ғаниевнинг хизматлари алоҳида.* «ЎЗМЭ».

СЦЕНАРИЙЧИ Сценарий ёзувчи адиб; сценарист. Э. Ҳамроев, А. Шариповлар ҳам [кино соҳасида] дастлабки ўзбек сценарийчиларидан. «ЎЗМЭ».

СЦЕНАРИСТ айн. *сценарийчи*.

СЧЁТ [р. считать, счесть — «ҳисобламоқ, санамоқ» фл. дан ясалган от] бухг. **1** Тўлов-ҳисоб варақаси, тўловнома. *Электр пули тўлаш учун счёт. Бажарилган ишга ҳақ олиш учун счёт ёзмоқ.* ■ *-Боя нега айтмадинг? — деди Абдуманноф счётни қўлига олиб. А. Қаҳҳор, Оғайниллар.*

2 Нақд пул маблағларини қайд этувчи молиявий ҳисоб-китоблар ва мажбурият-

ларни акс эттирувчи ҳужжат. *Ташкилотнинг банкдаги жорий счёти. Счётга пул ўтказмоқ. Счётга ёзиб қўймоқ.*

СЧЁТЧИК [р. счётчик — ҳисобловчи, сановчи] қ. **ҳисоблагич**. *Электр счётчиги. Газ счётчиги.*

СЪЕЗД [р. съехаться — «турли жойлардан бир жойга келиб тўшланмоқ» фл. дан ясалган от] Айрим ташкилотлар, аҳоли гуруҳлари вакилларининг йиғилиши; катта йиғин; қурултой. *Ўқитувчилар съезди. Съезд қарорлари. Съездда қатнашмоқ.*

СЪЁМКА [р. снять — «кино-, фото-, телетасвир тайёрламоқ, тасвирга (суратга) олмақ» фл. дан ясалган от] Суратга олиш (мас., киностудияда). *Съёмка қилмоқ. Съёмкада қатнашмоқ. ■ Уч ойдан кейин кинокомедиянинг съёмкаси бошланди. А. Қаҳҳор, Картина.*

СЮЖЕТ [фр. sujet < лот. subjectum — предмет, мазмун, моҳият, нарса] 1 Бадий асарда, фильмда воқеа-ҳодисалар тасвири, баёнидаги изчиллик ва ўзаро алоқа; бадий асар мазмуни. *Романнинг сюжети. Пьесанинг сюжети. ■ Бадий асар сюжети тасвирланаётган воқелик ва асарда иштирок этадиган қаҳрамонлар масаласига бевосита боғлиқ. «ЎЗМЭ».*

2 Тасвирий санъатда: тасвир объекти, предмети.

СЮИТА [фр. suite — қатор, изчиллик] Умумий бадий мазмун, гоё, дастур остида бирлаштирилган, кетма-кет келувчи бир неча (одатда контраст) мустақил қисмлардан ташкил топган мусиқа асари; мусиқий жанр. *Ўзбекистон композиторларидан.. М. Бурҳонов, М. Аиравий, С. Юдаков, Д. Соатқулов.. кабилар симфоник ва ўзбек халқ чолғу асбоблари оркестри, шунингдек, фортепиано ва бошқа созлар учун турли сюиталар яратилган. «ЎЗМЭ».*

СЎГАЛ Кўпинча ёш болалар ва ўсмирлар баданида, одатда қўл ёки оёқда бўладиган қаттиқ, юмалоқ ёки ясси ўсимта; терининг вирусли касаллиги. *Оддий сўгал. Ясси сўгал. ■ Оддий сўгал кўпи билан нўхат катталигида, оғриқсиз, ғадир-будур тугунча бўлиб, кўпинча қўл панжасида учрайди. «ЎЗМЭ».*

СЎЗ 1 тлш. Ўз товуш қобигига эга бўлган, нарса-ҳодисалар, жараёнлар, шахслар, белги ва миқдорларни, хусусиятларни,

ҳаракат ва ҳолатни, алоқа ва муносабатларни номлаш учун хизмат қиладиган, мустақил луғавий маънога эга бўлган, шунингдек, турли грамматик маъно ва вазифаларда қўлланидиган энг муҳим тил бирлиги; гапнинг қурилиш материали. *Туб сўз. Ясама сўз. Қўшма сўз. Сўз бирикмаси. Сўз таркиби. Сўз ясашиши. ■ Сўзнинг товуш ва маъно томони бор. Лекин ҳар қандай товуш йиғиндиси сўз бўлавермайди. «ЎЗМЭ».*

Кириш сўз 1) муқаддима, дебеча, кириш. *Ҳайдар аканинг одамларга малол келмайдиган.. кириш сўзлари ҳаммани хушхўл қилди. М. Исмоилий, Фарғона т. о.; 2) тлш. гап бўлаклари билан синтактик боғланмаган, гапда сўзловчининг баён этилган фикрга муносабатини, гап мазмунининг юқорида ёки қуйида айтил(ади)ган фикрга боғланишини ва ш. к. ни билдириб келувчи сўз, мас., *албатта, айтгандек, дарвоқе.**

2 Бирор маъно турига, услубга оид шундай бирлик (тилда, нутқда ифода воситаси сифатида). *Дағал сўз. Беадаб сўз. Сўздан сўзнинг фарқи бор, ўттиз икки нархи бор. Мақол. ■ ..не-не ошиқларни рад қилган бу гўзал жувон бир бўз боланинг икки оғизгина ширин сўзига зор бўлиб, қоронғилик қаърига умидсиз тикилиб турарди. С. Аҳмад, Уфқ. Афтидан, борлиғимиз Мастура билан банд, қуяндай чарх ураётган таассуротлар, фикрлар, туйғуларни ифода қилгани сўз тополмас эдик. А. Қаҳҳор, Минг бир жон.*

3 Сўзлашувда, гапда, нутқда шундай воситалардан фойдаланиш қобилияти, санъати. *У сўзда йўқроқ. ■ У кишининг сўзлари китобда ҳам йўқ, шундай маъноли.. ана сўзга усталигу. Ойбек, Танланган асарлар.*

4 Мақол; матал; ибора. *Қочирим сўзлар. Ҳикматли сўзлар Оталар сўзи — ақлнинг кўзи. Мақол. ■ Кумушининг гўзалик таърифни гойибона эшитиб, оғзининг суви келувчи хотинли ва хотинсиз орзумандлар «ётиб қолгунча, отиб қол!» сўзига амал қилиб, қутидорниқига совчиларни турнақатор юбора бошлаган эдилар. А. Қодирий, Ўтган кунлар.*

5 Гап, гап-сўз, нутқ. *Самимий сўзлар. Нотикнинг сўзлари. Сўз сўрамоқ. Маърузачига сўз бермоқ. Сўз айтмоқ. Сўз бошламоқ. Сўзга чиқмоқ. Сўзга тушмоқ. Сўзини бўлмоқ. Сўзни қисқа қилмоқ. Сўзини оғздан олмақ.*

■ Директор билан олдиндан келишиб олинган бўлса керак, биринчи бўлиб Бақалоқ сўзга чиқди. С. Нуров, Майсаларни аёз урмайди. Сўз бошлади чол титраб, Ҳалқумига келиб жон. А. Орипов, Йиллар армони. Азизхон бир сўз демай, машинанинг орқа ўриндиғига чиқди. С. Аҳмад, Уфқ.

Сўз бермаслик 1) гапиришга имкон бермаслик. Хотини Карим акага сўз бермайди. Бир гап айтса, бетингда кўзинг борми демай, қайириб ташлайди. М. Ҳазратқулов, Журбат; 2) бўйсунмаслик. Қишлоқи ёшлигим сарпойчан чопар Сўз бермай декабрь қуёнларига. А. Шер. **Сўз очмоқ** Гапиришни бошламоқ. Муҳаббат қиссасидан сўз очиб, қилсам ғазалхонлик, Ўқишгай ишқ эли назимни кўп заррин китоб ичра. Ҳабибий, Девон. **Сўз эркинлиги** ҳуқ. Инсоннинг асосий шахсий ва фуқароларнинг сиёсий ҳуқуқларидан бири; ўз фикрини оғзаки ва оммавий ахборот воситаларидан фойдаланган ҳолда ёзма баён этиш имконияти. Биз сўз эркинлигини сўрар эдик. А. Қодирий, Кичик асарлар. Демократик мамлакатларда оммавий ахборот воситаларининг фаолияти сўз эркинлигига асосланган. «ЎЗМЭ». **Сўз қотмоқ** Бирор гап, сўз айтмоқ, гапирмоқ. Зайнаб тамом, тамом лол эди, Сўз қотишга у беҳол эди. Ҳ. Олимжон, Танланган асарлар.

6 Миш-миш гап, овоза; игво. Эл бор ерда сўз бор. Мақол. ■ Уликми-тирикми — билармиз. Мен ҳам қараб турмайман. Аммо сўз тарқалмасин, айт, хотининг тилини қиссин. Ойбек, Танланган асарлар.

7 Ўғит, панд-насихат, таълим-тарбия, илтимос ёки буйруқ мазмунидаги гап. Онанинг сўзини қулоққа олмоқ. Катталарнинг сўзига кирмоқ. Сўзини икки қилмаслик. Ёмоннинг бўзини олгунча, Яхшининг сўзини ол. Мақол. Дўст сўзини ташлама, Ташлаб бошинг қашлама. Мақол.

Сўзини ерда қолдирмоқ Буйруқ ёки илтимосини бажармаслик. Кумушнинг қарши тушмаги тўғрисида, албатта, уларнинг шубҳалари йўқ эди. Шунинг билан бирга, отананинг сўзини ерда қолдиради, деб ҳам ўйламас эдилар, А. Қодирий, Ўтган кунлар. **Сўз(и)га кирмоқ** Айтганини қилмоқ, маслаҳат бўйича ҳаракат қилмоқ. Акасининг сўзига кириб, тўй қилдинг, шарманда бўлдинг. С. Аҳмад, Уфқ. **Бой афанди:** «Мана холос, агар ман сизнинг сўзингизга кирсам, тоза шар-

манда бўлар эканмиз», — деб. мени хижолат қилдилар. Ҳамза, Танланган асарлар.

8 Ваъда, лафз; азм-қарор. Сўзида турмоқ. Йигит сўзи бир бўлур. Мақол. Турсанг сўзингда — ҳурмат юзингда. Мақол. ■ [Авазхон:] Эй ота, падари бузруквор, сўздан қайтиш номарднинг иши. «Маликаи айёр». Мансур энди Гавҳар сўзидан қайтмаслигини тушуниб тўхтади. Ў. Ҳошимов, Қалбингга қулоқ сол. Бировга айтмасликка сўз бераман. С. Аҳмад, Юлдуз.

Орадан сўз ўтмоқ (ёки чиқмоқ) Келишмовчилик рўй бермоқ, низо чиқмоқ. Мир ҳазратлари билан орангиздан бирон сўз ўтган, деб гумон қилурман. Ойбек, Навоий. **Сўз ўйини** Бир сўзнинг турли маъноларидан ёки турли маънодаги шаклдош сўзлардан фойдаланиб тузилган, турлича тушунилиши мумкин бўлган ибора. Уй эгаси дастурхон ёзар экан: -Умридан шунча бўлгандан кейин, худо хоҳласа, умри узоқ бўлади, — деб сўз ўйини қилди. А. Қаҳҳор, Хотинлар.

СЎЗАК I [ф. سوزاك — триппер; хуснбузар, бўжама; йиринг] **1** тиб. Асосан тасодифий жинсий алоқа қилиш оқибатида келиб чиқадиган, сийдик йўллари ва жинсий аъзолар яллиғланишидан иборат юқумли таносил касаллиги; триппер. **Сўзак юқумли бўлгани учун, касаллик белгилари пайдо бўлиши биланок, венеролог врачга мурожаат этиш керак.** «ЎЗМЭ».

СЎЗАК II [ф. سوزك — санчик] Қаттиқ совқотиш натижасида панжа учларида сезиладиган санчикли оғриқ.

СЎЗАМОЛ Сўзга уста, гапга чечан; гапдон. Сўзамол одам. ■ Ҳамиша камгап Отамурод худди шунақа, бировга ёрдам керак бўлиб қолган пайтда сўзамол, очикдан-очик меҳрибон бўлиб қолади. М. Мансуров, Ёмби. Бошлиқ сўзамолгина, лекин қўлидан келса, яхшилигини аямайдиган одам экан. «Ёшлик».

СЎЗАМОЛЛИК Сўзга уста, гапга чечан бўлишлик. Сўзамоллик қилмоқ. ■ Зиёднинг фавқуллодда сўзамоллиги ўз йўлига, лекин ҳозир ҳар қўл силкиганда, кафтига бегона нарсалардай ишқаланаётган ортиғи ғалати туюлар эди. М. Мансуров, Ёмби. [Башир] Ўзининг сўзамоллигини йиғилганларга, айниқса, Қирмизхонга кўрсатиб қўйгиси келарди. Н. Аминов, Ёлғончи фаришталар. Минг хил нағмаси бор сўзамолликнинг, Оқиллар авомга боқар жавдираб. «Ёшлик».

СЎЗАН I [ф. سوزن — игна, нина; тикан] Этикдўз косиблар иш тикадиган махсус игна. Сўзан билан чок тикмоқ. ■ Уй-рўз-ғорда ишлатиладиган қуруллар номи: *пичоқ, ангишвона, жуволдиз, игна, чопқи, қайчи, сўзан ва бошқалар.* «ЎТА». Чол унга сўзан, бигиз тутишни кўрсатади. Ойбек, Танланган асарлар.

СЎЗАН II [ф. سوزن] Дуккаклилар оиласига мансуб, кумлоқ ерларда ўсадиган бута ўсимлик; ақачиянинг бир тури.

СЎЗАНА [ф. سوزنى — шойи ип билан кашта тикилган кичикроқ рўмол; палак] Сидирға газламага гул тикиб тайёрланган, деворга осиладиган безак буюми; гулкўрпа. *Шоҳи сўзана. Сўзана тикмоқ.* ■ Унинг қаршисида, сўзана тутилган девор тагида, мушдай бўлиб ўтирган мухбир йигит — *Ислом пиқиллаб кулиб юборди.* Ш. Холмирзаев, Оғир тош кўчса. *Сурмахон ая кўкка қаради: юлдуз тўла қорамтир осмон йирик-йирик гавҳар доналари қадалган бахмал сўзанага ўхшайди.* Ҳ. Фулом, Замин юлдузлари.

СЎЗАНАК I [ф. سوزنك — нинача; ниначи] шв. Ниначи.

СЎЗАНАК II [ф. سوزنك] шв. Отнинг пешноби.

СЎЗБОЗЛИК Куруқ гап, сафсата сотиш, сафсатабозлик. -*Бўлдимиз? Сиз билан сўзбозликка вақтим йўқ, — деб газабланиб кичқирди Йўлчи, — шуни билингики, халқ ўз ишини билиб қилади.* Ойбек, Танланган асарлар.

СЎЗБОШИ Кириш, дебоча, муқаддима.

СЎЗЛАМОҚ I Оғзаки равишда фикр баён этмоқ; гапирмоқ. *Оз сўзла, кўп тингла.* Мақол. *Кўп билган оз сўзлар, оз сўзласа ҳам, соз сўзлар.* Мақол. *Бошинга қилич келса ҳам, тўғри сўзла.* Мақол. ■ *Сўзласанг, ҳар кимнинг ўз ақлига чоғлаб сўзлагин, Кутмагай от хизматин ҳеч кимса ёш бир тойдан.* Ҳабибий, Девон. *Йигит улар олдида пилдираб бораркан, тинмай Азизхон қилаётган ишлардан сўзлаб борарди.* С. Аҳмад, Уфқ.

2 Нутқ, маъруза қилмоқ, гапирмоқ. *Гўё икки навқирон йигит шу бугун борибоқ Ўртақўрғонни забт этадигандай, баланд руҳ билан нутқ сўзлади.* М. М. Дўст, Лолазор. *Биринчи котиб йиғилганлар олдида чиқиб, озгина сўзлагандан кейин, ўтирган халқ-*

қа қарата огоҳлантиришсиз ўқ узишди. «Фан ва турмуш».

3 кўчма Ифодаламоқ, намоён этмоқ. *Баҳор табиат гўзаллигидан сўзлайди.* Газетадан. *Титроқ симлар Тамара опамизнинг бедор тунлари, ҳаловатсиз кунлари, роҳатбахш лаҳзалари ҳақида сўзларди бизга.* «Саодат».

СЎЗЛАНМОҚ I Сўзламоқ фл. мажҳ. ва ўзл. н. *Зиёфат асносида иттифоқнинг фойдалари, тарқоқликнинг зарарлари сўзланди.* А. Қодирий, Ўтган кунлар.

2 Ўзича гапирмоқ, ўз-ўзи билан гапиримоқ. *Сўнг ўзича сўзланиб, тўрга йўналди.* «Шарқ юлдузи». *У туйқус асабланиб, сўзланди.* «Шарқ юлдузи».

СЎЗЛАШМОҚ I Сўзламоқ фл. бирг. н.

2 Гапиришмоқ, гаплашмоқ. *Нотиқлар ўн минутдан сўзлашди.* ■ *Нима ва қайси тўғриларида сўзлашдилар, Отабек қипчоқларга қарши сўзламадими?* А. Қодирий, Ўтган кунлар.

3 Бирор нарса, масала ҳақида ўзаро музокара олиб бормоқ; гапиришмоқ, келишмоқ, битишмоқ. *Таътил тўғрисида директор билан сўзлашиб қўйдим.* ■ *Эртага шаҳарга тушинг, акам билан сўзлашиб, ишни битирасиз, дурустми?* Ойбек, Танланган асарлар.

СЎЗЛАШУВ Сўзлашмоқ фл. ҳар. н. [Гулнор] ..*Нурининг никоҳ кунигина Йўлчига яқинлашиб, у билан сўзлаша олган эди. Ундан бери учрашувга, икки оғиз сўзлашувга ботинолмасди.* Ойбек, Танланган асарлар.

Сўзлашув тили Кундалик турмушдаги алоқа-аралашув учун хизмат қилувчи тил; оғзаки нутқ турларидан бири.

СЎЗЛИ I Бирор миқдордаги сўздан таркиб топган, қанчадир сўзни ўз ичига олган. *Уч сўзли матн. Олтмиш минг сўзли луғат.*

2 Бирор аниқловчи билан биргаликда келиб, шахснинг характери ёки муомаласи қандайлигини билдиради. *Ширин сўзли — шоҳ косадан сув ичар.* Мақол. *Тўғри сўзлининг тўни йиртиқ.* Мақол. ■ *Қарилари ширин сўзли, Жувонлари турфа нозли, Қизлари бор жоду кўзли.* «Нурали».

Бир сўзли I бир сўзда, ўз айтганида туриб оладиган; ўжар, қайсар. *Бир сўзли бола.* ■ [Мулла Мадраҳим] *Мижғов гапни ёқтирмайдиган, бир сўзли бу заҳар полковникка мударрасини очик айтишга мажбур бўлди.*

Ш. Тошматов, Эрк куши; 2) сўзидан, лафзидан қайтмайдиган; айтганини қиладиган; ваъдали. *Бир сўзиданг юзи ёруғ. Мақол. ■ Пулатов қаршисида бир сўзли, зукко ва қатъиятли аёл турганлигини билди. «Ёшлик». Ўз сўзли* Ўз сўзини ўтказадиган, айтганини қилдирадиган, гапининг икки қилинишини ёқтирмайдиган. *Ўз сўзли йигит — кун юзли йигит. Мақол. ■ Шу ўтган давр уни кўп нарсага ўргатди: бўшаган қишлоқ қизини ўз сўзли, чўрткесар қилиб қўйди. С. Аҳмад, Уфк.*

СЎЗЛИК 1 Бирор луғатга, маълумотномага киритилган ёки киритиладиган сўзлар рўйхати. *Изоҳли луғат сўзлиги. Сўзлик тузмоқ. ■ Муайян фан соҳаси ичида аввал мавзулар бўйича сўзлик тузилади. «ЎЗМЭ».*

2 эск. айн. луғат. *Ботаника сўзлиги.*

СЎЗЛИЛИК Муайян даражадаги ўжарлик, қайсарлик; сўзида, ваъдасида туришлик. *Ўзбек ойим эрига ялина бошлади: -Бир сўзлилигингизни қўйинг, эр. А. Қодирий, Ўтган кунлар.*

СЎЗМА-СЎЗ *рвш. 1* Битта ҳам сўзни тушириб қолдирмай, оқизмай-томизмай; айнан. *Эшитган гапларини сўзма-сўз айтиб бермоқ.*

2 Гапнинг бутун маъносига қараб эмас, балки ундаги сўзларнинг луғавий маъноларига қараб; луғавий. *Сўзма-сўз таржима қилмоқ. Сўзма-сўз таржима.*

СЎЗОНА [ф. *سوزانه / سوزان* — ёнган, куйган; ёнаётган; куйдирувчи, емирувчи] Куйган, аламли. *Сўзона бўлмоқ. ■ Соғинчдан юраги сўзона она.. сочлари қировга айланган она тўртинчи марта, умид билан, ўғлининг лақабини ҳам қўшиб чақирибди. «Ёшлик». Ишқдан қалби куйган сўзона бир шам, Ишққа исён этиб, ёд этар қасам. «Ёшлик». Ҳеч ким менингдек куймаган ҳажринг ўтига, эй санам, Танҳо туташдим ман ўзим, сўзона бўлдим соғиниб. Ҳамза.*

СЎЗСИЗ 1 *сфт.* Сўзи, сўзлари бўлмаган, Сўзсиз сурат.

2 *рвш.* Овоз чиқармай, гапирмай; сукут ичра, жим. *Ногаҳон фалакка урган каби дўқ, Сўзсиз қотиб турар бўйчан тераклар. А. Орипов, Йиллар армони.*

3 *рвш.* Ҳеч қандай эътирозсиз. *Сўзсиз итоат этмоқ. Сўзсиз таслим бўлмоқ. ■ Хоҳиш-иродамизни сўзсиз бажарасан. «Шарқ юлдузи».*

4 *мод. с.* Фикрнинг аниқлигини, қатъий буйруқ ва заруратни билдиради. *Сўзсиз, у келади. Мактабдаги мусобақаларга қатнашади ва, сўзсиз, биринчи ўринни эгаллайди.*

СЎЗСИЗЛИК 1 Жимлик, жимжитлик, сукунат. *Орага сўзсизлик чўкди. ■ Орадаги сўзсизлик бир пиёладан чой ичгунча бузилмади. А. Қодирий, Ўтган кунлар.*

2 Лафзи, субути йўқлик, ваъдасизлик, бебурдлик.

СЎЗЧАН *кам қўлл. айн. сўзамол.* Сўзчан одам.

СЎЗЧИ 1 Гап ташувчи, йўқ гапларни тарқатиб юрувчи, гийбатчи. *Сўзчи одам.*

2 *айн. сўзамол.* *Ботир ёвда билинар, сўзчи довда билинар. Мақол. ■ Созчимисан, сўзчимисан, Бозингар — савдогармисан. «Юсуф ва Аҳмад».*

СЎЙИЛ Узун йўгон қалтак, таёқ. *Кетмон, чўкки [чўкчи], ўроқ, сўйил кўтарган жабрдийда косиблар, деҳқонлар, чорикорлар, қўшчилар тўдалашиб, Хива сари отланди. С. Сиёев, Аваз.*

СЎЙИНМОҚ *с. т.* Севинмоқ.

СЎЙИНЧИ *с. т.* Суюнчи.

СЎЙЛАМОҚ 1 Сўзламоқ. *Аввал ўйла, кейин сўйла. Мақол. ■ Шунчалар билимдон сиёқингиз бор, Минг ўйлаб, бир сўйлар ўқитувчи ҳам. Ф. Фулом, Танланган асарлар. Сўз сўйлашда ва улардан жумла тузишда узоқ андиша керак. А. Қодирий, Кичик асарлар. Шивирлаб сўйлайлик Ватан ҳақида Узоқ қиш туни Оқ тонгни уйғотган эртакка ўхшаб. А. Шер, Қадимги куй.*

2 *айн. сўзламоқ 3.* ..*Ва кўмилиб куз боғларига, Афсоналар сўйлар Самарқанд Қадим ўзбек қишлоқларига. Х. Даврон, Қақнус. Жайрон ҳасратида йўл кечар овчи, Ошиқнинг дардини сўйлар ғазал, тор. Миртемир, Асарлар.*

СЎЙЛОҚ 1 Ташқарига туртиб чиққан, узун (тиш ҳақида). *Хотин шишган қовоқлари остидаги кўкимтир кўзларини қисиб, сўйлоқ тишларини кўрсатганча, сўрашган киши бўлади. Х. Султонов, Бир оқшом эртаги.*

2 Шундай тишли одам. *Сўйлоқ киши чиқиб келиб, юкни қабул қилиб олгач, чой-пойга шама қилиб ўтирмай, дарҳол эшикни ёпди. А. Обиджон, Аканг қарагай Гулмат.*

СЎЙМОҚ 1 Бўғзига тиф туртиб ўлдирмоқ, бўғизламоқ. *Қўй сўймоқ. Товуқ сўймоқ. Чумчуқ сўйса ҳам, қассоб сўйсин. Мақол. ■*

[Латифжон:] Хўп бўлади, додхоҳ.. Бўрдоқини сўйишга қассобни чақирайми? Ҳамза, Танланган асарлар. [Ҳожи:] Қудаларингни нима билан кутишини бўлса, ўзинг биласан: туя сўйиб чарлаганинда ҳам, келмайдиган кишилар! А. Қодирий, Ўтган кунлар.

2 Кесмоқ, бўлакламоқ, кесиб-кесиб қўймоқ. (асосан, қовун, тарвуз, анор ва ш. к. ҳақида). *Қовун сўймоқ.* ■ Камолiddин маҳдум нонни ушатиб, патнусдаги анорни олдию, авайлаб сўя бошлади. М. Исмоилий, Фарғона т. о. *Рўзи полвон.. ҳандалакни эпчиллик билан сўйиб, меҳмонларнинг олдига қўйди.* Ш. Рашидов, Бўрондан кучли.

Пичоқсиз (ёки тигсиз) сўймоқ Қаттиқ алам етказмоқ, азоб бермоқ. *Инсофсизлар, мени тигсиз сўйдиларинг.* «Шарқ юлдузи». **Ўтмас пичоқ билан сўймоқ қ. пичоқ.**

СЎЙМОҚ II с. т. Севмоқ, суймоқ, яхши кўрмоқ. *Тенг егани тангри сўйибди.* Мақол. ■ *Икковинг ҳам созандасан, Ота сўйган дўзандасан.* «Юсуф ва Аҳмад».

СЎК Тозаланган, оқланган тарик. *Хом сўк. Қовурилган сўк. Сўк оши.* *Овқатга сўк солмоқ. Сўк толқон.* ■ *Дастурхонда яна ўша қурт, сузма, сўк пайдо бўлди, салдан кейин эшикдан бир гуруҳ қизлар кўринди.* О. Ёқубов, Эр бошига иш тушса. *Палоссиз, зах цементда ётасан, Ҳар кунни ейдиган бир чўмич ёвгон сўк оши ёки сули бўтқадан ҳам маҳрум бўлиб, икки юз грамм нон ва сувга кунинг қолади.* «Ёшлик».

Оғзига сўк солмоқ айн. оғзига толқон солмоқ қ. толқон. *Ниҳоят, Файзулла чидаб туролмади: -Ҳа, оғзингларга сўк солволдиларингми бугун?* Х. Султонов, Бир оқшом эртаги. *Мана бугун ҳам Ҳабиба билан Қудрат, ораларидан оламушук ўтгандай, оғзиларига сўк солиб кириб келишди.* Қ. Кенжа, Тоғ йўлида бир оқшом. **Сўк ошига сурнай қ. сурнай.**

СЎКАҒОН Кўп сўкинадиган, бўлар-бўлмага сўкадиган, сўкинаверадиган; сўконғич. *Сўкағон одам.*

СЎКИК Чоклари сўкилган; чокидан кетган. *Сўкик тўн. Елкаси сўкик кўйлак.*

СЎКИЛМОҚ I Сўкмоқ I фл. ўзл. ва мажҳ. н. *Кўрна сўкилиб, қайта қавилди.* ■ -*Саид! — У отасининг чақирувидан сўнг кўприк устида тўхтади. Кўйлагининг сўкилган жойидан чиқиб турган ипни ўраб тураверди.* «Ёшлик».

Дили (ёки юраги) сўкилмоқ Дили аламга тўлмоқ, вайрон бўлмоқ. *Халқни деб юраги тўкилиб турган, халқ шўрида юраги сўкилиб турган шу нуруний кексалар қараб тура олармикан?* М. Исмоилий, Фарғона т. о. **Чокидан (ёки чок-чокидан) сўкилмоқ 1)** тарқалиб, тўс-тўс бўлиб кетмоқ. *-Дод! — Хонанинг шифтигача лорсиллаб кетди. Ўз бақриғидан бағри чок-чокидан сўкилди.* «Ёшлик»; 2) барбод бўлмоқ, бутунлай издан чиқмоқ. *Битта бўрон кўтарилувдики, бутун ишингиз чок-чокидан сўкилиб кетди.* Ш. Рашидов, Бўрондан кучли.

СЎКИЛМОҚ II Сўкмоқ II фл. мажҳ. н. **СЎКИНИШ I Сўкинмоқ** фл. ҳар. н. *Бекорга сўкиниш.*

2 Сўкиш, ҳақорат сўзлари. *Сўкинишлар ўрнини — бахтиёр кулги, ғийбат, фисқу фасод, миш-мишлар ўрнини ширин суҳбатлар олади. Ана унда инсон ер юзидо меҳмон эмас, мезбон бўлиб яшаяжак!* Газетадан. *Туябонлар, филбонларнинг жаҳл билан қичқириб сўкинишлари қулоқни қоматга келтиради.* «Ёшлик».

СЎКИНМОҚ Ўзича, ҳеч кимга қаратмасдан сўкмоқ; койинмоқ. *Яхшибоев бўралаб сўкинди, лекин кўзини очди.* М. М. Дўст, Лолазор. *Шоҳмурод Кўҳистоний кун бўйи диққат бўлиб, сўкиниб юрди.* Мирмуҳсин, Темур Малик. *Фақат.. узоқдан Қодир девкорнинг қораси кўринди дегунча, пўнғиллаб сўкинганча, кўздан пинҳон бўлишади, жуфтакни ростлаб қолишади.* «Ёшлик».

СЎКИЧАК с. т. Сўкчак. **СЎКИШ II I Сўкмоқ II** фл. ҳар. н. -*Сўкмас эдим, болам, — деди Яхшибоев. — Асли сени болаликда кўпроқ сўкиш керак эди, энди жуда кеч.. хўш, нега уялдинг?* М. М. Дўст, Лолазор.

2 Сўкиниш, ҳақорат сўзлари. *Сўкиш эшитмоқ.* ■ [Ҳотам Шўро:] *Сенда савод бор, менда икки-уч оғиз чўйратма сўкишдан ўзга савод йўқ, болам.* М. М. Дўст, Лолазор. *Гар шеғрни севмасанг, сўкишларим бор, Омон айламакни кутмагил мендан.* А. Орипов, Йиллар армони.

СЎКМОҚ I Тикилган нарсанинг ипини узиб, суғуриб, бўлақларга ажратмоқ. *Кўрпани сўкиб, ағдариб тикмоқ.* ■ [Отабек] *Тикилган ипларни сўкди ва мактубни очиб, оч кўзини ишга қўйди.* А. Қодирий, Ўтган кунлар.

СҮКМОҚ II 1 Ёмон сўзлар билан уришмоқ, ҳақорат қилмоқ. *-Ҳа, ноинсоф, ҳа кўп-нак! - Қоратой бойни сўка бошлади. - Ифлос қарға!* Ойбек, Танланган асарлар. *Очман! Яланғочман! Хорман! Сиз у деб сўкасиз, бу деб сўкасиз, бас-да шунча хўрлаганингиз.* М. Исмоилий, Фарғона т. о.

2 Умуман, уришмоқ, койимоқ. *Турғунбой бутун айбни қўлида боласини кўтариб турган хотинга тўнкаб, уни сўкди ва қизариб-бўзариб, меҳмонлар билан сўраша бошлади.* П. Турсун, Ҳўқитувчи.

СҮКОНҒИЧ айн. **сўкагон.** Сўконғич бола.

СҮКЧАК Қурт боқиш учун қурилган, одатда бир неча қаватли махсус стеллаж. *Ҳозир клубга келаётиб, баҳор пайтлари клуб ичида сўкчаклар тахлаиб, қурт боқишли эсимга тушди.* О. Мухтор, Бухоролик бир йигит. *Гулзира, одатича, қўлини орқасига қилиб, сўкчаклар орасидан бир айланиб ўтди.* «Шарқ юлдузи».

СҮЎЛ айн. **чап 1.** Сўл қўл. *Ўнг кўзингга сўл кўзинг соқчи бўлсин.* Мақол. ■ *Электр симга қўниб, бошини гоҳ ўнг, гоҳ сўлга буриб, атрофни кузатаётган дала қалдирғочига кўзи тушди.* С. Нуров, Майсаларни аёз урмайди. *Қайиқнинг ўнгида ва сўлида тинч, қора иморатлар, кемалар пайдо бўладилар.* Ҳ. Олимжон, Танланган асарлар.

СҮЎЛАК Сўлак безларидан ишлаб чиқариладиган ёпишқоқ суюқлик; оғиз суви. *Тамаки сўлак безларига таъсир этиб, унинг ишлаб чиқарилишини ва таркибини ўзгартиради.* «Саодат». Сўлак оғиз бўшлиғига тушган бактерияларни нобуд қилиш хусусиятига ҳам эга. «ЎЗМЭ».

СҮЎЛАКАЙ с. т. Сўлак. *Холида хонага кирганда, Зумрад кампир, сўлакайини оқизганча, конвертни елимлаётганди.* «Ёшлик». *-Ажойиб нарса экан, - деди бояя йигит сўлакайини оқизиб.* М. Осим, Карвон йўлларида.

СҮЎЛАКЧА с. т. Гўдакларнинг, чақалоқларнинг кўкрагига тутиладиган фартукча.

СҮЎЛАҚМОН I Йўғон таёқ; сўйил.

2 *кўчма салб.* Гунгурсдай, хирсдай, барваста одам ҳақида. *Бу она сути оғзидан кетмаган сўлақмонлар нимани кўрибди?! С. Анорбоев, Ҳамсуҳбатлар. Шу юрган бекорчи сўлақмонлар орасида юрса юрипти-да, унга ошунон берармидик.* С. Абдулла, Соялар.

СҮЎЛЖАЙМОҚ I Эс-ҳушини йўқотиб анграйиб қолмоқ; серраймоқ. *Мамат қас-соб: -Амманг ўлгандай сўлжайиб ўтиришинг нимаси, тур ўрнингдан! - деди Шодийерга.* «Ёшлик».

2 Қовоғини, лаб-лунжини осилтирмоқ; ўшшаймоқ. *Гўзал йигит сўлжайганича қайтиб чиқди ва портфелини олиб жўнади.* А. Қаҳҳор, Қайғулар.

3 Бужмаймоқ, бурушиб-тиришмоқ. *Чолнинг кўзига у [Вали полвон] ранги ўчиб, қони қочган, семиз лунжлари сўлжайиб, қалин лаблари баттар дўрдайган.. кўринди.* Ҳ. Назир, Ўтлар туташганда.

СҮЎЛИ шв. Бисотдаги мол-мулк, дунё. *Подшонинг уруши адо бўлмади, Дехқон халқининг сўли сира қолмади.* «Фольклор».

СҮЎЛИМ I Ёқимли ва гўзал, лўппи, дўндик. *Сўлим қиз. ■ Қиз атлас лозим, атлас кўйлақда сўлим ҳам содда кўриняпти.* «Ёшлик». *Далага чиқ, соф ҳавода этилиб юрган сўлимлардан бирини танла!* И. Раҳим, Чин муҳаббат.

2 Бегубор, соф, гўзал ва ёқимли. *Сўлим кеча. Сўлим баҳор. ■ Навоий кўчаси тун қўйнида ғоятда сўлим эди: беҳисоб чироқлар юлдуздек милтираб ёниб ётибди.* Мирмуҳсин, Умид. *Қишлоғимиз адир бағрида жойлашган, табиати сўлим, ҳавоси оромбахш.* «Шарқ юлдузи».

СҮЎЛИМОҚ с. т. Сўлмоқ. *Ўсмани узиб қўйдим, Сўлиса кўяман деб.* «Ёшлик». *Лазлихон кампирнинг сўлиган олмадек бурушган юзидан ўнди-да, югурганча ювиниш учун уйга кириб кетди.* «Саодат».

СҮЎЛИШ I Сўлимоқ фл. ҳар. н. *Япроқларнинг сўлиши. Гулдек сўлиш.*

2 Нафас, тин, сулиш. *Сўлиш олмоқ. ■ -Гап-да, укажон, - деди Яхшибоев сўлиш олиб. - Отингиз нимади? М. М. Дўст, Лолазор. Чавандоз инқиллаб-синқиллаб ўтираркан, оғир сўлиш олди.* «Ёшлик».

СҮЎЛИҚ I кам қўл. Сўлиган, сўлғин. *Сўлиқ гўл. Сўлиқ юз. ■ Соппа-соғ одамдай ёзармишсиз хат, Лекин, биламанки, афтингиз сўлиқ.* Миртемир, Асарлар.

СҮЎЛИҚ II с. т. Сувлуқ. *Сўлиқ чайнаб турган жийрон зулукдай улоқчи бўлиб кўринди [Заргаровнинг] кўзига.* А. Мухтор, Асарлар. *От, бурун катаклари керилиб, сўлиқни безовта чайнаб, ҳид олди.* С. Нуров, Майсаларни аёз урмайди.

СҮЛИҚМОҚ айн. сўлмоқ 2. Сўлиққан юзлар.

СҮЛКАВОЙ [р. целковый – бир сўмлик танга] с. т. эск. 1 Бир сўмлик танга. *Етти ярим сўлкавойни жойи ростонда оласан, деб жунаб кетдим.* А. Қодирий, Кичик асарлар. *Бойваччалар ҳаменидан жсарақ-жсарақ сўлкавойлар тўкилиб, Франциядан келтирилган винолар Нилдай оқди.* Мирмуҳсин, Қаҳрамоннома.

2 Умуман, бир сўмлик пул, бир сўм. *Ҳай, майли, юз сўлкавой берасиз, олиб бориб қўямиз, акажон!* О. Ёқубов, Тилла узук.

СҮЛМОҚ 1 Ҳисоб турган ёки янги узилган вақтидаги ҳолатини йўқотмоқ; шалпаймоқ (ўсимлик ҳақида). *Умид сўлиб, қовжираб қолган гўзалар тепасида айланарди.* Мирмуҳсин, Умид. *Қизил гуллар айтар: Ҳеч сўлмагайман, Ёмоннинг қўлида хор бўлмагайман.* «Кўшиқлар».

2 кўчма Ғам-ташвишдан ёки дард-алам чекиб, ўзини олдирмоқ, ранги кетиб, қути ўчиб, синиқиб, сўлгин тус олмоқ; синиқмоқ. *Эл билан бўлсанг – бўласан, Элдан чиқсанг – сўласан.* Мақол. ■ *Қоп-қора кўзинг Ёшларга тўлмиш, Ой каби юзинг Япроқдай сўлмиш.* Миртемир, Асарлар. *Симобдек беқарор, куч-ғайрати танига сиғмаган ўт-олов йигит энди сўлган, тақдирнинг бемаҳал зарбасидан эсанкираб қолганди.* С. Аҳмад, Уфқ.

СҮЛОҚ Арава гупчаги тешигига икки томонидан ўрнатилган темир ҳалқа (гупчакнинг ейилиб кетмаслиги ва ўқнинг равон айланиши учун хизмат қилади). Сўлоқ ўрнатмоқ. Сўлоқни мойламоқ.

Сўлоғи ўйнаган (ёки чиққан) 1) сўлоғи маҳкам ўрнашмаган, қимирлаб, лиқиллаб турадиган. Сўлоғи ўйнаган арава; 2) кўчма дабдаласи чиққан, шалоқ. [Турғун Мирбадалга:] *Оббо! Сўлоғи чиққан машинангизни мунча мақтадингиз!* Н. Сафаров, Ҳаёт мактаби. «Победа» тўхтади. -*Юрмаяптими?* – сўради Рабиев. -*Эски. Сўлоғи ўйнаган, – изоҳ берди Сайфи.* Ш. Тошматов, Тонгдаги кўланка; 3) кўчма абжағи чиққан, яқсон, тормор бўлган. **Сўлоғини ўйнатмоқ (ёки чиқармоқ)** 1) дабдала, шалоқ қилмоқ. *Ўйинчоқнинг сўлоғини ўйнатибди;* 2) кўчма абжағини чиқармоқ; яқсон, тормор қилмоқ.

СҮЛҚИЛДОҚ 1 Лўмбиллаган, семиз, дўмбоқ, лўппи, сўлқиллаган. *Сўлқилдоқ бола.* ■ *Хумор келиннинг катта қора кўзлари*

ҳам, тер, сут ҳиди анқийган сўлқилдоқ тани ҳам, илиқ нафаси ҳам Бўрихонга ёқади. С. Нуров, Майсаларни аёз урмайди.

2 Эндигина етилган, сурх. *Сўлқилдоқ новда.* ■ [Мирғиёс:] *Кўк қурт! Ёмон офат. Ғузанинг заволи. Тезда тухумини қуртиши керак. Ғузанинг айна сўлқилдоқ найти, кемиради очофат!* Р. Азизхўжаев, Яшил чайла.

Сўлқилдоқ ер Етилиб, бўртиб, кўпчиб турган ер. **Сўлқилдоқ нон** Кўпчиб, сингиб пишган янги нон. *Нон, гарчанд арпа қўшилган бўлса ҳам, шундай иссиқ, сўлқилдоқ, ўзи-ям шундай қизариб пишганки, кўргандаёқ ташланади киши.* О. Ёқубов, Эр бошига иш тушса.

СҮЛҚИЛЛАМОҚ Аста тебранмоқ, селкилламоқ. *Кўклам бўлса, томошадир чўллари, От чопганда, сўлқиллайди беллари.* «Гулихиромон». *Лутфиниса оппоқ, юрса сўлқиллайдиган, икки қошининг учи бир-бирига туташ, буйи сал пастроқ, тўлагина қиз.* С. Аҳмад, Уфқ.

Сўлқиллаган ёки сўлқиллаб пишган (ёки турган) нон айн. **сўлқилдоқ нон** қ. **сўлқилдоқ.** *Ҳайрон бўлманг, Дилшодбек, рост гап. Ахир седана сепилган, сўлқиллаб турган бундақанги нонни ҳеч қаердан тополмайсиз!* М. Исмоилий, Фарғона т. о. **Сўлқиллаган ер** айн. **сўлқилдоқ ер** қ. **сўлқилдоқ.**

СҮЛҒИН 1 Сўлиган, сўлиқ. Сўлгин гўза. ■ *Экинлар томирига қон югурди. Сўлгин япроқлар аста жонлана бошлади.* Ж. Абдуллахонов, Тўфон. *Сахий жануб қуёши шитоб билан тик кўтарилди. Ўт-алаф ҳам, гулчечак ҳам.. иссиққа дош беролмай, сўлгин бош эгди.* С. Абдуқаҳҳор, Жанубий нуқтада.

2 кўчма Ўзини олдирган, синиққан, ранги кетган, қути ўчган, сўлиққан. *Сўлгин чеҳра.* ■ *Онанинг ранги сўлгин, кўпдан дард чекиб, хийла азоб тортган аёлнинг юзларига ўхшарди.* Ж. Абдуллахонов, Хонадон. *Панжининг кўзлари қизарган, юзи сўлгин эди.* «Ёшлик».

3 Файзини йўқотган, файз-футурдан кетган. *Сал сўлгин, қалин тутзорларга куз ҳали қўл урмаган бўлса ҳам, энди ёз эмас эди.* «Ёшлик». *Қуёш гоҳ булутлар орасига яширинар, гоҳ бирдан сўлгин далаларни, яланғоч теракларни майин товлантирар эди.* Ойбек, О. в. шабадалар.

Рухи сўлгин Рухи гушган, сўниқ. *Чолине руҳи сўлгин, кўзлари ич-ичига кириб кетган*

эди. Н. Сафаров, Султон бўзчининг неваралари.

СЎЛҒИНЛАШМОҚ Сўлғин кўринишида бўлмоқ; синиқмоқ. *Нечундир Асалнинг ранг-рўйи кўп ўтмай сўлғинлашди, овози, кулгиси дағаллашди. «Ёшлик». Саиднинг руҳи сўниб, ранг-рўйи тобора сўлғинлашиб борарди. «Шарқ юлдузи».*

СЎЛҒИНЛИК Сўлиқлик, синиққанлик, ҳорғинлик; руҳи тушганлик, хафалик. *Султонхоннинг ранги ўча бошлаган эди, икки бетидога шапалоқдай қизилига сўлғинлик югурди. Чўлпон, Кеча ва кундуз. Нигора бошини столдан шиддат билан кўтарди. Кўзларида маънос сўлғинлик, лабларида кинояли табассум. С. Анорбоев, Оқсой.*

СЎМ 1 тар. Собиқ Иттифоқда: совет рублининг ўзбекча номи; рубль. *Бир сўм. Уч сўм. ■ Проводник бир даста кулранг чойшаб, боғичи узилган ёстиқ жилдлар олиб келди, жувон билан Нусратбек бир сўмдан тўлаб олишди. С. Нуров, Майсаларни аёз урмайди. Мен гишт кукуни кўшилган гуруччи девзира деб, kilosини тўрт сўмдан сотаман. С. Аҳмад, Юлдуз.*

2 Ўзбекистон Республикасининг асосий пул бирлиги (1994 йил 1 июлдан). *Икки юз сўм. Минг сўм. ■ Сўмнинг муомаласага киритилиши Ўзбекистон пул муомаласи ва ҳисобкитоблар тизимини ташкил этиш ҳамда республика иқтисодиётини ривожлантиришида муҳим аҳамиятга эга бўлди. «ЎЗМЭ».*

СЎМ II Катта чипқон, хўппоз.

СЎМ III: сўм гўшт Суяксиз ва ёғсиз юмшоқ эт, лаҳм гўшт.

СЎМЛАБ *рви. 1* Сўмлар билан; ҳар бир сўмини алоҳида. *Пуларни сўмлаб санаб чиқмоқ. Сўмлаб пул йиғмоқ.*

2 Унча-мунча пулнинг бетига қарамай, кўплаб, катта-катта (ҳаражат қилмоқ). *Миллион сўмлаб пул топмоқ. ■ Бундай оилаларда тирикчилик эҳтиёжларига сўмлаб эмас, тийинлаб сарф қилинади. М. Исмоилий, Одамийлик қиссаси.*

СЎМЛИК Қўямати сўм турадиган, сўмга тенг. *Ун минг сўмлик ҳаражат. ■ Оқсоқолнинг жазаваси тутиб, плёнка дастурхонга тугилган бир нимани олиб, чўнқайиб ўтириб ечди-да, ичидан юз сўмликларни олиб, бошидан ошириб сочаверди. С. Аҳмад, Уфқ. Ҳар бир этик учун бир сўмлик материал сарф қилдилар. С. Айний, Куллар.*

СЎНА I: сўна пашша Икки қанотлиларга мансуб, калта мўйловли ҳашарот: урғочиси ҳайвонлар, баъзан одам қонини сўрадиган, эркаги гуллар шираси ва б. суяқликлар билан озиқланадиган йирик пашша. *[Мулладўст:] Ўргилай, тақсир! Бебахтнинг ошига пашша ҳам, кана ҳам, сўна ҳам, қолаверса, шалолаб олиб мана шунақа азройил ҳам, мункарнакир ҳам тушаверади. Ҳамза, Танланган асарлар.*

Сўна бўлмоқ Ҳира пашшадай ёпишиб олмоқ, пашшахўрда бўлмоқ.

СЎНА II Ёввойи ёки хонаки эркак ўрдак. *Шакарқўлга овга кетиб бораман, Шакарқўлдан сўна, суқсур ураман. «Интизор».*

СЎНГ I *от* Охир, пировард, ниҳоя. *Асарнинг боши ва сўнги. Зўрликнинг сўнги — хўрлик. Мақол. ■ [Кумуш] Сўзининг сўнгини айтолмади. А. Қодирий, Ўтган кунлар. Кушбеги мактубнинг сўнроғига келиб тўхтади-да, чақирди: -Пирмат, Пирмат! А. Қодирий, Ўтган кунлар. Дейдилар, фазонинг чегараси йўқ, Миллиард юлдузларнинг сўнги ҳам фазо. А. Орипов, Йиллар армони.*

2 сфт. Охирги, сўнгги. *Сўнг дафъа. Сўнг бор.*

3 рви. Кейин, сўнгра. *Сўнг дарди енглашдимиз, қадамлари илдамлашди. «Шарқ юлдузи». Сўзимиз тамом бўлсин, сўнг боражакман. С. Сиёев, Ёруғлик.*

4 кўм. (ч. к. билан) =дан кейин. *Бир оздан сўнг. ■ Саломдан сўнг Аҳмад тўғри муддаога ўтди. Ф. Мусажонов, Ҳиммат. Устод бир неча сониялик мулоҳазалардан сўнг қатъият ила олдинга юриб, ипни ушлади. «Фан ва турмуш».*

Сўнг сўз Асар охиридаги хотима; охирги сўз.

СЎНГАК Суяк, устухон. *Сўнгак ош бўлмас, нодон бош бўлмас. Мақол. ■ Камина: -Оёғимда бодим бор, сўнгақларим ҳали бутун, шукр, замона тўқлиқ, илигим тўла, — дедим. Н. Аминов, Қаҳқаҳа. Энди нима қилай, энди дашти биёбонга бош олиб кетайми?! У ёқда сўнгагимниям ҳеч ким тополмайди. «Ёшлик».*

СЎНГГИ I Охирги, охиридаги. *Сўнги йил. Сўнги саҳифа. Сўнги пушаймон — ўзинга душман. Мақол. ■ Отам сўнги ерини уч тиллога сотган маҳалда мен 10—11 ёшларда эдим. «Фан ва турмуш». Нимаики ёзма касалхонада, У сўнги ишиндек туюлаверар. А. Орипов, Йиллар армони. Заргаров мезбон-*

нинг сўнги сўзларини эслаб жилмайди. А. Мухтор, Асарлар. *Охунбобоев, уни хижолат қилмаслик учун, Норин суви қуйилиши керак бўлган каналнинг сўнги участкасини кўргани Қорадарё бўйига тушиб кетди.* С. Аҳмад, Уфқ. *Сўнги вақтларда игна билан даволаш усулига қизиқиш ортиб бормоқда.* «Фан ва турмуш».

2 Маълум иш ёки маълум пайтдан кейинги, кейин бўлган ёки бўладиган. *Сўнги қирқ йил мобайнида республикамизда илмий ходимларнинг умумий сони 103 марта.. кўпайди.* «Фан ва турмуш». *Сўнги вақтларда шаҳарда ижобий силжишлар кўзга ташланаётганлигини қайд этиб ўтиш лозим.* Газетадан. [Отабек] *Ҳомиднинг бундан сўнги режаларини ўрганишга ва шунга қараб кураш бошлашга қарор берган.. эди.* А. Қодирий, Ўтган кунлар.

СЎНГРА *рвш.* **1** Кейин, сўнг. *Душман ошингни ер, Сўнгра бошингни ер.* Мақол. ■ [Фотима:] *Олдин бир нарсага тушуниб олинг, сўнгра аччиқ қилсангиз мумкин.* Ҳамза, Тухматчилар жазоси.

2 Бундан, булардан ташқари; иккинчидан. *Келувчилар «аҳли раста», яъни савдогарлардан, сўнгра уламо, мударрис ва эшонлардан иборат.* Ойбек, Танланган асарлар. *Энди Салимжонга кириб айтинг, бундай ишдан қўлини тийсин! Бу – бир, сўнгра, ҳовлиқмасин.* Ойбек, Танланган асарлар.

СЎНГСИЗ Сўнги, охири, поёни йўқ; бепоеён, чексиз. *Сўнгсиз саҳро. Сўнгсиз йўл.* ■ *Бобо ёнидаги боладий хушхўл, Тўрғайлар чарх урар сўнгсиз самода.* А. Орипов, Йиллар армони. *Дўстларим, булар ҳам мезонмас сира, Бу – менинг чувалган, сўнгсиз ўйларим.* А. Орипов, Йиллар армони.

СЎНГСЎЗ (тўғриси сўнг сўз) қ. сўнг. **СЎНИҚ 1** Ўчган, сўнган, ўчирилган, ўчиқ. *Сўниқ печь.*

2 Хира, нурсиз. *Сўниқ юлдузлар.* ■ *Сўниқ кўзлари мўлтираб турган, ҳар бир буйруқни сўзсиз бажарувчи йиғит, қадам ташлашидан ёш жувонга ўхшаган жулдур паранжили аёлни сарой томон бошлади.* М. Осим, Карвон йўлларида.

3 *Кўчма* Синиққан, сўлгин. *Сўниқ чехра.* ■ *Ҳафиза ноумид уйга келди. У сўниқ, кайфи наст эди.* Мирмуҳсин, Умид. *Балки қаршингизга келгандир мунис Бева келинчакнинг сўниқ рухсори.* А. Орипов, Йиллар армони.

4 Ҳарорати, қўри кетган; сўнган. *Қалби сўниқ кишилар.*

Рухи сўниқ ёки сўниқ руҳ Рухи тушган, руҳи сўлгин. *Рухи сўниқ кишидан путур кетар ишидан.* Мақол. ■ *Пайғамов хотинининг сўниқ руҳи, совуқ қарашларини Нурсратбек сезанидан пинҳона изтироб чекди.* С. Нуров, Майсаларни аёз урмайди.

5 *Кўчма* Бўғиқ, ҳазин. *Сўниқ товуш.* ■ *– Ҳеч қандай айбим йўқ, ҳеч нарса билмайман, оға, – деди сўниқ овоз билан Абдусаломхўжа.* Ж. Шарипов, Хоразм.

СЎНИҚЛИК Сўниқ, нурсиз бўлишлик; руҳи тушганлик, руҳсизлик. *Нурнинг сўниқлиги. Кўзнинг сўниқлиги.* ■ *Чунки киши юзидаги сўниқлик, эснаш одатидек, дарров бошқаларга ҳам ўтади.* Мирмуҳсин, Илдиз ва япроқлар.

СЎНМАС 1 Сира ўчмайдиган, сўнмайдиган, абадий ёниб турадиган; ўчмас. *Ёдгорлик ёнида сўнмас машъал ёниб турибди.* ■ *Умидни жодига қўйиб, тўрт бўлак қилса бўладиган хиёнатини ҳам биларди.* *Лекин юрагида бир сўнмас оташ лов-лов ёниб ётарди.* Мирмуҳсин, Умид.

2 *Кўчма* Абадий турадиган; ўлмас. *Бу саҳар минг йиллар тилақларига Сўнмас овоз бериб янграган бонгдир.* А. Шер, Қадимги куй. *Олисдаги тоғлар сўнмас шўқор билан қад кериб турибди.* «Шарқ юлдузи».

СЎНМОҚ 1 Ёнмай, ёруғ бермай қўймоқ; ўчмоқ. *Учқун йилт этиб сўнди.* «Шарқ юлдузи». *Мушакнинг кўк, сариқ, қизил шуълалари тупроқ уюмларини, чойхона томларини узоқ ёритиб турди-да, кейин аста сўнди.* С. Аҳмад, Уфқ. *Домла сўна бошлаган гулханга ўтин ташлай туриб, унга синовчан қараб қўйди-ю, атай елка учирди.* М. Мансуров, Ёмби.

2 Ёруғлик кучи, даражаси пасайиб, нурсизланиб бормоқ, хира тортмоқ, хиралашмоқ. *Чекина олмайди деворда тасвир, Секин сўна бошлар деворда кўёш.* Х. Даврон, Қақнус. *Деразадан тушиб турган ёруғлик аста-аста сўниб, уй ичи қоронғилашаверди.* С. Аҳмад, Хукм.

3 *Кўчма* Дастлабки кучи, даражаси, шиддати пасаймоқ, сусаймоқ; ўчмоқ. *Юракдаги исёнкор туйғулар аста-секин сўниб, хаёлини аллақандай маънос ўйлар банд этди.* О. Ёкубов, Эр бошига иш тушса. *Илгаригидек*

ёнишлар, талпинишлар, эркалашлар, ҳаяжонлар сўнгандек.. Мирмуҳсин, Умид.

4 кўча Пасаймоқ, кучсизланмоқ (овоз, товуш ҳақида). Олам сукунати аниқроқ кетган поездининг сўниб борувчи тарақа-туруқидан бўлак ҳеч нарса бузмасди. М. Муҳамедов, Қаҳрамон изидан. Сўниб қолган кулги яна оловлана бошлади. П. Қодиров, Уч илдиш.

Ҳаёти (ёки умри) сўнмоқ Ўлмоқ, вафот қилмоқ.

СЎПОҚ Ясси ва чўзиқ (асосан бош ва юз тузилиши, бичими ҳақида). Сўпоқ бош. Сўпоқ (бош) бола. ■ Не кўзи билан кўрсинки, қизнинг рўпарасида турган — Қултой калла эди. Унинг катта сўпоқ боши чироқ ёруғида тебраниди. А. Мухтор, Асарлар. Сўпоқ бошининг таклифи билан қафасни боғнинг гадои топмас бир чеккасига кўчиришганди. «Шарқ юлдузи».

Ўтирса — ўпоқ, турса — сўпоқ демоқ қ. ўпоқ. Бибижоннинг бешик қўлтиқлаб, бола боқиб ўтириши бойга ҳам, унинг хотинларига ҳам хуш келмасди. Шунинг учун ҳам улар бу ўзича бахтиёр онага, ўтирса — ўпоқ, турса — сўпоқ, деб кун кўрсатишмади. К. Яшин, Ҳамза.

СЎСПАЙМОҚ 1 Ёлғиз қўққайиб турмоқ; хунукдан-хунук бўлиб қўққайиб қолмоқ. Аёл кийим-кечаклар бетартиб сочилган хона ўртасида гангигандек сўспайиб турарди. «Ёшлик». Хотин мендан бирор ўн ёш кичик, кўриниши ҳам шунга яраша, лекин ўзимизнинг бўларимиз бўлган.. бурун сўспайиб чиққан, лунжлар осилган, бўйин қилтириқ торган. М. М. Дўст, Лолазор. Нима қилсин, бир ўзи ҳовлида сўспайиб тура олмайди-ку. «Ёшлик».

2 Кимсасиз, ёлғиз бўлмоқ. Чол-кампир сўспайиб қолдик. Уй жимжит.. бир-биримизга мўлтайиб қараб ўтирамыз. В. Фофуров, Вафодор. Ҳамма далада, ишда, бир ўзим маҳаллада сўспайиб юргим келмади. Р. Раҳмон, Меҳр кўзда. Дунёга одам сўспайиб келиб, сўспайиб кетадиган бўлса, ундай одамнинг келганидан келмагани. М. Исмоилий, Фаргона т. о.

3 Ҳеч нарсасиз, қуруқдан-қуруқ. Тоғани [тоғанинг суратини] айниқса беш кетадиган қилиб чизибди. Хўп вақтида буюрган эканми. Бўлмаса қуруқдан-қуруқ, сўспайиб кириб боришарди. М. Мансуров, Ёмби.

СЎРАБ-СУРИШТИРМОҚ қ. сўрамоқ **1**. Менинг назаримда, Фотима суҳбатга эҳтиёткорлик билан ёндашар, кўпроқ менинг ҳақимда сўраб-суриштирарди.. «Ёшлик». Агар сенда эрлик ҳуқуқи бўлганида эди, менинг нима иш қилишим ва қаерларда юришимни олдинроқ сўраб-суриштирган бўлардинг. «Ёшлик».

СЎРАМОҚ 1 Маълумот олиш, билиш учун савол билан мурожаат қилмоқ; савол, сўроқ бермоқ. Манзилини сўрамоқ. Воқеанинг тафсилотини сўрамоқ. Сўраганинг айби йўқ. Мақол. Кўп юргандан сўрама, кўп кўргандан сўра. Мақол. ■ Куйганёр кўприги олдида келганда, шофёр тормоз бериб, қўй етаклаган кишидан еттинчи участка қай тарафдалигини сўради. С. Аҳмад, Уфқ. Азизхоннинг ўша тарафларга боргиси келди. Шошиб сўради: -Армияга одам олишадими? С. Аҳмад, Уфқ.

Кўнгил сўрамоқ қ. кўнгил **1**. Ҳаммадан онанг рози, Кўнгил сўраб туради. «Кўшпиклар».

2 Кимсани чақирмоқ ёки чақирилишини илтимос қилмоқ. -Алло, кимни сўраяпсиз? — Аҳмедовни сўраяпман.

3 Билимини текширмоқ, имтиҳон қилмоқ. «Ж»нинг каттасини кўрсатиб бермадингиз, эртага домла сўрайдиган эдилар. Қанақа ёзилади? А. Қаҳҳор, Санъаткор. Қўйинг, хола, алахситманг, дарсларини қилсинлар.. Битта-яримта одам дарсдан сўраб қолса.. Ҳеч ким сўрамаса ҳам, Урмонжон акам сўрайдилар. А. Қаҳҳор, Кўшчинор чироқлари.

4 Фикрлашиб, маслаҳатини ёки руҳсатини олмоқ. [Қутидор] Хотини ва қизидан сўраб ўтирмай, бир кун дўконидан эркак совчилар билан битишиб ҳам келди. А. Қодирий, Ўтган кунлар. Янаи йилга ер экувсиз қолса, колхоз ҳеч кимдан сўраб ҳам ўтирмасдан, қўш солиб юборади. А. Қаҳҳор, Кўшчинор чироқлари.

5 Бирор илтимос ёки талаб билан мурожаат этмоқ; илтимос ёки талаб қилмоқ. Изн сўрамоқ. Узр сўрамоқ. Қарз сўрамоқ. Номарддан ёрдам сўрама, юзингга солади. Мақол. Бой қўшинингдан сўрагунча, Йўқ уйингни ахтар. Мақол. ■ Азизхон жой излаб аланглаб тураркан, юқорида ўтирган Белявский уни имлаб, юқорига чиқишини сўради. С. Аҳмад, Уфқ. [Муҳсина] Савол сўралганда ҳам, жавоб бермайди, эрига мўлтираб қарайди — изн сўрайди. М. М. Дўст, Лолазор.

Баширжон ўзининг мушкул аҳволи тўғрисида маслаҳат сўрамоқчи эди, бўлмади. Кўрдик, акашоннинг аҳволи уникидан ҳам оғир. Н. Аминов, Қаҳқаҳа.

Гуноҳини сўрамоқ Гуноҳидан ўтишни илтимос қилмоқ. [*Мирзақул:*] *Бой ота, Суярни- нинг гуноҳини мен сиздан сўрадим. Кечинг. Н. Сафаров, Уйғониш.*

6 Рухсат, ижозат ёки розилик олмоқ. *Эшик очиқ бўлса ҳам, сўраб кир. Мақол. Меҳмон сўраб емас. Мақол. ■ Муқбил подишодан Ҳотамни бошлаб келишга ижозат сўрабди. «Чалпак ёққан кун».*

7 Кимсани хотинликка, келинликка берилишини илтимос қилмоқ. *Қиз(ини) сўрамоқ. Қизни сўраганга бер, Қимизни — сувсаганга. Мақол. ■ Мамат қассобнинг қизини қўшни қишлоқдан бир неча одам сўраган эди. «Ешлик».*

8 Бировни ахтармоқ ёки изламоқ. *Бугун Азизхонни сўрамаган, суриштирмаган одам йўқ, деса бўлади. С. Аҳмад, Уфқ. Кўп шаҳарга бордим сўраб, Тополмадим норим истаб. «Нурали». Ҳозир Эшон қишлоқда ҳам у кишини икки отлик сўради. С. Аҳмад, Уфқ.*

9 Салом ва яхши истақларни бировга етказмоқ. *Қариндошларни сўраб қўйинг.*

10 Савдода, олди-сотдида ўз моли учун бирор нархни айтмоқ. *Қиммат сўрамоқ. ■ -Тойчангизга неча пул сўрайсиз? -Эгаси юз сўм сўради. Мен етмиш сўм дедим. А. Қаҳҳор, Қанотсиз читтак. -Кетамиз, — деди [Отабек] бир оз ўйлангандан кейин, — мол баҳолари тўғрисида битишолмай турамиз — олғувчилар арзон сўрайдилар. А. Қодирий, Ўтган кунлар.*

11 фольк. Идора этмоқ; ҳокимлик, ҳукмронлик қилмоқ. *Юртни сўрамоқ. ■ Бу бошимга хос саллани ўрайман, Омон бўлсам, мамлакатни сўрайман. «Эрали ва Шерали». Чамбилбелни сўраб ётган зўр султон, Ўғил ёки қиз кўрмади Юнусдан. «Маликаи айёр».*

СЎРАШИШ 1 Сўрашмоқ 2 фл. ҳар. н. *-Ассалому алайҳум, эшон ака, менман, — деди Гуломжон ҳам, сўрашишга мажбур бўлиб. М. Исмоилий, Фарғона т. о.*

2 Салом-алик; кўришиш. *Мўмин кишиларнинг қўл бериб сўрашиши бошқа миллатларнинг ўпишиб кўришиши билан баробардир. «Фан ва турмуш».*

СЎРАШМОҚ 1 Сўрамоқ 1-3, 5-10 фл. бирг. н. *Ундан ҳеч нарса сўрашмади. ■ Штаб*

радиоузелидан тинмай қурувчилардан тартиб сақлашни, ўзбошимчалик қилмасликни сўрашарди. С. Аҳмад, Уфқ.

2 Салом-алик қилмоқ, кўришмоқ. *Қўл бериб сўрашмоқ.*

СЎРГИЧ бот. Гулнинг оталик чангини тутиб қоладиган қисми, тумшукчаси.

СЎРИ [*а. سرير* — каравот, койка] **1** Ток, қовоқ ва ш. к. чирмашувчи ўсимликларни ўстириш, кўтариб қўйиш учун шийпон шаклида, тик ёки қия қилиб кўтарилган мослама, қурилма. *Токларни сўрига олмоқ. ■ Токни сўрида ўстириш усули халқ тажрибаси асосида вужудга келган. «ЎЗМЭ».*

2 Нарса қўйиш, ёйиш учун қурилган, тўрт оёққа ўрнатилган тахта супа. *Инкубаторлар учун жой тайёрлаш, пиллахоналарни ремонт қилиш, ёқилги жамғариш, биналарни дезинфекциялаш, сўкчаклар ва сўрилар ҳозирлаш ишлари авж олиб кетди. Газетадан.*

3 шв. Катта тахта каравот. *Ҳали барг ёзмай, безрайиб турган икки туп сада тагидаги чойхона сўриларида одам кўп. С. Аҳмад, Ҳукм. Шийпоннинг сўриси битди-ю, томи ёпиқсиз қолди. «Шарқ юлдузи». Искандар эса беихтиёр сўри панжарасига оғир суяниб, ўзи сезмаган ҳолда, тоғ ағдарган одамдек чуқур тин олди. М. Мансуров, Ёмби.*

СЎРИТОК айн. **сўри 1.** Узум каттакатта боғларда ишқом қилиб ўстирилса, шаҳар ва қишлоқ ҳовлиларида асосан сўриток усулида етиштирилади. *К. Маҳмудов, Ўзбек тансиқ таомлари.*

СЎРМОҚ 1 **1** Лабларга қўйиб ёки лаб орасига олиб, сиқиб ичга тортмоқ. *Анорнинг сувини сўрмоқ. Жавзо кирмай, равоч сувини сўр. Мақол.*

2 Шу йўсинда овқатланмоқ, эммоқ (бола ҳақида). *Она кўкрагини сўриб ётмоқ.*

3 Дамига тортиб олмоқ. *Насос сувни сўриб олади.*

4 Умуман, тортиб олмоқ. *Куз офтоби.. эрталабдан оқшомги ёмғир заҳрини сўра бошлади. Й. Шамшаров, Кумуш пиёла. Тепага кўтарилган қуёш утли тили билан ер бағридаги барча намни сўриб оларди. Ш. Рашидов, Бўрондан кучли.*

5 Тирик организмларнинг сувини, ширасини, қонини махсус аъзолари ёрдамида тортиб ичмоқ (ҳашаротлар, қуш ва ҳайвонлар ҳақида). *Капалак гул сувини сўради. Зулук қон сўради. ■ Ёш ўргимчаклар онаси-*

нинг ҳар томонидан қон суюқлигини сўраверди. «Фан ва турмуш».

6 Оғизга олиб ва тупук билан ҳўлаб, селини тил ва танглай ҳаракати билан аста-секин ичга ютмоқ; шиммоқ. *Конфет сўрмоқ.* ■ *-Биз деҳқон одаммиз, Саидқул, — деди у. — Сиз у — аёллар билан кўп гаплашиб, оз тановул қилиб, кейин газагига қанд сўради-ган. М. М. Дўст, Лолазор.*

7 кўчма Зўрлик ёки алдов билан биронинг кучидан, меҳнатидан, бойлигидан фойдаланмоқ; эксплуатация қилмоқ. [*Зухра:*] *Сизнинг кўлогига тушган канадай эрни сўриб ётиш ҳам яхши касб! А. Қаҳҳор, Оғриқ тишлар.*

8 Чекмоқ, тортмоқ. *Чилим сўрмоқ.* ■ *Бектемир махорка ўраб, жимгина сўра бошлади. Ойбек, Қуёш қораймас.*

Бармоғининг (ёки тирноғининг) кирини сўрмоқ Оч қолмоқ, ейишга нарса тополмаслик. Кўпларнинг егани нони, қалагани ўтини йўқ. *Бармоғининг кирини сўриб, оёғини эски тўшакка ўраб ўтирибдур. Х. Тўхтабоев, Йиллар ва йўллар. Қонини (ёки кучини, илигини) сўрмоқ қ. қон.* *Бултур, кеч куз, қишининг бошлари бўлса керак — куч-қувватини аллақандай кўринмас жонзот сўриб олгандек, бирдан озиб-тўзиб.. ранги олинди, бурунги ғайратидан асар ҳам қолмади. «Ёшлик».* *Деҳқонларнинг ҳоли шундайин ўтган Шафқатсизлар илигин сўриб ётган. Эргаш Жуманбулбул ўғли.*

СЎРМОҚ II айн. **сўрамоқ.** Ранг кўр, ҳол сўр. Мақол. ■ *Аслим сўрсанг, бир якдона гавҳарман, Ёвмит, дейди униб-ўсган юртимни. «Гўрўғлининг туғилиши».* *Арзи ҳолингни бугун сўргали султон келадур. Ҳамза.*

СЎРОВ I **Сўрамоқ** фл. ҳар. н. *Бадалмат дума, Боқижонбойларга айтиб, уйларидаги бутун ғиламларини вокзалга чиқаришларини сўров керак. Ф. Фулом, Танланган асарлар.*

2 Савол, сўроқ. *Ҳафиза эрининг сўровига қисқагина жавоб қилди. Мирмуҳсин, Умид.*

3 Илтимо ёки талаб. *Сухбатдошлар сўрови билан мен ҳам ўзим тўғримда сўзлаб бердим. Н. Сафаров, Оловли излар.*

4 расм. Бирор маълумот ёки тушунтириш берилиши ҳақидаги расмий талаб; талабнома.

5 расм. Социологик тадқиқотларда қўлланидан дастлабки ахборот йиғиш усули. *Сўров социологик ахборотнинг ишончлилигини, яъни тадқиқотларда олинган маълумот-*

ларнинг ҳаққонийлигини таъминлаши зарур. «ЎЗМЭ».

СЎРОВНОМА I Ишга қабул қилишда тўлдириладиган расмий ҳужжат. *Сўровномада ишга кирувчи (тўлдирувчи)нинг имзосидан ташқари кадрлар билан шуғулланувчи (ҳужжатни текшириб олувчи)нинг ҳам имзоси бўлади. «ЎЗМЭ».*

2 Тўлдираётган одам ҳақида бирон-бир маълумот олиш ёки муайян дастур бўйича тузилган саволларга жавоб олиш учун бериладиган сўров варақаси, анкета. *Сўровнома тузиш, уни тарқатиш, ўрганиш (анкета-лаштириш) ижтимоий фанларда, аҳоли рўйхатини ўтказишда, жамоатчилик фикрини ўрганишда қўлланади. «ЎЗМЭ».*

3 айн. **сўров 4.** *Уша сўровномага ташкилот раҳбари нима жавоб қилган? Э. Аъзам, Кечикаётган одам.*

СЎРОҚ I Савол, сўров. *Сўроқ бермоқ. Сўроқ оҳанги. Сўроқ гап.* ■ *Кечир, Зайнаб, ожиздир Омон, Бу сўроғинг жон ўртар ёмон. Ҳ. Олимжон, Танланган асарлар. «Нега?», дейсан, тушунмайсан, ўз сўроғингнинг Жавобини юрагиндан тинглаб кўрасан. Ф. Фулом, Танланган асарлар.*

Сўроқ белгиси тлш. Мазмунидан сўроқ англашилган гаплар охирига қўйиладиган ва шу гапнинг ифода мақсадига кўра сўроқ гап эканлигини кўрсатадиган тиниш белгиси.

2 ҳуқ. Шахсдан кўрсатув ва тушунтирув олиш воситаси. *Сўроқ бермоқ. Сўроқ қилмоқ.*

■ *Сўроқ вақтида қийноққа солиш, зўравонлик, шафқатсизлик ёки инсон шайни ва кадр-қимматини камситувчи бошқа тарздаги тазйиққа дучор этиш жинойят ҳисобланади. «ЎЗМЭ».*

3 айн. **сўров 4.** *Ахир, улар сайловчи халқда! Уларнинг сўроғига, талабига тўла жавоб бериш керак-да. Ойдин, Садағанг бўлай, командир.*

СЎРОҚЛАМОҚ I Сўрамоқ, сўраб-суриштирмоқ. *Чол Сувонжоннинг шарпасини сизди шекилли, «топдингми?» деб сўроқлаб қолди. С. Анорбоев, Оқсой.*

2 Сўраб-сўраб қидирмоқ, суриштирмоқ; дарақламоқ. *Ёр ишқида неча бағримни доғлаб, Мен борайин Шаҳризарни сўроқлаб. «Маликаи айёр». Паризодни сўроқлаб, Бағрини ўтда доғлаб, Хоннинг эшигин қоқди, Эриб сув бўлиб оқди. Ҳ. Олимжон.*

СҮРОҚСИЗ 1 Рухсат олмасдан, берухсат. *Бўтабой суроқсиз эшикни очиб кирди. С. Аҳмад, Ҳукм. Вақт ҳам биздан суроқсиз ўтиб борапти. М. Қориев, Ойдин кечалар.*

2 ҳуқ. Суроқ қилмасдан; терговсиз. *Суроқсиз уч кун ётиб чиқибди.*

СҮРРАЙМОҚ 1 *айн. серраймоқ. Қуйидаги қўлага хануз бўғот остида сўррайиб турар эди. А. Қодирий, Кичик асарлар. Бечора Дандонов сўррайиб қолди. Н. Аминов, Қаҳқаҳа.*

2 Озиб-тўзиб кетмоқ, ўлар ҳолатга етмоқ. *Йигитнинг.. чўзинчоқ юзи сўррайиб қолди. С. Анорбоев, Меҳр.*

СҮРҒИЧ 1 Эмизикли болалар эмчак ўрнида сўрадиган резина буюм; эмизик. *Турсун Тураевичнинг ҳали-вери гапдан тийилишига кўзи етмаган хотин қўлидаги боласини ён тарафдаги стулга ўтқазди-ю, оғзига сўрғичини бериб, жаҳл билан ўрнидан турди. Н. Аминов, Қаҳқаҳа. Искандар елиннинг сўрғичдек учларидан «тиз-тиз» чўзилиб тушаётган сутга ҳайрат билан тикилиб қолди. С. Нуоров, Майсаларни аёз урмайди.*

2 *анат.* Тери ва шиллиқ парда сиртидаги сезгир дўмбоқчалар. *Тилни текширган чоғда.. тил сўрғичларига ҳам диққат билан қараш лозим. Н. Исмоилов, Касалларни парвариш қилиш. [Сўрувчиларнинг] Оғиз сўрғичи гавдасининг учида, унинг тубида оғиз тешиги жойлашган. «ЎЗМЭ».*

3 *бот.* Чирмашиб ўсадиган паразит ўсимликнинг туксимон ўсимталари.

4 *с. т.* Сурғуч. *Хизматкорлар кўзаларнинг оғзига сўрғич суриб, қатронга юмалатиб юборишди. М. М. Дўст, Галатепага қайтиш. Бу — вокзалнинг почта омбори бўлса эҳтимол, эски яшиқлардан сўрғич, елим, сирач, мумланган каноп ҳиди келиб турибди. «Ёшлик».*

СҮТА 1 Битта йўғон этли ўқда жойлашган тўпғул.

2 Маккажўхорининг донли ёки дони олингандан кейин қолган ўзаги; тўпмеваси. *Сўта ёқмоқ. Сўталарни йиғиштирмоқ. ■ Мана шу ҳафта сувли дарада кийик жўхори сўтасини кемириб турганини ўз кўзим билан кўрдим. Н. Норматов, Исмоил тоға тарозиси. Доналари марвариддай жўхори сўтасини отмоқчидай, она дўқ қилди қизга. Ойбек, О. в. шабадалар.*

3 *шв.* Таёқ, калтак. *«Ҳа, бўйнинг узилгур!» деб, ердан узун сўта олиб қўвди. С. Сиёев, Саратонда қор ёғди. Қирдан ошган ерда бир*

одам келаяпти, эғнида жанда, қўлида сўта, оғздан парча-парча кўпик тўкилиб келаяпти. «Юсуф ва Аҳмад».

СҮТАК Содда, гўл. *Сўтак одам. ■ -Кекиртагингни узиб ташлайман, сўтак! — деган дарғазаб овозлар эшитилади. Х. Тўхтабоев, Йиллар ва йўллар.*

СҮТАКЛИК Ёшлик; содаллик, гўллик. *Сўтаклик қилмоқ.*

СҮТМОҚ *шв.* Ситмоқ, сўкмоқ, чок-чок қилмоқ. *Чокини сўтмоқ. ■ Жилва бериб кулишиб, Қизлар ўтиб боради. Жонон чиннидай овози Юракни сўтиб боради. М. Алавия.*

СҮҒИ [а. صوفى — суфийлик издоши] **1** Масжидда азон айтувчи киши; муаззин. *Бутоқда хўроз қичқирар, Мезанада — сўғи. Мақол. ■ Мана бугун Султонбой қишлоқ сўғиси азон айтмасдан ўрнидан туриб, томга қамиш босаётибди. Ҳ. Фулом, Машғал. Лектўр [лектор] сўғи азон айтгандай қилиб гапираркан. «Ёшлик». Қўқоннинг эски шаҳарига қарашли бир масжидда бир сўғи бўларкан. Газетадан.*

Сўғи азон айтмасдан *Жуда эрта, тонг-саҳарлаб. [Аёл] Сўғи азон айтмасдан уйғониб, нон ёпди, мол-ҳолга қаради. «Ёшлик».*

2 *кўчма* Содда, гўл, художўй одам. *-Вой, отаси тушқур-ей, — деди кула-кула Муса, — мен сизни сўғи, бундай ишларга эътибор қилмайди, деб юрсам, сизда гап кўп экан. П. Турсун, Ўқитувчи. Уч-тўрт хонингли бойларнинг, айниқча, чорбозорчи савдогарларнинг беш-олтилаб хотинлари эрларини кутиб, сўғи бўлиб ўтиришади дейсизми? М. Исмоилий, Фарғона т. о.*

СҮҒИЁНА [ф. صوفيانе — суфий каби, суфийлардек] **1** *дин.* Суфийлик руҳидаги, суфийлик руҳи билан суғорилган. *Сўғиёна дунёқараш. ■ Султонмурод.. сўғиёна руҳ билан айтилган бир ғазалнигина мақтади. Ойбек, Навоий.*

2 Содда, художўй одамларга хос бўлган. *Сўғиёна кўриниш.*

СҮҒИЙ *дин. айн. суфий.* *Сўғийларнинг фикрича, инсон нафсга эрк бермаслиги, уни ўз вақтида жиловлай олиши зарур. «Фалсафа».*

СҮҒИЙЛИК *қ. суфийлик, тасаввуф.* *Сўғийликнинг амалиётига кўра, баркамол инсон ўз нафсини тия оладиган, ақл-заковатни ҳар қандай ҳиссиётдан устун кўя оладиган, қалби яхшилик, эзулик билан тўла кишидир. «Фалсафа».*

СҮФИЛИК Масжидда азон айтиш, сўфи машғулоти. *Сўфилик қилмоқ.* ■ *Борингики, ўғри қариганда сўфилик ихтиёр этган бўла қолсин.* М. М. Дўст, Лолазор.

СҮФИНАМО [а. + ф. صوفى نما - сўфига ўхшаш] Сўфи каби, сўфига ўхшаш. *Мингбошиси сўфинамо, Тасбеҳу бўйнида ридо, Чўқиб қочар зоғи ағло, Бир доғули айёр экан.* Муқимий.

СҮФИТЎРҒАЙ Бошида патлардан кокили бўлган, ерда яхши югурадиган, чумчуқсимонлар туркумига кирувчи қуш. *Эшикка чиқса, унинг ҳуснига маст бўлиб, сўфитўрғай, каклик, бўдана [бедана] — жами қушлар беадад сайрашар эди. «Ойсулув».* Кейин қир устида сўфитўрғай нозик чулдирди. М. Мансуров, Ёмби.

СҮХТА [ф. سوخته — куйган, ёндирилган; тагига олган; хафа, ғамгин] Пиликнинг куйган қисми. *Отабек миқроз билан шам сўхтасини кесиб тузатди.* А. Қодирӣ, Ўтган кунлар. *Мойи тугаб, пилиги сўхта бўлган чироқ бир лип этиб сўнди.* С. Аҳмад, Хўкм.

Гўр сўхта қ. гўрсўхта. Жигар сўхта қ. жигарсўхта. Жуvon сўхта қ. жуvonсўхта. Сўхтаси совуқ Ёқимсиз, турки хунук. *Сўхтаси совуқ одам.* ■ *Хуморхон ёмон кўради шу сўхтаси совуқ Раҳмонқуловни.* А. Мухтор, Туғилиш. **Сўхта бўлмоқ** Куйиб, кўмирга айланмоқ (лампа, шам ва ш.к. нинг пилиги ҳақида). *Сўхта бўлган пилик боши кесилур..* Ш. Шомухамедов.

СҮХТАЛАНМОҚ Куйиб кўмир бўлмоқ, қора кукунга айланмоқ. *Тун ярмидан оғиб, чироқ пилиги ҳам сўхталанди.* Ҳ. Фулом, Тошкентликлар.

СҮҚА [р. соха — тирговуч, тамба; омоч] Ер ҳайдаш учун ишлатиладиган чўян тишли содда асбоб; омоч. *Ерни сўқа, эски омоч эмас, трактор ҳайдайди. Ғўзага машина ишлов бериб, ҳатто нахтани машина териб беряпти.* Н. Сафаров, Оловли излар. *Ўшанда сўқа билан ер ҳайдаган деҳқонлар, дон сепаб бўлгач, катта тўй ўтказишар экан.* А. Муҳиддин, Ҳ. Тожибоев, Оташ қалбли қиз.

СҮҚИМ I Сўйиш учун семиртирилган, бўрдоқи қорамол (буқа, ҳўкиз, сигир). *Сўқим гўшти. Сўқим сўймоқ. Сўқимга боқмоқ.* ■ *Халойиққа энди обу ош берди, Қанча кўю қанча сўқимлар сўйди. «Нурали».*

2 кўчма салб. Ишламай еб ётувчи, давангирдай соғ одам ҳақида. *Сўқимдек йигит.* ■

—Ўргатма менга!.. — қаҳрдан қичқиради Муҳсина хоним. — Бир гала сўқим, бир гала текинтомоқ. М. М. Дўст, Лолазор. *Бу сўқимларни кутиб, ичагингиз узилиб кетади. Улар тунни билан зиёфатда кабоб еб, ҳиринглашиб чарчаган.* Мирмуҳсин, Қаҳрамоннома.

СҮҚИР [мўғ.] **1** Кўр, ожиз. *Чин кўнгилдан йиғласанг, сўқир кўздан ёш чиқар.* Мақол.

2 Кўзи кўр, кўзи ожиз одам. *Сўқир киши.* ■ *—Ҳой, мўғулар! — деб заҳарханда кулди у [Темур Малик]. — Иккинги учун садоғимда икки ўқ қолди, иккингиизни ҳам сўқир қилиб қўяйми? М. Осим, Карвон йўлларида. Бенафдур сўқирга тутилган чироқ.* Ш. Шомухамедов.

3 кўчма Ҳеч нарсани билмайдиган, сезмайдиган; қолоқ, кўр. *Кўзи сўқирдан кўкраги сўқир ёмон.* Мақол. ■ *Нима қилай, бу сўқир кўзлар кеч очилган бўлса? «Ёшлик».* *Шунча пайтдан бери кўр эканман, сўқир эканман. «Шарқ юлдузи».*

СҮҚИРЛИК Кўрлик, кўзи ожизлик; қолоқлик. *Кўзнинг сўқирлиги. Мағнавий сўқирлик.*

СҮҚМА Ўзича ўйлаб чиқарилган, сўқилган, тўқилган, ясалган; ясама. *Сўқма тил.* ■ *Уйнинг тўрида.. сўқма тахта стол олдида, беш-олти кишидан иборат ҳайбат ўтирибди.* Ойбек, Болалик.

Сўқма йўл айн. сўқмоқ I 1. *Тупроқ тўкиладиган жойга мокидай қатнаб, сўқма йўлни шулар шиббалаган.* Газетадан. *Боши ғувиллаб, ташқарига чиққанида, тонгнинг соф ҳавосиданми, юрак ютиб қилган шшиданми, бир оз енгил тортиб, дуч келган сўқма йўлга тушиб юриб кетди.* А. Мухтор, Кумуш тола.

СҮҚМОҚ I I Одамлар қатнови натижасида ўз-ўзидан юзага келган ёлғизоёқ йўл. *Мана шу адирлар бағридан бир сўқмоқ ўтган. «Ёшлик».* *Саҳро сўқмоғида бошин эгиб жим, Бир кимса кетмоқда, билмасман, у ким.* А. Орипов, Йиллар армони.

2 кўчма Киши фаолиятида, ҳаётда босиб ўтган ёки босиб ўтиладиган йўл. *Ҳаётимиз жуда гўзал. Лекин унинг ўзига яраша наст-баландликлари, сўқмоқлари ҳам бор. Ўйлаб турсам, менинг ёлғизоёқ сўқмоқ йўлим аллақачон тугабди.* А. Мухтор, Асарлар.

СҮҚМОҚ II 1 Урмоқ, туширмоқ, солмоқ. *Мушт билан сўқмоқ. Калла сўқмоқ. Сў-*

қолмаган сүйил кўтарар. Мақол. ■ Йўқ, оғалар, темирни қизигида сўқиб қолиш керак! А. Қодирий, Ўтган кунлар.

2 кам қўлл. Ўзича ўйлаб чиқармоқ, тўқимоқ, ясамоқ. «Яқинда Қирмизхон билан Қиёмхоннинг тўйлари бўлармиш», деб Ислом отадан қутулиш учун шунчаки важ-корсон сўққан эди. Н. Аминов, Қаҳқаҳа.

Фалсафа сўқмоқ айн. фалсафа сотмоқ қ. фалсафа 2.

СЎҚҚА Ҳеч кими йўқ, ёлғиз, якка. -Ўзинг сўққа жонингни боқолмайсан-у, тўқлини қандай қилиб боқасан, — деди Шум бола Омонга. Ф. Фулом, Шум бола.

СЎҚҚАБОШ 1 Ҳеч кими йўқ, ёлғиз. Сўққабош одам. ■ [У] Дунёда яккаю ягона, сўққабош одам. С. Аҳмад, Жимжитлик. Назарбек, бизда оила йўқ, оиламиз ўн йил бурун қазо қилган, икки фарзандимиз бор эди, бири ҳам турмади. Сўққабошимиз энди. М. М. Дўст, Лолазор.

2 Уйланмаган, бола-чақа қилмаган; бўйдоқ, ёлғиз. -Биби Робия, — деди у [Яхшибоев] — сўққабош ўтиб кетяпсан. М.М.Дўст, Лолазор.

СЎҚҚАБОШЛИК Сўққабош, ёлғиз бўлишлик. Сўққабошлик жонга тегди. Н. Сафаров, Ҳаёт мактаби.

СЎҚҚАЙМОҚ с.т. Сўппаймоқ, кўққаймоқ. Сўққайиб турмоқ. ■ Кўкка чарх урган қушлар ҳар замонда югуриб келиб, қўлларини кўксига қовуштирганича сўққайиб қоладиган кулранг юмронқозиқларга ўз жамолини кўз-кўз қила бошлади. Ж. Абдуллахонов, Тўфон.

СЎҒИН шв. Сўнг, кейин, сўнгра. Ундан сўгин элдан кўп лашкар олиб, Келган ёвман [ёв билан] сўгин жанжал қилажак. «Юсуф ва Аҳмад». Китоб ўқиган одамларни садағаси кетай, ўқиб-ўқиб, сўгин начайли [начальник — бошлиқ] бўлишган. С. Аҳмад, Жимжитлик.

СЎҒИР с. т. Суғур.

СЎҒОН шв. Пиёз. Сўфи сўгон ер, топилса йўгон ер. Мақол.



Т

ТААДДИ [*а. تعدى* — ҳужум, тажовуз қилиш; жабр-зулм; зўравонлик; қонунбузарлик] эск. кт. 1 Шафқатсиз эзиш; зулм, жабр. Биз.. Мусулмонқулнинг зулм ва тааддиси.. бағоят ошиб борганлигини музокара.. қилишдик. А. Қодирий, Ўтган кунлар. *Бир нечаси айтди: -Ҳозир Ултоннинг тааддисидан қочиб, бўлак чегарага бориб турганимиз маъқул. «Ёдгор».*

2 кўчма Дағдаға, дўқ, пўписа. [Султонмурод] *Таадди билан баланд кела бошлади: -Сизлар ким? Нима ҳақларинг бор? Ш. Тошматов, Эрк қуши.*

Таадди қилмоқ Дўқ, пўписа қилмоқ. Кўтарилиб, менинг кўнглим қавартма. Жўна деб, Шомирот, таадди қилма! «Ёдгор».

ТААЖЖУБ [*а. تعجب* — ҳайрон бўлиш, ажабланиш] 1 сфт. Кишини ҳайратда қолдирадиган, ажаблантирадиган, ғалати. *Таажжуб нарса. Таажжуб иш. ■ Бу таажжуб ҳол одамларда гумон туғдирмай қолмади. М. Исмоилий, Фарғона т. о. Редакцияга ақл бовар қилмайдиган таажжуб бир хат келди. «Муштум».*

2 от Ажабланиш, ҳайронлик. *Қўлдош юзуда таажжуб аломати пайдо бўлди. Ҳ. Шамс, Душман. Хотиннинг таажжуби ошди. С. Айний, Куллар. -Юсуфҷонов?! — деди қоровул ҳам таажжуб, ҳам хурсандлик билан. Н. Фозилов, Ҳаёт ўргатди. [Сафар] Таажжуб ва ҳайрат ичиди келиб, меҳмонхонага кирди. А. Қодирий, Меҳробдан чаён.*

3 Кишининг ажабланиш ҳолатини, ҳайронлигини билдиради; ажаб, қизиқ. *Таажжуб, унинг мактуби юрагимда на севинч уйғотди, на бир ачиниш! О. Ёқубов, Тилла*

узук. Лекин таажжуб: одамларнинг илиқ муомаласи, айниқса, Шербекнинг меҳрибонлиги негадир унинг кўнглини бузди. С. Анорбоев, Оқсой.

Таажжуб қилмоқ Таажжубланмоқ. **Таажжубга солмоқ** Ажаблантирмоқ. *Мени таажжубга солган нарса шуки, нима учундир ҳеч ким қачон ва қандай мукофот олганимни сўрамасди. Шукрулло, Жавоҳирлар сандиғи. Таажжубга тушмоқ* Ажабланиш ҳолатида бўлмоқ; ажабланмоқ. *Меъмор ўзини уста Абдуғафур негадир юқори қаватга чақиртирганидан таажжубга тушди. Мирмуҳсин, Меъмор.*

ТААЖЖУБЛАНАРЛИ Кишини таажжубга соладиган, ажаблантирадиган; ҳайрон бўларли, ажабланарли. *Бунинг ҳеч таажжубланарли жойи йўқ. ■ Хусусан, бундай юмушлар хизматкорларга буюрилса, бу ҳеч қандай таажжубланарли ҳол ҳисобланмайди. Ойбек, Танланган асарлар.*

ТААЖЖУБЛАНМОҚ Ҳайратда қолмоқ, ҳайрон бўлмоқ, ажабланмоқ. *Бирдан бошқа бир овоз эшитилди: кимдир тез-тез гапирди, дам эркакча, дам хотинча сўзлайди, дам чақалоқ бўлиб «инга»лайди.. Йўлчи таажжубланиб, Ёрматга қаради. Ойбек, Танланган асарлар. Олахўжа Мели полвоннинг олдига келди. Бузилаётган ерни қучоқлаб, ётиб олди. -Ййи, ййи! - дейишди таажжубланган одамлар. П. Турсун, Ўқитувчи.*

ТААЖЖУБЛИ с. т. Таажжубланарли, ажабланарли, ҳайрон қоларли, ғалати, қизиқ. *Таажжубли ҳол.*

ТААЛЛУҚ [*а. تعلق* — алоқа, боғлиқлик; содиқлик, мухлислик; ишқ-муҳаббат; те-

гишлилик] **1** кам қўл. Алоқадорлик, дахлдорлик; алоқа, боғланиш, муносабат. *Бу ишининг сизга ҳам тааллуқи бор.* ■ *Асад қори.. сўнги ҳикоянинг ҳам ўзига тааллуқи йўқдай, без бўлиб ўтираверди.* М. Исмоилий, Фарғона т. о.

2 эск. Уйланиш; алоқадорлик; хотин, рафиқа. *Отабекнинг иккинчи тааллуқи [Зайнаб] тўғрисида келин боламизга билдирилмаса хўп эди.* А. Қодирий, Ўтган кунлар.

ТААЛЛУҚДОР [а. + ф. تعلقدار — тааллуқли, алоқаси бор, алоқадор, боғлиқ] **1** айн. **тааллуқли.** *Ишга тааллуқдор ҳужжат.*

2 кўча эск. айн. **хотинли.**

Тааллуқдор қилмоқ Уйлантирмоқ, хотин олиб бермоқ.

ТААЛЛУҚЛИ 1 Бирор нарса ёки кимсага алоқаси, боғланиши бўлган; дахлдор, алоқадор. *Ишга тааллуқли ҳужжатлар.* ■ *Маҳкамов бошлиқнинг оғзига кўз тикиб, ишга тааллуқли бирор муҳим гап кутарди.* «Муштум».

2 Бирор нарса ёки кимсага қарашли, тегишли, мансуб. *Ғиждувонга ревкам келиб: -Амир ва унинг билан қочган одамларга тегишли моллардан ва умуман подшоҳликка тааллуқли нарсалардан бошқа нарсалар мусодара қилинмасин, — деди.* С. Айний, Қуллар.

ТААЛЛУҚСИЗ Алоқаси, боғланиши, дахли бўлмаган; алоқасиз, муносабатсиз. *Ишга тааллуқсиз ҳужжат.*

ТААММУЛ [а. تأمل — кўриб чиқиш, муҳокама; мушоҳада; ўйлаш, фикр, мулоҳаза юритиш] эск. кт. Андиша, фикр, мулоҳаза.

Тааммул қилмоқ Ўйламоқ, ўйлаб қолмоқ. *Хатиб домла мулла Обиднинг кўзидан бир маъно ўқиш учун тиришгандек бир оз тааммул қилиб қолади.* А. Қодирий, Обид кетмон.

ТААРРУЗ [а. تعرض — халақит бериш; қаршилик, эътироз] эск. кт. Бирор нарсага, ишга, ҳаракатга кўрсатилган қаршилик, тўсиқлик.

ТААССУБ [а. تعصب — бирор нарса ёки ғояга беҳад берилиш, кўр-кўрона эргашиш; фанатизм] **1** Бирор кимса ёки нарсага тақлид қилиш, эргашиш.

Таассуб қилмоқ Тақлидан эргашмоқ. *Сен Кумушхонга таассуб қиламан дейсанми? Ҳамза, Паранжи сирлари.*

2 Эътиқод, маслак ва ш.к. га кўр-кўрона берилиш; фанатизм. *Мулла Обидбой ва домлаларнинг қутқуси биланми ёки ўзининг ди-*

ний таассуби орқасиданми, баҳарҳол, ерни рад қилди. А. Қодирий, Обид кетмон.

ТААССУРОТ [а. تاثرات — таъсирчанлик, ҳассослик; ғам-андух, хафагарчилик] Кўрилган, ҳис этилган ҳодиса, киши ёки нарса тўғрисида кўнгилда, хотирада қолган из, туғилган фикр ва ҳис-туйғулар мажмуи. *Сафар таассуротлари.* *Яхши таассурот қолдирмоқ.* ■ *Бу куннинг кўркамлигидан олган таассуротини Али ичига сиғдирилмади: -Зап яхши кунми! — деди.* А. Қодирий, Ўтган кунлар. *Болалар янги ўқитувчининг дарси тўғрисида ўз таассуротларини ўртоқлаша бошладилар.* П. Турсун, Ўқитувчи.

ТААССУФ [а. تأسف — афсусланиш, ачиниш, куйиниш] Кўнгилсиз, номақбул воқеа, ҳодиса, аҳвол ва ш.к. дан туғилган ачиниш; афсус. *Таассуф қилмоқ.* *Таассуф билдирмоқ.* ■ *-Ғоят таассуф!* — деди *Талъат афанди, бармоқларини қовуштириб қирсиллатаркан.* Ҳ. Фулом, Машъал. *Отабек уялув аралаш кулумсираб, қутидорга қаради: -Таассуфки, эслай олмайман! — деди у.* А. Қодирий, Ўтган кунлар. *-Раҳматли валлама одам эдилар, — таассуф билан гапирарди кимдир.* «Ёшлик».

ТААССУФЛАНМОҚ Таассуф қилмоқ, афсусланмоқ, ачинмоқ. *Биз унинг [Лутфиланинг] аянчи ҳолига.. таассуфландик.* Мирмуҳсин, Созанда.

ТАБ [ф. تب — иситма, безгак] с. т. Тафт, ҳарорат.

Таб босди қилмоқ Тафтидан, ҳовуридан туширмоқ, таскин, тасалли бериб ёки бирор нарса билан овутиб, тафтини, ҳовурини босмоқ. *Ўзимнинг гапимга ўзим пушаймон еб, ўлганимнинг кунидан «таб босди» қилиб, шартномага қўл қўйдим.* Ф. Фулом, Тирилган мурда. **Таб тортмаслик** Бирор нарса қилиш ёки айтишдан қайтмаслик. *Қизлар — бало.. Кечалари ҳам далага чиқишдан таб тортмайди.* Ойбек, О.в. шабадалар. *Зухра ҳам таб тортмай: -Туртмасдан гапирсангиз бўлмайдим, ургандан туртган ёмон, — деди.* Ойдин, Ҳикоялар.

ТАБАА [а. تبعة — қарашлилик, тобелик; миллат, миллий мансублик; фуқаролик] эск. кт. Фуқаро, фуқаролар. *Ўз хўжайинлари.. иродаси билан.. инглиз табааси Шайх Файз Муҳаммадхон солган суннийларнинг ягона маҷитига имом бўлиб жойлашди.* А. Ҳакимов, Илон изидан.

ТАБААЛИК эск. кт. Фуқаролик.

ТАБААСОЗЛИК эск. кт. 1 Кимсага тақлид қилиш, эргашиш, таассуб.

2 Кимсанинг кўнглига қараб иш қилиш, кўнгилсозлик. *Табаасозлик қилмоқ.*

ТАБАР [ф. *تبر* – болта] 1 шв. Болта. *Мулалар ўқийди зеру забарни. Усталар ишлатар теша, табарни.* «Равшан».

2 тар. Ойболтанинг бир тури, қадимий жанг қуроли. *Сипоҳ билан гаплашмоқчи бўлсанг, қўлингда табаринг бўлсин, деганлар.* Мирмуҳсин, Меъмор.

ТАБАРГУЛ бот. Чучмомагулдошлар оиласига мансуб, хушбўй оқ гулли, туганак пиёзли кўп йиллик ўтсимон ўсимлик.

ТАБАРРУК [а. *تبرك* – дуо, фотиҳа олиш, рухсат, розилик олиш; муборак, муқаддас] 1 Улуғ ҳурматга сазовор, ғоят ҳурматли, мўътабар ва азиз. *Табаррук чол.* ■ Қишлоқнинг табаррук онахонлари уйда бешикка *гаврапуш ёпишаётган экан.* Э. Усмонов, Ёлқин. *Табаррук инсон Шоаҳмад ака айтгандек, «Ҳамма миллат болалари бир бола» эди.* Р. Файзий, Таъзим.

2 Яқин, мўътабар кимса ёки нарсани эслатадиган, ундан эсдалик, ёдгорлик бўлиб қолган. *Отамдан қолган табаррук китоб.* ■ [Навоий:] *Энди, сиз бу табаррук қилич билан давлатимизни, салтанатимизни, мамлакатимизни ва унинг санъатини ҳимоя қилинг!* Уйғун ва И. Султон, Алишер Навоий.

3 Илоҳий кучга эга бўлган; муқаддас; азиз-авлиёларнинг назари тушган. -*Маккатуллода, табаррук ерда эримга қурғон ўқитарман, гуноҳларини худодан йиғлаб тиларман, деган ният қанот бўлди, – деди Ҳожжи хола.* М. Исмоилий, Фарғона т. о. *Элимиз нонни ва донни табаррук ҳисоблаб, пешонасига суртади.* Газетадан. *Она! Дунёдаги энг азиз, энг лазиз ва табаррук, энг муҳтарам калом бу! «Саодат».*

ТАБАССУМ [а. *تبسم* – жилмайиш; илжайиш] Юз, кўз ва лаблар билан кулумсираш ҳолати, шундай ҳолат ифодаси; жилмайиш. *Ҳаётнинг юзига ширин табассум югурди.* М. Исмоилий, Фарғона т. о. *Отабек ҳам истехзоли табассум орасида Ҳомидга кўз қирини ташлади.* А. Қодирий, Ўтган кунлар. *Унинг лабларидаги табассумни кўрган Зулфиқор ашуллани яна баландроқ олди.* Мирмуҳсин, Меъмор. *Шоиранинг кўзлари табас-*

сумдан ёниб турар эди. Ў. Ҳошимов, Нур борки, соя бор.

Табассум қилмоқ Кулумсирамоқ; жилмаймоқ. *Юлдузхон Муҳиддинга қараб, маъноли табассум қилди.* Р. Файзий, Чўлга баҳор келди.

ТАБАҚ [а. *طبق* – қопқоқ; ликоп, лаганча] 1 эск. кт. айн. **ТОВОҚ.** *Ош мисоли табақда кўз ёши, Курмаги кўп, гурунчидан тоши.* Муқимий. *Лочираю патирлар, ширинликлар, табақларда эту кулчатой, косаларда шўрвалар..* Мирмуҳсин, Меъмор.

2 Чоп қилинган босма матнни ўлчаш бирлиги, босма табақ, яна қ. **БОСМА.** *Бу луғат тахминан 25 табақ ҳажмида бўлиб, ўн мингга яқин сўзни ўз ичига олади.* «ЎТА».

ТАБАҚА [а. *طبقة* – қатлам, қават; даража] 1 Эшик, дераза ва ш.к. нинг очилиб-ёпиладиган ҳар бир бўлаги. *Якка табақа дераза. Қўш табақа эшик.* ■ [Ҳасанали] *Занжирни тушириб, дарвозанинг бир табақасини очиш ҳамоно, шу табақага суяниб турган Отабек Ҳасаналининг оёғига йиқилиб тушди.* А. Қодирий, Ўтган кунлар.

2 Халқ ичидаги муайян ижтимоий қатлам, гуруҳ, тоифа. *Савдогарлар табақаси.* ■ *Шаҳар халқининг ҳар бир табақаси деярли Муулмонқул даққисини еб келган.* А. Қодирий, Ўтган кунлар. *Тахта атрофида ўтирганлар орасида аҳоли турли табақаларининг вакиллари бор эди.* Газетадан.

ТАБАҚАЛАНИШ 1 Табақаланмоқ фл. ҳар. н.

2 Табақаларга ажралиш, шундай жараён. *Аҳолининг табақаланиши.* ■ *Фақат жамиятда ҳукм сурган тенгсизлик, табақаланиш – одамларни бир-бирларига бўри.. қилиб қўйди.* М. Исмоилий, Фарғона т. о.

ТАБАҚАЛАНМОҚ Табақаларга бўлинмоқ.

ТАБАҚАЛАШТИРМОҚ 1 Табақаларга бўлиб юбормоқ, табақаларга ажратмоқ.

2 Маълум белгиларга қараб фарқламоқ, дифференциация қилмоқ. *Табақалаштирилган таълим.*

ТАБАҚАЛИ Табақаси бор, табақаси бўлган (эшик, дераза ва ш. к. ҳақида). *Икки табақали дарвоза.* ■ *Улар кичкина ҳовлининг бир табақали пастаккина эшигидан кирганларида, айвондаги ўчоқ олдида ўтирган аёл ўрнидан турди-да, ҳовлига юз ўғирди.* П. Турсун, Ўқитувчи.

ТАБАҚАЧИЛИК Жамият табақаларининг ўзига хос белгилари, тартиб-қоидалари ва уларга асосланган ижтимоий муносабатлар.

ТАБДИЛ [а. تبدال — ўзгартириш, алмаштириш] эск. кт. Ўзгариш, алмашиниш; ўзгартиш, алмаштириш. -*Ҳозир тағтил вақти бўлгани учун қишлоқларда табдили ҳаво қилиб юрибмиз, — деди домла.* Ф. Фулом, Шум бола.

Табдил этмоқ (ёки қилмоқ) Ўзгартирмоқ. ..*ўйлаб кўринг, тақдирни табдил этиб бўладими?! М. Ўринхўжаев, Унутилмас кунлар.*

ТАБЕЛЧИ 1 Корхона ва муассасаларда ишга келиш-кейтишни ҳисобга олиб борувчи, табель юритувчи ходим.

2 тар. Колхоз ва совхозларда ишчи ва колхозчиларнинг ишга чиққан-чиқмаганлигини ва қанча, қандай иш бажарганлигини қайд қилиб ва ҳисобга олиб бориш учун тайинланган шахс. *Мен ҳам олдинига табелчи, сўнг секретарь бўлганман.* Ш. Рашидов, Бўрондан кучли.

ТАБЕЛЧИЛИК Табелчи иши, касби. *Табелчилик қилмоқ.*

ТАБЕЛЬ [нем. Tabelle — жадвал < лот. tabella — кичкина юпқа тахта] **1** эск. Бирор нарсани ҳисобга олиш varaқаси; жадвал.

2 Ишчи ва хизматчиларнинг ишга келиш ва кетиш вақти қайд қилинадиган махсус дафтар ёки тахта. *Табелларда ёзилса «Рўзибиш кампир», Табелчига хўмрайиб аста қарайди.* Ф. Фулом.

3 Мактаб ўқувчиларининг дарсдан улгуришлари (баҳолари) қайд қилиб бориладиган varaқ. *Акамнинг табелидаги «хулқ» деб ёзилган графада ҳамма вақт «5» баҳоси бўлади.* С. Анорбоев, Оксой.

ТАБИАТ [а. طبيعة — борлиқ; табиий хислат; одагийлик] **1** Бутун мавжудотни ўз ичига олган олам, борлиқ. *Табиат зап қизик нарса-да. Унда ҳамма нарса мавжуд, ҳамма нарсанинг ўз ўрни, ўз мавқеи бор.* Н. Фозилов, Дийдор. *Табиатнинг ҳеч кимга бўйсунмайдиган, бировдан рухсат ҳам сўраб ўтирмайдиган қонунлари бор.* Ў. Ҳошимов, Қалбингга кулоқ сол. *Кузда табиатнинг жонли ва фаол вақили — одам организми ҳам тиниқади.* Газетадан.

2 Инсоният ва ҳайвонотдан ўзга олам. *Табиат билан одам боласи қиёсланса, бир-*

бирига ўхшаши ақлни ҳайратга солади. Газетадан. *Кетди қирдан турна ҳам, Бўшаб қолди табиат.. А. Орипов, Юртим шамоли. Табиатда учрайдиган минералларнинг баъзилари саноат аҳамиятига эа.* Газетадан.

3 Ўт-ўлан, ўсимлик ва б. нарсалар банд этган теварак-атроф, қир-адир, ўрмон ва ш.к. лар. *Отабек табиатнинг шу кўркем ва латиф кўринишига мафтун бўлиб, бир оз ётгандан кейин, «Ул ҳам бўлса эди», деб ўйлади ва узоқ тин олиб кўйди.* А. Қодирий, Ўтган кунлар. *Табиат сокин, уфқ жимирлайди.. А. Мухтор, Чинор. Табиат ўз тилида роз айтиб шивирлар экан, йигит бундан ўз қувончининг мадҳини ўқирди.* М. Исмоилий, Фаргона т.о. *Кечаги чангбости ёмғир табиатга ҳусн бериб кетганидек, одамларнинг ҳам бахридилини очиб юборди.* Н. Фозилов, Дийдор.

4 Ер сатҳининг маълум бир жиҳатини акс эттирувчи белги, хусусият ёки ҳолати. *Бу ернинг гўзал табиати ва зилол сув манбалари одамларга ором бағишлайди.* Газетадан. *«Бобурнома»ни varaқлар экансиз.. табиат манзаралари чизилган лавҳаларга дуч келасиз.* «Фан ва турмуш».

5 Инсон руҳиятига хос асосий, тургун хусусиятлар мажмуи; характер, феъл. -*Ўзи жуда оғир ва ақлли йигит, бунинг устига қизик табиати ҳам бор, — деди Уста Олим.* А. Қодирий, Ўтган кунлар. *У [Вали ака] табиатининг оғирлигига қарамай, ўрнидан сапчиб туриб кетди.* М. Исмоилий, Фаргона т. о. *Мирзакаримбойнинг қизи Нурунисонинг табиатида энгиллик билан макр устун турар эди.* Ойбек, Танланган асарлар. *Доим захда ўтириб ишлаганиданми ёки ўзимнинг табиатимда заифлик борми — ишқилиб, кўп вақтдан бери бедармон тортиб юрибман.* А. Қодирий, Ўтган кунлар.

Паст табиат Зиқна, қизғанчиқ, хасис. [Қодирқул:] *Бу бойнинг табиати шунақа пастми?* Ҳамза, Бой ила хизматчи. **Сўфи табиат** 1) характери, қилиғи сўфиларникига ўхшаш; 2) кечалари бедор, ухламайдиган. *Томма-том қочиб кетаётганимни баъзи уйқуси зийрак, сўфи табиат қари-қартанлар ҳам кўриб қолган эдилар.* Ф. Фулом, Шум бола. **Табиати кўтармайди (ёки тортмайди)** Мижозига тўғри келмайди, кўнгли тортмайди.

6 кўчма Нарсага хос бирор белги, хусусият. *Планеталарнинг физик табиати.* ■ *Туркий тилларда чўзиқ унлиларнинг табиати.. кўндан мутахассисларнинг диққатини жалб қилиб келади.* «ЎТА».

7 Кайфият, руҳий ҳолат. *Тожбойнинг Гулсумга жазманлиги тўғрисидаги гаплар эсига тушиб, табиати бир оз хира бўлди.* П. Турсун, Ўқитувчи. *Аҳмад ўз хонасига кирса, Толиб ака йўқ экан. Унинг табиати равшан эди.* Ф. Мусахонов, Ҳиммат.

8 Дил, фаросат. *Табиати нозик одам. У одамнинг табиатини қарангки..*

Тўқим табиат қ. тўқим.

9 Яратувчи, ато этувчи, бошқарувчи илоҳий куч-қудрат тимсоли. *Табиат бу диёрга шундай куч-сеҳрли куч ато этганки, унинг тупроғида ҳар қандай ўсимлик баҳра олади.* Газетадан. *Аслида тупроқни одил табиат Тақсим айлаган-ку ер юзига тенг.* А. Орипов, Йиллар армони.

ТАБИАТАН Табиатига кўра, табиатига, миқозига мос ўлароқ. *У киши табиатан хушфел одам бўлсалар ҳам.. бирдан тутақиб кетардилар.* М. Исмоилий, Фарғона т. о. *Ботир йигирма уч ёшларда бўлиб, табиатан шўх, ичида гап сақламайдиган йигит эди.* И. Раҳим, Ихлос. *Қиз болалар табиатан нозик, нафис, латофатлидирлар.* «Саодат».

ТАБИАТЛИ Айрим сўзлар билан бириктиб, шу сўз англатган маънодаги табиатга эгалликни билдиради (қ. **табиат 5**). *Оғир табиатли одам. Енгил табиатли аёл.* ■ *Олимов қирқ беш ёшлардаги.. мулоим табиатли.. киши эди.* Ҳ. Назир, Сўнмас чақмоқлар. *Юсуфий мураккаб табиатли одам эди.* Ш. Рашидов, Бўрондан кучли. *Кийинишидан нозик табиатли, баланд дидли эканлиги кўриниб турарди.* Шухрат, Шинелли йиллар.

ТАБИАТШУНОС [табиат + ф. شناس — ўрганувчи] **1** Табиатни ўрганувчи, текширувчи шахс. *Марҳамат Қудратга, ёш табиатшунослар тўғараги тузишда кўмаклашгин, деган эди.* Ҳ. Назир, Сўнмас чақмоқлар.

2 Табиатшунослик, табиёт мутахассиси.

ТАБИАТШУНОСЛИК Табиат ҳодисалари ва қонуниятлари ҳақидаги фан, табиёт.

ТАБИБ [а. طبيب — шифокор, даволовчи; врач] **1** эск. Беморларни даволовчи мутахассис; врач. *Касалнинг тузалгиси келса,*

табиб ўз оёғи билан келади. Мақол. *Табиб — табиб эмас, бошидан ўтган — табиб.* Мақол. ■ *Бухоройи шарифда Абу Али ибн Сино деган бағоят улўф табиб ўтган!* М. Исмоилий, Фарғона т. о.

2 Табиёт илмидан муайян мутахассис тайёрловчи ўқув юртида таълим олмаган, ўз ҳаракати, ҳаётий тажрибаси орқали беморларни даволаш билан шуғулланувчи шахс. *Табиб, кўй жигарини хом кабоб қилиб, бужғун сепиб енг, деган эди.. дарди шифо топмабди.* М. Исмоилий, Фарғона т. о.

ТАБИБГАРЧИЛИК с. т. Табиблик. *Табибгарчилик қилмоқ.* ■ *Биз энди табибгарчиликдан хабаримиз йўқ одам.* Ф. Фулом. Тирилган мурда.

ТАБИБЛИК 1 Табобат, беморларни даволаш билан шуғулланиш. *Ибн Ямин табиблик асбобларини, нодир китобларини олиб, Фарғонанинг Аввал қишлоғига йўл олди.* К. Яшин, Ҳамза.

2 Табиб иши, касби. *Ўтар бобо хон саройида қирқ йил хизмат қилиб, табиблик ва сартарошлик туфайли орттирган беш-ўн тангасини.. уй солишга сарфлади.* С. Сиёев, Ёруғлик.

ТАБИБЧИЛИК с. т. Табиблик. *Мулла ибн Ямин.. Қўқонда.. табибчилик билан шуғулланган.* «ЎТА».

ТАБИИЁТ [а. طبيعيات — табиат ҳодисалари; табиий фанлар] **1** Табиат ҳодисалари ва қонуниятлари ҳақидаги фан; табиатшунослик.

2 Мактабда табиат тўғрисида ўқитиладиган предмет номи. *Табиётдан «5» баҳо олдим. Табиёт ўқитувчиси.*

ТАБИИЙ [а. طبيعي — табиатга оид, табиатда бўладиган; одатий, меъерий] **1** Табиатнинг ўзида мавжуд бўлган, инсон таъсири бўлмаган; *зид. сунъий.* *Табиий бойликлар. Табиий шароит. Табиий газ.* ■ *Туз табиий конлардан ва шўр сувлардан олинishi маълум.* «Фан ва турмуш». *Унинг фикрича, сунъий шохлатилган гўзанинг юзта сунъий кўсагидан кўра шохлатилмаган гўзанинг ўн-та табиий кўсаги афзалроқ — оғир ва пахтасининг толаси узун бўлиши керак эди.* А. Қаҳҳор, Қўшчинор чироқлари. *Иссиқкўл соҳилларини табиий шифобахи маскан, дея бежиз айтишмайди.* Газетадан.

2 Табиатнинг ўз асл ҳолати, қонун-қоидалари билан боғлиқ бўлган, боғлиқ ҳолда

юз берадиган. *Табиий танланиш. Табиий ўз-гаришлар.* ■ «Бобурнома» ни варақлар экансиз, ўрни-ўрни билан табиат манзаралари чизилган лавҳаларга, табиий ҳодисалар тасвирига дуч келасиз. «Фан ва турмуш». Бу табиий офат [ер қимирлаши] кишиларнинг иродаси мустаҳкам, бир-бирига мададкор.. эканлигини яна бир бор исботлади. Газетадан.

Табиий фанлар эск. Табиат ҳодисалари ва қонуниятлари ҳақидаги фанлар мажмуи. Нега ўрта асрларда табиий фанлар жаҳонни ҳайратга соларди даражада тараққий этиб, Беруний, Хоразмий, Ибн Сино каби алломалар етишиб чиқди? С. Кароматов, Олтин кум.

3 Аслида (яратилишида) бор бўлган. *Лабидаги табиий холи ўзига ярашган.* ■ Табиий ҳолати бузилмаган тупроқнинг унумдорлиги тупроқнинг табиий унумдорлиги деб аталади. «Фан ва турмуш».

4 **кесим** өзф. Одатга, мантиққа тўғри (келадиган), бўладиган ҳол. Янги йил арафасида ҳар бир қалбда энг дилбар орзулар ошиботишади, бу — табиий. «Саодат». Катта иш бажараётганда, одам майда-чуйда камчиликларга йўл қўйиши табиий. Ф. Мусажонов, Ҳиммат. Киши оғир дамларда қадрдон дўстларини ёдга олар экан, юртини қўмсаши табиий. Назармат, Жўрлар баланд сайрайди.

5 **мод.** с. Албатга, ўз-ўзидан, шубҳасиз, аниқ. Табиий, Хушрўйнинг феълни яхши билган ота-она унинг раъйини олмасдан туриб, бир иш қилмоқдан қўрқардилар. А. Қодирий, Ўтган кунлар. Сўзамол, бадавлат.. қари тоғанинг бирдан кўз юмиб, сукутга ботишининг сабабини, табиий, Йўлчи тушунмади. Ойбек, Танланган асарлар. *Кеч. Табиий, бу чоқ кишилар ором оғушида.* Н. Сафаров, Оловли излар.

ТАБИЙЛИК Табиий ҳолат, шундай ҳолатга эгаллик. *Табассумнинг табиийлиги.* ■ [Кумуш] Латиф бурни ёнидаги қора холининг табиийлигига ишонмагандек қашиб кўрди. А. Қодирий, Ўтган кунлар. Дадамат аканинг бутун вужудидан қатъият, табиийлик ва самимият уфуриб турарди. Ф. Мусажонов, Ҳиммат.

ТАБЛ [а. طبل — катта ноғора; довул] *тар.* Ноғора; тери қошлаб ишланган ва уриб чалинадиган махсус чолғу. Бу сукунатни фақат мириабларнинг онда-сонда дап-даплаб чалинадиган табл садоси бузар.. эди. А. Ҳакимов, Илон изидан.

ТАБЛА [а. طبله — осма кулф; кути] 1 *шв.* Оглар турадиган оғилхона. *Шоҳдорхоннинг саксон таблада бедов оти бор эди.* «Гўрўғли».

2 **айн. табл.**

ТАБЛЕТКА [фр. tablette — кулча] Бўлакларга бўлинган, тугмачасимон қаттиқ дори. *Хинин таблеткаси. Таблетка ютмоқ.*

ТАБЛИЦА [пол. tablica < лот. tabula — тахта; жадвал] Графаларга батартиб қилиб жойлаштирилган ва рақамларда ифодаланган маълумот; жадвал. *Математик таблицалар. Таблица тузмоқ.*

ТАБЛО [фр. tableau — сурат, тасвир, картина; эълонлар тахтаси] Текшириш объектининг аҳволи ёки мусобақанинг бориши ва натижалари, тижорат хабарлари ва эълонлари ёзиб кўрсатиб туриладиган сигнал тахтаси. *Темир йўл таблоси.* ■ *Куйиб-пишиб дарвозага ким тўп киритди-ю, қайси анқов дарвозабон ўз дарвозасига келган тўпни ушлолмай қолди — буларнинг ҳаммасини.. табло ҳисобга олиб туради.* Ф. Маҳкамов, Табло қиссаси.

ТАБОБАТ [а. طبابت — шифокорлик касби, табиблик; даволаш] Тиббиёт (асосан, шарқ халқ тиббиётига нисбатан ишлатилади). *Нонушта пировард бўлгунча, домла шарқ табобати ва унинг машхур кишилари тўғрисида сўзлади.* А. Қаҳҳор, Сароб. *Халқ табобатида азалдан ялғиздан турли-туман касалликларни даволашда фойдаланиб келинган.* Газетадан. *Хусайн бўш вақтларида.. баъзан табобатга доир китобларни мутолаа қилар эди.* М. Осим, Ибн Сино қиссаси. *Байталнинг устидаги хуржуннинг икки кўзи табобат анжомлари билан тўлган эди.* Мирмуҳсин, Меъмор.

ТАБОБАТХОНА эск. Шифохона, касалхона.

ТАБОБАТЧИЛИК кам қўлл. Табобат, тиббиёт ишлари. *Исириқ қадим замонлардан бери турли халқлар табобатчилигида ишлатилиб келган.* «Фан ва турмуш». *Ўтмишда халқимиз табобатчиликда кўпгина турли гиёҳлар, дори-дармонлар ишлатганлар.* А. Раҳимжонов, Бош оғриқ.

ТАБОР [ф. تيار — қариндош, авлод; насл-насаб]: *хешу табор қ. хеш.*

ТАБОРАК [а. تبارك — дуо, фотиҳа олиш] Қуръондаги суралардан бирининг номи. *Йиғлаб уйга кирарканман, бувим мени қучоқ-*

лаб қарши олди: -Йиғлама, болам, таборакни ўқи, — дейди елкамни қоқиб. Ойбек, Болалик.

ТАБОҚ айн. табақ.

ТАБРИЗ [ф. تبريز — Эрондаги шаҳар — Табриз номидан] Ўзбекистонда ўсадиган узум навларидан бири ва шу узумдан тайёрланган майиз.

ТАБРИК [а. تبريك — бахт, омад, эзгулик тилаш; қутлаш] Бирор яхши (қутлуғ) кун, сана ёки эришилган ютуқ, яхшилик муносабати билан билдириладиган қутлов сўзлари; муборакбод. *Меҳмонлар билан вакилларнинг қизғин табриклари, хайрли тилақларидан кейин кечанинг расмий қисми тугади.* П. Турсун, Ўқитувчи. *Юзлари қувончдан қизарган Обид Йўлдошев табрикларга насттовуш билан раҳмат айтарди.* П. Қодиров, Уч илдиз. *Анвар самимий ва риё аралаш табриклардан анча ўнғайсизланган эди.* А. Қодирий, Меҳробдан чаён.

Табрик қилмоқ (ёки этмоқ) қ. табрик-ламоқ. *Анвар ўзини табрик қилувчи уламо ва ашрафлар юзидан очиқ равишда риё, шайтанат ва тамаъ ўқир, камбағаллардан содда самимият кўрар эди.* А. Қодирий, Меҳробдан чаён. *Мулла Абдураҳмон.. Анварни табрик этиш учун оғиз очишга қодир эмас ва ҳар замон қаршисидаги «бемаъни»га қараб кўяр эди.* А. Қодирий, Меҳробдан чаён.

ТАБРИКЛАМОҚ Табрик айтмоқ; муборакбод қилмоқ, қутлов сўзларини айтмоқ. *Набижон биринчи давлат имтиҳонини топширган куни Муборак уни катта гулдаста олиб келиб табриклади.* С. Зуннунова, Кўк чироқлар. *Зиё шоҳичи.. қутидорни Отабекдек бир йиғитни куёв қилиш билан табриклади.* А. Қодирий, Ўтган кунлар. *Эшикдан кира солиб.. баланд овозда Аҳмадни табриклади.* Ф. Мусаёнов, Ҳиммат.

ТАБРИКНОМА [табрик + нома] Табрик сўзлари ёзилган мактуб, табрик хати. *Табрикнома йўлламоқ. Табрикномани ўқиб бермоқ.* ■ *Мен ҳам таниш-нотаниш дўстларимдан янги йил табрикномаларини олаётирман.* Н. Сафаров, Оловли излар.

ТАБУ [полинезча табу — тақиқлаш] Диний эътиқод, ирим, кўрқин ва ш.к. таъсирида маълум сўз, ҳаракат кабилардан тийилиш, уларни чеклаш, ман этиш; ишлатилиши, қўлланиши чекланган, ман этилган сўз, нарса, ҳаракатнинг ўзи (Мас., чаён сўзини қўлламай, унинг ўрнида эшак,

оти йўқ сўзларини ишлатиш). *Жамоа йўлбошчилари ва қоҳинлар ўз ҳукмронликларини мустаҳкамлаш йўлида табу одатидан фойдаландилар.* «Фан ва турмуш».

ТАБУРЕТ(КА) [нем. Taburet < фр. tabouret] Суянчиги бўлмаган, квадрат ёки гардиш шаклидаги ўриндик; курси. *Матқовул ака борди-ю, Фуломжон тутган табуреткага ўтирмади, қўлларини қовуштириб иззат сақлади.* М. Исмоилий, Фарғона т. о. *Уйнинг бутун жиҳози: тахта каравату оддий бир стол билан иккита табуретка ва ерда эски наमत тўшоғлиқ, холос.* Ж. Шарипов, Хоразм.

ТАБЪ I [а. طبع — табиат, табиий ҳолат; ҳислат] эск. кт. айн. таъб.

ТАБЪ II [а. طبع — нашр этиш, босиб чиқариш]: **таъб этмоқ** эск. Нашр этмоқ, босмаҳонада босмоқ ёки бостирмоқ, чоп қилмоқ.

ТАВАЖЖУҲ [а. توجه — бирор кишига мурожаат қилиш, юзланиш; бирор томонга юриш, жўнаб кетиш] **1** Хайрихоҳлик билан юзланиш, қараш. *У Фуломжонни шу вақтгача танимагани учун афсус еяр, ошкор бир таважжуж билан унга қараб-қараб кўяр эди.* М. Исмоилий, Фарғона т. о.

2 Дикқат-эътибор. У[Самарқанд] ўзининг тарихий обидалари билан яққираб, бутун ер юзи халқларининг таважжужини ўзига тортиб туради. Ф. Фулом, Самарқанд сайқали. *Шоҳистанинг отаси, уйга қайтиши ҳақида сўз очгандан кейин, бошлиқлар таважжужидан қолади.* «Саодат».

3 дин. Худога ёлвориб, илтижо. *Эшон ҳолаҳвол сўраганда, ҳожи ўрнидан туриб, таъзим қилди: -Худого шукур, дуою таважжужларининг шарофатидан соғ-саломатман.* С. Айний, Дохунда. *Изингда термилиб қолди кекса чол, Кўзда таважжужуи, дуоси тилда.* А. Орипов.

ТАВАККАЛ [а. توكل — ваколат олиш; умид боғлаш; суяниш, ишониш] **1** Оқибат-натига қандай бўлишидан қатъи назар, бирор ишга жазм қилиш, нима бўлса бўлар, ё остидан, ё устидан зайлида қилинган ҳаракат. *Йўқ, ўртоқ Низомов, биз таваккал қилолмаймиз. Таваккалнинг туби тош, бошини урсанг — ёрилади.* Шухрат, Шинелли йиллар. *Баъзан жони халқумига келиб, ўзини нималарга урмади, неча марта қалтир таваккалларга борди, неча марта пачағи*

чиқиб, яна тикланиб олди. А. Мухтор, Опа-сингиллар.

2 дин. Ўзини Аллоҳ иродасига топшириш, бутун умидни унга боғлаш, унинг марҳаматига ишониш. *Кўргилликдан, таваккалдан, тақдирдан воз кечиб, халқ реал нарсаларга аҳамият берадиган бўлди.* Ойбек, Нур қидириб.

3 Таваккалчилик билан иш тутишни билдирувчи, шундай ҳолларда қўлланивчи сўз. *Биридан қочсанг, бошқасига тутиласан. Ундан кўра қочмаймиз! Таваккал. Пешонага битгани бўлур.* П. Қодиров, Юлдузли тунлар. *Унга ташланиб, қутичани олиб қўйсаммикан? Кучим етармикан?! Таваккал!* О. Мўминов, Хийбондаги уч учрашув.

Таваккал қилмоқ Таваккал тарзида иш қилмоқ, бирор ишга жазм этмоқ. *Инсон қадами камдан-кам тегадиган бу ёввойи водийда таваккал қилиб йўл босишдан бўлак илож қолмади.* С. Кароматов, Олгин кум. *Собир бирон марта ҳамсуҳбат бўлмаган.. Одил бувага, таваккал қилиб, юрак дардини очишга жазм қилди.* Р. Файзий, Чўлга баҳор келди.

ТАВАККАЛЧИ Таваккалига, таваккал билан иш қилувчи. *Ййчи уйига етгунча, таваккалчи ишини битирар.* Мақол. ■ ..ҳаммаси мол-дунё излаб чиққан таваккалчи бўйдоқлар бўлса керак-да. А. Мухтор, Чинор.

ТАВАККАЛЧИЛИК Таваккал билан иш тутишлик, таваккал иш. *Билимсиз, тажрибасиз болаларни, менинг қаршилигимга қарамай, қалтис таваккалчиликка бошлаган сиз эмасми эдингиз?* А. Мухтор, Туғилиш. *Буюк ишларнинг кўпчилиги таваккалчилик билан қўлга кирган, буни инкор қилиб бўлмайти.* Ж. Абдуллахонов, Тўфон.

ТАВАЛЛО [а. *تولا* — амал, мансабга эга бўлиш; бирор ҳис-туйғуга берилиш; дўст бўлишга интилиш] *эск.* Ёлвориш, ялиниб сўраш, илтижо. *Иброҳимбек, Пулатхўжаевнинг хитобу таваллоларини эшитмаган каби, ўтга «исиниб» ўтирар эди.* Ш. Холмирзаев, Қил кўприк.

Тавалло қилмоқ Ёлвормоқ, илтижо қилмоқ. *Даҳонинг онаси кўзига ёш олиб тавалло қилди.* Т. Мурод, Қўшиқ. *Халил бобо.. «Кечир, гумроҳ дўстингни кечир!..» дея тавалло қилганида, ҳеч ким оғиз очмади.* «Ёшлик».

ТАВАЛЛУД [а. *تولد* — пайдо бўлиш, дунёга келиш; туғилиш] *эск.* Туғилиш, дунёга келиш. *Навоий таваллудининг 500 йиллиги.*

■ *Ҳар умрнинг икки куни бор: Бири ўлим, бири таваллуд.* М. Шайхзода.

Таваллуд топмоқ Туғилмоқ, дунёга келмоқ. *Таваллуд топган чақалоқнинг биринчи эҳтиёжи пахтага бўлади.* Ҳ. Нуъмон, Чаноқ. *Ибн Сино ҳазратлари Бухоройи шарифда таваллуд топганлар.* О. Ёқубов, Қўҳна дунё.

ТАВАН [а. *توان / تاون* — жарима; зарарни қоплаш] *этно.* Хотинлар тўйга олиб келадиган мева ва кийимликлардан иборат тортиқ; туҳфа. *Бунча хотин, бунча бола-чақа, бунча таван қаерга сиғади?* Ойбек, Танланган асарлар.

ТАВАНБОШИ *этно.* Таванларни қабул қилиб олиш, меҳмонларга патнис тузаш учун таванхонага бош қилиб қўйилган аёл. *Бозорқулнинг онаси жуда чиройли хотин эди, тўй-ҳашамда таванбоши бўлиб ўлиб кетди.* А. Мухтор, Чинор.

ТАВАНХОНА *этно.* Тўй ва зиёфатларда меҳмонларга патнис тузаладиган, совға-саломлар, тўёналар, таванлар қабул қилиб олинадиган хона. *Тўёналар таванхонага уйиб қўйилмоқда.* М. Муҳаммаджонов, Турмуш уринишлари. *Ўғлим, таванхонадагиларга «Бу — Хадича холамнинг саватлари, эҳтиёт қиларкансизлар», дегин..* Т. Алимов, Совға.

ТАВАНЧИ 1 қ. таванбоши.

2 тар. Тўй ва зиёфатларда меҳмонларга хизмат кўрсатувчи ходим. *Таванчилар оёқ учи билан юриб, чаққонлик билан дастурхон ёздилар.* Ойбек, Навоий.

ТАВАҚА с. т. айн. **табақа 1.** *Дарвозанинг бир тавақаси очиқ.* ■ *Кўп ўтмай, дарвоза тавақасидаги эшик очилди.* Ў. Умарбеков, Ёз ёмғири. *Муқаддам бир тавақаси очилган дераза олдида эрига ачиниб қараб турарди.* Ў. Ҳошимов, Қалбингга қулоқ сол.

ТАВАҚАЛИ с. т. Табақали. *Афанди эшик бозоридан ўтаётиб, икки тавақали эшикни кўтариб қолди.* «Латифалар».

ТАВАҚҚУФ [а. *توقف* — тўхташ, тек туриш; бировга қарамлик; журъатсизлик] *эск. кт.* Тўхташ, сабр қилиш. *Йўқ, таваққуф қилинг.* А. Қаҳҳор, Сароб.

ТАВАҲҲУМ [а. *توهم* — хаёл қилиш, тасаввур этиш; тахмин қилиш, шубҳаланиш; ваҳимага тушиш] *эск. кт.* Ваҳимага тушиш, қўрқиш, қўрқув.

Таваҳҳум қилмоқ (ёки тортмоқ). Ваҳимага тушмоқ, қўрқмоқ.

ТАВБА [а. توبه — айбига иқрор бўлиш; гуноҳлари учун кечирим сўраб ёлвориш] **1** Қилмишидан таъзир еб ёки пушаймон бўлиб, уни қайтармаслик учун қилинган азм-қарор, берилган ваъда ёки қилмиши учун сўралган узр. *Менинг тавбамни лоақал ўзларингиз учун қабул қилингиз!* А. Қодирий, Ўтган кунлар. *Аммо халқ бундай ёлворишларга, тавба, тазарруларга қулоқ солмади, чунки иш ўтган, ғишт қолипдан кўчган эди.* А. Қодирий, Ўтган кунлар.

2 унд. с. Таажжубланиш, ҳайронликни билдиради. *Тавба, одам яқин кишисидаги камчиликни кўрмас эканми, деб қўйдим.* Ҳ. Назир, Ёнар дарё. *Ўз уйида ўтирган қиз бир кечада йўқ бўлсин, тавба!* Ойбек, Танланган асарлар.

3 Бирор ғайритабиий нарса, ҳодиса олдида истиғфор айтиш, худодан кечирим сўраш маъносига қўлланади. *Ҳадеб: «Ўзинг кечир», «тавба», «астағфирулло» деяверасиз-а.. «Гулдаста». Тавба денг, болам, бўйдоқсиз, яна шундай таннозлардан бирига учраб.. «Гулдаста». Худоё тавба, денглар, икки дунёда эшитмайлик!* П. Турсун, Ўқитувчи.

4 дин. Тасаввуфда: солиқнинг тариқат сари қадам қўйишидан олдин қилган барча гуноҳларидан тавба қилиб, келажақда бирор гуноҳ ишни қасддан қилмасликка азму қарор қилиши.

Тавба қилмоқ Тавбани билдирувчи сўзларни, шунингдек, «тавба» сўзининг ўзини айтмоқ. *Э худо, тавба қилдим! Осий бандангни ўзинг кечир!* Мирмуҳсин, Меъмор. *Собирнинг қиёфасида танбеҳ еб, тавба қилиш эмас, ўз истагидан қайтмаслик ҳисси барқарор эди.* Ф. Мусажонов, Ҳиммат. *Қарол, хизматкор бўлиб ишлашга тавба қилдим, киши бир марта алданади-да.* Ойбек, Танланган асарлар. **Тавбасига таянмоқ** Қилмишидан ниҳоятда пушаймон ҳолатда, таъзирини еган ҳолатда бўлмоқ, шундай ҳолатга тушмоқ. *Балки ўзи инсофга келгандир, тавбасига таянгандир..* М. Хайруллаев, Тилла маржон. *-Хўп, кетаман. Лекин билиб қўйинг.. пушаймон ейсиз, тавбанизга таяниб қоласиз, — деди Анвар.* З. Фатхуллин, Сўнмас юлдуз.

ТАВБА-ТАЗАРРУ [тавба + тазарру] Қилмиши учун астойдил кечирим сўраш; қилмишига ўқиниб, иқрор бўлиб, ялиниб сўралган узр.

Тавба-тазарру қилмоқ Ялиниб-ёлвориб узр айтмоқ. *Икки марта масаласи кўрилаганда, тавба-тазарру қилгани эсингиздан чиқдим, Бонҳон?* С. Кароматов, Ҳижрон. [Жонфигон] *Хотиница неча-неча тавба-тазаррулар қилиб, энди бирор жойга кириб ишлашга, астойдил ишлашга сўз берибди.* А. Қаҳҳор, Жонфигон.

ТАВИР фольк. Диккакдан кичик, узун сочоқли, эгар остида икки ёққа ёйиб ташланадиган от абзали.

ТАВКАР Тўрт ошиқ ташлаб ўйналадиган қимор ва унда қатнашувчи қиморбозлар давраси. *Бошладилар ошдан сўнг Зўр тавкар — қимор. Қаршилик йўқ бу ишга, Улфат аҳли ёр.* «Фольклор».

ТАВКАРГИР эск. Қиморда ютуқдан чўтал олувчи; чўталчи. *Охири Абдурахмон чойхонанишин, тавкаргир ва бобойи банлар орасида ўзига замин топди.* А. Қодирий, Меҳробдан чаён.

ТАВЛА шв. Чўлларда қўниб ўтиш учун ишланган қурилма, уй, бостирма.

ТАВОЗЕ [а. تواضع — ўзини паст тутиш, камтарлик; тил бириктириш, келишув] Ўзини хоксор, одоб билан тутиш; хоксорлик, камтарлик. *Гулбаҳор унга [аёлга] аввал тавозе билан эғлиб салом берди, кейин бориб, елкасини тутиб кўришди.* С. Зуннунова, Гулбаҳор. *Таъзим этган каби, қўлларини тавозе билан кўксига қўйди.* С. Кароматов, Сўнгни бархан. *Инсон илми, одоби, тавозеси билан ёқимли бўлиб, меҳнати билан шарафланади.* Газетадан.

Тавозе кўрсатмоқ Ўзини камтар, тавозели тутмоқ, шундай муносабатда бўлмоқ. *Меъморга тавозе кўрсатиб, бетоб бўлгани ва бунинг устига «амирзода пулни камроқ бераётгани»ни айтди.* Мирмуҳсин, Меъмор. *Муфти Мажидбекни ҳурмат қилса-да, Алига ўхшаб, унга унча тавозе кўрсатмади.* А. Ҳакимов, Илон изидан.

ТАВОЗЕЛАНМОҚ Тавозе билдирмоқ, тавозе кўрсатмоқ. *-Худога шуқур, давлатлари кўланкасида, — деб қўрбоши тавозеланди ва қўл қовуштириб, қушбегининг яқинига чўккалади.* А. Қодирий, Ўтган кунлар.

ТАВОЗЕЛИ Кишиларга тавозе билан муомала қилувчи, хоксор, камтар. *Бу [Дарвешали] ўқимишли, тавозели одам бўлса ҳам, кўп жиҳатларидан акасига ўшамасди.* Ойбек, Навоий. *У [Сафар чўтир] аввалгидан*

мулойим, тавозели, ювош эди. Ойбек, Қуёш қораймас.

ТАВОН [ф. تۋان — қудрат, қувват] *эск. кт.* Қувват, куч-қудрат, чидам. *Қолган умримни, Ҳабибий, сарф этай мадҳинг билан Ақлу ҳушу қудрату тобу тавоним борича.* Ҳабибий.

ТАВОНГАР [ф. تۋانگار — бой, бадавлат; қодир, қудратли] *эск.* Бадавлат, давлатманд, серпул, бой. *Тавонгар фақирни кўп дуо қилди ва деиди, бир масжид солурман, анинг савоби сенгадир.* А. Қаҳҳор, Миллатчилар.

ТАВОНО [ф. تۋانا — кучли, қодир] *эск. кт.* Забардаст, жисмонан бақувват, соғлом. *Бу одамнинг сену мендек қўлидан иш келади-ган тавоно ўғиллари бор.* С. Абдулла, Соялар.

ТАВОФ [а. طواف — (бирор нарса-нинг) атрофида юриш, айланиш] *дин.* Ҳаж ва умра маросимлари таркибига кирувчи, Каъба атрофида айланишдан иборат жараён (умра қилувчилар бир марта, ҳажга келганлар 3 марта тавоф амалини адо этадилар).

Тавоф қилмоқ 1) *дин.* муқаддас, табарруқ деб ҳисобланган кимса, нарса, жой атрофини зиёрат қилмоқ. *Мақсуд чой келтиради. Азизбойнинг имоси билан ярим сажда қилган ҳолатда эшонни тавоф қилади.* Н. Сафаров, Шарқ тонги; 2) кўча муқаддас, азиз санаб ёзозламоқ, кўзга суртмоқ. *Изларини қилсам тавоф.* «Равшан». *Ниҳоят, ноибнинг муҳрини чўнтагидан олди-да.. орзусига эришганлиги аломати сифатида уни тавоф қилди.* Х. Тўтабоев, Йиллар ва йўллар.

ТАВОЧИ [муғ. تۋاچى — ҳисобчи] *тар.* 13–19-асрларда Ўрта Осиё ва Эронда: ҳукмдорнинг фармон ва топшириқларини тегишли жойларга зудлик билан етказувчи олий ҳарбий мансабдор.

ТАВР I [р. тавро < т. туғро] Ҳайвонларнинг териси, шохи ёки туёғига куйдириб қўйиладиган белги, тамға. *Тавр босмоқ.*

ТАВР II [а. طور — босқич; ҳолат, аҳвол; сурат, ҳол, тарз, йўсин; одат, қилиқ, юриш-туриш] 1 *шв. рвш.* Сингари, каби; хилда, тарзда. *Қуёшнинг бу тавр ботишини.. фақат Жилвон чўлидаги кўрасиз.* Н. Юсуфий, Саидон достони.

2 *шв.* Ҳол, аҳвол. *Товмирилар қўймади ўз таврима, Эмранганда қонлар кетди бағрима.* «Ширин билан Шакар».

ТАВРИДА *кам қўлл.* Аслида, зотида; азалдан. *Лақаб бўлди Навоий, исми Алишер. Би-*

лим майдонида эрлар аро эр.. Бўлиб таврида олимпик нишони, Билимли, нуктадонлар нуктадони. Ҳабибий.

ТАВРОТ [а. تورات < ях. Тора — қонун] Яҳудий динининг муқаддас китоби; Ислом ақидасига кўра, Аллоҳ томонидан Жаброил орқали Мусо алайҳиссаломга нозил қилинган илоҳий китоб. *Тавротда афсона: бир олма учун Жаннатдан бадарға бўлганмиш одам.* Ф. Фулом.

ТАВСИФ [а. توصيف — муфассал таъриф, баҳо; сифатлаш, мақташ] 1 Сифат; сифатлар. *Эсизки, мен у кампирнинг тавбир ва тавсифларини эсимдан чиқарганман.* С. Айний, Эсдалиқлар. *Мен отахон тавсифи тўғрисида тўла тасаввурга эга эдим.* Н. Сафаров, Оловли излар.

2 Сифат-белгиларнинг баёни, таърифи, тасвири. *Шаҳарнинг тавсифи.* ■ *Таърифинг, тавсифинг тушмагай тилдан.* Уйғун, Ҳаёт чақиради. *Холбеканинг тавсифини, ҳусну зеболигини эшитган подшоҳлар ва хонзодалар ҳар мамлакатдан, ҳар юртдан, ҳар диёрдан совчи қўяберди.* «Кунтуғмиш». *Тавсифингга мен шуъладин қалам йўнайин.* Э. Воҳидов, Шодиёна.

Тавсиф қилмоқ айн. тавсифламоқ. *Бир-бирига қилар таассуф, Қилиб бўлмас уларни тавсиф.* «Гулихиромон».

ТАВСИФИЙ Таъриф-тавсифга оид, тавсифлаш тарзидаги. *Унинг ўзбек шевалари бўйича олиб борган тавсифий ишлари жуда аниқ бўлиши билан ажралиб туради..* «ЎТА».

ТАВСИФЛАМОҚ Тавсифини бермоқ, қайд этмоқ, баён этмоқ; таърифламоқ. *Ёзма адабиётда маънодор кулги, йўтал, юз-кўз ифодаси, қўл ҳаракатлари кенг ёритилади ва тавсифланади.* Ф. Саломов, Таржима назариясига кириш. *Моҳидил.. ёнма-ён, бидиллаганича воқеани тавсифлаб келаётган қизнинг гапларини аранг олиб оларди.* Ж. Абдуллахонов, Тўфон.

ТАВСИФНОМА [тавсиф + нома] Бирор кишига оид маълумотлар, унинг сифатлари қайд этилган ҳужжат, ёзма тавсиф. *Мана тавсифномангиз, энди бошқа ишга ўтсангиз.* С. Абдуқаҳҳор, Бетга айтганнинг заҳри йўқ.

ТАВСИЯ [а. توصيه — васият бўйича топшириш; тавсия, маслаҳат бериш, таништириш] 1 Бирор иш, лавозим, ўқиш ва ш.к. га лойиқ қўриб тақдим этиш, шундай маз-

мунли тақдимнома. *Йирик мутахассиснинг тавсияси билан ишга олмоқ.* ■ *Тавсия беришдан олдин.. тавсия берилувчининг барча фазилатларини тарозига солиб туриб, ўз фикрини айтади.* Газетадан.

2 Маслаҳат, кўрсатма. *Врачнинг тавсияси билан даво олмоқ.* ■ *Ибодовнинг тавсияси билан хатни таржима қила оладиган кишининг уйига борди.* С. Кароматов, Сўнгги бархан.

3 Фойдаланиш, амалга ошириш учун белгиланган кўрсатма, йўл-йўриқ. *Саноат ва қурилиш соҳаларига доир бир қатор илмий тавсиялар ишлаб чиқаришга топширилди.* Газетадан. Хусусан, узумчиликда тўпланган материаллар асосида илғор тавсиялар ишлаб чиқилди. «Фан ва турмуш».

Тавсия қилмоқ (*ёки этмоқ*) Маъкул (ло-йик) билиб тақдим қилмоқ, маслаҳат, кўрсатма бермоқ. *..одобли, билимдон йигит, — деди кулиб, тавсия қилаётган муаллимнинг фазилатларидан завқланган кишидек.* М. Осим, Ибн Сино қиссаси. *Сизни бўлим мудириликка тавсия этмоқчиман.* «Ёшлик». *Тез-тез шамоллаб турувчиларга олдин уйда пайпоқда, кейин яланг оёқ юриш тавсия этилади.* «Фан ва турмуш».

ТАВСИЯНОМА [тавсия + нома] Ёзма тавсия, маслаҳат (расмий ҳужжат турларидан бири). *Унинг [Пўлатжоннинг] партияга ўтиши учун генерал Собир Раҳимов тавсиянома ёзди.* С. Аҳмад, Қадрдон далалар.

ТАВТОЛОГИК Тавтологияга оид, тавтологиядан иборат бўлган. *Тавтологик ибора.*

ТАВТОЛОГИЯ [юн. *tauto* — айнан ўзи, ўша + *logos* — сўз] Бир фикрни бошқа сўз ёки сўзлар билан такроран, ортиқча ифодалаш, бир сўзни ортиқ такрорлаш. *Айрим ҳолларда ана шундай такрорнинг бири ҳеч қандай функцияни бажармайди, натижада бундай плеоназм тавтологияга айланади.* «ЎТА».

ТАВФИҚ [*а. توفيق* — мувофиқлаш(тириш); яраштириш, келиштириш; ёрдам, мадад; бахт, омад] **1** *дин.* Тўғри йўлга бошловчи дин йўл-йўриқлари, инсоф, диёнат; эътиқод. *Бу гуноҳкор ўғилга ўзинг тавфиқ бер ва мен қўлингни кечир.* Ойбек, Нур қидириб. *Жаноб Хўжа Яхё молу дунёга ҳирс қўйиб, тавфиқни унутган.* П. Қодиров, Юлдузли тунлар.

2 *кўчма* Ножўя иш, хатти-ҳаракат ва ш. к. дан ўзини тийиш. *-Золимларга инсоф, тавфиқ берсин! — деди бувим кўзларига ёш олиб.* Ойбек, Болалик.

Тавфиққа келмоқ Инсофга келмоқ, яхши йўлга кирмоқ, ёмон (номақбул) иш, хатти-ҳаракатлардан тийилмоқ. *-У вақт, — деди Шодим, — бизни шайтон йўлдан чиқарган эди. Энди тавфиққа келдик.* С. Айний, Қуллар.

ТАВФИҚЛИ 1 *дин.* Дин йўл-йўриқларини бажарувчи, диёнатли, эътиқодли; солиҳ.

2 *кўчма* Ножўя иш, хатти-ҳаракат ва ш. к. дан ҳазар қилувчи; инсофли, мўмин, солиҳ.

ТАВФИҚСИЗ қ. **бетавфиқ.**

ТАВҚ [*а. طوق* — бўйинга тақиладиган маржон; бўйин, ёқа; бўйинбоғ; ҳалқа]: **тавқи лаънат** **1)** *тар.* жазо тариқасида гуноҳкорнинг бўйнига кийгизиб, қулфлаб қўйиладиган кунда; **2)** *кўчма* бошга тушган (гарданга илинган) катта ташвиш; дардисар, ёмонлик. *У [Кўчқор] Муҳаббатга уйланаётганида, ўзини ниҳоятда бахтиёр ҳис этган, болалигидан бўйнига тавқи лаънат бўлиб илинган бахтсизлик ниҳоят унутилиб кетадиган бўлди.* С. Анорбоев, Оқсой. *Наҳотки, бундай бадномликлар одам боласининг манлайига тавқи лаънатдек тоабат муҳрлаб қўйилган бўлса?* С. Сиёев, Аваз.

ТАВҲИД [*а. توحيد* — бирикиш, қўшилиш, бирлашиш, яхлитланиш] *дин.* **1** Аллоҳнинг яккаю ягоналигига эътиқод қилиш, Аллоҳга ширк келтиришнинг барча кўринишларидан воз кечиш.

2 Тасаввуфнинг бешинчи босқичи: Ҳақикат билан уйғунлашиш, инсон руҳининг Аллоҳ томон юксалиши.

ТАГ [*ф. ته < تك* — ост, туб; остки қисм] **1** Нарсанинг остки, пастки қисми, туби. *Пақирнинг таги тешилибди. Туфлининг таги лой бўлибди.* ■ *Кўғазордаги водокачка тикланадиган бўлса, таги билан кўпориб ташлаймиз.* А. Қаҳҳор, Кўшчинор чироқлари.

2 Бирор ҳолатда бўлган, жойлашган нарсанинг ост томони, пастки томон (ер, бўшлиқ ёки бошқа нарса). *Столиннг тагига бекинмоқ.* ■ *Тўғон тагидан ўтган сув шалоласи канални тешиб юбориши ёки қирғоқларни ўпириб кетиши мумкин.* С. Сиёев, Ёруғлик. *Кўкрагини баланд тутди-да, яқтак чўнта-*

гидан носини олиб, бир чимдимини тил тагига ташлади. Ойдин, Ҳикоялар.

3 Тик ҳолатли нарсаларнинг ост қисми атрофи, ён-бегидаги ер сатҳи. Доим девор тагида турадиган стол икки каравот ўртасига олинган. Ў. Ҳошимов, Қалбингга қулоқ сол. Кун тиккага келгунча тўхтамай юриб, тик чўққининг шундоқ тагига келдик. Ў. Усмонов, Сирли соҳил.

4 Нарса ёки шахснинг бошқа бир нарса, сатҳ ва ш.к. га тегиб, ўрнаб турган томони; ост. Кўрпачанинг таги. Хат стол устидаги китобнинг тагида. ■ Мактубни ўқиб, ёстиқ тагига қўйди. К. Яшин, Ҳамза. У бир оз олдинда, тагидага саман йўрганнинг бир текис юришига мос сал чайқалиб, хаёлга чўмиб ўтирипти. О. Ёқубов, Эр бошига иш тушса.

5 Нарсанинг ўз сиртига қарама-қарши бўлган томони; ич. Домла ер остидан паранжи тагида жилпанглаб турган шўх аяга бир боқди-да, никоҳ хутбасини бошлаб юборди. «Муштум». Пиджагининг тагидан кийилган оқ садаф тугмали рангдор, катак кўйлак арзон костюмга жуда мос келган. П. Қодиров, Уч илди.

6 Ер, сув кабиларнинг ост, ич томони; ост, ич. Билмадим, кўкка учдим, ер тагига кирдим. Ойбек, Танланган асарлар.

7 Асли, зоти (ота-боболари), келиб чиқиши. Тагимиз камбағал. Отамизнинг касби ҳаммолик эди. П. Турсун, Ўқитувчи. У ҳам таги кўрган оиладан чиққан. Мирмуҳсин, Умид. Менинг отим — Олим. Таги Чорвоқликман. С. Кароматов, Бир томчи қон.

8 Замир; асос. Аҳмад.. бунинг тагида бир гап борлигини пайқади. Мирмуҳсин, Меъмор. Элмурод қассобнинг «сиёсат» тўғрисидаги саволи тагида унинг ўз ғарази ва ташвиши ётганини пайқади. П. Турсун, Ўқитувчи.

9 Охир-оқибат, натижа. Сабр таги — сар(иқ) олтин. Мақол. ■ Меҳнат таги — роҳат, деган қадимгилар. Ойбек, О.в. шабадалар. Устод Қавом бу ишнинг таги ёмонлигини.. биларди. Мирмуҳсин, Меъмор.

10 (3-ш. эгалик қўшимчаси билан — таги) Нарсанинг муайян ҳолати, миқдори [кўп ёки оз (кам) сўзи билан қўлланади]. Кейин бирини илишти, бирини пишириб еб, иккисини чўнтагига солиб кетди. Таги кўп бўлса ҳам кошки эди. «Муштум». Ўғлим, бу икки отга

ярашиқли нарсаларнинг ҳам таги камдир. «Эрали ва Шерали».

Бурни (ёки тумшуги) тагида Шундоққина олдида, ёнгинасида. Бурнимизнинг тагида экан-у бу лаънатилар, яна қидириб юрибмиз. А. Убайдуллаев, Қонли издан. Поезддан тушгандан кейин шундай тумшугимиз тагида экансан-ку, биз бўлсак қаёқларга бориб юрибмиз. Э. Раимов, Ажаб қишлоқ. **Дўппининг тагида одам бор қ. дўппи. Ер тагидан қарамоқ** Бошни куйи солган ҳолда қарамоқ (кўз ташламоқ). Бу гап Бадиага ер тагидан қараётган Зулфиқор Шоший устидан гўё совуқ сув қуйгандек бўлди. Мирмуҳсин, Меъмор. **Кўз тагига олмоқ** Эришиш (ўзиники қилиш) учун мўлжаллаб қўймоқ. Кўз тагига олиб қўйганинг борми ўзи? М. Қориев, Ойдин кечалар. Олдин институтни битирай, кейин ўзим мўлжаллаб, кўз тагига олиб юрган қиз бор. «Муштум». **Таги зил** Оқибати яхши бўлмаган; ишончсиз; ҳалокатли. Ҳазилнинг таги зил. ■ Муҳаммад Аргуннинг таги зил маълумотлари Шоҳруҳни ҳам, Улуғбекни ҳам оёққа турғазди. Мирмуҳсин, Меъмор. **Таги очилди** Нима эканлиги, мазмуни, моҳияти маълум бўлди. Энди таги очилди. Нима демоқчисан? Ҳамза, Танланган асарлар. **Таги паст қ. паст. Отасини кундирамиз, унинг таги паст, жазоси пул-да..** Ж. Шарипов, Хоразм. **Тагига етмоқ** 1) иш-ҳаракат, гап-сўз ва ш.к. нинг моҳиятини англамоқ, билмоқ, асли моҳиятини билмоқ, сирини очмоқ. Ботирли одамлар оғзидаги миш-мишларнинг тагига етишини истарди. Ҳ. Фулом, Машғал. **Ҳақиқатнинг тагига етгунча орада ноқулай гаплар бўлиб ўтди.** Газетадан. **Маҳкам ака гапнинг тагига энди етди, кулиб юборишга сал қолди.** Р. Файзий, Ҳазрати инсон; 2) йўқ қилмоқ. Ўғлим Ҳамзанинг ҳам тагига етиб, оз қолди мени доғда қўйиб кетишига. К. Яшин, Ҳамза. **Тагига (ёки тагини) олдирмоқ** Тагини куйдириб, ўта қовуриб қўймоқ. Бизни кутавериб, ошини тагига олдирибди. Ҳ. Назир, Ёнар дарё. ..шолени сочмасдан туюлмайд, сув қайнатса ҳам, тагига олдириб қўяди. А. Қаҳҳор, Қўшчинор чироқлари. **Тагига сув кетди** Фаолияти барҳам топди, йўқликка юз тутди, тамом бўлди. **Ўртада ҳар хил меросхўрлар кўпайди.** Бойликнинг тагига сув кетди. Ойбек, Танланган асарлар. У кунлар Назирқул учун энг бахтиёр кунлар эди. Ўшандай бе-

озор кунларнинг тагига сув кетди. С. Аҳмад, Хукм. **Тагида қолмоқ** Бирор нарсага катта миқдорда эга бўлмоқ. *Дуонинг тагида қолмоқ. Бойликнинг тагида қолмоқ.*

ТАГДОР [ф. تكدار — таги, насл-насаби бор; бирон асосга эга] **1** Насл-насаби, зоти яхши; асилзода. *Бу бир хил асил, тагдор хонзодами, деб ўрнидан туриб.. бир сўз айтади.* «Равшан».

2 Тагли маънога эга, замирида (тагида) махсус маъно бўлган. *Бечора йигит тагдор гапга тушунмай анрайиб қолди.* С. Сиёев, Аваз. *Дилшод тагдор қилиб кулди.* М. Исмоилий, Фарғона т.о. *Афандининг тагдор ишорасига қойил қолган шоҳ шу заҳоти унга саруво кийдиришни буюрди.* «Муштум».

ТАГДЎЗИ [таг + ф. دوزى — тикиш; тикилган] Таги бир рангдаги ипак билан сидирғасига тўлдирилган, у ер-бу ерига гул тикилган (дўппи ҳақида). *Унинг бошида янги тагдўзи дўппи.* Ойбек, Танланган асарлар.

ТАГЗАМИН [таг + замин] кам қўлл. Пойдевор, фундамент. *Баланд бетон тагзамин устига ғиштан қурилган, узун пешайвони шарққа қараган беш-олти хонали уй.* А. Ибодинов, «Латофат» дўқонидаги қатл.

ТАГЛИ 1 Таги, туби бор. *..оёғида қора чарм тагли оқ пийма-этик.* «Муштум».

2 айн. тагдор. Тагли одам.

ТАГЛИ-ЖОЙЛИ Насл-насаби яхши ва ўз жойи, етарли мол-мулкига эга. *Тагли-жойли одамлар-да, супага бир гилам солиб қўйипти, нах икки ёғидан уч қаричдан тушиб ёттипти..* «Муштум».

ТАГЛИК 1 Бирор буюмнинг тагини, ост қисмини яшаш учун боп материал.

2 Нарсанинг тагига қўйиш учун ишланган қурилма, мослама. *Куркаларни суғоришда.. рухланган челақлардан фойдаланилади, челақ ёғоч тагликка қўйилади.* «Ўзбекистон паррандачилиги».

3 Чақалоқнинг тагига солиб қўйиладиган юмшоқ мато. *Тагига нам ўтганини сезиб, бошқатдан йўрғакламоқчи бўлди.* Буни сезган Салима ирғиб ўрнидан туриб, таглик келтириб берди. Р. Файзий, Ҳазрати инсон.

ТАГОБИ Хўраки ва винобоп ўртапишар узум нави; шу хил узумдан тайёрланган майиз ёки вино. *Бундан чиқди.. тагобидан мўлроқ ичиб юборибди-да.* С. Сиёев, Эркалар эртаги.

ТАГСИЗ 1 Таги, туби йўқ. *Тагсиз челақ.*

2 кўчма Жуда чуқур, тубсиз. *Тагсиз денгиз.* ■ *Факультет — Муниسخон билан икковининг орасидаги тагсиз чоғга тушган омонат кўприк эди.* А. Қаҳҳор, Сароб.

3 кўчма Бепоеён, бениҳоя. *Тагсиз осмонда сочилиб ётган саноқсиз юлдузлар гузарнинг тўрт ерига ёқиб қўйилган кунжара машъални эрмак қилаётгандек живирлашади.* М. Исмоилий, Фарғона т. о.

4 кўчма Асоссиз, пуч. -*Бу гапларимни ёлгон демоқчимисан? —Албатта, тагсиз гаплар!* С. Айний, Куллар.

ТАГСИНЧ Синчли иморатнинг пойдеворига ётқизиладиган ва устига синчлар қадаладиган узун, бақувват ёғоч. *Малла киши ичкарига кирганда, ҳалиги эски парпаша наранжи айвон тагсинчида ётар эди.* М. Исмоилий, Фарғона т. о.

ТАГ-ТАХТ Кимсанинг асли, насли-насаби, зоти, келиб чиқиши. *Ўзининг «таг-тахти»га бино қўйган одамлар.* А. Мухтор, Опа-сингиллар.

ТАГ-ТАХТЛИ Бойлар, ўзига тўқ одамлар нуқтай назаридан насл-насаби яхши; тагдор. *Остонангизга арзийдиган таг-тахтли мастура қизлар қуриб кетиптими?* А. Мухтор, Опа-сингиллар.

ТАГ-ТОМИР: таг-томири билан 1 Тагитомирини қолдирмай; бутунлай. *Трактор.. ёввойи жийда, чангал, туранғи, тол, дўлана сингари бута ва майда дарахтларни таг-томири билан қўпориб ташлар эди.* А. Қаҳҳор, Қўшчинор чироқлари.

2 кўчма Ҳеч асари қолмай (асар қолдирмай); бутунлай. *Ойқиз раиснинг.. дилида занг босиб ётган.. чирик фикрларни таг-томири билан суғуриб ташлашни истарди.* Ш. Рашидов, Бўрондан кучли. *Илоё, таг-томири билан қуриб кетсин бу газандалар!* И. Раҳим, Чин муҳаббат.

ТАГ-ТУБ 1 айн. таг-тахт. [Баҳри:] *Турғуннинг таг-тубини бундоқ суриштирдингми?* Н. Сафаров, Ҳаёт мактаби.

2 айн. таг-томир. *Дарахтларни таг-туби билан қўпормоқ. Зарарли иллатларни таг-туби билан йўқотмоқ.*

ТАГ-ТУБЛИ айн. таг-тахтли. *Неча хртин олиб ёлчимаган туппа-тузук, таг-тубли одамлар кўп.* П. Турсун, Ўқитувчи.

ТАГ-ТУГ айн. таг-туб. *Таг-тузи билан қўпормоқ.* ■ *Ростини айтсам, мен шу вақт-*

гача ҳеч бир аёлнинг таг-тугини суриштирган эмасман. Ойбек, Танланган асарлар.

ТАГ-ТУГЛИ айн. таг-тахтли. - Қиз бола бўйга етганда, ота уйи унга торлик қилади. Ота-оналар уни «таг-тугли» жой топиб беришга шошиладилар, — деди Кумуш. Т. Жалолов, Олтин қафас.

ТАГЧАРМ Пойабзалнинг ост қисмига ишлатиладиган қалин чарм. Шиппагининг тагчарми кўчган ерларини тикди. С. Кароматов, Олтин қум.

ТАДБИР [а. تدبير — бошқариш, идора қилиш; тежамкорлик; чора, илож, йўл-йўриқ; ҳаракат тарзи] Амалга ошириш, рўёбга чиқариш учун йўл-йўриқ ва чора. Ҳосилдорликни ошириш тадбирлари. ■ ..ҳақиқат олдидан у ҳайрон ва бунга қарши тадбир ўйлаш билан гаранг эди. А. Қодирӣ, Ўтган кунлар. Бу тадбирнинг келиб-келиб Тўламадан чиққанини айтмайсизми! С. Анорбоев, Оқсой.

2 Мақсадни амалга ошириш йўлидаги иш, хатти-ҳаракатнинг ўзи. Бу шунчаки оддий тадбир бўлмай, у ер юзида тинчликни мустаҳкамлаш иши билан чамбарчас боғланиб кетади. «Фан ва турмуш». Ҳар бир тадбир талабалар тарбиясини такомиллаштиришга.. йўналтирилган. Газетадан. Ҳосил туғиш даврида чеканка қилиш муҳим агротехник тадбирлардан бири ҳисобланади. Газетадан.

3 Маълум мақсадда ташкилий равишда амалга ошириладиган (бажариладиган) иш, ишлар. Тошкент шаҳар кинолаштириш бошқармаси ва кинофильмлар прокати «Зулматдан зиёга» номи билан катта маданий тадбир ўтказишга ҳозирлик кўрмоқда. Газетадан.

ТАДБИРИЙ Тадбирга оид, тадбирга қаратилган. ..ҳайвонлар экспонатларини бойитиш каби жуда кўп тадбирӣй чоралар режалаштирилган. Газетадан.

ТАДБИРКОР [а. + ф. تدبيركار — тадбир қилувчи, тадбир изловчи] **1** айн. тадбирли. Омон мустақил фикрли, чўрткесар, узоқни кўра оладиган, тадбиркор, яхши дўст эди. С. Кароматов, Олтин қум. Тадбиркор Халил аканинг қаршисидан Аҳмад бир лаҳза ўзини жуда лапашанг ҳис этди. Ф. Мусажонов, Ҳиммат.

2 Ишлаб чиқаришни ёки бошқа фаолиятни ташкил этувчи, молиялаштирувчи,

тижорат ёки саноат корхонасини фойда олиш мақсадида бошқарувчи шахс, мулкдор.

ТАДБИРКОРЛИК Тадбиркорга хос хатти-ҳаракат, фаолият, хислат. Тадбиркорлик билан иш тутмоқ. ■ Бу ишда яна Бабич билан Семённинг тадбиркорлиги қўл келди. Ш. Ғуломов, Инсон қўли гул.

ТАДБИРЛИ Тадбир билан, пухта ўйлаб иш қиладиган. Тадбирли одам. ■ Норбиби ёш бўлса ҳам, анча тадбирли, довурак қиз эди. Ҳ. Шамс, Душман.

ТАДБИРСИЗ Ўйламасдан, режа ва тадбир кўрмасдан иш тутувчи; пала-партиш, шу тарздаги. Тадбирсиз одам. ■ Тошкент халқи қипчоқларнинг жабру зулми ва тадбирсиз идораси остидан ётиб, жуда тўйди. А. Қодирӣ, Ўтган кунлар.

ТАДОРИК [а. تدارك — тўғрилаш, тузатиш, тўғри йўлга қўйиш; чора, илож] Тайёргарлик, ҳозирлик. Сафар тадориклари. ■ Чол тўй тадоригини ҳам кўриб қўйган эди. С. Аҳмад, Ойдин кечалар. Байрам тадоригими, тонгонотар файзими.. баъзан мижжа қоқтирмайди сени. С. Акбарӣ, Сени улуғлайман.

ТАДРИЖ [а. تدريج — даражама-даража, аста-секин илгарилаш, юқорилаш, юксалиш] **1** кт. Миқдорӣй ёки сифат ўзгаришларидаги даражама-даражалик, аста-секинлик; табиат ва жамият ҳодисаларининг ҳаракат ва ривожланиш шаклларидан бири; эволюция. ..шу усул ҳам шеърда ҳисни, манзарани ва таъсирни пояма-пояма тадриж билан кучайтиришга хизмат қилади.. М. Шайхзода, Фурқатнинг бадий маҳоратига доир.

2 ад. Мумтоз шеърӣятда, асосан ғазалларда муайян образ ёки тушунчани ўхшатишлар воситаси билан даражама-даража ривожлантириб боришдан иборат бадий усул.

ТАДРИЖАН [а. تدريجاً — тадрижӣй равишда] кт. кам қўлл. Изчиллик билан, аста-секинлик билан, эволюцион тарзда, тадрижӣй равишда; даража-бадаража. Тадрижан ривожланмоқ.

ТАДРИЖИЙ Секин-аста, даража-бадаража содир бўладиган; эволюцион. Табиатнинг тадрижӣй тақомили. Тадрижӣй ривожланиш. ■ Лирик сюжет поэзияда лирик қаҳрамон характерининг шаклланишини ва тадрижӣй ривожланишини ифодалайди. Н.

Каримов, Ҳамид Олимжоннинг поэтик маҳорати.

ТАДҚИҚ [а. تَدْقِيق — синчиклаб, батафсил текшириш, синаш; аниқлаш] *Чуқур, синчиклаб ўрганиш иши.. уларда давр туйғуси, замон дарди ва воқелик тадқиқи чуқурлашиб бораётир.* Газетадан.

Тадқиқ қилмоқ (ёки этмоқ) Илмий асосда, синчиклаб, чуқур текширмоқ, ўрганмоқ. *Тил ҳодисаларини тадқиқ қилмоқ.* ■ **Мақсад** — «Ал-Тоҳир» юлдузига иложи борича яқинлашиб, унинг ўзини ва теварак-атрофини тадқиқ қилишдан иборат эди. О. Мўминов, Хиёбондаги уч учрашув. ..хуллас, бу жойларни тадқиқ этиб, аниқ бир фикрга келиш керак, — дея Шералига қараб сўзини ақунлади. С. Кароматов, Олтин қум.

ТАДҚИҚИЙ Илмий текширишга оид; илмий текширишга асосланган. *Тадқиқий иш. Тадқиқий метод.*

ТАДҚИҚОТ [а. تَدْقِيقَات — «тадқиқ» с. кўпл.] 1 Тадқиқ иши, текшириш, ўрганиш иши. *Бухоро яқинидаги Қизбиби меъморий комплексида кенг планда тадқиқотлар олиб борилди.* «Фан ва турмуш».

2 Илмий текшириш ишининг натижаси. *Янги кашфиёт ва тадқиқотларни ишлаб чиқаришга жорий қилмоқ муҳимдир.*

ТАДҚИҚОТЧИ Тадқиқот ишлари билан шуғулланувчи шахс. *Мақсуд Шайхзода Алишер Навоий ичодининг йирик тадқиқотчиларидан бири бўлди.* Газетадан.

ТАДҚИҚОТЧИЛИК Тадқиқот билан машғул бўлиш, тадқиқот ишлари. *Геология соҳасидаги тадқиқотчилик. Тадқиқотчилик билан шуғулланмоқ.*

ТАЁВ кам қўлл. айн. **тиргак.** *Таёвларни тиранг қирғоққа, Абдукарим, сен кел бу ёққа.* Э. Раҳим.

ТАЁҚ 1 Дарахт шохининг уриш, ҳайлаш ва ш.к. учун ишлатиладиган бўлаги, ундан махсус ишланган қисми; калтак. *Узун таёқ. Қуруқ таёқ.* ■ *Кал ўликни дарвозага олиб чиқиб, белини боғлаб, қўлига таёқ бериб кетибди.* «Эртақлар».

2 Шундай ёғоч (таёқ)дан теккан зарб. *Кимларнинг орқасида таёқ излари, Ҳали ҳам тўлқинлар қон денгизлари.* Ғайратий.

3 Ҳасса вазифасидаги ёғоч; ҳасса. *Оёқ чарчаса, таёқ ярайди.* Мақол. ■ *Ота залварли таёғини қорга ниқтаб босиб, бардам қадам ташларди.* С. Анорбоев, Оксой.

Айтилмаган кўноқ — йўнилмаган таёқ. *Айтмаган жойга меҳмон бўлиб бориш орзизлик бўлади, деган маънодаги мақол.* **Бояги-бояги** — бойхўжанинг таёғи қ. **бояги.**

ТАЁҚЛАМОҚ кам қўлл. Таёқ билан урмоқ, калтакламоқ. *Тухми одам бўлса, банди қилгин деб, Ким бўлса таёқлаб, бориб ургин деб.* «Нурали».

ТАЁҚЛИ Таёғи бор, таёқ кўтарган. *Арқ дарвозасидан югурган бир неча таёқлилар.. дехқонни ёқасидан ушлаб.. судраб олиб бордилар..* С. Айний, Қуллар.

ТАЁҚЧА 1 Кичкина таёқ.

2 айн. **стержень.** *Темир таёқча.*

3 Баъзи касалликлар микроби. *Кох таёқчалари* (сил касалини тарқатувчилар). ■ *..касалликни жуда майда бўлган кўкйўтал таёқчалари пайдо қилиши маълум бўлди.* А. Ҳабибов, Кўкйўтал.

ТАЖАЛЛИ [а. تجلی — кўриниш, жилваланиш, жилоланиш] 1 эск. кт. Жилва, жило; жилолар. *Ҳуснинг тажаллисидин бетоб моҳрўлар, Андоққи зоҳир ўлмас хурийд, чиқса кавкаб.* Нодира.

2 дин. Аллоҳнинг зуҳурланиши, намоён бўлиши (зот тажаллиси, сифот тажаллиси, феъл тажаллиси каби уч турга бўлинад).

ТАЖАММУЛ [а. تَجَمُّل — юзаки, ёлғондакам ҳушмуомалалик; безатиш, пардозлаш; сабр-тоқат] эск. Керакал нарсалар, зийнат буюмлари. *Қизниқда ҳамма тажаммулни тайёрлаб, Комилбекнинг отасидан тортиб никоҳ қиладиган қозию қуззотларгача куёвни кутиб ўлтирар эканлар.* А. Қодирий, Ўтган кунлар.

ТАЖАНГ 1 Кайфи бузуқ, жаҳли (асаби) кўзиган ҳолатли. *Юзлари лўппигина, серғайрат, тажанг хотинга қараб туриб, Нуратбек онасини эслади.* С. Нуров, Нарвон. *..ҳар сафар қайтишда хубо бўлар, сўкинар ва Аҳмаджонни ҳам тажанг гумон қилиб, унга масалли берар эди.* А. Қаҳҳор, Олтин юлдуз

Тажанг бўлмоқ Асаби кўзгаб жаҳлланмоқ, ўта кайфи бузилмоқ, тажанглиги тутмоқ. *Раис Рихсивой акадан аҳволни билгач, яна тажанг бўлди.* Р. Файзий, Чўлга баҳор келди. *Бугун Ботиралининг уйдаги жонланишдан тажанг бўлиб ўтирган махдум биллаб берди.* Ҳ. Фулом, Машғал.

2 Бекорга жаҳли чиқаверадиган, жигибийрон бўлаверадиган; жаҳери, аччиги тез. *Тажанг одам.* ■ *Ака-ука уста қўлида уч йил*

ишлашди — тезроқ ва тажанг Абутолиб уч йил деганда уста Нажмиддин Бухорийнинг розилигини олмай, ўз ҳовлисида хумдон қуриб, кошини идиши ясаб бошлади. Мирмуҳсин, Меъмор. Зоҳир шайх.. оғаси каби арзимаган нарсага ловуллаб кетадиган тажанг, жаҳлдор эмас.. С. Сиёев, Аваз.

3 Шундай белги-хусусиятга эга бўлган шахс исмига қўшиб айтиладиган (ишлатиладиган) сўз, лақаб. Нурилла Нарвоний «бир ичак узди» қилиш учун эшигига «Ҳасратхон» деб ёзилган нимқоронғи хонага Эшнўлат тажангни олиб кирибди. «Муштум».

ТАЖАНГЛАНМОҚ кам қўлл. Тажанг бўлмоқ. Солиҳбойнинг қайнаб турган газиби.. тажангланиб бақиршишида эмас, балки гапларининг қатъийлигида ифодаланади. Ф. Жўраев, Обид Жалилов.

ТАЖАНГЛАШМОҚ Тобора тажанг бўлмоқ, тажанглиги ошмоқ. Чол баттар тажанглашиб, энди оғзини сўзга жуфтлаган эди, вақтчоғ Унсин кўчадан қушдай учиб кирди. Ойбек, Улуғ йўл.

ТАЖАНГЛИК 1 Тажанг ҳолат. -Татар қайтдимми? — деб сўрайди мулла Обид. -Қайтди, тажанглиги ошиб, яна далага кетди! — деб кулади Мардонбой. А. Қодирий, Обид кетмон. У тажанглик билан қўлларини яна ўйнатди. П. Турсун, Ўқитувчи. Овозида тажанглик, асабийлик бор эди. М. Исмоилий, Фарғона т. о.

2 Тажанг шахсга хос хусусият, хислат. Ўқитувчи тажанглик, қўполлик, шоиқалоқлик, бесабрлик каби номатлуб сифатлардан бутунлай мусаффо бўлиши шарт. Р. Усмонов, Одобнома. Куюқ қошлари остида икки кўзи ёниб туради, жиндак тажанглиги ҳам бор — бир сўз етарли, икки сўз ортиқча. Мирмуҳсин, Умид.

ТАЖАССУМ [а. تجسم — шаклланиш, гавдаланиш; катгалашиш] эск. кт. Гавдаланиш, ифода белгиси, ҳолат. Воқеалар образлардагина конкрет тажассумига, типик чизгиларга эга бўлади. «Ёшлик». Фикрни теранлаштириш эвазига ғоя янада бойийди ва поэтик тажассумига эришади. «ЎТА».

Тажассум топмоқ Гавдаланмоқ, ифода белгисига эга бўлмоқ. Шу маънода пейзаж лирикада инсоний ҳис-туйғу ва кечинмаларнинг ёрқин тажассум топиши учун фон вазифасини ўтайди. «ЎТА».

ТАЖАССУМЛАНМОҚ эск. кт. Гавдаланмоқ, мужассам ҳолда намоён бўлмоқ. Инсон табиатининг порлоқ, хира, рангсиз, қора ва ҳоказо жонсиз жилвалари кўз олдига тажассумланади. Ойбек, Навоий.

ТАЖВИД [а. تجويد — қироат, оҳанг билан ўқиш] дин. Қуръон оятларини ўқишда нутқ товушлари талаффузининг тўғрилигига эътибор бериш, Қуръонни қироат, алоҳида оҳанг билан ўқиш; Қуръон ўқиш илми.

ТАЖНИС [а. تجنیس — ўхшаш, бир хил шаклга келтириш; тўла уйғунлик] 1 Тил бирликларининг шаклдошлигига асосланадиган сўз ўйини.

2 ад. Оғзаки ва ёзма адабиётда: шаклдош (омоним) сўзларни қўллаш, сўзларни шаклдош қилишдан иборат бадий санъат тури (туюқ жанрида кенг қўлланади). Мас.: Қўлингдан келганча чиқар яхши *от*, Яхшилик қил, болам, ёмонликни *от*, Насиҳатим ёд қилиб ол, фарзандим, Ёлғиз юрса, чанг чиқармас яхши *от*. «Равшан».

ТАЖОВУЗ [а. تجاوز — ўтиш, чегарадан ўтиш, босиб ўтиш; ҳаддан ошиш; қонунбузарлик] сиёс. Бир ёки бир неча давлатнинг бошқа мамлакатларни бўйсундириш, уларнинг ерларини босиб олиш мақсадида курол кучи билан бостириб кириши. Империализмнинг ҳар қандай хуружлари, исёнлари, суиқасдлари, тажовузлари бу руҳни ўлдиролмайди. П. Қодиров, Уч илди.

2 кўчма Умуман, зўрлик, зўравонлик хатти-ҳаракати, ҳамласи. Назира ёмон ниятда қилинаётган тажовузни сезиб қолгандай, қўллари ғайритабиий кучга кириб, Йигиталини итариб юборди. Д. Нурий, Осмон устун. Ҳамма чиройли қизлар каби, у ҳам йигитларнинг «тажовузи»га кўп учради. П. Қодиров, Уч илди.

Тажовуз қилмоқ Шундай иш, хатти-ҳаракат қилмоқ, зўравонлик, тажовузкорликни амалга оширмоқ. ..халқнинг эркига тажовуз қилишга қарши мардонавор кураш олиб борди. «Саодат». Қаёқдандир ковлаштириб, «Бир вақтлар Сайфиддинов фалончи қизнинг номусига тажовуз қилган», деган гапни топди. Мирмуҳсин, Жиблажибон.

ТАЖОВУЗКОР [а. + ф. تجاوزكار — тажовуз қилувчи] Тажовуз, босқинчилик сиёсатини қўлловчи (қ. тажовуз 1). Тажовузкор давлатлар.

ТАЖОВУЗКОРЛАРЧА Тажовузкорлар каби, тажовузкорлик билан. *Тажовузкорларча ҳаракат.*

ТАЖОВУЗКОРЛИК Бошқаларнинг ерларини босиб олиш мақсадларига қаратилган зўравонлик ҳаракати. *Тажовузкорлик сиёсати.*

ТАЖОВУЗКОРОНА айн. тажовузкорларча.

ТАЖОҲУЛ [а. تجاهل – билиб ёки билмасдан инкор этиш, ўзини билмасликка олиш]: **тажоҳули орифона** ад. Мумтоз шеърятда ўхшатиш усулларидан бири: шоир бирор манба (ёр, маҳбуб ва ш.к.) га нисбатан бир ёки бир неча тўғри, ҳаққоний ўшатиш қўлаб, гўё хатога йўл қўйгандай, ўшатишларнинг тўғри-нотўғрилиги ҳақида бошқалардан сўрайди.

ТАЖРИБА [а. تجربه – синов, эксперимент; малака, маҳорат; бирор хислатни, иш-ҳаракатни синаб кўриш] **I** Муайян мақсадда амалга оширилдиган, билиш, аниқлаш, синаш ва ш.к. га қаратилган иш, фаолият. *Тажриба ўтказмоқ. Тажриба натижалари. Тажрибада синаб кўрмоқ.* ■ *Тажриба учун ажратилган уч гектар ер тизма тоғлардай бир-бирига уланиб кетган адир этагида эди. Ж. Абдуллахонов, Орият. Кларк Маҳдининг юрак уришини текшириб кўрди-ю, тажрибани бас қилди. С. Сиёев, Ёруғлик.*

2 Амалий ишда, ҳаётда ўзлаштирилган, орттирилган билимлар, малакалар, уқувлар мажмуи. *Ҳаётий тажриба. Педагогик тажриба. Илғорларнинг тажрибасини ўрганмоқ. Тажрибаларни ўртоқлашмоқ.* ■ *Бизнинг вазифамиз илмни халқ тажрибаси билан бойитиш ва шу билан бирга халқ тажрибасини илмнинг элаидан ўтказишдир. А. Қаҳҳор, Кўшчинор чироқлари. Биз илғор машалларимизнинг тажрибасини оммалаштиришимиз керак. Ф. Мусажонов, Ҳиммат. Шайбонийхон чоршанба куни ҳаёт-мамоти ҳал бўлишини сезиб, бор истеъдодини, бутун тажрибасини ишга сола бошлади. П. Қодиров, Юлдузли тунлар.*

3 флс. Объектив дунёни, воқеликни амалий жиҳатдан ҳиссий-эмпирик билиш жараёни; объектив дунё ва ижтимоий амалиёт қонунларининг киши онгидаги инъикоси. *Ҳиссий тажриба. Санъаткорнинг эстетик тажрибаси.*

4 Бир масала, йўналишда дастлабки тарздаги иш, ҳаракат ва унинг маҳсули. *Ёш ижодкорнинг биринчи тажрибаси.* ■ *Ўз ғазалларига ўзи тахмис боғлаш тажрибасини ҳам адабиётимиз тарихида Навоий бошлаб берди. «ЎТА».*

ТАЖРИБАВИЙ Тажрибага оид, тажрибага асосланган. *Тажрибавий ва назарий физика.*

ТАЖРИБАДОР [а. + ф. تجربه دار – тажрибага эга] кам қўлл. айн. **тажрибали.** *Тажрибадор йилқичилар.*

ТАЖРИБАКОР [а. + ф. تجربه کار – тажриба қилувчи, тажриба ўтказувчи] **1** айн. **тажрибали.** *Тажрибакор одамлар.* ■ [Қодир:] *Бригадирликка энг яхши, илғор, тажрибакор, ишининг кўзини биладиган, жонкуяр одамларни сайламоқчимиз. Уйғун, Навбаҳор.*

2 Тажриба ўтказувчи, тажриба билан шуғулланувчи. *Лебедев – жаҳон фани тарихида ёруғлик босимини биринчи бўлиб аниқлаган машҳур тажрибакор олим. «Фан ва турмуш».*

ТАЖРИБАКОРЛИК Катта, кўп тажрибага эгалик, тажриба асосида иш кўришлик, тажрибага оид иш-фаолият. -*Соқол тажрибакорликдан оқаради, – деди у намоздан қайтиб келган чолга. Ф. Расул, Адолат.*

ТАЖРИБАЛИ Катта тажрибага эга, кўп тажриба, малака орттирган. *Тажрибали ўқитувчи. Тажрибали раҳбар.* ■ *Нигора Акрани тажрибали, билимдон врач деб ҳурмат қиларди. С. Анорбоев, Оқсой. Дарҳақиқат, пахтани тушуна оладиган, ерни биладиган тажрибали раиссан. Ш. Рашидов, Бўрондан кучли.*

ТАЖРИБАСИЗ Иш тажрибасига, малакага эга бўлмаган; гўр, хом. *Тажрибасиз агроном.* ■ *Мен ҳаммани бир-бир синаб кўргангандан кейин, Ҳасанни ҳаммадан тажрибасизроқ, соддароқ топиб, шунини овлашга киришдим. С. Айний, Қуллар.*

ТАЖРИБАСИЗЛИК Тажрибага эга эмаслик, тажриба кўрмаганлик. *Сиёсий тажрибасизлик. Тажрибасизлик оқибатидаги камчилик.* ■ *Мана, кечаги воқеани олинг. Самолётлар ҳужуми вақтида командирлар тажрибасизлик қилишди, жангчилар шошиб қолишди. И. Раҳим, Чин муҳаббат.*

ТАЖРИБАЧИ айн. **тажрибакор 2.** *Тажрибачи талаба.*

ТАЗАРРУ [а. تضرع – ўзини паст тутиш, итоаткорлик; ялиниш, ёлвориш] Узр билан ёлвориш, ялиниш. *Тавба-тазарру қил, тақсирим гуноҳингдан ўтсинлар.* «Муштум».

ТАЗЙИҚ [а. تضييق – торайтириш; чеклаш; эзиш, жабр қилиш; эзилиш] **1** Куч билан, зўрлаб ўтказиладиган таъсир, сиқув. *Жамоатчиликнинг тазйиқи. Тайзиқ кўрсатмоқ. Ўз фикрини тазйиқ билан ўтказмоқ.*

■ *Инглиз хўжайинларининг тазйиқи билан Хайдархўжа яна жиддийроқ ишга киришди.* А. Ҳакимов, Илон изидан. *Бир нафасгина қотган халқ тўлқини яна кучлироқ тазйиқ ва матонат билан олға сапчиди.* Ойбек, Танланган асарлар.

2 эск. физ. Босим. *Суyoқликнинг тазйиқи.*

■ *Ғоят кучли босимга эга бўлган нефтнинг ер остидан қилиб турган тазйиқини қайтариб турган нарса шу жинс (гил) эди.* «Фан ва турмуш».

ТАЗКИРА [а. تذكرة – билдириш, хабардор қилиш; ҳаётнома; хотира, эслаш; хотиранома] **1** ад. Ёзувчи ва шоирлар тўғрисида қисқача маълумот берилиб, асарларидан намуналар келтирилган, умуман, тарих, тасаввуф, санъат соҳасидаги воқеа ва шахслар ҳақида эсдалик руҳида ёзилган китоб, антология. *Навоий тазкираси – «Мажолис».. янги типдаги тазкира – антология эди.* «ЎТА».

2 айн. мемуар.

ТАЗКИРАЧИ Тазкира ёзувчи шахс. *Бу факт Навоий туркий халқлар адабиётида.. ўз замонаси адабиётининг қимматини оширган илк тазкирачи бўлиш эътибори билан ҳам ижобий таъсир ўтказганлигини кўрсатади.* «ЎТА».

ТАЗКИРАЧИЛИК Тазкира ёзиш, фаолиятнинг шу соҳаси. *..ўрта аср давридаги ўзбек адабиёти учун ҳам ҳамсачилик, тазкирачилик каби ранг-баранг бадиий асар хиллари.. характерлидир.* М. Ҳусайнов, Навоий мақолотлари.

ТАЗМИН [а. تضمين – қамраб олиш, ичига олиш; ўз фикрини тўғридан-тўғри эмас, ишора, рамзлар билан ифодалаш] ад. Шоир ўз фикри, ҳис-туйғусини тасдиқлаш, исботлаш ёки давом эттириш учун ўзга шоир ижодидан шоҳбайт – афоризм даражасига кўтарилган машҳур мисрани ўз шеърда келтиришидан иборат шеърини санъат тури. *Ғарибий хатни Муқимийга узатди. ..Бу шеър*

Муқимийнинг Йигчи эшон ҳақидаги ҳажвиге тазмин эди. С. Абдулла, Қувғунда.

ТАЗОД [а. تضاد – қарши ҳаракат, қарама-қаршилик] ад. Мумтоз шарқ шеъриятида ўзаро зид тушунчаларни ифодаловчи сўз ёки ибораларни қўллашдан иборат, кенг тарқалган бадиий тасвир воситаси. *Тазод дастлаб фольклор ва қадимги бадиий адабиётда ишлатилган.* «ЎЗМЭ».

ТАЙ [а. طی – буриш, букиш; масофани босиб ўтиш; юриш, кезиш]: **тай қилмоқ** (ёки **урмоқ**) эск. Кезиб, юриб, айланиб чиқмоқ. *Бир талай манзил-мароҳил тай қилиб, кўп юриб, кўп юрсам ҳам мўл юриб, Аччабод деган шаҳри азимга борганимда, бир тўда катта-кичик, қора-қура ўспиринлар атрофимни ўраб олишди.* Ф. Ғулом, Шум бола. *Ҳар шаҳарман шу шаҳарга борасан, Жаҳонни тай юриб, излаб кўрасан.* «Муродхон».

ТАЙГА [р. тайга < т.-олтой тайга – қояли тоғ] Осиё, Европа ва Американинг шимолидаги қалин ўрмон зонаси. *Тайга ўрмонлари. Тайга иқлими.* ■ *Тайгалар қуриови ичида бутун, Ажратиб бўлмасди кундузми ё тун.* М. Шайхзода.

ТАЙЁР [а. طيار – учадиган, учувчан; жўнатувчи] **1** Бирор ишга шайланиб, ҳозирланиб турган, шай, ҳозир. *Улар [солдатлар] милтиқларини осмонга ўқталиб, ҳар дам отишга тайёр турардилар.* М. Исмоилий, Фаргона т. о.

2 Бирор нарса, иш учун мойил, рози ҳолатли. *Мени қўя беринг, осадими, чопадими – ҳаммасига тайёрман.* К. Яшин, Ҳамза. *Йўлчи шу чоқда қанча ақчаси бўлса ҳам беришга тайёр эди..* Ойбек, Танланган асарлар. *Анварга мазкур олий табақаларнинг ҳар қайсиси ҳам ўз қизини бериб, кувё қилишга тайёр!* А. Қодирий, Меҳробдан чаён. *Салтанат учун қурбон бўлишга ҳам тайёр..* Мирмуҳсин, Меъмор.

3 Ишлатиш, истеъмол ва ш.к. учун ҳозирлаб қўйилган. *Тайёр кийимлар. Тайёр маҳсулотлар.* ■ *Сутчой тайёр бўлди, сузиб кирайми?* А. Қодирий, Ўтган кунлар. *Фаввос тайёр аравалардан бирини олиб келди.* Мирмуҳсин, Меъмор.

4 с.т. юкл. Кучайтириш, таъкид билдирадиган (асосан, болани ота ёки онага қиёслашда қўлланади). *Кичик ўғли тайёр отасининг ўзи бўлибди.*

Тайёр қилмоқ Тайёр ҳолга келтирмоқ. *..ғўшт, мой солиш учун тоғораларни тозалаб тайёр қилишни буюрди. Ойбек, Танланган асарлар. Уй эгаси ажойиб танти хотин, айтганингни тайёр қилади. Шухрат, Шинелли йиллар. Тайёр ошга баковул қ. баковул.*

ТАЙЁРГАРЛИК 1 Тайёр ҳолга келиш, келтириш ишлари; тайёрлаш, тайёрланиш ҳаракати; ҳозирлик. *Имтиҳонга тайёргарлик. Сафарга тайёргарлик. Баҳорги экишга тайёргарлик. ■ Азиз меҳмонни кутаётгандек уйда тайёргарлик зўр эди. С. Юнусов, Кутилмаган хазина.*

2 Тайёрлик, ҳозирлик ҳолати. *Сиёсий тайёргарлик. ■ ..жанговар тайёргарликни такомиллаштириб.. жангларга ҳозир бўлиб туриш керак. И. Раҳим, Чин муҳаббат. Коллеж жамоаси янги ўқув йилига катта тайёргарлик билан келди. Газетадан.*

Тайёргарлик кўрмоқ Тайёрлаш (тайёрланиш) ишларини қилмоқ, амалга оширмоқ. *Чодирларда дам олиш ва катта зиёфатлар бериш учун ҳамма тайёргарликлар кўриб қўйилганини мулла Фазлиддин билар эди. П. Қодиров, Юлдузли тунлар. Бадиа эгар қошидан ушлаб, отига енгилгина минди-да, улоққа тайёргарлик кўриб чопиб юрган чавандозлар тўпи сари учиб кетди. Мирмуҳсин, Меъмор.*

ТАЙЁРГАРЧИЛИК с.т. қ. **тайёргарлик.**

ТАЙЁРЛАМОҚ 1 Тайёр, муҳайё ҳолга келтирмоқ; тахт қилмоқ; ҳозирламоқ. *Қишга ўтин тайёрламоқ. ■ Гулнор ҳамма нарсани зумда тайёрлаб, дадасига кўрсатди. Ойбек, Танланган асарлар. Заврак нонушта тайёрлаб, у одам кутиб ўтирганини Меъморга хабар қилди. Мирмуҳсин, Меъмор. ..отин бувиларга, эшон оймларга таҳорат суви тайёрлаш каби юмушлар Гулнорни Йўлчи олдига аста-секин яқинлашувга мажбур қилди. Ойбек, Танланган асарлар.*

2 Ишлаб юзага келтирмоқ, ҳосил қилмоқ, етиштирмоқ (қурмоқ, пиширмоқ, тикмоқ, ясамоқ ва ш.к.). *Унсин.. Йўлчи учун ўзи тайёрлаган яхши «тагдўзи» дўппини кийдирди. Ойбек, Танланган асарлар. Ҳозирги пайтда шифобахш ўсимликлардан дори тайёрлашга алоҳида аҳамият берилмоқда. Газетадан. У шу куниеқ эни бир метр, бўйи ярим метрли супа тайёрлади. Газетадан. Чиннининг анъанавий вазифаси идиш-товоқлар, меъмор-*

чилик деталлари ва бошқа буюмлар тайёрлашда қўлланишидан иборатдир. Газетадан.

3 Ўқитиб, ўргатиб ва б. йўллар билан бирор иш-вазифа учун тайёр қилмоқ; етиштирмоқ. *Кадрлар тайёрламоқ. Имтиҳонга тайёрламоқ. ■ Тишченко уни [Малоҳатни] бирмунча вақт шофёрлар курсига тайёрлабди, оқибат киргизиб ҳам қўйибди. А. Қаҳҳор, Жонфигон. Ўттиз бир йигит-қиз Олмазордаги механизаторлар тайёрлайдиган билим юртига бориб ўқиймиз [деди Аъзам]. Э. Раимов, Ажаб қишлоқ.*

ТАЙЁРЛИК 1 Тайёр эканлик, тайёр ҳолатдалик. *Мирзакаримбой жиянининг ишга тайёрлигидан рози каби кулди-да, индамасдан, ичкари кириб кетди. Ойбек, Танланган асарлар.*

2 айн. **тайёргарлик.** *Шундай қадрли меҳмон келишини олдинроқ билмагани сабабли тайёрлик кўролмаганидан нақадар хижолатда эканини айтиб битиролмас эди. А. Қаҳҳор, Қанотсиз читтақ.*

ТАЙИН [а. تعيين — белгилаш, тайинлан] **1** Аниқ, белгили, тайинли. *Тайин вақт. Тайин иш. ■ Ахир, хатида тайин ёзибди-ку.. Р. Раҳмон, Меҳр кўзда. Умид уларга тайин бир гап айта олмади. Мирмуҳсин, Умид. Аммо бир нарса тайин эди: у шу қизсиз яшай олмади! Ў. Ҳошимов, Қалбнига қулоқ сол.*

2 Аниқ, бор ҳолатли, муқимликка эга. *Йигитнинг қўлида гулдай ҳунари бор экан.. уй-жойи тайин экан. Яна сенга нима керак? Ойбек, Танланган асарлар. ..унга нима етишмайди.. касб-кори тайин, бировга муҳтожлиги йўқ. «Ёшлик».*

Тайин қилмоқ (ёки этмоқ) 1) нима, қачон ва ш.к. жиҳатдан белгиламоқ, аниқламоқ, тайинламоқ. *Темир акамнинг бизларга тайин қилган иши шуки.. Н. Сафаров, Уйғониш. Унинг ёшини тайин қилиш қийин.. Ойбек, Танланган асарлар. Тайин қилдим тўйнинг бўлар кунини. Ҳ. Олимжон; 2) иш-вазифа, лавозим кабиларга қўймоқ, тайинламоқ. *Раисликка тайин қилмоқ. ■ ..мустаҳкам истеҳком ўрнатишимиз, қоровулар тайин этишимиз мақсадга мувофиқдир. Ж. Абдуллахонов, Тўфон. Тайини йўқ 1) аниқ, белгили эмас; ноаниқ, нотайин. Тўйнинг қачон бўлишининг ҳали тайини йўқ. ■ Наслу насаби номаълум, ота-онасининг ҳам тайини йўқ Қора илонни бирон кимса ҳам эсламади. Мирмуҳсин, Меъмор. Борадиган шахрининг**

тайини йўқ. «Муродхон»; 2) ҳолати, натижаси муқим (аниқ) белгилли эмас. *Ишингизга тушунолмайд турибман, Йигитали ака, топишингизнинг ҳам тайини йўқ.* С. Кароматов, Бир томчи қон. *Тайини йўқ иш! Мен гўзани нобуд қилгани қўймайман!* А. Қаҳҳор, Қўшчинор чироқлари; 3) иши, ваъдасида собитлиги йўқ, бурди йўқ; бетайин. *Йўқ, тайини йўқроқ бола экан, бир куни қарасам, бошқа бир қиз билан ивирсиб юрибди.* У. Назаров, Гурур.

ТАЙИНЛАМОҚ 1 айн. тайин қилмоқ (этмоқ) 1 қ. тайин. *Мажлис вақтини тайинламоқ. Пенсия тайинламоқ.*

2 Таъкидлаб, уқтириб айтмоқ; топшириқ бермоқ. *..ўғлига ёмон гапларни тилга олмасликни такрор-такрор тайинларди.* Мирмуҳсин, Меъмор. *Волидангиз тайинлаб юбордилар, дарҳол Андижон қўрғонига бориб, бекларни тўпламоқ керак!* П. Қодиров, Юлдузли тунлар. [Мавлонов:] *-Бу кишининг аҳволдан хабар олиб туринг, — деб қаттиқ тайинлаб кетган эди.* П. Турсун, Ҳўқитувчи.

3 Мансабга, вазифа ёки ишга қўймоқ, белгиламоқ. *Ишга тайинламоқ. Директор қилиб тайинламоқ.* ■ [Мусулмонқул:] *Бу мадрасаларга, хизмати билан танилган уламодан мударрислар тайинлар эди.* А. Қодирӣ, Ўтган кунлар. *У, бойнинг уйида кечган воқеалардан хабардор бўлиб туриш учун, Шокир отанинг кампирини тайинлаган.* Ойбек, Танланган асарлар. *Бизга канал бўйича ўтов қилиб, ошпаз тайинлаб беришди.* Ш. Фуломов, Шонли авлод.

ТАЙИНЛИ 1 Муайян, маълум, аниқ, тайин. *Тайинли иш. Тайинли кун.* ■ *Мажлис тайинли бир фикрга келмасдан тарқалди.* А. Қаҳҳор, Қўшчинор чироқлари. *Тайинли жавоб ололмаган бойвачча қўрғон эшигига бориб, кучи борича итарди.* С. Юнусов, Кутилмаган хазина.

2 Арзирли ва мақбул. *Тайинли иш.* ■ *Нусратулла рўзғорда қўлини совуқ сувга урмайди, ота мулкига тайинли бир наф қўшган эмас.* А. Мухтор, Опа-сингиллар. *Орага тушган совуқ вазиятни йўқотиш учун тайинлироқ сўз қидирар, аммо тилим калимага келмасди.* Ҳ. Хошимов, Хаёлларга бўламан тутқун.

3 Ишонса бўладиган, синашта, бурдли. *Тайинли одам.*

ТАЙИНСИЗ 1 Номаълум, ноаниқ, нотайин. *Иш жойи тайинсиз. Мажлиснинг куни тайинсиз.*

2 Ишониб бўлмайдиган, бурдсиз, бетайин. *Бу гап уни тайинсизроқ одамга ўхшатиб кўрсатарди.* Мирмуҳсин, Умид.

ТАЙЛАМОҚ шв. Ташламоқ. *Ойчинорнинг оёғини мўлжаллаб, Арқонини усталикман [усталик билан] тайлади.* «Ойсулув».

ТАЙМ [ингл. time — вақт] *спрт.* Спорт ўйинида, мас., футболда: ўйин учун ажратилган вақтнинг 45 минутлик икки қисмидан ҳар бири (баскетболда — 20 минут). *Биринчи тайм. Иккинчи тайм.*

ТАЙМ-АУТ [ингл. time out — муайян вақтдан ташқари(да)] Спорт ўйинлари қоидаларига кўра, жамоа, унинг устози ёки айрим ўйинчининг илтимоси билан рухсат этиладиган қисқа муддатли танаффус.

ТАЙМЕР [ингл. timer < time — вақтни белгиламоқ, тайинламоқ] *тех.* Маълум вақт оралиғи ўтгандан кейин бирор мослама, қурилмани автоматик равишда улайдиган (узадиган, ўчирадиган) ёки шундай вақт келганидан хабар берадиган асбоб.

ТАЙПАНГЛАМОҚ шв. Лўкилламоқ, лапангламоқ. *Қоғоз халта билан бирга белкуракни кўтарганича, тайпанглаб, пастилка қараб юриб қолди Манноп. Ж. Абдуллахонов, Тўфон. Каримов Норбуви ёнига тайпанглаб келди.* Ҳ. Шамс, Душман.

ТАЙПОҚ шв. Ялпоқ, бир оз яссироқ. *Тайпоқ бош.* ■ *Тайпоқ тобоқда исиріқ тутатди.* Т. Мурод, От кишнаган оқшом. *..бир зумда новдаларни бир-бирининг устидан ва остидан ўтказиб, тайпоқ саватча ясади.* Ш. Холмирзаев, Қил кўприк.

ТАЙСАЛЛАМОҚ 1 Қўрқинқирамоқ, ҳадиксирамоқ, шу ҳолда ўзини орқага олмақ. *-Сиз томонда анови.. кўчқорлар кўринмадими? — тайсалаб сўради Сувонжон.* С. Анорбоев, Оқсой. *Жонивор [от] бир-икки қамчидан кейин ҳам олдинга жилиш ўрнига орқасига тисарилиб, тайсалларди.* С. Аҳмад, Чўл бургути.

2 Орқага судрамоқ, кечиктирмақ, галга солмоқ. *..баъзи бировларимиз уч-тўрт йил нима бўларкин, деб якка рўзғор бўлиб тайсалаб юрди.* Ҳ. Шамшаров, Инсон қалби куёшдан ёруғ. *Даҳо турли-туман вазлар айтиб, тайсаллади.* Т. Мурод, Қўшиқ. *Наҳотки, ўзи бажариши керак бўлган ишга*

енг ишмариб киришиш ўрнига тайсалласа?!
С. Кароматов, Сўнгги бархан.

ТАЙСАЛМОҚ айн. тайсалламоқ **1.** Хизматчилар, ранглари қув ўчиб, чет-четга тайсалдилар. Ойбек, Нур қилириб.

ТАЙФИНЛАМОҚ с. т. Такфинламоқ, кафанламоқ.

ТАЙФУН [ингл. typhoon < хит. taifung (тайфун) – кучли шамол ёки а. طوفان – тошқин; сувнинг кўтарилиши] *геогр.* Жануби-Шарқий Осиё ва Узоқ Шарқда бўлиб турадиган шиддатли, ниҳоятда кучли шамолли тропик циклонларнинг маҳаллий номи; тўфон. Тайфун кемалар учун хавфли бўлиб, кўпинча ороларда ва материк соҳилида катта вайронгарчилик келтиради. «География».

ТАЙХАР шв. Эшак, эшакнинг боласи. *Ким экан у, онаси тайхар?* Н. Норқобилов, Бекатдаги оқ уйча. *Кулга ағанаган тайхардай ранги тоза айниб кетибди.* Н. Норқобилов, Бекатдаги оқ уйча.

ТАК 1 тақл. с. Чилдирма, ноғора каби нарсаларни чертганда, чўп билан урганда чиқадиган товушни билдиради. *Фақат фикр-жакчигина камон тортар, чилдирмачи ҳар замонда бир «так» этиб чертиб қўяр.* С. Аҳмад, Чўл бургути.

2 Ноғоранинг жаранглироқ овоз берадиган тоқаси; қ. **тум.**

3 унд. с. Отни тўхтатиш, тинчлантириш учун ишлатиладиган ундалма. «*Так*», *деди-ю*, «*чувҳа*» *деди*, *жунади*. *Қоражон ҳам ўз йўлидан қолмади.* «Алпомиш». *Так, так!* *Пашша талаяптими, ҳозир ҳаммасини жаҳаннамга юборамиз.* Ойбек, Танланган асарлар.

ТАКА I 1 Эчкининг эркаги; соғлом насл олиш учун танлаб олинadиган зотли эркак эчки. *Тоғ такаси тек турса, оч қолади.* Мақол. ■ *Кенжа аста қўйлар орасидан бориб, қора таканинг оёғидан маҳкам ушлади.* Н. Фозилов, Дийдор.

Така бўлсин, сути бўлсин Нима бўлса ҳам, фойдаси, нафи бўлсин. *Мунтазирман ҳар қандай буйруғига ер ўпиб, «Така бўлса, сути бўлсин», ийдириб юмшатаман.* «Муштум». **Така соқол(ли)** Соқоли таканинг соқолига ўшаш. [Бўри полвон] *Кенг ҳам дўнг пешонасини.. чўзиқ жағи, така соқолини силади.* Т. Мурод, Юлдузлар мангу ёнади. *–Яхши ухладингми? – деб сўради така соқолли нонуштадан сўнг.* Х. Тўхтабоев, Ширин қовнлар мамлақати.

2 Туркман қабилаларидан бирининг номи. *Така туркман.* ■ ..*кўчада юрган кимса борки, ўққа учди, така ёвмит қиличига йўлиқди.* С. Сиёев, Аваз.

ТАКА I Бангладеш Халқ Республикасининг пул бирлиги.

ТАКАББУР [а. تكبر – ўзини улуғ тутиш; мағрурлик, манманлик] Ўзини катта олувчи, кеккайган, гердайган; мутакаббир, димоғдор. *Такаббур одам.* ■ *Жуда такаббурсан-да, Зумрад. Отдан тушсанг ҳам, эгардан тушмайсан.* С. Сиёев, Отлиқ аёл. *Отасининг давлати, катта оғиз, ҳовлиқма ва такаббур онасининг эркалаши кўшилиб, қиза ортиқча ғурур берган.* Ойбек, Танланган асарлар.

ТАКАББУРЛАНМОҚ кам қўлл. Ўзини кибрли тутмоқ; кибрланмоқ. *Такаббурланиш ақлли одамнинг иши эмас.*

ТАКАББУРЛИК I Мағрурлик, манманлик, такаббуруна ҳолат. *Такаббурлик билан гапирмоқ.* ■ *Тешабўйнинг такаббурлигини кўриб, Ҳасан сўфи ҳам индамай қўя қолди.* М. Исмоилий, Фарғона т. о.

2 Такаббур оламларга хос хислат, хатти-ҳаракат, қилиқ. *Ўқитувчига кибру ҳаво ва такаббурлик асло ярашмайди, чунки ёш авлод удан ибрат олади.* Р. Усмонов, Одобнома.

ТАКАББУРОНА Такаббурлик билан, кибрланиб. *Уни такаббуруна қараш билан кузатиб турган Абдималик: –Тинчликми, оғайни? – дея ҳол сўрай бошлади.* Ш. Ғуломов, Бўз ер уйғонди.

ТАКАЛЛУМ [а. تَكَلُّم – сўзлаш, сўзлашиш, суҳбат] *кт.* Суҳбат, гаплашиш; сўзлаш. *Ҳамза энди мўйлаби сабз урган.. хаёлчан, такаллуми ифодали, мантиқли.. ўз сўзли йигит бўлиб етилган эди.* К. Яшин, Ҳамза. *Тўлғонойнинг такаллумини бир эшитиб, Амажон оғасига ҳорма айтиб келади..* С. Сиёев, Аваз.

Такаллум қилмоқ Сўзламоқ, гапирмоқ; суҳбатлашмоқ. *Уерда дўстликни улуглаб инсон, Такаллум қилади қумри мисоли.* А. Орипов, Юртим шамоли.

ТАКАЛЛУФ [а. تَكْلُف – сунъийлик, сохталиқ; серҳашамлик, жимжимадорлик; ийманиш, тортиниш] Ҳурмат-эҳтиром ва эъзоз-икром билан қилинган муомала, мулозамат. *Такаллуф билан қарши олмақ.* ■ *Мен сизнинг кўрпачангизда кўп ўлтирганман, энди менга ортиқча такаллуфингизнинг ҳожати*

йўқ. А. Қодирий, Ўтган кунлар. *Қиз ортиқ такаллуф кутиб туролмади, тўғри эшикни очиб, ичкарига кирди, ўзини Пулатжонга қараб отди. Ойдин, Асл ёр.*

Такаллуф қилмоқ (ёки **кўрсатмоқ**) Хурмат-эҳтиром билан муомалада бўлмоқ. Нусратбек.. *янги ҳамроҳига ибрат бўлар деган мақсадда жувонга такаллуф қилди: -Чой дамлаб келайми, чанқагандирсиз? С. Нуров, Нарвон. Хола меҳмонларга такаллуф кўрсатиб, орасида Миробидни ҳам чақиб оларди. В. Ғофуров, Вафодор.*

ТАКАЛЛУФЛИ Такаллуфни ўрнига қўювчи, сертакаллуф; такаллуф ифодаловчи. *Такаллуфли мезбон. ■ Нигора кўрққанидан такаллуфли жилмайди: -Қоплон, Қоплон, ахир биз сен билан танишимиз-ку! С. Анорбоев, Оқсой.*

ТАКАЛЛУФОТ эск. кт. Такаллуф; такаллуфлар. *Нозик муомала.. ва такаллуфотлар пардаси остида.. хиёнатлар сезди. Ойбек, Навоий.*

ТАКАЛЛУФСИЗ Тортинмасдан, такаллуф кутмасдан; бетакаллуф. *Мақсад: мундан кейин ҳам менга кечаги Анвар каби такаллуфсиз муомалада бўлишларингиз ва хурматлар билан мени ранжитмасликларингиздир. А. Қодирий, Меҳробдан чаён. Дўстмат такаллуфсиз, ортиқ қистатмай, ичкари кирди. Ҳ. Шамс, Душман.*

ТАКАЛЛУФСИЗЛИК Такаллуфсиз қилинган иш, ҳаракат, муомала; иш, муомаладаги шундай ифода. -*Хўжайин, — одатдагича такаллуфсизлик билан деди у, — бу кун бир талай иш қилдик. Қайнатангизни кидан келган йигит жуда яхши ишлади. Ойбек, Танланган асарлар. Қизимнинг боқишида, гап оҳангида жиндай такаллуфсизлик сезилиб турарди. Э. Усмонов, Ёлқин.*

ТАКА-ПУКА Чўчиш, кўрқиш, ваҳимага тушиш ҳолатли; безовта. *Бир оздан сўнг Шоқосим отларни тўтатиб, Йўлчиға қичқирди: -Тушунтир мундоқ, ўзи нима гап.. кўзларинг така-пука. Ойбек, Танланган асарлар. Ҳамманинг юраги така-пука — нафас чиқармай, тўнғизларнинг ўтиб кетишини кутишарди. Ж. Шарипов, Хоразм.*

Така-пука бўлмоқ Ваҳимага тушмоқ, безовталанмоқ. *Бу ерда хоннинг беҳисоб қўшинини кўриб, юраги така-пука бўлиб кетди. П. Қодиров, Юлдузли тунлар. Шу боис ҳаракатлари ноқулай, ясама, ичи така-пука эди.*

«Шарқ юлдузи». *Ҳафизанинг кўрқиб, така-пука бўлаётганини Шоқосим сезиб турарди. Мирмуҳсин, Умид.*

ТАКАСАЛТАНГ Ҳеч нарсанинг ғам-ташвишини қилмайдиган, ишەқмас, бекорчи. *Бир мақсади йўқ, мужмалу мижғов такасалтанг, Иш бўлса чўчиб, кўрқади ялқов такасалтанг. Ҳабибий. Ўзига ўшаиш бир-икки такасалтанг билан уззукун боғида ётиб.. ё тагин аллақайёқларда судралишиб, вақт ўтказади. Ҳ. Назир, Ўтлар туташганда.*

ТАКАСАЛТАНГЛИК Такасалтанг(лар)-га хос юриш-туриш, ҳолат. *Такасалтанглик жонига тегмоқ. ■ ..уддабурон бир йигит келди, уни ўзимиз сайлаб, ўзимиз кўтариб қўйибмиз-у, тагин ўша-ўша такасалтанглик қилиб юрибмиз. О. Ёқубов, Ларза.*

ТАКАСОҚОЛ 1 айн. **ЭЧКИСОҚОЛ** (яна қ. **така**).

2 бот. Сигирқуйруқдошлар оиласига мансуб, кенг тарқалган кўп йиллик бегона ўт.

ТАКА-ТАКА: така-така қилмоқ Ағдартунтар, алғов-далғов қилмоқ, шу тарзда тинчликни бузмоқ. *Товларни така-така қилиб юрган унинг [Абдукарим темирчининг] божаси бўлади. Ш. Тошматов, Эрк куши. Мақсуд Низомов акасига орқа қилиб.. ҳамма ёқни така-така қилиб юрибди. «Муштум».*

ТАКА-ГУМ тақл. с. Ноғора товушини билдиради. *Том бошида карнайлар наъра тортиб, ноғоралар така-тумаа олиб, бойнинг «шухратини» бутун шаҳарга ёймоқда эди. М. Муҳаммаджонов, Турмуш уринишлари.*

ТАКБАС [а. تکبیس — бир ерга зич қилиб босиш, сиқиш; зичлаш]: **такбас қилмоқ** Сархонага тамаки солмоқ, тамаки босмоқ, шундай қилиб чекмоқ. *Хўрандаларнинг ичида такаяга янги келган косиббаччалар ҳам бор эди. Булар солма ош қилиб, бир чилим, ярим чилим такбас қилиб кетувчи ёш-яланглар эди. Ф. Ғулум, Шум бола.*

ТАКБИР [а. تكبير — кенгайтириш, кучайтириш; улуғлаш, мақташ; худони улуғлаб, «Аллоҳу акбар» иборасини айтиш] дин. Аллоҳни улуғлаш билан боғлиқ ибора («Аллоҳу акбар» — Аллоҳ буюқдир)ни талаффуз этиш, тилга олиш. *Хатиб домла.. оқ буйра устидаги тобут ёнига боради ва салласининг нешини тушириб, такбир учун қўл кўтаради. А. Қодирий, Обид кетмон. Самад бўқоқ индамай, четга бурилиб кетди. Шукур сўфи шом намози учун такбир*

тушира бошлади. А. Қодирий, Меҳробдан чаён.

ТАКИЛЛАМОҚ «Так», «так» овоз чиқармоқ. *Оёқдан зах ўтиб, тиш такиллай бошлади.* Т. Алимов, Хиргойи. *Деворсоат қолган умрини ўлчаётган сингари бир алтозда такиллайди.* С. Сиёев, Ёруғлик.

ТАКИР-ТУКУР тақл. с. «Так», «тук» ва шунга яқин кетма-кет чиқадиған товушларни билдиради. *Майна уйда ёлғиз ўтириб, уй томини чертаётган ёмғирнинг такир-тукуруни тингларди.* Ш. Тошматов, Эркүши.

Такир-тукур қилмоқ Такир-тукур товуш чиқармоқ. *Қулоғига тунука томнинг такир-тукур қила бошлагани эшитилди.* Газетадан.

ТАККОН шв. Табиб. *Қимиз дори, деган неча такконлар, Чайиб бергин сава билан кўнакни.* «Алпомиш».

ТАКЛИФ [a. تكليف — буйруқ, топшириқ, вазифа; қийнаш; бурч, мажбурият] **1** Муҳокама қилиш, амалга ошириш ёки қабул қилиш учун тақдим этилган фикр, масала, маслаҳат ва ш. к. *Таклиф киритмоқ. Кўпчиликнинг таклифи билан қарор қабул қилмоқ.* ■ *Лаълихон колхозга раис бўлсин, деган таклиф овозга қўйилганда, ҳамма бир қўлини кўтарса, Бодом хола икки қўлини баб-баравар кўтарди.* С. Аҳмад, Қадрдон далалар. *Менинг таклифим шукки.. Мирзаевга ўхшаганларга институтда ўрин йўқ. Ў. Ҳошимов, Қалбингга кулоқ сол. Таклифи ўринсиз чиққанини сезди-ю.. гапни кулгига бурди.* П. Қодиров, Юлдузли тунлар.

2 Ташриф буюриш, қадам ранжида қилиш ва ш.к. ҳақидаги илтимос, сўз, чақириқ. *Таклиф билети.* ■ *-Раҳмат, Олимхон ака, Мен уйга борай, — Ҳакимбойвачча таклифни оддий манзират деб билгани учун кетмоқчи бўлди.* Ойбек, Танланган асарлар. *Аъзам таклифни кутиб турмай, бўш яшиқ устига ўтирди.* Р. Файзий, Чўлга баҳор келди.

Таклиф қилмоқ (ёки этмоқ) Таклиф билдирмоқ, таклифни айтмоқ. *..Меъмори кўриши билан дарҳол ўнг қўли кўксиди, салом бериб, ичкарига таклиф этди.* Мирмуҳсин, Меъмор. *Кейинчалик Санобарни ўша автобус шофёри устидан бўладиган судга таклиф қилишди.* М. Хайруллаев, Кўнгил. *Устод Қавом нон ушатиб.. дастурхондаги ширинликлардан олишга таклиф қилди.* Мирмуҳсин, Меъмор.

3 иқт. Муайян вақтда ва муайян нархлар билан бозорга чиқарилган ва чиқарилиши мумкин бўлган товарлар ва хизматлар миқдорини ифодаловчи тушунча.

ТАКЛИФНОМА [таклиф + нома] Мажлис, тўй ва ш. к. га таклиф этиб ёзилган хат; таклиф, чақирув қоғози. *Йиғилиш қатнашчиларига таклифнома юбормоқ.* ■ *Тўйга одамларни хат орқали чақиртирмоқчи бўлиб, таклифномалар ёздирди.* «Латифалар».

ТАКОМИЛ [a. تكامل — камолга етиш; мукамаллик; бир бутун бўлиб бирлашиш] **1** Ривожланиш, камол топиш. *Тадрижий такомил.* ■ *Шоир [Ҳамид Олимжон] ижодий такомилнинг ўзига хос даврлари бор.* Газетадан.

2 Мукамал, камолга етган ҳолат; камолот, етуклик. *Ҳа, Нигора бекам-кўст гўзал. У табиат гўзаллигининг такомили, инсон латофатининг айни мужассами эди.* С. Анорбоев, Оқсой.

Такомил топмоқ Камолга етмоқ. *Сен она! Сен битмас ҳаёт булоғи. Ҳаётни яратган муҳтарам омил. Улуғ келажакнинг ёш ниҳоллари Сендан тармоқ ёзиб, топар такомил.* Зулфия.

ТАКОМИЛЛАШМОҚ Камол топмоқ, мукамаллашмоқ. [Даминжон:] *Ҳа, бўлмасамчи! Машина деган доим ўзгариб, такомиллашиб туради.* А. Ҳайитметов, Пўлат бармоқлар.

ТАКРОР [a. تکرار — қайтариқ, такрорлаш] **1** айн. **қайтариқ 1.** *Матндаги такрорлар.* ■ *Кимдир «такрор бўлмасин!» деб қичқирди.* А. Қаҳҳор, Асарлар. *Айрим ҳолларда ана шундай такрорнинг бири ҳеч қандай функцияни бажармайди, натижада бундай плеоназм тавтологияга тенг бўлади.* «ЎТА». *Бироқ Абдураҳмон Шум боланинг янги шароитдаги қайтариғи ва такрори эмас, у янги қаҳрамон.* С. Сиёев, Ёруғлик.

2 Иккинчи ёки кўп марта; қайта, қайта-қайта. *Такрор айтмоқ. Такрор огоҳлантирмоқ.* ■ *Лоақал сиёсат юзасидан бир нима жаримага тортилсалар, истиқболда бу каби ғалаёнлар такрор бош кўтармагай.* Ойбек, Навоий. *Чол такрор сўрагач, у жавоб берди: -Тошкентда иш топсам, балки қоларман.* Ойбек, Танланган асарлар.

Такрор бўлмоқ Такрорланмоқ, қайтарилмоқ. *Ҳар баҳор ҳам шу бўлар такрор, Ҳар баҳор ҳам шундай ўтади.* Ҳ. Олимжон, Ўрик

гуллаганда. **Такрор қилмоқ** Такрорламоқ, қайтармоқ. *У, сўзларини билмаса ҳам, овозининг борича, бутун юраги, севинч ва қувончини бағишлаб, ёқимли оҳангни такрор қиларди.* Ш. Рашидов, Бўрондан кучли.

3 тлш. айн. такрорий сўз қ. такрорий.

ТАКРОРАН *рвш.* Иккинчи ёки кўп марта; такрор ҳолда, яна, қайтадан. *-Душман вақтинча тантана қилмоқда, — деди такроран Чернецов.* И. Раҳим, Чин муҳаббат.

ТАКРОРИЙ Такрор қилинадиган, такрор бажариладиган, такрор ҳолдаги. *Такрорий қурт боқиш. Такрорий экиш.* ■ *Меъмор хотини ва қизининг бир неча бор такрорий уқтиришлари натижасида уч соябон арава, олти отни кирага олиб..* Мирмуҳсин, Меъмор.

Такрорий сўз тлш. Сўзнинг кўплик, давомлилиқ каби маъноларни ифодалаш учун хизмат қилувчи такрор шакли. *Мас., катта-катта (дарахтлар) ёш-ёш (болалар) ҳўнг-ҳўнг (ийгелмаоқ) ва б.*

ТАКРОРЛАМОҚ Иккинчи ёки кўп марта такрор қилмоқ, қайтармоқ. *Яна бир такрорланг, фақир радифини уқиб олмоқчиман.* П. Қодиров, Юлдузли тунлар. *Юсуфбек ҳожи, то Эскижўвага етгунча, ўзининг юқоридаги сўзини кўй, гузар халқига такрорлаб келмоқда эди.* А. Қодирӣй, Ўтган кунлар.

ТАКСА I [*нем.* Taxe — эълон қилиш, баҳолаш < *лот.* taxaге — баҳоломоқ, баҳо, нарх кўймоқ] Давлат ёки ўз-ўзини бошқариш органи томонидан аниқ белгиланган товар баҳоси ёки меҳнат ва кўрсатилган хизмат ҳақи миқдори.

Такса бичмоқ (ёки кўймоқ) Қатъий баҳо, нарх белгилаб кўймоқ. *Шаҳар шўроси бутун хусусий уйларнинг ижара ҳақиға такса бичиб кўйди.* А. Қаҳҳор, Сароб.

ТАКСА II [*нем.* Dachshund] Танаси узун, оёқлари калта ва қийшиқ бўлган, инда яшовчи жониворларни овлашга мослашган ов ити.

ТАКСИ [*фр.* taxi] Киракаш енгил автомобиль ёки юк автомобили. *Енгил такси. Юк ташувчи такси. Уйға таксида қайтмоқ.* ■ *Бино ёниға такси келиб тўхтади, ичидан Ирода тушди..* Ф. Мусаҷонов, Ҳиммат.

ТАКСИЧИ Такси ҳайдовчиси, шофёр. *-Қаёққа, биродар? — шопмўйлов таксичи машинанинғ қяа деразачасидан мўралади.* Ў. Ҳошимов, Қалбингга кулоқ сол.

ТАКСОМЕТР [такса I + *юн.* metreo — ўлчаймаман] Такси автомобилнинг қанча йўл босганлигини ва қанча ҳақ тўлаш кераклигини кўрсатувчи ҳисоблагич.

ТАКСОМОТОР *айн. такси.* Таксомотор парки.

ТАКСОНОМИЯ [*юн.* taxis — тартиб билан жойлашиш + *nomos* + қонун] Бутун борлиқнинг мураккаб, одатда, иерархик тузилмали соҳаларини (жонли табиат, Ернинг тузилиши; география, геология, тилшунослик, этнография ва ш.к. нинг объектларини) таснифлаш ва тартибга солиш назарияси, шу ҳақдаги фан.

ТАКСОФОН [такса + *юн.* phone — товуш] Ичига танга, жетон ташлаш билан ёки магнитли карта киритиш орқали ишлайдиган (гаплашиш мумкин бўлган) телефон аппарати.

ТАКТ [*нем.* Takt < *лот.* tactus — сал тегишиш; сезиш, ушлаб кўриб ҳис қилиш] **1** Муסיқа вазн бирлиги: мусиқа асарининг баравар вақт давом этадиган ҳар бир бўлаги. *-Ҳовлидаги бир туп атиргул ҳам шу кўшиқнинг тактиға тушиб, аста тебранмоқда.. — деди қиз.* Ж. Абдуллаҳонов, Тонг ёришган соҳилда.

2 тех. Бирор механизм иш циклининг бир бўлаги.

3 тлш. Нутқнинг бўғиндан катга (бир неча бўғиндан иборат), фразадан кичик бўлган фонетик бирлиги.

ТАКТАК Арпанинғ бир тури; тоғарпа. *Ойша хола ҳам тандирға янтоқ, тактак унидан нон ёпишға уринаётганини ўйлади.* Ш. Тошматов, Эрк қуши.

ТАКТИК I Тактикани яхши биладиган, тактикаға моҳир.

ТАКТИК II Тактикаға оид, тактика принципларига ва қоидаларига мос; тактикаға асосланган, тактикадан келиб чиқадиган. *Тактик қоида. Тактик разведка.* ■ *Тактик жанглар, машғулотлар тугағач, курсантлар фронтға жўнади.* А. Раҳмат, Фронт йўлларида. *Гуреевнинг бу тактик усули ҳам Шералиға ёқмади.* С. Кароматов, Олтин қум.

ТАКТИКА [*юн.* taktike — кўшин тузиш, сафлаш маҳорати] **1** Ҳарбий санъатнинг жангға тайёргарлик кўриш ва жанг олиб бориш назарияси ва амалиётини ўз ичига олган таркибий қисми. *Дастлабки уринишлари беҳуда кетган немислар тактикани ўз-*

гартирдилар. Н. Сафаров, Оловли излар. *..алоҳида ўқчи батальон.. армия қисмларининг тажрибаларини, душман тактикасини ўрганиб, жангларга ҳозир бўлиб туриши керак.* И. Раҳим, Чин муҳаббат.

2 Кўзланган мақсадга эришмоқ учун олиб бориладиган курашнинг муайян шариоитга мос йўл ва воситалари, шакл ва усуллари. *Тактика билан иш олиб бориш, меҳнаткаш халққа таяниб.. улардан кўнгилли дружиначилар сафига тортиш керак.* Ҳ. Нуъмон ва А. Шораҳмедов, Ота.

ТАКФИН [а. تَكْفِين — кафанлаш, кафанга ўраш] Мурдани кафанлаш, кафанга ўраш. *Кечаси билан такфин чораларини кўриб.. ул жанобни дафн қилинди.* А. Қодирӣ, Кичик асарлар.

ТАКФИНЛАМОҚ Мурдани кафанламоқ, кафанлаб тобутга солмоқ.

ТАКЯ I [а. تَكْيَة — бошпана, тураржой, макон; мусофирхона; егимхона; суянчиқ] шв. Ёстиқ, болиш; суянчиқ.

Такя қилмоқ Суянмоқ, таянмоқ. *Унинг [Азизбекнинг] қаторидаги иккинчи киши бошига катта салла ўраб, қамчи сопи билан эгарнинг қошига такя қилган.. эди.* А. Қодирӣ, Ўтган кунлар. *Икки тирсагини тиззаларига кўйиб, кўлларини энгагига такя қилди.* С. Кароматов, Олтин кум.

ТАКЯ II [а. تَكْيَة — тураржой, макон, манзил] **1** Одамлар тўпланиб улфатчилик қиладиган жой. *Такяда ўтириб, энди битта чой ичиб бўлган эдим, қотмагина бир йигит келиб: -Қурбон ота сиз бўласизми? — деди.* А. Қаҳҳор, Кўшчинор чироқлари.

2 тар. Банги ва кўкнорлар тўпланадиган жой; кўкнорихона. *Ўн йил ичида у [Мамарайим] кирмаган кўча қолмади. Наякини ўрганди, қора дори еди, такяларга кириб, кўкнори ичди.* М. Исмоилий, Фарғона т. о.

ТАКЯГОҲ [а. تَكْيَة گاه] **1** айн. **такя** II, **такя-хона** **2**.

2 эск. кт. Суянчиқ, мададкор, ҳомий. *Бу мажбуриятни ўзимга эътиқод қилганимдан эмас, балки сизнингдек оталарим, оналаримга такягоҳ деб ишонганимдандир.* А. Қодирӣ, Меҳробдан чаён. *Баъзилар эса неча такягоҳларига суянади, онасини, отасини, ҳатто бобокалонларини ишга солади.* Н. Ёқубов, Жон.

ТАКЯХОНА [такя + хона] **1 тар.** Мусулмон мамлакатларида бой одамлар томони-

дан қурилган, мусофир, камбағал, уйсиз кишиларга вақтинча ётоқ, бошпана сифатида бепул хизмат кўрсатадиган меҳмонхона.

2 айн. **такя** II.

3 дин. Шиа йўналишига мансуб мусулмонлар ибодатхонаси, масжиди.

ТАЛАБ [а. طَلَب — излаш, қидириш; сўраш, исташ; хоҳиш] **1** Қатъият билан қилинган сўров, илтимос. *Лекин нима қилсин, раҳбарнинг буйруғи, талаби.* Ҳ. Шамс, Душман. *Замира кўпчиликнинг талаби билан ўрндан турар экан, қизил атлас куйлагининг ранги юзига ургандай, қип-қизариб кетди.* П. Қодиров, Уч илдиш.

2 Бажарилиши, бўлиши шарт ва тақозо этиладиган нарсa (нарсалар). *Олий ўқув юртига кириш талаблари.* *Стандарт талабларига жавоб бермоқ.* ■ *Бироқ жангнинг энг масъулиятли пайтида устав талабини бажариш имкони бўлмади.* И. Раҳим, Чин муҳаббат. *Мантиқ талаби шу эрур, шоҳим.* С. Сиёев, Ёруғлик.

3 Эҳтиёж, истак. *Унинг талаби катта.* *Маданий молларга талаб кучаймоқда.* ■ *Ҳозирча у бу хужжат билан мамлакат талабини қондиришга — маориф фронтига боради..* П. Турсун, Ўқитувчи.

4 иқт. Харидор, истеъмолчининг бозорда муайян товарларни, неъматларни сотиб олиш истаги. *Муайян товарга ёки товарлар тўпламига барча харидорлар билдирган талаб йиғиндиси бозор талаби дейилади.* «ЎЗМЭ».

5 с.т. Талабгор, хоҳловчи. *Талаб борми? У билан курашишга талаб чиқмади.* ■ *Қилич келиб ялаб-ялаб, Икки ёв урушга талаб.* «Ширин билан Шакар».

6 сфт. Отларга бирикиб, ўша отдан англашилган нарсани истайдиган, унга муҳтож, талабгор маъносини билдиради (Бундай бирикмаларнинг аксарияти кўшма сўзга айланган). *Сув талаб экинлар.* *Изоҳ талаб ибора.* *Чопиқ талаб гўзалар.* ■ *Ўктамнинг қовжироқ лаблари чойталаб эди.* Ойбек, О. в. шабадалар. *Чунончи, Атомиш, Манас — ум бўйи тирноқ кўрмай, фарзанд талаб бўлиб юрган чол ва кампирнинг ўғиллари.* Ф. Саломов, Таржима назариясига кириш.

Талаб қилмоқ (ёки **этмоқ**) **1**) қатъий тарзда хоҳиш-истак, талаб билдирмоқ; сўрамоқ. *..кекирикка ҳам пора талаб қиладиган нафси наҳангларнинг куни битди.* «Муштум». *..Замирнинг қотилларига ўлим жазоси бе-*

рилишини талаб қиламан! С. Зуннунова, Гулхан; 2) тақозо этмоқ, шарт қилиб қўймоқ. *Шайбойиҳон бугун қўлламоқчи бўлган усул яшин тезлигида ҳаракатланишини талаб қилади.* П. Қодиров, Юлдузли тунлар. *Халқ ҳаётини ғоятда теран тасвирлай билиш муаллифдан катта истевдод талаб этади.* Газетадан; 3) шв. талабгар бўлмоқ, истамоқ. *Суянган фарзандим, сен Ёдгоржоним, Болам, талаб қилма Аймоқ юртига.* «Ёдгор».

ТАЛАБА [а. طلب — сўровчилар, талаб қилувчилар; ўқувчилар] Олий ёки ўрта махсус ўқув юрти ўқувчиси. *Мадраса талабалари «аъло», «авсат» ва «адно» номи билан уч гуруҳга бўлинган эди.* М. Муҳаммаджонов, Турмуш уринишлари. *Йигиталининг ҳамхонаси — ҳозир институт талабаси..* *Ғолибжон уйга бориб келаман, дейтгандай бўлувди.* Д. Нурий, Осмон устунни. *Билим юрти талабаларининг ҳаёти ҳар томонлама сермазмун ўтмоқда.* Газетадан.

ТАЛАБГОР [а. + ф. طلبگار] 1 Талаб қилувчи; истовчи, хоҳловчи. *Баковул даврага чорлади: -Насим полвонга талабгор бўлса — чиқсин!* Т. Мурод, Қўшиқ. *Талабгорлар кўп, аммо сизга ўхшаган катта олимлар иштирок этишини тайинлашган эди.* Мирмуҳсин, Умид. *Келиб ҳар шахру қишлоқдан талабгор, Олурулар қанча бўлса илм даркор.* Ҳабибий.

2 эск. айн. даъвогар 2.

ТАЛАБНОМА [талаб + нома] Бирор нарсани талаб қилиб ёзилган хат, ҳужжат. *Талабнома ёзмоқ.* *Талабнома билан мол олмақ.* ■ *Участкалардан келиб турган талаблар, докладномалар.. янги-янги чизмалар сўралган талабномаларнинг саноғи бўлмайди бавзан.* Ж. Абдуллахонов, Тўфон. *Қўлига қўшимча зарур материаллар ёзилган талабномани тутқаздим.* Ҳ. Назир, Кўктерак шабадаси.

ТАЛАБЧАН 1 Бажариш, амалга оширишни қатъий туриб талаб қилувчи, бу йўлда оғишмайдиган. *У деканнинг иш юзасидан ҳар қандай яқинликни йиғиштириб қўйишини, талабчан, қаттиққўллигини, ҳеч кимни аяб ўтирмаслигини яхши биларди.* Ў. Ҳошимов, Қалбинга қулоқ сол. *Уртоқ Раҳимжонов ўз касбига муҳаббат билан қарайдиган, масъулиятни ҳис қиладиган, талабчан агрономдир.* Газетадан.

2 Юксак талаблар қўювчи, юқори даражани кўзлаб фаолият кўрсатишни талаб

қилувчи. *Расмининг тағига: «Ўзгар шогирддан талабчан устозга» деб ёзилган.* «Гулдаста». *Талабчан, меҳнаткаш шоир Ҳамид Олимжон қисқа умри ичида жуда катта маданий мерос қолдирди.* Н. Сафаров, Оловли излар.

3 Талаб жиҳатдан ва баҳолаш савияси юқори. *Талабчан китобхонлар.* ■ *«Бир йилнинг тўққиз кунини» фильми талабчан томошабинларимизнинг юксак дидига мосдир.* Газетадан. *Ҳа, йилдан йилга иш салмоғи ортиб боряпти, одамлар эса талабчан бўлиб кетишяпти.* «Муштум».

4 кўчма Кўп талаб қиладиган. *Бодринг — иссиқсевар, ёруғсевар ва намга талабчан ўсимлик.* «Фан ва турмуш».

ТАЛАБЧАНЛИК Талабчан бўлиш, талабни бўшастирмай иш тутиш. *Талабчанлик йўқлигидан бир йил мобайнида атиги учтагина мактаб текширилган эди.* Газетадан. *Ўз-ўзига қаттиқ талабчанлик билан уй-ғунлашиб кетган камтарлик одамнинг олийжаноб характеридан туғилади.* Х. Ёдгоров, Ҳаёт тўлқинлари.

ТАЛАЙ Анча, кўп, кўпгина. *Шу кўйи бошига тушган кулфатларни бир чеккадан айтишга чоғланди-ю, ташқаридан талай одамлар ўзларига қоқиб туришганини кўрди.* Ш. Холмирзаев, Қил кўприк. *Домла талай вақтгача ухлай олмади.* А. Қаҳҳор, Сароб.

Бир талай Жуда кўп. *Олма, ўрик, олчалар Тўккан гулларин, Мевалари бир талай, Эгган бўйларин.* З. Диёр. *Эртаси кунига мезбонлар бир талай меҳмон қаққиришган эди.* А. Қаҳҳор, Мирзо.

ТАЛАМОҚ 1 Зўрлик билан ёпирилиб тортиб олмақ, олиб қўймоқ. *Кўқонни талаб, бизнинг устимизга қўшин тортиб келаятган..* Султон Аҳмад мирзо эса бизнинг подшомиз билан бир отадан бўлган оға-инилар. П. Қодиров, Юлдузли тунлар.

2 Талашиб-тортишиб харид қилмоқ. *Янги китобни бирпасда талаб кетишди.*

3 Кўп бўлиб, биргалашиб ташланмоқ, ёпишмоқ. *Арилар таламоқ.* ■ *Болалар бараварига Раҳимни талай бошлашди.* Ҳ. Назир, Ёнар дарё.

4 Киши ёки нарсага давомли (такрор-такрор) ҳужум қилмоқ, шу тарзда юлиб-юлқимоқ. *Хув анави ялангликка қаранглар!..* *Унда одамзод суяги ётибди.* *Бечорани қашқир талаган бўлса керак.* Мирмуҳсин, Меъмор.

5 кўча с. т. Каттиқ уришиб бермоқ, юлиб-юлқиб ёпишмоқ. Кичкина бир қизчадан дакки еган аёл Эргашойни талаб берди. Н. Сафаров, Олияхон Султонова.

6 кўча с. т. Таламоқ, тирнамоқ, гаш қилмоқ. [Алишернин] Кўнглини шубҳа, газаб, пушаймон ҳислари талар эди. М. Осим, Зулмат ичра нур.

Ичини ит (ёки ари) таламоқ Ўта бетинч бўлмоқ, безовталанмоқ. Ҳамма ўз иши билан банд. Биргина Низомжоннинггина ичини ари талаяпти. С. Аҳмад, Уфқ.

ТАЛАНТ [юн. talanton – тарози; пул-ҳисоб бирлиги] **1** Юқори даражали туғма қобилият; истеъод. Бировларга суйкалиб эмас.. ўз меҳнати, таланти билан обрў олиши керак. Мирмуҳсин, Умид. *Ноёб талант эгаси бўлган Юсуфжон қизиқ ўз халқининг азиз фарзандларидан биридир.* Т. Обидов, Юсуфжон қизиқ.

2 Юксак қобилиятга, катта истеъодга эга бўлган шахс. *Бизда яхши талантлар жуда кўп.* ■ Абдулла Қодирий, Фафур Фулом, Абдулла Қаҳҳор каби туғма талантлардан ҳар қанча ўргансанг арзийди. М. Жўра, Ноширнома.

3 Юнонистон ва б. айрим қадимги давлатларда оғирлик ва пул ўлчови бирлиги. *Қадимги Римдаги кумуш ёмбилар бир талант оғирлигида чиқарилган.* «Фан ва турмуш».

ТАЛАНТЛИ Юқори даражали қобилиятга, талантга эга бўлган; истеъодли. *Талантли бола. Талантли созанда.* ■ *Ичи қора, ҳасадеғўй киши ақлли ва талантли кишилардан ўрганиш ўрнига, уларга бахиллик қилади.* Р. Усмонов, Одобнома. *Халқ ўзининг талантли фарзанди Ҳамид Олимжонга ҳайкал қўйяпти.* Н. Сафаров, Оловли излар.

ТАЛАНТСИЗ Таланти йўқ; истеъодсиз.

ТАЛА-ТАЛА Ҳамма ёқдан тортқилаб талаш, ўзлаштириш; талон-торож, торт-торт. *Тала-тала бўлмоқ. Тала-тала қилмоқ.*

ТАЛАТИН, талитин ив. Чармнинг қалин бир тури. *Шу тобда бошида қора чўғирма, эғнида узун ипак тўн, оёғига талитиндан маҳси кийган Аваз ўрнидан туриб.. шеър ўқий бошлади.* Ж. Шарипов, Хоразм.

ТАЛАТЎП Ур-ийқит, сур-сур ва ш.к. бесаранжом, нотинч ҳолат; тўс-тўполон. *Ўн минг уйли Кўнғирот талатўп бўлиб, Кашал элига, Қалмоқ юртига.. кўча бошлади.* «Ал-помииш». *Содиқжон бойваччанинг ҳовлиси*

бирпасда талатўп бўлиб қолди. Зубайда ерда ётарди.. К. Яшин, Ҳамза.

ТАЛА-ТЎПОЛОН Шов-шув, шовқин-суронли ҳолат. *..уларни қишлоқ чегарасига-ча тала-тўполон билан кузатишди, кейин ҳалиги ашулани айтиб, қишлоққа қайтишди.* Ҳ. Шамс, Душман. *Раис кўнғироқ чала бериб, тала-тўполонни сал босди-да, иккинчи жиноятчига – Азмиддинга ўтди.* Ҳ. Фулом, Манъғал.

ТАЛАФ [а. تلف – зарар, зиён; бузилиш, шикастланиш; ҳалокат; йўқотиш] *Йўқ бўлиш, ҳалок, нобуд бўлиш.* *Арзимаган сабаблар билан талаф бўлган жонларни ҳамиша кўз олдинда тут!* А. Қодирий, Ўтган кунлар.

ТАЛАФОТ [а. تلفات – «талаф» с. кўпл.] **1** Урушда берилган қурбонлар; йўқотишлар. *Душман катта талафот кўриб, чекинишга мажбур бўлди.* А. Раҳмат, Эллиқ бир баҳодир. *..жангда энг катта талафот пиедалар орасида бўлур, буни билурсенми?* П. Қодиров, Юлдузли тунлар.

2 Йўқотиш, ажраб қолиш; зарар. *Ер силкиниши ҳозир ҳам жуда катта талафотларга сабаб бўлмоқда.* Газетадан.

ТАЛАФФУЗ [а. تلفظ – сўзлаш, айтиш] Товуш ёки сўзнинг айтилиши, айтилиш хусусияти. *Унли товушларнинг талаффузи. Сўзни тўғри талаффуз қилиш.* ■ «Олин-олин» эмас, «олинг-олинг» – «берите, кушайте» деган сўз, – деди Элмурод. *-Ҳа, талаффузи қийин экан. Майли, ўрганиш мумкин. Ишқилиб, менга ўзбекча ўргатасиз, – деди Михайлов.* П. Турсун, Ўқитувчи. *Киши исмлари имлосига хос бўлган яна бир хусусият шундаки, баъзи сўзлар исмга кўчгач, сўзнинг талаффузида ҳам айрим ўзгаришлар юз беради.* Э. Бегматов, Киши исмлари имлоси.

ТАЛАШ 1 Таламоқ фл. ҳар. н. Босқинчилар шаҳару қишлоқларни талаш билан қаноатланмай, кўҳли қизларни чўриликка олиб кетишар эди. П. Қодиров, Юлдузли тунлар. *Бу кун – бозор куни, Хўжайлидан чиққан бозорчиларни талаш учун йўлтўсарлар шайланиб келаётган бўлсалар керак.* Ж. Шарипов, Хоразм.

2 Бирор нарсани қўлга киритиш йўлидаги зиддиятли олишув, жанг. *Ўзаро тожтахт талашлари Абдулатифни ёвуз инсонга, отасининг қотилига айлантиради.* Мирмуҳсин, Меъмор. *Жанг боради олисда, Ер та-*

лаш, осмон талаш. «Шарқ юлдузи». Қутлуг Нигор хоним.. ўғлининг бу талашларга, адоватларга аралашмасдан, ўз мулкда осойишта ҳукм суришини истарди. П. Қодиров, Юлдузли тунлар.

3 Ўзиники қилиш учун ёпишиш, тиришиш ҳаракати (кам, етишмаётган нарсаларга нисбатан). *Вагонда жойлар талаш. Чувурчувур. Ҳ. Назир, Ёнар дарё. Бутун бошлиқ колхозда битта универсал талаш. И. Раҳим, Чин муҳаббат.*

4 Жанжал, низо. *Ўзаро талашлар, фитналар, фасод — Меҳнатни, савдони, кўшиқни эзди. М. Шайхзода. Ушбу дорга осилгувчи бетавфиқ, Авбошларга, осийларга бўлиб бош, Халқ ичига солди нифоқ ва талаш. И. Султон, Номаълум киши.*

5 Тортишув; баҳс, мунозара. *Яна ўртада хомушлик ҳукм суриб, Ҳасанали ишни тузукроқ очиш ва ё шу куйи қолдириб кета бериш талашда эди. А. Қодирий, Ўтган кунлар. Қай ҳунарни танлашга Болалар қотди боши. Ҳаммасини ўргансак, — Қайнар фикр талаш. К. Муҳаммадий. Кун билан унинг бошида фикрлар талаш авжга минди. Мирмуҳсин, Чиниқиш.*

Тонг талаш Тонг отиш. *Тонг талаш пайт.. ой ётоғига отланаётган.. палла. Р. Файзий, Кишиларимиз қиссаси.*

ТАЛАШМОҚ 1 Таламоқ фл. бирг. н. *Шайбонийхоннинг қуондай отлиқлари уларнинг.. кўчларини талашди, кўпларини аёвсиз ўлдиришди. П. Қодиров, Юлдузли тунлар.*

2 Ўзиники қилиш учун тиришиб ёпишмоқ, айтишмоқ, олишмоқ. *Жой талашмоқ. ■ Талашиб, тортишиб, кўпроқ олган бир аёл ўз насибасидан Бувинисонинг косасига озгина солиб берди. П. Турсун, Ўқитувчи. Йигит, бошлиқ билан пул талашиб, айтишиб қолгани эсига тушиб, яна зардаси қайнади. М. Мансуров, Ёмби.*

3 Даъволашиб уриш-жанжал қилмоқ, низолашмоқ, уришмоқ. *Тахт талашмоқ. ■ Нега подиолар уришади? — Ер-сув талашиб уришади! П. Турсун, Ўқитувчи. ..қайсингиларнинг уй-жойини талашиб нима қиларди? -Буниси ўзига аён. Газетадан.*

4 Баҳслашмоқ, тортишмоқ. *Деворга орқасини бериб, ёнма-ён турган ўрта ёшдаги икки аёл нима ҳақидадир талашмоқда эдилар. Н. Сафаров, Олияхон Султонова. Баҳслаша-*

дилар, ҳар ким ўз ёнидаги билан талашади. А. Қодирий, Улоқда.

Бир қориндан талашиб тушган қ. қорин 7. Бўй талашмоқ Бўйи бараварлашмоқ. *Эртиндин маккажўҳорингиз ўзингиз билан бўй талашиб қолади. С. Кароматов, Ҳаёт қандай яхши. Йўл ёқасида бўй талашиб усган тераклар чўл шамолида оҳиста шовуллайди. «Ўзбекистон қўриқлари». Гап талашмоқ* Ўзиникини маъқуллаб гап айтишмоқ. *Икки қизча мактабдан келаётиб, гап талашиб қолишди. Ҳ. Назир, Чўл ҳавоси. Жон талашмоқ* 1) жон олиб, жон бермоқ; қаттиқ курашмоқ. *Олисда қонли уруш бормоқда, шаҳарлар ёнмоқда, одамлар ёвуз душман билан жон талашмоқда эдилар. С. Аҳмад, Уфқ; 2) ўлим олди талвасасида бўлмоқ. Қон талашмоқ* 1) тўқ қизил, кўкиш қизил рангга кирмоқ. *У қон талашиб турган чўл уфқида сокин термилганча.. ётаверди. С. Сисёв, Аваз; 2) бирор зарб таъсирида кўкиш рангда қон тўпланмоқ (киши танаеси ёки унинг бирор аъзосида) ёки қонга тўлмоқ. Қон талашган кўзлар. ■ ..қон талашган юзлари тирсиллаб ёрилиб кетгудай. «Муштум».*

ТАЛАШ-ТОРТИШ Қаттиқ баҳс, мунозара, тортишув. *Кўп талаш-тортишдан сўнг, у йигирма процентдан эмас, ўн уч процентдан беришга рози бўлди. А. Қаҳҳор, Сароб.*

ТАЛАШУВ 1 Талашмоқ фл. ҳар. н. *Талашувнинг ҳожати йўқ.*

2 Жанжал, тортишув. *Олимхоннинг «фазилатлари» саноқсиз: у, эликбоши бўлгани учун, ҳамма тўй, маъракаларга бурнини тикади, маҳалланинг одамлари орасида юз берган ҳар хил жанжал ва талашувларга боши билан кириб кетади. Ойбек, Танланган асарлар.*

ТАЛБИС [а. تلبیس — кийинтириш; қоплама, тўшам; ҳийла, макр, ёлгон] *эск. кт. 1 Сохта, қалбаки, ёлгон. Талбис васиқа.*

2 Айёрлик; ҳийла, найранг. *Шу кунгача айтган ёлгонларинг, қилган талбисларинг, еган ҳаром-харишларинг бас. С. Айний, Қуллар.*

ТАЛВАСА [а. تلوسه — ҳаяжон, изтироб, ташвиш] *Эсанкираш, саросима ва ш.к. билан юз берувчи безовталиқ, ҳаяжонли ҳолат. Мана энди.. талваса билан қалби тубига бекитиб келган сирини очиб қўйди.. Шуҳрат, Умр поғоналари. [Ёрқиной] Дадасининг оқ қилишини аччиқ устидаги талваса деб*

биларди. Р. Раҳмон, Меҳр кўзда. *Ярадорлар.. изтироб ва иситманинг зўридан талваса билан бирдан сачраб турар, сўнг ҳушсиз йиқилар эди.* Ойбек, Қуёш қораймас.

Жон талваси 1) ўлим олдидаги безовталик, жон талашшиш. *Уларнинг учи [учтаси] ўлган, бири эса ҳали жон талвасасида эди.* О. Отабеков, Кам бўлмагур, ўғил; 2) қаттиқ безовталик, қўрқув, ҳаяжон. *У [эркак] аёлниг билагидан ушлади. Аёл жон талвасасида: -Войдод, одам борми!?! — деб қичқириб юборди.* Ф. Насриддинов, Тундаги воқеа. *..сайёд домидан хуркиган охудай жон талвасасида қочиб қолди.* Ж. Абдуллахонов, Тўфон.

ТАЛВАСАЛАНМОҚ Талвасага тушмоқ, талвасада қолмоқ, қаттиқ ҳаяжонланмоқ. *Бўлмади, ўрнидан турди-да, ўринсиз ҳадиксираб талвасаланаётган.. йигитнинг сўзини бўлди.* Т. Алимов, Совға.

ТАЛЛИЙ [лот. thallium < юн. thallos — яшил новда] Менделеев даврий системасининг III гуруҳига мансуб кимёвий элемент; кумушранг оқ металл.

ТАЛЛОН 1 Ўн икки ёшли от.

2 *кўчма* Жуда қари, мункиллаган чол. *Буни ҳайданг, қўя кўрманг! Бу чатоқ бир шумли, Қошу мижжангни териб, Кўсаю таллон қилади.* Ҳамза.

ТАЛМЕҲ [а. تلميح — шама, ишора] ад. Шарқ мумтоз шеърятидаги бадийий санъатлардан бири бўлиб, бунда шоир ўз шеърида аввалдан маълум ва машҳур бўлган қисса, воқеа ёки асарга ишора қилади, натижада ўз фикрини мухтасар баён этади.

ТАЛМОВСИРАМОҚ 1 Довдирамоқ, ўзини йўқотиб қўймоқ. *Сабозул бу саволларнинг биронтасига жавоб тополмас, талмовсирар, нажот йўлини излаб, кўз ёшига зўр берарди.* С. Кароматов, Олтин кум. *Ёдгор ўзи ҳақидаги ҳукмини ўзи ўқиган маҳбус каби талмовсираб қолган эди.* Ў. Ҳошимов, Қалбингга қулоқ сол.

2 Атайлаб ўзини шундай ҳолатга солмоқ, шундай ҳолатда тутмоқ. *Ўрталаридаги сирдан дастурхончининг хабардорлигидан ҳайрон бўлди, ўзини билмасликка олиб талмовсиради.* Р. Файзий, Ҳазрати инсон. *Чолнинг талмовсираётганини очикдан-очик сезиб турарди у.* Мирмуҳсин, Тунги чақмоқлар.

ТАЛМУД [а. تلمود < қад. ях. ламейд — таълимот] Яҳудийларнинг қадимги диний

китоблар тафсиридан иборат қонун-қоидалар мажмуи, муқаддас китоби.

ТАЛМУДЧИ Масаланинг моҳиятини тушунмасдан, уни кўр-кўрона, юзаки ёллаб олган шахс; қироатхон, ҳарфхўр.

ТАЛМУДЧИЛИК Қироатхонларча фикр юритиш; ҳарфхўрлик.

ТАЛОН I Ўзганинг мулкини талаб тортиб олиш; талаш. *Агар биронтанинг қуроғимиз узилса, чуввос кўтарамиз. Айниқса, узилган қуроқ бошқа маҳалладан бўлса, мен ва ўртоқларим у тушар-тушмас талашиб-тортишиб, талон қилиб олишга шошиламиз.* Ойбек, Болалик. *Кўрди кўп зилзила, селни, тошқинни, Кўрди кўп талонни, кўрди босқинни.* А. Обиджон, Кетмагил.

ТАЛОН II [фр. talon] 1 Бирор нарсани олиш, бирор жойга кириш ҳуқуқини берадиган назорат варақчаси. *Бензин талони.*

2 Хужжаг (чек, ордер ва ш. к.)нинг ажратиб олинадиган ёки аксинча, у ажратиб олингач, дафтарда қолдириладиган қисми, дубликати.

ТАЛОН-ТОРОЖ [талон + ф. تاراج — ўғирлаш, талаш; ўлжа] Ҳамма ёқдан тортқилаб талаш, ўзлаштириш, тала-тала, торт-торт. *Талон-торож юртни вайрон этди, мамлакат завол топди.* С. Кароматов, Сўнгги бархан. *Талон-торож, босди-босдилар товсиллаб, Самарқанд ёнида Бухоронинг ҳам бир қадар осойишта тургани туфайли йиллар тез кечаётгандай туюлар эди.* Мирмуҳсин, Меъмор.

ТАЛОНЧИ Талон қилувчи, таловчи, босқинчи. *Ким яхши кўради у талончи итларни? И. Султон, Бургутнинг парвози. Ваҳший талончилардан қаттиқ нафратланган Юсуфжон.. фурсат пойлаб, улардан ўч олишга интиларди.* Т. Обидов, Юсуфжон қизиқ.

ТАЛОНЧИЛИК Талон, талон-торож иши, ҳаракати. *Башарият тарихи зулм, ҳақсизлик, талончилик даврини поймол этиб, эрк ва адолатнинг нузли асрига ғолибона юраёттир.* Ойбек, Танланган асарлар.

ТАЛОТУМ [а. تلاقم — ўзаро тўқнашиш, урилиш; тўлқинларнинг бир-бирига урилиши] Тўс-тўполон, ғавғо. *Бутун бир қишлоқни талотум қилган Равшан исмли оёқяланг ушландими? С. Кароматов, Бир томчи қон.*

ТАЛОҚ I [а. طلاق — ажралиш, хотин билан ажралиш, қўйиш] 1 Никоҳни бузиш,

бекор қилиш ҳақидаги эр томонидан ай-тиладиган сўз; бу сўзнинг айтилиши хотинни барча хотинлик мажбуриятидан тўла озод қилади. «Талоқ» сўзини *эшитган Қумушнинг кўзи ярқ этиб очилиб, яна юмилди*. А. Қодирий, Ўтган кунлар.

Талоқ қилмоқ «Талоқ» сўзини айтиб, никоҳни бузмоқ. *Хотин қилиш қўлингиздан келмаса, талоқ қилинг!* А. Қаҳҳор, Майиз емаган хотин. **Уч талоқ** Уч марта талоқ; узил-кесил ажралиш (бу ҳолда шариат қондасига кўра, хотин то бошқа эрга никоҳланиб, яна ажралмагунча, ўз эри билан ярашуви мумкин эмас). *Уста Абдураҳмон қизларни кўп уради. Бир куни Нисо буви: -Урсангиз, ўша дўконингизга олиб бориб уринг, - деганида, уста: -Ҳа, жонинг ачийдимми, бундан кейин мен ураётганда, кулиб турмасанг, уч талоқсан.. - деб юборди.* А. Қаҳҳор, Бошсиз одам. **Талоқ хат(и) қ. хат 9.**

2 Қиз, хотин каби сўзлар билан қўлланиб (одагта кўшма сўз сифатида), шу сўзга нисбатли сўкишни, ҳақоратни билдиради. *Мен ахир сингли талоқни жўрттага қоптирдимми? А. Қодирий, Обид кетмон. Тирноқча жойимни сен хотинталоққа бермаганим бўлсин.* Ойбек, Танланган асарлар. *..ҳе, гап билгунча иш билгин, баччаталоқ!* А. Қодирий, Меҳробдан чаён.

ТАЛОҚ II айн. қоражигар 1. Кўй сўйилиши билан қорин қисмига ёпишиб турган талоқни аста кўчириб оламиз. К. Маҳмудов, Ўзбек тансиқ таомлари.

ТАЛОҚНОМА [талоқ + нома] Талоқ қилинганлик тўғрисида эр томонидан ёзилган мактуб, ҳужжат. *Бу ишларингиз фойдасиз чиққач, исмимдан талоқнома ёзиб, икки йиллаб рафиқамдан айириб туришга муваффақ бўлдингиз, бу орада гуноҳсиз бир йигитни ҳам ўлдирдингиз.* А. Қодирий, Ўтган кунлар.

ТАЛОҚСИЗ Талоқ қилинмаган, талоқ хати берилмаган ёки олинмаган (қ. **талоқ 1**). «*Кишининг хотинини талоқсиз чиқариб олда, бугун эрга бер!» деди [Отабек] ва телбаларча нима учундир кулиб қўйди.* А. Қодирий, Ўтган кунлар.

ТАЛПАНГЛАМОҚ Лапангламоқ, лапанглаб юрмоқ.

ТАЛПИНМОҚ 1 Қанот қоқиб, қўлларни қанот каби ёйиб, олдинга интилмоқ. *Учишга талпинаётган қушдек юраги ҳаприқайётган Зулфиқорнинг ҳаяжонини Меъмор*

якши сезиб турарди. Мирмуҳсин, Меъмор. *Дадасига талпиниб турган Кимсанни Зебинисо эрига узатди-да.. тўрт томонга қарай бошлади.* Н. Сафаров, Саодатнинг қиссаси.

2 Умуман, олд томон ҳаракат қилмоқ, ташланмоқ. *Мен ўзимни вагондан отдим, мени кўриб, Саломат ҳам олдинга талпинди.* О. Ёқубов, Излайман. *Йигитали.. хушидан кетайёзган қизчини маҳкам бағрига босиб, ташқарига талпинди.* Д. Нурий, Осмон устун. *Машина ўжарлик билан олдинга талпинади қумликдан, чангдан.* «Ўзбекистон қўриқлари».

3 кўчма Эришиш, етишиш йўлида, ҳаракатида, мақсадида бўлмоқ; интилмоқ. *Аваз Мутрибни.. бир меҳр билан суяди, унга ҳаммаша қалбан талпинади.* С. Сиёев, Ёруғлик. *Бундай пайтларда яшил кўкат қанчалик кўзни қувонтирса, шўрхок таъбни шунчалик хира қилар, бамисоли бири ҳаётга талпинса, иккинчиси уни бўғмоқчи бўларди.* Р. Файзий, Чўлга баҳор келди. *..шон-шухратга, амалга талпинаётган кимсаларнинг қилмиши кўнглини оздирди, ғазабини қайнатди.* С. Сиёев, Ёруғлик.

ТАЛТАЙМОҚ 1 Мағрурланиб ўзини йўқотмоқ, кеккаймоқ. *Камтар бўл, талтайма, кеккаймагил тик!* *Дўст учун заҳар ют, ширин жонни тик!* Ё. Мирзо. *Муваффақиятлар ҳар қанча катта бўлганида ҳам, раҳбарнинг талтайиб ва кибрланиб кетишига ҳақи йўқ.* Газетадан.

2 Оёқ-қўлларни ёзиб, ялпайиб ўтирмоқ, ётмоқ, ястанмоқ. *Талтайиб ўтирмоқ. ■ Ўқтам тонг отгандан сўнг қалин, юмшоқ тўшақда талтайиб ётгиси келмади.* Ойбек, О. в. шабадалар.

3 Сийлаган, ҳурмат-иззат қилган ёки эр-калаган сари ҳаддан ошмоқ, суюлмоқ. *Талтайиб ўсган бола. Эрка тутса онаси, талтаяди боласи.* Мақол. ■ *Меъмор бўлса икки шогирднинг сал қуюшқондан чиқиб, талтайишаётганидан энсаси қошиб келарди.* Мирмуҳсин, Меъмор. *Ундақ талтайманг. Индамаганим сайин, қуюшқондан чиқиб кетяпсиз.* Ойбек, О. в. шабадалар.

ТАЛТАНГЛАМОҚ шв. Лапангламоқ, лапанглаб юрмоқ. *Бу одам азбаройи семизликдан, юрса — талтанглаб, гапирса — узлуксиз пишиллар эди.* П. Турсун, Ўқитувчи.

ТАЛҲ [ф. تلخ — аччиқ; ёмон] Тахир, аччиқ. *У далани соғинар.. бугдойзор гашти, андак талх исли сўлиган бедалар учун жонини беришга тайёр эди.* С. Сиёев, Аваз. [Чалоб]

Қудуқ сувига чалинган бўлса керак, бир оз талх. С. Нуров, Нарвон.

ТАЛҲА [ф. تلخه — зардоб, сафро; аччиқ алаф уруғи] айн. **какра 1**.

ТАЛЪАТ [а. طلعت — ташқи кўриниш; қиёфа, сиймо] **1** эск. кт. Юз, чеҳра; қиёфа. *Оҳ тортсам, сарғайди гулдайн талъат.. «Гулшанбоғ». Нечукким, менга нузли талъатинг жаннат билан тенгдир.* Э. Воҳидов.

2 Талъат (эркаklar исми).

ТАЛЪК [нем. Talk < а. طلق] Оқ ё яшилга мойил, қат-қат тузилган юмшоқ минерал (техникада ва тиббиётда одатда кукун ҳолида ишлатилади). *Ўзбекистонда олтингурут, фосфорит, талък, дала шпати.. каби минерал хомашёлар ҳам бор.* М. Зокиров, Бебаҳо хазиналар.

ТАЛҚИН [а. تلقين — ўқитиш, ўргатиш; ўгитлаш; аниқ қилиб тушунтириш; ўқиб, билиб ўзлаштириб олиш] **1** дин. Диний ваъз, таълим. [*Шум бола:*] *Биз аввал хонақоҳга кириб бордик. Қаландарбоши эшикдан.. талқин бошлаб кирди.* Ф. Фулом, Шум бола. *Шунинг учун ёлғиз ибодат, дуо, талқинлар кифоя қилмайди. Қатъий ҳаракат керак! Ҳаракат!* Н. Сафаров. Шарқ тонги.

2 Мазмун, моҳиятини тушунтириш; шарх. *Дилловарим, далагарим, эҳромларим олтиндан, Сўз тополмам, баланд турар таърифлардан, талқиндан.* Э. Охунова, Икки океан оша. *Расулжон хайрлашиб кетгандан кейин ҳам, унинг талқинини ҳар ким ўзича изоҳлаб, узоқ баҳслашиб ўтиришди.* Ж. Абдуллахонов, Хонадон.

3 Образ ёки мусиқий асарнинг ўйновчи, ижро этувчи томонидан ёритилиши, ижроси. *Маждиддин образи Обид Жалилов талқинида шу қадар салмоқли чиққанки, усз спектаклни тасаввур қилиш қийин.* Ф. Жўраев, Обид Жалилов.

Талқин қилмоқ (ёки **этмоқ**) **1)** диний ваъз-насиҳат қилмоқ; **2)** тушунтирмоқ, изоҳламоқ, талқинини бермоқ. *Аммо, бари бир, суиқасдни ҳар ким ҳар хил талқин этарди.* Мирмуҳсин, Меъмор. *Демак, у Шокир акага тақлид қилишдан қочиб, ролни ўзича талқин этган.* М. Хайруллаев, Кўнгил.

4 мус. Шашмақомда асосий куйнинг мустақил қисми. *Талқини баёт. Талқини наво.* ■ *Созанда бир жуфт нағма чалиб, талқинга ўтди. Ҳофиз йигит.. овози ширали,*

юракларни сел қилиб, тингловчиларни ерга қаратиб кўярди. С. Сиёев, Аваз.

5 шв. Қўшиқ, ашула. *Эрта саҳар тушар тонгинг салқини, Пахтазорда хотин-қизлар талқини.* «Кўшиқлар».

ТАЛҚИНЧИ 1 дин. Ваъз-насиҳат ўқувчи; воиз, ваъзгўй.

2 Талқин қилувчи, шарҳловчи.

3 шв. Қўшиқчи, ашулачи, хонанда.

ТАМА [а. طمع — кучли истак, тилак, орзу; ҳирс, очкузлик,] (*охирги а — чўзиқ*) **1** Бировдан бир нарса ундириш ҳисси, ўзиники қилиш, олишга бўлган интилиш. *..ундаги шухратпарастлик, тама олдида подшоҳларга тиз чўкишдан ҳам.. қайтмаслигини кўпчилик биларди.* Мирмуҳсин, Меъмор. *Мансабингдан манфаат, дастурхонингдан тама излаб ёндашган — дўст эмас.* Р. Усмонов, Умр сабоқлари.

2 Умидворлик, умид, илинж. -*Балки бегингизнинг тамалари хон қизидадир, — деди истеҳзо билан Ҳомид.* А. Қодирий, Ўтган кунлар.

Тама қилмоқ 1) бировдан бирор нарса кутмоқ, бировдан ўлжа олишга интилоқ, кўз тикмоқ. *Бир-бирларидан ҳеч нарса тама қилмай дўстлашишлари икковини ҳам чинакам бахтиёр қиларди.* П. Қодиров, Уч илди. *Махдум бу ерда ўқийётган икки мулла-вачча учун Қорабулоқдаги вақфдан ҳам тама қилмоқда эди.* М. Исмоилий, Фарғона т. о.; **2)** умидвор бўлмоқ, умид қилмоқ; толиб бўлмоқ. *Шунча азамат йигит турганда, сен бола, посёлканинг олд қизига тама қилиб келсанг-а!* П. Қодиров, Қадрим.

ТАМАГИР [а. + ф. طمعگیر — бирор нарса олишга интилувчи; очкўз, манфаатпараст] Бировдан ўлжа олишга, тама қилишга ўрганган, тама қилувчи. *Тамагир одам. Тамагир бўлмоқ.* ■ *Солиҳ махдум хасис, тамагир, ҳар ҳолда.. уни яхшилар қаторига қўйиб бўлмайди.* А. Қодирий, Меҳробдан чаён. *Учинчи бир туркум одамлар борки, ҳатто уйига меҳмонга бориб қолсанг ҳам, қўлингга қарайди. Бундай одамни тамагир, поражур, деявер.* Ё. Шукуров, Қасос.

ТАМАГИРЛИК Бировдан бир нарса кутиш ва шунинг илинжида бўлиш; шу мақсаддаги хатти-ҳаракат. *Тамагирлик билан қарамоқ.* ■ *Тамагирлик инсон ҳамиятини ерга уради.* Газетадан.

ТАМАДА [ғруз. tamadoba — тўй, зиёфатга катталиқ (бошчилик) қилиш] Ўтиришларда, зиёфатда ичкилик қуйиб, қадаҳ сўзи (тост) айтувчи; соқий, косагул. *Маруся келиб ўтириши билан Ҳайдар сўз бошлади: -Мени тамада қилиб қўйишди.* И. Раҳим, Ҳаёт булоқлари.

ТАМАДДИ [а. تمنع — роҳатланиш, хузурланиш; фойдаланиш ҳуқуқи] 1 Бирор нарса еб олиш, овқатланиш. *Нонуштада Эгамберди бобо нонини дастурхонга қўйса, пешиндаги тамаддида у белбоғини ёзарди.* Н. Қобил, Унутилган соҳиллар.

2 Енгил таом; егулик. *Бир одамнинг бир кунлик тамаддисидан бир кап қўғирмоч бўлиб, ёмон кунларни не ҳасратда ўтказишарди.* Н. Сафаров, Оловли излар. *Калла, бу — сўйилган ҳайвоннинг боши, ундан шўрвалар, яхна тамаддилар тайёрланади.* К. Маҳмудов, Ўзбек тансиқ таомлари. *Карамдан тайёрланган турли тамаддилар инсон саломатлигига жуда фойдали, уни бардам ва тетик қилади.* Газетадан.

Тамадди қилмоқ Бирор нарса еб олмоқ, озгина, енгилгина овқатланиб олмоқ. *Бир оз тамадди қилганларидан кейин, гапнинг мавзуси ўзгарди.* Ф. Мусажонов, Ҳиммат. -*Йигитали.. кўча беткайидаги кичкина кафед тамадди қилди.* ўзимиз ҳам тамадди қилиб олайлик, — деди Махсум пешин намозида ҳозирлик кўраётиб. С. Анорбоев, Оқсой.

ТАМАДДИЛАНМОҚ Енгил-елпи овқатланмоқ, бир оз овқатланиб олмоқ.

ТАМАДДУН [а. تمنن — маданият; цивилизация] эск. кт. қ. **маданият.** *Ҳаваскори тараққий ва тамаддун қаҳрамон ёшлар.* С. Хондайлиқий, Навбахор. *Туркияда .. жаҳоннинг икки буюк тамаддуни — Фарб ва Шарқ цивилизацияси учрашган.* Газетадан.

ТАМАДДУНЛАШМОҚ эск. кт. қ. **маданийлашмоқ.**

ТАМАКИ [а. تباك ёки ф. *тамако* < исп. tabaco] Йирик баргли ўтсимон ўсимлик ва шу ўсимликдан қуритиб тайёрланадиган чекимлиқ. *Аччиқ тамаки. Кучсиз тамаки. Тамаки маҳсулоти. Тамаки чекмоқ.* ■ 1958 йилда 120 гектарга тамаки экилган эди. «Муштум». *Эмин унга тамаки халтасини узатди: -Хуморингни ёз, ошнам, қўлбола тамаки.* И. Раҳим, Чин муҳаббат.

ТАМАКИДОН Тамаки солиб қўйиладиган идиш. *Тамакидондан тамаки олмоқ.*

ТАМАКИЗОР Тамаки экилган ер, майдон.

ТАМАКИКОР Тамаки экувчи ва етиштирувчи деҳқон ёки хўжалиқ. *Ургут тамакикорлари режани ўз вақтида бажардилар.* Газетадан.

ТАМАКИКОРЛИК Тамаки етиштириш, тамакичилик.

ТАМАКИФУРУШ Тамаки савдоси билан шуғулланувчи киши.

ТАМАКИЧИ 1 айн. тамакикор.

2 айн. тамакифуруш.

ТАМАКИЧИЛИК айн. тамакикорлик. *Совхоз тамакичиликдан «атиғи» 380 минг сўм зарар қилди.* «Муштум».

ТАМАКОР кам қўлл. айн. **тамагир.** *Тамакор одам.* ■ *Унинг [мулланинг] тамакор кўзлари юзимизга эмас, чўнтагимизга қаралган эди.* Газетадан.

ТАМАЛ [а. تملی — доимо, ҳамиша; чидам, бардош] эск. кт. Неғиз, асос, пойдевор. *Тамал солмоқ (қўймоқ).* ■ *Ҳақиқат тамалини қулатмоққа кўтарилган қўлларни кесмоқ зарур.* Ойбек, Навоий.

Тамал тоши Пойдевор, асос, фундамент. *Тамал тошини қўймоқ.*

ТАМАЛАНМОҚ кам қўлл. Тама қилмоқ, умидвор бўлмоқ.

ТАМАЛЛУҚ [а. تملق — хушомад, сермулозаматлик; ялтоқилиқ] эск. Ҳаддан ортиқ такаллуф кўрсатиш, сермулозамат бўлиш; хушомад қилиш, ялтоқилиқ, тилёғламалиқ. *Икки меҳмон тарафларидан ўзига қилинган фавқуллодда тамаллуқ ва мулозамат, табиий, уни ўйлашга мажбур қилади.* А. Қодирий, Обид кетмон.

ТАМАННО [а. تمنى / تمنّا — тилақ, истак, орзу] Ноз-ишвали ҳаракат. *Ёр таманноси.* ■ *Ажойибдир таманноси, таманносин бор маъноси.* «Кўшиқлар». *Ўз хуснига ўзининг рашики келаётгандай, таманно билан сочини тараяпти.* С. Сиёев, Ёруғлик.

Таманно қилмоқ (ёки этмоқ, айламоқ) 1) ноз-ишва, карашма қилмоқ. *Бувижон, кўз эркакларга гўзалликни таманно қилиш учун берилган,* Мирмуҳсин, Югурдак; 2) эск. истамоқ, тиламоқ, сўрамоқ. *Кўз нуримизнинг дуои жонини субҳи шом.. таманно этмоқ-дамиз.* А. Қодирий, Ўтган кунлар; 3) орзу қилмоқ. *Қайга мен бошим урай ҳам қайда гавго айлайин, Қайси бир лутфу карамларни таманно айлайин.* С. Абдулла.

ТАМАННОЛИ Ноз-ишвали, карашмали. Таманноли нозанин. Таманноли кўзлар. Таманноли қилиқлар.

ТАМАЧИ айн. **тамагир**. Тамачи одам.

ТАМБА Эшикни бекитиш учун унинг орқасидан тиралган ёки тираладиган тахта, ёғоч ва ш.к. Эшикка тамба қўймоқ. ■ Зулфизар катта дарвоза томон отилди. Тамбасини олиб ташлаб, ўзини қалишзор қўйнига урди. К. Яшин, Ҳамза.

ТАМБАЛ с. т. Танбал. Сен тамбалга берган томоғим ҳаром бўлсин.. Ж. Абдуллахонов, Тўфон.

ТАМБАЛАМОҚ Тамба қўймоқ, тамба тираб бекитмоқ. Дарвозани тамбаламоқ. ■ Кўча эшикни ичидан тамбалаб, ҳовли томон юрди. Д. Нурий, Осмон устун.

ТАМБУР [фр. tambour – гумбазнинг асос (айлана) қисми; доира] **1** т.й. Темир йўл вагонининг кираверишдаги даҳлизчасимон бўлмаси. Алоҳида вагонга қўшимча соқчилар қўйди. Ўзи ҳам шу вагон тамбурига кўчиб ўтди. Ҳ. Фулом, Машъал.

2 архит. Биноларнинг ташқи эшиклари олдига қурилган кичик хона, даҳлиз.

ТАМИЗ [а. تميين – имтиёз бериш; фарқлаш; соғлом фикр; фаҳм-фаросат] Ўз билиги, ақли, фаросати билан тегишлича иш тутиш қобилияти; фаҳм, фаросат. Тамизи йўқ одам. ■ -Тамизи бўлса, ўшанинг ўзи калтак, – деди-да, бирпас қулоқ бериб ўтирди. Р. Файзий, Ҳазрати инсон. Бу факт ва далиллар олдида ўжарлик қилиш ақл ва тамиздан эмас. А. Ҳақимов, Илон изилан.

ТАМИЗЛИ Ўз билиги, ақли, фаросати билан тегишлича иш тутувчи; фаҳмли, фаросатли. Тамизли бола. ■ Ҳали ҳеч ким кўрмасан бўлса ҳам, Мухторхон домла ёқтиргани учун, жуда ақлли, тамизли аёл чиқиши муқаррар бўлган келинни ҳамма ғойибона яхши кўриб қолди. А. Қаҳҳор, Тўйда аза.

ТАМИЗСИЗ Тамизи йўқ; бетамиз, бe-фаросат. Тамизсиз одам.

ТАМКИН [а. تمكين – мустаҳкамлаш; маҳкамлаш; имконият, ҳақ-ҳуқуқ бериш] **1** Салобат, савлат, савлатлилик.

2 Сабр, қаноат; оғирлик, вазминлик. Жангларда зафардор – Халқимга бўлиб ёр, Ҳар ишда мададкор, Тамкину қарорим. Ҳабибий. -Кўрқманг, – деди Асрорқул тамкин овозда; у сиртдан вазмин кўринарди. Н. Қиличев, Ёронгул.

ТАМЛИ Тами яхши; тотли, мазали. Тамли овқат. ■ Биринчи марта ўз меҳнатим.. билан тайёр бўлганиданми ёки ҳаддан ортиқ очикқанимданми, ҳар ҳолда, у кунги кўзиқорин қовурдоғи гўшт қовурдоғидан ҳам тамлироқ туюлди. С. Айний, Эсдаликлар. Бу Амударёнинг тамли балиғи, Балиқнинг лаққаси, ўбдан ёғлиғи. Миртемир.

ТАМОЙИЛ [а. تمایل – тебраниш, чайқалиш; ўзгариб туриш; ўзгарувчанлик; мойиллик] эск. кт. **1** Майл, мойиллик. Ваҳший халқларда қонхўрликка тамойил зўр бўлади. Бу – шубҳасиз ҳақиқат! Ойбек, Танланган асарлар.

2 Бирор соҳада тартиб, қоида тусини олган нарса, тадрижий йўналиш. Халқ афсоналарида реалистик тамойил шу тарзда тобора кучайиб борди. «Фан ва турмуш». ..бозорларимизда ўша азалий удумларимизни, тамойилларимизни тиклаш, бозорни миллий қадриятларимизнинг кўзгуси сифатида номён қилиш лозим. Газетадан.

ТАМОМ [а. تمام – тўлиқ, мукамал; охир, интиҳо, ниҳоя] **1** Охир, поён, ниҳоя. Иш тамомига етди. Ҳикояни тамомига етказмоқ.

Тамом бўлмоқ **1)** охирига, поёнига, ниҳоясига етмоқ, тугамоқ. Дарс тамом бўлди. ■ -Олтин ўтда билинади, – деди Собирахон, – уруш тамом ҳам бўлар, ўйин-кулги учун тўпланганимизда, бу кунлар эртақдай бўлиб ҳам қолар. А. Қаҳҳор, Хотинлар; **2)** битмоқ, қўлдан чиқмоқ, тайёр бўлмоқ. Қурилиш тамом бўлди; **3)** ишлатилиб, сарфланиб, истифода қилиниб олоқ бўлмоқ, тугамоқ. Пул тамом бўлди. Вақт тамом бўлди. ■ Занжирли реакция ғоят даражада тезлик билан ривожланади ва нарчаланувчи материалнинг ҳаммаси тамом бўлгунига қадар давом этади. «Фан ва турмуш»; **4)** кўчма дард-алам тортиб, кулфат чекиб, куйиб ёки ёниб адо бўлмоқ, тугамоқ. Майли, болам, бошга тушганни кўз кўрар, дейдилар. Мени қўйиб, ўзингни ҳам бир ўйлаб қўй. Бу ташвишлардан тамом бўлдинг-ку, болам! О. Ёқубов, Айтсам, тилим куяди, айтмасам – дилим; **5)** синмоқ, абгор бўлмоқ. Еган еб кетди. Ичган ичиб кетди. Аммо Абдувосеъ шу битта тўй билан тамом бўлди. «Муштум». **Тамом қилмоқ** **1)** охирига, поёнига, ниҳоясига етказмоқ. Аҳмедов капсанчиларни колхоз тузишга чақириб, сўзини тамом қилди.

Савол-жавобга ўтилди. А. Қаҳҳор, Қўшчинор чироқлари; 2) битирмоқ, қўлдан чиқармоқ, тайёр қилмоқ. *Мақтаб қурилишини сентябрғача тамом қиламиз;* 3) ишлатиб, сарфлаб, фойдаланиб одоқ қилмоқ; тугатмоқ. *Ресурсларни тамом қилмоқ.* ■ *Пул деданг — саноғи йўқ.. Санаб тамом қилиб бўлмайд.* М. Исмоилий, Фарғона т. о.; 4) ўқув юртида ўқиб чиқмоқ, битириб чиқмоқ, ўқув юртини тугатмоқ. *Университетни тамом қилган киши;* 5) кўчма адо қилмоқ. *Ўғлининг ташвиши кампирни тамом қилди;* 6) кўчма ўлдирмоқ. *Тўқсоновнинг мерганлик ҳаваси қўзиб, дарров Дадабойнинг елкасидаги сочма милтиқни олди-да, типирчилаётган итни бир отишда тамом қилди.* П. Турсун, Ўқитувчи; 7) кўчма синдирмоқ. *Битта тўй уни тамом қилди.*

2 Тамомила, бутунлай, батамом. *Тамом эдан чиқармоқ. Тамом ишонмоқ.* ■ *Элмурод маънос бир неча қадам босди.* «Йўқ, — деди ичида, — бу мен билган, мен синаган Фотима эмас. Энди ўзгариб, тамом бошқа бўлиб қолган». П. Турсун, Ўқитувчи. *Ярим кечага борганда, душман тамом ҳолдан тойиб, чекинишга мажбур бўлди.* А. Қаҳҳор, Олтин юлдуз. *Зайнаб ҳам тамом ипақларга кўмилиб ясанган..* А. Қодирий, Ўтган кунлар.

3 олам. Бутун, барча, тамоми. *Тамом халқ мажлисага йиғилди.* ■ *Юсуфбек ҳождининг Нормухаммад қушбегига юборган чопари Кировчи яқинида унга етган ва қушбегини тамом сипоҳлари билан Тошкентга қайтарган эди.* А. Қодирий, Ўтган кунлар. *..қалампирмунчоқни гулобга ивитишиб, келиннинг тамом баданига суртишар эмиш.* К. Яшин, Ҳамза.

4 кесим взф. Якунига етганлик, битганликни билдиради. *Тамом, хўжайин, ана, шай қилиб қўйдим.* К. Яшин, Ҳамза. *Шаҳзодадон эрига кўзларини ўқдек қадаб, тантанавор қараб тураверди. Бир зарб ўлса, тамом.* К. Яшин, Ҳамза.

5 юкл. взф. Таъкид, кучайтирувни билдиради. *Дадам ичиб келдим, тамом, дарров қилдан қийиқ чиқариб, ойишонимни дўппослашга тушарди.* Э. Раимов, Ажаб қишлоқ. *Шундан қўрқдим, тамом, ўлимдан қўрққани бўлади. Ўлимдан қўрққан киши қаҳрамон бўлолмайд.* А. Қаҳҳор, Олтин юлдуз.

Адойи тамом бўлмоқ қ. адойи. Гап тамом Бўлди, гап тугади, бошқа гапга ўрин йўқ. *Шу билан «гап тамом» дегандек.. сайр қилиш*

учун дарахтлар остидаги йўлдан ичкари томон йўналди. К. Яшин, Ҳамза.

ТАМОМАН рвш. Тўлиқ равишда; бутунлай, тўла, буткул. *Хатар тамоман йўқолди. Қарздан тамоман узилди.* ■ *Сафар бўзчи гинани тамоман кўнглидан ювиб ташлаган эди.* А. Қодирий, Меҳробдан чаён. *Қизнинг анор юзлари, тиниқ дудоқлари, нозик бели уни тамоман беҳуд этган эди.* С. Кароматов, Ҳижрон.

ТАМОМИ(Й) Ҳамма, барча, бари. *Тамоми(й) халқ майдонга йиғилди.* ■ *Фақат хотиннигина эмас, ер-сувни, тамоми давлат ва ашқол-дашқоллари билан тортиб олмоқчи.* У. Исмоилов, Сайланма.

ТАМОМИ(Й)ЛА рвш. Бутунлай, тамоман. *Аҳвол тамоми(й)ла ўзгарди.* ■ *Замира эса унинг тамомила акси.* С. Кароматов, Олтин қум.

ТАМОМЛАМОҚ 1 Охирига, поёнига, ниҳоясига етказмоқ. *Маърузани тамомламоқ.* ■ *Ҳожи ўздан ошириб сўзлаган бу сўзларини шу гап билан тамомлади.* А. Қодирий, Ўтган кунлар.

2 Битирмоқ, қўлдан чиқармоқ, тайёр қилмоқ. *Яна бир гайрат қилиб, ГЭСни битириб олсак, колхозчилар канални тамомлаб, сувни бизга келтириб берсалар, марра — бизники.* Ойдин, Мардлик — мангулик.

3 Ишлатиб, сарфлаб, фойдаланиб одоқ қилмоқ, тугатмоқ. *Маблагларни тамомламоқ. Захираларни тамомламоқ.* ■ *Қизиқ, биз пахта етилмай.. ҳосилни қарз-қурз, бўнак билан тамомлаймиз.* М. Исмоилий, Фарғона т. о.

4 Ўқув юртини битирмоқ, тугатмоқ. *Институтни тамомлашим билан орзум амалга оиди. Мен энди киноактрисаман.* «Муштум».

ТАМОШО [а. تماشى — бирга юриш, сайр қилиш] қ. **томоша.** Агар укалари Салимбойвачча ҳам улфатларини бошлаб чиқса, тамошонни унда кўрасиз. Ойбек, Танланган асарлар.

ТАМСИЗ Тами, мазаси йўқ; бемаза, тотсиз. *Тамсиз овқат.*

ТАМСИЛ [а. تمثيل — томоша, ўйин; ўхшаб кетиш; ўрнак, намуна олиш; мисол қилиб келтириш] ад. Мумтоз адабиётда: байтнинг биринчи мисрасида ифодаланган фикрга далил сифатида иккинчи мисрада ҳаётий бир ҳодисани мисол қилиб келтиришга асосланган бадийий санъат.

ТАМТАМ I 1 Қадди-қомати келишган ва зебо. У ниятига етди. Қишлоқнинг тамтам қизига уйланыпти. С. Аҳмад, Уфқ. *..ой қизлар, тамтам келинчақлар Ватан мудофаасига жўнашди..* Г. Нуруллаева, Юрак ёнмоғи керак.

2 кўчма салб. Ўзига, кийим-бошига зеб берган; башанг, олифта. *Номи Мўтти бўлса ҳам, кўп йигитларни лақиллатганидан «лўтти» деб ном олган бу қиз шаҳардаги энг тамтамларнинг бири экан.* С. Аҳмад, Мўтти. *Жуда олифта, тамтам йигит экан, шимимнинг тахи бузилмасин дебми, айвонга ҳам чиқмай.. курсида ўтириб, фотиҳа ўқибди.* Ҳ. Назир, Кўктерақ чироқлари.

ТАМТАМ II [фр. tam-tam < ҳинд. — товушга тақлид сўз] Катта мис баркаш шаклидаги, таёқча билан уриб чалинадиган мусиқа асбоби; гонгнинг бир тури. *Чўчима, раққоса! Тамтам сасидан.* Ҳ. Шарипов.

ТАМТАРОҚЛИ [ф. طمطراق — дабдаба, ҳашамат; серҳашамлик] Дабдабали, баландпарвоз. *Тамтароқли иборалар. ■ Паншев унинг тамтароқли сўзларини таржима қилгандан кейин, пристав мутаваллини қўлтиқлаб, тахт ёнига борди.* М. Осим, Элчилар.

ТАМУҒ эск. дин. Жаҳаннам, дўзах. *Оқни қаро деганлар ул тамуғга кирмишлар.* Аҳмад Ясавий.

ТАМШАНМОҚ I Бирор нарса еяётган, чайнаётгандек, оғиз очмай, лабларини қимирлатмоқ; оғзидагини тотиб кўраётгандек бўлиб, лабларини очмай чайнамоқ. *Элмурод қўл чўзиб, мошкичиридан жиндек оғзига солди-да, бўйинини қисиб, ерга қараган кўйи, секин тамшанди.* П. Турсун, Ўқитувчи. *Оғзидаги туршакни у лунжидан бу лунжига ўтказиб, тамшаниб, чайнаб ўтирарди.* Мирмуҳсин, Дорбозлар.

2 Тотигиси келиб, лаб-лунжини қимирлатмоқ. *Умида қуруқшаб бораётган оғзини очиб тамшанар.. эди.* Д. Нурий, Осмон устун. *Шайхнинг барзанги хизматкори мўлқўл таомни кўриб тамшанди.* С. Сиёев, Аваз. *Нормамаат хўрозқандга тўймаган боладай тамшаниб қолди.* «Ёшлик».

ТАМҒА I Нарса, мол, маҳсулот ва ш.к. ни ажратиш, ҳисобга олиш ёки уларнинг кимга тегишлилигини кўрсатиш учун қўйиладиган, босиладиган белги. *Фабрика тамғаси. ■ Оқопдан қараб турган Нормат*

уларнинг [самолётларнинг] қанотларидаги қизил юлдуз тамғаларини кўриб қолди. И. Раҳим, Чин муҳаббат. *Тошкент тамғаси босилган чинни буюмларни Ўрта Осиё республикаларининг барча хонадонларида учратиш мумкин.* У. Маърупов, Устоз.

2 Қадимда маҳбусларнинг танасига белги қўйиш, босиш учун қиздириб ишлатилган асбоб ва шу асбобни босишдан ҳосил бўладиган белги, из. *Боланинг билагига ёпишиб қолган тамгани Наби полвон, эритилган сурғуч устига босилган печатдек, зўрға узиб олди.* С. Айний, Қуллар.

3 От, мол ва ш.к. нинг танасига ёки тана аъзоларидан бирига белги босиш учун қиздириб ишлатиладиган асбоб ва шу асбобни босишдан қоладиган белги, из. *Отга тамга босмоқ. Қўйнинг қулоғидаги тамга.*

4 Очиш, бузиш ва ш.к. га қарши қўйиладиган белгили нарса, сурғуч. *Ҳайдарқул оддий ўғирлардан эмас, у мен тамга босиб қўйган чошдан арпа ўғирлаган.* С. Айний, Қуллар.

5 айн. герб. *Саодат беҳисоб тангалар орасида ўз тангасини таниб турибди; унинг.. тамғаси сув остида Саодатнинг кўзига ўзгача ярқирамоқда.* И. Раҳим, Ихлос.

6 кўчма Нимадандир қолган, унинг белгиси бўлган нарса, асар, из. *Азоб-уқубатлар тамғаси. ■ Уларда [тарихий обидаларда] кўп замонлар ва динларнинг тамғаси бор.* 3. Акрамов, Ҳиндистон лавҳалари. *Хотинининг истараси иссиқ чехрасига ниманингдир даҳшати қора тамғасини босиб кетган эди.* М. Исмоилий, Фарғона т.о. *Менга таниш бўлган хонадонлар, девор, томи қулаган уйлар.. Бу урушнинг бадбуруш тамғалари..* Н. Сафаров, Оловли излар.

7 кўчма Қилмиш, хатти-ҳаракат ва ш.к. га кўра тақилган ёрлиқ, белги. *Лавнат тамғаси. ■ Орада аллақанча давр бу ажойиб анъанага эскилик тамғаси босилиб, унутилаётган эди.* Н. Ҳайиткулов, Ер тафти.

8 тар. Қадимда четдан киритилган молга белги солишда олинган бож.

Тилингда тамга босилганми? Тилинг йўқми? Нега гапирмайсан?

ТАМҒАДОП I тар. Қадимда четдан киритилган молга тамга босиш ва бож олиш билан шуғуллианган лавозимли шахс.

2 Тамга босилган, тамғали.

ТАМҒАЛАМОҚ Тамга босмоқ, тамга солмоқ. *Молларни тамғаламоқ. ■ Яхшиги-*

на қўриқланг, хабардор бўлинг, элаб чошлагандан кейин тамғалоб, менга хабар беринг. Фурсатини топиб келиб, биргалашиб хирмонни кўтарамиз. С. Айний, Куллар.

ТАМҒАЛИ 1 Тамға босилган, тамға солинган. Қизил ярим ой тамғали санитария аравачалари, машиналар.. И. Раҳим, Чин муҳаббат.

2 айн. гербли. Дукондорлар унинг кафтига аллақандай тамғали марка пулни жирканиб ташлар, ё бўлмаса, кўзларини ўқрайтириб, қўлларини силтаб, «кет!» деб жеркиб берардилар. П. Турсун, Ўқитувчи.

ТАН [ф. *تن* — гавда, бадан, тана] **1** Одам гавдасининг кўкрак қафаси ва қорин бўшлиғидан иборат қисми: тана. Бир куни унинг бошини танидан жудо қилсалар ажаб эмас.. Мирмуҳсин, Меъмор. *Киши танидаги аъзоларнинг ҳам қулоғи бор: ўзининг бардамлигини эшитган аъзолар яна соғ туриб, хизматни бажараверади.* Мирмуҳсин, Меъмор.

2 Кишининг бутун борлиги, вужуд. *Соғ танда соғ ақл. Мақол. Тан соғлиқ — туман бойлик. Мақол. —Худоё тавба денг, жон бошқа, тан бошқа, — деди домла.* П. Турсун, Ўқитувчи. *Аноргулнинг қўлидаги дутор «Ўртоқлар» куйини танларга ларза бериб тарона қилди.* А. Қодирий, Ўтган кунлар. *Ахир тут фақат қорин тўйдирадиган таом бўлмасдан, киши танига дори—дармон ҳамдир.* Н. Сафаров, Оловли излар.

3 Тана, вужуднинг сирт қисми; бадан. *Гард юқмасин танинга, Лой тегмасин баринга.* Қ. Муҳаммадий. *Бу гапни эшитиб, Элмуроднинг тани жимирлаб кетди.* П. Турсун, Ўқитувчи. *Йигит унинг оқ мрамардек яланғоч танига боқмай, ерга қаради.* Мирмуҳсин, Йўқолган жавоҳир.

4 кўчма Ўлик тана; жасад. *Солдат тани, қўшни взводдан шекилли. Снайпернинг ўқи калласига тегибди, қора қонга бўялиб ётибди шўрлик.* Т. Рустамов, Мангу жасорат. *Мазлумларнинг танидан Қурган саройлар.. Ғамда ўтди халқ умри Кўп йиллар, ойлар.* Ғайратий.

5 Шахс билдирувчи сўзлар ёки эгалик шаклидаги сўз билан қўлланиб, тегишлилик, улуш каби маъноларни билдиради. *Ҳар ким ўз танини олди. Харажатнинг ярми менинг таним. Мен ҳам тўртдан бир тан.* ■ -Бўпти, Даврон, зиёфат менга тан, — дедим. -Ҳаммасини ўзим пишираман. П. Қодиров, Қадрим.

6 Дастлабки баҳо, таннарх; дастлабки маблағ, сармоя. *Танидан юз сўм камига сотмоқ. Еб-ичиб, танини қилмоқ. ■ Муҳаммадражаб саккиз минг сўмни ойига ўн уч процент фойда бериш шартин билан олиб, икки ойдан бери на фойдасини беради, на танини.* А. Қаҳҳор, Сароб.

7 кўм. *взф. кам. қўлл.* Томон, ён. *Ким зўр бўлса, жазосини бераман, Камбағал Назарнинг тани бўламан.* Ф. Йўлдош, Маматкарим полвон.

Бир жон, бир тан бўлмоқ қ. жон. Тан бермоқ **1)** ишонч ҳосил қилмоқ. *Илгари мен, очиги, буларнинг қўлидан шунчалик иш келишига инонмаган эдим, энди тан бериб қўйдим.* Ҳ. Назир, Маёқ сари. *..унинг билмаган нарсаси йўқлигига ҳамма тан бериб улгурган эди.* А. Мухтор, Туғилиш; **2)** қойил бўлмоқ, қойил қолмоқ. *Ўқтам кўзларини қисиб, бошини тебратиб, қовунни мақтади: -Дидингизга тан бердим. Ойбек, О. в. шабадалар. Ажойиб шахар Бокун бунёд этган халққа ва унинг истеъдодига тан бердик.* Н. Сафаров, Оловли излар. **Тан олмоқ** **1)** бўйнига олмоқ, иқрор бўлмоқ. *Ўз хатоларини тан олмоқ. ■ Адолат ҳар куни кечқурун Усмонжонни кўриш орзусида уйига ошиқар, уни соғинар, лекин бунини тан олишга ўздан-ўзи уяларди.* С. Зуннунова, Гулхан; **2)** танимоқ, ҳисоблашмоқ; эътироф қилмоқ. *Зарифа унча-мунча йигитни тан олиб яқинлашишга шошилмасди.* С. Кароматов, Олтин қум. *Раисни тан олмай қўйишларига ҳам сал қолди.* Ш. Рашидов, Бўрондан кучли. **Танини бағишламоқ** Тегишга, никоҳига ўтишга рози бўлмоқ. *Унинг никоҳига танини бағишлаган одам киради.. Мен эмас.* К. Яшин, Ҳамза. *Бормай туриб бағишласин танини, Сўнгра кўрсин хотин меҳрибонини.* «Гулшанбоғ». **Тақдирга тан бермоқ** Қисматидаги бирор нарсага, ҳолатга рози бўлмоқ, кўнмоқ. *Яраш полвон кекса момоларнинг тилига қириб, хотинини туркона муолажа қилдирди. Фойда чиқмади. Кейин эр-хотин тақдирга тан бердилар.* С. Сиёев, Отлиқ аёл.

ТАНА I [ф. *تانه* — гавда, бадан, тан; поя] **1 айн. тан 1—4.** *Эрта кўклам бўлгани учун, баҳор қуёши таналарга ёғдай ёқади.* Э. Раимов, Ажаб қишлоқ. *Бир қилич зарби билан бошини танасидан жудо қилди.* П. Қодиров, Юлдузли тунлар. *Шундан кейин бир оз танаси яйраб, таранг тортилган асаблари бў-*

шашиб, «Хайрият!» деб қўйди. К. Яшин, Ҳамза. Чопиб бордим қошига, Сулайиб ётар танаси, Олти газ нари жойда Вафодорим калласи. «Ойсулув».

2 Жониворларнинг жисми, жуссаси. Илоннинг қандай сув ичишини камдан-кам кўриш мумкин. У танасини гоҳ шишириб, гоҳ пучайтириб, оғир нафас оларди. «Фан ва турмуш».

3 Дарахтнинг, ўсимликнинг таг, поя қисми. Ҳовузнинг тўрт томонида йўгон-йўгон қайрағочлар, таналари қулочга сиғмайди. Ж. Шарипов, Хоразм.

4 тех. Турли асбоб, машина ва ш. к. нинг бўлакларини тутиб турувчи қисми. Краннинг танаси.

Тананга ўйлаб кўр (ёки қара) Яхшилаб ўйлаб, муҳокама, мулоҳаза қилиб кўр. Жаҳлимдан тушганимдан кейин шундай танамга ўйлаб қарасам, бечора ўртоғимдан унчалик қаттиқ гина қилишининг ҳожати йўқ экан. А. Қаҳҳор, Хотинлар.

ТАНА II [ф. تنه] Бир-икки ёшли ургочи бузоқ. Ҳа, ўша йили дадам билан колхоз таналарини боқдик. С. Анорбоев, Йўлда йўлдош бўлганлар. Кетаётир навкарлар Сўна қувган танадай. «Ойсулув».

ТАНАВОР [ф. تناور — тўла, бўлиқ, семиз] Пойабзалнинг бошлиғи ва қўнжи учун ишлатиладиган тери ва ундан бичиб олинган андоза. ..косиблар ҳафта давомида ўзлари тиккан кавуш, маҳсиларини сотиб, энг аввал кўнчилардан танавор сотиб олишарди. Газетадан. Москванинг чармфурушлик бозорида тагчарм бошқа растада, танавор чарм бошқа растада сотилишини гапириб берди. М. Осим, Элчилар. Агарда минг тўққиз юз йигирманчи йиллардаги унинг бозордан танавор тополмай, ишсиз, оч қолган вақтларидаги аҳволи руҳиясини хотирласак, унда советлар ҳокимиятига қарши бир кек туғилган даврига ҳам туртишиб ўтамиз. А. Қодирий, Обид кетмон.

ТАНАЗЗУЛ [а. تنزل — ўзини паст тутиш, тавозели бўлиш; тубанлашиш] Орқага қараб кетиш; инқироз, тушкунлик, регресс. Иқтисодий таназзул. Таназзулга тушмоқ. Таназзулга юз ўғирмоқ. ■ Бу иш тезда бартараф этилмаса, салтанат обрўсига путур етади, таназзулга олиб боради, деб ўйлардилар. Мирмуҳсин, Меъмор. Чунки ахлоқ бўлмаган жойда маънавий таназзул бошланади.

Газетадан. Бухоро амири Саидолимхон ҳукмронлик қилган давр.. мамлакат хўжалиги издан чиқиб, таназзулга юз ўғирган эди. Газетадан.

ТАНАКОР [ф. تَنَكَّار — танакор, бура] **1** Бор кислотасининг натрийли тузи (сир тайёрлашда, кимёвий идиш ва шишалар ишлаб чиқаришда, металлларни кавшарлашда ишлатиладиган шишасимон тиниқ кристалл модда).

2 кўчма Бирлаштирувчи энг зарур нарса ҳақида. Севги муқаддас нарса. Оиланинг тотув, ширин бўлишига у танакор бўлсин. С. Нуrow, Янгича тўйлар.

ТАНАФФУС [а. تَنَفُّس — нафас олиш; нафас, дам] **1** Дарс, иш, машғулот ва ш. к. орасида бериладиган қисқа дам. Ўқувчилар танаффусга чиқди. Танаффус элон қилмоқ.

■ Бу сукут боксёрларнинг шиддатли раундлари ўртасида нафас ростлашга бериладиган танаффусга ўшарди. Ф. Мусажонов, Ҳиммат. Эрталаб қуёш билан баравар туриш, қош қорайгунча иш. Бир маҳал овқатга танаффус. И. Раҳим, Чин муҳаббат.

2 кўчма Иш-ҳаракат, воқеа-ҳодисалар ўртасидаги узилиш, тўхташ бўлган вақт. У ашулаларни танаффус қилмай айтарди. «Ёшлик». Бир оз танаффусдан сўнг программада.. хоккей ўйини кўрсатила бошланди. Ў. Усмонов, Сирли соҳил.

ТАНАЧА I **Тана II** с. кичр. Танача боқмоқ. ■ Бизнинг даргоҳга яқин жойда икки яшар чамали бир ола танача бебошвоқ ўтлаб юрар эди. Ф. Фулом, Шум бола.

2 физиол. Кичкина, фақат микроскоп орқали кўрса бўладиган жисм, хужайра. Оқ таначалар. Қизил қон таначалари. ■ Қон — ичида жуда кўп қизил қон таначалари бўлган тиниқ, деярли рангсиз суюқликдан иборат. «Анатомия».

3 бот. Ниш; ниҳол.

ТАНБАЛ [ф. تَنبَل — эринчоқ, ялқов] Ўтакетган дангаса, ялқов. Танбал одам. ■ «Умр доно учун жуда қисқа, танбал учун керагидан ортиқ узун! Одам бўлсанг, шу қисқасини танла!» деб матал ўқиди. Шуҳрат, Жаннат қидирганлар. Дала шийпони қурилишига бошлиқ бўлиб биркитилган киши анча бўшанг ва танбал эди. Ш. Рашидов, Бўрондан кучли.

ТАНБАЛЛАШМОҚ Танбал бўлиб, ялқовланиб бормоқ, танбал, ишەқмас бўлиб

қолмоқ, дангасалашмоқ. *Бекорчиликка ўрганиб танбаллашиб қолибсан.*

ТАНБАЛЛИК Ишёқмаслик, дангасалик. Унинг отаси ҳам.. танбаллик, совуққонлик кишини охири хароб қилишини ўғлига такрор-такрор айтар эди. Мирмуҳсин, Меъмор. *Пахтакорга танбаллик ярашмайди, ука.. А. Муҳиддин, Чап чўнтак.*

ТАНБЕҲ [а. تنبيه — уйғониш, жонланиш; огоҳлантириш; эслатма, изоҳ] **1** Ножўя хатти-ҳаракат учун берилган таъбир, койиш, огоҳлантириш ёки жазо. *Енгил танбех. Қаттиқ танбех. Танбех бермоқ. Танбех олмоқ.* ■ *Кекса боғбоннинг самимий сўзлари ҳам таъна, ҳам танбех эди. Ш. Рашидов, Бўрондан кучли. Тоғанинг танбехларига қарамай, жиян ўз йўлидан қайтмади. «Шарқ юлдузи». — Биз текканимиз йўқ-ку, ота! — деди болалардан бири, чолнинг танбехини қаттиқ олиб. Ҳ. Назир, Сўнмас чақмоқлар.*

Танбех бермоқ Койиш, ўғит тарзидаги гап-сўз айтмоқ. *Ҳашира танбех бериб, бошимни ёстиққа қўйди. «Гулдаста». Бошлиқ бўлганингиздан кейин гапириш эмас, танбех беришга ҳам ҳаддингиз сиғади.. С. Нуоров, Нарвон. Танбех емоқ айн. танбех олмоқ. Танбех олмоқ **1)** танбехли гап-сўз эшитмоқ; **2)** иш-хизматда оғзаки ёки ёзма тарзда расмий жазо олмоқ. *Мен.. саҳар-мардонда тепани айланиб чиқаман деб, командирдан қаттиқ танбех олган эдим. Т. Рустамов, Мангу жасорат. Танбехини бермоқ* Жазо бўладиган иш ёки гап-сўз қилмоқ; жазосини (жаззасини) бермоқ. *Манман кишининг бунда бўйнин суғуриб, Агар кўрсам, танбехини бераман. «Баҳром ва Гуландом». Танбехини емоқ* Адабини, таъзирини емоқ. *Одам тиқилинч бўлган бу вагонда жой тополмасдан, эшикнинг олдида ўтириб, тоза танбехимни едим. М. Муҳаммаджонов, Турмуш уринишлари. Собирнинг қиёфасида танбех еб, тавба қилиш эмас, ўз истаидан қайтмаслик ҳисси барқарор эди. Ф. Мусажонов, Ҳиммат.**

2 Камчилик, хато кабиларни қайд этувчи гап-сўз, фикр-мулоҳазалар. *..бу ишдан ҳам айрилиб қолмай, деб астойдил ишлади, хўжайинидан бирон танбех эшитмади. Ё. Хаимов, М. Раҳмон, Ҳаёт-мамот. Уларнинг маслаҳати, йўл-йўриги ва танбехлари аксарият ҳолларда ўринли бўлиб чиқаётганлиги бежиз эмас. Газетадан.*

3 Иш-хизматдаги тартиб-қоидага бинон бериладиган расмий жазо. *Ишдан кечиккишлари учун танбех олмоқ. Тартибга риоя қилмаганлиги учун командир танбех эълон қилди.*

4 *спрт.* Ўйин қонун-қоидасига зид хатти-ҳаракат учун ҳакам томонидан айтилган гап, сўз; огоҳлантириш.

ТАНБЕҲЛАМОҚ **1** Танбех бермоқ, адабини, таъзирини бериб қўймоқ, койймоқ.

2 *Огоҳлантирмоқ; уқтирмоқ. Уни йиқилган йўғон дарахтлар орқасига ўтқазар, лабларини қисиб, қўллари билан танбехларди: «Йиғлама!» Ойбек, Қуёш қораймас. Ёз кунлари [Ўзбек ойим] айвоннинг тўрига ясланиб, Ҳасаналининг хотини бўлган Ойбодоққа, чўри қиз Ҳанифага хамирни ачитмасликни, паловни қирмоч олдирмасликни танбехлабгина ўтирар эди. А. Қодирий, Ўтган кунлар.*

ТАНБУР [а. طنبور — торли чертма мусиқа асбоби; уд] Дастаси узун, уч ёки тўртта сим торли, нохун билан чертиб чалинадиган мусиқа асбоби. *Танбур чалмоқ. Танбурни созламоқ.* ■ *Барот полвон «додхоҳ келибди шекилли», деб самовар томонга қараган эди, дутор, танбур, гижжак, най, доира кўтариб келаётган машишоқларга кўзи тушди. М. Исмоилий, Фарғона т. о.*

Эшакнинг (ёки хўкизнинг) қулоғига танбур чертмоқ (ёки чалмоқ) Гапни уқиб олмайдиган (олмаган) шахсга нисбатан қўлланади. *—Хўкизнинг қулоғига танбур чертдимми, нодон хотин! — қизариб кетди Ёрмат. — Кимга бўлар эди, бой отам ўзига сўраяпти. Ойбек, Танланган асарлар. Йиғилишдаги гаплар хўкизнинг қулоғига танбур чертгандай бўпти-да.. А. Муҳиддин, Фанишер.*

ТАНБУРЧИ Танбур чалувчи созанда. *Моҳир танбурчи.* ■ *Алоҳида уйлارда ёки мактаб боғида [домла] улар билан бир лаганда ош еб, дуторчи, танбурчи ва ашулачи йигит-қизларни шу ерга чақиртириб, машат қилишга берилди. П. Турсун, Ўқитувчи.*

ТАНВИН [а. تنوين — «н»лаштириш, айрим арабча сўз (от)лар охирини «н» билан айтиш] Араб ёзувида ҳарфнинг устига ёки остига қўйиладиган қўш зер, қўш забар, қўш пеш.

ТАНВИР [а. تنوير — ёритиш; маориф, маърифат; гуллаш] *эск. кт.* Маърифат, маориф, оқартирув. *Матбуотнинг вазифаси халқни танвир ва тўғри йўлга ташвиқ бўлса.. А. Қодирий, Кичик асарлар.*

Танвир этмоқ Ёритмоқ. Мен мантиқ.. фалсафа каби инсон закосининг муқаддас машъаллари билан талабаларнинг кўнгилларини танвир этаман. Ойбек, Навоий.

ТАНГ [ф. تنگ — тор, сиқик, зич] 1 Оралиги, эни, ҳажми етарлича қатта бўлмаган; тор, чоғ. Танг йўлак. ■ Тошни тошларга уриб, Тарқатиб қўрқинч оҳанг, Йўли унинг поёнсиз, Гўё сахро кўкси танг. Ғайратий. Вақт танг, далада иш тигиз. Ойбек, Танланган асарлар.

2 Кутулиш, ҳал қилиш ёки иложи, давосини топиш жуда қийин бўлган, ғоят оғир, мушкул, ночор. Танг аҳвол. Танг вазият. Беморнинг аҳволи танг. ■ Уканг Курбон оқсоқол тегирмонида ишлаб туради. Рўзгордан бир қадар сиқилишган. У ёғини суршитирсанг, қишлоқда ҳамманинг рўзғори танг. Ойбек, Танланган асарлар. Ишнинг энг танг жойи — қум билан шағалнинг етишмаслигида. А. Мухтор, Туғилиш. Ҳаёт-мамот урушининг танг дақиқаларида Эргаш меҳрибон онасининг гапларини эслади. Н. Сафаров, Оловли излар.

Танг қолмоқ (ёки қотмоқ) Ҳайратда қолмоқ. Зулайхонинг осойишта юзига қараб танг қолдим. У хатарли одам билан гаплашиб юрганини бутунлай сезмаётганга ўхшарди. П. Қодиров, Қадрим. «Ҳар қалай, уйғотай», деди яна она ва ўғлининг бошига эгилди, эгилди-ю, танг қотди. И. Раҳим, Чин муҳаббат.

ТАНГА 1 тар. Бухоро хонлигида 15 тийинга, Кўқон хонлигида 20 тийинга тенг бўлган кумуш пул. Бир танга (йигирма тийин). Ярим танга (ўн тийин). Туя бир танга — қани бир танга, Туя минг танга — мана минг танга. Мақол. ■ -Битта мушак уч мири, — деди Туробжон, — юзта мушак отилса.. биттангадан юз танга. Бир миридан кам — етмиш беш танга бўлади. А. Қаҳҳор, Анор.

2 Умуман, қоғоз пулдан бошқа, олтин, кумуш, мис кабилардан зарб этилган пул. Олтин (тилло) танга. Кумуш танга. Танга ва қоғоз пуллар.

3 Олтин, кумуш ва уларнинг қоришмасидан зарб этилган пул. қиёсланг: чақа. ..тошкентлик мардикор иштонининг липпасига қистирилган бўз халтачани — ҳамённи олиб, танга, чақа аралаш бир сўмни санаб тўкди. Ойбек, Танланган асарлар. Охирида маддоҳ

йиғилган танга ва қора пулларни бир шол қопчага солди. С. Айний, Куллар.

4 Қозоғистон Республикасининг асосий пул библиги.

5 Балиқ терисини қошлаб олган қаттиқ майда тўгаракчалар. Балиқнинг тангаси. Балиқ тангасини пичоқ билан тозалармоқ.

6 кўчма Йилтироқ тангасимон нарса ҳақида. Чойхоначи Дадамат унда-мунда кўёш тангалари йилтираган тоза, текис саҳнга миришкорлик билан сув сепди. Ойбек, О. в. шабадалар. Азамат дарахтларнинг япроқлари оралаб ерга тўкилган ойнинг оппоқ тангаларига ажиб бир завқ билан тикилар эди. С. Аҳмад, Қадрдон далалар.

ТАНГАДАЙ, -дек 1 Танга ўлчамидек, кичик. Супа ҳам анча салқин бўлиб, кечгача тангадек ерга кўёш тушмасди. Ш. Рашидов, Бўрондан кучли. [Заргаров:] Йўқ, йўқ! Менинг феълимни биласан-ку: жаҳлим чиқса, тангадай жанжални ғалвирдай қиламан-қўяман. А. Қаҳҳор, Оғриқ тишлар.

2 Танга каби, тангага ўхшаш. Сўзни тангадай жанралашиб сўзлашга устасиз.. Ойбек, О.в. шабадалар.

ТАНГАЧА 1 Танга с. кичр.

2 кўчма Майда танга шаклидаги йилтироқ нарсалар ҳақида. Ер бетига осмондан Куплаб тушар тангача, Будир қишининг зийнати: Ҳаммаёқ оқ тонгача. З. Диёр.

3 айн. танга 5.

ТАНГЕНС [лот. tangens — тегиб турувчи] мат. Тўғри бурчакли учбурчакда ўткир бурчак қаршисидаги катетнинг бошқа катетга нисбатидан иборат тригонометрик функция.

ТАНГИ [ф. تنگی — торлик, сиқиклик, камбарлик] геогр. Икки тоғнинг остки туташган ери; тор дара.

ТАНГЛАЙ Оғиз бўшлиғининг юқори девори; қаттиқ ва юмшоқ танглайдан иборат бўлиб, оғиз бўшлиғини бурун бўшлиғидан ажратиб туради. Қаттиқ танглай. Юмшоқ танглай. Тили танглайда тегизмоқ.

■ Секин [шафтолининг] пўстини арчсанг, оғзинга солиб, тилинг билан танглайинга боссанг-у, сувини қулт-қулт ютсанг. А. Қаҳҳор, Кўк конверт.

Танглайи тақиллаб кетди ёки танглайи қуриди Ортиқ сувсаб, томоғи қақраб кетди. [Қудратнинг] Лаблари қовжираган, танглайи қуриган, ранглари ўчган эди. З. Фатхуллин,

Сўнмас юлдуз. **Танглайини кўтармоқ** (ёки босмоқ) *эти.* Чақалоқнинг танглайини бош-малдоқ билан босмоқ. **Танглайини.. билан кўтарган** Бирикма таркибидаги «билан» кўмакчиси билан боғланган сўз аңглатган нарса, гап-сўз (уни қилиш, айтиш, қўллаш) шахсга ёшлиқдан одат эканлигини, ёшлиқдан теккан «касал» эканини билдиради («қўндокда теккан» ибораси маъносига яқин маъно билдиради). *Унинг танглайини пул билан кўтарган. Танглайини сўкиш билан кўтарган* (Кўп сўкинадиган, сўкиниб гапирадиган шахсга нисбатан қўлланади). **Танглайини тақиллатмоқ** Танглай билан тил орасидан тақиллаган овоз чиқармоқ (хайрат, инкор ва ш.к. маънолар ифодалаш учун). *– Ҳеч кимда йўқми-а? – паришон бир ҳолда сўради Бувинисо. Кўзлари милтиллаган бола, гапиришга мадорсиздек, танглайини тақиллатиб, бош чайқади. П. Турсун, Ўқитувчи. Тили танглайига ёпишмоқ* Ҳаяжон, газаб, кўркув ва ш.к. сабаблар туфайли гапиролмай қолмоқ. *Маҳмуджонни муздек тер босди. Нимадир демоқчи эди, тили танглайига ёпишди. «Муштум».*

ТАНГЛИК 1 Танг ҳолат, танг эканлик. *Жойнинг танглиги. Вақтнинг танглиги.*

2 Танг, сиқик жой. *Тангликка сира тобим йўқ.*

3 Торлик, кичкина эканлик. *Этигим бир оз танглик қилди.*

4 Оғир, мушкул аҳвол; етишмаслик. *Озиқ-овқат танглиги. ■ Рўзғордан шундай танглик тортиқки, гапирсам, балки шонмай-сиз. Ойбек, Танланган асарлар. Ем-хашак танглиги сабаб, магазиндан нон олиб боқишга мажбур бўлган. Ж. Абдуллахонов, Хонадон.*

5 *айн. кризис, инқироз. Иқтисодий танглик. Ҳукумат танглиги. ■ Ўтмишда.. тез-тез содир бўлиб турган ижтимоий-иқтисодий ва сиёсий тангликлар ирригация ишларига салбий таъсир қилган. И. Жабборов, Кўҳна харобалар сири.*

ТАНГО [*исп. tango*] Тўрт тактда ўйналадиган мулойим рақс ва шу рақс мусиқаси. *Тангога рақс тушмоқ. ■ «Чет» таклифларга чек қўйиш мақсадидан уни ўзи тангога олиб тушмоқчи бўлди. П. Қодиров, Уч илди.*

ТАНГРИ [мўғ. тэнгэр — осмон; худо] Оллоҳ, Худо, парвардигор. *Мен қиламан ўт-*

тиз, тангрим қилади тўққиз. Мақол. Тенгеганни тангри суйибди. Мақол. ■ Баъзида гўлдираб босинқирар, уйғониб кетиб, тангрига ёлвориб, нажот тиларди. Мирмуҳсин, Чўри.

ТАНГЧИЛИК *айн. танглик 3. Тангчиликдан чиқмоқ. ■ Оталаримиз.. кураш йўлида йўқчиликка ҳам, тангчиликка ҳам чидашди. И. Юсупов, Меҳнатда жасорат кўрсатинг.*

ТАНДА 1 Мато тўқиш учун узунасига, бўйлама тортилган ип, ўриш. *Тандаси ҳам, арқоғи ҳам соф ипақдан тайёрланган атлас. ■ Этаги олисларга чўзилиб кетган чўл тўқувчи дастгоҳидаги тандага, янги обод бўлган жойлар эса шу танданинг аста-секин тўқилиб келаётган сергул матосига ўшарди. С. Аҳмад, Чўл бургути.*

Танда қўймоқ 1) мато тўқиш учун унинг ўришини тартиби билан тортиб чиқмоқ; 2) кўп марта бориб келмоқ, бирор жойга серқатнов бўлиб қолмоқ. *Иноят оқсоқол Марғилон билан Чортерак орасига танда қўйиб қолган. С. Аҳмад, Уфқ. Менам шунисига доғман-да, ука. Кейинги вақтларда Турди ғилай идорага танда қўйган. А. Кўчимов, Ҳалқа.*

2 *кўчма* Ўриш иплари каби тортилган нур, тола ва ш.к. ҳақида. *Куёш ҳам шошқалоқ бўлиб қолди — тандасини дарров йиғиштириб олди. Ойбек, О. в. шабадалар.*

ТАНДАЧИ Танда қўювчи уста.

ТАНДИР [*а. تنور* — нон ёпиладиган ўчоқ, қурилма] Нон, сомса, кабоб кабиларни ёпиб пишириш, тайёрлаш учун лойдан ясалган қурилма. *Тандирга ўт ёқмоқ. Тандирда нон ёпмоқ. Тандирдан янги узилган иссиқ нон. Уйида чакса уни йўқ, том бошида қўш тандир. Мақол. ■ [Старшинанинг] Тандирдан чиққан ширмон нон каби бўртиб турган юзида шўх табассум пайдо бўлди. М. Муҳамедов, Қаҳрамон изидан. Ҳар гал нон ёпишганда, унга атаб жаажжигина кулча ясар, то қўллари куйиб, тандирдан узиб бермагунча, Мансур пойлаб ўтирарди. Ў. Ҳошимов, Қалбингга қулоқ сол.*

Супрадаги унга қарамай, тандирга ўт қалайдиган Бор ёки йўқ эканини суриштирмай, аҳволи билан ҳисоблашмай ҳотамлик қиладиган, эррайим. *Раис супрадаги унга қарамай, тандирга ўт қалайдиган хилидан. С. Аҳмад, Ҳодивой.*

ТАНДИРЧИ Тандир ясовчи (тайёрловчи) уста. *Кўқоннинг Исфара гузариди Мусо тандирчи ўғли Абдулхайни уйлантиряпти. Ҳ. Фулом, Тошкентликлар. Парфи сўтак билан Фармон кал орқаларига қайтиб, Пирмуҳаммад тандирчи ёнига келишди. Мирмуҳсин, Меъмор.*

ТАН-ЖОН, тану жон Кишининг бутун борлиғи, вужуди. *Бу ҳовлига келганида, у яйрар, тан-жони ором оларди. Мирмуҳсин, Топилган хусн. Ҳам ҳадик, ҳам эҳтирос билан тан-жони ёниб кетган Шаҳзодаҳон Олчинбекнинг кучоғидан зўрга суғурилиб чиқиб олди. К. Яшин, Ҳамза.*

Тан-жони соғ Соғ-саломат, сиҳат-саломат. *Нафисаҳон Ҳафизани қучиб: -Яхши юрибсанми, тан-жонинг соғми? — деди. Мирмуҳсин, Умид. .эс-хуши жойида, қадди-қомати келишган, тан-жони соғ. манман деган битта йигитнинг ишини баҳузур қиладиган хотин эди-да. А. Қаҳҳор, Кўшчинор чироқлари.*

ТАНИЛМОҚ 1 Танимоқ фл. мажҳ. н. У, ниқоб очилиб, танилиб қолди.

2 Ном чиқармоқ, донг таратмоқ, маълум-машҳур бўлмоқ. *Бу ҳофиз бутун оламга танилган. Ойбек, Танланган асарлар. Шундай қилиб, у тез фурсатда эл-юрт орасида «Ҳакимча табиб» номи билан танилди. К. Яшин, Ҳамза. Орадан кўп йиллар ўтди, Тамараҳонин машҳур актриса бўлиб танилди. Ҳ. Носирова, Мен ўзбек қизиман.*

ТАНИМОҚ 1 Таниш бўлмоқ, билмоқ. *Мен уни икки йилдан бери танийман. Бу ерда у ҳеч кимни танимайди. ■ Адолатни таниганлар унга ҳайрон бўлиб, бақрайиб қараб қолар, баъзи бировлар юзини ўғирар.. эди. С. Зуннунова, Гулхан. Нуринисони яқиндан таниганлар у билан ҳар вақт жуда эҳтиёт бўлиб муомала қилар эдилар. Ойбек, Танланган асарлар.*

2 Ўзига тегишли ёки таниш кимсани, нарсани кўринишидан ёки бошқа бирор белгисидан билмоқ, ажратмоқ. *Овозидан танимоқ. Кўзидан танимоқ. ■ Дарвозабон бекни таниб, қўл қовуштирди. А. Қодирий, Ўтган кунлар. Эшелоннинг кейинги тўхташида вагон тирқишидан қараб турган Исроил Азимов бу станцияни таниб, «Пенза» деди. И. Раҳим, Чин муҳаббат. Лой ва тупроққа қориган жангчиларни танимоқ қийин эди. Ойбек, Куёш қораймас. Ҳай, у қизни ўзинг кўрсанг танийсанми? С. Сиёев, Аваз.*

3 Фарқига борадиган, яхши-ёмонни ажратадиган бўлмоқ, ажрата билмоқ. *Отинг борида йўл тани, Ақлинг борида эл тани. Мақол. ■ Сен азалдан одам танийсан. Кўнглингга бир нарса келмасин-у, оғайни, Шоабдуфаттоҳ Хўжаев — ўғил бола йигит. А. Қаҳҳор, Оғайнилар. Гилам танийдиган одам икки мингга индамасдан олади. А. Қаҳҳор, Асарлар. Жўра бошқа отларга бир зум кўз ташлаб: -Агар от танисанг, рисоладаги саман — шу, — деди. Ойбек, Танланган асарлар.*

4 Ҳақ-ҳуқуқи, обрўйи, макъеи ва ш. к. билан ҳисоблашиб муомала қилмоқ, тан олмақ. *Биз Мусулмонқулни танимаймиз! Бизнинг бошлиғимиз Худоёрхондир! А. Қодирий, Ўтган кунлар.*

Одамни танимаслик (ёки танимай қўймоқ) Жуда мағрурликка берилиб (ҳаволаниб), ҳеч кимни менсимаслик, писанд қилмай қўймоқ. *Шундай қилиб, кунни ўтказаверди. Бурунгидай одам танимайдиган бўлиб кетди. «Баҳром ва Гуландом». Равшан Мусаев совхознинг 4-бўлимидо бошқарувчи бўлди-ю, унча-мунча одамни танимай қўйди. «Муштум».*

Оқ-қорани таниган Яхши-ёмонни кўрган, кўп нарсани, дунёнинг борди-келдисини билган. *Сиз оқ-қорани таниган одамсиз, Абдишукур. Ойбек, Танланган асарлар. Ҳат танимоқ* Ўқиш-ёзишни билмоқ, саводли бўлмоқ. *Ана, сизнинг меҳрибон Ойимхон опангиз. Районга бориб, уч ой ўқиб келди. Ҳа, салнал хат танийдиган бўпти. П. Турсун, Ўқитувчи. Эсини (ёки ақлини) танимоқ* Эси кириб, улғайиб, онгли равишда иш қиладиган ва кўрган-кечирганларини эслай оладиган бўлмоқ. *Биз, раисимиз айтмоқчи, энди эсини таниган боладаймиз: кўп нарсага қизиқамиз, кўп нарсани билгимиз келади. А. Қаҳҳор, Кўшчинор чироқлари. Мирўлат Темирович гапнинг пўсткалласини айтдилар, эсимни таниганимдан бери бу — иккинчи марта этик кийишим. С. Маҳкамов, Шогирд. Ҳақини танимоқ* Ўз ҳақ-ҳуқуқини билмоқ, ҳақ-ҳуқуқини ўз қўлига олмақ. *Давлатёр таърифлагандек, «ҳақини танимаган» бу бечора [Худойқул] шу равишда ҳаёт кечирар эди. П. Турсун, Ўқитувчи.*

ТАНИТМОҚ 1 Танимоқ фл. орт. н. Юзларини танитмаслик мақсадида, турли шаклдаги мўйлову соқол ва юзу сочинг тусини ўзгартирадиган мой суртмалар ғамлашган. «Муштум».

2 Маълум қилмоқ, билдирмоқ, айтмоқ (ўзини, кимлигини). *Отасига учраб, ўзимни танитдим, қилтиниб-тортиниб, арзимни айтдим.* «Муштум».

3 Маълум-машҳур қилмоқ. *Ана шу саксувулар, ана шу барханлару қўй-қўзилар менинг одамлигимни танитди.* М. Салом, Кечирим. *Меҳнат, халқ ишига садоқат Сафаровни барвақт элга танитди.* «Ўзбекистон кўриклари».

ТАНИШ 1 Танимоқ фл. ҳар. н. *Бир-бирини таниш. Хат таниш. Оқ-қорани таниш.* ■ Янги кийимлар кийиб, чиндан ҳам таниш қийин бўлиб қолган *Элмуродни кўриб.. кўзлар олайиб кетди.* П. Турсун, Ўқитувчи. *Агар жинойати қўлга тушсагина, Умар уни тусмоллаб таниши мумкинлигини тушунди терговчи.* С. Юнусов, Кутилмаган хазина.

2 сфт. Кимсага аввалдан маълум, кишилар танийдиган, биладиган. *Таниш одам. Таниш овоз. Таниш иш. Таниш имзо. Бу ерлар унга болаликдан таниш.* ■ *Зиёдилла таниш дала йўлидан хаёл суриб борарди.* Ҳ. Фулом, Машғал. *Унинг қўлида Зулфиқорга таниш кичик ханжар ялтираб турарди.* Мирмуҳсин, Меъмор.

3 от Кимгадир маълум бўлган, у танийдиган ва маълум даражада муносабат-алоқаси бўлган шахс. *Қани, юр, темир йўлда танишим бор эди.* С. Кароматов, Олтин кум. *Тўриқни бир танишиникида қолдирди-да, ўзи.. шаҳарга жўнади.* С. Анорбоев, Оқсой. *Ухў!.. эски танишлар тўпланадиган кун экан-да бўлмасам.* «Муштум».

Кўз таниш Фақат кўрганда салом-алиқ қилишиб юрадиган, ҳали унчалик алоқамуносабати бўлмаган таниш. *Муроджон билан ҳали тузукроқ таниша олганимча йўқ.* У ҳам менинг кимлигимни яхши билмайди. *Фақат кўз танишимиз, холос.* Файратий, Узоқдаги ёр.

ТАНИШ-БИЛИШ Бир-бирини танийдиган ва маълум жиҳатдан алоқа-муносабати бор шахс(лар). *Сумка, тўрхалта кўтарган одамлар уй-уйига шошилишар, таниш-билишларини кўриб, байрам билан қутлашар эди.* Ў. Ҳошимов, Қалбингга қулоқ сол. *Энди, дўхтир, ҳозир қайси институтга борсангиз, таниш-билишининг боласи қиради.* Ў. Ҳошимов, Нур борки, соя бор.

ТАНИШЛИК 1 Таниш бўлиш, таниш эканлик. *Иш билан танишлиги унга қўл кел-*

ди. ■ *Йигиталини ҳаммамиз яхши таниймиз.. Аммо ҳозир бу танишликнинг сира аҳамияти йўқ.* С. Кароматов, Бир томчи қон.

2 Ўзаро таниш-билиш ҳолати, таниш-билишлик муносабати. *Менга қолса, бу ишда ҳеч бир қўрқадиган гап йўқ, уста билан танишлиги бўлса, унинг уйига меҳмон бўлгандир.* А. Қодирий, Ўтган кунлар. *Бу одам бизнинг уйимизда нима қилиб ўтирибди? У билан танишлигининг борми?* «Муштум».

ТАНИШМОҚ 1 Танимоқ фл. бирг. н. *Улар мени танишмади.* ■ *Тошкентимиз шундай ўзгарганки, уни узоқ кўрмаганлар ҳозир таниша олмайди.*

2 Кимса билан ўзаро таниш бўлмоқ, бир-бирини таниб, билиб олмақ. *Бекмуродов билан ўтган йили дам олиш уйида танишган эдим.* С. Аҳмад, Юлдуз. *Одатда кўпчилик қизларнинг ҳусни танишиб, суҳбатлашиб, дўстлашиб кетганиндан кейин очилади.* Шухрат, Шинелли йиллар. *Албатта, ўзинг бирга борасан, қудаларинг билан танишмоғинг ҳам зарур.* А. Қодирий, Ўтган кунлар.

3 Муфассал ўрганмоқ, кўриб чиқмоқ, билиб олмақ. *Иш билан танишмоқ.* *Шаҳар билан танишмоқ.* ■ *У гувала деворли кўчаларда уйма-уй юриб, колхозчиларнинг турмуш шароити билан танишиб чиқди.* Й. Шамшаров, Тошқин.

ТАНИШСИЗЛИК 1 кам қўлл. Таниш эмаслик, нотанишлик. *Иш билан танишсизлик.*

2 Танишлари йўқлик. *Шаҳрингизга биринчи марта келишим бўлгани учун, танишсизлик, ёлғизлик мени жуда зериктирган эди.* А. Қодирий, Ўтган кунлар.

ТАНИҚ Таниб олиш учун қўйилган ёки табиий мавжуд бўлган белги, нишон. *Йўқолган отингизнинг қандай таниғи бор?*

Таниқ бермоқ Таниганлигини билдирмоқ, маълум қилмоқ; гувоҳлик бермоқ. *Қишлоқда мулла Мамажонни илгаридан танийдиган кишилар: -Бу йиллар [1928–29] фалон мазорнинг даҳмасида шайхлар билан бирга эди, – деб таниқ берадилар.* Ф. Фулом, Тирилган мурда.

ТАНИҚЛИ 1 Таниб олиш учун қандайдир белгиси ёки белгилари бўлган; таниш. *Таниқли кўча.* ■ *Тамға каби таниқли, Ҳар ерда бир из.. Узоқларда жилади Уч-тўрт хотин-қиз* Ҳ. Олимжон.

2 Кўпчиликка маълум, кўпчилик танийдиган; атоқли, машхур. *Таниқли шоир. ■ Кўпчилик олдида айтишиб утириш иккинги-гизга ҳам ярашмайди, — ..иккинги ҳам эл-юртда таниқли одамларсиз. И. Раҳим, Ихлос. Миркарим ака Эски шаҳарга таниқли одам. Ю. Шомансур, Қора марварид.*

ТАНК [ингл. tank — зирх билан қопланган, гусеничали ҳарбий машина < шу машина ихтирочисининг фамилияси (Танк)-дан келиб чиққан] **1** Зирхланган, тўп ва пулемётлар билан қуролланган, ҳар қандай йўлда ҳам юра оладиган гусеничали ҳарбий машина. *Оғир танк. Енгил танк. Танк дивизияси. ■ Бу ёққа [қишлоққа] мадад учун юборилган немис танкларининг йўлини бизнинг танкларимиз тўсган, сойликда танклар жанги бўлмоқда эди. А. Қаҳҳор, Олтин юлдуз.*

2 Суюқликларни сақлаш ва ташиш учун мўлжалланган, махсус жиҳозланган катта идиш.

ТАНКЕР [ингл. tanker] Суюқликларни, суюқ юкларни танкларда (қ. **танк 2**) ташийдиган махсус кема.

ТАНКЕТКА I [ингл. tankette — кичкина танк] Разведка, алоқа учун хизмат қилувчи гусеничали енгил жанговар машина (20-асрнинг 20-30-йилларида).

ТАНКЕТКА II [р.] Тагчарми товонга томон қалинлашиб борадиган, хотин-қизларбоп енгил оёқ кийими.

ТАНКЧИ Танк қисмида хизмат қилувчи ҳарбий ходим. *Танкчилар жангга кирди. ■ Танкчиларимизнинг жасоратига оид жуда кўп жанговар эпизодлар кўз олдимда турибди. «Ёшлик».*

ТАНЛАМОҚ I Бирор белги-хусусияти, хислати ва ш.к. га кўра ажратмоқ, белгиламоқ. *Қовун танламоқ. Кўйнинг семизини танламоқ. ■ Полвон учинчи дафъа келтирилган тошлар ичидан.. бир тошни танлаб олди-да, яхшилаб артишга ва бир томонини йўнишга буюрди. А. Қаҳҳор, Кўр кўзнинг очилиши. Унга қиз танлаш, қишлоқнинг энг биринчи қизини топиб бериш онанинг иши эмасми? И. Раҳим, Ихлос. ..ёш толга чиқиб олган йигит болтача билан силлиқ шоҳларни танлаб кесарди. Ў. Ҳошимов, Қалбингга қулоқ сол.*

2 Маъқулини белгиламоқ, маъқул топмоқ, ўзи учун маъқул деб билмоқ. *Касб танламоқ. Эшакнинг танлагани — шўра. Тан-*

лаган йўлидан қайтмаслик. ■ Боғнинг энг «туби»да, сердарахт ва пастқамликда кафе бор. Аҳмад шу кафени танлади. Ф. Мусаёнов, Ҳиммат.

3 Умуман, белгилаб, ажратиб олмоқ. *-Қаёққа бўларди, уйга-да, — қўрслик билан жавоб берди чол. — Ҳар ким ўз молини танлаб олсин, деган буйруқ чиқибди-ку! С. Аҳмад, Ҳукм.*

Танлаб (ёки танлаб-танлаб), тозисига учрамоқ Танлаб-танлаб, энг ёмонига, ноботига учрамоқ.

ТАНЛАНИШ I Танланмоқ фл. ҳар. н.

2: табиий танланиш Яшаш учун курашнинг натижаси бўлиб, жонли организмларнинг эволюцион тараққиёт жараёнида ҳаётий шароитларга мослашиб бориши ва яшаб қолишдан иборат биологик қонуният, жараён.

ТАННАРХ [тан 6 + нарх] иқт. Корхонанинг маҳсулот ишлаб чиқариш ва уни сотиш ҳамда ишлар бажариш ёки хизмат кўрсатиш учун қилинган жами жорий харажатларининг пул шаклидаги ифодаси; маҳсулотнинг иш ҳақи ва ишлаб чиқариш харажатларидан иборат ўз нархи. *Маҳсулот сифатининг ёмонлиги, таннархининг қимматлашгани ҳақида нега лом-мим демайсиз. «Муштум». Тупроққа қўшиладиган полимерларнинг таннархи унча қиммат эмас. С. Кароматов, Фан — бизнинг компасимиз.*

ТАННОЗ [а. طنّاز — ноз қилувчи, сўх ва серноз] **1** Ўзига оро бериб, ноз билан юривчи; нозли ҳаракатлар қилувчи. *Бир танноз қиз дабдаба билан идорага келиб деди: -Мени секретарликка қабул қилсангиз. «Муштум». Сертаманно, кеккайган таннозлар ёхуд нима десанг, хўп деб кўнаверадиган чўрисифат лақмалар дарров меъдага уради. Ф. Мусаёнов, Ҳиммат.*

2 Бирор фойдали иш-юмуш билан шуғулланмай, ўзига оро беришдан, ўйин-кулгидан бошқани билмайдиган, олифга. *Беши таннозлардан орттириб улфат, Ўйин-кулгиларга бердинг кўнгилини. Э. Охунова, Шу ҳам бахтми? Тавба денг, болам, бўйдоқсиз, шундай таннозлардан бирига учраб.. «Гулдаста». Совуқ сувга қўл урмас таннозини Етақлаб, қаёққадир бошлаб кетди. «Муштум».*

ТАННОЗЛИК I Таннозларга хос иш, ноз, карашма. *Таннозлик қилмоқ. ■ Айниқ-*

са, бой қизларининг юришида, ҳаракатида таннозлик, тантиқлик очиқ сезилиб туради. Х. Нуъмон ва А. Шораҳмедов, Ота. Қиз ҳамон бошини қуйи солиб турар.. таннозлик ўрнини энди қандайдир мулойим осойишталик эгаллаган.. Ж. Абдуллахонов, Орият.

ТАНОБ [а. طناب / طناب – арқон; пай] **1** эск. Ер ўлчаш, узунлик ўлчаш, чизик тортиш ва ш.к. ларда ишлатиладиган узун чилвир, режа ип.

Таноб тортмоқ (ёки урмоқ) Режа ип тортиб ўлчамоқ. *Матчон тўра кузда ҳосилни йиғиштириб олач, қумгача чўзилган бўз ерларга таноб урдириб, ўзига қўшиб олди.* Ж. Шарипов, Хоразм.

2 кам қўлл. Умуман, ингичка арқон, чилвир ёки каноп ип, ришта. *Шоҳнинг амри билан минг полвон ва кал икки кеча-кундуз йўл тортиб, Гўша тоғига етиб, чортиқлар [чодирлар] танобини тортиб.. ётаверди.* «Зулфизар билан Авазхон». Бекам-кўст турмуш кечириб, эр-хотин тотув яшаётган кезларда тўсатдан бу иноқ оила чархининг таноби узилди. И. Раҳим, Ёш хотин. *Банд этиб зулфинг аро кўнглимни озод этганинг, Қуш учиргандек эрур боғлаб аёғига таноб.* Нодира.

3 эск. тар. Ўрта Осиё хонликларида: томонлари 60 газдан иборат бўлган майдонга тенг юза (ер) ўлчов бирлиги. *Тонг отгунча бир танобча ернинг гўзаси сув ичди.* И. Раҳим, Чин муҳаббат. *Богнинг сатҳини Салим уч ярим таноб, Фазлиддин уч таноб мўлжаллади.* Ойбек, Танланган асарлар.

4 эск. тар. Ўрта Осиё, хусусан Ўзбекистонда қўлланган узунлик ўлчов бирлиги (17-асрда 39,9 метрга тенг бўлган).

Оғзининг (ёки лабининг) **таноби қочмоқ** айн. **оғзининг боғичи қочмоқ** қ. **боғич**. Муродовани кўрганда оғзининг таноби қочадиган Зуннуов бугун ҳақиқатан ҳам хомуш кўринди. И. Раҳим, Ихлос. *-Бор, яна бир миридан ташладим, – деб юборди.* Инглизнинг лабининг таноби қочиб, илжайди. К. Яшин, Ҳамза. **Танобини тортмоқ** 1) йўл, ҳажм ва ш.к. жиҳатдан қисқартмоқ, камайтирмоқ. *Минган оти жонивор Йўлнинг танобин тортди.* «Нурали». *Умридан барака топсин. Чўлнинг танобини тортяпти.* С. Аҳмад, Кадрдон далалар. *Овқатнинг танобини тортиб қўйиши.* И. Раҳим, Чин муҳаббат; 2) бўлмагур, номақбул иш-ҳаракатга чек қўй-

моқ, шундай хатти-ҳаракатдан тийиб қўймоқ. *..ҳўжаликларнинг баданига зулукдай ёпишиб олган мана шунақа одамларнинг танобини тортиш керак.* А. Қаҳҳор, Қўшчинор чироқлари. *Амакисига ён босган ўғлидан ҳам ранжиди. Танобини тортиб қўймоқ ниятида уйга келса, Жавҳар йўқ.* Ж. Абдуллахонов, Хонадон.

ТАНОБИЙ [а. + ф. طنبىي / طنباي – катта умумий хона, меҳмонхона, зал] Умумий бино, иморатда бошқалари нисбатан катта, махсус безатилган ва меҳмонлар кутиб олинадиган хона. *Хобгоҳдан икки хона нарида ҳашаматли танобий уйда аллақачон тўзаб қўйилган дастурхон мирзога мунтазир эди.* П. Қодиров, Бобур. *Бобур мирзо туя кигиз тўшалган танобий хонада даричадан ташқарига қараб, хомуш тикилиб ўтирарди.* Х. Султонов, Бир оқшом эртаги. *Танобий хона майин мусиқа, жаранг кулги, зарофатли гурунг ила яшнай бошлади.* С. Сиёев, Ёруғлик.

ТАНОБЛАМОҚ Таноб тортиб, ер ўлчамоқ. *Минг таноблаб ҳисобланган олмазор.* Ф. Фулом, Шум бола.

ТАНОБЧИ эск. Таноб тортиб, ер ўлчовчи киши. *Бой, танобчи олиб келиб ўлчатиб.. икки таноб чиқартириб олган эди. Менинг тахминимча, бой ўлчаб олган ер икки танобдан ортиқ эди.* С. Айний, Куллар.

2 тар. Солиқ олиш учун ер ўлчовчи лавозимли киши. *Ясовулбоши Шерназарбой хоннинг буёрғунини кўнгилдагидай бажара бошлади, қишлоқларга танобчилар юборди.* Ж. Шарипов, Хоразм.

ТАНОВАР [ф. تناور – семиз, бўлик; барваста, гавдали] Ўзбек халқ рақс куйларидан бирининг номи. *Тановарни чалмоқ. Тановарга ўйнамоқ.*

ТАНОВУЛ [а. تناول – ўз ичига олиш, қамраш; ейиш, ичиш]: **тановул қилмоқ** Истеъмол қилмоқ (емоқ, ичмоқ). *-Қани, бу ёққа, Анвар! – деди маҳдум. – Таомни шу ерда тановул қилсак ҳам бўлур.* А. Қодирий, Меҳробдан чаён. *Ифтор маҳалида тановул қилмоқ учун кўнгул туссаган нарса, озми-кўпми, дастурхонга муҳайё қилинади.* Н. Сафаров, Наврўз.

ТАНОСИБ [а. تناسب – ўзаро алоқа; қариндошлик; бир-бирига мутаносиб ва уй-гун бўлиш] **1** Ўзаро мутаносиблик ва уй-гунлик. *Ҳолбуки, тасвир ғоят бекаму кўстга ўхшарди: кенг порлоқ манглай, беозор дард*

акс этган ўйчан кўзлар, ажиб ёруғлик таношиби.. Х. Султонов, Бир оқшом эртаги. *Бир зумда ичкаридан ҳаворанг футболка кийган, қадди-басти таносиб қиз чиқиб келди.* Н. Ёкубов, Жон.

2 ад. Шарқ мумтоз шеърятисида: шеър байтларида маъно жиҳатдан бир-бирига яқин, ўзаро муносабатдош бўлган тушунчаларни англаувчи сўзларни қўллаб (мас., *жон-бадан; юз-оғиз-кўз; ҳажж-фарз-зиёрат* каби), улар воситасида образли ифодалар, лавҳалар яратишдан иборат бадиий санъат тури.

ТАНОСИЛ [а. تناسل — кўпайиш, урчиш, болалаш] Биологик жинсга оид, жинсий. *Таносил аъзолари.*

Таносил касалликлари Жинсий аъзолар касалликлари. қ. **венерик касалликлар.**

ТАНСА с. т. Танца, рақс.

ТАНСИҚ [а. تنسيق — териш, тизиш; тартиб билан жойлаш; мувофиқлашув; нодир, камёб нарса] **1** Кам қилинадиган ёки бирор жойда кам бўладиган, лекин севиб ейиладиган. *Тансиқ овқат. Тансиқ мева.* ■ *Қазикарта, кабоб, палов, беишбармоқ, Қовун-тарвуз, мева, саримой, қаймоқ, Тансиқ ҳисобланган ҳар нимаки бор, Дастурхонимизда сизга интизор.* Уйғун.

2 Умуман, кам топиладиган, кам бўладиган, кам учрайдиган; ноёб. *Адолат извошдаги тансиқ моллар, зеб-зийнат буюмларини кўриб, шуларнинг ҳаммаси бир бригадага тегишли эканига ишонмади.* И. Раҳим, Чин муҳаббат. - *Жуда иймансангиз, мана, бир қучоқ гул, бера қоласиз,.. — деди ҳазилсимон Комила. — Ана тансиқ совға!* Ойбек, О. в. шабадалар. [Тантибойвачча] *Жондор вагончи каби дўстини ғоят қувонтирган «ажойиб тансиқ ўтириш» ваъдасининг бундай ишқал бўлиб чиққанидан уялди.* Ойбек, Танланган асарлар.

ТАНСИХАТЛИК айн. тансоғлик. Шу билан бирга, сизларга узоқ умр, тансиҳатлик, ўқишда ғайрат тилаб қоламан. П. Турсун, Ўқитувчи.

ТАНСОҒЛИК Тан-жони соғлик, сиҳат-саломатлик. *Полвон бобо, ундай чил берманг-е, Ҳотам полвонга тансоғлик керак.* Т. Мурод, Юлдузлар мангу ёнади.

ТАНТАЛ [лот. tantalum < юн. Tantalos — юнон мифологиясида: маъбудлар томонидан абадий очлик ва ташналик азобига

маҳқум қилинган Лидия шоҳининг исми] Менделеев даврий системасининг V гуруҳига мансуб кимёвий элемент, кўкиш-қулранг, эриши қийин қаттиқ металл.

ТАНТАНА [а. طنطنه — жаранглаш, жаранг; шовқин; гўнғиллаш] **1** Муҳим воқеа, ҳодиса ва ш. к. муносабати билан ўтказиладиган, ўйин-қулги, хурсандчилик руҳида давом этадиган йиғин, маросим. *Байрам тантаналари. Янги йил тантаналари.* ■ *Тантана, ҳашаматни севган Ҳусайн Бойқаро уйни тўлдирган ва улугвор таъзим.. билан ўтирган оломонга фахрлиниб қаради.* Ойбек, Навоий. *Қаҳрамоннинг қишлоққа қайтиб келиши катта тантанага айланди.* Назармат, Жўрлар баланд сайрайди. *Май — баҳор эркаси, ғалаба рамзи, Шаҳар, қишлоқларда тантана, байрам.* Р. Бобожон.

2 Бирор мақсад, фаолият йўлидаги ғалаба, муваффақият ва унинг ифодаси. *Ойбек инсон ақл-идрокнинг, адолат ва бахтсаодатнинг тантанаси йўлида ғоят улкан ижодий жасорат кўрсатди.* Газетадан. *Тинчлик учун кураш, гуманистик ғоялар тантанаси учун кураш ишига ёшлар ҳам ўз ҳиссаларини қўшмоқдалар.* Газетадан. *Бу қарашда Зеби қандайдир заҳарли тантанани сезиб, унинг маъносига тушунди.* Ш. Рашидов, Қудратли тўлқин.

3 Тўй, хурсандчилик йиғини, маросими кабиларга оид хатти-ҳаракат, шодиёна ишлар. *Қизидан хабар топиб келган Ёрмат уни Шоқосимнинг кулбасидан тортиб олиб кетгач, бой ҳовлисида тўй тантаналари бошланди.* Ойбек, Танланган асарлар. *Уйда ғалати бир тантана ҳукм сурарди.* С. Зуннуова, Янги директор.

4 Фолибона, кўтаринки кайфият. *Ҳозир у мамнуният ва тантана билан кулумсираб, Маҳжамнинг яхши волейболчи эканини айтди..* П. Қодиров, Уч иллиз. *Суяр ўзининг қувончини тантана билан эълон қилди: -Бугун инструкторимизни қолдирдим, дада!* А. Қаҳҳор, Асарлар.

Тантана қилмоқ 1) ғалаба қилмоқ, рўёбга чиқмоқ. *Мана мен ҳам бугун мақсадимиз тантана қилишига ишонганим учун шаҳарга тушиб чиқмоқчиман.* Ҳ. Фулом, Машғал; 2) тантанали ҳолатда бўлмоқ, тантана ҳукм сурмоқ. *Тогда ҳам, наstdа ҳам.. — ҳамма ерда меҳнат тантана қиларди.* Ш. Рашидов, Бўрондан кучли. *Чиндан ҳам поёнсиз чўлда*

ҳаёт тантана қиларди. Ш. Рашидов, Бўрондан кучли.

ТАНТАНАБОЗ [тантана + ф. بان — яхши кўрадиган, берилган] Тантанани, асъасабдабани яхши кўрадиган, қуруқ тантаналарга берилган. *Нутқингизда: «Биз сийқаси чиққан ваъдабозлардан, тантанабозлардан.. эмасмиз», дедингиз. «Муштум».*

ТАНТАНАБОЗЛИК Қуруқ тантаналарга берилиш. *Йиғилиш ва конференциялар тантанабозликка айланмаслиги керак. Гаэтадан.*

ТАНТАНАВОР айн. тантанали. *Машишоқлар дарҳол «Хон чиқар» дейшладиган тантанавор мусиқани бошладилар. С. Сиёев, Ёруғлик. Дарвозанинг иккала қаноти очиб кўйилган, ичкарида тантанавор бир кайфият ҳукмрон эди. Д. Нурий, Осмон устуни.*

ТАНТАНАЛИ 1 Тантанага эга, тантана руҳидаги, тантана билан бўладиган. *Ўшдаги қароргоҳда бу оқшом сизларнинг шарафингизга тантанали зиёфат берилур. П. Қодиров, Юлдузли тунлар. Трестдагилар илғор бинокорлар қатори Ёдгорни ҳам тантанали кечага таклиф қилишди. Ў. Ҳошимов, Қалбингга қулоқ сол.*

2 Тантана ифодаловчи. *Гўё улуғ бир ҳодиса содир бўлиши кутилаётгандек, еру кўк тантанали қиёфа олди. С. Анорбоев, Оқсой. —Аҳа, демак, ҳали топганингиз йўқ, — деди Исмоил тантанали бир оҳангда.. Ойбек, Нур қидириб.*

3 Асъаса-дабдабали, кўтаринки руҳ билан. *Никоҳ тўйи фавқулодда суронли ва тантанали бўлди. Ойбек, Танланган асарлар. Саидғози бу сўзларни оғзини тўлдириб, алоҳида расмий тусда гапиргани учун тантанали жарангларди. С. Анорбоев, Оқсой.*

ТАНТИ 1 Ўзгаларга ёрдам, сарф ва хизматини аямайдиган, мард; кўнгли ва кўли очик. *Бой ва танти куёв харажатларнинг йирик ва майдалигини суриштирмай, чўнтақларидан даста-даста пул чиқарар эди. Ойбек, О.в. шабадалар. ..Бу танти йиғит ўз ўртоғи Низомиддиннинг зиндонда ётишига асло йўл қўймайди, деб ҳисобларди у. Мирмуҳсин, Меъмор. Танти, лекин бизга эмас.. Зиёфатларини еган одамлар унга Танти от қўйишган. Ойбек, Танланган асарлар.*

2 Алдам-қалдам, фирромлиги йўқ, ўзаро муносабат, беллашув ва ш.к. да ҳалол. *Азим тажанг қиморбоз эди, шунинг учун ҳам ҳар*

бир қиморбоз сингари мард, танти. М. Исмоилий, Фарғона т. о. Танти бўлиб урушайлик, деб Арза бекларга кўрсатди. «Гулихиромон».

3 кўчма Сахий, ҳалол. *Мана қатор-қатор карвон келар Гўзал Фарғонанинг танти ердан. Назармат, Жўрлар баланд сайрайди. Уктам ҳам Ўсаржонга қараб, салмоқланиб деди: —Хуллас калом, меҳнатни аяманглар, ана унда бу жой хийла танти бўлади. Ойбек, О. в. шабадалар.*

ТАНТИЛИК Танти одамларга хос иш, хатти-ҳаракат. *Йиғит кўрки эса мардлик, тантилик. Миртемир. Тантилик шундай бўлсин: Ҳар ким йиқилса, шу ўлсин, Йиқитган алп тирик қолсин. «Эрали ва Шерали». [Тантибойвачча] Гуландомга суйқалади, унинг атлас кўйлаги остида балқиб турган кўкрагини ўйнайди. Кераксиз бўлса ҳам, тантилик учун ҳар хил овқатлар, ичимликлар буюрди. Ойбек, Танланган асарлар.*

ТАНТИҚ 1 Ортиқ эркалатиб, талтайтириб юборилган, талтайган. *Моҳим — Хоразм хони.. Алломатхоннинг ягона тантиқ қизи, 18 ёшда. С. Абдулла, Тоҳир ва Зуҳра.*

2 Бўлмағур қилиқлар қиладиган, қилиқлари келишмаган, бемаъни. [Саидалимхон] *Ўлгудек тантиқ. Агар бир эркаланишга тушиб кетса, киши қилмаган қилиқларни қилади. Ойдин, Ҳазил эмиш.*

ТАНТИҚЛАНМОҚ Тантиқлик қилмоқ, талтайиб эркаланмоқ, суюлмоқ. *Эъвозхон очилиб кулди-да, нимчасини ечиб узатди: —Мана, суюнчи, жоним! Тозагул тантиқланди: —Бу билан қутулмайсиз. Чақалогимга бош-оёқ сарпо қиласиз. Ҳ. Фулом, Машъал. Рисолат Сабоҳатга ўхшаб тантиқланмади, бамайлихотир ўтираверди. Ф. Мусажонов, Ҳиммат.*

ТАНТИҚЛИК Тантиқ, эрка шахсларга хос қилиқ, хатти-ҳаракат, ҳислат. *Боядан бери тантиқликларидан ичида кулиб келадиган Ҳафиза ўзгарди.. Мирмуҳсин, Умид.*

ТАНФУРУШ [тан + ф. فروش — сотувчи] Эркалар билан жинсий алоқа ҳисобига кун кўрувчи бузуқ хотин; фоҳиша, фар. *Фуод афанди танфурушлар гумаштаси бўлиб, қора қабиҳ бир махлуқ эди. М. Исмоилий, Фарғона т. о.*

ТАНФУРУШЛИК Ўз танини, номусини сотиб кун кўришлик; фоҳишалик.

ТАНЦА [р. танец — доира бўлиб ашула айтиб рақс тушиши < нем. Tanz — рақс] **1** Европача рақс (танго, фокстрот, вальс ва

ш. к.). *У модани, танцани, театр ва сайл-ларни яхши кўради*. С. Аҳмад, Қадрдон дала-ларни.

2 Шундай рақс мусиқаси. *Брамсинг вен-герча танчалари*.

3 Европача рақс кечаси. *Бахтиёр дамлар кечанинг охиридаги танида ҳам давом қи-лиши керак эди*. П. Қодиров, Уч илдиз.

ТАНЧА шв. айн. сандал I. *Очиқ танчага писта кўмир солиб.. икки муфти қўлларини оловга товлар эдилар*. А. Қодирӣ, Меҳроб-дан чаён.

ТАНҚАБУРУН Учи юқорига кўтарилган ва тешиклари яққолроқ кўринадиган бурун; шундай бурунли одам. *Йирик гавдали, қисик кўз, танқабурун бу одам, афтидан, тилла тишининг шериги эди*. А. Ибодинов, «Латофат» дўконидаги қатл.

ТАНҚАЙГАН Учи юқорига кўтарилган ва тешиклари кўриниб турадиган (бурун ҳақида). *Унинг кўнғир қошлари, осмондай кўм-кўк кўзлари, сал танқайган бурни, қалин лаб-лари кўзларимга иссиқ кўринар, аммо уни қаерда кўрганлигимни эслай олмасдим*. А. Убайдуллаев, Қонли излан.

ТАНҚИД [а. تنقيد — баҳо бериш мақ-садида ўрганиш, таҳлил қилиш ва шу асосдаги хулоса] **1** Иш-ҳаракат, фаолият, асар, таълимот ва ш.к. нинг ютуқларини қайд этиш, камчилик ва нуқсонларини белгилаш ва бартараф этиш мақсадидаги муҳокама, таҳлил. *Таҳлил айлаб терсу ўн-гиндан, Иккимизни қилади беҳол. Хўп дўп-послаб, тақид сўнгиди Ижодимга тилайди камол*. Э. Воҳидов, Муҳаббатнома.

2 Бирор нарсанинг тўғри, ҳаққоний экан-ини илмий таҳлил этиш, тадқиқ этиш. *Тарихий манбаларнинг танқиди. Матн тан-қиди*.

3 Адабий фаолиятнинг бадиий, илмий ва б. турдаги асарларни, шунингдек, уларда акс эттирилган ҳаётӣ ҳодисаларни талқин ва таҳлил қилувчи махсус тури. *Шахсан мен адабий танқид фақат адабиёт учун эмас, умуман, маънавий ҳаёт учун зарур эканини.. яна ҳам чуқурроқ ҳис этдим*. У. Норматов, Талант тарбияси. *Адабий-бадиий танқид билан адабиётшунослик фанининг бир-бирига яқин томонларидан ташқари анчагина фарқ-лари ва ўзгачаликлари ҳам бор*. «ЎТА».

4 Камчилик, нуқсон, хатолик ва ш.к. ни қайд этиш, қоралаш, шунингдек, уларни

ҳал этиш мақсадида билдириладиган тан-беҳли фикр-мулоҳаза, гап-сўз. *Фақат бир нарсани — шу танқидга қарши зўр бир далил топиб, енгиб чиқишни ўйлашар эди*. П. Қо-диров, Уч илдиз. *Танқид бўғилган жойда ҳеч қандай тараққиёт бўлиши мумкин эмас*. Ф. Мусажонов, Ҳиммат. *Танқиднинг фойдаси катта, ишимизни ўнғариб оламиз, мен буни албатта қиламан*. «Муштум».

Танқид қилмоқ Танқид тарзидаги гап-сўз айтмоқ, танқидий фикр-мулоҳаза билдир-моқ. *У ғўзаларини ўт босган звено бошиқ-ларининг, сув бостириб юборган сувчилар-нинг номларини ёдаки айтиб, танқид қилар-ди*. О. Ёқубов, Эр бошига иш тушса. *Бў-табойнинг ишларидаги камчиликларни тан-қид қилганимда, мактаб масаласини ҳам қистириб ўтсам бўлар эди*. А. Қаҳҳор, Кўш-чинор чироқлари.

ТАНҚИДБОЗ [танқид + ф. باز — яхши кўрадиган, берилган] Бўлар-бўлмасга танқид қилиш, ҳамма нарсадан камчилик излашни яхши кўрадиган шахс.

ТАНҚИДБОЗЛИК Бўлар-бўлмасга тан-қид қилавериш, ҳамма нарсадан камчилик излаб, куруқ танқидга берилиш.

ТАНҚИДИЙ 1 Танқидга оид; танқиддан иборат бўлган, танқид мазмунидаги. *Тан-қидий мақола*. ■ *Гап танқидий мулоҳаза-ларга келган экан, яна бир масалада.. баҳс-лашмоқчиман*. У. Норматов, Талант тарбияси.

2 Танқидчилик руҳидаги, танқидийлик руҳи билан суғорилган; танқид кўзи билан қаровчи. *Ўктам ўз чопиғига танқидий разм солади*. Ойбек, О. в. шабадалар.

ТАНҚИДЧИ 1 Адабий, илмий, публи-цистик асарларни таҳлил қилиш, уларнинг ижобий ва салбий томонларини, ютуқ ва камчиликларини ўрганиш ва баҳолаш билан шуғулланувчи адабиётшунос. *Адабий танқидчи. Театр танқидчиси. Кино тан-қидчиси*. ■ *Ўйлайманки, роман ҳақида ҳали китобхонлар, адабий жамоатчилик, тан-қидчилар ўз мулоҳазаларини айтадилар*. С. Кароматов, Олтин кум.

2 с. т. Умуман, танқидий фикр-мулоҳаза айтувчи шахс.

ТАНҚИДЧИЛИК 1 айн. танқид **3**. *Тар-жима танқидчилиги ҳамма вақт ижодӣ меъёрни аниқлаган ҳолда, ана шу икки «фронт»да кураш олиб бормоғи лозим*. Ф. Са-ломов, Таржима назариясига кириш. *Ада-*

бий танқидчиликнинг биринчи ўргамчик асарлари вақтли матбуот саҳифаларида пайдо бўлди. «ЎТА».

2 Иш-ҳаракат, воқеа-ҳодиса, таълимот, назария ва ш.к. га танқидий ёндашиш, танқидий нуқтаи назардан қараш.

ТАНҚИС [а. تقيص — камайиш, қисқариш, пасайиш; етишмовчилик] Талаб, эҳтиёжга нисбатан оз, етишмайдиган миқдорда; камчил, камёб. *Танқис мол.* ■ *Шағал, қум олтмиш чақиримдан ташилади — биласан, қурилишда энг танқис нарса шу.* А. Мухтор, Туғилиш.

2 Бирор нарсадан сиқилган, камчилиги бўлган; шу нарсага бўлган талаби, эҳтиёжи етарли даражада қондирилмаган. *Сувдан танқис ерлар.* ■ [Қодир:] *Иш оғир, турмуш оғир.. Эҳтимол, кийим-кечакдан танқисдирлар.* Уйғун, Ҳаёт кўшиги.

ТАНҚИСЛИК Танқис ҳолат; етишмаслик, етишмовчилик; камёблик. *Биз кўприк қуриш билан қурилиш материали танқислигидан узил-кесил қутуламиз.* А. Мухтор, Туғилиш.

ТАНҚИСЧИЛИК айн. **танқислик.** *Ниҳоят, оилада бўладиган танқисчилик ҳам ўртага тушадиган бўп қолди.* Ш. Холмирзаев, Оғир тош кўчса.

ТАНҒИМОҚ 1 Маҳкам сиқиб, ўраб, айлантириб боғламоқ. *Белни танғимоқ.* *Ярани танғиб боғламоқ.* ■ *Умар шойи қийиқ билан пешонасини танғиб, каравотга ётди.* И. Раҳим, Ихлос. [Тамара] *Бир оз ўзига келгач, сочларини бошига танғиди—да, Ғофирни диванга таклиф қилди.* Қ. Мақсумов, Кутилмаган бахт. *Югурганича ичкари уйга кирмоқчи эди, оқ фартукли, бошига оқ рўмолча танғиган ёшигина хотин чиқиб, уни тўхтатди.* Ойдин, Чақалоққа чакмонча. *Бу ерларда сарвиқор тоғлар белига танғилган кумуш камардек темир йўл пайдо бўлди.* Газетадан.

2 Ечилмайдиган қилиб, маҳкам боғламоқ; чандимоқ. *Отни устунга танғиб қўймоқ.* ■ *Шу пастқам уйига арқон билан танғиб қўйганга ўхшайдилар—а.* Ш. Рашидов, Бўрондан кучли. *Жаниш бу бу гал эпчилик билан ҳалиги қозиқдан латтани олди—да, унинг оёқ-қўлини танғиб боғлади..* Ҳ. Шамс, Душман. *Бола ботинкаси устидан боғланган латтани қаттиқроқ танғиди.* Р. Файзий, Сен етим эмассан.

ТАНҒИШ 1 Танғимоқ фл. ҳар. н. Пешонани танғиш.

2 *тиб. кам қўлл.* Танғиб боғлаш учун белгиланган нарса. *Қон вена ёки капиллярлардан оқса, қаттиқроқ босадиган танғиш билан боғлаш керак.* Н. Исмоилов, Касалларни парвариш қилиш.

ТАНҒИҚ(ЛИ) Танғиб, чандиб боғланган, танғилган. *Пешонаси танғиқли йигит Тингламоқда айтганин чолнинг.* Э. Раҳим.

ТАНҲО [ф. تنها — бир, ягона, якка-ёлғиз] 1 Бошқа кимсадан, нарсадан холи, якка, ёлғиз. *Ҳамма ёқни сақлар муз тоғидан гов, Жимликка тикилган бир танҳо ўтов.* Ф. Фулом. *Қиз билан йигит суҳбатининг танҳо гувоҳи — осмонда сузиб юрган ой қаршисидаги қора булут парчасига айёрларча секин кириб яширинди.* Ф. Мусажонов, Ҳури. *Уйқум қочгач, кўчаларни танҳо айланиб, ширин орзулар оғушида тонг отгунча кезиб юргим келарди.* О. Ёқубов, Икки муҳаббат.

2 Кимсасиз, ҳеч ким йўқ. *Танҳо кечада фарзанд билан ота ўртасида бўлиб ўтган у учрашувни фақат кўкда сузиб юрган ойнинг кемтик ўроғи кузатиб турарди.* С. Аҳмад, Қадрдон далалар.

3 Бирор жиҳатдан яккаю ягона, тенги, ўхшаши йўқ. *Гилос ширинми ё сен! Ширинликда танҳо сен.* Р. Бобожон. *Ҳусн бобида танҳо десам, ҳунар бобида ҳам танҳо экансан.* Ў. Умарбеков, Одам бўлиш қийин.

4 кўм. вазф. Айириш, чегаралаш билдиради; фақат. *У даргоҳда ранг бор, олов бор, Танҳогина сен йўқсан, гулим.* Р. Парфи, Кўзлар. *Қани энди, бутун борлиққа танҳо ўзинг ҳукмрон бўлсанг.* Ф. Мусажонов, Ҳиммат.

ТАНҲОЛИК 1 Яккаю ягоналик, танҳо эканлик. *Гўзалликда танҳолик.* ■ *Предметни аниқлаш ёки шахснинг танҳолигини таъкидлаш учун қўлланган «ўз» сўзи ўзлик олмоши деб аталади.* «Ўзбек тили» дарслиги.

2 Ёлғизлик ҳолати; ёлғизликдаги ҳаёт; ёлғизлик. *Унсин туморча шакли ҳовлида айланади, танҳолик ва ҳасрат унинг юрагини эзади.* Ойбек, Танланган асарлар. *Ойниса ёлғиз қолди. У умрининг кўп қисмини шундай ёлғизликда, хавотирликда ўтказган, танҳоликка кўниккан бўлса ҳам, бу галгиси ниҳоятда оғир туюлди.* Ҳ. Фулом, Тошкентликлар. *Кейинги кунларда Авазни яна танҳолик ўртай бошлаган эди.* С. Сиёев, Аваз.

ТАОЛО [a. تعالى — баланд бўлишлик, юк-саклик; гурур, мағрурлик; мусулмонларнинг худонинг исмига қўшиб айтадиган улуғлаш сўзи] *дин*. Энг олий, энг юкори кўтарилган (худонинг сифатларидан бири). *Худойи таоло*. ■ *Ҳасанали севинчисини топширгандан сўнг, дуога қўл очди: -Олло таоло умри билан берган бўлсин! А. Қодирий, Ўтган кунлар. -Йўқ, — деди эшон, — Йўқ, банданинг иши ҳақ таолога имон келтирмақ!* П. Турсун, Ўқитувчи.

ТАОМ [a. طعام — емиш, овқат, егулик] Пиширилган, ейиш-ичиш учун тайёрланган нарса; овқат. *Лаззатли таом. Миллий таомлар. Таом тайёрламоқ. Таом туз билан, туз — ўлчов билан. Мақол. Аввал таом, баъдаз калом. Мақол. ■ -Қани, бу ёққа, Анвар, — деди махдум. — Таомни шу ерда тановул қилсак ҳам бўлур. А. Қодирий, Мехробдан чаён. Тўрдаги ёши улуғлар фотиҳадан сўнг таомларга қарашди. Мирмуҳсин, Меъмор.*

ТАОМИЛ [a. تعامل — ўзаро алоқа, муносабат; ҳамкорлик] Бирор жамиятда, эл-халқда одат ҳукмига кирган тартиб-қоида, расм. *Эски таомил. Янги таомил. Таомилга кирмоқ. ■ Тўйнинг тўри азиз меҳмонларга аталади. Урф-одатимиз, таомилимиз шундай. М. Назаров, Чўлни яшнатганлар. Тўй кунлари ичкарида самоварни кўпинча эркак киши қайнатиши эскидан бир таомил бўлиб қолган. Ойбек, Танланган асарлар. Жанубий Америкага бориб қолсангиз, самолётда кет-яксизми, кинотеатрга кирдингизми.. дарров сақич конфет билан сийлашади. Таомил шунақа! «Фан ва турмуш».*

ТАП I тақл. с. Икки нарсанинг бир-бирига урилиши ёки бирор нарсанинг ерга зарб билан тушишидан ҳосил бўладиган бўғиқ товушни билдиради. *Олма тап этиб ерга тушди. ■ Ботирали ўзини тап этиб ерга ташлади. Уқ варанглади. Ҳ. Ғулом, Машғал.*

ТАП II [ф. تفت — тез, шошилишч]: **тап торгмоқ** Чўчимоқ, ҳадиксирамоқ. [Заргаров:] *Нимадан тап тортаман!.. Олса, столини олади-да. А. Қаҳҳор, Оғриқ тишлар. Қудрат тап тортмаса ҳам, Кўзибой кўрқиб кетди: жон ҳолатда.. папқасини итга қараб отди. Ҳ. Назир, Сўнмас чақмоқлар. Шоқирбек сиз ўйлаган кишилардан эмас, асло тап тортмай сўзлай беринг. А. Қодирий, Ўтган кунлар.*

ТАПИЛЛАМОҚ «Тап-тап» урилмоқ, «тап-тап» овоз чиқармоқ. *Раҳим Саидов жўрттага оёқларини тапиллатиб, эшикка-ва борди. Ў. Умарбеков, Ёз ёмғири. Тун сукунати фақат водокачканинг тапиллашигина бузмоқда. А. Қаҳҳор, Кўшчинор чиқроқлари.*

ТАПИРА-ТУПУР айн. тапир-тупур.

ТАПИРЛАМОҚ Тапир-тапир товуш чиқармоқ.

ТАПИР-ТУПУР тақл. с. Кўп ва бетартиб тушаётган оёқ ёки бошқа нарсалардан чиқаётган «тапир» ва шунга яқин товушни билдиради. *Бир оздан кейин жуда кўп от тақаларининг тартибсиз тапир-тупури эшитилди. Ҳ. Ғулом, Машғал. Жуда яқин келиб қолган тапир-тупурдан, бир-бирига асло ўшамаган «ба-ба», «ма-ма»лардан бутун атроф ларзага келарди. С. Анорбоев, Оқсой. Ташқарида тапир-тупур оёқ товушлари эшитилиб, хонага икки навкар кириб келди. О. Ёқубов, Кўҳна дунё.*

ТАППА: *Ташламоқ, босмоқ* каби баъзи феъллар билан қўлланиб, шу феъл англатган ҳаракатнинг тезда, шартта бажарилишини билдиради. *Пирнафас ака ўзини ёстиққа таппа ташлади. Ж. Шарипов, Хоразм. Шакархон уйига лоҳас тортиб қайтди-да, ариқ бўйидаги сўрига таппа ёнбошлаб, чуқур нафас олди. Ҳ. Назир, Ўтлар туташганда. Камола.. чопқиллаганча уйларига кирди-ю, ўзини таппа каравотга отди. Н. Фозилов, Дийдор. Матпано бойвачча йигитни таппа ерга босди-ю, қўлини орқасига қайирди. С. Сиёев, Аваз.*

ТАППА-ТАХТ I «Тахт» сўзининг кучайтирма (интенсив) шакли; таппа-тайёр. *Ҳамма нарса таппа-тахт. Сафар анжомларини таппа-тахт қилиб қўймоқ. ■ Доншманд кал, сипоҳийликни ўхшатиб, қўшинни таппа-тахт этиб.. бостириб бора берди. «Хушкелди».*

2 юкл. Кучайтиришни билдиради; нақ, роса. *Гулсаранинг бувиси Таппа-тахт кирди юзга. Сочлари қордек оппоқ, Юзи ўхшар кундузга. Қ. Муҳаммадий. Водокачка биноси қурилишини тугатиш учун таппа-тахт уч кунлик иш қолган эди. Газетадан.*

ТАППИ I Чорва моллари тезагидан рапида шаклида ясаб қурилган ёқилғи. *Қуруқ таппи. Таппи ясамоқ. Таппи ёқмоқ. ■ У [Зебо] боғ ва полизга қарарди, ҳовли сунуриб,*

уйларни йиғиштирарди, нон ёпиб, сигир соғарди, кир ювиб, таппи қиларди. Ш. Рашидов, Қудратли тўлқин. Бу бесабр жимлик ва қоронғиликда, жинчироқ пирпирагани сари, таппи ёпиб ташланган баланд деворлар билан уч томондан ўраб олинган ҳовли юзи худди ерга чўкиб кетаётгандай эди. А. Мухтор, Опа-сингиллар.

2 кўчма Ранги таппига ўхшаш, қора. Аҳмаднинг қўли сомон қориб, гўнж кураб, нақ таппи бўлиб кетган қўллар, қишлоқчи ўсмирнинг қўли. М. М. Дўст, Галатепага қайтиш.

ТАППОТ *шв.* Тафт, ҳарорат; жазира (яна қ. **таффот**). *Наҳотки, ўғли чўл таппотлари билан олишишга кетаётганини англамас!* С. Нуров, Меҳригиё. *Ҳали бўй чўзолмай, таппотда қовжираган гиёҳни кўрмаган киши томчининг қадрини на билсин!* С. Кароматов, Саҳро кўшиғи. *Қарши чўли. Шамол увиллайди, кўчма қумлар гирдоб соларди, саратон таппоти юзни куйдирарди.* С. Нуров, Дурдона.

ТАПТ [ф. *تفت* — иссиқ, қайноқ; жазирама] с. т. Тафт, ҳарорат.

ТАП-ТАП **Тап** I с. такрори. *Бирин-кетин тўрт кишининг отдан тап-тап тушгани эшитилди.* Ҳ. Фулом, Машғал.

ТАП-ТАҚИР Бутунлай тақир, бирорта ҳам тук ёки гиёҳ йўқ. *У [Ҳошимжон ака] таптақир, юмалоқ бошини силаб жимлайди.* О. Ёқубов, Бир фельетон қиссаси. *-Бу таптақир даштни олтин водийга айлантира-миз, — деди ишонч ва ғурур билан Ўқтам.* Ойбек, О.в. шабадалар.

ТАП-ТУП «Тап», «туп» ва шунга яқин товушларни билдиради. *Ўриклар ерга таптуп туша бошлади. ■ От туюқлари бўғиқ тап-туп қилади, эгар-жабдуқлар аста ширқлайди.* С. Анорбоев, Гўзаллик излаб. *Аравалар гийқ этиб тўтади. Отлиқлар таптуп ерга тушиб, бандиларнинг қўл-оёқларини ечиб, пастга ола бошладилар.* Ҳ. Тўхтабоев, Йиллар ва йўллар.

ТАР I [ф. *تر* — ҳўл, нам; янги, тоза] **1:** **тар мева** Ҳўл мева. *Кўпроқ тар мева истеъмол қилсинлар, аммо Бухоро меваси жанобларига зарарлидир.* М. Осим, Ибн Сино қиссаси. *Тар гунчани топиб олган асалари унинг ширасига тўймагунча наригисига ўтмас экан.* Э. Самандар, Тангри кудуғи. *Абулғози шу тобда уни бағрига босишни, тар олмадай қизариб турган ёноқларидан, лаъли*

лабларидан ўпишни истар эди. Э. Самандар, Тангри кудуғи.

2 шв. Янги. *Тар очилган тоза боғнинг гулисан, Энанг ҳам онангининг жону дилисан. «Рустам». Ардоқладим авайлаб тар гунчадек астойдил.* Р. Бекниёз, Тўтиё.

ТАР II тақл. с. Баъзи нарсаларнинг йиртилишида ёки баъзи асбобларнинг ишлашида чиқадиған товушни билдиради. *Мотор тар этиб, уяна ўчди. ■ Алижон ҳоширт, зил тўшакни уйдан олиб чиқиб, ҳовлининг бир бурчагига улоқтирган эди, унинг бир томони тар этиб йиртилиб, ичидан пул сочилиб кетди.* Мирмуҳсин, Чиниқиш.

ТАРАДДУД [а. *تردد* — бирор қарорга келолмай туриш, иккиланиш; қатъиятсизлик] **1** Бирор ишни, мақсадни амалга ошириш учун кўриладиган тайёрлик, бажариладиган хагги-ҳаракат. *Имтиҳон тараддуди. Сафар тараддуди. ■ Ҳар икки томон ҳам шу бугундан бошлаб тўй тараддудини кўрадиган бўлдилар.* П. Турсун, Ўқитувчи.

2 Умуман, бирор иш, нарсани тайёрлаш, амалга ошириш ҳаракати. *Шарқ уфқида қуёшнинг олтин баркаши тепага кўтарилганда, оқонларда фронтча нонушта тараддуди бошланди.* Б. Имомов, Ҳорманг, қуролдошларим. *Элчиев ҳам жамғармасидан яхлитини кўтариб, бозор-ўчар тараддудига тушди.* Э. Аъзамов, Жавоб. *Мулла Алимқул эшикдан кириб келган меҳмон билан кўришиш ва ўз тагидаги кўрпачадан жой бериш тараддудида аста ўрнидан қўзғалди.* П. Турсун, Ўқитувчи.

3 Қатъиятсизлик, иккиланиш ҳолати; шундай ҳолатда сурилган ўй, фикр-хаёл, ташвиш, мулоҳаза. *Унинг эндиги тараддуди учрашиш ёки учрашмаслик борасида эмас, Раънонинг олдига очикча боришми, яширинчани тўғрисида эди.* А. Қодирий, Меҳробдан чаён. *Мен Матаубанинг.. шабадада тўзғиб, пешонасига тушган майин сочларини, тараддуд ифодаси жилованиб, пар-пар ёнган катта чарос кўзларини кўрдим-у, ўзимдан ранжидим.* О. Ёқубов, Бир фельетон қиссаси. *Опа-сингил ўзларини қаёққа қўйишларини билмай, тараддудга тушиб қолдилар, кўчага, йўлга қарадилар.* А. Мухтор, Опа-сингиллар. [Йўлчи] *Меҳмонхона эшигига келиб, тараддудда қолди: камбағал учун ўз қақини талаб қилиш ҳам қийин.* Ойбек, Танланган асарлар.

ТАРАДУДЛАНМОҚ Тарадуд ҳолатида бўлмоқ (**тарадуд** ҳар учала маъносиди). *Сафарга тарадудланмоқ. Бозорга тарадудланмоқ. Нима қилишини билмай тарадудланмоқ.* ■ Элчибек ўрнидан туриб кетиб, қайғқадир тарадудлана бошлади. А. Мухтор, Туғилиш. *Нодира Саодатхонга бир нима демоқчи бўлиб тарадудланди-ю, негадир айтолмади. С. Зуннунова, Янги директор. Менга ҳам Сатторқул акамнинг раис бўлиши маъқулдай туюлди-ку, бироқ раис бўлиб олгандан кейин мени яна кўпроқ ишлатса керак, деб тарадудланиб қолдим. Ф. Фулом, Тирилган мурда. Ҳакимбойвачча бу масалада ўзининг узоқ вақт тарадудланганига, ниҳоят, фурсатни қочирганига афсусланди. Ойбек, Танланган асарлар.*

ТАРАКА [а. *ترکه* — қолдирилган нарса; мерос] эск. Тақсимлаш, тақсим, бўлиш.

Тарака қилмоқ Бўлиб (тақсимлаб) бермоқ. *Азбаройиқи, шуролар камбагалпарвар ҳукумат, деб йиққанни кўпчилик ўртасида тарака қилмай, ҳукумат кўлига бердим. С. Кароматов, Сўнги бархан.*

ТАРАКАН қ. суварак.

ТАРАКАНА, таркана эск. Тақсимлашдан тегадиган улуш, ҳисса. *Муаллимлар.. бир ҳафтагача келиб, тараканаларини олиб кетишларини тавсия қиламиз.. Чунки Асака муассасаларининг.. мактабларнинг остонасигача бўлиб олиш хаёллари бор. «Муштум».*

Таракана қилмоқ айн. **тарака қилмоқ** қ. **тарака**. *«Менга деса, давлатингизни яланг оёқларга таракана қилиб юбормайсизми!» деб тўнғиллаганча чиқиб кетди. М. Осим, Тилсиз гувоҳ.*

ТАРАКАЧИ эск. шв. Мерос тақсимловчи. *Ёдгор, бир тангаси даста мирзосининг котибонасига [хизмат ҳақиға] кетган ойликка ўздан бир танга қўшиб, таракачига берди. С. Айний, Дохунда.*

ТАРАКЛАМОҚ «Тарак-тарак» товуш чиқармоқ. *Совуқдан тишлар таракларди.* ■ *Узоқда гоҳ-гоҳ автомат тараклаб қўярди. Ойбек, Қуёш қораймас. Тошларнинг қўрғон кунгураларига тегиб гумбурлаши.. мўғулларнинг даҳшатли сурони, ноғораларнинг тараклаши, карнайларнинг ғат-ғути ҳавони ларзага келтирди. М. Осим, Ўтрор.*

ТАРАЛ(Л)А Беғам-беташивиш айш қилиб юриш; шу тарздаги хурсандчилик, гашт. *Туй*

бўлса, сизга нима ғам, аяжон? Сиз ҳам таралани ванг қўйиб юравермайсизми? Ҳамза, Бой ила хизматчи. Уйнаб-кулиб, таралангни тортиб юравер. Сенга «чурқ» этадиганнинг боши ўнта. Ф. Фулом, Шум бола. Қурилиш раҳбарлари эса парвойи палак. «Бўлса бўлар, бўлмаса ғовлаб кетар», деб таралани ванг қилиб юришибди. «Муштум».

ТАРАЛ(Л)АБЕДОД Беғам-беташивиш айш қилиб юриш; хурсандчилик, гашт (шу тарзда юрадиган шахсларга нисбатан қўлланади). *Таралабедод қилиб юрмоқ.* ■ *Қачон кўрсанг, таралабедод, хурсанд, хушчақчақ. Шухрат, Шинелли йиллар. Бировларнинг севгисини хор қилиб, бошқа ёр топиб, таралабедод қилиб юрувчиларнинг адабини бериб қўйиш керак. Б. Раҳмонов, Юрак сирлари. -Асадни ёшлигидан билардим. Ширинтомоқ, машатга суяги йўқ, таралабедод, — деди Камол. Ҳ. Назир, Кўктерак шабадаси.*

ТАРАЛМОҚ 1 Тарамоқ 1, 2 фл. мажҳ ва ўзл. н. Сув ҳамма эгатега баравар таралади. ■ *Ўрмонжон шошиб чиқиб кетди ва бирон соатдан кейин озғин, сочи ўнг томонга жуда ҳафсала билан таралган.. ёшгина бир йигит билан кириб келди. А. Қаҳҳор, Қўшчинор чироқлари.*

2 Ёйилмоқ, тарқалмоқ. *Қайси бир узун қулоқ орқали бу гап қамиш тўзғоғидай таралиб кетди. Ҳ. Назир, Ўтлар туташганда. Кумушбиби бошловчи қизлар билан уйга кирди, ундан таралган атир ислари билан уй тўлди. А. Қодирий, Ўтган кунлар. Ўн икки ўғил-қизли ота-онанинг донғи бутун мамлакат бўйлаб таралди. Р. Файзий, Шоҳи дарпарда.*

3 Ҳар томонга кетмоқ, тарқалмоқ. *Қизлар мусиқий асбобларни қучоқлаб, қўрқаниса, гинг демасдан, ҳар ёққа таралдилар. Ойбек, Навоий. Чипор товуқ ҳам зўр ташвиш билан қақағлаб, таралиб юрган жўжаларини қаноти остига чақирарди. А. Муҳиддин, Оташ қалби қиз.*

ТАРАМ 1 Соч, соқолнинг тароқдан ўтказилиб силлиқланган ҳар бир тутами, қисми. *Бир тарам соч.* ■ *Сочингиз тарамлари упакдан силлиқ. Миртемир.*

2 кўчма Толаланиб, бўлаканиб, маржон каби оққан сув, кўз ёши ҳақида. *Хотинининг ҳар кўздан етмиш тарам ёш тўкилиб, юзгиналарига ёйилиб.. «Ойсулув».*

ТАРАМОҚ 1 Тароқ ёки бошқа бирор нарса билан соч, соқол ва ш.к. нинг чигилини ёзмоқ, текисламоқ. *Шундан кейин сочларини бир томонга силлиқ тараган тилла тишли йигит қўл кўтарди.* Н. Аминов, Суварак. *Отам уйланиб қолди. Соқолини бармоқлари билан таради.* Ойдин, Садаганг бўлай, командир. *Қоронғида сокин турган отнинг бўйнидан қучоқлади, бармоқлари билан ёлини таради.* Ойбек, Танланган асарлар.

Ювиб-тарамоқ Озода тутиб, парвариш қилмоқ. *Мен укаларимни ювиб-тараб, кечқурун бир қошиқ обиевғон қайнатиб, етимлигини билдирмасликка уриндим.* Ойбек, Танланган асарлар.

2 қ. х. Ариқ-жўякларга сувни бир меъёрда тақсимлаб оқизмоқ, таратмоқ. *Жўяк олинган жойларда тажрибакор сувчилар чанқанган ғўзаларга сув тарардилар.* Ш. Рашидов, Бўрондан кучли. *Шермат ота икки гектарлик картага сув тараб бўлди-да, эгатларни кўздан кечириб, ўқариқ бўйига чиқди.* Ҳ. Нуъмон, Фасллар.

3 кўча поэт. Ёймоқ, сочмоқ. *Қорли тоғлар орқасидан Атлас сочин тараб қўёш, Гоҳ мўралаб, ўйнатар қош, Ханда сочар дудоғидан.* Файратий.

Ток(ни) тарамоқ Ток новдаларини бирибидан ажратиб, таратиб, бағазларга боғламоқ. *Боғбон боққа қаролмапти, тоқларини таролмапти..* Ё. Шукуров, Асарлар.

ТАРАМ-ТАРАМ Ранг ёки бошқа жиҳатдан узун-узун йўлли, йўл-йўл. *Тарам-тарам олма. Тарам-тарам тарвуз.* ■ *Ҳовлидаги ёнғоқ ва ўрикларнинг қорамтир барглари ва бута ораларини тарам-тарам қизғиш нур ёритмоқда эди.* П. Турсун, Ўқитувчи. *Унинг баданлари қамчи изларидан тарам-тарам титилиб, мўматалоқ бўлиб кетди.* А. Пўлат, Ўқлар чақнаган дамларда.

ТАРАН [р. таран – девортешар қурол < нем. Tarant – қамал қуроли] **1 тар.** Қалъа ва унинг дарвозаларини бузишда қўлланганидан, узун йўғон ходадан иборат, занжирга осиб боғланган қадимий ҳарбий қурол. *Искандар усти ёпиқ, ғилдиракли таранлар ясаттирди.* М. Осим, Аждодларимиз қиссаси.

2 ҳарб. Душман самолёти, кемаси ёки танкига ўз самолёти, кемаси ёки танки билан зарба бериш. *Ўқларим тугади, самолётимни таранга олиб бормоқдаман.* Газетадан.

ТАРАНГ [ф. ترنگ – ўқ отилганда камон ипидан чиқадиған товуш] **1** Қаттиқ тортилган, солқа ёки бурушиқ жойи қолдирилмасдан керилган. *Таранг тортилган арқон.* ■ *Нафиса кўрдики, ип жуда таранг тортилди, энди ширт этиб узлиб кетиши мумкин.* Шуҳрат, Жаннат қидирганлар. *Бу тор, таранг кийимда унинг келишган қомати янада бўртиб турарди.* С. Сиёев, Отлиқ аёл.

2 Тўлишиб силлиқ торган, текис. *Таранг сийналар қора кофтага сиғмай, қўш чўққига айланган.* С. Сиёев, Отлиқ аёл. *Бир неча кун ичида Нодиржоннинг эти устухонига ёпишди, энли, таранг пешонасида ажинлар пайдо бўлди.* А. Муҳиддин, Чап чўнтак.

3 кўча Айрим сўзлар билан қўлланиб, нарса, ҳолат кабиларнинг юқори даражасини, сўнгги чегарасини билдиради. *Унинг бутун вужуди ҳаяжон билан таранг тортилган эди.* П. Қодиров, Уч илдиз. *..унинг уятчан кўзларига кўзи тушиб, таранг асаблари бирдан бўшашиб кетди.* С. Нуоров, Нарвон. *Саломхонадаги таранг вазият бир оз юмшагандек бўлди.* С. Сиёев, Ёруғлик. *Низомжон ана шу оилада, ҳамиша таранг рўзгор ичида ўсди.* С. Аҳмад, Уфқ.

Таранг қилмоқ 1) таранг ҳолга келтирмоқ. *Арқонни таранг қилмоқ;* 2) ялинтириш ва ш.к. мақсадда рози бўлмастик, кўнмаслик. *Шундай пайтларда Ҳури жуда очилиб кетар, гали келганда, ҳеч таранг қилмай, қўлидан келганини кўрсатар эди.* Ф. Мусаёнов, Ҳури. *Келини аравада олиб келишайтганларида, гузарларда тўсишарди.. соврин тилаб, атайин таранг қилишарди..* Р. Раҳмон, Меҳр кўзда.

ТАРАНГЛАМОҚ Тортиб ёки кериб, таранг ҳолга келтирмоқ. *Дорни тарангламоқ. Дуторнинг ипини тарангламоқ. Матонни таранглаб, гул тикмоқ.* ■ *Участка этагидаги икки йигит симни таранглаб, белги қилинган туғмачани назорат чизғига бараварлади.* Р. Раҳмон, Тиниб-тинчимас.

ТАРАНГЛАШМОҚ Таранг ҳолга етмоқ (**таранг** тўғри ва кўча маънода). *Йигитали сувдан руҳи енгил тортиб чиқди, таранглашган баданларида қайта бардамлик пайдо бўлди.* Д. Нурий, Осмон устун. *..бойвачча гоҳ асаби таранглашиб, митиғини қўлга олар, гоҳ бўшашиб, ёнига қўярди.* С. Юнусов, Қутилмаган ҳазина. *Эркин институтни тамомлаб, илмий иш билан шуғуллана бошлаган*

пайтда муносабат янада таранглашди. Газетадан.

ТАРАНГЛИК Таранг ҳолат (**таранг** тўғри ва кўчма маънода). *Бўғизда тиқилиб, ўртада тўлиб турган нафасни фақат сарбаст гап билан, ўртадаги тарангликни йўқотувчи эркин сўз билан ўнглаш мумкин эди. М. Исмоилий, Фарғона т.о. -Йўқ, Шерали Назарович, — деди ҳамон таранглигидан тушмаган Расулжон, — тўғри айтдингиз. Ж. Абдуллахонов, Хонадон.*

ТАРАНМОҚ Сочларини тараб, у ёқ-бу ёқларини тартибга келтирмоқ. *Танноз тарангунча тўй ўтар. Мақол. ■ [Элмурод] Ювинди, таранди ва сўнгера айвондаги сандалга ўтирди. П. Турсун, Ўқитувчи. Ювиниб, тараниб, тоза кийинган қиз заргар қўлидан эндигина чиққан узукка ўхшайди. Шуҳрат, Шинелли йиллар.*

ТАРАННУМ [а. *ترنم* — куйлаш, ашула айтиш; сайраш, гўзал сўзлаш] *поэт. Куйлаш; куй. Алаловчи ва фараҳбахш нозик тараннум Севги меҳри билан мени ҳар нафас қучар. Файрагий.*

Тараннум этмоқ (ёки қилмоқ) 1) куй ижро этмоқ, куйламоқ; 2) кўчма мадҳ этмоқ, мақтамоқ, куйламоқ. *Шоирлар шеърларида тараннум этган гўзал бог! Ойбек, Навоий. Мардлик сенда, ҳарорат сенда, Тараннум қил севги эртагин. Р. Бобожон.*

ТАРАНТАС [р. таратайка < карандас — одам ташийдиган арава тури] *эск. Одам ташийдиган тўрт гилдиракли арава. ..Чорраҳаларда чиройли тарантаслар, отлари тумшуғига кийгизилган тўрвадан сули чайнаятти. А. Мухтор, Чинор. Фойтун қиммат бўлгани учун, энди мен тарантас деган узун аравага тушдим. М. Муҳаммаджонов, Турмуш уринишлари.*

ТАРАТМОҚ 1 **Тарамоқ** фл. орт. н. *Сочини таратмоқ. Жўякларга сув таратмоқ.*

2 **Ёймоқ, сочмоқ, тарқатмоқ.** *Кабобпазнинг елпигичи мовий дудлар билан ёқимли ҳид таратади. Ш. Тошматов, Эрк куши. Осмонни тўлдириб учган қушларни айтинг: улар ҳам ҳузур бағишлаб, Кўкорол кўкида ёқимли куйлар таратар эди. Ҳ. Назир, Сўнмас чақмоқлар. Сахий ёз қуёши оламга нур таратади, қабристон ҳам кўм-кўк.. Газетадан.*

ТАРАФ [а. *طرف* — чет, чекка, уч; охириги, сўнги нуқта; чекка жой; ён, томон] *айн.*

томон 1-4. У тараф. Бу тараф. Ҳар тараф. ■ *Ўрданинг ташқариги қисмининг уч тарафи (жануб, шарқ, ғарб) биносиз, фақат кўрғон деворларининг зиналари эди. А. Қодирий, Ўтган кунлар. Кундузи қум тарафдан илиқ, нафасни қайтарадиган шамол эсади. С. Аҳмад. Уфқ. Ҳар икки тараф, ким ўзар ўйнагандек, оташ мақтовлар билан бир-бирини ўққа тутди. Ф. Мусажонов, Ҳиммат. Шунинг учун бошқа ўйинларни кўя туриб, мажлисининг энг қизиқ тарафи бўлиб саналган лапар айтишга кўчдилар. А. Қодирий, Ўтган кунлар. ..ҳар икки тараф ўртасидаги вазият тобора кескинлашиб борарди. К. Яшин, Ҳамза. Айтмади, сўрасам, гапни бошқа тарафга чалғитди. А. Қодирий, Ўтган кунлар.*

Тарафини олмоқ Тарафдор сифатида ҳаракат қилмоқ, бирор томонни ҳимоя қилмоқ, қўллаб-қувватламоқ; у ёки бу тарафга бўлишмоқ. *Жанжал чиққан вақтларида подшо камбағалларнинг эмас, бойларнинг тарафини олар экан. Н. Сафаров, Оловли излар.*

2 Курашувга, беллашувга, баҳслашувга хоҳиш билдирувчи шахс, талабгор. *Бирор шаҳарга келганида, унга [Кулматқорага] тараф чиқмай қолса борми, бундай шаҳарнинг йигитлари йигит ҳисобланмасди. А. Мухтор, Опа-сингиллар. Ишбоши: — Қани, тараф борми? — деб, полвоиларни майдонга чақирганда, нима бўлди-ю, таваккал қилиб, ўрнимдан туриб кетдим. П. Турсун, Ўқитувчи.*

Тараф йўқ Бас келадиган, беллаша оладиган, тенглашадиган киши йўқ. *Унинг [Валижоннинг] одамхуналиги, кўнгилчанлигида тараф йўқ. Ҳ. Назир, Олмос. Гапдан гап чиқаришга сенга тараф йўғ-а, хотин.. А. Муҳиддин, Ҳадя.*

3 *фольк. Душман, ғаним. Қашшоқларга бойлар кўп тараф бўлди. Эргаш Жуманбулбул ўғли. Мен ўлмасам, тараф босмас изингни. «Юсуф ва Аҳмад».*

4 *кўм. вzf. (3-ш эгаллик ва ч. к. шаклида). Томонидан, жиҳатидан. Ўз ёнларидан сарф қилиш учун ақчалари йўқ, ҳукумат тарафидан бериладиган овқатнинг салмоғи йўқ эди. А. Қодирий, Меҳробдан чаён.*

ТАРАФАЙН [а. *طرفين* — «тараф» с. иккилик сонни: ҳар икки тараф] *эск. кт. Даъвогар ва жавобгар ёки баҳслашувчи, курашувчи, олишувчи томонларнинг ҳар иккиси; томонлар, тарафлар. Тарафайнларни сўроқ қилмоқ. ■ Тарафайн бир-бирлари билан тани-*

шиб кўришгандан сўнг, марказ вакили идорани бу йилги зўр муваффақият билан табрик қилди. А. Қодирий, Обид кетмон. *Тарафайнларнинг гаплари эшитилгандан кейин, суд ҳўкм мажлисига кирди. А. Мажидий, Инжиқ зиёратчи.*

ТАРАФ-БАТАРАФ қ. **тарафма-тараф**. Деҳқонлар, боғбонлар чойхоналарни тўлдириб ўтиришади-да, тараф-батараф аскиябозлик қилишади. Б. Раҳмонов, Тиниб-тинчимас.

ТАРАФДОР [а. + ф. طرفدار — тарафини олувчи, ёқловчи, ҳимоя қилувчи] 1 Бир-бирига қарши бўлган томонлардан бирига ён босувчи, уни қўллаб-қувватловчи, ҳимоя қилувчи шахс. *Мусулмонқўлга тарафдорларингиз бўлса, тинчликча қўшиндан чиқиб кетсин!* А. Қодирий, Ўтган кунлар. *Бобур бу гал яна алданмаслик учун шаҳар ичидаги тарафдорларининг ҳеч бирига хабар бермасдан.. таваккал қилиб келди. П. Қодиров, Юлдузли тунлар.*

2 Бирор гоё ёки ҳаракатни ҳимоя қилувчи, шу гоё, ҳаракат учун курашувчи шахс, ташкилот ва ш.к. *Тинчлик тарафдорлари.* ■ *Бетоб бўлиб Ўшга келолмаган Хўжа Абдулло ҳам Бобурнинг Самарқандга қўшин тортиб боришига тарафдор эди. П. Қодиров, Юлдузли тунлар.*

ТАРАФКАШ [а. + ф. طرفکش — тарафини олувчи, тарафдор] 1 Бирор томоннинг тарафини олувчи; тарафдор. *Бедана эгалари ва уларга пул тиккан тарафкашларнинг кўзлари ола-кула, юраклари така-пука бўлиб, нафаслари ичига тушиб кетди. М. Муҳаммадҷонов, Турмуш уринишлари.*

2 Қарши чиқувчи, курашувчи, беллашувчи; талабгор. - *Бургутнинг йигитлари ҳали курашда елкаси ер кўрмаган полвонлар. Ҳозир бу полвонларга Фаргона томонда тарафкаш йўқ, — деди йигит. С. Аҳмад, Чўл бургути.*

3 Тараф-батараф бўлиб курашувчи; гуруҳбоз. *Менинг қишлоғимда тарафкашлар кўп... Бир-бирини ковлди. П. Турсун, Ўқитувчи.*

ТАРАФКАШЛИК Тарафкаш бўлиш, тарафкаш бўлиб иш тутиш. *Жанжал бир нафасда тарафкашликка айланиб кетди. П. Турсун, Ўқитувчи.*

ТАРАФЛАМА: Миқдор билдирувчи (*бир, икки каби*) сўзлар, шунингдек, ҳар сўзи би-

лан қўлланиб, шу сўзлар билдирган миқдорий нисбатни англатади. *Масалани бир тарафлама ҳал қилмоқ. ■ Кекса, танилган ёзувчи ўсиб келаётган ёш авлодга ҳар тарафлама кўмаклашуви керак. Н. Сафаров, Оловли излар.*

ТАРАФЛИ Тарафи, ёни бўлган. *Икки тарафли пичоқ. Бир тарафли мовут.*

Бир тарафли бўлмоқ У ёқли ёки бу ёқли бўлмоқ; бирор томон фойдасига ҳал бўлмоқ. *Отабек иш бир тарафли бўлгунича ўзининг қочмаслиги учун кафил беришга мажбурдир. А. Қодирий, Ўтган кунлар. Бир тарафли қилмоқ* У ёқли ёки бу ёқли қилмоқ; бирор томон фойдасига ҳал этмоқ.

ТАРАФМА-ТАРАФ Тараф-тараф бўлиб, тарафларга бўлиниб. *Кўчада Витя, Сарсенбой, Остап ва қўшни болалар тарафма-тараф бўлиб, тўп тепишмоқда. Р. Файзий, Сен етим эмассан. Тарафма-тараф бўлиб тортишувлар, ёр-ёр айтишувларни айтмайсизми.. Р. Раҳмон, Меҳр кўзда.*

ТАРАШ I Тарамоқ фл. ҳар. н. *Сочни тараш. Сувни тараш. Тараш машинаси.* ■ *Лаъли ишвали кўзлари билан унга ҳар қанча термулиб боқмасин, бек ўз оти билан, унинг.. ёлини тараш билан машғул. Ҳ. Ғулом, Машғал.*

ТАРАШ II [ф. تراش — кесиш; қириш, қиртишлаш] Кесиш, йўниш, қиртишлаш, қириб текислаш. *Идишлар қуриб, тарашдан чиққан, [Кулмуҳаммад] гилвата қуярди. Мирмуҳсин, Чўри.*

ТАРАША [ф. تراشه — силлиқланган, тарашланган нарса; ёғоч парахаси, қириндиси] 1 Ёриб майдаланган ўтин. *Қуруқ тараша. Тараша тайёрламоқ.* ■ *Кўмир йўқлигидан, тараша чўғи танчани бирпас биллатиб сўнган эди. Ойбек, Танланган асарлар. Кейин у айвондаги самоварни пуфлаб, ўтхонасига тараша ташлай бошлади. А. Мухтор, Давр менинг тақдиримда.*

2 кўчма Қуруқ, қаттиқ нарса ёки қотма одам ҳақида, *Унинг қўллари бамисоли тараша.*

3 Шундай қотма, «қуруқ» одамнинг исмига қўшиб айтиладиган лақаб. - *Полвон, бас, Ҳамзахонни чарчатиб қўймайлик, — деди Маҳмуд тараша.. К. Яшин, Ҳамза.*

Томдан тараша тушгандай Кутилмаган(да), бирдан, тўсатдан; ўйламай-нетмай.

Холиқнинг томдан тараша тушгандай гаплари тагин кулгимни қистатди. Ҳ. Назир, Бир туп ғўза. Қизиқ, туппа-тузук йигит, у йўқ-бу йўқ, томдан тараша тушгандай.. бирдан совчи юборгани қанақаси. О. Ёқубов, Баҳор кунларидан бирида.

ТАРАШЛАМОҚ 1 Силлиқ, текис қилиб олмоқ, қирмоқ (соч, соқол, жун ва ш.к. ни). -Сиз, — деди Азмиддин, калта, сийрак соқолини пўрим тарашлаган Бўронбекка қараб.. Ҳ. Фулом, Машғал. *Ўн олти ёшидан бери соқол олдирадиган сермўй Очил ҳозир уч кунда бир юзини тарашларди.* П. Қодиров, Уч илдиш.

2 Йўниб, қириб ва б. йўл билан ишлов бермоқ, силлиқламоқ. *Инсон қўли билан тарашлангандай силлиқ, тўртбурчак харсанглар бу ерда жуда кўп.* С. Анорбоев, Оқсой. *..йигит ўзидан уч-тўрт қадамча нарида гишт тарашлаб ўтирган кекса одамга ўзга тилда бир нима деди.* Мирмуҳсин, Меъмор.

3 кўчма Қириб-қиртишлаб, бутунлай йўқотмоқ, йўқ қилмоқ. *Насибани аллақачон кўнглимдан тарашлаб ташлаганим учун ҳам индамай қўя қолардим.* О. Ёқубов, Тилла узук.

ТАРАҚ 1 тақл. с. Икки қуруқ нарсанинг бир-бирига қаттиқ урилишидан чиққан товушни билдиради. *Тарақ этиб эшикни ёймоқ.* ■ *Хола тарақ этказиб, бўш челақни ерга қўйди.* Газетадан.

ТАРАҚ II: Баъзи сўзлар билан қўлланиб, шу сўз англатган нарсанинг юқори даражасини билдиради. -*Пичоғимиз мой устида денг! Касдо бўлиб қолган бозоримиз яна тарақ бўлар экан-да!* — деди қавушдўз ака Наврўзга. М. Осим, Элчилар. *Битта-яримтаси ваҳималироқ бир гап эшитдим, дарров мол нархини оширадилар. Уруш баҳона бўлди уларга. Бизнинг хўжайин-чи? Иши тарақ!* Ойбек, Танланган асарлар. *Кайфи тарақ Тантубойвачча Салимни юпатиш учун ичкиликни мўл ичирди.* Ойбек, Танланган асарлар. *Биринчи қалин қордан кейиноқ қақшатқич изғиринлар бўлиб, ҳамма ёқ тарақ музлади.* Ҳ. Нуъмон ва А. Шораҳмедов, Ота.

ТАРАҚ(А)-ТУРУҚ 1 тақл.с. «Тарақ» ва шунга яқин товушларни билдиради. *..оломон бир-бирига аралашиб, тарақа-туруқлар, қиличларнинг жаранги, отларнинг кишнаши дашт сукунатини бузиб юборди.* Мирмуҳсин, Чўри. *Эшик тарақ-туруқ очилиб, кўн этигини дўқиллатганча, акаси Мўмин кириб келди.* Ш. Фуломов, Ёрқин йўллар.

2 кўчма с.т. Ортиқча, кераксиз нарса, хатти-ҳаракат кабилар ҳақида. *Бунақа тарақа-туруқларнинг нима (кимга) кераги бор?!*

ТАРАҚЛАМОҚ 1 «Тарақ», «тарақ-тарақ» товуш чиқармоқ, тарақ этмоқ. *Кўча томонда бир нарса тарақлади. Аёл қўлидаги қошиқни қўйди-да, югуриб дераза олдида борди.* С. Зуннунова, Гулхан. *Эшик тарақлаб очилиб, кимдир Мунавварни қучоқлади.* С. Анорбоев, Меҳр.

2 кўчма Иш-фаолият, нарса ва ш.к. нинг авжида, юқори даражада бўлишини билдиради. *Тарақлаган участканинг бекасиман, Эргинамнинг жондан суйган эркасиман.* «Муштум». -*Иш тарақлаб, пул кўнайгандан кейин, бирваракай ички-ташқи данғиллама иморат соламан, — деди-да, ёмонгина ҳовлини ижарага олди.* Ойбек, Танланган асарлар.

ТАРАҚҚИЁТ [а. ترقیات — юксалиш, олға ҳаракатланиш, ривожланиш, ўсиш] Ривожланишнинг олдийдан мураккабга, қуйидан юқорига йўналган шакли, унинг юксалиши. *Тарихий тараққиёт. Техника тараққиёти. Кишилик жамиятининг тараққиёт босқичлари. Фан ва маданиятнинг тараққиёт даражаси.* ■ *Мана, тараққиёт даври келиб, шаҳарлар қайта қурилмоқда.* Мирмуҳсин, Меъмор. *Мамлакатимизда ишлаб чиқарувчи кучлар кенг кўламда ривожланмоқда, фан-техника тараққиёти авж олмоқда.* «Фан ва турмуш».

ТАРАҚҚИЙ [а. ترقى — кўтарилиш, юксалиш, ривожланиш] кам қўлл. айн. **тараққиёт.** *Азар биз жаҳду жадал қилиб, бу жаҳолат ботқоғидан қутулмасак, тараққий йўлини тутмасак.. яқин ўртада биз мусулмонларнинг муқаддас ерларимизни ҳам босиб оладилар.* Ойбек, Танланган асарлар.

Тараққий этмоқ (ёки қилмоқ, топмоқ) Ўсмоқ, ривожланмоқ, юксалмоқ; мукамаллашмоқ. *Тараққий топган мамлакатлар.* ■ *Қадимда қайси шаҳар тараққий этиб, обод бўлган бўлса, унинг сабабини тарих китобларида савдо йўли ўтганлигида, деб ўқитилади.* Шукрулло, Жавоҳирлар сандиғи.

ТАРАҚҚИЙПАРВАР [а. + ф. پروار — тараққиёт тарафдори, ҳимоячиси] Тараққиёт тарафдори, тараққиёт, юксалиш учун курашувчи. *Тараққийпарвар ёзувчи. Тараққийпарвар инсоният.* ■ *Унинг [«Хуриш» газетасининг] бошқармаси.. Шариф охунд деган тараққийпарвар бир одамнинг меҳмонхона-*

сида экан. М. Муҳаммаджонов, Турмуш ури-нишлари. У кўпинча тараққийпарвар зиё-лиларга яқин алоқада бўлди. Ойбек, Нур қидириб.

ТАРАҚҚОС [а. ترقّاص — сакраш, типир-чилаш; ўйинга, рақсга тушиш] **1** айн. **қумой**.

2 кўчма Жуда хунук, таъвия. **Таъвийий тараққос айн. таъвия-тараққос.**

Тараққос бойламоқ фольк. Гижинглаб турмоқ (от ҳақида); ноз-ишва қилмоқ. *Фирот Авазин кўриб, учадиган қушдай, ҳар кўзи таркашдай, юлдузни кўзлаб, тараққос бойлаб ўйнай берди.* «Балогардон».

ТАРАҲҲУМ [а. ترخم — раҳм қилиш, ғамхўрлик, марҳамат]: эск. кт. Раҳм, раҳм қилиш, марҳамат. *Али Акбарнинг Мирзога ишончу ихлоси бўрининг кўйга тараҳҳумидек иш эди.* А. Ҳақимов, Илон изидан. *Ҳасан-алининг юзига падарона тараҳҳум туси ки-риб, кексаларга хос оҳангдор бир товуш би-лан беқнинг устидаги оғир юкни ола бошла-ди.* А. Қодирий, Ўтган кунлар.

Тараҳҳум этмоқ (ёки қилмоқ, айламоқ) Раҳм, шафқат қилмоқ. *Умид қиламизки.. қизимизнинг кўз ёшига тараҳҳум этиб, айир-тириб кўйсангиз.* Ҳамза, Танланган асарлар. *Аслим сўрсанг — хонзодаман, қаддиндан, Тараҳҳумлар қилгин менинг ҳолима.* «Ойсу-лув». *Неча кундан бери кўрсатмайин васли соғинтирди, Тараҳҳум айласун ул шўх жо-нон, бир келиб кетсун.* Ҳамза.

ТАРБИЯ [а. تربيه — ривожлантириш; парвариш қилиш, ўстириш; ўргатиш; илм бериш] **1** Таълим, ахлоқ-одоб ва ш.к. ни ўргатиб, сингдириб, инсонни вояга етка-зиш, улғайтириш, ўстириш. *Интернат тар-биясида ўсган бола.* ■ *Абдурахмон.. отаси ўлиб, онаси ва ота томонлари тарбиясида қолди.* А. Қодирий, Меҳробдан чаён. *Қиз ўн олти ёшгача бу оилада, музыка муаллими бўл-ган камбағал амакининг тарбиясида ўсди.* Ойбек, Танланган асарлар.

2 Инсонда иш-хунар, одоб-ахлоқ ва ш.к. ни шакллантириш, ривожлантиришга, унинг жамиятда яшаши учун керак бўлган хислатларга эга бўлишини таъминлашга қаратилган иш-амаллар мажмуи ва шу йўл билан сингдирилган одоб-ахлоқ, хислат, фазилат кабиларнинг ўзи. *Сиёсий тарбия.* *Ҳоявий тарбия.* *Мактаб тарбияси.* *Тарбияси бузуқ одам.* *Тарбияси яхши бола.* ■ *Ёш ав-лод тарбиясида юқори самарага эришиши учун*

бир қатор шарт-шароитлар барқарор бўли-ши лозим. Газетадан. *Болалар китоби тарбия учун ёзилади, тарбия эса буюк иш.* «Саодат».

Тарбия бермоқ Тарбия хизматини амалга оширмоқ, тарбияламоқ. *Болага оила ҳам, мактаб ҳам тарбия бериши, одоб-ахлоқ ўр-гатиши шарт.* Газетадан. **Тарбия олмоқ (ёки кўрмоқ, топмоқ)** Тарбия орттирмоқ, тарбия-га эга бўлмоқ. *Хорст Шустер ўн ёшгача мак-табда шундай тарбия олган:* «Уруш жуда қизиқ нарса бўлади. Катта бўлганинда, бир ўзинг юзта душманни ўлдирасан..» А. Қаҳҳор, Асарлар. *Заргаров узун сўздан хулоса чиқар-иб:* -*Мен ёшлигимда шундай тарбия кўрсам, ҳозир ерда туриб, ойда чорвачилик қилар эдим, — деди.* А. Қаҳҳор, Оғриқ тишлар. *Мундоқ жойда тарбия топган киши қандоқ олим.. инсофли ва шафқатли бўлса керак.* Ҳамза, Танланган асарлар.

3 Маълум тартиб, усул асосида қараб, ишлов бериб ўстирмоқ; парваришламоқ (ўсимлик ва ҳайвонлар ҳақида). *Ғуза тар-бияси оғир иш.*

Тарбия қилмоқ **1)** тарбиялаб катта қил-моқ, вояга етказмоқ, ўстирмоқ, улғайтмоқ (қ. **тарбия 1**). *Ўн бир ёшлик Темир, тўққиз ёшлик Қобил ва Анварларни тарбия қилиш оғирлиги Нодиранинг устига тушиди.* А. Қо-дирий, Меҳробдан чаён; **2)** илм-хунар бер-моқ, одоб-ахлоқ ўргатмоқ, тарбиялаб би-рор хислат-фазилатни сингдирмоқ (қ. **тар-бия 2**). *Шунча таҳсил ва тарбия берганла-рингиз учун раҳмат!* М. Исмоилий, Фаргона т. о.; **3)** парвариш қилмоқ (қ. **тарбия 3**). *Ҳали нишона қилмаган мевани ҳисобга кирита-санми? Аввал тарбия қил, гулласин, ундан кейин мевасига сават тўқисанг арзийди.* Шўҳрат, Шинелли йиллар. *Бузоқлигидан ўзи тарбия қилган, унга ўрганган эди.* С. Юнусов, Кутилмаган ҳазина.

Жисмоний тарбия қ. жисмоний.

ТАРБИЯВИЙ Тарбияга оид; тарбия учун хизмат қиладиган. *Тарбиявий ишлар.* *Катта тарбиявий аҳамиятга эга бўлган асар.*

ТАРБИЯЛАМОҚ 1 Боқиб ва таълим бе-риб катта қилмоқ, вояга етказмоқ, ўстир-моқ. *Ўн бир болани тарбиялаган она.* ■ *Раҳ-мат, она, Ботиралидек ўғилни туққанингиз, тарбиялаб ўстирганингиз учун раҳмат!* Ҳ. Фулом, Машғал.

2 Илм-хунар бериб, одоб-ахлоқ ўргатиб етиштирмоқ. *Мактабимиз тарбиялаган бо-*

лалардан кўп олимлар етишиб чиқди. ■ Ким айтади бунни оғир қиз деб, олов-ку! Тўғри, сал ёввойилиги бор. Аммо ўзим тарбиялаб олам. Ф. Мусажонов, Ҳури.

3 Мунтазам, изчил тарбия йўли билан ғоявий, маънавий ёки бошқа жиҳатдан шакллантирмоқ, етиштирмоқ. У ўзбек санъатининг фахри бўлиб қолган кўпгина таланти артистларни тарбиялаб ўстирди. Т. Обидов, Юсуфжон қизиқ. Айни пайтда ҳар бир тошкентликда ватанпарварлик туйғусини, шаҳар бойлигига бойлик, чиройига чиройи қўшишга.. бўлган интилишни собит-қадамлик билан, изчил тарбиялаш керак. Газетадан.

4 Парвариш қилмоқ, Бу кўчатларни ўзимиз тарбияладик.

ТАРБИЯЛАНУВЧИ 1 Тарбияланмоқ фл. сфдш. Тарбияланувчи ёшлар.

2 Тарбия олувчи, тарбияда бўлган шахс. Тарбияланувчиларни доим эътиборда тутуш керак.

ТАРБИЯЛИ Тарбия кўрган, яхши тарбия олган. Тарбияли ёшлар.

ТАРБИЯСИЗ 1 Тарбия олмаган, ахлоқсиз. Тарбиясиз бола. ■ Тарбиясизнинг бир қилиғи ортиқ, деган мақол бор. А. Қодирий, Обид кетмон.

2 Шу маъноси билан ҳақорат учун қўлланади. У автобусдан тушиб, ловуллаб турган қулоғини ушлаганча, Ҳожига қаради ва бисотидаги энг оғир, энг даҳшатли ҳақоратни ишлатди, яъни «тарбиясиз!» деди. А. Қаҳҳор, Асарлар.

ТАРБИЯТ эск. кт. айн. тарбия 1. Ким кучук бирлан хўтикка Қанча қилса тарбият, Ит бўлур, эшак бўлур, Аслоки бўлмас одами. Уйғун ва И. Султон, Алишер Навоий.

ТАРБИЯЧИ Тарбия берувчи шахс, мураббий. Боғча тарбиячиси. Тарбиячи аёл. ■ Унинг гурур тўла кўзлари.. устозларига тикилар, ота ўрнида оталик қилган ҳурматли Давроновга, жонкуяр тарбиячи Нафиса хонимга чин қалбидан миннатдорлик билдиргиси келар эди. П. Турсун, Ўқитувчи. Абдулла Қаҳҳор ёшларнинг.. том маънодаги тарбиячиси эди. Газетадан.

ТАРВАЙМОҚ Ёйилиб ялпаймоқ, кериламоқ, Кундузи билан қурбақадек тарвайиб, узун теракнинг қоқ тепасида турган катта булут парчаси киши таъбини хира қиларди. Ибохон, Улуғ кун. Элмурод Абдурасулнинг

ёнига ўтиб, оёқлари тарвайган «эшак»нинг бир четига ўтирди. П. Турсун, Ўқитувчи.

ТАРВАҚАЙ кам қўлл. Шохлари атрофига ёйилган ҳолатли. Мен ҳовлимга бордим, болалигимда кўрганларимдан ёлғиз шу жийда қолибди — тарвақай, гадир.. қадимгидек. Миртемир.

ТАРВАҚАЙЛАМОҚ 1 Ёйилиб, ҳар томонга шох отиб кетмоқ (дарахт ҳақида). Ҳар ёққа тарвақайлаб ўсган бесўнақай, қари толларнинг кўланкаси қуюқ. Ойбек, Танланган асарлар.

2 кўчма Ёнига, атрофига чўзилмоқ, кенг очилмоқ. Меишдай қаппайган қорни юрганида ҳам силкинар, тирсиллаб турган оппоқ елини сонларига шалоп-шалоп урилар, ўрта қўлдай йўғон-йўғон, тарвақайлаб кетган эмчакларидан йўл-йўлакай сут тиз-тиз тирқирарди. С. Анорбоев, Оқсой. -Э, бўлди, бўлди, — лаблари тарвақайлаб илжайди Ҳалимбой. Ф. Мусажонов, Нозик масала. Раҳимнинг оғзи тарвақайлаб кетди. Ҳ. Назир, Сўнмас чақмоқлар.

3 Ялпаймоқ; лапангламоқ. Синфга узун малла тўн, кўк духоба дўппи кийган, қипқизил юзли, ўрта бўйли бир киши тарвақайлаб кириб келди. П. Турсун, Ўқитувчи.

ТАРВИЖ [а. ترويح — тарқатиш, ёйиш, сотиш; муомалага киритиш] эск. Тарқатиш, ёйиш, оммалаштириш; муомалага, амалга киритиш. ..дин томонидан тарвиж этилган бу хаттотлик санъати яхши тараққий қилган эди. Чўлпон, Кеча ва кундуз.

ТАРВУЗ Қовоқдошлар оиласига мансуб, палак отиб ўсадиган бир йиллик полиз ўсимлиги ва унинг ейиладиган юмалоқ ёки овалсимон, қизил гўштли, серсув ҳосили. Тарвуз уруғи. ■ Уроз қаерданбир катта тарвуз келтириб, ўртага қўйди. Ойбек, Танланган асарлар. Поезд билан баравар фарбга кетаётган қуёшнинг сафари тезлашди ва у, кесилган қизил тарвуз палласидек, ўрмон дарахтларига шиниб қолди. И. Раҳим, Чин муҳаббат.

Тарвузи қўлтигидан тушмоқ Умиди пучга чиқмоқ; ҳафсаласи пир бўлмоқ. Дафндан сўнг тўй бир йилсиз бўлмаслигини эшитиб, қари куёв, тарвузи қўлтигидан тушиб, қишлоғига хомуш қайтиб кетди. М. Исмоилий, Фарғона т. о. Қудрат тарвузи қўлтигидан тушгандай бўшади, кўзларига филт-филт ёш олди. Ҳ. Назир, Сўнмас чақмоқлар.

ТАРЕЛКА [нем. Teller] 1 Чети бир оз кў-тарилган, туби кенг, ясси ошхона идиши; ликопча. *Чинни тарелка. Бир тарелка ҳол-вайтар.* ■ *Ошқовоқдан пиширилган қозон сомсани тарелкага тузаб.. уларнинг олдига олиб бориб қўйиб, Ўзи уйга кириб кетди.* С. Зуннунова, Олов.

2 мус. Бир-бирига урилувчи иккита металл баркаш шаклидаги урма чолғу асбоби.

3 Афсона тарзидаги, тарелкага ўхшаш, осмонда учиб юрувчи номаълум жисм. *Учар тарелкалар.* ■ *Юлдуз деса, юлдуз эмас, Ё йўлдошими бир дайди. Ҳар ҳолда, у шов-шув солган Тарелкага ўхшайди.* А. Орипов, Ёиллар армони.

ТАРЁК [а. تریاق < юн. teriakon – зидди-заҳар, ҳайвон заҳарига қарши дори] Афюн, қорадори. *Баъзан.. узундан-узун хаёллар Меъморни қуршаб олиб, бир муддат тарёку наша элитган одамдай, бир нуқтага тикилганча хаёл суриб қоларди.* Мирмуҳсин, Меъмор.

ТАРЖИМА [а. ترجمه – бир тилдан иккинчи бир тилга ағдариш, ўгириш; изоҳлаш, шарҳлаш; биография] 1 Бир тилдаги матнни бошқа тилда қайта яратишдан иборат адабий ижод тури. *Эркин таржима. Сўзма-сўз таржима. Бадиий таржима. Таржима назарияси.* ■ *Нихоят, асар таржимаси борасидаги ишимиз охиради.* Газетадан. Лермонтов шеърларининг биринчи таржимаси 1920 йилларнинг охирига тўғри келади. «Саодат».

2 Бир тилдан бошқа тилга ағдарилган матн. *Таржима тайёр бўлгач, муаллиф у билан таниша бошлади.* Газетадан. *Таржимадаги сўзлар, иборалар, жумлалар бир-бирига таъсир кўрсатиб, жозибали маъно касб этади.* Х. Ёдгоров, Ҳаёт тўлқинлари.

Таржима қилмоқ Бир тилдаги матнни бошқа тилга оғзаки ёки ёзма ҳолда ағдармоқ, ўгирмоқ. *Кейинчалик Бағдодда бориб, қадимги юнон олимларининг фалакиётга оид асарларини таржима қилдилар ва илмий шарҳладилар.* Мирмуҳсин, Меъмор. *Болалардан русчани сал-пал тушунадиганлари бошқаларига таржима қилиб беришди.* П. Турсун, Ўқитувчи.

Таржимаи ҳол Кишининг ўз шахсий ҳаёти ва фаолияти ҳақида ёзилган баён; автобиография. *Шоирнинг таржимаи ҳоли. Таржимаи ҳол ёзмоқ.* ■ *Абдукарим ака Бо-*

тирали қаршисида маънос ўтириб, қутилмаганда ўз таржимаи ҳолини сўзлаб кетди. Ҳ. Фулом, Машғал.

ТАРЖИМАЧИ кам қўлл. айн. **таржимон.**
ТАРЖИМАЧИЛИК Таржима қилиш, таржима билан шуғулланиш. *Кейинги йилларда.. таржимачилик фаолияти тобора ривожланмоқда.* Ф. Саломов, Таржима назариясига кириш.

ТАРЖИМАШУНОС [таржима + ф. شناس – ўрганувчи] Таржима назариясини, унинг қонун-қоидаларини ўрганувчи мутахассис, олим.

ТАРЖИМАШУНОСЛИК Таржима назарияси билан шуғулланувчи фан. *Ойбекнинг таржима соҳасидаги катта фаолиятини ўрганиш ўсиб келаётган таржимашунослик фанининг долзарб вазифаларидан биридир.* Ж. Шарипов, Моҳир таржимон.

ТАРЖИМОН [а. ترجمان – таржима қилувчи] Таржима қилувчи шахс. *Моҳир таржимон.* ■ *Мен билан сўзлашишингиз учун таржимон ҳам керакдир ҳали?* П. Турсун, Ўқитувчи. *Мақсуд Шайхзода талантли шоир, моҳир таржимон, меҳрибон ўқитувчигина эмас, у атоқли олим ҳамдир.* «ЎТА».

ТАРЖИМОНЛИК Таржимон иши, касби. *Унинг қаноти остида кўндан-кўн ёш талантлар таржимонлик, тахрирчилик сингари мураккаб ишларнинг сир-асрорини билиб олдилар.* Х. Ёдгоров, Ҳаёт тўлқинлари.

ТАРЗ [а. طرز – ҳаракат усули, йўсин, равиш, услуб] (3-ш. эгалик шаклида – **тарзи**) Ўзи боғлиниб келган (ўзидан олдин қўлланган) сўз билдирган нарсанинг йўсини, кўриниши, ҳолати маъносини англатади. *Ҳаёт (турмуш) тарзи.* ■ *Онасининг гаплари Санамга ҳеч ёқмаган, лекин гапнинг тарзидан онасининг кампир билан ҳамфикр эканини англаган эди.* Ш. Холмирзаев, Тўлқинлар. *Сув музга айланганда, модда зарраларининг ҳаракат тарзи ўзгаради.* «Фан ва турмуш».

2 (3-ш. эгалик ва ў.-п. к. шаклида – **тарзида**) Иш-ҳаракат, нарса-ҳодисанинг йўсини, равиши маъносини билдиради; йўсинида, сифатида. *Кўнгли тортиб юрган одами айтгани учун хафа бўлмади, аммо ҳазилга ҳазил тарзида.. шўхлик қилди.* А. Қаҳҳор, Кўшчинор чироқлари. *Давра суҳбати савол-жавоб тарзида ўтди.* Газетадан. *Шу сабабли ўзингизга сир тарзида айтаманки, Англия*

тез орада жаҳоний давлат мавқеини йўқотади. А. Ҳакимов, Илон изидан.

3 (ў.-п. к. шаклида — тарзда) Белги билдирувчи сўзлар, шунингдек, айрим олмошлар билан қўлланиб, шу сўзлар англатган белгили ҳолатни, ҳаракат-ҳолатнинг шундай ҳолат, йўсин билан бўлишини билдиради; йўсинда, ҳолда. *Ҳафиз Мирзамухамедович одатига хилоф тарзда кўпроқ гапириб қўйганини пайқади шекилли, бирдан тўхтаб қолди.* С. Кароматов, Олтин қум. *Мусавирлар китобнинг мазмунига ҳамоҳанг тарзда расмлар чизишган.. «Фан ва турмуш».* Шу тарзда ишлар жуда секин силжиди. П. Қодиров, Уч илди.

4 (3-ш.эгаллик. ва ў.-п. к. билан — тарзида) кўм. өзф. Ўхшатиш, қиёс муносабатини билдиради; сифатида, каби. *..ўлпон тўлашдан бош торганлари учун, ўн олти минг қўйлари.. жарима тарзида тортиб олиб келинди.* П. Қодиров, Юлдузли тунлар.

5 шв. Юз, чеҳра; қиёфа, ақвол. *Тарзинг бордир ою кундан зиёда.* «Ойсулув». *Тарзига қарасанг, бир лочин — шунқор.* «Баҳром ва Гуландом».

Бир тарзи (ёки тарзда) айн. бир ҳолатда қ. ҳолат. *Универмагнинг сотувчиси Барот Зоҳидов ишдан бир тарзи бўлиб келган куни онаси кўп назр-ниёз билан.. Барно домланикига югуриб қолади.* «Муштум».

ТАРИЛЛАМОҚ «Тар» этган овоз чиқармоқ (тартарак, пулемёт ва ш.к. нинг овози ҳақида). *Мотоцикл тариллаб, биздан узоқлашди.* ■ *Сал ўтмай самолётнинг моторлари тариллаб, парраклари айлана бошлади.* Н. Фозилов, Дийдор. *Олдинги линияда аҳён-аҳёнда автомат ва пулемётнинг тариллагани эшитилар эди.* А. Убайдуллаев, Қонли издан.

ТАРИФ [фр. tarif — аниқлаш; қатъий баҳолар (тўловлар) тизими < ا. تعريف — аниқлаш, белгилаш; бож тўловлари ҳақида билдириш] Турли ишлаб чиқариш ва ношлаб чиқариш хизматлари учун (мас., йўловчи ва юк, экспорт ва импорт товарлари ташиш ва ш.к.) тўлов ставкалари (ҳақлари) тизими. *Имтиёзли тариф. Почта тарифи. Тариф жадвали. Тариф бўйича ҳақ тўламоқ.*

ТАРИХ [а. تاريخ — ўтмиш; давр, вақт, эра; сана; тарих] **1** Ижтимоий тараққиёт жараёнида юзага келган воқелик, ҳаёт. Та-

рих диалектикаси. *Тарих қонунлари.* ■ *Башарият тарихи зулм, ҳақсизлик, талончилик даврини поймол этиб, эрк ва адолатнинг нурли асрига ғолибона юраётмир.* Ойбек, Нур қидириб.

2 Ўтмишга оид факт ва ҳодисалар мажмуи; ўтмиш, кечмиш. *Тарихингдир минг асрлар ичра пинҳон, ўзбегим..* Э. Воҳидов, Муҳаббат. *Фақат уч туп қайрағочгина кўҳна тарих нишониси бўлиб турибди.* И. Раҳим, Ихлос. *Тарихдан шу нарса маълумки, инсониятга қилинган ёвузлик ва жиноят ҳеч қачон жазосиз қолмаган.* Газетадан.

3 Бирор нарса, воқеа-ҳодиса ёки шахснинг ўтмиш ҳаёти. *Қишлоқнинг тарихи. Савдо муносабатлари тарихи. Корхона тарихи.* ■ *Ота-боболаридан эшитган шаҳар тарихи, чеккан жабру жафолари кўз олдидан ўтарди.* Мирмуҳсин, Меъмор. *Сизга Мадамнинг тўғрисида маълумот керакми? Мадминнинг тарихини Юсвали тоғам яхшироқ билади.* П. Турсун, Ўқитувчи. *Нимасини айтасиз, бу одамнинг тарихи ҳам олам-жаҳон.* С. Кароматов, Олтин қум.

4 Жамият ва давлатлар ўтмиши тараққиётини ўрганувчи фан. *Янги тарих. Урта асрлар тарихи. Ўзбекистон тарихи. Жаҳон тарихи.*

5 Табиат ва жамиятнинг, ундаги маълум соҳаларнинг ривожланиши, ўзгариши билан боғлиқ томонларни ўрганувчи фан. *Муסיқа тарихидан дарс бермоқ. Тилишунослик тарихи.*

6 Бирор нарса, воқеа-ҳодисанинг юз бериши билан боғлиқ маълумотлар мажмуи. *Мен аччиқ оилавий фожиянинг тарихини билиб олдим.* «Ёшлик». *Эр-хотин айта берса, бу жанжалнинг тарихи бирон ёзувчининг қўлига тушса, каттақон бир китоб бўлади-ган.* А. Қаҳқор, Асарлар.

7 Бирор ишнинг бажарилганлигини, бирор воқеа-ҳодиса қачон бўлиб ўтганлигини, машҳур кишиларнинг таваллуди ва вафотини кўрсатувчи аниқ календарь вақт, сана (мумтоз адабиётдаги санъат тури сифатида «таърих» деб ҳам юритилади). *Қўл-ёзманинг тарихини аниқламоқ.* ■ *Ўнг томондаги тошга араб алифбесининг қадимги имлосида йирик қилиб «Маърифатхон жаннат макон», деб ёзилган ва ҳижрий билан «1335», деб тарих қўйилган эди.* А. Қаҳқор, Хотинлар.

Касаллик тарихи Касалнинг аҳволи ва унинг даволаниши ҳақида даволоччи врач томонидан тегишли маълумотлар ёзиб бориладиган варақа. *Профессор касаллик тарихига нима деб диагноз ёзишни билолмай.. шартли равишда «Негатив» деб атади.* «Ёшлик».

ТАРИХАН [ф. تارىخ — тарих нуқтаи назаридан, тарихга асосланиб] Тарих нуқтаи назаридан. *Воқеаларни тарихан тўғри таҳлил этмоқ. Тарихан жуда қисқа муддатда катта муваффақиятларга эришилди.*

ТАРИХИЙ 1 Тарихда қоладиган, тарихга кирадиган; муҳим. *Тарихий воқеа. Тарихий кун. ■ Бу тарихий дақиқани [Берлин устидан ғалабани] зафарли юриши билан келаётган жангчиларимиз сабрсизлик билан кутаётган эдилар. Т. Рустамов, Мангу жасорат.*

2 Бирор воқеа-ҳодисанинг бутун тарихига оид, бутун тарихий жараёни билан боғлиқ. *Ўзбек тили ўз тарихий тараққиёти давомида турли ўзгаришларга учраган.*

3 Тарих фанига оид, бирор соҳанинг тарихини ўрганадиган. *Тарихий грамматика. Тарихий география. Тарихий очерк.*

4 Ғтмишга, тарихга оид, қадимги, кўҳна. *Тарихий асар. Тарихий ёдгорлик. ■ -Албатта, Афлотун ҳам, Арасту ҳам замонасининг кўп доно, кўп ақлли олимлари бўлгани шубҳасиз. Уларнинг ишлари тарихий китоблардан маълум, — деди Элмурод. П. Турсун, Ҳўқитувчи. «Салор» ҳозирги пайтда тарихий ариқни эмас, балки чиқиндилар уюлиб ётган узун хандақни эслатади. Газетадан. Демак, бундай ҳолларда махсус сўзлик ва тарихий луғатларга мурожаат қилишга тўғри келади. Э. Бегмагов, Киши исмлари имлоси.*

ТАРИХИЙЛИК 1 Тарихга оидлик. *Ёдгорликнинг тарихийлиги.*

2 Ҳар бир нарса ёки ҳодисани уни юзага келтирган муайян тарихий шароит билан узвий боғланишда текшириш ва баҳолашдан иборат диалектик тамойил. *Тарихийликка аҳамият бермоқ.*

ТАРИХЛИ кам. қўл. Тарихи, санаси қайд этилган. *Тарихли қўлёзма.*

ТАРИХНАВИС [тарих + ф. نویس — ёзувчи] эск. Тарихни ёзиб борувчи, солномачи. *Қиссагўйлар, тарихнавислар ана шу ерлар [чўллар] фожиаси ҳақида, афсуски, ёдгорликлар ва китоблар қолдириб кет-*

маганлар. Миртемир ва А. Пўлат, Сирдарё сепаи.

ТАРИХЧИ 1 айн. тарихшунос. *Машҳур тарихчи олимлар китобларида ёзганлар.. К. Яшин, Ҳамза.*

2 Тарих, солнома ёзувчи. *..ўша давр тарихчилари Темури забардаст, хийла чиройли одам бўлганини ёзиб қолдирганлар. Ҳ. Ҳошимов, Қалбингга кулоқ сол.*

ТАРИХШУНОС [тарих + ф. شناس — ўрганувчи] Тарих илми билан шуғулланувчи мутахассис, олим.

ТАРИХШУНОСЛИК 1 Тарихшунослиги, касби.

2 Тарих фанининг тарихини ўрганувчи соҳа.

ТАРИҚ 1 Бошоқдошлар оиласига мансуб бир йиллик ғалла ўсимлиги ва унинг оқлаб сўк қилинадиган майда дони. *Тариқ сепмоқ. ■ ..қир пастида тариқ ўраётган бир тўда деҳқонларни кўриши билан табиатидаги бир дамлик равшанлик ўрнини яна диққатбозлик эғаллаб олди. Туйғун, Сўнгги саёҳат.*

ТАРИҚ 2 [а. طريق — йўл, кўча; усул, йўсин, йўл] эск. айн. **тариқа.** -*Не тариқ билан? — қизиқиб сўради Мажедиддин. Ойбек, Навоий. ..ота-онасидан чиройли ахлоқни, одамларга одамларча муомала тариқини ўрганиб келибди. М. Исмоилий, Одамийлик қиссаси.*

ТАРИҚА [а. طريقه — йўл, кўча; усул, йўл; йўсин] Баъзи сўзлар билан эғалик шаклида, шунингдек, *шу, бу, қай* каби олмошлар билан қўлланиб, «йўл», «йўсин» маъноси билдиради. *Ёшликда икковимизнинг кун кўриши тариқамиз, онимиз бир эди. А. Қаҳҳор, Сароб. Унинг [Отабекнинг] сўзига қараганда, сиз уни оғирроқ тариқа билан дарбозангиз ёнидан жўнатган экансиз. А. Қодирий, Ўтган кунлар. Эсон шундай хаёллар билан уйга қай тариқа етиб келганини ҳам сезмади. Ҳ. Аҳмар, Ким ҳақ?*

2 (3-ш. эғалик ва ў.-п. к. шаклида — **тариқасида**) кўм. *взф.* Бош келишиқдаги сўз билан қўлланиб, ўхшатиш, қиёс каби маъно билдиради; йўсинида, тарзида. *Насихат тариқасида. Совға тариқасида. Мисол тариқасида. Ҳазил тариқасида. ■ «Қўлтиқтаёққа дардисар бўлдинг!» деган ҳазил-мутойиба тариқасида айтилган сўз, тўғриси, иззат-нафсимга тегди. Н. Сафаров, Оловли*

излар. *Баъзан у бетимнинг қалини — жонимнинг хузури тариқасида иш қиларди.* Мирмуҳсин, Меъмор.

ТАРИҚАТ [а. تریقت — йўл; усул восита; маслак, суфийлик йўли] эск. кт. Тугилган йўл; маслак; суфийлик йўли. *У Бухорода мадрасада ўқиб юрганда, шариат ва тариқат илмини яхши ўрганган, қуръонни ёд билар эди.* П. Қодиров, Юлдузли тунлар. *Қўқондан келган меҳмонлар Жамолиддин Муҳаммад-карим суфини тариқатнинг пешвоси, аелиёи пир, дея кўп таърифини гапирдилар.* Ойбек, Улуғ йўл. *Сенинг бу қилигинг на фарза, на суннатга, на инсонийлик тариқатига тўғри келгай.* С. Сиёев, Аваз.

Тариқат аҳли Суфийлар.

ТАРИҚДАЙ, -дек 1 Тариққа ўхшаш, тариқ каби. *Бизларди жойлар Тошканмас — одам хирмонга тушган тариқдай йўқолиб кетса.* С. Нуоров, Нарвон. *Бу нима деган гап, қизлар, иш қолиб, тариқдай сочилиб, тупроқдай тўзиб, ялло қилиб юрибсизлар.* Ш. Саъдулла, Икки билагузук.

2 Жуда оз; жиндак, кичкина, тариқча. *Туйдек буй берма, тариқдек ақл бер.* Мирмуҳсин, Меъмор. *Табиб тариқдай афюн келтириб, ўз қўли билан ичирди.* С. Сиёев, Аваз. *Кўнглимда тариқдек ёмонлик бўлса, эртагача етмайин!* А. Қодирий, Ўтган кунлар.

ТАРИҚЧА (одатда инкор билдирувчи феъллар билан) Озгина, жиндай. *Тариқча ақли йўқ.* ■ [Маҳкам:] *Дадамда тариқча гуноҳ йўқ, тақсир.* Н. Сафаров, Уйғониш. *Агар шу сўзларим ичида тариқча қаллоблиги бўлса, билганларингни қилинлар.* Ҳ. Назир, Ўтлар туташганда. *— Тариқча инсоф борми сизда! — бўғилиб гапирди Ўктам.* Ойбек, О. в. шабадалар.

ТАРК I [а. ترك — ташлаш, воз кечиш; инкор қилиш]: **тарк этмоқ** (ёки **қилмоқ**) 1) воз кечмоқ, барҳам бермоқ, ташламоқ. *Чекшини тарк этмоқ.* ■ ..сўзини ҳазилдан бошларди. *Бу дафъа ҳам одатини тарк этади.* Туйғун, Дўстлик севинчлари. *Бошига салла ўрашни асло тарк қилмайди.* А. Қодирий, Обид кетмон; 2) ташлаб (қолдириб) чиқиб кетмоқ. *Қишлоқни тарк этмоқ.* *Хонани тарк этмоқ.* ■ *Атрофда баҳор нафаси кезади, қишда бу ерларни тарк этган қушлар яна учиб келишган, новдаларга қўниб чуғуллашади.* С. Зуннунов, Гулхан.

Тарки дунё қилмоқ Мол-дунёдан, дунёнинг иш-ташвишлари — барча нарсадан воз кечмоқ, узлатга чекинмоқ. *Ҳўш, сиз бу фаний дунё лаззатидан кечган.* *сарвари коинот ишқида тарки дунё қилган пири муришлардан бири экансиз.* К. Яшин, Ҳамза.

ТАРК II [ф. ترك — ёриқ, дарз, тирқиш] Букилган, қайтарилган жой; нарсанинг букланган раҳи; тах. *Дўппининг тарки.* *Қалпоқнинг тарки.* ■ *Ботир ака шошиб қолди шекилли, газетанинг таркини топиб очолмай, унинг бир чеккасини йиртиб ҳам қўйди.* Х. Тўхтабоев, Фельетондан сўнг.

ТАРКАНА эск. Талаш-тортиш, талашуш; тақсимлаб, бўлиб олишга интилиш; яна қ. **тарака**, **таракана.** *Булоқ сувини биз «Қора сув» деймиз.* *Улар ҳам ҳисобли, бригадалар ўртасида доим таркана.* Ҳ. Назир, Олмос. *Унгача тустовуқлар таркана бўб кетмаса бўлгани, устажон!* Ҳ. Назир, Кўктерак шабадаси.

ТАРКАШ [ф. ترکش — ўқдон, тирдон, садок] фольк. Пиёла, коса каби сопол идишларни синишдан сақлаш учун тери (чарм) ёки ёғочдан қубба шаклида ясалган гилоф. *Фирот Авазни кўриб, учадиган қушдай, қулоқлари қамишдай, ҳар кўзи таркашдай, юлдузни кўзлаб.. ўйнай берди.* «Балогардон».

ТАРКИБ [а. ترکیب — бириктириш, бирикма, бириктириб ҳосил қилиш; ҳайъат, ходимлар] 1 Маълум бир бутунликни ташкил этувчи қисмлар, унсурлар мажмуи. *Сўзнинг морфологик таркиби.* *Сувнинг кимёвий таркиби.* ■ *Тупроқ унумдорлиги учун унинг таркибида, аввало, ўсимликка зарур озиқ моддалар, шунингдек, сув, ҳаво ва иссиқлик етарли бўлиши керак.* «Фан ва турмуш». *Ёнғоқнинг таркибида мой, оқсил, углевод, кислота моддалари беҳисоб.* Ж. Абдуллахонов, Орият.

2 Жамоа, ташкилот ва ш.к. ни ташкил этувчи шахслар мажмуи. *Комиссия таркиби.* *Ҳукумат таркиби.* *Суд ҳайъати таркиби.* ■ *Базилар бу кема экипажининг таркибида Дурра Норни кўриб ажабланишди.* О. Мўминов, Хиёбондаги уч учрашув.

Таркиб топмоқ Қисм, унсур кабилардан иборат бўлмоқ, юзага келмоқ. *Кишиларимиз қоронги уйлardan таркиб топган қишлоқларда яшаганлар.* «Ўзбекистон қўриқлари». *Ирмоқлар бирлашиб, дарёлар ҳосил қилгани каби, катта-кичик муваффақиятлар жам*

бўлиб, улкан ютуқлар таркиб топади. Газетадан.

ТАРКИБАН [а. ترکیبان] Таркиб жиҳатидан; таркибига кўра. *Моддаларни таркибан таҳлил қилмоқ.*

ТАРКИБИЙ Таркибни, бутунни ташкил этувчи, таркибга кирувчи. *Навоий ижодиди ишқ масаласи шоир дунёқараши, унинг инсон ва ахлоқ ҳақидаги таълимнинг таркибий қисмидир.* «ЎТА».

ТАРЛОН Ола-тарғил, чавқар; шу тусдаги от. ■ *Тарлон бия Бойчиборнинг энаси Чибарнинг товушин тўқайда билди.* «Алпомиш». [Чорақор] *Тарлонни миниб, учраган, кўринган кишидан Хидирбойни кўрган борми, деб сўраб кетаверди.* «Зулфизар билан Авазхон». *Айил-пуштанини ечди бедовнинг, Сайислар тарлонни яланғочлади.* «Ойсулув». *Бўз от.. аждодида бўлса, тўққизга тўлганда тарлон бўлади.* Т. Мурод, От кишнаган оқшом.

Тарлон очган Ола-тарғил бўлиб бузилган, пес очган (бадан ҳақида). [Мастон] *Манглайдан тарлон очган, икки чаккасининг гўшти қочган.. кампир эди.* «Хушкелди». **Хаёли тарлон бўлди** шв. Хаёли қочди, хаёли паришон бўлди. *Хаёли тарлон бўлиб, ўзини ҳар ўйга солиб кетиб бораётир.* «Равшан».

ТАРМАШМОҚ айн. **тирмашмоқ.** *Тармашиб дарахтга чиқмоқ.* ■ *-Ана, опанг келди, - деди Муҳаммаджон, этагига тармашган болаларнинг бир-бир бошини силаб.* Н. Сафаров, Султон бўзчининг неваралари. *Юқоридан маймундай тармашиб, лип этиб пастга тушганини ҳеч ким пайқамабди ҳам.* А. Мухтор, Туғилиш. *..вишканинг темирига тармашиб, аста-секин юқорига чиқа бошладим.* П. Қодиров, Эрк.

ТАРМЕВА (тўғриси **тар мева**) қ. тар I.

ТАРМОҚ I Асосий йўл, оқим ва ш.к. дан бўлиниб, ажралиб чиққан қисм; шохобча. *Темир йўл тармоқлари.* *Дарё тармоғи.* ■ *Бу пастак тоғ Федченко музлик тоғларининг тармоқларидан бири бўлиб, маҳаллий аҳоли томонидан «Музлоқ тоғ» деб аталарди.* М. Исмоилий, Фарғона т. о. *Даставвал бош соқадан бошлаб катта анҳорлар, сўнгра унинг тармоқлари қазиларди.* Ж. Шарипов, Хоразм.

2 Асосий ташкилот ёки бирлашма шохобчаси. *Алоқа тармоқлари.* *Маориф тармоқлари.* ■ *Ҳалиги хат баҳона савдо тармоқ-*

лари ва саноат корхоналарида бўлдиқ. Газетадан. *Тез тармоқ ёймоқда бўлган маориф: сон-саноқсиз мактаблар, интернатлар, катталар учун кечки курслар, бир оз бўлса ҳам ўқиган одамларга муҳтож эди.* А. Қаҳҳор, Қўшчинор чироқлари.

3 Фан-техника, қишлоқ хўжалиги ва ш.к. га оид соҳа, соҳалар. *Хўжалиқнинг муҳим тармоқлари.* *Фан ва техника тармоқлари.* *Қорақўлчилик республика чорвачилигининг муҳим тармоқларидан биридир.* ■ *Бу ерда ғалла билан чорва асосий тармоқ ҳисобланади.* «Шарқ юлдузи».

Тармоқ ёймоқ Тармоқларга бўлинмоқ, тармоқлари юзага келмоқ. *Шу муддаони адабиётимизда ҳужжатли асарларнинг кенг тармоқ ёйганлиги сабаблари тўғрисидаги гапдан бошласак.* Н. Сафаров, Жасоратнинг давоми.

ТАРМОҚЛАНМОҚ Тармоқ, шохобчаларга бўлинмоқ, тармоқларга эга бўлмоқ. *Тармоқланган канал.* *Кенг тармоқланган соҳа.* ■ *Бехисоб йўллар чўл ичкарисига тармоқланиб кетган.* «Ўзбекистон қўриқлари».

ТАРМОҚЛИ Тармоқлари, шохобчалари бўлган, тармоқланган. *Кўп тармоқли ташкилот.* *Кўп тармоқли хўжалиқ.*

ТАРНОВ [ф. ترناو – сув оқадиган, ўтадиган қувур] Ёмгир, қор сувлари оқиб тушиши учун том четларига ўрнатиладиган, ёғоч ёки тунуқадан қувур ёки ариқча шаклида ясалган мослама. *Тунука тарнов.* Ёғоч тарнов. *Тарнов ясамоқ.* ■ *Мўриларда жон сақлаган мусичалар кукулаб, тарновларга қўниб олишди.* С. Аҳмад, Уфқ. *Жимжит хонада тарновлардан тушаётган сувнинг шитирлаши.. эшитилиб турарди.* П. Қодиров, Уч илдиз.

ТАРНОВЧЎП [ф. ترناوچوب – тарновсимон ёғоч] махс. Тиззага қўйиб, устида чок тикиладиган тарновчасимон косибчилик асбоби.

ТАРОВАТ [а. طراوت – нозиклик, мулоимлик; янгилик, тозалик; ҳўллик, намлик] кт. Янги ва тоза, сўлим ҳолат. *Жонли ранглари тароватини унча йўқотмаган катта гулзор теваразида аста айланар эди Комила.* Ойбек, О. в. шабадалар. *Кўзга ажиб равшанлик бахш этувчи яшил кўкатлар таровати.. кўксигади ранжу аламни қувгандек бўларди.* С. Сиёев, Аваз. *Ҳали ҳам унинг [Зумраднинг] қомати ўшандай нозик,*

аллақандай ёшлик тароватини уфуриб турарди. С. Аҳмад, Зумрад.

ТАРОВАТЛИ Ёқимли тароватга эга. *Кўёш ботиб, салқин тушди. Полизнинг тароватли, ҳандалак, босволди бўйини уфурган файзли оқишми бошланди. Н. Фозилов, Дийдор. Тоннинг тароватли шамоли бир нафасгина гўдаклик йилларини қайтарар эмиш. С. Аҳмад, Қадрон далалар.*

ТАРОВАТСИЗ Таровати йўқ. *Тароватсиз иссиқ шабада тунги гулханларнинг аччиқ тутунини кулранг қоялар, чакалаклар орасига таратаётган эди. А. Мухтор, Давр менинг тақдиримда. Назаримда, ҳамма хотинлар қогоздан ясалган гулдек ҳидсиз, ҳиссиз, тароватсиз кўрина бошлади. Т. Жалолов, Олтин қафас.*

ТАРОВИҲ [а. تراويح — дам олиш, ҳордиқ онлари; рамазон ойидаги кўшимча намоз, ибодат] дин. Рўза кунлари кечки, охириги намоздан кейин ўқиладиган кўшимча намоз. *Афанди.. ифтордан кейин мачитга таровиҳ ўқигани кетди. «Латифалар». Отабек.. туриб таҳорат олади ва меҳмонхонага кириб, таровиҳ бошлади. А. Қодирий, Ўтган кунлар.*

ТАРОЗИ [ф. тرازو — вазн ўлчаш асбоби] Оғирлик ўлчаш асбоби. *Қўл тарози. Паллали тарози. Тарози палласи. Тарозида тортмоқ. ■ Очилвой балиқтутнинг маҳкамроқ шохига қўл тарози осиб, пахталарни пешма-пеш ўлчаб олишга тушди. Н. Аминов, Тилло табассумлар.*

Ақл тарозиси билан тортмоқ (ёки ўлчамоқ) Ақл билан баҳоламоқ. *Кейин дадамнинг аҳволини ўйлаб, ақл тарозиси билан тортиб кўриб, тақдирга рози бўлдим. Ойбек, Танланган асарлар. Тарози босадиган* 1) салмоқли, салмоқдор, вазнли. *Озгин мол гўшти тарози босмас экан. «Муштум»;* 2) кўчма асосли, жиддий. *Тарози босадиган далиллар тўплади. С. Анорбоев, Оқсой. Тарозига солмоқ* 1) тортиш учун тарозига қўймоқ; 2) кўчма фактларни бир-бирига таққослаб, солиштириб, ўйлаб, мулоҳаза қилиб кўрмоқ. *Келинг, сўзларингизни тарозига солайлик, нучми ёки тош босадими, дарров маълум бўлади. Ш. Рашидов, Бўрондан кучли;* 3) кўчма ўзини ёки ўз ишини пеш қилмоқ, ўзига ёки ўз ишига ортиқ баҳо бермоқ. *Қори ўзини тарозига солиб, мен бор, мактаб бор.. деб гердаийб юрар эди. П. Тур-*

сун, Ўқитувчи; 4) кўчма ортиқ мақтамоқ. *-Ҳадеб уни [қизни] тарозига сола берманг, худо урди-кетди, — деди совчи. С. Абдуқаҳҳор, Санамай саккиз дема.*

ТАРОЗИБОН [ф. ترازوبان — тарозига қараб, уни кўриқлаб турувчи] Тарозида тортувчи, тарозида тортиш ишини бажарувчи. *Кекса тарозибон келтирилган пахталарни тортмоқда. Туйғун, Бригадир. Тарозибон гангиб қолиб, посанги тошни шимининг чўнтагига солди. М. Муҳамедов, Қаҳрамон изидан.*

ТАРОЗУ қ. тарози. *Ҳар жойни қилма орзу, Ҳар жойда бор тошу тарозу. Мақол.*

ТАРОНА [ф. ترانه — ашула ва унинг оҳанги] 1 Куй, оҳанг. *Ҳар бир уйда шодиёна тарона, Тўкин-сочин ўртада кенг дастурхон. Ҳабибий. Ашула оҳангидаги ранг-баранг тароналар Фуломжон ҳаяжонига пайванд бўлиб оқар.. эди. М. Исмоилий, Фарғона т. о. Бугун қурувчиларнинг руҳларида фавқулдда шодлик, юракларида дунё-дунё севинч тароналари. Н. Сафаров, Саодатнинг қиссаси.*

Тарона қилмоқ (ёки этмоқ) 1) куйламоқ. *Анорғулнинг қўлидаги дутор «Ўртоқлар» куйини танларга ларза бериб тарона қилди. А. Қодирий, Ўтган кунлар;* 2) кўчма мадҳ этмоқ. *Куйла, созим, юрагим, шеърим, Бахт китобин қилгил тарона. Ғайратий.*

2 Шашмақомда мусиқа асарининг бир қисми. *Таронаи дуғоҳ.*

ТАРОҚ 1 Соч, соқол тараш учун ишла-тиладиган, ёғоч, металл, суяк ва ш.к. дан ясалган тишли буюм. *Шамшод тароқ. Темир тароқ. Майда тишли тароқ. ■ Талъат шимининг чўнтагидан тароқ олиб, сочини текисларкан, тагин жилмайди. Ў. Ҳошимов, Қалбингга қулоқ сол.*

2 Матога босиладиган шу нусхадаги нақш, тарам-тарам гул. *Жоноқи олмаларнинг икки бетидаги нақш Марғилон атласининг майда тароқларини эслатади. С. Акбарий, Шодлик давоми.*

3 тех. Дастгоҳ, мослама ва ш.к. нинг нарсаларни тараш ёки титиш учун хизмат қиладиган қисми. *Йигирув дастгоҳининг тароғи. ■ Бу ернинг бола-чақаси тили чиқиб, аввал билган сўзи — арқоқ билан тароғу найча билан моки. А. Мухтор, Опа-сингиллар.*

ТАРОҚЛАМОҚ кам қўлл. айн. тарамоқ. *Ел сочимни тароқлаб ўтса, уйғонаман ширин уйқудан. Р. Бобажон.*

ТАРОҚСИЗ 1 Тароғи йўқ.

2 Таралмаган, тараб текисланмаган. *..тароқсиз сочларига оқ оралаган, ҳорғин, сўлгин эди.* А. Мухтор, Чинор.

ТАРОҚЧИ Тароқ ясовчи уста. *Бешикчилар, тароқчилар, дукчилар Майрамхонни ўз қўллари билан овқатлантиришни «бахт» деб билар эдилар.* Ф. Фулом, Шум бола.

ТАРОҚЧИЛИК 1 Тароқ ясаш иши, касби. *Тароқчилик қилмоқ.*

2 Бозорда тароқ ясаб сотувчи дўконлар қатори, растаси.

ТАРР тақл. с. Газмол йиртилганда, тар-тарак тариллаганда чиқадиған ва шунга ўхшаш овозни билдиради. *Яктак тарр этиб йиртилди.* ■ *Рўпарадаги уйнинг тоmidан «тарр» этган товуш эшитилди. Қизил аскар зинага йиқилди.* А. Қаҳҳор, Олтин юлдуз.

ТАРРА 1 шв. Таррак.

2 Қовун, узум каби ширали меваларни кўп истеъмол қилгандан кейинги ланжлик, лоҳаслик ҳолати. *-Нафс қурсин.. Сиз ақллилик қилган экансиз, мулла Муҳсин, — дейди қурсоғини ишқалаб, — чоғи, қовуннинг тарраси ушлади мени.* А. Қодирий, Обид кетмон.

Тарраси тутади Кишини ланж, лоҳас қилади. *Хатиб домлани қовуннинг тарраси тутта бошлайди.* А. Қодирий, Обид кетмон. *Кабоб билан иш битадимми, шўрвасини ичмасанг, тарраси тутуши бор.* И. Раҳим, Ҳаёт булоқлари.

ТАРРАК Палак отиб ўсадиган полиз экини ва унинг бодрингдан кўра йирикроқ куврак ҳосили. *Бозорга бодринг, таррак ва эртаги ҳандалаклар ҳам чиққан эди.* К. Яшин, Ҳамза.

Таррак бурун(ли) Бурни катта ва хунук. *Ичкаридан аврасиз нўстин кийган, таррак бурунли, қип-қизил одам чиқди.* А. Мухтор, Туғилиш. **Тарракдек қотмоқ** 1) нима қиларини билмай, ғўдайганча қолмоқ. *Ориф мени кўрди-ю.. бола бечора тарракдек қотди.* Х. Тўхтабоев, Сарик девни миниб; 2) қаттиқ уйқуга кетмоқ. *Болалар бирпас кувлашмачоқ ўйнаб, кейин дуч келган жойда тарракдек қотиб қолишади.* Э. Аъзамов, Олам ям-яшил.

ТАРС тақл. с. Таранг ёки қаттиқ нарса ёрилганда, синганда ёки урилганда чиқадиған овозни билдиради. *Қовун тарс ёрилди. У эшикни тарс этиб ёпди.* ■ *Ҳасан аканинг чаккасига ҳам бир нима «тарс» этиб*

тегди. А. Муҳиддин, Инсон қалби оташ. -Эҳ, — *Акрам тиззасига «тарс» эткизиб урди-да, креслодан сапчиб турди.* С. Анорбоев, Оқсой.

ТАРСАЙМОҚ шв. Бақрайиб, безрайиб қараб турмоқ.

ТАРСАКИ Очиқ кафт билан юзга берилган зарб, шапалоқ. *Тарсаки (билан) урмоқ. Тарсаки емоқ. Тарсаки солмоқ.* ■ *Бек Лағлининг у юзи-бу юзига тарсаки қўйиб юборди.* Ҳ. Фулом, Машғал.

ТАРСАКИЛАМОҚ Тарсаки урмоқ. *Зулайхо Гавҳарга бемор одамага қарагандай ачиниб қарайди, бундан кўра тарсакилаб юборгани яхши эмасми? Ў. Ҳошимов, Қалбингга кулоқ сол.*

ТАРСИЛЛАМОҚ «Тарс» этган овоз чиқармоқ. *Эшик тарсиллаб очилди. Қовун тарсиллаб ёрилди.*

ТАРСО [ф. ترسا — қўрққан, қўрқувчи; христиан, насроний] дин. *Ғайридин, кофир. Бутхоналар ичра тарсо кўрмади сен каби санамни. Амирий. Ҳо-ой, мусулмонлар! Тарсо Авазнинг дўконига йўламанглар! Ул шайтони лаин бирла тил бириктирган.. С. Сиёев, Аваз.*

ТАРС-ТУРС тақл. с. «Тарс» ва шунга яқин товушлар. *Башорат «эсиз одамгарчилик» дезандек, уна [эрига] бир ўқрайиб қаради-ю, тарс-турс юриб, ҳовлидан чиқиб кетди.* С. Аҳмад, Муллажон. *Тарвузи қўлтиғидан тушган тунқотар.. тарс-турс кўчага чиқди.* А. Қодирий, Меҳробдан чаён.

ТАРТАРАК Қаттиқ тариллаб овоз чиқарадиган парракли ёғоч асбоб (асосан боғни кўриқлашда ишлатилади). *Тартарак чалиб, боғ кўримоқ.* ■ *Чол тартарагини қўлтиғига қисиб, сўйилига суянганича, индамай туриб қолди.* П. Турсун, Ўқитувчи. *Узоқ-яқиндан палахмон, тартарак овози, ўғил болаларнинг бақирғи.. эшитиларди..* С. Юнусов, Кутилмаган хафина.

ТАРТИБ [а. ترتيب — тайёрлаш, ташкил этиш; интизом; мойиллик, рағбат; режа] 1 *Иш-ҳаракат, тадбир-чора ва ш.к. нинг амалга ошувида риоя қилинадиган маълум изчиллик, режа, қонун-қоида ва шу қонун-қоидаларга жавоб берадиган ҳолат. Пенсия белгилаш тартиби. Овоз бериш тартиби. Янгича тўй тартиби.* ■ [Заргаров:] *Мажлисда тартиб бўлиши керак!..* [Пўлатжон домла:] *Бугунги мажлиснинг тартиби шунақа.* А. Қаҳҳор, Оғриқ тишлар. *Ойимхон стол-*

ни тақиллатиб, Тожибойни тартибга чақирди. П. Турсун, Ўқитувчи.

Кун тартиби 1) мажлисда муҳокамага қўйиладиган масалалар. *Мажлисни Иброҳимов очди ва кун тартибини эълон қилди.* А. Қаҳҳор, Қўшчинор чироқлари; 2) кўчма навбатда турган вазифа. *Мен бу билан дамба масаласини кун тартибидан чиқариб ташлаш керак, демоқчи эмасман.* А. Қаҳҳор, Қўшчинор чироқлари.

2 Нарсаларнинг жойлашуви ва ш.к. жиҳатдан мутаносиблик бўлиши, меъерий ҳолат. *Ҳовлиларга тартиб билан мева дарахтлари экилган.* С. Сиёев, Ёруғлик. *Яқиндагина келтирилган вагончаларда тартиб ўрнатилди.* Ш. Рашидов, Бўрондан кучли. *Уйдаги тартиб ва озодалик унинг баҳрини очиб юборган эди.* С. Зуннунова, Янги директор.

Тартибга солмоқ Тартибли ҳолга келтирмоқ. *..сочларини тартибга солди-ю, ўрнidan туриб, шоҳи атлас кўрпа-кўрпачалар тўла тахмонга борди.* К. Яшин, Ҳамза. *Стolni тартибга солаётган Наргизага кўмаклашди.* Ў. Ҳошимов, Қалбингга қулоқ сол.

3 Шахс ёки нарсаларнинг ўринлашиш тизимида қўлланган йўл; сира. *Почтахона орқага қияроқ ўрнатилган газета витрина-*

сидан иборат бўлиб, унга алифбо тартибида яшиқлар ўрнатилган. А. Қаҳҳор, Қўшчинор чироқлари.

4 Йўл-йўриқ, усул, йўсин. *..хон қўшинларнинг шаҳарга кириш ва жойлашиш тартибини олдиндан ўйлаб қўйган эди.* П. Қодиров, Юлдузли тунлар.

Тартиб бермоқ (ёки қилмоқ) Тузмоқ. [Машҳадий] *Тунларни уйқусиз кечириб, «Девон» ҳам тартиб қилган.* Ойбек, Навоий. **Тартиб сон тли.** Соннинг қатор, сира билдирувчи шакли, мас. *бешинчи (синф), саккизинчи (хона).*

ТАРТИББУЗАР Қонун-қоида, тартиб-интизом талабларини бузувчи, унга зид иш тугувчи. *Тартиббузарларга қарши курашда жамоатчилик кўмагидан фойдаланиш керак.*

ТАРТИБЛАМОҚ кам қўлл. **1** Тартибга, системага солмоқ.

2 Тартиб қилмоқ, тузмоқ.

ТАРТИБЛИ 1 Маълум тартиб, қонун-қоида талабларига жавоб берадиган; тартиб асосида, изчил. *Тартибли иш. Тартибли уй. Тартибли корхона.* ■ *Марҳаматнинг кўзига унинг уст-боши ҳар вақтдагидан тартибли, озода кўринди.* Ҳ. Назир, Ёнар дарё.

2 Тартиб-интизомга риоя қиладиган, интизомли. *Тартибли ўқувчи.*